


Tnúhu ní cáháⁿ yă
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022
 872f7754-0986-5ecd-a059-925a708a6939

Contents

SAN MATEO	1
SAN MARCOS	73
SAN LUCAS	118
SAN JUAN	187
LOS HECHOS	234
ROMANOS	297
1 CORINTIOS	326
2 CORINTIOS	356
GÁLATAS	375
EFESIOS	385
FILIPENSES	395
COLOSENSES	402
1 TESALONICENSES	409
2 TESALONICENSES	415
1 TIMOTEO	419
2 TIMOTEO	427
TITO	433
FILEMÓN	437
HEBREOS	439
SANTIAGO	462
1 PEDRO	468
2 PEDRO	476
1 JUAN	481
2 JUAN	488
3 JUAN	489
JUDAS	490
APOCALIPSIS	493

TNÚHU NÍ CHÍDÓ TNÚNÍ TÈ MÀTEÚ

Nchaa cue téé ní xíndecu ndéé sanaha cùtnàhá vátá quíxí-gă Xítóhó Jesucrìstú

(Lc. 3:23-38)

¹ Te ñaní tnàhá Xítóhó Jesucrìstú ní cuu ndí Dàvíí ndíhí ndí Àbrahám, cue téé ní xíndecu ndéé sanaha vîhi-gă ñuyú-a. Te duha ndù cuendá dava-gá cue téé ní cuu ñaní tnàhá-gă ní xíndecu ndéé sanaha.

² Ndí Àbrahám ní xóo ñí déhe ndí, te ndí-án ní xínani ndí Isàác. Te déhe ndí Isàác-án ní cuu ndí Jàcób, te déhe ndí Jàcób-án ní cuu ndí Jùdá, te ñu-ni ndí Jàcób-án ní cuu tâtá dava-gá cue ñaní ndí Jùdá-án. ³ Te déhe ndí Jùdá-án ndíhí ñadìhí ndí, ndí Tamár ní cuu ndí Fàrés ndíhí ndí Zàrà. Te déhe ndí Fàrés-án ní cuu ndí Èsróm, te déhe ndí Èsróm-án ní cuu ndí Àrám. ⁴ Te déhe ndí Àrám-án ní cuu ndí Aminàdáb, te déhe ndí Aminàdáb-án ní cuu ndí Nàsón, te déhe ndí Nàsón-án ní cuu ndí Sàlmón. ⁵ Te ñadìhí ndí Sàlmón-án ní xínani-a Ràháb, te ní xóo ñí déhe-yu ní xínani-dě Bòóz. Te ñadìhí ndí Bòóz-án ní xínani-a Rût, te ní xóo ñí déhe-yu ní xínani-dě Òbéd, te déhe ndí Òbéd-án ní cuu ndí Isàí. ⁶ Te déhe ndí Isàí-án ní cuu ndí Dàvíí téé ní xíndaha ñàha xii cue ñáyiú isràél. Te déhe ndí Dàvíí-án ndíhí ñadìhí ndí ní cuu ndí Salòmón. Te díhna-gá ndí Ùriás ní cándeca ndí ñadìhí-án te dàtnùní ní naquehe ñàha ndí Dàvíí-án.

⁷ Te déhe ndí Salòmón ní cuu ndí Ròboám, te déhe ndí Ròboám-án ní cuu ndí Àbíás, te déhe ndí Àbíás-án ní cuu ndí Àsá. ⁸ Te déhe ndí Àsá-án ní cuu ndí Josáfát, te déhe ndí Josáfát-án ní cuu ndí Jòrá, te déhe ndí Jòrá-án ní cuu ndí Ùziás. ⁹ Te déhe ndí Ùziás-án ní cuu ndí Jòtám, te déhe ndí Jòtám-án ní cuu ndí Àcáz, te déhe ndí Àcáz-án ní cuu ndí Ezèquiás. ¹⁰ Te déhe ndí Ezèquiás-án

ní cuu ndí Manàsés, te déhe ndí Manàsés-án ní cuu ndí Àmón, te déhe ndí Àmón-án ní cuu ndí Jòsiás. ¹¹ Te déhe ndí Jòsiás-án ní cuu ndí Jecóniás. Te ñu-ni ndí Jòsiás-án ní cuu tâtá nchaa dava-gá cue ñaní ndí Jecóniás-án. Te dàvá-án ní quide yica cue téé ñuú Babiloniá ndécá-güedé ñáyiú isràél cuáhá ñuú-güedé cuendá yàcá cundecú-yu.

¹² Te sàtá ní yáha duca ní cuu, te ndí Jecóniás ní xóo ñí déhe ndí ndíhí ñadìhí ndí, te téé-án ní xínani-dě Salàtiél. Te déhe ndí Salàtiél-án ní cuu ndí Zorobàbél. ¹³ Te déhe ndí Zorobàbél-án ní cuu ndí Àbíú, te déhe ndí Àbíú-án ní cuu ndí Eliàquím, te déhe ndí Eliàquím-án ní cuu ndí Àzór. ¹⁴ Te déhe ndí Àzór-án ní cuu ndí Sàdóc, te déhe ndí Sàdóc-án ní cuu ndí Àquím, te déhe ndí Àquím-án ní cuu ndí Èliú. ¹⁵ Te déhe ndí Èliú-án ní cuu ndí Eleàzár, te déhe ndí Eleàzár-án ní cuu ndí Mátán, te déhe ndí Mátán-án ní cuu ndí Jàcób. ¹⁶ Te déhe ndí Jàcób-án ní cuu ndí Chéé téé ní cuu yí tá Màriá xíchí ní cuu ñaná Jèsús Yaá ní tendaha Dütú Ndiòxí ní quixi ñuyú-a.

¹⁷ Te sa ní cuu úxúú tnàhá cue téé cù ñaní tnàhá ndí Àbrahám ndécú dàvá-án, te dàtnùní ní cacu ndí Dàvíí ñu-ni ñaní tnàhá ndí. Te núú tnàhá méé ndí Àbrahám ndíhí ndí Dàvíí ní cuu úxícúmí tnàhá-güedé. Te duca ní cuu ní xínu úxícúmí-gă tucu-güedé ní cacu, te dàtnùní ní tñi ñàha cue téé ñuú Babiloniá xii ñáyiú isràél ndécá ñàha-güedé xii-yu cuáhá ñuú-güedé cuendá yàcá cundecú-yu. Te sàtá ní yáha sá dúcá ní cuu, te ní cacu úxúní tucu cue téé ní cuu ñaní tnàhá ndí Àbrahám ndíhí ndí Dàvíí, te dàtnùní ní cacu Xítóhó Jesucrìstú ñuyú-a. Te núú tnàhá méé-gă ní cuu úxícúmí tnàhá-güedé.

Ní cacu Jèsús

(Lc. 2:1-7)

¹⁸ Te duha ní cuu cùtnàhá ní cacu Xítóhó Jesucrìstú, chí dàvá-án ní xíndecu ñí xíchí cuéchí ní xínani Màriá. Te xíchí-án sa ní cundáá tnúhu sá

tnãndaha-xi ndihi ìⁿ téé nàni Cheé. Te cùmání-gã tnãndaha-xi ndihi téé-áⁿ te Espíritú Yã Ndiõxí ní quide ní ngúhuⁿ déhe-xi. ¹⁹ Te té Chèé té cuíni candeca ñaha xì xíchí-ãⁿ ñí cutnùní iní-dé sá ñúhú dèhe-xi. Te cùu-dé ìⁿ téé quide ndáá, núu xiãⁿ duuⁿ duuⁿ ní sani iní-dé sá vã tnãndaha-gá-dé ndihi-xi, te dicó-ni sá ñà túú ní cãháⁿ-dé chi ní cuíni-dé sá vã càháⁿ cuèhé càháⁿ duha ñáyiu cuendá-xi. ²⁰ Te sátá dúcáⁿ ñí sani iní-dé te ní ngáva-dé ní xídí-dé, te núú sàní-dé ní sáháⁿ ìⁿ espíritú xínú cuèchi núú Yã Ndiõxí ní xáhaⁿ-xi xì-dé:

—Yòhó té Chèé té cùu ñaní tnáhá ndíi Dàvíí, yúhú càchí tnúhu-í xii-n sã ñà túú nã cani iní-n, tnãndaha nahi-ni-n ndihi tá Màriá cuèi ñúhu déhe-xi, chi mee Espíritú Yã Ndiõxí ní quide-xi ducaⁿ ñí ngúhuⁿ déhe-xi.

²¹ Te na càcu déhe-xi-áⁿ te danàni-n-dé Jèsús. Te ducaⁿ cùnani-dé, chi téé-áⁿ cada-dé cuendá sá vã cùndècu-gá cue ñaní tnáhá-dě ñáyiu isràél ichi cuèhé ichi duha —duha ní xáhaⁿ espíritú-áⁿ xii té Chèé-áⁿ núú sàní-dé.

²² Te ducaⁿ ñí cuu chi ní quee ndáá-xi nàcuáa ní xáhaⁿ Yã Ndiõxí xii ìⁿ téé ní càháⁿ tnúhu-gá ndéé sanaha. Te téé-áⁿ ñí chídó tnùní-dé núú tütú-gá nàcuáa ní xáhaⁿ-gã xii-dé, te duha ní xáhaⁿ-gã:

²³ Cundecu ìⁿ xíchí cuéchí ndèé cuèé-gá.

Te òré ndécú ìí-xi vátá ñihí-gá yíi-xi te ngúhuⁿ déhe-xi.

Te òré ná cáci dèhe-xi te danàni ñahá-yu Emànuél.

Duha ní xáhaⁿ-gã xii téé-áⁿ ñí chídó tnùní-dé núú tütú-gá. Te tnúhu Emànuél-áⁿ quée-xí: Yá Ndiõxí ndécú ndihi-o. Núu xiãⁿ ducaⁿ ñí cuu vitna.

²⁴ Te òré ní ndiquíú iní té Chèé-áⁿ te ní quide-dé nàcuáa ní xáhaⁿ espíritú-áⁿ xii-dé chi ní tnãndaha-dé ndihi tá Màriá. ²⁵ Dico ndí dííⁿ ñí xíndécú-yu ndéé ní sáá nduu ñí cacu déhe-xi. Te òré ní cacu déhe-xi-áⁿ te ní dánání ñaha-dé Jèsús.

2

Cue téé cuángoto ñaha xìi Jesús

¹ Te Jèsús ní cacu-gá ìⁿ ñuú nání Bèlén, te ñuú-áⁿ yíndèhu-xi distritú Jùdeá. Te dàvá-áⁿ cùnùu té Hèrodés yíndàha-dé ñáyiu. Te ñuú Jerusalén ní quexio cue téé véxi ndàa xio nacuáa quène nchícanhii, cue téé túha dàcuaha cuendá nchaa sá ndéé andíu. ² Te ndùcu tnúhu-güedé núú ñáyiu ñuú-áⁿ, te xáhaⁿ-güedé:

—¿Vá cùndèe iní-ndó càchí tnúhu-ndo ndéé ndécú tée quíndaha ñaha xii ñáyiu isràél-ãⁿ? Chi ní xiní-ndí ní quene chódíní-dě ndàa xio nacuáa quène nchícanhii, núu xiãⁿ véxi-ndí chi cuíni-ndí quíni-ndí-dé te chiñuhu-ndí-dé —càchí-güedé xáhaⁿ-güedé xii-yu.

³ Te òré ní níhí tée cùnùu nani Herodés tnúhu sá ndúcú tnúhu cue téé-áⁿ ndéé ndécú tée quíndaha ñaha xii ñáyiu isràél, te ñá túú tnàhí ni cùu váha iní-dé, te diu-ni ducaⁿ ñà túú ní cùu váha iní tnàhá nchaa ñáyiu ñuú-áⁿ. ⁴ Te ní cana-dé cue téé cùu dútú cùnùu, ndihi cue téé dàcuaha ñaha xii ñáyiu nchaa tnúhu ní chídó tnùní ndí Moisés, te ní xicáⁿ tnúhú-dě núú-güedé núu xíní-güedé ndéé cacu Crístú téé tendaha Yã Ndiõxí quixi ñuyíú-a. ⁵ Te ní xáhaⁿ-güedé xii-dé:

—Ìⁿ ñuú yíndèhu distritú Jùdeá cacu-dé, te ñuú-áⁿ nání-xí Bèlén, chi quee ndáá-xi nàcuáa ní xáhaⁿ Yã Ndiõxí xii ìⁿ téé ní xóo càháⁿ tnúhu-gá ndéé sanaha. Te duha ndùu tnúhu ní chídó tnùní-dé núú tütú-gá:

⁶ Ñuú Bèlén cúu-xí ìⁿ ñuú líhli yíndèhu distritú Jùdeá, te ío-gá cùnùu-xi dacúxí dàva-gá ñuú cùnùu yíndèhu distritú-áⁿ,

chi diu ñuú-áⁿ quee ìⁿ téé ío cùnùu.

Te téé cunuu-ãⁿ quíndaha-dě ñáyiu cùu cuendá-í ñáyiu isràél.

Duha ní xáhaⁿ-gã xii téé ní xóo càháⁿ tnúhu-gá, te ducaⁿ ñí chídó tnùní-dé núú tütú-gá —càchí-güedé xáhaⁿ-güedé xii té Hèrodés.

⁷ Te sátá dúcáⁿ te té Hèrodés dayuhu ñí cana-dé cue téé ndùcu tnúhu núu ndéé ní cacu téé quíndaha ñaha xii ñáyiu isràél, te ní xicáⁿ tnúhú-dě núú-güedé ná nduu cùu-xi nduu

díhna nuu nĩ xini-güedé chódíní. ⁸ Te sátá dúcáⁿ te ní xáhaⁿ-dě xii-güedé:

—Chí cuáháⁿ ñuú Bèlén te nducu tnúhu váha-ndo nuu ndéé ní cacu téé ducaⁿ quindaha ñaha xii ñáyi israél. Te òré ná nàníhí-ndó-dě te quixi-ndo cächí tnúhu-ndo cuendá quíhíⁿ-í tnáhá-í chiñuhu-í-dé — cächí-dé xáhaⁿ-dě xii-güedé.

⁹ Te sátá dúcáⁿ nĩ xáhaⁿ tẽ Hèrodés-áⁿ te ní xica-güedé cuáháⁿ-güedé. Te chódíní nĩ xini-güedé ní quene ndàa xio nacuaa quene nchíanchii-áⁿ yòdo nuu-di núu-güedé cuáháⁿ. Te ní ngüíñí chódíní-áⁿ, te núu nĩ ngüíñí-di-áⁿ yíndáá núu ndécú Jèsús.

¹⁰ Te òré ní xini cue téé-áⁿ nĩ ngüíñí chódíní-áⁿ núu yíndáá ndécú-gã, te ní cudíí víhí iní-güedé. ¹¹ Te ducaⁿ te ní quexìo-güedé ndéé núu cáá vèhe ndecu Jèsús. Te òré cuánguihu-güedé xití vehe te ní xini-güedé Jèsús ndécú-gã ndihí náná-gã Màriá. Te ní ngüíñí xití-güedé, te ní ngüíta-güedé ní cachí-güedé sá ìo càhnu cuu Jèsús. Te dàtnùní ní nacaáⁿ-güedé càjá xínehe-güedé, te ní tava-güedé díhúⁿ cuááⁿ, ndihí dúsa sá ìo váha sàháⁿ tnámí nàni insiensú, ndihí yúcu sá nání mirrá ní taxi ndecu-güedé núu Jèsús cuendá cuu-xi ìⁿ táhú sá cúu-xí-gã. ¹² Te Yá Ndiòxí ní cáháⁿ-gã núu sàní-güedé, te xáhaⁿ-gã xii-güedé sá vã náyáha-gã-güedé cáháⁿ ndihí-güedé té Hèrodés. Núu xíáⁿ cue téé-áⁿ cuánuhú-güedé ingá ichi, te ñá túú-gã ní náyáha-güedé núu ndécú tẽ Hèrodés.

Cuáháⁿ-yu ndihí Jèsús nàcióⁿ Ègiptú

¹³ Te sátá nĩ yáha cuánuhú cue téé ní sángoto ñaha xii Jèsús, te ní quexìo ìⁿ espíritú xínú cuèchi núu Yá Ndiòxí núu sàní té Chèé, te xáhaⁿ-xi xii-dé:

—Véxi-í cächí tnúhu-í xii-n sã ndacóo-n, te ndee-n ñuú-a ndihí Jèsús, ndihí náná-gã cunu-ndo quíhíⁿ-ndó nàcióⁿ Ègiptú, chi té Hèrodés tendaha-dě cue téé quixi nanducu ñaha xii Jèsús cuendá cahni ñaha-güedé. Te yacáⁿ cundecu-ndo ndéé cachí

tnúhu-í xii-n ndùu ndixi-ndo —cachí espíritú-áⁿ xáhaⁿ-xi xii té Chèé núu sàní-dé.

¹⁴ Te té Chèé-áⁿ nĩ ndacóo-dé, te niú ní xica-dé ndihí tá Màriá ndécã-yu Jèsús cuáháⁿ nàcióⁿ Ègiptú. ¹⁵ Te nàcióⁿ Ègiptú-áⁿ ndécü-yu ní xihí té Hèrodés. Te ducaⁿ nĩ cuu chi ní quee ndáá-xi nacuaa ní cachí ìⁿ téé ní xóo cáháⁿ tnúhu Yá Ndiòxí ndéé sanaha nĩ guide-dé núu-gã ní cáháⁿ-dé yuhu-gã, te duha ní xáhaⁿ-gã ní cáháⁿ-dé: “Nàcióⁿ Ègiptú ndécú Dèhe-í ní cuu, te ní xáhaⁿ-í xii-dé sá ndéé-dě ñuú-áⁿ vã cündecu-gã-dé”, duha ní xáhaⁿ-gã xii téé ní cáháⁿ tnúhu-gã ní guide-dé núu-gã.

Té Hèrodés ní táuchíúⁿ-dě cahni-güedé cue landú

¹⁶ Te cue téé ní sángoto ñaha xii Jèsús ní dándàhú-güedé té Hèrodés, chi ñá túú ní náyáha-güedé cúñaha-güedé sá nĩ naníhí-güedé Jèsús. Te sátá nĩ cutnùní iní té Hèrodés sá nĩ dándàhú ñáhá-güedé xii-dé te ní cudééⁿ víhí-dě, te ní tendaha-dě cue téé cuáháⁿ ñuú Bèlén, ndihí nchaa dava-gã ñuú cáá yàtni xíáⁿ cuendá cahni-güedé mee-ni cuè landú téé. Te ndéé cue landú íchí ní cacu, ndihí ndéé cue landú sa ní nútnahá úú cuíá-xi nchaa-güexi cahni-güedé ní xáhaⁿ-dě. Te ducaⁿ nĩ guide-dé chi ní guide cuendá-dé nacuaa ndùu tnúhu ní xáhaⁿ cuè téé ní sángoto ñaha xii Jèsús nduu nĩ xini-güedé chódíní, núu xíáⁿ ducaⁿ nĩ táuchíúⁿ-dě ní guide cue téé-áⁿ. ¹⁷ Te ducaⁿ nĩ cuu chi ní quee ndáá-xi nacuaa ní cachí ndíi Jeremiás téé ní xóo cáháⁿ tnúhu Yá Ndiòxí ndéé sanaha, te duha ní cachí ndíi:

¹⁸ Ní tecú ndàhí víhí ñáyi ñuú Ràmá sá ndihú iní-yu,

te ñáyi xíndáhyú-áⁿ cúu-yu ñaní tnáhá tã Ràquél, te ndàhyú-yu cuendá sá nĩ xihí déhe-yu.

Te ñáyi-áⁿ ñà túú ní cuíní-yu dàñá-yu sá ndihú iní-yu cuendá sá nĩ xihí déhe-yu.

Duha ní cachí ndíi Jeremiás.

¹⁹ Te sátá nĩ xihí té Hèrodés te ní sáháⁿ tucu espíritú xínú cuèchi núu Yá

Ndiöxí núú sàní té Chèé òré ndécú-dé nàcióⁿ Ègiptú, te ní xáhaⁿ-xi xii-dé:

²⁰ —Véxi tucu-í cächí tnúhu-í xii-n sã ndácõo-n, te núhú-n ndìhi Jesús ndìhi nãná-gã ñuú cue ñaní tnáhá-n ñáyi isràél cundecu-ndo, chi sa ní xihí cue té cuení cahni ñaha xii Jesús ní cùu —cachí espíritú-áⁿ xãhaⁿ-xi xii té Chèé núú sàní-dé.

²¹ Te té Chèé-áⁿ ñi ndacóo-dé, te ní ndee-dé ndìhi Jèsús ndìhi nãná-gã cuánuhú-yu ñuú cue ñáyi isràél ñáyi cùu ñaní tnáhá-yu. ²² Te té Chèé ní níhí-dé tnúhu sá tẽ Arquelaú ní nucúnutnii-dé núú tãtã-dé té Hèrodés distritú Jùdeá yíndàha-dé ñáyi. Te ní yùhú té Chèé-áⁿ, te ñá túú ní cuení-dé quihíⁿ-dé cundecu-dé distritú-áⁿ. Te Yá Ndiöxí ní cáháⁿ-gã núú sàní-dé, te ní xáhaⁿ-gã xii-dé sá quihíⁿ-dé distritú Galileá, núu xíãⁿ yàcáⁿ cuáháⁿ-yu. ²³ Te òré ní quexió-yu distritú Galileá, te ní sáháⁿ-yu ñi ñuú nání Nazàrét ní xíndecú-yu. Te ducaⁿ ñi cuu chi ní quee ndáá-xi nàcuáa ní cachí cue té ní xóo cáháⁿ tnúhu Yá Ndiöxí ndéé sanaha sá Jèsús cuu-gá té ñuú Nazàrét.

3

Té Juáá té dacuandute ñaha xii ñáyi cuáháⁿ-dé tnúhu Yá Ndiöxí xití yucu (Mr. 1:1-8; Lc. 3:1-9, 15-17; Jn. 1:19-28)

¹ Te ní xica nduu sá dúcáⁿ ñi cuu, te té nani Juaá té dacuandute ñaha xii ñáyi ní quexió-dé yucu distritú Jùdeá càháⁿ-dé tnúhu Yá Ndiöxí núú ñáyi xití yucu-áⁿ. ² Te xáhaⁿ-dẽ xií-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha, chi sa ní cuyatni nduu ndíhu ndaha ñaha Yá Ndiöxí xii-ndo —cächí-dé xáhaⁿ-dẽ xií-yu.

³ Te diu cuendá té Juáá-áⁿ ñi chídó tnùní ndí Chàíá té ní xóo cáháⁿ tnúhu Yá Ndiöxí ndéé sanaha, te duha ndùu tnúhu ní chídó tnùní ndí cuendá-dé: Tècú càháⁿ níhi ñi té yìhi xití yucu, te cächí-dé:

“Chí dáñá nchàa ichi cuehé ichi duha ndècu-ndo, te tñi-ndo ichi váha,

Te ducaⁿ càda-ndo cuendá cundecu túha-ndo chi véxi Yaá ío cùnuu”, duha quesaha tẽe-áⁿ.

Duha ndùu tnúhu ní chídó tnùní ndí Chàíá-áⁿ cuendá té Juáá.

⁴ Te té Juáá-áⁿ ñi xóo cuihnu-dé dóo idi caméyu, te ñi ñi ní cuu pãñú xití-dé, te ní xóo caxi-dé tíca làngóstá ndìhi ndudí ñúñú cuéchi. ⁵ Te ñáyi ñuú Jerusálén, ndìhi ñáyi nchaa ñuú yíndèhu distritú Jùdeá, ndìhi ñáyi nchaa ñuú cáá yàtni yúte Jòrdán ní sáháⁿ-yu ní xíndedóho-yu nàcuáa ní cáháⁿ té Juáá. ⁶ Te ní ngüita-yu ní náhmá-yu nchaa cuéchi-yu núú Yá Ndiöxí. Te òré ducaⁿ ñi náhmá-yu te ní dácúandute ñaha té Juáá xií-yu yúte Jòrdán.

⁷ Te vai cue té cùu fariséu ndìhi cue té cùu saducéu cuáháⁿ-güedé núú ndécú tẽ Juáá cuení-güedé dacuandute ñaha-dé xii-güedé. Te òré ní quexió-güedé núú ndécú-dé, te ní xáhaⁿ-dẽ xii-güedé:

—¡Nchaa nchòhó cúu-ndó dàtná ñi cóo dèéⁿ chi ío cuihna iní-ndó! ¿Te nása ní cuu núu tnáhá nchòhó ndúcú-ndó nàcuáa cada-ndo cãcu nihnu-ndo núu tnúndòho cahnu vihi ta cuyatni ñaha xii-ndo véxi-í? ⁸ Te chí cáda váha vitna cundecu-ndo cuendá ducaⁿ cùtnuní sá ñi dáñá-ndó nchàa ichi cuehé ichi duha ndècu-ndo. ⁹ Te vá cächí-ndó sã ío càhnu cuu-ndo cuendá sá cúu-ndó ñaní tnáhá ndí Abrahám. Chi cuéi ndéé yúu te ndacu Yá Ndiöxí ndada-gá ñáyi te cuú-yu ñaní tnáhá ndí Abrahám. ¹⁰ Te caá chi ndècu túha-xi sá quèndé-xi nchaa yutnu sá dúcáⁿ ñà túú càváha sávidí-xi-áⁿ, chi nchaa yutnu-áⁿ tẽndé-xi te cuánee-xi núú ñùhú càyú-xi. Te duha sãtnáhá-xi ndòho nchaa ñáyi ñà túú quide váha-áⁿ chi nchaa ñáyi ñà túú quide váha cúu-yu dàtná nchaa yutnu sá ñà túú càváha sávidí-xi. ¹¹ Te na cächí tnúhu ndáá-í xii-ndo sã yùhú dacuandute-í mee-ni ñáyi ní dáñá nchàa ichi cuehé ichi duha. Dico nchícúⁿ tucu

ingá té véxi, te té-áⁿ taxi-dé Espíritú Yá Ndiöxí cundecu ndihi-ndo. Te cùu-xi datná ìⁿ ñuhú, chi ndada ndoo ndada nine-xi iní-ndó. Te té-áⁿ ïo-gá cùnùu-dé dàcúúxí yùhú, chi yùhú cùu-í ìⁿ té duuⁿ duuⁿ ñá túú tàú cuita nehe ni chàú-dé dico quide-í chiùⁿ-dé. ¹² Te té-áⁿ sa véxi túha-dé sá cádá dèⁿ ñaha-dé xii-o dàtná quidé ñáyiù ndàda ndoo triú, chi ñáyiù-áⁿ sa nèhe túha-ná-yu yaxíⁿ-yu òré náñani cuendá ndada ndoó-yu. Te òré ndádá ndoó-yu triú-áⁿ te dàquee díⁿ-yu mihi-xi, te tàxúha-yu mee-ñá triú-áⁿ te sàhmí-yu mihi-xi-áⁿ. Te dàtná quidé-yu mihi triú-áⁿ ducaⁿ sàtnahá-xi cada ñaha té-áⁿ xii nchaa ñáyiù ñá túú quide váha, chi daquihíⁿ ñáhá-dé xii-yu núú ñuhú núú càyú, te ñuhú-áⁿ ñá túú tnàhí ndàhvá — càchí-dé xàhaⁿ-dè xii-güedé.

Sàndute Jesús

(Mr. 1:9-11; Lc. 3:21-22)

¹³ Te Jèsús ní quee-gá distrítú Galileá cuáháⁿ-gá yúte Jòrdán núú ndécú tè Juáá cuendá dacuàndute ñaha-dé xii-gá. ¹⁴ Te òré ní quexìo Jèsús núú ndécú tè Juáá, te ñá cuíní-dé dacuàndute ñaha-dé xii-gá ní cùu, te ní xàhaⁿ-dè xii-gá:

—Yùhú tàú-í sá dácuaⁿndute ñaha-n xii-í, te ñá díú dà yùhú dacuàndute ñaha-í xii-n —càchí-dé xàhaⁿ-dè xii-gá.

¹⁵ Te Jèsús ní xàhaⁿ-gá xii-dé:

—Queheⁿ daña, chi dacuítí xini ñuhu-xi ducaⁿ cada-o nacuaá cundáá-ó núú Yá Ndiöxí —càchí-gá xàhaⁿ-gá xii-dé.

Te té Juáá-áⁿ ñí sáháⁿ uuⁿ-dé tnúhu ní xàhaⁿ Jèsús xii-dé. ¹⁶ Te ní dácuaⁿndute-dé Jèsús. Te òré ní nene-gá xití ndute te ní xiní-gá nchi andiù, te ní quee Espíritú Yá Ndiöxí véxi cuuⁿ-xi ngúndecu ndihi ñaha-xi xii-gá, te dàtná cáá ìⁿ lómá cáá Espíritú-áⁿ véxi cuuⁿ-xi. ¹⁷ Te òré-áⁿ ní tecú ní cáháⁿ Yá Ndiöxí ndéé andiù, te xàhaⁿ-gá xii Jèsús:

—Yòhó cúu-n Dèhe-í téé ío cùu iní-í te ío cùdí iní ñáhà-í xii-n —càchí-gá xàhaⁿ-gá xii Jèsús.

4

Sácuíhná quidé yica-xi cada Jesús sá ñà túú tàú-gá cada-gá ní cùu

(Mr. 1:12-13; Lc. 4:1-13)

¹ Te Espíritú Yá Ndiöxí ndécá-xi Jèsús cuáháⁿ ìⁿ xití yucu cuendá yàcáⁿ cundecu tnaa-gá, te yàcáⁿ quexìo sácuíhná coto ndéé ñáhá-xi xii-gá te núu ndisa sá vǎ cádá-gǎ ìⁿ sá ñá túú tàú-gá cada-gá.

² Te Jèsús ñá ní xèxi-gá údico nduu údico niú, te ducaⁿ te dàtnùní ní xícáⁿ iní-gá caxi-gá. ³ Te sátá dúcáⁿ te ní quexìo sácuíhná quidé yica-xi cada Jesús ìⁿ sá ñá túú tàú-gá cada-gá, te xàhaⁿ-xi xii-gá:

—Te núu ndisa sá cúu-n Dèhe Yá Ndiöxí te cúñaha xii yúú-a na ndùu-xi paá —càchí-xi xàhaⁿ-xi xii-gá.

⁴ Te Jèsús ní xàhaⁿ-gǎ xii-xi:

—Núú tütú Yá Ndiöxí càchí-xi: “Ñá díú mèe-ni paá candeca-xi iní ñáyiù ñuyíú, chi tnàhá nchaa tnúhu càháⁿ Yá Ndiöxí candeca-xi iní-yu”, duha càchí-xi núú tütú-gá —càchí-gá xàhaⁿ-gǎ xii-xi.

⁵ Te dàtnùní sácuíhná-ǎⁿ ndécá ñàha-xi xii-gá cuáháⁿ ñuú Jerusàlén, te yàcáⁿ ní xàhaⁿ-xi xii-gá cuásaá-gá díquí véñùhu càhnu sá ïo cùnùu núú ñáyiù isràél, ⁶ te dàtnùní ní xàhaⁿ tucu-xi xii-gá:

—Te núu ndisa cùu-n Dèhe Yá Ndiöxí te cuandèe ndava núú ñuhú cuendá quee ndáá-xi nàcuáa càháⁿ-xi núú tütú-gá núú càchí-xi: “Yá Ndiöxí tendaha-gǎ cue espíritú xínú cuèchi núú-gǎ quixi-xi cuendá coto ñaha-xi xii-n, te núú ndáhá-xi càundodo-n cuendá sá vǎ dánícuèhé yúú sáhá-n”, duha càchí-xi núú tütú-gá —càchí sácuíhná-ǎⁿ xàhaⁿ-xi xii Jèsús.

⁷ Te Jèsús ní xàhaⁿ-gǎ xii-xi:

—Te càchí tucu-xi núú tütú Yá Ndiöxí: “Vǎ cání iní-n còto ndéé-n Dütú Ndiöxí Yáá cúú Ndiöxí-n cuendá-ni sá cuíní-n sǎ dácǎcu nihnu ñaha-gǎ xii-n ìⁿ sá sání iní-n càda-n”, duha càchí-xi núú tütú-gá —càchí-gá xàhaⁿ-gǎ xii-xi.

⁸ Te sácuíhná ndécá tucu-xi Jesús cuáháⁿ ìⁿ núú tìndúú dùcúⁿ, te

uuⁿni ní dánèhé núú ñáhá-xí xì-gá nchaandi túhú nàcióⁿ cáá ñùyíú, ndihi nchaa sá yãha ió ñⁿ ñⁿ nàcióⁿ-áⁿ. ⁹ Te ní xáhaⁿ-xí xì-gá:

—Te núu yòhó ngüíñí xítí-n nù-í chiñuhu ñaha-n xì-í ñá, te taxi cuèndá-í nchaa sá ñí dánèhé ñáhà-í-a cuu cuèndá-n —càchí-xí xãhaⁿ-xí xì-gá.

¹⁰ Te Jèsús ní xáhaⁿ-gã xii-xi:

—Xocuñí yòhó sácúíhná nùú ndécù-í-a, chi vá cúú càda-í nàcuáa càchí-n, chi núú tütú Yã Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ñi-ñi-gá cada-ndo nchaa nacuáa càháⁿ-gá”, duha càchí-xi núú tütú-gá —càchí-gá xãhaⁿ-gã xii-xi.

¹¹ Te dätñuní sácúíhná ñí dáñá-xí Jèsús ní xica-xí cuáháⁿ-xí. Te sátá dúcáⁿ te ní quexìo cue espíritú xínú cuèchi núú Yã Ndiöxí ní xinu cuechi-xi nùú Jèsús.

Distritú Galileá ní chisaha Jèsús chiùⁿ ní táhú Tátá-gã Dütú Ndiöxí cada-gá

(Mr. 1:14-15; Lc. 4:14-15)

¹² Te òré ní níhí Jèsús tnúhu sá ñí ngava té Juáá tée dàcuandute ñaha xii ñáyiu vecaá, te ní xica-gá cuáháⁿ-gá distritú Galileá. ¹³ Te ñí ñà túú ní xñdecu-gá ñuú Nazàrét, chi ní yáha-gá cuáháⁿ-gá ndéé ñuú Capèrnaúm yacáⁿ ní xñdecu-gá, te ñuú-áⁿ cáá yàtni yuhu lagúná, te yatni xiáⁿ cáá ñuhu nani Zabulón, ndihi ñuhu nani Neftalí. ¹⁴ Te ducaⁿ ñí cuu chi ní quee ndáá-xi nàcuáa ní chídó tnùní ndí Chàíá téé ní xóo cáháⁿ tnúhu Yã Ndiöxí ndéé sanaha nùú tütú-gá núú càchí-xi:

¹⁵ Ñuhu nani Zabulón, ndihi ñuhu nani Neftalí, ñuhu-áⁿ yíndèhu-xi distritú Galileá,

te xiáⁿ xñdecu cue ñáyiu ñá túú cùu ñáyiu isràél,

te càa-xi yatni yuhu lagúná te ndàa ìngá xio yúte Jòrdán cúú-xí.

¹⁶ Te cue ñáyiu-áⁿ ndécù-yu ñí núú néé chi ndécù-yu ichi cuèhé ichi duha,

te sáá nduu te cada ìní-ndó sã ñáyiu-áⁿ queé-yu núú ditó chi

vá cùndècu-gá-yu ichi cuèhé ichi duha.

Te ñi-ñi ñáyiu-áⁿ cúu-yu ñáyiu ta xíta nihnu duuⁿ cuáháⁿ,

dico sáá nduu te vá cuíta nihnu-gá-yu.

Duha ní chídó tnùní ndí núú tütú-gá.

¹⁷ Te dàvá-áⁿ ñí ngüíta Jèsús ní dánèhé-gá ñáyiu, te ní xáhaⁿ-gã xií-yu:

—Chí dándixi túu ìní sá ñà túú quide váha-ndo ndècu-ndo te dañá-ndo nchaa ichi cuehé ichi duha, chi sa ní cuyatni nduu ndíhu ndaha ñaha Yã Ndiöxí xii-ndo —càchí-gá xãhaⁿ-gã xií-yu.

Jèsús càháⁿ-gá cúmí tnàhá cue téé tní chácá

(Mr. 1:16-20; Lc. 5:1-11)

¹⁸ Te Jèsús ñúhú-gã ichi cuáháⁿ-gá tá yãha-gá yuhu làgúná Galileá, te ní xiní-gá úú tnàhá cue téé xídáquèe-güedé ñunu-güedé xítí ndute tní-güedé chácá, chi quiti tnàhí-áⁿ cúú chiùⁿ-güedé tní-güedé-di. Te ñí-dé nání-dé Xímú, àdi Pelú chi úú ñi-ñi-dé, te ñaní-dé cúú ìngá téé ndíhí-dé te téé-áⁿ nání-dé Ndríxí. ¹⁹ Te Jèsús ní xáhaⁿ-gã xii-güedé:

—Chí dáñá chiùⁿ quide-ndo-áⁿ te quixi-ndo chitnahá ñáhá-ndó xì-í, te taxi-í ìngá núú chiùⁿ cada-ndo chi quíhíⁿ-ndó dàcáháⁿ-ndó ñáyiu cuèndá tuha ñáhá-yu xii-í —càchí-gá xãhaⁿ-gã xii-güedé.

²⁰ Te òré-ñi-áⁿ ñí dáñá cuè téé-áⁿ ñunu-güedé, te ní tuha-güedé Jèsús.

²¹ Te ní xica tucu Jèsús cuáháⁿ-gá luha-gá, te ní xiní tucu-gá úú-gá tnàhá cue téé tní chácá. Te ñí-téé-áⁿ nání-dé Jàcobó, te ñaní-dé cúú ìngá téé ndíhí-dé te téé-áⁿ nání-dé Juáá, te ndí ndúu-güedé cúú-güedé déhe té Zebèdeú. Te xíxínucóo-güedé ndíhí tátá-güedé xítí bàrcú xñaticu-güedé ñunu-güedé, te Jèsús ní cana ñaha-gã xii-güedé.

²² Te òré-ñi-áⁿ ñí dándóo-güedé bàrcú-güedé, ndíhí tátá-güedé, te ní tuha ñaha-güedé xii-gá.

Jèsús dánèhé-gá cuéhé víhí ñáyi
(Lc. 6:17-19)

23 Te Jèsús tá xica ndodo-gá nihí distritú Galileá cuáháⁿ tá dānehé-gá ñáyi tñúhu váha tñúhu sá sánú ìchi ñaha xií-yu nācuáa ndíhu ndaha ñaha Yá Ndióxi xií-yu. Te ndi tnaháⁿ ñⁿ ñúú sàá-gá te ducaⁿ cuānguihu-gá xití veñúhu dānehé-gá ñáyi tñúhu-áⁿ. Te ndi dííⁿ ndi dííⁿ núú cuéhé tñaháⁿ ñⁿ ñáyi dico nchaá-ní-yu ta quide tátna-gá cuáháⁿ. 24 Te ndéé nchaá ñáyi yìndehu distritú Siriá ní nihí-yu tñúhu nchaá nācuáa quide Jesús. Te ní queé-yu ñúú-yu te ndécá-yu nchaá ñáyi tñaháⁿ ndi dííⁿ núú cuéhé cuáháⁿ núú ndécú Jèsús. Te cuéi ñáyi xiyíhí, ndihí ñáyi ñá túú-gá càndá nihnu, ndihí ñáyi yíhí ñaha espíritú cùndihí yucu ñávāha ndécá-yu cuáháⁿ núú-gá, te nchaá-yu ní quide tátna ñaha-gá xií-yu. 25 Te ío vāi ñáyi ní chinchícúⁿ ñáhá xii Jesús, chi ní chinchícúⁿ ñáhá ñáyi distritú Galileá, ndihí ñáyi nchaá ñúú xindáa Dècápolis, ndihí ñáyi ñúú Jerusálén, ndihí cue ñáyi nchaá ñúú yìndehu distritú Jùdeá, ndihí ñáyi xindecu yatni yúte Jòrdán ndāa xio quene nchícanhii.

5

Jèsús núcōo-gá ñⁿ núú tìndúú dānehé-gá ñáyi

1 Te sātá ñí xiní Jèsús sá cuéhé víhí ñáyi nchícúⁿ ñáhá xii-gá, te ní xica-gá cuásaá-gá ñⁿ núú tìndúú te xíáⁿ ñí ngóo-gá, te cue téé xica cuu ndihí-gá ní nadúcúⁿ ndéé ñáhá-güedé xii-gá. 2 Te ní ngüíta-gá dánèhé ñáhá-gá xii-güedé ndihí cue ñáyi-áⁿ, te xāhaⁿ-gá:

Cuèndá ñáyi ío váha táhú-xi
(Lc. 6:20-23)

3 —Váha táhú nchaá ñáyi cùtnuní iní-xi sá ío-gá cúmāñí-yu cudíu-yu núú Yá Ndióxi, chi ñáyi-áⁿ nduu táhú-yu ndíhu ndaha ñaha-gá xií-yu.

4 Váha táhú nchaá ñáyi ndāhyú sá ndíhu iní-yu, chi Yá Ndióxi

cuāñaha-gá tñúhu ndee iní cundecu ndihí-yu.

5 Váha táhú nchaá ñáyi ndāhú iní-xi, chi ñáyi-áⁿ nduu táhú-yu cundecú-yu ñⁿ xichi núú cuāñaha Yá Ndióxi xií-yu.

6 Váha táhú nchaá ñáyi ío cùní cada nchaá nācuáa càháⁿ Yá Ndióxi, chi ñáyi-áⁿ ío nduu vétú iní-yu.

7 Váha táhú nchaá ñáyi cùndahú iní tñaha ñáyi-xi, chi ñáyi-áⁿ dñu-ni ducaⁿ càda ñaha Yá Ndióxi xií-yu cundāhú iní ñáhá-gá.

8 Váha táhú nchaá ñáyi ní nduu ndoo ní nduu nine iní-xi, chi cue ñáyi-áⁿ nduu táhú-yu cundecú-yu ndihí Yá Ndióxi.

9 Váha táhú nchaá ñáyi càháⁿ dóho tñaha ñáyi-xi nācuáa cundecu ndihí váha tñahá-yu, chi cùtnuní sá ñáyi-áⁿ cuú-yu déhe Yá Ndióxi.

10 Váha táhú nchaá ñáyi ío ndòho ndecu ñuyúú-a sá cuèndá sá quidē-yu nācuáa càháⁿ Yá Ndióxi, chi ñáyi-áⁿ nduu táhú-yu ndíhu ndaha ñaha-gá xií-yu.

11 Te cùu-ndo ñáyi ío váha táhú-xi te núu na cūcuéhé ñáhá ñáyi, àdi cada úhú ñáhā-yu xii-ndo, àdi dācaá díquí ñáhā-yu nāndi cuéchi neñúú xii-ndo sá cuèndá-í. 12 Te òré ducaⁿ na càda ñahá-yu xii-ndo te cudíí víhí-ní iní-ndó cundecu-ndo, chi ío váha càa sá ndécú àndiu nduu táhú-ndó cundecu ndihí-ndo nduu na saá-ndó yacáⁿ cundecu-ndo, chi dñu-ni ducaⁿ ñí xóo cada ñaha cué ñaní tñahā-yu xii cue téé ní xóo càháⁿ tñúhu Yá Ndióxi ní xindecu ndéé sanaha.

Cuèndá ñíí ndihí cuèndá ñuhú
(Mr. 9:50; Lc. 14:34-35)

13 Te nchòhó cada iní-ndó sá cúu-ndó dàtná ñíí cuèndá ñuyúú-a. Te ñíí chi nāndíhí-xi dico núu na nduu víxiⁿ-xi, te ñá túú-gá nāndíhí-xi chi dāngoyo-ná-ó, te yāha ñáyi xēihnú-yu. Te ducaⁿ sātnahá-xi cùu nchohó chi cùu-ndo datná ñíí vāha te núu na càda váha-ndo, te núu vá cáda vāha-ndo te quee tíhú-ndó.

14 Te nchòhó cada iní-ndó sá cúu-ndó dàtná ñⁿ sá dáyèhé ndécú

ñùyíú-a, chi sànu ichi-ndo ñáyíu ichi váha. Te nchòhó xìní-ndó sã nũu ìñú cáá ìñú nũú tìndúú te vá cúú càchí-ó sã nguivãha-xi. ¹⁵ Te ñá túú xìní-ó ìñú ñáyíu teñuhú-yu ìñú lìntèrná te chiváha-yu xití ìñú càjá, chi tàxi ndecú-yu nũú ñĩnu cuèndá cutnùnì nũú nchàa ñáyíu ndècu vehe. ¹⁶ Te ducaⁿ càda nchohó cada váha-ndo dàtná quidé ìñú ñuhú dayèhe-xi nũú ñáyíu, te ducaⁿ quini ñáyíu nàcuáa quide-ndo ndecu-ndo, te tnàhá-yu cachí-yu sá ìo càhnu cuu Dútú Ndiõxí Yá cúú Tátá-ndó ndècu andíu chi quini-yu sá quidé váha-ndo ndècu-ndo.

Cuèndá tnúhu ní chídó tnùnì ndí Moisés

¹⁷ Te vá cánì ìní-ndó sã yùhú véxi-í xocàni-í tnúhu ní chídó tnùnì ndí Moisés, te ní vá cánì ìní-ndó sã véxi-í xocàni-í tnúhu ní chídó tnùnì cue téé ní xóo cáháⁿ tnúhu Yá Ndiõxí ndéé sanaha, chi yùhú véxi-í sá cáda-í nàcuáa càháⁿ nchaa tnúhu-án. ¹⁸ Te na càchí tnúhu ndáá-í xii-ndo sã tnúhu ní chídó tnùnì ndí Moisés ìo ndáá càháⁿ-xi, chi dacuití cùu nchaa nacuáa càháⁿ-xi. Te yáchí-gá naa andíu ndíhi ñuyíú dàcúxí sã quèe cáva ìñú tnúhu-án. ¹⁹ Nũu xiãⁿ nchaa ñáyíu na càchí sá dáva tnúhu ní chídó tnùnì ndí Moisés ñá túú xìnì ñuhu-xi chi ñá túú cùnũu-xi, te ñáyíu-án ñu-ni ducaⁿ dànehé-yu nchaa dava-gá tnàha ñáyíú-yu, te sá dúcáⁿ quidé-yu te vá cùnũu vihí-yu nũú ndécú Yá Ndiõxí táxí tnùnì-gá, chi cuú-yu dàtná ìñú ñáyíu nchìcúⁿ cuì-ñã. Dico nchaa ñáyíu nchìcúⁿ nihnu quide nchaa nacuáa càháⁿ nchaa tnúhu-án, te ñu-ni ducaⁿ dànehé-yu nchaa dava-gá tnàha ñáyíú-yu, te ñáyíu-án ìo cùnũu-yu nũú ndécú Yá Ndiõxí táxí tnùnì-gá. ²⁰ Te na càchí tnúhu-í xii-ndo sã ìo xìnì ñuhu-xi cada-ndo nchaa nacuáa càháⁿ Yá Ndiõxí, te vá cáda-ndó dàtná xíquide cue téé dànehé ñáhá xii ñáyíu nchaa tnúhu ní chídó tnùnì ndí Moisés, ndíhi dàtná xíquide cue téé cùu fariséú, chi nũu na càda-ndo datná xíquide cue téé-án

ñá, te vá ndúú tãhú-ndó ndíhu ndaha ñàha Yá Ndiõxí xii-ndo.

Jèsús càháⁿ-gá cuèndá ñáyíu cùdèéⁿ (Lc. 12:57-59)

²¹ Te nchòhó sa xìní-ndó sã ncháá ñáyíu ní cuu ñanì tnàhá-ndó ñí xindecu ndéé sanaha ñí ñíhi-yu tnúhu sá vã cúú càhni-yu tnàha ñáyíú-yu, chi nũu ducaⁿ na càda-yu te nacháhu-yu cuéchi-yu. ²² Dico vitna na càchí tnúhu-í xii-ndo sã nũu ndédani càa-ndo na cudééⁿ-ndó nũú tnàha ñáyíu-ndo, te nacháhu-ndo sã dúcáⁿ quide-ndo, àdi nũu na cùcuèhé-ndó-yu te nũú chítú nũú tàcá cundáá cuéchi-ndo te nũu ducaⁿ na càda-ndo, àdi nũu nã cúu-ndo tnàha ñáyíu-ndo ìñú tnúhu vée vèhi, te cucuéchi vèhi xii-ndo chi quíhíⁿ-ndó nũú ùhú nũú ndàhú.

²³ Te xiãⁿ nũu nchòhó òré ndécú ndíhi-ndo ìñú sá cuìní-ndó cuãha-ndo Yá Ndiõxí nduu tãhú-gã, te òré cuáháⁿ-ndó cuãñaha-ndo xii-gá, te òré ní quexìo-ndo nũú dúcáⁿ cuãñaha-ndo xii-gá sá ndúú tãhú-gã, te ní ndacu iní-ndó sã ndécú ñáyíu ñá túú cùu váha iní ñáhá xii-ndo cuèndá ìñú sá ñí cumánì nũú tnàhá-ndó. ²⁴ Te dândóo-ndo sã dúcáⁿ nèhe-ndo cuáháⁿ nduu tãhú Yá Ndiõxí, te díhna-gá quíhíⁿ-ndó nàcáháⁿ càhnu ìní tnàhá-ndó ndíhi ñáyíu ñá túú cùu váha iní ñáhá xii-ndo-án, te dàtnùnì ducaⁿ te quíhíⁿ-ndó cuãha-ndo Yá Ndiõxí sá ndúú tãhú-gã.

²⁵ Te nũu ìo ìñú-ndo ñí sáháⁿ ñáyíu nũú téé cùchiuⁿ ní sacáⁿ cuéchi-yu cuèndá-ndó cuèndá ìñú sá ñí quide-ndo, te òré ní naníhí tnàhá-ndó ndíhi-yu cuáháⁿ-ndó nũú téé cùchiuⁿ-án, te nacáháⁿ càhnu ìní tnàhá-ndó ndíhi-yu cuèndá sá vã cuãha cuèndá ñáhá-gã-yu xii-ndo nũú téé cùchiuⁿ, chi nũu ducaⁿ na càda-yu te téé cùchiuⁿ-án cuãha cuèndá ñáhá-dé xii-ndo nũú cuè téé cùu poleciá, te cue téé-án chihi ñaha-güedè vecaá xii-ndo. ²⁶ Te na càchí tnúhu ndáá-í xii-ndo sã vã càcu-ndo te nũu na ngáva-ndo vecaá ndéé nacháhu-ndo nchàa sá tau-ndó.

Cuèndá cue ñáyíu ñá túú quide váha

27 'Te nchòhó sa xìní-ndó nàcuáa ndùu tnúhu ní cáháⁿ cue téé ní xíndecu ndéé sanaha, te duha ní cachí-güedé: "Nchaa cue téé vá cúú cáháⁿ ndihí-güedé ñadìhí te núu ñá díú ñàdìhí-güedé cúú-yu, te diu-ni ducaⁿ tucu nchaa cue ñáyiu dìhí vá cúú cáháⁿ ndihí-yu téé te núu ñá díú yíi-yu cùu-güedé", duha ní cachi-güedé. 28 Dico yúhú càchí tnúhu-í xii-ndo sã ndéda-ni càa cue téé na cundehe ìⁿ ñadìhí te núu na càni iní-güedé cundecu díi iní-güedé ndihí-yu te cada iní-ndó sã dàtná sá sà ní cáháⁿ ndihí ñaha-güedé xii-yu sá dúcáⁿ ñí sani iní-güedé.

29 'Te núu ìⁿ xio tìnùu-ndo quide-xi quide-ndo nándi sá cuèhé sá dúhá te tava-ndo, chi váha-gá sá ná cuíta te ñá díú ñihí ní ndúú yìqui cuñú-ndó quíhíⁿ-xi núú ùhú núú ndàhú. 30 Te núu ìⁿ xio ndaha-ndo quide-xi quide-ndo nándi sá cuèhé sá dúhá te quehndé-ndó, chi váha-gá sá ná cuíta ìⁿ xio ndaha-ndo te ñá díú sã ñihí ní ndúú yìqui cuñú-ndó quíhíⁿ-xi núú ùhú núú ndàhú.

Jèsús càháⁿ-gá cuendá cue ñáyiu dàña tnaha
(Mt. 19:9; Mr. 10:11-12; Lc. 16:18)

31 'Te nchòhó sa nàha tucu-ndo nacuéa ní cáháⁿ tucu cue téé ní xíndecu ndéé sanaha, te duha ní cachí-güedé: "Te núu ìⁿ téé na dàña tnaha-dé ndihí ñadìhí-dé, te xìní ñuhu-xi cadúha-dé ìⁿ tutú cuáñaha-dé núú càháⁿ-xi sá ñí dáñá ñàha-dé", duha ní cachí-güedé. 32 Dico yúhú càchí tnúhu-í xii-ndo sã cúú dàña ìⁿ téé ñadìhí-dé, te núu cùtnuní ndáa iní-dé sá cáháⁿ ndihí-aⁿ ingá téé. Dico núu ñá túú dùcaⁿ quide-aⁿ te ñá túú ndùu váha-xi dàña ñàha-dé. Te núu ñá túú dùcaⁿ quide ñadìhí-dé, te cada iní-ó sã méé-dé ní sanu ichi ñaha-dé xii-aⁿ cáháⁿ ndihí-aⁿ ingá téé te núu na dàña ñaha-dé. Te téé na nàqueheⁿ ñaha xii ñaha ní dáñá ñàha yíi-xi-áⁿ, te diu-ni ñá túú ní quide váha-dé sá dúcáⁿ ñí naqueheⁿ-dé ñaha-áⁿ.

Ñáyiu càcunehe ñaha xii Yá Ndiõxí cuendá cutnùní iní tnàha ñáyiu-yu sá ndáa cada-yu ìⁿ sá sání iní-yu cada-yu

33 'Te sa nàha tucu-ndo nacuéa ní cáháⁿ tucu cue téé ní xíndecu ndéé sanaha, chi cue téé-áⁿ ní cachí-güedé: "Te núu càcunehe-ndo Yá Ndiõxí núú tnàha ñáyiu-ndo nàcuáa cutnùní iní-yu sá ndáa cada-ndo ìⁿ sá sání iní-ndó càda-ndo, te cada-ndo", duha ní cáháⁿ dóho tnàha-güedé. 34 Dico yúhú càchí tnúhu-í xii-ndo sã ñà túú ñà cacunehe-ndo sã ndáa cada-ndo ìⁿ sá sání iní-ndó càda-ndo. Te ni vã cáci nèhe-ndo andiu chi yacáⁿ cúú-xí núú núcõo Yá Ndiõxí táxí tnùnigá. 35 Te ni vã cáci nèhe-ndo ñuyíu-a, chi tnàhá ñuyíu-a ndècu-gá, te ni vã cáci nèhe-ndo ñuu Jerusàlén chi ñuu-áⁿ cúú cuendá-gá, te diu-gá cúú-gã Yaá ío cùnuu. 36 Te ni vã cáci nèhe-ndo díquí-ndó chi nàha-ndo sá ñí ìⁿ idi díquí-ndó ñà ndácú-ndó ndàda cuixíⁿ-ndó àdi ndada tnuu-ndo. 37 Te váha-gá sá núu ìⁿ sá sání iní-ndó càda-ndo, te cachí-ni-ndo: "Cuu cada-ndí, àdi vá cúú càda-ndí", cachí-ni-ndo. Chi nchaa dava-gá sá chídó-ndó cáháⁿ-ndó òré ducaⁿ sání iní-ndó càda-ndo ìⁿ sá cadá-ndó cùu-xi sá dácàhu iní ñàhá yùcu ñávàha.

Cuendá ñáyiu nàchinaa sá quidé ñàha tnaha ñáyiu-xi
(Lc. 6:29-30)

38 'Te sa nàha tucu-ndo nacuéa ní cáháⁿ tucu cue téé ní xíndecu ndéé sanaha, chi cue téé-áⁿ ní cachí-güedé: "Ñáyiu na càda ñaha tnaha ñáyiu-xi ìⁿ sá ñà túú vãha, te nanchòcáva-yu nachinaa-yu sá ñí quide ñaha tnàha ñáyiu-yu", duha ní cachí-güedé. 39 Dico yúhú càchí tnúhu-í xii-ndo sã ñà túú ñà cada-ndo nchaa cue ñáyiu cuihna iní-xi te núu quide ñahá-yu ìⁿ sá ñà túú vãha xii-ndo. Te núu ní canihá-yu ìⁿ xito te cuini tucú-yu canihá-yu ingá xito te dàña-ndo na canihá-yu. 40 Àdi ní sacáⁿ cuéchi-yu núú cuè téé cùchiuⁿ cuendá-ndó, te cuini-yu quendeé-yu dúhnú-ndó te dàña-ndo na cànehé-yu quíhíⁿ, te tnàhá-ni dóo ndíxí ndòdo-ndo

daña-ndo na canehé-yu quihíⁿ. ⁴¹ Te núu quide yicá-yu caca-ndo dàtná úú kilómetrú cuido-ndo ndàchiúⁿ-yu ña, te chido-ndo úú-gá tucu kilómetrú cuido-ndo ndàchiúⁿ-yu. ⁴² Te núu ió ñⁿ sá xicáⁿ-yu núu-ndó te cuañaha-ndo, àdi ió ñⁿ sá sánúú-yu núu-ndó te cuañaha nùu-ndo.

Cuu iní-ó nchàa ñáiyu cùu úhú iní ñáhá xii-o

(Lc. 6:27-28, 32-36)

⁴³ Te sa nàha tucu-ndo nacuaáa ní cachí tucu cue téé ní xindecu ndéé sanaha, chi cue téé-áⁿ ní cachí-güedé: “Cuu iní-ndó cuè ñáiyu ndècu ndihí váha-ndo, te cuu úhú iní-ndó cuè ñáiyu cùu úhú iní ñáhá xii-ndo”, duha ní cachí-güedé. ⁴⁴ Dico yúhú càchí tnúhu-í xii-ndo sã cúú iní-ndó cuè ñáiyu cùu úhú iní ñáhá xii-ndo, te cáháⁿ váha-ndo cuendá cue ñáiyu càháⁿ úhú ñáhá xii-ndo, te cada-ndo sã vâha sá cúú-xí cuè ñáiyu cùu úhú iní ñáhá xii-ndo, te cáháⁿ ndihí-ndo Yã Ndiöxí cuendá cue ñáiyu xicuèhé ñáhá xii-ndo, ndihí cuendá cue ñáiyu quide úhú ñáhá xii-ndo. ⁴⁵ Te núu na càda-ndo nchaa nacuaáa càháⁿ-í-a, te ducaⁿ te cutnùní sá cúú-ndó dèhe Tãtã-ndó Dütú Ndiöxí Yaa ndécú àndiü. Te diu-gá cúú-gã Yaa quidé quène nchícanhii, te diu-ni-gá cúú-gã Yaa dácùuⁿ dáú ñuyíú-a, te ducaⁿ quide-gá cuendá cuu-xi sá vâha sá cúú-xí cuè ñáiyu quide váha, ndihí sá cúú-xí cuè ñáiyu ñá túú quide váha. ⁴⁶ Te núu nchòhó ná cúú iní-ndó mèe-ni ñáiyu na cùu iní ñáhá xii-ndo, te vá càchí-ndó sã Yã Ndiöxí taxi-gá sá ndúú tãhú-ndó sã dúcáⁿ quide-ndo, chi cuèi cue téé cuihna iní-xi quide cobrá ñáhá xii cue ñáiyu cuendá impuèstú ducaⁿ xiquide-güedé. ⁴⁷ Te núu mee-ni ñáiyu ndècu ndihí váha-ndo ïo váha cáháⁿ ndihí-ndó-yu, te vá càchí-ndó sã ïo váha quide-ndo sá dúcáⁿ quide-ndo, chi cuèi ndéé nchaa ñáiyu ñá túú xini dana cuendá Yã Ndiöxí ducaⁿ xiquidé-yu. ⁴⁸ Te duha ndüu tnúhu càháⁿ-í cuendá sã nchòhó cada ndáá-ndó cùndecu-ndo datná quidé ndáá méé Tãtã-ndó Dütú Ndiöxí Yaa ndécú àndiü —duha ní

dánèhé ñáhá Jèsús xii cue téé xica cuu ndihí-gá ndihí nchaa ñáiyu.

6

Jèsús dánèhé-gá ñáiyu nàcuáa cada-yu sá vâha

¹ Te Jèsús ndécú-ní-gã dánèhé-gá cue téé xica cuu ndihí-gá ndihí nchaa ñáiyu, te xãhaⁿ-gã:

—Te òré quidé-ndó sã vâha te vá cáda-ndó núú ñáiyu cuendá-ni sá cuini-ndó cáháⁿ váha-yu cuendá-ndó, chi núu núú ñáiyu ducaⁿ na càda-ndo te Dütú Ndiöxí Yaa cúú Tãtã-ndó vã táxi-gã sá ndúú tãhú-ndó. ² Te xíãⁿ núu nchòhó òré chindèe-ndo ñáiyu ndàhú, te vá cñaha-ndo xii cue ñáiyu sá chindèe-ndo cue ñáiyu ndàhú-áⁿ dàtná xiquide cue ñáiyu dandahú méé-xí sã quidé ndáá te ñá ndáá sá quidé ndáá-yu, chi ñáiyu-áⁿ ducaⁿ xiquidé-yu òré sãháⁿ-yu veñúhu, chi dâtecú tnúhu-yu nchaa ñáiyu òré ducaⁿ chindee-yu ñáiyu ndàhú. Te diu-ni ducaⁿ quidé-yu xãháⁿ-yu xii cue ñáiyu sá chindèe-yu cue ñáiyu ndàhú-áⁿ nchaa núú xicá cúú-yu, te ducaⁿ xiquidé-yu cuendá cuini-yu cáháⁿ váha ñáiyu cuendá-yu. Te yúhú na càchí tnúhu ndáá-í xii-ndo sã ñà túú nã nduu tãhú ñáiyu-áⁿ núú Yã Ndiöxí sá dúcáⁿ quidé-yu chi mee-ni núú tnàha ñáiyú-yu cùdiú-yu. ³ Te nchòhó òré chindèe-ndo ñáiyu ndàhú, te cuèi ñáiyu ío-gá váha ndècu ndihí-ndo dico vá cñaha-ndo sã dúcáⁿ chindee-ndo cue ñáiyu ndàhú-áⁿ, te ni cuèi dava-gá ñáiyu vá cñaha-ndo. ⁴ Chi váha-gá sá iní méé-ní-ndó ná cùhuⁿ sá dúcáⁿ chindee-ndo cue ñáiyu ndàhú-áⁿ. Te núu ducaⁿ na càda-ndo ña, te Dütú Ndiöxí Yaa cúú Tãtã-ndó táxi-gá sá ndúú tãhú-ndó chi diu-ni mee-gã ndéhé-gã nàcuáa quide-ndo ndecu-ndo.

Jèsús dánèhé-gá ñáiyu nàcuáa cáháⁿ ndihí-yu Yã Ndiöxí

(Lc. 11:2-4)

⁵ Te nchòhó òré càháⁿ ndihí-ndo Yã Ndiöxí, te vá cáda-ndó dàtná xiquide cue ñáiyu dandahú méé-xí càchí sá

quidé ndáá te ñá ndáá sá quidé ndáá-yu, chi ñáyi-u-áⁿ tnàhá iní-yu cunutní-yu càháⁿ ndihí-yu Yá Ndiöxí òré yíhí-yu veñúhu. Te diu-ni ducaⁿ xíquidé-yu nchaa núú xicá cùú-yu, te ducaⁿ quidé-yu cuendá sá cuíní-yu quíní ñáyi-u nàcuáa xíquidé-yu. Te na càchí tnúhu ndáá-í xii-ndo sã ñà túú nã nduu táhú ñáyi-u-áⁿ núú Yá Ndiöxí sá dúcáⁿ quidé-yu chi mee-ni núú tnàhá ñáyiú-yu cùú-yu. ⁶ Te nchòhó òré cuíní-ndó càháⁿ ndihí-ndo Yá Ndiöxí, te ndihu ndedí nihnu-ndo xiti vehe-ndo, chi diu-gá cúú Tátá-ndó te ndècu ndihí ñaha-gá xii-ndo, te diu-ni mee-gã ndéhé ñaha-gá xii-ndo nàcuáa quide-ndo, te núu ducaⁿ na càda-ndo te taxi-gá sá ndúú táhú-ndó.

⁷ Te òré càháⁿ ndihí-ndo Yá Ndiöxí te vá sũúni cuendá-ni dacáa-ndó tnúhu càháⁿ ndihí-ndo-gã dàtná xíquide cue ñáyi-u ñã túú xini tnúhu-gã, chi ñáyi-u-áⁿ sání iní-yu sá tédõho ñaha vihi-gá Yá Ndiöxí xii-yu sá dúcáⁿ sũúni dacáa-yu tnúhu càháⁿ ndihí ñahá-yu xii-gá dico ñáhá. ⁸ Dico nchòhó, vá cáda-ndó dàtná xíquide cue ñáyi-u-áⁿ, chi mee Tátá-ndó Dütú Ndiöxí sa nàha-gá ná cúú nchàa sá xini ñuhu-ndo cuéi òré vátá càcáⁿ-gá-ndó núú-gã. ⁹ Te duha càháⁿ-ndó òré càháⁿ ndihí-ndo Yá Ndiöxí:

Yòhó Tátá-ndí Dütú Ndiöxí Yaá ndécú àndiu,
nchaa ñáyi-u na càháⁿ-yu sá cúú-n Yàá ío yíñúhu.

¹⁰ Te xicáⁿ táhú-ndí núú-n sã ná sàa nduu ndihu ndàhá-n-yu.

Te cada-n dàtná càchí iní-n ñuyú-a dàtná quidé-n àndiu.

¹¹ Te xicáⁿ táhú-ndí núú-n sã táxí-n sã cóhó-ndí sá cáxí-ndí ñⁿ nduu ñⁿ nduu.

¹² Te cada càhnu iní-n nchàa yicá cuéchi-ndí, chi tnàhá nchúhú quidé càhnu iní-ndí nchaa sá quidé ñaha tnaha ñáyi-u-ndí.

¹³ Te vá dáñá-n dàcàháⁿ ñáhá yècu ñávàha xii-ndí cada-ndí sá ñà túú vaha, chi coto ñaha-n xii-ndí cuendá sá vã dúcáⁿ càda ñaha-xi.

Te diu-n cùu-n Yaá ío cùnnu nchaa nduu nchaa quíú, te ío càhnu cuu-n, te diu-ni-n quindaha ñaha-n xii-ndí ni caa ni quíhíⁿ.

Te ducaⁿ na cùnduu.

Duha dānehé ñáhà-í xii-ndo càháⁿ ndihí-ndo Yá Ndiöxí.

¹⁴ Te núu nchòhó quidé càhnu iní-ndó nchàa sá quidé ñaha tnaha ñáyi-u-ndo, te ducaⁿ te Tátá-ndó Dütú Ndiöxí Yaá ndécú àndiu cada cahnu iní-gá nchaa sá ñà túú vaha quide-ndo tucu. ¹⁵ Dico núu nchòhó vá cáda càhnu iní-ndó nchàa sá quidé ñaha tnaha ñáyi-u-ndo ña, te ni Dütú Ndiöxí Yaá cúú Tátá-ndó vã cáda càhnu iní-gá nchaa sá quidé-ndó tucu.

Cuendá ñáyi-u ñã túú tnàhí ná xéxí ãma càháⁿ ndihí-yu Yá Ndiöxí

¹⁶ Te nchòhó, nduu ñà túú tnàhí ná xéxí-ndó càháⁿ ndihí-ndo Yá Ndiöxí, te vá cùndiyí-ndó dàtná xíquide nchaa ñáyi-u dāndahú méé-xí càchí sá quidé ndáá te ñá ndáá sá quidé ndáá-yu, chi ñáyi-u-áⁿ ducaⁿ xíquidé-yu cuendá sá cuíní-yu cutnùni iní ñáyi-u sá ñà túú tnàhí ná xéxí-yu càháⁿ ndihí-yu Yá Ndiöxí. Te yúhú càchí tnúhu-í xii-ndo sã sá dúcáⁿ quidé-yu te ñà túú nã chindee ñaha-xi xii-yu cuendá níhí-yu ñⁿ sá ndúú táhú-yu núú Yá Ndiöxí. ¹⁷ Dico nchòhó, nduu dūcaⁿ quide-ndo ñã túú tnàhí ná xéxí-ndó càháⁿ ndihí-ndo Yá Ndiöxí, te váha váha naquete-ndo núú-ndó, te váha váha chihi-ndo cūcá ¹⁸ cuendá sá vã cùtnùni iní ñáyi-u sá ñà túú nã xéxí-ndó nduu ducaⁿ càháⁿ ndihí-ndo Yá Ndiöxí. Te Dütú Ndiöxí Yaá cúú Tátá-ndó ndècu ndihí-ndo diu-ni mee-gã ndéhé-gã nàcuáa quide-ndo ndecu-ndo, te diu-gá taxi-gá sá ndúú táhú-ndó.

Cuendá nchaa sá vaha nduu táhú-ó (Lc. 12:33-34)

¹⁹ Te vá cání iní-ndó cùu-ndo ñáyi-u cuica nãndi sá cùndècu ndihí-ndo ñuyú-a chi vá cùdii-xi, chi dava quee tíquidi, te dava caxi cudi ñuhu, àdi quíhu ñadúhú vehe-ndo te duhu-güedé. ²⁰ Te váha-gá chí ndúcú nàcuáa càda-ndo cuendá

ducaⁿ ngündecu sá ndúú tǎhú-ndó àndiú, te xiǎⁿ cudíi-xi cundecu ndihí-ndo nì caa nì quíhíⁿ, chi yàcáⁿ vá quée-gǎ tíquidi, te ni vǎ cáxí-gǎ cudi ñuhu, te ni vǎ quíní-gá-ndó ñàdúhú duhu-güedě ndachìuⁿ-ndo. ²¹ Te núu cùu-ndo ñáyiu cuica ndècu ñuyíú-a, te ñi-ni nchaa sá ndécú ndihí-ndo ñuyíú-a ñuhu iní-ndó. Àdi cuu-ndo ñáyiu quide nacuaa ngündecu sá ndúú tǎhú-ndó àndiú, te ñi-ni sá ndúú tǎhú-ndó ndècu andiú-áⁿ ñuhú iní-ndó.

Núú-ó cùu-xi datná ñⁿ ñuhú
(Lc. 11:34-36)

²² Te cada iní-ndó sǎ núú-ndó cùu-xi datná ñⁿ ñuhú. Te núu núú-ndó cáváha te cùtnuní iní-ndó nǎ cúú sǎ ndécú núú-ndó. ²³ Dico núu cùhú núú-ndó ñà túú cùtnuní cundehe-ndo ña, te ña túú cùtnuní iní-ndó nǎ cúú sǎ ndécú núú-ndó. Te sá dúcáⁿ cùhú núú-ndó te cada iní-ndó sǎ ndécú-ndó datná ñⁿ núú née. Te duha nduu tñúhu cǎháⁿ-í chi núu sàni váha iní-ndó cuendá Yǎ Ndiǒxí ña, te cùu vii cuu váha iní-ndó ndècu-ndo. Áⁿ te núu ña túú sàni váha iní-ndó cuendá-gǎ ña, te ña túú tñàhí cùu váha iní-ndó ndècu-ndo. Te sá dúcáⁿ ña túú sàni váha iní-ndó cuendá-gǎ te cada iní-ndó sǎ ndécú-ndó datná ñⁿ núú née.

Vá ndácú ñⁿ tée cunu cuechi-dě núú úú pàtróóⁿ
(Lc. 16:13)

²⁴ Te ni ñⁿ tée xínu cuechi vá ndácú-dě cunu cuechi-dě núú úú pàtróóⁿ, chi tée-áⁿ cuu váha iní-dé núú ñⁿ pàtróóⁿ-dě te tñi-dé nchaa tñúhu cǎháⁿ pàtróóⁿ tée cùu váha iní-dé núú-xi-áⁿ. Te núú ñngá tucu pàtróóⁿ-dě vá cúú váha iní-dé, te ni vǎ tñí-dě tñúhu cǎháⁿ ñngá tée-áⁿ. Te ducaⁿ sǎtnahá-xi cùu nchohó chi vá ndácú-ndó cunu cuechi-ndo núú Yǎ Ndiǒxí te cuhuⁿ iní-ndó nchaa sá ío ñuyíú-a.

Yá Ndiǒxí xító-gǎ nchaa ñáyiu cùu déhe-gǎ
(Lc. 12:22-31)

²⁵ Te na cǎhí tñúhu-í xii-ndo sǎ vǎ ío cani iní-ndó núu nása níhí-ndó sǎ cóhó sǎ cáxí-ndó, te ni vǎ ío

cani iní-ndó núu nása níhí-ndó dǒo cuihnu-ndo, chi cùnuu-gǎ méé-ndó dàcúúxí sǎ nchító-ndó, te ducaⁿ cùnuu-gǎ yiqui cùnú-ndó dàcúúxí dǒo sácúhnu-ndo. ²⁶ Te chí cáda cuendá sǎ ncháá quiti ndava ña túú tñàhí ná xítú-güedi, te ni ña túú ndée cuháⁿ-güedi nàtahu-güedi, te ni ña túú nǎ nátaxúha-güedi, te ni ña túú ndée cáa yàcá-güedi, chi mee Tǎtá-ó Dütú Ndiǒxí Yáa ndécú àndiú xito ñaha-gǎ xii-güedi níhí-güedi sǎ xéxí-güedi. Te núu cue quiti-áⁿ ducaⁿ xito ñaha-gǎ xii-güedi, jte uuⁿ-gǎ xító ñaha-gǎ xii nchòhó, chi nchòhó ío-gǎ cùnùu-ndo dacúúxí cuè quiti-áⁿ! ²⁷ Te cuèi nǎndi sǎ sání vihi iní-ndó ndècu-ndo, dico ña ndácú-ndó càda-ndo nacuaa cuehnu-ndo cuèdicó ñⁿ yiqui-gǎ.

²⁸ Te vá ío cani iní-ndó núu nása níhí-ndó dǒo cuihnu-ndo. Te chí cáda cuendá nàcuáa sàhnu nchaa itá ío yucu, chi nchaa itá-áⁿ ña túú quide chiuⁿ-xi, te ni ña túú quèheⁿ-xi idi. ²⁹ Te na cǎhí tñúhu-í xii-ndo sǎ ndíj Salòmón cuèi ío vii ní xínduu dǒo ní xóo cuihnu ndíi, dico ña túú nùtnahá-xi nàcuáa càa nchaa itá, chi ío-gǎ vii càa nchaa itá. ³⁰ Te nchaa itá ío yucu tnaa-ni cùdíi-xi, te yìchí-xi te sàhmi ñáyiu. Te cuèi ducaⁿ dico mee Yǎ Ndiǒxí quidé-gǎ ío vii sácúnduu-xi. Te núu nchaa itá-áⁿ ducaⁿ quide-gǎ xító-gǎ sácúnduu vii-xi, te xiǎⁿ cùtnuní sǎ ío-gǎ coto ñaha-gǎ xii-ndo, dícó-ni sǎ ña túú sàndáá váha iní-ndó-gǎ. ³¹ Te xiǎⁿ núu ña túú xini ñuhu vihi-xi cani iní-ndó núu nása níhí-ndó sǎ cóhó sǎ cáxí-ndó, àdi nása níhí-ndó dǒo cuihnu-ndo. ³² Chi nchaa ñáyiu ña túú xini nàcuáa cǎháⁿ tñúhu Yá Ndiǒxí mee-ni nchaa xiǎⁿ ñuhú iní-yu. Dico nchòhó chi mee Tǎtá-ndó Dütú Ndiǒxí sa naha-gǎ ná cúú sǎ xini ñuhu-ndo. ³³ Te xiǎⁿ núu ío xini ñuhu-xi sǎ cùhúⁿ iní-ndó sǎ Yǎ Ndiǒxí yíndàha ñaha-gǎ xii-ndo, te ducaⁿ càda-ndo nchaa nacuaa cùini-gǎ, te ducaⁿ te taxi-gǎ nchaa sǎ xini ñuhu-ndo. ³⁴ Núu xiǎⁿ vá ío cani iní-ndó nása cundecu-ndo nduu tnee, chi cani iní-ndó nàcuáa cada-ndo cundecu-ndo vitna, chi nduu tñéé-áⁿ te òré-nǎ te cùtnuní

nũu nása cada-ndo cùndecu-ndo. Chi nchòhó sa nàha-ndo sá ìo tìtní núú sá quidé-xí ìn nduu ìn nduu —duha ní dánèhé ñáhá Jèsús xii cue téé xìca cuu ndìhi-gá ndìhi nchaa ñáyiu.

7

Vá càháⁿ cuèhé-ó cuèndá tnàha ñáyiu-o

(Lc. 6:37-38, 41-42)

¹ Te Jèsús ndèccuu-ni-gá dánèhé-gá cue téé xìca cuu ndìhi-gá ndìhi nchaa ñáyiu, te xàhaⁿ-gã:

—Vá càháⁿ cuèhé-ndó cuèndá tnàha ñáyiu-ndo, te ducaⁿ te Yá Ndiõxí ñá túú nã tnúhu cúñaha-gã xii-ndo. ² Chi núu na càháⁿ cuèhé-ndó cuèndá tnàha ñáyiu-ndo, te Yá Ndiõxí ìó ìn sá cáda ñàha-gá xii-ndo. Te núu nchòhó ná càháⁿ cuèhé víhí-ndó cuèndá tnàha ñáyiu-ndo te Yá Ndiõxí ío-gá dandòho ñaha-gá xii-ndo. ³ ¿Te ná cuèndá ndéhé-ndó ìn sá ñà túú vãha quide tnaha ñáyiu-ndo te mee-ndo víhi-gá quidé-ndó-í? Te sá dúcáⁿ quide-ndo te cada iní-ndó sá ndéhé-ndó dàtná ìn mihi líhli ñùhu núú tnàha ñáyiu-ndo te mee-ndo ñùhu ìn mihi cahnu-gá núú-ndó te ñá túú quide cuèndá-ndó. ⁴ Te núu na nãcanu ichi-ndo tnaha ñáyiu-ndo cuèndá sá ñà túú quide vãha-yu ndècú-yu, te mee-ndo víhi-gá quidé-ndó ñá, te cada iní-ndó sá xàhaⁿ-ndo xii tnaha ñáyiu-ndo sá nátàva-ndo mihi líhli ñùhu núú-yu sá dúcáⁿ quide-ndo, te mihi cahnu ñùhu núú mée-ndó ñà túú quide cuèndá-ndó. ⁵ Te sá dúcáⁿ quide-ndo te ío dandahú-ndó mèe-ndo sá quidé ndáá-ndó te ñà ndáá sá quidé ndáá-ndó, te xini ñùhu-xi díhna-gá dañà-ndo nchaa sá ñà túú vãha quide-ndo, te dàtnùní ducaⁿ te cuu nacanu ichi-ndo tnàha ñáyiu-ndo cuèndá nchaa sá ñà túú vãha quidé-yu.

⁶ Te nchaa ñáyiu ío sàá iní-xi, te vá cáda yìca-ndó-yu cundedòho-yu tnúhu Yá Ndiõxí, chi núu na càda yìca-ndó-yu te ngóo-yu cuu úhú iní ñáhã-yu xii-ndo. Te ñáyiu-áⁿ cúu-yu dàtná iná chi quiti-áⁿ núu na cuñaha-o ìn sá cuñaha-o, te núu ñá

túú cùtnuní iní-di ná cúú xǎⁿ te tñi ñaha-di xii-o. Te cùu tucú-yu dàtná cùchí chi quiti-áⁿ núu na chùcu-o núú-di yúú vãha sá ìo vii càa nani pérlá, te dícó-ni cùnu sáhá-di chi ñá túú cùtnuní iní-di sá cúú-xí yúú vãha.

Cácáⁿ-ó núú Yá Ndiõxí núu ná cuini-ó

(Lc. 11:9-13; 6:31)

⁷ Te na càchí tnúhu-í xii-ndo sá cãcáⁿ-ndó núú Yá Ndiõxí te núu nã cuini-ndó te taxi-gá, te vá dáñá ndèé-ndó cãcáⁿ-ndó núú-gã núu ná cuini-ndó te ducaⁿ te níhí-ndó. Te cada iní-ndó sá ñi quexio-ndo vehe ìn tnaha ñáyiu-ndo te ní càháⁿ-ndó, te ñáyiu-áⁿ ñi tedòho ñáhã-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndiõxí tedòho ñaha-gã xii-ndo, te taxi-gá sá ná càcáⁿ-ndó núú-gã. ⁸ Chi nchaa ñáyiu ducaⁿ xiquide, te Yá Ndiõxí tédòho ñaha-gã xii-yu te níhí-yu sá cuini-yu. Te ñu-ni ducaⁿ tucu nchaa ñáyiu na càcáⁿ núú-gã ìn sá cuini-yu, chi sãñaha-gã sá xìcáⁿ-yu núú-gã. Te ñu-ni ducaⁿ tucu nchaa ñáyiu ñá túú dàña ndéé xìcáⁿ núú Yá Ndiõxí sá cuini-yu chi níhí-yu.

⁹ Te nchòhó cue téé cùu tátá, ñá túú cùndee iní-ndó cuñaha-ndo xii cue déhe-ndo ìn yúú caxi-güexi òré xìcáⁿ-güexi ìn pàá núú-ndó càxi-güexi. ¹⁰ Te ni ñà túú cùndee iní-ndó cuñaha-ndo ìn cóo caxi-güexi òré xìcáⁿ-güexi ìn chácá núú-ndó càxi-güexi. ¹¹ Te nchòhó cuèi ndéé dau-na sàá iní-ndó dico sãha-ndo cuè déhe-ndo sá vãha xèxi-güexi òré ná cúú sá xìcáⁿ-güexi núú-ndó càxi-güexi. Te núu nchòhó ducaⁿ quide-ndo, ñte uuⁿ-gá ducaⁿ quide Tátá-ndó Dütú Ndiõxí Yaá ndécú àndu, chi taxi-gá sá vãha sá cúú-xi-ndó te núu na càcáⁿ-ndó núú-gã!

¹² Te nchaa sá vãha cuini-ndó càda tnaha ñáyiu-ndo, te cada-ndo tnàhá-ndó ndìhí-yu, chi ducaⁿ sãnu ichi ñaha tnúhu ní chídó tnùní ndíi Moisés, te ñu-ni ducaⁿ sãnu ichi ñaha tucu nchaa tnúhu ní chídó tnùní cue téé ní xóo càháⁿ tnúhu Yá Ndiõxí ndéé sanaha.

Yuyèhe cuiñi
(Lc. 13:24)

13-14 "Te xini ñuhu-xi nducu-ndo nacuaa cada-ndo tñi-ndo ichi Yá Ndiöxi. Te ichi-gá-án cúu-xí datná ñi ichi cuiñi, àdi datná ñi yuyèhe cuiñi. Te duha càhá-í chi ío úhú xínu iní-ndó tñi-ndo ichi Yá Ndiöxi, te sacú-ni nchòhó cue ñáyi ndècu ñuyú-a tñi-ndo ichi-gá. Te nchaa ñáyi ndècu ichi cuehé ichi duha ta xita nihnú-yu cuáhá. Te ichi ndècú-yu-án cada iní-ndó sá cúu-xí ñi ichi cahnu ichi quehé, àdi ñi yuyèhe quehé. Te duha càhá-í chi ío vai ñáyi ndècú-yu ichi-án.

Ndi ñi nùú yutnu xini-ó nã yutnu cùu-xi cuendá sá sávidí-xi
(Lc. 6:43-44)

15 "Te càhí tñuhu-í xii-ndo sã ño quihí iní-ndó cùndecu-ndo cuendá sã vã dándahú ñáhá cue téè càhí sá càhá tñuhu Yá Ndiöxi te ñá ndáá sá càhá-güedé tñuhu-gá. Chi cue téè-án sãnuu sá quidé-güedé datná quidé mbéé quiti ío váha iní-xi, dico ñá ndáa chi ñá túú ñuhu váha iní-güedé, chi quide-güedé datná quidé quiti déé quiti nani yíhí. 16 Te òré quexio-güedé núú ndècú-ndó te cada cuendá-ndó nãcuáa quide-güedé cuendá duca cùtnuní iní-ndó nã ñáyi cùu-güedé. Te nchòhó xini-ndó sã ña túú cùu ndéhé yoho váha stilé tnu ñu, te ni ña túú xini-ndó cùu ngúxí ñi tnu ñu. 17-18 Te xini tucu-ndo sã ncháa yutnu váha cùu sávidí váha, te nchaa yutnu váha-án ña túú cùu sávidí sã ña túú váha. Te nchaa yutnu sã ña túú váha ña túú cùu sávidí váha, chi mee-ni sávidí sã ña túú váha cùu. 19 Te nchaa yutnu sã ña túú cùu sávidí váha xèndé-güedé, te cuánguee-xi núú ñuhú càyú-xi. Te duca sãtnahá-xi váha nchaa cue téè dándahú ñáhá càhí sá càhá tñuhu Yá Ndiöxi te ñá ndáá sá càhá-güedé tñuhu-gá, chi quihí-güedé núú ñuhú núú càyú. 20 Te nchòhó cutnuni iní-ndó nã ñáyi cùu cue téè-án cuendá nchaa sá quidé-güedé.

Ñá ncháa ñáyi ngündecú-yu núú ndècú Yá Ndiöxi táxi tñuni-gá
(Lc. 13:25-27)

21 "Te na càhí tñuhu-í xii-ndo sã ño vai ñáyi cachí-yu sã yñhú cúu-í Xítohó-yu, dico ñá ncháa-yu nduu táhú-yu cundecú-yu núú ndècú Tãtã-í Dútú Ndiöxi táxi tñuni-gá, chi mee-ni nchaa ñáyi na càda nchaa nacuaa càhá-gá ñáyi-án nduu táhú-yu cundecú-yu núú ndècú-gã táxi tñuni-gá. 22 Te na sãá nduu càda ndáá Yá Ndiöxi cuéchi nchaa ñáyi, te vai-yu cùñahá-yu xii-í: "Yòhó Xítohó Jesucristú nchúhú cúu-ndí ñáyi ní càhá tñuhu-n nãcuáa ní cachí-n, te ñu-ni-n ní cacunehe-ndí te ní sãndáá iní ñáhá nchaa espíritu cùndihí yucu ñávãha xii-ndí ní quee-xi yiqui cùnú ñáyi, te ñu-ni yòhó ní chindee ñaha-n xii-ndí ní ndacu-ndí ní quide-ndí titní núú sã vã yò tñahí ndacu cada", duha cùñahá-yu xii-í dává-án. 23 Dico yúhú cùñaha-í xii-yu: "Ñá túú tñahí xini ñáhá-í xii nchòhó núú ndèé ñáyi cùu-ndo, te chí xócuiñi nchaa nchòhó ñáyi quide nchaa sã cuehé sá dúhá núú ndècú-í-a", duha cùñaha-í xii-yu.

Ñi vehe ndècu cimientú-xi ndihí ñi vehe ña túú cimientú-xi
(Mr. 1:22; Lc. 6:47-49)

24 "Te nchaa ñáyi sãcúndedóho tñuhu càhá-í te núu na tñi-yu, te ñáyi-án cúu-yu datná ñi téè ío váha cùtnuní iní-xi. Chi téè-án ní dácaá-dé ñi vehe, dico díhna-gá ní xete-dé ndèé ní tnahá-dé yúú cáxi te datnuni ní tava-dé cimientú-xi. 25 Te òré ní cuu dáú te ní ndee ndute ñuhu, te ní dándáá-xi ndèé núú cáá vehe-án, dico ña túú ní ndacu-xi cuido-xi. Te ní quene tucu táhí ñi dico ña túú ní ndacu-xi cuido-xi vehe-án, te duca chi téè ní dácaá vehe-án ní tava-dé cimientú-xi núú yúú cáxi. Duha sãtnahá-xi cùu nchaa ñáyi tñi tñuhu càhá-í. 26 Dico nchaa ñáyi sãcúndedóho tñuhu càhá-í te ña túú cùni-yu tñi-yu, ñáyi-án cúu-yu datná ñi téè ña túú tñahí cùtnuní iní-xi. Chi téè-án ní dácaá-dé ñi vehe

núú yúcu mèe-ni ñuhu cúchí. ²⁷ Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-áⁿ, te ní quene táchí ñihi te íí-ni ní xido-xi vehe-áⁿ cuendá sá núú ñuhu cúchí ñí sáá. Duha sátnahá-xi cùu nchaa ñáyiú sàcúndedóho tnúhu càháⁿ-í te ñá túú cuení-yu tñí-yu —duha ní dánèhé ñáhá Jèsús xii cue tée xica cuu ndihí-gá ndihí nchaa ñáyiú.

²⁸ Te òré ní ndihí Jèsús sá dúcáⁿ ñí cáháⁿ-gá, te nchaa ñáyiú ní xíndedóho nchaa tnúhu ní cáháⁿ-gá ío ní cuñúhu-yu nàcuáa ní dánèhé ñáhá-gá xii-yu. ²⁹ Chi ní cáháⁿ-gá dàtná càháⁿ cue tée cùnūu, te cùnūu ndisa-gá, te ñá túú ní cáháⁿ-gá dàtná càháⁿ nchaa cue tée dàcuaha ñaha xii ñáyiú nchaa tnúhu ní chídó tnùní ndí Moisés.

8

Jèsús quidé tãtna-gá ñⁿ tée tnàhá cuéhé sã dátèhyú nihnu-xi yiqui cùñú-ó (Mr. 1:40-45; Lc. 5:12-16)

¹ Te Jèsús ní xica-gá cuánuu-gá dñí tndúú núú dúcáⁿ ñí xíndecu-gá ní dánèhé-gá ñáyiú-áⁿ, te cuéhé víhí ñáyiú nchícúⁿ ñáhá xii-gá cuánuu. ² Te ní quexìo ñⁿ tée tnàhá cuéhé sã dátèhyú nihnu-xi yiqui cùñú-ó núú Jèsús, te ní ngúíñí xítí-dé núú-gã, te xãháⁿ-dë xii-gá:

—Mèstrú, véxi-í càháⁿ ndàhú-í núú-n núu vá cùndèe iní-n càda tátna ñaha-n xii-í, chi cùtnuní iní-í sá ndácú-n —càchí-dé xãháⁿ-dë xii-gá.

³ Te Jèsús ní dácáa-gá ndaha-gá ní tendaha ñaha-gá xii-dé, te xãháⁿ-gã:

—Cuu cada tátna ñaha-í xii-n, te vitna ndúha-n —càchí-gá xãháⁿ-gã xii-dé.

Te òré-ni-áⁿ ñí xócuíñí cuéhé tnàhá-dé. ⁴ Te Jèsús ní xãháⁿ tùcu-gá xii-dé:

—Te vitna cuanùhú te vá yõo ñⁿ cúñaha-n sã yùhú ní quide tátna ñaha-í xii-n, núú dùtú-ni cuáháⁿ cuendá sá ná quini ñáhá-dé xii-n sã ñí ndúha-n, te cuáñaha-n sã ndúú tãhú Yã Ndiõxí dàtná ní cachí ndí Moisés. Te ducaⁿ càda-n cuendá cutnùní iní ñáyiú sá ñí

ndúha-n —càchí-gá xãháⁿ-gã xii tée ní quide tátna-gá-áⁿ.

Jèsús quidé tãtna-gá ñⁿ tée xìnu cuechi núú ñⁿ tée cùu capitáⁿ

(Lc. 7:1-10)

⁵ Te Jèsús ní xica-gá cuáháⁿ-gá ñuú Capèrnaúm. Te òré cuánguìhu-gá ñuú-áⁿ te ní quexìo ñⁿ tée cùu capitáⁿ càháⁿ ndàhú-dé núú-gã, ⁶ te xãháⁿ-dë xii-gá:

—Mèstrú, véxi-í càháⁿ ndàhú-í núú-n núu vá cùndèe iní-n càda tátna-n ñⁿ tée xìnu cuechi núú-í, chi cùhú-dé te càhú víhí tnàhá-dé, te ío ndòho-dé te ni ñã cùndèe-gá-dé candá nihnu-dé —càchí-dé xãháⁿ-dë xii-gá.

⁷ Te Jèsús ní xãháⁿ-gã xii-dé:

—Te na quíhíⁿ-ó càda tátna-í-dé —càchí-gá xãháⁿ-gã xii-dé.

⁸ Te tée cùu capitáⁿ-áⁿ ñí xãháⁿ-dë xii-gá:

—Mèstrú, ñá túú tàú-í sá quíhu-n ndèe xítí vehe-í, chi cùu-í ñⁿ tée cùtexínu sá cúú-xí-n, te cáháⁿ-ni sá ndúha tée xìnu cuechi núú-í te ndúha-dé. ⁹ Chi yùhú ndècu cue tée tàxi tnuní ñáhá xii-í, te ducaⁿ yùhú tucu ndècu cue sandadú táxi tnùní-í. Te òré xãháⁿ-í xii ñⁿ-dë quíhíⁿ-dë ñⁿ chiúⁿ te cuáháⁿ-dë, te òré xãháⁿ-í xii ñngá-dé quixi-dé te véxi-dé, te òré xãháⁿ-í xii ñⁿ tée xìnu cuechi núú-í cada-dé ñⁿ chiúⁿ te quide-dé. Núu xíãⁿ yòhó cáháⁿ-ni sá ndúha tée xìnu cuechi núú-í te ndúha-dé —càchí-dé xãháⁿ-dë xii Jèsús.

¹⁰ Te Jèsús ío ní cuñúhu-gá sá dúcáⁿ ñí cáháⁿ tée cùu capitáⁿ-áⁿ, te ní xãháⁿ-gã xii nchaa ñáyiú nchícúⁿ ñáhá xii-gá:

—Na càchí tnúhu ndáá-í xii-ndo sã vátá quini-gá-í ni ñⁿ ñáyiú isràél, ñáyiú súúni ïo váha sàndáá iní ñáhá xii Yã Ndiõxí dàtná sàndáá iní ñáhá tée-a xii-gá. ¹¹ Te na càchí tnúhu ndáá tucu-í xii-ndo sã ïo cuéhé ñáyiú quixi ndàa xio nacúaa quène nchícanhii, te ñu-ni ducaⁿ ïo cuéhé tucu-yu quixi ndàa xio nacúaa quée tucu nchícanhii. Te nchaa ñáyiú-áⁿ naníhí tnàhá-yu ndihí té Àbrahám, ndihí té Isàác, ndihí té Jàcób núú ndécú Yã

Ndiöxí táxí tnùní-gá te yàcáⁿ cundecu ndihi ñáhá-yu xii-güedé. ¹² Te nchaa ñáyiú tàú nduu táhú cundecu núú ndécú Yá Ndiöxí táxí tnùní-gá ní cùu, ñáyiú-áⁿ quee tíhü-yu, chi quíhíⁿ-yu ìⁿ xichi núú néé núú ïo ndohó-yu cundecú-yu, te yàcáⁿ ïo ndáhí-yu, te dicó rúhñú-ná cuu núhu-yu sá sàtú iní-yu cuendá sá ndóhó-yu —càchí-gá xáhaⁿ-gá xii-yu.

¹³ Te Jèsús ní xáhaⁿ tùcu-gá xii téé cùu capitáⁿ-áⁿ:

—Yòhó téé ndècu ndihi téé cùhú cuanùhú vehe-n vitna chi ndúha-dé chi ní sándáá iní-n Yá Ndiöxí —càchí-gá xáhaⁿ-gá xii-dé.

Te ñu-ni òré ducaⁿ ñí xáhaⁿ Jèsús xii téé cùu capitáⁿ-áⁿ ñí ndúha téé xinu cuechi núú-dé.

Jèsús quidé tātna-gá nānā ñadihí té Pèlú

(Mr. 1:29-31; Lc. 4:38-39)

¹⁴ Te Jèsús ní xica-gá cuáháⁿ-gá vehe té Pèlú, te òré ní quexìo-gá vehe-dé te ní xiní-gá cáá nānā ñadihí-dé cùhú-aⁿ ñùhu vihi-aⁿ cahni.

¹⁵ Te Jèsús ní tñii-gá ndaha ñaha cùhú-áⁿ, te òré-ni-áⁿ ñí nchíco-aⁿ cahni te ní ndacóo-aⁿ ní xinu cuechi-aⁿ núú-güedé ndihi-gá.

Jèsús quidé tātna-gá vāi ñáyiú cùhú

(Mr. 1:32-34; Lc. 4:40-41)

¹⁶ Te òré ní dáhu nchíanchii te ní quexìo ñáyiú núú ndécú Jèsús, te ndécá-yu vāi ñáyiú yìhi ñaha espíritú cùndihi yucu ñávāha ní sáá núú-gá te ndèca tucú-yu vāi ñáyiú tnàhá dava-gá núú cuéhé. Te ìⁿ-ni tnúhu ní cáháⁿ Jèsús ní tenāá-gá nchaa espíritú cùndihi yucu ñávāha yìhi ñaha xii nchaa ñáyiú-áⁿ, te ní quee-xi yiqui cùñú-yu cuáháⁿ-xi. Te tnàhá nchaa dava-gá ñáyiú cùhú-áⁿ ñí quide tátna-gá. ¹⁷ Te ducaⁿ ñí cuu chi ní quee ndáá-xi nācuāa ní cáháⁿ ndíi Chàíá téé ní xóo cáháⁿ tnúhu Yá Ndiöxí ndéé sanaha, te duha ní cachí ndíi: “Mee-gá cada tátna ñaha-gá xii-o, chi ñu-gá xocàni-gá nchaa sá quidé ùhú yiqui cùñú-ó”, duha ní cachí ndíi.

Ñáyiú cuiní tuha ñaha xii Jèsús

(Lc. 9:57-62)

¹⁸ Te òré ní xiní Jèsús sá ïo cuéhé ñáyiú xixúcu núú ndécú-gá, te ní xáhaⁿ-gá xii cue téé xica cuu ndihi-gá sá quée-gá ndihi-güedé bàrcú cuendá téhndé-gá ndihi-güedé ndàa ingá xio yuhu làgúná. ¹⁹ Te mei òré-áⁿ ñí quexìo ìⁿ téé dàcuaha ñaha xii cue ñáyiú nchaa tnúhu ní chídó tnùní ndíi Moisés, te xáhaⁿ-dè xii-gá:

—Mèstrú, cuiní-í canchicúⁿ ñáhà-í xii-n ndèni ní cuu na quíhíⁿ-n —càchí-dé xáhaⁿ-dè xii-gá.

²⁰ Te Jèsús ní xáhaⁿ-gá xii-dé:

—Nchaa ñúcuui chi ndècu yaú cúu vèhe-güedi saquíhi-güedi, te nchaa cue quiti ndàva caa tacá-güedi diquí yutnu. Dico yúhú Téé cùu ñaní tnàhá-ndó nchaa-ndo chi ñá túú ndèé cáá vèhe-í ñuyíú-a ndetatú-í —càchí-gá xáhaⁿ-gá xii-dé.

²¹ Te ìⁿ téé ní chitnahá ñáhá xii Jèsús ní xáhaⁿ-dè xii-gá:

—Jèsús, dañā na nùhú-í cundetu-í cuú tātā-í te chindúxi-í-dé dātnùní quixi-í chitnahá ñáhá dùcaⁿ-ná-í xii-n —càchí-dé xáhaⁿ-dè xii-gá.

²² Te Jèsús ní xáhaⁿ-gá xii-dé:

—Dañā ñáyiú ñá túú sándáá iní ñáhá xii-í ná chindúxi tnàha meé-yu, chi ñáyiú-áⁿ cúu-yu dàtná ñáyiú ní xihí cuéi ndècu-ni-yu núú ñuyíú-a, te yòhó canchicúⁿ ñáhá-ni xii-í —càchí-gá xáhaⁿ-gá xii-dé.

Jèsús ngání-gā táchí ndihi ndute làgúná

(Mr. 4:35-41; Lc. 8:22-25)

²³ Te sáta dúcáⁿ te Jèsús cuánguee-gá bàrcú ndihi cue téé xica cuu ndihi-gá, te ní xica bàrcú-áⁿ cuáháⁿ-xi. ²⁴ Te ñini ñùhu bàrcú-áⁿ ichi cuáháⁿ-xi núú ndute ní xidí Jèsús, te ní ngúita-xi níhi vihi quene táchí, te ta nādachitú-xi ndute xití bàrcú cuáháⁿ. ²⁵ Te cue téé xica cuu ndihi-gá cuáháⁿ-güedé núú cáá-gá xidí-gá, te xáhaⁿ-güedé xii-gá:

—¡Mèstrú, ndiquíú iní chi dàcácu ñaha-n xii-o chi quée naa-o cuiní-xi! —càchí-güedé xáhaⁿ-güedé xii-gá.

²⁶ Te Jèsús ní xáhaⁿ-gá xii-güedé:

—¿Ná cuendá ndéé ducaⁿ ïo yùhú-ndó? ¿Náa ñá túú sàndáá iní ñáhá ndisa-ndo xii-í-ǎⁿ? —càchí-gá xǎhaⁿ-gǎ xii-güedé.

Te Jèsús ní ndacóo-gá te ní tenáa-gá táchí-ǎⁿ ndihí ndute-áⁿ, te ní ngüíñí táchí-ǎⁿ te ní nucúndecu nahi-ñá ndute làgúná-áⁿ. ²⁷ Te nchaa cue téé ñùhu xití bàrcú-áⁿ ñí cuñúhu-güedé sá dúcáⁿ ñí quide-gá ní xiní-güedé, te ní xitnáha-güedé:

—¿Te ná téé cùu téé-a núu duha ní cáháⁿ-ni-dé te ní ngüíñí táchí te ní nucúndecu nahi-ni ndùte làgúná-a-í? —càchí-güedé xitnáha-güedé.

Cue téé ñúú Gàdará cue téé yìhi ñaha espíritú cùndìhi yucu ñávǎha (Mr. 5:1-20; Lc. 8:26-39)

²⁸ Te òré ní quèxio Jèsús ndàa ingá xio yuhu làgúná yucu cue téé ñúú Gàdará, te úú tnàhá cue téé quide vehe núu yíndǔxi ndíyí ní quee-güedé cuáháⁿ-güedé núu ndécú Jèsús, te ndi ndúú-güedé yíhí ñàha espíritú cùndìhi yucu ñávǎha xii-güedé, te ío màñá-güedé chi vá yóo tnàhí dàña-güedé yáha yatni núu ndécú-güedé. ²⁹ Te cue espíritú yíhí ñàha xii-güedé-áⁿ ñí quide-xi níhi ní cáháⁿ-güedé, te xǎhaⁿ-güedé xii-gá:

—¿Ná cuendá véxi-ò Jèsús Déhe Dútú Ndiòxí chidácá ñáhá-n xii-ndí? ¿Áⁿ sàma véxi-n dàndoho ñàha-n xii-ndí? Te vátá sàá-gá nduu dùcaⁿ cada-n —cachí-güedé xǎhaⁿ-güedé xii-gá.

³⁰ Te yatni xíaⁿ xixica cuu vài cuchí xixexi-güedi. ³¹ Te cue espíritú cùndìhi yucu ñávǎha yìhi ñaha xii cue téé-áⁿ ñí cáháⁿ ndàhú-xi núu Jèsús, te xǎhaⁿ-xi:

—Te núu vá dáñá-gǎ-n quíhi-ndí yìquì cùñú cue téé-a, te càháⁿ ndàhú-ndí núu-n sǎ dàña-n na quíhíⁿ-ndí quíhu-ndí yìquì cùñú nchaa cùchí-ǎⁿ —càchí cue espíritú-áⁿ xǎhaⁿ-xi xii-gá.

³² Te Jèsús ní xǎhaⁿ-gǎ xii cue espíritú cùndìhi yucu ñávǎha-áⁿ:

—Chí táquèe yìquì cuñú cue téé-áⁿ te quíhíⁿ-ndó núu ndéé ichi

quíhíⁿ-ndó —càchí-gá xǎhaⁿ-gǎ xii nchaa espíritú-áⁿ.

Te cue espíritú cùndìhi yucu ñávǎha-áⁿ ñí quee-xi yìquì cùñú cue téé-áⁿ, te cuáháⁿ-xi cuánguihu-xi nchaa cùchí-áⁿ. Te cue quíti-áⁿ ñí xinu-güedi duha ní quee-güedi ndàa núu dèhvá yuhu làgúná-áⁿ, te ní ngaunihnu-güedi xití ndute, te ní ndihí-güedi ní cáhá.

³³ Te cue téé xito ñaha xii nchaa cuchí-áⁿ ñí yùhú-güedé te ní xinu-güedé, te ní sáháⁿ-güedé ní cani-güedé cuèndú núu cuè ñáyi ndècu xití ñúú nchaa nàcuáa ní cuu cuendá cue téé ní xihí ñaha nchaa espíritú cùndìhi yucu ñávǎha-áⁿ. ³⁴ Te nchaa ñáyi ñúú-áⁿ ñí quee-yu cuáháⁿ-yu núu ndécú Jèsús. Te òré ní quexió-yu núu ndécú-gǎ te ní cáháⁿ ndàhú-yu núu-gǎ sá ná quèe-gá yucu ñúú-yu núhú-gá.

9

Jèsús quidé tǎtna-gá ìⁿ téé cùhú ñá cúu-gǎ candá nihnu

(Mr. 2:1-12; Lc. 5:17-26)

¹ Te sátá dúcáⁿ ñí cuu te Jèsús cuánde-gá bàrcú cuáháⁿ-gá ní natehdé-gá ndàa ingá xio yuhu làgúná. Te xíaⁿ ñí ndexio-gá ñúú núu quidé ñúú-gá. ² Te xíaⁿ ndécú-gǎ ní quexio cue téé nchido-güedé ìⁿ téé cùhú ñá cúu-gǎ candá nihnu ñùhu-dé xito, te Jèsús ní cutnùní iní-gá sá sàndáá ndisa iní ñáhá-güedé xii-gá núu ní xǎhaⁿ-gǎ xii téé cùhú-áⁿ:

—Yòhó téé cùhú vá ndìhú-gá iní-n, chi sa ní quide càhnu iní-í nchaa cuèchi-n —càchí-gá xǎhaⁿ-gǎ xii-dé.

³ Te sá dúcáⁿ ñí cáháⁿ-gá núu xíaⁿ cue téé dàcuaha ñaha xii ñáyi nchaa tnúhu ní chídó tnùní ndí Moisés ní sani iní-güedé: “Téé-a càháⁿ cuèhé-dé cuendá Yá Ndiòxí”, duha ní sani iní-güedé. ⁴ Te Jèsús ní cutnùní iní-gá nàcuáa sani iní-güedé núu ní xǎhaⁿ-gǎ xii-güedé:

—¿Ná cuendá ducaⁿ sàni cuehé sání dùha iní-ndó? ⁵ Te sá dúhá ñí xǎhaⁿ-í xii téé cùhú-a sá ñí quide càhnu iní-í

nchaa yíca cuèchi-dé, te xíàⁿ nchòhò ñá túú cùtnuní iní-ndó nũ ndáá càháⁿ-í àdi ñá ndáá. Dico núu cúu-í-dé sá ndácòo-dé te caca-dé, te cutnùní ndáá iní-ndó nũ ndáá càháⁿ-í àdi ñá ndáá, chi cundehe nũú-ndó nàcuáa cada-í. ⁶ Te vitna na càda-í nàcuáa cutnùní iní-ndó nchaa-ndo sá yúhú Tée cùu ñaní tnáhá-ndó nchaa-ndo ndecu ndíhi-í tnúhu ndee iní ñuyíú-a sá cáda càhnu iní-í nchaa cuèchi ñáyiú –càchí-gá xáhaⁿ-gã xii-güedé.

Te sátá dúcáⁿ te ní xáhaⁿ-gã xii té cùhú-áⁿ:

–Ndacóo, te ndocani-n xító ñùhu-n véxi-áⁿ te núhú-n vehe-n –cachí-gá xáhaⁿ-gã xii-dé.

⁷ Te òré-ni-áⁿ ñí ndúha té cùhú-áⁿ te ní ndacóo-dé te ní ndocani-dé xító ñùhu-dé ní quexìo-áⁿ te ní xica-dé cuánuhú-dé vehe-dé. ⁸ Te nchaa ñáyiú xíndecu-áⁿ ño ní cuñúhu-yu sá dúcáⁿ ñí quide Jèsús ní xiní-yu, te ní cachí-yu sá ño càhnu cuu Yá Ndiòxí cuendá sá ñí sáñaha-gã xii Jèsús tnúhu ndee iní cada-gá nchaa sá vã yõo tnàhí ndàcu cada.

Jèsús càháⁿ-gá ñí tée nàni Mateú chitnahá ñáhá-dé xii-gá

(Mr. 2:13-17; Lc. 5:27-32)

⁹ Te Jèsús ní nucúhuⁿ tucu-gá ichi cuáháⁿ-gá, te ichi ñùhu-gá ní xiní-gá núcòo ñí tée nàni Mateú quidé còbrá-dé ñáyiú chi cobràdór impuèstú cúu-dé, te ní xáhaⁿ-gã xii-dé:

–Màteú, nehé chitnahá ñáhá-n xii-í –càchí-gá xáhaⁿ-gã xii-dé.

Te té Màteú-áⁿ ñí ndacuñí-dé ní chitnahá ñáhá-dé xii-gá.

¹⁰ Te ñí xito ndècu Jèsús ñí vehe, te yíhi-gá mèsá ndíhi cue téé xica cuu ndíhi-gá xéxi ndíhi ñaha-gá xii-güedé. Te tnàhá cue téé cuihna iní-xi quide cobrá ñáhá xii ñáyiú cuendá impuèstú yíhí ndíhi-gá mèsá, te tnàhá tucu dava-gá cue téé ndècu ichi cuehé ichi duha yíhi ndíhi-gá mèsá. ¹¹ Te sá ñí xiní cue téé cùu fariséú xéxi Jèsús ndíhi nchaa cue téé-áⁿ, te ní xicáⁿ tnúhú-güedé núu cuè téé xica cuu ndíhi-gá, te xáhaⁿ-güedé:

–¿Ná cuendá ducaⁿ quide téé cùu mestrú-ndó xèxi-dé ndíhi cue téé

cuihna iní-xi quide cobrá ñáhá xii ñáyiú cuendá impuèstú, ndíhi nchaa dava-gá cue téé ndècu ichi cuehé ichi duha-í? –càchí-güedé xáhaⁿ-güedé.

¹²⁻¹³ Te Jèsús ní tecú dóho-gá nàcuáa ndúu tnúhu ní xáhaⁿ-güedé xii cue téé xica cuu ndíhi-gá, núu ní xáhaⁿ-gã xii-güedé:

–Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í càháⁿ-í ñáyiú cùtnuní iní-xi sá ndécú cuèchi-xi cuendá dàñá-yu nchaa sá cuehé sá dúhá quidé-yu, te ñá túú véxi-í càháⁿ-í ñáyiú càchí sá ñá túú ndècu cuèchi-xi. Te chí cáda cuendá váha nàcuáa càháⁿ Yá Ndiòxí núu tütú-gá núu càchí-xi: “Yúhú cuini-í sá cùndahú iní-ndó cuè tnaha ñáyiú-ndo, te ñá díú mèe-ni sá cáhni-ndó quèti nduu táhú-í”, duha càchí-gá núu tütú-gá –càchí Jèsús xáhaⁿ-gã xii-güedé.

Cue téé ndècu tnúhu núu Jèsús cuendá ñáyiú ñá túú tnàhí ná xéxi áma càháⁿ ndíhi-yu Yá Ndiòxí

(Mr. 2:18-22; Lc. 5:33-39)

¹⁴ Te cue téé xica cuu ndíhi té Juáá téé dàcuandute ñaha xii ñáyiú ní sáháⁿ-güedé núu ndécú Jèsús, te xicáⁿ tnúhú-güedé núu-gã, te xáhaⁿ-güedé:

–Cuini-ndí cachí tnúhu-n ñá cuendá nchúhú, ndíhi cue téé cùu fariséú ñá túú tnàhí ná xéxi-ndí áma càháⁿ ndíhi-ndí Yá Ndiòxí, te cue téé xica cuu ndíhi-n ñá túú dùcaⁿ quide-güedé –càchí-güedé xáhaⁿ-güedé xii-gá.

¹⁵ Te Jèsús ní xáhaⁿ-gã xii-güedé:

–Nchòhó xini-ndó sã vã cúu cùñaha-o xii ñáyiú ñùhu vico tnándaha sã vã cúu càxí-yu ñini ndècu ndíhi ñaha téé tnándaha xií-yu, dico sáá nduu vã cùndècu ndíhi ñaha-gá téé tnándaha-áⁿ xií-yu, te dàvá-áⁿ te cahni iní-yu vá cáxí-yu cuendá sá ndíhú iní-yu.

¹⁶ Te ni vã yõo dándée luha dóo sáá ñí dóo sa ní cuu tühú víhí, chi dóo sáá-áⁿ nàndíyi-xi te uuⁿ-gá ndata-xi dóo sã ñí cuu tühú-áⁿ. ¹⁷ Te ni vã yõo

chìhi ndidí sáá xítí ìḡ lamba sa ní cuu tùhú víhí, chí núu yoo ducaⁿ na càda te ndava lamba sa ní cuu tùhú-áⁿ chí ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu, núu xǎⁿ xíní ñùhu-xi queé ndidí sáá-áⁿ xítí ìḡ lamba saa cuèndá ducaⁿ ñà túú ñà cuu cováha-xi — càchí-gá xǎhaⁿ-gǎ xii-güedé.

Cuèndá déhe yoco té Jàirú ndihí cuèndá ìḡ ñaha ní tnándeé dóó Jèsús

(Mr. 5:21-43; Lc. 8:40-56)

¹⁸ Te càháⁿ dúcáⁿ-ní Jèsús ní quexìo ìḡ tée cùnūu núú ndécú-gǎ, ìḡ tée tàxi tnuní veñúhu, te ní ngüíñí xítí-dé núú-gǎ càháⁿ ndàhú-dé, te xǎhaⁿ-dē xii-gǎ:

—Véxi-í càháⁿ ndàhú-í núú-n nūu vá cùndèe iní-n quíhíⁿ-ó vèhe-í dandòto-n déhe yoco-í chí ní xíhí-xi tnàvíí, te yúhú cùtnùní iní-í sá nūu quíhíⁿ-n tèndaha-n yíqui cuñú-xi te ndoto-xi —càchí-dé xǎhaⁿ-dē xii-gǎ.

¹⁹ Te Jèsús ní xica-gǎ cuáháⁿ-gǎ ndihí-dé ndihí cue tée xica cuu ndihí-gǎ. ²⁰ Te ichi ñùhu-gǎ cuáháⁿ-gǎ ní sáháⁿ ìḡ ñadìhí ní tnándeé-aⁿ yuhu dǎo-gǎ ndàa sáta-gǎ, te ñaha-áⁿ sa ní cuu úxúú cuía sǎ cùhú-aⁿ ngòyo ñaha níñí xii-aⁿ. ²¹ Te ducaⁿ ñí quide-aⁿ chí ní sani iní-aⁿ sá nūu ndacu-aⁿ tnándeé-aⁿ cuèdicó luha yuhu dóó Jèsús te ndúha-aⁿ ní sani iní-aⁿ. ²² Te Jèsús ní nchócótó-gǎ ndàa sáta-gǎ te ní xíní-gǎ ñadìhí-áⁿ, te ní xáhaⁿ-gǎ:

—Yòhó ñaha cùhú, vá ndìhú-gǎ iní-n vitna chí sa ní ndúha-n, chí ní sándáá iní ñáhá-n xii-í —càchí-gǎ xǎhaⁿ-gǎ xii-aⁿ.

Te òré-ni-áⁿ ñí ndúha ñaha cùhú-áⁿ.

²³ Te òré ní quexìo Jèsús vehe tée cùnūu taxi tnuní veñúhu-áⁿ, te ní xíní-gǎ xǐndáhí víhí ñáyiū, te xǐndecu müsicú. ²⁴ Te ní xáhaⁿ-gǎ xii-yu:

—Chí táquèe xítí vehe-a, chí xíchí-a ñá túú ní xíhí-xi chí dícó xidí-xi —càchí-gǎ xǎhaⁿ-gǎ xii-yu.

Te ní sácú ndeé ñáhǎ-yu xii-gǎ sá dúcáⁿ ñí càháⁿ-gǎ, chí sá cúú-xí mèe-yu te ní xíhí ndisa xíchí-áⁿ. ²⁵ Te ñáyiū-áⁿ ñí queé-yu te cuánguihu Jèsús núú cándòdo xíchí ñí xíhí-áⁿ,

te ní tnii-gǎ ndaha-xi te òré-ni-áⁿ ñí ndacóo-xi. ²⁶ Te nchaa ñuú cáá yàtni xíaⁿ ñí níhí ñáyiū tnúhu nàcuáa ní quide Jèsús.

Jèsús quidé tǎtna-gǎ núú úú tnàhá cue tée cuáá

²⁷ Te sáta dúcáⁿ ñí cuu te ní xica Jèsús cuánuhú-gǎ, te ichi ñùhu-gǎ ní chinchícúⁿ ñáhá úú tnàhá cue tée cuáá xii-gǎ, te níhi càháⁿ-güedé, te xǎhaⁿ-güedé xii-gǎ:

—Yòhó Jèsús, tée cùu ñaní tnáhá ndíi Dàvíí, cundàhú iní ñáhá xii-ndí —càchí-güedé xǎhaⁿ-güedé xii-gǎ.

²⁸ Te òré ní nasáá Jèsús núú quidé vèhe-gǎ, te cue tée cuáá-áⁿ ñí quexìo-güedé ndeé núú-gǎ, te ní xícáⁿ tnúhú-gǎ núú-güedé, te xǎhaⁿ-gǎ:

—¿Sándáá iní-ndó sǎ yúhú ndacu-í cada tǎtna-í núú-ndó-áⁿ? —càchí-gǎ xǎhaⁿ-gǎ xii-güedé.

Te ní xáhaⁿ-güedé xii-gǎ:

—Sándáá iní-ndí sá díú yòhó Jèsús ndacu-n càda tǎtna-n nūú-ndí —càchí-güedé xǎhaⁿ-güedé xii-gǎ.

²⁹ Te Jèsús ní dácáá-gǎ ndaha-gǎ ní tendaha-gǎ núú-güedé, te ní xáhaⁿ-gǎ xii-güedé:

—Te vitna, ndúha núú-ndó chí ní sándáá iní-ndó sǎ díú yúhú ndacu-í cada tǎtna-í núú-ndó —càchí-gǎ xǎhaⁿ-gǎ xii-güedé.

³⁰ Te òré-ni-áⁿ ñí ndúha núú-güedé, te Jèsús ní càháⁿ víhí-gǎ dóho-güedé cuèndá sá vǎ càháⁿ-güedé nàcuáa ní cuu ní ndúha núú-güedé.

³¹ Te cue tée-áⁿ òré ní ndee-güedé núú ndécú Jèsús, te ní ngüíta-ni-güedé ní caní-güedé cuèndú núú ñáyiū nàcuáa ní quide ñaha-gǎ xii-güedé. Te nchaa dava-gǎ ñuú cáá yàtni xíaⁿ ñí sáháⁿ-güedé ní caní-güedé cuèndú núú ñáyiū nàcuáa ní quide ñaha Jèsús xii-güedé.

Jèsús quidé tǎtna-gǎ ìḡ tée ñíhí

³² Te íchí ñí ndee cue tée ní ndúha núú-xi-áⁿ nūú ndécú Jèsús, te ní quexìo ìḡ úú ñáyiū ndècá-yu ìḡ tée ñíhí yíhí ñaha espíritú cùndihí yucu ñávǎha. ³³ Te Jèsús ní queñuhu-gǎ

espíritú cundìhi yucu ñávãha yìhi ñaha xii té-áⁿ, te òré-ni-áⁿ ñi cuu ní nacáháⁿ-dé. Te nchaa ñáyiu xĩndecu-áⁿ ïo ní cuñúhu-yu, te ní xitnàhá-yu:

—Ñá túú tnàhí xini-ó ìⁿ té duha cada ñuú nchoo cuè ñáyiu isràél ní cùu —cachí-yu xitnàhá-yu.

³⁴ Te cue té cùu fariséú ní ngüita-güedé xitnàha-güedé:

—Tée-a chi sácúíhná chindèe ñaha-xi xii-dé queñuhu-dé nchaa espíritú yìhi ñaha xii ñáyiu te ñu-ni sácúíhná-ãⁿ táxi tnùnì-xi nchaa espíritú-áⁿ —cachí-güedé xitnàha-güedé.

Jèsús cundàhú iní-gá ñáyiu

³⁵ Te Jèsús cuáháⁿ-gá nchaa ñuú náhnú ndìhi nchaa ñuú lìhli, te ndi tnahá ìⁿ ìⁿ ñuú sàá-gá te ducaⁿ cuãnguihu-gá ìⁿ ìⁿ veñúhu càa nchaa ñuú-áⁿ dánèhé-gá ñáyiu tnúhu váha, tnúhu sá sánú ìchi ñaha xií-yu nàcuáa ndíhu ndaha ñaha Yá Ndiõxí xií-yu. Te ducaⁿ-ni ta quide tátna-gá nchaa ñáyiu cùhú cuáháⁿ cuè ndi ñiⁿ ndi ñiⁿ núú cuèhé tnàhá-yu ìⁿ ìⁿ-yu. ³⁶ Te sá ñi xini Jèsús sá ïo vai ñáyiu nchicúⁿ ñáhá xii-gá, te ní cundàhú iní ñáhá-gã xií-yu chi ïo ndihú iní-yu, te vá yõo nèhe cuendá ñáhá xii-yu, te cùu-yu dàtná cue mbèé cue quitì ñá túú tòli-xi. ³⁷ Te Jèsús ní xáhaⁿ-gã xii cue té xica cuu ndihí-gá:

—Nchòhó xini-ndó sã òré ná sàá nduu cùu nchaa sá xitú ñáyiu te ïo vai cuu. Te na cachí tnúhu ndáá-í xii-ndo sã dàtná ïo vai sá xitú ñáyiu cùu, ducaⁿ ïo vai ñáyiu cùmání cundedóho tnúhu-í, te ïo sacú ñáyiu dàcuaha ñaha xií-yu. ³⁸ Núu xíãⁿ xini ñuhu-xi cácaⁿ-ndó núú Yã Ndiõxí Yaá cúú Xitohó-ndó ndihí-yu cuendá sá ná dàcaháⁿ-gá iní-yu cáháⁿ-yu tnúhu-gá núú nchaa dava-gá tnàha ñáyiu-yu cùmání cundedóho tnúhu-gá —cachí-gá xáhaⁿ-gã xii-güedé.

10

Jèsús sãñaha-gã tnúhu ndee iní xii ndi ùxúú cue té xica cuu ndihí-gá
(Mr. 3:13-19; Lc. 6:12-16)

¹ Te Jèsús ní cana-gá ndi ùxúú cue té xica cuu ndihí-gá, te ní sãñaha-gã xii-güedé tnúhu ndee iní cundecu ndihí-güedé cuendá queñuhu-güedé nchaa espíritú cundìhi yucu ñávãha yìhi ñaha xii ñáyiu, ndihí cuendá sá cadá tátna-güedé nchaa dava-gá ñáyiu cùhú cuè nándi núú cuèhé tnàhá-yu.

² Te duha xĩnani ndi ùxúú cue té-áⁿ: té cùnno-gá nání-dé Ximú, àdi Pelú chi úú ñu-dé, te ñaní-dé cúú tã Ndríxí, te tnàhá té-áⁿ cúú-dé té xica cuu ndihí Jesús, ndihí té Jàcobó ndihí ñaní té Jàcobó-áⁿ tãe nani Juaá, te ndi ndúú cue té-áⁿ cúú-güedé déhe té Zebèdeú. ³ Te tnàhá té Lìpé xicá cùu ndihí-gá, ndihí té Bartolómé, ndihí té Mãxí, ndihí té Mâteú té cùu cobradór impuestú ní cùu, ndihí té Jàcobó déhe té Àfeú, ndihí té Lèbeú tée dãnani-güedé Tàdeú, ⁴ ndihí té Ximú té ní cundihí cue té cananistá, ndihí té Jüdás Iscarioté té ní sáá nduu ñi sáha cuendá ñáhá xii Jesús núú cuè té cùu úhú iní ñáhá xii-gá.

Jèsús téndàha-gá ndi ùxúú cue té xica cuu ndihí-gá quihíⁿ-güedé cáháⁿ-güedé tnúhu-gá núú ñáyiu

(Mr. 6:7-13; Lc. 9:1-6)

⁵⁻⁶ Te Jèsús ní xáhaⁿ-gã xii ndi ùxúú cue té xica cuu ndihí-gá sá quihíⁿ-güedé cáháⁿ-güedé tnúhu-gá núú ñáyiu, te cùmání-gã caca-güedé quihíⁿ-güedé, te ní xáhaⁿ-gã xii-güedé:

—Na cachí tnúhu-í xii-ndo sã méé-ñi ñuú núú xĩndecu cue ñáyiu isràél quihíⁿ-ndó cáháⁿ-ndó tnúhu-í, te vá quihíⁿ-ndó ñi ìⁿ ñuú yíndèhu distritú Sãmariá, te ñi vá quihíⁿ-ndó dàva-gá ñuú núú xĩndecu ñáyiu ñá túú cùu ñáyiu isràél. Te cue ñáyiu isràél-áⁿ cúú-yu dàtná cue mbèé cue quitì ní xita chi ta xita nihnú-yu cuáháⁿ. ⁷ Te cùñaha-ndo xií-yu sá sã ní cuyatni nduu ndíhu ndaha ñaha Yá Ndiõxí xií-yu. ⁸ Te cada tátna-ndo nchaa ñáyiu cùhú cuè ñáyiu tnàhá cuèhé sã dátèhyú nihnu-xi yiqui cùñú-yu, te queñuhu-ndo nchaa espíritú cundìhi yucu ñávãha yìhi ñaha xii ñáyiu, te

dandòto-ndo cue ñáyiú sa ní xíhí, te vá càcáⁿ-ndó yáhu-ndo núú ñáyiú òré cada-ndo nchàa chiuⁿ-án, chi sa nàha-ndo sá dìcò ducaⁿ ñí taxi-í tnúhu ndee ìní ndécú ndìhi-ndo.

⁹ Te vá cànèhe-ndo díhúⁿ cuu ichi-ndo, ¹⁰ te ni vǎ cànèhe-ndo ñunu cuhuⁿ ndachiuⁿ-ndo, te ni vǎ cànèhe-ndo ìngá ichi dóó-ndó nàdáma-ndo, te ni vǎ cànèhe-ndo úú-gá chàu-ndó chi ñiú-ni chàu yíhí-ndó-ǎⁿ xǎⁿ-ni quíhi-ndo, te ni vǎ cànèhe-ndo tatnu, te ducaⁿ càda-ndo chi nchòhó sa nàha-ndo sá ncháá ñáyiú quidè chiuⁿ te ñiú-ni cuendá chiuⁿ quidè-yu níhí-yu sá xéxǐ-yu.

¹¹ Te ndi tnahá ñuú ná quèxio-ndo te nducu-ndo ñáyiú cùtnuní ìní-ndó sǎ cúú-yu ñáyiú váha, te vehe ñáyiú-án cundecu-ndo ndèé sáá nduu ndèe-ndo ñuú-án. ¹² Te òré quèxio-ndo vehé-yu te cúñaha-ndo xii-yu: “Yá Ndiòxí chíndèe chitúu ñaha-gǎ xii-ndo ndècu-ndo”, duha cúñaha-ndo xii-yu. ¹³ Te núu ní cǎháⁿ váha ndìhi ñàhá-yu xii-ndo, te cuu-xi sá váha sá cúú-xí-yu cuendá tnúhu ní xáhaⁿ-ndo-ǎⁿ, dico núu ñá túú ní cǎháⁿ váha ndìhi ñàhá-yu xii-ndo, te cúñaha-ndo xii-yu sá vǎ cúú-xí sǎ váha xii-yu tnúhu ní xáhaⁿ-ndo-ǎⁿ. ¹⁴ Te núu ní sáá-ndó ñíⁿ ñuú àdi ñíⁿ vehe, te núu ñá túú ní cǎháⁿ ndìhi ñaha váha-yu xii-ndo te ni ñà túú ní cuíní-yu cundedóho-yu tnúhu cǎháⁿ-ndó te ndee-ndo ñuú-án àdi vehe-án, te naquidí-ndo tícǎ chúhmá ñí tníi sáhá-ndó cuendá ná cùtnuní ìní-yu sá ñà túú quidè váha-yu. ¹⁵ Te na càchí tnúhu ndáá-í xii-ndo sǎ sáá nduu te ío-gá dandòho ñaha Yá Ndiòxí xii ñáyiú ducaⁿ na càda ñaha xii-ndo-án dàcúúxí ñáyiú ní xíndecu ñuú Sòdomá ndìhi ñuú Gòmorrá.

Ndoho tnahá-ó cùndecu-o ichi Xítóhó Jesucrístú

¹⁶ Te càda ìní-ndó sǎ cúú-ndó dàtná cue mbéé cue quítì cuáháⁿ núú ío yíhí. Te ducaⁿ sǎtnahá-xi cùu-ndo chi yúhú tendaha ñaha-í xii-ndo quíhíⁿ-ndó núú xíndecu cue ñáyiú cuihna ìní-xi, te ío váha cuáha-ndo cuendá nàcuáa cada-ndo dàtná quidè

cóó, dico cunduu váha ìní-ndó ñà túú nǎ cada-ndo dàtná quidè lómá.

¹⁷ Te quíhi ìní-ndó chi cue ñáyiú na cùu úhú ìní ñàhá xii-ndo, te cuáha cuendá ñàhá-yu xii-ndo núú cuè téé cùchiuⁿ, te caniha-güedé xii-ndo xítì veñúhu-güedé. ¹⁸ Te dava tucu ñáyiú cuu úhú ìní ñàhá xii-ndo candeca ñàhá-yu xii-ndo quíhíⁿ núú cuè téé cùnuu yíndaha nacióⁿ, àdi núú dàva-gá cue téé cùnuu sá cuendá-í. Te nchòhó níhí-ndó nàcuáa cada-ndo cǎháⁿ váha-ndo cuendá-í núú-güedé ndìhi núú cuè ñáyiú ñà túú cùu ñáyiú isràél. ¹⁹⁻²⁰ Dico òré cuáha cuendá ñàhá-yu xii-ndo núú nchàa cue téé-án, te vá cǎní ìní-ndó núú nása cunduu tnúhu cǎháⁿ-ndó núú-güedé, chi òré-nǎ te níhí-ndó tnúhu cǎháⁿ-ndó. Te ñà ñíú mèe-ndo cahu ìní-ndó tnúhu cǎháⁿ-ndó, chi mee Espíritú Yá Ndiòxí Yá cúú Tǎtá-ndó dàcáhú ìní ñàhá-xí xii-ndo nàcuáa cunduu tnúhu cǎháⁿ-ndó.

²¹ Te dava cue téé cuáha cuendá-güedé ñaní-güedé núú cuè téé cùchiuⁿ cuendá cahni ñaha-güedé, te dava cue téé cùu tǎtá ñiú-ni ducaⁿ càda-güedé déhe-güedé, te ñiú-ni ducaⁿ càda ñaha dava cue ñáyiú cùu déhe xii tǎtǎ-yu ndìhi nǎnǎ-yu, chi cuáha cuendá ñàhá-yu núú cuè téé cùchiuⁿ cuendá cahni ñaha-güedé xii-yu. ²² Te nchòhó chi nchaa ñáyiú ngüíta-yu cuu úhú ìní ñàhá-yu xii-ndo sǎ cuendá-í. Te núu na càda ndee-ni ìní-ndó cànchicúⁿ níhnu-ni-ndo ìchi-í cuèi nǎndí sá ná càda ñàhá-yu xii-ndo ndèé ná sáá nduu vǎ cùndècu-gá-ndó ñuúyú-a ña, te nduu tǎhú-ndó cùndecu-ndo ni caa ni quíhíⁿ ndìhi Yá Ndiòxí. ²³ Te núu ñíⁿ ñuú cuíní-güedé tníi ñaha-güedé xii-ndo càda úhú ñàhá-güedé sá cuendá-í, te cunu-ndo núú-güedé quíhíⁿ-ndó ìngá ñuú. Te na càchí tnúhu ndáá-í xii-ndo sǎ cùmání-gǎ quíhíⁿ-ndó nchàa dava-gá ñuú núú xíndecu ñáyiú isràél cǎháⁿ-ndó tnúhu-í, te sa quixi tucu yúhú, Téé cùu ñaní tnahá-ndó nchàa-ndo ñuúyú-a.

²⁴⁻²⁵ Te nchòhó xíní-ndó sǎ ñíⁿ téé dàcuaha ñà túú cùnuu-dé dàcúúxí

mèstrú-dé, te núu mèstrú téé-áⁿ nãndi yãha-dé ndécú-dě te tàú-dé nduu vétú iní-dé te núu tnàhá-dé yãha-dé dàtná yãha mèstrú-dé-áⁿ. Te ñii-ni ducaⁿ sãtnahá tucu-xi cùu ñⁿ téé xínu cuechi, chi ñá túú cùnuu-dé dàcúúxí pãtróóⁿ-dě, te nchaa sá yãha pãtróóⁿ-dě-áⁿ te tàú-dé nduu vétú iní-dé te núu tnàhá-dé yãha-dé dàtná yãha pãtróóⁿ-dě-áⁿ. Te núu yúhú Yáá táxí tnùní ñáhá xii-ndo cachí-yu sá cùú-í sácúíhná, te uuⁿ-gá ducaⁿ cùñahá-yu xii nchòhó cue téé cùndihí-í.

Vá yùhú-ó cuendá nchaa sá cádá ñàha ñáyíu xii-ó

(Lc. 12:2-7)

²⁶ Te nchòhó vá yùhú-ndó nũú ñáyíu. Chi nchaa tnúhu sá cùú yùhu ni cuu vá cùú yùhu-gá, chi nchaa dacuítí sã quée túu-xi núú ñáyíu. ²⁷ Te nchaa tnúhu sá càchí tnúhu-í xii-ndo nũú méé nũú ñⁿ-ó, cùu-xi tnúhu sá ndúú yùhu ni cuu datúu-ndo nũú cué ñáyíu cuéi núú chítú nũú tàcá. ²⁸ Te xini ñuhu-xi sá vã yùhú-ndó cué ñáyíu cuéi na càhni ñahá-yu xii-ndo, chi ñii-ni yiqui cùñú-ndó ndacú-yu cahní-yu, dico ñá túú nãgá ndacú-yu cada ñahá-yu xii-ndo. Te tàú-ndó sã Yã Ndióxi yùhú-ndó chi Yáá-áⁿ ndacu-gá danàa-gá yiqui cùñú-ndó, te ndacu-gá daquihíⁿ ñáhá-gã xii-ndo nũú ùhú núú ndàhú.

²⁹ Te nchòhó xini-ndó sã ndéé úú tnàhá tìlãá cùyãhu-di núú ñⁿ-ní ñíhúⁿ, te ni ñⁿ-di ñá túú xihí cùtexínu-di chi ndéé nũu mee Yã Ndióxi Yáá cùú Tãtã-ndó ná càchí-gá te xihí-di. ³⁰ Dico nchòhó chi ío-gá néhé cuendá ñáhá Yã Ndióxi xii-ndo chi ndéé idi díquí-ndó yìndehu. ³¹ Núu xíãⁿ càchí-í sá vã yùhú-ndó chi cùnuu-gá-ndó dàcúúxí tìlãá cuéi vãi vihi-güedi.

Nchaa ñáyíu datúu núú tnàha ñáyíu-xi sá ndécú ndihí-yu Xitohó Jesucristú

(Lc. 12:8-9)

³² Te na càchí tnúhu-í xii-ndo sã ncháá ñáyíu na datúu núú tnàha ñáyíu-xi sá ndécú ndihí ñahá-yu xii-í,

te ducaⁿ te tnàhá yúhú datúu-í núú Tãtã-í Dútú Ndióxi Yáá ndécú àndíu sá ndécú ndihí-í-yu. ³³ Dico nchaa ñáyíu na cùñaha xii tnaha ñáyíu-xi sá ñà túú ndécú ndihí ñahá-yu xii-í, te ñii-ni ducaⁿ càda yúhú tucu chi cùñaha-í xii Tãtã-í Dútú Ndióxi Yáá ndécú àndíu sá ñà túú ndécú ndihí-í-yu.

Ñá túú cùu ñⁿnuu ñáyíu

(Lc. 12:51-53; 14:26-27)

³⁴ Te na càchí tnúhu-í xii-ndo sã vã caní iní-ndó sã yùhú véxi-í ñuyíú-a te cuu ñⁿnuu-gã ñáyíu cundecú-yu, chi da ngüita-yu vá cùú ñⁿnuu-gá-yu cundecú-yu, te ducaⁿ chi nchaa ñáyíu vá quindáá iní ñáhá xii-í ñáyíu-áⁿ ngõo-yu cuu úhú iní-yu nchaa ñáyíu quindáá iní ñáhá xii-í. ³⁵ Te dava cue téé xíndecu tãtã-xi te ngóo-güedé cuu úhú iní-güedé tãtã-güedé, te ñii-ni ducaⁿ càda cue ñáyíu ñíhí xíndecu nãná-xi, chi ngóo-yu cuu úhú iní-yu nãná-yu, te ñii-ni ducaⁿ càda tucu cue ñáyíu cùu sãnu, chi ngóo-yu cuu úhú iní-yu nãná yí-yu. ³⁶ Te ndi mèé-yu vehé-yu ngóo-yu vá cùú ñⁿnuu-gá-yu cundecú-yu.

³⁷ Te na càchí tnúhu tucu-í xii-ndo sã ncháá ñáyíu ío-gá ná cùu iní tãtã-xi àdi nãná-xi dàcúúxí yùhú, te ñáyíu-áⁿ ñà túú tàú-yu cundecu ndihí ñahá-yu xii-í, te nchaa ñáyíu ío-gá ná cùu iní déhe ducuⁿ-xi, àdi déhe yoco-xi dàcúúxí yùhú, te ñii-ni ducaⁿ ñà túú tàú-yu cundecu ndihí ñahá-yu xii-í.

³⁸ Te nchaa ñáyíu vá càchícúⁿ ni-hnu ñaha xii-í cuendá sá yùhú-yu ndohó-yu dàtná ndoho-í ñáyíu-áⁿ ñà túú tàú-yu cundecu ndihí ñahá-yu xii-í. ³⁹ Te cue ñáyíu na yùhú cuú sá cuendá-í te ñáyíu-áⁿ cuíta nihnú-yu, dico nchaa ñáyíu vá yùhú cuú sá cuendá-í, te ñáyíu-áⁿ nduu táhú-yu cundecú-yu ni caa ni quihíⁿ ndihí Yá Ndióxi.

Cuendá sá ndúú tãhú-ó

(Mr. 9:41)

⁴⁰ Te nchaa ñáyíu na quèheⁿ cuendá ñáhá xii-ndo te cada iní-yu sá tnàhá yúhú ní quèheⁿ cuendá-yu. Te nchaa

ñáyiú na quèheⁿ cuendá ñáhá xii-í, te cada iní-yu sá tnàhá Tàtà-í Dútú Ndiöxí Yaá ní tendaha ñàha xii-í véxi-í ñuyíú-a ní queheⁿ cuendá-yu. ⁴¹ Te nchaa ñáyiú na quèheⁿ cuendá ìⁿ tée càháⁿ tnúhu Yá Ndiöxí cuendá sá quidé-dě chiúⁿ-gá, te dàtná-ni càa táhú cuañaha-gã nduu táhú tée ducaⁿ càháⁿ tnúhu-gá-áⁿ, diu-ni ducaⁿ cùnduu táhú cuañaha-gã nduu táhú ñáyiú ducaⁿ na quèheⁿ cuendá ñáhá xii-dé. Te nchaa ñáyiú na quèheⁿ cuendá ìⁿ tée quide váha cuendá sá dúcáⁿ quide váha-dé, te dàtná-ni càa táhú nduu táhú tée-áⁿ diu-ni ducaⁿ cùnduu táhú nduu táhú ñáyiú na quèheⁿ cuendá ñáhá xii-dé. ⁴² Te nchaa ñáyiú na cuañaha ìⁿ yaxiⁿ ndute coho ìⁿ ñáyiú cùu cuendá-í cuendá sá ñi tuha ñàhá-yu xii-í cuéi ñá túú cùnuu vihi-yu, te ñáyiú ducaⁿ na cuañaha ndüte-áⁿ ñihí-yu sá ndúú tãhú-yu núú Yá Ndiöxí –càchí Jèsús xãhaⁿ-gã xii-güedé.

11

Jèsús càháⁿ ndihí-gá cue téé xica cuu ndihí té Juàá

(Lc. 7:18-35)

¹ Te sátá ñi yáha ducaⁿ ñi xáhaⁿ Jèsús xii ndi ùxúú cue téé xica cuu ndihí-gá, te ní xica-gá cuáháⁿ-gá nchaa ñuú cáa yàtni xiáⁿ dánèhé-gá ñáyiú tnúhu-gá.

² Te té Juàá yihí-dé vecaá te ní níhí-dě tnúhu nchaa nàcuáa quide Xítoho Jesucristú. Te sátá dúcáⁿ te ní tendaha-dě ìⁿ úú cue téé xica cuu ndihí-dé cuáháⁿ-güedé núú ndécú Jèsús. ³ Te òré ní quexìo-güedé núú ndécú-gã, te xicáⁿ tnúhú-güedé núú-gã nàcuáa ní xáhaⁿ tã Juàá xii-güedé, te xãhaⁿ-güedé xii-gá:

–Véxi-ndí xicáⁿ tnúhú-ndí núú-n ñuú sá díú-n cùu-n Cristú Yaá ní tendaha Yá Ndiöxí véxi ñuyíú-a, àdi sá cùndetu nahi-ni-ndí mei Yáá-áⁿ –càchí-güedé xãhaⁿ-güedé xii-gá.

⁴ Te Jèsús ní xáhaⁿ-gã xii-güedé:

–Chí cuánuhú te cani-ndo cuendú núú tã Juàá nchaa sá ñi xiní-ndó quide-í, ndihí nchaa nàcuáa ndùu tnúhu ní càháⁿ-í ní xíndedóho-ndo.

⁵ Te cúñaha-ndo xii-dé sá quidé tãtna-í núú cué ñáyiú cuáa, te quide tãtna-í cue ñáyiú yacua, ndihí cue ñáyiú tnàhá cuéhé sã dátèhyú nihnu-xi yiqui cùñú-yu, ndihí cue ñáyiú doho, nchaa ñáyiú-áⁿ quidé tãtna-í, te ndúha-yu, te ndéé tnàhá cue ñáyiú sa ní xihí dándòto-í cúñaha-ndo. Te cúñaha tùcu-ndo xii-dé sá ndécuu-í dánèhé-í nchaa ñáyiú ndàhú, tnúhu sá sánú ichi ñaha xii-yu nàcuáa naníhí tãhú-yu. ⁶ Te cúñaha tùcu-ndo xii-dé sá ìo váha táhú nchaa ñáyiú ñá túú quide sáa iní-xi nchaa tnúhu càháⁿ-í, duha cúñaha-ndo xii-dé –càchí-gá xãhaⁿ-gã xii-güedé.

⁷ Te sátá ñi yáha-güedé cuánuhú-güedé te ní ngúita Jèsús ní càháⁿ-gá núú ñáyiú cuendá té Juàá, te xãhaⁿ-gã xii-yu:

–Nchòhó ní sáháⁿ ndéhé-ndó ìⁿ téé ndécú xití yucu, te téé-áⁿ ñá túú sàni ìⁿ sàni úú iní-dé, chi ñá túú quide-dé dàtná quidé nchaa ité náhnú cuáháⁿ-xi duha cuáháⁿ-xi dàcáⁿ òré quéné tãchí. ⁸ Te ní ñá túú ní sáháⁿ ndéhé-ndó ìⁿ téé nihnu dóó váha dóó vii càa. Te nchòhó xiní-ndó sã ncháá ñáyiú nihnu dóó váha dóó vii càa xíndecú-yu vehe cue téé cùnuu yíndaha ñáyiú. ⁹ Dico nchòhó chi ní sándéhé-ndó ìⁿ téé càháⁿ tnúhu Yá Ndiöxí, te ndáá sá díú ìⁿ téé càháⁿ tnúhu-gá cúú-dě, te cùnuu-gá-dé dàcúxí dàva-gá cue téé càháⁿ tnúhu-gá. ¹⁰ Te diu cuendá té Juàá-áⁿ càháⁿ-xi núú tütú Yá Ndiöxí nàcuáa ní xáhaⁿ-gã xii Cristú, te duha ní xáhaⁿ-gã:

Tendaha-í ìⁿ téé càháⁿ-dé tnúhu-í codonùu-dé núú-n,

cuendá dàtúha-dé ñáyiú cuendá quíndáa iní-yu tnúhu-n.

Duha ní xáhaⁿ-gã, te ducaⁿ ñi ngódó tnùní núú tütú-gá. ¹¹ Te na càchí tnúhu ndáá-í xii-ndo sã ñi ìⁿ cue téé ñuyíú-a ñá túú cùnuu-güedé dàtná cùnùu té Juàá téé dàcuandute ñaha xii ñáyiú. Te nchaa ñáyiú sa ta ndíhu ndaha ñàha Yá Ndiöxí vitna cuáháⁿ cùnùu-gã-ni tucú-yu dàcúxí té Juàá

cuèi cùu-yu ñáiyu ñá túú cùnuu dácúúxí dáva-gá ñáiyu yìndaha-gá.

12 Te ndéé cùtnàhá ní ngüíta té Juàá té dácuanđute ñaha xii ñáiyu càháⁿ-dé tnúhu Yá Ndiöxí ñuyíú-a, ndéé dává-áⁿ nǐ ngüíta ñáiyu cuìní-yu sá ndíhu ndaha ñàha Yá Ndiöxí xií-yu te ndècu ndeé-yu quidé-yu nàcuáa ndíhu ndaha ñàha-gá xií-yu. 13 Te nchaa cue téé ní xóo càháⁿ tnúhu Yá Ndiöxí ndéé sanaha nǐ càháⁿ-güedé sá díú-gă ndíhu ndaha-gă cue ñáiyu, te ñu-ni ducaⁿ nǐ càháⁿ tucu ndíi Moisés ní ngódó tnùnǐ núú tütú ndíi. Te ñu-ni ducaⁿ cùnuu nchaa tnúhu-áⁿ càháⁿ-xi nàcuáa ndíhu ndaha Yá Ndiöxí ñáiyu ndéé ní sáá nduu nǐ ngüíta té Juàá càháⁿ-dé tnúhu-gá ñuyíú-a. 14 Te na càchí tnúhu-í xii-ndo sǎ cáda cuendá-ndó, chí núú tütú Yá Ndiöxí càchí-xi sá ndíxí tē Èliás, te ñu núú tē Èliás-áⁿ nǐ quide té Juàá. 15 Te nchaa nchòhó ñáiyu ndèdóho nchaa tnúhu càháⁿ-í-a te ío váha chí cuàha cuendá.

16 Te na càchí tnúhu tucu-í xii-ndo nàcuáa sǎtnahá-xi cùu ñáiyu ndècu vitna. Chí ñáiyu-áⁿ cúu-yu dàtná cue landú sácóo núú yáhu dàdiqui-güexi te níhi càháⁿ-güexi, te xǐtnàha-güexi ndi mee landú-güexi: 17 “Ní tiú-ndí yaá ndíhi vílu te ñá túú ní cuìní-ndó càta-ndo. Te ío yica ìní ní xita yuhu-ndí te ñá túú ní ndǎhyú-ndó”, càchí-güexi xǐtnàha-güexi. Te ducaⁿ sǎtnahá-xi cùu ñáiyu ndècu vitna, 18 chí té Juàá ío ndáhú ní xóo caxi-dé, te nǐ ñà túú ní xóo coho-dé ndudí ndéhé yoho yàha stilé sá sà ní nduu-xi ndidí, te sá dúcáⁿ nǐ xóo cada-dé te ní cachí-yu sá nǐ xíndecu ndíhi-dé espíritú cùndíhi yucu ñávàha. 19 Te sáta nǐ quexió yúhú Téé cùu ñanǐ tnáhá-ndó nchaa-ndo, te xèxi-í xíhi-í quidè-í, te càchí-yu sá yúhú cúu-í ñⁿ téé xèxi vihi te xíhi vihi, te càchí tucu-yu sá cúu-í téé xica cuu ndíhi cue téé cuíhna ìní-xi quide cobrá ñáhá xií-yu cuendá impuèstú ndíhi nchaa dáva-gá cue téé ndècu ichi cuehé ichi duha, duha càchí-yu. Te ñáiyu ní tnahá tnúhu ndíhi Yá Ndiöxí, ñáiyu-áⁿ

quidè-yu sá vǎha nàcuáa cutnùnǐ sá méé-gă ío ndècu ndíhi-gá sá xini tnùnǐ-gá —càchí-gá xǎhaⁿ-gă xií-yu.

Cuendá ñáiyu dáva ñuú ñá túú sàndáá ìní tnúhu Xítóhó Jesucristú (Lc. 10:13-15)

20 Te Jèsús ní ngüíta-gá càháⁿ-gá dóho nchaa ñáiyu ñuú núú ío-gá vǎi núú sǎ vǎ yóo tnàhí ndàcu cada ní quide-gá, chí nchaa ñáiyu ñuú-áⁿ ñà túú cuìní-yu ndixi túu ìní-yu sá ñà túú quide váha-yu ndècú-yu, te xǎhaⁿ-gă xií-yu:

21 —¡Ndàhú nchòhó cue ñáiyu ñuú Corazín! ¡Te ndàhú nchòhó cue ñáiyu ñuú Betsaidá! Chí núú dícó ñuú Tírú ndíhi ñuú Sidón ní quide-í nchaa sá vǎ yóo tnàhí ndàcu cada datná ní quide-í ñuú-ndó-á nǐ xini-ndó ñá, te sá ndéé ama-gá cuíhnú-yu dóo ndáhú te cunu cóo-yu núú yáa cuendá sá ndíxí cuèchi ìní-yu sá ñà túú quide váha-yu ní cùu. 22 Dico sáá nduu te ío-gá dandòho ñaha Yá Ndiöxí xii-ndo dácúúxí ñáiyu ñuú Tírú ndíhi ñáiyu ñuú Sidón. 23 Te nchòhó cue ñáiyu ñuú Capernaúm ío quide cahnu-ndo mee-ndo, te quide ìní-ndó sǎ sá cuánda-ná-ndó àndíu, dico ñáhá chí núú ùhú núú ndáhú nduu táhú-ndó cùndecu-ndo. Te núú dícó ñuú Sòdomá ní quide-í nchaa sá vǎ yóo tnàhí ndàcu cada datná ní quide-í ñuú-ndó nǐ xini-ndó ñá, te ñáiyu-áⁿ vǎ nǎa-yu chí cundecu-ní-yu ndéé vitna ní cùu. 24 Te na càchí tnúhu-í xii-ndo sǎ sáá nduu te ío-gá dandòho ñaha Yá Ndiöxí xii-ndo dácúúxí ñáiyu ñuú Sòdomá —càchí-gá xǎhaⁿ-gă xii nchaa ñáiyu ñuú-áⁿ.

Jèsús cuìní-gá sá túhá ñàha ñáiyu xii-gá

(Lc. 10:21-22)

25 Te sáta xǎⁿ te Jèsús ní ngüíta-gá càháⁿ ndíhi-gá Tǎtá-gă Dútú Ndiöxí, te xǎhaⁿ-gă:

—Yòhó Tǎtà-í Dútú Ndiöxí, ío chíñuhu ñaha-í xii-n chí ñu-n tàxi tnùnǐ-n àndíu ndíhi ñuyíú-a, te dǎnehé-n cuè ñáiyu nchaa tnúhu váha, te ñu-ni ñáiyu-áⁿ cúu-yu ñáiyu ñá túú cùtnùnǐ ìní-xi nchaa tnúhu càháⁿ cue

tée cächí sá ïo túha, te nchaa tnúhu váha-án ñà túú dàtúu-n nùú ñáyiú cächí sá ïo túha te ío váha sàá díquí-xi. ²⁶ Chi ducaⁿ cuíní-n cùnduu –cachí-gá xáhaⁿ-gá xii Tàtá-gá.

²⁷ Te xáhaⁿ-gá xii nchaa ñáyiú xíndecu-án:

–Mee Tàtá-í Dútú Ndiöxí ní cachí-gá sá cùnùu-í nùú nchàandí túhú sá ío. Te vá yõ ñⁿ-gá xìní nàcuáa sàni iní yúhú Déhe Dútú Ndiöxí, chi ñⁿdíi díí-ni mee-gá xìní-gá nàcuáa sàni iní-í, te mee-í xìní-í nàcuáa sàni iní méé-gá. Te nchaa ñáyiú cächí iní-í sá quíní-yu nàcuáa sàni iní Tàtá-í Dútú Ndiöxí te xítnúhu-í-yu, te vá yõ ñⁿ-gá xìní chi díu-ni ñáyiú ducaⁿ xítnúhu-í-án xìní-yu. ²⁸ Te nchaa nchòhó ñáyiú ñá túú ndècu váha, ñáyiú ñá túú ñíhí nàcuáa cada cundecu váha iní-xi quixi-ndo túha ñaha-ndo xii-í nàcuáa ducaⁿ cundecu váha iní-ndó. ²⁹ Te cuu vii cuu váha iní-ndó tñⁿ-ndo nchaa tnúhu càháⁿ-í, te ío dacuáha-ndo, te ducaⁿ càda-ndo chi yúhú ío càhnu iní-í, te ío ndàhú iní-í. Te núu ducaⁿ na càda-ndo te ío váha cuu iní-ndó cundecu-ndo. ³⁰ Te tñⁿ-ndo nchaa tnúhu càháⁿ-í chi ñá túú cùu-xi ñⁿ sá vée, chi cada iní-ndó sá cúú-xí dàtná ñⁿ chiúⁿ ñamá –cachí-gá xáhaⁿ-gá xii-yu.

12

Cue tée xica cuu ndihí Jesús sàhnú-güedé yoco triú nduu ndètatú ñáyiú

(Mr. 2:23-28; Lc. 6:1-5)

¹ Te ñⁿ nduu cùu-xi nduu ndetátú ñáyiú ñúhu Jesús ichi ndihí cue tée xica cuu ndihí-gá, te ta yáha-gá ndihí-güedé ñⁿ xichi nùú cáá triú te xíxíhí-güedé docó nùú xíáⁿ ní ngüíta-güedé sàhnú-güedé yoco triú-án, te ndihí ndaha-güedé quííⁿ-güedé quée triú-án tá xèxi-güedé cuáháⁿ. ² Te cue tée cùu fariséú ní xìní-güedé nàcuáa quide cue tée xica cuu ndihí Jesús, núu ní xáhaⁿ-güedé xii-gá:

–¿Ná cuèndá ducaⁿ quide cue tée xica cuu ndihí-n sàhnú-güedé yoco triú, te vitna cùu-xi nduu ndetátú-í?

Te ñá túú tàú-güedé ducaⁿ càda-güedé –cachí-güedé xáhaⁿ-güedé xii-gá.

³ Te Jèsús ní xáhaⁿ-gá xii-güedé:

–¿Náa ñá túú dàcuaha-ndo nùú tütú Yá Ndiöxí nùú càháⁿ-xi nàcuáa ní quide ndíi Dàvií cútnàhá ní xíhí ndíi docó ndihí cue tée ní xica cuu ndihí ndíi-án? ⁴ Chi ndíi-án ní quihu ndíi vehe Yá Ndiöxí ní queheⁿ ndíi pàá ní cuu íi ndécú-án ní xexi ndíi ndihí cue tée ní xica cuu ndihí ndíi, te ñá túú tàú ndíi sá dúcáⁿ càda ndíi ndihí cue tée-án ní cùu, chi mee-ni cuè dútú tàú-güedé caxi-güedé pàá-án ní cùu. ⁵ ¿Te náa ñá túú xìní-ndó nàcuáa càháⁿ-xi nùú tütú ndíi Moisés sá ncháá cuè dútú vã ndètátú-güedé nduu cùu-xi nduu ndetátú-án? Te ñá díú ñⁿ cuèchi cùu-xi sá dúcáⁿ ñà túú ndètátú-güedé nduu cùu-xi nduu ndetátú. ⁶ Te na cächí tnúhu-í xii-ndo sá yúhú cùu-í tée ío-gá cùnùu ndecu ndihí-ndo dacúxí veñúhu sá ïo cùnùu. ⁷ Dico nchòhó chi ñá tècú tnùní-ndó nàcuáa càháⁿ Yá Ndiöxí nùú tütú-gá nùú cächí-xi: “Yúhú cuíní-í sá cùndàhú iní-ndó cuè tnaha ñáyiú-ndo te ñá díú mèe-ni sá cáhni-ndó quiti nduu táhú-í”, duha cächí-gá nùú tütú-gá. Te núu dìcò nchòhó tècú tnùní-ndó ñá, te vá càháⁿ cuèhé-ndó cuèndá nchaa ñáyiú ñá túú ndècu cuèchi-xi. ⁸ Te yúhú Tée cùu ñaní tnàhá-ndó nchaa-ndo, tnàhá-í ndécú ndihí-í tnúhu ndee ñí sá cùu-í nchaa ñáyiú nàcuáa cada-yu nduu ndètátú-ó-á –cachí-gá xáhaⁿ-gá xii-güedé.

Ñⁿ tée ní yíchí ñⁿ xio ndaha-xi

(Mr. 3:1-6; Lc. 6:6-11)

⁹ Te Jèsús ní xica-gá cuáháⁿ-gá, te cuánguihu-gá xití ñⁿ veñúhu. ¹⁰ Te xíáⁿ ndécú ñⁿ tée ní yíchí ñⁿ xio ndaha-dé. Te dava cue tée xíndecu-án ndúcú-güedé nàcuáa cada-güedé cacáⁿ cuèchi-güedé cuèndá-gá nùú cuè tée cùnùu, te ní xícaⁿ tnúhú-güedé nùú-gá, te xáhaⁿ-güedé:

–Cachí tnúhu xii-ndí nùu cuu cada tátna-o ñⁿ tée cùhú nduu cùu-xi nduu ndetátú-ó ñⁿ ñàhá –cachí-güedé xáhaⁿ-güedé xii-gá.

¹¹ Te Jèsús ní xáhaⁿ-gá xii-güedé:

—Te nchòhó òré ná ngàunihnu ìⁿ mbéé-ndó ìⁿ déhvá cùnú te nàtava-ndo-dì cuéi cùu-xi nduu ndetatú-ó. ¹² Te ìⁿ ñáyiu ío-gá cùnùú-yu dàcúúxí ìⁿ mbéé, núu xíⁿ tàú-ó sá cádá-ó sá vâha sá cúú-xí-yu cuéi cùu-xi nduu ndetatú-ó —càchí-gá xâhaⁿ-gã xii-güedé.

¹³ Te dàtnùní ní xáhaⁿ-gã xii téé cùhú ndaha-xi-áⁿ:

—Ndacani ndaha-n —càchí-gá xâhaⁿ-gã xii-dé.

Te téé-áⁿ ñí ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé. ¹⁴ Te cue téé cùu fariséú ní ndee-güedé xití veñúhu, te ní ngüíta-güedé ndátnùhu-güedé nùu nása cada-güedé cahni-güedé Jèsús.

Nàcuáa sa ndéé tnuní cuèndá Jèsús

¹⁵ Te sáta ñí cutnùní iní Jèsús nàcuáa cuèní-güedé cada ñaha-güedé xii-gá te ní xica-gá cuáháⁿ-gã, te ío vâi ñáyiu nchìcúⁿ ñáhá xii-gá cuáháⁿ, te tnàhá cue ñáyiu cùhú nchìcúⁿ ñáhá xii-gá cuáháⁿ, te ní quide tátna-gá cue ñáyiu-áⁿ. ¹⁶ Te ní xáhaⁿ-gã xii-yu sá vâ càháⁿ-yu yoo cùu-gá. ¹⁷ Te ducaⁿ ñí cuu chi ní quee ndáá-xi nàcuáa ní xáhaⁿ Yâ Ndiòxí xii ndíi Chàíá téé ní xóo cáháⁿ tnúhu-gá ndéé sanaha ñí chídó tnùní ndíi núú tütú-gá, te duha ndùu tnúhu ní xáhaⁿ-gã:

¹⁸ Téé-a cùu-dé téé ní sani iní-í sá cúnú cuèchi-dé núú-í,

te ío cùu iní-í-dé, te cùdǐ iní-í-dé.

Te yúhú cuáñaha-í Espíritú-í cundecu ndíhi-dé,

te ñu-dé cúñaha-dé xii nchaa ñáyiu ñuyú sá yúhú ío ndáá quidè-í.

¹⁹ Te vá dácáá-dé tnúhu cáháⁿ-dé ndíhi ñáyiu, te ñí vâ cáná sàa-dé òré cáháⁿ-dé,

te ñí vâ yóo níhi tnúhu nása cáháⁿ-dé cuhú-dé ichi.

²⁰ Te ñí ñà túú nã cada-dé cue ñáyiu cùu datná ìⁿ tnu ndóó sá cuèní-xi tnáhnú, te ñu-ni ñáyiu-áⁿ cúú tucú-yu dàtná ìⁿ mèchá càndíl sá ío quène ñúhmá te cuèní-xi ndahvá.

Te ducaⁿ sãtnahá-xi cùu ñáyiu-áⁿ chi ñà túú níhi ndéé-yu cundecu-yu sá cúú-xi-í, te mee-ni sã vâha cada ñaha-dé xii-yu, te ñu-ni ducaⁿ càda-dé ndéé sáá nduu cutnuni iní nchaa ñáyiu sá ío ndáá quidè-dé.

²¹ Te nchaa ñáyiu níhi ñuyú ío cundee cùu cahnu iní ñáhã-yu xii-dé.

Duha ní xáhaⁿ-gã xii ndíi Chàíá ní chídó tnùní ndíi núú tütú-gá.

Càchí-güedé sá ndécú ndíhi Jèsús espíritú cùndíhi yucu ñávãha

(Mr. 3:20-30; Lc. 11:14-23; 12:10)

²² Te ní quexìo ìⁿ úú cue téé núú ndécú Jèsús, te ndéca-güedé ìⁿ téé ñíhi te cuáá-dé, te yíhi ñaha espíritú cùndíhi yucu ñávãha xii-dé, te Jèsús ní queñuhu-gá espíritú cùndíhi yucu ñávãha yíhi ñaha xii-dé, te òré-ni-áⁿ ñí cuu ní nacáháⁿ-dé te ní ndúha núú-dé. ²³ Te nchaa ñáyiu xíndecu-áⁿ ío ní cuñúhu-yu sá dúcáⁿ ñí quide-gá, te ní xitnàhá-yu:

—Váa téé-a cùu-dé ñani tnàhá ndíi Dàvíí téé tendaha Yâ Ndiòxí quixi ñuyú-a —càchí-yu xitnàhá-yu.

²⁴ Te cue téé cùu fariséú ní tecú dóho-güedé nàcuáa ndùu tnúhu xitnàhá-yu, núu xíⁿ ní xitnàha-güedé:

—Téé-a ndèñuhu-dé nchaa espíritú cùndíhi sácuíhná yíhi ñaha xii ñáyiu, chi ñu-ni sácuíhná-áⁿ chíndèe ñaha-xi xii-dé te ñu-ni-xi tàxi tnuní-xi nchaa espíritú-áⁿ —duha ní xitnàha-güedé.

²⁵ Te Jèsús ní cutnùní iní-gá nàcuáa ndùu tnúhu ní xitnàha-güedé, núu ní xáhaⁿ-gã xii-güedé:

—Te nchòhó xini-ndó sã nùu ìⁿ téé yíndaha ìⁿ nacióⁿ vá cúú ìⁿnuu-dé ndíhi cue téé cùndíhi-dé, te vá cùdǐ-dé cunuu-dé. Te ñu-ni ducaⁿ sãtnahá tucu-xi cùu tucu cue téé cùchiuⁿ ìⁿ ñúú, chi núu vá cúú ìⁿnuu-güedé cundecu-güedé, te vá cùdǐ-güedé cundecu-güedé taxi tnùní-güedé. Te ñu-ni ducaⁿ sãtnahá tucu-xi cùu cue ñáyiu xíndecu ìⁿ-ni vèhe, chi núu vá cúú ìⁿnuú-yu cundecu-yu te vá cùdǐ-yu cundecu càhnú-yu.

²⁶ Te núu sácuíhná ducaⁿ quide-xi

queñuhu-xi cue espíritú cündihí-xi yíhi ñaha xii ñáyiú ña, te ñá túú cùu ñnuu-xi ndecu-xi te núu ducaⁿ, te vá cúdli sácúlná-ãⁿ cundecu-xi taxi tnùní-xi te núu ducaⁿ quide-xi. ²⁷ Te duha càháⁿ-í chi nchòhó càchí-ndó sã chindèe ñaha sácúlná xii-í queñuhu-í nchaa espíritú cündihí-xi yíhi ñaha xii ñáyiú. Te núu yúhú quidé cuendá-ndó sã sácúlná chindèe ñaha-xi xii-í, te xini ñuhu-xi cada cuendá-ndó yòo chindee ñaha xii cue téé xica cuu ndihí-ndo queñuhu-güedé nchaa espíritú cündihí yucu ñávãha yíhi ñaha xii ñáyiú. Te mee-güedé càchí-güedé sã nchòhó ñá túú càháⁿ ndáá-ndó sã dúcáⁿ càháⁿ-ndó. ²⁸ Dico yúhú chi Espíritú Yã Ndiõxí chindèe ñaha-xi xii-í queñuhu-í nchaa espíritú cündihí sácúlná yíhi ñaha xii ñáyiú, te sã dúcáⁿ chindee ñaha Espíritú-gá xii-í, xíãⁿ cútnùní sã sà ní sáá nduu cuiní-gá ndíhu ndaha ñaha-gá xii-ndo.

²⁹ Te nchòhó xini-ndó sã cué ñadúhú chi vá ndácú-güedé cuendá-ni quíhu-güedé duhu-güedé vehe ñⁿ téé ío ndee, chi díhna-gá xini ñuhu-xi tñi-güedé téé-áⁿ dacùtu ñaha-güedé xii-dé dàtnùní ducaⁿ te ndacu-güedé duhu-güedé nchaa sã ndécú ndihí-dé.

³⁰ Te nchaa ñáyiú ñá túú cündihí ñaha xii-í, te cùu úhú iní ñáhã-yu. Te nchaa ñáyiú ñá túú chindee ñaha xii-í, te dàquee tíhũ-yu chiuⁿ quide-í.

³¹ Te na càchí tnúhu-í xii-ndo sã ncháá ñáyiú quide nchaa sã cuèhé sã dúhá cuu cada càhnu iní ñáhã Yã Ndiõxí xii-yu, te ñu-ni ducaⁿ cùu cada càhnu iní-gá nchaa tnúhu cuèhé tnúhu duha càháⁿ-yu. Dico cue ñáyiú na càháⁿ úhú cuendá Espíritú-gá, te ñáyiú-áⁿ vã cádá càhnu iní ñáhã tnàhí-gá xii-yu. ³² Te nchaa ñáyiú na càháⁿ úhú cuendá yúhú Téé cùu ñaní tnáhã-yu ncháá-yu, te cuu cada càhnu iní ñáhã Yã Ndiõxí xii-yu. Dico cue ñáyiú na càháⁿ úhú cuendá Espíritú-gá te vá cádá càhnu iní ñáhã tnàhí-gá xii-yu cuéi vitna ndècu vívũ-yu, te cuéi na cùu-yu.

Ndi ñnuú yutnu xini-ó ñá yutnu cùu-xi cuendá sã sãvidí-xi (Lc. 6:43-45)

³³ Te nchòhó xini-ndó sã ndi ñnuú yutnu xini-ó ñá yutnu cùu-xi cuendá sã sãvidí-xi, te xini-ó sã ncháá yutnu váha cùuⁿ mee-ni sãvidí váha, dico nchaa yutnu sã ñá túú váha te cùuⁿ mee-ni sãvidí sã ñá túú váha. Te duha càháⁿ-í cuendá cada cuendá váha-ndo nàcuáa ndùu chiuⁿ quide-ndo ñⁿ ñⁿ-ndo cuendá ducaⁿ cùtnuní ná ñáyiú cùu-ndo. ³⁴ Dico nchòhó cùu-ndó dàtná ñⁿ cóo déeⁿ chi ío cuihna iní-ndó, te vá cáni iní-ndó sã ndácú-ndó càháⁿ-ndó ñⁿ tnúhu váha, chi ío cuihna iní-ndó. Te nchòhó xini-ndó sã ncháá ñáyiú càháⁿ-yu nání véxi iní-yu. ³⁵ Te nchaa ñáyiú váha iní-xi càháⁿ-yu tnúhu váha, chi ñu-ni tnúhu váha-áⁿ ñúhú iní-yu. Te nchaa ñáyiú cuihna iní-xi càháⁿ-yu tnúhu cuèhé tnúhu duha, chi ñu-ni tnúhu cuèhé tnúhu duha-áⁿ ñúhú iní-yu. ³⁶ Te na càchí tnúhu-í xii-ndo sã ná sáá nduu càda ndáá Yã Ndiõxí cuéchi nchaa nchòhó ñáyiú ndècu ñuyíú-a, te nchaa tnúhu cuèhé tnúhu duha càháⁿ-ndó càháⁿ-gá sã ñá túú ní quide váha-ndo sã dúcáⁿ ní càháⁿ-ndó tnúhu-áⁿ. ³⁷ Te nàcuáa ndùu tnúhu ní càháⁿ-ndó ñⁿ ñⁿ-ndo, te ducaⁿ càháⁿ Yã Ndiõxí te núu ndècu cuéchi-ndo àdi ñá túú ndècu cuéchi-ndo. Te núu ñá túú cuéchi-ndo te càcu-ndo, dico núu ndècu cuéchi-ndo te vá càcu-ndo —càchí-gá xãhaⁿ-gã xii cue téé cùu fariséú-áⁿ.

Cue téé cuiní sã cádá Jèsús ñⁿ sã vã yõo tnàhí ndàcu cada (Mr. 8:12; Lc. 11:29-32)

³⁸ Te cue téé cùu fariséú, ndihí cue téé dàcuaha ñaha xii ñáyiú nchaa tnúhu ní chidó tnùní ndí Moisés xãhaⁿ-güedé xii Jèsús:

—Mèstrú, cuiní-ndí cada-n ñⁿ sã vã yõo tnàhí ndàcu cada cuendá ducaⁿ cùtnuní iní-ndí sã Yã Ndiõxí chindèe ñaha-gá xii-n —càchí-güedé xãhaⁿ-güedé xii-gá.

³⁹ Te Jèsús ní xãhaⁿ-gã xii-güedé:

—Ñáyiú ndècu ichi cuèhé ichi duha ñá túú cuiní-yu tñi-yu tnúhu càháⁿ

Yã Ndiõxí, te ñáyíu-áⁿ cuení-yu cada-í ñⁿ sá vã yõo tnàhí ndàcu cada nacuaáa cutnùní iní-yu núu ndáá sá Yã Ndiõxí chindèe ñaha-gá xii-í. Dico yúhú chi ñá túú nãgá cada-í quini-yu, chi sa nihí-yu tnúhu nàcuáa ní yáha ndí Jónás tée ní xóo cáháⁿ tnúhu Yá Ndiõxí ndéé sanaha, te ñíu-ni ducaⁿ yãha yúhú tucu. ⁴⁰ Chi ndí Jónás-áⁿ ní xúhuⁿ ndíi úní nduu úní niú xití ñⁿ chácá cáhnú vñhi nani ballená. Te ñíu-ni ducaⁿ yãha yúhú Téee cùu ñani tnáhá-ndó ncháa-ndo, chi úní nduu úní niú cuhuⁿ-í xití ññuhu. ⁴¹ Te na sáá nduu càda ndáá Yã Ndiõxí cuéchi ncháa ñáyíu ndècu ññuyíú-a, te dàvá-áⁿ cachí ncháa ñáyíu ññú Nñivé sá ñà túú ní quide ndáá ncháa ñáyíu ndècu vitna, te ducaⁿ cáháⁿ-yu chi mèe-yu ní dáñã-yu ichi cuèhé ichi duha cútnàhá ní sáháⁿ ndíi Jónás ññú-yu ní cáháⁿ ndíi tnúhu Yá Ndiõxí núu-yu. Dico vitna iha ndècu ndíhi ñaha-ndo xii yúhú, te ñíu-í ío-gá cùnùu-í dàcúúxí ndíi Jónás. ⁴² Te nduu càda ndáá Yã Ndiõxí cuéchi ncháa ñáyíu, te dàvá-áⁿ quini-ndó ñⁿ ñadíhí ñaha ní xíndaha ñⁿ nacióⁿ cáá ndàa xio datni núu quéné nchícanhii, te ñaha-áⁿ ío xica ñí xíndecu-aⁿ te ní sáháⁿ-aⁿ ní xíndedóho-aⁿ ncháa tnúhu ní cáháⁿ ndíi Salómón, chi ndíi-áⁿ ío ní sáá sá xini tnùní ndíi. Te tnàhá ñaha-áⁿ cáháⁿ-aⁿ sá ñà túú ní quide ndáá ncháa ñáyíu ndècu vitna. Dico vitna iha ndècu ndíhi ñaha-ndo xii yúhú, te ñíu-í ío-gá cùnùu-í dàcúúxí ndíi Salómón.

Espiritú cündíhi yucu ñávãha sá nánchòcáva xito cùu uú
(Lc. 11:24-26)

⁴³ Te òré ná quée ñaha ñⁿ espíritu cündíhi yucu ñávãha xii ñⁿ ñáyíu, te cuáháⁿ-xi ndùcu-xi ñⁿ xichi núu cündècu-xi te ñá nihí-xi te ní sani iní-xi: ⁴⁴ “Váha-gá núhú tucu-í núu ñí xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xini-xi sá cáá iní ñáyíu-áⁿ dàtná cáá-ñã ñⁿ vehe ní natíhú ní nduu vii-ná te vã yõo-gá ndécú. ⁴⁵ Te sáta dúcáⁿ te ní xica-xi cuáháⁿ-xi cuándúcú-xí ùsá tnáhá espíritu

cündíhi-xi sá nèhé víhí-gã xíquide. Te òré ní nihí-xi cue espíritu-áⁿ te ndèca ñaha-xi cuáháⁿ cuendá ngúndecu ndíhi-xi ñáyíu-áⁿ. Te ñáyíu-áⁿ uuⁿ-gá nándi yáha-yu dàcúúxí ndéé díhna. Te ñíu-ni ducaⁿ sátnahá-xi yáha ncháa ñáyíu cuihna iní-xi ndècu ññuyíú-a vitna —càchí-gá xãhaⁿ-gã xii-güedé.

Cue ñani Jèsús ndíhi nãná-gã

(Mr. 3:31-35; Lc. 8:19-21)

⁴⁶ Te càháⁿ dúcáⁿ-ní Jèsús ní quexìo náná-gã ndíhi cue ñani-gá cuení-yu cáháⁿ ndíhi ñáhá-yu xii-gá, te ní ngúnu tní-yu ndàa quehé vehe núu ndécú-gã. ⁴⁷ Te ñⁿ cue ñáyíu xíndecu-áⁿ ñí xáhãⁿ-yu xii-gá:

—Ní quexìo náná-n ndíhi cue ñani-n xínutñí-yu quehé, te cuení-yu cáháⁿ ndíhi ñáhá-yu xii-n —càchí ñáyíu-áⁿ xáhãⁿ-yu xii-gá.

⁴⁸ Te ní xáhãⁿ-gã xii ñáyíu ducaⁿ xáhãⁿ xii-gá-áⁿ:

—Te cachí tnúhu yóndi-gã ñáyíu cùu datná nãná-í ndíhi dàtná cue ñani-í —càchí-gã xáhãⁿ-gã xii ñáyíu-áⁿ.

⁴⁹ Te ní dánèhé ñáhã-gã ncháa cue téee xica cuu ndíhi-gá, te ní xáhãⁿ-gã xii ñáyíu-áⁿ:

—Cue téee-a cùu-güedé dàtná nãná-í, ndíhi dàtná cue ñani-í. ⁵⁰ Te ncháa ñáyíu na càda ncháa nacuaáa cáháⁿ Tãtà-í Dútú Ndiõxí Yaá ndécú àndíu, te ñáyíu-áⁿ cúu-yu dàtná nãná-í, ndíhi dàtná cue ñani-í, ndíhi dàtná cue cúha-í —càchí-gã xáhãⁿ-gã xii ñáyíu ducaⁿ ñí dáýãha tnúhu núu-gã-áⁿ.

13

Nàcuáa quide téee cuángacáⁿ tríu

(Mr. 4:1-9; Lc. 8:4-8)

¹ Te ñíu-ni nduu-áⁿ ní quee Jèsús vehe núu ndécú-gã, te ní xica-gá cuáháⁿ-gá ní ngóo-gá yuhu làgúná.

² Te ío cuéhé ñáyíu ní tacá núu ndécú-gã. Te sá dúcáⁿ ío cuéhé ñáyíu núu ní quée-gá xití ñⁿ bàrcú nùtní xití ndute làgúná-áⁿ, te núu xíãⁿ ní ngóo-gá, te ncháa ñáyíu-áⁿ xíxúcu-yu yuhu làgúná-áⁿ. ³ Te Jèsús ní ngúita-gá ní cani-gá titní cuendú núu-yu nàcuáa

tecú tnùnì-yu nchaa nàcuáa ndùu tnúhu-gá, te xáhaⁿ-gã xií-yu:

—Iⁿ tée cuángacáⁿ-dé triú, ⁴ te òré ní ngúita-dé dǎngoyo-dé triú-áⁿ, te dava ní quene ndava ní ngava ndéé ichi, te ní xiní cue tílaá te ní na-datácá-güedi. ⁵ Te dava ní ngava ñuhu yadi núú yíhí vihi yúú, te ndíhi-ni ní xínu-xi chi ñá túú cavihi ñuhu. ⁶ Dico òré ní nayehé te ñá túú ní cùndee iní-xi chi ní yíchí-xi, chi ñá túú ní ñhí quíhíⁿ cùnú yóho-xi. ⁷ Te dava ní ngava núú yúcú ndíquíⁿ tnu ñnu, te ñⁿnuu-ni ní xínu-xi ndíhi tnu ñnu. Te tnu ñnu-áⁿ ní sahnú-xi te ní dánáá-xí nchaa triú sá ní xínu-áⁿ. ⁸ Dico dava-gá triú ní ngava núú ndécú ñuhu coçóⁿ te xiáⁿ ío váha ní cuu, chi núú ñⁿ-ní triú-áⁿ te dava yoco-xi ní nguíhi ócó úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ñⁿ ciendú triú-xi. ⁹ Te vitna nchaa nchòhó ñáyiú ní xíndedóho tnúhu ní cáháⁿ-í-a, te ío váha chí cuáha cuendá —càchí-gá xáhaⁿ-gã xií-yu.

Cue tée xica cuu ndíhi Jesús ndícuí tnúhu-güedé núú-gã ná cuendá caní-gã cuendú núú ñáyiú

(Mr. 4:10-12; Lc. 8:9-10)

¹⁰ Te cue tée xica cuu ndíhi Jesús ní sáháⁿ-güedé ndéé núú-gã, te xáhaⁿ-güedé xii-gá:

—Ndúcu tnúhu-ndí núú-n núu ná cuendá ducaⁿ mee-ni cuendú caní-n núú ñáyiú —càchí-güedé xáhaⁿ-güedé xii-gá.

¹¹ Te ní xáhaⁿ-gã xii-güedé:

—Nchòhó chí sa càchí tnúhu Yá Ndióxi xii-ndo ñⁿ sá vátá quíní-gá-ndó, chí càchí tnúhu-gá nàcuáa quide-gá ndíhu ndaha-gã ñáyiú, dico dava-gá ñáyiú chí ñá túú ñá xáhaⁿ-gã xií-yu. ¹² Te nchaa ñáyiú sa təcú tnùnì te uuⁿ-gá cuita tecú tnùnì-yu quíhíⁿ, te nchaa ñáyiú ñá túú təcú tnùnì te uuⁿ-gá vá təcú tnùnì-yu. ¹³ Te xiáⁿ núu duha caní-í mee-ni cuendú núú-yu, chí cuéi na quíní-yu nchaa nàcuáa cuu dico ní vǎ cùtnùnì iní-yu ná cuendá ducaⁿ cùu, te

cuéi na cùndedóho-yu dico ní vǎ təcú tnùnì-yu. ¹⁴ Te diu cuendá ñáyiú-áⁿ ní xáhaⁿ Yá Ndióxi xii ndí Chàíá tée ní xóo cáháⁿ tnúhu-gá ndéé sanaha ní chídó tnùnì ndí núú tütú-gá núú càchí-xi:

Nchaa nchòhó cùndedóho-ndo tnúhu cáháⁿ-í, dico ní vǎ təcú tnùnì-ndó,

te cuéi na quíní-ndó nchaa nàcuáa cada-xi, dico ní vǎ cùtnùnì iní-ndó ñá cuendá ducaⁿ quide-xi.

¹⁵ Te ducaⁿ chí cùu-ndo ñáyiú ío sàá iní-xi,

te cùu-ndo ñáyiú ñá túú təcú tnùnì tnúhu cáháⁿ-í,

te cùu tucu-ndo datná cue ñáyiú cuáa chí ñá túú cuíní-ndó cada cuendá-ndó tnúhu-í,

te ní ñá túú cuíní-ndó cùndedóho-ndo, te ní ñá túú cuíní-ndó təcú tnùnì-ndó,

te ní ñá túú cuíní-ndó nàtuha ñaha-ndo xii-í cuendá cada càhnu iní-í nchaa yíca cuéchi-ndo nàcuáa ío váha cuu iní-ndó cùndecu-ndo.

Duha ní xáhaⁿ Yá Ndióxi xii ndí Chàíá ní chídó tnùnì ndí núú tütú-gá.

¹⁶ Dico nchòhó chí ío váha táhú-ndó chí cùtnùnì iní-ndó nchaa nàcuáa quide-í, te cùtnùnì tucu iní-ndó nchaa nàcuáa ndùu tnúhu cáháⁿ-í. ¹⁷ Te na càchí tnúhu ndáá-í xii-ndo sǎ ío vǎi cue tée ní xóo cáháⁿ tnúhu Yá Ndióxi ndéé sanaha ndíhi nchaa dava-gá ñáyiú váha iní-xi ní cuíní-yu cundehé-yu nchaa sá ndéhé-ndó vitna quide-í dico ñá túú ní xiní-yu, te ní cuíní tucú-yu cùndedóho-yu nchaa tnúhu ndèdóho-ndo vitna cáháⁿ-í te ñá túú ní xíndedóho-yu.

Jesús cáháⁿ-gá nàcuáa quèe-xi cuendá tée cuángacáⁿ triú

(Mr. 4:13-20; Lc. 8:11-15)

¹⁸ Te vitna cùndedóho váha-ndo na càchí tnúhu-í xii-ndo nàcuáa quèe-xi cuendú tée cuángacáⁿ triú ní caní-í núú-ndó. ¹⁹ Te triú sá ní quene ndava ní ngava ndéé ichi, xiáⁿ cúú-xí datná ñáyiú ní xíndedóho tnúhu sá cáháⁿ nàcuáa ndíhu ndaha ñaha Yá Ndióxi xií-yu, dico ñá túú ní cuíní-yu tní-yu, chí sácuíhná cuáháⁿ-xi nàdatuhú-xi

iní-yu cuendá sá vă cánchezicúⁿ ni-
hnú-yu nàcuáa càháⁿ tnúhu-áⁿ. ²⁰ Te
triú sá nĩ ngava ñuhu yadi núú yíhĩ
vìhi yúú-ăⁿ, xĩăⁿ cúú-xí dâtná ñáyiu
ní xíndedóho tnúhu Yá Ndiôxí te dĩ
iní ní tñĩ-yu tnúhu-gá, ²¹ dico òré ná
ngũta ñáyiu cúcuèhé ñáhă-yu xĩ-yu
àdi nândi-gá sá yăha-yu sá cuendá
tnúhu-gá, te ñă cùndèe iní-yu chi
dăñă-yu tnúhu-gá cuendá sá ñă túú
nìhĩ ndéë-yu. ²² Te triú sá nĩ ngava
núú yúcu ndĩquíⁿ tnu iñu-áⁿ, xĩăⁿ
cúú-xí dâtná ñáyiu ní tecú dóho-xi
tnúhu Yá Ndiôxí dico cuèe cuèe ní
nacuaaná-yu tnúhu-gá, chi cuendá
mee-ni să ío ñuyíú-a ñuhu iní-yu,
ndihĩ cuendá sá ío sàni iní-yu cuu
cuicá-yu, te mee-ni nchàa xĩăⁿ ñúhú
iní-yu te ñă túú ñuhu iní-yu tnúhu
sá nĩ xíndedóho-yu-áⁿ nàcuáa cada
váha-yu cundecú-yu. ²³ Dico triú sá
nĩ ngava núú ndécú ñuhu cocoⁿ-áⁿ,
xĩăⁿ cúú-xí dâtná ñáyiu ní xíndedóho
tnúhu Yá Ndiôxí te quidè-yu nàcuáa
càháⁿ tnúhu-gá. Te cada iní-ndó să
ñáyiu-áⁿ cúú-yu dâtná triú sá nĩ nguĩhĩ
yoco-xi ócú úxí triú-xi, ndihĩ triú sá
nĩ nguĩhĩ yoco-xi únídico triú-xi, ndihĩ
triú sá nĩ nguĩhĩ yoco-xi ñⁿ cièndú
triú-xi. Ducaⁿ sãtnahá-xi cúú-yu chi
íó váha quidè-yu –càchĩ-gá xăhaⁿ-gă
xii-güedé.

*Cuendá nchaa cùhú să ñă túú văha
xĩnu xitĩ triú*

²⁴ Te Jèsús ní canĩ-gá ñⁿ cuèndú núú
ñáyiu nàcuáa tecú tnùnĩ-yu tnúhu-gá,
te xăhaⁿ-gă xii-yu:

–Te vitna na cànĩ-í ñⁿ cuèndú
núú-ndó nàcuáa tecú tnùnĩ-ndó
nàcuáa cada-xi òré ndĩhu ndaha ñăha
Yá Ndiôxí xii ñáyiu. ñⁿ tée ío váha
triú ní sacáⁿ-dé núú ñúhú-dě. ²⁵ Dico
xitĩ niú ní sáháⁿ ñⁿ tée cùu úhú iní
ñáhă xii-dé, te ní dăngoyo-dé ndĩquíⁿ
yúcu să ñă túú văha núú nĩ sacáⁿ-dé
triú-áⁿ. ²⁶ Te òré vitna váha váha ní
ngũta-xi quène yoco nchaa triú-áⁿ,
te ní xĩnu coyo nchaa yúcu să ñă túú
văha-áⁿ. ²⁷ Te cue tée xĩnu cuechi
núú tée ní sacáⁿ triú-áⁿ nĩ xĩtnúhu
ñăha-güedé xii-dé să dúcáⁿ nĩ xĩnu

cùhú să ñă túú văha-áⁿ núú triú-dé,
te xăhaⁿ-güedé: “Pàtróóⁿ, ħnása ní cuu
núú ní xĩnu cùhú să ñă túú văha núú
triú-n, te ío váha càa triú ní sacáⁿ-n
ní cùu?” , cachĩ-güedé xăhaⁿ-güedé.
²⁸ Te tée cùu patróóⁿ-güedé-áⁿ nĩ
xáhaⁿ-dě xii-güedé: “ñⁿ tée cùu úhú
iní ñáhă nàhi xii-í ducaⁿ nĩ quide-dé
ní sáháⁿ-dé ní dăngoyo-dé ndĩquíⁿ
cùhú să ñă túú văha-áⁿ núú triú-í
núú ducaⁿ nĩ xĩnu coyo-xi”, càchĩ-dé
xăhaⁿ-dě xii-güedé. Te cue tée
xĩnu cuechi núú-dé ní xáhaⁿ-güedé
xii-dé: “Te núu cuinĩ-n te quĩhĩⁿ-ndĩ
tnuhu-ndĩ nchaa cùhú să ñă túú
văha ní xĩnu núú triú-n”, càchĩ-güedé
xăhaⁿ-güedé xii-dé. ²⁹ Te tée cùu
xítóhó triú-áⁿ nĩ xáhaⁿ-dě xii cue
tée xĩnu cuechi núú-dé-áⁿ: “Ñáhă,
vá quĩhĩⁿ-ndó tnúhu-ndo, chi òré
tnuhu-ndo te tnáhă-ni triú quene
chi càa vihi cùhú-ăⁿ. ³⁰ Văha-gá
chĩ dăñă ná cuĩhnu nahi ndéé
ná cùu triú, te dâtnùnĩ nducu-ĩ
cue tée quĩhĩⁿ-güedé tnuhu-güedé
nchaa cùhú să ñă túú văha-áⁿ, te
dacùtu nuhĩ-güedé te cahmi-güedé,
te dâtnùnĩ nàquehndé-güedé triú
nacani-güedé te nataxúha-güedé xitĩ
yacá-í”, càchĩ-dé xăhaⁿ-dě xii-güedé –
duha ní canĩ Jèsús cuèndú núú-yu.

*Cuendá ndĩquíⁿ yutnu nàni mostázá
(Mr. 4:30-32; Lc. 13:18-19)*

³¹ Te Jèsús ní canĩ tucu-gá ingá
cuèndú núú ñáyiu nàcuáa tecú
tnùnĩ-yu tnúhu-gá, te xăhaⁿ-gă xii-yu:

–Na cànĩ-í ñⁿ cuèndú núú-ndó
nàcuáa tecú tnùnĩ-ndó nàcuáa cada-xi
òré ndĩhu ndaha ñăha Yá Ndiôxí xii
ñáyiu. ñⁿ tée ní queheⁿ-dé ndĩquíⁿ
yutnu nàni mostázá te nèhe-dé cuáháⁿ
ní sacáⁿ-dé núú ñúhú-dě. ³² Te
ndĩquíⁿ yutnu-áⁿ ío chăhu, dico òré ná
xĩnu-xi te sàhnu-gá-xi dâcúúxí nchàa
cùhú, te cue quitĩ ndàva núú tàchĩ
cádũha-güedĩ tacá-güedĩ núú dítè-xi
–càchĩ-gá xăhaⁿ-gă xii-yu.

*Nàcuáa quide levadurá
(Lc. 13:20-21)*

³³ Te Jèsús ní xáhaⁿ tucu-gá xii ñáyiu:

—Te na càchí tnúhu tucu-í xii-ndo nàcuáa cada-xi òré ndíhu ndaha ñàha Yá Ndiöxí xii ñáyi. Ìⁿ ñadihi ní chihi-aⁿ levadùrá úní arròbá yuchi triú, te levadùrá-áⁿ ní quide-xi ní ndaa nihí yusaⁿ-áⁿ —càchí-gá xàhaⁿ-gã xii-yu.

Mee-ni cuèndú ní caní Jèsús núú ñáyi

(Mr. 4:33-34)

³⁴ Te mee-ni cuèndú ní caní Jèsús núú ñáyi ndí tnahá òré ní dánèhé ñáhá-gã xii-yu tnúhu-gá. ³⁵ Te ducaⁿ ní quide-gá chi ní quee ndáá-xi nàcuáa ní chídó tnùnì ìⁿ téé ní xóo càháⁿ tnúhu Yá Ndiöxí ndéé sanaha núú tütú-gá núú càchí-xi:

Mee-ni cuèndú caní-í núú ñáyi òré danèhé-í-yu tnúhu-í cuèndá tecú tnùnì-yu,

te nchaa tnúhu sá vǎtá yǎo-gá cund-edóho danèhé-í-yu, te nchaa tnúhu-áⁿ ndúú yùhu-xi ndéé cútñahá ní ngáva ñuyíú.

Duha ní chídó tnùnì téé-áⁿ núú tütú-gá.

Jèsús càháⁿ-gá nàcuáa quèe-xi cuendá cùhú sǎ ñà túú vǎha càa xití triú

³⁶ Te Jèsús ní dándácá-gã ñáyi te cuánuhú-gá vehe, te cue téé xica cuu ndihí-gá ní xáhaⁿ-güedě xii-gá:

—Cachí tnúhu xii-ndí nása quèe-xi cuendá cùhú sǎ ñà túú vǎha càa xití triú —càchí-güedě xàhaⁿ-güedě xii-gá.

³⁷ Te Jèsús ní xáhaⁿ-gã xii-güedé:

—Téé càchí-í ní sacáⁿ triú cǎvǎha-áⁿ cúú yùhú Téé cùu ñaní tnahá-ndó nchàa-ndo. ³⁸ Te nchaa núú ní sacáⁿ téé-áⁿ triú cúú-xí ñuyíú. Te tatá vǎha-áⁿ cúú-xí cuè ñáyi yìndaha ñaha Yá Ndiöxí. Te nchaa cùhú sǎ ñà túú vǎha-áⁿ cúú-xí ñáyi yìndaha ñaha sácuíhná. ³⁹ Te téé ní dǎngoyo ndíquíⁿ cùhú sǎ ñà túú vǎha núú triú-áⁿ cúú-dě mee sácuíhná. Te nduu nàtehndé-nǎ triú-áⁿ cúú-xí ndùu ndihí nihnu-ná nchaa sá ió ñuyíú-a. Te nchaa ñáyi nàquehndé triú-áⁿ cúú-yu mee-ní cuè espíritú xínú cuèchi núú Yá Ndiöxí. ⁴⁰ Te dàtná cada cue téé quíhíⁿ tnuhu nchaa cùhú sǎ ñà túú vǎha-áⁿ dacùtu

nuhní-güedé te cahmi-güedé, ducaⁿ sǎtnahá-xi yáha nchaa ñáyi cùndihí yucu ñávǎha na sàá nduu. ⁴¹ Te yúhú Téé cùu ñaní tnahá-ndó nchàa-ndo tendaha-í nchaa espíritú xínú cuèchi núú-í quíhíⁿ-xi nadatácá-xi nchaa ñáyi sànu ichi cue tnahá ñáyi-xi ichi cuèhé ichi duha, ndihí nchaa dava-gá ñáyi ñà túú quide vǎha, te nchaa ñáyi-áⁿ xìndecú-yu nchaa núú ndécú cuè ñáyi yìndaha-í. ⁴² Te cue espíritú-áⁿ daquíhíⁿ-xi cue ñáyi-áⁿ núú ñuhú núú càyú, te yàcáⁿ ío ndáhyú-yu te dícó rúhñú-nǎ cuu núhu-yu sá sàtú iní-yu sá ndóhǎ-yu. ⁴³ Te nchaa ñáyi quide nchaa nàcuáa cuení Tǎtǎ-yu Dútú Ndiöxí, ñáyi-áⁿ ío cunúú-yu cundecú-yu núú ndécú-gã táxi tnùnì-gá, chí cuú-yu dàtná nchíanchii dayèhé-yu cundecú-yu núú ndécú-gã. Te nchaa nchòhó ñáyi ndèdóho nchaa tnúhu càháⁿ-í-a, te ío vǎha chí cuǎha cuèndá —càchí-gá xàhaⁿ-gã xii-güedé.

Cuèndá ìⁿ sá ìo ndèyáhu

⁴⁴ Te Jèsús xàhaⁿ tucu-gá xii-güedé:

—Na càni tucu-í ingá cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiöxí xii ñáyi. Ìⁿ téé ní naníhí-dě ìⁿ sá ìo ndèyáhu yìndúxi ìⁿ xichi, te ní nachindúxi tucu-dé dǎu-ni núú ní naníhí-dě-áⁿ, te ío ní cudí iní-dé sá dúcáⁿ ní naníhí-dě xǎⁿ. Te ní xica-dé cuánuhú-dé te ní nadico-dé nchaa sá ndécú ndihí-dé, te ní nacuaaⁿ-dé ñuhu núú dúcáⁿ ní naníhí-dé xǎⁿ.

Cuèndá ìⁿ sá ìo ndèyáhu nàni pèrlá

⁴⁵ Te na càni tucu-í ingá cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiöxí xii ñáyi. Ìⁿ téé quide ndáhú ndúcú-dě sá nání pèrlá sá ìo ndèyáhu. ⁴⁶ Te ní naníhí-dě ñáyi ndècu ndihí ìⁿ pèrlá sá ìo-gá ndèyáhu, te ní xica-dé cuánuhú-dé te ní nadico-dé nchaa sá ndécú ndihí-dé, te ní sáháⁿ-dé ní saaⁿ-dé pèrlá sá ìo-gá ndèyáhu-áⁿ.

Cuèndá ñunu tnè-güedé chácá

⁴⁷ Te na càni tucu-í ingá cuèndú núú-ndó nàcuáa tecú tnùnì-ndó

nàcuáa cada-xi òré ndíhu ndaha ñàha Yá Ndiòxí xii ñáyi. Cue téé tñi chácá ní dáquée-güedé ñunu-güedé xiti ndute làmár tñi-güedé chácá, te dácá nuu dácá nihnu chácá cuãnguee-güedi xiti ñunu-án. 48 Te òré ní cutnùní iní-güedé sá ní chítú ñunu-güedé, te ní natava-güedé ní nene yuhu làmár, te ní ngüíta-güedé nácãxi-güedé nchaa chácá-án. Te nchaa chácá vaha dàquée-güedé-di xiti tídihi, te nchaa chácá nèhé dǎngoyo-güedé-di. 49 Te dàtná ní quide cue téé-án ducaⁿ càda cue espíritú xínú cuèchi núú Yá Ndiòxí ná sàá nduu vǎ cùndecu-gá nchaa sá ió ñuyú-a, chi cue espíritú-án daquée diⁿ-xi nchaa ñáyi ní quide váha tnuú nchaa ñáyi ñá túú ní quide váha. 50 Te nchaa ñáyi ñá túú ní quide váha-án daquihíⁿ ñáhá-xí xii-yu núú ñùhú núú càyú, te yàcáⁿ ió ndáhyú-yu, te dícó rúhñú-ná cuu núhu-yu sá sàtú iní-yu cuendá sá ndóhó-yu —càchí-gá xáhaⁿ-gǎ xii cue téé xica cuu ndihí-gá.

Cuendá cue téé ndècu ndihí sá ní quee túu díhna ndihí sá ní quee túu saa

51 Te Jèsús ní xicáⁿ tñuhú-gǎ núú-güedé, te xáhaⁿ-gǎ xii-güedé:

—¿Ní tecú tñuní-ndó nàcuáa ndùu nchaa tñuhu ní cáháⁿ-í-án? —càchí-gá xáhaⁿ-gǎ xii-güedé.

Te ní xáhaⁿ-güedé xii-gá:

—Ní tecú tñuní-ndí —càchí-güedé xáhaⁿ-güedé xii-gá.

52 Te ní xáhaⁿ tucu Jèsús xii-güedé:

—Te núu ñⁿ téé dàcuaha ñaha xii ñáyi nchaa tñuhu ní chídó tñuní ndí Moisés ná cùnuni iní-dé nàcuáa quide Yá Ndiòxí ndíhu ndaha-gǎ ñáyi, te téé-án cúú-dé dàtná ñⁿ téé cùu xitohó vehe. Te téé cùu xitohó vehe-án ní queñuhu-dé nchaa sá ní quee túu díhna ndècu ndihí-dé, ndihí nchaa sá ní quee túu saa. Te ducaⁿ sǎtnahá-xi cùu téé-án te núu na cùnuni iní-dé nàcuáa quide Yá Ndiòxí ndíhu ndaha-gǎ ñáyi —càchí-gá xáhaⁿ-gǎ xii-güedé.

Jèsús ndécú-gǎ ñuú núú ní sahnú-gá (Mr. 6:1-6; Lc. 4:16-30)

53 Te sátá ní yáha ducaⁿ ní cani Jèsús cuendú núú-güedé, te ní xica-gá cuánuhú-gá. 54 Te ní ndexiò-gá ñuú núú cúú ñuú-gá, te cuánguihu-gá xiti veñúhu càa ñuú-án te ní ngüíta-gá dánèhé-gá ñáyi. Te nchaa ñáyi ndèdóho nchaa tñuhu càháⁿ-gá xicuñúhu-yu, te xitnàhá-yu:

—¿Nása ní cuu núu ió váha cùnuni iní téé-a nàcuáa cunduu tñuhu cáháⁿ-dé, te quide-dé nchaa sá vǎ yóo tñahí ndàcu cada-i? 55 Te dícó déhe téé cùu carpinterú ndihí tá Màriá cúú-dé, te ñaní-dé cúú tǎ Jàcobó, ndihí té Chèé, ndihí té Xímú, ndihí té Jùdás. 56 Te cue cúha-dé ndécú ndihí ñáhá-yu xii-o ñuú-a. ¿Te nása ní quide-dé núu ndéé dácáⁿ ió váha cùnuni iní-dé nàcuáa cunduu tñuhu cáháⁿ-dé-i? —càchí-yu xitnàhá-yu.

57 Te ñá túú ní cuini-yu cáháⁿ ndihí váha-yu Jèsús, dico mee-gǎ ní xáhaⁿ-gǎ xii-yu:

—Te núu ñⁿ téé càháⁿ tñuhu Yá Ndiòxí ná nàsáá-dé ñuú-dé, te nchaa ñáyi ñuú-dé-án ndihí nchaa ñáyi cùu ndimee-dé ñá túú nèhé-yu sá yíñùhu núú-dé, dico cue ñáyi nchaa dava-gá ñuú chi nèhé-yu sá yíñùhu núú-dé —càchí-gá xáhaⁿ-gǎ xii-yu.

58 Te ñá túú ní quide Jèsús titní núú sǎ vǎ yóo tñahí ndàcu cada ñuú-án, chi ñá túú ní cuini-yu quindáá iní ñáhá-yu xii-gá.

14

Nàcuáa ní cuu ní xihí té Juáá tée dàcuandute ñaha xii ñáyi (Mr. 6:14-29; Lc. 9:7-9)

¹ Te diu-ni dàvá-án ní níhí tǎ Hèrodés tñuhu nchaa nàcuáa quide Jèsús, te té Hèrodés-án cúú-dé téé tàxi tñuní distritú Galileá. ² Te ní xáhaⁿ-dǎ xii nchaa cue téé ndècu ndihí-dé:

—Téé dii cuendú-xi nihí-ó-án cùu-dé té Juáá téé dàcuandute ñaha xii ñáyi, téé ní xihí ní cùu te ní ndoto-dé núu dácáⁿ ndácú-dǎ quidé-dǎ nchaa sá vǎ yóo tñahí ndàcu cada —cachí-dé xáhaⁿ-dǎ xii-güedé.

³ Te ducaⁿ ní cáháⁿ té Hèrodés chi mee-dé ní táuchíúⁿ-dǎ ní tñi ñaha-güedé xii té Juáá, te ní dácútú

ñaha-güedé xii-dé, te ní chihi ñaha-güedé vecaá. Te ducaⁿ ñi quide té Hèrodés-áⁿ sã cuendá ñaha ñani Herodiás, ñaha ní cándeca ñani-dé té Lípé, te ní naqueheⁿ ñaha-dé xii-aⁿ ndéca ñaha-dé. ⁴ Te té Juàá ní xáhaⁿ-dë xii té Hèrodés:

—Ñá túú ní quide váha-n dùha ní naqueheⁿ-n ñaha ní cándeca ñani-n — dùha ní xáhaⁿ tã Juàá xii té Hèrodés.

⁵ Te sá dúcáⁿ ñi xáhaⁿ tã Juàá-áⁿ xii té Hèrodés, te ní cuini té Hèrodés-áⁿ cahni-dé té Juàá-áⁿ, dico ñá túú ní cùyi-dé chi ní yùhú-dé núú cué ñáyiú, chi nchaá-yu ní cutnùní iní-yu sã tã Juàá cúú-dé iⁿ tée càháⁿ tnúhu Yá Ndiöxí. ⁶ Te iⁿ nduu ní quide té Hèrodés vico vehe-dé ní quide càhnu-dé nduu ñi cacu-dé. Te ndècu iⁿ déhe yoco ñaha ñani Herodiás-áⁿ, te xíchí-ãⁿ ñi quíhu-xi xití vehe núú cúú vico-áⁿ ñi xita saha-xi. Te núcóo té Hèrodés ndihi cue tée ní cáháⁿ-dé ndéhe-güedé, te ío ní cudíi iní-dé nàcuáa ní xita xíchí-ãⁿ. ⁷ Te té Hèrodés-áⁿ ñi cacunehe-dé ndéé Yá Ndiöxí nàcuáa cutnùní iní xíchí-ãⁿ sã ndáa cuañaha-dé ñuú ná cúú sã ná càcáⁿ-xi núú-dé. ⁸ Te xíchí-ãⁿ ñi dácáhu iní ñáhá ñaná-xi xii-xi ná cúú sã càcáⁿ-xi núú té Hèrodés, núú xiãⁿ ní xáhaⁿ-xi xii-dé:

—Cuini-í quehdé-n díquí tã Juàá tée dàcuandute ñaha xii ñáyiú te taxi-n, dico na cùhuⁿ iⁿ xití cóhó taxi-n — càchí-xi xáhaⁿ-xi xii-dé.

⁹ Te sá dúcáⁿ ñi xáhaⁿ-xi, te ní cundiýí té Hèrodés, dico ñá túú ní ñihí-dé nása cada-dé, chi ndédóho ñáyiú òré ní cacunehe-dé Yá Ndiöxí sã ndáa cuañaha-dé iⁿ sã ná càcáⁿ-xi núú-dé. Te ní quide-dé nàcuáa ní xáhaⁿ-xi. ¹⁰ Chi ní táuchíúⁿ-dë ní sáháⁿ cue tée ní xehndé-güedé díquí tã Juàá òré yíhí-dé vecaá. ¹¹ Te ní chihi-güedé díquí-dé iⁿ xití cóhó te nèhe-güedé cuánuhú ní sáñaha-güedé xii xíchí-ãⁿ, te xíchí-ãⁿ ñi nacuáñaha-xi xii ñaná-xi.

¹² Te cue tée xica cuu ndihi té Juàá-áⁿ ñi sáháⁿ-güedé ní naqueheⁿ-güedé yiqui cùnú-dé ní chindúxi-güedé, te dātnùní ní sáháⁿ-güedé ní xáhaⁿ-güedé xii Jèsús nàcuáa ní cuu.

Jèsús dácàxi-gá úhúⁿ mĩ cue tée te dèiⁿ ñáyiú dèhí ndihi landú

(Mr. 6:30-44; Lc. 9:10-17; Jn. 6:1-14)

¹³ Te Jèsús ní ñihí-gã tnúhu nàcuáa ní cuu ní xihí té Juàá. Te sátá xiãⁿ te cuánguee-gá iⁿ bàrcú cuáháⁿ-gá iⁿ xichi núú ñà túú ñáyiú ndècu, dico nchaa ñáyiú xĩndecu nchaa ñuú cáa yàtni xiáⁿ ñi ñihí-yu tnúhu sã cuáháⁿ-gá, te ní queé-yu ñuú-yu xica sahá-yu cuáháⁿ núú quidè-yu cuendá quexìo Jèsús. ¹⁴ Te òré ní quexìo Jèsús núú cuáháⁿ-gá, te ní quene-gá bàrcú, te ní xiní-gá cuéhé víhí ñáyiú xixúcu-yu xiáⁿ, te ní cundàhú iní ñáhá-gã xií-yu, te ní quide tátna-gã nchaa ñáyiú cùhú ndihi-yu. ¹⁵ Te sátá ñi cuaa te ní sáháⁿ cue tée xica cuu ndihi Jèsús núú-gã, te xáhaⁿ-güedé xii-gá:

—Sa ní cuu dandàca-n nchaa ñáyiú-a chi sa ní cuaa, te na quíhíⁿ-yu nchaa ñuú cáa yàtni iha cuaáⁿ-yu sã caxí-yu, chi núú ndécú-ó iha ñá túú tnàhí ná ío — càchí-güedé xáhaⁿ-güedé xii-gá.

¹⁶ Te Jèsús ní xáhaⁿ-gã xii-güedé:

—Ñáhá, vá dándàca-í-yu, váha-gá mee-ndo chí cuañaha sã ná càxi-yu — càchí-gá xáhaⁿ-gã xii-güedé.

¹⁷ Te ní xáhaⁿ-güedé xii-gá:

—Ñá túú nãgá ndécú ndihi-ndí, chi úhúⁿ duha-ná pàá ndihi úú-nã chácá ndécú ndihi-ndí — càchi-güedé xáhaⁿ-güedé xii-gá.

¹⁸ Te Jèsús ní xáhaⁿ-gã xii-güedé:

—Chí cànèhe paá-áⁿ ndihi chácá-ãⁿ táquixi iha — càchí-gá xáhaⁿ-gã xii-güedé.

¹⁹ Te Jèsús ní xáhaⁿ-gã xii nchaa ñáyiú sã ná ngõo-yu nchaá-yu núú ité cuíi càa xiáⁿ, te ní queheⁿ-gá ndi úhúⁿ pàá-áⁿ ndihi ndi nduú chácá-ãⁿ te ní ndacoto-gá andiú, te ní ndacáⁿ táhú-gã núú Yá Ndiöxí, te dātnùní ní táhú cuèchi-gá pàá-áⁿ te ní sáñaha-gã xii cue tée xica cuu ndihi-gá ní dácãhñu-güedé cue ñáyiú ní xexí-yu.

²⁰ Te nchaá-yu ní xexí-yu ní ndahá xití-yu. Te sátá ñi túhú cóhó-yu te ní

nadatacá-güedé nchaa sá nǐ quendóo, te ní chítú ùxúú tñhá tídihi mee-ni sá nǐ quendóo. ²¹ Te nchaa ñáyiú ní xexi-áⁿ nǐ xínu úhúⁿ mǐl mee-ni cuè téé chi mee-ni cuè téé-áⁿ nǐ quíúndehu, te ðíⁿ cue ñáyiú ðíⁿ ndíhi cue landú.

Jèsús xicá-gǎ núú ndute

(Mr. 6:45-52; Jn. 6:16-21)

²² Te òré-ni-áⁿ nǐ xáhaⁿ Jèsús xii cue téé xica cuu ndíhi-gǎ sá quée-güedé bàrcú téhndé-güedé ndàa ingá xio yuhu làgúná, te mee-gǎ quendóo-gǎ cada ndee iní tñhá-gǎ ndíhi cue ñáyiú. ²³ Te sátá nǐ yáha ní quide ndee iní tñhá-gǎ ndíhi cue ñáyiú, te medíi-gǎ ní xica-gǎ cuásaá-gǎ ðíⁿ tñdúú cáá yàtni xíaⁿ cuèndá cáháⁿ ndíhi-gǎ Yǎ Ndióxi, te ðíu-ni medíi-gǎ ndécú xíaⁿ nǐ cundiquiⁿ. ²⁴ Te bàrcú sá ñúhú cuè téé xica cuu ndíhi-gǎ-áⁿ sa cuáháⁿ-xi ndéé cuádava xití làgúná-áⁿ, te níhi vìhi quene táchí ndàa ichi cuáháⁿ-xi, te ðàcandau ndeé-xi ndute nchaa ðíⁿ-xi. ²⁵ Te tàculhndá váhi-gǎ tá xica Jesús núú ndute cuáháⁿ tá cùyatni-gǎ bàrcú-áⁿ. ²⁶ Te cue téé xica cuu ndíhi-gǎ ní xini ñáhá-güedé xii-gǎ tá xica-gǎ núú ndute cuáháⁿ, te ní yùhú-güedé te níhi ní cáháⁿ-güedé te xítnàha-güedé:

—^{ðíⁿ} àlmá! —càchí-güedé xítnàha-güedé

²⁷ Te Jèsús ní cáháⁿ-gǎ, te xáhaⁿ-gǎ xii-güedé:

—Ñíⁿ cunduu-ndo vǎ yùhú-ndó, chi yùhú cù-í —càchí-gǎ xáhaⁿ-gǎ xii-güedé.

²⁸ Te té Pèlú ní xáhaⁿ-dǎ xii-gǎ:

—Mèstrú, te núú ðíu-n te tauchiⁿ sá tñhá-í ná càca-í núú ndute quixi tñhá ñáhà-í xii-n —càchí-dé xáhaⁿ-dǎ xii-gǎ.

²⁹ Te Jèsús ní xáhaⁿ-gǎ xii-dé:

—Taquixi—cachí-gǎ xáhaⁿ-gǎ xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáháⁿ cuátnhá ñáhá-dǎ xii-gǎ. ³⁰ Te ní cutnùní iní-dé sá ïo níhi xico táchí, te ní ngüíta-dé yùhú-dé. Te òré-ni-áⁿ tá quée naa-dé xití ndute cuáháⁿ ní cùu, te níhi ní cáháⁿ-dé xáhaⁿ-dǎ xii Jèsús:

—^{ðí}Mèstrú, vá dáñá-n quée naa-í xití ndute! —càchí-dé xáhaⁿ-dǎ xii-gǎ.

³¹ Te òré-ni-áⁿ nǐ tñí Jèsús ndaha-dé, te ní xáhaⁿ-gǎ xii-dé:

—¿Ná cuèndá ñá túú sàndáá ndisa iní ñáhá-n xii-í sàni ðíⁿ sani úú iní-n-i? —càchí-gǎ xáhaⁿ-gǎ xii-dé.

³² Te òré cuánguee Jèsús ndíhi té Pèlú xití bàrcú, te òré-ni-áⁿ nǐ ngüíñí táchí. ³³ Te cue téé ñùhu xití bàrcú-áⁿ nǐ ngüíñí xití-güedé núú-gǎ, te xáhaⁿ-güedé xii-gǎ:

—Sá ndàá sá cuítí sǎ díú yòhó cùú-n Dèhe Dútú Ndióxi—càchí-güedé xáhaⁿ-güedé xii-gǎ.

Jèsús quidé tǎtna-gǎ ñáyiú cùhú ðíⁿ xichi núú nání Gènesarét

(Mr. 6:53-56)

³⁴ Te ní quexìo Jesús ndíhi cue téé xica cuu ndíhi-gǎ ndàa ingá xio yuhu làgúná, te núú nǐ quexìo-gǎ ndíhi-güedé-áⁿ nání-xí Gènesarét. ³⁵ Te nchaa ñáyiú xíndecu xíaⁿ nǐ cutnùní iní-yu sá díú-gǎ ní quexìo, te ní dátécú tñúhu-yu nchaa dáva-gǎ ñáyiú xíndecu yatni xíaⁿ sǎ nǐ quexìo-gǎ. Te ndécá-yu nchaa ñáyiú cùhú ndécú ndíhi-yu cuáháⁿ núú ndécú Jèsús. ³⁶ Te nchaa ñáyiú cùhú-áⁿ nǐ ngüíta-yu càháⁿ ndàhú-yu núú Jèsús sá ná dáña-gǎ tñándeé-yu cuèdicó luha yuhu dǎo-gǎ cuèndá ndúha-yu, te cue ñáyiú cùhú, ñáyiú ní tñándeé yuhu dǎo-gǎ ní ndúha-yu.

15

Cuèndá nchaa sá quidé-xí ngündecu cuéchi ñáyiú

(Mr. 7:1-23)

¹ Te sátá dúcáⁿ te ðíⁿ úú cue téé cùu fariséú ní quee-güedé ñúú Jerusalén, ndíhi cue téé dàcuaha ñaha xii ñáyiú nchaa tñúhu ní chídó tñùní ndíi Moisés ní quexìo-güedé núú ndécú Jèsús, te xáhaⁿ-güedé xii-gǎ:

² —¿Ná cuèndá cue téé xica cuu ndíhi-n ñá túú nàquete-güedé ndaha-güedé òré caxi-güedé nàcuáa ní cachí cue ñaní tñáhá-ó nǐ xíndecu ndéé sanaha-i? —càchí-güedé xáhaⁿ-güedé xii-gǎ.

³ Te Jèsús ní xáhaⁿ-gã xii-güedé:

—Te nchòhó tucu, ¿ná cuendá ñá túú quide-ndo nacúáa ní cachí Yá Ndiöxí cada-ndo, núu da nàcuáa ta quide cue téé ñuyíú-a quide-ndo-i?

⁴ Te Yá Ndiöxí càchí-gá núú tütú-gá:

“Canehe-ndo sã yíñuhu núú tãtã-ndó ndìhi núú nãná-ndó”, càchí-gá. Te càchí tucu-gá ìngá xichi núú tütú-gá: “Nchaa ñáyiu na càháⁿ úhú tãtã-xi àdi náná-xi te cahni ñaha-güedé xii-yu”, duha càchí-gá núú tütú-gá.

⁵ Dico nchòhó càchí-ndó sã cuè ñáyiu chi cuu cúñahá-yu xii tãtã-yu àdi náná-yu: “Vá cúú chindee ñaha-ndí xii-n, chi sá táxí-ndí xii-n ni cùu, xíãⁿ ní nduu cuendá Yá Ndiöxí”, cuu duha cúñaha ñáyiu xii tãtã-yu àdi náná-yu càchí-ndó.

⁶ Te càchí-ndó sã cuè ñáyiu ducaⁿ na cúñaha xì tãtã-xi àdi náná-xi te ñá túú-gã tàú-yu chindee-yu ni tãtã-yu ni nãñá-yu. Te ducaⁿ quide-ndo chi ní dáquéé tìhú-ndó nàcuáa ní cachí Yá Ndiöxí cada-ndo, te mee-ni nàcuáa ta quide cue téé ñuyíú-a véxi nchicúⁿ nihnu-ndo quide-ndo. ⁷ Te nchòhó cúú-ndó ñáyiu ío dàndahú méé-xí, chi càchí-ndó sã quidé ndää-ndó te ñá ndää sá quidé ndää-ndó! Te ní quee ndää-xi nàcuáa ní chídó tnùní ndíi Chàíá téé ní xóo càháⁿ tnúhu Yá Ndiöxí ndéé sanaha núú tütú-gá núú càháⁿ-xi nàcuáa ní càháⁿ-gá cuendá-ndó, te duha ní cachí-gá:

⁸ Ñáyiu-a càchí-yu sá ío càhnu cuu-í dico dícó-ni yuhu càháⁿ-yu, chi duuⁿ duuⁿ ñá túú ñuhu iní ñáhã-yu xii-í.

⁹ Te àúⁿ nã cuu chihuhu ñahá-yu xii-í chi ñá túú vèdana ndèé nándìhi-xi,

chi cue ñáyiu-a dàcuahá-yu cue tnàha ñáyíú-yu nàcuáa cundecú-yu, dico mee-ni tnúhu sá ñí cahu iní cue ñáyiu ñuyíú-a càháⁿ-yu.

Duha ní chídó tnùní ndíi Chàíá núú tütú Yá Ndiöxí nàcuáa ní càháⁿ-gá cuendá-ndó —càchí-gá xãhaⁿ-gã xii-güedé.

¹⁰ Te ní xáhaⁿ-gã xii cue ñáyiu:

—Chí táquixi ndehe iha, te cund-edóho váha-ndo tnúhu na càháⁿ-í, te ío váha cuáha-ndo cuendá. ¹¹ Nchaa sá xéxí-ndó chi ñá túú nã quidé-xí ìní-ndó, dico nchaa sá cuèhé sá dúhá sàni ìní-ndó càháⁿ-ndó nchaa xíãⁿ quidé-xí ndècu cuéchi-ndo —càchí-gá xãhaⁿ-gã xii-yu.

¹² Te cue téé xica cuu ndìhi-gá ní sáháⁿ-güedé ndéé núú-gã, te xãhaⁿ-güedé xii-gá:

—Véxi-ndí càchí tnúhu-ndí xii-n sã cuè téé cùu fariséú ñá túú cùu váha ìní-güedé cuendá tnúhu ní càháⁿ-n —càchí-güedé xãhaⁿ-güedé xii-gá.

¹³ Te ní xáhaⁿ-gã xii-güedé:

—Nchaa ñáyiu ñá túú cùu cuendá Tãtã-í Dútú Ndiöxí cuíta nihnú-yu, chi ñáyiu-áⁿ cúú-yu dàtná nchaa cúhú sã ñá túú nándìhi te tnúhu ñáyiu. ¹⁴ Te vá cáda cuendá-ndó nàcuáa càháⁿ cue téé-áⁿ, chi cùu-güedé dàtná cue ñáyiu cuáá sácúta nehe tnàha. Te nchòhó xíní-ndó sã núu ìñá ñáyiu cuáá ná cuítá nèhe tucú-yu ìngá ñáyiu cuáá, te ndí ndùú-yu quée-yu déhvä —càchí-gá xãhaⁿ-gã xii-güedé.

¹⁵ Te té Pèlú ní xáhaⁿ-dë xii-gá:

—Cachí tnúhu xii-ndí nàcuáa quèe-xi tnúhu ní càháⁿ-n-ãⁿ —càchí-dë xãhaⁿ-dë xii-gá.

¹⁶ Te Jèsús ní xáhaⁿ-gã:

—¿Náa tnàhá nchòhó ñá túú ní tècú tnùní-ndó nàcuáa ndùu tnúhu ní càháⁿ-í núú ñáyiu-ãⁿ ñá? ¹⁷ Nchaa sá xéxí-yu cuánguee-xi xití-yu, te dàtnùní náyãha ñaha-xi xii-yu. ¹⁸ Dico nchaa tnúhu cuèhé tnúhu duha càháⁿ-yu xíãⁿ véxi quene-xi ìní-yu, te ñíu nchaa xíãⁿ quidé-xí ndècu cuéchi-yu. ¹⁹ Te ìní-yu-áⁿ cácu nihnu nchaa sá cuèhé sá dúhá, chi sàni cuèhé sání dùha ìní-yu, te sàhni-yu tnàha ñáyíú-yu, te cue téé càháⁿ ndìhi-güedé ñáyiu dìhí te ñá díú ñàdìhí-güedé cúú-yu.

Te ñíu-ni ducaⁿ quide cue ñáyiu dìhí càháⁿ ndìhí-yu cue téé te ñá díú yí-yu cùu-güedé, te cuèi téé te cuèi ñàdìhí mee-ni ìchi díí ìní cúdíí ìní-yu cundecú-yu, te dùhu ndachiuⁿ tnahá-yu, te dàcuandehndé-yu, te càháⁿ cuèhé-yu cuendá tnàha ñáyíú-yu. ²⁰ Te nchaa

xíáⁿ quidé-xí ndècu cuéchi-yu, dico ñá díú sá ñà túú ndàhá-yu dàtná ní cachí cue téé ndéé sanaha, chí xíáⁿ ñá túú quide-xi cuendá ngúndecu cuéchi-yu —càchí-gá xáhaⁿ-gá xii-güedé.

Hⁿ ñadìhí ñaha cùu ñaní tnáhá ñáyiú canàneá ní sándáá iní-aⁿ Jèsús

(Mr. 7:24-30)

²¹ Te Jèsús ní xica-gá cuáháⁿ-gá ní sáa-gá yucu cue téé ñúú Tírú, ndìhi yucu cue téé ñúú Sidón. ²² Te ñⁿ ñadìhí ñaha cùu ñaní tnáhá ñáyiú canàneá ndécú yàtni-aⁿ xíáⁿ, te níhi ta càháⁿ-aⁿ ní quexìo núú ndécú Jèsús, te xáhaⁿ-aⁿ xii-gá:

—jMèstrú, ñaní tnáhá ndìi Dàvií, cundàhú iní ñáhá xii-í cada tátna-n déhe yoco-í! Chí yìhi ñaha espíritú cùndìhi yucu ñávàha xii-xi te ío dándoho ñaha-xi —cachí-aⁿ xáhaⁿ xii-gá.

²³ Dico Jèsús ñá túú tnàhí ní càháⁿ-gá, te cue téé xica cuu ndìhi-gá ní sáháⁿ-güedé núú-gá, te xáhaⁿ-güedé xii-gá:

—Cúñaha xii ñaha-áⁿ ná nùhú-aⁿ, chí ío níhi càháⁿ-aⁿ ñchìcúⁿ ñáhá-áⁿ xii-o —cachí-güedé xáhaⁿ-güedé xii-gá.

²⁴ Te Jèsús ní xáhaⁿ-gá xii-güedé:

—Yá Ndiöxí ní tendaha ñàha-gá xii-í véxi-í mee-ni ñúú núú xíndecu cue ñáyiú isràél, chí ñáyiú-áⁿ cúú-yu dàtná cue mbéé cue quitì ní xíta, chí ta xíta nihnú-yu cuáháⁿ —càchí-gá xáhaⁿ-gá xii-güedé.

²⁵ Te ñadìhí-áⁿ ní sáháⁿ-aⁿ ndéé núú Jèsús ní ngüíñí xítí-áⁿ, te xáhaⁿ-aⁿ xii-gá:

—jMèstrú, chindee ñàha xii-í! —càchí-aⁿ xáhaⁿ-aⁿ xii-gá.

²⁶ Te Jèsús ní xáhaⁿ-gá xii-aⁿ:

—Vá cúú chindee-í cue ñáyiú ñá túú cùu ñáyiú isràél, chí ñⁿ-ni cùu-xi núu na quèheⁿ-o paá cúú cuendá cue landú te cuáha-o ìná caxi-dì —càchí-gá xáhaⁿ-gá xii-aⁿ.

²⁷ Dico ñaha-áⁿ ní xáhaⁿ-aⁿ xii-gá:

—Ndáá càháⁿ-n, dico cue iná chí nàdatacá-güedé sá ngóyó yùhu cóhó xítòhó-güedé —càchí-aⁿ xáhaⁿ-aⁿ xii-gá.

²⁸ Te Jèsús ní xáhaⁿ-gá xii-aⁿ:

—jYòhó ñaha cùhú déhe-xi, ío váha sàndáá iní ñáhá-n xii-í! Te na càda-í nàcuáa cuìní-n —càchí-gá xáhaⁿ-gá xii-aⁿ.

Te òré-ni-áⁿ ní ndúha déhe-aⁿ.

Jèsús quidé tátna-gá vài ñáyiú cùhú

²⁹ Te sáta dúcáⁿ ní cuu te Jèsús ní xica-gá cuáháⁿ-gá ní yáha-gá yuhu làgúná distrítú Galileá, te cuásaá-gá ñⁿ tìndúú te xíáⁿ ní ngóo-gá. ³⁰ Te xíáⁿ núcõo-gá ní quexìo cuéhé víhí ñáyiú, te ndécá-yu ñáyiú yacua, ndìhi ñáyiú ní yíchí ñⁿ xio ndaha-xi, ndìhi ñáyiú cuáá, ndìhi ñáyiú ñìhí, te vài dava-gá cue ñáyiú cùhú tnàhá dava-gá núú cuéhé ndécá-yu ní quexìo núú ndécú-gá. Te ní taxi ndecu ñàhá-yu núú Jèsús te ní quide tátna ñaha-gá xii-yu te ní ndúha-yu.

³¹ Te nchaa ñáyiú xíndecu-áⁿ ío ní cuñúhu-yu sá dúcáⁿ ní xini-yu ní cuu ní nacáháⁿ nchaa ñáyiú ñìhí, ndìhi cuendá sá ní ndúha nchaa cue ñáyiú yacua, ndìhi cuendá sá ní ndúha cue ñáyiú ní yíchí ñⁿ xio ndaha-xi, ndìhi cuendá sá ní ndúha núú cue ñáyiú cuáá. Te nchaá-yu ní cachí-yu sá ío càhnu cuu Yá Ndiöxí Yáá cúú Ndiöxí cue ñáyiú isràél.

Jèsús dácàxi-gá cúmí mǐ cue téé te dǐⁿ ñáyiú dǐhí ndìhi landú

(Mr. 8:1-10)

³² Te Jèsús ní cana-gá cue téé xica cuu ndìhi-gá, te ní xáhaⁿ-gá xii-güedé:

—Yúhú cundàhú iní-í nchaa ñáyiú-a, chí sa ní cuu úní nduu ndècu ndìhi ñàhá-yu xii-o ìha, te ñá túú tnàhí-gá sá caxí-yu, te ñá túú cuìní-í nattendaha-í-yu núhú tnámă-yu vehé-yu, chí ná ndéé cuáháⁿ cuneé-yu docó ichi —càchí-gá xáhaⁿ-gá xii-güedé.

³³ Te ní xáhaⁿ-güedé xii-gá:

—¿Te ndèé níhí-ó sá cuñaha-o càxi nchaa ñáyiú-a, te ío cuéhé-yu te ñá túú nǎ ío ìha chí cùu-xi xítì yucu-i? —càchí-güedé xáhaⁿ-güedé xii-gá.

³⁴ Te Jèsús ní xicáⁿ tnúhú-gá núú-güedé, te xáhaⁿ-gá:

—¿Ná daha-gá paá ndécú ndìhi-ndo-i? —cachí-gá xáhaⁿ-gá xii-güedé.

Te ní xáhaⁿ-güedé xii-gá:

—Ndècu ndihi-ndí úsá-gá tnàhá pàá ndihi ìíⁿ ùú-gá chácá —càchí-güedé xàhaⁿ-güedé xii-gá.

³⁵ Te Jèsús ní xàhaⁿ-gá xii nchaa ñáyiú sá ná ngõo-yu nchaá-yu, te ní ngóo-yu. ³⁶ Te ní queheⁿ-gá ndí úsá pàá-áⁿ ndí ìíⁿ ùú-gá chácá-áⁿ, te ní ndacáⁿ táhú-gá núú Yá Ndiõxí, te dātñuní ní táhú cuèchi-gá pàá-áⁿ ndihi chácá-áⁿ te ní sãñaha-gá xii cue téé xica cuu ndihi-gá ní dácãhñu-güedé nchaa ñáyiú-áⁿ. ³⁷ Te nchaá-yu ní xexí-yu ní ndahá xití-yu. Te sátá ní túhú cóhõ-yu te ní nadatàcá-güedé nchaa sá ní quendóo, te ní chítú úsá tnàhá tídihi mee-ni sã ní quendóo-áⁿ. ³⁸ Te núú ncháá ñáyiú ní xexi te ní xínu cúmí mĩ mee-ni cuè téé chi ñu-ni cue téé-áⁿ ní quiúndehu, te ñuⁿ cue ñáyiú ñíhi ndihi cue landú. ³⁹ Te sátá dúcáⁿ te Jèsús ní dándácá ñaha-gá xií-yu, te cuánguee-gá bàrcú cuáháⁿ-gá yucu cue téé ñuú Màgdalá.

16

Cue téé cùu fariséú ndihi cue téé cùu saducéú xàhaⁿ-güedé xii Jèsús cada-gá ìíⁿ sá vã yõo tnàhí ndàcu cada
(Mr. 8:11-13; Lc. 12:54-56)

¹ Te cue téé cùu fariséú ndihi cue téé cùu saducéú ní sáá-güedé núú ndécú Jèsús xitó ndèé ñáhá-güedé xii-gá, te xàhaⁿ-güedé sá ná cáda-gá ìíⁿ sá vã yõo tnàhí ndàcu cada cundehe-güedé nàcuáa cutñuní iní-güedé núú ndáá sá Yá Ndiõxí ní tendaha ñaha-gá xii-gá véxi-gá ñuyíú-a. ² Te Jèsús ní xàhaⁿ-gá xii-güedé:

—Nchòhó chi òré tá cuàa cuáháⁿ te ndàcoto-ndo andiú, te càchí-ndó: “Ío váha cada-xi tneé chi càa vícò tícuèhé andiú”, duha càchí-ndó. ³ Te òré dátneé ndácòto tucu-ndo andiú, te càchí-ndó: “Vá cáda váha-xi nduu vitna chi tícuèhé andiú, te càa vícò”, duha càchí-ndó. ¡Dico nchòhó cúú-ndó ñáyiú ío dándahú méé-xí sã quidé ndáá te ñá ndáá sá quidé ndáá-ndó! Te cùtnuní iní-ndó nàcuáa quíde-xi andiú, dico ñá túú cùtnuní iní-ndó nàcuáa quèe-xi nchaa sá quidé Yá Ndiõxí vitna. ⁴ Dico nchaa

nchòhó ñáyiú ndècu ñuyíú vitna ío cuihna iní-ndó, te ñá túú cuíní-ndó cáda ndáá-ndó núú Yá Ndiõxí, te cuíní-ndó cáda-í ìíⁿ sá vã yõo tnàhí ndàcu cada dico ñá túú nãgá cada-í, chi ñu-ni nàcuáa ní quíde Yá Ndiõxí ndí Jónás ñu-ni ducaⁿ cáda tucu-gá vitna —càchí-gá xàhaⁿ-gá xii-güedé.

Te ducaⁿ te ní xica-gá cuáháⁿ-gá ndihi cue téé xica cuu ndihi-gá.

Cuendá cue téé cùu fariséú ndihi cuendá cue téé cùu saducéú
(Mr. 8:14-21)

⁵ Te òré ní quexìo ndihi ñaha-gá xii-güedé ndàa ingá xio yuhu làgúná, te ní ndacu iní-güedé sá ní cunaa-güedé canehe-güedé pàá quihíⁿ caxi-güedé. ⁶ Te Jèsús ní cáháⁿ-gá dóho-güedé, te xàhaⁿ-gá xii-güedé:

—Na càchí tnúhu-í xii-ndo sã ío quihi iní-ndó cùndecu-ndo, te vá cáda cuendá tnàhí-ndo lèvadurá cue téé cùu fariséú ndihi cue téé cùu saducéú —càchí-gá xàhaⁿ-gá xii-güedé.

⁷ Te ní ngüíta-güedé xitnaha-güedé:

—Cuendá sá ñá túú ní cãnehe-o pàá quihi xíáⁿ duha cáháⁿ-gá —càchí-güedé xitnaha-güedé.

⁸ Te Jèsús ní cutñuní iní-gá nàcuáa nduu tnúhu xitnaha-güedé, núú ní xàhaⁿ-gá xii-güedé:

—Nchòhó chi ñá túú sàndáá iní ñáhá váha-ndo xii-í núú xíáⁿ da sá ñá túú ní cãnehe-ndo pàá quihi cáháⁿ-ndó. ⁹ ¿Te náa ñá ndácú iní-ndó sã núú ùhúⁿ-ni pàá, te ní taxi-í ní dácãhñu-ndo ní xexi ùhúⁿ mĩ cue téé, chi ñu-ni cue téé-áⁿ ní quiúndehu, te sátá ní túhú cóhó-güedé

te ní chítú tìtní tídihi mee-ni sã ní quendóo-áⁿ? Te ñá tècú tnùní-ndó nàcuáa quèe-xi nàcuáa ní quíde-í. ¹⁰ ¿Te náa ñá ndácú tucu iní-ndó sã núú úsá-ni pàá te ní taxi-í ní dácãhñu tucu-ndo ní xexi cúmí mĩ cue téé, chi ñu-ni cue téé-áⁿ ní quiúndehu, te sátá ní túhú cóhó-güedé te ní nadatàcá-ndó nchaa sá ní quendóo, te ní chítú tìtní tídihi mee-ni sã ní quendóo-áⁿ? ¹¹ Dico nchòhó chi ñá túú ní quíde cuendá-ndó nàcuáa nduu tnúhu cáháⁿ-í òré ní càchí-í sá vã quèhéⁿ cuendá-ndó lèvadurá cue téé

cùu fariséu ndihi cue téé cùu saducéu, chi ñá díú cuendá pàá ní cǎháⁿ-í — cǎchí-gǎ xǎháⁿ-gǎ xii-güedé.

¹² Te sátá dúcáⁿ ní xáhaⁿ Jèsús xii cue téé xica cuu ndihi-gǎ, te ní tecú tnùní-güedé sá xǎháⁿ-gǎ xii-güedé sá vǎ tníi-güedé tnúhu cǎháⁿ cue téé cùu fariséu ndihi cue téé cùu saducéu, te ñá díú cuendá levadùrá sá quíhu yuchi cuǎha pàá ní cǎháⁿ-gǎ.

Té Pèlú xǎháⁿ-dē xii Jèsús sá díú-gǎ cúú-gǎ Crìstú

(Mr. 8:27-30; Lc. 9:18-21)

¹³ Te Jèsús ní quexìo-gǎ yucu cue téé ñuú Cèsareá Filipú, te ní xicáⁿ tnúhú-gǎ núú cuè téé xica cuu ndihi-gǎ, te xǎháⁿ-gǎ xii-güedé:

—¿Yoo cùu yúhú Téé cùu ñaní tnáhá-ndó nchàa-ndo cachí cue ñáyíu-va? —cǎchí-gǎ xǎháⁿ-gǎ xii-güedé.

¹⁴ Te ní xáhaⁿ-güedé xii-gǎ:

—Davá-yu cǎchí-yu sá cúú-n ndí Juáá téé ní xóo dacuàndute ñaha xii ñáyíu, te davá-yu cǎchí-yu sá cúú-n tē Èliás, te davá-yu cǎchí-yu sá cúú-n ndí Jeremiás téé ní xóo cǎháⁿ tnúhu Yá Ndiòxí ndéé sanaha, àdi cuu-n ingá téé ní xóo cǎháⁿ tnúhu-gǎ ndéé sanaha, duha cǎchí-yu —cǎchí-güedé xǎháⁿ-güedé xii-gǎ.

¹⁵ Te Jèsús ní xicáⁿ tnúhú tùcu-gǎ núú-güedé, te xǎháⁿ-gǎ xii-güedé:

—Te nchòhó, ¿yoo sàni iní-ndó cùu-í-i? —cǎchí-gǎ xǎháⁿ-gǎ xii-güedé.

¹⁶ Te té Xímú, àdi Pelú chi úú diu-dé, ní xáhaⁿ-dē xii-gǎ:

—Yòhó cúú-n Crìstú Yaá ní tendaha Yá Ndiòxí véxi ñuyíú-a, te diu Yá Ndiòxí cúú-gǎ Yaá ndécú nchàa nduu nchaa quíú, te yòhó cúú-n Dēhe-gǎ —cǎchí-dé xǎháⁿ-dē xii-gǎ.

¹⁷ Te Jèsús ní xáhaⁿ-gǎ xii-dé:

—Yòhó té Xímú déhe té Jónás, ío váha tǎhú-n chi mee Tǎtà-í Dútú Ndiòxí ní dácáhú iní ñáhá-gǎ xii-n nàcuáa cundu duu tnúhu cǎháⁿ-n, te ñá díú ñáyíu ñuyíú-a ducaⁿ ni dàcahu iní ñáhǎ-yu xii-n tnúhu-án. ¹⁸ Te yúhú xǎháⁿ-í Pèlú xii-n, te tnúhu-án quée-xí yúú, chi quèe ndáá-xi nàcuáa nàni-n, chi

cuu-n ñíⁿ téé vá cání ñíⁿ caní úú iní-xi canu ichi-n cuè ñáyíu nàcuáa cundecu ndihi ñáhá-yu xii-í. Te nchaa ñáyíu cùu cuendá-í vá ndácú yùcu ñávǎha dacuíta nihnu ñaha-xi xii-yu. ¹⁹ Te yúhú taxi-í tnúhu ndee iní cundecu ndihi-n cuendá cunuu-n núú cuè ñáyíu yíndaha ñaha Yá Ndiòxí, te nchaa sá ná cǎháⁿ-n sǎ cúú-xí sǎ vǎha, te diu-ni ducaⁿ cǎháⁿ Yá Ndiòxí, te nchaa sá ná cǎháⁿ-n sǎ ñà túú cùu-xi sǎ vǎha, te diu-ni ducaⁿ cǎháⁿ tucu-gǎ, chi quide-n nàcuáa cuñí-gǎ —cǎchí-gǎ xǎháⁿ-gǎ xii-dé.

²⁰ Te sátá dúcáⁿ te ní xáhaⁿ Jèsús xii cue téé xica cuu ndihi-gǎ sá vǎ yóo cúñaha-güedé sá díú-gǎ cúú-gǎ Crìstú Yaá ní tendaha Yá Ndiòxí véxi ñuyíú-a.

Jèsús cǎháⁿ-gǎ sá cǎhí ñàha-güedé xii-gǎ

(Mr. 8:31-9:1; Lc. 9:22-27)

²¹ Te ndéé dàvá-án ní ngúíta Jèsús xǎháⁿ-gǎ xii cue téé xica cuu ndihi-gǎ:

—Dacuítí sǎ quíhíⁿ-í ñuú Jerusàlén, te yacáⁿ cue téé cùu sacuéhé núú ñáyíu isràél, ndihi cue dútú cúnúu, ndihi cue téé dàcuaha ñaha xii ñáyíu nchaa tnúhu ní chídó tnùní ndí Moisés, nchaa cue téé-án ío dandòho ñaha-güedé xii-í, te cǎhí ñaha-güedé, dico nduu úní sá cúú-í te ndoto-í —cǎchí-gǎ xǎháⁿ-gǎ xii-güedé.

²² Te té Pèlú ní cana-dé Jèsús ñíⁿ xio, te ní ngúíta-dé ténàá ñáhá-dē xii-gǎ, te xǎháⁿ-dē:

—¡Sá vǎ cǎchí Ndiòxí sá dúcáⁿ ndòho-n chi ñá túú tàú-n sǎ dúcáⁿ ndòho-n! —cachí-dé xǎháⁿ-dē xii-gǎ.

²³ Te ndàa sátá Jèsús nútní té Pèlú òré ducaⁿ xǎháⁿ-dē xii-gǎ núu ní nchócuíhnu-gǎ, te xǎháⁿ-gǎ xii-dé:

—¡Xocuíñí yòhó yucu ñávǎha núú-í-a chi dícó quidé tnèñu-n! Chi ñá túú sàni iní-ò dàtná sání iní Yá Ndiòxí chi ñíⁿ-ni sàni iní-ò ndihi dava-gǎ cue ñáyíu ndècu ñuyíú-a —cǎchí-gǎ xǎháⁿ-gǎ xii-dé.

²⁴ Te sátá dúcáⁿ te ní xáhaⁿ-gǎ xii nchaa cue téé xica cuu ndihi-gǎ:

—Nchaa ñáyíu cuñí chitnahá ñáhá xii-í, te xini ñuhu-xi dañá-yu

vá cada-gã-yu sá sání ìní méé-yu, te ío cada ndee ìní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. ²⁵ Te nchaa ñáyiú cuíni sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñá túú tnàhí yùhú cuèi nándi sá ná yáha-yu cundecu-yu ñuyíú-a sá cuendá-í, te ñáyiú-áⁿ naníhí tãhú-yu. ²⁶ Te cuèi nchaandi túhú sá ío ñuyíú-a na nihí ñáyiú cundecu ndihí-yu, dico núu diu nchaa xĩáⁿ ná cada cuíta nihnú-yu te ñá túú vèdana nãndíhi-xi sá dúcáⁿ ndècu ndihí-yu nchaa xĩáⁿ. Te ni ìⁿ sá ío ñuyíú-a vá chĩndèe ñaha-xi xií-yu cuendá naníhí tãhú-yu. ²⁷ Te ndáá quée-xí tnúhu càháⁿ-í, chi na quixi tucu yúhú Tée cùu ñaní tnáhã-yu nchaa-yu, te dàvá-áⁿ quiní-yu sá ío càhnu cuu-í dàtná càhnu cuu Tátà-í Dútú Ndiõxí, te quixi-í ndihí cue espíritú xínú cuèchi núú-gã, te dàvá-áⁿ cuãha-í nchaa ñáyiú sá ndúú tãhũ-yu nãcuáa ndùu sá ñi quidé-yu ìⁿ ìⁿ-yu. ²⁸ Te na càchí tnúhu ndáá-í xii-ndo sã ío dava nchòhó ñáyiú ndècu ìha vitna vá cùú-ni-ndo, chi cundecu-ni-ndo ndèé quiní-ndó quixi tucu yúhú Tée cùu ñaní tnáhã-ndó nchaa-ndo taxi tnuni-í nchaa ñáyiú —càchí-gã xãhaⁿ-gã xii-güedé.

17

*Ní nadáma dóo Jèsús ndihí núú-gã
(Mr. 9:2-13; Lc. 9:28-36)*

¹ Te núú ìnú nduu sá dúcáⁿ ñi càháⁿ Jèsús, te ní xica-gã cuásaá-gã ìⁿ yucu dùcúⁿ, te ndèca-gã té Pèlú, ndihí té Jàcobó, ndihí té Juáa ñaní té Jàcobó-áⁿ cuásaá. Te úní tnàhí-ni cue tée-áⁿ ndécá-gã cuásaá. ² Te yucu-áⁿ ndécú-gã ní nadáma núú-gã ndihí dóo-gã, te núú-gã súúni dàtásaⁿ-xi dàtná quidé-xí núú nchĩcanchii, te dóo-gã súúni ñi nduu cuixíⁿ dàtná cáá ñùhú cuixíⁿ. ³ Te òré-ni-áⁿ ñi xiní-güedé ndíi Moisés ndihí té Eliás nútñi-güedé ndihí-gã ndátnúhu ndihí ñaha-güedé xii-gã. ⁴ Te té Pèlú ní xãhaⁿ-dè xii Jèsús:

—Mèstrú, ìváha ní cuu sá ndécú-ó ìha vitna! Te núu cuíni-n, te na dàcaa-ndí úní tnàhá vehe tnuvixiⁿ, te ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Eliás —càchí-dé xãhaⁿ-dè xii-gã.

⁵ Te ñini dùcaⁿ caháⁿ té Pèlú ní quexio ìⁿ vícò núú ndécú-güedé ní dàdãhu ñaha-xi xii-güedé te súúni chàhchí. Te xití vícò-ãⁿ ñi tecú ní càháⁿ Yã Ndiõxí, te xãhaⁿ-gã xii-güedé:

—Tée-a cùu-dé Déhe-í tée ío cùu ìní-í, te ío cùdĩ ìní-í-dé, te cundedóho-ndo nchaa tnúhu càháⁿ-dé —duha ní xãhaⁿ-gã xii-güedé.

⁶ Te sá dúcáⁿ ñi càháⁿ Yã Ndiõxí ní tecú dóho cue tée xica cuu ndihí Jèsús te ío ní yùhú-güedé, te ní ngüñi xití-güedé te ní nuu núú-güedé ndaa núú ñùhú. ⁷ Te Jèsús cuáhã-gã núú xĩndecu cue tée xica cuu ndihí-gã, te ní tendaha ñaha-gã, te xãhaⁿ-gã xii-güedé:

—Chí ndacuíñi, vá yùhú-ndó —càchí-gã xãhaⁿ-gã xii-güedé.

⁸ Te òré ní ndanehe núú-güedé, te ñá túú-gã ní xiní-güedé cue tée úú-áⁿ chi mee-nã Jèsús. ⁹ Te òré cuánuu ndihí ñaha Jèsús xii-güedé tĩndúú-ãⁿ, te ní xãhaⁿ-gã xii-güedé:

—Vá yõo cúñaha-ndo ñi ìⁿ sá ñi xiní-ndó núú ñi sáá-ó-á, te cuu càháⁿ-ndó dico ndéé ná yáha ndoto yúhú Tée cùu ñaní tnáhã-ndó nchaa-ndo sá cùú-í —càchí-gã xãhaⁿ-gã xii-güedé.

¹⁰ Te cue tée xica cuu ndihí-gã ní xãhaⁿ-güedé xii-gã:

—Cuíni-ndí cachí tnúhu-n ña cuendá cue tée dàcuaha ñaha xii ñáyiú nchaa tnúhu ní chídó tnúni ndíi Moisés càchí-güedé sá dĩhna-gã té Eliás quixi, te dàtnúni quixi Yáa tendaha Yã Ndiõxí quixi ñuyíú-a —càchí-güedé xãhaⁿ-güedé xii-gã.

¹¹ Te Jèsús ní xãhaⁿ-gã xii-güedé:

—Ndáá sá códó núu ìⁿ tée quixi-dé te cada-dé dàtná ní quide té Eliás te tée-áⁿ cada ndáá-dé nchaa nãcuáa cùu. ¹² Te na càchí tnúhu-í xii-ndo vitna sá sã ní quixi tée ní quide dàtná ní xóo cada té Eliás, te cue

ñáiyu ñá túú ní cùtnuní iní-yu sá díú-dě, te ní quide ñàhá-yu xii-dé nchaa nàcuáa ní quixi iní mée-yu, te díu-ni ducaⁿ càda ñaha tucú-yu xii yúhú Tée cùu ñaní tnáhă-yu nchaá-yu, chi dandòho ñahá-yu xii-í —càchí-gá xăhaⁿ-gă xii-güedé.

¹³ Te cue tée xica cuu ndihi-gá ní cutnùní iní-güedé sá cuendá ndí Juàá tée ní xóo dacuàndute ñaha xii ñáiyu ní cáháⁿ-gá.

Jèsús quidé tătna-gá ñⁿ tée cuechi tnàhá cuéhé xiyíhí

(Mr. 9:14-29; Lc. 9:37-43)

¹⁴ Te Jèsús ní nasáá-gá ndihi cue tée ní sáá ndihi-gá tındúú-ăⁿ núú xĩndecu vâi ñáiyu, te ní quexìo ñⁿ tée núú-gă ní ngüíñí xítí-dě, te xăhaⁿ-dě xii-gá:

¹⁵ —Mèstrú, cundàhú iní déhe-í chi tnàhá-dé cuéhé xiyíhí, te ío dândoho ñaha-xi xii-dé, te ní cuu vâi xito daquéé ñaha-xi núú ñuhú xii-dé, te ní cuu vâi tucu xito dangauñihu ñaha-xi ndute xii-dé. ¹⁶ Te sa ndéca-í-dé ní quixi núú cuè tée xica cuu ndihi-n dico ñá túú ní ndàcu-güedé cada tătna ñaha-güedé xii-dé —càchí-dé xăhaⁿ-dě xii-gá.

¹⁷ Te Jèsús ní xăhaⁿ-gă xii nchaa ñáiyu xĩndecu-áⁿ:

—Nchaa nchòhó ñáiyu ndècu ñuyíú-a, ío sáá iní-ndó chi ñá túú cuíní-ndó quíndáá iní-ndó Yă Ndiöxí, te ní cuu vâi nduu quide ndee iní-í nchaa sá quidé-ndó. ¿Te ná ndéé ama vá dúcáⁿ-gă cada-ndo-i? Te chí cándèca tée cùhú-áⁿ táquixi iha —cachí-gá xăhaⁿ-gă xii-yu.

¹⁸ Te Jèsús ní tenàá-gá espíritú cundíhí yucu ñávăha yíhí ñaha xii tée-áⁿ, te ní quee ñaha-xi xii-dé, te òré-ni-áⁿ nĩ ndúha-dé.

¹⁹ Te sáta dúcáⁿ te òré ndécú mée Jèsús ndihi cue tée xica cuu ndihi-gá, te ní xícáⁿ tnúhú-güedé núú-gă, te xăhaⁿ-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cundíhí yucu ñávăha yíhí ñaha xii tée-ăⁿ —càchí-güedé xăhaⁿ-güedé xii-gá.

²⁰ Te Jèsús ní xăhaⁿ-gă xii-güedé:

—Te ñá túú ní ndàcu-ndo, chi ñá túú sàndáá ndisa iní-ndó Yă Ndiöxí. Te na càchí tnúhu ndáá-í xii-ndo sã núu nchòhó quíndáá ndisa iní-ndó Yă Ndiöxí cuèdicó luha líí dàtná líhli ndíquíⁿ yutnu nàni mostázá, te ducaⁿ te cuu cúñaha-ndo xii ñⁿ tındúú xocuíñí-xi núú ndécú-xí te xocuíñí-xi. Te nchaa núú sã văha ndacu-ndo càda-ndo te núu na quíndáá iní ndisa-ndo Yă Ndiöxí. ²¹ Te xini ñuhu-xi sá ío cáháⁿ ndihi-ndo-gă te ñá túú tnàhí ná caxi-ndo cáháⁿ ndihi-ndo-gă, te ducaⁿ te ndacu-ndo quèñuhu-ndo espíritú cundíhí yucu ñávăha yíhí ñaha xii ñáiyu, dàtná cúú espíritú sá yíhí ñaha xii tée-ăⁿ ní cùu —cachí-gá xăhaⁿ-gă xii-güedé.

Jèsús cáháⁿ tucu-gá sá cáhni ñàha-güedé xii-gá

(Mr. 9:30-32; Lc. 9:43-45)

²² Te nini xica cuu Jèsús ndihi cue tée xica cuu ndihi-gá distritú Galileá, te ní xăhaⁿ-gă xii-güedé:

—Yúhú Tée cùu ñaní tnáhă-ndó nchaa-ndo sáá ñⁿ nduu te cuáha cuendá ñáhă-güedé xii-í núú cuè tée cùu úhú iní ñáhă, ²³ te cahni ñaha-güedé xii-í dico nduu úní sá cúú-í te ndoto-í —càchí-gá xăhaⁿ-gă xii-güedé.

Te sá dúcáⁿ nĩ xăhaⁿ-gă xii-güedé, te ío ní ndíhú iní-güedé.

Díhúⁿ cuendá veñúhu

²⁴ Te òré ní quexìo Jèsús ndihi cue tée xica cuu ndihi-gá ñuu Capèrnaúm, te cue tée quide cobrá díhúⁿ cuendá veñúhu ní sáhăⁿ-güedé ní cáháⁿ ndihi-güedé té Pèlú, te xăhaⁿ-güedé:

—¿Chăhu mèstrú-ndó úú díhúⁿ sã nání drăcmá cuendá veñúhu ăⁿ ñáhă? —càchí-güedé xăhaⁿ-güedé xii-dé.

²⁵ Te té Pèlú ní xăhaⁿ-dě:

—Chăhu-dé —càchí-dé xăhaⁿ-dě xii-güedé.

Te té Pèlú cuánguihu-dé xítí vehe núú ndécú Jèsús, te díhna-gá ní cáháⁿ-gá, te xăhaⁿ-gă xii-dé:

—Xímú, ¿nása sàni iní-n, ná cúú ñáiyu quide cobrá ñáhă cuè tée yindaha ñáiyu ndècu ñuyíú-a cuendá

nchaa sá ndúú yǎhu ñúú-güedé ndihí cuendá nchaa díhúⁿ sǎ ngáútnàha, cue ñáyíu ñúú-güedé ǎⁿ cuè ñáyíu véxi xica quide cobrá-güedé? —càchí-gá xǎhaⁿ-gǎ xii-dé.

²⁶ Te té Pèlú ní xǎhaⁿ-dě xii-gá:

—Cue ñáyíu véxi xica quide cobrá-güedé —càchí-dé xǎhaⁿ-dě xii-gá.

Te Jèsús ní xǎhaⁿ-gǎ xii-dé:

—Te núu ducaⁿ te cue ñáyíu ñúú-güedé ñá túú nǎ chǎhu-yu te núu ducaⁿ. ²⁷ Dico cuendá sá vǎ yǒ dasátú-ó ìní-xi, te cuàháⁿ làgúná te dàquée-n sǎ tñíⁿ chǎcá xití ndute, te chácá díhnanuu na tàva-n te cundehe-n yùhu-dí, chi yíhi ñⁿ díhúⁿ cuixíⁿ. Te díhúⁿ-ǎⁿ canehe-n quíhíⁿ chǎhu-n cuendá-í ndihí cuendá-n, chi díhúⁿ-ǎⁿ sa tnahá quéyǎhu cuendá-ó ndí ndúú-ó —càchí-gá xǎhaⁿ-gǎ xii-dé.

18

Cue té ndücu tñuhu núú Jèsús yoo ío-gá cúnüu

(Mr. 9:33-37; Lc. 9:46-48)

¹ Te sátá dúcáⁿ te cue té xica cuu ndihí Jesús ní sáháⁿ-güedé núú-gǎ, te xǎhaⁿ-güedé xii-gá:

—Cachí tñuhu xii-ndí, yoo ío-gá cúnüu núú cuè ñáyíu yíndaha ñaha Yá Ndiöxí —càchí-güedé xǎhaⁿ-güedé xii-gá.

² Te Jèsús ní cana-gá ñⁿ té líhli te ní sanutñí ñaha-gǎ xii-dé cuádava tnuú-güedé. ³ Te xǎhaⁿ-gǎ xii-güedé:

—Na càchí tñuhu ndáá-í xii-ndo sǎ núu vǎ dáñá-ndó nchàa sá ñá túú vǎha quide-ndo, te nduu ndàhú ìní-ndó dàtná ndàhú ìní té líhli-a, te vǎ ndúú tǎhú-ndó ndíhu ndaha ñaha Yá Ndiöxí xii-ndo. ⁴ Te ñáyíu quide datná quidé tǎ líhli-a ndàhú ìní-yu, te ñá túú quide cahnú-yu mèé-yu, ñáyíu-áⁿ ío cunüú-yu núú ndécú Yá Ndiöxí táxí tñuní-gá. ⁵ Te nchaa ñáyíu na quèheⁿ cuendá ñⁿ landú dàtná té líhli-a cuendá sá cúú ìní ñáhǎ-yu xii-í ñá, te cada ìní-yu sá yǎhú ní queheⁿ cuendá-yu —càchí-gá xǎhaⁿ-gǎ xii-güedé.

Quihi ìní-ó vǎ cúnðecu-o ichi cuehé ichi duha

(Mr. 9:42-48; Lc. 17:1-2)

⁶ Te Jèsús xǎhaⁿ tùcu-gá xii-güedé:

—Te núu ñⁿ té na dàcaháⁿ-dé cue ñáyíu sàndáá ìní ñáhá xii-í cadá-yu nándi sá cuèhé sá dúhá, te vǎha-gá sá ná dàcutu ndeé-güedé ñⁿ yúú yǒdó dúcúⁿ-dě, te dàquée ñaha-güedé xii-dé xití ndute làmár, te ñá díú sǎ cúnðecu-dé ducaⁿ càda-dé. ⁷ Te ndàhú ní cuu nchaa ñáyíu xíndecu ñuyíú-a, chi coo cue tée dàcaháⁿ ñáhá xii-yu cadá-yu nándi sá cuèhé sá dúhá te dacuití sǎ dúcáⁿ càda-xi! Te dico ndàhú ní cuu cue tée ducaⁿ na dàcaháⁿ ñáhá xii-yu cadá-yu nándi sá cuèhé sá dúhá!

⁸ Te núu ñⁿ xio ndaha-ndo àdi ñⁿ xio sáhá-ndó quide-xi quide-ndo nándi sá cuèhé sá dúhá, te quehdé-ndó ná cuíta, chi vǎha-gá sá nánihí tǎhú-ndó cuèi na cuíta ñⁿ xio ndaha-ndo àdi ñⁿ xio sáhá-ndó, te ñá díú sǎ quíhíⁿ-ndó ñihí ní ndúú-ndó núú ñùhú núú càyú. ⁹ Te núu ñⁿ xio tñüu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chi vǎha-gá sá nánihí tǎhú-ndó cuèi na cuíta ñⁿ xio tñüu-ndo, te ñá díú sǎ ndí ndúú xio núú-ndó quíhíⁿ-ndó núú ñùhú núú càyú.

Cuendá ñⁿ mbéé quiti ní xíta

(Lc. 15:3-7)

¹⁰ Te vǎ dàquée tihú-ndó cuè ñáyíu cùu cuendá-í cuèi cùú-yu ñáyíu ío ndàhú ìní-xi. Te na càchí tñuhu-í xii-ndo sǎ cuè espíritu xínú cuèchi núú Yá Ndiöxí, cue espíritu néhé cuendá ñáhá xii-yu ñuyíú-a, nchaa-ni nduu nchaa-ni òré ndécú-xí núú Tǎtà-í Dútú Ndiöxí Yá ndécú àndü. ¹¹ Te ducaⁿ chi yúhú Té cùu ñaní tnahá-ndó nchàa-ndo véxi-í ñuyíú-a dàcácu nihnu-í ñáyíu núú ùhú núú ndàhú, ñáyíu ta xíta nihnu cuáháⁿ.

¹² Te nása sàni ìní-ndó cuendá ñⁿ té ndècu ñⁿ ciendú mbéé-xi?, chi núu na cuíta ñⁿ-dí te dàndóo-dé cúmídíco sáhúⁿ cúmí-dí cundecu-dí ñⁿ yucu te quíhíⁿ-dé cúnúndúcú-dé quiti ní xíta-áⁿ. ¹³ Te núu na nánihí-dé-dí,

te nchòhó sa cùtnuní iní-ndó sã ïo-gã cudíí iní-dé cuendá quití ní xíta-án òré naníhí-dě-dí dàcúúxí cùmídícó sãhúⁿ cùmí quití ñà túú ní xíta-án. ¹⁴ Te ducaⁿ sãtnahá-xi quide Tátá-ó Dütú Ndiõxí Yaá ndécú àndiù, chi cuiní-gá sá vã cuíta ni ïⁿ cue ñáyiu cùu cuendá-gá.

Cada càhnu iní-ó sã quidé ñàha tnahà ñáyiu-o

(Lc. 17:3)

¹⁵ Te núu ïⁿ ñáyiu ndècu ndihí-ndo ní quidé-yu ïⁿ sá ñà túú tàú-yu cada-yu sá cúú-xí-ndó, te cãháⁿ-ndó dõho-yu núú méé nũú ïⁿ-ndó ndihí-yu cuendá sá ná ndixi cuéchi iní-yu sá ñà túú quide váha-yu. Te núu ní tñí-yu tnúhu ní xáhaⁿ-ndo xíí-yu, te ní ndacu-ndo ñí nacanu ichi-ndõ-yu. ¹⁶ Te núu ñà túú ní cuiní-yu tñí-yu tnúhu xáhaⁿ-ndo xíí-yu, te nducu-ndo ïⁿ àdi úú tnàhá cue téé canehe núú-güedé cuendá cundedóho-güedé nãcuáa ndùu tnúhu ndàtnúhu-ndo ndihí-yu. ¹⁷ Te tnàhá cue téé-án cãháⁿ-güedé dóho-yu, dico núu ni tnúhu cãháⁿ cue téé-án ñà túú ní cuiní-yu tñí-yu, te dàtúu-ndo nũú dàva-gá ñáyiu ndècu ndihí-ndo ichi Xítóhó Jesucristú cuendá cutnùní iní-yu nãcuáa quide ñáyiu-án. Te núu ñáyiu ndècuéchi-án ñà túú ní cuiní-yu tñí-yu tnúhu sá ñí xáhaⁿ dàva-gá cue ñáyiu ndècu ichi-gá, te cada-ná iní-ndó sã cúú-yu ñáyiu ñà túú ndècu ichi Yá Ndiõxí dàtná cue téé cuihna iní-xi quide cobrá ñàhá xii ñáyiu cuendá impuèstú.

¹⁸ Te na cãchí tnúhu ndáá-í xii-ndo sã nũu nchòhó ná cãchí-ndó sã ndécú cuéchi ñáyiu, te diu-ni ducaⁿ cãháⁿ Yá Ndiõxí, àdi cachí-ndó sã ñà túú cuéchi-yu te diu-ni ducaⁿ cãháⁿ tucu-gá, te ducaⁿ chi nchòhó quidé-ndó nãcuáa cãháⁿ-gá.

¹⁹ Te na cãchí tnúhu-í xii-ndo sã nũu úú tnàhá-ndó cùu ïⁿ nuu-ndo cãháⁿ ndihí-ndo Tátá-í Dütú Ndiõxí Yaá ndécú àndiù xicáⁿ-ndó nũú-gã nũu ná cúú sã cuiní-ndó, te taxi-gá nũu ná cúú sã xicáⁿ-ndó nũú-gã. ²⁰ Te núu úú tnàhá-ndó àdi úní tnàhá-ndó ñí

natacá-ndó ïⁿ xichi cuendá sá ñúhú iní ñàhá-ndó xii-í, te xíáⁿ ndécú ndihí ñàhá-í xii-ndo —cãchí-gá xáhaⁿ-gã xii-güedé.

²¹ Te té Pèlú ní sãháⁿ ndehe yatni-dé núú Jèsús, te xáhaⁿ-dẽ xii-gá:

—Mèstrú, cachí tnúhu xii-í ná daha xito cada càhnu iní-í tnàha ñáyiu-í te núu ïⁿ sá ná càda ñàhá-yu xii-í. ¿Cuèdicó úsá xito-ãⁿ? —cãchí-dé xáhaⁿ-dẽ xii-gá.

²² Te Jèsús ní xáhaⁿ-gã xii-dé:

—Yúhú cãchí-í sá ñà díú-ní úsá xito cada càhnu iní-n-yu, chi únídico úxí xito ndihí úsá ndihí úsá xito cada càhnu iní-n-yu —cãchí-gá xáhaⁿ-gã xii-dé.

Cuendá téé ñà túú quide càhnu iní tnàha ñáyiu-xi

²³ Te xáhaⁿ tucu-gá xii-güedé:

—Na càni-í ïⁿ cuendú núú-ndó nãcuáa tecú tnùní-ndó nãcuáa cada-xi òré ndíhu ndaha ñàha Yá Ndiõxí xii ñáyiu. ïⁿ téé yindaha ñàha xii ñáyiu ní sani iní-dé sá cáda ndáá-dé ndihí cue téé xínu cuechi núú-dẽ cuendá nchaa sá tàú-güedé núú-dẽ. ²⁴ Te òré sa ní ngúndecu túha-dé te ní quexio ïⁿ téé xínu cuechi núú-dẽ. Te téé-án tàú-dé cuéhé víhí díhúⁿ nũú-dẽ, chi tàú-dé úxí mĩ díhúⁿ sã nání tàlentú. ²⁵ Te téé xínu cuechi-án ñà túú díhúⁿ ndécú ndihí-dé nacháhu-dé sá tàú-dé núú patróóⁿ-dẽ-án, núu xíáⁿ ní táuchíúⁿ téé cùu patróóⁿ-dẽ-án dico ñàha-güedé xii-dé ndihí ñàdihí-dé ndihí cue déhe-dé ndihí nchaa sá ndécú ndihí-dé cuendá nchaa-yu cuú-yu ñáyiu ñà túú tnàhí dàñá quee núú chíúⁿ patróóⁿ-xi, te ducaⁿ te ndéyãhu sá tàú-dé núú patróóⁿ-dẽ.

²⁶ Te téé xínu cuechi-án ñí ngúñí xítí-dẽ núú patróóⁿ-dẽ, te xáhaⁿ-dẽ: “Patróóⁿ, cãháⁿ ndàhú-í núú-n sã ïo ndee ïo càhnu cada iní-n sã dúhá tàú-í núú-n, te ñà túú nã cani iní-n chi nacháhu-í nchaa sá tàú-í núú-n”, cãchí-dé xáhaⁿ-dẽ xii patróóⁿ-dẽ. ²⁷ Te téé cùu patróóⁿ-dẽ-án ñí cundàhú iní ñàhá-dẽ xii-dé, te ní quide càhnu iní ñàhá-dẽ, te ní dàñá ñàha-dé cuánuhú-dé. ²⁸ Te téé xínu cuechi-án ñí naníhí-dẽ ïⁿ téé xínu cuechi ndihí-dé

ichi cuánuhú-dé, te téé ní naníhí-dě-án tàú-dé sacú-ni díhúⁿ núú-dě chi ñⁿ ciendú-ni díhúⁿ denariúⁿ tàú-dé. Te ní tñi-dé téé tàú núú-dě-án dácuehne ñáhá-dě xii-dé, te xáhaⁿ-dě: “Nacháhu sá tàú-n núú-í”, cächí-dé xáhaⁿ-dě. ²⁹ Te téé tàú-án ní ngüñí xití-dě núú tée dii núú-xi tàú-dé-án, te xáhaⁿ-dě: “Càháⁿ ndàhú-í núú-n sá cádá càhnu iní ñáhá-n xii-í sá tàú-í núú-n, te nacháhu cuèé-í nchaá sá tàú-í núú-n”, cächí-dé xáhaⁿ-dě. ³⁰ Dico téé dii núú-xi tàú-dé-án ñà túú ní cuíní-dé cada ndee iní-dé cundetú-dé nacháhu cuèé téé-án sá tàú-dé, chi ní chihí ñaha-dě vecaá cuèndá yàcáⁿ quihí-dé ndéé nacháhu-dé nchaá sá tàú-dé. ³¹ Te dava-gá cue téé xinu cuechi ní xiní-güedé nàcuáa ní quide téé-án, te ní cudééⁿ-güedé núú-dě, te ní sáháⁿ-güedé ní xitnúhu-güedé téé cùu patróóⁿ-güedé sá dúcáⁿ ní quide-dé. ³² Te téé cùu patróóⁿ-güedé-án ní cana-dé téé ducaⁿ ní quide-án, te ní xáhaⁿ-dě: “Yòhó cúú-n ñⁿ téé ío cuihna iní-xi xinu cuechi núú-í, chi yúhú ní quide càhnu iní ñáhà-í xii-n cuèndá nchaá sá tàú-n núú-í òré ní cáháⁿ ndàhú-n. ³³ Te tñàhá yòhó tàú-n dùcaⁿ cada-n cada cahnu iní-n tée xinu cuechi ndihí-n núú-í cuèndá nchaá sá tàú-dé núú-n dàtná ní quide ñaha-í xii-n ní quide càhnu iní-í cuèndá nchaá sá tàú-n”, cächí téé cùu patróóⁿ-án xáhaⁿ-dě xii téé ducaⁿ ní quide-án. ³⁴ Te téé cùu patróóⁿ-án ní cudééⁿ víhí-dě sá dúcáⁿ ní quide téé-án, te ní táuchíúⁿ-dè dandòho ñaha-güedé xii-dé ndéé nacháhu-dé nchaá sá tàú-dé —duha ní caní Jèsús cuèndú núú-güedé.

³⁵ Te xáhaⁿ tùcu-gá xii-güedé:

—Dàtná ní quide téé cùu patróóⁿ-án ní dándóhó-dè téé tàú núú-dě-án ducaⁿ càda ñaha Tàtá-í Dútú Ndiòxí Yaá ndécú àndiú xii-ndo, te núú vá ní yúhu ní iní-ndó càda cahnu iní-ndó sá quidé ñaha tñaha ñáyíu-ndo xii-ndo —cachí-gá xáhaⁿ-gá xii-güedé.

19

Jèsús càháⁿ-gá cuèndá cue ñáyíu dàña tñaha
(Mr. 10:1-12; Lc. 16:18)

¹ Te sátá ní yáha ducaⁿ ní cáháⁿ Jèsús, te ní ndee-gá distritú Galileá cuáháⁿ-gá ndàa ingá xio yúte Jòrdán yucu distritú Júdeá. ² Te ío cuèhé ñáyíu nchicúⁿ ñáhá xii-gá cuáháⁿ, te yàcáⁿ ní quide tátna-gá nchaá ñáyíu cùhú.

³ Te ní quexìo ñⁿ úú cue téé cùu fariséú núú ndécú Jèsús xitó ndéé ñáhá-güedé xii-gá núu nása cunduu tñúhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tñúhú-ndí núú-n, ¿cuu dañá ñⁿ téé ñadìhí-dé núu ndédani càa ñⁿ sá ñà túú cùndáá-yu-ãⁿ? — cächí-güedé xáhaⁿ-güedé xii-gá.

⁴ Te Jèsús ní xáhaⁿ-gá xii-güedé:

—Te nchòhó, ¿náa ñá túú dàcuaha-ndo núu tütú Yá Ndiòxí, te diu núú tütú-gá càháⁿ-xi sá cùtnàhá ní cadúha-gá ñáyíu, te téé ñadìhí ní cadúha-gá-ãⁿ?

⁵ Te duha cächí tucu-xi núú tütú Yá Ndiòxí nàcuáa ní cáháⁿ-gá: “Cue téé na nihí ñadìhí-xi te diñⁿ-ná cada-güedé tátá-güedé ndihí náná-güedé, chi ñadìhí-ná-güedé cuu cuu ndihí-güedé, te cada iní-ndó sá ñⁿ-ná yiqui cùñú cuú-yu cundecú-yu”, duha cächí Yá Ndiòxí núú tütú-gá. ⁶ Te xáⁿ núu cada iní-ndó sá cuè ñáyíu úú-án ñⁿ-ná yiqui cùñú cúú-yu, te ñá túú-gá ndi díñⁿ ndi díñⁿ yiqui cuñú cúú-yu. Núu xáⁿ ñá túú nduu váha-xi dañá cuè téé ñadìhí-güedé, chi mee Yá Ndiòxí ní cachí-gá sá cúú úú-yu cundecú-yu —cächí Jèsús xáhaⁿ-gá xii-güedé.

⁷ Te ní xáhaⁿ-güedé xii Jèsús:

—Te núu ducaⁿ, ¿te ná cuèndá ndíi Moisés ní cachí ndíi sá núu ñⁿ téé cuíní-dé dañá-dè ñadìhí-dé, te cuu cadúha-dé ñⁿ tütú núú càháⁿ-xi sá ní dañá-dè ñadìhí-dé, te ducaⁿ te cuu dañá ñaha-dé ní cachí ndíi vãⁿ? — cächí-güedé xáhaⁿ-güedé xii-gá.

⁸ Te Jèsús ní xáhaⁿ-gá xii-güedé:

—Te ducaⁿ ní cachí ndíi Moisés sá cúú dàña-ndo ñadìhí-ndó, chi nchòhó ío sáa iní-ndó, dico ndéé díhna chi ní tecú tñúhu nchaá cue téé sá vã dañá-güedé ñadìhí-güedé. ⁹ Dico yúhú cächí tñúhu-í xii-ndo sá núu ñⁿ téé na dàña-dé ñadìhí-dé te naqueheⁿ-dé ingá ñadìhí te ío nèhé quidé-dè, te núu

ñá díú cuendá sá càháⁿ ndihí-aⁿ ingá téé ducaⁿ na dàña ñaha-dé. Te sá dúcáⁿ cuendá-ni na dàña ñⁿ téé ñadìhí-dé, te ñⁿ-ni cuèchi cùu-xi ndihí cuèchi quide téé ndèca ñadìhí te càháⁿ ndihí-dé ingá ñadìhí —càchí-gá xăhaⁿ-gă xii-güedé.

10 Te cue téé xica cuu ndihí-gá ní xăhaⁿ-güedé xii-gá:

—Te núu ducaⁿ cùu cuendá cue téé ndihí ñadìhí-güedé, te váha-gá sá vă cándèca cue téé ñadìhí —càchí-güedé xăhaⁿ-güedé xii-gá.

11 Te Jèsús ní xăhaⁿ-gă xii-güedé:

—Ñá ncháá ñăyiu ducaⁿ ndùu tăhŭ-yu cundecú-yu, chi mee-ni ñăyiu ní cachí Yă Ndiöxí sá dúcáⁿ tnăhí nduu tăhú cundecu mee. 12 Te ió cue téé ducaⁿ tnăhí ní nduu tăhú-güedé ndéé òré ní cacu-güedé sá vă cándèca-güedé ñadìhí. Te ió cue téé ñá ndácú-güedé candeca-güedé ñadìhí cuendá sá ní quide ñaha dàva-gá cue tnăha téé-güedé xii-güedé. Te dava-güedé ñá túú cándeca-güedé ñadìhí chi cuení-güedé sá vă dáña ndéé-güedé cunu cuechi-güedé núu Yă Ndiöxí. Te nchaa cue téé ducaⁿ ní nduu tăhú núu Yă Ndiöxí cundecu mee, te váha-ni te núu na cundecu mee-güedé —càchí-gá xăhaⁿ-gă xii-güedé.

Jèsús xicáⁿ tăhú-gă núu Yă Ndiöxí cuendá landú (Mr. 10:13-16; Lc. 18:15-17)

13 Te ñⁿ ũú ñăyiu ndècá-yu landú lîhli cuáháⁿ núu Jèsús, chi cuení-yu sá téndàha ñaha-gá xii-güexi, te cacáⁿ tăhú-gă núu Yă Ndiöxí cuendá-güexi. Te cue téé xica cuu ndihí-gá ní ngüíta-güedé ténàá ñáhá-güedé xii-yu, te xăhaⁿ-güedé sá vă dúcáⁿ càdá-yu. 14 Te Jèsús ní xăhaⁿ-gă xii-güedé:

—Chí dáña ná quixi nahi cue landú lîhli-áⁿ nŭù-í-a, te vă càdí-ndó ìchi-güexi, chi dàtná cúú váha iní cue landú lîhli-áⁿ ducaⁿ cùu váha iní cue ñăyiu yindaha ñaha Yă Ndiöxí —càchí-gá xăhaⁿ-gă xii-güedé.

15 Te ní tendaha ñaha-gá xii-güexi, te ní xicáⁿ tăhú-gă núu Yă Ndiöxí

cuendá-güexi, te sátá dúcáⁿ ní quide-gá te ní xica-gá cuáháⁿ-gá.

Ëⁿ téé cuica càháⁿ ndihí-dé Jèsús (Mr. 10:17-31; Lc. 18:18-30)

16 Te ñⁿ téé cuechi ní quexìo-dé núu ndécú Jèsús, te xicáⁿ tnúhú-dé núu-gă, te xăhaⁿ-dë xii-gá:

—Yòhó Mèstrú, cùu-n téé ío váha iní-xi, te cuení-í nŭu vá cündèe iní-n càchí tnúhu-n nă cúú să váha cada-í cuendá nduu tăhú-í cundecu-í ndihí Yă Ndiöxí ní caa ní quíhíⁿ —càchí-dé xăhaⁿ-dë xii-gá.

17 Te Jèsús ní xăhaⁿ-gă xii-dé:

—¿Te cùtnuní iní-n năcuáa ndùu tnúhu càháⁿ-n să yŭhú váha iní-ăⁿ?, chi ñⁿndi díí-ni Yă Ndiöxí ío váha iní-gá. Te núu cuení-n năníhí tăhú-n te tnŭ-n nchaa tnúhu càháⁿ Yă Ndiöxí, tnúhu sá sánú ìchi ñaha xii ñăyiu năcuáa cadá-yu cundecú-yu —càchí-gá xăhaⁿ-gă xii-dé.

18 Te téé cuechi-ăⁿ ní xăhaⁿ-dë xii-gá:

—¿Te ndëndida càa tnúhu càháⁿ Yă Ndiöxí cada-í-i? —càchí-dé xăhaⁿ-dë xii-gá.

Te Jèsús ní xăhaⁿ-gă xii-dé:

—Te duha ní cachí Yă Ndiöxí cada ñăyiu: “Vă cáhní-ndó tnăha ñăyiu-ndo, vá càháⁿ ndihí-ndo ñadìhí te núu ñá díú ñadìhí-ndó cùu-yu, te ducaⁿ-ni nchòhó cue ñăyiu dîhí tucu vá càháⁿ ndihí-ndo tēe te núu ñá díú yŭ-ndo cuu-güedé, te vá dúhú-ndó să ndécú ndihí tnaha ñăyiu-ndo, vá dácàcu-ndo cuèchi neñúú sá cúú-xí tnăha ñăyiu-ndo. 19 Te canehe-ndo să yíñùhu núu tătá-ndó ndihí núu năná-ndó, te cundàhú iní-ndó tnăha ñăyiu-ndo dàtná cündàhú iní-ndó mèe-ndo”, duha ní cachí Yă Ndiöxí cada ñăyiu —càchí-gá xăhaⁿ-gă xii-dé.

20 Te téé cuechi-ăⁿ ní xăhaⁿ-dë xii-gá:

—Nchaa xíăⁿ ní ngüíta-í quidè-í ndéé cùtnàhá cúú landú-í, ¿te vitna nágá cúmăní cada-í-i? —càchí-dé xăhaⁿ-dë xii-gá.

21 Te Jèsús ní xăhaⁿ-gă xii-dé:

—Te núu cuení-n cùu-n ñⁿ téé ío váha cada ndáá, te cuáháⁿ dico-n

nchàa sá ndécú ndìhi-n, te díhúⁿ-n cuàha táhú-n cue ñáyiú ndàhú, te ducaⁿ te nduu táhú-n ngündecu váha-n núú ndécú Yá Ndióxi táxi tnùní-gá. Te sátá ná yáha ducaⁿ càda-n te quixi-n chìtnahá ñáhá-n xii-í — càchí-gá xàhaⁿ-gã xii-dé.

²² Te sá dúcáⁿ ñí xáhaⁿ Jèsús xii-dé te ío ní cundií-dé, chí ío cuica-dě, te ní xica-dé cuáháⁿ-dé.

²³ Te Jèsús ní xáhaⁿ-gã xii cue téé xica cuu ndìhi-gá:

—Na càchí tnúhu ndáá-í xii-ndo sã ío úhú quíndáá iní ñaha cue ñáyiú cuica xii Yá Ndióxi cuèndá ndíhu ndaha ñàha-gá xii-yu. ²⁴ Te na càchí tnúhu tucu-í xii-ndo sã yáchí-gá yáha ñⁿ caméyu yaú ñⁿ yiqui tìcú dàcúxí sã quíndáá iní ñⁿ ñáyiú cuica Yá Ndióxi cuèndá ndíhu ndaha ñàha-gá xii-yu — càchí-gá xàhaⁿ-gã xii-güedé.

²⁵ Te sá dúcáⁿ ñí cáháⁿ Jèsús, xíáⁿ ío ní cuñúhu cue téé xica cuu ndìhi-gá, te ní ngúíta-güedé xìtnàha-güedé:

—¿Yoo naníhí tãhú te núu ducaⁿ vãíⁿ? —càchí-güedé xìtnàha-güedé.

²⁶ Te Jèsús ní ndacoto-gá núú-güedé, te xàhaⁿ-gã xii-güedé:

—Nchaa ñáyiú ñuyíú-a chí vá ndácũ-yu ná cadá-yu nàcuáa ndíhu ndaha ñàha Yá Ndióxi xii-yu, dico mee-gã chí ndacu-gá ndíhu ndaha ñàha-gá xii-yu chí nchaandi túhú sã váha ndàcu-gá quidé-gã —càchí-gá xàhaⁿ-gã xii-güedé.

²⁷ Te té Pèlú ní xáhaⁿ-dě xii-gá:

—Nchúhú ní dándõ-ndí nchaa sá ndécú ndìhi-ndí, te ní tuha ñaha-ndí xii-n, ¿te ná cúú sã ñihí-ndí nduu táhú-ndí sá dúcáⁿ ñí quide-ndí-i? —càchí-dé xàhaⁿ-dě xii-gá.

²⁸ Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sã ná sãá nduu, ndùu saa nchaa sá ío andíu ndìhi ñuyíú-a, te dàvá-áⁿ cunucóo yúhú Téé cùu ñaní tnáhá-ndó nchàa-ndo ñⁿ núú xilé váha, te nchaa ñáyiú quini-yu sã ío càhnu cuu-í, te nchòhó cue téé ní tuha ñaha xii-í tnáhá-ndó cunucóo-ndo núú ñⁿ caa xilé váha ndí ùxúú tnáhá-ndó, te xiáⁿ

cunucóo-ndo càda ndáá-ndó cuèchi ndí ùxúú xichi cue ñáyiú isràél. ²⁹ Te nchaa ñáyiú na dándõo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu ducaⁿ na cadá-yu sá cuèndá-í te ío-gá cuéhé sã cuãñaha Yá Ndióxi cundecu ndìhi-yu, te ñá díú-ní xíáⁿ chí tnáhá nduu táhú-yu cundecú-yu ndìhi-gá ñí caa ñí quíhíⁿ. ³⁰ Te dava ñáyiú cùnnu ndecu ichi Yá Ndióxi vitna, ñáyiú-áⁿ sãá nduu te vá ío-gá cunúú-yu dàtná cùnúú-yu vitna, te dava ñáyiú nchìcúⁿ ñá túú cùnnu vitna, ñáyiú-áⁿ sãá nduu te ío cunúú-yu —càchí-gá xàhaⁿ-gã xii-güedé.

20

Cuèndá cue téé quide chiur

¹ Te xàhaⁿ tucu Jèsús xii cue téé xica cuu ndìhi-gá:

—Na càni-í ñⁿ cuèndú núú-ndó cuèndá tecú tnùní-ndó nàcuáa cada-xi òré ndíhu ndaha ñàha Yá Ndióxi xii ñáyiú. ñⁿ téé ní xitu-dé yoho yàha stilé, te ñⁿ nduu ní quee-dé nehé-ni cuándúcú-dé cue téé cada chiurⁿ núú dúcáⁿ ñí xitu-dé yoho yàha stilé-áⁿ. ² Te òré ní níhí-dě cue téé cada chiurⁿ-áⁿ, te ní quide ndáá-dé ndìhi-güedé sã chãhu ñaha-dě xii-güedé ñⁿ díhúⁿ denariú ñⁿ nduu. Te sátá dúcáⁿ te ní tendaha ñàha-dé xii-güedé cuáháⁿ-güedé cada chiurⁿ-güedé núú dúcáⁿ ñí xitu-dé yoho yàha stilé-áⁿ. ³ Te dàtnùní ní xica tucu-dé cuáháⁿ-dé dàtná òré caá ñⁿ dátneé cuándúcú-gã-dé cue téé cada chiurⁿ núú ñí xitu-dé yoho yàha stilé-áⁿ, te ní xiní-dé xínutnii ñⁿ úú cue téé núú yãhu te ñá túú nã chiurⁿ xíquide-güedé. ⁴ Te ní xáhaⁿ-dě xii-güedé: “Ñá túú cùdana cuyáchí-ndó càda-ndo chiurⁿ-í te cháhu ñaha-í xii-ndo nàcuáa tàú-xi cundu-áⁿ”, càchí-dé xàhaⁿ-dě xii-güedé. Te cue téé-áⁿ ñí sãha-güedé tnúhu cada chiurⁿ-güedé te ní xica-güedé cuáháⁿ-güedé. ⁵ Te téé ní xitu yoho yàha stilé-áⁿ ñí xica tucu-dé dàtná òré cauxúú nduu cuándúcú-gã-dé cue téé

cada chiùⁿ-dé, te ní níhí tucu-dé cue téé cada chiùⁿ. Te ní quee tucu-dé dàtná òré caá úní sacuaa, te diu-ni ducaⁿ nǐ quide tucu-dé. ⁶ Te ní quee tucu-dé dàtná òré caá úhúⁿ sacuaa cuándúcú-gǎ-dé cue téé cada chiùⁿ-dé, te ní xiní-dé xǐnutnǐ ìⁿ úú cue téé diu-ni núú yǎhu-áⁿ te ñá túú nǎ chiùⁿ quide-güedé, te ní xáhaⁿ-dě xii-güedé: “Sànuu sá nchòhó ní cuu nchàca vitna ñá túú níhí-ndó chiùⁿ cada-ndo”, cachí-dé xáhaⁿ-dě xii-güedé. ⁷ Te cue téé-áⁿ nǐ xáhaⁿ-güedé xii-dé: “Ñá túú níhí-ndí chiùⁿ cada-ndí chi vá yǎo ndùcu ñaha xii-ndí”, cǎchí-güedé xáhaⁿ-güedé xii-dé. Te ní xáhaⁿ-dě xii-güedé: “Yúhú taxi-í chiùⁿ cada-ndo, te quíhíⁿ-ndó núú nǐ xitu-í yoho yàha stilé yàcáⁿ cada chiùⁿ-ndo, te cháhu ñaha-ǐ xii-ndo nàcuáa tàú-xi cunduu”, cǎchí-dé xáhaⁿ-dě xii-güedé. ⁸ Te sátá nǐ dáhu nchíanchii, te téé dii chiùⁿ-xi-áⁿ nǐ xáhaⁿ-dě xii téé tàxi tnuní ñáhá xii cue téé quide chiùⁿ-áⁿ: “Cúñaha xii nchaa cue téé quide chiùⁿ-áⁿ ná quíxí-güedé te cháhu-n-güedé, te díhna-gá cue téé nchícúⁿ cuíⁿ-nǎ cuánguǐhu núú chíúⁿ ngüǐta-n cháhu-n, te ndéé núú nǐ ndíhí-nǎ cháhu-n cué téé cuánguǐhu díhna nuu-gǎ núú chíúⁿ”, cǎchí-dé xáhaⁿ-dě xii téé tàxi tnuní ñáhá xii cue téé quide chiùⁿ-áⁿ. ⁹ Te díhna-gá cue téé cuánguǐhu caá úhúⁿ sacuaa ní quexìo-güedé cuendá cháhu ñaha-dé, te ní cháhu ñaha-dé ìⁿ caa díhúⁿ denàriú xii ìⁿ ìⁿ-güedé. ¹⁰ Te sátá nǐ cháhu-dé dava-gá cue téé ní quide chiùⁿ. Te ndéé núú nǐ ndíhí-nǎ ní cháhu-dé cue téé cuánguǐhu díhna nuu-gǎ núú chíúⁿ. Te cue téé-áⁿ nǐ sani iní-güedé sá vái-gǎ cháhu ñaha-dé xii-güedé, dico ñáhá chi ìⁿ caa-ni díhúⁿ denàriú ní cháhu ñaha-dé xii ìⁿ ìⁿ-güedé. ¹¹ Te cue téé-áⁿ nǐ queheⁿ cuendá-güedé díhúⁿ-güedé dico ñá túú ní quide váha-xi iní-güedé. ¹² Te ní xáhaⁿ-güedé xii téé dii chiùⁿ-xi ní quide-güedé: “¿Ná cuendá cue téé nchícúⁿ cuíⁿ-nǎ cuánguǐhu núú chíúⁿ ìⁿ-ni nǐ cháhu ñaha-n xii-ndí ndíhí-güedé, te ìⁿ dii oré duha ní quide chiùⁿ-güedé? Te nchúhú

nchàca nchaa ní sahni iní-ndí ní quide chiùⁿ-ndí, te ní ndoho-ndí cahni, te ìⁿ-ni nǐ cháhu ñaha-n xii-ndí ndíhí-güedé”, cǎchí-güedé xáhaⁿ-güedé xii téé dii chiùⁿ-xi ní quide-güedé. ¹³ Te téé dii chiùⁿ-xi ní quide-güedé-áⁿ nǐ xáhaⁿ-dě xii ìⁿ téé-áⁿ: “Yòhó, ñá túú quide-í ìⁿ sá ñá túú tàú-í cada-í sá cúú-xi-n, chi ní quide ndáá-ó sǎ díú-ní ìⁿ díhúⁿ denàriú cháhu ñaha-ǐ xii-n ìⁿ nduu. ¹⁴ Te vitna queheⁿ díhúⁿ cuendá nduu-n te núhú-n, chi yúhú cuíní-í sá ìⁿ-ní cháhu ñaha-ǐ xii-n ndíhí cue téé nchícúⁿ cuíⁿ-nǎ cuánguǐhu núú chíúⁿ. ¹⁵ Chi yúhú cuu-ni cada-í nání cuíní-í ndíhí díhúⁿ-í, ¿àdi dico ñá túú quide váha-xi iní-n sǎ dúhá cundahú iní-í cue téé-áⁿ ducaⁿ cháhu-í-güedé?”, cǎchí téé cùu patróoⁿ-áⁿ xáhaⁿ-dě xii téé-áⁿ. Duha nduu cuendú cání-í núú-ndó. ¹⁶ Te duha cǎhán-í chi dava ñáyiú cunuú ndecu ichi Yá Ndiòxí vitna sáá nduu te vá cúnúu vihi-gá-yu dàtná cúnúú-yu vitna, te dava ñáyiú ñá túú cunuú vitna sáá nduu ìo cunúú-yu. Te ío cuéhé ñáyiú cǎhán ñáhá Yá Ndiòxí xii-yu dico sacú-ni-yu nduu táhú-yu cundecú-yu ndíhí-gá – cǎchí-gá xáhaⁿ-gǎ xii-güedé.

Jèsús cǎhán tucu-gá sá cǎhni ñaha-güedé xii-gá

(Mr. 10:32-34; Lc. 18:31-34)

¹⁷ Te ñuhu Jesús ichi cuásaá-gá ñuu Jerusàlén ndíhí cue téé xica cuu ndíhí-gá, te ní cana ñaha-gǎ xii-güedé ní naníhí tnáhá-güedé ndíhí-gá, te ta ndàtnúhu ndíhí ñaha-gǎ xii-güedé cuáháⁿ, te xáhaⁿ-gǎ xii-güedé:

¹⁸ —Vitna ñuhu-o ichi cuásaá-ó ñuu Jerusàlén, te yàcáⁿ cuáha cuendá ñáhá-güedé xii yúhú Téé cùu ñaní tnáhá-ndó nchàa-ndo núú cué téé cùu dútú cúnúu, ndíhí núú cué téé dàcuaha ñaha xii ñáyiú nchaa tnúhu ní chídó tnuní ndí Moisés. Te diu cue téé-áⁿ cǎñaha-güedé xii dava-gá cue téé sá cǎhni ñaha-güedé xii-í. ¹⁹ Te cuáha cuendá ñáhá-güedé xii-í núú cué téé ñá túú cùu cue téé isràél, te cue téé-áⁿ cudíquí ndéé ñáhá-güedé xii-í, te caniha-güedé ndíhí ñí, te dàtnuní

cata caa ñaha-güedě xii-í núú cùrúxí te núú cùrúxí-áⁿ cuú-í, dico nduu úní sá cùú-í te ndoto-í —càchí-gá xăhaⁿ-gă xii-güedě.

Năná tĕ Jăcobó ndihí tĕ Juăá cuiní-aⁿ sá cúnũu-güedě ndihí Jĕsús

(Mr. 10:35-45)

²⁰ Te cue déhe tĕ Zebèdeú tĕ Jăcobó ndihí tĕ Juăá ndécá ñaha náná-güedě xii-güedě cuáháⁿ núú ndécú Jĕsús, te òré ní quexiò-aⁿ ndihí-güedě núú ndécú-gă te ní ngũíñí xítí-áⁿ nũú-gă cuendá cuiní-aⁿ ndàtnúhu ndihí ñaha-aⁿ xii-gá cuendá sá cùú-xí cuè déhe-aⁿ. ²¹ Te cùmání-gă cáháⁿ-aⁿ te ní xicáⁿ tnúhú Jĕsús núú-aⁿ, te xăhaⁿ-gă:

—¿Ná cuiní-n? —càchí-gá xăhaⁿ-gă xii-aⁿ.

Te ní xăhaⁿ-aⁿ xii-gá:

—Véxi-í càháⁿ ndàhú-í núú-n nũu vá cùndĕe iní-n cùnucóo ĩⁿ déhe-í-a xio cùha-n, te ingá-dé cunucóo-dé xio dàtni-n na saá nduu cùnucóo-n nũú táxí tnùn-í-n —càchí-áⁿ xăhaⁿ-aⁿ xii-gá.

²² Te Jĕsús ní xăhaⁿ-gă xii úú cue tĕe-áⁿ:

—Nchòhó, ñá túú cùtnuní váha iní-ndó năcuáa ndũu sá xicáⁿ-ndó nũú-í. ¿Te năa cundee iní-ndó dândoho ñaha ñáyiú xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-ăⁿ? —càchí-gá xăhaⁿ-gă xii-güedě.

Te ní xăhaⁿ-güedě xii-gá:

—Cundee iní-ndí yáha-ndí nchaa năcuáa càháⁿ-n-ăⁿ —càchí-güedě xăhaⁿ-güedě xii-gá.

²³ Te Jĕsús ní xăhaⁿ-gă xii-güedě:

—Ndáá sá cùndĕe iní-ndó ndòho-ndo nchaa năcuáa ndòho-í, dico sá dúcáⁿ cuiní-ndó să ĩⁿ-ndó cùnucóo-ndo xio cùha-í, te ĩⁿ-ndo cùnucóo-ndo xio datni-í, te xiăⁿ chi ñá díú yũhú tàú-í cachí-í nũu sá cùú cùnucóo-ndo àdi sá vă cùú cùnucóo-ndo, chi mee Tătà-í Dútú Ndiòxí cachí-gá te núú ná cùú ñáyiú nduu táhú cunucóo diñi-í dăvâ-áⁿ —càchí-gá xăhaⁿ-gă xii-güedě.

²⁴ Te òré ní níhí ũxí-gá cue tĕe xica cuu ndihí-gá tnúhu năcuáa ndũu sá cuiní cue tĕe úú-áⁿ, te ní cudééⁿ-güedě

núú cuè tĕe úú-áⁿ. ²⁵ Te Jĕsús ní cana-gá nchaa cue tĕe xica cuu ndihí-gá, te ní xăhaⁿ-gă xii-güedě:

—Nchòhó xini-ndó să cuè tĕe yindaha nacióⁿ quidé-güedě sá ïo cùnũu-güedě, te nchaa dava-gá cue tĕe cùnũu ndihí-güedě quidé-güedě tnáhá-güedě sá ïo cùnũu-güedě. ²⁶ Dico nchòhó chi vá dúcáⁿ càda-ndo, chi núú dava-ndo cuiní-ndó cùnũu-ndo, te xini ñuhu-xi cunu cuechi núú tnáhá-ndó te vá cádá-ndó să cúnũu-ndo. ²⁷ Te núú dava-ndo cuiní-ndó quĕne cáva-ndo, te cuu-ndo dàtná cue ñáyiú ñá túú tnáhí dàñá quee núú chíúⁿ pàtróoⁿ-xi cunu cuechi nũú tnáhá-ndó. ²⁸ Te cada-ndo dàtná quidé yũhú Tĕe cùú ñanı tnáhá-ndó nchaa-ndo, chi yúhú véxi-í ñuyíú-a dico ñá díú să cúnú cuèchi ñáyiú núú-í chi véxi-í sá cúnú cuèchi-í núú-yu. Te cuú-í ñuyíú-a cuendá vai-yu cácu nihnú-yu núú ùhú núú ndàhú —càchí-gá xăhaⁿ-gă xii-güedě.

Jĕsús quidé tătna-gá núú ũú tnàhá cue tĕe cuáá
(Mr. 10:46-52; Lc. 18:35-43)

²⁹ Te òré ní quee Jĕsús ñuú Jericó ndihí cue tĕe xica cuu ndihí-gá, te cuéhé víhí ñáyiú nchicúⁿ ñáhá xii-gá cuáháⁿ. ³⁰ Te yuhu ìchi cuáháⁿ-gă xñucóo úú tnáhá cue tĕe cuáá, te cue tĕe-áⁿ ñí cutnùn-í iní-güedě sá Jĕsús ñúhú-gă ìchi-áⁿ te ní ngũíta-güedě níhi càháⁿ-güedě, te xăhaⁿ-güedě xii-gá:

—¿Yòhó Mèstrú, ñanı tnáhá ndĩ

Dàvíí, cundàhú iní ñáhá xii-ndí! —càchí-güedě xăhaⁿ-güedě xii-gá.

³¹ Te cue ñáyiú tĕnaá ñáhă-yu xii-güedě, te xăhăⁿ-yu sá ná càdí-güedě yuhu-güedě, dico uuⁿ-gá níhi ní cáháⁿ-güedě, te xăhaⁿ-güedě xii-gá:

—¿Yòhó Mèstrú, ñanı tnáhá ndĩ Dàvíí, cundàhú iní ñáhá xii-ndí! —càchí-güedě xăhaⁿ-güedě xii-gá.

³² Te ní ngũíñí Jĕsús te ní cana ñaha-gă xii-güedě, te ní xicáⁿ tnúhú-gă núú-güedě, te xăhaⁿ-gă:

—¿Ná cuiní-ndó càda ñaha-í xii-ndo-i? —càchí-gá xăhaⁿ-gă xii-güedě.

33 Te ní xáhaⁿ-güedě xii-gá:

—Mèstrú, cuíní-ndí sá cádá tătna-n nũú-ndí cuëndá cundehe-ndí — cächí-güedé xáhaⁿ-güedě xii-gá.

34 Te Jèsús ní cundàhú iní ñáhá-gă xii-güedé, te ní tendaha-gă núú-güedě. Te òré-ni ní ndúha núú-güedě, te nchìcúⁿ ñáhá-güedě xii-gá cuáháⁿ.

21

Jèsús cuánguihu-gá ñuú Jerusàlén

(Mr. 11:1-11; Lc. 19:28-40; Jn. 12:12-19)

1 Te òré sa ta cùyatni Jèsús ndihí cue téé xica cuu ndihí-gá ñuú Jerusàlén, te ní quexìo-gá ndihí-güedé yatni víí-nă ñuú Bèttagé, te xíaⁿ cáá yùcu nani Olívú. Te ní ndatnúhu-gá ndihí úú cue téé xica cuu ndihí-gá, 2 te ní xáhaⁿ-gă xii-güedé:

—Chí cuáháⁿ ñuú cáá yàtni yacáⁿ, te òré quexìo-ndo yacáⁿ te nanihí-ndó ñⁿ búrru dîhí ndètníⁿ-dî ndihí déhe-dî, te nandaxi-ndo-güèdî te candeca-ndo-güèdî quixi. 3 Te núú íó ñáyiú dàdahaⁿ ñaha xii-güedî, te cúñaha-ndo xii-yu sá yùhú Yaa xicá cùu ndihí-ndo xini ñuhu-í-güedî, te ndihí-ni natendaha-í-güedî núhú-güedî cúñaha-ndo —cächí-gá xáhaⁿ-gă xii-güedé.

4 Te ducaⁿ ñí cuu chi ní quee ndáá-xi nàcuáa ní chídó tñùní ñⁿ téé ní xóo cáháⁿ tñúhu Yá Ndiòxí ndéé sanaha nũú tütú-gá núú cächí-xi:

5 Chí cùñaha cuè ñáyiú ñuú Sìón ná cádá cuëndá-yu, chí véxi téé yíndaha ñaha xii-yu yòdo-dé ñⁿ búrru líhli déhe ñⁿ búrru quiti sa xido,

te cùu-dé ñⁿ téé ío ndàhú iní-xi. Duha ní chídó tñùní ñⁿ téé ní xóo cáháⁿ tñúhu Yá Ndiòxí ndéé sanaha nũú tütú-gá.

6 Te cue téé xica cuu ndihí-gá ní xica-güedé cuáháⁿ-güedé, te ní quide-güedé nàcuáa ní xáhaⁿ-gă xii-güedé cada-güedé. 7 Te ní ndexìo-güedé ndécá-güedě ñⁿ búrru dîhí ndihí déhe-dî, te ní sacáⁿ ndodo-güedé dóó-güedě sáta-güedî,

te dătnùní cuásaá Jèsús sáta ñⁿ-dî ní ngódó ñàha-gă xii-dî. 8 Te ío cuéhé ñăyiú ta sàcáⁿ-yu dóó-yu ichi cuáháⁿ-gá cuëndá núú dóó-yu-áⁿ yăha-gă ndihí quiti yòdo-gá. Te davá-yu xèhdé-yu ndaha yùtnu ñuú tá sàcáⁿ-yu cuáháⁿ. 9 Te nchaa ñáyiú yòdonuu núú-gă ndihí nchaa ñáyiú nchìcúⁿ ndàa sáta-gă ní ngúíta-yu níhi càháⁿ-yu, te cächí-yu:

—Íó càhnu cuu Yaa cúú ñàní tñáhá ndí Dávíí! ¡Te Yá Ndiòxí ío na chindee ñaha-gá chí cùu-gá Yaa ní tendaha Yá Ndiòxí véxi quide núú-gă! ¡Te ndéé nchaa sá ío andíu na cächí-xi sá ío càhnu cuu-gá! —duha cächí-yu.

10 Te òré cuánguihu Jèsús ñuú Jerusàlén, te nchaa ñáyiú ñuú-áⁿ ñí ngúíta-yu xicuáá-yu, te davá-yu ní ngúíta-yu xitnàhá-yu:

—¿Yoo cùu téé-ăⁿ? —cächí-yu xitnàhá-yu.

11 Te davá-yu xitnàhá-yu:

—Téé-ăⁿ cúú-dě Jèsús téé càháⁿ tñúhu Yá Ndiòxí, te cùu-dé téé ñuú Nazàrét ñuú yíndèhu distritú Galileá —cächí-yu xitnàhá-yu.

Jèsús ñá túú tñáhá iní-gá nàcuáa xiquide ñáyiú xití veñúhu

(Mr. 11:15-19; Lc. 19:45-48; Jn. 2:13-22)

12 Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xíndecu ñáyiú quide ndáhú nádícó-yu, ndihí ñáyiú xísaaⁿ, te ncháá-yu ní queñuhu ñaha Jèsús xii-yu quehé, te ní dándúá-gá mèsá nchaa ñáyiú dàma dîhúⁿ, ndihí nchaa xilé sácóo nchihí ñáyiú dîco lómá xíndecu xití veñúhu-áⁿ.

13 Te ní xáhaⁿ-gă xii-yu:

—Núú tütú Yá Ndiòxí càháⁿ-xi nàcuáa ní cáháⁿ-gá, te ní cachí-gá: “Vehe-í cúú-xi núú càháⁿ ndihí ñaha ñáyiú xii-í”, duha ní cáháⁿ-gá cächí-xi núú tütú-gá. Dico nchòhó quidé-ndó vèhe-gá vehe ñadúhú —cächí-gá xáhaⁿ-gă xii-yu.

14 Te xíaⁿ ndécú Jèsús ní quexìo cue téé cuáá ndihí cue téé yacua, te ní quide tătna ñaha-gă xii-güedé te ní ndúha-güedé. 15 Te cue dútú

cúnù ndìhi cue tée dàcuaha ñaha xii ñáyi nchaa tnúhu ní chídó tnùnì ndí Moisés ní xiní-güedé ní quide Jèsús sá vǎ yǎo tnàhí ndàcu cada, te ndèdóho tucu-güedé níhi xícáháⁿ cue landú xití veñúhu càhnu sá ïo cùnùu-áⁿ, te cǎchí-güexi: “Ío càhnu cuu Yaá cúú ñàní tnáhá ndí Dàvíí”, cǎchí-güexi. Te ní cudééⁿ-güedé, ¹⁶ te ní xáhaⁿ-güedé xii Jèsús:

—¿Ndèdóho-n nàcuáa càháⁿ cue landú-ǎⁿ ñǎ? —cǎchí-güedé xáhaⁿ-güedé xii-gǎ.

Te Jèsús ní xáhaⁿ-gǎ xii-güedé:

—Ndèdóho-í, te nchòhó náa ñá túú dàcuaha-ndo núú tütú Yǎ Ndiǒxí núú càháⁿ-xi cuendá cue landú-ǎⁿ, te duha cǎchí-xi:

Yòhó ní quide-n sǎ cuè landú vitna sàdi, ndìhi cue dava-gǎ landú, chiñuhu ñaha-güexi xii-n nàcuáa tàú-xi cundu.

Duha cǎchí-xi núú tütú-gǎ —cǎchí-gǎ xáhaⁿ-gǎ xii-güedé.

¹⁷ Te xíaⁿ ñí dándóo ñaha Jèsús xii-güedé, te ní xica-gǎ cuáháⁿ-gǎ ñuú Bètaniá, yàcáⁿ ní xíndecu-gǎ niú-áⁿ.

Jèsús xáhaⁿ-gǎ xii yutnu ngǔxí sá vǎ cúúⁿ-gǎ sávidí-xi

(Mr. 11:12-14, 20-26)

¹⁸ Te nduu tnéé-áⁿ nehé-ni cuáháⁿ tucu Jèsús ñuú Jerusalén, te ichi ñuhu-gǎ ní xihí-gǎ docó. ¹⁹ Te ní xiní-gǎ ñí yutnu ngǔxí nútní ñí xio yuhu ichi, te ní xica-gǎ cuáháⁿ ndéhé-gǎ núu ndéé sávidí-xi, dico ñá túú ñǎ ndéé chi mee-ni ndàha-xi ndéé. Te ní xáhaⁿ-gǎ xii yutnu ngǔxí-áⁿ:

—¿Vitna te vǎ ñíⁿ ndùu-gǎ cuuⁿ sávidí-n! —cǎchí-gǎ xáhaⁿ-gǎ xii-xi.

Te òré-ni-áⁿ ñí yíchí yutnu ngǔxí-áⁿ.

²⁰ Te sá dúcáⁿ ñí cuu ní xiní cue tée xica cuu ndìhi Jèsús, te ío ní cuñúhu-güedé, te ní xicáⁿ tnúhú-güedé núú-gǎ, te xáhaⁿ-güedé:

—¿Ná cuendá ndéé dàcáⁿ ío ndìhi ní yíchí yutnu ngǔxí-áⁿ-í? —cǎchí-güedé xáhaⁿ-güedé xii-gǎ.

²¹ Te Jèsús ní xáhaⁿ-gǎ xii-güedé:

—Na cǎchí tnúhu ndáá-í xii-ndo sǎ núu nchòhó quíndáá ndisa iní-ndó

Yǎ Ndiǒxí, te vǎ cání ñíⁿ cani úú iní-ndó, te ñá díú-ní sǎ ñí quide-í-a ní xiní-ndó ndàcu-ndo cada-ndo, chi ndéé tándúú-a xocuíñí-xi núú ndécú-xi te núu cúñaha-ndo sǎ xocuíñí-xi te quíhíⁿ-xi quée-xi xití lámár. Te díu ducaⁿ càda-xi te núu na quíndáá iní-ndó. ²² Te nchaa sǎ ná càcáⁿ-ndó núú Yǎ Ndiǒxí òré càháⁿ ndìhi-ndo-gǎ te taxi-gǎ te núu sàndáá ndisa iní-ndó sǎ táxí-gǎ sǎ xicáⁿ-ndó núú-gǎ —cǎchí-gǎ xáhaⁿ-gǎ xii-güedé.

Jèsús ndécú ndìhi-gǎ tnúhu ndee iní (Mr. 11:27-33; Lc. 20:1-8)

²³ Te Jèsús cuánguihu-gǎ xití veñúhu càhnu sá ïo cùnùu danehé-gǎ ñáyi, te xíaⁿ ndécú-gǎ ní quexio cue dútú cúnù ndìhi cue tée cúu sacuéhé núú ñáyi israél, te xáhaⁿ-güedé xii-gǎ:

—Cuíní-ndí cachí tnúhu-n xii-ndí nása nduu tnúhu ndee iní ndécú ndìhi-n núu quide-n nándí sǎ quidé-n, ¿te yoo ducaⁿ ñí taxi tnúhu ndee iní-áⁿ xii-n-í? —cǎchí-güedé xáhaⁿ-güedé xii-gǎ.

²⁴ Te Jèsús ní xáhaⁿ-gǎ xii-güedé:

—Yúhú tnàhá-í cuíní-í càcáⁿ tnúhu-í ñí sǎ càcáⁿ tnúhu-í núú-ndó, te núu na cǎchí tnúhu-ndo te cachí tnúhu-í xii-ndo yò ní taxi tnúhu ndee iní duha quide-í. ²⁵ Te chí cǎchí tnúhu xii-í yoo ní táuchíúⁿ ñí dácuándüte ndí Juáá ñáyi, ¿Yá Ndiǒxí ǎⁿ cuè tée ñuyíú-a ní táuchíúⁿ dùcaⁿ ní quide ndí?, te chí cǎchí tnúhu —cǎchí-gǎ xáhaⁿ-gǎ xii-güedé.

Te ní ngúíta-güedé xítnàha-güedé:

—¿Nása cúñaha-o? Chi núu na cúñaha-o sǎ Yǎ Ndiǒxí ní táuchíúⁿ dùcaⁿ ní quide ndí Juáá ñá, te quesaha-dé: “¿Ná cuendá ñá túú ní sàndáá iní-ndó tnúhu ní càháⁿ ndí vǎíⁿ?”, quesaha-dé. ²⁶ Te núu na cúñaha-o sǎ cuè ñáyi ñuyíú-a ní táuchíúⁿ dùcaⁿ ní quide ndí ñá, te cudééⁿ ñáyi núú-ó, chi ncháa-yu cǎchí-yu sǎ Yǎ Ndiǒxí ní xáhaⁿ-gǎ xii ndí sǎ càháⁿ ndí tnúhu-gǎ núú ñáyi —cǎchí-güedé xítnàha-güedé.

²⁷ Te ní xáhaⁿ-güedé xii Jèsús:

—Ñá túú xìní-ndí yoo ní táúchíúⁿ dùcaⁿ ní dácuándùte ndí Juàá ñáyiú — cächí-güedé xähaⁿ-güedé xii-gá.

Te ní xähaⁿ-gä xii-güedé:

—Te núu ducaⁿ te ni yühú vá cächí tñuhu-í xii-ndo yòo ní taxi tñuhu ndee ìní duha quide-í —cächí-gá xähaⁿ-gä xii-güedé.

Cuendá ñⁿ téé ndíhi úú déhe-dé

²⁸ Te Jèsús ní xähaⁿ tucu-gá xii-güedé:

—Na càni-í ñⁿ cuèndú núú-ndó nàcuáa tecú tñuní-ndó tñuhu càháⁿ-í. ñⁿ téé ndècu úú déhe-dé, te ní xähaⁿ-dè xii déhe-dé téé sacuéhé-gä: “Yòhó déhe-í, véxi-í càháⁿ ndàhú-í núú-n nñu vá cündèe ìní-n cuànùndaha ñaha-n xii-í cada chiúⁿ-o núú nñ xitu-í yoho yàha stilé”, cächí-dé xähaⁿ-dè. ²⁹ Te ní xähaⁿ dèhe-dé xii-dé: “Vá quíhíⁿ-í cada chiúⁿ-í núú chíúⁿ-n”, cächí-dé xähaⁿ-dè xii tātá-dè. Dico cuèé ní nacani ìní-dé te ní säháⁿ-dé ní quide chiúⁿ-dé núú chíúⁿ tātá-dè. ³⁰ Te téé-áⁿ nñ säháⁿ tucu-dé ní xähaⁿ-dè xii déhe-dé téé lñhli-gá nñu vá cündèe ìní-dé cuànùndaha ñaha-dé, te ní xähaⁿ dèhe-dé-áⁿ xii-dé: “Cuu cuànùndaha ñaha-í xii-n”, cächí-dé xähaⁿ-dè. Dico ñá túú ní säháⁿ-dé cada chiúⁿ-dè. ³¹ Te vitna chí càháⁿ nñu ndédacàa cue téé úú-áⁿ nñ quide-güedé sá cuíni tātá-güedé —cächí-gá xähaⁿ-gä xii-güedé.

Te ní xähaⁿ-güedé xii-gá:

—Téé cùu sacuéhé-gä, téé ní càháⁿ ndíhi-dé díhna —cächí-güedé xähaⁿ-güedé xii-gá.

Te Jèsús ní xähaⁿ-gä xii-güedé:

—Na cächí tñuhu ndáá-í xii-ndo sã ncháa cuè téé cuihna ìní-xi quide cobrá ñáhá xii ñáyiú cuèndá impuèstú, ndíhi cue ñáyiú dñí xñdecu ichi díí ìní yáchí-gá ndíhu ndaha ñaha Yá Ndiöxí xii cue téé-áⁿ ndíhi cue ñáyiú dñí-áⁿ dàcúxí nchòhó. ³² Chi ndí Juàá téé ní xóo dacuàndute ñaha xii ñáyiú ní càháⁿ ndí nàcuáa cadá-yu cundecú-yu, dico nchòhó chi ñá túú cuíni-ndó quíndáá ìní-ndó nàcuáa ní càháⁿ ndí, dico cue téé cuihna ìní-xi quide cobrá ñáhá xii ñáyiú cuèndá impuèstú, ndíhi cue

ñáyiú dñí xñdecu ichi díí ìní, chi sàndáá ìní-güedé ndíhi-yu tñuhu ní càháⁿ ndí. Te nchòhó cuèi ndèhe-ndo sã sàndáá ìní cue ñáyiú-áⁿ nchaa tñuhu ní càháⁿ ndí, dico ñá túú cuíni-ndó ndíxi cuèchi ìní-ndó cuèndá nchaa sá cuéhé sá dúhá quide-ndo cuèndá tñi-ndo tñuhu ní càháⁿ ndí —cächí-gá xähaⁿ-gä xii-güedé.

Cuendá cue téé cuihna ìní-xi
(Mr. 12:1-12; Lc. 20:9-19)

³³ Te xähaⁿ tucu Jèsús xii-güedé:

—Cundedóho-ndo na càni tucu-í ìngá cuèndú núú-ndó cuèndá tecú tñuní-ndó tñuhu càháⁿ-í. ñⁿ téé ní nacúxi-dé mee-ni yòho yaha stilé núú ñuhú-dè, te ní chidoco-dè cuèndá sá vá cúú dàñú, te ní cadúha-dé núú quíhí-dè ndéhé yoho yàha stilé-áⁿ òré ná cùu, te ní cadúha-dé ñⁿ xító dùcúⁿ núú cáúndòdo cue téé coto nchaa yoho yàha stilé-áⁿ.

“Te ní sáá ñⁿ nduu quèe-dé quíngaca cuu xica-dè te ní dándòo ndaha-dè sá nñ xitu-dé-áⁿ xii ñⁿ úú cue téé xìní tñáhá ndíhi-dé cuèndá cada chiúⁿ-güedé, te ní ndatnùhu-güedé sá òré ná cúú te cuu cuèndá dava-güedé, te ducaⁿ te ní quee-dé cuáháⁿ-dè. ³⁴ Te sáta nñ sáá nduu nñ cuu ndéhé nchaa yoho yàha stilé sá nñ xitu-dé-áⁿ, te ní xähaⁿ-dè xii ñⁿ úú cue téé xínu cuechi núú-dè: “Chí cuáháⁿ cácaⁿ-ndó sá cúú cuèndá-í núú cuè téé ní dándòo ndàha-í nchaa yoho yàha stilé sá nñ xitu-í”, cächí-dé xähaⁿ-dè xii-güedé.

³⁵ Te cue téé ní dándòo ndaha-dè nchaa yoho yàha stilé sá nñ xitu-dé-áⁿ nñ tñi-güedé cue téé xínu cuechi núú-dè-áⁿ, te ñⁿ-dé ní caní-güedé, te ñⁿ-dé ní sahani ñaha-güedé, te ìngá-dé ní sãñaha-güedé yúú. ³⁶ Te téé ní xitu yoho yàha stilé-áⁿ nñ tendaha-dè tñí-gá tucu cue téé xínu cuechi núú-dè cuáháⁿ-güedé cuángacáⁿ-güedé sá cúú cuèndá-dé núú cuè téé ní dándòo ndaha-dè sá nñ xitu-dé-áⁿ, dico diu-ni ducaⁿ nñ quide ñaha cuè téé-áⁿ xii cue téé xínu cuechi núú-dè-áⁿ.

³⁷ Te téé cùu xítóhó nchaa yoho yàha stilé-áⁿ nñ sani ìní-dé: “Vàha-gá nñu tendaha-í déhe-í-a núhú-dé, chi òré quíni ñáhá-güedé xii-dé te

canehe-güedé sá yíñùhu núú-dě”, duha ní sani iní-dé. Te ní tendaha-dě déhe-dé cuánuhú-dé. ³⁸ Dico òré ní xiní cue téé quide chiu^{n-án} dēhe téé cùu xítóhó nchaa yoho yàha stilé-án, te ní xítñàha-güedé: “Téé-ǎⁿ téé véxi nduu táhú ñuhu-a ndihí nchaa sá cáá núú-xi, dico cahni-o-dé te mee-o ndùu táhú-ó sǎ ndúú táhú-dě”, cǎchí-güedé xítñàha-güedé. ³⁹ Te ní tñi-güedé téé-án te ndéca ñaha-güedé cuáháⁿ ñiⁿ xio yuhu ñùhu-án, te ní sahani ñaha-güedé xii-dé —duha cuáháⁿ cuéndú ní cani Jèsús núú-güedé.

⁴⁰ Te ní xáhaⁿ tucu Jèsús xii-güedé:

—¿Te nchòhó sa cùtnuní iní-ndó nǎsa cada ñaha xítóhó ñuhu-án xii cue téé-án ñǎ? —cǎchí-gá xǎha^{n-gǎ} xii-güedé.

⁴¹ Te cue téé-án ñi xáha^{n-güedé} xii-gá:

—Téé cùu xítóhó ñuhu-án ñuhú-dé, te vá cùndàhú iní-dé cue téé cuihna iní-xi-án chi cahni ñaha-dě xii-güedé, te dándóo ndaha-dě ñuhu-dé xii cue téé cùtnuní iní-dé cada ndáa cuéndá ndi tnahá cúúⁿ ndéhé nchaa yoho yàha stilé sá ñi xitu-dé-án te cuáñaha-güedé xii-dé sá cúú cuéndá-dé —cǎchí-güedé xǎha^{n-güedé} xii-gá.

⁴² Te Jèsús ní xáha^{n-gǎ} xii-güedé:

—Te nchòhó, nǎa ñǎ túú dàcuaha-ndo núú tütú Yǎ Ndiǒxí núú cǎchí-xi:

Yúú sǎ ñi dáquéé tǐhú cue téé dàcaa vehe, ní cuu-xi yúú cùnùu vitna.

Chi mee Dütú Ndiǒxí ducaⁿ ñi cǎchí-gá cunduu, te cùu-xi ñiⁿ sǎ ño cùñùhu-o vitna.

Duha cǎchí-xi núú tütú-gá. ⁴³ Te duha cǎhá^{n-í} chi Yǎ Ndiǒxí cada-gá te vá ñihí-ndó tñuhu ndee ñiⁿ cundecu ndihí-ndo cuéndá ndihu ndaha ñaha-gá xii-ndo, chi tñuhu ndee ñiⁿ cundecu ndihí cue ñáyiú cada ndáa cuéndá ndihu ndaha ñaha Yǎ Ndiǒxí xii-yu. ⁴⁴ Te yúú sǎ cùnùu-án cúú-xi yǐhú, te nchaa ñáyiú ñǎ túú tñiⁿ tñuhu-í cùú-yu dàtná ñiⁿ ñáyiú nduá núú yǐú-ǎⁿ te tñahnú duú^{n-yu}, àdi núu na tàú ñáhá-xi xii-yu, te dacǎchi

duuⁿ ñaha-xi —cǎchí-gá xǎha^{n-gǎ} xii-güedé.

⁴⁵ Te sá dúcáⁿ ndùu cuéndú ní cani Jèsús te cue téé cùu dütú cùnùu-án, ndihí cue téé cùu fariséú ní cutnùní iní-güedé sá cuéndá-güedé ní cǎhá^{n-gá}. ⁴⁶ Te ní cuiní-güedé tñiⁿ ñaha-güedé xii-gá òré-án dico ñǎ túú ní cùyⁿ-güedé, chi ní yuhú-güedé cue ñáyiú, chi ní cutnùní iní-yu sá cúú-gá ñiⁿ téé cǎháⁿ tñuhu Yǎ Ndiǒxí.

22

Cuéndá ñiⁿ vico tñǎndaha

¹ Te Jèsús ní ngúita tucu-gá cáni-gǎ ingá cuéndú núú-güedé, te xǎha^{n-gǎ}:

² —Na cǎni tucu-í ingá cuéndú núú-ndó cuéndá tecú tñuní-ndó nǎcuáa cada-xi òré ndihu ndaha ñaha Yǎ Ndiǒxí xii ñáyiú. ñiⁿ téé yíndaha ñaha xii ñáyiú ní quide-dé ñiⁿ vico ní dátñǎndaha-dé déhe ducu^{n-dé}. ³ Te ní tendaha-dě cue téé xínu cuechi núú-dě cuáhá^{n-güedé} cuángana-güedé cue ñáyiú sa ní cǎhá^{n-dé} cuhuⁿ vico, dico ñáyiú-án ñǎ túú ní cuiní-yu quíhí^{n-yu}. ⁴ Te ní xáhaⁿ tucu-dé xii dáva-gá cue téé xínu cuechi núú-dě:

“Quíhí^{n-ndó} cǎñaha-ndo xii cue ñáyiú sa ní cǎhá^{n-í} cuhuⁿ vico sǎ sǎ ní quide túha-í sǎ cǎxí-yu, te sa ní sahani-í ndicutu ndihí nchaa dáva-gá quiti ní dánucúihnu-í, te nchaa sa ní quide túha-í, te na quixí-yu cuhu^{n-yu} vico cǎchí-í cǎñaha-ndo”, cǎchí-dé xǎha^{n-dě} xii cue téé xínu cuechi núú-dé-án. ⁵ Dico ñiⁿ ñáyiú ní cǎhá^{n-dé-án} ñǎ túú ní cuiní-yu quíhí^{n-yu} cuhu^{n-yu} vico. Chi ñiⁿ-yu ní sáhá^{n-yu} ní quide chiú^{n-yu} núú ñuhú-yu, te ingá-yu ní sáhá^{n-yu} ní nadicó-yu núu nǎndi cùu ndáhú quidé-yu. ⁶ Te dáva-gá-yu ní tñiⁿ-yu dáva cue téé xínu cuechi núú téé quide vico-án, te ní canihá-yu ndéé ní sahani ñáhá-yu xii-güedé. ⁷ Te téé yíndaha ñaha xii ñáyiú quide vico-án ñiⁿ cudééⁿ víhí-dě sá dúcáⁿ ñiⁿ quidé-yu, te ní tendaha-dě cue sandádú-dé ní sáhá^{n-güedé} ní sahani-güedé cue ñáyiú ducaⁿ ñiⁿ quide-án, te ní sahani-güedé nchaa

vehe càa ñuú-yu. ⁸ Te sáta dúcáⁿ te ní xáhaⁿ-dě xii dava-gá cue tée xínu cuechi núú-dě: “Nchaa sa ndècu túha, te cue ñáyiu ní cáháⁿ-í cuhuⁿ vico-a ni cùu ñá túú-gă tàú-yu sá cùhũⁿ-yu. ⁹ Te chí cuáháⁿ ndèni ní cuu te cáháⁿ-ndó nchaa ñáyiu na naníhí-ndó ìchi na quixí-yu cuhúⁿ-yu vico-a”, cächí-dé xăhaⁿ-dě xii-güedé. ¹⁰ Te cue tée xínu cuechi-áⁿ ñí quee-güedé cuáháⁿ-güedé, te ní cáháⁿ-güedé nchaa ñáyiu ní naníhí-güedé ichi, te cuèi ñáyiu váha iní-xi, te cuèi ñáyiu cuihna ìní-xi, te ní chítũ-yu núú cúú vico-áⁿ.

¹¹ Te sáta dúcáⁿ te tée yìndaha ñáyiu quide vico-áⁿ ñí quíhu-dé xití vehe ní xíndéhé-dě cue ñáyiu ñùhu vico-áⁿ, te ní xiní-dé ìⁿ tée ñùtnahá tnuú-yu te ñá túú càa dóó-dě dàtná cáá dǒó níhnú cuè ñáyiu ñùhu vico-áⁿ. ¹² Te ní xáhaⁿ-dě xii téé-áⁿ: “¿Tăta, nása ní cuu cuánguihu-ǒ iha, te ñá túú càa dóó-n dàtná cáá dǒó níhnú cuè ñáyiu ñùhu vico tñándaha-i?”, cächí-dé xăhaⁿ-dě xii téé-áⁿ. Dico téé-áⁿ ñá túú ní ñíhí-dě tnuú cáháⁿ-dé. ¹³ Te téé yìndaha ñáyiu quide vico-áⁿ ñí xáhaⁿ-dě xii cue ñáyiu xínu cuechi núú mèsá: “Chí tñíí tēe-áⁿ te dacùtu-ndo-dé, te queñuhu-ndo-dě ná quíhíⁿ-dé cundecu-dé ìⁿ xichi núú néé nũú ïo ndoho-dé, te yàcáⁿ ïo ndáhyú-dé te dicó rúhñú-nă cuu núhu-dé sá sátú iní-dé sá ndóhó-dé”, cächí-dé xăhaⁿ-dě xii cue ñáyiu xínu cuechi núú mèsá-áⁿ. ¹⁴ Te duha ndùu cuendú cáháⁿ-í chí ïo cuéhé ñáyiu cáháⁿ ñáhá Yă Ndióxi xií-yu, dico sacú-ni-yu nduu táhũ-yu cundecú-yu ndihí-gá – cächí-gá xăhaⁿ-gă xii-güedé.

Cuendá impuèstú

(Mr. 12:13-17; Lc. 20:20-26)

¹⁵ Te cue tée cùu fariséú ní sáháⁿ-güedé ìⁿ xichi ní ndatnúhu-güedé nàcuáa cada-güedé datìcánuu-güedé Jèsús núú tñùhu cáháⁿ-gá cuendá ducaⁿ ñíhí-güedé nàcuáa cada-güedé cacáⁿ cuéchi-güedé cuendá-gá. ¹⁶ Te ní tendaha-güedé ìⁿ úú cue tée cùndihí-güedé, ndihí cue tée cùndihí té Hèrodés cuáháⁿ-güedé núú ndécú

Jèsús. Te òré ní quexìo-güedé núú ndécú-gă, te ní xáhaⁿ-güedé xii-gá:

–Mèstrú, ñíhí-ndí tnuúhu sá ïo ndáá cáháⁿ-n, te cáháⁿ ndáá-n nàcuáa cáháⁿ Yă Ndióxi cundecu-o ñùyíú-a, te cuèi ndèda-ni càa ñáyiu ìⁿ-ni cáháⁿ-n ndihí-yu chí ñá túú quide cuendá-n cuèi ná ñáyiu cùú-yu. ¹⁷ Te cachí tnuúhu xii-ndí, núu váha-ni quide-ndí sá chăhu-ndí té Cèsár téé ïo cùnuu cuendá impuèstú áⁿ ñáhá – cächí-güedé xăhaⁿ-güedé xii-gá.

¹⁸ Dico Jèsús ní cutnùní iní-gá sá xító ndèé ñáhá-güedé xii-gá, núu ní xáhaⁿ-gă xii-güedé:

–Nchòhó cue téé dândahú méé-xí sá quidé ndáá te ñá ndáá sá quidé ndáá-ndó, ¿ná cuendá xító ndèé ñáhá-ndó xii-í? ¹⁹ Chí dánèhé ñáhá xii-í ìⁿ díhúⁿ sá chăhu-ndo cuendá impuèstú núu nása càa –cachí-gá xăhaⁿ-gă xii-güedé.

Te ní dánèhé ñáhá-güedé xii-gá ìⁿ díhúⁿ sá nání dènariú. ²⁰ Te òré ní xiní-gá díhúⁿ-ăⁿ te ní xícáⁿ tnuúhú-gă núú-güedé, te xăhaⁿ-gă:

–Chí cächí tnuúhu yoo núú-xi ndèé ndihí yoo diu-xi ndèé –cächí-gá xăhaⁿ-gă xii-güedé.

²¹ Te ní xáhaⁿ-güedé xii-gá:

–Núú tē Cèsár ndèé ndihí diu-dé – cächí-güedé xăhaⁿ-güedé xii-gá.

Te Jèsús ní xáhaⁿ-gă xii-güedé:

–Te núu ducaⁿ te chí nàcuăha té Cèsár sá cúú cuendá-dé, te sá cúú cuendá méé Yă Ndióxi te xíăⁿ nàcuăha-ndo-gă –cächí-gá xăhaⁿ-gă xii-güedé.

²² Te cue téé-áⁿ ïo ní cuñúhu-güedé sá dúcáⁿ ñí cáháⁿ-gá, te ní natnìⁿ-güedé ichi cuánuhú-güedé.

Cuendá cue ñáyiu ndoto

(Mr. 12:18-27; Lc. 20:27-40)

²³ Te diu-ni nduu-ăⁿ ñí quexìo ìⁿ úú cue tée cùu saducéú núú ndécú Jèsús. Te cue téé-áⁿ ñá túú sàndáá iní-güedé sá ndótó cuè ñáyiu ní xíhí, te ní xáhaⁿ-güedé xii-gá:

²⁴ –Mèstrú, ndíi Moisés ní cachí ndíi sá nũu ìⁿ téé ndècu ñadihí-xi cuú-dé te quendóo ñadihí-dé, te núu ñá túú dēhe-dé ní xǒo ndihí-aⁿ te

tée cùu ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndihi-aⁿ cuendá ñaní-dé tée ní xihí-áⁿ.
²⁵ Te ñuú-ndí-a ní xindecu úsá tnàhá cue tée mee-ni ndí ñaní-güedé. Te tée díhna ní níhí ñadìhí-dé te ñá túú ní cùdí-dé cundecu-dé chi ní xihí-dé, te ní ñⁿ déhe-dé ñá túú ní xòo ndihi ñadìhí-dé-áⁿ. Te tée cùu uú ní nàqueheⁿ-dé ñaha ní quendóo quèé-áⁿ.
²⁶ Dico ní xihí tucu-dé, te ní ñⁿ tucu déhe-dé ñá túú ní xòo ndihi ñaha-áⁿ, te ñⁿ ducaⁿ ñí yáha tée cùu uní, te ní xínu ndí úsá-güedé ní cándeca ñaha-güedé xii ñaha-áⁿ dico ñⁿ ducaⁿ ñí xihí-güedé. ²⁷ Te ndéé núú ñí ndihi-ná te ní xihí tnàhá ñadìhí-áⁿ.
²⁸ Te na sàá nduu ndòto-güedé ndihi ñaha-áⁿ, ¿te ndédacàa-güedé ñadìhí-güedé cuu-aⁿ-i? Chi ndí úsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

²⁹ Te Jèsús ní xáhaⁿ-gá xii-güedé:

—Ní xíta nchòhó tnúhu càháⁿ-ndó, chi ñá túú xini-ndó nàcuáa càháⁿ Yá Ndiòxí núú tütú-gá, te ní ñá túú cùnuni iní-ndó sá díú-gá ndácú-gá quidé-gá nchaandi túhú sá vaha. ³⁰ Te na càchí tnúhu-í xii-ndo sá òré ná sàá nduu ndòto nchaa ñáyiú ní xihí, te dàvá-áⁿ vā yòo-gá dasaⁿ dèhe yoco-xi chi vá yòo-gá candeca tnàha, chi cuu-ná-yu dàtná cue espíritú xínú cuèchi núú Yá Ndiòxí. ³¹ ¿Te náa ñá túú quide cuendá-ndó nàcuáa càháⁿ Yá Ndiòxí núú tütú-gá núú càháⁿ-gá cuendá cue ñáyiú ní xihí-áⁿ? Te duha càchí-gá: ³² “Yúhú cùu-í Ndiòxí tē Àbrahám, ndihi té Isàác, ndihi té Jácób”, duha càchí-gá núú tütú-gá. Te cue tée-áⁿ chi cuèi ní xihí-güedé núú ñuyíú-a, dico sá cùu-xí Yá Ndiòxí chi ndècu vívú-ni-güedé. Chi ñⁿ gá cùu-gá Ndiòxí mee-ni cuè ñáyiú xindecu vívú, te ñá túú cùu-gá Ndiòxí cue ñáyiú ñá túú ndècu vívú —càchí-gá xáhaⁿ-gá xii-güedé.

³³ Te sá dúcáⁿ ñí càháⁿ-gá ní xii-gá cue tée-áⁿ, te ío ní cuñúhu nchaa ñáyiú cuendá sá ío váha ndúu tnúhu ní càháⁿ-gá.

Tnúhu sá ío-gá cúnúu
(Mr. 12:28-34)

³⁴ Te cue tée cùu fariséú ní xini-güedé ní sadí Jèsús yuhu cue tée cùu saducéú, chi ñá túú ní ñíhí-gá-güedé tnúhu cúñaha-güedé xii-gá, te cue tée cùu fariséú-áⁿ ñí nat-acá-güedé te cuáháⁿ-güedé núú ndécú Jèsús. ³⁵ Te ñⁿ tée cùu fariséú-áⁿ ío váha cùnuni iní-dé nàcuáa ndúu nchaa tnúhu ní chídó tnúu ndíi Moisés te xito ndéé-dé Jèsús, te xáhaⁿ-dé xii-gá:

³⁶ —Mèstrú, cachí tnúhu ndédacàa tnúhu sá ñí chídó tnúu ndíi Moisés ío-gá cúnúu cada-o —cachí-dé xáhaⁿ-dé xii-gá.

³⁷ Te Jèsús ní xáhaⁿ-gá xii-dé:

—Duha càháⁿ tnúhu sá ío-gá cúnúu: “Cuu iní-ndó Dütú Ndiòxí Yáa cúu Ndiòxí-ndó ñí yuhu ñí iní-ndó, te caní iní-ndó càda-ndo datná cuíní méé-gá, te mee-ni tnúhu váha caní iní-ndó nàcuáa cuu víi cuu váha-ndo núú-gá”,
³⁸ duha càháⁿ tnúhu sá ío-gá cúnúu.
³⁹ Te duha càháⁿ tucu ingá tnúhu cùu uú sá ío cúnúu, te sa yatní ñⁿ-ni cùu-xi ndihi tnúhu díhna nuu, te càchí-xi: “Cuu iní-ndó tnàha ñáyiú-ndo dàtná cúu iní-ndó mée-ndo”, duha càháⁿ tnúhu cùu uú-áⁿ. ⁴⁰ Te cuendá úú tnúhu-a ní cáá nchaa tnúhu ní càháⁿ ndíi Moisés nàcuáa cada ñáyiú, te ñⁿ cuendá úú tnúhu-a ní cáá tnúhu ní càháⁿ nchaa cue tée ní xóo càháⁿ tnúhu Yá Ndiòxí ndéé sanaha —càchí-gá xáhaⁿ-gá xii-güedé.

Yoo cùu Xítohó Jesucristú
(Mr. 12:35-37; Lc. 20:41-44)

⁴¹ Te ndècu ducaⁿ-ni cue tée cùu fariséú núú ndécú Jèsús. ⁴² Te ní xicáⁿ tnúhú-gá núú-güedé, te xáhaⁿ-gá:

—Cuíní-í cachí tnúhu-ndo yòo déhe-xi cùu Crístú Yáa tendaha Yá Ndiòxí quixi ñuyíú-a —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Déhe ndíi Dàvíí cúu Yáa-áⁿ —càchí-güedé xáhaⁿ-güedé xii-gá.

⁴³ Te Jèsús ní xáhaⁿ-gá xii-güedé:

—¿Te nása càchí-tu-ndo sá dèhe ndíi Dàvíí cúu Crístú Yáa tendaha Yá Ndiòxí quixi ñuyíú-a, te mee ndíi Dàvíí-áⁿ ñí dácáhu iní ñáhá Espíritú Yá Ndiòxí xii ndíi, te ní cachí ndíi sá

Cristú Yaá tendaha Yá Ndiöxí quixi ñuyíu-a cùu-gá Xítóhó ndíi? Te duha ní cachí ndíi:

⁴⁴ Dútú Ndiöxí ní xáhaⁿ-gã xii Yaá cúu Xítóhó-í:

“Ngóo xio cùha-í, te yúhú cada-í te nchaa sá cúu ùhú iní ñáhá xii-n canehe-xi sá yíñuhu núu-n.”

Duha ní xáhaⁿ Dútú Ndiöxí xii Yaá cúu Xítóhó-í, cachí ndíi. ⁴⁵ ¿Te nása cùu Cristú déhe ndíi Dàvíí, te mee ndíi ní cachí ndíi sá cúu-gã Xítóhó ndíi? — cachí Jèsús xáhaⁿ-gã xii-güedé.

⁴⁶ Te ni ñⁿ-güedé ñá túu-gã ní ñíhí-güedé tñúhu cúñaha-güedé xii-gã. Te ndéé nduu-ãⁿ ñá túu-gã ní cùyí-güedé ná tñúhu cácaⁿ tñúhú-güedé núu-gã.

23

Jèsús càháⁿ-gá cuendá cue téé cùu fariséu ndíhi cuendá cue téé dàcuaha ñaha xii ñáyiu

(Mr. 12:38-40; Lc. 11:37-54; 20:45-47)

¹ Te Jèsús ní cáháⁿ ndodo-gá núu nchaa ñáyiu, ndíhi núu cué téé xica cuu ndíhi-gá, te xáhaⁿ-gã:

² —Cue téé dàcuaha ñaha xii ñáyiu nchaa tñúhu ní chídó tñúhí ndíi Moisés, ndíhi cue téé cùu fariséu ndécú ndíhi-güedé tñúhu ndee iní cáháⁿ-güedé nchaa tñúhu sá ñí chídó tñúhí ndíi Moisés-áⁿ. ³ Te cada-ndo nàcuáa dànehé ñáhá-güedé xii-ndo, dico vá cáda-ndó dàtná xíquide-güedé, chi tucu ndùu tñúhu càháⁿ-güedé, te tucu quide-güedé. ⁴ Te quide-güedé dàtná quidé ñáyiu dàcuido ñⁿ tñaha ñáyiu-xi ñⁿ sá ïo véé, te mée-yu ni lùha ñá túu cuíní-yu cuidó-yu. Te ducaⁿ sãtnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ni lùha ñá túu cuíní-güedé cada-güedé nàcuáa dànehé ñáhá-güedé xii-ndo.

⁵ Te mee-ni ndùcu-güedé nàcuáa quide-güedé cuendá quini ñáyiu sá ïo cùu cahnu-güedé. Te ndéé xindá sá ndéé ñⁿ úú tñúhu Yá Ndiöxí tneé-güedé ndíhi ndaha-güedé, te tñahá iní-güedé sá ïo-gá cunduu

quéhéⁿ xindá-áⁿ dàcúxí xindá dava-gá ñáyiu. Te tñahá tucu iní-güedé sá ïo-gá cunduu nani núu dõó sácuihnu-güedé dàcúxí dõó sácuihnu dava-gá-yu. ⁶ Te ndi tñahá òré sácõo vico, òré quíhu-güedé mèsá caxi-güedé te ïo-gá cúu ñⁿ iní-güedé cunucóo-güedé núu xilé núu sácõo cue téé cùnuu-gá, te diu-ni ducaⁿ quide tucu-güedé cuéi xití veñúhu. ⁷ Te nchaa núu xicá cùu-güedé cuíní-güedé sá ndíhi tñúhu yíñuhu cáháⁿ ndíhi ñaha ñáyiu xii-güedé, te cuíní tucu-güedé sá cùñahá-yu xii-güedé mèstrú.

⁸ 'Dico nchòhó vá cùñaha-ndo xii ñáyiu sá cùñahá-yu mèstrú xii-ndo, chi nchòhó ñⁿ-ni cùu-ndo ndecu-ndo, chi ducaⁿ ñⁿ-ni yúhú Yaá ní tendaha Yá Ndiöxí véxi ñuyíu-a cùu-í Mèstrú ndécú ndíhi ñaha-í xii-ndo. ⁹ Te ñⁿ-ni Dútú Ndiöxí Yaá ndécú àndiu cuu-gá Tãtã-ndó, núu xiãⁿ vá càháⁿ-ndó sã dàva cue téé ñuyíu-a cùu-güedé tãtã-ndó. ¹⁰ Te ni vã cání iní-ndó càda-ndo nacuáa cáháⁿ ñáyiu sá cùnùu-ndo, chi ñⁿ-ni yúhú Cristú Yaá ní tendaha Yá Ndiöxí véxi ñuyíu-a cùnuu-í. ¹¹ Te ñáyiu ïo-gá cùnùu ndecu ndíhi-ndo, ñáyiu-áⁿ cúu-yu ñáyiu xínu cuechi núu-ndó. ¹² Te nchaa ñáyiu quide cahnu mee-xi ñáyiu-áⁿ vã cúu-yu ñáyiu cùnuu, te nchaa ñáyiu ñá túu quide cahnu mee-xi ñáyiu-áⁿ cùnùu-yu.

¹³ 'Te nchòhó cue téé dàcuaha ñaha xii ñáyiu nchaa tñúhu ní chídó tñúhí ndíi Moisés, ndíhi nchòhó cue téé cùu fariséu, cùu-ndo cue téé ïo dandahú mée-xí sã quidé ndáá te ñá ndáá sá quidé ndáá-ndó, te ndahú ní cuu-ndo chi sãdí-ndó ìchi ñáyiu ñá dáñá-ndó ndíhu ndaha ñaha Yá Ndiöxí xií-yu, te ni mée-ndo ñá túu quide-ndo nacuáa ndíhu ndaha ñaha-gá xii-ndo, te ni dàva-gá cue ñáyiu cuíní sá ndíhu ndaha ñaha-gá xií-yu ñá dáñá-ndó.

¹⁴ 'Te nchòhó cue téé dàcuaha ñaha xii ñáyiu nchaa tñúhu ní chídó tñúhí ndíi Moisés, ndíhi nchòhó cue téé cùu fariséu, cúu-ndó cué téé ïo dandahú

mée-xí sã quidé ndää te ñá ndää sã quidé ndää-ndó, te ndàhú ní cuu-ndo chi quèndeé-ndó vèhe cue ñáyiú quèé, te ío naha càháⁿ ndihí-ndo Yã Ndiöxí cuèndá cuiní-ndó sã vã yõo cutnùní iní-xi nàcuáa quide-ndo. Te sã dúcáⁿ quide-ndo te ío-gá ndoho-ndo nũú ùhú nũú ndàhú dàcúúxí dàva-gá ñáyiú.

15 Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí nchòhó cue téé cùu fariséú, cúú-ndó cuè téé ío dándahú mée-xí sã quidé ndää te ñá ndää sã quidé ndää-ndó, te ndàhú ní cuu-ndo chi sàhni iní-ndó cuàháⁿ-ndó ndèni ní cuu dàcaháⁿ-ndó ñáyiú cuèndá cuiní-ndó tñí-yu ichi ndècu-ndo. Te òré ná xĩnu iní-yu tñí-yu ichi ndècu-ndo-áⁿ te uuⁿ-gá cuíta nihnú-yu dàcúúxí mèe-ndo.

16 Te nchòhó cúú-ndó dàtná cue ñáyiú cuàá, chi ñá cútnùní iní-ndó nàcuáa canu ichi-ndo ñáyiú, te ndàhú ní cuu-ndo chi càchí-ndó: “Íⁿ ñáyiú na càcunehe veñúhu càhnu sã ío cùnnuu òré cuiní-yu cutnùní iní tnàha ñáyiú-yu sã ndää cadá-yu ìⁿ sã sání iní-yu cadá-yu, te vã cúú cuèchi xií-yu cuèi vã cadã-yu. Dico núu na càcu nehé-yu díhúⁿ cuàáⁿ yíhí xití veñúhu-áⁿ te cuu cuèchi xií-yu te núu vã cadã-yu sã ñí cachí-yu cadá-yu”, duha càchí-ndó.

17 Te nchòhó cúú-ndó cuè téé ío ñí ñíquí-xi, te cùu-ndo datná cue ñáyiú cuàá chi ñá tècú tnùní-ndó! Te vã càchí-ndó sã ío-gá cùnnuu díhúⁿ cuàáⁿ dàcúúxí veñúhu, chi ñí cuèndá veñúhu-áⁿ ñí cuu íí díhúⁿ cuàáⁿ-áⁿ.

18 Te càchí tucu-ndo: “Íⁿ ñáyiú na càcunehe xító núú sácõdó sã ndúú tãhú Yã Ndiöxí òré cuiní-yu cutnùní iní tnàha ñáyiú-yu sã ndää cadá-yu ìⁿ sã sání iní-yu cadá-yu, te vã cúú cuèchi xií-yu cuèi vã cadã-yu, dico núu na càcu nehé-yu sã ndúú tãhú Yã Ndiöxí yódó núú xító-áⁿ te cuu cuèchi xií-yu te núu vã cadã-yu sã ñí sani iní-yu cadá-yu”, duha càchí-ndó.

19 Te cùu-ndo cue téé ío ñí ñíquí-xi, te cùu-ndo datná cue ñáyiú cuàá chi ñá tècú tnùní-ndó! Te vã cání iní-ndó sã ío-gá nándihí sã ndúú tãhú Yã

Ndiöxí sácõdó núú xító núú sácõdó tnàhí sã ndúú tãhú-gã-áⁿ dàcúúxí mèe xító-áⁿ.

20 Chi nchaa ñáyiú ducaⁿ càcunehe xító-áⁿ, te tnàhá-ni sã yódó núú-xi càcu nehé-yu òré ducaⁿ càháⁿ-yu.

21 Te nchaa ñáyiú ducaⁿ càcunehe veñúhu càhnu sã ío cùnnuu te ñá díú mèe-ni veñúhu càcu nehé-yu òré ducaⁿ càháⁿ-yu, chi tnàhá-ni Yã Ndiöxí Yaá cúú cuèndá veñúhu-áⁿ cáciú nehé-yu òré ducaⁿ càháⁿ-yu.

22 Te nchaa ñáyiú càcunehe andíu cuèndá cutnùní iní tnàha ñáyiú-yu sã ndää cadá-yu ìⁿ sã sání iní-yu cadá-yu, te ñá díú mèe-ni andíu cacu nehé-yu chi tnàhá-ni núú núcõo Yã Ndiöxí táxí tnùní-gá cáciú nehé-yu òré ducaⁿ càháⁿ-yu, te tnàhá mée-gã cáciú nehé-yu òré ducaⁿ càháⁿ-yu.

23 Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí nchòhó cue téé cùu fariséú, cúú-ndó cuè téé ío dándahú mée-xí sã quidé ndää te ñá ndää sã quidé ndää-ndó. Te cuèi núú ùxí xichi yúcú mèntá ñihí-ndó, te sãñaha-ndo ìⁿ xichi xii Yã Ndiöxí, te ñíu-ni ducaⁿ quide-ndo yúcú nání ànís, ndihí yúcú nání còminú, dico ndàhú ní cuu-ndo chi ñá túú quide cuèndá-ndó nàcuáa càháⁿ nchaa tnúhu sã ío-gá cùnnuu sanu ichi ñaha xii-ndo, te tnúhu-áⁿ càchí-xi sã ío xini ñíhu-xi cada ndää-ndó cùndecu-ndo, te cundàhú iní-ndó cuè tnàha ñáyiú-ndo, te quindáá iní-ndó Yã Ndiöxí, te cada-ndo nchaa nàcuáa ndúu tnúhu càháⁿ-ndó, te nchaa tnúhu-áⁿ cúú-xi tnúhu sã ío cùnnuu xini ñíhu-xi cada-ndo nàcuáa càháⁿ-xi, dico vã dáñá ndèé-ndó càda-ndo nchaa dàva-gá nàcuáa càháⁿ tnúhu sã sánú ichi ñaha xii-ndo.

24 Te nchòhó cúú-ndó dàtná cue ñáyiú cuàá, chi ñá túú cùtnùní iní-ndó nàcuáa canu ichi-ndo ñáyiú, chi quide cuèndá-ndó mèe-ni nchaa tnúhu sã ñá túú ío cùnnuu, dico nchaa tnúhu sã ío-gá cùnnuu xini ñíhu-xi cada cuèndá-ndó ñá túú quide cuèndá-ndó!

25 Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí nchòhó cue téé cùu fariséú, cùu-ndo cue téé ío dándahú

mée-xí sã quidé ndää te ñá ndää sã quidé ndää-ndó. Te ndàhú ní cuu-ndo chi cùu-ndo datná cue ñáyiú nàquete sátá-ni tàsáⁿ ndihì sátá-ni còhó te xití-xi càndehe caduha-ni. Te ducaⁿ sàtnahá-xi cùu-ndo chi mee-ni sã ndécú ndihì tnaha ñáyiú-ndo ñùhu iní-ndó, te nándi dándahú-ndó-yu te quèheⁿ-ndo sã ndécú ndihì-yu. ²⁶ Te nchòhó cue téé cùu fariséú, cúú-ndó dàtná cue ñáyiú cuàá, chi ñá túú cùtnuní iní-ndó nàcuáa ndùu sã quidé-ndó. Te ío xini ñùhu-xi sã cádá-ndó nàcuáa nduu ndoo nduu nine iní-ndó cuèndá ndacu-ndo càda-ndo sã vãha, te xiãⁿ ñùu chí cádá dàtná xiquide ñáyiú nàquete ndaa xití tàsáⁿ ndihì ndaa xití còhó.

²⁷ Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndihì nchòhó cue téé cùu fariséú, cùu-ndo cue téé ío dándahú mée-xí sã quidé ndää te ñá ndää sã quidé ndää-ndó. Te ndàhú ní cuu-ndo chi cùu-ndo datná núú yíndüxi ndíyi núú nì cuáha vii te ní nacáhyú sã cuixíⁿ, dico xití yaú-áⁿ chi càndehe caduha chi mee-ni yiqui ndíyi ñùhu. ²⁸ Te ducaⁿ sàtnahá-xi cùu-ndo chi sànuu sã cúú-ndó cuè téé váha dico iní-ndó chi mee-ni sã cuèhé sã dúhá ñùhu, te ío dándahú-ndó mée-ndo sã quidé ndää-ndó te ñá ndää sã quidé ndää-ndó.

²⁹ Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndihì nchòhó cue téé cùu fariséú, cúú-ndó cuè téé ío dándahú mée-xí sã quidé ndää te ñá ndää sã quidé ndää-ndó. Te ndàhú ní cuu-ndo chi càdúha-ndo nchaa núú nì nguíndüxi cue téé ní xóo cáháⁿ tnúhu Yá Ndiõxí ndéé sanaha, te ío vii quide-ndo nchaa núú sã nì cuáha núú yíndüxi cue ñáyiú ní quide váha ní xíndecu ñuyíú-a. ³⁰ Te càchí-ndó: “Te núú dicó nchoo ní xíndecu-o cùtnàhá ní xíndecu cue ñanì tnáhá-ó ndéé sanaha, te vá chítñahá-ó-güedé cahni-o cuè téé ní xóo cáháⁿ tnúhu Yá Ndiõxí dàvá-áⁿ ní cùu”, duha càchí-ndó. ³¹ Te sã dúcáⁿ càháⁿ-ndó, te xiãⁿ cùtnùnì sã íiⁿ-ní cùu-ndo ndihì cue ñanì tnáhá-ndó cuè téé ní xíndecu

ndéé sanaha, cue téé ní sahni ñaha xii cue téé ní cáháⁿ tnúhu Yá Ndiõxí dàvá-áⁿ. ³² Te núú ducaⁿ te chí dáxiu cava chiúⁿ ní tausaha-güedé.

³³ Te nchòhó cúú-ndó cuè téé ío cuihna iní-xi, chi cùu-ndo datná cóo dèéⁿ! Te nchòhó vá nihí-ndó nàcuáa cada-ndo càcu nihnu-ndo núú úhú núú ndàhú. ³⁴ Te cuèndá xiãⁿ ñùu tendaha-í cue téé càháⁿ tnúhu Yá Ndiõxí quixi núú-ndó, ndihì cue téé cùu mestrú danèhé ñáhá xii-ndo tnúhu-gá, ndihì cue téé ío váha cùtnunì iní-xi cuèndá cáháⁿ-güedé tnúhu-gá núú-ndó. Dico nchòhó chi da cùu úhú iní-ndó-güedé, chi dava-güedé cahni-ndo-güedé, te dava-güedé cata caa-ndo-güedé núú cùrúxi, te dava-güedé cani-ndo-güedé xití veñúhu, te ndi tnahá ñuú ndi tnahá ñuú quihíⁿ-ndó nànducu-ndo-güedé cuèndá cada úhú iní-ndó-güedé.

³⁵ Te sã dúcáⁿ ná càda-ndo, te ndadíquí-ndó cuè téé ní quide ndáá ní xíndecu ní xihí ní sahni ñaha cuè ñanì tnáhá-ndó. Te ndéé ndíi Abél téé ío váha ní quide ndáá ní xíndecu ní sahni-güedé ndadíquí-ndó, ndihì nchaa dava-gá cue téé ní sahni-güedé, ndihì ndéé ndíi Zacariá déhe ndíi Berèquiás téé ní sahni-güedé ndéé núú nì ndihì-ná ndadíquí-ndó, te ndíi-áⁿ nì sahni-güedé mei tnúú veñúhu càhnu sã ío cùnuu ndihì xító núú sácódó sã ndúú tãhú Yá Ndiõxí, te nchaa cue téé-áⁿ ndadíquí-ndó chí dàtná tnúhu mee-ndo nì sahni-ndo cuè téé-áⁿ, chí diu-ni ñanì tnáhá mée-ndo ducaⁿ ní sahni ñaha xii-güedé. ³⁶ Te na càchí tnúhu ndáá-í xii-ndo sã nchaa cue téé ní quide ndáá ní xíndecu ní sahni-güedé, nchaa cue téé-áⁿ ndadíquí nchaa ñáyiú ndècu vitna –cachí-gá xãhaⁿ-gã xii-güedé.

Jèsús càháⁿ-gá cuèndá ñáyiú ñuú Jerusalén

(Lc. 13:34-35)

³⁷ Te xãhaⁿ Jèsús xii ñáyiú ñuú Jerusalén:

–Nchòhó ñáyiú ñuú Jerusalén sàhni-ndo cue téé ní tendaha Yá Ndiõxí véxi càháⁿ tnúhu-gá núú-ndó, te mee-ni ndihì yúú sàhni-ndó

dàva-güedé. ¡Te yúhú titní xito ní cuiní-í coto ñaha-í xii-ndo dàtná quidé nchùxi xito-güedi déhe-güedi sàquíhi-güedi xití ndíxíⁿ-güedi, dico nchòhó ñá túú ní cuiní-ndó, te ñu-ni ducaⁿ sàni iní-í ndéé vitna! ³⁸ Te na cächí tñúhu ndáá-í xii-ndo sã sã nduu te ío ndàhú yáha ñuú-ndó, te vá cündècu-gá-ndó. ³⁹ Te na cächí tñúhu tucu-í xii-ndo sã vã quini ñáhá-gã-ndó xii-í, dico sãá nduu quini ñáhá tucu-ndo, te dàvá-áⁿ cachí-ndó: “Ío càhnu cuu Yaá ní tendaha Dütú Ndiõxí véxi”, duha cachí-ndó — cächí-gá xãhaⁿ-gã xií-yu.

24

Jèsús cächí-gá sá ngóyó veñúhu
(Mr. 13:1-2; Lc. 21:5-6)

¹ Te Jèsús ní quee-gá veñúhu càhnu sã ío cùnuu, te mei òré ní queheⁿ-gá ichi quíhíⁿ-gá ìⁿ xichi, te ní sãndehe yatni cue tée xica cuu ndíhi-gá ñíni-gá, te xãhaⁿ-güedé xii-gá:

—Cundehe veñúhu-a ñã ío váha ní sãá —cächí-güedé xãhaⁿ-güedé xii-gá.

² Te Jèsús ní xãhaⁿ-gã xii-güedé:

—Na cächí tñúhu ndáá-í xii-ndo sã ncháá sã ndéhé-ndó-á vitna saá nduu te vá cündüu-gá-xi dàtná cáá-xí vitna, chi ni ìⁿ-gá yúú vã códó nchíhi tnaha-xi chi ndíhi ngoyo —cächí-gá xãhaⁿ-gã xii-güedé.

Nàcuáa cada-xi nduu ta cùyatni naa ñuyúú-a

(Mr. 13:3-23; Lc. 21:7-24; 17:22-24)

³ Te Jèsús ní sãá-gá ndíhi cue tée xica cuu ndíhi-gá yucu Òlívú, te xíáⁿ ñí ngóo-gá te núú núcõo-gá-áⁿ ñí sáháⁿ cue tée xica cuu ndíhi-gá, te dayuhu ñí xãhaⁿ-güedé xii-gá:

—Cuiní-ndí cachí tñúhu-n ñã nduu dùcaⁿ cada-xi ngoyo veñúhu càhnu sã ío cùnuu, ndíhi nãndi cùu sã cádá-xí òré sa ta cùyatni nduu quixi tucu-n ñuyúú-a, ndíhi òré sa ta cùyatni naa-xi —cachí-güedé xãhaⁿ-güedé xii-gá.

⁴ Te Jèsús ní xãhaⁿ-gã xii-güedé:

—Ío quíhi iní-ndó cündècu-ndo cuendá sã vã yõo dandàhú ñáhá xii-ndo. ⁵ Chi ío cuéhé cue tée coo ñuyúú, te danàni-güedé meé-güedé

dàtná nãni-í, te cachí-güedé: “Yúhú cùú-í Crístú Yaá ní tendaha Yã Ndiõxí véxi ñuyúú-a”, duha cachí-güedé. Te sã dúcáⁿ cãháⁿ-güedé te ío vai ñáyiu dandàhú-güedé. ⁶ Te níhi-ndó tñúhu nãá-güedé ndèni ní cuu, dico vá yúhú-ndó chi dacuítí sã dúcáⁿ càda-xi, dico vátá sãá-gá nduu nãa ñuyúú òré ducaⁿ càda-xi. ⁷ Chi cue tée ìⁿ nacióⁿ nãá-güedé ndíhi cue tée ingá nacióⁿ, te titní ñuú ngüíta-güedé nãá-güedé, te titní xichi ñuyúú coo tnamá, te titní tucu xichi ñuyúú quixi cuéhé, te titní tucu xichi ñuyúú ío níhi tnáa. ⁸ Te nchaa xíáⁿ cuu-xi tñúndõho sã vitná váha váha quèsaha sã cùú-xí cuè ñáyiu xíndecu ñuyúú.

⁹ Te cue ñáyiu na cùu úhú iní ñáhá xii-ndo cuáha cuendá ñáhã-yu núú cuè tée cùchiuⁿ cuendá caniha-güedé xii-ndo, te dava-ndo càhni ñaha-güedé, te nchaa ñáyiu cuu úhú iní ñáhã-yu xii-ndo sã cuendá-í.

¹⁰ Te dàvá-áⁿ ío vai ñáyiu dàñá-yu sã sãndáá iní-yu Yá Ndiõxí, te ngóo-yu cuu úhú iní tnáhã-yu, te cuáha cuendá tnáhã-yu núú cuè tée cùchiuⁿ. ¹¹ Te ío vai cue tée cachí-güedé sã cãháⁿ-güedé tñúhu Yá Ndiõxí te ñã ndáá sã cãháⁿ-güedé tñúhu-gá, te ducaⁿ ío vai ñáyiu dandàhú-güedé. ¹² Te dàvá-áⁿ cunuu mèe-ni nchaa sã cuéhé sã dúhá cádá-yu, te vai-yu vá cùú iní-gá-yu tnàha ñáyíu-yu. ¹³ Dico nchaa ñáyiu na càda ndee-ni iní canchicúⁿ nihnu ñaha-ni xii-í, ñáyiu-áⁿ naníhí tãhú-yu. ¹⁴ Te níhí ñuyúú quíhíⁿ ñáyiu cáháⁿ-yu tñúhu váha, tñúhu sã cáháⁿ nãcuáa ndíhu ndaha ñaha Yá Ndiõxí xii ñáyiu, te sátá ná níhí nchaa ñáyiu tñúhu-áⁿ te naa ñuyúú.

¹⁵ Te ndíi Dániél tée ní xóo cáháⁿ tñúhu Yá Ndiõxí ndéé sanaha ñí chídó tñúni ndíi cuendá ìⁿ sã dáquèe tñú Yã Ndiõxí cundecu ìⁿ xichi núú ñí cuu íí, te xíáⁿ cada-xi sã vã cündècu-gá ni ìⁿ ñáyiu xíáⁿ. Te cada cuendá váha-ndo nãcuáa ní cáháⁿ ndíi, chi nduu na quini-ndó xíáⁿ cundecu-xi núú dúcáⁿ ñí cuu íí, ¹⁶ te dàvá-áⁿ nchaa ñáyiu xíndecu distritú Júdeá xini ñúhu-xi

cunú-yu quíhíⁿ-yu xítí yucu. ¹⁷ Te nchaa ñáiyu ndáa ndódó díquí véhé-xí vǎ ndǐhu-gá-yu vehé-yu quehéⁿ-yu ñⁿ ndachíúⁿ-yu canehé-yu quíhíⁿ. ¹⁸ Te nchaa ñáiyu cuáháⁿ yucu vǎ nùhú-gá-yu vehé-yu cúnúquehéⁿ-yu dóó-yu. ¹⁹ Te ndàhú ní cuu nchaa ñáiyu díhí ñúhú dēhe-xi, ndíhi cue ñáiyu díhí xǐndeca déhe vitna sàdi na saá nduu dùcaⁿ cada-xi! ²⁰ Te nchòhó, chí càcáⁿ táhú nùú Yǎ Ndiǒxí cuendá sǎ vǎ dúcáⁿ ndòho-ndo yóó quidé vǐxiⁿ-xi, te ni vǎ dúcáⁿ ndòho-ndo nduu cuu-xi nduu ndetatú-ndó. ²¹ Chi dàvá-áⁿ coo tnúndòho cahnu vihi ñuyíú, te vátá ñⁿ ndùu-gá coo tnúndòho cahnu vihi-áⁿ ndéé cútñàhá ní ngáva ñuyíú, chi díu-ni dàvá-áⁿ coo tnúndòho cahnu vihi-áⁿ, te ni nùú cuáháⁿ núú vǐxi vǎ cóo-gǎ tnúndòho-áⁿ. ²² Te Yǎ Ndiǒxí càchí-gá sǎ vǎ ño vǎi nduu coo tnúndòho cahnu vihi-áⁿ sǎ cuendá nchaa ñáiyu ní cáháⁿ-gá cundecu ndíhi-gá. Chi núu vǎi nduu na coo tnúndòho-áⁿ te vǎ yóo cácu nihnu.

²³ Te núu ño ñáiyu càchí-yu xii-ndo: “Chí cundèhe iha, chi iha ní quexìo Cristú Yaá ní tendaha Yǎ Ndiǒxí véxi ñuyíú-a”, àdi cachí-yu: “Chí cundèhe yacáⁿ chi yàcáⁿ ndécú-gǎ”, càchí-yu ña. Te vǎ quíndáá iní-ndó tnùhu càháⁿ-yu. ²⁴ Chi coo cue tée cachí-güedé sǎ cúu-güedé Yaá ní tendaha Yǎ Ndiǒxí véxi ñuyíú-a, te dava-güedé cachí-güedé sǎ cúu-güedé cue tée càháⁿ tnùhu Yǎ Ndiǒxí dico ñá ndáá sǎ cúu-güedé cue tée càháⁿ tnùhu-gá, te cada-güedé tǐtní núú sǎ vǎ yóo tnàhí ndàcu cada cuendá dandàhú-güedé ñáiyu. Te caní iní-güedé dandàhú-güedé ndéé cue ñáiyu ní cáháⁿ Yǎ Ndiǒxí cundecu ndíhi-gá. ²⁵ Te duha ndùu tnùhu càháⁿ-í dátùha ñaha-í xii-ndo, ²⁶ Te núu càchí-yu xii-ndo: “Xítí yucu-ǎⁿ ní quexìo Yaá ní tendaha Yǎ Ndiǒxí véxi ñuyíú-a”, càchí-yu. Te vǎ quíndáá iní-ndó quíhíⁿ-ndó, àdi cachí-yu: “Vehe-ǎⁿ ndécú Yàá ní tendaha Yǎ Ndiǒxí véxi ñuyíú-a”,

càchí-yu. Te vǎ quíndáá iní-ndó tnùhu càháⁿ-yu. ²⁷ Chi dàtná xìní nchaa ñáiyu quide-xi oré sàá nduté dàyehé-xi ní càa xico ñuyíú ducaⁿ càda-xi oré quixi tucu yúhú Tée cùu ñaní tnáhá-ndó nchàa-ndo chí ncháa-yu quini ñáhà-yu xii-í. ²⁸ Te nchòhó xìní-ndó sǎ ncháá nùú yúcu yíqui cuñú ní xíhí te yàcáⁿ tàcá nchaa ndixíí xéxí-güedi.

Nàcuáa cada-xi òré quixi tucu Tée cùu ñaní tnáhá cue ñáiyu
(Mr. 13:24-37; Lc. 21:25-33; 17:26-30, 34-36)

²⁹ Te na yǎha-ni coo tnúndòho cahnu vihi-áⁿ, te vǎ dáyehé-gá nchíanchii, te ni vǎ dáyehé-gá yóó, te ngoyo nchaa chódíní ndéé andíu, te quidi-xi andíu ³⁰ nàcuáa cutnùní iní ñáiyu sǎ sǎ véxi yúhú Tée cùu ñaní tnáhà-yu ncháa-yu. Te cue ñáiyu nihí ñuyíú ndǎhyú-yu sǎ ndíhú iní-yu òré ducaⁿ càda-xi, te ncháa-yu quini ñáhà-yu xii-í quee-í andíu quixi-í ichi xítí vícò, te quini-yu sǎ ño càhnu cuu-í, te quide-í nchaa sǎ vǎha. ³¹ Te tauchíuⁿ-í cue espíritú xínú cuèchi núu-í níhi tíú-xi cútú nadatàcá-xi nchaa ñáiyu ní cáháⁿ-í chitnahá ñáhà xii-í xǐndecu ní càa xico ñuyíú.

³² Te nchòhó sa xìní-ndó nàcuáa quide yutnu ngúxí, chí yutnu-áⁿ ndúú yùte núú díte-xi te nàtáhú ndaha-xi. Te òré ducaⁿ quide-xi te càchí-ndó sǎ sǎ ní cuyatni nuu cahni. ³³ Te díu-ni ducaⁿ sǎtnahá-xi cada-xi ñuyíú-a òré ná quini-ndó càda-xi nchaa nàcuáa ní cáháⁿ-í, te cutnùní iní-ndó sǎ sǎ ní cuyatni vii-ñá nduu nàa ñuyíú. ³⁴ Te na càchí tnùhu ndáá-í xii-ndo sǎ òré vátá cùu-gá nchaa ñáiyu xǐndecu ñuyíú-a vitna, te cada-xi nchaa nàcuáa ní cáháⁿ-í. ³⁵ Te andíu ndíhi ñuyíú-a chí ndíhi nihnu-xi, dico tnùhu-í chí vǎ ndíhí nihnu-xi chí cùu-xi tnùhu ndáá cuíti.

³⁶ Dico ñá túú cùtnuní ná nduu quixi tucu-í, te ni ñà túú cùtnuní ná òré chí vǎ yóo xìní, te ni cuè espíritú xínú cuèchi núú Yǎ Ndiǒxí ñá túú xìní-xi ná nduu quixi-í, te ni mèe yúhú Tée cùu Déhe Dútú Ndiǒxí ñá túú xìní-í

ná nduu quixi tucu-í, chi ñndii díi-ni mee-gã xini-gá ñuu ná nduu quixi-í.

37 Te nduu na quixi tucu yúhú Tée cùu ñani tnáhá-ndó nchàa-ndo ñuyíú-a te cada-xi datná ní quide-xi cùtnàhá ní xindecu ndíi Nõé. 38 Chi nchaa ñáyíu ní xindecu davá-áⁿ òré vátá ndáá-gã ndute ñuyíú, te xèxí-yu xihí-yu quidé-yu, te davá-yu ío-yu vico tnándaha, te davá-yu dásáⁿ-yu déhe yòcò-yu candeca ñaha tée, te ducaⁿ-ni xiquidé-yu ndéé ní sáá nduu cuãnguee té Nõé xití bàrcú. 39 Te ñá túú ní cùtnuní iní-yu nàcuáa cada-xi ñuyíú ndéé ní sáá nduu ñi ngüíta-xi ní cuuⁿ dáú ñi ndaa ndute ñuyíú ñi dánáá ñaha-xi xii-yu. Te ñi-ni ducaⁿ sãtnahá tucu-xi cada-xi nduu na quixi tucu yúhú Tée cùu ñani tnáhá-yu ncháá-yu ñuyíú-a, chi nduu ñà túú ñá yíhí iní-yu te quixi tucu-í. 40 Te davá-áⁿ ñuu úú tnáhá cue tée yíhi-güedé xití yucu, te ñn-dé ndanchita te ñn-dé quendóo. 41 Àdi úú ñáyíu ñíhí nchicò-yu ñn-ni vèhe, te ñn-yu ndanchita te ñn-yu quendóo.

42 Te duha nduu tnúhu càháⁿ-í cuendá nchòhó cundecu túha-ndo, chi ñá túú xini-ndó ñá òré quixi tucu yúhú Yaá cúú Xitohó-ndó. 43 Te nchòhó xini-ndó sã ñuu ñn tée cùu xitohó vehe xini-dé ñá òré cúú-xi niú quíhu ñadúhú vehe-dé duhu-güedé, te quíhi iní-dé cundecu-dé cuendá sã vã dáñá-dé quíhu ñadúhú-ãⁿ vehe-dé duhu-güedé, dico ñá túú xini-dé. 44 Te duha càháⁿ-í chi nchòhó xini ñúhu-xi cundecu túha-ndo, chi na cuáháⁿ òré ñá túú ñá yíhí iní-ndó quèxio yúhú Tée cùu ñani tnáhá-ndó nchàa-ndo.

Cuendá ñn tée xinu cuechi (Lc. 12:41-48)

45 Te na càni-í ñn cuendú núú-ndó. ñn tée xinu cuechi núú ñn patróoⁿ cúú-dé ñn tée ío váha tècú tnùní, te quide ndáá-dé ndécú-dé. Te ñn xito ní dándóo ndaha ñaha patróoⁿ-dë xii-dé nchaa cue ñáyíu ndècu vehe-dé cuendá coto ñaha-dé xii-yu cuáñaha-dé sã cáxi-yu òré tàú-xi caxí-yu, te tée cùu patróoⁿ-áⁿ ñi quee-dé cuáháⁿ-dé. 46 Te váha

táhu tée xinu cuechi-áⁿ te núu ndècuu-dé quidé-dé nchaa nàcuáa ní xáhaⁿ patróoⁿ-dë cada-dé mei òré ní nasáá patróoⁿ-dë-áⁿ. 47 Te na càchí tnúhu ndáá-í xii-ndo sã tée cùu patróoⁿ-dë-áⁿ cùñaha-dé xii-dé sã quíndàha-dé nchaa sã ndécú ndíhi-dé. 48 Dico núu tée xinu cuechi-áⁿ ní cùu-dé ñn tée cuihna iní-xi, te ngóo-dé caní iní-dé sã cùyaa patróoⁿ-dë vá násáá ndíhi-dé. 49 Te ngüíta-dé caní-dé nchaa dava-gá cue ñáyíu xinu cuechi ndíhi-dé, te ngóo-dé caxi-dé coho-dé cada-dé ndíhi nchaa cue tée quíhu. 50 Te ñn nduu òré ñá túú yíhi iní-dé nasáá patróoⁿ-dë, 51 te ío dandòho ñaha patróoⁿ-dë xii-dé, chi daquíhíⁿ ñáhá-dé xii-dé núu xindecu cue ñáyíu ní cachí sã ñi quide ndáá te ñá ndáá sã ñi quide ndáá-yu. Te ducaⁿ sãtnahá-xi dandòho ñaha Yá Ndiõxí xii ñáyíu, chi daquíhíⁿ ñáhá-gã xii-yu ñn xichi núú ío ndohó-yu te yacáⁿ ío ndáhyú-yu, te dicó rúhñú-ñá cuu núhu-yu sã sàtú iní-yu sã ndóhò-yu —càchí-gá xáhaⁿ-gã xii-güedé.

25

Cuendá úxi ñáyíu ñíhí

1 Te xáhaⁿ tucu Jesús xii-güedé:

—Na càni-í ñn cuendú núú-ndó nàcuáa tècú tnùní-ndó nàcuáa cada-xi òré ndíhu ndaha ñaha Yá Ndiõxí xii ñáyíu. Te úxi tnáhá ñáyíu ñíhí ñáyíu cuechi ñi quehéⁿ-yu lintèrná-yu, te cuáháⁿ-yu ñn xichi núú cóó vico tnándaha cuendá cundetú-yu quexio tée tnándaha. 2 Te úhúⁿ ñáyíu cuechi-ãⁿ ío váha cùtnuní iní-yu, te úhúⁿ-yu ñáhá. 3 Te ndí ùhúⁿ ñáyíu cuechi dùcaⁿ ñá túú cùtnuní iní-xi-áⁿ ñà túú ní cãnehé-yu sã ndéè lintèrná-yu. 4 Dico ndí ùhúⁿ ñáyíu cuechi cùtnuní iní-xi-áⁿ nehé-yu sã ndéè lintèrná-yu. 5 Te tée tnándaha-áⁿ cùyaa-dé quexio-dé núú ndétú ñáhá-yu-áⁿ, te ñini dùcaⁿ cuyaa-dé ní tñi ñaha sàní xii-yu ní xidí-yu. 6 Te cùu-xi datná dava niú níhi ní cáháⁿ dava-gá ñáyíu, te càchí-yu: “Sa véxi tée

tnándaha, chí táquèe quehé queheⁿ cuendá-ndó-dě”, cächí-yu. ⁷ Te ndi ùxí ñáyiú cuechi-ǎⁿ ñi ndacóo-yu quide túha-yu lintérnǎ-yu. ⁸ Te ndi ùhúⁿ ñáyiú cuechi ñà túú cùtnuní iní-xi-áⁿ ñi xáhǎⁿ-yu xii cue ndi ùhúⁿ ñáyiú cùtnuní iní-xi-áⁿ: “Chí táxí nùu luha sá nděe lintérná-ndó ná nděe lintérná-ndí chi ñà cuení-xi cáyú mee-ñi ndàhvá”, cächí-yu xáhǎⁿ-yu. ⁹ Te cue ñáyiú cuechi cùtnuní iní-xi-áⁿ ñi xáhǎⁿ-yu: “Vá táxí nùu-ndí chi vá tnàhá canehe chiúⁿ mee-ndí, te váha-gá chí cuáháⁿ cuaaⁿ-ndo nùú cuè ñáyiú xídícó cuendá sá vǎ cúmǎní xii-ndo, te vá cúmǎní xii nchúhú tucu”, cächí-yu xáhǎⁿ-yu. ¹⁰ Te ñini cuáháⁿ ndi ùhúⁿ ñáyiú ducaⁿ ñà túú cùtnuní iní-xi-áⁿ cuànguaáⁿ-yu sá nděe lintérnǎ-yu ní quexìo téé tnándaha. Te ndi ùhúⁿ ñáyiú cuechi cùtnuní iní-xi-áⁿ ñi queheⁿ cuendá ñáhǎⁿ-yu xii-dé, te cuánguihu ndihí ñàháⁿ-yu xii-dé nùú cóo víco tnándaha, te sátá dúcáⁿ te ní nandedí yuyèhe. ¹¹ Te òré ní nasáá cue ñáyiú cuechi ñáyiú ní sánguáaⁿ sá nděe lintérná-xi-áⁿ, te ní ngüíta-yu cǎháⁿ-yu xĩnutñi-yu ndàa sátá yuyèhe ndaa quehé, te xáhǎⁿ-yu xii téé tnándaha-áⁿ: “¡Táta, nacaáⁿ yuyèhe na quíhu-ndí!”, cächí-yu xáhǎⁿ-yu xii-dé. ¹² Te téé tnándaha-áⁿ ñi xáhaⁿ-dě xii-yu: “Na cächí tnúhu ndáá-í xii-ndo sǎ nchòhó ñà túú tàú-ndó quíhu-ndo víco-a, chi ñà túú tnàhá tnúhu ndihí ñàha-ndo xii-í”, cächí-dé xáhaⁿ-dě xii-yu –cächí Jèsús xáhaⁿ-gǎ xii-güedé.

¹³ Te xáhaⁿ tucu Jèsús xii-güedé:

–Ío quíhi iní-ndó cùndecu-ndo, chi ñà túú xini-ndó nǎ nduu, te ni ñà túú xini-ndó nǎ òré quixi tucu yúhú Téé cùu ñaní tnàhá-ndó nchàa-ndo –cachí-gá xáhaⁿ-gǎ xii-güedé.

Cuendá cue téé ní ndóo ndaha díhúⁿ
(Lc. 19:11-27)

¹⁴ Te xáhaⁿ tucu Jèsús xii-güedé:

–Na cǎni tucu-í ingá cuendú nùú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndióxi xii ñáyiú. Iⁿ téé sa ñihu ichi-ná-dé sá cáca-dě quíngaca cuu

xica-dě, te ní cana-dé cue téé xinu cuechi nùú-dě cuendá dándóo ndaha ñàha-dé díhúⁿ-dě xii-güedé.

¹⁵ Te nàcuáa nduu chiúⁿ quide iⁿ iⁿ-güedé te ducaⁿ díhúⁿ ñi sáñaha-dě xii-güedé, te iⁿ-dé ní sáñaha-dě úhúⁿ tnàhá díhúⁿ sǎ ío yahu nàni talentú, te ingá-dé ní sáñaha-dě úú tnàhá díhúⁿ-ǎⁿ, te ingá-dé ní sáñaha-dě iⁿ díhúⁿ-ǎⁿ, te dǎtnuní ní quee-dé cuáháⁿ-dé. ¹⁶ Te téé ní queheⁿ cuendá úhúⁿ tnàhá díhúⁿ sǎ nání tàlentú ní quide-dé ndáhú ndihí-xi te ní níhí tucu-dé úhúⁿ-gá tucu tnàhá díhúⁿ-ǎⁿ. ¹⁷ Te diu-ni ducaⁿ ñi quide tucu téé ní níhí úú díhúⁿ sǎ nání tàlentú-áⁿ, chi ní quide-dé ndáhú te ní níhí tucu-dé úú-gá tucu tnàhá. ¹⁸ Dico téé ní níhí iⁿ-ni díhúⁿ-ǎⁿ chi da ní chiváha-dé díhúⁿ pàtróoⁿ-dě, chi ní xete-dé iⁿ yaú te ní chindúxi-dé.

¹⁹ Te ní cuu cuéhé nduu sá ñi quee pàtróoⁿ-güedé-áⁿ ní sángaca cuu-dé, te ní nasáá-dé te ní ngüíta-dé quidé ndáá-dé ndihí-güedé cuendá díhúⁿ sǎ ñi dándóo ndaha ñàha-dé xii-güedé. ²⁰ Te téé ní quendóo ndaha úhúⁿ tnàhá díhúⁿ-ǎⁿ ñi xáhaⁿ-dě xii pàtróoⁿ-dě: “Pàtróoⁿ, náu úhúⁿ tnàhá díhúⁿ sǎ ñi dándóo ndaha ñàha-n xii-í-a, te ní sáháⁿ-í ní quide-í ndihí-xi ndáhú te ní chídó-xí úhúⁿ-gá tucu tnàhá, te náu-a naqueheⁿ cuendá-n”, cächí-dé xáhaⁿ-dě xii pàtróoⁿ-dě. ²¹ Te téé cùu pàtróoⁿ-dě-áⁿ ñi xáhaⁿ-dě xii-dé: “Ío váha ní quide-n, te vitna quide ñàha-í xii-n iⁿ téé váha téé quide ndáá, te sá sàcú díhúⁿ ñi dándóo ndaha ñàha-í xii-n te ní quide ndáá-n, te sátá dúcáⁿ ñi quide-n te vǎi-gá taxi cuendá ñàhà-í xii-n. Te vitna cuu cundecu-n nùú ndécù-í, te ío cudíi iní-ó cùndecu ndihí tnaha-o”, cachí téé cùu pàtróoⁿ-dě-áⁿ xáhaⁿ-dě xii-dé. ²² Te sátá dúcáⁿ te téé ní quendóo ndaha úú tnàhá díhúⁿ sǎ nání tàlentú-áⁿ ñi xáhaⁿ-dě xii pàtróoⁿ-güedé: “Pàtróoⁿ, náu úú tnàhá díhúⁿ sǎ ñi dándóo ndaha ñàha-n-a, te ní sáháⁿ-í ní quide-í ndihí-xi ndáhú, te ní chídó-xí úú-gá tucu tnàhá, te náu-a naqueheⁿ cuendá-n”, cächí-dé xáhaⁿ-dě xii pàtróoⁿ-güedé. ²³ Te ní xáhaⁿ téé cùu pàtróoⁿ-áⁿ xii-dé:

“Ío váha ní quide-n, te vitna quide ñaha-í xii-n ñí tée váha tée quide ndáá, te sá sácú díhúⁿ ñí dándõ ndaha ñaha-í xii-n te ní quide ndáá-n, te sá dúcáⁿ ñí quide-n te vâi-gá taxi cuendá-í. Te vitna cuu cundecu-n núú ndécú-í, te ío cudí^í ñí-ó cundecu ndíhi tñaha-o”, cachí tée cùu patróó^{n-áⁿ} xáha^{n-dě} xii-dé. ²⁴ Te tée ní ndóo ndaha ñí-ñí díhú^{n-áⁿ} ñí xáha^{n-dě} xii tée cùu patróó^{n-dě-áⁿ}: “Pàtróóⁿ, yúhú sa naha-í sá yòhó cúú-n ñí tée ndúcu mee-ni sá cúú-xí mèe-xi te tàhu-n chiuⁿ cuáháⁿ nchúhú cue tée xínu cuechi núú-n sácáⁿ-ndí triú, te òré ná nàtaxi tñaha-ndí, te yòhó dícó-nă náquèheⁿ cuendá-n tàxúha-n. ²⁵ Te núu xǎⁿ ní yùhú-í cada-í ndáhú ndíhi díhúⁿ, te ní sáhá^{n-í} ní xete-í ñí yaú te ní chindúxi-í, te náu díhú^{n-áⁿ} naqueheⁿ cuendá-n”, cächí-dé xáha^{n-dě} xii tée cùu patróó^{n-áⁿ}. ²⁶ Te tée cùu patróó^{n-áⁿ} ñí xáha^{n-dě}: “Yòhó cúú-n ñí tée cuihna ñí-xi xínu cuechi núú-í te cuhndu-n, te núu yòhó sání ñí-n sǎ cúú-í ñí tée tàuchiuⁿ cuáháⁿ-ndó sácáⁿ-ndó triú te òré nàtaxi tñaha-ndo, te yúhú dícó-nă náquèheⁿ cuendá-í nàtàxúha-í. ²⁷ Te núu sání ñí-n sǎ dúcáⁿ quide-í, te dasaⁿ núu-n díhú^{n-í} te cúñaha-n chǎhu-yu díquí-xi ni cùu, te òré ndexìo-í te sa ngódó lùha-gá díquí-xi naquehe^{n-í} ní cùu”, cachí-dé xáha^{n-dě} xii tée xínu cuechi-áⁿ. ²⁸ Te tée cùu patróó^{n-áⁿ} ñí xáha^{n-dě} xii dava-gá cue tée ndècu ndíhi-dé: “Chí quéndéé ñí díhúⁿ sǎ nání tàlentú néhé tée-áⁿ, te cuáha-ndo tée nêhe úxí tñahá ñí-ñí díhú^{n-áⁿ}. ²⁹ Chí cue tée sa ndècu ndíhi te níhí-gǎ-güedé cundecu ndíhi-güedé, te ni vǎ ñíhí-gǎ-güedé ndèe cundecu nchaa sá cundècu ndíhi-güedé. Te cue tée ñá túú nǎ ndécú ndíhi vai, te nchaa sá ndécú ndíhi-güedé vá cundècu ndíhi-gǎ-güedé. ³⁰ Te tée xínu cuechi ñá túú vèdana nàndíhi-áⁿ, chí tñí-dě te daquíhíⁿ-ndó-dě ñí xichi núú nêe núú ño ndoho-dé, te yàcáⁿ ndáhyú-dé, te dícó rúhñú-nă cuu núhu-dé sá sàtú ñí-dé sá ndóhó-dě”, cächí tée cùu

patróó^{n-áⁿ} xáha^{n-dě} xii-güedé. Duha sǎtnahá-xi ndoho nchaa ñá yiu ñá túú quide váha —cächí-gǎ xáha^{n-gǎ} xii-güedé.

Cuendá cue ñá yiu ní quide váha ndíhi cuendá cue ñá yiu ñá túú ní quide váha

³¹ Te xáhaⁿ tucu Jesús xii-güedé:

—Te nduu na quixi tucu yúhú Tée cùu ñaní tñahá-ndó nchaa-ndo, te quixi-í ndíhi nchaa cue espíritú xínu cuèchi núú-í, te nchaa ñá yiu quini-yu sá ño càhnu cuu-í, te dàvá-áⁿ cunucóo-í núú táxi tñúni-í, te ío cuñúhu ñá yiu sá ño càhnu cuu-í. ³² Te dàvá-áⁿ natacá nchaa ñá yiu xíndecu ñí càa xico ñuyú cundécú-yu núú-í, te cada-í-yu dàtná quidé ñí toli oré táú dè-ndé nchaa mbéé ndíhi nchaa chivá chí dè-ndé taxi ndecu-dé nchaa mbéé, te dè-ndé taxi ndecu-dé nchaa chivá. ³³ Te ducaⁿ sǎtnahá-xi cada-í chí nchaa ñá yiu ní quide ndáá núú-í ñá yiu-áⁿ taxi ndecu-í-yu xio cùha-í, te nchaa ñá yiu cuihna ñí-xi ñá túú ní cuini cada ndáá núú-í ñá yiu-áⁿ taxi ndecu-í-yu xio dàtni-í. ³⁴ Te ducaⁿ te yúhú tée ío cùnno cúñaha-í xii ñá yiu na cundecu xio cuha-í: “Nchaa nchòhó ñá yiu ní quide váha ñaha Tàtá-í Dútú Ndióxi, chí nêhé chí vitna ní sáa nduu cundecu-ndo núú ndécú-gǎ táxi tñúni-gǎ, chí ndéé cútnahá ní ngáva ñuyú sa ndècu túha tñahí núú ndécú-gǎ-áⁿ sǎ nchòhó nduu táhú-ndó cundecu-ndo. ³⁵ Te ducaⁿ chí òré xihí-í docó te ní taxi-ndo sǎ ñí xexi-í, te òré yìhí-í ndute te ní taxi-ndo ndute ní xihí-í, te òré ñúhú-í ichi te ní taxi-ndo vèhe ní ndetatú-í. ³⁶ Te òré xini ñúhu-í dóo cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xihí-í vecaá te ní quixi tucu-ndo ñí quixi coto ñaha-ndo xii-í”, duha cúñaha-í xii nchaa ñá yiu-áⁿ. ³⁷ Te nchaa ñá yiu ducaⁿ ñí quide ndáá-áⁿ cùñahá-yu xii-í: “Yòhó Yaá cúú Xitohó-ndí, ni ñí xito ñá túú ní tàxi-ndí sá cáxi-n òré xihí-n dócó, te ni ñí xito ñá túú ní tàxi-ndí ndute coho-n òré yìhí-n. ³⁸ Te ni ñá túú ní tàxi-ndí vèhe ndetatú-n òré ñúhú-n ichi, te ni ñá

túu ní tàxi-ndí dóo cuihnu-n òré xíní ñùhu-n. ³⁹ Te ni ñà túu ní quixi coto ñaha-ndí xii-n òré ní cuhú-n, te ni ñà túu ní quixi coto ñaha-ndí xii-n òré ní xíhi-n vècaá”, duha quesàhá-yu cúñahá-yu xii-í. ⁴⁰ Te yúhú té cùnūu cúñaha-í xii-yu: “Na càchí tnúhu ndáá-í xii-ndo sã ncháá sã vãha ní quide-ndo sã cúu-xí ncháa ñáyiu xĩndecu ichi-í cuè ío ndàhú xĩndáa-yu, te sã dúcáⁿ ñi quide-ndo sã vãha sã cúu-xí-yu, te cada iní-ndó sã mèe-í ducaⁿ ñi quide-ndo ñi xito ñaha-ndo xii-í”, duha cúñaha-í xii-yu.

⁴¹ Te dātnūnī cúñaha-í xii ñáyiu na cūndecu xio datni-í: “Ncháa nchòhó ñáyiu ní xíta nihnu chí xócuñí nūú ndécú-í-a, chí nchòhó ní nduu táhú-ndó cūndecu-ndo nūú ñùhú nūú càyú, ñu-ni nūú ñi quide túha-í cūndecu sácúhna ndíhi ncháa espíritú cūndíhi-xi, te yacáⁿ cūndecu-ndo ñi caa ñi quíhíⁿ. ⁴² Chí yúhú òré xihí-í docó te ñà túu ní tàxi-ndo sã cáxi-í, te ni òré yìchí-í ndute te ñà túu ní tàxi-ndo ndute coho-í. ⁴³ Te ni òré ní xúhuⁿ-í ichi ñà túu ní tàxi-ndo vehe ndetatú-í, te ni òré xíní ñùhu-í dóo cuihnu-í te ñà túu ní tàxi-ndo, te ni òré ní cuhú-í te ñà túu ní quixi-ndo quixi coto ñaha-ndo xii-í, te ni òré ní xíhi-í vècaá te ñu-ni ducaⁿ ñi quide-ndo ñà túu ní quixi-ndo quixi coto ñaha-ndo xii-í”, duha cúñaha-í xii-yu. ⁴⁴ Te ñáyiu-áⁿ cūñahá-yu xii-í: “Yòhó Yaá cúu Xĩtohó-ndí ñi ñiⁿ xito ñà túu ní xíní-ndí òré xihí-ñ docó cuendá taxi-ndí sã cáxi-n, te ni ñiⁿ xito ñà túu ní xíní-ndí òré yìchí-n ndute cuendá taxi-ndí ndute coho-n, te ni ñiⁿ xito ñà túu ní xíní-ndí cuhuⁿ-n ìchi cuendá taxi-ndí vehe ndetatú-n, te ni ñiⁿ xito ñà túu ní xíní-ndí òré xíní ñùhu-n dóo cuendá taxi-ndí dóo cuihnu-n, te ni ñiⁿ xito ñà túu ní xíní-ndí òré cùhú-n cuendá quixi coto ñaha-ndí xii-n, te ni ñiⁿ xito ñà túu ní xíní-ndí quíhi-n vècaá cuendá quixi coto ñaha-ndí xii-n”, duha quesàhá-yu cúñahá-yu xii-í. ⁴⁵ Te yúhú cúñaha-í xii-yu: “Na càchí tnúhu ndáá-í xii-ndo sã sã cuendá sã ñà túu ní quide-ndo ñiⁿ sã vãha

sã cúu-xí cuè ñáyiu ndècu ichi-í cuè ío ndàhú xĩndáa-yu, te sã dúcáⁿ ñi quide-ndo ñà túu ní quide-ndo sã vãha sã cúu-xí-yu, te cada iní-ndó sã mèe-í ducaⁿ ñi quide-ndo ñà túu ní quide-ndo sã vãha sã cúu-xí-í”, duha cúñaha-í xii-yu. ⁴⁶ Te ncháa ñáyiu-áⁿ quíhíⁿ-yu nūú ùhú nūú ndàhú ñi caa ñi quíhíⁿ. Te ncháa ñáyiu ní quide ndáá nūú-í ní xĩndecu ñuyíú-a, ñáyiu-áⁿ nduu táhú-yu ío vãha cūndecú-yu ñi caa ñi quíhíⁿ — càchí-gá xãhaⁿ-gã xii-güedé.

26

Cue tée cūu úhú iní ñáhá xii Jesús ndúcú-güedé nācuāa cada-güedé tñi ñaha-güedé xii-gá

(Mr. 14:1-2; Lc. 22:1-2; Jn. 11:45-53)

¹ Te sātá ñi yáha ducaⁿ ñi cáháⁿ Jèsús, te ní xáhaⁿ-gã xii cue tée xica cuu ndíhi-gá:

² —Nchòhó sa xíní-ndó sã cūmání ũú-gá nduu te coo vico pascuá, te càchí tnúhu-í xii-ndo sã yúhú Té cūu ñaní tnáhá-ndó ncháa-ndo tñi ñaha-güedé xii-í, te cuáha cuendá ñáhá-güedé nūú cuè tée cūu úhú iní ñáhá xii-í, te cata caa ñaha-güedé nūú cùrúxí te nūú cùrúxí-áⁿ cuú-í — càchí-gá xãhaⁿ-gã xii-güedé.

³ Te ñu-ni òré cáháⁿ ndíhi Jèsús cue tée xica cuu ndíhi-gá ní natacá cue tée cūu dútú cūnūu, ndíhi cue tée dācuaha ñaha xii ñáyiu ncháa tnúhu ní chídó tñuní ndí Moisés, ndíhi cue tée cūu sacuéhé nūú ñáyiu israhél. Te mei quèhé vehe nūú cúu vèchiuⁿ té Caifás té cūu dútú ío-gá cūnūu ní natacá-güedé. ⁴ Te xíaⁿ ñi ndatnúhu-güedé nācuāa cada-güedé dandàhú-güedé Jèsús cuendá tñi ñaha-güedé xii-gá, te cahni ñaha-güedé. ⁵ Te ní xitnàha-güedé:

—Váha-gá sã vã tñi-ó Jèsús mei ndūu vico, chí nūu ducaⁿ na càda-o te ío dusaⁿ càda ñáyiu —càchí-güedé xitnàha-güedé.

Ñi ñadíhí chíhí-áⁿ àciti díquí Jèsús
(Mr. 14:3-9; Jn. 12:1-8)

6 Te ndècu Jesús ñuú Bètaniá vehe ñⁿ té nàni Xímú, té ní tnahá cuéhé sã dátèhyú nihnu-xi yiqui cùñú-ó.

7 Te xíáⁿ ndécú-gã ní quexìo ñⁿ ñadihí néhé-áⁿ ñⁿ sá ñí cuáha yúú vãha nàni alabastrú, te xití xíãⁿ ñúhú àcítí sàháⁿ tnámí sã ïo ndèyáhu. Te yìhi Jesús mèsá xéxí-gã, te ñaha-áⁿ ñí sáháⁿ-aⁿ ní sódó-aⁿ àcítí ñúhú xití xíãⁿ díquí-gã.

8 Te òré ní xíní cue té xica cuu ndihí Jesús sá dúcáⁿ ñí quide ñaha-áⁿ te ní cudééⁿ-güedé, te ní ngüíta-güedé xitnàha-güedé:

—Ñá túú quide váha ñaha-áⁿ dàcáⁿ quidé-áⁿ dacuíta-aⁿ acítí-ãⁿ. 9 Chi váha-gá ñúu cuyáhu acítí-ãⁿ ní cùu chi ïo ndèyáhu, te díhúⁿ cuyáhu acítí-ãⁿ cuu cuendá cue ñáyu ndàhú ní cùu —cachí-güedé xitnàha-güedé.

10 Te Jèsús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gã xii-güedé:

—Vá dásatú-ndó ñí ñadihí-a, chi sá ñí quide ñaha-aⁿ xì-í cúu-xí ñⁿ sá vãha. 11 Chi cue ñáyu ndàhú ducaⁿ-ni cùtnahá ñáyu-áⁿ tnuú-ndó, dico yúhú chi vá ncháá ndùu cundecu ndihí ñaha-í xii-ndo ñuyú-a.

12 Te sá dúhá ñí quide ñaha ñadihí-a xii-í ní sódó-aⁿ àcítí díquí-í, te xíãⁿ cada iní-ndó sã sã quide túha-aⁿ yiqui cùñú-í cuendá nguíndüxi-xi. 13 Te na cächí tnúhu ndáá-í xii-ndo sã ndèni ní cuu ñihí ñuyú ná càháⁿ ñáyu tnúhu-í, te càháⁿ-yu tnàhá cuendá ñadihí-a cuendá quini nchaa ñáyu nàcuáa ní quide-aⁿ te ducaⁿ vã nàcuánaá-yu —cachí-gã xáhaⁿ-gã xii-güedé.

Té Jùdás ndúcú-dé nàcuáa cada-dé cuáha cuendá-dé Jèsús núu cuè té cùu úhú iní ñáhá xì-gá

(Mr. 14:10-11; Lc. 22:3-6)

14 Te sátá dúcáⁿ te té Jùdás Iscarioté ní sáháⁿ-dé ní ndatnúhu-dé ndihí cue té cùu dútú cùnùu. Te núu tnàhá té Jùdás-áⁿ cúu ùxúú cue té xica cuu ndihí Jesús. 15 Te ní xáhaⁿ-dë xii cue té cùu dútú cùnùu-áⁿ:

—¿Ndédau cháhu ñaha-ndo xì-í te taxi cuendá-í Jèsús xii-ndo-i? —cächí-dé xáhaⁿ-dë xii-güedé.

Te cue dútú-ãⁿ ñí xáhaⁿ-güedé xii-dé sã cuãñaha-güedé ócú úxí díhúⁿ cuixíⁿ, te ñu-ni ducaⁿ ñí sãñaha-güedé xii-dé.

16 Te ndéé òré ní queheⁿ cuendá té Jùdás-áⁿ díhúⁿ, te ní ngüíta-dé ndúcú-dé nàcuáa cada-dé cuáha cuendá-dé Jèsús núu-güedé.

Cùdini Jesús ndihí cue té xica cuu ndihí-gá

(Mr. 14:12-25; Lc. 22:7-23; Jn. 13:21-30; 1 Co. 11:23-26)

17 Te ní sáá nduu ñí quesaha vico xexi ñáyu pàá sã ñà túú yìhi levadurá ñu-ni vico pàscuá, te cue té xica cuu ndihí Jesús ní sãndehe yatni-güedé dñi-gá, te xáhaⁿ-güedé xii-gá:

—Mèstrú, véxi-ndí xicáⁿ tnúhú-ndí núu-n ñúu ndéé cuini-n càda túha-ndí cuendá cudini-o sacuaa nduu vico pascuá —cachí-güedé xáhaⁿ-güedé xii-gá.

18 Te Jèsús ní xáhaⁿ-gã xii-güedé:

—Chí cuaháⁿ xití ñuú-ãⁿ, te yacáⁿ naníhí-ndó ñⁿ té cùtnuní iní-ndó sã sã xíní ñáhá-dé xii-o, te cuñaha-ndo xì-dé: “Yaá cúu Mèstrú cächí-gá sã sã ní cuyatni nduu vã cùndecu-gá ñuyú-a, te vehe-n cuini-gá cada-gá vico pàscuá ndihí cue té xica cuu ndihí-gá”, duha cuñaha-ndo xì té-áⁿ —cachí-gã xáhaⁿ-gã xii-güedé.

19 Te cue té xica cuu ndihí-gá-áⁿ ñí xica-güedé cuaháⁿ-güedé, te ní quide-güedé nàcuáa ní xáhaⁿ-gã xii-güedé, te ní quide túha-güedé sã cùdini-güedé ndihí-gá sacuaa nduu vico pascuá-áⁿ. 20 Te òré sa ní cundiquiⁿ te cuánguihu Jèsús ndihí ndi ùxúú cue té xica cuu ndihí-gá mèsá cuendá cudini-gá ndihí-güedé.

21 Te ñini xèxi-gá ndihí-güedé ní xáhaⁿ-gã xii-güedé:

—Na cächí tnúhu ndáá-í xii-ndo sã díú ñⁿ nchohó cue té xica cuu ndihí-í cuáha cuendá ñáhá-ndó xì-í núu cuè té cùu úhú iní ñáhá —cachí-gã xáhaⁿ-gã xii-güedé.

22 Te sátá dúcáⁿ ñí xáhaⁿ-gã xii-güedé te nchaa-güedé ní ngüíta-güedé

cúndiyí-güedé, te da ñⁿ da ñⁿ-güedé ní ngüíta-güedé xáhaⁿ-güedé xii-gá:

—Mèstrú, ¿ñá díú yúhú ducaⁿ sàni iní-n càda-í-u? —càchí-güedé xáhaⁿ-güedé xii-gá.

²³ Te ní xáhaⁿ-gá xii-güedé:

—Tée nacaxi ndihi-í ñⁿ-ni cóhó caxi-ndí, tée-áⁿ cuáha cuèndá ñáhá-dé xii-í núú cuè tée cùu úhú iní ñáhá.

²⁴ Te yúhú Tée cùu ñani tnáhá-ndó nchàa-ndo ñuhu ichi-í cuáháⁿ-í yáha-í nàcuáa càháⁿ-xi núú tütú Yá Ndiöxí, dico ndáhú ní cuu tée ducaⁿ na cuáha cuèndá ñáhá xii-í núú cuè tée cùu úhú iní ñáhá, chi váha-gá sá vǎ cǎcú tée-áⁿ cundecu-dé ní cùu, te ñá díú sǎ ní cacu-dé te ducaⁿ càda-dé —càchí-gá xáhaⁿ-gá xii-güedé.

²⁵ Te sǎtá dúcáⁿ te ní cáháⁿ té Júdás tée cuáha cuèndá ñáhá xii-gá, te xáhaⁿ-dǎ:

—Mèstrú, ¿te náa sàni iní-n sǎ yúhú cuáha cuèndá ñáhá-í xii-n núú cuè tée cùu úhú iní ñáhá xii-n-áⁿ? —càchí-dé xáhaⁿ-dǎ xii-gá.

Te Jèsús ní xáhaⁿ-gá xii-dé:

—Diu-n —càchí-gá xáhaⁿ-gá xii-dé.

²⁶ Te ñini cùdini cue tée xica cuu ndihi Jesús ní queheⁿ-gá pǎá, te ní ndacáⁿ táhú-gá núú Yá Ndiöxí, te dàtnùní ní táhú cuèchi-gá te ní ngüíta-gá dǎcǎhñu-gá cue tée xica cuu ndihi-gá-áⁿ, te xáhaⁿ-gá xii-güedé:

—Chí quéhéⁿ pǎá-a caxi-ndo, te cada iní-ndó sǎ yǐqui cuñú-í cúu-xí —càchí-gá xáhaⁿ-gá xii-güedé.

²⁷ Te ní queheⁿ-gá vǎsú ñúhú ndùdí ndéhé yoho yàha stilé, te ní ndacáⁿ táhú-gá núú Yá Ndiöxí, te dàtnùní ní ngüíta-gá sǎñaha-gá xii-güedé cuèndá coho-güedé luha luha sǎ ñúhú xǐtǐ-xi, te xáhaⁿ-gá xii-güedé:

—Chí cóhó nchàa nchohó ndudí ndéhé yoho yàha stilé ñúhú xǐtǐ vǎsú-a. ²⁸ Te cada iní-ndó sǎ cúu-xí dàtná ñǐñí-í sǎ cǎtǐ òré cahni ñaha-güedé xii-í, te sǎ dúcáⁿ cǎtǐ ñǐñí-í xǐáⁿ cutnùní ndǎá sǎ Yá Ndiöxí cada-gá ingá núú sǎ váha sǎ cúu-xí vǎi ñáyiú dàtná ní cachí-gá cada-gá, te ío vǎi ñáyiú cada càhnu iní-gá cuèchi-yu. ²⁹ Te na càchí tnúhu-í xii-ndo sǎ vítná-nǎ duha xǐhi ndihi

ñaha-í xii-ndo ndùdí ndéhé yoho yàha stilé-a, te vá cóhó ndihi ñaha-gá-í xii-ndo, dico na sǎá nduu nànihí tnáhá-ó núú ndécú Tǎtǎ-í Dútú Ndiöxí táxi tnùní-gá te dàvá-áⁿ cada iní-ndó sǎ dàtná sǎ cóhó ndihi ñaha tucu-í xii-ndo chi ío cudǐí iní-ó —càchí-gá xáhaⁿ-gá xii-güedé.

Té Pèlú cúñaha-dǎ xii ñáyiú sǎ ñà túú xini-dé Jèsús

(Mr. 14:26-31; Lc. 22:31-34; Jn. 13:36-38)

³⁰ Te Jèsús ní xita-gá ñⁿ ndudú ndihi cue tée xica cuu ndihi-gá, te dàtnùní ní xica-gá cuáháⁿ-gá ndihi-güedé yucu Òlívú. ³¹ Te yácáⁿ ní xáhaⁿ-gá xii-güedé:

—Na càchí tnúhu-í xii-ndo sǎ nchǎá-ndó dǎndóo ñaha-ndo xii-í niú vitna, chi quee ndǎá-xi nàcuáa càháⁿ-xi núú tütú Yá Ndiöxí núú càchí-xi: “Yúhú cuáha-í tnúhu cahni-güedé tée cùu toli, te nchaa mbéé-dǎ ndihi-güedé cuténuu”, duha càchí-xi núú tütú-gá. ³² Dico na ndòto-í te codonùu-í núú-ndó quǐhǐn distritú Galileá —càchí-gá xáhaⁿ-gá xii-güedé.

³³ Te té Pèlú ní xáhaⁿ-dǎ xii-gá:

—Te cuèi nchaa-güedé ná dǎndóo ñaha-güedé xii-n, dico yúhú chi vá dǎndóo ñaha-í xii-n —càchí-dé xáhaⁿ-dǎ xii-gá.

³⁴ Te Jèsús ní xáhaⁿ-gá xii-dé:

—Na càchí tnúhu ndǎá-í xii-n sǎ niú vitna cùmǎní-gá cana ñⁿ líhi, te úní xito cáháⁿ-n núú ñáyiú sǎ ñà túú xini ñáhá-n xii-í —càchí-gá xáhaⁿ-gá xii-dé.

³⁵ Te té Pèlú ní xáhaⁿ-dǎ xii-gá:

—Cuèi na cùú ndihi ñaha-í xii-n dico vá càháⁿ-í núú ñáyiú sǎ ñà túú xini ñáhá-í xii-n —càchí-dé xáhaⁿ-dǎ xii-gá.

Te nchaa dava-gá cue tée xica cuu ndihi-gá diu-ni ducaⁿ ñí xáhaⁿ-güedé xii-gá.

Jèsús càháⁿ ndihi-gá Yá Ndiöxí ñⁿ xichi núú nání Gètsemaní

(Mr. 14:32-42; Lc. 22:39-46)

³⁶ Te Jèsús ní quexìo-gá ndihi cue tée xica cuu ndihi-gá ñⁿ xichi núú nání Gètsemaní, te xǐáⁿ ñí xáhaⁿ-gá xii-güedé:

—Chí cúnúçõo iha cundetú-ndo na quihíⁿ-í yacáⁿ cáháⁿ ndihí-í Yá Ndiõxí —càchí-gá xáhaⁿ-gã xii-güedé.

³⁷ Te ndèca-gá té Pèlú, ndihí ndi nduú déhe té Zebèdeú cuáháⁿ, te ní ngüíta-xi súúni ndihú iní-gá. ³⁸ Te ní xáhaⁿ-gã xii cue tée úní-áⁿ:

—Súúni ndihú iní-í dàtná sá cùú-í, te chí quéndõo nchòhó iha te vá cùdú-ndó chi yúhú vá cùdú-í —càchí-gá xáhaⁿ-gã xii-güedé.

³⁹ Te sa ñùnchií luha ní xica ndehe Jèsús núú ndécú-güedé, te ní ngüíñí xítí-gã te ní nuu núú-gã ndàa núú ñúhú, te ní ngüíta-gá cáháⁿ ndihí-gá Tátá-gã Dútú Ndiõxí, te xáhaⁿ-gã:

—Yòhó Tátá mée-í, cáháⁿ ndàhú-í núú-n nũu vá cùndèe iní-n tàunihnu ñaha-n xii-í cuendá sá vã ndòhò-í ná sáa òré, dico vá cáda-n nàcuáa càchí iní mée-í, chi cada-n nàcuáa càchí iní mée-n —càchí-gá xáhaⁿ-gã xii Tátá-gã Dútú Ndiõxí.

⁴⁰ Te sátá ñí yáha ní cáháⁿ ndihí-gá Tátá-gã Dútú Ndiõxí, te cuánuhú-gá núú ñí dándõo-gá cue tée úní-áⁿ te xixidí-güedé òré ní nasáa-gá, te ní xáhaⁿ-gã xii té Pèlú:

—¿Náa ñá cùndèe iní-ndó vá cùdú-ni-ndo cuèdicó ñⁿ òré ñini cáháⁿ ndihí-í Yá Ndiõxí-ãⁿ? ⁴¹ Te chí quéndõo tucu te cuhuⁿ iní-ndó vá cùdú-ndó, te cáháⁿ ndihí-ndo Yá Ndiõxí cuendá sá vã dácáháⁿ ñáhá yùcu ñávaha xii-ndo càda-ndo sá ñà túú tàú-ndó càda-ndo. Te xìní ndáa-í sá nchòhó cuìní-ndó càda-ndo nchaa nacuaa cáháⁿ-í dícó-ni sá ñà túú ñihí ndéé-ndó —càchí-gá xáhaⁿ-gã xii-güedé.

⁴² Te xito cùu uú cuáháⁿ tucu Jèsús cáháⁿ ndihí-gá Tátá-gã Dútú Ndiõxí, te xáhaⁿ-gã:

—Yòhó Tátá mée-í, te núu vá cùndèe iní-n tàunihnu ñaha-n xii-í cuendá sá vã ndòhò-í, te cada nàcuáa càchí iní mée-n —càchí-gá xáhaⁿ-gã xii Tátá-gã Dútú Ndiõxí.

⁴³ Te òré ní yáha ní cáháⁿ ndihí-gá Tátá-gã Dútú Ndiõxí, te cuánuhú tucu-gá núú xindecu cue tée úní xicá cùu ndihí-gá-áⁿ, te xidí-ni tucu-güedé òré ní nasáa-gá, te ducaⁿ ñí quide-güedé chi súúni ñuhu saní

núú-güedé. ⁴⁴ Te ní dándõo ñaha tucu Jèsús xii-güedé xiáⁿ, te cuáháⁿ tucu-gá xito cùu úní cáháⁿ ndihí tucu-gá Tátá-gã Dútú Ndiõxí, te ñiu-ni tnúhu sá sá ní xáhaⁿ-gã xii Tátá-gã Dútú Ndiõxí, ñiu-ni tnúhu-áⁿ ñí xáhaⁿ tucu-gá. ⁴⁵ Te sátá ñí yáha ní cáháⁿ ndihí-gá Tátá-gã Dútú Ndiõxí, te cuánuhú tucu-gá núú ndécú cue tée xica cuu ndihí-gá-áⁿ, te òré ní nasáa-gá, te ní xáhaⁿ-gã xii-güedé:

—¿Te náa xidí-ni tucu-ndo? Te sa ní sáa òré cuáha cuendá ñáhá-güedé xii-í núú cue tée ndècu ichi cuehé ichi duha. ⁴⁶ Dico vitna chí ndácõo na quihíⁿ-ó, chi sa véxi tée cuáha cuendá ñáhá xii-í núú cue tée cùu úhú iní ñáhá —càchí-gá xáhaⁿ-gã xii-güedé.

Ní tñi-güedé Jèsús ndécá ñàha-güedé xii-gá cuáháⁿ

(Mr. 14:43-50; Lc. 22:47-53; Jn. 18:2-11)

⁴⁷ Te cáháⁿ dúcáⁿ-ní Jèsús ní quexio té Jüdás. Te núú tnàhá tée-áⁿ cúu ùxúu tnàhá cue tée xica cuu ndihí-gá ní cùu te ducaⁿ ñí quide-dé. Te ndihí-dé vai cue tée ní quexio te dava-güedé xínehe-güedé machití, te dava-güedé xínehe-güedé carrutí. Te cue tée-áⁿ ñí tendaha ñaha cue dútú cùnùu, ndihí cue tée cùu sacuéhé núú ñáyiú israhél. ⁴⁸ Te té Jüdás tée cuáha cuendá ñáhá xii-gá-áⁿ sa ní xitnùhu-dé cue tée-áⁿ nàcuáa cada-dé cuáha cuendá-dé Jèsús núú-güedé, te duha ní xáhaⁿ-dè xii-güedé:

—Cundehe-ndo tée na tèyuhu-í te tée-áⁿ tñi-ndo-dè chi tée-áⁿ cúu-dè tée ndèe iní-ndó —duha ní xáhaⁿ-dè xii-güedé.

⁴⁹ Te sátá dúcáⁿ ñí xáhaⁿ-dè xii-güedé, te ní sàndehe yatni-dé núú Jèsús, te ní xáhaⁿ-dè xii-gá:

—¿Ràcióⁿ Mèstrú! —càchí-dé xáhaⁿ-dè xii-gá.

Te ní teyuhu ñaha-dé xii-gá. ⁵⁰ Te Jèsús ní xáhaⁿ-gã xii-dé:

—Yòhó tée ní chitnahá ñáhá xii-í, ¿ná cuìní-n nũu véxi-n nũu-í? —càchí-gá xáhaⁿ-gã xii-dé.

Te òré-ni-áⁿ ñí tñi ñaha cue tée ndihí té Jüdás-áⁿ xii Jèsús, te ndèca ñaha-güedé xii-gá cuáháⁿ.

⁵¹ Te ñⁿ cue tée ndihi Jèsús ní tava-dé machití-dé, te ní xehndé-ni-dé ñⁿ xio lóho ñⁿ tée xínu cuechi núú dútú cúnú te ní quendé duuⁿ lóho-dé. ⁵² Te Jèsús ní xáhaⁿ-gã xii tée ducaⁿ ñⁿ xehndé lóho tée-áⁿ:

—Nachihí machití-n ñⁿ-xi, chí nchaa cue tée na nàá ndihi machití cahni-güedé tñaha ñáyiü-güedé te diu-ni ndihi machití cuú méé-güedé tucu. ⁵³ Te na càchí tñuhu-í xii-ndo sã nñu yúhú cuíní-í cácu-í te cáháⁿ ndihi-í Tãtã-í Dútú Ndiöxí, te tendaha-gã cuéhé víhí espíritú xínú cuèchi núú-gã quixi-xi dàcácu ñaha-xi xii-í. ⁵⁴ Dico núú ducaⁿ na càda-í te vá queé ndáá-xi nàcuáa càháⁿ-xi núú tütú Tãtã-í Dútú Ndiöxí núú ndéé tñuní sã dàcuítí xini ññu-xi nándi ndoho-í —càchí-gã xáhaⁿ-gã xii-dé.

⁵⁵ Te Jèsús ní xáhaⁿ-gã xii cue tée ducaⁿ ñⁿ tñi ñaha xii-gã-áⁿ:

—Nchaa-ni nduu ní xiní-ndó ñⁿ xóo cunucóo-í xití veñúhu càhnu sã ïo cúnú ní xóo danéhé-í ñáyiü, te ñá túú ní tñi ñaha-ndo xii-í, ¿te ná cuendá vitna quide ñaha-ná-ndó xii-í dàtná quidé-ndó ñⁿ ñadúhú, nèhe-ná-ndó màchití nèhe-ná-ndó càrrutí ní quexìo ní tñi ñaha-ndo xii-í-í? ⁵⁶ Dico dacuítí sã dúhá càda-xi nàcuáa quee ndáá-xi nàcuáa ní cáháⁿ cue tée ní xóo cáháⁿ tñuhu Yá Ndiöxí ndéé sanaha ñⁿ ngódó tñuní núú tütú-gã —càchí-gã xáhaⁿ-gã xii-güedé.

Te nchaa cue tée xica cuu ndihi-gã ní xinu-güedé ní dándöo ñaha-güedé xii-gã.

Jèsús ndécú-gã jündá

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Te cue tée ní tñi ñaha xii Jesús ndécá ñaha-güedé xii-gã cuáháⁿ núú tã Caifás tée cùu dútú cúnú-gã. Te núú ndécú dútú cúnú-gã-áⁿ sa ní tacá cue tée dàcuaha ñaha xii ñáyiü nchaa tñuhu ní chídó tñuní ndí Moisés, ndihi cue tée cùu sacuéhé nñu ñáyiü isràél cuendá cada-güedé jündá.

⁵⁸ Te té Pèlú xica xica-ni nchicúⁿ ñáhá-dé xii-gã cuáháⁿ ní sáá-dé ndéé quehé vehe núú ndécú tée cùu dútú cúnú-gã-áⁿ, te xíaⁿ ñⁿ ngóo-dé ndihi

cue tée cùu poleciá cuendá cuíní-dé quiní-dé nása cada ñaha-güedé xii Jèsús.

⁵⁹ Te cue tée cùu dútú cúnú, ndihi cue tée cùu sacuéhé nñu ñáyiü isràél, ndihi nchaa dava-gã cue tée xíndecu jündá ndúcú-güedé nàcuáa cada-güedé dacàa-güedé ñⁿ cuèchi díquí Jèsús cuèi cùu-xi ñⁿ sã ñã ndáa cuendá níhí-güedé nàcuáa cada-güedé cahni ñaha-güedé xii-gã. ⁶⁰ Te vãi cue tée ní ngüita-güedé dacàa-güedé cuèchi díquí-gã, dico ñá túú ní cündee tñuhu-güedé chí mee-ni tñuhu ndehnde cùu-xi. Te sátá dúcáⁿ te ní quexìo tucu úú tñhá cue tée dàcuandehnde-güedé, ⁶¹ te xáhaⁿ-güedé xii nchaa cue tée xíndecu jündá:

—Véxi-ndí càchí tñuhu-ndí xii-ndo sã tée-a càchí-dé sã dängöyo-dé veñúhu càhnu sã ïo cúnú núú chíññu-o Yá Ndiöxí, te dandaa-dé ingá veñúhu saa, diu-ni núú cáa tñáhí veñúhu-ãⁿ, te xití úní-ni nduu sa nadaxínu-dé, duha càchí-dé —càchí-güedé xáhaⁿ-güedé.

⁶² Te tée cùu dútú cúnú-gã-áⁿ ñⁿ ndacuíní-dé, te xáhaⁿ-dë xii Jèsús:

—¿Ná cuendá duha nduu tñuhu càháⁿ cue tée-a cuendá-n? Te cáháⁿ nñu nása cunduu tñuhu cáháⁿ-n —càchí-dé xáhaⁿ-dë xii-gã.

⁶³ Dico Jèsús ñá túú tñáhí ní cáháⁿ-gã. Te tée cùu dútú cúnú-gã-áⁿ ñⁿ xáhaⁿ tucu-dé xii-gã:

—Yúhú, cácu nèhe-í Yã Ndiöxí chí cuíní-í sã càchí tñuhu ndáa-n xii-ndí nñu sã díú Crístú Déhe Yá Ndiöxí Yáa ní tendaha-gã véxi ñuyíü-a cùu-n —cachí-dé xáhaⁿ-dë xii-gã.

⁶⁴ Te Jèsús ní xáhaⁿ-gã xii-dé:

—Diu Yáa-áⁿ cùu-í dàtná càchí-n-ãⁿ, te na càchí tñuhu-í xii-ndo sã sã nduu te quiní-ndó yúhú Tée cùu ñaní tñáhá-ndó nchaa-ndo cunucóo-í xio cùha Dútú Ndiöxí Yáa ndácú quide nchaandi túhú sã vaha. Te dàvá-áⁿ quiní ñáhá-ndó xii-í quee-í andiu quixi-í ichi xití vícú —càchí-gã xáhaⁿ-gã xii-dé.

⁶⁵ Te dútú cúnú-gã-áⁿ ñⁿ ndátá-dé dóo níhñú-dé cuendá sã ñá túú ní tñhá iní-dé nàcuáa ní cáháⁿ Jèsús, te

ní xáhaⁿ-dě xii nchaa cue téé xĩndecu jũndá:

—Téé-a càháⁿ úhú-dé cuendá Yá Ndiõxí, te vitna ñá túú-gã xíní ñùhu-xi cue téé càháⁿ ndáá nũu ndáá sá ndècuéchi-dé àdi ñá túú ndècuéchi-dé, chi sa ní tecú dóho-o nàcuáa ndũu tnúhu ní càháⁿ-dé ní càháⁿ úhú-dé cuendá Yá Ndiõxí. ⁶⁶ Te nchaa-ndo chí càháⁿ vitna nũu nása sàni iní-ndó cundu cuendá téé-a —càchí-dé xáhaⁿ-dě xii nchaa cue téé-án.

Te cue téé-án ñí xáhaⁿ-güedě:

—Nchúhú càchí-ndí sá tàú-xi cuú-dé chí ndècuéchi-dé —càchí-güedé xáhaⁿ-güedě.

⁶⁷ Te ní ngüíta-güedé ní tiú díi ñáhá-güedě xii-gá te ní caniha-güedě, te tnàhá núú-gã ní cani-güedě. ⁶⁸ Te ní cudíquí ndeé ñáhá-güedě xii-gá, te xáhaⁿ-güedě:

—Yòhó Téé càchí sá cúú Cristú Yaa ní tendaha Yá Ndiõxí véxi ñuyíú-a, càháⁿ ná còto yoo ní caniha xii-n —càchí-güedé xáhaⁿ-güedě xii-gá.

Té Pèlú xáhaⁿ-dě xii ñáyiú sá ñà túú xíní-dé Jèsús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Te níni núcóo té Pèlú quehé, te ní sáháⁿ ñí xíchí xínú cuèchi vehe-án nũú-dě, te xáhaⁿ-xi xii-dé:

—Yòhó tnàhá-n cùu-n téé xica cuu ndihí Jèsús téé distritú Galileá —càchí-xi xáhaⁿ-xi xii-dé.

⁷⁰ Te té Pèlú ñá túú ní nũnuu-dé, te ndèdóho nchaa ñáyiú xĩndecu-án ñí xáhaⁿ-dě xii xíchí-án:

—Yúhú, ñá túú cùtnuní iní-í nása ndũu tnúhu càháⁿ-n —càchí-dé xáhaⁿ-dě xii-xi.

⁷¹ Te ní xica té Pèlú cuáháⁿ-dé ndàa nacuáa nchíi yuyèhe vehe-án, te ní xíní ñáhá tùcu ingá xíchí xínú cuèchi vehe-án, te xáhaⁿ-xi xii nchaa ñáyiú xĩndecu-án:

—Téé-a tnàhá-dé xicá cùu-dé ndihí Jèsús téé ñuú Nazàrét —càchí-xi xáhaⁿ-xi xii-yu.

⁷² Te té Pèlú ní xáhaⁿ-dě:

—Nchàcuítí Yá Ndiõxí sá ñà túú xíní-í téé càcunehe-ndo-án —càchí-dé xáhaⁿ-dě xii-yu.

⁷³ Te tna tnaa-ni ní cuu, te dava ñáyiú xĩndecu xíaⁿ ñí xáhaⁿ tùcú-yu xii té Pèlú:

—Ndáá sá tnàhá-n xica cuu-n ndihí téé ndèca-güedé cuánguihu-án, chí ñáyúhú càháⁿ-n —càchí-yu xáhaⁿ-yu xii-dé.

⁷⁴ Te té Pèlú ní xáhaⁿ-dě xii-yu:

—Nchàcuítí Yá Ndiõxí sá yúhú càháⁿ ndáá-í sá ñà túú xíní-í téé càcunehe-ndo-án —càchí-dé xáhaⁿ-dě xii-yu.

Te òré-ni-án ñí cana ñí líhi. ⁷⁵ Te ní ndacu iní té Pèlú nàcuáa ní xáhaⁿ Jèsús xii-dé sá cùmání-gã cana ñí líhi te úní xito càháⁿ-dé sá ñà túú xíní ñáhá-dě xii-gá. Te ní quee-dé tnuú ñáyiú-án cuáháⁿ-dé ñí xio ní ndáhyú víhí-dě ní ndixi cuéchi iní-dé.

27

Ndèca-güedé Jèsús cuáháⁿ núú tẽ Pìlatú

(Mr. 15:1; Lc. 23:1-2; Jn. 18:28-32)

¹ Te sáta ñí túndaá te nchaa cue téé cùu dútú cùnũu, ndihí cue téé cùu sacuéhé nũú ñáyiú isràél ní ndatnúhu-güedé nàcuáa cada-güedé cahni-güedé Jèsús. ² Te ní dácútú ñàha-güedé xii-gá, te ndèca ñàha-güedé cuáháⁿ núú tẽ Pìlatú téé cùu gobiernú.

Ní xihí té Jùdás

³ Te té Jùdás téé ní sáha cuendá ñáhá xii Jèsús ní cutnùní iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcáⁿ ñí quide-dé ní sáha cuendá ñáhá-dě xii-gá núú cuè téé cùu úhú iní ñáhá, te ní xica-dé cuáháⁿ-dé danchòcáva-dé ócò úxí díhúⁿ cuixíⁿ núú cuè dútú cùnũu-án, ndihí núú cuè téé cùu sacuéhé nũú ñáyiú isràél, chí díu cue téé-án ñí sáñaha-güedě díhúⁿ xii-dé. ⁴ Te òré ní quexìo té Jùdás-án nũú ndécú-güedě, te xáhaⁿ-dě xii-güedé:

—Yúhú, ñá túú ní quide váha-í sá dúcáⁿ ñí quide-í ní taxi cuendá-í ñí téé ñá túú tnàhí cuéchi-xi cahni-ndo-dě —càchí-dé xáhaⁿ-dě xii-güedé.

Te cue téé-án ñí xáhaⁿ-güedě xii-dé:

—Nchúhú, ñá túú nǎgá cuèndú cuíní-ndí cáháⁿ ndihí ñaha-ndí xii-n, te mee-n ñaha núu nása sàni iní-n càda-n —cachí-güedé xǎhaⁿ-güedé xii-dé.

⁵ Te té Jùdás ní dǎngoyo-dé díhúⁿ-ǎⁿ xití veñúhu càhnu sá ïo cùnunu, te ní xica-dé cuáháⁿ-dé ní dácuehñé-dé méé-dé.

⁶ Te cue dútú cùnunu ní naqueheⁿ-güedé díhúⁿ-ǎⁿ, te ní xitnàha-güedé:

—Díhúⁿ-a ní quéyǎhu cuèndá sá cùu ìⁿ ñáyiu, núu xǎⁿ vá cúu nàchihi-o xití càjá núu ñúhú sǎ cúu cuèndá Yǎ Ndióxi —cachí-güedé xitnàha-güedé.

⁷ Te ní ndatnúhu-güedé te ní cuu ìⁿnuu-güedé cuèndá nacuaaⁿ-güedé ìⁿ xichi núu cáá ñúhu danani-güedé Núu Cuǎha Nchaa Sá Cuǎha Ñuhu, te xíaⁿ ñí saaⁿ-güedé cuèndá xíaⁿ nguñdǔxi nchaa ñáyiu véxi xica.

⁸ Te ní nadáma diu ñuhu-áⁿ, te vitna dǎnani-güedé Ñuhu Yáhu Níñí, duha dǎnani-güedé. ⁹ Te ducaⁿ ñí cuu chi ní quee ndáá-xi nàcuáa ní cáháⁿ ndí Jeremiás téé ní xóo cáháⁿ tnúhu Yá Ndióxi ndéé sanaha, te duha ní cachí ndí: “Cue téé israél ní cachí-güedé sá òcò úxí díhúⁿ cuixíⁿ cháhu-güedé cuèndá ìⁿ téé queheⁿ cuèndá-güedé. Te díhúⁿ-ǎⁿ nàqueheⁿ-güedé, ¹⁰ te cuaaⁿ-güedé ìⁿ xichi núu nání Núu Cuǎha Nchaa Sá Cuǎha Ñuhu, te ducaⁿ càda-xi chi ducaⁿ ñí cachí Yǎ Ndióxi cunduu”, duha ní cachí ndí Jeremiás-áⁿ.

Jèsús ndécú-gǎ núu tǎ Pilatú

(Mr. 15:2-5; Lc. 23:3-5; Jn. 18:33-38)

¹¹ Te Jèsús ndécú-gǎ núu tǎ Pilatú téé cùu gobiernú, te téé-áⁿ ñí xicáⁿ tnúhú-dé núu-gǎ, te xǎhaⁿ-dǎ xii-gá:

—¿Ndáá sá díu-n cùu-n téé yindaha ñaha xii ñáyiu israél-ǎⁿ? —cachí-dé xǎhaⁿ-dǎ xii-gá.

Te Jèsús ní xǎhaⁿ-gǎ xii-dé:

—Diu-í yindaha-í-yu —cachí-gǎ xǎhaⁿ-gǎ xii-dé.

¹² Te cue dútú cùnunu ndihí cue téé cùu sacuéhé núu ñáyiu israél sàcáⁿ cuéchi-güedé núu tǎ Pilatú cuèndá Jèsús, dico mee-gǎ ni ìⁿ tnúhu ñá túú

ní cǎháⁿ-gá. ¹³ Te té Pilatú ní xǎhaⁿ-dǎ xii-gá:

—Cáháⁿ, ná cuèndá ñá túú càháⁿ-n, te cundehe nǎ ndéé duha titní cuéchi dàcaa cue téé-a díquí-n —cachí-dé xǎhaⁿ-dǎ xii-gá.

¹⁴ Dico Jèsús ñá túú tnàhí ní cǎháⁿ-gá, te té Pilatú téé cùu gobiernú-áⁿ ïo ní cuñúhu-dé sá dúcáⁿ ñá túú tnàhí ní cǎháⁿ-gá.

Ní quide ndáá-güedé sá cáhni-güedé Jèsús

(Mr. 15:6-20; Lc. 23:13-25; Jn. 18:38-19:16)

¹⁵ Te ndí tnahá nduu víco pascuá dácácu té Pilatú téé cùu gobiernú-áⁿ ìⁿ téé yihí vecaá chi ducaⁿ tnàhí quide-dé, te mee ñáyiu càháⁿ-yu te núu ndédacàa téé yihí vecaá-áⁿ cǎcu-dé te téé-áⁿ dácácu-dé. ¹⁶ Te dàvá-áⁿ yihí ìⁿ téé nàni Barrabás vecaá, te téé-áⁿ ïo cuèndú-dé sá ïo nèhé ní quide-dé.

¹⁷ Te ní natacá nchaa ñáyiu, te té Pilatú ní xicáⁿ tnúhú-dé núu-yu, te xǎhaⁿ-dǎ:

—¿Ndédacàa núu ùú cue téé-a cuíní-ndó dácácu-í-güedé-í? ¿Té Barrabás ǎⁿ Jèsús téé nàni Cristú? —cachí-dé xǎhaⁿ-dǎ xii-yu.

¹⁸ Te ducaⁿ ñí cáháⁿ té Pilatú, chi ní cutnùní iní-dé sá dicó sá cuèdú iní-güedé ducaⁿ ñí quide-güedé ní sáha cuèndá ñáhá-güedé xii Jèsús núu-dé.

¹⁹ Te nini núcóo té Pilatú núu xèhndé-dé cuéchi ní tendaha ñàdihí-dé tnúhu cuáháⁿ núu-dé, te duha ndùu tnúhu ní tendaha-aⁿ: “Vá cání iní-n nǎ cada-n tǎe ní taxi cuèndá ñáhá-güedé xii-n, téé ñá túú tnàhí cuéchi-xi, chi icuini ïo nèhé ní dácótó ñàha saní-í cuèndá-dé”, duha ndùu tnúhu ní xǎhaⁿ-aⁿ xii té Pilatú.

²⁰ Dico cue téé cùu dútú cùnunu, ndihí cue téé cùu sacuéhé núu ñáyiu israél ní xǎhaⁿ-güedé xii ñáyiu sá ná cùñhá-yu xii té Pilatú dácácu-dé té Barrabás te cahni-dé Jèsús, te ní quidé-yu nàcuáa ní xǎhaⁿ-güedé. ²¹ Te té Pilatú-áⁿ ñí xǎhaⁿ tùcu-dé xii-yu:

—¿Ndédacàa núu ùú cue téé-a cuíní-ndó dácácu-í? —cachí-dé xǎhaⁿ-dǎ xii-yu.

Te ní xáhãⁿ-yu xii-dé:

—Té Barrábás dàcácu-n —càchí-yu xáhãⁿ-yu xii-dé.

²² Te té Pilatú ní xícáⁿ tnúhú-dě núú-yu, te xáhãⁿ-dě:

—¿Te ná cuíní-ndó càda-í Jèsús tée nàni Cristú tée càchí sá Yã Ndiõxí ní tendaha ñaha xii-dé véxi-dé ñuyíú-a-í? —càchí-dé xáhãⁿ-dě xii-yu.

Te nchaá-yu ní cáháⁿ-yu, te xáhãⁿ-yu:

—Cata caa-dé núú cùrúxí —càchí-yu xáhãⁿ-yu xii-dé.

²³ Te té Pilatú ní xáhãⁿ tùcu-dé xii-yu:

—¿Te ná cúú cuèchi ní quide-dé nùu ducaⁿ cuíní-ndó càda-í-dé-í? —càchí-dé xáhãⁿ-dě xii-yu.

Dico nchaá-yu uuⁿ-gá níhi ní cáháⁿ-yu, te xáhãⁿ-yu xii-dé:

—¿Cata caa-dé núú cùrúxí! —càchí-yu xáhãⁿ-yu xii-dé.

²⁴ Te té Pilatú ní cutnùní iní-dé sá vã ñihí-dé nàcuáa cada-dé, chi uuⁿ-gá ní ngüíta ñáyiú xícuáa-yu, te xíãⁿ ní xícáⁿ-dé ndute ní ndáhá-dě núú nchaa ñáyiú, te ní xáhãⁿ-dě xii-yu:

—Tée-a cùu-dé ñⁿ tée ñá túú tnàhí cuèchi-xi, te nchòhó cuíní-ndó sá cùú-dé, dico ñⁿ-ni mee-ndo cuído yáhu-ndo-dě chi yúhú vá cuído yáhu-í-dé —càchí-dé xáhãⁿ-dě xii-yu.

²⁵ Te nchaá-yu ní xáhãⁿ-yu xii-dé:

—¿Ñⁿ nchúhú ndíhi cue déhe-ndí cuído yáhu-ndí-dé! —càchí-yu xáhãⁿ-yu.

²⁶ Te sátá dúcáⁿ te té Pilatú ní dácácu-dé té Barrábás, te ní táuchíúⁿ-dě ní caní-güedé Jèsús. Te sátá dúcáⁿ ñⁿ quide ñaha-güedé xii-gá, te ní táuchíúⁿ-dě candeca ñaha-güedé xii-gá quíhíⁿ cata caa ñaha-güedé xii-gá núú cùrúxí.

²⁷ Te cue tée cùu sandadú té Pilatú ndécá-güedé Jèsús cuánguihu xití vehe càhnu cuu cuendá-dé, te cue tée cùu sandadú-áⁿ ñⁿ cana-güedé dava-gá cue sandadú núú dúcáⁿ ndéca-güedé Jèsús cuánguihu-áⁿ. ²⁸ Te xíãⁿ ñⁿ taunuu-güedé dóó-gã, te ní dácuíhnú ñaha-güedé xii-gá ñⁿ dóó tícuèhé víhí. ²⁹ Te ní cadúha-güedé ñⁿ coróná iñu ní chihi-güedé díquí-gã,

te ní chitnii-güedé ñⁿ carrutí ndaha cùha-gá, te ní ngüíñí xití-güedé núú-gã cúdíquí ndeé ñáhá-güedé xii-gá, te xáhãⁿ-güedé:

—¿Ío càhnu cuu yohó tée yíndaha ñaha xii ñáyiú isràél! —càchí-güedé xáhãⁿ-güedé xii-gá.

³⁰ Te ní tíú díí ñáhá-güedé xii-gá, te ní queheⁿ-güedé carrutí sá ñⁿ sãñaha-güedé xii-gá te ní ducuⁿ-güedé díquí-gã. ³¹ Te sátá ñⁿ yáha ní cudíquí ndeé ñáhá-güedé xii-gá, te ní nataunuu ñaha-güedé xii-gá dóó tícuèhé víhí sã ñⁿ dácuíhnú ñaha-güedé xii-gá, te ní dándíúnuu ñaha-güedé xii-gá dóó méé-gã, te dàtnùní ndécá ñaha-güedé cuáháⁿ núú catá cà ñaha-güedé xii-gá núú cùrúxí.

Sàta caa-güedé Jèsús núú cùrúxí

(Mr. 15:21-32; Lc. 23:26-43; Jn. 19:17-27)

³² Te ñuhu-güedé ndíhi-gá ichi, te ní naníhí-güedé ñⁿ tée ñuú Cirené nání-dě Xímú, te tée-áⁿ ñⁿ quide yica-güedé ní xido-dé cùrúxí sá nchídó Jèsús.

³³ Te ní sáá-güedé ndíhi-gá ñⁿ xichi núú nání Gõlgotá, te tnúhu-áⁿ quée-xí: Núú nání yíquí díquí ndíyi, ñⁿ duha quèe-xi tnúhu-áⁿ. ³⁴ Te xíãⁿ sãñaha-güedé ndudí úa coho-gá ní cùu, te ñá túú ní xíhi-gá chi dico-ni ní xito ndéé-gá.

³⁵ Te ní sata caa ñaha-güedé xii-gá núú cùrúxí, te sátá dúcáⁿ te cue tée cùu sandadú-áⁿ ñⁿ xito ndéé-güedé nùu ndédacàa-güedé cuu cuendá-güedé dóó-gã. Te ducaⁿ ñⁿ cuu chi ní quee ndáá-xi nàcuáa ní cáháⁿ ñⁿ tée ní xóo cáháⁿ tnúhu Yã Ndiõxí ndeé sanaha yòdo tnuní núú tütú-gá, te duha càchí-xi: “Ní xito ndéé-güedé nùu ndédacàa-güedé cuu cuendá-güedé dóó-gã”, duha ní cachí tée-áⁿ te ducaⁿ ñⁿ ngódó tnùní núú tütú-gá.

³⁶ Te sátá dúcáⁿ ñⁿ quide-güedé, te ní ngóo-güedé ndeé ñáhá-güedé xii-gá. ³⁷ Te ní taxi ndecu-güedé ñⁿ sá ndeé lètrá ndaa díquí-gã. Te lètrá-áⁿ càháⁿ-xi ná cuendá ducaⁿ ñⁿ quide ñaha-güedé xii-gá, te duha càháⁿ

lètrá-án: “Tée-a cùu-dé tée yìndaha ñaha xii ñáyiú isràél”, duha càchí-xi. ³⁸ Te tnàhá úú cue tée cùu ñadúhú nǐ sata caa-güedé ðiu-ni núú cùrúxí tucu, te ñⁿ-dé ní sata caa-güedé xio cùha-gá, te ingá-dé ní sata caa-güedé xio dàtni-gá. ³⁹ Te nchaa ñáyiú yáha yatni núú táca-gá-án, te dàcuicó-yu díquǐ-yu ndèhe ñahá-yu xii-gá, te xǐcuèhé ñáhǎ-yu. ⁴⁰ Te xǎhǎⁿ-yu xii-gá:

—Yòhó càchí-n sǎ dàngoyo-n veñúhu càhnu sá ïo cùnunu, te dandàa-n ingá veñúhu saa, te xití úní-ni nduu sa nadaxǐnu-n, te vitna tanùu núú cùrúxí-án dàcácu-n mée-n te núu ndisa sá Dèhe Yá Ndiõxí cúú-n —càchí-yu xǎhǎⁿ-yu xii-gá.

⁴¹ Te ðiu-ni ducaⁿ cùdiquí ndeé ñáhá cuè tée cùu dútú cùnùu xii-gá, ndihí cue tée dàcuaha ñaha xii ñáyiú nchaa tnúhu ní chídó tnùnǐ ndíi Moisés, ndihí cue tée cùu fariséú, ndihí cue tée cùu sacuéhé núú ñáyiú isràél, te xǐtnàha-güedé:

⁴² —Tée-a ní ndacu-dé ní dácácu-dé dava ñáyiú, te mee-dě ñá ndácú-dě dàcácu nihnu-dé mée-dě. Te núu ndisa sá cúú-dě tée yìndaha ñaha xii ñáyiú isràél, te na cùndehe-o nuu-dé núú cùrúxí-a cuèndá quíndáá iní-ó-dě. ⁴³ Te càchí-dé sá sàndáá iní-dé Yá Ndiõxí, te mee-gǎ ná dàcácu ñaha-gǎ xii-dé te núu cùndahú iní ñáhá-gǎ, chi mee-dě càchí-dé sá Dèhe-gá cúú-dě —càchí-güedé xǐtnàha-güedé.

⁴⁴ Te ndeé tnàhá cue tée cùu ñadúhú táca xio xio ðíni-gá xǐcuèhé ñáhá-güedé xii-gá.

Ní xihí Jèsús

(Mr. 15:33-41; Lc. 23:44-49; Jn. 19:28-30)

⁴⁵ Te òré ní cuu cuádava nduu te ní cunee nihí ñuyíú, te ducaⁿ-ni càa ní cuu caá úní sacuaa. ⁴⁶ Te òré sa ta cùyatni cuu caá úní sacuaa-án, te níhi ní cáhán Jèsús, te càchí-gá:

—Èlí, Èlí, ¿láma sabàctaní? —càchí-gá.

Te tnúhu-án quée-xí: Ndiõxí mée-í, Ndiõxí mée-í, ¿ná cuèndá ní dáñá ñàha-n xii-í?, duha quèe-xi tnúhu-án.

⁴⁷ Te dava cue tée xǐndecu yatni núú táca-gá-án nǐ tecú dóho-güedé nàcuáa ní cáhán-gá, te ní xǐtnàha-güedé:

—Tée-a càna-dé té Èliás —càchí-güedé xǐtnàha-güedé.

⁴⁸ Te òré-ni-án nǐ quene cunu ñⁿ cue tée xǐndecu-án nǐ queheⁿ-dé luha cáchí, te ní chindóyo-dé xití ndudí íá, te ní chinenu-dé díquí ñⁿ yutnu càni te ní ndocani-dé ní chihi-dé yuhu-gá. ⁴⁹ Te dava-güedé ní xáhaⁿ-güedé xii tée-án:

—Cundetú tnaa na cùndehe-o nacoto núu quixi té Èliás dàcácu ñaha-dé xii-dé —càchí-güedé xǎhaⁿ-güedé xii tée-án.

⁵⁰ Te Jèsús níhi ní cana saa-gá, te ní xihí-ni-gá. ⁵¹ Te sátá dúcáⁿ te ní ndátá dǒó cúú còrtiná xití veñúhu càhnu sá ïo cùnunu ní quée dava ndáá, te ndàa núu nǐnu ní ngúíta-xi ní ndátá, te ní tnáa, te dava cava nàhnu ní táhú. ⁵² Te dava yaú núú yìndǔxi ñáyiú ní xihí ní sàndáá iní ñáhá xii Yá Ndiõxí ní nacaáⁿ te ní ndotó-yu. ⁵³ Te sátá nǐ yáha ní ndoto Jèsús, te cue ñáyiú ní ndoto-án cuànguìhú-yu xití ñúú Jerusàlén, te cue ñáyiú ñúú-án ïo vai-yu ní xiní-yu cue ñáyiú ducaⁿ nǐ ndoto-án.

⁵⁴ Te sá dúcáⁿ nǎndi ní quide-xi, ndihí sá dúcáⁿ nǐ tnáa xǎⁿ ïo ní yùhú tée cùu capitáⁿ ndihí nchaa dava-gá cue tée ndècu ndihí-dé ndeé-güedé yiqui cùñú Jèsús, te ní xǐtnàha-güedé:

—Sá ndáá ndisa sá díú tée-a cùu-dé Dèhe Yá Ndiõxí ní cùu —càchí-güedé xǐtnàha-güedé.

⁵⁵ Te xica xǐnutnǐ vai ñáyiú ðihí ndéhé-yu nchaa nàcuáa ní quide ñaha-güedé xii Jèsús, te ñáyiú-án cúú-yu ñáyiú ní chindéé-yu Jèsús, te ndeé distritú Galileá ní chinchícúⁿ ñáhǎ-yu xii-gá. ⁵⁶ Te tnuú ñáyiú-án tnàhá tá Màriá Magdaléná, ndihí tá Màriá nǎná tǎ Jàcobó ndihí té Chèé, ndihí nǎná cue déhe té Zebèdeú.

Chindúxi-güedé Jèsús
(Mr. 15:42-47; Lc. 23:50-56; Jn. 19:38-42)

⁵⁷ Te ndècu ìn tée cuica nàni-dé Chèé te cùu-dé tée ñuú Arimàtéa, te tnàhá-dé ní tnàhá tnúhu-dé ndihí Jèsús. Te òré sa ní cuaa, ⁵⁸ te ní sáhá-dé núú tē Pilatú, te xáha-dě nũu vá cùndèe iní-dé dañá-dě chindúxi-dé yiqui cùñú Jèsús. Te té Pilatú-án ñí sáha-dé tnúhu, te ní táuchíú-dě sá cuáha cuendá-güedé té Chèé-án yiqui cùñú-gá. ⁵⁹ Te té Chèé-án ñí quehe cuendá-dé yiqui cùñú-gá, te ní chidúcú-nuu-dé ìn dóó cuixín dóó cándò. ⁶⁰ Te sa nchii ìn yaú sáá ñí caán té Chèé-án ìn yiqui naha cava te xián cúu cuendá-dé, te yaú-án ñí chihi-dé yiqui cùñú Jèsús, te dàtnùní ní sadí-dé ìn yúu cáhnú yúu quèhé yuhu yaú-án, te ní xica-dé cuánuhú-dé. ⁶¹ Te tnàhá tá Màriá Magdaléná, ndihí ingá xíchí nání Màriá ní quexió-yu ní ngóo-yu yatni núu nchii yaú-án.

Cue tée ndèé yaú núu yíhí yiqui cùñú Jèsús

⁶² Te sátá ñí yáha ní quide túha ñáyiu nchaa sá nándihí-yu nduu tnèé nduu ndètatú-yu-án, te diu-ni nduu ndètatú-yu-án ñí sáhá cue dútú cùnùu, ndihí cue tée cùu fariséú ní cáhá ndihí-güedé té Pilatú. ⁶³ Te xáha-güedé xii-dé:

—Yòhó tée cùnùu, véxi-ndí càchí tnúhu-ndí sá ñí ndacu iní-ndí sá tée ndehnde ñí xihí-án càchí-dé òré ndécú-gã-dé sá nduu úní sá cùu-dé, te ndoto-dé. ⁶⁴ Te tendaha-n cue tée na quihín-güedé cundeé-güedé yuhu yaú núu ñí chihi-güedé yiqui cùñú-dé, chi na cuáhán quihín cue tée ní xica cuu ndihí-dé duhu-güedé yiqui cùñú-dé, te cùñaha-güedé xii ñáyiu sá ñí ndoto-dé. Chi núu duca na càda-güedé te ío-gá dandàhú-güedé cue ñáyiu dàcúxí dàtná ní quide mee tée ní xihí-án —càchí-güedé xáha-güedé.

⁶⁵ Te té Pilatú ní xáha-dě xii-güedé:
—Náu cue sandadú-a candeca-ndo-güedé

yuhu yaú-án nàcuáa tàú-xi cunduu, te na cundeé-güedé nàcuáa sàni iní-ndó cunduu —cachí-dé xáha-dě xii-güedé.

⁶⁶ Te cue tée-án ñí xica-güedé cuáhán-güedé, te ní tee-güedé ìn sèhá yúu ndèdí yèhe yaú-án, te ní dándòo-güedé cue sandadú-án ndèé-güedé yaú-án, te duca ñí quide-güedé cuendá sá vǎ yòo quihín nacaán yaú-án.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

¹ Te sátá ñí yáha nduu ndètatú ñáyiu, te ndumìngú nehé víhí-ní ñí xica tá Màriá Magdaléná ndihí ingá xíchí nání Màriá cuángotó-yu yaú núu ñí chihi-güedé yiqui cùñú Jèsús. ² Te uu-ni níhi víhi ní tnáa, te òré duca ñí quide-xi chi ìn espíritú xínú cuèchi núu Yá Ndióxi ní quexio-xi núu dúcán nchii yaú núu ñí chihi-güedé yiqui cùñú Jèsús, te ní xócání espíritú-án yúu ndèdí yèhe yaú-án te ní ngóo-xi núu yúu-án. ³ Te dàtná dátasa-xi òré sáa nduté dùca datása-xi núu espíritú-án, te dóó níhnú-xí cuixín quiyí. ⁴ Te òré duca ñí quide-xi te cue sandadú ndèé yaú-án ñí quidi ñaha-xi xii-güedé sá ñí yùhú-güedé, te ní nduá-güedé, te ní xíta sá xini tnùnì-güedé. ⁵ Te espíritú-án ñí xáha-xi xii cue ñáyiu dihi cuángoto yaú-án:

—Nchòhó ñáyiu dihi véxi coto yaú-a, vá yùhú-ndó chi yùhú cùtnùnì iní-í sá nchòhó véxi-ndo nànducu-ndo yiqui cùñú Jèsús Yaá ní xihí núu cùrúxí. ⁶ Dico Yaá-án chi ñá túu-gã ndécú yiqui cùñú-gá iha, chi sa ní ndoto-gá, te diu duca ñí cachí-gá sá ndótó-gã cùtnàhá vátá cùu-gá, te chí táquixi cundehe-ndo núu ñí sacán-güedé yiqui cùñú-gá ní cùu te quiní-ndó nǎ ñá túu-gã. ⁷ Te vitna ío ndihí chí cuáhán núu xíndecu cue tée ní xica cuu ndihí-gá, te cùñaha cùñaha-ndo xii-güedé: “Ní ndoto Jèsús Yaá ní xihí ní cùu, te

codonù-gá núú-ndó quíhíⁿ distritú Galileá te yàcáⁿ quini-ndó-gǎ”, duha cúñaha-ndo xii-güedé. Duha ndùu tnúhu ní cachí tnúhu-í xii-ndo — cǎchí espíritú-áⁿ xǎhaⁿ-xi xii cue ñáyiú dǐhí-áⁿ.

⁸ Te cue ñáyiú dǐhí-áⁿ ní natnǐ-yu ichi, te súúni ndǐhi cuánuhú-yu núú xǐndecu cue téé ní xica cuu ndǐhi Jèsús cuendá nacani tnúhu-yu núú-güedé nàcuáa ní xáhaⁿ espíritú-áⁿ xii-yu, te cuéi ní yùhú-yu dico súúni cùdíí ìní-yu. ⁹ Te ichi ñùhú-yu cuánuhú-yu, te na iní-yu ní quexìo Jesús núú-yu ní dándácõo váha ñaha-gǎ xii-yu. Te ñáyiú-áⁿ ní ngúíñí xítí-yu núú-gǎ, te ní numi ñàhá-yu xii-gǎ, te ní chiñuhu ñàhá-yu. ¹⁰ Te ní xáhaⁿ-gǎ xii-yu:

—Vá yùhú-ndó, chí cuàháⁿ cúñaha-ndo xii cue téé ní xica cuu ndǐhi-í sá ná quíhíⁿ-güedé distritú Galileá, te yàcáⁿ quini ñàhá-güedé xii-í —cǎchí-gǎ xǎhaⁿ-gǎ xii-yu.

Nàcuáa ndùu tnúhu ní nacani cue sandàdú

¹¹ Te nini ñùhu cue ñáyiú dǐhí-áⁿ ichi cuánuhú-yu, te dava cue sandàdú cue téé ndéé yaú-áⁿ ní cùu ní xica-güedé cuánuhú-güedé ñuú cuendá nacani tnúhu-güedé núú cuè téé cùu dútú cùnùu nacuáa ní cuu. ¹² Te cue téé cùu dútú cùnùu-áⁿ ní quide-güedé jùndá ndǐhi cue téé cùu sacuéhé nùú ñáyiú isràél, te ní ndatnúhu-güedé nàcuáa cada-güedé, te ní quide ndáá-güedé ndǐhi cue sandàdú-áⁿ sǎ cuñaha-güedé vǎi díhúⁿ cuendá dacuàndehnde-güedé. ¹³ Te ní xáhaⁿ-güedé xii cue sandàdú-áⁿ:

—Cuìní-ndí sá vǎ cǎháⁿ ndáá-ndó nùú ñáyiú nàcuáa ní cuu, chí cúñaha-ndo xii-yu sá òré xidí-ndó ní quixi cue téé ní xica cuu ndǐhi-dé ní dúhú-güedé yǐquǐ cùñú-dé néhé-güedé cuáháⁿ, duha cúñaha-ndo xii-yu. ¹⁴ Te núu na nihí té Pilatú téé cùu gobiernú tnúhu nàcuáa cúñaha-ndo xii ñáyiú, te nchúhú cada ndáá-ndí ndǐhi-dé cuendá sá ñà túú nǎ cada ñaha-dé xii-ndo —cǎchí-güedé xǎhaⁿ-güedé xii cue sandàdú-áⁿ.

¹⁵ Te cue sandàdú-áⁿ ní queheⁿ cuendá-güedé díhúⁿ, te ní xica-güedé cuáháⁿ-güedé te ní cǎháⁿ-güedé nàcuáa ní xáhaⁿ cuè téé-áⁿ cǎháⁿ-güedé. Te nchaa ñáyiú isràél ní nihí-yu tnúhu ní cǎháⁿ-güedé-áⁿ, te dǐu-ni tnúhu-áⁿ cǎháⁿ-yu ndéé vitna.

Jèsús xǎhaⁿ-gǎ xii cue téé ní xica cuu ndǐhi-gǎ nàcuáa ndùu chiuⁿ cada-güedé (Mr. 16:14-18; Lc. 24:36-49; Jn. 20:19-23)

¹⁶ Te ndǐ ùxí ñⁿ cue téé ní xica cuu ndǐhi Jèsús ní xica-güedé cuáháⁿ-güedé ñⁿ yucu cǎa distritú Galileá núú ní xáhaⁿ-gǎ naníhí tnáhá-güedé ndǐhi-gǎ. ¹⁷ Te òré ní xiní-güedé Jèsús te ní chiñuhu ñaha-güedé xii-gǎ, dico dava-güedé sàni ñⁿ sani úú iní-güedé nùu dǐu-gǎ àdi ñá díú-gǎ. ¹⁸ Te Jèsús ní sàndehe yatni-gǎ ndéé núú-güedé, te ní xáhaⁿ-gǎ xii-güedé:

—Yùhú ndécú ndǐhi-í tnúhu ndee ìní táxí tnùn-í cuéi andǐu te cuéi ñuyíú-a.

¹⁹ Te vitna tàuchiúⁿ-í sá quíhíⁿ-ndó nihí ñuyíú cǎháⁿ-ndó tnúhu-í núú ñáyiú cuendá tuha ñàhá-yu xii-í, te dacuàndute-ndó-yu. Te òré ducaⁿ càda-ndo, te cacunehe-ndo tǎtá-ó Dútú Ndiõxí ndǐhi yùhú Yaá cúú Dèhe-gǎ ndǐhi Espíritú-gǎ. ²⁰ Te cúñaha-ndo xii-yu sá ná càdá-yu nchaa nàcuáa sa ní dánèhé ñàhá-í xii-ndo càda-ndo. Te na cǎchí tnúhu-í sá cùndècu ndǐhi ñaha-ni-í xii-ndo ñuyíú-a ndéé ná sǎa nduu nàa-xi —cachí-gǎ xǎhaⁿ-gǎ xii-güedé. Te ducaⁿ na cùnduu.

TNÚHU NÍ CHÍDÓ TNUNÍ TÈ MÀCÚ

Té Juàá téè dàcuandute ñaha xii ñáyi
càháⁿ-dé tnúhu Yá Ndiòxí xití yucu
(Mt. 3:1-12; Lc. 3:1-9, 15-17; Jn.
1:19-28)

¹ Duha ní quesaha tnúhu sá càháⁿ nàcuáa naníhí tàhú-ó tnúhu Xítóhó Jesucristú Déhe Yá Ndiòxí.

² Te ndíi Chàíá téè ní xóo càháⁿ tnúhu Yá Ndiòxí ndéé sanaha ní chídó tnuní ndíi nàcuáa ní xáhaⁿ Yá Ndiòxí xii Déhe-gá, te duha ní xáhaⁿ-gã: Tendaha-í ñⁿ téè codonuu-dé núú-n, te dàtúha-dé ñáyi cuendá tñí-yu tnúhu-n.

³ Te téè-áⁿ quihi-dé xití yucu te níhí càháⁿ-dé cúñaha-dé xii ñáyi: “Chí dáñá nchàa ichi cuehé ichi duha ndècu-ndo, te tñí-ndo ìchi váha, te ducaⁿ càda-ndo cuendá cundecu túha-ndo, chí véxi Yaá ío cùnuu”, duha cúñaha-dé xii-yu.

Duha nduu tnúhu ní chídó tnuní ndíi Chàíá nàcuáa ní xáhaⁿ Yá Ndiòxí xii Déhe-gá. ⁴ Te téè dii cuendá-xi ní ngódó tnuní-áⁿ nání-dé Juàá, te téè-áⁿ ñí xíhi-dé xití yucu ní càháⁿ-dé tnúhu Yá Ndiòxí, te ní xóo dacuandute-dé ñáyi, te duha ní xáhaⁿ-dè xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te ducaⁿ te Yá Ndiòxí cada càhnu iní-gá nchaa yíca cuèchi-ndo — duha ní xáhaⁿ-dè xii-yu.

⁵ Te nchaa ñáyi distritú Jùdeá, ndíhi ñáyi ñuu Jerusàlén ní sáháⁿ-yu ndéé yúte Jòrdán núú ndécú tè Juàá ní xíndedóho-yu nchaa tnúhu ní càháⁿ-dé. Te cue ñáyi ní náhmá nchaa yíca cuèchi-xi te ní dacuandute ñaha-dé xii-yu.

⁶ Te té Juàá-áⁿ ñí xíhnu-dé dóo idi caméyu, te ñⁿ ñí ní cuu pàñú xití-dé, te ní xóo caxi-dé tíca làngóstá ndíhi ndudí ñúñú cuéchí. ⁷ Te ní xáhaⁿ tucu-dé xii ñáyi:

—Nchícúⁿ ñⁿ téè véxi, te téè-áⁿ ño-gá cúnú-dé dàcúxí yúhú, chí yúhú cùú-í ñⁿ téè duuⁿ duuⁿ ñà túú tàú-í ngúnundeyi-í nandaxi cuèdicó ñíi nihnu chàú-dé dico quide-í chùuⁿ-dé. ⁸ Te yúhú dacuandute ñaha-í xii-ndo, dico mee-dé taxi-dé Espiritú Yá Ndiòxí cundecu ndíhi-ndo —càchí-dé xáhaⁿ-dè xii-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-áⁿ ñí quee Jèsús ñuu Nazàrét ñⁿ ñuu yíndèhu distritú Galileá cuáháⁿ-gá yúte Jòrdán. Te yàcáⁿ ní dacuandute ñaha té Juàá xii-gá. ¹⁰ Te òré ní nene-gá xití ndute, te ní xíní-gá nchí andíu, te ní quee Espiritú Yá Ndiòxí véxi cuuⁿ-xi ngúndecu ndíhi ñaha-xi xii-gá, te dàtná cáá ñⁿ lómá cáá Espiritú-áⁿ véxi cuuⁿ-xi. ¹¹ Te òré-áⁿ ñí tecú ní càháⁿ Yá Ndiòxí ndéé andíu, te xáhaⁿ-gá xii Jèsús:

—Yòhó cúú-n Dèhe-í téè ío cùu iní-í te ío cùdí iní ñáhà-í xii-n —càchí-gá xáhaⁿ-gã.

Sácuíhná quidé yíca-xi cada Jesús sá ñà túú tàú-gá cada-gá dico ñà túú ní quide-gá

(Mt. 4:1-11; Lc. 4:1-13)

¹² Te Espiritú Yá Ndiòxí ndécá-xí Jèsús cuáháⁿ ñⁿ xití yucu. ¹³ Te xití yucu-áⁿ ío víhí quítí dééⁿ, te xíáⁿ ndécú Jèsús ní ngúita sácuíhná quidé yíca-xi cada-gá ñⁿ sá ñà túú tàú-gá cada-gá dico ñà túú ní sàndáá iní-gá. Te cue espíritú xínú cuèchi núú Yá Ndiòxí ní xínu cuechi-xi núú-gá. Te ní xíndecu-gá údico nduu xití yucu-áⁿ.

Distritú Galileá ní chisaha Jèsús chiuⁿ ní táhú Tátá-gã Dútú Ndiòxí cada-gá

(Mt. 4:12-17; Lc. 4:14-15)

¹⁴ Te sátá ñí ngava té Juàá ve-caá, te Jèsús cuáháⁿ-gá distritú Galileá dānehé-gá ñáyi tnúhu váha, tnúhu sá càháⁿ nàcuáa ndíhu ndaha ñaha Yá Ndiòxí xii-yu. ¹⁵ Te xáhaⁿ-gá xii-yu:

—Vitna sa ní cuyatni nduu ndíhu ndaha ñaha Yá Ndiòxí xii-ndo, te

chí dáñá nchàa ichi cuehé ichi duha ndècu-ndo, te quindáá iní-ndó tnúhu váha, tnúhu sá càháⁿ nàcuáa naníhí tàhú-ndó —càchí-gá xáhaⁿ-gã xií-yu.

Jèsús càháⁿ-gá cúmí tnàhá cue té tñi chácá

(Mt. 4:18-22; Lc. 5:1-11)

16 Te Jèsús ñúhú-gã ichi cuáháⁿ-gá tá yáha-gá yuhu làgúná Galileá, te ní xiní-gá té Xímú ndihí ñaní-dé té Ndríxí xídáquëe-güedé ñunu-güedé xití ndute tñi-güedé chácá, chi quití tnàhí-áⁿ cúu chiuⁿ-güedé tñi-güedé-di. 17 Te Jèsús ní xáhaⁿ-gã xii-güedé:

—Chí dáñá chiuⁿ quide-ndo-áⁿ, te quixi-ndo chitnahá ñáhá-ndó xii-í te taxi-í ingá núu chiuⁿ cada-ndo chi quíhíⁿ-ndó cãháⁿ-ndó ñáyi cuendá dacuáhá-yu tnúhu-í —càchí-gá xáhaⁿ-gã xii-güedé.

18 Te òré-ni-áⁿ ní dáñá cuè té-áⁿ ñunu-güedé te ní tuha ñaha-güedé xii-gá.

19 Te cuáháⁿ-gá luha-gá, te ní xiní-gá té Jàcobó ndihí ñaní-dé té Juàá ñúhú-güedé xití bàrcú-güedé náticu-güedé ñunu-güedé, te ndi ndùú-güedé cúu-güedé déhe té Zebèdeú. 20 Te ní cana ñaha-gã xii-güedé, te ní dándõ-güedé tátá-güedé ndihí cue té xinu cuechi núu-güedé xití bàrcú, te ní tuha ñaha-güedé xii-gá.

Ëⁿ té yíhí ñaha espíritú cündihí yucu ñávãha

(Lc. 4:31-37)

21 Te ní quexìo Jesús ndihí cue té-áⁿ ìⁿ ñúu nání Càpernaúm, te yàcáⁿ ndécú-gã ní tnahá nduu ndètatú ñáyi, te cuánguìhu-gá veñúhu ñáyi isràél dānehé ñáhá-gã xií-yu. 22 Te xicuñúhu vñí-yu nchaa tnúhu càháⁿ-gá, chi quide-gá sá cúu-gã ìⁿ Yaá táxí tnùní víhí, te ñá túú dàcuaha ñaha-gá xií-yu dàtná dācuaha ñaha cue té dàcuaha ñaha xií-yu nchaa tnúhu ní chídó tnùní ndíi Moisés. 23 Te xití veñúhu-áⁿ ndécú tnàhá ìⁿ té yíhí ñaha ìⁿ espíritú cündihí yucu ñávãha, te

espíritú-áⁿ ñi quide-xi níhi ní cáháⁿ té-áⁿ, te xáhaⁿ-dē xii Jèsús:

24 —¿Te ná cuíní yòhó Jèsús té ñúu Nazàrét cada ñaha-n xii-ndí ñúu véxi-n ñúu ndécú-ndí-í? ¿Áⁿ véxi-n dànaa ñaha-n xii-ndí? Chi yúhú xiní ñáhá-í xii-n sá cúu-n ìⁿ té ñá túú tnàhí cuéchi-xi, chi núu Yá Ndiòxí ní quee-n véxi-n ñúyú-a —càchí-dé xáhaⁿ-dē xii-gá.

25 Dico Jèsús ní tenàá-gá espíritú cündihí yucu ñávãha-áⁿ, te xáhaⁿ-gã:

—¿Cadí yuhu-n, te taquèe yiqui cuñú té-áⁿ! —càchí-gá xáhaⁿ-gã xii espíritú-áⁿ.

26 Te espíritú cündihí yucu ñávãha-áⁿ ñi dācūyíhí ñáhá-xí xii té-áⁿ, te ní dācāná sàa ñaha-xi, te ní quee-xi yiqui cuñú-dé cuáháⁿ-xi.

27 Te nchaa ñáyi xīndecu-áⁿ ìo ní cuñúhu-yu, te ní xitnahá-yu:

—¿Te nása nduu-tu sá quidé tē-a? ¿Ndudú sáa càháⁿ-tu-dé sánuu? Te quide-dé dàtná quidé ìⁿ té cūnuu vihi, chi càháⁿ-ni-dé te sàndáá iní ñáhá nchaa espíritú cündihí yucu ñávãha —càchí-yu xitnahá-yu.

28 Te ìo ndihí ní níhí nchaa ñáyi dava-gá ñúu yíndèhu distritú Galileá tnúhu nchaa nàcuáa càháⁿ Jèsús ndihí nchaa sá quidé-gã.

Jèsús quidé tātna-gá nāná ñadìhí té Xímú

(Mt. 8:14-15; Lc. 4:38-39)

29 Te òré ní ndee Jèsús veñúhu cue ñáyi isràél, te cuáháⁿ-gá ndihí té Jàcobó ndihí té Juàá vehe té Xímú ndihí té Ndríxí. 30 Te nāná ñadìhí té Xímú cùhú-aⁿ ñúhu vihi-aⁿ cahni, te ndihí-ni ní xáhaⁿ-güedé xii Jèsús sá cùhú-aⁿ. 31 Te ní sáháⁿ-gá núu cáá ñàha cùhú-áⁿ te ní tñi-gá ndaha-aⁿ ní ndocani ñaha-gã xii-aⁿ. Te òré-ni-áⁿ ñi nchíco-aⁿ cahni, te ní ngüíta-aⁿ xinu cuechi-aⁿ núu-güedé ndihí-gã.

Jèsús quidé tātna-gá vāi ñáyi cùhú

(Mt. 8:16-17; Lc. 4:40-41)

32 Te òré sa cuíní-xi cundiquiⁿ te ní quexìo ñáyi núu ndécú Jèsús, te nchaa ñáyi cùhú ní dátacá-yu

ndècá-yu ní sáá núú-gă, te tnàhá cue ñáyiú yìhi ñaha espíritú cùndìhi yucu ñávãha ndècá-yu ní sáá núú-gă. ³³ Te nchaa ñáyiú ñuú-án nǐ chítú níhnǔ-yu yuyèhe vehe núú nǐ quexìo Jesús. ³⁴ Te Jèsús ní quide tátna-gá nchaa ñáyiú cùhú cuèi ndi dííⁿ ndi dííⁿ núú cuèhé tnàhá-yu ìⁿ ìⁿ-yu, te ní queñuhu-gá nchaa espíritú cùndìhi yucu ñávãha yìhi ñaha xii ñáyiú, te ñá túú ní dàña-gá cáháⁿ cue espíritú cùndìhi yucu ñávãha-án nǐ ìⁿ tnúhu, te ducaⁿ nǐ quide-gá chi cue espíritú-án sa xìní-xi yoo cùu-gá.

Jèsús càháⁿ-gá tnúhu Yá Ndiõxí distritú Galileá

(Lc. 4:42-44)

³⁵ Te òré vátá tũndaá váha-gá ní ndacóo Jèsús cuáháⁿ-gá ìⁿ xio yuhu ñuú núú ñà túú ñáyiú ndècu cuendá yacáⁿ cáháⁿ ndihí-gá Yá Ndiõxí. ³⁶ Te té Xímú ndihí cue té cùndihí-dé nándùcu ñaha-güedé xii-gá. ³⁷ Te òré ní naníhí ñáhá-güedé xii-gá, te ní xáhaⁿ-güedé:

—Nchaa ñáyiú nànducu ñahá-yu xii-n —càchí-güedé xáhaⁿ-güedé xii-gá.

³⁸ Te ní xáhaⁿ-gă xii-güedé:

—Chí ná quihíⁿ-ó nchàa ñuú xĩndáa yatni-a, chí danèhé-í ñáyiú tnúhu Yá Ndiõxí chí ñuú chùⁿ-án vèxi-í —càchí-gá xáhaⁿ-gă xii-güedé.

³⁹ Te Jèsús tá xica ndodo-gá cuáháⁿ nchaa ñuú yĩndèhu distritú Galileá dánèhé-gá ñáyiú, te ndi tnàhá ìⁿ ìⁿ ñuú sáá-gá te ducaⁿ cuãnguìhu-gá veñúhu-yu dànehé ñáhá-gă xii-yu tnúhu Yá Ndiõxí, te cue ñáyiú yìhi ñaha espíritú cùndìhi yucu ñávãha ta queñuhu-gá nchaa espíritú-án yiqui cùñú-yu cuáháⁿ.

Jèsús quidé tátna-gá ìⁿ té tnàhá cuéhé sã dátèhyú nihnu-xi yiqui cùñú-ó
(Mt. 8:1-4; Lc. 5:12-16)

⁴⁰ Te ní quexìo ìⁿ té tnàhá cuéhé sã dátèhyú nihnu-xi yiqui cùñú-ó núú Jèsús, te ní ngüíñí xítí-dé núú-gă càháⁿ ndàhú-dé, te xáhaⁿ-dè xii-gá:

—Vèxi-í càháⁿ ndàhú-í núú-n núú vá cùndèe iní-n càda tátna ñaha-n xii-í

chi cùtnuní iní-í sá ndácú-n —càchí-dé xáhaⁿ-dè xii-gá.

⁴¹ Te Jèsús ní cundàhú iní ñáhá-gă xii-dé te ní dácàá-gá ndaha-gá ní tendaha ñaha-gá xii-dé, te xáhaⁿ-gă:

—Cuu cada tátna ñaha-í xii-n, te vitna ndúha-n —càchí-gá xáhaⁿ-gă xii-dé.

⁴² Te òré-ni-án nǐ xócuñí cuéhé tnàhá-dé. ⁴³⁻⁴⁴ Te Jèsús ní cáháⁿ víhí-gă dóho-dé, te xáhaⁿ-gă xii-dé:

—Vitna cuanùhú-na, dico vá yõo ìⁿ cùñaha-n sà ní quide tátna ñaha-í xii-n, te núú dùtú-ni cuáháⁿ cuendá sá ná quini ñáhá-dé xii-n sà ní ndúha-n te cuáha-n-dé sá ndúú tãhú Yá Ndiõxí dàtná ní cachí ndi Moisés cuendá ná quini ñáyiú sá ndàá ní ndúha-n —càchí-gá xáhaⁿ-gă xii-dé.

⁴⁵ Te tée ní cuhú-án nǐ xica-dé cuáháⁿ-dè, te ní ngüíta-dé xáhaⁿ-dè xii nchaa ñáyiú ta naníhí-dè nàcuáa ní quide Jèsús ní quide tátna ñaha-gă xii-dé. Te sá dúcáⁿ nǐ xité nuu té-án cuendú nàcuáa ní quide ñaha Jèsús xii-dé ní quide tátna ñaha-gă ní ndúha-dé, te xíáⁿ núu dayuhu nǐ xóo quíhu-gá dava ñuú núú ìo vài ñáyiú ndèhe ñaha xii-gá, te ní xóo cundecu-gá xití yucu núú ñà túú ñáyiú ndècu. Te nchaa ñuú ní quee ñáyiú ní sáháⁿ-yu núú ndécú-gă ní cáháⁿ ndihí ñahá-yu xii-gá.

2

Jèsús quidé tátna-gá ìⁿ té cùhú ñá cùú-gă candá nihnu

(Mt. 9:1-8; Lc. 5:17-26)

¹ Te sátá nǐ cuu ìⁿ ùú nduu sá nǐ quee Jèsús ñuú Capernaúm te ní nasáa tucu-gá, te cue ñáyiú ní níhí-yu tnúhu sá nǐ ndexìo-gá núú quidé vèhe-gá. ² Te ndíhi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tnàhá-gá-yu. Te ní ngüíta-gá ní dánèhé ñáhá-gă xii-yu tnúhu Yá Ndiõxí. ³ Te òré-án nǐ quexìo cúmí tnàhá cue té núú ndécú-gă nchídó-güedé ìⁿ té cùhú ñá cùú-gă candá nihnu-dé. ⁴ Dico ñá túú ní ndàcu-güedé sáá-güedé ndéé núú-gă chí ío cuéhé ñáyiú ndècu. Te

xíáⁿ nõu ní sáá-güedé díquí véhé nõu yíhí-gã-áⁿ nĩ caáⁿ-güedé, te ichi ndàa díquí véhé-áⁿ nĩ dáquẽe-güedé tée cùhú-áⁿ, te ñùhu-dé ìⁿ xító ní dáquẽe ñaha-güedé ndéé núú-gã. ⁵ Te Jèsús sa ní cutnùnì iní-gá sá sàndáá iní ñáhá-güedé xii-gá nõu ní xáhaⁿ-gã xii tée cùhú-áⁿ:

—Yòhó tée cùhú, sa ní quide càhnu iní-í nchaa cuéchi-n —càchí-gá xãhaⁿ-gã xii-dé.

⁶ Te xíáⁿ xĩnucóo ìⁿ ùú cue tée dàcuaha ñaha xii ñáyiu nchaa tnúhu ní chídó tnùnì ndíi Moisés, te sá dúcáⁿ nĩ cáháⁿ Jèsús núú cue tée-áⁿ nĩ sani iní-güedé: ⁷ “Tée-a càháⁿ cuèhé-dé cuèndá Yá Ndiõxí duha càháⁿ-dé, chi vá yõo ìⁿ ndàcu cada cahnu iní nchaa yíca cuéchi ñáyiu chi ìⁿ dîi díí-ni Yá Ndiõxí quidé càhnu iní-gá”, duha ní sani iní-güedé. ⁸ Dico òré-ni-áⁿ nĩ cutnùnì iní Jèsús nàcuáa sàni iní-güedé, núú ní xáhaⁿ-gã xii-güedé:

—¿Te ná cuèndá ducaⁿ sàni iní-ndó-í? ⁹ Te sá dúhá nĩ xáhaⁿ-í xii tée cùhú-a sá ní quide càhnu iní-í nchaa yíca cuéchi-dé, te xíáⁿ nchòhó ñá túú cùtnùnì iní-ndó nõu ndáá càháⁿ-í àdi ñá ndáá. Dico núú cúu-í-dé sá ndácóo-dé, te ndocani-dé xító ñùhu-dé véxi, te caca-dé, te cutnùnì ndáá iní-ndó nõu ndáá càháⁿ-í àdi ñá ndáá chi cundehe nõú-ndó nàcuáa cada-í. ¹⁰ Te vitna na càda-í nàcuáa cutnùnì iní-ndó nchàa-ndo sá yùhú Téee cùu ñanì tnáhá-ndó nchàa-ndo ndecu ndíhi-í tnúhu ndee ìní sá càda càhnu iní-í nchaa cuéchi ñáyiu ñuyíú-a —càchí-gá xãhaⁿ-gã xii-güedé.

Te sáta dúcáⁿ te ní xáhaⁿ-gã xii tée cùhú-áⁿ:

¹¹ —Ndacóo te ndocani-n xító ñùhu-n véxi-áⁿ, te núhú-n vèhe-n —càchí-gá xãhaⁿ-gã xii-dé.

¹² Te òré-ni-áⁿ nĩ ndacóo-dé, te ní ndocani-dé xító ñùhu-dé ní quexìo-áⁿ, te ndèhe nchaa ñáyiu xĩndecu-áⁿ nĩ ndee-dé tnuú-yu cuáháⁿ-dé. Te sá dúcáⁿ nĩ quide Jèsús ní quide tátna-gá tée-áⁿ, xíáⁿ ío ní cuñúhu nchaa ñáyiu, te ní xítñahá-yu:

—Càhnu vihi cuu Yá Ndiõxí, chi ñá ìⁿ ndùu quiní-ó dùha cuu datná ní cuu vitna —càchí-yu xítñahá-yu.

*Jèsús càháⁿ-gá ìⁿ téee nàni Leví
(Mt. 9:9-13; Lc. 5:27-32)*

¹³ Te Jèsús cuáháⁿ tucu-gá yuhu làgúná, te ío cuéhé ñáyiu ní sátnahá ñáhá xii-gá, te ní dánèhé ñáhá-gã xii-yu tnúhu Yá Ndiõxí. ¹⁴ Te òré ní yáha ní dánèhé ñáhá-gã xii-yu, te ní naqueheⁿ-gá ichi, te ní yáha yatni-gá ìⁿ xichi núú núcóo ìⁿ téee nàni Leví déhe ìⁿ téee nàni Alfeú quidé còbrá-dé ñáyiu cuèndá impuèstú chi cobràdór cúu-dé. Te òré ní xiní ñáhá-gã xii-dé, te ní xáhaⁿ-gã:

—Néhe chitnahá ñáhá-n xii-í —càchí-gá xãhaⁿ-gã xii-dé.

Te té Leví-áⁿ nĩ ndacuñí-dé, te ní tuha ñaha-dé xii-gá.

¹⁵ Te té Leví-áⁿ cuáháⁿ-dé ndíhi Jèsús vehe-dé. Te yíhi Jèsús mèsá xéxi-gã ndíhi cue téee xica cuu ndíhi-gá, te tnáhá vèi cue téee cuihna ìní-xi quide cobrá ñáhá xii ñáyiu cuèndá impuèstú, ndíhi dava-gá cue téee ndècu ichi cuehé ichi duha núcóo ndíhi ñaha-güedé xii-gá xéxi ndíhi ñaha-güedé, te ducaⁿ chi ío vèi ñáyiu nchícúⁿ ñáhá xii-gá. ¹⁶ Te sá ní xiní cue téee dàcuáha ñaha xii-yu nchaa tnúhu ní chídó tnùnì ndíi Moisés, ndíhi cue téee cùu fariséú xéxi Jèsús ndíhi nchaa cue téee-áⁿ nõu ní xicáⁿ tnúhú-güedé núú cuè téee xica cuu ndíhi-gá, te xáhaⁿ-güedé:

—¿Ná cuèndá ducaⁿ quide téee cùu mestrú-ndó xèxi-dé ndíhi cue téee cuihna ìní-xi quide cobrá ñáhá xii ñáyiu cuèndá impuèstú, ndíhi nchaa dava-gá cue téee ndècu ichi cuehé ichi duha-í? —càchí-güedé xãhaⁿ-güedé.

¹⁷ Te Jèsús ní tecú dóho-gá nàcuáa ndùu tnúhu ní xáhaⁿ-güedé xii cue téee xica cuu ndíhi-gá, nõu ní xáhaⁿ-gã xii-güedé:

—Nchaa ñáyiu ñá túú cùhú chi ñá túú xini ñuhú-yu ñátátná, dico nchaa ñáyiu cùhú chi xini ñuhú-yu ñátátná. Te yùhú véxi-í càháⁿ-í ñáyiu cùtnùnì iní-xi sá ndécú cuéchi-xi te ñá túú véxi-í càháⁿ-í ñáyiu càchí sá ñá túú ndècu cuéchi-xi —càchí-gá xãhaⁿ-gã xii-güedé.

Cuendá cue ñáyiú ñá túú tnàhí ná xéxí áma càháⁿ ndihí-yu Yá Ndiöxí (Mt. 9:14-17; Lc. 5:33-39)

¹⁸ Te cue téé xica cuu ndihí té Juàá, ndihí cue téé xica cuu ndihí cue téé cùu fariséú ñá túú tnàhí ná xéxí-güedé áma càháⁿ ndihí-güedé Yá Ndiöxí. Te ìⁿ nduu ducaⁿ xiquide-güedé, te ní sáháⁿ ñáyiú ní xicáⁿ tnúhũ-yu núú Jèsús, te xähãⁿ-yu xii-gá:

—Cuñí-ndí cachí tnúhu-n ñá cuendá cue téé xica cuu ndihí té Juàá, ndihí cue téé xica cuu ndihí cue téé cùu fariséú ñá túú tnàhí ná xéxí-güedé áma càháⁿ ndihí-güedé Yá Ndiöxí, te cue téé xica cuu ndihí-n ñá túú dùcaⁿ quide-güedé —càchí-yu xähãⁿ-yu xii-gá.

¹⁹ Te Jèsús ní xähãⁿ-gã xií-yu:

—Nchòhó xini-ndó sã vã cúú cũñaha-o xii ñáyiú ñùhu vico tnándaha sã vã cúú càxí-yu nini ndècu ndihí ñaha téé tnándaha xií-yu. ²⁰ Dico sáá nduu te vá cùndècu ndihí ñaha-gá téé tnándaha-áⁿ xií-yu, te dàvá-áⁿ te cahni iní-yu vá càxí-yu cuendá sã ndihú iní-yu.

²¹ Te vá yõ ìⁿ dandée luha dóó sáá ìⁿ dóó sa ní cuu tühú víhí, chi dóó sáá-áⁿ nandiyi-xi te uuⁿ-gá ndata-xi dóó sã ní cuu tühú-áⁿ. ²² Te ní vã yõ ìⁿ chihí ndidí sáá xití ìⁿ lamba sa ní cuu tühú víhí, chi núú yoo ducaⁿ na càda te ndava lamba sa ní cuu tühú-áⁿ, chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núú ducaⁿ na càdá-yu. Núú xähãⁿ xini ñùhu-xi quée ndidí sáá-áⁿ xití ìⁿ lamba saa —càchí-gá xähãⁿ-gã xií-yu.

Cue téé xica cuu ndihí Jèsús sàhnú-güedé yoco triú nduu ndetátú ñáyiú

(Mt. 12:1-8; Lc. 6:1-5)

²³ Te ìⁿ nduu cùu-xi nduu ndetátú ñáyiú ñùhu Jèsús ichi ndihí cue téé xica cuu ndihí-gá, te ta yãha-gá ndihí-güedé ìⁿ xichi núú cáá triú, te ní ngüíta-güedé sàhnú-güedé yoco triú-áⁿ. ²⁴ Te cue téé cùu fariséú ní xähãⁿ-güedé xii-gá:

—¿Ná cuendá ducaⁿ quide cue téé xica cuu ndihí-n sàhnú-güedé yoco

triú vitna cùu-xi nduu ndetátú-i? Te ñá túú tàú-güedé ducaⁿ càda-güedé —càchí-güedé xähãⁿ-güedé xii-gá.

²⁵ Te ní xähãⁿ-gã xii-güedé:

—¿Te náa vátá dácuàha tnahi-gá-ndó núú tütú Yá Ndiöxí núú càháⁿ-xi nàcuáa ní quide ndí Dàvíí cútnhá ní xihí ndí docó ndihí cue téé ní xica cuu ndihí ndí-áⁿ? ²⁶ Te dàvá-áⁿ ní xindecu ìⁿ téé ní xinani Abiátár ní cuu-dé dütú cùnùu, te ndí Dàvíí ní quihu ndí xití vehe Yá Ndiöxí ní queheⁿ ndí pàá ní cuu íí ndécú-áⁿ ní dácãñu ndí cue téé ní xica cuu ndihí ndí ní xexi ndí ndihí-güedé, te mee-ni cuè dütú tàú-güedé caxi-güedé pàá-áⁿ ní cùu —cachí-gá xähãⁿ-gã xii-güedé.

²⁷ Te ní xähãⁿ tucu Jèsús xii-güedé:

—Mee Yá Ndiöxí ní taxi ndecu-gá nduu ndetátú ñáyiú, te ñá túú ní càchí-gá sã méè-yu nándi cani iní-yu cadá-yu canehe ìⁿ-yu nduu ndetátú-yu-áⁿ. ²⁸ Te yúhú Téé cùu ñaní tnáhá-ndó nchaa-ndo, tnáhá-í ndécú ndihí-í tnúhu ndee ìní sã cùu-í nchaa ñáyiú nàcuáa cadá-yu nduu ndetátú-ó-áⁿ —càchí-gá xähãⁿ-gã xii-güedé.

3

Ìⁿ téé ní yíchí ìⁿ xio ndaha-xi (Mt. 12:9-14; Lc. 6:6-11)

¹ Te Jèsús cuánguihu tucu-gá xití veñúhu, te xití veñúhu-áⁿ ndécú ìⁿ téé ní yíchí ìⁿ xio ndaha-dé. ² Te xiáⁿ ndécú cuè téé xito dayuhu ñaha xii-gá, te núú cada tátna-gá téé cùhú-áⁿ nduu cùu-xi nduu ndetátú-güedé ndihí ñáyiú, cuendá ducaⁿ te níhí-güedé nàcuáa cada-güedé cacáⁿ cuèchi-güedé cuendá-gá. ³ Te ní xähãⁿ-gã xii téé cùhú ndaha-xi-áⁿ:

—Ndacuíñí te ngúnutnii-n cuädava iha —càchí-gá xähãⁿ-gã xii-dé.

⁴ Te ní xicáⁿ tnúhú-gã núú-güedé, te xähãⁿ-gã:

—Chí càchí tnúhu ná cúú sã cúú càda-o nduu ndetátú-ó. ¿Sá vãha ñã sã cuèhé? ¿Sá cadá tátna-o ñáyiú cùhú ñã sã cáhni-ó-yu? —càchí-gá xähãⁿ-gã xii-güedé.

Dico ni ñá güedé ñá túú tnàhí ni cáhá-güedé. ⁵ Te Jèsús ní xíndéhé vâha-gá núú nchâa-güedé te ní cudéé-gă, te ní ndíhú iní-gá chi ío sàá iní-güedé, te ní xâha-gă xii téé cùhú ndaha-xi-án:

—Ndocani ndaha-n —càchí-gá xâha-gă xii-dé.

Te ní ndocani-dé ndaha-dé, te òré-ni-án ñí ndúha. ⁶ Te cue téé cùu fariséú ní xica-güedé cuáhá-güedé ñí xichi núú ñí naníhí tnáhá-güedé ndíhi cue téé cùndíhi té Hèrodés cuendá ndatnúhu-güedé nása cada-güedé cahni-güedé Jèsús.

Cuéhé vîhí ñá yiu ní quexìo yuhu lagúná

⁷ Te Jèsús ní xica-gá cuáhá-gá ndíhi cue téé xica cuu ndíhi-gá yuhu lagúná distritú Galileá, te ío cuéhé ñá yiu distritú-án nchícú ñáhă-yu xii-gá cuáhá. ⁸ Te núú ñí quexìo-gá-án ñí sáhá ñá yiu distritú Júdeá, ñá yiu ñúú Jerusálén, ñá yiu distritú Idúmeá, ñá yiu xíndecu ndâa ingá xio yúte Jòrdán, ndíhi ñá yiu xíndecu yatni ñúú Tírú ndíhi ñúú Sídón, te duca ño vâi-yu ní sáhá núú ndécú-gă chi ní níhí-yu tnúhu nchaa nâcuâa quide-gá. ⁹ Te Jèsús ní xâha-gă xii cue téé xica cuu ndíhi-gá sá cadá tûha-güedé ñí bàrcú cuendá caa-gá núú-xi cuendá sá vâ dádèhnde ñáhă-yu xii-gá chi ío cuéhě-yu. ¹⁰ Te sá dúcá ñí níhí-yu tnúhu sá quidé tâtna-gá ñá yiu cùhú, núú xíá nchaa dava-gá ñá yiu cùhú súúní dícó ngõnchihi tnáhă-yu cuáhá-yu núú ndécú-gă cuíní-yu tnándeé ñáhă-yu xii-gá cuendá sá cuíní-yu ndúha-yu. ¹¹ Te cue ñá yiu yîhi ñaha espíritú cùndíhi yucu ñávâha ní sanu xiti ñaha-xi xii-yu núú Jèsús òré ní xini ñáhă-xi xii-gá, te xíá ñí quide níhi ní cáhá-yu, te xâhă-yu xii Jèsús:

—Yòhó cúú-n Dêhe Yá Ndiõxí! —càchí-yu xâhă-yu xii-gá.

¹² Te Jèsús ní tenâa-gá nchaa espíritú cùndíhi yucu ñávâha-án, te ní xâha-gă xii nchaa ñá yiu ní xíhi-xi-án sá vâ cáhá-yu núú ñá yiu yoo cùu-gá.

Jèsús cãxi-gá úxúú tnáhă cue téé dacuâha ñaha xii ñá yiu tnúhu-gá

(Mt. 10:1-4; Lc. 6:12-16)

¹³ Te sátá dúcá ñí cuu te Jèsús ní sáa-gá ñí yucu, te xíá ndécú-gă ní cana-gá nchaa cue téé càchí iní-gá. Te òré ní quexìo nchaa cue téé-án núú-gă, ¹⁴ te ní cáxi-gá úxúú tnáhă cue téé caca cuu ndíhi-gá, te dîu-ni cue téé-án tendaha-gă quíhí-güedé cáhá-güedé tnúhu-gá núú ñá yiu. ¹⁵ Te ní sâñaha-gă xii-güedé tnúhu ndee iní cundecu ndíhi-güedé cuendá cada tâtna-güedé ñá yiu cùhú, ndíhi cuendá queñuhu-güedé nchaa espíritú cùndíhi yucu ñávâha yîhi ñaha xii ñá yiu. ¹⁶ Te duha xñani ndí ùxúú cue téé-án: ñí-dé nání-dě Xímú, te mee-gă ní taudiu ñaha-gá xii-dé sá cúnani-dé Pèlú. ¹⁷ Te ingá-dé nání-dě Jâcobó, te ingá-dé nání-dě Juàá, te ñani té Jâcobó-án cúú tẽ Juàá te ndí ndúú-güedé cúú-güedé déhe té Zebèdeú, te ndí ndúú cue téé-án ñí dánání ñaha Jèsús xii-güedé Boànergés, te tnúhu-án quée-xi: Cue téé ío yâchí cúdèé, duha quèe-xi tnúhu-án. ¹⁸ Te duha xñani dâva-gá-güedé: Té Ndríxí, té Lìpé, té Bartolómé, té Mâteú, té Măxí, té Jâcobó déhe té Àlfeú, té Tâdeú, té Xímú téé ní cundíhi cue téé cananistá ní cùu, ¹⁹ ndíhi té Júdás Iscarioté téé ní sáa nduu ñí sâha cuendá ñáhă xii Jèsús núú cuè téé cùu úhú iní ñáhă xii-gá, duha xñani cuè téé ní cáxi Jèsús ní xica cuu ndíhi-gá.

Càchí-güedé sá ndécú ndíhi Jèsús yucu ñávâha dico ñá ndâá

(Mt. 12:22-32; Lc. 11:14-23; 12:10)

Te sátá dúcá te cuáhá-gá ndíhi-güedé núú quidé vèhe-gá. ²⁰ Te ío vâi ñá yiu ní tacá-ni tucú-yu xíá, te ní ñá ní níhí-gă nása cada-gá caxi-gá ndíhi cue téé xica cuu ndíhi-gá cuendá sá ío vâi-yu. ²¹ Te cue ñá yiu cùu ndí mee Jèsús ní níhí-yu tnúhu nchaa nâcuâa cùu, te nchaa ñá yiu ñá cùtnuní váha iní-xi ní cachí-yu sá ñí nduu lúcú-gá núu xíá cuáhá ñá yiu cùu

ndi mee Jesús núú ndécú-gã cuendá candeca ñahá-yu xii-gá núhú ní cùu.

22 Te cue tée dàcuaha ñaha xii ñáiyu nchaa tnúhu ní chídó tnùní ndí Moisés véxi ndéé ñuú Jerusalén ní cáháⁿ cuèhé-güedé cuendá Jesús, chi ní xítñaha-güedé:

—Tée-a ndècu ndihí-dé sácúíhná, te ñuú xíáⁿ chíndée ñaha-xi xii-dé queñuhu-dé nchaa espíritú cündihí-xi yíhi ñaha xii ñáiyu, te ñuú-ni-xi tàxi tnuní-xi nchaa espíritú-áⁿ —duha ní xítñaha-güedé.

23 Te Jesús ní cana ñaha-gã xii-güedé, te ní cani-gá ñⁿ cuendú núú-güedé nàcuáa tecú tnùní-güedé tnúhu-gá, te xãhaⁿ-gã xii-güedé:

—¿Te nása cada sácúíhná queñuhu-xi cue espíritú cündihí-xi yíhi ñaha xii ñáiyu-í? 24 Te nchòhó xíní-ndó sã núú ñⁿ tée yíndaha ñⁿ nacióⁿ vá cúú ñⁿnuu-dé ndihí cue tée cündihí-dé, te vá cúdĩ-dé cunu-dé. 25 Te ñuú-ni ducaⁿ sãtnahá-xi cùu tucu ñáiyu xíndecu ñⁿ-ni vèhe, chi núú vá cúú ñⁿnuú-yu, te vá cúdĩ-yu cundecu càhnú-yu. 26 Te núú sácúíhná ñà túú cùu ñⁿnuu-xi ndihí cue espíritú cündihí-xi, te vá cúdĩ-xi cundecu-xi taxi tnùní-xi te núú ducaⁿ quíde-xi.

27 Te nchòhó xíní-ndó sã cuè ñaduhú chi vá ndácú-güedé cuendá-ni quíhu-güedé duhu-güedé vehe ñⁿ tée ío ndee, chi díhna-gá xíní ñùhu-xi tñi-güedé tée-áⁿ dacùtu ñaha-güedé xii-dé dàtnùní ducaⁿ te ndacu-güedé duhu-güedé nchaa sá ndécú ndihí-dé.

28 Te na càchí tnúhu ndáá-í xii-ndo sã ncháá sã cuèhé sá dúhá quíde ñáiyu, ndihí nchaa tnúhu cuèhé tnúhu duha càháⁿ-yu cuendá Yã Ndióxi cuu cada càhnu iní-gá. 29 Dico cue ñáiyu na càháⁿ cuèhé cuendá Espíritú Yã Ndióxi, ñáiyu-áⁿ vã cádá càhnu iní ñahá tnàhí-gá xií-yu, chi cundecu-ni cuéchi-yu núú-gã ni caa ni quíhíⁿ —càchí-gá xãhaⁿ-gã xii-güedé.

30 Te ducaⁿ ñí cáháⁿ-gá chi càchí-güedé sá ndécú ndihí-gá espíritú cündihí yucu ñávãha.

Nãná Jèsús ndihí cue ñaní-gá
(Mt. 12:46-50; Lc. 8:19-21)

31 Te ní quexìo náná Jèsús ndihí cue ñaní-gá núú ndécú-gã xínutñi-yu quehé, te ní xáhãⁿ-yu xii ñⁿ ñáiyu xíndecu-áⁿ sã dáyãha-yu tnúhu núú-gã cuendá quee-gá ndatnúhu ndihí ñaha-gã xií-yu. 32 Te cue ñáiyu xínucóo ni càndéé ñiñi-gá ní xáhãⁿ-yu xii-gá:

—Nãná-n ndihí cue ñaní-n ndécú-yu quehé nándùcu ñahá-yu xii-n —càchí-yu xáhãⁿ-yu xii-gá.

33 Te Jesús ní xáhaⁿ-gã xií-yu:

—Te cachí tnúhu-ndo yòndi-gã ñáiyu cùu datná nãná-í ndihí dàtná cue ñaní-í —càchí-gá xãhaⁿ-gã xií-yu.

34 Te dàtnùní ní xíndéhé vãha-gã núú nchãa ñáiyu xínucóo ni càndéé ñiñi-gá-áⁿ, te ní xáhaⁿ-gã xií-yu:

—Nchaa ñáiyu-a cùú-yu dàtná nãná-í ndihí dàtná cue ñaní-í. 35 Chi nchaa ñáiyu quíde nacuáa càháⁿ Yã Ndióxi, ñáiyu-áⁿ cúú-yu dàtná cue ñaní-í, ndihí dàtná cue cúha-í, ndihí dàtná nãná-í —càchí-gá xãhaⁿ-gã xií-yu.

4

Nàcuáa quíde tée cuángacáⁿ triú
(Mt. 13:1-9; Lc. 8:4-8)

1 Te Jesús ní ngüíta-gã dácuaha tucu-gã ñáiyu yuhu làgúná. Te cuèhé víhí-yu ní tacá xíáⁿ núú cuásaá-gã núú ñⁿ bàrcú nùtní xití ndute làgúná-áⁿ, te núú xíáⁿ ní ngóo-gã te ní ngüíta-gã dánèhé ñahá-gã xií-yu, te ncháá-yu xíxúcu-yu yuhu làgúná-áⁿ.

2 Te ní ngüíta-gã ní cani-gã titní cuendú núú-yu nàcuáa tecú tnùní-yu tnúhu-gã, te xãhaⁿ-gã xií-yu:

3 —Chí cündèdóho váha ñⁿ cuendú ná càni-í-a. ñⁿ tée cuángacáⁿ-dé triú. 4 Te òré ní ngüíta-dé dãngoyo-dé triú-áⁿ, te dava ní quene ndava ní ngava ndéé ichi, te ní xíní cue tãláa te ní nãdatácá-güedi. 5 Te dava ní ngava ñuhu yadi núú yíhí víhi yúú, te ndihí-ni ní xínu-xi cuendá sã ñà túú càvihi ñuhu. 6 Dico òré ní nayehé ñà túú ní cùndee iní-xi chi ní yíchí-xi, chi ñà túú ní ñhí quíhíⁿ cùnú yóho-xi.

7 Te dava ní ngava núú yúcu ndíquín tnu ìñu, te ìñu-ni ní xínu-xi ndíhi tnu ìñu, te tnu ìñu-án ní sahnú-xi te ní dánáá-xí nchàa triú sá ní xínu-án.

8 Dico dava triú-án ní ngava-xi núú ndécú ñuhu cocón, te xíá ní xínu-xi te ní sahnú-xi te ío váha ní cuu, chí núú ìñ-ní triú-án te dava yoco-xi ní nguíhi ócò úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ìñ cièndú triú-xi —càchí-gá xáhaⁿ-gá xií-yu.

9 Te xáhaⁿ tùcu-gá xií-yu:

—Nchaa nchòhó ñáyiú ní xíndedóho nchaa tnúhu ní cáháⁿ-í-a, te ío váha chí cuáha cuèndá —càchí-gá xáhaⁿ-gá xií-yu.

Jèsús càháⁿ-gá ná cuèndá ducaⁿ càni-gá cuèndú

(Mt. 13:10-17; Lc. 8:9-10)

10 Te sátá ní ndaca ñáyiú-án te ní quèndó mee-ná Jèsús ndíhi cue téé xíca cuu ndíhi-gá, ndíhi ìñ úú-ná ñáyiú. Te ñáyiú-án ndíhi cue téé-án ní xícaⁿ tnúhú-yu ndíhi-güedé núú-gá, núú nása quèe-xi cuèndú ní cani-gá núú-yu ndíhi-güedé. 11 Te ní xáhaⁿ-gá:

—Nchòhó chí sa càchí tnúhu Yá Ndiòxí xii-ndo ìñ sá vátá quíní-gá-ndó, chí càchí tnúhu-gá nàcuáa cada-gá ndíhu ndaha-gá ñáyiú, dico dava-gá ñáyiú càni-í mee-ni cuèndú núú-yu. 12 Chí cuèi na quíní-yu nchaa nàcuáa cuu dico ní vǎ cútñuní iní-yu ná cuèndá ducaⁿ cùu, àdi cuèi na cùndedóho-yu dico ní vǎ tècú tnùní-yu. Te ducaⁿ ndòhó-yu cuèndá sá vǎ quíndáá iní-yu Yá Ndiòxí, ndíhi cuèndá sá vǎ cádá càhnu iní-gá nchaa yíca cuèchi-yu —càchí-gá xáhaⁿ-gá xií-yu ndíhi-güedé.

Jèsús càháⁿ-gá nàcuáa quèe-xi cuèndá téé cuángacáⁿ triú

(Mt. 13:18-23; Lc. 8:11-15)

13 Te ní xáhaⁿ tùcu Jesús xii cue téé xíca cuu ndíhi-gá, ndíhi cue ñáyiú-án:

—Nchòhó, ñá túú ní tècú tnùní-ndó cuèndú ní cani-í núú-ndó, te núú ducaⁿ, ¿te nása tecú tnùní-ndó dàva-gá cuèndú cani-í núú-ndó-í? Te na càchí tnúhu-í xii-ndo nàcuáa quèe-xi

cuèndú ní cani-í núú-ndó. 14 Te téé cuángacáⁿ triú-án cúú-dě dàtná ìñ téé cuáháⁿ càháⁿ tnúhu Yá Ndiòxí núú ñáyiú. 15 Te triú-án cúú-xí dàtná tnúhu Yá Ndiòxí, te triú sá ní quene ndava ní ngava ndéé ichi, xíáⁿ cúú-xí dàtná ñáyiú ní tnahá iní-xi tnúhu Yá Ndiòxí, dico sácuíhna cuáháⁿ-xi xòcani-xi tnúhu-gá iní-yu cuèndá sá vǎ cǎnchícúⁿ nihnú-yu nàcuáa càháⁿ tnúhu-án.

16 Te triú sá ní ngava ñuhu yadi núú yíhí vǐhi yúú, xíáⁿ cúú-xí dàtná ñáyiú ní xíndedóho tnúhu Yá Ndiòxí te díí iní ní tñí-yu tnúhu-gá. 17 Dico òré ná nguíta ñáyiú cúcuèhé ñáhǎ-yu xií-yu àdi nándí-gá sá yáha-yu sá cuèndá tnúhu-gá, te ñá cùndèe iní-yu chí dàñá-yu tnúhu-gá cuèndá sá ñà túú nihí ndéè-yu. 18 Te triú sá ní ngava núú yúcu ndíquín tnu ìñu xíáⁿ cúú-xí dàtná ñáyiú ní tecú dóho-xi tnúhu Yá Ndiòxí, 19 dico cuèé cuèé ní nacuanaá-yu tnúhu-gá, chí cuèndá mee-ni sǎ cúú-xí mèè-yu ñuhu iní-yu, ndíhi cuèndá sá ío sǎni iní-yu cuu cuìcá-yu, ndíhi cuèndá sá ío cùdíí iní-yu nchaa sá ío ñuyíú-a, te ñá túú ñuhu iní-yu tnúhu sá ní xíndedóho-yu-án nàcuáa cada váha-yu cundecú-yu. 20 Dico triú sá ní ngava núú ndécú ñuhu cocón, xíáⁿ cúú-xí dàtná ñáyiú ní xíndedóho tnúhu Yá Ndiòxí te quidé-yu nchaa nàcuáa càháⁿ tnúhu-án. Te cada iní-ndó sǎ ñáyiú-án cúú-yu dàtná triú sá ní nguíhi yoco-xi ócò úxí triú-xi, ndíhi triú sá ní nguíhi yoco-xi únídico triú-xi, ndíhi triú sá ní nguíhi yoco-xi ìñ cièndú triú-xi. Te ducaⁿ sǎtnahá-xi cúú-yu chí ío váha quidé-yu —càchí-gá xáhaⁿ-gá xii cue téé xíca cuu ndíhi-gá ndíhi cue ñáyiú-án.

Cuèndá iti

(Lc. 8:16-18)

21 Te xáhaⁿ-gá xii nchaa ñáyiú:

—Ñá túú ní ìñ ñáyiú tēñuhú iti te chiváha-yu ìñ xití quídi, àdi chiváha-yu ìñ caha càamá, chí tàxi ndecú-yu ìñ núú dùcúⁿ cuèndá cutñuní núú nchàa ñáyiú. 22 Te ní ìñ tnúhu sá ñǎ tècú tnùní ñáyiú

vitna cachí-ó sã vã tècú tnùnì-yu chi dacuitíi sã tècú tnùnì-yu, te ni ìⁿ tnúhu sã cãchí-ó cùu yuhu vitna vá cúú yuhu chi dacuitíi sã quée tũu-xi núú ñãyiú.
 23 Te nchòhó cue ñãyiú ní xíndedóho nchaa tnúhu ní cãháⁿ-í-a, te ío váha chí ná cuãha cuendá —cãchí-gã xãhaⁿ-gã xií-yu.

24 Te ní xáhaⁿ tucu-gã:

—Ío váha chí cündedóho tnúhu na cãháⁿ-í-a. Te nãcuãa-ni quide-ndo danehé-ndó ñãyiú tnúhu Yá Ndiõxí, te ñi-ni ducaⁿ cãda ñaha-gã xii-ndo, te uuⁿ-gã ducaⁿ cãda-gã sã cúú-xí-ndó.
 25 Te nchaa nchòhó ñãyiú tècú tnùnì tnúhu Yá Ndiõxí, uuⁿ-gã cuita tecú tnùnì-ndó tnúhu-gã quíhíⁿ. Te nchaa nchòhó ñãyiú ñã túú tècú tnùnì tnúhu-gã, te uuⁿ-gã vá tècú tnùnì-ndó —cãchí-gã xãhaⁿ-gã xií-yu.

Nãcuãa sãhnu triú

26 Te Jèsús xãhaⁿ tucu-gã:

—Na cãni-í ìⁿ cuendú núú-ndó cuendá tecú tnùnì-ndó nãcuãa cada-xi òré ndíhu ndaha ñaha Yá Ndiõxí xii ñãyiú. Ìⁿ tée cuángacáⁿ-dé triú. 27-28 Te sátá ñi yáha ní sacáⁿ-dé triú-áⁿ, te cuánuhú-dé vehe-dé ndétátú-dé. Te ducaⁿ-ni ta xica nduu cuáháⁿ te ní xínu triú-áⁿ, te nãcuãa ta sãhnu-xi cuáháⁿ te ta quée ndaha-xi, te ducaⁿ-ni cùu ní sáá nduu ñi quene yoco-xi te ní nguíhi triú-xi, dico tée ní sacáⁿ triú-áⁿ ñã túú xíní-dé nása ní sahnu-xi, chi mee ñúhu ní quide-xi ní sahnu triú-áⁿ. 29 Te òré sa ní ndíhi ní cuaaⁿ te ní nguíta tée ní sacáⁿ-áⁿ náquèhndé-dé nátãxi tnaha-dé —cãchí-gã xãhaⁿ-gã xií-yu.

Cuendá ndíquíⁿ yutnu nàni mostázá (Mt. 13:31-32; Lc. 13:18-19)

30 Te xãhaⁿ tucu Jèsús xií-yu:

—Na cãni tucu-í íngã cuendú núú-ndó cuendá tecú tnùnì-ndó nãcuãa cada-xi òré ndíhu ndaha ñaha Yá Ndiõxí xii ñãyiú. 31 Ìⁿ yutnu nàni mostázá cúú-xí ìⁿ yutnu sã líhli víhi-gã ndíquíⁿ-xi dàcúúxí ndíquíⁿ nchaa cúhú, 32 dico òré ná càcãⁿ-güedé núú ñúhú-güedé, te na xínu-xi te sãhnu-gã-xi dàcúúxí nchaa

cúhú, te nchaa dité-xi ío cùu cahnu-xi, te ndée cue quiti ndava núú tàchí sãcõo-güedi nchaa núú dité-xi xínu ndeti-güedi —cachí-gã xãhaⁿ-gã xií-yu.

Ío titní cuendú ní cani Jèsús núú ñãyiú (Mt. 13:34-35)

33 Te ío-gã vai cuendú ní cani Jèsús núú ñãyiú cuendá tecú tnùnì-yu tnúhu Yá Ndiõxí, dico dava cuendú ñã túú ní cãni-gã núú-yu, chi ní cutnùnì iní-gã sã vã tècú tnùnì-yu nchaa. 34 Te mee-ni cuendú ní cani Jèsús núú ñãyiú ndi tnahá òré ní dánèhé ñáhã-gã xií-yu tnúhu-gã. Te òré ndécú mee Jèsús ndíhi cue tée xica cuu ndíhi-gã, te ní xáhaⁿ-gã xii-güedé nãcuãa quèe-xi ìⁿ ìⁿ cuendú ní cani-gã núú ñãyiú.

Jèsús ngání-gã táchí ndíhi ndute làgúná

(Mt. 8:23-27; Lc. 8:22-25)

35 Te ñi-ni nduu-ãⁿ òré sa ta cündiquíⁿ cuáhãⁿ ní xáhaⁿ Jèsús xii cue tée xica cuu ndíhi-gã:

—Chí ná quíhíⁿ-ó ndaa íngã xio yuhu làgúná —cãchí-gã xãhaⁿ-gã xii-güedé.

36 Te ní quide ndee iní-gã nchaa ñãyiú xixúcu-áⁿ, te ñi-ni bàrcú sã ñúhú-gã òré ní dánèhé-gã ñãyiú tnúhu-gã ñi-ni xíãⁿ ní dácacá cuè tée xica cuu ndíhi-gã ndécã ñaha-güedé xii-gã cuáhãⁿ, te tnahá ìⁿ úú-gã bàrcú ní xica-xi nchicúⁿ-xi bàrcú ñúhú-gã-áⁿ cuáhãⁿ. 37 Te ñúhu bàrcú ñúhú-gã-áⁿ ichi cuáhãⁿ-xi núú ndute, te ní quexìo ìⁿ táchí ñíhi, te ta nãdachitú-xi ndute xití bàrcú-áⁿ cuáhãⁿ, te sa cuíní-ñã-xi quée naa bàrcú-áⁿ xití ndute ní cùu. 38 Te Jèsús cáã-gã xidí-gã ìⁿ xichi ndaa sátá bàrcú-áⁿ, te yínchihí ìⁿ dóo díquí-gã. Te sã dúcãⁿ cuíní-xi quée naa bàrcú-áⁿ núu ní sáhãⁿ-güedé ní ndocani ñaha-güedé xii-gã, te xãhaⁿ-güedé:

—¡Mèstrú, ndíquíú iní! ¿Náa ñã túú ndíhú iní-n sã tá quèe naa-o cuáhãⁿ-ãⁿ? —cãchí-güedé xãhaⁿ-güedé xii-gã.

39 Te Jèsús ní ndiquíú ìní-gá te ní ndacóo-gá, te ní tenáá-gá táchí-ǎn, te ní xáhaⁿ-gǎ xii ndute làgúná:

—ǎTnavíí-nǎ cuhuⁿ, chí ío dusaⁿ! — cǎchí-gá xáhaⁿ-gǎ xii ndute-áⁿ.

Te òré-ni ní ngüíñí táchí-ǎⁿ te ní nucúndecu nahi-nǎ ndute làgúná-áⁿ.

40 Te Jèsús ní xáhaⁿ-gǎ xii-güedé:

—ǎNá cuendá ndéé dúcáⁿ yùhú-ndó-í? ǎNáa ñá túú sàndáá ìní ñáhá ndìsa-ndo xii-í-ǎⁿ? — cǎchí-gá xáhaⁿ-gǎ xii-güedé.

41 Dico mee-güedé chí ío ní yùhú-güedé sá ducaⁿ ñí quide-gá ní xiní-güedé, te ní xítñàha-güedé:

—ǎTe ná téé cùu téé-a núu ní cǎháⁿ-ni-dé, te ní ngüíñí táchí te ní nucúndecu nahi ndùte làgúná-a-í? — cǎchí-güedé xítñàha-güedé.

5

ǎⁿ téé yìhi ñaha espíritú cùndìhi yucu ñávǎha

(Mt. 8:28-34; Lc. 8:26-39)

1 Te ní sáá Jèsús ndìhi cue téé xìca cuu ndìhi-gá ndàa ìngá xio yuhu làgúná yucu cue téé ñuú Gàdará.

2 Te òré ní quene-gá xití bàrcú te ǎⁿ téé yìhi ñaha espíritú cùndìhi yucu ñávǎha ní quee-dé núu yíndǔxi ndíyì cuáháⁿ-dé núu-gǎ. 3 Te mee-ni núu yíndǔxi ndíyì-áⁿ quidé vèhe-dé, te cuèi dàcutu ñaha-güedé cadèná xii-dé dico ñá túú tñahí ndàcu-güedé núu-dě.

4 Te ío titní xito ní dácútú-güedé cadèná sáhá-dě ndìhi ndaha-dé dico ní dándává-ni-dé, te ní xóo dacàchi-gá-dé nchaa cadèná-áⁿ, te ñá túú tñahí ní ndàcu-güedé núu-dě. 5 Te cuèi nduu cuèi níú ní xóo cana saa-dé, te váha-ni núu xití yucu ndècu-dé àdi núu yíndǔxi ndíyì dico càna saa nahi-ni-dé, te ío ní xóo dǎnícüehé-dé méé-dě ndìhi yúú. 6 Te òré ní xiní-dé Jèsús te xìnu-dé ní sáháⁿ núu-gǎ, te ní ngüíñí xití-dě, 7 te espíritú yìhi ñaha xii-dé-áⁿ ñí quide-xi níhi ní cǎháⁿ-dé, te xáhaⁿ-dě xii-gá:

—ǎNá cuendá véxi yòhó Jèsús Déhe Dútú Ndióxí sàdí-n ìchi-í? Te cǎháⁿ ndàhú-í núu Ndióxí yuhu núu-n sǎ

vǎ dándòho ñaha-n xii-í — cǎchí-dé xáhaⁿ-dě xii-gá.

8 Te ducaⁿ ñí cǎháⁿ-dé cuendá sá Jèsús ní xáhaⁿ-gǎ xii espíritú cùndìhi yucu ñávǎha yìhi ñaha xii-dé-áⁿ sǎ queé ñàha-xi xii-dé.

9 Te Jèsús ní xicáⁿ tñuhú-gǎ núu-dě, te xáhaⁿ-gǎ:

—ǎNása nàni-n-í? — cǎchí-gá xáhaⁿ-gǎ xii-dé.

Te ní xáhaⁿ-dě:

—Vài Sandadú, duha nàni-í chí ío cuéhé-ndí — cǎchí-dé xáhaⁿ-dě xii-gá.

10 Te cue espíritú cùndìhi yucu ñávǎha-áⁿ ñí cǎháⁿ ndàhú-xi núu Jèsús sá vǎ tэндàha ñaha-gǎ xii-xi quíhíⁿ-xi ìngá xichi. 11 Te dǎu-ni yatni yucu núu ndécú Jèsús-áⁿ yìhí vài cuchí xìxexi-güedi. 12 Te nchaa cue espíritú-áⁿ ñí cǎháⁿ ndàhú-xi núu-gǎ, te xáhaⁿ-xi xii-gá:

—Cǎháⁿ ndàhú-ndí núu-n sǎ dáñá-n quǎhu-ndí yìqui cùñú nchaa cùchí-ǎⁿ — cǎchí-xi xáhaⁿ-xi xii-gá.

13 Te Jèsús ní xáhaⁿ-gǎ sá cúu quǎhu-xi yìqui cùñú-güedi, te xìnu dàtná úú mǐl-güedi yìhi yucu-áⁿ. Te nchaa espíritú cùndìhi yucu ñávǎha yìhi ñaha xii téé-áⁿ ñí quee ñaha-xi xii-dé, te cuánguǎhu-xi yìqui cùñú nchaa cùchí-áⁿ, te nchaa-güedi ní xinu-güedi duha ní queé-güedi ndàa núu dèhvá yuhu làgúná-áⁿ, te ní ngaunihnu-güedi xití ndute te ní ndìhi-güedi ní cǎhá.

14 Te òré ní xiní cue téé xìto cuchí-áⁿ nàcuáa ní cuu te ní xinu-güedé, te ní sáháⁿ-güedé ní caní-güedé cuèndú núu cuè ñáyíu ndècu xití ñuú, ndìhi núu cuè ñáyíu ndècu xití yucu. Te nchaa ñáyíu ní níhí tñuhu ní xicá-yu cuáháⁿ ndéhě-yu nàcuáa ní cuu. 15 Te òré ní quexió-yu núu ndécú Jèsús te ní xiní-yu téé ní xíhi ñaha cuè espíritú cùndìhi yucu ñávǎha-áⁿ núcóo-dé núu sáhá Jèsús, te ñihnu-ná-dé dóo-dě te núcóo-ná-dé dàtná ǎⁿ ñáyíu váha, te ní yùhú-yu òré ní xiní ñáhǎ-yu xii-dé. 16 Te nchaa ñáyíu ní xiní nàcuáa ní cuu ní ndúha téé yìhi ñaha

cue espíritú cundíhi yucu ñávãha-án ní cùu ní caní-yu cuendú núu nchaa ñáyiu ní quexìo-án nàcuáa ní cuu ní ndúha téé-án ndíhi nàcuáa ní cuu cuendá nchaa cùchí-án. ¹⁷ Te sá dúcáⁿ ní níhí ñáyiu-án tñúhu nàcuáa ní cuu núu ncháá-yu ní ngüíta-yu càháⁿ ndàhú-yu núu Jèsús sá ná quèe-gá yucu ñuú-yu núhú-gá.

¹⁸ Te ní xica-gá cuáháⁿ-gá núu ndécú bàrcú, te òré ndée-gá bàrcú-án nùhú-gá ní ngüíta téé ní xíhi ñaha cuè espíritú cundíhi yucu ñávãha-án càháⁿ ndàhú-dé núu-gã nùu vá cundèe iní-gá quíhíⁿ ndíhi ñaha-gã xii-dé. ¹⁹ Dico ñá túú ní sãha-gá tñúhu quíhíⁿ ndíhi ñaha-gã xii-dé, te ní xãhaⁿ-gã xii-dé:

—Cuanùhú vehe-n, te cani-n cuendú núu cuè ñáyiu sá Yã Ndiòxí ní cundàhú iní ñáhá-gã xii-n, te ío càhnu cuu nchaa sá vãha ní quide-gá sá cúu-xí-n —càchí-gá xãhaⁿ-gã xii-dé.

²⁰ Te téé-án ñí xica-dé cuánuhú-dé, te ní sáháⁿ-dé ndí ùxí ñuú nání Dècápolis, te ní cani-dé cuendú núu nchaa ñáyiu sá ío càhnu cuu nchaa sá vãha ní quide ñaha Jèsús xii-dé, te ncháá-yu ío ní cuñúhu-yu.

Cuendá déhe yoco té Jàirú ndíhi cuendá ñí ñadìhí ní tnándeé dóó Jèsús (Mt. 9:18-26; Lc. 8:40-56)

²¹ Te Jèsús cuánde-gá bàrcú, te ní natehdé-gá ndàa ìngá xio yuhu làgúná, te ío vãi ñáyiu ní tacá núu ñí quexìo-gá-án, te xíaⁿ ndécú-gã ²² ní quexìo ñí téé tàxi tñuní veñúhu núu-gã, te téé-án nání-dè Jàirú, te ní ngüíñí xítí-dè núu-gã. ²³ Te ní ngüíta-dé càháⁿ ndàhú-dé núu-gã, te xãhaⁿ-dè xii-gá:

—Ío càhú tnàhá déhe yoco-í cùhú-xi, te ndècu-ná-xi sá cùu-xi, te véxi-í càháⁿ ndàhú-í núu-n nùu vá cundèe iní-n quíhíⁿ-ó vèhe-í tendaha-n-xi cuendá ndúha-xi, te cundecu-xi —càchí-dé xãhaⁿ-dè xii-gá.

²⁴ Te Jèsús ní xica-gá cuáháⁿ-gá ndíhi téé-án, te ío vãi ñáyiu nchìcúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu. ²⁵ Te tnuú

nchaa ñáyiu-án ñútnàhá ñí ñaha cùhú, te ñaha-án sa ní cuu úxúú cuía sã cùhú-aⁿ ngòyo ñaha níñí xii-aⁿ. ²⁶ Te ío ta ndòho-aⁿ véxi, te ío cuéhé ñátátná ñí cuu ta quide tátna ñaha xii-aⁿ, te sa ní ndíhi nchaa sá ndécú ndíhi-aⁿ ní nadico-aⁿ cuendá ní níhí-aⁿ díhúⁿ ñí queheⁿ nchaa ñáyiu ní quide tátna ñaha xii-aⁿ dico ní ñíⁿ-yu ñá túú ní ndàcú-yu ndúha-aⁿ, chi da uuⁿ-gá tá cùu cahú-aⁿ cuáháⁿ. ²⁷ Te òré ní níhí-aⁿ tñúhu cuendá Jèsús, te ní xica-aⁿ cuáháⁿ-aⁿ núu ndécú-gã. Te òré ní quexìo-aⁿ núu ndécú-gã te ní sáháⁿ ndehe yatni-aⁿ ndàa sátá-gã ní tnándeé-aⁿ dóó-gã. ²⁸ Te ducaⁿ ñí quide-aⁿ chi ní sani iní-aⁿ sá nùu ndacu-aⁿ tnándeé-aⁿ cuèdicó luha yuhu dóó Jèsús te ndúha-aⁿ ní sani iní-aⁿ. ²⁹ Te òré ducaⁿ ñí quide-aⁿ te ñá túú-gã ní ngòyo ñaha-gá níñí xii-aⁿ, te òré-án ñí cutnùní iní-aⁿ sá ñí ndúha-aⁿ cuéhé tnàhá-aⁿ. ³⁰ Te Jèsús ní cutnùní iní-gá sá ñí ñáyiu ní ndúha sá cuendá-gá, núu ní nchócótó-gã ndàa sátá-gã te ní xicáⁿ tñúhú-gã núu nchaa ñáyiu nchìcúⁿ ñáhá xii-gá, te xãhaⁿ-gã xii-yu:

—¿Ndèdacàa-ndo ní tnándeé ñáhá xii-í? —càchí-gá xãhaⁿ-gã xii-yu.

³¹ Te cue téé xica cuu ndíhi-gá ní xãhaⁿ-güedè xii-gá:

—Mèstrú, ndèhe-n sá vái ñáyiu nchìcúⁿ ñáhá xii-n, te texio texio dàdehnde ñahá-yu xii-n te xicáⁿ tñúhú-gã-n yòo ní tnándeé ñáhá xii-n —càchí-güedè xãhaⁿ-güedè xii-gá.

³² Te Jèsús ní xíndéhé vãha-gá xio xio dñí-gá nùu ndèdacàa ñáyiu ní tnándeé ñáhá xii-gá. ³³ Te sá dúcáⁿ ñí cutnùní iní ñadìhí-án nàcuáa ní cuu, núu yùhú yùhú-aⁿ ní sáháⁿ-aⁿ ní ngüíñí xítí-án nùu Jèsús, te ní xãhaⁿ ndàá-aⁿ xii-gá nàcuáa ndùu cuendá-aⁿ. ³⁴ Te Jèsús ní xãhaⁿ-gã xii-aⁿ:

—Yòhó ñaha cùhú ní cùu, ní sándáá iní ñáhá-n xii-í, núu ní ndúha-n, te vitna cuanùhú te vá ndíhú-gá iní-n, chi vá dúcáⁿ-gã ndòho-n —càchí-gá xãhaⁿ-gã xii-aⁿ.

35 Te càháⁿ dúcáⁿ-ní Jèsús ní sáá cue téé xínu cuechi vehe té Jàirú téé tàxi tnuní veñúhu-áⁿ, te xăhaⁿ-güedě xii-dé:

—Sa ní xíhí déhe-n, vá chíchìuⁿ-gá-n Mèstrú —càchí-güedé xăhaⁿ-güedě xii-dé.

36 Dico Jèsús ñá túú ní quide cuendá-gá nàcuáa ndùu tnúhu ní cáháⁿ cue téé-áⁿ, te ní xáhaⁿ-gă xii téé tàxi tnuní veñúhu-áⁿ:

—Ñá túú nă caní iní-n, quindáá iní ñáhá-ní-n xii-í —càchí-gá xăhaⁿ-gă xii-dé.

37 Te Jèsús vá yôo-gá ní cuiní-gá canchicúⁿ ñáhá xii-gá quíhíⁿ, chí té Pèlú-ni, ndihí té Jàcobó-ni, ndihí ñaní-ni-dé té Juáá cuáháⁿ ndihí ñaha-gă xii-güedé. 38 Te òré ní quexìo-gá ndihí-güedé vehe téé tàxi tnuní veñúhu-áⁿ, te ní xiní-gá sá òo vâi ñáyiu xĩndecu, te súúní dùsaⁿ quidé-yu te níhí xícáháⁿ-yu te xĩndáhí-yu. 39 Te òré cuánguihu-gá xití vehe, te ní xáhaⁿ-gă xii-yu:

—¿Ná cuendá ndéé dúcáⁿ òo dusaⁿ quide-ndo, te ndàhyú-ndó? Te xíchí-a ñá túú ní xíhí-xi chí dícó xidí-xi —càchí-gá xăhaⁿ-gă xii-yu.

40 Te ní sácú ndéé ñáhă-yu xii-gá sá dúcáⁿ ñí cáháⁿ-gá, chí sá cúú-xí mèé-yu chí ní xíhí ndisa xíchí-ăⁿ. Te òré-áⁿ ñí queñuhu-gá nchaá-yu quehé, te cuánguihu-gá núú cándòdo yiquí cuñú xíchí ñí xíhí-áⁿ. Te ndèca-gá tátá xíchí ñí xíhí-áⁿ ndihí năná-xi cuánguihu, te tnàhá cue téé úní ndihí-gá-áⁿ cuánguihu ndihí-gá. 41 Te ní tñi-gá ndaha xíchí ñí xíhí-áⁿ, te ní xáhaⁿ-gă:

—Tálíta, cúmí —càchí-gá xăhaⁿ-gă.

Te tnúhu-áⁿ quée-xí: Yòhó xíchí cuéchí yúhú càchí-í sá ndácòo-n, duha quèe-xi tnúhu-áⁿ.

42 Te òré-ni-áⁿ ñí ndoto xíchí cuéchí-ăⁿ ñí ndacóo-xi ní nacaca cuu-xi, te ndècu-xi úxúú cuía-xi. Te òo ní cuñúhu nchaa ñáyiu sá dúcáⁿ ñí dándótó ñaha Jesús xii-xi. 43 Te Jèsús ní cáháⁿ víhí-gă dóho tátá-xi ndihí năná-xi sá vă yôo ñí cúnàhá-yu sá ñí dándótó ñaha-gă xii-xi. Te sáta dúcáⁿ

te ní xáhaⁿ-gă xii-yu sá cuñàhá-yu xii-xi sá cáxi-xí.

6

Jèsús ndécú-gă ñuú Nazàrét
(Mt. 13:53-58; Lc. 4:16-30)

1 Te Jèsús ní ndee-gá ñuú núú ñí dándótó-gă xíchí ñí xíhí-áⁿ, te cuánuhú-gá núú cúú ñuú-gá, te tnàhá cue téé xica cuu ndihí-gá cuánuhú ndihí-gá. 2 Te ndècu Jesús ñuú-gá ní tnàhá nduu ndètatú ñáyiu. Te nduu-ăⁿ cuánguihu-gá xití veñúhu dàcuaha ñaha-gă xii-yu. Te vâi ñáyiu ndèdóho nchaa tnúhu càháⁿ-gá, te xícunúhu vîhí-yu, te xĩtnàhá-yu:

—¿Ndéé ní sáháⁿ dácúhá téé-a núu ndéé duha váha càháⁿ-dé, nása ní quide-dé núu ndéé duha òo váha cùtnuní iní-dé, te ndàcu-dé quidé-dé nchaa sá vă yôo tnàhí ndàcu cada-i?

3 Te dícó carpintèrú cúú-dě, dícó déhe tá Màriá cúú-dě, te ñaní-dé cúú tē Jàcobó, ndihí té Chèé, ndihí té Júdás, ndihí té Xímú, te ñu-ni cue cúha-dé cúú ñáyiu ndècu ndihí-o ñuú-a —càchí-yu xĩtnàhá-yu.

Te ñá túú ní cuiní-gá-yu cáháⁿ ndihí váha ñàhá-yu xii-gá. 4 Te Jèsús ní xáhaⁿ-gă xii-yu:

—Te núu ñí téé càháⁿ tnúhu Yá Ndiòxí ná nāsáá-dé ñuú-dé dácúhá-dé ñáyiu tnúhu-gá, te nchaa ñáyiu ñuú-dé-áⁿ, ndihí nchaa ñáyiu ndècu ndihí-dé vehe-dé, ndihí nchaa ñáyiu cùu ndi mee-dé ñá túú nèhé-yu sá yíñùhu núú-dě, dico cue ñáyiu nchaa dava-gá ñuú chí nèhé-yu sá yíñùhu núú-dě —càchí-gá xăhaⁿ-gă xii-yu.

5 Te ñá túú ní quide tátna Jèsús vâi ñáyiu cuendá sá ñá túú ní sàndáá iní ñáhă-yu xii-gá, dico ní quide tátna-gá ñí úú ñáyiu cùhú ní sàndáá iní ñáhá xii-gá. Te ní tendaha ñaha-ni-gá xii-yu te ní ndúha-yu. 6 Te òo ní cuñúhu-gá sá dúcáⁿ ñá túú ní cuiní-yu quindáá iní ñáhă-yu xii-gá. Te sáta dúcáⁿ te ní xica-gá cuáháⁿ-gá nchaa dava-gá ñuú líhli càa yatni xiáⁿ cuendá dácúhá-gá ñáyiu tnúhu-gá.

Jèsús táuchìuⁿ-gá quíhíⁿ cue téé xìca cuu ndìhi-gá cáháⁿ-güedé tnúhu Yá Ndiöxí núú ñáyi

(Mt. 10:5-15; Lc. 9:1-6)

⁷ Te Jèsús ní cana-gá ndi ùxúú cue téé xìca cuu ndìhi-gá, te ní sáñaha-gã xii-güedé tnúhu ndee iní cundecu ndìhi-güedé cuèndá queñuhu-güedé nchaa espíritú cündìhi yucu ñávãha yìhi ñaha xii ñáyi. Te ní xáhaⁿ-gã xii-güedé sá ndi ndúú ndi ndúú-güedé quíhíⁿ-güedé cáháⁿ-güedé tnúhu Yá Ndiöxí núú ñáyi. ⁸⁻⁹ Te cùmání-gã caca-güedé quíhíⁿ-güedé, te ni xáhaⁿ-gã xii-güedé:

—Vá cánèhe-ndo ñunu cuhuⁿ ndachiuⁿ-ndo, te ni vã cánèhe-ndo sá cáxí-ndó, te ni vã cánèhe-ndo díhúⁿ, chí ìⁿ caa-ni tàtnu canehe-ndo, te chàu yíhí-ní-ndó-ãⁿ xíãⁿ-ni quihi-ndo, te vã cánèhe-gá-ndó ìngá ichi dóó-ndó chí òⁿ-ni dóó níhnú-ndó-ãⁿ xíãⁿ tnàhí-ni cuihnu-ndo te ñá túú tnàhí-gã ná canehe-ndo —càchí-gã xáhaⁿ-gã xii-güedé.

¹⁰ Te xáhaⁿ tùcu-gá:

—Te òré ná sàá-ndó ìⁿ ñuú, te ió ñáyi cáháⁿ ñáhã-yu xii-ndo vèhé-yu, te xíãⁿ-ni cundecu-ndo ndèé ná sàá nduu ndèe-ndo ñuú-áⁿ. ¹¹ Te núu ió dava ñuú ñá túú cuìní-yu cáháⁿ ndìhi ñaha vãha-yu xii-ndo, te ni ñà túú cuìní-yu cundedóho-yu tnúhu càháⁿ-ndó, te ndee-ni-ndo ñuú-áⁿ te naquidi-ndo ticáchúhmá ñi tñi sáhá-ndó cuèndá ná cùtnuní iní-yu sá ñà túú quide váha-yu. Te na càchí tnúhu ndáá-í xii-ndo sã ná sàá nduu càda ndáá Yá Ndiöxí cuéchi nchaa ñáyi, te cue ñáyi ducaⁿ na càda ñaha xii-ndo-áⁿ ïo-gá ndohó-yu dàvá-áⁿ dàcúxí dàtná ndoho cue ñáyi ñuú Sòdomá ndìhi cue ñáyi ñuú Gòmorra —càchí-gã xáhaⁿ-gã xii-güedé.

¹² Te cue téé-áⁿ ñi xica-güedé cuáháⁿ-güedé te ní ngüíta-güedé dácua-güedé cue ñáyi tnúhu Yá Ndiöxí, te xáhaⁿ-güedé xii-yu:

—Chí dándixi túu iní sá ñà túú quide váha-ndo ndècu-ndo, te dañà-ndo nchàa ichi cuehé ichi duha

ndècu-ndo. —càchí-güedé xáhaⁿ-güedé xii-yu.

¹³ Te vãi espíritú cündìhi yucu ñávãha yìhi ñaha xii ñáyi ta queñuhu-güedé yiqui cündú-yu cuáháⁿ, te vãi tucu ñáyi cùhú tá quide tátna-güedé cuáháⁿ chíhí ñaha-güedé acítí xii-yu te ndüha-yu.

Nàcuáa ní cuu ní xíhí té Juáa té dácuañdute ñaha xii ñáyi

(Mt. 14:1-12; Lc. 9:7-9)

¹⁴ Te nchaa xichi ní níhí ñáyi tnúhu nchaa nàcuáa quide Jesús, te tnàhá té Hèrodés téé yìndaha ñaha xii ñáyi ní níhí-dé tnúhu nchaa nàcuáa quide-gá, te ní cachí-dé:

—Té Juáa téé ní xóo dácuañdute ñaha xii ñáyi ní ndoto núu dàcáⁿ ndácú-dé quidé-dé nchaa sá vã yóo tnàhí ndacu cada —duha ní cachí-dé.

¹⁵ Te dava ñáyi càchí-yu sá tã Èliás téé ní xóo cáháⁿ tnúhu Yá Ndiöxí ndéé sanaha ní nasáá-dé.

Te davá-yu càchí-yu sá cúú-gã dàtná ìⁿ téé ní xóo cáháⁿ tnúhu Yá Ndiöxí ndéé sanaha. ¹⁶ Te té Hèrodés ní níhí-dé tnúhu nchaa nàcuáa càháⁿ-yu, te ní cachí-dé:

—Diu té Juáa téé ní táuchíuⁿ-í ní xehndé-güedé díquí-xi ní ndoto —càchí-dé.

¹⁷⁻¹⁸ Te duha ní cuu cùtnàhá ní sahani té Hèrodés té Juáa, chí dàvá-áⁿ ñi naqueheⁿ té Hèrodés-áⁿ ìⁿ ñaha nàni Herodiás ndécá-dé, te ñaha-áⁿ sà ní cándeca ñaha ñàní-dé té Lìpé. Te té Juáa ní xáhaⁿ-dè xii té Hèrodés sá ñà túú ní quide váha-dé sá dúcáⁿ ñi naqueheⁿ-dé ñaha ní cándeca ñàní-dé, núu sá cuèndá ñaha-áⁿ ñi táuchíuⁿ tã Hèrodés ní tñi-güedé té Juáa ní chihi ñaha-güedé vecaá, te ní dácútú ñaha-güedé xii-dé, te ducaⁿ ñi quide-dé cuèndá sá ndécá ñaha-dé xii-áⁿ.

¹⁹ Te ñaha nàni Herodiás ndécá tã Hèrodés-áⁿ ïo ní cuu úhú iní-aⁿ té Juáa, te ní cuini-aⁿ cahni-aⁿ-dé, dico ñà túú ní níhí-aⁿ nàcuáa cada-aⁿ. ²⁰ Te mee tã Hèrodés chí ní cùtnuní ndáá iní-dé sá tã Juáa cúú-dé ìⁿ téé quide mee-ni sá vãha, te quide ndáá-dé núu Yá Ndiöxí, te ní xóo yùhú ñáhá-dé

nũu xíáⁿ ñá túú ní dàña-dé ná cada ñaha ñaha ndeca-dé-áⁿ xii té Juáá. Te té Hèrodés-áⁿ ïo ní cudíí ìní-dé ní xíndedóho-dé nchaa tnúhu ní xáhaⁿ tẽ Juáá xii-dé, dico ñá túú ní sàni ìní-dé duuⁿ duuⁿ tñi-dé tnúhu-áⁿ. ²¹ Te ìⁿ nduu ní xóo vico vehe té Hèrodés ní quide càhnu-dé nduu ní cacu-dé. Te nduu-áⁿ ní níhí ñaha nàni Herodiás-áⁿ nàcuáa cada-aⁿ cuendá cuú té Juáá. Te nduu-áⁿ ní cáháⁿ té Hèrodés nchaa cue tée cùchiuⁿ, ndihí nchaa cue tée tàxi tnuní ñáhá xii cue sandadú, ndihí nchaa cue tée cuica ndècu distritú Galiléa cuendá cudini ndihí ñaha-dé xii-güedé nduu-áⁿ. ²² Te ndècu ìⁿ déhe yoco ñaha nani Herodiás-áⁿ, te xíchí-áⁿ ní quíhu-xi vehe núú cúú vico-áⁿ ní xita saha-xi mèi oré yíhí tẽ Hèrodés mèsá ndihí nchaa cue tée ní cáháⁿ-dé, te ío ní cudíí ìní-dé ndihí nchaa cue tée-áⁿ nàcuáa ní xita xíchí-áⁿ. Te té Hèrodés ní xáhaⁿ-dẽ xii-xi:

—Cácaⁿ núú-í nũu ná cuíni-n te taxi-í —càchí-dé xáhaⁿ-dẽ xii-xi.

²³ Te ní cacunehe-dé ndéé Yã Ndiõxí nàcuáa cutnùní ìní xíchí-áⁿ sã ndàá cuãñaha-dẽ nũu ná cúú sã ná càcáⁿ-xi núú-dẽ cuèi ndéé cuádava nchaa sã ndécú ndihí-dé, te núu na càcáⁿ-xi. ²⁴ Te sã dúcáⁿ ñí xáhaⁿ-dẽ xii-xi núú ní quee-xi quehé ní xáhaⁿ-xi xìi náná-xi:

—Náá, ¿ná cúú sã càcáⁿ-í núú tẽ Hèrodés? —càchí-xi xáhaⁿ-xi xii-aⁿ.

Te náná-xi-áⁿ ñí xáhaⁿ-aⁿ xii-xi:

—Cuáháⁿ cácaⁿ-n díquí tẽ Juáá tée dàcuandute ñaha xii ñáyiu —càchí-aⁿ xáhaⁿ-aⁿ.

²⁵ Te ndihí-ni cuándihu xíchí-áⁿ xití vehe núú yíhí tẽ Hèrodés-áⁿ, te xáhaⁿ-xi xii-dé:

—Cuíni-í sã mèi nduu vitna quehndé-n díquí tẽ Juáá tée dàcuandute ñaha xii ñáyiu te taxi-n, dico na cùhuⁿ ìⁿ xití cóhó taxi-n —càchí-xi xáhaⁿ-xi xii-dé.

²⁶ Te té Hèrodés ní ngüíta-dé ndihú víhí ìní-dé sã dúcáⁿ ñí xáhaⁿ-xi xii-dé, dico ñá túú ní cùyii-dé cúñaha-dẽ xii-xi sã vã cúú cuãñaha-dẽ sã xicáⁿ-xi, chi cuendá sã núú nchaa ñáyiu ní xáhaⁿ-dẽ sã cúú cuãñaha-dẽ nũu ná cúú sã ná càcáⁿ-xi, te ní cacunehe-dé ndéé Yã Ndiõxí nàcuáa

cutnùní ìní-xi sã ndàá cuãñaha-dẽ sã ná càcáⁿ-xi núú-dẽ. ²⁷ Te té Hèrodés-áⁿ ndihí-ni ní xáhaⁿ-dẽ xii ìⁿ sandadú sã quíhíⁿ-dé quehndé-dé díquí tẽ Juáá. ²⁸ Te sandadú-áⁿ ñí xica-dé cuáháⁿ-dé vecaá núú yíhí tẽ Juáá-áⁿ, te ní quexìo-dé te ní xehndé-ni-dé díquí tẽ Juáá, te ní chihi-dé ìⁿ xití cóhó te nèhe-dé cuánuhú ní sáha-dé xíchí xicáⁿ-áⁿ, te xíchí-áⁿ ñí nacuáha-xi náná-xi. ²⁹ Te òré ní níhí nchaa cue tée ní xica cuu ndihí ndíi Juáá-áⁿ tnúhu sã dúcáⁿ ñí sahani ñaha-güedé xii ndíi, te ní sáháⁿ-güedé ní ndocani-güedé yíqui cuñú ndíi te ní chindúxi-güedé.

Jèsús dácàxi-gá úhúⁿ mĩ cue tée te dèⁿ ñáyiu dèhí ndihí landú

(Mt. 14:13-21; Lc. 9:10-17; Jn. 6:1-14)

³⁰ Te nchaa cue tée ní táuchíúⁿ Jèsús cuáháⁿ cáháⁿ tnúhu Yá Ndiõxí núú ñáyiu ní ndexìo-güedé núú-gã te ní ngüíta-güedé nàcàni tnúhu-güedé nchaa nàcuáa ní quide-güedé ndihí nchaa nàcuáa ní dánèhé ñáhá-güedé xii-yu. ³¹ Te Jèsús ní xáhaⁿ-gã xii-güedé:

—Chí nèhé ná quíhíⁿ-ó ìⁿ xichi núú ñà túú ñáyiu ndetatú-ó —càchí-gá xáhaⁿ-gã xii-güedé.

Te ducaⁿ ñí xáhaⁿ-gã xii-güedé, chi ío cuéhé ñáyiu cuáháⁿ véxi-yu cùu-yu núú ndécú-gã. Te ni ñã nihí-gá nása cada-gã caxi-gá ndihí cue tée xica cuu ndihí-gá. ³² Te Jèsús cuánguee-gá bàrcú ndihí mee-ni cuè tée ní táuchíúⁿ-gã cáháⁿ tnúhu-gá, te cuáháⁿ-gá ndihí-güedé ìⁿ xichi núú ñà túú ñáyiu ndècu. ³³ Dico vãi ñáyiu ní cutnùní ìní-yu sã díú-gã ñúhú bàrcú-áⁿ cuáháⁿ ndihí cue tée xica cuu ndihí-gá, te nchaa ñuú cáá yàtni xíáⁿ ñí quee ñáyiu xixinú-yu cuáháⁿ núú ñí quidé-yu cuendá quexìo Jèsús, te sa ndécú-yu xíáⁿ ñí quexìo-gá. ³⁴ Te òré ní quene Jèsús xití bàrcú, te ní xiní-gá cuéhé víhí ñáyiu xixúcu núú ñí quexìo-gá-áⁿ, te ní cundàhú ìní ñáhá-gã xii-yu chi ndécú-yu dàtná xíndecu cue mbéé cue quití ñá túú tòli-xi, te ío vãi núú sã ñí ngüíta-gá

ní dácuahá ñaha-gá xii-yu. ³⁵ Te sátá tá cuàa cuáháⁿ te ní sáháⁿ cue téé xica cuu ndihi Jesús núú-gă, te xăhaⁿ-güedě xii-gá:

—Sa ní cuaa te ñá túú ñăyiu ndècu yatni iha. ³⁶ Văha-gá dandăca nchaa ñăyiu-a chi na quihíⁿ-yu nchaa vehe cãa xití yucu-a, ndihi nchaa ñuú cáa nchaa yatni iha cuaaⁿ-yu sá cáxí-yu —cächí-güedě xăhaⁿ-güedě xii-gá.

³⁷ Te Jèsús ní xăhaⁿ-gă:

—Mee-ndo chí cuăñaha sã ná cáxí-yu —cächí-gă xăhaⁿ-gă xii-güedě.

Te xăhaⁿ-güedě xii-gá:

—¿Te nása cada-ndí, chí xìni ñuhu-xi datná úú ciendú díhúⁿ denariú cuendá cuaaⁿ-ndí sá cáxí-yu? —cächí-güedě xăhaⁿ-güedě xii-gá.

³⁸ Te Jèsús ní xăhaⁿ-gă xii-güedě:

—Chí cuáháⁿ cundehe-ndo ñuú ná daha pãá ndécú ndihi-ndo te cachí tnúhu-ndo —cächí-gă xăhaⁿ-gă xii-güedě.

Te ní sáháⁿ ndéhé-güedě ñuú ná daha pãá ndécú, te ní xăhaⁿ-güedě xii-gá:

—Úhúⁿ duha-ná pãá ndihi úú-nă chácá ndécú —cächí-güedě xăhaⁿ-güedě xii-gá.

³⁹ Te Jèsús ní xăhaⁿ-gă xii nchaa ñăyiu sá ná ñihí tnáhă-yu cuu titní xichí-yu, te ngóo-yu nchaa núú cùhú cuí cãa xiáⁿ. ⁴⁰ Te ncháá-yu ní ngóo-yu, te dava xichí-yu ní ngóo ñⁿ ciendú-yu, te dava xichí-yu ní ngóo údico úxí-yu. ⁴¹ Te sátá ñí ndihí-yu ní ngóo, te ní queheⁿ Jèsús ndi ùhúⁿ pãá ndi úú chácá-ăⁿ, te ní ndacoto-gá andiⁿ te ní ndacáⁿ táhú-gă núú Yă Ndiöxí, te dătnúⁿ ní táhú cuèchi-gă pãá-ăⁿ te ní sãñaha-gă xii cue téé xica cuu ndihi-gá ní dăcãhñu-güedě nchaa ñăyiu-ăⁿ ní xexí-yu. Te diu-ni ducaⁿ ñí quide tucu-gă úú chácá-ăⁿ. ⁴² Te ncháá-yu ní xexí-yu ní ndahá xití-yu.

⁴³ Te sátá ñí túhú cóhõ-yu te ní nadatãcã-güedě nchaa sá ñí quendóo, te ní chítú ùxúú tnáhá tídihi mee-ni sã ñí quendóo núú ùhúⁿ-ni pãá, ndihi núú ùú-ni chácá. ⁴⁴ Te nchaa ñăyiu ní xexi-ăⁿ chí xñu úhúⁿ mĩl mee-ni cuè

tée chí diu-ni cue téé-ăⁿ ñí quíúndehu, te diñⁿ ñăyiu dihí ndihi cue landú.

Jèsús xicã-gă núú ndute

(Mt. 14:22-27; Jn. 6:16-21)

⁴⁵ Te òré-ni-ăⁿ ñí xăhaⁿ Jèsús xii cue téé xica cuu ndihi-gă sá quëe-güedě bàrcú codonùu-güedě quihíⁿ-güedě ñⁿ ñuú nání Betsaidá cáá ndàa ingá xio yuhu làgúná núú ndécú-güedě-ăⁿ, te mee-gă quendóo-gă cada ndee ñí tnáhă-gă ndihi cue ñăyiu. ⁴⁶ Te sátá ñí yăha ní quide ndee ñí tnáhă-gă ndihí-yu, te ní xica-gă cuáháⁿ-gă ñⁿ tindúú cáá yàtni xiáⁿ cuendá cáhãⁿ ndihi-gă Yă Ndiöxí. ⁴⁷ Te òré sa ní cundiquiⁿ te bàrcú sá ñúhú cuè téé xica cuu ndihi-gă sa cuáhãⁿ-xi ndéé cuádava xití làgúná-ăⁿ, te mee-gă ndécú-gă ñⁿ núú tindúú. ⁴⁸ Te túu ndèhe-gă sá sùúⁿ ndòho-güedě tá dăcaca-güedě bàrcú-ăⁿ cuáhãⁿ, chí cuendá ndàa nacuáa cuáhãⁿ-xi-ăⁿ duha véxi táchí te nătúndaha-xi. Te ingá nduu-ăⁿ tàculhndã-gă sa ní cuyatni vii-nă Jèsús bàrcú ñúhú-güedě-ăⁿ, dico núú ndute tá xica-gă cuáhãⁿ te luha-ná te yăha ñaha-gă xii-güedě ní cùu. ⁴⁹⁻⁵⁰ Te òré ní xiní ñáhã cuè téé ñuhu bàrcú-ăⁿ xii-gă te ní yùhú-güedě ní cana saa-güedě, chí ní sani ñí-güedě sá ñⁿ almã cúú-gă. Te ní xăhaⁿ-gă xii-güedě:

—¡Ñíí cunduu-ndo, vá yùhú-ndó, chí yùhú cúú-í! —cächí-gă xăhaⁿ-gă xii-güedě.

⁵¹ Te Jèsús cuánguee-gă xití bàrcú ñúhú-güedě-ăⁿ, te sátá cuánguee-gă te òré-ni ní ngüñí táchí, te ní cuñúhu vihi-güedě. ⁵² Te ducaⁿ chí cue téé-ăⁿ ñà túú ní cùtnuní ñí-güedě nása quide-gă, chí ñã túú ní cùtnuní váha ñí-güedě năcuáa ndùu sá ñí quide-gă òré ní nadacayã-gă pãá, chí ío ñí dĩquí-güedě.

Jèsús quidé tãtna-gă ñăyiu cùhú ñuú
Genesàrét

(Mt. 14:34-36)

⁵³ Te ní yăha-güedě ndihi-gă ndàa ingá xio yuhu làgúná, te ní sãá-güedě ndihi-gă yucu cue téé ñuú Genesàrét.

Te yàcáⁿ ní dácútú ndèé-güedé bàrcú-güedé yuhu làgúná. ⁵⁴ Te òré ní quene Jèsús ndihi cue téé xìca cuu ndihi-gá xití bàrcú, te nchaa ñáyiú xíndecu-áⁿ ñí cutnùnì iní-yu sá díú-gă. ⁵⁵ Te ñáyiú-áⁿ ndíhi-ni ní sáháⁿ-yu nchaa núú xíndecu cue ñáyiú cùhú, te cue ñáyiú cùhú-áⁿ ñí quée-yu xító nchìdo ñahá-yu cuáháⁿ ndí tnahá ñí ñí xichi núú ñíhi-yu tñúhu quèxio Jèsús. ⁵⁶ Te nchaa ñúú náhnú ndíhi nchaa ñúú líhli núú cuáháⁿ Jèsús, ducaⁿ xíndecá-yu nchaa ñáyiú cùhú cuáháⁿ xití ñúú sàcáⁿ ñáhă-yu núú-gă cuendá cada tátna ñaha-gă xii-yu. Te ñíu-ni ducaⁿ xíquidé-yu nchaa dava-gă xichi núú cuáháⁿ-gá núú xíndecu cue ñáyiú, te càháⁿ ndàhú-yu núú-gă sá ná dáñá-gă tnándeé cue ñáyiú cùhú-áⁿ cuèdicó luha yuhu dǒó-gă cuendá ndúha-yu. Te nchaa ñáyiú cùhú ní tnándeé yuhu dǒó-gă ní ndúha-yu.

7

Cuendá nchaa sá quidé-xí ngündecu cuéchi ñáyiú
(Mt. 15:1-20)

¹ Te ñúú Jerusálén ní quee cue téé dàcuaha ñaha xii ñáyiú nchaa tñúhu ní chídó tñùnì ndíi Moisés, te ní quexìo-güedé núú ndécú Jèsús, te tnahá cue téé cùu fariséú ní quexìo ndíhi-güedé. ² Te cue téé-áⁿ ñí xínì-güedé sá dàva cue téé xìca cuu ndíhi Jèsús ñá túú ndàha-güedé dàtná ndáhá mèe cue téé cùu fariséú-áⁿ òré caxi-güedé. Te xíáⁿ núú cue téé ní quexìo-áⁿ ñí cáháⁿ cuèhé-güedé cuendá cue téé xìca cuu ndíhi-gă. ³ Te ducaⁿ chi nchaa cue téé cùu fariséú-áⁿ ndíhi nchaa ñáyiú isràél nchìcúⁿ nihnú-yu quidé-yu dàtná ní xóo cada nchaa cue ñaní tnáhă-yu ní xíndecu ndéé sanaha, chi nchaa ñáyiú-áⁿ và caxí-yu te núú và ndáhă-yu dàtná ní xóo ndaha nchaa cue ñaní tnáhă-yu ní xíndecu ndéé sanaha-ăⁿ. ⁴ Te ñáyiú-áⁿ ndí tnahá òré cuáháⁿ-yu núú yăhu te nàsáá-yu, te ndàhă-yu nàcuáa sàni iní-yu ndùvétú iní Yă Ndiǒxí, te núú và dúcáⁿ càdá-yu te

vá caxí-yu. Te tnahá náqueté-yu vàsú sá sácùhuⁿ sá xíhí-yu, ndíhi lítu, ndíhi cóhó càá, ndíhi càamá. Te nchaa xéhé náqueté-yu nàcuáa sàni iní-yu ndùvétú iní Yă Ndiǒxí. Te ío-gá titní sá ñí xóo cada nchaa ñáyiú ní xíndecu ndéé sanaha-ăⁿ nchìcúⁿ nihnú-yu quidé-yu. ⁵ Te cue téé cùu fariséú-áⁿ, ndíhi cue téé dàcuaha ñaha xii ñáyiú nchaa tñúhu ní chídó tñùnì ndíi Moisés-áⁿ ñí xáhaⁿ-güedé xii Jèsús:

—¿Ná cuendá cue téé xìca cuu ndíhi-n ñá túú nàquete-güedé ndaha-güedé òré caxi-güedé dàtná ní cachí nchaa cue téé ní xíndecu ndéé sanaha-i? —càchí-güedé xáhaⁿ-güedé xii-gă.

⁶ Te Jèsús ní xáhaⁿ-gă xii-güedé:

—Nchòhó cúú-ndó cuè téé ío dàndahú mèé-xí chi càchí-ndó sǎ ío quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tñùnì ndíi Chàíá téé ní xóo cáháⁿ tñúhu Yă Ndiǒxí ndéé sanaha núú tütú-gă núú càháⁿ-xi nàcuáa ní cáháⁿ-gă cuendá-ndó, te duha ní cachí-gă:

Ñáyiú-a càchí-yu sá ío càhnu cuu-í, dico dicó-ni yuhu càháⁿ-yu, chi ñá túú ñúhu iní ñáhă-yu xii-í.

⁷ Te àúⁿ nǎ cuu chíñuhu ñahá-yu xii-í, chi ñá túú vèdana ndéé nándíhi-xi,

chi cue ñáyiú-a dàcuahá-yu cue tnahá ñáyiú-yu nàcuáa cundecú-yu, dico mee-ni tñúhu sá ñí cahu iní cue ñáyiú ñuyíú-a càháⁿ-yu.

Duha ní chídó tñùnì ndíi Chàíá núú tütú Yă Ndiǒxí nàcuáa ní cáháⁿ-gă cuendá-ndó. ⁸ Te nchòhó ní dáñá-ndó nàcuáa ní cachí Yă Ndiǒxí cada-ndo, te nchìcúⁿ nihnu-ndo quide-ndo nàcuáa ní cahu iní cue ñáyiú ñuyíú-a, chi nàquete-ni-ndo lítu, te nàquete-ni-ndo vàsú sácùhuⁿ sá xíhí-ndó nàtava-ndo nàcuáa ní xóo cada ñáyiú-áⁿ ñí xóo naqueté-yu nchaa xíáⁿ, te nándi-gă nchaa núú sǎ quidé-ndó —càchí Jèsús xáhaⁿ-gă xii-güedé.

⁹ Te ní xáhaⁿ tùcu-gă xii-güedé:

—Te nchòhó, ñá túú cuínì-ndó càda-ndo nàcuáa cuínì Yă Ndiǒxí,

chi mee-ni nàcuáa ní cachí cue téé ní xíndecu ndéé sanaha nchícúⁿ nihnu-ndo quíde-ndo. ¹⁰ Te ndíi Moisés ní cachí ndíi sá ncháá ñáyiú canehé-yu sá yíñùhu núú tātá-yu ndíhi núú nǎǎ-yu. Te nchaa ñáyiú na càháⁿ úhú cuendá tātá-yu àdi cuendá nǎǎ-yu te cahni ñaha-güedé xii-yu ní cachí ndíi. ¹¹ Te nchòhó càchí-ndó sǎ ñú ñⁿ téé na cǔñaha-dě xii tātá-dě ndíhi nǎǎ-dě sá sǎ ní sani iní-dé cuañaha-dě xii-yu cùu-xi Corbán, te ñá túú-gǎ xíní ñùhu-xi sá cuañaha-dě xii-yu, te tnúhu Còrbán-áⁿ quée-xí: Sá cúú cuendá Yǎ Ndióxi. ¹² Te sá dúcáⁿ ná càháⁿ ñⁿ téé-áⁿ te nchòhó chíndèe tnúhu-ndo-dě cuendá sá vǎ chíndèe-gǎ-dé tātá-dě ndíhi nǎǎ-dě. ¹³ Te ducaⁿ quíde-ndo chi ní dáquée tíhú-ndó nàcuáa ní cachí Yǎ Ndióxi cada-ndo, te mee-ni nàcuáa ta quíde cue téé ñuyíú-a véxi nchícúⁿ nihnu-ndo quíde-ndo, te diu-ni ducaⁿ ta sànu ichi tnaha-ndo véxi, te nándi-gǎ nchaa sá cáhú iní-ndó quíde-ndo — cachí-gǎ xǎhaⁿ-gǎ xii-güedé.

¹⁴ Te Jèsús ní xǎhaⁿ tùcu-gǎ xii cue ñáyiú xíndecu-áⁿ:

—Chí táquixi ndehe iha, te cundedóho váha-ndo tnúhu na càháⁿ-í-a te ío váha cuáha-ndo cuendá. ¹⁵ Nchaa sá xéxi-ndó chi ñá túú nǎ quíde-xí iní-ndó, dico nchaa sá cuèhé sá dúhá sàni iní-ndó quíde-ndo, nchaa xǎⁿ quíde-xí ndècu cuéchi-ndo. ¹⁶ Te nchaa nchòhó ñáyiú ndèdóho nchaa tnúhu càháⁿ-í-a ío váha chí cuáha cuendá —càchí-gǎ xǎhaⁿ-gǎ xii-yu.

¹⁷ Te Jèsús ní dándõo-gǎ nchaa ñáyiú núú xixúcu-yu-áⁿ te cuándihu-gǎ xití vehe. Te cue téé xica cuu ndíhi-gǎ ní xicáⁿ tnúhú-güedé núú-gǎ ñúu nása quée-xi cuendú ní cani-gǎ núú ñáyiú-áⁿ. ¹⁸ Te ní xǎhaⁿ-gǎ xii-güedé:

—¿Te náa tnàhá nchòhó ñá túú ní təcú tnùn-ndó cuendú ní cani-í núú ñáyiú-áⁿ? Nchaa sá xéxi-yu cuánguee xití-yu ñá túú quíde-xi iní-yu nàcuáa ngúndecu cuéchi-yu. ¹⁹ Chi ñá díú iní-yu cuánguee-xi chi cuánguee ndáá-xi xití-yu, te nàyáha

ñaha-xi xii-yu —càchí-gǎ xǎhaⁿ-gǎ xii-güedé.

Te sá dúcáⁿ ní càháⁿ-gǎ te ní dátüu-gǎ sá cúú càxi-o nchaa núú sǎ cúú càxi-o. ²⁰ Te ní xǎhaⁿ tùcu-gǎ xii-güedé:

—Nchaa sá cuèhé sá dúhá quíde ñáyiú xǎⁿ cǎcú nihnu-xi iní-yu, te nchaa xǎⁿ quíde-xí ndècu cuéchi-yu. ²¹ Te iní-yu-áⁿ cǎcú nihnu nchaa sá cuèhé sá dúhá, chi sàni cuehé sání dùha iní-yu. Te cue téé càháⁿ ndíhi-güedé ñadìhí te ñá díú ñadìhí-güedé cúu-yu, te diu-ni ducaⁿ quíde cue ñáyiú díhí càháⁿ ndíhi-yu téé te ñá díú yǎ-yu cùu-güedé. Te sàhní-yu cue tnàha ñáyiú-yu, te mee-ni ichi díí iní cúdí iní-yu cundecú-yu. ²² Te dùhu ndachiuⁿ tnahá-yu, te xihó-yu cundecu ndíhi-yu sá ndécú ndíhi tnaha ñáyiú-yu, te ío quíde úhú iní-yu sá cúú-xí tnàha ñáyiú-yu, te ío dándahú tnáhǎ-yu, te mee-ni nchàa sá cuèhé sá dúhá cùdí iní-yu quíde-yu, te ío cuédú iní-yu, te ío yiti yùhú-yu, te ío quíde cahnú-yu mée-yu, te quíde-yu nándi-gǎ sá ñá túú tàú-yu cadá-yu. ²³ Te nchaa sá cuèhé sá dúhá-áⁿ cǎcú nihnu-xi iní-yu, te nchaa xǎⁿ quíde-xí ndècu cuéchi-yu, te ñá túú cùu-xi sá váha sá cúú-xí iní-yu.

Ñⁿ ñadìhí véxi ñúú xicá ní sándáá iní-aⁿ Jèsús

(Mt. 15:21-28)

²⁴ Te ní xica Jèsús cuáháⁿ-gǎ ndéé yucu cue téé ñúú Tírú, ndíhi yucu cue téé ñúú Sìdón. Te òré ní quexìo-gǎ xǎⁿ te cuánguìhu-gǎ ñⁿ vehe te xǎⁿ cundecu-gǎ, te cuíní-gǎ sá vǎ quíní ñáyiú sá xǎⁿ ndécú-gǎ ní cùu, dico dai ní níhí-yu tnúhu. ²⁵ Te ñⁿ ñadìhí ndécú ñⁿ déhe yoco-aⁿ, te yíhi ñaha espíritú cundíhi yucu ñávàha xii-xi, te ñaha-áⁿ ío ndíhi ní níhí-aⁿ tnúhu sá ní quexìo Jèsús xǎⁿ ñúu ní sáháⁿ-aⁿ núú ndécú-gǎ, te ní ngüíñí xití-áⁿ núú-gǎ. ²⁶ Te ní ngüíta-aⁿ càháⁿ ndàhú-aⁿ núú-gǎ, te xǎhaⁿ-aⁿ sǎ ñúu vá cundèe iní-gǎ queñuhu-gǎ espíritú

cúndìhi yucu ñávãha yìhi ñaha xii déhe-aⁿ. Dico ñá díú ñaha israél cúú-áⁿ chi ñaha ñuú Sirofènicíá cúú-áⁿ te tnúhu griégú cúú tnúhu-aⁿ. ²⁷ Te xíãⁿ núu ní xáhaⁿ Jèsús xii-aⁿ:

—Daña na càxi tnaa ncha landú chítú xití-güexi, te dätñuní caxi cue iná, chi ñá túú nduu váha-xi queheⁿ-o sã xéxí landú te cuáha-o iná —càchí-gá xãhaⁿ-gã xii-aⁿ.

²⁸ Te ní xáhaⁿ-aⁿ xii-gá:

—Mèstrú, ndáá-ni càháⁿ-n, dico iná chi nàdatacá-güedi sá ngóyó yùhu cóhó landú —càchí-aⁿ xãhaⁿ-aⁿ xii-gá.

²⁹ Te Jèsús ní xáhaⁿ-gã xii-aⁿ:

—Ío váha ní càháⁿ-n, te cuanùhú te ñá túú-gã ná cani iní-n, chi sa ní quee espíritú cúndìhi yucu ñávãha yìhi ñaha xii déhe-n —càchí-gá xãhaⁿ-gã xii-aⁿ.

³⁰ Te ñaha-áⁿ ñi nasáá-aⁿ vehe-aⁿ te càa déhe-aⁿ núú camá, dico ñá túú-gã espíritú cúndìhi yucu ñávãha yìhi ñaha xii-xi chi sa ní quee ñaha-xi.

Jèsús quidé tátna-gá ñi téé ñá cúú càháⁿ váha te doho-dé

³¹ Te Jèsús ní ndee-gá yucu cue téé ñuú Tírú te ní yáha-gá yucu cue téé ñuú Sidón, ndihi yucu ndi ùxí ñuú nání Dècápolís, te ní sáá-gá ndéé yuhu làgúná distritú Galiléa.

³² Te xíãⁿ ndécú-gã ní quexio ñáyi ndéé núú-gã ndécã-yu ñi téé ñá cúú càháⁿ váha-dé te doho-dé. Te càháⁿ ndàhú-yu núú-gã sá ná tëndaha ñaha-gá xii-dé cuèndá ndúha-dé.

³³ Te Jèsús ní queñuhu ñaha-gã xii-dé tnuú-yu, te ndèca ñaha-gá cuáhãⁿ ñi xio, te ní dáquihu-gá díquí ndáhã-gã yaú lóho-dé, te ní dácánù-gá díí-gá díquí ndáhã-gã, te ní tendaha-gã yàa-dé. ³⁴ Te ní ndacoto-gá andi te ní sánuu iní-gá, te ní càháⁿ-gá tnúhu mee-gã, te xãhaⁿ-gã:

—jěfatá! —càchí-gá xãhaⁿ-gã xii-dé.

Te tnúhu-áⁿ queé-xí: Nacaáⁿ yòhó lóho. ³⁵ Te òré-ni-áⁿ ñi nacaáⁿ lóho-dé, te ní nduu váha yàa-dé, te ní cuu càháⁿ váha-dé. ³⁶ Te Jèsús ní càháⁿ víhí-gã dóho ñáyi ndihi ñaha xii téé ní quide tátna-gá-áⁿ sã vã yõ ñi cúñãhá-yu sá ñi quide tátna ñaha-gã xii-dé, dico

uuⁿ-gá ní quidé-yu ní càháⁿ-yu núú ñáyi sá ñi quide tátna-gá téé-áⁿ. ³⁷ Te nchaá-yu ío ní cuñúhu-yu, te ní xitnãhá-yu:

—Váha víhi quide-dé, chi ncha-ni ndàcu-dé quidé-dé, chi quide tátna-ni-dé ñáyi doho, te quide tátna-ni-dé ñáyi ñihí —càchí-yu xitnãhá-yu.

8

Jèsús dácãxi-gá cúmí mĩ ñáyi (Mt. 15:32-39)

¹ Te ñi nduu tucu ío cuéhé ñáyi ní tacá núú ndécú Jèsús, te ñá túú tnàhí sá cáxi-yu. Te ní cana-gá cue téé xica cuu ndihi-gá, te ní xáhaⁿ-gã xii-güedé:

² —Yúhú, cùndahú iní-í ncha ñáyi-a chi sa ní cuu úní nduu ndècu ndihi ñahã-yu xii-o ìha, te ñá túú tnàhí ná sá cáxi-yu. ³ Te núu na nàtendaha-í-yu núhú tnãmã-yu vehé-yu, te cuneé-yu docó ichi, chi davá-yu ío xica ndécú-yu —càchí-gá xãhaⁿ-gã xii-güedé.

⁴ Te ní xáhaⁿ-güedé xii-gá:

—¿Te ndéé níhí-ó sã cuãñaha-o càxi ncha ñáyi-a, te ìha ñá túú ñã ío chi cùu-xi xití yucu-i? —càchí-güedé xãhaⁿ-güedé xii-gá.

⁵ Te Jèsús ní xicãⁿ tnúhú-gã núú-güedé, te xãhaⁿ-gã:

—¿Ná daha-gá pàá ndécú ndihi-ndo-i? —cachí-gá xãhaⁿ-gã xii-güedé.

Te ní xáhaⁿ-güedé xii-gá:

—Ndècu ndihi-ndí úsã-gã tnàhá —càchí-güedé xãhaⁿ-güedé xii-gá.

⁶ Te Jèsús ní xáhaⁿ-gã xii ncha ñáyi sá ngõo-yu nchaá-yu, te ní ngóo-yu, te ní queheⁿ-gã ndi úsã pàá-áⁿ, te ní ndacãⁿ táhú-gã núú Yã Ndiõxí. Te dätñuní ní táhú cuèchi-gá te ní sãñaha-gã xii cue téé xica cuu ndihi-gá ní dácãñu-güedé ncha ñáyi-áⁿ. ⁷ Te ndècu ndihi-güedé ñi úú chácá lĩhi, te diu-ni ducaⁿ ñi quide-gá ní ndacãⁿ táhú-gã núú Yã Ndiõxí. Te dätñuní ní táuchíúⁿ-gã ní dácãñu ñaha-güedé xií-yu. ⁸ Te nchaá-yu ní xexí-yu ní ndahã xití-yu. Te sátá ñi túhú cóhõ-yu te ní nadatãcã-güedé

nchaa sá nǐ quendóo, te ní chítú ũsá tñàhá tídihi mee-ni sǎ nǐ quendóo-án.
 9 Te núú ncháá ñǎyiu ní xexi-án xǐnu dàtná cúmí mǐl-yu. Te sátá nǐ yáha ní dácáxí ñàha Jesús xii-yu te ní dándácá ñàha-gá. 10 Te dàtnùnì cuánguee-gá bàrcú ndihi cue téé xica cuu ndihi-gá cuáhán-gá ndihi-güedé yucu cue téé ñúú Dalmànutá.

Cue téé cùu fariséú xǎhaⁿ-güedě xii Jèsús cada-gá ñⁿ sá vǎ yǒo tñàhí ndàcu cada

(Mt. 16:1-4; Lc. 12:54-56)

11 Te núú nǐ quexìo Jesús xián nǐ sáá cue téé cùu fariséú, te ní ngüíta-güedé nándi tñúhu xǎhaⁿ-güedě xii-gá xító ndèé ñàhá-güedě. Te xǎhaⁿ-güedě sá ná cádá-gǎ ñⁿ sá vǎ yǒo tñàhí ndàcu cada cundehe-güedé nàcuáa cutnùnì iní-güedé nǔu ndáá sá Yǎ Ndiöxí ní tendaha ñàha-gá xii-gá véxi-gá ñuyú-a. 12 Te ní sánuu iní-gá te ní xǎhaⁿ-gǎ xii-güedé:

—Nchaa nchòhó ñáyiu ndècu ñuyú-a cuiní-ndó càda-í ñⁿ sá vǎ yǒo tñàhí ndàcu cada nacúáa cutnùnì iní-ndó nǔu ndáá sá Yǎ Ndiöxí chindèe ñàha-gá xii-í. Dico na cǎchí tñúhu ndáá-í xii-ndo sǎ vǎ cáda-í sá cuiní-ndó —cǎchí-gá xǎhaⁿ-gǎ xii-güedé.

13 Te ní dándõo-gá ñáyiu xǐndecu-án, te cuánde-gá bàrcú ndihi cue téé xica cuu ndihi-gá te cuáhán-gá ndihi-güedé ndàa ñngá xio yuhu làgúná.

Nàcuáa quìde cue téé cùu fariséú

(Mt. 16:5-12)

14 Te ní cunaa-güedé canehe-güedé sá cáxí-güedě quíhíⁿ, te ñⁿdì-ni paá ndécú xití bàrcú-án nǐ naníhí-güedě. 15 Te Jèsús ní cáhán-gá dóho-güedé, te xǎhaⁿ-gǎ xii-güedé:

—Na cǎchí tñúhu-í xii-ndo sǎ ño quíhí iní-ndó cùndecu-ndo te vǎ cáda cuendá tñàhí-ndo lèvadurá cue téé cùu fariséú, ndihi levadurá cue téé cùndihi té Hèrodés —cǎchí-gá xǎhaⁿ-gǎ xii-güedé.

16 Te ní ngüíta-güedé xǐtñàha-güedé:

—Cuendá sá ñà túú ní cǎnehe-o paá quixi núu xián duha cǎhán-gá —cǎchí-güedé xǐtñàha-güedé.

17 Te Jèsús ní cutnùnì iní-gá nàcuáa ndùu tñúhu xǐtñàha-güedé, núu ní xǎhaⁿ-gǎ xii-güedé:

—¿Ná cuendá da sá ñà túú ní cǎnehe-ndo paá quixi cǎhán-ndó? Te ñà díú cuendá paá-án ní cǎhán-í, te dícó-ni sá méé-ndó ñà túú quìde cuendá váha-ndo nàcuáa ndùu tñúhu cǎhán-í, te ni ñǎ tècú tñùnì-ndó chí ío ñi díquí-ndó. 18 Te cuèi ndèhe-ndo dico ñà túú cùtñunì iní-ndó nǎ cúú nchaa sá quìde-í, te cuèi ndédóho-ndo nchaa tñúhu cǎhán-í dico ñà cùtñunì iní-ndó nǎsa ndùu-xi, te ni ñǎ ndácú iní-ndó nchaa sá tá quìde-í véxi. 19 Te chí dándàcu iní cùtñàhá ní táhú cuèchi-í úhúⁿ-ni paá te ní xexi úhúⁿ mǐl mee-ni cuè téé chí diu-ni cue téé-án nǐ quíúndehu. Te chí cǎchí tñúhu ná daha tídihi ní chítú mee-ni sǎ nǐ quendóo òré ní nadatácá-ndó —cǎchí-gá xǎhaⁿ-gǎ xii-güedé.

Te ní xǎhaⁿ-güedě xii-gá:

—Úxúú tñàhá tídihi ní chítú mee-ni sǎ nǐ quendóo —cǎchí-güedé xǎhaⁿ-güedě xii-gá.

Te xǎhaⁿ tùcu-gá:

20 —Te cùtñàhá ní táhú cuèchi tucu-í úsá tñàhá paá ní xexi cúmí mǐl ñáyiu, te chí cǎchí tñúhu ná daha tucu tídihi ní chítú mee-ni sǎ nǐ quendóo —cǎchí-gá xǎhaⁿ-gǎ xii-güedé.

Te ní xǎhaⁿ-güedě xii-gá:

—Úsá tñàhá tídihi ní chítú mee-ni sǎ nǐ quendóo —cǎchí-güedé xǎhaⁿ-güedé xii-gá.

21 Te Jèsús ní xǎhaⁿ tùcu-gá xii-güedé:

—Vitna, ¿te sa ní tecú tñùnì-ndó tñúhu ní cǎhán-í ñⁿ ñàhá? —cǎchí-gá xǎhaⁿ-gǎ xii-güedé.

Jèsús quìde tǎtna-gá ñⁿ té cuáá ñúú Bètsaidá

22 Te Jèsús ní sáá-gá ndihi cue téé xica cuu ndihi-gá ñúú Bètsaidá. Te ñúú-án ndécú-gǎ ní quexìo ñáyiu núú-gǎ tánèhé-yu ñⁿ té cuáá, te cǎhán ndáhú-yu núú-gǎ nǔu vǎ cùndèe iní-gá tendaha ñàha-gá xii-dé cuendá ndúha núú-dě. 23 Te Jèsús ní tñi-gá ndaha téé cuáá-án, te ní queñuhu ñàha-gǎ tnuú-yu, te ndèca ñàha-gá

cuáháⁿ ìⁿ xio yuhu ñùú. Te yàcáⁿ ní dácánùu-gá díi-gá núú-dě te ní tendaha ñàha-gá xii-dé, te dàtnùní ní xícaⁿ tnúhú-gá núú-dě, te xàhaⁿ-gá:

—¿Cùtnuní núú-n-àⁿ? —càchí-gá xàhaⁿ-gá xii-dé.

²⁴ Te tée cuàá-áⁿ ñí ndonehe núú-dě, te xàhaⁿ-dě xii-gá:

—Cùtnuní núú-í ndéhè-í nchaa cue té-àⁿ, dico dà ndáa yutnu cuii ndáa-güedé te xíca-güedé —càchí-dé xàhaⁿ-dě xii-gá.

²⁵ Te Jèsús ní tendaha tùcu-gá núú-dě te ní cuu ní ndacoto váha-gá-dé, te òré-áⁿ ñí ndúha núú-dě. Te nchaandi túhú sá ndéhé-dě ní cutnùní váha núú-dě nándi cùu nchaa xíáⁿ. ²⁶ Te ní xáhaⁿ Jèsús xii-dé:

—Vitna te núhú-n, dico ndáa ichi vehe-n nùhú-n te ñá díú dà xití ñuú quíhíⁿ-n, te vá yòo ìⁿ cúñaha-n sá yùhú ní quide tátna-í núú-n ñí ndúha —càchí-gá xàhaⁿ-gá xii-dé.

Té Pèlú xàhaⁿ-dě xii Jèsús sá díú-gá cúú-gá Crìstú

(Mt. 16:13-20; Lc. 9:18-21)

²⁷ Te Jèsús ní xica-gá cuáháⁿ-gá ndihí cue té xíca cuu ndihí-gá nchaa ñuú líhli càa ñuú Cèsareá Filipú, te òré ñúhú-gá ndihí-güedé ichi te ní xícaⁿ tnúhú-gá núú-güedé, te xàhaⁿ-gá xii-güedé:

—Chí càchí tnúhu nása càháⁿ ñáyiu cuèndá-í. ¿Yoo cùu-í càchí-yu-va? —càchí-gá xàhaⁿ-gá xii-güedé.

²⁸ Te ní xáhaⁿ-güedé xii-gá:

—Davá-yu càchí-yu sá cúú-n ndíi Juáá té ní xóo dacuàndute ñaha xii ñáyiu, te davá-yu càchí-yu sá cúú-n tē Èliás, te dava tucú-yu càchí-yu sá cúú-n ìⁿ té ní xóo càháⁿ tnúhu Yá Ndiòxí ndéé sanaha, duha càchí-yu —càchí-güedé xàhaⁿ-güedé xii-gá.

²⁹ Te ní xícaⁿ tnúhú tùcu-gá núú-güedé, te xàhaⁿ-gá xii-güedé:

—Te nchòhó, ¿yoo sàni iní-ndó cùu-í-i? —càchí-gá xàhaⁿ-gá xii-güedé.

Te té Pèlú ní xáhaⁿ-dě xii-gá:

—Yòhó cúú-n Crìstú Yaá ní tendaha Yá Ndiòxí véxi ñuyíú-a —càchí-dé xàhaⁿ-dě xii-gá.

³⁰ Te Jèsús ní càháⁿ-gá dóho-güedé, te xàhaⁿ-gá:

—Vá yòo ìⁿ cúñaha-ndo yòo cuu-í —càchí-gá xàhaⁿ-gá xii-güedé.

Jèsús càháⁿ-gá sá càhni ñàha-güedé xii-gá

(Mt. 16:21-28; Lc. 9:22-27)

³¹ Te Jèsús ní ngüíta-gá xitnùhu-gá cue té xíca cuu ndihí-gá nàcuáa yáha-gá, te xàhaⁿ-gá xii-güedé:

—Yúhú Té e cùu ñaní tnáhá-ndó nchàa-ndo chi ío ndoho-í, chi daquée tíhú ñáhá nchàa cue té cùu sacuéhé núú ñáyiu israél, ndihí cue dútú cúnùu, ndihí cue tée dàcuaha ñaha xii ñáyiu nchaa tnúhu ní chídó tnùní ní chídó tnùní ndíi Moisés, nchaa cue té-àⁿ dàquee tíhú ñáhá-güedé xii-í. Te sáa nduu te cahni ñaha-güedé xii-í, dico nduu úní sá cùu-í te ndoto-í —càchí-gá xàhaⁿ-gá xii-güedé.

³² Te ducaⁿ ní càháⁿ Jèsús núú cue té xíca cuu ndihí-gá nàcuáa tecú tnùní váha-güedé tnúhu càháⁿ-gá. Te té Pèlú ní cana ñaha-dě xii-gá ìⁿ xio, te ní ngüíta-dé ténáa ñáhá-dě xii-gá ní cùu. ³³ Dico Jèsús ndihí-ni ní nchócuíhnu-gá ní ndàcoto-gá núú nchàa-güedé chi ndàa sátá-gá xíndecu-güedé, te ní ngüíta-gá ténáa-gá té Pèlú, te xàhaⁿ-gá xii-dé:

—¿Xocuíñí yòhó núú-í-a, chi dàtná càháⁿ yucu ñávàha càháⁿ-n! Chi ñá túú sàni iní-ò dàtná sání iní Yá Ndiòxí, chi ìⁿ-ni sàni iní-ò ndihí dava-gá cue ñáyiu ndècu ñuyíú-a —càchí-gá xàhaⁿ-gá xii-dé.

³⁴ Te Jèsús ní cana-gá nchaa cue té xíca cuu ndihí-gá, ndihí nchaa ñáyiu xíndecu-áⁿ, te ní xáhaⁿ-gá:

—Nchaa ñáyiu cuíni chitnahá ñáhá xii-í, te xini ñuhu-xi vá cáda-gá-yu sá sání iní mée-yu, te ío cada ndee iní-yu cundecu túha-yu ndohó-yu cuèndá-í, te cuéi na ndòhó-yu dàtná ndoho-í. ³⁵ Te nchaa ñáyiu cuíni sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiu ñá túú tnàhí yùhú cuéi nándi sá ná yàha-yu cundecú-yu ñuyíú-a sá cuèndá-í, ndihí sá cuèndá tnúhu-í, te

ñáyiú-áⁿ naníhí tàhú-yu. ³⁶ Te cuèi nchaandi túhú sá ìò ñuyíú-a na nihí ñáyiú cundecu ndihí-yu, dico núu ñu nchaa xíáⁿ ná càda cuíta nihnú-yu te ñá túú vèdana nàndíhi-xi sá dúcáⁿ ndècu ndihí-yu nchaa xíáⁿ. ³⁷ Te ni ñⁿ sá ìò ñuyíú-a vá chíndèe-xi ñáyiú cuendá naníhí tàhú-yu. ³⁸ Te nchaa ñáyiú na cùcahaⁿ núú-xi cáháⁿ váha cuendá-í, ndihí cuendá tnúhu-í núú nchàa ñáyiú dàquee tihú ñáhá xii Yá Ndiöxí, ñáyiú xíndecu ichi cuèhé ichi duha, te tnàhá yúhú Tée cùu ñaní tnáhã-yu ncháá-yu cucahaⁿ núú-í núú-yu òré ná quixi tucu-í ndihí cue espíritú xínú cuèchi núú Tàtà-í Dútú Ndiöxí. Te mee-gã cada cutnùní iní nchaa ñáyiú sá yúhú ío càhnu cuu-í.

9

¹ Te na càchí tnúhu ndáá-í xii-ndo sá ìò dava nchòhó ñáyiú xíndecu iha vitna vá cùú-ni-ndo, chi cundecu-ni-ndo ndèé quini-ndó sàa nduu ndíhu ndaha ñàha Yá Ndiöxí xii ñáyiú, te dàvá-áⁿ quini-ndó sá ndácú-gã quidé-gã nchaandi túhú sá váha —càchí-gã xàhaⁿ-gã xii cue tée xica cuu ndihí-gã ndihí cue ñáyiú-áⁿ.

Jèsús ní nadama dóó-gã ndihí núú-gã

(Mt. 17:1-13; Lc. 9:28-36)

² Te núú ìnú nduu sá dúcáⁿ ñí cáháⁿ Jèsús te ní xica-gã cuásaá-gã ñⁿ yucu dùcúⁿ, te ndèca-gã té Pèlú, ndihí té Jàcobó, ndihí té Juàá cuásaá, te úní tnàhí-ni cue tée-áⁿ ndécá-gã cuásaá. Te yucu-áⁿ ndécú-gã ní nadama núú-gã, ³ te ní nadama dóó-gã. Te dóó-gã-áⁿ sùúni ñí nduu cuixíⁿ quiyí te tásaⁿ, te ni ñⁿ ñáyiú ñuyíú-a ñá túú ndàcú-yu naqueté-yu ñⁿ dóó nduu cuixíⁿ dàtná ní nduu dóó-gã. ⁴ Te ní xiní-güedé té Moisés ndihí té Èliás nútñí-güedé ndihí-gã ndátnúhu ndihí ñaha-güedé xii-gã. ⁵ Te té Pèlú ní xàhaⁿ-dè xii Jèsús:

—Mèstrú, jváha ní cuu sá ndécú-ó iha vitna! Te na dàcaa-ndí úní tnàhá vehe tnuvixíⁿ, te ñⁿ cuu cuendá-n te ñⁿ

cuu cuendá té Moisés te ñⁿ cuu cuendá té Èliás —càchí-dé xàhaⁿ-dè xii-gã.

⁶ Te ducaⁿ ñí cáháⁿ-dé chi ío ní yúhú-güedé, te cuendá-ni ní cuu yáchí-dé ní cáháⁿ-dé, te ni mèe-dé ñá túú ní cùtnuní iní-dé nása ndùu tnúhu ní cáháⁿ-dé. ⁷ Te òré-áⁿ ñí quexìo ñⁿ vico núú ndécú-güedé ndihí Jèsús ní dádãhu ñaha-xi xii-güedé ndihí-gã, te xití vico-ãⁿ ñí cáháⁿ Yá Ndiöxí ní tecú dóho-güedé, te xàhaⁿ-gã xii-güedé:

—Tée-a cùu-dé Déhe-í tée ío cùu iní-í, te cundedóho-ndo nchàa tnúhu càháⁿ-dé —càchí-gã xàhaⁿ-gã xii-güedé.

⁸ Te òré ní quide cuendá-güedé, te ñá túú-gã ní xiní-güedé cue tée úú-áⁿ chi mee-nã Jèsús ndécú.

⁹ Te òré cuánuu ndihí ñaha-gã xii-güedé yucu-áⁿ, te ní cáháⁿ-gã dóho-güedé, te xàhaⁿ-gã:

—Vá yõo ñⁿ cúnaha-ndo nchàa sá ñí xiní-ndó núú ñí sáá-ó-á, te cuu cáháⁿ-ndó dico ndéé ná yàha ndoto yúhú Tée cùu ñaní tnáhã-ndó nchàa-ndo sá cùú-í —càchí-gã xàhaⁿ-gã xii-güedé.

¹⁰ Núú xíáⁿ cue tée-áⁿ ñí xúhuⁿ nahi-ni iní-güedé nchaa sá ñí xiní-güedé núú ñí sáhã-güedé ndihí Jèsús te ñá túú tnàhí ni càháⁿ-güedé, dico ní ndúcú tnúhu núú tnáhã-güedé ná cuendá ducaⁿ ñí cáháⁿ-gã sá ndéé ná yàha ndoto-gã sá cùú-gã te dàtnùní cáháⁿ-güedé nàcuáa ndùu nchaa sá ñí xiní-güedé. ¹¹ Te ní xicáⁿ tnúhú-güedé núú Jèsús, te xàhaⁿ-güedé xii-gã:

—¿Cuini-ndí cachí tnúhu-n ná cuendá càchí cue tée dàcuaha ñaha xii ñáyiú nchaa tnúhu ní chídó tnùní ndí Moisés sá dñhna-gã té Èliás ndixi-dé te dàtnùní quixi Yá tendaha Yá Ndiöxí quixi ñuyíú-a? —càchí-güedé xàhaⁿ-güedé xii-gã.

¹² Te Jèsús ní xàhaⁿ-gã:

—Ndáá sá códo núu ñⁿ tée quixi-dé te cada-dé dàtná ní quide té Èliás, te tée-áⁿ cada ndáá-dé nchaa nàcuáa cùu. Dico núú tütú Yá Ndiöxí càháⁿ-xi cuendá yúhú Tée cùu ñaní tnáhã-ndó nchàa-ndo sá ìo ndoho-í, te daquèe tihú ñáhã ñáyiú xii-í. ¹³ Te na càchí tnúhu-í xii-ndo vitna sá sà ní quixi ñⁿ

tée ní quide dàtná ní xóo cada té Èliás, te cue ñáyiú ñá túú ní cãnehé-yu sá yíñùhu núú-dě, te ní quide ñàhá-yu xii-dé nchaa nàcuáa ní quixi iní méě-yu. Te núú tütú Yă Ndiöxí sa ndeé tñuní nchaa nàcuáa yáha-dé, te nchaa xíãⁿ sa ní quide ñaha ñáyiú xii-dé —càchí-gá xăhaⁿ-gă xii-güedé.

Jèsús quidé tătna-gá ìⁿ tée cuechi yìhi ñaha espíritú cündìhi yucu ñávãha (Mt. 17:14-21; Lc. 9:37-43)

¹⁴ Te Jèsús ní ndexio-gá ndihí cue tée úní-áⁿ núú xíndecu dava-gá cue tée xica cuu ndihí-gá, te vâi vihi ñáyiú ndècu núú ndécú-güedé-áⁿ, te tñàhá cue tée dàcuaha ñaha xii-yu nchaa tñúhu ní chídó tñuní ndíi Moisés xíndecu, te cue tée-áⁿ nãndi tñúhu xăhaⁿ-güedé xii cue tée xica cuu ndihí Jèsús. ¹⁵ Te òré ní xiní-yu ní ndexio-gá, te nchaá-yu ío ní cuñúhu-yu, te xínú-yu ní sáháⁿ ní cáháⁿ ndihí ñàhá-yu xii-gá. ¹⁶ Te ní xícáⁿ tñúhú-gă núú cuè tée xica cuu ndihí-gá núu ná tñúhu ndàtnúhu-güedé ndihí cue tée-áⁿ. ¹⁷ Te ìⁿ ñáyiú xíndecu xíãⁿ ní xáhãⁿ-yu xii-gá:

—Mèstrú, ndèca-í déhe-í véxi nãnducu ñaha-í xii-n, chí yìhi ñaha espíritú cündìhi yucu ñávãha xii-dé, te ðiu xíãⁿ ní quide ní cuu ñìhí-dé. ¹⁸ Te ío ndòho-dé chí súúní ndèni ní cuu ngötni ñaha-xi xii-dé, te òré ducaⁿ quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú nùhu-dé, te ndàda ruúⁿ ñáhá-xí xii-dé. Te sa ní xáhãⁿ-í xii cue tée xica cuu ndihí-n sá queñùhu-güedé espíritú cündìhi yucu ñávãha yìhi ñaha xii-dé dico ñá túú ní ndàcu-güedé queñùhu-güedé-xi —càchí ñáyiú-áⁿ xáhãⁿ-yu xii-gá.

¹⁹ Te Jèsús ní xáhãⁿ-gă:

—jNchaa nchòhó ñáyiú ndècu ñuyíú-a ío sàá iní-ndó, chí ñá túú cuíní-ndó quìndáá iní-ndó Yă Ndiöxí, te ní cuu vâi nduu quide ndee iní-í nchaa sá quidé-ndó! ¿Te ná ndeé ama vá dúcáⁿ-gă cada-ndo-í? Te

chí cándèca tée cùhú-áⁿ táquixi iha —cachí-gá xăhaⁿ-gă xii-yu.

²⁰ Te ñáyiú ndihí ñaha xii tée yìhi ñaha espíritú cündìhi yucu ñávãha-áⁿ ndécá ñàhá-yu xii-dé cuáháⁿ ndeé núú Jèsús, te òré ní xiní ñáhá espíritú cündìhi yucu ñávãha-áⁿ xii-gá, te ní ngüíta-ni-xi sàhni yìhí ñáhá tucu-xi xii-dé, te ní dánduá ñáhá-xí xii-dé, te ní ngüíta-dé xíchí ñùhu-dé, te quène tíñú yuhu-dé. ²¹ Te Jèsús ní xícáⁿ tñúhú-gă núú tătá-dé, te xáhãⁿ-gă xii-dé:

—¿Ná ndeé ama ní ngüíta-xi duha ndòho déhe-n? —càchí-gá xăhaⁿ-gă xii-dé.

Te tée-áⁿ ní xáhãⁿ-dè xii-gá:

—Ndeé cútnàhá cúú lìhli-dé ní ngüíta espíritú cündìhi yucu ñávãha duha quide ñaha-xi xii-dé. ²² Te ní cùtìtní xito dàngaunihnu ñaha-xi xii-dé núú ñùhú, te ní cùtìtní tucu xito dàngaunihnu ñaha-xi xii-dé ndute cuíní-xi cahni ñaha-xi xii-dé. Te ndèca-í-dé véxi núú-n te núú ndacu-n càda tătna-n-dé, te cundàhú iní ñáhá-n xii-ndí chindee ñàha-n —cachí-dé xáhãⁿ-dè xii-gá.

²³ Te Jèsús ní xáhãⁿ-gă:

—Te ná cuèndá càchí-n núu ndacu-í cada tătna-í déhe-n, chí nchaa ñáyiú na quìndáá iní ñáhá xii-í te nihí-yu sá ná càcáⁿ-yu núú-í —càchí-gá xăhaⁿ-gă xii-dé.

²⁴ Te tătá tée cuechi-ãⁿ ñìhi ní cáháⁿ-dè xáhãⁿ-dè xii-gá:

—Sàndáá iní ñáhà-í xii-n, dico chindee ñàha xii-í cuèndá ná quìndáá iní ñáhá-gă-í xii-n —càchí-dé xáhãⁿ-dè xii-gá.

²⁵ Te Jèsús ndéhe-gă sá ío vâi ñáyiú ta tàcá núú ndécú-gă-áⁿ. Te ní tenàá-gá espíritú cündìhi yucu ñávãha-áⁿ, te xáhãⁿ-gă xii-xi:

—Yòhó espíritú cündìhi yucu ñávãha, ní quide ñìhí-n ní quide doho-n tée-a, dico vitna yúhú càchí-í sá quée-n yìqui cuñú-dé te vá ndìhu-gá-n —càchí-gá xáhãⁿ-gă xii espíritú cündìhi yucu ñávãha-áⁿ.

26 Te espíritú cündìhi yucu ñávãha-án nĩ dácáná sàa ñaha-xi xii téé-án, te ní sahani yìhĩ ñáhá tùcu-xi xii-dé, te dàtnùní ní quee ñaha-xi xii-dé cuáhán-xi, dico téé-án chi dacàa-ni ndíyĩ cãa-dé cãtùu-dé. Te nchaa ñáyiu xĩndecu xíán cãchĩ-yu sã nĩ xihĩ-dé ní cùu. 27 Te Jèsús ní tñi-gã ndaha-dé ní ndocani ñaha-gã xii-dé, te ní ndacóo-dé ní nucúnutnĩ-dé.

28 Te Jèsús cuándihu-gã xití vehe ndihĩ cue téé xica cuu ndihĩ-gã, te òré ndéhé-güedé ñá túú-gã ñáyiu, te ní xicán tñuhú-güedé núú-gã, te xãhã-gã xii-güedé:

—Cachĩ tñuhu xii-ndĩ ná cuendã ñá túú ní ndàcu-ndĩ queñuhu-ndĩ espíritú cündìhi yucu ñávãha yìhĩ ñaha xii téé-ãñ —cãchĩ-güedé xãhã-gã xii-gã.

29 Te Jèsús ní xãhã-gã xii-güedé:

—Na cãchĩ tñuhu-í xii-ndo sã nõu òré cuinĩ-ndó queñuhu-ndo espíritú cündìhi yucu ñávãha yìhĩ ñaha xii ñáyiu dàtnã cúú espíritú cündìhi-xi yìhĩ ñaha xii téé-ãñ ní cùu ñã, te xini ñuhu-xi sã ïo cãhãñ ndihĩ-ndo Yã Ndiõxí te ñá túú tñahĩ ná caxi-ndo cãhãñ ndihĩ-ndo-gã, te ducañ te ndacu-ndo queñuhu-ndo espíritú cündìhi yucu ñávãha yìhĩ ñaha xii ñáyiu —cãchĩ-gã xãhã-gã xii-güedé.

Jèsús cãhãñ tucu-gã sã cãhñ ñaha-güedé xii-gã

(Mt. 17:22-23; Lc. 9:43-45)

30 Te Jèsús ní quee-gã núú ndécú-gã-án ndihĩ cue téé xica cuu ndihĩ-gã cuáhã-gã ndihĩ-güedé distritú Galileá, te cuinĩ-gã sã vã quini ñáyiu ndéé ichi cuáhã-gã. 31 Te ducañ nĩ sani iní-gã, chi mee-gã sa nãha-gã sã ndãá cada-xi nãcuãa xãhã-gã xii cue téé xica cuu ndihĩ-gã, te duha xãhã-gã xii-güedé:

—Yúhú Téé cùu ñanĩ tñahã-ndó nchãa-ndo sãá ññ nduu te cuãha cuendã ñáhã-güedé xii-í núú cuè téé cùu úhú iní ñáhã, te cahni ñaha-güedé xii-í, dico nduu únĩ sã cùú-í te ndoto-í —cãchĩ-gã xãhã-gã xii-güedé.

32 Dico ñá túú tñahĩ ní tècú tñunĩ-güedé nása nduu tñuhu ní cãhãñ-gã, te ní ñã túú ní cùyi-güedé cãcãñ tñuhú-güedé núú-gã.

Cue téé ndücu tñuhu núú tñahã nõu ndédacãa-güedé ïo-gã cúnüu

(Mt. 18:1-5; Lc. 9:46-48)

33 Te Jèsús ní quexiõ-gã ndihĩ cue téé xica cuu ndihĩ-gã ñuu Capèrnaúm, te òré sa ndècu-gã ññ vehe te ní xicãñ tñuhú-gã núú-güedé, te xãhã-gã xii-güedé:

—¿Nãndĩ cùu tñuhu ta xĩtñaha-ndo véxi? —cãchĩ-gã xãhã-gã xii-güedé.

34 Dico ñá túú tñahĩ ní cãhãñ-güedé cúñaha-güedé xii-gã nõu ná tñuhu xĩtñaha-güedé òré ñuhú-güedé ichi. Te ducañ ní quide-güedé chi cuendã tá ndãtñuhu-güedé nõu ndédacãa-güedé ïo-gã cúnüu. 35 Te Jèsús ní ngóo-gã, te ní xãhã-gã xii ndĩ ùxúú cue téé xica cuu ndihĩ-gã:

—Chĩ táquixi iha te cundedõho-ndo tñuhu na cãhãñ-í-a. Te núu ïo dava-ndo cuinĩ-ndó cùnuu-ndo, te cada-ndo sã cúú-ndó ñáyiu nchicún cuinĩ-nã, te cunu cuechi-ndo nõu tñaha ñáyiu-ndo —cãchĩ-gã xãhã-gã xii-güedé.

36 Te Jèsús ní sanutnĩ-gã ññ té lĩhli cuãdava tnuú-güedé, te dàtnùní ní nguídèhé ñáhã-gã xii-dé, te xãhã-gã xii-güedé:

37 —Nchaa ñáyiu na quèheñ cuendã ññ té lĩhli dàtnã té lĩhli-a cuendã sã ñuhú iní ñáhã-yu xii-í ñã, te cada iní-yu sã yũhú ní queheñ cuendã-yu. Te nchaa ñáyiu na quèheñ cuendã ñáhã xii-í te ñã díú-ní mèe-í ní quèheñ cuendã-yu, chi tñahã Tãtã-í Dútú Ndiõxí Yaá ní tendaha ñaha xii-í véxi-í ñuyúú-a ní queheñ cuendã-yu —cãchĩ-gã xãhã-gã xii-güedé.

Nchaa ñáyiu ñá túú cùu úhú iní ñáhã xii-o te cündìhi ñahã-yu

(Mt. 10:42; Lc. 9:49-50)

38 Te té Juãá ññu-ni ññ téé xica cuu ndihĩ-gã ní xãhãñ-dé xii-gã:

—Mèstrú, ní xinĩ-ndĩ ññ téé cãcunehe ñaha-dé xii-n, te queñuhu-dé espíritú cündìhi yucu ñávãha yìhĩ ñaha

xii ñáyi, te nchúhú ñá túú ní dañá-gá-ndí ducaⁿ càda-dé, chi ñá túú xica cuu ndíhi ñaha-dé xii-o —càchí-dé xáhaⁿ-dè xii-gá.

³⁹ Te Jèsús ní xáhaⁿ-gã xii-güedé:

—Daña-ndo na càda nahi-dé ní cùu, chi ñá túú nì ìⁿ ñáyi ndíhi ndíhi-ni ndacu cáháⁿ cuèhé cuendá-í te núu càcunehe ñahá-yu xii-í, te quidé-yu sá vã yõo tnàhí ndàcu cada. ⁴⁰ Te nchaa ñáyi ñá túú cùu úhú iní ñáhá xii-o te cùndíhi ñahá-yu. ⁴¹ Te na càchí tnúhu-í xii-ndo sã cuè ñáyi na tàxi ìⁿ yaxiⁿ ndute coho-ndo cuendá sá cúú-ndó cuè téé xica cuu ndíhi-í, te ñáyi-áⁿ sáá nduu te dacuèi sá nihí-yu sá ndúú tãhũ-yu —càchí-gá xáhaⁿ-gã xii-güedé.

Cada cuendá-ó vã cùndècu-o ichi cuèhé ichi duha

(Mt. 18:6-9; Lc. 17:1-2)

⁴² Te xáhaⁿ tùcu Jèsús xii-güedé:

—Te núu ìⁿ téé na dàcaháⁿ-dé cue ñáyi sàndáá iní ñáhá xii-í cadá-yu nándi sá cuèhé sá dúhá, te váha-gá sá núu na dàcutu ndeé-güedé ìⁿ yúú yódó dũcúⁿ-dè, te dàquée ñaha-güedé xii-dé xití ndute làmár, te ñá díú sã cùndècu-dé ducaⁿ càda-dé. ⁴³ Te núu ìⁿ xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèi na cuíta ìⁿ xio ndaha-ndo te ñá díú sã quihíⁿ-ndó nihíí ní ndúú-ndó núú ùhú núú ndàhú núú dícó sáá ndáhá itá ñuhú nì caa nì quihíⁿ. ⁴⁴ Chi yàcáⁿ cúú-xí núú ñà túú tnàhí ndàhvã ñuhú, te ío ndoho-ndo cùndècu-ndo xíáⁿ nì caa nì quihíⁿ. ⁴⁵ Te núu ìⁿ xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèi na cuíta ìⁿ xio sáhá-ndó, te ñá díú sã quihíⁿ-ndó nihíí ní ndúú-ndó núú ùhú núú ndàhú núú dícó sáá ndáhá itá ñuhú nì caa nì quihíⁿ. ⁴⁶ Chi yàcáⁿ ñá túú tnàhí ndàhvã ñuhú, te ío ndoho-ndo cùndècu-ndo xíáⁿ nì caa nì quihíⁿ. ⁴⁷ Te núu ìⁿ xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cùndècu-ndo núú ndécú

Yã Ndiõxí táxi tnùní-gá cuèi na cuíta ìⁿ xio tinùu-ndo, te ñá díú sã ndí nduú xio núú-ndó quihíⁿ-ndó núú ùhú núú ndàhú. ⁴⁸ Chi yàcáⁿ ñá túú tnàhí ndàhvã ñuhú, te ío ndoho-ndo cùndècu-ndo xíáⁿ nì caa nì quihíⁿ.

⁴⁹ Te dàtná quidé-güedé quiti sàhni-güedé chihí-güedé cuñú-di ñíí te dàquée-güedé núú ñuhú, ducaⁿ sãtnahá-xi ndoho cue ñáyi chi ío ndohó-yu. ⁵⁰ Te ñíí chi ío váha nándíhi-xi, dico núu na nduu víxiⁿ-xi te ñá túú-gã nándíhi-xi te nì ñà túú-gã nása cada-o nduu úhá tucu-xi. Te ío váha cada cuendá-ndó nàcuáa cundècu-ndo cuendá cuu-ndo ñáyi váha, te ducaⁿ te cuu-ndo dàtná ñíí sã ñà túú nduu víxiⁿ, te ío váha cundècu ndíhi tnàha-ndo —cachí-gá xáhaⁿ-gã xii-güedé.

10

Jèsús càháⁿ-gá cuendá cue ñáyi dañá tnaha

(Mt. 19:1-12; Lc. 16:18)

¹ Te Jèsús ní xica-gá cuáháⁿ-gá ní yáha-gá yucu distritú Júdeá ní téhndé-gá ndàa ingá xio yúte Jòrdán. Te yàcáⁿ ndécú-gã ní tacá tucu cuèhé víhí ñáyi, te ní ngúita-ni tucu-gá dánèhé ñáhá-gã xii-yu tnúhu-gá chi ducaⁿ tnàhí quide-gá. ² Te ní quèxio ìⁿ úú cue téé cùu fariséú núú ndécú Jèsús xító ndèé ñáhá-güedé xii-gá núú nása cunduu tnúhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tnúhú-ndí núú-n núu cuu dañá ìⁿ téé ñadíhi-dé ãⁿ ñáhá —càchí-güedé xáhaⁿ-güedé xii-gá.

³ Te Jèsús ní xáhaⁿ-gã xii-güedé:

—Te nchòhó, ¿nása ní cachí ndí Moisés cada-ndo-i? —càchí-gá xáhaⁿ-gã xii-güedé.

⁴ Te ní xáhaⁿ-güedé xii-gá:

—Ndí Moisés ní cachí ndí sá cúú dañá ìⁿ téé ñadíhi-dé dícó-ni sá cadúha-dé ìⁿ tutú cuáñaha-dé, te núú tutú-áⁿ codo tnùní sá nì dáñá ñaha-dé, te ducaⁿ te cuu dañá-dé ñadíhi-dé —càchí-güedé xáhaⁿ-güedé xii-gá.

⁵ Te Jèsús ní xáhaⁿ-gã xii-güedé:

—Te ducaⁿ nǐ chídó tnùnǐ ndíi Moisés cada-ndo cuendá sá ío sàá iní-ndó. ⁶ Dico Yá Ndiöxí cútnàhá nǐ cadúha-gá ñuyíú ndíhi nchaa sá ío, chi téé ñadìhí nǐ cadúha-gá. ⁷ Te xiáⁿ nǔu nchaa cue téé na nìhí ñadìhí-xi, te ðíⁿ-ná cada-güedé tǎtá-güedé ndíhi nǎná-güedé, chi mee-nǎ ñadìhí-güedé cuu cuu ndíhi-güedé. ⁸ Te cue ñáyiu úú-án ñá túú-gǎ ndí ðíⁿ ndí ðíⁿ yìquǐ cuñú cúú-yu, chi cada iní-ndó sǎ íⁿ-ná yìquǐ cuñú cúú-yu. ⁹ Te xiáⁿ nǔu ñá túú ndùu váha-xi dañá cue téé ñadìhí-güedé, chi mee Yá Ndiöxí nǐ cachí-gá sá cúú úú-yu cundecú-yu ndéé naa ndéé cuú-yu —càchí-gá xǎhaⁿ-gǎ xii-güedé.

¹⁰ Te òré yíhí Jèsús ndíhi cue téé xica cuu ndíhi-gá vehe, te nǐ xicáⁿ tnúhu-güedé núú-gǎ nása ndùu tnúhu nǐ cáháⁿ-gá cuendá cue ñáyiu dañá tnaha. ¹¹ Te Jèsús nǐ xǎhaⁿ-gǎ xii-güedé:

—Te núu ìⁿ téé na dañá-dé ñadìhí-dé te naqueheⁿ-dé ingá ñadìhí, te ío nèhé quidé-dé, te ìⁿ-nǐ cuèchi cùu-xi ndíhi cuèchi quide téé ndéca ñadìhí te càháⁿ ndíhi-dé ingá ñadìhí. ¹² Te ðiu-ni ducaⁿ sǎtnahá-xi cùu tucu ñáyiu ðíhí te núu na dañá-yu yí-yu te naquehéⁿ-yu ingá téé, chí ìⁿ-nǐ cuèchi cùu-xi sá quidé-yu ndíhi sá quidé cue ñáyiu ðíhí ndécú yí-xi, te càháⁿ ndíhi-yu ingá téé —càchí-gá xǎhaⁿ-gǎ xií-yu.

Jèsús xicáⁿ tǎhú-gǎ núú Yá Ndiöxí cuendá landú
(Mt. 19:13-15; Lc. 18:15-17)

¹³ Te ìⁿ úú ñáyiu ndécá-yu landú líhli cuáháⁿ núú Jèsús, chi cuíní-yu sá téndàha ñaha-gá xii-güexi. Te cue téé xica cuu ndíhi-gá nǐ ngüíta-güedé ténàá ñáhá-güedé xií-yu, te xǎhaⁿ-güedé sá vǎ dúcáⁿ càdá-yu. ¹⁴ Te òré nǐ xiní-gá sá dúcáⁿ quide-güedé, te nǐ cudééⁿ-gǎ núú-güedé, te xǎhaⁿ-gǎ xii-güedé:

—Chí dañá ná quixi nahi cue landú líhli-án nǔu-í-a te vǎ càdí-ndó ìchi-güexi, chí dàtná cúú váha iní cue landú líhli-án ducaⁿ cùu váha iní cue

ñáyiu yíndaha Yá Ndiöxí. ¹⁵ Te na càchí tnúhu ndáá-í xii-ndo sǎ nǔu vǎ quíndáá iní ñáhá-ndó dàtná quidé cue landú líhli sàndáá iní ñáhá xii-í, te vǎ ndíhu ndaha ñàha Yá Ndiöxí xii-ndo —càchí-gá xǎhaⁿ-gǎ xii-güedé.

¹⁶ Te sǎtá dúcáⁿ nǐ xǎhaⁿ-gǎ te nǐ nguídèhé-gá cue landú-án te nǐ tendaha ñàha-gá xii-güexi, te nǐ xicáⁿ tǎhú-gǎ núú Yá Ndiöxí cuendá-güexi.

Íⁿ téé cuica càháⁿ ndíhi-dé Jèsús
(Mt. 19:16-30; Lc. 18:18-30)

¹⁷ Te òré sa ñúhu ichi Jèsús caca-gá quíhíⁿ-gá ingá xichi nǐ cùu nǐ quexio cunu ìⁿ téé nǐ ngüíñí xití-dé núú-gǎ, te xǎhaⁿ-dè xii-gá:

—Yòhó Mèstrú, cùu-n téé ío váha iní-xi, te cuíní-í nǔu vǎ cündèe iní-n càchí tnúhu-n nǎ cúú sǎ càdá-í cuendá nduu tǎhú-í cundecu-í ndíhi Yá Ndiöxí nǐ caa nǐ quíhíⁿ —càchí-dé xǎhaⁿ-dè xii-gá.

¹⁸ Te Jèsús nǐ xǎhaⁿ-gǎ xii-dé:

—¿Te cùtnuní iní-n nàcuáa ndùu tnúhu càháⁿ-n sǎ yúhú váha iní-ǎⁿ? Chi ìⁿ ðíⁿ dǐí-ni Yá Ndiöxí ío váha iní-gá. ¹⁹ Te yòhó xiní-n nàcuáa nǐ cachí Yá Ndiöxí cada ñáyiu, te duha nǐ cachí-gá: “Nchòhó cue téé vǎ càháⁿ ndíhi-ndo ñadìhí te núu ñá díú ñadìhí-ndó cùú-yu, te ducaⁿ-ni nchòhó cue ñáyiu ðíhí tucu vǎ càháⁿ ndíhi-ndo tée te núu ñá díú yí-ndo cuu-güedé, te vǎ cáhni-ndó tnàha ñáyiu-ndo, te nǐ vǎ dúhú-ndó sǎ ndécú ndíhi-yu, te nǐ vǎ dácàcu-ndo cuèchi neñúú sá cúú-xí tnàha ñáyiu-ndo, te nǐ vǎ dácuañdehnde-ndo, te canehe-ndo sǎ yíñúhu núú tǎtá-ndó ndíhi núu nǎná-ndó”, duha nǐ cachí Yá Ndiöxí cada ñáyiu —càchí-gá xǎhaⁿ-gǎ xii-dé.

²⁰ Te téé-án nǐ xǎhaⁿ-dè xii-gá:

—Mèstrú, nchaa xiáⁿ nǐ ngüíta-í quidè-í ndéé cútnàhá cúú landú-í —càchí-dé xǎhaⁿ-dè xii-gá.

²¹ Te Jèsús nǐ xíndéhé ñàha váha-gá xii-dé, te nǐ cuu váha iní ñáhá-gǎ, te nǐ xǎhaⁿ-gǎ xii-dé:

—Dico cùmání ingá núú sǎ càdá-n. Vitna te quíhíⁿ-n te dico-n nchàa

sá ndécú ndíhi-n, te díhúⁿ-n cuáha táhú-n cuè ñáyi ndàhú. Te ducaⁿ, te nduu táhú-n nùcúndecu váha-n nùú ndécú Yá Ndiöxí táxí tnùní-gá, te sátá ná yáha ducaⁿ càda-n, te quixi-n chitnahá ñáhá-n xii-í cuèi na ndòho-n datná ndoho-í —càchí-gá xáhaⁿ-gá xii-dé.

²² Te sá dúcáⁿ ñí xáhaⁿ Jèsús xii-dé te ío ní cundíyí-dé chi ío cuica-dě, te ní xica-dé cuánuhú-dé.

²³ Te ní ndacoto-gá ñi càndéé dèñi-gá, te ní xáhaⁿ-gá xii cue téé xica cuu ndíhi-gá:

—Cue ñáyi cuica chi ío úhú quíndáá iní-yu Yá Ndiöxí cuèndá ndíhu ndaha ñàha-gá xii-yu —càchí-gá xáhaⁿ-gá xii-güedé.

²⁴ Te cue téé xica cuu ndíhi-gá-án ío ní cuñúhu-güedé nàcuáa ní cáháⁿ-gá, te ní xáhaⁿ tucu-gá xii-güedé:

—Nchòhó cue téé xica cuu ndíhi-í càchí tnúhu tucu-í xii-ndo sá ío úhú quíndáá iní cue ñáyi cuica Yá Ndiöxí cuèndá ndíhu ndaha ñàha-gá xii-yu, chi sàni iní-yu sá ncháá sá ndécú ndíhi-yu dàcácu nihnu ñaha-xi xii-yu núú ùhú núú ndàhú. ²⁵ Te yáchí-gá yáha ñiⁿ càméyu yaú ñiⁿ yiqui tìcú dàcúxí sá quíndáá iní ñiⁿ ñáyi cuica Yá Ndiöxí cuèndá ndíhu ndaha ñàha-gá xii-yu —càchí-gá xáhaⁿ-gá xii-güedé.

²⁶ Te cue téé xica cuu ndíhi-gá ní cuñúhu vñhi-gá-güedé sá dúcáⁿ ñí cáháⁿ-gá, te ní ngúita-güedé xítnàha-güedé:

—¿Te yoo sa ndacu naníhí tàhú te núu ducaⁿ vání? —càchí-güedé xítnàha-güedé.

²⁷ Te Jèsús ní xíndéhé váha ñaha-gá xii-güedé, te ní xáhaⁿ-gá:

—Nchaa ñáyi ñuyíu-a chi vá ndácü-yu ná cadá-yu nàcuáa ndíhu ndaha ñàha Yá Ndiöxí xii-yu, dico mee-gá chi ndacu-gá ndíhu ndaha ñàha-gá xii-yu, chi nchaandi túhú sá váha ndacu-gá quíde-gá —càchí-gá xáhaⁿ-gá xii-güedé.

²⁸ Te té Pèlú ní xáhaⁿ-dě xii-gá:

—Nchúhú ní dándöo-ndí nchaandi túhú sá ndécú ndíhi-ndí te ní tuha ñaha-ndí xii-n —càchí-dé xáhaⁿ-dě xii-gá.

²⁹ Te Jèsús ní xáhaⁿ-gá xii-dé:

—Na càchí tnúhu ndáá-í xii-ndo sá ncháá ñáyi na dándöo vehe-xi, àdi ñaní-xi, cúha-xi, tátá-xi, náná-xi, déhe-xi, àdi ñuhu-xi, te núu ducaⁿ na càdá-yu sá cuèndá-í ndíhi sá cuèndá tnúhu-í, ³⁰ te ío-gá cuéhé sá cuñàha Yá Ndiöxí cundecu ndíhi-yu, chi níhi-yu vehé-yu, ñuhú-yu, ñaní-yu, cúha-yu, náná-yu, déhe-yu, te ñá díu-ní sá nchàa xíáⁿ níhi-yu cundecu ndíhi-yu, chi tnàhá nduu táhú-yu cundecu ndíhi ñàhá-yu xii-í ñi caa ñi quíhíⁿ ná sáa nduu. Dico díhna-gá ndoho tnahá-yu núú ñuyíu-a sá cuèndá-í. ³¹ Te dava ñáyi cùnuu ndecu ichi Yá Ndiöxí vitna, ñáyi-án sáa nduu te vá ío-gá cunúu-yu dàtná cùnúu-yu vitna, te dava ñáyi nchícúⁿ ñá túú cùnuu vitna ñáyi-án sáa nduu te ío cunúu-yu —càchí-gá xáhaⁿ-gá xii-güedé.

Jèsús càháⁿ tucu-gá sá cáhni ñàha-güedé xii-gá

(Mt. 20:17-19; Lc. 18:31-34)

³² Te ñuhu Jèsús ichi ndíhi cue téé xica cuu ndíhi-gá cuásaá ndíhi ñaha-gá xii-güedé ñuú Jerusálén, te yòdo nuu-gá núú-güedé cuásaá. Te cue téé-án xícuñúhu-güedé sá dúcáⁿ cuáháⁿ-gá ñuú Jerusálén, te dava cue ñáyi xínchícúⁿ xiyùhú-yu. Te ní taudíⁿ-gá ndí ùxúú cue téé xica cuu ndíhi-gá, te ní ngúita-gá cání-gá cuèndú núú-güedé nchaa nàcuáa yáha-gá. ³³ Te xáhaⁿ-gá xii-güedé:

—Vitna ñuhu-o ichi cuásaá-ó ñuú Jerusálén, te yàcáⁿ cuáha cuèndá ñáhá-güedé xii yúhú Téé cùu ñaní tnàhá-ndó nchàa-ndo núú cuè téé cùu dútú cùnúu, ndíhi núú cuè téé dàcuaha ñaha xii ñáyi nchaa tnúhu ní chídó tnùní ndí Moisés. Te díu cue téé-án cùñaha-güedé xii dava-gá cue téé sá cáhni ñàha-güedé xii-í, te cuáha cuèndá ñáhá-güedé xii-í núú cuè téé ñá túú cùu cue téé isràél. ³⁴ Te cue

tée-án cudíquí ndeé ñáhá-güedě xii-í, te caniha-güedě ndihi ñii, te tiú díi ñáhá-güedě, te cahni ñaha-güedě xii-í dico nduu úní sá cùú-í te ndoto-í — cächí-gá xáhaⁿ-gá xii-güedé.

Té Jàcobó ndihi té Juàá càháⁿ ndàhú-güedé núú Jèsús sá cádá-gă ñⁿ sá cuiní-güedé

(Mt. 20:20-28)

³⁵ Te cue déhe té Zebèdeú té Jàcobó ndihi té Juàá ní quexìo-güedé núú Jèsús, te xáhaⁿ-güedě xii-gá:

—Mèstrú, véxi-ndí càháⁿ ndàhú-ndí núú-n nñu vá cündèe iní-n càda-n ñⁿ sá cuiní-ndí —cächí-güedé xáhaⁿ-güedě xii-gá.

³⁶ Te Jèsús ní xícaⁿ tnúhú-gá núú-güedě, te xáhaⁿ-gă:

—¿Ná cúú sã cuiní-ndó càda-í-i? — cächí-gá xáhaⁿ-gă xii-güedé.

³⁷ Te ní xáhaⁿ-güedě xii-gá:

—Cuiní-ndí sá òré ná sàá nduu cündecu-n núú táxí tnùnín, te ñⁿ-ndí cunucóo-ndí xio cùha-n te ñⁿ-ndí cunucóo-ndí xio dàtni-n — cächí-güedé xáhaⁿ-güedě xii-gá.

³⁸ Te Jèsús ní xáhaⁿ-gă xii-güedé:

—Nchòhó, ñá túú cùtnuní iní-ndó nàcuáa nduu sá xícaⁿ-ndó nñu-í. ¿Te náa cundee iní-ndó dândoho ñaha ñáyiú xii-ndo dàtná dândoho ñahá-yu xii-í, te cundee tùcu iní-ndó cãhni ñahá-yu xii-ndo dàtná cahni ñahá-yu xii-í-ãⁿ? —cächí-gá xáhaⁿ-gă xii-güedé.

³⁹ Te ní xáhaⁿ-güedě xii-gá:

—Cundee iní-ndí yáha-ndí nchaa nàcuáa cãháⁿ-n-ãⁿ —cächí-güedé xáhaⁿ-güedě xii-gá.

Te Jèsús ní xáhaⁿ-gă xii-güedé:

—Ndáá sá cündèe iní-ndó ndòho-ndo nchaa nàcuáa ndoho-í, te cundee tùcu iní-ndó cãhni ñahá-yu xii-ndo, chi yúhú cahni ñahá-yu xii-í.

⁴⁰ Dico sá dúcáⁿ cuiní-ndó sã ñⁿ-ndó cùnucóo-ndo xio cuhá-í te ñⁿ-ndo cùnucóo-ndo xio datni-í, te xíãⁿ chi ñá díú yúhú tàú-í cachí-í te núú sá cúú cùnucóo-ndo àdi sá vã cúú cùnucóo-ndo, chi mee Tãtà-í Dútú Ndióxi cachí-gá te núú ná cúú ñáyiú nduu táhú cunucóo dñi-í dàvá-ãⁿ — cächí-gá xáhaⁿ-gă xii-güedé.

⁴¹ Te òré ní níhí ùxí-gá cue tée xica cuu ndihi-gá tnúhu nàcuáa nduu sá cuiní té Jàcobó ndihi ñaní-dé té Juàá, te ní cudééⁿ-güedě núú cuè tée úú-ãⁿ.

⁴² Te Jèsús ní cana-gá nchaa cue tée xica cuu ndihi-gá-ãⁿ, te ní xáhaⁿ-gă xii-güedé:

—Nchòhó xini-ndó sã cuè tée yindaha ñⁿ nacióⁿ quide-güedé sá ño cùnucóo-güedé, te nchaa dava-gá cue tée cündihi-güedé tnàhá-güedé quidé-güedě sá ño cùnucóo-güedé. ⁴³ Dico nchòhó chi vá dúcáⁿ càda-ndo. Chi núú dava-ndo cuiní-ndó cùnucóo-ndo te xini ñuhu-xi cunu cuechi núú tnàhá-ndó te vá cádá-ndó sã cùnucóo-ndo. ⁴⁴ Te núú dava-ndo cuiní-ndó quène cáva-ndo, te cuu-ndo dàtná cue ñáyiú ñá túú tnàhí dàñá quee núú chíúⁿ pàtróoⁿ-xi cunu cuechi núú tnàhá-ndó. ⁴⁵ Te yúhú Tée cùu ñaní tnàhá-ndó nchaa-ndo, chi ñá túú véxi-í sá cùnucóo cuèchi ñáyiú núú-í, chi véxi-í sá cùnucóo cuèchi-í núú-yu. Te cuú-í ñuyú-a cuendá vãi-yu cácu nihnu núú ùhú núú ndàhú —cächí-gá xáhaⁿ-gă xii-güedé.

Jèsús quidé tãtna-gá ñⁿ tée cuáá nání-dě Bartimeú

(Mt. 20:29-34; Lc. 18:35-43)

⁴⁶ Te Jèsús ní quexìo-gá ñuú Jericó ndihi cue tée xica cuu ndihi-gá, te ní yáha-gá ndihi-güedé ichi xití ñuú-ãⁿ, te ño cuéhé ñáyiú nchícúⁿ ñahá xii-gá cuáháⁿ te ñⁿ xio yuhu ichi sá ñi quee xití ñuú-ãⁿ núcõo ñⁿ tée cuáá nání-dě Bartimeú, te tãtà-dě nání-dě Timeú, te tée-ãⁿ núcõo-dé yuhu ichi-ãⁿ xícaⁿ ndàhú-dé. ⁴⁷ Te tée-ãⁿ ñi cutnùnín iní-dé sá Jèsús tée ñuú Nazàrét ñúhú-dě ichi, te ní ngüita-dé níhi cãháⁿ-dé, te xáhaⁿ-dě xii-gá:

—Jèsús, ñaní tnàhá ndíi Dàví, cundàhú iní ñahá xii-í! —cächí-dé xáhaⁿ-dě xii-gá.

⁴⁸ Te vãi ñáyiú tenaá ñahã-yu xii-dé, te xáhãⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xáhaⁿ-dě xii-gá:

—Jèsús, ñaní tnàhá ndíi Dàví cundàhú iní ñahá xii-í! —cächí-dé xáhaⁿ-dě xii-gá.

49 Te Jèsús ní ngüíñí-gá te ní xáhaⁿ-gã xii cue téé ndihi-gá:

—Chí cuanguaca téé cuàá-áⁿ can-deca-ndo-dě quixi iha —càchí-gá xáhaⁿ-gã.

Te cue téé-áⁿ nĩ xica-güedé cuanguaca-güedé téé cuàá-áⁿ, te òré ní quexìo-güedé núú-dě te ní xáhaⁿ-güedé xii-dé:

—Ndacuíñí te vá ndihú-gá iní-n, na quihíⁿ-ó chi càna ñaha Jèsús xii-n —càchí-güedé xáhaⁿ-güedé xii-dé.

50 Te téé-áⁿ nĩ xócání-dě dóó ndíxí-dě, te ndihi-ni ní ndacuíñí-dé te ní xica-dé cuáháⁿ-dé núú Jèsús. 51 Te òré ní quexìo-dé te ní xícáⁿ tnúhú-gã núú-dě, te xáhaⁿ-gã xii-dé:

—¿Ná cuíní-n càda ñaha-í xii-n-i? —càchí-gá xáhaⁿ-gã xii-dé.

Te téé cuàá-áⁿ nĩ xáhaⁿ-dě xii-gá:

—Mèstrú, cuíní-í cada tátna-n núú-í cuèndá cundehe-í —càchí-dé xáhaⁿ-dě xii-gá.

52 Te Jèsús ní xáhaⁿ-gã xii-dé:

—Cuanùhú vitna, chi sa ní ndúha núú-n chi ní sándáá iní-n Yá Ndiöxí —càchí-gá xáhaⁿ-gã xii-dé.

Te òré-ni-áⁿ nĩ ndúha núú-dě te nchìcúⁿ-dé Jèsús cuáháⁿ.

11

Jèsús cuanguihu-gá ñuú Jerusàlén

(Mt. 21:1-11; Lc. 19:28-40; Jn. 12:12-19)

1 Te Jèsús ní cuyatni-gá ndihi cue téé xica cuu ndihi-gá ñuú Bètaniá, ndihi ñuú Bèttagé, te xíaⁿ cáá yùcu nani Olívú, te yatni víí-nã xíaⁿ cáá ñuú Jerusàlén. Te Jèsús ní cana-gá úú-ni tnàhá cue téé xica cuu ndihi-gá. 2 Te ní xáhaⁿ-gã xii-güedé:

—Chí cuáháⁿ ñuú cáá yàtni yacáⁿ, te òré quexìo-ndo yacáⁿ te naníhí-ndó ñⁿ búrru ndètní-dí, te vátá yóo ñⁿ-gá codo ñaha xii-dí, te nandaxi-ndo-dí te candeca-ndo-dí quixi. 3 Te núú yoo na càcáⁿ tnúhú núú-ndó nã cuèndá nándàxi-ndo-dí, te cúñaha-ndo sã yùhú Yaá xícá cùu ndihi-ndo xini ñuhu-í-dí, te na yãha canehe chiuⁿ-í-dí te ndihi-ni natendaha-í-dí,

duha cúñaha-ndo —càchí-gá xáhaⁿ-gã xii-güedé.

4 Te cue téé-áⁿ nĩ xica-güedé cuáháⁿ-güedé, te òré ní quexìo-güedé ñuú-áⁿ te ní naníhí-güedé ñⁿ búrru ndètní-dí ñⁿ yutnu ñihnu yatni ñⁿ yuyehe vehe caa yatni yuhu ichi, te ní ngüíta-güedé nándàxi-güedé-dí.

5 Te mei òré nándàxi-güedé-dí ní quexìo ñáyiú xáhãⁿ-yu xii-güedé:

—¿Ná cuèndá nándàxi-ndo búrru-áⁿ-i? —càchí-yu xáhãⁿ-yu xii-güedé.

6 Te cue téé-áⁿ nĩ xáhaⁿ-güedé xií-yu nàcuáa ní xáhaⁿ Jèsús cúñaha-güedé. Te sátá dúcáⁿ te ní dáñã-yu ndèca-güedé búrru-áⁿ cuáháⁿ núú ndécú Jèsús. 7 Te òré ní quexìo-güedé ndihi-dí núú ndécú-gã, te ní sacáⁿ ndodo-güedé dóo-güedé sátá-dí, ní ngódó ñaha Jèsús xii-dí. 8 Te ío cuéhé ñáyiú ta sàcáⁿ-yu dóo-yu ichi cuáháⁿ-gã cuèndá núú dõo-yu-áⁿ yãha-gã ndihi quití yòdo-gã, te davá-yu xèhndé-yu ndaha yutnu ta sacáⁿ-yu cuáháⁿ.

9 Te nchaa ñáyiú yòdo nuu núú-gã ndihi nchaa ñáyiú nchìcúⁿ ndaa sátá-gã ní ngüíta-yu níhi càháⁿ-yu, te càchí-yu:

—¡Ío càhnu cuu Yaá-a! ¡Te Yá Ndiöxí ná chindee ñaha-gã, chi diu-gá cúú-gã Yaá ní tendaha-gã véxi quide núú-gã! 10 ¡Te diu-ni Yaá-á cúú-gã Yaá véxi quindaha ñaha xii-o datná ní xóo cada ndí Dàvíí! ¡Te ndéé nchaa sá ío andíu na càchí-xi sá ío càhnu cuu-gã! —duha càchí-yu.

11 Te Jèsús ní quexìo-gã ñuú Jerusàlén, te cuanguihu-gã xití veñúhu càhnu sã ío cùnuu, te ní xíndéhé vãha-gã nchaa sã ndécú xití veñúhu-áⁿ. Te sátá dúcáⁿ te ní ndee-gã cuáháⁿ-gã ñuú Bètaniá ndihi ndí ùxúú cue téé xica cuu ndihi-gã chi sa ní cuaa.

Jèsús xáhaⁿ-gã xii yutnu ngüxí sã vã cúúⁿ-gã sávidí-xi

(Mt. 21:18-19)

12 Te nduu tnéé-áⁿ nĩ quee Jèsús ñuú Bètaniá ndihi cue téé xica cuu ndihi-gã, te ichi ñuhu-gã ní

xíhí-gá docó. ¹³ Te xica nǐ xini-gá nǔtní ñⁿ yutnu ngǔxí, te ní xica-gá cuándéhé-gǎ nǔu ndéé sávídí-xi te ñá túú nǎ ndéé, chi mee-ni ndàha-xi ndéé chi ñá díú yǒó sácǔndeé sávídí-xi. ¹⁴ Te Jèsús ní xáhaⁿ-gǎ xii yutnu ngǔxí-áⁿ:

—Vitna te vá yǒo ñⁿ-gǎ caxi sávídí-n, chi vá cúúⁿ-gǎ —càchí-gǎ xáhaⁿ-gǎ xii yutnu ngǔxí-áⁿ.

Te cue téé xica cuu ndihí-gá ní tecú dóho-güedé nàcuáa ní xáhaⁿ-gǎ xii yutnu ngǔxí-áⁿ.

Jèsús ñá túú tnàhá iní-gǎ nàcuáa quide ñáyiu xití veñúhu

(Mt. 21:12-17; Lc. 19:45-48; Jn. 2:13-22)

¹⁵ Te Jèsús ní quexìo tucu-gá ndihí cue téé xica cuu ndihí-gá ñuú Jerusàlén, te cuánguihu tucu-gá xití veñúhu càhnu sá ïo cùnūu, te xití veñúhu-áⁿ xíndecu cue ñáyiu quide ndáhú nádìcò-yu, ndihí cue ñáyiu xísaaⁿ. Te nchaá-yu ní queñuhu ñaha Jèsús xii-yu quehé, te ní dándúá-gǎ mèsá cue ñáyiu dàma díhúⁿ, ndihí nchaá xilé sácóo nchihi cue ñáyiu dico lómá xíndecu xití veñúhu-áⁿ. ¹⁶ Te ñá túú tnàhí-gǎ ní dàña-gǎ yáha cue ñáyiu ndihí nchaá sá nchídò-yu ichi xití veñúhu-áⁿ. ¹⁷ Te ní xáhaⁿ-gǎ xii-yu:

—Núú tùtú Yǎ Ndiǒxí càháⁿ-xi nàcuáa ní cáháⁿ-gǎ, te ní cachí-gǎ: “Vehe-í cúú-xí vèhe núú tàcá ñáyiu nǐhì ñuyú cáháⁿ ndihí ñàhá-yu xii-í”, duha ní cáháⁿ-gǎ càchí-xi núú tùtú-gǎ. Dico nchòhó quidé-ndó vèhe-gǎ vèhe ñadúhú —càchí-gǎ xáhaⁿ-gǎ xii-yu.

¹⁸ Te nchaá dútú cùnūu, ndihí nchaá cue téé dàcuaha ñaha xii-yu nchaá tnúhu ní chídó tnùnì ndii Moisés ní tecú dóho-güedé nàcuáa ní cáháⁿ-gǎ te ní ngúita-güedé ndúcú-güedé nàcuáa cada-güedé cahni ñaha-güedé xii-gǎ, chi yùhú-güedé sá ïo cùnūu-gǎ, te ducaⁿ chi nchaá ñáyiu ío cùnūhu-yu nchaá tnúhu càháⁿ-gǎ. ¹⁹ Te òré sa ní cuaa cuí-nǎ, te ní quee tucu Jèsús ndihí cue téé xica

cuu ndihí-gǎ ñuú Jerusàlén cuáháⁿ-gǎ ndihí-güedé ingá xichi.

Ní yíhí yutnu ngǔxí
(Mt. 21:20-22)

²⁰ Te nduu tnéé nehé-ni ní yáha tucu Jèsús ndihí cue téé xica cuu ndihí-gǎ núú níhnú yutnu ngǔxí, te ní xini-güedé sa ní yíhí nǐhì ndéé yóho-xi. ²¹ Te té Pèlú ní ndacu iní-dé nàcuáa ní xáhaⁿ Jèsús xii yutnu ngǔxí-áⁿ, te ní xáhaⁿ-dè xii-gǎ:

—Mèstrú, cundehe nǎ ní yíhí yutnu ngǔxí sá ñí xáhaⁿ-n sǎ vǎ cúúⁿ-gǎ sávídí-xi —càchí-dé xáhaⁿ-dè xii-gǎ.

²² Te Jèsús ní xáhaⁿ-gǎ xii-güedé:

—Quindáa ndisa iní-ndó Yǎ Ndiǒxí.

²³ Te na càchí tnúhu ndáa-í xii-ndo sǎ nǔu nchòhó cúñaha-ndo xii tindúú-a xocuñí-xi núú ndécú-xí, te quíhíⁿ-xi quée-xi xití làmár. Te díu ducaⁿ càda-xi te núu nchòhó vá cání ñⁿ cani úú iní-ndó, te quindáa iní-ndó sǎ dúcáⁿ càda-xi. ²⁴ Te xǎⁿ nǔu càchí tnúhu-í xii-ndo sǎ nchàa sá ná càcáⁿ-ndó nǔú Yǎ Ndiǒxí òré càháⁿ ndihí-ndo-gǎ, te taxi-gǎ te núu nchòhó sàndáa ndisa iní-ndó sǎ táxí-gǎ sá xicáⁿ-ndó nǔú-gǎ. ²⁵ Te òré càháⁿ ndihí-ndo Yǎ Ndiǒxí te dandàcu iní-ndó te núu ndècu ñáyiu ñá túú cùu váha iní ñàhá xii-ndo, te cada càhnu iní-ndó-yu cuendá ducaⁿ càda cahnu iní ñàhá Tǎtá-ndó Dútú Ndiǒxí Yaa ndécú àndiu xii-ndo cuendá nchaá sá ñà túú váha quide-ndo. ²⁶ Dico núu nchòhó vá cadá càhnu iní-ndó sǎ quidé ñàha tnaha ñáyiu-ndo xii-ndo, te ni Tǎtá-ndó Dútú Ndiǒxí vá cadá càhnu iní ñàhá-gǎ xii-ndo cuendá nchaá sá ñà túú váha quide-ndo —cachí-gǎ xáhaⁿ-gǎ xii-güedé.

Jèsús ndécú ndihí-gǎ tnúhu ndee iní
(Mt. 21:23-27; Lc. 20:1-8)

²⁷ Te Jèsús ní ndexìo tucu-gǎ ñuú Jerusàlén ndihí cue téé xica cuu ndihí-gǎ, te cuánguihu tucu-gǎ xití veñúhu càhnu sá ïo cùnūu ndihí-güedé. Te xití veñúhu-áⁿ yíhí-gǎ ní quexìo cue dútú cùnūu ndihí cue téé dàcuaha ñaha xii ñáyiu nchaá tnúhu ní chídó tnùnì ndii Moisés, ndihí cue téé cùu sacuéhé

núú ñáyiú isràél. ²⁸ Te xáhaⁿ-güedë xii-gá:

—Cuñí-ndí cachí tnúhu-n xii-ndí nása ndúu tnúhu ndee ìní ndécú ndíhi-n núu quide-n nándi sá quidé-n, ¿te yoo ducaⁿ ñí taxi tnúhu ndee ìní-áⁿ xii-n-i? —càchí-güedé xáhaⁿ-güedë xii-gá.

²⁹ Te Jèsús ní xáhaⁿ-gá xii-güedé:

—Yúhú tnàhá-í cuñí-í cácaⁿ tnúhu-í ñí sá cácaⁿ tnúhu-í núú-ndó te núu na cächí tnúhu-ndo, te cachí tnúhu-í xii-ndo yòo ní taxi tnúhu ndee ìní xii-í duha quide-í. ³⁰ Te chí cächí tnúhu xii-í yoo ní táuchíúⁿ ñí dácuándüte ndí Juàá ñáyiú, ¿Yá Ndiöxí áⁿ cuè téé ñuyúú-a ní táuchíúⁿ dùcaⁿ ní quide ndí? Te chí cächí tnúhu —cächí-gá xáhaⁿ-gá xii-güedé.

³¹ Te ní ngüíta-güedé xitnàha-güedé:

—¿Nása cúñaha-o? Chi núu na cúñaha-o sá Yá Ndiöxí ní táuchíúⁿ dùcaⁿ ní quide ndí Juàá ñá, te quesaha-dé: “¿Ná cuendá ñá túú ní sàndáá ìní-ndó tnúhu ní cáháⁿ ndí vâⁿ?”, quesaha-dé. ³² Te ní vâ cúú cúñaha-o sá cuè ñáyiú ñuyúú-a ní táuchíúⁿ dùcaⁿ ní quide ndí Juàá —cächí-güedé xitnàha-güedé.

Te ducaⁿ ñí xitnàha-güedé chí ñá túú ní cùtnuní ìní-güedé nása cúñaha-güedé xii-gá, chí xiyùhú-güedé cue ñáyiú chí nchaa ñáyiú-áⁿ ñí cutnùní ndáá ìní-yu sá Yá Ndiöxí ní táuchíúⁿ-gá ducaⁿ ñí quide ndí Juàá.

³³ Te ní xáhaⁿ-güedë xii Jèsús:

—Ñá túú xini-ndí yoo ní táuchíúⁿ dùcaⁿ ní dácuándüte ndí Juàá ñáyiú —cächí-güedé xáhaⁿ-güedë xii-gá.

Te Jèsús ní xáhaⁿ-gá xii-güedé:

—Te núu ducaⁿ te ní yúhú vá cächí tnúhu-í xii-ndo yòo ní taxi tnúhu ndee ìní duha quide-í —cächí-gá xáhaⁿ-gá xii-güedé.

12

*Cuendá cue téé cuihna ìní-xi
(Mt. 21:33-46; Lc. 20:9-19)*

¹ Te Jèsús ní ngüíta-gá cání-gá ñí cuendú núú ñáyiú nácuáa tecú tnùní-yu tnúhu-gá, te xáhaⁿ-gá xii-yu:

—Ñí téé ní nacúxi-dé mee-ni yòho yaha stilé núú ñúhú-dë, te ní chidoco-dë cuendá sá vâ cúú dàñú, te ní cadúha-dé núú quíhni-dë ndéhé yoho yàha stilé-áⁿ òré ná cúu, te ní cadúha-dé ñí xító dùcúⁿ núú cáundòdo cue téé coto yoho yàha stilé-áⁿ.

Te ní sáá ñí nduu quèe-dé quíngaca cuu xica-dé vâi nduu, te ní dándòo ndaha-dë sá ñí xitu-dé-áⁿ xii ñí úú cue téé càháⁿ ndíhi-dé cuendá cada chiúⁿ-güedé, te ní ndatnúhu-güedé sá òré ná cúú te cuu cuendá dava-güedé te ducaⁿ te ní quee-dé cuáháⁿ-dé.

² Te sátá ñí sáá nduu ñí cuu ndéhé yoho yàha stilé sá ñí xitu-dé-áⁿ, te ní xáhaⁿ-dë xii ñí téé xinu cuechi núú-dë: “Cuáháⁿ cácaⁿ-n sá cúú cuendá-í núú cuè téé ní dándòo ndàha-í nchaa yoho yàha stilé sá ñí xitu-í-áⁿ”, cächí-dé xáhaⁿ-dë. Te téé xinu cuechi-áⁿ ñí xica-dé cuáháⁿ-dé. ³ Te cue téé-áⁿ ñí tñi-güedé téé xinu cuechi-áⁿ, te ní caniha-güedë xii-dé, te dâtnùní ní nacuícúⁿ ñáhá-güedé, te ñá túú tnàhí ná ní sãñaha-güedë. ⁴ Te téé cúu xítóhó yoho yàha stilé-áⁿ ñí tendaha tùcu-dé ingá téé xinu cuechi núú-dë cuáháⁿ-dé. Te òré ní quexió téé xinu cuechi-áⁿ te cue téé-áⁿ ñí sáha ñaha-güedë yúú xii-dé, te ní táhú-güedë díquí-dë, te ní xícuèhé ñáhá-güedë xii-dé. ⁵ Te téé cúu xítóhó nchaa yoho yàha stilé-áⁿ ñí tendaha tùcu-dé ingá téé xinu cuechi núú-dë cuáháⁿ-dé núú cuè téé-áⁿ, dico téé-áⁿ òré ní quexió-dé te ní sahani ñaha-güedë xii-dé. Te téé cúu xítóhó nchaa yoho yàha stilé-áⁿ ñí tendaha-dë vâi-gá cue téé xinu cuechi núú-dë cuáháⁿ ngácáⁿ-güedé sá cúú cuendá-dé ní cúu dico diu-ni ducaⁿ ñí quide ñaha tùcu cue téé ndèe nchaa yoho yàha stilé-áⁿ xii-güedé, chí dava-güedé ní caniha-güedë te dava-güedé ní sahani ñaha-güedë.

⁶ Te téé cúu xítóhó nchaa yoho yàha stilé-áⁿ ndécú ñíndii-ná téé tendaha-dë quíhíⁿ núú cuè téé ní dándòo ndaha-dë sá ñí xitu-dé-áⁿ, te téé tendaha-dë-áⁿ cúú-dé déhe ducuⁿ-dé, te ío cúu ìní ñáhá-dë. Te ní sani ìní-dé: “Váha-gá núu tendaha-í

déhe-í-a núhú-dé, chi òré quini ñáhá-güedě xii-dé te cànehe-güedě sá yíñuhu núú-dě”, duha ní sani iní-dé. Te ducaⁿ te ní xáhaⁿ-dě xii déhe-dé-áⁿ sá nùhú-dé, te téé-áⁿ cuñuhú-dé cuáháⁿ ngácáⁿ-dé sá cúu cuendá tátá-dě núú cuè téé-áⁿ. ⁷ Dico òré ní xiní cue téé quide chiuⁿ-áⁿ dēhe téé cùu xitohó nchaa yoho yàha stilé-áⁿ, te ní xítñaha-güedé: “Téé-áⁿ téé véxi nduu táhú ñuhu-a ndihi sá cáá núú-xi, dico cahni-o-dě te mee-o ndùu táhú-ó sá ndúú táhú-dě”, duha ní xítñaha-güedé. ⁸ Te ní tñi-güedé téé-áⁿ, te ní sahani ñaha-güedě, te ní dáquéné-güedě yiqui cùñú-dé ìⁿ xio yuhu ñuhu núú cáá yòho yaha stilé-áⁿ —duha cuáháⁿ cuendú ní caní Jèsús núú-yu.

⁹ Te Jèsús ní xáhaⁿ tùcu-gá xii-yu:

—¿Te nchòhó sa cùtnuní iní-ndó nàcuáa cada xitohó ñuhu-áⁿ áⁿ? Chi núhú-dé te cahni-dé cue téé-áⁿ te dándóo ndaha-dě ñuhu-dé xii cue téé cùtnuní iní-dé cada ndáá —càchí-gá xáhaⁿ-gá xii-yu.

¹⁰ Te xáhaⁿ tùcu-gá xii-yu:

—Te nchòhó, náá ñá túú dàcuaha-ndo núú tütú Yá Ndióxi núú càchí-xi: Yúú sá ní dáquée tñí cue téé dàcaa vehe, ní cuu-xi yúú cùnùu vitna.

¹¹ Chi mee Yá Ndióxi ducaⁿ ní càchí-gá cunduu, te cùu-xi ìⁿ sá ìo cùñúhu-o vitna. Duha càchí-xi núú tütú-gá —càchí Jèsús xáhaⁿ-gá xii-yu.

¹² Te cue téé ní xíndedóho nàcuáa ndùu tñuhu ní cáháⁿ-gá ní cuiní-güedé tñi ñaha-güedě xii-gá ní cùu, chi ní cutnùní iní-güedé sá cuendá-güedé ní cáháⁿ-gá, dico ní yùhú-güedé tñi ñaha-güedě xii-gá cuendá sá ìo vài ñáyiu, te ná ìo ná cada ñáhá-yu xii-güedé ní sani iní-güedé, te ní xica-güedé cuáháⁿ-güedé.

Cuendá impuèstú

(Mt. 22:15-22; Lc. 20:20-26)

¹³ Te sátá ní xica-güedé cuáháⁿ-güedé, te ní tendaha-güedě ìⁿ úú cue téé cùu fariséú, ndihi ìⁿ úú cue téé cùndihi té Hèrodés cuáháⁿ-güedé núú ndécú Jèsús ndúcú-güedě nàcuáa

cada-güedé datìcánuu ñaha-güedě xii-gá núú tñuhu càháⁿ-gá. ¹⁴ Te cue téé-áⁿ ní quexìo-güedé núú Jèsús, te xáhaⁿ-güedě xii-gá:

—Mèstrú, cùtnuní iní-ndí sá ìo ndáá càháⁿ-n, te ñá túú quide cuendá-n nàcuáa càháⁿ ñáyiu, te cuèi ndédani cáa-yu ìⁿ-ni càháⁿ-n ndihí-yu chi ñá túú quide cuendá-n cuèi ná ñáyiu cùu-yu, te càháⁿ ndáá-n nàcuáa càháⁿ Yá Ndióxi cundecu-o ñúyíu-a. Te cachí tñuhu xii-ndí núu váha-ni quide-ndí sá cháhu-ndí té Cèsár téé ìo cùnùu cuendá impuèstú áⁿ ñáhá —càchí-güedé xáhaⁿ-güedě xii-gá.

¹⁵ Dico Jèsús ní cutnùní iní-gá sá xitó ndèé ñáhá-güedě xii-gá, núú ní xáhaⁿ-gá xii-güedé:

—¿Ná cuendá ducaⁿ xito ndeé ñáhá-ndó xii-í? Chí dánèhé ñáhá xii-í ìⁿ díhúⁿ sá cháhu-ndo cuendá impuèstú te núu nása cáa —cachí-gá xáhaⁿ-gá xii-güedé.

¹⁶ Te cue téé-áⁿ ní dánèhé ñáhá-güedě xii-gá ìⁿ díhúⁿ sá cháhu-güedé cuendá impuèstú. Te Jèsús ní xáhaⁿ-gá xii-güedé:

—Chí càchí tñuhu xii-í núu yoo núú-xi ndèé ndihi yoo diu-xi ndeé —càchí-gá xáhaⁿ-gá xii-güedé.

Te ní xáhaⁿ-güedě xii-gá:

—Núú tē Cèsár ndèé ndihi diu-dé —càchí-güedé xáhaⁿ-güedě xii-gá.

¹⁷ Te Jèsús ní xáhaⁿ-gá xii-güedé:

—Te núu ducaⁿ te chí nàcuáha té Cèsár sá cúu cuendá-dé, te sá cúu cuendá méé Yá Ndióxi te xíáⁿ nacuáha-ndo-gá —càchí-gá xáhaⁿ-gá xii-güedé.

Te cue téé-áⁿ ìo ní cuñúhu-güedé sá dúcáⁿ ní cáháⁿ-gá.

Cuendá cue ñáyiu ndoto

(Mt. 22:23-33; Lc. 20:27-40)

¹⁸ Te sátá dúcáⁿ te ní quexìo ìⁿ úú cue téé cùu saducéú núú ndécú Jèsús, te cue téé-áⁿ ñá túú sándáá iní-güedé sá ndótó cuè ñáyiu ní xihí, te ní xáhaⁿ-güedě xii-gá:

¹⁹ —Mèstrú, ndíi Moisés càchí ndíi núú tütú ndíi ndècu vitna sá núu ìⁿ téé na cùu-dé te quendóo ñadihí-dé, te núu ñá túú ní xòo

déhe-dé ndihi ñadìhí-dé-án, te téé cùu ñaní-dé naqueheⁿ-dé ñaha ní quendóo quèé-án cuendá coo déhe-dé ndihi-aⁿ cuendá téé ní xíhí-án. ²⁰ Te ní xíndecu úsá tñahá cue téé mee-ni ndì ñaní-güedé. Te téé díhna ní níhí ñadìhí-dé, te ñá túú ní cùdí-dé cundecu-dé chi ní xíhí-dé, te ni ìⁿ déhe-dé ñá túú ní xõ ndihi ñadìhí-dé. ²¹ Te téé cùu uú ní naqueheⁿ-dé ñaha ní quendóo quèé-án, dico ní xíhí tucu-dé, te ni ìⁿ tucu déhe-dé ñá túú ní xõ ndihi ñaha-án. Te ñu-ni ducaⁿ ní xíhí téé cùu uní. ²² Te ní xínu ndì úsá-güedé ní cándeca ñaha-güedé xii ñaha-án, dico ni ìⁿ-güedé ñá túú ní xõ déhe-güedé ndihi-aⁿ, te ní ndihi-güedé ní xíhí te ndéé núú ní ndihi-ná ní xíhí tñahá ñadìhí-án. ²³ Te na sàá nduu ndòto-güedé ndihi ñaha-án, ¿te ndèdaca-güedé ñadìhí-güedé cuu-aⁿ-i? Chi ndì úsá-güedé ní cándeca ñaha-güedé xii-aⁿ —càchí-güedé xàhaⁿ-güedé xii-gá.

²⁴ Te Jèsús ní xàhaⁿ-gá xii-güedé:

—Ní xíta nchòhó tñuhu càháⁿ-ndó, chi ñá túú xíní-ndó nàcuáa càháⁿ Yá Ndiòxí núú tütú-gá, te ni ñà túú xíní-ndó sã díú-gá ndácú-gá quidé-gá nchaandi túhú sá vãha. ²⁵ Te na càchí tñuhu-í xii-ndo sã òré ná sàá nduu ndòto nchaa ñáyiú ní xíhí, te dává-án vã yõ-gá dasaⁿ dèhe yoco-xi chi vá yõ-gá candeca tñaha, chi na ndòtó-yu te cuu-ná-yu dàtná cue espíritú xínu cuèchi núú Yá Ndiòxí. ²⁶ Te núú nchòhó cuíní-ndó càháⁿ-ndó cuendá nchaa ñáyiú ndoto, te díhna-gá dacuàha-ndo nacuáa ní chídó tñuní ndíi Moisés núú tütú ndíi ni cùu. Chi ñu núú tütú ndíi càháⁿ-xi nàcuáa ní xàhaⁿ Yá Ndiòxí xii ndíi cùtñahá ní càháⁿ ndihi ñaha-gá ìⁿ xichi núú níhnú tñùtaú nchìcúⁿ ñuhú. Te duha ní xàhaⁿ-gá xii ndíi: “Yúhú cùu-í Ndiòxí tẽ Abrahám, ndihi té Isàác, ndihi té Jàcób”, duha ní xàhaⁿ Yá Ndiòxí xii ndíi càchí-xi núú tütú ndíi. ²⁷ Te Yá Ndiòxí ñá túú cùu-gá Ndiòxí cue ñáyiú ní xíhí, chi cùu-gá Ndiòxí cue ñáyiú xíndecu vívú, núú xíáⁿ nchòhó ío xíta-ndo tñuhu càháⁿ-ndó. Te sá dúcáⁿ ní càháⁿ-gá cuendá cue téé-án,

te xíáⁿ cùtñuní sá cuèi ní xíhí-güedé sá cùu-xí tñaha ñáyiú-güedé, dico ndècu vívú-güedé sá cùu-xí-gã —càchí-gá xàhaⁿ-gã xii-güedé.

Tnúhu sá ño-gá cúnúu
(Mt. 22:34-40)

²⁸ Te tñahá ìⁿ téé dàcuaha ñaha xii ñáyiú nchaa tñuhu ní chídó tñuní ndíi Moisés ndèdóho-dé nchaa tñuhu càháⁿ Jèsús ndihi cue téé cùu saducéú-án, te ndèdóho-dé sá sùuní vãha níhí-gá tñuhu nãdanchocáva-gá. Te ní sãndehe yatni-dé núú-gã, te xàhaⁿ-dè xii-gá:

—Cachí tñuhu xii-í ndèdaca tñuhu sá ní càháⁿ Yá Ndiòxí ío-gá cúnúu cuu díhna —càchí-dé xàhaⁿ-dè xii-gá.

²⁹ Te Jèsús ní xàhaⁿ-gã xii-dé:

—Duha càháⁿ tñuhu sá ño-gá cúnúu: “Nchòhó ñáyiú isràèl ío váha chí cùndèdóho tñuhu-a. Ìⁿdíi díi-ni Yá Ndiòxí ndécú, te ñu-ni-gá cùu-gã Ndiòxí-ó. ³⁰ Te cuu iní-ndó Dütú Ndiòxí Yá cùu Ndiòxí-ndó ñi yuhu ni iní-ndó, te cani iní-ndó càda-ndo datná cuíní mée-gã, te mee-ni tñuhu váha cani iní-ndó cuendá cuu vii cuu váha-ndo núú-gã, te coo iní-ndó càda-ndo nacuáa cuu váha iní-gá”, duha càháⁿ tñuhu sá ño-gá cúnúu. ³¹ Te duha càháⁿ tucu ingá tñuhu cùu uú sá ño cúnúu: “Cuu iní-ndó tñaha ñáyiú-ndo dàtná cùu ñí-ndó mèe-ndo”, duha càháⁿ tñuhu cùu uú-án. Te úú duha-ni tñuhu-a cùu-xi tñuhu sá ño-gá cúnúu —cachí-gá xàhaⁿ-gã xii-dé.

³² Te téé dàcuaha ñaha xii ñáyiú nchaa tñuhu ní chídó tñuní ndíi Moisés ní xàhaⁿ-dè xii-gá:

—Mèstrú, váha-ni càháⁿ-n chi ndáá sá ìⁿdii-ni Yá Ndiòxí ndécú, te ñá túú-gã ndéé ndécú ñngá ndiòxí. ³³ Te dàtná ní cachí-n sã ñi yuhu ni iní-ó cùu iní-ó Yá Ndiòxí, te cani iní-ó càda-o nacuáa cuu vii cuu váha iní-gá te ío vii ío váha cuu iní-ó dàtná cuíní mée-gã, te coo iní-ó càda-o nacuáa cuu váha iní-gá, te cuu iní-ó cue tñaha ñáyiú-o dàtná cùu ñí-ó mèe-o. Te nchaa xíáⁿ ío-gá xíní ñuhu-xi cada-o dacúxí sã cuãñaha-o quiti

cahni-güedé te cáyú-di nduu táhú ñáhá Yá Ndiöxí, ndíhi dàcúúxí nchaa dava-gá sá sãñaha-o ndùu táhú-gã — cächí-dé xãhaⁿ-dë xii-gá.

³⁴ Te sá dúcáⁿ ïo váha ndùu tnúhu ní cáháⁿ téé-áⁿ, núu ní xáhaⁿ Jèsús xii-dé:

—Luha-ná cúmăní xii-n te ndíhu ndaha ñàha Yá Ndiöxí —cächí-gá xãhaⁿ-gã xii-dé.

Te sá dúcáⁿ ñí xáhaⁿ-gã xii téé-áⁿ, núu vá yõo ñⁿ-gá ní cùyíi nágá tnúhu nducu tnúhu-yu núú-gá.

*Yoo cùu Xítohó Jesucristú
(Mt. 22:41-46; Lc. 20:41-44)*

³⁵ Te Jèsús yíhí-gã xití veñúhu cãhnu sá ïo cùnnuu danehé-gá ñáyi, te xãhaⁿ-gã xií-yu:

—Cue téé dàcuaha ñaha xii ñáyi nchaa tnúhu ní chídó tnùní ndí Moisés cächí-güedé sá Cristú Yaá tendaha Yá Ndiöxí quixi ñuyíú-a cùu-gá déhe ndí Dàví, te ndí-áⁿ ñí cunaha vihi ní xíhí ndí. ¿Te ná cuendá ducaⁿ cáháⁿ-güedé? ³⁶ Te mee ndí Dàví-áⁿ ñí dácáhu ñí ñáhá Espíritú Yá Ndiöxí xii ndí nàcuáa cáháⁿ ndí, te duha ní cachí ndí:

Dútú Ndiöxí ní xáhaⁿ-gã xii Yaá cùu Xítohó-í:
“Ngóo xio cùha-í,
te yúhú cada-í te nchaa sá cùu ùhú ñí ñáhá xii-n canehe-xi sá yíñuhu núú-n.”

Duha ní xáhaⁿ Dútú Ndiöxí xii Yaá cùu Xítohó-í.

Duha ní cachí ndí. ³⁷ ¿Te nása cùu Cristú déhe ndí Dàví, te mee ndí cachí ndí sá cùu-gã Xítohó ndí? — cächí Jèsús xãhaⁿ-gã xii-yu.

Te ío cuéhé ñáyi ní xíndedóho nchaa tnúhu ní cáháⁿ-gá, te ío ní cudíi ñí-yu ní xíndedóho ñáhá-yu xii-gá.

Jèsús cáháⁿ-gá cuendá cue téé dàcuaha ñaha xii ñáyi nchaa tnúhu ní chídó tnùní ndí Moisés

(Mt. 23:1-36; Lc. 11:37-54; 20:45-47)

³⁸ Te òré dánèhé ñáhá Jèsús xii cue ñáyi, te xãhaⁿ-gã xií-yu:

—Cada cuendá-ndó vã cádá-ndó dàtná quidé cuè téé dàcuaha ñaha xii ñáyi nchaa tnúhu ní chídó tnùní ndí

Moisés, chi cue téé-áⁿ tnàhá ñí-güedé cuihnu-güedé dóó nání sã sácúhnu cue téé cùnnuu-gá te cuíni-güedé sá méé-ñí ndíhi tnúhu yíñuhu cáháⁿ ndíhi ñaha ñáyi xii-güedé nchaa núú xícá cùu-güedé. ³⁹ Te nàcáxi-güedé xilé sácóo nchihi cue téé cùnnuu-gá xití veñúhu sácóo nchihi-güedé. Te ducaⁿ-ni quíde-güedé cuèi òré quíhu-güedé mèsá caxi-güedé òré ndécú-güedé ñⁿ vico, chi mee-ñí núú sácóo cue téé cùnnuu cuíni-güedé coo-güedé. ⁴⁰ Te quèndéé-güedé vehe nchaa ñáyi quèé, te ío naha cáháⁿ ndíhi-güedé Yá Ndiöxí dándahú-güedé méé-güedé sá ïo quíde ndáá-güedé cuendá sá cuíni-güedé cáháⁿ váha ñáyi cuendá-güedé. Te sá dúcáⁿ quíde-güedé te ío-gá ndoho-güedé núú ùhú núú ndàhú dàcúúxí dàva-gá ñáyi —cächí-gá xãhaⁿ-gã xií-yu.

*Díhúⁿ nduu táhú Yá Ndiöxí ní dáquëe ñí ñaha ndàhú ñaha quèé
(Lc. 21:1-4)*

⁴¹ Te núcóo Jèsús xití veñúhu yatni núú ndécú àlcanciá te ndèhe-gá xídáquëe ñáyi díhúⁿ xití alcanciá-áⁿ, te tnàhá cue ñáyi cuica xídáquëe-yu vãi díhúⁿ. ⁴² Te ní quexìo ñí ñaha ndahú ñaha quèé, te ndèhe-gá ní dáquëe-aⁿ úú tnàhá díhúⁿ còbrí xití alcanciá, te díhúⁿ-áⁿ ïo sacú yáhu-xi. ⁴³ Te Jèsús ní cana-gá cue téé xica cuu ndíhi-gá, te ní xáhaⁿ-gã xii-güedé:

—Na cächí tnúhu ndáá-í xii-ndo sã ñaha ndahú ñaha quèé-a ío-gá nándíhi díhúⁿ ñí dáquëe-aⁿ xití alcanciá dàcúúxí díhúⁿ ñí dáquëe dava-gá-yu. ⁴⁴ Chi nchaa ñáyi-áⁿ ñí dáquëe-yu mee-nã díhúⁿ sã ñí quendóo-ná, dico ñaha quèé-a cuèi ndàhú-aⁿ dico ní dáquëe-aⁿ ñíhí díhúⁿ sã cuááⁿ sã caxí-áⁿ ní cùu —cachí-gá xãhaⁿ-gã xii-güedé.

13

*Jèsús cächí-gá sá ngóyó veñúhu
(Mt. 24:1-2; Lc. 21:5-6)*

1 Te òré ní ndee Jèsús xití veñúhu càhnu sá ïo cùnunu, te ìn tée xica cuu ndihi-gá ní xáhaⁿ-dě xii-gá:

—jMèstrú, cundehe nã ío vii ní sáá veñúhu-aⁿ ndihi nchaa vehe nèhe tnaaha ndihi-xi, te ío vii ndãa nchaa yúú yíhí! —càchí-dé xãhaⁿ-dě xii-gá.

2 Te Jèsús ní xáhaⁿ-gã xii-dé:

—Nchaa nàcuáa càa nchaa vehe sá cùñúhu-n-a vitna sáá nduu te vá cùndùu-gá-xi dàtná cáá-xí vitna, chi ni ìn-gá yúú vã códó nchihhi tnaaha-xi, chi ndihi ngoyo —càchí-gá xãhaⁿ-gã xii-dé.

Nàcuáa cada-xi nduu ta cùyatni naa ñuyíú

(Mt. 24:3-28; Lc. 21:7-24; 17:22-24)

3 Te Jèsús ní xica-gá ndihi cue tée xica cuu ndihi-gá cuáháⁿ ndihi ñaha-gã xii-güedé yucu nãni Olívú, te yucu Òlívú-áⁿ tũu ndáá núú cáá veñúhu càhnu sá ïo cùnunu. Te Jèsús ní quexìo-gá ndihi-güedé yucu Òlívú-áⁿ, te xíáⁿ nĩ ngóo-gá te núú núcõo-gá-áⁿ nĩ sáháⁿ té Pèlú ndihi té Jàcobó ndihi té Juáá ndihi té Ndrìxí, te dayuhu nĩ xáhaⁿ-güedé xii-gá:

4 —Cùnì-ndí cachí tnúhu-n nã nduu dùcaⁿ cada-xi ngoyo veñúhu càhnu sá ïo cùnunu, àdi nãndi cùu sá cáá-xí cuendá cutnùnì iní-ndí sá sã ta cuyatni nduu ducaⁿ cada-xi —cachí-güedé xãhaⁿ-güedé xii-gá.

5 Te Jèsús ní xáhaⁿ-gã xii-güedé:

—Ío quíhi iní-ndó cùndecu-ndo cuendá sá vã yõo dandàhú ñáhá xii-ndo. 6 Chi ío cuéhé cue tée coo ñuyíú te danàni-güedé méé-güedé dàtná nãni-í, te cachí-güedé: “Yúhú cùu-í Crìstú Yaa ní tendaha Yã Ndiõxí véxi ñuyíú-a”, duha cachí-güedé. Te sá dúcáⁿ cãháⁿ-güedé te ío vãi ñáyíu dandàhú-güedé.

7 Te òré ná nìhí-ndó tnúhu sá nãa-güedé ndèni ní cuu, te vá yùhú-ndó chi dacuítí sã dúcáⁿ càda-xi, dico vátá sãá-gá nduu nãa ñuyíú òré ducaⁿ càda-xi. 8 Chi cue tée ìn nacióⁿ nãa-güedé ndihi cue tée ingá nacióⁿ, te tìtní ñuu ngüíta-güedé nãa-güedé, te tìtní xichi ñuyíú ñhi

vìhi tnáa, te tìtní tucu xichi ñuyíú coo tnamá, te ío-gá cuéhé sã yãha ñáyíu. Te nchaa sã dúcáⁿ càda-xi-áⁿ cúu-xí tnùndòho sá vítná vãha vãha quèsaha-xi sácúú-xí cuè ñáyíu ndècu ñuyíú-a.

9 Dico nchòhó ío quíhi iní-ndó cùndecu-ndo, chi nchaa ñáyíu na cùu úhú iní ñáhá xii-ndo cuáha cuendá ñáhã-yu xii dava-ndo núú cuè tée cùchiuⁿ, te candeca ñaha-güedé xii-ndo quíhíⁿ xití veñúhu-güedé, te yacáⁿ caniha-güedé xii-ndo. Te quíhíⁿ-ndó núú cuè tée yìndaha nacióⁿ àdi núú dàva-gá cue tée cùnunu sá cuendá-í, te nchòhó nìhí-ndó nàcuáa cada-ndo cãháⁿ váha-ndo cuendá-í núú-güedé. 10 Te cùmání-gã sáá nduu nãa ñuyíú-a te sa cutènuu tnúhu-í ni càa xico ñuyíú-a, te tnúhu-áⁿ cãháⁿ-xi nàcuáa naníhí tãhú ñáyíu. 11 Te òré ná candeca ñaha ñáyíu xii-ndo quíhíⁿ núú cuè tée cùchiuⁿ cuáha cuendá ñáhã-yu, te òré vátá sãá-gá-ndó núú-güedé te vá cánì iní-ndó núu nása cunduu tnúhu cùñaha-ndo xii-güedé. Chi òré-nã te Yã Ndiõxí dacàhu iní ñáhã-gã xii-ndo nãsa cunduu tnúhu cùñaha-ndo xii-güedé, te diu-ni tnúhu sá dacàhu iní ñáhã-gã-áⁿ cùñaha-ndo xii-güedé.

Te ñá díú mèe-ndo cãháⁿ-ndó chi Espiritú Yã Ndiõxí cãháⁿ-xi yuhu-ndo. 12 Te dava cue tée cuáha cuendá-güedé ñani-güedé núú cuè tée cùchiuⁿ cuendá cahni ñaha-güedé. Te dava cue tée cùu tátá diu-ni ducaⁿ càda-güedé cuáha cuendá-güedé déhe-güedé núú cuè tée cùchiuⁿ. Te dava cue tée cùu déhe cuu úhú iní-güedé tátá-güedé ndihi nãná-güedé, te cuáha cuendá ñáhã-güedé xií-yu núú cuè tée cùchiuⁿ cuendá cahni ñaha-güedé xií-yu. 13 Te ío cuéhé ñáyíu cuu úhú iní ñáhã-yu xii-ndo sã cuendá-í, dico nchaa nchòhó ñáyíu na càda ndee-ni iní canchicúⁿ nihnu ñaha-ni xii-í te naníhí tãhú-ndó.

14 Te ndí Daniél tée ní xóo cãháⁿ tnúhu Yã Ndiõxí ndéé sanaha nĩ chídó tnùnì ndí núú tütú ndí cuendá ìn sá dáquèe tìhú Yã Ndiõxí cundecu ìn

xichi núú ñà túú tàú-xi cundecu-xi, te xiáⁿ cada-xi sá vǎ cúndècu-gá ni ìⁿ ñáyiú xiáⁿ. Te cada cuèndá váha-ndo nàcuáa ní cáháⁿ ndíi, chi nduu na quini-ndó xiáⁿ cundecu-xi ìⁿ xichi núú ñà túú tàú-xi cundecu-xi, te dàvá-áⁿ nchaa ñáyiú xíndecu distritú Júdeá xíní ñùhu-xi cunú-yu quíhíⁿ-yu xítí yucu. ¹⁵ Te nchaa ñáyiú ndáa ndódó dìquí véhé-xí vǎ ndíhu-gá-yu vehé-yu quehéⁿ-yu ìⁿ ndachíuⁿ-yu canehé-yu quíhíⁿ. ¹⁶ Te nchaa ñáyiú cuáháⁿ yucu ni vǎ ñùhú-gá-yu vehé-yu cúnúquehéⁿ-yu dóó-yu. ¹⁷ Te ndàhú ní cuu nchaa ñáyiú dìhí ñùhú dèhe-xi, ndíhi cue ñáyiú dìhí xíndeca déhe vitna sàdi na saá nduu dùcaⁿ cada-xi! ¹⁸ Te nchòhó ío chí càcáⁿ táhú núú Yá Ndióxi cuèndá sá vǎ dúcáⁿ ndòho-ndo yóó quidé víxiⁿ-xi. ¹⁹ Chi dàvá-áⁿ coo tnúndòho cahnu vihi ñuyíú, te vátá ìⁿ ndùu-gá coo tnúndòho cahnu vihi-áⁿ ndéé cútñahá ní cadúha Yá Ndióxi ñuyíú, chi ñu-ni dàvá-áⁿ coo tnúndòho cahnu vihi-áⁿ, te ni núú cuáháⁿ núú véxi vǎ cóo-gǎ tnúndòho-áⁿ. ²⁰ Te Yá Ndióxi càchí-gá sá vǎ ío vai nduu coo tnúndòho cahnu vihi-áⁿ ñuyíú sǎ cuèndá nchaa ñáyiú ní cáháⁿ-gá cundecu ndíhi-gá. Te núu vai nduu na coo tnúndòho-áⁿ, te vǎ yóo cácu nihnu.

²¹ Te dàvá-áⁿ cǔñaha ñáyiú xii-ndo: “Chí cúndèhe iha, chi iha ní quexìo Cristú Yaá ní tendaha Yá Ndióxi véxi ñuyíú-a”, duha cǔñahá-yu xii-ndo. Àdi quesahá-yu: “Chí cúndèhe yacáⁿ chí yàcáⁿ ndécú-gǎ”, quesahá-yu. Te vǎ quíndáá iní-ndó tnúhu càháⁿ-yu. ²² Te coo cue tée danàni-güedé méé-güedé dàtná nání-í te cachí-güedé sá cúu-güedé Yaá ní tendaha Yá Ndióxi véxi ñuyíú-a. Te dava-güedé cachí-güedé sá cúu-güedé cue tée càháⁿ tnúhu Yá Ndióxi dico ñá ndáá sá cúu-güedé cue tée càháⁿ tnúhu-gá, te cada-güedé títí núú sǎ vǎ yóo tnàhí ndàcu cada cuèndá dandàhú-güedé ñáyiú, te caní iní-güedé dandàhú-güedé ndéé cue ñáyiú ní cáháⁿ Yá Ndióxi cundecu

ndíhi-gá. ²³ Te vitna ío váha cuáha-ndo cuèndá, te quíhi iní-ndó cundecu-ndo, chi nchaa sa ní dátúha ñaha-í xii-ndo.

Nàcuáa cada-xi òré quixi tucu Tée cùu ñaní tnáhá nchaa ñáyiú
(Mt. 24:29-35,42-44; Lc. 21:25-36)

²⁴ Te nà yáha-ni coo tnúndòho cahnu vihi-áⁿ, te vǎ dáyèhé-gá nchícanhii te ni vǎ dáyèhé-gá yóó. ²⁵ Te ngoyo nchaa chódíní ndèè andíu, te quídi-xi andíu. ²⁶ Te dàvá-áⁿ quini ñáhá nchaa ñáyiú xii yúhú Tée cùu ñaní tnáhá-yu ncháa-yu quee-í andíu quíxi-í ichi xítí vícò, te quini-yu sá ío càhnu cuu-í, te quíde-í nchaa sá vǎha. ²⁷ Te tendaha-í cue espíritú xínú cuèchi núu-í quíhíⁿ-xi nadatàcá-xi nchaa ñáyiú ní cáháⁿ-í chitnahá ñáhá xii-í xíndecu ní càa xico ñuyíú.

²⁸ Te cundehe-ndo nàcuáa quíde yutnu ngúxí, chi yutnu-áⁿ ndúú yùte núú dìté-xi te nàtahú ndaha-xi, te òré ducaⁿ quíde-xi te càchí-ndó sǎ sǎ ní cuyatni nuu cahni. ²⁹ Te ducaⁿ sǎtnahá-xi cada-xi òré ná quini-ndó càda-xi nchaa nacúáa ní cáháⁿ-í, te cutnúní iní-ndó sǎ sǎ ní cuyatni vii-nǎ nduu nàa ñuyíú. ³⁰ Te na càchí tnúhu ndáá-í xii-ndo sǎ òré vátá cúu-gá cue ñáyiú xíndecu ñuyíú-a vitna, te cada-xi nchaa nàcuáa ní cáháⁿ-í. ³¹ Te andíu ndíhi ñuyíú-a chi ndíhi nihnu-xi, dico tnúhu-í chi vǎ ndíhí nihnu-xi chí cùu-xi tnúhu ndáá.

³² Dico ñá túú cùtnuní ná nduu quíxi tucu-í, te ni ñà túú cùtnuní ná òré chí vǎ yóo xíní, te ni cuè espíritú xínú cuèchi núú Yá Ndióxi ñá túú xíní-xi ná nduu quíxi-í, te ni mèe yúhú tée cùu Déhe Dútú Ndióxi ñá túú xíní-í ná nduu quíxi tucu-í, chí ìⁿdí díí-ni mee Tǎtà-í Dútú Ndióxi xíní-gá núu ná nduu quíxi-í.

³³ Te nchòhó xíní ñùhu-xi sá ío quíhi iní-ndó cundecu-ndo, te cáháⁿ ndíhi-ndo Yá Ndióxi, chí ñá túú xíní-ndó ná nduu quíxi tucu-í. ³⁴ Te na càchí tnúhu-í xii-ndo cuèndá ìⁿ tée cuini quíngaca cuu xica. Te tée-áⁿ cùmání-gǎ quee-dé vehe-dé te ní xáhaⁿ-dè xii cue tée xínu cuechi núu-dé sǎ ná cáda cuèndá-güedé

vehe-dé. Te ní sáñaha-dě xii-güedé ndí dííⁿ núú-güedé chiúⁿ cada-güedé. Te ní xáhaⁿ-dě xii téé ndèé yuyèhe sá ná cùndecu túha-ni-dé yuyèhe ndéé nàsáá-dé. ³⁵ Te duha ndùu tnúhu càháⁿ-í cuèndá nchòhó cundecu túha-ndo, chi ñá túú xini-ndó nã nduu te ni ñà túú xini-ndó nã òré quixi tucu yúhú Yaá cúú Xitohó-ndó, núu òré sa ní cundiⁿquⁿ, àdi dava niú, àdi òré sa ní cana uuⁿ líhi, àdi òré sa ta cùditó cuáháⁿ, núu xiáⁿ ío chí cùndecu túha. ³⁶ Te duha càháⁿ-í chi na cuáháⁿ òré ñá túú nã yíhi iní-ndó quèxio-í, te ñá túú ndècu túha-ndo. ³⁷ Te dàtná-ni xáhaⁿ-í xii nchòhó sá cùndecu túha-ndo, te diu-ni ducaⁿ xáhaⁿ-í xii nchaa dava-gá ñáyiú sá cùndecu túha-yu —càchí-gá xáhaⁿ-gã xii-güedé.

14

Ndùcu-güedé nàcuáa cada-güedé cahni-güedé Jèsús

(Mt. 26:1-5; Lc. 22:1-2; Jn. 11:45-53)

¹ Te cùmání úú-gá nduu te quesaha víco pascuá, víco xèxi ñáyiú pàa sá ñà túú yíhi levadurá. Te cue dútú cùnùu, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedé nàcuáa cada-güedé dandàhú-güedé Jèsús cuèndá tñi ñaha-güedé xii-gá te cahni ñaha-güedé. ² Te ní xítñaha-güedé:

—Váha-gá sá vã tñí-ó Jèsús mei ndùu víco, chí núu ducaⁿ na càda-o te ío dusaⁿ càda ñáyiú —càchí-güedé xítñaha-güedé.

Hⁿ ñadìhí chíhí-áⁿ àcítí díquí Jèsús
(Mt. 26:6-13; Jn. 12:1-8)

³ Te Jèsús ndécú-gã ñuú Bètaniá vehe ñⁿ téé nãni Xímú, téé ní tnahá cuéhé sã dátèhyú nihnu-xi yiqui cùñú-ó. Te yíhi Jèsús mèsá xéxi-gã ní quexìo ñⁿ ñadìhí néhé-áⁿ ñⁿ sá ñí cuáha yúú vãha yúú nání àlabastrú, te xítí xiáⁿ ñúhú àcítí sàháⁿ tnámí sã nání nãrdú sá ío ndèyáhu, te ní táhú-áⁿ xiáⁿ te acítí ñúhú xítí-xi-áⁿ ñí sódo-aⁿ díquí Jèsús. ⁴ Te ñⁿ úú cue téé xíndecu-áⁿ ñí

cudééⁿ-güedé sá dúcáⁿ ñí quide-aⁿ, te ní xítñaha-güedé:

—Ñá túú quide váha ñaha-áⁿ dàcáⁿ quidé-áⁿ, chí íí ñí dácúita-aⁿ acítí váha-áⁿ. ⁵ Chí váha-gá ñúu cuyáhu acítí-áⁿ sá ùní cièndú díhúⁿ denàriú, te díhúⁿ sã cùyáhu acítí-áⁿ cuu cuèndá ñáyiú ndàhú ní cùu —cachí-güedé xítñaha-güedé.

Te ní tenàá-güedé ñaha-áⁿ sã dúcáⁿ ñí quide-aⁿ.

⁶ Te Jèsús ní xáhaⁿ-gã xii-güedé:

—Chí dáñá, vá dásatú-ndó iní ñadìhí-a, chí sá ñí quide ñaha-aⁿ xii-í cúú-xí ñⁿ sá vãha. ⁷ Chí cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, te nãni òré càchí iní-ndó te chindee-ndó-yu. Dico yúhú chí vá ncháá ndùu cundecu ndihí ñaha-í xii-ndo ñúyíú-a. ⁸ Te ñadìhí-a ní quide-aⁿ ñⁿ sá vãha ndèé není ní ndacu-aⁿ, chí sá dúhá ñí quide ñaha-aⁿ xii-í ní chíhi ñaha-aⁿ àcítí, te xiáⁿ cada iní-ndó sã sà quide túha-aⁿ yiqui cùñú-í cuèndá quíndúxi-xi. ⁹ Te na càchí tnúhu ndáá-í xii-ndo sã ndèni ní cuu ñihí ñuyíú ná càháⁿ ñáyiú tnúhu-í, te càháⁿ-yu tnahá cuèndá ñadìhí-a cuèndá quini nchaa ñáyiú nàcuáa ní quide-aⁿ, te ducaⁿ vã nàcuànaá-yu —càchí-gá xáhaⁿ-gã xii-güedé.

Té Jùdás ndúcú-dě nàcuáa cada-dé cuáha cuèndá-dé Jèsús núú cuè téé cùu úhú iní ñáhá xii-gá

(Mt. 26:14-16; Lc. 22:3-6)

¹⁰ Te té Jùdás Iscarioté ní sáháⁿ-dé ní ndatnúhu-dé ndihí cue téé cùu dútú cùnùu sá cuáha cuèndá-dé Jèsús núú-güedé, te núu tnahá té Jùdás-áⁿ cúú ùxúú tnahá cue téé xica cuu ndihí-gá ní cùu. ¹¹ Te òré ducaⁿ ñí ndatnúhu-dé ndihí-güedé, te ío ní cudíí iní-güedé, te ní xáhaⁿ-güedé xii-dé sã cuáñaha-güedé díhúⁿ xii-dé. Te té Jùdás-áⁿ ñí ngúita-dé ndúcú-dě nàcuáa cada-dé cuáha cuèndá-dé Jèsús núú-güedé.

Cùdini Jèsús ndihí cue téé xica cuu ndihí-gá

(Mt. 26:17-29; Lc. 22:7-23; Jn. 13:21-30; 1 Co. 11:23-26)

12 Te ní sáá nduu nǐ quesaha vico pascuá, vico ñá túú xèxi ñáyiú pàá sá ñà túú yìhi levadurá, te diu-ni nduu-ǎⁿ sáhní-güedé ìⁿ mběé lǐhli xèxí-yu nduu vico pascuá-áⁿ. Te cue téé xica cuu ndihi Jesús ní xicáⁿ tnúhú-güedé núú-gǎ, te xǎhaⁿ-güedé xii-gá:

—Mèstrú, véxi-ndí xicáⁿ tnúhú-ndí núú-n nǔu ndèé cáá vèhe cuiní-n càda túha-ndí sá cúdini-o sacuaa nduu vico pascuá —càchí-güedé xǎhaⁿ-güedé xii-gá.

13 Te Jèsús ní xáhaⁿ-gǎ xii úú-ni tnàhá cue téé xica cuu ndihi-gá:

—Chí cuàháⁿ xití ñuú-ǎⁿ, te yàcáⁿ naníhí-ndó ìⁿ téé tànehe yóó ndute, te téé-áⁿ cándèndaha-ndo-dé quíhíⁿ.

14 Te núu ndédacàa vehe na ndihu-dé te xíaⁿ quíhu-ndo. Te cúñaha-ndo xii xítóhó vehe-áⁿ: “Yaá cúú Mèstrú càchí-gá sá nǔu ndédacàa xichi xití vehe-n cuñaha nùu-n xii-gá cudini-gá ndihi cue téé xica cuu ndihi-gá sacuaa nduu pascuá”, duha cúñaha-ndo. 15 Te dàtnùní danèhé ñáhá-dé xii-ndo ìⁿ quartú cáhnú càa núú nǐnu, chi vehe yòdo tnaha cuu-xi, te sa ní quide túha-dé nchaa sá nándihi, te nchòhó dìcò-nǎ comidá cada túha-ndo cùdini-o —cachí-gá xǎhaⁿ-gǎ xii-güedé.

16 Te cue téé-áⁿ nǐ xica-güedé cuáháⁿ-güedé xití ñuú-áⁿ, te nchaa-ni nàcuáa ní xáhaⁿ Jèsús ní cuu. Te ní quide túha-güedé sá cúdini-güedé ndihi-gá sacuaa nduu vico pascuá-áⁿ.

17 Te sátá nǐ cundiquiⁿ te ní quexìo Jesús ndihi ndi ùxúú cue téé xica cuu ndihi-gá. 18 Te cuánguihu-gá mèsá ndihi-güedé cuèndá cudini ndihi ñaha-gá xii-güedé, te òré yíhí-gǎ mèsá ndihi-güedé, te xǎhaⁿ-gǎ xii-güedé:

—Na càchí tnúhu ndáá-í xii-ndo sǎ ìⁿ nchòhó cue téé xèxi ndihi ñaha xii-í cuàha cuèndá ñáhá-ndó núú cuè téé cùu úhú iní ñáhá xii-í —càchí-gá xǎhaⁿ-gǎ xii-güedé.

19 Te sá dúcáⁿ nǐ xáhaⁿ-gǎ xii-güedé, te nchaa-güedé ní ngúíta-güedé cùndiyí-güedé. Te da ìⁿ da ìⁿ-güedé

ní ngúíta-güedé xicáⁿ tnúhú-güedé núú-gǎ, te xǎhaⁿ-güedé xii-gá:

—¿Ñá díú yǔhú ducaⁿ sàni iní-n càda-í-u? —càchí-güedé xǎhaⁿ-güedé xii-gá.

20 Te Jèsús ní xáhaⁿ-gǎ xii-güedé:

—Diu-ni ìⁿ nchòhó cue téé úxúú xicá cùu ndihi-í, téé na dàquèndaha còhó òré daquèndaha-í, téé-áⁿ cuàha cuèndá ñáhá-dé xii-í núú cuè téé cùu úhú iní ñáhá. 21 Te yúhú Téé cùu ñaní tnáhá-ndó nchàa-ndo ñuhu ichi-í cuáháⁿ-í ndòho-í nàcuáa càháⁿ-xi núú tütú Yǎ Ndiòxí. Dico ndàhú ní cuu téé ducaⁿ na cuàha cuèndá ñáhá xii-í núú cuè téé cùu úhú iní ñáhá, chi váha-gá sá vǎ cǎcú tǎe-áⁿ cundecu-dé ní cùu, te ñá díú sǎ nǐ cacu-dé te ducaⁿ càda-dé —càchí-gá xǎhaⁿ-gǎ xii-güedé.

22 Te nini cùdini cue téé xica cuu ndihi Jesús ní queheⁿ-gá pàá, te ní ndacáⁿ táhú-gǎ núú Yǎ Ndiòxí, te dàtnùní ní táhú cuèchi-gá, te ní ngúíta-gá dǎcǎhñu ñaha-gǎ xii-güedé, te xǎhaⁿ-gǎ:

—Chí quéhéⁿ pàa-a caxi-ndo, te cada iní-ndó sǎ cúú-xí dàtná yiqui cùñú-í —càchí-gá xǎhaⁿ-gǎ xii-güedé.

23 Te ní queheⁿ-gá vàsú ñúhú ndùdí ndéhé yoho yàha stilé, te ní ndacáⁿ táhú-gǎ núú Yǎ Ndiòxí, te dàtnùní ní ngúíta-gá sǎñaha-gǎ xii-güedé cuèndá coho-güedé luha luha sá ñúhú xití-xi, te nchaa-güedé ní xihí. 24 Te ní xáhaⁿ-gǎ xii-güedé:

—Ndudí ndéhé yoho yàha stilé-a cada iní-ndó sǎ cúú-xí dàtná níñí-í sá cǎtí òré cahni ñaha-güedé xii-í. Te sá dúcáⁿ cǎtí níñí-í xíǎⁿ cutnùní ndáá sǎ Yǎ Ndiòxí cada-gá ingá núú sǎ vǎha sá cúú-xí vǎi ñáyiú dàtná ní cachí-gá cada-gá. 25 Te na càchí tnúhu ndáá-í xii-ndo sǎ vítná-nǎ duha xihí-í ndudí ndéhé yoho yàha stilé-a te vǎ cóhó-gǎ-í, dico na sǎá nduu cùndecu-í núú ndécú Yǎ Ndiòxí táxí tnùní-gá, te dàvá-áⁿ cada iní-í sǎ dàtná sǎ cóhó tucu-í chi ío cudí iní-í —càchí-gá xǎhaⁿ-gǎ xii-güedé.

Jèsús càháⁿ-gá sá tẽ Pèlú cúñaha-dẽ xii ñáyiú sá ñà túú xini ñáhá-dẽ xii-gá (Mt. 26:30-35; Lc. 22:31-34; Jn. 13:36-38)

²⁶ Te Jèsús ní xita-gá ìⁿ ndudú ndihi cue tée xica cuu ndihi-gá, te dàtnùní ní xica-gá cuáháⁿ-gá ndihi-güedé yucu Òlívú. ²⁷ Te yacáⁿ ní xáhaⁿ-gá xii-güedé:

—Na càchí tnúhu-í xii-ndo sã ncháa-ndó dàña nihnu ñaha-ndo xii-í niú vitna, chí quee ndáá-xi nàcuáa càháⁿ-xi núú tütú Yã Ndiöxí núú càchí-xi: “Yúhú cuáha-í tnúhu cahni-güedé tée cùu toli, te nchaa mbéé-dẽ ndihi-güedi cuténuu”, duha càchí-xi núú tütú-gá. ²⁸ Dico na cùú-í te ndoto-í te codonùu-í núú-ndó quíhíⁿ distritú Galileá —càchí-gá xáhaⁿ-gá xii-güedé.

²⁹ Te té Pèlú ní xáhaⁿ-dẽ xii-gá:

—Te cuëi nchaa-güedé ná dándóo ñaha-güedé xii-n, dico yúhú chí vá dándóo ñaha-í xii-n —càchí-dé xáhaⁿ-dẽ xii-gá.

³⁰ Te Jèsús ní xáhaⁿ-gá xii-dé:

—Na càchí tnúhu ndáá-í xii-n sã niú vitna cùmání-gá cana líhi úú xito, te úní xito cáháⁿ-n núú ñáyiú sá ñà túú xini ñáhá-n xii-í —càchí-gá xáhaⁿ-gá xii-dé.

³¹ Dico té Pèlú ní cáháⁿ ñí-dé, te xáhaⁿ-dẽ xii-gá:

—Cuëi na cùú ndihi ñaha-í xii-n dico vá càháⁿ-í núú ñáyiú sá ñà túú xini ñáhá-í xii-n —càchí-dé xáhaⁿ-dẽ xii-gá.

Te nchaa dava-gá cue tée xica cuu ndihi-gá ñu-ni ducaⁿ ñí xáhaⁿ-güedé xii-gá.

Jèsús càháⁿ ndihi-gá Yã Ndiöxí ìⁿ xichi núú nání Gètsemaní (Mt. 26:36-46; Lc. 22:39-46)

³² Te Jèsús cuáháⁿ-gá ndihi cue tée xica cuu ndihi-gá ìⁿ xichi núú nání Gètsemaní. Te òré ní quexio-gá ndihi-güedé xián, te ní xáhaⁿ-gá xii-güedé:

—Chí cúnúco iha cundetun-ndo na quíhíⁿ-í yacáⁿ cáháⁿ ndihi-í Yã Ndiöxí —càchí-gá xáhaⁿ-gá xii-güedé.

³³ Te ndèca-gá té Pèlú, ndihi té Jàcobó, ndihi té Juáá cuáháⁿ, te ñá túú tnahí-gá cúú vãha iní-gá te ní

ngúita-xi súúní ndihú iní-gá. ³⁴ Te ní xáhaⁿ-gá xii cue tée úní-áⁿ:

—Súúní ndihú iní-í dàtná sá cùú-í, te chí quéndóo iha te vá cùdú-ndó —càchí-gá xáhaⁿ-gá xii-güedé.

³⁵ Te sa ñùnchií luha ní xica ndehe Jèsús núú ndécú-güedé, te ní ngáundeyi-gá ndéé ñuhu càháⁿ ndihi-gá Tãtá-gá Dútú Ndiöxí sá núú vá cündèe iní-gá taunihnu ñaha-gá xii-gá cuendá nchaa nàcuáa yáha-gá. ³⁶ Te òré càháⁿ ndihi Jèsús Tãtá-gá Dútú Ndiöxí, te xáhaⁿ-gá:

—Yòhó tãtá mèe-í, nchaandi túhú sá vãha ndàcu-n quide-n, te càháⁿ ndáhú-í núú-n núú vá cündèe iní-n tàunihnu ñaha-n xii-í cuendá sá vá ndóhò-í ná sãá òré, dico vá cáda-n nàcuáa càchí iní mèe-í chí cada-n nàcuáa càchí mee-n —càchí-gá xáhaⁿ-gá xii Tãtá-gá Dútú Ndiöxí.

³⁷ Te sãtá ñí yáha ní cáháⁿ ndihi-gá Tãtá-gá Dútú Ndiöxí, te cuánuhú-gá núú ñí dándóo-gá cue tée úní-áⁿ, te xixídí-güedé òré ní nasáá-gá, te ní xáhaⁿ-gá xii té Pèlú:

—Xímú, ¿náa sama xidí-n? ¿Náa ñá cündèe tnahi núú-n vá cùdú-ni-n cuèdicó ìⁿ òré-ãⁿ? —càchí-gá xáhaⁿ-gá xii-dé.

Te ní xáhaⁿ tucu-gá xii-güedé:

³⁸ —Te chí quéndóo tucu, te cuhuⁿ iní-ndó vá cùdú-ndó, te cáháⁿ ndihi-ndo Yã Ndiöxí cuendá sá vá dácáháⁿ ñáhá yucu ñávãha xii-ndo cáda-ndo sá ñà túú tàú-ndó cáda-ndo. Te na càchí tnúhu ndáá-í xii-ndo sã nchòhó cùnín-ndó cáda-ndo nchaa nàcuáa càháⁿ-í dícó-ni sá ñà túú nihí ndéé-ndó —càchí-gá xáhaⁿ-gá xii-güedé.

³⁹ Te Jèsús ní xica tucu-gá cuáháⁿ-gá cáháⁿ ndihi-gá Tãtá-gá Dútú Ndiöxí, te ñu-ni nàcuáa ní xáhaⁿ-gá díhna xáhaⁿ tucu-gá. ⁴⁰ Te òré ní yáha ní cáháⁿ ndihi-gá Tãtá-gá Dútú Ndiöxí, te cuánuhú tucu-gá núú xíndecu cue tée úní xicá cùu ndihi-gá-áⁿ, te xidí-ni tucu-güedé òré ní nasáá-gá, te ducaⁿ ñí quide-güedé chí súúní ñuhu saní núú-güedé, te ñá ní nihí-güedé tnúhu cúñaha-güedé xii-gá òré ní nasáá-gá.

⁴¹ Te ní sáháⁿ tucu-gá xito cùu

uní ní cáháⁿ ndihi-gá Tátá-gă Dútú Ndiõxí, te òré ní nasáá tucu-gá núú xíndecu-güedé, te xăhaⁿ-gă xii-güedé:

—¿Te náa xidí-ni tucu-ndo?, te vitna vá cùdú-gá-ndó chi sa ní sáá òré cuáha cuendá ñáhá-güedě xii yúhú Tée cùu ñani tnáhá-ndó nchàa-ndo núú cuè téé ndècu ichi cuehé ichi duha. ⁴² Te vitna chí ndácõo na quihíⁿ-ó chi sa véxi téé cuáha cuendá ñáhá xii-í núú cuè téé cùu úhú iní ñáhá —càchí-gá xăhaⁿ-gă xii-güedé.

Ní tñi-güedé Jèsús ndécá ñàha-güedé xii-gá cuáháⁿ

(Mt. 26:47-56; Lc. 22:47-53; Jn. 18:2-11)

⁴³ Te cáháⁿ dúcáⁿ-ní Jèsús ní quexìo té Jùdás. Te núú tnáhá téé-áⁿ cùú ùxúú tnáhá cue téé xica cuu ndihi-gá. Te ndihi-dé vai cue téé ní quexìo, te dava-güedé xínehe-güedé machití te dava-güedé xínehe-güedé carrutí. Te cue téé-áⁿ ní tendaha ñàha cue dútú cùnùu ndihi cue téé dàcuaha ñàha xii ñáyiú nchaa tnúhu ní chídó tnùní ndíi Moisés, ndihi cue téé cùu sacuéhé núú ñáyiú isràél. ⁴⁴ Te té Jùdás téé cuáha cuendá ñáhá xii Jesús sa ní xitnùhu-dé cue téé-áⁿ nàcuáa cada-dé cuáha cuendá ñáhá-dě xii Jesús núú-güedé. Te duha ní xăhaⁿ-dě xii-güedé:

—Cundehe-ndo tée na tèyuhu-í, te téé-áⁿ tñi-ndo-dě chi téé-áⁿ cùú-dě téé ndèé iní-ndó, te ío quihí iní-ndó càndeca-ndo-dé quihíⁿ —duha ní xăhaⁿ-dě xii-güedé.

⁴⁵ Te òré ní quexìo té Jùdás ndihi cue téé-áⁿ núú ndécú Jèsús, te ní xăhaⁿ-dě xii-gá:

—Mèstrú —càchí-dé xăhaⁿ-dě xii-gá.

Te ní teyuhu ñàha-dé. ⁴⁶ Te nchaa cue téé ndihi-dé-áⁿ ní tñi-güedé Jèsús cuendá candeca ñàha-güedě xii-gá quihíⁿ. ⁴⁷ Te ñiⁿ cue téé cùndihi Jesús ní tava-dé machití-dé, te ní xehndé-ni-dé ñiⁿ xio lóho ñiⁿ téé xinu cuechi núú dútú cùnùu, te ní quendeé duuⁿ lóho téé-áⁿ. ⁴⁸ Te Jèsús ní xăhaⁿ-gă xii cue téé ní tñi ñàha xii-gá-áⁿ:

—Nchòhó, nèhe-ná-ndó màchití, nèhe-ná-ndó càrrutí véxi ní tñi ñàha-ndo xii-í, dàtná quidé-ndó ñiⁿ ñadúhú quidé ñàha-ndo xii-í. ⁴⁹ Te nchaa-ni nduu ní xiní-ndó ní xíndecu-í xití veñúhu càhnu sá ío cùnùu ní xóo danèhé-í ñáyiú, te ñá túú ní tñi ñàha-ndo xii-í. Dico dàcuítí sã dúhá yăha-í cuendá quee ndáá-xi nàcuáa cáháⁿ-xi núú tütú Yă Ndiõxí —càchí-gá xăhaⁿ-gă xii-güedé.

⁵⁰ Te nchaa cue téé xica cuu ndihi-gá ní xinu-güedé ní dándõ ñàha-güedé xii-gá.

Ñiⁿ téé cuechi ní xinu-dé

⁵¹ Te ñiⁿ téé cuechi ndëndaha-dě Jèsús cuáháⁿ, te lavichi-dě, ñiⁿ-ni dóó yadí yídúcúⁿ nuu-dé nihí-dé, te ní tñi ñàha-güedě xii-dé, ⁵² dico ní ndacu-dé ní quenuñi-dě te ní dándõ-dé dóó yídúcúⁿ nuu-dé-áⁿ ní xinu-dé.

Jèsús ndécú-gă jùndá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Te cue téé ní tñi ñàha xii Jesús ndécá ñàha-güedé xii-gá cuáháⁿ núú tée cùu dútú cùnùu-gá. Te xiáⁿ ní tacá nchaa dava-gá cue téé cùu dútú cùnùu, ndihi cue téé cùu sacuéhé núú ñáyiú isràél, ndihi cue téé dàcuaha ñàha xii-yu nchaa tnúhu ní chídó tnùní ndíi Moisés cuendá cada-güedé jùndá.

⁵⁴ Te té Pèlú xica xica-ni nchicúⁿ ñáhá-dě xii-gá cuáháⁿ ní sáá-dé ndéé quehé vehe núú ndécú tée cùu dútú cùnùu-gá-áⁿ, te xiáⁿ ní ngóo teté-dé yuhu nùhú ndihi cue téé cùu poleciá.

⁵⁵ Te cue téé cùu dútú cùnùu ndihi nchaa dava-gá cue téé xíndecu jùndá ndúcú-güedě ñáyiú dacàa ñiⁿ cuéchi díquí Jesús cuendá ducaⁿ nihí-güedě nàcuáa cada-güedé cahni ñàha-güedě xii-gá, dico ñá túú ní ndàcu-güedé.

⁵⁶ Te cuèi vai ñáyiú dàcaá-yu cuéchi díquí-gă dico mee-ni sã ní cahu iní mée-yu ní cáháⁿ-yu, chi tucu cáháⁿ ñiⁿ tucu cáháⁿ ñiⁿ-yu. ⁵⁷ Te davá-yu ní ndacuíní-yu te ní ngüíta-yu dàcaá-yu ñiⁿ cuéchi neñùú díquí-gă, te xăhăⁿ-yu xii nchaa cue téé cùnùu:

58 —Nchúhú ní tecú dóho-ndí cächí-dé sá dängöyo-dé veñúhu cànhu sá ïo cùnuu sá ní dácáá cuè téé ñuyíú-a, te dandaa tucu-dé ingá veñúhu saa, diu-ni núú cáá tnàhí veñúhu-án te xití úní-ni nduu sa nadaxĩnu-dé, te vá cúú-gã-xi veñúhu sá ní dácáá cuè téé ñuyíú-a, duha cächí-dé ní tecú dóho-ndí —cächí-yu xähãⁿ-yu xii-güedé.

59 Dico ni dùcaⁿ ñá túú ní cùu ñⁿnuú-yu nchaa tnúhu ní cáháⁿ-yu.

60 Te téé cùu dútú cùnùu-gá ní ndacuñí-dé tnuú nchaa ñáyíu, te xähãⁿ-dë xii Jèsús:

—¿Ná cuendá duha ndùu tnúhu cähãⁿ ñáyíu-a cuendá-n? Te cáháⁿ nñu nása ndùu tnúhu cáháⁿ-n —cächí-dé xähãⁿ-dë xii-gá.

61 Dico Jèsús ñá túú tnàhí ní cähãⁿ-gá. Te téé cùu dútú cùnùu-gá-án ní xähãⁿ tùcu-dé xii-gá:

—Cuñí-í cachí tnúhu-n xii-ndí nñu sá díú Crístú Déhe Yá Ndiöxí Yaá ní tendaha-gã véxi ñuyíú-a cùu-n. Te diu Yá Ndiöxí cúú-gã Yaá quidé cànhu-ndí —cächí-dé xähãⁿ-dë xii-gá.

62 Te Jèsús ní xähãⁿ-gã xii-dé:

—Diu Yaá-án cúú-í, te na cächí tnúhu-í xii-ndo sã sãá nduu te quini-ndó yúhú Téé cùu ñani tnáhã-ndó nchãa-ndo cunucóo-í xio cùha Dútú Ndiöxí Yaá ndácú quide nchaandi túhú sá váha. Te ðávã-án quini ñáhã-ndó xii-í quee-í andíu quixi-í ichi xití vícú —cächí-gá xähãⁿ-gã xii-dé.

63 Te dútú cùnùu-gá-án ní ndátá-dë dóó cání ñihnu-dé cuendá sá ñà túú ní tnàhá iní-dé nàcuáa ní cáháⁿ Jèsús, te ní xähãⁿ-dë xii nchaa cue téé xĩndecu jündá:

—Ñá túú-gã xini ñihu-xi cue téé cáháⁿ nñu ndáá sá ndècuéchi-dé àdi ñá túú ndècuéchi-dé. 64 Chi sa ní xĩndedóho-o nàcuáa ndùu tnúhu ní cáháⁿ-dé ní cáháⁿ úhú-dé cuendá Yá Ndiöxí, te nchaa-ndo chí cähãⁿ vitna núu nása sàni iní-ndó cùnduu cuendá téé-a —cächí-dé xähãⁿ-dë xii-í-güedé.

Te nchaa-güedé ní cachí-güedé sá ná cùú-dé.

65 Te dava-güedé ní ngüíta-güedé ní tíú díí ñáhã-güedë xii-gá, te ní dádãhu-güedé núú-gã, te ní ngüíta-güedé cànha-güedé xii-gá, te xähãⁿ-güedë:

—¡Cáhãⁿ ná cótó nã cúú tée ní caniha xii-n! —cachí-güedé xähãⁿ-güedë xii-gá.

Te cue téé cùu poleciá ní cani-güedé núú-gã.

Té Pèlú cähãⁿ-dé núú ñáyíu sá ñà túú xini-dé Jèsús

(Mt. 26:69-75; Lc. 22:56-62; Jn. 18:15-18, 25-27)

66 Te ndéé xití vehe càa núú ññu quide-güedé jündá, chí vehe yòdo tnaha cuu-xi, te té Pèlú núcóo-dé quehé vehe-án. Te ñⁿ xíchí xínú cuèchi núú dütú cùnùu-án ní quexìo-xi núú núcóo té Pèlú. 67 Te òré ní xini ñáhã-xi xii-dé núcóo teté-dé yuhu nùhú, te ní xindéhé ñaha váha-xi xii-dé, te xähãⁿ-xi:

—Yòhó tnàhá-n cùu-n téé xica cuu ndíhi Jesús téé ñuu Nazàrét —cächí-xi xähãⁿ-xi xii-dé.

68 Te té Pèlú ní xähãⁿ-dë xii-xi:

—Yúhú ñá túú xini-í téé-ãⁿ, te ní ñà túú cùtnuní iní-í nása ndùu tnúhu cähãⁿ-n —cächí-dé xähãⁿ-dë xii-xi.

Te té Pèlú ní xica-dé cuáhãⁿ-dé ndàa nacuaa nchii yuyèhe vehe-án, te ní cana ñⁿ líhi. 69 Te xíchí xínú cuèchi-án ní xini ñáhã tùcu-xi xii-dé, te xähãⁿ-xi xii nchaa ñáyíu xĩndecu-án:

—Diu téé-ãⁿ tnàhá-dé xicá cùu-dé ndíhi téé ndèca-güedé cuànguihu-a —cächí-xi xähãⁿ-xi xii-yu.

70 Dico té Pèlú ñá túú ní nñuu tucu-dé sá xicá cùu-dé ndíhi Jèsús. Te tna tnaa-ni ní cuu sá dúcãⁿ ní xähãⁿ xíchí-ãⁿ xii-dé, te ní xähãⁿ tùcu dava cue ñáyíu xĩndecu-án xii-dé:

—Ndáá sá tnàhá-n cùu-n téé xica cuu ndíhi téé ndèca-güedé cuànguihu-ãⁿ chí cùu-n téé distritú Galileá, te cähãⁿ-n dàtná cähãⁿ-güedé —cächí-yu xähãⁿ-yu xii-dé.

71 Te té Pèlú ní xähãⁿ-dë xii-yu:

—Nchacuítí Yá Ndiöxí sá yúhú cähãⁿ ndáá-í sá ñà túú xini-í téé càcunehe-ndo-án —cächí-dé xähãⁿ-dë xii-yu.

72 Te òré-ni-áⁿ nǐ cana tucu lǐhi xito cùu uú, te òré-áⁿ nǐ ndacu iní té Pèlú nàcuáa ní xáhaⁿ Jèsús xii-dé sá cùmání-gǎ cana ìⁿ lǐhi úú xito te úní xito cáháⁿ-dé núú ñáyiú sá ñà túú xìní ñáhá-dě xii-gá. Te òré ducaⁿ nǐ ndacu iní-dé nàcuáa ní xáhaⁿ Jèsús xii-dé, te ní ndáhyú-dé ní ndixi cuéchi iní-dé.

15

Jèsús ndécú-gǎ núú tǎ Pìlatú
(Mt. 27:1-2, 11-14; Lc. 23:1-5; Jn. 18:28-38)

1 Te sáta nǐ túndaá te cue téé cùu dútú cùnùu, ndihì cue téé cùu sacuéhé núú ñáyiú isràél, ndihì cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndihì nchaa dava-gá cue téé cùnùu ní xíndecu jùndá ní natacá-güedé, te ní dácútú-güedé Jèsús te ndèca ñaha-güedé xii-gá cuáháⁿ núú tǎ Pìlatú. 2 Te té Pìlatú ní xícáⁿ tnúhú-dě núú Jèsús, te xáhaⁿ-dě xii-gá:

—¿Ndáá sá díú-n cùu-n téé yìndaha ñaha xii ñáyiú isràél-ǎⁿ? —càchí-dé xáhaⁿ-dě xii-gá.

Te Jèsús ní xáhaⁿ-gǎ xii-dé:

—Díu-í yìndaha-í-yu —càchí-gá xáhaⁿ-gǎ xii-dé.

3 Te cue téé cùu dútú cùnùu da-caa-güedé vài cuéchi díquí-gǎ. 4 Te té Pìlatú ní xícáⁿ tnúhú tùcu-dé núú-gǎ, te xáhaⁿ-dě xii-gá:

—Cáháⁿ, ná cuèndá ñà càháⁿ-n te cundehe ñà ndéé duha títí cuéchi dàcaa díquí ñáhá cuè téé-a xii-n —càchí-dé xáhaⁿ-dě xii-gá.

5 Dico Jèsús ñà túú tnàhí ní càháⁿ-gá te té Pìlatú ío ní cuñúhu-dé sá dúcáⁿ ñà túú tnàhí ní càháⁿ-gá.

Cue ñáyiú xáhǎⁿ-yu xii té Pìlatú sá cáhni-dě Jèsús

(Mt. 27:15-31; Lc. 23:13-25; Jn. 18:38-19:16)

6 Te ndi tnahá nduu víco pascuá dácacu té Pìlatú ìⁿ téé yìhi vecaá chi ducaⁿ tnàhí quide-dé, te mee ñáyiú càháⁿ-yu te núu ndédacàa téé yìhi vecaá-áⁿ cǎcu-dé, te téé-áⁿ dácacu-dé. 7 Te yìhi ìⁿ téé nàni Barrabás vecaá

ndihì dava-gá cue téé cùndihì-dé. Te té Barrabás-áⁿ nǐ sanu ichi-dé ñáyiú ñuu ingá ichi, te ní ngüíta-yu ndihì-dé ní cuu úhú iní-yu cue téé cùchiuⁿ, te ní sahani-dé ndíyì núu xǎⁿ ní chihi ñaha-güedé vecaá xii-dé. 8 Te nchaa ñáyiú ní sáháⁿ-yu núú tǎ Pìlatú, te càháⁿ ndàhú-yu núú-dě sá ná cádá nàhi-ni-dé dàtná quidé-dě. 9 Te té Pìlatú ní xáhaⁿ-dě xii-yu:

—¿Cuínì-ndó sǎ dácacu-í téé yìndaha ñaha xii ñáyiú isràél-ǎⁿ? —càchí-dé xáhaⁿ-dě xii-yu.

10 Te ducaⁿ nǐ cáháⁿ té Pìlatú, chi ní cutnùnì iní-dé sá dícó sá cuèdú iní cuè dútú cùnùu núu xǎⁿ ducaⁿ nǐ quide-güedé ní sáha cuèndá ñáhá-güedé xii Jèsús núú-dě. 11 Te cue dútú cùnùu ní xáhaⁿ-güedé xii nchaa ñáyiú sá ná cùñáhá-yu xii té Pìlatú dácacu-dé té Barrabás, te ní quidé-yu nàcuáa ní xáhaⁿ-güedé. 12 Te té Pìlatú ní xícáⁿ tnúhú-dě núú-yu, te xáhaⁿ-dě xii-yu:

—¿Ná cuínì-ndó càda-í téé càchí-ndó yìndaha ñaha xii ñáyiú isràél-i? —càchí-dé xáhaⁿ-dě xii-yu.

13 Te ncháá-yu níhi ní cáháⁿ-yu, te xáhǎⁿ-yu xii-dé:

—¡Cata caa-dé núú cùrúxí! —càchí-yu xáhǎⁿ-yu xii-dé.

14 Te té Pìlatú ní xáhaⁿ-dě xii-yu:

—¿Te ná cúu cuéchi ní quide-dé te núu ducaⁿ cuínì-ndó càda-í-dé-i? —càchí-dé xáhaⁿ-dě xii-yu.

Dico ncháá-yu uuⁿ-gá níhi ní cáháⁿ-yu, te xáhǎⁿ-yu xii-dé:

—¡Cata caa-dé núú cùrúxí! —càchí-yu xáhǎⁿ-yu xii-dé.

15 Te té Pìlatú ní quide-dé nàcuáa ní xáhǎⁿ-yu xii-dé cuèndá sá cúdiu-dé núú-yu, te ní dácacu-dé té Barrabás, te ní táuchíúⁿ-dě ní cani-güedé Jèsús ndihì ñii. Te sáta dúcáⁿ nǐ quide ñaha-güedé xii-gá, te ní táuchíúⁿ-dě candeca ñaha-güedé quíhíⁿ cata caa ñaha-güedé xii-gá núú cùrúxí.

16 Te cue téé cùu sandadú ndécá ñaha-güedé xii-gá cuáháⁿ vechiúⁿ, te díu-ni xíaⁿ cúu vèhe téé cùu gobiernú. Te xíaⁿ nǐ tacá nchaa dava-gá

cue tée cùu sandadú. ¹⁷ Te xíáⁿ ní dácúíhnú ñàha-güedé xii-gá ìⁿ dóó t̃cuèhé víhí, te ní cadúha-güedé ìⁿ coróná iñu ní chihi-güedé díquí-gă. ¹⁸ Te ní ngüíta-güedé níhi càháⁿ-güedé cúdíquí ndeé ñáhá-güedé xii-gá, te xăháⁿ-güedé:

—Ío càhnu cuu yohó tée yìndaha ñaha xii ñáyiu isràél! —càchí-güedé xăháⁿ-güedé xii-gá.

¹⁹ Te càni-güedé díquí-gă ndihi ìⁿ carrutí, te tiú dí ñáhá-güedé xii-gá, te ngüíñí xítí-güedé núú-gă quidé-güedé sá néhé-güedé sá yíñùhu núú-gă dico ñá ndáá chi dícó cúdíquí ndeé ñáhá-güedé xii-gá.

²⁰ Te sátá dúcáⁿ ní cudíquí ndeé ñáhá-güedé xii-gá, te ní nataunuu ñaha-güedé xii-gá dóó t̃cuèhé víhí sá ní dácúíhnú ñàha-güedé, te ní dándíunuu ñaha-güedé xii-gá dóó méé-gă. Te dătnúní ndécá ñàha-güedé cuáháⁿ núú catá cà ñaha-güedé xii-gá núú cùrúxí.

Sàta caa-güedé Jèsús núú cùrúxí
(Mt. 27:32-44; Lc. 23:26-43; Jn. 19:17-27)

²¹ Te ichi cuáháⁿ-güedé ndihi Jèsús ní naníhí-güedé ìⁿ tée ñúú Cirené nání-dě Xímú, te déhe-dé cúú ìⁿ tée nàni Lijandru, ndihi ingá tée nàni Rúfú. Te té Xímú-áⁿ ñúhú-dě ichi duha cuándixi-dé ní sáháⁿ-dé yucu, te ní quide yica-güedé ní xido-dé cùrúxí sá nchídó Jèsús.

²² Te ndèca-güedé Jèsús cuáháⁿ ìⁿ xichi núú nání Gôlgotá, te tnúhu-áⁿ quée-xí: ìⁿ xichi núú nání yiqui díquí ndíyí, duha quèe-xi tnúhu-áⁿ. ²³ Te ní sáñaha-güedé xii-gá ndudí sá ní quée yúcu nání mîrrá coho-gá ní cùu dico ñá túú ní xíhi-gá. ²⁴ Te ní sata caa ñaha-güedé xii-gá núú cùrúxí. Te sátá dúcáⁿ te cue tée cùu sandadú-áⁿ ní xito ndeé-güedé núu ndédacàa-güedé cuu cuèndá-güedé dóó-gă.

²⁵ Te cùu-xi caá ìⁿ dátneé òré ní sata caa ñaha-güedé xii-gá núú cùrúxí. ²⁶ Te ní taxi ndecu-güedé ìⁿ sá ndèé lètrá núú tãcàa-gá. Te

lètrá-áⁿ càháⁿ-xi ná cuèndá ducaⁿ ní quide ñaha-güedé xii-gá. Te duha càháⁿ lètrá-áⁿ: “Tée yìndaha ñaha xii ñáyiu isràél”, duha càchí-xi. ²⁷ Te tnàhá úú cue tée cùu ñadúhú ní sata caa-güedé diu-ni núú cùrúxí tucu. Te ìⁿ-dé ní sata caa-güedé xio cùha-gá, te ingá-dé ní sata caa-güedé xio dătni-gá. ²⁸ Te ducaⁿ ní cuu chi ní quee ndáá-xi năcuáa càháⁿ-xi núú tütú Yă Ndiöxí núú càchí-xi: “Ìⁿ-ni ní quide ñaha-güedé xii-gá ndihi cue tée ndècu cuéchi-xi”, duha càchí-xi núú tütú-gá.

²⁹ Te nchaa ñáyiu yăha yatni núú tãcàa-gá dácúicó-yu díquí-yu te x̃cuèhé ñáhă-yu xii-gá, te xăháⁿ-yu:

—Te ná cuèndá ducaⁿ càa-n tacaa-n xíáⁿ, te càchí-n sã dàngoyo-n veñúhu càhnu sá ìo cùnuu te dandàa-n ingá veñúhu saa, te xítí úní-ni nduu sa nadaxínu-n càchí-n. ³⁰ Te vitna tanùu núú cùrúxí-áⁿ dăcácu-n mée-n —cachí-yu xăháⁿ-yu xii-gá.

³¹ Te diu-ni ducaⁿ ní quide cue tée cùu dútú cùnùu, ndihi cue tée dăcuaha ñaha xii ñáyiu nchaa tnúhu ní chídó tnúní ndí Moisés, chi ní cudíquí ndeé ñáhá-güedé xii-gá, te ní xítñaha-güedé:

—Tée-a ní ndacu-dé ní dăcăcu nihnu-dé ñáyiu, ¿te ná cuèndá ñá ndácú-dé dăcácu nihnu-dé méé-dě-i? ³² Te núu ndáá sá díú-dé cúú-dé Crístú Yaá ní tendaha Yă Ndiöxí véxi ñuyíú-a quindaha ñaha xii ñáyiu isràél, te na cundehe-o nuu-dé núú cùrúxí, cuèndá quíndáá iní-ó-dě —càchí-güedé xítñaha-güedé.

Te ndéé tnàhá cue tée tãcaa xio xio diñi-gá x̃cuèhé ñáhă-güedé xii-gá.

Ní xíhí Jèsús
(Mt. 27:45-56; Lc. 23:44-49; Jn. 19:28-30)

³³ Te òré ní cuu cuádava nduu, te ní cunee nihí ñuyíú, te ducaⁿ-ni càa ní cuu ndéé caá úní sacuaa. ³⁴ Te diu-ni òré caá úní sacuaa-áⁿ ñhi ní cáháⁿ Jèsús, te xăháⁿ-gă xii Tătá-gă Dútú Ndiöxí:

—Elói, Elói, láma sabactaní —càchí-gá xăháⁿ-gă.

Te tnúhu-án quée-xí: Ndiöxí mée-í, Ndiöxí mée-í, ná cuendá ní daña ñaha-n xii-í, duha quée-xi tnúhu-án.

³⁵ Te dava cue tée xíndecu yatni núu táca-gá-án ní tecú dóho-güedé nàcuáa ní cáháⁿ-gá, te ní xítñaha-güedé:

—Chí cündedóho chi càna-dé té Eliás —càchí-güedé xítñaha-güedé.

³⁶ Te ìⁿ cue tée xíndecu-án xínú-dé ní sáhán ní chindóyo-dé luha cáchí xítí ndudí íá, te ní chinenu-dé díquí ìⁿ yutnu càni te ní ndocani-dé chíhí-dé yuhu-gá cuendá coho-gá. Te ní xáhaⁿ cuè tée xíndecu-án xii tée-án:

—Cundetú tnaa ña cundehe-o nacoto núu quixi té Eliás nunehe ñaha-dé xii-dé núu cùrúxí —càchí-güedé xáhaⁿ-güedé xii-dé.

³⁷ Te Jèsús níhi ní canasaa-gá te ní xíhí-ni-gá. ³⁸ Te sátá dúcáⁿ te ní ndátá dǒo cúu còrtiná xítí veñúhu càhnu sá ìo cùnunu ní quée dava ndáá, te ndàa núu ññu ní ngüíta-xi ní ndátá. ³⁹ Te tée cùu capitáⁿ nútñi-dé ndàa núu Jèsús, te ndèhe-dé nàcuáa ní quide-gá òré ní xíhí-gá, te ní cachí-dé:

—Sá ndàa ndisa sá díú tǔe-a cùu-dé Déhe Yá Ndiöxí ní cùu —duha ní cachí-dé.

⁴⁰ Te xica xínutnii ìⁿ úú ñáyiu òhí ndéhě-yu nchaa nàcuáa ní quide ñaha-güedé xii Jèsús, te tnàhá tá Màriá Magdaléná, ndihí tá Salómé, ndihí tá Màriá ñáná tǔ Chèé ndihí té Jàcobó tée càchí-güedé cúu ìhli-gá.

⁴¹ Te cue ñáyiu òhí-án ní xica cuú-yu ndihí Jèsús distritú Galileá ní xinu cuèchí-yu núu-gá. Te cue ñáyiu òhí-án nchícúⁿ ñáhá-yu xii-gá ní quexio ndéé ñúu Jerusalén ndihí dava-gá ñáyiu òhí nchícúⁿ ñáhá xii-gá cuáháⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

⁴² Te cùu-xi nduu vispré nduu ndètátú ñáyiu. Te nduu-án xíquide túha-yu sá cúu ìngá nduu nduu ndètátú-yu-án, te díu-ni nduu-á sa ní cuaa vìhi, ⁴³ te ìⁿ tée nàni Cheé tée ñúu Arimàteá ní cuyi-dé ní sáhán-dé núu tǔ Pilatú, te ní xáhaⁿ-dǔ sá ñuu

vá cündèe iní-dé dañá-dǔ chindúxi-dé yiqui cùñú Jèsús. Te tnàhá té Chèé-án cúu-dǔ ìⁿ tée cùnunu cundihí-dé cue tée quide jundá, te tnàhá-dé ndétú-dǔ sáa nduu ndihu ndaha ñaha Yá Ndiöxí xii-dé ndihí cue ñáyiu. ⁴⁴ Te té Pilatú ìo ní cuñúhu-dé sá dúcáⁿ ìo ndihí ní xíhí Jèsús, te ní cana-dé tée cùu capitáⁿ ní xicáⁿ tnúhú-dǔ núu-dǔ ñuu ndisa sá sà ní xíhí-gá. ⁴⁵ Te tée cùu capitáⁿ-án ní xáhaⁿ-dǔ xii té Pilatú sá ndáa ní xíhí Jèsús, núu xíáⁿ té Pilatú-án ní sáha-dé tnúhu chindúxi té Chèé-án yiqui cùñú-gá. ⁴⁶ Te té Chèé-án ní saaⁿ-dǔ ìⁿ dóo vǔha, te ní sáhán-dé ní nunehe-dé yiqui cùñú Jèsús núu cùrúxí, te ní chidúcúⁿ nduu-dé yiqui cùñú-gá dóo vǔha sá ní saaⁿ-dǔ-án, te dàtnùní néhé-dǔ yiqui cùñú-gá cuáháⁿ ní chihí-dé ìⁿ yaú nchii yiqui naha càva, te ní sadí-dé yuhu yaú-án ndihí ìⁿ yúu quéhéⁿ. ⁴⁷ Te tá Màriá Magdaléná, ndihí tá Màriá ñáná tǔ Chèé ní xiní-yu núu ní chihí-dé yiqui cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

¹ Te sátá ní cundiquiⁿ nduu ndètátú ñáyiu, te tá Màriá Magdaléná, ndihí tá Salómé, ndihí tá Màriá ñáná tǔ Jàcobó ní saaⁿ-yu acití sáhán tnámí cuendá canehé-yu quíhíⁿ chíhí-yu yiqui cùñú Jèsús. ² Te ndumìngú nehé-ni òré vitna váha váha ní xínu coto núu nchicanhii ní quexio-yu núu nchii yaú yíhí yiqui cùñú Jèsús. ³ Te ní xítñahá-yu:

—Yoo cúñaha-o xòcani yúu ndèdí yuhu yaú-a, chi vá yǔo tnàhí ndècu iha —cachí-yu xítñahá-yu.

⁴ Te òré ní xíndéhé vǔha-yu te ní xiní-yu sá yúu cáhnu ndèdí yuhu yaú-án ìⁿ xio-ná ndécú. ⁵ Te cuánguìhú-yu xítí yaú-án, te ní xiní-yu nùcúo ìⁿ espíritú xínú cuèchi núu Yá Ndiöxí ndàa xio cuhá-yu, te càa-xi datná cáá ìⁿ tée cuechi, te ñihnu-xi ìⁿ dóo cuixíⁿ dóo cání, te ní yùhú-yu òré

ní xini-yu espíritu-án. ⁶ Te espíritu-án ní xáhaⁿ-xi xii-yu:

—Vá yùhú-ndó, chi yúhú sa cùtnuní iní-í sá nchòhó véxi-ndo nànducu-ndo yiqui cuñú Jèsús téé ñúú Nazàrét téé ní sahani-güedé núú cùrúxí, dico ñá túú-gã yiqui cùñú-dé ndécú ìha chi sa ní ndoto-dé, te chí cùndèhe núú ní sacáⁿ-güedé yiqui cùñú-dé te quiní-ndó ñá ñá túú-gã-dé. ⁷ Te chí cuáháⁿ núú ndécú tē Pèlú ndihi dava-gá cue téé ní xica cuu ndihi-dé, te duha cúñaha-ndo xii-güedé: “Jèsús codonùu-gá núú-ndó quíhíⁿ distritú Galileá, te yàcáⁿ quiní-ndó-gã dàtná ní cachí-gá xii-ndo”, duha cúñaha-ndo xii-güedé —càchí espíritu-án xáhaⁿ-xi xii-yu.

⁸ Te cue ñáyiú díhí-án ìo ní yùhú-yu, te ní quene cunú-yu cuánuhú-yu, te quidi ñaha-ná-xi xii-yu sá ìo ní yùhú-yu, te ñá túú tñahí ná tñúhu ní xáháⁿ-yu xii cue ñáyiú ní naníhí-yu ichi cuèndá sá ìo ní yùhú-yu.

Tá Màriá Magdalèná ní xini-xi Jèsús (Jn. 20:11-18)

⁹ Te sátá dúcáⁿ ní ndoto Jèsús ndumìngú nehé-ni-án, te díhna nuu-gã tá Màriá Magdalèná ní quee túu-gá núú-xi, te ñu tá Màriá-án cúu-xí xíchí ní xíhí ñaha úsá espíritu cùndihí yucu ñávãha ni cùu, te Jèsús ní queñuhu-gá nchaa espíritu-án yiqui cùñú-xi. ¹⁰ Te xíchí-ãⁿ ní sáháⁿ-xi ní xítñùhu-xi cue téé ní xica cuu ndihi Jèsús nàcuáa ní cuu, te xíndáhí-güedé sá ndihú iní-güedé òré ní quexìo-xi núú ndécú-güedé. ¹¹ Te òré ní xáhaⁿ tá Màriá xii-güedé sá ní ndoto Jèsús ndihi sá ní xini ñáhá-xí xii-gá, te ñá túú ní sàndáá iní-güedé.

Jèsús ní quee túu-gá núú úú cue téé ní xica cuu ndihi-gá (Lc. 24:13-35)

¹² Te úú tñahá cue téé ní xica cuu ndihi Jèsús ñúhú-güedé ichi cuáháⁿ-güedé yucu, te uuⁿni ní quee túu-gá núú-güedé, te ní dácótó ñaha-xi xii-güedé sá ñà túú-gã cáá-gã dàtná cáá-gã. ¹³ Te cue téé úú-án ní xica-güedé cuáháⁿ-güedé ní

xítñùhu-güedé nchaa dava-gá cue téé ní xica cuu ndihi-gá sá ní xini ñáhá-güedé xii-gá, dico ñu-ni ducaⁿ ñà túú ní sàndáá iní cue téé-án tñùhu ní cáháⁿ-güedé.

Jèsús xáhaⁿ-gã xii cue téé ní xica cuu ndihi-gá nàcuáa ndiúu chiuⁿ cada-güedé (Mt. 28:16-20; Lc. 24:36-49; Jn. 20:19-23)

¹⁴ Te ndi úxí ñⁿ cue téé ní xica cuu ndihi Jèsús yíhí-güedé mèsá xéxí-güedé, te ní quee túu-gá núú-güedé te ní tenáá ñáhá-gã xii-güedé cuèndá sá ìo sàá iní-güedé ñá túú sàndáá iní ñáhá vãha-güedé xii-gá, chí ñá túú ní cuñí-güedé quíndáá iní-güedé nàcuáa ní xáhaⁿ ñáyiú ní xini ñáhá xii-gá sátá ní yáha ní ndoto-gá. ¹⁵ Te ní xáhaⁿ-gã xii-güedé:

—Quíhíⁿ-ndó ñihí ñuyú cáháⁿ-ndó núú nchaa ñáyiú tñúhu váha tñúhu sá cáháⁿ nàcuáa naníhí tãhú-yu. ¹⁶ Te nchaa ñáyiú na quíndáá iní tñúhu-án te cuanduté-yu, te naníhí tãhú-yu, dico nchaa ñáyiú vá quíndáá iní tñúhu-án te cuíta nihnú-yu. ¹⁷ Te nchaa ñáyiú na quíndáá iní ñáhá xii-í te cadá-yu sá vã yòo tñahí ndacu cada, te cacunehe ñáhá-yu xii-í, te queñuhú-yu nchaa espíritu cùndihí yucu ñávãha yíhí ñaha xii ñáyiú. Te uuⁿni ndacú-yu cáháⁿ-yu ingá núú tñùhu sá vãtá dácuàha-gá-yu. ¹⁸ Te cuèi na tñíⁿ-yu cóo dééⁿ dico ñá túú ñá cada ñaha-di xii-yu, te cuèi venènú ná cáxí-yu dico ñá túú ñá tñahá-yu, te tendàhá-yu cue ñáyiú cùhú te ndúha-yu —càchí-gá xáhaⁿ-gã xii-güedé.

Jèsús cuándaa-gá andiú (Lc. 24:50-53)

¹⁹ Te sátá ní yáha ducaⁿ ní xáhaⁿ Jèsús xii cue téé ní xica cuu ndihi-gá, te ní ndanchita-gá cuándaa-gá andiú te ní ngóo-gá xio cùha Dútú Ndiòxí. ²⁰ Te cue téé-án ní xica-güedé cuáháⁿ-güedé, te ní ngúita-güedé cáháⁿ-güedé tñúhu Xítóhó Jesucristú nchaa xichi. Te mee-gã ní chindee ñaha-gã xii-güedé ní quide-güedé

nchaa sá vǎ yǒo tnàhí ndàcu cada
cuendá cutnùní iní ñáyiú sá ndàá
càháⁿ-güedé tnúhu-gá. Duha ní cuu
dává-áⁿ.

TNÚHU NÍ CHÍDÓ TNÜNÍ TÈ LÚCÁ

Nàcuáa ní ngódó tnùnì tnúhu Yá Ndiöxí

¹ Te vâi ñáyiú chîdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu. ² Te ñiú-ni nchaa tnúhu chîdo tnuní-yu-án cúú-xí tnúhu ní cáháⁿ nchaa cue téé ní xiní ndáá nàcuáa ní cuu ndéé díhna, cue téé ní cáháⁿ tnúhu Yá Ndiöxí. ³ Te yúhú sa ní cuu nduu quide cuendá-í nchaa nàcuáa ní cuu, núu xǎⁿ ní sani iní-í tee vâha-í nchaa tnúhu-a núú tütú sá cúú-xí yòhó té Tëofilú chi ío vâha cùu iní-í sá cúú-xí-n, ⁴ te tée-í cuendá cutnùnì iní-n sǎ sǎ ndáá cúú-xí nchaa sá ñí dánèhé ñàhá-güedé xii-n.

Èⁿ espíritú xínú cuèchi núú Yá Ndiöxí cächí-xi sá cácuⁿ ñí tée cunani Juáá

⁵ Te cútnàhá ní xíndaha té Hèrodés ñáyiú distritú Júdeá dàvâ-án ñí xíndecu ñí dútú ñí xínani-dě Zacàriá, te ní cundihi-dé cue dútú Ábiás. Te ñadìhí-dé ní xínani-aⁿ Èlisabét, te ñaha-án ñí cuu-aⁿ ñaní tnàhá ndí Àrón. ⁶ Te ndí ndùú-yu ío ní quide ndáá-yu núú Dütú Ndiöxí, chi ní tní-yu nchaa tnúhu ní cáháⁿ-gá. ⁷ Te ñá túú ñí ñí déhe-yu, chi ducaⁿ tǎhú tǎ Elisabét sá vǎ cóo déhe-aⁿ, te ducaⁿ ndí nduú-yu ío ní sahnú-yu.

⁸ Te ñí nduu xínu cuechi tucu té Zacàriá ndíhi nchaa cue téé cundihi-dé núú Yá Ndiöxí xití veñúhu. ⁹ Te dàvâ-án ñí xito ndéé-güedé cuendá cutnùnì iní-güedé ñúu ndédacàa-güedé quíhu núú nàá xití veñúhu-án cahmi-güedé sá sàháⁿ tnámí, te ní cutnùnì sá tē Zacàriá quíhu-dé. Te ducaⁿ ñí quide-güedé, chi ducaⁿ tnàhí ní xóo cada nchaa cue dútú dàvâ-án. ¹⁰ Te ñini sàhmi té Zacàriá sá sàháⁿ tnámí núú nàá, te vâi vihi ñáyiú xíndecu quehé veñúhu-án cáháⁿ ndíhi-yu Yá Ndiöxí. ¹¹ Te ní xiní té Zacàriá ñí espíritú xínú cuèchi núú

Yá Ndiöxí nútní-xi xio cùha núú nàá núú càyú sá sàháⁿ tnámí-án. ¹² Te òré ní xiní té Zacàriá espíritú-án te ñá ní cutnùnì iní-dé nása cada-dé chi ío ní yùhú-dé. ¹³ Te espíritú-án ñí xàháⁿ-xi:

—Zacàriá, vâ yùhú-n chi Yá Ndiöxí ní tedóho-gá tnúhu ní cáháⁿ-n, te vitna coo ñí déhe ñadìhí-n tǎ Elisabét te danàni-n-dé Juáá. ¹⁴ Te ío cudí ñí-n, te ducaⁿ ío vâi ñáyiú cudí ñí-n-yu na càcu-dé. ¹⁵ Te ío cudíu-dé núú Yá Ndiöxí, te ñí vǎ cóhó-dě ndidí te ñí vǎ cóhó-dě ndudí sá ñí natíu, te sa cundecu ndíhi-dé Espíritú Yá Ndiöxí òré cacu-dé. ¹⁶ Te ñiú-dé cada te ío vâi ñáyiú isràél natuhá-yu ichi Dütú Ndiöxí Yaá cúú Ndiöxí-ó. ¹⁷ Te té Juáá-án codonùu-dé núú-gǎ, te cundecu ndíhi-dé Espíritú-gá, te taxi tnùnì-dé dàtná ní quide té Èliás. Te nacanu ichi-dé cue téé cùu sacuéhé cuendá cada-güedé sá vâha sá cúú-xí cuè téé cuechi, te cuèi cue téé ío sǎá iní-xi, te ñiú-dé cada te tní-güedé tnúhu vâha, tnúhu cáháⁿ ñáyiú quide ndáá. Te ducaⁿ càda-dé cada túha-dé ñáyiú cuendá cunu cuèchi-yu núú Dütú Ndiöxí —cächí-xi xàháⁿ-xi xii-dé. ¹⁸ Te té Zacàriá ní ndúcú tnúhu-dé núú espíritú-án, te xàháⁿ-dè:

—¿Te nása cutnùnì ndáá iní-í tnúhu cáháⁿ-n-í? Chi yúhú ío ní sahnú-í ndíhi ñadìhí-í —cächí-dé xàháⁿ-dè xii-xi.

¹⁹ Te espíritú-án ñí xàháⁿ-xi:

—Yúhú cùu-í espíritú nání Gàbriél, te xínu cuechi-í núú Yá Ndiöxí, te mee-gǎ ní táuchíuⁿ-gǎ nàhá-í tnúhu-gá véxi cuendá cutnùnì iní-n nàcuáa cada ñaha-gǎ xii-ndo. ²⁰ Te vitna cuu ñihí-n te vǎ cáháⁿ-gá-n ndéé ná sǎá nduu càcu déhe ñadìhí-n, chi ñá túú ní sàndáá-ni iní-n tnúhu ní cáháⁿ-í. Te dacuítí sǎá nduu càda-xi nacuáa ní cáháⁿ-í-a —cächí espíritú-án xàháⁿ-xi xii-dé.

²¹ Te nchaa ñáyiú xíndecu quehé ndétü-yu té Zacàriá, te xícuñúhu-yu sá ío cùyaa-dé xití veñúhu. ²² Te òré ní ndee té Zacàriá, te ñá ní cùu-gá cáháⁿ ndíhi ñaha-dě xii-yu, te òré-án ñí cutnùnì iní-yu sá ñí xiní-dé ñí espíritú xínú cuèchi núú Yá Ndiöxí

xití veñúhu. Te mee-nă ndaha-dé ní quide-dé núu-yu chi ñá ní cùu-gá cáháⁿ-dé.

²³ Te ní xínu nduu nǐ xínu cuechi tē Zacàriá núu Yă Ndiöxí xití veñúhu, te cuánuhú-dé vehe-dé. ²⁴ Te sátá dúcáⁿ nǐ cuu te ñadìhí-dé tá Elisàbét ní ngúhuⁿ déhe-aⁿ, te úhúⁿ yóó ñà túú tñahí-gá ní quèe-aⁿ caca cuu-aⁿ, te ní cachí-aⁿ: ²⁵ “Mee Dütú Ndiöxí duha ní cundàhú iní ñáhá-gă sá cóó ñⁿ déhe-í cuendá sá vǎ cúú yíhí iní ñáhá ñăyiu xii-í”, duha ní cachí-aⁿ.

Ñⁿ espíritú xínú cuèchi núu Yă Ndiöxí cächí-xi sá cácu Jèsús

²⁶⁻²⁷ Te núu ñúú yóó sǎ nǐ ngúhuⁿ déhe tá Elisàbét, te ní tendaha tùcu Yă Ndiöxí espíritú nání Gábriél cuáháⁿ-xi ñⁿ ñúú nání Nàzarét cuáháⁿ ngoto-xi ñⁿ xíchí cuéchí nani Mariá. Te ñúú-áⁿ yíndèhu-xi distritú Galileá. Te xíchí-áⁿ sa ní cundáá tñúhu sá tñandaha-xi ndìhí ñⁿ téé nani Cheé ñani tñáhá ndíi Dàvíí. ²⁸ Te espíritú-áⁿ nǐ quíhu-xi ndéé xití vehe núu ndécú tǎ Màriá, te ní xáhaⁿ-xi:

—¡Cóvǎha-n-aⁿ! Dütú Ndiöxí ío cùu iní ñáhá-gă xii-n te ndècu ndìhí ñaha-gá, te ío-gá xító ñaha-gá xii-n dàcúúxí dàva-gá ñăyiu dìhí —cächí espíritú-áⁿ xáhaⁿ-xi.

²⁹ Dico òré ní xiní tá Màriá espíritú-áⁿ, te ní quíyùhú iní-xi sá dúcáⁿ nǐ cáháⁿ espíritú-áⁿ. Te ní sani iní-xi: “¿Ná cuendá duha cáháⁿ-tu espíritú-a-í?”, duha ní sani iní-xi. ³⁰ Te espíritú-áⁿ nǐ xáhaⁿ-xi:

—Màriá, vá yùhú-n chi ducaⁿ nǐ nduu táhú-n nǐu Yă Ndiöxí. ³¹ Te vitna ngúhuⁿ déhe-n, te na càcu-dé te danani-n-dé Jèsús. ³² Te ío cunuu-dé, chi Dütú Ndiöxí Yaá ío cùnuu cachí-gá sá Déhe-gá cúú-dé, te ñu-gá cada te cuu-dé ñⁿ téé cùnuu núu ñăyiu isràél dàtná ní quide-gá ndíi Dàvíí. ³³ Te taxi tñuní-dé ñăyiu isràél, te ducaⁿ-ni cùnuu-dé nǐ caa nǐ quíhíⁿ —cächí-xi xáhaⁿ-xi.

³⁴ Te tá Màriá ní xáhaⁿ-xi xii espíritú-áⁿ:

—¿Te nása cuu tñúhu cáháⁿ-n te ñà túú yíi-í-í? —cächí-xi xáhaⁿ-xi.

³⁵ Te ní xáhaⁿ espíritú-áⁿ:

—Espíritú Yă Ndiöxí quixi cundecu ndìhí-n, te ducaⁿ Yă Ndiöxí cada-gá ñⁿ sá vǎha sá cúú-xí-n ná càcu déhe-n. Te Yă Ndiöxí cächí-gá sá ío cundecu yíñùhu-dé núu-gá, chi Déhe-gá cúú-dé. ³⁶ Te tñahá didí-n tá Elisàbét ñúhú déhe-aⁿ cuèi ío ní sañu-aⁿ, te ñu-aⁿ cächí-yu sá vǎ cóó déhe-aⁿ ní cùu, te vitna sa ní cuu ñúú yóó ñúhú déhe-aⁿ. ³⁷ Chi Yă Ndiöxí ndácú-gă quidé-gă nchaa sá vǎ yòo tñahí ndàcu cada —cachí-xi xáhaⁿ-xi.

³⁸ Te tá Màriá ní xáhaⁿ-xi:

—Yúhú ná cúnú cuèchi-í núu Dütú Ndiöxí, te mee-gǎ ná cádá ñaha-gá xii-í nàcuáa ní cachí-n —cächí-xi xáhaⁿ-xi xii espíritú-áⁿ.

Te sátá dúcáⁿ te espíritú-áⁿ nǐ xica-xi cuáháⁿ-xi.

Tá Màriá cuáháⁿ ngoto-xi tá Elisàbét

³⁹ Te tá Màriá ío ndìhí cuáháⁿ-xi ñⁿ ñúú cáá xití yucu distritú Jùdeá.

⁴⁰ Te ní sáa-xi vehe té Zacàriá, te cuánguihu-xi ní dándácóo vǎha-xi tá Elisàbét. ⁴¹ Te òré ní tecú dóho tá Elisàbét ní cáháⁿ tá Màriá, te ní candá déhe-aⁿ xití-aⁿ, te òré-áⁿ nǐ ngúndecu ndìhí-aⁿ Espíritú Yă Ndiöxí. ⁴² Te níhi ní cáháⁿ-aⁿ, te xáhaⁿ-aⁿ xii tá Màriá:

—Yă Ndiöxí ío xito ñaha-gá xii-n dàcúúxí dàva-gá tñaha dìhí-ó, te ducaⁿ-ni xito-gá cuèi déhe-n. ⁴³ ¿Te ná cúú yùhú nǐu véxi coto ñaha yòhó nǎná Yaá cúú Xìtohó-í-í? ⁴⁴ Chi òré-ni ní tecú dóho-í ní cáháⁿ-n te ní candá-ni déhe-í xití-í sá cùdíí ñí-dé. ⁴⁵ Te vǎha táhú yòhó sá ní sàndáá iní-n, chi dacuítíí sǎ cádá Dütú Ndiöxí nàcuáa ní cáháⁿ espíritú ní tendaha-gǎ ní quixi ní cachí tñúhu xii-n nàcuáa cada-gá —cächí-aⁿ xáhaⁿ-aⁿ xii tá Màriá.

⁴⁶ Te ní xáhaⁿ tǎ Màriá:

Ío càhnu cuu Dütú Ndiöxí,

⁴⁷ Ío cùdíí ñí-í chi ñu-gá taunihnu ñaha-gǎ xii-í núu ùhú núu ndàhú.

⁴⁸ Chi ní ndacu iní ñáhá-gă xii yúhú, te dícó ñⁿ xíchí xínú cuèchi núu-gǎ cúú-í,

te vitna te nchaandi túhú ñáyiú cachí-yu sá ïo váha táhù-í.

49 Te Yá Ndiöxí cándòo caa nine iní-gá, te ío càhnu ïⁿ sá váha ní quide-gá sá cúú-xì-í.

50 Te cùndahú iní-gá nchaa ñáyiú nèhe sá yíñùhu núú-gă.

Te ducaⁿ-ni cuëi ñáyiú sa ndècu ñuyíú-a ndihi ñáyiú vitna véxi.

51 Chi ta quide-gá nchaa sá vă yõ tnàhí ndàcu cada véxi, te ta dàndóo canúú-gă cue ñáyiú quide cahnu mee-xì.

52 Te cue ñáyiú tàxi tnuní ñá túú-gă dáñá-gă taxi tnùnì-yu, te cue ñáyiú ndàhú ní quide nínu ñaha-gă xií-yu.

53 Te cue ñáyiú ndècu ndihi tnúndòho tnúhu ndàhú ní quide váha ñaha-gă xií-yu,

te cue ñáyiú cuica ñà túú nă ní ñihí-gă-yu cundecu ndihi-yu.

54 Te chindee-gá ñáyiú isràèl, ñáyiú xínu cuechi núú-gă, te ñá túú dàña nihnu ñaha-gá xií-yu, chi cùndahú iní ñáhá-gă.

55 Chi ducaⁿ ñi xáhaⁿ-gă xii ndíi Àbrahám, ndihi cue ñaní tnáhá ndíi.

Duha ní xáhaⁿ tă Màriá xii tá Elisàbét.
56 Te ní xíndecu tá Màriá dàtná úní yóó ndihi tá Elisàbét te dàtnùnì cuánuhú-xi vehe-xi.

Ní cacu té Juàá té dacuàndute ñaha xii ñáyiú

57 Te ní sáá nduu ñi cacu ïⁿ déhe téé tá Elisàbét. 58 Te nchaa ñáyiú ndècu yatni ndihi-aⁿ, ndihi nchaa ñaní tnáhá-áⁿ ñi níhí-yu tnúhu nàcuáa ní chindee ñàha Yá Ndiöxí xii-aⁿ. Te ío ní cudíí iní-yu cuendá-aⁿ. 59 Te núú ùná nduu sá ñi cacu déhe-aⁿ, te ní sáháⁿ ñáyiú núú ndécú-áⁿ cuendá cuáhă-yu sèñá ñi déhe-aⁿ. Te cuiní-yu cunani déhe-áⁿ Zacàriá dàtná nání tătă ní cùu.
60 Te ní xáhaⁿ náná déhe-áⁿ:

—Ñáhá, chi Juàá cunani-dě — cächí-aⁿ xáhaⁿ-aⁿ xií-yu.

61 Te ní xáhăⁿ-yu:

—¿Te ná cuendá te ñá túú ñi ïⁿ ñaní tnáhá-ndó dùcaⁿ nani-i? —cachí-yu xáhăⁿ-yu.

62 Te ní quidé-yu ndàhá-yu núú tătă dèhe-áⁿ cuendá cuiní-yu núú nása cuiní méé-dě cunani dèhe-dé. 63 Te ní xícáⁿ-dé ïⁿ tutú ní chídó tnùnì-dé nàcuáa cunani dèhe-dé, te duha ní chídó tnùnì-dé: “Juàá cunani-dě”, cächí-xi núú tütú ní tee-dé-áⁿ. Te nchaa ñáyiú xíndecu-áⁿ ñi cuñúhu-yu nàcuáa ní cuu. 64 Te òré-áⁿ ñi nacáháⁿ té Zacàriá sá ñi cuu ñihí-dé ní cùu, te ní ngúita-dé ní cachí-dé sá ïo càhnu cuu Yá Ndiöxí. 65 Te nchaa ñáyiú xíndecu yatni ndihi-dé ní cuñúhu-yu, te nchaa ñáyiú xíndecu nihíi xití yucu distrítú Jùdeá ní níhí-yu tnúhu nàcuáa ní cuu. 66 Te nchaa ñáyiú-áⁿ ïo vâi ní sani iní-yu, te ní xítñahá-yu:

—¿Ná cúú sá cádá tēe-áⁿ ndéé idá-gá ná cuèhnu-dé? —cächí-yu xítñahá-yu.

Te ducaⁿ ñi xítñahá-yu chi Dútú Ndiöxí ndécú ndihi ñaha-gă xii-dé.

Té Zacàriá cächí-dé sá ïo càhnu cuu Yá Ndiöxí

67 Te té Zacàriá tătă tē lĩhli-áⁿ ñi ngúndecu ndihi-dé Espíritú Yá Ndiöxí te ní cáháⁿ-dé nchaa tnúhu sá ñi dánèhé ñáhá-gă, te ní cachí-dé:

68 Ío càhnu cuu Dútú Ndiöxí nchoo ñáyiú isràèl,

chi ní quixi coto ñaha-gă xii-o, te cùu-o ñáyiú cùu cuendá-gá, chi dàcácu nihnu ñaha-gă xii-o vitna.

69 Chi ní tendaha-gă ïⁿ téé véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñaní tnáhá ndíi Dàvíí téé ní xínu cuechi núú-gă ndéé sanaha.

70 Te dıu-ni tnúhu ní cáháⁿ Yá Ndiöxí ní cáháⁿ cue téé ní quide ndáá ní xíndecu núú-gă ñuyíú-a ndéé sanaha.

71 Te ní cachí-güedé sá táúnihnu ñaha-gá xii-o núú nchàa ñáyiú cùu úhú iní ñáhá, ndihi núú nchàa ñáyiú ñá túú cùu quiní ndee ñáhá.

72 Te ní xáhaⁿ-gă sá cùndahú iní ñáhá-gă xii-o, te ducaⁿ càda-gá chi vá nàcuànaa-gá tnúhu ní cáháⁿ-gá ndihi-güedé.

73 Te ñuú ducaⁿ ndùu tnúhu ní xáhaⁿ-gã xii ndíi Àbrahám sá
74 táunìhnu ñaha-gá xii-o núú nchàa ñáyiu cùu úhú iní ñáhá, cuèndá sá vã yùhú-ó cùnu cuechi-o núú-gã.

75 Te cada ndáá-ó, te cundecu yíñuhu-o núú-gã ndi nchàa nduu cundecu-o ñuyíú-a.

Duha ní cachí té Zacàriá.

76 Te xáhaⁿ-dẽ xii té lĩhli-án: Te yòhó té lĩhli, cáháⁿ ñáyiu cuèndá-n sá cúú-n ñⁿ tée càháⁿ tnúhu Dútú Ndiõxí Yáá ío cùnuu,

chi quíhíⁿ-n còdonuu-n núú Yáá cúú Xítóhó-ó dàtúha-n ñáyiu cuèndá cundecu túha-yu òré quexìo-gá.

77 Te cúñaha-n xii ñáyiu isràèl sá cuíní-gá cada càhnu iní-gá nchaa cuéchi-yu,

te naníhí tàhú-yu.

78 Te ducaⁿ càda-gá chi ío cùu iní ñáhá-gã xii-o, chi ndéé andiú ní tendaha-gã ñⁿ tée véxi cuuⁿ-dé dandìxi túu-dé iní-ó cuèndá cutnùnì iní-ó nàcuáa ndùu cuèndá Yá Ndiõxí.

79 Te ducaⁿ dàndixi túu-dé iní nchaa ñáyiu ndècu ichi cuehé ichi duha ta xíta nihnu cuáháⁿ cuèndá nucúnu ichí-yu ñⁿ ichi váha.

Duha ní xáhaⁿ tẽ Zacàriá xii déhe-dé.

80 Te té lĩhli-án tá sàhnu-dé, te ta chindee chítúu ñaha Yá Ndiõxí xii-dé cuáháⁿ, te ní xíndecu-dé xítí yucu ndéé ní sáa nduu ní ngúíta-dé ní cáháⁿ-dé núú cuè ñáyiu isràèl tnúhu Yá Ndiõxí.

2

Ní cacu Jèsús (Mt. 1:18-25)

1 Te dàvá-án ní táuchíúⁿ tẽ Àugustú Cèsár nucódó tnùnì nchaa ñáyiu nacióⁿ yíndàha-dé. 2 Te xéhe sá dñhanuu ní nucódó tnùnì ñáyiu, te ñuú ní dàvá-án ní cunuu té Cireníú distritú Siríá. 3 Te nchaa ñáyiu ní natacá-yu ñuú núú ní cacú-yu cuèndá nucódó tnùnì-yu. 4 Núu xíáⁿ ní quee té Chèé ñuú Nazàrét ñⁿ ñuú yíndèhu distritú Galileá, te cuáháⁿ-dé ñuú

Bèlén ñⁿ ñuú yíndèhu distritú Jùdeá, chi xíáⁿ ní cuu ñuú ndíi Dàvíí, te ñuú ní ñanì tnáhá tẽ Chèé-án ní cuu ndíi.

5 Núu xíáⁿ cuáháⁿ-dé ndéé ñuú Bèlén nucódó tnùnì-dé, te tnáhá tá Màriá xíchí ní cundáá tnúhu sá tnàndaha ndìhi-dé cuáháⁿ ndìhi ñaha-dé, te sa ñuhu déhe-xi. 6 Te nini cùyaá-yu ñuú Bèlén-án ní sáá òré cacu déhe-xi.

7 Te ní cacu déhe díhna-xi, te ní chidúcúⁿnuu-xi dóó, te ní sacáⁿ ñáhá-xí ñⁿ vehe núú cúú vèhe quítì, chi ñá túú ní ñĩhí-yu vehe coó-yu.

Cue espíritú xínú cuèchi núú Yá Ndiõxí ndìhi cue toli.

8 Te yatni ñuú-án xíndecu ñⁿ úú toli ndéé-güedé mbèé-güedé ndécú-güedé majadá niú-án. 9 Te uuⁿni ní quexìo ñⁿ espíritú xínú cuèchi núú Yá Ndiõxí, te Yá Ndiõxí ní quide-gá ní dáyhé-xi ní càndéé núú xíndecu-güedé, te ní yùhú víhí-güedé. 10 Te ní xáhaⁿ espíritú-án:

—Vá yùhú-ndó, chi nàha-í ñⁿ tnúhu váha véxi sá cúú-xí-ndó, te ío cudíí iní-ndó ndìhi nchaa ñáyiu. 11 Chi vitna ní cacu ñⁿ tée dàcácu nihnu ñaha xii-ndo núú ùhú núú ndàhú ñuú ndíi Dàvíí, te téé-án cúú-dé Xítóhó Jesucristú. 12 Te dàtná ñⁿ sèñá te naníhí-ndó tẽ lĩhli-án yídúcúⁿ nuu-dé dóó cáá-dé ñⁿ vehe quítì —càchí-xi xáhaⁿ-xi xii-güedé.

13 Te òré-án ní quexìo cuehé víhí espíritú véxi cuuⁿ andiú ní naníhí tnáhá-xí ndìhi espíritú-án, te ní ngúíta-xi ní chiñuhu-xi Yá Ndiõxí, te càchí-xi:

14 ¡Ío càhnu cuu Yá Ndiõxí Yáá ndécú àndiú, te na cùndecu váha-ni nchaa ñáyiu cùu iní méé-gã!

Duha càchí cue espíritú-án.

15 Te òré cuánda cue espíritú-án andiú, te ní ngúíta cue toli-án xítñaha-güedé:

—Na quíhíⁿ-ó ñuú Bèlén quiní-ó nàcuáa ní cuu, chi Dútú Ndiõxí sa ní cachí tnúhu-gá —càchí-güedé xítñaha-güedé.

16 Te ní tñi-güedé ichi súúnì ndìhi cuáháⁿ-güedé, te ní naníhí-güedé tá Màriá ndìhi té Chèé, ndìhi té

lĩhli-áⁿ cáá-dě xití ñⁿ vehe quiti.
 17 Te òré ní xiní ñáhá-güedě te ní xáhaⁿ-güedě xii-yu nàcuáa ní xáhaⁿ espíritú-áⁿ xii-güedé cuendá té lĩhli-áⁿ. 18 Te nchaa ñáyiu ní tecú dóho-xi ní cuñúhu-yu nàcuáa ní cáháⁿ-güedé. 19 Dico tá Màriá chi ñùhu nahi-ni iní-xi, te dícó-ni sàni iní-xi cuendá nchaa tnúhu-áⁿ. 20 Te cue toli-áⁿ ñi natñi-güedé ichi, te ta xitnàha-güedé cuánuhú sá ïo càhnu cuu Yá Ndiöxí cuendá nchaa tnúhu ní xíndedóho-güedé, ndihí cuendá nchaa sá ñi xiní-güedé, chi cuendá sá ndáá ní cuu nchaa nàcuáa ní tecú tnúhu-güedé.

Ndècá-yu Jèsús cuáháⁿ veñúhu

21 Te núú ùná nduu sá ñi cacu té lĩhli-áⁿ, te ní sáha-güedé señá ñi-dé, te ní dánání ñàha-güedé Jèsús xii-dé, diu-ni nàcuáa ní xáhaⁿ espíritú xínú cuèchi núú Yá Ndiöxí xii tá Màriá ndéé cúnahá vátá ngùhuⁿ-gá-dé xití-xi.

22 Te sátá ñi tnahá nduu, ndùu ñi-yu nàcuáa càháⁿ nchaa tnúhu ní chídó tnùnì ndii Moisés, te ndècá-yu té lĩhli-áⁿ cuáháⁿ ñuú Jerusalén cuendá quee túu-dé núú Dütú Ndiöxí. 23 Te ducaⁿ ñi quidé-yu, chi ducaⁿ càháⁿ-xi núú tütú Yá Ndiöxí sá ncháá làndú té na càcu díhna quetúu-güexi núú-gá cuendá cundecu-ná-güexi cuendá-gá. 24 Te ní quidé-yu nàcuáa càháⁿ Yá Ndiöxí núú tütú-gá núú cächí-xi: “Canehe-ndo úú lómá àdi úú cücu quihíⁿ nduu táhú ñáhá Yá Ndiöxí”, duha càháⁿ-gá núú tütú-gá.

25 Te dàvá-áⁿ ndécú ñiⁿ téé nàni Mió ñuú Jerusalén. Te ío váha iní-dé, te chiñuhu-dé Yá Ndiöxí, te ndètu-dé sáá nduu chindee ñaha Yá Ndiöxí xii ñáyiu isràél. Te ndècu ndihí té Mió-áⁿ Espíritú Yá Ndiöxí. 26 Te sa ní xáhaⁿ-xi xii-dé sá vã cùú-ni-dé, chi dacuñí quini-dé Crístú Yaá tendaha Yá Ndiöxí quixi ñuyíu-a. 27 Te téé-áⁿ ndécá ñaha Espíritú Yá Ndiöxí xii-dé cuáháⁿ veñúhu càhnu sá ïo cùnuu. Te cuáháⁿ-yu ndihí Jèsús veñúhu-áⁿ cuendá cadá-yu ndihí-gá nàcuáa càháⁿ tnúhu ní chídó tnùnì ndii Moisés. 28 Te òré ní sáá-yu, te té Mió-áⁿ ní

nguidèhé-dé Jèsús, te ní cáháⁿ-dé sá ïo càhnu cuu Yá Ndiöxí, te ní xáhaⁿ-dë xii-gá:

29 Yòhó Dütú Ndiöxí sa ní cuu dañ-a-n cùú-í vitna,

chi sa ní quide-n nàcuáa ní cachí-n xii yúhú téé xínu cuechi núú-n.

30 Chi sa ní xiní núú-í Yaá dácácu ñi-hnu ñaha xii ñáyiu núú uhú núú ndàhú vitna.

31 Te Yaá ní tendaha-n vëxi núú ndécú nchàa ñáyiu ñuyíu-a.

32 Te cùu-gá dàtná ñiⁿ ñuhú, chi dandixi túu-gá iní ñáyiu cuendá cutnùnì iní-yu cuendá Yá Ndiöxí cuèí ñá díú ñáyiu isràél cùú-yu.

Te diu-gá cada, te canehe ñáyiu dava-gá ñuú sá yíñùhu núú ñáyiu isràél chi diu ñáyiu isràél cùú-yu ñáyiu cùu cuendá-n.

Duha ní xáhaⁿ tã Mió xii Yá Ndiöxí.

33 Te té Chèé ndihí náná Jèsús ní cuñúhu-yu tnúhu ní cáháⁿ té Mió cuendá-gá. 34 Te dàtnùnì té Mió ní xicáⁿ táhú-dë núú Yá Ndiöxí cuendá-yu, te xáhaⁿ-dë xii tá Màriá náná Jèsús:

—Cundedóho tnúhu na càháⁿ-í-a, té lĩhli-a ní nduu táhú-dë nacanu ichi-dé dava ñáyiu isràél ichi Yá Ndiöxí, te davá-yu vá tñi-yu tnúhu cáháⁿ-dé, te ñáyiu-áⁿ cuíta niñnú-yu, te cada-dé nàcuáa cutnùnì iní ñáyiu sá Yá Ndiöxí ní tendaha ñaha-gá xii-dé, dico vá quindáá iní-yu, chi daquèe tihú ñahá-yu xii-dé. 35 Te ducaⁿ te cutnùnì nàcuáa sàni iní ñiⁿ ñiⁿ ñáyiu. Dico sá cùú-xi yòhó chi ío cada ndàhú-xi iní-n, chi súúni dàtná sá ñi nícuèhé iní-n càda-xi —cachí-dé xáhaⁿ-dë xii tá Màriá.

36 Te xíáⁿ ndécú tnàhá ñiⁿ ñaha càháⁿ tnúhu Yá Ndiöxí nání-áⁿ Aná, te tãtá-aⁿ ní xínani-dë Fànuél ñani tnahá ndii Áser. Te ñaha-áⁿ sa ní sahnu vihi-aⁿ, te cuechi-ni-aⁿ ñi tñándaha-aⁿ te úsá-ni cuíá ñi xíndecu-aⁿ ndihí yii-aⁿ, 37 te ní quendóo quèé-aⁿ, te sa ñuhu-aⁿ cùmídíco cümü cuíá-aⁿ. Te ñá túú ní xóo quee-aⁿ veñúhu càhnu sá ïo cùnuu, chi nduu niú ní xóo chiñuhu-aⁿ Dütú Ndiöxí, te áma ñá túú tnàhí ná ní xóo caxi-aⁿ ní xóo cáháⁿ ndihí-aⁿ Yá Ndiöxí. 38 Te

d̩u-ni òré ndécũ-yu ndih̩i Jèsús ní quexìo-aⁿ núũ-yu, te ní ndacáⁿ táhú-áⁿ núú Yă Ndiõxí cuendá sá n̩i xiní-aⁿ Jèsús, te d̩atn̩uní ní ngũíta-aⁿ càháⁿ váha-aⁿ cuendá-gá núú nchàa ñáyiu, ñáyiu ndètu quini sáa nduu dàcácu Yá Ndiõxí ñáyiu Jerusàlén núú tn̩ndòho tn̩úhu ndáhú.

Cuánuhú-yu ñuú Nazàrét

³⁹ Te sátá n̩i quidé-yu nchaa nàcuáa càháⁿ tn̩úhu Yá Ndiõxí, te cuánuhú-yu ñuú Nazàrét núú ndécú tn̩ahí-yu, te ñuú-áⁿ y̩ndèhu-xi distritú Galileá.

⁴⁰ Te té l̩hli n̩ani Jesús-áⁿ tá sàhnu-dé, te ta n̩ihí ndéé-dé cuáháⁿ, te ducaⁿ ïo váha ta sáa sá xiní tn̩uní-dé cuáháⁿ, chi Yá Ndiõxí ndécú ndih̩i ñaha-gá xii-dé.

Jèsús ndécú-gă veñúhu

⁴¹ Te ndi tnahá cuía n̩i xóo quih̩iⁿ té Chèé ndih̩i n̩aná Jèsús vico p̩ascuá ñuú Jerusàlén. ⁴² Te cútn̩ahá ní chítú Jèsús úxúú cuía-gă, te cuáháⁿ-yu ndih̩i-gá ñuú Jerusàlén vico p̩ascuá, chi ducaⁿ tn̩ahí quidé-yu. ⁴³ Te òré ní yáha vico, te ní natn̩i-yu ichi cuánuhú-yu, te ní quendóo-gá ñuú Jerusàlén, te ní n̩aná-gă, te ní t̩é Chèé ñá túú ní xiní ní quendóo-gá. ⁴⁴ Chi ní sani iní-yu sá ñútn̩ahá-gá tnuú nchaa ñáyiu ní sáháⁿ vico cuánuhú. Te ní xúhuⁿ-yu ìⁿ nduu ichi ta ndùcu tn̩úhu-yu-gá núú nchàa ñani tn̩áhă-yu, ndih̩i núú nchàa ñáyiu xiní tn̩áhá ndih̩i-yu, ⁴⁵ te ñá túú ní n̩an̩ihí ñáhă-yu xii-gá. Núú ní nacuìcò-yu cuánuhú tucú-yu ñuú Jerusàlén cuendá yàcáⁿ nanducu ñahá-yu xii-gá.

⁴⁶ Te núú ùn̩i nduu sá n̩i dana núú ñahă-yu xii-gá, te ní nan̩ihí ñahă-yu n̩ucóo-gá xit̩i veñúhu càhnu sá ïo cunuu tnuú cue t̩é dàcuaha ñaha xii-yu nchaa tn̩úhu ní chídó tn̩uní ndí Moisés, te ndèdóho ñaha-gă xii-güedé, te n̩and̩i sá ndúcú tn̩úhu-gá núú-güedé. ⁴⁷ Te nchaa cue t̩é x̩ndedóho ñaha xii-gá x̩cuñúhu-güedé sá ïo váha sáa sá xiní tn̩uní-gá, te ïo váha n̩ihí-gá tn̩úhu n̩andanchocáva-gá. ⁴⁸ Te òré ní xiní ñahá t̩é Chèé ndih̩i

n̩aná-gă xii-gá, te ïo ní cuñúhu-yu, te ní xáhaⁿ n̩aná-gă xii-gá:

—Yòhó déhe-í, ¿ná cuendá ducaⁿ n̩i quide ñaha-n xii-ndí? Te t̩atá-n ndih̩i yúhú ndih̩i iní-ndí xicá n̩anducu ñaha-ndí xii-n —càchí-xi xáhaⁿ-xi xii-gá.

⁴⁹ Te ní xáhaⁿ Jèsús xii-yu:

—¿Ná cuendá n̩anducu ñaha-ndo? ¿Náa ñá túú xiní-ndó sá núú chíúⁿ T̩atá-í tàú-í caca cuu-í-ăⁿ? —càchí-gá xáhaⁿ-gă xii-yu.

⁵⁰ Dico mèé-yu ñá túú ní t̩ècú tn̩uní-yu nàcuáa ní xáhaⁿ-gă.

⁵¹ Te sátá dúcáⁿ te cuánuhú ndih̩i ñahá-yu xii-gá ñuú Nazàrét, te ïo ní sándáá iní ñahá-gă xii-yu. Te nchaa sá n̩i quide-gá-áⁿ n̩i xúhuⁿ nahi-ni iní n̩aná-gă. ⁵² Te Jèsús ducaⁿ-ni ta sàhnu-gá cuáháⁿ, te ta sáa-gá sá xiní tn̩uní-gá cuáháⁿ, te ducaⁿ cùd̩u-gá núú Yá Ndiõxí, ndih̩i núú nchàa ñáyiu.

3

Té Juàá t̩é dàcuandute ñaha xii ñáyiu càháⁿ-dé tn̩úhu Yá Ndiõxí xit̩i yucu (Mt. 3:1-12; Mr. 1:1-8; Jn. 1:19-28)

¹ Te ní cuu sáhúⁿ cuía sá y̩ndàha té Tiberiú cuéhé n̩acióⁿ, te dàvá-áⁿ n̩i cunuu té Pilatú distritú Jùdeá, te té Hèrodés ní cunuu-dé distritú Galileá, te ñani-dé té Lìpé ní cunuu-dé distritú Itùreá ndih̩i ìngá distritú n̩aní Tràconité, te té Lisaniás ní cunuu-dé distritú Abiliniá. ² Te té Ànás ndih̩i té Caifás ní cuu-güedé dútú cùnùu. Te dàvá-áⁿ n̩i cáháⁿ ndih̩i ñaha Yă Ndiõxí xii té Juàá déhe té Zacariá xit̩i yucu sá quih̩iⁿ-dé cáháⁿ-dé tn̩úhu-gá núú ñáyiu. ³ Te té Juàá ní yáha-dé nchaa ñuú cáa y̩t̩ni yúte Jòrdán, te xáhaⁿ-d̩é xii nchaa ñáyiu:

—Chí d̩ánd̩ixi túu iní sá ñà túú quide váha-ndo, te dañ-ndo nchaa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yă Ndiõxí nchaa yicá cuèchi-ndo — duha ní xáhaⁿ-d̩é xii-yu.

⁴ Te ducaⁿ n̩i quide-dé chi ní quee ndáá-xi nàcuáa ní chídó tn̩uní ndí Chaiá t̩é ní xóo cáháⁿ tn̩úhu Yá

Ndiõxí ndéé sanaha nõú tütú ndíi nõú cächí-xi:

Tècú càháⁿ níhi ìⁿ téé yìhi xití yucu, te xãhaⁿ-dẽ xii ñáyiu:

“Chí dáñá nchàa ichi cuehé ichi duha ndècu-ndo, te tñi-ndo ìchi váha,

te ducaⁿ càda-ndo cuendá cundecu túha-ndo, chi véxi Yaá ío cùnuu.

⁵ Te nchaa nõú cùnú nachítú,

te nchaa tìndúú ndìhi nchaa yucu ngoyo nihnu cuendá nduu ndáá,

te nchaa ichi ñá túú cuãháⁿ ndáá nduu ndáá,

te nchaa ichi ñá túú càváha nduu váha.

⁶ Te nchaa ñáyiu ñuyíú-a níhí-yu tñuhu sá Yã Ndiõxí véxi-gá dàcácu nihnu ñaha-gã xii-yu nõú ùhú nõú ndàhú.”

Duha ní chídó tñuní ndíi Chàia nõú tütú ndíi.

⁷ Te òré ní xica ñáyiu cuáháⁿ-yu cuendá dacuàndute ñaha té Juáá xii-yu, te ní xãhaⁿ-dẽ:

—ìNchaa nchòhó cúú-ndó dàtná ìⁿ cóó dèéⁿ chi ío cuihna ìní-ndó! ¿Te nása ní cuu nõú tñàhá nchòhó ndúcú-ndó nàcuáa cácu nihnu-ndo nõú tñùndòho cahnu vihi sá tá cùyatni ñaha xii-ndo véxi-i? ⁸ Te chí cáda váha vitna cuendá ducaⁿ cùtnuní sá ní dáñá-ndó nchàa ichi cuehé ichi duha ndècu-ndo. Te vá cächí-ndó sã ìo càhnu cuu-ndo cuendá sá cúú-ndó ñàní tñáhá ndíi Àbrahám, chi cuèi ndéé yúú te ndacu Yá Ndiõxí ndada-gá ñáyiu te cuú-yu ñàní tñáhá ndíi Àbrahám. ⁹ Te caá chi ndècu túha-xi sá quèhndé-xi nchaa yutnu sá ñà túú càváha sávidí-xi, chi nchaa yutnu-áⁿ tèhndé-xi te cuánguee-xi nõú ñùhú càyú-xi. Te duha sãtnahá-xi ndoho nchaa ñáyiu ñá túú quide váha, chi nchaa ñáyiu ducaⁿ ñà túú quide váha cùú-yu dàtná nchaa yutnu sá ñà túú càváha sávidí-xi. —cächí-dé xãhaⁿ-dẽ xii-yu.

¹⁰ Te ní xicáⁿ tñuhu-yu nõú-dẽ, te xãháⁿ-yu:

—¿Te nása cada-ndí váíⁿ? —cächí-yu xãháⁿ-yu xii-dé.

¹¹ Te xãhaⁿ-dẽ:

—Te nõú ndèdacàa-ndo ndecu ndìhi-ndo úú dóó te cuãñaha-ndo ìⁿ xii ñáyiu ñá túú ndècu ndìhi, àdi nõú ndècu ndìhi-ndo sá nchító-ó te cuáha-ndõ-yu na cãxí-yu —cächí-dé xãhaⁿ-dẽ xii-yu.

¹² Te ní quexìo ìⁿ úú cue téé cuihna ìní-xi quide cobrá ñáhá xii ñáyiu cuendá impuèstú cuendá cuàndute-güedé, te ní xicáⁿ tñuhu-güedé nõú tẽ Juáá, te xãhaⁿ-güedé:

—Mèstrú, ¿te nása cada-ndí cuendá cuu váha ìní Yã Ndiõxí-i? —cächí-güedé xãhaⁿ-güedé xii-dé.

¹³ Te té Juáá ní xãhaⁿ-dẽ:

—Vá cuídó-ndó càda cobrá-ndó ñáyiu —cächí-dé xãhaⁿ-dẽ xii-güedé.

¹⁴ Te tñàhá ìⁿ úú cue téé cùu sandadú xĩndecu-áⁿ ní xicáⁿ tñuhú-güedé nõú tẽ Juáá, te xãhaⁿ-güedé:

—Te nchúhú ¿nása cada-ndí cuendá cuu váha ìní Yã Ndiõxí-i? —cächí-güedé xãhaⁿ-güedé xii-dé.

Te ní xãhaⁿ tẽ Juáá:

—Vá quèndéé-ndó sã néhé tñàha ñáyiu-ndo, te ni vã dàcàa díquí-ndõ-yu ìⁿ sá ñà túú ñà quidè-yu, te nduu vétú ìní-ndó nàcuáa ñùhu yáhu-ndo —cächí-dé xãhaⁿ-dẽ xii-güedé.

¹⁵ Te nchaa ñáyiu xĩndetu sá quíxí Crìstú sàni ìⁿ sani úú ìní-yu nõú sá díú Crìstú Yaá tendaha Yã Ndiõxí quixi ñuyíú-a cùu te Juáá àdi ñáhá. ¹⁶ Dico té Juáá ní cáháⁿ ndodo-dé nõú-yu ncháá-yu, te xãhaⁿ-dẽ:

—Na cächí tñuhu ndáá-í xii-ndo sã yùhú véxi-í sá cuendá-ni dacuàndute ñaha-í xii-ndo dàtná ní cachí Yã Ndiõxí, dico nchicúⁿ ìngá téé véxi, te téé-áⁿ taxi-dé Espíritú Yã Ndiõxí cundecu ndìhi-ndo, te cùu-xi datná ìⁿ ñuhú, chi ndada ndoo ndada nine-xi ìní-ndó. Te téé-áⁿ ìo-gá cùnùu-dé dàcúxí yùhú, chi yùhú cùú-í ìⁿ téé duuⁿ duuⁿ ñá túú tàú-í nandaxi-ì cuèdicó ñi chàu-dé dico quide-í chiuⁿ-dé. ¹⁷ Te téé-áⁿ sa véxi túha-dé sá cáda dèⁿ ñaha-dé xii-o dàtná quidé ñáyiu ndàda ndoo triú, chi ñáyiu-áⁿ sa nèhe túha-ná-yu yaxíⁿ-yu òré náñani cuendá ndada ndoó-yu, te

òré ndádá ndòó-yu triú-án te dàquee dǎiⁿ-yu mihi-xi, te tàxúha-yu mee-nǎ triú-án, te mihi-xi-án sáhmi-yu. Te dàtná quídě-yu mihi triú-án ducaⁿ sǎtnahá-xi cada ñaha té-án xii nchaa ñáyiú ñá túú quide váha, chi daquihíⁿ ñáhá-dě xií-yu núú ñùhú núú càyú, te ñuhú-án ñà túú tnàhí ndàhvá — càchí-dé xǎhaⁿ-dě xií-yu.

18 Te tǐtní víhí-gǎ tnúhu váha ní xáhaⁿ tǎ Juàá xií-yu òré ní dásàhú ñáhá-dě. 19 Te ní cáháⁿ-dé dóho té Hèrodés cuendá sá ndécá-dě ìⁿ ñaha nàni Herodiás ñaha ní cándeca ñaní-dé té Lìpé, te ní xáhaⁿ-dě cuendá nchaa dava-gá sá cuèhé sá dúhá quide-dé. 20 Dico té Hèrodés ñá túú ní quide cuendá-dé tnúhu ní cáháⁿ té Juàá, chi nèhé-gá tucu ní quide-dé, chi da ve-caá ní chihi-dé té Juàá.

Sàndute Jesús

(Mt. 3:13-17; Mr. 1:9-11)

21 Te òré dácuaⁿndute té Juàá nchaa ñáyiú, te tnàhá Jèsús ní dácuaⁿndute ñaha-dé xii-gá. Te nini càháⁿ ndihi-gá Dútú Ndiöxí ní nacaáⁿ andiú, 22 te ní quee Espiritú Yǎ Ndiöxí véxi cuuⁿ túu-xi, te càa-xi datná cáá ìⁿ lómá, te òré-án ní tecú ní cáháⁿ Yǎ Ndiöxí ndéé andiú, te xáhaⁿ-gǎ xii Jèsús:

—Yòhó cúu-n Dèhe-í téé ío cùu iní-í, te ío cùdí iní ñáhà-í xii-n —càchí-gǎ xáhaⁿ-gǎ xii Jèsús.

Cue téé ní xíndecu díhna-gǎ ñuyíú-a dàcúúxí Xǐtohó Jesucristú

(Mt. 1:1-17)

23 Te ndècu Jesús dàtná ócò úxí cuíá-gǎ cútnàhá ní chisaha-gǎ chiúⁿ ní táhú Tǎtá-gǎ Dútú Ndiöxí cada-gá. Te ní cuu-gǎ déhe té Chèé chi ducaⁿ sàni iní ñáyiú ñuyíú-a. Te té Chèé-án nǐ cuu-dé déhe té Èlí, 24 te té-án nǐ cuu-dé déhe té Mátát. Te té Mátát-án nǐ cuu-dé déhe té Lèví, te té-án nǐ cuu-dé déhe té Mèlquí. Te té Mèlquí-án nǐ cuu-dé déhe té Jàná, te té-án nǐ cuu-dé déhe té Chèé. 25 Te té Chèé-án nǐ cuu-dé déhe té Matàtiás, te té-án nǐ cuu-dé déhe té Àmós. Te té Àmós-án nǐ cuu-dé déhe té Nàhúm, te té-án nǐ cuu-dé déhe té Èslí. Te té Èslí-án nǐ cuu-dé déhe té Nagàí, 26 te té-án nǐ

cuu-dé déhe té Mátát. Te té Mátát-án nǐ cuu-dé déhe té Matàtiás, te té-án nǐ cuu-dé déhe té Semèí. Te té Semèí-án nǐ cuu-dé déhe té Chèé, te té-án nǐ cuu-dé déhe té Jùdá. 27 Te té Jùdá-án nǐ cuu-dé déhe té Jòaná, te té-án nǐ cuu-dé déhe té Rèsá. Te té Rèsá-án nǐ cuu-dé déhe té Zorobàbél, te té-án nǐ cuu-dé déhe té Salàtiél. Te té Salàtiél-án nǐ cuu-dé déhe té Nèrí, 28 te té-án nǐ cuu-dé déhe té Mèlquí. Te té Mèlquí-án nǐ cuu-dé déhe té Àdí, te té-án nǐ cuu-dé déhe té Còsám. Te té Còsám-án nǐ cuu-dé déhe té Elmòdám, te té-án nǐ cuu-dé déhe té Èr. 29 Te té Èr-án nǐ cuu-dé déhe té Jòsué, te té-án nǐ cuu-dé déhe té Elièzér. Te té Elièzér-án nǐ cuu-dé déhe té Jòrím, te té-án nǐ cuu-dé déhe té Mátát. 30 Te té Mátát-án nǐ cuu-dé déhe té Lèví, te té-án nǐ cuu-dé déhe té Mìó. Te té Mìó-án nǐ cuu-dé déhe té Jùdá, te té-án nǐ cuu-dé déhe té Chèé. Te té Chèé-án nǐ cuu-dé déhe té Jònán, te té-án nǐ cuu-dé déhe té Eliàquím. 31 Te té Eliàquím-án nǐ cuu-dé déhe té Mèléá, te té-án nǐ cuu-dé déhe té Mainán. Te té Mainán-án nǐ cuu-dé déhe té Mátatá, te té-án nǐ cuu-dé déhe té Nàtán. 32 Te té Nàtán-án nǐ cuu-dé déhe té Dàvíí, te té-án nǐ cuu-dé déhe té Isàí. Te té Isàí-án nǐ cuu-dé déhe té Òbéd, te té-án nǐ cuu-dé déhe té Bòóz. Te té Bòóz-án nǐ cuu-dé déhe té Sàlmón, te té-án nǐ cuu-dé déhe té Naàson. 33 Te té Naàson-án nǐ cuu-dé déhe té Aminadáb, te té-án nǐ cuu-dé déhe té Àrám. Te té Àrám-án nǐ cuu-dé déhe té Èsróm, te té-án nǐ cuu-dé déhe té Fàrés. Te té Fàrés-án nǐ cuu-dé déhe té Jùdá, 34 te té-án nǐ cuu-dé déhe té Jàcób. Te té Jàcób-án nǐ cuu-dé déhe té Isàác, te té-án nǐ cuu-dé déhe té Àbrahám. Te té Àbrahám-án nǐ cuu-dé déhe té Tàré, te té-án nǐ cuu-dé déhe té Nàcór. 35 Te té Nàcór-án nǐ cuu-dé déhe té Sèrúg, te té-án nǐ cuu-dé déhe té Ragàú. Te té Ragàú-án nǐ cuu-dé déhe té Pèlég, te té-án nǐ cuu-dé déhe té Hèbér. Te té Hèbér-án nǐ cuu-dé déhe té Sàlá, 36 te té-án nǐ cuu-dé déhe té Cànán. Te té Cànán-án nǐ cuu-dé déhe té Arfàxád, te té-án nǐ cuu-dé déhe té Sëm. Te té Sëm-án nǐ cuu-dé déhe té Nòé, te té-án nǐ cuu-dé déhe té Láméc. 37 Te té Láméc-án nǐ cuu-dé

déhe té Matusalén, te té-án nǐ cuu-dé déhe té Ènóc. Te té Ènóc-án nǐ cuu-dé déhe té Jàréd, te té-án nǐ cuu-dé déhe té Mahalàleél. Te té Mahalàleél-án nǐ cuu-dé déhe té Cainán, ³⁸ te té-án nǐ cuu-dé déhe té Ènós. Te té Ènós-án nǐ cuu-dé déhe té Sèt, te té-án nǐ cuu-dé déhe té Adán. Te té Adán-án chi mee Yá Ndiöxí ní cadúha ndaha ñàha-gá xii-dé.

4

Sácuíhná quidé yíca-xi cada Jesús sá ñà túú tàú-gá cada-gá ní cùu

(Mt. 4:1-11; Mr. 1:12-13)

¹ Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndihí-gá Espíritú Yá Ndiöxí, te Espíritú-án ndécá ñàha-xi xii-gá cuáhán ìⁿ xití yucu. ² Te yàcán ní xindecu-gá údico nduu, te sácuíhná nǐ cuiní-xi coto ndeé ñáhá-xí xii-gá te núu ndisa sá vǎ cadá-gǎ ìⁿ sá ñà túú tàú-gá cada-gá. Te ñà túú tnàhí ná ní xèxi-gá ndi údico nduu-án, te sátá dúcán te ní xícán iní-gá caxi-gá. ³ Te sácuíhná-án nǐ xáhaⁿ-xi xii-gá:

—Te núu ndisa sá cúu-n Dèhe Yá Ndiöxí, te cuñaha xii yúu-a na nduu-xi paá —càchí-xi xáhaⁿ-xi xii-gá.

⁴ Te Jèsús ní xáhaⁿ-gǎ xii-xi:

—Núu tùtú Yá Ndiöxí càchí-xi: “Ñá díú mèe-ni paá candeca-xi iní ñáyiu, chi tnàhá nchaa tnúhu càhán Yá Ndiöxí candeca-xi iní-yu”, duha càchí-xi núu tùtú-gá —càchí-gá xáhaⁿ-gǎ xii-xi.

⁵ Te dǎtnùnǐ sácuíhná ndécá ñàha-xi xii-gá cuáhán ìⁿ núu tìndúú dùcún, te uuⁿni ní dánèhé núu ñáhá-xí xii-gá nchaandi túhú nàcióⁿ cáá ñùyúú. ⁶ Te ní xáhaⁿ-xi xii-gá:

—Yúhú cada-í, te taxi tnùnǐ-n nchàa-ndi túhú nàcióⁿ-a ndihí nchaa sá vǎha íó díu-ni nchaa nàcióⁿ-a, te cachí ñáyiu sá ío cùnuu-n, chi yúhú cúu cuendá-í nchaa sá íó nchaa nàcióⁿ-a, te ndédani càa ñáyiu cùu iní-í te cuñaha-í xií-yu taxi tnùnǐ-yu. ⁷ Te núu ni yúhu ní iní-n chĩñuhu ñàha-n xii-í ñá, te nchaa taxi-í cuu cuendá-n —càchí-xi xáhaⁿ-xi xii-gá.

⁸ Te Jèsús ní xáhaⁿ-gǎ xii-xi:

—Xocuiñí yòhó sácuíhná núu ndécú-í-a, chi vá cúu càda-í nàcuáa càchí-n chi núu tùtú Yá Ndiöxí càchí-xi: “Chiñuhu-ndo Dútú Ndiöxí Yáa cúu Ndiöxí-ndó, te ìⁿdii díí-ni-gǎ cada-ndo nchàa nacuáa càhán-gá”, duha càchí-xi núu tùtú-gá —càchí-gá xáhaⁿ-gǎ xii-xi.

⁹ Te sácuíhná ndécá ñàha tucu-xi xii-gá cuáhán ñuú Jerusàlén, te ní xáhaⁿ-xi xii-gá cuásaá-gá díquí veñúhu càhnu sá ío cùnuu, te ní xáhaⁿ tùcu-xi:

—Te núu ndisa cùu-n Dèhe Yá Ndiöxí te cuandèe ndaya ndeé núu ñúhú ¹⁰ cuendá quee ndáá-xi nàcuáa càhán-xi núu tùtú Yá Ndiöxí núu càchí-xi:

Yá Ndiöxí tendaha-gǎ cue espíritú xínú cuèchi núu-gǎ quixi-xi coto ñàha-xi xii-n.

¹¹ Te núu ndáhá-xí càundodo-n cuendá sá vǎ dánicuèhé yúu sǎhá-n,

duha càchí-xi núu tùtú-gá —càchí sácuíhná xáhaⁿ-xi xii-gá.

¹² Te Jèsús ní xáhaⁿ-gǎ xii-xi:

—Te càchí tucu-xi núu tùtú Yá Ndiöxí: “Vá cánǐ iní-n còto ndeé-n Dútú Ndiöxí Yáa cúu Ndiöxí-n núu ndisa sá dácǎcu nihnu ñàha-gǎ xii-n cuendá ìⁿ sá sání iní-n càda-n sá cúu-xí mèe-n”, duha càchí-xi núu tùtú-gá —càchí-gá xáhaⁿ-gǎ xii-xi.

¹³ Te sátá dúcán te sácuíhná ñà túú-gǎ ní cùtnunǐ iní-xi nása cada-xi Jèsús, núu xǎá ní xica-xi cuáhán-xi ní sanaa tnaa-xi.

Distritú Galileá ní chisaha Jèsús chiúⁿ ní táhú Tǎtá-gǎ Dútú Ndiöxí cada-gá

(Mt. 4:12-17; Mr. 1:14-15)

¹⁴ Te Jèsús cuáhán tucu-gá distritú Galileá, dico sa ndècu ndihí-gá Espíritú Yá Ndiöxí, te ni càa xico xíaⁿ ní níhí-yu tnúhu nchaa nàcuáa quide-gá. ¹⁵ Te ndi tnàhá ñuú cuáhán-gá ducaⁿ cuànguihu-gá veñúhu-yu dānehé ñáhá-gǎ xií-yu, te ncháa-yu càchí-yu sá ío càhnu cuu-gá.

Jèsús ndécú-gǎ ñuú Nazàrét

(Mt. 13:53-58; Mr. 6:1-6)

¹⁶ Te Jèsús ní sáhán-gǎ ñuú Nazàrét ñuú núu nǐ sahnu-gá. Te nduu

ndètatú ñáyiú ní quíhu-gá veñúhu, chi ducaⁿ tnàhí quide-gá, te ní ngúnutnii-gá dácuaⁿha-gá tutú ndèé tnúhu Yá Ndiöxí. ¹⁷ Te ní sáñaha-güedé xii-gá tutú ndèé tnúhu ní cáháⁿ ndí Chàíá téé ní xóo cáháⁿ tnúhu Yá Ndiöxí ndèé sanaha, te òré ní nandicá-gá núú tütú-áⁿ te ní naníhí-gã núú cächí-xi:

¹⁸ Espiritú Yă Ndiöxí ndécú ndíhi ñaha-xi xii-í,

chi ní cachí-gá sá cáháⁿ-í tnúhu-gá sá cúú-xí ñáyiú ndàhú,

ñáyiú vátá cündedóho tnàhí-gá.

Te véxi-í cuendá vá ndíhú-gá iní ñáyiú ñá túú ndècu váha iní-xi,

te cue ñáyiú sa nèhe váha ñaha-ñă yucu ñăvâha dâcâcu ni-hnu-í-yu.

Te cue ñáyiú cuâá nacaáⁿ-í núŷ-yu, te ñáyiú ndòho dandoho ñaha tnaha ñáyiú-xi taunihnu-í-yu.

¹⁹ Te cúñaha-í xii ñáyiú sá sâá nduu càda Yá Ndiöxí ñⁿ sá vâha sá cúú-xí-yu.

Duha cächí-xi núú tütú dácuaⁿha-gá.

²⁰ Te Jèsús ní nacadí-gá núú tütú-áⁿ, te ní nacuaⁿha-gá ñⁿ téé xínu cuechi veñúhu-áⁿ, te ní ngóo-gá. Te nchaa ñáyiú yíhi veñúhu ñá núú núŷ-yu ndèhe ñahá-yu xii-gá. ²¹ Te xâhaⁿ-gã xií-yu:

—Mei vitna ní quee ndáá-xi nâcuâa cáháⁿ-xi núú tütú Yă Ndiöxí —cächí-gá xâhaⁿ-gã xií-yu.

²² Te ncháá-yu ní cáháⁿ váha-yu cuendá-gá, te ní cuñúhu-yu tnúhu váha cáháⁿ-gá, te xitnàhá-yu:

—¿Te náa ñá díú tēe-a cùu-dé déhe té Chèé-ãⁿ? —cächí-yu xitnàhá-yu.

²³ Te Jèsús ní xâhaⁿ-gã:

—Na cächí tnúhu ndáá-í xii-ndo sã ñúhú iní-ndó cññaha-ndo xii-í ñⁿ tnúhu cùtexínu sá cáháⁿ méé-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tucu-ndo xii-í: “Sa ní níhí-ndí tnúhu nâcuâa ní quide-n ñúú Capèrnaúm, te cada-n tnàhá ñúú núú ñí sahnú-n”, duha quesaha-ndo — cächí-gá xâhaⁿ-gã xií-yu.

²⁴ Te ní xâhaⁿ tucu-gá:

—Na cächí tnúhu ndáá-í xii-ndo sã ñí ñⁿ téé cáháⁿ tnúhu Yá Ndiöxí ñá túú tnàhá iní ñáhá ñáyiú ñúú-dé. ²⁵ Te na cächí tnúhu ndáá tucu-í xii-ndo sã ño vai ñáyiú ñíhí ñáyiú quèé ní xindecu nâcióⁿ Isràél cùtnàhá ní xindecu té Èliás cùtnàhá ñá túú ní cùuⁿ dáú ŷní cuiá dava, te dàvá-áⁿ ño ní ndoho ñáyiú docó nitùhú nâcióⁿ. ²⁶ Dico Yá Ndiöxí ñá túú ní tëndaha-gá té Èliás quíhíⁿ-dé vehe ndèdani càa ñáyiú ñíhí-áⁿ, chi vehe ñⁿ ñaha ñúú Sàreptá ní xâhaⁿ-gã ní sâháⁿ-dé, te ñúú-áⁿ cáá yâtni-xi ñúú Sidón. ²⁷ Te ní xindecu tucu ingá téé ní xóo cáháⁿ tnúhu Yá Ndiöxí ndèé sanaha, te téé-áⁿ ñí xínani-dé Eliseú, te ñíu-ni dàvá-áⁿ ñí xindecu tucu vai ñáyiú cùhú nâcióⁿ Isràél, ñáyiú ní tnàhá cuéhé sã dátèhyú nihnu-xi yiqui cùñú-yu dico ñá túú ní ndúha-yu, chi ñⁿ dî-ni té Nàamán téé distritú Síríá ní ndúha-dé —cächí-gá xâhaⁿ-gã xií-yu.

²⁸ Te sá dúcáⁿ ñí cáháⁿ-gá te xiáⁿ ní cudééⁿ víhí nchaa ñáyiú yíhi veñúhu-ãⁿ núú-gã. ²⁹ Te ní queñuhú-yu Jèsús yuhu dèhvá tìndúú núú cáá ñúú-yu-áⁿ cuendá yacáⁿ dàquée-yu-gá dèhvá ní cùu. ³⁰ Dico Jèsús vii-ni ní quee-gá tnuú-yu cuáháⁿ-gá.

Ñⁿ téé yíhi ñaha espíritu cündíhi yucu ñăvâha
(Mr. 1:21-28)

³¹ Te Jèsús cuáháⁿ-gá ñúú Capèrnaúm, te ñúú-áⁿ yíndèhu-xi distritú Galileá. Te yacáⁿ ndécú-gã ní tnàhá nduu ndètatú ñáyiú, te ní ngúita-gá dácuaⁿha-gá ñáyiú. ³² Te xicunúhu-yu nchaa nâcuâa dânehé ñáhá-gã xií-yu, chi cáháⁿ-gá dàtná cáháⁿ ñⁿ téé cùnuu, te cùnuu ndisa-gá.

³³ Te xití veñúhu yíhi ñⁿ téé yíhi ñaha ñⁿ espíritu cündíhi yucu ñăvâha, te espíritu-áⁿ ñí quide-xi níhi ní cáháⁿ téé-áⁿ, te xâhaⁿ-dè xii Jèsús:

³⁴ —¿Te ná cuíní yòhó Jèsús téé ñúú Nazàrét cada ñaha-n xii-ndí núú véxi-n núú ndécú-ndí-i? ¿Áⁿ véxi-n dànaa ñaha-n xii-ndí? Chi yúhú xini

ñáhà-í xii-n sǎ cúú-n ìñ tée ñá túú tñàhí cuéchi-xi chí núú Yá Ndiöxí ní quee-n véxi-n ñùyíú-a —càchí-dé xǎhaⁿ-dě xii-gá.

³⁵ Te Jèsús ní tenàá-gá espíritú cúndìhì yucu ñávǎha-án, te xǎhaⁿ-gǎ:

—¡Cadí yuhu-n, te taquèe yiqui cuñú tée-án! —càchí-gá xǎhaⁿ-gǎ.

Te espíritú cúndìhì yucu ñávǎha-án nǐ dándùá-xi tée-án ndèé ñuhu tnuú ñáyíu xǐndecu-án, te ñá túú-gǎ ná ní quide ñaha-xi, te ní quee ñaha-xi xii-dé. ³⁶ Te nchaá ñáyíu xǐndecu-án nǐ cuñúhu-yu, te ní xítñàhá-yu:

—¿Te nása ndùu-tu tñúhu càháⁿ tée-án ñá? ¡Te càháⁿ-dé dàtná càháⁿ ìñ tée tàxi tñuní víhí, chí càháⁿ-ni-dé te nchaá espíritú cúndìhì yucu ñávǎha quèe-ni-xi yiqui cuñú-yu! —càchí-yu xítñàhá-yu.

³⁷ Te nchaá xichi ní níhǐ-yu tñúhu nàcuáa quide Jesús.

Jèsús quidé tǎtna-gá nǎná ñadìhì té Xímú
(Mt. 8:14-15; Mr. 1:29-31)

³⁸ Te Jèsús ní ndee-gá xití veñúhu, te cuáháⁿ-gá vehe té Xímú. Te nǎná ñadìhì té Xímú-án cùhú-aⁿ ñùhu vihi-aⁿ cahni, te ní càháⁿ ndàhú-yu núú Jèsús cuèndá-aⁿ. ³⁹ Te Jèsús ní sáháⁿ-gá núú ndécú-án, te ní ngúnundeyi-gá te ní xáhaⁿ-gǎ xii cahni-án sǎ ná xòcuíñí-xi, te ní xòcuíñí-ni-xi, te òré-ni-án nǐ ndúha ñaha cùhú-án te ní ndacóo-aⁿ ní xinu cuechi-aⁿ núú-güedě ndihì-gá.

Jèsús quidé tǎtna-gá vǎi ñáyíu cùhú
(Mt. 8:16-17; Mr. 1:32-34)

⁴⁰ Te òré ní ngódó tñúú nchícanhii, te nchaá ñáyíu xǐndecu ndihì ñáyíu cùhú vehe-xi ndèca ñahá-yu cuáháⁿ núú Jèsús. Te Jèsús ní sacáⁿ ndodo-gá ndaha-gá díquí ìñ ìñ ñáyíu cùhú-án, te ducaⁿ nǐ quide-gá te ní ndúha-yu. Te ndi dííⁿ núú cuèhé tñàhá-yu ìñ ìñ-yu ni cùu. ⁴¹ Te tñàhá òra ñáyíu cùhú-án yíhí ñàha espíritú cúndìhì yucu ñávǎha xii-yu ni cùu, te òré ní quee ñaha-xi xii-yu, te xǎⁿ ní quide-xi níhi ní càháⁿ-yu, te xǎhǎⁿ-yu xii Jèsús:

—Yòhó cúú-n Dèhe Dútú Ndiöxí —càchí-yu xǎhǎⁿ-yu xii-gá.

Dico Jèsús níhi ní càháⁿ-gá ní tenàá-gá nchaá espíritú cúndìhì yucu ñávǎha-án, te xǎhaⁿ-gǎ sǎ vǎ dúcáⁿ-gǎ cada-xi, chí sa xíní-xi sǎ díú-gǎ cúú-gǎ Crístú Yáá ní tendaha Yá Ndiöxí véxi ñuyíú-a.

Jèsús dánèhé-gá ñáyíu distrítú Galiléa
(Mr. 1:35-39)

⁴² Te ìñ nduu ní túndaá-ni ní quee Jèsús ñuú núú ndécú-gǎ-án cuáháⁿ-gá ìñ xichi núú ñǎ túú ñáyíu ndècu. Te cue ñáyíu ní ngúíta-yu nànducu ñahá-yu xii-gá te ní naníhí ñáhǎ-yu, te cuíní-yu ngani ñàhá-yu xii-gá cuèndá sǎ ñà túú-gǎ ndèé quíhíⁿ-gá ní cùu.

⁴³ Dico ní xáhaⁿ-gǎ xii-yu:

—Dacuití quíhíⁿ-í cúñaha-í xii nchaá ñáyíu òra-gá ñuú tñúhu sǎ càháⁿ nàcuáa ndíhu ndaha ñàha Yá Ndiöxí xii-yu, chí chiúⁿ tñahí-án véxi-í —càchí-gá xǎhaⁿ-gǎ xii-yu.

⁴⁴ Te ní xica cuu Jèsús ní dánèhé-gá ñáyíu tñúhu-gá nchaá xití veñúhu ndáa distrítú Galiléa.

5

Jèsús ní quide-gá ní níhí-güedě chácá
(Mt. 4:18-22; Mr. 1:16-20)

¹ Te ìñ xito ndècu Jesús yuhu làgúná Genesàrét, te ío cuéhé ñáyíu ní sáá, te ta dàdehnde ñaha-ná-yu xii-gá cuáháⁿ sǎ cuíní-yu cundedóho-yu nchaá tñúhu càháⁿ-gá. ² Te Jèsús ní xiní-gá úú bàrcú cue tée tñì chácá xǐnutnǐ-xi yatni yuhu làgúná-án, te sa ní quene cue tée ñùhu xití-xi-án xǐnaquete-güedě ñunu-güedé. ³ Te Jèsús cuásaá-gá núú ìñ bàrcú-án, te bàrcú-án cúú-xi bàrcú té Xímú, te ní xáhaⁿ-gǎ xii té Xímú-án sǎ dánñdehe-dé-xi luha-gá xití ndute. Te dàtnúní ní ngóo-gá núú bàrcú-án, te xǎⁿ núcòo-gá ní ngúíta-gá dánèhé-gá ñáyíu. ⁴ Te òré ní túhú ní dánèhé ñáhá-gǎ xii-yu, te ní xáhaⁿ-gǎ xii té Xímú:

—Daquíhíⁿ bàrcú-a xití làgúná mei núú cùnú-gá, te dàquèe-ndo ñunu-ndo

tnii-ndo chácá —càchí-gá xăhaⁿ-gă xii-dé.

⁵ Te té Xímú ní xáhaⁿ-dě:

—Mèstrú, ni niú ní quide chùuⁿ-ndí te ni ìⁿ chácá ñà túú ní ñíhí-ndí, dico vitna cuèndá-ni sá yòhó táuchìuⁿ-n te na dàquée-ndí ñunu-ndí váⁿ —càchí-dé xăhaⁿ-dě xii-gá.

⁶ Te òré ní dáquëe-güedé ñunu-güedé te súúni vâi chácá ñí ñíhí-güedé, te ta ndátá-nă ñunu-güedé cuáháⁿ ní cùu.

⁷ Núu ní quide-güedé ndaha-güedé núu dàva-gá cue tée cùndihí-güedé xixúhuⁿ ingá bàrcú cuèndá quíhíⁿ-güedé chindee ñàha-güedé. Te cue tée-áⁿ ñí sáháⁿ-güedé ní chindee tnàha-güedé ní dáchítú-güedé ndi ndúu bàrcú mee-ni chácá, te súúni ñí cuu véé núu cuíni-na-xi quée naa-güedé ndihí bàrcú ní cùu. ⁸ Te sá dúcáⁿ cuíni-xi quée naa bàrcú ní cùu, núu té Xímú, àdi Pelú chi úú òu-dé, ní ngüíñí xítí-dé núu Jèsús, te xăhaⁿ-dě:

—Xocuíñí yòhó Jèsús núu ndécù-í-a, chi yúhú cùu-í ñíⁿ téé ío ndècu cuéchi-xi —càchí-dé xăhaⁿ-dě xii-gá.

⁹ Te ducaⁿ ñí cáháⁿ-dé chi ní yùhú-dé, te ní cuñúhu-dé ndihí nchaa cue téé ndihí-dé-áⁿ cuèndá sá ío vâi chácá ñí ñíhí-güedé. ¹⁰ Te tnàhá té Jàcobó ndihí té Juàá cue déhe té Zebèdeú ío ní cuñúhu-güedé, te òu-ni cue téé cùndihí té Xímú-áⁿ cùu-güedé tnàhá-güedé. Te Jèsús ní xáhaⁿ-gă xii té Xímú:

—Vá yùhú-n, chi není vitna quíhíⁿ-n dàcaháⁿ-n ñáyíu cuèndá tuha ñàhá-yu xii-í —càchí-gá xăhaⁿ-gă xii-dé.

¹¹ Te ní quene-güedé ndihí bàrcú ndéé ñuhu yìhí yuhu làgúná-áⁿ. Te òré-áⁿ ñí dándòo-güedé nchaandi túhú sá ndécú ndihí-güedé, te ní tuha-güedé Jèsús.

Jèsús quidé tătna-gá ñíⁿ téé tnàhá cuéhé sã dátèhyú nihnu-xi yiquí cùñú-ó (Mt. 8:1-4; Mr. 1:40-45)

¹² Te òré ní quexìo Jèsús ñíⁿ ñuú, te ní quexìo ñíⁿ téé cùhú tnàhá-dé cuéhé sã dátèhyú nihnu-xi yiquí cùñú-ó, te òré ní xiní-dé Jèsús te ní sáháⁿ-dé núu

ndécú-gă, te ní ngüíñí xítí-dé núu-gă te ní nuu núu-dé ndàa núu ñúhú te càháⁿ ndàhú-dé, te xăhaⁿ-dě xii-gá:

—Mèstrú, véxi-í càháⁿ ndàhú-í núu-n ñúu vá cùndèe iní-n càda tătna ñàha-n xii-í, chi cùtnuní iní-í sá ndácú-n —càchí-dé xăhaⁿ-dě xii-gá.

¹³ Te Jèsús ní dácàá-gá ndaha-gá ní tendaha ñàha-gá xii-dé, te xăhaⁿ-gă:

—Cuu cada tătna ñàha-í xii-n, te vitna te ndúha-n —càchí-gá xăhaⁿ-gă xii-dé.

Te òré-ni ní xócuíñí cuéhé tnàhá-dé.

¹⁴ Te dàtnuní ní xáhaⁿ tùcu Jèsús xii-dé:

—Vá yòo ñíⁿ cùñàha-n sã ñí quide tătna ñàha-í xii-n, núu dùtú-ni cuáháⁿ cuèndá sá ná quíni ñàhá-dé xii-n sã ñí ndúha-n te cuàha-n-dé sá ndúú tãhú Yã Ndiòxí dàtná ní cachí ndí Moisés cuèndá ná quíni ñáyíu sá ndàá ní ndúha-n —càchí-gá xăhaⁿ-gă xii-dé.

¹⁵ Te ducaⁿ ta xíté nuu-gá tnúhu nchaa nàcuáa quide Jèsús, te ío cuéhé ñáyíu ní xóo tacá nchaa núu ñí xíndecu-gá cuèndá sá cuíni-yu cundedóho-yu tnúhu càháⁿ-gá, ndihí cuèndá sá cuíni-yu cada tătna ñàha-gă xii-yu. ¹⁶ Dico Jèsús ní xóo quee nihni-gá tnuú-yu ní xóo quíhíⁿ-gá núu ñà túú ñáyíu ndècu ní xóo cáháⁿ ndihí-gá Yã Ndiòxí.

Jèsús quidé tătna-gá ñíⁿ téé cùhú ñá cùu-gă candá nihnu

(Mt. 9:1-8; Mr. 2:1-12)

¹⁷ Te ñíⁿ nduu dànehé-gá ñáyíu, te xínucóo ñíⁿ úú cue téé cùu fariséu, ndihí cue téé dàcuaha ñàha xii ñáyíu nchaa tnúhu ní chídó tnùní ndí Moisés. Te cue téé-áⁿ ñí quee-güedé nchaa ñuú yíndèhu distritú Galileá, ndihí distritú Jùdeá, ndihí ñuú Jerusalén, te nchaa ñuú-áⁿ ñí quee-güedé cuáháⁿ-güedé núu ndécú-gă. Te Yã Ndiòxí chíndèe ñàha-gá quidé tătna-gá ñáyíu cùhú.

¹⁸ Te ñíⁿ úú cue téé nchido-güedé ñíⁿ téé cùhú ñá cùu-gă candá nihnu ñúhu-dé xító ní quexìo ndihí ñàha-güedé, te cuíni-güedé quíhu ndihí ñàha-güedé ndéé xítí vehe, sáá-güedé ndéé núu Jèsús ndihí téé cùhú-áⁿ. ¹⁹ Dico ñá túú ní ñíhí-güedé ndéé ichi quíhu-güedé,

chi cuendá ío cuéhé ñáyiú ndècu, núu xíáⁿ ní sáá-güedé díquí véhé-áⁿ ñí caáⁿ-güedé te ndàa díquí véhé-áⁿ ñí dáquë-güedé téé cùhú-áⁿ, te ñùhu-ñí-dé xító ní dáquë ñaha-güedé tnuú ñáyiú ní sáá ndéé núú Jèsús.

²⁰ Te Jèsús ní cutnùní iní-gá sá ñí yuhu ñí iní-güedé sàndáá iní ñáhá-güedé xii-gá, núu ní xáhaⁿ-gá xii téé cùhú-áⁿ:

—Yòhó téé cùhú, sa ní quide càhnu iní-í nchaa cuéchi-n —càchí-gá xáhaⁿ-gá xii-dé.

²¹ Te cue téé dàcuaha ñaha xii-yu nchaa tnúhu ní chídó tnùní ndíi Moisés ndíhi cue téé cùu fariséú ní sani iní-güedé: “¿Ná cúú téé-a núu càháⁿ cuéhé-dé cuendá Yá Ndióxi-í? Te vá yòo ñí ndàcu cada càhnu iní nchaa yíca cuéchi ñáyiú, chi ñí dídí-ñí Yá Ndióxi quidé càhnu iní-gá”, duha ní sani iní-güedé.

²² Dico Jèsús sa ní cutnùní iní-gá nàcuáa sàni iní-güedé núu ní xáhaⁿ-gá xii-güedé:

—¿Te ná cuendá ducaⁿ sàni iní-ndó-í? ²³ Te sá dúhá ñí xáhaⁿ-í xii téé cùhú-a sá cáda càhnu iní-í nchaa yíca cuéchi-dé, te xíáⁿ nchòhó ñá túú cùtnuní iní-ndó núu ndáá càháⁿ-í àdi ñá ndáá. Dico núu cúu-í-dé sá ndácóo-dé, te caca-dé te cutnùní ndáá iní-ndó núu ndáá càháⁿ-í àdi ñá ndáá, chi cundehe núu-ndó nàcuáa cada-í. ²⁴ Te vitna na càda-í nàcuáa cutnùní iní-ndó nchaa-ndo sá yúhú Téé cùu ñaní tnáhá-ndó nchaa-ndo ndècu ndíhi-í tnúhu ndee ñí sá cáda càhnu iní-í nchaa cuéchi ñáyiú ñuyíú-a —càchí-gá xáhaⁿ-gá xii-güedé.

Te sátá dúcáⁿ te ní xáhaⁿ-gá xii téé cùhú-áⁿ:

—Ndacóo, te ndocani-n xító ñùhu-n véxi-áⁿ, te núhú-n véhe-n —càchí-gá xáhaⁿ-gá xii-dé.

²⁵ Te òré-ñí-áⁿ ñí ndúha téé cùhú-áⁿ te ní ndacóo-dé, te ní ndocani-dé xító ñùhu-dé ní quexìo-áⁿ, te ní natnñí-dé ichi ta càháⁿ-dé cuánuhú sá ño càhnu cuu Yá Ndióxi. ²⁶ Te nchaa ñáyiú xíndecu-áⁿ ñí cuñúhu-yu, te tnáhá-yu ní cachí-yu sá ño càhnu cuu Yá Ndióxi, te ducaⁿ ño ní yúhú-yu, te ní xítñahá-yu:

—Vitna ní xiní-ó ñí sá ñá túú tnàhí xiní-ó ní cùu —cachí-yu xítñahá-yu.

Jèsús cáná-gá té Lèví

(Mt. 9:9-13; Mr. 2:13-17)

²⁷ Te sátá dúcáⁿ ñí cuu te ní quee Jèsús xíáⁿ, te ní xiní-gá ñí téé nàni Lèví núcóo-dé ñí xichi quide cobrá-dé ñáyiú cuendá impuèstú, chi cobradór cúu-dé, te ní xáhaⁿ-gá xii-dé:

—Néhé chítñahá ñáhá-n xii-í —càchí-gá xáhaⁿ-gá xii-dé.

²⁸ Te té Lèví-áⁿ ñí ndàcúñí-dé te ní dándóo-dé nchaa sá ndécú ndíhi-dé núu núcóo-dé-áⁿ, te ní tuha-dé Jèsús.

²⁹ Te sátá dúcáⁿ te té Lèví-áⁿ ñí quide-dé ñí vico càhnu vehe-dé sá cúu-xí Jèsús, te ní tacá vai cue téé quide chiuⁿ quide-dé, te nchaa-güedé cuánguñhu-güedé mèsá ní ngóo-güedé ndíhi dava-gá ñáyiú ní quexìo cuendá caxi-güedé ndíhi-yu. ³⁰ Dico cue téé cùu fariséú ndíhi cue téé dàcuaha ñaha xii-yu nchaa tnúhu ní chídó tnùní ndíi Moisés ní ngúita-güedé xícuéhé-güedé cue téé xica cuu ndíhi-gá, te xáhaⁿ-güedé:

—¿Ná cuendá xéxi-ndó xíhi-ndo ndíhi cue téé cuhna iní-xi quide cobrá ñáhá xii ñáyiú cuendá impuèstú, ndíhi nchaa dava-gá cue téé ndècu ichi cuéhé ichi duha-í? —càchí-güedé xáhaⁿ-güedé.

³¹ Te Jèsús ní xáhaⁿ-gá xii-güedé:

—Nchaa ñáyiú ñá túú cùhú chi ñá túú xíni ñuhú-yu ñátátná, dico nchaa ñáyiú cùhú chi xíni ñuhu ñahá-yu.

³² Te yúhú véxi-í càháⁿ-í ñáyiú cùtnuní iní-xi sá ndécú cuéchi-xi cuendá dàñá-yu nchaa sá cuéhé sá dúhá quidé-yu, te ñá túú véxi-í càháⁿ-í ñáyiú càchí sá ñá túú ndècu cuéchi-xi —càchí-gá xáhaⁿ-gá xii-güedé.

Cue téé ndècu tnúhu núu Jèsús cuendá ñáyiú ñá túú tnàhí ná xéxi áma càháⁿ ndíhi-yu Yá Ndióxi

(Mt. 9:14-17; Mr. 2:18-22)

³³ Te ní xáhaⁿ-güedé xii Jèsús:

—Te áma ñá túú tnàhí ná xéxi cué téé xica cuu ndíhi té Juáá càháⁿ ndíhi-güedé Yá Ndióxi, te dñu-ñí ducaⁿ quide cue téé xica cuu ndíhi nchúhú cue téé cùu fariséú. ¿Te ná cuendá

cue téé xica cuu ndihí-n ñá túú dùcaⁿ quide-güedé nũu nchaa-ni nduu xèxi-güedé xihí-güedé quidé-güedé-i? —cachí-güedé xãhaⁿ-güedé xii-gá.

³⁴ Te Jèsús ní xãhaⁿ-gã xii-güedé:

—Nchòhó xìní-ndó sã vã cúú cũñaha-o xii cue ñáyiu ñũhu vico tnándaha sã vã cúú càxí-yu nini ndècu ndihí ñaha téé tnándaha-áⁿ xií-yu. ³⁵ Dico sáá nduu te vá cùndècu ndihí ñaha-gá téé tnándaha-áⁿ xií-yu, te dàvá-áⁿ te cahni iní-yu vá cáxí-yu sá ndihú iní-yu —càchí-gá xãhaⁿ-gã xii-güedé.

³⁶ Te ní cani-gá ìⁿ cuèndú núú ñáyiu nàcuáa tecú tnùní-yu tnũhu-gá, te xãhaⁿ-gã:

—Vá yõo ìⁿ dandée luha dóó sáá ìⁿ dóó sa ní cuu tũhú víhí, chi núu yoo ducaⁿ na càda, te dóó sáá-ãⁿ nãndiyi-xi te uuⁿ-gá ndata-xi dõó sã ñí cuu tũhú-áⁿ, te luha dóó sáá-ãⁿ ñà túú nàtaú-xi ndée dóó sã ñí cuu tũhú-áⁿ. ³⁷ Te ñí vá yõo ìⁿ chihí ndidí sáá xití ìⁿ lamba sa ní cuu tũhú víhí, chi núu yoo ducaⁿ na càda, te ndava lamba sa ní cuu tũhú-áⁿ chi ío ñihí yócó ndidí-áⁿ, te cuíta-ni ndidí-áⁿ te cuíta-ni lamba-áⁿ. ³⁸ Núu xiáⁿ xíní ñũhu-xi quée ndidí sáá-ãⁿ xití ìⁿ lamba saa cuèndá ducaⁿ ñà túú ñã cuu cováha-xi. ³⁹ Te ñí ìⁿ ñáyiu ñá túú tnàhá iní-yu cohó-yu ndidí sáá, te núu díhna-gá ná cohó-yu ndidí sá ñí quene díhna-gá, chi càchí-yu sá xihí vãha-gá ndidí sá ñí quene díhna-gá-áⁿ dàcúúxí ndidí sáá —càchí-gá xãhaⁿ-gã xií-yu.

6

Cue téé xica cuu ndihí Jesús sãhnú-güedé yoco triú nduu ndetátú ñáyiu

(Mt. 12:1-8; Mr. 2:23-28)

¹ Te ìⁿ nduu cùu-xi nduu ndetátú ñáyiu ñũhu Jesús ichi ndihí cue téé xica cuu ndihí-gá, te ta yãha-gá ndihí-güedé ìⁿ xichí núú cáá triú, te ní nguíta-güedé sãhnú-güedé yoco triú-áⁿ te ndihí ndaha-güedé quíⁿ-güedé quée triú tá xèxi-güedé cuáháⁿ. ² Te ìⁿ ũú cue téé cùu fariséu

ní xãhaⁿ-güedé xii cue téé xica cuu ndihí-gá:

—¿Te ná cuèndá ducaⁿ quide nchohó ìⁿ sá ñà túú tàú-ó càda-o vitna cuu-xi nduu ndetátú-ó-í? —càchí-güedé xãhaⁿ-güedé.

³ Te Jèsús ní xãhaⁿ-gã xii-güedé:

—¿Te náa ñá túú dàcuaha-ndo núú tütú Yã Ndiõxí núú càháⁿ-xi nàcuáa ní quide ndí Dãvíí cùtnhá ní xihí ndí docó ndihí cue téé ní xica cuu ndihí ndí-ãⁿ? ⁴ Chi ní quihu ndí vehe Yã Ndiõxí, te ní queheⁿ ndí pàá ní cuu íí ndécú-ãⁿ ñí dácãhũu ndí cue téé xica cuu ndihí ndí ní xexi ndí ndihí-güedé, te ñá túú tàú ndí sá dúcáⁿ càda ndí ni cùu, chi mee-ni cuè dútú tàú-güedé caxi-güedé pàá-áⁿ ní cùu —cachí-gá xãhaⁿ-gã xii-güedé.

⁵ Te ní xãhaⁿ tũcu-gá:

—Te yúhú Téé cùu ñaní tnàhá-ndó nchàa-ndo, tnàhá-í ndécú ndihí-í tnũhu ndee ñí sá cùu-í nchaa ñáyiu nàcuáa cadá-yu nduu ndetátú-ó-á —càchí-gá xãhaⁿ-gã xii-güedé.

Ìⁿ téé ní yíchí ìⁿ xio ndaha-xi

(Mt. 12:9-14; Mr. 3:1-6)

⁶ Te ìngá nduu ñũu-ni nduu ndetátú ñáyiu cuánguihu Jèsús xití veñũhu dãnehé-gá ñáyiu. Te xiáⁿ ndécú ìⁿ téé cùhú ní yíchí nihnu ìⁿ xio ndaha cùha-dé. ⁷ Te cue téé dàcuaha ñaha xii ñáyiu nchaa tnũhu ní chídó tnùní ndí Moisés, ndihí cue téé cùu fariséu ndéhé-güedé nũu cada tátna ñaha Jèsús xii téé cùhú-áⁿ nduu ndetátú-güedé-áⁿ cuèndá níhí-güedé nàcuáa cada-güedé cacáⁿ cuéchi-güedé cuèndá-gá. ⁸ Dico Jèsús sa ní cùtnùní iní-gá nàcuáa sàni iní-güedé, te ní xãhaⁿ-gã xii téé cùhú ndaha-xi-áⁿ;

—Ndàcuiñí te ngúnutnìⁿ-n cuãdava tnuú-ndí-a —càchí-gá xãhaⁿ-gã xii-dé.

Te téé-áⁿ ñí ndacuiñí-dé te ní ngúnutnìⁿ-dé cuãdava tnuú-güedé ndihí-gá. ⁹ Te dãtnùní Jèsús ní xicáⁿ tnũhú-gã núú cuè ñáyiu xĩndecu-áⁿ, te xãhaⁿ-gã xií-yu:

—Cuíní-í cachí tnũhu-ndo ñã cúú sã vãha cada-o nduu ndetátú-ó. ¿Ìⁿ chiuⁿ vãha àdi ìⁿ chiuⁿ cuehé, sá cadá

tătna-o ñăyiu cùhú àdi sá cáhni-ó-yu?
—càchí-gá xăhaⁿ-gă xií-yu.

¹⁰ Te dătnùní ní ndacoto-gá núu-yu nchaá-yu, te ní xáhaⁿ-gă xii té cùhú ndaha-xi-áⁿ:

—Ndocani ndaha-n —càchí-gá xăhaⁿ-gă xii-dé.

Te ní ndocani-dé ndaha-dé, te òré-ni ní ndúha. ¹¹ Te cue té xĩndecu-áⁿ sũúni ní cudééⁿ-güedě sá dúcáⁿ ní quide tătna Jèsús té cùhú-áⁿ, te ní ngũíta-güedě ndátnũhu-güedě nõu nása cada ñaha-güedě xii-gá.

Jèsús cǎxi-gá úxúú tnàhá cue tée dacuàha ñaha xii ñáyiu tnúhu-gá

(Mt. 10:1-4; Mr. 3:13-19)

¹² Te sátá dúcáⁿ ní cuu te ní xica Jèsús cuáháⁿ-gá xití yucu cuendá yacáⁿ cáháⁿ ndihí-gá Tătá-gă Dútú Ndiõxí, te ní niú ní cáháⁿ ndihí ñaha-gă. ¹³ Te sátá ní túndaá, te ní cana-gă nchaá cue té xica cuu ndihí-gá, te ní cǎxi-gá úxúú tnàhá-güedě, te cue té-áⁿ ní xáhaⁿ-gă sá díú-güedě cuu-güedě cue té quihíⁿ cáháⁿ tnúhu-gá núu ñáyiu. ¹⁴ Te duha xĩnani ndi úxúú cue té-áⁿ. Té Xĩmú, àdi Pelú chi úú ñiú-dé, ndihí ñani-dé té Ndrĩxí, ndihí té Jàcobó, ndihí té Juàá, ndihí té Lìpé, ndihí té Bartolòmé, ¹⁵ ndihí té Mâteú, ndihí té Mǎxí, ndihí té Jàcobó déhe té Àlféu, ndihí ingá té Xĩmú té ní cundihí cue té cananistá, ¹⁶ ndihí té Jùdás ñani té Jàcobó, ndihí té Jùdás Iscarioté té ní sáá nduu ní sáha cuendá ñáhá xii Jèsús núu cuè té cùu úhú iní ñáhá xii-gá, duha xĩnani cuè té ní cǎxi Jèsús ní xica cuu ndihí-gá.

Jèsús dánèhé-gá cuéhé víhí ñáyiu

(Mt. 4:23-25)

¹⁷ Te Jèsús cuánuu-gá yucu núu ní sáá-gá-áⁿ, te ní ngava-gá ìⁿ núu ndàá ndihí cue té xica cuu ndihí-gá, te xiáⁿ ní ngúnutnĩ-gá. Te xiáⁿ ndécú dàva-gá cue té xica cuu ndihí-gá ndihí vai ñáyiu ndetu ñahá-yu xii-gá, te ñáyiu-áⁿ vèxi-yu nchaá ñuú cáá ñistritú Jùdeá, ndihí ñuú Jerusalén, te ndècu ñáyiu véxi ndàa yuhu lamár yatni ñuú Tìrú, ndihí ñuú Sidón. Te nchaá ñáyiu-áⁿ ní quexió-yu cuiní-yu cundedóho-yu

nchaá tnúhu càháⁿ Jèsús, ndihí cuendá sá cuiní-yu ndúha-yu nchaá cuéhé tnàhá-yu. ¹⁸ Te tnàhá ñáyiu yihí ñaha espíritú cundihí yucu ñávãha.

¹⁹ Te nchaá-yu cuiní-yu dacàá-yu ndahá-yu tendàhá-yu Jèsús ní cùu cuendá sá ní níhĩ-yu tnúhu sá ndècu ndihí-gá tnúhu ndee ìní quidé tătna-gá nchaá ñáyiu cùhú.

Cuendá ñáyiu ío váha táhú-xi

(Mt. 5:1-12)

²⁰ Te Jèsús ní ndacoto-gá núu cuè té xica cuu ndihí-gá, te ní xáhaⁿ-gă:

—Váha táhú nchaá nchòhó cue ñáyiu ndàhú, chi nduu táhú-ndó cundecu-ndo núu táxi tnùnĩ Yă Ndiõxí.

²¹ Váha táhú nchaá nchòhó ñáyiu ío cuiní cundedóho tnúhu Yá Ndiõxí chi ío vii ío váha cuu iní-ndó.

Váha táhú nchaá nchòhó ñáyiu ndàhyú sá ndihú iní-ndó, chi sáá nduu te cudí ìní-ndó ní caa ní quihíⁿ.

²² Váha táhú nchaá nchòhó ñáyiu na cùu úhú iní ñáhá tnàha ñáyiu-xi, chi sáá nduu te vá dáñá-gă-yu quihu-ndo vèñúhu, te cúcuéhé ñáhá-yu xii-ndo, te cachí-yu sá ñà díú ñáyiu váha cùu-ndo, te ducaⁿ càda ñahá-yu xii-ndo sã cuendá yúhú Té cùu ñani tnàhá-ndó nchaa-ndo. ²³ Te òré ducaⁿ na càda ñahá-yu xii-ndo te cudí víhí-ni ìní-ndó cundecu-ndo, chi sáá nduu nduu táhú-ndó sã ío váha càa ndecu andiú cundecu ndihí-ndo nduu na nasaá-ndó yacáⁿ cundecu-ndo, chi ñiú-ni ducaⁿ ní xóo cada ñaha cuè ñani tnàhá-yu xii cue té ní xóo cáháⁿ tnúhu Yá Ndiõxí ní xĩndecu ndéé sanaha.

²⁴ Te ndàhú ní cuu nchaá ñáyiu cuica ñà túú sàndáá iní ñáhá xii Yá Ndiõxí, chi vitna ío váha ndécú-yu, dico sáá nduu te nduu ndàhú-yu.

²⁵ Te ndàhú ní cuu tucu nchaá ñáyiu ñà túú tnàhí ná cúmãní xii-xi vitna, chi sáá nduu quiní-yu tnúndòho tnúhu ndàhú.

Te ndàhú ní cuu nchaá ñáyiu cudí ìní-xi ndècu ichi cuéhé ichi duha vitna, chi sáá nduu te ndàhyú-yu sá ndihú iní-yu.

26 'Te ndàhú ní cuu nchaa ñáyiú na càháⁿ váha dava-gá ñáyiú cuendá-xi, chi ducaⁿ ñí xóo càháⁿ váha-yu cuendá nchaa cue téé ní xóo dandàhú ñáhá xii ñáyiú ndéé sanaha, chi ní cachí-güedé sá càháⁿ-güedé tnúhu Yá Ndiöxí te ñá ndàá —cachí-gá xáhaⁿ-gã xii-güedé.

Cuu iní-ó nchàa ñáyiú cùu úhú iní ñáhá xii-o

(Mt. 5:38-48; 7:12)

27 Te Jèsús ní xáhaⁿ-gã xii nchaa ñáyiú xíndecu-áⁿ:

—Nchaa nchòhó ñáyiú xíndedóho ñaha càchí tnúhu-í xii-ndo sá cúú ìní-ndó ñáyiú cùu úhú iní ñáhá xii-ndo, te cada-ndo sá váha sá cúú-xí-yu cuèi nándi sá ná cádá ñáhá-yu xii-ndo. 28 Te cácaⁿ táhú-ndó nùú Yá Ndiöxí cuendá ñáyiú càháⁿ úhú ñáhá xii-ndo, ndihi cuendá ñáyiú tèe ñaha cuéchi neñúú xii-ndo. 29 Te núu ní canihá-yu xii-ndo ñí xito te cuini tucú-yu canihá-yu, te dañá-ndo na cànihá-yu, àdi núu na quèndéé-yu dóo ndíxí ndòdo-ndo, ndihi dúhnú-ndó, te dañá-ndo na cànehé-yu quíhíⁿ. 30 Te núu xicáⁿ-yu ñí sá nándíhi-yu núú-ndó te cuáñaha-ndo, àdi quèndéé-yu ñí ndachìuⁿ-ndo, te vá nándàcáⁿ-ndó nùú-yu. 31 Te nchaa sá váha cuini-ndó càda tnaha ñáyiú-ndo, te cada-ndo tnàhá-ndó ndíhí-yu.

32 'Chi núu nchòhó ná cùu iní-ndó mèe-ni ñáyiú cùu iní ñáhá xii-ndo, te vá càchí-ndó sá ïo váha quède-ndo, chi tnàhá nchaa ñáyiú ndècu ichi cuehé ichi duha ducaⁿ xíquidé-yu.

33 Àdi mee-ni ñáyiú quède ñaha sá váha xii-ndo quède váha-ndó-yu, te vá càchí-ndó sá ïo váha quède-ndo, chi tnàhá nchaa ñáyiú ndècu ichi cuehé ichi duha ducaⁿ xíquidé-yu.

34 Àdi mee-ni ñáyiú sàni iní-ndó nàcoto ñaha xii-ndo cuáñaha-ndo ñí sá xicáⁿ-yu núú-ndó, te vá cání ìní-ndó sá ïo quède váha-ndo, chi tnàhá ñáyiú ndècu ichi cuehé ichi duha dàsaⁿ nuú-yu ñí sá néhé váha-yu, te ndètu cahnu-ná-yu nacoto ñaha ñáyiú ní sáha nùú-yu-áⁿ. 35 Dico nchòhó xíni ñùhu-xi cuu iní-ndó ñáyiú cùu úhú

iní ñáhá xii-ndo, te cada-ndo sá váha sá cúú-xí-yu, te cuáñaha nùu-ndo ñí sá ná ndíhi-yu te núu xicáⁿ-yu núú-ndó, te vá cùndètu-ndo nacoto ñáhá-yu xii-ndo. Te ducaⁿ te ïo-gá cuehé ñíhí-ndó cùndecu ndíhi-ndo, te cuu ndisa-ndo dèhe Dútú Ndiöxí, chi ïo càhnu iní-gá sá cúú-xí nchàa ñáyiú ñá túú ndàcáⁿ táhú nùú-gã cuendá nchaa sá váha quède-gá, ndihi sá cúú-xí nchàa ñáyiú ndècu ichi cuehé ichi duha. 36 Te cunduu càhnu iní nchòhó tucu dàtná càhnu iní Tàtá-ó Dútú Ndiöxí.

Vá càháⁿ cuèhé-ó cuendá tnàha ñáyiú-o

(Mt. 7:1-5)

37 'Te vá càháⁿ cuèhé-ndó cuendá sá quidé tnàha ñáyiú-ndo, te ducaⁿ te Yá Ndiöxí ñá túú nà tnúhu cúñaha-gã xii-ndo. Te vá cùñaha-ndo xii ñáyiú sá quíhíⁿ-yu ñí xichi núú ùhú núú ndàhú ndohó-yu cuendá nchaa sá ñá túú váha quède-yu, te ducaⁿ te Yá Ndiöxí vá cùñaha-gã xii-ndo sá tnàhá-ndó quíhíⁿ-ndó ñí xichi núú ùhú núú ndàhú ndohó-ndo. Te chí cádá càhnu iní nchaa sá quidé-yu, te ducaⁿ te Yá Ndiöxí cada càhnu iní ñáhá-gã xii-ndo tucu. 38 Te chí cuáñaha xii ñáyiú núu ná cúú sá xíni ñùhú-yu, te dàtná chitu ñí yicá súúni xidó coyo-ná, ducaⁿ tàxi Yá Ndiöxí xii-ndo. Te nánicuáa na càda-ndo cada váha-ndo sá cúú-xí tnàha ñáyiú-ndo, te diu-ni ducaⁿ càda ñaha Yá Ndiöxí xii-ndo —càchí Jèsús xáhaⁿ-gã xii-yu.

39 Te dàtnúni ní cani-gá ñí cuèndú núú-yu nàcuáa tecú tnúni-yu tnúhu-gá, te xáhaⁿ-gã:

—Ñí téé cuáa chi ñá ndácú-dé cuita nehe-dé ñgá téé cuáa, chi núu ducaⁿ na càda-güedé te ndi ndúú-güedé ngaunihnu-güedé déhvá.

40 Te ni ñí landú yíhí scuèlá ñá túú cùnuu-gá-güexi dàcúxí mèstrú-güexi, te ndéé nùu na cùtúha váha-güexi, te dàtnúni nútnahá-güexi téé dànehé ñáhá xii-güexi.

41 'Te na càchí tnúhu-í xii-ndo sá nchàa cuéchi quède ñáyiú cùu-xi datná ñí mihi líhli. ¿Te ná cuendá

ndéhé-ndó ìⁿ sá ñà túú vǎha quǐde tnaaha ñáyíu-ndo, te mee-ndo vǐhi-gá quǐdé-ndó-í? Te sá dúcáⁿ quǐde-ndo te cada iní-ndó sǎ ndéhé-ndó dàtná ìⁿ mihi líhli ñùhu núú tnaaha ñáyíu-ndo, te mee-ndo ñùhu ìⁿ mihi cahnu-gá núú-ndó. ⁴² Te núu na nàcanu ichi-ndo tnaaha ñáyíu-ndo cuendá sá ñà túú quǐde váha-yu ndécú-yu te mee-ndo vǐhi-gá quǐdé-ndó ñá, te cada iní-ndó sǎ xǎhaⁿ-ndo xǐi-yu sá natáva-ndo mihi líhli ñùhu núú-yu, te mihi cahnu ñùhu núú méé-ndó ñà túú quǐde cuendá-ndó. ¡Te sá dúcáⁿ quǐde-ndo te ío dándahú-ndó mèe-ndo sá quǐdé ndǎá-ndó te ñá ndǎá sá quǐdé ndǎá-ndó! Te xǐni ñùhu-xi díhna-gá daña-ndo nchaa sá ñà túú vǎha quǐde-ndo, te dàtnùní ducaⁿ te cutnùní váha iní-ndó nàcuáa nacanu ichi-ndo tnaaha ñáyíu-ndo.

Ndi díⁿ núú yutnu xǐní-ó nǎ yutnu cùu-xi cuendá sá sǎvidí-xi
(Mt. 7:17-20; 12:34-35)

⁴³ Te ñá túú ñi ìⁿ yutnu váha te quiní-ó cùuⁿ sǎvidí sá ñà túú vǎha, te ñi ìⁿ yutnu sá ñà túú vǎha, te quiní-ó cùuⁿ sǎvidí váha, chi mee-ni sǎvidí sá ñà túú vǎha cùuⁿ. ⁴⁴ Te ndi díⁿ núú yutnu xǐní-ó nǎ yutnu cùu-xi cuendá sá sǎvidí-xi, chi ñá túú xǐní-ó cùuⁿ ngúxí ìⁿ tnu ñù, te ñi ñà túú xǐní-ó cùuⁿ ndéhé yoho yàha stilé díquí ìⁿ yoho yàha cutexínu. ⁴⁵ Te nchaa ñáyíu váha iní-xi càháⁿ-yu tnúhu váha, chi ñi-ni tnúhu váha tnahí-án ñúhú ñi-yu, te nchaa ñáyíu ñá túú vǎha iní-xi càháⁿ cuèhé-yu, chi ñi-ni tnúhu cuèhé tnahí-án ñúhú ñi-yu, chi nchaa sá ñúhú ñi-yu te xǎⁿ càháⁿ-yu.

Ìⁿ vehe ndècu cimientú-xi ndihí ìⁿ vehe ñá túú cimientú-xi
(Mt. 7:24-27)

⁴⁶ ¿Te ná cuendá càchí-ndó sǎ yǔhú cùu-í Yaá cùú Xǐtohó-ndó te ñá túú quǐde-ndo nchaa nacuaá càháⁿ-í-í? ⁴⁷ Te na càchí tnúhu-í xii-ndo cuendá ñáyíu tǔha ñaha xii-í, chi ñáyíu-án sácúndedóho-yu nchaa tnúhu càháⁿ-í te tnǐⁿ-yu. ⁴⁸ Te ñáyíu-án cùú-yu dàtná ìⁿ téé ní dácáá ìⁿ vehe, chi téé-án

dǐhna-gá ní xete-dé ndéé ní tnahá-dé yúú cáxíⁿ te dàtnùní ní tava-dé cimientú-xi, te òré ní cuuⁿ dáú, te ní ndee ndute ñùhu, te ní ndacáⁿ-xi ndéé núú cáá vèhe-án, dico ñá túú ní ndàcu-xi cuidu-xi, te ducaⁿ chi téé ní dácáá vèhe-án ñi tava-dé cimientú-xi núú yúú cáxíⁿ. Duha sǎtnahá-xi cùu nchaa ñáyíu sácúndedóho tnúhu càháⁿ-í te tnǐⁿ-yu. ⁴⁹ Te ñáyíu sácúndedóho tnúhu càháⁿ-í te ñá túú tnǐⁿ-yu, ñáyíu-án cùú-yu dàtná ìⁿ téé ní dácáá ìⁿ vehe, te ñá túú ní tava-dé cimientú-xi, te òré ní cuuⁿ dáú, te ní ndee ndute ñùhu, te ní ndacáⁿ-xi ndéé núú cáá vèhe-án, te íi-ni ní xido-xi vehe-án cuendá sá ñà túú ní quène cimientú-xi. Duha sǎtnahá-xi cùu nchaa ñáyíu sácúndedóho tnúhu-í te ñá túú cùuⁿ-yu tnǐⁿ-yu —càchí-gá xǎhaⁿ-gǎ xǐi-yu.

7

Jèsús quǐdé tǎtna-gá ìⁿ téé xǐnu cuechi núú ìⁿ téé cùu capitán
(Mt. 8:5-13)

¹ Te sátá ñi yáha ní càháⁿ Jèsús ndihí ñáyíu, te cuáháⁿ-gá ñuú Capèrnaúm. ² Te yàcáⁿ ndécú ìⁿ téé cùu capitán, te cùhú ìⁿ téé xǐnu cuechi núú-dé téé ío-gá cùú ñi-dé, te sa ndècu-ná-dé sá cùú-dé. ³ Te òré ní níhí téé cùu capitán-án tnúhu cuendá Jèsús, te ní tendaha-dé ìⁿ ùú cue téé cùu sacuéhé núú ñáyíu isràél cuáháⁿ-güedé càháⁿ ndàhú-güedé núú-gǎ núu vá cúndèe iní-gá quǐhíⁿ-gá cada tǎtna-gá téé xǐnu cuechi núú-dé-án. ⁴ Te ní quexio-güedé núú ndécú Jèsús, te ní ngüita-güedé càháⁿ ndàhú víhí-güedé núú-gǎ, te xǎhaⁿ-güedé:

—Téé cùu capitán ní cachí-dé véxi-ndí núu vá cúndèe iní-n quǐhíⁿ-n càda tǎtna-n ìⁿ téé xǐnu cuechi núú-dé chi cùhú-dé, te tǎu ndisa-n càda-n nacuaá càháⁿ capitán-án, ⁵ chi téé-án ío cùu iní ñáhá-dé xii nchaa nchúhú ñáyíu isràél te ñi-dé ní táuchíúⁿ-dé ní sáá veñúhu-ndí —càchí-güedé xǎhaⁿ-güedé xii-gá.

⁶ Te sátá dúcáⁿ te Jèsús ní xica-gá cuáháⁿ-gá ndihí-güedé, te òré tá

cuyatni-gá vehe núú ndécú tée cùhú-án cuáhán, te tée cùu capitán-án nĩ xáhaⁿ-dẽ xii ñⁿ úú cue tée càháⁿ ndihí-dé:

—Quíhíⁿ-ndó cũñaha-ndo xii Yaa cúu Mèstrú sá càchí-í sá ñà túú ñă cani iní-gá, chi ñà túú tàú-í sá quíhu-gá ndéé xití vehe-í, ⁷ chi nĩ sá cùnú ndúcú mèe-í-gá ñà túú ní cùyí-í. Núu xĩⁿ cúñaha-ndo xii-gá sá ná càháⁿ-ni-gá sá ndũha tée xĩnu cuechi núú-í-a te ndúha-dé. ⁸ Chi yúhú ndécú cuè tée tàxi tnuní ñáhá xii-í, te ducaⁿ yúhú tucu ndècu cue sandadú táxi tnuní-í. Te òré xáhaⁿ-í xii ñⁿ-dé quíhíⁿ-dé ñⁿ chiúⁿ te cuáhán-dé, te òré xáhaⁿ-í xii ingá-dé quixi-dé te véxi-dé, te òré xáhaⁿ-í xii tée xĩnu cuechi núú-í cada-dé ñⁿ chiúⁿ te quide-dé. Duha càchí-í cúñaha-ndo xii-gá —càchí-dé xáhaⁿ-dẽ xii cue tée càháⁿ ndihí-dé-án.

⁹ Te sátá dúcáⁿ nĩ xáhaⁿ-güedẽ xii Jèsús, te ní cuñúhu-gá nchaa tnúhu ní cáháⁿ tée cùu capitán-án, te ní nchócótó-gá núú nchaa ñáyiu nchícúⁿ ñáhá xii-gá cuáhán, te ní xáhaⁿ-gã:

—Na càchí tnúhu ndáá-í xii-ndo sã vátá quini-gá-í nĩ ñⁿ ñáyiu israhél, ñáyiu ío váha sàndáá iní-xi Yá Ndiõxí dàtná sàndáá iní ñáhá tée-ãⁿ xii-gá —càchí-gá xáhaⁿ-gã xii-yu.

¹⁰ Te òré ní ndexìo cue tée nèhe tnúhu-án nĩ sáháⁿ núú Jèsús, te sa ní ndúha tée cùhú-án.

Jèsús dándòto-gá déhe ñⁿ ñaha quèé

¹¹ Te sátá dúcáⁿ nĩ cuu te ní xica Jèsús cuáhán-gá ñⁿ ñuú nání Nàin, ndihí cue tée xica cuu ndihí-gá, ndihí vãi ñáyiu. ¹² Te òré ní sáá-gá yuhu ñuú-án, te ní xiní-gá nchídó-güedẽ ñⁿ ndíyí cuáhán chindúxi ñaha-güedẽ, te ndíyí-án cúú dèhe ñⁿ ñaha quèé, te ñⁿndii ducaⁿ-ni déhe-aⁿ ndècu ní cuu te ní xihí-dé. Te ío cuéhé ñáyiu cuáhán chindúxi ñaha. ¹³ Te òré ní xiní ñáhá Jèsús xii-aⁿ ndàhyú-aⁿ te ní cundàhú iní ñáhá-gã, te ní xáhaⁿ-gã:

—Vá ndàhyú-n —càchí-gá xáhaⁿ-gã xii-aⁿ.

¹⁴ Te ní dáyátní-gã càjá ñúhú ndíyí-án te ní dácáá-gá ndaha-gá te ní tendaha-gã càjá-án, te ní ngüñí cue

tée nchido ñaha-án. Te ní xáhaⁿ-gã xii ndíyí-án:

—Tée cuechi, yúhú càchí-í sá ndácõo-n —càchí-gá xáhaⁿ-gã xii ndíyí-án.

¹⁵ Te tée ní xihí-án nĩ nucúnucóo-dé te ní ngüita-dé càháⁿ-dé, te Jèsús ní nacuáha cuendá ñáhá-gã xii-dé ndaha náná-dẽ. ¹⁶ Te sátá dúcáⁿ nĩ quide Jèsús ní xiní-yu te ío ní yúhú-yu, te ní xitnàhá-yu:

—Ío càhnu cuu Yá Ndiõxí chi ñⁿ tée càháⁿ tnúhu-gá ní quexìo núú ndécú-ó —càchí-yu xitnàhá-yu.

Te ní xitnàha tucú-yu:

—Yá Ndiõxí véxi-gá chindee ñaha-gá xii nchaa nchoo ñáyiu cùu cuendá-gá —càchí-yu xitnàhá-yu.

¹⁷ Te nchaa ñuú distritú Jùdeá, ndihí dava-gá ñuú ní níhí-yu tnúhu nàcuáa ní quide Jèsús.

Cue tée ní tendaha té Juàá cuáhán núú ndécú Jèsús

(Mt. 11:2-19)

¹⁸ Te cue tée xica cuu ndihí té Juàá ní xáhaⁿ-güedẽ xii-dé nchaa sátá nĩ quide-gá, núu ní cana-dé úú tnàhá-güedẽ ¹⁹ cuendá cúñaha-dẽ quíhíⁿ-güedẽ nducu tnúhu-güedẽ núú Jèsús, te núu sátá díú-gã cúú-gã Crìstú Yáa ní tendaha Yá Ndiõxí véxi ñuyíú-a àdi sátá cündètu nahi-ni-güedẽ mei Yáa-án. ²⁰ Te òré ní quexìo cue tée ní tendaha té Juàá núú ndécú Jèsús, te xáhaⁿ-güedẽ xii-gá:

—Té Juàá tée dàcuandute ñaha xii ñáyiu ní tendaha ñaha-dé xii-ndí véxi-ndí cácáⁿ tnúhú-ndí núú-n, núu sátá díú-n cùu Crìstú Yáa quixi ñuyíú-a, àdi sátá cündètu-ndí mei Crìstú càchí-dé —càchí-güedẽ xáhaⁿ-güedẽ xii-gá.

²¹ Te mei òré ní quexìo-güedẽ-án nĩ quide tátna Jèsús vãi ñáyiu cùhú, te davá-yu càhú víhí tnàhá-yu, te ndi dííⁿ ndi dííⁿ núú cuéhé tnàhá-yu ñⁿ ñⁿ-yu, te cue ñáyiu yihí ñaha espíritú cündihí yucu ñávãha ní queñuhu-gá espíritú-án yiqui cùñú-yu, te ío vãi ñáyiu cuàá ní nacaáⁿ-gá núú-yu. ²² Te Jèsús ní xáhaⁿ-gã xii-güedẽ:

—Chí cuánuhú te cani-ndo cuèndú núú tẽ Juáá nchaa sá nĩ xini-ndó quide-í, ndihí nchaa nàcuáa ndùu tnúhu ní cáháⁿ-í ní xindedóho-ndo. Te cúñaha-ndo xii-dé sá quidé tãtña-í núú cue ñáyiú cuáá, te quide tãtña-í cue ñáyiú yacua, ndihí cue ñáyiú tnàhá cuéhé sã dátèhyú nihnu-xi yiqui cùñú-yu, ndihí cue ñáyiú doho, nchaa ñáyiú-án quide tãtña-í te ndũha-yu, te ndéé cue ñáyiú sa ní xihí dándòto-í cúñaha-ndo xii-dé, te cúñaha tùcu-ndo xii-dé sá nděcuu-í dánèhé-í nchaa ñáyiú ndàhú tnúhu sá sánú ichi ñaha xií-yu nàcuáa naníhí tãhú-yu. ²³ Te cúñaha tùcu-ndo xii-dé sá ïo váha tãhú nchaa ñáyiú ñá túú quide sáá iní nchaa tnúhu càháⁿ-í, duha cúñaha-ndo xii-dé —càchí-gã xãhaⁿ-gã xii-güedé.

²⁴ Te sãtã nĩ yãha-güedé cuánuhú-güedé, te ní ngüíta Jèsús ní cáháⁿ-gã núú ñáyiú cuèndá té Juáá, te xãhaⁿ-gã xií-yu:

—Nchòhó ní sándéhé-ndó ìⁿ tée ndècu xití yucu, te tée-án ñà túú sàni ìⁿ saní úú iní-dé, chi ñá túú quide-dé dàtná quidé nchaa ité náhnú cuáhãⁿ-xi duha cuáhãⁿ-xi dàcãⁿ òré quéné tãchí. ²⁵ Te ni ñà túú ní sándéhé-ndó ìⁿ tée nihnu dóó vãha dóó vii càa. Te nchòhó xini-ndó sã ñáyiú sàcuíhnu dóó vãha dóó vii càa ñá túú nã cúmãní xií-yu, te nchaa ñáyiú-án ndécũ-yu vehe cue tée cùnũu yindaha ñaha xii ñáyiú. ²⁶ Dico nchòhó chi ní sándéhé-ndó ìⁿ tée càháⁿ tnúhu Yá Ndiõxí. Te ndáá sã díú tẽ càháⁿ tnúhu-gã cúú-dě dico cùnũu-gã-dé dàcúúxí dàva-gã cue tée càháⁿ tnúhu-gã. ²⁷ Te diu cuèndá té Juáá-án càháⁿ-xi núú tütú Yã Ndiõxí nàcuáa ní xãhaⁿ-gã xii Crìstú, te duha ní xãhaⁿ-gã:

Tendaha-ĩ ìⁿ tée cáháⁿ tnúhu-í
codonũu-dé núú-n cuèndá
dãtũha-dé ñáyiú cuèndá
quíndáá iní-yu tnúhu-n.

Duha ní xãhaⁿ-gã, te ducaⁿ nĩ ngódó tnùní núú tütú-gã. ²⁸ Te na càchí tnúhu-í xii-ndo sã ni ìⁿ cue tée ñuyú-a ñá túú cùnũu-güedé dàtná cùnũu té Juáá tée dàcuandute ñaha xii

ñáyiú. Te nchaa ñáyiú sa ta ndũhu ndaha ñàha Yá Ndiõxí vitna cuáhãⁿ cùnũu-gã-ni tucú-yu dàcúúxí tẽ Juáá cuèi cùú-yu ñáyiú ñá túú cùnũu dàcúúxí dàva-gã ñáyiú yindaha-gã —càchí Jèsús xãhaⁿ-gã xií-yu.

²⁹ Te sã dúcãⁿ nĩ cáháⁿ Jèsús, núu nchaa ñáyiú ní dàcuandute té Juáá ní cachí-yu sã ïo váha quide Yá Ndiõxí, te diu-ni ducaⁿ nĩ cáháⁿ cue tée cuihna iní-xi quide cobrá ñáhã xii ñáyiú cuèndá impuèstú, cue tée ní dàcuandute-dé. ³⁰ Dico cue tée cùu fariséú, ndihí cue tée dàcuaha ñaha xii ñáyiú nchaa tnúhu ní chídó tnùní ndí Moisés, cue tée ñá túú ní dàcuandute té Juáá ñá túú ní tnàhá iní-güedé cada-güedé nchaa sã vãha cuini Yã Ndiõxí. ³¹ Te Xitohó Jesucristú ní xãhaⁿ-gã xií-yu:

—Na càchí tnúhu-í xii-ndo nàcuáa sãtnahã-xi cùu ñáyiú ndècu vitna. ³² Chi ñáyiú-án cúú-yu dàtnã cue landú sãcõo núú yãhu dàdiqui-güexi te níhi càháⁿ-güexi, te xitnãha-güexi: “Ní tiú-ndí yaá ndihí vilu te ñá túú ní cuini-ndó càta-ndo. Te ío yica iní ní xita yuhu-ndí te ñá túú ní ndãhyú-ndó”, càchí-güexi xitnãha-güexi. Te ducaⁿ sãtnahã-xi cùu ñáyiú ndècu vitna. ³³ Te té Juáá tée ní xõo dacuandute ñaha xii ñáyiú ío ndàhú ní xõo caxi-dé, te ni ñà túú ní xõo coho-dé ndudí ndéhé yoho yãha stilé sã sã ní nduu-xi ndidí, te ní cachí-ndó sã nĩ xindecu ndihí-dé espíritú cundihí yucu ñávãha. ³⁴ Te sãtã nĩ quexiò yúhú Tée cùu ñaní tnáhã-ndó nchaa-ndo, te xèxi-í xihí-í ndécũ-í te càchí-ndó sã cúú-í tée xèxi vihi te xihí vihi-í. Te càchí tucu-ndo sã cúú-í tée xica cuu ndihí cue tée cuihna iní-xi quide cobrá ñáhã xii ñáyiú cuèndá impuèstú, ndihí nchaa dàva-gã cue tée ndècu ichi cuehé ichi duha, duha càchí-ndó. ³⁵ Te ñáyiú ní tnahã tnúhu ndihí Yá Ndiõxí, ñáyiú-án quidé-yu nàcuáa cutnùní sã mée-gã ío ndècu ndihí-gã sã xini tnùnigã —càchí-gã xãhaⁿ-gã xií-yu.

Jèsús ndécũ-gã vehe ìⁿ tée cùu fariséú tée nãni Ximú

36 Te ìⁿ tée cùu fariséú ní cáháⁿ-dé Jèsús vehe-dé caxi-gá, te òré ní quexìo-gá te cuánguihu-gá mèsá. 37 Te xíáⁿ núcõo-gá ní sáá ìⁿ ñadìhí te ñu-ni ñaha ñuú-áⁿ cúú-áⁿ, te ndècu-aⁿ ichi díí ìní, te sá ñí níhí-aⁿ tnúhu sá cuãngaxi Jèsús vehe tée cùu fariséú-áⁿ, núu nèhe-aⁿ ìⁿ yoó chitu àcítí sàháⁿ tnámí.

38 Te ní ngóo-aⁿ ìⁿ xio dñi Jesús, te ní ngüíta-aⁿ ndàhyú-aⁿ te ndihí ndute núu-aⁿ ní naquete-aⁿ sàhá-gã. Te dàtnùní ní nadayìchí-aⁿ ndihí idi díquí-aⁿ, te ní teyuhu-aⁿ sàhá-gã, te ní chihí ñaha-aⁿ àcítí sàháⁿ tnámí-ãⁿ.

39 Te sá dúcáⁿ ñí quide-aⁿ ní xiní tée cùu fariséú tée ní cáháⁿ ñáhá xii-gá-áⁿ núu ní sani iní-dé: “Te núu dicó ndisa tée càháⁿ tnúhu Yá Ndiõxí cúú tõe-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiú cùu-aⁿ, te dicó ìⁿ ñaha ndècu ichi díí ìní cúú-áⁿ”, duha ní sani iní-dé. 40 Te Jèsús ní xáhaⁿ-gã xii-dé:

—Xímú, ndècu ìⁿ tnúhu cachí tnúhu-í xii-n —càchí-gá xáhaⁿ-gã xii-dé.

Te tée cùu fariséú-áⁿ xáhaⁿ-dë xii-gá:

—Cachí tnúhu, Mèstrú —càchí-dé xáhaⁿ-dë xii-gá.

41 Te Jèsús ní xáhaⁿ-gã:

—Ní xíndecu ìⁿ tée ní xóo dasaⁿ núu díhúⁿ, te ní xítaú úú tnàhá-güedé núu-dë. Te ìⁿ-dé ní sàhá-dé úhúⁿ cièndú díhúⁿ denàriú, te ìngá-dé ní sàhá-dé údico úxí. 42 Te ñá ní ñíhí-güedé nacháhu-güedé núu-dë, te tée ní sánùu ñaha-áⁿ ñí quide càhnu iní-dé ndi ndùú-güedé. Te vitna cachí-õ tucu te núu ndèda càa-güedé cúú ìní ñáhá-gã-güedé xii-dé —càchí-gá xáhaⁿ-gã xii-dé.

43 Te ní xáhaⁿ tẽ Xímú-áⁿ:

—Sànuu sá tée taú vãi-gá díhúⁿ ño-gá cúú ìní-dé tée ní sánùu ñaha díhúⁿ-ãⁿ —càchí-dé xáhaⁿ-dë xii-gá.

Te ní xáhaⁿ Jèsús:

—Sá ndàá càháⁿ-n —càchí-gá xáhaⁿ-gã xii-dé.

44-46 Te Jèsús ní ndacoto-gá núu ñadìhí-áⁿ, te ní xáhaⁿ-gã xii té Xímú-áⁿ:

—¿Ndèhe-n nacuaa quide ñadìhí-a ñá? Chi cuánguihu-í vehe-n, dico ñá

túu ní tàxi-n ndute ndoo sàhá-í, te ni ñà túu ní tàyuhu ñaha-n, te ni ñà túu ní chihí-n acítí díquí-í, dico ñadìhí-a ní naquete-aⁿ ndihí ndute núu-aⁿ sàhá-í, te ní nadayìchí-aⁿ ndihí idi díquí-aⁿ, te nuu núu teyuhu-aⁿ sàhá-í, te ní chihí-aⁿ acítí sàháⁿ tnámí sàhá-í. 47 Te na càchí tnúhu-í xii-n sã ño cùu iní ñáhá-áⁿ xii-í, te núu xíáⁿ cutnùní iní-ó sã cuèi ño vãi sá cuèhé sá dúhá ñí quide-aⁿ, dico Yá Ndiõxí sa ní quide càhnu iní ñáhá-gã xii-aⁿ. Chi Yá Ndiõxí quidé càhnu iní-gá ñáyiú cuèi vãi àdi sacú cuèchi-yu, te núu sacú cuèchi-yu te sacú cúú ìní ñáhá-yu xii-í —càchí-gá xáhaⁿ-gã xii-dé.

48 Te ní xáhaⁿ-gã xii ñadìhí-áⁿ:

—Sa ní quide càhnu iní-í nchaa cuèchi-n —càchí-gá xáhaⁿ-gã xii-aⁿ.

49 Te cue tée xñucóo ndihí-gá xñnàha-güedé:

—¿Ná tée cùu tée-a núu nándi sá quidé-dë, te ndéé nchaa yíca cuèchi ñáyiú quide càhnu iní-dé-í? —càchí-güedé xñnàha-güedé.

50 Te Jèsús ní xáhaⁿ tucu-gá xii ñadìhí-áⁿ:

—Sa ní cácu nihnu-n núu ùhú núu ndàhú vitna chì ní sándáá ìní ñáhá-n xii-í, te vitna cuanùhú te ñá túú-gã ná cani iní-n —càchí-gá xáhaⁿ-gã xii-aⁿ.

8

Ñáyiú dñi ní chindee ñàha xii Jesús

1 Te sáta dúcáⁿ ñí cuu te Jèsús ní xica-gá cuáháⁿ-gá tñní víhí ñùú náhnú, ndihí ñuú líhli dànehé-gá ñáyiú nàcuáa ndíhu ndaha ñàha Yá Ndiõxí xii-yu. Te cuáháⁿ ndihí-gá ndi ùxúú tnàhá cue tée xica cuu ndihí-gá, 2 ndihí ìⁿ úú ñáyiú dñi ní quide tátna-gá ní xíhí ñaha espíritú cündihí yucu ñávàha, ndihí ñáyiú tnàhá dava-gá cuèhé ùhú ní cùu. Te xíáⁿ tnàhá tucu ìⁿ ñaha nàni Mariá Magdaléná, te ñaha-áⁿ ñí xíhí ñaha ùsá espíritú cündihí yucu ñávàha xii-aⁿ ni cùu, te ní quee ñaha-xi. 3 Te tnàhá ìⁿ ñaha nàni Juáná ñadìhí ìⁿ tée nàni Chúza tée ní cunuu ñí xinuu cuechi vèhe té Hèrodés, ndihí ìngá ñaha nàni Susaná

nchaa ñáyi-u-áⁿ ñi chindee ñàhá-yu xii-gá ndihi nchaa sá ndécú ndihí-yu, te ñi-u-ni ducaⁿ ñi quide vai-gá tucu ñáyi-u nchicúⁿ ñàhá xii-gá cuáháⁿ.

Nàcuáa quide té cuángacáⁿ triú
(Mt. 13:1-9; Mr. 4:1-9)

⁴ Te ío vai ñáyi-u ndaa ñuú ní tacá-yu núu ndécú Jèsús, te ní ngüita-gá ní cani-gá ñⁿ cuendú núu-yu cuendá tecú tnùní-yu tnúhu-gá, te xáhaⁿ-gã xií-yu:

⁵ —Íⁿ té cuángacáⁿ-dé triú. Te òré ní ngüita-dé dangoyo-dé triú-áⁿ te dava ní quene ndava ní ngava ndéé ichi, te ní xénihnu ñáyi-u, te ní xiní tílaá te ní nadatácá-güedi. ⁶ Te dava ní ngava ñuhu yadi núu yíhí vñhi yúu, te ní xínu-xi dico núu sácú-ni nduu te ní yíchí-xi, chi ñá túu cõhyo yíhí.

⁷ Te dava ní ngava núu yúcú ndíquíⁿ tnu ñu, te ñⁿ nuu-ni ñi xínu-xi ndihí tnu ñu-áⁿ, te tnu ñu-áⁿ ñi dánáá-xi ncháa triú sá ñi xínu-áⁿ. ⁸ Dico dava triú-áⁿ ñi ngava-xi núu ndécú ñuhu cocoⁿ, te xiáⁿ ní xínu-xi te ní sahu-xi, te ío váha ní cuu, chi núu ñⁿ-ní triú te ní nguíhí yoco-xi ñⁿ ciendú triú-xi —càchí-gá xáhaⁿ-gã xií-yu.

Te níhi ní cáháⁿ-gá ní xáhaⁿ tucu-gá xií-yu:

—Nchaa nchòhó ñáyi-u ní xíndedóho tnúhu ní cáháⁿ-í-a, te ío váha chí cuáha cuendá —càchí-gá xáhaⁿ-gã xií-yu.

Nàcuáa quèe-xi tnúhu ní cáháⁿ Jèsús
(Mt. 13:10-17; Mr. 4:10-12)

⁹ Te cue té xica cuu ndihí Jèsús ní xicáⁿ tnúhú-güedé núu-gã ñu nása quèe-xi cuendú ní cani-gá núu ñáyi-u.

¹⁰ Te ní xáhaⁿ-gã xii-güedé:

—Nchòhó chi sa càchí tnúhu Yá Ndiõxí xii-ndo ñⁿ sá vátá quíní-gá-ndó, chi càchí tnúhu-gá nàcuáa cada-gá ndíhu ndaha-gã ñáyi-u, dico dava-gá ñáyi-u caní-í mee-ni cuendú núu-yu, chi cuéi na quíní-yu nchaa nàcuáa cuu dico ñi vá cútñuní iní-yu ná cuendá ducaⁿ cùu, àdi cuéi na cùndedóho-yu dico ñi vá tècú tnùní-yu —càchí-gá xáhaⁿ-gã xii-güedé.

Jèsús càháⁿ-gá nàcuáa quèe-xi tnúhu
cuendá té cuángacáⁿ triú

(Mt. 13:18-23; Mr. 4:13-20)

¹¹ Te xáhaⁿ tucu-gá xii-güedé:

—Duha quèe-xi cuendú ní caní-í núu-ndó, chi triú ní sacáⁿ té-áⁿ cúu-xí dàtná tnúhu Yá Ndiõxí. ¹² Te triú sá ñi quene ndava ní ngava ndéé ichi-áⁿ, xiáⁿ cúu-xí dàtná ñáyi-u ní quèe iní-xi tnúhu Yá Ndiõxí, dico sácuhná cuáháⁿ-xi xòcani-xi tnúhu-gá iní-yu cuendá sá vã quíndáá iní-yu, te vá nánihí tàhú-yu. ¹³ Te triú sá ñi ngava ñuhu yadi núu yíhí vñhi yúu, xiáⁿ cúu-xí dàtná ñáyi-u ní xíndedóho tnúhu Yá Ndiõxí te díí iní ní tñí-yu tnúhu-gá, dico òré ná dàcaháⁿ ñàhá yùcu ñávãha xií-yu nándi cadá-yu, te dàña nihnú-yu tnúhu-gá chi ñá nihí ndéé-yu canchicúⁿ nihnú-yu nàcuáa càháⁿ tnúhu-gá. ¹⁴ Te triú sá ñi ngava núu yúcú ndíquíⁿ tnu ñu-áⁿ, xiáⁿ cúu-xí dàtná ñáyi-u ní tecú dóho-xi tnúhu Yá Ndiõxí, dico cuéé cuéé ní nacuanaá-yu tnúhu-gá, chi cuendá mee-ni sã cúu-xí mèe-yu ñuhu iní-yu, ndihí cuendá sá ño sãni iní-yu cuu cuicá-yu, ndihí cuendá sá ño cùdíí iní-yu nchaa sá ío ñuyíú-a núu xiáⁿ àúⁿ nã cuu ní xíndedóho-yu tnúhu-gá. ¹⁵ Dico triú sá ñi ngava núu ndécú ñuhu cocoⁿ, xiáⁿ cúu-xí dàtná ñáyi-u váha iní-xi ní xíndedóho tnúhu Yá Ndiõxí chi ñá túu dàña nihnú-yu, te ñi yùhu ñi iní-yu quidé-yu nchaa nàcuáa càháⁿ tnúhu-gá.

Nàcuáa quidé-yu ití
(Mr. 4:21-25)

¹⁶ Te ñá túu ñi ñⁿ ñáyi-u tènñuhú-yu ñⁿ ití te dàdáhu-yu, àdi chiváha-yu ñⁿ caha camá, chi tàxi ndecú-yu núu ññu cuendá cutñuní núu ncháa ñáyi-u ndècu vehe. ¹⁷ Te ñi ñⁿ tnúhu sá ñã tècú tnùní ñáyi-u vitna vá càchí-ó sã vã tècú tnùní-yu chi dacuèi sã tècú tnùní-yu, te ñi ñⁿ tnúhu sá càchí-ó cùu yuhu vitna vá cúu yùhu chi dacuítí sã quèé tñu-xi núu ñáyi-u.

¹⁸ Te chí cùndedóho váha tnúhu na càháⁿ-í-a. Nchaa ñáyi-u sàndáá iní ñàhá xii Yá Ndiõxí ío-gá cuita

quindáá-gá iní ñáhă-yu xii-gá quíhíⁿ, te nchaa ñáyiú ñá túú sàndáá iní ñáhá xii-gá uuⁿ-gá cuita cuu sàá-gá iní-yu núú-gă quíhíⁿ —càchí-gá xáhaⁿ-gă xii-güedé.

Cue ñaní Jèsús ndihí năná-gă
(Mt. 12:46-50; Mr. 3:31-35)

¹⁹ Te ní quexìo náná Jèsús ndihí cue ñaní-gá vehe núú ndécú-gă, te ñá ndácú-yu cáháⁿ ndihí ñáhá-yu xii-gá chi ío cuéhé ñáyiú ndècu núú ndécú-gă. ²⁰ Te ìⁿ ñáyiú xĩndecu-áⁿ nĩ dáyăha-yu tnúhu núú-gă, te xăhăⁿ-yu:

—Ní quexìo náná-n ndihí cue ñaní-n xĩnutnĩⁿ-yu quehé, te cuìní-yu cáháⁿ ndihí ñáhá-yu xii-n —càchí-yu xăhăⁿ-yu xii-gă.

²¹ Te ní xáhaⁿ-gă:

—Nchaa ñáyiú sàcúndedóho tnúhu Yá Ndiöxí te quidé-yu nchaa nàcuáa càháⁿ tnúhu-gă, ñáyiú-áⁿ cúú-yu dàtná nănà-í ndihí dàtná cue ñaní-í —càchí-gá xáhaⁿ-gă xii ñáyiú ní dáyăha tnúhu núú-gă-áⁿ.

Jèsús ngání-gă táchí ndihí ndute làgúná

(Mt. 8:23-27; Mr. 4:35-41)

²² Te ìⁿ nduu ní quée Jèsús bàrcú ndihí cue téé xica cuu ndihí-gá, te ní xáhaⁿ-gă:

—Chí ná quíhíⁿ-ó ndàa ingá xio yuhu làgúná —càchí-gá xáhaⁿ-gă xii-güedé.

Te cuáháⁿ-güedé ndihí-gă. ²³ Te nini ñùhu bàrcú ichi cuáháⁿ-xi núú ndute ní xídí Jèsús. Te ní ngüíta-xi níhi vîhi quene táchí te ta nàdachitú-xi ndute xití bàrcú-áⁿ cuáháⁿ, te sa cuìní-nă-xi quée naa bàrcú-áⁿ xití ndute ni cùu. ²⁴ Te ní sáháⁿ-güedé núú cáá Jèsús xídí-gă, te ní xáhaⁿ-güedé xii-gă:

—jMèstrú, ndiquíú iní chi tà quée naa-o cuáháⁿ! —càchí-güedé xáhaⁿ-güedé xii-gă.

Te Jèsús ní ndiquíú iní-gă te ní ndacóo-gă te ní tenàá-gă táchí-ăⁿ ndihí ndute làgúná-áⁿ, te ní ngüíñí-ni táchí-ăⁿ te ní nucúndecu nahi-nă ndute làgúná-áⁿ. ²⁵ Te ní xáhaⁿ-gă xii-güedé:

—¿Náa ñá túú sàndáá iní ñáhá ndisa-ndo xii-í ăⁿ? —càchí-gá xáhaⁿ-gă xii-güedé.

Te ní cuñúhu-güedé sá dúcáⁿ nĩ quide-gá ní xiní-güedé, te ní yùhú-güedé, te ní xitnàha-güedé:

—¿Te ná téé cùu téé-a núu ní cáháⁿ-ni-dé te ní ngüíñí táchí te ní nucúndecu nahi-ni ndute làgúná-a-í? —càchí-güedé xitnàha-güedé.

Téé yîhi ñaha cue espíritú cúndihí yucu ñávăha

(Mt. 8:28-34; Mr. 5:1-20)

²⁶ Te ní sáá-gă ndihí-güedé yucu cue téé ñuú Gàdará, te yîhi ndáá-ni ndàa ingá xio làgúná-áⁿ cáá dístítú Galiléa. ²⁷ Te òré ní quene Jèsús xití bàrcú te ní dáyátní ñàha ìⁿ téé ñuú-áⁿ xii-gă, te yîhi ñaha titnĩ espíritú cúndihí yucu ñávăha xii-dé. Te ní cunaha ñà túú-gă sácúnhu-dé dóó-dě, te ni ñà túú-gă sácúndecu-dé vehe-dé,

chi da nchaa núú yĩndüxi ndíyí quide vehe-dé. ²⁸ Te òré ní xiní-dé Jèsús te ní ngüíñí xití-dě núú-gă, te cue espíritú yîhi ñàha xii-dé-áⁿ nĩ quide-xi níhi ní cáháⁿ-dé, te xáhaⁿ-dě xii-gă:

—¿Ná cuendá véxi-ö Jèsús Déhe Dútú Ndiöxí sàdí-n ìchi-í-í? Te càháⁿ ndáhú-í núú-n sã và dândóho ñaha-n xii-í —càchí-dé xáhaⁿ-dě xii-gă.

²⁹ Te ducaⁿ nĩ cáháⁿ-dé cuendá sá Jèsús ní xáhaⁿ-gă xii nchaa espíritú cúndihí yucu ñávăha yîhi ñaha sá ná quée ñaha-xi xii-dé. Te nchaa xíãⁿ ní xóo dacàháⁿ-xi iní-dé nándi sá nĩ xóo cada-dé nũu ní xóo dacùtu ñaha-güedé cadená xii-dé cuendá sá ñà túú-gă ná cada-dé, te ní xóo cundeé ñáhá-güedé, dico cuèi ducaⁿ dico ní xóo dandáva-ni-dé cadená, te cue espíritú cúndihí yucu ñávăha-áⁿ nĩ xóo dacùnu ñaha-xi xii-dé ní xóo quíhíⁿ-dé xití yucu. ³⁰ Te Jèsús ní xicáⁿ tnúhú-gă núú-dě, te xáhaⁿ-gă:

—¿Nása nàni-n-í? —cachí-gă xáhaⁿ-gă.

Te ní xáhaⁿ-dě:

—Vài Sandadú nàni-í —càchí-dé xáhaⁿ-dě xii-gă.

Te ducaⁿ nĩ xáhaⁿ-dě xii-gá cuendá sá ïo cuéhé espíritú cündihĩ yucu ñávãha yĩhĩ ñaha xii-dé. ³¹ Te nchaa espíritú-áⁿ nĩ cáháⁿ ndàhú-xi núú Jèsús sá vã téndàha ñaha-gá xii-xi quíhĩⁿ-xi núú ùhú núú ndàhú. ³² Te ðiu-ni yatni yucu núú ndécú Jèsús-áⁿ yíhĩ vãi cuchí xixexi-güedi, te nchaa espíritú-áⁿ nĩ cáháⁿ ndàhú-xi núú-gá sá ná dàña-gá quíhu-xi yiqui cùñú nchaa cùchĩ-áⁿ, te Jèsús ní xáhaⁿ-gã sá cúú quíhu-xi yiqui cùñú-güedi. ³³ Te ní quee ñaha nchàa espíritú-áⁿ xii tée-áⁿ, te ní quíhu-xi nchaa cùchĩ-áⁿ, te cùchĩ-áⁿ nĩ xinu-güedi duha ní quee-güedi ndàa núú ðèhvã yuhu làgúná-áⁿ, te ní ngaunihnu-güedi xitĩ ndute te ní ndihĩ-güedi ní cáhá.

³⁴ Te òré ní xiní cue tée xito cuchí-áⁿ nàcuáa ní cuu te ní yùhú-güedé ní xinu-güedé, te ní sáháⁿ-güedé ní cani-güedé cuendú núú cuè ñáyiu ndècu xitĩ ñuú, ndihĩ núú cuè ñáyiu ndècu xitĩ yucu. ³⁵ Te nchaa ñáyiu ní níhĩ tnũhu ní queé-yu cuáháⁿ ndéhẽ-yu nàcuáa ní cuu. Te òré ní quexiò-yu núú ndécú Jèsús, te ní xiní-yu téé ní xihĩ ñaha cuè espíritú cündihĩ yucu ñávãha-áⁿ núcõo-dé núú sáhá Jèsús, te nihnu-ná-dé dóo-dé, te núcõo-dé dàtná ñá yu váha, te ní yùhú-yu òré ní xiní ñáhã-yu xii-dé. ³⁶ Te nchaa ñáyiu ní xiní nàcuáa ní cuu ní ndúha téé yihĩ ñaha cue espíritú cündihĩ yucu ñávãha-áⁿ ní cùu ní caní-yu cuendú núú nchàa ñáyiu ní quexiò-áⁿ nàcuáa ní cuu ní ndúha téé-áⁿ ndihĩ nàcuáa ní cuu cuendá nchaa cùchĩ-áⁿ. ³⁷ Te sá dúcáⁿ nĩ níhĩ-yu tnũhu nàcuáa ní cuu, núu nchaa ñáyiu ñuú Gàdará ío ní yùhú-yu te ní ngüíta-yu càháⁿ ndàhú-yu núú Jèsús sá ná nùhú-gá nõu ndèè ichi véxi-gá. Te sá dúcáⁿ nĩ cáháⁿ-yu núú cuáháⁿ-gá núú ndécú bàrcú. Te òré ndée-gá bàrcú-áⁿ nõhú-gá ³⁸ ní ngüíta téé ní xihĩ ñaha cuè espíritú cündihĩ yucu ñávãha càháⁿ ndàhú-dé núú-gã nõu vá cündèè iní-gá quíhĩⁿ

ndihĩ ñaha-gã xii-dé, dico Jèsús ní quide ndee ìní ñáhã-ni-gã xii-dé, te ní xáhaⁿ-gã:

³⁹ —Cuanùhú vehe-n, te cani-n cuendú núú nchàa ñáyiu sá ïo càhnu cuu nchaa sá vãha ní quide ñaha Yã Ndiõxí xii-n —càchĩ-gá xáhaⁿ-gã xii-dé.

Te téé-áⁿ nĩ xica-dé cuánuhú-dé te ní ngüíta-dé ní cani-dé cuendú núú nchàa ñáyiu xĩndecu nihĩ ñuú sá ïo càhnu cuu nchaa sá vãha ní quide ñaha Jèsús xii-dé.

Cuendá déhe yoco tẽ Jàirú, ndihĩ cuendá ñá ñadĩhĩ ní tnándeé dóo Jèsús (Mt. 9:18-26; Mr. 5:21-43)

⁴⁰ Te òré ní ndexiò Jèsús ndàa ingá xio yuhu làgúná, te ñáyiu xĩndecu xiáⁿ sa ndètu cahnu ñaha-ná-yu, te ío váha ní cáháⁿ ndihĩ ñáhã-yu xii-gá òré ní nasáá-gá. ⁴¹ Te ñá téé tàxi tnuní veñúhu ní quexiò-dé núú ndécú Jèsús, te téé-áⁿ nání-dé Jàirú, te ní ngüíñĩ xitĩ-dé núú-gã càháⁿ ndàhú-dé, te xáhaⁿ-dẽ xii-gá:

—Véxi-í càháⁿ ndàhú-í núú-n nõu vá cündèè iní-n quíhĩⁿ-ó vèhe-í cada tátna-n ðèhe yoco-í —càchĩ-dé xáhaⁿ-dẽ xii-gá.

⁴² Te ducaⁿ nĩ xáhaⁿ-dẽ chi ndècu ñá dii-ni ðèhe yoco-dé, te ndècu-xi datná úxúú cuíá-xi, te càhú víhĩ tnáhã-xi cùhú-xi te cuìní-xi cuú-xi. Te Jèsús ní xica-gá cuáháⁿ-gã ndihĩ téé-áⁿ, te ío vãi ñáyiu nchìcúⁿ ñáhã xii-gá cuáháⁿ, te dàdehnde ñaha-ná-yu xii-gá ní cùu.

⁴³ Te tnuú nchaa ñáyiu-áⁿ nõútnáhã ñá ñaha cùhú, te ñaha-áⁿ sà ní cuu úxúú cuíá sá cùhú-aⁿ ngõyo ñaha níñĩ xii-aⁿ, te ío cuéhé díhúⁿ nĩ cuu dàndonũhu-aⁿ chi ní nadico-aⁿ nchàa sá ndécú ndihĩ-aⁿ cuendá ní níhĩ-aⁿ díhúⁿ nĩ queheⁿ nchaa ñáyiu ní quide tátna ñaha xii-aⁿ, dico ní ñá-yu ñá túú ní ndàcú-yu ndúha-aⁿ. ⁴⁴ Te ní sáháⁿ ndehe yatni-aⁿ ndàa sátá Jèsús, te ní tnándeé-aⁿ luha yuhu dóo-gã te òré-ni-áⁿ nĩ ndúha-aⁿ.

⁴⁵ Te Jèsús ní xicáⁿ tnúhú-gã nõu-yu, te xáhaⁿ-gã:

—¿Ndèdacàa-ndo ní tnándeé ñáhã xii-í? —càchĩ-gá xáhaⁿ-gã xií-yu.

Te nchaá-yu ní xáhăⁿ-yu sá nǐ ĩⁿ-yu ñá túú ní tnăndeé ñáhá xii-gá. Te té Pèlú ndihi cue té cündihi-dé ní xáhaⁿ-güedé xii-gá:

—Mèstrú, ndèhe-n sá vái ñáyi u nchìcúⁿ ñáhá xii-n, te xio xio dàdehnde ñáhá-yu, te xicáⁿ tnúhú-gă-n yòo ní tnăndeé ñáhá xii-n —cachí-güedé xáhaⁿ-güedé xii-gá.

⁴⁶ Dico Jèsús ní xáhaⁿ-gă xii-yu:

—Dico ñu ĩⁿ-ndo nǐ tnăndeé ñáhá xii-í, chi ní cutnùní iní-í sá ĩⁿ ñáyi u cùhú ní tnăndeé ñáhá xii-í te ní ndúha-yu —cachí-gă xáhaⁿ-gă xii-yu.

⁴⁷ Te sátá nǐ xiní ñaha-áⁿ sá nǐ cutnùní iní Jèsús sá nǐ tnăndeé ñáhá-áⁿ xii-gá, te yùhú yùhú-aⁿ ní sáhá-aⁿ ní ngüñí xití-áⁿ nùú-gă, te ní náhmá-aⁿ nùú-gă, ndihi nùú nchaa ñáyi u ná cuendá ducaⁿ nǐ quide-aⁿ ní tnăndeé-aⁿ-gă, ndihi cuendá sá òré-ni-áⁿ nǐ ndúha-aⁿ. ⁴⁸ Te Jèsús ní xáhaⁿ-gă xii-aⁿ:

—Yòhó ñaha cùhú, ní sándáá iní ñáhá-n xii-í nùu ní ndúha-n, te cuanùhú vitna te ñá túú-gă ná cani iní-n —cachí-gă xáhaⁿ-gă xii-aⁿ.

⁴⁹ Te cáháⁿ dúcáⁿ-ní Jèsús ní sáá ĩⁿ té xinu cuechi vehe té Jàirú té tàxi tnuní veñuhu, te xáhaⁿ tée xinu cuechi-áⁿ xii-dé:

—Sa ní xihí déhe-n, vá chíchiuⁿ-gă-n Mèstrú —cachí-dé xáhaⁿ-dë.

⁵⁰ Te sá dúcáⁿ xáhaⁿ tée xinu cuechi-áⁿ xii té Jàirú ní tecú dóho Jèsús, nùu ní xáhaⁿ-gă xii-dé:

—Vá ndihú iní-n, quindáá iní ñáhá-ní-n xii-í te ndúha déhe-n —cachí-gă xáhaⁿ-gă xii-dé.

⁵¹ Te òré ní sáá-gă vehe té Jàirú te ñá ní dàña-gă quihu ñáyi u cùtexinu, nùu té Pèlú-ni ndihi té Jàcobó-ni, ndihi té Juàá-ni, ndihi tătá ndihi năná-ni xíchí nǐ xihí-áⁿ cuănguihu ndihi-gă xití vehe. ⁵² Te nchaa ñáyi u sa xindecu vehe-dé-áⁿ xındáhyú-yu sá ndihú iní-yu cuendá sá ní xihí-xi. Te Jèsús ní xáhaⁿ-gă xii-yu:

—Vá ndàhyú-ndó, chi dícó-ni xidí-xi ñá túú ní xihí-xi —cachí-gă xáhaⁿ-gă xii-yu.

⁵³ Te ní sácú ndeé ñáhă-yu xii-gá, chi sá cúu-xí mèé-yu chi ní xihí ndisa xíchí-ăⁿ. ⁵⁴ Te Jèsús ní tñi-gă ndaha xíchí nǐ xihí-áⁿ, te níhi ní cáháⁿ-gă, te xáhaⁿ-gă:

—Xíchí cuéchí, ndacóo —càchí-gă xáhaⁿ-gă.

⁵⁵ Te xíchí-ăⁿ nǐ ndoto-xi, te òré-ni ní ndacóo-xi, te Jèsús ní xáhaⁿ-gă sá ná cuăñahá-yu sá caxí-xí. ⁵⁶ Te tătá-xi ndihi năná-xi súúni nǐ cuñuhu-yu sá dúcáⁿ nǐ dándótó ñaha Jèsús xii-xi, te ní xáhaⁿ-gă xii-yu sá vă yòo ĩⁿ cúñahá-yu sá dúcáⁿ nǐ quide-gă.

9

Jèsús téndaha-gă ndi ùxúu cue té xica cuu ndihi-gă quihíⁿ-güedé cáháⁿ-güedé tnúhu-gă

(Mt. 10:5-15; Mr. 6:7-13)

¹ Te Jèsús ní cana-gă ndi ùxúu cue té xica cuu ndihi-gă, te ní sáñaha-gă xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cündihi yucu ñávaha yihí ñaha xii ñáyi u, ndihi cuendá sá cádá tătna-güedé nchaa ñáyi u cùhú. ² Te ní xáhaⁿ-gă xii-güedé sá quihíⁿ-güedé danèhé-güedé ñáyi u nàcuáa cada Yá Ndiöxí ndihu ndaha ñaha-gă xii-yu, te ducaⁿ cada tătna-güedé cue ñáyi u cùhú.

³ Te cùmání-gă caca-güedé quihíⁿ-güedé, te ní xáhaⁿ-gă xii-güedé:

—Ñá túú tnàhí ná canehe-ndo cùu ichi-ndo, ni tătnu, ni ñunu, ni sá caxí-ndó, ni dñhúⁿ. Te ni vă canèhe-ndo ingá ichi dóo-ndó, chi ñu-ni dóo níhnú-ndó-ăⁿ xíáⁿ tnàhí-ni. ⁴ Te ndédani càa vehe na saá-ndó, te xíáⁿ cundecu-ndo ndeé ná sáá nduu ndeè-ndo. ⁵ Te nùu ñá túú cuñi-yu queheⁿ cuendá ñáhă-yu xii-ndo, te ndee-ndo ñúú-áⁿ, te naquidi-ndo tìcá chúhmá nǐ tñi sáhá-ndó cuendá sá ná cùtnuní iní-yu sá ñá túú quide váha-yu —cachí-gă xáhaⁿ-gă xii-güedé.

⁶ Te sátá dúcáⁿ nǐ xáhaⁿ Jèsús xii-güedé, te ní quee-güedé cuáháⁿ-güedé nchaa ñuú dácuàha-güedé ñáyi u tnúhu Yá Ndiöxí, tnúhu sá cáháⁿ nàcuáa

naníhí tǎhú-yu, te ducaⁿ ta quide tǎtna-güedé nchaa ñáyiú cùhú cuáháⁿ.

Nàcuáa ní cuu ní xíhí té Juáá té dǎcuandute ñaha xii ñáyiú

(Mt. 14:1-12; Mr. 6:14-29)

⁷ Te té Hèrodés té cùu gobiernú ní níhí-dě tnúhu nchaa nàcuáa quide Jesús, te quíyuhú iní-dé te sàni iní-dé yoo cùu-gá. Te ducaⁿ ñí sani iní-dé chi dava ñáyiú cǎchí-yu sá tǎ Juáá té ní xóo dǎcuandute ñaha xii ñáyiú ní ndoto cùu-gá. ⁸ Te davá-yu cǎchí-yu sá tǎ Èliás cúu-gǎ, te davá-yu cǎchí-yu sá ñⁿ té ní xóo cǎháⁿ tnúhu Yá Ndiǒxí ndéé sanaha vǐhi ní ndoto cùu-gá, cǎchí-yu. ⁹ Dico té Hèrodés ní cachí-dé:

—Yúhú ní táuchíúⁿ-í ní xehndé-güedé díquí tǎ Juáá. ¿Te yoo cùu té dǐi cuèndú-xi níhí-a sá súúni cuéhé núú sá quide-dé váiⁿ? —duha ní cachí-dé.

Te té Hèrodés ndúcú-dě nàcuáa cada-dé cuèndá quini-dé Jesús.

Jèsús dǎcǎxi-gá úhúⁿ mǐl cue té te dǐiⁿ ñáyiú dǐhí ndǐhi landú

(Mt. 14:13-21; Mr. 6:30-44; Jn. 6:1-14)

¹⁰ Te nchaa cue té ní táuchíúⁿ Jesús cuáháⁿ cǎháⁿ tnúhu Yá Ndiǒxí núú ñáyiú ní ndexio-güedé núú-gǎ te ní ngúita-güedé nǎcǎni tnúhu-güedé nchaa nàcuáa ní quide-güedé. Te dǎtnúni ní xica-gá medǐ-ni-gá ndécá ñaha-gá xii-güedé cuáháⁿ ñⁿ xichi núú ñà túú ñáyiú ndècu, yatni núú cáá ñúú Betsaidá. ¹¹ Dico òré ní níhí ñáyiú tnúhu sá cuáháⁿ Jesús, te nchícúⁿ-yu-gá cuáháⁿ, te òré ní quexió-yu núú-gǎ, te ní queheⁿ cuèndá ñáhá-gǎ xii-yu, te ní dǎnèhé ñáhá-gǎ xii-yu nàcuáa ndǐhu ndaha ñaha Yá Ndiǒxí xii-yu, te ní quide tǎtna-gá nchaa ñáyiú cùhú.

¹² Te òré sa ní cuaa te ní natacá ndǐ ùxúú cue té xica cuu ndǐhi-gá núú-gǎ, te ní xáhaⁿ-güedě xii-gá:

—Sa ní cuu dandaca-n nchaa ñáyiú-a, chi sa ní cuaa, te na quíhíⁿ-yu nchaa vehe cǎa yatni iha, ndǐhi nchaa xití ñúú cáá yatni iha cuaaⁿ-yu sá cáxǐ-yu, te dǐu-ni yacáⁿ ndetatú-yu,

chi núú ndécú-ó ñha ñà túú tnàhí ná íó —cǎchí-güedé xáhaⁿ-güedě xii-gá.

¹³ Te Jèsús ní xáhaⁿ-gǎ xii-güedé:

—Mee-ndo chí cuǎñaha sǎ ná cǎxǐ-yu —cǎchí-gá xáhaⁿ-gǎ xii-güedé.

Te ní xáhaⁿ-güedě xii-gá:

—Ñá túú nǎgá ndécú ndǐhi-ndǐ, chi úhúⁿ duha-ná pǎá, ndǐhi úú-nǎ chácá ndécú ndǐhi-ndǐ, te dǐu-ni núú quíhíⁿ-ndǐ cuaaⁿ-ndǐ sá cáxǐ-yu —cǎchí-güedé xáhaⁿ-güedě xii-gá.

¹⁴ Te xǐnu dǎtná úhúⁿ mǐl mee-ni cuè téé, te dǐiⁿ ñáyiú dǐhí ndǐhi landú. Te Jèsús ní xáhaⁿ-gǎ xii cue téé xica cuu ndǐhi-gá:

—Chí cǐñaha na ngǒo ndǐ údico úxí ndǐ údico úxí-yu ñⁿ ñⁿ xichi —cǎchí-gá xáhaⁿ-gǎ xii-güedé.

¹⁵ Te ducaⁿ ñí quide-güedé, te ní ngóo-yu ncháa-yu. ¹⁶ Te dǎtnúni ní queheⁿ-gá ndǐ úhúⁿ pǎá-áⁿ, ndǐhi ndǐ ndúú chácá-ǎⁿ. Te ní ndacoto-gá andǐu, te ní ndacáⁿ táhú-gǎ núú Yá Ndiǒxí, te dǎtnúni ní táhú cuèchi-gá pǎá-áⁿ ndǐhi chácá-ǎⁿ, te ní sáha-gá nchaa cue téé xica cuu ndǐhi-gá ní dǎcǎhñu ñaha-güedě xii-yu. ¹⁷ Te ncháa-yu ní xexí-yu ní ndahá xití-yu. Te sátá ñí túhú cóhǒ-yu te ní nǎdatácá-güedé nchaa sá ñí quendóo, te ní chítú ùxúú tnàhá tídihi mee-ni sǎ ñí quendóo.

Té Pèlú xáhaⁿ-dě xii Jèsús sá dǐú-gǎ cúu-gǎ Crìstú

(Mt. 16:13-19; Mr. 8:27-29)

¹⁸ Te ñⁿ nduu ndècu mee Jesús ndǐhi cue téé xica cuu ndǐhi-gá, te cǎháⁿ ndǐhi-gá Yá Ndiǒxí, te sátá ñí yáha ní cǎháⁿ ndǐhi-gá Yá Ndiǒxí, te ní xicáⁿ tnúhú-gǎ núú-güedě, te xáhaⁿ-gǎ xii-güedé:

—¿Yoo cùu yúhú cǎchí ñáyiú-va? —cǎchí-gá xáhaⁿ-gǎ xii-güedé.

¹⁹ Te ní xáhaⁿ-güedě xii-gá:

—Davá-yu cǎchí-yu sá cúu-n ndǐ Juáá téé ní xóo dǎcuandute ñaha xii ñáyiú, te davá-yu cǎchí-yu sá cúu-n tǎ Èliás, te davá-yu cǎchí-yu sá ñⁿ téé ní xóo cǎháⁿ tnúhu Yá Ndiǒxí ndéé sanaha ñí ndoto cùu-n, duha cǎchí-yu —cǎchí-güedé xáhaⁿ-güedě xii-gá.

20 Te ní xícaⁿ tnúhú tùcu-gá núú-güedě, te xáhaⁿ-gã xii-güedé:

—Te nchòhó, ¿yoo sàni iní-ndó cùu-í-í? —càchí-gá xáhaⁿ-gã xii-güedé.

Te té Pèlú ní xáhaⁿ-dě xii-gá:

—Yòhó cúú-n Crìstú Déhe Dútú Ndiòxí —càchí-dé xáhaⁿ-dě xii-gá.

Jèsús càháⁿ-gá sá cáhni ñàha-güedé xii-gá

(Mt. 16:20-28; Mr. 8:30-9:1)

21 Te ní xáhaⁿ-gã xii-güedé sá vǎ yǎo ñⁿ cúñaha-güedě yoo cùu-gá. 22 Te ní xáhaⁿ-gã xii-güedé:

—Yúhú Tée cùu ñàní tnáhá-ndó nchàa-ndo ío cuéhé sǎ ndòhò-í, chí daquèe tíhú ñáhá cuè tée cùu sacuéhé nǔú ñáyiú isràél, ndihí cue dútú cùnù, ndihí cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, te sǎá nduu te cahni ñaha-güedě xii-í, dico nduu únì sá cùú-í te ndoto-í —càchí-gá xáhaⁿ-gã xii-güedé.

23 Te dàtnùnì ní xáhaⁿ-gã xii nchaa ñáyiú:

—Nchaa ñáyiú cuìnì chitnahá ñáhá xii-í, te xini ñuhu-xi vǎ cǎdá-gǎ-yu sá sání iní méě-yu, te ñⁿ nduu ñⁿ nduu cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. 24 Te nchaa ñáyiú cuìnì sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyiú ñà túú yùhú cuèi nándi sá ná yáha-yu cundecu-yu ñuyíú-a sá cuendá-í, te ñáyiú-áⁿ naníhí tàhú-yu.

25 Te cuèi nchaandi túhú sá ìò ñuyíú-a na nihí ñáyiú cundecu ndihí-yu, dico núu ñⁿ nchaa xǎáⁿ ná cǎda cuíta nihnú-yu te ñà túú vǎdana nàndihí-xi sá dúcáⁿ ndècu ndihí-yu nchaa xǎáⁿ.

26 Te nchaa ñáyiú na cùcahaⁿ núú-xi cáháⁿ váha cuendá-í ndihí cuendá nchaa tnúhu-í, te tnàhá yùhú Tée cùu ñàní tnáhá-ndó nchàa-ndo cucahaⁿ núú-í núú-yu òré quixi tucu-í ndihí cue espíritú xínú cuèchi núú Tǎtà-í Dútú Ndiòxí, te mee-gǎ cada cutnùnì iní nchaa ñáyiú sá ìò càhnu cuu-í. 27 Te na càchí tnúhu ndáá-í xii-ndo sǎ ìò dava nchòhó ñáyiú ndècu ìha vitna vǎ cùú-ni-ndo, chí cundecu-ni-ndo nděe

quiní-ndó sǎá nduu ndíhu ndaha ñàha Yá Ndiòxí xii ñáyiú —càchí-gá xáhaⁿ-gã xií-yu.

Ní nadáma dóó Jèsús ndihí núú-gǎ (Mt. 17:1-8; Mr. 9:2-8)

28 Te ní cuu dàtná úná nduu sá dúcáⁿ ñⁿ cáháⁿ Jèsús, te cuásaá-gǎ ñⁿ yucu cáháⁿ ndihí-gá Yǎ Ndiòxí, te ndèca-gǎ té Pèlú, ndihí té Jàcobó, ndihí té Juàá cuásaá. 29 Te ñini càháⁿ ndihí-gá Yǎ Ndiòxí ní nadáma núú-gǎ ndihí dóó-gǎ, te dóó-gǎ-áⁿ sùúnì ñⁿ nduu cuixíⁿ víhí, te sùúnì dàtásaⁿ-xi. 30 Te òré-ni-áⁿ ñⁿ xiní-güedé úú tnàhá cue tée càháⁿ ndihí-gá, te ñⁿ-dé cúú-dě té Moisés, te ingá-dé cúú-dě té Èliás, 31 te sùúnì dàtásaⁿ-xi ñⁿ cǎndéé núú ndécú cuè tée úú-áⁿ ndihí-gá, te xǎdatnúhu-güedé nàcuáa ndoho Jèsús cuú-gá ñuú Jerusalén dàtná ní cachí méé-gǎ. 32 Te té Pèlú ndihí úú-gǎ-güedé cuìnì víhí-güedé cúdú-güedé, dico ní sahani iní-güedé ñà túú ní xǎdí-güedé, te ní dánèhé núú ñáhá-xi xii-güedé sá sùúnì vǎha cǎa núú ndécú Jèsús, ndihí úú cue tée càháⁿ ndihí-gǎ-áⁿ. 33 Te òré sa ndùcu ndee cue tée úú-áⁿ caca-güedé núhú-güedé, te ní xáhaⁿ tǎ Pèlú xii-gá:

—Mèstrú, ¡váha ní cuu sá ndécú-ó ìha vitna! Te na dàcaa-ndí únì tnàhá vehe tnuvixiⁿ, ñⁿ cuu cuendá-n, te ñⁿ cuu cuendá té Moisés, te ñⁿ cuu cuendá té Èliás —càchí-dé xáhaⁿ-dě xii-gǎ.

Dico té Pèlú chí ñⁿ mèe-dé ñà túú ní cùtnunì iní-dé nása nduu tnúhu ní cáháⁿ-dé. 34 Te ñini càháⁿ-dé ní quexìo ñⁿ vícò núú ndécú-güedé-áⁿ ñⁿ dǎdáhu ñaha-xi xii-güedé, te ní yùhú-güedé sá dúcáⁿ ñⁿ quexìo vícò-áⁿ ñⁿ dǎdáhu ñaha-xi. 35 Te xití vícò-áⁿ ñⁿ tecú ní cáháⁿ Yǎ Ndiòxí, te xáhaⁿ-gǎ xii-güedé:

—Tée-a cùu-dé Déhe-í, téé ìò cùu iní-í, te tñⁿ-ndo nchàa tnúhu càháⁿ-dé —duha ní xáhaⁿ-gǎ xii-güedé.

36 Te sǎtá dúcáⁿ ñⁿ cáháⁿ Yǎ Ndiòxí, te ní quide cuendá-güedé sá mèdii-ná Jèsús ndécú-gǎ xǎáⁿ. Te vǎ yǎo ñⁿ ñⁿ xáhaⁿ-güedé nàcuáa nduu nchaa sá ñⁿ xiní-güedé-áⁿ.

Jèsús quidé tātna-gá ìⁿ téé cuechi yìhi ñaha espíritú cùndìhi yucu ñávãha
(Mt. 17:14-21; Mr. 9:14-29)

37 Te ingá nduu-ãⁿ cuãnuu-gá yucu-áⁿ ndìhi-güedé, te ío cuéhé ñáyiú cuáháⁿ tnahá ñáhá xii-gá. 38 Te ìⁿ téé ñùhu tnahá tnuú-yu-áⁿ ñí cáháⁿ níhi-dé, te xáhaⁿ-dë xii-gá:

—Mèstrú, ío cáháⁿ ndàhú-í núú-n ñùu vá cùndèe iní-n càda tātna-n déhe-í, chí ìⁿdìi duha-dé ndécú, 39 te yìhi ñaha espíritú cùndìhi yucu ñávãha xii-dé, te òré ná nàtnìi ñaha-xi xii-dé, te dàcana saa ñaha-xi, te ndàda ruúⁿ ñáhá-xí xii-dé, te tàva-xi tíñú yuhu-dé. Te ío dándoho ñaha-xi xii-dé, chí ndéé núú ñà cúú-gã, te dàña ñaha tnaa-xi xii-dé. 40 Te sa ní cáháⁿ ndàhú-í núú cuè téé xica cuu ndìhi-n queñuhu-güedé-xi, dico ñá túú ní ndàcu-güedé —càchí-dé xáhaⁿ-dë xii-gá.

41 Te Jèsús ní xáhaⁿ-gã xii nchaa ñáyiú:

—jNchaa nchòhó ñáyiú ndècu ñuyúú-a ío sàá iní-ndó, chí ñá túú cuìní-ndó quèndáá iní-ndó Yã Ndiöxí! Te ní cuu vãi nduu quide ndee iní-í nchaa sá quidé-ndó, ¿te ná ndéé ama vá dúcáⁿ-gã cada-ndo-i? —càchí-gá xáhaⁿ-gã xii-yu.

Te ní xáhaⁿ-gã xii téé cùhú déhe-xi-áⁿ:

—Taxi déhe-n ìha —cachí-gá xáhaⁿ-gã xii-dé.

42 Te òré cuáháⁿ téé cuechi-ãⁿ núú-gã, te espíritú cùndìhi yucu ñávãha-áⁿ ñí dánduá ñáhá-xí xii-dé, te sàhni yìhí ñáhá tùcu-xi xii-dé ní cùu, dico Jèsús níhi ní cáháⁿ-gá ní tenàá-gá espíritú-áⁿ, te ní quee ñaha-xi xii-dé, te ní nacuéha cuèndá ñáhá-gã xii-dé tātá-dë. 43 Te ncháá-yu ní cuñúhu-yu sá dúcáⁿ ñí cuu, te ní cachí-yu sá ìo càhnu cuu Yã Ndiöxí.

Jèsús càháⁿ tucu-gá sá cùú-gá
(Mt. 17:22-23; Mr. 9:30-32)

Te ñini xicuñúhu-yu nàcuáa ní quide Jèsús, te ní xáhaⁿ-gã xii cue téé xica cuu ndìhi-gá:

44 —Nchòhó cundedóho váha-ndo tñùhu na càháⁿ-i-a, te vá ná

cuànaa-ndo, chí yúhú Téé cùu ñaní tnáhá-ndó nchàa-ndo sáá ìⁿ nduu te cuáha cuèndá ñáhá-güedé xii-í núú cuè téé cùu úhú iní ñáhá —càchí-gá xáhaⁿ-gã xii-güedé.

45 Dico cue téé-áⁿ ñà túú ní tècú tnùnì-güedé nàcuáa nduu tñùhu ní xáhaⁿ-gã xii-güedé, te ducaⁿ ñí yáha-güedé, chí ducaⁿ tnàhí ní cachí-gá sá vá tècú tnùnì-güedé, te ní yúhú-güedé cácaⁿ tñùhú-güedé núú-gã nása nduu tñùhu ní xáhaⁿ-gã xii-güedé.

Cue téé ndùcu tñùhu núú tnáhá ñù ndèdacàa-güedé ío-gá cùnùu

(Mt. 18:1-5; Mr. 9:33-37)

46 Te cue téé xica cuu ndìhi-gá ní ngúta-güedé ndátnùhu-güedé ñù ndèdacàa-güedé ío-gá cùnùu, 47 dico Jèsús ní cutnùnì iní-gá nàcuáa sàni iní-güedé ñù ní cana-gá ìⁿ té líhli, te ní sanu tnìi ñaha-gã ìⁿ xio dñi-gá.

48 Te ní xáhaⁿ-gã xii-güedé:

—Nchaa ñáyiú na quèheⁿ cuèndá ìⁿ té líhli dàtná té líhli-a cuèndá sá ñùhú ìní ñáhá-yu xii-í ñá, te cada iní-yu sá yúhú ní queheⁿ cuèndá-yu, te nchaa ñáyiú na quèheⁿ cuèndá ñáhá xii yúhú, te cada iní-yu sá tnàhá Tātá-í Dútú Ndiöxí Yáá ní tendaha ñaha xii-í véxi-í ñuyúú-a ní queheⁿ cuèndá-yu. Te nchaa ñáyiú ío ndàhú iní-xi mee-ni xìnu cuechí-yu, ñáyiú-áⁿ ìo-gá cùnùú-yu —càchí-gá xáhaⁿ-gã xii-güedé.

Ñáyiú ñá túú cùu úhú iní ñáhá cùndìhi ñahá-yu xii-o

(Mr. 9:38-40)

49 Te té Juáá ñu-ni ìⁿ téé xica cuu ndìhi-gá ní xáhaⁿ-dë xii-gá:

—Mèstrú, ní xiní-ndí ìⁿ téé càcunehe ñaha-dé xii-n, te ndèñuhu-dé espíritú cùndìhi yucu ñávãha yìhi ñaha xii ñáyiú, te nchúhú ñá túú ní dàña-gá-ndí ducaⁿ càda-dé, chí ñá túú xica cuu ndìhi ñaha-dé xii-o —càchí-dé xáhaⁿ-dë xii-gá.

50 Te Jèsús ní xáhaⁿ-gã xii-dé:

—Daña-ndo na càda nahi-dé ní cùu, chí ñáyiú ñá túú cùu úhú iní ñáhá xii-o

te cùndihi ñahá-yu —càchí-gá xáhaⁿ-gã xii-dé.

Jèsús càháⁿ-gá dóho té Jàcobó ndihi té Juàá

51 Te òré sa ta cùyatni ndaa Jesús andiu, te ní xica-gá cuáháⁿ-gá ñúú Jerusálén, chi duuⁿ duuⁿ ní sani iní-gá sá quíhíⁿ-gá. 52 Te ní tendaha-gã cue téé yòdo nuu cuáháⁿ, te ní quexìo-güedé ìⁿ ñúú, te ñúú-áⁿ yíndèhu-xi distritú Sàmariá, te ndùcu-güedé ìⁿ vehe cada túha-güedé òré quexìo-gá. 53 Dico ñáyiú Sàmariá ñá túú ní cuíní-yu cuáñaha núú-yu vehe, chi cuendá sá ní cutnùní iní-yu sá ìchi yáha-ni-gá quíhíⁿ-gá ñúú Jerusálén. 54 Te sá dúcáⁿ ñí quidé-yu ñá túú ní cuíní-yu cuáñaha núú-yu vehe ndetatú-gá, núu ní xáhaⁿ tè Jàcobó ndihi té Juàá cue téé xica cuu ndihi-gá xii-gá:

—Mèstrú, ¿cuíní-n càcáⁿ táhú-ó núú Yá Ndiöxí cuendá dangáva-gá ñuhú danàa-gá ñáyiú ñúú-a dàtná ní quide té Èliás téé ní xóo cáháⁿ tnúhu Yá Ndiöxí ndéé sanaha-ãⁿ? —càchí-güedé xáhaⁿ-güedé xii-gá.

55 Te Jèsús ní nchócótó-gá núú-güedé, te níhi ní cáháⁿ-gá dóho-güedé, te xáhaⁿ-gã:

—Nchòhó, chi ñá túú vãha iní-ndó te núu ducaⁿ càháⁿ-ndó. 56 Chi yúhú Téé cùu ñaní tnáhá-ndó nchàa-ndo véxi-í sá dácãcu nihnu-í ñáyiú, te ñá díú véxi-í sá dácũta nihnu-í-yu —càchí-gá xáhaⁿ-gã xii-güedé.

Te sátá dúcáⁿ ñí xáhaⁿ-gã, te ní xica-gá cuáháⁿ-gá ndihi-güedé ingá ñúú.

Ñáyiú cuíní chitnahá ñáhá xìi Jesús ní cùu

(Mt. 8:19-22)

57 Te ñúhu Jesús ìchi ndihi-güedé, te ìⁿ téé ní xáhaⁿ-dè xii-gá:

—Mèstrú, cuíní-í canchicúⁿ ñáhà-í xii-n ndèni ní cuu na quíhíⁿ-n —càchí-dé xáhaⁿ-dè xii-gá.

58 Te Jèsús ní xáhaⁿ-gã xii-dé:

—Nchaa ñúcuui chi ndècu yaú cúú vèhe-güedi saquíhi-güedi, te nchaa quití ndàva caa tacá-güedi

díquí yutnu, dico yúhú Téé cùu ñaní tnáhá-ndó nchàa-ndo chi ñá túú ndéé cáá vèhe-í ñuyíú-a ndetatú-í —càchí-gá xáhaⁿ-gã xii-dé.

59 Te dàtnùní ní xáhaⁿ tùcu-gá xii ingá-dé:

—Yòhó taquìxi chitnahá ñáhá-n xìi-í —càchí-gá xáhaⁿ-gã xii-dé.

Dico téé-áⁿ ñí xáhaⁿ-dè xii-gá:

—Mèstrú, dañá na nùhú-í cundetú-í cuú tãtã-í te chindúxi-í-dé, te dàtnùní quixi-í chitnahá ñáhá dùcaⁿ-ná-í xii-n —càchí-dé xáhaⁿ-dè xii-gá.

60 Te Jèsús ní xáhaⁿ-gã xii-dé:

—Daña ñáyiú ñá túú sándáá iní ñáhá xìi-í ná chindúxi tnàha meé-yu, chi ñáyiú-áⁿ cúú-yu dàtná ñáyiú ní xíhí cuéi ndècu-ní-yu núú ñuyíú-a. Te yòhó taquìxi, chi quíhíⁿ-n dànehé-n ñáyiú nàcuáa cada Yá Ndiöxí ndíhu ndaha ñàha-gá xii-yu —càchí-gá xáhaⁿ-gã xii-dé.

61 Te ní xáhaⁿ tùcu ingá-dé xii-gá:

—Mèstrú, cuíní-í chitnahá ñáhà-í xii-n, dico díhna-gá dañá na nùhú-í cada ndee iní-í nchaa ñáyiú ndècu vehe-í, te dàtnùní quixi-í —càchí-dé xáhaⁿ-dè xii-gá.

62 Te Jèsús ní xáhaⁿ-gã:

—Nchaa ñáyiú ní sándáá iní ñáhá xìi-í, te núu vá cãchicúⁿ nihnu ñáhá-yu ní yùhu ní iní-yu, te cúú-yu dàtná ìⁿ téé ní tní ndaha làtú cutu-dé, chi téé-áⁿ núu na ndàcoto-dé ndàa sátá-dè òré xítú-dè, te vá quíhíⁿ ndáa làtú-dé ducaⁿ sãtnahá-xi cúú-yu. Te cue ñáyiú chi vá cúú ndáa-yu nàcuáa ndíhu ndaha-gá dava-gá ñáyiú —càchí-gá xáhaⁿ-gã xii-dé.

10

Jèsús téndàha-gá únídico úxí cue téé quíhíⁿ cáháⁿ tnúhu-gá núú ñáyiú

1 Te sátá dúcáⁿ ñí cuu, te ní cáxi tucu Xítohó Jesucristú únídico úxí cue téé codonù-güedé quíhíⁿ-güedé cáháⁿ-güedé tnúhu-gá nchaa ñúú, ndihi nchaa dava-gá xichi núú quíhíⁿ-gá, te ndi ndúú ndi ndúú-güedé tendaha ñàha-gá

xii-güedé quíhíⁿ-güedé. ² Te cùmání-gã caca-güedé, te ní xáhaⁿ-gã xii-güedé:

—Nchòhó xìní-ndó sã òré ná sàà yóo cuu nchaa sá xítú ñáyiú, te ío vài cuu. Te na càchí tnúhu ndáá-í xii-ndo sã dàtná vài sá xítú ñáyiú cuu, ducaⁿ ío vài ñáyiú cùmání cundedóho tnúhu Yá Ndiòxí te ío sacú ñáyiú dàcuaha ñaha xií-yu tnúhu-gá, núu xíáⁿ xìní ñùhu-xi cácaⁿ-ndó núú Yá Ndiòxí cuendá sá ná dàcaháⁿ-gá iní ñáyiú cáháⁿ-yu tnúhu-gá núú ñáyiú cùmání cundedóho tnúhu-gá. ³ Te nchòhó cúú-ndó dàtná cue mbéé cue quítì cuáháⁿ núú yíhí cuè quítì dééⁿ. Chi tendaha ñaha-í xii-ndo quíhíⁿ-ndó núú xíndecu nchaa ñáyiú cuihna iní-xi. ⁴ Te vá cánèhe-ndo ñunu cuhuⁿ ndachiuⁿ-ndo, ni núú cúhúⁿ díhúⁿ-ndó, te ni vã cádá túha-gá-ndó chàú-ndó chi ñiu-ni chàú yíhí-ndó-áⁿ xíáⁿ-ni quíhi-ndo, te vá ío cuyaa-ndo cáháⁿ ndíhi-ndo ñáyiú ñùhu ichi. ⁵ Te òré ná quèxio-ndo ìⁿ vehe, te duha cúñaha-ndo xii ñáyiú dìi vèhe-xi-áⁿ: “Yá Ndiòxí chindee ñaha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu. ⁶ Te núu ñáyiú-áⁿ ní nduu táhú-yu sá cùndecu váha iní-yu núú Yá Ndiòxí, te cuu-xi sá vãha sá cúú-xí-yu tnúhu cúñaha-ndo-áⁿ, dico núú ñá túú ní càháⁿ váha ndíhi ñáhá-yu xii-ndo, te cúñaha-ndo sã vã cúú-xí sã vãha sá cúú-xí-yu. Dico núú ní cáháⁿ váha ndíhi ñáhá-yu xii-ndo, ⁷ te ñiu-ni vehe-áⁿ cada vehe tnaa-ndo, te ñá túú-gã ndéé nducu-ndo vèhe cundecu-ndo, te caxi-ndo nchaa sá ná tàxí-yu, chi nchaa cue téé quide chiuⁿ dacuití tãú-güedé sá ñíhí-güedé sá cáxí-güedé cuendá nchaa chiuⁿ quide-güedé. ⁸ Te núú ní sáá-ndó ìⁿ ñúú núú ní queheⁿ cuendá ñáhá-yu xii-ndo, te caxi-ndo nchaa sá ná tàxí-yu. ⁹ Te cada tátna-ndo cuè ñáyiú cùhú xíndecu ñúú-áⁿ, te cúñaha-ndo xii-yu sá sã ní sáá nduu ndíhu ndaha ñaha Yá Ndiòxí xií-yu. ¹⁰ Dico núú ní sáá-ndó ìⁿ ñúú núú ñà túú ní queheⁿ cuendá ñáhá-yu xii-ndo, te tñi-ndo ìchi cuita

cáháⁿ-ndó cuáháⁿ, te cúñaha-ndo xii-yu: ¹¹ “Ndéé tícá chúhmá ní tñi sáhá-ndí ñúú-ndó nàquidi-ndí, te duha quide-ndí cuendá cutnùní iní-ndó sã ñà túú quide váha-ndo ndècu-ndo. Dico cunaha-ndo sã sã ní sáá nduu ndíhu ndaha ñaha Yá Ndiòxí xii-ndo ni cuu”, duha cúñaha-ndo xii-yu. ¹² Te na càchí tnúhu-í xii-ndo sã ná sáá nduu càda ndáá Yá Ndiòxí cuèchi nchaa ñáyiú, te ñáyiú ñúú-áⁿ ío-gá ndohó-yu dàvá-áⁿ dàcúxí ñáyiú ñúú Sòdomá —càchí-gá xáhaⁿ-gã xii-güedé.

Cuendá ñáyiú dava ñúú ñá túú sàndáá iní tnúhu Xitohó Jesucristú (Mt. 11:20-24)

¹³ Te Jèsús xáhaⁿ-gã xii ñáyiú dava ñúú ñá túú sàndáá iní tnúhu-gá:

—¡Ndàhú nchòhó cue ñáyiú ñúú Coràzín! ¡Te ndàhú nchòhó cue ñáyiú ñúú Bètsaidá! Chi núú dìcò ñúú Tírú, ndíhi ñúú Sìdón ní quide-í nchaa sã vã yõo tnahí ndàcu cada datná ní quide-í ñúú-ndó-áⁿ ní xìní-ndó ñá, te sá ndéé ama-gá cuihnú-yu dóo ndàhú, te cunucóo-yu núú yáa cuendá sá ndíxí cuèchi iní-yu sã ñà túú quide váha-yu ni cuu. ¹⁴ Dico sáá nduu te ío-gá dandòho ñaha Yá Ndiòxí xii-ndo dàcúxí ñáyiú ñúú Tírú, ndíhi ñáyiú ñúú Sìdón. ¹⁵ Te nchòhó ñáyiú ñúú Capèrnaúm quide iní-ndó sã sã cuándaa-ndo àndíu, dico ñáhá chi núú ùhú núú ndàhú cundecu-ndo —duha ní xáhaⁿ-gã xii nchaa ñáyiú ñúú-áⁿ.

¹⁶ Te xáhaⁿ tùcu-gá xii cue téé tendaha-gã quíhíⁿ cáháⁿ tnúhu-gá-áⁿ:

—Nchaa ñáyiú na cùndedóho nchaa tnúhu cáháⁿ-ndó, te cada iní-yu sã yùhú càháⁿ-í ndèdóho-yu, te nchaa ñáyiú na dàquee tíhú ñáhá xii-ndo, te tnahá yùhú daquèe tíhú-yu, te nchaa ñáyiú ducaⁿ na dàquee tíhú ñáhá xii-í, te tnahá Tãtà-í Dútú Ndiòxí Yáá ní tendaha ñaha xii-í véxi-í ñuyíú-a dàquee tíhú-yu —càchí-gá xáhaⁿ-gã xii-güedé.

Te ducaⁿ te ní xica-güedé cuáháⁿ-güedé.

Ní nasáá cue téé únídico úxí ní tendaha Jèsús ní sáháⁿ ní cáháⁿ tnúhu-gá núú ñáyiú

17 Te cue téé únídico, úxí-án nĩ nasáá-güedé te súúni cùdíí ìní-güedé, te xáhaⁿ-güedé xii Jèsús:

—Mèstrú, ndéé espíritú cùndìhi yucu ñávãha sàndáá ìní ñáhá-xi xii-ndí òré cáci nèhe ñaha-ndí xii-n —càchí-güedé xáhaⁿ-güedé xii-gá.

18 Te Jèsús ní xáhaⁿ-gã:

—Ndáá càháⁿ-ndó chi yúhú ní xiní-í cùtnàhá ní xíta nihnu yucu ñávãha, chi dàtná ní ngava ìⁿ tasaⁿ nĩ ngava-xi ñuyú-a. 19 Te dàtná quidé-ndó òré xènihnu-ndo ìⁿ cóó, àdi ìⁿ nchacua ducaⁿ cada-ndo daquee tíhú-ndó yucu ñávãha, te ñá túú nã cada ñaha-xi xii-ndo, chi ní taxi-í tnúhu ndee ìní ndécú ndìhi-ndo. 20 Dico vá cùdíí ìní-ndó cuèndá sá sàndáá ìní ñáhá cuè espíritú cùndìhi yucu ñávãha xii-ndo, chi cùdíí ìní-ndó cuèndá sá sà yodo tnuní-ndó núú tùtú Yã Ndiõxí Yá ndécú àndi —cachí-gá xáhaⁿ-gã xii-güedé.

*Jèsús cùdíí ìní-gá
(Mt. 11:25-27; 13:16-17)*

21 Te òré-áⁿ súúni nĩ quide díí ìní ñáhá Espíritú Yã Ndiõxí xii Jèsús, te ní xáhaⁿ-gã xii Yá Ndiõxí:

—Yòhó Tãtà-í Dútú Ndiõxí, ío chiñuhu ñaha-í xii-n chi ñi-n tàxi tnuní-n àndi ndìhi ñuyú-a, te dànehé-n cuè ñáyíu nchaa tnúhu váha, te ñi-ni ñáyíu-áⁿ cùú-yu ñáyíu ñá túú cùtnuní ìní-xi nchaa tnúhu càháⁿ cue téé túha, te nchaa tnúhu càháⁿ-n-ãⁿ ñà túú ní dàtúu-n núú ñáyíu càchí sá ío túha, te ío váha sàá díquí-xi. Te ducaⁿ quide-n, chi ducaⁿ cuìní-n cùnduu —cachí-gá xáhaⁿ-gã xii Yá Ndiõxí.

22 Te xáhaⁿ tùcu-gá xii cue téé ní nasáá-áⁿ:

—Mee Tãtà-í Dútú Ndiõxí ní cachí-gá sá cùnùu-í núú nchaa-ndí túhú sá ío. Te vá yò ìⁿ xiní nàcuáa sàni ìní yúhú Déhe Dútú Ndiõxí, chi ìⁿndí díí-ni mee-gã xiní-gá nàcuáa sàni ìní-í. Te ducaⁿ ìⁿndí-ni yúhú xiní-í nàcuáa sàni ìní mée-gã, te nchaa ñáyíu càchí ìní-í sá quìní-yu nàcuáa sàni ìní Tãtà-í Dútú Ndiõxí te xitnùhu-í-yu, te vá yò ìⁿ-gã xiní nàcuáa sàni ìní-gá

chi ñi-ni ñáyíu ducaⁿ xitnùhu-í-áⁿ xiní-yu —càchí-gá xáhaⁿ-gã xii-güedé.

23 Te ní nchócótó-gã núú xĩndecu mee-ni cuè téé xica cuu ndìhi-gá, te ní xáhaⁿ-gã xii-güedé:

—Váha táhú nchòhó ndìhi nchaa ñáyíu ndèhe nchaa nacuáa quide-í vitna. 24 Chi ío cuéhé cue téé ní xóo càháⁿ tnúhu Yá Ndiõxí ndéé sanaha, ndìhi cue téé ní xĩndaha ñàha xii ñáyíu ní cuìní-güedé cundehe-güedé nchaa sá ndéhé-ndó quide-í vitna, te ñá túú ní xiní-güedé, te ní cuìní-güedé cund-edóho-güedé nchaa tnúhu càháⁿ-í ndèdóho-ndo vitna, te ñá túú ní xĩndedóho-güedé —càchí-gá xáhaⁿ-gã xii-güedé.

Nàcuáa ní quide ìⁿ téé distritú Sàmariá

25 Te ìⁿ téé dàcuaha ñaha xii ñáyíu nchaa tnúhu ní chídó tnuní ndí Moisés ní ndacuñí-dé xító ndéé-dé Jèsús núú nása cunduu tnúhu càháⁿ-gã, te xáhaⁿ-dè xii-gá:

—Mèstrú, ¿ná cúú sã càdà-í cuèndá nduu táhú-í cundecu-í ndìhi Yá Ndiõxí nĩ caa nĩ quíhíⁿ-í? —càchí-dé xáhaⁿ-dè xii-gá.

26 Te Jèsús ní xáhaⁿ-gã xii-dé:

—Cuìní-í cachí tnúhu-n nása càháⁿ-xi núú tùtú ndí Moisés —cachí-gá xáhaⁿ-gã xii-dé.

27 Te xáhaⁿ-dè xii-gã:

—Ndí Moisés càchí ndí núú tùtú ndí: “Cuu ìní-ndó Dútú Ndiõxí Yá cúú Ndiõxí-ndó nĩ yuhu nĩ ìní-ndó, te caní ìní-ndó càdà-ndo datná cuìní mée-gã, te mee-ni tnúhu váha caní ìní-ndó nàcuáa cuu vii cuu váha-ndo núú-gã, te coo ìní-ndó cùu ìní-ndó-gã. Te cuu ìní-ndó tnàha ñáyíu-ndo dàtná cúú ìní-ndó mée-ndo”, duha càchí ndí núú tùtú ndí —càchí-dé xáhaⁿ-dè xii-gã.

28 Te Jèsús ní xáhaⁿ-gã:

—Váha-ni càháⁿ-n, te núu cada-n nàcuáa càháⁿ-n ãⁿ, te nduu táhú-n cùndecu-n ndìhi Yá Ndiõxí nĩ caa nĩ quíhíⁿ —cachí-gá xáhaⁿ-gã xii-dé.

29 Te sá dúcáⁿ nĩ xáhaⁿ Jèsús xii-dé núu ndùcu-dé nàcuáa cada-dé cácu nihnu-dé núú tnúhu ní càháⁿ-dè, te ní xícaⁿ tnúhú-dè núú-gã, te xáhaⁿ-dè:

—¿Yoo cùu tnahà ñáyiú-í-í? —
càchí-dé xáhaⁿ-dě xii-gá.

³⁰ Te Jèsús ní cani-gá ìⁿ cuèndú nùú-dě nàcuáa tecú tnùnì-dé tnúhu-gá, te xáhaⁿ-gá:

—Ìⁿ téé ní ndee-dé ñuú Jerusàlén ñúhú-dě ichi cuánuu-dé cuáháⁿ-dé ñuú Jericó, te ní quee ñadúhú ichi-dé ní dúhú-güedé dóó níhnú-dě, ndihì nchaa sá néhé-dě, te ní caniha vihi-güedé, te nchìto diu-ná-dé ní dáña ñàha-güedé te cuáháⁿ-güedé.

³¹ Te mei òré cátùu-dé-áⁿ ñúhú ìⁿ dútú ichi-áⁿ, te òré ní xinì ñáhá dútú-áⁿ xii-dé, te ìⁿ xio-ni ní xócóo ndee-dé ní yáha-dé. ³² Te ñùhu tucu ìⁿ téé cùu levítá ichi-áⁿ, te òré ní xinì-dé téé-áⁿ cátùu-dé, te diu-ni ducaⁿ ní quide-dé ìⁿ xio-ni ní xócóo ndee-dé ní yáha-dé. ³³ Dico ìⁿ téé distritú Sàmariá ñúhú tucu-dé ichi-áⁿ te òré ní xinì-dé téé-áⁿ cátùu-dé, te ní cundàhú iní ñáhá-dě. ³⁴ Te ní sáháⁿ-dé nùú cátùu téé-áⁿ, te ní quide tátna-dé nchaa nùú ñí nícuèhé xii téé-áⁿ ñí chihi-dé yúcu, te ní dácútú-dé. Te dátñunì ní dácáá ñàha-dé sátá quiti-dé, te ndèca ñàha-dé cuáháⁿ ìⁿ vehe nùú sácóo cue ñáyiú sácúhuⁿ ichi, te yacáⁿ ní xito ñàha-dě. ³⁵ Te ingá nduu òré ní nucúhuⁿ téé Samaritánú-áⁿ ichi, te ní tava-dé úú díhúⁿ denàriú, te ní sáha-dé téé cùu xitohó vehe-áⁿ, te ní xáhaⁿ-dè: “Coto saú-n tée-a, te nùú ñá ní tnàhá díhúⁿ sã ñí taxi-í, te cuèi na dàndoñuhu-gá-n díhúⁿ-n cuèndá-dé, te òré ná quixi tucu-í te nacháhu-í”, duha ní xáhaⁿ tée Samaritánú-áⁿ xii téé dii vèhe xíáⁿ. ³⁶ Te vitna cáháⁿ, te nùú ndèdacàa cue téé únì-áⁿ cúú-güedé téé váha cùu iní-güedé tnàha ñáyiú-güedé — càchí-gá xáhaⁿ-gá xii téé dàcuaha ñàha xii-í ñáyiú-áⁿ nchaa tnúhu ní chídó tnùnì ndíi Moisés.

³⁷ Te téé-áⁿ ñí xáhaⁿ-dè xii-gá:

—Téé ní cundàhú iní ñáhá xii téé ní dánícuèhé ñáhá cuè ñadúhú-áⁿ, téé-áⁿ cúú-dé téé cùu iní tnàha ñáyiú-xi — càchí-dé xáhaⁿ-dè xii-gá.

Te Jèsús ní xáhaⁿ-gá:

—Cuáháⁿ te diu-ni ducaⁿ càda-n tnahá-n —càchí-gá xáhaⁿ-gá xii-dé.

Jèsús ndécú-gã vehe tá Mårta ndihì tá Måría

³⁸ Te Jèsús ñúhú-ni-gã ichi cuáháⁿ-gá ndihì cue téé xica cuu ndihì-gá, te ní sáa-gá ìⁿ ñuú líhli, te xíáⁿ ñí quee ìⁿ xíchí nání Mårta ní cáháⁿ ñáhá-xí xii-gá vehe-xi. ³⁹ Te tá Mårta ndècu ìⁿ cùhú-xi nàni-xi Mariá, te xíchí-áⁿ ñí ngóo-xi nùú Jèsús ndèdóho-xi nchaa tnúhu càháⁿ-gá. ⁴⁰ Te tá Mårta-áⁿ ndihì vihi-ni iní-xi quide-xi chiuⁿ-xi, te ní sáháⁿ-xi nùú Jèsús, te ní xáhaⁿ-xi:

—Mèstrú, ¿náa ñá túú tnàhí sàni iní-n sã ñí dándóo ndaha ñàha cùhú-í nchaa chiuⁿ-áⁿ? Cùñaha saú ná quixi-xi chindee ñàha-xi —càchí-xi xáhaⁿ-xi xii-gá.

⁴¹ Dico Jèsús ní xáhaⁿ-gã:

—Yòhó Mårta, ñùhu tneñu vihi-n, te ndihú iní-n sã ño vài chiuⁿ-n ñuhu, ⁴² dico xini ñuhu vihi-gá-xi cundèdóho-n tnúhu càháⁿ-í, chí tá Måría-a sa ndèdóho-xi tnúhu-í, te vá yóo ìⁿ ndacu xocàni tnúhu-í sã ñí ngúndecu ndihì-xi —càchí-gá xáhaⁿ-gã xii-xi.

11

Jèsús dánèhé-gá cue téé xica cuu ndihì-gá nàcuáa cáháⁿ ndihì-güedé Yã Ndiõxí

(Mt. 6:9-15, 7:7-11)

¹ Te ìⁿ nduu càháⁿ ndihì Jèsús Yã Ndiõxí ìⁿ xichi, te sátá ñí yáha ní cáháⁿ ndihì-gá Yã Ndiõxí, te ní xáhaⁿ ìⁿ téé xica cuu ndihì-gá xii-gá:

—Mèstrú, danèhé ñáhá xii-ndí nása cáháⁿ ndihì-ndí Yã Ndiõxí dàtná ní quide ndí Juàá ní dánèhé ndíi cue téé ní xica cuu ndihì ndíi —càchí-dé xáhaⁿ-dè xii-gá.

² Te Jèsús ní xáhaⁿ-gã:

—Òré cáháⁿ ndihì-ndo Yã Ndiõxí, te cachí-ndó: Yòhó tátá-ndí Dútú Ndiõxí Yaá ndécú àndiú, nchaa ñáyiú na càháⁿ-yu sá cúú-n Yàá ío yiñuhu.

Te xicáⁿ táhú-ndí nùú-n sã ná sàá nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndiú.

3 Te xicáⁿ táhú-ndí núú-n sá táxí-n sá cándeca iní-ndí ìⁿ nduu ìⁿ nduu.

4 Te cada càhnu iní-n nchàa yícá cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

Te vá dáñá-n dàcaháⁿ ñáhá yucu ñávàha xii-ndí cada-ndí sá ñà túú vâha, chi coto ñaha-n xii-ndí cuendá sá vâ dúcáⁿ càda ñaha-xi,

duha cáháⁿ-ndó

—càchí-gá xáhaⁿ-gã xii-güedé.

5 Te Jèsús ní xáhaⁿ tùcu-gá:

—Te núu ndèdacaà nchohó ndécú ìⁿ téè tnàha tnúhu ndìhi-ndo, te dava niú cuáháⁿ-ndó vehe-dé, te òré ní quexìo-ndo, te xáhaⁿ-ndo xii-dé: “Véxi-í núu vá cùndèe iní-n tàxi nuu-n úní tnàhá pàá, 6 chi ìⁿ téè xini tnàhá ndìhi-í ñúhú-dè ichi ní quexìo-dé vehe-í, te ñà túú tnàhí ná cuñaha-í caxi-dé”, quesaha-ndo cùñaha-ndo. 7 Te téè-án cáháⁿ-dè ndéé xití vehe-dé, te cùñaha-dè xii-ndo: “Vá dásatú nihá-n chi ndèdí yuyèhe-í, te càa-í ndìhi cue landú-í, te vá cúú ndàcòo-í taxi-í sá cuini-n”, quesaha-dè cùñaha-dè xii-ndo. 8 Te na càchí tnúhu-í xii-ndo sá cuèi cùu-dé téè tnàha tnúhu ndìhi-ndo, dico ducaⁿ cùñaha-dè xii-ndo, dico dacuití sá ndàcòo-dé taxi-dé sá cuini-ndó cuendá sá vâ dásatú-gá-ndó iní-dé. 9 Te yúhú càchí-í xii-ndo sá cãcáⁿ-ndó núu ná cuini-ndó núú Yã Ndiõxí te taxi-gá. Te vá dáñá ndèé-ndó cãcáⁿ-ndó núú-gã núu ná cuini-ndó, te ducaⁿ te níhí-ndó. Te cada iní-ndó sá ní quexìo-ndo vehe ìⁿ tnaha ñáyiú-ndo te ní cáháⁿ-ndó, te ñáyiú-án ní tedóho ñáhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chí Yã Ndiõxí tedóho ñaha-gã xii-ndo, te taxi-gá sá ná càcáⁿ-ndó núú-gã. 10 Chi nchaa ñáyiú ducaⁿ xiquide te Yã Ndiõxí tedóho ñaha-gã xii-yu nihí-yu sá cuini-yu. Te ñu-ni ducaⁿ tùcu nchaa ñáyiú na càcáⁿ núú-gã ìⁿ sá cuini-yu, chi sãñaha-gã sá xicáⁿ-yu núú-gã. Te ñu-ni ducaⁿ tùcu níhí nchaa ñáyiú ñà túú dàña ndéé

xicáⁿ núú Yã Ndiõxí sá cuini-yu, chi nihí-yu.

11 Te nchòhó cue téè cùu tátá ñà túú cùndèe iní-ndó cuñaha-ndo cuè déhe-ndo ìⁿ yúú caxi-güexi òré xicáⁿ-güexi ìⁿ pàá núú-ndó càxi-güexi, te ní ñà túú cùndèe iní-ndó cuñaha-ndo ìⁿ cóo caxi-güexi òré xicáⁿ-güexi ìⁿ chácá núú-ndó càxi-güexi. 12 Te ní ñà túú cùndèe iní-ndó cuñaha-ndo ìⁿ nchacua caxi-güexi òré xicáⁿ-güexi ìⁿ ndíú núú-ndó càxi-güexi. 13 Te nchòhó cuèi ndéé dau sáá iní-ndó, dico sãha-ndo cuè déhe-ndo sá vâha xèxi-güexi òré xicáⁿ-güexi núú-ndó. Te núu nchòhó ducaⁿ quide-ndo, ìte uuⁿ-gá ducaⁿ quide Tátá-ndó Dütú Ndiõxí Yáá ndécú àndiú, chi taxi-gá Espiritú-gá cundecu ndìhi-ndo te núu na càcáⁿ-ndó núú-gã! —càchí-gá xáhaⁿ-gã xii-güedé.

Càchí-güedé sá ndécú ndìhi Jesús yucu ñávàha

(Mt. 12:22-30; Mr. 3:20-27)

14 Te Jèsús ndèñuhu-gá espíritú cùndìhi yucu ñávàha yìhi ñaha xii ìⁿ téè ní quide ñìhí-xi, te òré ní ndèe ñaha espíritú-án xii téè-án, te ní nacáháⁿ-dè. Te ío ní cuñúhu ñáyiú sá dúcáⁿ ní quide-gá. 15 Te davá-yu ní xitnàhá-yu:

—Téè-a ndèñuhu-dé nchaa espíritú cùndìhi sácuíhná yìhí ñaha xii ñáyiú, chí ñu-ni sácuíhná-án chindèe ñaha-xi xii-dé, te ñu-ni-xi tàxi tnuní-xi nchaa espíritú-án —càchí-yu xitnàhá-yu.

16 Te davá-yu xitò ndèe ñáhá-yu xii-gá, te xãháⁿ-yu sá ná cadá-gã ìⁿ sá vâ yõ tnàhí ndàcu cada ñuyíú-a cundèhé-yu nàcuáa cutnùní iní-yu núu ndáá sá Yã Ndiõxí ní tendaha ñaha-gã xii-gá véxi-gá ñuyíú-a. 17 Dico mee-gã sa ní cutnùní iní-gá nchaa nàcuáa sàni iní-yu, núu ní xáhaⁿ-gã xii-yu:

—Te nchòhó xini-ndó sá núu ìⁿ téè yìndaha ìⁿ nacióⁿ vá cúú ìⁿnuu-dé ndìhi cue téè cùndìhi-dé, te vá cùdì-dé cunuu-dé. Te ñu-ni ducaⁿ sãtnahá tucu-xi cùu cue ñáyiú xindecu ìⁿ-ni

vehe, chi núu vá cúú ñⁿnuú-yu cundecú-yu, te vá cúdíi-yu cundecu càhnú-yu. ¹⁸ Te ducaⁿ sãtnahá-xi cùu sãcuíhná, chi núu vá cúú ñⁿnuu-xi ndihi nchaa espíritú cùndihi-xi te vá cúdíi-xi cundecu-xi taxi tnùnì-xi. Te duha càháⁿ-í chi nchòhó càchí-ndó sã sãcuíhná chindèe ñaha-xi xii-í queñuhu-í nchaa espíritú cùndihi-xi yíhi ñaha xii ñáyiú. ¹⁹ Te núu yúhú quidé cuendá-ndó sã sãcuíhná chindèe ñaha-xi xii-í, te xini ñuhu-xi cada cuendá-ndó yòo chindèe ñaha xii cue téé xica cuu ndihi-ndo queñuhu-güedé nchaa espíritú cùndihi-xi yíhi ñaha xii ñáyiú. Te mee-güedé càchí-güedé sã nchòhó ñá túú càháⁿ ndáá-ndó sã dúcáⁿ càháⁿ-ndó. ²⁰ Te ndáá sã Yã Ndiõxí chindèe ñaha-gá xii-í queñuhu-í nchaa espíritú cùndihi sãcuíhná yíhi ñaha xii ñáyiú, te xiãⁿ cutnùnì iní-ndó sã sã ní sáá nduu ndíhu ndaha ñaha Yã Ndiõxí xii-ndo.

²¹ Te núu ñⁿ téé ío ndee, te súúni ñⁿ cáá-dé, te ndéé-dé vehe-dé cuendá sã vá cuíta, te ní quide túha-dé titni sã dèéⁿ, te ío váha nèhe váha-dé nchaa ndachìuⁿ-dé. ²² Dico núu quexìo ñngá téé ío-gá ñⁿ cáá te ndee-gã-dé, te ngüíta-dé nãá-dé ndihi téé ndèé vehe-xi-áⁿ, te cada cànári ñáhá tãe-áⁿ xii téé ndèé vehe-xi-áⁿ, te quendeé-dé nchaa sã dèéⁿ cùndèe iní-dé, te taxi tnùnì-na-dé nchaa xiãⁿ, ndihi nchaa sã ndécú ndíhi-dé, te dàcáhnü-dé nchaa cue téé cùndihi-dé nchaa sã ná ñíhí-dé.

²³ Te nchaa ñáyiú ñá túú cùndihi ñaha xii-í, te cùu úhú iní ñáhã-yu, te nchaa ñáyiú ñá túú chindèe ñaha xii-í, te dàquee tíhü-yu chìuⁿ quide-í.

Espíritú cùndihi yucu ñávãha sã nãchòcãva xito cùu uú
(Mt. 12:43-45)

²⁴ Te òré ná quèe ñaha ñⁿ espíritú cùndihi yucu ñávãha xii ñⁿ ñáyiú, te cuáhãⁿ-xi ndùcu-xi ñⁿ xichi núú cùndècu-xi te ñá ñíhí-xi, te ní sani iní-xi: “Vãha-gá núhú tucu-í núú ñí xíndecu-í”, duha ní sani iní-xi. ²⁵ Te cuánuhú-xi, te òré ní nasáá-xi, te ní xiní-xi sã cáá iní ñáyiú-áⁿ dàtná

cáá-nã ñⁿ vehe ní natíhú, chi ní nduu vii-ná, vá yòo-gá ndécú. ²⁶ Te sãtã dúcãⁿ te ní xica-xi cuáhãⁿ-xi cuándúcú-xi ùsã tnáhã espíritú cùndihi-xi sã nèhé víhí-gã xíquide, te òré ní níhí-xi cue espíritú-áⁿ te ndèca ñaha-xi cuáhãⁿ cuendá ngúndecu ndíhi-xi ñáyiú-áⁿ, te ñáyiú-áⁿ uuⁿ-gá nãndi yãha-yu dàcúúxí ndèe díhna – càchí-gã xáhaⁿ-gã xií-yu.

Cuendá ñáyiú cùu váha ndisa iní-xi

²⁷ Te ñini càháⁿ Jèsús tnúhu-áⁿ nũú ñáyiú ní cáháⁿ níhi ñⁿ ñadíhí tnuú-yu, te xáhaⁿ-aⁿ xii Jèsús:

–¡Sã váha táhú ñadíhí ní dácácú ñaha xii-n, te ní dácuéhnú ñaha-aⁿ! – cachí-aⁿ xáhaⁿ-aⁿ xii-gã.

²⁸ Te Jèsús ní xáhaⁿ-gã:

–¡Vãha-gã táhú nchãa ñáyiú sãcúndedóho nchaa tnúhu càháⁿ Yã Ndiõxí te sãndáá iní-yu! –càchí-gã xáhaⁿ-gã xii-aⁿ.

Ñáyiú ñá túú sãndáá iní ñáhã xii Jèsús cuínì-yu cada-gã ñⁿ sã vã yòo tnáhí ndàcu cada
(Mt. 12:38-42; Mr. 8:12)

²⁹ Te ta tàcã vai ñáyiú te dàdehnde tnaha-nã-yu, te ní ngüíta Jèsús xáhaⁿ-gã xií-yu:

–Nchòhó ñáyiú ndècu ñuyúú vitna, chi ío sãá iní-ndó, te cuínì-ndó càda-í ñⁿ sã vã yòo tnáhí ndàcu cada cuendá cuínì-ndó cùtnunì iní-ndó nũu ndisa sã Yã Ndiõxí ní tendaha ñaha-gã xii-í véxi-í. Dico ñá túú nãgã cada-í quinì-ndó, chi sa ñíhí-ndó tnúhu nãcuãa ní yãha ndí Jónás téé ní xóo cáháⁿ tnúhu Yã Ndiõxí ndèé sanaha, te diu-ni ducaⁿ yãha yúhú tucu. ³⁰ Chi nchaa ñáyiú ñuú Ñinivé ní cutnùnì iní-yu sã Yã Ndiõxí ní tendaha ñaha-gã xii ndí Jónás ní sáhãⁿ ndí ñuú-yu. Te ducaⁿ sãtnahá-xi cùu yúhú Téé cùu ñanì tnáhã-ndó nchãa-ndo, chi sãá nduu te cutnùnì iní-ndó sã Yã Ndiõxí ní tendaha ñaha-gã xii-í véxi-í ñuyúú-a. ³¹ Te na sãá nduu càda ndáá Yã Ndiõxí cuéchi nchaa nchòhó ñáyiú ndècu ñuyúú-a, te dàvã-áⁿ quinì-ndó ñⁿ ñadíhí ñaha ní xíndaha ñⁿ nacióⁿ cáá ndãa xio cuha núú quené nchicanchii.

Te ñaha-án ïo xica ñi xíndecu-aⁿ, te ní sáháⁿ-aⁿ ní xíndedóho-aⁿ nchaa tnúhu ní cáháⁿ ndíi Salòmón, chí ndíi-án ïo ní sáá sá xíní tnùní ndíi. Te ñaha-án cáháⁿ-aⁿ dává-án sá nchòhó ñáyi ndècu vitna ñá túú ní quide ndáá-ndó. Dico vitna iha ndècu ndíi ñaha-ndo xii yúhú, te ñu-í ío-gá cúnúu-í dàcúúxí ndíi Salòmón. ³² Te ñu-í nduu càda ndáá Yá Ndiòxí cuèchi nchaa nchòhó ñáyi ndècu ñuyíu-a vitna, dává-án tnàhá cue ñáyi ní xíndecu ñuú Níivé cundecú-yu núú Yá Ndiòxí, te tnàhá-yu cachí-yu sá ñà túú ní quide ndáá-ndó. Chí ñáyi ñuú Níivé-án ñi ndixi túu iní-yu sá ñà túú quide váha-yu ndècú-yu te ní natuhá-yu ichi Yá Ndiòxí cutnàhá ní cáháⁿ ndíi ñaha ndíi Jónás tnúhu-gá xii-yu. Dico vitna iha ndècu ndíi ñaha-ndo xii yúhú té cáháⁿ tucu tnúhu Yá Ndiòxí, te ñu-í ío-gá cúnúu-í dàcúúxí ndíi Jónás.

*Núú-ó cùu-xi datná ñi ñuhú
(Mt. 5:15; 6:22-23)*

³³ Te ñá túú ñi ñi ñáyi tènñuhú ñi linténa, te taxi ndecú-yu ñi núú yídáhu, àdi chiváha-yu xití ñi tídihi, chí taxi ndecú-yu ñi núú ñi cuèndá nchaa ñáyi quíhu vehe cutnùní núú-yu. ³⁴ Te núú-ndó cùu-xi datná ñi ñuhú, chí ñi sá ná quíní-ndó te ndixi túu iní-ndó ñá cùú xiáⁿ, te núú càváha núú-ndó, te ducaⁿ cutnùní iní-ndó ñá cùú sá ndécú núú-ndó, áⁿ te núú cùhú, te vá cutnùní iní-ndó ñá cùú sá ndécú núú-ndó. Te sá dúcáⁿ cùhú núú-ndó te cada iní-ndó sá ndécú-ndó dàtná ñi núú néé. ³⁵ Te ío cada cuèndá-ndó vâ cáni cuèhé iní-ndó cuèndá tnúhu Yá Ndiòxí cuèndá cutnùní iní-ndó nàcuáa cundecu-ndo, chí núu na càni cuèhé iní-ndó cuèndá tnúhu-gá, te cùu-ndo datná ñi ñáyi ñá túú cutnùní núú-xí. ³⁶ Te núu càndoo canine iní-ndó, te mee-ñi sá vâha ñuú iní-ndó, te cutnùní váha iní-ndó tnúhu ndáá dàtná cutnùní váha núú-ndó òré càyú ñuhú, ducaⁿ cutnùní iní-ndó —càchí-gá xáhaⁿ-gá xii-yu.

Jèsús càháⁿ-gá cuèndá cue té cùu fariséu ndíi cue té dàcuaha ñaha xii-í

ñáyi

(Mt. 23:1-36; Mr. 12:38-40; Lc. 20:45-47)

³⁷ Te òré ní ndíi tnúhu ní cáháⁿ Jèsús, te ñi té cùu fariséu ní cáháⁿ ñáhá-dé xii-gá vehe-dé caxi-gá, te cuánguihu-gá vehe-dé, te ní ngóo-gá mèsá. ³⁸ Te té cùu fariséu-án ïo ní cuñúhu-dé, chí Jèsús ñá túú ní ndàha-gá nàcuáa sàni iní-güedé nduu vétú iní Yá Ndiòxí òré ní ngóo-gá caxi-gá dàtná quidé mèe-güedé. ³⁹ Te Jèsús ní xáhaⁿ-gá xii-dé:

—Nchòhó cue té cùu fariséu xíní-ndó sá ío ñáyi nàquete sáta-ñi tàsáⁿ ndíi sáta-ñi còhó, te xití-xi càndehe caduha-ñi. Te ducaⁿ sàtnahá-xi cùu nchòhó, chí ndaha-ñi-ndo nàquete-ndo, te iní-ndó ñà túú nduu ndoo, te nándi dándahú-ndó tnàha ñáyi-ndo, te quèheⁿ-ndo sá ndécú ndíi-yu, te nándi-gá nchaa sá cuèhé sá dúhá ñuú iní-ndó quide-ndo. ⁴⁰ Te nchòhó cùu-ndó cuè té ío ñi iní-xi! ¿Te ná ñá túú cutnùní iní-ndó sá Yá Ndiòxí Yá ní cadúha yiqui cuñú-ó ñu-í-gá ní chíhi-gá iní-ó-áⁿ? ⁴¹ Te nchaa sá vâha ndècu ndíi-ndo cuáha-ndo nchaa ñáyi xini ñuú na cundecu ndíi-yu, te núu ducaⁿ na càda-ndo, te cuu-ndo ñáyi sa ní nduu ndoo ní nduu nine iní-xi.

⁴² Te ndàhú ní cuu nchaa nchòhó cue té cùu fariséu! Chí sàha-ndo Yá Ndiòxí núú ùxí xichi yúcú nání mèntá, ndíi yúcú rúdá, ndíi nchaa dava-gá núú yúcú quèe comidá, dico ñá túú quide ndáá-ndó, te ñi ñà túú ñuú iní-ndó Yá Ndiòxí. Dico tnúhu càháⁿ-í-a tàú-ndó càda-ndo, te ñi vâ dáñá ndèé-ndó càda-ndo nchaa dava-gá sá vâha.

⁴³ Te ndàhú ní cuu nchòhó cue té cùu fariséu! Chí cuíní-ndó cùnucóo-ndo núú sácóo cue té ío cùnuu xití veñúhu, te cuíní-ndó mèe-ñi ndíi tnúhu yíñuú cáháⁿ ndíi ñaha ñáyi xii-ndo nchaa núú xicá cùu-ndo.

⁴⁴ Te ndàhú ní cuu nchòhó cue té dàcuaha ñaha xii ñáyi nchaa tnúhu ní chídó tnùní ndíi Moisés, ndíi nchòhó cue té cùu fariséu chí ío dándahú-ndó mèe-ndo sá quidé ndáá-ndó te ñá

ndàá sá quidé ndáá-ndó! Chi cùu-ndo datná ìⁿ ñáyiú ní xíhí te ní nguíndüxi, te ñá túú cùtnuní-gá ndéé yíndüxi-yu, te cuèi nà yáha ñáyiú dico ñá túú cùtnuní sá yíndüxi ndíyi. Te ducaⁿ sãtnahá-xi cùu nchohó, chi nchaa ñáyiú ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —càchí-gá xáhaⁿ-gã xii-güedé.

⁴⁵ Te ní xáhaⁿ ìⁿ tée dàcuaha ñaha xii-yu nchaa tnúhu ní chídó tnùní ndí Moisés xii-gá:

—Mèstrú, te sá dúcáⁿ càháⁿ-n te tnàhá nchúhú xícuèhé-n ãⁿ —càchí-dé xáhaⁿ-dè xii-gá.

⁴⁶ Te Jèsús ní xáhaⁿ-gã:

—¡Ndàhú ní cuu tnàhá nchaa nchòhó cue tée dàcuaha ñaha xii ñáyiú nchaa tnúhu ní chídó tnùní ndí Moisés! Chi quíde-ndo datná quidé ñáyiú dàcuido ìⁿ tnaha ñáyiú-xi ìⁿ sá ïo véé, te mèé-yu ni lùha ñá túú cuíní-yu cuidó-yu. Te ducaⁿ sãtnahá-xi quíde nchohó chi dànehé-ndó ñáyiú nàcuáa cadá-yu, dico mee-ndo chi ni lùha ñá túú cuíní-ndó càda-ndo nacuáa dànehé-ndó-yu.

⁴⁷ ¡Te ndàhú ní cuu tucu-ndo! Chi càdúha-ndo nùú ñí nguíndüxi cue tée ní xóo cáháⁿ tnúhu Yá Ndiöxí ndéé sanaha cuèndá sá cúnàha-ndo núú yíndüxi cue ndíi, te ñíu-ni cue ñaní tnàhá-ndó ñí sahani-güedé cue ndíi.

⁴⁸ Te nchòhó sa nàha-ndo nacuáa ní quíde cue ñaní tnàhá-ndó, te càchí-ndó sã ñí quíde váha-güedé sá dúcáⁿ ñí sahani-güedé cue ndíi-áⁿ, te vitna càdúha-ndo nùú ñí nguíndüxi cue ndíi.

⁴⁹ Te Yá Ndiöxí ïo sàá nchaa sá xíní tnùní-gá, te ní cachí-gá sá dácàháⁿ-gá iní cue tée cuèndá cáháⁿ-güedé tnúhu-gá núú ñáyiú, te cada-güedé nchaa nàcuáa cuíní-gá, te dava-güedé cahni ñàhá-yu xii-güedé, te dava-güedé ïo dandòho ñàhá-yu xii-güedé duha ní cachí-gá. ⁵⁰ Te nchaa ñáyiú ñuyíú vitna tnàhá-yu nacháhu-yu núú Yá Ndiöxí cuèndá sá ñí sahani-güedé cue tée ní cáháⁿ tnúhu-gá ndéé cúnàhá ní ngáva

ñuyíú. ⁵¹ Te ndéé ndíi Àbél tée ní sahani-güedé ndéé díhna nuu, ndíhi ndéé ndíi Zacàriá tée ní sahani-güedé ndéé núú ñí ndíhi-ná ndácáⁿ cuèndá ñàhá Yá Ndiöxí núú ñáyiú ndècu ñuyíú vitna, te ñíu ndíi-áⁿ ñí sahani-güedé mei tnúú veñúhu càhnu sá ïo cùnuu, ndíhi xito núú sácódó sã ndúú tãhú Yá Ndiöxí.

⁵² ¡Te ndàhú ní cuu tucu nchaa nchòhó cue tée dàcuaha ñaha xii ñáyiú nchaa tnúhu ní chídó tnùní ndí Moisés! Chi quíde-ndo datná quidé ìⁿ tée tàxi tnuní ìⁿ vehe, chi nacadí-dé te ñá dáñá-dè quíhu ñáyiú te ni mèé-dé ñá túú quíhu-dé. Te ducaⁿ sãtnahá-xi quíde-ndo, chi dàcuaha-ndo tnúhu Yá Ndiöxí te ñá túú cuíní-ndó quíndáá iní-ndó te ni ñá túú dànehé-ndó ñáyiú cuíní tníi tnúhu-gá nàcuáa tàú-xi cunduu cuèndá naníhí tãhú-yu —càchí-gá xáhaⁿ-gã xii-dé.

⁵³ Te òré ní ndee Jèsús vehe tée cùu fariséú-áⁿ, te cue tée dàcuaha ñaha xii ñáyiú nchaa tnúhu ní chídó tnùní ndí Moisés, ndíhi cue tée cùu fariséú ní cudééⁿ-güedé núú-gã, te ní nguíta-güedé nándi sá xicáⁿ tnúhú-güedé núú-gã cuèndá cuíní-güedé nùu vá cuíta-gá ìⁿ tnúhu càháⁿ-gá ⁵⁴ cuèndá ducaⁿ ñíhí-güedé nàcuáa cada-güedé cacáⁿ cuéchi-güedé cuèndá-gá.

12

Jèsús càháⁿ-gá cuèndá cue tée dandahú mée-xí

¹ Te òré-áⁿ ñí tacá titní mĩ ñáyiú núú ndécú Jèsús, te súúni dícó ngõnchihi tnàha-ná-yu. Te ndèdòho-yu ní xáhaⁿ Jèsús xii cue tée xica cuu ndíhi-gá:

—Cada cuèndá-ndó vã cáncñicúⁿ nihnu-ndo nàcuáa quíde cue tée cùu fariséú, chi cue tée-áⁿ ïo dandahú-güedé mée-güedé sá quidé ndáá-güedé dico ñá ndáá sá quidé ndáá-güedé. ² Te nchaa tnúhu sá cúu yùhu ñí cuu vá cúu yùhu-gá, chi nchaa dacuítí sã quéé tũu-xi núú ñáyiú.

³ Chi nchaa tnúhu càháⁿ dayuhu-ndo quèe túu-xi núú chítú nùú tàcá, te

nchaa tnúhu càháⁿ méé-ndó vèhe-ndo dacuítí sã nihí ñáyiú tnúhu.

Yá Ndiöxí xíní ñùhu-xi yuhú-ó-gã
(Mt. 10:26-31)

⁴ Te nchòhó cue téé ío váha tnàhá tnúhu ndìhi-í ná càchí tnúhu-í xii-ndo sã vã yuhú-ndó cuè ñáyiú cuèi na càhni ñahá-yu xii-ndo, chí ñiu-ni yiqui cùñú-ndó ndàcú-yu cahni-yu, te ñá túú nãgã ndacú-yu cada ñahá-yu xii-ndo. ⁵ Te na càchí tnúhu-í xii-ndo sã Yá Ndiöxí tàú-ndó yuhú-ndó-gã, chí mee-gã ío cùnuu-gã, te ñiu-gã quidé-gã sã vã cùndècu-gã ñáyiú ñuyíú, te daquihíⁿ ñahá-gã xií-yu núú ùhú núú ndàhú, núú xiãⁿ càchí tnúhu-í xii-ndo sã Yáá-áⁿ tàú-ndó yuhú-ndó-gã.

⁶ Te nchòhó xíní-ndó sã ndéé úhúⁿ tnàhá tílaá cùyáhu-di núú ùú díhúⁿ, dico Yá Ndiöxí ñá túú cùnaa-gã ni ñⁿ-güedi, chí nèhe cuendá ñahá-gã xii-güedi. ⁷ Te nchòhó ndéé ñⁿ ñⁿ idi díquí-ndó yìndehu, núú xiãⁿ càchí-í sã vã yuhú-ndó, chí cùnuu-gã-ndó dàcúxí tílaá cuèi vãi vihi-güedi.

Ñáyiú na dàtúu núú dàva-gã ñáyiú sã ndécú ndìhi-yu Xitohó Jesucristú
(Mt. 10:32-33; 12:32; 10:19-20)

⁸ Te na càchí tnúhu-í xii-ndo sã nùu na dàtúu-ndo núú dàva-gã ñáyiú sã ndécú ndìhi ñaha-í xii-ndo. Te ducaⁿ te tnàhá yuhú Téé cùu ñaní tnàhá-ndó nchàa-ndo datúu-í núú nchàa cue espíritú xínú cuèchi núú Yá Ndiöxí sã nchòhó ndécú ndìhi ñaha-ndo xii-í. ⁹ Dico núú na cùñaha-ndo xii ñáyiú sã ñà túú ndècu ndìhi ñaha-ndo xii-í, te ñiu-ni ducaⁿ càda yuhú Téé cùu ñaní tnàhá-ndó nchàa-ndo, chí cùñaha-í xii cue espíritú xínú cuèchi núú Yá Ndiöxí sã ñà túú ndècu ndìhi ñaha-í xii-ndo.

¹⁰ Te ndédani càa ñáyiú na càháⁿ cuèhé cuendá yuhú Téé cùu ñaní tnàhá-ndó nchàa-ndo, te cada càhnu iní ñahá Yá Ndiöxí xií-yu. Dico ñáyiú na càháⁿ cuèhé cuendá Espíritú Yá Ndiöxí, te ñáyiú-áⁿ vã cadá càhnu iní ñahá-gã xií-yu.

¹¹ Te òré ná càndeca ñaha-güedé xii-ndo quihíⁿ veñúhu, àdi núú cuè

tée cùchiuⁿ, te ni vã cání ìní-ndó nùu nása cunduu tnúhu cùñaha-ndo xii-güedé, te ni vã cání ìní-ndó nùu ná tnúhu nadànchocáva-ndo nùu ná tnúhu na cùñaha-güedé xii-ndo, ¹² chí òré-nã te mee Espíritú Yá Ndiöxí dacàhu iní ñahá-xí xii-ndo tnúhu cùñaha-ndo xii-güedé —càchí-gã xáhaⁿ-gã xii-güedé.

Cuendá ñⁿ téé cuica

¹³ Te ñⁿ téé ñùhu tnàhá tnuú ñáyiú-áⁿ ñí xáhaⁿ-dè xii Jèsús:

—Mèstrú, cùñaha xii ñaní-í sã ná chidava-dé sã ñí dándóo tãtã-ndí cuu cuendá-ndí —càchí-dé xáhaⁿ-dè xii-gã.

¹⁴ Te Jèsús ní xáhaⁿ-gã xii-dé:

—¿Te ná cuendá ducaⁿ càháⁿ-n? Te ñá díú chiúⁿ-áⁿ vèxi-í cada-í, chí ñá díú téé cùchiuⁿ cuu-í —càchí-gã xáhaⁿ-gã xii-dé.

¹⁵ Te xáhaⁿ-gã xii nchaa ñáyiú xíndecu-áⁿ:

—Nchaa nchòhó ñáyiú ndédóho nchaa tnúhu càháⁿ-í ío váha cada cuendá-ndó, te vã cání ìní-ndó nãndí nducu-ndo cùndecu ndìhi-ndo, chí cuèi vãi vihi na nihí-ndó cùndecu ndìhi-ndo, dico vã chíndèe ñaha-xi cudíi-ndo cùndecu-ndo ñuyíú-a —càchí-gã xáhaⁿ-gã xií-yu.

¹⁶ Te dàtnùní ní ngüíta-gã cání-gã ñⁿ cuendú nùu-yu cuendá tecú tnùnì-yu tnúhu-gã, te xáhaⁿ-gã:

—Ñⁿ téé cuica sùúní ñí cuu nchaa tatá ní xitu-dé núú ñúhú-dè. ¹⁷ Te ní ngüíta-dé sání ìní-dé: “¿Te nása cada-í? Te ñá túú ndéé nataxúha-í nchaa sã ñí xitu-í”, duha ní sani ìní-dé.

¹⁸ Te dàtnùní ní sáha váha tucu-dé cuendá nàcuáa cada-dé, te ní cachí-dé: “Duha na cùnduu, dangòyo-í yacá-í, te ndada càhnu-gã-í, te xití-xi nataxúha-í nchaandi túhú sã ñí xitu-í, ndìhi nchaa dava-gã sã ndécú ndìhi-í. ¹⁹ Te sátá dúcáⁿ, te cachí-í: Ío vãi sã ndécú ndìhi-í, te cudíi-xi cuéhé cuíá, te vitna ndetatú-í, te coho-í te caxi-í cada-í, te nãndi-gã cada-í cuendá cudíi ìní-í cundecu-í, duha quesaha-í”, càchí-dé.

²⁰ Dico Yá Ndiöxí ní xáhaⁿ-gã xii-dé: “Yòhó, ñá túú nãndìhi sã sání ìní-n, chí yuhú càchí-í sã niú vitna cuú-n, te nchaa sã ndécú ndìhi-n ¿yoo cuu

sá vǎha xii-aⁿ-i?", cǎchí-gǎ xáhaⁿ-gǎ xii-dé. ²¹ Duha yáha nchaa ñáyiú nándi sàni iní-xi cundecu ndihí-xi ñuyíú-a, dico ñáyiú-áⁿ ío ndáhú-yu chi ñá túú nǎ nduu táhú-yu núú Yǎ Ndiǒxí cundecu ndihí-yu –cǎchí Jèsús xáhaⁿ-gǎ xii-yu.

Yá Ndiǒxí xító-gǎ nchaa ñáyiú sàndáá iní ñáhá xii-gǎ

(Mt. 6:25-34)

²² Te ní xáhaⁿ Jèsús xii cue téé xica cuu ndihí-gǎ:

–Te na cǎchí tnúhu-í xii-ndo sǎ vǎ ío cani iní-ndó núu nása cundecu-ndo, àdi nása níhí-ndó sǎ cǎxí-ndó, àdi nása níhí-ndó dǒo cuihnu-ndo. ²³ Chi cùnuu-gǎ méé-ndó dǎcúúxí sǎ nchító-ndó, te ducaⁿ yìiquí cuñú-ndó cùnuu-gǎ-xi dǎcúúxí dǒo sǎcuíhnu-ndo. ²⁴ Te chí cuǎha cuèndá nàcuáa quide cue tícácá, chi ni ñá túú chihi-güedi tatá cuu itú natahu-güedi te ni ñá túú ndéé nútní yacá-güedi, te nihí-güedi xèxi-güedi, chi Yá Ndiǒxí xító ñaha-gǎ xii-güedi. ¡Te nchòhó cùnuu-gǎ-ndó dǎcúúxí nchàa cue quití ndava! ²⁵ Te cuèi nándi sá sání vèhi iní-ndó ndècu-ndo, dico ñá ndácú-ndó càda-ndo nacuáa cuehnu-ndo cuèdicó ìⁿ yìiquí-gǎ. ²⁶ Te núu ni sǎ lúhá xǎⁿ ñá ndácú-ndó càda-ndo, ¿te ná cuèndá ío sàni iní-ndó cuèndá nchaa sá cuìní-ndó níhí-ndó cundecu ndihí-ndo?

²⁷ Te chí cǎdá cuèndá nàcuáa sàhnu ìⁿ tnu itá, chi ni ñá túú quide chiuⁿ-xi, te ni ñá túú quèheⁿ-xi idi. Te na cǎchí tnúhu-í xii-ndo sǎ ndíi Salòmón ío víi ní cǎa nchaa sá ní xíndecu ndihí ndíi, dico víi-gǎ tucu cǎa nchaa itá dǎcúúxí nchàa sá ní xíndecu ndihí ndíi. ²⁸ Te cùhú sǎ ío vitna tnaa-ni cùdíi-xi te sàhmí-yu, te cuèi ducaⁿ dico ío víi càdúha Yá Ndiǒxí nchaa cùhú-ǎⁿ. ¡Te nchòhó ío cùnuu-ndo dǎcúúxí nchàa cùhú-ǎⁿ, núu xǎⁿ ío xító ñaha-gǎ xii-ndo, te dicó yica cùu iní-ndó sàndáá iní-ndó-gǎ! ²⁹ Te vǎ ío canchicúⁿ nihnu-ndo sǎ cóhó sǎ cǎxí-ndó, te ni vǎ dándihú-ndó iní-ndó núu nása cada-ndo níhí-ndó. ³⁰ Chi nchaa ñáyiú ñá túú sàndáá iní ñáhá xii Yá Ndiǒxí ducaⁿ mèe-ni sá cóhó sǎ cǎxí-yu xica nchicúⁿ

nihnú-yu. Dico mee Tǎtá-ó Dǔtú Ndiǒxí sa nàha-gǎ nándi cùu sá xíní ñùhu-ndo, te taxi-gǎ. ³¹ Te cada-ndo nchàa nacuáa cǎháⁿ Yǎ Ndiǒxí Yaá yíndàha ñaha xii-ndo, te ducaⁿ te taxi-gǎ nchaa sá xíní ñùhu-ndo.

Cuèndá sá vǎha nduu táhú-ó núú Yǎ Ndiǒxí
(Mt. 6:19-21)

³² Te vǎ yùhú nchòhó cue téé ndècu ndihí-í cuèi ío sacú-ndó, chí Tǎtá-ó Dǔtú Ndiǒxí ní cǎchí-gǎ sá ndúú táhú-ndó cundecu-ndo núú ndécú-gǎ taxi tnùní-ndó tnàhá-ndó. ³³ Te chí dícó nchàa sá ndécú ndihí-ndo, te chí cuǎha nchaa ñáyiú ndáhú díhúⁿ-ndó ñáyiú xini ñuhu, te cada váha-ndo cundecu-ndo, te ducaⁿ te nduu táhú-ndó sǎ ío-gǎ váha núú Yǎ Ndiǒxí cundecu ndihí-ndo, te xǎⁿ vǎ cúú tùhú tnàhí-gǎ-xi, te ni vǎ ndíhí nihnu-gǎ-xi, te ni ñadúhú vǎ ndácú-güedě duhu-güedě, te ni tìquidi vǎ quée-dí. ³⁴ Te núu xǎⁿ cúú cuèndá-ndó ñá, te diu-ni xǎⁿ ñúhú iní-ndó, áⁿ te núu mee-ni sǎ ndécú ñuyíú-a ndècu ndihí-ndo, te diu-ni nchaa xǎⁿ ñúhú iní-ndó.

Xini ñuhu-xi quihi iní-ó cundecu-o

³⁵⁻³⁶ Te ío quihi iní-ndó cundecu-ndo, te cada-ndo dàtná quidé dàva cue téé xínu cuechi sacúndecu túha-güedé cuèi nání òré-áⁿ ndétú-güedě pàtróonⁿ-güedě ná òré nasáá-dé sá cuaháⁿ-dé vico tnǎndaha. Te núu niú te sa cúu cáyú-ni ñuhú-güedé sá cùndètu ñaha-güedé, chí òré ná nasáá-dé dacàsaⁿ-dé yuyèhe, te ndíhi-ni nacaáⁿ-güedé ndíhu-dé. ³⁷ Te váha táhú nchaa cue téé xínu cuechi-áⁿ, chí ndècu túha-ni-güedé ndétú-güedé ndéé òré ní nasáá pàtróonⁿ-güedě, te na cǎchí tnúhu ndáá-í xii-ndo sǎ òré ná nasáá pàtróonⁿ-güedě-áⁿ te chihi ñaha-dé mèsá xii-güedé, te ndacáⁿ ndee-dé dóo níhnú-dě núu yìiquí-dě, te ngüíta-dé cani-dé cóhó-güedě cuèndá caxi-güedé. ³⁸ Te diu-ni ducaⁿ càda-dé cuèi dava niú, àdi tacuíhndá-gǎ, te núu ñá túú xidí-güedé òré nasáá-dé, te cue téé xínu cuechi-áⁿ ío váha

tnahá-güedé. ³⁹ Te núu dícó ìⁿ téé cùu xítóhó ìⁿ vehe xìní-dé ná òré quíhu ñadúhú vehe-dé ñá, te quíhi iní-dé te vá cùdú-dé, te vá dáñá-dě nacaáⁿ-güedé yuyèhe-dé quíhu-güedé duhu-güedé. ⁴⁰ Te nchòhó tucu nchaa-ni nduu quíhi iní-ndó cundecu túha-ndo, chi na cuáháⁿ nduu ñá túú yíhi iní-ndó, te quixi tucu yúhú Tée cùu ñaní tnahá-ndó nchaa-ndo — cachi-gá xáhaⁿ-gá xii-güedé.

Cue téé quíde ndáá ndíhi cue téé ñá túú quíde ndáá

(Mt. 24:45-51)

⁴¹ Te té Pèlú ní xícáⁿ tnúhú-dě núú Jèsús, te xáhaⁿ-dě:

—Mèstrú, ¿te tnúhu ní cáháⁿ-n-ãⁿ cùu-xi mee-ni cuendá nchúhú ãⁿ cuendá nchaa ñáyíu? —càchí-dé xáhaⁿ-dě xii-gá.

⁴² Te Jèsús ní xáhaⁿ-gá:

—Càháⁿ-í cuendá ñáyíu quíde váha dàtná quíde ìⁿ téé tàxi tnuní ñáhá xii cue ñáyíu xínu cuechi ndecu vehe patróóⁿ-xi, chi téé-áⁿ ío váha tècú tnùní-dé, te quíde-dé nchaa nàcuáa càháⁿ patróóⁿ-dě, te dàcaxi-dé cue ñáyíu xínu cuechi oré tàú-xi caxí-yu. ⁴³ Te núu ducaⁿ quíde váha téé tàxi tnuní ñáhá xii cue ñáyíu xínu cuechi-áⁿ ñá, te ío váha tnàhá-dé òré násáá patróóⁿ-dě nùu ndèé cuáháⁿ-dé.

⁴⁴ Te na càchí tnúhu ndáá-í xii-ndo sá tèé quíde ndáá táxi tnùní ñáhá xii cue ñáyíu xínu cuechi-áⁿ cùñaha-nă patróóⁿ-dě xii-dé sá ncháándi túhú-nă sá ndécú ndíhi-dé quíndaha-dě.

⁴⁵ Dico núu téé tàxi tnuní ñáhá xii cue ñáyíu xínu cuechi-áⁿ ná caní iní-dé sá cùyàa patróóⁿ-dě vá násáá ndíhi-ni-dé ñá, te ngüíta-dé cani-dé nchaa ñáyíu xínu cuechi, cuèi téé cuèi ñadíhí, te ngüíta-dé caxi-dé coho-dé, te dàxíni-dé méé-dě, ⁴⁶ te nduu ñá túú yíhi iní-dé te nasáá patróóⁿ-dě, te dandòho ñaha patróóⁿ-dě-áⁿ xii-dé, te daquíhíⁿ ñáhá-dě xii-dé núú ndécú ñáyíu ñá túú ní quíde ndáá.

⁴⁷ Te dava cue téé xínu cuechi xíní-güedé nàcuáa cuíní patróóⁿ-güedé cada-güedé te ñá túú quíde-güedé,

te ni ñá túú cuíní-güedé cundecu túha-güedé cundetu-güedé patróóⁿ-güedé, te nchaa cue téé ducaⁿ xíquide dandòho ñaha patróóⁿ-güedé, chi ñáni víhi-güedé. ⁴⁸ Te dava cue téé xínu cuechi ñá túú xíní-güedé nàcuáa cuíní patróóⁿ-güedé cada-güedé, te ní quíde-güedé sá neñúú-güedé ìⁿ sá ñá túú tàú-güedé cada-güedé ñá, te cue téé-áⁿ sacú-gá dandòho ñaha patróóⁿ-güedé, chi sacú-gá ñáni-güedé. Te ñáyíu cùtnuní iní-xi nàcuáa cuíní Yá Ndióxi cadá-yu, te ñu-ni ducaⁿ tàú-yu cadá-yu nàcuáa cuíní-gá. Te ñáyíu vâi-gá tècú tnùní nàcuáa càháⁿ-gá, te ñu-ni ducaⁿ vâi nchaa sá càháⁿ-gá tàú-yu cadá-yu.

Ñá túú cùu ìⁿnuu ñáyíu

(Mt. 10:34-36)

⁴⁹ Te yúhú véxi-í ñuyíú-a cuendá cùtnuní iní ñáyíu nàcuáa cada ñaha Yá Ndióxi xii-yu, ¿te cuíní-í sá ndíhi-ni cada-gá nàcuáa sàni iní-gá! ⁵⁰ Te yúhú ío vâi tnúhu sàni iní-í, ¿chi sáá nduu te ío ndoho-í, te ñu-ni xíãⁿ cuhuⁿ iní-í ndéé ná sáá nduu dúcáⁿ yáha-í! ⁵¹ Te nchòhó vá caní iní-ndó sá yúhú véxi-í ñuyíú-a te cundecu ndíhi tnàha váha-ni ñáyíu, te ñáhá chi da ngüíta-yu vá cúú ìⁿnuú-yu cundecú-yu. ⁵² Te ndéé není vitna ngüíta ñáyíu vá cúú ìⁿnuú-yu cundecú-yu, te na càda-o cuendá te núu úhúⁿ ñáyíu xíndecu ìⁿ-ni vehe, te vá cúú ìⁿnuu-gá-yu, chi úní-yu ndatnúhu-yu te nàá-yu ndíhi úú-gá-yu, àdi ñáyíu úú-áⁿ ndatnúhu-yu te nàá-yu ndíhi ñáyíu úní-áⁿ. ⁵³ Te dava cue téé cùu tátá vá cúú ìⁿnuu-gá-güedé ndíhi déhe ducuⁿ-güedé, te ni dàva cue ñáyíu cùu náná vá cúú ìⁿnuu-gá-yu ndíhi déhe yòcò-yu, te ni sànu-yu vá cúú ìⁿnuu ndíhi-gá-yu. Te ducaⁿ cadá-yu chi davá-yu quíndáá iní ñáhá-yu xii-í, te davá-yu vá quíndáá iní ñáhá-yu — càchí-gá xáhaⁿ-gá xii-güedé.

Ñáyíu cùtnuní iní-xi nàcuáa quíde-xi ñuyíú ndíhi andíu

(Mt. 16:1-4; Mr. 8:11-13)

54 Te Jèsús ní xáhaⁿ-gã xii nchaa ñáyiú xĩndecu-áⁿ:

—Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sã cúúⁿ dǎú, te ðiu ducaⁿ ndìsa quide-xi. 55 Te òré ná quène táchí ndàa xio datni nacúaa quène nchíanchii, te càchí-ndó sã ïo cada ihni-xi, te ðiu ducaⁿ ndìsa quide-xi. 56 Te nchòhó ïo váha cùtnuní iní-ndó nàcuáa quide-xi andiu ndihí ñuyúú, ¿te ná cuèndá quidé-ní-ndó sã ñã tècú tnùní-ndó nàcuáa quide Yá Ndiõxí vitna? Te sã dúcáⁿ quide-ndo-áⁿ ïo dándahú-ndó mèe-ndó sã ïo váha cùtnuní iní-ndó, chi ñã ndàá sã cútnuní iní-ndó.

Nducu-o nàcuáa nucúndecu ndihí váha-o ñáyiú cùu úhú iní ñáhá

(Mt. 5:25-26)

57 Te nchòhó, ¿ná cuèndá ñã túú dándixi túu-ndo iní-ndó càda-ndo mee-ni sã váha sã tàú-ndó càda-ndo-i? 58 Te núu ïo ìⁿ-ndo ñĩ sacáⁿ cuèchi ñáyiú cuèndá-ndó cuèndá ìⁿ sã ñĩ quide-ndo, te cuáháⁿ-ndó ndihí-yu núú tée cùchiuⁿ, te ñini ñuhu-ndo ndihí-yu ichi, te nducu-ndo nàcuáa cada-ndo nàcáháⁿ cáhnú iní tnáhá-ndó ndihí-yu cuèndá sã vã cándèca ñaha-gá-yu quíhíⁿ núú tée cùchiuⁿ, chi núu ducaⁿ na càdá-yu te tée cùchiuⁿ-áⁿ nachihí ñaha-dě ndaha cue tée cùu poleciá, te cue tée-áⁿ chihí ñaha-güedě vecaá xii-ndo. 59 Te na càchí tnúhu-í xii-ndo sã núu na ngáva-ndo vecaá, te vá càcu-ndo te núu vá náchãhu-ndo nchàa sã tàú-ndó —càchí-gá xáhaⁿ-gã xií-yu.

13

Xìni ñuhu-xi natuha-o ichi Yá Ndiõxí

1 Te ðiu-ni òré-áⁿ ñĩ ngúnutnĩ ìⁿ úú ñáyiú núú Jèsús cáñi-yu cuèndú núú-gã nàcuáa ní quide ñaha té Pilatú xii cue tée distritú Galileá cue tée ní sahní quití nduu táhú Yá Ndiõxí, te mei òré ní sahní-güedé cue quití-áⁿ ñĩ táuchíúⁿ tẽ Pilatú cue sandádú-dé ní sahní-güedé cue tée Galileá-áⁿ, te ní xica níñi-güedě núú ñúhú ndihí níñi cue quití-áⁿ, te ní nadácánuu-xi. 2 Te Jèsús ní xáhaⁿ-gã xií-yu:

—Te núu nchòhó sání iní-ndó sã sã dúcáⁿ ñĩ yáha cue tée distritú Galileá-áⁿ te cùu-güedé cue tée ndècu vihi-gá cuèchi-xi dàcúúxí cuè tée ñuú-güedé ñã. 3 Te na càchí tnúhu-í xii-ndo sã ñáhá. Te núu nchòhó vá ndíxí cuèchi iní-ndó cuèndá nchaa sã cuèhé sã dúhá quide-ndo ndecu-ndo ñã, te tnàhá nchaa nchòhó cuíta nihnu-ndo te núu vá nátnnì-ndo ichi Yá Ndiõxí. 4 Te núu nchòhó sání iní-ndó sã ñáyiú sáhúⁿ úní ní xihí ní táú ñáhá vèhe ducúⁿ Silòé ïo-gá ndécú cuèchi-yu dàcúúxí nchàa ñáyiú xĩndecu ñuú Jerusálén ñã, 5 te na càchí tnúhu tucu-í xii-ndo sã ñáhá. Te núu nchòhó vá ndíxí cuèchi iní-ndó cuèndá nchaa sã cuèhé sã dúhá quide-ndo ndecu-ndo ñã, te tnàhá nchaa nchòhó cuíta nihnu-ndo te núu vá nátnnì-ndo ichi Yá Ndiõxí —càchí-gá xáhaⁿ-gã xií-yu.

Yutnu ngüxí ñã túú cùuⁿ sávídí-xi

6 Te Jèsús ní caní tucu-gá ìⁿ cuèndú núú-yu nàcuáa tecú tnùní-yu tnúhu-gá, te xáhaⁿ-gã:

—Ìⁿ tée nùtnnì ìⁿ yutnu ngüxí núú ñúhú-dě, te cuáháⁿ ndéhé-dě núu ní cuuⁿ sávídí-xi ni cùu, te ni ìⁿ ñã túú ní cùuⁿ. 7 Te ní xáhaⁿ tée-áⁿ xii tée ndèé ñuhu-dé: “Ñaha-ñ sã vitna ní cuu úní cuía quíxí còto-í yutnu ngüxí-a te ñã túú xìní-í ni ìⁿ sávídí-xi. Te quehdé-n vitna, chi àúⁿ ñã cuu nùtnnì-xi quide tneñu-xi núú ñuhu-áⁿ”, càchí-dě xáhaⁿ-dě xii tée ndèé ñuhu-dé-áⁿ. 8 Te tée ndèé ñuhu-áⁿ ñĩ xáhaⁿ-dě: “Pàtróón, dañã na cùhnu-xi cuía vitna-ná, te na nàdatayá-í ñuhu núú sàhá-xi, te chihí-í saháⁿ. 9 Te ducaⁿ te cudana cuuⁿ sávídí-xi, àdi núu ñã túú ní cùuⁿ sávídí-xi ñã te téhdé-ñã-xi”, càchí-dě xáhaⁿ-dě xii pàtróón-dě —càchí-gá xáhaⁿ-gã xií-yu.

Jèsús quidé tãtna-gá ìⁿ ñadìhí ní nduu cueyi sãtá-xi nduu ndetatú ñáyiú

10 Te ìⁿ xito cùu-xi nduu ndetatú ñáyiú, te yihí Jèsús ìⁿ veñúhu dānehé-gá ñáyiú. 11 Te xiáⁿ ndécú ìⁿ ñadìhí ní cuu sáhúⁿ úní cuía sã cùhú-aⁿ yihí ñaha espíritú cùndihí

yucu ñávãha xii-aⁿ, te xíãⁿ ní ndada cueyi-xi sãtã-aⁿ, te ñã dáñã-gã-xi nucúnutnî ndãã-aⁿ. ¹² Te òré ní xini ñãhá Jèsús xii-aⁿ te ní cana ñaha-gã, te xáhaⁿ-gã:

—Yòhó ñaha cùhú, ndúha-n cuèhé tnàhá-n —càchí-gã xáhaⁿ-gã xii-aⁿ.

¹³ Te ní dácãã-gã ndaha-gã ní tendaha ñaha-gã xii-aⁿ, te òré-ni-ãⁿ ñí ndúha-aⁿ te ní nucúnutnî ndãã-aⁿ, te ní ngúita-aⁿ ní cachí-aⁿ sã ïo càhnu cuu Yá Ndiõxí. ¹⁴ Dico téé tàxi tnuní veñúhu ní cudééⁿ-dè sã dúcãⁿ ñí quide Jèsús ní quide tátna-gã ñaha cùhú-ãⁿ nduu ndetátú-yu, te ní xáhaⁿ-dè xii-yu:

—Íó ñú nduu tàú-ó càda chiuⁿ-o, te ndédani càa nduu-ãⁿ quixi-ndo cùtátna-ndo, dico ñã díú nduu cuu-xi nduu ndetátú-ó —càchí-dé xáhaⁿ-dè xii-yu.

¹⁵ Te ní xáhaⁿ Jèsús:

—Nchòhó chi ío dándahú-ndó mèe-ndo sã quidé ndãã-ndó dico ñã ndãã sã quidé ndãã-ndó, ¿nãã ñã túú nãdaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó ãⁿ? ¹⁶ Te ñadîhí-a cùu-aⁿ ñaní tnàhá ndîi Àbrahám, te dicó-ni sã yùcu ñávãha quide duha cùhú-aⁿ ní cuu sáhúⁿ úní cuiá, ¿te nãã ñã túú xini ñuhu-xi cutátna-aⁿ cuèi cùu-xi nduu ndetátú-ó ãⁿ? —càchí-gã xáhaⁿ-gã xii-dé.

¹⁷ Te sã dúcãⁿ ñí cáháⁿ Jèsús, núu nchaa cue téé cùu úhú iní ñãhá xii-gã ní cucahaⁿ núu-güedè, dico nchaa dava-gã ñáyiú chi xícudîí iní-yu xíndéhè-yu nchaa sã vã yõo tnàhí ndàcu cada quide-gã.

Cuendá ndíquíⁿ yutnu nàni mostázã (Mt. 13:31-32; Mr. 4:30-32)

¹⁸ Te ní xáhaⁿ-gã xii-yu:

—Na càni-í ñí cuendú núu-ndó nãcuãa tecú tnùní-ndó nãcuãa cada-xi òré ndíhu ndaha ñaha Yá Ndiõxí xii-ndo. ¹⁹ ñí téé ní queheⁿ-dè ndíquíⁿ yutnu nàni mostázã te nèhe-dé cuáhãⁿ ní sacãⁿ-dè núu ñúhú-dè te ní xínu-xi, te ní sahnu-xi ní cuu dùcúⁿ-xi, te cue quití ndàva núu tàchí cáduha-güedi

tacã-güedi núu dité-xi —càchí-gã xáhaⁿ-gã xii-yu.

Nãcuãa quide levadurã (Mt. 13:33)

²⁰ Te ní xáhaⁿ tucu Jèsús xii-yu:

—Te na càchí tnúhu tucu-í xii-ndo nãcuãa cada tucu Yá Ndiõxí òré ndíhu ndaha ñaha-gã xii-ndo. ²¹ ñí ñadîhí ní queheⁿ-aⁿ levadurã ní chihi-aⁿ úní arròbã yuchi tríú, te levadurã-ãⁿ ñí quide-xi ní ndaa ñihí yusaⁿ-ãⁿ —càchí-gã xáhaⁿ-gã xii-yu.

Yuyèhe cuiñí (Mt. 7:13-14, 21-23)

²² Te ichi ñúhu Jèsús cuáhãⁿ-gã ñúú Jerusálén, te nchaa ñúú náhnú, ndîhi nchaa ñúú ñhli ta yãha-gã ducaⁿ ta dànehé-gã ñáyiú tnúhu-gã cuáhãⁿ.

²³ Te ñí ñúú-ãⁿ ñí xáhaⁿ ñí téé xii-gã:

—Mèstrú, cuìní-í cácãⁿ tnúhu-í ñí tnúhu núu-n, ¿ndãã sã ïo sacú ñáyiú nãñíhí tàhú-ãⁿ? —càchí-dé xáhaⁿ-dè xii-gã.

Te Jèsús ní xáhaⁿ-gã xii-dé ndîhi nchaa ñáyiú:

²⁴ —Cada-ndo sã nãñíhí tàhú-ndó, te tnî-ndo ñchi Yá Ndiõxí, te ichi-gã-ãⁿ cúu-xí dàtnã ñí yuyèhe cuiñí, te càchí tnúhu-í xii-ndo sã ïo cuéhé ñáyiú cachí iní-yu quíhu-yu yuyèhe cuiñí-ãⁿ dico vá ndácú-yu. ²⁵ Te na càni tucu-í ingã cuendú núu-ndó nãcuãa tecú tnùní-ndó tnúhu càháⁿ-í. Te òré ná ndàcúñí téé cùu xítóhó vehe, te nacadí-dé yuyèhe, te nchaa nchòhó ñáyiú na quèndóo quehé dacãsaⁿ-ndo yuyèhe, te quesaha-ndo cùñaha-ndo xii-dé: “Tátã, nacaãⁿ yuyèhe na quíhu-ndí”, quesaha-ndo cùñaha-ndo xii-dé. Dico téé cùu xítóhó vehe-ãⁿ cùñaha-dè xii-ndo: “Ñã túú xini-í nchòhó ndèé ñáyiú cùu-ndo”, duha cùñaha-dè xii-ndo. ²⁶ Te dàtnùní ngúita nchòhó cùñaha-ndo xii-dé: “Nchúhú ní xexi ndîhi ñaha-ndí, te ní xihí ndîhi ñaha-ndí xii-n, te nchaa ichi ní xóo dacuãha ñaha-n xii-ndí”, quesaha-ndo cùñaha-ndo xii-dé. ²⁷ Dico cachí tucu téé cùu xítóhó vehe-ãⁿ cùñaha-dè xii-ndo: “Sa ní cachí-í sã ñã túú xini-í ndèé ñáyiú cùu-ndo. Te

chí xócuñí nchòhó ñáyi ndècu ichi cuehé ichi duha núú ndècu-í”, que-saha-dě cúñaha-dě xii-ndo. ²⁸ Te na sàá nduu dùcaⁿ cada-xi te quini-ndó tē Àbrahám, ndihi té Isàác, ndihi té Jàcób, ndihi nchaa cue tée ní xó cáháⁿ tnúhu Yá Ndióxi, te nchaa cue tée-áⁿ ndécú-güedé núú ndécú-gá táxi tnùnigá, te nchòhó quee tíhú-ndó nùú-gá sá tnúhu ñá túú ní cuini cada ndáá, te dàvá-áⁿ ndáhyú-ndó te cuu rúhñú-ná núhu-ndo sá sàtú iní-ndó cuendá sá ndóhó-ndó. ²⁹ Te dàvá-áⁿ quihu nchaa ñáyi ndi cù mí xio ñuyú núú ndécú Yá Ndióxi táxi tnùnigá caxí-yu ndihi-gá, te cundecú-yu ndihi-gá. ³⁰ Te dava ñáyi nchícúⁿ ñá túú cùnuu ndecu ichi Yá Ndióxi vitna, ñáyi-áⁿ sáá nduu te ío cunúú-yu. Te dava ñáyi cùnuu ndecu ichi-gá vitna, ñáyi-áⁿ sáá nduu te vá ño-gá cunúú-yu —càchí-gá xáhaⁿ-gá xií-yu.

Jèsús ndáhyú-gá cuendá ñáyi ñuu Jerusálén

(Mt. 23:37-39)

³¹ Te diu-ni nduu-áⁿ ñi quexìo ñi úú cue tée cùu fariséu núú ndécú-gá, te xáhaⁿ-güedé xii-gá:

—Quee-n ñha quíhíⁿ-n ñuu ndèe quíhíⁿ-n, chi tée cùu Herodés cuini-dé cahni ñaha-dě xii-n —càchí-güedé xáhaⁿ-güedé xii-gá.

³² Te Jèsús ní xáhaⁿ-gá:

—Chí cuaháⁿ te cúñaha-ndo xii tée ñehe mañá-áⁿ sá càchí-í sá ná cùndedóho váha-dé ñi tnúhu càháⁿ-í, chi cùmání ñi úú-gá nduu cundecu-í xocani-í nchaa espíritú cùndíhi yucu ñávaha yíhi ñaha xii ñáyi, te cada tátna-í nchaa dava-gá ñáyi cùhú, te ducaⁿ te ndihi chiúⁿ-í, duha cúñaha-ndo xii-dé. ³³ Dico dacuítí sá cùhú-í ichi ñi úú-gá nduu, te ducaⁿ te sáá-í núú quíhíⁿ-í, chi vá cúú tnàhí cuú ñi tée càháⁿ tnúhu Yá Ndióxi ingá ñuu, chi mei ñuu Jerusálén cuú-güedé —càchí-gá xáhaⁿ-gá xii-güedé.

³⁴ Te ní xáhaⁿ-gá xii ñáyi ñuu Jerusálén:

—Nchòhó chi sàhni-ndo nchaa cue tée càháⁿ tnúhu Yá Ndióxi, cue tée

ní tendaha-gá véxi, te mee-ni ndíhi yúú sáhní-ndó-güedé. ¡Te títní xito ní cuini-í nadatáca ñàhà-í xii-ndo dátna nádàtaca ñi nchuxi cùe déhe-di sàquihí-güedi xití ndíxíⁿ-di, dico ñá ní cuini-ndó, te ducaⁿ-ni sàni iní-í ndéé vitna! ³⁵ Te chí cùndedóho tucu ingá tnúhu na càháⁿ-í-a: Yá Ndióxi dañá ñaha-gá xii-ndo. Te na càchí tnúhu tucu-í xii-ndo sá vǎ quini ñàhá-gá-ndó xii-í, dico sáá nduu te quini ñàhá tucu-ndo, te nduu-áⁿ cachí-ndó sá ño càhnu cuu yúhú Yaá ní tendaha Dütú Ndióxi véxi ñuyú-a —càchí-gá xáhaⁿ-gá xií-yu.

14

Jèsús quidé tátna-gá ñi tée ñuu cuiñu

¹ Te duha ní cuu ñi nduu, nduu ndètatú ñáyi chí ñi tée cùu fariséu cùnùu ní cáháⁿ-dé Jèsús vehe-dé caxi-gá, te cue tée ndècu vehe-dé ndéhé-güedé ñuu nása cada-gá. ² Te xíaⁿ ndécú tnàhá ñi tée cùhú ñuhú-dě cuiñu. ³ Te Jèsús ní xicáⁿ tnúhú-gá núú cùe tée dàcuaha ñaha xii ñáyi nchaa tnúhu ní chídó tnùní ndíi Moisés, ndíhi núú cùe tée cùu fariséu, te xáhaⁿ-gá:

—¿Cuu cada tátna-o ñi ñáyi cùhú nduu ndètatú-ó ñi ñàhá? —càchí-gá xáhaⁿ-gá xii-güedé.

⁴ Dico cue tée-áⁿ ña túú tnàhí ní càháⁿ-güedé. Te ní dácàá-gá ndaha-gá ní tendaha-gá tée cùhú-áⁿ ñi quide tátna ñaha-gá xii-dé, te ní xáhaⁿ-gá sá ná ñuhú-dé vehe-dé. ⁵ Te ní xicáⁿ tnúhú-gá núú nchaa cue tée-áⁿ, te xáhaⁿ-gá:

—¿Te núu nchòhó ná ngáunìhnu ñi búrru-ndo àdi ñi ndícutu-ndo déhvá, te vá ná tàva ndíhi-ni-ndo-di cuèi cùu-xi nduu ndètatú-ndó-áⁿ? —càchí-gá xáhaⁿ-gá xii-güedé.

⁶ Te ñá túú ní ñihí-güedé tnúhu na dànocháva-güedé.

Ñáyi càháⁿ-yu quíhíⁿ vico tnàndaha

⁷ Te ndèhe Jesús nàcuáa xiquide nchaa ñáyi ndècu vico sá súúni ñi nacáxi-yu xilé sácóo nchíhi cue tée cùnùu-gá conchihí-yu òré cuànguìhú-yu mèsá caxí-yu, núu ní xáhaⁿ-gá xií-yu:

8 —Òré ná càháⁿ ñáhá ìⁿ ñáyiú xii-ndo ìⁿ vico tnándaha, te vá cóó-ndó nǔú xilé sácõo cue téé cùnuu-gá, chí núu ducaⁿ na càda-ndo, te cudana quexìo dava-gá ñáyiú cùnuu-gá dàcúúxí nchòhó. ⁹ Te ñáyiú ní cáháⁿ ñáhá xii-ndo-áⁿ quixí-yu te cúñahá-yu xii-ndo: “Chí cuñaha xilé núcõo nchihi-ndo-áⁿ ná còncihi ñáyiú ní quexìo-a”, quesàhá-yu cúñahá-yu xii-ndo. Te cuìní-ndó ñáhá cuèi cùcaháⁿ núú-ndó ndàcuíñí-ndó quíhíⁿ-ndó ngóo-ndo núú xilé xĩnutnii ndéé núú ní ndihí-ná ndàa sátá-xi. ¹⁰ Te yúhú càchí-í sá òré ná càháⁿ ñáhá-yu xii-ndo, te ngóo-ndo núú xilé xĩnutnii ndéé núú ní ndihí-ná ndàa sátá-xi chí cuèndá òré ná quèxio ñáyiú ní cáháⁿ ñáhá xii-ndo, te cúñahá-yu xii-ndo: “Nchòhó cue ñáyiú càháⁿ ndihí-í, chí yáha núú xilé sácõo cue téé cùnuu-gá coo-ndo”, duha cúñahá-yu xii-ndo. Te ducaⁿ te cada nínu ñaha nchàa ñáyiú yìhi ndihí-ndo mesá. ¹¹ Te nchaa ñáyiú na càda nínu mee-xi, te ñáyiú-áⁿ ñà túú cùu nínu-yu, te nchaa ñáyiú ñá túú quide nínu mee-xi, ñáyiú-áⁿ cúú ñnu-yu — càchí-gá xáhaⁿ-gã xii-yu.

¹² Te dàtnùní ní xáhaⁿ-gã xii téé ní cáháⁿ ñáhá xii-gá:

—Te yòhó òré cuìní-n càda-n ìⁿ vico, te vá càháⁿ-n mée-ni cue téé càháⁿ ndihí-n, ni cuè ñaní-n, ni cuè ñáyiú cùu ñaní tnáhá-n, ni cuè ñáyiú cuica ndècu yatni ndihí-n, chí ñáyiú-áⁿ ducaⁿ càdá-yu ìⁿ nduu cáháⁿ ñáhá-yu xii-n te ndéyáhu-ni sá ní quidé-n-yu. ¹³ Te ñáhá chí òré ná càda-n ìⁿ vico, te cáháⁿ-n ñáyiú ndàhú, ndihí ñáyiú ñá cúú càca, ndihí ñáyiú yacua, ndihí ñáyiú cuàá. ¹⁴ Te núu ducaⁿ na càda-n, te cuu-xi ìⁿ sá vãha xii-n, chí ñáyiú-áⁿ vã ñihí-yu nacoto ñáhá-yu xii-n, dico na cùú-n te sáá nduu ndòto-n ndihí nchaa ñáyiú ní quide ndáá ní xĩndecu ichi Yá Ndiõxí, te dàvá-áⁿ taxi-gá sá ndúú tàhú-n —càchí-gá xáhaⁿ-gã xii-dé.

Nàcuáa xĩquide ñáyiú òré càháⁿ ñáhá ìⁿ téé cada vico (Mt. 22:1-10)

¹⁵ Te sá dúcáⁿ ní cáháⁿ Jèsús ní tecú dóho cue téé yìhi mesá-áⁿ, núu ní xáhaⁿ ìⁿ-dé xii-gá:

—Ío váha táhú nchaa ñáyiú na càxi nchaa sá cuãha ñaha Yá Ndiõxí nduu na sáá-yu cundecú-yu núú ndécú-gã táxí tnùní-gá —càchí-dé xáhaⁿ-dẽ xii-gá.

¹⁶ Te Jèsús ní xáhaⁿ-gã xii-dé:

—Íⁿ téé quide-dé vico, te ní dátècú tnúhu-dé cuéhé víhí ñáyiú quíhíⁿ-yu caxí-yu. ¹⁷ Te òré sa ní cuu-ná sá caxí-yu, te ní xáhaⁿ-dẽ xii téé xĩnu cuechi núú-dẽ sá quíhíⁿ-dé cúñaha-dẽ quíhíⁿ-yu caxí-yu, chí sa ndècu túha nchaa sá caxí-yu. ¹⁸ Dico nchaa-yu ní xáháⁿ-yu xii-dé sá ná cadá càhnu iní téé càháⁿ ñáhá-áⁿ, chí ñá túú cùyáchí-yu quíhíⁿ-yu vico-áⁿ. Te téé ní cáháⁿ ndihí téé xĩnu cuechi-áⁿ dĩhna ní xáhaⁿ-dẽ: “Íchí ní saaⁿ-í ìⁿ pedàsú ñuhu, te quíhíⁿ ndéhè-í tnaví, núu xiãⁿ càháⁿ ndàhú-í núú-n sã cùñaha-n xii téé càháⁿ ñáhá-áⁿ xii-í sá ná cadá càhnu iní-dé chí ñá túú cùyáchí-í”, càchí-dé xáhaⁿ-dẽ. ¹⁹ Te ìngá-dé ní xáhaⁿ-dẽ: “Ní saaⁿ-í úhúⁿ yùndá ndicutu sa xítu, te cue quiti-áⁿ quíhíⁿ-í coto ndeé-í-güedi vitna, núu xiãⁿ càháⁿ ndàhú-í núú-n sã cùñaha-n xii téé càháⁿ ñáhá-áⁿ xii-í sá ná cadá càhnu iní-dé chí ñá túú cùyáchí-í”, càchí-dé xáhaⁿ-dẽ. ²⁰ Te ìngá tucu-dé ní xáhaⁿ-dẽ: “Íchí ní tnándaha-í nũu xiãⁿ vá cùyáchí-í quíhíⁿ-í”, càchí-dé xáhaⁿ-dẽ. ²¹ Te òré ní nasáá téé xĩnu cuechi-áⁿ, te ní nacani tnúhu-dé núú patróóⁿ-dẽ nchaa nàcuáa ní xáháⁿ-yu. Te ní cudééⁿ tée cùu patróóⁿ-áⁿ, te ní xáhaⁿ-dẽ xii téé xĩnu cuechi núú-dẽ-áⁿ: “Yáchí cuaháⁿ nanducu-n nchaa ñáyiú ndàhú, ndihí nchaa ñáyiú ñá cúú càca, ndihí nchaa ñáyiú yacua, ndihí nchaa ñáyiú cuàá, te nděni ní cuu na nàníhí-n-yu te candecá-n-yu quixi”, càchí-dé xáhaⁿ-dẽ. ²² Te sátá ní nasáá téé xĩnu cuechi-áⁿ, te ní xáhaⁿ-dẽ xii patróóⁿ-dẽ: “Patróóⁿ, sa ní quide-í chiúⁿ ní táhú-n, dico ndècu-gá núú cóo-yu”, càchí-dé xáhaⁿ-dẽ. ²³ Te téé cùu patróóⁿ-dẽ-áⁿ ní xáhaⁿ-dẽ: “Cuaháⁿ tucu nděni

ní cuu te cada yica-n na quixí-yu quíhu-yu cuendá ná chítú vehe-í. ²⁴ Te na cächí tnúhu-í xii-n sã nì ìñ ñáyiú ní cáháⁿ-í díhna vã cúú-gã caxí-yu sã sã ní quide túha-í caxí-yu ní cùu”, cachí téé-áⁿ xáhaⁿ-dë xii téé xínu cuechi núú-dë –cächí-gã xáhaⁿ-gã xii téé-áⁿ.

Ndoho-o cùndecu-o ichi Xítóhó Jesu-crístú

(Mt. 10:37-38)

²⁵ Te ío cuéhé ñáyiú nchícúⁿ-yu Jèsús, te ní xáhaⁿ-gã xií-yu:

²⁶ –Te núu dava nchòhó cuení-ndó chitnahá ñáhá-ndó xii-í, te cuu iní ñáhá ndisa-ndo. Te cuéi na dándóo-ndo tãtá-ndó, ndihi náná-ndó, ndihi ñadihí-ndó, ndihi déhe-ndo, ndihi ñaní-ndó, ndihi cúha-ndo, te caní iní-ndó sã cuéi na cúú-ndó sã cuendá-í, te ducaⁿ te cuu ndisa-ndo cué ñáyiú tnàhá tnúhu ndihí-í. ²⁷ Te nchaa ñáyiú vã cáncñícúⁿ nihnu ñaha xii-í cuendá sã yuhú-yu ndohó-yu dàtná ndoho-í, ñáyiú-áⁿ vã cúú-yu ñáyiú tnàhá tnúhu ndihí-í. ²⁸ Te núu ìñ nchòhó ná càni iní-ndó dàcaa-ndo ìñ vehe ducúⁿ, ¿te náa ñá díú díhna-gã cada cuendá-ndó nõu ndëdau díhúⁿ cuu, ducaⁿ te cutnùní iní-ndó nõu tnàhá díhúⁿ-ndó càa vehe-áⁿ àdi ñáhá? ²⁹ Chi núu vã dúcáⁿ càda-ndo, te na ngüíta-ndo tàusaha-ndo te vã xínu cada-ndo, te nchaa ñáyiú na cùndehe ñaha xii-ndo, te cáháⁿ cuéhé-yu cuendá-ndó. ³⁰ Te cachí-yu: “Téé-ãⁿ ní ngüíta-dé dácàa-dé ìñ vehe te ñá ní ndàcu-dé xínu”, cachí-yu. ³¹ Àdi te núu ìñ téé yìndaha ñaha xii ñáyiú cuení-dé nàá-dé ndihí ingá tucu téé yìndaha ñaha xii ñáyiú, ¿te náa ñá díú díhna-gã cada cuendá-dé te núu ndacu-dé ndihí úxí míl cue sandádú-dé nàá-güedé, ndihí ócó míl cue sandádú ingá tucu téé yìndaha ñaha xii ñáyiú cùu úhú iní tnàhá ndihí-dé-ãⁿ? ³² Àdi te núu xító-dé sã vã ndácú-dé ñá, te òré vátá cùyàtni ñaha-gã téé cùu úhú iní tnàhá ndihí-dé-áⁿ, te tendaha-dë ìñ téé quíhíⁿ-dé quíhu-dé tnúhu ndàhú núu tée-áⁿ cuendá sã vã nàá-güedé.

³³ Te duha càháⁿ-í chi núu nchòhó vã cáda ndée iní-ndó dàña-ndo nchaa sã ndécú ndihí-ndo cuendá chitnahá ñáhá-ndó xii-í, te vã cúú-ndó cué ñáyiú tnàhá tnúhu ndihí-í.

Ñí ñí nduu víxiⁿ

(Mt. 5:13; Mr. 9:50)

³⁴ Te ñí chi ío váha, dico núu na ndùu víxiⁿ-xi, ¿te nása-gã cada-o nándihí-o te núu ducaⁿ-í? ³⁵ Chi ñá túú-gã nándihí-xi ní sã dácá ñuhu, te ní sã dácá saháⁿ, chi cuendá-ñã dängoyo-o. Te nchaa nchòhó ñáyiú ní xindedóho tnúhu ní cáháⁿ-í-a xini ñuhu-xi ío váha cuáha-ndo cuendá –cächí-gã xáhaⁿ-gã xií-yu.

15

Cuendá ìñ mbéé quití ní xíta

(Mt. 18:10-14)

¹ Te cue téé cuihna iní-xi quide cobrá ñáhá xii ñáyiú cuendá impuéstú ndihí cue dava-gã ñáyiú ndècu ichi cuéhé ichi duha ní quexió-yu núu ndécú Jèsús cuendá cundedóho-yu tnúhu càháⁿ-gã. ² Te ní ngüíta cue téé cùu fariséú, ndihí cue téé dàcuaha ñaha xii ñáyiú nchaa tnúhu ní chídó tnùní ndí Moisés xicáháⁿ cuéhé-güedé cuendá-gã, te cächí-güedé:

–Téé-a quèheⁿ cuendá-dé ñáyiú ndècu ichi cuéhé ichi duha, te xèxi ndihí ñaha-dé xií-yu –cächí-güedé xitnàha-güedé.

³ Te Jèsús ní caní-gã ìñ cuendú nàcuáa tecú tnùní-güedé tnúhu-gã, te xáhaⁿ-gã xii-güedé:

⁴ –Ìñ téé ndècu ìñ ciendú mbéé-dë, te ní xíta ìñ-di, te nchòhó sa cùtnuní iní-ndó nàcuáa cada téé-áⁿ, chi dándóo-dé cúmídícó sãhúⁿ cúmí-di ìñ yucu, te cùnúndúcú-dé quití ní xíta xíãⁿ ndéé ndéé naníhí-dë-di. ⁵ Te òré ní naníhí-dë-di te ní dácáá-dë-di chíó-dë ní docó-dë-di sã cúdí iní-dé. ⁶ Te òré ní nasáá-dé vehe-dé, te ní dátàcá-dé nchaa cue téé càháⁿ ndihí-dé, ndihí nchaa ñáyiú ndècu yatni ndihí-dé, te ní xáhaⁿ-dë: “Chí ná cùdí iní-ó vitna, chi ní naníhí-í mbèè-í quití ní xíta ní cùu”, cachí-dé xáhaⁿ-dë xií-yu. ⁷ Te yuhú cächí-í sã ìo-gã cúdí iní Yã Ndiõxí ndihí cue espíritú xínu

cuèchi núú-gă nõu #ñ ñáyiú ndècu ichi cuehé ichi duha na ndìxi cuèchi iní-yu cuendá nchaa sá ñà túú vâha quidè-yu ndècú-yu te tñí-yu ichi-gá, dàcúúxí cùmídícó sâhúⁿ cúmí ñâyíu sa ní tuha ichi-gá, chi ñá túú-gă xíní ñùhu-xi ndìxi cuèchi iní-yu chi sa ndècú-yu ichi-gá —càchí-gá xâhaⁿ-gă xii-güedé.

Cuendá dîhúⁿ ñî xîta

8 Te ní caní Jèsús ingá cuendú núú-güedé, te xâhaⁿ-gă:

—#ñ ñadîhí ndécú ndîhi-aⁿ úxí dîhúⁿ cuixíⁿ, te ní dâcuíta-aⁿ #ñ te ní teñuhú-aⁿ iti, te ní ngüíta-aⁿ nâtihu-aⁿ vehe, te súúní vâha vâha ní nanducu-aⁿ ndéé ní naníhí-aⁿ. 9 Te òré ní naníhí-aⁿ, te ní dátacá-aⁿ nchaa ñâyíu dîhí càháⁿ ndîhi-aⁿ ndîhi nchaa ñâyíu ndècu yatni ndîhi-aⁿ, te ní xâhaⁿ-aⁿ: “Chí ná cùdíí ñí-ó vîtna chi ní naníhí-í dîhúⁿ-í sá ñî xîta ní cùu”, cachí-aⁿ xâhaⁿ-aⁿ xii-yu. 10 Te yúhú càchí-í sá dúcáⁿ ïo cùdíí ñí nchaa espíritú xínú cuèchi núú Yâ Ndiõxí, núú #ñ ñâyíu ndècu ichi cuehé ichi duha na ndìxi cuèchi iní-yu cuendá nchaa sá ñà túú vâha quidè-yu, te tñí-yu ichi-gá —càchí-gá xâhaⁿ-gă xii-güedé.

Cuendá #ñ téé ñá túú ní quide váha

11 Te ní caní tucu Jèsús ingá cuendú núú-güedé, te xâhaⁿ-gă:

—#ñ téé ndècu úú déhe ducuⁿ-dé, 12 te téé líhli-gá ní xâhaⁿ-dè xii tâtá-dè: “Táu, taxi-n tâhú sâ cúú cuendá-í”, càchí-dé xâhaⁿ-dè. Te tâtá-dè-áⁿ ñî sâñaha-dè ndí dííⁿ núú-güedé sá cúú cuendá-güedé. 13 Te núú sâcú-ni nduu, te déhe-dé téé líhli-gá-áⁿ ñî nadico-dè nchaa sá ñî sâñaha tâtá-dè, te ní xica-dé cuáháⁿ-dé #ñ ñúú xícá, te yàcáⁿ ní tñí-dé #ñ ichi cuèhé ichi duha, te ní ndîhi dîhúⁿ-dè ní dándónñuhu-dé ndîhi cue téé càháⁿ ndîhi-dé, ndîhi nchaa ñâyíu dîhí xîndecu ichi díí ñí. 14 Te ní ndîhi ndoo dîhúⁿ-dè ní dándónñuhu-dé, te núú sâcú-ni nduu ní sâá tnamá ñúú núú ndécú-dè-áⁿ, te ñá ñíhí-gá-dé sá cáxí-dè, te xîhí-dé docó. 15 Núú ní xica-dé cuáháⁿ ndúcú chîuⁿ-dé núú #ñ téé dîu-ni ñúú xícáⁿ, te téé-áⁿ ñî sâha chîuⁿ ñaha-dé #ñ xichi núú ñúhú-dè

coto-dé cùchí. 16 Te súúní xîhí-dé docó te cuíní-dé caxi-dé nchaa sâ sâha-yu cùchí-áⁿ ní cùu, dico ñá túú ní sâñahá-yu xii-dé. 17 Te uuⁿni ní sani váha iní-dé, te ní cachí-dé: “Íío cuèhé cue téé xînu cuechi vehe tâtá-í te ío cuèhé sâ xéxí-güedé ndécú, te yúhú duha ndòho-í docó iha! 18 Te ndacuíñí-í te núhú-í vehe tâtá-í, te cúñaha-í xii-dé: Táu, ñá túú ní quide váha-í núú Yâ Ndiõxí te ní ñà túú ní quide váha-í núú-n, 19 te ñá túú-gă tâu-í sá cúú-í déhe-n vîtna, te cada ñaha-ñâ-ñ xî-í dàtná #ñ téé xînu cuechi núú-n”, duha ní sani iní-dé cúñaha-dè xii tâtá-dè. 20 Te sátá dúcáⁿ ní sani iní-dé, te ní natñí-dé ichi cuánuhú-dé vehe tâtá-dè, te xica-gă cuánuhú-dé ní xíní ñáhá tâtá-dè xii-dé te ní cundáhú ñí ñáhá-dè. Te xînu tâtá-dè-áⁿ ñî sâháⁿ nûtnahá ñáhá-dè, te ní numi ñaha-dè, te ío váha ní càháⁿ ndîhi ñaha-dè. 21 Te ní xâhaⁿ dèhe-dé-áⁿ xii-dé: “Táu, ñá túú ní quide váha-í núú Yâ Ndiõxí te ní ñà túú ní quide váha-í núú-n, te ñá túú-gă tâu-í sá cúú-í déhe-n vîtna”, cachí-dé xâhaⁿ-dè.

22 ‘Dico tâtá-dè-áⁿ ñî xâhaⁿ-dè xii cue téé xînu cuechi núú-dè: “Chí quèññuhu ndîhi-ni dóó vâha-gá cuáha-ndo dèhe-í-a na cuñnu-dé, ndîhi #ñ dehé ná quîhi díquí ndáhá-dè, ndîhi chàú váha na quîhi-dé. 23 Te quîhíⁿ ngueheⁿ-ndo #ñ ndicutu numa quîti caváha-gá, te cahni-ndo-dî, te na càda-o vico, te na càxi-o-dî. 24 Chi déhe-í-a ní sani iní-í sá ñî xîhí-dé ní cùu, te ñáhá chi ndècu vívú-dè, te ní sani tucu iní-í sá ñî xîta-dé ní cùu te ní nasáá meé-dè”, càchí-dé xâhaⁿ-dè xii cue téé xînu cuechi núú-dè-áⁿ. Te ní ngüíta-güedé ní quide-güedé vico.

25 “Te déhe-dé téé sâcuéhé-gă cuáháⁿ-dé yucu, te òré cuándixi-dé tá nduu yatni-dé vehe, te ní tecú dóho-dé ío yaá cúú vico. 26 Te ní cana-dé #ñ téé xînu cuechi, te ní xícáⁿ tñúhú-dè núú-dè ná cuendá ducaⁿ ío yaá. 27 Te téé xînu cuechi-áⁿ ñî xâhaⁿ-dè: “Ñaní-n tée cuáháⁿ ní cùu ní nasáá-dé, te tâtá-n ñî táúchíúⁿ-dè ní xîhí #ñ ndicutu nûma quîti caváha-gá cuendá sá ñî nasáá váha-dé”, càchí-dé xâhaⁿ-dè.

28 'Dico ñaní-dé tée sàcuéhé-ǎⁿ ní cudééⁿ-dě, te ní cachí-dé sá vǎ ndíhu-dé vehe cundecu-dé vico-áⁿ ní cùu, dico ní quee tǎtá-güedé ní cáháⁿ ndàhú-dé núú-dě cuendá ndíhu-dé. 29 Te ní xáhaⁿ-dě xii tǎtá-dě: “Táu, cundedóho váha saú-n tñùhu na càháⁿ-í-a, yúhú ío cuéhé cuiá ní cuu xínu cuechi-í núú-n, te ni ìⁿ xito ñá túú quide sáá iní-í núú-n, te ni ìⁿ chivá líhli ñá túú tàxi-n-di caxi dí^í iní-í-di ndihí cue tée càháⁿ ndihí-í. 30 Te vitna ní nasáá déhe-n tée ní sáháⁿ ní dándóñùhu díhúⁿ-n ndihí nchaa ñáyiú xíndecu ichi dí^í iní. Te ní sahní-n ìⁿ ndicutu numa quiti caváha-gá sá cuendá-dé”, cǎchí-dé xǎhaⁿ-dě xii tǎtá-dě. 31 Te ní xáhaⁿ tǎtá-dě xii-dé: “Yòhó déhe-í ducaⁿ-ni ndècu ndihí ñaha-n xii-í, te nchaa sá ndécú ndihí-í cúú-xí cuendá-n. 32 Te vitna dacutí^í tauú-xi sá cádá-ó vico, te cudí^í iní-ó, chi ñaní-n-áⁿ ní quide-í cuendá sá ní xíhí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, cǎchí-dé xǎhaⁿ-dě xii déhe-dé tée sàcuéhé-gǎ-áⁿ –duha cuáháⁿ cuendú ní caní Jèsús núú-güedé.

16

Nàcuáa ní quide ìⁿ tée tàxi tñuní ñáhá xii cue tée xínu cuechi

1 Te Jèsús xáhaⁿ-gǎ xii cue tée xíca cuu ndihí-gá:

–Ní xíndecu ìⁿ tée cuica, te ducaⁿ ní xíndecu ìⁿ tée ní taxi tñuní ñáhá xii cue tée ní xínu cuechi núú-dé. Te tée-áⁿ ní xíní ñáhá ñáyiú dùhu-dé díhúⁿ tée cùu patróóⁿ-dě, te cuáháⁿ-dé dándóñùhu-dé, te ní xáhǎⁿ-yu xii tée cùu patróóⁿ-dě sá dúcáⁿ quide-dé.

2 Te tée cùu patróóⁿ-dě-áⁿ ní cana ñaha-dě xii-dé, te ní xáhaⁿ-dě: “¿Ná cuendá duha càháⁿ ñáyiú cuendá-n? Yáchí chi na tàxi cuendá-n nchaa chiuⁿ ní quide-n, chi vitna te vá táxí tñuní-gá-n cuè tée xínu cuechi núú-í”, cǎchí-dé xǎhaⁿ-dě. 3 Te tée tàxi tñuní ñáhá xii cue tée xínu cuechi-áⁿ ní sani iní-dé: “¿Te nása cada-í vitna na quèhndé patróóⁿ-í chiuⁿ-í? Chi ñá cündè-gá-í cada-í chiuⁿ vée, te

cùcahaⁿ núú-í cácáⁿ ndàhú-í. 4 Dico duha cada-í cuendá queheⁿ cuendá ñáhá ñáyiú vehé-yu òré ná quèhndé duuⁿ-ná patróóⁿ-í chiuⁿ-í”, duha ní sani iní-dé. 5 Te sáta dúcáⁿ te ní cana-dé ìⁿ ìⁿ cue tée tauú núú patróóⁿ-güedé. Te tée díhna ní xícáⁿ tñuhú-dé núú-dě, te xáhaⁿ-dě: “¿Ndèé dau tauú-n núú patróóⁿ-í?”, cǎchí-dé xǎhaⁿ-dě. 6 Te tée-áⁿ ní xáhaⁿ-dě: “Tauú-í ìⁿ ciendú bàrríl acití”, cǎchí-dé xǎhaⁿ-dě. Te tée tàxi tñuní ñáhá xii cue tée xínu cuechi-áⁿ ní xáhaⁿ-dě: “Iha náu reciú-n-á, te ndadúha ingá sá údico úxí taxi-n”, cǎchí-dé xǎhaⁿ-dě. 7 Te dǎtnuní ní xícáⁿ tñuhú tucu-dé núú ingá-dé, te xáhaⁿ-dě: “Te yòhó, ¿ndèé dau tauú-n-í?”, cǎchí-dé xǎhaⁿ-dě. Te tée tauú-áⁿ ní xáhaⁿ-dě: “Íⁿ ciendú ngohnchi triú tauú-í”, cǎchí-dé xǎhaⁿ-dě. Te tée tàxi tñuní ñáhá xii cue tée xínu cuechi-áⁿ ní xáhaⁿ-dě: “Iha náu reciú-n-á, te cadúha ingá sá cùmídíco-nǎ taxi-n”, cǎchí-dé xǎhaⁿ-dě. 8 Te tée cùu patróóⁿ-áⁿ ní cachí-dé sá ío váha ñùhu díquí tée dùhu-áⁿ nàcuáa cada-dé cundecu váha-dé. Te nchaa ñáyiú xíndecu ichi cuéhé ichi duha, ío-gá váha ñùhu díquí-yu nàcuáa cada-yu cundecu váha-yu ndihí nchaa ñáyiú cündihí-yu dàcúúxí ñáyiú ndècu ichi Yá Ndiǒxí.

9 Te yúhú cǎchí-í sá cádá-ndó sǎ vǎha ndihí nchaa sá ndécú ndihí-ndo ní cuáha ñuyúú yíca cuèchi-a, te ducaⁿ te coo cue tée ío váha tnahá tñuhu ndihí-ndo, te òré ná ndihí nchaa sá ío ñuyúú-a, te Yá Ndiǒxí queheⁿ cuendá ñáhá-gǎ xii-ndo, te cundecu-ndo ndihí-gá ni caa ni quíhíⁿ.

10 Te núu ìⁿ tée quide ndáá cuèi ìⁿ chiuⁿ líhli na càda-dé, te díu-ni ducaⁿ quide ndáá-dé cuèi ìⁿ chiuⁿ cahnu na cada-dé. Dico tée ñá túú quide ndáá, chi cuèi chiuⁿ líhli àdi chiuⁿ cahnu na cada-dé dico ìⁿ-ni quide-dé. 11 Te núu nchòhó vá cádá-ndó sǎ vǎha ndihí nchaa sá ní cuáha ñuyúú yíca cuèchi-a ña, te Yá Ndiǒxí vá táxí-gǎ sá vǎha ndècu ndihí-gá xii-ndo. 12 Te núu vá cádá ndáá-ndó còto-ndo nchaa sá táxí núu tnahá ñáyiú-ndo, te vá yòo taxi sá

ndúú tàhú-ndó.

13 "Te ni ìn tée xìnu cuechi v́a ndácú-dě cunu cuechi-dě núú ṹ pàtróón, chi tée-án cuu váha iní-dé núú ìn pàtróón-dě te tñi-dé nchaa tnúhu càháñ pàtróón tée cùu váha iní-dé núú-xi-án. Te núú ìngá tucu pàtróón-dě v́a cúú v́aha iní-dé, te ni v́a tñí-dě tnúhu càháñ pàtróón-dě-án. Te ducañ sàtnahá-xi cùu nchohó chi v́a ndácú-ndó cunu cuechi-ndo núú Yá Ndiòxí te cuhuñ iní-ndó nchaa sá ìo ñuyíú-a —càchí-gá xáhañ-gă xii-güedé.

14 Te nchaa cue tée cùu fariséú ìo ñuhu iní-güedé nchaa sá ìo ñuyíú-a, te x́indedóho-güedé nchaa tnúhu càháñ Jèsús, te ní cáháñ yíchí-güedé cuendá-gá. 15 Te Jèsús ní xáhañ-gă xii-güedé:

—Nchòhó cúú-ndó cuè tée ìo váha càháñ núú ñáyi cuendá-ni sá cuiní-ndó càháñ váha-yu cuendá-ndó, dico Yá Ndiòxí xìní ndáá-gá nàcuáa càa iní-ndó ìn ìn-ndo, te nchaa sá càchí cue ñáyi ñuyíú-a sá ìo nàndíhi, Yá Ndiòxí dáquèe tíhú-gă.

Cuendá nchaa tnúhu ní chídó tnùnì ndíi Moisés

16 "Te nchaa tnúhu ní chídó tnùnì ndíi Moisés cùnù-xi ni cuu, ndíhi nchaa tnúhu ní chídó tnùnì cue tée ní xóo cáháñ tnúhu Yá Ndiòxí ndéé sanaha. Dico cútnahá ní ngúita té Juáá tée ní xóo dacuàndute ñaha xii ñáyi ní cáháñ-dé tnúhu-í, ndéé dàv́a-án ñà túú-gă ní cùnùu nchaa tnúhu ní chídó tnùnì ndíi Moisés ndíhi nchaa tnúhu ní chídó tnùnì cue tée ní xóo cáháñ tnúhu Yá Ndiòxí ndéé sanaha. Te ñi-ni ndéé dàv́a-án ñi quesaha ta təcú tnùnì ñáyi nàcuáa ndíhu ndaha ñaha Yá Ndiòxí xií-yu, te v́ai ñáyi ìo sàni iní-yu vitna nàcuáa cadá-yu ndíhu ndaha ñaha Yá Ndiòxí xií-yu. 17 Te nchaa tnúhu ní chídó tnùnì ndíi Moisés ìo ndáá càháñ-xi, te ndíhi-gá naa andíu ndíhi ñuyíú dàcúxí sá ndíhi ìn ìn tnúhu-án cada-xi nàcuáa càháñ-xi.

Jèsús càháñ-gá cuendá ñáyi dàña tnaha

(Mt. 19:1-12; Mr. 10:1-12)

18 "Te núú ìn tée na dàña tnaha-dé, ndíhi ñadíhi-dé, te tnándaha tucu-dé ndíhi ìngá-yu, te nèhé víhí quide-dé te núú ducañ na càda-dé, te tée na tnándaha ndíhi ñaha ní dáñá yí-xi, te ñi-ni ducañ ñà túú cùu-xi sá v́aha te núú ducañ na cadá-yu —càchí-gá xáhañ-gă xii-güedé.

Cuendá ìn tée nàni Lázarus ndíhi cuendá ìn tée cuica

19 Te xáhañ tucu-gá xii-güedé:

—Ní xíndecu ìn tée cuica, te ní xóo cuíhnu-dé mee-ni dđó v́aha dóó v́i càa, te nchaa nduu súní v́aha ní xóo cada-dé vico vehe-dé. 20 Te ní xíndecu tucu ìn tée ndáhú ní xínani-dě Lázarus, te tée-án ñi cuhú-dé ní xíndé-dé nitùhú-dé ndíhi, te ìn nduu ìn nduu ní xóo taxinucóo ñaha-güedě xii-dé yuyèhe tée cuica-án. 21 Te tée ndáhú-án ñi xóo cuú-dé docó, te ní xóo cuiní-dé caxi-dé nchaa sá ñà túú-gă ní xóo yáha caxi tée cuica-án, te ñà túú ní xóo níhí-dě. Te cuèi iná ní xóo quíhi-ndí ní xóo nayuu-ndí nchaa núú ndíhi ndéé-dé-án. 22 Te ní sáá ìn nduu te ní xíhi tée ndáhú-án, te cue espíritú xínú cuèchi núú Yá Ndiòxí ndécá ñaha-xi xii-dé cuánda núú ndécú té Àbrahám cundecu-dé. Te ní sáá nduu ñi xíhi tée cuica-án tnàhá-dé, te ní chindúxi ñaha-güedě xii-dé. 23 Te ní sáá-dé núú xíndecu nchaa ñáyi ní xíhi ñà túú ní quide ndáá núú Yá Ndiòxí te xíañ ìo ndòho-dé ndécú-dě, te ní ndonehe núú-dě te xica ní xíní-dé té Àbrahám ndíhi té Lázarus-án xíndecu-güedé. 24 Te níhi ní cáháñ-dé, te xáhañ-dě: "Yòhó tătá Àbrahám, cundáhú iní ñahá xii-í, te cúñaha xii té Lázarus ná dándaxi-dé díquí ndáhá-dě, te na quixi-dé dandàxi-dé yàa-í, chi ìo ndòho-í ñùhù-í núú ñùhú núú càyú-a", càchí-dé xáhañ-dě xii té Àbrahám. 25 Dico té Àbrahám ní xáhañ-dě: "Ndáhú yòhó ñani tnàhá-í, dandacu iní sá ìo váha ní xíndecu-ñ ñuyíú, te té Lázarus ìo ndáhú ní ndòho-dé ní xíndecu-dé. Te vitna ní nucúndecu váha-dé iha, te yòhó ndóhó-n vitna. 26 Te ñà díú-ni sá xíañ tucu, chi cuádava ndècu ìn déhv́a cùnú ñùhú nèhu-xi núú

ndécú-ó, te cuèi nchaa ñáyiú xĩndecu iha na càchí iní-yu quixí-yu núú ndécú-ndó dico vá ndácú-yu, te ni nchòhó vá ndácú-ndó quixi-ndo núú ndécú-ndí”, càchí-dé xǎhaⁿ-dě. ²⁷ Te ní xáhaⁿ tée cuica-ǎn: “Te núú ducaⁿ te càháⁿ ndàhú-í núú yòhó tǎtá Àbrahám vitna sá téndàha-n té Lázará ná quihíⁿ-dé vehe tǎtá-í, ²⁸ chi ndècu úhúⁿ-gá ñaní-í, te na cǔñaha-dě xii-güedé sá vǎ cáda-güedé dàtná ní quide-í cuèndá sá vǎ quixí-güedé tnàhá-güedé núú ndécú-í ndóhò-í-a”, càchí-dé xǎhaⁿ-dě. ²⁹ Te té Àbrahám ní xáhaⁿ-dě: “Mee-güedé ndécú ndíhi-güedé nchaa tnúhu ní chídó tnùní ndíi Moisés, ndíhi nchaa tnúhu ní chídó tnùní cue tée ní xóo cáháⁿ tnúhu Yá Ndiòxí ndéé sanaha, te nchaa tnúhu-áⁿ ná tñi-güedé nàcuáa càháⁿ-xi”, càchí-dé xǎhaⁿ-dě xii-dé. ³⁰ Te ní xáhaⁿ tùcu tée cuica-ǎn: “Tǎtá Àbrahám, dico vá cáda cuèndá-güedé nchaa tnúhu-áⁿ, dico núú ñáyiú ñá túú-gǎ ndécú ñúyúⁿ ñáyiú ndècu ndíhi-n quihíⁿ-yu cáháⁿ ndíhi ñàhá-yu xii-güedé nàcuáa ndùu tnúhu váha, te ndixi cuèchi iní-güedé nchaa sá ñà túú quide váha-güedé ndécú-güedé, te cada váha-güedé”, càchí-dé xǎhaⁿ-dě xii-dé. ³¹ Dico té Àbrahám ní xáhaⁿ-dě: “Te núú ñá túú cuèndá-güedé tñi-güedé tnúhu ní cáháⁿ ndíi Moisés, ndíhi tnúhu ní cáháⁿ cue tée ní xóo cáháⁿ tnúhu Yá Ndiòxí ndéé sanaha ña, te ñu-ni ducaⁿ càda-güedé cuèi ñáyiú ní xíhí ná ndòtó-yu cúñàhá-yu nàcuáa ndùu tnúhu váha, chi vá quindáa iní-güedé”, càchí té Àbrahám xǎhaⁿ-dě xii tée cuica-ǎn —càchí Jèsús xáhaⁿ-gǎ xii cue tée cùu fariséú.

17

Quihi iní-ó vǎ cùndècu-o ichi cuehé ichi duha
(Mt. 18:6-7, 21-22; Mr. 9:42)

¹ Te Jèsús ní xáhaⁿ-gǎ xii cue tée xica cuu ndíhi-gá:

—Dacuití sǎ cóo cuè tée dacàháⁿ-güedé ñáyiú cada-yu nándi sá cuèhé sá dúhá, ñ dico ndàhú ní cuu cue tée ducaⁿ na dàcàháⁿ ñàhá xii-yu cada-yu nándi

sá cuèhé sá dúhá! ² Chi váha-gá sá núu na dàcutu ndeé ñáyiú ñá yúú yòdó dücúⁿ-güedé te dàquée ñàhá-yu xii-güedé xití ndute làmár, te ñá díú sǎ cùndècu-güedé dacàháⁿ-güedé ñáyiú cada-yu nándi sá cuèhé sá dúhá, cuèi ñáyiú ndàhú iní-xi dandàhú-güedé. ³ Te ío quihí iní-ndó cùndecu-ndo.

“Te núú ñá ñaní tnàhá-ndó quide-dé ñá sá ñà túú tàú-dé cada-dé sá cúú-xí-ndó te cáháⁿ-ndó dòho-dé, te núú ní ndixi cuèchi iní-dé sá ñà túú ní quide váha-dé, te cada càhnu iní-ndó sǎ ñi quide-dé. ⁴ Te cuèi úsá xito na càda-dé nándi sá ñà túú tàú-dé cada-dé sá cúú-xí-ndó ñá nduu, te núu na quixi-dé úsá xito núú-ndó, te cachí-dé sá vǎ dúcáⁿ-gǎ cada-dé, te xini ñuhu-xi cada càhnu iní-ndó-dé —càchí-gǎ xáhaⁿ-gǎ xii-güedé.

Ñáyiú sàndáa ndisa iní-xi

⁵ Te ní xáhaⁿ cuè tée xica cuu ndíhi Jèsús xii-gá:

—Chindee ñàha xii-ndí cuèndá ducaⁿ te quindáa-gǎ iní-ndí sá Yá Ndiòxí ndácú-gǎ quidé-gǎ nchaa sá váha —càchí-güedé xǎhaⁿ-güedé xii-gǎ.

⁶ Te ní xáhaⁿ Jèsús:

—Te núu nchòhó quindáa ndisa iní-ndó sùúni cuèdicó luha líi dàtná cuèndá-ndó càa ñá ndíquíⁿ yutnu nàni mostázá, te ducaⁿ te cuu cúñaha-ndo xii ñá yutnu: “Quene-n iha te quihíⁿ-n cuèhnu-n xití làmár”, duha cúñaha-ndo. Te ducaⁿ càda-xi te núu na quindáa ndisa iní ñàhá-ndó xii-í —càchí-gǎ xáhaⁿ-gǎ xii-güedé.

Nàcuáa tàú ñá tée xinu cuechi cada-dé

⁷ Te xáhaⁿ tùcu-gǎ xii-güedé:

—Te núu ñá nchòhó ndécú ñá tée xinu cuechi núú-ndó, te cuáháⁿ-dé yucu cuángada chiúⁿ-dé, àdi cuáháⁿ-dé yucu coto-dé quiti, te òré ní nasáa-dé vehe sá ñi sáháⁿ-dé yucu, te vá cúñaha nchòhó cue tée cùu patróon-dé xii-dé: “Yáchí nehé caxi-n díta”, vá dúhá cúñaha-ndo. ⁸ Chi nchòhó cue tée cùu patróon-dé cúñaha-ndo xii-dé: “Cundíhí iní cada túha sá cùdini-í, te díhna-gǎ-í caxi-í díta te dàtnùni caxi-n”, duha cúñaha nchòhó cue tée

cùu patróón xii-dé. ⁹ Te òré ná ndíhí chiuⁿ ní táhú nchòhó cue téé cùu patróón cada téé xínu cuechi núú-ndó, te ñá túú tàú-ndó ndàcáⁿ táhú-ndó núú téé xínu cuechi núú-ndó. ¹⁰ Te duha càháⁿ-í chi núu òré ná ndíhí nchaa chiuⁿ ní táhú Yá Ndiöxí cada-ndo, te cachí-ndó: “Nchúhú cúú-ndí cue téé xínu cuechi núú Yá Ndiöxí, dico ñá túú tàú-gá ndacáⁿ táhú-gá núú-ndí, chi mee-ni chiuⁿ ní táhú-gá ní quide-ndí”, duha cachí-ndó — càchí-gá xáhaⁿ-gá xii-güedé.

Jèsús quidé tātna-gá úxí cue téé tnàhà cuéhé sã dátèhyú nihnu-xi yiqui cùñú ñáyiu

¹¹ Te ñuhu Jèsús ichi cuáháⁿ-gá ñuú Jerusálén, te ní yáha-gá núú ràyá distritú Sàmariá ndíhí distritú Galiléa. ¹² Te ta cùyatni-gá ñⁿ ñuú líhli cuáháⁿ, te ní sátnahá ñáhá úxí tnàhà cue téé cùhú xii-gá, te tnàhà-güedé cuéhé sã dátèhyú nihnu-xi yiqui cùñú-ó dico xica lùha ní ngúnu tníi-güedé, ¹³ te níhi ní cáháⁿ-güedé, te xáhaⁿ-güedé xii Jèsús:

—¡Mèstrú, cundàhú iní ñáhá xii-ndí! —càchí-güedé xáhaⁿ-güedé xii-gá.

¹⁴ Te òré ní xiní ñáhá Jèsús xii-güedé, te ní xáhaⁿ-gá:

—Chí cuáháⁿ núú dütú ná cùndehe ñaha-dé xii-ndo —càchí-gá xáhaⁿ-gá xii-güedé.

Te ní xica-güedé cuáháⁿ-güedé, te ichi-ni ñuhu-güedé cuáháⁿ-güedé ní ndúha-güedé cuéhé tnàhà-güedé. ¹⁵ Te nchaa-güedé ní cutnùní iní-güedé sá ñí ndúha-güedé, dico ñⁿ-ni-dé ní nacuico-dé, te ní ngüíta-dé níhi ní cáháⁿ-dé, te ní cachí-dé sá ño càhnu cuu Yá Ndiöxí. ¹⁶ Te ní ngüíñí xítí-dé núú Jèsús, te ní nuu núú-dé ndàa núú ñúhú ndàcáⁿ táhú-dé núú-gá. Te téé-áⁿ cúú-dé téé distritú Sàmariá. ¹⁷ Te Jèsús ní cachí-gá:

—Úxí tnàhà-güedé ní ndúha cuéhé tnàhà-güedé. ¿Te ndèé ndécú dàva-gá-güedé-i? ¹⁸ ¿Te náa ñⁿdii-ni téé ingá ñuú-a ní nacuico-dé ndàcáⁿ táhú-dé núú Yá Ndiöxí, te càchí-dé sá ño càhnu cuu-gá ñá? —càchí-gá.

¹⁹ Te ní xáhaⁿ-gá xii téé-áⁿ:

—Ndacuíñí te núhú-n, chi sa ní ndúha-n cuéhé tnàhà-n, chi ní sándáá iní-n Yá Ndiöxí —càchí-gá xáhaⁿ-gá xii-dé.

Nàcuáa yìndaha ñaha Yá Ndiöxí (Mt. 24:23-28, 36-41)

²⁰ Te cue téé cùu fariséú ní xicáⁿ tnúhú-güedé núú Jèsús núu ná ama ngüíta Yá Ndiöxí ndíhu ndaha-gá ñáyiu. Te ní xáhaⁿ-gá:

—Ñá túú ñá cada-xi ñuyú quini-ndó cuendá cutnùní iní-ndó sã ndíhu ndaha ñaha Yá Ndiöxí xii-ndo. ²¹ Te ní vã yõo cachí: “Iha ndècu-gá táxí tnùní-gá, àdi yacáⁿ ndécú-gá táxí tnùní-gá”, chi tnuú-ndó sã ndecu-gá ndíhí nchaa ñáyiu yìndaha-gá — càchí-gá xáhaⁿ-gá xii-güedé.

²² Te ní xáhaⁿ-gá xii cue téé xica cuu ndíhí-gá:

—Te nchòhó chi sáá nduu, te cachí iní-ndó sã sùúni cuèdicó ñⁿ nduu quini ñáhá-ndó xii yúhú Téé cùu ñaní tnáhá-ndó nchàa-ndo, dico vã quini ñáhá-gá-ndó xii-í. ²³ Te coo ñáyiu cúñáhá-yu xii-ndo: “Iha ndècu-gá, áⁿ yacáⁿ ndécú-gá”, quesàhá-yu cúñáhá-yu xii-ndo. Dico vã quindáá iní-ndó quíhíⁿ-ndó ndíhí-yu núú càchí-yu, te ní vã cání iní-ndó quíhíⁿ méé-ndó. ²⁴ Chi dàtná cùni-ndó quide-xi oré sáá ndúté àndiu, chi uuⁿi dàyehé-xi nihí ñuyú, ducaⁿ càda-xi nduu na quixi tucu yúhú Téé cùu ñaní tnáhá-ndó nchàa-ndo, te dàvá-áⁿ quini ñáhá nchàa-ndi túhú ñáyiu xii-í. ²⁵ Dico díhna-gá ndoho vìhi-í, te daquèe tíhú ñáhá ñáyiu ñuyú-a xii-í. ²⁶ Te cadá-yu dàtná ní quide ñáyiu ní xíndecu cùtnàhà ní xíndecu té Nõé, te diu-ni ducaⁿ sátnahá-xi cada nchaa ñáyiu ndècu vitna ndéé sáá nduu quixi tucu yúhú Téé cùu ñaní tnáhá-ndó nchàa-ndo. ²⁷ Chi caxi-ní-yu, coho-ní-yu, te caca cuu-ni cue téé xica ndáhú, te tnàndaha-ní-yu, chi ducaⁿ ñí quide-yu dàvá-áⁿ ndéé ní sáá nduu cuànguee té Nõé xítí bàrcú, te ní ngüíta-xi ní cuuⁿ dáú ñí ndaa ndute ñuyú, te ncháa-yu ní xíhí ní cáhá-yu dàvá-áⁿ.

28 Te ðiu-ni ducaⁿ nǐ quide tucu ñáyiú cútnàhá ní xíndecu té Lõt, chi xèxí-yu xihí-yu, te sàáⁿ-yu te nàdicó-yu, te xíxitú-yu nándi sá xíxitú-yu, te nchaa cue té xídácáá-güedě vehe. 29 Te òré ní quee té Lõt ñuú Sòdomá, te ní ngoyo ñuhú andiú, te dàcá yúú sũú ní dicó ní nduu ñuhú-nǎ-xi, te ní xihí nchaandi túhú ñáyiú ñuú-áⁿ. 30 Te ðiu-ni ducaⁿ sǎtnahá-xi cada ñáyiú na sàá nduu quixi tucu yúhú Tée cùu ñani tnáhá-ndó nchaa-ndo ñuyíú-a.

31 Te núu ñⁿ ñáyiú càndodó-yu díquí véhě-yu nduu-áⁿ, te ní vá ndǐhu-gá-yu quehéⁿ-yu ñⁿ ndachìuⁿ-yu canehé-yu quíhíⁿ, te ñáyiú cuáháⁿ yucu, te ní vá nùhú-gá-yu vehé-yu. 32 Te chí dándàcu iní nàcuáa ní yáha ñadìhí té Lõt. 33 Te nchaa ñáyiú cuení dàcácu nihnu mee-xi ñuyíú-a ña, te cuíta nihnú-yu, te nchaa ñáyiú na cùú sá cuendá-í, te naníhí tàhú-yu.

34 Te na càchí tnúhu tucu-í xii-ndo sǎ ndùu-áⁿ, te núu úú-yu càa ñⁿ núu xító, te ñⁿ-yu ndanchitá-yu ndaá-yu andiú, te ñⁿ-yu quendóo. 35 Te núu úú ñáyiú ðìhí nchícõ-yu ñⁿ-ni vèhe, te ñⁿ-yu ndanchitá-yu ndaá-yu andiú, te ñⁿ-yu quendóo. 36 Te núu úú cue té yèhi-güedé yucu, te ñⁿ-dé ndànchita-dé ndaa-dé andiú, te ñⁿ-dé quendóo —càchí-gá xáhaⁿ-gǎ xii-güedé.

37 Te sá dúcáⁿ nǐ cáháⁿ-gá nũu ní xicáⁿ tnúhú-güedě núú-gǎ, te xáhaⁿ-güedě xii-gá:

—Mèstrú, ¿te ndéé ducaⁿ càda-xi-i? —cachí-güedé xáhaⁿ-güedě xii-gá.

Te ní xáhaⁿ-gǎ:

—Te nchòhó xini-ndó sǎ ncháá nũu yúcu yiqui cuñú ní xihí, te yàcáⁿ tàcá cue ndixíí xéxí-güedě —cachí-gá xáhaⁿ-gǎ xii-güedé.

18

Jèsús càháⁿ-gá cuendá ñⁿ juéxí ndihi cuendá ñⁿ ñaha quèé

1 Te Jèsús ní cani-gá ñⁿ cuendú núu-güedě cuendá sá vǎ ná túhú iní-güedé cáháⁿ ndihi-güedé Yǎ Ndiõxí nchaa-ni òré. 2 Te xáhaⁿ-gǎ:

—Ñⁿ ñuú ndécú ñⁿ juéxí, te ní ñà túú sàndáá iní-dé Yǎ Ndiõxí, te ní ñⁿ tnúhu xáhaⁿ ñáyiú ñà túú cuení-dé cada cuendá-dé. 3 Te ðiu-ni ñuú-áⁿ ndécú tucu ñⁿ ñadìhí ñaha quèé, te ní sáháⁿ-aⁿ càháⁿ ndàhú-aⁿ núú juéxí-áⁿ cuendá cada ndáá-dé ñⁿ cuéchi. 4 Te tǐtní xito ní cuu sáháⁿ-aⁿ càháⁿ ndàhú-aⁿ núú-dě te ñà túú cuení-dé cada cuendá-dé tnúhu càháⁿ-aⁿ ní cùu, te ndéé núú ñà cúú-gǎ te ní sani iní-dé: “Te cuèi ñà túú sàndáá iní-í Yǎ Ndiõxí, te ní ñà túú quide cuendá-í nchaa tnúhu càháⁿ ñáyiú cada-í, 5 dico na càda ndáá-í cuendá ñaha quèé-a ndihi ñáyiú cùu úhú iní tnáhá ndihi-aⁿ, chi vá cündèe-gá iní-í nuu núu quixi-aⁿ dasátú iní ñáhá xii-í”, duha ní sani iní té cùu juéxí-áⁿ —càchí-gá xáhaⁿ-gǎ xii-güedé.

6 Te ní xáhaⁿ tucu-gá xii-güedé:

—Càda cuendá-ndó nàcuáa ní sani iní juéxí té cuihna iní-xi-áⁿ. 7 Te Yǎ Ndiõxí ío chindee-gá nchaa ñáyiú ní cáháⁿ-gá cundecu ndihi-gá, chi cuèi nduu cuèi niú càháⁿ ndihi ñáhá-yu xii-gá, te vá cùyàa-gá nachinaa-gá nchaa sá quidé ñaha nchaa ñáyiú cùu úhú iní ñáhá xii-yu. 8 Te ío ndǐhi ducaⁿ càda-gá. Te òré ná quixi yúhú Tée cùu ñani tnáhá-ndó nchaa-ndo, ¿te náa naníhí-gǎ-í ñáyiú sàndáá ndisa iní Yǎ Ndiõxí-áⁿ? —càchí-gá xáhaⁿ-gǎ xii-güedé.

Nàcuáa quide ñⁿ té cùu fariséú ndihi ñⁿ té cùu cobradór

9 Te Jèsús ní cáháⁿ-gá núú ñáyiú nàcuáa quide ñáyiú sàni iní sá ío quide ndáá te dàquee tǐhũ-yu tnàha ñáyiú-yu, te xáhaⁿ-gǎ xii-yu:

10 —Úú cue té cuáháⁿ-güedé veñúhu càhnu sá ío cùnno cáháⁿ ndihi-güedé Yǎ Ndiõxí, te ñⁿ-dé cúú-dě té cùu fariséú, te ingá-dé cúú-dě té cuihna iní-xi quide cobrá ñáhá xii ñáyiú cuendá impuèstú. 11 Te té cùu fariséú-áⁿ nútnǐ-dé càháⁿ ndihi-dé Yǎ Ndiõxí, te xáhaⁿ-dě xii-gá: “Yòhó Dútú Ndiõxí ndàcáⁿ táhú-í núú-n, chi ñà túú quide-í dàtná quidé dàva-gá-güedé, chi ðuhu-güedé, càháⁿ ndihi-güedé ñadìhí te ñà díú

ñàdihí-güedé cúŭ-yu, te nándi-gá nchaa sá cuéhé sá dúhá quide-güedé, te ni ñà túú quide-í dàtná quidé tée cuihna iní-xi quide cobrá ñáhá xii ñáyiú cuendá impuèstú ndécú iha. ¹² Chi yúhú ñá túú tnàhí ná xéxi-í úú nduu xití samàná cuendá sá càháⁿ ndihí ñaha-í xii-n, te nchaa sá ñihí-í te càhu-í úxí xichi, te ìⁿ xichi tàxi-í xii-n”, càchí-dé xàhaⁿ-dè xii Yá Ndiöxí. ¹³ Dico tée cuihna iní-xi quide cobrá ñáhá xii ñáyiú cuendá impuèstú-áⁿ chi xica lùha nutní-dé, te ni lùha ñá túú cùyⁱⁱ-dé ndonehe núú-dé andiú cuendá sá ndíxí cuèchi iní-dé nchaa sá ñà túú vâha quide-dé, te ndèdí ndaha-dé pèchú-dé sá ndihú iní-dé, te xàhaⁿ-dè xii Yá Ndiöxí: “Yòhó Dútú Ndiöxí cundàhú iní ñáhá xii-í, chi ío cuéhé sá ñà túú vâha quide-í núú-n!”, càchí-dé xàhaⁿ-dè xii Yá Ndiöxí. ¹⁴ Te na càchí tnúhu-í xii-ndo sá tée cuihna iní-xi quide cobrá ñáhá xii ñáyiú-áⁿ ní tedóho Yá Ndiöxí nchaa tnúhu ní cáháⁿ-dé, te ní quide càhnu iní-gá nchaa sá ñà túú vâha ní quide-dé, te cuánuhú-dé vehe-dé. Te tée cùu fariséú-áⁿ ñà túú ní tedóho ñaha Yá Ndiöxí xii-dé. Chi nchaa ñáyiú na càda cahnu mee-xi ñuyíú-a te vâ cúŭ-yu ñáyiú cùnnuu, te nchaa ñáyiú ñá túú quide cahnu mee-xi, ñáyiú-áⁿ cunúú-yu —càchí Jèsús xàhaⁿ-gã xii-yu.

*Jèsús quidé ÿ-gã landú
(Mt. 19:13-15; Mr. 10:13-16)*

¹⁵ Te ìⁿ úú ñáyiú ndècá-yu landú lĩhli cuáháⁿ núú Jèsús chi cuení-yu sá téndàha ñaha-gá xii-güexi, te òré ní xiní cue tée xica cuu ndihí-gá sá ndècã-yu landú-áⁿ cuáháⁿ núú-gã, te ní ngüíta-güedé ténàá ñáhá-güedé xií-yu, te xàhaⁿ-güedé sá vâ dúcáⁿ càdá-yu. ¹⁶ Dico Jèsús ní cana ñaha-gã xii-güedé, te ní xàhaⁿ-gã:

—Chí dáñá ná quixi nahi landú lĩhli-áⁿ núú-í-a, te vâ càdí-ndó ìchi-güexi, chi dàtná cúú vâha iní cue landú lĩhli-áⁿ ducaⁿ cùu vâha iní cue ñáyiú yindaha ñaha Yá Ndiöxí. ¹⁷ Te na càchí tnúhu ndáá-í xii-ndo sá núu vâ quindáá iní ñáhá-ndó dàtná

quidé dâva landú lĩhli sàndáá iní ñáhá xii-í, te vâ ndĩhu ndaha ñaha Yá Ndiöxí xii-ndo, te vâ ndúú tãhú-ndó cùndecu-ndo ndihí-gá ni caa ni quíhíⁿ —càchí-gá xàhaⁿ-gã xii-güedé.

*Ìⁿ tée cuica càháⁿ ndihí-dé Jèsús
(Mt. 19:16-30; Mr. 10:17-31)*

¹⁸ Te ìⁿ tée cùnnuu ní xicáⁿ tnúhú-dè núú Jèsús, te xàhaⁿ-dè xii-gá:

—Yòhó Mèstrú, cùu-n tée ío vâha iní-xi, te cuení-í núu vâ cùndèe iní-n càchí tnúhu-n nã cúú sã vâha cada-í cuendá nduu tãhú-í cùndecu-í ndihí Yá Ndiöxí ni caa ni quíhíⁿ —càchí-dé xàhaⁿ-dè xii-gá.

¹⁹ Te Jèsús ní xàhaⁿ-gã xii-dé:

—¿Te cùtnuní iní-n nàcuáa ndùu tnúhu càháⁿ-n sã yúhú vâha iní-ãⁿ? Chi ìⁿ dîi díí-ni Yá Ndiöxí vâha iní-gá. ²⁰ Te yòhó xiní-n nàcuáa ní cachí Yá Ndiöxí cada ñáyiú, te duha ní cachí-gá: “Nchòhó cue tée vâ càháⁿ ndihí-ndo ñàdihí te núu ñá díú ñàdihí-ndó cùú-yu, te ducaⁿ-ni nchòhó cue ñáyiú dîhí tucu vâ càháⁿ ndihí-ndo tée te núu ñá díú yì-ndo cuu-güedé, te vâ cáhni-ndó tnàha ñáyiú-ndo, te ni vâ dúhú-ndó sã ndécú ndihí-yu, te ni vâ dácàcu-ndo cuèchi neñúú sá cúú-xí tnàha ñáyiú-ndo, te canehe-ndo sã yíñùhu núú tãtá-ndó ndihí núú nãná-ndó”, duha ní cachí Yá Ndiöxí cada ñáyiú —càchí Jèsús xàhaⁿ-gã xii-dé.

²¹ Te tée-áⁿ ní xàhaⁿ-dè xii-gá:

—Nchaa xíãⁿ ní ngüíta-í quidè-í ndéé cùtnàhá cúú landú-í —càchí-dé xàhaⁿ-dè xii-gá.

²² Te Jèsús ní xàhaⁿ-gã xii-dé:

—Dico cùmání ìngá núú sã càdá-n, vitna te quíhíⁿ-n te dico-n nchàa sá ndécú ndihí-n, te díhúⁿ-n cuãha tãhú-n cuè ñáyiú ndàhú, te ducaⁿ te nduu tãhú-n cùndecu vâha-n núú ndécú Yá Ndiöxí táxí tnúni-gá, te na yãha ducaⁿ càda-n te quixi-n chitnahá ñáhá-n xii-í —càchí-gá xàhaⁿ-gã xii-dé.

²³ Te sá dúcáⁿ ní xàhaⁿ Jèsús xii-dé, te ío ní cundiyí-dé, chi ío cuica-dè.

24 Te sá nǐ xiní ñáhá Jèsús xii-dé cùndìyí-dé, núu ní cachí-gá:

—Ío úhú quíndáá iní ñáyiú cuica Yă Ndiôxí cuendá ndíhu ndaha ñaha-gá xii-yu! 25 Te yáchí-gá yáha ìⁿ càméyu yaú ìⁿ yiqui tìcú dàcúxí sǎ quíndáá iní ìⁿ ñáyiú cuica Yă Ndiôxí cuendá ndíhu ndaha ñaha-gá xii-yu —duha ní cachí-gá.

26 Te nchaa ñáyiú ní tecú dóho-xi tnúhu ní cáháⁿ-gá ní xáhãⁿ-yu xii-gá:

—¿Te yoo naníhí tǎhú te núu ducaⁿ vǎiⁿ? —càchí-yu xáhãⁿ-yu xii-gá.

27 Te Jèsús ní xáhaⁿ-gǎ xii-yu:

—Cue ñáyiú ñuyíú-a chi vá ndácũ-yu ná cadá-yu nàcuáa ndíhu ndaha ñaha Yá Ndiôxí xii-yu, dico mee-gǎ chi ndacu-gá ndíhu ndaha ñaha-gá xii-yu chi nchaa sá vǎha ndàcu-gá quídé-gǎ —càchí-gá xáhaⁿ-gǎ xii-yu.

28 Te té Pèlú ní xáhaⁿ-dě xii-gá:

—Nchúhú ní dándõo-ndí nchaa sá ndécú ndíhi-ndí, te ní tuha ñaha-ndí xii-n —càchí-dé xáhaⁿ-dě xii-gá.

29 Te ní xáhaⁿ-gǎ xii ñáyiú:

—Na càchí tnúhu ndáá-í xii-ndo sǎ ncháá ñáyiú na dándõo vehe-xi, àdi tátá-xi, nǎná-xi, ñaní-xi, cúha-xi, ñadíhí-xi, déhe-xi cuendá sá cuíní-yu ndíhu ndaha ñaha Yá Ndiôxí xii-yu, 30 te ío-gá cuéhé sǎ cuǎñaha-gǎ xii-yu cundecu ndíhi-yu, te ñá díú-ní xǎⁿ, chi tnáhá nduu táhũ-yu cundecu ndíhi ñáhá-yu xii-í ní caa ní quíhíⁿ ná sáa nduu —càchí-gá xáhaⁿ-gǎ xii-yu.

Jèsús càháⁿ tucu-gá sá cáhni ñaha-güedé xii-gá

(Mt. 20:17-19; Mr. 10:32-34)

31 Te Jèsús ní taudíⁿ-gá ndí ùxúú cue téé xica cuu ndíhi-gá tnuú ñáyiú, te ní xáhaⁿ-gǎ xii-güedé:

—Vitna te quíhíⁿ-ó ñùú Jerusalén, chi yàcáⁿ cada-xi nchaa nàcuáa sa ní chídó tnùnì cue téé ní xóo cáháⁿ tnúhu Yá Ndiôxí ndéé sanaha nàcuáa yáha yúhú Téé cùu ñaní tnáhá-ndó nchàa-ndo. 32 Chi cuáha cuendá ñáhá-güedé xii-í núú cuè téé ñá túú cùu cue téé isràél, te cudíquí

ndeé ñáhá-güedé xii-í, te cúcuèhé ñáhá-güedé, te tíú díí ñáhá-güedé xii-í. 33 Te caniha-güedé ndíhi ñí, te dǎtnùnì cahni ñaha-güedé xii-í, dico nduu únì sá cùú-í te ndoto-í —càchí-gá xáhaⁿ-gǎ xii-güedé.

34 Dico ní ìⁿ tnúhu ní cáháⁿ-gá ñá túú ní tècú tnùnì-güedé, chi ío yidáhu tnúhu ní cáháⁿ-gá nũu xǎⁿ ní ìⁿ ñá túú ní tècú tnùnì-güedé.

Jèsús quídé tǎtna-gá núú ìⁿ téé cuàá ñuú Jericó

(Mt. 20:29-34; Mr. 10:46-52)

35 Te òré tá cùyatni Jèsús ñuú Jericó cuáháⁿ, te yuhu ìchi cuáháⁿ-gá-án núcõo ìⁿ téé cuàá xicáⁿ ndàhú-dé.

36 Te òré ní tecú dóho-dé xicáháⁿ vǎi ñáyiú xiyáha-yu, te ní xicáⁿ tnúhú-dé núú ñáyiú ndècu ndíhi-dé ná cuendá ducaⁿ vǎi-yu yáha. 37 Te ní xáhãⁿ-yu sá Jèsús téé ñuú Nazàrét ñúhú-dé ìchi. 38 Te níhi ní cáháⁿ-dé, te xáhaⁿ-dě xii-gá:

—Jèsús ñaní tnáhá ndí Dàvíí, cundáhú iní ñáhá xii-í! —càchí-dé xáhaⁿ-dě xii-gá.

39 Te ñáyiú xixódó núú nũú Jèsús ní tenáa ñáhã-yu xii-dé, te xáhãⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xáhaⁿ-dě xii-gá:

—Yòhó téé cùu ñaní tnáhá ndí Dàvíí, cundáhú iní ñáhá xii-í! —càchí-dé xáhaⁿ-dě xii-gá.

40 Te Jèsús ní ngüñí-gá, te ní táuchíúⁿ-gǎ ní sǎngueheⁿ ñaha cuè téé ndíhi-gá. Te òré ní quexìo-dé núú-gǎ, te ní xicáⁿ tnúhú-gǎ núú-dě, te xáhaⁿ-gǎ:

41 —¿Ná cuínì-n càda ñaha-í xii-n-í? —càchí-gá xáhaⁿ-gǎ xii-dé.

Te téé cuàá-án ní xáhaⁿ-dě:

—Mèstrú, cuínì-í cada tǎtna-n nũú-í cuendá cundehe-í —càchí-dé xáhaⁿ-dě xii-gá.

42 Te Jèsús ní xáhaⁿ-gǎ:

—Sa ní ndúha núú-n chi ní sándáá iní-n Yá Ndiôxí —càchí-gá xáhaⁿ-gǎ xii-dé.

43 Te òré-ni-án ní ndúha núú-dě, te ní chinchícúⁿ-dé Jèsús, te ní cachí-dé sá ío càhnu cuu Yá Ndiôxí. Te nchaa ñáyiú ní xiní nàcuáa ní cuu ní ndúha

núú-dě tnàhá-yu ní cachí-yu sá ìo cànnyu cuu Yá Ndiòxí.

19

Jèsús ndìhi ìn tée nàni Zaqueú

¹ Te Jèsús ní sáá-gá ñuú Jerìcò, te ta yáha-gá xití ñuú-án cuáhán. ² Te ñuú-án ndécú ìn tée cuica nàni-dé Zaqueú, te cùnnyu-dé táxí tnùnì-dé cue tée cùndìhi-dé, cue tée cuihna ìní-xi quide cobrá ñáhá xii ñáyíu cuendá impuèstú. ³ Te tée-án cuìní-dé quini-dé Jèsús òré-án ní cùu te ñá ní ndàcu-dé, chi ìo cuéhé ñáyíu, te ñá túú dùcú-dé. ⁴ Te xìnyu-dé ní ngódó núú-dě te ní sáá-dé díquí ìn yutnu sìcómorú nùtní yatni yuhu ìchi núú yáha Jèsús cuendá cuìní-dé quini ñáhá-dě xii-gá. ⁵ Te òré tá yáha Jèsús xíán, te ní ndonehe núú-gá díquí yutnu núú cándòdo-dé-án, te ní xáha-gá xii-dé:

—Zaqueú, tanùu ndìhi díquí yutnu-án, chi tnaví quexio-í vehe-n ndètatú-í —càchí-gá xáha-gá xii-dé.

⁶ Te té Zaqueú-án ní nuu ndìhi-dé díquí yutnu-án, te ìo ní cudí ìní-dé ní quehe cuendá-dé Jèsús vehe-dé. ⁷ Te sá ní xini ñáyíu ní quexio Jèsús vehe-dé, te nchaá-yu ní ngúita-yu cànnyu cuéhé-yu cuendá-gá, te xitnàhá-yu:

—Tée-a cuànguìhu-dé vehe ìn tée ndècu ìchi cuehé ìchi duha —càchí-yu xitnàhá-yu.

⁸ Te té Zaqueú-án ní ndacuíñí-dé tnuú-yu, te xáha-gá xii Jèsús:

—Yòhó Mèstrú, na cuáha-í ñáyíu ndàhú cuádava nchaa sá ndécú ndìhi-í. Te núu yoo ní dándàhú-í ní dúhù-í, te codo ùní-gá tnàhá sá ní dúhù-í-yu nacuañaha-í xii-yu —càchí-dé xáha-gá xii-gá.

⁹ Te Jèsús ní xáha-gá xii té Zaqueú:

—Vitna ní naníhí tàhú-n ndìhi nchaa ñáyíu xindecu vehe-n, chi tnàhá-n cùu-n ñaní tnàhá ndii Àbrahám. ¹⁰ Te yúhú Tée cùu ñaní tnàhá-ndó nchàa-ndo véxi-í nándùcu-í ñáyíu ní xíta nihnu cuendá

dàcácu nihnu-í-yu núú ùhú núú ndàhú —càchí-gá xáha-gá xii-dé.

Nàcuáa ní quide-güedé ndìhi díhú cuáán

(Mt. 25:14-30)

¹¹ Te nchaa ñáyíu-án ní sani ìní-yu sá ndìhi-ni ndìhu ndaha ñàha Yá Ndiòxí xii-yu cuendá sá ní cuyatni Jèsús ñuú Jerusàlén, te xíán núu ní ngúita Jèsús ní cani-gá ìn cuendú núu-yu cuendá tecú tnùnì váha-yu tnúhu-gá. ¹² Te xáha-gá xii-yu:

—Ní xindecu ìn tée cùu ñaní tnàhá ñáyíu cùnnyu, te cuáhán-dé ìngá ñuú xícá cuendá yàcá cuáha ñaha-güedé chiu coo-dé, te dàtnùnì ndixi-dé quindaha-dé titní ñuú. ¹³ Te cùmání-gá quee-dé quihí-dé, te ní cana-dé úxí cue tée xìnyu cuechi núú-dě, te ní sáñaha-dě ndí díhú núu-güedé ìn caa ìn caa díhú cuáán, te ní xáha-gá: “Chí cáda ndàhú ndìhi díhú-án ndéé ná sáá nduu nàsáá-í”, càchí-dé xáha-gá xii-güedé. ¹⁴ Dico nchaa ñáyíu ñuú quindaha-dé-án ñà túú tnàhá ìní-yu sá quindaha ñaha-dé, núu ní tendàhá-yu cue tée nèhe tnúhu cuáhán núu cue tée cuáñaha chiu coo-dé-án, te ní xáha-gá-yu sá cùñaha-güedé sá ñà túú tnàhá ìní-yu sá tée-án quindaha ñaha-dé xii-yu. ¹⁵ Dico dacuítí sá ní sáha-güedé tée-án chiu coo-dé sá díú-dě quindaha-dé ñáyíu nchaa ñuú-án, te ní nacuico-dé cuánhú-dé ñuú-dé. Te òré ní nasáá-dé vehe-dé, te ní tendaha-dé ìn tée ní sánucana ñaha xii cue tée xìnyu cuechi núú-dě, cue tée ní dándò ndaha-dé díhú cuendá cáca tnúhú-dě núu-güedé ìn ìn-güedé núu ndéé dau ní chídó-xí díquí díhú sá ní dándò ndaha ñaha-dé-án. ¹⁶ Te tée ní ndèxio díhna xáha-gá: “Pàtróón, ní quide-í ndàhú ndìhi díhú-n sá ní dándò ndaha ñaha-n xii-í, te sá ìn ní taxi-n te ní chídó-xí ùxí-gá tnàhá te náu-a naquehe cuendá-n”, càchí-dé xáha-gá. ¹⁷ Te tée cùu patróón-dé-án ní xáha-gá: “Ío váha tée xìnyu cuechi cuu-n chi ìo váha ní quide-n, te sá ní quide váha-n ndìhi sacú díhú sá ní dándò ndaha ñaha-í xii-n, te xíán

nũu yúhú cächí-í sá táxí tnùní-n ùxi ñuú vitna”, cächí-dé xáhaⁿ-dë. ¹⁸ Te ní ndexìo ìngá-dé, te ní xáhaⁿ-dë: “Pàtróón, ní quide-í ndáhú ndìhi díhúⁿ-n sã ñí dándõo ndaha ñàha-n xii-í, te sá ìíⁿ ñí taxi-n te ní chídó-xí ùhúⁿ-gá tnàhá te náu-a naqueheⁿ cuèndá-n”, cächí-dé xáhaⁿ-dë. ¹⁹ Te ní xáhaⁿ tõe cùu patróónⁿ-dë-áⁿ xii-dé: “Te yòhó taxi tnùní-n ùhúⁿ ñuú”, cächí-dé xáhaⁿ-dë xii tée xìnu cuechi-áⁿ. ²⁰ Te dātñuní ní ndexìo tucu ìngá-dé, te xáhaⁿ-dë: “Pàtróón, náu díhúⁿ-n-á, te naqueheⁿ cuèndá-n chí ní taxúha-í ní chidúcúⁿnuu-í ìíⁿ pãñú te ñá túú ní quide-í ndáhú ndìhi díhúⁿ-n, ²¹ chí ní yùhú ñàhá-í xii-n, chí cùu-n ìíⁿ tée díi, te nàqueheⁿ-n ìíⁿ sá ñà túú ní tàxi ndecu-n, te nàtahu-n ìíⁿ xichi núú ñà túú ní chíhi-n tatá”, cächí-dé xáhaⁿ-dë xii patróónⁿ-dë. ²² Te ní xáhaⁿ patróónⁿ-dë xii-dé: “Yòhó cúu-n ìíⁿ tée cuihna ìní-xi xìnu cuechi núu-í, te ñi-ni nchaa tnúhu càháⁿ-n-áⁿ cächí tnùní-xi nàcuáa cuu ndáa cuéchi-n. Te núu sàni ìní-n sã cúu-í ìíⁿ tée díi, te nàqueheⁿ-í ìíⁿ sá ñà túú ní tàxi ndecu-í, te nàtahu-í ìíⁿ xichi núú ñà túú ñí chíhi-í tatá, ²³ te núu ducaⁿ ña, ¿te ná cuèndá ñá túú ní càhu ìní-n dàsaⁿ nuu-n díhúⁿ ñí taxi-í, te cúñaha-n chãhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naqueheⁿ cuèndá-í ní cùu-í?”, cächí-dé xáhaⁿ-dë xii tée xìnu cuechi-áⁿ. ²⁴ Te ní xáhaⁿ tõe cùu patróónⁿ-áⁿ xii cue tée xìndecu xíáⁿ: “Chí quèndèé díhúⁿ cuàáⁿ néhé tõe-a, te cuáha-ndo tõe nèhe úxí tucu díhúⁿ cuàáⁿ-áⁿ”, cächí-dé xáhaⁿ-dë xii-güedé. ²⁵ Te ní xáhaⁿ-güedé: “Pàtróón, dico sa nèhe-dé úxí díhúⁿ cuàáⁿ”, cächí-güedé xáhaⁿ-güedé. ²⁶ Te ní xáhaⁿ tõe cùu patróónⁿ-áⁿ: “Na cächí tnúhu-í xii-ndo sã cuè ñáyíu ò xii-xi te níhí-gã-yu cundecu ndìhí-yu, te cue ñáyíu sacú ndécú ndìhi cuita ndìhi nihnu nchaa sá ndécú ndìhí-yu”, cächí tée cùu patróónⁿ-áⁿ xáhaⁿ-dë xii-güedé. ²⁷ Te xáhaⁿ tucu-dé xii-güedé: “Nchaa ñáyíu cùu úhú ìní ñàhá xii-í ñá tnàhá ìní-yu quindaha-í-yu, te chí cándecá-yu

taquixi iha, te cahni-ndõ-yu núu-í-a”, cächí tée cùu patróónⁿ-áⁿ xáhaⁿ-dë xii-güedé —duha cuáháⁿ cuèndú ní caní Jèsús núu ñáyíu.

Jèsús cuànguìhu-gá ñuú Jerusalén
(Mt. 21:1-11; Mr. 11:1-11; Jn. 12:12-19)

²⁸ Te sátá dúcáⁿ ñí cáháⁿ-gá, te ní nucúhuⁿ ichi-gá cuáháⁿ-gá ñuú Jerusalén. ²⁹ Te òré sa ní cuyatni-gá ñuú Bèttagé, ndìhi ñuú Bètaniá te xíáⁿ cáa yùcu nani Olívú, te ní xáhaⁿ-gã xii úú cue tée xìca cuu ndìhi-gá:

³⁰ —Chí cuáháⁿ ñuú cáa yàtni yacáⁿ, te òré quexìo-ndo yacáⁿ, te naníhí-ndó ìíⁿ búrru ndètní-di, te vátá yõo ìíⁿ-gá codo ñàha xii-di, te nandaxi-ndo-di te candeca-ndo-di quixi. ³¹ Te núu yoo na càcáⁿ tnúhu núu-ndó ñá cuèndá nándaxi-ndo-di, te cúñaha-ndo xii-yu sá yùhú Yaá xíca cùu ndìhi-ndo xini ñuhu-í-di —cächí-gá xáhaⁿ-gã xii-güedé.

³² Te cue tée-áⁿ ñí xica-güedé cuáháⁿ-güedé, te nchaa-ni nàcuáa ní xáhaⁿ Jèsús ducaⁿ ñí cuu, ³³ chí mei òré nándaxi-güedé búrru-áⁿ ñí quexìo cue ñáyíu cùu xitohó-di xìcáⁿ tnúhu-yu núu-güedé, te xãháⁿ-yu:

—¿Ná cuèndá nándaxi-ndo búrru-ndí-í?
—cächí-yu xãháⁿ-yu.

³⁴ Te ní xáhaⁿ-güedé xii-yu:

—Nà ndaxi-ndí-di chí Yaá xíca cùu ndìhi-ndí xini ñuhu ñaha-gá xii-di —cächí-güedé xáhaⁿ-güedé xii-yu.

³⁵ Te ndèca-güedé-di cuáháⁿ núu ndécú Jèsús, te òré ní quexìo-güedé ndìhi-di núu ndécú-gã te ní sacáⁿ ndodo-güedé dóo-güedé sátá-di, te ní ngódó ñàhá-gã xii-di. ³⁶ Te ò cuéhé ñáyíu ta sàcáⁿ-yu dóo-yu ichi cuáháⁿ-gá cuèndá núu dóo-yu-áⁿ yãha-gá ndìhi quiti yòdo-gá. ³⁷ Te ní nucuíta nuu-gá ichi tindúú yucu Olívú tá cuyatni-gá ñuú Jerusalén cuáháⁿ, te nchaa ñáyíu sàndáa ìní ñàhá xii-gá nchícúⁿ ñàhá-yu te ní ngúíta-yu níhi càháⁿ-yu sá cúdí ìní-yu, te cächí-yu sá ò càhnu cuu Yá Ndiõxí cuèndá sá ñí xini-yu nchaa sá vã yõo tnàhí ndàcu cada ní quide-gá. ³⁸ Te cächí-yu:

—Ío càhnu cuu Yaá véxi quindaha ñaha xii-o, te diu-gá cúu-gã Yaá ní tendaha Yã Ndiõxí véxi quide núu-gã! ¡Te ío càhnu cuu mee-gá! ¡Te andiu ñà túu tnàhí ná cúu! —duha càchí-yu.

³⁹ Te ñúu cue téé cùu fariséu ñúhú tnàhá tnuú ñáyiu-áⁿ ñí xáhaⁿ-güedé xii Jèsús:

—Mèstrú, cúñaha nchaa ñáyiu ndihí-n na càdí-yu yuhú-yu — càchí-güedé xáhaⁿ-güedé xii-gá.

⁴⁰ Dico Jèsús ní xáhaⁿ-gã xii-güedé:

—Te na càchí tnúhu-í xii-ndo sã ñúu ñáyiu-a na càdí-yu yuhú-yu ña, te nchaa yúu cáháⁿ níhi-xi dàtná ñúu ñáyiu —càchí-gá xáhaⁿ-gã xii-güedé.

⁴¹ Te òré ní cuyatni-gá ñúu Jerusálén te ní xiní-gá, te ní ndáhyú-gá cuendá nchaa ñáyiu dii ñúu-xi-áⁿ sã ndihú iní-gá. ⁴² Te ní xáhaⁿ-gã xii cue ñáyiu-áⁿ:

—Ío cuu váha iní-í te núu dicó nchòhó tecú tnùní-ndó vìtna ñúu tnúhu sá cáda váha ñaha xii-ndo, chi ñá túu-gã ná cuu cundecu-ndo, te núu na tècú tnùní-ndó. Dico ñá tècú tnùní-ndó, chi ío yidáhu tnúhu-a. ⁴³ Te sáá nduu tnúndòho tnúhu ndàhú sá cúu-xí-ndó, te nchaa cue téé dava-gá ñúu cúu ùhú iní tnàhá ndihí-ndo quixi-güedé chidoco ñaha-güedé xii-ndo, te ñí càndéé núu ndécú-ndó-ãⁿ dacàa-güedé ndóho cuendá xíáⁿ quihí váha-güedé nàa ndihí ñaha-güedé xii-ndo, te vá dáñá-güedé cunu-ndo. ⁴⁴ Te cahni ñaha-güedé xii-ndo, te ndihí nchaa vehe-ndo dangoyo-güedé ndéé cimièntú-xi, chi ñá túu ní cuìní-ndó nàcuáha-ndo cuendá òré ní quixi coto ñaha Yã Ndiõxí xii-ndo —duha ní xáhaⁿ-gã xii ñáyiu ñúu-áⁿ.

Jèsús ñá túu tnàhá iní-gá nàcuáa quidé-yu veñúhu

(Mt. 21:12-17; Mr. 11:15-19; Jn. 2:13-22)

⁴⁵ Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xíndecu cue ñáyiu quide ndáhu ndihí cue ñáyiu xísaaⁿ. Te ní queñuhu ñaha

Jèsús xii-yu quehé. ⁴⁶ Te ní xáhaⁿ-gã xii-yu:

—Núu tütú Yã Ndiõxí cáháⁿ-xi nàcuáa ní cáháⁿ-gá, te duha ní cachí-gá: “Vehe-í cúu-xí núu cáháⁿ ndihí ñaha ñáyiu xii-í”, duha ní cáháⁿ-gá càchí-xi núu tütú-gá. Dico nchòhó quidé-ndó vehe-gá vehe ñadúhú —càchí-gá xáhaⁿ-gã xii-yu.

⁴⁷ Te Jèsús nchaa nduu dànehé-gá ñáyiu xití veñúhu, dico cue téé cùu dütú cùnùu, ndihí cue téé dàcuaha ñaha xii ñáyiu nchaa tnúhu ní chídó tnùní ndí Moisés, ndihí cue téé cùnuu ñúu-áⁿ ndúcú-güedé nàcuáa cada-güedé cahni ñaha-güedé xii-gá. ⁴⁸ Dico ñá ñihí-güedé nàcuáa cada-güedé, chi cuendá nchaa ñáyiu ío cùdí iní-yu ndèdòho-yu nchaa tnúhu cáháⁿ-gá.

20

Jèsús ndécú ndihí-gá tnúhu ndee iní (Mt. 21:23-27; Mr. 11:27-33)

¹ Te ñúu nduu yihí Jesús xití veñúhu càhnu sá ío cùnuu danehé-gá ñáyiu tnúhu sá cáháⁿ nàcuáa naníhí tãhú-yu. Te ní quexío cue téé cùu dütú cùnùu ndihí cue téé dàcuaha ñaha xii ñáyiu nchaa tnúhu ní chídó tnùní ndí Moisés, ndihí cue téé cùu sacuéhé núu ñáyiu isràél, ² te ní xáhaⁿ-güedé xii-gá:

—Cuìní-ndí cachí tnúhu-n xii-ndí nása nduu tnúhu ndee iní ndécú ndihí-n núu quide-n nánda sá quidé-n. ¿Te yoo ducaⁿ ñí taxi tnúhu ndee iní-áⁿ xii-n? —càchí-güedé xáhaⁿ-güedé xii-gá.

³ Te Jèsús ní xáhaⁿ-gã:

—Yúhú tnàhá-í cuìní-í cácaⁿ tnúhu-í ñúu sá cácaⁿ tnúhu-í núu-ndó, te cachí tnúhu-ndo. ⁴ Te chí càchí tnúhu xii-í yoo ní táuchíúⁿ ñí dácúandute ndí Juáa ñáyiu. ¿Yá Ndiõxí ãⁿ cuè téé ñuyíú-a ní táuchíúⁿ dùcaⁿ ní quide ndí? —càchí-gá xáhaⁿ-gã xii-güedé.

⁵ Te ní ngüíta-güedé xitnàha-güedé:

—¿Nása cúñaha-o? Chi núu nà cúñaha-o sã Yã Ndiõxí ní táuchíúⁿ dùcaⁿ ní quide ndí Juáa ñá, te quesaha-dé: “¿Ná cuendá ñá túu ní sàndáá iní-ndó tnúhu ní cáháⁿ ndí

vàin?“, quesaha-dě. ⁶ Àdi te núu nà cùñaha-o sã cuè ñáyiu ñuyíú-a ní táúchíúⁿ dùcaⁿ ní quide ndíi ña, te nchaa ñáyiu cuáha ñáhá-yu yúú xii-o, te cahni ñáhá-yu, chi cãchí-yu sã ndàá sã Yã Ndiõxí ní táúchíúⁿ-gã ní cáháⁿ ndíi Juáá tnúhu-gá núú ñáyiu – cãchí-güedé xítnàha-güedé.

⁷ Te ní xáhaⁿ-güedé xii-gá sã ñà túú xìní-güedé yoo ní táúchíúⁿ dùcaⁿ ní dácúándüte ndíi Juáá ñáyiu. ⁸ Te ní xáhaⁿ Jèsús xii-güedé:

–Te núu ducaⁿ te ni yùhú vá cãchí tnúhu-í xii-ndo yòo ní taxi tnúhu ndee iní duha quide-í –cãchí-gá xáhaⁿ-gã xii-güedé.

*Cuendá cue té cuihna iní-xi
(Mt. 21:33-44; Mr. 12:1-11)*

⁹ Te sátá dúcáⁿ te ní ngüíta Jèsús ní cani-gá ñⁿ cuendú núú ñáyiu nàcuáa tecú tnùní-yu tnúhu-gá, te xáhaⁿ-gã xií-yu:

–Ñⁿ téé ní xitu-dé mee-ni yòho yaha stilé núú ñúhú-dě. Te ní sáá ñⁿ nduu quingaca cuu xica-dě vài nduu te ní dándõo ndaha-dě sã ñⁿ xitu-dé-áⁿ xii ñⁿ úú cue téé cáháⁿ ndíhi-dé cuendá cada chiuⁿ-güedé, te ní ndatnúhu-güedé sã òré ná cùu te cuu cuendá dava-güedé te ducaⁿ te ní quee-dé cuáháⁿ-dé. ¹⁰ Te sátá ñⁿ sáá nduu ñⁿ cuu nchaa ndéhe yoho yàha stilé sã ñⁿ xitu-dé-áⁿ, te ní xáhaⁿ-dě xii ñⁿ téé xínu cuechi núú-dě: “Cuáháⁿ cáháⁿ-n sã cúú cuendá-í núú cuè téé ní dándõo ndàha-í nchaa yoho yàha stilé sã ñⁿ xitu-í”, cãchí-dé xáhaⁿ-dě. Te téé xínu cuechi-áⁿ ñⁿ xica-dé cuáháⁿ-dé, dico cue téé ndéé nchaa yoho yàha stilé-áⁿ ñⁿ tñi-güedé téé xínu cuechi-áⁿ te ní caniha-güedé, te ní naciúúⁿ ñáhá-güedé xii-dé, te ñá túú tnàhí ná ní sãñaha-güedé. ¹¹ Te dãtnùní téé cùu xítóhó nchaa yoho yàha stilé-áⁿ ñⁿ tendaha tùcu-dé ingá téé xínu cuechi núú-dě cuáháⁿ-dé, dico ñⁿ ducaⁿ ñⁿ quide ñaha-güedé xii-dé, chi ní xícuèhé ñáhá-güedé, te ní caniha-güedé te ní naciúúⁿ ñáhá-güedé, te ñá túú tnàhí ná ní sãñaha-güedé. ¹² Te téé cùu xítóhó nchaa yoho yàha stilé-áⁿ ñⁿ tendaha

tùcu-dé ingá-dé cuáháⁿ-dé, te ñⁿ ducaⁿ ñⁿ quide ñaha tùcu-güedé, chi ní dánícuèhé ñáhá-güedé, te ní naciúúⁿ ñáhá-güedé.

¹³ “Te téé cùu xítóhó nchaa yoho yàha stilé-áⁿ ñⁿ sani iní-dé: “¿Nása cada-í vitna? Váha-gá tendaha-í déhe-í téé ío cùu iní-a núhú-dé, chi cudana te òré quiní ñáhá-güedé xii-dé, te canehe-güedé sã yíñùhu núú-dě”, duha ní sani iní-dé. ¹⁴ Dico òré ní xini cue téé quide chiuⁿ-áⁿ déhe xítóhó nchaa yoho yàha stilé-áⁿ, te ní xítnàha-güedé: “Téé-áⁿ téé véxi nduu táhú ñuhu-a ndíhi nchaa sã cáá núú-xi, dico cahni-o-dě te mee-o nduu tahú-ó sã ndúú táhú-dě”, cãchí-güedé xítnàha-güedé. ¹⁵ Te ní queñuhu ñaha-güedé ñⁿ xio yuhu ñùhu-áⁿ, te ní sahani ñaha-güedé xii-dé –duha cuáháⁿ cuendú ní cani Jèsús núú-yu.

Te dãtnùní ní xáhaⁿ tùcu-gá xií-yu:

–¿Te nchòhó sa cùtnuní iní-ndo nàcuáa cada ñaha xítóhó ñuhu-áⁿ xii cue téé-áⁿ ñⁿ? ¹⁶ Chi núhú-dé te cahni-dé cue téé-áⁿ, te dándõo ndaha-dě ñuhu-dé xii cue téé cùtnuní iní-dé cada ndáá –cãchí-gá xáhaⁿ-gã xií-yu.

Te sátá dúcáⁿ ñⁿ cáháⁿ-gá, núu ní cachí-yu:

–¿Sã và cãchí Ndiõxí sátá dúcáⁿ yàha-o! –cãchí-yu.

¹⁷ Te Jèsús ní ndacoto-gá núú-yu, te ní xáhaⁿ-gã:

–Chí cãchí tnúhu nása quèe-xi naciúú cáháⁿ-xi núú tütú Yã Ndiõxí, núú cãchí-xi:

Yúú sã ñⁿ dáquéé tñhú cue téé dàcaa vehe ní saa-xi cùu-xi yúú cúnùu vitna.

Duha cãchí-xi núú tütú-gá. ¹⁸ Te nchaa ñáyiu ñá túú cuñí tñi tnúhu-í, te ndohó-yu dàtná ñⁿ ñáyiu tnàhnú duuⁿ òré ndúá-yu núú yúú, àdi núu na tàú ñáhá-xí te dàcachi duuⁿ ñaha-xi –cachí-gá xáhaⁿ-gã xií-yu.

Cuendá impuèstú

(Mt. 21:45-46; 22:15-22; Mr. 12:12-17)

¹⁹ Te cue téé cùu dútú cúnùu, ndíhi cue téé dàcuaha ñaha xii ñáyiu nchaa

tnúhu ní chídó tnùní ndíi Moisés ní cuení-güedé tñi-güedé Jèsús òré-ni-á ní cùu, chi ní cutnùní iní-güedé sá cuendá-güedé ní cáháⁿ-gá, dico ní yùhú-güedé cuendá sá ìo vài ñáyiú. ²⁰ Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue tée cuáháⁿ ngoto dayuhu ñaha xii-gá, te cuáháⁿ-güedé dàtná cue tée váha iní-xi, te ndùcu-güedé nàcuáa cada-güedé nùu cáháⁿ-gá ìiⁿ tnúhu sá ñà túú tàú-gá cáháⁿ-gá cuendá ducaⁿ te candeca ñaha-güedé xii-gá quíhíⁿ cuáha cuendá ñáhá-güedé núú tée cùnùu. ²¹ Te ní xáhaⁿ-güedé xii Jèsús:

—Mèstrú, ñihí-ndí tnúhu sá dánèhé-n ñáyiú mee-ni tnúhu váha, te cuéi ndédani càa ñáyiú ìiⁿ-ni càháⁿ-n ndíhí-yu, te càháⁿ ndáá-n nàcuáa càháⁿ Yá Ndiòxí cundecu-ò ñùyíú-a. ²² Te cachí tnúhu xii-ndí nùu váha-ni cháhu-ndí té Cèsár tée ío cùnùu cuendá impuéstú àⁿ ñáhá —càchí-güedé xáhaⁿ-güedé xii-gá.

²³ Dico Jèsús ní cutnùní iní-gá sá xító ndéé ñáhá-güedé xii-gá, nùu ní xáhaⁿ-gá xii-güedé:

²⁴ —Chí dánèhé ñáhá xii-í ìiⁿ díhúⁿ cuixíⁿ te cachí tnúhu-ndo nùu yoo núú-xi ndéé, ndíhí yoo òu-xi ndéé —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tē Cèsár ndéé ndíhí òu-dé —càchí-güedé xáhaⁿ-güedé xii-gá.

²⁵ Te ní xáhaⁿ tucu-gá xii-güedé:

—Te núu ducaⁿ te chí nàcuáha té Cèsár sá cúú cuendá-dé, te sá cúú cuendá mée Yá Ndiòxí, te xíáⁿ nacuáha-ndo-gá —càchí-gá xáhaⁿ-gá xii-güedé.

²⁶ Te ñà ní ndàcu tnahí-güedé datìcànùu ñaha-güedé xii-gá núú tnúhu càháⁿ-gá, chi òré ní cáháⁿ-gá, te da ní cuñúhu-güedé nchaa tnúhu ní cáháⁿ-gá, te váha-gá ní sadí-güedé yuhu-güedé.

Cuendá nchaa ñáyiú ndoto

(Mt. 22:23-33; Mr. 12:18-27)

²⁷ Te sátá dúcáⁿ te ní sáá ìiⁿ úú cue tée cùu saducéú núú ndécú Jèsús. Te

cue tée-áⁿ ñà túú sàndáá iní-güedé sá ndótó cue ñáyiú ní xíhí, te ní xáhaⁿ-güedé xii-gá:

²⁸ —Mèstrú, ndíi Moisés càchí ndíi núú tütú ndècu vitna sá nùu ìiⁿ tée na cùú, te quendóo ñadìhí-dé te ñà túú dèhe-dé ní xòo ndíhí-aⁿ, te tée cùu ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndíhí-aⁿ cuendá ñaní-dé tée ní xíhí-áⁿ. ²⁹ Te ní xíndecu úsá tñàhá cue tée mee-ni ndí ñaní-güedé. Te tée díhna ní níhí ñadìhí-dé, dico ñà túú ní cùdí-dé cundecu-dé chi ní xíhí-dé, te ni ìiⁿ déhe-dé ñà túú ní xòo ndíhí ñadìhí-dé-áⁿ. ³⁰ Te tée cùu uú ní naqueheⁿ-dé ñaha ní quendóo quèé-áⁿ dico ní xíhí tucu-dé, te ni ìiⁿ tucu déhe-dé ñà túú ní xòo ndíhí ñaha-áⁿ. ³¹ Te tée cùu uní ní naqueheⁿ tucu-dé ñaha ní quendóo quèé-áⁿ, te òu-ni ducaⁿ ñí xíhí-dé, te ní xínu ndí úsá-güedé ní cándeca ñaha-güedé xii ñaha-áⁿ, dico ni ìiⁿ-güedé ñà túú ní xòo déhe-güedé ndíhí-aⁿ, te ní ndíhí-güedé ní xíhí. ³² Te ndéé núú ñí ndíhí-ná ní xíhí tñàhá ñadìhí-áⁿ. ³³ Te na sàá nduu ndòto-güedé ndíhí ñaha-áⁿ ¿Te ndédacàa-güedé ñadìhí-güedé cuu-aⁿ-i? Chi ndí úsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

³⁴ Te Jèsús ní xáhaⁿ-gá xii-güedé:

—Nchaa ñáyiú ñuyíú-a tñandahá-yu.

³⁵ Dico nchaa ñáyiú ní nduu táhú ndoto díhna nuu ñáyiú-áⁿ cundecú-yu ndíhí Yá Ndiòxí ni caa ni quíhíⁿ, te yàcáⁿ ñà túú-gá sá cándeca tnahá-yu.

³⁶ Te ni ñà túú-gá tnúhu xíhí, chi cuu-ná-yu dàtná cue espíritú xínú cuèchi núú Yá Ndiòxí cuendá sá ñí ndótó-yu, chi cúú-yu déhe-gá. ³⁷ Te ndéé ndíi Moisés ní chídó tnùní ndíi núú tütú ndíi sá ncháá ñáyiú ní xíhí ndótó-yu, te òu-ni xíáⁿ càháⁿ-xi cuendá tnutáú nchìcúⁿ ñuhú, te òu-ni xíáⁿ càchí tucu-xi sá Yá Ndiòxí cúú-gá Ndiòxí ndíi Àbrahám, ndíi Isàác, ndíhí ndíi Jàcób. ³⁸ Te cue tée-áⁿ chi cuéi ní xíhí-güedé sá cúú-xí nchòhó, dico sá cúú-xí Yá Ndiòxí chi ndècu vívú-ni-güedé. Chi cùtnuní iní-ò sá

Yă Ndiöxí cúú-gă Ndiöxí mee-ni cue ñáyiú xĩndecu vívú, te ñá túú cùu-gă Ndiöxí cue ñáyiú ñá túú ndècu vívú. Te sá cúú-xí mèe-gá chi nchaa ñáyiú ndècu ndihí-gá ndécú vívú-yu cuéi sa ní xihí-yu núú ñùyíú-a —càchí-gá xáhaⁿ-gă xii-güedé.

³⁹ Te ìⁿ tée dàcuaha ñaha xii ñáyiú nchaa tnúhu ní chídó tnùní ndíi Moisés ní xáhaⁿ-dë xii Jèsús:

—Mèstrú, váha-ni càháⁿ-n —càchí-dé xáhaⁿ-dë xii-gá. ⁴⁰ Te ñá túú-gă ní cùyí-güedé cácaⁿ tnúhú-güedé ni ìⁿ tnúhu núú-gă.

Yoo déhe-xi cùu Cristú
(Mt. 22:41-46; Mr. 12:35-37)

⁴¹ Te Jèsús ní xáhaⁿ-gă xii-güedé:

—¿Te nása càchí-tu-yu sá Cristú Yaá tendaha Yă Ndiöxí quixi ñuyíú-a cùu-gă déhe ndíi Dàvií? ⁴² Te mee ndíi Dàvií-áⁿ ñí cachí ndíi núú librú Sălmú: Dútú Ndiöxí ní xáhaⁿ-gă xii Yaá cúú Xítohó-í:

“Ngóo xio cùha-í,

⁴³ te yúhú cada-í te nchaa sá cúú ùhú iní ñáhá xii-n canehe-xi sá yíñuhu núú-n.”

Duha ní xáhaⁿ Dútú Ndiöxí xii Yaá cúú Xítohó-í càchí ndíi núú librú Sălmú.

⁴⁴ ¿Te nása cùu Cristú déhe ndíi Dàvií, te mee ndíi ní cachí ndíi sá cúú-gă Xítohó ndíi-i? —càchí Jèsús xáhaⁿ-gă xii-güedé.

Jèsús càháⁿ-gá cuendá cue tée dàcuaha ñaha xii ñáyiú nchaa tnúhu ní chídó tnùní ndíi Moisés

(Mt. 23:1-36; Mr. 12:38-40; Lc. 11:37-54)

⁴⁵ Te òré ndátnúhu Jèsús ndihí cue tée xica cuu ndihí-gá xĩndedóho ñaha ñáyiú, te xáhaⁿ-gă xii-güedé:

⁴⁶ —Cada cuendá-ndó vă cáda-ndó nàcuáa quide cue tée dàcuaha ñaha xii ñáyiú nchaa tnúhu ní chídó tnùní ndíi Moisés, chi tnàhá iní-güedé cui-hnu-güedé dóó nání sá sácúihnu cue tée cùnúu. Te nchaa núú tàcá ñáyiú cuení-güedé sá ndihí tnúhu yíñuhu cáháⁿ ndihí ñáhá-yu xii-güedé, te nácaxi-güedé xilé sácóo nchihí cue tée cùnúu-gá xití veñúhu conchihí-güedé, te ducaⁿ-ni quide-güedé cuéi òré

quíhu-güedé mèsá caxi-güedé òré ndécú-güedé ìⁿ vico, chi mee-ni núú sácóo cue tée cùnúu-gá cuení-güedé coo-güedé. ⁴⁷ Te quèndeé-güedé

vehe nchaa ñáyiú dñí ñáyiú quèé, te ío naha càháⁿ ndihí-güedé Yă Ndiöxí cuendá cuení-güedé cáháⁿ váha-yu cuendá-güedé. Te sá dúcáⁿ quide-güedé te sáá nduu te ío-gá ndoho-güedé núú ùhú núú ndàhú dàcúxí dàva-gá ñáyiú —càchí-gá xáhaⁿ-gă xii-güedé.

21

Díhúⁿ nduu táhú Yă Ndiöxí ní dáquëe ìⁿ ñaha ndàhú ñaha quèé

(Mr. 12:41-44)

¹ Te Jèsús ní xiní-gá xití veñúhu xídáquëe cue tée cuica díhúⁿ nduu táhú Yă Ndiöxí xití alcanciá. ² Te ní xiní-gá tnàhá ìⁿ ñaha ndàhú ñaha quèé ní dáquëe-aⁿ úú díhúⁿ còbrí, ³ te ní xáhaⁿ Jèsús xii cue ñáyiú xĩndecu-áⁿ:

—Na càchí tnúhu ndáá-í xii-ndo sá ñaha ndahú ñaha quèé-a ío-gá nándñi díhúⁿ ñí dáquëe-aⁿ xití alcanciá nduu táhú Yă Ndiöxí dàcúxí díhúⁿ ñí dáquëe dáva-gá-yu. ⁴ Chi nchaa ñáyiú-áⁿ ñí dáquëe-yu mee-nă sá ñí ndóo-ná, dico ñaha quèé-a cuéi ndàhú-aⁿ dico ní dáquëe-aⁿ ñihí díhúⁿ sá cuááⁿ-áⁿ sá cáxí-áⁿ ní cùu —cachí-gá xáhaⁿ-gă xii-yu.

Jèsús càchí-gá sá ngóyó veñúhu
(Mt. 24:1-2; Mr. 13:1-2)

⁵ Te ìⁿ ùú ñáyiú xicáháⁿ-yu cuendá veñúhu càhnu sá ío cùnúu sá ío vii cà nchaa yúú yíhí, ndihí cuendá nchaa sá ñí sáñaha táhú ñáyiú yíhí xití-xi. Te Jèsús ní xáhaⁿ-gă xii-yu:

⁶ —Sáá nduu te nchaa sá cúñúhu-ndo-a vă cundúu-gá-xi dàtná cáá-xí vitna, chi ni ìⁿ-gá yúú vă códo nchihí tnaha-gá-xi chi ndihí ngoyo —càchí-gá xáhaⁿ-gă xii-yu.

Nàcuáa cada-xi nduu ta cùyatni naa ñuyíú

(Mt. 24:3-28; Mr. 13:3-23)

⁷ Te cue tée xĩndecu-áⁿ ñí xicáⁿ tnúhú-güedé núú Jèsús, te xáhaⁿ-güedé xii-gá:

—Mèstrú, ¿te ná nduu dùcaⁿ cada-xi ngoyo veñuhu, àdi nándi cùu sá cáda-xí cuèndá cutnùní iní-ndí sá sà ta cuyatni nduu ducaⁿ cada-xi-í? — cachi-güedé xáhaⁿ-güedé xii-gá.

⁸ Te Jèsús ní xáhaⁿ-gá xii-güedé:

—Ío quíhi iní-ndó cùndecu-ndo, te vá dáñá-ndó mèe-ndo dandahú ñáhá ñáyiú xii-ndo. Chi ío cuéhé cue téé coo ñuyíú-a, te danàni-güedé méé-güedé dàtná nàni-í te cachi-güedé: “Yúhú cùu-í Cristú Yaá ní tendaha Yá Ndiöxí véxi ñuyíú-a”, duha cachi-güedé. Te cachi tucu-güedé: “Vitna sa ní sáá nduu càda-xi nchaa nacuaá ní cáháⁿ-í”, duha cachi-güedé. Dico vá quíndáá iní-ndó, te nì vá túhá-ndó-güedé. ⁹ Te òré ná nihí-ndó tnúhu sá titní nacióⁿ xínàá-güedé te dava ñuu xínàá-güedé ndi mèe-güedé, te vá yùhú-ndó chi dacuítí sá dúcáⁿ càda-xi, dico vátá sáá-gá nduu nàa ñuyíú òré ducaⁿ càda-xi —cachi-gá xáhaⁿ-gá xii-güedé.

¹⁰ Te xáhaⁿ tucu-gá xii-güedé:

—Nchaa cue téé ñⁿ nacióⁿ nàá-güedé ndihí cue téé ñngá nacióⁿ, te titní ñuu ngüíta-güedé nàá-güedé. ¹¹ Te titní xichi ñuyíú ñhi víhi tnáa, te titní tucu xichi ñuyíú coo tnamá, te titní tucu xichi ñuyíú quixi cuéhé, te titní núú sá cáda-xí àndiú, te yùhú ñáyiú.

¹² Te òré cúmání-gá cada-xi nchaa nacuaá cáháⁿ-í-a, te cue téé cùu úhú iní ñáhá xii-ndo tní ñaha-güedé, te candeca ñaha-güedé xii-ndo quíhíⁿ xití veñuhu-güedé cada ndáá-güedé cuéchi-ndo, te chihi ñaha-güedé vecaá xii-ndo, te candeca ñaha-güedé quíhíⁿ núú cuè téé cùnuu yíndaha nacióⁿ àdi núú dává-gá cue téé cùnuu sá cuèndá-í. ¹³ Te òré ducaⁿ na càda ñaha-güedé xii-ndo, te òré-áⁿ tàú-xi cáháⁿ váha-ndo cuèndá-í núú-güedé. ¹⁴ Te vá cání iní-ndó ñuu nása cunduu tnúhu cúñaha-ndo xii-güedé cuèndá cácu nihnu-ndo. ¹⁵ Chi yúhú dacàhu iní ñáhà-í xii-ndo tnúhu cúñaha-ndo xii-güedé, te taxi-í sá vátá quíni tnùnigá-ndó, te ni ñⁿ ñáyiú cùu

úhú iní ñáhá xii-ndo vá nihí-gá-yu tnúhu cúñáhá-yu xii-ndo. ¹⁶ Te ndéé tātá-ndó, ndihí ñani-ndó, ndihí cue ñáyiú cùu ñani tnáhá-ndó, ndihí cue ñáyiú cáháⁿ ndihí váha-ndo cuáha cuèndá ñáhá-yu xii-ndo núú cuè téé cùchiuⁿ, te dava-ndo cáhni ñaha-güedé xii-ndo. ¹⁷ Te ío cuéhé ñáyiú cuu úhú iní ñáhá-yu xii-ndo sá cuèndá-í. ¹⁸ Dico Yá Ndiöxí ío coto ñaha-gá xii-ndo chi ndéé idi díquí-ndó còto-gá. ¹⁹ Te núu na càda ndee iní-ndó càncicúⁿ nihnu ñaha-ndo xii-í, te nduu táhú-ndó cùndecu-ndo ndihí Yá Ndiöxí ni caa ni quíhíⁿ.

²⁰ Te nduu na quíni-ndó ñuhu doco sandadú ni càndéé yuhu ñuu Jerusalén, te sa cutnùní iní-ndó sá sà ní cuyatni nduu dànaa-güedé ñuu-áⁿ. ²¹ Te dává-áⁿ nchaa ñáyiú xíndecu distritú Júdeá xíní ñuhu-xi cunú-yu quíhíⁿ-yu xití yucu, te nchaa ñáyiú xíndecu ñuu Jerusalén queé-yu xití ñuu-áⁿ, te ñáyiú ñá túú xíndecu ñuu-áⁿ vá ndíhu-gá-yu. ²² Chi dává-áⁿ cuu-xi nduu tnúndòho tnúhu ndàhú, te ducaⁿ càda-xi chi ducaⁿ ndéé tnuní núú tütú Yá Ndiöxí nacuaá dandòho ñaha-gá xii-yu. ²³ Te ndàhú ní cuu nchaa ñáyiú dñí ñuhú dèhe-xi, ndihí nchaa ñáyiú ndèca déhe vitna sàdi na sáá nduu dùcaⁿ cada-xi! Chi ío cuéhé tnúndòho tnúhu ndàhú coo núú ndécú-yu dává-áⁿ, te xíáⁿ cuu-xi ñⁿ tnúndòho tendaha Yá Ndiöxí quixi sá cúu-xi-yu. ²⁴ Te dava cue téé cuú-güedé cahni ñaha-güedé, te dava-güedé tní ñaha-güedé candeca ñaha-güedé quíhíⁿ nchaa ñuu xícá, te cue téé dava-gá ñuu cunuu-güedé ñuu Jerusalén, te mee Yá Ndiöxí cachi-gá te núu ná daha nduu cunuu-güedé ñuu-áⁿ.

Nacuaá cada-xi òré quixi tucu Téé cùu ñani tnáhá cuè ñáyiú (Mt. 24:29-35, 42-44; Mr. 13:24-37)

²⁵ Te cada-xi ñⁿ sá vátá quíni-gá ñáyiú núú nchícanhii, ndihí núú yóó, ndihí núú ncháa chódíni, te ñuyíú-a coo tnúhu ndíhú iní-xi te vá cutnùní iní-yu nása cáda-yu cuèndá

sá ïo dusaⁿ càda ndute lamár òré candaundéé tnáhá-xí. ²⁶ Te nchaa ñáyiú cuneé-yu sá yùhú-yu, ndihí sá ndihú iní-yu cuendá nchaa sá cáda-xí ñùyíú-a, te quidi-xi andiú. ²⁷ Te sáta dúcáⁿ te quini-ndó yùhú Tée cùu ñaní tnáhá-ndó nchàa-ndo quee-í andiú quixi-í ichi xití vícò, te dàvá-áⁿ quini ñáhá nchàa ñáyiú sá ïo cùnui-í te ndàcu-í quide-í nchaa sá vâha. ²⁸ Te òré ná ngüita-xi ducaⁿ càda-xi, te cuita cundee-gã iní-ndó quihíⁿ, te quihí iní-ndó chi sa ní cuyatni vií-nã nduu cãcu nihnu-ndo vã cündècu-gá-ndó núú ñùyíú yíca cuèchi-a —càchí-gá xáhaⁿ-gã xii-güedé.

²⁹ Te ní cani-gá ïⁿ cuèndú núú-güedé nàcuáa tecú tnùní váha-güedé tnúhu-gá, te xáhaⁿ-gã xii-güedé:

—Chí cündèhe yutnu ngúxí ndihí nchaa dava-gá yutnu. ³⁰ Chi nàtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni. ³¹ Te ñiú-ni ducaⁿ sãtnahá-xi cùu òré ná quini-ndó càda-xi nchaa nacuaa càháⁿ-í, te sá dúcáⁿ te cutnùní iní-ndó sã sã ní cuyatni nduu ndíhu ndaha ñaha Yá Ndióxi xii-ndo.

³² Te na càchí tnúhu ndáá-í xii-ndo sã òré vátá cùú-gá cue ñáyiú xñdecu ñuyíú-a vitna, te cada-xi nchaa nàcuáa ní cáháⁿ-í. ³³ Te andiú ndihí ñuyíú-a chi ndihí nihnu-xi, dico tnúhu-í chi vá ndihí nihnu-xi, chi cùu-xi tnúhu ndáá.

³⁴ Te quihí iní-ndó vã cündècu-ndo ichi cuehé ichi duha, te vá cùú-ndó ñáyiú quihu, te vá cùhúⁿ iní-ndó mée-ni nchaa sá ïó ñuyíú-a, chi núu ducaⁿ na càda-ndo te nacua-naa-ndo sã sãá nduu càda-xi nacuaa ní cáháⁿ-í. Te uuⁿni sãá nduu-ãⁿ, ³⁵ te cada-xi dàtná cuini-ndó quide ïⁿ trampá chi uuⁿni ngáva-xi, te ducaⁿ càda-xi nchaa ñáyiú xñdecu ñuyíú-a, chi uuⁿni sãá nduu-ãⁿ. ³⁶ Te nchòhó cundecu túha-ndo te ïó cáháⁿ ndihí-ndo Yá Ndióxi cuendá ndacu-ndo yãha-ndo nchàa tnúndòho quixi ñuyíú-a, te ducaⁿ te nasáá-ndó cündècu-ndo núú ndécú yùhú Tée cùu

ñaní tnáhá-ndó nchàa-ndo —cachí-gá xáhaⁿ-gã xii-güedé.

³⁷ Te nduu nduu ní xóo danèhé Jèsús ñáyiú tnúhu-gá xití veñúhu càhnu sá ïo cùnui, te niú niú ní xóo quihíⁿ ngúdú-gá xití yucu Òlívú. ³⁸ Te nehé nehé ní xóo quihíⁿ nchaa ñáyiú veñúhu-áⁿ ní xóo cundedòho-yu nchaa tnúhu càháⁿ-gá.

22

Ndùcu-güedé nàcuáa cada-güedé cahni-güedé Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnàhá vico páscaá, te vico-áⁿ xéxí ñáyiú pãá sã ñà túú yìhi levadurá. ² Te cue té cùu dútú cùnui, ndihí cue té dácuaaha ñaha xii ñáyiú nchaa tnúhu ní chídó tnùní ndí Moisés ndúcú-güedé nàcuáa cada-güedé cahni-güedé Jèsús, te dícò-ni sá xiyùhú-güedé ñáyiú.

³ Te yucu ñávãha ní dácáhu iní ñáhá-xí xii té Jüdás déhe té Iscarioté, te núú tnàhá té-áⁿ cúú ùxúú tnàhá cue té xica cuu ndihí-gá ní cùu. ⁴ Te té Jüdás-áⁿ ní sáháⁿ-dé ní ndatnúhu-dé ndihí cue té cùu dútú cùnui, ndihí cue té taxi tnuní ñáhá xii cue té quide cuendá veñúhu nàcuáa cada-dé cuáha cuendá-dé Jèsús núú-güedé. ⁵ Te ïó ní cudíi iní-güedé, te ní xáhaⁿ-güedé xii-dé sá cuãñaha-güedé díhúⁿ, ⁶ te ní xáhaⁿ-dè sá cúú quèheⁿ-dé díhúⁿ-ãⁿ, te ní ngüita-dé ndúcú-dè nàcuáa cada-dé cuáha cuendá-dé Jèsús núú-güedé òré ñà túú ñáyiú.

Cùdini Jèsús ndihí cue té xica cuu ndihí-gá

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sãá nduu ní quesaha vico xexí-yu pãá sã ñà túú yìhi levadurá, te ñiú-ni nduu-ãⁿ sáhní-güedé ïⁿ mbéé lìhli xéxí-yu. ⁸ Te Jèsús ní xáhaⁿ-gã xii té Pèlú ndihí té Juáá:

—Chí cuáháⁿ chi cada túha-ndo núú cùdini-o sacuaa nduu vico páscaá —càchí-gá xáhaⁿ-gã xii-güedé.

9 Te ní xí cáⁿ tnúhú-güedě núú-gă, te xăhaⁿ-güedě xii-gă:

—¿Te ndèé cáá vèhe cuiní-n càda túha-ndí-i? —càchí-güedé xăhaⁿ-güedě xii-gă.

10 Te ní xăhaⁿ Jèsús xii-güedé:

—Chí cündèdóho na càchí tnúhu-í xii-ndo nàcuáa cada-ndo. Òré quíhu-ndo xítí ñuú núú quíhíⁿ-ndó, te naníhí-ndó ìⁿ tée tànehe ìⁿ yoó ndute, te tée-áⁿ candéndaha-ndo-dě quíhíⁿ, te núu ndédacàa vehe na ndíhu-dé te xíaⁿ quíhu-ndo. 11 Te cúñaha-ndo xii xítóhó vehe-áⁿ: “Yaá cúú Mèstrú càchí-gă núu ndédacàa xichi xítí vehe-n cuñaha nùu-n xii-gă cudìni-gă ndíhi cue tée xica cuu ndíhi-gă sacuaa nduu vico pascuá”, duha cúñaha-ndo. 12 Te dătnùní danèhé ñáhá-dě xii-ndo ìⁿ quartú cáhnú càa núú ñinu, chi vehe yòdo tnaha cuu-xi, te sa ní quide túha-dé nchaa sá ná ndíhi, te nchòhó dícó-nă sá cùdini-o cada túha-ndo —càchí-gă xăhaⁿ-gă xii-güedé.

13 Te ní xica-güedé cuáháⁿ-güedé, te nchaa-ni nàcuáa ní xăhaⁿ Jèsús xii-güedé ní cuu, chi nchaa sa ndècu túha, te ní quide túha-güedé sá cùdini-güedé ndíhi-gă sacuaa nduu vico pascuá-áⁿ.

14 Te sátá ñí tnahá òré cudìni Jesús ndíhi cue tée ní táuchíúⁿ-gă cáháⁿ tnúhu-gă núú ñăyiu, te cuánguihu ndíhi ñaha-gă xii-güedé mèsá. 15 Te xăhaⁿ-gă xii-güedé:

—¿Ducaⁿ-ni ìo sàni iní-í sá cùdini ndíhi ñaha-í xii-ndo sàcuáa nduu vico pascuá òré cúmání-gă sáá nduu ndòho-í te cuú-í! 16 Te na càchí tnúhu-í xii-ndo sá vă dúhá-gă caxi ndíhi ñaha-í xii-ndo nduu vico pascuá, chi ndéé òré ná sáá nduu nàsáá-ndó núú táxi tnùní Yă Ndiòxí cundecu-o, te dāvá-áⁿ cada iní-ndó să dătná sá cáxi túcu-o chí ío văha cuu iní-ó cundecu-o —cachí-gă xăhaⁿ-gă xii-güedé.

17 Te ní queheⁿ-gă ìⁿ vāsú ñúhú ndùdí ndéhé yoho yàha stilé, te ní ndacáⁿ táhú-gă núú Yă Ndiòxí, te dătnùní ní xăhaⁿ-gă xii-güedé:

—Chí quéhéⁿ vāsú ñúhú ndùdí ndéhé yoho yàha stilé-a, te coho-ndo lùha luha nchaa-ndo. 18 Te na càchí tnúhu tucu-í xii-ndo să vítná-nă duha xíhi ndíhi ñaha-í xii-ndo ndùdí ndéhé yoho yàha stilé-a te vă cóhó ndíhi ñaha-gă-í, dico na sáá nduu naníhí tnáhá-ó núú ndécú Tàtà-í Dútú Ndiòxí táxi tnùní-gă, te dāvá-áⁿ cada iní-ó să dătná sá cóhó ndíhi ñaha tucu-í xii-ndo, chí ío cudíⁿ iní-ó —càchí-gă xăhaⁿ-gă xii-güedé.

19 Te sátá ñí túhú cóhó-güedě ní cudìni-güedé, te ní queheⁿ-gă pàá te ní ndacáⁿ táhú túcu-gă núú Yă Ndiòxí, te dătnùní ní táhú cuèchi-gă, te ní dácăhñu ñaha-gă xii-güedé, te xăhaⁿ-gă:

—Pàá-a cùu-xi datná yiqui cùñú-í, chí cahni ñaha-güedě xii-í sá cuèndá-ndó, te ducaⁿ-ni càxi-ndo paá-a cuèndá ndacu iní ñáhá-ndó xii-í —càchí-gă xăhaⁿ-gă xii-güedé.

20 Te diu-ni ducaⁿ ñí quide-gă ndíhi vāsú ñúhú ndùdí ndéhé yoho yàha stilé, chí ní queheⁿ-gă te òré sãñaha-gă xii-güedé coho-güedé, te ní xăhaⁿ-gă:

—Ndudí ñúhú vāsú-a cada iní-ndó să cúú-xí dătná ñíñí-í sá cáti òré cahni ñaha-güedě xii-í. Te sá dúcáⁿ càti ñíñí-í xíáⁿ cutnùní ndáá sá Yă Ndiòxí cada-gă ingá núú să văha sá cúú-xí-ndó.

21 Dico vitna chí iha tnahá tée cuáha cuèndá ñáhá xii-í núú cuè tée cùu úhú iní ñáhá yíhi-dé mèsá. 22 Te yúhú Tée cùu ñani tnáhá-ndó nchaa-ndo ñuhu íchi-í cuáháⁿ-í cuú-í dătná ní cachí Yă Ndiòxí. ¡Dico ndáhú ní cuu tée ducaⁿ na cuáha cuèndá ñáhá xii-í núú cuè tée cùu úhú iní ñáhá! —càchí-gă xăhaⁿ-gă xii-güedé.

23 Te ní ngüíta-güedé ndúcú tnúhu núú tnáhá-güedě núu ndéda càa-güedé ducaⁿ càda cuáha cuèndá ñáhá xii-gă núú cuè tée cùu úhú iní ñáhá.

Xíndatnúhu-güedé ndédacàa-güedé cunuu-gă

24 Te sátá dúcáⁿ te ní ngüíta-güedé xíndatnúhu-güedé núu ndédacàa-güedé tau-güedé cunuu-güedé. 25 Dico Jèsús ní xăhaⁿ-gă xii-güedé:

—Nchaa cue tée yìndaha ñaha xii ñáyiú ío tàxi tnuní-güedé, te mee-güedé cuení-güedé sá càháⁿ váha ñáyiú cuendá-güedé. ²⁶ Dico nchòhó vá dúcáⁿ càda-ndo, chi núu ìⁿ-ndo cùnuu te cada-ni-ndo sá ñà túú cùnuu-ndo, àdi cuu-ndo ìⁿ tée tàxi tnuní ñáhá xii cue tée xìnu cuechi, te cada-ni-ndo sá cúú-ndó ìⁿ tée xìnu cuechi-áⁿ. ²⁷ Te vá càchí-ó sá tée xìnu cuechi cunu-gá-dé, chi tée quíhu mèsá cùnù-gá-dé. Dico yúhú ndécú ndìhi ñaha-í xii-ndo dàtná ìⁿ tée xìnu cuechi.

²⁸ Te nchòhó ducaⁿ-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaa sá táyáha-í véxi. ²⁹ Te Tàtá-í Dútú Ndiòxí ní cachí-gá sá táxi tnuní-í, te yúhú càchí-í xii-ndo sá sàá nduu te tnàhá-ndó tàxi tnuní-ndó. ³⁰ Te dàvá-áⁿ caxi-o coho-o càda-o núú táxi tnuní-í, te yàcáⁿ ngüíta-ndo càda ndáá-ndó cuèchi ndi ùxúú xichi ñáyiú isràél —càchí-gá xáhaⁿ-gã xii-güedé.

Jèsús càháⁿ-gá sá tē Pèlú cúñaha-dē xii ñáyiú sá ñà túú xini ñáhá-dē xii-gá (Mt. 26:31-35; Mr. 14:27-31; Jn. 13:36-38)

³¹ Te Xítóhó Jesucrístú ní xáhaⁿ-gã xii té Xímú:

—Yòhó Xímú, cundedóho váha ìⁿ tnúhu na càháⁿ-í-a, chi dàtná cuení-n quide táchí tríú sàcáⁿ-xi duha sàcáⁿ-xi dàcáⁿ, ducaⁿ quèsaha yucu ñáváha cada ñaha-xi xii-ndo. Chi coto ndeé ñáhá-xi xii-ndo te núu ndisa sàndáá iní ñáhá-ndó xii-í. ³² Dico yúhú xicáⁿ táhù-í núú Yá Ndiòxí cuendá-n, cuendá sá vã dáñá ndeé-n quindáá iní ñáhá-n xii-í. Te òré ndixi túu iní-n sá ñà túú ní quide váha-n, te quíhíⁿ-n cuáha-n cuè tée cündìhi-n tnúhu ndeé iní cuendá canchicúⁿ nihnu-ni-güedé ichi Yá Ndiòxí —càchí-gá xáhaⁿ-gã xii-dé.

³³ Te ní xáhaⁿ-dē xii-gá:

—Mèstrú, sa ndècu túha-í sá quíhíⁿ ndìhi ñaha-í xii-n vècaá, àdi cuéi na cúú ndìhi ñaha-í xii-n —càchí-dé xáhaⁿ-dē xii-gá.

³⁴ Te Jèsús ní xáhaⁿ-gã:

—Pèlú, na càchí tnúhu-í xii-n sá cùmání-gã cana ìⁿ líhi te úní xito

cáháⁿ-n núú ñáyiú sá ñà túú xini ñáhá-n xii-í —càchí-gá xáhaⁿ-gã xii-dé.

Sa ní cuyatni ndoho Jèsús

³⁵ Te Jèsús ní xáhaⁿ-gã xii-güedé:

—Te cútnàhá ní tendaha ñaha-í xii-ndo ní sáháⁿ-ndó chiúⁿ-í, chi ñá túú ní cànehe-ndo ní ìⁿ sá cúhúⁿ díhúⁿ-ndó, te ní ìⁿ sá cúhúⁿ ndàchiúⁿ-ndo ñá túú ní cànehe-ndo. Te chí càchí tnúhu núu ío ìⁿ sá ní cùmání xii-ndo —càchí-gá xáhaⁿ-gã xii-güedé.

Te ní xáhaⁿ-güedé:

—Ñáhá, chi ní ìⁿ sá ñà túú ní cùmání xii-ndí —càchí-güedé xáhaⁿ-güedé xii-gá.

³⁶ Te ní xáhaⁿ-gã:

—Te vitna núu ndècu ndìhi-ndo sá sácúhuⁿ díhúⁿ-ndó, àdi sá sácúhuⁿ ndachìuⁿ-ndo te canehe-ndo. Te núu ñá túú ndècu ndìhi-ndo machití, te nadico-ndo dǒó tǐcachi nihnu-ndo te cuaaⁿ-ndo. ³⁷ Te na càchí tnúhu-í xii-ndo sá dàcuítí sá yáha-í nàcuáa càháⁿ-xi núú tütú Yá Ndiòxí núú càchí-xi: “Íⁿ-ni ní quide ñaha-güedé xii-gá, ndìhi cue tée ndècu cuèchi-xi”, duha càchí-xi núú tütú-gá. Te ñá díú-ni xǎⁿ yáha-í chi nchaandi túhú nàcuáa càháⁿ-xi núú tütú-gá yáha-í —càchí-gá xáhaⁿ-gã xii-güedé.

³⁸ Te xáhaⁿ-güedé:

—Mèstrú, iha ndècu úú machití —càchí-güedé xáhaⁿ-güedé xii-gá.

Te ní xáhaⁿ-gã:

—Chí návíi-nã yuhu-ndo, vá càháⁿ-gá-ndó —càchí-gá xáhaⁿ-gã xii-güedé.

Jèsús càháⁿ ndìhi-gá Yá Ndiòxí yucu Òlívú

(Mt. 26:36-46; Mr. 14:32-42)

³⁹ Te Jèsús ní quee-gá cuáháⁿ-gá yucu Òlívú, chi ducaⁿ tnàhí quide-gá. Te cue tée xica cuu ndìhi-gá nchicúⁿ ñáhá-güedé xii-gá cuáháⁿ. ⁴⁰ Te òré ní quexìo-gá xíáⁿ, te ní xáhaⁿ-gã xii-güedé:

—Chí càháⁿ ndìhi Yá Ndiòxí cuendá sá vã dácàháⁿ ñáhá yucu ñáváha xii-ndo càda-ndo sá ñà túú tau-ndó càda-ndo —cachí-gá xáhaⁿ-gã xii-güedé.

41 Te sáta dúcáⁿ te ní quee ðíⁿ-gá tnuú-güedé cuáháⁿ-gá ðíⁿ xio, te sa ñùnchíí luha ní xica ndehe-gá núú ndécú-güedé, te xíaⁿ ní ngüíñí xítí-gá càháⁿ ndíhi-gá Tátá-gá Dútú Ndiöxí.

42 Te xáhaⁿ-gá:

—Táu, te núú ðicó cachí-n te tauni-hnu ñaha-n xii-í cuendá sá vâ ndóhò-í ná sâá òré, ðico vâ cáda-n nâcuáa càchí iní mée-í, chí cada-n nâcuáa càchí iní mée-n —càchí-gá xáhaⁿ-gá xii Tátá-gá Dútú Ndiöxí.

43 Te sáta dúcáⁿ te ní quexìo ðíⁿ espíritú xínú cuèchi núú Yâ Ndiöxí ní sáñaha-gá-xi tñúhu ndee ìní xii-gá.

44 Te òré súúni ndíhú iní-gá, te uuⁿ-gá súúni ñí yuhu ñí iní-gá càháⁿ ndíhi-gá Dútú Ndiöxí, te tnée-gá cáá dàtná cáá ñíñí te ngóyó núú ñúhú.

45 Te sáta ñí yáha ní cáháⁿ ndíhi-gá Tátá-gá Dútú Ndiöxí, te ní ndacuíñí-gá cuánuhú-gá núú ñí dándòo-gá cue téé-áⁿ, te òré ní nasáá-gá te xíxídí-güedé cuendá sá ïo cuéhé tñúhu sâni iní-güedé cuendá-gá.

46 Te xáhaⁿ-gá xii-güedé:

—¿Ná cuendá xidí-ndó? Chí ndácòo, te cáháⁿ ndíhi-ndo Yâ Ndiöxí cuendá sá vâ dâcâháⁿ ñáhá yücu ñávâha xii-ndo càda-ndo sá ñâ túú tàú-ndó càda-ndo —cachí-gá xáhaⁿ-gá xii-güedé.

Ní tñí-güedé Jèsús ndécá ñàha-güedé cuáháⁿ

(Mt. 26:47-56; Mr. 14:43-50; Jn. 18:2-11)

47 Te càháⁿ dúcáⁿ-ní Jèsús ní quexìo vai cue téé, te ðíⁿ téé xica cuu ndíhi-gá nání Jùdás cúnúu-dé yódó núu-dé núú-güedé ní quexìo ndéé núú-gá, te ní teyuhu ñàha-dé xii-gá, te núú tñàhá téé-áⁿ cúú ùxúú cue téé xica cuu ndíhi-gá. 48 Te ní xáhaⁿ Jèsús xii-dé:

—Jùdás, ¿te yòhó cuáha cuendá ñáhá-n xii yúhú Téé cùu ñani tñáhá-ndó nchâa-ndo núú cuè téé cùu úhú iní ñáhá xii-í cáháⁿ-n núu duha tàyuhu ñaha-n-áⁿ? —càchí-gá xáhaⁿ-gá xii-dé.

49 Te sáta ñí xíní nchaa cue téé cùndíhi Jèsús nâcuáa cùu cue téé ní

quexìo-áⁿ, núú ní xicáⁿ tñúhú-güedé núú-gá, te xáhaⁿ-güedé xii-gá:

—Mèstrú, ¿cúu nâá-ndí ndíhi-güedé ndíhi machítí-a ñâ? —càchí-güedé xáhaⁿ-güedé xii-gá.

50 Te ðíⁿ-dé ní xehndé-ni-dé lóho xio cùha ðíⁿ cue téé ní quexìo-áⁿ, te téé-áⁿ xínú cuèchi-dé núú dütú cúnúu-gá, te ní quendeé duuⁿ lóho-dé. 51 Te Jèsús ní xáhaⁿ-gá xii-güedé:

—Chí dáñá-güedé, vâ dúcáⁿ càda-ndo —cachí-gá xáhaⁿ-gá xii-güedé.

Te ní dâcâá-gá ndaha-gá ní tendaha-gá núú ní xindeé lóho téé-áⁿ, te ní nduu váha dàtná-ni càa. 52 Te nchaa cue téé cùu dütú cúnúu, ndíhi cue téé tàxi tñuní nchaa cue téé quide cuendá veñúhu sá ïo cúnúu, ndíhi cue téé cùu sacuéhé núú ñâyüu isràél, nchaa cue téé-áⁿ véxi tñí ñaha-güedé xii-gá, te ní xáhaⁿ-gá xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécú-í, dàtná quidé-ndó ðíⁿ ñadúhú quidé ñàha-ndo xii-í. 53 Te ducaⁿ-ni ñí xíní-ndó ñí xindecu-í xítí veñúhu càhnu sá ïo cúnúu ní xóo danèhé-í ñâyüu, te ní lùha ñâ túú ní cùu tñándeé ñáhá-ndó xii-í òré-áⁿ, te vitna ní sáá òré ducaⁿ càda-ndo, te cada sâcuíhna nâcuáa cùu iní-xi —càchí-gá xáhaⁿ-gá xii-güedé.

Té Pèlú càháⁿ-dé núú ñâyüu sá ñâ túú xíní-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Te ní tñí-güedé Jèsús, te ndéca ñaha-güedé xii-gá cuáháⁿ vehe téé cùu dütú cúnúu-gá, te té Pèlú xica xica-ni nchicúⁿ ñáhá-dé xii-gá cuáháⁿ.

55 Te òré ní quexìo-güedé xíaⁿ te ní dàtnáhá-güedé ñuhú quehé vehe-áⁿ, te ní càndéé yuhu nùhú-áⁿ ñí ngóo teté-güedé, chí quide víxiⁿ-xi, te tñàhá té Pèlú ní ngóo teté ndíhi ñaha-dé xii-güedé. 56 Te xíaⁿ ndécú ðíⁿ xíchí xínú cuèchi vehe-áⁿ, te òré ní xíní-xi nùcòo teté tñàhá té Pèlú, te ní ndacoto-xi núú-dé, te ní xáhaⁿ-xi xii-güedé:

—Tnàhá té-a xica cuu ndihi-dé té ndèca-güedé cuànguihu-ǎⁿ —càchí-xi xǎhaⁿ-xi xii-güedé.

⁵⁷ Dico té Pèlú ñá túú ní nūnuu-dé, te xǎhaⁿ-dē xii-xi:

—Yúhú ñá túú xìní-í té-ǎⁿ —càchí-dé xǎhaⁿ-dē xii-xi.

⁵⁸ Te tna tnaa-ni ní cuu, te ní xini ñáhá tucu ñⁿ-dé, te xǎhaⁿ-dē:

—Yòhó tnàhá-n xica cuu ndihi-n té ndèca-güedé cuànguihu-ǎⁿ —càchí-dé xǎhaⁿ-dē xii-dé.

Dico té Pèlú ní xǎhaⁿ-dē:

—Ñáhá, ñá díú yúhú xicá cùu ndihi-í-dé —càchí-dé xǎhaⁿ-dē.

⁵⁹ Te sa ní cuu dàtná ñⁿ òré te càchí tucu ingá-dé:

—Ndáá sá tē-a xica cuu ndihi-dé té ndèca-güedé cuànguihu-ǎⁿ, chi tnàhá-dé cúú-dē té distritú Galilea —càchí-dé xǎhaⁿ-dē xii-güedé.

⁶⁰ Te té Pèlú ní xǎhaⁿ-dē xii té-áⁿ:

—Yúhú ñá túú cùtnuní iní-í nása ndùu tnúhu càháⁿ-n —càchí-dé xǎhaⁿ-dē.

Te ni vǎtá xǐnu ducaⁿ-gǎ tnúhu càháⁿ-dé ní cana-ni ñⁿ líhi. ⁶¹ Te Xítóhó Jesucristú ní nchócótó-gǎ núú-dē, te òré-ni-áⁿ ñí ndacu iní-dé tnúhu ní xǎhaⁿ-gǎ xii-dé sá cùmání-gǎ cana ñⁿ líhi, te úní xito cáháⁿ-dé sá ñà túú xini ñáhá-dē xii-gá. ⁶² Te té Pèlú ní quee-dé tnuú-güedé cuáháⁿ-dé ñⁿ xio, te ní ndáhyú víhí-dē ní ndixi cuéchi iní-dé.

Cùdiquí ndeé-güedé Jèsús

(Mt. 26:67-68; Mr. 14:65)

⁶³⁻⁶⁴ Te cue té ndèé ñáhá xii Jèsús ní cudíquí ndeé ñáhá-güedé xii-gá, te ní dádǎhu-güedé núú-gǎ, te ní caniha-güedé xii-gá, te xǎhaⁿ-güedé:

—¡Cáháⁿ ná cótó yòo ní caniha xii-n! —càchí-güedé xǎhaⁿ-güedé xii-gá.

⁶⁵ Te cuéhé víhí-gǎ tnúhu cuéhé ní xǎhaⁿ-güedé xii-gá.

Jèsús ndécú-gǎ jündá

(Mt. 26:59-66; Mr. 14:55-64; Jn. 18:19-24)

⁶⁶ Te sátá ñí túndaá, te ní tacá cue té cùu sacuéhé núú ñáyiú israél, ndihi cue té cùu dútú cùnùu, ndihi cue té dàcuaha ñaha xii-yu nchaa tnúhu ní chídó tnùní ndíí Moisés, te ndèca-güedé Jèsús

cuáháⁿ núú cádá-güedé jündá, te òré ní quexio-güedé ndihi-gá núú cádá-güedé jündá-áⁿ, te ní xǎhaⁿ-güedé xii-gá:

⁶⁷ —Cuìní-ndí cachí tnúhu-n xii-ndí núu díu-n cùu-n Cristú Yaá ní tendaha Yá Ndióxi véxi ñuyúú-a —càchí-güedé xǎhaⁿ-güedé xii-gá.

Te ní xǎhaⁿ-gǎ xii-güedé:

—Te núu na càchí-í sá díú-í cúu Crìstú ñá, te ni vá quíndáá iní-ndó, ⁶⁸ àdi te núu ñⁿ sá ná càcáⁿ tnúhu-í núú-ndó, te ni vá càchí tnúhu-ndo, te ni vǎ dáñá ñàha-ndo. ⁶⁹ Dico vitna ní cuyatni nduu ngóo yúhú Tée cùu ñaní tnáhá-ndó nchaa-ndo xio cuha Dútú Ndióxi Yaá ío cùnùu —cachí-gǎ xǎhaⁿ-gǎ xii-güedé.

⁷⁰ Te dàtnuní nchaa-güedé ní xicáⁿ tnúhú-güedé núú-gǎ, te xǎhaⁿ-güedé xii-gá:

—¿Te yòhó cúu-n Dēhe Yá Ndióxi te núu ducaⁿ vǎni? —càchí-güedé xǎhaⁿ-güedé xii-gá.

Te ní xǎhaⁿ Jèsús:

—Ndáá sá díú Dēhe-gǎ cúu-í dàtná càchí méé-ndó-ǎⁿ —càchí-gǎ xǎhaⁿ-gǎ xii-güedé.

⁷¹ Te ní xitnàha-güedé:

—Ñá túú-gǎ xini ñùhu-xi cue té cáháⁿ núu ndáá sá ndècuéchi-dé àdi ñá túú ndècuéchi-dé chi yuhu mee-dé ní cáháⁿ-dé vitna ní xíndedóho-o —càchí-güedé xitnàha-güedé.

23

Jèsús ndécú-gǎ núú té Pilatú

(Mt. 27:1-2, 11-14; Mr. 15:1-5; Jn. 18:28-38)

¹ Te nchaa-güedé ní ndacuíñí-güedé, te ndèca-güedé Jèsús cuáháⁿ núú té Pilatú, ² te núú té-áⁿ ñí ngúita-güedé sácáⁿ cuéchi-güedé cuendá-gǎ, te xǎhaⁿ-güedé:

—Ní naníhí-ndí té-a dándahú-dé ñáyiú ñuú-ó, chi xǎhaⁿ-dē xii-yu sá vǎ chǎhu-gǎ-yu impuéstú xii té Cèsár téé ío cùnùu, te càchí-dé sá díú-dé cúu-dé Crìstú Yaá ní tendaha Yá Ndióxi véxi ñuyúú-a te yíndaha-dé ñáyiú càchí-dé —càchí-güedé xǎhaⁿ-güedé xii-dé.

3 Te té Pilatú ní xicáⁿ tnúhu-dé núú-gǎ, te xáhaⁿ-dē xii-gá:

—¿Ndáá sá díú-n cùu-n tée yìndaha ñaha xii ñáyiu isràél-ǎⁿ? —càchí-dé xáhaⁿ-dē xii-gá.

Te Jèsús ní xáhaⁿ-gǎ xii-dé:

—Díu-í yìndaha-í-yu —càchí-gá xáhaⁿ-gǎ xii-dé.

4 Te té Pilatú ní xáhaⁿ-dē xii nchaa ñáyiu, ndihì cue tée cùu dútú cùnùu:

—Yúhú cùtnùnì iní-í sá ñà túú nì ìⁿ cuèchi tée-a —càchí-dé xáhaⁿ-dē xií-yu.

5 Dico níhi-gá ní cáháⁿ-güedé, te xáhaⁿ-güedé:

—Càchí-ndí sá ïo dusaⁿ xǐquide ñáyiu cuendá nchaa sá dánèhé ñáhá-dē xií-yu, te ní quesaha-dē ndéé distritú Galileá, te ní yáha-dé ñihí distritú Jüdeá dánèhé-dé ñáyiu, te vitna ní sáá-ni-tu-dé ndéé ndíha dànèhé-dé-yu —càchí-güedé xáhaⁿ-güedé xii té Pilatú.

Jèsús ndécú-gǎ núú tē Hèrodés

6 Te sá dúcáⁿ ñí tecú dóho té Pilatú ní cacu nehé-yu distritú Galileá, núu xíáⁿ ní xicáⁿ tnúhú-dē núú-yu núu tée Galileá cúu-gǎ. 7 Te ní xáháⁿ-yu sá díú tée yàcáⁿ cúu-gǎ, núu xíáⁿ ní na dàyáha ñaha-dē xii-gá ndaha té Hèrodés tée cùu gobiernú distritú Galileá chi nduu-ǎⁿ ndécú-dē tnàhá-dé ñuú Jerusàlén-ǎⁿ. 8 Te òré ní xiní té

Hèrodés-ǎⁿ Jèsús te ío ní cudíí iní-dé, chi ní cunaha dùcaⁿ-ni cuiní-dé quini ñáhá-dē xii-gá te ñà túú tnàhí xini ñáhá-dē xii-gá ní cùu, chi cuendá-ni tnúhu ñihí-dé cuendá-gá, te ndètu-dé sáá ìⁿ nduu quini ñáhá-dē xii-gá, te cada-gá ìⁿ sá vǎ yòo tnàhí ndàcu cada cundehe-dé ní sani iní-dé. 9 Te vǎi sá ñí xicáⁿ tnúhú-dē núú Jèsús, dico ni ìⁿ tnúhu ñà túú ní cáháⁿ-gá. 10 Te xíáⁿ xíndecu tnàhá cue tée cùu dútú cùnùu, ndihì cue tée dàcuaha ñaha xii ñáyiu nchaa tnúhu ní chidó tnùnì ndíi Moisés, te cue tée-ǎⁿ sùúnì ío iní-güedé sàcáⁿ cuèchi-güedé cuendá-gá. 11 Te té Hèrodés ndihì cue tée cùu sandadú-dé ñà túú ní cùu váha iní-güedé núú Jèsús, te ní cudíquí ndéé ñáhá-güedé

xii-gá, te ní dáciuhnú ñàha-güedé dóo vǎha xii-gá dàtná cáá dǒo sáciuhnu cue tée sàquindaha ñaha xii ñáyiu. Te dàtnùnì té Hèrodés ní dánùhú ñáhá tucu-dé xii-gá ndaha té Pilatú. 12 Te nduu-ǎⁿ ñí tnahá tnúhu té Pilatú ndihì té Hèrodés, chi cùu úhú iní tnahá-güedé ní cùu.

Càchí-güedé sá cáhni-güedé Jèsús

(Mt. 27:15-26; Mr. 15:6-15; Jn. 18:39-19:16)

13 Te té Pilatú ní nadatácá-dé nchaa cue tée cùu dútú cùnùu ndihì dava-gá cue tée cùnùu, ndihì nchaa ñáyiu ñuú-ǎⁿ, 14 te ní xáhaⁿ-dē:

—Nchòhó ndécá-ndó tée-a véxi ní taxi cuendá-ndó-dé iha, te càchí-ndó sá ïo dusaⁿ quide ñáyiu cuendá nchaa sá dánèhé ñáhá-dē xií-yu, te núú-ndó ndùcu tnúhu-í núú-dē núu ná ní quide-dé. Dico yúhú cùtnùnì iní-í sá ñà túú nì ìⁿ cuèchi-dé dàtná cáháⁿ-ndó-ǎⁿ. 15 Te cuèi té Hèrodés díu-ni ducaⁿ cáháⁿ-dē sá ñà túú cuèchi-dé núu ní techiuⁿ ñaha tucu-dé cuándixi-dé iha. Te vitna sa ní cùtnùnì iní-ó sá ñà túú tàú-xi cahni-o-dé chi ñà túú cuèchi ní quide-dé. 16 Te na dàndohò-ni-í-dé te dàcácu-í-dé —càchí-dé xáhaⁿ-dē xií-yu.

17 Te ndi tnahá nduu vico pascua te dacuitíi sǎ dácácu té Pilatú-ǎⁿ ìⁿ cue tée yìhi vecaá, chi ducaⁿ tnàhí quide-dé. 18 Dico ncháá-yu ní cuáá-yu, te xáháⁿ-yu xii-dé:

—¡Queñuhu tée nàni Jesús-ǎⁿ, te cahni-n-dé! ¡Te dàcácu-n tē Barrábás! —càchí-yu xáháⁿ-yu xii-dé.

19 Te té Barrábás-ǎⁿ ñí sanu ichi-dé ñáyiu ñuú ingá ichi, te ní ngüíta-yu ndihì-dé ní cuu úhú iní-yu cue tée cùchiuⁿ, te ní sahani-dé ndíyì núu xíáⁿ ní chihì ñaha-güedé vecaá xii-dé. 20 Te té Pilatú cuiní-dé dàcácu-dé Jèsús núu xíáⁿ cáháⁿ ndihì ñaha tucu-dé xií-yu ní cùu, 21 dico uuⁿ-gá níhi ní cuáá-yu, te ní xáháⁿ-yu xii-dé úú xito:

—¡Cata caá-dé núú cùrúxí! ¡Cata caá-dé núú cùrúxí! —càchí-yu xáháⁿ-yu xii-dé.

22 Te xito cuu únì ní xáhaⁿ tē Pilatú:

—¿Te ná cúu cuèchi ní quide-dé te núu ducaⁿ cuiní-ndó càda-í-dé-í? Te

yúhú cútnùní iní-í sá ñà túú cuèchi ni quìde-dé nùu xǎhⁿ ñá túú tàù-xi cahni-o-dě, te na dàndoho-ni-í-dé te dàcácu-í-dé —càchí-dé xǎhaⁿ-dě xii-yu.

²³ Dico níhi-ni càháⁿ-yu xǎhⁿ-yu sá ná càta caa ñaha-dé xii-gá núú cùrúxí, te ñáyiu-áⁿ ndihì nchaa cue téé cùu dùtú cùnùu xícáháⁿ níhi-güedé ndihí-yu ndéé ní xínu iní té Pilatú cada-dé nàcuáa càchí iní-yu. ²⁴ Te ní xáhaⁿ-dě xii-yu sá cúú càda-dé nàcuáa xǎhⁿ-yu. ²⁵ Te ducaⁿ te ní dácăcu-dé té Barrábás téé ní sanu ichi ñáyiu ñuú ìngá ichi, te ñu-ni-dé ní sahnì-dé ndíyì núu xǎhⁿ ní xíhì-dé vecaá, te dàtnùní ní táuchíúⁿ-dě cada-güedé Jèsús nàcuáa xǎhⁿ-yu.

*Sàta caa-güedé Jèsús núú cùrúxí
(Mt. 27:32-44; Mr. 15:21-32; Jn. 19:17-27)*

²⁶ Te ndèca-güedé Jèsús cuáháⁿ núú cātá càa ñaha-güedé xii-gá, te ichi cuáháⁿ-güedé ndihì-gá ní tñi-güedé ñⁿ téé ñuú Cirené nání-dě Xímú ñúhú-dě ichi duha cuándixi-dé ní sáháⁿ-dé yucu, te ní dácúidó ñaha-güedé xii-dé cùrúxí nchídó Jèsús, te ní ngúita nchicúⁿ-dé sátá-gă.

²⁷ Te ío cuéhé ñáyiu nchìcúⁿ ñáhá xii-gá cuáháⁿ, te vài ñáyiu ñhì ío níhi ndàhí-yu sá ndihú iní-yu cuendá Jèsús. ²⁸ Te Jèsús ní nchócótó-gă núu-yu, te ní xáhaⁿ-gă:

—Nchòhó ñáyiu ñhì ñuú Jerusàlén, vá ndàhyú-ndó cuendá-í chí ndàhyú cuendá méé-ndó ndihì cuendá déhe-ndo. ²⁹ Chí sáá nduu quèsaha ñáyiu: “Sá vǎha táhú nchaa ñáyiu ñá túú càcu déhe-xi, ndihì nchaa ñáyiu vátá quèní-gá cuhuⁿ déhe-xi, chí ni ñà túú xìní-yu dacàdí-yu”, duha quesàhá-yu. ³⁰ Te dàvá-áⁿ cǎñaha ñáyiu xii nchaa tìndúú ndihì nchaa núú xìquí: “Chí tǎcùuⁿ ngónchihi ñaha-ndo xii-ndí”, duha cúñahá-yu. ³¹ Te núu yúhú téé quìde ndáá duha quìde ñaha-güedé xii-í vitna, te ndèé-gá cada-güedé nchaa ñáyiu ndècu ichi cuehé ichi duha —càchí-gá xáhaⁿ-gă xii-yu.

³² Te ndèca tucu-güedé úú tñàhá cue téé ndècu ndisa cuéchi-xi cuáháⁿ cuendá cahni ñaha-güedé xii-güedé ndihì Jèsús. ³³ Te òré ní quexìo-güedé ndihì-gá ñⁿ xichi núú nání Yìquí Díquí Ndíyì, te xíaⁿ ñí sata caa ñaha-güedé xii-gá núú cùrúxí, ndihì úú cue téé ndècu ndisa cuéchi-xi-áⁿ, te ñⁿ-dé ní sata caa-güedé xio cùha-gá te ìngá-dé ní sata caa-güedé xio dàtni-gá ñu-ni núú cùrúxí tucu. ³⁴ Te ní xáhaⁿ-gă xii Tǎtá-gă Dùtú Ndiǒxí:

—Táu, cada càhnu iní sá quíde-güedé, chí ñá túú cùtnuní iní-güedé ná cúú sǎ quíde-güedé —càchí-gá xáhaⁿ-gă.

Te cue téé cùu sandadú ní xito ndéé-güedé nùu ndédacàa-güedé cuu cuendá-güedé dóó-gă. ³⁵ Te nchaa ñáyiu xǎndecu-áⁿ ndéhě-yu nàcuáa quìde-güedé Jèsús, te nchaa cue téé cùnùu ní cudíquí ndéé ñáhá-güedé xii-gá, te ní xítñaha-güedé:

—Te dava ñáyiu ní ndacu-dé ní dácăcu nihnu-dé, te vitna na dàcácu nihnu-dé méé-dě, te núu ndisa sá Crìstú Yáá ní tendaha Yǎ Ndiǒxí véxi ñuyíú-a cùu-dé —càchí-güedé xítñaha-güedé.

³⁶ Te tñàhá cue téé cùu sandadú ní cudíquí ndéé ñáhá-güedé xii-gá, chí ní sàndehe yatni-güedé núú tǎcàa-gá sǎñaha-güedé ndudí íá còho-gá ní cùu, ³⁷ te ní xáhaⁿ-güedé xii-gá:

—Te núu yòhó cúú-n tǎe yìndaha ñaha xii ñáyiu isràél, te dàcácu nihnu mee-n —càchí-güedé xáhaⁿ-güedé xii-gá.

³⁸ Te ní taxi ndecu-güedé ñⁿ sá ndéé lètrá ndàa díquí-gă te ndéé úní núú tñùhu, tñùhu grìégú, ndihì tñùhu làtín, ndihì tñùhu hèbreú, te duha quèe-xi ndi nuní núú tñùhu-áⁿ “Téé-a cùu-dé téé yìndaha ñaha xii ñáyiu isràél”, duha quèe-xi.

³⁹ Te ñⁿ téé ndècu ndisa cuéchi-xi, téé ní sata caa-güedé ñhì-gá xǎcùèhé ñáhá-dě xii-gă, te xáhaⁿ-dě:

—Te núu yòhó cúú-n Crìstú Yáá ní tendaha Yǎ Ndiǒxí véxi ñuyíú-a, te

dàcácu nihnu mee-n, te dàcácu nihnu ñaha xii nchúhú tnàhá-ndí tucu — cächí-dé xáhaⁿ-dë xii-gá.

⁴⁰ Dico ingá tée cùndihi-dé tée tàcaa ingá xio ñá-gá ní tenáá ñáhá-dë xii-dé, te xáhaⁿ-dë:

—¿Te náa ñá túú ndàcu iní-n Yá Ndiõxí vitna duha càa-o ndoho-o ndihi tée nani Jesús-a ñá? ⁴¹ Chi nchoo tàú ndisa-o sá dúhá ndòho-o nacháhu-o cuèchi-o, dico Jèsús-a chi ñá túú cuèchi-dé —cächí-dé xáhaⁿ-dë xii tée tàcaa ndihi-dé-áⁿ.

⁴² Te dàtnùní ní xáhaⁿ-dë xii-gá:

—Jèsús, ndacu iní ñáhá-n xii-í òré ná quixi-n taxi tnuní-n ñùyíú-a — cächí-dé xáhaⁿ-dë xii-gá.

⁴³ Te Jèsús ní xáhaⁿ-gã:

—Na cächí tnúhu ndáá-í xii-n sá méi ndúu vitna cundecu ndihi ñaha-í xii-n núú ní nduu táhù-í cundecu-í — cächí-gá xáhaⁿ-gã xii-dé.

Ní xíhí Jèsús

(Mt. 27:45-56; Mr. 15:33-41; Jn. 19:28-30)

⁴⁴ Te òré ní cuu cuádava nduu. Te ní cunee nihíí ñuyíú, te ducaⁿ-ní càa ní cuu ndéé caá úní sacuaa. ⁴⁵ Chi ñá túú-gá ní dàyehé nchícanhii te ní ndátá dóó cúú còrtiná veñúhu càhnu sá ío cùnuu ní quée dava ndáá. ⁴⁶ Te níhi ní cáháⁿ Jèsús, te xáhaⁿ-gã xii Tátá-gã Dútú Ndiõxí:

—Táu, naqueheⁿ cuendá-n espíritú-í —cächí-gá xáhaⁿ-gã xii Tátá-gã.

Te tnúhu-ná-áⁿ ní cáháⁿ-gá te ní xíhí-ni-gá.

⁴⁷ Te òré ní xiní tée cùu capitáⁿ sá dúcáⁿ ní cuu, te ní ndacu iní-dé Yá Ndiõxí, te ní cachí-dé:

—Sá ndáá ndisa sá tée-a cùu-dé ìⁿ tée ío quide ndáá ndécú ñùyíú-a ní cùu —duha ní cachí-dé.

⁴⁸ Te chitu ñáyiú ní tacá xíaⁿ chi cuíní-yu cundèhé-yu nása cada-güedé Jèsús. Te sátá ní yáha ní xiní-yu nàcuáa ní quide ñaha-güedé xii-gá, te ní ndihí-yu ní ndaca ta caní-yu pèchú-yu cuánuhú sá ndihú iní-yu.

⁴⁹ Dico ndècu tnahá cue ñáyiú xiní tnáhá ndihi Jesús, ndihi ñáyiú ñáyiú ní chinchícúⁿ ñáhá xii-gá ndéé distritú Galileá, te ñáyiú-áⁿ xica-ni

xixínutnii-yu xíndéhě-yu nchaa nàcuáa ní quide ñaha-güedé xii-gá.

Chindúxi-güedé Jèsús

(Mt. 27:57-61; Mr. 15:42-47; Jn. 19:38-42)

⁵⁰ Te ndècu ìⁿ tée ñuú Arimateá nání-dë Chèé, te ñuú-áⁿ yíndèhu-xi distritú Jùdeá, te ío váha iní-dé te quide ndáá-dé núú Yá Ndiõxí, te tnàhá-dé cúú-dë chùⁿ te ní xíndecu-dé jùndá cue tée isràél. ⁵¹ Te ñá ní tnàhá tnàhí iní-dé nàcuáa ní cáháⁿ-güedé núú jùndá nàcuáa cada-güedé Jèsús.

Te tée-áⁿ ndétú-dë sáa nduu ndíhu ndaha ñàha Yá Ndiõxí xii-dé ndihi ñáyiú. ⁵² Te tée-áⁿ ní sáháⁿ-dé núú tē Pilatú te ní xáhaⁿ-dë sá núu vá cùndèe iní-dé dañá-dë chindúxi-dé yiqui cùñú Jèsús. Te té Pilatú-áⁿ ní sáha-dé tnúhu. ⁵³ Te ní nunehe-dé yiqui cùñú-gá núú cùrúxí, te ní chidúcúⁿnuu-dé ìⁿ dóó cuixíⁿ, te ní chihi-dé ìⁿ yaú nchii yiqui naha càva,

te vátá yõo ìⁿ-gá nguíndüxi yaú-áⁿ. ⁵⁴ Te cùu-xi nduu vispré nduu ndètatú ñáyiú, núu xíquide túha-ná-yu sá cúú ingá nduu.

⁵⁵ Te nchaa ñáyiú ñáyiú ní chinchícúⁿ ñáhá xii Jesús ndéé distritú Galileá ndèndàhá-yu té Chèé ní sáháⁿ núú nchii yaú-áⁿ, núu ní xiní-yu nàcuáa ní sacáⁿ-dé yiqui cùñú-gá xití yaú-áⁿ.

⁵⁶ Te ducaⁿ te cuánuhú-yu vehé-yu, te ní quide túha-yu acití sáháⁿ tnámí, ndihi pomadá, te ní ndetatú-yu ingá nduu-áⁿ ní quidé-yu nàcuáa càháⁿ tnúhu Yá Ndiõxí.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

¹ Te ndumìngú nehé víhí-ní cuáháⁿ tucu ñáyiú ñáyiú ní chihí-güedé yiqui cùñú Jèsús, te nehé-yu nchaa sá sáháⁿ tnámí ní quide túha-yu-áⁿ cuáháⁿ, te tnàhá tucu ìⁿ úú-gá tnàha ñáyiú-yu nchícúⁿ ñáhá xii-yu cuáháⁿ. ² Te òré ní quexió-yu yuhu yaú-áⁿ te ní xiní-yu sá yúú ndèdí ìⁿ xio-ná ndécú, ³ te

ní quíhu-yu xítí yaú-án, dico ñá túú-gã yiqui cùñú Jèsús yíhí. ⁴ Te ñá ní cùtnuní tnàhí iní-yu ndéé ichi cuáhán yiqui cùñú-gá, te ní xiní-yu úú espíritú xínú cuèchi núú Yá Ndiõxí xĩnutnĩ-xi dìñi-yu te xĩxĩhnu-xi dóó chãhnchí. ⁵ Te ní yùhú-yu te ñá túú ní cùyí-yu cundèhé-yu cue espíritú-án, te cue espíritú-án ñí xáhaⁿ-xi xìi-yu:

—¿Ná cuendá nándùcu-ndo Jesús Yaá ndécú vǐvú núú yĩndũxi ñáyiu ní xíhí-í? ⁶ Te ñá túú-gã yiqui cùñú-gá ndécú ìha chi sa ní ndoto-gá, te chí dándàcu iní nàcuáa ní cáháⁿ-gá cútnàhá ní xĩndecu-ndo ndìhí-gá distritú Galileá, ⁷ chi ní cachí-gá sá méé-gã cúú-gã ñaní tnàhá-ndó nchàa-ndo, te dacuítí cuãha cuendá ñáhá-güedě xii-gá núú cuè téé ndècu ichi cuehé ichi duha, te cata caa ñaha-güedě xii-gá núú cùrúxí, te núú cùrúxí-án cuú-gá dico nduu úní sá cúú-gá te ndoto-gá, duha ní cachí-gá xii-ndo.

⁸ Te òré-án ñí ndacu iní-yu tnúhu ní cáháⁿ Jèsús. ⁹ Te sátá dúcáⁿ te ní naquehéⁿ-yu ichi cuánuhú-yu, te ní caní-yu cuendú núú ndí úxí ñí cue téé ní táuchíúⁿ Jèsús cáháⁿ tnúhu-gá, ndìhí núú dàva-gá ñáyiu. ¹⁰ Te ñáyiu ducaⁿ ñaha tnúhu cuánuhú núú-güedě-án cúú tã Màriá Magdalená, ndìhí tá Juáná, ndìhí tá Màriá nãná tẽ Jãcobó, ndìhí dava-gá ñáyiu dìhí. ¹¹ Dico cue téé-án ñí sani iní-güedě sá dìcò cáhú ìní-yu tnúhu xãhãⁿ-yu xii-güedě ñúu ñá túú ní sàndáá iní-güedě nàcuáa ní xãhãⁿ-yu.

¹² Dico té Pèlú ní quee-dé xínú-dě cuáhán cuándéhé-dě yaú núú ñí chihi-güedě yiqui cùñú Jèsús, te ní sáa-dé te ní ngáundeyi-dé xító ñihni-dé xítí yaú-án te ní xiní-dé sá méé-nã dóó ñí xĩducúⁿ nuu-gá yúcu ñí xio, te ío ní cuñúhu-dé sá dúcáⁿ ñí cuu, te ní natnĩ-dé ichi cuánuhú-dé vehe núú xĩndecu-güedě.

*Ichi ñúú Emàús
(Mr. 16:12-13)*

¹³ Te dũ-ni nduu-ãⁿ ñúhú úú cue téé ní xica cuu ndìhí Jèsús ichi cuáhán-güedě ñí ñúú nání Emàús, te sàcúhuⁿ-güedě dàtná úú òré ichi ndéé ñúú Jerusàlén, te ndéé ñúú Emàús. ¹⁴ Te ta ndàtnúhu-güedě cuáhán nchaa nàcuáa ní cuu, ¹⁵ te ñíni dùcaⁿ xicáhán-güedě, te Jèsús ní natnahá ñáhá-gã xii-güedě te ndèca tnaha-gá ndìhí-güedě cuáhán. ¹⁶ Te cuèi ndèhe ñaha-güedě xii-gá dico dàtná ñí sá ndèdí núú-güedě, chi ñá ná quèní ñáhá-güedě xii-gá ní cùu. ¹⁷ Te Jèsús ní xicáⁿ tnúhú-gã núú-güedě, te xáhaⁿ-gã:

—¿Ná tnúhu xicáhán-ndó ñúhu-ndo ichi núu ducaⁿ ño cùu ndiyí-ndó-í? —càchí-gá xáhaⁿ-gã xii-güedě.

¹⁸ Te ñí téé nàni Cleofás ní xáhaⁿ-dẽ xii-gá:

—¿Te ná cuendá nchaa ñáyiu íchí ñí sáa ñúú Jerusàlén xiní-yu nchaa nàcuáa ní cuu, te ñí ñí ñí yòhó ñá túú xiní-n-í? —càchí-dé xáhaⁿ-dẽ xii-gá.

¹⁹ Te ní xáhaⁿ-gã xii-güedě:

—¿Te ná ní cuu-í? —càchí-gá xáhaⁿ-gã xii-güedě.

Te ní xáhaⁿ-güedě xii-gá:

—Cuendá Jesús téé ñúú Nazàrèt càháⁿ-ndí, chi téé-án cúú-dě ñí téé càháⁿ tnúhu Yá Ndiõxí, te ío váha ndúu tnúhu càháⁿ-dé ní cùu, te quide-dé sá vã yõo tnàhí ndàcu cada nacuáa cudí ñí Yá Ndiõxí ndìhí ñáyiu ní cùu. ²⁰ Te cue téé cùu dútú cúnúu, ndìhí cue téé cúnúu taxi tnuní ñáhá xii-ndí ní sáha cuendá ñáhá-güedě xii-dé núú tẽ Pilatú te ní sata caa ñaha-güedě te núú cùrúxí-án ñí xíhí-dé. ²¹ Dico vitna sa ní cuu úní nduu sá ñí xíhí-dé, te nchúhú ní sani iní-ndí sá tẽ-án dácácu ñihnu ñaha-dẽ xii nchúhú ñáyiu isràél núú nchàa tnúndòho tnúhu ndàhú ndécú-ndí. ²² Dico ío cùñúhu-ndí cúú, chi ñí ñí ñáyiu dìhí ní tuha ñaha xii-dé ndécú ndìhí-ndí ní sáhán ngotó-yu ndéxuehe tàcuĩhndá-gá yaú núú ñí chihi-güedě yiqui cùñú-dé, ²³ te ní nasáa-yu càchí-yu xii-ndí sá ñá túú-gã yiqui cùñú-dé yíhí xítí yaú-án. Te ní xiní-yu espíritú xínú

cuèchi núú Yă Ndiöxí, te ní xáhaⁿ-xi xii-yu sá ndécú vívú-dě. ²⁴ Te sátá dúcáⁿ te ìⁿ ũú cue téé cùndihi-ndí ní sáháⁿ ndéhé-güedě yaú-áⁿ, te ní xiní-güedé sá ndàá cúú-xí nchàa tnúhu ní cáháⁿ ñáyiú dǐhí-áⁿ, dico ñá túú ní xìní-güedé téé-áⁿ —càchí-güedé xáhaⁿ-güedě xii-gá.

²⁵ Te Jèsús ní xáhaⁿ-gá xii-güedé:

—Ío cùmání sǎ xìní tnùn-ndó, chi ío cuèé sàndáá iní-ndó tnúhu ní cáháⁿ cue téé ní xóo cáháⁿ tnúhu Yá Ndiöxí ndéé sanaha! ²⁶ ¿Te náa ñá túú tàú-xi sá ndóhó Cristú òré cùmání-gǎ sáá nduu ndàa-gá andiú nùú ndécú Dǔtú Ndiöxí cundecu-gá-ǎⁿ? —càchí-gá xáhaⁿ-gá xii-güedé.

²⁷ Te ní ngüíta-gá xáhaⁿ-gá nàcuáa quèe-xi nchaa tnúhu càháⁿ-xi núú tütú Yă Ndiöxí cuendá-gá, te dǐhna-gá ní cáháⁿ-gá nàcuáa ndùu nchaa tnúhu yòdo tnuní núú tütú ndi Moisés, te dǎtnùn-ndó ní cáháⁿ-gá nàcuáa ndùu nchaa tnúhu yòdo tnuní núú tütú nchaa cue téé ní xóo cáháⁿ tnúhu Yá Ndiöxí ndéé sanaha.

²⁸ Te òré ní quexìo-güedé yuhu ñùú núú cuaháⁿ-güedé-áⁿ, te Jèsús ní quide-ni-gá sá yáha-gá quíhíⁿ-gá ìngá xichi ní cùu. ²⁹ Dico ní cáháⁿ ndáhú-güedé núú-gǎ sá quéndòo-gá xíáⁿ ndetatú-gá ndihí-güedé, te xáhaⁿ-güedé xii-gá:

—Quendóo ndihí ñaha xii-ndí iha ndetatú-n chi sa ní cuaa, te tnaví cundiquíⁿ —càchí-güedé xáhaⁿ-güedé xii-gá.

Te xíáⁿ cáá ìⁿ vehe cuánguihu-güedé ndetatú-güedé ndihí-gá. ³⁰ Te òré sa yìhi-güedé mèsá ndihí-gá cùdini ndihí ñaha-güedé, te ní queheⁿ-gá pàá te ní ndacáⁿ táhú-gǎ núú Yă Ndiöxí, te ní táhú cuèchi-gá te dǎtnùn-ndó ní dácǎhñu ñaha-gǎ xii-güedé. ³¹ Te òré-áⁿ ñí naquiní ñáhá-güedé xii-gá ní cùu, dico uuⁿni ní ndóñhú-gǎ. ³² Te ní xitnáha-güedé:

—Te ndáá sá sùúní cùdíí ìní-ó òré tá ndàtnúhu-o ndihí Jèsús véxi ichi, te ta dánhé ñáhá-gǎ xii-o nchàa nacuáa

quèe-xi tnúhu càháⁿ-xi núú tütú Yă Ndiöxí —càchí-güedé xitnáha-güedé.

³³ Te ñá túú-gǎ ní xǐndetu-güedé chi ndihí-ni ní natnii-güedé ichi cuánuhú-güedé ñúú Jerusàlén, te ní nasáá-güedé núú xǐndecu ndi ùxí ìⁿ cue téé ní táuchíúⁿ Jèsús cáháⁿ tnúhu-gá, ndihí dava-gá ñáyiú. ³⁴ Te cue téé xǐndecu-áⁿ xáhaⁿ-güedé:

—Ndáá sá ñí ndoto Yaá cúú Mèstrú, chi ní xiní ñáhá tǎ Xímú —càchí-güedé xáhaⁿ-güedé.

³⁵ Te cue téé ní nasáá-áⁿ ñí cani-güedé cuendú nàcuáa ní cuu ichi, ndihí nàcuáa ní cuu ní naquiní-güedé Jèsús òré ní táhú-gǎ pàá ní dácǎhñu ñaha-gǎ xii-güedé.

Jèsús ní quexìo-gá núú xǐndecu cue téé ní xica cuu ndihí-gá

(Mt. 28:16-20; Mr. 16:14-18; Jn. 20:19-23)

³⁶ Te càháⁿ dúcáⁿ-ní-güedé nàcuáa ní cuu ní quexìo Jèsús ní ngúnutnii-gá ndéé tnuú-güedé, te xáhaⁿ-gá xii-güedé:

—Yá Ndiöxí chǐndèe ñaha-gá xii-ndo ío váha cùu iní-ndó ndècu-ndo —cachí-gá xáhaⁿ-gǎ xii-güedé.

³⁷ Te da ní yùhú-güedé, te ní sani iní-güedé sá dícó ìⁿ espíritú cúú sǎ ndéhé-güedé ní cùu. ³⁸ Dico Jèsús ní xáhaⁿ-gǎ xii-güedé:

—¿Ná cuendá yùhú-ndó, te sàni ìⁿ sani úú iní-ndó-í? ³⁹ Chí cùndèhe ndaha-í ndihí sáhá-í te quiní-ndó nǎ diu-ni-í. Te chí téndàha ñaha xii-í te cundehe-ndo, te núu ìⁿ espíritú ndécú yìqui cuñú-xi dǎtná ndécú ndihí yùhú —càchí-gá xáhaⁿ-gǎ xii-güedé.

⁴⁰ Te sátá dúcáⁿ ñí xáhaⁿ-gǎ te ní dánhé ñáhá-gǎ xii-güedé ndaha-gá ndihí sáhá-gǎ. ⁴¹ Te ío ní cuñúhu-güedé, te ní cudíí ìní-güedé sá ndécú-gǎ tnuú-güedé dico sàni ìⁿ sani úú iní-güedé, te ní xáhaⁿ Jèsús xii-güedé:

—¿Ndècu ndihí-ndo luha sá cáxí-ó iha ñá? —càchí-gá xáhaⁿ-gǎ xii-güedé.

⁴² Te ní sáñaha-güedé xii-gá luha chácá ñí chíhó, ndihí dítá ñhñú ñhñú ndúdí, ⁴³ te ní queheⁿ-gá te

ndèhe-güedé ní xexi-gá. ⁴⁴ Te dătnùní ní xáhaⁿ-gă:

—Nchaa sá nǐ yáha-í-a cùu-xi sá nǐ cachí tnúhu-í xii-ndo cǔtnàhá ndécú ndìhi ñaha-gá-í xii-ndo, chi ní cachí-í sá dăcui^{tí} càda-xi nchaa nacuáa càháⁿ-xi núú tütú ndíi Moisés, ndìhi núú tütú ndéé tnúhu ní cáháⁿ cue téé ní xóo cáháⁿ tnúhu Yá Ndiöxí ndéé sanaha, ndìhi núú librú Sálmu —cächí-gá xáhaⁿ-gă xii-güedé.

⁴⁵ Te òré-áⁿ nǐ sáñaha-gă sá xini tnùnigüedé, te ní tecú tnùnigüedé nchaa tnúhu càháⁿ-xi núú tütú Yá Ndiöxí. ⁴⁶ Te ní xáhaⁿ-gă xii-güedé:

—Ducaⁿ ndéé tnuní núú tütú Yá Ndiöxí sá dăcui^{tí} sá yúhu Cristú cuú-í, te nduu úní ndoto-í. ⁴⁷ Te nǐhì ñuyú cùténuu tnúhu ní cáháⁿ-í, dico díhna nuu-gă ñuú Jerusàlén ngúita-yu cacunehe ñàhá-yu xii-í, te cáháⁿ-yu năcuáa ní dănèhé-í-yu, te cúñàhá-yu xii cue ñáyu sá ná dândixi túu-yu iní-yu sá ñà túú quide váha-yu, te dàñá-yu nchaa ichi cuèhé ichi duha ndécú-yu, te natnǐ-yu ichi Yá Ndiöxí, te ducaⁿ te cada càhnu iní-gá nchaa yíca cuèchi-yu. ⁴⁸ Te vitna nchòhó cuu-ndo cuè téé cáháⁿ ndáá nchaa năcuáa ní cuu chi ní xini núú-ndó. ⁴⁹ Te yúhu tendaha-í Espiritú Yá Ndiöxí quixi cundecu ndìhi-ndo, chi ducaⁿ ní cachí-gá. Dico chí cündecu-ni ñuú Jerusàlén-áⁿ ndéé ná quèxio Espiritú Yá Ndiöxí ngúndecu ndìhi-ndo cuèndá chindee ñàha-xi xii-ndo cada-ndo nchaa nacuáa ní cáháⁿ-í —cächí-gá xáhaⁿ-gă xii-güedé.

Jèsús cuándaa-gá andiu

(Mr. 16:19-20)

⁵⁰ Te Jèsús ní queñuhu ñaha-gă xii-güedé ñuú Jerusàlén ndéca ñàha-gá cuáháⁿ ñuú Bètaniá, te xiáⁿ nǐ ndonehe-gá ndaha-gá núú nǐnu, te ní xícaⁿ táhu ñàha-gá xii-güedé núú Yá Ndiöxí. ⁵¹ Te sáta nǐ xícaⁿ táhu ñàha-gá xii-güedé núú Yá Ndiöxí, te ní quee-gá tnuú-güedé cuándaa-gá andiu. ⁵² Te ní ngúita-güedé ní cachí-güedé sá ño càhnu cuu Jesús, te ní natnǐ-güedé ichi cuánuhú-güedé ñuú Jerusàlén, te súúni cùdí^í iní-güedé ñuhú-güedé ichi.

⁵³ Te nchaa nduu ní xindecu-güedé veñúhu càhnu sá ño cùnuu ní ndacáⁿ táhu-güedé núú Yá Ndiöxí, te ní cachí-güedé sá ño càhnu cuu-gá. Duha ní cuu dává-áⁿ.

TNÚHU NÍ CHÍDÓ TNÛNÍ TĚ JUÁÁ

Déhe Yá Ndiöxí ní cuu-gá ññáyi

¹ Cùmání-gã ngáva ñuyú, te sa ndècu ndihí Yá Ndiöxí Déhe-gá. Te ññ-ni xĩcuu-gá. Te Déhe-gá-án ññ cuu-gá dàtná ññ tnúhu, chi ní cachí tnúhu-gá nàcuáa càa Tátá-gã Dútú Ndiöxí. ² Te sa ndècu-gá ndihí Dútú Ndiöxí te ní ngáva ñuyú. ³ Te ññ-ni tnúhu mee Dútú Ndiöxí ní cuu ní cadúha Déhe-gá nchaa sá ió ñuyú. Te núu ñá túú Déhe-gá ñá, te ñá túú nã coo ñuyú-a ni cùu. ⁴ Te ññ-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o. ⁵ Te tnúhu-gá ní xité nuu-xi núú ndécú nchaa ññáyi ññhuichi cuehé ichi duha. Te ññáyi-án cúũ-yu dàtná cue ññáyi ndècu ññ núú néé, te ññ-ni-yu cachí iní-yu xocání-yu tnúhu-gá dico vá ndácũ-yu.

⁶⁻⁷ Te ní xĩndecu ññ téé ní xĩnani-dě Juáá, te téé-án ññ táúchíú Yá Ndiöxí sá càhá-dé tnúhu-gá núú ññáyi. Te ní xáha-dě xií-yu sá vëxi Déhe-gá ñuyú-a, te dandixi túu-gá iní-yu cuendá cutnùní iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá. ⁸ Te ñá díú mèe té Juáá ní dandixi túu-dé iní-yu cuendá cutnùní iní-yu nàcuáa ndùu cuendá Yá Ndiöxí, chi cuendá-ni ní xica cuu-dé ní càhá-dé sá Déhe Yá Ndiöxí véxi-gá dandixi túu-gá iní-yu. ⁹ Te ndáá ndisa sá méé-gã dándixi túu-gá iní ññáyi ñuyú-a cuendá cutnùní iní-yu nàcuáa ndùu cuendá Yá Ndiöxí.

¹⁰ Te ní xĩndecu-gá ñuyú-a, te ññáyi ñuyú-a ñá ní cùtnuní iní-yu yoo cùu-gá, te ññ-ni mee-gã ní cadúha-gá ñuyú-a ní quide-gá chùu ní táhú Dútú Ndiöxí. ¹¹ Te ní quixi-gá ñuyú ní cadúha mee-gã, dico cue ññáyi ñuyú-a ñá ní cùu váha iní-yu núú-gá. ¹² Dico davá-yu ní sándáá iní ññá-yu xii-gá, te ní nduu táhũ-yu ní nduu déhe ñaha Yá Ndiöxí xií-yu. ¹³ Te ñá túú ní ndùu déhe ñaha-gã xií-yu

sá cúũ-yu déhe ññáyi ñuyú-a, àdi sá ndécú tãtã-yu, nãñã-yu chi mee Yá Ndiöxí duca ññ cuiní-gá cunduu sá ndúú dèhe ñaha-gã xií-yu.

¹⁴ Te Déhe-gá ní quixi túu-gá ñuyú-a, te ní cuu-gá ññ yiqui cùñú ní xĩndecu ndihí ñaha-gã xii nchoo cue ññáyi ní xica cuu túu ndihí-gá. Te ní xini-ó sã ññ cãhnu cuu-gá cuendá sá ññ dñi díí-ni-gã cúú-gã Déhe Yá Ndiöxí, te ío cùndahú iní ññá-gã chĩndèe ñaha-gá xii nchoo ññáyi ndècu ñuyú-a, te ío ndáá càhá-gá. ¹⁵ Te duha ní càhá té Juáá cuendá Déhe Yá Ndiöxí ní xáha-dě xii ññáyi:

—Cuendá téé iha ni càhá-í ndéé cãni-gá ní cachí-í sá quixi ññ téé quixi. Te téé-án cùnùu-gá-dé, chi díhna-gá-dé sa ndècu-dé dàcúúxí yũhú —duha ní xáha-dě xií-yu.

¹⁶ Te ío váha iní Yá-án chi xito ñaha-gá xii-o nchaa-o ññ nduu ññ nduu. ¹⁷ Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ichi ñaha xii-o nacuáa cundecu-o, dico Déhe-gá Xítoho Jesucristú ní cachí-gá sá ññ cùu iní ññá Yá Ndiöxí xii-o. Te ní càhá-gá nchaa dava-gá tnúhu ndáá. ¹⁸ Te ñá ññ ññáyi xini túu-yu Yá Ndiöxí. Dico ññ dñi díí-ni Déhe-gá Yá ndécú ndihí-gá càchí tnúhu-gá nàcuáa càa-gá.

Té Juáá téé dàcuandute ñaha xii ññáyi càhá váha-dé cuendá Xítoho Jesucristú (Mt. 3:11-12; Mr. 1:7-8; Lc. 3:15-17)

¹⁹ Te cue téé israél ndécú ññú Jerusalén ní tendaha-güedé cue dútú ndihí cue téé cùu levítá cuáhá-güedé núú ndécú tã Juáá ndúcú tnũhu-güedé núú-dě ññ ná téé cùu-dé. ²⁰ Te ní càhá ndáá-dé ní xáha-dě xii-güedé:

—Yúhú, ñá díú Cristú Yá ní tendaha Yá Ndiöxí véxi ñuyú-a cùu-í —càchí-dé xáha-dě.

²¹ Te ní xáha ññ cùu-güedé:

—¿Te yoo cùu yohó váin? ¿Á yohó cúu-n tã Èliás? —càchí-güedé xáha-güedé xii-dé.

Te ní xáha tã Juáá:

—Yúhú, ñá díú tã Èliás cùu-í —càchí-dé xáha-dě.

Te xáhaⁿ tùcu-güedé:

—¿Te yòhó cúu-n tée ní cachí cue tée ndéé sanaha quixi cáháⁿ tnúhu Yá Ndiöxí-áⁿ? —cächí-güedé xáhaⁿ-güedé xii-dé.

Te ní xáhaⁿ-dë:

—Ní ñà díú tée-áⁿ cúu-í —cächí-dé xáhaⁿ-dë xii-güedé.

²² Te ní xáhaⁿ tùcu-güedé:

—¿Te ná tée cúu yohó váiⁿ?, cuendá ducaⁿ nàcani tnúhu-ndí núú cuè tée ní tendaha ñaha xii-ndí véxi-ndí, te cáháⁿ duuⁿ-n ñuu ná tée cúu-n —cachí-güedé xáhaⁿ-güedé xii-dé.

²³ Te ní xáhaⁿ tē Juàá:

—Yúhú cúu-í tée xica cáháⁿ xití yucu nàcuáa ní cáháⁿ ndí Chaiá, chi ndí-áⁿ ní cachí ndí: “Chí dáñá ìchi cuehé ìchi duha ndècu-ndo te tní-ndo ìchi váha, chi véxi Yaá ío cùnuu”, duha ní cachí ndí —cächí té Juàá xáhaⁿ-dë xii-güedé.

²⁴ Te cue tée ndècu tnúhu núú tē Juàá ñuu ná tée cúu-dé, cue tée-áⁿ ní tendaha ñaha cue tée cúu fariséu xii-güedé. ²⁵ Te ní xáhaⁿ tùcu-güedé xii tē Juàá:

—¿Ná cuendá dácuàndute-n ñáyiu te núú ñà díú Cristú cúu-n, te ni ñà díú tē Eliás, te ni ñà díú tē véxi cáháⁿ tnúhu Yá Ndiöxí cúu-n váiⁿ? —cächí-güedé xáhaⁿ-güedé xii-dé.

²⁶⁻²⁷ Te ní xáhaⁿ tē Juàá:

—Yúhú ní ngódó núu-í dácuàndute-í ñáyiu. Dico nchícúⁿ ñⁿ tée véxi, te tée-áⁿ cúnuu-gá-dé dàcúxí yúhú, chi yúhú cúu-í ñⁿ tée duuⁿ duuⁿ ñá túú tàú nandaxi cuèdicó ñí chàú-dé dico quède-í chiⁿ-dé. Te tée-áⁿ sa ñúhu tnahá-dé tnuú-ndó dicó-ni sá ñá túú xini-ndó-dë —cächí-dé xáhaⁿ-dë.

²⁸ Duha ní cuu ñuu Bètábará ñuu cáá ndàa ingá xio yúte Jòrdán, yàcáⁿ ní xindecu té Juàá ní dácuàndute-dé ñáyiu.

Jèsús quidé càhnu iní-gá nchaa yíca cuèchi ñáyiu

²⁹ Te nduu tnéé ní xini té Juàá Jèsús véxi yatni-gá núú ndécú-dë ndíhi ñáyiu. Te ní xáhaⁿ-dë xii-yu:

—Chí cündèhe tée-áⁿ, chi tée-áⁿ cúu-dë Crìstú Yaá ní tendaha Yá Ndiöxí véxi ñuyíú-a, te véxi-dé cada càhnu iní-dé nchaa yíca cuèchi ñáyiu

ñuyíú. Te cúu-dé dàtná ñⁿ mbéé quiti ío váha iní-xi. ³⁰ Te díu tée-áⁿ ní cachí-í sá cànchícúⁿ-dé quixi. Te cùnuu-gá-dé dàcúxí yúhú, chi díhna-gá-dé sa ndècu ní cachí-í xii-ndo. ³¹ Te ni yúhú ñá túú xini-í-dé ní cúu, dico xica cuu-í dácuàndute-í ñáyiu cuendá nchaa ñáyiu israél quini ñáhã-yu xii-dé —cächí-dé xáhaⁿ-dë xii-yu.

³² Te ní xáhaⁿ tùcu-dé:

—Ní xini-í Espiritú Yá Ndiöxí ní quee-xi andíu véxi cuuⁿ-xi ngúndecu ndíhi ñaha-xi xii-dé, te dàtná cáá lómá cáá Espiritú-áⁿ véxi cuuⁿ-xi.

³³ Te yúhú ñá túú xini-í-dé ní cúu, dico Yá Ndiöxí Yaá ní tendaha ñaha xii-í xicá cúu-í dácuàndute-í ñáyiu, Yaá-áⁿ ní cachí tnúhu-gá sá tée na quini-í ngúndecu ndíhi Espiritú-gá sá véxi cuuⁿ andíu, te tée-áⁿ taxi-dé Espiritú-gá cundecu ndíhi-o. ³⁴ Te yúhú ní xini-í-dé te xini ndáá-í sá Dèhe Dútú Ndiöxí cúu-dë. Te xíáⁿ cächí tnúhu-í xii-ndo —cächí té Juàá xáhaⁿ-dë xii-yu.

Cue tée díhna nuu xica cuu ndíhi Jèsús

³⁵ Te nduu tnéé-áⁿ díu-ni xíáⁿ ndécú tē Juàá ndíhi úú cue tée xica cuu ndíhi-dé. ³⁶ Te ní xini-dé Jèsús ñúhú-gã ìchi, te ní xáhaⁿ-dë xii cue tée xica cuu ndíhi-dé-áⁿ:

—Chí cündèhe tée-áⁿ, chi tée-áⁿ cúu-dë Crìstú Yaá ní tendaha Yá Ndiöxí véxi ñuyíú-a. Te cúu-dé dàtná ñⁿ mbéé quiti ío váha iní-xi —cächí-dé xáhaⁿ-dë.

³⁷ Te sá dúcáⁿ ní cáháⁿ té Juàá núú cuè tée úú ndíhi-dé-áⁿ ñuu ní chinchícúⁿ-güedé Jèsús. ³⁸ Te ní nchócótó-gã ndàa sátá-gã, te ní xini-gá sá nchícúⁿ ñáhã-güedé xii-gá. Te ní xáhaⁿ-gã xii-güedé:

—¿Ná nánducu-ndo? —cachí-gá xáhaⁿ-gã xii-güedé.

Te ní xáhaⁿ-güedé:

—¿Ndéé ndécú-n, Ràbíí? —cächí-güedé xáhaⁿ-güedé xii-gá.

Te Ràbíí-áⁿ quée-xí Mèstrú tnúhu mee-güedé. ³⁹ Te ní xáhaⁿ Jèsús xii-güedé:

—Chí nèhé te quini-ndó —cächí-gá xáhaⁿ-gã.

Te ní xica-güedé cuáháⁿ-güedé, te ní quexìo-güedé núú quidé vèhe-gá. Te ndècu-ni-güedé ndihì-gá ní cuaa, chi dàtná òré caa cúmí sacuaa ní sáá-güedé.

⁴⁰ Te úú cue téé-áⁿ ñí tñii-güedé tñúhu ní cáháⁿ té Juáá, te ní chinchícúⁿ-güedé Jèsús. Te núú úú cue téé-áⁿ, ìⁿ-dé nání-dě Ndrìxí, te ñaní-dé cúú tē Xímú, àdi Pelú chi úú diu-dé. ⁴¹ Te té Ndrìxí-áⁿ ñí nanducu-ni-dě ñaní-dé te ní xáhaⁿ-dě:

—Ní naníhí-ndí téé cùu Mesiás — càchí-dé xáhaⁿ-dě.

Te Mesiás-áⁿ quée-xí Crìstú tñúhu mee-güedé, Yaá ní tendaha Yá Ndiòxí véxi ñuyíú-a. ⁴² Te ndèca té Ndrìxí ñaní-dé cuáháⁿ núú ndécú Jèsús. Te òré ní xiní ñáhá Jèsús xii té Xímú, te ní xáhaⁿ-gă:

—Yòhó cúú-n tē Xímú déhe té Jònás, te vitna danàni ñaha-í Céfás xii-n — càchí-gá xáhaⁿ-gă.

Te Céfás-áⁿ quée-xí Pèlú tñúhu mee-güedé.

Jèsús ní cáháⁿ-gá té Lìpé ndihì té Natanàél

⁴³ Te nduu tñéé ní sani iní-gá quíhíⁿ-gá distritú Galileá. Te ní naníhí-gă ìⁿ téé nàni Lìpé, te ní xáhaⁿ-gă xii-dé:

—Néhé ná quíhíⁿ-ó núú quíhíⁿ-í-a — càchí-gá xáhaⁿ-gă.

⁴⁴ Te té Lìpé-áⁿ cúú-dě téé ñuú Betsaidá. Te diu-ni ñuú yàcáⁿ cúú ñuú té Ndrìxí ndihì té Pèlú. ⁴⁵ Te té Lìpé ní naníhí tnáhá-dě ndihì té Natanàél, te ní xáhaⁿ-dě:

—Ní naníhí-ndí téé dii cuèndú-xi ní chidó tñuní ndii Moisés ndihì dava-gá cue téé ní xóo cáháⁿ tñúhu Yá Ndiòxí ndéé sanaha. Te téé-áⁿ nání-dě Jèsús déhe té Chéé, téé ñuú Nazàrét — càchí-dé xáhaⁿ-dě.

⁴⁶ Te ní xáhaⁿ tē Natanàél xii té Lìpé:

—¿Te náa ío váha càa ñuú Nazàrét nùu da yàcáⁿ quee téé cáháⁿ tñúhu Yá Ndiòxí? —càchí-dé xáhaⁿ-dě.

Te ní xáhaⁿ tē Lìpé:

—Néhé ná quíhíⁿ-ó te quiní-n — càchí-dé xáhaⁿ-dě.

⁴⁷ Te òré ní xiní Jèsús té Natanàél tá cùyatni-dé cuáháⁿ, te ní cáháⁿ-gá cuèndá-dé te ní cachí-gá:

—Tée véxi-áⁿ cúú-dě mei tēe isràèl, te ñá ìⁿ ndùu dandahú-dé ñáyiú — càchí-gá xáhaⁿ-gă.

⁴⁸ Te ní xáhaⁿ tē Natanàél xii Jèsús:

—¿Te nása náquiní ñáhá-n? — càchí-dé xáhaⁿ-dě.

Te ní xáhaⁿ Jèsús:

—Yúhú sa ní xiní ñáhà-í xii-n òré ndécú-gă-n càha yutnu ngúxí-áⁿ te ní tē Lìpé vátá cáná ñàha-gá-dé xii-n òré-áⁿ —càchí-gá xáhaⁿ-gă xii-dé.

⁴⁹ Te sá dúcáⁿ ñí cáháⁿ-gá, núu ní xáhaⁿ tē Natanàél xii-gá:

—Mèstrú, yòhó cúú-n Dèhe Dútú Ndiòxí yíndàha-n ñáyiú isràèl — càchí-dé xáhaⁿ-dě xii-gă.

⁵⁰ Te Jèsús ní xáhaⁿ-gă:

—Cuèndá sá ñí xiní ñáhà-í xii-n càha yutnu ngúxí xíáⁿ iní ñáhá-n, dico cuéhé-gă núú sá quiní-n —càchí-gá xáhaⁿ-gă xii-dé.

⁵¹ Te ní xáhaⁿ tùcu-gá:

—Na càchí tñúhu ndáá-í sá sàá nduu, te quiní-ndó nàcaáⁿ andiú. Te quiní-ndó cuè espíritú xínú cuèchi núú Yá Ndiòxí sá ndáa nuu-xi quide-xi núú cùndècu yúhú Tée cùu ñaní tnáhá-ndó nchàa-ndo —cachí-gá xáhaⁿ-gă xii-güedé.

2

Vico tnăndaha ío ñuú Cànaá

¹ Te nduu úní sá dúcáⁿ ñí cuu te ní xóo ìⁿ vico tnăndaha ñuú Cànaá, ìⁿ ñuú yíndèhu distritú Galileá. Te yàcáⁿ ní xíndecu năná Jèsús. ² Te tnàhá Jèsús ndihì cue téé xica cuu ndihì-gá ní cáháⁿ-yu cuáháⁿ-gá ndihì-güedé vico-áⁿ. ³ Te òré ní ndihì vínú, te ní xáhaⁿ năná Jèsús xii-gá:

—Ñá túú-gă vínú ndécú ndihì-yu — càchí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Năá, ñá túú xini ñuhu-xi da yúhú cúñaha-n cuèndá vínú-áⁿ, chi vátá tnàhá-gá òré quiní-yu yoo cùu yúhú — càchí-gá xáhaⁿ-gă xii-aⁿ.

⁵ Te ní xáhaⁿ-aⁿ xii ñáyiú xínu cuechi:

—Cada-ndo nchàa nacuáa na càháⁿ Jèsús —càchí-aⁿ xáhaⁿ-aⁿ.

⁶ Te yàcáⁿ nútnǎi íñú quídi yúú te quée dàtná ìⁿ ciendú lítrú ndute ìⁿ ìⁿ quídi-áⁿ. Te ndute-áⁿ nándǎhi ñáyiú isràél ndáhǎ-yu te nàqueté-yu cóhǒ-yu chi ducaⁿ tnàhí quidé-yu nàcuáa sàndáá iní-yu Yá Ndiòxí. ⁷ Te ní xáhaⁿ Jèsús xii nchaa cue téé xinu cuechi:

—Nadachítú-ndó ndùte ndi nchaa quídi-áⁿ —càchí-gá xáhaⁿ-gǎ xii-güedé.

Te ní nadachítú-güedé. ⁸ Te ní xáhaⁿ-gǎ:

—Vitna te tava-ndo lùha, te canehe-ndo quíhíⁿ cuáha-ndo tée quide vico —cachí-gá xáhaⁿ-gǎ xii-güedé.

Te ducaⁿ ñí quide-güedé ní tava-güedé luha nèhe-güedé cuáháⁿ ní sáha-güedé téé quide vico. ⁹ Te ní xito ndéé téé quide vico-áⁿ, te sa ní nduu-xi vínú, te ñá túú ní xíní-dé ndéé véxi-xi, dico mee cuè téé xinu cuechi sa naha-güedé núú ñí tava-güedé. Ducaⁿ te téé quide vico-áⁿ ñí cana-dé téé tnándaha. ¹⁰ Te ní xáhaⁿ-dǎ:

—Nchaa ñáyiú quide vico queñuhú-yu díhna-gá vínú váha. Te sa vai vínú váha xihí-yu, te dàtnúní queñuhú-yu vínú ndàhú. Te yòhó díhna-gá vínú ndàhú ní queñuhu-n, te ndéé núú ñí ndihí-ná ní queñuhu-n vínú váha —càchí téé quide vico-áⁿ xáhaⁿ-dǎ xii téé tnándaha-áⁿ.

¹¹ Te sá ñí nadatiù Jesús ndute-áⁿ ñí nduu-xi vínú cúú-xí ìⁿ chiuⁿ díhna nuu sǎ vǎ yòo tnàhí ndàcu cada ní quide-gá ñuú Cànaá, ìⁿ ñuú yíndèhu distritú Galileá, te chiuⁿ ní quide-gá-áⁿ cúú-xí ìⁿ chiuⁿ cahnu vihi, núú xíáⁿ ní cutnúní iní-yu sá ìo càhnu cuu-gá, te ní sándáá iní ñáhá nchaa cue téé xica cuu ndihí-gá.

¹² Te sátá ñí yáha vico, te ní xica Jèsús ndihí náná-gǎ, ndihí cue ñaní-gá, ndihí nchaa cue téé xica cuu ndihí-gá cuáháⁿ-yu ñuú Capèrnaúm. Te yàcáⁿ ní xíndecú-yu ìⁿ úú nduu ndihí-gá.

Jèsús ñá túú tnàhá iní-gá nàcuáa quide ñáyiú xití veñúhu

(Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáyiú isràél vico pàscuá, te ní xica Jèsús cuáháⁿ-gá ñuú Jerusàlén. ¹⁴ Te sátá ñí sáá-gá yàcáⁿ, te ní xica-gá cuáháⁿ-gá veñúhu càhnu sá ìo cùnuu, te xití veñúhu-áⁿ ñí xíní-gá ndécú ñáyiú dícó-yu ndicutu, mbéé ndihí lómá, te tnàhá ñáyiú dàma díhúⁿ núcòo-yu ní xíní-gá. ¹⁵ Te ní queheⁿ-gá ìⁿ úú yoho, te ní cáunuu tnàha-gá, te ní dáyùhu-gá ñáyiú ní queé-yu quehé veñúhu, ndihí ndicutú-yu ndihí mbéé-yu. Te cue ñáyiú dàma díhúⁿ-ǎⁿ ní dǎngòyo-gá díhúⁿ-yu, te ní dándùá-gá mèsá-yu. ¹⁶ Te ní xáhaⁿ-gǎ xii cue ñáyiú dícó lómá:

—¡Queñuhu-ndo nchaa quití-a xití veñúhu-a! ¡Vá cáda-ndó vèhe núú yáhu núú cúú vèhe Tàtá-í Dútú Ndiòxí! —càchí-gá xáhaⁿ-gǎ xii-yu.

¹⁷ Te xíáⁿ ní ndacu iní cue téé xica cuu ndihí-gá sá dúcáⁿ yòdo tnuní núú tütú-gá, te càchí-xi: “Ío cùyica iní-í chi ñá cuíní-yu canehe ìⁿ-yu vehe Tàtá-í”, duha càchí-xi núú tütú-gá.

¹⁸ Te ní xáhaⁿ cuè téé isràél xii-gá:

—¿Ná cúú sǎ vǎ yòo tnàhí ndàcu cada, cada-n cuendá cutnúní iní-ndí sá cúú dùha taxi tnuní ñáhá-n xii-ndí-í? —càchí-güedé xáhaⁿ-güedé xii-gá.

¹⁹ Te ní xáhaⁿ Jèsús:

—Chí dǎngòyo veñúhu-a, te neni xití úní nduu te sa nadaxínu-í —càchí-gá xáhaⁿ-gǎ xii-güedé.

²⁰ Te ní xáhaⁿ tùcu cue téé isràél:

—Údico íñú cuía ñí xíndecuu-güedé ní sáá veñúhu-a, te yòhó cuíní-n nàdaxínu-n xití úní-ñi nduu —càchí-güedé xáhaⁿ-güedé xii-gá.

²¹ Dico sá ñí cáháⁿ-gá chi ñá díú cuendá veñúhu ní cáháⁿ-gá chi cuendá yiqui cùñú-gá ní cáháⁿ-gá. ²² Núú sátá ñí xihí-gá, te ní ndoto-gá, te òré-áⁿ ñí ndacu iní cue téé ní xica cuu ndihí-gá nàcuáa ní cáháⁿ-gá, núú xíáⁿ ní sándáá iní-güedé tnúhu yòdo tnuní

núú tütú-gá. Te ducaⁿ te ní sándáá iní-güedé tnúhu ní cáháⁿ-gá.

Jèsús xiní-gá nàcuáa càa iní nchaa ñáyiu

²³ Te òré ndécú Jèsús vico pàscuá, te ío vai ñáyiu ní sándáá iní ñáhá xii-gá cuendá ío titní sá vǎ yǎo tnàhí ndàcu cada ní quide-gá ní xiní-yu. ²⁴ Dico Jèsús ñá ní cáháⁿ-gá nchaa tnúhu ñúhu iní-gá, chi sa ní cutnùní iní-gá sá ñà túú cùu váha iní-yu. ²⁵ Te ñá túú xini ñuhu-gá ñá ñáyiu cúñaha nàcuáa càa iní nchaa tnàha ñáyíu-yu, chi mee-gǎ sa nàha ndáá-gá nàcuáa càa iní-yu ncháá-yu.

3

Jèsús ndíhi té Nicòdemú

¹ Ní xíndecu ñá tée cùu fariséu ní xínani-dé Nicòdemú, te ní cuu-dé ñá tée cùnuu núú ñáyiu isràél. ² Te tée-áⁿ ñá sáháⁿ-dé níú ní cáháⁿ ndíhi-dé Jèsús, te ní xáhaⁿ-dǎ:

—Mèstrú, yúhú ndíhi dava-gá-güedé sa nàha-ndí sá Yǎ Ndiǒxí ní tendaha ñàha-gá xii-n véxi-n dānehé ñáhá-n xii-ndí, chi núu ñá túú Yǎ Ndiǒxí ndécú ndíhi-n, te vá ndácú-n càda-n nchaa sá vǎ yǎo tnàhí ndàcu cada quide-n —cachí-dé xáhaⁿ-dǎ.

³ Te ní xáhaⁿ Jèsús:

—Na càchí tnúhu ndáá-í xii-n sǎ ncháá ñáyiu vá ná càcu saa tucu, te vá ndíhu ndaha ñàha Yǎ Ndiǒxí xii-yu —càchí-gá xáhaⁿ-gǎ xii-dé.

⁴ Te ní xáhaⁿ té Nicòdemú:

—¿Te nása cada ñá ñáyiu sa ní yí te cacu-ni tucú-yu? ¿Náa ndíhu tucú-yu xití nǎnǎ-yu te cacu tucú-yu xito cùu uú-áⁿ? —càchí-dé xáhaⁿ-dǎ xii-gá.

⁵ Te ní xáhaⁿ Jèsús:

—Na càchí tnúhu ndáá-í xii-n sǎ nchaa ñáyiu na ndùu ndoo nduu nine iní-xi cuú-yu ñáyiu ní na càcu saa ndíhi ndute ndíhi Espíritú Yǎ Ndiǒxí, ñáyiu-áⁿ ndíhu ndaha ñàha-gá xii-yu.

⁶ Te nchaa ñáyiu càcu ñuyíu-a, chi déhe ñáyiu ñuyíu-a cùu-yu. Te ñáyiu ní nduu ndoo ní nduu nine iní-xi, ñáyiu-áⁿ ñá nduu táhú-yu Espíritú Yǎ Ndiǒxí te tàxi tnuní ñáhá-nǎ

Espíritú-gá xii-yu. ⁷ Te vá cùñúhu-n tnúhu ní cáháⁿ-í-a, chi nchaa ñáyiu ní sándáá iní ñáhá xii-í ní nduu ndoo ní nduu nine iní-yu, te ñáyiu-áⁿ cùu-yu dàtná ñáyiu ní nacacu saa. ⁸ Táchí ndéni xíaⁿ tècú dóho-o xico-xi, dico ñá túú xiní-ó ndéé ichi véxi-xi, te ní ñá túú xiní-ó ndéé ichi cuáháⁿ-xi. Ducaⁿ sǎtnahá-xi cùu Espíritú-gá ndécú ndíhi ñáyiu ní nduu ndoo ní nduu nine iní-xi —càchí-gá xáhaⁿ-gǎ xii-dé.

⁹ Te dàtnùní ní xicáⁿ tnúhú tucu té Nicòdemú núú-gǎ, te xáhaⁿ-dǎ xii-gá:

—¿Te nása ndùu tnúhu càháⁿ-n dùcaⁿ caháⁿ-n? —càchí-dé xáhaⁿ-dǎ xii-gá.

¹⁰ Te ní xáhaⁿ Jèsús:

—Yòhó cúu-n ñá tée cùtnuní iní-xi, chi dàcuaha-n ñáyiu isràél, ¿te ñá tècú tnùní-n tnúhu càháⁿ-í-u? ¹¹ Te na càchí tnúhu ndáá-í xii-n sǎ nchúhú càháⁿ-ndí ñá sá ñá tecú tnùní-ndí, te càháⁿ ndáá-ndí cuendá ñá sá ñá xiní-ndí. Dico nchòhó ñá tècú tnùní-ndó tnúhu càháⁿ-ndí. ¹² Te ñá sándáá iní-ndó tnúhu càháⁿ-í cuendá nchaa nàcuáa cùu ñuyíu-a, te uuⁿ-gá cada-ndo núu càháⁿ-í cuendá nchaa nàcuáa cùu andíu.

¹³ Vǎ yǎo ñá sǎa andíu, te caní-xi cuendú nàcuáa càa. Chi ñá dǎi-ni yúhú véxi cuuⁿ-í andíu, te cùu-í ñá ní tnáhá-ndó nchaa-ndo. Te dǎi-ni yácaⁿ ndaa-í cundecu-í. ¹⁴ Te dàtná ní ndanehe ndí Moisés cóo ñá sata caa ndí-dí xití yucu, ducaⁿ càda ñàha-güedé cata caa ñàha-güedé núu cùrúxí xii yúhú Tée cùu ñá ní tnáhá-ndó nchaa-ndo ñá nduu, ¹⁵ te ducaⁿ yǎha-í cuendá nchaa ñáyiu na quíndáá iní ñáhá xii-í te nduu táhú-yu cundecu-yu ndíhi Yǎ Ndiǒxí ní caa ní quíhíⁿ —càchí-gá xáhaⁿ-gǎ xii-dé.

Yǎ Ndiǒxí ío cùu iní-gá ñáyiu ñuyíu-a

¹⁶ Te Yǎ Ndiǒxí ío cùu iní-gá ñáyiu ñuyíu-a. Te ñá dǎi-ni Déhe-gá ndécú, te ní tendaha ñàha-gá ní quixi-gá ñuyíu-a, te núu na quíndáá iní ñáhá ñáyiu, te vá cuíta nihnú-yu, chi nduu táhú-yu cundecu-yu ndíhi-gá ní caa ní quíhíⁿ. ¹⁷ Te Yǎ Ndiǒxí ñá túú ní tendaha-gá Déhe-gá quixi-gá ñuyíu-a

dacuíta nihnu-gá ñáiyu, chi ní tendaha-gã Déhe-gá ní quixi-gá sá dácăcu nihnu-gá ñáiyu ñuyíú-a núú ùhú núú ndàhú.

¹⁸ Nchaa ñáiyu sàndáá iní ñáhá xii Déhe-gá, te vá cuíta nihnú-yu. Te nchaa ñáiyu ñá túú sàndáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sàndáá iní-yu Déhe Dútú Ndiöxí. ¹⁹ Chi ní quixi Déhe-gá ñuyíú-a ní dándíxí túu-gá iní-yu cuendá cutnùní iní-yu năcuáa ndùu cuendá Yă Ndiöxí te tnií-yu ìⁿ ichi váha ni cùu, te ñá ní tnàhá iní-yu, chi ní cudíí-gã iní-yu nchaa sá cuèhé sá dúhá dăcúúxí sá váha, núu xiáⁿ tá xita nihnú-yu cuáháⁿ. ²⁰ Te nchaa ñáiyu quide nchaa sá cuèhé sá dúhá ñă tnàhá iní-yu cutnùní iní-yu năcuáa ndùu cuendá Yă Ndiöxí, te ñá tnií-yu tnúhu-gá cuendá yùhú-yu nduu tnùní nchaa sá quidě-yu. ²¹ Te nchaa ñáiyu ñùhu ichi ndáá cuiní-yu cutnùní iní-yu năcuáa ndùu cuendá Yă Ndiöxí, te cùtnuní sá chindèe ñaha-gá xií-yu, chi quide váha-yu.

Té Juàá té dăcuandute ñaha xii ñáiyu cáháⁿ váha tucu-dé cuendá Jèsús

²² Te sátá dúcáⁿ ñă cuu, te ní quee Jèsús cuáháⁿ-gá ndihi cue té xica cuu ndihi-gá distritú Jùdeá. Te yàcáⁿ ní xindecu tnaa-gá ndihi-güedé ní xóo dăcuandute-güedé ñáiyu. ²³ Te ndècu té Juàá ìⁿ xichi núú nání Ènón yatni ñúú Sălém dăcuandute-dé ñáiyu, chi yàcáⁿ ío váha ñùhu ndute, núu xiáⁿ ní xóo quíhíⁿ ñáiyu yàcáⁿ ní xóo cuanduté-yu. ²⁴ Duha ní cuu cùtnàhá vátá ngává-gã té Juàá vecaá.

²⁵ Te ní cacu ìⁿ cuendú ní cáháⁿ cue té xica cuu ndihi té Juàá ndihi ìⁿ úú cue té isrâél, núu ndédacàa sá váha-gá cada ñáiyu cuendá nduu ìí-yu. ²⁶ Te ní sáháⁿ-güedé núú ndécú tē Juàá ní xáháⁿ-güedé:

—Mèstrú, té ní quixi núú ñă xindecu-n ndàa ìngá xio yúte Jòrdán, tée dii cuendú-xi ní cáháⁿ-n, té-ăⁿ dăcuandute-dé tnàhá-dé ñáiyu. Te ío

vai ñáiyu ní chinchícúⁿ ñáhá xii-dé — cächí-güedé xáháⁿ-güedé xii-dé.

²⁷ Te ní xáháⁿ tē Juàá:

—Te vá yôo ìⁿ ndăcu cada ìⁿ chiuⁿ năcuáa cuu váha iní Yă Ndiöxí, te núu ñá túú mēe-gá chindēe ñaha-gá xií-yu. ²⁸ Te nchòhó sa nàha-ndo sá yùhú ní cáháⁿ ndáá-í sá ñà díú Crìstú cùu-í, dico mee Yă Ndiöxí ní tendaha ñaha-gá yódó nùu-í véxi núú Yàá-áⁿ. ²⁹ Te nchòhó xini-ndó sá ìⁿ tēe tnăndaha te xíchí tnăndaha ndihi-ná-dé cùndihi-dé. Te tēe ní xica ndáhú ío cùdíí ìn-í-dé ndédòho-dé nchaa tnúhu cáháⁿ tēe tnăndaha-áⁿ. Te ducaⁿ sătnahá-xi cùu yùhú, chi ío cùdíí ìn-í-í sá vái ñáiyu ta chinchícúⁿ ñáhá xii Jèsús cuáháⁿ. ³⁰ Te uuⁿ-gá cuita cuu vai ñáiyu cutnùní iní-xi sá ío cùnuu-gá, te yùhú cuita ndóo ndee-í quíhíⁿ — cächí-dé xáháⁿ-dē xii-güedé.

Crìstú véxi cuuⁿ-gá andiü

³¹ Te ìⁿ dii díi-ni Crìstú Yáá véxi cuuⁿ andiü cùnuu-gá núú ñuyíú-a. Te nchaa ñáiyu ndècu ñuyíú-a cùu-yu ñáiyu ñuyíú iha, te cáháⁿ-yu sá cùu-xí ñuyíú-a. Dico Crìstú Yáá véxi cuuⁿ andiü ³² cáháⁿ-gá ìⁿ sá ñă xini-gá, te cáháⁿ-gá ìⁿ sá ñă tecú dóho-gá. Te ñá túú cuiní-yu quindáá iní-yu tnúhu cáháⁿ-gá. ³³ Te nchaa ñáiyu tnií tnúhu cáháⁿ Yáá véxi cuuⁿ andiü-áⁿ cáháⁿ-yu sá tnúhu Yá Ndiöxí cùu-xí ìⁿ sá ndàá. ³⁴ Te Déhe-gá Yáá véxi cuuⁿ andiü cáháⁿ-gá mee-ni tnúhu-gá. Te ñá ùhú iní-gá ní sáñaha-gã Espiritú-gá ndécú ndihi Déhe-gá. ³⁵ Te Dútú Ndiöxí ío cùu iní-gá Déhe-gá, núu ní xáháⁿ-gã sá mēe-gã taxi tnùní-gá nchaandi túhú sá ío. ³⁶ Te nchaa ñáiyu na quindáá iní ñáhá xii Déhe-gá, ñáiyu-áⁿ cundecú-yu ndihi-gá ñă caa ñă quíhíⁿ. Te nchaa ñáiyu vá quindáá iní ñáhá xii Déhe Yá Ndiöxí ío dandòho ñaha-gá xií-yu.

4

Jèsús ndihi ìⁿ ñaha Sàmariá

¹ Te ní níhí cue tée cùu fariséú tnúhu sá vai-gá ñáiyu ta chinchícúⁿ ñáhá xii Jèsús. Te ducaⁿ vai-gá-yu ta

dàcuandute-gá cuáháⁿ dàcúxí tẽ Juàá.
 2 Te cuẽi ñá díú mèe-gá dácuañdute ñaha-gá xii-yu, dico cue tée xica cuu ndihí-gá dácuañdute ñaha-güedé xii-yu. 3 Te ní níhí Jèsús tnúhu nàcuáa càháⁿ cue tée cùu fariséú, núu ní ndee-gá distritú Jùdeá cuánuhú tucu-gá distritú Galileá.

4 Te ichi ñùhu-gá ní nayáha-gá distritú Sàmariá. 5 Te ní sáá-gá ìⁿ ñúú nání Sícár te ñúú-áⁿ yíndèhu-xi distritú Sàmariá. Te xíaⁿ cáá yàtni ñuhu núú ñí sáha táhú ndíi Jàcób déhe ndíi ndíi Chèé. 6 Te yàcáⁿ cáá dòco ní cuu cuendá ndíi Jàcób. Te cùu-xi datná cuádava nduu ñùhu Jesús ichi, te ío ní xàú-gá ñúu ní sáá-gá yuhu dòco-áⁿ ñí ngóo-gá ndétátú-gá. 7-8 Te ní xica cue tée xica cuu ndihí-gá cuáháⁿ-güedé xití ñúú Sícár cuánguaaⁿ-güedé sá cáxí-güedé. Te yuhu dòco-áⁿ núcõo-gá ní sáá ìⁿ ñadìhí ñaha distritú Sàmariá véxi quéhnu-aⁿ ndute, te ní xáhaⁿ Jèsús:

—Taxi táhú luha ndute na còho-í —càchí-gá xáhaⁿ-gá.

9 Te ní xáhaⁿ ñàdìhí-áⁿ:

—¿Ná cuendá da núu-í xicáⁿ-n ndùte coho-n? Te yòhó cúu-n tẽe isràél, te yúhú cúu-í ñaha Sàmariá —càchí-aⁿ xáhaⁿ-aⁿ xii-gá.

Te ducaⁿ ñí xáhaⁿ-aⁿ, chi ñá túú ndècu váha ñáyiu isràél ndihí ñáyiu distritú Sàmariá. 10 Te ní xáhaⁿ Jèsús xii-aⁿ:

—Ñá cútnùní iní-n ñá taxi Yá Ndiõxí xii-n, te ni ñá cútnùní iní-n yòo xicáⁿ ndute núu-n. Te núu dìcò xìní-n yòo cuu yúhú á, te da mee-n cãcáⁿ-n ndùte núu-í coho-n, te yúhú taxi-í ndute cundecu ndihí-n núu cuáháⁿ núu véxi —càchí-gá xáhaⁿ-gá.

11 Te ní xáhaⁿ tucu ñadìhí-áⁿ:

—Tátá, nì sá quéhnu-n ndute ñá túú nèhe-n, te doco-a cùnú víhí, te ñá túú ndèé quíngueheⁿ-n ndute taxi-n coho-í. 12 Ndíi Jàcób ñaní tnáhá-ndíi ní xíndecu ndèé sanaha ñí cadúha ndíi doco-a ñí tóo ndute ní xihí ndíi, ndihí nchaa déhe ndíi, ndihí nchaa quítí ndíi, te ní ndóo cùu cuendá-ndíi.

¿Te násai, te yòhó cùnùu-gá-n dàcúxí ndíi-áⁿ? —càchí-aⁿ xáhaⁿ-aⁿ xii-gá.

13 Te ní xáhaⁿ Jèsús:

—Nchaa ñáyiu xihí ndute doco-a, te vá cúu vétú dúcáⁿ iní-yu chi dayìchí ñáhá-ní tucu-xi ndute-a. 14 Dico nchaa ñáyiu na còho ndute na cuáñaha-í, te vá ìⁿ ndùu-gá dayìchí ñáhá-xí ndute-áⁿ xii-yu, chi ndute cuáñaha-í cúu-xí ndute váha-gá. Te dàtná quée ñihni ndute xití doco-a, nchaa-ni nduu ñùhu ñá túú yìchí, ducaⁿ sãtnahá-xi cada-xi chi candeca-xi iní-yu ni caa ni quíhíⁿ, te núu na còhó-yu ndute cuáñaha yúhú —càchí-gá xáhaⁿ-gá xii-aⁿ.

15 Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vá dáyichí ñáhá tnáhí-gá-xi ndute. Te vá quíxí-gá-í quixi quéhnu-í ndute doco-a —càchí-aⁿ xáhaⁿ-aⁿ xii-gá.

16 Te ní xáhaⁿ Jèsús:

—Cuáháⁿ cuángàna yìi-n, te quixi-ndo ìha —cachí-gá xáhaⁿ-gá xii-aⁿ.

17 Te ní xáhaⁿ-aⁿ:

—Ñá túú yìi-í —càchí-aⁿ xáhaⁿ-aⁿ xii-gá.

Te ní xáhaⁿ tucu Jesús:

—Ndáá càháⁿ-n sã ñà túú yìi-n.

18 Dico ní cuu úhúⁿ tée cãndeca-n, te tée ndèca-n vitna chi ñá díú yìi-n cuu-dé, te ndáá càháⁿ-n sã ñà túú yìi-n —cachí-gá xáhaⁿ-gá xii-aⁿ.

19 Te sá dúcáⁿ ñí xáhaⁿ-gá ñúu ní xáhaⁿ tucu-aⁿ:

—Tátá, yúhú sání iní-í sá yòhó cúu-n ìⁿ tée càháⁿ tnúhu Yá Ndiõxí. 20 Te cue ñaní tnáhá-ndíi ní xíndecu ndèé sanaha ñí xóo cada càhnú-yu Yá Ndiõxí tìndúú-a, dico nchòhó ñáyiu isràél càchí-ndó sã ndèé ñúú Jerusàlén cada càhnu-o-gá —càchí-aⁿ xáhaⁿ-aⁿ xii-gá.

21 Te ní xáhaⁿ Jèsús xii-aⁿ:

—Ìⁿ tnúhu na càháⁿ-í-a, te quíndáá iní-n. Sa ta cùyatni sáá nduu sã ñà díú-gá mee-ni tìndúú-a, te ni ñà díú-gá mee-ni ñúú Jerusàlén cada càhnu-ndo Tátá-ó Dútú Ndiõxí, chi

ndëni ní cuu cada càhnu-ndo-gá.
 22 Te nchòhó cue ñáyiú Sàmariá chi ñá cùtnùnì iní-ndó nã cúú sã quidé càhnu-ndo, dico nchúhú ñáyiú isràél, chi cùtnunì iní-ndí ná cúú sã quidé càhnu-ndí. Chi ìⁿ tée isràél véxi-dé dácácu nihnu-dé ñáyiú cuèndá vá quìhìⁿ-yu núú ùhú núú ndàhú. 23 Te není vitna ngüíta-yu cada càhnu ndisá-yu Tátá-ó Dütú Ndiöxí, te cadá-yu ni yùhu ni iní-yu sá cúú-xí-gã, chi mee-gã ducaⁿ cuiní-gá cadá-yu cada càhnu-yu-gá. 24 Te Yá Ndiöxí chi ìⁿ espíritú cúú-gã. Te nchaa ñáyiú na càda cahnu ñaha, te cadá-yu ni yùhu ni iní-yu sá cúú-xí-gã te cadá-yu dàtná càháⁿ tnúhu-gá —càchí-gá xáhaⁿ-gã xii-aⁿ.

25 Te ní xáhaⁿ ñàdihí-áⁿ:

—Xiní-í sá quíxí tée cùu Mesiás, tée càchí-güedé nánì Crìstú. Te tée-ãⁿ ná sàá-dé, te cachí tnúhu ndáá-dé nàcuáa cuu —càchí-aⁿ xáhaⁿ-aⁿ xii-gá.

26 Te ní xáhaⁿ Jèsús:

—Diu tée-áⁿ cúú yùhú tée ndàtnúhu ndihí-n —càchí-gá xáhaⁿ-gã xii-aⁿ.

27 Te òrè-áⁿ ñí ndexìo cue tée xica cuu ndihí-gá, te ní cuñúhu-güedé sá ndàtnúhu-gá ndihí ñàdihí-áⁿ. Dico ni ìⁿ-güedé ñá ní xicáⁿ tnúhú-güedé núú-gã nũu ná cuèndú ndàtnúhu-gá ndihí ñàdihí-áⁿ. 28 Ducaⁿ te ní dándõo ñàdihí-áⁿ yoó ndute-aⁿ xíaⁿ, te ní xica-aⁿ cuánuhú-aⁿ ñuú cùtnúhu-aⁿ ñáyiú cuèndá Jèsús. 29 Te ní xáhaⁿ-aⁿ:

—Chí nèhé ná quìhìⁿ-ó, chi quiní-ndó nã cúú ìⁿ tée núcóo yuhu dòco-áⁿ nũu ñá díú Crìstú Yáá ní tendaha Yá Ndiöxí véxi ñuyíú-a cùu-dé nũu ní càháⁿ ndáá-dé nàcuáa cùu ndecu-í —càchí-aⁿ xáhaⁿ-aⁿ xii-yu.

30 Te sá ñí níhí ñáyiú ñuú-áⁿ tnúhu, xíaⁿ ní xicá-yu cuáháⁿ-yu. 31 Te òrè vátá sàá-gá-yu xíaⁿ ñí xáhaⁿ cuè tée xica cuu ndihí-gá xii-gá:

—Mèstrú, cudèhñu na cudehñu-o —cachí-güedé xáhaⁿ-güedé xii-gá.

32 Te ní xáhaⁿ-gã:

—Ndècu ìⁿ sá cáxi-í, ìⁿ sá ñà túú xìnì nchòhó —càchí-gá xáhaⁿ-gã xii-güedé.

33 Te cue tée xica cuu ndihí-gá xitnàha-güedé:

—Váa ío ñáyiú ní quixi nehe sá ñí xexi-gá nũu duha càháⁿ-gá —càchí-güedé xitnàha-güedé.

34 Te ní xáhaⁿ-gã:

—Dàtná cuiní-ndó cùu vétú iní-ó òrè xéxi-ó, ducaⁿ cùu vétú iní-í quidé-í nchaa nàcuáa ní càháⁿ Yá Ndiöxí Yáá ní tendaha ñaha xii-í véxi-í ñuyíú-a, te chiúⁿ-gá ío cùdíⁿ iní-í dandihí-í. 35 Te nchòhó càchí-ndó sã cùmánì cùmí-gã yóo te cuu itú. Dico yúhú càchí-í sá cùndehe-ndo ñáyiú-ãⁿ, chi sa ndècu túha-yu, dàtná cúú-nã itú sá sã ní cuu-ná natahu-o cùu-yu, chi sa ndècu túha-ná-yu cundedóho-yu tnúhu-í.

36 Te dàtná cúú ñáyiú natahu itú chi sa cúhuⁿ yáhu-yu, ducaⁿ sãtnahá-xi cùu ñáyiú na càháⁿ tnúhu-í, chi cuáñaha-í sá ndúú tãhũ-yu na sàá nduu. Te nchaa ñáyiú na tnì tnúhu-í te nduu tãhũ-yu cundecu-í ndihí-yu ni caa ni quíhìⁿ. Te dàtná cúú ñáyiú ní chihí tatá-xi, ndihí ñáyiú ní natahu itú-xi cùdíⁿ-nã iní-yu. Ducaⁿ sãtnahá-xi cùu ñáyiú na càháⁿ tnúhu-í. 37 Chi ndáá quée-xí nàcuáa cuáháⁿ ìⁿ cuèndú sá càchí-xi: “Tucu tée ní chihí tatá, te tucu tée ní natahu”, duha cuáháⁿ cuèndú-áⁿ. 38 Te yúhú tendaha ñaha-í xii-ndo quíhìⁿ-ndó càháⁿ-ndó tnúhu-í núú sã ní yáha-güedé ní càháⁿ-güedé tnúhu-í. Te nchòhó quíhìⁿ-ndó dícó-nã nduu cuèndá-ndó chiúⁿ-áⁿ —càchí-gá xáhaⁿ-gã xii-güedé.

39 Te ío cuéhé ñáyiú ñuú-áⁿ ñí xíndedóho-yu cuèndú ní canì ñàdihí-áⁿ nũu-yu sá Jèsús ní xáhaⁿ-gã nchaa nàcuáa quide-aⁿ, te xíaⁿ ío vai-yu ní sándáá iní-yu Jèsús. 40 Te ní quexìo-yu núú ndécú-gã, te ní càháⁿ ndàhú-yu núú-gã sá quèndõo-gã ñuú-yu, núu xíaⁿ ní xíndecu-gá ndihí-yu úú nduu. 41 Te ío cuéhé-gã-yu ní sándáá iní-yu tnúhu ní càháⁿ mée-gã. 42 Te ní xáháⁿ-yu xii ñàdihí-áⁿ:

—Vitna te ñá díú mèe-ni tnúhu ní càháⁿ-n ní sándáá iní-ndí-gá, chi ní càháⁿ mée-gã ní xíndedóho-ndí vitna

núu ní sándáá ndisa iní-ndí sá díú-gă cúú-gă Crístú Yaá ní tendaha Yă Ndiõxí véxi ñuyíú-a dàcácu nihnu-gă ñáyiú núú ùhú núú ndàhú —càchí-yu xáhãⁿ-yu xii-aⁿ.

Jèsús quidé tătna-gă déhe ìⁿ té ndèè chíúⁿ núú gobièrnú

43 Te nduu úní ní nucúhuⁿ Jèsús ichi cuáhãⁿ-gă distritú Galileá. 44 Te cuáhãⁿ-gă yàcãⁿ, chi mee-gă ní cachí-gă sá ñúu ìⁿ té na càhãⁿ-dé tnúhu Yă Ndiõxí ñúú núú ní cacu-dé, te ñá túú nèhé-yu sá yíñùhu núú-dé. 45 Te òré ní sáá-gă distritú Galileá, te ío váha ní cuu iní ñáhãⁿ-yu xii-gă, chi cuèndá tnàhá-yu ní xíndecu ndihí-gă vico pàscuá ñúú Jerusàlén. Te yàcãⁿ ní xiní-yu nchaa sá ñí quide-gă.

46 Te ní sáhãⁿ tucu-gă ñúú Cànaá ìⁿ ñúú yíndèhu distritú Galileá, núú ñí nadatiu-gă ndute ní nduu-xi vínú. Te ñúú Capèrnaúm ndécú ìⁿ té ndèè chíúⁿ núú tée cùu gobièrnú, te tée-áⁿ cùhú ìⁿ déhe-dé. 47 Te ní níhí-dé tnúhu sá ñí ndee Jèsús distritú Jùdeá ní ndexìo-gă distritú Galileá, núú ní sáhãⁿ-dé núú ndécú-gă, te ní càhãⁿ ndàhú-dé núú-gă sá quihíⁿ-gă cada tátna-gă déhe-dé, chi sa ndècu-na-dé sá cùú-dé. 48 Te ní xáhaⁿ Jèsús xii-dé:

—Nchòhó, chi vá quíndáá iní ñáhãⁿ-ndó xì-í te núu vá càdã-í ìⁿ sá vã yõo tnàhí ndàcu cada quíní-ndó —càchí-gă xáhaⁿ-gă xii-dé.

49 Te ní xáhaⁿ tucu tée cùhú déhe-xi-áⁿ xii-gă:

—Tátã, cundee iní-n ná quihíⁿ-ni-o càda tátna-n déhe-í ná cuu-dé, chi càhú víhí tnàhá-dé —càchí-dé xáhaⁿ-dè xii-gă.

50 Te ní xáhaⁿ Jèsús:

—Cuanùhú te quíní-n nã ní ndúha déhe-n —càchí-gă xáhaⁿ-gă xii-dé.

Te ní sándáá iní-dé tnúhu ní càhãⁿ Jèsús, te cuánuhú-dé. 51 Te ñùhu-dé ichi cuánuhú-dé ní sánú tnàhá ñáhãⁿ cuè tée xínu cuechi núú-dé. Te ní xáhaⁿ-güedé sá sà ta ndúha déhe-dé cuáhãⁿ.

52 Te ní xícãⁿ tnúhú-dé núú-güedé ná òré cúú-xí ñí ngüíta-xi ta quètau cuéhé-dé. Te ní xáhaⁿ-güedé:

—Icu dàtnã òré caá ìⁿ sacuaa ní nchíco-dé cahni —càchí-güedé xáhaⁿ-güedé xii-dé.

53 Te tătã tée cùhú-áⁿ ñí ndacu iní-dé sá díú òré ní quètau cuéhé-dé ní càhãⁿ ndihí-dé Jèsús ní xáhaⁿ-gă sá ndúha déhe-dé. Te xíãⁿ ñúu ndi nchãa tée-áⁿ vehe-dé ní sándáá iní-yu Jèsús.

54 Te sá ñí quide-gă-áⁿ cúú ùú xito quide-gă sá vã yõo tnàhí ndàcu cada. Te sá ñí quide-gă xito cùu uú-áⁿ cúú-xí sã ñí quide-gă cùtnàhá ní ndee-gă distritú Jùdeá cuánuhú-gă distritú Galileá.

5

Jèsús quidé tătna-gă ìⁿ té cùhú ìⁿ xichi núú nání Bètesdá

1 Te sátã dúcãⁿ ñí cuu, te ní tnahã nduu ñí quide ñáyiú isràél ìⁿ vico. Te ní sáhãⁿ Jèsús ñúú Jerusàlén. 2 Te ní càa xico yuhu ñúú-áⁿ ñúhú dòco, te titní yèhe-xi ndecu. Te ìⁿ yèhe-xi-áⁿ nání Yùyehe Mbéé, te yatni xíãⁿ cáã ìⁿ tanquí ndute dàna-ní-yu Bètesdá tnúhu mèé-yu tnúhu hèbreú, te yuhu tànquí-áⁿ cáã ùhúⁿ corrèdór. 3 Te xití corrèdór-áⁿ xíndecu cuéhé ñáyiú cùhú, ñáyiú cuàá, ñáyiú yacua, ñáyiú ñá cúú-gă candá nihnu, ndètú-yu candá ndute-áⁿ. 4 Chi nihí-yu tnúhu sá àma nihnu cùuⁿ ìⁿ espíritú xínú cuèchi núú Yă Ndiõxí, te dàcandã-xi ndute ñùhu tanquí-áⁿ. Te ñáyiú díhna nuu nã quée xití ndute-áⁿ, te òré-ni ndúha-yu. 5 Te yàcãⁿ ñútnàhá ìⁿ té ní cuu ócò sáhúⁿ úní cuíá sã cùhú-dé. 6 Te ní xiní Jèsús cáã-dé, te ní cutnùní iní-gă sá ñí cuu cuéhé cuíá cùhú-dé, te ní xáhaⁿ-gă:

—¿Cuíní-n ndúha-n-ãⁿ? —càchí-gă xáhaⁿ-gă xii-dé.

7 Te ní xáhaⁿ tée cùhú-áⁿ:

—Tátã, vá yõo nihí-í dàquée ñaha xì-í xití tànquí-a òré càndã ndute, chi òré cuíní-í quée-í, te ingã-ni tucú-yu quènduú-yu núú-í cuángueé-yu —càchí-dé xáhaⁿ-dè xii-gă.

8 Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gá xáhaⁿ-gã xii-dé.

⁹ Te òré-ni-áⁿ nĩ ndúha téé cùhú-áⁿ, te ní ndaca-ni-dé yuu-dé, te ní xica-dé cuáháⁿ-dé. Te nduu-áⁿ cúú-xí ndùu ndetatú ñáyiú, ¹⁰ núu ní xáhaⁿ cué téé isràél xii téé ní cuhu-áⁿ:

—Vitna cùu-xi nduu ndetatú-ó núu vá cúú cuído-n yuu-n —cachí-güedé xáhaⁿ-güedé xii-dé.

¹¹ Te ní xáhaⁿ-dë:

—Mee téé ní quide tátna ñaha xii-í ní cachí-dé sá ndácàni-í yuu-í, te caca-í —càchí-dé xáhaⁿ-dë xii-güedé.

¹² Te ní xáhaⁿ-güedë:

—¿Te ná cúú téé ducaⁿ nĩ cachí sá ndácàni-n yuu-n te caca-n-i? —càchí-güedé xáhaⁿ-güedé xii-dé.

¹³ Dico téé ní cuhú-áⁿ ñà túú ní cùnuni iní-dé ná cúú téé ní quide tátna ñaha xii-dé, chi Jèsús òré-ni ní xica-gá cuáháⁿ-gá tnuú nchaa ñáyiú chitu xĩndecu xiáⁿ. ¹⁴ Te sátá dúcáⁿ te ní naníhí tnáhá Jèsús ndihí téé ní quide tátna-gá-áⁿ xití veñúhu càhnu sá ïo cùnuu, te ní xáhaⁿ-gã xii-dé:

—Ní xiní-n nã ní ndúha-n-va. Te vitna vá cáda-gã-n nãndi sá cuéhé sá dúhá, chi núu na càda-ni-n ña, te quixi ingá cuéhé, te vñhi-gá ndoho-n —càchí-gá xáhaⁿ-gã xii-dé.

¹⁵ Ducaⁿ te ní xica téé ní cuhú-áⁿ cuãgúñaha-dé xii cue téé isràél sá Jèsús ní quide tátna ñaha-gã xii-dé.

¹⁶ Núu sátá nĩ níhí cue téé isràél tnúhu, te ní cuu úhú iní-güedé Jèsús. Te ní cuini-güedé cahni ñaha-güedé xii-gá cuendá sá dúcáⁿ nĩ quide tátna-gá nduu ndetatú-güedé. ¹⁷ Te ní xáhaⁿ Jèsús xii-güedé:

—Tătà-í Dútú Ndiöxí quidé chiúⁿ-ni-gá núu xiáⁿ quidé chiúⁿ-í tnáhá-í —càchí-gá xáhaⁿ-gã xii-güedé.

¹⁸ Te ní cudééⁿ-güedé sá ñã ní cãnehe íi-gã nduu ndetatú-güedé, te ní cuini-güedé cahni ñaha-güedé, te uuⁿ-gá ní cuini-güedé cahni ñaha-güedé xii-gá sá ní cachí-gá sá Tătá-gã cúú Dútú Ndiöxí, chi ní sani iní-güedé sá cuini-gá nútahá-gá Yã Ndiöxí núu xiáⁿ ío ní cudééⁿ-güedé.

Jèsús Déhe Yá Ndiöxí táxi tnùní-gá

¹⁹ Te ní xáhaⁿ tùcu Jèsús xii-güedé:

—Na càchí tnúhu ndáá-í xii-ndo sã yùhú chi ní ñⁿ sá ñã ndácú-í cada mee-í núu ñá túú mèe Tătà-í dánèhé ñáhá-gã xii-í nàcuáa cada-í, chi nchaa sá quidé Tătà-í quidé-í tnáhá-í. ²⁰ Te Tătà-í ío cùu iní ñáhá-gã xii-í núu dànèhé ñáhá-gã nchaa nàcuáa quide-gá. Te vitna ndècu vai-gá chiúⁿ tahu-gá cada-í, chiúⁿ sá vátá quini-gá-ndó càda-í nàcuáa cuñúhu vñhi-ndo. ²¹ Chi Tătà-í dandòto-gá ñáyiú ní xihí. Te yùhú cada-í te nduu táhú nchaa ñáyiú càchí iní-í cundecu ndihí ñáhá-yu xii-í ni caa ni quihíⁿ. ²² Te na sàá nduu te ñá díú Tătà-í cada ndáá-gá cuéchi ñáyiú, chi ní cachí-gá sá yùhú cada ndáá-í ²³ cuendá nchaa ñáyiú canehé-yu sá yíñùhu núu-í dàtná nehé-yu sá yíñùhu núu Tătà-í Yaá ní tendaha ñaha xii-í véxi-í ñuyíú-a. Te nchaa ñáyiú ñá túú nèhe sá yíñùhu núu yùhú, te ni núu Tătà-í ñá túú nèhé-yu sá yíñùhu.

²⁴ Te na càchí tnúhu ndáá-í xii-ndo sã nchàa ñáyiú na cùndedóho tnúhu na càháⁿ-í, te núu na quindáá iní-yu Dútú Ndiöxí Yaá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu táhú-yu cundecú-yu ndihí-gá ni caa ni quihíⁿ. ²⁵ Te vitna na càchí tnúhu ndáá-í xii-ndo sã nchàa ñáyiú ndècu ichi cuehé ichi duha cùu-yu dàtná ñⁿ ñáyiú ní xihí, te vitna ní sàá nduu cùndedóho-yu tnúhu càháⁿ yùhú Déhe Dútú Ndiöxí, te nchaa ñáyiú na quindáá iní-xi, te naníhí tàhú-yu.

²⁶ Te dàtná quidé mèe Tătà-í dácácu nihnu-gá ñáyiú, ducaⁿ nĩ cachí-gá cada-í dácácu nihnu-í-yu. ²⁷ Te ní cachí tucu-gá sá sàá ñⁿ nduu, te cada ndáá-í cuéchi nchaa ñáyiú ñá túú quide ndáá, chi yùhú táxi tnùní-í, te cùu-í ñani tnáhá-ndó nchàa-ndo. ²⁸ Te ni vã cùñùhu-ndo tnúhu càháⁿ-í, chi sàá nduu te nchaa ñáyiú ní xihí tecú dóho-yu tnúhu càháⁿ-í. ²⁹ Te ndoto nchaa ñáyiú ní quide váha cundecu ndihí-í-yu ni caa ni quihíⁿ, te ndoto tnáhá nchaa ñáyiú ní quide cuéhé ní quide duha, te ñáyiú-áⁿ quihíⁿ-yu núu

ùhú núú ndàhú.

Yá Ndiöxí chindèe tnúhu-gá Jèsús

³⁰ Te yúhú, chi ni ñá sá ñã ndácù-í cada mee-í nũu ñá díú mèe Yá Ndiöxí táúchiúⁿ-gá nàcuáa cada-í. Te quide ndáá-í cuéchi ñáyiú nàcuáa tàxi tnuní-gá cada-í, te yúhú ñá túú quide-í sá cúú ñí mèe-í chi Tătà-í ní táúchiúⁿ-gã nàcuáa cada-í. ³¹ Te núu na càháⁿ-í sá mèe-í táxi tnùn-í, te vá quindáá iní-ndó. ³² Chi Yá Ndiöxí chindèe tnúhu ñaha-gã xii-í, te yúhú xiní-í sá tnúhu càháⁿ-gá cuendá-í cúú-xí ñá sá ndáá. ³³ Te nchòhó ní téchiúⁿ-ndó cuè téé ní sáháⁿ ní ndúcú tnúhu-güedé núú tẽ Juáá nũu ná tnúhu càháⁿ-dé cuendá-í, te téé-ãⁿ ní càháⁿ ndáá-dé nàcuáa ndũu cuendá-í. ³⁴ Dico yúhú, chi ñá túú xiní ñuhu-í ñáyiú ñuyú-a chindee tnúhu ñahá-yu xii-í, dico té Juáá ní càháⁿ váha-dé cuendá-í, te xiãⁿ càhí tnúhu tucu-í cuendá quindáá iní-ndó, te naníhí tãhú-ndó. ³⁵ Te dàtná cuiní-ndó cùu ñá iti ndéñuhú te dàyehé-xi, ducaⁿ sãtnahá-xi ní cuu té Juáá, chi sacú-ni nduu ío ní cudí iní-ndó tnúhu ní càháⁿ-dé. ³⁶ Te váha-ni ní càháⁿ té Juáá, dico yúhú chi ndècu nchaa sá tá quide-í véxi nàcuáa ní táúchiúⁿ Yá Ndiöxí cada-í, te nchaa xiãⁿ cúú-xí ñá sá cútnùn-í iní-ndó sã mèe Yá Ndiöxí ní tendaha ñaha-gã xii-í véxi-í ñuyú-a. ³⁷ Te ñáyiú-ni-gá chindèe tnúhu ñaha-gã xii-í, dicó-ni sá mèe-ndó ñá túú cuiní-ndó càda cuendá-ndó tnúhu càháⁿ-gá, te ni ñá túú xiní-ndó nàcuáa càa-gá. ³⁸ Te ñá túú quèe iní nchòhó tnúhu càháⁿ-gá, chi ñá túú sãndáá iní ñahá-ndó xii yúhú Déhe-gá. ³⁹ Te dàcuaha vihi-ndo tutú ndéé tnúhu-gá, chi sãni iní-ndó sã xiãⁿ-ni dacuàha-ndo te naníhí tãhú-ndó. Te váha-ni quide-ndo, chi ñáyiú tutú-ãⁿ càháⁿ-xi cuendá-í. ⁴⁰ Te nchòhó ñá túú cuiní-ndó quindáá iní ñahá-ndó xii-í cuendá naníhí tãhú-ndó.

⁴¹ Te yúhú, ñá túú xiní ñuhu-í sá cáda càhnu ñaha-ndo xii-í. ⁴² Dico sa xiní-í nàcuáa sãni iní-ndó chi ñá túú cùu iní-ndó Yá Ndiöxí. ⁴³ Te yúhú véxi-í ñuyú-a chi Tătà-í ní tendaha ñaha-gã, te nchòhó ñá túú

cuiní-ndó tní-ndo tnúhu càháⁿ-í, dico núu quixi ñá téé càháⁿ cuendá mèe-xí, chi quindáá iní-ndó. ⁴⁴ Te ná váha nchòhó ná tní-ndó tnúhu càháⁿ-í, te xio xio-ni quide cahnu tnaha-ndo, te ñá túú quide cuendá-ndó sã tnúhu váha càháⁿ Yá Ndiöxí cuu xii-ndo. ⁴⁵ Te vá cáni iní-ndó sã yúhú ndácáⁿ cuéchi-í núú Tătà-í nàcuáa quide-ndo, chi ndíi Moisés ní chídó tnùn-í ndíi núú tutú Yá Ndiöxí nàcuáa quide-ndo sã ñá túú quide váha-ndo, te mee-ndo sãni iní-ndó sã naníhí tãhú-ndó cuendá tnúhu ní càháⁿ ndíi. ⁴⁶ Chi núu nchòhó sãndáá ndisa iní-ndó tnúhu ní càháⁿ ndíi Moisés ñá, te ducaⁿ te quindáá iní-ndó yúhú ní cùu, chi ndíi-ãⁿ ní chídó tnùn-í ndíi nàcuáa cada-í ñuyú-a vitna. ⁴⁷ Te núu ñá túú sãndáá iní-ndó tnúhu ní chídó tnùn-í ndíi, te ñáyiú-ni ducaⁿ càda ñaha-ndo xii-í vá quindáá iní-ndó tnúhu càháⁿ-í — càhí-gá xáhaⁿ-gã xii-güedé.

6

Jèsús dácaxi-gá úhúⁿ mĩ ñáyiú

(Mt. 14:13-21; Mr. 6:30-44; Lc. 9:10-17)

¹ Te sáta dúcáⁿ ñá cuu, te ní quee Jèsús cuáháⁿ-gá ingá xio yuhu làgúná Galileá, àdi Tiberiás chi úú ñáyiú-xi. ² Te ío cuéhé ñáyiú nchícúⁿ ñahá xii-gá cuáháⁿ cuendá sá ñá xiní-yu nchaa sá vã yõ tnahí ndàcu cada ní quide-gá, chi ní quide tátna-gá nchaa ñáyiú cùhú. ³ Te ní sáá Jèsús ndíi cue téé xica cuu ndíi-gá ñá núú tìndúú, te xiãⁿ ñá ngóo-gá ndíi-güedé. ⁴ Te ta cùyatni coo víco pascuá, víco quide ñáyiú isràél. ⁵ Te ní xiní-gá sá ío vãi ñáyiú nchícúⁿ ñahá xii-gá cuáháⁿ, te ní xáhaⁿ-gã xii té Lìpé:

—¿Ndéé quíhíⁿ-ó quinguaaⁿ-o sã cáxi nchaa ñáyiú-a? —càhí-gá xáhaⁿ-gã xii-dé.

⁶ Te ducaⁿ ñá xáhaⁿ-gã xii-dé cuendá sá cuiní-gá quini-gá nása cunduu tnúhu càháⁿ-dé, dico mee-gã sa xiní-gá nàcuáa cada-gá. ⁷ Te ní xáhaⁿ tẽ Lìpé xii-gá:

—Te cuéi úú ciendú díhúⁿ denariú ná dãndoñuhu-o cuaaⁿ-o paá, te ni

vã tnàhá caxí-yu luha luha —càchí-dé xáhaⁿ-dë xii-gá.

8 Te té Ndríxí ingá té xica cuu ndihí-gá, ñaní té Xímú, àdi Pelú chi úú diu-dé, ní xáhaⁿ-dë:

9 —Iha ndècu ñⁿ té líhli nèhe-dé úhúⁿ pàá cebàdá te úú chácá, dico ndéé tnàhá xéhé, te cuéhé víhí ñáyiú —càchí-dé xáhaⁿ-dë xii-gá.

10 Te ní xáhaⁿ Jèsús xii-güedé:

—Chí cñhaha nà ngóo-yu nchaá-yu —càchí-gá xáhaⁿ-gã.

Te ñáyiú-áⁿ nì ngóo-yu, te càa vihi ité núú nì ngóo-yu-áⁿ, te xínu dàtná úhúⁿ mĩ mee-ni cuè téé, te dñⁿ ñáyiú dñí ndihí landú. 11 Te ní queheⁿ Jèsús pàá, te ní ndacáⁿ táhú-gã núú Yã Ndiöxí, te ní sãñaha-gã pàá-áⁿ xii cue téé xica cuu ndihí-gá, te cue téé-áⁿ nì dácãhñu-güedé ní xexi nchaa ñáyiú xixúcu-áⁿ. Te diu-ni ducaⁿ nì quide-gá chácá, te ní dácãhñu tucu-güedé-di ní xexi ñáyiú ní ndahá xití-yu. 12 Te òré ní túhú cóhõ-yu, te ní xáhaⁿ Jèsús xii cue téé xica cuu ndihí-gá sá ná nàqueheⁿ-güedé nchaa sá nì quendóo cuendá sá vã quíhíⁿ-xi núú míhí.

13 Te cue téé-áⁿ ní naqueheⁿ-güedé nchaa sá nì quendóo, te ní chítú ùxúú tídihi núú ùhúⁿ-ni pàá cebàdá. 14 Te sá nì xiní-yu ní nadacàyá-gá sá nì xexí-yu, xiãⁿ ní ngúíta-yu ní xítñàhá-yu:

—Ndáá sá tēe-a sa ió cuendú sá quíxí-dë ñuyíú-a cáháⁿ-dé tnúhu Yá Ndiöxí —càchí-yu xítñàhá-yu.

15 Te ní cutnùní iní Jèsús sá cáda yicá-yu candeca ñàhá-yu xii-gá quíhíⁿ cuendá cundecu-gá quindaha ñàha-gá xií-yu ni cùu, núú xiãⁿ ní xica tucu-gá cuáháⁿ-gá xití yucu mee dii chícuú-gá.

Jèsús xicá-gã núú ndute

(Mt. 14:22-27; Mr. 6:45-52)

16 Te òré ní cuu ndiquíⁿ, te cuáháⁿ cue téé xica cuu ndihí-gá yuhu làgúná. 17 Te ní quée-güedé bàrcú cuáháⁿ-güedé ñúú Capèrnaúm cáá ndàa ingá xio yuhu làgúná, te sa ní cuu ndiquíⁿ, te ñá túú Jèsús quexìo

quée-gá bàrcú ñúhú-güedé-áⁿ. 18 Te ní ngúíta-xi quène táchí ñíhi, te níhi dàcandau ndéé tnàhá ndùte làgúná-áⁿ.

19 Te sa ní cuu dàtná úhúⁿ kilómetrú cuáháⁿ-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núú ndúté, te ní yùhú-güedé. 20 Te ní xáhaⁿ Jèsús xii-güedé:

—Yùhú véxi-í, vá yùhú-ndó —càchí-gá xáhaⁿ-gã xii-güedé.

21 Te ío ní cudíí ìní-güedé sá nì quexìo-gá cuánguee-gá bàrcú, te òré-ni ní quexìo-güedé ndihí-gá ndéé ingá xio yuhu làgúná núú cuáháⁿ-güedé.

Ñáyiú nànducu ñaha xii Jèsús

22 Te ingá nduu-ãⁿ xñdecu-ni nchaa ñáyiú ní quendóo yuhu làgúná. Te ní quide cuendá-yu sá ñⁿ dii-ná bàrcú nùtnñ-áⁿ ní cùu ñá túú-gã, chi cue téé xica cuu ndihí Jèsús ní quée-güedé bàrcú-áⁿ cuáháⁿ-güedé. Te ní níhi-yu tnúhu sá ñà túú ní quée tnàhá Jèsús. 23 Te diu-ni nduu-ãⁿ nì quee ñⁿ úú bàrcú ñúú Tiberiás ní sáá-xi yatni núú nì xexí-yu pàá sá nì ndacáⁿ táhú Jèsús núú Yã Ndiöxí. 24 Te ní xiní-yu sá ñà túú Jèsús ndihí cue téé xica cuu ndihí-gá, núú ní quée-yu bàrcú-áⁿ cuáháⁿ-yu ñúú Capèrnaúm cuánúndúcú ñàhá-yu xii-gá.

Jèsús cúú-gã dàtná ñⁿ sá nchító-ó

25 Te ní sáá-yu ingá xio yuhu làgúná, xiãⁿ nì naníhí-yu Jèsús, te ní xáhaⁿ-yu xii-gá:

—Mèstrú, ¿ná òré ní sáá-n ìha? —cachí-yu xáhaⁿ-yu xii-gá.

26 Te ní xáhaⁿ Jèsús:

—Na càchí tnúhu ndáá-í sá nchòhó nánducu ñaha-ndo xii-í cuendá-ni sá nì xexi-ndo nì ndahá xití-ndó, dico ñá díú cuendá sá nì quide-í sá vã yõ tnàhí ndàcu cada nanducu ñaha-ndo.

27 Te vã cáda cuendá-ndó sã méé-ní sã cáxí-ndó càda chiuⁿ-ndo chi xiãⁿ vá cudíi-xi. Chi ío-gá xiní ñúhu-xi cada cuendá-ndó tnúhu Yá Ndiöxí te tnñ-ndo, te naníhí tàhú-ndó. Te tnúhu-áⁿ cachí tnúhu yùhú Téé cùu ñaní tnàhá-ndó nchaa-ndo, te xiãⁿ candeca-xi iní-ndó nì caa nì quíhíⁿ,

chi mee Dútú Ndiõxí ní cachí-gá sá dúcáⁿ càda-í —càchí-gá xáhaⁿ-gã xií-yu.

²⁸ Te ní xáhãⁿ-yu:

—¿Nása cada-ndí cuendá ngúnu ichi-ndí nàcuáa cuení Yã Ndiõxí cunduu-í? —càchí-yu xáhãⁿ-yu xii-gá.

²⁹ Te ní xáhaⁿ Jèsús xií-yu:

—Yá Ndiõxí cuení-gá sá quindáá iní ñáhá-ndó xii yúhú, téé ní tendaha-gã véxi ñuyúú-a —càchí-gá xáhaⁿ-gã xií-yu.

³⁰ Te ní xáhaⁿ tùcú-yu xii-gá:

—¿Ná cúú sã vã yõo tnàhí ndàcu cada, cada-n cundehe-ndí cuendá quindáá iní ñáhá-ndí xii-n-í? ¿Àdi nágá cúú sã cáda-n cuendá cutnùní iní-ndí sá ndáá càháⁿ-n-í? ³¹ Chi cue ñani tnàhá-ó nì xindecu ndéé sanaha nì xexí-yu pàá nání mànáá xití yucu dàtná yódó tnùní núú tütú Yã Ndiõxí núú càchí-xi: “Yá Ndiõxí ní sãñaha-gã sá nì xexí-yu, te ní cuuⁿ túu-xi andiú”, duha càchí-xi núú tütú-gá —càchí-yu xáhãⁿ-yu xii-gá.

³² Te ní xáhaⁿ Jèsús:

—Na càchí tnúhu ndáá-í xii-ndo sã ñà díú ndí Moisés ní sãñaha ndí pàá ní cuuⁿ andiú nì xexí-yu, chi mee Tàtá-í ní sãñaha-gã sá nì xexí-yu. Te sá táxi-gã vitna cùu-xi ³³ datná pàá véxi cuuⁿ andiú càndeca-xi iní-ndó nì caa nì quíhíⁿ —càchí-gá xáhaⁿ-gã xií-yu.

³⁴ Te ní xáhãⁿ-yu xii-gá:

—Tàtá, mee-ni pàá-áⁿ taxi-n càxi-ndí —càchí-yu xáhãⁿ-yu xii-gá.

³⁵ Te ní xáhaⁿ Jèsús:

—Yúhú cúú-í dàtná ñⁿ sá xexí-ndó càndeca-xi iní-ndó. Te duha ndùu tnúhu càháⁿ-í, chi nchaa ñáyiu na quindáá iní ñáhá xii-í, te vã ndóhó-gã-yu docó te vã ndóhó-gã-yu ndute. ³⁶ Dìcò-ni sá nchòhó ñá túú sàndáá iní ñáhá-ndó cuèi xini ñáhá-ndó xii-í. ³⁷ Te nchaa ñáyiu na càchí Tàtá-í nduu cuendá-í nasaá-yu núu-í, te ñáyiu-áⁿ vã dáquèe tíhù-í-yu.

³⁸ Te ñá díú yúhú sá véxi cuuⁿ-í andiú te quide-í nchaa sá cúú iní mée-í, chi véxi cuuⁿ-í sá cáda-í nchaa nàcuáa ní táuchíúⁿ mée Tàtá-í Dútú Ndiõxí Yaa

ní tendaha ñàha xii-í véxi-í ñuyúú-a.

³⁹ Te cuení-gá sá ncháá ñáyiu ní cachí-gá nduu cuendá-í vã dáñà-í-yu cuíta nihnú-yu, te na sàá nduu te diu-ni-í dandòto-í-yu. ⁴⁰ Chi ducaⁿ nì cachí Dútú Ndiõxí cunduu sá ncháá ñáyiu na tnì tnúhu càháⁿ-í, te quindáá ndisa iní ñáhã-yu xii yúhú Déhe-gá, te nduu táhũ-yu cundecú-yu ndíhi Yá Ndiõxí nì caa nì quíhíⁿ, te yúhú dandòto-í-yu na sàá nduu —càchí-gá xáhaⁿ-gã xií-yu.

⁴¹ Te ñá ní tnàhá iní ñáyiu israél tnúhu ní cáháⁿ Jèsús núu ní ngúíta-yu ní cáháⁿ cuèhé-yu cuendá-gá cuendá sá nì xáhaⁿ-gã sá mée-gã cúú-gã dàtná sá xexí-ó véxi cuuⁿ andiú. ⁴² Te ní xitnàhá-yu:

—¿Náa ñá díú tõe-a cùu-dé Jèsús déhe té Chèé? Nchoo xini-ó tãtá-dě, te xini-ó nãná-dě, ñá cachí-tu té-a sá andiú véxi cuuⁿ-dé! —càchí-yu xitnàhá-yu.

⁴³ Te ní xáhaⁿ Jèsús xií-yu:

—Vã càháⁿ cuèhé-gá-ndó cuendá-í, chí dáñá. ⁴⁴ Vã yõo quindáá iní ñáhá xii yúhú núu ñá túú mée Tàtá-í táxi cuendá ñáhá-gã xií-yu. Te diu-gá ní tendaha ñàha-gá xii-í véxi-í, te yúhú dandòto-í-yu na sàá nduu. ⁴⁵ Te núú tütú cue téé ní xóo cáháⁿ tnúhu Yã Ndiõxí ndéé sanaha càchí-xi: “Yá Ndiõxí danèhé ñáhá-gã xií-yu tnúhu-gá”, duha càchí-xi. Te nchaa ñáyiu na cùndedóho nchaa tnúhu càháⁿ Dútú Ndiõxí, te cutúha-yu nàcuáa càháⁿ-gá, te ñáyiu-áⁿ quindáá iní ñáhã-yu xii yúhú.

⁴⁶ Te vã yõo xini ñáhá xii Dútú Ndiõxí chi ñⁿndi-ni yúhú xini-í-gá, chi núú ndécú-gã ní quee-í véxi cuuⁿ-í —càchí-gá xáhaⁿ-gã xií-yu.

⁴⁷ Te xáhaⁿ tùcú-gá:

—Na càchí tnúhu ndáá-í xii-ndo sã nchaa ñáyiu na quindáá iní ñáhá xii-í, te naníhí tãhú-yu. ⁴⁸ Te yúhú cúú-í dàtná ñⁿ sá xexí-ndó càndeca-xi iní-ndó, te ducaⁿ sãtnahá-xi cùu-í chi yúhú cada-í te nduu táhú-ndó cùndecu-ndo ndíhi Yá Ndiõxí nì caa nì quíhíⁿ. ⁴⁹ Te cue ñani tnàhá-ó nì xindecu ndéé sanaha nì xexí-yu pàá

nání mànáá xití yucu, dico ní sáá nduu te dacuití ní xihí-yu. ⁵⁰⁻⁵¹ Te yúhú càháⁿ-í cuendá mée-í, chi véxi cuuⁿ-í andiu. Te cùu-í dàtná ìⁿ sá nchító-ndó, te nchaa ñáyiú na càxi te candeca-xi iní-yu ni caa ni quíhíⁿ te vá cuíta nihnu-gá-yu. Te sá táxi-í xii-ndo xíãⁿ cúu-xí yiqui cuñú-í, te cùu-xi cuendá nchaa ñáyiú nihí ñuyú cuendá nduu táhú-yu cundecú-yu ndihí Yá Ndiöxí ni caa ni quíhíⁿ — càchí-gá xáhaⁿ-gá xií-yu.

⁵² Te ní ngüíta ñáyiú isràél xitnàhá-yu:

—¿Nása cada-tu téa-a núu càchí-tu-dé sá yiqui cuñú-dé taxi-dé caxi-o-í? — càchí-yu xitnàhá-yu.

⁵³ Te ní xáhaⁿ Jèsús:

—Na càchí tnúhu ndáá-í xii-ndo sã núu na càda iní-ndó sã dàtná sá cáxi-ndó yiqui cuñú yúhú Téa cùu ñaní tnáhá-ndó nchàa-ndo, te cada tuçu iní-ndó sã dàtná sá cohó-ndó níñí-í ñá, te xíãⁿ queé-xí sã quindáá iní ñáhá-ndó nì yuhu ni iní-ndó te naníhí tàhú-ndó, te núu ñáhá te cuíta nihnu-ndo. ⁵⁴ Nchaa ñáyiú na càda iní-xi sá dàtná sá cáxi-yu yiqui cuñú-í te cohó-yu níñí-í, ñáyiú-áⁿ naníhí tàhú-yu te yúhú dandòto-í-yu na sàá nduu. ⁵⁵ Chi yiqui cuñú-í ndihí níñí-í cúu-xí mée-í. ⁵⁶ Te nchaa ñáyiú na càda iní-xi sá dàtná sá cáxi-yu yiqui cuñú-í te cohó-yu níñí-í, te ñáyiú-áⁿ ìⁿ-nã cuu-í ndihí-yu chi cundecu ndihí-í-yu. ⁵⁷ Te yúhú nchító-í chi ducaⁿ nchító Tàtá-í Yáá ní tendaha ñàha xii-í véxi-í ñuyú-a. Te diu-ni ducaⁿ nchàa ñáyiú na quindáá iní ñáhá xii-í te cundecu ndihí-í-yu ni caa ni quíhíⁿ. ⁵⁸ Te yúhú cúu-í dàtná ìⁿ sá nchító-ndó véxi cuuⁿ andiu, dico ñá díú pàá sá nání mànáá ní xèxi cue ñaní tnáhá-ó ní xíndecu ndéé sanaha, chi ní xexí-yu pàá te dacuéi ní xihí-yu. Te nchaa ñáyiú na quindáá iní ñáhá xii yúhú Yáá véxi cuuⁿ andiu, te cundecu ndihí-í-yu ni caa ni quíhíⁿ —càchí-gá xáhaⁿ-gá xií-yu.

⁵⁹ Nchaa tnúhu-a ní càháⁿ-gá xití veñúhu ñáyiú ñúú Capèrnaúm.

Jèsús càchí tnúhu-gá nàcuáa naníhí tàhú-ó

⁶⁰ Te sá dúcáⁿ ní càháⁿ-gá núu vai ñáyiú nchícúⁿ ñáhá xii-gá ní xitnàhá-yu:

—Vá tníi cuíti-o tnúhu càháⁿ-dé chi ñá díú tnúhu sá cúu vãha iní-ó càháⁿ-dé —càchí-yu xitnàhá-yu.

⁶¹ Te ní cutnùní iní Jèsús sá ñà túú càháⁿ váha-yu cuendá tnúhu ní càháⁿ-gá, núu ní xáhaⁿ-gá xií-yu:

—¿Náa ñá tnàhá iní-ndó nàcuáa càháⁿ-í-a? ⁶² Te uuⁿ-gá cada nchòhó núu quini-ndó yúhú Téa cùu ñaní tnáhá-ndó nchàa-ndo ndaa-í núu ní xíndecu-í díhna. ⁶³ Te espíritú ndécú ndihí yiqui cuñú-ó, xíãⁿ ndécá ñàha-xi xii-o, te núu ñá túú xíãⁿ, te yiqui cuñú-ó ñà túú nandíhí-xi. Dico núu nchaa tnúhu càháⁿ-í-a queé-xi iní-ndó ñá, te quini-ndó nã xéhé candeca ñàha-xi xii-ndo núu cuàháⁿ núu véxi. ⁶⁴ Te ñava nchòhó chi ñá túú sàndáá iní-ndó —càchí-gá xáhaⁿ-gá xií-yu.

Te ducaⁿ ní xáhaⁿ-gá chi sa nàha-gá nándi cùu ñáyiú vá quindáá iní ñáhá xii-gá. Te ducaⁿ sã nàha-gá ndédacàa téa cuáha cuendá ñáhá xii-gá núu cue téa cùu úhú iní ñáhá. ⁶⁵ Te ní xáhaⁿ tùcu Jèsús xii-yu:

—Te duha càháⁿ-í chi sa ní cachí tnúhu-í xii-ndo sã vã yòo ìⁿ cuíni tníi tnúhu-í te núu ñá túú Tàtá-í Dútú Ndiöxí sánú ìchi ñàha-gá xií-yu — càchí-gá xáhaⁿ-gá xií-yu.

⁶⁶ Te òré-áⁿ ío vai ñáyiú nchícúⁿ ñáhá xii-gá ní xócòo-yu ñá ní xica cuu-gá-yu ndihí-gá. ⁶⁷ Te xíãⁿ ní xáhaⁿ Jèsús xii ndi ùxúú cue téa xica cuu ndihí-gá:

—¿Cuíni-ndó dandóo ñàha-ndo tnàhá-ndó-ãⁿ? —càchí-gá xáhaⁿ-gá xii-güedé.

⁶⁸ Te ní xáhaⁿ tẽ Xímú, àdi Pelú chi úú diu-dé:

—Mèstrú, ñá túú-gã ndéé quíhíⁿ-ndí, chi nchúhú nàhá-ndí sá tnúhu mee-n cùu-xi sá vãha candeca-xi iní-ndí ni caa ni quíhíⁿ. ⁶⁹ Chi nchúhú sa ní sàndáá iní ñáhá-ndí xii-n chi nàha-ndí

sá yòhó cúú-n Crìstú Déhe Dútú Ndiòxí yaá ndécú àndiù —cachí-dé xáhaⁿ-dë xii-gá.

⁷⁰ Te ní xáhaⁿ Jèsús:

—Nàha-ndo sá yùhú ní cáháⁿ ñáhà-í xii ndi ùxúú-ndó xica cuu ndihí ñaha-í xii-ndo, dico ìⁿ-ndo quihu ñaha yucu ñávaha xii-ndo —càchí-gá xáhaⁿ-gá xii-güedé.

⁷¹ Duha ní cáháⁿ Jèsús cuendá té Jüdás déhe té Xímú Iscàrioté ìⁿ tée ñùtnahá núú ùxí ìⁿ cue tée xica cuu ndihí-gá, chí sa nàha-gá sá tée-áⁿ cuàha cuendá ñáhá-dë xii-gá ìⁿ nduu núú cuè tée cùu úhú iní ñáhá.

7

Cue ñaní Jèsús ñá túú sàndáá iní-güedé nàcuáa ndiù tñúhu càháⁿ-gá

¹ Te sátá dúcáⁿ ñí cuu, te ní xica cuu Jèsús distritú Galileá, te ñá ní sáháⁿ-gá distritú Jüdeá, chí yacáⁿ cuení cue tée israél cahni ñaha-güedë xii-gá ní cùu.

² Te ní cuyatni nduu càdá-yu vico, vico sá dánàní-yu Vico Vehe Tnuvixiⁿ.

³ Te ní xáhaⁿ cuè ñaní Jèsús xii-gá:

—Váha-gá quíhíⁿ-n distritú Jüdeá te vá cündècu-n iha, chí yacáⁿ cada-n nchaa sá quidé-n iha cuendá quini nchaa ñáyiù cündihí ñaha xii-n ndecu yacáⁿ. ⁴ Chí núu cuení-ó quini nchaa ñáyiù ná chiúⁿ cada-o te vá cádá dáyuhu-o. Te yòhó cuéhé núú sá quidé-n, te cada-n na quini nchaa ñáyiù —càchí-güedé xáhaⁿ-güedë xii-gá.

⁵ Ducaⁿ ñí cáháⁿ cue ñaní-gá, chí ni mèe-güedé ñá túú sàndáá iní-güedé nàcuáa ndiù tñúhu càháⁿ-gá. ⁶ Te ní xáhaⁿ Jèsús xii-güedé:

—Vátá tñahá-gá òré quíhíⁿ-í dico nchòhó ndèdani càa oré cuu quíhíⁿ-ndó. ⁷ Chí nchaa ñáyiù ñuhu ichi cuehé ichi duha chí ñá túú cùu úhú iní ñáhá-yu xii nchòhó. Dico yúhú chí cùu úhú iní ñáhá-yu xii-í cuendá sá càháⁿ-í sá quidë-yu nchaa sá cuéhé sá dúhá. ⁸ Te chí cuáháⁿ nchòhó vico chí yúhú vá quíhíⁿ-ni-í chí vátá tñahá-gá òré quíhíⁿ-í —càchí-gá xáhaⁿ-gá xii-güedé.

⁹ Te ducaⁿ ñí xáhaⁿ-gá te ní ndóo-gá Galileá, te cue tée-áⁿ cuáháⁿ-güedé.

Jèsús ndécú-gá ìⁿ vico chiñuhú-yu Yá Ndiòxí

¹⁰ Dico sátá cuáháⁿ cue ñaní-gá, te ní xica-gá cuáháⁿ-gá tñahá-gá dícó-ni sá dáyuhu cuáháⁿ-gá. ¹¹ Te ñáyiù israél ñáyiù xíndecu vico nànducú-yu Jèsús, te xítnahá-yu:

—¿Ndéé ndécú Jèsús? —càchí-yu xítnahá-yu.

¹² Te nchaa ñáyiù xíndecu vico xíndatnúhu-yu cuendá-gá. Te davá-yu xítnahá-yu sá ïo váha iní-gá, te davá-yu xítnahá-yu sá ñà díú tée váha cùu-gá, chí dándahú-gá ñáyiù.

¹³ Dico mee-ni xicáháⁿ náhí-yu, chí xíyuhú-yu cue tée cùnuu núú-yu.

¹⁴ Te ta ngùhuⁿ dava vico, te cuánguìhu Jèsús veñúhu càhnu sá ïo cùnuu, te ní ngüita-gá dácuaaha-gá ñáyiù. ¹⁵ Te ñáyiù israél ní cuñúhu vihí-yu sá ïo váha càháⁿ-gá, te ní xítnahá-yu:

—¿Ná cuendá ïo váha ñuhu-tu díquí tée-a tñúhu cáháⁿ-dé te ñá túú ní dácuaaha-dé-i? —càchí-yu xítnahá-yu.

¹⁶ Te ní xáhaⁿ Jèsús:

—Ñá díú cuendá mèe-í cúú-xí sá dánèhé ñáhà-í xii-ndo, chí cuendá Dútú Ndiòxí Yaá ní tendaha ñaha xii-í véxi-í cúú-xí. ¹⁷ Te núu ïo dava-ndo ñí yuhu ni iní-ndó cuení-ndó càda-ndo nacuaa cuení Yá Ndiòxí cunduu, te cutnùní ndáá iní-ndó sá tñuhu dácuaaha ñaha-í xii-ndo cùu-xi cuendá mèe Dútú Ndiòxí, te ñá díú cuendá mèe-í cúú-xí. ¹⁸ Te tée cuení sá cádá càhnu ñaha ñáyiù xii-dé, tée-áⁿ càháⁿ-dé nàcuáa véxi iní mèe-dë. Dico yúhú cuení-í sá cádá càhnú-yu Dútú Ndiòxí Yaá ní tendaha ñaha xii-í véxi-í ñuyíú-a, te càháⁿ ndáá-í te ñá túú dácuaandehnde-í.

¹⁹ Te ndí Moisés ní taxi ndí tñúhu sá sánú ichi ñaha xii-ndo nacuaa cundecu-ndo, te ni dùcaⁿ ñá túú sàndáá iní-ndó nàcuáa càháⁿ tñúhu-áⁿ. ¿Te ná cuendá cuení-ndó cahni ñaha-ndo xii-í? —càchí-gá xáhaⁿ-gá xii-yu.

²⁰ Te ní xáháⁿ-yu xii-gá:

—Yucu ñävãha dàcoto ñaha xii-ó, chi vá yõo ñi cuñí cahni ñaha xii-n — cachí-yu xãhãⁿ-yu xii-gá.

²¹ Te ní xáhaⁿ Jèsús xií-yu:

—Sá ñi quide-í ñi sá vã yõo tnãhi ndacu cada nduu cuu-xi nduu ndetátú-ó, xiãⁿ ío ní cuñúhu ñaha-ndo xii-í. ²² Te ndíi Moisés ní cachí ndíi sá cuãha-yu señá ñi cue landú té, dico ñá díú mèe ndíi ñi càhu iní ndíi chi ducaⁿ tnãhi ní xóo cada cue ñani tnãhá-ó dàvá-áⁿ, núu xiãⁿ nchòhó sãha-ndo señá ñi landú té cuèi cùu-xi nduu ndetátú-ó. ²³ Te ducaⁿ quide-ndo cuendá sá ña túu nã cumání-ndó núu tnũhu sá sánú ichi ñaha xii-ndo ní dándõo ndíi Moisés. ¿Te ná cuendá cúdeéⁿ-ndó núu-í sá ñi quide tátna-í té cùhú nduu ndetátú-ó-í? ²⁴ Te váha váha cada cuendá-ndó, te vá cuendá-ñi cáháⁿ-ndó sã yũhú ndècuéchi-í chi ñá túu xini-ndó —càchí-gá xáhaⁿ-gã xií-yu.

Jèsús xáhaⁿ-gã xií-yu núu véxi-gá

²⁵ Te dava ñáyiú ñuú Jerusàlén ní ngüita-yu xitnãhá-yu:

—¿Náa ñá díú tãe-áⁿ nándùcu-güedé cahni-güedé?, ²⁶ núu náí-dé nútñi núu chítú núu tàcá-ãⁿ càháⁿ-dé, te vá yõo cùyi cùñaha xii-dé ñi tnúhu. Cudana te cue té cùchiuⁿ sandáá iní-güedé sá díú-dë cúú-dë Crìstú Yaá ní tendaha Yá Ndiõxí véxi ñuyiú-a. ²⁷ Dico nchoo xini-ó ndèe ichi véxi té-ãⁿ, dico Crìstú ná quixi-gá chi vá yõo ñi quini ndèe ichi quixi Yaá-áⁿ —càchí-yu xitnãhá-yu.

²⁸ Te yihí Jesús xití veñúhu càhnu sá ño cùnuu danehe-gá ñáyiú, te ní tecú dóho-gá tnúhu càháⁿ-yu. Te ñi ní cáháⁿ-gá, te xáhaⁿ-gã xií-yu:

—¡Ná quini-tu nchòhó ndèe ichi véxi yúhú! Yúhú véxi-í dico ñá díú sá cúú iní mèe-í, chi Yá Ndiõxí Yaá quidé nchàa-ndi túhú sá vãha ní tendaha ñaha-gá xii-í véxi-í, te nchòhó ñá túu xini-ndó-gã. ²⁹ Te yúhú xini-í-gá chi núu ndécú-gã ní quee-í véxi-í, te ñu mee-gã ní tendaha ñaha-gá véxi-í —càchí-gá xáhaⁿ-gã xií-yu.

³⁰ Te sá dúcáⁿ ñi cáháⁿ-gá, núu cuñí-güedé tñi ñaha-güedé xii-gá quihíⁿ-gá vecaá ní cùu, dico vá yõo ñi ní cùyi tñi ñaha xii-gá chi vátá sãá-gá òré tñi ñaha-güedé. ³¹ Dico vai-yu ní sandáá iní ñãhã-yu xii-gá, te ní xitnãhá-yu:

—¿Nágá cúú sã cádá Crìstú ná quixi-gá-í?, te té-a ío cuéhé núu sã tá quide-dé véxi. Váa ñu té-a cùu-dé Crìstú Yaá ní tendaha Yá Ndiõxí véxi ñuyiú-a —càchí-yu xitnãhá-yu.

Cue té cùu fariséu cuñi-güedé quihíⁿ Jèsús vecaá

³² Te ní ñihí cue té cùu fariséu tnúhu nãcuáa càháⁿ ñáyiú cuendá Jèsús, núu ní ndatnúhu-güedé ndihí cue dútú cùnù, te ní techiúⁿ-güedé cue té quide cuendá veñúhu cuáhãⁿ-güedé cuátni ñaha-güedé xii-gá ní cùu. ³³ Te ní xáhaⁿ-gã xii-güedé:

—Sacú duha nduu cundecu ndihí ñaha-í xii-ndo, te núhú tucu-í núu ndécú tátà-í Yaá ní tendaha ñaha xii-í véxi-í ñuyiú-a. ³⁴ Te cuèi na nãnducu ñaha-ndo dico vá ná ñihí ñãhá-ndó chi vá sãá-ndó núu cùndecu-í —càchí-gá xáhaⁿ-gã xii-güedé.

³⁵ Te ní ngüita ñáyiú isràel xitnãhá-yu:

—¿Ndèe quihíⁿ-tu té-a te vá ná ñihí-ó-dë-í? ¿Àdi quihíⁿ-dé na chitnãhá-dé ñáyiú isràel ñáyiú nchiténuu nchaa ñuú xicá cuendá danèhé-dé ñáyiú griégú? ³⁶ ¿Náa càháⁿ-tu-dé duha càháⁿ-dé: “Nãnducu ñaha-ndo te vá nãñihí ñãhá-ndó chi vá sãá-ndó núu cùndecu-í”, càchí-tu-dé? —càchí-yu xitnãhá-yu.

Nãcuáa cada Espiritú Yá Ndiõxí iní-ó

³⁷ Te nduu ñi yáha-ná vico cùu-xi nduu càhnu vihi, te nduu-ãⁿ ñi ngúnu tñi Jèsús tnuú ñáyiú, te ñi ní cáháⁿ-gá, te xáhaⁿ-gã xií-yu:

—Núu ño dava-ndo yichí-ndó ndüte, te quixi-ndo núu-í, te coho-ndo. ³⁸ Duha càháⁿ-í chi nchaa ñáyiú na quindáá iní ñãhá xii-í, te cada-xi iní-yu dàtná ñi núu xicá ndüte,

nchaa-ni nduu xica ñá túú yìchí, ducaⁿ càda-xi iní-yu núú cuàháⁿ núú vèxi dàtná càháⁿ-xi núú tùtú Yá Ndiòxí —càchí-gá xáhaⁿ-gã xii-yu.

³⁹ Te ducaⁿ ñí cáháⁿ-gá cuendá sá quixí Espiritú Yá Ndiòxí ngúndecu ndihí nchaa ñáyiú na quíndáá iní ñáhá xii-gá, chí sáá nduu ndaa-gá andiú càda cahnu ñaha Tátá-gã xii-gá, te dàvá-áⁿ te quixi Espiritú Yá Ndiòxí cundecu ndihí-yu.

Ñá ní cùu ñⁿnuú-yu cuendá tnúhu ní cáháⁿ Jèsús

⁴⁰ Te dava ñáyiú ní xíndedóho tnúhu ní cáháⁿ Jèsús ní xitnàhá-yu:

—Ndáá sá tée-a cùu-dé tée càchí-yu quixi cáháⁿ tnúhu Yá Ndiòxí —càchí-yu xitnàhá-yu.

⁴¹ Te dava tucú-yu xitnàhá-yu:

—Tée-a cùu-dé Crístú Yaá ní tendaha Yá Ndiòxí véxi ñuyíú-a —càchí-yu xitnàhá-yu.

Te dava-gá tucú-yu xitnàhá-yu:

—¿Náa ndaa distritú Galileá quixi Crístú Yaá tendaha Yá Ndiòxí quixi ñuyíú-a? ⁴² Chí núú tùtú Yá Ndiòxí càchí-xi sá Crístú Yaá tendaha Yá Ndiòxí quixi ñuyíú-a cuu-gá ñⁿ ñaní tnáhá ndí Dàvíí, te quee-gá ñuú Belén ñuú méé ndí Dàvíí, duha càháⁿ-xi núú tùtú Yá Ndiòxí —càchí-yu xitnàhá-yu.

⁴³ Te xíáⁿ ñuú ñá ní cùu ñⁿnuú-yu cuendá Jèsús. ⁴⁴ Te davá-yu cuíní-yu tñí-yu Jèsús quíhíⁿ-gá vecaá ní cùu, dico ní ñⁿ-yu ñá túú ní cùyíⁿ-yu tñí ñàhá-yu xii-gá.

Cue tée cùchiuⁿ ñá túú sàndáá iní-güedé Jèsús

⁴⁵ Te cue tée cuáháⁿ tñí ñaha xii Jèsús ní cùu ní ndexio-güedé núú cuè tée cùu fariséu ndihí núú cuè dútú cùnúu. Te xáhaⁿ cuè tée cùnúu-áⁿ:

—¿Ná cuendá ñá ní cãndeca-ndo tée-áⁿ quixi? —càchí-güedé xáhaⁿ-güedé.

⁴⁶ Te cue tée ní sáháⁿ chùⁿ ní xáhaⁿ-güedé:

—Ní ñⁿ tée ñá túú xíní-ndí cáháⁿ dàtná càháⁿ tée-áⁿ —càchí-güedé xáhaⁿ-güedé.

⁴⁷ Te ní xáhaⁿ cuè tée cùu fariséu:

—¿Náa tnàhá nchòhó ní sàndáá iní-ndó tnúhu ndehnde càháⁿ tée-áⁿ?

⁴⁸ ¿Náa ñá túú xíní-ndó sá ní ñⁿ cue tée tàxi tnuní nchúhú, te ní ñⁿ nchúhú cue tée cùu fariséu ñá túú sàndáá iní-ndí tée-áⁿ ñá? ⁴⁹ Nchaa ñáyiú tùha ñaha xii tée-áⁿ ñá túú sàndáá iní-yu nàcuáa càháⁿ tnúhu sá sánú ichi ñaha xii-o, dico cuíta nihnú-yu sá dúcáⁿ quidé-yu —càchí-güedé xáhaⁿ-güedé xii cue tée-áⁿ.

⁵⁰ Te té Nicòdemú tée ní sáháⁿ niú ní ndatnúhu-dé ndihí Jèsús cúu-dé tnàhá-dé ñⁿ tée fariséu, te ní xáhaⁿ-dè xii-güedé:

⁵¹ —Tnúhu sá sánú ichi ñaha xii-o nacuáa cundecu-o càchí-xi sá ndéé cundedóho-o nása càháⁿ tée tàú cuéchi cuendá cutnùní iní-ó ñá ní quide-dé, te dàtnùní cáháⁿ-ó ñuú ndisa ndècuéchi-dé àdi ñá túú ndècuéchi-dé —càchí-dé xáhaⁿ-dè.

⁵² Te ní xáhaⁿ-güedé:

—Cùu ní cachí sá tnàhá-ò cúu-n tée distritú Galileá ñuú ducaⁿ càháⁿ-n. Dacuàha tutú yódó tnùní tnúhu Yá Ndiòxí te quíní-n nàcuáa càháⁿ-xi sá ní ñⁿ tée véxi distritú Galileá ñá túú càháⁿ-dé tnúhu Yá Ndiòxí —càchí-güedé xáhaⁿ-güedé.

⁵³ Ducaⁿ te ndí dñⁿ cuãnuhú-güedé vehe-güedé.

8

Ñⁿ ñadìhí ndécú vèhi cuéchi-xi

¹ Te Jèsús cuáháⁿ-gá yucu Òlívú.

² Te sátá ñí túnada nduu tnéé, te cuáháⁿ tucu-gá veñúhu cahnu sá ïo cùnúu. Te ïo cuéhé ñáyiú ní chítú níhnú-yu núú-gã, te ní ngóo-gá ní dánèhé ñáhá-gã xii-yu. ³ Te ní quexio cue tée dàcuaha ñaha xii-yu nchaa tnúhu ní chídó tnùní ndí Moisés, ndihí cue tée cùu fariséu, te ndèca-güedé ñⁿ ñadìhí ní sáá, te ñaha-áⁿ ñí xíní ñáhã-yu càháⁿ ndihí-aⁿ ñⁿ tée dico ñá díú yíⁿ-aⁿ cuu-dé, te ní sanutñí ñaha-güedé xii-aⁿ tnuú nchaa ñáyiú xíndecu núú Jèsús. ⁴ Te ní xáhaⁿ-güedé xii Jèsús:

—Mèstrú, ñadìhí-a ní xíní ñáhá ñáyiú xii-aⁿ càháⁿ ndihí-aⁿ ñⁿ tée dico ñá díú yíⁿ-aⁿ cuu-dé. ⁵ Te tnúhu ní chídó tnùní

ndíi Moisés cächí-xi sá yúú cahni-o nchaa ñáyiú dîhí duha quide. Te yòhó, ¿nása cächí-n cùnduu-í? —cachí-güedé xáhaⁿ-güedé xii-gá.

⁶ Duha ní cáháⁿ-güedé chi cuendá sá cuíní-güedé coto ndeé ñáhá-güedé xii-gá nūu nása cáháⁿ-gá cuendá núcóo nchihí ñaha-güedé xii-gá ní cáháⁿ-güedé. Te ní ngúnu ndeyi-gá te ní ngúita-gá téé-gă ndihí díquí ndáhá-gá lètrá núú ñúhú. ⁷ Te xicáⁿ tnúhú-ní tucu-güedé núú-gă nūu ní ndonehe núú-gă, te ní xáhaⁿ-gă:

—Ndëdani cãa nchohó te núú ñá túú nã cuéchi quide-ndo te díhna nuu-gă-ndó chí cuãha-aⁿ yúú — cächí-gá xáhaⁿ-gă xii-güedé.

⁸ Te ní ngúnu ndeyi tucu-gá téé tucu-gá lètrá núú ñúhú. ⁹ Te sá dúcáⁿ ñí xáhaⁿ-gă xii-güedé te ní ndixi túú iní-güedé sá ñà túú quide váha mee-güedé tnàhá-güedé, núu da ñⁿ da ñⁿ-güedé ní ndee, te díhna-gá cue téé cùu sacuéhé ñí ndee te ní ngúita nchicúⁿ dava-gá-güedé. Te sátá ñí ndihí-güedé ní ndee, te ní quendóo mee-nã Jèsús ndihí ñadîhí-áⁿ. ¹⁰ Te ní ndonehe núú Jèsús te ní xiní-gá sá ñí ndihí-güedé cuáháⁿ te mee-nã ñadîhí-áⁿ ñí ndóo-aⁿ, te ní xáhaⁿ-gă xii-aⁿ:

—¿Ndëndi cuáháⁿ cue téé cächí sá ñí quide-n cuéchi? ¿Ni ñⁿ-güedé ñá ní cùndee tnúhu-güedé quíhíⁿ-n cástiú-va? —cächí-gá xáhaⁿ-gă xii-aⁿ.

¹¹ Te ní xáhaⁿ-aⁿ xii Jèsús:

—Ñáhá, chi ni ñⁿ-güedé ñá ní ndàcu-güedé —cächí-aⁿ xáhaⁿ-aⁿ.

Te ní xáhaⁿ Jèsús:

—Te ni yúhú vá dáquihíⁿ ñáhà-í castiú xii-n. Te vitna te núhú-n te vá cádá-gă-n nãndi sá cuéhé sá dúhá — cächí-gá xáhaⁿ-gă xii-aⁿ.

Jèsús dándixi túu-gá iní-ó

¹² Te ní cáháⁿ tucu Jèsús núú ñáyiú, te xáhaⁿ-gă xii-yu:

—Yúhú cùú-í dàtná ñⁿ ñuhú dáyèhe-í ñuyú-a, te nchaa ñáyiú na chitnahá ñáhá xii-í, te vá cùndecu-gá-yu ichi cuéhé ichi duha, chi yúhú dándixi

túu-í iní-yu cuendá cutnùní iní-yu nàcuáa ndùu cuendá Yã Ndiòxí, te cundecu-í ndihí-yu ni caa ni quíhíⁿ — cächí-gá xáhaⁿ-gă xii-yu.

¹³ Te ní xáhaⁿ cuè téé cùu fariséú xii-gá:

—Medi-n cáháⁿ-n sã cùú-n tée váha, te vá yòo ñⁿ-gá chindèe tnúhu ñaha xii-n núu ná téé cùu-n, dico xiãⁿ ñá túú nãndihí-xi —cächí-güedé xáhaⁿ-güedé xii-gá.

¹⁴ Te ní xáhaⁿ Jèsús:

—Cuèi cáháⁿ-í cuendá mée-í dico nãndihí tnúhu cáháⁿ-í. Chi yúhú nàha-í ndèe ichi véxi-í, te xiní-í ndèe ichi núhú-í, dico nchòhó chi ñá túú xiní-ndó ndèe ichi véxi-í, te ni ñà túú xiní-ndó ndèe ichi quíhíⁿ-í.

¹⁵ Te nchòhó chi cuendá-ni cáháⁿ-ndó cuendá ñáyiú núu quide váha-yu àdi ñá túú quide váha-yu. Te yúhú ñá túú cáháⁿ-í cuendá ñáyiú núu quide váha-yu àdi ñá túú quide váha-yu.

¹⁶ Àdi núu cáháⁿ-í dico ñⁿ tnúhu ndáá cáháⁿ-í chi ñá díú-ní mée-í cáháⁿ, chi tnàhá Tãtà-í Yaá ní tendaha ñaha xii-í véxi-í ñuyú-a cáháⁿ-gă chindèe tnúhu ñaha-gă xii-í.

¹⁷ Te tnúhu sá sánú ichi ñaha xii-ndo cachí-xi sá nūu na cùndecu úú cue téé cáháⁿ ndáá-güedé nàcuáa cùu ñⁿ sá cùndáá, te núu ñⁿ-ni tnúhu na cáháⁿ-güedé ndi ndúú-güedé te xiãⁿ nãndihí-xi, duha cächí tnúhu-áⁿ. ¹⁸ Te díu-ni ducaⁿ cùu-xi yúhú chi cáháⁿ-í ñⁿ tnúhu ndáá sá cùú-xi mée-í, te díu-ni dàtná cáháⁿ-í cáháⁿ Tãtà-í Yaá ní tendaha ñaha xii-í véxi-í ñuyú-a —cächí-gá xáhaⁿ-gă xii-güedé.

¹⁹ Te ní xáhaⁿ-güedé xii-gá:

—¿Te ndèe ndécú Tãtà-n-í? — cächí-güedé xáhaⁿ-güedé.

Te ní xáhaⁿ Jèsús:

—Te núu dicó xiní-ndó yòo cuu yúhú-á te ducaⁿ te quini-ndó Tãtà-í. Te ni yúhú ñá túú xiní-ndó yòo cuu-í nūu xiãⁿ ñá túú xiní-ndó Tãtà-í — cächí-gá xáhaⁿ-gă xii-güedé.

²⁰ Duha ní cáháⁿ Jèsús ñini dàcuaha-gá ñáyiú xití veñúhu núu ndécú àlcanciá díhúⁿ. Te vá yòo ñⁿ ni cùyi tñi ñaha xii-gá chi vátá sàá-gá òré tñi ñaha-güedé.

Ñáyiú ñá túú sàndáá iní ñáhá xii Jesús vá ndácú-yu quíhíⁿ-yu núú nùhú-gá cundecu-gá

²¹ Te ní xáhaⁿ tùcu Jesús xii-güedé:

—Yúhú nùhú-í te nanducu ñàha-ndo te vá nánihí ñáhá-ndó, te cuú-ndó núú yíca cuèchi-ndo, chi vá ndácú-ndó sáa-ndó núú nùhú-í cundecu-í —càchí-gá xáhaⁿ-gá xii-güedé.

²² Te ní xítàha cue téé isràél:

—¿Te náa cahni-dé méé-dé núu càchí-dé sá vá ndácú-ó sáa-ó núú quíhíⁿ-dé-ãⁿ? —càchí-güedé xítàha-güedé.

²³ Te ní xáhaⁿ Jèsús xii-güedé:

—Nchòhó chi cue téé ñuyíú-a cùu-ndo, núu ío ñùhu iní-ndó sá ío ñuyíú-a. Te yúhú chi téé núú ñnu cùu-í núu xíãⁿ ñá túú sá ío ñuyíú-a ñùhu iní-í. ²⁴ Te xíãⁿ núu càchí-í sá cùu-ndó núú yíca cuèchi-ndo, chi ñá cuiní-ndó quíndáá iní-ndó sá yúhú véxi cuuⁿ-í andíu, te núu xíãⁿ ñnu-ni núú yíca cuèchi-ndo cùu-ndó —càchí-gá xáhaⁿ-gá xii-güedé.

²⁵ Te ní xícáⁿ tnúhú-güedé núu-gá, te xáhaⁿ-güedé:

—¿Te ná cúu yòhó núu ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gá:

—Sa ní cachí tnúhu-í xii-ndo ndéé díhna —càchí-gá xáhaⁿ-gá xii-güedé.

²⁶ Te xáhaⁿ tùcu-gá:

—Ndècu cuéhé tnúhu càháⁿ-í cada ndáá-í cuendá nchòhó. Te Tàtá-í Yaá ní tendaha ñàha xii-í véxi-í ñuyíú-a càháⁿ-gá tnúhu ndáá, te tnúhu càháⁿ yúhú ñuyíú-a cùu-xi tnúhu ní càháⁿ-gá ní xíndedóho-í —càchí-gá xáhaⁿ-gá xii-güedé.

²⁷ Te mee-güedé ñá túú ní tècu tnùnì-güedé sá cuendá Dútú Ndiòxí ní càháⁿ Jèsús. ²⁸ Te ní xáhaⁿ-gá xii-güedé:

—Òré ná catá càa ñàha-ndo xii yúhú Téé cùu ñanì tnáhá-ndó nchàa-ndo núú cùrúxí cahni ñàha-ndo, te òré-áⁿ cutnùnì iní-ndó yòo cuu-í, te ñá túú quíde-í sá cúu iní méè-í, chi yúhú càháⁿ-í nàcuáa ní dánèhé ñáhá Tàtá-í ²⁹ Yaá ní tendaha ñàha xii-í véxi-í. Te ñnu-gá ndécú ndíhi ñàha-gá xii-í, te ñá

túú dàña nihnu ñàha-gá chi quíde-í nchaa nàcuáa cùu iní-gá —càchí-gá xáhaⁿ-gá xii-güedé.

³⁰ Te sá dúcáⁿ ñí càháⁿ-gá núu ío vài ñáyiú ní sàndáá iní ñáhá xii-gá.

Ñáyiú sàndáá iní ñáhá xii Yá Ndiòxí ndíhi ñáyiú ndècu ichi cuehé ichi duha

³¹ Te ní xáhaⁿ Jèsús xii ñáyiú isràél ñáyiú ní sàndáá iní ñáhá xii-gá:

—Te núu vá dáña ndèé-ndó càda-ndo nchaa nàcuáa càháⁿ-í, te cuu ndisa-ndo cuè téé tnáhá tnúhu ndíhi-í, ³² te tecú tnùnì-gá-ndó tnúhu ndáá, te ducaⁿ te cácu nihnu-ndo —càchí-gá xáhaⁿ-gá xii-yu.

³³ Te ní xáhãⁿ-yu:

—Nchúhú cúu-ndí cue ñanì tnáhá ndíhi Abrahám, te ni ñⁿ nduu ñá túú ndèé sácündedí nihnu-ndí ndoho tnáhá-ndí núu càchí-ò sá dàcácu nihnu ñàha-n xii-ndí —càchí-yu xáhãⁿ-yu xii-gá.

³⁴ Te ní xáhaⁿ Jèsús xii-yu:

—Na càchí tnúhu ndáá-í xii-ndo sá nchàa ñáyiú quíde nchaa sá cuéhé sá dúhá tàxi tnùnì ñáhá-ñá-xi xii-yu.

³⁵ Te cue ñáyiú xinu cuechi te vá cúu ñⁿ-ná cúu-yu ndíhi ñáyiú díi vèhe-xi xinu cuechí-yu, dico cue déhe ñáyiú díi vèhe-xi-án chi ñⁿ-ni cùu ndíhi ñàha-güexi xii-yu. ³⁶ Te núu yúhú Yaá cúu Dèhe Yá Ndiòxí dàcácu nihnu ñàha-í xii-ndo núu nchàa yíca cuèchi-ndo, te ndáá sá nchòhó cácu nihnu ndisa-ndo. ³⁷ Te yúhú sa xini-í sá nchòhó cúu-ndó ñanì tnáhá ndíhi Abrahám, te dicó-ni sá ñá tnáhá iní-ndó tnúhu càháⁿ-í núu xíãⁿ cuiní-ndó càhni ñàha-ndo. ³⁸ Te yúhú càháⁿ-í nàcuáa ní dánèhé ñáhá Tàtá-í, te nchòhó quíde-ndó nàcuáa càháⁿ tātá-ndó —càchí-gá xáhaⁿ-gá xii-yu.

³⁹ Te ní xáhãⁿ-yu:

—Ndíhi Abrahám cúu tātá-ndí —càchí-yu xáhãⁿ-yu xii-gá.

Te ní xáhaⁿ Jèsús:

—Núu ndisa ñanì tnáhá ndíhi Abrahám cúu-ndó, te cada-ndo nàcuáa ní xóo cada ndíhi ni cùu. ⁴⁰ Te yúhú cuèi càháⁿ-í ñⁿ tnúhu ndáá nàcuáa càháⁿ Yá Ndiòxí càchí tnúhu-gá xii-í, te cuiní-ndó càhni ñàha-ndo. ;Dico ndíhi

Àbrahám chi ñá túú dùcaⁿ ni quide ndíi! ⁴¹ Te nchòhó quidé-ndó nàcuáa quide tátá-ndó —càchí-gá xáhaⁿ-gá xií-yu.

Te ní xáhãⁿ-yu:

—Nchúhú, ñá túú yàyacáⁿ ndécú tátá-ndí, chi ñndíi Yá Ndiöxí cúú tátá-ndí —càchí-yu xáhãⁿ-yu xii-gá.

⁴² Te ní xáhaⁿ Jèsús:

—Núu dìcò Yá Ndiöxí ndisa cùu Tátá-ndó te cuu iní ñáhá-ndó xii-í ní cùu chi yúhú ní quee-í núú ndécú-gá véxi-í ñuyú-a. Te ñá túú véxi-í sá cúú iní méè-í, chi mee-gã ní tendaha ñaha-gá véxi-í. ⁴³ Te ñá túú tècú tnùn-ndó tnùhu càháⁿ-í chi ñá túú tnàhá iní-ndó. ⁴⁴ Te nchòhó chi tátá-ndó cùu yucu ñávãha núu cùdíi iní-ndó quide-ndo nchaa nacuáa cùu iní-xi, chi ndéé òré ní ngáva ñuyú ducaⁿ-ni ndècu-xi dacáhãⁿ-xi iní-ndó sàhni tnaha-ndo. Te ñá ñndúu càháⁿ-xi ñndúu tnùhu ndáá chi ñá túú xica-xi ichi ndáá, chi mee-ni ichi tnùhu ndehnde xica-xi chi ducaⁿ iní-xi. Te ñndúu-xi dàcahu-xi iní-ndó dàcuandehnde-ndo. ⁴⁵ Te yúhú càháⁿ-í tnùhu ndáá te ñá túú cuíní-ndó quindáá iní ñáhá-ndó. ⁴⁶ ¿Te ndèdacàa nchòhó xini-ndó sá quidé-í ñndúu sá cuèhé sá dúhá-í?, te yúhú ñá túú nã quidé-í chi càháⁿ ndáá-í, ¿te ná cuèndá ñá túú cuíní-ndó quindáá iní-ndó tnùhu càháⁿ-í? ⁴⁷ Te nchaa ñáyiu ndècu ichi Yá Ndiöxí, ñáyiu-án sácündedóho-yu nchaa tnùhu càháⁿ-gá. Te nchòhó chi ñá díú ichi Yá Ndiöxí ndécú-ndó núu ñá túú sácündedóho-ndo tnùhu càháⁿ-gá —càchí-gá xáhaⁿ-gá xií-yu.

Díhna-gá Crístú sa ndècu dacúúxí ndíi Àbrahám

⁴⁸ Te ní xáhaⁿ ñáyiu isràél:

—Váha-ni càháⁿ-ndí sá tée samaritánú cúú-n, te yucu ñávãha ndècu ndíi-n —cachí-yu xáhãⁿ-yu xii-gá.

⁴⁹ Te ní xáhaⁿ Jèsús:

—Yúhú, ñá túú yùcu ñávãha ndècu ndíi-í, chi Tátá-í quidé càhnu-í, te nchòhó da cùu úhú iní ñáhá-ndó xii-í —càchí-gá xáhaⁿ-gá xií-yu.

⁵⁰ Te xáhaⁿ tùcu-gá:

—Yúhú, ñá túú càchí-í sá cáda càhnu ñaha-ndo, dico Dútú Ndiöxí cuíní-gá sá cáda càhnu ñaha-ndo xii-í. Te mee-gã càháⁿ-gá núu ndèdacàa-ndo quide váha, te ndèdacàa-ndo ñá túú quide váha. ⁵¹ Te na càchí tnùhu ndáá-í xii-ndo sã nchaa ñáyiu na tníi tnùhu càháⁿ-í te vá cuíta nihnú-yu —càchí-gá xáhaⁿ-gá xií-yu.

⁵² Te ní xáhaⁿ tùcu ñáyiu isràél:

—Vitna te ní xiní ndáá-ndí sá yùcu ñávãha ndècu ndíi-n, chi ndíi Àbrahám ndíi nchaa cue tée ní xóo càháⁿ tnùhu Yá Ndiöxí ndéé sanaha ní xihí-güedé, te yòhó càchí-tu-n sã ncháá ñáyiu na tníi tnùhu càháⁿ-n te vá cúú-gá-yu. ⁵³ ¿Náa ío-gá càhnu cuu-ó dàcúúxí ñaní tnáhá-ndí ndíi Àbrahám-ãⁿ? Tée-án dai ní xihí-dé ndíi cue tée ní xóo càháⁿ tnùhu Yá Ndiöxí ndéé sanaha. ¿Te yòhó nágá-tu cùu-n te vá cúú-n càháⁿ-n-í? —cachí-yu xáhãⁿ-yu.

⁵⁴ Te ní xáhaⁿ Jèsús:

—Te núu dìcò méè-í quidé càhnu-í méè-í ñá, te ñá túú nandíi sá quidé-í núu ducaⁿ. Dico Tátá-í quidé càhnu ñaha-gá xii-í, te ñndúu-ni Yá-án càchí-ndó cùu Ndiöxí-ndó. ⁵⁵ Te nchòhó chi ñá túú xini-ndó-gã. Te yúhú chi xini-í-gá. Te núu na càchí-í sá ñá túú xini-í-gá te dàcuandehnde-í dàtná ndehnde mèe-ndo. Te yúhú chi xini ndisa-í-gá te tníi-í nchaa tnùhu càháⁿ-gá. ⁵⁶ Te ndíi Àbrahám ñaní tnáhá-ndó ní xindecu ndéé sanaha ío ní cudíi iní ndíi sá quini ñáhá ndíi xii-í, te ní sáá nduu ní xiní ñáhá ndíi xii-í núu ío ní cudíi iní ndíi —càchí-gá xáhaⁿ-gá xií-yu.

⁵⁷ Te ní xáhaⁿ ñáyiu isràél xii Jèsús:

—Ni vátá cùhúⁿ-gã-n ùdico úxí cuíá-n te càchí-n sã ní xiní-n ndíi Àbrahám, te ní cunaha vèhi ní xihí ndíi-án —càchí-yu xáhãⁿ-yu xii-gá.

⁵⁸ Te ní xáhaⁿ Jèsús:

—Te na càchí tnùhu ndáá-í xii-ndo sã cùmání-gã cundecu ndíi-án ñuyú-a te yúhú sa ndècu-gá-í —càchí-gá xáhaⁿ-gá xií-yu.

⁵⁹ Te sá dúcáⁿ ní càháⁿ-gá núu xiiⁿ ní quehéⁿ-yu yúú cuãha ñáhá-yu xii-gá

ní cùu, te ní nguívãha-gá núu-yu te ní quee-gá xití veñúhu cuáhã-gá.

9

Jèsús quidé tãtna-gã ìñ tée cuàá

¹ Te núú xicá cùu Jèsús ní naníhí-gã ìñ tée cuàá, te sa ducaⁿ tnàhí càa núú-dě ní cacu-dé. ² Te ní xáhaⁿ cuè tée xica cuu ndihí-gã xii-gá:

—Mèstrú, ¿ná cuendá dàcãⁿ cuàá tée-ãⁿ ní cacu-dé? ¿Sá cuendá nchaa yicá cuèchi tãtã-dě, ãⁿ sã cuendá nchaa yicá cuèchi nãná-dě, ãⁿ sã cuendá nchaa yicá cuèchi mee-dě dàcãⁿ cáá-dě ní cacu-dé? —càchí-güedé xãhaⁿ-güedé xii-gá.

³ Te ní xáhaⁿ Jèsús:

—Ni ñà díú sã cuendá nchaa yicá cuèchi mee-dě, te ni ñà díú sã cuendá nchaa yicá cuèchi tãtã-dě, te ni ñà díú sã cuendá nchaa yicá cuèchi nãná-dě, chi mee Yã Ndiõxí ní cuiní-gã sã dúcãⁿ cùnduu-dé sáá-dé ñuyíú-a cuendá sã ñuyíú-a quini ñáyiu nása cada ñaha Yã Ndiõxí xii-dé ndúha núú-dě. ⁴ Te vitna ió-gã nduu cùyica sã cáda-í nchaa chiuⁿ ní táhú Yãá ní tendaha ñaha xii-í véxi-í ñuyíú-a, chi sáá nduu te vá ndácú-gã-í cada-í chiuⁿ-gã. ⁵ Te ñini ndècu-gã-í ñuyíú-a te dândixi túu-í iní nchaa ñáyiu cuendá cutnùní iní-yu nãcuáa nduu cuendá Yã Ndiõxí —càchí-gã xáhaⁿ-gã xii-güedé.

⁶ Te sátá dúcãⁿ ñí cáháⁿ-gã, te ní satí-gã díí-gã núú ñúhú te ní dácã-gã luha ñuhu ní cuáha ndéhyú, te ndéhyú-ãⁿ ñí dácánù-gã ndúú xio núú tée cuàá-ãⁿ. ⁷ Te ní xáhaⁿ-gã xii-dé:

—Quíhíⁿ-n nãquete-n núú-n ndùte tanquí Silòé —càchí-gã xáhaⁿ-gã xii-dé. Te Silòé-ãⁿ quée-xí tnùhu mée-yu: Tée xica chiuⁿ.

Te ní sáhãⁿ tée cuàá-ãⁿ ñí naquete-dé núú-dě, te òré ní ndexio-dé te sa ndèhe-dé. ⁸ Te nchaa ñáyiu ndècu yatni núú ndécú-dě ndihí nchaa ñáyiu xìní ñáhã xii-dé núú xicãⁿ ndàhú-dé ní xitnãhá-yu:

—¿Náa ñá díú tée-ãⁿ ní xóo cácaⁿ ndàhú-dé? —càchí-yu xitnãhá-yu.

⁹ Te davá-yu càchí-yu sã díú-dě, te davá-yu càchí-yu sã ñà díú-dě, dico ducaⁿ càa-dé, càchí-yu xitnãhá-yu.

Dico mee-dě ní xáhaⁿ-dě xií-yu sã díú-dě.

¹⁰ Te ní xicãⁿ tnúhú-yu núú-dě, te xãhãⁿ-yu:

—¿Náa ní cuu núu ní ndúha núú-n ndèhe-n vitna? —càchí-yu xãhãⁿ-yu xii-dé.

¹¹ Te ní xáhaⁿ-dě:

—Tée nãni Jèsús-ãⁿ ní cadúha-dé luha ndéhyú te ní dácánù-dé núú-í, te ní táuchíúⁿ-dě ní sáhãⁿ-í tanquí Silòé ní naquete-í núú-í, te òré-ãⁿ ñí cuu cundehe-í —càchí-dé xáhaⁿ-dě xií-yu.

¹² Te ní xicãⁿ tnúhú tucú-yu núú-dě, te xãhãⁿ-yu:

—¿Te ndécú tée-ãⁿ? —càchí-yu xãhãⁿ-yu xii-dé.

Te ní xáhaⁿ-dě:

—Ná túú xìní-í —càchí-dé xáhaⁿ-dě xií-yu.

Cue tée cùu fariséú ndátnùhu-güedé ndihí tée ní ndúha núú-xi

¹³ Te ndèca-güedé tée ní ndúha núú-xi-ãⁿ cuáhãⁿ núú cuè tée cùu fariséú. ¹⁴ Te cuendá sã nduu ndetátú-yu ní cadúha Jèsús ndéhyú ñí dácánù-gã núú tée-ãⁿ te ní ndúha, ¹⁵ xiãⁿ nùu ní xicãⁿ tnúhú cuè tée cùu fariséú núú-dě, te xáhaⁿ-güedé:

—¿Náa ní cuu ní ndúha núú-n? —càchí-güedé xáhaⁿ-güedé xii-dé.

Te ní xáhaⁿ-dě xii-güedé:

—Íñ tée ní dácánù-dé ndéhyú núú-í te ní sáhãⁿ-í ní naquete-í, te ní cuu ndèhe-í vitna —càchí-dé xáhaⁿ-dě xii-güedé.

¹⁶ Te dava cue tée cùu fariséú ní xitnãhá-güedé:

—Ñá díú Yã Ndiõxí ní tendaha ñaha-gã xii tée-ãⁿ véxi-dé nùu duha quide-dé nchaa sã vã yõo tnàhí ndàcu cada, te ñá túú sãndáá iní-dé canehe íí-dě nduu ndetátú-ó —càchí-güedé xitnãhá-güedé.

Te dava-güedé ní xitnãhá-güedé:

—¿Náa ndacu-dé cada-dé sã vã yõo tnàhí ndàcu cada te núu cùu-dé tée yicá cuèchi? —càchí-güedé xitnãhá-güedé.

Te ñá túú ní cùu ìⁿnuu-güedé tnúhu ní cáháⁿ-güedé. ¹⁷ Te ní xí cáⁿ tnúhú tucu-güedé núú tée ní ndúha núú-xi-áⁿ, te xáhaⁿ-güedé:

—Te yòhó, ¿nása cächí-n cuendá tée ní quide tátna núú-n te ní ndúha? — cächí-güedé xáhaⁿ-güedé xii-dé.

Te ní xáhaⁿ-dë:

—Yúhú cächí-í sá ìⁿ tée cáháⁿ tnúhu Yá Ndiöxí cúú-dé —cächí-dé xáhaⁿ-dë xii-güedé.

¹⁸ Dico cue tée isràél ñá ní sàndáá iní-güedé sá cuàá-dé ní cùu, chi cuendá sa ní ndúha núú-dë ní xini ñáhá-güedé, te xíáⁿ núu ní cana-güedé tátá-dé ndihí náná-dé, ¹⁹ te ní xí cáⁿ tnúhú-güedé núú-yu, te xáhaⁿ-güedé:

—¿Diu tée-a déhe-ndo tée cächí-ndó cuàá-dé ní cacu-dé-áⁿ? ¿Te nása ní cuu ní ndúha núú-dë? —cächí-güedé xáhaⁿ-güedé xii-yu.

²⁰ Te ní xáhaⁿ tátá-dé ndihí náná-dé:

—Diu déhe-ndí cúú-dé te sa cuàá ndisa-dé ní cacu-dé, ²¹ dico ñá túú xini-ndí nása ní cuu ní ndúha núú-dë, te ni ñá túú xini-ndí yoo ní quide tátna. Chí cacaⁿ tnúhú núú mée-dé xíáⁿ núu sa sacuéhé-dé, te na cáháⁿ-dë núu nása ní cuu ní ndúha núú-dë —cächí-yu xáhaⁿ-yu xii-güedé.

²² Duha ní cáháⁿ tátá-dé ndihí náná-dé ní xáhaⁿ-yu xii-güedé cuendá sá yuhú-yu cue tée cunuú núú ñáyiú isràél, chi cue tée-áⁿ sa ní ndatnúhu-güedé ní cuu ìⁿnuu-güedé sá núu ndédacáa ñáyiú na cáháⁿ sá Jèsús cúú-gá Crístú Yaa ní tenda Yá Ndiöxí véxi ñuyíú-a, te vá dáhá-gá-güedé quíhu-yu veñúhu. ²³ Núu xíáⁿ ní xáhaⁿ tátá-dé ndihí náná-dé sá ná cacaⁿ tnúhú-güedé núú mée-dé chi sa sacuéhé-dé.

²⁴ Te xíáⁿ núu ní cana tucu-güedé tée ní ndúha núú-xi-áⁿ, te ní xáhaⁿ-güedé:

—Cáháⁿ-n ìⁿ tnúhu ndáá chi Yá Ndiöxí ndéhé ndí-gá nacuáa ní cuu ní ndúha núú-n, chi nchúhú xini-ndí sá dícó ìⁿ tée ndècu yíca cuéchi-xi cùu tée cächí-n ní quide tátna núú-n —cächí-güedé xáhaⁿ-güedé xii-dé.

²⁵ Te ní xáhaⁿ-dë:

—Yúhú, ñá túú xini-í te núu tée ndècu yíca cuéchi-xi cùu-dé àdi ñáhá.

Dícó-ni sá xini-í sá cuàá-í ní cùu te vitna ní cuu cundehe-í —cächí-dé xáhaⁿ-dë xii-güedé.

²⁶ Te ní xí cáⁿ tnúhú tucu-güedé núú-dë, te xáhaⁿ-güedé:

—¿Nása ní quide ñaha-dë xii-n te ní ndúha núú-n-í? —cächí-güedé xáhaⁿ-güedé xii-dé.

²⁷ Te ní xáhaⁿ-dë:

—Yúhú sa ní cáháⁿ-í te ñá túú quide cuendá-ndó. ¿Te ná cuendá cuini-ndó cächí tnúhu-ni tucu-í? ¿Á tnahá-ndó cuini-ndó quindáá iní-ndó tñhu cáháⁿ-dë? —cächí-dé xáhaⁿ-dë xii-güedé.

²⁸ Te ní cudééⁿ-güedé núú-dë, te ní xáhaⁿ-güedé xii-dé:

—Te núu yòhó cuini-n chinchícúⁿ-n tée-áⁿ te cuaháⁿ, dico nchúhú chi canchícúⁿ nihnu nahi-ni-ndí nacuáa ní cáháⁿ ndí Moisés. ²⁹ Te nchúhú chi ñaha-ndí sá Yá Ndiöxí ní cáháⁿ ndihí-gá ndí Moisés, dico tée cächí-n-áⁿ chi ni ñá túú xini-ndí ndéé tée cùu-dé —cächí-güedé xáhaⁿ-güedé xii-dé.

³⁰ Te ní xáhaⁿ tée ní ndúha núú-xi-áⁿ:

—¿Te náa ñá díú nchòhó cächí-ndó sá ío túha-ndo? Te núu ducaⁿ cáháⁿ-ndó sá ñá túú xini-ndó ndéé tée cùu-dé, te diu-dé ní quide tátna-dé núú-í ní ndúha —cächí-dé xáhaⁿ-dë xii-güedé.

Te xáhaⁿ tucu-dé:

³¹ —Xini-ó sá Yá Ndiöxí ñá túú tédóho-gá tnúhu cáháⁿ ñáyiú quide nchaa sá cuéhé sá dúhá, chi nchaa ñáyiú quide cahnu ñaha xii-gá te quidé-yu nchaa nacuáa cùu iní-gá, te ñáyiú-áⁿ tédóho-gá tnúhu cáháⁿ-yu.

³² Te ñá ìⁿ ndùu cáháⁿ ñáyiú cuendá ìⁿ tée cada tátna núú ìⁿ ñáyiú cuàá ndéé ní cacu-xi te ndúha. ³³ Te núu ñá díú mèe Yá Ndiöxí ní tenda ñaha-gá xii tée-áⁿ véxi-dé ñá, te vá ndácú-dé cada tátna-dé núú-í ní cùu —cächí-dé xáhaⁿ-dë xii-güedé.

³⁴ Te ní xáhaⁿ-güedé:

—Dico yòhó ndéé yatni vèi cuéchi sa ta quide-n véxi, ¿te vitna nacanu ichi ñaha-n xii-ndí cáháⁿ-n-áⁿ? —cächí-güedé xáhaⁿ-güedé xii-dé.

Te ní queñuhu ñaha-güedě xii-dé tnuú-güedé ñá túú ní ðaña-gá-güedé níhí tnáhá ndìhì ñaha-dé xii-güedé.

Ñáyiú ñá túú ndìxi túú iní cuendá nchaa sá cuèhé sá dúhá quidé-yu

³⁵ Te ní níhí Jèsús tnúhu sá ñí queñuhu-güedé téé ní cuhú núú-xi-áⁿ tnuú-güedé cuendá sá vǎ tnáhá tnúhu ndìhì ñaha-gǎ-dé xii-güedé, te ní naníhí ñáhá-gǎ xii-dé te ní xáhaⁿ-gǎ:

—¿Sàndáá iní-n Dèhe Yá Ndiõxí-ǎⁿ? —càchí-gá xáhaⁿ-gǎ.

³⁶ Te ní xáhaⁿ tée ní cuhú núú-xi-áⁿ; —Mèstrú, cachí tnúhu núu ndèé ndécú tée-áⁿ cuendá quíndáá iní-í-dé —càchí-dé xáhaⁿ-dě xii-gá.

³⁷ Te ní xáhaⁿ Jèsús: —Sa xìní-n-dě chi ðu-dé cúú yùhú téé ndàtnúhu ndìhì-n —càchí-gá xáhaⁿ-gǎ xii-dé.

³⁸ Te ní ngüíñí xítí-dě núú-gǎ, te ní xáhaⁿ-dě:

—Xítóhó Jesucristú, sàndáá iní ñáhá-í xii-n —càchí-dé xáhaⁿ-dě xii-gá.

³⁹ Te ní xáhaⁿ tùcu Jèsús: —Yúhú véxi-í ñuyíú-a cada ndáá-í cuéchi ñáyiú. Te nchaa ñáyiú ñá túú quíde váha cùú-yu ðàtná ìⁿ ñáyiú cuàá, dico nchaa ñáyiú cùtnuní iní-xi sá ñà túú quíde váha, te núu na quíndáá iní-yu tnúhu càháⁿ-í, te cada iní-ndó sǎ ðàtná sá ñí nacaáⁿ núú-yu chi tní-yu tnúhu càháⁿ-í. Te ñáyiú càchí sá quíde váha vá núu núu-yu cuéchi-yu chi quesàhá-yu sá ìo ndáá quídě-yu, ñáyiú-áⁿ cúú-yu ðàtná ìⁿ ñáyiú cuàá, chi vá ndíxí tũu iní-yu sá ñà túú quíde váha-yu ndécú-yu, te vá tní-yu tnúhu càháⁿ-í —càchí-gá xáhaⁿ-gǎ xii-dé.

⁴⁰ Te sá dúcáⁿ ñí càháⁿ-gá, núu ní càháⁿ ìⁿ úú cue téé cùu fariséú, te xáhaⁿ-güedé:

—¿Te náa tnáhá nchúhú cuàá-ndí càháⁿ-n-ǎⁿ? —càchí-güedé xáhaⁿ-güedé xii-gá.

⁴¹ Te ní xáhaⁿ Jèsús: —Te núu ðicó nchòhó cuàá-ndó ñá, te vá cùndècu cuéchi-ndo ni cùu, dico càchí-ndó sǎ ndéhé-ndó ìⁿ sá

quídé-ndó te ñá ndáá, núu xǎⁿ ìo ndècu cuéchi-ndo.

10

Jèsús càháⁿ-gá cuendá cùrrálí mběé

¹ Te na càchí tnúhu ndáá-í xii-ndo sǎ ìⁿ tée ñá túú quíhu ndáa yuyehe ìⁿ currálí mběé, te cùtexínu-ni na cuidó-dé, tée-áⁿ cúú-dě ñádúhú. ² Dico téé quíhu ichi yèhe currálí-güedi, tée-áⁿ cúú-dě xítóhó-güedi. ³ Te téé ndèé yèhe currálí-güedi nacaáⁿ-dé te cuánguihu xítóhó-güedi te ní càháⁿ-dé, te ní nucúhuⁿ ndudú ñáhá-güedi xii-dé. Te ní càháⁿ díú-dě-güedi te ní queñuhu-dé-güedi cùrrálí. ⁴ Te sáta ñí quee-güedi cùrrálí, te ní ngódó núú-dě núú-güedi, te ní ngüíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi. ⁵ Te ñá túú chinchicúⁿ-güedi ìⁿ tée tàtú, chi núcúhuⁿ ndudú-güedi sá ñà díú xítóhó-güedi cùu-dé, núu xǎⁿ xínú-güedi núú-dě —càchí-gá xáhaⁿ-gǎ xii-güedé.

⁶ Duha ní càháⁿ Jèsús cuendá sá cuíní-gá dacuàhá-yu tnúhu-gá ní cùu, dico ñá ní tècú tnùní-yu nása ndùu tnúhu ní càháⁿ-gá.

Jèsús cúú-gǎ ðàtná ìⁿ toli

⁷ Te ní xáhaⁿ tùcu Jèsús xii-güedé: —Na càchí tnúhu ndáá-í xii-ndo sǎ yùhú cúú-í ðàtná ìⁿ yèhe currálí núú ndíhu cue mběé. ⁸ Te nchaa cue téé sa yòdo nuu-gá ní quixi ní dándàhú-güedé ñáyiú cùu-güedé ðàtná ñádúhú dùhu-güedé cue mběé ní cùu, dico ñá ní quíde cuendá ñáhá-güedi xii-güedé, chi ní cutnùní iní-güedi sá ñà díú xítóhó-güedi cùu-güedé. ⁹ Te yùhú cúú-í ðàtná yuyèhe currálí cue mběé. Te ducaⁿ sǎtnahá-xi cùu-í chi nchaa ñáyiú na tũha ñaha xii-í te naníhí tàhú-yu. Te cùú-yu ðàtná cue mběé quítí xíquee cùrrálí-xi cuàháⁿ-güedi núú cáá ité caxi-güedi, te ðàtnùní cuándihu-ná-güedi cùrrálí, ducaⁿ sǎtnahá-xi cùú-yu.

¹⁰ Ñádúhú òré véxi-dé chi dùhu-dé, sàhni-dé te dànaa-dé mběé, dico yùhú chi véxi-í cuendá sá naníhí tàhú-ndó

te ío cudíí ìní-ndó cùnu cuechi-ndo núú Dútú Ndiõxí ni caa ni quíhíⁿ.

11 Te yúhú cùu-í dàtná ìⁿ toli téé ío nèhe cuendá mbéé-xi, chi téé-áⁿ cuéi na cùu-dé sá cùu-xí mbéé-dé cuendá-ná sá ná cäcu-güedi. 12 Te núu ìⁿ téé na còto ñaha xii-güedi, te téé-áⁿ cuendá-ni sá ñúhú yähu-dé xító-dé-güedi. Te núu na quíni-dé sáá ìⁿ quiti dééⁿ te dàña-dé-güedi xìnu-dé, te ndìhi-güedi xité nuu ñaha quiti dééⁿ-áⁿ, chi ñá díú mèi xítóhó-güedi cùu-dé. 13 Chi cuendá-ni sá ñúhú yähu-dé xító-dé-güedi núu ñá túú ná ndìhú iní-dé cuéi na dàndìhi ñaha quiti cuihna. 14 Te yúhú cùu-í dàtná ìⁿ téé ío váha xito mbéé-xi, chi téé-áⁿ da ìⁿ da ìⁿ-di xìní-í-dé nàcuáa ndáa-di, te ducaⁿ xìní ñáhá-güedi xii-dé. Te ducaⁿ sätnahá-xi cùu yúhú ndìhi nchaa ñáyiu sàndáá iní ñáhá xii-í, chi yúhú xìní-í-yu te ducaⁿ mèé-yu xìní ñáhá-yu xii-í.

15 Te díu-ni ducaⁿ cùu-í ndìhi Tàtà-í, chi xìní ñáhá-gä xii-í te xìní-í-gá. Te sáá nduu cùu-í cuendá nchaa ñáyiu sàndáá iní ñáhá xii-í. 16 Te ndècu-gá ñáyiu vátá quíndáá iní ñáhá-gä xii-í. Te xìní ñuhu-xi cundedóho-yu tnúhu-í te quíndáá iní ñáhá-yu cuendá ìⁿ-ná ichí cuú-yu, te ducaⁿ cùndecu ìⁿ-ná téé coto ñaha xii-yu cuu-dé dàtná ìⁿ tòlí-yu, te téé coto ñaha xii-yu-áⁿ cúu yúhú.

17 Te Tàtà-í ío cudíí ìní ñáhá-gä xii-í cuendá sá sáá ìⁿ nduu te cuú-í, te cuú-í chi ducaⁿ cächí iní-í, te ñá díú sá cúu ìní ñáyiu ñuyíú-a cuú-í, te cuú-í dico ndoto-í. 18 Te vá yóo ìⁿ te ndacu cahni ñaha xii-í, te núu ñá díú sá cúu ìní mèé-í cuú-í. Te dàtná-ni cùu iní-í sá cùu-í te díu-ni ducaⁿ ndòto-í chi ducaⁿ ñí cachí Tàtà-í Dútú Ndiõxí cunduu — cächí-gá xáhaⁿ-gä xii-güedé.

19 Te sá dúcáⁿ ñí cáháⁿ-gá te ñá ní cùu ìⁿnuu tucu ñáyiu isràél. 20 Te davá-yu ní xítñahá-yu: —¿Ná cuendá sàndáá-tu iní-ndó tnúhu cáháⁿ téé-áⁿ, te yucu ñávähá ndècu ndìhi-dé, lúcú téé-áⁿ? — cächí-yu xítñahá-yu.

21 Te davá-yu ní xítñahá-yu:

—¿Ná cuendá sàndáá-tu iní-ndó tnúhu cáháⁿ téé-áⁿ, te yucu ñávähá ndècu ndìhi-dé, lúcú téé-áⁿ? — cächí-yu xítñahá-yu.

21 Te davá-yu ní xítñahá-yu:

—¿Náa xìní-ndó ìⁿ téé ndècu ndìhi yucu ñávähá duha váha cáháⁿ-dé? ¿Náa xìní-ndó núu ndàcu yucu ñávähá cada tátña-xi núu ìⁿ téé cuáá te ndúha? —cächí-yu xítñahá-yu.

Ñáyiu isràél dáquèe tíhü-yu Jèsús

22 Te ndi tnahá cuía ndádá cahnú-yu vico veñúhu cahnú sá ío cùnuu ñúú Jerusàlén, te mei yóo quidé vixiⁿ-xi quidé-yu vico-áⁿ. 23 Te corrèdór veñúhu-áⁿ nání-xí Sàlomón, te xíáⁿ xícá cùu Jèsús. 24 Te ní chítú níhnú ñáyiu isràél núu-gä, te ní xáháⁿ-yu:

—¿Ná ndéé òré cachí tnúhu ndááⁿ, te núu sá Crístú Yáá ní tendaha Yá Ndiõxí véxi ñuyíú-a cùu-n, àdi ná téé cùu-n?, cáháⁿ-ni-n —cächí-yu xáháⁿ-yu xii-gá.

25 Te ní xáháⁿ Jèsús:

—Sa ní cachí tnúhu-í te ñá sàndáá iní-ndó, te ndèhe-ndo sá vái núú sá quidé-í sá ñí táuchíúⁿ Tàtà-í cada-í, te cùu-xi ìⁿ sá cútnùní iní-ndó ná téé cùu-í. 26 Dico nchòhó ñá sàndáá iní-ndó, chi ñá túú cùu-ndo ñáyiu ní chitnahá ñáhá xii-í. 27 Chi nchaa ñáyiu ní chitnahá ñáhá xii-í cùu-yu dàtná cue mbéé quiti xíndecu ndìhi xítóhó-xi chi núcúhuⁿ ndudú-güedi xítóhó-güedi, te ducaⁿ nàquiní ñáhá-ní xítóhó-güedi xii-güedi. Ducaⁿ sätnahá-xi cùu nchaa ñáyiu ní chitnahá ñáhá xii-í. 28 Te yúhú cada-í te nduu táhü-yu cundecu ndìhi ñáhá-yu xii-í ni caa ni quíhíⁿ te vá ìⁿ ndùu-gá cuíta nihnú-yu, te ni vá yóo ìⁿ ndacu naquendeé ñáhá xii-yu ndaha-í. 29 Chi Tàtà-í ní taxi cuendá ñáhá-gä xii-yu. Te ío cùnuu-gá núu xíáⁿ vá yóo ìⁿ ndacu naquendeé ñáhá xii-yu ndaha-gá. 30 Yúhú ndìhi Tàtà-í Dútú Ndiõxí ìⁿ-ni cùu-ndí —cächí-gá xáháⁿ-gä xii-yu.

31 Te ní queheⁿ tucu ñáyiu isràél yúú cuáha ñáhá-yu xii-gá ní cùu.

32 Te ní xáháⁿ-gä xii-yu:

—Ío cuéhé sá váha ní quide-í núu-ndó ñí chindee ñaha Tàtà-í Dútú Ndiõxí. ¿Te ndèdacáa sá ñá tñahá iní-ndó núu cùní-ndó cuáha ñaha-ndo yúú xii-í-í? —cächí-gá xáháⁿ-gä xii-yu.

³³ Te ní xáhaⁿ ñáyiú isràél:

—Ñá díú cuèndá nchaa sá vǎha ni quide-n cuini-ndí cuáha ñaha-ndí yúú xii-n, chí ìⁿ dìi-ni sá ìo càháⁿ úhú-n cuèndá Yǎ Ndiǒxí. Te dícó ìⁿ téé ñuyíú-a cùu-n te càchí-n sá cúú-n Ndiǒxí —càchí-yu xǎhǎⁿ-yu xii-gá.

³⁴ Te ní xáhaⁿ Jèsús:

—Núú tütú Yǎ Ndiǒxí sá ndécú ndìhi-ndo càháⁿ-xi nàcuáa ní càháⁿ-gá, te duha ní cachí-gá: “Nchòhó quidé-ndó nǔù-í”, duha ní cachí-gá. ³⁵ Te nàha-o sá vǎ cúú quèhndé nihnu-o tnùhu yòdo tnuní núú tütú Yǎ Ndiǒxí, chí mee-gǎ ní cachí-gá sá cádá-yu núú-gǎ, te vǎ càchí-ó sǎ ñǎ ndàá. ³⁶ Te núú ducaⁿ ní càháⁿ-gá sá nǔú-gǎ quidé nchàa ñáyiú ní sándáá iní ñáhá xii-gá ñá, ¿te ná cuèndá cúdeéⁿ-ndó nǔú yǔhú sá càchí-í sá cúú-í Déhe-gá? Te mee Yǎ Ndiǒxí ní tendaha ñàha-gá xii-í véxi-í ñuyíú-a sá cádá-í chiúⁿ-gá. ³⁷ Te núú ñá túú quide-í nàcuáa ní táuchíúⁿ Tǎtà-í cada-í ñá, te vǎ quèndáá iní ñáhá-ndó. ³⁸ Te núú quide-í ñá, te cuèi vǎ quèndáá iní ñáhá-ndó xii mee-í dico quèndáá iní-ndó nchàa chiúⁿ quide-í. Ducaⁿ te cutnùní ndáá iní-ndó sǎ Yǎ Ndiǒxí ndécú ndìhi-í te ìⁿ-ni cùu-ndí —càchí-gá xáhaⁿ-gǎ xií-yu.

³⁹ Te ní cuini-güedé tni ñaha tucu-güedé xii-gá quíhíⁿ-gá vecaá ní cùu, dico ní xinu núú ñáhá-gǎ xii-güedé.

⁴⁰ Te ní xica-gá cuáháⁿ-gá ndàa ingá xio yúte Jòrdán núú ní xóo dacuàndute ndí Juáá ñáyiú ndéé díhna, yàcáⁿ ní xindecu-gá. ⁴¹ Te yàcáⁿ ío vǎi ñáyiú ní sáháⁿ ní càháⁿ ndìhi ñaha xii-gá, te ní xitnàhá-yu:

—Ndí Juáá, cuèi ñá túú ní quide ndí sá vǎ yòo tnàhí ndàcu cada dico ndáá ní càháⁿ ndí, chí dàtná-ni ní càháⁿ ndí quide téé-a —càchí-yu xitnàhá-yu.

⁴² Te yàcáⁿ ío vǎi-yu ní sándáá iní ñáhá-yu xii-gá.

11

Ní xíhí té Lǎzarú

¹ Nnú Bètaniá ní xindecu ìⁿ téé ní xínani-dé Lǎzarú. Te càhú víhí ní tnàhá-dé ní cuhú-dé, te ní xindecu ndìhi-dé cue cúha-dé tá Màriá ndìhi tá Màrta chí xíáⁿ ñúú-yu. ² Te tá Màriá-án cúú-xí xíchí ní sódo àcítí sáháⁿ tnámí sáhá Jèsús, te ní nadayìchí-xi sáhá-gǎ ndìhi idi díquí-xi. Te cuèndá sá cùhú cúha-yu té Lǎzarú, ³ núú ní tendàhá-yu ñáyiú nàha tnùhu cuáháⁿ núú Jèsús, te xǎhǎⁿ-yu xii-gá:

—Mèstrú, téé ío cùu iní-n ío càhú tnàhá-dé cùhú-dé —càchí-yu xǎhǎⁿ-yu xii-gá.

⁴ Te sá dúcáⁿ càa tnùhu ní sáá, núú ní xáhaⁿ Jèsús xií-yu:

—Dico cuéhé-ǎⁿ chí vǎ cúú-dé sá cúú dúcáⁿ-dé, chí Yǎ Ndiǒxí cuini-gá sá quini-yu nchaa sá cádá-gǎ cuèndá chiñuhu ñáhá-yu xii-gá, te diu-ni ducaⁿ chiñuhu ñáhá-yu xii yúhú Déhe-gá —càchí-gá xáhaⁿ-gǎ xií-yu.

⁵ Te cuèi ío cùu iní ñáhá Jèsús xii té Lǎzarú ndìhi cue cúha-dé ⁶ dico òré ní níhí-gǎ tnùhu, te ní cuyaa-gǎ úú-gǎ nduu núú ndécú-gǎ. ⁷ Te ní xáhaⁿ-gǎ xii cue téé xica cuu ndìhi-gá:

—Na quíhíⁿ tucu-o dìstrítú Jùdeá —càchí-gá xáhaⁿ-gǎ xii-güedé.

⁸ Te ní xáhaⁿ cuè téé xica cuu ndìhi-gá xii-gá:

—Mèstrú, vitna-ni cuini cue téé isràél xindecu yàcáⁿ cuáha ñaha-güedé xii-n yúú ní cùu, ¿te cuini-ni tucu-n quíhíⁿ-n-ú? —càchí-güedé xáhaⁿ-güedé xii-gá.

⁹ Te ní xáhaⁿ Jèsús:

—Úxúú òré cúú ìⁿ nduu, te núú nduu na càca cuu-o, te ñá túú nǎ candaundeé-ó chí cutnùní núú-ó chí dító. ¹⁰ Dico núú niú ná càca cuu-o, te ío ná candaundeé-ó chí vǎ cutnùní núú-ó —càchí-gá xáhaⁿ-gǎ xii-güedé.

¹¹ Te ní xáhaⁿ Jèsús:

—Té Lǎzarú téé ío váha tnàhá tnùhu ndìhi-o ní xídí-dé dico quíhíⁿ-ó chí ndocani-o-dé —càchí-gá xáhaⁿ-gǎ xii-güedé.

¹² Te ní xáhaⁿ-güedé xii-gá:

—Mèstrú, te núú xídí-dé te vǎa sa ta ndùha-dé cuáháⁿ —càchí-güedé xáhaⁿ-güedé xii-gá.

13 Duha ní cáháⁿ Jèsús, chi té Lăzarú sa ní xíhí-dé te cue tée xica cuu ndihí-gá ní sani iní-güedé sá nǐ xídí ndisa-dé. 14 Te Jèsús ní xáhaⁿ ndáá-gá xii-güedé:

—Sa ní xíhí té Lăzarú. 15 Váha-gá sá ñǎ ní sǎháⁿ-í quíngoto-í-dé, chi ndècu ingá chiúⁿ cada-í quini-ndó, te quíndáá iní ñáhá-gǎ-ndó xii-í, te vitna na quíhíⁿ-ó núú ndécú yìqui cuñú ndí —càchí-gá xáhaⁿ-gǎ xii-güedé.

16 Te té Mǎxí tée xáhaⁿ-güedé cuáchí ní xáhaⁿ-dè xii dava-gá-güedé:

—Na quíhíⁿ-ó nchàa-o chi yàcáⁿ cuú-ó ndihí-dé —càchí-dé xáhaⁿ-dè xii-güedé.

Jèsús càháⁿ-gá sá cuèi na cùú ñáyiu dico ndotó-yu cundécú-yu ndihí-gá

17 Te òré ní sáá Jèsús ñuú Bètaniá, te ní xáháⁿ-yu sá sà ní cuu cúmí nduu ní xíhí té Lăzarú. 18 Te ñuú-áⁿ cáá yàtni-ni-gá ñuú Jerusàlén, dàtná cuádava-ná òré cuhuⁿ-o ìchi te saá-ó. 19 Núú xǎⁿ vǎi ñáyiu isràél ní sáháⁿ-yu ní cáháⁿ ndihí-yu tá Mǎrta ndihí cúhú-xi tá Màriá, te ní sǎñáhá-yu tnúhu ndee ìní sá dúcáⁿ nǐ xíhí cúha-yu. 20 Te ní níhí tǎ Mǎrta tnúhu sá ñúhú Jèsús ichi cuáháⁿ-gá núú ndécú-yu núú ní sáháⁿ-xi ní sátnahá-xi-gá, te cúhú-xi tá Màriá ní ndóo-xi vehe. 21 Te òré ní naníhí tǎ Mǎrta Jèsús, te ní xáhaⁿ-xi xii-gá:

—Mèstrú, te núú dicó ní xǐndecu-n ìha te vá cùú cúha-ndí ní cùu. 22 Te cuèi vitna te núú ná sá ná càcáⁿ-n núú Yǎ Ndiòxí te taxi-gá xii-n —càchí-xi xáhaⁿ-xi xii-gá.

23 Te ní xáhaⁿ Jèsús:

—Vá ndihú iní-n chi ndoto cúha-n —càchí-gá xáhaⁿ-gǎ xii-xi.

24 Te ní xáhaⁿ tǎ Mǎrta:

—Ndáá chi sa xini-í sá ndótó-dè ná quítnahá nduu ndòto nchaa ñáyiu ní xíhí —càchí-xi xáhaⁿ-xi xii-gá.

25 Te ní xáhaⁿ Jèsús:

—Yúhú dandòto-í-yu cuèndá cundécú-yu ni caa ni quíhíⁿ ná sàá nduu. Te nchaa ñáyiu na quíndáá iní ñáhá xii-í, te cuèi na cùú-yu dico ndotó-yu cundecu-í ndihí-yu ni caa ni quíhíⁿ.

26 Te nchaa ñáyiu ndècu vívú ñuyíú-a te núu na quíndáá iní ñáhá-yu xii-í, te cundecu ndihí-í-yu ni caa ni quíhíⁿ. ¿Sàndáá iní-n tnúhu-a ñǎ? —càchí-gá xáhaⁿ-gǎ xii tá Mǎrta.

27 Te xáhaⁿ-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yǎ Ndiòxí, Yaá ní tendaha-gǎ véxi ñuyíú-a —càchí-xi xáhaⁿ-xi xii-gá.

Jèsús ndàhí-gá núú nǐ nguíndüxi té Lăzarú

28 Sátá dúcáⁿ nǐ cáháⁿ-xi te ní sáháⁿ ngana-xi cúhú-xi tá Màriá, te dayuhu ní xáhaⁿ-xi:

—Yàcáⁿ ní quexìo Mèstrú, te càna ñaha-dé xii-n —càchí-xi xáhaⁿ-xi.

29 Te sá dúcáⁿ xáhaⁿ cúhú tǎ Màriá sá cáná ñàha Jèsús xii-xi, núu ndihí-ni ní xica-xi cuáháⁿ-xi núú ndécú-gǎ. 30 Te Jèsús vátá quíhu-gá xití ñuú, chi ndècu-ni-gá núú nǐ sáháⁿ tnahá ñáhá tǎ Mǎrta. 31 Te ñáyiu isràél ndécú sǎnhaha tnúhu ndee ìní xii tá Màriá ndihí cúhú-xi ní sani iní-yu sá cuáháⁿ-xi núú yíndüxi cúha-xi ndáhyú-xi ní cáháⁿ-yu, núu nchìcúⁿ-yu-xi cuáháⁿ.

32 Te ní sáá tá Màriá núú ndécú Jèsús te ní nguíñí xití-xi núú-gǎ, te xáhaⁿ-xi xii-gá:

—Mèstrú, te núú dicó ní xǐndecu-n ìha te vá cùú cúha-ndí ní cùu —cachí-xi xáhaⁿ-xi xii-gá.

33 Te sá nǐ xiní Jèsús ndáhyú tá Màriá ndihí ñáyiu isràél nchìcúⁿ ñáhá cuáháⁿ, xǎⁿ ío ní cuyica ìní-gá. 34 Te ní xáhaⁿ-gǎ xii-yu:

—¿Ndèé ní taxi ndecu-ndo yìqui cuñú-dé-i? —càchí-gá xáhaⁿ-gǎ xii-yu.

Te ní xáháⁿ-yu:

—Mèstrú, néhé ná quíhíⁿ-ó te quini-n —càchí-yu xáháⁿ-yu xii-gá.

35 Te ní ndáhyú-gá tnahá-gá. 36 Te ní xitnàha ñáyiu isràél:

—Súúni cùu iní-dé ndí ni cùu —cachí-yu xitnàhá-yu.

37 Te davá-yu xitnàhá-yu:

—Tée-a ní quide tátna-dé núú tée cuáá te ní ndúha. ¿Te nása ní cuu núu ñá túú ní quide tátna-dé té Lăzarú

cuendá sá vǎ cùu-dé ní cùu-i? — cachí-yu xǐtnàhá-yu.

Jèsús dándòto-gá té Lǎzarú

³⁸ Te ío ní cuyica tucu iní Jèsús òré ní quexìo-gá yuhu yàú núú nǐ chihi-güedé yiqui cùnú té Lǎzarú. Te yuhu yàú-áⁿ ndèdí ìⁿ yúú. ³⁹ Te ní xáhaⁿ Jèsús xií-yu:

—Chí xócàni yúú-ǎⁿ —càchí-gá xáhaⁿ-gǎ xií-yu.

Te ní xáhaⁿ tǎ Mǎrta cúha téé ní xǐhí-áⁿ:

—Mèstrú, sa tucu sàháⁿ-dé chi sa ní cuu cúmí nduu sá nǐ xǐhí-dé —càchí-xi xáhaⁿ-xi xǐ-gá.

⁴⁰ Te ní xáhaⁿ Jèsús:

—¿Náa ñá díú nǐ cachí-í sá nǔu na quíndáá iní-n, te quíni-n sǎ ìo càhnu cuu Yá Ndiòxí? —càchí-gá xáhaⁿ-gǎ xǐ-xi.

⁴¹ Te ní xócáni-yu yúú ndèdí yuhu yàú-áⁿ. Te ní ndacoto-gá andi, te ní xáhaⁿ-gǎ xǐ Tǎtá-gǎ Dútú Ndiòxí:

—Táu, ndàcáⁿ táhù-í núú-n sǎ nǐ tédoho-n tnúhu ní cáháⁿ-í. ⁴² Te yúhú sa nàha-í sá ncháá-ni òré ndèdóho ñaha-n xǐ-í, dico duha càháⁿ-í cuendá sá ná tècú dóho nchaa ñáyiú ndècu iha cuendá quíndáá iní-yu sá díú-n nǐ tendaha ñaha-n xǐ-í véxi-í ñuyíú-a —càchí-gá xáhaⁿ-gǎ xǐ Dútú Ndiòxí.

⁴³ Te sátá dúcáⁿ nǐ cáháⁿ-gá ndihí Yá Ndiòxí, te níhi ní cáháⁿ-gá xáhaⁿ-gǎ xǐ téé ní xǐhí-áⁿ:

—¡Lǎzarú, tandèe xǐáⁿ! —càchí-gá xáhaⁿ-gǎ xǐ-dé.

⁴⁴ Te ní ndee téé ní xǐhí-áⁿ yaú-áⁿ, te ndùtu dóó cuíñí ndàha-dé ndihí sáhá-dé, te dàhu tucu ìⁿ dóó nǔú-dé. Te ní xáhaⁿ Jèsús xií-yu:

—Chí nándàxi-dé te dañà-ndo-dé ná cáca-dé —càchí-gá xáhaⁿ-gǎ xií-yu.

Ndùcu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

⁴⁵ Te nchaa ñáyiú nchìcúⁿ ñáhá xǐ tǎ Màriá cuáháⁿ ío vaí-yu ní sándáá iní-yu Jèsús sá nǐ xiní-yu nàcuáa ní quide-gá. ⁴⁶ Dico davá-yu ní sáháⁿ-yu núú cuè téé cùu fariséú, te ní caní-yu cuendú núú-güedé nàcuáa ní quide Jèsús. ⁴⁷ Te cue téé cùu fariséú ndihí

cue dútú cúnùu ní natacá-güedé ní xóo-güedé jùndá, te ní xǐtnàha-güedé:

—¿Nása cada-o?, chi téé-ǎⁿ ío vaí sá vǎ yóo tnàhí ndàcu cada quide-dé.

⁴⁸ Te núu na dàña ío te nchaa ñáyiú quíndáá iní ñáhá-yu xǐi-dé, te quixi cue téé ñuú Rómá dangoyo-güedé veñúhu-o te danàa-güedé nchaa ñuú-ó —càchí-güedé xǐtnàha-güedé.

⁴⁹ Te ìⁿ cue téé-áⁿ nání-dé Caifás, te cùnùu-gá-dé núú dàva-gá cue dútú cuíá-ǎⁿ, te ní xáhaⁿ-dé xǐi-güedé:

—Nchòhó ni lùha ñá túú cùtnuní iní-ndó. ⁵⁰ Te ni ñá sáha-ndo cuendá sá vǎha-gá tnahá-ó, te núu na cùu ìⁿ-ni téé cuendá nchaa ñáyiú isràél, te ñá díú sǎ dánàa ñaha-güedé xií-yu —càchí-dé xáhaⁿ-dé xǐi-güedé.

⁵¹ Dico té Caifás chi ñá díú sǎ cúu iní mée-dé ní cáháⁿ-dé, chi cuendá sá cuíá-ǎⁿ nǐ cunuu-dé núú cuè dútú, núu xǐáⁿ Yá Ndiòxí ní dácáhu iní ñáhá-gǎ nàcuáa cáháⁿ-dé sá Jèsús cuú-gá sá cúu-xí nchaa ñáyiú isràél.

⁵² Te ñá díú cuendá mee-ni ñáyiú-áⁿ cuú-gá, chi cuú-gá tnàhá cuendá nchaa ñáyiú ní sándáá iní ñáhá xǐi-gá, ñáyiú nchítenuu nihí ñuyíú, te ìⁿ-nǎ cuú-yu ndihí-gá. ⁵³ Núu ndéé nduu-ǎⁿ nǐ ndatnúhu cue téé cùnùu núú ñáyiú isràél nàcuáa cada-güedé cahni-güedé Jèsús.

⁵⁴ Te xǐáⁿ nǔu ñá ní xǐca cuu-gá Jèsús quíni ñáhá ñáyiú isràél, te ní quee-gá cuáháⁿ-gá ñuú Efraín, ìⁿ ñuú cáa yàtni yucu, yàcáⁿ ní ngüíñí-gá ndihí cue téé xǐca cuu ndihí-gá.

⁵⁵ Te ta cùyatni nduu cadá-yu vico pàscuá. Te cuéhé ñáyiú ní quee-yu ñuú-yu cuáháⁿ-yu ñuú Jerusalén cuendá sá sà ndihí-yu ncháa-yu nduu íí, te tnahá nduu vico pascuá. ⁵⁶ Te yàcáⁿ nándúcú-yu Jèsús ní cùu te ñá túú-gǎ òré-áⁿ, te ní naníhí tnahá-yu xǐtí veñúhu, te xǐtnàhá-yu:

—¿Nása sàni iní-ndó-í? ¿Quixi Jèsús vico ǎⁿ ñáhá? —càchí-yu xǐtnàhá-yu.

⁵⁷ Te cue téé cùu fariséú ndihí cue dútú cúnùu sa ní xáhaⁿ-güedé xǐi ñáyiú sá nǔu ndéda-ni cáa-yu xiní-yu núú ndécú Jèsús te na càháⁿ-ni-yu cuendá tñi ñaha-güedé xǐi-gá.

12

Èⁿ ñadìhí chíhí-án Jèsús acítí
(Mt. 26:6-13; Mr. 14:3-9)

¹ Ìñú-gá nduu cùmání tnahá vico pàscuá, te ní sáháⁿ Jèsús ñuú Bètaniá, ñuú té Lázará té ní dándótó-gã. ² Te xíáⁿ ñí cadúha-yu sá ñí cudìni Jesús. Te tá Màrta ní sani-xi cóhó, te té Lázará yíhí-dě mèsá ndìhi Jèsús, ndìhi dava-gá-güedé xéxí-güedě. ³ Te tá Màriá néhé-xí cuádava lítrú acítí sáháⁿ tnámí sã ìo ndèyáhu, te acítí-án ñí cuáha mee-ni yücú nãrdú, te ní sódó-xi sáhá Jèsús, te ní nadayìchí-xi ndìhi idi díquí-xi sáhá-gã. Te ñihí xití vehe ní xité nuu dicó acítí-án. ⁴ Te té Jùdás déhe té Xímú Iscàrioté ñu-ni ìⁿ té xica cuu ndìhi-gá, té cuáha cuendá ñáhá xì-gá núú cuè té cùu úhú iní ñáhá ñí xáhaⁿ-dě xii-gá:

⁵ —¿Ná cuendá ñá ní cùyáhu acítí-a sá ùní ciendú díhúⁿ denàriú cuu cuendá ñáyiú ndàhú? —càchí-dé xáhaⁿ-dě xii-gá.

⁶ Dico sá dúcáⁿ ñí cáháⁿ té Jùdás chi ñá díú sã ndísá ñùhu iní-dé ñáyiú ndàhú chi dicó-ñí ìⁿ ñádúhú cúú-dě, chi ñu-dé néhé cuendá-dé díhúⁿ-güedě nchaa-güedé te ní xóo duhu ñàha-dé xii-güedé. ⁷ Te ní xáhaⁿ Jèsús:

—Daña, vá dásàtú-n iní xíchí-a na tàxúha nahi-xi àcítí-a, chi nàndìhi ndéé òré ná nguñdũxi-í. ⁸ Chi nchòhó chi cuhuⁿ tnahá-ni ñáyiú ndàhú tnuú-ndó, dico yúhú chi vá ncháá ndùu cundecu ndìhi ñàha-í xii-ndo —càchí-gá xáhaⁿ-gã xii-dé.

Tnahá té Lázará cuìní-güedé cahni ñàha-güedě xii-dé

⁹ Te vai ñáyiú isràél ní ñihí-yu tnúhu sá ndécú Jèsús ñuú Bètaniá. Te ní sáháⁿ-yu cuendá quini-yu-gá, te quini-yu tnahá té Lázará té ní dándótó-gã. ¹⁰ Te cue dútú cùnùu ní ndatnúhu-güedé ní cuu ìⁿnuu-güedé cuendá sá cáhni-güedé tnahá té Lázará ní cùu, ¹¹ chi ñu cuendá té-án ñí cuu cuéhé ñáyiú isràél tá dàña ñihí-yu-güedé cuáháⁿ cuendá sá ñí sándáá iní-yu Jèsús.

Jèsús cuánguìhu-gá ñuú Jerusàlén
(Mt. 21:1-11; Mr. 11:1-11; Lc. 19:28-40)

¹² Te nduu tnée-án vai ñáyiú ní quexìo ñuú Jerusàlén cuendá cundécú-yu vico, te ní ñihí-yu tnúhu sá Jèsús sáa-gá tnahá-gá cundecu-gá vico-án, ¹³ núu ní xehndé-yu ndaha yùtnu ñuú, te nèhé-yu ní sáháⁿ ní sátnahá ñáhã-yu xii-gá. Te ñihí ní cáháⁿ-yu, te càchí-yu:

—Ío càhnu cuu Yá Ndiòxí! Te ducaⁿ-ni ìo càhnu cuu Yaá ní tendaha-gã véxi quindaha ñàha xii-o —duha ní cachí-yu.

¹⁴ Te Jèsús ní ñihí-gã ìⁿ búrru, te yòdo-gá-di cuáháⁿ. Te ducaⁿ ñí cuu chi ní quee ndáá-xi nàcuáa càháⁿ-xi núú tùtú Yá Ndiòxí núú càchí-xi:

¹⁵ Vá yùhú nchòhó cue ñáyiú ndècu ñuú Sìón,

chi iha véxi té yìndaha ñàha xii-ndo yodo-dé ìⁿ búrru.

Duha càchí-xi núú tùtú-gá. ¹⁶ Dico cue té xica cuu ndìhi Jesús ñá ní ndàcu iní-güedé nàcuáa càháⁿ-xi núú tùtú Yá Ndiòxí nàcuáa cada Jèsús. Dico sáta cuándaa-gá andiú càda cahnu ñàha Tátá-gã xii-gá, te ní ndacu iní-güedé sá dúcáⁿ yòdo tnuní nàcuáa cada-gá, te ducaⁿ ñí cuu.

¹⁷ Nchaa ñáyiú ní xindecu ndìhi Jèsús òré ní dándótó-gã té Lázará, ya yacáⁿ ní caní-yu cuendú núú ñáyiú nàcuáa ní quide ñàha-gã xii-dé. ¹⁸ Te vai-yu ní sáháⁿ-yu núú ndécú Jèsús cuendá sá ñí ñihí-yu tnúhu ní quide-gá sá vã yòo tnahí ndàcu cada. ¹⁹ Te cue té cùu fariséú ní xitnàha-güedé:

—Ní xito-ndo ñá túú nàndìhi sá quidé-ó-vá, chi nchaa ñáyiú ní chinchícúⁿ ñáhã-yu xii-dé —càchí-güedé xitnàha-güedé.

Ñáyiú ñá túú cùu ñáyiú isràél nándúcú-yu Jèsús

²⁰ Te tnahá ñáyiú ñá túú cùu ñáyiú isràél ní sáháⁿ-yu vico ñuú Jerusàlén ní quide càhnú-yu Yá Ndiòxí. ²¹ Te ñáyiú-án ñí sáháⁿ-yu núú tè Lìpé té ñuú Bètsaidá, te ñuú-án yìndèhu-xi dis-tritú Galileá. Te ní xáhãⁿ-yu xii-dé:

—Tátá, vá cùndèe iní-n càchí tnúhu-n nùu ndèé ndécú Jèsús, chi cuíní-ndí cáháⁿ ndihí-ndí-gá — càchí-yu xáhãⁿ-yu xii-dé.

²² Te té Lìpé ní naníhí-dě té Ndríxí te ní xáhaⁿ-dě nàcuáa cáháⁿ-yu, te ndi ndùu-güedé ní sáháⁿ-güedé ní xáhaⁿ-güedé xii Jèsús nàcuáa cáháⁿ-yu.

²³ Te ní xáhaⁿ Jèsús xii-güedé:

—Vitna ní cuyatni òré cada càhnu ñaha Tátá-í xii-í, te quiní-yu sá ïo càhnu cuu yúhú Tée cùu ñaní tnáhã-yu nchaá-yu. ²⁴ Te na càchí tnúhu ndáá-í xii-ndo sã nùu ìⁿ tatá vá ngává-xí nùú ñúhú tēhyú-xi ña, te ñiu-ni ducaⁿ cùnduu-xi cundecu-xi. Dico ìⁿ tatá ná ngává nùú ñúhú xínu déhe-xi, te xiãⁿ nádacayá tnáhã-xí, te mee-xi tēhyú-xi. ²⁵ Te nchaá ñáyiú ío ñùhu iní-xi cundecu ñuyíú-a ñá túú ñùhu iní-yu Yá Ndiõxí, te ñáyiú-áⁿ cuíta niñnú-yu. Te nchaá ñáyiú ío ñùhu iní ñáhã xii Yá Ndiõxí, ñáyiú-áⁿ cundecu-yu ndihí-gá ni caa ni quíhíⁿ. ²⁶ Te nchaá ñáyiú cuíní cunu cuechi nùu-í xini ñuhu-xi natuha ñahã-yu xii-í, te nduu táhũ-yu cundecu-yu nùú nùhú-í cundecu-í. Te nchaá ñáyiú na cùnu cuechi nùu-í, te cada càhnu ñaha Tátá-í xií-yu — càchí-gá xáhaⁿ-gã xii-güedé.

Jèsús cáháⁿ-gá sá cáhni ñàha-güedé xii-gá

²⁷ Te ní xáhaⁿ tùcu-gá:

—Ío ndihú iní-í. Te cúñaha-í xii Tátá-í taunihnu ñaha-gã nùu dícó sá cúú, dico vá cúú chi cuendá tnàhí-a véxi-í — càchí-gá xáhaⁿ-gã xii-güedé.

²⁸ Te ní xáhaⁿ-gã xii Tátá-gã Dútú Ndiõxí:

—Táu, cada nàcuáa ní sani iní-n cùnduu cuendá sá ná cáda càhnu ñaha ñáyiú xii-n — càchí-gá xáhaⁿ-gã.

Te ducaⁿ te ní tecú ní cáháⁿ Yá Ndiõxí ndéé andiú, te càchí-gá:

—Sa ní quide-í nàcuáa cachí ñáyiú sá ïo càhnu cuu-í. Te cada tucu-í cuendá cada càhnu ñaha-gá-yu xii-í — càchí Yá Ndiõxí xáhaⁿ-gã xii Déhe-gá.

²⁹ Te nchaá ñáyiú xindecu ní tecú dóho-yu ní cáháⁿ-gá, dico ñá túú ní sàni iní-yu sá méé-gã ní cáháⁿ, chi davá-yu ní xítñahã-yu sá ñùhu ní

cáháⁿ, te davá-yu ní xítñahã-yu sá ìⁿ espíritú xínu cuèchi núú Yá Ndiõxí ní cáháⁿ. ³⁰ Te ní xáhaⁿ Jèsús xií-yu:

—Ñá díú cuendá yúhú ní cáháⁿ Yá Ndiõxí, chi ní cáháⁿ-gá cuendá sá nchòhó cundedóho-ndo. ³¹ Te vitna ní sáá nduu càda ndáá Yá Ndiõxí cuèchi nchaá ñáyiú ñuyíú-a, te ducaⁿ te vá cùnùu-gá yucu ñävãha. ³² Te na càta caa ñaha-güedé xii-í núú cùrúxí, te xiáⁿ cuú-í te níhí-yu tnúhu ni càa xico ñuyíú, te quindáá iní-yu tnúhu-í — càchí-gá xáhaⁿ-gã xií-yu.

³³ Duha ní cáháⁿ-gá cuendá cutnùni iní-yu nàcuáa ndoho-gá òré cuú-gá.

³⁴ Te ní xáhãⁿ-yu xii-gá:

—Nihí-ndí tnúhu sá nùú tütú yódó tnùní tnúhu Yá Ndiõxí cáháⁿ-xi sá Crístú Yaá tendaha-gã quixi ñuyíú-a cundecu-gá ni caa ni quíhíⁿ. ¿Te yòhó nása cáháⁿ-tu-n sã ìⁿ tée cùu ñaní tnáhã nchàa ñáyiú ñuyíú-a cahni ñaha-güedé núú cùrúxí? Te cachí tnúhu-n nã cúú tēe-áⁿ — càchí-yu xáhãⁿ-yu xii-gá.

³⁵ Te ní xáhaⁿ Jèsús:

—Yúhú cúu-í dàtná ìⁿ ñuhú dáyèhé ñuyíú-a, dico sacú-ni nduu ndècu ndihí ñaha-í xii-ndo. Te caca-ndo ìchi ndáá vitna dáyehé-gá-í núú-ndó chi na cùnee te vá cùtnùní-gá núú-ndó ndèé ichi quíhíⁿ-ndó. ³⁶ Quindáá iní ñáhã-ndó xii-í vitna ndècu ndihí ñaha-gá-í xii-ndo dándixi túu-í iní-ndó, cuendá cutnùní iní-ndó nàcuáa nduu cuendá Yá Ndiõxí, te cuu-ndo déhe-í — càchí-gá xáhaⁿ-gã xií-yu.

Te sátá dúcáⁿ ñí cáháⁿ Jèsús, te ní quee-gá cuáhãⁿ-gá ìⁿ núú vã ná nihí ñáhã-yu xii-gá.

Ñáyiú isràel ñá cuíní-yu quindáá iní-yu Jèsús

³⁷ Te cuèi ío vài sá vã yõo tnàhí ndàcu cada ní quide Jèsús ní xini-yu, dico ni dùcaⁿ ñá túú ní sàndáá iní-yu-gá. ³⁸ Te ducaⁿ ñí quidé-yu chi dacuití ñí quee ndáá-xi nàcuáa ní chídó tnùní ndíi Chàíá ndíi ní cáháⁿ tnúhu Yá Ndiõxí ndéé sanaha núú tütú-gá núú càchí-xi:

Yòhó Yaá cúú Xìtohó-í, vá yõo ìⁿ sàndáá iní tnúhu càháⁿ-ndí.

Te vá yõo ìⁿ cùtnuní iní-xi sá ìo càhnu cuu-n.

Duha ní chídó tnùní ndí Chàia núú tütú-gá. ³⁹ Te ñá ní sàndáá iní-yu chi ní quee ndáá-xi nàcuáa ní chídó tnùní tucu ndí Chàia núú tütú Yá Ndiõxí nàcuáa cáháⁿ Jèsús:

⁴⁰ Mee Yá Ndiõxí ní quide-gá sá vǎ təcú tnùní-yu,

chi ní dádǎhu ndodo iní ñáhá-gǎ xií-yu,

chi ío sàá iní-yu núú ñá ní cuení-gá-yu quíndáá iní ñáhǎ-yu xii-gá.

Te ni vǎ túhá ñáhá-yu xii yúhú cuendá dacǎcu nihnu-í-yu.

⁴¹ Duha ní chídó tnùní ndí Chàia nàcuáa cáháⁿ Jèsús chi ní xiní ndí sá ìo càhnu cuu-gá.

⁴² Te cuèi ducaⁿ nǐ cuu dico titní cue té cùnunu núú ñáyiú isràél ní sàndáá iní ñáhá-güedé xii-gá. Dico ñá túú ní xõo cáháⁿ ndáá-güedé chi ní xõo yúhú-güedé sá vǎ dáñá-gǎ cue té cùu fariséu quíhu-güedé veñúhu. ⁴³ Chi ní xõo cudíⁿ-gǎ iní-güedé sá càháⁿ ñáyiú dácúúxí tnúhu càháⁿ Yá Ndiõxí.

Ñáyiú ñá túú sàndáá iní tnúhu Jèsús cuíta nihnú-yu

⁴⁴ Jèsús níhi ní cáháⁿ-gá, te càchí-gá: —Nchaa ñáyiú na quíndáá iní ñáhá xii-í, te ñá díú-ní mèe-í quíndáá iní-yu, chi tnàhá Tǎtà-í Yaá ní tendaha ñàha xii-í véxi-í ñuyíú-a quíndáá iní-yu. ⁴⁵ Te ñáyiú xiní ñáhá xii yúhú xiní-yu tnàhá Tǎtà-í. ⁴⁶ Te yúhú véxi-í dandixi túu-í iní ñáyiú ñuyíú-a cuendá cutnùní iní-yu nàcuáa ndùu cuendá Yá Ndiõxí, te nchaa ñáyiú na quíndáá iní ñáhá xii-í te vá cùndècu-gá-yu ichi cuèhé ichi duha. ⁴⁷ Te núú ìo davá-yu ndèdóho-yu nàcuáa càháⁿ-í te ñá túú tnǐ-yu tnúhu-í, te ñá díú yúhú dácúita nihnu-í-yu, chi ñá túú véxi-í ñuyíú-a sá dácúita nihnu-í-yu, chi véxi-í sá dácǎcu nihnu-í-yu. ⁴⁸ Te nchaa ñáyiú na cùyíchí iní ñáhá xii-í te ñá túú quide cuendá-yu nàcuáa càháⁿ-í, te ñáyiú-áⁿ ná sàá nduu te cuíta nihnú-yu chi ñá ní tnǐ-yu

tnúhu ní cáháⁿ-í. ⁴⁹ Te yúhú ñá túú càháⁿ-í tnúhu véxi iní mèe-í, chi mee Tǎtà-í Yaá ní tendaha ñàha xii-í véxi-í ñuyíú-a ní cachí tnúhu-gá nàcuáa cunduu tnúhu cáháⁿ-í danèhé-í ñáyiú.

⁵⁰ Te yúhú xiní-í sá tnúhu ní táuchíúⁿ Tǎtà-í cáháⁿ-í cúú-xí ìⁿ sá vǎha sá cúú xii-ndo chi nduu táhú-ndó cùndecu-ndo ndíhi-gá ní caa ní quíhíⁿ, núú xíáⁿ càháⁿ-í nchaa nàcuáa ní táuchíúⁿ-gǎ —càchí-gá xáhaⁿ-gǎ xií-yu.

13

Jèsús náquète-gá sáhá cuè té xica cuu ndíhi-gá

¹ Te cùmání-gǎ tnahá vico pàscuá, te Jèsús sa nàha-gá sá sà ní cuyatni òré dándóo-gá ñuyíú-a, te ndaa-gá núú ndécú Tǎtà-gǎ. Te ío ní cuu iní-gá nchaa ñáyiú ní sàndáá iní ñáhá xii-gá, te ní quide ndisa-gá sá nǐ cuu iní ñáhá-gǎ xií-yu.

²⁻⁴ Te ní quíhu yucu ñávàha díquí tǎ Júdás déhe té Xímú Iscarioté, te ní sani iní-dé nàcuáa cada-dé cuáha cuendá-dé Jèsús núú cuè té cùu úhú iní ñáhá xii-gá. Te Jèsús sa nàha-gá sá mée Yá Ndiõxí Yaá cúú Tǎtà-gǎ ní sáñaha-gǎ tnúhu ndee iní xii-gá sá cáda-gǎ núú-gǎ, te nàha-gá sá díú núú Tǎtà-gǎ ní quee-gá véxi-gá ñuyíú-a. Te sáá nduu nàsáá tucu-gá núú Tǎtà-gǎ. Te cùdini Jèsús ndíhi cue té xica cuu ndíhi-gá ní cùu, te ní ndacuíñí-gá yuhu mèsá, te ní taunuu-gá ìⁿ dóo nihnú-gǎ, te ní queheⁿ-gá ìⁿ dóo nǐ dácútú-gǎ núú yíquí-gǎ. ⁵ Te ní chihi-gá ndute ìⁿ tǐná, te xíáⁿ nǐ naquète-gá sáhá cuè té xica cuu ndíhi-gá, te ndíhi dóo ndútú núú yíquí-gǎ-áⁿ nǐ ndayìchí-gá sáhá-güedé.

⁶ Te òré naquète-gá sáhá tǎ Xímú, àdi Pelú, ní cùu ní xáhaⁿ-dǎ xii-gá:

—Mèstrú, ¿te yòhó naquète-n sáhá-í-u? —càchí-dé xáhaⁿ-dǎ xii-gá.

⁷ Te ní xáhaⁿ Jèsús:

—Vitna ñá cùtnùní iní-n sǎ quídè-í-a dico sáá nduu te cutnùní iní-n —càchí-gá xáhaⁿ-gǎ xii-dé.

⁸ Te ní xáhaⁿ tǎ Pèlú:

—Yúhú chi vá ìíⁿ ndùu te naquete-n sàhà-í —càchí-dé xàhàⁿ-dě xii-gá.

Te ní xáhaⁿ Jèsús:

—Te núu vá náquète-í sáhá-n áⁿ, te vá cáda-gã-n cuendá sá ndécú ndìhi ñaha-í xii-n —càchí-gá xáhaⁿ-gã xii-dé.

⁹ Te ní xáhaⁿ tẽ Pelú:

—Te núu ducaⁿ te vá méé-ní sàhà-í naquete-n, chi naquete-n tnàhá ndaha-í ndìhi díquì-í —càchí-dé xáhaⁿ-dě xii-gá.

¹⁰ Te ní xáhaⁿ Jèsús xii-dé:

—Tée íchí nǐ xichí chi xini ñuhu-xi sá sáhá-na-dé ndoo, te ducaⁿ te ndoo ndoo-dé nihí-dé. Te nchòhó sa càndoo-ndo cuéi ñá ncháá-ndó càndoo —cachí-gá xáhaⁿ-gã xii-dé.

¹¹ Te ducaⁿ nǐ cáháⁿ Jèsús chi sa nàha-gá sá ìíⁿ cuè téé-áⁿ cuàha cuendá ñáhá-güedé xii-gá núu cuè téé cùu úhú iní ñáhá, xiáⁿ núu ní xáhaⁿ-gã sá ña túú càndoo-güedé nchaa-güedé.

¹² Te sáta nǐ naquete-gá sáhá-güedé, te ní ndécúnhu-gá dóó-gã, te ní nucóo-gá yuhu mèsá, te ní xáhaⁿ-gã xii-güedé:

—¿Te ní cutnùní iní-ndó sã nǐ quide ñaha-í xii-ndo-ãⁿ? ¹³ Te nchòhó váha-ni cáháⁿ-ndó sã cùnùu-í, te dānani ñaha tucu-ndo Mestrú xii-í, te ndáá cáháⁿ-ndó. ¹⁴ Te núu yúhú cùu-í Mestrú, te cùu tucu-í téé cūnuu te náquete-í sáhá-ndó, te diu-ni ducaⁿ càda nchòhó tucu naquete sáhá tnàhá-ndó. ¹⁵ Yúhú sànu ichi ñaha-í xii-ndo nàcuáa cada-ndo. ¹⁶ Te na càchí tnúhu ndáá-í xii-ndo sã nǐ ìíⁿ téé xinu cuechí ñá túú cūnuu-dé dàcúxí patróoⁿ-dè, te nǐ ìíⁿ téé xica chiuⁿ ñá túú cūnuu-dé dàcúxí tée tēndaha ñaha xii-dé cuáháⁿ-dè chiuⁿ. Te ducaⁿ sātñahá-xi cùu yúhú ndìhi nchòhó. ¹⁷ Te núu ní cutnùní iní-ndó nàcuáa ní quide ñaha-í xii-ndo ña, te ducaⁿ càda tnaha-ndo te cuu váha iní ñáhá Yá Ndiòxí xii-ndo.

¹⁸ Yúhú, ñá túú cáháⁿ-í cuendá-ndó nchaa-ndo, chi yúhú sa nàha-í nàcuáa sàni iní ìíⁿ ìíⁿ nchòhó cue téé ní nanducu nihnu-í tnuú nchaa ñáyiu ñuhu ichi cuehé ichi duha ní cachí-í chitnahá ñáhá-ndó xii-í. Chi dacuítí sã quéé ndáá-xi nàcuáa cáháⁿ-xi núu tütú Yá Ndiòxí núu càchí-xi: “Tée xèxi

ndìhi ñaha xii-í ngóo-dé cuu úhú iní ñáhá-dè”, duha càchí-xi núu tütú-gá.

¹⁹ Te cùmání-gã sáá nduu càda ñaha-dé sá sání iní-dé, núu xiáⁿ càchí tnúhu-í xii-ndo nàcuáa cada-dé, chi na sáá nduu-ãⁿ te cutnùní iní-ndó sã yúhú cùu-í Crístú Yaá ní tendaha Yá Ndiòxí véxi ñuyíú-a. ²⁰ Te na càchí tnúhu ndáá-í xii-ndo sã nchaa ñáyiu na quèheⁿ cuendá ñáhá xii cue téé tendaha-í cáháⁿ tnúhu-í, te cada iní-yu sá tnàhá yúhú ní queheⁿ cuendá-yu. Te nchaa ñáyiu na quèheⁿ cuendá ñáhá xii-í, te cada iní-yu sá tnàhá Tātà-í Dútú Ndiòxí Yaá ní tendaha ñaha xii-í véxi-í ñuyíú-a ní queheⁿ cuendá-yu —càchí-gá xáhaⁿ-gã xii-güedé.

Jèsús càchí-gá sá tẽ Jùdás cuáha cuendá ñáhá-dé xii-gá núu cuè téé cùu úhú iní ñáhá

(Mt. 26:20-25; Mr. 14:17-21; Lc. 22:21-23)

²¹ Te sáta dúcáⁿ nǐ cáháⁿ Jèsús te ío ní ndíhú iní-gá, te ní xáhaⁿ-gã xii-güedé:

—Na càchí tnúhu ndáá-í xii-ndo sã diú-ní ìíⁿ nchòhó cuáha cuendá ñáhá-ndó xii-í núu cuè téé cùu úhú iní ñáhá —càchí-gá xáhaⁿ-gã xii-güedé.

²² Te ní ngúita cue téé xica cuu ndìhi-gá ndéhé ìíⁿ ndehe ìíⁿ núu tnàhá-güedé, chi ñá ní cùtnuní iní-güedé ndēdacàa-güedé cuendá-güedé ní cáháⁿ-gá. ²³ Te ìíⁿ téé-áⁿ ìo cùdíí iní ñáhá Jèsús, te ndècu yatni-dé diñi-gá cùdini-dé ndìhi-gá.

²⁴ Te té Xímú, àdi Pelú chi úu diu-dé, ní quide-dé señá núu tēe ndècu yatni diñi-gá-áⁿ sá càcáⁿ tnúhú-dé núu-gã núu ndēdacàa-güedé cuendá-güedé ní cáháⁿ-gá. ²⁵ Te téé-ãⁿ ní sáháⁿ ndehe yatni-gá-dé diñi Jesús, te ní xáhaⁿ-dè xii-gá:

—Mestrú, ¿ndēdacàa-ndí cuendá-ndí ní cáháⁿ-n-í? —càchí-dé xáhaⁿ-dè xii-gá.

²⁶ Te ní xáhaⁿ Jèsús:

—Na chindóyo-í luha pàá, te téé na cuáha-í te téé-áⁿ cúu-dè —càchí-gá xáhaⁿ-gã xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscarioté.

27 Te òré ní queheⁿ-dé pàá, te ní ngúndecu ndìhì ñaha dùuⁿ-ná yucu ñávàha xii-dé. Te ní xáhaⁿ Jèsús:

—Sá nǐ sani iní-n càda-n te cada ndìhì-ni-n —càchí-gá xáhaⁿ-gã xii-dé.

28 Te ni ìⁿ cue tée cùdini ndìhì-gá ñá ní tècú tnùnì-güedé nása nduu tnúhu ní xáhaⁿ-gã xii té Jùdás.

29 Te dava-güedé ní sani iní-güedé sá sǎ cuendá sá ndécú ndìhì-dé sá ñúhú díhúⁿ, te vaa íó ìⁿ sá cuááⁿ-dè nàndíhì-güedé vico, àdi díhúⁿ cuáha-dé ñáyiu ndàhú xáhaⁿ-gã ní cáháⁿ-güedé. 30 Te sa ní cundiquiⁿ ní queheⁿ cuendá té Jùdás pàá caxi-dé, te òré ní níhì-dé pàá-án te ní quee-dé cuáháⁿ-dé.

Jèsús càchí tnúhu-gá nàcuáa cada-o

31 Te sátá nǐ quee té Jùdás cuáháⁿ-dé, te ní xáhaⁿ Jèsús xii dava-gá-güedé:

—Vitna te quiní-ndó ndìhì nchaa ñáyiu sá ìo càhnu cuu yúhú Tée cùu ñaní tnáhá-ndó nchaa-ndo, te òré-án cutnùnì iní-ndó sǎ ìo càhnu cuu tucu mee Yá Ndiòxí. 32 Te núu yúhú quidé càhnu-í Yá Ndiòxí, te ñu-ni ñu-í ducaⁿ càda cahnu ñaha-gá xii yúhú, te ñá túú-gã titní nduu te ducaⁿ càda-gá. 33 Te nchòhó cue déhe-í na càchí tnúhu-í sá sàcú duha-ná nduu ndècu ndìhì ñaha-í xii-ndo. Te nchòhó nanducu ñaha-ndo xii-í dico vá ná níhì ñáhá-ndó dàtná ní xáhaⁿ-í xii ñáyiu israél, te ñu-ni ducaⁿ cáháⁿ-í núu-ndó sǎ vǎ ndácú-ndó quíhìⁿ-ndó núu quíhìⁿ-í. 34 Te duha sànu ichi ñaha tucu-í xii-ndo nàcuáa cada-ndo sǎ cúu iní tnáhá-ndó ìⁿ ìⁿ-ndo datná yúhú cúu iní ñáhà-í xii-ndo. 35 Te núu na cùu iní tnáhá-ndó ìⁿ ìⁿ-ndo ña, te ducaⁿ te cutnùnì iní nchaa ñáyiu sá cúu-ndó cuè tée ní chitnahá ñáhá xii-í —càchí-gá xáhaⁿ-gã xii-güedé.

Jèsús cáháⁿ-gá sá tǎ Pèlú vá nǔnuu-dé sá xicá cùu ndìhì ñaha-dé xii-gá

(Mt. 26:31-35; Mr. 14:27-31; Lc. 22:31-34)

36 Te ní xáhaⁿ tǎ Xímú, àdi Pèlú chi úu ñu-dé, xii Jèsús:

—Mèstrú, ¿ndèé quíhìⁿ-n-í? — càchí-dé xáhaⁿ-dè xii-gá.

Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quíhìⁿ núu quíhìⁿ-í, dico na sáá nduu te dai sáá-n núu cùndècu-í —càchí-gá xáhaⁿ-gã xii-dé.

37 Te ní xáhaⁿ tǎ Pèlú xii-gá:

—Mèstrú, ¿te ná cuendá núu vá ndácú-í cànchicúⁿ ñáhà-í xii-n quíhìⁿ vitna-í? Chi yúhú ñá túú tnàhì yúhú-í cuèi na cùu-í sá cuendá-n —càchí-dé xáhaⁿ-dè xii-gá.

38 Te ní xáhaⁿ Jèsús:

—¿Te ndáá sá xèndé iní-n sǎ cuèi na cùu-n cuendá-í-u? Te na càchí tnúhu ndáá-í xii-n sǎ cùmání-gã cana líhi, te únì xito cáháⁿ-n sǎ ña túú xini ñáhá-n xii-í —càchí-gá xáhaⁿ-gã xii-dé.

14

Jèsús dánèhé ñáhá-gã nàcuáa cada-o nàsáá-ó núu ndécú Yá Ndiòxí

1 Te ní xáhaⁿ-gã xii-güedé:

—Te ñá túú nǎ canì iní-ndó. Quindáá iní-ndó Yá Ndiòxí, te quindáá iní-ndó yúhú. 2 Chi núu ndécú Tàtá-í ío nùne núu cùndècu-o, chi núu ñáhá ñá te sa cachí tnúhu-í xii-ndo ni cùu. Te vitna na nùhú-í te cada túha-í núu cùndècu-ndo. 3 Te dàtnùnì quixi tucu-í te candeca ñaha-í xii-ndo quíhìⁿ cuendá ìⁿ-ni xìchi cundecu-o. 4 Te sa nàha-ndo ndéé quíhìⁿ-í te sa xini-ndó ìchi —cachí-gá xáhaⁿ-gã xii-güedé.

5 Te ní xáhaⁿ tǎ Mǎxí xii-gá:

—Mèstrú, ñá túú xini-ndí ndèé quíhìⁿ-n te da ichi-ná quiní-ndí —càchí-dé xáhaⁿ-dè xii-gá.

6 Te ní xáhaⁿ Jèsús:

—Yúhú cúu-í dàtná ìⁿ ichi te cáháⁿ-í tnúhu ndáá, te yúhú cada-í te naníhì tàhú-ndó. Te ìⁿ ñu-í ní yúhú cada-í te sáá-ndó núu Yá Ndiòxí cundecu-ndo te núu na quindáá iní ñáhá-ndó xii-í. 7 Te núu dícó cutnùnì ndisa iní-ndó yòo cuu-í-án, ducaⁿ te cutnùnì iní-ndó yòo cuu Tàtá-í ní cùu. Dico vitna dàtná sá ní xini núu-ndó Dútú Ndiòxí Yáá cúu Tàtá-í cada iní-ndó, chi ní xini-ndó yúhú —càchí-gá xáhaⁿ-gã xii-dé.

⁸ Te ní xáhaⁿ tẽ Lìpé xii-gá:

—Mèstrú, danèhé ñáhá xii-ndí Dútú Ndiõxí chi na cùu váha iní-ndí — cächí-dé xáhaⁿ-dẽ xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túú xini ñáhá-n xii-í? Te sa ní cuu vai nduu ndecu ndihi ñaha-í xii-ndo, chi ñáyiú xini ñáhá xii-í te xini-yu tnàhá Tàtá-í. ¿Te ná cuendá yòhó cächí-n sã dánèhé ñàhá-í xii-ndo Tàtá-í? ¹⁰ ¿Náa ñá túú sàndáá iní-ndó sã yúhú ndécú-í ndihi Tàtá-í? Te mee-gã ndécú ndihi ñaha-gá xii-í. Te nchaa tnúhu càháⁿ-í núú-ndó ñà túú càháⁿ-í sã vèxi iní mèe-í, chi Tàtá-í Yaá ndécú ndihi ñaha xii-í chindèe ñaha-gá quidè-í chiuⁿ-gá. ¹¹ Te quindáá iní-ndó sã yúhú ndécú-í ndihi Tàtá-í, te ducaⁿ mèe-gá ndécú ndihi ñaha-gá xii-í. Te núú ñá túú sàndáá iní-ndó tnúhu càháⁿ-í-a, te dandácu iní-ndó nchaa chiuⁿ ta quide-í véxi, te quindáá iní ñáhá-ndó. ¹² Te na cächí tnúhu ndáá-í xii-ndo sã nchaa ñáyiú na quindáá iní ñáhá xii-í, te cadá-yu chiuⁿ quide-í te càhnu-gá chiuⁿ cadá-yu chi yúhú núhú-í núú ndécú Tàtá-í cundecu-í nàcuáa níhí ndéé-gã-yu cundecu-yu. ¹³ Te nchaa sã ná càcáⁿ-ndó te taxi-í te núú na quindáá iní ñáhá-ndó xii-í, te nchaa cada-í cuendá cutnùní iní ñáyiú sã ïo càhnu cuu Tàtá-í Dútú Ndiõxí. ¹⁴ Te yúhú cada-í nchaa sã cuini-ndó càcáⁿ táhú-ndó nùú-í, te núú na quindáá iní ñáhá ndisa-ndo xii-í.

Jèsús cächí-gá sã téndàha-gá Espiritú Yã Ndiõxí quixi cundecu ndihi-o

¹⁵ Te núú nchòhó cúú iní ñáhá-ndó xii-í te tnú-ndo nchaa tnúhu càháⁿ-í. ¹⁶ Te yúhú cacáⁿ táhú-í núú Tàtá-í sã téndàha-gá Espiritú-gá quixi cundecu ndihi-ndo cànu ichi ñaha-xi xii-ndo nacuéa cundecu-ndo, te chindee ñaha-xi xii-ndo ni caa ni quíhíⁿ. ¹⁷ Te nchaa ñáyiú ndècu ichi cuehé ichi duha ñá túú xini-yu Espiritú Yã Ndiõxí te ni vã cúú cundecu ndihi-yu. Dico nchòhó sa xini-ndó Espiritú-gá te ndècu ndihi ñaha-xi xii-ndo. Te sáá ïⁿ nduu te cunuu

Espiritú-gá iní-ndó. ¹⁸ Te yúhú vá dáñá ñihnu ñaha-í xii-ndo, chi quixi tucu-í cundecu ndihi ñaha-í xii-ndo. ¹⁹ Te sácú duha-ná nduu ndècu-í te vá quini ñáhá-gã ñáyiú xii-í, dico nchòhó chi quini ñáhá-ni-ndó xii-í. Te ducaⁿ-ni cundecu-ndo ichi váha chi cundecu ndihi ñaha-í xii-ndo ni caa ni quíhíⁿ. ²⁰ Te dàvá-áⁿ cutnùní iní-ndó sã ndécú-í ndihi Tàtá-í, te ducaⁿ nchòhó cundecu ndihi ñaha-ni-ndo xii-í. ²¹ Te nchaa ñáyiú dàcuaha tnúhu-í te tnú-yu, ñáyiú-áⁿ quidé ndisá-yu sã cúú iní ñáhá-yu xii-í. Te ducaⁿ Tàtá-í cúú iní ñáhá-gã xií-yu, te ducaⁿ-ni yúhú cúú iní-í-yu tucu, te ducaⁿ te cutnùní iní-yu sã ndécú ndihi-í-yu —cächí-gá xáhaⁿ-gã xii-dé.

²² Te ní càháⁿ ïⁿ tée nani Judás dico ñá díú tẽ Jùdás déhe té Xímú Iscarioté ní càháⁿ, chi ïngá té Jùdás ní xáhaⁿ-dẽ xii-gá:

—Mèstrú, ¿nása cada-n cuendá cutnùní iní-ndí sã cundècu ndihi ñaha-n xii-ndí, te ñáyiú ñùhu ichi cuehé ichi duha vá cundècu ndihi-n-yu-i? —cächí-dé xáhaⁿ-dẽ xii-gá.

²³ Te ní xáhaⁿ Jèsús xii-güedé:

—Nchaa ñáyiú cùu iní ñáhá xii-í te tnú-yu tnúhu càháⁿ-í, te ñáyiú-áⁿ cúú iní ñáhá Tàtá-í xií-yu, te yúhú ndihi Tàtá-í ndécú-ndí ndihi-yu. ²⁴ Te nchaa ñáyiú ñá túú cùu iní ñáhá xii-í te ñá túú tnú-yu tnúhu càháⁿ-í. Te nchaa tnúhu ní càháⁿ-í ní xindédóho-ndo chi Tàtá-í Yaá ní tendaha ñaha xii-í véxi-í ñuyúú-a ní dácáhu iní ñáhá-gã xii-í, te ñá díú mèe-í ní càhu iní-í tnúhu càháⁿ-í.

²⁵ Duha nduu tnúhu càháⁿ-í núú-ndó vitna ndecu ndihi ñaha-gá-í xii-ndo. ²⁶ Dico Yã Ndiõxí tendaha-gã Espiritú-gá quixi-xi cada-xi núú-í taxi-xi tnúhu ndee iní xii-ndo, te diu-xi chindee ñaha-xi xii-ndo te danèhé ñáhá-xí xii-ndo nchaa sã cúmání quini-ndó, te diu-ni-xi dandácu iní ñáhá-xí xii-ndo nchaa nacuéa ní càháⁿ-í.

²⁷ Te yúhú chindee chituu ñaha-í xii-ndo ïo váha cuu iní-ndó cundecu-ndo datná yúhú ïo váha cùu

iní-í ndécù-í, chi sa ta cùyatni nduu nùhú-í. Te yúhú càchí tnúhu ndáá-í sá chíndèe ñaha-í xii-ndo, te vá cáda-í dàtná quídé ñáyiú ñùhu ichi cuehé ichi duha. Te ni vǎ ndihú iní-ndó, te ni vǎ yùhú-ndó. ²⁸ Te sa ní xíndèdóho-ndo ní cáhá-í sá nùhú-í, te quixi tucu-í cundecu ndihí ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnùhu sá nùhú-í núu ndécú Tǎtà-í, te cudí iní-ndó ní cùu, chi ío càhnu cuu-gǎ dàcúxí yùhú. ²⁹ Te sa ní cachí tnúhu-í sá nùhú-í, te na sǎá òré nùhú-í núu ndécú Tǎtà-í, te quíndáá iní ñáhá-ndó xii-í.

³⁰ Te ñá túú-gǎ vǎi tnúhu ndatnúhu ndihí ñaha-í xii-ndo chi sa véxi yucu ñávǎha sá táxí tnùní ñuyíú-a, dico vá táxí tnùní ñáhá-xí xii yúhú. ³¹ Te cada-í nchaa nàcuáa ní táuchíúⁿ Tǎtà-í cuèndá cutnùní iní nchaa ñáyiú ñuyíú-a sá yùhú ío cùu iní-í-gǎ. Te vitna chí ndácuíñí ná quíhíⁿ-ó — càchí-gǎ xáhaⁿ-gǎ xii-güedé.

15

Cuèndá yoho yàha stilé ndihí nchaa dité-xi

¹ Te ní xáhaⁿ tucu-gǎ xii-güedé: —Yúhú cùu-í dàtná yoho yàha stilé, te Tǎtà-í cùu-gǎ dàtná ìⁿ téé xito yoho yaha stilé-áⁿ. ² Te nchaa ñáyiú ní sándáá iní ñáhá xii-í cùu-yu dàtná dité nchaa yoho yàha stilé-áⁿ. Te téé xito yoho yaha stilé-áⁿ xèhndé-dé nchaa dité-xi sá ñǎ cuíní-gǎ-xi cuuⁿ ndéhé-xi, te ndàda ndoo-dé nchaa dité-xi sá cùuⁿ cuèndá cuuⁿ-gǎ. ³ Te ducaⁿ sǎtnahá-xi cùu nchohó, chi sa ní xócuíñí nchaa sá cuèhé sá dúhá ndècu ndihí-ndo, chi ní sándáá iní-ndó tnùhu ní cáhá-í. ⁴ Te cuu ìⁿnuu-ndo cundecu ndihí ñaha-ndo xii-í, te núu ducaⁿ na càda-ndo, te cundecu ndihí ñaha-í xii-ndo. Chi núu ìⁿ yutnu vídí ná quèndéé dité-xi, te dité-xi sá ñǎ quendeé-áⁿ vǎ cùuⁿ-gǎ sávídí-xi chí duuⁿ duuⁿ ní xíta-xi. Ducaⁿ sǎtnahá-xi cùu nchohó chí vá ndácú-ndó càda-ndo chiuⁿ-í, te núu vá cùndècu ndihí ñaha-í xii-ndo.

⁵ 'Chi yúhú cùu-í dàtná yutnu vídí-áⁿ, te nchòhó cùu-ndó dàtná

nchaa dité-xi. Te nchaa ñáyiú cùu ìⁿnuu ndihí ñaha xii-í, te ndècu ndihí-í-yu, te ndácú-yu quídé-yu chiuⁿ-í. Te núu vá cùuⁿ ìⁿnuu ndihí ñahá-yu xii-í, te vá ndácú-yu cada-yu chiuⁿ-í. ⁶ Te nchaa ñáyiú vá cùuⁿ ìⁿnuu ndihí ñaha xii-í, te yáha-yu dàtná yǎha ìⁿ dité yutnu vídí sá ñá túú cùuⁿ sávídí-xi, chí xèhndé-güedé yìchí-xi, te sǎhmi-güedé.

⁷ 'Cuu ìⁿnuu ndihí ñaha-ndo xii-í, te vá nàcuánaa-ndo nàcuáa ní cáhá-í. Te núu ducaⁿ na càda-ndo, te nání cuíní-ndó cǎcáⁿ-ndó nùu-í te taxi-í. ⁸ Te núu nchòhó ná cáda vǎha-ndo cundecu-ndo, te ío cada càhnu-ndo Tǎtà-í, te ducaⁿ cutnùní sá ndísá cùu-ndo cue téé ní chitnahá ñáhá xii-í. ⁹ Te yúhú ío cùu iní ñáhá-í xii-ndo dàtná cùu iní ñáhá Yǎ Ndiòxí xii-í. Te cada-ni-ndo mèe-ni sá vǎha cuèndá cudí iní ñáhá-gǎ-í xii-ndo. ¹⁰ Te núu na quíndáá iní-ndó càda-ndo nchaa nàcuáa ní cáhá-í, te ío cuu iní ñáhá-í xii-ndo, chí yúhú ducaⁿ ío sándáá iní-í Tǎtà-í quídé-í nchaa nàcuáa ní cáháⁿ-gǎ, te xǎⁿ nùu ío cùu iní ñáhá-gǎ xii-í.

¹¹ 'Duha càhá-í núu-ndó cuèndá cudí ndisa iní-ndó dàtná cùu iní mèe-í. ¹² Te duha nduu tnùhu càhá-í cuèndá sá cùu iní tnáhá-ndó ìⁿ ìⁿ-ndo datná cùu iní ñáhá-í xii-ndo. ¹³ Te núu ní xíhó sǎ cùu-xí ìⁿ téé ío váha tnáhá tnúhu ndihí-o, te xǎⁿ cutnùní iní ñáyiú sá ío cùu iní-ó-dé. ¹⁴ Te nchòhó cuu-ndo cuè téé ío váha tnáhá tnúhu ndihí-í te núu na càda-ndo nchaa nàcuáa càhá-í. ¹⁵ Te vá cùhaha-gǎ-í xii-ndo sá cùu-ndó cuè téé xinu cuechi nùu-í, chí ní ìⁿ téé xinu cuechi ñá túú xíní-dé ná quídé pàtróoⁿ-dé. Te yúhú càchí-í xii-ndo sá cùu-ndó cuè téé ío váha tnáhá tnúhu ndihí-í, chí ní cachí tnúhu-í nchaa nàcuáa ní cáháⁿ Tǎtà-í. ¹⁶ Te ñá díú nchòhó ní càháⁿ ñáhá-ndó xii yúhú, chí yúhú ní cáháⁿ ñáhá-í xii-ndo. Te yúhú tauchíuⁿ-í quíhíⁿ-ndó càda-ndo nchaa nàcuáa ní cáhá-í, chí tnúhu-áⁿ vǎ ndihí nihnu-xi. Te ducaⁿ nchaa sá ná cǎcáⁿ-ndó nùu Tǎtà-í Yǎ Ndiòxí te taxi-gǎ, te núu na quíndáá iní ñáhá-ndó xii-í. ¹⁷ Te yúhú càhá-í dóho-ndo sá cùu iní tnáhá-ndó

ɛ̃n ɛ̃n-ndo.

Ñáyi ndècu ichi cuehé ichi duha cùu úhú iní-yu Jèsús ndih nchaa ñáyi sàndáá iní tnúhu-gá

18 "Te nchaa ñáyi ndècu ichi cuehé ichi duha ñá cùu quini ñáhã-yu xii-ndo, te sa naha-ndo sá dǐhna-gá yúhú ní ngüíta-yu ducaⁿ ñá cùu quini ñáhã-yu xii-í. 19 Te núu dícó tnáhã nchòhó ndécú-ndó ichi cuehé ichi duha ñá, te cuu iní ñáhã-yu xii-ndo dàtná cùu iní tnáhã-yu ndi mèe-yu ni cùu. Te yúhú ní nanducu nihnu ñaha-í xii-ndo tnúu ñáyi ndècu ichi cuehé ichi duha, núu xiãⁿ ío cùu úhú iní ñáhã-yu xii-ndo cuendá sá ñá túu-gã chitnahá-ndõ-yu. 20 Te dandàcu iní-ndó nàcuáa ní cáháⁿ-í sá ni ɛ̃n tée xinu cuechi ñá túu cùnuu-dé dácúxí pàtróóⁿ-dé. Te yúhú cùu úhú iní ñáhã-yu, te diu-ni ducaⁿ càda ñahã-yu xii nchòhó. Te núu dícó ní tnǐ-yu tnúhu ní cáháⁿ-í ñá, te diu-ni ducaⁿ tnǐ-yu tnúhu cáháⁿ-ndó nǔ-yu ni cùu. 21 Te ducaⁿ càda ñahã-yu xii-ndo sã cuendá-í, chi ñá xini-yu Tãtã-í Yaá ní tendaha ñaha xii-í véxi-í ñuyíú-a.

22 "Te vaa vá cùndècu cuéchi-yu ni cùu, te núu ñá túu yúhú ní cáháⁿ-í nǔ-yu, te vitna vá cùu tnáhí cachí-yu sá ñá túu cuéchi-yu. 23 Chi nchaa ñáyi cùu úhú iní ñáhã xii-í, te cùu úhú iní-yu tnáhã Tãtã-í. 24 Te vaa ni ɛ̃n cuéchi-yu vá cùndècu ni cuu, te núu dícó ñá túu ní xini-yu nchaa sá ñá quide-í sá vã yõ tnáhí ndàcu cada. Te cuéi ní xini-yu dico dai cùu úhú iní ñáhã-yu xii-í ndih Tãtã-í. 25 Te duha quidé-yu chi dacuítí quèe ndáá-xi nàcuáa yòdo tnuní núu tütú Yã Ndiõxí sá dácuhã-yu, chi càchí-xi sá ñá túu ñá cuéchi-í te cuu úhú iní ñáhã-yu xii-í.

26 "Te Espiritú Tãtã-í Dútú Ndiõxí sá ndécú nǔ-gã tendaha-í quixi chindee ñaha-xi xii-ndo, te canu ichi ñaha-xi nàcuáa cundecu-ndo, te Espiritú-áⁿ cáháⁿ ndáá-xi cuendá cutnùni iní nchaa ñáyi yoo cùu-í. 27 Te nchòhó tnáhã-ndó cáháⁿ váha-ndo cuendá-í cuendá cutnùni

iní-yu yoo cùu-í, chi naha-ndo sá ndèé òré ní ngüíta-í quidè-í chiúⁿ Tãtã-í ní chitnahá ñáhã-ndó xii-í —càchí-gá xáhaⁿ-gã xii-güedé.

16

1 Te ní xáhaⁿ tucu-gá xii-güedé:

—Duha càháⁿ-í cuendá ná nanchòcáva iní-ndó nǔhú-ndó ichi cuehé ichi duha. 2 Chi vá dáñã-gã-güedé

quihu-ndo venúhu, te ni vã cùu-gã quini ndeé ñáhã-güedé xii-ndo. Te sáá ɛ̃n nduu te cahni ñaha-güedé xii-ndo, te xiãⁿ cuu cahaⁿ-güedé sá quidé-güedé chiúⁿ Yã Ndiõxí. 3 Te ducaⁿ càda-güedé chi ñá túu xini-güedé Tãtã-í, te ni ñá túu xini ñáhã-güedé xii yúhú. 4 Te duha nduu tnúhu càháⁿ-í núu-ndó, chi na sáá òré te ndacu iní-ndó nchaa tnúhu sá sá ní cachí tnúhu-í xii-ndo nàcuáa cada ñaha-güedé xii-í.

Nchaa chiúⁿ quide Espiritú Yã Ndiõxí

Te ñá túu ní càchí tnúhu-í xii-ndo ndeé dǐhna chi ndècu ndih ñaha-í xii-ndo. 5 Dico vitna sa ta cùyatni nduu nǔhú-í núu ndécú Tãtã-í Yaá ní tendaha ñaha xii-í véxi-í ñuyíú-a. Te ni ɛ̃n nchòhó ñá túu xicãⁿ tnúhú-ndó nǔ-í nǔu ndeé quihⁿ-í. 6 Chi mee-ni sã ndihú iní-ndó sã dúcãⁿ ñá cáháⁿ-í. 7 Te na càchí tnúhu ndáá-í xii-ndo sã váha-gã sá cùu-xi-ndó nǔu nǔhú-í, chi tendaha-í Espiritú Yã Ndiõxí quixi cundecu ndih-ndo chindee ñaha-xi, chi núu vá nǔhú-í te vá quixí Espiritú-gã cundecu ndih-ndo chindee ñaha-xi xii-ndo. 8 Te na quixi Espiritú-gã te dandixi túu-xi iní nchaa ñáyi ndècu ichi cuehé ichi duha sá ñá túu quide váha-yu. Te dacàhu iní ñáhã-xi sã ndécú ɛ̃n ichi váha ichi ndáá. Te Espiritú-gã-áⁿ cada-xi nàcuáa cutnùni iní-yu sá Yã Ndiõxí cada ndáá-gã cuéchi-yu. 9 Te ducaⁿ te cutnùni iní-yu sá ndécú cuéchi-yu, chi ñá túu sàndáá iní ñáhã-yu xii-í. 10 Te ducaⁿ te cutnùni iní-yu nàcuáa nduu cuendá ichi váha ichi ndáá, chi yúhú nǔhú-í núu ndécú Tãtã-í, te nchòhó vá quini ñáhã-gã-ndó. 11 Te ducaⁿ te cutnùni iní-yu sá Yã Ndiõxí cada

ndáá-gá cuéchi-yu, chi sa ní cáháⁿ-gá sá yúcu ñávãha sá táxi tnùnì ñuyú-a quíhíⁿ-xi núú ùhú núú ndàhú.

12 Te vãi-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchàa vitna. 13 Te na quíxi Espíritú Yã Ndiõxí, Espíritú càháⁿ ndáá cuítì, te Espíritú-áⁿ danèhé ñáhá-xí nchàa tnúhu váha tnúhu ndáá. Te vá dácàhu iní ñáhá-xí xii-ndo sá vèxi iní méé-xí chi dacàhu iní ñáhá-xí nchàa sá càháⁿ Yã Ndiõxí, te cachí tnúhu-xi nchaa nàcuáa cada-xi ndéé núú cuáháⁿ núú vèxi-gá. 14 Te Espíritú-gá-áⁿ cada càhnu ñaha-xi xii yúhú chi ndècu ndìhi-xi tnúhu-í, te danèhé ñáhá-xí xii-ndo. 15 Te nchaa sá ndécú ndìhi Tàtà-í ndécú ndìhi-í tnáhá-í, núú xíáⁿ càchí-í sá Espíritú-gá danèhé ñáhá-xí nchàa tnúhu-í xii-ndo.

Nchaa ñáyiu ndìhú iní-xi nduu dǐí iní-yu na quíxi tucu Jesús

16 Te ìⁿ úú-nã nduu ndècu-í te vá quínì ñáhá-gã-ndó xii-í, dico núú sàcú-ni nduu te quínì ñáhá tùcu-ndo xii-í, te ducaⁿ chí núhú-í núú ndécú Tàtà-í —càchí-gá xáhaⁿ-gã xii-güedé.

17 Te sá dúcáⁿ ñí cáháⁿ-gá ñuu ní ngúíta ìⁿ úú cue téé xica cuu ndìhi-gá xítnàha-güedé:

—¿Nása ndùu-tu tnúhu càháⁿ-gá sá càchí-gá sá ìⁿ úú-nã nduu ndècu-gá te vá quínì-gá-ó-gã, dico núú sàcú-ni nduu te quínì tucu-o-gã-i?, chí núhú-gá núú ndécú Tàtà-gã —càchí-güedé xítnàha-güedé.

18 Te xítnàha tucu-güedé:

—¿Nása cuáháⁿ-tu tnúhu-ãⁿ sá sàcú-ni nduu? Te ñá tècú tnùnì-ó ñása ndùu tnúhu càháⁿ-gá —càchí-güedé xítnàha-güedé.

19 Te Jèsús ní cutnùnì iní-gá sá cuínì-güedé cácaⁿ tnúhú-güedé núú-gã nása ndùu tnúhu ní cáháⁿ-gá, núú ní xáhaⁿ-gã:

—Cuèndá sá ñí cachí-í sá ìⁿ úú-nã nduu ndècu-í te vá quínì ñáhá-gã-ndó xii-í, dico núú sàcú-ni nduu te quínì ñáhá tùcu-ndo xii-í ní cachí-í, ¿xíáⁿ ndúcú tnúhu núú tnáhá-ndó-ãⁿ? —càchí-gá xáhaⁿ-gã xii-güedé.

20 Te ní xáhaⁿ tùcu-gá:

—Te na càchí tnúhu ndáá-í xii-ndo sã nchòhó ndìhú víhí iní-ndó te ndáhyú-ndó, dico nchaa ñáyiu ndècu ichi cuehé ichi duha chi da cudǐí iní-yu. Dico nchòhó ñáyiu ndáhyú chí sáa nduu te nduu dǐí iní-ndó. 21 Chi dàtná cuínì-ndó cùu ìⁿ ñadìhí ñaha ní tnáhá nduu cacu déhe-xi vãi sani iní-aⁿ sá quidé ùhú ñáhá-xí. Dico na yãha cacu déhe-aⁿ, te ñá túú-gã ndácú iní-aⁿ sá ñí quide ùhú ñáhá-xí xii-aⁿ chí mee-nã sá cudǐí iní-aⁿ déhe-aⁿ. 22 Ducaⁿ sãtnahá-xi cùu nchohó vitna chí ndìhú iní-ndó sã nùhú-í, dico quíxi tucu-í quíxi coto ñaha-í xii-ndo, te òré-áⁿ te cudǐí ndìsa iní-ndó, te vá yõo ìⁿ-gá dandìhú iní ñáhá xii-ndo davá-áⁿ.

23 Te dàvá-áⁿ ñà túú-gã ná nducu tnúhu-ndo nùú-í. Te na càchí tnúhu ndáá-í xii-ndo sã Tàtà-í taxi-gá nchaa sá ná càcáⁿ-ndó nùú-gã nùu na quíndáá iní ñáhá-ndó xii-í. 24 Te ndéé vitna vátá dúcáⁿ-gã cada-ndo càcáⁿ-ndó. Dico càcáⁿ-ndó nùú-gã nùu ná cuínì-ndó te taxi-gá cuèndá cudǐí ndìsa iní-ndó —càchí-gá xáhaⁿ-gã xii-güedé.

Xítohó Jesucrístú ní cunuu tnúhu-gá núú yucu ñávãha

25 Te xáhaⁿ tùcu-gá xii-güedé:

—Mee-ni ñí chidáhu ndodo-í tnúhu ní cáháⁿ-í núú-ndó, dico sáa nduu te vá chidáhu-gá-í tnúhu cáháⁿ-í, chí cáháⁿ ndáá-na-í cuèndá Tàtà-í. 26 Te dàvá-áⁿ càcáⁿ-ndó núú Tàtà-í nùu ná cuínì-ndó te taxi-gá, te núu na quíndáá iní ñáhá-ndó xii yúhú Déhe-gá. Te ñá túú-gã xínì ñúhu-xi sá yúhú cácaⁿ-í núú-gã cuèndá-ndó chí cácaⁿ méé-nã-ndó. 27 Chí mee Tàtà-í ío cùu iní ñáhá-gã xii-ndo cuèndá cúú iní ñáhá-ndó xii-í, te sàndáá iní-ndó sã nùú-gã ní quee-í véxi-í. 28 Te yúhú ní quee-í núú Tàtà-í véxi-í ñuyú-a, te vitna dándóo-í ñuyú-a te núhú-í núú ndécú-gã —càchí-gá xáhaⁿ-gã xii-güedé.

29 Te ní xáhaⁿ cuè téé xica cuu ndìhi-gá:

—Vitna chi càháⁿ ndáá-nă-n, ñá túú-gă chídăhu-n tnũhu càhá-n. ³⁰ Te vitna ní xiní-ndí sá ïo váha cùtnuní iní-n nchàa nacuáa cùu, te cùtnuní iní-n nchàa nacuáa sàni iní nchaa ñáyiu. Te ñá túú xini ñuhu-xi nágá nducu tnũhu-yu núú-n chi nchaa sa ní dátũu-n nũũ-yu. Te xíăⁿ nũu sàndáá iní-ndí sá nũú Yă Ndiõxí ní quee-n véxi-n —càchí-güedé xăhaⁿ-güedé xii-gá.

³¹ Te ní xáhaⁿ Jèsús:

—¿Te vitna sàndáá iní-ndó-ăⁿ? ³² Vitna ní sáá nduu nĩ sáá òré sá ncháá nchòhó cuténuu-ndo càa ìⁿ caa úú cuu-ndo, te dândóo mee ñaha-ndo xii-í. Dico ñá díú mée dii-í quendóo chi ndècu ndihí-í Tătà-í. ³³ Duha càháⁿ-í cuendá cuu váha iní-ndó cùndecu-ndo, chi ñuyíú-a cuu úhú iní ñáhă-yu xii-ndo, dico ni vă yùhú-ndó chi yúhú sa ní dáquéeé tĩhù-í nchaa sá cuèhé sá dúhá ío ñuyíú-a —càchí-gá xáhaⁿ-gă xii-güedé.

17

Jèsús xicáⁿ táhú-gă núú Tătá-gă Dútú Ndiõxí cuendá cue téé xica cuu ndihí-gá

¹ Te sátá dúcáⁿ nĩ cáháⁿ Jèsús te ní ndacoto-gá andiũ, te ní xáhaⁿ-gă xii Tătá-gă Dútú Ndiõxí:

—Táu, vitna ní sáá nduu càda cahnu ñaha-n xii-í cuendá ducaⁿ càda cahnu ñaha-í xii-n. ² Chi mee-n nĩ cachí-n sá táxí tnùn-í nchaa ñáyiu ñuyíú-a, te dàcacu nihnu-í nchaa ñáyiu ní cachí-n nàníhí tàhú. ³ Te cundecu ndihí-õ-yu ni caa ni quíhíⁿ, chi sàndáá iní ñáhă-yu sá ìⁿ ddi díí-ni yòhó cúú-n Ndiõxí ndisa, te ducaⁿ xini ñáhă-yu xii yúhú Jesucristú téé ní tendaha-n véxi ñuyíú-a.

⁴ Te yúhú ní chiñuhu ñaha-í xii-n ñuyíú-a, te ní xínu chìuⁿ ní cachí-n càda-í. ⁵ Táu, vitna na nàsáá-í núú-n te cada càhnu ñaha-n xii-í dàtná ní xóo cada càhnu ñaha-n xii-í ndéé cùtnàhá vátá ngáva-gá ñuyíú.

⁶ Te nchaa ñáyiu ní nanducu nihnu-n tnuú nchaa ñáyiu ndècu ichi cuehé ichi duha, ní taxi cuendá-n-yu, te ní xáhaⁿ-í xii-yu yoo cùu-n.

Te cuendá-n cùú-yu, te ní taxi cuendá-n-yu, te ní sàndáá iní-yu tnúhu-n. ⁷ Te vitna ní cutnùn-í iní-yu sá ncháá tnũhu ndècu ndihí-í diũ-ni mee-n nĩ taxi-n. ⁸ Te ní dánèhé-í-yu nchaa tnúhu sá nĩ dánèhé ñáhă-n xii-í, te ní sàndáá iní-yu. Te ní cutnùn-í iní-yu sá nũú-n nĩ quee-í véxi-í, te ní sàndáá iní-yu sá yòhó ní tendaha ñaha-n xii-í véxi-í ñuyíú-a.

⁹ Te yúhú càháⁿ ndàhú-í núú-n cuendá nchaa ñáyiu ní taxi cuendá-n. Te ñá túú càháⁿ ndàhú-í núú-n cuendá ñáyiu ndècu ichi cuehé ichi duha, chi cuendá nchaa ñáyiu ní taxi cuendá-n càháⁿ-í, chi cuendá-n cùú-yu. ¹⁰ Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xi cuendá-í tnàhá-í. Te xiquide càhnu ñahă-yu xii-í.

¹¹ Te yúhú vá cùndecu-gá-í ñuyíú-a, dico mée-yu chi cundecu-ní-yu, te yúhú ndixi-í núú ndécú-n. Táu, yòhó ío yiñũhu ndecu-n, te yúhú càháⁿ ndàhú-í núú-n sã ní yùhu ni iní-n còto-n nchaa ñáyiu ní taxi cuendá-n, ñáyiu ní sàndáá iní tnúhu-í cuendá sá ìⁿ-ní ichi cuú-yu cundecú-yu dàtná ìⁿ-ni cùu nchoo. ¹² Chi òré ndécú-í ndihí-yu ñuyíú-a ní xito-í-yu nàcuáa cùu iní-n, te ni ìⁿ-yu ñá túú ní xíta nihnu, chi ìⁿ-ni té Jùdás ní xíta nihnu tnàhí-dé, te ducaⁿ nĩ cuu cuendá sá nĩ quee ndáá-xi nàcuáa yòdo tnuní núú tütú-n.

¹³ Te vitna sa ndixi-í núú ndécú-n, dico nini ndècu-gá-í ñuyíú-a duha càháⁿ-í cuendá sá cúú ìⁿ-yú dàtná cúú ìⁿ mée-í. ¹⁴ Te yúhú ní dánèhé-í-yu tnúhu-n, dico nchaa ñáyiu ndècu ichi cuehé ichi duha cùu úhú iní ñáhă-yu xii-yu cuendá sá ñá túú-gă ndécú-yu ichi cuehé ichi duha-áⁿ dàtná yúhú ñá túú ndècu-í ichi-áⁿ.

¹⁵ Te ñá túú càchí-í sá xócàni-n-yu ñuyíú-a, dico càháⁿ ndàhú-í núú-n sã dácacu nihnú-n-yu núú yucu ñávăha. ¹⁶ Te yúhú ñá túú ndècu-í ichi cuehé ichi duha, te ducaⁿ mée-yu ñá túú-gă ndécú-yu ichi cuehé ichi duha. ¹⁷ Te ío na cùndecu yihi ñuhu-gă-yu núú-n dàcuahă-yu

tnúhu-n, chi cùu-xi ìⁿ tnúhu ndáá.
 18 Te dàtná ní tendaha ñàha-n xii yúhú véxi-í tnuú nchaa ñáyi ndècu ichi cuehé ichi duha, ducaⁿ càda-í tendaha-ì-yu quíhíⁿ-yu cáháⁿ-yu tnúhu-í tnuú nchaa ñáyi ndècu ichi cuehé ichi duha. 19 Te yúhú ndècu yíñuhu-í núu-n, te cada ñaha-n xii-í nàcuáa cùu iní-n sã cuendá-yu, te ducaⁿ te cundecu yíñuhú-yu núu-n dàcuahá-yu tnúhu-n.

20 Te ñá díú cuendá mee-ni ñáyi sa ní sándáá iní-xi càháⁿ ndàhú-í núu-n, chi tnàhá cuendá nchaa ñáyi na quíndáá iní ñáhá xii-í ndéé ìdá-gá ñu na cùndedóho-yu tnúhu cáháⁿ ñáyi na tendaha-í. 21 Te xicáⁿ táhù-í núu-n sã ncháá-yu ìⁿ-ná ichi na cùu-yu, te ìⁿ-ná cani iní ndihí ñàhá-yu xii-o dàtná cúu nchòo ìⁿ-ni cuu-o. Te ducaⁿ ìⁿ-ná cuu-o ndihí-yu cuendá sá ná quíndáá iní nchaa ñáyi ndècu ichi cuehé ichi duha sá díú-n ñí tendaha ñàha-n xii-í véxi-í ñuyíú-a. 22 Te nchaa sá vaha ní taxi-n ndècu ndihí-í ní dánèhé-í-yu cuendá sá ìⁿ-ná cúu-yu cundecú-yu dàtná ndècu nchòo. 23 Te yúhú cundecu ndihí-í-yu, te yòhó cundecu ndihí ñaha-n xii yúhú cuendá ìⁿ-ná cuu ndisá-yu cundecú-yu. Te ducaⁿ te cutnùní iní nchaa ñáyi ndècu ichi cuehé ichi duha sá díú mèe-n ní tendaha ñàha-n xii-í véxi-í ñuyíú-a, te cùu iní-n-yu dàtná cúu iní ñáhá-n xii yúhú.

24 Táu, mee-n ñí taxi cuendá-n-yu, te cuíní-í sá cùndecú-yu núu cùndecu-í cuendá quíní-yu sá quidé càhnu ñaha-n xii-í chi ducaⁿ-ni cùu iní ñáhá-n xii yúhú ndéé cùtnàhá vátá ngáva-gá ñuyíú. 25 Táu, yòhó ío yíñuhu ndecu-n. Te ñáyi ndècu ichi cuehé ichi duha ñá túú xini ñáhá-yu xii-n, dico yúhú chi xini ñáhá-í xii-n, dico ñáyi ní sándáá iní ñáhá xii-í sa xini-yu sá díú-n ñí tendaha ñàha-n xii-í véxi-í ñuyíú-a. 26 Te sa xáhaⁿ-í xii-yu yoo cùu-n, te díu-ni ducaⁿ càda-í cuendá cuu iní tnàhá-yu dàtná cúu iní ñáhá-n xii-í, te ducaⁿ cùndecu-í ndihí-yu —càchí-gá xáhaⁿ-gã xii Tátá-gã Dútú Ndióxi.

18

Ní tñi-güedé Jèsús ndécá ñàha-güedé cuáháⁿ

(Mt. 26:47-56; Mr. 14:43-50; Lc. 22:47-53)

1 Te sáta dúcáⁿ ñí cáháⁿ Jèsús, te ní quee-gá ndihí cue téé xica cuu ndihí-gá cuáháⁿ-güedé ndàa ingá xio yuhu yúu Cèdrón. Te yàcáⁿ cáá ìⁿ lahuertá, te xití lahuertá-áⁿ cuãnguihu Jèsús ndihí cue téé xica cuu ndihí-gá.

2 Te té Jüdás déhe té Xímú Iscarioté téé ní sáha cuendá ñáhá xii-gá núu cué téé cùu úhú iní ñáhá sa xini-dé lahuertá-áⁿ chi titní xito ní sáháⁿ Jèsús ndihí-güedé xíaⁿ. 3 Núu ndáá ichi xíaⁿ ñí sáá té Jüdás ndihí vai sandadú, ndihí cue téé quide cuendá veñuhu ní techiúⁿ ñaha cue dútú cùnùu, ndihí cue téé cùu fariséú. Te xinehe-güedé machití ndihí ìⁿ úú-gá sá dèéⁿ, te yòtnuú-güedé lintérná ndihí iti ní sáá.

4 Te Jèsús sa ñaha-gá nchaa nàcuáa cada ñaha-güedé xii-gá ñu ní sáháⁿ tuha ñaha-gã xii-güedé, te ní xáhaⁿ-gã: —¿Yoo nànducu-ndo? —cachí-gá xáhaⁿ-gã xii-güedé.

5 Te ní xáhaⁿ-güedé:

—Jèsús téé ñuú Nazàrét nánducu-ndí —càchí-güedé xáhaⁿ-güedé xii-gá.

Te ní xáhaⁿ Jèsús:

—Yúhú ducaⁿ nàni-í, te náu-í ndécú-á te núu yúhú nánducu-ndo —cachí-gá xáhaⁿ-gã xii-güedé.

Te tnàhá té Jüdás téé ní sáha cuendá ñáhá xii-gá ndihí-güedé. 6 Te òré ní xáhaⁿ Jèsús sá díú-gã cúu téé nànducu-güedé, te ní nacaca dùma-güedé te ní nduá-güedé ndéé ñuhu. 7 Te ní xicáⁿ tnúhú tùcu Jèsús núu-güedé yoo nànducu-güedé. Te ní xáhaⁿ tùcu-güedé sá Jèsús téé ñuú Nazàrét nánducu-güedé, 8 núu ní xáhaⁿ-ná Jèsús:

—Sa ní cáháⁿ-í sá díú yúhú ducaⁿ nàni-í, te núu yúhú nánducu-ndo, te dañá-ndo nchàa cue téé iha na nùhú-güedé —cachí-gá xáhaⁿ-gã xii-güedé.

9 Duha ní cuu chi ní quee ndáá-xi nàcuáa ní cáháⁿ méé Jèsús chi ní

cachí-gá sá ncháá ñǎyiu ní sáha cuendá ñáhá Yǎ Ndióxi cundecu ndihi-gá vá cuíta nihnú-yu. ¹⁰ Te té Xímú, àdi Pelú chi úú diù-dé, néhé-dě ìⁿ machìtí, te ní tava-dé machìtí-áⁿ ñii-xi te ní xehndé-dé lóho xio cùha ìⁿ téé nàni Malcú ní quéndeé duuⁿ. Te téé-áⁿ xínú cuèchi-dé núú dütú cúnù-gá. ¹¹ Te ní xáhaⁿ Jèsús xii té Pèlú:

—Nataxúha machìtí-áⁿ núú ñúhú-xí, chi dacuítí sǎ ndóhò-í nàcuáa ní cachí Tǎtà-í cunduu — cachí-gá xáhaⁿ-gǎ xii-dé.

Jèsús ndécú-gǎ núú dütú cúnù-gá
(Mt. 26:57-58; Mr. 14:53-54; Lc. 22:54)

¹² Te cue sandàdú ndihi cue téé cúnù-gá núú-güedě, ndihi cue téé quide cuendá veñúhu ní tñii-güedé Jèsús, te ní dácútú ñàha-güedé. ¹³ Te ndèca ñàha-güedé xii-gá cuáháⁿ núú ndécú tǎ Ànás, te té Ànás-áⁿ cúú-dě tǎtà ñadihi té Caifás. Te té Caifás-áⁿ ní cuu-dé dütú cúnù-gá cuía-ǎⁿ. ¹⁴ Te diu-ni téé-áⁿ ní xáhaⁿ-dě xii ñáyiu isràél sá vǎha-gá sá íⁿ-ní téé na cùú-dé sá cuendá-yu ncháá-yu.

Té Pèlú càháⁿ-dé núú ñáyiu sá ñà túú xini-dé Jèsús

(Mt. 26:69-70; Mr. 14:66-68; Lc. 22:55-57)

¹⁵ Te té Pèlú, àdi Xímú chi úú diù-dé, ndihi ingá tucu-dé nàcuáa xica cuu ndihi-güedé Jèsús nchìcúⁿ ñáhá-güedě xii-gá cuáháⁿ. Te ìⁿ téé-áⁿ xini tñáhá-dě ndihi dütú cúnù-áⁿ núú nchìcúⁿ-dé tñáhá-dé Jèsús cuánguihu ndéé núú cáá vèhe téé cúnù-áⁿ. ¹⁶ Dico té Pèlú ní ndóo-dé yuyèhe ndaa quehé, núú ní ndee téé ndihi té Pèlú-áⁿ ní càháⁿ ndihi-dé ñàha ndéé yuyèhe, te ndèca-dé té Pèlú cuánguihu. ¹⁷ Te ní xáhaⁿ ñàha ndéé yuyèhe-áⁿ xii té Pèlú:

—¿Náa ñá díú yòhó tñáhá-n xica cuu ndihi-n téé ndèca-güedé cuánguihu-a? —cachí-aⁿ xáhaⁿ-aⁿ xii-dé.

Te ní xáhaⁿ tǎ Pèlú:

—Ñáhá, ñá túú tǎe-ǎⁿ xicá cùu ndihi-ú —cachí-dé xáhaⁿ-dě xii-aⁿ.

¹⁸ Te ío víxiⁿ quide-xi núú cue téé xinu cuechi, ndihi cue téé quide

cuendá veñúhu ní dátñáhá-güedé ñuhú, te xínutñii teté-güedé ndihi té Pèlú.

Dütú cúnù nducu tñúhu-dé núú Jèsús

(Mt. 26:59-66; Mr. 14:55-64; Lc. 22:66-71)

¹⁹ Te dütú cúnù ní xicáⁿ tñúhú-dě núú Jèsús núu nándi cùu cue téé xica cuu ndihi-gá, te nándi sá dánèhé ñáhá-gǎ xii-güedé. ²⁰ Te ní xáhaⁿ-gǎ:

—Yúhú càháⁿ ndodo-í núú ncháa ñáyiu cuèi xití veñúhu càhnu sá ìo cúnùu, te cuèi xití ncháa dava-gá veñúhu núú tàcá ncháa ñáyiu isràél ducaⁿ-ni dānehé-í-yu, te ñá túú dǎyuhu càháⁿ-í. ²¹ Núú vá càcáⁿ tñúhú-n núú-í. Càcáⁿ tñúhú núú ncháa ñáyiu sàcúndedóho tñúhu càháⁿ-í, te na càháⁿ-yu núú nása ndùu tñúhu càháⁿ-í chi xini-yu —cachí-gá xáhaⁿ-gǎ xii-dé.

²² Te sá dúcáⁿ ní càháⁿ Jèsús núu ìⁿ téé quide cuendá veñúhu nùtñii-dé tñáhá-dé te ní cani-dé ìⁿ déhndé núú-gǎ. Te ní xáhaⁿ-dě:

—¿Ná cuendá ducaⁿ càháⁿ-n núú dütú cúnù-i? —cachí-dé xáhaⁿ-dě xii-gá.

²³ Te ní xáhaⁿ Jèsús xii-dé:

—Te núu nèhé ní càháⁿ-í te càháⁿ-n nása ndùu tñúhu ní càháⁿ-í, te yúhú càháⁿ váha-í te ducaⁿ càniha-n —cachí-gá xáhaⁿ-gǎ xii-dé.

²⁴ Te ndùtu yoho-ni Jèsús ní dánùhú ñáhá tǎ Ànás xii-gá ndaha té Caifás dütú cúnù-gá.

Té Pèlú càháⁿ tucu-dé núú ñáyiu sá ñà túú xini-dé Jèsús

(Mt. 26:71-75; Mr. 14:69-72; Lc. 22:58-62)

²⁵ Te té Pèlú nùtñii teté-ni-dé, te ní xáhaⁿ-güedě xii-dé:

—¿Náa ñá díú tñáhá yòhó xicá cùu ndihi téé ndèca-ndí véxi-ǎⁿ? —cachí-güedé xáhaⁿ-güedě xii-dé.

Te ní xáhaⁿ tǎ Pèlú:

—Ñáhá, ñá túú tǎe-ǎⁿ xicá cùu ndihi-ú —cachí-dé xáhaⁿ-dě xii-güedé.

²⁶ Te ìⁿ ñani tñáhá tǎe ní xehndé té Pèlú lóho-xi-áⁿ xínú cuèchi-dé

tnàhá-dé núú dütú cúnù. Te téé-án ní xáháⁿ-dè xii té Pèlú:

—¿Náa ñá díú tnàhá-n ndìhi-n-dé ní xiní ñáhà-í òré ní tñi-ndí-dé xití lahuèrtá? —càchí-dé xáháⁿ-dè xii-dé.

²⁷ Te té Pèlú ní xáháⁿ tùcu-dé sá ñá díú-dè, te òré-án ní cana ìⁿ líhi.

Jèsús ndécú-gă núú tē Pilatú

(Mt. 27:1-2, 11-14; Mr. 15:1-5; Lc. 23:1-5)

²⁸ Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiùⁿ téé cùu gobiernú. Te sa ta cùditó-ni-gá cuáháⁿ núu ñá ní cuíní cue téé isràél quíhu-güedé xití vechiùⁿ téé cùu gobiernú-án. Te núu nì quíhu-güedé vechiùⁿ-án ñá, te vá cúú-gă quíhu-güedé cudini-güedé vico pascuá ní cùu chi ducaⁿ tnàhí quide-güedé. ²⁹ Núu té Pilatú téé cùu gobiernú ní quee-dé vechiùⁿ-dé ní cáháⁿ ndìhi ñaha-dè xii-güedé, te ní xáháⁿ-dè:

—¿Ná cuéchi ní quide téé-a núu ndèca-ndo-dé véxi? —càchí-dé xáháⁿ-dè xii-güedé.

³⁰ Te ní xáháⁿ-güedé:

—Te núu dícó ñá túú cuéchi-dé-án te vá cándèca-ndí-dé quixi núu-n ní cùu —cachí-güedé xáháⁿ-güedé xii-dé.

³¹ Te ní xáháⁿ tùcu té Pilatú xii-güedé:

—Chí cándèca-dé cuánùhú, te cada ndáá-ndó cuéchi-dé nàcuáa càa leí mée-ndó —càchí-dé xáháⁿ-dè xii-güedé.

Te ní xáháⁿ-güedé:

—Dico nchúhú ñáyiu isràél chi ñá túú dùcaⁿ taxi tñuní leí sá cáhni-ndí —càchí-güedé xáháⁿ-güedé xii-dé.

³² Te ducaⁿ ñi cuu chi dacuítí ñi quee ndáá-xi nàcuáa ní cáháⁿ mée Jèsús cada-xi cuú-gá. ³³ Te cuándihu té Pilatú vechiùⁿ-dé, te ní cana-dé Jèsús ní xicáⁿ tñuhú-dè núú-gă, te xáháⁿ-dè:

—¿Yòhó yíndaha-n ñáyiu isràél-án? —càchí-dé xáháⁿ-dè xii-gá.

³⁴ Te ní xáháⁿ Jèsús:

—¿Te xíáⁿ cáháⁿ-n sá vèxi iní mée-n, àdi íó ìⁿ ñáyiu ní cachí tñuhu xii-n cuèndá-í? —càchí-gá xáháⁿ-gă xii-dé.

³⁵ Te ní xáháⁿ tē Pilatú xii-gá:

—Ná díú tē isràél cùu-í núu ducaⁿ cáháⁿ-n, chi cue ñani tnàhá-n cuè téé isràél ndìhi cue dütú cúnù ní taxi cuèndá ñáhá-güedé xii-n iha. ¿Te ná ní quide-n? —càchí-dé xáháⁿ-dè xii-gá.

³⁶ Te ní xáháⁿ Jèsús:

—Ná díú tē ñuyíu-a cùu-í te ni ñá túú vèxi-í taxi tñuní-í ñuyíu-a, chi núu dícó iha taxi tñuní-í án te cue téé xica cuu ndìhi-í nàá-güedé ndìhi cue téé isràél cuèndá sá vă tñí ñaha-güedé xii-í ní cùu, dico ñá túú vèxi-í sá táxi tñuní-í ñuyíu-a —càchí-gá xáháⁿ-gă xii-dé.

³⁷ Te ní xáháⁿ tē Pilatú:

—¿Te téé yíndaha ñáyiu cùu-ó vání? —càchí-dé xáháⁿ-dè xii-gá.

Te ní xáháⁿ Jèsús:

—Te dàtná càchí-n-án yíndaha ndisa-í ñáyiu, chi yúhú véxi-í ñuyíu-a te iha ní cacu-í te cáháⁿ-í mee-ni tñuhu ndáá. Te nchaa ñáyiu na cùdí ìní-xi tñuhu ndáá, te tedóho-yu nchaa tñuhu cáháⁿ-í —càchí-gá xáháⁿ-gă xii-dé.

³⁸ Te ní xáháⁿ tē Pilatú:

—¿Te ná cúú-tu tñuhu ndáá-ái? —càchí-dé xáháⁿ-dè xii-gá.

Càchí-güedé sá cáhni-güedé Jèsús

(Mt. 27:15-31; Mr. 15:6-20; Lc. 23:13-25)

Te sáta ñi yáha ní xicáⁿ tñuhú tē Pilatú núu Jèsús, te ní quee tucu-dé quehé, te xáháⁿ-dè xii cue téé isràél:

—Ná túú ñá cuéchi téé-a. ³⁹ Te váha-ni chi ducaⁿ tnàhí quide nchohó sá ndì tnahá nduu vico pascuá cuíní-ndó sá dácăcu-í ìⁿ téé yíhi vecaá. Te núu cuíní-ndó te na dácăcu-í téé yíndaha ñaha xii-ndo —cachí-dé xáháⁿ-dè xii-güedé.

⁴⁰ Te sá dúcáⁿ ñi cáháⁿ-dé, núu nchaa-güedé níhi ní cáháⁿ-güedé, te xáháⁿ-güedé:

—¡Vá dácăcu-n tē-án, té Barrábás dácăcu-n! —càchí-güedé xáháⁿ-güedé xii-dé.

Te té Barrábás-án ñi cuu-dé ìⁿ ñadúhú.

19

1 Te té Pilatú ní táuchíuⁿ-dè ní tñi ñaha cuè sandadú xii Jèsús, te ní

caniha-güedě xii-gá ndihí ñi. ² Te diu-ni cue tée-án nǐ cadúha-güedé ñiⁿ coróná iñu ní chihi-güedé díquí-gă, te ní dáquũ nuu ñaha-güedě xii-gá ñiⁿ dóó tícuèhé víhí. ³ Te ní sáháⁿ ndehe yatni-gá-güedé núú-gă, te ní xáhaⁿ-güedě:

—¡Ío cãhnu cuu yohó tée yìndaha ñaha xii ñáyiũ isràél! —càchí-güedé xáhaⁿ-güedé cúdíquí ndeé ñáhá-güedě xii-gá.

Te ní cani-güedé déhndé núú-gă.

⁴ Te ní quee tucu té Pilatú quehé te ní xáhaⁿ-dě xii nchaa ñáyiũ xĩndecu quehé:

—Te cundehe-ndo-dě ná ndeé ñùhu-í-dé iha, chi yúhú sãha-í cuendá sá ñà túú cuèchi-dé —càchí-dé xáhaⁿ-dě xii-yu.

⁵ Te ní ndeñuhu ñaha té Pilatú xii Jèsús xití vechiũ-dé te ñùhu ñiⁿ coroná iñu díquí-gă, te nihnu-gá dóó tícuèhé víhí-ãⁿ. Te ní xáhaⁿ tẽ Pilatú xii-yu:

—¡Nái-dé-a! —càchí-dé xáhaⁿ-dě xii-yu.

⁶ Te ní xiní ñáhá cuè dútú cúnũ ndihí cue tée quide cuendá veñúhu. Te ní cuáá-güedé, te xáhaⁿ-güedě:

—¡Cata caa-dé! ¡Cata caa-dé núú cùrúxí! —càchí-güedé xáhaⁿ-güedé xii-dé.

Te ní xáhaⁿ tẽ Pilatú:

—Vãha-gá núu candeca mee-ndo-dě quíhíⁿ cata caa-ndo-dě núú cùrúxí, chi yúhú cútnúni iní-í sá ñà túú na cuèchi-dé —càchí-dé xáhaⁿ-dě xii-güedé.

⁷ Te ní xáhaⁿ cuè tée isràél:

—Léi ndécú ndihí nchúhú càchí-xi sá dàí cuú-dé, chi càchí-dé sá Dẽhe Yá Ndiõxí cúú-dě —càchí-güedé xáhaⁿ-güedé xii-dé.

⁸ Te sá dúcáⁿ nǐ xáhaⁿ-güedě xii té Pilatú, te vãa-gá ní yùhú-dé. ⁹ Núu cuándihu tucu-dé vechiũ-dé, te ní xáhaⁿ tũcu-dé xii Jèsús:

—¿Te yohó ndeé tée cùu-n-i? —cachí-dé xáhaⁿ-dě xii-gá.

Dico Jèsús ñá túú ní cãháⁿ-gá.

¹⁰ Núu ní xáhaⁿ tẽ Pilatú xii-gá:

—¿Te vá càchí tnúhu-n núu ndèè tée cùu-n-u? ¿Náa ñá túú xini-n

sã yúhú táxí tnùní-í, te cuu-ni tauchiũⁿ-í cata caa ñaha-güedě xii-n núú cùrúxí cuú-n, te cuu-ni dàcãcu ñaha-ĩ xii-n-ãⁿ? —càchí-dé xáhaⁿ-dě xii-gá.

¹¹ Te ní xáhaⁿ Jèsús:

—Yohó ñá túú sã táxí tnùní ñáhá-n xii yúhú ní cùu núu ñá túú Yã Ndiõxí ní cuíni-gá sá dúcáⁿ cùnduu, te tée ní taxi cuendá ñáhá xii-í núú-n tẽe-án ïo-gá ndècuéchi-dé dàcúúxí yohó —càchí-gá xáhaⁿ-gă xii-dé.

¹² Te òré-án nǐ ngüíta té Pilatú ndúcú-dě nãcuáa cada-dé dàcãcu-dé Jèsús ní cùu, dico cue tée isràél ní ngüíta-güedé ní cuáá-güedé, te xáhaⁿ-güedě:

—Te núu na dàcãcu-n tẽe-án, te ñá díú tẽe tnàhá tnúhu ndihí té Cèsár cúú-n. Chi ndèda-ni cãa tée na càchí sá cúú-dě tée yìndaha ñaha xii ñáyiũ cùu úhú iní-dé té Cèsár. Te té Jèsús-án càchí-dé sá táxí tnùní-dé —càchí-güedé xáhaⁿ-güedě xii-dé.

¹³ Te sá dúcáⁿ nǐ xáhaⁿ-güedě xii té Pilatú núu ní quee-dé ndihí Jèsús cuáháⁿ ndihí ñaha-dě corrèdór núu nǐ quee mee-ni yúú vãha núú ñúhú, te xiáⁿ nání-xí Gãbatá tnúhu hèbreú. Te xiáⁿ ndécú xilé sãcõo nchihí té Pilatú xèhndé-dé cuèchi ñáyiũ, núu ní nucóo-dé núú xilé-dé òré ní quexiõ-dé ndihí Jèsús. ¹⁴ Te cùu-xi datná cuádava nduu, nduu víspré vico pãscuá. Te ní xáhaⁿ tẽ Pilatú xii ñáyiũ isràél:

—¡Nái tée yìndaha ñaha xii-ndo-a! —cachí-dé xáhaⁿ-dě xii-yu.

¹⁵ Te ní cuáá-yu, te xãháⁿ-yu:

—¡Cahni-dé! ¡Cahni-dé! ¡Cata caa-dé núú cùrúxí! —càchí-yu xãháⁿ-yu.

Te ní xáhaⁿ tẽ Pilatú:

—¿Te yúhú cata caa-í tée yìndaha ñaha xii-ndo-u? —cachí-dé xáhaⁿ-dě xii-yu.

Te cue dútú cúnũ ní xáhaⁿ-güedě:

—Nchúhú ñá túú-gă tée yìndaha ñaha xii-ndí, chi ñiⁿni té Cèsár yìndaha ñaha-dé xii-ndí —càchí-güedé xáhaⁿ-güedé xii-dé.

¹⁶ Te té Pilatú ní xáhaⁿ-dě ní queheⁿ cuendá-güedé Jèsús ndécá ñaha-güedé

cuáháⁿ cata caa ñaha-güedé núú cùrúxí.

Sàta caa-güedé Jèsús núú cùrúxí
(Mt. 27:32-44; Mr. 15:21-32; Lc. 23:26-43)

¹⁷ Te ní quee Jèsús nchídó-gă cùrúxí cuáháⁿ ìⁿ xichi núú nání Yìqúi Díqúi Ndÿyi. Te tnúhu hèbreú queé-xí Gôlgotá. ¹⁸ Te yàcáⁿ ní sata caa ñaha-güedé xii-gá núú cùrúxí-áⁿ. Te xio xio òⁿ òⁿ òⁿ ní sata caa-güedé úú cue téé ndècu ndisa cuéchi-xi òⁿ ni núú cùrúxí tucu. ¹⁹ Te ní táúchíúⁿ tē Pilatú ní taxi ndecu-güedé ìⁿ sá ndéé lètrá núú cùrúxí tá càa-gá, te duha càchí lètrá-áⁿ: “Jèsús téé ñuu Nazàrét, téé yìndaha ñaha xii ñáyi isràél”, duha càchí-xi. ²⁰ Te vâi ñáyi isràél ní xiní-yu nâcuáa càháⁿ lètrá-áⁿ, chi yatni-ni yuhu ñùú ní sata caa ñaha-güedé xii-gá núú cùrúxí. Te lètrá-áⁿ càháⁿ-xi tnúhu hèbreú, te càháⁿ-xi tnúhu grìégú, te càháⁿ-xi tnúhu làtín. ²¹ Te ní xáhaⁿ cué dútú cùnùu xii tē Pilatú:

—Vá táúchíuⁿ-n tee-güedé lètrá càháⁿ-xi “Téé yìndaha ñaha xii ñáyi isràél” ní cùu, váha-gá tauchiⁿ-n tee-güedé lètrá càháⁿ-xi “Téé càchí yìndaha ñaha xii ñáyi isràél ní cùu” —cachí-güedé xáhaⁿ-güedé xii-dé.

²² Te ní xáhaⁿ tē Pilatú:
—Nâcuáa ní táúchíuⁿ-í ní tee-güedé te ducaⁿ quèndóo-xi —càchí-dé xáhaⁿ-dē xii-güedé.

²³ Te sátá ní sata caa ñaha cué sandadú xii Jèsús núú cùrúxí, te cúmí xichi ní quide-güedé dóó-gă, te ìⁿ ìⁿ xichi dóó-gă ní cáhñu cue sandadú-áⁿ. Te ndècu ìⁿ dóó-gă dóó cání ñà túú ní tǐcu. ²⁴ Te cuèndá dóó-ăⁿ ñí xítñaha cue sandadú-áⁿ:

—Vá ndátá-ó dǒó-a, váha-gá ñuu na còto ndéé-ó cuèndá quini-ó ndèdacàa-o cuu cuèndá-ó —càchí-güedé xítñaha-güedé.

Te ducaⁿ ñí quide-güedé chi ní quee ndáa-xi nâcuáa càháⁿ-xi núú tùtú Yă Ndiǒxí núú càchí-xi: “Títñí xichi ní cáhñu-güedé dóó-í. Te ní xito ndéé-güedé cuèndá cutnùní iní-güedé ndèdacàa-güedé níhí-güedé dóò-í”,

duha càchí-xi núú tùtú-gá. Te sá dúcáⁿ càháⁿ-xi núú tùtú Yă Ndiǒxí ñuu xiáⁿ ducaⁿ ñí quide cue sandadú-áⁿ.

²⁵ Te yatni òⁿ curúxí núú tácaà Jèsús nútní ñaná-gă, ndihí cùhú-xi, ndihí tá Màriá ñadihí té Clèofás, ndihí tá Màriá Magdalèná. ²⁶ Te ní xiní Jèsús ñaná-gă nútní-aⁿ òⁿ òⁿ òⁿ ñí xica cuu ndihí-gá, téé ío cùu iní-gá, te ní xáhaⁿ-gă xii ñaná-gă:

—Náá, téé nútní-áⁿ nduu-dé dàtná déhe mee-n —càchí-gá xáhaⁿ-gă xii-aⁿ.

²⁷ Te ní xáhaⁿ-gă xii téé ní xica cuu ndihí-gá-áⁿ:

—Ñaha-áⁿ nduu-aⁿ dàtná ñaná méé-n —càchí-gá xáhaⁿ-gă xii-dé.

Núu ndéé dàvâ-áⁿ ñí nduu ñaná ñáhâ tē-áⁿ xii ñaná-gă.

Ní xihí Jèsús
(Mt. 27:45-56; Mr. 15:33-41; Lc. 23:44-49)

²⁸ Te ní cutnùní iní Jèsús sá ñí ndihí chiⁿ ní táhú Tâtá-gă Dútú Ndiǒxí ní quide-gá ñuu ní cachí-gá:

—Yìchí-í ndute —càchí-gá.

Te duha ní càháⁿ-gá chi ní quee ndáa-xi nâcuáa càháⁿ-xi núú tùtú Yă Ndiǒxí.

²⁹ Te ndècu ìⁿ lítu ñùhu ndudí íá. Te sá dúcáⁿ ñí càháⁿ-gá sá yìchí-gá ndute, núu xiáⁿ ní queheⁿ-güedé càchí te ní chindóyo-güedé xití ndudí íá-ăⁿ, te ní chinenu-güedé díqúi ìⁿ dité yutnu nâni hisópó, te ní ndocani-güedé ní chihi-güedé yuhu-gá. ³⁰ Te sátá ñí xihí-gá ndudí íá-ăⁿ, te càchí-gá:

—Vitna ní dâxñu cava-í nchaa chiⁿ ní cachí Tâtâ-í cada-í —duha ní cachí-gá.

Te ní xócuïta dúcúⁿ-gă ndâa núú-gă, te ní xihí-ni-gá.

Ìⁿ sandadú ní caáⁿ-dé yìqúi nahá Jèsús ndihí ìⁿ pùyá yihí càà núú-xi

³¹ Te cuèndá sá ndùu vispré vico pàscuá cúú-xí ñuu ñá ní cuini cue téé isràél cundecu-ni yìqúi cùñú-gá núú cùrúxí ndihí yìqúi cùñú cue téé ní sata caa-güedé òⁿ òⁿ òⁿ, chi cuèndá nduu tnéé-áⁿ cúú-xí ndùu ndetatú ñáyi, te ío quide cahnú-yu nduu-ăⁿ, núu ní xáhaⁿ-güedé xii tē Pilatú sá táúchíuⁿ-dē

quíhíⁿ cue tée cáhnú-güedé díhíⁿ Jèsús ndíhí díhíⁿ cue tée tàcaa ndíhí-gá, te xocàni-güedé yiqui cùñú-gá ndíhí yiqui cùñú-güedé yàcáⁿ. ³² Te sáta dúcáⁿ te ní sáháⁿ cue sandàdú ní sáhnú-güedé díhíⁿ cue tée tàcaa xio xio díhí Jèsús. ³³ Te òré ní cuyatni-güedé núú-gă, te ní xiní-güedé sá sà ní xíhí-gá núu ñá ní sáhnú-güedé díhíⁿ-gá.

³⁴ Dico ìⁿ sandàdú-áⁿ ñí cúxi-dé pùyá néhé-dě ìⁿ xio yiqui naha-gă, te yìhí caá núú-xi núu ní caáⁿ-xi yiqui naha-gă ní quee níñí ndíhí ndute cuií. ³⁵ Te yúhú té Juáá tée ní cadúha tutú-a ní xiní-í nàcuáa ní cuu ní xíhí Jèsús, te xiáⁿ núu càháⁿ ndáá-í cuendá quíndáá iní-ndó. ³⁶ Te ducaⁿ ñí cuu ñá ní sáhnú-güedé díhíⁿ Jèsús, chi ní quee ndáá-xi nàcuáa càháⁿ-xi núu tutú Yá Ndiòxí núu càchí-xi: “Vá cáhnú-güedé ñí ìⁿ yiqui-gá”, duha càchí-xi. ³⁷ Te ducaⁿ ñí quide-güedé Jèsús ní caáⁿ-güedé yiqui naha-gă, chi ingá xichi núu tutú Yá Ndiòxí càchí-xi: “Sáá nduu te quiní-güedé ìⁿ tée ní dánícuèhé-güedé”, duha càchí-xi.

Chìndúxi-güedé Jèsús

(Mt. 27:57-61; Mr. 15:42-47; Lc. 23:50-56)

³⁸ Te sáta dúcáⁿ ñí cuu, te té Chèé tée ñúú Arimateá tnahá-dé ní sándáá iní-dé tñúhu Jèsús dico dayuhu, chi ní xóo yùhú-dé cue tée cùnuu núu ñáyiú isràél. Te tée-áⁿ ñí xáhaⁿ-dě xii té Pilatú núu vá dáñá-dě canehe-dé yiqui cùñú Jèsús quíhíⁿ chindúxi-dé, te té Pilatú ní xáhaⁿ-dě xii-dé sá cúú cànehe-dé yiqui cùñú Jèsús quíhíⁿ, núu ní sáháⁿ-dé ní nuu nehe-dé yiqui cùñú-gá núu cùrúxí nchídó-dě cuáháⁿ. ³⁹ Te té Nicòdemú tée ní sáháⁿ niú ní cáháⁿ ndíhí-dé Jèsús ndéé díhna, tée-áⁿ néhé-dě ócò úxí kílú yuchi ní cuáha mee-ni yúcú sá nání mirrá ndíhí yúcú sá nání àloés. Te ío váha tñami saháⁿ. ⁴⁰ Te ní naníhí tnahá-dě ndíhí té Chèé, te ní chidúcúⁿnuu-güedé yiqui cùñú Jèsús mee-ni dǒó vâha, te nàcuáa ta dùcuⁿ nuu-güedé yiqui cùñú-gá dǒó-ăⁿ, te ducaⁿ ta chido-güedé yuchi

sáháⁿ tñamí-ăⁿ núú dǒó-ăⁿ chi ducaⁿ tnahí quide ñáyiú isràél òré chindúxi tnahá-yu. ⁴¹ Te yatni núú ñí sata caa-güedé Jèsús cáá ìⁿ lahuertá. Te xití lahuertá-áⁿ nchíí ìⁿ yaú cava duha cuáháⁿ ndáá-xi, te vátá yǒo ìⁿ-gá nguíndúxi xiáⁿ. ⁴² Te cuendá sá ñí cuyatni tnahá nduu ndètátú ñáyiú isràél núu xiáⁿ yaú cava nchíí yatni-ni xiáⁿ ñí chihi-güedé yiqui cùñú Jèsús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumìngú tacuìhndá-gá cuáháⁿ tá Màriá Magdalèná cuáháⁿ ngoto-xi yaú núú ñí chihi-güedé yiqui cùñú Jèsús, te ní sáá-xi ní xiní-xi sá ñá túú-gă ndèdí yúú yèhe yaú-áⁿ. ² Núu xinu-xi cuánuhú núu ndécú tǎ Xímú, àdi Pelú chi úú diù-dé, ndíhí ingá tée ní xica cuu ndíhí-gá tée ío cùu iní-gá, te ní xáhaⁿ-xi xii-güedé:

—Nèhe-güedé yiqui cùñú Jèsús cuáháⁿ, te ñá xiní-ó ndèé ní taxi ndecu-güedé —càchí-xi xáhaⁿ-xi xii-güedé.

³ Te ní quee té Pèlú ndíhí ingá tée-áⁿ cuáháⁿ ndéhé-güedé yaú núú ñí chihi-güedé yiqui cùñú-gá. ⁴ Te ndúú-güedé xinú-güedé cuáháⁿ ní cùu, dico ingá tée-áⁿ ñí cuu níhí-gá sáhá-dé cuáháⁿ-dé núu díhna-gá-dé ní sáá-dé yuhu yaú núú ñí chihi-güedé yiqui cùñú Jèsús ní cùu. ⁵ Te ní ngáundeyi-dé xító ñihni-dé xití yaú-áⁿ, te ní xiní-dé mee-nă dǒó vâha sá ñí xiducúⁿ nuu-gá yúcú, dico ñá ní quíhu-dé. ⁶ Te sáta ñí sáá té Pèlú te cuánguihu-dé xití yaú-áⁿ, núu tnahá-dé ní xiní-dé nchaa dǒó ñí xiducúⁿ nuu-gá yúcú-ăⁿ. ⁷ Te ní xiní-dé sá dǒó ñí xindútú dǐquí-gă ñá túú càtuu jundú-xi ndíhí dǒó ñí xiducúⁿ nuu-gá chi ní nadúcúⁿnuu-ná càtùu ìⁿ xio. ⁸ Te nchícúⁿ tucu tée ní sáá díhna-gá-áⁿ cuánguihu xití yaú-áⁿ, te ní xiní-dé sá dǒó-nă yúcú, te ñá túú-gă yiqui cùñú Jèsús núu ní sándáá iní-dé

sá nǐ ndoto-gá. ⁹ Chi vátá tècú tnùnì-gá-güedé nàcuáa càháⁿ-xi núú tütú Yǎ Ndiöxí núú càchí-xi sá Jèsús ndoto-gá. ¹⁰ Te ní xícó ndì ndúú cue téé ní sángoto yaú núú nǐ chihi-güedé yiqui cùñú Jèsús ní cùu cuánuhú-güedé vehe-güedé.

Jèsús ní naníhí tnáhá-gǎ ndíhi tá Màriá Magdalèná

(Mr. 16:9-11)

¹¹ Te ní sáá tucu tá Màriá yuhu yaú núú nǐ chihi-güedé yiqui cùñú Jèsús te ní ngüíta-xi ndàhyú-xi, te ní ngáundeyi-xi xìto nihni-xi xití yaú-áⁿ.

¹² Te xití yaú-áⁿ nǐ xiní-xi úú espíritú xínú cuèchi núú Yǎ Ndiöxí xǐxíhnu-xi mee-ni dóó cuixíⁿ xǐndecu-xi núú nǐ cáa yiqui cùñú-gá. Te ìⁿ-xi nùcúo núú nǐ cáa díquí-gǎ, te ìⁿ-xi nùcúo núú nǐ cáa sáhá-gǎ. ¹³ Te espíritú-áⁿ nǐ xáhaⁿ-xi xì tá Màriá:

—¿Ná cuèndá ndàhyú-n? —càchí-xi xǎhaⁿ-xi.

Te ní xáhaⁿ tá Màriá:

—Ndàhyú-í chi nèhe-güedé yiqui cùñú Yaá cúú Xìtohó-í cuáháⁿ, te ñá túú xiní-í ndèé ní taxi ndecu-güedé —càchí-xi xǎhaⁿ-xi xì cue espíritú-áⁿ.

¹⁴ Te tnúhu-ni-áⁿ nǐ cáháⁿ-xi te ní nchócótó-xi ìⁿ xio, te ní xiní-xi Jèsús nútñí-gá dico ñá túú ní cùtnuní iní-xi sá díú mèe-gá. ¹⁵ Te ní xáhaⁿ Jèsús xii-xi:

—¿Ná cuèndá ndàhyú-n? ¿Yoo nànducu-n? —cachí-gá xáhaⁿ-gǎ xii-xi.

Te mee-xi nǐ sani iní-xi sá tèe xìto lahuertá-áⁿ cúú tèe-áⁿ, núú ní xáhaⁿ-xi:

—Táta, te núú yòhó néhé-n yiqui cùñú Jèsús cuáháⁿ, te cáháⁿ-n ndèé ní taxi ndecu-n chi cuèndá naqueheⁿ-í canehe-í núhú —càchí-xi xǎhaⁿ-xi.

¹⁶ Te ní cáháⁿ díú ñàha-gá xii-xi, te xáhaⁿ-gǎ:

—¿Màriá! —càchí-gá xáhaⁿ-gǎ xii-xi.

Te ní ndacoto-xi núú-gǎ, te ní cáháⁿ-xi tnúhu hèbreú, te xáhaⁿ-xi:

—¿Rabóní! —càchí-xi xǎhaⁿ-xi. Te tnúhu-áⁿ quée-xí Mèstrú.

¹⁷ Te ní xáhaⁿ Jèsús:

—Daña vá ngání ñàha-n chi vátá ndáá-gǎ-í núú ndécú Tǎtà-í. Te

núhú-n cùñaha-n xì cue téé ío váha ní tnahá tnúhu ndíhi-í sá ndáá-í núú ndécú Tǎtà-í Dútú Ndiöxí, te ñiú-gá cúú Tǎtà-ndó nchaa-ndo, te ñiú-ni-gá cúú Ndiöxí-ndó —càchí-gá xáhaⁿ-gǎ xii-xi.

¹⁸ Te ní natnì tá Màriá Magdalèná ichi cuánuhú-xi cùñaha-xi xì cue téé ní xica cuu ndíhi-gá sá nǐ xiní-xi Jèsús, te ní xáhaⁿ-xi xì-güedé nchaa nàcuáa ní xáhaⁿ-gǎ xii-xi.

Ní quexìo Jèsús núú xǐndecu cue téé ní xica cuu ndíhi-gá

(Mt. 28:16-20; Mr. 16:14-18; Lc. 24:36-49)

¹⁹ Te ñiú-ni ndumìngú sandiquiⁿ ní natacá cue téé ní xica cuu ndíhi-gá, te xǐndedí nihnu-güedé vehe sá xǐyùhú-güedé cue téé cùnuu núú ñǎyiu isràél. Te ní quíhu Jèsús ndéé tnuú-güedé ní ngúnutnì-gá, te ní xáhaⁿ-gǎ:

—Yá Ndiöxí chǐndèe ñaha-gá xii-ndo ío váha cùu iní-ndó ndècu-ndo —cachí-gá xáhaⁿ-gǎ xii-güedé.

²⁰ Te ní dánèhé ñáhá-gǎ ndaha-gá ndíhi yiqui naha-gǎ xii-güedé. Te ío ní cudí iní-güedé sá díú ndisa-gá ní xiní ñáhá-güedé. ²¹ Te ní xáhaⁿ tucu Jèsús xii-güedé:

—Yá Ndiöxí chǐndèe ñaha-gá xii-ndo ío váha cùu iní-ndó ndècu-ndo. Te dàtná ní tendaha ñàha Tǎtà-í Dútú Ndiöxí xii-í véxi-í ñuyíú-a, te ducaⁿ tendaha ñaha-í xii-ndo quíhíⁿ-ndó cáháⁿ-ndó tnúhu-í núú ñǎyiu —càchí-gá xáhaⁿ-gǎ xii-güedé.

²² Te ní chiyóco-gǎ núú-güedé, te ní xáhaⁿ-gǎ:

—Chí ndúú tàhú Espíritú Yǎ Ndiöxí cundecu ndíhi-ndo. ²³ Te nchaa ñáyiu na quíndáá iní-xi tnúhu-í te cùñaha-ndo xii-yu sá nǐ quide càhnu iní Yǎ Ndiöxí nchaa cuéchi-yu. Te nchaa ñáyiu vá quíndáá iní tnúhu-í te cùñaha-ndo xii-yu sá vǎ cáda càhnu iní-gá cuéchi-yu —càchí-gá xáhaⁿ-gǎ xii-güedé.

Té Mǎxí càháⁿ ndíhi-dé Jèsús

²⁴ Te núú ùxúú cue téé ní xica cuu ndíhi-gá, te ìⁿ-dé nání-dé Mǎxí téé ní

xóo danàni-güedé Cuächí, te téé-án ñà túú-dě ndécú ndìhi-güedé òré ní sáháⁿ Jèsús. ²⁵ Te dava-gá cue téé ní xica cuu ndìhi-gá ní xáhaⁿ-güedě xii-dé:

—Ní xiní-ndí Jèsús —càchí-güedé xáhaⁿ-güedě.

Te ní xáhaⁿ tē Mǎxí:

—Te vá quíndáá iní-í, chi ndéé quíní-í ndaha-gá núú nǐ quée nduyú, te dàquíhu-í díquí ndáhà-í núú nǐ caáⁿ nduyú-áⁿ, te dàquíhu ndàha-í yíquí naha-gǎ núú nǐ caáⁿ, ducaⁿ te quíndáá iní-í —càchí-dé xáhaⁿ-dě xii-güedé.

²⁶ Te núú ùná tucu nduu ní natacá tucu cue téé ní xica cuu ndìhi Jèsús ìⁿ vehe, te nduu-áⁿ tnàhá té Mǎxí ndécú ndìhi-güedé. Te cuèi ndèdí ni-hnu-güedé vehe-áⁿ, te ní quíhu Jèsús ndéé tnuú-güedé, te ní xáhaⁿ-gǎ:

—Yá Ndiòxí chíndèe ñaha-gá xii-ndo ïo váha cùu iní-ndó ndècu-ndo —cachí-gá xáhaⁿ-gǎ xii-güedé.

²⁷ Te ní xáhaⁿ-gǎ xii té Mǎxí:

—Cundehe ndàha-í te dàquíhu-n díquí ndáhá-n núú nǐ quée nduyú, te dàquíhu-n ndàha-n yíquí naha-í-a cuèndá quíndáá iní-n te vá cání ìⁿ cani úú iní-n —càchí-gá xáhaⁿ-gǎ xii-dé.

²⁸ Te ní xáhaⁿ tē Mǎxí xii-gá:

—¡Yòhó cúú-n Xítóhó-í! ¡Yòhó cúú-n Ndiòxí-í! —càchí-dé xáhaⁿ-dě xii-gá.

²⁹ Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdí-gǎ iní nchaa ñáyíu ñá túú ní xini núú ñáhá xii-í, te ní sándáá iní-yu —càchí-gá xáhaⁿ-gǎ xii-dé.

Quíndáá iní-ó tñíhu yòdo tnuní núú tütú-a

³⁰ Te vài-gá sá vǎ yòo tnàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndìhi-gá. ³¹ Dico dava-gá ní ngódó tnùní núú tütú-a cuèndá sá quíndáá iní-ndó sǎ Jèsús cúú-gǎ Crìstú Déhe Dútú Ndiòxí, te naníhí tàhú-ndó te núu na quíndáá iní-ndó-gǎ.

21

Úsá cue téé ní xica cuu ndìhi Jèsús ní xiní ñáhá-güedě xii-gá

¹ Te ingá nduu tucu xíndecu cue téé ní xica cuu ndìhi Jèsús yuhu làgúná ñúú Tiberiás, te ní sáháⁿ-gá núú xíndecu-güedé-áⁿ. Te duha ní cuu ní xiní ñáhá-güedě xii-gá. ² Te ndècu té Xímú, àdi Pelú chi úú diu-dé, ndìhi té Mǎxí téé ní xóo cúñaha-güedě Cuächí, ndìhi té Natanàel téé ñúú Cànáá, te ñúú-áⁿ yíndèhu-xi distritú Galileá, te tnàhá ndi ndúú déhe té Zebèdeú, ndìhi úú-gá tucu cue téé ní xica cuu ndìhi-gá. ³ Te ní xáhaⁿ tē Pèlú xii-güedé:

—Quíhíⁿ-í quítní-í chácá —càchí-dé xáhaⁿ-dě xii-güedé.

Te ní xáhaⁿ-güedě:

—Tnàhá nchúhú canchicúⁿ ñáhá-ndí xii-n quíhíⁿ tucu —càchí-güedé xáhaⁿ-güedě xii-dé.

Te ní xica-güedé cuáháⁿ-güedé ní sáá-güedé núú ndécú bàrcú, te ní quée-güedé xití bàrcú-áⁿ cuáháⁿ-güedé. Te niú-áⁿ ñǎ ní nǐhí tnàhí-güedé chácá. ⁴ Te sa ta cùditó-ñǎ cuáháⁿ ní xiní-güedé Jèsús yuhu làgúná, dico ñá ní cùtnuní iní-güedé sá díú-gǎ. ⁵ Te ní xáhaⁿ-gǎ xii-güedé:

—Cue téé cuechi, ¿ní níhí-ndó chácá caxi-o ñǎ? —càchí-gá xáhaⁿ-gǎ xii-güedé.

Te ní xáhaⁿ-güedě:

—Vèdana chácá ñà túú ní níhí-ndí —càchí-güedé xáhaⁿ-güedě xii-gá.

⁶ Te ní xáhaⁿ Jèsús:

—Chí dáquèe ñunu-ndo ndàa xio cuha barcú chi níhí-ndó-dí —càchí-gá xáhaⁿ-gǎ xii-güedé.

Te ducaⁿ nǐ quide-güedé, te òré nátava-güedé ñunu xití ndute, te ñá cùndèe-gá-güedé natava-güedé cuèndá sá nǐ chítú chácá xití-xi. ⁷ Te téé ní xica cuu ndìhi-gá téé ío cùu iní-gá ní xáhaⁿ-dě xii té Pèlú:

—¡Díu Xítóhó Jesucristú! —càchí-dé xáhaⁿ-dě xii-dé.

Te sá nǐ tecú dóho té Pèlú sá dúcáⁿ càháⁿ-dé núu ní ndíunuu-dé dóó-dě,

chi dóo sã yímàa-ni-dé níhnú-dě ní cùu. Ducaⁿ te ní nuu ndava-dé bàrcú ní ngaunihnu-dé ndute, te cuáháⁿ-dé núu ndute-áⁿ nĩ quene-dé ndéé ñuhu yìchí. ⁸Te dava-gá cue téé ndihí té Pèlú ñi-ni cue téé ní xica cuu ndihí Jèsús ní quendóo-güedé dàtná ñⁿ ciendú-gá mèstrú te quene-güedé yuhu ndüte. Te tañuhu-ni-güedé ñunu-güedé chitu chăcá nĩ quene-güedé ndéé yuhu ndüte. ⁹Te òré ní quene-güedé ñuhu yìchí, te ní xiní-güedé càyú ñuhú, te núu ñùhú-áⁿ ñùhú ñⁿ chácá ndihí ñⁿ pàá. ¹⁰Te ní xáhaⁿ Jèsús xii-güedé:

—Quíhíⁿ ngueheⁿ-ndo ñⁿ úú chácá quití íchí nĩ tñi-ndo —càchí-gá xáhaⁿ-gã xii-güedé.

¹¹Núu té Pèlú ní sáháⁿ-dé núu ndécú bàrcú, te ní quée-dé xití-xi ní cándéé-dé ñunu ñuhu chácá tañuhu-dé ní quene ndéé ñuhu yìchí, te chitu chăcá náhnú, te ñuhu ñⁿ ciendú údico úxí úní-di xití ñunu-áⁿ, te cuèi ducaⁿ vài-di ñuhu dico ñá ní ndätä ñunu-áⁿ.

¹²Te ní xáhaⁿ Jèsús:

—Chí nèhé cadí iní-ndó —càchí-gá xáhaⁿ-gã xii-güedé.

Dico ní ñⁿ cue téé ní xica cuu ndihí-gá-áⁿ ñã ní xicáⁿ tnúhú-güedé núu-gã nũu yoo cùu-gá, chi sa ní cutnùní iní-güedé sá díú Jèsús cúu-gã.

¹³Te Jèsús ní sáháⁿ-gá ní queheⁿ-gá pàá ní sãñaha-gã xii-güedé caxi-güedé, te dàtnùní ní queheⁿ tucu-gá chácá nĩ sãñaha-gã xii-güedé.

¹⁴Vitna cùu úní xito sá xiní ñáhá cue téé ní xica cuu ndihí-gá sátá nĩ ndoto-gá.

Jèsús càháⁿ ndihí-gá té Pèlú

¹⁵Te sátá nĩ túhú cóhó-güedé ní sadí iní-güedé te ní xicáⁿ tnúhú Jèsús núu tẽ Xímú, àdi Pelú chi úú ñi-dé, te xáhaⁿ-gã:

—Xímú, déhe té Jònás, ¿cùu iní-gá-n yùhú dàcúxí dàva-gá cue téé-a ñã? —càchí-gá xáhaⁿ-gã xii-dé.

Te ní xáhaⁿ tẽ Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dẽ xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéé líhli-í —càchí-gá xáhaⁿ-gã xii-dé.

Te cue mbéé-áⁿ cúu-güedé ñáyiú cùu cuendá-gá.

¹⁶Te ní xáhaⁿ tucu-gá xii té Pèlú:

—Xímú, déhe té Jònás, ¿cùu iní ñáhá-n xii-í-u? —càchí-gá xáhaⁿ-gã xii-dé.

Te ní xáhaⁿ tucu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dẽ xii-gá.

Te ní xáhaⁿ-gã:

—Te núu ducaⁿ, te coto-n cue mbéè-í —càchí-gá xáhaⁿ-gã xii-dé.

¹⁷Te xito cùu úní ní xáhaⁿ tucu-gá xii té Pèlú:

—Xímú, déhe té Jònás, ¿cùu iní ñáhá-n-ãⁿ? —càchí-gá xáhaⁿ-gã xii-dé.

Te té Pèlú ío ní cundiyí-dé sá dúcáⁿ nĩ cuu úní xito xicáⁿ tnúhú-gã núu-dẽ nũu ndisa sá cúu ñí ñáhá-dẽ xii-gá, te ní xáhaⁿ-dẽ:

—Mèstrú, yòhó nchaa sa xiní-n, te sa cùtnuní iní-n sã cúu ñí ñáhà-í xii-n —càchí-dé xáhaⁿ-dẽ xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéè-í. ¹⁸Te na càchí tnúhu ndáá-í xii-n sã cùtnáhá cuechi-gã-n ní xóo ndécuihnu mee-n dđó-n, te ní xóo quíhíⁿ-n ndèni ní xóo cachí iní-n, dico na yì-n te dacàá-n ndàha-n, te ingá téé dacuihnu ñaha xii-n dđó-n te cada yica-dẽ candeca ñaha-dẽ xii-n quíhíⁿ ñⁿ núu ñà túú tnàhá iní-n —càchí-gá xáhaⁿ-gã xii-dé.

¹⁹Te sá dúcáⁿ nĩ càháⁿ Jèsús cúu-xí sã nĩ dátécú tnúhu ñaha-gã xii té Pèlú nàcuáa cada-xi cuú-dé, te ducaⁿ càda cahnu-dé Yã Ndiõxí, te ní xáhaⁿ-gã xii-dé:

—¡Canhicúⁿ ñáhá-n xii-í! —càchí-gá xáhaⁿ-gã xii-dé.

Téé ío cùu iní-gá

²⁰Te ní nchócótó tẽ Pèlú ndàa sátá-dẽ, te ní xiní-dé sá nchicúⁿ ñáhá ingá téé xica cuu ndihí-gá cuáháⁿ, téé ío cùu iní-gá téé ní xinucóo ñi-í-gá òré ní cudini ndihí ñaha-gá xii-güedé, te ñi-ni téé-áⁿ nĩ xicáⁿ tnúhú-dẽ núu-gã dàvá-áⁿ nũu ndèda càa téé cuáha cuendá ñáhá xii-gá núu cue téé cùu úhú iní ñáhá. ²¹Te òré ní xiní té

Pèlú sá nchìcúⁿ ñáhá tée-áⁿ, te ní xí cáⁿ tnúhú-dě núú Jèsús, te xǎhaⁿ-dě:

—Mèstrú, te tée-ǎⁿ, ¿ná cúú sǎ yǎha-dé-i? —càchí-dé xǎhaⁿ-dě xii-gá.

²² Te ní xáhaⁿ Jèsús:

—Te núu yúhú cuìní-í sá cùndècu-ni-dé ndéé ná quìxi tucu-í ñuyíú-a, ¿te yòhó ná cuèndá-n núu xí cáⁿ tnúhú-n? Yòhó canchicúⁿ ñáhá-ní xii-í —càchí-gá xáhaⁿ-gǎ xii-dé.

²³ Te ní xinu tnúhu núú nchàa ñáyiú sàndáá iní tnúhu-gá sá tée-ǎⁿ vǎ cùú-dé. Dico Jèsús ñá túú dùcaⁿ ní xáhaⁿ-gǎ sá vǎ cùú-dé, chi ní xáhaⁿ-gǎ: “Núu yúhú cuìní-í sá tée-ǎⁿ cundecu-ni-dé ndéé ná quìxi tucu-í ñuyíú-a, ¿te yòhó ná cuèndá-n?”, duha ní xáhaⁿ-gǎ xii té Pèlú.

²⁴ Te òu-ni yúhú té Juàá tée ní sani iní-yu sá vǎ cùú càháⁿ ndáá-í nchaa nàcuáa ní cuu, te ducaⁿ ñí tee-í núú tútú-a, te cùtnuní iní-ndó sǎ tnúhu ndáá cúú-xí.

²⁵ Te ndècu vai-gá núú sǎ ñí quide Jèsús. Te núu òicó ní ngǔndee nchaandi túhú ñá, te vǎa ñí te ñihí ñuyíú te vǎ tnàhá núú-xi cundecu lìbrú, te núu òicó ní ngǔndee nchaa. Te ducaⁿ na cùnduu. Te ío chí cádá ndèe iní-nǎ vitna.

NCHAA NÀCUÁA NÍ QUIDE CUE TÉE NÍ TÁÚCHÍÚⁿ JÈSÚS DACUÀHA ÑAHA XII ÑÁYIU TNÚHU-GÁ

Jèsús ní cachí tnúhu ndáá-gá sá quíxí Espíritú Yá Ndiõxí cundecu ndihi ñáyiu

¹ Te duha ní cáháⁿ té Lùcá ní xíi-dé té Tèofilú: Yúhú sa ní chídó tnùn-í núú librú ndéé díhna nchaa sá ní quide Jèsús, ndihi nchaa sá ní dácuhá-gá ñáyiu. Te ní chídó tnùn-í nchaa sá ní quide-gá ndéé nduu ní quesaha-gá quidé chiúⁿ-gá, ² ndihi nchaa sá ní quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue tée ní cáháⁿ-gá dacuàha ñaha xii ñáyiu tnúhu-gá, te mee Espíritú Yá Ndiõxí ní chindee ñaha-xi xii-gá ní xáhaⁿ-gá nàcuáa cada-güedé. ³ Te sátá ní xíhí-gá te ní ndoto-gá, te ní xíndecu-gá údico nduu. Te titní xito ní sáháⁿ-gá núú ní xíndecu-güedé, te ducaⁿ ní quide-gá cuéndá quiní-güedé sá ndáá ní ndoto-gá, te ní xáhaⁿ-gá nàcuáa quide Yá Ndiõxí ndíhu ndaha-gá ñáyiu.

⁴ Te ìⁿ nduu ndècu ndihi ñaha-gá xii-güedé, te ní xáhaⁿ-gá:

—Vá quée-ní-ndó ñúú Jerusàlén, chi cundetu-ndo quixi Espíritú Yá Ndiõxí cundecu ndihi-ndo, chi sa ní cachí tnúhu-í sá dúcáⁿ ní cáháⁿ Tátá-ó Dútú Ndiõxí Yaá ndécú àndiu nacuáa cunduu. ⁵ Te ndáá sá ndí Juáá ní dácuhá-gá ñaha ndí xii-ndo, dico vitna ñá túú-gá cuéhé nduu, te quexio Espíritú Yá Ndiõxí cundecu ndihi-ndo —càchí-gá xáhaⁿ-gá xii-güedé.

Jèsús cuándaa-gá andiu

⁶ Te òré ní xíndecu-güedé ndihi Jèsús, te ní xáhaⁿ-güedé xii-gá:

—Mèstrú, cuíní-ndí cachí tnúhu-n núu sa ta cùyatni nduu chindee-n ñáyiu ñúú Isràél cuéndá taxi tnùn-í tucú-yu ñúú-yu —càchí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

—Ñá túú xìni ñuhu-xi cunaha nchohó xáⁿ, chi Tátá-ó Dútú Ndiõxí náhá-gá ná nduu càda-gá nchaa sá ní cáháⁿ-gá. ⁸ Te òré quexio Espíritú Yá Ndiõxí cundecu ndihi-ndo, te cuyi-ndo ní yuhu ní iní-ndó quíhíⁿ-ndó cáháⁿ-ndó tnúhu-í núú ñáyiu ñúú Jerusàlén ndihi núú ñáyiu distrítú Jùdeá ndihi núú ñáyiu distrítú Sàmariá. Te ducaⁿ-ni cáháⁿ-ndó quíhíⁿ-ndó ní caxico ñuyú —càchí-gá xáhaⁿ-gá xii-güedé.

⁹ Te sátá dúcáⁿ ní cáháⁿ-gá, te ndèhe-güedé ní ndanchita-gá cuándaa-gá andiu cuándihu-gá xití vícò, te ñá túú-gá ní xìni náhá-güedé xii-gá. ¹⁰ Te ndèhe vihi-güedé andiu núu ndéé quiní ñáhá-güedé xii-gá yòtnúhu, te ní quexio cunu úú cue tée nihnu dóó cuixíⁿ núú ndécú-güedé.

¹¹ Te xáhaⁿ-güedé:

—Nchòhó cue tée Galileá, ¿ná cuéndá ndéhé-ndó àndiu? Te dàtná-ni càa Jesús cuándaa-gá andiu vitna, te ducaⁿ-ni cunduu-gá quixi tucu-gá —càchí cue tée nihnu dóó cuixíⁿ-án xáhaⁿ-güedé.

Cuéndá sá ñà túú-gá ndí Jùdás núu ní nanducu-güedé té Màriá ní nucúnutní-dé núu ndí

¹² Te ní ndee-güedé yucu Òlívú cuánuhú-güedé ñúú Jerusàlén, te ní xúhuⁿ-güedé cuèdicó cuádava òré ichi.

¹³ Te òré ní ndexio-güedé ñúú-áⁿ, te cuándaa-güedé cuàrtú ndéé núú ñnu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juáá, té Ndríxí, té Lìpé, té Mǎxí, té Bartolòmé, té Màteú, té Jàcobó déhe té Àlfeú, ndihi té Xímú tée ní cundíhi cue tée canànistá, ndihi té Jùdás ñani té Jàcobó. ¹⁴ Te ní naníhí tnáhá-güedé nchaa-güedé yàcáⁿ ndihi tá Màriá náná Jèsús, ndihi cue ñani-gá

ndihí dava-gá cue ñáyiú dîhí. Te ñⁿ-ni ní cuú-yu ní cáháⁿ ndihí-yu Yá Ndiöxí.

15 Te ñⁿ nduu ní xíndecu dàtná ñⁿ ciendú ócó mee-ni ñáyiú sàndáá iní tnúhu Jèsús, te ní ngúnutnîí té Pèlú núú-yu, te ní xáhaⁿ-dê xií-yu:

16-17 —Nchòhó cue ñáyiú ndècu ndihí-í ichi Xítohó Jesucristú, na càni-í cuendú núú-ndó nàcuáa ní chídó tnùní ndíi Dàvií té ní xíndecu ndéé sanaha nàcuáa ní cáháⁿ Espíritú Yá Ndiöxí cuendá té Jùdás. Te dacuítí dùcaⁿ ní cuu, chi tnàhá té Jùdás ní xíndecu ndihí-o, te ní xinu cuechi-o ndihí-dé núú-gã sá dîhna, te ducaⁿ nî quide-dé ní sáha cuendá-dé Jèsús núú cuè téè cùu úhú iní ñáhá xii-gá.

18 Te ní cháhu ñaha-güedê xii-dé cuendá sá nî sáha cuendá ñáhá-dê xii-gá. Te ní sáháⁿ-dê ñⁿ xichi ní sata caa-dé méé-dê, te ní ngava-dé, te ní cahndí duuⁿ xití-dé te xíaⁿ nî xihí-dé. Te ní naqueheⁿ-güedê dîhúⁿ sã nî cháhu-güedê ndíi, te ní nacuaaⁿ-güedê ñuhu núú nî ngava ndíi-áⁿ. 19 Te nchaa ñáyiú Jerusalén ní níhí-yu tnúhu, te ní dánání-yu ñuhu-áⁿ Acèldamá. Te tnúhu mée-yu quèe-xi: Ñuhu núú nî satí níñí. 20 Te duha ní cáháⁿ ndíi Dàvií ní chídó tnùní ndíi núú librú Salmú ní dándóo ndíi: “Nà ndóo nahi vèhe-dé, vá yõ ñⁿ quíhíⁿ cundecu”, duha ní cáháⁿ ndíi. Te ingá tucu tnúhu ní cachí ndíi: “Na nànducu-güedê ingá téè nucúnutnîí núú ndíi”, duha ní cáháⁿ ndíi Dàvií —càchí té Pèlú xáhaⁿ-dê xií-yu.

21-22 Te ní xáhaⁿ tùcu-dé:

—Te ducaⁿ nî cáháⁿ ndíi Dàvií, te vitna xini ñuhu-xi nanducu-o ñⁿ téè nucúnutnîí-dé núú ndíi Jùdás, te xini ñuhu-xi diu-ni ñⁿ téè ní xica cuu ndihí Xítohó Jesucristú cútnàhá ní xica cuu-o ndihí-gá, ñⁿ téè ní xiní ndéé òré ní dácuaándute ñaha ndíi Juáa xii-gá, te ndéé òré cuándaa-gá andiu. Te téè nanducu-o cundecu-dé cáháⁿ-dê nàcuáa ní cuu ní ndoto-gá —càchí té Pèlú xáhaⁿ-dê xií-yu.

23 Te ní cacunehe-güedê úu tnàhá-güedê nùu ndédacàa-güedê nduu táhú-güedê nucúnutnîí-güedê

núú ndíi. Te ñⁿ-dê nání-dê Chèé Barsàbás, àdi Justú chi úú diu-dé, te ingá-dé nání-dê Màtiá. 24 Te ní cáháⁿ ndihí-güedê Yá Ndiöxí, te xáhaⁿ-güedê xii-gá:

—Yòhó Dútú Ndiöxí xiní-n iní nchaa ñáyiú, te mee-n nàha-n núú ndéda càa núú úú cue téè-a tnàhá iní-n 25 cáháⁿ-güedê tnúhu-n núú ñáyiú, te téè-áⁿ nucúnutnîí-dé núú ndíi Jùdás, chi cuáháⁿ ndíi núú úhú núú ndàhú núú tàú-xi quíhíⁿ ndíi —càchí-güedê xáhaⁿ-güedê xii-gá.

26 Te ní xito ndéé-güedê, te ní cutnùní sá téè nàni Matíá quendóo-dé ndihí úxí ñⁿ cue téè ní táuchíúⁿ-gã dacuàha ñaha xii ñáyiú tnúhu-gá.

2

Ní quexìo Espíritú Yá Ndiöxí cundecu ndihí ñáyiú

1 Te ní sáá nduu còo vico Pentecostés te xíndecu nchaa ñáyiú ñⁿ-ni xichi. 2 Te ní tecú dóho-yu uuⁿni ní níhi andiu, dàtná quidé ñⁿ táchí níhi vîhi ní quide-xi, te ducaⁿ nî cuu ndéé xití vehe núú ndécú-yu nchaá-yu. 3 Te ní xiní-yu dàtná cáá itá ñuhú cáá sã ndécú xití vehe, te ní xité nuu-xi ní ngoyo ndodo-xi díqui-yu nchaá-yu. 4 Te ducaⁿ nî quide-xi òré ní quexìo Espíritú Yá Ndiöxí ní ngúndecu ndihí-yu nchaá-yu. Te ní ngúíta-yu ní cáháⁿ-yu tnúhu cue ñáyiú ñá túú cùu ñáyiú isràél, te nchaa xíaⁿ ní quide Espíritú Yá Ndiöxí.

5 Te vâi ñáyiú isràél xíndecu nchaa dava-gá ñuú ní tacá-yu ñuú Jerusalén, te ñáyiú-áⁿ ò ndùcu ndéé-yu dàcuahá-yu nchaa ndudú sá dácuaàha tnahí-yu. 6 Te òré ní tecú dóho-yu níhi, te ní sáháⁿ-yu ní xíndedóho-yu tnúhu càháⁿ méè-yu ñⁿ ñⁿ ñuú-yu, chi ndí dîíⁿ ndí dîíⁿ tnúhu càháⁿ ñáyiú ndècu-áⁿ. 7 Te xíaⁿ ío ní cuñúhu ñáyiú véxi dava-gá ñuú, te ní xitnàhá-yu:

—Ñáyiú ducaⁿ xicáháⁿ cúu-yu ñáyiú distritú Galileá. 8 ¿Te nása ní quidé-yu ní cutúha-yu nàcuáa càháⁿ-ó ñⁿ ñⁿ-o

ndéé lĩhli-o? ⁹ Te iha véxi ñáyiú dava nàcióⁿ, chi véxi ñáyiú Pàrtiá, véxi ñáyiú Mèdiá, véxi ñáyiú Èlám, véxi ñáyiú Mesopòtamiá, véxi ñáyiú Jùdeá, véxi ñáyiú Capadociá, véxi ñáyiú Pòntó, véxi ñáyiú Àsiá, ¹⁰ véxi ñáyiú Frigiá, véxi ñáyiú Pànfilíá, véxi ñáyiú Ègiptú, véxi ñáyiú Áfricá ñáyiú ndècu ndéé núú-gã-xi ñuú Cirené. Te tñàhá ñáyiú ñuú Rómá véxi, te ñáyiú-áⁿ chi ñá díú mèe-ni ñáyiú isràél cúu-yu nchaá-yu, dico ñⁿ-ni cùu sá dácuàhá-yu. ¹¹ Te véxi ñáyiú Crètà, véxi ñáyiú Àrabiá. Te nchaa-o sa ndèdóho-o càháⁿ-yu nàcuáa cuáháⁿ tñúhu mee-o ñⁿ ñⁿ-o. Te nchaa ñáyiú xicáháⁿ tñúhu-o càháⁿ-yu cuèndá nchaa sá vã yõo tñàhí ndàcu cada ní quide Yá Ndiõxí —càchí-yu xĩtnàhá-yu.

¹² Te ní cuñúhu vñhí-yu, te ñá ná sàá iní-yu nása ní cuu, te xĩtnàhá-yu:

—¿Nása ní cuu duha càháⁿ-yu tñúhu-o? —càchí-yu xĩtnàhá-yu.

¹³ Te davá-yu ní sácú ndeé yíchí ñáhã-yu, te xĩtnàhá-yu:

—Xixíni ñáyiú-áⁿ ñuu ñá náhá-yu tñúhu càháⁿ-yu —càchí-yu xĩtnàhá-yu.

Tnúhu ní xáhaⁿ tẽ Pèlú xii cue ñáyiú

¹⁴ Te ní ngúnutñí té Pèlú ndihí úxí ñⁿ cue téé ní táuchíúⁿ Jèsús dacuàhá ñaha xii ñáyiú tñúhu-gá, te níhi ní cáháⁿ-dé, te xãháⁿ-dẽ xií-yu:

—Nchaa nchòhó ñáyiú distrítú Jùdeá ndihí nchòhó ñáyiú ñuú Jerusàlén, cundedóho váha-ndo tñúhu na càháⁿ-í-a. ¹⁵ Ná ndàá tñúhu càháⁿ-ndó, chi ñá túú xĩni-ndí te ducaⁿ càháⁿ-ndó, chi davitna cùu-xi caá ñⁿ dátneé, vátá tñàhá-gá òré coho ñáyiú ndidí. ¹⁶ Te yúhú ná càchí tñúhu-í xii-ndo vitna nacuáa ní xáhaⁿ Yá Ndiõxí xii ndíi Jòél téé ní xóo cáháⁿ tñúhu-gá ndéé sanaha nàcuáa cada ñaha-gã xii ñáyiú, te ndíi-áⁿ ñí chídó tñúni ndíi nàcuáa ní cáháⁿ-gá. ¹⁷ Te duha ní xáhaⁿ-gã xii ndíi:

Cùmání-gã sáá nduu nàa ñuyú, te cuáñaha-ĩ Espiritú-í cundecu ndihí nchaa ñáyiú na quindáa iní ñáhã xii-í.

Te cue déhe-yu cáháⁿ-yu tñúhu-í, te cue téé cuechi dacòto núú ñáhã-xi xii-güedé,

te ducaⁿ-ni cuè téé ni sàhnu cáháⁿ saní-güedé,

te ñu-ni cuèndá nchaa sá quidè-í ducaⁿ dàcoto núú ñáhã-xi xii-güedé.

¹⁸ Te nchaa ñáyiú xinu cuechi núu-í cáháⁿ-yu tñúhu-í, te cuáñaha-ĩ Espiritú-í cundecu ndihí-yu.

¹⁹ Te ndéé andiu, yacáⁿ vai sá cadà-í nàcuáa cuñúhu vñhí-yu,

te núú ñuyú-a cada-í ñⁿ sá vátá quini tñàhí-gá-yu,

te ngoyo níñí te ngoyo ñuhú te quene vñhi ñúhmá.

²⁰ Te vá dáyhé-gá nchíanchii, cuu nee ñuyú te cuu tñuèhé núú yõo dàtná tñuèhé níñí.

Te dàvá-áⁿ sáá nduu quixi Yáa cúu Xitohó-yu,

te nduu-ãⁿ cuu-xi ñⁿ nduu càhnu vihi, chi cada-gá nchaa sá ñà túú xini-yu, te cuñúhu vñhí-yu.

²¹ Te òré xiáⁿ te nchaa ñáyiú càháⁿ ndihí ñaha xii Yáa cúu Xitohó-yu-áⁿ naníhí tãhú-yu.

Duha ní xáhaⁿ Yá Ndiõxí xii ndíi Jòél ní chídó tñúni ndíi.

²² Te nchòhó ñáyiú isràél, cundedóho váha-ndo tñúhu na càháⁿ-í-a cuèndá Jèsús téé ñuú Nazàrét. Te Jèsús ní quide-gá chiúⁿ Yá Ndiõxí, chi mee Yá Ndiõxí ní chindee ñaha-gá ní quide Jèsús ná daha núú chiúⁿ, núu xiáⁿ ní ndacu-gá ní quide-gá nchaa sá vã yõo tñàhí ndàcu cada, te xiáⁿ ní cuñúhu vñhi-ndo. Te sa nàha-ndo nacuáa ní quide-gá cùtnàhá ní xica cuu-gá ñuyú. ²³ Te ndíi Jùdás ní taxi cuèndá ñáhã ndíi Jèsús xii nchòhó cue téé ní cuu úhú iní ñáhã xii-gá, te ní ndúcú-ndó cuè téé úhú iní-xi ní tñi ñaha-güedé xii-gá te ní sata caa ñaha-güedé núú cùrúxí, te núú cùrúxí-áⁿ ñí xihí-gá. Dico sa ní cutnùni iní Yá Ndiõxí sá dúcáⁿ càda-ndo Jesús, te mee Yá Ndiõxí ní cachí-gá sá dúcáⁿ ndòho Jesús. ²⁴ Te ñu-ni mee Yá Ndiõxí ní dándótó-gã Jèsús, chi sa ní cáháⁿ-gá sá òré cuú-gá te vá cúu dúcáⁿ-gã. ²⁵ Te ndíi Dàvíí téé

ní xíndaha ñàha xii cue ñaní tnáhá-ó ní xíndecu ndéé sanaha ní chídó tnùní ndíi nàcuáa ní cáháⁿ Jèsús, te duha ní cáháⁿ-gá:

Cùtnuní iní-í sá ncháá ndùu ndecu ndíhi-í Yá Ndiöxí, te ío chìndee ñaha-gá xii-í,

te ñá túu tnàhí sá yùhú-í.

²⁶ Te ío ndàcáⁿ táhù-í núú Yá Ndiöxí chi cùdíí iní-í, chi sa nàha-í sá cùú-í dico ndoto-í,

²⁷ chi vá dáñá-gã quíhíⁿ dúcáⁿ àlmá-í núú ndécú ñáyiú ní xíhí,

te vá dáñá-gã téhyú yíqui cùñú-í chi cùú-í Déhe-gá, te yúhú sa nàha-í sá cùú iní ñáhá-gã xii-í.

²⁸ Te sa ní cachí tnúhu-gá nàcuáa cada-í cundecu-í ichi váha, te cuendá sá ndécú ndíhi ñaha-gá xii-í núú ío cùdíí iní-í.

Duha ní cáháⁿ Jèsús, te ducaⁿ ní chídó tnùní ndíi Dàvíí.

²⁹ Te nchòhó cue ñaní tnáhà-í, na càchí tnúhu ndáá-í xii-ndo cuendá ndíi Dàvíí téé ní xíndecu ndéé sanaha víhi, chi ní xíhí-dé, te ní chindúxi ñaha-güedé, te nàha-o tnavíí núú ní chindúxi ñaha-güedé. ³⁰ Te ndíi Dàvíí ní xóo cáháⁿ ndíi tnúhu Yá Ndiöxí, te sa nàha ndíi sá Yá Ndiöxí ní cáháⁿ ndáa cuítí-gá sá díú-ní ñⁿ tnaha ndíi taxi tnùní-dé ñáyiú isràél ndéé cuèé-gá dàtná ní xóo taxi tnùní méé ndíi cùtnáhá ní xíndecu ndíi, te téé taxi tnùní-án cùú Crístú chi cùú-gá ñⁿ tnàha ndíi. ³¹ Te sa ní cùtnùní iní ndíi sá ndótó Crístú, núú xiáⁿ ní chídó tnùní ndíi sá vã dáñá Yá Ndiöxí sá quíhíⁿ dúcáⁿ àlmá-gá cundecu-xi núú ndécú ñáyiú ní xíhí, te vá dáñá-gã téhyú yíqui cùñú-gá.

³² Te ndáa chi Yá Ndiöxí ní dándótó-gã Jèsús, te nchúhú ní xiní-ndí sá ñí ndoto-gá. ³³ Te ní xáhaⁿ Yá Ndiöxí xii Jèsús sá cundecu ndíhi ñaha-gá, te taxi tnùní Jèsús ñí caa ñí quíhíⁿ. Te Yá Ndiöxí ní sáñaha-gã Espíritú-gá ní ngúndecu ndíhi-gá nàcuáa ní xáhaⁿ-gã, te ñíu Jèsús ní quide-gá nchaa sá ñí xiní-ndó vitna ndíhi nchaa sá ñí xíndedóho-ndo. ³⁴ Te ndíi Dàvíí ñá túu ní ndáa túu ndíi

andíu ndíhi yíqui cuñú ndíi, te òré ndécú-gã ndíi ñuyíú-a ní cachí ndíi:

Dútú Ndiöxí ní xáhaⁿ-gã xii Yaá cùú Xítohó-í:

“Ngóo xio cùha-í,

³⁵ te yúhú cada-í te nchaa sá cùú ùhú iní ñáhá xii-n canehe-xi sá yíñùhu núú-n.”

Duha ní xáhaⁿ Dútú Ndiöxí xii Yaá cùú Xítohó-í cachí ndíi.

³⁶ Te nchòhó ñáyiú isràél cùu-ndo ndí mee-í, te cuíní-í cundedóho váha-ndo ñⁿ tnúhu na càháⁿ-í-a. Jèsús ní sata caa-ndo-gã núú cùrúxí, dico Yá Ndiöxí ní cachí-gá sá Jèsús dacäcu nihnu-gá ñáyiú, te vá cání ñⁿ cani úú iní-ndó, chi ñíu-gá cùnùu-gá núú nchàa ñáyiú —càchí té Pèlú xáhaⁿ-dè xií-yu.

³⁷ Te ñáyiú ní xíndedóho tnúhu ní cáháⁿ té Pèlú ní ndixi túu iní-yu nàcuáa quidé-yu ndécú-yu, te ní xáháⁿ-yu xii-dé ndíhi dava-gá cue téé ní táuchíúⁿ Jèsús dacuàha ñaha xií-yu tnúhu-gá:

—Nchaa nchòhó cue ñaní tnáhá-ndí, ¿nása cachí-ndó cùnduu, nása cada-ndí vitna? —càchí-yu xáháⁿ-yu xii-güedé.

³⁸ Te ní xáhaⁿ tẽ Pèlú xií-yu:

—Daña-ndo nchàa sá cuèhé sá dúhá quide-ndo, te cada càhnu iní Yá Ndiöxí nchaa yíca cuèchi-ndo. Te cuandute-ndo cuendá quini-yu sá ñí natuha-ndo ichi Jesús, te ducaⁿ te taxi Yá Ndiöxí Espíritú-gá cundecu ndíhi-ndo, ³⁹ chi cuíní-gá taxi-gá Espíritú-gá xii mee-ndo ndíhi déhe-ndo, te cuáñaha-gã Espíritú-gá xii nchaa ñáyiú ñí càa xico ñuyíú, ñáyiú cáháⁿ-gá cundecu ichi-gá ndéé idá-gá —càchí té Pèlú xáhaⁿ-dè xií-yu.

⁴⁰ Te titní-gá tnúhu ní xáhaⁿ-dè nàcuáa cadá-yu, te xáhaⁿ tùcu-dé:

—Daña-ndo nchàa sá cuèhé sá dúhá quide-ndo, vá cadá-ndó sá quidé dàva-gá-yu —càchí-dé xáhaⁿ-dè.

⁴¹ Te nchaa ñáyiú ní sándáa iní-xi tnúhu ní cáháⁿ té Pèlú ní sanduté-yu, te ñíu-ñí nduu-ãⁿ ñí cuu dàtná úní mĩl ñáyiú ní sándáa iní-xi ní xíndecu ndíhi ñáyiú xídácuáhá tnúhu Yá Ndiöxí. ⁴² Te

ío ní xíndedóho-yu tnúhu ní cáháⁿ cue téé ní táuchíúⁿ Jèsús dacuàha ñaha xii-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá náhá-yu sá dúcáⁿ ní quide Jèsús cútnàhá vátá cáhni ñaha-gá-güedé xii-gá, te ní xóo cáháⁿ ndihí-yu Yá Ndiöxí.

Nàcuáa ní quide nchaa ñáyiu ní sándáa iní tnúhu Jèsús ndéé díhna nuu

⁴³ Te nchaá-yu ní cuñúhu vihí-yu, chi cue téé ní táuchíúⁿ-gá dacuàha ñaha xii-yu tnúhu-gá ní quide-güedé títní núú sá vǎ yǎo tnàhí ndàcu cada, te xíáⁿ ní cutnúni iní-yu sá méé Yá Ndiöxí chindèe ñaha-gá xii-güedé. ⁴⁴ Te nchaa ñáyiu sándáa iní tnúhu Jèsús cáháⁿ ndihí tnàha váha-yu, te cuèi-ni nchaa ndachíuⁿ nandíhi-yu ndècu cahnu. ⁴⁵ Te ní dícǎ-yu nchaa ndachíuⁿ sá ñà túú xini ñuhú-yu, te ní níhí-yu díhúⁿ te ní sáñàhá-yu xii nchaa ñáyiu ñá nihí. ⁴⁶ Te ñⁿ nduu ñⁿ nduu ní xóo quíhíⁿ ndihí tnàhá-yu veñúhu càhnu sá ño cùnuu. Te ní xexi ndihí tnàhá-yu vehé-yu. Te ío ní cudíi iní-yu chi ñⁿ-ni ní cuú-yu nchaá-yu. ⁴⁷ Te ío ní ndacáⁿ táhú-yu núú Yá Ndiöxí, te nchaa dava-gá ñáyiu ní cáháⁿ váha-yu cuèndá ñáyiu-áⁿ. Te mee Yá Ndiöxí ní quide-gá ní sándáa iní vai-gá ñáyiu, te ní xíndecú-yu ndihí dava-gá ñáyiu xídacuáhá tnúhu-gá.

3

Quide tátna-güedé ñⁿ téé yacua

¹ Te ñⁿ nduu òré caá úní sacuaa, òré xícáháⁿ-yu ndihí Yá Ndiöxí cuáháⁿ té Pèlú ndihí té Juáa veñúhu càhnu sá ño cùnuu sácúú-xí ñáyiu isràél. ² Te ndècu ñⁿ téé yacua, te ducaⁿ-ni càa-dé ní cacu-dé. Te sàháⁿ ndihí ñàhá-yu veñúhu càhnu sá ño cùnuu, te sàcǎo-dé ñⁿ xio yuyèhe veñúhu sá nání Yèhe Vii Caa, chi ducaⁿ nàni-xi, te xicáⁿ ndàhú-dé núú nchaa ñáyiu sàháⁿ veñúhu. ³ Te ní xiní-dé té Pèlú ndihí té Juáa cuánguihu-güedé veñúhu, te xicáⁿ ndàhú-dé núú-güedé. ⁴ Te ní

ndacoto-güedé núú-dé, te ní xáhaⁿ té Pèlú xii téé yacua-áⁿ:

—Cundehe ñaha xii-ndí —càchí té Pèlú xáhaⁿ-dé xii-dé.

⁵ Te ní xíndéhe ñaha-dé xii-güedé, chi ní cáháⁿ-dé sá ño ñⁿ sá cuañaha-güedé. ⁶ Te ní xáhaⁿ té Pèlú:

—Ñá túú tnàhí díhúⁿ néhè-í dico chindee ñaha-í xii-n, te Xítohó Jesucristú Yaá ní xíndecu ñuú Nazàrét, ndacu-gá cada tátna ñaha-gá xii-n, ndacuíñí te caca-n —càchí-dé xáhaⁿ-dé.

⁷ Te té Pèlú ní tñi-dé ndaha cùha téé yacua-áⁿ, te ní ngúita-dé ndàcàni ñaha-dé, te òré xíáⁿ ní naníhí ndéé-dé, te ní ndúha sàhá-dé. ⁸ Te ní ndacuíñí cunu mee-dé te ní xica-dé, te ní cachí-dé sá ño càhnu cuu Yá Ndiöxí cuèndá sá ñi ndúha-dé, te ta sàndava-dé cuánguihu ndihí ñaha-güedé veñúhu. ⁹ Te nchaa ñáyiu xíndecu-áⁿ ní xiní-yu sá ñi nduu váha-dé, te ndèhé-yu ndàcáⁿ táhú-dé núú Yá Ndiöxí. ¹⁰ Te ní naquiní ñáhá-yu xii-dé sá díú téé xicáⁿ ndàhú téé ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vihí-yu sá ñi ndúha-dé.

Té Pèlú ní cáháⁿ-dé corrèdór sá néhé ñⁿ ndí Salòmón

¹¹ Te sátá veñúhu càa corrèdór sá néhé ñⁿ ndí Salòmón. Yàcáⁿ ndécú té Pèlú ndihí té Juáa ndihí téé ní ndúha sàhá-xi, te ñá cuini téé ní ndúha sàhá-xi-áⁿ dañá-dé quíhíⁿ-güedé dandǎo ñaha-güedé xii-dé. Te chítú-yu ní quexíu coyó-yu núú ndécú-güedé, te ní cuñúhu vihí-yu sá ñi ndúha sàhá téé cùhú-áⁿ. ¹² Te té Pèlú ní xiní-dé ní quexíu coyó-yu, te ní xáhaⁿ-dé xii-yu:

—Nchòhó ñáyiu isràél, ¿ná cuèndá ndéé dúcáⁿ ndèhe ñaha-ndo xii-ndí te cuñúhu-ndo sá ñi ndúha téé yacua-áiⁿ? Nchòhó cáháⁿ-ndó sá méé-ndí ní quide tátna-ndí-dé sá ño váha iní-ndí, dico ñáhá chi ñá díú mèe-ndí ní quide tátna-ndí-dé. ¹³ Chi Yá Ndiöxí ní ndadúha ñaha-gá xii-dé, chi ñⁿ-gá cúú Ndiöxí ndí Àbrahám ndihí ndí Isàác ndihí ndí Jàcób, te

diu-ni cue té-áⁿ cúú ñàní tnáhá-ó ñí xíndecu ndéé sanaha vihi. Te diu-ni Ndiöxí-áⁿ ní xáhaⁿ-gã xii Déhe-gá Jèsús sá táxí tnùní-gá nchaa sá ìo andiu ndìhi nchaa ñáyiu ndècu ñuyíú-a, dico mee-ndo ñí sáha cuèndá-ndó Jèsús núú tée cùchiuⁿ. Te té Pilatú ní cuini-dé dacäcu-dé Jèsús ní cùu, te mee-ndo ñã ní cuini-ndó. ¹⁴ Te Yá Ndiöxí ní cachí-gá sá ìo váha iní Jèsús te ñá túú tnáhi cuéchi-gá. Te mee-ndo ñà túú ní cuini-ndó cácu-gá ñúu ní xáhaⁿ-ndo xii té Pilatú sá váha-gá dacäcu-dé ìⁿ tée ndècu vihi cuéchi-xi, te vá dacäcu-dé Jèsús. ¹⁵ Te ní xáhaⁿ-ndo sã cáhni-güedë Jèsús Yá quidé nchìto-o ndecu-o, dico Yá Ndiöxí ní dándótó ñaha-gá, te ní xiní-ndí sá ndáá ní ndoto-gá. ¹⁶ Te nchúhú sa nàha-ndí sá díú Xìtoho Jesucristú ní ndadúha-gá tée yacua, te náí-dé nútní-a. Te ducaⁿ ñí quide-gá chi ní sándáá iní ñáhá-dë xii-gá, te vitna ní xiní-ndó sã ndáá ní ndúha-dé.

¹⁷ Te nchòhó ndìhi cue tée cùnui ní sahani-ndo Xìtoho Jesucristú, chi ñá ní cùnui iní-ndó sã ñí quide-ndo. ¹⁸ Te cue tée ní xóo cáháⁿ tnúhu Yá Ndiöxí ndéé sanaha ñí chídó tnùní-güedé nàcuáa ní xáhaⁿ Yá Ndiöxí xii-güedé sá Crístú quixi-gá ñuyíú-a, te ndoho vihi-gá, te xiáⁿ ñúu ducaⁿ ñí cuu ìo ní ndoho-gá. ¹⁹ Te vitna te dañá-ndo nchàa sá cuèhé sá dúhá quide-ndo. Te quindáá iní-ndó Yá Ndiöxí, te ducaⁿ te cada càhnu iní-gá nchaa sá ñà túú váha ní quide-ndo ñuyíú-a, te canu ichi ñaha-gã xii-ndo ìⁿ ichi váha. ²⁰ Te ní tendaha-gã Crístú ní quixi-gá ñuyíú-a, chi mee Yá Ndiöxí ní cachí-gá sá díú Crístú taunihnu ñaha-gã xii-ndo. ²¹ Te dacuití cùndecu-gá andiu ndéé ná sáá nduu nàtaxi ndecu-gá nchaa sá ndécú ñuyíú nàcuáa sàni iní mée-gã. Te diu ducaⁿ ñí cáháⁿ Yá Ndiöxí ñúu ducaⁿ ñí chídó tnùní cue tée ní xóo cáháⁿ tnúhu-gá ndéé sanaha. ²² Te ndí Moisés ní xáhaⁿ ndíi xii cue ñaní tnáhá-ó ñí xíndecu ndéé sanaha: “Yá Ndiöxí tendaha-gã ìⁿ tée quixi-dé cáháⁿ-dé tnúhu-gá dàtná cuini-ndó ñí quide ñaha-gã xii yúhú,

te té-áⁿ cuu-dé ìⁿ ñaní tnáhá-ndó. Te cundedóho váha-ndo nchàa tnúhu cáháⁿ-dé. ²³ Te nchaa ñáyiu vá quindáá iní tnúhu cáháⁿ-dé, te cuíta nihnú-yu chi vá quihíⁿ-yu núú quihíⁿ ñáyiu sándáá iní tnúhu Yá Ndiöxí”, duha ní xáhaⁿ ndíi Moisés xií-yu — càchí té Pèlú xáhaⁿ-dë xií-yu.

²⁴ Te ní xáhaⁿ tùcu té Pèlú xií-yu:

—Ndíi Sàmuel ndìhi nchaa cue tée nchìcúⁿ-gá ní xóo cáháⁿ tnúhu Yá Ndiöxí ndéé sanaha ñí cáháⁿ-güedé nàcuáa cada-xi vitna. ²⁵ Te Yá Ndiöxí ní cáháⁿ-gá ndìhi cue tée ní cáháⁿ tnúhu-gá ndéé sanaha. Te ní quide ndáá-gá ndìhi nchaa ñaní tnáhá-ó ñí xíndecu ndéé sanaha nàcuáa cada-gá naníhí tàhú-ó. Te duha ní xáhaⁿ-gã xii ndíi Àbrahám: “Ìó nduu cacu ìⁿ tnàha-n, te té-áⁿ cada-dé te naníhí tàhú ñáyiu ñuyíú-a”, duha ní xáhaⁿ-gã xii ndíi Àbrahám. ²⁶ Núu xiáⁿ ní tendaha-gã Déhe-gá ní quixi-gá núú ndécú-ndó cuèndá dañá-ndo nchàa sá cuèhé sá dúhá quide-ndo, te naníhí tàhú-ndó —càchí té Pèlú xáhaⁿ-dë xií-yu.

4

Té Pèlú ndìhi té Juáá ndécú-güedë ndaha tée cùchiuⁿ

¹ Te té Pèlú ndìhi té Juáá càháⁿ dúcáⁿ-ni-güedë ndìhi ñáyiu, ní quexìo cue dútú ndìhi tée tàxi tnùní ñáhá xii cue tée quide cuèndá veñúhu càhnu sá ìo cùnui, ndìhi cue tée cùu saducéú. ² Te ní cudééⁿ-güedë nchaa-güedé núú tã Pèlú ndìhi té Juáá sá xáhaⁿ-güedë xii ñáyiu sá ndótó ñáyiu ní xíhí dàtná ní ndoto Jèsús. ³ Te ní tní ñaha-güedë ní chihi ñaha-güedë vecaá xii-güedé, te ñá ní quide ndáá tée cùchiuⁿ cuéchi-güedé nduu-áⁿ chi sa ní cuaa. ⁴ Te ìo vai ñáyiu ní sándáá iní-yu tnúhu ní cáháⁿ-güedé, te ñáyiu-áⁿ ndìhi ñáyiu sa ní sándáá iní-xi ndéé càni-gá ní xínu dàtná úhúⁿ mìl mee-ni cue tée, te dèⁿ ñáyiu dèhí ndìhi landú.

⁵ Te nduu tnéé-áⁿ diu-ni ñúu Jerusàlén-áⁿ ñí tacá cue tée yìndaha veñúhu, ndìhi cue tée cùu sacuéhé núú ñáyiu isràél ndìhi cue tée dàcuaha

ñaha xii-yu nchaa tnúhu ní chídó tnùnì ndíi Moisés. ⁶ Te tnàhá dútú cùnù-gá tée nàni Anás ndécú ndíhi té Caifás, ndíhi té Juàá, ndíhi té Lijandrú ndíhi dava-gá ñaní tnàhá dútú cùnù-gá-áⁿ ndécú. ⁷ Te ní xáhaⁿ-güedě xii cue tée xìnu cuechi núú-güedě:

—Chí cuàháⁿ queñuhu-ndo tē Pèlú ndíhi té Juàá vecaá, te na quixi-güedé iha —càchí-güedé xáhaⁿ-güedě.

Te ní quexìo té Pèlú ndíhi té Juàá núú cuè tée cùnùu, te cue tée cùnùu-áⁿ nì xicáⁿ tnúhú-güedě núú-güedě, te xáhaⁿ-güedě:

—¿Nása ní quide-ndo cuendá tée yacua-ãⁿ? ¿Yoo ní táuchíúⁿ dùcaⁿ cada-ndo? —cachí-güedé xáhaⁿ-güedě.

⁸ Te ndècu ndíhi té Pèlú Espíritú Yá Ndiòxí, núú xiáⁿ ní xáhaⁿ-dě xii-güedě:

—Nchòhó cue tée cùchiuⁿ ndíhi nchòhó cue tée cùu sacuéhé núú ñáyiú isràél, ⁹ te núú cuíní-ndó quíní-ndó nása ní quide-ndí ní ndúha tée yacua-ãⁿ, ¹⁰ te cundedóho-ndo ñⁿ tnúhu na càháⁿ-í-a. Xìni ñuhu-xi cundedóho nchaa ñáyiú isràél cuendá quíní-yu nàcuáa ní cuu ní ndúha tée-ãⁿ. Xítóhó Jesucristú Yaa ní xíndecu ñuú Nazàrét ní quide tátna-gá sáhá tē yacua ní ndúha, te diu-ni-gá ní sata caa-ndo núú cùrúxí te núú cùrúxí-áⁿ nì xihí-gá, te ní dándótó ñaha Yá Ndiòxí xii-gá. ¹¹ Te núú tütú Yá Ndiòxí càchí-xi: “Cristú cúu-gã dàtná ñⁿ yúú ndécú xíquí ñⁿ vehe. Te yúú càchí-yu sá ñà túú nàndíhi, te diu xíáⁿ ní nàndíhi-xi ní ngúnutnì-xi xíquí véhé”, duha càchí-xi núú tütú-gá. Te ducaⁿ sàtnahá-xi cùu Jesús, chi càchí-ndó sá ñà túú nàndíhi-gá, ¹² dico Yá Ndiòxí ñà túú ndéé ní tàxi ndecu-gá ingá tée dàcácu nihnu ñaha xii-o núú ùhú núú ndàhú, chi ñⁿndí díi-ni Déhe-gá Xítóhó Jesucristú dacácu nihnu ñaha-gã xii-o —càchí té Pèlú xáhaⁿ-dě xii-güedě.

¹³ Te té Pèlú ndíhi té Juàá ñà túú tūha-güedé, te cùñúhu cue tée cùchiuⁿ sá ño ñí xíndáa-güedé. Te ní cutnùnì

iní cue tée cùchiuⁿ-áⁿ sã Jèsús ní xica cuu ndíhi-güedé, núú xiáⁿ ñà túú tnàhí yùhú-güedé càháⁿ-güedé. ¹⁴ Te cuendá ndécú ndíhi té Pèlú ndíhi té Juàá tē ní ndúha sáhá-xi, núú xiáⁿ ñà ní ñíhí cue tē cùchiuⁿ tnúhu càháⁿ-güedé. ¹⁵ Te ní xáhaⁿ-güedě xii té Pèlú ndíhi té Juàá sá queé-güedě quehé cuendá ndóo mee-güedě ndatnúhu-güedé. ¹⁶ Te ní xítñaha-güedé:

—¿Nása cada-o ùú cue tē-ãⁿ?, chi nchaa ñáyiú ñuú Jerusàlén nàhá-yu sá ñí quide tátna-güedé ñⁿ tē yacua, te xiáⁿ xícuñúhu vñhi ñáyiú. Te vá cúú càchí-ó sã ñã ndáá, chi vñhi ñáyiú ní xíní nàcuáa ní cuu. ¹⁷ Te dayùhú-ó-güedě te cùñaha-o sã vã càháⁿ-gá-güedé tnúhu Jèsús, chi núú ñáhá te quindáa-gá iní-yu —càchí-güedé xítñaha-güedé.

¹⁸ Te ní cana tucu-güedé té Pèlú ndíhi té Juàá, te xáhaⁿ-güedě sá vã dácuaⁿha-gá-güedé ñáyiú tnúhu Jèsús. ¹⁹ Te té Pèlú ndíhi té Juàá ní xáhaⁿ-güedě:

—Chí cuàha cuendá, te núú sá càchí nchòhó cada-ndí àdi sá càháⁿ Yá Ndiòxí cada-ndí. Te cada càhnu iní-ndó chi vá cúú càda-ndí sá càchí-ndó, chi cada nahi-ni-ndí sá càchí Yá Ndiòxí. ²⁰ Chi dacuítí càháⁿ-ndí nàcuáa ní càháⁿ Jèsús, te càháⁿ-ndí nchaa sá ñí xíní-ndí ní quide-gá —càchí-güedé xáhaⁿ-güedě.

²¹ Te cue tē cùchiuⁿ níhi-gá ní càháⁿ-güedé xáhaⁿ-güedě sá cáda càstíú ñáhá-güedě núú vá dáñá-güedě sá dácuaⁿha-güedé ñáyiú. Te ducaⁿ te ní dáñá ñaha-güedé cuánuhú-güedé, chi ñà ní ñíhí-güedě nása cada-güedé cada castíú ñáhá-güedě, chi nchaá-yu ndàcáⁿ táhú-yu núú Yá Ndiòxí sá ñí ndúha tē yacua. ²² Te tē ní quide tátna-güedé-áⁿ ndécú-dě vñhi-gá údico cuíá-dě, te ío ní cuñúhu-yu sá ñí ndúha-dé.

Ñáyiú sàndáá iní tnúhu Jèsús xicáⁿ táhú-yu núú-gã sá vã yùhú-yu càháⁿ-yu tnúhu-gá

²³ Te ní ndee té Pèlú ndíhi té Juàá cuánuhú-güedé núú ndécú

cuè téé cùndihì-güedé, te ní nacani tnúhu-güedé nàcuáa ní xáhaⁿ cuè dútú cúnùu ndihì cue téé cùu sacuéhé nùú ñáyiú isràél. ²⁴ Te sátá ñí xíndedóho-yu tnúhu ní cáháⁿ-güedé, te ñⁿ-ni tnúhu ní cáháⁿ-yu nchaá-yu ndihì Yá Ndiöxí, te ní xáháⁿ-yu xii-gá:

—Yòhó Dútú Ndiöxí, ní cadúha-n àndiú, ní cadúha-n ñùyíú, ní cadúha-n làmár, ní cadúha-n nchàandi túhú sá íó ñuyíú. ²⁵ Te ndíi Dàvíí ní sándáá iní ndíi tnúhu ní cáháⁿ-n, te ní chídó tnùnì ndíi nàcuáa ní xáhaⁿ-n cáháⁿ ndíi, te ñiú-ni Espíritú-n ñí chindee ñàha-xi xii ndíi ní chídó tnùnì ndíi, te duha ní chídó tnùnì ndíi:

Ñáyiú ñá túú cùu ñáyiú isràél ío cùdèñⁿ-yu núú Yá Ndiöxí,
te cuínì-yu nàá-yu ndihì-gá, dico vá ndácũ-yu chi mee-gá cúnùu-gá.

²⁶ Te cue téé yíndaha nacióⁿ ndihì cue téé cùchiuⁿ tacá-güedé nàá-güedé ndihì Dútú Ndiöxí ndihì Crístú Yaá ní quixi ñuyíú-a.

Duha ní chídó tnùnì ndíi Dàvíí nàcuáa ndùu tnúhu ní cáháⁿ-n —cachí-yu xáháⁿ-yu xii Yá Ndiöxí.

²⁷ Te xáhaⁿ tùcú-yu xii-gá:

—Ndáá ní cáháⁿ ndíi Dàvíí chi ñiú-ni ñuú iha ní tacá té Hèrodés ndihì té Pònciú Pilatú ndihì ñáyiú ñá túú cùu ñáyiú isràél ndihì ñáyiú isràél ní cáháⁿ cuèhé-yu cuèndá Jèsús. Te Yòhó Dútú Ndiöxí, Déhe-n cùu Jèsús nùu ío váha iní-gá, te ní sáha chiúⁿ-n-gá, te ío úhú ní cuu iní ñáhá ñáyiú xii-gá. ²⁸ Te ní quidé-yu nàcuáa ní sani iní-n càdá-yu ndéé sanaha, ndéé cùtnàhá ní ngáva ñuyíú. ²⁹ Te Yòhó Dútú Ndiöxí sa nàha-n nása càháⁿ cue téé cuínì cada úhú ñáhá xii-ndí. Te quíde-ndí chiúⁿ tahu-n, te vitna chindee ñàha-n xii-ndí cuèndá sá vǎ yùhú-ndí cáháⁿ-ndí tnúhu-n.

³⁰ Te cada tátna-n ñáyiú cùhú, te chindee ñàha-n xii-ndí, te cada-ndí nchaá sá vǎ yǒo tnàhí ndàcu cada nacuáa cuñúhu vihí-yu. Te xìnì-ndí sá méé Jèsús chindee ñàha-gá xii-ndí, chi quíde-gá chiúⁿ tahu-n —cachí-yu xáháⁿ-yu xii Yá Ndiöxí.

³¹ Te sátá ñí yáha ní cáháⁿ-yu ndihì Yá Ndiöxí, te ní quidi-xi vehe núú xíndecú-yu, te òré-áⁿ ñí cutáhú tucú-yu nchaá-yu Espíritú-gá. Te ní cáháⁿ-yu tnúhu Yá Ndiöxí, te ñá túú tnàhí ni yùhú-yu.

Cuèndá nchaá ndachíuⁿ cánehe chiúⁿ-yu

³² Te nchaá ñáyiú ní sándáá iní tnúhu Yá Ndiöxí ñⁿ-ni tnúhu ní cáháⁿ-yu nchaá-yu. ñⁿ-ni tnúhu ní sani iní-yu, te ní xóo chindee tnàhá-yu chí ní xóo cuáha táhú tnáhá-yu nchaá sá xínì ñùhú-yu, te ni ñⁿ-yu ñá túú ní cáháⁿ-yu sá ndàchiúⁿ-yu ñⁿdi-ni-yu cùu nchaá sá ndécú ndihí-yu. ³³ Te cue téé ní táuchíuⁿ Jèsús dacuàha ñaha xií-yu tnúhu-gá ío váha ní cáháⁿ-güedé nàcuáa ní cuu ní ndoho Xitohó Jesu-crístú. Te ío ní chindee ñàha Yá Ndiöxí ní cáháⁿ-yu tnúhu-gá, te ñá túú ní cáháⁿ cuèhé dava-gá-yu cuèndá ñáyiú dàcuaha tnúhu-gá. ³⁴ Te ñá túú tnàhí ni cùndahú-yu díhúⁿ, chi nchaá ñáyiú ndècu ndihì ñuhu-xi, ndihì nchaá ñáyiú càa vehe-xi ní nadìcò-yu, te da ñⁿ da ñⁿ ndachíuⁿ-yu ní nadìcò-yu òré xínì ñùhú-yu díhúⁿ. ³⁵ Te ní sáñhá-yu xii cue téé ní táuchíuⁿ Jèsús dacuàha ñaha xií-yu tnúhu-gá, te cue téé-áⁿ ñí dácǎhñu-güedé nchaá ñáyiú xìnì ñuhu. ³⁶ Te distritú Chìpré ndécú ñⁿ téé nàni-dé Chèé ñanì tnàhá ndíi Lèví, te ní xóo cunu cuechi-dé veñúhu ñáyiú isràél. Te cuèndá sá sáñaha-dé tnúhu ndee iní xií-yu, xíáⁿ nùu ní dánání ñàha-güedé Vèé xii-dé. ³⁷ Te téé-áⁿ ñí nadìcò-dé luha ñuhu-dé, te nèhe-dé díhúⁿ cuáháⁿ núú cuè téé ní táuchíuⁿ-gǎ dacuàha ñaha xií-yu tnúhu-gá.

5

Té Ananiás ndihì tá Sàfirá ñá túú ní quíde ndáa-yu

¹ Te ndècu ñⁿ téé nàni Ananiás, te ñadìhí-dé nánì-áⁿ Sàfirá, te ñáyiú-áⁿ ñí nadìcò-yu luha ñuhú-yu. ² Te ní taxúha-dé sacú díhúⁿ, te sacú-gá nehé-dé cuáháⁿ ní sáñaha-dé xii cue

tée ní táuchíúⁿ Jèsús dacuàha ñaha xii ñáyiu tnúhu-gá, te ní dándàhú ñáhá-dě xii-güedé, chí ní xáhaⁿ-dě sá ñihí ní sáñaha-dě, te ñaha ñadihí-dé sá dúcáⁿ nĩ quide-dé. ³ Te ní xáhaⁿ tẽ Pèlú xii-dé:

—Ananiás, ¿ná cuèndá ducaⁿ nĩ quide-n nĩ dáñá-n nĩ quíhu sácúíhná iní-n? Te ní dácúándèhnde-n núú Espíritú Yá Ndiõxí, te ní taxúha-n sácú díhúⁿ nĩ níhí-n cuèndá ñuhu-n. ⁴ ¿Te ñuhu-áⁿ cuèndá sá ñúhú mée-n, àdí díhúⁿ-áⁿ cuèndá sá díhúⁿ méé-n cùu-xi, te cuu-ni cada-n nàcuáa càchí iní-n càhaⁿ-n ñá? ¿Ná cuèndá ducaⁿ nĩ quide-n? ¿Ná ní quide-xi iní-n núu ní dácúándèhnde-n núú Yá Ndiõxí? Chí ñá díú-ni mée-ni ñáyiu ni dándahú-n —càchí té Pèlú xáhaⁿ-dě xii-dé.

⁵ Te òré ní ndihí tnúhu ní xáhaⁿ tẽ Pèlú, te uuⁿni ní nduá-dé te ní xihí-ni-dé. Te nchaa ñáyiu ní níhí tnúhu sá nĩ xihí-dé, te ní yùhú víhí-yu.

⁶ Te ní quixi ñⁿ úú cue tée cuechi, te ní ndanehe ñaha-güedé ní sacáⁿ ñáhá-güedé núu yuu, te ní ducuⁿ nuu ñaha-güedé yuu-áⁿ, te ní xido ñaha-güedé néhé ñaha-güedé cuáháⁿ chindúxi ñaha-güedé xii-dé.

⁷ Te ní cuu úú uní òré, te ní quexìo ñadihí tée ní xihí-áⁿ, te vátá quíní-gá-aⁿ sá nĩ xihí yíⁿ-aⁿ. ⁸ Te ní xáhaⁿ tẽ Pèlú xii-aⁿ:

—Cuíní-í cachí tnúhu ndáá-n. ¿Ndèdau ní díco-ndó ñuhu, ní díco-ndó nàcuáa ní cachí yíⁿ-aⁿ? —càchí té Pèlú xáhaⁿ-dě xii-aⁿ.

Te ní xáhaⁿ-aⁿ:

—Ndáá sá díú-ni dùcaⁿ —cachí-aⁿ xáhaⁿ-aⁿ.

⁹ Te ní xáhaⁿ tẽ Pèlú:

—¿Ná cuèndá ducaⁿ nĩ chitnàha tnúhu-ndo dùcaⁿ ní quide-ndo nĩ cuíní-ndó dándahú-ndó Espíritú Yá Ndiõxí? Quíní-n, chí sa cuándixi cue tée ní sáháⁿ ní chindúxi yíⁿ-n, te yòhó tnàhá-n càndeca ñaha tucu-güedé xii-n quíhíⁿ vitna —càchí-dé xáhaⁿ-dě xii-aⁿ.

¹⁰ Te òré-áⁿ nĩ nduá-aⁿ núu tẽ Pèlú, te ní xihí-ni-aⁿ. Te cuándihu cue tée cuechi-áⁿ xití vehe, te ní xiní-güedé sá sà ní xihí-aⁿ, núu ní xido ñaha tucu-güedé cuáháⁿ chindúxi-güedé-aⁿ

díñi yíⁿ-aⁿ. ¹¹ Te ní yùhú víhí ñáyiu ní sándáá iní tnúhu Yá Ndiõxí, ndihí dava-gá ñáyiu ní níhí tnúhu nàcuáa ní cuu.

Ní quide-güedé titní núú sã vã yõo tnàhí ndàcu cada te ío ní cuñúhu ñáyiu

¹² Te cue tée ní táuchíúⁿ Jèsús dacuàha ñaha xii-yu tnúhu-gá titní víhí sã vã yõo tnàhí ndàcu cada ní quide-güedé, te ní cuñúhu víhí-yu. Te nchaa ñáyiu ní sándáá iní-xi tnúhu Jèsús ní xóo tacá-yu corrèdór néhé diu ndí Salòmón. ¹³ Te nchaa ñáyiu ñá túú dàcuaha tnúhu-gá ñá ní cùyíⁿ-yu chitnahá-yu ñáyiu ní sándáá iní-xi tnúhu-gá, dico nchaá-yu ní cáháⁿ váha-yu cuèndá ñáyiu ní sándáá iní-xi tnúhu-gá. ¹⁴ Te vài tée, vài ñadihí ní sándáá iní-yu tnúhu-gá.

¹⁵ Te cuèndá sá nĩ níhí-yu tnúhu sá quidé tãtna cue tée ní xica cuu ndihí Jèsús, núu xiáⁿ ní queñuhú-yu nchaa ñáyiu cùhú ichi, te davá-yu ní quide túha-yu càamá te davá-yu ní quide túha-yu yuu, núu núú nchaa xiáⁿ tá sácáⁿ-yu cue ñáyiu cùhú-áⁿ cuáháⁿ,

te xiáⁿ cáⁿ-yu ndètú-yu, chí ní sani iní-yu sá òré yáha té Pèlú te cuèdicó cuándahú-dě yáha ndodo ñaha-xi xii-yu te ndúha-yu. ¹⁶ Te ní quixi ñáyiu ñuú yatni Jerusalén ndécá-yu ñáyiu cùhú, ndihí ñáyiu yíhí ñaha espíritú cùndihí yucu ñávãha ní quixi, te nchaá-yu ní ndúha.

Ío ní quide úhú-güedé té Pèlú ndihí té Juáá

¹⁷⁻¹⁸ Te dútú cùnùu-gá ndihí cue tée cùu saducéu cue tée cùndihí-dé ní cudééⁿ-güedé sá ío chítú-yu dàcuaha tnúhu Jèsús, núu xiáⁿ ní tníⁿ-güedé cue tée ní táuchíúⁿ Jèsús dacuàha ñaha xii-yu tnúhu-gá ní chihí ñaha-güedé vecaá. ¹⁹ Te xití niú-áⁿ nĩ quexìo ñⁿ espíritú xínú cuèchi núu Yá Ndiõxí ní nacaáⁿ-xi yèhe vecaá ní quee-güedé, te ní xáhaⁿ-xi xii-güedé:

²⁰ —Quíhíⁿ-ndó venúhu càhnu sá ío cùnùu te cúñaha-ndo xii ñáyiu nàcuáa cadá-yu naníhí tãhú-yu —càchí espíritú-áⁿ xáhaⁿ-xi xii-güedé.

21 Te sá dúcáⁿ ñí xáhaⁿ-xi ñũ sátá ñí túndaá, te ní sáháⁿ-güedé veñúhu càhnu sá ïo cùnũu sá cúú-xí ñãyiu isràel ní dácuahá ñàha-güedé xií-yu.

Te dútú cúnũu-gá ndihì cue tée cùndihì-dé ní nadatàcá tnáhá-güedé ndihì nchaa cue tée cùu sacuéhé ñũ ñãyiu isràel ndihì cue tée cùchiuⁿ, te ní tendaha-güedé sandàdú cuáháⁿ queñuhu-güedé cue tée yìhi vecaá ní cùu. 22 Te ní quexìo-güedé yèhe vecaá, te ní xiní-güedé sá ñí ìⁿ-gá cue tée dàcuaha ñaha xii ñãyiu tnúhu Jèsús ñá túú-gã-güedé yíhí. Te cuánuhú-güedé 23 ní xítñũhu-güedé cue tée cùchiuⁿ, te xáhaⁿ-güedé:

—Ní sáháⁿ-ndí ní sándéhé-ndí vecaá, te ndèé chóó-ñí, te xíndecu-ñí sandàdú cue tée xíndéé yèhe vecaá. Te ní nacaáⁿ-ndí vecaá, te vá yõ ìⁿ-gá yíhí —càchí-güedé xáhaⁿ-güedé.

24 Te sá dúcáⁿ ñí xáhaⁿ-güedé, te cuáháⁿ iní cue dútú cúnũu ndihì tée tàxi tnuní cue tée xíndéé veñúhu càhnu sá ïo cùnũu, te ní xítñaha-güedé:

—¿Nása cada-xi vitna duha càa ní cuu ní xinu cue tée yìhi vecaá-i? —càchí-güedé xítñaha-güedé.

25 Te ní quexìo ìⁿ tée ní xáhaⁿ-dë:

—Cundedóho-ndo na càchí tnúhu-í ìⁿ tnúhu. Cue tée ní chihì-ndo vecaá ndécú-güedé veñúhu càhnu sá ïo cùnũu dacuaha-güedé ñãyiu —càchí-dé xáhaⁿ-dë.

26 Te cue tée ndèé veñúhu ndihì tée tàxi tnuní ñáhá xii-güedé cuánguaca ñaha-güedé, te ñá túú ní quide úhú ñáhá-güedé, chi ní yùhú-güedé cuáha yúú ñáhá ñãyiu dii ñũú-xi-áⁿ. 27 Te ní ndexìo ndihì ñaha-güedé núu cuè tée cùu sacuéhé ndihì núu cuè tée cùchiuⁿ. Te dútú cúnũu-gá ní ngüíta-dé ténàà ñáhá-dë xii-güedé, te xáhaⁿ-dë:

28 —Te náa ñá díú ñí cachí-ndí sá vã dácuaaha-gá-ndó ñãyiu tnúhu Jèsús te dàcuaha-ñí-ndó-yu, te vitna nchaa ñãyiu ñuú Jerusálén ní níhí-yu tnúhu nàcuáa càháⁿ-ndó. ¿Te ná cuendá ducaⁿ quide-ndo, te càchí-ndó sã nchũhú ndècuéchi-ndí ní sahani-ndí Jèsús-i? —càchí dútú cúnũu-gá xáhaⁿ-dë xii-güedé.

29 Te té Pèlú ndihì dava-gá cue tée ní táuchíuⁿ Jèsús dacuàha ñaha xií-yu ní xáhaⁿ-güedé xii cue tée cùchiuⁿ:

—Nchúhú, Yá Ndiõxí cúnũu-gá sándáa iní-ndí tnúhu càháⁿ-gá dácúxí tnúhu càháⁿ ñãyiu. 30 Te nchòhó ní sata caa-ndo Jèsús núu cùrúxí te núu cùrúxí-áⁿ ñí xihí-gá, dico ní dándótó ñaha Yá Ndiõxí xii-gá. Te Yá Ndiõxí ní sándáa iní cue ñaní tnáhá-ndí ní xíndecu ndéé sanaha. 31 Te Yá Ndiõxí ní xáhaⁿ-gã sá cùndècu Jèsús xio cùha-gá cuendá taxi tnuní-gá te dacacu nihnu-gá ñãyiu isràel núu ùhú núu ndàhú. Te ducaⁿ-ni dacacu nihnu-gá nchaa ñãyiu na dàña nchaa sá cuèhé sá dúhá, te cada càhnu iní-gá nchaa yíca cuèchi-yu. 32 Te ní xiní-ndí nàcuáa ní quide-gá, núu xíãⁿ cání-ndí cuendú núu nchaa ñãyiu, te Espiritú Yã Ndiõxí chíndèe ñaha-xi xii-ndí càháⁿ-ndí tnúhu-gá. Te diu-ñí Espiritú-gá ní sãñaha-gã xii nchaa ñãyiu ní sándáa iní-xi tnúhu-gá —càchí té Pèlú ndihì dava-gá-güedé xáhaⁿ-güedé xii cue tée cùchiuⁿ.

33 Te sátá dúcáⁿ ñí xáhaⁿ-güedé xii cue tée cùchiuⁿ, te ní cudééⁿ-güedé, te ní ndatnúhu-güedé sá cáhñí ñaha-güedé. 34 Te ìⁿ tée cùu fariséu tnàha-dé cúú-dë chiúⁿ, te nani-dé Gamaliél, te cùu-dé mèstrú dácuaaha-dé ñãyiu nàcuáa ní chídó tnuní ndí Moisés, te ïo yíñũhu caháⁿ ndihì ñáhá-yu xii-dé. Te ní ngúnutñí-dé, te ní xáhaⁿ-dë sá ná quèe tnaa té Pèlú ndihì dava-gá-güedé quehé. 35 Te ní xáhaⁿ-dë xii cue tée cùchiuⁿ:

—Nchòhó cue tée isràel, xini ñũhu-xi sá cání vãha iní-ndó nása cada-ndo ndihì cue tée-ãⁿ. 36 Chi ní cunaha ñí xíndecu ìⁿ tée ní xínani Tèudás, te ní cachí-dé sá cúnũu-dé, te ní cundihì-dé dàtná cúmí ciendú cue tée, te ñá ní cuení-güedé cuu ìⁿnuu-güedé ndihì cue tée cùchiuⁿ. Te ní sahani ñaha cuè tée cùchiuⁿ-áⁿ xii tée Tèudás, te ní ndihì cue tée ní xica cuu ndihì-dé ní xité nuu-güedé, te ñá túú-gã ní quide-güedé nàcuáa ní sani iní-güedé cada-güedé. 37 Te sátá ñí

xíhí té-án, te ní tnahá nduu nùcódó tñuní ñáyiu. Te dává-án nǐ xíndecu ñí té distritú Galileá ní xínani-dě Jùdás. Te titní-güedé ní chitnahá ñáhá-güedě xii-dé. Te tñahá-dé ní sahní ñaha tucu cue té cùchiuⁿ, te nchaa cue té ní xica cuu ndihi-dé ní xité nuu-güedé. ³⁸ Te na cächí tñuhu-í sá dañá-ndó cuè té-án, te ní ñà túú nǎgá tñuhu cúñaha-ndo xii-güedé, chi núu chi^u mee-güedé quidé-güedě te cuíta-güedé, ³⁹ dico núu chi^u Yá Ndiöxí quidé-güedě, te vá ndínihnu chiuⁿ quide-güedé. Te núu quide-güedé chi^u Yá Ndiöxí, te vá nää-ndó ndihi-güedé, chi Yá Ndiöxí nää ndihi-ndo sá dúcáⁿ xíquide-ndo — cächí té Gamaliél xáhaⁿ-dé xii cue té cùchiuⁿ.

⁴⁰ Te nchaa-güedé ní cáháⁿ sá tñuhu ndáá cáháⁿ-dé. Te dätñuní ní nacana tucu-güedé té Pèlú ndihi dava-gá-güedé te ní caniha-güedě, te ní cáháⁿ níhi-güedé, te xáhaⁿ-güedě sá vǎ cáháⁿ-gá-güedé tñuhu Jèsús, te dätñuní ní dañá ñaha-güedé cuánuhú-güedé. ⁴¹ Te ío ní cudí^í iní-güedé, chi mee Yá Ndiöxí ní cachí-gá sá dúcáⁿ ndòho-güedé dacuàha-güedé ñáyiu tñuhu Jèsús. ⁴² Te ñí nduu ñí nduu ní dácuahá-güedě ñáyiu xití veñúhu càhnu sá ío cùnuu ndihi nchaa vehé-yu. Te ní xáhaⁿ-güedě xii-yu sá Jèsús cúu-gǎ Cristú Yaá ní quixi ñuyíu-a.

6

Ní ndúcú-güedě úsá cue té cundecu dacǎhñu sá cáxí ñáyiu

¹ Te diu-ni dává-án nǐ sándáá iní vǎi ñáyiu tñuhu Jèsús. Te cue ñáyiu griégú ní cáháⁿ cuèhé-yu cuèndá ñáyiu isràél, sá ñáyiu dǐhí ñáyiu quèé ñáyiu cáháⁿ tñuhu griégú ñá túú tñahá sá cáxí-yu, chi ñá túú sañaha ñínuu-güedé. ² Te cue téé úxúú ní táuchíúⁿ Jèsús dacuàha ñaha xii-yu tñuhu-gá, cue té-án nǐ cana-güedé nchaa ñáyiu sándáá iní tñuhu Jèsús. Te ní xáhaⁿ-güedě xii-yu:

—Nchúhú chi vá cúú dácáhñu-ndí sá cáxí-yu, chi mee-ni tñuhu Yá Ndiöxí

cáháⁿ-ndí. ³ Te nchòhó cue téé ndècu ndihi-ndí ichi Xitohó Jesucristú cáháⁿ ndihi-ndo úsá cue téé xíndecu iha, cue téé cáháⁿ ndihi ñáhá-yu mee-ni tñuhu yíñùhu, cue téé ndècu ndihi Espiritú Yá Ndiöxí, mee-ni cuè téé cùtnuní váha iní-xi. Te cue té-án cuàha-ndí-güedé chi^u cada-güedé dacáhñu-güedé sá cáxí-yu. ⁴ Te nchúhú mee-ni Yá Ndiöxí cáháⁿ ndihi-ndí, te mee-ni tñuhu-gá dacuàha-ndí-yu — cächí-güedé xáhaⁿ-güedě xii-yu.

⁵ Te nchaá-yu ní tñí-yu tñuhu ní cáháⁿ-güedé, núu ní ndúcú-yu cue téé cada chi^u-án. Te ñí-dé nání-dě Tévá, te ío váha sándáá iní-dé Yá Ndiöxí, te ndècu ndihi-dé Espiritú-gá. Te duha ní xínani dává-gá-güedé: té Lìpé, té Pröcoró, té Nicànor, té Tìmon, té Pàrmenás, té Lǎxí téé ñuú Antìoquiá téé ní sándáá iní-xi sá dácuaàha ñáyiu isràél te vitna ní sándáá iní-dé tñuhu Jèsús. ⁶ Te úsá cue té-án nǐ sáháⁿ-güedé núu cuè téé úxúú ní táuchíúⁿ Jèsús dacuàha ñaha xii-yu tñuhu-gá, te cue téé úxúú-án nǐ cáháⁿ ndihi-güedé Yá Ndiöxí, te ní sacáⁿ ndodo-güedé ndaha-güedé díquí cuè téé úsá-án.

⁷ Te ñáyiu ní sándáá iní tñuhu Jèsús cuáháⁿ-yu titní xichi cáháⁿ-yu tñuhu-gá. Te vǎi-gá ñáyiu ta sándáá iní-yu tñuhu-gá cuáháⁿ, te ní xíndecú-yu ndihi dava-gá ñáyiu dácuaaha tñuhu-gá ñuú Jerusàlén. Te titní dútú nǐ sándáá iní-güedé tñuhu-gá.

Ní tñí-güedé té Tévá

⁸ Te té Tévá ní quide-dé titní núu sǎ vǎ yò tñahí ndàcu cada, te ní cuñúhu vihí-yu sá dúcáⁿ nǐ quide-dé, te ducaⁿ nǐ quide-dé chi ndècu ndihi-dé Yá Ndiöxí chíndèe ñaha-gá. ⁹ Te ní xíndecu cue téé ní xóo cunu cuechi núú ñí téé tàxi tñuní, te téé tàxi tñuní-án ñǎ ní xòo dañá tñahí-dé quee-güedé núu chíúⁿ-dě, te ní xinu-ná-güedé. Te sátá xǎⁿ, te ní dácáá-güedě veñúhu-güedé, te veñúhu-án sáháⁿ ñáyiu ñuú Cirené, ñáyiu ñuú Alejàndriá, ñáyiu ñuú Cìliciá, ndihi ñáyiu distritú Àsiá. Te nchaa

ñáyu-áⁿ ní nàá ndihí-yu té Těvá. ¹⁰ Te ñá ní ñihí-yu tnúhu cáháⁿ-yu, chi ío váha ní sáá díquí-dě nàcuáa ní xáhaⁿ-dě xii-yu, chi Espíritú Yá Ndiöxí ní chindee ñàha-xi xii-dé. ¹¹ Te ní cháhu-yu cue téé ní dácuaándèhnde tnúhu ní cáháⁿ té Těvá núu-yu. Te ní xáhaⁿ-güedě sá càháⁿ cuèhé-dé cuendá ndíi Moisés ndihí cuendá Yá Ndiöxí. ¹² Te cuendá sá dúcáⁿ ní dácuaándèhnde-güedé núu ní sándáá iní-yu, te ní cudééⁿ-yu núú tě Těvá. Te ní cudééⁿ cue téé cùu sacuéhé, te tnàhá cue téé dácuaaha ñaha xii-yu nchaa tnúhu ní chídó tnùní ndíi Moisés ní cudééⁿ-güedě. Te ní sáháⁿ-güedé ní tñi-güedé té Těvá ndécá ñàha-güedé cuáháⁿ núú quidé cuè téé cùchiuⁿ jundá, ndihí cue téé cùu sacuéhé. ¹³ Te ndécá-yu cue téé dácuaandehnde cuáháⁿ núú quidé-güedé jundá, te ní quesaha-ni tucu-güedé càháⁿ cuèhé-güedé, te xáhaⁿ-güedé:

—Tée-a mee-ni càháⁿ cuèhé-dé cuendá veñúhu sá ío cùnuu, veñúhu ní cuu íi, te càháⁿ cuèhé-dé cuendá nchaa sá ní chídó tnùní ndíi Moisés. ¹⁴ Te ní tecú dóho-ndí càchí-dé sá Jèsús téé ñuú Nazàrét dangòyo-dé veñúhu càhnu sá ío cùnuu te vá dáñá-gá-dé cada-ndí nàcuáa ní cachí ndíi Moisés cada-ndí —càchí-güedé xáhaⁿ-güedé.

¹⁵ Te nchaa cue téé ndècu jundá ní ndacoto váha-güedé núú tě Těvá. Te ní dáyèhé-xi núú-dě dàtná quidé-xi núú espíritú xínú cuèchi núú Yá Ndiöxí.

7

Té Těvá xáhaⁿ-dě sá ñà túu cuèchi-dé

¹ Te ní xáhaⁿ dütú cùnùu-gá xii-dé:

—¿Ndáá tnúhu càháⁿ-güedé cuendá-n-áñ?
—càchí-dé xáhaⁿ-dě.

² Te té Těvá ní xáhaⁿ-dě xii-güedé:

—Nchòhó cue ñaní tnàhá-í ndihí nchòhó cue téé cùu sacuéhé, cund-edóho-ndo ñiⁿ tnúhu na càháⁿ-í-a. Yá Ndiöxí ío cùnuu-gá, te ní cáháⁿ ndihí-gá ndíi Àbrahám nacióⁿ Mesopotamiá cútnàhá vátá quihíⁿ-gá ndíi cundecu ndíi ñuú Hàrán. ³ Te ní xáhaⁿ-gá xii ndíi: “Daña-n nchàa ñaní tnàhá-n, te daña-n ñuhu-n, te

quihíⁿ-n ñiⁿ xichi núú dánèhé ñàhá-í cundecu-n”, duha ní xáhaⁿ Yá Ndiöxí xii ndíi Àbrahám. ⁴ Te sátá dúcáⁿ ní xáhaⁿ Yá Ndiöxí xii ndíi Àbrahám, te ní ndee ndíi ñuú Càldeá, te cuáháⁿ ndíi cundecu ndíi ñuú Hàrán. Te sátá ní xihí tātá ndíi, te ní xáhaⁿ Yá Ndiöxí quixi ndíi cundecu ndíi núú ndécú-ó vitna. ⁵ Te Yá Ndiöxí ñá túú ní sãñaha-gá ni lùha ñuhu cuu cuendá ndíi núú ní xindecu ndíi. Te ní xáhaⁿ ndáá Yá Ndiöxí xii ndíi sá cuãñaha-gá ñuhu cuu cuendá ndíi, te na cùú ndíi, te ndóo ndihí nchaa ñaní tnàhá ndíi cacu túu ndéé cuèé-gá. Te ducaⁿ ní xáhaⁿ-gá cuèi vátá cündècu-gá ni ñiⁿ déhe ndíi. ⁶ Te ní xáhaⁿ tucu Yá Ndiöxí xii ndíi Àbrahám sá díu-ní ñaní tnàhá ndíi quihíⁿ-yu núú xicá cündecú-yu cúmí ciendú cuía, te vá dáñá-yu queé-yu núú chíuⁿ-yu, te ío dandòho ñaha-güedé núú cündecú-yu. Duha ní xáhaⁿ Yá Ndiöxí xii ndíi, te ndáá ducaⁿ ní cuu. ⁷ Te ní xáhaⁿ tucu Yá Ndiöxí xii ndíi Àbrahám: “Yúhú dandòho-í nchaa ñáyu na dandòho ñaha xii cue ñaní tnàhá-n. Te dàvá-áⁿ te ndee cue ñaní tnàhá-n núú cündecú-yu, te quixí-yu chiñuhu ñàhá-yu xii-í iha”, duha ní xáhaⁿ Yá Ndiöxí xii ndíi Àbrahám, te ndáá ducaⁿ ní cuu. ⁸ Te Yá Ndiöxí ní quide ndáá-gá ndihí ndíi Àbrahám, te ní xáhaⁿ-gá xii ndíi sá cuãha-güedé sèñá ñiⁿ nchaa landú téé cuendá cunàhá-yu nàcuáa nduu sá ní quide ndáá-gá ndihí ndíi Àbrahám. Núu xíãⁿ núú ùná nduu sá ní cacu té Isàác déhe ndíi Àbrahám, te ní sáha ndíi sèñá ñiⁿ-dé. Te díu-ni ducaⁿ ní quide tucu té Isàác déhe-dé té Jàcób, te díu-ni ducaⁿ ní quide té Jàcób, chi úxúú déhe-dé ní xindecu, te nchaa-güedé ducaⁿ ní quide-dé. Te ndíi ùxúú cue téé-áⁿ ní cuu-güedé ñaní tnàhá-ó.

⁹ Te ñiⁿ déhe té Jàcób ní xínani-dě Chèé. Te ñá ní cùu váha iní cue ñaní-dé núú-dě, núu ní díco ñàha-güedé ní queheⁿ ñaha cuè téé cuáháⁿ nacióⁿ Ègiptú, te Yá Ndiöxí ñá ní dàña ñaha-gá xii-dé cuíta nihnu-dé. ¹⁰ Te ní chindee ñàha-gá xii-dé ní cacu-dé cútnàhá ní ndoho vihi-dé. Te téé yìndaha Egiptú ío ní cudíi

iní-dé té Chèé, te ní cutnùní iní-dé sá ío váha túha té Chèé, te ducaⁿ nǐ cutnùní iní-dé, chi Yá Ndiõxí ní chindee ñaha-gá xii té Chèé. Te ní xáhaⁿ tēe yìndaha Egiptú xii té Chèé sá díú tē Chèé coo-dé gobièrnú Ègiptú, te taxi tnùní-dé nchaa ñáyiú xìnu cuechi núú tēe yìndaha Egiptú-áⁿ.

11 "Te ní quíhu tnamá nihí nàcióⁿ Ègiptú ndihí nàcióⁿ Cànaá, te ío ní ndohó-yu. Te nchaa ñaní tnáhá-ó nǐ xíndecu ndéé sanaha ñǎ ní xǒo nihí-gá-yu sá cáxi-yu. 12 Te ní nihí tē Jàcób tnúhu sá ío triú Ègiptú, núú ní tendaha-dē cue déhe-dé ní sáháⁿ-güedé ní ságuaaⁿ-güedé triú-áⁿ, te dàvá-áⁿ nǐ sáháⁿ cue ñaní tnáhá-ó xito díhna nuu nàcióⁿ Ègiptú. 13 Te xito cùu uú cuáháⁿ-güedé, te ní xáhaⁿ tē Chèé sá ñaní-dé cúu-güedē. Te tēe yìndaha Egiptú ní cutnùní iní-dé sá díú-ní ñaní té Chèé cúu-güedē. 14-15 Te ní cana té Chèé tātá-dē té Jàcób ndihí nchaa ñaní tnáhá-dē. Te cùu-xi datná únídico sáhúⁿ-yu ndēca té Jàcób cuáháⁿ nàcióⁿ Ègiptú núú ndécú tē Chèé, te xíaⁿ nǐ quexió-yu ní ngóo-yu. Te yàcáⁿ ní xihí té Jàcób ndihí nchaa déhe-dé cue ñaní tnáhá-ó. 16 Te sátá nǐ cuu titní cuía, te ní natava-güedé yiquí ndíi Jàcób ndihí nchaa déhe ndíi nchìdo-güedé cuáháⁿ ñuú Sìquém. Te ndíi Àbrahám sa ní cuu titní-gá cuía sǎ nǐ nacuaaⁿ ndíi ñuhu núú cuè déhe ndíi Hámór. Te xíaⁿ nchíi yaú ní nachindúxi-güedé yiquí-áⁿ.

17 "Te cútnàhá vátá nátáva-gá-güedé yiquí cue ndíi, te sa ta tnàhá yatni cada Yá Ndiõxí nàcuáa ní xáhaⁿ-gǎ xii ndíi Àbrahám cada-gá sá cúu-xí ñáyiú isràèl ndécú Ègiptú, te ta cǎyá víhí-yu cuáháⁿ. 18 Te dàvá-áⁿ chi ingá tēe yìndaha nacióⁿ Ègiptú, te ñá túú-gǎ ní xíní-dé nása ní xóo cada ndíi Chèé. 19 Te tēe yìndaha Egiptú ñá ní quide ndáá-dé, chi ío ní dándóhó-dē ñaní tnáhá-ó nǐ xíndecu dàvá-áⁿ. Te ní táúchíúⁿ-dē sá xócuíñí-yu dándóo-yu déhe yiquíⁿ cuèndá ndihí-güexi cuú. 20 Te dàvá-áⁿ

nǐ cacu té Moisés, te ío ní cudíí iní ñáhá Yá Ndiõxí xii-dé. Te ní xíndecu ndihí ñaha náná-dē ndihí tātá-dē úní-ni yóo. 21 Te ndēca ñáhá-yu cuáháⁿ ingá xichi, te yàcáⁿ ní dándóo ñáhá-yu xii-dé, te ní naníhí ñáhá dēhe yoco tēe yìndaha Egiptú, te ní xito-xi-dé dàtná xító-xí ñⁿ déhe mee-xi nǐ xito-xi-dé ndéé ní sahnú-dé. 22 Te ní cutúha-dé nchaa sá xíní cue tēe ègiptú, te ío váha ní sáá díquí-dē tnúhu cáháⁿ-dé ndihí nchaa sá cádá-dē.

23 "Te cútnàhá ndécú-dē údico cuía-dē, te ní cachí-dé sá quíhíⁿ-dé cáháⁿ ndihí-dé cue ñaní tnáhá-dē ñáyiú isràèl. 24 Te ní xíní-dé ní caniha ñⁿ tēe ègiptú xii ñⁿ tēe isràèl, te ñá ní cùndee iní-dé cundehe-dē núu ní sáháⁿ-dé ní chindee-dē tēe isràèl, te ní sahní-dé tēe ègiptú, 25 chi ní cachí Yá Ndiõxí sá díú-dē dacacu-dé ñaní tnáhá-dē ñáyiú isràèl núú cuè tēe ègiptú. Te ní sani iní-dé sá cútnùní iní-yu nàcuáa ní xáhaⁿ Yá Ndiõxí xii-dé, dico ñá túú ní cùtnuní iní-yu. 26 Te nduu tnéé ní xíní-dé nàá úú cue tēe isràèl, te ñá túú ní tnàhá iní-dé nàá-güedé núu ní xáhaⁿ-dē xii-güedé: "¿Ná cuèndá ducaⁿ xínáa-ndó? ¿Náa ñá díú ndímee-ndo núu ducaⁿ xínáa-ndó?" Duha ní xáhaⁿ tē Moisés xii-güedé. 27 Te tēe ndécucuechi ní sáháⁿ-dé ní chindaha nihnu-dé té Moisés ñⁿ xio, te ní xáhaⁿ-dē: "¿Ná cúu yòhó núu véxi-n tàxi tnuní ñáhá-n? 28 Te tnàhá-ni tucu yúhú cahni-n dàtná ní sahní-n tēe ègiptú icu càhaⁿ-n á", duha ní xáhaⁿ-dē xii té Moisés. 29 Te sá dúcáⁿ nǐ cáháⁿ tēe isràèl núu ní yúhú té Moisés ní xínu-dé cuáháⁿ-dé ní sáá-dé nàcióⁿ Mèdián. Yàcáⁿ ní ngóo-dé, te yàcáⁿ ní tnándaha-dé, te ní cacu úú déhe tēe-dé.

30 "Te sátá nǐ xínu údico cuía, te ní sáháⁿ té Moisés ñⁿ xio yucu Sinái. Te yàcáⁿ ní xíní-dé ñⁿ tnutáu nchícúⁿ ñuhú, te xití itá ñuhú-áⁿ nǐ xíní-dé yíhí ñⁿ espíritú xínú cuèchi núú Yá Ndiõxí. 31 Te òré ní xíní-dé sá yíhí-xí xití itá ñuhú-áⁿ, te ní cuñúhu víhi-dé sá nǐ xíní-dé espíritú-áⁿ xití itá ñuhú-áⁿ, te ní sándehe-gá-dé, te ní xíndéhé

vãha-dé. Te ní tecú dóho-dé ní cáháⁿ Yã Ndiõxí, te xáhaⁿ-gã xii-dé: ³² “Yúhú cùu-í Ndiõxí ní cáháⁿ ndihí cue ñaní tnáhá-n ndéé sanaha, ndíi Abrahám ndihí ndíi Isàác ndihí ndíi Jàcób, ndihí dava-gá cue ñaní tnáhá-n. Nchaa cue ndíi-án ñi xóo cáháⁿ ndihí-í.” Duha ní xáhaⁿ-gã xii té Moisés. Te ní quidi ñaha-xi xii té Moisés sá ñi yùhú-dé, te ñá ní cùyii-gá-dé cundehe-dé tnutàú nchìcúⁿ ñuhú-án. ³³ Te Yã Ndiõxí ní xáhaⁿ-gã xii-dé: “Queñuhu chàú-n, chi núú ñuhú ñi cuu íi nútñi-n. ³⁴ Te yúhú ndéhè-í sá ío ndòho nchaa ñáyiú cùu cuendá-í, ñáyiú ndècu nacióⁿ Ègiptú. Te ní tecú dóho-í sá ío ndàhú xicáháⁿ-yu, núu xiáⁿ véxi-í càchí tnúhu-í sá nùhú-n nacióⁿ Ègiptú cuendá ndeñùhú-n-yu yàcáⁿ.” Duha ní xáhaⁿ Yã Ndiõxí xii té Moisés.

³⁵ “Te ñá ní sàndáá iní-yu té Moisés ndéé díhna, chi ní xáháⁿ-yu: “¿Ná cuendá véxi-n tàxi tnuní ñáhá-n xii-ndí?” Duha ní xáháⁿ-yu xii té Moisés. Te ñi-ni té Moisés ní tendaha ñaha Yã Ndiõxí ní sáháⁿ-dé dacàcu-dé ñáyiú isràél nacióⁿ Ègiptú cuèi ñá ní sàndáá iní ñáhá-yu xii-dé. Dico ní taxi tnùní-dé-yu, chi ducaⁿ ñi xáhaⁿ-gã òré ní xiní-dé espíritú xínú cuèchi núú-gã xití tnutàú nchìcúⁿ ñuhú. ³⁶ Te té Moisés ní ngúíta-dé ní quide-dé sá vã yõo tnàhí ndàcu cada, te ní cuñúhu vñhí-yu sá dúcáⁿ ñi quide-dé, te ducaⁿ ñi quide-dé Ègiptú ndihí Làmar Tícuèhé. Te ní ngódó núú-dé núú-yu ní queé-yu Ègiptú cuáháⁿ-yu ñi ichi xití yucu núú vã yõo tnàhí ndècu, te ní xihí-yu údico cuía xití yucu-án, te xiáⁿ ñi xóo cada-dé sá vã yõo tnàhí ndàcu cada. ³⁷ Te ñi-ni té Moisés ní xáhaⁿ-dè xii cue ñaní tnáhá-dè dàvá-án: “Yã Ndiõxí cada-gá te coo ñi ñaní tnáhá-ndó ndéé cuéé-gá, te téé-án cáháⁿ-dé tnúhu-gá núú-ndó dàtná cuiní-ndó ñi cachí-gá quidé yùhú, te ío xini ñuhu-xi cundedóho-ndo tnúhu cáháⁿ-dé”, duha ní xáhaⁿ té Moisés xii-yu dàvá-án. ³⁸ Te ñi-ni té Moisés ní xindecu ndihí-dé ñáyiú isràél xití yucu, te ní sáá-dé yucu Sinài, te xiáⁿ ñi quixi ñi espíritú xínú cuèchi núú Yã

Ndiõxí ní cáháⁿ ndihí ñaha-xi xii-dé, te yàcáⁿ ní dácúhá ñaha-xi tnúhu-gá, te ñi-ni tnúhu-án ñi ndóo dàcuaha-o.

³⁹ “Te cue ñaní tnáhá-ó ñi xindecu ndéé sanaha ñá ní sàndáá iní-yu té Moisés, te ñá ní ndèe iní ñáhá-yu xii-dé, chi ní cuiní-yu nuhú tucú-yu ñuú Ègiptú cundecú-yu. ⁴⁰ Te òré ndécú té Moisés yucu ní xáháⁿ-yu xii ñaní-dé té Àrón: “Cadúha-n ñi úú ndiõxí díhúⁿ cuááⁿ codonùu núú-ó cùhuⁿ-o ichi, chi ñá túú cùtnuní iní-ó ndéé ichi cuáháⁿ té Moisés, téé yòdo nuu núú-ó ndùu ní quee-o Ègiptú”, duha ní xii-yu té Àrón. ⁴¹ Te dàvá-án ñi cadúha-güedé ñi chèhlu mee-ni díhúⁿ cuááⁿ, te ní sahani-güedé ñi úú quiti nchìto ní quide càhnu-güedé chèhlu-án. Te ío ní cudí iní-yu quiti-án, chi ní cachí-yu sá díú-ni ndiõxí cúu-dí. ⁴² Te sá dúcáⁿ ñi quidé-yu, xiáⁿ ní dáñá ñaha Yã Ndiõxí xii-yu. Te ní dáñá-gã ní xóo cada càhnú-yu nchíanchii, ndihí yóo, ndihí nchaa chódíní. Te duha ní chídó tnùní ñi téé ní xóo cáháⁿ tnúhu Yã Ndiõxí ndéé sanaha nàcuáa ní xáhaⁿ-gã xii ñáyiú dàvá-án:

Nchòhó ñáyiú isràél, ní cuu údico cuía yíhí-ndó yùcu,

te ní sahani-ndo quiti-ndo ní quide càhnu ñaha-ndo xii-í cáháⁿ-ndó, dico ñáhá chi ní sahani-ndo-güedi ní quide càhnu-ndo sá ñi cadúha mee-ndo.

⁴³ Te ní cadúha-ndo ñi veñúhu líhli, te ní sanutñi-ndo Mòlóc sá càchí-ndó cùu ndiõxí-ndó xica nchido-ndo xití yucu,

te ní cadúha-ndo ñi chódíní, te quiti-án càchí-ndó sã cúu-dí ndiõxí Rénfán,

te ndi ndúú sá ñi cadúha-ndo-án ñi quide càhnu-ndo.

Te cuendá sá dúcáⁿ ñi quide-ndo te yúhú queñuhu ñaha-í xii-ndo quíhíⁿ-ndó cundecu-ndo ingá xio nacióⁿ Babiloniá,

Duha ní xáhaⁿ Yã Ndiõxí xii-yu, te ducaⁿ ñi chídó tnùní téé ní xóo cáháⁿ tnúhu-gá.

44 'Te xití yucu-án nǐ dácáá-güedé ñí veñúhu vehe dóó. Te vehe-án nǐ cuu-xi ñí sá cútnùní iní-yu sá Yá Ndiöxí ndécú ndìhi ñaha-gá xií-yu. Te vehe-án nǐ dácáá-güedé nàcuáa ní xáhaⁿ Yá Ndiöxí xii té Moisés, chi ní dánèhé ñáhá-gǎ xii-dé nàcuáa dacàa-güedé. 45 Te sátá nǐ xihí nchaa cue téé-án, te ní ndóo ndìhi nchaa déhe-güedé veñúhu-án. Te ní xido tucu-güedé veñúhu-güedé cuáháⁿ-güedé, te cuáháⁿ ndìhi-güedé té Jòsué núú cündécú-yu. Te sátá nǐ quexió-yu, te ní dácúnǔ-yu ñáyiu dii ñúú-xi-án chi mee Yá Ndiöxí ní chindee ñaha-gá xií-yu. Te sátá nǐ ndìhi nchaa ñáyiu ní xica nchido veñúhu dóó-án nǐ xihí, te ní ndóo ndìhi dava-gá-yu. Te ducaⁿ-ni ndècu-xi ní cacu té Dàvií, téé ní xíndaha ñaha xií-yu. 46 Te Yá Ndiöxí ní cudíí víhí iní-gá té Dàvií. Te ní xicáⁿ tnúhú-dé núú-gǎ nǔu cuu dacàa-dé veñúhu cuu cuendá-gá, chi ñí-ni Yá Ndiöxí ní xóo cada càhnu té Dàvií ndìhi té Jácób, ñaní tnáhá-ó nǐ xíndecu ndéé sanaha víhi-gá. 47 Te Yá Ndiöxí ñá ní dàña-gá dacàa té Dàvií veñúhu-gá dico déhe-dé té Salòmón, chi ní dáña-gá ní dácáá-dé veñúhu cuu cuendá-gá 48 cuéi ñá túú sácúndecu-gá veñúhu dàcaa cue téé ñuyíú-a, chi ndèni xíaⁿ ndécú-gǎ chi espíritú cúú-gǎ. Te duha ní chídó tnùnǐ téé ní xóo cáháⁿ tnúhu Yá Ndiöxí ndéé sanaha nàcuáa ní cáháⁿ-gá:

49 Yúhú táxi tnùnǐ-í andíu ndìhi ñuyíú, te xíaⁿ nǔu nchòhó vá ndácú-ndó chihí ñaha-ndo xití veñúhu dàtná quidè-yu sá càchí-yu cùu ndiöxí-yu ní cadúha-yu.

Te ñá túú xini ñuhu-í núú ndétátú-í,

50 chi yúhú ní cadúha-í nchaa sá ió ñuyíú-a.

Duha ní cáháⁿ Yá Ndiöxí, te diu-ni ducaⁿ nǐ chídó tnùnǐ téé ní xóo cáháⁿ tnúhu-gá —duha ndúu nchaa tnúhu ní xáhaⁿ tǎ Tǎvá xii-güedé.

51 Te ní xáhaⁿ tùcu-dé:

—Nchòhó, ío sàá iní-ndó chi quide-ndo datná quidé ñáyiu ñá túú cùu ñáyiu isràél chi ñá túú tédóho-ndo tnúhu càháⁿ Yá Ndiöxí,

chi ñá cuiní-ndó quíndáá iní-ndó tnúhu-gá, mee-ni cùu úhú iní-ndó Espíritú-gá dàtná ní xóo cada cue ñaní tnáhá-ndó nǐ xíndecu ndéé sanaha. 52 Chi cue téé-án ió ní xóo dandòho-güedé nchaa cue téé ní xóo cáháⁿ tnúhu Yá Ndiöxí ndéé sanaha. Te ní sahani-güedé nchaa cue téé ní cáháⁿ sá quixí Crístú ñuyíú-a, te Yaá-án ñá túú cuèchi-gá. Te diu-ni ducaⁿ nǐ quide-ndo Crístú cútnáhá ní quixi-gá ñuyíú-a, chi ní sáha cuendá-ndó-gǎ núú cuè téé ní cuu úhú iní ñáhá xii-gá ní sahani ñaha-güedé. 53 Te ndècu ndìhi-ndo tnúhu ní chídó tnùnǐ ndí Moisés nàcuáa ní xáhaⁿ espíritú xínú cuèchi núú Yá Ndiöxí xii ndí, te ní dùcaⁿ ñá túú sàndáá iní-ndó tnúhu-án nǔu ní sahani-ndo Jèsús. Te diu-ni tnúhu-án ndécú ndìhi-ndo ndéé vitna —càchí té Tǎvá xáhaⁿ-dǎ xii-güedé.

Ní sahani-güedé té Tǎvá

54 Te sá dúcáⁿ nǐ xáhaⁿ tǎ Tǎvá xii-güedé, te ní cudééⁿ víhí-güedé núú-dǎ, núu ní quide rúhñú-güedé núhu-güedé sá sàtú iní-güedé. 55 Te té Tǎvá ndécú ndìhi-dé Espíritú Yá Ndiöxí, te ní ndacoto váha-dé andíu, te ní xiní-dé súúnǐ dátasaⁿ-xi núú ndécú Yá Ndiöxí, te ní xiní-dé Xítóhó Jesucrístú nútnǐ-gá xio cùha Yá Ndiöxí. 56 Te ní xáhaⁿ tǎ Tǎvá xii-güedé:

—Chí cündèhe andíu chi yúhú ndèhè-í Xítóhó Jesucrístú nútnǐ-gá xio cùha Yá Ndiöxí, te diu-gá cúú-gǎ ñaní tnáhá-ndó nchàa-ndo —cachí-dé xáhaⁿ-dǎ.

57 Te ní sadí-güedé dóho-güedé cuendá sá ñá ní tnáhá iní-güedé cundedóho-güedé tnúhu càháⁿ-dé, te uuⁿi ní cuáá-güedé, te ní taxi ndaha ñaha-güedé xii-dé 58 ndécá ñaha-güedé cuáháⁿ ndéé ñí xio yuhu ñúú, te yàcáⁿ ní sáñaha-güedé yúú xii-dé. Te ndècu ñí téé cuechi nàni-dé Sàulú, te téé-án nǐ quide cuendá-dé dóó-güedé cuendá ní nune ndaha-güedé ní sáñaha-güedé yúú xii té Tǎvá. 59 Te òré sáñaha-güedé yúú, te ní cáháⁿ ndìhi-dé Xítóhó Jesucrístú te xáhaⁿ-dǎ:

—Yòhó Xítóhó Jesucristú, naqueheⁿ-n iní-í —càchí-dé xáhaⁿ-dě xii-gá.

⁶⁰ Te ní ngúíñí xítí-dě, te níhi ní cáháⁿ-dé, te xáhaⁿ-dě:

—Yòhó Xítóhó Jesucristú, vá técuěchi-n cuè té-a sá dúhá quide ñaha-güedé xii-í —càchí-dé xáhaⁿ-dě xii-gá.

Te xiáⁿ-nă ní cáháⁿ-dé, te ní xíhí-dé.

8

Té Sàulú chíhí-dě ñáyiú sàndáá iní-xi tnúhu Jèsús vecaá

¹ Te té Sàulú ní nduu vétú iní-dé sá nǐ sahní-güedé té Těvá.

Te diu-ni nduu-ăⁿ nǐ cuu níhi cuendá nchaa ñáyiú sàndáá iní-xi tnúhu Jèsús ñuú Jerusálén. Te ní ndihí-yu ní xité nuu cuáháⁿ-yu distritú Jüdeá ndihí distritú Sàmariá. Te cue té ní táuchíúⁿ Jèsús dácuàha ñaha xií-yu tnúhu-gá ní ndóo-güedé ñuú Jerusálén. ² Te nchaa cue té càháⁿ ndihí Yá Ndiöxí ní chindúxi-güedé ndíi Těvá. Te ío ní ndáhyú ñáyiú ní sàndáá iní tnúhu Jèsús sá nǐ xíhí ndíi. ³ Te té Sàulú ío dándoho-dé-yu, chi ndi vehe ndi vehe cuáháⁿ-dé cuátni-dé cuěi té cuěi ñadihí ndécá-dě cuáháⁿ vecaá.

Càháⁿ-yu tnúhu Yá Ndiöxí distritú Sàmariá

⁴ Te nchaa ñáyiú ní xité nuu cuáháⁿ-yu càháⁿ-yu tnúhu Jèsús nchaa núu quexió-yu. ⁵ Te té Lìpé cuáháⁿ-dé distritú Sàmariá càháⁿ-dé tnúhu Xítóhó Jesucristú Yaá ní tendaha Yá Ndiöxí ní quixi ñuyíú-a. ⁶ Te ío vâi núu sâ vâ yôo tnahí ndàcu cada ní quide-dé, te ní cuñúhu vîhí-yu, te ní xíndedóho váha-yu nchaa tnúhu ní cáháⁿ-dé. ⁷ Te vâi ñáyiú yîhi ñaha espíritú cündihí yucu ñávâha ní queñuhu-dé nchaa espíritú-áⁿ yiqui cùñú-yu, te ní cana saa-xi òré ní ndee-xi yiqui cùñú-yu cuáháⁿ-xi, te ní ndúha-yu. Te vâi ñáyiú cùhú ñá cúú-gă candá nihnú-yu ndihí ñáyiú yacua ní quide tátna-dé, te ní ndúha-yu. ⁸ Te sá dúcáⁿ nǐ cáháⁿ-dé

tnúhu Jèsús te ní quide tátna-dé-yu, xiáⁿ ío ní cudíi iní ñáyiú ñuú-áⁿ.

⁹ Te diu-ni ñuú-áⁿ ndécú ñⁿ té nàni Xímú, te té-áⁿ xíní-dé cada ndúu-dé, te ní cuu naha dùcaⁿ quide-dé, te ní xóo cuñúhu ñáyiú distritú Sàmariá sá dúcáⁿ quide-dé, te ní cachí-dé sá díú-ní-dě cúnú. ¹⁰ Te nchaa ñáyiú cuěi ñáyiú cuica te cuěi ñáyiú ndàhú ío nèhé-yu sá yíñuhu núu-dě, te xítnahá-yu:

—Tée-ăⁿ ío chîndee ñaha Yá Ndiöxí xii-dé núu vâi núu sâ quidé-dě —càchí-yu xítnahá-yu.

¹¹ Te ní sàndáá iní-yu nàcuáa ní xóo cada ndúu-dé, te ní xóo cuñúhu vîhí-yu, te ní cuu naha dùcaⁿ-ni dandahú ñáhá-dě xií-yu. ¹² Te té Lìpé ní cáháⁿ-dé tnúhu Xítóhó Jesucristú, te ní xáhaⁿ-dě xií-yu sá Yá Ndiöxí cuíní-gá ndíhu ndaha ñaha-gá xií-yu. Te cuěi té cuěi ñadihí ní sàndáá iní-yu tnúhu-gá, te ní sanduté-yu. ¹³ Te tnahá té Xímú ní sàndáá iní-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chi titní núu sâ vâ yôo tnahí ndàcu cada ní quide té Lìpé, te ní cuñúhu vîhi nchaa ñáyiú.

¹⁴ Te dava-gá cue té ní táuchíúⁿ Jèsús dacuàha ñaha xii ñáyiú tnúhu-gá ní níhí-güedé tnúhu sá ñáyiú distritú Sàmariá ní sàndáá iní-yu tnúhu Yá Ndiöxí. Te ní tendaha-güedé té Pèlú ndihí té Juáa cuáháⁿ-güedé distritú Sàmariá. ¹⁵ Te ní quexio-güedé, te ní cáháⁿ ndihí-güedé Yá Ndiöxí ní xícáⁿ-güedé Espíritú-gá quixi cundecu ndihí-yu. ¹⁶ Chi ni ñⁿ-yu vátá sàá-gá Espíritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. ¹⁷ Te òré ní sacáⁿ ndodo-güedé ndaha-güedé díquí-yu, te ní quexio Espíritú-gá ní ngúndecu ndihí-yu.

¹⁸ Te ní xíní té Xímú nàcuáa ní quide-güedé ní quexio Espíritú-gá ní ngúndecu ndihí-yu, te cuíní-dé cuañaha-dě díhúⁿ xii té Pèlú ndihí té Juáa ní cùu. ¹⁹ Te ní xáhaⁿ-dè:

—Chindee ñaha-ndo cuendá ndéda-ni cáa-yu cacáⁿ ndodo-í ndaha-í díquǐ-yu, te níhǐ-yu Espíritú Yá Ndiǒxí cundecu ndihí-yu — cächí-dé xǎhaⁿ-dë xii-güedé.

²⁰ Te té Pèlú ní xáhaⁿ-dë xii-dé:

—Yòhó cuíta nihnu-n ndihí díhúⁿ-n, chi cuíní-n cuáaⁿ-n sá vǎha quide Yá Ndiǒxí. ²¹ Yòhó vá cúú càda-n chiuⁿ quide-ndí, chi ñá túú ndècu váha iní-n núú Yá Ndiǒxí. ²² Te vá dúcáⁿ cáháⁿ-n, chi ío nèhé cáháⁿ-n sá dúcáⁿ cáháⁿ-n. Te cáháⁿ ndàhú-n núú Yá Ndiǒxí sá ná cádá càhnu iní-gá tnúhu ní cáháⁿ-n. ²³ Te yúhú sa xíní-í sá ío úhú iní-n, chi mee-ni sá cuèhé sá dúhá chido nuu-n quide-n — cächí té Pèlú xǎhaⁿ-dë xii té Xímú.

²⁴ Te ní xáhaⁿ tǎ Xímú xii-güedé:

—Cáháⁿ ndàhú-ndó núú Yá Ndiǒxí sá ñá túú ná tnahá-í sá dúcáⁿ ní cáháⁿ-í — cächí-dé xǎhaⁿ-dë.

²⁵ Te té Pèlú ndihí té Juáa ní cáháⁿ-güedé tnúhu Yá Ndiǒxí núú ñǎyiu ñuú-áⁿ. Te ní xáhaⁿ-güedë nchaa nàcuáa ní quide Jèsús ní xíní-güedé òré ní xica cuu-gá ñuyíú-a. Te ní tni-güedé ichi cuánuhú-güedé ñuú Jerusalén, te ní yáha-güedé titní ñuú yíndèhu distritú Sàmariá, te ní cáháⁿ-güedé tnúhu-gá.

Té Lìpé ndihí ìⁿ tée ñuú Etiòpiá

²⁶ Te ìⁿ espíritú xínú cuèchi núú Yá Ndiǒxí ní quexìo-xi ñuú Jerusalén ní xáhaⁿ-xi xii té Lìpé:

—Cada túha-n chi quée nuu-n ñuú Gǎzá, dico mee-ni xití yucu cuáháⁿ ichi — cächí-xi xǎhaⁿ-xi xii-dé.

²⁷ Te ní xica-dé cuáháⁿ-dé, te ní natnahá-dé ìⁿ tée nacióⁿ Etiòpiá ñúhú-dë ichi. Te cùu-dé tesorèrú xínú cuèchi-dé núú ìⁿ ñadìhí ñaha yíndaha nacióⁿ Etiòpiá, te ñaha-áⁿ nání-áⁿ Cándacé. ²⁸ Te tée etiòpiá-áⁿ ní sáháⁿ-dé ñuú Jerusalén ní cáháⁿ ndihí-dé Yá Ndiǒxí, te ñuhu-dé ichi cuánuhú-dé ñuú-dé ñúhú-dë carretà, te dàcuaha-dé tnúhu ní chídó tnùní ndí Chàia tée ní xóo cáháⁿ tnúhu Yá Ndiǒxí ndéé sanaha. ²⁹ Te ní xáhaⁿ Espíritú Yá Ndiǒxí xii té Lìpé:

—Quíhíⁿ tuha-n càrretá-áⁿ — cächí Espíritú-gá xǎhaⁿ-xi xii-dé.

³⁰ Te té Lìpé ní sátuha-dé carretà-áⁿ, te ní tecú dóho-dé nàcuáa cáháⁿ tée etiòpiá-áⁿ, tée ñuhu carretà-áⁿ dácuaaha-dé nàcuáa ní chídó tnùní ndí Chàia. Te ní xáhaⁿ tǎ Lìpé xii tée etiòpiá-áⁿ:

—¿Técú tnùní-n nchaa tnúhu dàcuaha-n-áⁿ? — cächí té Lìpé xǎhaⁿ-dë xii-dé.

³¹ Te ní xáhaⁿ tǎ etiòpiá:

—¿Nása tecú tnùní-í te vá yòo dànehé ñáhá xii-í? Ta quène iha coo-n chi danèhé ñáhá-n — cächí-dé xǎhaⁿ-dë xii té Lìpé.

Te cuásaá té Lìpé núú carretà ní ngóo-dé. ³² Te ndèdóho-dé nàcuáa dàcuaha tée etiòpiá-áⁿ nàcuáa ní chídó tnùní ndí Chàia núú tütú Yá Ndiǒxí núú cächí-xi:

Dàtná quidé ìⁿ mbéé cada-dé òré can-deca ñaha-güedë xii-dé quíhíⁿ cahni ñaha-güedë chi ñá túú ná cada-dé,

dàtná cuíní-ndó quide mbéé òré dèté-di ñá túú ndàhí-di ducaⁿ càda-dé òré cahni ñaha-güedë chi ni vǎ cáháⁿ-dé.

³³ Te mee-ni cùdiquí ndéé ñáhá-güedë xii-dé, te ní vǎ ndúcú tnúhu-güedé núú-dë ñuú ndáá ndècuéchi-dé.

Te ío cuu nduu cuihna iní cue ñaní tnahá-dë, chi cahni ñaha-güedë xii-dé ñuyíú-a.

Duha cáháⁿ tutú ní dácuahá tǎ etiòpiá ní xíndedóho té Lìpé.

³⁴ Te ní xáhaⁿ tùcu tée Etiòpiá xii té Lìpé:

—Cundee iní-n cächí tnúhu-n yòo cacunehe tée ní cáháⁿ tnúhu Yá Ndiǒxí ndéé sanaha, núu cáháⁿ-dé cuendá méé-dë àdi cáháⁿ-dé cuendá ingá ñáyiu — cächí tée etiòpiá-áⁿ xǎhaⁿ-dë xii té Lìpé.

³⁵ Te té Lìpé ní cani-dé cuèndú núú tǎ etiòpiá nàcuáa ní cáháⁿ ndí Chàia nàcuáa cada Jèsús òré quixi-gá ñuyíú-a. Te ní xáhaⁿ-dë nàcuáa ndùu tnúhu Jèsús ndihí nàcuáa ní quide-gá.

³⁶ Te ñuhu-güedé ichi cuáháⁿ-güedé ní naníhí-güedë ìⁿ xichi núú ñúhú ndùte, te ní xáhaⁿ tǎ etiòpiá:

—Iha ñuhu ndute, ¿te vá cúu cuàndute-í iha-ã? —càchí-dé xãhaⁿ-dë xii té Lìpé.

³⁷ Te xãhaⁿ tẽ Lìpé:

—Te núu sàndáá ndisa iní-n Jèsús, te cuu cuandute-n —càchí-dé xãhaⁿ-dë.

Te ní xãhaⁿ tẽ etiòpiá:

—Sàndáá ndisa iní-í sá Dëhe Yá Ndiòxí cúu Xítohó Jesucristú —càchí-dé xãhaⁿ-dë.

³⁸ Te ní ngani-dé carretà, te ní nuu-güedé ndi ndùú-güedé, te cuánguee-güedé xití ndute, te ní dácuàndute ñaha té Lìpé xii-dé. ³⁹ Te òré ní nene-güedé xití ndute, te ndèca ñaha Espiritú Yá Ndiòxí xii té Lìpé cuáháⁿ. Te ñá túú ní xini tée ní sandute-áⁿ ndèé ichi cuáháⁿ té Lìpé. Te ío ní cudíí iní-dé sá ñi natuha-dé ichi Yá Ndiòxí, te cuàndaa-dé núu carretà-dé cuánuhú-dé. ⁴⁰ Te ní quexio té Lìpé ñuú Àzotó, te ndi tnahá ñuú ndi tnahá ñuú cuáháⁿ-dé càháⁿ-dé tnúhu Yá Ndiòxí, te ní yáha-dé cuáháⁿ-dé ní quexio-dé ndéé ñuú Cèsareá.

9

Té Sàulú ní tuha-dé ichi Xítohó Jesucristú

(Hch. 22:6-16; 26:12-18)

¹ Te té Sàulú mee-ni càháⁿ cuèhé-dé cuèndá ñáyiú ní sàndáá iní tnúhu Jèsús, te cuíní-dé cahni ñaha-dë xií-yu. Te ní sáháⁿ-dé núu dütú cùnù-gá, ² te ní xãhaⁿ-dë sá cádÿha dütú-ãⁿ ñi tutú canehe-dé quíhíⁿ cuáha-dé cue tée xindeé nchito veñúhu ñuú Dàmascú, chi cuíní-dé tñi-dé nchaa ñáyiú dàcuaha tnúhu Xítohó Jesucristú candeca ñaha-dë quíhíⁿ ñuú Jerusalén. ³ Te ní xica-dé cuáháⁿ-dé tá cùyatni-dé ñuú Dàmascú, te uuⁿni ní quee ñuhú andiú, te ní dáyèhé-xi ndéé núu núní-dé. ⁴ Te ní nduá-dé ndéé ñuhu, te ní tecú dóho-dé càháⁿ ñi sá càháⁿ núu ñinu, te xãhaⁿ-xi xii-dé:

—Yòhó Sàulú, ¿ná cuèndá cúu úhú iní ñáhá-n xii-í te dándoho ñaha-n? —càchí sá càháⁿ-áⁿ xãhaⁿ-xi xii-dé.

⁵ Te ní xãhaⁿ-dë:

—¿Ná cúu yòhó sá càháⁿ-áⁿ-i? —càchí-dé xãhaⁿ-dë.

Te ní xãhaⁿ sã càháⁿ xii-dé:

—Yúhú cúu-í Jèsús tée cúu úhú iní-n. Te ío dándoho-n mee-n, chi dàtná quidé ndìcutu quide-n, chi quiti-áⁿ núu na cúxi-güedé-di püyá te sãha-di patadá núu-xi, te quide úhú-di mee-di. Te ducaⁿ sãtnahá-xi cúu yohó chi ñá túú sàndáá iní ñáhá-n xii-í —càchí sá càháⁿ-áⁿ xãhaⁿ-xi xii-dé.

⁶ Te té Sàulú ní quidi ñaha-xi xii-dé sá ñi yùhú-dé, te ní xãhaⁿ-dë:

—Xítohó Jesucristú, ¿te ná cuíní-n càda-í-i? —càchí-dé xãhaⁿ-dë.

Te Jèsús ní xãhaⁿ-gã xii-dé:

—Ndacóo, te quíhíⁿ-n ñuú-ãⁿ, te yacáⁿ tecú tnúhu-n ná cúu sã cáda-n —càchí-gá xãhaⁿ-gã xii-dé.

⁷ Te cue tée cuáháⁿ ndihí té Sàulú ní tecú dóho-güedé càháⁿ ñi sá càháⁿ, dico vá yòhó tñahí ní xini-güedé, te ní yùhú víhí-güedé, te ñá túú tñahí ní càháⁿ-güedé. ⁸ Te ní ndacóo té Sàulú, te ñá ní cúu-gá cundehe-dë, chi ní cuaa-dé, te ní tñi-güedé ndaha-dé ndécá ñaha-güedé cuáháⁿ ñuú Dàmascú. ⁹ Te yacáⁿ ní xindecu-dé úní nduu, te ñá ní cúu tñahí cundehe-dë, te ñá túú ná ní xèxi-dé, te ñá túú ní xihí-dé ndute.

¹⁰ Te ndècu tée sàndáá iní tnúhu Jèsús ñuú Dàmascú, nání-dë Ananiás, te ní sáháⁿ Jèsús núu sání-dé, te ní xãhaⁿ-gã xii-dé:

—¡Ananiás! —càchí-gá xãhaⁿ-gã.

Te ní xãhaⁿ-dë:

—¿Yúhú càháⁿ ndihí-n-ãⁿ? —càchí-dé xãhaⁿ-dë.

¹¹ Te ní xãhaⁿ-gã:

—Ndacuíñí, te quíhíⁿ-n ñi chiuⁿ ichi núu dánani-güedé Ichi Ndáá, te yacáⁿ nanducu-n vèhe té Jüdás, chi vehe tée-áⁿ ndécú ñi tée ñuú Tarsú nání-dë Sàulú, te tée-áⁿ sa càháⁿ ndihí ñaha-dë xii-í. ¹² Te tée-áⁿ ñi dácótó ñaha-xi sá ñi xini ñáhá-dë xii-n ñi quexio-n núu ndécú-dé, te ní sacáⁿ ndodo-n ndàha-n díquí-dë, te ducaⁿ te ní nacaáⁿ núu-dë ní dácótó ñaha-xi xii-dé —càchí-gá xãhaⁿ-gã.

¹³ Te té Ananiás ní xãhaⁿ-dë:

—Yòhó Xítohó Jesucristú, càchí tnúhu-í xii-n sã ñi níhí-í tnúhu nàcuáa quide-dé sá ío quide úhú-dé ñáyiú càháⁿ ndihí-n ñuú Jerusalén. ¹⁴ Chi

nèhe-dé tutú ní sáñaha cuè dútú cúnúu cuendá níhí-dě nàcuáa cada-dé tñi-dé nchaa ñáyiú sàndáá iní ñáhá xii-n —cachí-dé xáhaⁿ-dě xii-gá.

15 Te Jèsús ní xáhaⁿ-gã xii-dé:

—Quíhíⁿ-n ndàtnúhu-n ndìhi-dé, chi cuíní-í cada-dé chiúⁿ-í, quíhíⁿ-dé cáháⁿ-dé tnúhu-í núú cuè ñáyiú isràél, ndìhi núú cuè ñáyiú ñá túú cùu ñáyiú isràél, ndìhi núú cuè té yìndaha ñaha xií-yu. 16 Te yúhú cúñaha-í xii-dé sá ndóhó vîhi-dé cuendá-í —càchí-gá xáhaⁿ-gã xii té Anàniás.

17 Te cuáháⁿ té Anàniás vehe núú ndécú tè Sàulú te ní sacáⁿ ndodo-dé ndaha-dé díqui tè Sàulú, te ní xáhaⁿ-dě:

—Yòhó té Sàulú té ndècu ndìhi-í ichi Xítóhó Jesucristú, diu-ni Xítóhó Jesucristú Yaá ní cáháⁿ ndìhi ñaha xii-n ichi ní tendaha ñaha-gá véxi-í cuendá cacáⁿ táhù-í núú-gã cuendá-n te ndúha núú-n, te dàtnùní quixi Espíritú-gá cundecu ndìhi-n —càchí-dé xáhaⁿ-dě.

18 Te dàtná sá ní xócání-ó ñiⁿ sá ndèdí núú-dě ní quide ñaha-xi xii-dé, te ní nacaáⁿ núú-dě, te ní sandute-dé. 19 Te ní xexi-dé, te ní naníhí ndéé-dě, te títí nduu ní xíndecu ndìhi-dé ñáyiú ní sàndáá iní tnúhu-gá ñuú Dàmascú.

Té Sàulú dácuàha-dé ñáyiú tnúhu Yá Ndiòxí ñuú Dàmascú

20 Te sátá ñi ndúha núú-dě, te ní sáháⁿ-dé veñúhu cue ñáyiú isràél ní xáhaⁿ-dě sá Jèsús cúú-gã Déhe Yá Ndiòxí. 21 Te nchaa ñáyiú ní xíndedóho tnúhu ní cáháⁿ-dé, te ní cuñúhu vîhí-yu, te ní xítnàhá-yu:

—Diu té-ãⁿ ní sahní-dé ñáyiú ní xóo chiñúhu ñaha xii Jèsús ñuú Jerusàlén. Te ní quixi-dé iha ní cuíní-dé tñi ñaha-dě xií-yu candeca ñaha-dě quíhíⁿ núú cuè dútú cúnúu ni cuu —cachí-yu xítnàhá-yu.

22 Te ió iní-gá té Sàulú xáhaⁿ-dě xií-yu sá díú Jèsús cúú-gã Cristú Yaá ní tendaha Yá Ndiòxí ní quixi ñuyíú-a, te xíáⁿ ñá ní níhí ñáyiú isràél ndécú ñuú Dàmascú tnúhu cáháⁿ-yu, te ní cuñúhu vîhí-yu.

Té Sàulú ní dáxíó-dě núú ñáyiú isràél

23 Te sátá ñi cuu títí nduu, te ní ndatnúhu cue té isràél sá cáhí-güedé té Sàulú. 24 Te té Sàulú ní níhí-dě tnúhu nàcuáa cáháⁿ-güedé cada ñaha-güedé xii-dé, te cuè nduu cuè níú néhé cuendá-güedé yuyèhe núú ñúdòco ndóho yuhu ñuú cuendá cuíní-güedé tñi ñaha-güedé xii-dé te cahni ñaha-güedé. 25 Te ñiⁿ níú ndécá ñaha cue té ní sàndáá iní-xi tnúhu Jèsús cuáháⁿ ndéé núú ñúdòco ndóho yuhu ñuú. Te ní sáá-güedé núú ndóho, te ní chihi ñaha-güedé xii-dé xítí tídihi te ní dándèe ñaha-güedé núú ñúhú, te ní quene-dé cuáháⁿ-dé.

Te Sàulú ndécú-dě ñuú Jerusàlén

26 Te té Sàulú ní nasáá-dé ñuú Jerusàlén, te cuíní-dé chitnahá-dé ñáyiú sàndáá iní tnúhu Jèsús, te ní yúhú-yu chi ní cáháⁿ-yu sá dándàhú ñáhá-dě sá sàndáá iní-dé Jèsús. 27 Te té Bèé ndécá-dě té Sàulú cuáháⁿ núú ndécú cuè té ní táuchíúⁿ Jèsús dacuàha ñaha xií-yu tnúhu-gá. Te ní caní té Bèé cuendú núú-güedé nàcuáa ní cuu ní naníhí tnáhá tè Sàulú ndìhi Jèsús ichi, te ní cáháⁿ ndìhi ñaha-gã xii-dé. Te ní xáhaⁿ tùcu té Bèé nàcuáa ní cáháⁿ té Sàulú tnúhu Jèsús núú ñáyiú Dàmascú, te ñá túú tnàhí ni yúhú-dé ní cáháⁿ-dé, càchí té Bèé xáhaⁿ-dě xii-güedé. 28 Te ní xíndecu té Sàulú ndìhi ñáyiú xídacuáhá tnúhu-gá ñuú Jerusàlén. Te ní ndicuu ndicuu-dé ní cáháⁿ-dé tnúhu Jèsús, te ñá túú tnàhí ni yúhú-dé 29 ní cáháⁿ ndìhi-dé ñáyiú isràél ñáyiú cáháⁿ tnúhu grìégú. Te ñáyiú-áⁿ ñi ngúíta-yu ndàtnúhu-yu sá cáhí ñàhá-yu xii-dé. 30 Te ñáyiú sàndáá iní tnúhu-gá ní níhí-yu tnúhu nàcuáa cuíní ñáyiú cáháⁿ tnúhu grìégú cada ñàhá-yu xii té Sàulú, núú ní sàndeca ñàhá-yu xii-dé ñuú Cèsareá, te yàcáⁿ ní tendaha ñàhá-yu cuánuhú-dé ñuú Tàrsú.

31 Te sátá xíáⁿ te ní sanaá-yu ñá túú-gã ní xóo cada úhú-yu nchaa ñáyiú sàndáá iní tnúhu Jèsús níhí distritú Jùdeá, ndìhi distritú Galileá, ndìhi distritú Sàmariá. Te ní níhí ndéé-yu ní quide-yu nàcuáa ní xáhaⁿ

Yă Ndiöxí cadá-yu, te ío ní xíndecu yíñhú-yu núú-gă, te Espíritú-gá ní chindee ñaha-xi xii-yu, te vâi-gá ñáyiú ní sándáá iní-yu tnúhu-gá.

Té Pèlú ní quide tátna-dé té Èneás

³² Títñí xichi ní sáháⁿ té Pèlú ní cáháⁿ-dé tnúhu Yă Ndiöxí. Te ìⁿ nduu ní sáháⁿ-dé ñúú Lídá ní cáháⁿ ndihí-dé ñáyiú sándáá iní ñáhá xii Jesús. ³³ Te yàcáⁿ ní naníhí-dé ìⁿ té nàni Eneás, te ní cuu úná cuíá cùhú-dé, te ní lùha ñá cúú-gă candá nihnu-dé. ³⁴ Te ní xáhaⁿ tē Pèlú xii-dé:

—Èneás, Xítóhó Jesucristú cada tátna ñaha-gă xii-n tnàvíí. Ndacóo te ndocani-n yùu-n —cachí-dé xăhaⁿ-dē.

Te òré-ni ní ndacóo-dé. ³⁵ Te nchaa ñáyiú ñúú Lídá ndihí ñáyiú ñúú Sàrón ní xiní-yu sá ñí ndúha-dé, te ní sándáá víhí iní-yu Xítóhó Jesucristú.

Ní ndoto tá Dòrcás

³⁶ Te ñúú Jòpé ndécú ìⁿ ñadihí sándáá iní-aⁿ tnúhu Jèsús, te nàni-aⁿ Tabitá, te tnúhu griégú xăháⁿ-yu Dòrcás, te ío váha ní xóo cada-aⁿ chí ío váha iní-aⁿ, te ní xóo chindee-aⁿ ñáyiú ndàhú. ³⁷ Te váha-ni ndècu-aⁿ ní cuu, te ní tñi ñaha cuèhé ñí xíhí-aⁿ, te ní nadacùchi ñahá-yu, te ní chihi ñahá-yu ìⁿ cuàrtú ndécú ndéé núú ñnu. ³⁸ Te ñáyiú ní sándáá iní tnúhu Jèsús ñúú Jòpé ní ñihí-yu tnúhu sá ndécú tē Pèlú ñúú Lídá. Te yatni-ni càa ñúú-áⁿ, te ní tendàhá-yu úú cue tēe cuáháⁿ-güedé núú ndécú-dé cuèndá cúñaha-güedé candeca ñaha-güedé xii-dé quíhíⁿ núú ndécú-yu. Te ní xáhaⁿ-güedé xii té Pèlú:

—Yáchí ná quíhíⁿ-ó ñúú-ndí, chí yàcáⁿ cáná ñahá-yu quíhíⁿ-n tnàvíí —cachí-güedé xăhaⁿ-güedé xii té Pèlú.

³⁹ Te té Pèlú ní xica-dé cuáháⁿ-dé ndihí cue tēe-áⁿ ñúú Jòpé, te òré ní quexìo-güedé ndihí-dé, te cuásá ndihí ñaha-güedé cuàrtú ndéé núú ñnu. Te nchaa ñáyiú ñáyiú quèé ní tacá ndéé ñáhá xii ndíyi-áⁿ xíndáhyú-yu, te ní dánèhé ñáhă-yu nchaa dóó ñí cadúha ñaha ní xíhí-áⁿ. Chí ní xóo cadúha-aⁿ dícúⁿ, te ní

xóo cadúha-aⁿ dío òré ní xíndecu-aⁿ ñuyíú-a, te nchaa xíáⁿ ní dánèhé ñáhă-yu xii té Pèlú. ⁴⁰ Te té Pèlú ní xáhaⁿ-dē sá quèé-yu ncháa-yu quehé, te ní queé-yu. Te ní ngúíñí xítí-dé te ní cáháⁿ ndihí-dé Yă Ndiöxí, te dàtnùní ní ndacoto-dé núú cándòdo ndíyi-áⁿ, te ní xáhaⁿ-dē:

—Tàbitá, ndacóo —cachí-dé xăhaⁿ-dē.

Te ní ndacoto-aⁿ núú tē Pèlú te ní ndacóo-aⁿ. ⁴¹ Te ní tñi-dé ndaha-aⁿ ní nacanutñi ñaha-dé. Te ní cana-dé nchaa ñáyiú ñáyiú quèé ndihí nchaa ñáyiú sándáá iní tnúhu Jèsús cuèndá quini-yu sá ñí ndoto-aⁿ. ⁴² Te nchaa ñáyiú ñúú Jòpé ní ñihí-yu tnúhu nàcuáa ní quide té Pèlú ní ndoto ñaha ní xíhí-áⁿ, te vâi-yu ní sándáá iní-yu Xítóhó Jesucristú. ⁴³ Te títñí nduu ní xíndecu té Pèlú vehe té Xímú tēe dàcuitá ñi.

10

Té Pèlú ndihí té Còrneliú

¹ Te ndècu ìⁿ té nàni-dé Còrneliú ñúú Cèsareá te cùu-dé capitáⁿ, te ndècu ndihí-dé ìⁿ cièndú sandádú. Te cue tēe-áⁿ nání-güedé Sandádú Itàlianú. ² Te tēe cùu capitáⁿ ío váha iní-dé, te mee-dé ndihí ñadihí-dé ndihí nchaa landú-dé ío nèhé-yu sá yíñhú núú Yă Ndiöxí, te sáha-dé ñáyiú ndàhú ñáyiú isràél díhúⁿ, te ío cáháⁿ ndihí-dé Yă Ndiöxí. ³ Te ìⁿ nduu dàtná òré caá úní sacuaa ní dácótó ñúú ñáhá-xí xii-dé sá ní sáháⁿ ìⁿ espíritú xínú cuèchi núú Yă Ndiöxí núú-dé, te ní xáhaⁿ-xi:

—Còrneliú —cachí-xi xăhaⁿ-xi xii-dé.

⁴ Te ní xiní-dé ndi ndùú xio núú-dé espíritú-áⁿ. Te ío ní yùhú-dé. Te ní xáhaⁿ-dē:

—¿Ná chíúⁿ vèxi-n? —cachí-dé xăhaⁿ-dē.

Te xáhaⁿ-xi:

—Ío cáháⁿ ndihí-n Yă Ndiöxí, te ñáyiú ndàhú sãñaha-n díhúⁿ-n, te nchaa xíáⁿ sa nàha-gá. ⁵ Te vitna tendaha-n cuè tēe na quíhíⁿ-güedé ñúú Jòpé quíngana-güedé ìⁿ té nàni Xímú, àdi Pèlú chí úú ñiú-dé, te candeca ñaha-güedé quixi. ⁶ Te òré quexìo-dé te cachí tnúhu-dé nchaa dava-gá sá cuini Yă Ndiöxí cada-n.

Te ndècu-dé vehe ingá tucu téé nàni Xímú téé dàcuitá ñii, te vehe téé-án cáá ñiⁿ xio yuhu lamár —càchí-xi xáhaⁿ-xi xii-dé.

7 Te sátá cuáháⁿ espíritú-án, te té Còrneliú ní cana-dé úú tnàhá cue téé xínu cuechi núú-dé ndi^{hi} ñiⁿ sandádú xínu cuèchi tucu núú-dé, te tnàhá sandádú-án ò cáháⁿ ndi^{hi}-dé Yá Ndiöxí. 8 Te té Còrneliú ní cani-dé cuèndú núú-güedé nàcuáa ní cáháⁿ espíritú xínu cuèchi núú Yá Ndiöxí. Te ní tendaha ñàha-dé xii-güedé cuáháⁿ-güedé ñuú Jòpé.

9 Te nduu tnèé-án ñúhú-ní-güedé ichi cuáháⁿ-güedé, te cùu-xi datná òré cauxúú nduu ta cùyatni-güedé ñuú-án, te òré-án ñi sáá té Pèlú díquí véhé cáháⁿ ndi^{hi}-dé Yá Ndiöxí. 10 Te òré-án sa xihí-dé docó cuiní-dé caxi-dé, te ñini càduha-yu sá cáxí-dé ní dácótó núú ñáhá-xí 11 sá ñi xini-dé ñiⁿ sá ndécú àndiu, te càa datná cáá ñiⁿ dóó cáhnú nchìcúⁿ yoho ndi cùmí xíquí-xi véxi cuuⁿ núú ñúhú. 12 Te núú dóó-án yódó còó ndi^{hi} quiti ndàva ndi^{hi} nchaa núú quiti ndèé cùmí sáhá-xi. 13 Te ní tecú dóho-dé cáháⁿ ñiⁿ sá cáháⁿ, te xáhaⁿ sá cáháⁿ-án xii-dé:

—Pèlú, ndacuíñi cahni-n ndèda-ni càa quiti-a caxi-n-di —cachí sá cáháⁿ-án xáhaⁿ-xi xii-dé.

14 Te té Pèlú ní xáhaⁿ-dè:

—Vá cáhni-í-di chi càchí tnúhu sá sánú ìchi ñaha xii nchúhú ñáyiú isràél sá vǎ cúú càxi-ndí nchaa quiti-a chi cuu cuèchi, te vátá cáxí-gǎ-í-di ni ñiⁿ xito —cachí-dé xáhaⁿ-dè.

15 Te ní cáháⁿ tucu sá ñi cáháⁿ-án, te xáhaⁿ-xi:

—Vá cúú càchí-n sǎ vǎ cúú càxi-n-di, chi mee Yá Ndiöxí ní cachí-gá sá díú nchàa quiti-a cuu caxi-o vitna —cachí sá ñi cáháⁿ-án xáhaⁿ-xi xii-dé.

16 Te ducaⁿ ñi cáháⁿ sá ñi cáháⁿ-án ùní xito, te dàtnùní cuàndaa tucu dóó-án andiu. 17 Te té Pèlú ñá ní cùtnuní iní-dé ná cuèndá ducaⁿ ñi dácótó núú ñáhá-xí xii-dé, núú xíǎⁿ ío cuéhé ñi sani iní-dé. Te òré-án ñi quexio cue téé ní tendaha té Còrneliú ndéé yuyèhe, chi ndi vehe ndi vehe cuáháⁿ-güedé ndúcú tnúhu-güedé ndèé cáá vèhe té Xímú

tée dii vèhe-xi ndecu té Pèlú. 18 Te ní cáháⁿ ñiⁿhi-güedé, te xáhaⁿ-güedé:

—Ñá túú cùdana iha ndecu ñiⁿ téé nànducu-ndí nání-dé Xímú, àdi Pelú chi úú diu-dé —càchí-güedé xáhaⁿ-güedé.

19 Te té Pèlú vǎi sani iní-dé sá ñi dácótó núú ñáhá-xí xii-dé. Te òré-án ñi xáhaⁿ Espíritú Yá Ndiöxí xii-dé:

—Cundedóho-n ñiⁿ tnúhu na cáháⁿ-í-a. Ní quexio úní cue téé nànducu ñaha xii-n. 20 Yáchí, cuandèe chi quíhíⁿ-n ndi^{hi}-güedé, te vǎ yúhú-n chi yúhú ní xáhaⁿ-í véxi cuaca ñaha-güedé xii-n —càchí Espíritú-gá xáhaⁿ-xi xii té Pèlú.

21 Te ní xica-dé cuàndee-dé núú ndécú cuè téé xica nanducu ñaha xii-dé, te xáhaⁿ-dè xii-güedé:

—Yúhú cúú tǎe nànducu-ndo-án. Náu-í-a núú ná chíúⁿ cuiní ñáhá-ndó —càchí-dé xáhaⁿ-dè xii-güedé.

22 Te xáhaⁿ-güedé:

—Tée cùu capitáⁿ téé nàni Corneliú ní tendaha ñàha-dé véxi-ndí, te téé-án ò váha iní-dé, chi ío sàndáá iní-dé Yá Ndiöxí, te nchaa ñáyiú isràél ío váha cáháⁿ-yu cuèndá-dé. Te ñiⁿ espíritú xínu cuèchi núú Yá Ndiöxí ní xáhaⁿ-xi xii-dé sá cáná ñàha-dé xii-n quíhíⁿ-n vèhe-dé dacuàha-n-dé tnúhu Yá Ndiöxí —càchí cue téé ní tendaha té Còrneliú xáhaⁿ-güedé xii té Pèlú.

23 Te ní xáhaⁿ tǎ Pèlú sá quíhu-güedé vehe-dé, te candeca tnàha-güedé ndi^{hi}-dé quíhíⁿ ndéé nduu tnèé. Te nduu tnèé-án ñi xica-güedé ndécá tnàha-güedé ndi^{hi} té Pèlú cuáháⁿ, te tnàhá ñiⁿ úú cue téé sàndáá iní tnúhu Jèsús ñuú Jòpé cuáháⁿ ndi^{hi} ñaha-güedé xii-dé.

24 Te ndéé ingá nduu ní quexio-güedé ñuú Cèsareá. Te té Còrneliú ndétú ñàha-dé xii-güedé vehe-dé te sa ndècu túha-dé ndi^{hi} ñadìhí-dé ndi^{hi} nchaa landú-dé ndi^{hi} cue téé ío váha tnàhá tnúhu ndi^{hi}-dé, chi ní cana ñaha-dé ní ñitnáhà-yu ndi^{hi}-dé cundetú-yu té Pèlú. 25 Te sátá ñi quexio té Pèlú vehe té Còrneliú, te ní quee-dé quehé, te ní ngüíñi xítí-dé núú tǎ Pèlú chíñùhu ñaha-dé ní cùu. 26 Te té Pèlú ní xáhaⁿ-dè:

—Ndacuíñí vá ngüñí xítí-n nũ-í chi ñá díú Ndiõxí cùu-í, dícó ñⁿ té nuyíú-a cùu-í —càchí té Pèlú xáhaⁿ-dë xii-dé.

²⁷ Te ta cãháⁿ té Pèlú ndihí té Còrneliú cuánguihu-güedé xítí vehe, te chitu ñáyíu xixíhi xítí vehe. ²⁸ Te ní xáhaⁿ tẽ Pèlú xií-yu:

—Sa ñaha-ndo sá càchí tnúhu sá sánú ìchi ñaha xii nchúhú ñáyíu isràél sá vã cúu quixi-ndí vehe ni ñⁿ nchohó ñáyíu ñá túú cùu ñáyíu isràél te ñi vã cúu tnàhá tnúhu ndihí ñaha-ndí xii-ndo. Dico Yá Ndiõxí ní cachí-gá sá vã cúu cãháⁿ-í sá vã cúu cãháⁿ ndihí-í ñáyíu ñá túú cùu ñáyíu isràél, chi cuu cuéchi. ²⁹ Núu xíãⁿ ndíhi-ni véxi-í òré ní quexìo tnúhu sá caná ñaha-ndo. Te cachí tnúhu-ndo ná cuendá caná ñaha-ndo —cachí té Pèlú xáhaⁿ-dë xií-yu.

³⁰ Te té Còrneliú ní xáhaⁿ-dë:

—Ní cuu cúmí nduu, te ñi-ni dàtná òré iha cùu-xi, te yúhú ndècu-í ñi-ni vehe-í, te ñá túú tnàhí ná xéxi-í cãháⁿ ndihí-í Yá Ndiõxí, te òré-áⁿ ní quexìo ñⁿ espíritú xínú cuèchi núu-gá níhú-xí dóo cuixíⁿ dóo chàhncí. ³¹ Te càchí-xi: “Còrneliú, ní xíndedóho Yá Ndiõxí tnúhu ní cãháⁿ-n ndihí-gá, te xíní-gá sá sãñaha-n díhúⁿ xii ñáyíu ndàhú. ³² Te ñuú Jòpé ndécú ñⁿ té nani Xímú, àdi Pelú chi úú ñi-dé, te ndècu-dé vehe ñⁿ té nani tucu Xímú tée dàcuitá ñi, te cãa vehe-dé ñⁿ xio yuhu làmár, te cana-n-dë ná quixi-dé ndatnúhu-n ndihí-dé”, duha ní cãháⁿ espíritú xínú cuèchi núu Yá Ndiõxí. ³³ Núu xíãⁿ ndíhi-ni ní cana ñaha-í xii-n. Te táxãhu xii-n sã véxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiõxí, te cuíní-ndí cachí tnúhu-n nchaa tnúhu ní cachí Yá Ndiõxí cãháⁿ-n —càchí té Còrneliú xáhaⁿ-dë.

Té Pèlú ní ndatnúhu-dé ndihí ñáyíu ní tacá vehe té Còrneliú

³⁴ Te té Pèlú xáhaⁿ-dë xií-yu:

—Vitna ní xiní-í sá Yá Ndiõxí cãháⁿ ndihí-gá ñáyíu cuéi ndéda-ni cãa ñuú, te ñⁿ-ni quide-gá ndihí nchaa-yu.

³⁵ Te nchaa ñáyíu nèhe sá yíñùhu núu Yá Ndiõxí, te xiquide váha-yu, te

nchaa-yu cùu váha iní ñáhá-gã xií-yu. Te ñá túú quide cuendá-gã cuéi ná ñáyíu ñuú cúu-yu. ³⁶ Te Yá Ndiõxí ní tendaha-gã Xítoho Jesucristú ní sáháⁿ-gã ní xíndecu-gã nacióⁿ Isràél, te ní xáhaⁿ-gã xií-yu ñⁿ tnúhu váha nacuáa cuu váha iní-yu. Te ñi-ni mee Jèsús cùnù-gã núu ñáyíu ní cãa xico ñuyíú. ³⁷ Te ñaha-ndo sá díhna-gã ndí Juáá ní cãháⁿ ndí tnúhu Yá Ndiõxí núu ñáyíu, te ní dácuándute ñaha ndí xií-yu. Te dàtnúni ní ngüita Jèsús ní cãháⁿ-gã tnúhu-gã distritú Galileá, te dàtnúni ní sáháⁿ-gã níhí nacióⁿ Isràél ní cãháⁿ-gã tnúhu-gã núu ñáyíu. ³⁸ Te sa ñaha-ndo sá Yá Ndiõxí ní sãñaha-gã Espíritú-gã xii Jèsús té ñuú Nazàrét ndécú ndihí-dé chíndèe ñaha-xi xii-dé. Te ñaha-ndo sá ñi xica cuu Jèsús ní quide tátna-gã nchaa ñáyíu yíhi ñaha espíritú cùndíhi yucu ñávãha. Te ío vai-gã sá vãha ní quide ñaha-gã xií-yu, te ducaⁿ ñi quide-gã, chi Yá Ndiõxí ní chindee ñaha-gã. ³⁹ Te mee-ndí ní xiní-ndí nacuáa ní quide Jèsús ñuú Jerusalén ndihí níhí nacióⁿ Isràél. Te ní sata caa ñaha-güedé xii-gã núu cùrúxi te yacáⁿ ní xíhí-gã. ⁴⁰ Te núu ùní nduu ní dándótó ñaha Yá Ndiõxí xii-gã. Te ní cuíní-gã sá cùndècu Xítoho Jesucristú titní nduu sátá ñi ndoto-gã cuendá cãháⁿ ndihí ñaha-gã xii-ndí nchaa-ndí nacuáa ní xica cuu-ndí ndihí-gã. ⁴¹ Te ñá ncháá ñáyíu ní xíní ñáhá xii-gã, chi mee-ni nchúhú cue té ní cachí-gã sá cãháⁿ ndáá-ndí sá ñi ndoto-gã, chi ní xíndecu ndihí-ndí-gã, te ní xihí ní xexi-ndí ndihí-gã, núu cãháⁿ ndáá-ndí sá ñi ndoto-gã. ⁴² Te ní cachí-gã sá nchúhú quíhíⁿ-ndí cùñaha-ndí xii ñáyíu sá méé Yá Ndiõxí ní táuchíúⁿ-gã sá Jèsús cada ndáá-gã cuéchi nchaa ñáyíu ndècu vívú ndihí cuéchi nchaa ñáyíu ní xíhí. Te ducaⁿ ñi xáhaⁿ Yá Ndiõxí xii Jèsús, te ñi-ni ducaⁿ ñi cachí Jèsús cãháⁿ-ndí. ⁴³ Te cue té ní cãháⁿ tnúhu Yá Ndiõxí ndéé sanaha ñi cãháⁿ-güedé sá quixí Jèsús, te ní cachí-güedé sá ncháá ñáyíu na

quindáá iní ñáhá xii Jesús, te cada cãnu iní-gá nchaa cuéchi-yu —càchí tẽ Pèlú xãhaⁿ-dẽ xií-yu.

Ní quexìo Espíritú Yã Ndiõxí ní ngúndecu ndihí cue ñáyiu ñá túú cùu ñáyiu isràél

⁴⁴ Te mei òrẽ cãháⁿ-dẽ ndèdóho-yu ní quexìo Espíritú Yã Ndiõxí ní ngúndecu ndihí nchaa ñáyiu-áⁿ. ⁴⁵ Te cue tée isràél cuáháⁿ ndihí tẽ Pèlú, cue tée ní sándáá iní tnúhu Jèsús ní cuñúhu vïhi-güedé sá ñí quexìo Espíritú Yã Ndiõxí ní ngúndecu ndihí-yu, chi cuendá sá ñà díú ñáyiu isràél cúu-yu núu xiãⁿ ní cuñúhu-güedé. ⁴⁶ Te ní cutnùní sá ñí quexìo Espíritú Yã Ndiõxí ní ngúndecu ndihí-yu, chi ní ngüíta-yu cãháⁿ-yu tnúhu sá dácàhu iní ñáhá Espíritú-gá, tnúhu sá ñà túú xiní-yu cãháⁿ-yu. Te ní ndacáⁿ táhũ-yu núu Yã Ndiõxí cuendá nchaa sá ñí quide-gá. ⁴⁷ Te dãtnùní ní xáhaⁿ tẽ Pèlú:

—Vitna te cuandute ñáyiu ní natuha ichi Xítóhó Jesucristú chi sa ndècu ndihí-yu Espíritú Yã Ndiõxí dàtná cuiní-ndó ndècu ndihí nchoo, núu xiãⁿ vá cúú cãchí dava-gá ñáyiu sá vã cúú cuànduté-yu —cãchí-dẽ xáhaⁿ-dẽ xií-yu.

⁴⁸ Te dãtnùní ní xáhaⁿ-dẽ xii ñáyiu:

—Vitna te cuandute-ndo, te òrẽ-áⁿ te cacunehe-ndo Xítóhó Jesucristú —cãchí-dẽ xáhaⁿ-dẽ xií-yu.

Te dãtnùní ní cãháⁿ ndàhú-yu núu tẽ Pèlú cundecu ndihí ñaha-dẽ xií-yu ìⁿ úú nduu.

11

Tẽ Pèlú ní cani-dé cuendú núu ñáyiu sándáá iní tnúhu Jèsús ñúú Jerusàlén

¹ Te cue tée ní táuchíúⁿ Jèsús dacuàha ñaha xii ñáyiu tnúhu-gá, ndihí cue ñáyiu ní sándáá iní tnúhu-gá, ñáyiu ndècu distritú Jùdeá ní níhĩ-yu tnúhu sá ñáyiu ñá túú cùu ñáyiu isràél ní sándáá iní-yu tnúhu Yã Ndiõxí. ² Te òrẽ ní ndexìo tẽ Pèlú ñúú Jerusàlén, te ñáyiu isràél ñáyiu ní cachí sá cáda nchàa nacuáa ní cãháⁿ ndí Moisés

ní satnuhu ñáhá-yu xii-dé. ³ Te ní xáhaⁿ-yu xii tẽ Pèlú:

—¿Ná cuendá ní sáháⁿ-n ndéẽ ndíacãⁿ ní cãháⁿ ndihí-n ñáyiu-ãⁿ, te ñá túú quidé-yu dàtná quidé nchòo-i? Te ní sáháⁿ-n yàcáⁿ ní xexi-n ndihí-yu —cãchí-yu xáhaⁿ-yu xii-dé.

⁴ Te tẽ Pèlú ní cani-dé cuendú nacuáa ní cuu núu ní sáháⁿ-dẽ, te xáhaⁿ-dẽ:

⁵ —Ní xíndecu-í ñúú Jòpé. Te òrẽ cãháⁿ ndihí-í Yã Ndiõxí, te ní dácótó ñàha-xi xii-í sá vèxi cuuⁿ ìⁿ dóó cãhnú àndiu, te ndùtu ndi cumí xiquí-xi, te ní ngava-xi núu ndécù-í. ⁶ Te ní xíndéhé vãha-í, te ní xiní-í nchaa quitì yòdo núu-xi. Te ìⁿ xichi yòdo quitì cúmí sáhá-xi, te ìⁿ xichi yòdo quitì dééⁿ, te ìⁿ xichi yòdo cóó, te ìⁿ xichi yòdo quitì ndava. ⁷ Te ní tecú dóho-í cãháⁿ ìⁿ sá cãháⁿ, te cãchí-xi: “Pèlú, ndacuñí cãhni-n ndèda-ni càa quitì-a caxi-n-di”, cachí sá ñí cãháⁿ-áⁿ. ⁸ Te ní xáhaⁿ-í: “Vá cãhni-í-di chi cãchí tnúhu sá sánú ìchi ñaha xii nchúhú ñáyiu isràél sá vã cúú cãxi-ndí nchaa quitì-a”, xáhaⁿ-í.

⁹ Te ní tecú dóho-í cãháⁿ-ni tucu núu ñinu, te cãchí sá cãháⁿ-áⁿ: “Vá cúú cãchí-n sã vã cúú cãxi-n-di, chi mee Yã Ndiõxí ní cachí-gá sá díú nchàa quitì-áⁿ cuu caxi-o”, cãchí sá cãháⁿ-áⁿ. ¹⁰ Te ducaⁿ ñí cãháⁿ sá ñí cãháⁿ-áⁿ ùní xito, te dãtnùní cuàndaa dóó-ãⁿ ndihí nchaa quitì-áⁿ andiu. ¹¹ Te òrẽ-ni ní quexìo úní cue tée vehe núu ndécù-í. Te cue tée-áⁿ ñí tendaha ñàha ìⁿ tée ñúú Cèsareá nándücu ñaha-güedé xii-í. ¹² Te mee Espíritú Yã Ndiõxí ní cachí-xi sá quihíⁿ-í ndihí-güedé, te ní cachí-xi sá ñà túú ñã cani iní-í. Te tnàhá ìñú cue tée ndècu iha ní sáháⁿ ndihí ñaha-güedé xii-í, te nchaa-ndí ní sáháⁿ-ndí vehe tẽ Còrneliú ñúú Cèsareá. ¹³ Te ní cani-dé cuendú nacuáa ní cuu ní sáháⁿ ìⁿ espíritú xínú cuèchi núu Yã Ndiõxí vehe-dé, te ní quihu-xi ndéé xitì vehe-dé, te ní xáhaⁿ-xi xii-dé: “Tendaha-n cuè tée na quihíⁿ-güedé ñúú Jòpé quíngana-güedé ìⁿ tée nàni Xímú, àdi Pelú chi úú diu-dé. Te candeca ñaha-güedé quixi. ¹⁴ Te tée-áⁿ cachí

tnúhu-dé nása cada-n naníhí tǎhú-n ndihí ñadihí-n, ndihí landú-n, ndihí nchaa ñáyiú xínu cuechi vehe-n”, duha ní xáhaⁿ espíritú-áⁿ xii té Còrneliú. ¹⁵ Te òré ní ngüíta-í càháⁿ ndihí-í-yu ní quexìo Espíritú Yǎ Ndiòxí ní ngúndecu ndihí-yu dàtná ní guide-xi cùtnàhá ní taxi Yá Ndiòxí Espíritú-gá ndéé díhna ní ngúndecu ndihí nchoo. ¹⁶ Te ní ndacu iní-í nàcuáa ní càháⁿ Xítóhó Jesucristú, te duha ní cachí-gá: “Té Juáa ní xóo dacuàndute-dé ñáyiú, dico yúhú sǎñaha-í Espíritú Yǎ Ndiòxí cundecu ndihí-yu”, duha ní cachí-gá. ¹⁷ Te Yá Ndiòxí ní sǎñaha-gǎ Espíritú-gá cundecu ndihí ñáyiú ñá túú cùu ñáyiú isràél dàtná ní guide-gá cùtnàhá ní sándáa iní-ó tnúhu Jèsús, núu xíǎⁿ vá càchí-í sá vǎ cúu càda-í ñⁿ sá cuíní Yǎ Ndiòxí cada-í –càchí té Pèlú xǎhaⁿ-dǎ xií-yu.

¹⁸ Te sátá dúcáⁿ ñí xáhaⁿ tǎ Pèlú, te ñá túú-gǎ ná tnúhu ní càháⁿ-yu, te ío ní cudíí iní-yu nchaa nàcuáa ní guide Yá Ndiòxí, te ní xítñàhá-yu:

–Tnàhá nchaa ñáyiú ñá túú cùu ñáyiú isràél naníhí tǎhú-yu núu na dàñá-yu nchaa sá cuèhé sá dúhá quidé-yu, chi ducaⁿ cuíní Yǎ Ndiòxí cunduu –càchí-yu xítñàhá-yu.

Ñáyiú sándáa iní tnúhu Jèsús ñuú Antiòquiá

¹⁹ Te sátá ñí sahní-güedé té Tǎvá, te ní cuíní-güedé cada úhú-güedé nchaa ñáyiú ní sándáa iní-xi tnúhu Jèsús, te ní xité nuú-yu ndi tnahá ñⁿ ñⁿ ñuú. Te davá-yu cuáháⁿ-yu ndéé distritú Fènicia ndihí distritú Chìpré ndihí ñuú Antiòquiá. Te ní càháⁿ-yu tnúhu Jèsús núu mee-ni ñáyiú isràél, te ñá ní xítñúhu-yu dava-gá-yu. ²⁰ Te dava-gá ñáyiú distritú Chìpré ndihí ñáyiú ñuú Cirené ní sáháⁿ-yu ñuú Antiòquiá. Te ñá díú mèe-ni ñáyiú isràél ní càháⁿ ndihí-yu, chi tnàhá ñáyiú ñá túú cùu ñáyiú isràél ní xáhǎⁿ-yu tnúhu Jèsús. ²¹ Te ní chindee ñàha-gá xii ñáyiú càháⁿ tnúhu-gá, te vǎi-gá-yu ní sándáa iní-yu-gá chi ní tuhá-yu ichi-gá.

²² Te ñáyiú ndècu ñuú Jerusalén ñáyiú ní sándáa iní tnúhu Jèsús ní níhí-yu tnúhu nàcuáa ní cuu, núu xíǎⁿ ní tendàhá-yu té Bèé cuáháⁿ-dé ñuú Antiòquiá. ²³ Te òré ní quexìo té Bèé, te ní xiní-dé nàcuáa ní guide ñaha-gǎ xií-yu sá ñí naníhí tǎhú-yu, núu xíǎⁿ ío ní cudíí iní-dé. Te ní dácáhu iní ñáhá-dǎ, te ní xáhaⁿ-dǎ:

–Ío nducu ndèe-ndo cada-ndo nchaa sá càchí Yǎ Ndiòxí cada-ndo –càchí-dé xǎhaⁿ-dǎ xií-yu.

²⁴ Te té Bèé cúu-dǎ ñⁿ tée váha iní-xi, te ndècu ndihí-dé Espíritú Yǎ Ndiòxí, te ío sándáa iní-dé tnúhu Jèsús. Te vǎi vihi ñáyiú ní tuhá-yu ichi-gá.

²⁵ Te dàtnùní cuáháⁿ té Bèé ñuú Tǎrsú cuánúndúcú-dǎ té Sàulú. ²⁶ Te òré ní naníhí ñáhá-dǎ, te ndèca ñaha-dé cuáháⁿ ñuú Antiòquiá, te yàcáⁿ ní xíndecu-güedé ñⁿ cuíá ndihí ñáyiú ní sándáa iní tnúhu Jèsús, te vǎi-yu ní dácúhá ñàha-güedé tnúhu-gá. Te díu-ni ñuú Antiòquiá ní dánání ñàhá-yu Cristiànú xii nchaa ñáyiú sándáa iní tnúhu Jèsús.

²⁷ Te ndéé dàvá-áⁿ ñí quee ñⁿ úú cue tée càháⁿ tnúhu Yá Ndiòxí ñuú Jerusalén cuáháⁿ-güedé ñuú Antiòquiá. ²⁸ Te ñⁿ-dé nání-dǎ Àgabú, te ní chindee ñàha Espíritú Yǎ Ndiòxí xii-dé, te ní sáháⁿ-dé núu nchaa ñáyiú sándáa iní tnúhu-gá, te ní xáhaⁿ-dǎ xií-yu sá quíxí ñⁿ tnamá nihí ñuyíú. Te ducaⁿ ñí cuu sátá ñí ngúnutnǎí té Claudiú tée yíndaha cuèhé nacióⁿ. ²⁹ Núu xíǎⁿ nchaa ñáyiú sándáa iní tnúhu Jèsús ñuú Antiòquiá ní ndatnúhu-yu sá chíndéé-yu nchaa ñáyiú sándáa iní tnúhu-gá ndécú distritú Júdeá cuendá vá ndóhó vihí-yu docó. Te nàcuáa ní níhí-yu, te ducaⁿ ñí sacáⁿ tnáhǎ-yu. ³⁰ Te ní tacá díhúⁿ-ǎⁿ, te nèhe té Bèé ndihí té Sàulú cuáháⁿ, cuáha-güedé cue tée yíndaha ñáyiú sándáa iní tnúhu-gá.

12

Sátá ñí xíhí té Jacobó, te ní ngava té Pèlú vecaá

¹ Te ndéé dàvá-áⁿ ñí ngüíta té Hèrodés tée yíndaha ñaha xii ñáyiú

israél ní quide úhú-dé ìⁿ ùú ñáyiú sàndáá iní tnúhu Yá Ndiöxí. ² Te ní táúchíúⁿ-dē ní tñi-güedé té Jàcobó ñani té Juàá, te ní sahani ñaha-güedē ndihí machítí. ³ Te ío ní cudíí iní dava ñáyiú israél cuendá sá ñi sahani ñaha-güedē xii té Jàcobó, núu xíáⁿ ní tendaha tucu té Hèrodés sandàdú-dé ní sáháⁿ tñi tucu-güedé té Pèlú. Te ducaⁿ ñi quide-dé cútnhá ní xóo vico ní xexí-yu paa sá ñà túú yìhi levadurá. ⁴ Te ní naníhí-güedē té Pèlú, te ní tñi ñaha-güedē ndécá ñaha-güedé cuáháⁿ vecaá. Te té Hèrodés ní táúchíúⁿ-dē cuáháⁿ sáhúⁿ ìⁿ sandàdú cündé-güedé té Pèlú. Te ní xáhaⁿ-dē:

—Cundee-ndó ndì cúmí ndì cúmí-ndó tēe-áⁿ —càchí-dé xáhaⁿ-dē xii-güedé.

Te té Hèrodés ní sani iní-dé queñuhu-dé té Pèlú vecaá òré ná yáha vico cuendá cahni ñaha-güedē cáháⁿ-dē ní cùu. ⁵ Te ní xíhi-ni té Pèlú vecaá, te ní xindeé cuaa ñaha sandadú xii-dé. Te cue ñáyiú sàndáá iní tnúhu Yá Ndiöxí ío ní xícaⁿ táhü-yu núu-gã cuendá sá ñà túú nã cada ñaha-güedē xii-dé.

Yá Ndiöxí ní dácacu-gá té Pèlú vecaá

⁶ Ìⁿ niú-gá quíhi té Pèlú vecaá ní cùu, te nduu tñé tauchíuⁿ té Hèrodés quíhíⁿ sandàdú queñuhu ñaha-güedē xii-dé vecaá cuendá quiní nchaa ñáyiú nása cada ñaha-güedē ní cùu. Te té Pèlú cáá-dē xidí-dé xití vecaá, te ndi ndúú dúcúⁿ ndáhá-dē ndútú càdená, te xio xio diñi-dé ndécú sandadú, te dava-gá sandàdú xindeé-güedé yèhe vecaá. ⁷ Te ní quexìo ìⁿ espíritú xínú cuèchi núú Yá Ndiöxí xití vecaá núú cáá tē Pèlú xidí-dé, te uuⁿni ní dáyèhé-xi xití vecaá, te ní danguíhi ñaha-xi xii-dé, te xáhaⁿ-xi xii-dé:

—Yáchí, ndácóo —càchí-xi xáhaⁿ-xi xii-dé.

Te ní ndacóo-dé, te nchaa cadèná ndútú dúcúⁿ ndáhá-dē ní nandáxí. ⁸ Te ní xáhaⁿ tucu espíritú-áⁿ xii-dé:

—Yáchí, nucuíhnu dóo-n, te ndíhu-n chàu-n —càchí-xi xáhaⁿ-xi xii-dé.

Te ní ndíhu nuu-dé dóo-dē, te ní xáhaⁿ tucu espíritú-áⁿ:

—Candixi dóo-n, te na quíhíⁿ-ó —càchí-xi xáhaⁿ-xi xii-dé.

⁹ Te té Pèlú ní chinchícúⁿ-dē espíritú-áⁿ, te ñá ní cùtnuní iní-dé núu ndáá ìⁿ espíritú xínú cuèchi núú Yá Ndiöxí ducaⁿ quide àdi ñáhá, te dàcoto ñaha-xi xii-dé ní sani iní-dé. ¹⁰ Te ndèndaha-ni-dē espíritú-áⁿ cuáháⁿ ní yáha-dé nàcuáa xínutnñi sandàdú, te ta yáha-gá-dé núú ndécú dàva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáháⁿ ndéé xití ñuu, te ní nacaáⁿ méé yèhe-áⁿ, te ní quee-dé cuáháⁿ-dē ndihí espíritú-áⁿ. Te ní tnahá-dé ìⁿ tnuú, te yacáⁿ ní dándóo ñaha espíritú-áⁿ xii-dé. ¹¹ Te dàtnuní ní nene váha sani núú-dē, te ní cùtnuní iní-dé, te ní cachí-dé:

—Ndáá sá Yá Ndiöxí ní tendaha-gã espíritú-áⁿ ní quixi-xi ní dácacu ñaha-xi xii-í cuendá sá yà cáhni ñaha té Hèrodés. Te dava ñáyiú israél ío ní cudíí iní-yu cuendá sá ñi cuini té Hèrodés cahni ñaha-dē xii-í —duha ní cachí-dé sátá ñi cùtnuní iní-dé.

¹² Te sátá ñi cùtnuní iní-dé sá ñi cácu-dé, te cuáháⁿ-dē vehe ìⁿ ñaha nani Mariá nãná tē Juàá, àdi Mácú chi úú diu-dé, te xíaⁿ ndécú vai-yu càháⁿ ndihí-yu Yá Ndiöxí. ¹³ Te té Pèlú ní quexìo-dé ndéé yuyèhe ní dácásáⁿ-dē, te ní quixi ìⁿ xíchí nání Ròdé ní quixi ndehe-xi nã cúú ñáyiú dàcasaⁿ. ¹⁴ Te ní nucúhuⁿ ndudú-xi sá díú tē Pèlú, te ní cudíí víhí iní-xi, dico ñá ní nacaáⁿ-xi yuyèhe. Te ní quene cunu-xi cuáháⁿ ngúñaha-xi xii-yu sá nùtnñi té Pèlú yuyèhe ndaa quehé. ¹⁵ Te ñá ní sàndáá iní-yu tnúhu ní cáháⁿ-xi, te xáháⁿ-yu xii-xi:

—¡Ná tnúhu vèhi cáháⁿ-òⁿ xíchí lùcú! —càchí-yu xáháⁿ-yu.

Te xáhaⁿ-xi sã ndáá nùtnñi-dé, te xáháⁿ-yu:

—Ñá díú tē Pèlú chi espíritú sá xító ñaha xii-dé cúú sã càháⁿ —càchí-yu xáháⁿ-yu xii-xi.

¹⁶ Te òré ducaⁿ xítnhá-yu, te té Pèlú ní dácásáⁿ tucu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tē Pèlú, te ní cuñúhu

vihí-yu. ¹⁷ Te ní quide-dé ndaha-dé núu-yu cuendá cadí-yu yuhú-yu. Te ní ngúíta-dé ní caní-dé cuendú nàcuáa ní quide ñaha Yá Ndiöxí xii-dé sá ní dácäcu ñaha ñⁿ espíritú xínú cuèchi núu-gã xii-dé vecaá, te ní xáhaⁿ-dë xií-yu:

—Cúu-ndo tẽ Jàcobó ndihí dava-gá ñáyiú sàndáá iní tnúhu Jèsús nàcuáa ní quide ñaha Yá Ndiöxí xii-í —càchí-dé xáhaⁿ-dë xií-yu.

Te sátá dúcáⁿ ñí xáhaⁿ-dë, te ní quee-dé cuáháⁿ-dé ingá xichi.

¹⁸ Te sátá ñí túndaá, te ní ngúíta nchaa sandádú càháⁿ ñⁿ càháⁿ ñⁿ-güedé, te xĩtnàha-güedé:

—Ñá túu-gã té Pèlú yíhí vècaá, ¿te nása cada-o-í? —càchí-güedé xĩtnàha-güedé.

¹⁹ Te té Hèrodés ní tendaha-dë titní sandádú cuáháⁿ-güedé cuánúndúcú ñaha-güedé, te ñá ní nánihí ñáhá-güedé xii-dé. Te dàtnúni ní cana-dé sandádú cue tée ní xindee ñáhá xii té Pèlú, te ní tenáá ñáhá-dë xii-güedé, te ní xáhaⁿ-dë xii dava-gá cue sandádú-dé:

—Cahni-ndo cuè tée-ãⁿ —càchí té Hèrodés xáhaⁿ-dë.

Te dàtnúni ní quee té Hèrodés distritú Jùdeá cuáháⁿ-dé ñuú Cèsareá, yacáⁿ ní ngúndecu-dé.

Ní xihí té Hèrodés

²⁰ Té Hèrodés ní cudééⁿ-dë núu ñáyiú ñuú Tírú ndihí núu ñáyiú ñuú Sìdón. Te xiãⁿ ní ndatnúhu-yu ní cuu ñⁿnuu tnúhu-yu, te ní xicá-yu cuáháⁿ-yu cuáháⁿ ndatnúhu ndihí ñáhá-yu xii-dé, te ní ndatnúhu ndihí-yu té Blástú. Te tée-áⁿ cúu-dë chiúⁿ quide-dé núu tẽ Hèrodés, te ní chindee tnúhu ñaha-dë xií-yu, chi ní cáháⁿ ndàhú-yu núu tẽ Hèrodés sá vã cádá ùhú ñáhá-dë xií-yu. Te ducaⁿ ñí quidé-yu cuendá ñuú té Hèrodés-áⁿ quée sã xéxí-yu. ²¹ Te ní xáhaⁿ tẽ Hèrodés ná nduu quíhíⁿ-yu ndatnúhu ndihí ñaha-dë xií-yu, te nduu-ãⁿ ñí quíunuu-dé ñⁿ dóo vaha, ñⁿ sá sácúhnu tée tàxi tnuní. Te ní ngóo-dé núu xilé vaha, xilé sá sácõo nchihí tée tàxi tnuní, te ní ngúíta-dé

ní cáháⁿ sàhú-dé dóho-yu. ²² Te uuⁿni ní cuáá-yu te càchí-yu:

—¡Tée-a càháⁿ-dé dico ñá díú tẽ ñuyíú-a cùu-dé chi ndiöxí cúu-dë! —càchí-yu xĩtnàhá-yu.

²³ Te diu-ni òré-áⁿ ñí yáha ñⁿ espíritú xínú cuèchi núu Yá Ndiöxí, te ní sáñaha-xi cuèhé xii té Hèrodés. Te ducaⁿ ñí tnahá-dé chi mee-dë ñá ní xáhaⁿ-dë sá ñáyiú cùu-dé, te ní cáhãⁿ-yu sá ndiöxí cúu-dë. Te nchìto-gá-dé ní sanú ñáhá tìndácú xii-dé, te dàtnúni ní xihí-dé.

²⁴ Te ío titní xichi ní sáháⁿ ñáyiú sàndáá iní tnúhu Yá Ndiöxí ní cáháⁿ-yu tnúhu-gá, te ío chítú-yu ní sàndáá iní-yu tnúhu-gá.

²⁵ Te té Bèe ndihí té Sàulú ní ndihí chiúⁿ-güedé, te ní ndee-güedé ñuú Jerusalén cuáháⁿ-güedé ndihí té Juáá, àdi Mácú chi úu diu-dé.

13

Té Bèe ndihí té Sàulú cuáháⁿ-güedé dácuaⁿha-güedé ñáyiú tnúhu Yá Ndiöxí nchaa ñuú xicá

¹ Te ñuú Antiòquia ndécú ñⁿ úu cue tée càháⁿ tnúhu Yá Ndiöxí núu nchaa ñáyiú ní sàndáá iní-xi tnúhu-gá. Te ndècu tucu ñⁿ úu cue tée cùu mestrú dácuaⁿha ñaha-güedé xií-yu tnúhu-gá. ñⁿ-dé nání-dë Bèe, te ñⁿ-dé nání-dë Xímú, te té Xímú-áⁿ xáhaⁿ-güedé Nègrú chi tnuu-dë. Te ingá-dé nání-dë Lùciú, te tée-áⁿ cúu-dë tée ñuú Cìrené. Te ingá-dé nání-dë Sàulú, te ingá tucu-dé nání-dë Manàén. Te té Manàén-áⁿ ndihí té Hèrodés tée cùu gobiernú Galileá ío vaha ní xóo cáháⁿ ndihí tnàha-güedé cútnàhá ní cuu lĩhli-güedé. ² Te ñⁿ nduu ñá túu ñá ní xèxi ñáyiú ní sàndáá iní tnúhu Yá Ndiöxí cuendá mee-ni-gã ní cáháⁿ ndihí-yu, te ní xáhaⁿ Espíritú Yá Ndiöxí xií-yu:

—Tendaha-ndo tẽ Bèe ndihí té Sàulú quíhíⁿ-güedé dava-gá ñuú cada-güedé chiúⁿ tahu-í, chi ducaⁿ cuiní-í cunduu —càchí Espíritú-gá xáhaⁿ-xi xií-yu.

³ Te ní cáháⁿ ndihí tucú-yu Yá Ndiöxí, te ñá túu tnàhí ná ní xèxi tucú-yu, te ní sacáⁿ ndodo-güedé

ndaha-güedé díquí tē Bèé ndihí té Sàulú. Te sáta dúcáⁿ ní quide-güedé, te ní quide ndee ìní ñáhă-yu xii-güedé.

Té Bèé ndihí té Sàulú cuáháⁿ-güedé distritú Chìpré cáháⁿ-güedé tnúhu Yá Ndiöxí

⁴ Te té Bèé ndihí té Sàulú ní quee-güedé cuáháⁿ-güedé cuendá ducaⁿ cuìní Espiritú Yá Ndiöxí cundu sá cáca cùu-güedé dava-gá ñúú, te ní quexìo-güedé ñúú Selèuciá, te yàcáⁿ ní quee-güedé bàrcú cuáháⁿ-güedé distritú Chìpré. Te ñúú-áⁿ cáá xití làmár chi ndècu ñuhu yichí xití ndute. ⁵ Te ní quexìo-güedé mei ñúú Salàminá, te ní quene-güedé bàrcú, te ní xica-güedé cuáháⁿ-güedé nchaa veñúhu ñáyiú isràél càháⁿ-güedé tnúhu Yá Ndiöxí. Te cuáháⁿ ndihí-güedé té Juàá cuendá chindee ñàha-dé xii-güedé. ⁶ Te ní tñii-güedé ichi cuáháⁿ-güedé ñúú Pàfós cáá ndàa ingá xio Chìpré, te yàcáⁿ ní naníhí tnáhá-güedé ndihí ìⁿ tée isràél nání-dé Barjèsús, te tée-áⁿ xìní-dé cada ndùu-dé, te càchí-dé sá càháⁿ-dé tnúhu Yá Ndiöxí dico ñá ndàá. ⁷ Te tée-áⁿ quidé chiùⁿ-dé ndihí té Sèrgiú, àdi Páblú chi úú ñúu-dé, te cùu-dé gobièrnú Chìpré, te ío túha-dé. Te ní cana-dé té Bèé ndihí té Sàulú, chi cuìní-dé cundedóho-dé tnúhu Yá Ndiöxí. ⁸ Te tée quide nduu-áⁿ ñá ní dàña-dé cáháⁿ-güedé tnúhu-gá, chi ñá ní cuìní-dé sá tée cùu gobièrnú-áⁿ tuha-dé ichi Yá Ndiöxí. Te ducaⁿ ní quide té Barjèsús, tée xáhaⁿ-güedé Èlimás. ⁹ Te tnáhá tucu té Sàulú ndécú úú ñúu-dé chi xáhaⁿ tùcu-güedé Páblú, te ndècu ndihí-dé Espiritú Yá Ndiöxí. Te ní xíndéhé ñí ñáhá-dé xii tée quide nduu-áⁿ. ¹⁰ Te ní xáhaⁿ-dè:

—Yòhó, chi dàtná quidé yùcu ñávàha quide-n chi mee-ni dándahú-n ñáyiú. Yòhó cúu-n dèhe sácúhná, chi nchaa tnúhu váha cuìní Yá Ndiöxí cáháⁿ-yu, te yòhó ñá dáña-n. ¹¹ Te vitna quini-n nàcuáa cunduu, chi taxi Yá Ndiöxí ìⁿ castiú xii-n chi vá cútnùní-gá núu-n càca cuu-n ìⁿ úú nduu —càchí-dé xáhaⁿ-dè xii tée quide nduu-áⁿ.

Te òré ducaⁿ ní xáhaⁿ tē Páblú xii-dé, te òré-ni ní cuaa-dé, te ñá túú ní cùtnùní tnáhí-gá núu-dé, te ní xóo nducu-nă-dé ñáyiú ní xóo cuita nehe ñaha xii-dé. ¹² Te tée cùu gobièrnú ní xiní-dé nàcuáa ní quide té Páblú, te ío ní cuñúhu-dé. Te ní tnáhá ìní-dé tnúhu Jèsús, núu xíáⁿ ní sándáa ìní-dé.

Té Páblú ndihí té Bèé ndécú-güedé ñúú Antiòquiá Pìsidiá

¹³ Te té Páblú ndihí dava-gá cue tée xica cuu ndihí-dé ní quee-güedé bàrcú, te ní quee-güedé ñúú Pàfós cuáháⁿ-güedé ñúú Pèrgé, te ñúú-áⁿ yíndèhu-xi distritú Pànfilíá. Te té Juàá ní nacuico-dé ní dándóo ñaha-dé xii-güedé cuánuhú-dé ñúú Jerusalén. ¹⁴ Te dava-gá-güedé ní quee-güedé ñúú Pèrgé cuáháⁿ-güedé ñúú Antiòquiá, te Pìsidiá yíndàha-xi ñúú-áⁿ. Te nduu xíndetatú-yu, te ní sáháⁿ-güedé veñúhu ñáyiú isràél, te ní ngóo-güedé xití veñúhu. ¹⁵ Te cue tée ndècu veñúhu ní queheⁿ-güedé tutú yódó tnùní nchaa tnúhu sá ní chídó tnùní ndíi Moisés ndihí tutú yódó tnùní nchaa tnúhu sá ní chídó tnùní dava-gá cue tée ní xóo cáháⁿ tnúhu Yá Ndiöxí ndéé sanaha, te ní dácuáhá-güedé ní xíndedóho cue ñáyiú, te dàtnùní cue tée yíndaha veñúhu-áⁿ ní xáhaⁿ-güedé xii té Páblú ndihí dava-gá-güedé:

—Nchòhó cue tée cùu ñaní tnáhá-ndí, te núu cuìní-ndó càháⁿ-ndó tnúhu Yá Ndiöxí, te cuu cáháⁿ-ndó tnàví cuendá cutúha-yu —càchí-güedé xáhaⁿ-güedé.

¹⁶ Te té Páblú ní ndacuñí-dé, te ní ndacani-dé ndaha-dé cuendá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dè:

—Te nchòhó ñáyiú quide nchaa nacuáa càháⁿ Yá Ndiöxí ndihí nchaa nchòhó ñáyiú isràél, cundedóho-ndo nchàa-ndo ìⁿ tnúhu na càháⁿ-í-a. ¹⁷ Te cuèi ndéé sanduu te cuèi vitna chindee ñaha-ni Yá Ndiöxí xii nchaa ñáyiú isràél, te ní nacáxi ñaha-gá xii-yu te ní chindee ñaha-gá cuendá cáyá-yu, chi cuìní-gá sá cúú vai-yu, te ducaⁿ ní quide-gá cútnáhá ní

xíndecú-yu nàcióⁿ Ègiptú. Te dătnùní ní dácăcu ñaha-gă xii-yu ñuú-áⁿ, chi mee-gă nchaa ndăcu-gă quidé-gă. ¹⁸ Te ní xíndecú-yu ñⁿ xichi núú ñà túú tnàhí sàcúndecu ñáyiu údico cuiá, te xití údico cuiá-ăⁿ ñí cundee iní-gă nchaa sá ñí quidé-yu. ¹⁹ Te Yá Ndiöxí ní chindee ñaha-gă xii ñáyiu isràél, te ní dánăă-yu úsá nàcióⁿ, chi cuendá ní cuiní-gă cuu cuendá-yu ñuhú-áⁿ. ²⁰ Te dătnùní ní cachí Yá Ndiöxí sá díú-ní cue téee cùchiuⁿ taxi tñuní-güedé nchaa ñáyiu, te ducaⁿ ñí quide-güedé dătná cúmí ciendú dava cuiá. Te sáta xăăⁿ, te ní xíndecu té Sămuél téee ní cáháⁿ tñuhu Yá Ndiöxí. ²¹ Te dăvâ-áⁿ ñí cuiní ñáyiu isràél sá cundecu ñⁿ téee quindaha ñaha-dé xii-yu, te Yá Ndiöxí ní cachí-gă sá tē Sàul quindaha-dē-yu, te téee-áⁿ ñí cuu-dé déhe té Cís, te té Benjámín téee ní xíndecu ndéee sanaha-gă ní cuu ñaní tnáhá-dē. Te té Sàul ní xíndaha-dē ñáyiu údico cuiá. ²² Te Yá Ndiöxí ñá ní cuiní-gă cundecu-ni-dé quindaha-dē ñáyiu, chi ní cuiní-gă sá tē Dàvíí ndíhu ndaha-dē cue ñáyiu isràél, te ní cachí-gă: “Ío váha ní tnahá iní-í năcuáa quide té Dàvíí déhe téee Isàí, te cada-dé nchaa năcuáa cúñaha-í xii-dé”, duha ní cachí Yá Ndiöxí — cächí té Păblú xăhaⁿ-dē xii-yu.

²³ Te ní xăhaⁿ tucu té Păblú:

—Díu-ni ñaní tnáhá tē Dàvíí cúú Jèsús. Te Yá Ndiöxí ní tendaha-gă Jèsús ní quixi-gă ñuyíú-a cuendá nchaa ñáyiu isràél ná quindáá iní ñáhá xii Jesús naníhí tãhú-yu, chi ducaⁿ ñí cachí Yá Ndiöxí cunduu. ²⁴ Te cútnáhá vátá ngüita-gă Jèsús cáháⁿ-gă tñuhu Yá Ndiöxí, te ní cáháⁿ té Juáá núú ñáyiu isràél sá xíní ññuhu-xi dañá-yu nchaa sá cuéhé sá dúhá, te cuanduté-yu. ²⁵ Te sa ta cùyatni-ni-gă cuú-dé, te ní xăhaⁿ-dē xii-yu: “Nchòhó cächí-ndó sã yühú cùú-í Crístú Yá ndétú-ndó dico ñáhá, chi ñá díú yühú cùú-í Crístú, chi davitna quixi Crístú Yá tendaha Yá Ndiöxí quixi ñuyíú-a. Te yühú cùú-í ñⁿ téee duuⁿ duuⁿ ñá túú tàú nandaxi cuèdicó chàú-gă dico quide-í chiúⁿ-gă”, duha ní cáháⁿ te

Juáá —cächí té Păblú xăhaⁿ-dē xii-yu.

²⁶ Te ní xăhaⁿ tucu té Păblú:

—Cundedóho tucu-ndo ñngá tñuhu na cãháⁿ-í. Nchòhó tnáhá-ndó cùu-ndo ñaní tnáhá ndíi Àbrahám, te xíní-ndó sã Yá Ndiöxí cúnùu-gă. Te díu-ni-gă cuiní-gă sá ncháá-ndó cundedóho-ndo tñuhu-gă, chi cùu-xi tñuhu sá cãháⁿ năcuáa naníhí tãhú-ndó. ²⁷ Te nchaa ñáyiu ndecu ñuú Jerusálén ndíhi nchaa cue téee cúnuu ñá ní cùtnuní iní-yu ndíhi-güedé sá Yá Ndiöxí ní tendaha-gă Jèsús ní quixi-gă ñuyíú-a. Te ñá ní sãha-yu cuendá sá díú Jèsús ní cacunehe cue téee ní cáháⁿ tñuhu Yá Ndiöxí ndéee sanaha cuèi ní dăcuáhă-yu tñuhu-gă veñuhu-yu ndí tnahá úná nduu, nduu ndétatú-yu. Te ní cachí-yu sá ndecuéchi Jèsús, te ní xăháⁿ-yu sá cáhni ñaha-güedé xii-gă. Te xăăⁿ sa ñaha cue téee ní xóo cáháⁿ tñuhu-gă ndéee sanaha sã dúcáⁿ cãháⁿ-yu. ²⁸ Te cuèi ñá túú nă ní quide-gă te ní xăháⁿ-yu xii té Pìlatú téee cùu gobiernú sá táuchíuⁿ-dé cahni ñaha-güedé xii-gă. ²⁹ Te xăăⁿ núu ní sata caa ñaha-güedé xii-gă núú cùrúxí. Te ní quide-güedé nchaa năcuáa ní chídó tñuní cue téee ní cáháⁿ tñuhu Yá Ndiöxí ndéee sanaha. Te sáta ñí xihí-gă, te ní nunehe ñaha-güedé xii-gă núú cùrúxí, te nchido ñaha-güedé cuáháⁿ, te ní chihi ñaha-güedé ñⁿ xití yaú. ³⁰ Te Yá Ndiöxí ní dándótó-gă Jèsús. ³¹ Te titní xito ní sáháⁿ Jèsús núú ndécú ñáyiu ní xica cuu ndíhi-gă, ñáyiu ní quee distritú Galileá ní sáháⁿ-yu ndíhi-gă ñuú Jerusálén. Te vitna nchaa ñáyiu-áⁿ xăháⁿ-yu xii dava-gă ñáyiu isràél năcuáa ní cuu ní ndoto-gă. ³² Te nchúhú cãháⁿ-ndí năcuáa cada-ndo naníhí tãhú-ndó, chi Yá Ndiöxí ní xăhaⁿ-gă xii cue ñaní tnáhá-ó ñí xíndecu ndéee sanaha sã tēndaha-gă Déhe-gă Jèsús quixi-gă ñuyíú-a. ³³ Te ní quixi-gă ní xihí-gă, te ní dándótó ñaha Yá Ndiöxí xii-gă, te núu xăăⁿ naníhí tãhú-ó núu na quindáá iní-ó-gă. Te ñⁿ téee ní cáháⁿ tñuhu Yá Ndiöxí ndéee sanaha ñí chídó

tnùní-dé núú sàlmú cúú ùú nàcuáa ní cáháⁿ Yá Ndiöxí ní xáhaⁿ-gã xii Déhe-gá, te duha ní xáhaⁿ-gã: “Yòhó cúú-n Dèhe-í, te vitna cutnùní iní ñáyíu sá yùhú cúú-í Tàtá-n”, duha ní xáhaⁿ-gã xii Jèsús. Te ñu-ni ducaⁿ ñí chídó tnùní téé ní cáháⁿ tnúhu-gá ndéé sanaha. ³⁴ Te ñngá xichi tucu núú tütú-gá ní chídó tnùní ñⁿ téé ní xíndecu ndéé sanaha nàcuáa ní xáhaⁿ-gã xii Déhe-gá, te duha ní xáhaⁿ-gã: “Mee-ni sá vãha cada ñaha-í dàtná ní xíí-í té Dàvíí”, duha ní xáhaⁿ-gã. Te ducaⁿ ñí chídó tnùní téé ní xíndecu ndéé sanaha nàcuáa ní cáháⁿ Yá Ndiöxí, chi òré ní xíhí Jèsús te ní dándótó ñaha-gá cuèndá sá vã tíú yìquì cuñú-gá. ³⁵ Te núú xíáⁿ duha ní chídó tnùní ñⁿ téé ní xíndecu ndéé sanaha núú librí Sàlmú nàcuáa ní xáhaⁿ-dè xii-gá: “Vá dáñá-n sá tíú yìquì cuñú Déhe-n chi ío váha quide-gá”, duha ní chídó tnùní téé ní xíndecu ndéé sanaha —càchí té Pàblú xáhaⁿ-dè xii-yu.

³⁶ Te xáhaⁿ tucu-dé:

—Te té Dàvíí ní quide-dé nchaa chiúⁿ ní táhú Yá Ndiöxí cada-dé, te dàtnùní ní xíhí-dé. Te ní chindúxi ñaha-güedè xii-dé yatni nàcuáa yíndúxi cue ñaní tnáhá-dè ndéé sanaha-gã, te xíáⁿ ñí téhyú yìquì cùñú-dé. ³⁷ Te Jèsús chi ñá ní téhyú yìquì cùñú-gá, chi ní dándótó ñaha Yá Ndiöxí xii-gá. ³⁸ Te cuñí-í cachí tnúhu-í xii-ndo cuèndá cutnùní iní-ndó nchaa-ndo sá cádá càhnu iní Yá Ndiöxí nchaa cuèchi-o, chi ní xíhí Jèsús cuèndá naníhí tàhú-ó. ³⁹ Te nchaa ñáyíu na quèndáá iní ñáhá xii Jèsús te cada càhnu iní-gá nchaa sá ñà túú vãha ní quide-yu, chi núú mee-ni tnúhu ní chídó tnùní ndí Moisés ná quèndáá iní-yu te vá nánihí tàhú-yu. ⁴⁰⁻⁴¹ Te ío coto-ndo mèe-ndo cuèndá sá vã yãha-ndo dàtná ní cachí Yá Ndiöxí yáha cue ñáyíu ñá túú ní quide váha ní xíndecu ndéé sanaha. Te nàcuáa ní cáháⁿ-gá ní chídó tnùní ñⁿ téé ní cáháⁿ tnúhu-gá ndéé sanaha, te duha ní xáhaⁿ-gã xii-yu dàvã-áⁿ:

Cundedóho nchaa nchòhó ñáyíu cuèhé yuhu-xi na càháⁿ-í

ñⁿ tnúhu te quini-ndó ñá cuñúhu-ndo,

yúhú quidè-í vai núú sá ío váha vitna ndècu-ndo ñuyíú-a,

te cuèi na còo ñáyíu cachí tnúhu xii-ndo nàcuáa ndúu nchaa sá vãha-áⁿ, dico nchòhó vá quèndáá iní-ndó,

te sá dúcáⁿ càda-ndo vá quèndáá iní-ndó, te dàcuíta nihnu-ndo mèe-ndo.

Duha ní xáhaⁿ-gã xii-yu te ducaⁿ ñí chídó tnùní téé ní cáháⁿ tnúhu-gá ndéé sanaha —càchí té Pàblú xáhaⁿ-dè xii-yu.

⁴² Te òré ní ndee té Pàblú veñúhu ñáyíu isràél ndihí cue téé xica cuu ndihí-dé, te ní cáháⁿ ndàhú ñáyíu yìhí veñúhu núú-dè sá quèhíⁿ-dé núú ùná nduu, te ñu-ni tnúhu ní cáháⁿ-dé cáháⁿ tucu-dé òré quexìo-dé. ⁴³ Te sáta ñí túhú veñúhu-yu, te vai ñáyíu isràél ndihí ñáyíu ní chitnahá ñáhá xii-yu nchìcúⁿ nihnu quide nacuáa quide-yu càháⁿ ndihí-yu Yá Ndiöxí cuáháⁿ ndihí-yu té Pàblú ndihí té Bèé. Te ní xáhaⁿ-güedè xii-yu sá vã dáñá ndéé-yu canchicúⁿ nihnú-yu tnúhu sá càháⁿ nàcuáa quide Yá Ndiöxí sá cúú-xí-yu.

⁴⁴ Te núú ùná nduu, nduu ndètatú-yu ní quexìo vai vihi ñáyíu, chi nihí ñuú ní quexìo ndedóho-yu tnúhu Yá Ndiöxí. ⁴⁵ Te cuèndá sá ío vai ñáyíu ní quexìo, núú xíáⁿ ní cuu cuèdú iní ñáhá ñáyíu isràél xii té Pàblú, te ní xícuèhé ñáhã-yu xii-dé. Te ní xáhãⁿ-yu xii-dé sá dándàhú ñáhã-dè xii-yu ndihí tnúhu càháⁿ-dé. ⁴⁶ Te té Pàblú ndihí té Bèé ñá túú ní yùhú ñáhã-güedè xii-yu. Te ní xáhaⁿ-güedè:

—Xìni ñuhu-xi díhna-gá nchòhó ñáyíu isràél cáháⁿ ndihí-ndí tnúhu Yá Ndiöxí, te mee-ndo ñã cuñí-ndó cundedóho-ndo. Te sá dúcáⁿ quide-ndo, te vá nánihí tàhú-ndó, te ní vã càháⁿ-gá-ndí tnúhu Yá Ndiöxí núú-ndó, dico cáháⁿ-ndí núú dàvã-gá ñáyíu cuèi ñá díú ñáyíu isràél cúú-yu, ⁴⁷ chi ducaⁿ ñí táuchíúⁿ Yá Ndiöxí cada-ndí. Te ní cachí-gá:

Cuini-í cundecu-ndo dàtná ìⁿ té yòtnuú ñuhú cundecu-ndo cãháⁿ-ndó tnũhu-í núú nchàa ñáyiu ñá túú cundihí-ndo ñáyiu ndècu nihí ñuyúú, te naníhí tãhú-yu, duha ní cãháⁿ-gá —cãchí té Pãblú ndihí té Bèé xãháⁿ-güedë xií-yu.

⁴⁸ Te ñáyiu ñá túú cùu ñáyiu isrâél ío ní cudíí iní-yu sá dúcãⁿ ní cãháⁿ-güedé, te ní xítnãhá-yu sá ío váha cuáhãⁿ tnúhu Yã Ndiõxí. Te mee Yã Ndiõxí sa ñaha-gá nãndi cùu ñáyiu naníhí tãhú, te ñu-ni ñáyiu-ãⁿ ní sãndãá iní-yu. ⁴⁹ Te nchaa xichi xiãⁿ ní sãháⁿ-yu ní cãháⁿ-yu tnúhu-gá. ⁵⁰ Te cue té isrâél ní ndatnúhu-güedé ndihí cue té cùnuu, ndihí cue ñáyiu ñihí cùnùu, te ñáyiu ñihí-ãⁿ ña túú tnãhí cùmãní-yu veñúhu. Te ní xãháⁿ-güedë sá cáda ùhú-yu té Pãblú ndihí té Bèé, te dàtnúú cuícúⁿ ñãhá-yu xii-güedé, te ducaⁿ ní quidé-yu. ⁵¹ Te ní casaⁿ ñuhu té Pãblú ndihí té Bèé sãhá-güedë ní naquidi-güedé tícã chũhmã ní tní sãhá-güedë. Te ducaⁿ ní quide-güedé cuendã cutnùú iní-yu sá ña túú ní quide váha-yu. Te dàtnúú ní quee-güedé cuáhãⁿ-güedé ñuú Ìconiú. ⁵² Te ñáyiu ní sãndãá iní-xi tnúhu Jèsús ío váha ní cuu iní-yu cuendã sá ní naníhí tãhú-yu, te ncháa-yu sa ndècu ndihí-yu Espiritú Yã Ndiõxí.

14

Té Pãblú ndihí té Bèé ndécú-güedë ñuú Ìconiú

¹ Te ní quexío té Pãblú ndihí té Bèé ñuú Ìconiú. Te ní sãháⁿ-güedé veñúhu ñáyiu isrâél, te ío váha ní cãháⁿ-güedé tnúhu Yã Ndiõxí, te vai ñáyiu isrâél ndihí ñáyiu ñá túú cùu ñáyiu isrâél ní sãndãá iní-yu tnúhu-gá. ² Te dava ñáyiu isrâél ñá ní sãndãá iní-yu, te ní cãháⁿ cuéhé-yu cuendã té Pãblú ndihí té Bèé cuendã sá vã quindãá iní ñáyiu ñá túú cùu ñáyiu isrâél. ³ Te ní xíndecu-güedé titní nduu, te ñá túú tnãhí ni yùhú-güedé ní dácuáhã-güedé ñáyiu tnúhu Yã Ndiõxí. Te mee-gã ní chindee ñaha-gá ní quide-güedé

titní núú sã vã yõ tnãhí ndàcu cada, te ío ní cuñúhu-yu. Te ducaⁿ ní quide-gá cuendã cutnùú iní-yu sã ndãá cãháⁿ-güedé sá méé-gã ío cùu iní ñãhá-gã xií-yu, te naníhí tãhú-yu núu na quindãá iní-yu tnúhu-gá. ⁴ Te ní quee dava ñáyiu ñuú Ìconiú, davã-yu cundihí-yu ñáyiu isrâél ñáyiu ñá túú sãndãá iní tnúhu Jèsús. Te davã-yu cundihí-yu cue té ní táuchíúⁿ Jèsús cãháⁿ tnúhu-gá. ⁵ Te ñáyiu isrâél ndihí dava-gã ñáyiu ñá túú sãndãá iní-xi ní cuu ìⁿnúú-yu ndihí cue té cùnuu sá cãní-yu-güedé, te cuãha yúú ñãhá-yu xii-güedé. ⁶ Te té Pãblú ndihí té Bèé ní níhí-güedë tnúhu sã cuini-yu canihã-yu, núu xiãⁿ dayuhu ní quee-güedé cuáhãⁿ-güedé ñuú Lìstrã ndihí ñuú Dèrbé. Te ndi ndùú ñuú-ãⁿ yíndèhu-xi Licaoniã. Te ní sãháⁿ-güedé dava-gã ñuú lĩhli cãa yatni xiãⁿ. ⁷ Te nchaa ñuú-ãⁿ ní cãháⁿ-güedé tnúhu Jèsús.

Ñuú Lìstrã ní sãha yúú ñãhá-yu xii té Pãblú

⁸ Te ñuú Lìstrã ndécú ìⁿ té yacua, mee-ni núcóo-dé chi ducaⁿ tnãhí cãa-dé ní cacu-dé. ⁹ Te ndedóho-dé tnúhu cãháⁿ té Pãblú, te ní cutnùú iní té Pãblú sã ío sãndãá iní té yacua-ãⁿ sã Yã Ndiõxí cada tátna ñaha-gã xii-dé, núu xiãⁿ ní xíndéhé ñaha váha té Pãblú xii-dé. ¹⁰ Te té Pãblú ní cãháⁿ níhí-dé, te ní xãháⁿ-dë:

—Ndacuíñí cunutnì váha-n — cãchí-dé xãháⁿ-dë.

Te ní ndacuíñí cunu-dé te ní xica-ni-dé. ¹¹ Te òré ní xiní-yu sã tã Pãblú ní quide tátna-dé té yacua-ãⁿ, te ncháa-yu ní cãháⁿ-yu tnúhu mèé-yu tnúhu Licãoniã. Te ní cãháⁿ níhí-yu, te xítnãhá-yu:

—Cue té-ãⁿ sãnuu sã ñáyiu cùu-güedé dico ñãhá, chi ndiõxí cúu-güedé te ní quexío-güedé ñuyúú-a —cãchí-yu xítnãhá-yu.

¹² Te ní cachí-yu sã tã Bèé cúu-dë ndiõxí dánàní-yu Jüpitér, te té Pãblú cúu-dë ndiõxí dánàní-yu Mèrcuriú, chi cuendã té-ãⁿ cúu-dë té cãháⁿ. ¹³ Te cãa ìⁿ veñúhu yuhu ñuú-ãⁿ núú quidé cãhnú-yu ndiõxí sã dánàní-yu

Jüpitér. Te dútú yíndàha veñúhu-án ndécá-dě ìⁿ ùú ndicutu cuáháⁿ quehé veñúhu, te ñùhu itá dúcúⁿ-güedi. Te cue quití-án cahni-dé cada càhnu-dé ndihí-yu té Bèè ndihí té Pàblú ní cùu, chi ducaⁿ quidé-yu quide cahnú-yu ndiöxí-yu. ¹⁴ Te té Bèè ndihí té Pàblú ní níhí-güedě tnúhu nàcuáa sàni iní-yu cadá-yu, te ní ndátá-güedě dóo-güedě cuendá cutnùní iní-yu sá ñã tnàhá iní-güedé nàcuáa sàni iní-yu cadá-yu. Te xínu-güedé cuànguñhu-güedé tnuú-yu, te níhi ní cáháⁿ-güedé, te xàháⁿ-güedé:

¹⁵ —¿Ná cuendá ducaⁿ cuiní-ndo cada-ndo? Te ñu-ni tnàha ñáyi-ndo cùu-ndí, dìcò-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vã cadá-gã-ndó nàcuáa quide-ndo, te quindáá iní-ndó Yá Ndiöxí, chi ìⁿ dli-ni Yá Ndiöxí ndécú. Te ñu-gá ní cadúha-gá andi ndihí ñuyíú-a ndihí lámár ndihí nchaandi túhú sá ío ñuyíú-a. ¹⁶ Te ndéé sanaha ñí dáñá Yá Ndiöxí ní quidé-yu nàcuáa cuáháⁿ iní méé-yu. ¹⁷ Te ní xóo cada-gá sá vãha cuendá cutnùní iní-yu sá ío váha iní-gá. Te ñu-gá dácùuⁿ-gá dáú, te tàxi-gá sá nchító-ó chi xito-gá nchaa tatá xítú-ó, te xiáⁿ cúdí ñí-ó ndècu-o ñuyíú-a —càchí té Pàblú ndihí té Bèè xàháⁿ-güedě xií-yu.

¹⁸ Te cuèi ducaⁿ ñí xàháⁿ-güedě nchaa tnúhu-án, dico ío úhú ní sándáá iní-yu ñá ní sàhní-yu ndicutu-án chi cuendá ducaⁿ tnàhí quidé-yu sàhní-yu ndicutu òré quidé càhnú-yu ndiöxí-yu.

¹⁹ Te ñuú Antiòquiá ndihí ñuú Ìconiú xíndecu dava ñáyi-ndé, te ní queé-yu cuáháⁿ-yu ñuú Lìstrá núú ndécú té Pàblú. Te xiáⁿ ñí quexió-yu te ní xáhãⁿ-yu xii ñáyi-ndé ñuú xiáⁿ sã cáhni-yu té Pàblú. Te ní sáha yúú ñáhãⁿ-yu xii-dé, te ní cáhãⁿ-yu sá ñí xihí-dé, te ní tnã ñaha-güedě xii-dé, te tàñuhu ñaha-güedě xii-dé cuáháⁿ ìⁿ xio yuhu ñuú ní sá dáquéné ñaha-güedé. ²⁰ Te ní quexió cue ñáyi-ndé sándáá iní tnúhu Jèsús núú cátùu-dé-án, te ní nadúcúⁿ ndèè

ñáhãⁿ-yu xii-dé, te ñíni xínutnãⁿ-yu-án ñí ndacóo-dé cuánuhú ndihí ñaha tucu-dé xií-yu xití ñuú. Te nduu tnèé-án ñí ndee-dé ndihí té Bèè cuáháⁿ-güedé ñuú Dèrbé.

²¹ Te ní cáháⁿ-güedé tnúhu Yá Ndiöxí ñuú-án, te ío vãi ñáyi-ndé ní sándáá iní-yu tnúhu-gá. Te dàtnùní ní quee-güedé cuáháⁿ tucu-güedé ñuú Lìstrá, ndihí ñuú Ìconiú, ndihí ñuú Antiòquiá. ²² Te ní xàháⁿ-güedě xií-yu sá vã dáñá ñhñú-yu tnúhu Jèsús. Te sá dúcáⁿ ñí cáháⁿ-güedé, te vñhi-gá ní cudíí iní-yu cadá-yu nàcuáa cuiní Yá Ndiöxí cadá-yu, te ní xàháⁿ-güedé:

—Dacuití cùndecu-o ñuyíú-a ndoho-o, te dàtnùní ducaⁿ te nacuaca ñaha Yá Ndiöxí xii-o —càchí-güedé xàháⁿ-güedě xií-yu.

²³ Te ní sáhãⁿ-güedé ndi tnàhá ìⁿ ìⁿ xichi núú ndécú ñáyi-ndé dacuaha tnúhu Yá Ndiöxí, te ní taxi ndecu-güedé cue té quindaha ñaha xií-yu, te ní cáháⁿ ndihí-güedé Yá Ndiöxí, te ñá túú tnàhí ná ní xèxi-güedé cuendá sá ñí cáháⁿ ndihí-güedé-gá. Te ní xàháⁿ-güedé sá Yá Ndiöxí coto ñaha-gã xií-yu chi ñu-ni-gá ní sándáá iní-yu.

Té Pàblú ndihí té Bèè cuáhãⁿ tucu-güedé ñuú Antiòquiá Sìriá

²⁴⁻²⁵ Te dàtnùní ní quee té Pàblú ndihí té Bèè cuáhãⁿ-güedé, ní yáha-güedé distrítú Pìsidiá. Te ní quexió-güedé ñuú Pèrgé, xiáⁿ ñí cáháⁿ-güedé tnúhu Jèsús. Te ñuú-án yíndèhu-xi Panfiliá. Te dàtnùní cuáhãⁿ-güedé ñuú Àtaliá. ²⁶ Te yacáⁿ ní quee-güedé bàrcú cuánuhú tucu-güedé ñuú Antiòquiá. Te ñuú-án cúu-xí ñuú núú ñí xicáⁿ táhñ-yu núú Yá Ndiöxí cuendá sá chíndé ñaha-gá xii-güedé chiuⁿ quide-güedé. Te cuendá sá ñí ndihí chiuⁿ-güedé nchaa ñuú núú ñí sáhãⁿ-güedé, núú xiáⁿ cuánuhú-na-güedé. ²⁷ Te ní ndexió-güedé ñuú-án, te ní cana-güedé nchaa ñáyi-ndé sándáá iní tnúhu-gá, te ní cani-güedé cuendú núú-yu nchaa nàcuáa ní cuu núú ñí sáhãⁿ-güedé, te xàháⁿ-güedé: “Yá Ndiöxí ío ní chindee ñaha-gá xii-ndí ní cáháⁿ-ndí

tnúhu-gá núú nǐ sáháⁿ-ndí, te mee-gá ní quide sá tnàhá ñáyiú ñá túú cùu ñáyiú isràél ní xíndedóho-yu tnúhu-gá cuèndá quíndáá iní-yu”, cächí-güedé xáhaⁿ-güedé xii-yu. ²⁸ Te vâi nduu ní xíndecu-güedé ñuú Antiòquiá ndihí nchaa ñáyiú ní sándáá iní tnúhu Jèsús.

15

Ní natacá ñáyiú sándáá iní tnúhu Jèsús ñuú Jerusalén

¹ Te ní quee ñⁿ úú cue téé distritú Jùdeá cuáháⁿ-güedé ñuú Antiòquiá, te ní sáá-güedé, te ní xáhaⁿ-güedé xii ñáyiú sándáá iní tnúhu Jèsús sá nùu vá cuáha-güedé sèñá ñⁱⁱ nchaa cue téé dàtná ní cachí ndí Moisés, te vá nánihí tàhú-güedé. ² Te sá dúcáⁿ nǐ cáháⁿ cue téé-áⁿ, te ní ngüíta té Páblú ndihí té Bèé ní tenáá-güedé cue téé-áⁿ, chi dandàhú ñáhá-güedé cuíní-güedé ní cùu. Te nchaa ñáyiú sándáá iní tnúhu-gá ní cachí-yu sá quíhíⁿ té Páblú ndihí té Bèé ndihí ñⁿ úú-gá-güedé ñuú Jerusalén. Te yàcáⁿ cada-güedé ñⁿ jùndá ndihí mee-ni cuè téé ní táuchíúⁿ Jèsús cáháⁿ tnúhu-gá, ndihí cue téé yìndaha ñáyiú sándáá iní tnúhu-gá ñuú-áⁿ, te jùndá-áⁿ cada ndáá-güedé tnúhu ní cáháⁿ cue téé ní sáá ñuú Antiòquiá.

³ Te nchaa ñáyiú sándáá iní tnúhu-gá ní quide ndee iní ñáhá-yu xii-güedé, te ní tní-güedé ichi cuáháⁿ-güedé. Te ní yáha-güedé distritú Fèniciá ndihí distritú Sámariá, te yàcáⁿ ní caní-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiòxí, te ní cudíí víhí iní nchaa ñáyiú ní xíndedóho-áⁿ.

⁴ Te té Páblú ndihí té Bèé ní ndexìo-güedé ñuú Jerusalén, te ío ní cudíí iní-yu sá nǐ ndexìo váha-güedé. Te ndècu dava-gá cue téé ní táuchíúⁿ Jèsús dácuàha ñaha xii-yu tnúhu-gá, ndihí cue téé yìndaha ñaha xii-yu, ndihí dava-gá ñáyiú sándáá iní tnúhu-gá, te ní caní-güedé cuèndú núu-yu nàcuáa ní quide Yá Ndiòxí ní chindee ñàha-gá xii-güedé ní quide-güedé chiuⁿ-gá. ⁵ Te ndècu ñⁿ úú

cue téé ní tuha ichi Yá Ndiòxí, te cue téé-áⁿ cúu-güedé cue téé farisèú, te ní ndacuíñí-güedé, te ní xáhaⁿ-güedé:

—Dacuítí xini ñuhu-xi sá cuáha-güedé sèñá ñⁱⁱ cue téé cùmání cue téé ñá túú cùu ñáyiú isràél, te cùñaha-ndo sá ná cádá-güedé nchaa nàcuáa ní chídó tnùní ndí Moisés —cächí cue téé cùu farisèú-áⁿ xáhaⁿ-güedé xii-güedé.

⁶ Te cue téé ní táuchíúⁿ Jèsús dacuàha ñaha xii ñáyiú tnúhu-gá, ndihí cue téé yìndaha ñáyiú sándáá iní tnúhu-gá ní quide-güedé jùndá cuèndá ní ndatnúhu-güedé nása cunduu. ⁷ Te vâi vihi tnúhu ní cáháⁿ-güedé. Te té Pèlú ní ndacuíñí-dé, te ní xáhaⁿ-dè xii-güedé:

—Nchòhó cue téé ndècu ndihí-í ichi Xítohó Jesucristú, chí cùndedóho ñⁿ tnúhu na cáháⁿ-í-a. Sa nàha-ndo sá nǐ cachí Yá Ndiòxí sá diù-í cáháⁿ-í tnúhu Jèsús núú ñáyiú ñá túú cùu ñáyiú isràél cuèndá sá quíndáá iní-yu, te naníhí tàhú-yu. ⁸ Dico Yá Ndiòxí sa nàha-gá nása càa iní ñⁿ ñáyiú. Te cùtnuní iní-ó sá cúu iní ñáhá-gá xii cue ñáyiú ñá túú cùu ñáyiú isràél, chi ní sáñaha-gá Espiritú-gá ndécú ndihí-yu dàtná cuíní-ndó nǐ taxi-gá ndécú ndihí nchoo. ⁹ Chi Yá Ndiòxí ñⁿ nuu-ni cùu iní ñáhá-gá xii-o nchaa-o ndihí cue ñáyiú ñá túú cùu ñáyiú isràél, chí tnàhá-yu ní xócání-gá nchaa sá cuèhé sá dúhá nǐ xóo cadá-yu ndéé òré ní sándáá iní-yu Jèsús. ¹⁰ ¿Te ná cuèndá nchòhó cuíní-ndó càa ñáyiú ní sándáá iní tnúhu-gá ñⁿ sá ñá tnàhá iní-gá sá cádá-yu? Te cuíní-ndó dándoho-ndó-yu. Te ni nchò te ni cue ñaní tnàhá-ó nǐ xíndecu ndéé sanaha ñá ní ndàcú-yu cadá-yu nchaa xíáⁿ. ¹¹ Te vá dúcáⁿ cáháⁿ-ndó, chi sa nàha-ndo sá Yá Ndiòxí ní cundàhú iní ñáhá-gá xii-o, te dió ducaⁿ nǐ quide-gá sá nánihí tàhú-ó nchaa-o. Te diu-ni ducaⁿ nǐ quide-gá ñáyiú ñá túú cùu ñáyiú isràél, te ní naníhí tàhú-yu —cächí té Pèlú xáhaⁿ-dè xii-güedé.

¹² Te dàtnùní té Bèé ndihí té Páblú ní ngüíta-güedé ní cáháⁿ-güedé, te ní xíndedóho-yu nchaa tnúhu ní cáháⁿ-güedé. Te ní xáhaⁿ-güedé xii-yu

nàcuáa ní chindee ñàha Yá Ndiöxí xii-güedé, te ní quide-güedé vai núú sã vã yõ tnahí ndàcu cada, te ducaⁿ te ní cutnùní iní ñáyiú ñá túú cùu ñáyiú isràél sá ndàá càháⁿ-güedé. ¹³ Te òré ní ndihí cuèndú ní càháⁿ-güedé, te té Jàcobó ní xàháⁿ-dè:

—Nchòhó cue té ndècu ndihí-í ichi Xítóhó Jesucristú, chí cùndèdóho ñⁿ tnúhu na càháⁿ-í-a. ¹⁴ Té Xímú, àdi Pelú chí úú òu-dé, ní cani-dé cuèndú nàcuáa ní quide Yá Ndiöxí ndéé díhna ní dáquée díⁿ-gá ñáyiú ñá túú cùu ñáyiú isràél tnuú nchaa ñáyiú ñá túú ndècu ichi-gá, cuèndá cuìní-gá chiñuhu ñàhá-yu xii-gá. ¹⁵ Te dàtnùní ní càháⁿ-dé nàcuáa ní càháⁿ Yá Ndiöxí ndéé sanaha. Te duha ní chídó tnùnì cue té ní xóo càháⁿ tnúhu-gá ndéé sanaha nàcuáa ní càháⁿ-gá, te duha ní cachí-gá:

¹⁶ Dàtná cuìní-ndó cùu ñⁿ vehe ní sáá te ní ngoyo te dàndaa-güedé xito cùu úú, ducaⁿ sãtnahá-xi cada-xi ñⁿ nduu, chí ñaní tnahá ndí Dàvíí ní xóo càháⁿ ndihí ñàhá-yu xii-í ní cùu, te ní dáñá ndéé-yu ichi-í, te na quixi-í te natuha ñàha tùcú-yu.

¹⁷ Te ducaⁿ te vai ñáyiú ñá túú cùu ñáyiú isràél nandúcú-yu ichi-í te càháⁿ ndihí ñàhá-yu.

¹⁸ Duha ní càháⁿ Yá Ndiöxí, te ducaⁿ ñí chídó tnùnì cue té ní xóo càháⁿ tnúhu-gá ndéé sanaha —càhí té Jàcobó xàháⁿ-dè xii-güedé.

¹⁹ Te xàháⁿ tùcu-dé:

—Yúhú càhí iní-í sã vã cúú dàsatú-ó iní nchaa ñáyiú ta sàndáá iní-xi tnúhu Yá Ndiöxí, ñáyiú ñá túú cùu ñáyiú isràél, te ñⁿ úú-ni tnúhu cúñaha-o nàcuáa cadá-yu. ²⁰ Dico xini ñuhu-xi daquihíⁿ-ó tùtú cúñaha-o sã vã cáxí-gã-yu nchaa sá nchító-ó ndùu táhú nchaa sá càhí-yu cùu ndiöxí-yu. Te cúñaha-o sã vã càháⁿ ndihí cue té ñadihí te núu ñá díú ñàdihí-güedé cúú-yu, te ni cuè ñáyiú díhí vá càháⁿ ndihí-yu té te núu ñá díú yí-yu cùu-güedé, te vá cáxí-yu cuñú quiti cuèhné, te vá cáxí-yu níñí. ²¹ Te ducaⁿ cúñaha-o, chí ndi tnahá ñuú núú ndécú-yu, te xíndecu ñáyiú isràél

dàcuàhá-yu tnúhu ní chídó tnùnì ndí Moisés, te ndi tnahá nduu ndètatú-yu dàcuahá-yu tnúhu ndí veñúhu-yu —càhí té Jàcobó xàháⁿ-dè xii-güedé.

²² Te dàtnùní cue té ní táuchíúⁿ Jèsús dacuàha ñàha xii-yu tnúhu-gá, ndihí cue té yíndaha ñáyiú sàndáá iní tnúhu-gá ní cachí-güedé sá ndúcú-güedé ñⁿ úú-gá cue té quihíⁿ ndihí té Pàblú ndihí té Bèé ñuú Antiòquiá, te òu-ni ducaⁿ ñí càháⁿ dava-gá ñáyiú ndècu ichi-gá. Te úú cue té ní ndúcú-güedé, ñⁿ-dé nání-dè Silás, te ñⁿ-dé nání-dè Jùdás, àdi Barsabás chí úú òu-dé, te cùnuu-güedé ndi ndúú-güedé. ²³ Te ní cadúha nchaa cue té cùnuu tutú canehe-güedé quihíⁿ, te duha càháⁿ-xi:

“Còvãha díí-ndó nchàa-ndo. Nchúhú cue té ní táuchíúⁿ Jèsús càháⁿ-ndí tnúhu-gá, ndihí cue té yíndaha cue ñáyiú sàndáá iní tnúhu-gá quide ndee iní ñàhá-ndí xii nchòhó cue ñáyiú ndècu ndihí-ndí ichi-gá cuèi ñá díú ñáyiú isràél cúú-ndó. Te nchòhó ñáyiú xíndecu ñuú Antiòquiá, ndihí nchòhó ñáyiú ndècu distritú Sìriá, ndihí nchòhó ñáyiú ndècu distritú Cìliciá, càhí tnúhu-ndí xii-ndo sã ²⁴ ñí níhí-ndí tnúhu sá ñⁿ úú cue té ndècu iha ní quixi-güedé núú ndécú-ndó, te ñá túú chiúⁿ ni tahu-ndí quixi-güedé. Te sá ñⁿ tnúhu ní càháⁿ-güedé ní xàháⁿ-güedé xii-ndo sã ngündecu seña ñíi-ndo, te canchicúⁿ nihnu-ndo nchàa nàcuáa ní chídó tnùnì ndí Moisés, te xíⁿ ní sani ñⁿ ní sani úú iní-ndó, chí ñá túú xini-ndó núu ndáá tnúhu càháⁿ-güedé àdi ñá ndáá. ²⁵ Te ní ndatnúhu-ndí nàcuáa cunduu sá téndaha-ndí úú cue té quixi-güedé ndihí té Bèé ndihí té Pàblú, cue té ío cùu iní-ndí, te cue té-áⁿ càháⁿ-güedé nàcuáa càháⁿ-ndí-a. ²⁶ Te òu-ni té Bèé ndihí té Pàblú ní sàháⁿ-güedé ní càháⁿ-güedé tnúhu Xítóhó Jesucristú nchaa xichi. Te ndi tnahá cuaháⁿ-güedé cuìní-yu cahni ñàhá-yu xii-güedé. ²⁷ Te tendaha-ndí té Jùdás ndihí té

Silás quixi-güedé tnàhá-güedé cachí tnúhu váha-güedé nàcuáa cuáháⁿ tnúhu càháⁿ-ndí. ²⁸ Te diu-ni ducaⁿ càháⁿ-ndí cachí tnúhu-ndí nàcuáa càháⁿ Espíritú Yá Ndióxi cada-ndo, chi nchúhú vá càháⁿ-ndí sá cáda-ndó nchàa sá ní cáháⁿ ndí Moisés cada ñáyiú, chi ío úhú, te vá yóo ndacu cada. Te vitna na càháⁿ-ndí ñⁿ úú-ni tnúhu nàcuáa cada-ndo. ²⁹ Vá cáxi-ndó sá nchító-ó ndúu táhú nchaa sá cachí ñáyiú cùu ndióxí-yu, te vá cáxi-ndó ñíí, te vá cáxi-ndó cùñú quití cuèhné, te vá càháⁿ ndihí cue tée ñadhí te núu ñá díú ñadhí-güedé cúu-yu, te ni cue ñáyiú ñíí vá càháⁿ ndihí-yu tée te núu ñá díú yíi-yu cùu-güedé. Te núu na càda-ndo nchaa nacuáa càháⁿ-ndí-a, te cada váha-ndo. Te vitna ío cada ndee ñíí-ndó nchàa-ndo-na.” Duha ní chídó tnúni-güedé núu tütú ní ten-daha-güedé cuáháⁿ.

³⁰ Te ní quide ndee ñíí-yu cue tée quííⁿ ñúú Antióquiá, te ducaⁿ te ní xica-güedé cuáháⁿ-güedé. Te òré ní quexio-güedé ñúú-áⁿ, te ní cana-güedé nchaa ñáyiú sándáá ñíí tnúhu Jèsús, te ní sáñaha-güedé tütú xii-yu. ³¹ Te ní dácuáhá-yu tütú ní sáñaha-güedé-áⁿ, te ní cudíí víhí ñíí-yu chi ío váha càháⁿ tütú-áⁿ. ³² Te té Júdás ndihí té Silás tnàhá-güedé ní nduu táhú-güedé càháⁿ-güedé tnúhu sá dácàhu ñíí ñáhá Yá Ndióxi. Te ní xáhaⁿ-güedé vai tnúhu nàcuáa cadá-yu, te víhi-gá ní cudíí ñíí-yu cadá-yu nàcuáa càháⁿ Yá Ndióxi cadá-yu. ³³ Te ní xindecu-güedé ñⁿ úú nduu ndihí-yu, te dátnúni ní quide ndee ñíí ñáhá-yu xii-güedé cuendá sá nùhú-güedé núu vèxi-güedé, te mee-ni té Júdás cuánuhú-dé. ³⁴ Te té Silás ní xáhaⁿ-dè sá vá nùhú-ni-dé, ³⁵ Te té Páblú ndihí té Bèé ní ndóo-güedé ní cáháⁿ-güedé tnúhu Yá Ndióxi ñúú Antióquiá, te vai-gá tucu ñáyiú Antióquiá ní cáháⁿ-yu tnúhu-gá.

Xito cùu uú cuáháⁿ té Páblú càháⁿ-dé tnúhu Yá Ndióxi núu ñáyiú

³⁶ Te sátá ní cuu cuéhé nduu, te ní xáhaⁿ té Páblú xii té Bèé:

—Na quííⁿ-ó nchàa ñúú núu ní sáháⁿ-ó ní cáháⁿ-ó tnúhu Yá Ndióxi cáháⁿ ndihí-o nchàa ñáyiú ní tuha ichi-gá cuendá quini-ó núu ndècu váha-yu —cachí-dé xáhaⁿ-dè.

³⁷ Te té Bèé ní xáhaⁿ-dè sá quííⁿ ndihí-güedé té Juáá, àdi Mácú chi úú diu-dé. ³⁸ Dico té Páblú ñá ní dàña-gá-dé quííⁿ té Juáá, chi ní dándóo ñaha-dé xii-güedé cútnàhá ní xindecu-güedé Pánfilíá, te ní nacuico-dé cuánuhú-dé, te ñá tütú-gá ní sáháⁿ ndihí ñaha-dé xii-güedé. ³⁹ Xíáⁿ ní cuu ní tenáá tnàhá té Bèé ndihí té Páblú, te ichi càa ichi caa ní cuu-güedé. Te té Bèé ndihí té Mácú ní quèe-güedé bàrcú cuáháⁿ-güedé Chìpré. ⁴⁰ Te té Páblú ní xáhaⁿ-dè xii té Silás sá quííⁿ ndihí ñaha-dé, te ñáyiú sándáá ñíí-xi tnúhu Jèsús ní cáháⁿ ndihí-yu Yá Ndióxi sá chíndèe ñaha-gá xii-güedé. ⁴¹ Te ní xica-güedé cuáháⁿ-güedé te ní yáha-güedé ñíí distritú Síríá ndihí distritú Cìliciá. Te ní cáháⁿ-güedé tnúhu Jèsús núu nchàa ñáyiú ní sándáá ñíí tnúhu-gá, núu xíáⁿ ío-gá ní cudíí ñíí-yu cadá-yu nàcuáa càháⁿ Yá Ndióxi.

16

Tnàhá té Timùteú cuáháⁿ ndihí-dé té Páblú ndihí té Silás

¹ Te té Páblú ndihí té Silás cuáháⁿ-güedé ñúú Dèrbé ndihí ñúú Lìstrá, te ñúú Lìstrá yàcáⁿ ndécú ñⁿ tée nàni Timuteú. Te tée-áⁿ sándáá ñíí-dé tnúhu Jèsús, te tnàhá ñáhá-dè sándáá ñíí-aⁿ tnúhu-gá, te ñaha isràél cúu-áⁿ, te tée griégú cúu tátá-dé.

² Te nchaa ñáyiú ní sándáá ñíí tnúhu-gá ñáyiú ndècu ñúú Lìstrá, ndihí ñáyiú ñúú Iconiú, nchaa ñáyiú-áⁿ cudíí ñíí-yu nàcuáa quide-dé. ³ Te ní cuini té Páblú sá tnàhá té Timùteú quííⁿ ndihí-dé dava-gá ñúú, núu xíáⁿ díhna-gá seña ní sáha té Páblú ñíí té Timùteú, chi ñá ní tnàhá ñíí té Páblú sá càháⁿ cuéhé ñáyiú isràél cuendá té Timùteú. Te nchaa ñáyiú isràél ndécú ñúú-áⁿ xini-yu sá tée griégú cúu tátá-dé, te ñá díú tée isràél cúu-dé, te xíáⁿ ní sáha té Páblú seña ñíí té

Timùteú. ⁴ Te ndi tnahá ñuú ndi tnahá ñuú cuáháⁿ-güedé càháⁿ ndihí-güedé nchaa ñáyiú ní sándáá iní tnúhu Jèsús. Te ní xáhaⁿ-güedě nàcuáa càháⁿ tutú ní cadúha cue téé ní táúchíúⁿ Jèsús dacuàha ñaha xii-yu tnúhu-gá, ndihí cue téé yíndaha ñáyiú sándáá iní tnúhu-gá ñuú Jerusàlén. ⁵ Te cuendá ducaⁿ ñí sáháⁿ-güedé nchaa ñuú núú ndécú ñáyiú sándáá iní tnúhu-gá ní dácúhá ñàha-güedé xii-yu, núú xiáⁿ tá cùu túha-gá-yu tnúhu Yá Ndiöxí, te vài-gá-yu ní tuhá-yu ichi-gá.

Ní dácótó ñàha-xi xii té Păblú sá ní xini-dé ñí té distritú Macèdoniá

⁶ Te ñá ní dàña Espiritú Yá Ndiöxí quíhíⁿ-güedé càháⁿ-güedé tnúhu-gá distritú Àsiá, núú ní sáháⁿ-güedé distritú Frigiá ndihí distritú Gàlaciá càháⁿ-güedé tnúhu-gá. ⁷ Te ní sáá-güedé yuhu distritú Misiá. Te quíhíⁿ-güedé distritú Bitiniá ní cùu, dico ñá ní dàña Espiritú Yá Ndiöxí quíhíⁿ-güedé yàcáⁿ. ⁸ Te ní yáha-güedé Misiá, te ní quexìo-güedé ñuú Tròás, te yàcáⁿ ní nanítnáhá-ndí ndihí-dé. ⁹ Te ñí níú ní dácótó-xí núú tē Păblú sá ñí xini-dé ñí té distritú Macèdoniá nútñí-dé, te ní xáhaⁿ tē-áⁿ xii té Păblú: “Cada ndee iní-n quíhíⁿ-n Macedoniá chi dacuàha ñaha-n nchaa sá xini-n”, càchí-dé xáhaⁿ-dē, ní dácótó ñàha-xi xii té Păblú. ¹⁰ Te cuendá sá dúcáⁿ ñí dácótó ñàha-xi xii té Păblú núú ní ndatnúhu-ndí quíhíⁿ-ndí Macèdoniá, chi ní cutnùní iní-ndí sá cáná ñàha Yá Ndiöxí quíhíⁿ-ndí càháⁿ-ndí tnúhu-gá núú ñáyiú yàcáⁿ.

Té Păblú ndihí té Silás ndécú-güedé ñuú Filipú

¹¹ Te ní quée-ndí bàrcú ñuú Tròás, te cuáháⁿ ndáá-ndí ñuú Samòtraciá, te yàcáⁿ ní quexìo-ndí, te ní yáha-ni-ndí cuáháⁿ-ndí. Te nduu tněé ní quexìo-ndí ñuú Nèápolís. ¹² Te yàcáⁿ ní quene-ndí bàrcú, te xìca-na-ndí cuáháⁿ-ndí ñuú Filipú te ñuú-áⁿ yíndèhu-xi distritú Macèdoniá. Te yàcáⁿ ní cudíi-ndí ní xíndecu tnaa-ndí.

Te ñuú Filipú-áⁿ ío cùnuu-xi, chi ío chitu ñáyiú ròamá ní ngóo-yu. ¹³ Te nduu ndètatú-yu ní quée-ndí ñuú cuáháⁿ-ndí ñí xio yuhu yùte, chi yàcáⁿ sáháⁿ-yu càháⁿ ndihí-yu Yá Ndiöxí. Te òré ní quexìo-ndí, te ní naníhí tnahá-ndí ndihí mee-ni ñáyiú dèhí, te ní càháⁿ-ndí tnúhu Yá Ndiöxí ní xíndedóho-yu. ¹⁴ Te ndècu ñí ñaha nani Lidiá ní xíndedóho-aⁿ nàcuáa ní càháⁿ-ndí, te ñaha ñuú Tiàtirá cúú-áⁿ, te dīco-aⁿ dóó muradú, te ío càháⁿ ndihí-aⁿ Yá Ndiöxí. Te diu-ni mee Yá Ndiöxí ní chindee ñàha-gá ní sándáá iní-aⁿ tnúhu ní càháⁿ té Păblú. ¹⁵ Te ní sandute-aⁿ ndihí landú-aⁿ, ndihí nchaa ñáyiú xinu cuechi núú-aⁿ, te ní cachí-aⁿ xii-ndí:

—Te núú ní cutnùní iní-ndó sá ñí sándáá ndisa iní-í tnúhu Jèsús, te cundecu tnaa-ndo vèhe-í —càchí-aⁿ xii-ndí.

Te ní quide yica-aⁿ ñí xíndecu-ndí vehe-aⁿ.

¹⁶ Te ñí nduu ñuhu-ndí ichi cuáháⁿ-ndí núú càháⁿ ndihí-yu Yá Ndiöxí, te ní naníhí-ndí ñí xíchí ñúhú ichi, te yíhí ñaha espíritú cùndihí yucu ñávàha xii-xi. Te xiáⁿ ní quide ní càháⁿ-xi nchaa sá vǎ yóo tnahí cutnùní iní-xi núú nchaa ñáyiú ní sángándihí ñaha xii-xi. Te ñáyiú dii vèhe-xi xinu cuechi-xi ío vài díhúⁿ ñí níhí-yu chi ní cháhu nchaa ñáyiú ní sángándihí ñaha xii-xi. ¹⁷ Te xíchí-áⁿ ñí chinchícúⁿ ñáhá-xí xii-ndí ndihí té Păblú ndëndaha ñàha-xi cuáháⁿ, te ní càháⁿ níhí-xi xáhaⁿ-xi xii dava-gá ñáyiú:

—Cue téé-a xinu cuechi-güedé núú Yá Ndiöxí, chi ío càhnu cuu-gá, te càchí tnúhu-güedé nása cada-ndo naníhí tǎhú-ndó —càchí-xi xáhaⁿ-xi xii-yu.

¹⁸ Te titní xito ní yáha-ndí ducaⁿ-ni ñí càháⁿ-xi. Te ñá ní cùndee-gá iní té Păblú sá dúcáⁿ càháⁿ-xi, núú ní nanchocuíhnu-dé núú nútñí-xi, te ní xáhaⁿ-dē xii espíritú cùndihí yucu ñávàha yíhí ñaha xii-xi:

—Ío càhnu cuu Xítóhó Jesucristú, núú xiáⁿ càchí-í sá xócuiñí-n vǎ

quíhí-gã-n yìqui cuñú xíchí-a —
càchí-dé xãhaⁿ-dë.

Te òré-ni ní quee espíritú cùndìhi
yucu ñávãha-áⁿ yìqui cùñú-xi.

19-20 Te ñáyiu dii vèhe-xi xinu
cuechi-xi-áⁿ nì cutnùnì iní-yu sá
vã nihí-gá-yu díhúⁿ cuendá tnúhu
càháⁿ-xi, núu ní tñí-yu té Pãblú ndìhi
té Silás ndécá ñàhá-yu cuáháⁿ núu
cuè té cùchiuⁿ Romá, te xáhãⁿ-yu
xii-güedé:

—Cue té-a cùu-güedé cue té
isràél, te ío dusaⁿ xíquide-güedé
ñuú-ó. 21 Te cuínì-güedé cada-o
nàcuáa quide-güedé, te vá cúu dùcaⁿ
cada-o chi ñáyiu nàcióⁿ Ròmá cúu-ó —
càchí-yu xáhãⁿ-yu xii cue té cùchiuⁿ.

22 Te uuⁿni ní cáháⁿ nchaá-yu,
te xáhãⁿ-yu sá ñà túu quide váha
té Pãblú ndìhi té Silás. Te cue
té cùchiuⁿ ní cándeé-güedé dóo
të Pãblú ndìhi dóo té Silás ní
ndátá-güedé, te ní táuchíuⁿ-güedé
caniha-güedé ndìhi tnudìi xii-güedé.

23 Te ní caniha-güedé, te dàtnùnì
ní chihi ñaha-güedé vecaá. Te ní
xáhaⁿ-güedé xii tée ndëchito vecaá
sá cádá cuèdadú víhí-dë cuendá ná
canú-güedé vecaá. 24 Te cuendá
sá dúcáⁿ nì cáháⁿ-güedé, núu té
ndëchito vecaá ní dáyãha ñaha-dë
ingá cuártú ndécú xítì vecaá, te ní
chihi-dé sáhá-güedé yaú nduhu, te ní
quide tii-dé.

25 Te dava niú ní cáháⁿ ndìhi té
Pãblú ndìhi té Silás Yã Ndiòxí, te
ní xita-güedé ndudú ní quide càhu
ñaha-güedé xii-gá. Te dava-gá cue té
yìhi vecaá ní xíndedóho-güedé nàcuáa
ní xita-güedé. 26 Te uuⁿni níhi víhi ní
tnáa ní quidi-xi ndéé cimientú vecaá,
te ní nacaáⁿ nchaa yèhe vecaá, te ní
ndìhi cadená ndútú cuè té yìhi vecaá
ní nandáxí. 27 Te ní ndiquíú cúnú
iní té ndëchito vecaá, te ní quide
cuendá-dé nchíi nchaa yèhe vecaá.
Te ní tava-dé machítì-dé cahni-dé
méé-dë ní cùu, chi ní cáháⁿ-dë sá ní
ndìhi cue té yìhi vecaá ní xinu ni
cùu. 28 Te té Pãblú ní cáháⁿ níhi-dé, te
xãhaⁿ-dë xii té ndëchito vecaá:

—Vá dúcáⁿ càda-n cahni-n mee-n,
chi nchaa-ni-ndí yìhi —càchí-dé
xãhaⁿ-dë xii té ndëchito vecaá.

29 Te dàtnùnì ní xícáⁿ té ndëchito
vecaá ñuhú, te xinu-dé cuánguihu xítì
vecaá núu yìhi té Pãblú ndìhi té Silás,
te quidi ñaha-ná-xi xii-dé ní quexìo-dé
ní ngüíñí xítì-dë núu-güedé. 30 Te
dàtnùnì ndécá ñaha-dé xii-güedé ní
ndee vecaá, te ní xícáⁿ tnúhú-dë
núu-güedé, te xãhaⁿ-dë:

—Nchòhó cachí tnúhu-ndo nãsa
cada-í naníhí tàhú-í —càchí-dé
xãhaⁿ-dë.

31 Te ní xáhaⁿ-güedé:

—Quindáa iní-n ndìhi ñadihí-n,
ndìhi landú-n, ndìhi nchaa ñáyiu
xinu cuechi núu-n tnúhu càháⁿ Xitohó
Jesucristú, te naníhí tàhú-ndó —
càchí-güedé xãhaⁿ-güedé.

32 Te ní dácuáhá ñaha-güedé xii
té ndëchito vecaá ndìhi nchaa
ñáyiu ndëcu vehe-dé tnúhu Yã Ndiòxí.

33 Te diu-ni òré-áⁿ nì naquete-dé
sátá-güedé núu nì ñani, te dàtnùnì
ní sandute-dé ndìhí-yu. 34 Te ndëca
ñaha-dé cuáháⁿ vehe-dé ní sãñaha-dë
sá nì xexi-güedé, te ní cudíi víhí iní
té ndëchito vecaá ndìhi nchaa-dé
vehe-dé sá nì tuhá-yu ichi Yã Ndiòxí.
Te cuándihu tucu té Pãblú ndìhi té
Silás vecaá.

35 Te nduu tnëé ní xáhaⁿ cuè té
cùchiuⁿ xii poleciá cuáháⁿ-güedé
cúu-güedé té ndëchito vecaá
queñuhu-dé úu cue té cuánguihu
ndedí nduu ìcu núhú-güedé. 36 Te
té ndëchito vecaá ní xáhaⁿ-dë xii té
Pãblú ndìhi té Silás:

—Cue té cùchiuⁿ ní cachí-güedé sá
quéé-ndó nùhú-ndó, chi ñá túu-gã ná
cada-güedé, chi sa ní yáha cuendá-ndó
—càchí té ndëchito vecaá xãhaⁿ-dë
xii-güedé.

37 Te té Pãblú ní xáhaⁿ-dë xii cue té
cùu poleciá:

—Té ròmá cúu-ndí, te vá cúu
dúcaⁿ-ni cunduu, chi ní caniha-güedé
tnudìi xii-ndí, te ní xiní-yu nchaá-yu.
Te ñá túu tnàhí ní xícáⁿ tnúhú-güedé
nùu ndáá ndëcuéchi-ndí àdi ñáhá, chi
cuendá-ni ní chihi ñaha-güedé vecaá
xii-ndí. Te vitna cuínì-güedé dacacu

ñaha-güedě nùhú-ndí cuendá sá vǎ yõ quini ñáhá nùhú-ndí cáháⁿ-güedě, dico vá cúú dùcaⁿ cada ñaha-güedé xii-ndí. Chí cuáháⁿ cúñaha-ndo na quixi mee-güedé queñuhu ñaha-güedě —càchí té Páblú xii-dé cue poleciá.

³⁸ Te cue téé cùu poleciá cuánuhú-güedé nùú ndécú cuè téé cùchiuⁿ, te ní xáhaⁿ-güedé nàcuáa ní cáháⁿ té Páblú. Te sá dúcáⁿ ñí xáhaⁿ pòleciá sá tée ròmá cúú-güedě, xíáⁿ ní yùhú-güedé.

³⁹ Te ní sáháⁿ cue téé cùchiuⁿ yehe vecaá, te ní xáhaⁿ-güedě sá cádá càhnu iní-güedé sá ñí chihi ñaha-güedě vecaá, te ní ndeñuhu ñaha-güedě vecaá. Te ní cáháⁿ ndàhú-güedé nùú cuè téé ní xíhi vecaá sá ndéé-güedě ñuú-áⁿ nùhú-güedé. ⁴⁰ Te ní ndee-güedé vecaá, te cuáháⁿ-güedé vehe tá Lidiá, te ní ndatnúhu-güedé ndíhi nchaa ñáyiú ní sándáá iní-xi tnúhu Jèsús, te ní xáhaⁿ-güedé xii-yu nàcuáa cadá-yu, te ío ní cudíí iní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiú ñuú Tesalónica

¹ Te ní yáha-güedé ñuú Ànfípolis ndíhi ñuú Apòloniá, te ní quexiò-güedé ñuú Tesalónica, te yàcáⁿ cáá ñí veñúhu ñáyiú isràél. ² Te ní sáháⁿ té Páblú veñúhu-áⁿ, chí ducaⁿ tnàhí quide-dé, te ndí tnahá nduu ndètatú-yu ní sáháⁿ-dé veñúhu-áⁿ ùñí xito. Te ní ndatnúhu ndíhi ñaha-dé xii-yu nàcuáa ní chídó tnùní cue téé ní xóo cáháⁿ tnúhu Yá Ndiõxí ndéé sanaha. ³ Te ní xítnúhu ñaha-dé nàcuáa ní cáháⁿ cue téé-áⁿ sá Crìstú Yaá tendaha Yá Ndiõxí quixi ñuyíú-a ndoho vîhi-gá, te cuú-gá, te ndoto-gá, te xáhaⁿ-dě:

—Te ñuú Jèsús cúú Crìstú Yaá ní tendaha Yá Ndiõxí ní quixi ñuyíú-a, nùú xíáⁿ càchí tnúhu-í vitna —càchí té Páblú xáhaⁿ-dě xii-yu.

⁴ Te dava ñáyiú isràél ní sándáá iní-yu tnúhu ní cáháⁿ té Páblú, te ní níhí tnáhã-yu ndíhi-dé, ndíhi té Silás. Te vâi ñáyiú griégú ñáyiú càháⁿ ndíhi Yá Ndiõxí ní sándáá iní-yu tnúhu Jèsús. Te ndècu titní ñáyiú dîhí ñáyiú

cùnuu, te ñáyiú-áⁿ tnàhá-yu ní sándáá iní-yu tnúhu-gá. ⁵ Te dava ñáyiú isràél ñá túú ní cùu váha iní-yu nùú té Páblú nùu ní ndúcü-yu cue téé cuihna iní-xi tuhíó-güedé cada chiúⁿ-güedé, chí ndí cuihnu ndí cuihnu-ni-güedé, te ñachaá-yu ndíhi cue téé-áⁿ ndí coyo ndí coyó-yu xícuáá-yu. Te sátá ní tecú dóho dava-gá-yu, te ní sáháⁿ tuhá-yu, te ío ní quide dùsáⁿ-yu. Te nísáháⁿ-yu vehe té Jàsón, te ní quide yicá-yu ní quíhu-yu vehe-dé nándúcú-yu té Páblú ndíhi té Silás cuendá queñuhu ñáhã-yu nùú nchàa ñáyiú. ⁶ Te ñá ní nàníhí ñáhã-yu xii-güedé, nùú xíáⁿ ní tní-yu té Jàsón ndíhi ñí ùú-gá cue téé sándáá iní tnúhu Jèsús, te tãñuhu ñáhã-yu xii-güedé cuáháⁿ nùú cuè téé cùchiuⁿ. Te òré ní quexiò-yu nùú ndécú cuè téé cùchiuⁿ, te ní ngüíta-yu ní cuáá-yu, te xáhãⁿ-yu xii-güedé:

—Ní quexiò cue téé-áⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú nùú xicá cùu-güedé. ⁷ Te té Jàsón-áⁿ ní xáhaⁿ-dě sá cúú cùndecu-güedé vehe-dé, te ñá túú sándáá iní-güedé nàcuáa càháⁿ té Cèsár téé yindaha cuéhé nacióⁿ, te càchí-güedé sá ndécú ñngá téé cùnuu-gá tucu nàni-dé Jèsús —càchí-yu xáhãⁿ-yu xii cue téé cùchiuⁿ.

⁸ Te sátá dúcáⁿ ñí cáháⁿ-yu, te ní cudééⁿ víhí cuè téé cùchiuⁿ ndíhi dava-gá ñáyiú ndèdóho. ⁹ Te vâi díhúⁿ ñí xicáⁿ cue téé cùchiuⁿ nùú té Jàsón ndíhi dava-gá cue téé cuáháⁿ ndíhi-dé cuendá té Páblú ndíhi té Silás, te nùu na ndèe-güedé nùhú-güedé, te nacuañaha cuè téé cùchiuⁿ díhúⁿ-güedě.

Té Páblú ndíhi té Silás ndécú-güedé ñuú Bèreá

¹⁰ Te òré ní cundiquiⁿ, te ní quide ndee iní ñáhã ñáyiú sándáá iní tnúhu Jèsús xii té Páblú ndíhi té Silás, te ní xica-güedé cuáháⁿ-güedé ñuú Bèreá. Te ñuú-ni nduu ñí sáá-güedé yàcáⁿ ní sáháⁿ-güedé veñúhu ñáyiú isràél. ¹¹ Te váha-gá iní ñáyiú ñuú Bèreá dàcúúxí ñáyiú ñuú Tesalónica, chí ío ní cudíí iní-yu ní xíndedóho-yu tnúhu Jèsús,

te #ⁿ nduu #ⁿ nduu ní dácuahã-yu tñúhu ní chídó tñùnì cue téé ní xóo cáháⁿ tñúhu Yá Ndiöxí ndéé sanaha cuëndá cuiní-yu quini-yu núu ndáá cáháⁿ té Páblú ndihì té Silás. ¹² Te titní ñáyiú isràél ní sándáá iní-yu tñúhu-gá ndihì titní cue téé griégú ndihì ñáyiú dñhì ñáyiú cùnúu ní sándáá iní-yu. ¹³ Te ñáyiú ñáyiú isràél ndécü-yu ñúú Tesalónica, te ñáyiú-áⁿ ñí ñíhì-yu tñúhu sá ndécú tẽ Páblú ndihì té Silás ñúú Bèréá cáháⁿ-güedé tñúhu Yá Ndiöxí, núu xiáⁿ ní sáháⁿ-yu ñúú Bèréá ní dácüandèhndé-yu núu nchàa ñáyiú vátá dácüaha-gá. Te ñáyiú-áⁿ ñí sándáá iní-yu tñúhu ndehnde te ní cudééⁿ víhì-yu núu-güedé. ¹⁴ Te òré-áⁿ ñí xáhaⁿ ñáyiú sándáá iní tñúhu-gá xii té Páblú sá quihíⁿ-dé yuhu lámár, te ní xica-dé cuáháⁿ-dé, te té Silás ndihì té Timùteú ní quendóo-güedé ñúú Bèréá. ¹⁵ Te #ⁿ üü-güedé cuáháⁿ ndihì-güedé té Páblú, te ndèca ñaha-güedé cuáháⁿ ndéé ñúú Àtenás, te ní xáhaⁿ tẽ Páblú xii-güedé:

—Núu na nùhú-ndó, te cúu-ndo tẽ Silás ndihì té Timùteú ná quixí ndihì-ni-güedé nanítnáhá-ndí iha — cächí-dé xáhaⁿ-dè.

Te ní xica-güedé cuánuhú-güedé.

Té Páblú ndécü-dé ñúú Àtenás

¹⁶ Te ñúú Àtenás ndétú tẽ Páblú quihíⁿ té Silás ndihì té Timùteú. Te yacáⁿ ní xiní-dé sá ìo cuéhé sã cächí-yu cùu ndiöxí-yu ndècu te ñá ndáá sá díú ndiöxí cúu-xí, te xiáⁿ ñá túu ní cùu váha iní-dé, chi ñá tñàhá iní-dé nàcuáa quidé-yu. ¹⁷ Te ní sáháⁿ-dé veñúhu ní cáháⁿ ndihì-dé ñáyiú isràél ndihì ñáyiú dáva-gá ñáyiú cáháⁿ ndihì Yá Ndiöxí. Te #ⁿ nduu #ⁿ nduu sáháⁿ-dé xití ñúú cáháⁿ-dé tñúhu-gá ndihì nchaa ñáyiú xica cuu yacáⁿ. ¹⁸ Te cue téé cùu epicureú ndihì cue téé cùu estoicú, cue téé-áⁿ ñí ndatnúhu-güedé ndihì té Páblú, te ñáyiú dáva-güedé xitnàha-güedé:

—¡Ná tñúhu víhì cáháⁿ téé lùcú-ãⁿ! — cächí-güedé xitnàha-güedé.

Te ñáyiú dáva-güedé xitnàha-güedé:

—Sàni iní-ndí sá cáháⁿ-dé cuëndá ndiöxí sá vátá quini-gá-ó — cächí-güedé xitnàha-güedé.

Te ducaⁿ xitnàha-güedé, chi cáháⁿ té Páblú tñúhu Jèsús, te ní cáháⁿ-dé nàcuáa ní dándótó ñaha Yá Ndiöxí xii-gá, xiáⁿ núu ducaⁿ xitnàha-güedé. ¹⁹ Te ndèca ñaha-güedé xii té Páblú cuáháⁿ #ⁿ xichi núu nání Àreópagú, te ní xáhaⁿ-güedé xii-dé:

—Cächí tñúhu ndáá-n ñáyiú cuáháⁿ tñúhu cáháⁿ-n, chi na cùtnuní ndáá iní-ndí, ²⁰ chi ducaⁿ-ni cáháⁿ-n tñúhu sá ñá túu sácündèdóho-ndí, te cuiní-ndí cächí tñúhu ndáá-n ñáyiú ndúu tñúhu-áⁿ cuëndá cùtnuní váha iní-ndí — cächí-güedé xáhaⁿ-güedé xii-dé.

²¹ Te nchaa ñáyiú ñúú Àtenás ndihì ñáyiú dáva-gá ñúú, mee-ni tñúhu saa cuiní-yu cáháⁿ-yu, nchaa sá vátá cündèdóho-gá-yu cuiní-yu cündèdóho-yu.

²² Te té Páblú ní ngúnutñí-dé núu xixúcu-yu nchaa-yu, te xáhaⁿ-dè:

—Nchòhó cue ñáyiú ñúú Àtenás, cündèdóho-ndo nchàa tñúhu na cáháⁿ-í-a. Ío quide cahnu nchóhó sá cächí-ndó cùu ndiöxí-ndó. ²³ Te vitna ní quexiò-í ñúu-ndó, te ní xiní-í sá yàyacáⁿ ndécú nchàa sá cächí-ndó cùu ndiöxí-ndó cáháⁿ ndihì-ndo. Te ní xiní-í #ⁿ xichi núu ndéé tñuní quidé cahnu-ndo Yá Ndiöxí Yaá ñá túu xiní-ndó, te ñáyiú ducaⁿ cáháⁿ lètrá ndéé tñuní xiáⁿ, te cächí-xi: “Iha quide cahnu-ndí Ndiöxí sá ñá túu xiní-ndí”, duha cáháⁿ lètrá-áⁿ. Te quide cahnu-ndo Yá Ndiöxí cáháⁿ-ndó, dico ñá túu xiní-ndó ñáyiú càa-gá, te yúhú xiní ndáá-í nàcuáa càa Yá Ndiöxí, chi ñáyiú Yá Ndiöxí cáháⁿ ndihì-í, te ñáyiú tñúhu-gá cáháⁿ-í vitna.

²⁴ Te ñáyiú Yá Ndiöxí ní cadúha-gá ñuyíú-a ndihì nchaa sá ìó, núu ñáyiú-gá cúu Xitohó ñuyíú-a ndihì andíu. Te ñá túu xiní ñáyiú-gá vehe dàcaa ñáyiú ñuyíú-a cundecu-gá. ²⁵ Te ñá túu xiní ñáyiú-gá ñáyiú chindee ñáhá-yu xii-gá, chi mee-gá quidé-gá nchító-ó ndècu-o te tàxi-gá yócó tächí-ó ndihì nchaa sá xiní ñáyiú-o.

26 Te ndéé sanaha nĩ cadúha-gá ñndi-ni téé, te ñu-ni níñi-dě cúú ñáyi ndècu nìcaxico ñuyíú. Te ñu-ni mee Yá Ndióxi ní xáhaⁿ-gã nchaa núú cùndécú-yu, te mee-gã ní cáháⁿ-gá ná daha cuiá cudí nchaa nacióⁿ ndihí mée-yu. 27 Te cuini-gá sá ncháá ñáyi nanducu ñahá-yu cáháⁿ ndihí ñahá-yu xii-gá, te mee-gã ndécú túha-gá sá cáháⁿ ndihí ñaha-gã xii-yu ññⁿ ññⁿ-yu. 28 Te ñu-ni Yá Ndióxi xító ñaha-gá xii-yu núú cùdí-yu ndécú-yu te càndá-yu. Te duha ní cáháⁿ ññⁿ ññaní tñahá-ndó, téé ní cutnùní iní-xi ní xíndecu ndéé sanaha, te ní xáhaⁿ-dě xii-yu: “Nchaa-o cùu-o déhe Yá Ndióxi”, duha ní xáhaⁿ-dě xii-yu. 29 Te núú déhe Yá Ndióxi cúú-yu ncháá-yu, te vá cúú cáháⁿ-yu sá Yá Ndióxi cúú sá nĩ cadúha-yu ndahá-yu. Te sá nĩ cadúha-yu cùu ndiúxi-yu-áⁿ, dava cùu-xi díhúⁿ cuááⁿ, dava cùu-xi díhúⁿ cuixíⁿ, dava cùu-xi yúú. Te mée-yu ní cahu iní-yu nacuáa cunduu sá cúú ndiúxi-yu. 30 Te cùtnàhá ñá túú ní cùtnuní iní-yu sá nèhé ní quidé-yu ní cadúha-yu nchaa xíáⁿ, te ñá túú ní quide cuendá Yá Ndióxi sá dúcáⁿ nĩ quidé-yu. Te vitna cachi Yá Ndióxi sá dáñá nchaa ndi túhú-yu nchaa sá cuéhé sá dúhá quidé-yu. 31 Te Yá Ndióxi náhá-gã ná nduu cùndecu nchaa ñáyi núú-gã, te mee-gã sa ñaha-gá ndëndida càa ñáyi ní quide váha, te ndëndida càa ñáyi ñá túú ní quide váha. Te mee-gã ní xáhaⁿ-gã xii Déhe-gá Yaá nání Jèsús cùñaha-gã xii-yu núú ndëndida càá-yu ní quide váha te ndëndida càá-yu ñá túú ní quide váha. Te mee Jèsús cáháⁿ ndáá cuiti-gá, te sa ñaha-o sá ncháá xíáⁿ cada Jèsús, chi ñu cuendá-áⁿ nĩ dándótó ñaha Yá Ndióxi xii-gá —cachi té Páblú xáhaⁿ-dě xii-yu.

32 Te òré ní cáháⁿ té Páblú sá nĩ ndoto Jèsús, te dava ñáyi ñá ní tñahá iní-xi tñuhu ní cáháⁿ-dé ní cáháⁿ yíchi-yu. Te dáva-yu ní xáháⁿ-yu xii-dé:

—Te ingá xito quixi-n, te cáháⁿ tucu-n tñuhu ní cáháⁿ-n vitna — cachi-yu xáháⁿ-yu xii-dé.

33 Te ní xica-dé cuáháⁿ-dé. 34 Te dava ñáyi ní xíndedóho tñuhu ní cáháⁿ té Páblú ní sándáá iní-yu Jèsús, te ní chindee tñuhu ñahá-yu xii-dé. Te ññⁿ téé cùchiuⁿ Areópagú nání-dě Níxú ndihí ññⁿ ñadihí nání-áⁿ Damarís, tñahá-yu ní sándáá iní-yu tñuhu-gá ndihí dava-gá-yu.

18

Té Páblú ndécú-dě ñuú Còrintú

1 Te té Páblú ní quee-dé ñuú Atenás cuáháⁿ-dé ñuú Còrintú. 2 Te yacáⁿ ní naníhí tñahá-dě ndihí ññⁿ téé israél nání-dě Àquilú, te téé-áⁿ cúú-dě téé distritú Pòntó, te ní xíndecu-dé ndihí ñadihí-dé tá Priscilá ñuú Rómá. Te té Césár téé yíndaha cuéhé nacióⁿ, téé nani Claudiú ní xáhaⁿ-dě sá vá cúú-gã cundecu ñáyi israél ñuú Rómá, te xíáⁿ núú ní ndee té Àquilú ndihí ñadihí-dé cuáháⁿ-yu ñuú Còrintú. Te sácú-ni nduu ní cuu sá ní quexió-yu ñuú-áⁿ, te ní sáháⁿ té Páblú ní ndatnúhu ndihí ñaha-dě xii-yu vehé-yu. 3 Te ní xáháⁿ-yu sá cùndecu-dé cada chiúⁿ ndihí ñahá-yu, chi ññⁿ-ni chiúⁿ quide-dé ndihí-yu, te ní xóo dacáá-yu vehe dóó. Te núú xíáⁿ ní xíndecu ndihí ñaha té Páblú ní quide chiúⁿ ndihí ñaha-dé xii-yu. 4 Te núú ùná núú ùná nduu, nduu ndetatú-yu, ní xóo quíhíⁿ-dé veñuhu ñáyi israél. Te ní ndatnúhu-dé ndihí ñáyi israél ndihí ñáyi ñá túú cùu ñáyi israél, te ní xáhaⁿ-dě sá quíndáá iní-yu tñuhu Jèsús.

5 Te té Silás ndihí té Timùteú ní quee-güedé distritú Macèdoniá cuáháⁿ-güedé núú ndécú té Páblú. Te òré ní quexió-güedé, te ní cáháⁿ-ni té Páblú tñuhu Yá Ndióxi núú ñáyi israél, te xáháⁿ-dě xii-yu sá Jèsús cúú-gã Crístú Yaá ní tendaha Yá Ndióxi ní quixi ñuyíú-a. 6 Te sá dúcáⁿ nĩ cáháⁿ-dé núú ní nää ndihí ñahá-yu xii-dé, te ní cáháⁿ cuéhé-yu cuendá-dé, núú xíáⁿ ní naquidi-dé dóó-dě. Te ducaⁿ nĩ quide-dé cuendá sá cùtnuní iní-yu sá ñá ní tñahá iní-dé

nàcuáa ní cáháⁿ-yu, te ní xáhaⁿ-dě xií-yu:

—Yúhú ñá túú cuèchi-í, te núu ní xíta nihnu-ndo, xíãⁿ quèndóo cuèchi mee-nã-ndó. Te vitna quíhíⁿ-í cáháⁿ ndihí-í ñáyiu ñá túú cùu ñáyiu isràél, te vá nándücu-gá-ínchòhó ñáyiu isràél cáháⁿ ndihí ñaha-í xii-ndo —càchí-dé xáhaⁿ-dě xií-yu.

⁷ Te ní xica-dé cuáháⁿ-dé vehe ñⁿ téé nàni Justú, te téé-áⁿ ndécú yàtni-dé núu cáá veñúhu, te tnahá-dé càháⁿ ndihí-dé Yá Ndiöxí. ⁸ Te té Crispú téé yìndaha veñúhu-áⁿ ñí sándáá iní-dé Jèsús ndihí ñadìhí-dé ndihí landú-dé. Te vài ñáyiu ñuú Còrintú ní sáháⁿ-yu ní xíndedóho-yu tnúhu-gá, te ní sándáá iní ñáhã-yu xii-gá, te ní sanduté-yu. ⁹ Te ñⁿ níu ní cáháⁿ saní té Páblú sá ñí xáhaⁿ Yá Ndiöxí xii-dé:

—Cáháⁿ-ni-n tnúhu-í, te vá yùhú-n nchàa tnúhu cuèhé tnúhu duha càháⁿ ñáyiu, ¹⁰ chi yúhú chindee ñaha-í xii-n, te vá yõo ñⁿ cada úhú ñáhã xii-n, te vài-gá ñáyiu ñuú-áⁿ quèndáá iní-yu tnúhu-í —càchí-gá xáhaⁿ-gã núu saní-dé.

¹¹ Te ñuú Còrintú ní xíndecu té Páblú ñⁿ cuíá dava, te mee-ní tnúhu Yá Ndiöxí ní xóo dacuàha-dé ñáyiu.

¹² Te ndècu-gá-dé ñuú-áⁿ ñí ngóo té Gàlìón chiùⁿ taxi tnuní-dé distritú Acáyá. Te dàvá-áⁿ ñí cudééⁿ ñáyiu isràél núu tẽ Páblú, te ní tñi ñahã-yu xii-dé ndécá ñahã-yu cuáháⁿ núu cuè téé cùchiuⁿ. ¹³ Te ní xáháⁿ-yu xii té Gàlìón téé cùu gobiernú:

—Téé-a ní quexìo-dé ñuú-ó xica cuu-dé te cuìní-dé dandàhú ñáhã-dé chitnahá-ndí-dé cada-ndí nàcuáa quide-dé quidé càhnu-dé Ndiöxí-dé, te daña-ndí vá cádá-gã-ndí nàcuáa càháⁿ tnúhu sá sánú ìchi ñaha xii-o nacuáa cundecu-o cuìní-dé —càchí-yu xáháⁿ-yu xii téé cùu gobiernú.

¹⁴ Te té Páblú cuìní-dé caní-dé cuèndú ní cùu, te ní nguíta té Gàlìón càháⁿ-dé, te xáhaⁿ-dě xií-yu:

—Nchòhó ñáyiu isràél, cundedóho-ndo tnúhu na càháⁿ-í-a. Te núu ndècu núu ñⁿ cuèchi ní quide-dé àdi ní sahani-dé ñⁿ ndíyí, te cuu cundáá-xi iha, te cáháⁿ-ndó ñuú nándi cùu sá ñí

quide-dé, ¹⁵ àdi dico-ni sá ñⁿ tnúhu ní cáháⁿ-dé, te yáchí-gá chí cuáháⁿ yàcáⁿ ndatnúhu-ndo núu méé-ndó, chi mee-ni sã ñà túú quide-dé nàcuáa càháⁿ tnúhu sá sánú ìchi ñaha xii-ndo càháⁿ-ndó, te yúhú ñá túú tnahá iní-í cada ndáá-í nchaa xíãⁿ —càchí-dé xáhaⁿ-dě.

¹⁶ Te ní cudééⁿ-dè, te ní ndeñuhu ñaha-dé xií-yu vechiùⁿ. ¹⁷ Te ñáyiu ñá túú cùu ñáyiu isràél ní tñi-yu té Sòstenés téé yìndaha veñúhu ñáyiu isràél, te ndèhe té Gàlìón téé cùu gobiernú ní canihá-yu xii-dé, dico ñá túú tnahí ná tnúhu ñí càháⁿ-dé tauni-hnu-dé téé ní caní-yu-áⁿ.

Té Páblú cuáháⁿ tucu-dé ñuú Antiòquiá, te yàcáⁿ ní xica tucu-dé cuáháⁿ-dé dava-gá ñuú càháⁿ-dé tnúhu Yá Ndiöxí

¹⁸ Te titní-gá nduu ní xíndecu té Páblú ñuú Còrintú, te ní quide ndee iní-dé nchaa ñáyiu ní sándáá iní-xi tnúhu Jèsús, te ní tñi-dé ìchi cuáháⁿ-dé distritú Sirjá ndihí té Àquilú ndihí ñadìhí té Àquilú-áⁿ tã Priscilá, te ní quexìo-yu ñuú Cèncreá. Te cùmání-gã tñi-yu ìchi quíhíⁿ-yu ñuú Éfesú, te ní dèté díquí tẽ Páblú, chi ducaⁿ ñí xáhaⁿ-dě xii Yá Ndiöxí sá ndéé xínu ñⁿ chiùⁿ ní saní iní-dé cada-dé cuèndá-gá, te dàtnùní dètè-dé. Te ní quée-yu bàrcú cuáháⁿ-yu. ¹⁹ Te ní quexìo-yu ñuú Éfesú, te yàcáⁿ ní xáhaⁿ tẽ Páblú sá cùndècu té Àquilú ndihí ñadìhí-dé, te mee-dè quíhíⁿ-dé dava-gá ñuú. Te cùmání-gã caca-dé quíhíⁿ-dé, te ní sáháⁿ-dé veñúhu ñáyiu isràél ní ndatnúhu ndihí ñaha-dé xií-yu. ²⁰ Te ní xáháⁿ-yu sá cùndècu-dé titní nduu, te ñá ní cuìní-dé cundecu-dé. ²¹ Te ní xáhaⁿ-dè:

—Núhú-í chi dacuítí xini ñuhu-xi cundecu-í vico coo ñuú Jerusalén, te quixi tucu-í te núu Ndiöxí ná càchí-gá, te vitna chí cádá ndèe iní —càchí-dé xáhaⁿ-dè xií-yu.

Te ní quée-dé bàrcú cuáháⁿ-dé. ²² Te ní quexìo-dé ñuú Cèsareá, te ní quene-dé bàrcú, te ní xica-dé

cuánuhú-dé ñuú Jerusàlén, te ní ndexìo-dé, te ní dándácõ váha-dé ñáyiú ndècu ichi Yá Ndiõxí, te dătnùní ní xica-dé cuáháⁿ-dé ñuú Antiòquia. ²³ Te yàcáⁿ ní xíndecu-dé titní nduu, te dătnùní ní tñi-dé ichi cuáháⁿ-dé. Te ní sáháⁿ-dé ñihí distritú Gálaciá ñihí distritú Frigiá. Te ndi tnahá ñuú ní sáháⁿ-dé ní cáháⁿ-dé ñihí ñáyiú sándáá iní tñuhu Yá Ndiõxí, te ní ndúcú ndéé-gă-yu ní quidé-yu nchaa năcuáa ní xáhaⁿ-dê cadá-yu.

Té Àpolós càháⁿ-dé tñuhu Yá Ndiõxí ñuú Éfesú

²⁴ Te dává-áⁿ ñi quèxio ñⁿ téé isràèl ñuú Éfesú, te nàni-dé Àpolós, te cùu-dé téé ñuú Alejándriá, te ío váha túha-dé tñuhu Yá Ndiõxí, te ío váha ñuhu díquí-dê năcuáa cáháⁿ-dé, ²⁵ chi sa xini-dé năcuáa ní xóo cáháⁿ ndíi Juáa cútnàhá ní xóo dacuándute ndíi ñáyiú. Te ío ní cudíí iní-dé ní cáháⁿ-dé nchaa năcuáa ní cuu cuendá Jèsús, dico vátá dăcuàha-gá-dé nchaa tñuhu ní cáháⁿ méé Jèsús. ²⁶ Te ní sáháⁿ-dé veñúhu ñáyiú isràèl, te yàcáⁿ ní cáháⁿ-dé ni yuhu ni iní-dé. Te ndècu té Àquilú ñihí ñadìhí-dé tá Priscilá ndèdóho-yu tñuhu ní cáháⁿ-dé, te ní xáhăⁿ-yu sá quihíⁿ-dé vehé-yu, te ní sáháⁿ-dé, te ní xítnñuhu ñáhăⁿ-yu xii-dé dava-gá tñuhu Yá Ndiõxí sá ñà túú xini-dé. ²⁷ Te ní cachí té Àpolós sá quihíⁿ-dé distritú Acáyá, núu xiăⁿ ní cadúha ñáyiú ñuú Éfesú ñⁿ tutú canehe-dé quihíⁿ ndaha ñáyiú sándáá iní tñuhu-gá xíndecu Acáyá. Te xáhăⁿ-yu núú tütú-yu: “Cáháⁿ váha-ndo ñihí té Àpolós ñuú ní quèxio-dé”, cächí-yu xáhăⁿ-yu núú tütú-yu. Te ní xica-dé cuáháⁿ-dé, te ní quèxio-dé Acáyá. Te nchaa ñáyiú sándáá iní tñuhu-gá yàcáⁿ, diu-ni mee Yá Ndiõxí ní chindee ñàha-gá ní sándáá iní ñáhăⁿ-yu xii-gá. Te té Àpolós ío váha ní cáháⁿ-dé tñuhu Yá Ndiõxí núu-yu, te xiăⁿ ío ní ndúcú ndéé-gă-yu ní quidé-yu chiúⁿ-gá. ²⁸ Te té Àpolós ní ndatnúhu-dé ñihí ñáyiú isràèl, te ní xíndedóho dava-gá-yu. Te ío váha ní cani-dé cuendú nchaa năcuáa ní xóo

cáháⁿ cue téé ndéé sanaha sã quíxí Crìstú ñuyíú-a. Te ní cáháⁿ ndáá-dé ní xáhaⁿ-dê sá díú-ní Jèsús cúú-gă Crìstú Yaá ní tendaha Yá Ndiõxí ní quixi ñuyíú-a. Te ñáyiú isràèl xíndatnúhu-yu sá ñă ndáa năcuáa càháⁿ-dé, dico ñá ní ñihí-yu tñuhu cúñáhăⁿ-yu xii-dé, chi ío váha ñuhu díquí-dê tñuhu cáháⁿ-dé.

19

Té Păblú ndécú-dê ñuú Éfesú

¹ Te cútnàhá ndécú-gă té Àpolós ñuú Còrintú, te ní xica té Păblú cuáháⁿ-dé tá yăha-dé mee-ni xiti yucu cuáháⁿ, te ní sáá-dé ndéé ñuú Éfesú. Te ñuú-áⁿ ñi naníhí tñáhăⁿ-dê ñihí cue téé sándáá iní tñuhu Jèsús. ² Te ní xicáⁿ tñuhú-dê núu-güedê, te xăhaⁿ-dê:

—¿Sa ní quèxio Espiritú Yá Ndiõxí ní ngúndecu ñihí-ndo ndéé òré ní sándáá iní-ndo Jèsús-ăⁿ? —cächí-dé xăhaⁿ-dê xii-güedê.

Te ní xáhaⁿ-güedê:

—Ñá túú xini-ndí sá ío Espiritú Yá Ndiõxí —cächí-güedê xăhaⁿ-güedê xii-dé.

³ Te ní xáhaⁿ tucu-dé:

—¿Nása ní cáháⁿ téé ní dăcuándute ñaha xii-ndo-i? —cachí-dé xăhaⁿ-dê xii-güedê.

Te ní xáhaⁿ-güedê:

—Ní cáháⁿ-dé năcuáa ní xóo cáháⁿ ndíi Juáa —cächí-güedê xăhaⁿ-güedê xii-dé.

⁴ Te ní xáhaⁿ tē Păblú:

—Ndíi Juáa ní dăcuándute ñaha ndíi xii ñáyiú, chi ní cuini-yu sá dáñă-yu nchaa sá cuèhé sá dúhá quidé-yu. Te ní xáhaⁿ ndíi xii-yu: “Quíndáá iní-ndo tñuhu Jèsús chi dăcuití quixi-gá ñⁿ nduu”, duha ní xáhaⁿ ndíi Juáa xii-yu —cächí té Păblú xăhaⁿ-dê xii-güedê.

⁵ Te sá dúcáⁿ ñi cáháⁿ té Păblú xăhaⁿ-dê xii-güedê, núu xiăⁿ ní sandute-güedê năcuáa ní dándõo tñuhu Jèsús. ⁶ Te ní sacáⁿ ndodo té Păblú ndahá-dé díquí-güedê, te òré-ni ní quèxio Espiritú Yá Ndiõxí ní ngúndecu ñihí-güedê, te ní ngúita-güedê ní cáháⁿ-güedê tñuhu sá dăcàhu iní ñáhăⁿ Espiritú-gá, tñuhu sá ñà túú xini-güedê cáháⁿ-güedê,

te ní cáháⁿ-güedé tnúhu Yá Ndiöxí nàcuáa ní dácáhu ínì ñáhá Espiritú-gá xii-güedé. ⁷ Te cùu datná úxúú tnàhá-güedé.

⁸ Te té Páblú ní sáháⁿ-dé veñúhu ñáyiú isràél ní cáháⁿ ndihí-dé-yu, te únì yóó ñí xínu ní xica cuu-dé veñúhu-yu. Te ío váha ñùhu díquí-dé tnúhu cáháⁿ-dé, núu xiáⁿ ní cuyí-dé ní cáháⁿ-dé, te ní xáhaⁿ-dè sá quindáa iní-yu tnúhu Jèsús, te ducaⁿ te ndihu ndaha ñàha Yá Ndiöxí xií-yu.

⁹ Te davá-yu ío sàa iní-yu ñá ní cuínì-yu quindáa iní-yu, te ío ní cáháⁿ cuèhé-yu cuendá Jèsús xití veñúhu núu dàva-gá-yu. Te té Páblú ní ndee-dé veñúhu cuáháⁿ-dé ndihí ñáyiú sàndáa iní tnúhu Jèsús. Te ìⁿ nduu ìⁿ nduu ní sáháⁿ-dé scuèlà té Tiranú ní dácúhá ñàha-dé xií-yu.

¹⁰ Te úu cuiá ducaⁿ ñí sáháⁿ-dé scuèlà ní dácúhá-dé ñáyiú. Te nchaa ñáyiú isràél ñáyiú ndècu nihií distritú Àsiá ndihí nchaa ñáyiú ñá túú cùu ñáyiú isràél ní xíndedóho-yu tnúhu Jèsús.

¹¹ Te té Páblú ío ní chindee ñàha Yá Ndiöxí xii-dé ní quide-dé vèi núu sá vã yòo tnàhí ndàcu cada. ¹² Te pañú díquí-dé ndihí dóó cándèé núu yíquí-dé ní xicáⁿ-yu nèhé-yu ní sáháⁿ núu ndécú ñáyiú cùhú, te xiáⁿ ní tñí ñáyiú cùhú ndihí ñáyiú yíhi ñàha espíritú cùndihí yucu ñávãha, te ní ndúha-yu.

¹³ Te ñuú Isràél véxi cue téé tatna xica cuu-güedé quidé tátna-güedé ñáyiú yíhi ñàha espíritú cùndihí yucu ñávãha. Te ní ngüíta-güedé ní cacu nèhe-güedé Jèsús cuendá quee espíritú-áⁿ yíqui cùñú-yu, te ní xáhaⁿ-güedé:

—Xocuñí-n, chi càchí Jèsús sá vã cùndècu ndihí-gá-n tée-a. Te ñu-ni Jèsús cacú nèhe té Páblú òré cáháⁿ-dé tnúhu-gá —càchí-güedé xáhaⁿ-güedé xii espíritú-áⁿ.

¹⁴ Te úsá tnàhá-güedé ducaⁿ ñí xóo cada-güedé. Te tátá-güedé ní xínani-dé Èsevã, te téé-áⁿ ñí cuu-dé dútú cùnùu. ¹⁵ Te sá dúcáⁿ ñí

cáháⁿ-güedé, te ní xáhaⁿ espíritú cùndihí yucu ñávãha-áⁿ xii-güedé:

—¿Te ná cúu nchòhó ñuú dayùhú ñáhá-ndó? Te xínì-í Jèsús, te xínì-í yoo cùu té Páblú, te nchòhó ñá túú xínì ñàhá-í xii-ndo —càchí espíritú-áⁿ xáhaⁿ-xi xii-güedé.

¹⁶ Te téé yíhi ñàha espíritú cùndihí yucu ñávãha-áⁿ ñí ndanchita-dé ní tñí-dé cue téé quide tátna-áⁿ, te ní ndihí dóó-güedé ní ndátá-dé, te ní dánicuehé ñáhá-dé xii-güedé, te ní xínu-güedé cuáháⁿ-güedé. ¹⁷ Te nchaa ñáyiú isràél ndécú ñuú Éfesú ndihí dava-gá ñáyiú ndècu ñu-ni ñuú-áⁿ ñí níhi-yu tnúhu nàcuáa ní cuu, te ío ní yùhú-yu, te vèi-yu ní cachí sá ño càhnu cuu Xítòhó Jesucristú.

¹⁸ Te dava ñáyiú ní sàndáa iní-xi tnúhu Jèsús ní sáháⁿ-yu núu ndécú té Páblú, ndihí núu ndécú nchaa ñáyiú ní sàndáa iní tnúhu-gá ní náhmá-yu nàcuáa ní xóo cada-yu. ¹⁹ Te titní ñáyiú ní xóo cada ndùu nehé-yu tutú-yu ní sáháⁿ núu ndécú nchaa ñáyiú sàndáa iní-xi tnúhu-gá, te yacáⁿ ní ndada cuendá-yu sá ño yahu ní sáha-yu tutú-yu, chi ndéé údico úxí míl díhúⁿ cuixíⁿ ní sáha-yu núu ncháá. Te ncháá-yu ní sahmí-yu tutú-yu. ²⁰ Te sátá ñí cáyú nchaa tutú-áⁿ, te vèi-gá ñáyiú ní tuhá-yu ichi Yá Ndiöxí, te ní sáha-yu cuendá sá ño xínì ñuhu tnúhu Yá Ndiöxí.

²¹ Te ní cachí té Páblú sá quíhíⁿ-dé distritú Macèdoniá ndihí distritú Acáyá, te dàtnùnì núhú-dé ñuú Jerusalén, te ducaⁿ te dàtnùnì quíhíⁿ-dé ñuú Rómá. ²² Te ndècu ndihí-dé té Timùteú ndihí té Èrastú cue téé chindee ñàha xii-dé. Te té Páblú ní xáhaⁿ-dé xii-güedé sá códo ñuú-güedé quíhíⁿ Macèdoniá, te ní xica-güedé cuáháⁿ-güedé, te mee-dé ní quendóo-dé.

Ñáyiú Éfesú ío dusaⁿ quidé-yu ñuú-yu

²³ Te dàvá-áⁿ ño ní cudééⁿ-yu núu nchaa ñáyiú ní tuha ichi Yá Ndiöxí. ²⁴ Te ìⁿ téé ñuú Éfesú nánì-dé Demètriú. Te téé-áⁿ ñí xóo

canehe chiuⁿ-dé mee-ni dǐhúⁿ cuixíⁿ ní xóo cadúha-dé veñúhu líhli, dàtná cuiní-ndó càa veñúhu Diàná sá cúu ndiöxí-yu. Te vai díhúⁿ ní xóo níhí-dé ndihí cue téé ní xóo cada chiuⁿ ndihí-dé. ²⁵ Te ní cana-dé cue téé quide chiuⁿ ndihí-dé, ndihí nchaa cue téé quide chiuⁿ ndihí díhúⁿ cuixíⁿ, te ní xáhaⁿ-dē xii-güedé:

—Nàha-ndo sá ïo váha nihí-ó díhúⁿ cuendá chiuⁿ quide-o. ²⁶ Te nàha-ndo sá càchí té Pàblú sá ñà díú ndiöxí cúu sá ní cadúha ñáyiú ñuyíú-a. Te ducaⁿ càháⁿ-dé ñuu-ó, te ducaⁿ-ni càháⁿ-dé nihí distritú Àsiá, te ío-gá vai ñáyiú sàndáá iní tnúhu càháⁿ-dé. ²⁷ Te ío úhú nùu na cuíta chiuⁿ quide-o, vá yõo-gá cuaaⁿ sá cadúha-o. Te ngüíta-yu càháⁿ-yu sá veñúhu Diàná ñá túu càváha, te vá cadá càhnu-gá-yu sàndú-ó. Te nàha-ndo sá ïo càhnu cuu Dianá, chi nchaa ñáyiú distritú Àsiá quidé càhnu ñahá-yu ndihí ñáyiú xĩndecu ní càa xico ñuyíú —càchí té Demètriú xáhaⁿ-dē xii-güedé.

²⁸ Te sá dúcáⁿ ní càháⁿ té Demètriú, xíⁿ ní cudéⁿ-güedé núu tē Pàblú, te uuⁿni ní cuáá-güedé te càchí-güedé:

—Ío càhnu cuu Dianá sàndú ñáyiú Éfesú! —càchí-güedé.

²⁹ Te nchaa ñáyiú ñuu Éfesú ndi coyo ndi coyo-yu xicáháⁿ-yu. Te tnàhá úu cue téé distritú Macèdoniá xicá cùu-güedé ndihí té Pàblú, ñⁿ-dé nání-dē Gáyú, te ñⁿ-dé nání-dē Aristarcú. Te ní tñi-güedé úu cue téé-áⁿ, te cuánguihu coyo ndihí ñaha-güedé vehe núu quidé-güedé jùndá. ³⁰ Te té Pàblú cuiní-dé quíhu-dé tnàhá-dé vehe-áⁿ càháⁿ ndihí ñaha-dē ní cùu, te ñá ní dàña cue téé ní sàndáá iní tnúhu-gá. ³¹ Te ñⁿ úu cue téé cùnno distritú Àsiá ní càháⁿ váha-güedé cuendá té Pàblú, te ní xáhaⁿ-güedé xii ñⁿ téé xìnu cuechi núu-güedé ní sáháⁿ-dé ní xáhaⁿ-dē xii té Pàblú sá vǎ quíhu-dé vehe núu quidé-güedé jùndá. ³² Te uuⁿni ní cuáá-yu ncháá-yu, te ñá ñⁿ-ní tnúhu ní càháⁿ-yu, chi ndi díⁿ tnúhu ní càháⁿ-yu ñⁿ ñⁿ-yu. Te chitu-gǎ ñáyiú ñá ní cùnno iní-yu ná cuendá ní

dátacá ñahá-güedé xití vehe-áⁿ, chi ñá ñⁿ-ní tnúhu ní càháⁿ-yu. ³³ Te davá-yu ní càháⁿ-yu sá cuéchi té Lijandrú cúu-xí, chi ní xáhaⁿ ñáyiú isràél xii-dé sá càháⁿ-dé yuhú-yu chindee tnúhu ñaha-dē xii-yu. Te ní quide-dé ndaha-dé núu-yu sá cùndedóho-yu tnúhu càháⁿ-dé chindee tnúhu ñaha-dē xii-yu yòtnúhu. ³⁴ Te ní cutnùní iní-yu sá tēe isràél cúu-dē, te uuⁿni ní cuáá tucú-yu, ñá ní dàña-yu càháⁿ-dé, te càchí-yu:

—Ío cùnno Dianá sàndú ñuu Éfesú! —càchí-yu. Te dàtná úu òré ñⁿ-ní tnúhu ní càháⁿ-yu.

³⁵ Te téé cùu secretariú-ni-gá ní càháⁿ-dé, te dàtnùní cuéé cuéé ní sadí-yu yuhú-yu. Te ní xáhaⁿ-dē xii-yu:

—Nchaa-ndo cùndedóho-ndo ñⁿ tnúhu na càháⁿ-í-a. Ío cùnno Dianá, te nchaandi túhú ñáyiú sa nahá-yu sá ncháá-ó ïo nèhe cuendá-ó veñúhu-áⁿ. Te nahá-yu sá néhé cuendá-ó sàndú-áⁿ, chi véxi cuuⁿ-gá andiu. ³⁶ Te vá yõo ñⁿ càchí sá ñá ndáá. Te coto-ndo mēe-ndo, te vá cuidó-ndó càda-ndo, te vá cuidó-ndó càháⁿ-ndó. ³⁷ Te ná cuendá ndécá-ndó cué téé-áⁿ véxi, te ñá túu nǎ ní quide-güedé, te ñá túu nǎ ní dùhu-güedé veñúhu, te ñá túu càháⁿ cuèhé-güedé cuendá Diàná. ³⁸ Te núu ío yoo nàá ndihí ñaha xii té Demètriú ndihí cue téé quide chiuⁿ ndihí-dé, te quíhíⁿ-güedé cacáⁿ cuéchi-güedé núu cué téé cùchiuⁿ. Te cue téé cùchiuⁿ na cundoho-güedé nùu quehndé-güedé cuéchi-yu àdi ñahá. ³⁹ Àdi ío-gá ná cuendú ñúhú iní-ndó, te càháⁿ-ndó òré ná cóo jùndá. ⁴⁰ Te ío úhú nùu na nihí téé tàxi tnùní ñahá xii-o tnúhu sá dúhá ïo quide dusaⁿ-o, te cachí-dé sá ndècuéchi-o chi ñá túu sàndáá iní-ó-dē quesaha-dē. Te ñá túu tnàhí ndùu váha-xi sá dúhá càda-o ní cuu, te vitna duha ní quide-o, te ñá cùnno iní-ó nǎsa cùñaha-o xii téé tàxi tnùní ñahá xii-o núu na càna ñaha-dé —càchí téé cùu secretariú xáhaⁿ-dē xii-yu.

⁴¹ Te ní xáhaⁿ-dē sá nùhú-yu te ní ndihí-yu cuánuhú.

20

Té Păblú cuáháⁿ-dé distritú Macèdoniá ndihí distritú Grèciá

¹ Te òré ñá túú-gá ní guide dusáⁿ-yu, te ní cana ñaha tē Păblú xii nchaa ñáyiú sàndáá iní tnúhu Jèsús ní cáháⁿ-dé dóho-yu nàcuáa cadá-yu. Te ní quide ndee iní ñáhá-dě xií-yu, te ní tñi-dé ichi cuáháⁿ-dé distritú Macèdoniá. ² Te tayáha-dé cuáháⁿ ïⁿ ïⁿ ñuú yíndèhu Macedoniá. Te càháⁿ-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudíí iní-yu cadá-yu nàcuáa càháⁿ Yă Ndiöxí cadá-yu sá dúcáⁿ ñí cáháⁿ-dé dóho-yu. Té ní quexìo-dé distritú Grèciá. ³ Te xiáⁿ ñí xíndecu-dé úní yóó. Te xiáⁿ quée-dé bàrcú quihíⁿ-dé distritú Siriá ní cùu, te ní níhí-dě tnúhu sá ndétú ñaha ïⁿ úú cue tée israél cahni ñaha-güedě xii-dé ní cùu, núu xiáⁿ ní tñi-dé ichi cuáháⁿ-dé ní yáha-dé ichi distritú Macèdoniá. ⁴ Te cuáháⁿ ndihí-dé té Sopàtér tée ñuú Bèreá, ndihí té Arìstarcú, ndihí ïⁿ tée nàni Segundú. Te ndi nduú cue tée-áⁿ cùu-güedě cue tée ñuú Tesalónicá. Te tnàhá té Găyú tée ñuú Dèrbé, ndihí té Timùteú cuáháⁿ ndihí-dé, te tnàhá té Tìquicú ndihí té Tröfimú cuáháⁿ ndihí-dé, te úú cue tée-áⁿ cùu-güedě cue tée distritú Àsiá. Te nchaa cue tée-áⁿ cuáháⁿ ndihí-güedě té Păblú. ⁵⁻⁶ Te ní quexìo-güedě ñuú Filipú, te yàcáⁿ ní naníhí ñáhá-güedě xii-ndí. Te té Păblú ní tendaha-dě cue tée ndihí-dé cuáháⁿ-güedě ñuú Tròás, te ní xáhaⁿ-dě sá díú-ní yàcáⁿ cundetú ñaha-güedě xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhi levadurá. Te sàtá ñí yáha vico, te ní quée-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexìo-ndí ñuú-áⁿ. Te yàcáⁿ ní naníhí tnàhá-ndí ndihí cue tée yòdo nuu cuáháⁿ ní xíndecu-ndí úsá nduu.

Té Păblú cuáháⁿ ngándihí-dé ñáyiú ñuú Tròás

⁷ Te ïⁿ nduu ndumìngú ní naníhí tnàhá-ndí ndihí nchaa ñáyiú ní sàndáá

iní-xi tnúhu Jèsús ní xexi-ndí pàá ndihí-yu. Te ducaⁿ ñí quide-ndí, chi ní cachí Jèsús sá dúcáⁿ càda-o cuendá sá vă nàcuànaa-o sá ñí xihí-gá cuendá naníhí tànhú-ó. Te té Păblú ní ngüita-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tũndaá ingá nduu-áⁿ, te caca-dé quihíⁿ-dé ingá xichi. ⁸ Te ndècú-yu vehe yòdo tnaha, te yìhí-yu ndéé cuàrtú cùu ùní núu ññu, te càyú víhí ññuhú xití cuàrtú-áⁿ. ⁹ Te ïⁿ tée sa ta cùu sacuéhé luha nàni-dé Eùticú núcòo-dé yèhe ventaná, cuení-dé cùdú-dé, chi ní cunaha vîhi caháⁿ té Păblú, te ní tñi ñaha sàní xii-dé ní xidí-dé, te ní ngava-dé ndéé ñuhu. Te ní nuú-yu núu ññuhú cuendá ndacani ñàhá-yu, te sa ní xihí-dé, chi ío dùcúⁿ ní ngava-dé. ¹⁰ Te tnàhá té Păblú nchìcúⁿ-dé ní nuu. Te ní quexìo cunu-dé núu cātùu tée ní xihí-áⁿ, te ní numi ñaha-ni-dě, te ní xáhaⁿ-dě xií-yu:

—Vá ndìhú iní-ndó, chi ní ndoto-dé —càchí-dé xáhaⁿ-dě xií-yu.

¹¹ Te dătnùní cuándaa ndihí ñaha tùcu-dé xií-yu cuàrtú núu yìhí-yu ní cùu, te yàcáⁿ ní xexi ndihí ñaha-dě xií-yu, dătnùní ní ngüita-dé vâi-gá tnúhu ní cáháⁿ-dé, te càháⁿ-ni-dé ní tũndaá, te dătnùní ní xica-dé cuáháⁿ-dé. ¹² Te tée ní ngava-áⁿ ní sánúndeca ñàhá-yu xii-dé ndéé vehe-dé, te ío ní cudíí iní-yu sá ñí ndoto-dé.

Ní quee-güedě ñuú Tròás cuáháⁿ-güedě ñuú Miletú

¹³ Te té Păblú ní cachí-dé sá quihíⁿ-ndí ndihí bàrcú ndéé ñuú Àsón, te mee-dě caca saha-dě, te yàcáⁿ naníhí tnàhá-ndí ndihí-dé te quée-dé bàrcú, te ní quée-ndí bàrcú cuáháⁿ-ndí. ¹⁴ Te ní naníhí tnàhá-ndí ndihí-dé ñuú Àsón, te yàcáⁿ ní quée-dé bàrcú tnàhá-dé cuáháⁿ-ndí ñuú Mitilené. ¹⁵ Te ní quexìo-ndí ndéé ingá nduu yatni ñuú Quiú, te ndéé nduu tnéé ní quexìo-ndí ñuú Sămú te yàcáⁿ ní yáha-ndí, te ní quexìo-ndí ñuú Trògiliú. Te ndéé

nduu idá ní quexìo-ndí ñuú Miletú. ¹⁶ Te té Păblú ñá ní cuiní-dé yáha-ndí ñuú Éfesú, chi ñá túú ní tnàhá iní-dé cuyaa-dě ichi, chi ío ndíhi iní-dé cuendá cuiní-dé quiní-dé ñuu vá ndácú-dě ndexìo-dé ñuú Jerusàlén cundecu-dé vico Pentecòstés.

Té Păblú cáháⁿ ndíhi-dé cue té yíndaha ñaha xii ñáyiu sàndáá iní tnúhu Jèsús ñuú Éfesú

¹⁷ Te òré ndécú tē Păblú ñuú Miletú, te ní cana-dé cue té yíndaha ñaha xii ñáyiu sàndáá iní tnúhu Jèsús ñuú Éfesú sá quíhíⁿ-güedé núú ndécú-dě. ¹⁸ Te sátá ñí quexìo-güedé, te ní xáhaⁿ-dě xii-güedé:

—Nàha-ndo nacuáa ní quide-í ndéé cùtnàhá ní quexìo-í distritú Àsiá. ¹⁹ Chi ní quide-í nàcuáa ní cáháⁿ Yă Ndiòxí cada-í, ñá túú ní tühío-í, te ñá túú ní quide cahnu-í méè-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tìtní xito ní cuiní ñáyiu isràél cahni ñàhá-yu xii-í ní cùu, te ío ní ndoho-í ní cácu-í. ²⁰ Te sa nàha-ndo sá ncháándì túhú sa ní cachí tnúhu-í nàcuáa cada-ndo cuendá sá chíndèe ñaha Yă Ndiòxí xii-ndo. Te ní cáháⁿ-í tnúhu-gá núú-ndó nchàa-ndo, te ñuu-ñi ducaⁿ ñí quixi-í ndí tnahá vehe-ndo ñí cáháⁿ-í tnúhu-gá núú-ndó. ²¹ Te ní xáhaⁿ-í xii ñáyiu isràél ndíhi ñáyiu ñá túú cùu ñáyiu isràél sá dáñá-yu nchaa sá cuèhé sá dúhá quidé-yu te quíndáá iní-yu tnúhu Xítóhó Jesucristú. ²² Te dacuití quíhíⁿ-í ñuú Jerusàlén, chi Espíritú Yă Ndiòxí ní cachí-xi sá dáí quíhíⁿ-í, te ñá túú xìní-í nándi cada ñaha-güedě xii-í yàcáⁿ te núu na quèxio-í. ²³ Te ñí ñí ñuú núú sàháⁿ-í cächí tnúhu Espíritú-gá sá chíhí ñàha-güedé vecaá, te cada úhú ñàhá-güedě. ²⁴ Dico ñá túú tnàhí ná cuu cuèi na càhni ñàha-güedé xii-í, dico cuiní-í sá ñí iní dandíhi-í nchaa sá ñí cachí Xítóhó Jesucristú cada-í. Te ní cachí Yă Ndiòxí sá cáháⁿ-í núú ñáyiu sá ío cùu iní ñàhá-gá xii-yu, te

naníhí tàhú-yu núu na quíndáá iní-yu tnúhu-gá.

²⁵ Te sa ní cachí tnúhu-í xii-ndo nchàa-ndo sá ñuu na quíndáá iní-ndó Yă Ndiòxí, te ndíhu ndaha ñàha-gá xii-ndo. Te na cächí tnúhu-í sá ñí ñíⁿ nduu-gá vá quiní ñàhá-ndó xii-í ñuyíu-a. ²⁶⁻²⁷ Te yúhú ñá túú cuèchi-í ñuu ío ñáyiu vá naníhí tàhú, chi sa ní cachí tnúhu-í nchaa sá ñí cáháⁿ méé Yă Ndiòxí cada-ndo. ²⁸ Te coto-ndo mée-ndo, te coto-ndo tnàhá ñáyiu sàndáá iní tnúhu-gá, chi Espíritú-gá ní cachí-xi sá cùnùu-ndo núu-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xító-ndó-yu ducaⁿ càda-ndo cuendá, chi nàha-ndo sá Jèsús ní sati ñíhí-gă, te ní xíhí-gá cuendá naníhí tàhú-ó ndíhi-yu. ²⁹ Te yúhú sa cùtnuní iní-í sá òré ñá túú-gă-í ndécú, te quixi ñáyiu dandàhú ñàhá xii-ndo cuendá ñàha-ndo tnúhu Yă Ndiòxí, te cada ñàhá-yu xii-ndo dàtná quidé ñáñá òré tní-dí mbéé. ³⁰ Te ñuu-ñi ñíⁿ ñíⁿ cue té ndècu ndíhi-ndo, cue té-áⁿ dacuàndehnde-güedé, te cudana davá-yu quíndáá iní-yu chítnàhá ñàhá-yu xii-güedé. ³¹ Te xíhíⁿ ñuu cächí tnúhu-í sá ío quíhí iní-ndó cundecu-ndo ndíhi nchaa ñáyiu sàndáá iní tnúhu-gá. Te nàha-ndo sá yúhú ní xíndecu-í úní cuíá ñí cáháⁿ-í tnúhu Jèsús núú ñáyiu cuèi nduu cuèi níu. Te áma ní xóo ndáhyú-í, chi ñá ní cuiní-yu quíndáá iní-yu nchaa-yu tnúhu ní cáháⁿ-í —cächí té Păblú xáhaⁿ-dě xii-güedé.

³² Te xáhaⁿ tùcu-dé:

—Nchòhó cue té ndècu ndíhi-í ichi Xítóhó Jesucristú, ío cuiní-í sá méé Yă Ndiòxí chindee ñàha-gá xii-ndo. Te mee-gă ní cáháⁿ-gá sá ío cùdíⁿ iní ñàhá-gă xii-ndo. Te naníhí tàhú-ndó ndíhi nchaa ñáyiu cùu cuendá-gá, te chindee ñàha-gá xii-ndo cuendá cada-ndo nchàa sá cáháⁿ-gá. ³³ Te òré ní xíndecu ndíhi ñàha-í xii-ndo, te ní ñíhíⁿ ní dđó ñá túú ní cùdíⁿ iní-í. ³⁴ Te mee-ndo sá nàha-ndo sá yúhú ní quide chíuⁿ-í, te ní níhí-í

nchaa sá nǐ nandíhi-í ndihi cue téé xica cuu ndihi-í. ³⁵ Te sa ní xiní-ndó nacuáa ní quide-í ní quide chiúⁿ-í, te diu-ni ducaⁿ càda chiúⁿ-ndo cuendá chindee-ndo nchaa ñáyiú ndàhú, chi sa nàha-ndo nacuáa ní cachí Xitohó Jesucristú, te duha ní cachí-gá: “Cùdí-gă iní-ó cuăha-o ñáyiú ndàhú sá xiní ñùhú-yu dâcúxí sǎ táxí-yu xii mee-o”, duha ní cachí-gá —càchí té Păblú xăhaⁿ-dĕ xii-güedé.

³⁶ Te sâtá dúcáⁿ nǐ cáháⁿ-dé, te ní ngüñí xítí-dĕ ndihi dava-gá-güedé, te ní cáháⁿ ndihi-dé Yă Ndiöxí. ³⁷ Te sâtá nǐ túhú tnúhu ní cáháⁿ-dé ndihi Yă Ndiöxí, te ní ndáhyú víhí-güedĕ sá quihíⁿ-dé, te ní numi ñaha-güedĕ, te ní teyuhu ñaha-güedé. ³⁸ Te ní ndíhú víhí iní-güedé, chi ní xáhaⁿ tĕ Păblú sá nǐ ñⁿ nduu-gá vá nánihí tnáhá-güedĕ cáháⁿ ndihi tnàha-güedé. Te cuáháⁿ ndihi ñaha-güedĕ xii-dé núú ndécú bàrcú.

21

Té Păblú cuáháⁿ-dé ñuú Jerusalén

¹ Te ní quide ndee iní-ndí nchaa cue téé cūnuu. Te ní quée-ndí bàrcú cuáháⁿ ndáa ichi-ndí ñuú Cös. Te nduu tnĕé ní sáháⁿ-ndí ñuú Ròdás, te ní yáha-ndí cuáháⁿ-ndí ñuú Pàtará. ² Te yàcáⁿ ní naníhí-ndĭ ñⁿ bàrcú ñùhú ìchi-xi quihíⁿ-xi distritú Fèniciá, xíáⁿ ní quée-ndí cuáháⁿ-ndí. ³ Te ichi cuáháⁿ-ndí ní xiní-ndí distritú Chìpré cáá cuădava xítí làmár, te ní yáha-ndí, te ní quendóo ñuú-áⁿ xio dâtni-ndí. Te cuáháⁿ-ndí ñuú Tírú ñⁿ ñuú yíndĕhu distritú Síríá cuendá yàcáⁿ tava-güedé nchaa sá nchídó bàrcú. ⁴ Te yàcáⁿ ní naníhí tnáhá-ndĭ ndihi ñáyiú ní sándáá iní tnúhu Jèsús, te ní xíndecu-ndí úsá nduu ndihí-yu. Te ní xáhăⁿ-yu sá vǎ quihíⁿ té Păblú ñuú Jerusalén, chi Espiritú Yă Ndiöxí ní xáhaⁿ-xi xii-yu sá ndóhó víhi-dé nǔu na quihíⁿ-dé. ⁵ Te sâtá nǐ yáha nduu úsá, te ní quée-ndí cuáháⁿ-ndí yuhu làmár. Te ní quée nchaa ñáyiú ní sándáá iní tnúhu-gá, téé, ñadìhí, nchaa landú, nchaá-yu ní sândeca ñáhá-yu

yuhu làmár, te òré ní quexìo-ndí, te ní ngüñí xítí-ndĭ ní cáháⁿ ndihi-ndí Yă Ndiöxí. ⁶ Te ní quide ndee iní tnáhá-ndĭ ndihí-yu, te dâtnúni ní quée-ndí bàrcú, te ní naquehéⁿ-yu ichi cuánuhú-yu vehé-yu.

⁷ Te ní xica bàrcú ñùhú-ndĭ ní quée-xi ñuú Tírú cuáháⁿ-ndí ndihi-xi ñuú Tolèmaidá. Te xíáⁿ nǐ sáá-xi te ní quene-ndí, te ní sáháⁿ-ndí ní cáháⁿ ndihi-ndí nchaa ñáyiú sándáá iní-xi tnúhu Jèsús, te ní xíndecu-ndí ndihí-yu ñⁿ nduu. ⁸ Te nduu tnĕé ní ndée tucu-ndí bàrcú cuáháⁿ-ndí ñuú Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lìpé cundecu-ndí ndihi-dé. Te téé-áⁿ nǐ xóo cada chiúⁿ ndihi-dé íñú-gá cue téé ní chindee ñaha xii ñáyiú sándáá iní tnúhu-gá ñuú Jerusalén ní xóo cuñaha-güedĕ sá nǐ xóo caxí-yu. Te dâtnúni mee-nǎ tnúhu Yă Ndiöxí cáháⁿ-dé xícá cūu-dé. ⁹ Te té Lìpé-áⁿ ndĕcu cūmí dĕhe dĭhí-dé, te ní ñⁿ-yu vátá ndúcú ñaha-gá téé xii-yu, te nchaá-yu cáháⁿ-yu tnúhu Yă Ndiöxí tnúhu sá dácàhu iní ñáhá mèe-gá. ¹⁰ Te xíáⁿ nǐ cuu tĭtní nduu ndĕcu-ndí, te ní quexìo ñⁿ téé nàni Agabú ñuú-áⁿ, véxi-dé distritú Jùdeá, te téé-áⁿ tnáhá-dé cáháⁿ-dé tnúhu Yă Ndiöxí. ¹¹ Te ní níhí-dĕ tnúhu núú ndécú-ndĭ nǔu ní quixi-dé ní cáháⁿ ndihi ñaha-dĕ xii-ndí. Te ní xícáⁿ-dé cínchú té Păblú, te ní ngóo-dé, te ní ngüita-dé ní dácútú-dĕ sáhá-dĕ ndihi ndaha-dé, te ní cachí-dé xii-ndí:

—Espiritú Yă Ndiöxí ní cachí-xi sá tĕe dĭi cínchú-xi-a tnĭ ñaha cuè téé isràel ñuú Jerusalén, te duha dacùtu ñaha-güedé xii-dé, te cuáha cuendá ñáhá-güedĕ xii-dé núú cuè téé ñuú Rómá. Duha ní cáháⁿ Espiritú-gá —càchí té Àgabú.

¹² Te sá dúcáⁿ nǐ cáháⁿ-dé, te ní xáhaⁿ-ndĭ nchaa-ndí sá vǎ quihíⁿ té Păblú ñuú Jerusalén. ¹³ Te té Păblú ní cachí-dé:

—¿Ná cuendá ndée dúcáⁿ ndàhyú-ndó dândihú iní ñáhá-ndó xii-í-i? Te ñá

tuu ná cuu cuéi na dàcutu ñaha-güedé, àdi cuéi na càhni ñaha-güedé xii-í cuendá sá càháⁿ ndihí-í Jèsús, chi sa ndècu túha-í sá cùu-í —càchí-dé.

¹⁴ Te ñá túú ní sàndáá iní-dé sá dúcáⁿ xáhaⁿ-ndí, núu xíáⁿ ñá túú-gá ná ní xáhaⁿ-ndí xii-dé sá vǎ quíhíⁿ-dé, te ní xítñaha-ndí:

—Mee-ni-gǎ Yǎ Ndiǒxí ná cùnaha-gá nása sàni iní-gá cada-gá —xítñaha-na-ndí

¹⁵ Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñuú Jerusàlén.

¹⁶ Te cuáháⁿ ndihí-ndí ñíⁿ ùú cue téé Cèsareá, cue téé ní sàndáá iní tnúhu Jèsús. Te ndèca ñaha-güedé xii-ndí cuáháⁿ vehe té Mnàson, te téé-áⁿ cúu-dé téé distritú Chìpré, te ndècu-dé ñuú Jerusàlén, te sa ní cuu vǎi nduu ní sàndáá iní-dé tnúhu-gá, te vehe téé-áⁿ ní xíndecu-ndí.

Té Pǎblú ndátnúhu-dé ndihí té Jàcobó

¹⁷ Te òré ní quexìo-ndí ñuú Jerusàlén, te nchaa ñáyiú ní sàndáá iní tnúhu Jèsús ní quixí-yu ní dándácõ vǎha ñàhá-yu, chi ní cudíí víhí iní-yu sá ñí quexìo-ndí. ¹⁸ Te nduu tnéé cuáháⁿ ndihí-ndí té Pǎblú cuendá càháⁿ ndihí-ndí té Jàcobó, te òré ní quexìo-ndí núú ndécú-dé, te ndècu ndihí-dé nchaa cue téé yìndaha ñaha xii ñáyiú sàndáá iní tnúhu Jèsús. ¹⁹ Te té Pǎblú ní dándácõ vǎha ñaha-dé xii-güedé, te ní xáhaⁿ-dé nàcuáa ní quide Yǎ Ndiǒxí ní chindee ñaha-gá xii-dé ní càháⁿ-dé tnúhu-gá núú ñáyiú ñá túú cùu ñáyiú isràél. ²⁰ Te sǎtá ñí yáha ní càháⁿ-dé, te ní ndácáⁿ táhǔ-yu núú Yǎ Ndiǒxí cuendá nchaa sá ñí quide-gá. Te dàtnùnì ní xáhaⁿ-güedé xii té Pǎblú:

—Yòhó sa nàha-n sá ñí cuu titní mǐl ñáyiú isràél ní sàndáá iní-yu tnúhu Jèsús, te càchí-yu sá ño xìni ñuhu-xi cadá-yu nchaa nàcuáa càháⁿ tnúhu sá ñí chídó tnùnì ndí Moisés. ²¹ Te ní níhí-yu tnúhu sá dácuàha-n ñáyiú isràél ñáyiú ndècu ñuú xícá cuendá sá vǎ cadá-gǎ-yu nàcuáa ní cachí ndí Moisés cadá-yu. Te xáhaⁿ-n xii-yu sá vǎ cuàha-gǎ-yu seǎá ñí landú-yu, te vǎ cadá-gǎ-yu dàtná ní

xóo cada ñáyiú ndéé sanaha, duha dàcuaha-n ñáyiú ní níhí-yu tnúhu.

²² Te na níhí-yu tnúhu sá ndécú-n ñha, te tnávíí ngúita-yu càháⁿ cuèhé-yu cuendá-n. ²³ Te na càchí tnúhu-ndí nàcuáa cada-n. Ndècu cúmí cue téé vátá cadá-gǎ-güedé nàcuáa ní càháⁿ méé-güedé sá cadá-güedé cuendá nduu vétú iní Yǎ Ndiǒxí. ²⁴ Te quíhíⁿ-n

ndihí-güedé te cada-n nchaa nàcuáa ní xóo cada ñáyiú ndéé sanaha cuendá nduu vétú iní Yǎ Ndiǒxí. Te tava-n díhúⁿ cuu núu-güedé cháhu-güedé veñúhu, te ducaⁿ te dàtnùnì ndacu dèté díquí-güedé. Nchaa xíáⁿ cada-n, te quini ñáyiú sá ñá ndáá tnúhu càháⁿ nchaa ñáyiú càháⁿ cuèhé cuendá-n. Te na cùtnunì iní-yu sá tnàhá-n quide-n nchaa nàcuáa ní chídó tnùnì ndí Moisés cadá-yu. ²⁵ Te sa ní quide ndáá-ndí cuendá nchaa ñáyiú ñuú xícá, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyiú-áⁿ sǎ vǎ cǎxí-yu nchaa sá nchító-ó ndùu táhú nchaa sá càchí-yu cùu ndiǒxí ní cadúha cue ñáyiú ñuyíú-a. Te ní xáhaⁿ-ndí sá vǎ cǎxí-yu níñí, te vǎ cǎxí-yu cuñú nchaa quiti cuèhné. Te vǎ càháⁿ ndihí cue téé ñadìhí te núu ñá díú ñadìhí-güedé cúu-yu, te ní cué ñáyiú dìhí vǎ càháⁿ ndihí-yu téé te núu ñá díú yíi-yu cùu-güedé. Duha ní tee-ndí núú tütú cuáháⁿ —càchí-güedé xáhaⁿ-güedé xii té Pǎblú.

Ní tnú-güedé té Pǎblú xiti veñúhu ñáyiú isràél

²⁶ Te nduu tnéé cuáháⁿ té Pǎblú ndihí cúmí cue téé veñúhu càhnu sá ño cùnuu núú ñáyiú isràél cada-güedé nàcuáa ní xóo cada ñáyiú ndéé sanaha cuendá nduu vétú iní Yǎ Ndiǒxí. Te ní quíhu-dé veñúhu càhnu sá ño cùnuu-áⁿ ní xáhaⁿ-dé ná daha-gá nduu cùmání dandìhí-güedé nàcuáa ní xóo cada ñáyiú ndéé sanaha, te dàtnùnì cànehe-güedé sá ndúú táhú Yǎ Ndiǒxí quíhíⁿ veñúhu.

²⁷ Te cùmání-gǎ cuu úsá nduu sá ñí sáháⁿ-güedé veñúhu càhnu sá ño cùnuu,

te sa ndècu tucu té Păblú veñúhu. Te cue téé isràél véxi dištrítú Àsiá ní xiní-güedé té Păblú yíhi-dě veñúhu, te ní tñi ñaha-güedě xii-dé, te ío ní cáháⁿ cuèhé-güedé cuèndá-dé núú dăva-gá ñáyiú yíhi veñúhu cuèndá sá cúdeⁿ-yu núú tē Păblú. ²⁸ Te níhi ní cáháⁿ-güedé, te xăhaⁿ-güedě xií-yu:

—¡Nchòhó ñáyiú isràél, yáchí-ndó chì cuánùndaha ñaha-ndo! Chì téé-a yayacáⁿ cuáháⁿ-dé cāháⁿ-dé sá ñà túú nàndíhi-o, te cāháⁿ-dé sá vă cādá-ó nchàa nacuáa cāháⁿ tnúhu sá ñi chídó tnùnì ndíi Moisés, te cāchí-dé sá ñà túú nàndíhi veñúhu-a. Te ñá díú-ní xǎⁿ chi sa ní quíhu-dé veñúhu-a ndíhi cue téé ñá túú cùu ñáyiú isràél, te sá dúcáⁿ ñi quide-dé, te ñá túú-gá ní cānehe íi-dě xití veñúhu. Te veñúhu-a cùu-xi vehe Yá Ndiöxí —cāchí-güedé xăhaⁿ-güedě xií-yu.

²⁹ Te ducaⁿ ñi cáháⁿ-güedé chi ní sani iní-güedé sá ñi quíhu ndíhi-dé té Tröfimú veñúhu-güedé, chi ní xiní-güedé xícá cùu ndíhi ñaha-dé xití ñuú. Te téé-áⁿ cúu-dě téé ñuú Éfesú, te ñá díú tē isràél cúu-dě.

³⁰ Te chitu ñáyiú ñuú-áⁿ ñi tacá-yu ní tñi-yu té Păblú táñùhu ñahá-yu ní ndee veñúhu cāhnu sá ío cùnūu, te òré-ni ní nacadí-güedé yèhe veñúhu-áⁿ. ³¹ Te sa cahní-yu té Păblú ní cùu, te ní sáháⁿ ñi ùú-güedé núú ndécú tē cùu capitáⁿ cùnūu-gá, te ní xáhaⁿ-güedě xii-dé sá ncháá ñáyiú ñuú Jerusalén xǎnàá-yu. ³² Te òré-áⁿ cuáháⁿ tē cùu capitáⁿ cùnūu-gá ndíhi dăva-gá cue téé nchícúⁿ-gá ndíhi sandádú-dé. Te òré ní xiní-yu ní quexìo coyo-güedé núú xǎxúcu-yu, te ní yùhú-yu ñá túú-gá ní cāní-yu té Păblú. ³³ Te téé cùu capitáⁿ ní sātuha-dé té Păblú, te ní xáhaⁿ-dě xii cue sandádú-dé sá tñí ñaha-güedé dacùtu ñaha-güedé úú cadená. Te dātñùnì ní xícáⁿ tnúhú-dě núú-yu, te xăhaⁿ-dě:

—¿Ná cúu tē-a? ¿Ná ní quide-dé? —cāchí-dé xăhaⁿ-dě xií-yu.

³⁴ Te téé cùu capitáⁿ-áⁿ ñă ní cùnūnì iní-dé ñuú ná cúu sǎ ñi quide té

Păblú, chi uuⁿi ní cuáá-yu. Te tucu cāháⁿ ñiⁿ, tucu cāháⁿ ñiⁿ-yu, núu xǎⁿ ní xáhaⁿ-dě cue sandádú-dé sá cāndēca ñaha-güedé xii-dé quíhiⁿ cuártél núú ndécú-güedě. ³⁵⁻³⁶ Te nchícúⁿ ñăhă-yu cuáháⁿ ní quexìo ndéé nācuáa cāa nchio cuñi-yu cahní ñahá-yu xii-dé ni cùu. Te níhi ní cáháⁿ-yu xăhăⁿ-yu sá cahní ñaha-güedé, te xǎⁿ ní ndacani ñaha-güedě ndécá ñaha-güedé cuásaá nchio-ăⁿ.

Té Păblú xăhaⁿ-dě xii-güedé sá ñà túú cuēchi-dé

³⁷ Te cuānguihu-güedé cuártél ndíhi té Păblú ní cùu, te ní xáhaⁿ-dě xii tē cùu capitáⁿ cùnūu-gá:

—Cāháⁿ ndàhú-í núú-n cùndetu-n na cúñaha-í ñiⁿ ùú tnúhu xií-yu —cāchí-dé xăhaⁿ-dě.

Te téé tàxi tnuní-áⁿ ñi xáhaⁿ-dě:

—¿Náa tnàhá yòhó cāháⁿ-n tnúhu grìégú? ³⁸ Te ní cáháⁿ-í sá tē ègíptú cúu-n, chi diu-n ñi ndúcú-n cuè téé ní nàa ndíhi tē cùchiuⁿ Cesár ní cáháⁿ-í, chi diu ñiⁿ tē yacáⁿ ní ndúcú-dě cúmí mǐl cue téé ní sahani ndíyi. Te ndēca tnaha-güedé ní sáháⁿ xití yucu ní xíhi váha-güedé —cāchí-dé xăhaⁿ-dě xii té Păblú.

³⁹ Te té Păblú ní xáhaⁿ-dě:

—Ñá díú tē ègíptú cúu-í, chi tē isràél cúu-í, chi diu-ni tē isràél cúu tātā-í, te dícó-ni sá ñi cacu-í ñuú Tarsú ñuú cāhnú, te ñuú-áⁿ yǐndèhu-xi dištrítú Cìliciá. Te cuñi-í cada ndee ìní-n dāña-n na cāháⁿ ndíhi-í-yu —cāchí-dé xăhaⁿ-dě.

⁴⁰ Te ní xáhaⁿ tē cùu capitáⁿ cùnūu-gá sá cúu cāháⁿ té Păblú, núu ní ngúnutñi-dé núú nchio, te ní quide-dé ndaha-dé sá cùndédóho-yu. Te ní sadí-yu yuhú-yu, te ní cáháⁿ-dé tnúhu ñáyiú isràél, te xăhaⁿ-dě xií-yu:

22

¹ —Chí cādá cāhnu iní nchòhó cue téé sa cuéhé ndíhi nchòhó cue téé cuechi, na cāháⁿ-í ñiⁿ tnúhu cundédóho-ndo sǎ ñà túú cuēchi-í, chi ñá túú nǎ ní quide-í, te ni ñà túú nǎ tnúhu cāháⁿ-í —cāchí-dé xăhaⁿ-dě xii-güedé.

² Te cuèndá sá dúcáⁿ ñi cáháⁿ-dé tnúhu mèe-yu núu tnávíi-nǎ ní

sadí-yu yuhú-yu ní xíndedóho-yu ní cáháⁿ-dé, te xǎhaⁿ-dě:

³ —Yúhú cúu-í téé isràél, te ní cacu-í ñúú Tàrsú, te ñúú-áⁿ yíndèhu-xi Ciliciá. Te davitna líhli-í cútnàhá ní quexìo-í ñúú Jerusalén ní dácúáhá ñàha té Gamaliél. Te ní dácúáhà-í nchaa tnúhu ní chídó tnùnì nchaa cue téé ndéé sanaha nàcuáa cada ñáyiu. Te yúhú ní cahu iní-í ní guide-í titní núú chiuⁿ nacuáa cuu váha iní Yá Ndiöxí ní cáháⁿ-í, te ñúu-ni ducaⁿ guide nchohó tucu. ⁴ Te ní sánú ndúcù-í nchaa ñáyiu sàndáa iní-xi tnúhu Jèsús, cuèi téé, cuèi ñáyiu ñíhí ní dácútù-í-yu, te ní chihi-í-yu vecaá, te ní níhì-í tnúhu ndee iní sá cáhni-ndí-yu. ⁵ Te dútú cúnú-gá ndíhi cue téé cùnúu núú-ndó ñàha-güedé sá ndáa cáháⁿ-í chi mee-güedé ní taxi-güedé tutú cuañaha-í xii ñáyiu isràél ñáyiu ndècu ñúú Dàmascú cuendá cutnùnì iní-yu ná chiúⁿ cuáhàⁿ-í ní cùu. Te ñúhu-í ichi cuáhàⁿ-í ñúú-áⁿ cuánúndúcù-í ñáyiu ní sàndáa iní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñáhà-güedé xií-yu ni cùu.

Té Pǎblú xǎhaⁿ-dě xii ñáyiu nàcuáa ní cuu ní tuha-dé ichi Jèsús
(Hch. 9:1-19; 26:12-18)

⁶ Te ta cùyatni-í ñúú Dàmascú cuáhàⁿ-í, te cùu-xi datná òré caúxúú nduu, te uuⁿni ní quee ñuhú andiu, te ní dáyèhé-xi ndéé núú nútñí-í. ⁷ Te ní guide nee-xi núu-í, xiǎⁿ ní nduá-í ndéé ñuhu. Te ní tecú dóho-í cáháⁿ ñⁿ sá cáháⁿ andiu, te cächí-xi: “Yòhó té Sàulú, ¿ná cuendá cúu úhú iní ñáhà-n dándoho ñaha-n xii-í?”, cächí sá cáháⁿ-áⁿ. ⁸ Te ní xáhaⁿ-í: “¿Ná cúu yòhó sá cáháⁿ-áⁿ?”, xǎhaⁿ-í. Te ní cáháⁿ tucu ingá xito te cächí-xi: “Yúhú cúu-í Jèsús téé ní xíndecu ñúú Nazàrét, te ducaⁿ ò dándoho ñaha-n xii-í”, cächí sá cáháⁿ-áⁿ. Te xiǎⁿ ní cutnùnì iní-í sá díú Jèsús cáháⁿ. ⁹ Te nchaa cue téé ndíhi-í ní xiní-güedé ní dáyèhé ñuhú, te ní yùhú-güedé, dico ñá túú ní tècú dóho-güedé òré ní cáháⁿ-gá. ¹⁰ Te ní xáhaⁿ-í xii-gá:

“Yòhó Xítohó Jesucristú, ¿ná cuení-n càda-í?”, xǎhaⁿ-í xii-gá. Te ní cachí-gá: “Ndacóo, te quíhíⁿ-n ñúú Dàmascú, yàcáⁿ tecú tnúhu-n nchaa nacuáa cuení Yá Ndiöxí cada-n”, cächí-gá — cächí té Pǎblú xǎhaⁿ-dě xií-yu.

¹¹ Te ní xáhaⁿ tucu té Pǎblú:

—Te cuendá sá ní dácúáa ñàha ñuhú xii-í núu ní tñí cue téé ndíhi-í ndaha-í ndécá ñàha-güedé cuáhàⁿ ndéé ñúú Dàmascú.

¹² Te yàcáⁿ ndécú ñⁿ téé nàni Ananiás, te ío vèi sá ní chídó tnùnì ndíi Moisés cada-yu guide-dé. Te nchaa ñáyiu ñúú Dàmascú ío váha cáháⁿ ndíhi ñáhà-yu xii-dé. ¹³ Te ní quexìo-dé núú ndécù-í, te ní cachí-dé: “Yòhó té Sàulú, téé ndècu ndíhi-í ichi Xítohó Jesucristú, ndúha núu-n”, cächí-dé. Te òré-ni ní nacaáⁿ núu-í te ní xiní-í-dé. ¹⁴ Te dǎtnùnì ní cachí-dé: “Yá Ndiöxí ní cáháⁿ ndíhi-gá ñàni tnáhà-ó ní xíndecu ndéé sanaha. Te ñúu-gá ní cáxi ñaha-gǎ xii-n cuendá quiní-n nchaa sá váha cuení-gá cada-n. Te quiní-n Jèsús Yaá ñá túú cuèchi-xi, te ñúu-ni mee-gǎ cáháⁿ ndíhi ñaha-gǎ xii-n. ¹⁵ Te cáháⁿ-n tnúhu Jèsús núu nchaa ñáyiu, te cáháⁿ-n nchaa sá ní xiní-n ndíhi nchaa sá ní xíndedóho-n. ¹⁶ Tnávíi, te quíhíⁿ-n cuàndute-n, te cáháⁿ ndíhi-n Yá Ndiöxí cuendá cada càhnu iní-gá nchaa sá cuèhé sá dúhá ní guide-n”, duha ní cachí té Ananiás xii-í — cächí té Pǎblú xǎhaⁿ-dě xií-yu.

Té Pǎblú ní cani-dé cuèndú nàcuáa ní xáhaⁿ Jèsús cada-dé quíhíⁿ-dé ñúú núu xíndecu ñáyiu ñá túú cùu ñáyiu isràél

¹⁷ Te ní xáhaⁿ tucu té Pǎblú:

—Te ní ndee-í cuàndixi-í ñúú Jerusalén. Te ní sáhàⁿ-í veñúhu càhnu sá ò cùnúu ní cáháⁿ ndíhi-í Yá Ndiöxí, te ní dácótó núu ñáhà-xi sá méé Jèsús ní xiní-í xití veñúhu, ¹⁸ te ní cachí-gá: “Yáchí, quee-n ñúú Jerusalén, chi ñáyiu-a vá quíndáa iní-yu nàcuáa ní cachí-í cúñaha-n xií-yu cuendá-í”, duha ní cachí-gá xii-í. ¹⁹ Te ní xáhaⁿ-í xii-gá: “Yòhó Xítohó Jesucristú, sa xiní-n sǎ ncháa ñáyiu ñáhà-yu sá ní sáhàⁿ-í ndí tnahá ñⁿ ndí tnahá ñⁿ veñúhu nànducu-í ñáyiu sàndáa iní

tnúhu-n, te ní tñi-í-yu, ní chihi-í-yu vecaá, te ní táuchíuⁿ-í ní caniha-güedé xii-yu. ²⁰ Te cútnàhá ní sahani-güedé ndíi Těvá tée ní xóo cáháⁿ tnúhu-n, te tnàhá-í ndécú òré-áⁿ te ní xindeé-í dóo cue tée ní sahani ñaha xii ndíi. Te yúhú ní cáhàⁿ-í sá ní quide váha-güedé sá dúcáⁿ ní quide-güedé”, duha ní xáhaⁿ-í xii-gá. ²¹ Te ní cachí tnúhu-gá xii-í: “Cuàháⁿ chi cuini-í quíhíⁿ-n nchàa ñuú xicá núu xíndecu cue ñáyiú ñá túú cùu ñáyiú israhél cáháⁿ-n tnúhu-í”, cächí-gá —cächí té Páblú xáhaⁿ-dë xii-yu.

Te Páblú ndíhi tée tàxi tnuní ñáhá xii cue sandadú

²² Te sá dúcáⁿ ní cáháⁿ-dë, te ñá ní tnàhá-gá iní-yu cundedóho-yu tnúhu cáháⁿ-dë. Te ñⁿ-ni ní cuú-yu ncháa-yu, te ní cuáa-yu, te xähäⁿ-yu:

—¡Chí cáhni-dë! ¡Ñá díú sá cündecu-dë ñuyíú-a! —cächí-yu xähäⁿ-yu.

²³ Te mei òré ducaⁿ ní cáháⁿ-yu, te ní ndátá-yu dóo-yu, te ní dáquéně-yu núu ñnu sá sätú iní-yu. Te ní quéhnu-yu ñuhu, te ní dácácòyó-yu núu ñnu sá ïo sätú iní-yu. ²⁴ Te tée cùu capitáⁿ cùnù-gá ní xáhaⁿ-dë xii cue sandadú-dë:

—Chí dítá-dë ná quíhu-dë ndéé xití vehe, te cani-ndo-dë ñii, chi na quène yuhu-dë ná tnúhu ní cáháⁿ-dë núu ndéé dúcáⁿ cùdèěⁿ-yu núú-dë —cächí-dë xáhaⁿ-dë xii-güedé.

²⁵ Te sátá ní dácútú ñaha-güedé xii té Páblú sá cání ñaha-güedé ní cùu, te ní xáhaⁿ-dë xii tée cùu capitáⁿ ndécú-ãⁿ:

—Te na cächí tnúhu-í sá vã cúu caniha-güedé ñii, chi tée rómá cùu-í, te vátá quini ndáa-gá-ndó núu ndècuéchi-í àdi ñáhá —cächí-dë xáhaⁿ-dë xii tée cùu capitáⁿ.

²⁶ Te sá dúcáⁿ ní cáháⁿ-dë, te ní sáháⁿ tée cùu capitáⁿ núú tée cùnù-gá, te ní xáhaⁿ-dë:

—Vá cúu cani-o tée-ãⁿ, chi tée rómá cúu-dë —cächí-dë xáhaⁿ-dë.

²⁷ Te ní sáháⁿ tée cùu capitáⁿ cùnù-gá ndéé núú tã Páblú, te ní xáhaⁿ-dë:

—Cáháⁿ ndáa-n núu ndisa tée rómá cúu-n —cächí-dë xáhaⁿ-dë.

Te ní xáhaⁿ tã Páblú:

—Ndáa sá tée rómá cúu-í —cächí tã Páblú xáhaⁿ-dë xii tée cùnù-áⁿ.

²⁸ Te ní xáhaⁿ tã cùnù-áⁿ:

—Yúhú tnàhá-í cùu-í tée rómá, chi vãi díhúⁿ ní cháhu-í —cächí-dë xáhaⁿ-dë.

Te té Páblú ní xáhaⁿ-dë:

—Tnàhá-í cùu-í tée yàcáⁿ tucu, chi tãtã-í cúu-dë tée rómá —cächí tã Páblú xáhaⁿ-dë xii tée cùu capitáⁿ cùnù-gá.

²⁹ Te uuⁿni ní nacaca sata cuè tée cuáháⁿ caniha xii-dë ní cùu. Te ní yúhú tée tàxi tnuní sá dúcáⁿ ní xáhaⁿ tã Páblú sá tã rómá cúu-dë, chi ní xáhaⁿ-dë ní dácútú ñaha-güedé xii-dë, núu xíãⁿ ní yúhu-dë.

Té Páblú ní cáháⁿ ndíhi-dë cue tée cùnùu oré ní quide-güedé jündá

³⁰ Te tée tàxi tnuní sandadú ñá ní xiní-dë ná cuéchi ní dácáa ñáyiú israhél díquí tã Páblú, núu xíãⁿ nduu tnéé ní cana-dë cue dútú cùnùu, ndíhi cue tée cùchiuⁿ, ndíhi cue tée cùu sacuéhé, te ní xáhaⁿ-dë sá cáda-güedé jündá cuendá nducu tnúhu-güedé núú tã Páblú ná cuéchi ní dácáa-yu díquí-dë. Te ní xáhaⁿ-dë xii cue sandadú sá nándaxi ñaha-güedé cadená ndútú-dë, te candeca ñaha-güedé quíhíⁿ núu cáda-güedé jündá. Te ní sáháⁿ-güedé ní nandaxi ñaha-güedé xii-dë ndécá ñaha-güedé cuáháⁿ jündá, te ní quexio-güedé, te ní ngúnutñi-dë núú cuè tée cùchiuⁿ.

23

¹ Te yàcáⁿ ní xíndéhé vaha té Páblú núu nchàa-güedé, te ní xáhaⁿ-dë:

—Cada càhnu iní nchòhó cue tée cùchiuⁿ, te ducaⁿ nchòhó cue tée cùu sacuéhé, véxi-í cächí tnúhu-í sá ña túú cuéchi-í, chi mee Yã Ndiõxí nánhá-gã nása ndècu-í ñuyíú-a, te ñá túú cùcahaⁿ núú-í núú-gã —cächí tã Páblú xáhaⁿ-dë xii-güedé.

² Te té Ananiás tée cùu dútú cùnù-gá ní xáhaⁿ-dë xii cue tée nùtní yatni díñi té Páblú sá cání-güedé déhndé yuhu-dë. ³ Te té Páblú ní xáhaⁿ-dë xii dútú-ãⁿ:

chi quiní té Păblú ná cahni-ndí-dé —càchí-güedé xăhaⁿ-güedé xii cue té cùchiuⁿ.

¹⁶ Te déhe cúha té Păblú ní níhí-dé tnúhu năcuáa cada-güedé ditó-dé. Te ní sáháⁿ-dé cuàrtél, te ní xáhaⁿ-dē xii ditó-dé năcuáa càháⁿ-güedé cada ñaha-güedé. ¹⁷ Te ní cana té Păblú ñⁿ té cùu capitáⁿ, te ní xáhaⁿ-dē:

—Vá cündèe iní-n, quíhíⁿ ndihí-n tēe-a na càháⁿ ndihí-dé té cùnuu-gá, chi ndècu ñⁿ cuendú cúñaha-dē cuiní-í —càchí té Păblú xăhaⁿ-dē xii té cùu capitáⁿ.

¹⁸ Te dătnúni ní xica té cùu capitáⁿ ndécá-dē dáxíⁿ tē Păblú cuáháⁿ núu ndécú tē cùnuu-gá, te òré ní quexiò-güedé núu-dē, te ní xáhaⁿ tē cùu capitáⁿ xii-dé:

—Té Păblú té yíhi vecaá ní cana ñaha-dē xii-í, te ní cachí-dé véxi-í ndihí té-a cuendá cachí tnúhu-dé ñⁿ cuendú cuiní-dé —càchí-dé xăhaⁿ-dē xii té cùnuu-gá.

¹⁹ Te té cùnuu-áⁿ ní tñi-dé ndaha dáxíⁿ tē Păblú, te tănèhe ñaha-dé cuáháⁿ ñⁿ xio, te ní xícáⁿ tnúhú-dē núu-dē, te xăhaⁿ-dē:

—¿Ná cuendú cuiní-n cāháⁿ-n? —càchí-dé xăhaⁿ-dē xii dáxíⁿ tē Păblú.

²⁰ Te ní xáhaⁿ-dē xii té cùnuu-áⁿ:
—Cue tée israél ní ndatnúhu ndáá-güedé sá quíxí-güedé tneé cāháⁿ ndàhú-güedé núu-n càndeca-n té Păblú quíhíⁿ jündá, te yàcáⁿ cācáⁿ tnúhú ndáá-güedé núu-dē ná cúu sá ñi quide-dé, càchí-güedé xítnàha-güedé. ²¹ Te vá quíndáá iní-n chi dícó dandàhú ñáhá-güedé, chi vñhi-gá údico-güedé ndátnúhu-güedé cundedí-güedé ichi cahni ñaha-güedé. Te xítnàha-güedé sá ni dítá vā cāxí-güedé, te ni ndüte vá cóhó-güedé ndéé núu ní ndacu-güedé ní sahni ñaha-güedé, te dătnúni caxi-güedé dítá, te coho-güedé ndute, chi sa ní sani iní-güedé sá cādá-güedé, te cuu cuéchi núu vá cādá-güedé, càchí-güedé xítnàha-güedé. Te cundecu túha-ná-güedé cundetu ñaha-güedé tneé, te núu na quíndáá iní-n càndeca-n-dé quíhíⁿ jündá —càchí-dé xăhaⁿ-dē xii té cùnuu-áⁿ.

²² Te té cùnuu-áⁿ ní xáhaⁿ-dē:

—Cuanùhú, te vá yōo tnàhí cúñaha-n sá ñi quixi-n ní cachí tnúhu-n năcuáa càháⁿ-güedé cada-güedé té Păblú —càchí-dé xăhaⁿ-dē.

Ndèca-güedé té Păblú cuáháⁿ núu tē Juélí té cùu gobiernú

²³ Te té cùnuu-gá ní cana-dé úu cue té cùu capitáⁿ, te xăhaⁿ-dē:

—Tava-ndo úú ciendú sandàdú cue té xica saha, ndihí únídico úxí sandàdú cue té yōdo cuayú, ndihí úú ciendú sandàdú mee-ni cuè té xínehe lánzá. Te cada túha-ndo chi caca-ndo òré caá ñⁿ niú quíhíⁿ-ndó ñúú Cèsareá ndihí té Păblú. ²⁴ Te nducu-ndo cuèdicó ñⁿ úú cuayú codo-dé ndihí cue té ndéé ñáhá xii-dé. Te cada cuedàdú-ndó-dé ichi, te candeca-ndo-dé quíhíⁿ quíndeca-ndo-dé núu tē cùu gobiernú —càchí té cùnuu-áⁿ xăhaⁿ-dē xii cue té cùu capitáⁿ.

²⁵ Te té cùnuu-áⁿ ní cadúha-dé tutú cuendá quíhíⁿ ndaha té Juélí té cùu gobiernú. Te duha ní chídó tnùní-dé núu tütú cuáháⁿ:

²⁶ “Cóvãha díi-n, tătá gobernàdór. Ío cada càhnu iní, yúhú nání-í Clàudiú Lìsiás. Yúhú ní tendaha-í ñⁿ tutú véxi ndaha-n cuendá quiní tnùní-n năcuáa ní cuu iha. ²⁷ Cue tée israél ní tñi-güedé ñⁿ tée nani Păblú cuiní-güedé cahni ñaha-güedé ní cùu, te ní níhí-í tnúhu sá tēe rómá cúu-dē núu ní sáháⁿ-í ndihí sandàdú-í ní dácăcu-ndí-dé. ²⁸ Te ní cuiní-í quiní-í ná cuendá té ñaha-güedé cuéchi xii-dé, núu xíáⁿ ndécá-í-dé ní sáháⁿ núu ñi quide cue té cùchiuⁿ israél jündá. ²⁹ Te yàcáⁿ ní níhí-í tnúhu sá ña túu nă cuéchi ní quide-dé, chi cuendá-ni sá ñi níhí-güedé tnúhu sá ña túú sandáá iní-dé cada-dé nchaa sá ñi xóo cada ñayiu ní xíndecu ndéé sanaha nchicúⁿ nihnu-güedé quide-güedé, xíáⁿ ní cudééⁿ-güedé núu-dē. Te ña túú cuéchi càhnu ni quide-dé núu quíhíⁿ-dē vecaá àdi cahni-í-dé. ³⁰ Te ní níhí-í tnúhu sá cuè tée israél ndúcú-güedé năcuáa cada-güedé cahni ñaha-güedé xii-dé, xíáⁿ ní xáhaⁿ-í xii sandàdú-í sá cándèca

ñaha-güedé quixi xíaⁿ. Te ní xáhaⁿ-í xii cue tée tée ñaha cuéchi sá quíxi-güedé ndéé xíaⁿ cǎháⁿ-güedé núu ná cuéchi ní quide-dé. Te cada cǎhnu iní-n chi duha-ni ndúu tnúhu cǎháⁿ-í, te cundee iní-n quèheⁿ cuendá-n-dě”, duha ní chídó tnúni tée ní cadúha tutú cuáháⁿ ndaha té Juéli.

³¹ Te cue sandádú ní quide-güedé nǎcuáa ní xáhaⁿ tée tàxi tnuní ñáhá xii-güedé chi ní xica-güedé ndíhi té Pǎblú òré caá íⁿ niú, te diu-ni niú-áⁿ ní quexìo-güedé ñuú Antipatrís. ³² Te sátá ní túndaá, te ní nacuico cuè tée xínehe lǎnzá ndíhi dava-gá sandádú xíca sǎha cuánuhú-güedé cuártél, te mee-nǎ sandádú cue tée yòdo cuayú cuáháⁿ ndíhi té Pǎblú. ³³ Te òré ní quexìo-güedé ñuú Cèsareá, te ní sǎha-güedé tée cùu gobiernú tutú nehé-güedé cuáháⁿ. Te ní queheⁿ cuendá-dé té Pǎblú. ³⁴ Te sátá ní dácuáhá tée cùu gobiernú-áⁿ tutú-áⁿ te ní xícaⁿ tnúhú-dě núu tǎ Pǎblú, te xáhaⁿ-dě:

—¿Ndéé tée cùu-n? —cachí-dé xáhaⁿ-dě.

Te ní xáhaⁿ tǎ Pǎblú:

—Tée Cìliciá cùu-í —cǎchí-dé xáhaⁿ-dě.

³⁵ Te ní xáhaⁿ tée cùu gobiernú-áⁿ:

—Òré quexìo cue tée tée ñaha cuéchi xii-n, te cǎháⁿ-n nǎsa ní cuu, chi níhi-í nǎcuáa cada ndáa-í cuendá-n —cǎchí-dé xáhaⁿ-dě xii té Pǎblú.

Te ní xáhaⁿ-dě xii sandádú sá cùndèé-güedé té Pǎblú vehe cǎhnu té Hèrodés.

24

Té Pǎblú xáhaⁿ-dě xii té Juéli sá ña túu cuéchi-dé

¹ Te sátá ní cuu úhúⁿ nduu, te té Ananiás dútu cúnúu-gá cuáháⁿ-dé ñuú Cèsareá ndíhi cue tée cùu sacuéhé ndíhi íⁿ tée nǎni Tértulú tée cǎháⁿ yuhu-güedé. Te cuáháⁿ-güedé núu tée cùu gobiernú cuáháⁿ dácuándèhnde-güedé núu-dě sá ndècuéchi té Pǎblú. ² Te ní sǎnguaca-güedé té Pǎblú. Te òré ní quexìo-dé núu-güedé, te ní ngúita té Tértulú xáhaⁿ-dě xii té Juéli nǎcuáa cǎa cuéchi tée-güedé té Pǎblú:

—Ío cǎhnu cada iní tǎtá gobernádor. Duha ndúu chiuⁿ ndéé iní ñáhá-ndí xii-n vǎxi-ndí, núu nǎsa cachí-n cùnduu. Tǎxǎhu xii-n, chi ío váha ndècu nchaa ñáyiu, te ñá túu nǎa-yu chi ío váha quide-n. ³ Te ío cùdíí iní-yu chi nchaa-ni nduu xǐndecu váha-yu nchaa-yu, te ío tǎxǎhu Ndióxi xii-n sǎ dúcaⁿ quide-n. ⁴ Te cada cǎhnu iní, cuíní-í ndatnúhu-o íⁿ úu-ni cuèndú cuendá sá vǎ cùyàa-o dacuíta-í chiuⁿ-n. ⁵ Te íⁿ tée iha ío dǎsatú iní ñáhá-dě, chi ndèni ní cuu cuáháⁿ-dé ndátnúhu-dé ndíhi ñáyiu isràél dánáa-dé-yu. Te nehé quidé-dě chi cuáháⁿ-dé dǎcǎháⁿ-dé nchaa ñáyiu cuendá quíndaá iní-yu tnúhu tée ní xǐndecu ñuú Nazàrèt. ⁶ Chi ducaⁿ cǎháⁿ cue tée iha sá ní sǎháⁿ-dé veñúhu cǎhnu sá ío cúnúu, te cuíní-dé daquèe tíhú-dě veñúhu cuendá cuíní-dé xocàni-dé sá íi ndécú, núu xǎⁿ ní tní ñaha-güedé ndéca ñaha-güedé cuáháⁿ núu cuè tée cùchiuⁿ cuendá cǎcáⁿ tnúhú-güedé núu-dě núu ná cuendá ducaⁿ cuíní-dé cada-dé, chi ducaⁿ cǎa leí ndécú ndíhi-güedé sá cǎdá ndáa-güedé núu ná íⁿ sá cúu. ⁷ Te té Lisiú tée cùu capitáⁿ cúnúu-gá ní quexìo-dé ndíhi sandádú, te ní dǎcúnú-güedé nchaa cue tée nùtní ndíhi té Pǎblú, te dǎtnúni ní tní ñaha-güedé xii-dé ndéca ñaha-güedé cuáháⁿ. ⁸ Te sátá xǎⁿ, te ní xáhaⁿ-dě sá quíxi-güedé ndéé ndíha cundáa cuéchi-dé. Te yòhó cundee iní-n cǎcáⁿ tnúhú-n núu-dě, te núu ndáa ducaⁿ ní quide-dé àdi ñáhá —cǎchí té Tértulú xáhaⁿ-dě xii té Juéli tée cùu gobiernú.

⁹ Te dava-gá cue tée isràél xǐnutní xíaⁿ ní cǎháⁿ-güedé sá ndáa cǎháⁿ té Tértulú. ¹⁰ Te tée cùu gobiernú ní quide-dé ndaha-dé núu tǎ Pǎblú cuendá cǎháⁿ-dé, te té Pǎblú ní xáhaⁿ-dě:

—Yòhó sa ní cuu titní cuía ndécú-n iha xehndé-n cuéchi nchaa ñáyiu xǐnǎa, núu xǎⁿ ío cùdíí iní-í sá ndíha téhndé cuéchi tée ñaha-güedé xii-í. Te cundee iní-n cùndedóho-n na cǎni-í cuèndú nǎcuáa ní cuu. ¹¹ Te nducu tnúhu-n te quíní-n nǎ cǎháⁿ

ndáá-í, chi sa ní cuu úxúú nduu sá ní sáháⁿ-í veñúhu càhnu sá ìo cùnūu ñuú Jerusàlén ní cáháⁿ ndihí-í Yá Ndiöxí.

¹² Te ni ñà túú ní nàá-í ndihí ñáyiū xití veñúhu, te ñà túú ní xáhaⁿ-í nàá-yu ni ñⁿ xichi, te ni ñⁿ veñúhu lĩhli ní sáháⁿ-í ñà túú ñà ní xáhaⁿ-í cada-yu.

¹³ Te ni ñà túú quèñuhu-güedé cue tée cáháⁿ ndáá te núu ndáá ducaⁿ ñi quide-í. ¹⁴ Te yúhú cáháⁿ ndáá-í sá cáháⁿ ndihí-í Yá Ndiöxí, chi ñi-ni Yá Ndiöxí ní xóo cáháⁿ ndihí ñáyiū ndéé sanaha, núu xiáⁿ ní tuha-í ichi-gá. Te cue tée-a càchí-güedé sá ñà díú ñⁿ ichi váha ni tuha-í. Te yúhú sàndáá iní-í nchaá sá ñi chídó tnùní ndíi Moisés ndihí dava-gá cue tée ní xóo cáháⁿ tnúhu Yá Ndiöxí ndéé sanaha. ¹⁵ Te sàndáá tucu iní-í sá ndótó nchàa ñáyiū ní xihí, cuèi ñáyiū váha iní-xi, te cuèi ñáyiū úhú iní-xi, dico ndotó-yu. Te ducaⁿ ñi xóo quindáá iní nchaá ñáyiū ní xíndecu ndéé sanaha. ¹⁶ Te yúhú ío ndücu ndee-í quide-í nchaá sá cáháⁿ Yá Ndiöxí cuèndá sá vā cúu càhaⁿ núu-í núu-gá ndihí núu ñáyiū ñuyíu-a.

¹⁷ Te sa ní cuu titní cuía sá ñà túú-gá sáháⁿ-í ñuú Jerusàlén, te ní sáháⁿ tucu-í néhè-í díhúⁿ ñi taxi ñáyiū ñuú xicá cuèndá cuañaha-í xii ñáyiū ñuú Jerusàlén. Te ní ndúcù-í sá cuaha táhù-í Yá Ndiöxí. ¹⁸ Te ní xíndecu-í veñúhu càhnu sá ìo cùnūu ní quide-í nchaá nàcuáa ní xóo cada ñáyiū ní xíndecu ndéé sanaha cuèndá nduu vétú iní Yá Ndiöxí. Te ñà túú chitú-yu ni sáháⁿ, te ni ñà túú ñà ní cùu, te ni naníhí ñáhá ñⁿ úú cue tée isràél xii-í, cue tée véxi distritú Àsiá. ¹⁹ Te quixi mee-güedé iha cáháⁿ-güedé, te núu sá ndáá ní xini-güedé sá yúhú ndècuéchi-í ní cùu, ²⁰ àdi ñáhá. Dico cachí tnúhu cue tée-áⁿ ñàsa ní cuu òré ní xíndecu-í jündá-güedé ñuú ndècuéchi-í àdi ñà túú ndècuéchi-í. ²¹ Dico ñà túú cuéchi-í chi ñⁿdi-ñi tnúhu ni cáháⁿ-í ní xáhaⁿ-í xii-güedé sá sàndáá iní-í sá ndótó nchàa ñáyiū ní xihí, te ñi-ni núu xiáⁿ càchí-güedé sá ndècuéchi-í —càchí té Páblú xáhaⁿ-dè xii té Juèlí.

²² Te té Juèlí sa xini váha-dé nàcuáa cuaháⁿ tnúhu Jèsús, núu xiáⁿ ñà ní

cuini-gá-dé ndatnúhu-dé ndihí té Páblú, te ní xáhaⁿ-dè:

—Sa ní cuu, cundetu-n na quèxio té Lisiú tée cùu capitáⁿ cùnūu-gá, te òré-áⁿ cundáá cuèndá-n —càchí té Juèlí xáhaⁿ-dè.

²³ Te ní xáhaⁿ-dè xii tée cùu capitáⁿ:

—Cundeé-n tē Páblú-áⁿ, te núu nása càchí-dé cada-n, te dañá-n na cáháⁿ ndihí-dé cue tée xini tnáhá ndihí-dé núu cuañaha-güedé nchaá sá xini ñuú-dé àdi nása cada-güedé —càchí té Juèlí xáhaⁿ-dè xii tée cùu capitáⁿ.

²⁴ Te ní cuu titní nduu, te ní sáháⁿ té Juèlí vechiūⁿ ndihí ñadihí-dé, te ñaha-áⁿ nání-áⁿ Drüsilá, te ñaha isràél cúu-áⁿ. Te ní xáhaⁿ-dè sá quingueñuhu-güedé té Páblú, te òré ní quexio-dé vechiūⁿ, te ní cáháⁿ-dé núu-yu nchaá-yu sá quindáá iní-yu tnúhu Xitohó Jesucristú. ²⁵ Te ní xáhaⁿ-dè:

—Mee-ni sá vāha cada-ndo. Te coto-ndo mēe-ndo, te vā cadá-ndó ni ñⁿ sá cuéhé sá dúhá, chi ñⁿ nduu cáháⁿ Yá Ndiöxí ndèdacàa ñáyiū váha iní-xi, te ndèdacàa ñáyiū úhú iní-xi —càchí té Páblú xáhaⁿ-dè.

Te sá dúcáⁿ ñi xáhaⁿ-dè, te ní yúhú té Juèlí, te ní xáhaⁿ-dè:

—Vā cáháⁿ-gá-ó tnávii, cuaháⁿ, te òré cüyächí-í, te cana ñaha-í xii-n —càchí-dé xáhaⁿ-dè.

²⁶ Te té Juèlí ní quide-dé cuèndá sá cuañaha tē Páblú díhúⁿ te vā ndíhu-gá-dé vecaá ní cùu, núu xiáⁿ titní xito ní cana-dé té Páblú vechiūⁿ ní ndatnúhu ndihí tnàha-güedé, dico ñà túú ní chāhu-dé. ²⁷ Te úú cuía ducaⁿ ñi quide-güedé, te dātnùní ní xínu té Juèlí chiūⁿ-dé, te ní ngúnutñi té Pòrsiú Fèstú. Te òré ní xínu té Juèlí chiūⁿ-dé, te ní dándōo-dé té Páblú yihí-ni-dè vecaá. Te ducaⁿ ñi quide-dé cuèndá ní cuini-dé cuñu-dé núu cuè tée isràél.

25

Té Páblú cáháⁿ ndihí-dé té Fèstú

¹ Te ní cuu úní nduu sá ñi quexio té Fèstú ñuú Cèsareá ní queheⁿ-dé chiūⁿ, te ní quee-dé cuaháⁿ-dé ñuú Jerusàlén. ² Te yacáⁿ ní naníhí

tnáhá-dě ndihí nchaa dútú cúnù ndihí nchaa cue tée tàxi tnuní ñáhá xii ñáyiú israhél, te xáhaⁿ-güedě xii té Fèstú sá ndáá ndècuéchi té Páblú. ³ Te ní cáháⁿ ndáhú-güedé núú-dě sá téndàha-dé sandàdú-dé quíngueñuhu ñaha-güedě vecaá xii-dé ndéé ñuú Cèsareá te candeca ñaha-güedě quíhíⁿ. Te ducaⁿ ñí cáháⁿ-güedé, chi ní ndatnúhu-güedé sá cáhni ñaha-güedé xii té Páblú ichi ni cùu. ⁴ Te té Fèstú ní xáhaⁿ-dě:

—Vá cúu quíxi-dé ndéé ndíha. Na cùndetu-dé ñuú Cèsareá chi sacú-ni nduu cuyaa-í iha te dàtnuní núhú-í yacáⁿ. ⁵ Te yáchí-gá quíhíⁿ ndihí-í cue tée cùnù-gá, te yacáⁿ cuu cáháⁿ-ndó núu ndáá ndècuéchi-dé àdi cáháⁿ mée-dě núu ndáá ndècuéchi-dé àdi ñáhá, te cutnùní ini-ndó —càchí-dé xáhaⁿ-dě.

⁶ Te ní xíndecu té Fèstú úná úxí nduu ñuú Jerusàlén, te dàtnuní cuánuhú-dé ñuú Cèsareá. Te nduu tnéé cuáháⁿ-dè vechiⁿ, te òré ní quexiò-dé, te ní xáhaⁿ-dè xii cue sandàdú xínú cuéchi sá quíhíⁿ-güedé queñuhu-güedé té Páblú vecaá te candeca ñaha-güedě quíhíⁿ vechiⁿ. ⁷ Te òré ní quexiò té Páblú vechiⁿ, te sa ndècu cue tée israhél cue tée ní quee ñuú Jerusàlén, te cuánguñuhu-güedé ndéé dìñi té Páblú ní ngúnutñi-güedé, te xáhaⁿ-güedě xii cue tée cùchiuⁿ sá ndècuéchi vñhi-dé, dico ñá túú ní cùndee tnúhu-güedé. ⁸ Te té Páblú ní xáhaⁿ-dè xii té Fèstú:

—Ñá túú ndècuéchi-í, ñá túú nã ní quide-í, chi ñá túú tnáhá ini-í cada-í ñíⁿ sá càchí lèi sá vã cúu cada-o. Te ni xiti veñúhu càhnu sá ño cùnù ñá túú nã quide-í, te ni té Cèsár tée yìndaha cuéhé nacióⁿ ñá túú càháⁿ cuéhé-í cuèndá-dé —càchí té Páblú xáhaⁿ-dè xii-dé.

⁹ Te té Fèstú ní cuini-dé cada-dé nàcuáa cudíu-dé núú cuè tée israhél ní cùu, núu xíáⁿ ní xáhaⁿ-dè xii té Páblú:

—¿Cundee ìní-n quíhíⁿ-n ñuú Jerusàlén-ãⁿ? Te yacáⁿ cundáa cuéchi sá sàa díquí-n —càchí té Fèstú xáhaⁿ-dè xii té Páblú.

¹⁰ Te xáhaⁿ té Páblú:

—Díu-ni ñíⁿ vechiⁿ tée cùchiuⁿ Cèsár ndécú-í iha, te díu-ni iha cada ndáa-n

núu cuini-n ní cùu. ¿Te ná cuèndá candeca ñaha-n quíhíⁿ ingá xichi? Yòhó tnáhá-n xini-n sã ñá túú nã quide-í ñáyiú israhél. ¹¹ Chi núu dìcò yúhú ní quide-í ñíⁿ cuéchi càhnu, te ñá túú nã cada-xi cuèi ña càhni ñaha-ndo xii-í ní cùu. Te sa ní cutnùní ini-n sã ñá ndáa, chi mee-ni tnúhu ndehnde xícáháⁿ-güedé, te ñá túú nduu váha-xi ducaⁿ cada-n cúñaha-n sã quíhíⁿ-í ndihí-güedé ingá xichi. Te xíáⁿ cuini-í quíhíⁿ-í núú tã Cèsár tée yìndaha cuéhé nacióⁿ, te yacáⁿ cáháⁿ mée-dě núu ndáa ndècuéchi-í —càchí té Páblú xáhaⁿ-dè xii té Fèstú.

¹² Te ní ndatnúhu té Fèstú ndihí cue tée chindee tnúhu ñaha xii-dé, te dàtnuní ní xáhaⁿ-dè xii té Páblú:

—Te sa ní cáháⁿ-n sã quíhíⁿ-n quítnahá-n tã Cèsár te díu-ni quíhíⁿ-n, te quini-n nãsa cáháⁿ tée-ãⁿ yacáⁿ —càchí-dé xáhaⁿ-dè xii té Páblú.

Té Páblú càháⁿ ndihí-dé té Àgripá tée yìndaha nacióⁿ Israhél

¹³ Te sátá ñí cuu cuéhé nduu, te ní quee té Àgripá tée yìndaha nacióⁿ Israhél cuáháⁿ-dè ñuú Cèsareá ndihí ñadihí-dé, te ñaha-áⁿ nání-áⁿ Berènicé te òré ní quexiò-yu, te ní cáháⁿ ndihí-yu té Fèstú. ¹⁴ Te sátá ñí cuu titní nduu, te ní cáháⁿ té Fèstú cuèndá té Páblú ní xíi-dé té Àgripá:

—Ndècu ñíⁿ tée ní dándõo té Juèlì vecaá nání-dè Páblú. ¹⁵ Te cútnahá ní sáháⁿ-í ñuú Jerusàlén ní nanítnáhà-í ndihí cue dútú cúnù ndihí cue tée cùu sacuéhé núu ñáyiú israhél. Te ní dácáa díquí-güedé té Páblú cuéchi, te ní cachí-güedé sá táuchìuⁿ-í càhni ñaha-güedé xii-dé ní cùu. ¹⁶ Te ní xáhaⁿ-í xii-güedé sá vã cúu, chi ñá túú dùcaⁿ quide nchúhú cue tée ròma cùtexínu cada castiú-ndí ñáyiú, chi díhna-gá ndúcú tnúhu-ndí núú ñáyiú sàa cuéchi díquí-xi cuèndá quini-ndí núu nãsa cáháⁿ mée-yu ndihí ñáyiú sácáⁿ cuéchi cuèndá-yu, te òré-áⁿ cútnuní ini-ndí núu ndáa ndècuéchi-yu àdi ñáhá, te ducaⁿ te nihí-ndí nàcuáa quide ndáa-ndí

cuendá-yu, duha ní xáhaⁿ-í xii-güedé —càchí té Fèstú xáhaⁿ-dë xii té Àgripá.

17 Te ní xáhaⁿ tùcu té Fèstú:

—Te sátá nǐ quexìo-güedé ndéé ndíha, te nduu tnéé ní sáháⁿ-ni-ndí vechiùⁿ. Te ní xáhaⁿ-í sá quǐngueñuhu-güedé té Páblú candeca ñaha-güedé quixi, te òré ní quexìo-dé, 18 te ní ngüíta-güedé xáhaⁿ-güedé sá ndècuéchi-dé. Te ní sani iní-í sá ñá cuéchi càhnu tee ñaha-güedé dico ñáhá, chi dicó-ni sá ñá tnúhu ní cáháⁿ-dé, xiáⁿ ducaⁿ nǐ quide-güedé. 19 Te ní tenáá ñáhá-güedé xii-dé, chi càchí-güedé sá ñá túú càháⁿ váha-dé cuendá ndiõxí-güedé. Te tnàhá-ni cuendá ñá té nani Jesús càháⁿ-dé, chi càchí-dé sá nǐ xihí téé-áⁿ te ní ndoto-dé càchí-dé xáhaⁿ-dë xii-güedé, càchí-güedé. 20 Te ñá ní cùtnuní iní-í nása cúñaha-í xii-güedé cuendá téhndé cuéchi-dé. Te xiáⁿ ní xicáⁿ tnúhu-í núú tē Páblú nūu cundee iní-dé quíhíⁿ-dé ñúú Jerusálén, te ndéé ndiácáⁿ cada ndáá-ndí cuendá-dé, te núu ndáá ndècuéchi-dé nàcuáa càháⁿ-güedé àdi ñáhá ní cùu. 21 Te dàtnuní té Páblú ní cachí-dé sá cündècu tnaa-dé vecaá te dàtnuní quíhíⁿ-dé núú tē Cèsár, te téé-áⁿ cada ndáá-dé cuendá-dé. Te cuendá sá dúcáⁿ ní cáháⁿ té Páblú, xiáⁿ nūu ní xáhaⁿ-í sá cündèé ñáhá cuè sandadú xii-dé, nini na còto-í nása cada-í quíhíⁿ-dé núú tē Cèsár, duha ní xáhaⁿ-í xii-güedé —càchí té Fèstú xáhaⁿ-dë xii té Àgripá.

22 Te té Àgripá ní xáhaⁿ-dë xii té Fèstú:

—Te tnàhá yúhú ío cudíí iní-í cundedóho-í tnúhu càháⁿ-dé —càchí-dé xáhaⁿ-dë.

Te ní xáhaⁿ tē Fèstú:

—Tnéé cana-í-dé te cundedóho-n nása cáháⁿ-dé —càchí-dé xáhaⁿ-dë.

23 Te nduu tnéé ní quexìo té Àgripá ndíhi ñadìhí-dé tá Berènicé vechiùⁿ, te ío ní quide càhnu ñaha-güedé xii-yu. Te cuánguihú-yu vechiùⁿ ndíhi cue téé cùu capitáⁿ cùnùu-gá ndíhi cue téé cùnùu ñúú Cèsareá. Te té Fèstú ní xáhaⁿ-dë sá quǐngueñuhu-güedé té Páblú vecaá, te òré ní quexìo-dé, 24 te

ní xáhaⁿ tē Fèstú xii té Àgripá ndíhi nchaa ñáyiù xǐndecu-áⁿ:

—Chí cündèhe téé iha chi téé-a càchí cue téé isràél sá ndècuéchi-dé, te cùtnàhá ní xǐndecu-í ñúú Jerusálén ní cachí-güedé sá ndáa ndècuéchi-dé, te diu-ni ducaⁿ càháⁿ-güedé iha. Te nchaa-güedé ní cuáá-güedé te càchí-güedé sá táuchiuⁿ-í cahni ñaha-güedé xii-dé ní cùu. 25 Te sátá nǐ ndíhi cuendú ní cáháⁿ-güedé, te ní cutnùní iní-í sá ñá túú nǐ ñá cuéchi càhnu ní quide-dé, núu ñá túú ní tàuchiuⁿ-í cahni ñaha-güedé xii-dé. Te mee-dë ní cachí-dé sá quíhíⁿ-dé núú tē Cèsár téé yǐndaha cuéhé nacióⁿ, te ní xáhaⁿ-í sá cúu quíhíⁿ-dé. 26 Te ñá túú ní xini váha-í nása ní quide-dé, núu xiáⁿ ñá ní ñhí-í nàcuáa cadúha-í tutú quíhíⁿ ndaha té Cèsár, te xiáⁿ ní cana-í-dé véxi-dé iha cuendá nchaa-ndo càháⁿ ndíhi-ndo-dé. Te ducaⁿ canuu cadíhna-gá yòhó tātá Àgripá cácaⁿ tnúhú-n núú-dë nūu nása cáháⁿ-dé, te òré-áⁿ cutnùní iní-í nása cada-í cadúha-í tutú quíhíⁿ ndaha té Cèsár. 27 Chi sàni iní-í sá ñá túú ndūu váha-xi sá quíhíⁿ ñá téé tàu cuéchi te núu vá códó tnùní núú ñá tutú nàcuáa càa cuéchi tàú-dé —càchí té Fèstú xáhaⁿ-dë xii-güedé.

26

Te Páblú càháⁿ ndíhi-dé té Àgripá

1 Te dàtnuní ní xáhaⁿ tē Àgripá téé yǐndaha nacióⁿ Isràél xii té Páblú:

—Te vitna cáháⁿ-n nūu nása ní cuu cuendá-n —càchí-dé xáhaⁿ-dë.

Te té Páblú ní ndacani-dé ndaha-dé sá cündedóho-güedé, te ní xáhaⁿ-dë xii té Àgripá téé yǐndaha nacióⁿ Isràél:

2-3 —Tātá Àgripá, ío cudíí iní-í sá nǐ naníhí tnàhá-ó vitna, chi yòhó ío váha xini-n nchaa nacúáa quide ñáyiù isràél quidé càhnú-yu Yá Ndiõxí, te ío váha xini-n nchaa tnúhu xǐtnàhá-yu. Te vitna cundee iní-n cündedóho-n ñá úu tnúhu na càháⁿ-í. Na càchí tnúhu-í sá ñá ndáa ní quide-í nchaa sá càháⁿ cue téé isràél.

Té Păblú cǎháⁿ-dē nǎcuáa ní quide-dē cǔtnáhá vátá túhá-gǎ-dē ichi Yá Ndiǒxí

⁴ Te sa naha nchaa cue tée cūnuu núú ñáyiú isráel nǎcuáa ní quide-í ñuú-í ndihí núú Jerusálén cǔtnáhá ní cuu landú-í. ⁵ Te mee-güedē náhá-güedē sá ndéē lǐhli-í ní chitnahá-í cue tée cūu fariséú. Te núu cuíní-güedé cǎháⁿ-güedé sá tēe fariséú cúu-í àdi ñáhá dico nchaa-güedé sa naha-güedé sá cuè tēe-áⁿ ní chitnahá-í. Te cue tēe cūu fariséú-áⁿ ïo cuíní-güedé cada-güedé nchaa nǎcuáa nchìcúⁿ nihnu ñáyiú quidé-yu. Te yúhú nchaa sá nchìcúⁿ nihnú-yu quidé-yu-áⁿ ñí quide-í. ⁶ Te vitna ndècu-í iha, te cǎháⁿ-n nūu váha-ni quide-í àdi ñáhá, chi cue tēe-ǎⁿ tēe ñaha-güedé cuéchi xii-í cuendá sá sándáá iní-í sá ndótó nchaa ñáyiú ní xihí. Te ñu-ni ducaⁿ ñí xáhaⁿ Yá Ndiǒxí xii nchaa ñaní tnáhá-ó ñí xindecu ndéé sanaha. ⁷ Te nchaa ñáyiú-áⁿ xǐndetú-yu nduu ndòto ñáyiú ní xihí ní cūu. Te ñu-ni ducaⁿ ndetu nchaa ñaní tnáhá-ó ndècu ñuyíú-a ndéé vitna, te xǐáⁿ nūu cuèi nduu cuèi niú cǎháⁿ ndihí-yu Yá Ndiǒxí. Te sá sándáá iní-í nūu xǐáⁿ ní cǎháⁿ-í, te tēe ñaha cue tēe isráel cuéchi xii-í. ⁸ ¿Te ná cuendá nchòhó cue tēe isráel ñá túú cuíní-ndó quindáá iní-ndó sǎ dándòto Yá Ndiǒxí nchaa ñáyiú ní xihí? —càchí té Păblú xáhaⁿ-dē.

Té Păblú cání-dē cuendú sá ñí xóo chihi-dē ñáyiú sándáá iní tnúhu Jèsús vecaá

⁹ Te ní xáhaⁿ tùcu té Păblú: —Ndéé dàvá-áⁿ ñí quide úhú-í ñáyiú sándáá iní-xi tnúhu Jèsús Yaá ní quee ñuú Nazàrét, te ní cǎháⁿ-í sá váha-ni ní quide-í sá dúcáⁿ ñí quide-í. ¹⁰ Te ñu-ni ducaⁿ ñí quide-í ñuú Jerusálén. Te cue dútú cūnuu ní taxi-güedé ñí tutú cuendá tñí-í ñáyiú ní sándáá iní tnúhu Jèsús, te vǎi-yu ní chihi-í vecaá. Te òré ní cǎháⁿ-güedé sá cǎhni-güedé ñáyiú-áⁿ, te tnáhá-í ní cǎháⁿ-í sá cúu cǎhni ñaha-güedé xii-yu. ¹¹ Te tñí xito ní sáháⁿ-í nchaa veñúhu ñáyiú isráel, te ní caní-í-yu te ní xáhaⁿ-í sá dáñá-yu ichi Jèsús. Te cuendá ío ní

cudéⁿ-í núu-yu, xǐáⁿ ní sáháⁿ-í nchaa ñuú xícá ñí sánúndúcú-í dava-gá ñáyiú sándáá iní tnúhu-gá cuendá dandòho ñaha-güedé xii-yu.

Té Păblú cǎháⁿ tucu-dē nása ní cuu ní tuha-dē ichi Yá Ndiǒxí (Hch. 9:1-19; 22:6-16)

¹² Te cuendá xǐáⁿ ní xica tucu-í cuáháⁿ-í ñuú Dámascú, néhè-í tutú ní taxi cue dútú cūnuu cuáháⁿ, cuendá sá ndácú-í tñí-í nchaa ñáyiú sándáá iní tnúhu Jèsús ní cūu. ¹³ Te òré caúxúú nduu ñuhu-í ichi cuáháⁿ-í, te uuⁿni ní quee ñuhú andiú ñí dáyèhé-xi ndéé núu núnñí-í ndihí cue tēe ndèca tnaha ndihí-í, te níhi-gá ní dáyèhé-xi dàcúúxí nchìcanchii. ¹⁴ Te nchaa-ndí ní nduá-ndí ndéé ñuhu, te ní tecú dóho-í cǎháⁿ ñí sá cǎháⁿ tnúhu ñáyiú isráel, te càchí-xi: “Yòhó Sàulú, ¿Ná cuendá cúu úhú iní ñáhá-n xii-í dándòho ñaha-n? Te ío dándòho-n mee-n, chi dàtná cuíní-n quide ndicutu quide-n chi quiti-áⁿ òré cǔxi-güedé-di pùyá te sǎha-di patadá núu-xi, te sá dúcáⁿ quide-di te quide úhú-di mee-di. Te ducaⁿ sǎtnahá-xi cūu yohó chi ñá túú sándáá iní ñáhá-n xii-í”, càchí sá ñí cǎháⁿ-áⁿ. ¹⁵ Te ní xáhaⁿ-í: “¿Ná cúu yòhó sá ñí cǎháⁿ-áiⁿ?”, xáhaⁿ-í. Te càchí sá cǎháⁿ-áⁿ: “Yúhú cúu-í Jèsús Yaá cúu úhú iní-n”, duha ní cachí sá cǎháⁿ-áⁿ. Te xǐáⁿ ní cutnùní iní-í sá Jèsús cǎháⁿ. ¹⁶ Te ní cachí-gá: “Ndacuíñí-n chi yúhú cǎháⁿ-í chi cuíní-í quíhíⁿ-n càda-n chiuⁿ-í, chi quíhíⁿ-n cǎháⁿ-n núu ñáyiú nǎcuáa ní cuu ní xiní ñáhá-n xii-í vitna, te quixi tucu-í cǎháⁿ ndihí ñaha-í xii-n, te cúñaha-n xii-yu nǎcuáa cǎháⁿ-í. ¹⁷ Chi cuíní-í quíhíⁿ-n cǎháⁿ-n tnúhu-í núu ñáyiú isráel ndihí núu ñáyiú ñá túú cūu ñáyiú isráel, te coto ñaha-í xii-n cuendá vá cǎhni ñáhá-yu xii-n. ¹⁸ Te cuíní-í quíhíⁿ-n cǔñaha-n xii-yu sá dáñá-yu nchaa ichi cuèhé ichi duha ndécú-yu, te tuhá-yu ichi váha cuendá vá quindáá iní-yu cadá-yu sá cǎháⁿ yucu ñávaha, te quindáá iní-yu cadá-yu nchaa nǎcuáa cǎháⁿ

Yă Ndiöxí. Te núu na quindáá iní-yu tnúhu càháⁿ-í, te cada càhnu iní-í nchaa cuéchi-yu, te naníhí tãhú-yu ndihí dava-gá ñáyiu sa ní xócuíñí nchaa sá cuèhé sá dúhá ní xíndecu iní-yu”, duha ní cachí-gá xii-í —càchí té Păblú xăhaⁿ-dě xii té Àgripá tée yîndaha nacióⁿ Isràél.

Té Păblú quidé-dě nchaa năcuáa ní xăhaⁿ Jêsús cada-dé

19 Te ní xăhaⁿ tucu té Păblú xii té Àgripá:

—Ñá túú dàña ndeé-í quidé-í nchaa năcuáa ní cáháⁿ Jêsús òré ní cáháⁿ-gá andiu. 20 Te díhna-gá ñáyiu ñúú Dàmascú ní cáháⁿ-í tnúhu-gá núu-yu, te ní xăhaⁿ-í xii-yu sá dáñă-yu nchaa sá cuèhé sá dúhá quidé-yu, te cáháⁿ ndihí-yu Yă Ndiöxí, te cada-yu mee-ni sã văha cuendá cutnùní iní dava-gá-yu sá ní dáñă-yu nchaa sá ñă túú văha ní xóo cada-yu. Te ducaⁿ-ni ní xăhaⁿ-í xii ñáyiu ñúú Jerusálén ndihí ñáyiu nihí nacióⁿ Isràél ndihí nchaa ñáyiu ñă túú cùu ñáyiu isràél. 21 Te cuendá sá dúcáⁿ ní cáháⁿ-í nŭu ní tñi ñaha cuè tée isràél xii-í cútnăhá ní sáhăⁿ-í veñúhu càhnu sá ïo cùnūu cahni ñaha-güedé ní cùu. 22 Te ñiu-ni mee Yă Ndiöxí ní chindee ñăha-gá xii-í nŭu ndècu-í iha tñaví cáháⁿ-í tnúhu-gá, te mee-ni tñuⁿhu-gá cáháⁿ ndihí-í ncháa-yu, cuèi ñáyiu cuica, te cuèi ñáyiu ndàhú. Te ndíi Moisés ndihí dava-gá cue tée ní xóo cáháⁿ tnúhu Yă Ndiöxí ndéé sanaha ní cáháⁿ-güedé năcuáa cada-xi vitna, te ñiu-ni ducaⁿ cáháⁿ-í nchaa-ni nduu. 23 Te cue tée-ăⁿ ní cachí-güedé sá Crístú Yaá tendaha Yă Ndiöxí quixi ñuyú-a ndoho tnahá-gá, te cuú-gá, te dàtnùní ndoto-gá. Te ducaⁿ càda-xi nchaa ñáyiu ní xihí ndotó-yu núu na sàá nduu chi ducaⁿ càda-xi ní cachí méé Yă Ndiöxí. Te cuendá sá dúcáⁿ ní ndoto-gá, xíăⁿ cútnùní sá cúu năníhí tãhú ñáyiu, cuèi ñáyiu isràél, te cuèi ñáyiu ñă túú cùu ñáyiu isràél. Te dàtnă-ni ndùu tnúhu ní cáháⁿ cue tée ní xóo cáháⁿ tnúhu-gá ndéé sanaha-ăⁿ, te ñiu-ni ducaⁿ cáháⁿ yúhú tucu —càchí té Păblú xăhaⁿ-dě.

Té Păblú xăhaⁿ-dě xii té Àgripá sá quindáá iní-dé tnúhu Jêsús

24 Te sá dúcáⁿ ní cáháⁿ té Păblú, te ní cáháⁿ nihí té Fèstú, te xăhaⁿ-dě:

—Păblú, jío lùcú cáháⁿ-n! Cuendá ïo vài ní dăcuáhă-n, núu xíăⁿ ndádă lùcú ñăhá-xí xii-n —cachí-dé xăhaⁿ-dě.

25 Te ní xăhaⁿ tē Păblú:

—Ñăhá, vá dúcáⁿ cáháⁿ-n chi ñă díú sã lùcú-í duha cáháⁿ-í, chi tnúhu ndáá cáháⁿ-í. 26 Te té Àgripá-a sa năha-dé ndihí nchaa ñáyiu isràél năcuáa ní cuu, chi sa ní nihí-dé tnúhu ndihí dava-gá-yu năcuáa ní cáháⁿ-í, núu xíăⁿ cùyi-í cáháⁿ ndihí-í-dé —càchí-dé xăhaⁿ-dě xii té Fèstú.

27 Te ní xăhaⁿ-dě xii té Àgripá:

—Yúhú sa xini-í sá sândăá iní-n tnúhu ní chídó tñuní cue tée ní xóo cáháⁿ tnúhu Yă Ndiöxí ndéé sanaha —càchí-dé xăhaⁿ-dě.

28 Te ní xăhaⁿ tē Àgripá:

—¿Quide-n cuendá sá íñⁿ úú tnúhu ní cáháⁿ-n te quindáá iní-í tnúhu Jêsús cáháⁿ-n-ăⁿ? —càchí-dé xăhaⁿ-dě.

29 Te ní xăhaⁿ tucu té Păblú:

—Cuèi vitna te cuèi ndéé cuèé-gá dico cuini-í sá dăcuítíi sã quindáá iní-n tnúhu Jêsús. Te ñiu-ni ducaⁿ xicáⁿ táhú-í núu Yă Ndiöxí sá ncháá ñáyiu ndècu ndihí-o iha quindáá iní-yu tnúhu-gá dàtnă cuini-n ní quide yúhú, ducaⁿ càda-yu. Dìcô-ni sá nŭu vá quihíⁿ-ni-yu vecaá dàtnă cuini-n ndòho yúhú —càchí-dé xăhaⁿ-dě xii té Àgripá.

30 Te sátă dúcáⁿ ní cáháⁿ-dé, te ní ngúnutnăi té Àgripá tée yîndaha nacióⁿ Isràél, ndihí té Fèstú tée cùu gobiernú, ndihí tá Berenicé ndihí dava-gá ñáyiu xínucóo yatni. 31 Te ní tnahá-yu ndèca tnahá-yu cuáhăⁿ ïⁿ xio. Te ní xitnăhá-yu:

—Tée-ăⁿ ñă túú ñă cuéchi ní quide-dé nŭu chihí ñaha-güedé vecaá àdi cahni ñaha-güedé —càchí-yu xitnăhá-yu.

32 Te té Àgripá ní xăhaⁿ-dě xii té Fèstú:

—Cuéchi mee-dé chi ní cachí-dé sá quítnahă-dé té Cèsár, xíăⁿ nŭu ndíhu tucu-dé vecaá, te núu ñă túú dùcaⁿ ni

cáháⁿ-dé, te cácu-dé ní cùu —cachí-dé xăhaⁿ-dě xii té Fèstú.

27

Té Păblú cuáháⁿ-dé ñuú Ròmá

¹⁻² Te ní ndatnúhu-güedé sá quíhíⁿ té Păblú ndíhi bàrcú nàcióⁿ Itàliá, te tnàhá yúhú quíhíⁿ-í ndíhi-dé. Te tnàhá ìⁿ té nàni Aristarcú cuení-dé quíhíⁿ ndíhi-ndí-dé, te cùu-dé té ñuú Tesalónicá, te ñuú-áⁿ yíndèhu-xi distritú Macèdoniá. Te ní sáha cuèndá-güedé té Păblú ndíhi ìⁿ ũú-gá cue té xixíhi vecaá ní queheⁿ cuèndá ñáhá tē Jülüú té cùu capitáⁿ, té yíndaha nchaá sandadú nání Àugustú, te ní quée-ndí nchaá-ndí bàrcú ñuú Adràmitiú. Te ní xica bàrcú-áⁿ cuáháⁿ-ndí ndíhi-xi te cuita yáha-ndí ìⁿ ũú ñuú yíndèhu distritú Àsiá quíhíⁿ. ³ Te nduu tnée ní quexìo-ndí ñuú Sidón. Te ío váha ní quide té Jülüú, chi ní dáñá-dē ní quene té Păblú ní sáháⁿ-dé ní cáháⁿ ndíhi-dé cue té ío váha tnàhá tnúhu ndíhi-dé núu cudana cundàhú iní ñáhá-güedé cuáñaha-güedē nchaá sá xíní ñuhu-dé. ⁴ Te dătnúní ní ndée tucu-dé bàrcú cuáháⁿ-ndí. Te ío níhi táchí te ñá ní dăña-xi caca ndáá bàrcú, te ní sáháⁿ bàrcú ndée yatni yuhu dîstritú Chîpré, te distritú-áⁿ cáá cuădava xití làmár, te xíáⁿ ñà túú cuèhé táchí ní yăha-ndí. ⁵ Te ta yăha-ndí cuáháⁿ, te ní yáha-ndí ìⁿ xio yuhu dîstritú Cîliciá ndíhi yuhu dîstritú Pănfilíá, te ní sáá-ndí ndée ñuú Mírá ìⁿ ñuú yíndèhu distritú Liciá.

⁶ Te ní quene té cùu capitáⁿ cuándúcú-dē ingá bàrcú, te ní níhí-dē ìⁿ bàrcú té ñuú Alejândriá, ñúhú ìchi-xi quíhíⁿ-xi nàcióⁿ Itàliá. Te ní ndícuaca ñaha-dē xii-ndí cuáháⁿ-ndí ní quée-ndí bàrcú-áⁿ, te ní xica-xi cuáháⁿ-xi. ⁷ Te ío cuèé cuáháⁿ bàrcú-áⁿ, cuèhé nduu ní xúhuⁿ-xi ichi, te yica-ni ñí quexìo-ndí yuhu ñuú Nidú, te ñá ní dăña-gá táchí quíhíⁿ ndáá bàrcú núu ní xícó ndúú-xi. Te ní yáha-ndí ìⁿ xio yuhu dîstritú Crětá núú ñà túú quène vihi táchí, te ñu-ni cuádava tucu làmár cáá dîstritú-áⁿ.

Te ní yáha-ndí yuhu ñuú Sàlmón, te ñu-ni Crětá yíndàha-xi ñuú-áⁿ. ⁸ Te ní yáha-ndí cuáháⁿ-ndí mee-ñá núú ràyá distritú Crětá, te ío ní ndoho-ndí ní sáá-ndí ìⁿ xichi núú nání Puèrtú Váha, yatni víi-ni-gá ñuú Làseá.

⁹ Te ní cuyaa vihi-ndí ichi, ducaⁿ-ni cùu-ndí ní tnàhá yóó cúúⁿ dăú táchí, te ío úhú yăha bàrcú núu na quíhíⁿ-ni-xi. ¹⁰ Te ní xáhaⁿ tē Păblú xii-güedé:

—Nchaá-ndo cùndedóho-ndo tnúhu na càháⁿ-í-a. Ío úhú núú na càda yica-o quíhíⁿ-ó ndíhi bàrcú chi cuíta càrgá te cuíta bàrcú, te cuu-ni iní-xi tnàhá-ni mee-o cùú-ó chi cáháⁿ-ó núu na ngàunihnu-o xití ndute —càchí-dé xăhaⁿ-dě xii-güedé.

¹¹ Te té cùu capitáⁿ ñá ní sàndáá iní-dé tnúhu ní cáháⁿ té Păblú. Dico tnúhu ní cáháⁿ té dăcaca bàrcú ndíhi xitohó-xi chi ní sàndáá iní-dé. ¹² Te ñá ní tnàhá iní-güedé Puèrtú Váha cuèndá sá ñí tnàhá yóó cúúⁿ dăú táchí, te ñá túú dăhu váha táchí xíáⁿ, núu vâi-güedé ní cuíní-güedé yáha-güedé quíhíⁿ-güedé sáá-güedé ndée ñuú Fènicé ní cùu. Te yàcáⁿ cundecu-güedé yóó cúúⁿ dăú táchí cuèi ñá túú càváha vihi, chi nchíi năcuáa yăha bàrcú, te yàcáⁿ quíhu táchí, dico dăhu-gá. Núu xíáⁿ ndée ndíácăⁿ nâtăcá bàrcú yóó cúúⁿ dăú táchí, te ñu-ni Crětá yíndàha-xi ñuú-áⁿ.

Ñitùhú làmár cúúⁿ dăú táchí

¹³ Te duha ní quene nuu luha táchí, xíáⁿ ní sani iní-güedé sá ndácú-güedé quíhíⁿ-güedé, núu ní natava-güedé caá ndètní ndée bàrcú, te ní xica-xi cuáháⁿ-xi ní yáha-ndí yatni víi yuhu dîstritú Crětá. ¹⁴ Te tnaa-ni ní cuu sá ñí xica bàrcú, te duha ní cunuu dăú táchí ìⁿ xio yuhu ñuú-áⁿ ¹⁵ te nchita ichi cuáháⁿ bàrcú. Te ñá ní ndăcu-gá-xi quíhíⁿ ndáá-xi năcuáa cuáháⁿ-xi ní cùu, núu ní dáñá-ndí cuáháⁿ mée-ñá bàrcú. ¹⁶ Te ní yáha-ndí ìⁿ ñuú nání Clăudá, te ñuú-áⁿ cáá cuădava xití làmár. Te ìⁿ xio yuhu ñuú núú ñà túú quène vihi táchí ñí yáha-ndí, te bàrcú líhli sá

nchìcúⁿ sáta bàrcú cáhnú, chi ní ndacu-ndí ní taxúha-ndí xití bàrcú cáhnú. ¹⁷ Te sáta ní ndacu-ndí ní taxúha-ndí bàrcú líhli, te ní ducúⁿ nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núú ñùhú cùchí yuhu ñùú Sirté, núu xíáⁿ ní ndihí dóo nchítá ñiquí bàrcú ní nuu nehe-güedé, chi dóo-ãⁿ ío níhi chindaha táchí, núu xíáⁿ cuáháⁿ bàrcú ñⁿ xio. Te ní dáñá-güedé ñá túú-gã ní dácaca-güedé, núu cuáháⁿ méé-nã-xi ta chindaha táchí cuáháⁿ. ¹⁸ Te ío níhi dáú táchí, te ñá ní cuíní tnàhí-xi yáha. Te nduu úú sá dúcáⁿ ñà túú-gã ní dácaca-güedé bàrcú te ní ngüíta-güedé ní dängöyo-güedé sá nchídó-xí cuendá cuíní-güedé nduu ñamá-xi. ¹⁹ Te nduu úní ní dängoyo-güedé nchaa ndachiuⁿ cánehe chiúⁿ-güedé xití bàrcú. ²⁰ Te cuéhé nduu ñá túú ní xíní-ndí ní chodíní ní nchícanhii, chi ío níhi ní cuuⁿ dáú táchí, núu ní cáháⁿ-ndí sá vã cãcu-ndí, chi ndihí-ndí cáhá ní cáháⁿ-ndí.

²¹ Te ní cuu titní nduu ñá túú-gã xéxí-ndí, núu xíáⁿ ní ngúnutñí té Páblú núú-güedé, te xáhaⁿ-dè:

—Quindáá iní-ndó tnùhu ní cáháⁿ-í, te cundecu nahi-o Crëtá ní cùu. Te núu ní tní-ndo tnúhu-í, te vã dácuita-o càrgá ndihí dava-gá ndàchiuⁿ ní cuu.

²² Te vã yùhú-ndó chi vã cùú ní ñⁿ-ndo dico bàrcú chi cuíta. ²³ Te nàha-ndo sá yùhú càháⁿ ndihí-í Yã Ndióxi te quide-í nàcuáa càháⁿ-gá. Te diu-ni mee-gã ní techiuⁿ-gá ñⁿ espíritú xínú cuèchi núú-gã ní quixi, ²⁴ te ní cachí-xi xii-í: “Vã yùhú-n chi vã cùú-n, dico dacuití quíhíⁿ-n cáháⁿ ndihí-n tã Cèsár. Te ní ñⁿ tée ndihí-n vã cùú, chi ío cùdí iní ñáhá Yã Ndióxi xii-n”, duha ní cáháⁿ espíritú xínú cuèchi núú-gã ní cachí tnúhu-xi xii-í. ²⁵ Núu xíáⁿ càchí tnúhu-í sá vã yùhú-ndó, chi sa cùtnuní iní-í sá cádá Yã Ndióxi nàcuáa ní cáháⁿ espíritú xínú cuèchi núú-gã. ²⁶ Te mee táchí chindaha-xi bàrcú daquihíⁿ-xi ndéé yuhu ndute —cachí té Páblú xáhaⁿ-dè xii-güedé.

²⁷ Te sa ní cuu sáhúⁿ nduu sáhúⁿ

niú sá ní ngüíta-xi cùuⁿ dáú táchí, te ñá túú-gã dácaca-güedé bàrcú, chi mee-nã táchí tá chindaha-xi barcú cuáháⁿ núú ndute lámár Adriá. Te sáta ní cuu dava niú, te ní quide cuendá cue tée dácaca barcú sá tá cùyatni-güedé ñuhu yìchí. ²⁸ Te ní chicuàhá-güedé ná daha-gá mètrú néhé-xí sã cùnú xití ndute cuendá cutnùní iní-güedé sá tá cùyatni-xi ndéé yuhu lámár, te nèhe-xi ócó sáhúⁿ ñⁿ-ni-gá mètrú. Te ní xica tucu bàrcú luha-gá, te dàtnùní ní chicuàhá tucu-güedé, te xíáⁿ néhé-xí ócó úsá-ni-gá mètrú. ²⁹ Te ní yùhú-güedé sá candaundeé-xi cava, te ní queheⁿ-güedé cúmí caá náhnú sã nchìcúⁿ yoho, te ní dáquëe-güedé xití ndute ndaa sáta bàrcú, te dàtnùní ní ngüíhí-xi ñá ní xica-gá-xi, te ní cuíní-güedé sá òré-ni tundaá ní cùu. ³⁰ Te cue tée dácaca barcú ní natava-güedé bàrcú líhli dandéé-güedé núú ndute ní cùu, te ní cachí-güedé sá quíhíⁿ-güedé ndaa núú bàrcú dàquëe-güedé úú-gá caá cuendá cuita candéé-xi bàrcú cáhnú cuendá sá vã cáca-xi. Te cuíní-güedé dandáhú-güedé dava-gá nchúhú cue tée ñùhu ndihí-güedé bàrcú, chi ní ndatnúhu-güedé sá cùnú-güedé ní cùu. ³¹ Te té Páblú ní xáhaⁿ-dè xii tée cùu capitáⁿ ndihí dava-gá sandádú:

—Te núu na dandóo ñaha cuè tée dácaca barcú cunu-güedé, te vã cãcu-o —cachí-dé xáhaⁿ-dè.

³² Te sá dúcáⁿ ní xáhaⁿ-dè núu ní sáháⁿ sandádú ní xehndé-güedé yoho nchìcúⁿ bàrcú líhli dängáúnhnu-güedé xití ndute cuáháⁿ-xi.

³³ Te váha váha-ni ta tundaá cuáháⁿ, te ní xáhaⁿ tã Páblú:

—Sa ní cuu sáhúⁿ nduu ñá túú tnàhí xèxi-ndo sá ndihú iní-ndó. ³⁴ Te vitna yáchí-ndó, chi caxi-ndo cuendá naníhí ndéé-ndó, te vã yùhú-ndó chi ñá túú ñã tnahá ní ñⁿ-ndo —cachí-dé xáhaⁿ-dè xii-güedé.

³⁵ Te sáta dúcáⁿ ní cáháⁿ-dè, te ní queheⁿ-dè ñⁿ pàá, te ní ndacáⁿ táhú-dè núú Yã Ndióxi, te núú-güedé nchaa-güedé ducaⁿ ní quide-dé, te dàtnùní ní táhú-dè luha ní xexi-dé.

36 Te ducaⁿ te dătnùní ní cuyi-güedé ní xexi-güedé nchaa-güedé. 37 Te úú ciëndú únídico sáhúⁿ ìⁿ-ndí ñuhú bàrcú núú tnàhá té Păblú, te nchaa-ndí ní xexi ndihi-ndí-dé. 38 Te ní xexi-ndí ní ndahá xití-ndí. Te dătnùní ní ngüíta-güedé ní tava-güedé nchaa ngohnchi triú ní dăngoyo-güedé xití ndute cuendá nduu ñamá-gá bàrcú.

Ní dáhu bàrcú xití làmár

39 Te sáta ní túndaá, te ñá ní cùtnuní-gá iní-güedé ndéé cúú-xí nùú ní sáá-güedé, te ní xiní-güedé ìⁿ xichi núú ní xícó ndúú luha yuhu làmár, te vâi vihi cúchí dándáá-xí yùhu ndute, te xiáⁿ ñá túú dâcandá víhí tâchí ndute. Te ní ndatnúhu-güedé sá ndácú-güedé dacâca-güedé bàrcú quíhíⁿ-xi ndéé núú ñuhú cùchí. 40 Te xiáⁿ nùú ní sáháⁿ-güedé ní xehndé-güedé nchaa yoho nchícúⁿ caá tácândeé bàrcú ní ndóo xití làmár, te ní nadatâyá-güedé vítú sâ dâcuico-xi bàrcú, te ní nacata caa-güedé ìⁿ dóo dîquí bàrcú, te ta chîndaha tâchí cuáháⁿ yuhu làmár tá cùyatni-xi ñuhu yichí cuáháⁿ. 41 Te ndècu ìⁿ xichi ní nataká víhí cùchí xití ndute, te xiáⁿ ní nguindüxi nihnu bàrcú-güedé, te ní cuti-xi xití cúchí, te ñá ní ñhí-gâ-güedé nâcuâa cada-güedé nene-xi. Te ío níhi ní dâcandá tâchí ndute, te ní chúcú ndéé-xi ndâa sáta bàrcú, te ní ndihi ní táhú-xí. 42 Te cue sandâdú ní xitnâha-güedé sâ cáhni-güedé nchaa cue téé ní xíhi vecaá cuendá sâ vâ quíhíⁿ-güedé núú ndute te cunu-güedé. 43 Te téé cùu capitáⁿ ñá ní dâña-dé cahni-güedé cue téé ní xíhi vecaá, chi ñá ní cûndee iní-dé cahni-güedé tnàhá té Păblú. Te ní xâhaⁿ-dê xii-güedé sâ cuè téé xícuu cada quíhíⁿ núú ndute te na yâha-güedé ndute quene-güedé yuhu làmár. 44 Te dava cue téé ñá cúú càda, ní xâhaⁿ-dê nanducu-güedé vítú ñí àdi vítú ní táhú sâ ní xíhi bàrcú, te núú xiáⁿ caundodo-güedé yâha-güedé ndute quene-güedé ndéé

yuhu làmár. Núu duha ní cuu ní cácu-ndí nchaa-ndí.

28

Té Păblú ndécú-dê ñuú Măltá cáá cuădava làmár

1 Te sáta ní cácu-ndí ní nene-ndí ñuhu yichí, te ní níhí-ndí tnúhu nâcuâa nâni ñuú núú ní sáá-ndí, te ñuú-âⁿ nâni-xí Măltá, te càa-xi cuădava làmár. 2 Te ío quide víxiⁿ-xi cuendá ío cùuⁿ dáú. Te ñáyiú ñuú-âⁿ ní cundâhú iní ñáhâ-yu xii-ndí, ní dâtnâhá-yu ñuhu te ní cana ñâhá-yu ní sáháⁿ-ndí ní nacuídí-ndí. 3 Te té Păblú dátacá-dé nducú, te tnàhá-ni ìⁿ cóo dèéⁿ ní tnî nihnu-dé-di, te òré cuáháⁿ ndaha-dé chucu-dê núú ñuhú, te ní ñâni-di cahni, te ní ndee-di xití nducú ní sânduú-di ndaha-dé, te ní xexihaⁿ-di xii-dé. 4 Te nchaa ñáyiú ndèhé-yu sâ tácândeé-di ndaha-dé, te ní ngüíta-yu ní xitnâhá-yu:

—Vâa ndíyi ní sahani téé-a, te ñá ní xíhí-dé làmár, te dacuití sâ cúú-dé vítna, chi sa nâha Yâ Ndiôxí ná ní quide-dé ñuyíú-a —câchí-yu xitnâhá-yu.

5 Te té Păblú ní quidi-dé ndaha-dé ní ngaunihnu-di núú ñuhú, te ñá túú tnâhí ná ní cùu núú ní xexi-di. 6 Te ñáyiú ñuú-âⁿ xîndéhê-yu núu daquíhíⁿ-xi chúhúⁿ àdi nduá-dé cuú-dé. Te nâha ní xîndéhé ñâhá-yu núu nása cada ñâha-xi xii-dé, te ñá túú tnâhí ná ní quide ñâha-xi, te ní xitnâhá-yu:

—Vâa ndiôxí cúú tée-a núu dâcâⁿ ñá túú tnâhí ná ní quide-xi ndaha-dé núú ní xexi cóo —câchí-yu xitnâhá-yu.

7 Te yatni núú dúcáⁿ ní xexihaⁿ cóo-âⁿ cáá ñuhu xitu téé nâni Publiú, te téé-âⁿ táxí tnùnî-dé níhí ñuú cáá cuădava xití làmár núú ndécú-ndí nduu-âⁿ. Te ío vâha iní-dé chi ní cana ñâha-dê ní sáháⁿ-ndí ní xîndecu-ndí únî nduu vehe-dé. 8 Te tâtá tē Pūbliú-âⁿ cáá-dê cùhú-dé ñuhú-dê cahni, te tnàhá-dé daxi. Te té Păblú ní sáháⁿ-dê núú cáá-dê, te ní cáháⁿ ndihi-dé Yâ Ndiôxí, te ní sacâⁿ ndodo-dé ndaha-dé díquí tée cùhú-âⁿ, te ducaⁿ-ni ní quide-dé, te ní ndúha

tée cùhú-án. ⁹ Te sátá dúcáⁿ ñi quide té Páblú, te ní quixi nchaa ñáyiú cùhú núú ndécú-ndí, te ní quide tátña ñaha tẽ Páblú xií-yu te ní ndúha-yu. ¹⁰ Te òré ndécú-ndí xiáⁿ, te vài sá ñi taxi táhú-güedẽ, te òré ní xica-ndí ní taxi tucu-güedé nchaa sá xíní ñùhu-ndí ichi.

Té Páblú ní quexìo-dé ñuú Rómá

¹¹ Te yàcáⁿ ní xíndecu-ndí úní yóó, te sa ndècu ñiⁿ barcú tée ñuú Alejándriá òré ní quexìo-ndí, te ní xíndecu-xi ñihí yóó cúúⁿ dǎú táchí. Te núú-xi càndodo sandú sá dánàni-güedé Càstór ndíhi sàndú sá dánàni-güedé Pólúx, te xití bàrcú-án ñi quée-ndí cuáháⁿ-ndí. ¹² Te ní quexìo-ndí ñuú Siràcusá, te yàcáⁿ ní xíndecu-ndí úní nduu. ¹³ Te ní xica tucu bàrcú cuáháⁿ-xi, te ní quexìo-ndí ñuú Règiú. Te nduu tnèé duha ní quene nuu táchí. Te ní xica bàrcú cuáháⁿ-xi, te ndéé nduu úú ní quexìo-ndí ñuú Pùteolí. ¹⁴ Te yàcáⁿ ní naníhí tnáhá-ndí ndíhi ñáyiú sàndáá iní tnúhu Jèsús, te ní cachí-yu sá cùndècu-ndí úná nduu, núú xiáⁿ ní xíndecu-ndí úná nduu ndíhi-yu. Te ní xica tucu bàrcú cuáháⁿ-xi, te ní quexìo-ndí ñuú Rómá. ¹⁵ Te ñáyiú rómá ñáyiú sàndáá iní tnúhu Jèsús, ní níhí-yu tnúhu sá cuáháⁿ-ndí, te ní quixí-yu ní quixi tnahá ñáhá-yu ichi. Te davá-yu ní naníhí-ndí ñuú Fòrú Àpiú, te davá-yu ní naníhí-ndí ñuú Úní Tàbernás. Te òré ní xíní té Páblú nchaa ñáyiú véxi tnahá ñáhá xii-ndí, te ndee ndèe ní cuu iní-dé, te ní ndacáⁿ táhú-dẽ núú Yǎ Ndiõxí sá dúcáⁿ ñi quidè-yu. ¹⁶ Te sátá ñi quexìo-ndí ñuú Rómá, te cue tée cùchiuⁿ ní xáhaⁿ-güedẽ xii té Páblú sá cùndècu ñiⁿ-dé, te ní xíndeé ñáhá cuàa sandadú xii-dé.

Té Páblú càháⁿ-dé tnúhu Yá Ndiõxí ñuú Rómá

¹⁷ Nduu úní sá ñi quexìo té Páblú, te ní cana-dé cue tée cùnuu núú ñáyiú isràél ndécú ñuú Rómá, te

ní sáháⁿ-güedé núú ndécú-dẽ, te ní xáhaⁿ-dẽ:

—Nchòhó cue tée isràél, càchí tnúhu-í sá ñà túú ñà ní quidè-í ní ñiⁿ ñáyiú cùtnáhá ní xíndecu-í ñuú Jerusalén. Te ñà túú ní càháⁿ cuèhé-í sá quidè-yu nchaa nàcuáa ní xóo cada cue ñaní tnáhá-ó ñi xíndecu ndéé sanaha, te ñà túú ñà ní quidè-í te ní tñi ñaha-güedẽ ní sáha cuèndá ñáhá-güedẽ xii-í núú cuè tée rómá, cue tée ndècu yacáⁿ. ¹⁸ Te cue tée-án ñi ndúcú tnúhu-güedé ñuú ndáá ndècuéchi-í, te ní cutnùní iní-güedé sá ñà túú ñà ní quidè-í, te xiáⁿ cuìní-güedé queñuhu ñaha-güedẽ xii-í vecaá ní cùu. ¹⁹ Te ñuú-ni cue tée isràél ñà ní dàña-güedé cácu-í, chí cuìní-güedé sá càhí ñàha cue tée rómá, cue tée xíndecu yàcáⁿ xii-í ní cùu, te xiáⁿ ñuú ní xáhaⁿ-í sá quixí-í càháⁿ ndíhi-í té Cèsár cuèndá iha cada ndáá méé-dẽ cuèndá-í, te vá yóo ñiⁿ tee-í cuéchi. ²⁰ Núú xiáⁿ ní cana ñàha-í xii-ndo cuèndá cunaha-ndo nàcuáa ní cuu. Te ní xáhaⁿ-í sá sàndáá iní-í sá ndótó ñáyiú ní xihí, te ñuú-ni ducaⁿ càháⁿ dava-gá ñáyiú isràél, te sá dúcáⁿ ñi càháⁿ-í, te ní chíhi ñaha-güedẽ vecaá, te xíndeé ñáhá-güedẽ ndéé vitna —càchí té Páblú xáhaⁿ-dẽ xii-güedẽ.

²¹ Te ní xáhaⁿ-güedẽ xii-dé:

—Ñà túú tnáhí tutú ní tëndaha cue tée distritú Jùdeá quixi cuèndá-n. Te ní cuè tée isràél ñà túú ní quixi-güedé càháⁿ cuèhé-güedé cuèndá-n. ²² Te cuìní-ndí cundedóho-ndí nása cunduu tnúhu càháⁿ-n, chí sa ní níhí-ndí tnúhu sá ncháá xìchi ío xicáháⁿ cuèhé-yu cuèndá nchaa ñáyiú sàndáá iní tnúhu Jèsús —càchí-güedé xáhaⁿ-güedẽ xii té Páblú.

²³ Te ní xáhaⁿ-güedẽ nduu cùyáchí-güedé te quixi-güedé cundedóho-güedé dava-gá cuèndú càháⁿ té Páblú. Te ní tnahá nduu ñi ndatnúhu-güedé quíhíⁿ-güedé núú quidè vèhe-dé, te vài-yu ní sáháⁿ-yu ní xíndedóho-yu tnúhu ní càháⁿ-dé, te nchàca nchaa ní càháⁿ ndíhi-dé-yu. Te ní xáhaⁿ-dẽ xií-yu sá ndíhi Moisés ndíhi dava-gá cue tée ní xóo càháⁿ

tnúhu Yá Ndiöxí ndéé sanaha ní chídó tnùní-güedé núú tutú-güedé sá díú-gă tendaha-gă Crìstú quixi-gă ñuyíú-a. Te ní chídó tnùní-güedé nchaa nàcuáa cada-gá, te ñu-ni nàcuáa càháⁿ tutú-güedé cada Crìstú, te ducaⁿ ñí quide-gá cútnàhá ní xica cuu-gá ñuyíú-a, núu xiǎⁿ ní cutnùní sá díú Jësús cúú-gă Crìstú Yaá ní tendaha Yă Ndiöxí ní quixi ñuyíú-a. Te núu quindáá iní-yu, te ndíhu ndaha ñàha Yá Ndiöxí xií-yu. ²⁴ Te davá-yu ní sándáá iní-yu tnúhu ní càháⁿ-dé, te davá-yu ñá túú ní sándáá iní-yu. ²⁵ Te cuendá sá ñă ííⁿ-ní tnúhu ni càháⁿ-yu, núu xiǎⁿ cuiní-yu núhú-yu ni cùu. Te ní xáhaⁿ tē Păblú sá cündetu tnaá-yu càháⁿ-dé ingá tnúhu, te xăhaⁿ-dě:

—Ní xáhaⁿ Espíritú Yă Ndiöxí xii ndí Chàjá nàcuáa càháⁿ ndí núú nchàa ñani tnàhá-ó ñí xindecu ndéé sanaha. Te ní càháⁿ Espíritú-gá ííⁿ sá ndáá ní xáhaⁿ-xi xii ndí, te duha ní xáhaⁿ-xi:

²⁶ Quíhíⁿ-n te cúñaha-n xii ñáyiu:

Nchòhó mee-ni cündedóho-ndo tnúhu càháⁿ Yă Ndiöxí, dico ni vă təcú tnùní-ndó.

Te cada-gá titní núú să vă yõo tnàhí ndàcu cada, dico ni vă cútnùní iní-ndó nàcuáa ndùu sá cadá-gă,

²⁷ chi cuendá sá ño sàá iní-ndó,

xiǎⁿ ducaⁿ ñà túú săha-ndo cuendá nása cuáháⁿ tnúhu càháⁿ-gá,

chi ñá cuiní-ndó cündedóho-ndo, te ni ñă sándáá iní-ndó.

Te ni ñă cuiní-ndó dàña-ndo nchaa sá cuèhé sá dúhá quide-ndo

cuendá xocàni-gá nchaa xiǎⁿ iní-ndó, duha cúñaha-n xií-yu.

Càchí Espíritú-gá xăhaⁿ-xi xii ndí.

²⁸ Te na càchí tnúhu-í sá quíhíⁿ cue tée càháⁿ tnúhu Yá Ndiöxí càháⁿ-güedé tnúhu-gá núú ñáyiu ñá túú cùu ñáyiu isràél, chi ñáyiu isràél ñá túú cuiní-yu cündedóho-yu. Dico ñáyiu ñá túú cùu ñáyiu isràél chi cùdíí iní-yu cündedóho-yu, núu xiǎⁿ naníhí tãhú-yu — càchí tē Păblú xăhaⁿ-dě xií-yu.

²⁹ Te sátá ñí ndíhí cuendú ní xáhaⁿ-dě, te ní ndéé-yu cuánuhú-yu ta ndàtnúhu-yu cuáháⁿ.

³⁰ Te úú cuía ñí xínu ní xindecu tē Păblú ííⁿ vehe ní chàhu-dé. Te ní xóo càháⁿ váha-dé ndíhí nchaa ñáyiu ní xóo quíhíⁿ vehe-dé. ³¹ Te ní xáhaⁿ-dě sá ndíhu ndaha ñàha Yá Ndiöxí xií-yu núu quindáá iní-yu tnúhu-gá, te vă yõo ííⁿ ni sàdí yuhu-dé. Te mee-ni tnúhu Xítóhó Jesucristú ní càháⁿ-dé núú-yu.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ RÒMÁ

Té Păblú cādūha-dé tutú quíhíⁿ ndaha ñáyiú xĩndecu ichi Xítóhó Jesucristú ndécú ñúú Rómá

¹ Yúhú té Păblú xínú cuèchi-í núú Xítóhó Jesucristú, chí mee Yă Ndiöxí ní cachí-gá sá cúu-í ñⁿ téé cáháⁿ tnúhu-gá núú ñáyiú, te tnúhu-gá cúu-xí tnúhu sá cáháⁿ nàcuáa naníhí tǎhú-ó, núú ðiu-gá ní tendaha ñàha-gá xii-í xicáⁿ cúu-í cáháⁿ-í tnúhu-gá.

² Te ndéé sanaha ñí cachí Yă Ndiöxí sá dàcuítíí sáá nduu ngũndecu ndihí ñáyiú tnúhu-gá. Te ducaⁿ ñí xáhaⁿ-gá xii cue téé ní cáháⁿ tnúhu-gá dàvá-áⁿ ñí chídó tnúni-güedé núú tütú-gá.

³ Te tnúhu-gá sá cáháⁿ-í-a cáháⁿ-xi ðiu-ni cuendá Xítóhó Jesucristú Yaá cúú Dêhe-gá. Te Dêhe-gá-áⁿ cúú-gá ñⁿ ñáyiú, te cúu-gá ñaní tnáhá ndíi Dávíí.

⁴ Te cúu-gá Yaá ñá túú tnàhí cuèchi-xi. Te ní xihí-gá te ní ndoto-gá, te xiáⁿ cútnúni iní-ó sá cúú-gá Dêhe Yă Ndiöxí, te ío cǎhnu cuu-gá.

⁵ Te ðiu-ni Xítóhó Jesucristú ní quide-gá ní nduu tǎhú-í núú Yă Ndiöxí sá cáháⁿ-í tnúhu-gá núú cuè ñáyiú ñuyíú-a cuendá quíndáá iní-yu tnúhu-gá te canchicúⁿ nihnú-yu cadá-yu nchaa nàcuáa cáháⁿ-xi, te ducaⁿ ío cuu cǎhnu-gá.

⁶ Te tnáhá nchòhó cúú-ndó ñáyiú sa nchícúⁿ nihnu quide-ndo nchaa nàcuáa cáháⁿ tnúhu-áⁿ, chí ní cachí Yă Ndiöxí sá nchòhó tnáhá tnúhu-ndo ndihí Xítóhó Jesucristú.

⁷ Te nchòhó ñáyiú xĩndecu ñuú Rómá, ñáyiú ío cúu iní ñáhá Yă Ndiöxí, cādúha-í tutú-a daquixi-í ndaha-ndo. Te ðiu-ni nchòhó cúú-ndó cuè ñáyiú ní cachí Yă Ndiöxí cada ndáá cundecu-ndo núú-gá. Te xicáⁿ tǎhú-í núú Tátá-ó Dütú Ndiöxí ndihí núú Xítóhó Jesucristú sá ío na chindee chitúú ñaha-gá xii-ndo, te ducaⁿ ndí nduú-gá ná càda te ío váha cuu iní-ndó cundecu-ndo.

Té Păblú cuini-dé quíhíⁿ ngoto-dé cue ñáyiú xĩndecu ichi Xítóhó Jesucristú ndécú ñúú Rómá

⁸ Te díhna nuu-gá cǎchí tnúhu-í xii-ndo sá ío ndácáⁿ tǎhú-í núú Yă Ndiöxí cuendá sá ío sàndáá iní-ndó-gá, te nchaa ñáyiú nihí-yu tnúhu sá dúcáⁿ quide-ndo. Te Xítóhó Jesucristú dáyǎha-gá nchaa tnúhu cáháⁿ-í núú Yă Ndiöxí.

⁹ Te ndí tnáhá òré cáháⁿ ndihí-í Yă Ndiöxí ducaⁿ-ni xicáⁿ tǎhú-í núú-gá cuendá-ndó, te mee-gá náhá-gá sá cáháⁿ ndáá-í, te ðiu-ni núú-gá xínú cuèchi-í ní yúhu ní iní-í, chí cáháⁿ-í nàcuáa ní quide Dêhe-gá Xítóhó Jesucristú cuendá naníhí tǎhú-ó.

¹⁰ Te xicáⁿ tǎhú-í núú Yă Ndiöxí sá ñuu mee-gá ná cǎchí te sáá ñⁿ nduu quixi coto ñaha-í xii-ndo.

¹¹ Chí ío cuini-í cundecu ndihí ñaha-í xii-ndo dànehé ñáhà-í ñⁿ úú tnúhu nàcuáa ío-gá chindee ñàha Espíritú Yă Ndiöxí xii-ndo, te ducaⁿ ío-gá cuita nducu ndèe-ndo cada-ndo nchaa nàcuáa cuini-gá.

¹² Te ío chí ná cuàha tnàha-o tnúhu ndee iní cundecu-o ichi-gá, chí nchòhó ndihí yúhú ío sàndáá iní-ó-gá.

¹³ Te nchòhó ñáyiú ndècu ndihí-í ichi Xítóhó Jesucristú na cǎchí tnúhu-í xii-ndo sá dúcáⁿ-ní ío sàni iní-í quixi coto ñaha-í xii-ndo. Te cuini-í sá òré quixi coto ñaha-í xii-ndo, te vá cuíta chiúⁿ quixi-í dàtná quídè-í òré sǎngoto-í nchaa ñáyiú dava-gá ñuú ñá túú xíta chiúⁿ-í chí ío váha sǎhúuⁿ-yu tnúhu cáháⁿ-í, dico ñá ndácú-í quixi-í quixi coto ñaha-í xii-ndo.

¹⁴ Te yúhú yídiquí-í cáháⁿ-í tnúhu Xítóhó Jesucristú núú nchaa ñáyiú cáháⁿ tnúhu gríégú, ndihí núú nchaa ñáyiú cáháⁿ dava-gá núú tnúhu, ndihí núú nchaa ñáyiú túha, ndihí núú nchaa ñáyiú ñá túú túha.

¹⁵ Te cuendá sá dúhá yídiquí-í cáháⁿ-í tnúhu-gá, xiáⁿ ío cuini-í danèhé ñáhà-í xii nchaa nchòhó ñáyiú ñuú Rómá nàcuáa nduu tnúhu sá cáháⁿ nàcuáa naníhí tǎhú-ó.

Ío cùnuu tnúhu Xítóhó Jesucristú

¹⁶ Te yúhú ñá túú tnàhí cùcahaⁿ núú-í cáháⁿ-í tnúhu Xítóhó Jesucristú, chí cúu-xi tnúhu ío cùnuu, chí Yă Ndiöxí ní cachí-gá sá ncháá ñáyiú

na quíndáá iní-xi tnúhu-áⁿ te naníhí tǎhú-yu. Te ní cachí-gá sá dǎhnanu-gǎ ñáyiú isràél ngúndecu ndihí-yu tnúhu-áⁿ te dǎtnùní ngúndecu ndihí ñáyiú ñá túú cùu ñáyiú isràél. ¹⁷ Te tnúhu-áⁿ dánèhé ñáhá-xí xii-o sá cúdiú-o núú Yǎ Ndiǒxí te núu mee-ni sǎ quíndáá iní-ó-gǎ dǎtná càháⁿ-xi núú tǔtú-gá núú càchí-xi: “Nchaa ñáyiú sàndáá iní ñáhá xii Yǎ Ndiǒxí cúdiú-yu núú-gǎ, te ndècu ndihí ñáhá-yu xii-gǎ”, duha càchí-xi núú tǔtú-gá.

Nchaa ñáyiú ndècu ñuyíú ndècuéchi-yu

¹⁸ Te ndéé andiu tëndaha Yǎ Ndiǒxí sá ùhú quixi sá cúú-xí nchaa ñáyiú ñá túú quide ndáá núú-gǎ, ñáyiú quide nchaa sá cuèhé sá dúhá. Te cuèndá nchaa sá quidè-yu-áⁿ xǎⁿ ñá túú cuíní-yu tñí-yu tnúhu ndáá tnúhu Yǎ Ndiǒxí cuèndá cuu-xi #ⁿ sá vǎha sá cúú-xi-yu. ¹⁹ Te cuèi ducaⁿ quidè-yu dico cùtnuní ndáá iní-yu nàcuáa ndùu sá sání iní Yǎ Ndiǒxí ndihí nàcuáa ndùu sá quidè-gǎ dǎtná cùtnuní iní nchaa dava-gá-yu, chi diu-gá dánèhé ñáhá-gǎ xii-yu. ²⁰ Te ni vǎ ndácú-ó quíní núú-ó nǎsa càa-gǎ, te ni vǎ ndácú-ó quíní-ó nǎsa càa iní-gǎ, te ni vǎ ndácú-ó quíní-ó nǎsa quide-gǎ táxi tnùní-gá nchaa nduu nchaa quíú. Te cuèi ducaⁿ dico ndéé cùtnàhá ní ngáva ñuyíú ní ngúita nchaa ñáyiú tècú tnùní váha-yu nàcuáa ndùu sá sání iní-gá ndihí nàcuáa ndùu sá quidè-gǎ te ducaⁿ tècú tnùní-yu cuèndá nchaa sá ñí cadúha-gá ndéhè-yu ió ñuyíú-a, núu xǎⁿ vǎ càchí-yu sá ñá túú cuèchi-yu. ²¹ Te cuèi ducaⁿ ñí cutnùní iní-yu cuèndá Yǎ Ndiǒxí dico ñá túú cuíní-yu canehé-yu sá yíñùhu núú-gǎ nàcuáa tàú-xi cunduu. Te ni ñá túú cuíní-yu ndacáⁿ tǎhǔ-yu núú-gǎ cuèndá nchaa sá vǎha quide ñaha-gá xii-yu, chi mee-ni nchaa sá ñá túú vèdana nàndíhí ñùhu iní-yu. Te quidè-yu dǎtná quidè #ⁿ ñáyiú ñá túú ndècu ndihí nchaa sá xíní tnùní-xi. Te uuⁿ-gá uuⁿ-gá tá quidè-yu cuáháⁿ. ²² Te càchí-yu sá cúú-yu ñáyiú ió váha sàá sá xíní tnùní-xi dico ñá

ndáá, chi cùú-yu ñáyiú ió ñí dǎquí-xi. ²³ Te ñá túú cuíní-yu càháⁿ-yu sá ió càhnu cuu Yǎ Ndiǒxí Yaá ndécú nchaa nduu nchaa quíú, chi da nchaa sá ñí cadúha mèé-yu quide cahnú-yu. Te ní cadúha-yu nchaa sá nàhá ñáyiú ñá túú cùdii ndècu ñuyíú-a. Te ní cadúha-yu sá nàhá quiti ndáva, ndihí sá nàhá quiti sàcuíta ñuhu mee-xi, ndihí sá nàhá nchaa dava-gá quiti, nchaa xǎⁿ quidè cahnú-yu.

²⁴ Te xǎⁿ núu ní dáñá Yǎ Ndiǒxí quidè-yu nchaa sá cuèhé sá dúhá sàni iní-yu. Te xǎⁿ ió quide ndihí tnahá-yu sá cuèhé sá dúhá sàcúú-xí yiqui cuñú-yu. ²⁵ Te ducaⁿ quidè-yu chí ñá túú sàndáá iní-yu tnúhu ndáá tnúhu Yǎ Ndiǒxí. Te mee-ni tnúhu ndehnde sàndáá iní-yu, te nèhé-yu sá yíñùhu núú dàva sá ñí cadúha-gá ió ñuyíú-a ndihí dava sá ndéé andiu te quide cahnú-yu, te ñá túú càchí-yu sá mèé-gǎ ió càhnu cuu-gá, dico mee-gǎ xíní ñùhu-xi càháⁿ-yu sá ió càhnu cuu-gá ni caa ni quíhíⁿ. Te ndáá ndisa sá ió càhnu cuu-gá.

²⁶ Te sá dúcáⁿ ñá túú quide váha-yu núu xǎⁿ ní dáñá-nǎ Yǎ Ndiǒxí quidè-yu nchaa sá cuèhé sá dúhá sàni iní mèé-yu. Te dava ñáyiú dihí càháⁿ ndihí tnahá-yu ndi mèe dihí-yu te ñá túú quidè-yu nàcuáa ní nduu tǎhǔ-yu cadá-yu. ²⁷ Te diu-ni ducaⁿ xǎquide dava cue téé chi sàni cuehé sání dùha iní-güedé sá cúú-xí yiqui cuñú-güedé ndi mèe tnahá téé-güedé, chí càháⁿ ndihí tnahá ndi mee-güedé te ñá túú quide-güedé nàcuáa ní nduu tǎhǔ-güedé cada-güedé, te sá dúcáⁿ quide-güedé te ñá túú tnahí cùu váha iní-güedé ndécú-güedé, te ducaⁿ tnahí tàú-xi ndoho-güedé cundecu-güedé.

²⁸ Te ñá túú tnahí ñùhu iní-yu Yǎ Ndiǒxí núu xǎⁿ duuⁿ duuⁿ ní dáñá ñihnu ñaha-gá xii-yu sàni cuehé sání dùha iní-yu, te quidè-yu nchaa sá ñá túú tàú-yu cadá-yu. ²⁹ Te nchaa núú sǎ cuèhé sá dúhá cùnuu quidè-yu. Te cue téé càháⁿ ndihí-güedé ñáyiú dihí te ñá díú ñàdihí-güedé cúú-yu. Te diu-ni ducaⁿ xǎquide cue ñáyiú dihí chí

càháⁿ ndihí-yu cue téé te ñá díú yíi-yu cùu-güedé. Te mee-ni sã ñà túú vãha quidé-yu sã cúú-xí tnàha ñáyíú-yu, te xihó-yu cundecu ndihí-yu sã ndécú ndihí dava-gá tnàha ñáyíú-yu, te ío sàni cuehé sání dùha iní-yu sã cúú-xí tnàha ñáyíú-yu, te ío cuédú iní-yu, te sàhni tnahá-yu, te ío plètú-yu, te dándahú tnáhã-yu, te cùu úhú iní-yu cue tnàha ñáyíú-yu, te ío yiti yùhú-yu. ³⁰ Te càháⁿ cuèhé-yu cuendá nchaa dava-gá tnàha ñáyíú-yu, te cùu úhú iní-yu Yá Ndiöxí, te xio xio cuini-yu cunuu tnúhu-yu, te mee-ni sàni iní-yu sã ío váha cunduú-yu, te ío quide cahnú-yu mée-yu, te ío sàni iní-yu sã cádá úhú-yu tnàha ñáyíú-yu, te ñá túú sándáá iní-yu ni tãtä-yu ni nãñã-yu. ³¹ Te ñá túú tècú tnùní-yu sã váha, te ñá túú quidé-yu ñá sã càháⁿ-yu, te ñá túú cùu iní-yu ni ñáyíu cùu ndi meé-yu, te ni dàva-gá tnàha ñáyíú-yu, te ñá túú quide cahnú iní-yu ñá sã cúmãní nũú tnáhã-yu, te ni ñá túú cùndahú iní-yu tnàha ñáyíú-yu. ³² Te Yá Ndiöxí ní cachí-gá sã ncháá ñáyíu ducaⁿ xiquide quihíⁿ-yu núú úhú núú ndàhú. Te xini-yu sã Yá Ndiöxí daquihíⁿ ñáhã-gã xii-yu núú úhú núú ndàhú sã dúcãⁿ quidé-yu, dico uuⁿ-gã quidé-yu chi váha-gã cúú iní-yu cue ñáyíu quide datná quidé mée-yu.

2

Yá Ndiöxí cada ndáá-gá cuéchi nchaa ñáyíu ndècu ñuyíú

¹ Te nchòhó ñáyíu càchí sã ío ndècu cuéchi dava-gá ñáyíu tnàhá-ndó ío ndècu cuéchi-ndo cuéi nágá ñáyíu cùu-ndo, chi tnàhá-ndó quide-ni-ndo nchaa nacuáa quide dava-gá ñáyíu càchí-ndó ndècu cuéchi-xi, te sã dúcãⁿ càháⁿ-ndó sã ndécú cuéchi ñáyíu-áⁿ te dàcaa-ndo cuéchi díquí-ndó chi tnàhá-ndó quide-ndo datná quidé-yu. ² Te nchoo xini-ó sã Yá Ndiöxí ío váha cùtnuní iní-gá nacuáa cada ndáá-gá cuéchi ñá ñá nchoo ñáyíu ndècu ñuyíú-a, chi daquihíⁿ-gã nchaa ñáyíu quide nacuáa ní cáháⁿ-í núú úhú núú

ndàhú. ³ Te nchòhó ñáyíu ñá-ni quide ndihí ñáyíu càchí mée-ndó sã ndécú cuéchi-xi dacuití sã ná chãhu-ndo núú Yá Ndiöxí sã dúcãⁿ quide-ndo. ⁴ Te ñá túú cùu váha iní-ndó sã Yá Ndiöxí cùndahú iní ñáhã-gã xii-ndo, te ni ñá túú cùu váha iní-ndó sã ío cuini-gã cada cahnú iní-gã nchaa sã ñá túú váha quide-ndo, te ni ñá túú quide cuendá-ndó sã Yá Ndiöxí quidé váha ñáhã-gã xii-ndo cuendá cuini-gã sã nchòhó ndixi túu iní-ndó sã ñá túú quide váha-ndo ndècu-ndo. ⁵ Te nchòhó cúú-ndó ñáyíu ío sàá iní-xi, chi ñá túú cuini-ndó ndixi túu iní-ndó sã ñá túú quide váha-ndo ndècu-ndo, te xíãⁿ núu ío-gã tá cùu vai tnúndòho sã cúú-xí-ndó. Te na sàá nduu tnúhu ndòho tnúhu ndàhú te ío ndòho-ndo, chi Yá Ndiöxí cada ndáá-gã nacuáa ndècu cuéchi-ndo. ⁶ Te dàvá-áⁿ cada ndáá Yá Ndiöxí nchaa nacuáa ndècu nchaa sã ní quide ñá ñá ñáyíu ndècu ñuyíú-a. ⁷ Te nchaa ñáyíu nchicúⁿ nihnu-ni quide mee-ni sã váha, ñáyíu-áⁿ nduu táhú-yu cundecú-yu ndihí Yá Ndiöxí ni caa ni quihíⁿ, te ducaⁿ quide váha-yu chi cuini-yu sã Yá Ndiöxí cuu váha iní ñáhã-gã xii-yu, te cuini tucú-yu nduu táhú-yu núú ío váha càa ndècu Yá Ndiöxí cundecú-yu ni caa ni quihíⁿ. ⁸ Te ío cùdéeⁿ-gã núú ncháa ñáyíu ñèhu iní mee-ni sã cúú-xí mée-xi, te ñá túú sándáá iní-yu tnúhu ndáá chi mee-ni sã cuèhé sã dúhá quidé-yu. ⁹ Te nchaa ñáyíu ducaⁿ xiquide ío ndíhú iní-yu. Te díhna-gã ñáyíu isràél ngüíta-xi ndohó-yu, te dàtnùní ngüíta-xi ndòho nchaa ñáyíu ñá túú cùu ñáyíu isràél. ¹⁰ Te nchaa ñáyíu ní quide váha, te Yá Ndiöxí cada-gã te ngúndecú-yu núú ío váha càa ndècu-gã, te cachí-gã sã ní quide váha-yu, te ío váha cuu iní-yu cundecú-yu. Te díhna-gã ñáyíu isràél ñáyíu ní quide váha ducaⁿ càa ñáhã-gã xii-yu, te dàtnùní ducaⁿ càa ñáhã-gã xii ñáyíu ñá túú cùu ñáyíu isràél ñáyíu ní quide váha.

¹¹ Te ñá túú quide cuendá-gã cuéi ná ñáyíu cùú-yu. ¹² Te nchaa ñáyíu ndècu ndihí nchaa tnúhu ní

chídó tnùní ndíi Moisés, Yá Ndiöxí cada ndáá-gá cuéchi-yu nàcuáa càháⁿ nchaa tnúhu-áⁿ. Te nchaa ñáyiú ñá túú ndècu ndíhi tnúhu ní chídó tnùní ndíi-áⁿ, Yá Ndiöxí vá cada ndáá-gá cuéchi-yu nàcuáa càháⁿ nchaa tnúhu-áⁿ. Dico nchaa ñáyiú quide náandi sá cuèhé sá dúhá dàcutíí cuíta nihnú-yu cuèi ndècu ndíhi-yu tnúhu ní chídó tnùní ndíi Moisés àdi ñá túú ndècu ndíhi-yu. ¹³ Te nchaa ñáyiú dicó-ni sàcúndedóho nchaa tnúhu ní cáháⁿ ndíi Moisés te ñá túú tníi-yu, ñáyiú-áⁿ ñá túú cùdú-yu núú Yá Ndiöxí, dico nchaa ñáyiú tníi nchaa tnúhu ní cáháⁿ ndíi, ñáyiú-áⁿ càchí Yá Ndiöxí sá cùdú-yu núú-gă, chi ñá túú-gă cuéchi-yu ndècu núú-gă. ¹⁴ Te nchaa ñáyiú ñá túú ndècu ndíhi tnúhu ní chídó tnùní ndíi Moisés, te núú quidé-yu nchaa nàcuáa ní cáháⁿ ndíi te cùu-xi ñⁿ sá sání tnàhí iní méè-yu cada-yu, te sá sání iní-yu-áⁿ cúu-xí ñⁿ tnúhu váha sá sánú ìchi ñaha xii-yu nàcuáa cada váha-yu cundecú-yu. ¹⁵ Te sá dúcáⁿ quidé-yu xiáⁿ cútnùní sá sání iní-yu dàtná càháⁿ tnúhu ní chídó tnùní ndíi Moisés cada ñáyiú isràél, te ío váha cùtnuní iní-yu nchaa nàcuáa quidé-yu chi ndíxi túu iní-yu òré ñá túú quide váha-yu. ¹⁶ Te sáá nduu te Yá Ndiöxí cúñaha-gă xii Xítóhó Jesucristú cada ndáá-gá nchaa cuéchi ñáyiú, nchaa sá sání iní méè-yu ndùu yuhu, te cada-gá dàtná càháⁿ tnúhu sá sánú ìchi ñaha xii-o nàcuáa naníhí tãhú-ó, tnúhu sá dãnèhé ñáhà-í xii-ndo.

Cuèndá ñáyiú isràél ndíhi cuèndá nchaa tnúhu ní chídó tnùní ndíi Moisés

¹⁷ Te nchòhó ñáyiú isràél nchaa-ndo cùu-ndo ndi mee-í, te càchí-ndó sã nchícúⁿ nihnu-ndo quide-ndo nchaa tnúhu ní cáháⁿ ndíi Moisés nùu xiáⁿ ndécú váha-ndo, te càchí-ndó sã ío càhnu cuu-ndo sá ndécú ndíhi-ndo Yá Ndiöxí. ¹⁸ Te cùtnuní iní-ndó nchaa nàcuáa cuíní Yá Ndiöxí cada-ndo, te sá dúcáⁿ nchícúⁿ nihnu-ndo quide-ndo nàcuáa càháⁿ tnúhu-áⁿ xiáⁿ cútnùní iní-ndó nchaa sá ío-gá váha xini ñuhu-xi cada-ndo. ¹⁹ Te càchí-ndó

sã ío váha xini-ndó cànuichi-ndo nchaa ñáyiú ñá túú cùtnuní iní-xi, te càchí tucu-ndo sã ío váha xini-ndó nà canu ichi-ndo nchaa ñáyiú ndècu ichi cuèhé ichi duha. ²⁰ Te sànu ichi-ndo nchaa ñáyiú ío ñi dîquí-xi, ndíhi nchaa ñáyiú vitna ta tècú tnùní nchaa sá váha, te ducaⁿ quide-ndo chi ndècu ndíhi-ndo nchaa tnúhu ní chídó tnùní ndíi Moisés, te tnúhu-áⁿ cúu-xí tnúhu ndáá, chi sànu ichi ñaha-xi xii-ndo nàcuáa cada-ndo. ²¹ Te nchòhó dàcuaha-ndo ñáyiú nàcuáa cada-yu, te mee-ndo ñá túú dàcuaha-ndo cada-ndo nchaa nàcuáa tàú-xi cunduu, te xãhaⁿ-ndo xii-yu sá vã cúu dùhú-yu te mee-ndo dùhu-ndo. ²² Te dàcuaha-ndó-yu sá cuè téé vá cúu cãháⁿ ndíhi-güedé ñáyiú dîhí te núu ñá díú ñàdîhí-güedé cúu-yu, te ducaⁿ-ni cuè ñáyiú dîhí, vá cúu cãháⁿ ndíhi-yu téé te núu ñá díú yíi-yu cùu-güedé. Te nchaa sá xãhaⁿ-ndo vã cúu càda ñáyiú te mee-ndo quide-ni-ndo, te xãhaⁿ-ndo xii-yu sá vã cãnèhé-yu sá yíñùhu núu nchaa sá càchí-yu cùu ndiöxí-yu, te mee-ndo nèhé-gá quidé-ndó, chi dùhu-ndo nchaa sá ndécú venúhu. ²³ Te càchí-ndó sã ío cùnuu nchaa tnúhu ní chídó tnùní ndíi Moisés, te ñá túú quide-ndo nchaa nàcuáa ní cáháⁿ ndíi, te sá dúcáⁿ quide-ndo-áⁿ te dàquee tíhú-ndó Yá Ndiöxí. ²⁴ Te quèe ndáá-xi nàcuáa càháⁿ-xi núu tütú Yá Ndiöxí nàcuáa quide-ndo-áⁿ nùu càchí-xi sá ncháá ñáyiú ñá túú cùu ñáyiú isràél càháⁿ cuèhé-yu cuèndá Yá Ndiöxí sá cuèndá-ndó.

²⁵ Te nchòhó ñáyiú isràél nchaa-ndo cùu-ndo ndi mee-í, te tnàhá-ndó ndècu ndíhi-ndo seña ñi-ndo, te váha-ni sá dúcáⁿ te núu quide-ndo nchaa nàcuáa ní cáháⁿ ndíi Moisés. Dico núu ñá túú quide-ndo nchaa nàcuáa ní cáháⁿ ndíi ña, te ñá túú nàndíhi-xi sá cúu-ndó ñáyiú isràél cuèi ndècu seña ñi-ndo. ²⁶ Te nchaa ñáyiú ñá túú ndècu ndíhi seña ñi-xi, te núu quidé-yu nchaa nàcuáa ní cáháⁿ ndíi Moisés, te cùu-yu dàtná cue ñáyiú ndècu ndíhi seña ñi-xi, chi quidé-yu

nchaa nàcuáa ní cáháⁿ ndíi. ²⁷ Te ñáyiú ñá túú ndècu ndihí seña ñí-xi, te núu na càdá-yu nchaa nàcuáa ní cáháⁿ ndíi Moisés, te ñáyiú-áⁿ cachí-yu sá ñà túú quide ndáá nchaa nchòhó ñáyiú ndècu ndihí seña ñí-xi, chi ndècu ndihí-ndo nchaa tnúhu ní chídó tnùní ndíi te ñá túú quide-ndo nacuáa càháⁿ tnúhu-áⁿ. ²⁸ Te nchòhó ñáyiú isràél, ñáyiú nchìcúⁿ nihnu-ni quide nchaa nacuáa ta quide tnahi-ndo véxi, ñá túú quide-ndo sá cúu-ndó ñáyiú isràél, te mee-ndo ndècu seña ñí-ndo dico ñá túú quide-ndo nacuáa tàù-xi cada nchaa ñáyiú ndècu seña ñí-xi, te mee-ni seña-áⁿ sàha-ndo ñí-ndo te ñá túú quide-ndo nacuáa cuìní Yá Ndiòxí cada-ndo. ²⁹ Te nchaa ñáyiú sàndáá ndisa iní-xi Yá Ndiòxí, ñáyiú-áⁿ cúu ndìsá-yu ñáyiú isràél, te sa ní nduu ndoo ní nduu nine iní-yu chi Espíritú Yá Ndiòxí ducaⁿ ní quide-xi, dico ñá díú sá sàha-yu seña ñí-yu dàtná ní cachí ndíi Moisés. Te ñáyiú-áⁿ cúu vâha iní ñáhá Yá Ndiòxí xií-yu cuèi ñá túú càháⁿ vâha tnàha ñáyiú-yu cuèndá-yu.

3

¹ Te sá dúhá càháⁿ-í te ió dava ñáyiú quesàhá-yu sá ñí-ní cùu ñáyiú ñá túú cùu ñáyiú isràél ndihí nchoo ñáyiú isràél, te quesaha tùcú-yu sá ñí-ní quide tucu-xi cuèi na cuãha àdi vá cuãha seña ñí-yu. ² Dico yúhú càchí-í sá ncháá ñáyiú isràél ío-gá cùnùu-yu, chi ío tìtní núú sá vâha ní quide ñaha Yá Ndiòxí xií-yu, chi ní sáñaha-gã tnúhu-gá ndécú ndihí-yu. ³ Te davá-yu ñá túú cuìní-yu cada ndáá-yu, dico ñá díú sá xǎⁿ te cùyica iní Yá Ndiòxí ñá túú quide ndáá-gá. ⁴ Dico ñáhá chi xìní ñuhu-xi sá ncháá ñáyiú cada cuèndá-yu sá Yá Ndiòxí cúu-gã Yaá quidé ndáá cuiti, te cuèi ncháá-yu na càchí-yu sá ñà túú quide ndáá-gá, dico mee-gã chi quide ndáá-ni-gá. Te núú tùtú-gá càháⁿ-xi nàcuáa ní xáhaⁿ ñí tée ní xíndecu ndéé sanaha xii-gá, te duha ní xáhaⁿ-dè:

Yòhó Dútú Ndiòxí, cùtnuní iní ñáyiú sá ïo ndáá càháⁿ-n, te cùnùu nahi-ni tnúhu-n cuèi òrè càchí ñáyiú sá ñà túú càháⁿ ndáá-n.

Duha ní xáhaⁿ tée ndéé sanaha-ãⁿ xii-gá càchí-xi núú tùtú-gá.

⁵ Te cuèndá nchaa sá cuèhé sá dúhá quide ñáyiú, xǎⁿ cùtnuní iní-yu sá Yá Ndiòxí cúu-gã Yaá ío vâha quide ndáá, chi mee-gã ñá túú dùcaⁿ quide-gá. Te cuèi ducaⁿ dico vá caní iní-yu sá Yá Ndiòxí ñá túú quide ndáá-gá sá dándòho ñaha-gá xií-yu na sàá nduu, te núu ducaⁿ na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. ⁶ Te vá dúcáⁿ càni iní-yu, chi núu Yá Ndiòxí ñá túú quide ndáá-gá ñá, te vá cúu càda ndáá-gá nchaa cuèchi cue ñáyiú ñuyú-a te núu ducaⁿ.

⁷ Te núu yúhú ná càni iní-í cáháⁿ-í ñí tnúhu ndehnde, te sá tnúhu-áⁿ te caní tucu iní-í sá quidé càhnu-gá-í tnúhu ndáá tnúhu Yá Ndiòxí, te sá dúcáⁿ ná càháⁿ-í te caní tucu iní-í sá vâ cúu càháⁿ Yá Ndiòxí sá ndécú cuèchi-í. ⁸ Te núu na càni tucu iní-í sá vâha-gá cada-í nchaa sá cuèhé sá dúhá cuèndá Yá Ndiòxí cada-gá sá vâha, dico ñá ndáá. Te ío ñáyiú càháⁿ cuèhé cuèndá-í te càchí-yu sá díú-ní dùcaⁿ dacuaha-í ñáyiú dico ñá ndáá sá dúcáⁿ dànehé-í-yu, te ñáyiú-áⁿ nacháhu-yu tnúhu càháⁿ-yu, chi ducaⁿ tàù-xi cunduu.

Nchaa ñáyiú ñuyú-a ndècuèchi-yu

⁹ Te vitna càchí dava ñáyiú sá ïo-gá cùnùu nchoo cue ñáyiú isràél dàcúxí dàva-gá ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sá nchàa ñáyiú ndècuèchi-yu cuèi ñáyiú isràél te cuèi ñáyiú ñá túú cùu ñáyiú isràél. ¹⁰ Te núú tùtú Yá Ndiòxí càchí-xi:

Vá yõo ñí quide ndáá,

¹¹ te ni vá yõo ñí təcú tnùní tnúhu vâha, te ni vá yõo ñí nànducu nihnu Yá Ndiòxí.

¹² Chi ncháá-yu ñá túú nchìcúⁿ nihnú-yu ichi vâha, te ncháá-yu cùu-yu ñáyiú xíndecu neñùú sá cúu-xí Yá Ndiòxí.

Te ni ñá túú quidé-yu ñá sá vâha.

13 Te cada iní-ndó sã yúhũ-yu cùu-xi datná cúú ñá yaú núú yíndũxi ndíyí núú ïo ndehe sãháⁿ,

te ducaⁿ sãtnahá-xi cùu yuhú-yu, chi ío cãháⁿ cuèhé-yu, te mee-ni dândahú-yu nchaa tnàha ñáyíú-yu.

Te cada iní-ndó sã vènenú cóo yíhí yuhú-yu chi mee-ni cãháⁿ úhú-yu cuendá tnàha ñáyíú-yu.

14 Te ío iní-yu cãháⁿ úhú tnãhá-yu.

15 Te àúⁿ nã cuu àúⁿ nã xíãⁿ xĩsahni tnãhá-yu.

16 Te nchaa núú xícá cùú-yu quide úhú iní-yu nchaa tnàha ñáyíú-yu nãcuáa ndíhú iní ñáyíú-áⁿ.

17 Te ñá túú cuení-yu cundecu ndíhi tnàha váha-yu.

18 Te ñá túú sãni iní-yu canehé-yu sã yíñũhu núú Yã Ndiõxí.

Duha quidé-yu cãchí-xi núú tütú-gã.

19 Te cùtnuní iní-ó sã nchãa tnúhu ní chídó tnùní ndíi Moisés cúú-xí cuendá nchaa ñáyíú nchícúⁿ nihnu nchaa tnúhu-áⁿ. Te tnúhu-áⁿ cúú-xí cuendá sã vã yóo tnãhí cachí sã ñá túú cuèchi-xi, te ducaⁿ te nchaandi túhú ñáyíú cutnùní iní-yu sã ná chãhu-yu nchaa sã quidé-yu núú Yã Ndiõxí.

20 Te ducaⁿ càda-xi chi ni ñá ñáyíú vá cãchí-ó sã vã cùndècu cuèchi-yu núú Yã Ndiõxí cuendá-ni sã nchícúⁿ nihnú-yu nchaa tnúhu sã ñá chídó tnùní ndíi Moisés, te tnúhu-áⁿ cãchí tnúhu-xi cuendá-ni sã cùtnuní iní-ó sã ndécú-ó ìchi cuehé ichi duha.

Te núu na quíndáa iní-ó Xítoho Jesucristú te naníhí tãhú-ó

21 Te vitna ní cutnùní iní-ó sã ñá díú sã cáda-ó nchãa nacuáa ní cãháⁿ ndíi Moisés cudíu-o núú Yã Ndiõxí, chi mee-gã quidé cùdúu-o núú-gã. Te núú tütú ndíi Moisés ndíhi núú tütú cue téé ní xóo cãháⁿ tnúhu Yã Ndiõxí ndéé sanaha cãháⁿ-xi nãcuáa cada ñaha-gã xii-o vitna. 22 Te ducaⁿ cùdúu-o núú Yã Ndiõxí te núu na quíndáa iní-ó Xítoho Jesucristú. Te díu-ni ducaⁿ cùdúu nchaa ñáyíú ñuyíú te núu na quíndáa iní ñãhá-yu xii-gã, chi ñá-ni cùu-o nchaa-o sã cúú-xí Yã Ndiõxí.

23 Chi nchaa-yu ndècu cuèchi-yu, chi ñá ñá-yu quidé-yu nãcuáa cãháⁿ Yã Ndiõxí sã cúú-yu ñáyíú quide váha.

24 Dico Yã Ndiõxí ío váha iní-gã chi ní quide ñaha-gã xii-o ñá sã váha, chi dicó-ni ducaⁿ ní quide-gã nãcuáa vá cùndècu-gã cuèchi-o núú-gã, chi Xítoho Jesucristú ní sati níñí-gã te ní xíhí-gã, te ducaⁿ ní yãha-gã cuendá sã vã cùndècu-gã cuèchi-o. 25 Te Yã Ndiõxí ní taxi ndecu-gã Xítoho Jesucristú núú ñáyíú ñuyíú-a, te ní xíhí-gã sã cuendá nchaa yícá cuèchi-yu, te ducaⁿ ní cuu cuendá sã nchãá ñáyíú na quíndáa iní ñãhá xii-gã te vá náchãhu-yu cuèchi-yu núú Yã Ndiõxí. Te Yã Ndiõxí ní quide ndee iní-gã nchaa sã cuèhé sã dúhá ní quide cue ñáyíú ní xíndecu ndéé sanaha. Te xíãⁿ ní xíhí Xítoho Jesucristú cuendá cutnùní iní-ó sã Yã Ndiõxí cúú-gã Yaá ío váha quide ndáa cuèi ducaⁿ ní quide ndee iní-gã nchaa sã ní quide cue ñáyíú-áⁿ. 26 Núu xíãⁿ vitna ní cutnùní ndisa iní-ó sã quidé ndáa-gã, te quide-gã sã cuè ñáyíú vá cùndècu-gã cuèchi-yu núú-gã, te núu na quíndáa iní-yu Xítoho Jesucristú.

27 Te vitna vá cãchí-ó sã ío cãhnu cuu-o cuendá sã ñá túú-gã cuèchi-o ndècu núú Yã Ndiõxí, te ducaⁿ ñá túú-gã cuèchi-o ndècu núú-gã cuendá sã sãndáa iní-ó Xítoho Jesucristú, te ñá díú sã cuendá nchaa tnúhu ní cãháⁿ ndíi Moisés. 28 Te cùtnuní iní-ó sã ndèda-ni cãa ñáyíú vá cùndècu-gã cuèchi-yu núú Yã Ndiõxí te núu na quíndáa iní-yu Xítoho Jesucristú cuèi ní quidé-yu nchaa nãcuáa ní cãháⁿ ndíi Moisés àdi ñá túú ní quidé-yu.

29 Te cùtnuní iní-ó sã Yã Ndiõxí cúú-gã Ndiõxí nchaandi túhú ñáyíú, te ñá díú mèe-ni Ndiõxí ñáyíú isràel cúú-gã. 30 Te ñá díú ní díú-gã cúú-gã Ndiõxí, te nchaa ñáyíú sãndáa iní ñãhá xii Xítoho Jesucristú te vá cùndècu-gã cuèchi-yu núú Yã Ndiõxí cuèi cùú-yu ñáyíú isràel àdi ñá túú cúú-yu. 31 Te ñá díú sã sãndáa iní-ó Xítoho Jesucristú te cãchí-ó sã ñá túú nãndíhi nchaa tnúhu sã sãnú ìchi

ñaha xii-o nacuaa cada-o, te ñáhá chi sá dúhá sándáá iní-ó-gã te xiãⁿ nchícúⁿ nihnu-o quide-o nacuaa càháⁿ tnúhu-áⁿ.

4

Cuendá ndíi Àbrahám

¹ Te vitna na cächí tnúhu-í xii-ndo cuendá ndíi Àbrahám tée ní cuu ñaní tnáhá-ó ñí xíndecu ndéé sanaha. ² Te ndíi-áⁿ ñà túú ní xíndecu cuéchi ndíi núú Yá Ndiöxí, dico ñá díú cuendá ñⁿ chiuⁿ ní quide ndíi ducaⁿ ñà túú ní xíndecu cuéchi ndíi núú-gã. Chi núu cuendá ñⁿ chiuⁿ ní quide ndíi ducaⁿ ñà túú ní xíndecu cuéchi ndíi núú Yá Ndiöxí ñá, te cada càhnu ndíi mee ndíi ni cùu, dico ñá díú núú Yá Ndiöxí cada càhnu ndíi mee ndíi te núu ducaⁿ ní quide ndíi. ³ Te chí dándacu iní nàcuáa càháⁿ-xi núú tùtú Yá Ndiöxí núú cächí-xi: “Té Àbrahám ní sándáá iní-dé Yá Ndiöxí, te xiãⁿ ní cachí-gá sá cúdiu-dé núú-gã”, duha cächí-xi núú tùtú-gã. ⁴ Te sá cùhúⁿ yáhu ñⁿ tée quide chiuⁿ, te vá cächí-ó sã xiãⁿ cúú-xí ñⁿ táhú sã cúú-xí-dě chi yáhu tnàhí-dé cúú-xí. ⁵ Te vá yõo ñⁿ ndàcu cada ñⁿ chiuⁿ nacuaa cudíu-xi núú Yá Ndiöxí. Te ñá túú ñà chiuⁿ xini ñuhu-xi cada ñáyiu te cudíu-yu núú-gã, chi xini ñuhu-ni-xi sá quíndáá-ni iní-yu-gã. Te diu-gã cächí-gá sá ñáyiu ndècu ichi cuehé ichi duha vá cùndècu-gã cuéchi-yu núú-gã, te núu na quíndáá iní ñáhã-yu xii-gã. ⁶ Te diu-ni ducaⁿ ñí cáháⁿ ndíi Dàvíí, chi ní cachí ndíi sá ïo váha táhú nchaa ñáyiu ní cachí Yá Ndiöxí cudíu núú-gã, dico ñá díú cuendá ñⁿ chiuⁿ quidé-yu cudíu-yu núú-gã. ⁷ Te duha ní cachí ndíi:

Váha táhú nchaa ñáyiu quide cahnu iní Yá Ndiöxí nchaa cuéchi-xi, te ñá túú-gã quidé cuendá-gã nchaa sá cuehé sá dúhá ñí quidé-yu.

⁸ Váha táhú-yu chi Yá Ndiöxí cächí-gá sá ñà túú-gã cuéchi-yu.

Duha ní cachí ndíi Dàvíí.

⁹ Te ñá díú mèe-ni ñáyiu ngündecu seña ñⁿ-xi ducaⁿ vaha táhú-yu, chi tnáhá ñáyiu ñá túú ngündecu seña ñⁿ-xi ducaⁿ vaha táhú-yu. Te sa

nàha-o sá Yá Ndiöxí ní cachí-gá sá cúdiu ndíi Àbrahám núú-gã cuendá sá ni sándáá iní ñáhá ndíi xii-gã. ¹⁰ Te cunaha-ndo sã dñhna-gã ní cachí Yá Ndiöxí sá cúdiu ndíi Àbrahám núú-gã te dātnùní ngündecu seña ñⁿ ndíi. ¹¹ Te ní ngündecu seña ñⁿ ndíi cuendá xiãⁿ cuu-xi ñⁿ seña sá cúdiu ndíi núú Yá Ndiöxí. Te ndéé cútnáhá vátá ngündecu-gã seña ñⁿ ndíi, te sa cúdiu ndíi núú-gã chi ní sándáá iní ñáhá ndíi xii-gã. Te sá dúcáⁿ ñà túú ndècu seña ñⁿ ndíi cútnáhá ní sándáá iní ndíi Yá Ndiöxí xiãⁿ ní cuu ndíi dàtná ñⁿ dñhí dütú nchaa ñáyiu sándáá iní ñáhá xii-gã, ñáyiu ñá túú ní ngündecu seña ñⁿ-xi, te cudíu-yu núú-gã. ¹² Te ndíi Àbrahám ní cuu tucu ndíi dàtná ñⁿ dñhí dütú nchaa ñáyiu ní ngündecu seña ñⁿ-xi, dico ñá díú cuendá-ni sá ñí ngündecu seña ñⁿ-yu cùu ndíi dñhí dütú-yu, chi cuendá sá sándáá iní-yu Yá Ndiöxí nchícúⁿ nihnú-yu nàcuáa ní quide ndíi ní sándáá iní ñáhá ndíi xii-gã ndéé cútnáhá vátá ngündecu-gã seña ñⁿ ndíi.

Yá Ndiöxí cada-gã nchaa nàcuáa ní cachí-gã te núu na quíndáá iní-ó-gã

¹³ Te Yá Ndiöxí ní xáhaⁿ-gã xii ndíi Àbrahám sá ndúú táhú ndíi cunuu ndíi ñuyíú, ndíhi cue déhe ndíi, ndíhi nchaa dava-gã cue ñaní tnáhá ndíi vitna cacu túu. Te ducaⁿ ñí xáhaⁿ Yá Ndiöxí xii ndíi ndíhi cue ñaní tnáhá ndíi, chi ní sándáá iní ñáhá ndíi xii-gã núu xiãⁿ ní cudíu ndíi núú-gã. Te ducaⁿ ñí xáhaⁿ-gã xii ndíi dico ñá díú cuendá sá ñí quide ndíi nàcuáa ní xáhaⁿ Yá Ndiöxí xii ndíi Moisés cada ñáyiu ndéé cuéé-gã. ¹⁴ Te núu mee-ni ñáyiu nchícúⁿ nihnu quide nacuaa ní cáháⁿ ndíi Moisés ní ndùu táhú-yu cunúu-yu ñuyíú-a ni cùu ña, te ñá túú xini ñuhu-xi quíndáá iní-ó Yá Ndiöxí, te ñá túú nàndíhi tnúhu ní xáhaⁿ Yá Ndiöxí xii ndíi Àbrahám ní cùu te núu ducaⁿ. ¹⁵ Te núu ñⁿ ñáyiu ñá túú quide nacuaa càháⁿ tnúhu sá sánú ichi ñaha xii-o nacuaa cada-o te nacháhu-yu sá dúcáⁿ quidé-yu. Te núu ñá túú tnúhu sá sánú ichi ñaha-xi xii-o nacuaa

cada-o ni cùu ña, te ñá túú cuěchi-o ni cùu.

16 Te ducaⁿ ñi xáhaⁿ Yá Ndiöxí xii ndíi Àbrahám nàcuáa cada-gá, chi cuendá sá ni sàndáá iní ñáhá ndíi xii-gá. Te ducaⁿ ñi quide-gá chi ío váha iní-gá, dico ñá díú sá ñiⁿ chiuⁿ ni quide ndíi ducaⁿ ñi xáhaⁿ-gá. Te sá dúcáⁿ ñi cuu te cùu-xi ñiⁿ tnúhu ndáá sá cúu-xí nchàa ñani tnáhá ndíi, ñáyiú sàndáá iní ñáhá xii-gá dàtná ní sàndáá iní ñáhá mèe ndíi xii-gá, te ñá díú mèe-ni cuendá nchaa ñani tnáhá ndíi nchìcúⁿ nihnu nchaa nàcuáa ní cáháⁿ ndíi Moisés, chi ndíi Àbrahám-áⁿ ñi cuu ndíi dàtná ñiⁿ díhí dütú cue ñáyiú sàndáá iní ñáhá xii Yá Ndiöxí. 17 Te núú tütú Yá Ndiöxí càháⁿ-xi nàcuáa ní xáhaⁿ-gá xii ndíi, te duha ní xáhaⁿ-gá: “Yòhó té Àbrahám ní quide ñaha-í xii-n dàtná ñiⁿ díhí dütú cue ñáyiú xñdecu nihíi ñuyíú.” Duha ní xáhaⁿ Yá Ndiöxí xii ndíi, càchí-xi núú tütú-gá. Te Yá Ndiöxí náhá ndáá-gá sá cádá-xi nàcuáa ní xáhaⁿ-gá xii ndíi Àbrahám, te ñi-gá cúu Yá ní sàndáá iní ndíi, te ñi-gá dándòto-gá ñáyiú ní xihí, te ñi-gá quidé tá ngñdecu nchaa sá vátá cùndècu-gá ñuyíú-a.

18 Te Yá Ndiöxí ní xáhaⁿ-gá xii ndíi Àbrahám sá ío cuéhé dèhe ndíi coo, te ío ní sàndáá iní ndíi nàcuáa ní xáhaⁿ-gá dico ñá túú ní cùtnuní iní ndíi nása cada-gá, chi ío ní sahnu ndíi. Te cuendá sá dúcáⁿ ío ní sàndáá iní ndíi tnúhu ní xáhaⁿ-gá ñu xíáⁿ ní cuu ndíi díhí dütú vai ñáyiú xñdecu nihíi ñuyíú.

19 Te ndíi Àbrahám ñèhu ndíi ñiⁿ cièndú cuíá cùtnáhá ducaⁿ ñi xáhaⁿ Yá Ndiöxí xii ndíi, te ní cutnùní iní ndíi sá ñà túú tãhú ndíi sá cóo dèhe ndíi ndíi ñadíhí ndíi ndíi Sàrá, chi ndíi ndúu-yu sa ní sahnu vñhí-yu, te cuèi ducaⁿ dico ní sàndáá-ni iní ndíi nàcuáa ní xáhaⁿ Yá Ndiöxí. 20 Te ñá túú ní sàni ñiⁿ sàni úú iní ndíi nàcuáa ní xáhaⁿ Yá Ndiöxí cada-gá sá cúu-xí ndíi, chi da uuⁿ-gá váha ní sàndáá iní ndíi nàcuáa ní xáhaⁿ-gá, te ní cachí ndíi sá ío càhnu cuu-gá. 21 Te ní cutnùní ndáá iní ndíi sá Yá Ndiöxí ndácú-gá quidé-gá nchaa sá càháⁿ-gá. 22 Te sá ñi sàndáá iní ndíi nàcuáa ní cáháⁿ Yá Ndiöxí, núu

xíáⁿ ní cachí-gá sá cúu ndíi ñiⁿ téé ñà túú cuěchi-xi núú-gá.

23 Te ní ngódó tnùní núú tütú Yá Ndiöxí cuendá ndíi Àbrahám sá ñi cachí-gá sá ñà túú cuěchi ndíi núú-gá, te ñá díú-ni cuendá mèe ndíi ni ngódó tnùní núú tütú-gá. 24 Chi tnàhá cuendá-ó nchàa-o ní ngódó tnùní núú tütú-gá. Te càchí-gá sá ñà túú cuěchi-o núú-gá chi sàndáá iní-ó-gá, te ñi-gá cúu-gá Yá ní dándótó ñàha xii Xítohó Jesucristú Yá cúu Xítohó-ó. 25 Te Yá Ndiöxí ní cachí-gá sá díú Xítohó Jesucristú cuú-gá cuendá nacháhu-gá nchaa cuéchi-o. Te ní xihí-gá te ní ndoto-gá cuendá nchaa-o vñ cùndècu-gá cuéchi-o núú Yá Ndiöxí te núu na quèndáá iní-ó-gá.

5

Ío váha tnàhá ñáyiú càchí Yá Ndiöxí sá ñà túú cuěchi-xi

1 Te vitna, ñá túú-gá cuéchi-o ndècu núú Yá Ndiöxí chi sàndáá iní-ó Xítohó Jesucristú, te ío váha ndècu ndíi-o Yá Ndiöxí vitna sá cuendá Xítohó Jesucristú. 2 Te cuendá sá ñi sàndáá iní-ó Xítohó Jesucristú xíáⁿ ñi-gá ní quide ní ngñdecu váha-o núú Yá Ndiöxí, te ducaⁿ-ni cùndècu-o, te ío cùdíi iní-ó chi ndècu ndíi-o tnúhu ndee iní sá sáa nduu ngñdecu-o núú ío váha càa ndècu Yá Ndiöxí. 3 Te ñá díú-ni sá cuendá sá ndúú tãhú-ó cùndècu-o núú ndécú-gá cùdíi iní-ó, chi cùdíi iní-ó ndòho-o cuendá-gá, chi cùtnuní iní-ó sá ñu na ndòho-o cuendá-gá te cunduu càhnu-gá iní-ó, 4 te núu cùu-o ñáyiú ta quide cahnu-gá iní-xi te cùtnuní sá cúu-ó ñáyiú quide váha, te núu cùu-o ñáyiú quide váha te uuⁿ-gá tá ngñdecu ndíi-o tnúhu ndee iní cuáháⁿ sá cádá váha ñaha Yá Ndiöxí xii-o. 5 Te núu ducaⁿ te vá ñiⁿ ndúu ndixi cuéchi iní-ó sá ndécú ndíi-o tnúhu ndee iní ngñdecu váha-o. Te Espíritú sá ñi taxi Yá Ndiöxí ndécú ndíi-o xíáⁿ quidé-xi cùtnuní iní-ó sá ío cùu iní ñáhá Yá Ndiöxí xii-o.

6 Te nchoo ñà túú vèdana ná ní ndàcu-o cada-o cuendá dàcácu nihnu-o mèe-o, dico Xítohó Jesucristú ní

xíhí-gá cuèndá-ó, ndìhi cuèndá nchaa dava-gá ñáiyu ñá túú tnàhá tnúhu ndìhi Yá Ndiöxí, te ní xíhí-gá mei ndùu taú-xi cuú-gá. ⁷ Te cudana-ni núu xíhí ìⁿ ñáiyu sá cuèndá ìⁿ ñáiyu quide ndáá, te áma xíhí tucu ìⁿ-yu sá cuèndá ñáiyu quide váha tnàhá ñáiyu-xi. ⁸ Te Yá Ndiöxí ní quide-gá sá nchóó cùtnuní iní-ó sá ïo cùu iní ñáhá-gá xii-o, chí cùtnàhá ndécú-ó ìchi cuehé ìchi duha te ní tendaha-gá Xítohó Jesucristú ní quixi-gá ñuyíú-a ní xíhí-gá cuèndá-ó. ⁹ Te sá cuèndá sá ní xíhí Xítohó Jesucristú xíáⁿ ñá túú-gá cuéchi-o ndècu núú Yá Ndiöxí, te vitna ní cutnùní ndáá iní-ó sá vǎ dáquìhíⁿ ñáhá-gá Yá Ndiöxí xii-o núú ùhú núú ndàhú sá cuèndá Xítohó Jesucristú. ¹⁰ Te cùtnàhá ñá túú tnàhá tnúhu-o ndìhi Yá Ndiöxí ní cùu ní xíhí Xítohó Jesucristú Yaá cúú Dèhe-gá cuèndá cuu váha iní ñáhá-gá xii-o, te ducaⁿ te nduu táhú-ó cùndecu-o ndìhi-gá ni caa ni quíhíⁿ cuèndá sá ní ndoto Xítohó Jesucristú. ¹¹ Te ndètu-o sáá nduu ngùndecu-o ndìhi-gá ni caa ni quíhíⁿ, te ñá díú-ní xíáⁿ quidé-ó chí tnàhá cùdí iní-ó Yá Ndiöxí, chí Xítohó Jesucristú ní quide-gá ducaⁿ cùdí iní-ó-gá, te díu-ni Xítohó Jesucristú ní quide-gá ní nucùndecu váha-o ndìhi Yá Ndiöxí.

Nàcuáa ní quide ndíi Àdán ndìhi nàcuáa ní quide Xítohó Jesucristú

¹² Te ndíi Àdán ñá túú ní quide ndáá ndíi núú Yá Ndiöxí núú xíáⁿ ní ngùndecu nchaa sá cuèhé sá dúhá ñuyíú-a, te sá cuèndá nchaa sá cuèhé sá dúhá quide ñáiyu xíáⁿ xíhí-yu, te nchaá-yu xíhí-yu chí nchaá-yu quidé-yu nchaa sá cuèhé sá dúhá. ¹³ Te sa quide-gá-yu nchaa sá cuèhé sá dúhá te dǎtnùní ní ngùndecu nchaa tnúhu sá ní chídó tnùní ndíi Moisés nàcuáa ní xáhaⁿ Yá Ndiöxí cada ñáiyu, te nchoo cùtnuní iní-ó sá núú ñá túú tnúhu sá sánú ìchi ñaha xii-o nàcuáa cada-o, te ñá túú cuéchi-o sànuu. ¹⁴ Te ndéé cùtnàhá ní xíndecu ndíi Àdán ní quesaha-xi xíhí ñáiyu, te ducaⁿ-ni xíhí-yu ndéé ní sáá nduu ní xíndecu ndíi Moisés. Te ducaⁿ ní xíhí-yu chí

ní quidé-yu nchaa sá cuèhé sá dúhá cuéi ñá túú ní quidé-yu nàcuáa ní quide ndíi Àdán, chí ndíi-áⁿ ñá túú ní sàndáá iní ndíi nàcuáa ní xáhaⁿ Yá Ndiöxí cada ndíi. Te ndíi Àdán ní cuu ndíi ìⁿ téé cùu cahnu ní xíndecu ñuyíú-a, te sáta dúcáⁿ te ní quixi Xítohó Jesucristú te Yaá-áⁿ ïo-gá cahnu cuu-gá.

¹⁵ Te sá ní quide ndíi Àdán te vá càchí-ó sá ìⁿ-ní cùu-xi ndìhi sá ní cachí Yá Ndiöxí nduu táhú-ó vitna. Te sá ñá túú ní quide ndáá ndíi xíáⁿ nchaa ñáiyu xíhí-yu, dico Yá Ndiöxí ío váha iní-gá chí ío váha ní quide-gá sá cúú-xí nchaa nchoo ñáiyu ndècu ñuyíú-a, chí dicó ducaⁿ ní cachí-gá sá nánihí táhú-ó, te ìⁿdìi-ni téé tnàhá-dé ío váha ní quide-dé sá cúú-xí-ó, te téé-áⁿ cúú-dě Xítohó Jesucristú. ¹⁶ Te sá ní quide ìⁿdìi-ni ndíi Àdán ñá túú ìⁿ-ni cuu-xi ndìhi sá ní quide Yá Ndiöxí sá cúú-xí-ó, chí ndíi-áⁿ ñá túú ní quide ndáá ndíi núú-gá. Te sá dúcáⁿ ní quide ndíi te xíáⁿ ní cuu-xi cuéchi díhna nuu ní quide ndíi, núu xíáⁿ ní cachí Yá Ndiöxí sá cué ñáiyu quíhíⁿ-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gá ní quide sá cué ñáiyu naníhí táhú-yu dicó-ni ducaⁿ, te ducaⁿ te vá cùndecu-gá cuéchi-yu núú-gá cuéi ío vǎi cuéchi-yu. ¹⁷ Te sá dúcáⁿ ñá túú ní quide ndáá ìⁿdìi-ni ndíi Àdán-áⁿ núú Yá Ndiöxí, xíáⁿ ní quide-xi xíhí nchaa ñáiyu. Te sá cuèndá sá ní quide ìⁿdìi-ni Xítohó Jesucristú xíáⁿ ío váha ní quide ñaha Yá Ndiöxí xii ñáiyu, chí dicó-ni ducaⁿ ní nduu táhú-yu cùdíu-yu núú-gá. Te nchaa ñáiyu ducaⁿ cùdíu núú-gá nduu táhú-yu cunúú-yu ndìhi Xítohó Jesucristú cuèndá sá ní quide-gá sá váha sá cúú-xí-yu.

¹⁸ Te sá dúcáⁿ ní quide ndíi Àdán ñá túú ní quide ndíi nàcuáa ní xáhaⁿ Yá Ndiöxí xii ndíi ìⁿ xito, núu xíáⁿ ní cachí-gá sá ncháá ñáiyu táu-yu nacháhu-yu nchaa cuéchi-yu, dico Xítohó Jesucristú ní quide-gá ìⁿ sá váha cuèndá nchaa ñáiyu vá

cúndècu-gá cuéchi-yu núú Yă Ndiöxí te núu na quíndáá iní ñáhă-yu xii-gá, te ducaⁿ te cundecú-yu ndihi-gá ni caa ni quíhíⁿ. 19 Te sá ñà túú ní sàndáá iní ñⁿdii-ni ndíi Àdán nàcuáa ní xáhaⁿ Yă Ndiöxí xii ndíi, xíăⁿ ní nguínchicúⁿ nihnu nchaa ñáyiu quidé-yu nchaa sá cuèhé sá dúhá. Te ducaⁿ ñⁿdii-ni Xítóhó Jesucristú ní quide-gá nàcuáa ní xáhaⁿ Yă Ndiöxí cuendá sá Yă Ndiöxí cachí-gá sá cúdiú-yu núú-gă.

20 Te Yá Ndiöxí ní xáhaⁿ-gă xii ndíi Moisés nàcuáa cada ñáyiu, te sá cuendá tnúhu-áⁿ uuⁿ-gá ní nguíta nchaa ñáyiu quidé-yu nchaa sá cuèhé sá dúhá, te Yá Ndiöxí uuⁿ-gá cúndàhú iní ñáhă-gă xii-yu tucu. 21 Te sá cuendá nchaa cuéchi ñáyiu xíăⁿ xihí-yu, dico Yá Ndiöxí ío váha iní-gá chi diu-gá ní cachí-gá sá ncháá ñáyiu na tnáhă tnúhu ndihi ñaha xii-gá cudíu-yu núú-gă, te cundecú-yu ndihi-gá ni caa ni quíhíⁿ, te ducaⁿ chi Xítóhó Jesucristú ní quide-gá sá váha sá cúu-xí-yu.

6

Ñáyiu ñà túú-gă ndécú ichi cuehé ichi duha ndécú-yu cuendá Xítóhó Jesucristú

1 Te sá dúcáⁿ quide Yá Ndiöxí, te vá cání iní-ó cànchicúⁿ nihnu-ni-o ichi cuehé ichi duha, chi ñà díú sá cànchicúⁿ nihnu-o ichi-áⁿ te ngóo càni iní-ó sá ío-gá cundàhú iní ñáhă-gă xii-o. 2 Te vá cúu cànchicúⁿ nihnu-o ichi cuehé ichi duha, chi nchoo cùu-o datná cue ñáyiu sa ní xihí, núu xíăⁿ vá cúu-gă canchicúⁿ nihnu-o ichi-áⁿ. 3 Te sa nàha-o sá cuendá sá ñí sandute-o quèe-xi sá tnáhă tnúhu-o ndihi Xítóhó Jesucristú. Te sá ñí sandute-o quèe tucu-xi sá cúu-ó datná ñáyiu ní xihí ndihi-gá. 4 Te ñà díú-ní sá ñí xihí-ó ndihi-gá chi quèe tucu-xi sá ñí nguíndüxi-o ndihi-gá te ní ndoto-o datná ní ndoto mee-gă ní dándótó ñaha Dútú Ndiöxí Yáá ío càhnu cuu, te ducaⁿ ñí cuu cuendá sá vá cúndècu-gá-ó datná ní xíndecu-o.

5 Te núu ñⁿ-ni cùu-o ndihi Xítóhó Jesucristú cuendá sá cúu-ó datná ñáyiu ní xihí ndihi-gá, te ndáá sá cúu-ó datná ñáyiu ní ndoto ní ngúndecu váha datná ní ndoto mee-gă ní nucúndecu váha-gá. 6 Te nchoo nàha-o sá cúu-ó ñáyiu ío ndècu cuéchi-xi ni cùu, dico sá tá ñí cuu-o datná ñáyiu ní xihí datná ní xihí Xítóhó Jesucristú núú cùrúxí, te ndéé dàvâ-áⁿ ñí dáñá-ó ncháa ichi cuehé ichi duha ndècu-o ni cuu, te ñà túú-gă cúnùu sá cuèhé sá dúhá iní-ó. 7 Chi nchaa ñáyiu ní xihí ñà túú-gă ndécü-yu ichi cuehé ichi duha. 8 Te núu cùu-o datná ñáyiu ní xihí datná ní xihí Xítóhó Jesucristú ñà, te cùtnuní ndáá iní-ó sá cúndècu-o ndihi-gá ni caa ni quíhíⁿ. 9 Te sa nàha-o sá Xítóhó Jesucristú ní xihí-gá te ní ndoto-gá te vá ñⁿ ndùu ñⁿ quíú-gă te cuú-gá, chi ñà túú ñăgá sá cádá cùu-gá. 10 Te Xítóhó Jesucristú ní xihí-gá ñⁿ xito-ni sá cuendá nchaa cuéchi nchoo ñáyiu ñuyíú, te vá ñⁿ ndùu-gá cuú-gá, te ndècu-ni-gá sá cúu-xí Yă Ndiöxí. 11 Núu xíăⁿ nchòhó cada iní-ndó sá datná sá ñí xihí-ndó vá cúndècu-gá-ndó sá cúu-xí ichi cuehé ichi duha, chi ndècu-ná-ndó sá cúu-xí Yă Ndiöxí, chi ní tnahá tnúhu-ndo ndihi Xítóhó Jesucristú Yáá cúu Xítóhó-ó.

12 Te núu xíăⁿ vá dáñá-gă-ndó cúnùu ni ñⁿ sá cuèhé sá dúhá iní-ndó cuendá sá vá cádá-gă-ndó ni ñⁿ sá cuèhé sá dúhá sàni iní-ndó. 13 Te vá dáñá-ndó tàxi tnuní ñáhă ni ñⁿ sá cuèhé sá dúhá-ăⁿ xii-ndo cuendá sá vá cádá-gă-ndó, te chí dáñá ná tàxi tnuní ñáhă Yă Ndiöxí xii-ndo, te chí dáñá ná chindee ñaha-gá cada-ndo mèe-ni sá váha, te ducaⁿ te cada iní-ndó sá cúu-ndó datná ñáyiu ní xihí te ní ndoto ndècu. 14 Te ducaⁿ càda-ndo chi vá ndácú-gă ni ñⁿ sá cuèhé sá dúhá tàxi tnuní ñáhă-xí xii-ndo, chi Yá Ndiöxí cúndàhú iní ñáhă-gă chindee ñaha-gá xii-ndo. Te ducaⁿ chi ñà túú-gă cúnùu nchaa tnúhu sá ñí chídó tnuní ndíi Moisés cada ñáyiu.

Ñáyiu nchicúⁿ nihnu sá váha

15 Te ñá díú sǎ cúnđàhú iní ñáhá Yǎ Ndiǒxí xii-o chìnđee ñaha-gá ndíhi sǎ ñà túú-gǎ cúnùu nchaa tnúhu ní chídó tnùní ndíi Moisés, te cachí-ó sǎ cúú-ní cùnđecu-o ichi cuehé ichi duha. 16 Te nchoo xini-ó sǎ núu na cuǎha-o tnúhu cunu cuechi-o núú ñáyiú cuini cunu cuechi-o núú-xi, te cùu-ná-ó ñáyiú xinu cuechi núú-yu te quide-o nchaa chiuⁿ tahu-yu. Te ducaⁿ sǎtnahá-xi cùu nchaa ñáyiú quide nchaa sǎ cuèhé sǎ dúhá chi tàxi tnuní ñáhá-nǎ-xi xii-yu, te ñu nchaa xiǎⁿ dácuíta nihnu ñaha-xi xii-yu, te ñu-ni ducaⁿ sǎtnahá-xi cùu nchaa ñáyiú sǎndáá iní ñáhá xii Yǎ Ndiǒxí chi tàxi tnuní ñáhá-gǎ xii-yu, te quide-yu nchaa sǎ vǎha nǎcuáa cuini méé-gǎ cada-yu. 17 Te nchòhó ducaⁿ ñi xóo cada-ndo nchaa sǎ cuèhé sǎ dúhá ní cùu, dico táxǎhu xii Yǎ Ndiǒxí chi vitna ñi yùhu ñi iní-ndó quide-ndo nchaa nǎcuáa cǎháⁿ tnúhu-gǎ sǎ ñi ngúnđecu ndíhi-ndo. 18 Te vitna ñá túú-gǎ táxi tnùní ñáhá ñi ñⁿ sǎ cuèhé sǎ dúhá xii-ndo, te quide-ná-ndó nchaa sǎ vǎha tàuchiuⁿ Yǎ Ndiǒxí cada-ndo. 19 Te duha cǎháⁿ-í cuendá cue ñáyiú xinu cuechi cuendá sǎ nchòhó tecú tnùní-ndó nǎcuáa ndùu tnúhu cǎháⁿ-í. Te nchòhó ní dáñá-ndó ñi taxi tnùní ñáhá nchaa sǎ cuèhé sǎ dúhá xii-ndo, te ñá túú ní quide-ndo nǎcuáa ní cǎháⁿ Yǎ Ndiǒxí cada-ndo chi da vǎhi-gǎ ní quide-ndo, te ñu-ni ducaⁿ chí dáñá ná tàxi tnuní ñáhá Yǎ Ndiǒxí xii-ndo vitna cuendá cada-ndo mée-ni sǎ vǎha nǎcuáa cuini méé-gǎ cada-ndo, te ducaⁿ te cuu-ndo ñáyiú quide ndáá cundecu núú-gǎ.

20 Te nchoo cǔtnáhá ní xóo cada-ndo nchaa sǎ cuèhé sǎ dúhá ñà túú ní xóo cada-o ñi ñⁿ sǎ vǎha cuini Yǎ Ndiǒxí cada-o. 21 Te dicó sǎcǎⁿnúú sǎñaha nchaa sǎ cuèhé sǎ dúhá-ǎⁿ te núu na cǎda-o, te ñi ñⁿ sǎ vǎha vá ñihí-ó te núu na cǎda-o nchaa xiǎⁿ, te ñu nchaa xiǎⁿ dácuíta nihnu ñaha-xi xii-o. 22 Te vitna ñá túú-gǎ cúú-ó ñáyiú ndècu ichi cuehé ichi duha, chí cùu-ná-ó ñáyiú quide nchaa nǎcuáa cǎháⁿ Yǎ Ndiǒxí. Te sǎ dúhá quide-o cuu ndisa-xi ñⁿ sǎ vǎha sǎ cúú-xi-ó, te cùu-o ñáyiú quide ndáá ndécú-ó núú-gǎ vitna, te sǎá nduu cùnđecu-o ndíhi-gǎ ñi caa ñi

quihíⁿ. 23 Te nchaa sǎ cuèhé sǎ dúhá dicó dácuíta nihnu ñaha-xi xii-o, dico Yǎ Ndiǒxí ní quide-gǎ sǎ dicó-ni ducaⁿ ndùu táhú-ó cùnđecu-o ndíhi-gǎ ñi caa ñi quihíⁿ, chí ní tnahá tnúhu-o ndíhi Xítóhó Jesucristú Yaá cúú Xítóhó-ó.

7

Cuendá ñáyiú tnǎndaha

1 Te nchaa nchòhó ñáyiú ndècu ndíhi-í ichi Xítóhó Jesucristú sǎ nǎha-ndo nǎcuáa cǎháⁿ tnúhu sǎ dánèhé ñáhá xii-o nǎcuáa cada-o cùnđecu-o, chí tnúhu-ǎⁿ cǎháⁿ-xii dóho nchaa ñáyiú xíndecu vívú ñuyíú-a. 2 Te nchaa ñáyiú ñíhi sa ndècu yí-xi, te ñu tnúhu-ǎⁿ dánèhé ñáhá-xii xii-yu sǎ vǎ dáñá-yu yí-yu, dico núu na cùu yí-yu te ñá túú-gǎ ná cǎháⁿ tnúhu-ǎⁿ cuendá-yu. 3 Dico núu vátá cùu-gǎ yí-yu te ñá túú ndùu váha-xi naquehéⁿ-yu ingá téé, dico núu na cùu yí-yu te quendóo mée-yu, te ñá túú nǎgǎ cǎháⁿ tnúhu sǎ dánèhé ñáhá xii-yu nǎcuáa cada-yu te ducaⁿ te cuu naquehéⁿ-yu ingá téé, te ñá túú cùu-xi ñⁿ cuéchi.

4 Te nchòhó cue ñáyiú ndècu ndíhi-í ichi Xítóhó Jesucristú cúú-ndó dátá ñáyiú ní xíhi dátá ní xíhi-gǎ. Te xiǎⁿ ñá túú-gǎ táxi tnùní ñáhá nchaa tnúhu ní chídó tnùní ndíi Moisés xii-ndo. Te ducaⁿ ñi cuu cuendá nchòhó ngúnđecu-ndo ndíhi Xítóhó Jesucristú Yaá ní xíhi ní cùu te ní ndoto-gǎ. Te ducaⁿ ñi cuu cuendá nchaa nchoo ñáyiú ndècu ichi-gǎ cada-o nchaa nǎcuáa cǎháⁿ Yǎ Ndiǒxí. 5 Te nchoo ñi xíndecu-o ichi cuehé ichi duha, te tnúhu sǎ sǎnú ichi ñaha xii-o nǎcuáa cada-o cùnđecu-o cachí-xi sǎ ñà túú váha cundecu-o ichi-ǎⁿ, te nchoo dà uuⁿ-gǎ ní quide-o nchaa sǎ cuèhé sǎ dúhá sǎ dúcǎⁿ cǎháⁿ tnúhu-ǎⁿ, te sǎ dúcǎⁿ ñi quide-o te ta xíta nihnu-o cuǎháⁿ ní cùu. 6 Te vitna cada iní-ó sǎ cúú-ó dátá ñáyiú ní xíhi sǎ cúú-xii tnúhu sǎ dánèhé ñáhá xii-o nǎcuáa cada-o cùnđecu-o, chí ñá túú-gǎ cúnùu-xi, te vitna mee-nǎ Espíritú Yǎ Ndiǒxí chíndèe ñaha-xi xii-o xinu cuechi-o núú-gǎ, te ñá díú

cuendá nchaa tnúhu sá nǐ ngúndee ndéé díhna cada ñáyiú xínu cuechi-o núú-gǎ vitna.

Nchaa sá cuèhé sá dúhá ñùhu iní-í

⁷ Te cuèi duha càháⁿ-í dico vá cúú tnàhí cáháⁿ-ó sǎ tnùhu sá sánú ìchi ñaha xii-o nacuáa cada-o cùndecu-o ñá díú tnùhu váha cùu-xi. Te yúhú ñá túú cùtnuní iní-í ná cúú nchàa sá cuèhé sá dúhá ní cùu te núú ñá túú tnùhu-áⁿ ní càhí tnùhu-xi xii-í, te ní ñà túú cùtnuní tucu iní-í nùu váha àdi ñá túú váha sá nchídó iní-í sá ndécú ndìhi tnahá ñáyiú-o ní cùu te núú ñá túú tnùhu-áⁿ ní càhí-xi sá vǎ cúú cùu iní-í sá ndécú ndìhí-yu. ⁸ Te tnúhu-áⁿ nǐ dánèhé ñáhá-xí xii-í sá vǎ cúú càda-í ní ìⁿ sá cuèhé sá dúhá, dico sá cuendá tnúhu-áⁿ uuⁿ-gǎ ducaⁿ nǐ sani iní-í ní quide-í. Te núú ñá túú tnùhu sá sánú ìchi ñaha xii-o nacuáa cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. ⁹ Te cútnàhá vátá nihí-gǎ-í tnúhu-áⁿ te ñá túú tnàhí ná sání iní-í ndécú-í ní cùu, dico sátá nǐ nihí-í tnúhu-áⁿ te ní cutnùní iní-í sá ndécú cuèchi-í, te ta xǐta nihnu-í cuáháⁿ ní cùu. ¹⁰ Te núú ní quide-í nchaa nacuáa càháⁿ tnúhu-áⁿ te sa ndéé ama-gǎ naníhí tàhú-í ní cùu, dico ñá túú ní quide-í nùu ní cutnùní iní-í sá tá xǐta nihnu-í cuáháⁿ ní cùu. ¹¹ Te sá xíi tnùhu-áⁿ xǐáⁿ uuⁿ-gǎ ní cunuu nchàa sá cuèhé sá dúhá nǐ dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáháⁿ ní cùu.

¹² Te tnúhu sá sánú ìchi ñaha xii-o nacuáa cada-o cùndecu-o cuu-xi tnúhu ío yíñùhu ní taxi Yá Ndiòxí, te ìⁿ ìⁿ tnúhu-áⁿ cúú-xí mèe-ni tnúhu váha, te ní ìⁿ tnúhu cuèhé tnúhu duha ñá túú ñùhu tnahá. ¹³ Te vá cúú càhí-í sá tnùhu váha-áⁿ nǐ quide-xi ta xǐta nihnu-í cuáháⁿ ní cùu, chi nchaa sá cuèhé sá dúhá nǐ quide-í, xǐáⁿ tá dàcuíta nihnu ñaha-xi xii-í cuáháⁿ ní cùu, te sá cuendá tnúhu váha-áⁿ nǐ cutnùní iní-í sá quidè-í nchaa sá cuèhé sá dúhá, te xǐáⁿ tá xǐta nihnu-í cuáháⁿ ní cùu. Te sá cuendá nchaa nacuáa càháⁿ tnúhu sá sánú ìchi ñaha xii-o nacuáa cada-o cùndecu-o ní cutnùní iní-í sá xidó ndécú cuèchi-í ní cùu.

¹⁴ Te tnúhu-áⁿ nǐ taxi Espíritú Yá Ndiòxí ndécú ndìhi-o cachí tnúhu-xi nacuáa cada váha-o. Te nchoo cùu-o mee-ni ñáyiú yíca cuèchi, te tàxi tnuní ñáhá nchàa sá cuèhé sá dúhá xii-o ní cuu. ¹⁵ Dico nchoo tnàhá iní-ó càda-o nchaa sá váha dico ñá túú quide-o, te da nchaa sá ñà túú tnàhá iní-ó càda-o quide-o, te ñá túú cùtnuní iní-ó nǎ cuendá ducaⁿ quide-o. ¹⁶ Te sá dúcáⁿ quide-o nchaa sá ñà túú tnàhá iní-ó, te xǐáⁿ ndíxí tǔu iní-ó sǎ tnùhu sá dúcáⁿ sànu ichi ñaha xii-o nacuáa cada-o cùndecu-o cuu-xi tnúhu ío váha. ¹⁷ Te cùtnuní iní-ó sǎ nchàa sá cuèhé sá dúhá ñùhu iní-ó, xǐáⁿ quidè-xí ducaⁿ quide-o sá ñà túú váha, te ñá díú sǎ cáhú iní mèé-ó dùcaⁿ quide-o. ¹⁸ Te cùu-o cue ñáyiú sàni cuehé sání dùha iní-xi, te cuini-ó càda-o nchaa sá váha dico ñá túú nihí ndéé-ó càda-o. ¹⁹ Te cuini-ó càda-o nchaa sá váha dico ñá ndácú-ó, te ñá túú cuini-ó càda-o datná quidè nchàa ñáyiú ndècu ichi cuehé ichi duha, chi ñáyiú-áⁿ mee-ni nchàa sá cuèhé sá dúhá quidè-yu, dico diu-ni nchaa xǐáⁿ quidè-ó tnàhá-ó. ²⁰ Te sá dúcáⁿ quide-o nchaa sá ñà túú tnàhá iní-ó càda-o te ñá díú mèe-o ducaⁿ cahu iní-ó quide-o, chi nchaa sá cuèhé sá dúhá ñùhu iní-ó xǐáⁿ quidè-xí dùcaⁿ quide-o.

²¹ Te ducaⁿ tnàhí yáha-o òré cuini-ó càda-o sá váha, chi da mee-ni nchàa sá cuèhé sá dúhá quide-o. ²² Te ío cùdíí iní-ó càda-o nchaa nacuáa càháⁿ Yá Ndiòxí, ²³ te dícó-ni sá ncháá sǎ cuèhé sá dúhá ñùhu iní-ó, xǐáⁿ quidè-xí ngàni ñaha-xi xii-o ñá túú quide-o sá váha sàni iní-ó càda-o, te ducaⁿ yáha-o chi nchaa sá cuèhé sá dúhá-áⁿ cùnùu-xi taxi tnuní ñáhá-xí xii-o.

²⁴ ¡Te ndàhú ní cuu nchoo! Chi vá yóo ìⁿ ní ndàcu cada nacuáa vá táxi tnùní ñáhá-gǎ nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu. ²⁵ Te táxǎhu xii Yá Ndiòxí sá Xítóhó Jesucristú ní quide-gǎ cuendá sá vǎ táxi tnùní ñáhá-gǎ ní ìⁿ sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sàni iní-ó càda-o nchaa nacuáa càháⁿ Yá Ndiòxí, dico núu nchaa sá cuèhé sá dúhá ná

cùnuu-xi taxi tnuní ñáhá-xí xii-o, te ðiu-ni nchaa xiáⁿ cada-o.

8

Ñáyiú quide nchaa nacuaá càháⁿ Espíritú Yá Ndiöxí

¹ Te vitna nchaa nchoo ñáyiú tnàhá tnúhu ndihi Xítohá Jesucristú vá cuíta nihnu-gá-ó, chi ñá túú-gã ndécú-ó ìchi cuehé ichi duha, chi mee-nã nchaa nacuaá càháⁿ Espíritú Yá Ndiöxí quidé-ó. ² Te Espíritú Yá Ndiöxí-ãⁿ táxi tnuní ñáhá-xí xii-o, te ducaⁿ chi ndècu ndihi-o Xítohá Jesucristú, te sá dúcáⁿ tàxi tnuní ñáhá Espíritú-gá xii-o nõu xiáⁿ ñá túú-gã táxi tnuní ñáhá ni ìⁿ-gá sá cuèhé sá dúhá xii-o, te ducaⁿ quide Espíritú-gá cuendá sá vã cuíta nihnu-o, te ðiu-ni Espíritú-gá quidé-xí cuendá sá nchóó ndùu táhú-ó cùndecu-o ndihi-gá ni caa ni quíhíⁿ.

³ Te nchoo ñã ní ndàcu-o cada-o nchaa nacuaá càháⁿ tnúhu sá sánú ìchi ñaha xii-o nacuaá cada-o cùndecu-o, nõu xiáⁿ tnúhu-áⁿ ñá túú ní nihí ndéé-xí càda-xi cuendá sá nchóó vã cuíta nihnu-o. Dico Yá Ndiöxí ní tendaha-gã Déhe mee-gã ní quixi ñuyúú-a, te Yaá-áⁿ cúú-gã ìⁿ ñáyiú, te càa-gá dàtná cáá ñáyiú ndècu cuéchi-xi xñndecu ñuyúú-a, te sá cuendá nchaa cuéchi nchaa nchoo ñáyiú xñndecu ñuyúú-a ní quixi-gá, te ndéé dàvá-áⁿ ní quide-gá cuendá sá vã táxi tnuní ñáhá-gã ni ìⁿ sá cuèhé sá dúhá xii-o.

⁴ Te ducaⁿ ní quide-gá cuendá nchoo nchícúⁿ nihnu-o quide-o nacuaá càháⁿ tnúhu sá sánú ìchi ñaha xii-o nacuaá cada-o, chi ñá túú-gã cùnùu ni ìⁿ sá cuèhé sá dúhá ìní-ó, chi Espíritú Yá Ndiöxí-nã táxi tnuní ñáhá-xí xii-o.

⁵ Te nchaa ñáyiú cùnùu nchaa sá cuèhé sá dúhá ìní-xi mee-ni xiáⁿ ñúhú ìní-yu te quidé-yu. Dico nchoo ñáyiú quide nchaa nacuaá cuini Espíritú Yá Ndiöxí ñúhú ìní-ó mèe-ni nacuaá càháⁿ Espíritú-gá-áⁿ te quide-o. ⁶ Te nõu mee-ni nchaa sá cuèhé sá dúhá cùnùu ìní-ó, te cuíta nihnu-o, dico nõu mee-ni nchaa tnúhu càháⁿ Espíritú Yá Ndiöxí cùnùu ìní-ó, te ío váha cuu ìní-ó cùndecu-o ndihi-gá ni caa ni quíhíⁿ. ⁷ Te nchaa ñáyiú ñùhu ìní

mee-ni sá cuèhé sá dúhá cùu ùhú ìní-yu Yá Ndiöxí, te ñá túú cuini-yu cada-yu nacuaá càháⁿ-gá, te ni ñã ndácú-yu cada-yu. ⁸ Te nchaa ñáyiú ducaⁿ cùnùu nchaa sá cuèhé sá dúhá ìní-xi-áⁿ ñá túú cùdiú-yu nõu Yá Ndiöxí.

⁹ Te nchòhó chi ñá túú-gã cùnùu sá cuèhé sá dúhá ìní-ndó, chi mee-nã nacuaá càháⁿ Espíritú Yá Ndiöxí quidé-ndó, te ducaⁿ quide-ndo chi ndècu ndihi-ndo Espíritú-gá, te ðiu-ni Espíritú-gá-áⁿ ní tendaha Xítohá Jesucristú véxi ndècu ndihi-o, te nchaa ñáyiú ñá túú ndècu ndihi Espíritú sá ní tendaha Xítohá Jesucristú véxi ndècu ndihi-o ñá túú ndècu ndihi ñahá-yu xii-gá. ¹⁰ Te nõu ndècu ndihi-ndo Xítohá Jesucristú, te cuéi na cùu yiqui cùñú-ndó sã cuendá nchaa sá cuèhé sá dúhá ío ñuyúú-a, dico ìní-ndó chi cùndecu ndihi-xi Yá Ndiöxí chi ñá túú-gã cuéchi-ndo ndècu nõu-gã.

¹¹ Te nõu ndècu ndihi-ndo Espíritú Yá Ndiöxí Yaá ní dándótó ñaha xii Xítohá Jesucristú, te ðiu-ni-gã cada te ndoto yiqui cùñú-ndó sã tá xita nihnu cuaháⁿ nõu na cùú-xi, te ducaⁿ chi ndècu ndihi-ndo Espíritú-gá.

¹² Te nchòhó ñáyiú ndècu ndihi-í ichi Xítohá Jesucristú, ñá túú-gã tàú-ndó cùnùu ni ìⁿ sá cuèhé sá dúhá ìní-ndó nacuaá vá cùndecu-gá-ndó ìchi cuehé ichi duha. ¹³ Chi nõu na cùnùu sá cuèhé sá dúhá ìní-ndó te cuíta nihnu-ndo, chi quíhíⁿ-ndó nõu ùhú nõu ndàhú. Dico nõu dañà-ndo mèe-ndo chindee ñaha Espíritú Yá Ndiöxí xii-ndo cuendá sá vã cùnùu-gá sá cuèhé sá dúhá ìní-ndó ñá, te nduu táhú-ndó cùndecu-ndo ndihi-gá ni caa ni quíhíⁿ te nõu ducaⁿ na càda-ndo.

¹⁴ Chi nchaa ñáyiú quide nchaa nacuaá sànu ichi ñaha Espíritú Yá Ndiöxí cúú-yu déhe-gã. ¹⁵ Te Espíritú sá ní taxi Yá Ndiöxí ndécú ndihi-o ñá túú quide-xi sã nchóó yùhú-ó cùnùu cuechi-o nõu-gã, chi Espíritú-áⁿ quidé-xí sã nchóó cùu-o déhe-gã, te ðiu-ni Espíritú-áⁿ quidé xãhaⁿ-o xii Yá Ndiöxí: “¡Yòhó Dútú Ndiöxí cúú-n Tãtá méé-ndí!”, duha xãhaⁿ-o xii-gã. ¹⁶ Te ðiu-ni Espíritú-gá-ãⁿ

tnàhá tnúhu-xi ndihi iní-ó, te cãháⁿ ndáá-xi sá nchóó cùu-o déhe-gá. ¹⁷ Te sá dúcáⁿ cùu-o déhe Yá Ndiõxí xiáⁿ ní cachí-gá sá tnàhá-ó ndùu táhú-ó sá n̄ nduu táhú Xitohó Jesucristú, te ducaⁿ ndùu táhú-ó te núu na càda ndee iní-ó ndòho-o datná ní ndoho Xitohó Jesucristú, te núu ducaⁿ te ío cuu cãhnu-o ndihi-gá ni caa ni quíhíⁿ.

¹⁸ Te yúhú cãchí-í sá ñà túú ñà cada-xi cuèi ndòho-o cuendá-gá ndécú-ó ñuyú-a, chi ío váha càa núu ndúú táhú-ó cundecu-o na saá nduu. ¹⁹ Te nchaandi túhú sá n̄ cadúha Yá Ndiõxí ní taxi ndecu-gá ñuyú-a ndètu cahnu-ná-xi sáá nduu cãchí-gá sá ío cãhnu cuu nchaa déhe-gá. ²⁰ Te nchaa sá n̄ cadúha Yá Ndiõxí ní taxi ndecu-gá ñuyú-a ní sáá nduu ñà túú-gã cúu-xí sã vãha sá cúu-xí-gã. Te ñà díú mèe sá n̄ taxi ndecu Yá Ndiõxí ñuyú-a ducaⁿ ni sàni iní-xi cunduu, chi mee-gã ducaⁿ tnàhí ní cachí-gá cunduu sá saá nduu vã cúu-xí sã vãha sá cúu-xí-gã, dico sáá tucu nduu te nchaa xiáⁿ cuu tucu-xi sá vãha sá cúu-xí-gã. ²¹ Te nchaa sá n̄ taxi ndecu-gá ñuyú-a vá cunduu-gá-xi datná cáá-xí vitna te ni vã dánàa-gá, chi nduu saa-xi te ngúndecu váha-xi datná ngúndecu váha nchaa cue déhe-gá. ²² Te naha-o sá ncháándi túhú sá nchító n̄ cadúha Yá Ndiõxí ndécú ñuyú-a ndòho-xi vitna datná ndóhó ìⁿ ñadihí sa ní tnahá òré cacu déhe-xi. ²³ Te ñà díú-ní nchàa sá dúcáⁿ n̄ cadúha-gá-ãⁿ ducaⁿ ndòho-xi, chi tnàhá nchoo dùcaⁿ ndoho-o ndecu-o ñuyú-a tucu, te nchoo sà ní nduu táhú-ó Espiritú Yá Ndiõxí Espiritú sá n̄ cachí mée-gã nduu táhú-ó dñhanuu. Te ío ndòho tnahá-ó ndècu-o ñuyú-a te ndètu cahnu-ná-ó sáá nduu ndàda saa-gá yiqui cùñú-ó, te cãháⁿ-gá sá cúu-ó déhe-gá. ²⁴ Te Yá Ndiõxí ní quide-gá ní naníhí táhú-ó n̄u xiáⁿ ní ngúndecu ndihi-o tñuhu ndee iní ndétú-ó sáá nduu càda-gá nacuáa ní cachí-gá, te núu sa ndècu ndihi-o sá ndúú táhú-ó te vã cúu cãháⁿ-ó sã cundètu-o sá ndúú táhú-ó chi sa ndècu ndihi-o. ²⁵ Dico sá ndétú-ó ndùu táhú-ó cùu-xi sá vátá cundècu ndihi-gá-ó,

te xini ñuhu-ni-xi cada ndee-ni iní-ó cundetu-o ndéé sáá nduu ndùu táhú-ó sá dúcáⁿ ní cachí Yá Ndiõxí nduu táhú-ó.

²⁶ Te Espiritú-gá chindee ñaha-xi xii-o nacuáa níhí ndéé-ó cundecu-o, te nchoo ñà túú xini-ó cãháⁿ ndihi-o Yá Ndiõxí nacuáa taú-xi cunduu dico Espiritú-gá cãháⁿ ndàhú-xi núu-gã cuendá-ó cuèi òré ñà ñihí-ó tñuhu cãháⁿ-ó cuendá nchaa sá ío cuèni-ó cãcáⁿ-ó núu-gã. ²⁷ Te Yá Ndiõxí sa naha ndáá-gá nchaa nacuáa sàni iní-ó, te ducaⁿ sà naha ndáá-gá nchaa nacuáa sàni iní Espiritú-gá. Te Espiritú-gá cãháⁿ ndàhú-xi núu-gã cuendá nchoo ñayiu yindaha-gá, te cãháⁿ ndàhú-xi núu-gã nacuáa cuèni mée-gã cunduu.

Nchaa sá ná càda ñaha ñayiu te vá ndácú-yu nadatùhú-yu iní-ó chi ndacu nahi-ni-o yãha-o nchàa sá ná cáda ñàhá-yu

²⁸ Te sa naha-o sá Yá Ndiõxí quidé-gã sá ncháá sã yãha-o ndècu-o ñuyú-a cùu-xi sá vãha sá cúu-xí nchòo cue ñayiu cùu iní ñáhá xii-gá, chi cùu-o ñayiu ní cãháⁿ-gá cundecu ndihi-gá datná ní cachí iní mée-gã. ²⁹ Te ndéé cútnàhá vátá ngáva-gá ñuyú, te Yá Ndiõxí sa naha-gá nãndi cùu ñayiu cundecu ndihi-gá, te diu-ni ndéé dàvá-áⁿ ní cachí-gá sá ñayiu-áⁿ cunduu váha iní-yu datná váha iní Déhe mee-gã, te ducaⁿ ní cachí-gá cuendá sá Dèhe mee-gã-áⁿ cunuu-gã núu nchàa ñayiu cundecu ndihi-gá. ³⁰ Te nchaa ñayiu ducaⁿ ní cachí-gá cundecu ndihi-gá ndéé cútnàhá vátá ngáva-gá ñuyú cãháⁿ ñáhá-gã xii-yu vitna, te nchaa ñayiu ducaⁿ cãháⁿ-gá cãchí-gá sá ñà túú-gã cuèchi-yu ndècu núu-gã, te diu-ni ñayiu-áⁿ cachí-gá sá ío cãhnu cuú-yu.

³¹ Te vitna ní cutnùni iní-ó, te ñà túú ñãgá cani iní-ó, chi Yá Ndiõxí ndécú ndihi ñaha-gá xii-o, te vá yòo ìⁿ-gã ndacu quehndé nihnu cuendá sá vã chindèe ñaha-gá xii-o. ³² Te Yá Ndiõxí ñà túú ní cùdí iní-gá Déhe-gá sá cùu-gá cuendá nchaa nchoo ñayiu xñdecu ñuyú-a, te sá dúcáⁿ ndéé

Déhe-gá ñá túú ní cùdíí iní-gá xiǎⁿ cùtnùní iní-ó sǎ táxí-gǎ nchaandi túhú sá xíní ñùhu-o. ³³ Te vá yǎo ìⁿ ndacu cacáⁿ cuéchi núú Yǎ Ndiǒxí cuendá nchaa ñáyiú ní cachí-gá cundecu ndíhi-gá te núu ná cúú cuéchi-yu ndècu. Chi mee-gǎ càchí-gá sá ñà túú ndècu cuéchi-yu núú-gǎ. ³⁴ Te vá yǎo ìⁿ ndacu daquìhíⁿ ñáhá xii-o núú ùhú núú ndàhú, chi Xítóhó Jesucristú ní xíhí-gá te ní ndoto-gá, te cuándaa-gá núú ndécú Dǔtú Ndiǒxí núcǎo-gá xio cùha-gá, te ducaⁿ ìo cùnno-gá, te yàcáⁿ càháⁿ ndàhú-gá núú Dǔtú Ndiǒxí cuendá-ó. ³⁵ Te vá yǎo ìⁿ ndacu cada ñaha xii-o ìⁿ sá ñà túú vǎha cuendá sá vǎ cúú ìní ñáhá-gǎ Xítóhó Jesucristú xii-o, te ní tnúndòho tnúhu ndàhú, te ní sá ndíhú iní-ó ñǎ cùtnùní iní-ó ñàsa cada-o càcu nihnu-o ìⁿ sá ná yǎha-o, te ní nchaa sá cáda ñaha ñáyiú sá cuendá-gá, te cuèi-ni sá vǎ ñíhí-ó sǎ cóhó sǎ cáxí-ó, te cuèi-ni sá vǎ ñíhí-ó dǎo cuihnu-o, te cuèi ndècu-ná-ó sǎ yǎha-o ìⁿ sá yǎha-o, te cuèi sa ndècu-ná-ó sǎ cáhni ñáhá-yu, dico Xítóhó Jesucristú vá dáñá ndéé-gá sá cúú ìní ñáhá-gǎ xii-o. ³⁶ Te quee ndáá-xi nàcuáa ní cáháⁿ ìⁿ téé ní xóo cáháⁿ tnúhu Yá Ndiǒxí ndéé sanaha ñí ngódó tnùní núú tǔtú-gá núú càchí-xi:

Yòhó Dǔtú Ndiǒxí nchaa-ni nduu nchaa-ni òré cuíni ñáyiú cahni ñáhá-yu xii-ndí sá cuendá-n,

te càchí-yu sá cúú-ndí dàtná cue mbéé cue quití sa ndècu túha-ná cahni-yu.

Duha ní cachí téé ní xóo cáháⁿ tnúhu-gá-áⁿ, te ducaⁿ ñí ngódó tnùní núú tǔtú-gá. ³⁷ Te cuèi ducaⁿ ñàndí sá ná càda ñahá-yu xii-o, dico vá ndácǔ-yu nadatùhú-yu iní-ó chi ndacu nahi-ni-o yǎha-o nchaa sá dúcáⁿ ná càda ñahá-yu xii-o, te ducaⁿ chi Xítóhó Jesucristú Yáá ìo cùu ìní ñáhá xii-o ndecu ndíhi ñaha-gá chindèe ñaha-gá. ³⁸⁻³⁹ Te yúhú cùtnùní ndáá iní-í sá ñí ìⁿ sá ìo ñuyíú-a vá ndácú-xí càda-xi cuendá sá vǎ cúú ìní ñáhá-gǎ Yǎ Ndiǒxí xii-o, te ní sǎ cùú-ó, te ní sǎ cùndècu-o ñuyíú-a, te

ni ìⁿ espíritú sá ìo cùnno cundíhi yucu ñávaha te ní ìⁿ dava-gá cue espíritú cùndíhi-xi vá ndácú-xí càda-xi cuendá sá vǎ cúú ìní ñáhá Yǎ Ndiǒxí xii-o. Te ní sǎ cúú ñuyíú-a vitna, te ní sǎ cúú ndéé cuéé-gá, te ní ìⁿ sá ndécú àndiú, te ní ìⁿ sá ndécú ñuyíú-a, te ní ìⁿ sá ñí cadúha mee Yǎ Ndiǒxí, ni ìⁿ xiǎⁿ vá ndácú-xí càda-xi cuendá sá vǎ cúú ìní ñáhá-gǎ xii-o chi ndècu ndíhi-o Xítóhó Jesucristú Yáá cúú Xítóhó-ó.

9

Yá Ndiǒxí ní cachí-gá sá ñáyiú isràél cuú-yu ñáyiú canchicúⁿ nihnu ñaha xii-gá

¹ Te yúhú càháⁿ ndáá-í chi cùu-í ìⁿ téé ndècu ndíhi Xítóhó Jesucristú, te ndècu ndíhi-í Espíritú Yǎ Ndiǒxí ñuu xiǎⁿ cùtnùní iní-í sá càháⁿ ndáá-í. ² Te nchaa-ni nduu nchaa-ni òré ìo ndíhú iní-í, te ducaⁿ-ni ìo quide úhú-xi iní-í ³ sá cuendá nchaa ñáyiú cùu ndi mee-í. Te núu dícó cúú-xi ìⁿ sá chindèe ñaha xii-yu núcúndecu váha-yu núú Yǎ Ndiǒxí ñá, te dàña-í mée-í dàcuíta nihnu ñaha Xítóhó Jesucristú ñuu dícó sá cúú. ⁴ Te nchaa ñáyiú cùu ndi mee-í-áⁿ cúú-yu ñáyiú isràél, te Yá Ndiǒxí ní cachí-gá sá cúú-yu déhe-gá, te ní quide-gá nàcuáa ní cutnùní iní-yu sá ìo càhnu cuu-gá, te ní cáháⁿ ndáá-gá núú-yu nàcuáa cada ñaha-gǎ xii-yu, te ní xáhaⁿ-gǎ xii ndí Moisés ní chídó tnùní ndí nàcuáa cáda-yu cundécú-yu. Te ní xáhaⁿ-gǎ xii-yu nàcuáa cáda-yu cada càhnu ñahá-yu xii-gá, te ní xáhaⁿ tucu-gá xii-yu nchaa nàcuáa cáda-gá ndéé cuéé-gá. ⁵ Te nchaa ñáyiú-áⁿ cúú-yu ñaní tnáhá nchaa cue téé ní cùnno ñí xindecu ndéé sanaha, te ñi-ni ñaní tnáhá-yu cùu Xítóhó Jesucristú Yáá ní tendaha Dǔtú Ndiǒxí ní quixi ñuyíú-a, te tnáhá-gá cúú-gǎ Ndiǒxí te ìo cùnno-gá, te nchaa nduu nchaa quíú ìo càhnu cuu-gá. Te ducaⁿ na cùnduu.

⁶ Te vá càchí-ó sǎ Yǎ Ndiǒxí ñá túú ní quide-gá nchaa nàcuáa ní cachí-gá cáda-gá cuendá sá ñà túú sàndáá iní ñáhá dàva ñáyiú isràél xii-gá. Te

sá dúcáⁿ xíquide davá-yu te ñá túú quidé-yu nàcuáa tàú-xi cada-yu sá cúu-yu ñáiyu israhél. Te ñáiyu ducaⁿ xíquide-áⁿ cúu-yu ñáiyu ñá túú cùu cuendá ñáhá Yá Ndiöxí. ⁷ Te cuèi nchaá-yu cùu-yu ñaní tnáhá ndii Àbrahám dico ñá túú quidé-yu nchaa nàcuáa tàú-xi cunduu cada-yu sá cúu-yu ñaní tnáhá ndii. Te Yá Ndiöxí ní xáhaⁿ-gã xii ndii Àbrahám: “Nchaa cue ñaní tnáhá tẽ Isàac tée cùu déhe ducuⁿ-n, mee-ni cuè ñáiyu-áⁿ cuu ñaní tnáhá-n”, duha ní xáhaⁿ-gã xii ndii Àbrahám. ⁸ Te xiãⁿ cútnùní iní-ó sã ñã ncháá ñáiyu cùu ñaní tnáhá ndii Àbrahám cúu-yu ñáiyu cùu cuendá Yá Ndiöxí, chi mee-ni ñáiyu sàndáá iní nàcuáa ní cáháⁿ-gã cada-gá, ñáiyu-áⁿ cúu cuendá-gá. ⁹ Te duha ndùu tnúhu ní xáhaⁿ Yá Ndiöxí xii ndii Àbrahám: “Sáá nduu te yúhú cada-í te coo ñⁿ déhe-n ndii ñadihí-n tã Sãrá”, duha ní xáhaⁿ-gã xii ndii.

¹⁰ Te ñá díu-ní xiãⁿ ní quide Yá Ndiöxí, chi tnáhá ní ndatnúhu-gá ndii ndii Rèbecá cútnáhá vitna ñúhu úú déhe ndii ndii Isàac tée ní cuu ñaní tnáhá-ó ñã xindecu ndéé sanaha. ¹¹⁻¹³ Te cútnáhá vitna ñúhu-gá déhe ndii Rèbecá, cútnáhá vátá cáda-gã-güexi ni ñⁿ sá cuèhé sá dúhá, te ni ñⁿ sá vãha, ní xáhaⁿ Yá Ndiöxí xii ndii: “Déhe-n tẽe díhna na càcu te tée-áⁿ tñi-dé nchaa tnúhu cáháⁿ déhe-n tẽe cùu uú ná càcu”, duha ní xáhaⁿ-gã xii ndii Rèbecá. Te ní quee ndáá-xi nàcuáa ní cáháⁿ Yá Ndiöxí núu tütú-gá núu càchí-xi: “Té Jàcób ní cuu váha iní-í núu-dẽ, te té Esàú ñá túú ní cùu váha iní-í núu-dẽ”, duha càchí-gá núu tütú-gá. Te ducaⁿ ñã cuu chi ducaⁿ ñã cachí méé-gã cunduu sá càháⁿ-gã nchaa ñáiyu cuíni méé-gã, te ñá díu cuendá ñⁿ chiúⁿ quidé-yu càháⁿ ñáhá-gã xií-yu.

¹⁴ Te vá cúu tnàhí cáháⁿ-ó sã Yá Ndiöxí ñá túú quide váha-gá sá dúcáⁿ quide-gá chi mee-gã ío ndáá quidé-gã! ¹⁵ Te mee-gã ní xáhaⁿ-gã xii ndii Moisés: “Cundàhú iní-í chindee-í mee-ni cuè ñáiyu càchí iní-í”, duha ní xáhaⁿ-gã xii ndii. ¹⁶ Te xiãⁿ cútnùní

iní-ó sã cundàhú iní-gá ñáiyu chi ducaⁿ cuíni méé-gã cunduu, dico ñá túú cundahú iní ñáhá-gã xií-yu cuendá sá dúcáⁿ cuíni-yu cada-gá, te ni ñã túú cundahú iní ñáhá-gã xií-yu cuendá sá ío ndùcu ndéé-yu quidé-yu ñⁿ sá quidé-yu. ¹⁷ Te núu tütú Yá Ndiöxí càháⁿ-xi nàcuáa ní xáhaⁿ-gã xii tée ní cuu Faràón tée ní xíndaha nacióⁿ Ègiptú, te duha ní xáhaⁿ-gã: “Yúhú ní quide-í yíndàha-n ñáiyu cuendá cada-í titní núu sã cáda-í núu-n cuendá cutnùní iní-n sã ío càhnu cuu-í, te ducaⁿ nchaa ñáiyu ñuyú cutnùní iní-yu sá yúhú cúu-í Ndiöxí”, duha ní xáhaⁿ-gã xii tée ní cuu Faràón. ¹⁸ Te xiãⁿ cútnùní iní-ó sã Yá Ndiöxí cundàhú iní-gá mee-ni cuè ñáiyu càchí iní méé-gã, te ducaⁿ ndàda díi-gá iní nchaa ñáiyu càchí iní méé-gã ducaⁿ càda-gá.

¹⁹ Te sá dúhá càháⁿ-í te dava-ndo quèsaha-ndo: “Ná cuendá Yá Ndiöxí dácàa-gá cuèchi díquí ñáiyu núu ni ñⁿ-yu ñã ndácú-yu quehndé nihnú-yu cuendá sá vã cáda Yá Ndiöxí nàcuáa cuíni-gã”, quèsaha-ndo. ²⁰ Te chí cuãha cuendá sá dicó ñáiyu ñuyú-a cùu-ndo te ñá túú ndùu váha-xi sá nchòhó cáháⁿ-ndó ñⁿ tnúhu sã ñã túú ndùu váha sá cúu-xi Yá Ndiöxí. Te duha na càháⁿ-í núu-ndó nàcuáa tecú tnùni-gã-ndó nàcuáa ndùu tnúhu càháⁿ-í. Te ñá túú xini-ó sã ñⁿ quídi ñuhu cúñaha-xi xii ñáiyu ní cadúha ñaha xii-xi: “Ná cuendá duha ní cadúha ñaha-n xii-í”, cúñaha-xi. ²¹ Chi ñáiyu cadúha nchaa quídi-áⁿ cuu-ni cadúha-yu ndii ñuhu cuèi nása na cunduu quídi cadúha-yu canehe chiúⁿ-yu, chi ñⁿ-ni ñuhu cadúha-yu quídi cánehe chiúⁿ-yu ndi tnáhá nduu sácóo-yu vico ndii quídi sá cánehe chiúⁿ-yu nduu cùtexínu.

²² Te díu-ni ducaⁿ quide Yá Ndiöxí, chi cuíni-gá dandòho-gá ñáiyu ñá túú quide nchaa nàcuáa nduu vétú iní-gá, te cada-gá nàcuáa cutnùní iní-yu sá ío càhnu cuu-gá. Te sa ndècu túha-ná-yu sá quihíⁿ-yu núu ùhú núu ndàhú, te cuèi ducaⁿ dico ío ta quide càhnu

iní-gá cuáháⁿ. ²³ Te ducaⁿ quide-gá cuendá cutnùní iní nchaa ñáyiú ñuyíú sã ïo váha quide-gá sá cúu-xí nchaa nchoo ñáyiú cùndahú iní-gá, chi ní cachí-gá sá nchóó cuè ñáyiú cùndahú iní-gá nduu táhú-ó cùndecu-o ndihí-gá núú ïo váha càa ndecu-gá. ²⁴ Te dava nchoo ñáyiú ní cáháⁿ Yã Ndiöxí cúu-ó ñáyiú isràél, te dava-o cùu-o ñáyiú ñá túú cùu ñáyiú isràél. ²⁵ Te ní quee ndáá-xi nàcuáa ní xáhaⁿ Yã Ndiöxí xii ndíi Oseás téé ní xóo cáháⁿ tnúhu-gá ndéé sanaha ñí chídó tnùní ndíi núú tütú-gá núú càchí-xi:

Ñáyiú ñá túú cùu cuendá-í ní cùu te nduu cuendá-í-yu,
te ñu-ni ñáyiú-áⁿ ñà túú cùu váha iní-í núú-yu ní cùu, dico vitna cùu váha iní-í núú-yu.

²⁶ Te ñu-ni ñuú núú dúcáⁿ ñí cachí-í sá ñà túú ñáyiú cùu cuendá-í ñu-ni ñuú-áⁿ coo ñáyiú cuu déhe yúhú Dútú Ndiöxí Yaa ndécú tũu andiú.

Duha ní xáhaⁿ Yã Ndiöxí xii ndíi Oseás ní chídó tnùní ndíi núú tütú-gá.

²⁷ Te ndíi Chàíá téé ní xóo cáháⁿ tucu tnúhu Yã Ndiöxí ndéé sanaha ñí cáháⁿ ndíi cuendá ñáyiú isràél, te duha ní cachí ndíi: “Cuèi cuéhé víhí ñáyiú isràél dàtná cuéhé ñuhu cúchí lámár dico sacú-ni-yu vá quíní-yu tnúndòho tnúhu ndàhú. ²⁸ Te Yã Ndiöxí ío ndihí cada-gá nchaa nàcuáa càháⁿ-gá ñuyíú”, duha ní cachí ndíi. ²⁹ Te ní cáháⁿ tucu ndíi nàcuáa cada-xi ndéé cuèé-gá, te ní cachí ndíi:

Yã Ndiöxí Yaa táxí tnùní nchaandi túhú sá ío andiú ndihí ñuyíú ñà túú ní dànaa-gá nchaa ñáyiú isràél, chi núu ní ndihí-yu danàa ñaha-gá,

te nchoo cùu-o datná ní cuu nchaa ñáyiú ní xíndecu ñuú Sòdomá ndihí nchaa ñáyiú ní xíndecu ñuú Gòmorra, te ndihí-o nàa datná ní naa nchaa ñáyiú-áⁿ ní cùu.

Duha ní cachí ndíi.

Ñáyiú isràél ñá túú sàndáá iní-yu tnúhu Xítohó Jesucristú

³⁰ Te sá cuendá xíáⁿ núu vitna càchí tnúhu-í xii-ndo sã cuè ñáyiú

ñá túú cùu ñáyiú isràél ñá túú ní nànducu nihnú-yu nàcuáa cada-yu cudíú-yu núu Yã Ndiöxí, dico vitna cudíú-yu núu-gá chi ní sàndáá iní-yu Xítohó Jesucristú. ³¹ Te ñáyiú isràél nchícúⁿ nihnú-yu tnúhu sá dánèhé ñáhá xii-yu nàcuáa cada-yu cudíú-yu núu Yã Ndiöxí dico ñá túú cudíú-yu núu-gá chi ñá ndácú-yu cada-yu nchaa nàcuáa càháⁿ-xi. ³² Te ducaⁿ ñà túú cudíú-yu núu Yã Ndiöxí chi ñá túú sàndáá iní-yu Xítohó Jesucristú, te sàni iní-yu sá sã cuendá mee-ni nchaa sá quidé mèé-yu cudíú-yu núu-gá, te sá dúcáⁿ quidé-yu te cùu-yu dàtná ñí ñáyiú nguñenu ñí yúú te nduá-yu. Te ducaⁿ sàtnahá-xi cùu-yu chi ñá túú cùu váha iní-yu núu Xítohó Jesucristú. ³³ Te quèe ndáá-xi nàcuáa ní cáháⁿ Yã Ndiöxí ñí xichi núú tütú-gá núú càchí-xi:

Yúhú táxí ndècu-í ñí téé ñuú Sìón, te cuu-dé dàtná ñí yúú, te yúú-áⁿ nguñenu ñáyiú te nduá-yu,

te nchaa ñáyiú na quíndáá iní ñáhá xii-dé, te vá ndíxí cuèchi iní-yu sá dúcáⁿ ñí sàndáá iní ñáhá-yu xii-dé.

Duha càchí-gá núú tütú-gá.

10

¹ Te nchòhó ñáyiú ndècu ndihí-í ichi Xítohó Jesucristú càchí tnúhu-í xii-ndo sã cáháⁿ ndihí-í Yã Ndiöxí cuendá ñáyiú isràél, chi ío cuíní-í sá nánihí tàhú-yu. ² Te na càháⁿ ndáá-í cuendá-yu sá ïo ndècu ndéé-yu xínu cuechí-yu núu Yã Ndiöxí, te dicó-ni sá ñà túú quidé-yu nàcuáa cuíní méé-gá cada-yu. ³ Chi ñá túú quide cuendá-yu nàcuáa cuíní Yã Ndiöxí cada ñaha-gá xii-yu nàcuáa cudíú-yu núu-gá, te quide-ni-yu nàcuáa sàni iní mèé-yu cudíú-yu núu-gá te ñá túú cuíní-yu tní-yu tnúhu càháⁿ-gá nàcuáa cudíú-yu núu-gá. ⁴ Te Xítohó Jesucristú ní quide-gá cuendá sá vã cùnù-gá nchaa tnúhu ní chídó tnùní ndíi Moisés, te nchaa ñáyiú na quíndáá iní ñáhá xii-gá te ñu-gá cada te cudíú-yu núu Yã Ndiöxí.

5 Te ndíi Moisés cãháⁿ ndíi núú tütú ndíi cuëndá ñáyiú cuení cudíu núú Yã Ndiõxí cuëndá sã nchícúⁿ nihnú-yu nchaa nãcuáa ní cãháⁿ ndíi. Te ní cachí ndíi sã ncháã ñáyiú na càda nchaa nãcuáa ní xáhaⁿ Yã Ndiõxí xii ndíi ní chídó tnùní ndíi te naníhí tãhú-yu, te núú dícó ndacú-yu cadá-yu nchaa nãcuáa ní cãháⁿ ndíi. 6 Dico vitna núú na quindáá iní-ó Xítohó Jesucrístú, te cudíu-o núú Yã Ndiõxí. Te duha cãchí tnúhu ní chídó tnùní ndíi núú tütú-gá: “Vã cãní iní-ndó sã xini ñúhu-xi cada-ndo # sã vã yõo tnãhí ndàcu cada sã cáã tũu-ndo àndíu te cúñaha-ndo xii Cristú cuuⁿ-ndo ndíhí-gá núú ñúyú-a. 7 Te ni vã cãní tucu iní-ndó sã quíhíⁿ túu-ndo núú xíndecu nchaa ñáyiú ní xihí te cada-ndo sã Crístú ndoto-gá”, duha cãchí tnúhu-án sã vã dúcãⁿ cãní iní-ó. 8 Te cãchí tucu tnúhu-án: “Tnúhu Yã Ndiõxí sã ndécú ndíhí ñaha-xi xii-ndo chi sãni iní-ndó cuëndá tnúhu-án te cãháⁿ-ndó”, duha cãchí tnúhu-án. Te tnúhu sã ndécú ndíhí-ndo-án cúú-xí tnúhu cãháⁿ-ndí núú ñáyiú, te xini ñúhu-xi sã quindáá iní-yu tnúhu-án. 9 Te núú na nũuu-ndo cãháⁿ-ndó sã Xítohó Jesucrístú cúú-gã Xítohó-ndó, te quindáá iní-ndó nì yuhu nì iní-ndó sã Yã Ndiõxí ní dándótó-gã Xítohó Jesucrístú, te naníhí tãhú-ndó te núú ducaⁿ na càda-ndo. 10 Te nchaa ñáyiú ducaⁿ sãndáá iní te cãháⁿ-yu sã Xítohó Jesucrístú cúú-gã Xítohó-yu, ñáyiú-án cúdíu-yu núú Yã Ndiõxí te naníhí tãhú-yu.

11 Te núú tütú Yã Ndiõxí cãchí-xi sã nì # ñáyiú sãndáá iní ñáhã xii Xítohó Jesucrístú vã ndíxí cuèchi iní-yu sã dúcãⁿ sãndáá iní ñáhã-yu xii-gã. 12 Te sã cúú-xí Xítohó Jesucrístú chi #n-ni cùu ñáyiú isràél ndíhí ñáyiú ñã túú cùu ñáyiú isràél, chi díu-gã cúú-gã Yaá cúnúu taxi tnuní-gã nchaa ñáyiú, te ío váha quide-gã sã cúú-xí nchã ñáyiú cãháⁿ ndíhí ñaha xii-gã. 13 Te quèe ndáá-xi nãcuáa cãháⁿ-xi núú tütú Yã Ndiõxí núú cãchí-xi: “Nchaa ñáyiú na cãháⁿ ndãhú núú Xítohó Jesucrístú sã dácãcu nihnu ñaha-gã xii-yu,

te ñáyiú-án naníhí tãhú-yu”, duha cãchí-xi núú tütú-gã. 14 Te ñáyiú-án vã nihí-yu nãcuáa cãháⁿ ndãhú-yu núú-gã te núú ñã túú sãndáá iní ñáhã-yu xii-gã, te ni vã nihí-yu nãcuáa cadá-yu quindáá iní ñáhã-yu xii-gã te núú vátã cündedóho-gã-yu tnúhu-gã, te ni vã nihí-yu tnúhu-gã te núú vã yõo quíhíⁿ cútnuhu ñaha xii-yu. 15 Te ni vã yõo quíhíⁿ ducaⁿ cútnuhu ñaha xii-yu tnúhu-gã te núú Yã Ndiõxí vã téndãha-gã ñáyiú quíhíⁿ cútnuhu ñaha xii-yu. Te núú tütú Yã Ndiõxí cãchí-xi: “Ío vii ío váha cùu iní-ó vèxi ñáyiú dãnehé ñáhã xii-o nãcuáa ndúu tnúhu sã cãháⁿ nãcuáa naníhí tãhú-ó”, duha cãháⁿ-xi núú tütú-gã.

16 Te ñã ncháã-yu cuení-yu quindáá iní-yu tnúhu-án. Te ní quee ndáá-xi nãcuáa ní xáhaⁿ ndíi Chãíá xii Yã Ndiõxí te duha ní xáhaⁿ ndíi xii-gã: “Yòhó Dútú Ndiõxí na nãcãni tnúhu-í núú-n sã ío sacú-ni ñáyiú sãndáá iní-yu tnúhu cãháⁿ-ndí”, duha ní xáhaⁿ ndíi xii-gã. 17 Te xini ñúhu-xi sã díhna-gã cundedóho-yu tnúhu-án cuëndá ducaⁿ te quindáá iní-yu, te tnúhu-án cúú-xí tnúhu Xítohó Jesucrístú.

18 Te vã cúú cãháⁿ-ó sã ñã túú ní nihí ñáyiú isràél tnúhu-gã, chi ncháã-yu ní nihí-yu tnúhu-gã, chi núú tütú Yã Ndiõxí cãchí-xi:

Cue tée ní cãháⁿ tnúhu Yã Ndiõxí ní cãháⁿ-güedé tnúhu-gã núú ñáyiú,

te tnúhu-án nì xité nuu-xi nihí ñúyú. Duha cãchí-xi núú tütú-gã. 19 Te ni vã cãháⁿ-ó sã ñáyiú isràél ñã túú ní cùu tnuní iní-yu nãcuáa ndúu tnúhu-gã chi ní tecú tnùní-yu. Te ndéé sanaha nì chídó tnùní ndíi Moisés nãcuáa ní xáhaⁿ Yã Ndiõxí xii ñáyiú isràél, te duha ní xáhaⁿ-gã xii-yu:

Yúhú cada váha-í nchaa ñáyiú ñã túú cùu ñáyiú isràél, ñáyiú ñã túú cútuní iní-xi nãcuáa cada váha cundecu núú-í,

te nchòhó cudééⁿ-ndó nũu-yu te cuu cuédú iní-ndó-yu.

Duha ní xáhaⁿ Yã Ndiõxí xii-yu te ducaⁿ nì chídó tnùní ndíi Moisés. 20 Te

ndíi Chàiaá ñá túú tnàhí ni yùhú ndíi ní quide ndíi núú Yá Ndiòxí ní cáháⁿ ndíi tnúhu-gá, te ní cachí ndíi:

Ñáyiú ñá túú nànducu ñaha xii-í ní cùu ní naníhí ñáhã-yu xii-í, te ni ñà túú ndùcu tnúhu ñàhá-yu xii-í ní cùu te ní xiní ñáhã-yu.

Duha ní cachí ndíi Chàiaá ní cáháⁿ ndíi tnúhu Yá Ndiòxí. ²¹ Te ní quide tucu ndíi núú Yá Ndiòxí ní cáháⁿ ndíi tnúhu-gá cuendá ñáyiú isràél, te ní cachí ndíi: “Nchaa-ni nduu yìhi-í càháⁿ-í ñáyiú isràél te ñá túú cuiní-yu quindáá iní-yu chi ío sàá iní-yu”, duha ní cachí ndíi Chàiaá ní cáháⁿ ndíi tnúhu Yá Ndiòxí.

11

Cuendá ñáyiú isràél ñáyiú naníhí tàhú

¹ Te cuèi ducaⁿ dico vá càháⁿ-ó sã Yá Ndiòxí dáquèe tihú-gã ñáyiú isràél chi ðiu-ni ñáyiú-áⁿ cúú cuendá-gá, chi yùhú tnàhá-í cúú-í mei tõe isràél, te ñani tnàhá-í ní cuu ndíi Àbrahám téé ní xíndecu ndéé sanaha vîhi-gã, te ðiu-ni ñani tnàhá-í ní cuu tucu ndíi Benjamín. ² Te ndéé sanaha dùcaⁿ ní cachí Yá Ndiòxí sá nchùhú ñáyiú isràél cúú-ndí ñáyiú cùu cuendá-gá, te ñá túú dàquee tihú ñáhã-gã xii-ndí, te nchòhó sa xìní-ndó nàcuáa càháⁿ-xí núú tùtú Yá Ndiòxí núú càchí-xí nàcuáa ní quide té Èliás ní ndacáⁿ cuéchi-dé núú-gã cuendá ñáyiú isràél. ³ Te duha ní xáhaⁿ-dẽ xii-gá: “Yòhó Dútú Ndiòxí, ná nàcani tnúhu-í núú-n sã ñi sahní-yu cue téé càháⁿ tnúhu-n, te ní dátanú-yu núú xihí quiti ndùu tàhú-n, te yùhú-nã ní cácu-í ndécù-í dico nànducu ñahã-yu chi tnàhá-í cuiní-yu cahni ñáhã-yu xii-í”, duha ní xáhaⁿ-dẽ xii Yá Ndiòxí. ⁴ Te Yá Ndiòxí ní xáhaⁿ-gã xii-dé: “Sa ní dáquée ðiⁿ-í úsá mîl cue téé cùu cuendá-í, te ñá túú nèhe-güedé sá yíñuhu núú Bàál sá càchí-yu cùu ndiòxí-yu te ñá ndàá sá ndiòxí cúú-xí”, duha ní xáhaⁿ-gã xii té Èliás. ⁵ Te ducaⁿ sãtnahã-xi cùu vitna chi xíndecu ñáyiú ní cáháⁿ-gá ní chìtnahã ñáhã xii-gá, te ducaⁿ ñi quide-gá chi ní cundáhú iní ñáhã-gã

xii-yu. ⁶ Te ducaⁿ ñi cáháⁿ ñáhã-gã xii-yu sá cundáhú iní ñáhã-gã, te ñá díú cuendá ðiⁿ chiuⁿ quidé-yu ducaⁿ ñi cáháⁿ ñáhã-gã xii-yu, chi núu ðicó cuendá ðiⁿ chiuⁿ quidé-yu ducaⁿ ñi cáháⁿ ñáhã-gã xii-yu ña, te ñá díú-gã sá cúú iní mée-gã ducaⁿ ñi cáháⁿ ñáhã-gã xii-yu te núu ducaⁿ.

⁷ Te na càchí tnúhu-í xii-ndo nàcuáa cùu vitna sá ñáyiú isràél cuiní-yu cudíú-yu núú Yá Ndiòxí dico ñá ndácú-yu, dico dava ñáyiú ní cáháⁿ-gã ñáyiú-áⁿ cúú-yu núú-gã, te ñáyiú ducaⁿ ñà túú cùu núú-gã-áⁿ ío ní cuu sàá iní-yu núú-gã. ⁸ Te ní quee ndáá-xi nàcuáa càháⁿ-xi núú tùtú Yá Ndiòxí núú càchí-xi: “Yá Ndiòxí ní cachí-gá sá cúú-yu ñáyiú ío ñi ðiquí-xi, chi cuèi ndèhé-yu nàcuáa càháⁿ tnúhu-gá dico ñá cùtnùní iní-yu nàcuáa càháⁿ-xi, te cuèi ndèdòho-yu dico ñá túú quèe díquí-yu, te ducaⁿ-ni quidé-yu ndéé vitna”, duha càchí-xi núú tùtú-gá. ⁹ Te ndíi Dàvií ní cachí ndíi:

Ñáyiú ío váha ndècu te cùdí iní-yu quidé-yu vico, dico yáha-yu dátaná yáha ðiⁿ quiti ngáva trampá àdi ðiⁿ quiti ñá cùtnùní iní-xi quée xití ñunu, chi cuíta nihnú-yu te nacháhu-yu nchaa sá quidè-yu.

¹⁰ Te cúú-yu ñáyiú ñá túú vèdana tècú tnùní, te cùu tucú-yu dátaná ðiⁿ ñáyiú ío ndòho nchido ðiⁿ sá vèe. Duha ní cachí ndíi Dàvií.

Ñáyiú ñá túú cùu ñáyiú isràél naníhí tàhú-yu

¹¹ Te cuèi ducaⁿ dico vá càchí-ó sã sã dúcáⁿ ñà túú ní quide ndáá ñáyiú isràél te ní xíta nihnu duúⁿ-yu, te ñáhã chi sá dúcáⁿ ñi quidé-yu te ní ngúndecu ndíhi dava-gã ñáyiú tnúhu sá càháⁿ nàcuáa naníhí tàhú-yu, te ñáyiú isràél quiní-yu nàcuáa naníhí tàhú ñáyiú ñá túú cùu ñáyiú isràél, te tnàhá-yu cudí iní-yu naníhí tàhú-yu.

¹² Te sá dúcáⁿ ñi quide sàá iní-yu ñá túú ní quide ndáá-yu núú Yá Ndiòxí, te xíáⁿ ní cuu-xi ðiⁿ sá váha sá cúú-xi ñáyiú nihí ñuyíú, dico sàá nduu te

cada ñáiyu israhél nchaa nàcuáa càháⁿ Yá Ndiöxí, te dàvá-áⁿ ño-gá váha cuu xii nchaa ñáiyu nihí ñuyíú.

13 Te nchòhó ñáiyu ñá túú cùu ñáiyu israhél càchí tnúhu-í xii-ndo sá Yá Ndiöxí ní cachí-gá sá càháⁿ-í tnúhu-gá núú-ndó, te yúhú càchí-í sá ño càhnu cuu chiuⁿ quide-í. 14 Te duha càháⁿ-í cuendá sá ñuu cudana ño dava ñáiyu cùu ndi mee-í cudí iní-yu cada váha ñaha Yá Ndiöxí xii-yu dàtná quidé váha ñaha-gá xii-ndo, te naníhí tãhú-yu. 15 Te sá cuendá sá ñi quee tíhú ñáiyu israhél ní nacáháⁿ cáhnú iní tnáhá ñáiyu nihí ñuyíú ndihí Yá Ndiöxí, dico na sàá nduu núcúndecu váha ñáiyu israhél ndihí Yá Ndiöxí, te ío-gá váha tnáhá ñáiyu nihí ñuyíú, te ñáiyu-áⁿ cada iní-ó sá cúu-yu dàtná ñáiyu ní xihí, dico dàvá-áⁿ cada tucu iní-ó sá cúu-yu dàtná ñáiyu ní ndoto chi núcúndecu váha-yu ndihí-gá. 16 Te núu sá lúhá-ní ñiⁿ tílúlú yusaⁿ càváha te ñu-ni ducaⁿ càváha nihí. Te núu càváha yóho ñiⁿ yutnu te ñu-ni ducaⁿ càváha-xi nihí-xi. Te ñu-ni ducaⁿ sãtnahá-xi cùu ñáiyu israhél, chi ñani tnáhá-yu ní xindecu ndéé sanaha ñi cúu-yu ñáiyu ní cuu cuendá ñáhá Yá Ndiöxí, te ñu-ni ducaⁿ cùu cuendá ñáhá-gá xii mèé-yu ndéé vitna.

17 Te ío ñiⁿ yutnu váha nani olívú, te dava dité yutnu-áⁿ ñi téhndé te ní nucódó dité yutnu olívú cùtexínu, te mee-ñá yutnu olívú váha-áⁿ ño váha quide-xi nchito dité yutnu olívú cùtexínu-áⁿ. Te dité nchaa yutnu olívú váha-áⁿ cúu-xí dàtná ñáiyu israhél, te nchaa dité-xi sá ñi téhndé-áⁿ cúu-xí ñu-ni ñáiyu israhél ñáiyu ñá túú tnáhá tnúhu ndihí Yá Ndiöxí. Te dité yutnu olívú cùtexínu sá ñi nucódó tnáhá-áⁿ cúu-xí dàtná ñáiyu ñá túú cùu ñáiyu israhél tnáhá tnúhu ndihí Yá Ndiöxí. 18 Te vá cáni iní-ndó sá sá dúcáⁿ ndècu váha-ndo ndihí Yá Ndiöxí te ío cùnuu-ndo dacúúxí ñáiyu israhél, te vá dúcáⁿ càni iní-ndó chi sá cuendá nchaa ñani tnáhá ñáiyu israhél ní xindecu ndéé sanaha ducaⁿ ndècu váha-ndo ndihí Yá Ndiöxí vitna, te ñá díú sá cuendá nchòhó ndécú ndihí

váha ñáiyu-áⁿ Yá Ndiöxí vitna.

19 Te cudana sàni iní-ndó te càchí-ndó sá ñáiyu israhél ní quee tíhú-yu cuendá sá nchòhó nucuíñí-ndó ñuu-yu núcúndecu váha-ndo ndihí Yá Ndiöxí. 20 Te ndáá sá ñi quee tíhú-yu chi ñá túú ní sàndáá iní ñáhá-yu xii-gá, te nchòhó ío váha cùu ndecu-ndo ndihí-gá chi ní sàndáá iní-ndó-gá, dico vá càchí-ndó sá ño càhnu cuu-ndo, te ío váha chí cuãha cuendá nàcuáa cundecu-ndo. 21 Te cue ñáiyu israhél cúu-yu ñáiyu cùu cuendá-gá ní cùu te ní dáquéé tíhú ñáhá-gá xii-yu cuendá sá ñá túú ní sàndáá iní ñáhá-yu xii-gá, te tnáhá nchòhó daquèe tíhú ñáhá-gá xii-ndo te núu na càda-ndo datná ní quide ñáiyu-áⁿ. 22 Te chí cáda cuendá sá Yá Ndiöxí ío váha iní-gá, dico cùdééⁿ-gá núu nchaa ñáiyu ñá túú sàndáá iní ñáhá xii-gá, dico sá cúu-xí nchòhó cue ñáiyu sàndáá iní ñáhá xii-gá chí ío váha iní-gá. Te ducaⁿ-ni cùnduu váha iní-gá sá cúu-xí-ndó te núu vá dáñá ndéé-ndó càda-ndo nacuáa càháⁿ-gá cuendá sá ño váha iní-gá, te núu ñáhá te tnáhá nchòhó quee tíhú-ndó dàtná ní quee tíhú ñáiyu israhél, ñáiyu ñá túú ní sàndáá iní ñáhá xii-gá. 23 Dico núu ñáiyu israhél ñáiyu ní dáquéé tíhú ñáhá Yá Ndiöxí quíndáá iní ñáhá-yu xii-gá te nduu cuendá ñáhá tucu-gá xii-yu, te ñáiyu-áⁿ cúu-yu dàtná dava dité yutnu olívú sá ñi téhndé te ní nucódó tnáhá tucu. Te ducaⁿ sãtnahá-xi cúu-yu te núu na quíndáá iní ñáhá-yu xii-gá. 24 Te nchòhó cúu-ndó dàtná nchaa dité yutnu olívú cùtexínu, chí ñá díú ñáiyu israhél cúu-ndó, te dité nchaa yutnu olívú cùtexínu-áⁿ ñi nucódó-xi núu dité yutnu olívú váha-áⁿ. Te yáchí-gá núcúndecu váha ñáiyu israhél ndihí Yá Ndiöxí, chí cúu-yu dàtná nchaa dité yutnu olívú váha sá ñi téhndé te ní nucódó tnáhá tucu. Te ducaⁿ sãtnahá-xi cúu-yu te núu na quíndáá iní ñáhá-yu xii-gá.

Sáá nduu te naníhí tãhú ñáiyu israhél

25 Te nchòhó ñáyiú ndècu ndìhi-í ichi Xítohó Jesucrístú, na càchí tnúhu-í xii-ndo ìⁿ tnúhu ndùu yuhu ni cuu, cuendá sá vǎ cání ìní-ndó sǎ ìo-gǎ váha sǎá díquí-ndó dàcúúxí ñǎyiú isràél, chi dava ñáyiú isràél cúú sǎá ìní-yu núú Yǎ Ndiòxí ñini na ndìhi ñáyiú ní cachí Yǎ Ndiòxí ngúndecu váha ndìhi ñàhá-yu xii-gǎ, ñáyiú ñǎ túú cùu ñáyiú isràél. 26 Te nduu na ndìhi ñáyiú-áⁿ ngúndecu váha-yu ndìhi Yǎ Ndiòxí, te dàvǎ-áⁿ naníhí tàhú ñáyiú isràél chi quee ndáá-xi nàcuáa càháⁿ Yǎ Ndiòxí núú tütú-gǎ núú càchí-xi:

Ndàa ñuú Sìon quixi Yaá cada naníhí tàhú nchaa ñáyiú,

te òu-ni Yaá-áⁿ cada-gǎ cuendá sǎ dáñǎ nchàa ñáyiú isràél ichi cuèhé ichi duha.

27 Te yúhú cada càhnu ìní-í nchaa cuèchi ñáyiú isràél, chi cada-í dàtnǎ ní cachí-í ndéé sanaha. Duha càchí Yǎ Ndiòxí núú tütú-gǎ.

28 Te sǎ cuendá tnúhu sǎ càháⁿ nàcuáa naníhí tàhú-ó xǎⁿ cúú ùhú ìní ñáyiú isràél Yǎ Ndiòxí, te sǎ dúcǎⁿ quidé-yu xǎⁿ nchòhó ní níhí-ndó tnúhu sǎ càháⁿ nàcuáa naníhí tàhú-ndó. Te ní cachí Yǎ Ndiòxí sǎ ñáyiú isràél cuu cuendá-gǎ, te cùu ìní ñàhá-ní-gǎ xií-yu, te ducaⁿ quide-gǎ chi ducaⁿ ñǎ xáhaⁿ-gǎ xii cue ñani tnáhǎ-yu ní xíndecu ndéé sanaha. 29 Te Yǎ Ndiòxí ñǎ túú ndùu ùhú ìní-gǎ ìⁿ sǎ táxí-gǎ, te ñǎ túú ndìxi cuèchi ìní-gǎ sǎ càháⁿ ñàhá-gǎ xii-o. 30 Te nchòhó chi ñǎ túú sàndáá ìní-ndó Yǎ Ndiòxí ní cùu, dico vitna ñini ñǎ túú sàndáá ìní ñàhá ñáyiú isràél xii-gǎ, te ní cundàhú ìní ñàhá-gǎ ní dácacu nihnu ñaha-gǎ xii-ndo nùú ùhú núú ndàhú. 31 Te vitna quidé-yu dàtnǎ ní xóo cada nchòhó cútnàhá ñǎ túú ní xóo quindáá ìní-ndó-gǎ. Dico sǎá nduu te natuha ñàhá-yu xii-gǎ te dàcacu nihnu ñaha-gǎ xií-yu sǎ cúndàhú ìní ñàhá-gǎ dàtnǎ ní quide ñaha-gǎ xii nchòhó. 32 Te Yǎ Ndiòxí ní dáñǎ-gǎ sǎ dúcǎⁿ cùnduu saá ìní nchaa ñáyiú cuendá cùní-gǎ cundàhú ìní ñàhá-gǎ xií-yu.

33 Te súúní vǎha quide ñaha Yǎ Ndiòxí xii-o, te ìo váha xíní-gǎ nchaa cuèi sǎ ìo andiu te cuèi sǎ ìo ñuyú-a, te ducaⁿ ìo váha sǎá nchaa sǎ xíní tnùní-gǎ. Te ñǎ ndácú-ó cùtnuní ìní-ó ñǎ cúú nchàa sǎ sání ìní-gǎ cada-gǎ, te ñǎ ndácú-ó cùtnuní ìní-ó nàcuáa ndùu cuendá nchaa sǎ quidé-gǎ.

34 Te núú tütú-gǎ càchí-xi: “Vǎ yóo ìⁿ cùtnuní ìní-xi nàcuáa sàni ìní Yǎ Ndiòxí, te ñǎ yóo ìⁿ ndàcu dacahu ìní ñàhá xii-gǎ nàcuáa càháⁿ-gǎ. 35 Te Yǎ Ndiòxí ñǎ túú quide yica ìní-gǎ cada-gǎ sǎ vǎha sǎ cúú-xí ñáyiú cuendá ìⁿ sǎ sǎñàhá-yu xii-gǎ chi ñǎ túú dùcaⁿ quide-gǎ”, duha càchí-xi núú tütú-gǎ. 36 Te ducaⁿ chi mee Yǎ Ndiòxí ní taxi ndecu-gǎ nchaandi túhú sǎ ìo ñuyú, te òu-ni mee-gǎ táxí tnùní-gǎ nchaa sǎ ñǎ taxi ndecu-gǎ, te nchaa cùu-xi cuendá-gǎ. Te vitna chí ná càchí-ó sǎ ìo càhnu cuu-gǎ ñǎ caa ñǎ quíhíⁿ. Te ducaⁿ na cùnduu.

12

Cada-o nàcuáa nduu vétú ìní Yǎ Ndiòxí

1 Te vitna nchòhó ñáyiú ndècu ndìhi-í ichi Xítohó Jesucrístú càchí tnúhu-í xii-ndo sǎ Yǎ Ndiòxí cúndàhú ìní ñàhá-gǎ xii-o chindee ñaha-gǎ, núú xǎⁿ càháⁿ ndàhú-í núú-ndó sǎ dáñǎ-ndó mèe-ndo núú ndàhá-gǎ, te cada ìní-ndó sǎ cúú-ndó dàtnǎ ìⁿ tàhú sǎ nchító-ó ñǎ nduu tàhú-gǎ. Te cuu-ndo ñáyiú váha ñáyiú cada nchaa nàcuáa nduu vétú ìní Yǎ Ndiòxí chi ducaⁿ tàú-ndó càda-ndo sǎ cúú-xí-gǎ.

2 Te vǎ cànchìcúⁿ nihnu-gǎ-ndó càda-ndo datnǎ xǎquide nchaa ñáyiú ndècu ichi cuèhé ichi duha ndècu ñuyú-a, te vǎ cúhúⁿ-gǎ ìní-ndó ìchi cuèhé ichi duha-áⁿ, chi mee-ñǎ sǎ vǎha cuhuⁿ ìní-ndó, te ducaⁿ te cutnùní ìní-ndó nchàa nàcuáa cùní Yǎ Ndiòxí cada-ndo, te nchaa sǎ cùní-gǎ cada-ndo cùu-xi mee-ni sǎ vǎha, sǎ ìo váha ndùu vétú ìní-gǎ, te cùu-xi nchaa sǎ xíní ñùhu-xi cada-ndo núú-gǎ.

3 Te sǎ cuendá chiuⁿ ní cundàhú ìní ñàhá Yǎ Ndiòxí ní taxi-gǎ xii-í xǎⁿ nùu na càháⁿ-í dóho-ndo vitna: Vǎ cání ìní-ndó ìⁿ sǎ ñǎ túú tàú-ndó

càni iní-ndó te cucahaⁿ-ndo sã ïo cãhnu cuu-ndo. Te nchòhó ní sãndáá iní-ndó Yã Ndiòxí nũu chindee ñaha-gá xii-ndo, te vitna chí cuãha cuendá nũu ná daha núu chi^u-gá ndacu-ndo càda-ndo. ⁴ Te nchoo tìtní xichi cùu yiqui cuñú-ó, te ndi dííⁿ ndi dííⁿ chi^u quide-xi ìⁿ ìⁿ-xi. ⁵ Te ducaⁿ sãtnahá tucu-xi cùu nchoo ñáyiu ndècu ndihi Xítohó Jesucristú chí cuèi ná daha tnàhá-ó dico ìⁿ-ni cùu-o ndihi-gá, te ducaⁿ mèe-o tucu ìⁿ-ni cùu-o.

⁶ Te mee Yã Ndiòxí ní cundàhú iní ñáhá-gã xii-o ñi taxi-gá chi^u taú-ó càda-o ìⁿ ìⁿ-o te chindee ñaha-gá xii-o, te xini ñuhu-xi cada-o nacuáa ndũu chi^u ní taxi-gá cada-o. Te núu ní nduu táhú-ó nũú-gã sá càháⁿ-ó tnũhu sá dácàhu iní ñáhá mèe-gá xii-o te càháⁿ-ó nàcuáa sãndáá iní-ó chindee ñaha-gá xii-o, ⁷ àdi ní nduu táhú-ó nũú-gã sá ïo váha chindee-o tnàha ñáyiu-o te ñiu-ni ducaⁿ càda-o, àdi ní nduu táhú-ó dانهé-ó ñáyiu tnũhu-gá te ñiu-ni ducaⁿ càda-o, ⁸ àdi ní nduu táhú-ó nũú-gã sá dácàháⁿ-ó ñáyiu canchicúⁿ nihnú-yu ichi-gá te ñiu-ni ducaⁿ càda-o, àdi ní nduu táhú-ó nũú-gã sá cuãñaha-o xii tnaha ñáyiu-o sã ñihí-ó ndècu ndihi-o te ñiu-ni ducaⁿ càda-o, dico ñi yũhu ñi iní-ó cuãñaha-o xii-yu, àdi ní nduu táhú-ó nũú-gã taxi tnũní-ó te ñiu-ni ducaⁿ càda-o, te ñi yũhu ñi iní-ó càda-o, àdi ní nduu táhú-ó nũú-gã chindee-o cuè ñáyiu ndècu ndihi tnũndòho tnũhu ndàhú te ñiu-ni ducaⁿ càda-o, te ïo cudíí ìní-ó càda-o chi^u-án.

Nchaa nàcuáa tàú-xi cada nchaa ñáyiu ndècu ichi Xítohó Jesucristú

⁹ Te cuu iní tnáhá ndisa-ndo ìⁿ ìⁿ-ndo, te dañà-ndo nchàa sá cuèhé sá dúhá te cada-ndo mèe-ni sá váha. ¹⁰ Te ïo cuu iní tnáhá-ndó, te cada-ndo cuendá sá ìⁿ-ní ñáyiu cùu-ndo, te ìⁿ ìⁿ-ndo càni-gá iní-ndó cànehe yĩñuhu núu tnáhá-ndó.

¹¹ Te nducu ndèe-ndo cada-ndo nchaa chi^u tahu Xítohó Jesucristú vá tũhío-ndo, te cada-ndo ñi yuhu ñi iní-ndó sã cúú-xi-gã.

¹² Te ïo cudíí ìní-ndó cùndecu-ndo chi ní ngũndecu ndihi-ndo tnũhu ndee

ìní sá cùndècu ndihi-ndo Xítohó Jesucristú, te cada cãhnu iní-ndó cuèi nãndi na càda ñaha ñáyiu xii-ndo sã cuendá-gá, te vá dáñá ndèe-ndó càháⁿ ndihi-ndo Yã Ndiòxí.

¹³ Te chindee tnàha-ndo te núu ïo dava nchòhó ñáyiu ndècu ichi-gá ïo ìⁿ sá cúmãní xii-ndo, te ïo váha cuu iní-ndó còto-ndo ñáyiu véxi vehe-ndo.

¹⁴ Te cácaⁿ táhú-ndó nũú Yã Ndiòxí cuendá nchaa ñáyiu nãndi quide ñaha xii-ndo, te cácaⁿ táhú-ndó nũú-gã sá ná chindee ñaha-gá xii-yu te ñá díú dà cácaⁿ táhú-ndó nũú-gã sá ná dàcuíta niñnu ñaha-gã xii-yu.

¹⁵ Te núu ïo ñáyiu cùdíí ìní-xi te cudíí ìní-ndó ndihí-yu, te núu ïo ñáyiu ndihú ìní-xi te ndihú ìní-ndó ndihí-yu.

¹⁶ Te cuu ìⁿnuu-ndo cùndecu-ndo, te vá cáda cãhnu-ndo mee-ndo, te tnahá tnũhu-ndo ndihi nchaa ñáyiu ndàhú ìní-xi, te vá cáni ìní-ndó sã ïo-gá túha-ndo.

¹⁷ Te vá nãnchòcáva-ndo nàchinaa-ndo ìⁿ sá quidé ñaha ñáyiu xii-ndo, te ïo nducu ndèe-ndo cada-ndo mee-ni sá váha nàcuáa cuu váha iní ñáyiu.

¹⁸ Te ïo nducu ndèe-ndo cada-ndo sã ndácú-ndó cùndecu váha-ndo ndihi nchaa ñáyiu. ¹⁹ Te nchòhó ñáyiu ïo cùu ìní-í, vá cáni ìní-ndó nàchinaa-ndo ìⁿ sá cáda ñaha ñáyiu xii-ndo, chí cundetú-ndo sã mée Yã Ndiòxí ná nàchinaa-gá sá quidé ñáhá-yu xii-ndo, chí quee ndáá-xi nàcuáa càháⁿ Yã Ndiòxí núu tütú-gá núu càchí-xi:

“Yúhú dandòho-í-yu chí nachinaa-í nchaa sá quidé-yu”, duha càchí-gá núu tütú-gá. ²⁰ Te xini ñuhu tucu-xi cada-ndo nacuáa càháⁿ tucu-xi ingá xichi núu tütú-gá núu càchí-xi: “Te núu ñáyiu cùu úhú ìní ñáhá xii-ndo ñá túú sã cóhó sã cáxí-yu te cuãñaha-ndo xii-yu, te núu ducaⁿ na càda-ndo te ïo cucahaⁿ núú-yu”, duha càchí-xi núu tütú-gá. ²¹ Te núu ïo ìⁿ sá quidé ñaha tnaha ñáyiu-ndo xii-ndo te vá nãnchòcáva-ndo nàchinaa-ndo sá quidé ñáhá-yu xii-ndo, chí cada-ndo sã váha sá cúú-xi-yu, te ducaⁿ te vá

cadá-ndó sã ñà túú tàú-ndó càda-ndo núú Yã Ndiõxí dàtná quidé-yu.

13

¹ Te nchaa ñáyiú tàú-yu quindáá iní-yu nchaa cue téé cùchiuⁿ, chi Yá Ndiõxí ní cachí-gá sá cundècu téé cùchiuⁿ ñuyíú-a, núu xíáⁿ xĩndecu-güedé vitna. ² Te nchaa ñáyiú ñá túú sãndáá iní ñáhá xii cue téé cùchiuⁿ ñá túú tnàhá iní Yã Ndiõxí sá dúcáⁿ quidé-yu, chi mee-gã ní cachí-gá sá cundècu-güedé. Te nchaa ñáyiú ducaⁿ ñà túú sãndáá iní ñáhá xii cue téé cùchiuⁿ nacháhu-yu sá dúcáⁿ quidé-yu. ³ Te nchaa ñáyiú quide váha ñá túú yùhú-yu cue téé cùchiuⁿ chi quide váha-yu, dico nchaa ñáyiú ñá túú quide váha chi xiyùhú-yu cue téé cùchiuⁿ. Te vitna núu nchòhó cuiní-ndó sã vá yùhú-ndó cuè téé cùchiuⁿ te chí cáda váha, te ducaⁿ te cáháⁿ váha-güedé cuendá-ndó. ⁴ Te Yá Ndiõxí ducaⁿ ñí cachí-gá cundecu-güedé cuendá cada-güedé sá ñà túú nã cuu cundecu-ndo, te núu ñá túú quide váha-ndo ndècu-ndo te quiyùhú iní-ndó núú-güedé, chi ñá túú àúⁿ nã cuu ndècu ndihí-güedé tnúhu ndee iní dandòho-güedé nchaa ñáyiú ñá túú quide váha, chi Yá Ndiõxí ducaⁿ ñí cachí-gá cundecu-güedé sá dúcáⁿ càda-güedé dandòho-güedé nchaa ñáyiú ñá túú quide váha. ⁵ Núu xíáⁿ ío xini ñuhu-xi sá quindáá iní-ndó nchaa cue téé cùchiuⁿ, te ñá díú sã yùhú-ndó dandòho ñaha-güedé xii-ndo, chi cada-ndo sã cútnuní iní-ndó sã cúú-xí ñíⁿ sá váha. ⁶ Chi díú cuendá xíáⁿ sãcáⁿ-ndó díhúⁿ núú cuè téé cùchiuⁿ, te ducaⁿ chi Yá Ndiõxí ducaⁿ ñí cachí-gá cundecu-güedé te díu-ná chiúⁿ ndeé-güedé ñúhú iní-güedé.

⁷ Te nacháhu-ndo nchaa sá tàú-ndó núú nchaa ñáyiú tàú-ndó núú-xi, te cuèi díhúⁿ tàú-ndó cuendá ñuhu-ndo núú cuè téé cùchiuⁿ àdi nágá díhúⁿ tàú-ndó núú-güedé te nacháhu-ndo núú-güedé. Te ío-gá canehe-ndo sã yíñùhu núú nchaa ñáyiú cùnuu, te cáháⁿ váha-ndo ndihí-yu. ⁸ Te vá dácuídó-ndó ndùu nacháhu-ndo sã

tàú-ndó núú tnàha ñáyiú-ndo, te cuu iní tnàhá-ndó ñíⁿ ñíⁿ-ndo. Te núu ducaⁿ quide-ndo ndecu-ndo ña, te quide-ndo nchaa nacuaá càháⁿ tnúhu sá sánú ìchi ñaha xii-o nacuaá cada-o cundecu-o. ⁹ Te duha ndùu tnúhu càháⁿ Yã Ndiõxí cuendá nchaa sá vá cúú càda-o: “Nchaa nchòhó cue téé vá càháⁿ ndihí-ndo ñáyiú díhí te núu ñá díú ñàdihí-ndó cùú-yu, te ducaⁿ-ni nchaa nchòhó cue ñáyiú díhí tucu vá càháⁿ ndihí-ndo tée te núu ñá díú yíi-ndo cuu-güedé, te vá cáhni-ndó tnàha ñáyiú-ndo, te vá dúhú-ndó sã ndécú ndihí-yu, te vá dácu-ndo cuèchi neñúú, te vá xihó-ndó sã ndécú ndihí tnaha ñáyiú-ndo”, nchaa xéhe càhí Yã Ndiõxí sá vá cúú càda-o. Te tnúhu-a quide-o ndihí nchaa dava-gá tnúhu sá sánú ìchi ñaha xii-o nacuaá cada-o cundecu-o, te núu quide-o ingá tnúhu sá càhí-xi: “Cuu iní-ndó nchaa tnaha ñáyiú-ndo dàtná cúú iní-ndó mèe-ndo”, duha càháⁿ tnúhu-áⁿ. Te nchaa dava-gá quidé-ó te núu quide-o nacuaá càháⁿ tnúhu-a. ¹⁰ Te nchaa ñáyiú cùu iní tnàha ñáyiú-xi te ñá túú quide úhú iní-yu tnàha ñáyiú-yu, te núu ducaⁿ cùu iní-yu tnàha ñáyiú-yu te quidé-yu nacuáa càháⁿ tnúhu sá sánú ìchi ñaha xii-o nacuaá cada-o cundecu-o.

¹¹ Te ducaⁿ xini ñuhu-xi cada-ndo chi sa ní cutnuni iní-ndó nacuáa ta xica nduu cuáháⁿ ñuyíú-a, te ní sáá nduu sá ío xini ñuhu-xi ndixi túu iní-ó càda-o nchaa nacuaá càháⁿ Yã Ndiõxí, chi vitna sa ní cuyatni-gá nduu nacuaca ñaha Xítohó Jesucristú xii-o dàcúxí ndèe cútnàhá ní sãndáá iní-ó tnúhu-gá. ¹² Te cada iní-ndó sã dàtná ñíⁿ niú sá sã ta cuyatni túndaá, ducaⁿ sãtnahá-xi cùu ñuyíú yíca cuèchi-a chi sa ta cuyatni nduu quixi tucu Xítohó Jesucristú, te núu xíáⁿ xini ñuhu-xi daña-o nchaa sá cuèhé sá dúhá te cada-o mèe-ni sá váha, te ducaⁿ te ni ñíⁿ sá cuèhé sá dúhá vá cùnùu-xi taxi tnuni ñáhá-xi xii-o, te ducaⁿ te vá cúú-gã-ó dàtná ñáyiú ndècu núú néé chi cuu-ná-ó dàtná ñáyiú ndècu núú ditó. ¹³ Te cada-o nchaa nacuaá tàú-xi cunduu cundecu-o dàtná tàú-xi cada ñáyiú ndècu ìchi

Xítohó Jesucristú, te vá quíhíⁿ-ó víco cuehé víco duha, te vá cúú-ó ñáiyu quíhu, te ni vǎ cǎháⁿ ndíhi-o ñáiyu dǐhí te núu ñá díú ñàdihí-ó cùú-yu, te ducaⁿ-ni cuè ñáiyu dǐhí tucu vá cǎháⁿ ndíhí-yu téte te núu ñá díú yǐ-yu cùu-güedé, te ni vǎ cùndècu-o ichi díí ìní, te ni vǎ nàá-ó ndíhi tnaha ñáiyu-o, te ni vǎ cúú-ó ñáiyu cuédú ìní. ¹⁴ Te vitna nchòhó dañá-ndo mée-ndo sá Xítohó Jesucristú ná chindee ñaha-gá xii-ndo càda váha-ndo cùndecu-ndo datná quidé mée-gá ndécú-gǎ, te vá cáni-gǎ ìní-ndó càda-ndo datná ní xóo cada-ndo cùtnàhá ní cunuu nchàa sá cuèhé sá dúhá ìní-ndó.

14

Vá cuátnùhu tnaha-o nacúaa ndècu-o ichi Xítohó Jesucristú

¹ Te núu ñáiyu ndècu ichi Xítohó Jesucristú ñá túú tècú tnùnì váha-yu nàcuáa cuínì Yǎ Ndiöxí cadá-yu, te queheⁿ cuendá-ni-ndö-yu te vá ténàá tnáhá-ndó ndíhí-yu. ² Chi íó ñáiyu sàni ìní sá cúú vǎha ìní Yǎ Ndiöxí sá cúú cǎxí-yu nání nìhí-yu, te dava ñáiyu ñá túú cùtnunì váha ìní-yu nàcuáa cǎháⁿ Yǎ Ndiöxí te mee-ni yücú xéxí-yu. ³ Te ñáiyu xèxi nchaa núú sǎ nìhí-yu te vá dáquèe tíhǔ-yu ñáiyu ñá túú xèxi, te ducaⁿ-ni ñáiyu ducaⁿ ñá túú xèxi-áⁿ vǎ cuátnùhú-yu nchaa ñáiyu ducaⁿ xèxi nchaa núú sǎ nìhí-xi-áⁿ, chi tnàhá ñáiyu ducaⁿ xèxi nchaa núú sǎ nìhí-xi-áⁿ quèhéⁿ cuendá ñáhá Yǎ Ndiöxí xii-yu. ⁴ Te ñá túú ndècu ndíhi-o tnúhu ndee ìní cuatnúhu-o ñáiyu xínu cuechi, chi mee ñáiyu cùu patródⁿ-yu tàú-yu cǎháⁿ-yu te núu cùndáá ñáiyu xínu cuechi núú-yu àdi ñá túú cùndáá-yu. Te ducaⁿ sǎtnahá-xi cùu ñáiyu xínu cuechi núú Yǎ Ndiöxí, chi mee-gǎ cǎháⁿ-gá te núu nása quidé-yu, te ñu-ni mee-gǎ cada te cundáá-yu cundécú-yu núú-gǎ.

⁵ Te na cǎchí tnúhu tucu-í xii-ndo sǎ íó ñáiyu cǎchí sá íó dava nduu ío cǎhnu cuu-xi, te íó tucu dava ñáiyu cǎchí-yu sá ñá-ni cuu-xi nchaa-ni nduu, te xíni ñuhu-xi sá cùtnunì ndáá ìní-yu

sá ndáá cúú-xi nàcuáa cǎháⁿ-yu ñá ñá-yu. ⁶ Te ñáiyu cǎnehe íí dava nduu quidé-yu sá néhè-yu sá yíñùhu núú Yǎ Ndiöxí, te ñáiyu cǎchí sá ñá-ni cùu-xi nchaa-ni nduu quidé-yu sá néhè-yu sá yíñùhu núú Yǎ Ndiöxí tnàhá-yu. Te ñu-ni ducaⁿ sǎtnahá-xi cùu nchaa ñáiyu xèxi nchaa nání nìhí-yu, chi quidé-yu sá néhè-yu sá yíñùhu núú Yǎ Ndiöxí, chi ndàcáⁿ táhǔ-yu núú-gǎ cuendá nchaa sá nìhí-yu. Te ñu-ni ducaⁿ sǎtnahá-xi cùu nchaa ñáiyu ñá túú xèxi nchaa núú sǎ nchító-ó chi quidé-yu sá néhè-yu sá yíñùhu núú Yǎ Ndiöxí, te ndàcáⁿ táhǔ-yu núú-gǎ cuendá nchaa sá nìhí-yu.

⁷ Te nchoo cuèi vitna ndècu vívú-ó àdi cuèi na cùú-ó dico ñá díú cuendá mée-ó cùú-ó. ⁸ Chi vitna ndècu vívú-ó te ndècu-o sá cúú-xi Xítohó Jesucristú àdi cuèi na cùú-ó dico cuú-ó ñu-ni sá cúú-xi-gǎ, núu xǎⁿ cuèi vitna ndècu vívú-ó àdi cuèi na cùú-ó dico ñu-ni Xítohó Jesucristú cúú cuendá ñáhá-gǎ xii-o. ⁹ Chi Xítohó Jesucristú ní xíhí-gá te ní ndoto-gá, te vitna cùu-gá Xítohó nchaa ñáiyu, cuèi ñáiyu xíndecu vívú te cuèi ñáiyu ní xíhí.

¹⁰ Te nchòhó, ñá túú ndùu váha-xi cuatnuhu tnaha-ndo nacúaa ndècu-ndo ichi Xítohó Jesucristú, te ni ñá túú ndùu váha-xi daquèe tíhú tnáhá-ndó, chi nchaa-o sǎá nduu cùndecu-o núú Xítohó Jesucristú, te mee-gǎ cǎchí-gá te núu ní quide ndáá-ó àdi ñá túú ní quide ndáá-ó.

¹¹ Te Yǎ Ndiöxí cǎchí-gá núú tütú-gá: Yúhú Yǎ Ndiöxí ndécú-í cǎchí tnúhu ndáá-í xii-ndo sǎ nchàa ñáiyu ngüíñí xítí-yu núú-í, te nchaa-yu cǎháⁿ-yu sá yúhú cùú-í Ndiöxí.

Duha cǎchí Yǎ Ndiöxí núú tütú-gá.

¹² Núu xǎⁿ nchaa-o ndí dííⁿ nàcani tnúhu-o núú Yǎ Ndiöxí nchaa sá ní quide-o.

Vá dácuíta nihnu tnàha-o

¹³ Núu xǎⁿ vá cuátnùhu tnaha-gá-ndó, te cada yica-ndo càda-ndo mee-ni sá vǎha, te vá cadá-ndó ñá sá ñá túú tàú-ndó càda-ndo cuendá sá vǎ cuíta nihnu dava ñáiyu ndècu ndíhi-ndo

ichi Xítohó Jesucristú. ¹⁴ Te yúhú ndécú ndìhí-í Xítohó Jesucristú te cùtnuní ndáá iní-í sá ncháá nùú sá cúú càxi-o cuu-ni caxi-o te vâ cúú cuèchi. Te ñáiyu sàni iní sá vâ cúú càxí-yu te núu na càxí-yu te cuu cuèchi xii-yu. ¹⁵ Te nchòhó, te núu cuèndá sá xéxí-ndó ncháa núú sá cúú càxi-ndo, cuèndá xiáⁿ ñá túú-gá cúú vâha iní nchaa ñáiyu ndècu ndìhí-ndo ichi Xítohó Jesucristú, te ñá túú-gá quidé-ndó sá cúú ìní ndisa-ndó-yu te núu ducaⁿ na càda-ndo, te núu ìⁿ sá sání ìní-ndó càxi-ndo te cùtnuní iní-ndó sá xiáⁿ cada-xi cuíta nihnu ñáiyu ndècu ndìhí-ndo ichi Xítohó Jesucristú te vâ cáxí-ndó xiáⁿ te núu ducaⁿ, chi Xítohó Jesucristú ní xihí-gá cuèndá-yu. ¹⁶ Te núu ìⁿ sá quidé-ndó sàni iní-ndó sá cúú-xí ìⁿ sá vâha, te ñáiyu càchí-yu sá ñà túú vâha te vâ cádá-ndó cuèndá sá vâ càháⁿ cuèhé-yu cuèndá-ndó. ¹⁷ Te sá yíndàha ñaha Yá Ndiöxí xii-o xiáⁿ ío xini ñuhu-xi cada ndáá-ó cùndecu-o, te cundecu váha ndìhí tnàha-o, te cudí^í iní-ó cùndecu-o chi Espiritú-gá ndécú ndìhí ñaha-xi xii-o, te nchaa xéhé ío-gá cùnùu dacúúxí sá cóhó sá cáxí-ó. ¹⁸ Te nchaa ñáiyu ducaⁿ quide nchaa sá ío-gá xini ñuhu-xi, xinu cuechí-yu núú Xítohó Jesucristú, te sá dúcáⁿ quidé-yu te ndùu vétú iní Yá Ndiöxí, te cùdíú-yu núú ñáiyu.

¹⁹ Te nchoo chí ná ndùcu-o nacuaá cada-o cùndecu ndìhí váha tnàha-o, te nducu tùcu-o nacuaá cada-o chindee tnúhu tnàha-o nacuaá cuíta cundáá-gá-ó núú Xítohó Jesucristú quíhíⁿ. ²⁰ Te ñá díú sá cuèndá ìⁿ núú sá xéxí-ó, te dàquee tíhú-ó sá vâha ní quide ñaha Yá Ndiöxí xii tnàha ñáiyu-o. Te na càchí tnúhu ndáá-í xii-ndo sá ncháá-ní nùú sá cúú càxi-o, te dicó-ni sá ñà túú ndùu váha-xi núú sá cuèndá-ni sá cáxí-ó ìⁿ núú sá cúú càxi-o cuíta nihnu ìⁿ tnàha ñáiyu-o. ²¹ Te váha-gá sá vâ cáxí-ó cùnùú te vâ cóhó ndídí, te ni ñà túú nágá cada-o te núu xito-o sá xiáⁿ cada te ngüíta tnàha ñáiyu-o càdá-yu sá ñà túú vâha, àdi xito-o sá xiáⁿ cada te ngüíta-yu cani ìⁿ cani úú iní-yu cundecu-yu ichi

Xítohó Jesucristú, te vâ cùndáá-gá-yu núú-gá te núu ducaⁿ na càda-o. ²² Te núu ìⁿ sá vâha sàni iní-ó càda-o, te vâ dátúu-o núú ñáiyu chi mee-ni núú Yá Ndiöxí datúu-o. Te nchoo cùu-o ñáiyu ío váha táhú-xi te núu cùtnuní ndáá iní-ó sá quidé ndáá-ó núu nándi cùu sá quidé-ó, te cùtnuní iní-ó sá ñà díú ìⁿ cuèchi cùu-xi sá quidé-ó. ²³ Te núu nchoo sàni iní-ó sá quidé vâha-o àdi ñá túú quide váha-o òré xéxí-ó ìⁿ núú sá xéxí-ó, te cuu cuèchi xii-o te núu ducaⁿ na càda-o. Te ducaⁿ cùu cuèchi xii-o chi ñá túú ìⁿ-ni sá sání iní-ó, chi nchaa núú sá quidé-ó sàni ìⁿ sàni úú iní-ó núu váha-ni àdi ñá túú vâha-ni, te cuu cuèchi xii-o sá dúcáⁿ quide-o.

15

Cada-o sá vâha sá cúú-xí tnàha ñáiyu-o

¹ Te nchoo ñáiyu ío váha sàndáá iní ñáhá xii Xítohó Jesucristú, xini ñuhu-xi cuáñaha-o tnúhu ndee iní xii ñáiyu ñá túú nihí ndéé cùndecu ichi-gá, te vâ cádá-ó mèe-ni sá cúú-xí mèe-o. ² Te cada-o sá vâha nàcuáa cuu váha iní tnàha ñáiyu-o cuèndá cuu-xi sá vâha sá cúú-xí-yu, te ducaⁿ cuíta nihí ndéé-gá-yu quindáá iní-yu Xítohó Jesucristú. ³ Te Xítohó Jesucristú ñá túú ní quide-gá mee-ni sá cúú vâha iní méé-gá, te ní quee ndáá-xi nàcuáa càháⁿ-xi núú tütú Yá Ndiöxí nàcuáa ní xáhaⁿ Xítohó Jesucristú xii-gá, te càchí-xi: “Nchaa ñáiyu cùu úhú iní ñáhá xii-n ní xicuèhé ní xiduha ñáhá-yu xii-í”, duha càháⁿ-xi núú tütú Yá Ndiöxí nàcuáa ní xáhaⁿ Xítohó Jesucristú xii-gá. ⁴ Te ndéé sanaha ñí ngúndeé nchaa tnúhu Yá Ndiöxí núú tütú-gá, te ducaⁿ ñí ngúndeé cuèndá dacuàha-o, te tnúhu-áⁿ dánèhé ñáhá-xí cùndecu cahnu iní-ó cuèi nándi nà yáha-o cùndecu-o ichi-gá, te sá xii tnúhu-áⁿ te vâ ndìhú-gá iní-ó cùndecu-o, te díu-ni sá xii tnúhu-áⁿ cundecu ndìhí-o tnúhu ndee iní. ⁵ Te Yá Ndiöxí quidé-gá ndécú ndìhí-o tnúhu cahnu iní, te díu-ni-gá quidé-gá ñá túú ndìhú iní-ó ndècu-o. Te xicáⁿ táhú-í núú-gá sá díú-gá ná

cádá te cuu ñⁿnuu-ndo cùndecu-ndo datná ní quide mee Xítohó Jesucristú cútnàhá ní xíndecu-gá ñuyíú-a. ⁶ Te ducaⁿ nchàa-ndo cuu ñⁿnuu-ndo, te daníhí tnáhá-ndó yóco táchí-ndó te cachí-ndó sã ïo càhnu cuu Yá Ndiöxí Yaá cúú Tátá Xítohó Jesucristú.

Ñáyiú ñá túú cùu ñáyiú isràél ní níhí-yu tnúhu Xítohó Jesucristú

⁷ Te núu xíãⁿ chí quehéⁿ cuèndá tnáhá dàtná ní quide Xítohó Jesucristú ní queheⁿ cuèndá ñáhá-gã xii-o, te núu ducaⁿ na càda-ndo te ío cuu càhnu Yá Ndiöxí. ⁸ Te na càchí tnúhu-í xii-ndo sã Xítohó Jesucristú ní quixi-gá ní quide-gá sã vâha sã cúú-xí ñáyiú isràél, te sã dúcãⁿ ñí quide-gá xíãⁿ cútnúni ndáá iní-ó sã Yá Ndiöxí quidé-gã ñⁿ sã càháⁿ-gã, chí Xítohó Jesucristú ní quide-gá nchaa nàcuáa ní xáhaⁿ Yá Ndiöxí xii cue ñaní tnáhá-ó ñí xíndecu ndéé sanaha. ⁹ Te ducaⁿ ñí quide Xítohó Jesucristú sã vâha sã cúú-xí ñáyiú isràél cuèndá nchaa ñáyiú ñá túú cùu ñáyiú isràél cachí-yu sã ïo càhnu cuu Yá Ndiöxí, te ducaⁿ quèsahá-yu chí ío cùndahú iní ñáhá-gã chíndèe ñaha-gã xii-yu, te quee ndáá-xi nàcuáa càháⁿ-xi núu tütú Yá Ndiöxí núu càchí-xi:

Yúhú cachí-í sã ïo càhnu cuu-n núu nchaa ñáyiú ñá túú cùu ñáyiú isràél,

te cata-í ndudú chiñuhu ñaha-í xii-n. Duha càchí-xi núu tütú-gã ¹⁰ Te càchí tucu-xi núu tütú-gã:

Te nchòhó ñáyiú ñá túú cùu ñáyiú isràél ío chí cúdí iní ndíhi ñáyiú isràél ñáyiú ndècu ndíhi-í.

Duha càchí-xi núu tütú-gã. ¹¹ Te càchí tucu-xi ñgá xichi núu tütú-gã:

Nchaa nchòhó ñáyiú ñá túú cùu ñáyiú isràél chí càháⁿ sã ïo càhnu cuu Yá Ndiöxí,

te nchaa ñáyiú na càháⁿ-yu sã ïo càhnu cuu-gã.

Duha càchí-xi núu tütú-gã. ¹² Te ndí Chàjá càchí tucu ndí núu tütú Yá Ndiöxí:

Coo ñⁿ ñaní tnáhá ndí Isái téé ní xíndecu ndéé sanaha,

te téé-áⁿ taxi tnúni-dé cue ñáyiú ñá túú cùu ñáyiú isràél,

te ñáyiú-áⁿ cundee cùu cahnu iní ñáhá-yu xii-dé.

Duha ní càháⁿ ndí Chàjá càchí-xi núu tütú-gã.

¹³ Te xicãⁿ táhù-í núu Yá Ndiöxí Yaá ní taxi tnúhu ndee iní ndécú ndíhi-o sã mée-gã ná càda ío cudí iní-ndó cùndecu-ndo, te ducaⁿ ïo vâha cundecu iní-ndó núu-gã chí sàndáá iní-ndó-gã, te ducaⁿ Espiritú-gã ná càda te uuⁿ-gã uuⁿ-gã cuita ngúndecu ndíhi-ndo tnúhu ndee iní quíhíⁿ sã cádá vâha ñaha-gã xii-ndo.

¹⁴ Te nchòhó ñáyiú ndècu ndíhi-í ichi Xítohó Jesucristú cùtnúni ndáá iní-í sã nchòhó ío vâha iní-ndó, te ducaⁿ ïo vâha cùtnúni iní-ndó nchaa tnúhu vâha, te ducaⁿ ïo dàsahú tnáhá-ndó nàcuáa cundecu-ndo. ¹⁵ Te dava tnúhu ní chídó tnúni-í núu tütú-a cùu-xi tnúhu sã ïo càháⁿ-í dóho-ndo, te ducaⁿ ñí tee-í cuèndá sã nchòhó dandacu iní-ndó tnúhu-áⁿ, te ní tee-í chí Yá Ndiöxí ní cundahú iní ñáhá-gã xii-í ní taxi-gã chiúⁿ quide-í

¹⁶ xínú cuèchi-í núu Xítohó Jesucristú càháⁿ-í tnúhu-gã núu ñáyiú ñá túú cùu ñáyiú isràél. Te tnúhu-áⁿ cúú-xí tnúhu sã sánú ichi ñaha xii-o nacuáa naníhí tãhú-ó, te ducaⁿ dānehé-í ñáyiú ñá túú cùu ñáyiú isràél tnúhu Yá Ndiöxí cuèndá cuú-yu dàtná ñⁿ sã ndúú tãhú-gã, te Espiritú-gã quidé-xí cùu-yu ñáyiú cùdiu núu-gã, te cùu vâha iní ñáhá-gã xii-yu.

¹⁷ Te ío vâha cùu iní-í cuèndá nchaa chiúⁿ quide-í sã cúú-xí Yá Ndiöxí, chí Xítohó Jesucristú ndécú ndíhi ñaha-gã xii-í. ¹⁸ Te mee-ni nàcuáa quide Xítohó Jesucristú chíndèe ñaha-gã xii-í xíãⁿ-ni càháⁿ-í, te sã dúcãⁿ quide-gã xíãⁿ ní sàndáá iní cue ñáyiú ñá túú cùu ñáyiú isràél tnúhu-gã. Te ducaⁿ chí ní chindee ñaha-gã xii-í ní càháⁿ-í tnúhu-gã te ducaⁿ-ni ñí chindee ñaha-gã xii-í ní quide-í titní núu sã ñí quide-í núu-yu ní xiní-yu. ¹⁹ Te Espiritú Yá Ndiöxí ní quide-xi ní quide-í titní núu sã vã yó tnàhí ndacu cada ní xiní-yu te ío ní cuñúhu-yu. Te nchaa ñúú ní sáhãⁿ-í ní càháⁿ-í tnúhu Xítohó Jesucristú núu ñáyiú cuèi ndéé ñúú Jerusalén, te cuèi ndéé

distritú Ilíricú, núu nchaa ñuú-áⁿ nĩ sáháⁿ-í ní cáháⁿ-í núu-yu tnúhu sá cáháⁿ nàcuáa naníhí tǎhú-ó. ²⁰ Te ducaⁿ ïo ndücu ndee-í cáháⁿ-í tnúhu sá cáháⁿ nàcuáa naníhí tǎhú-ó núu vátá nihí-gá-yu tnúhu cuendá Xítohó Jesucristú, te ducaⁿ quide-í chi ñá túu cuiní-í quíhíⁿ-í cáháⁿ-í tnúhu-gá núu sá xíndecu ñáyiú cáháⁿ tnúhu-gá. ²¹ Te quide-í nàcuáa cáháⁿ-xi núu tütú Yá Ndiöxí núu cǎchí-xi:

Ñáyiú vátá nihí-gá tnúhu cuendá Yaa quixi ñuyú te nihí-yu,
te ducaⁿ təcú tnùnı-yu tnúhu-gá.
Duha cǎchí-xi núu tütú-gá.

Té Pǎblú cuinı-dé quíhı-dé ñuú Rómá

²² Te sá dúcáⁿ cáháⁿ-í tnúhu-gá núu xǎáⁿ ñá túu ní ndàcu-í quixi-í quixi coto ñaha-ı xii-ndo cuıi ducaⁿ-ni sàni inı-ı quixi coto ñaha-ı. ²³ Te ní cuu titnı cuıá ducaⁿ-ni sàni inı-ı quixi coto ñaha-ı xii-ndo, te vitna ní ndihı-ı nchaa iha ní cáháⁿ-ı tnúhu Xítohó Jesucristú núu nchaa ñáyiú. ²⁴ Núu xǎáⁿ sánı inı-ı sá ndüu na quíhıⁿ-ı nacióⁿ Èspaña te yáha cáháⁿ-ı quinı-ı nása ndècu-ndo, te dàvá-áⁿ ïo cudıı inı-ó cùndecu tnaa-o, te ducaⁿ te òré nucúhuⁿ tucu-ı ichi te cada ndee inı-ndó chındee ñaha-ndo xii-ı. ²⁵ Te vitna quíhıⁿ-ı ñuú Jerusálén quınehe-ı sá ndúú tǎhú ñáyiú ndècu ichi Xítohó Jesucristú xındecu yácáⁿ. ²⁶ Te ñáyiú xındecu ichi Xítohó Jesucristú ndécú distritú Macèdonıá, ndihı distritú Acáyá ní cuu ñnùu-yu ní sacáⁿ tnáhǎ-yu sá ndúú tǎhú ñáyiú ndàhú xındecu ichi-gá ndécú ñuú Jerusálén. ²⁷ Te ducaⁿ tnàhı ní cudıı inı-yu cadá-yu, te ducaⁿ tnàhı tàú-yu cadá-yu chındèé-yu ñáyiú xındecu ñuú Jerusálén. Te ñáyiú Macèdonıá ndihı ñáyiú Acáyá-áⁿ ñà túu cùu-yu ñáyiú isràél. Te ñáyiú xındecu ñuú Jerusálén cùu-yu mee-ni ñáyiú isràél, te ducaⁿ tàú-yu cadá-yu chi sá cuendá ñáyiú isràél-áⁿ nĩ nihı-yu tnúhu sá cáháⁿ nàcuáa naníhı tǎhú-yu, núu xǎáⁿ tàú-yu chındee ñàhá-yu ndihı nchaa sá nihı-yu. ²⁸ Te sátá ná

yáha quınguáha cuendá-ı-yu sá ndúú tǎhú-yu, te ducaⁿ te dàtnunı quee-ı quíhıⁿ-ı nacióⁿ Èspaña, te ichi yáha-ı yáha cáháⁿ-ı núu ndécú-ndó. ²⁹ Te cùtnunı ndáá inı-ı sá òré ná quèxio-ı núu ndécú-ndó, te Xítohó Jesucristú ïo chındee ñàha-gá xii-ı cáháⁿ-ı tnúhu-gá núu-ndó nàcuáa ïo váha cundecu-ndo ichi-gá.

³⁰ Te nchòhó ñáyiú ndècu ndihı-ı ichi Xítohó Jesucristú cáháⁿ ndàhú-ı núu-ndó sǎ ïo chındee ñàha-ndo xii-ı cáháⁿ ndihı-o Yá Ndiöxı cuendá-ı, te ducaⁿ càda-ndo chi ndècu ndihı-ndo Xítohó Jesucristú. Te Espıritú Yá Ndiöxı quıdè-xı cùu inı tnáhá-ó ñn ñn-o. ³¹ Te ïo chí cǎcáⁿ tǎhú núu Yá Ndiöxı sá ná còto ñaha-gá xii-ı, te ñá túu nǎ cada ñaha nchaa ñáyiú ñá túu sàndáá inı ñàhá xı-gá xındecu distritú Júdeá. Te cǎcáⁿ tǎhú tucu-ndo núu-gǎ sá ncháá sǎ cǎnehe-ı quíhıⁿ nduu tǎhú ñáyiú ndècu ichi-gá ndécú ñuú Jerusálén ïo váha cuu inı-yu queheⁿ cuendá-yu. ³² Te ducaⁿ càda-ndo cuendá sá núu Yá Ndiöxı ná cǎchı-gá te ïo cudıı inı-ı òré quexıo-ı núu ndécú-ndó, te ïo váha cuu inı-ı cundecu ndihı ñaha tnàı xii-ndo. ³³ Te vitna xıcáⁿ tǎhú-ı núu Yá Ndiöxı Yaa quıdè ïo váha cùu inı-ó ndècu-o sá ná chındee chıtúu ñaha-gǎ xii-ndo nchaa-ndo. Te ducaⁿ na cùnduu.

16

Té Pǎblú quıdè ndèe inı-dé ñáyiú ndècu ñuú Rómá

¹ Te yúhú tendaha-ı tá Fèbé quixi-xi núu ndécú-ndó, te tnàhá-xi ndècu-xi ichi Xítohó Jesucristú, te quide-xi chiuⁿ Yá Ndiöxı sá cúu-xı ñáyiú ndècu ichi Xítohó Jesucristú xındecu ñuú Cèncreá. ² Te cuinı-ı sá ïo váha cuu inı-ndó quèheⁿ cuendá-ndó-xı, chi ndècu ndihı-xi Xítohó Jesucristú, te cada-ndo nàcuáa tàú-xi cunduu dàtná tàú-xi cada ñáyiú ndècu ichi-gá, te ïo chındee-ndo-xi te núu ná cúu sǎ xını ñuhu-xi, chi tnàhá-xi ïo chındee-xi cue ñáyiú ndècu ichi Xítohó Jesucristú, te tnàhá yúhú ducaⁿ ïo chındee-xi.

³ Te cúñaha-ndo ïo na càda ndee inı té Àquilú ndihı ñàdihı-dé tá Prıscılá,

chi ñáyiú-áⁿ ñi quide chiúⁿ-í ndihí-yu ní quide-ndí chiúⁿ Xítoho Jesucristú. ⁴ Chi mée-yu ní cácu cuú-yu sá cuendá sá ñi dácácu ñàhá-yu xii-í sá ñi yáha-í, núu xíáⁿ ío ndàcáⁿ táhù-í núú-yu, te ñá díú-ní yúhú ducaⁿ ío ndàcáⁿ táhù-í núú-yu chi tnàhá nchaa ñáyiú ñá túú cùu ñáyiú isràél xíndecu ichi-gá xíndecu nchaa xichi ducaⁿ ío ndàcáⁿ táhù-yu núú tē Aquilú ndihí núú ñadihí-dé tá Priscilá. ⁵ Te cúñaha tucu-ndo sá ío na càda ndee iní nchaa ñáyiú xíndecu ichi Xítoho Jesucristú tàcá vehe té Àquilú ndihí tá Priscilá dácuahá-yu tnúhu-gá, te cúñaha tucu-ndo sá ío na càda ndee iní té Epènetú chi tnàhá-dé ío ñúhu iní-í-dé, chi té-áⁿ cúú-dé tée díhna nuu ñi sándáá iní tnúhu Xítoho Jesucristú distritú Acáyá. ⁶ Te cúñaha tucu-ndo sá ío na càda ndee iní tá Màriá xichí ndécú ndihí-ndo, xichí ío ndùcu ndee xinu cuechi núú Xítoho Jesucristú. ⁷ Te cúñaha tucu-ndo sá ío na càda ndee iní cue tée cùu ndi mee-í té Andrónicú ndihí té Júnias, chi tnàhá-güedé ní xihí ndihí ñaha-güedé xii-í vecaá, te ío cùdiu-güedé núú nchaa cue tée ní táuchíúⁿ Jèsús cáháⁿ tnúhu-gá. Te díhna-gá-güedé ní sándáá iní-güedé tnúhu Xítoho Jesucristú dácúxí yúhú. ⁸ Te cúñaha-ndo sá ná càda ndee iní té Ampliás chi tnàhá-dé ío ñúhu iní-í-dé, te ndècu-dé tnàhá-dé ichi Xítoho Jesucristú. ⁹ Te cúñaha tucu-ndo xii té Bãnú tée cùndihí ñaha xii-o quide-o chiuⁿ Xítoho Jesucristú sá ná càda ndee iní-dé, te cúñaha tucu-ndo xii té Èstaquis sá ná càda ndee iní-dé chi tnàhá-dé ío ñúhu iní-í-dé. ¹⁰ Te cúñaha tucu-ndo xii té Àpelés sá ío na càda ndee iní-dé, chi té-áⁿ ío váha cùndáá-dé núú Xítoho Jesucristú, te cúñaha tucu-ndo xii ñáyiú xíndecu vehe té Aristóbulú sá ío na càda ndee iní-yu. ¹¹ Te cúñaha-ndo xii té Herodión tée cùu ndi mee-í sá ío na càda ndee iní-dé, te cúñaha-ndo xii ñáyiú ndècu ichi Xítoho Jesucristú xíndecu vehe té Nàrcisú sá ío na càda ndee iní-yu. ¹² Te cúñaha-ndo xii tnàhá tá Trifená ndihí tá Trifosá sá ío na càda ndee iní-yu,

chi tnàhá-yu quidé-yu chiúⁿ Xítoho Jesucristú. Te tnàhá tá Përsidá xichí ndécú ndihí-o ichi Xítoho Jesucristú cúñaha-ndo xii-xi sá ío na càda ndee iní-xi, chi tnàhá-xi ío ndùcu ndee-xi quide-xi chiuⁿ Xítoho Jesucristú. ¹³ Te cúñaha-ndo tnàhá té Rűfú tée ío váha sándáá iní tnúhu Xítoho Jesucristú sá ío na càda ndee iní-dé ndihí náná-dé, chi ñaha-áⁿ quidé iní-í sá cúú-áⁿ datná náná-í. ¹⁴ Te cúñaha-ndo sá ío na càda ndee iní té Asíncritú, ndihí té Flègonté, ndihí té Hèrmás, ndihí té Pàtrobás, ndihí té Hèrmés, ndihí nchaa dava-gá cue ñáyiú ndècu ndihí-o ichi Xítoho Jesucristú xíndecu ndihí-güedé. ¹⁵ Te cúñaha tucu-ndo sá ío na càda ndee iní té Filológó, ndihí tá Juliá, ndihí té Nèreú, ndihí cúha té Nèreú, ndihí tá Òлимпás, ndihí nchaa dava-gá ñáyiú sándáá iní tnúhu Xítoho Jesucristú xíndecu ndihí-yu.

¹⁶ Te ío yíñúhu cada ndee iní tnàhá-ndó ñⁿ ñⁿ-ndo. Te nchaa ñáyiú tàcá nchaa iha dácuaaha tnúhu Xítoho Jesucristú quidé ndèe iní ñàhá-yu xii-ndo.

¹⁷ Te nchòhó ñáyiú ndècu ndihí-í ichi Xítoho Jesucristú càháⁿ-í dóho-ndo sá cáda cuendá-ndó núu ío ñáyiú quide nacuaá vá cúú ñⁿnuu-ndo cundecu-ndo, chi ñáyiú-áⁿ sánú ichi ñàhá-yu ñⁿ ichi ñá túú vaha, chi ñá túú ñⁿ-ni cuu-xi tnúhu càháⁿ-yu ndihí tnúhu sá ñi níhí-ndó ndècu ndihí-ndo, te ñáyiú ducaⁿ xíquide vá ñihí tnàhá-gã-ndó ndihí-yu. ¹⁸ Chi ñáyiú-áⁿ ñà túú quidé-yu chiúⁿ sá cúú-xí Xítoho Jesucristú, chi mee-ni sá cúú-xí mée-yu quidé-yu, te mee-ni nchaa tnúhu sá ío víi ío váha cuáháⁿ càháⁿ-yu òré cuáháⁿ-yu dándahú-yu nchaa ñáyiú ío yáchí sándáá iní-xi ñⁿ tnúhu. ¹⁹ Te nchaa ñáyiú ñihí-yu tnúhu sá nchòhó sándáá iní-ndó tnúhu Xítoho Jesucristú, núu xíáⁿ ío cùdíí iní-í. Te cùní-í sá nchòhó ío váha cutnùní iní-ndó nàcuáa cada-ndo mée-ni sá vaha, te vá cání iní-ndó càda-ndo datná xíquide nchaa ñáyiú ndècu ichi cuehé ichi duha. ²⁰ Te Yá Ndióxi Yáá quidé ío váha cùu iní-ó ndècu-o ío ndihí cada-gá cuendá sá

sàcuíhná ñà túú-gă ná cada ñaha-xi xii-ndo, te xicáⁿ táhù-í núú Xítóhó Jesucristú sá ïo na chindee chitúu ñaha-gă xii-ndo.

²¹ Te té Timùteú tée quide ndihi-í chi^u Xítóhó Jesucristú iha quide ndee iní ñáhá-dě xii-ndo, te tnàhá té Lùciú, ndihi té Jàsón, ndihi té Sosipàtér cue tée cùu ndi mee-í quidé ndèe iní ñáhá-güedě xii-ndo.

²² Te tnàhá yúhú té Tèrciú tée càdúha tutú-a cuèndá té Păblú quidé ndèe iní ñáhà-í xii-ndo, chi ïⁿ-ni cùu-o ndihi Xítóhó Jesucristú.

²³ Te tnàhá té Găyú tée dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiu dàcuahá-yu tnúhu Xítóhó Jesucristú. Te tnàhá té Èrastú tée yìndaha díhúⁿ ñùú quidé ndèe iní ñáhá-dě xii-ndo, te tnàhá té Cuărtú tée ndècu ndihi-o ichi Xítóhó Jesucristú quidé ndèe iní ñáhá-dě xii-ndo.

²⁴ Te xicáⁿ táhù-í núú Xítóhó Jesucristú sá ïo na chindee chitúu ñaha-gă xii-ndo nchàa-ndo. Te ducaⁿ na cùnduu.

Cáháⁿ-ó sǎ ïo càhnu cuu Yá Ndiöxí

²⁵ Te vitna chí ná cǎchí-ó sǎ ïo càhnu cuu Yá Ndiöxí, chí mee-gǎ cada te ío-gǎ cuita níhí ndéé-gǎ-ndó cùndecu-ndo ichi Xítóhó Jesucristú dàtná cǎchí tnúhu sǎ cǎháⁿ nàcuáa naníhí tǎhú-ó, tnúhu sǎ dánèhé-í ñáyiu cuèndá Xítóhó Jesucristú, te nchaa tnúhu-a ïⁿ-ni cùu-xi ndihi nchaa tnúhu sǎ nǐ cǎchí Yǎ Ndiöxí cuu yuhu ndéé cùtnàhá ní ngáva ñuyíú, te vitna ní quee túu-xi, ²⁶ chí mee Yǎ Ndiöxí ní dátúu-gǎ núú-ó vitna, te cǎháⁿ-ndí nàcuáa ní chídó tnùní cue tée ní xóo cǎháⁿ tnúhu Yá Ndiöxí ndéé sanaha. Te ducaⁿ tnúhu sǎ ndúú yúhu ní cuu ta xíté nuu-xi níhí ñuyíú cuǎháⁿ, chí ducaⁿ nǐ cǎchí Yǎ Ndiöxí Yaá ndécú nchàa nduu nchaa quíú cunduu cuèndá sǎ quìndáá iní ñáhá ñáyiu xii-gǎ, te tní^í-yu nchaa tnúhu cǎháⁿ-gǎ.

²⁷ ¡Te ïⁿ-di-ni Yá Ndiöxí cúu-gǎ Yaá ío sǎá sǎ xìní tnùní-xi! ¡Te nchaa-o chí ná cǎchí-ó sǎ ïo càhnu cuu-gǎ,

chi ndècu ndihi-o Xítóhó Jesucristú, te ducaⁿ-ni càda-o ní caa ní quíhíⁿ! Te ducaⁿ na cùnduu. Te ío chí cǎdá ndèe iní-nǎ vitna.

TUTÚ DÍHNA NUU NĪ CADÚHA TÉ PĀBLŪ QUIHĪⁿ NDAHA ÑÁYIU ÑUÚ CÒRINTÚ

Té Pāblū cādūha-dé tutú quihĪⁿ ndaha ñáyiu xñdecu ichi Xítoho Jesucristú ndécú ñuú Còrintú

¹ Yúhú té Pāblū ní cáháⁿ ñáhá Yá Ndiöxí xii-í cuendá sá cáháⁿ-í tnúhu Xítoho Jesucristú núú ñáyiu, chi ducaⁿ nĪ cachí Yá Ndiöxí cunduu. Te cādūha-í tutú-a ndihĪ té Sōstenés té ndècu ndihĪ-o ichi Xítoho Jesucristú ² cuendá daquixi-í ndaha nchòhó ñáyiu xñdecu ichi Yá Ndiöxí ndécú ñuú Còrintú, chi nchòhó cúu-ndó ñáyiu cùu cuendá Yá Ndiöxí cuendá sá ndécú ndihĪ-ndo Xítoho Jesucristú. Te diu-ni-ndo cùu-ndo ñáyiu ní cáháⁿ ñáhá Yá Ndiöxí cuendá cundecu yññūhu-ndo núu-gă, ndihĪ nchaa dava-gă ñáyiu ndècu nchaa xichi, ñáyiu cāchí sá ĩo cāhnu cuu Xítoho Jesucristú. Te Yaá-áⁿ cúu-gă Xítoho-yu, te diu-ni-gă cúu-gă Xítoho nchoo tūcu. ³ Te xicáⁿ táhū-í núu Tātá-ó Dütú Ndiöxí ndihĪ núu Xítoho Jesucristú sá ndĪ nduú-gă ĩo na chñndee chitúu ñaha-gă xii-ndo, te ĩo váha cuu iní-ndó cñndecu-ndo.

Yá Ndiöxí ĩo chñndee ñaha-gă xii-o cuendá sá ndécú-ó ndihĪ Xítoho Jesucristú

⁴ Te ducaⁿ-ni ĩo ndacáⁿ táhū-í núu Yá Ndiöxí cuendá-ndó, chi mee-gă ĩo chñndee chitúu ñaha-gă xii-ndo sá cuendá Xítoho Jesucristú. ⁵ Te cuendá sá ndécú-ndó ndihĪ Xítoho Jesucristú, núu xiăⁿ Yá Ndiöxí ĩo chñndee ñaha-gă xii-ndo sáá díquí-ndó nācuāa cáháⁿ-ndó, ndihĪ nācuāa cñtnuní iní-ndó, ⁶ chi tnúhu sá ni nĪhĪ-ndó cuendá Xítoho Jesucristú ní quée-xi iní-ndó. ⁷ Te xiăⁿ nūu nchaa sá váha ñá túu tnāhĪ cñmánĪ xii-ndo chi Yá Ndiöxí ĩo chñndee ñaha-gă. Te ducaⁿ quide-gă nĪni nchòhó ni yūhu ni iní-ndó ndètu-ndo sáá nduu

quixi tucu Xítoho Jesucristú. ⁸ Te Yá Ndiöxí ducaⁿ-ni ĩo chñndee ñaha-gă xii-ndo cuendá sá vá yōo teñaha cuēchi nduu na quixi tucu Xítoho Jesucristú. ⁹ Te nchaa sá cáháⁿ Yá Ndiöxí dacuití quide-gă, te diu-gă cúu-gă Yaá ní cáháⁿ ñáhá xii-ndo cuendá cuu ĩⁿnuu-ndo ndihĪ Déhe-gă Xítoho Jesucristú Yaá cúu Xítoho-ó.

Ñá túu cùu ĩⁿnuu ñáyiu ndècu ichi Xítoho Jesucristú

¹⁰ Te nchòhó ñáyiu ndècu ndihĪ-í ichi Xítoho Jesucristú cáháⁿ-í dóho-ndo sá vá ndĪ díĪⁿ cāni iní-ndó, te ĩo cuu ĩⁿnuu-ndo cñndecu-ndo, te ĩⁿ-ni cāni iní-ndó, te ĩⁿ-ni cāda-ndo chi ducaⁿ cñnĪ-gă cunduu. ¹¹ Te duha cáháⁿ-í dóho nchòhó ñáyiu ndècu ndihĪ-í ichi Xítoho Jesucristú, chi cue ñáyiu vehe té Clòé ní cachí tnúhu-yu xii-í sá ñā túu cùu ĩⁿnuu-ndo ndecu-ndo. ¹² Te duha ndūu tnúhu ní nĪhĪ-í nācuāa cùu ndecu-ndo, chi dava-ndo cāchĪ-ndó: “Yúhú cúu-í cuendá té Pāblū.” Te dava-ndo cāchĪ-ndó: “Yúhú cúu-í cuendá té Apolós.” Te dava-ndo cāchĪ-ndó: “Yúhú cúu-í cuendá té Pēlū.” Te dava tucu-ndo cāchĪ-ndó: “Yúhú cúu-í cuendá Xítoho Jesucristú”, duha cāchĪ-ndó. ¹³ Te vá dúcāⁿ cáháⁿ-ndó chi ñā túu ñā dāha Xítoho Jesucristú ndécú chi ĩⁿdĪ-ni-gă. Te ñā díú yūhú té Pāblū ní xĪhĪ-í núu cūrúxĪ sá cuendá-ndó, te ni ñā túu ní sāndute-ndo cuendá sá yūhú cuu cuendá ñāhā-í xii-ndo. ¹⁴ Te táxāhu xii Yá Ndiöxí chi ñā díú nchāa-ndo ni dacuandute-í, chi té Crispú-ni ndihĪ té Găyú-ni ní dacuāndute-í-güedé. ¹⁵ Te xiăⁿ nūu vá cúu tnāhĪ cáháⁿ-ndó sá nĪ sandute-ndo sá cúu cuendá ñāhā-í xii-ndo. ¹⁶ Te ní ndacu tucu inĪ-í sá tnāhā tucu ñáyiu cùu ndĪ mee té Èstefanás ní dacuāndute-í, te diu-nā ñáyiu-áⁿ te sānuu sá ñā túu-gă nāgā ñáyiu ni dācuandute-í. ¹⁷ Te Xítoho Jesucristú ñā túu ní tēndaha ñaha-gă xii-í sá dacuāndute-í ñáyiu, chi ní tēndaha ñaha-gă xii-í sá cáháⁿ-í tnúhu-gă núu-yu, tnúhu sá cáháⁿ nācuāa nanĪhĪ tēhū-ó. Te ñā túu cáháⁿ-í dātnā cáháⁿ ñáyiu túha. Te ducaⁿ quide-í cuendá

sá nchòhó quíndáá váha iní-ndó tnúhu sá càháⁿ nàcuáa ní xíhí Xítohó Jesucristú núú cùrúxí. Chi núu na càháⁿ-í dàtná càháⁿ ñáyiú túha te nchòhó vá quíndáá iní-ndó tnúhu-áⁿ nàcuáa tàú-xi cunduu.

Sá cuèndá Xítohó Jesucristú cútnùní iní-ó sã ïo càhnu cuu Yá Ndiöxí

¹⁸ Te nchaa ñáyiú ta xíta nihnu cuáháⁿ càchí-yu sá ñà túú nàndíhi tnúhu sá càháⁿ nàcuáa ní xíhí Xítohó Jesucristú núú cùrúxí, dico sá cúú-xí nchò ñáyiú sa ní naníhí tàhú, chi tnúhu-áⁿ cúú-xí ñⁿ tnúhu sá ñ taxi Yá Ndiöxí ndécú ndíhi-o cuèndá ndacu-gá cada-gá nchaa nàcuáa cuíní-gá iní-ó, ¹⁹ te quèe ndáá-xi nàcuáa càháⁿ-gá núú tütú-gá núú càchí-xi:

Yúhú cada-í te nchaa ñáyiú túha vá nándíhi-gá nchaa sá xíní tnùní-yu,

te nchaa ñáyiú ío váha sàá díquí-xi vá nándíhi-gá nchaa nàcuáa sàni iní-yu.

Duha càchí Yá Ndiöxí núú tütú-gá.

²⁰ Te xíãⁿ cútnùní iní-ó sã ncháá ñáyiú sàni iní-xi sá ïo túha ndècu ñuyíú-a, ndíhi nchaa cue téè dàcuaha ñaha xii-yu nchaa tnúhu ní chídó tnùní ndíi Moisés, ndíhi nchaa ñáyiú ío váha sàá díquí-xi càháⁿ cuèndá nchaa sá ío ñuyíú-a, te nchaa ñáyiú-áⁿ càchí Yá Ndiöxí sá ñà túú nàndíhi nchaa sá xíní tnùní-yu sá cúú-xí-gá. ²¹ Te Yá Ndiöxí ío váha cùtnuní iní-gá nàcuáa quide-gá, chi ñà túú dāña-gá cundècu ndíhi ñàhá-yu xii-gá sá cuèndá nchaa sá ñ sáá díquí mée-yu, te ducaⁿ quide-gá chi cuíní-gá sá cùndèdóho-yu tnúhu sá sání iní-yu ñà túú nàndíhi. Te sá cuèndá tnúhu-áⁿ te naníhí tàhú-yu te núu na quíndáá iní ñàhá-yu xii-gá.

²² Te cue ñáyiú isràél cuíní-yu quíní-yu sá vã yõo tnàhí ndàcu cada, te cue ñáyiú griégú nchicúⁿ nihnú-yu nchaa sá dácuaha ñáyiú ío túha.

²³ Dico nchoo yíhi-o càháⁿ-ó núú ñáyiú sá Xítohó Jesucristú ní xíhí-gá núú cùrúxí. Te cue ñáyiú isràél ñà túú tnàhí tnàhá iní-yu cundèdóho-yu

tnúhu-áⁿ. Te cue ñáyiú ñà túú cùu ñáyiú isràél càchí-yu sá ñà túú vèdana nàndíhi tnúhu-áⁿ. ²⁴ Dico sá cúú-xí nchaa ñáyiú ní càháⁿ ñàhá Yá Ndiöxí chi cuèi cùú-yu ñáyiú isràél àdi ñà túú cùú-yu, dico ñáyiú-áⁿ càchí-yu sá sã cuèndá Xítohó Jesucristú cútnùní iní-yu sá ïo càhnu cuu Yá Ndiöxí te ndècu ndíhi-gá nchaa sá xíní tnùní-gá.

²⁵ Te sá quidé Yá Ndiöxí càchí ñáyiú ñuyíú-a sá ñà túú nàndíhi, dico xíãⁿ ío-gá nàndíhi dàcúúxí sã sání iní mée-yu. Te sá ñ xíhí Xítohó Jesucristú núú cùrúxí, xíãⁿ càchí ñáyiú sá ñà túú ní nihí ndée Yá Ndiöxí cada-gá sá ñ sani iní-gá cada-gá. Dico sá dúcáⁿ ñ quide Yá Ndiöxí, xíãⁿ cúú-xí sã ïo-gá ní nihí ndée-gã ní quide-gá ñⁿ sá ñ sani iní-gá dàcúúxí sã sání iní mée ñáyiú ñuyíú-a. ²⁶ Te nchòhó ñáyiú ndècu ndíhi-í ichi Xítohó Jesucristú,

chí dándàcu iní nàcuáa ndècu-ndo cútnàhá ní càháⁿ ñàhá Yá Ndiöxí xii-ndo, chi sacú-ni-ndo túha dàcúúxí ñáyiú ñà túú ndècu ichi-gá. Te ducaⁿ sacú-ni-ndo tàxi tnuní-ndó, te ñu-ni ducaⁿ sacú-ndó nèhe ñáyiú sá yíñùhu núú-ndó. ²⁷ Te ñáyiú ñà túú ndècu ichi Yá Ndiöxí càchí-yu sá ñà túú tnàhí túha dava-gá tnàha ñáyiú-yu, dico dava ñáyiú ñà túú túha-áⁿ càháⁿ ñàhá Yá Ndiöxí xii-yu cundècu-yu ichi-gá, te cundècu ndíhi ñaha-gã xii-yu, te ducaⁿ dándóo canúú-yu nchaa ñáyiú càchí sá ïo túha. Te càháⁿ tucu-gá ñáyiú càchí dava-gá ñáyiú sá ñà túú tnàhí tàú cunuu cundècu-yu ichi-gá, te ducaⁿ cundècu ndíhi ñaha-gá xii-yu, te dándóo canúú-yu nchaa ñáyiú càchí sá táxi tnùní. ²⁸ Te ducaⁿ Yá Ndiöxí càháⁿ-gá ñáyiú ñà túú tnàhí cunuu cundècu ndíhi-gá, ndíhi ñáyiú quèe tíhú núú dàva-gá tnàha ñáyiú-xi, ndíhi ñáyiú càchí-yu sá ñà túú vèdana nàndíhi, nchaa ñáyiú-áⁿ càháⁿ-gá cundècu ndíhi-gá, te ducaⁿ quide-gá cuèndá dándóo canúú-yu nchaa ñáyiú càchí sá ïo cunuu. ²⁹ Te núu xíãⁿ ni ñⁿ ñáyiú vá cúú càchí-yu sá ïo càhnu cuú-yu núú Yá Ndiöxí.

³⁰ Dico nchòhó chi mee Yá Ndiöxí

ní quide-gá ndécú-ndó ndìhi Xítohó Jesucristú, te Xítohó Jesucristú ní quide-gá ní cutnùníní-ó sǎ Yǎ Ndiöxí cúú-gǎ Yáá ndécú ndìhi nchaa sá xíní tnùní-gǎ. Te ðiu-ni Xítohó Jesucristú ní quide-gǎ cuendá sá nchóó vǎ cùndècu-gǎ cuèchi-o núú Yǎ Ndiöxí, te ducaⁿ cùndecu yíñuhu-o núú-gǎ, te nduu táhú-ó cùndecu-o ndìhi-gǎ ni caa ni quíhíⁿ. ³¹ Te sá dúcáⁿ quide-gǎ núu xíáⁿ xíní ñùhu-xi cada-o nacuaá càháⁿ-xi núú tütú Yǎ Ndiöxí núú cǎchí-xi: “Vǎ cǎchí-ndó sǎ méé-ndó ïo cǎhnu cuu-ndo, chí cǎchí-ndó sǎ Yáá cúú Xítohó-ndó ïo cǎhnu cuu-gǎ”, duha cǎchí-xi núú tütú-gǎ.

2

Tnúhu sá càháⁿ nàcuáa ní cuu ní xíhí Xítohó Jesucristú núú cùrúxí

¹ Te nchòhó ñáyiú ndècu ndìhi-í ichi Xítohó Jesucristú sa nàha-ndo sá cùtnàhá ní quixi-í ní càháⁿ-í tnúhu Yá Ndiöxí núú-ndó, te ñá túú ní càháⁿ-í dàtná càháⁿ ìⁿ ñáyiú ïo váha sàá díquí-xi, àdi datná càháⁿ ìⁿ ñáyiú ïo túha. ² Chí cùtnàhá ní xíndecu ndìhi ñaha-í xii-ndo chí ní sani iní-í sá méé-ní cuendá Xítohó Jesucristú càháⁿ-í núú-ndó ndìhi nacuaá ní cuu ní xíhí-gǎ, te ðiu ducaⁿ ñí quide-í. ³ Te cùtnàhá ní quexìo-í núú ndécú-ndó te ni ñá cùtnùníní iní-í nása cada-í ní cùu, te ïo ní quíyùhú iní-í ní càháⁿ-í tnúhu-gǎ núú-ndó. ⁴ Te cùtnàhá ní càháⁿ-í nàcuáa ndùu tnúhu Xítohó Jesucristú núú-ndó, te nàha-ndo sá Espíritú Yǎ Ndiöxí ní chindee ñàha-xi xii-í ní càháⁿ-í tnúhu-gǎ núú-ndó, te tnúhu-áⁿ ñí quée-xi iní-ndó. Te ñá túú ní càháⁿ-í ìⁿ tnúhu cǎhnu núú-ndó tnúhu sá càháⁿ cue ñáyiú ïo váha sàá díquí-xi. ⁵ Te ducaⁿ ñí cuu cuendá sá nchòhó quíndáá iní-ndó tnúhu Yá Ndiöxí chí ní quide-gǎ sá vǎha sá cúú-xí iní-ndó, te ñá díú sǎ cuendá tnúhu sá càháⁿ ñáyiú cǎchí sá ïo túha ducaⁿ ñí sándáá iní-ndó tnúhu-gǎ.

Espíritú Yǎ Ndiöxí quidé-xí cùtnuní iní-ó nàcuáa sàni iní-gǎ

⁶ Te nchoo càháⁿ-ó tnúhu cǎhnu núú ñáyiú sa ní níhí ndéé ndècu

ichi Xítohó Jesucristú. Te tnúhu-áⁿ ñá túú càháⁿ ñáyiú ñá túú ndècu ichi-gǎ, te ni cuè téé yíndaha ñaha xii-yu ñá túú càháⁿ-güedé tnúhu-áⁿ chí cue téé-áⁿ naa-güedé. ⁷ Te tnúhu cǎhnu-áⁿ cúú-xí tnúhu Yá Ndiöxí, te mee-gǎ ní cǎchí-gǎ ndéé cùtnàhá vátá ngǎva-gǎ ñuyúú sǎ ncháá ñáyiú na quíndáá iní tnúhu-áⁿ te nduu táhú-yu cundecú-yu ndìhi-gǎ núú ïo váha cǎa ndecu-gǎ ni caa ni quíhíⁿ. Te tnúhu-áⁿ ndúú yùhu-xi ni cuu. ⁸ Te ni ìⁿ cue téé yíndaha cue ñáyiú ñuyúú-a ñá túú tècú tnùníní-güedé tnúhu-áⁿ, chí núu dícó tècú tnùníní-güedé tnúhu-áⁿ te vǎ cǎtá cǎa-güedé Xítohó Jesucristú núú cùrúxí cǎhni ñaha-güedé xii-gǎ ní cùu. Te ðiu-ni Yáá-áⁿ ïo cǎhnu cuu-gǎ. ⁹ Dico ducaⁿ ñí cuu chí ní quee ndáá-xi nàcuáa càháⁿ-xi núú tütú Yǎ Ndiöxí núú cǎchí-xi:

Yá Ndiöxí sa ní sani iní-gǎ nchaa nàcuáa cada-gǎ sá cúú-xí cuendá nchaa ñáyiú cùu iní ñáhá xii-gǎ.

Te sá ñí sani iní-gǎ cada-gǎ cúú-xí sǎ vátá quíní-gǎ ñáyiú te ni vátá cùndèdóho-gǎ-yu,

te ni ñá túú tnàhí cùtnuní iní-yu nása cada-gǎ.

Duha cǎchí-xi núú tütú-gǎ. ¹⁰ Te mee Yá Ndiöxí ní cǎchí-gǎ sá Espíritú-gǎ cada-xi te nchoo cùtnuní iní-ó nchaa nacuaá sàni iní-gǎ cada-gǎ, núu xíáⁿ ducaⁿ tècú tnùníní-ó vitna, chí Espíritú-gǎ xíní-xi nchaandi túhú nàcuáa sàni iní-gǎ cada-gǎ.

¹¹ Te ñá ìⁿ ñáyiú xíní ndáá-yu nàcuáa sàni iní ingá ñáyiú, chí mee ñáyiú-áⁿ xíní ndáá-yu nchaa nàcuáa sàni iní-yu. Te ducaⁿ sǎtnahá-xi cùu Yá Ndiöxí chí medì-ni Espíritú-gǎ xíní-xi nchaa nàcuáa sàni iní-gǎ. ¹² Te nchoo chí Yá Ndiöxí ní taxi-gǎ Espíritú-gǎ ndécú ndìhi-o, te ñá díú ñuyúú-a ducaⁿ ni quèe espíritú ní ngúndecu ndìhi-o. Te ducaⁿ ñí taxi-gǎ Espíritú-gǎ ndécú ndìhi-o cuendá ducaⁿ cùtnuní iní-ó nàcuáa ndùu nchaa sá vǎha sá dícó ducaⁿ ñí taxi-gǎ ndécú ndìhi-o. ¹³ Te cuendá nchaa sá vǎha-áⁿ càháⁿ-ndí,

te cãháⁿ-ndí nãcuáa dàcahu iní ñáhá Espíritú Yã Ndiõxí xii-ndí, te ñá túú cãháⁿ-ndí nãcuáa cãhu iní ñáyiu ñuyíú-a cãháⁿ-yu, te ñiu-ni nchaa tnúhu dàcahu iní ñáhá Espíritú-gá xii-ndí cãháⁿ-ndí, ñiu-ni nchaa xiãⁿ dánèhé-ndí nchaa ñáyiu ndècu ndihi tucu Espíritú-gá.

14 Te ñáyiu ñá túú ndècu ndihi Espíritú Yã Ndiõxí ñá túú tnàhá iní-yu nãcuáa ndùu tnúhu dàtecú tnúhu ñaha Espíritú-gá xií-yu, te ni ñà túú tècú tnúni-yu, te cãchí-yu sã ñà túú nãndíhi-xi. Te ducaⁿ chi mee-ni nchaa ñáyiu ndècu ndihi Espíritú-gá tècú tnúni-yu nãcuáa ndùu tnúhu-áⁿ. 15 Te cue ñáyiu ducaⁿ ndècu ndihi Espíritú Yã Ndiõxí cútnúni ndáá iní-yu ná cúu nchaa sã vãha, te vá yõo ñⁿ xini nchaa nãcuáa sãni iní-yu. 16 Te núú tùtú Yã Ndiõxí cãchí-xi: “Vá yõo ñⁿ xini nãcuáa sãni iní Yã Ndiõxí, núu xiãⁿ vá yõo ñⁿ ndacu ná danèhé ñáhá xii-gá”, duha cãchí-xi núú tùtú-gá. Te nchoo chi ñⁿ-ni sãni iní-ó ndihi Xítóhó Jesucrístú.

3

Cue tée xiquide chiúⁿ Yã Ndiõxí

1 Te nchòhó ñáyiu ndècu ndihi-í ichi Xítóhó Jesucrístú cãchí tnúhu-í xii-ndo sã ñá ní ñihí-í nãcuáa cada-í cãháⁿ-í tnúhu-gá núú-ndó dàtná cãháⁿ-í núú nchaa ñáyiu quide nchaa nãcuáa cãháⁿ Espíritú Yã Ndiõxí, chi ní cãháⁿ-í núú-ndó dàtná cãháⁿ-í núú nchaa ñáyiu cùnuu nchaa sã cuèhé sã dúhá iní-xi, te ní quide ñaha-í xii-ndo dàtná cue ñáyiu íchí ñí sãndáá iní tnúhu Xítóhó Jesucrístú, núu xiãⁿ ducaⁿ ñí cãháⁿ-í núú-ndó. 2 Te ní quide ñaha-í xii-ndo dàtná ñⁿ déhe yiquiⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ñⁿ sã ñà túú tnàhí úhú tecú tnúni-ndó, te ñá túú ní dànèhé ñáhà-í xii-ndo ñⁿ sã xító-í sã vã tècú tnúni-ndó. Te quide cuendá-í sã díú-ní dùcaⁿ vá tècú tnúni-ndó ndèé vitna te núu na dànèhé ñáhà-í xii-ndo nchaa dava-gá tnúhu. 3 Te ducaⁿ chi quide-ni-ndo nãcuáa sãni iní mée-ndó, chi ndècu-ni-ndo ichi cuédú

íní, te nàá ndihi tnàha-ni-ndo, te ñá túú tnàhí cùu ñⁿnuu-ndo ndecu-ndo. Te xiãⁿ cútnúni sã mée-ní nchaa nãcuáa sãni iní mée-ndó quide-ndo, te xiquide-ndo dàtná quidé nchaa ñáyiu ñá túú ndècu ichi Xítóhó Jesucrístú. 4 Te dava-ndo cãchí-ndó: “Yúhú cúu-í cuendá té Pãblú.” Te dava-ndo cãchí-ndó: “Yúhú cúu-í cuendá té Apolós”, duha cãchí-ndó. Te sã dúcãⁿ cãháⁿ-ndó xiãⁿ cútnúni sã quidé-ní-ndó mée-ni nchaa nãcuáa sãni iní mée-ndó.

5 Te yúhú té Pãblú cãchí tnúhu-í xii-ndo sã ñà túú cùnuu-í, te ni té Àpolós ñá túú cùnuu-dé chi dícó cue tée xinu cuechi núú Yã Ndiõxí cúu-ndí, te ní cãháⁿ-ndí tnúhu-gá núú-ndó, núu xiãⁿ ní sãndáá iní-ndó. Te ndi dííⁿ ndí dííⁿ ndùu chiuⁿ ní táhú Yã Ndiõxí cada-ndí. 6 Te yúhú cúu-í dàtná ñⁿ tée chihí tatá chi dàcãháⁿ ñáhà-í xii-ndo tùha-ndo ichi Yã Ndiõxí. Te té Àpolós cúu-dé dàtná ñⁿ tée nãcuhñu chi tée-áⁿ ndécú-dé dánèhé ñáhà-í xii-ndo tnúhu-gá. Te Yã Ndiõxí cúu-gã Yaá quidé sãhnu tatá ní chihí-í-áⁿ, te duha cãháⁿ-í chi ñiu-gá quidé-gã tá ñihí ndéé-ndó ndècu-ndo ichi-gá. 7 Te núu xiãⁿ ni tée chihí tatá te ní tée nãcuhñu ñá túú cùnuu-güedé, dico Yã Ndiõxí ío cùnuu-gá chi ñiu-gá quidé-gã xinu tatá-áⁿ te sãhnu-xi. 8 Te ñⁿ-ni cùu tée chihí tatá ndihi tée nãcuhñu. Te ducaⁿ sãtnahá-xi cùu nchúhú cue tée xiquide chiúⁿ Yã Ndiõxí, te nãcuáa ndùu chiuⁿ ní quide-ndí te ducaⁿ cùnduu táhú taxi Yã Ndiõxí nduu táhú-ndí. 9 Te nchòhó cúu-ndó dàtná ñⁿ xichi núú ñí quée tatá, te nchúhú cúu ñⁿnuu-ndí quidé chiúⁿ-ndí xiáⁿ. Te ducaⁿ sãtnahá-xi cùu-ndo chi cùu cuendá ñáhá Yã Ndiõxí xii-ndo, te nchúhú cúu ñⁿnuu-ndí quidé-ndí chiúⁿ-gá.

Te cùu tucu-ndo datná ñⁿ vehe sã vitná sáá, te ducaⁿ sãtnahá-xi cùu-ndo chi Yã Ndiõxí quidé-gã tá sãhnu nihnu-ndo ichi-gá cuáhãⁿ. 10 Te yúhú cúu-í dàtná ñⁿ tée cùnuu dacia vehe te ní tava-í cimièntú-xi, te dííⁿ cue tée véxi dàcaa-güedé ndóho, te ñⁿ ñⁿ cue tée-áⁿ ío xini ñuhu-xi cada

cuendá-güedé nàcuáa dacàa-güedé. Núu ducaⁿ sàtnahá-xi cùu yúhú chi Yá Ndiöxí ní taxi-gá chiúⁿ quide-í te chindee ñaha-gá, chi díhna-gá-í ní quixi-í ní cáháⁿ-í tnúhu Xítohó Jesucrístú núu-ndó, te dèⁿ cue téé véxi dàcuaha ñaha-ná xii-ndo tnúhu-gá, te ìⁿ ìⁿ cue téé-áⁿ ìo xìni ñuhu-xi cada cuendá-güedé nàcuáa dacuàha ñaha-güedé xii-ndo tnúhu-gá. ¹¹ Te cimièntú vehe-áⁿ cada iní-ó sá cúu-xí mee Xítohó Jesucrístú, te ducaⁿ chi yúhú ní dánèhé ñáhà-í xii-ndo ní ngúndecu ndìhi-ndo Xítohó Jesucrístú, te vá yòo-gá cundecu ndìhi-ndo chi ìⁿdìi díi-ni-gá ndécú. ¹² Te dava cue téé dàcaa-güedé vehe váha te chìhi-güedé díhúⁿ cuááⁿ, ndìhi díhúⁿ cuixíⁿ, ndìhi yúú sá ìo vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixiⁿ. ¹³ Te sáá nduu te nchaa vehe-áⁿ càyú-xi, te vehe vítú-áⁿ ndìhi vehe ité-áⁿ ndìhi vehe tnuvixiⁿ-áⁿ ndoo ndoo càyú, te nchaa vehe váha-áⁿ vǎ càyú-xi cuèi na yǎha ñuhú. Te nchaa cue téé ní dácáá vèhe váha-áⁿ cada iní-ó sá cúu-güedé ñáyiú ìo váha quide chiúⁿ Yá Ndiöxí. Te nchaa cue téé ní dácáá vèhe vítú, ndìhi cue téé ní dácáá vèhe ité, ndìhi cue téé ní dácáá vèhe tnuvixiⁿ cada iní-ó sá cúu-güedé ñáyiú ñá túú cuìní cada chiúⁿ Yá Ndiöxí nàcuáa tàú-xi cunduu. Te sáá nduu te cutnùní nàcuáa ndùu chiúⁿ ní quide ìⁿ ìⁿ ñáyiú, chi Yá Ndiöxí cáháⁿ-gá nàcuáa ndùu chiúⁿ ní quide ìⁿ ìⁿ ñáyiú ní quide chiúⁿ-gá. ¹⁴ Te cue ñáyiú ìo váha xǐquide chiúⁿ Yá Ndiöxí te cùdíi chiúⁿ quidé-yu, te ñáyiú-áⁿ ñíhǐ-yu sá ndúú tǎhǐ-yu. ¹⁵ Te cue ñáyiú ñá túú quide chiúⁿ Yá Ndiöxí nàcuáa tàú-xi cunduu, te vá cùdíi chiúⁿ ní quidé-yu chi cuíta te ndóo-ná-yu duha, dico mèe-yu chi naníhǐ tǎhǐ-yu.

¹⁶ Te yúhú càháⁿ-í dóho-ndo dándacu-í iní-ndó sá cúu-ndó dàtná vehe Yá Ndiöxí, chi Espíritú-gá ndécú ndìhi ñaha-xi xii-ndo. ¹⁷ Te núu yoo na dànaa ñaha xii nchohó ñáyiú cùu veñúhu-gá, te Yá Ndiöxí danàa ñaha-gá xii ñáyiú-áⁿ, te ducaⁿ

càda-gá chi nchòhó cúu-ndó ñáyiú cùu cuendá-gá.

¹⁸ Te vá dándàhú-ndó mèe-ndo sá ìo túha-ndo. Te núu ìo dava-ndo sàni iní-ndó sá túha-ndo dàtná sání ìní cue ñáyiú ñá túú ndècu ichi Yá Ndiöxí, te cada-ndo sá cúu-ndó dàtná ñáyiú ñá túú tnàhǐ túha, te ducaⁿ te cuu ndisa-ndo ñáyiú túha sá cúu-xí Yǎ Ndiöxí. ¹⁹ Te nchaa sá xìní tnùnǐ nchaa ñáyiú càchǐ sá ìo túha ñá túú ndècu ichi Yá Ndiöxí ñá túú nàndíhi-xi sá cúu-xí-gá. Te càchǐ-xi núu tütú-gá: “Nchaa ñáyiú càchǐ sá ìo túha te Yá Ndiöxí dandòo canúú ñáhá-gǎ xií-yu núu nchàa sá quidè-yu”, duha càchǐ-xi núu tütú-gá. ²⁰ Te càchǐ tucu-xi ingá xichi: “Yá Ndiöxí cùtnùnǐ iní-gá nchaa nàcuáa sàni iní ñáyiú càchǐ sá ìo túha. Te nchaa nàcuáa sàni iní-yu-áⁿ càchǐ-gá sá ñá túú vèdana nàndíhi-xi”, duha càchǐ-xi núu tütú-gá. ²¹ Núu xiǎⁿ càháⁿ-í dóho-ndo sá vǎ càchǐ-ndó sá nchùhú cue téé dànèhé ñáhá xii-ndo tnúhu-gá ìo càhnu cuu-ndí. Te nchaa sá ìo ñuyíú-a cùu-xi sá vǎha sá cúu-xí-ndó. ²² Te cuèi yúhú ndìhi té Àpolós ndìhi té Pèlú ndécú-ndǐ sá cúu-xí-ndó, te cuèi nchaa sá ìo ñuyíú-a te cuèi nchaa nduu ndècu-ndo te cuèi sá cùu-ndó dico nchaa cùu-xi sá vǎha sá cúu-xí-ndó. Te cuèi nchaa sá ndécú tnàvíí, te cuèi nchaa sá cóo ndèe cuèe-gá nchaa cùu-xi sá vǎha sá cúu-xí-ndó. ²³ Te mee-ndo ndècu-ndo sá cúu-xí Xítohó Jesucrístú, te mee Xítohó Jesucrístú ndécú-gǎ sá cúu-xí Yǎ Ndiöxí.

4

Nàcuáa ndùu chiúⁿ quide cue téé ní táuchíúⁿ Xítohó Jesucrístú cáháⁿ tnúhu-gá

¹ Te cada cuendá-ndó sá nchùhú dicó-ni cue téé xínu cuechi núu Xítohó Jesucrístú cúu-ndí, te chiúⁿ-áⁿ ñí taxi Yá Ndiöxí quidé-ndǐ càháⁿ-ndí tnúhu sá ñí cachǐ-gá yíyùhu ni cuu. ² Te xìni ñuhu-xi sá ncháá ñáyiú ducaⁿ ñí sǎhaha Yǎ Ndiöxí chiúⁿ quidé-yu cada ndáá-yu cadá-yu chiúⁿ-áⁿ. ³ Te yúhú ñá túú quide cuendá-í nùu nása ndùu

tnúhu càháⁿ-ndó cuendá-í nũu cùu-í tée váha àdi ñá túú cùu-í. Te ñi-ñi ducaⁿ ñà túú quide cuendá-í nũu nása-gá càháⁿ nchaa dawa-gá ñáyiu cuendá-í. Te ni mée-í ñá túú càháⁿ-í nũu cùu-í tée váha àdi ñá túú cùu-í. ⁴ Te sànuu iní-í sá ñà túú ñà cúmāni-í núú Yá Ndiõxí, dico ñá díú sá xiãⁿ te cachí-í sá ñá túú cuèchi-í ndécú nũú-gã, chi mee-gã náhá ndáá-gá te núu nása quide-í ndécú-í. ⁵ Te nchòhó vá càháⁿ-gá-ndó sá ñà túú cùndáá ñáyiu núú Yá Ndiõxí, chi vátá sàá-gá nduu cùndáá cuèchi-yu. Te na sàá nduu quixi tucu Xítohó Jesucristú te dàvá-áⁿ dàtúu-gá nchaa sá quidè-yu, nchaa sá ñà túú xini-ó quidè-yu vitna, te ducaⁿ dàtúu-gá nchaa nacuáa sàni iní-yu. Te Yá Ndiõxí càháⁿ váha-gá cuendá nchaa ñáyiu ní quide váha.

⁶ Te nchòhó ñáyiu ndècu ndihí-í ichi Xítohó Jesucristú, càcunehe-í té Àpolós ndihí yúhú núú-ndó dànehé ñàhá-í xii-ndo nacuáa cada-ndo cuendá ducaⁿ cùu-xi ñⁿ sá váha sá cúu-xi-ndó, ndihí cuendá sá nchòhó canchicúⁿ nihnu-ndo càda-ndo mee-ñi nchaa nacuáa yòdo tnuní núú tütú Yá Ndiõxí. Te ducaⁿ te vá càchí-ndó sá ñⁿ tée càháⁿ tnúhu Yá Ndiõxí ío-gá càhnu cuu-dé dàcúxí ñngá-dé. ⁷ Te nchòhó vá càchí-ndó sá ío-gá cùnũu-ndo dacúxí dawa-gá ñáyiu chi Yá Ndiõxí ní quide-gá ní ngúndecu ndihí-ndo nchaa sá xini tnuní-ndó. Te mee-gã ducaⁿ ñi quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mée-ndó ñi quide-ndo dùcaⁿ ní ngúndecu ndihí-ndo nchaa sá xini tnuní-ndó.

⁸ Te nchòhó quidè-ndó sá ñà túú tnàhí-gá ná cúmāni-ndó nũú Yá Ndiõxí, te quide-ndo sá ni ñihí-ndó nchaa sá cuini-ndó nũú-gã ndécú ndihí-ndo, te sànuu sá cúu-ñá-ndó dàtná cue tée yíndaha ñáyiu, te nchúhú ñá túú cùu ñⁿnuu ndihí ñàhá-ndí xii-ndo quíndaha ndihí ñàhá-ndí xii-ndo ñáyiu, ñte váha-ni te núu dicó ndisa sá yíndaha-ndo ñáyiu chi tnàhá nchúhú ní tnàhá

ndihí ñàhá-ndí xii-ndo quíndaha-ó-yu te núu dicó cúu-xi ñⁿ sá ndáá dico ñàhá! ⁹ Te yúhú quidè cuendá-í sá nchúhú cue tée ní táuchíuⁿ Xítohó Jesucristú càháⁿ tnúhu-gá núú ñáyiu ní cachí Yá Ndiõxí sá cúu-ndí cue tée ñá túú nàndihí sá cúu-xi dawa-gá ñáyiu. Te ní cachí tucu-gá sá cúu-ndí dàtná cue ñáyiu sa ní tnàhá òré cuú-xi quíhíⁿ nacháhu cuèchi-xi, te nchaa ñáyiu cùñúhu ñàhá-yu xii-ndí sá dúcáⁿ ndòho-ndí, te tnàhá nchaa espíritú cùñúhu ñàhá-xi xii-ndí. ¹⁰ Te cuendá sá xínú cuèchi-ndí núú Xítohó Jesucristú, xiãⁿ cúu-ndí dàtná cue tée ñá túú vèdana nàndihí sá cúu-xi ñáyiu. Te nchòhó quidè-ndó sá cúu-ndó ñáyiu ío túha ndècu ndihí Xítohó Jesucristú. Te ñáyiu càchí-yu sá nchúhú cúu-ndí cue tée ñá túú ndàcu cada ñⁿ sá cáda sá cúu-xi Yá Ndiõxí. Te nchòhó quidè-ndó sá cúu-ndó ñáyiu ío váha ndàcu quide ñⁿ sá sání iní-ndó sá cúu-xi-gã. Te cue ñáyiu dàquee tihú ñàhá-yu xii-ndí, te nchòhó nèhè-yu sá yíñúhu núú-ndó. ¹¹ Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiu quide úhú ñàhá-yu xii-ndí, te ni vèhe-ndí ñá túú ndèé cáá cùndecu-ndí. ¹² Te ío ndòho-ndí quidè chiuⁿ-ndí ñihí-ndí sá xéxi-ndí. Te cue ñáyiu xicuèhé ñàhá-yu xii-ndí dico xicáⁿ táhú-ndí núú Yá Ndiõxí cuendá-yu, te ñá cúu tnàhí quiní ndèé ñàhá-yu xii-ndí dico quide cahnu iní-ndí nchaa sá quidè ñàhá-yu. ¹³ Te mee-ñi tnúhu cuèhé tnúhu duha càháⁿ-yu cuendá-ndí dico sàcahnu iní-ndí te dàsahú-ndí-yu mee-ñi tnúhu váha. Te càchí-yu sá cúu-ndí dàtná ñⁿ sá ñà túú-gã vèdana nàndihí, te nchaa-ni nduu ducaⁿ càháⁿ-yu xàháⁿ-yu xii-ndí.

¹⁴ Te yúhú duha càháⁿ-í núú tütú-a dàsahú ñàhá-í xii-ndo, dico ñá díú tnúhu sá cúu càháⁿ núú-ndó càháⁿ-í. Te duha càháⁿ-í dóho-ndo chi quide iní-í sá sũúni dàtná déhe mee-í

cúu-ndó chi ío cùu iní ñáhà-í xii-ndo, ¹⁵ Te nchaa-o ndècu-o ichi Xítohó Jesucrístú vitna, dico yúhú cùu-í tée díhna nuu nǐ dánèhé ñáhá xii-ndo nacuaá ndùu tnúhu sá cǎháⁿ nǎcuáa naníhí tǎhú-ó, núu xiǎⁿ cùu-í dàtná tǎtá-ndó. Te cuèi vǎi vihi cue tée na quixi-güedé danèhé ñáhá-güedé xii-ndo tnúhu-gá dico ñⁿ dìi-ni yúhú cùu-í tée díhna nuu-gǎ ní dánèhé ñáhá xii-ndo tnúhu-gá. ¹⁶ Núu xiǎⁿ cǎháⁿ-í dóho-ndo sǎ cǎnchíⁿ níhnu-ndo cada-ndo nchaa nacuaá quide-í.

¹⁷ Te xiǎⁿ núu sa ní tendaha-í té Timùteú véxi coto ñaha-dé xii-ndo, te tée-án ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítohó Jesucrístú, te tée-án cachí tnúhu-dé xii-ndo nchaa nacuaá quide-í ndécú-í ichi-gá. Te ñⁿ ni nǎcuáa na cǎchí tnúhu-dé-án ñⁿ ni ducaⁿ quide-í nchaa xichi núu tǎcǎ ñáyiú dàcuaha tnúhu Xítohó Jesucrístú. ¹⁸ Te dava nchòhó ío quide cahnu-ndo mee-ndo chi sǎni iní-ndó sǎ vǎ quixí-gǎ-í quixi coto ñaha-í xii-ndo. ¹⁹ Dico núu mee Yǎ Ndiǒxí ná cǎchí-gǎ te ío ndíhi quixi coto ñaha-í xii-ndo, te dàvǎ-án quini-í te núu nása quide nchaa ñáyiú ducaⁿ ío xíquide cǎhnu mee-xi-án ndécú-yu ichi Xítohó Jesucrístú. Te vǎ cáda cuendá-í tnúhu cǎháⁿ-yu chi chiúⁿ quidé-yu cada cuendá-í. ²⁰ Te vitna yíndaha ñaha Yǎ Ndiǒxí xii-o, te chindee ñaha-gǎ xii-o quide-o nchaa sǎ vǎha sǎni iní-ó quide-o te ñá díú mèe-ni sǎ cǎháⁿ-ó. ²¹ Te ío chí cǎní iní núu ndédacǎa sǎ vǎha-gǎ cada-í òré ná quéxió-í núu ndécú-ndó, núu sǎ ténáá ñáhà-í xii-ndo àdi sǎ cǎháⁿ ndíhi ñaha-í xii-ndo ndíhi tnúhu vii tnúhu vǎha nǎcuáa cutnùní iní-ndó sǎ cúu iní ñáhà-í xii-ndo.

5

Ñⁿ cuéchi cǎhnu vihi

¹ Te yúhú sa ní níhí ndáá-í tnúhu nǎcuáa cùu ndecu-ndo, chi ñⁿ tée ndècu ndíhi-ndo ndeca-dé nǎná chǎhá-dé. Te xiǎⁿ cúu-xí ñⁿ cuéchi cǎhnu vihi, chi ndéé nchaa ñáyiú ñá túú ndècu ichi Yǎ Ndiǒxí cǎchí-yu sǎ vǎ cúu tnǎhí ducaⁿ cada-o.

² ;Te nchòhó ío quide cahnu-ni-ndo mee-ndo xíndecu-ndo! ;Te tàú-ndó sǎ cúnđiyí-ndó ndixi cuéchi iní-ndó sǎ dúcǎⁿ cùu ndecu-ndo ni cuu! Te tée ducaⁿ quide-án xini ñúhu-xi sǎ vǎ dáñǎ-gǎ-ndó níhí tnǎhá ndíhi ñaha-dé xii-ndo ni cùu dico ñá túú dúcǎⁿ quide-ndo. ³ Te yúhú ñá túú ndècu ndíhi ñaha-í xii-ndo dico dàtná tnúhu sǎ ndécú ndíhi ñaha-í xii-ndo chi ducaⁿ-ni ío ñúhu iní ñáhà-í xii-ndo. Te yúhú cǎchí-í sǎ nǎchǎhu tée-án cuéchi-dé sǎ dúcǎⁿ quide-dé, te ñⁿ ni ducaⁿ cǎháⁿ-í núu-ndó te núu dícó ndécú ndíhi ñaha-í xii-ndo. ⁴ Te òré nǎtǎcǎ-ndó cǎháⁿ ndíhi-ndo Yǎ Ndiǒxí te ñⁿ ni Xítohó Jesucrístú ñá túú dàña ndéé-gǎ chíndèe ñaha-gǎ xii-ndo, te òré-án cada-ndo nǎcuáa cuini Xítohó Jesucrístú cada-ndo, te cada iní-ndó sǎ tnǎhá-í ndécú ndíhi ñaha-í xii-ndo. ⁵ Chi tàú-xi sǎ tée ducaⁿ quide-án daquèe tǐhú-ndó-dé, te ducaⁿ te sǎcuíhnǎ dandòho ñaha-xi xii-dé cuèi na cúu-dé, dico na sǎá nduu te nduu tǎhú-dé cundecu-dé ndíhi Xítohó Jesucrístú.

⁶ Te nchòhó ñá túú ndùu váha-xi sǎ cǎchí-ndó sǎ ío cǎhnu cuu-ndo. Te xini-ndó sǎ cuèi luha-ni levadùrá ná quíhu yuchi cuáha pǎá dándàa-xi cuèi luha-ni ná quíhu te níhí-ni yuchi sǎháⁿ ndoho-xi. Te ducaⁿ sǎtnahá-xi cùu nchòhó chi núu ndècu ndíhi-ndo ñⁿ ñáyiú quide sǎ ñá túú vǎha te nchaa-ndo ñá túú-gǎ cúu vǎha iní-ndó ndècu-ndo. ⁷ Te xini ñúhu-xi sǎ cáda-ndó dàtná quidé cuè ñáyiú quide vico pascuá, chí ñá túú chíhí-yu levadùrá yuchi cuáha pǎá xéxi-yu nduu quidé-yu vico-án. Te sǎ quíhu pǎá-án cada iní-ó sǎ cúu-xí nchaa sǎ cuèhé sǎ dúhá nǐ xóo cada-ndo. Te vǎ cáda-gǎ-ndó ni ñⁿ sǎ cuèhé sǎ dúhá, te ducaⁿ te cuu-ndo ñáyiú váha chí sa ní nduu ndoo ní nduu nine iní-ndó. Te cue mbéé cue quiti ní xóo cǎhni-güedé nduu pǎscuá cue quiti-án cada iní-ó sǎ cúu-güedé datná Xítohó Jesucrístú nǎcuáa ní xíhí-gǎ núu cùrúxí. ⁸ Te núu xiǎⁿ xini ñúhu-xi sǎ vǎ cáda-gǎ-ndó ni ñⁿ sǎ cuèhé sǎ dúhá sǎ nǐ xóo cada-ndo, te ni vǎ cúhúⁿ-gǎ iní-ndó te ni vǎ cáda-gǎ-ndó, te ni yúhu ni

iní-ná-ndó càda-ndo mee-ni sá vâha.

9 Te tutú sá sà ní dáquíxì-í ndaha-ndo ñ cachí-í sá vâ nihí tnáhá-ndó ndìhi cue ñáyiú ndècu ichi díí ìní. 10 Te sá dúcáⁿ càháⁿ-í núú tütú ní dáquíxì-í ndaha-ndo te vâ cání ìní-ndó sá yùhú càchí-í sá vâ cúú-gã tnahá tnúhu-ndo ndìhi cue ñáyiú ndècu ichi cuehé ichi duha, ndìhi ñáyiú ndècu ichi díí ìní, ndìhi ñáyiú xìho nchaa sá ió ñuyíú, ndìhi ñáyiú dùhu sá ndécú ndìhi tnaha ñáyiú-xi, ndìhi ñáyiú quide cahnu sá càchí-yu cùu ndiòxí te ñá ndáá sá ndiòxí cúú-xí chi dícó cue téé ñuyíú-a ní cadúha nchaa xíãⁿ, chi núú ducaⁿ na càda-ndo vá tnáhá tnúhu-gá-ndó ndìhí-yu te xìni ñuhu-xi sá vâ cúndècu-gá-ndó núú ndécú-yu. 11 Te ñá túú dùcaⁿ quee-xi nacúáa càháⁿ-í núú tütú-í, chi yùhú càchí-í sá vâ cúú tnáhá tnúhu-ndo ndìhi ñáyiú càchí sá ndécú ichi Xítóhó Jesucristú te ñá ndáá sá ndécú-yu ichi-gá. Te núú cùú-yu ñáyiú ndècu ichi díí ìní, àdi cúú-yu ñáyiú xìho nchaa sá ió ñuyíú-a, àdi cúú-yu ñáyiú quide cahnu nchaa sá càchí-yu cùu ndiòxí te ñá ndáá chi dícó cue téé ñuyíú-a ní cadúha nchaa xíãⁿ, àdi cúú-yu ñáyiú yiti yùhu-xi, àdi cúú-yu ñáyiú quihu, àdi cúú-yu ñáyiú dùhu sá ndécú ndìhi tnaha ñáyiú-xi, te nchaa ñáyiú ducaⁿ càchí sá ndécú ichi-gá te ñá ndáá te ducaⁿ xíquidè-yu, te ni vâ cúú nihí tnáhá-ndó ndìhí-yu caxi-ndo ndìhí-yu. 12-13 Te ñá díú yùhú cúú-í téé càháⁿ cuendá nchaa ñáyiú ñá túú ndècu ichi Xítóhó Jesucristú núu quide ndáá-yu àdi ñá túú quide ndáá-yu ndécú-yu, chi mee Yã Ndiòxí càháⁿ-gá te núú nása quidè-yu ndécú-yu. Dico nchòhó chi tàú-ndó càda cuendá-ndó núu nása quide cue ñáyiú ndècu ndìhi-ndo ichi Xítóhó Jesucristú. Núú xíãⁿ xíní ñùhu-xi daquee tíhú-ndó téé ducaⁿ ñá túú quide váha ndècu ndìhi-ndo-áⁿ, te vâ dáñá-gã-ndó nihí tnáhá ndìhi ñaha-dé xii-ndo.

6

Nàcuáa tàú-xi cada ñáyiú ndècu ichi Xítóhó Jesucristú te núú ñá túú ndècu ndìhi váha tnáhá-yu

1 Te dava nchòhó òré ñá túú ndècu ndìhi váha tnàha-ndo te cùyii-ndo cuáháⁿ-ndó núú cuè téé cùchiuⁿ ñá túú ndècu ichi Xítóhó Jesucristú sàcáⁿ cuéchi-ndo, te ñá túú dùcaⁿ taú-xi cada-ndo chi núú cuè téé ndècu ichi-gá ducaⁿ tàú-ndó quihíⁿ-ndó càcáⁿ cuéchi-ndo. 2 Te nchòhó sa nàha-ndo sá ncháá ñáyiú cùu cuendá Yã Ndiòxí sáá nduu càháⁿ-yu te núú ní quide ndáá nchaa dava-gá ñáyiú àdi ñá túú ní quide ndáá-yu, te nchòhó tnáhá-ndó cùu-ndo ñáyiú ducaⁿ càháⁿ, te núú ducaⁿ te cutnùní iní-ndó sá ndácú-ndó càda ndáá-ndó nchaa cuéchi sá ñá túú úhú cundáá vitna ndècu-ndo ñuyíú-a. 3 Te nchòhó sa nàha-ndo sá ncháá ndéé cue espíritú xínú cuéchi núú Yã Ndiòxí sáá nduu càháⁿ-ó te núú nása quide-xi ndècu-xi. ¡Núú xíãⁿ cutnùní iní-ó sá úúⁿ-gã ndacu-o càda ndáá-ó nchaa cuéchi sá ió ñuyíú-a! 4 Te núú ió dava-ndo ió nása cùu ndècu-ndo te xínáa-ndó, te vâ quihíⁿ-ndó càcáⁿ cuéchi-ndo núú cuè téé ndèhe-ndo sá ñá túú ndècu-güedé ichi Yã Ndiòxí, dico nchòhó chi da núú cuè téé-áⁿ cuáháⁿ-ndó sàcáⁿ cuéchi-ndo. 5 Te duha càháⁿ-í cuendá cucahaⁿ núú-ndó chi ñá túú quide váha-ndo sá dúcáⁿ quide-ndo. ¿Te náa dícó-ñá ñá túú tnáhí ñáⁿ téé cutnùní iní-xi nàcuáa cada ndáá cuéchi-ndo ndècu ndìhi-ndo ichi Xítóhó Jesucristú-áⁿ? 6 Te nchòhó, ñá túú quide váha-ndo, chi dava-ndo cuáháⁿ-ndó núú cuè téé ñá túú ndècu ichi Xítóhó Jesucristú sàcáⁿ cuéchi-ndo cuendá dava-gá cue ñáyiú ndècu ndìhi-ndo ichi-gá. 7 Te ñá túú quide váha-ndo sá dúcáⁿ nàá ndìhi tnàha-ndo te cuáháⁿ-ndó sàcáⁿ cuéchi-ndo, te váha-gá sá cáda càhnu iní-ndó cuéi náandi na càda ñaha tnaha ñáyiú-ndo xii-ndo cuéi dùhú-yu sá ndécú ndìhi-ndo dico cada càhnu-ni iní-ndó. 8 Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xí tnàha ñáyiú-ndo, chi cùu

úhú iní-ndö-yu, te dùhu-ndó-yu, te ndéé méé-ndó nàcuáa ndècu-ndo ichi Xítóhó Jesucristú ducaⁿ quide tnaha-ndo.

⁹ Te nchòhó sa nàha-ndo sá ncháá ñáyiú ndècu ichi cuehé ichi duha vá ndúú tãhũ-yu cundecú-yu núú ndécú Yá Ndiöxí táxí tnùní-gá, núú xíãⁿ vá cání iní-ndó sã ñáyiú-áⁿ nduu tãhũ-yu cundecú-yu ndihí-gá. Te ni cuè ñáyiú ndècu ichi díí ìní, te ni cuè ñáyiú quide cahnu nchaa sá cãchí-yu cùu ndióxí te ñá ndáá chi dícó cue téé ñuyúú-a ní cadúha nchaa xíãⁿ, te ni cuè téé cãháⁿ ndihí ñadìhí te ñá díú ñadìhí-güedé cúú-yu, te ni cuè ñáyiú dìhí cãháⁿ ndihí téé te ñá díú yíí-yu cùu-güedé, te ni cuè téé cãháⁿ ndihí tnàha téé-xi, ¹⁰ te ni cuè ñáyiú dùhu, te ni cuè ñáyiú xìho sá ndécú ndihí tnaha ñáyiú-xi, te ni cuè ñáyiú quihu, te ni cuè ñáyiú cãháⁿ úhú, te ni cuè ñáyiú dànícuehé tnàha ñáyiú-xi te dùhu ñahá-yu, te ni ìⁿ cue ñáyiú duha xíquide vá ndúú tãhũ-yu cundecú-yu núú ndécú Yá Ndiöxí táxí tnùní-gá. ¹¹ Te dava nchòhó ducaⁿ ñí xóo cada-ndo ni cùu, te vitna ní cuu-ndo ñáyiú sa ní nduu ndoo ní nduu nine iní-xi, te ní cuu-ndo ñáyiú cùu cuendá Yá Ndiöxí, te ní cuu tucu-ndo ñáyiú ñá túú-gã cuèchi-xi ndècu núú-gã. Te ducaⁿ ñí quide ñaha Yá Ndiöxí xii-ndo sã vãha sá cuendá Xítóhó Jesucristú, te ní ngúndecu ndihí-ndo Espíritú Yá Ndiöxí.

Nàcuáa ndùu cuendá yiqui cùñú-ó

¹² Te cãchí ñáyiú sá ncháá sã sání ìní-ó cuu cada-o, te ndáá cãháⁿ-yu dícó-ní sá ñã ncháá cùu-xi sã vãha sá cúú-xí-ó. Te núú cuìní nchaa sá sání ìní-ó-ãⁿ taxi tnùní ñáhá-xí te vá cáda-ó. ¹³ Te nchòhó sa xíní-ndó sã ncháá sã xéxí-ó cuãguee-xi xití-ó, te xití-ó ñí cuáha tnàhí-xi sá cùhúⁿ nchaa sá cáxí-ó, dico xití-ó ndihí nchaa sã xéxí-ó chi naa-xi. Te Xítóhó Jesucristú néhé cuendá-gá yiqui cùñú-ó, te ducaⁿ yiqui cùñú-ó cùu-xi cuendá-gá, te ñá túú ní cuãha yiqui cùñú-ó sã cùndècu-xi ichi díí ìní. ¹⁴ Te dàtná

ní quide Yá Ndiöxí ní dándótó-gã Xítóhó Jesucristú ducaⁿ càda ñaha-gá xii nchoo tucu chi dandòto ñaha-gá xii-o nũu na cùú-ó, chi ndàcu-gá quidé-gã nchaa sã vãha.

¹⁵ Te nchòhó sa nàha-ndo sá yiqui cùñú-ó cùu-xi cuendá Xítóhó Jesucristú chi ìⁿ-ni cùu-o ndihí-gá, núú xíãⁿ ñá túú tnàhí ndùu váha-xi cãháⁿ ndihí-o ñáyiú ndècu ichi díí ìní, chi yiqui cùñú-ó cùu-xi cuendá Xítóhó Jesucristú, te núú ducaⁿ na càda-o te cada iní-ó sã cuendá-ñã ñáyiú-áⁿ cúú yiqui cùñú-ó, núú xíãⁿ ñá túú tnàhí ndùu váha-xi ducaⁿ càda-o. ¹⁶ Te sa xíní-ndó sã nũu ìⁿ téé na cãháⁿ ndihí-dé ìⁿ ñadìhí ndécú ìchi díí ìní te cada iní-ó sã ìⁿ-ñã yiqui cùñú cúú-yu. Te ducaⁿ cãháⁿ-xi núú tütú Yá Ndiöxí núú cãchí-xi: “Ìⁿ téé na cãháⁿ ndihí-dé ìⁿ ñadìhí te ìⁿ-ñã yiqui cùñú cúú-yu”, duha cãchí-xi. ¹⁷ Te ducaⁿ sãtnahá-xi cùu nchaa ñáyiú tnàhá tnúhu ndihí Xítóhó Jesucristú, chi ìⁿ-ñã cúú-yu ndihí-gá.

¹⁸ Te núú xíãⁿ cãháⁿ-í dóho-ndo sã vã cùndècu-ndo ichi díí ìní, chi núú ducaⁿ na càda-ndo te ñá túú tnàhí sã vãha cùu-xi sá cúú-xí yiqui cùñú-ndó chi ío dàcuíta nihnu-xi yiqui cùñú-ndó. Te nchaa dava-gá sá cuèhé sá dúhá ñà túú quide-xi yiqui cùñú-ndó dàtná quidé xíãⁿ. ¹⁹ Te nchòhó sa cùtnuní iní-ndó sã yiqui cùñú-ndó cùu-xi datná ìⁿ vehe núú ndécú Espíritú Yá Ndiöxí. Te ducaⁿ sãtnahá-xi cùu yiqui cùñú-ndó chi ndècu-ndo ndihí Espíritú-gá. Te mee-gã ní taxi-gá Espíritú-gá ndécú ndihí-ndo, te ñá díú mèe-ndo cuu cuendá-ndó mèe-ndo chi Yá Ndiöxí cúú cuendá ñáhá-gã xii-ndo. ²⁰ Te ducaⁿ cùu-ndo ñáyiú cùu cuendá Yá Ndiöxí chi Xítóhó Jesucristú ní nacháhu-gá nchaa yíca cuèchi-ndo. Te núú xíãⁿ xíní ñùhu-xi sá ñihíí ní ndúú-ndó càda-ndo nacuáa cuu cahnu Yá Ndiöxí, te ducaⁿ tàú-xi cada-ndo chi espíritú-ndó ndihí yiqui cùñú-ndó cùu-xi cuendá-gá.

7

Sáhu sã cúú-xí ñáyiú ní tnándaha

1 Te ní quexìo tutú sá nǐ dáquíxí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó nǔú tütú-ndó. Te váha cada-xi te núu vá cándèca téé ñadìhí, te ducaⁿ-ni vâha cada-xi te núu ñáyiu dìhí vá cándècá-yu téé. 2 Te dícó-ni sá nǔú ducaⁿ na càda-ndo te dava-ndo càni iní-ndó cùndecu-ndo ichi díí iní. Núu xiáⁿ xíní ñuhu-xi sá ncháá cuè téé ndi dííⁿ cùndecu ñadìhí-güedé, te ducaⁿ-ni tucu nchaá cue ñáyiu dìhí ndi dííⁿ cùndecu yíi-yu. 3 Te càchí tnúhu-í xii-ndo sá ncháá cuè téé vá cúú càchí-güedé sá vâ cúú càháⁿ ndihí-güedé ñadìhí-güedé, te diu-ni ducaⁿ cuè ñáyiu dìhí tucu, vá cúú càchí-yu sá vâ cúú càháⁿ ndihí-yu yíi-yu. 4 Te nchaá cue ñáyiu dìhí chi ñá díú mèe-ní-yu cùu cuendá-yu yiqui cùñú-yu chi tnàhá cúú cuendá yíi-yu, te ducaⁿ-ni nchaá cue téé tucu chi ñá díú-ní mèe-güedé cúú cuendá-güedé yiqui cùñú-güedé chi tnàhá cúú cuendá cue ñadìhí-güedé. 5 Te cue téé vá cúú càchí-güedé sá vâ cúú càháⁿ ndihí-güedé ñadìhí-güedé. Te ni cuè ñáyiu dìhí vá cúú càchí-yu sá vâ cúú càháⁿ ndihí-yu yíi-yu. Àdi te núu ní ndatnúhu-yu sá vâ dúcáⁿ càdá-yu ñⁿ úú nduu cuendá sá cuíní-yu ío cáháⁿ ndihí-yu Yá Ndiöxí, dico nà yáha núu ná daha nduu ducaⁿ nǐ ndatnúhu-yu sá vâ dúcáⁿ càdá-yu te naníhí tnàhá tucú-yu, chi núu ñáhá te cudana te vá cuácàhnu iní-yu te sácúlhná dacàháⁿ ñáhá-xí xii-yu cadá-yu sá ñà túú tàú-yu cadá-yu.

6 Te tnúhu càháⁿ-í-a quèe-xi sá tée ndihí ñadìhí cuu candeca tnàhá-yu dico ñá túú quide yica-í sá dúcáⁿ càdá-yu. 7 Te yúhú sání iní-í sá nǔú dícó sá cúú te nchaá-ndo cùndecu-ndo datná ndécú-í, dico ñáhá chi mee Yá Ndiöxí ní cachí-gá nàcuáa nduu táhú-ó ñⁿ ñⁿ-o cundecu-o, chi dava-o nǐ cutáhú-ó nǔú-gã sá cùndècu ñadìhí-ó te dava-o ñáhá. 8 Te càchí tnúhu-í xii nchòhó cue téé vátá nihí-gá ñadìhí-xi sá vâha-gá sá nǔú

vá cùndècu ñadìhí-ndó dàtná yúhú. Te ducaⁿ-ni nchòhó cue ñáyiu dìhí ñáyiu vátá nihí-gá yíi-xi sá vâha-gá sá nǔú vá cùndècu yíi-ndo. Te diu-ni duha càháⁿ-í sá cúú-xí nchaá nchòhó ñáyiu dìhí ní quendóo quèé sá vâha-gá sá nǔú vá cándèca-gá-ndó tée. 9 Te càchí tnúhu-í xii nchaá-ndo sá nǔú xito-ndo sá vâ cùndèe iní-ndó cùndecu mee-ndo te váha-gá sá nǔú tnándaha-ndo, te ñá díú sá mée-ní càni cuehé cani duha iní-ndó cùndecu-ndo.

10 Te nchaá nchòhó ñáyiu sa ní tnándaha càháⁿ-í dóho-ndo, te ñá díú mèe-í duha càhu iní-í càháⁿ-í dóho-ndo chi Xítóhó Jesucristú ducaⁿ dàcahu iní ñáhá-gã xii-í, chi mee-gã cuíní-gá cada-ndo nàcuáa na càháⁿ-í-a. Te nchaá nchòhó cue ñáyiu dìhí càháⁿ-í dóho-ndo sá vâ dáñá-ndó yíi-ndo. 11 Te núu ío dava-ndo sá ní dáñá-ndó yíi-ndo, te xini ñuhu-xi sá vâ cándèca-gá-ndó tée, chi cundecu mee-nã-ndó àdi núu ñáhá te naqueheⁿ tucu-ndo tée ní cuu yíi-ndo. Te nchaá nchòhó cue téé ndècu ñadìhí-xi càháⁿ-í dóho-ndo sá vâ dáñá-ndó ñáyiu cùu ñadìhí-ndó.

12 Te tnúhu na càháⁿ-í-a cùu-xi sá nǐ sani iní mèe-í te ñá díú tnúhu sá nǐ cachí Xítóhó Jesucristú càháⁿ-í cúú-xí. Te núu dava nchòhó cue téé ndècu ichi Xítóhó Jesucristú ndécá-ndó ñáyiu dìhí ñáyiu ñá túú ndècu ichi-gá, te vá dáñá-ndó-yu te núu cùu váha iní-yu ndèca ñáhá-yu xii-ndo. 13 Te núu dava nchòhó cue ñáyiu dìhí ñáyiu ndècu ichi Xítóhó Jesucristú ndécá-ndó cuè téé ñá túú ndècu ichi-gá te vá dáñá-ndó-güedé te núu cùu váha iní-güedé ndécá ñàha-güedé xii-ndo. 14 Te núu ñⁿ téé ñá túú sàndáá iní-dé Xítóhó Jesucristú te ñadìhí-dé sàndáá iní ñáhá-áⁿ xii-gá, te téé-áⁿ nǐ cuu-dé ñⁿ téé sa ní cuyatni tnàhá tnúhu ndihí ñàha xii-gá sá cuendá ñadìhí-dé. Te ducaⁿ sãtnahá-xi cùu tucu ñadìhí ñá túú sàndáá iní ñáhá xii Xítóhó Jesucristú te yíi-aⁿ sàndáá iní ñáhá-dé xii-gá, te ñàha-áⁿ sa ní cuyatni tnàhá tnúhu-aⁿ ndihí-gá sá cuendá yíi-aⁿ,

te ñi-ni ducaⁿ sãtnahã-xi cùu cue landú-yu chi sa ní cuyatni tnahã tñuhu-güexi ndihí-gã. Te núu vá dúcãⁿ cùu te cue landú-yu-ãⁿ ño xica cùndecu-güexi núu-gã. ¹⁵ Te núu ñiⁿ téé ñã túú sãndãã iní ñãhá xii Xítohó Jesucristú cuiní-dé ñãhá tñaha-dé ndihí ñãdihí-dé ñãhá sãndãã iní ñãhá xii Xítohó Jesucristú, te ñi-ni na càda-dé nãcuãã sãni iní-dé. Te ñi-ni ducaⁿ tucu te núu ñãdihí ñãhá ñã túú sãndãã iní ñãhá xii Xítohó Jesucristú cuiní-aⁿ ñãhá-aⁿ téé sãndãã iní ñãhá xii-gã, téé cùu yí-aⁿ te ñi-ni na càda-aⁿ nãcuãã sãni iní-aⁿ. Chi téé sãndãã iní ñãhá xii Xítohó Jesucristú ñã túú tàú-dé cada yica-dé ñãdihí-dé cundecu ndihí ñãhá-aⁿ xii-dé te núu ñã túú cuiní-aⁿ. Te ñi-ni ducaⁿ ñãdihí ñãhá sãndãã iní ñãhá xii-gã ñã túú tàú-aⁿ cada yica-aⁿ cundecu ndihí ñãhá yí-aⁿ xii-aⁿ te núu ñã túú cuiní-dé cundecu ndihí ñãhá-dé xii-aⁿ, chi Yã Ndiõxí cuiní-gã sã nchãã nchòo ñãyiu ndècu ichi-gã cundecu váha-o vã nãã-ó. ¹⁶ Chi cue téé sãndãã iní tñuhu Xítohó Jesucristú ñã túú cùtnuní iní-güedé te núu ndacu-güedé canu ichi-güedé ñãdihí-güedé ichi-gã àdi ñãhá te núu ñã túú sãndãã iní ñãhá-yu xii-gã, te ducaⁿ-ni cuè ñãyiu ñãdihí sãndãã iní tñuhu Xítohó Jesucristú ñã túú cùtnuní iní-yu te núu ndacú-yu canu ichi-yu yí-yu ichi-gã àdi ñãhá te núu ñã túú sãndãã iní ñãhá-güedé xii-gã.

¹⁷ Te duha na càchí tñuhu-í xii-ndo, nchãã chiuⁿ ní nduu tãhú-ndó nũú Yã Ndiõxí quidé-ndó ndèé cùtnãhá ní cáháⁿ ñãhá-gã xii-ndo ñi natuha-ndo ichi-gã te ñi-ni chiuⁿ-ãⁿ cada-ndo cùndecu-ndo. Te nchãã xichi núu tàcã ñãyiu ñãcuaha tñuhu-gã ñi-ni duha càháⁿ-í dóho-yu. ¹⁸ Te nchãã cue téé ndècu seña ñi-xi ñãtnã ní cãchí ndí Moisés, cue téé ní cáháⁿ Yã Ndiõxí ndécú ichi-gã, te ñi-ni ducaⁿ cùnduu-güedé cundecu-güedé, te nchãã cue téé ñã túú ndècu seña ñi-xi ní cáháⁿ-gã cundecu ichi-gã, ñi-ni ducaⁿ cùnduu-güedé cundecu-güedé vá cuãha-güedé seña ñi-güedé. ¹⁹ Te ñi-ni cùu-xi cuéi na cuãha-o seña

ñi-o àdi vá cuãha-o. Te sã ño-gã xini ñi-ni-xi cada-o xiãⁿ cúu-xi sã càdá-ó nchãã nãcuãã cuiní Yã Ndiõxí. ²⁰ Chi xini ñi-ni-xi sã cùndecu-ni-o ñãtnã ndécú-ó cùtnãhá ní cáháⁿ ñãhá Yã Ndiõxí xii-o ñi ngùndecu-o ichi-gã. ²¹ Te núu cùu-ndo ñãyiu ñã túú tñãhí ñãhá quee núu chíuⁿ pãtróoⁿ-xi cùtnãhá ní cáháⁿ ñãhá Yã Ndiõxí xii-ndo, te ñã túú ñã caní iní-ndó, dico núu ñãhá ñãhá pãtróoⁿ-ndó quee-ndo núu chíuⁿ-ndó te váha-ni quee-ndo nũú chíuⁿ-ndó. ²² Te sãtã ñi cáháⁿ ñãhá Xítohó Jesucristú xii nchòhó ñãyiu ducaⁿ ñã túú tñãhí ñãhá quee núu chíuⁿ pãtróoⁿ-xi-ãⁿ, te ní cuu-ndo ñãtnã ñãyiu ñãhá quee nũú chíuⁿ pãtróoⁿ-xi sã cúu-xi-gã, te ducaⁿ chi ñã túú-gã ndécú-ndó ichi cuehé ichi duha. Te nchòhó ñãyiu ñãhá quee nũú chíuⁿ pãtróoⁿ-xi cùu-ndo ñãtnã ñãyiu ñã túú tñãhí ñãhá quee núu chíuⁿ pãtróoⁿ-xi sã cúu-xi Xítohó Jesucristú, te ducaⁿ chi xinu cuechi-nã-ndó nũú-gã. ²³ Te Yã Ndiõxí ní nduu cuendã ñãhá-gã xii-o chi Xítohó Jesucristú ní nachãhu-gã nchãã yicã cuèchi-o sã ndécú nũú Yã Ndiõxí ní cùu, te vá ñãhá-ndó sã tñãhá ñãyiu-ndo ñãdatuhú iní ñãhá-yu xii-ndo vã cùnú cuèchi-ndo núu Xítohó Jesucristú nãcuãã tàú-xi cunduu. ²⁴ Te núu xiãⁿ càchí tñuhu-í xii nchãã nchòhó ñãyiu ndècu ndihí-í ichi Xítohó Jesucristú sã cùndecu-ni-ndo ñãtnã-ni ndècu-ndo ndèé cùtnãhá ní cáháⁿ ñãhá-gã xii-ndo, te ñi-ni ducaⁿ cùndecu-ndo ichi-gã.

²⁵ Te càchí tñuhu tucu-í xii-ndo sã Xítohó Jesucristú ñã túú càchí tñuhu-gã xii-í nũú nãsa cáháⁿ-í cuendã nchãã ñãyiu vátã tñãndaha-gã. Te duha sãni iní-í cáháⁿ-í cuendã-yu, te nchòhó cuu quindãã iní-ndó tñuhu càháⁿ-í chi Xítohó Jesucristú chindèe chitúu ñãhá-gã xii-í. ²⁶ Te yúhú càchí-í sã sã cuendã nchãã tñãndòho tñuhu ñãhú ío ñuyú-a vitna, te váha-gã sã nchãã ñãyiu te núu nãsa xindécú-yu te ducaⁿ-ni na cùndecú-yu. ²⁷ Te nchãã cue téé ndècu ñãdihí-xi te ducaⁿ-ni na cùndecu-güedé ndihí-yu, te nchãã cue téé ñã túú ñãdihí-xi te ducaⁿ-ni

na cùnduu-güedé vá ndúcú-güedé ñadihí-güedé. ²⁸ Dico nchaa cue téé na ndùcu ñadihí-xi te ñá díú ñⁿ cuéchi cùu-xi sá dúcáⁿ ná ndùcu-güedé ñadihí-güedé, te ñu-ni ducaⁿ cùu tucu cue ñáyiu ñihí te núu na ñihí-yu yí-yu chi ñá díú ñⁿ cuéchi cùu-xi sá dúcáⁿ ñihí-yu yí-yu. Te núu cue téé na ñihí-güedé ñadihí-güedé te nándi ndohó-yu cundecú-yu ñuyíú-a, te núu xíáⁿ duha càháⁿ-í cuèndá sá vǎ ndúcú-güedé ñadihí-güedé cuèndá sá vǎ ndóhó-yu.

²⁹ Te nchaa nchòhó ñáyiu ndècu ndihí-í ichi Xítóhó Jesucristú na càchí tñuhu-í xii-ndo sǎ ñǎ túú-gǎ vǎi nduu cumání te quixi tucu Xítóhó Jesucristú, núu xíáⁿ xíní ñùhu-xi sá ndèé vitna ngüíta nchaa cue téé ndècu ñadihí-xi cada-güedé chiúⁿ Xítóhó Jesucristú, te cada-güedé dàtná sá ñǎ túú ñadihí-güedé. ³⁰ Te nchaa ñáyiu ndihú iní-xi te na càda-ní-yu sá ñǎ túú ndihú iní-yu cada-yu chiúⁿ Yá Ndióxi. Te nchaa ñáyiu cùdíí iní-xi te na càda-ní-yu sá ñǎ túú cùdíí iní-yu cada-yu chiúⁿ-gá, te nchaa ñáyiu ndècu ndihí nándi sá ndécú ndihí te na càda-ní-yu sá ñǎ túú nǎ ndécú ndihí-yu cada-yu chiúⁿ-gá. ³¹ Te nchaa ñáyiu nèhe chiuⁿ nchaa sá ió ñuyíú-a te na càda-ní-yu cuèndá sá ñǎ túú nǎ néhé chiúⁿ-yu cada-yu chiúⁿ Yá Ndióxi, chi nchaa sá ió ñuyíú-a sa ñùhu-xi ichi cuáháⁿ-xi núu ndihí ñihnu-xi.

³² Te cuíní-í sá vǎ cúhúⁿ iní-ndó nándi sá ió ñuyíú-a, te ni ñǎ túú tñahí ná cani iní-ndó cundecu-ndo, chi nchaa cue téé ndècu ichi Xítóhó Jesucristú xíndecu mee ió ñùhu iní-güedé cada-güedé chiúⁿ-gá nàcuáa cudíu-güedé núu-gǎ. ³³ Te nchaa cue téé sa ndècu ñadihí-xi cue téé ndècu ichi-gá ñùhu iní-güedé nàcuáa cada-güedé cundecu-güedé ñuyíú-a cuèndá ducaⁿ cùdiu-güedé núu ñadihí-güedé. ³⁴ Te ñu-ni ducaⁿ cùu tucu cue ñáyiu ñihí chi ñá túú ñⁿ-ni cuu ñáyiu sa ndècu yí-xi ndihí ñáyiu

vátá cùndècu-gá yí-xi, chi ñáyiu ndècu ichi Xítóhó Jesucristú ñá túú ndèca téé ió ñùhu iní-yu cada-yu chiúⁿ-gá nàcuáa ñihí ní ndúú-yu cundecu yíñùhú-yu núu Yá Ndióxi, dico cue ñáyiu ñihí ndécá tée ndècu ichi-gá ió ñùhu iní-yu nàcuáa cundecú-yu ñuyíú-a cuèndá cudíu-yu núu yí-yu.

³⁵ Te duha càháⁿ-í cuèndá cúu-xí ñⁿ sá vǎha xii-ndo, te cudíu núu tñahá-ndó, te cuu-ndo ñáyiu cada ndáá núu Xítóhó Jesucristú, te mee-ni-gǎ cuhuⁿ iní-ndó. Te ñá díú sǎ dúhá càháⁿ-í te quide yica-í sá cáda-ndó nàcuáa càháⁿ-í.

³⁶ Te núu ió dava-ndo sǎni iní-ndó sǎ ñǎ túú nduu váha-xi sá ió cuu sacuéhé ñéhe yoco-ndo cundecú-yu ña, te núu sǎni iní-ndó sǎ vǎha-gá candecá-yu téé te cada-ndo nàcuáa sǎni iní-ndó, chi ñá díú ñⁿ cuéchi cùu-xi. ³⁷ Te núu dava-ndo ndècu ñéhe yoco-ndo, te vá yóo ñⁿ cada yica ñaha xii-ndo sá cándecá-yu téé. Te núu mee-ndo sǎni váha iní-ndó nàcuáa cada-ndo, te núu vá dásáⁿ-ndó ñéhe yoco-ndo càndeca ñaha téé te quide váha-ndo sǎ dúcáⁿ quide-ndo. ³⁸ Te nchaa ñáyiu dásaⁿ ñéhe yoco-xi càndeca ñaha téé te váha-ni quidé-yu, te nchaa ñáyiu ñá túú dásaⁿ ñéhe yoco-xi càndeca ñaha téé te váha-gá tucu quidé-yu sá dúcáⁿ quidé-yu.

³⁹ Te nchaa ñáyiu ñihí ndécú yí-xi xini ñuhu-xi sá cùndècu-ní-yu ndihí yí-yu ñini ndècu vívú-güedé chi ducaⁿ càháⁿ tñuhu sá dánèhé ñahá xii-o nàcuáa cada-o cundecu-o, dico núu na cúu-güedé te cuu naquehéⁿ-yu ingá téé candecá-yu dicó-ni sá ñu-ni téé ndècu ichi Xítóhó Jesucristú. ⁴⁰ Te yúhú sání iní-í sá ió-gá váha cundecú-yu te núu vá nánducú-yu ingá téé candecá-yu, te duha càháⁿ-í chi Espíritú Yá Ndióxi ducaⁿ dàcahu iní ñahá-xí xii-í cáháⁿ-í.

8

Cuèndá nchaa sá nchító-ó sǎñaha ñáyiu nduu táhú nchaa sá càchí-yu cùu ndióxi

1 Te vitna na càháⁿ-í cuendá nchaa sá nchító-ó sãñaha ñãyiu ndùu táhú nchaa sá càchí-yu cùu ndióxí te ñá ndàá chi dicó ndaha cue tee ñuyíú-a ní cuáha nchaa xiãⁿ. Te nchoo sa cùtnuní váha iní-ó cuendá nchaa xiãⁿ, dicó-ni sá cuendá nchaa sá cùtnuní váha iní-ó xiãⁿ quidé càhnu-o mee-o, dico núu cùu iní-ó tnàha ñãyiu-o te canu ichi-ò-yu ichi váha. 2 Te núu dava-ndo sàni iní-ndó sã tũha-ndo dico cùu-ndo ñãyiu vátá cùtũha-gá nàcuáa tàú-xi cunduu. 3 Te núu nchòhó cúú iní-ndó Yã Ndióxí te mee-gã cáháⁿ-gá sá cúú-ndó ñãyiu cùu cuendá-gá.

4 Te vitna na càchí tnúhu-í xii-ndo nàcuáa ndùu cuendá nchaa sá nchító-ó sãñaha ñãyiu ndùu táhú nchaa sá càchí-yu cùu ndióxí te ñá ndàá chi dicó ndaha cue tee ñuyíú-a ní cuáha nchaa xiãⁿ. Te nchoo cùtnuní iní-ó sã ncháá sã càchí ñãyiu cùu ndióxí cádũha-yu ñuyíú-a ñá túú cùu-xi ndióxí, chi ñndii díí-ni Yá Ndióxí ndécú. 5 Te cue ñãyiu ñuyíú-a càchí-yu sá cuëi andiu te cuëi ñuyíú-a ndècu tĩtní ndióxí. Te ndáá sá ndèni ní cuu ndècu espíritú sá càchí ñãyiu cùu ndióxí te ñá ndàá sá ndióxí cúú-xí, te nchaa xiãⁿ táxí tnùní ñáhá-xí xii-yu. 6 Te nchoo cùtnuní ndáá iní-ó sã ñndii díí-ni Yá Ndióxí ndécú te diu-gá cúú-gã Tátá-ó, te nchoo cùu-o ñãyiu cùu cuendá-gá. Te diu-ni mee-gã ní táuchíúⁿ-gã ní cuáha nchaa sá ió ñuyíú-a, te cùtnuní tucu iní-ó sã ñndii díí-ni Xítóhó Jesucristú ndécú, te Yaá-áⁿ ñi quide-gá nchaa chiúⁿ ní táhú Dũtú Ndióxí ní cadúha-gá nchaandi túhú sá ió ñuyíú. Te diu-ni mee Xítóhó Jesucristú quidé ndècu-o ichi-gá vitna.

7 Te ñá ncháá nchòhó ñãyiu ndècu ichi Xítóhó Jesucristú cùtnuní iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sá càchí-yu cùu ndióxí ní cùu. Te cuendá xiãⁿ nũu nàqueheⁿ-ni-ndo nchaa sá nchító-ó ndùu táhú nchaa sá càchí-yu cùu ndióxí-áⁿ xéxi-ndó, te sàni-ni iní-ndó sã quidé càhnu-ndo nchaa sá càchí-yu cùu ndióxí-áⁿ

te ñá ndàá sá ndióxí cúú-xí. Te núu sàni iní-ndó sã ñá túú váha caxi-ndo sá dúcáⁿ ndùu táhú-xi-áⁿ te xéxi-ndo te xiãⁿ ñá túú cùu váha iní-ndó cuendá sá dúcáⁿ quide-ndo.

8 Te ñá díú nchàa sá xéxi-ó quide-xi cudũu-o núú Yã Ndióxí, chi ñni quide-xi cuëi na càxi-o àdi vá cáxí-ó chi ni ñni sá cáxí-ó vã chĩndèe ñaha-xi cudũu-o núú Yã Ndióxí. Te cuëi vá cáxí-ó dico ñá díú xiãⁿ cada sá vã cùdũu-o núú-gã. 9 Te cuu-ni caxi-ndo nchàa nani ñihí-ndó. Te dicó-ni sá càda cuendá-ndó sã ñá díú cuendá sá xéxi-ndó-ãⁿ cuíta ñihnu dava ñãyiu ndècu ndihí-ndo ichi Xítóhó Jesucristú cadá-yu nãndi sá cáda-yu nàcuáa vá cúú váha iní Yã Ndióxí chi ñãyiu-áⁿ ñá túú cùtnuní iní-yu.

10 Te nchòhó ñãyiu xini váha cuendá nchaa sá càchí-yu cùu ndióxí, te núu na quihíⁿ-ndó nũú ndécú nchàa xiãⁿ te ngóo-ndo càxi-ndo nchaa sá ñi cutáhú-xi, te quiní ñãyiu ndècu ndihí-ndo ichi Xítóhó Jesucristú, ñãyiu vátá cùtnuní-gá iní-xi nàcuáa ndùu cuendá nchaa sá dúcáⁿ càchí-yu cùu ndióxí-áⁿ, te cuëi sàni iní-yu sá ñá túú quide váha-ndo sã dúcáⁿ quide-ndo te cudana te cada yicá-yu caxi-yu tnàhá-yu nchaa sá dúcáⁿ ñi nduu táhú nchaa sá càchí-yu cùu ndióxí-áⁿ te ñá ndàá sá ndióxí cúú-xí. 11 Te núu ducaⁿ cùtnuní iní-ndó nàcuáa ndùu cuendá nchaa xiãⁿ te ducaⁿ quide-ndo, te sá dúcáⁿ quide-ndo-ãⁿ te dàcuíta ñihnu-ndo dãva-gá ñãyiu ndècu ndihí-ndo ichi Xítóhó Jesucristú, ñãyiu vátá cùtnuní-gá iní-xi nàcuáa ndùu cuendá nchaa xiãⁿ, te diu cuendá tnàhá ñãyiu-áⁿ ñi xihí Xítóhó Jesucristú. 12 Te sá dúcáⁿ quide-ndo-ãⁿ cúú-xí ñni cuëchi núú Xítóhó Jesucristú, chi quide-ndo nàcuáa xinu iní-yu cadá-yu ñni sá sání iní-yu ñá túú váha, núu xiãⁿ ñá túú quide váha-ndo sã cúú-xi-yu. 13 Te núu yúhú cùtnuní iní-í sá sã cuendá ñni sá cáxi-í te ngóo ñni ñãyiu ndècu ndihí-í ichi Xítóhó Jesucristú cadá-yu ñni sá vã cúú váha iní Yã Ndióxí, te váha-gá sá vã cáxi-gã-í xiãⁿ cuendá sá vã cáda-yu ñni sá vã cúú váha iní-gá.

9

Nchaa sá cúú càda cue téé ní táúchíúⁿ Xítóhó Jesucristú cáháⁿ tnúhu-gá

¹ Te yúhú chi cuu cada-í nchaa sá sání ìní-í, chi tnàhá-í ní táúchíúⁿ Xítóhó Jesucristú cáháⁿ-í tnúhu-gá núú ñáyiú. Te yúhú ní xiní núú-í Xítóhó Jesucristú Yáá cúú Xítóhó-ó te nchòhó cúú-ndó ñáyiú ní sándáá iní tnúhu-gá sá càháⁿ-í te ducaⁿ chi ndècu ndíhí-í-gá. ² Te ió dava ñáyiú ñá túú sándáá iní-yu sá Xítóhó Jesucristú ní táúchíúⁿ-gá cáháⁿ-í tnúhu-gá, dico nchòhó chi cùtnuní ndáá iní-ndó sá díú-gá ní tendaha ñàha-gá xii-í xícá cù-í càháⁿ-í tnúhu-gá, te ducaⁿ chi yúhú ní cáháⁿ-í tnúhu-gá núú-ndó te ní sándáá iní-ndó-gá te xíáⁿ cùtnuní sá díú-gá ní tendaha ñàha-gá xii-í xícá cù-í càháⁿ-í tnúhu-gá núú ñáyiú.

³ Te duha ndùu tnúhu càháⁿ-í cuèndá cundedóho nchaa ñáyiú sàtnuhu ñaha xii-í. ⁴ Chi yúhú cuu-ni caxi-í nchaa núú sá cúú càxi-o na taxi ñáyiú. ⁵ Te cuu-ni cundecu ñàdìhí-í te caca ndeca-í-yu nchaa núú xícá cù-í càháⁿ-í tnúhu Yá Ndiöxí dàtná quidé dàva-gá cue téé càháⁿ tnúhu-gá, ndíhi cue téé cùu ñaní Xítóhó Jesucristú, ndíhi té Pèlú. ⁶ Te tnàhá yúhú ndíhi té Bèé cuu daña-ndí chiuⁿ quide-ndí te cada-ndí dàtná xiquide dàva-gá-güedé càháⁿ-güedé tnúhu Xítóhó Jesucristú. ⁷ Te nchoo xini-ó sá ncháá cuè sandadú dacuití sá ñúhú yáhu-güedé xínú cuèchi-güedé, te ñá túú dicó ducaⁿ xínu cuèchi-güedé. Te ducaⁿ sàtnahá-xi cùu tucu ñáyiú xítu ñⁿ sá xítú chi dacuití ñíhí-yu ñⁿ sá xítú-yu xèxi-yu, te ñá díú dicó ducaⁿ xítú-yu. Te ducaⁿ cùu tucu cue téé cùu toli chi quihni-güedé dícu quití xító-güedé xíhi-güedé te ñá túú dicó ducaⁿ xító-güedé-dí. ⁸ Te vá cání ìní-ndó sá sá dúhá càháⁿ-í te càhu iní mée-í duha càháⁿ-í, chi tnúhu càháⁿ-í-a ñⁿ-ni quèe-xi ndíhi tnúhu ní cáháⁿ ndíi Moisés. ⁹ Chi ndíi-áⁿ ní chídó tnùní ndíi núú tütú ndíi nàcuáa ní xáhaⁿ Yá Ndiöxí xii

ndíi, te càchí-xi: “Vá chíhí-ndó ñùnu yuhu ndicutu oré danchihí-di triú”, duha càchí-xi núú tütú ndíi. Te ñá díú sá dúcáⁿ ní cáháⁿ Yá Ndiöxí te càháⁿ-gá mee-ni cuèndá ndicutu-áⁿ.

¹⁰ Chi ní cáháⁿ-gá cuèndá nchoo cuè ñáyiú ndècu ichi-gá, te ndáá sá díú cuèndá-ó dùcaⁿ ní cáháⁿ-gá. Te nchaa cue téé xítu chihi tatá sání iní-güedé sá díú tàtá chíhí-güedé-áⁿ cuu sá caxí-güedé, te díu-ni ducaⁿ cùu tucu cue téé xícani triú chi càni-güedé cuèndá quee caxi-güedé. ¹¹ Te ducaⁿ sàtnahá-xi cùu nchúhú cue téé càháⁿ tnúhu Xítóhó Jesucristú, chi dànehé ñáhá-ndí xii-ndo cuèndá nchaa sá vaha quide ñaha Yá Ndiöxí xii-o, núu xíáⁿ dai tàú-xi sá nchòhó chindee ñàha-ndo xii-ndí núu ná cúú sá xiní ñúhu-ndí. ¹² Te núu dava cue téé càháⁿ tnúhu Yá Ndiöxí chindèe-ndo-güedé, te uuⁿ-gá ducaⁿ tàú-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tàú ndisa-ndo sá chindèe ñaha-ndo xii-ndí dico ñá túú dùcaⁿ caháⁿ-ndí núú-ndó càda-ndo, te quide cahnu iní-ndí cuèi nándi sá tá yáha-ndí véxi. Te ducaⁿ quide-ndí cuèndá sá ñà túú ñà cani iní ñáyiú cuèndá-ndí te ducaⁿ cuíta cuténuu-gá tnúhu sá càháⁿ nàcuáa naníhí tàhú-ó quíhíⁿ. ¹³ Te nchòhó xiní-ndó sá ncháá cuè téé xínu cuèchi veñúhu díu-ni xíáⁿ ñíhí-güedé xéxi-güedé, te díu-ni cue téé-áⁿ xínú cuèchi-güedé núú xihí quití ndùu tàhú Yá Ndiöxí, te díu-ni xíáⁿ ñíhí tucu-güedé sá xéxi-güedé. ¹⁴ Te díu-ni ducaⁿ sàtnahá-xi cùu nchúhú cue téé càháⁿ tnúhu sá càháⁿ nàcuáa naníhí tàhú-ó, chi Xítóhó Jesucristú ní cachí-gá sá díú-ni cuèndá chiuⁿ quide-ndí ñíhí-ndí caxi-ndí. ¹⁵ Te ñá ñⁿ ndùu cáháⁿ-í núú-ndó càda-ndo nàcuáa tàú-xi cunduu sá cúú-xi-í, te vá cání ìní-ndó sá sá dúhá càháⁿ-í te ñⁿ sá xícáⁿ-í núú-ndó. ¡Chi cuèi na cúú-í sá ndòhò-í te ñá díú sá càháⁿ ñáyiú sá sá cuèndá sá càháⁿ-í tnúhu Xítóhó Jesucristú ñíhí-í xéxi-í!

¹⁶ Te yúhú ñá túú quide cahnú-í mée-í sá càháⁿ-í tnúhu sá càháⁿ nàcuáa naníhí tàhú-ó, chi tàú tnàhá-í sá càdà-í

chi ducaⁿ ñ cachí Yă Ndiöxí cada-í. Te ndahú ní cuu yúhú te núu vá cãháⁿ-í tnúhu-áⁿ! ¹⁷ Te ñá túú cãháⁿ-í tnúhu-gá sá cúú ìní mée-í chi mee-gã ní táuchíúⁿ-gã cáháⁿ-í tnúhu-gá. Te núu cãháⁿ-í tnúhu-gá sá cúú ìní mée-í te tàú-í níhì-í sá ndúú tãhù-í ní cùu. ¹⁸ Dico sá sà ní nduu tãhù-í cúú-xí sã ïo cùdí ìní-í sá dìcò ducaⁿ cãháⁿ-í tnúhu sã cãháⁿ nãcuáa naníhí tãhù-ó. Te cuèi tàú-í queheⁿ-í sá táxí-ndó ndúu tãhù-í sã cuendá sã cãháⁿ-í tnúhu Xítohó Jesucristú, dico ñá túú dùcaⁿ quide-í. ¹⁹ Te sá dúcáⁿ dìcò ducaⁿ cãháⁿ-í tnúhu sã cãháⁿ nãcuáa naníhí tãhù-ó, xiãⁿ ni ìⁿ ñáyiu ñuyúú-a vá cúú cãchí-yu sá táxí tnùnì ñáhã-yu xii-í, te cuèi ducaⁿ dico mee-í ní sanì iní-í sá cùú-í dàtná ìⁿ tée xínu cuechi núu nchaa ñáyiu cuendá ducaⁿ cuíta cuu vaí-yu tuhá-yu ichi Xítohó Jesucristú quíhíⁿ. ²⁰ Te òré ñúhú tnàhí tnuú cue ñáyiu isràél te quide-í sá ìⁿ-ní cùu-í ndihí-yu cuèi ñá túú nchìcúⁿ nihnu-í tnúhu ní cáháⁿ ndíi Moisés, te ducaⁿ quide-í cuendá sã ñáyiu-áⁿ quindáá iní-yu tnúhu cãháⁿ-í te tuhá-yu ichi Xítohó Jesucristú. ²¹ Te òré ñúhú tnàhí tnuú nchaa ñáyiu ñá túú nchìcúⁿ nihnu-í tnúhu ní cáháⁿ ndíi Moisés, te quide-ní-í sá quidè-í dàtná quidé mée-yu cuendá quindáá iní-yu tnúhu cãháⁿ-í, te tuhá-yu ichi Xítohó Jesucristú. Te cuèi ducaⁿ quide-í dico ñá túú dàña ndeé-í quidè-í nchaa nãcuáa cuiní Yă Ndiöxí cada-o, te ducaⁿ chi nchìcúⁿ nihnu-í quidè-í nchaa nãcuáa cãháⁿ Xítohó Jesucristú. ²² Te òré ndécù-í ndihí nchaa ñáyiu ñá túú cùtnuní váha iní-xi nãcuáa cundecu ichi Xítohó Jesucristú, te tnàhá-í quidè-í dàtná quidè-yu cuendá sá ná tédóho-yu nchaa tnúhu cãháⁿ-í te ducaⁿ cùtnuní-gá iní-yu nãcuáa cundecu-yu ichi-gá. Te nchaandi túhú ñáyiu quide-í sã ìⁿ-ni cuu-í ndihí-yu cuendá ducaⁿ níhì-í nãcuáa cada-í te cundedóho-yu tnúhu cãháⁿ-í te tní-yu ichi Xítohó Jesucristú te naníhí tãhù-yu. ²³ Te duha quide-í cuendá sá cuíta quindáá iní-yu tnúhu sã cãháⁿ nãcuáa naníhí tãhù-ó quíhíⁿ, te ducaⁿ

te tnàhá yúhú ïo váha cundecu-í dàtná cãháⁿ tnúhu-áⁿ.

²⁴ Te nchòhó sa xini-ndó sã ncháa cuè tée xínu quíhu màrcúhyú nchaa-güedé xínu-güedé, dico ìⁿ-ni-dé cúú tée ndacu ngodó núu te tée-áⁿ cúú tée níhí sá ndúú tãhù-xi, te ducaⁿ xini ñuhu-xi cada nchòhó tucu chi cada-ndo nchaa nãcuáa cuiní Yă Ndiöxí cada-ndo cuendá ducaⁿ níhí-ndó sã ndúú tãhù-ndó. ²⁵ Te nchaa cue tée xini dadiqui te váha váha quide cuendá-güedé núu ná cúú sã cadá tneñu te xòcani-güedé cuendá sã ñá díú xiãⁿ cada te cuíta-güedé òré dadiqui-güedé. Te ducaⁿ quide-güedé cuendá cuiní-güedé níhí-güedé sã ndúú tãhù-güedé, te sã ndúú tãhù-güedé-áⁿ cúú-xí ìⁿ sã ndihí nihnu ñuyúú-a. Dico nchoo ndùcu ndee-o quide-o nãcuáa níhí-ó sã ndúú tãhù-ó, te xiãⁿ cudí-xi cundecu ndihí-o ní caa ni quíhíⁿ. ²⁶ Te yúhú quidè-í dàtná quidé cuè tée xínu, chi cue tée-áⁿ xini-güedé núu quéxio-güedé, te quide tucu-í dàtná xiquide cue tée sa ní cutúha nãá, te ñá túú quide-í dàtná quidé cuè tée vitna dàcuaha naá. Te ducaⁿ chi yúhú quidè-í nchaa nãcuáa cuiní Yă Ndiöxí cundecu. ²⁷ Te yúhú ñá túú dàña-í taxi tnùnì ñáhã ni ìⁿ sã cuèhé sã dúhá xii-í chi yòtni-í mée-í. Te ducaⁿ quide-í chi yúhú cãháⁿ-í tnúhu Xítohó Jesucristú núu ñáyiu, te cuiní-í sã vã cuíta sã ñ cachí Yă Ndiöxí nduu tãhù-í.

10

Cuendá nchaa sã ñ cadúha cue tée ñuyúú-a quide cahnu ñáyiu

¹ Te nchòhó ñáyiu ndècu ndihí-í ichi Xítohó Jesucristú na cãchí tnúhu-í xii-ndo cuendá nchaa ñanì tnàhá-ndí ñáyiu isràél ní xindecu ndeé sanaha, chi vitna tnàhá nchòhó cúú-ndó dàtná cue ñanì tnàhá nchaa ñáyiu-áⁿ chi ndècu-ndo ichi-gá. Te nchaa ñáyiu-áⁿ ñ taxi ndecu Yă Ndiöxí ìⁿ vícò ñ dánèhé ñáhã-xí xii-yu ichi quíhíⁿ-yu, te ní quée dava ndute làmár naní Măr Tícuèhé te ncháa-yu ní yáha-yu. ² Te sá dúcáⁿ ñ cuu te

nchaá-yu ñⁿ-ná ní cuú-yu ndihí ndíi Moisés, te ní xihí ndaha ñaha ndíi xií-yu. ³ Te nchaá-yu ní xexí-yu sá ní sáñaha Yă Ndiöxí xií-yu. ⁴ Te ducaⁿ nchàa tucú-yu ní xihí-yu ndute sá ní sáñaha-gă xií-yu, ndute sá ní quee yiqui nàha cava. Te cava-áⁿ cada iní-ó sã cúu-xí dàtná Xítohó Jesucristú te ducaⁿ chi ndihí ñaha-gă xií-yu ichi cuáháⁿ-yu dàvá-áⁿ. ⁵ Dico ío vâi-yu ñá túú ní quidé-yu nàcuáa càháⁿ Yă Ndiöxí, te xiăⁿ ñá túú ní cùu váha iní ñáhá-gă xií-yu. Te sá dúcáⁿ ní quidé-yu núu xiăⁿ òré ñúhũ-yu ichi cuáháⁿ-yu xití yucu ío vâi-yu ní xihí.

⁶ Te ducaⁿ ñí cuu cuendá nchoo vã cáncñicúⁿ nihnu-o càda-o nacuáa ní quidé-yu, chi ñáyiu-áⁿ mee-ni nchàa sá cuèhé sá dúhá ñí sani iní-yu ní quidé-yu. Te nchoo xìni ñuhu-xi sá vã dúcáⁿ càda-o. ⁷ Te yúhú càháⁿ-í dóho-ndo sã vã quindáá iní-ndó te ni vã cáda càhnu-ndo ni ñⁿ sá càchí-yu cùu ndióxí ní cadúha cue téé ñuyíú-a dàtná ní quide cue ñaní tnáhá-ndí ní xindecu ndéé sanaha. Chi ñáyiu-áⁿ ñí quidé-yu dàtná càháⁿ-xi núú tütú Yă Ndiöxí núú càchí-xi: “Nchaa ñáyiu ní xexí-yu ní xihí-yu ní quidé-yu vico, ní quide càhnu-yu sá càchí-yu cùu ndióxí ní cadúha-yu te ñá ndàá sá ndiöxí cúu-xí”, duha càchí-xi núú tütú-gá. ⁸ Te ni vã cùndècu-ndo ichi díí iní dàtná ní quide dava ñáyiu-áⁿ, chi sá dúcáⁿ ñí quidé-yu te ní xihí ócò úní mĩl-yu ñⁿ-ni ndùu. ⁹ Te vã cání iní-ndó sã sã cáhnu iní Yă Ndiöxí te nándi sá cuèhé sá dúhá càda-ndo cuendá cuiní-ndó quini-ndó núu nása cada ñaha-gă xii-ndo, chi ñáyiu ní xindecu ndéé sanaha-ăⁿ ducaⁿ ñí xóo cadá-yu, te ní xihí-yu ní xexihaⁿ cõó. ¹⁰ Te ni vã càháⁿ cuèhé-ndó cuendá Yă Ndiöxí, chi dava ñáyiu ní xindecu ndéé sanaha-ăⁿ ducaⁿ ñí quidé-yu ní càháⁿ cuèhé-yu cuendá-gá te ní quixi espíritú xínú cuèchi núu-gă ní sahani ñaha-xi xií-yu.

¹¹ Te ducaⁿ ñí cuu te ducaⁿ ñí ngúndéé núú tütú Yă Ndiöxí cuendá dacuàha-o vitna ta cuyatni nduu naa ñuyíú-a. Te nchaa tnúhu sá ñí

ngódó tnùní-áⁿ càháⁿ dóho ñaha-xi xii-o cuendá sá vã cáda-ó dàtná ní quide ñáyiu-áⁿ. ¹² Te xiăⁿ núu nchaa nchòhó ñáyiu sàni iní sá ío váha cùndáá ndécú ichi Xítohó Jesucristú cada cuendá-ndó sã dúcáⁿ-ní cùndáá-ndó núu-gă, te vã dáná cuendá-ndó càda-ndo sá ñá túú cùu váha iní Yă Ndiöxí. ¹³ Te ñíu-ni dàtná quidé sàcuíhná dácàháⁿ-xi iní nchaa dava-gá ñáyiu nándi quidé-yu, te ñíu-ni ducaⁿ quide ñaha-xi xii-ndo. Dico mee Yă Ndiöxí cúu-gă Yaá quidé ndáá chi quide-gá nchaa sá càháⁿ-gá, te ñá dáñá-gă sá sùúni cuídó sàcuíhná coto ndeé ñáhá-xí xii-ndo, chi není-ni nàcuáa cùndee iní-ndó dàña-gá ducaⁿ quide ñaha-xi xii-ndo. Te ñíu-ni-gá chindee ñaha-gá xii-ndo cùndee iní-ndó vã cáda-ndó cuèi nándi sá ná dàcahu iní ñáhá-xí xii-ndo.

¹⁴ Te xiăⁿ núu càháⁿ-í dóho nchòhó ñáyiu ío cùu iní-í sá vã quindáá iní-ndó ni ñⁿ sá càchí-yu cùu ndióxí te ñá ndáá chi dícó ndaha cue téé ñuyíú-a ní cuáha nchaa xiăⁿ, te ni vã cáda càhnu-ndo. ¹⁵ Te duha càháⁿ-í chi cùu-ndo ñáyiu tècú tnùní, te mee-ndo ío váha cuáha-ndo cuendá te núu váha-ni càháⁿ-í àdi ñá túú váha-ni. ¹⁶ Te nchoo ndácáⁿ táhú-ó núú Yă Ndiöxí cuendá ndudí ndéhé yoho yàha stilé sá xihí-ó, te sá dúcáⁿ xihí-ó ndudí ndéhé yoho yàha stilé-áⁿ, te xiăⁿ ndácú iní-ó sã ñⁿ-ní cùu-o ndihí Xítohó Jesucristú cuendá sá ñí sati níñi-gá ní xihí-gá núú cùrúxí, te ñíu-ni ducaⁿ sãtnahá tucu-xi cùu paá sá xexí-ó òré xihí-ó ndudí ndéhé yoho yàha stilé-áⁿ, chi sá dúcáⁿ xexi-o paá-áⁿ xiăⁿ ndácú iní-ó sã ñⁿ-ní cùu-o ndihí Xítohó Jesucristú sá cuendá yiqui cùñú-gá. ¹⁷ Te cuèi vâi vihi-o dico ñⁿdi-ni paá xexí-ó, te sá dúcáⁿ ñⁿdii-ni paá xexí-ó xiăⁿ ndácú iní-ó sã ñⁿ-ní cùu-o ndihí Xítohó Jesucristú.

¹⁸ Te cada cuendá-ndó nàcuáa quide ñáyiu israhél, chi ñáyiu-áⁿ xexí-yu sá ndúú táhú Yă Ndiöxí. Te sá dúcáⁿ quidé-yu-áⁿ cùtnùní iní-ó sã tnáhá tnúhu-yu ndihí-gá. ¹⁹ Te vã cání iní-ndó sã sã dúhá càháⁿ-í te cachí-ndó sã cùnuu nchaa sá càchí-yu cùu ndióxí ní cadúha cue téé ñuyíú-a

Jesucristú, te ducaⁿ Xítoho Jesucristú ñⁿdii-ni-gá cúnùu taxi tnuni-gá nchaa cue téé, te nchaa cue téé diu-ni mee-güedë cúnùu-güedé táxi tnuni-güedé ñadìhí-güedé. ⁴ Te núu nchoo cue téé na dàdàhu-o díquí-ó òré càháⁿ-ó núú ñáyiú tnúhu sá dácàhu iní ñáhá Yá Ndiòxí xii-o àdi oré càháⁿ ndihí-o-gá, te ñⁿ sácáⁿnúú cúú-xí te núu ducaⁿ na càda-o dadáhu-o díquí-ó. ⁵ Dico núu ñáyiú dìhí vá dadáhu-yu díquí-yu òré càháⁿ ndihí-yu Yá Ndiòxí, àdi oré càháⁿ-yu tnúhu sá dácàhu iní ñáhá-gá xii-yu núú tnàhá ñáyiú-yu, te sácáⁿnúú cúú-xí te núu vá dadáhu-yu díquí-yu, chi ñⁿ-ni cùu-xi te núu na dèté ndii-yu díquí-yu. ⁶ Te núu ñá túú cuìní cue ñáyiú dìhí dàdàhu-yu díquí-yu te váha-gá sá ná dèté ndii-yu díquí-yu. Te núu cùcahaⁿ núú-yu sá dèté díquí-yu te váha-gá sá ná dàdàhu-yu díquí-yu. ⁷ Te nchoo cue téé vá cúú dàdàhu-o díquí-ó òré càháⁿ ndihí-o Yá Ndiòxí ni òré càháⁿ-ó tnúhu sá dácàhu iní ñáhá-gá xii-o núú ñáyiú chi díhna-gá-ó ní cadúha ñaha Yá Ndiòxí xii-o, te ní taxi ndecu-gá nchaa sá xini tnuni-ó dàtná ndécú ncháa sá xini tnuni méé-gá. Te ducaⁿ ní quide-gá chi cuini-gá sá nchóó càda-o nacuaa cáháⁿ nchaa dava-gá ñáyiú sá ïo càhnu cuu-gá, te cue ñáyiú dìhí quidë-yu nàcuáa cunuu nchòo cue téé. ⁸ Te Yá Ndiòxí ní cadúha-gá téé, dico ñá díú yìqui naha ñadìhí ní quenehe-gá ní cadúha-gá téé chi yìqui naha téé ní quenehe-gá ní cadúha-gá ñadìhí. ⁹ Te sá cuendá téé ducaⁿ ní cadúha-gá ñadìhí-áⁿ te ñá díú sá cuendá ñadìhí ní cadúha-gá téé. ¹⁰ Núu xiáⁿ tauú-xi sá ncháá ñáyiú dìhí dàdàhu-yu díquí-yu cuendá ducaⁿ cùnuni sá ñá túú cùnùu-yu dàtná cúnùu nchoo cue téé. Te ducaⁿ xini ñuhu-xi cadá-yu sá cuendá nchaa espíritú xínú cuèchi núú Yá Ndiòxí. ¹¹ Te vitna nchoo ñáyiú ndècu ichi Xítoho Jesucristú, vá càchí-ó sá cuè téé ñá túú xini ñuhu-güedé cue ñáyiú dìhí

chindee ñáhá-yu, te ni vǎ càchí-ó sá cuè ñáyiú dìhí ñá túú xini ñuhu-yu cue téé chindee ñàha-güedé xii-yu. ¹² Te ñⁿ yìqui naha téé ní queñuhu Yá Ndiòxí ní cadúha-gá ñadìhí, dico vitna chi ñáyiú dìhí dácàcú-yu téé. Te téé, ñadìhí ní cadúha Yá Ndiòxí, te diu-ni ducaⁿ ní cadúha-gá nchaa dava-gá sá ïo.

¹³ Te mee-ndo càda cuendá-ndo te núu ndùu váha-xi sá vǎ dadáhu cue ñáyiú dìhí díquí-yu òré càháⁿ ndihí-yu Yá Ndiòxí àdi ñáhá. ¹⁴ Te nchaa ñáyiú càháⁿ-yu sá ñá túú ndùu váha-xi sá cuè téé cunduu nàni idi díquí-güedë, chi ñⁿ sácáⁿnúú cúú-xí càchí-yu. ¹⁵ Te nchaa ñáyiú dìhí ñáyiú nàni idi díquí-xi càchí ñáyiú sá ñⁿ sá váha cùu-xi sá cúú-xi-yu sá dúcáⁿ nàni idi díquí-yu. Te ducaⁿ chi Yá Ndiòxí ní cachí-gá sá dúcáⁿ cunduú-yu cuendá quidáhu-xi díquí-yu. ¹⁶ Te núu ïo ñáyiú cuìní dacáa cuendú cuendá sá ní cáháⁿ-í-a, te na cùnahá-yu sá ncháá nchùhú cue téé càháⁿ tnúhu Xítoho Jesucristú diu-ni ducaⁿ sàni iní-ndí cada nchaa ñáyiú dìhí. Te diu-ni ducaⁿ sàni iní nchaa ñáyiú ndècu ichi-gá.

Cuendá ñáyiú ñá túú quide datná ní quide Xítoho Jesucristú cùnàhá ní cudini-gá ndihí cue téé ní xica cuu ndihí-gá

¹⁷ Te nchòhó ñá túú quide váha-ndo ndècu-ndo núu xiáⁿ duha na càháⁿ-í dóho-ndo, chi nchòhó òré tàcá-ndo ñá túú quide váha-ndo chi ñá túú chindee tnaha-ndo cada-ndo sá váha, chi da nàdatuhú iní tnáhá-ndo nàcuáa ndècu-ndo. ¹⁸ Te díhna-gá na càchí tnúhu-í xii-ndo sá nihí-í tnúhu sá òré tàcá-ndo quide-ndo nacuaa ní cáháⁿ Xítoho Jesucristú, te ñá túú cùu ñⁿnuu-ndo oré ducaⁿ quide-ndo nacuaa ní cáháⁿ-gá. Te dava sá càháⁿ ñáyiú sàndáa iní-í te dava ñáhá. ¹⁹ Te ndáa sá dúcáⁿ tnàhí cada-xi vá cúú ñⁿnuu-ndo cuendá ducaⁿ cùnuni núu ndèdacáa-ndo sandáa ndisa iní-ndó tnúhu Xítoho Jesucristú te ndèdacáa-ndo ñáhá! ²⁰ Te ndi tnahá òré tàcá-ndo quide-ndo datná ní quide Xítoho Jesucristú

cútnàhá ní cudìni-gá ndìhi cue téé ní xica cuu ndìhi-gá, te ñá túú quède-ndo nacuáa tàú-xi cunduu chi cùtèxínu-ni quède-ndo. ²¹ Chi òré tàcá-ndó quède-ndo nacuáa ní cachí Xítóhó Jesucristú, te dava-ndo ngódó núú-ndó dǐhna-gá-ndó xèxi-ndo sá nèhé-ndó te ñá túú sǎ cùndètu tnahá-ndo, te ñá túú càháⁿ tñáhá-ndó nǔu xǎⁿ dava-ndo ñà túú xèxi-ndo ndahá xítí-ndó, te dava-ndo xídó-ndó quède-ndo chi xǎni-ndo. ²² Te vá dúcáⁿ càda-ndo chi càa vehe-ndo núú dúcáⁿ cǎxi-ndo coho-ndo cada-ndo ndéé ndahá xítí-ndó, chi sá dúcáⁿ quède-ndo te dàquee tǐhú-ndó nchàa dáva-gá ñáyíu ndècu ndìhi-ndo ichi Yá Ndiǒxí, te dándóo canúú-ndó nchàa ñáyíu ndàhú sá dúcáⁿ quède-ndo. ¡Núu xǎⁿ vá cúú cǎchí-í sá cúú-ndó ñáyíu quède váha chi ñá túú quède váha-ndo sá dúcáⁿ quède-ndo ndecu-ndo!

Xítóhó Jesucristú ní dándóo tñúhu-gá sá cóhó-ó ndùdí ndéhé yoho yàha stilé te caxi-o pàá cuèndá ndacu iní-ó sǎ ní xǐhí-gá

(Mt. 26:26-29; Mr. 14:22-25; Lc. 22:14-20)

²³ Te dàtná-ni ní dánèhé ñáhá Xítóhó Jesucristú xii-í te ñíu-ni ducaⁿ ñí dánèhé ñáhà-í xii-ndo, chi ñíu-ni níú cútnàhá ní sáha cuèndá ñáhá ndíi Júdás Iscarioté xii-gá núú cuè téé cùu úhú iní ñáhá ñí queheⁿ-gá pàá, ²⁴ te ní ndacáⁿ táhú-gǎ núú Yá Ndiǒxí, te ní táhú cuèchi-gá, te ní xáhaⁿ-gǎ xii cue téé xica cuu ndìhi-gá: “Chí quéhéⁿ pàá-a caxi-ndo te cada iní-ndó sǎ cúú-xí dàtná yǐqui cùñú-í, chi yúhú cuú-í sácuèndá-ndó. Te ducaⁿ-ni càda-ndo cundecu-ndo cuèndá ndacu iní ñáhá-ndó xii-í”, cǎchí-gá xǎhaⁿ-gǎ xii-güedé. ²⁵ Te sátá ñí yáha ní xexi-güedé pàá sá ñí sǎñaha-gǎ, te ní queheⁿ-gá tásáⁿ ñúhú ndùdí ndéhé yoho yàha stilé, te ní ndacáⁿ táhú tucu-gá núú Yá Ndiǒxí. Te ní xáhaⁿ-gǎ xii cue téé xica cuu ndìhi-gá: “Chí cóhó ndùdí ndéhé yoho yàha stilé-a, te cada iní-ndó sǎ cúú-xí dàtná níñí-í, te cuèndá níñí-í sá cǎtí òré cuú-í cutnùní ndáá sá Yá Ndiǒxí cada-gá ingá núú sǎ váha sá cúú-xí

ñáyíu. Te ndí tnahá òré coho-ndo ndùdí ndéhé yoho yàha stilé-áⁿ te ndacu iní ñáhá-ndó xii-í, te ducaⁿ-ni càda-ndo cundecu-ndo”, cǎchí-gá xǎhaⁿ-gǎ xii-güedé. ²⁶ Te ndí tnahá òré xéxi-ndó pàá te xíhi-ndo ndudí ndéhé yoho yàha stilé, te xǎⁿ dátúu-ndo nǔú ñáyíu sá Xítóhó Jesucristú ní xǐhí-gá cuèndá-yu, te ducaⁿ-ni càda-ndo cundecu-ndo ndéé ná sǎá nduu quìxi tucu Xítóhó Jesucristú.

Ñacuáa cada-o òré caxi-o pàá ndìhi òré coho-o ndùdí ndéhé yoho yàha stilé dàtná ní cachí Xítóhó Jesucristú

²⁷ Te dava-ndo ñà túú quède-ndo nacuáa cuèní Yá Ndiǒxí càda-ndo òré xéxi-ndó pàá ndìhi òré xǐhí-ndó ndùdí ndéhé yoho yàha stilé, te sá dúcáⁿ quède-ndo-áⁿ te cucuéchi xii-ndo chi ñá túú nèhe-ndo sá yǐñúhu sá cúú-xí yǐqui cuñú Xítóhó Jesucristú, te ní ñà túú nèhe-ndo sá yǐñúhu sá cúú-xí níñí-gǎ. ²⁸ Te ío váha cada cuèndá-ndó te núu ndècu váha iní-ndó nǔú Xítóhó Jesucristú òré cùmání-gǎ caxi-ndo pàá ndìhi òré cùmání-gǎ coho-ndo ndùdí ndéhé yoho yàha stilé. Te núu ndècu váha iní-ndó nǔú-gǎ te caxi-ndo te coho-ndo. ²⁹ Te dava nchòhó ñá túú sǎni váha iní-ndó cuèndá yǐqui cuñú Xítóhó Jesucristú te xèxi-ndo pàá te xíhi-ndo ndudí ndéhé yoho yàha stilé, te nacháhu-ndo sǎ dúcáⁿ ñà túú sǎni váha iní-ndó. ³⁰ Te ñíu sá dúcáⁿ quède-ndo núu xǎⁿ vǎi-ndo cuhú, te ío ndàhú ndécú-ndó, te dava ñáyíu ndècu ndìhi-ndo sa ní xǐhí-yu. ³¹ Dico núu ío váha sáha-o cuèndá ñacuáa ndècu-o núú Yá Ndiǒxí, te vá dúcáⁿ dándóo ñaha-gá xii-o. ³² Te òré ndéhé Yá Ndiǒxí sá ñà túú quède ndáá-ó ndècu-o te dándóo ñaha-gá xii-o. Te ducaⁿ quède-gá cuèndá sá vǎ cuíta nihnu-o, chi núu ñáhá te cuíta nihnu-o ndìhi nchaa ñáyíu ndècu ichi cuehé ichi duha.

³³ Te núu xǎⁿ càháⁿ-í dóho nchaa nchòhó ñáyíu ndècu ndìhi-í ichi Xítóhó Jesucristú sá òré tacá-ndó càda-ndo nacuáa ní quide Xítóhó Jesucristú cútnàhá ní cudìni-gá ndìhi cue téé ní xica cuu ndìhi-gá, te

cundetü tñaha-ndo nduu nchaa-ndo te dätñuní ducaⁿ càda-ndo. ³⁴ Te núu daya-ndo xihí-ndó dòcò te caxi duuⁿ-ndo vèhe-ndo te dätñuní nat-acá-ndó, cuendá òré natacá-ndó te vá cáda-ndó ñⁿ sá ñà túú tàú-ndó càda-ndo cuendá sá vã dándòho ñaha Yá Ndiòxí xii-ndo. Te òré quixi coto ñaha-í xii-ndo te dàvá-áⁿ cachí tñuhu-í xii-ndo nchaa dava-gá sá cúmãní.

12

Nàcuáa chindee ñaha Espiritú Yá Ndiòxí cada-o ñⁿ ñⁿ-o

¹ Te nchòhó ñáyü ndècu ndihí-í ichi Xítohó Jesucristú cuiní-í cachí tñuhu-í xii-ndo nàcuáa chindee ñaha Espiritú Yá Ndiòxí xii-o ñⁿ ñⁿ-o cuendá cutñuní iní-ndó.

² Te nchòhó sa naha-ndo sá cütñahá vátá cündècu-gá-ndó ìchi Xítohó Jesucristú ní xóo dandàhú ñáhá yücu ñávãha xii-ndo, te ní xóo quíndáá iní-ndó nchaa sá ñí cadúha cue ñáyü ñuyú-a nchaa sá càchí-yu cùu ndiòxí te ñá ndáá sá ndiòxí cúú-xí, te nchaa xiãⁿ ñá túú càháⁿ-xi. ³ Te cuiní-í sá nchòhó cutñuní iní-ndó sã Espiritú Yá Ndiòxí ñá túú chindee-xi ní ñⁿ ñáyü cuendá sá càháⁿ úhú-yu Xítohó Jesucristú. Te ní ñⁿ ñáyü ñá túú càhu iní-yu càháⁿ-yu sá Xítohó Jesucristú cúú-gã Xítohó-yu te núu ñá túú Espiritú Yá Ndiòxí dácàhu iní ñáhá-xí xii-yu.

⁴ Te ndi dñⁿ ndi dñⁿ ndùu chiun ní cachí Espiritú Yá Ndiòxí cada-o, te ñⁿ-ni ñⁿ-ni Espiritú-gá ndécú.

⁵ Te ndi dñⁿ ndùu chiun guide-o xinu cuechi-o núú ñⁿ-ni Xítohó Jesucristú. ⁶ Te ndi dñⁿ ndi dñⁿ chindee ñaha Yá Ndiòxí xii-o nàcuáa cada-o chiun-gá, te ñⁿ-ni ñⁿ ñⁿ-ni ndécú chindee-gá nchaa ñáyü. ⁷ Te Espiritú Yá Ndiòxí quidé-xí sã nchóó càda-o sá vãha, te ducaⁿ chindee-o cue ñáyü ndècu ndihí-o ichi Xítohó Jesucristú.

⁸ Te dava-o ñí nduu táhú-ó núú Yá Ndiòxí sá Espiritú-gá cada te ndacu-o càháⁿ-ó tñuhu sá ñó càhnu cuu ñⁿ-ni tñuhu mee Yá Ndiòxí, te dava tucu-o ñí nduu táhú-ó cütñuní iní-ó nàcuáa càháⁿ tñuhu-gá te càháⁿ-ó nàcuáa

cuiní Espiritú-gá. ⁹ Te dava tucu-o ñí nduu táhú-ó sã ñó quíndáá iní-ó Xítohó Jesucristú cuendá cada-gá ñⁿ sá cuiní-ó, te ducaⁿ chi Espiritú Yá Ndiòxí chindèe ñaha-xi xii-o. Te dava tucu-o ñí nduu táhú-ó sã càcáⁿ táhú-ní-ó núú Xítohó Jesucristú cuendá ñáyü cùhú te ndúha-yu. ¹⁰ Te dava tucu-o ñí nduu táhú-ó sã ndácú-ó càda-o nchaa sá vã yóo tñahí ndacu cada, te dava tucu-o ñí nduu táhú-ó núú Yá Ndiòxí sá càháⁿ-ó tñuhu sá dácàhu iní ñáhá-gã xii-o, te dava tucu-o ñí nduu táhú-ó sã cütñuní iní-ó núu ñⁿ Espiritú Yá Ndiòxí chindèe ñaha-xi xii ñáyü òré càháⁿ-yu tñuhu-gá àdi cue espíritú cündihí yucu ñávãha. Te dava tucu-o ñí nduu táhú-ó càháⁿ-ó tñuhu sá dácàhu iní ñáhá Espiritú Yá Ndiòxí xii-o tñuhu sá ñà túú xini-ó, te dava tucu-o ñí nduu táhú-ó càháⁿ-ó nàcuáa quèe-xi nchaa tñuhu-áⁿ. ¹¹ Te ñⁿ-ni dñⁿ Espiritú Yá Ndiòxí ducaⁿ chindee ñaha-xi, te ñⁿ-ni Espiritú-gá dácàhñu ñaha-xi xii-o ndi dñⁿ núú chiun sá cuiní meé-xí càda-o.

Nchaa-o ñⁿ-ni cuu-o ndihí Xítohó Jesucristú

¹² Te nchoo ñáyü ndècu ñuyú-a titní xichi cùu yiqui cuñú-ó dico ñⁿ-ni cùu-xi, te ñⁿ-ni ducaⁿ sãtnahá-xi cùu-o vitna ndecu-o ichi Xítohó Jesucristú chi ñⁿ-ni cùu-o ndihí-gá.

¹³ Te dava-o cùu-o ñáyü isràél, te dava-o ñà túú cùu-o ñáyü isràél, te dava-o cùu-o ñáyü ñá túú tñahí dàñá quee núú chíuⁿ pàtróoⁿ-xi, te dava-o cùu-o ñáyü dàñá quee núú chíuⁿ pàtróoⁿ-xi. Te mee Espiritú Yá Ndiòxí ní guide-xi sá ncháá-ó ñⁿ-ná cúú-ó ndècu-o ndihí Xítohó Jesucristú. Te Yá Ndiòxí ní cachí-gá sá ncháá-ó cündecu ndihí-o Espiritú-gá.

¹⁴ Te nchòhó xini-ndó sã titní xichi cùu yiqui cuñú-ó te ñá dñⁿ ñⁿ-ni xichi cuu-xi. ¹⁵ Te cuèi sáhá-ó ndihí ndaha-o ñá túú ñⁿ-ni cuu-xi dico vá cúú càchí-ó sã sáhá-ó ñá túú cùu-xi yiqui cuñú-ó. ¹⁶ Te cuèi lóho-o ndihí tinuu-o ñá túú ñⁿ-ni cuu-xi dico vá càchí-ó sã lóho-o ñá túú cùu-xi yiqui cuñú-ó. ¹⁷ Te núu ñihí ní ndúú yiqui

cuñú-ó ní xĩndeé mee-ni tĩnuu-o, te ñá túú ndèé cundeeé lóho-o cùndedóho ni cùu te núu ducaⁿ, àdi núu ñihí yiqui cùñú-ó ní xĩndeé mee-ni lóho-o te ñá túú ndèé cundeeé dítní-ó ní cùu te núu ducaⁿ. ¹⁸ Dico mee Yá Ndiõxí ní taxi ndecu-gá ìⁿ ìⁿ xichi yiqui cùñú-ó nàcuáa ní cachí iní méé-gá. ¹⁹ Te núu ìⁿ-ni sá ní xĩndecu ñihí yiqui cùñú-ó, te vá cùndùu-xi nacuáa tàú-xi cunduu ni cùu te núu ducaⁿ. ²⁰ Dico títní xichi cùu yiqui cuñú-ó, te ìⁿ-ni cùu-xi ñihí-xi.

²¹ Te sa nàha-o sá vǎ cúú cǎchí-ó sǎ tĩnuu-o ñá túú xini ñuhu-xi ndaha-o, àdi díquí-ó ñà túú xini ñuhu-xi sáhá-ó. ²² Te nchoo sà naha-o sá dává xichi yiqui cuñú-ó sǎ cǎchí-ó sǎ ñà túú cùnuu ío-gá xíní ñuhu-xi. ²³ Te dava xichi yiqui cùñú-ó sǎ ñà túú quide cuendá cávihí-ó nchàa xǎⁿ sá quidáhu dóo sácũhnu-o, te dava xichi yiqui cùñú-ó ñà cúú cùtúu chi dacuití sǎ quidáhu. ²⁴ Te nchaa xichi yiqui cùñú-ó sǎ cúú cùtúu ñá túú xini ñuhu-xi quidáhu. Te Yá Ndiõxí ní taxi ndecu-gá nchaa xichi yiqui cùñú-ó nàcuáa tàú-xi cunduu. Te ní cachí-gá sá dává-gǎ xichi yiqui cùñú-ó núú vǎ cúú cùtúu quidáhu. ²⁵ Te ducaⁿ ní quide-gá cuendá sá ìⁿ-ní cùu yiqui cuñú-ó. Te ducaⁿ ndì tnahá ìⁿ ìⁿ xichi yiqui cùñú-ó chĩndee tnahá-xi. Te ducaⁿ sǎtnahá-xi cùu nchoo vitna ndecu-o ichi Xitohó Jesucristú chi chĩndee tnahá-o. ²⁶ Te núu ìⁿ xichi yiqui cùñú-ó ná tñàhúhú te ñihí-ó quide úhú-xi, te núu ìⁿ xichi yiqui cùñú-ó ìo váha ndècu-xi te ducaⁿ ñihí yiqui cùñú-ó cúú vǎha-xi. Te ducaⁿ sǎtnahá-xi cùu-o vitna ndecu-o ichi Xitohó Jesucristú.

²⁷ Te nchoo ndècu ndihí-o Xitohó Jesucristú, te cùu-o datná yiqui cùñú-gá te ìⁿ ìⁿ-o cùu-o datná ìⁿ ìⁿ xichi yiqui cùñú-gá. ²⁸ Te ducaⁿ sǎtnahá-xi cùu-o chi Yá Ndiõxí ní taxi-gá ndí díⁿ ndí díⁿ chiuⁿ quide-o sá cúú-xí nchàa ñáyiu ndècu ichi-gá. Te díhna-gá cue téé caca cuu cáháⁿ tñuhu-gá núú ñáyiu ní taxi ndecu-gá, te dǎtnùní ní taxi ndecu-gá cue téé cáháⁿ tñuhu-gá

nàcuáa dàcahu iní ñáhá mèe-gá, te dǎtnùní ní taxi ndecu-gá cue téé dǎnehé ñáhá xì ñáyiu tñuhu-gá núú tàcá-yu, te dǎtnùní ní taxi ndecu tucu-gá cue téé ndàcu quide sá vǎ yǒo tñahí ndàcu cada. Te ní taxi ndecu tucu-gá cue téé xicáⁿ táhú-ní núú Xitohó Jesucristú cuendá ñáyiu cùhú te ndúha-yu. Te ní taxi ndecu tucu-gá cue téé chĩndee cue ñáyiu ndècu ichi-gá. Te ní taxi ndecu tucu-gá cue téé yĩndaha ñaha xii ñáyiu ndècu ichi-gá, te ní taxi ndecu tucu-gá cue téé cǎháⁿ tñuhu sá dǎcǎhu iní ñáhá Espiritú-gá tñuhu sá ñà túú xini-güedé. ²⁹ Te ñá ncháá-ó cùu-o cue téé ní táuchíúⁿ Xitohó Jesucristú cáháⁿ tñuhu-gá núú ñáyiu, te ñá ncháá-ó cùu-o cue téé cǎháⁿ tñuhu sá dǎcǎhu iní ñáhá Yá Ndiõxí xii-o. Te ñá ncháá-ó cùu-o cue téé dǎcuaha ñaha xii-yu. Te ñá ncháá-ó cùu-o cue téé quide sá vǎ yǒo tñahí ndàcu cada. ³⁰ Te ñá ncháá-ó cùu-o cue téé dicó-ní cácáⁿ táhú núú Xitohó Jesucristú cuendá ñáyiu cùhú te ndúha-yu. Te ñá ncháá-ó cùu-o cue téé cǎháⁿ tñuhu sá dǎcǎhu iní ñaha Espiritú Yá Ndiõxí tñuhu sá ñà túú xini-ó, te ñá ncháá-ó cùu-o cue téé cùtnuní iní-xi cáháⁿ nàcuáa ndùu tñuhu-áⁿ. ³¹ Te ío nducu ndèe-ndo cada-ndo nacuáa nduu táhú-ndó núú Yá Ndiõxí nchaa sá ío-gá cúnùu cada-ndo. Te vitna na dǎnehé ñáhá tucu-í xii-ndo nàcuáa cada-ndo, dico sá dǎnehé ñáhá-í-a ío-gá cúnùu-xi.

13

Cuu iní-ó tñaha ñáyiu-o

¹ Te núu nchoo xini-ó cǎháⁿ-ó tñuhu sá ío vii ío váha cuáháⁿ cǎháⁿ ñáyiu ñuyíú-a, àdi xini-ó cǎháⁿ-ó tñuhu sá ío vii ío váha cuáháⁿ cǎháⁿ cue espíritú xínú cuèchi núú Yá Ndiõxí, te núu xini-ó cǎháⁿ-ó nchàa tñuhu-áⁿ te ñá túú cùu iní-ó cuè tñaha ñáyiu-o ña, te ñá túú nǎndíhí-xi sá xini-ó cǎháⁿ-ó tñuhu-áⁿ te cùu-o datná dava caá sá ío dusaⁿ quide. ² Te núu cùu-o ñáyiu cǎháⁿ tñuhu sá dǎcǎhu iní ñáhá Yá Ndiõxí, àdi cuu-o ñáyiu cùtnuní iní-xi nàcuáa cuáháⁿ nchaa tñuhu ndùu yuhu ni cuu, àdi cuu-o ñáyiu ío váha

cùtnuní iní-xi nchaa nàcuáa quide Yá Ndiöxí, àdi cuu-o ñáyiú ío váha sàndáá iní ñáhá xii Yá Ndiöxí nàcuáa ndacu-o cùu-o ñⁿ yucu xocuiñi-xi núú ndécú-xí, te núu nchaa xiáⁿ xini-ó càda-o te ñá túú cùu iní-ó cuè tñaha ñáyiú-o ña, te ñá túú vèdana nàndihí-xi te núu vá cúú iní-ó tñaha ñáyiú-o cuèi na càda-o nchaa xiáⁿ. ³ Te cuèi nchaa sá ndécú ndihí-o na dacáhñu-o, te cuèi na cuãha cuendá-ó mèe-o cáyú-ó sá cúú-xí Yá Ndiöxí, dico ñá túú vèdana chindee ñaha-xi xii-o sá dúcáⁿ càda-o te núu ñá túú cùu iní-ó cuè tñaha ñáyiú-o.

⁴ Dico núu cùu iní-ó cuè tñaha ñáyiú-o, te càhnu iní-ó, te quide váha-o, te ñá túú cùu-o ñáyiú cuédú iní, te ni ñá túú càháⁿ-ó núu cùu cahnu-o, te ni ñá túú sàni iní-ó càda cahnu-o mee-o, ⁵ te ni ñá túú ñuhu cuehé iní-ó, te ni ñá túú nducu-o mee-ni sá cúú-xí mèe-o, te ni ñá túú-gá cúdeéⁿ-ó cuendá ñⁿ sá cúú, te ni ñá túú-gá sácùhuⁿ iní-ó sá quidé ñaha tñaha ñáyiú-o xii-o. ⁶ Te ni ñá túú-gá cúdí iní-ó nchaa sá ñá túú váha quide ñáyiú, chi mee-ñá cuendá nchaa sá váha cùdí iní-ó. ⁷ Te nchaa sá yãha-o sàcahnu iní-ó, te sàni váha iní-ó cuendá nchaa ñáyiú, te sàni iní-ó sá díú-ní nchaa sá váha cuu xii nchaa tñaha ñáyiú-o ndéé cuéé-gá, te ío quide cahnu iní-ó cuèi nándi sá yãha-o, te nchaa xiáⁿ quidé-ó te núu cùu iní-ó cuè tñaha ñáyiú-o.

⁸ Te ni caa ni quíhíⁿ duha-ni cuu iní-ó cuè tñaha ñáyiú-o. Dico sáá nduu te vá cóo-gã ñáyiú cáháⁿ tnúhu sá dácàhu iní ñáhá Yá Ndiöxí, te ni vá cóo-gã ñáyiú cáháⁿ tnúhu sá dácàhu iní ñáhá Espíritú Yá Ndiöxí tnúhu sá ñá túú xini-yu, te ni vá cóo-gã ñáyiú túha dàtná túha ñáyiú vitna. ⁹ Te vitna ñá túú cùtnuní iní-ó nchaa nacuáa sàni iní Yá Ndiöxí chi sacú-ni cùtnuní iní-ó, te ducaⁿ sacú-ni càháⁿ-ó nàcuáa ndùu tnúhu-gá, dico càháⁿ-ó tnúhu-gá nàcuáa dácàhu iní ñáhá-gã xii-o. ¹⁰ Te na sáá nduu càda Yá Ndiöxí nchaa nàcuáa tàú-xi cunduu, te dàvá-áⁿ te nchaa sá cächí-gã ñá túú ndècu-xi nacuáa tàú-xi cunduu vá dúcáⁿ-gã

cundecu-xi.

¹¹ Te yúhú cùtnàhá ní cuu landú-í ní xóo cada-í sá cùu-í landú, ní xóo cáháⁿ-í, ní xóo cani iní-í, te ní xóo tecú tnùn-í dàtná quidé cuè landú xíndecu vitna, dico sáá ní cuu-í ñⁿ téé cùu sacuéhé te ñá túú-gã quidé-í dàtná ní xóo cada-í cùtnàhá ní cuu landú-í. ¹² Te ducaⁿ sãtnahá-xi cùu-o vitna ndecu-o ichi Xítóhó Jesucristú, chi ñá túú cùtnuní váha iní-ó nàcuáa cùu cuendá Yá Ndiöxí, te cùu-o datná ñáyiú ndèhe ñⁿ núú yútátá sá ñá túú tũu váha núú-xi, te ducaⁿ sãtnahá-xi cùu-o chi ñá túú cùtnuní váha iní-ó nãsa cùu cuendá-gã, dico sáá nduu quíni núú-ó-gã. Te nchoo sácú-ni cùtnuní iní-ó nàcuáa ndùu-gã vitna dico na sáá nduu te quíni ndáá-ó nàcuáa càa nacuáa ndùu-gã dàtná xini ñáhá mèe-gã xii-o. ¹³ Te ni caa ni quíhíⁿ ducaⁿ-ni quíndáá iní-ó Yá Ndiöxí, te ducaⁿ-ni cùndecu ndihí-o tnúhu ndee iní cundecu-o ndihí-gã, te ducaⁿ-ni ío cuu iní-ó-gã ndihí tñaha ñáyiú-o. Te sá cúú iní-ó Yá Ndiöxí ndihí sá cúú iní-ó tñaha ñáyiú-o xiáⁿ ío-gã cùnùu-xi dacúúxí dàva-gã.

14

Ñáyiú càháⁿ tnúhu sá dácàhu iní ñáhá Espíritú Yá Ndiöxí

¹ Te vá dáñá ndéé-ndó cùu iní-ndó tñaha ñáyiú-ndo, te cuhuⁿ iní-ndó sá ndùu táhú-ndó núú Yá Ndiöxí títñi núú chiúⁿ cada-ndo nacuáa chindee ñaha Espíritú-gã xii-ndo, te ío cuhuⁿ iní-ndó sá ndúú táhú-ndó cáháⁿ-ndó tnúhu sá dácàhu iní ñáhá Yá Ndiöxí xii-ndo. ² Te cue ñáyiú cáháⁿ tnúhu sá dácàhu iní ñáhá Espíritú Yá Ndiöxí tnúhu sá ñá túú xini-yu, te tnúhu càháⁿ-yu-áⁿ cúú-xí sá cúú-xí Yá Ndiöxí te ñá díú sá cúú-xí ñáyiú chi ñá túú tecú tnùn-í-yu, te mee Espíritú Yá Ndiöxí quidé-xí dùcaⁿ cáháⁿ-yu tnúhu yiyuhu. ³ Te cue ñáyiú ní nduu táhú núú Yá Ndiöxí cáháⁿ tnúhu sá dácàhu iní ñáhá-gã xii-yu, te ñáyiú-áⁿ dácàháⁿ-yu ñáyiú nàcuáa cuita níhí ndéé-gã-yu cundecu-yu ichi-gã, te ducaⁿ cuãñahá-yu tnúhu ndee iní xii-yu òré ndihú iní-yu.

4 Te ñáyiú cãháⁿ tnúhu sá dácàhu iní ñáhá Espíritú Yã Ndiõxí xii-yu tnúhu sá ñà túú xìní-yu-áⁿ, ñáyiú-áⁿ mee-nĩ-yu nihí ndéé-yu ndécú-yu ichi-gá. Dico ñáyiú cãháⁿ tnúhu sá dácàhu iní ñáhá-gã xii-yu, cãháⁿ-yu tnúhu-áⁿ nàcuáa níhí ndéé dàva-gã ñáyiú nchìcúⁿ nihnu ichi-gá.

5 Te yúhú ío cudíí iní-í te núu nchaa-ndo cãháⁿ-ndó tnúhu sá dácàhu iní ñáhá Espíritú Yã Ndiõxí xii-ndo tnúhu sá ñà túú xìní-ndó. Dico ío-gá cudíí iní-í te núu nchaa-ndo cãháⁿ-ndó tnúhu sá dácàhu iní ñáhá-gã, chí ío-gá xìní ñúhu-xi sá cãháⁿ-ndó tnúhu-áⁿ dàcúúxí sá cãháⁿ-ndó tnúhu sá dácàhu iní ñáhá Espíritú-gá cãháⁿ-ndó tnúhu sá ñà túú xìní-ndó. Dico ñni nũtnahá-xi quide-ndo te núu nchòhó ñáyiú cãháⁿ tnúhu sá dácàhu iní ñáhá Espíritú-gá cãháⁿ-ndó nàcuáa quèe-xi tnúhu-áⁿ. Te ducaⁿ te nchaa ñáyiú ndècu ichi Yã Ndiõxí cuita níhí ndéé-gã-yu quíhíⁿ cundecú-yu ichi-gá. 6 Te núu yúhú quexìo-í núú ndécú nchòhó ñáyiú ndècu ndihí-í ichi Xitohó Jesucristú, te ngúita-í cãháⁿ-í mee-ni tnúhu sá dácàhu iní ñáhá Espíritú Yã Ndiõxí xii-í tnúhu sá ñà túú xìní-í, te ñà túú nã sá vãha cuu-xi sá cúú-xí-ndó. Dico cuu-xi sá vãha xii-ndo te núu na cãháⁿ-í núú-ndó nchaa tnúhu sá dánèhé ñáhá Yã Ndiõxí xii-í tnúhu sá vátá dácuaã-gã-í, ndihí nchaa tnúhu sá sà xìní-í, ndihí nchaa tnúhu sá dácàhu iní ñáhá-gã xii-í cãháⁿ-í, ndihí nchaa dava-gã tnúhu-gá.

7 Te na càda-o cuendá sá núu ñni téé tiú-dé vïlu àdi caní-dé àrpá te núu ñà túú sãhnú-dé ndihí-xi ñni yaá, te ñà cútñuní iní-ó nã yaá caní-dé àdi ná yaá tiú-dé te núu ducaⁿ na càda-dé. 8 Te ñni-ducaⁿ sãtnahá-xi cùu tucu téé cùu sandadú tiú cútú, chí núu vá tiú vãha-dé nàcuáa tàú-xi cunduu òré quíhíⁿ-güedé nãá-güedé, te vá ngündecu túha dava-gã cue sandadú te núu ducaⁿ na càda-dé vá tiú vãha-dé. 9 Te ducaⁿ sãtnahá-xi cùu nchohó te núu vá cãháⁿ-ndó ñni tnúhu nàcuáa tàú-xi cunduu núú ñáyiú te vá tècú tnùní-yu tnúhu cãháⁿ-ndó. ¡Chí

àúⁿ nã cuu cãháⁿ-ndó te núu ducaⁿ na càda-ndo! 10 Te ío titnì núú tnúhu ío ñuyíú, te ñni ñni núú tnúhu-áⁿ cútñuní iní ñáyiú nàcuáa quèe-xi. 11 Te núu nchoo ñã tècú tnùní-ó ñni tnúhu cãháⁿ ñni ñáyiú, te quide-ó-yu ñáyiú ñnuú xicá chí ñà túú cãháⁿ-yu tnúhu cãháⁿ-ó, te ñni-ducaⁿ quide ñahá-yu xii nchoo tucu. 12 Te xíãⁿ núu cãchí tnúhu-í xii nchaa nchòhó ñáyiú ío cuíní nduu táhú núú Yã Ndiõxí sá Espíritú-gá chindee ñaha-xi xii-ndo cada-ndo ná daha núú chiúⁿ, te ío nducu ndèe-ndo cada-ndo chiúⁿ sá ñni nduu táhú-ndó nàcuáa cuita níhí ndéé-gã ñáyiú ndècu ichi-gá quíhíⁿ.

13 Te núu cãháⁿ-ndó tnúhu sá ñà túú xìní-ndó, tnúhu sá dácàhu iní ñáhá Espíritú Yã Ndiõxí xii-ndo, te xini ñnuhu-xi sá càcáⁿ táhú-ndó núú Yã Ndiõxí cuendá sá ná chindee ñaha-gã xii-ndo cãháⁿ-ndó núú ñáyiú núu nása quèe-xi tnúhu-áⁿ. 14 Chí núu nchoo na cãháⁿ ndihí-o Yã Ndiõxí ndihí tnúhu sá ñà túú xìní-ó, te ñni yùhu ñni iní-ó cãháⁿ ndihí-o-gã dicó-ni sá ñã tècú tnùní-ó nàcuáa nduu tnúhu cãháⁿ-ó. 15 Te xíãⁿ núu xini ñnuhu-xi cãháⁿ ndihí-o Yã Ndiõxí ñni yùhu ñni iní-ó nàcuáa chindee ñaha Espíritú-gá xii-o te cãháⁿ-ó nàcuáa tecú tnùní-ó, te ñni-ducaⁿ càda-o oré xítá yùhu-o chíñuhu-o Yã Ndiõxí, chí ñni yùhu ñni iní-ó dùcaⁿ cada-o nàcuáa chindee ñaha Espíritú-gá xii-o, te cútñuní iní-ó nàcuáa cuáháⁿ nchaa tnúhu cãháⁿ-ó xíta-o. 16 Chí núu nchoo na ndacáⁿ táhú-ó núú Yã Ndiõxí ndihí mee-ni tnúhu sá ñà túú xìní-ó tnúhu sá dácàhu iní ñáhá Espíritú-gá xii-o, te ñáyiú ñà túú ní nduu táhú cãháⁿ tnúhu cãháⁿ-ó ndèdóho ñahá-yu xii-o, te ñáyiú-áⁿ vã ndácú-yu cãháⁿ-yu tnúhu cãháⁿ-ó ndacáⁿ táhú-ó ndihí-yu núú Yã Ndiõxí chí ñà túú tècú tnùní-yu tnúhu cãháⁿ-ó. 17 Te vãha-ni quide-o sá dúcáⁿ cãháⁿ-ó ndacáⁿ táhú-ó núú Yã Ndiõxí, te dicó-ni sá tnúhu-áⁿ ñà túú chindee-xi ñáyiú nàcuáa cuita níhí ndéé-gã-yu cundecú-yu ichi-gá. 18 Te yúhú ío ndacáⁿ táhú-í núú Yã Ndiõxí chí cãháⁿ-í tnúhu sá ñà túú xìní-í tnúhu sá dácàhu iní ñáhá Espíritú-gá xii-í, te cãháⁿ-gã-í dàcúúxí nchaa

nchohó. ¹⁹ Te òré tàcá ñáyi ndècu ichi Yá Ndiòxí dácuhá-yu tnúhu-gá, te cáháⁿ-í tnúhu-gá núu-yu sá sà ní cutnùní iní mée-í nàcuáa ducaⁿ cùtnuní iní-yu nàcuáa ndùu tnúhu cáháⁿ-í. Te tnàhá-gá iní-í cáháⁿ-í úhúⁿ-ni tnúhu-áⁿ núu-yu dácúxí sá cáháⁿ-í úxí míl tnúhu sá ñà túú xìní-í, tnúhu sá dácàhu iní ñáhá Espíritú Yá Ndiòxí xii-í cáháⁿ-í.

²⁰ Te nchòhó ñáyi ndècu ndìhi-í ichi Xítóhó Jesucristú, vá cání iní-ndó dàtná sání iní cue landú, chi caní iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú líhli vá cùndècu-ndo ichi cuehé ichi duha, chi cue landú-áⁿ ñà túú ndècu-güexi ichi-áⁿ. ²¹ Te núu tütú Yá Ndiòxí cáháⁿ-xi nàcuáa ní cáháⁿ-gá, te cachí-xi: “Cue téé ñuú xicá cáháⁿ ndi ðíⁿ núu tnúhu quíhíⁿ-güedé cáháⁿ-güedé tnúhu-í núu ñáyi israél cada-güedé núu-í, te cuèi ducaⁿ dico vá quindáá iní-yu tnúhu-í”, duha ní cachí Yá Ndiòxí te ducaⁿ ní ngúndéé núu tütú-gá. ²² Te tnúhu sá dácàhu iní ñáhá Espíritú Yá Ndiòxí xii-o tnúhu sá ñà túú xìní-ó, xiáⁿ cúu-xí cuendá sá cùtnùní iní cue ñáyi ñà túú sàndáá iní tnúhu Yá Ndiòxí sá ñà túú cùu váha iní ñáhá-gá xii-yu. Dico sá cúu-xí cuè ñáyi sàndáá iní tnúhu-gá ñà túú nà quidé-xí sá cúu-xí-yu. Te tnúhu sá dácàhu iní ñáhá Yá Ndiòxí xii-o, xiáⁿ cúu-xí cuendá sá cùtnùní iní cue ñáyi sàndáá iní tnúhu-gá sá ndécú ndìhi ñaha-gá xii-yu, dico ñà túú dùcaⁿ sani iní cue ñáyi ñà túú sàndáá iní tnúhu-gá. ²³ Te núu ní tacá ncha nchòhó ñáyi ndècu ichi Yá Ndiòxí, te ncha-ndo ní ngúita-ndo cáháⁿ-ndó tnúhu sá dácàhu iní ñáhá Espíritú Yá Ndiòxí xii-ndo tnúhu sá ñà túú xìní-ndó, te mei òré-áⁿ quexìo cue ñáyi ñà túú sàndáá iní tnúhu-gá, ndìhi cue ñáyi vátá quíní dana-gá tnúhu-gá núu ndécú-ndó, te ñáyi-áⁿ quesàhá-yu sá lúcú-ndó te núu ducaⁿ cáháⁿ-ndó tnúhu sá dácàhu iní ñáhá Espíritú-gá xii-ndo òré quexìo-yu. ²⁴ Dico núu ncha-ndo cáháⁿ-ndó tnúhu sá dácàhu iní ñáhá Yá Ndiòxí xii-ndo,

te mei òré-áⁿ quexìo cue ñáyi ducaⁿ ñà túú sàndáá iní-xi tnúhu-gá, ndìhi cue ñáyi ducaⁿ ñà túú xìní dana tnúhu-gá-áⁿ, te ñáyi-áⁿ cutnùní iní-yu sá ndécú cuèchi-yu núu-gá, te ngúita-yu cuáha-yu cuendá sá ñà túú quide váha-yu ndécú-yu cuendá sá cáháⁿ-ndó tnúhu-gá ndédóho-yu. ²⁵ Te ncha sá cuèhé sá dúhá ní quidé-yu sàni iní-yu yíyuhu ndacu iní-yu, te ngúita-yu náhmá-yu ncha sá ñà túú váha ní quidé-yu núu Yá Ndiòxí, te cachí-yu sá ño cànno cuu-gá, te cachí tucú-yu sá ndáá ndécú ndìhi-ndo-gá.

Cada-o nàcuáa tàú-xi cunduu

²⁶ Te vitna nchòhó ñáyi ndècu ndìhi-í ichi Xítóhó Jesucristú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yá Ndiòxí, te dava-ndo dásahú-ndó ñáyi tnúhu-gá, te dava-ndo cáháⁿ-ndó nàcuáa dàquixi túu Yá Ndiòxí iní-ndó, te dava-ndo cáháⁿ-ndó tnúhu sá dácàhu iní ñáhá Espíritú Yá Ndiòxí xii-ndo tnúhu sá ñà túú xìní-ndó, te dava-ndo cáháⁿ-ndó nàcuáa quèe-xi tnúhu-áⁿ. Te ncha sá quidé-ndó ná cùu-xi nacuáa chindee-xi ñáyi nàcuáa cuita níhí ndéé-gá-yu cundécú-yu ichi-gá. ²⁷ Te òré cáháⁿ-ndó tnúhu sá dácàhu iní ñáhá Espíritú Yá Ndiòxí xii-ndo tnúhu sá ñà túú xìní-ndó, te úu-ni-ndo àdi úní-ni tnàhá-ndó cáháⁿ-ndó tnúhu-áⁿ te vá úuⁿ ní cáháⁿ-ndó chi ndéé ndìhi ñⁿ-ndo te dàtnùní ngúita ingá-ndó cáháⁿ-ndó. Te xini ñuhu-xi sá ñⁿ ñáyi cáháⁿ-yu nàcuáa quèe-xi tnúhu cáháⁿ-ndó-áⁿ. ²⁸ Te núu ñà túú ñáyi tècú tnùní nàcuáa quèe-xi tnúhu cáháⁿ-ndó-áⁿ, te núu mée núu ñⁿ-ní-ndó cáháⁿ-ndó tnúhu-áⁿ cáháⁿ ndìhi-ndo Yá Ndiòxí te vá cáháⁿ-ndó núu ñáyi. ²⁹ Te òré cáháⁿ-ndó tnúhu sá dácàhu iní ñáhá Yá Ndiòxí xii-ndo te úu-ni-ndo àdi úní-ni tucu-ndo cáháⁿ, te dava-gá-ndó cùndedóho-ndo tnúhu-áⁿ te cáháⁿ-ndó núu váha-ni cáháⁿ-güedé àdi ñà túú váha-ni. ³⁰ Te núu ñⁿ-ndo ní dácáhú iní ñáhá Yá Ndiòxí xii-ndo ñⁿ tnúhu cáháⁿ-ndó, te núu ñⁿ-ndo sá cáháⁿ-ndó te ngúíhí-ndó te quíhu tucu ingá-ndó

cáháⁿ-ndó nàcuáa ní dácáhu íní ñáhá Yá Ndiöxí xii-ndo. ³¹ Te nchaa nchòhó ñáiyu ní nduu táhu cáhánⁿ tnúhu sá dácàhu íní ñáhá Yá Ndiöxí, te vá úúⁿ-ní cáhánⁿ-ndó chí díhna-gá ìⁿ-ndo cáhánⁿ te dàtnùní cáhánⁿ tucu ingá-ndó. Te ducaⁿ càda-ndo cuendá nchaa-ndo tècú tnùnì-ndó nàcuáa ndùu tnúhu cáhánⁿ ìⁿ ìⁿ-ndo, te ducaⁿ te cudíí-gá íní-ndó càncicúⁿ nihnu-ndo ìchi-gá. ³² Te nchaa ñáiyu cáhánⁿ tnúhu Yá Ndiöxí sa nàha-ná mée-yu nàcuáa quidé-yu cáhánⁿ-yu tnúhu-gá nàcuáa ñá túú quide cutexínu-yu. ³³ Te Yá Ndiöxí cúú-gá Yaá quidé ïo váha cùu ìⁿnuu-ndo ndecu-ndo, te ñá túú dàticá nuu ñaha-gá xii-ndo.

Te na càchí tnúhu-í xii-ndo nàcuáa cáhánⁿ-í nchaa núú tàcá cue ñáiyu ndècu ndìhi-o ichi Xítohó Jesucristú. ³⁴ Te yúhú càchí-í sá vǎ cúú cáhánⁿ cue ñáiyu dìhí òré tàcá-ndó dàcuaha-ndo tnúhu-gá, chí ñá túú dùcaⁿ cuiní-gá cadá-yu, te quíndáá-ni íní-yu cadá-yu nàcuáa tàú-xi cunduu. ³⁵ Te núú ìⁿ sá cuiní-yu nducu tnúhu-yu te ndéé òré nasáá-yu vehé-yu te nducu tnúhu-yu núú yí-yu, chí ñá túú ndùu váha-xi sá cáhánⁿ-yu núú tàcá nchaa ñáiyu dàcuáha ndìhí-yu tnúhu-gá.

³⁶ Te chí dándàcu íní sá ñà díú nchòhó cúú-ndó ñáiyu ní ngúndecu ndìhi tnúhu Yá Ndiöxí díhna nuu nàcuáa datècú tnúhu-ndo dàva-gá ñáiyu, te ní ñà díú mèe-ni nchohó sa ní ngúndecu ndìhi-ndo tnúhu Yá Ndiöxí vitna, núú xǎⁿ vá càchí-ndó sǎ ïo cùnuu-ndo. ³⁷ Te núú dava nchòhó sání íní-ndó sǎ cáhánⁿ-ndó nàcuáa dácàhu íní ñáhá Yá Ndiöxí xii-ndo àdi sani íní-ndó sǎ quidé-ndó nàcuáa chindee ñaha Espíritú-gá xii-ndo, te cuáha váha-ndo cuendá sá ncháá tnúhu cáhánⁿ-í-a cùu-xi tnúhu sá ní cachí tnúhu mee Xítohó Jesucristú cada-o. ³⁸ Te ndéda-ni càa ñáiyu ndècu ndìhi-ndo te núú ñá túú sàndáá íní-yu tnúhu cáhánⁿ-í, te vá cadá cuendá-ndó tnúhu cáhánⁿ-yu.

³⁹ Te vitna nchòhó ñáiyu ndècu ndìhi-í ichi Xítohó Jesucristú, ío canì íní-ndó cáhánⁿ-ndó tnúhu sá dácàhu íní ñáhá Yá Ndiöxí núú ñáiyu,

te dañà-ndo na cáhánⁿ cue ñáiyu ní nduu táhu núú Yá Ndiöxí sá cáhánⁿ-yu tnúhu sá dácàhu íní ñáhá Espíritú-gá xii-yu tnúhu sá ñà túú xini-yu. ⁴⁰ Te cada-ndo nchaa nàcuáa tàú-xi cunduu nàcuáa ñá túú ñà cuu cundecu-ndo.

15

Ní ndoto Xítohó Jesucristú

¹ Te vitna nchòhó ñáiyu ndècu ndìhi-í ichi Xítohó Jesucristú cuiní-í sá dándàcu íní-ndó nàcuáa ní dánèhé ñáhà-í xii-ndo tnúhu sá cáhánⁿ nàcuáa naníhí tàhú-ó, chí díu tnúhu-áⁿ ní sàndáá íní-ndó te nchìcúⁿ nihnu-ndo. ² Te sá xii tnúhu-áⁿ níhnú-ndó ichi cuáhánⁿ-ndó núú ndúú tàhú-ndó cùndecu-ndo ndìhi Yá Ndiöxí ní caa ní quíhíⁿ, te ducaⁿ ndùu táhú-ndó núú cùndecu-ndo ní caa ní quíhíⁿ ndìhi Yá Ndiöxí te núu nchìcúⁿ nihnu-ndo nàcuáa ní dánèhé ñáhà-í xii-ndo, te núu ñá túú nchìcúⁿ nihnu-ndo te ñá túú ní sàndáá íní-ndó nàcuáa tàú-xi cunduu.

³ Te yúhú sa ní cachí tnúhu-í xii-ndo ìⁿ tnúhu sá ïo cùnuu ní níhì-í, chí ní cachí tnúhu-í xii-ndo sǎ Xítohó Jesucristú ní xihí-gá cuendá nchaa yíca cuèchi-o, te ducaⁿ ní cuu chí ducaⁿ cáhánⁿ-xi núú tùtú Yá Ndiöxí sá dúcáⁿ yáha-gá. ⁴ Te ní chindúxi ñaha-güedé xii-gá te nduu únì ní dándótó ñaha Yá Ndiöxí xii-gá, te ducaⁿ ní cuu chí ducaⁿ cáhánⁿ-xi núú tùtú Yá Ndiöxí. ⁵ Te sátá ní ndoto-gá te ní quee túu-gá núú tǎ Pèlú, te dàtnùní ní quee túu-gá núú dàva-gá cue téé ní táuchíúⁿ-gá cáhánⁿ tnúhu-gá. ⁶ Te sátá dúcáⁿ te dàtnùní ní quee túu-gá núú ùhúⁿ cièndú cue ñáiyu ndècu ichi-gá, te vǎi-yu xǎndecu-ní-yu vitna chí sacú-ni-yu ní xihí. ⁷ Te dàtnùní ní quee túu-gá núú tǎ Jàcobó, te sátá dúcáⁿ te dàtnùní ní quee túu-gá núú nchaa cue téé ní táuchíúⁿ-gá cáhánⁿ tnúhu-gá.

⁸ Te ndéé núú ní ndìhi-ná te ní quee túu-gá núú mèe-í, te òré ní quee túu-gá núú-í te cùu-í dàtná ìⁿ déhe yíquiⁿ vǎtá sàa-gá nduu càcu chí cùu-í ìⁿ téé ñá túú sání váha íní-xi cuendá-gá ní cùu. ⁹ Te

yúhú ñá túú cùnū-í dàtná cùnū cue téé ní táúchíúⁿ Xítóhó Jesucristú cáháⁿ tnúhu-gá. Te cùu-í ìⁿ téé ní táúchíúⁿ-gã cáháⁿ tnúhu-gá, cuèi ñá túú tàú-í sá cáháⁿ-í tnúhu-gá, chi ní xóo cuu úhú iní-í cue ñáyiú ndècu ichi Yá Ndiòxí. ¹⁰ Dico Yá Ndiòxí ío váha iní-gá chi ní quide ñaha-gã xii-í ìⁿ téé váha, chi ñá túú-gã quidè-í dàtná ní xóo cada-í. Te ío cùndahú iní ñáhá-gã chindèe ñaha-gá xii-í dico ñá túú àúⁿ nã cuu chindèe ñaha-gá, chi ío-gá vai chiuⁿ-gá ní cuu sa ta quide-í cuáháⁿ dàcúúxí dává-gá cue téé ní táúchíúⁿ-gã cáháⁿ tnúhu-gá te ñá díú mèe-í ducaⁿ quide-í chi mee Yá Ndiòxí ío cùndahú iní ñáhá-gã chindèe ñaha-gá xii-í quidè-í chiuⁿ-gá. ¹¹ Te ñá túú nã cada-xi cuèi dává-gá-güedé sa ní cuu vai-gá chiuⁿ-gá quidé-güedé àdi yúhú, chi ìⁿ-ni tnúhu cáháⁿ-ndí te tnúhu-áⁿ cúú tnúhu ní sándáá iní-ndó.

Cue ñáyiú ní xihí ndotó-yu

¹² Te nchúhú cue téé cáháⁿ tnúhu Xítóhó Jesucristú cáháⁿ-ndí sá ní xihí-gá te ní ndoto-gá, ¿te ná cuendá dává nchòhó cächí-ndó sá vã ndótó cuè ñáyiú ní xihí? ¹³ Te núu ducaⁿ sàni iní-ndó sá vã ndótó cuè ñáyiú ní xihí te ni Xítóhó Jesucristú ñá túú ní ndòto-gá te núu ducaⁿ. ¹⁴ Te núu dìcò Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñá túú nàndíhi-xi te núu ducaⁿ, te àúⁿ nã cuu sándáá iní-ndó-gã te núu ducaⁿ. ¹⁵ Te núu dìcò cúú-xí ìⁿ sá ndáá tnúhu sàni iní dává-ndo ña, te dàcuandehnde-ndí sá cáháⁿ-ndí tnúhu Yá Ndiòxí núú-ndó te núu ducaⁿ, te ñá túú cáháⁿ ndáá-ndí núú-ndó sá Yá Ndiòxí ní dándótó-gã Xítóhó Jesucristú, te núu ndáá nàcuáa sàni iní dává-ndo sá vã ndótó cuè ñáyiú ní xihí, dico ñá ndáá nàcuáa sàni iní-ndó. ¹⁶ Te núu vá ndótó cuè ñáyiú ní xihí te ni Xítóhó Jesucristú ñá túú ní ndòto-gá. ¹⁷ Te núu Xítóhó Jesucristú ñá túú ní ndòto-gá ñá, te àúⁿ nã cuu sándáá iní-ndó-gã te núu ducaⁿ, te ndècu-ni cuèchi-ndo núú Yá Ndiòxí te núu ducaⁿ. ¹⁸ Te núu ndáá nàcuáa sàni iní-ndó ñá te cue ñáyiú ní

sándáá iní ñáhá xii Xítóhó Jesucristú ñáyiú ní xihí ní xíta nihnú-yu te núu ducaⁿ. ¹⁹ Te núu nchoo ndècu ndíhi-o tnúhu ndee iní núú Xítóhó Jesucristú cuendá-ni sá cùndècu-o ñuyíú-a ña, te cùu-o ñáyiú ío-gá duuⁿ duuⁿ ndàhú sá cúú-xí dává-gá ñáyiú te núu ducaⁿ.

²⁰ Dico ndáá sá Xítóhó Jesucristú ní xihí-gá te ní ndoto-gá núu xiáⁿ cùtnùní iní dává-o sá ndótó cuè ñáyiú ní xihí ñáyiú ní sándáá iní tnúhu-gá. ²¹ Te sá cuèchi ìⁿdii-ni téé ní xindècu ñuyíú-a xiáⁿ xihí ñáyiú, te sá cuendá ìⁿdii-ni tucu ingá téé te ndoto cue ñáyiú ní xihí. ²² Te nchaa ñáyiú xihí-yu sá cuèchi ìⁿ téé, te téé-áⁿ cúú-dé ndí Adán téé díhna nuu ní cuu ñaní tnáhá cuè ñáyiú ñuyíú. Te diu-ni ducaⁿ sá cuendá ìⁿdii-ni téé te ndoto cue ñáyiú ní xihí, te téé-áⁿ cúú-dé Xítóhó Jesucristú chi nchaa ñáyiú ndècu ndíhi-gá ndotó-yu. ²³ Te díhna-gá Xítóhó Jesucristú ní ndoto-gá xiáⁿ cùtnùní iní dává-o sá ndòu na quixi tucu-gá ñuyíú-a te dává-áⁿ ndoto nchaa ñáyiú ní xihí ñáyiú ní sándáá iní tnúhu-gá. ²⁴ Te dàtnùní ducaⁿ te sáá nduu nàa nchaa sá ío ñuyíú, te Xítóhó Jesucristú danàa-gá nchaa ndí túhú sá cùnū ío ñuyíú-a, chi danàa-gá nchaa ñáyiú ío cùnū, ndíhi yucu ñávãha, ndíhi nchaa espíritú xínú cuèchi núú-xi. Te ducaⁿ te cúñaha-gã xii Tátá-ó Dütú Ndiòxí taxi tnùní-gá. ²⁵ Chi Xítóhó Jesucristú dacuití taxi tnùní-gá ndéé ná sáá nduu dànaa-gá nchaa sá cúú úhú iní ñáhá xii-gá. ²⁶ Te ndéé núú ní ndíhi-ná te danàa-gá sá quidé xihí ñáyiú. ²⁷ Te ducaⁿ chi cáháⁿ-xi núú tütú Yá Ndiòxí sá méé-gã ní nachihí-gá nchaa sá ío ndaha Xítóhó Jesucristú cuendá sá méé Xítóhó Jesucristú taxi tnùní-gá, te vá yòo ìⁿ taxi tnùní ñáhá xii Yá Ndiòxí, chi mee Yá Ndiòxí cúú-gã Yaá ní nachihí-gá nchaa sá ío ndaha Xítóhó Jesucristú. ²⁸ Te díhna-gá ní xáhaⁿ Yá Ndiòxí xii Xítóhó Jesucristú Yaá cúú Dèhe-gá sá quíndaha-gá nchaa sá ío, te òré ná quíndaha Xítóhó Jesucristú nchaa sá ío, te cúñaha-gã xii Yá Ndiòxí

taxi tnùnì ñàhá-gă xii-gá, te ducaⁿ te mee-nă Yă Ndiöxí taxi tnùnì-gá nchaandi túhú sá ió.

²⁹ Te núu ñá túú ndáá càháⁿ-í, ¿te ná cuendá dava ñáyiú sànduté-yu cuendá ñáyiú ní xíhí núu ñá túú ndáá sá ndótó ñáyiú ní xíhí?

³⁰ Te nchúhú ducaⁿ-ni sàni iní ñáyiú cahni ñàhá-yu xii-ndí, te núu vá ndótó ñáyiú ní xíhí te àúⁿ nă cuu ducaⁿ quide cahnu iní-ndí ducaⁿ cuiní-yu cahni ñàhá-yu xii-ndí te núu ducaⁿ.

³¹ Te nchòhó ñáyiú ndècu ndìhì-í ichi Xítohó Jesucristú ío váha sàni iní-í cuendá-ndó, chi ndècu-o ichi-gá. Te na càchí tnúhu ndáá-í xii-ndo sã ìⁿ nduu ìⁿ nduu ndeé iní ñàhá ñáyiú cahni ñàhá-yu xii-í. ³² Te núu dícó ndáá sá vã ndótó ñáyiú ní xíhí dàtná càchí dava ñáyiú, te àúⁿ nă cuu ní xíndecu-í ñuú Éfesú ní cuu úhú iní ñàhá ñáyiú xii-í te núu ducaⁿ, chi ñáyiú-án ñí quidé-yu dàtná quidé ìⁿ quiti déeⁿ sã cúu-xì-í. Te núu ndáá sá vã ndótó ñáyiú ní xíhí ñá, te váha-gá núu cachí-ó dàtná càchí ñáyiú: “Vítna na còho-o te na càxi-o chi tneé idá cuú-ó”, duha càchí-yu.

³³ Te vá dáñá-ndó mèe-ndo dan-dahú ñàhá ñáyiú ndècu ichi cuehé ichi duha xii-ndo, te ngüíta-ndo càni iní-ndó dàtná sání iní-yu. Chi quèe ndáá-xi nàcuáa càháⁿ tucu dava-gá ñáyiú, chi càchí-yu sá núu ñáyiú quide váha na nihí tnáhă-yu ndìhì ñáyiú ndècu ichi cuehé ichi duha, te ngüíta ñáyiú quide váha-án cadá-yu tnàhá-yu nchaá sá cuehé sá dúhá dàtná quidé ñáyiú-án. ³⁴ Te ío váha cuáha-ndo cuendá nàcuáa cundecu-ndo, te vá cadá-gă-ndó dàtná quidé cuè ñáyiú ndècu ichi cuehé ichi duha. Te dava-ndo quide-ndo datná quidé cuè ñáyiú ndècu ichi cuehé ichi duha chi ñá túú sàndáá iní-ndó Yă Ndiöxí. Te duha càháⁿ-í cuendá sá cúcàháⁿ núu-ndó cuendá nchaá sá ñà túú váha quide-ndo.

Nàcuáa ndoto ñáyiú ní xíhí

³⁵ Te cudana dava-ndo ndùcu tnúhu-ndo núu nása ndoto ñáyiú ní xíhí, te nása cunduu yiqui cùñú-yu

òré ndotó-yu. ³⁶ Te nchòhó ñáyiú ducaⁿ càháⁿ cúu-ndó ñáyiú ñá túú tnàhí cùtnuní iní-xi, te duha na càháⁿ-í nàcuáa tecú tnùnì-ndó. Te núu ìⁿ tata ná chíhí-ó te tèhyú méé-xí te xínu déhe-xi. ³⁷ Dico ñá díú sã sà ní xínu ta sàhnu cuáháⁿ ní cùxi-o, te diu-ni ducaⁿ quide-o cuéi triú ndìhì nchaá dava-gá tata xítú-ó. ³⁸ Te Yă Ndiöxí quidé-gă sácünduu tata xínu-án dàtná cuiní méé-gă cunduu. Te ndèda-ni càa tata te diu-ni-gá quidé-gă sácünduu-xi nàcuáa tàú-xi cunduu. ³⁹ Te ndí díⁿ ndáa nchaá yiqui cùñú, chi tucu càa yiqui cùñú nchoo cuè ñáyiú, te tucu càa yiqui cùñú nchaá quiti xica núu ñúhú, te tucu càa yiqui cùñú nchaá quiti ndàva, te tucu càa yiqui cùñú nchaá chácá. ⁴⁰ Te ducaⁿ ñà túú ìⁿ-ni caa nchaá yiqui cùñú sá ió andiú ndìhì nchaá yiqui cùñú ñáyiú ió ñuyíú-a, te ducaⁿ ñà túú ìⁿ-ni ndáa vii nchaá sá ió andiú ndìhì ñuyíú-a. ⁴¹ Te ducaⁿ cùu tucu-xi nchícanhì chi tucu dàyehé-xi, te tucu dàyehé yóó, te tucu dàyehé nchaá chódíní, te ducaⁿ ñà túú ìⁿ-ni dayehé nchaá chódíní. ⁴² Te ducaⁿ sàtnahá-xi cùu ñáyiú ní xíhí te ndoto, chi tucu càa yiqui cùñú-yu sá nguindüxi te tucu cunduu yiqui cùñú-yu òré ndotó-yu, te yiqui cùñú sá ndótó ndìhì-yu-án vã ndìhì ñihnu-gá-xi. ⁴³ Te yiqui cùñú ñáyiú xíhí ñá túú nàndìhì-xi, dico yiqui cùñú sá ndótó ndìhì-yu te ío váha cunduu. Te nchaá yiqui cùñú ñáyiú xíhí ñá túú tnàhí-gá ndee-xi, dico yiqui cùñú ndoto ndìhì-yu xíãⁿ ío cunduu ndee-xi. ⁴⁴ Te yiqui cùñú nchaá ñáyiú xíhí cúu-xí cuendá ñuyíú-a, dico yiqui cùñú sá ndótó ndìhì-yu xíãⁿ cundecu-ná-xi cuendá Espiritú Yă Ndiöxí. Te dàtná ío yiqui cùñú sá cúu-xí cuendá ñuyíú-a, te ducaⁿ ío yiqui cùñú sá cúu-xí cuendá mee-nă Espiritú Yă Ndiöxí.

⁴⁵ Te núu tütú Yă Ndiöxí càchí-xi: “Ndíi Àdán ndíi ní xíndecu ndeé díhna ní chíhì Yă Ndiöxí iní ndíi”, duha càchí-xi núu tütú-gá. Te ingá tucu téé cùu-dé dàtná ndíi Àdán te téé-án

cúu-dě Xítohó Jesucristú, te Yaá-án quidé-gã sá mée-ná Espíritú Yã Ndiöxí quidé-xí ndècu-o ichi-gá vitna. ⁴⁶ Te díhna-gá yiqui cùñú cuendá ñuyíú-a ní ngúndecu, te dàtnùní ngúndecu yiqui cùñú cundecu ndihi mee-nã Espíritú Yã Ndiöxí. ⁴⁷ Te tée díhna nuu nĩ xíndecu ñuyíú-a chi ñuhu ní cadúha ñaha Yã Ndiöxí xii-dé, te tée-án cúu-dě ndíi Àdán, te ingá tucu tée ní cuu-dé andiu te tée-án cúu-dě Xítohó Jesucristú. ⁴⁸ Te nchaa ñáyiu càa yiqui cuñú-yu dàtná cáá yiqui cuñú té Àdán tée ducaⁿ nĩ cuáha ñuhu-án, te nchaa ñáyiu ní nduu táhú cundecu ndihi tée ducaⁿ vëxi cuuⁿ andiu-án, ñáyiu-án nduu yiqui cuñú-yu dàtná cáá yiqui cuñú ní nduu táhú-dě ndécú ndihi-dé vitna, te tée-án cúu-dě Xítohó Jesucristú. ⁴⁹ Te nchaa ñáyiu ñuyíú-a càa-yu dàtná-ni càa datná-ni nduu tée ducaⁿ nĩ cuáha ñuhu-án. Te nchaa nchoo ñáyiu ní nduu táhú cundecu ndihi tée ducaⁿ vëxi cuuⁿ andiu-án nduu-o dàtná-ni càa datná-ni nduu tée-án tucu.

⁵⁰ Te nchòhó ñáyiu ndècu ndihi-í ichi Xítohó Jesucristú càchí tnúhu-í xii-ndo sã ncháá nàcuáa càa yiqui cuñú ñáyiu xíndecu vitna vá sàa-xi cundecu-xi núú ndécú Yã Ndiöxí táxí tnùnì-gá, chi ñuyíú-a ndihi nihnu-xi. Dico sá tàú-xi sáá núú ndécú-gã táxí tnùnì-gá xini ñuhu-xi cuu-xi sá cùdíi cundecu. ⁵¹ Te na càchí tnúhu-í xii-ndo ñⁿ tnúhu sá yíyùhu ní cuu: Dava-o cùú-ó te dava-o cundecu-ni-o, dico nchaa-o nàdáma yiqui cuñú-ó. ⁵² Te uuⁿni ducaⁿ nàdáma yiqui cuñú-ó òré cáháⁿ ñⁿ cútú, te cútú-ãⁿ cáháⁿ-xi òré sa ta cùyatni naa ñuyíú. Te òré cáháⁿ cútú-ãⁿ te ndoto nchaa ñáyiu ní xihí ñáyiu ní xíndecu ichi Xítohó Jesucristú, te ducaⁿ te vá ñⁿ nduu ñⁿ quíú-gã cuú-yu. Te nchaa ñáyiu ndècu vívú te nàdáma yiqui cuñú-yu tnàhá-yu. ⁵³ Te nchaa yiqui cùñú ndécú ndihi nchaa ñáyiu ndècu ñuyíú-a vitna ñá túú cùdíi-xi chi xihí-xi, dico yiqui cùñú nduu táhú nchoo ñáyiu ndècu ichi Xítohó Jesucristú chi cudíi-xi ní caa ní quíhíⁿ

chi vá cùú-gá-xi. ⁵⁴ Te òré ná nduu táhú-ó yiqui cuñú sá dúcáⁿ cùdíi ní caa ní quíhíⁿ-án, te vá cùndècu ndihi-gá-ó yiqui cuñú sá ñá túú cùdíi. Te dàvá-án te quee ndáá-xi nàcuáa càháⁿ-xi núú tütú Yã Ndiöxí núú càchí-xi: “Vitna ñá túú-gã xihí ñáyiu chi mee-nã Yã Ndiöxí cùnùu-gá táxí tnùnì ñáhá-gã xii-yu. ⁵⁵ Te ñá túú tnàhí-gá ná ndoho ñáyiu sá cuendá tnúhu xihí, chi vá cóó-gã tnúhu xihí”, duha càchí-xi núú tütú Yã Ndiöxí. ⁵⁶ Te cue ñáyiu ndècu ndihí-yu tnúhu sá sánú ichi ñaha xii-yu nàcuáa cadá-yu cundecú-yu dico uuⁿ-gá quidè-yu nchaa sá cuèhé sá dúhá. Te sá cuendá nchaa sá cuèhé sá dúhá quidè-yu-án, te xiãⁿ ní ngúndecu tnúhu xihí dándòho ñaha-xi xii-yu. ⁵⁷ Dico táxãhu xii Yã Ndiöxí chi ní taxi-gá tnúhu ndee iní ndécú ndihi-o sá sàá nduu te vá quínì-gá-ó tnúhu xihí, te ducaⁿ chi ndècu ndihi-o Xítohó Jesucristú.

⁵⁸ Te xiãⁿ núu càháⁿ-í dóho nchòhó cue ñáyiu ndècu ndihi-í ichi Xítohó Jesucristú chi ío cùu iní ñáhà-í xii-ndo, te càháⁿ-í dóho-ndo sã càncìcùⁿ nihnu-ni-ndo ichi Xítohó Jesucristú cuèi nándi na càda ñaha ñáyiu xii-ndo sã cuendá-gá, te ío nducu ndèe-ni-ndo cada-ndo chiuⁿ-gá, chi sa nàha-ndo sá ncháá chiuⁿ quide-o cuendá-gá ñá túú àúⁿ nã cuu quide-o.

16

Nàcuáa sàcáⁿ tnàhá ñáyiu díhúⁿ

¹ Te na càchí tnúhu-í xii-ndo cuendá díhúⁿ sã sàcáⁿ tnàhá-ndó sã cúú-xi ñáyiu ñuú Jerusàlén, chi diu-ni duha ní dánèhé-í cue ñáyiu xíndecu ichi Xítohó Jesucristú ndécú ñⁿ ñⁿ xichi distritú Gàlaciá. ² Te duha cada-ndo ndi tnàhá nduu ndumìngú, te ñⁿ ñⁿ-ndo dàquee díhúⁿ-ndo sacú díhúⁿ nàcuáa chindee ñaha Yã Ndiöxí xii-ndo nihí-ndó cuendá òré quexio-í te sa cundecu túha díhúⁿ-ãⁿ. ³ Te òré quexio-í te mee-ndo càxi-ndò-yu núu ndédacáa-yu sàni iní-ndó càda ndáá canehe díhúⁿ-ãⁿ quíhíⁿ ndaha ñáyiu xíndecu ichi Xítohó Jesucristú ndécú ñuú Jerusàlén. Te cadúha-í ñⁿ úú

tutú canehé-yu quíhíⁿ cuendá cutnùnì iní ñáyu ñuú Jerusàlén nàcuáa ndùu chiuⁿ cuáháⁿ-yu. ⁴ Te núu xìni ñuhu-xi sá quíhíⁿ-í te candeca-í-yu quíhíⁿ.

Té Páblú sání iní-dé quíngoto-dé cue ñáyu ndècu ichi Xítohó Jesucristú

⁵ Te yúhú sání iní-í yáha-í ìⁿ úú ñuú cáa dístítú Macèdoniá, te dàtnùnì ducaⁿ te sáa-í núú ndécú-ndó. ⁶ Te òré quexìo-í te cudana cundecu ndíhi ñaha-í xii-ndo vai nduu, àdi cudana te cundecu ndíhi ñaha-í xii-ndo ndéé yáha nchaa yóó quidé víxiⁿ-xi. Te sátá dúcáⁿ te cada ndee iní-ndó chindee ñaha-ndo xii-í òré nuçúhuⁿ ichi-í te núu ndéé ichi na quíhíⁿ-í. ⁷ Te duha càháⁿ-í chi núu Yá Ndiöxí ná càchí-gá te cundecu ndíhi ñaha-í xii-ndo òré quexìo-í te ñá díú dícó-ni ichi yáha-í. ⁸ Te cundecu-ni-í ñuú Éfesú-a ndéé tnahá vico Pentecòstés. ⁹ Te ducaⁿ chi iha ío tédóho ñáyu tnúhu Xítohó Jesucristú sá càháⁿ-í núú-yu. Núu xíãⁿ ío váha quèe cuendá cada-í chiuⁿ-gá cuèi ío vai ñáyu ñá túú tnahá iní-yu sá càháⁿ-í tnúhu-gá.

¹⁰ Te núu na quíxi coto ñaha té Timùteú xii-ndo, te ío váha cuu iní-ndó càháⁿ ndíhi-ndo-dé cuendá ducaⁿ ñá túú ná caní iní-dé cundecu ndíhi ñaha-dé xii-ndo, chi tnahá-dé cúú-dé té quide chiuⁿ Xítohó Jesucristú dàtná quidé-í. ¹¹ Te cuíní-í sá nì ìⁿ-ndo vá caní cuèhé iní-ndó cuendá-dé, te chindee-ndo-dé nàcuáa cuu váha iní-dé òré quíxi-dé quíxi coto ñaha-dé xii-í, chi yúhú ndíhi dava-gá ñáyu ndècu ichi Xítohó Jesucristú ndétú-ndí-dé quexìo-dé.

¹² Te ío ní càháⁿ ndàhú-í núú tē Àpolós té ndècu ndíhi-o ichi Xítohó Jesucristú cuendá quíxi-dé ndíhi dava-gá cue té ndècu ndíhi-o ichi-gá quíxi coto ñaha-güedé xii-ndo dico ñá túú ní cuíní-dé quíxi-dé vitna, dico quíxi-dé ndéé cuèé-gá.

Tnúhu ndéé núú nì ndíhi-ná

¹³ Te ío quíhi iní-ndó cundecu-ndo ichi Xítohó Jesucristú, te vá dáña ndéé-ndó quíndáa iní-ndó-gá, te ío yíi cùnduu iní-ndó cundecu-ndo ichi-gá,

te ío nducu ndèe-ndo canchicúⁿ ni-hnu-ndo ichi-gá. ¹⁴ Te ío váha cuu iní tnahá-ndó, te ducaⁿ ío váha cada tnahá-ndo te núu nándi cùu sá váha sàni iní-ndó càda-ndo.

¹⁵ Te nchòhó ñáyu ndècu ndíhi-í ichi Xítohó Jesucristú sa ñaha-ndo sá dñnanuu cuè ñáyu cùu ndi mee té Èstéfanás ndécú dístítú Acáyá ní sándáa iní-yu tnúhu Xítohó Jesucristú. Te vitna ñá túú dàña ndéé-yu quidé-yu sá váha sá cúú-xí dàva-gá ñáyu sándáa iní tnúhu-gá. ¹⁶ Te càháⁿ ndàhú-í núú-ndó sá quíndáa iní-ndó nchaa ñáyu ducaⁿ xíquide, ndíhi nchaa dava-gá ñáyu ío ndècu ndee quide chiuⁿ ndíhi-ndo cuendá Xítohó Jesucristú.

¹⁷ Te ío cùdíi iní-í sá nì quexìo té Èstéfanás, ndíhi té Fortunatú, ndíhi té Acàicú, chi cue téé-áⁿ nì quide-güedé núú-ndó nì quide-güedé nchaa sá ñá túú ndàcu-ndo cada-ndo cuendá-í ní cùu. ¹⁸ Te ío tàxi-güedé tnúhu ndee iní xii-í, te díu-ni ducaⁿ tàxi-güedé tnúhu ndee iní xii nchòhó tucu, te núu xíãⁿ xíní ñuhu-xi sá cànèhe-ndo sá yíñuhu núu nchaa cue téé duha xíquide váha.

¹⁹ Te nchaa ñáyu xíndecu ichi Xítohó Jesucristú ndécú dístítú Àsiá quide ndee iní ñáhá-yu xii-ndo, te ío cada ndee iní-ndó càchí té Àquilú ndíhi ñadíhí-dé tá Priscilá, te ducaⁿ quide ndee iní ñáhá tucu nchaa ñáyu tàcá dácuaⁿ tnúhu Yá Ndiöxí vehé-yu xii nchaa nchòhó ñáyu ndècu ichi-gá.

²⁰ Te cada ndee iní tucu-ndo càchí cue dava-gá ñáyu ndècu ndíhi-o ichi Xítohó Jesucristú. Te nì yùhu nì iní-ndó càda ndee iní tnahá-ndó ìⁿ ìⁿ-ndo.

²¹ Te vitna ndaha mee yúhú té Páblú téé-í tnúhu-a quide ndee iní ñáhà-í xii-ndo.

²² Te ñáyu ñá túú cùu váha iní-xi núú Xítohó Jesucristú te na cuíta niñú-yu. Te vitna nchaa-o chí ná càchí-ó sá Xítohó Jesucristú quíxi tucu-gá.

²³ Te xìcáⁿ táhù-í núú Xítohó Jesucristú sá ná chindee chítúu ñaha-gá xii-ndo. ²⁴ Te ío cùu iní ñáhà-í xii-ndo

nàcuáa ndècu-o ichi Xítóhó Jesucrístú,
te ducaⁿ na cùnduu, te ío chí cádá ndè
iní-nă vitna.

TUTÚ CÚÚ ÛÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ CÒRINTÚ

*Té Päblú cádúha-dé tutú quihiⁿ
ndaha ñáyiu xíndecu ichi Xítoho Jesu-
crístú ndécú ñúú Còrintú*

¹ Yúhú té Päblú cãháⁿ-í tnúhu Xítoho Jesucristú chi ducaⁿ ñ cachí Yá Ndiöxí cunduu. Te cádúha-í tutú-a ndihi té Timùteú té ndècu ndihi-o ichi-gá cuendá daquixi-í ndaha nchòhó ñáyiu xíndecu ichi Yá Ndiöxí ndécú ñúú Còrintú, te tutú-a cuu-xi tnàhá cuendá nchaa ñáyiu cùu cuendá Yá Ndiöxí xíndecu nchaa ñúú yíndèhu distritú Acãyá. ² Te xicáⁿ táhù-í núú Tãtá-ó Dútú Ndiöxí ndihi núú Xítoho Jesucristú sá ïo na chindee chitúu ñaha-gã xii-ndo, te ñu-ni ndi ndùú-gá ná càda te ïo váha cuu iní-ndó cùndecu-ndo.

*Té Päblú cãháⁿ-dé nchaa nàcuáa
ndòho-dé*

³ Te chí ná cãchí-ó sã ïo váha iní Dútú Ndiöxí Yaá cúú Tãtá Xítoho Jesucristú, te ñu-ni Dútú Ndiöxí cúú-gã Yaá ïo cùndahú iní ñáhá xii-o, te ñu-ni-gá cúú-gã Yaá táxi tnúhu ndee iní. ⁴ Te cuéi nándi ndòho-o ndecu-o dico ñu-ni Dútú Ndiöxí táxi-gã tnúhu ndee iní xii-o, te ducaⁿ quide-gá cuendá sá nchóo cuãñaha-o tnúhu ndee iní xii nchaa ñáyiu nándi ndòho ndecu, te ñu-ni nchaa tnúhu ndee iní táxi-gã xii-o ñu-ni nchaa tnúhu ndee iní-áⁿ cuãñaha-o xii-yu. ⁵ Te Xítoho Jesucristú ïo ní ndòho-gá, te ducaⁿ nchòo tucu ïo ndòho-o, te ducaⁿ ïo vai tnúhu ndee iní ñihí-ó ndècu ndihi-o chi ndècu-o ndihi Xítoho Jesucristú. ⁶ Te nchúhú nándi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndihi-ndo te naníhí tàhú-ndó. Te Yá Ndiöxí táxi-gã tnúhu ndee iní xii-ndí, te ducaⁿ quide-gá cuendá sá nchòhó tnàhá-ndó ñihí-ndó tnúhu ndee iní-áⁿ te naníhí tàhú-ndó, te ducaⁿ càda

ndee cada cahnu iní-ndó ndòho-ndo datná ndóhó nchúhú, ⁷ Te nchúhú ïo váha sãni ndáá iní-ndí cuendá-ndó chi ndòho-ndo datná ndóhó-ndí, te ducaⁿ táxi Yá Ndiöxí tnúhu ndee iní xii-ndo datná táxi-gã xii-ndí.

⁸ Te nchòhó ñáyiu ndècu ndihi-ndí ichi Xítoho Jesucristú cuiní-ndí cachí tnúhu-ndí xii-ndo nàcuáa ní yáha-ndí cùtnàhá ní xíndecu-ndí distritú Àsiá chi dàvá-áⁿ ïo ní ndòho-ndí, te luha-ná te vá cùndèe iní-ndí yáha-ndí nchaa tnúndòho-áⁿ ní cùu chi ní xehndé iní-ndí sá vã cãcu-ndí. ⁹ Chi ní sani iní-ndí sá ndiyi-ná cuu-ndí ní cùu, te ducaⁿ ñ yáha-ndí cuendá sá ïo-gá quíndáá iní-ndí Yá Ndiöxí sá díú-gã taunihnu ñaha-gã xii-ndí, te ñá díú mèe-ndí taunihnu-ndí mée-ndí, te ñu-ni-gá cúú-gã Yaá dándòto cuéi ñáyiu sa ní xíhí. ¹⁰ Te ñu-ni-gá ní taunihnu ñaha-gã ñá túú ní sãhni ñaha ñáyiu xii-ndí, te ñu-ni-gá táunihnu ñaha-gã xii-ndí cuéi vitna, te cùtnuní ndáá iní-ndí sá díú-ni-gã taunihnu ñaha-gã xii-ndí núú cuaháⁿ núú vëxi te vá cáhni ñaha ñáyiu. ¹¹ Te nchòhó tnàhá-ndó chindee ñaha-ndo xii-ndí chi cãháⁿ ndihi-ndo Yá Ndiöxí cuendá-ndí, te ïo vai ñáyiu cãháⁿ ndihi ñáhá-yu xii-gá cuendá-ndí, te ducaⁿ ïo vai ñáyiu ndacáⁿ táhù-yu núú-gã cuendá nchaa sá váha quide ñaha-gã xii-ndí.

*Té Päblú cãháⁿ-dé ná cuendá ñá túú
ní ñáyaha-dé ñúú Còrintú*

¹² Te ïo váha cùu iní-ndí chi cùtnuní iní-ndí sá cúú-ndí cue té cùu ndáá datná cuiní Yá Ndiöxí cunduu ndècu-ndí ñuyú-a, te ñu-ni ducaⁿ quide-ndí sá cúú-xi-ndó chi mee-gã cùndahú iní ñáhá-gã xii-ndí chíndèe ñaha-gã, te ñá túú quide-ndí datná sãni iní cue ñáyiu ñuyú-a. ¹³⁻¹⁴ Nchaa nàcuáa ndèu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñá túú ùhú tecú tnuní-ndó. Te nchòhó sã cùtnuní luha iní-ndó nàcuáa quide-ndí ndécú-ndí, te cuiní-ndí sá ïo-gá váha

tecú tnùnì-ndó cuèndá sá òré ná quìxi tucu Xítohó Jesucristú, te dàvá-áⁿ ò cada nínu ñaha-ndo xii-ndí dàtná cada nínu ñaha-ndí xii-ndo. ¹⁵ Te cuèndá xiáⁿ núu ní sani iní-í yáha cáháⁿ-í úú xito núu ndécú-ndó cuèndá ío cudíí iní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha cáháⁿ-í núu ndécú-ndó, te òré ndixi tucu-í te nayáha cáháⁿ tucu-í, te òré nayáha cáháⁿ-í te taxi-ndo sá cúu ìchi-í cuèndá quíhíⁿ-í distritú Jùdeá, duha ní sani iní-í ní cùu. ¹⁷ Te sá dúcáⁿ ñá túú ní quíxi coto ñaha-í xii-ndo te cudana sàni iní-ndó sá yùhú ñá túú ní sáha váha-í cuèndá nàcuáa ní sani iní-í cada-í, àdi cudana ñáyiú ndècu ichi cuehé ichi duha, chi cue ñáyiú-áⁿ tnaa càchí-yu sá cúu càdá-yu ìⁿ sá sání ìní-yu cadá-yu te tnaa càchí-yu sá ñáhá. ¹⁸ Dico Yá Ndiöxí Yaá ío váha quide ndáá nàha ndáá nàhá càxi-gá sá nchùhú ñá túú dàma-ndí sá càháⁿ-ndí. ¹⁹ Te yùhú ndíhi té Silvanú ndíhi té Timùteú dánèhé ñáhá-ndí xii-ndo cuèndá Xítohó Jesucristú Yaá cúu Dèhe Yá Ndiöxí, te Xítohó Jesucristú cúu-gá Yaá ñá túú dàma-gá tnúhu càháⁿ-gá, chi cùu-gá Yaá càháⁿ mee-ni tnúhu ndáá tnúhu cuíti. ²⁰ Te diu-ni Xítohó Jesucristú cúu-gá Yaá quidé nchàa nàcuáa ní cachí Yá Ndiöxí. Te sá cuèndá sá dúcáⁿ quide Xítohó Jesucristú xiáⁿ càchí-ó sá ío càhnu cuu Yá Ndiöxí. Te ncha-o na càchí-ó sá díú-ní dùcaⁿ na cada-gá. ²¹ Te mee Yá Ndiöxí quidé-gá ndécú-ní-ó ìchi Xítohó Jesucristú. Te diu-ni mee-gá ní cáháⁿ ñáhá-gá xii-o cuèndá cunu cuechi-o núu-gá. ²² Te Yá Ndiöxí ní quide-gá sá nchóo cùu-o ñáyiú cùu cuendá-gá, te ní taxi-gá Espiritú-gá ní ngúndecu ndíhi-o cuèndá cutnùnì iní-ó sá ndàá cada ñaha-gá xii-o nàcuáa ní cachí-gá cada-gá.

²³ Te Yá Ndiöxí nàhá-gá sá yùhú càháⁿ ndáá-í ná cuèndá vátá quíxi-gá-í quíxi coto ñaha-í xii-ndo, te vátá quíxi-gá-í chi ñá túú cuìní-í dandìhú-í iní-ndó. ²⁴ Te nchùhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yá

Ndiöxí, chi sa sàndáá váha iní-ndó-gá, chi nchùhú cuìní-ndí chindee tnúhu ñaha-ndí xii-ndo nàcuáa ío-gá cudíí iní-ndó cùndecu-ndo.

2

¹ Te ní sani ndáá iní-í sá vǎ quíxi ndíhi-ni-í quíxi coto ñaha-í xii-ndo cuèndá sá vǎ dándìhú-í iní-ndó. ² Te nchòhó cúu-ndó ñáyiú tàxi tnúhu ndee ìní xii-í cudíí ìní-í ndécú-í, te xiáⁿ núu ñá túú cuìní-í dandìhú-í iní-ndó, chi núu ducaⁿ na càda-í te vǎ cùndècu váha-gá iní-ndó nàcuáa taxi-ndo tnúhu ndee ìní xii-í. ³ Te xiáⁿ núu ní tendaha-í tutú véxi ndaha-ndo cuèndá sá òré quíxi coto ñaha-í xii-ndo, te dàvá-áⁿ quíni-í sá quidé-ndó nàcuáa cudíí ìní-í te ñá díú dà dandìhú-ndó ìní-í òré quexìo-í, chi nchòhó tàú-ndó càda-ndo sá yùhú cudíí ìní-í. Te cùtnunì ndáá iní-í sá núu yùhú cudíí ìní-í te tnàhá nchòhó cudíí ìní-ndó cuèndá sá dúcáⁿ cudíí ìní-í. ⁴ Te ndàhyú-í sá ndíhú iní-í òré ní cadúha-í tutú ní dáquixì-í ndaha-ndo, chi ío cuehé sá sání iní-í, te ñá túú ní dàquixì-í tutú-áⁿ ndaha-ndo cuèndá sá dándìhú iní ñáhà-í xii-ndo, chi ní dáquixì-í cuèndá sá nchòhó cutnùnì iní-ndó sǎ ío cùu iní ñáhà-í xii-ndo.

Nàcuáa tàú ñáyiú ñúú Còrintú cadá-yu cuèndá ìⁿ ñáyiú ñá túú quide ndáá

⁵ Te na càchí tnúhu-í xii-ndo cuèndá ìⁿ tée ní quide ìⁿ sá ñá túú tàú-dé cada-dé ndécú ndíhi-ndo, te ní quide ndàhú-xi luha iní-í cuèndá sá ñí quide-dé-áⁿ dico nchòhó tnàhá-ndó ñí dándìhú-dé luha iní-ndó, te duha càchí-í sá lúhá-ní ñí dándìhú-dé iní-ndó cuèndá sá vǎ cuidó-gá-í ná tnúhu cáháⁿ-í. ⁶ Te nàcuáa ní ndatnúhu-ndo ñí quide ndáá-ndó cuèchi tée-áⁿ te sa ndói-gá cuu nàcuáa ní quide-ndo-dě. ⁷ Te vitna tàú-ndó càda cahnu iní-ndó sǎ ñí quide-dé, te cuáñaha-ndo tnúhu ndee ìní xii-dé chi núu ñáhá te vǎ ñíhí ndée-gá-dé cada-dé sá vǎha cuèndá sá ndíhú iní-dé. ⁸ Te xiáⁿ núu càháⁿ ndàhú-í núu-ndó sǎ cadá tucu-ndo sá cúu

iní-ndó-dě. ⁹ Te d̄iu-ni cuendá iha cãháⁿ-í ìⁿ núú tûtú sá sã ní dáquíxì-í ndaha-ndo, te ducaⁿ ñi quide-í xító ndèè ñáhà-í xii-ndo nõu ndisa cuini-ndó càda-ndo nchaa nacuaa cãháⁿ-í. ¹⁰ Te ndèda-ni cà ñáyiú na càda cahnu iní-ndó ìⁿ sá quidè-yu, te tnàhá yúhú cada càhnu iní-í sá quidè-yu tucu. Te núú ió ìⁿ sá xíní ñùhu-xi cada cahnu iní-í te quide cahnu iní-í, te mee Xítóhó Jesucristú nãhá-gã sá dúcãⁿ quide-í, te ducaⁿ quide-í cuendá sá nchòhó cuu-xi sá vãha xii-ndo. ¹¹ Te ducaⁿ te sãcuíhnã vã ñihí-xi ná cada ñaha-xi xii-o, chi nchoo sã xíní-ó nãcuãa quide-xi.

Té Pãblú ndìhú iní-dé ndécú-dě ñuú Tròás

¹² Te ní xica-í cuáhãⁿ-í ñuú Tròás cuendá yacãⁿ cãháⁿ-í tnúhu sã cãháⁿ nãcuãa naníhí tàhú-ó tnúhu Xítóhó Jesucristú, te òré ní quexìo-í te ní níhì-í ìⁿ ichi càhnu cãháⁿ-í tnúhu-gã. ¹³ Dico ñã túú ní cùu vãha iní-í chi ñã túú ní naníhì-í té Títú tée ndècu ndìhi-o ichi Xítóhó Jesucristú, núu xiãⁿ ní quide ndee iní tnãhá-í ndìhi cue ñáyiú ñuú-ãⁿ, te ní xica-í cuáhãⁿ-í distritú Macèdoniã.

Dàquetìhú-ó yucu ñãvãha chi ndècu ndìhi-o Xítóhó Jesucristú

¹⁴ Te táxãhu xii Yã Ndiõxí chi ducaⁿ-ni sãnu ichi ñaha-gã xii-ndí nãcuãa cunuu-ndí núú yucu ñãvãha chi ndècu ndìhi-ndí Xítóhó Jesucristú, te mee Yã Ndiõxí sãchìuⁿ ñaha-gã xii-ndí cãháⁿ-ndí tnúhu-gã. Te cada iní-ó sã tnúhu-gã-ãⁿ cúu-xí dàtnã ìⁿ yúcú sã ìo vãha sãháⁿ te ta xítenuu dicó-xi ndèni ní cuu cuáhãⁿ. Te ducaⁿ sãtnahã-xi cùu tnúhu-gã chi nchúhú quidè-ndí nãcuãa ta xítenuu ndèni ní cuu cuáhãⁿ. ¹⁵ Te cùu-ndí dàtnã dicó ìⁿ yúcú sã ìo vãha sãháⁿ, te nãcãni cuendá Xítóhó Jesucristú núú Yã Ndiõxí, te dicó yúcú-ãⁿ nchítã cuèi núú xĩndecu cue ñáyiú sa ní naníhí tàhú, te cuèi núú xĩndecu cue ñáyiú ta xĩta ñihnu cuáhãⁿ. ¹⁶ Te sã cúu-xí cuè ñáyiú ta xĩta ñihnu cuáhãⁿ-ãⁿ, dicó yúcú-ãⁿ cúu-xí dàtnã ìⁿ sã sãhni ñaha xií-yu, dico sã cúu-xí

cuè ñáyiú sa ní naníhí tàhú, dicó yúcú-ãⁿ cúu-xí dàtnã ìⁿ sã ndécã iní-yu, ducaⁿ sãtnahã-xi cùu nchúhú. Te vitna chí cuãha cuendá nõu ná cúu ñáyiú sãni iní-ndó ndàcu cada nacuaa ndùu tnúhu cãháⁿ-í-a. ¹⁷ Chi nchúhú cãháⁿ-ndí tnúhu Yã Ndiõxí dico ñã túú ndãhú quidè-ndí ndìhi tnúhu-gã dàtnã xĩquide dava-gã-güedé, chi quide ndãã-ndí cãháⁿ-ndí tnúhu-gã, te mee-gã ní cachí-gã sã dúcãⁿ càda-ndí te ndèhe-gã sã nchúhú quidè-ndí nãcuãa ní cachí-gã, chi ndècu ndìhi-ndí Xítóhó Jesucristú.

3

Cuendã ìngã núú sã vãha ní cachí Yã Ndiõxí cada-gã ñáyiú

¹ Te cuèi duha cãháⁿ-ndí núú-ndó dico ñã túú xini ñùhu-xi sã cũñaha-ndí xii-ndo sã cúu-ndí cue tée quide vãha, te ni ñã túú xini ñùhu-xi cacanehe-ndí ìⁿ tutú núú cãháⁿ-xi sã cúu-ndí cue tée vãha danèhé ñáhã xii-ndo datnã xĩquide dava-gã-güedé, te ni ñã túú xini ñùhu-xi sã nchòhó taxi-ndo ìⁿ tutú núú cãháⁿ-ndó sã nchúhú cúu-ndí cue tée quide vãha. ² Te ñã túú xini ñùhu-xi ducaⁿ cada-ndí. Te cùtnuní ndãã iní-ndí sã nchòhó cúu-ndó dàtnã ìⁿ tutú sã ìo vãha cãháⁿ cuendã-ndí. Te ducaⁿ sãtnahã-xi cùu-ndo chi nchaa ñáyiú ñihí-yu tnúhu nãcuãa quide-ndo ndecu-ndo, te xiãⁿ cùtnuní iní-yu sã nchúhú cúu-ndí cue tée quide vãha. ³ Te nchòhó cúu-ndó cuendã Xítóhó Jesucristú, te cùu-ndo datnã tutú-gã te tutú-ãⁿ ñi táuchíuⁿ-gã xii-ndí ní cadúha-ndí, te mee-ni ndìhi Espiritú Yã Ndiõxí ní ngúndéé tnúhu-ãⁿ te ñã díú ndìhi tindã ní ngúndéé. Te ñã díú ìⁿ núú yúú ní ngúndéé chi iní-ndó cùu-xi núú dúcãⁿ ñi ngúndéé tnúhu-ãⁿ te ducaⁿ sãtnahã-xi cùu-ndo.

⁴ Te duha cãháⁿ-ndí chi cùtnuní ndãã iní-ndí sã Yã Ndiõxí quidè vãha ñaha-gã xii-ndí, chi ndècu ndìhi-ndí Xítóhó Jesucristú. ⁵ Te nchúhú chi ndàcu-ndí quidè-ndí sã

váha dico ñá díú mée-ndí ducaⁿ ndàcu-ndí quidé-ndí, chi mee Yă Ndiöxí chindèe ñaha-gá xii-ndí nūu ndàcu-ndí quidé-ndí sá vāha. ⁶ Te mee Yă Ndiöxí ní quide-gá sá nchūhú ndacu-ndí cunu cuechi-ndí núú-gă cāháⁿ-ndí núú ñáyiū cuendá ingá núú sá vāha ní cachí-gá cada ñaha-gă xií-yu. Te sá vāha ní cachí-gá cada ñaha-gă xií-yu-áⁿ ñà túú ñⁿ-ni cuu-xi ndihí nchaa tnúhu sá ñí xāhaⁿ-gă xii ndíi Moisés ní chídó tnùní ndíi, te ducaⁿ chi espíritú Yă Ndiöxí néhé chiūⁿ-xi nchaa tnúhu sá cāháⁿ cuendá nchaa sá vāha-áⁿ. Te nchaa tnúhu ní chídó tnùní ndíi Moisés, dándixi túu-xi iní nchaa ñáyiū ndècu ndihí tnúhu-áⁿ sá cuíta nihnú-yu cuendá nchaa cuéchi-yu, dico cue ñáyiū ndècu ndihí Espíritú Yă Ndiöxí ñáyiū-áⁿ ndécú ndihí-yu tnúhu ndee iní sá cācu nihnú-yu.

⁷ Te tnúhu sá ñí cāháⁿ Yă Ndiöxí ndéé díhna nācuāa cada ñáyiū ní ngúndeé-xi ñⁿ núú yūú quèhéⁿ. Te òré ní dátūu ndíi Moisés nācuāa cāháⁿ tnúhu sá ñí cāháⁿ Yă Ndiöxí ndéé núú yūú-áⁿ núú cue ñáyiū isráél, te súúní ñí tāsāⁿ núú ndíi te ñá túú-gă ní cūu cundehé-yu núú ndíi, te ducaⁿ-gă ducaⁿ-gă quidé-xí dátāsāⁿ-xi núú ndíi ní cūu ñá túú-gă ducaⁿ ní quide-xi. Te tnúhu ndéé núú yūú-áⁿ dándixi túu-xi iní cue ñáyiū sá cuíta nihnú-yu sá cuendá nchaa cuéchi-yu, te ío vāha ní quide-xi cútnāhá ní ngúndecu ndihí cue ñáyiū isráél tnúhu-áⁿ. ⁸ Te sá dúcāⁿ ñí quide-xi xíáⁿ cútnùní sá tnūhu cāháⁿ Espíritú Yă Ndiöxí vitna uuⁿ-gá ducaⁿ ío-gá vāha quide-xi. ⁹ Te núu ducaⁿ ío vāha ní quide-xi cútnāhá ní ngúndecu ndihí cue ñáyiū isráél tnúhu sá dándixi túu iní-yu sá cuíta nihnú-yu sá cuendá nchaa cuéchi-yu, te uuⁿ-gá ducaⁿ vāha quide-xi vitna ní ngúndecu ndihí-o tnūhu sá cāháⁿ nācuāa quide Yă Ndiöxí cuendá sá vā cūndecu-gá cuéchi ñáyiū núú-gă. ¹⁰ Te vā cāchí-ó sá cūtnāhá ní ngúndecu ndihí cue ñáyiū isráél tnúhu ndéé núú yūú-áⁿ ío-gá vāha ní quide-xi, te ñáhá chi uuⁿ-gá vāha quide-xi vitna

cuendá tnúhu sá cāháⁿ nācuāa quide Yă Ndiöxí. ¹¹ Te núu ducaⁿ ío vāha ní quide-xi cútnāhá ní ngúndecu ndihí ñáyiū isráél tnúhu sá ñà túú ní cūdíi, te uuⁿ-gá ducaⁿ ío vāha quide-xi vitna ní ngúndecu ndihí-o tnūhu sá vā ndíhí nihnu tnahí-gá.

¹² Te cūtnuní iní-ndí sá vā ndíhí nihnu sá dúcāⁿ ío vāha quide-xi, núu xíáⁿ ío víi ío vāha cūu iní-ndí cāháⁿ-ndí tnúhu sá ñí ngúndecu ndihí-o. ¹³ Te ñá túú quide-ndí dàtná ní xóo cada ndíi Moisés, chi ndíi-áⁿ ñí xóo dàdāhu ndíi núú ndíi òré dátāsāⁿ-xi núú ndíi cuendá sá vā quíní cue ñáyiū isráél òré ñá túú-gă dátāsāⁿ-xi núú ndíi. ¹⁴ Te cue ñáyiū isráél ñá túú ní tēcú tnùní vāha-yu nācuāa ní xóo danèhé ñáhá ndíi Moisés xií-yu, te cuéi ndéé vitna ñá túú tēcú tnùní-yu òré dācuāhá-yu tnúhu sá ñí cāháⁿ Yă Ndiöxí ndéé díhna nācuāa cada-gá, te cada iní-ó sá dàtná sá ñí xídāhu núú ndíi Moisés yídāhu núu-yu cuendá sá vā cútnùní núu-yu cundehé-yu te tecú tnùní-yu, dico núu tnahá tnúhu-yu ndihí Xítohó Jesucristú te tecú tnùní-yu. ¹⁵ Te cuéi ndéé vitna òré dācuāhá-yu nchaa tnúhu sá ñí chídó tnùní ndíi Moisés nchaa núú tūtú ndíi, te cada iní-ó sá dàtná sá ñí xídāhu núú ndíi yídāhu núu-yu chi ñá túú tēcú tnùní-yu. ¹⁶ Dico cue ñáyiū na tūha ñaha xii Xítohó Jesucristú te tēcú tnùní-yu tnúhu-gá. ¹⁷ Te Xítohó Jesucristú ñⁿ-ni cūu-gá ndihí Espíritú Yă Ndiöxí, te nchaa ñáyiū ndècu ndihí Espíritú-gá ñá túú-gă táxí tnùní ñáhá ní ñⁿ sá ñà túú vāha xií-yu. ¹⁸ Te dàtná cúú ñⁿ yutátá sá dánèhé núú ñáhá-xí xii ñáyiū ñⁿ sá vāha, ducaⁿ sātnahá-xi cūu-o chi quide-o nācuāa cāháⁿ ñáyiū sá ío cāhnu cuu Xítohó Jesucristú, te ducaⁿ uuⁿ-gá uuⁿ-gá tá cūndāá-ó ndècu-o ichi-gá dàtná quidé mée-gá quidé ndāá-gá. Te Espíritú-gá quidé-xí dùcāⁿ ta cūndāá-ó núú-gă cuáháⁿ.

4

¹ Te mee Yă Ndiöxí ní cundāhú iní ñáhá-gă xii-ndí ní taxi-gá chiūⁿ

quide-ndí cãháⁿ-ndí tnúhu-gá, núu xíãⁿ ñá túú tnàhí nàtúhú iní-ndí cãháⁿ-ndí tnúhu-gá. ² Te nchúhú dàquee tíhú-ndí nchaandi túhú sá ñà túú vãha quide dayuhu ñáyiu, chi nchaa xíãⁿ cúú-xí ñⁿ sácáⁿnúú sá cúú-xí-yu, te nchúhú ñá túú sàni iní-ndí dandàhú-ndí ñáyiu te ni ñá túú sàni iní-ndí dama-ndí nàcuáa cãháⁿ tnúhu Yá Ndiõxí, chi cãháⁿ ndáá-ndí nàcuáa tàú-xi cãháⁿ-ndí, te mee Yá Ndiõxí nãhá-gã nàcuáa ndùu tnúhu cãháⁿ-ndí núú ñáyiu, te ñáyiu-ánⁿ cùnùnì iní-yu sá nchúhú cãháⁿ váha-ndí. ³ Te cue ñáyiu ñá túú tècú tnùnì nàcuáa ndùu tnúhu sá cãháⁿ nàcuáa naníhí tàhú-ó cãháⁿ-ndí núú-yu, ñáyiu-ánⁿ cúú-yu ñáyiu ta xíta nihnu cuáhãⁿ. ⁴ Te cue ñáyiu-ánⁿ cúú-yu ñáyiu ío sàá iní-xi chi ñá túú cuínì-yu quíndáá iní-yu tnúhu Xítohó Jesucristú, te xíãⁿ núu sácúhná cùnùu-xi núú-yu te ñihí-xi nàcuáa quide-xi dadáhu ndodo iní ñãhá-xí xii-yu cuendá sá vã tècú tnùnì-yu tnúhu sá cãháⁿ nàcuáa naníhí tàhú-yu, te tnúhu-ánⁿ cúú-xí tnúhu sá ío váha chi cãháⁿ-xi sá ío cãhnu cuu Xítohó Jesucristú, te cùu-gá dàtná mée Tãtã-gã Dútú Ndiõxí. ⁵ Te nchúhú ñá túú cãháⁿ-ndí cuendá sá cúú-xí mée-ndí núú-ndó chi cãháⁿ-ndí cuendá Xítohó Jesucristú, te cãchí-ndí xii-ndo sã díú-gã cúú-gã Yaá ío cùnùu, te cãchí-ndí xii-ndo sã mée-ndí cúú-ndí dícó-ni cue tée xínu cuechi sá cúú-xí-ndó, te ducaⁿ quide-ndí nàcuáa cuu vii cuu váha iní Xítohó Jesucristú. ⁶ Te Yá Ndiõxí Yaá ní dáyèhé ndée cútnàhá nee ñuyíú ní cùu, Yaá-ánⁿ ñí cachí-gá sá Xítohó Jesucristú cada-gá nàcuáa tecú tnùnì-ó sã ío cãhnu cuu mee Yá Ndiõxí. Te sá dúcãⁿ ñí quide-gá te cada iní-ó sã dàtná tnúhu sá ñí dáyèhé-gá iní-ó.

Ío quíndáá iní-ó Yá Ndiõxí

⁷ Te nchúhú ndécú ñihí-ndí tnúhu Xítohó Jesucristú, te tnúhu-gá cúú-xí dàtná ñⁿ sá ío váha ñùhu ñⁿ xítí quídi ñuhu, te nchúhú cúú-ndí dàtná

quídi-ánⁿ. Te ducaⁿ sãtnahã-xi cùu-ndí chi tnúhu-gá ío cãhnu cuu-xi te mee-ndí ñãhá, te ducaⁿ cùu nacuáa cutnùnì sá mée Yá Ndiõxí quidé-gã nchaa sá váha te ñá díú mée-ndí. ⁸ Te cuèi ío ndòho-ndí ndécú-ndí dico ñihí-ndí nàcuáa quide-ndí tá yãha-ndí nchaa tnúndòho-ánⁿ cuáhãⁿ, cuèi áma sa ndetu vii-ñã quehndé iní-ndí sá vã ndácú-ndí yãha-ndí nchaa tnúndòho-ánⁿ, dico ndàcu-ndí yãha-ndí. ⁹ Te cuèi nànducu ñaha ñáyiu cuínì-yu ná cada ñãhá-yu xii-ndí dico ñá túú dàña ñaha Yá Ndiõxí xii-ndí, te cuèi cãnihã-yu xii-ndí dico cãcu-ndí ñá túú sãhni ñahã-yu. ¹⁰ Te ndèni ní cuu cuáhãⁿ-ndí xicã cùu-ndí, te cãcu cãcu cahni ñãhá-yu xii-ndí dàtná ní quidé-yu Xítohó Jesucristú, te ducaⁿ yãha-ndí cuendá cutnùnì sá ndécú tũu Xítohó Jesucristú andíu te chindee ñaha-gã xii-ndí. ¹¹ Te nchúhú ñini ndècu-ndí ñuyíú-a te nchaa-ni nduu cãcu cãcu cahni ñaha ñáyiu xii-ndí sá cuendá Xítohó Jesucristú, te ducaⁿ yãha-ndí ndécú-ndí cuendá cutnùnì sá Xítohó Jesucristú ndécú ñihí ñaha-gã xii-ndí cuèi vá cúdí yiqui cùnù-ndí cundecu-xi. ¹² Te sá dúcãⁿ cãcu cãcu cahni ñaha ñáyiu xii-ndí xíãⁿ nchòhó uuⁿ-gá tá ñihí ndée-ndó cuáhãⁿ ndécú-ndó ìchi Xítohó Jesucristú.

¹³ Te ñⁿ tée ní xíndecu ndée sanaha ñí chidó tnùnì-dé núú tütú Yá Ndiõxí núú cãchí-xi: “Yúhú ní sãndáá iní-í Yá Ndiõxí núu xíãⁿ ní cãháⁿ-í”, duha ní cachí tée-ánⁿ. Te dàtná-ni ní sãni iní tée-ánⁿ ñí cãháⁿ-dé te ñíu-ni ducaⁿ sãni iní nchúhú tucu núu xíãⁿ cãchí-ndí: “Sãndáá iní-ndí Yá Ndiõxí núu xíãⁿ cãháⁿ-ndí”, duha cãchí-ndí. ¹⁴ Te cùnùnì iní-ndí sá núu na cùu-ndí te Yá Ndiõxí dandòto ñaha-gã xii-ndí dàtná ní dándótó-gã Xítohó Jesucristú, te tnãhá nchòhó ducaⁿ càda ñaha-gã xii-ndo, te dàvá-ánⁿ candeca ñaha-gã xii-o quíhíⁿ nucúndecu-o núú-gã. ¹⁵ Te nchúhú nãndi cùu sá tá yãha-ndí véxi cuendá nchòhó ngúndecu váha-ndo, te ducaⁿ cuíta cáyã-gã ñáyiu ngúndecu

váha sá xíí Yă Ndiöxí, te ðiu-ni ducaⁿ cuíta cuu vai-gá ñáyiu ndacáⁿ táhŭ-yu núú-gă te cachí-yu sá ïo cãhnu cuu-gá.

16 Te xíăⁿ nŭu nchúhú ñá túú tnàhí nàtúhú iní-ndí ndécú-ndí ichi Xítóhó Jesucrístú, te cuëi yiqui cùñú-ndí tá xàú-xi cuáháⁿ dico iní-ndí chi uuⁿ-gá uuⁿ-gá tá nihí ndéé-xí cuáháⁿ. 17 Te nchaa sá ndóhó-ndí ñuyíú-a ñá túú cãchí-ndí sá cúú-xí ìⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yă Ndiöxí ío váha cada ñaha-gă xii-ndí nduu na sàá-ndí núú ndécú-gă, te ðiu-ni ducaⁿ càda ñaha-gá xii-ndí ni caa ni quíhíⁿ. 18 Te nchúhú ñá túú nchícúⁿ nihnu-ndí sá túu ndèhe-ndí ío ñuyíú-a, chi nchícúⁿ nihnu-ndí sá vátá quíní-gá-ndí ndécú àndiu, te ducaⁿ quide-ndí chi nchaa sá túu ndèhe-ndí ío ñuyíú-a vá cúdŭi-xi cundecu-xi, te nchaa sá ñà túú túu ndècu andiu xíăⁿ cudíi-xi cundecu-xi ni caa ni quíhíⁿ.

5

1 Te yiqui cùñú-ó cùu-xi datná ìⁿ vehe, te vehe-áⁿ ñà túú cudíi-xi, te ducaⁿ sãtnahá-xi cùu yiqui cùñú-ó chi vá cúdŭi-xi, te na sàá nduu vã cùndècu-gá-ó ndihí yiqui cùñú-ó, te Yă Ndiöxí taxi-gá ìⁿ yiqui cùñú sáá sã cúú-xí-ó, te xíăⁿ cúú-xí dàtná ìⁿ vehe sá ñà túú ní càdúha cue ñáyiu ñuyíú-a, chi mee Yă Ndiöxí ní càdúha-gá vehe-áⁿ te vehe-áⁿ cudíi-xi cundecu-xi ni caa ni quíhíⁿ andiu. Te ducaⁿ sãtnahá-xi cùu yiqui cùñú sá táxí Yă Ndiöxí xii-o chi cudíi-xi cundecu-xi ni caa ni quíhíⁿ. 2 Te nchúhú ndècu ndihí-gá-ndí yiqui cùñú-ndí sá ndécú ndihí-ndí vitna te sama cuíní-ndí sá ïo ndihí taxi Yă Ndiöxí yiqui cùñú sáá cundecu ndihí-ndí. 3 Chi mee-gă vá dáñá-gă sá dúcáⁿ-ní cunduu-ndí cundecu-ndí, chi dai taxi-gá yiqui cùñú sáá-ăⁿ xii-ndí. 4 Te ñini ndècu-ndí ndihí yiqui cùñú-ndí vitna ío sàni iní-ndí te ndihú iní-ndí, dico ñá díú sã dúhá

quide-ndí te ñá túú-gă tnàhá iní-ndí cundecu-ndí ndihí yiqui cùñú-ndí, chi cuíní-ndí sá Yă Ndiöxí ío ndihí taxi-gá yiqui cùñú sáá nduu táhú-ndí, chi xíăⁿ cudíi-xi ni caa ni quíhíⁿ te yiqui cùñú-ndí sá tá ndihí nihnu cuáháⁿ-a vá cúdŭi-xi cundecu-xi. 5 Te ducaⁿ tnàhí ní cachí Yă Ndiöxí cunduu sá dúcáⁿ nduu táhú-ó yiqui cùñú sáá-ăⁿ, te ní taxi-gá Espíritú-gá ní ngúndecu ndihí-o cuendá cutnùní iní-ó sã ndàá taxi-gá yiqui cùñú sáá-ăⁿ nduu táhú-ó.

6 Te xíăⁿ nŭu nchúhú nihí ndéé-ndí ndécú-ndí, te cùtnuní iní-ndí sá ñini ndecu-ndí ndihí yiqui cùñú-ndí sá ndécú ndihí-ndí vitna te vátá sáá-gá-ndí cundecu-ndí mei nŭú ndécú Xítóhó Jesucrístú. 7 Te ducaⁿ cùtnuní iní-ndí chi sàndáá iní-ndí Yă Ndiöxí ndécú-ndí ñuyíú-a cuëi ñá túú xíní-ndí-gá. 8 Te ío váha cùu iní-ndí ndécú-ndí, te sàni iní-ndí sá vãha-gá sá nŭu vá cùndècu-gá-ndí ndihí yiqui cùñú-ndí sá ndécú ndihí-ndí vitna. Te ducaⁿ sàni iní-ndí chi vãha-gá cundecu-ndí mei nŭú ndécú Xítóhó Jesucrístú. 9 Te ío ndècu ndee-ndí quidé-ndí nàcuáa cuu vii cuu váha iní Xítóhó Jesucrístú vitna ndècu-ndí ñuyíú-a, te ðiu-ni ducaⁿ càda-ndí cuëi òré vá cùndècu-gá-ndí. 10 Te dacuítí sã ncháá-ó cùndecu-o núú Xítóhó Jesucrístú ìⁿ nduu, te dàvá-áⁿ mee-gă cáháⁿ-gá te núu nása nduu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa nduu chiuⁿ ní quide-o ìⁿ ìⁿ-o te ducaⁿ nduu sá táxí-gă nduu táhú-ó.

Nàcuáa ní cuu ní ngúndecu váha-o ndihí Yă Ndiöxí

11 Te nchúhú quíyùhú iní-ndí nàcuáa cada Xítóhó Jesucrístú, núu xíăⁿ càháⁿ-ndí tnúhu-gá núú ñáyiu cuendá xínu iní-yu tuha ñàhá-yu xii-gá. Te mee Yă Ndiöxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí.

12 Te sá dúhá càháⁿ-ndí te vá cání ìní-ndó sã nchùhú càháⁿ váha-ndí cuèndá-ndí nàcuáa nchòhó cuu váha iní ñáhá-gã-ndó xii-ndí te ñáhá, chi duha càháⁿ-ndí cuèndá sã nchòhó ñíhí-ndó tnúhu càháⁿ váha-gã-ndó cuèndá-ndí núú ñáyiú. Te ducaⁿ ñíhí-ndó tnúhu cúñaha-ndo xii cue ñáyiú quide nínu mee-xi, chi cue ñáyiú-áⁿ ñà túú quide cuendá-yu nása ndècu iní-yu. 13 Te núu nchòhó sání ìní-ndó sã lùcú-ndí cuèndá nàcuáa quide-ndí ndécú-ndí te cùu-xi cuendá Yã Ndiõxí, àdi núu sání iní-ndó sã ñà túú lùcú-ndí cuèndá nàcuáa quide-ndí ndécú-ndí te cùu-xi sã vãha sã cúú-xí-ndó. 14 Te quide-ndí nàcuáa cuení Xítóhó Jesucristú chi cùtnuní iní-ndí sã ìo cùu iní-gá nchaa ñáyiú, te ducaⁿ xíní ndáá-ndí sã ñí xíhí-gá cuèndá ncháá-yu, te xíãⁿ núu cada iní-ó sã dàtná tnúhu sã ncháá ñáyiú ní xíhí-yu ndíhí-gá. 15 Te ducaⁿ ñí xíhí Xítóhó Jesucristú cuèndá nchaa ñáyiú chi cuení-gá sã ncháá-yu cundecú-yu cada-yu nàcuáa cuení méé-gã te vá cáda-yu nàcuáa cuení méé-yu, chi mee-gã ní xíhí-gá te ní ndoto-gá cuèndá cuu-xi sã vãha sã cúú-xí-yu. 16 Te xíãⁿ núu nchúhú ñà túú-gã ná sání ìní-ndí cuèndá tnàha ñáyiú-ndí núu nándíhí-yu àdi ñà túú nándíhí-yu dàtná ní xóo caní iní-ndí cùtnàhá ní xíndecu-ndí ichi cuèhé ichi duha, te dává-áⁿ ñí xóo caní iní-ndí cuèndá Xítóhó Jesucristú dàtná sání iní cue ñáyiú ndècu ichi cuehé ichi duha vitna. 17 Te nchaa nchoo ñáyiú ní tnàhá tnúhu ndíhí Xítóhó Jesucristú ní nduu-o dàtná ñí ñáyiú saa, te ducaⁿ chi ñà túú-gã quidé-ó dàtná ní xóo cada-o cùtnàhá ní xíndecu-o ìchi cuehé ichi duha, chi ní ngúita-o quide-o mee-ná sã vãha te nchaa xíãⁿ cúú-xí sã sáá sã cúú-xí-ó chi vátá quení-gá-ó càda-o.

18 Te ducaⁿ quide-o ndecu-o chi mee Yã Ndiõxí quidé-gã sã dúcáⁿ càda-o cundecu-o. Te Xítóhó Jesucristú ní quide-gá ní ngúndecu váha-o ndíhí Yã Ndiõxí vitna, te ducaⁿ chi mee

Yã Ndiõxí ducaⁿ tnàhí ní cachí-gá cunduu, te diu-ni mee Yã Ndiõxí ní taxi-gá chiúⁿ quide-ndí càháⁿ-ndí tnúhu-gá nàcuáa ngúndecu váha cue ñáyiú ndíhí-gá. 19 Te ducaⁿ chi mee-gã ní cachí-gá sã Xítóhó Jesucristú cada-gá nàcuáa nucúndecu váha nchaa nchoo cue ñáyiú ndècu ñuyúú-a ndíhí Yã Ndiõxí. Te nchaa ñáyiú ní tuha ñaha xii-gá ñà túú-gã sání ìní-gá sã ñáyiú-áⁿ nacháhu-yu cuéchi-yu núú-gã. Te mee Yã Ndiõxí ní taxi-gá chiúⁿ quide-ndí càháⁿ-ndí tnúhu-gá núú ñáyiú nàcuáa ngúndecu ndíhí ñaha vãha-yu xii-gá. 20 Te Xítóhó Jesucristú ní cachí-gá sã nchùhú càháⁿ-ndí tnúhu-gá núú nchaa ñáyiú, te sá dúhá quide-ndí càháⁿ-ndí tnúhu-gá te quide-ndí núú Yã Ndiõxí càháⁿ-ndí yuhu-gá, te xíãⁿ núu càháⁿ ndàhú-ndí núú-ndó sã tnàhá tnúhu-ndo ndíhí Yã Ndiõxí cuèndá cundecu váha-ndo ndíhí-gá, te duha càháⁿ-ndí chi ducaⁿ càhí Xítóhó Jesucristú cada-ndí. 21 Te Xítóhó Jesucristú cúú-gã Yaá ñà túú tnàhí cuéchi-xi, dico Yã Ndiõxí ní quide ñaha-gã xii-gá dàtná ñí ñáyiú ndècu cuéchi-xi, te ducaⁿ chi Xítóhó Jesucristú ní xido-gá cuéchi nchaa nchoo ñáyiú ñuyúú-a, te ducaⁿ ñí xido Xítóhó Jesucristú nchaa cuéchi-o cuèndá sã núu na tnàhá tnúhu-o ndíhí-gá te cudíu-o núú Yã Ndiõxí, te ducaⁿ ñí cuu chi mee Yã Ndiõxí ducaⁿ ñí cachí-gá cunduu.

6

1 Te nchoo ñí-ni cùu-o quide chiuⁿ-o cuendá Yã Ndiõxí núu xíãⁿ càháⁿ ndàhú-ndí núú-ndó sã vã dícó-ni ducaⁿ cùndedóho-ndo tnúhu Yã Ndiõxí, chi cada-ndo nàcuáa na chindee ñaha-ni-gá. 2 Chi mee-gã càhí-gá ñí xichí núú tütú-gá núú càhí-xi:

Sáá nduu te cundàhú iní ñáhà-í xii-ndo chindee ñaha-í cuèndá naníhí tàhú-ndó,
te ní sáá nduu tàú-xi sã cundàhú iní ñáhà-í xii-ndo chindee ñaha-í cuèndá naníhí tàhú-ndó,
núu xíãⁿ ní xíndedóho-í tnúhu ní càháⁿ-ndó te ní chindee

ñaha-í xii-ndo nàcuáa naníhí tãhú-ndó.

Duha càchí-gá núú tütú-gá. Te vitna cùu-xi nduu cundahú iní ñáhá Yá Ndiöxí chindèe ñaha-gá, te cùu-xi nduu naníhí tãhú-ó.

³ Te nchúhú ñá túú quide-ndí ìⁿ sá ñà túú tàú-ndí cada-ndí sá cúú-xí ñáyiú, chi cuíní-ndí sá vã càháⁿ cuèhé-yu cuèndá chiúⁿ quide-ndí. ⁴ Te nchaa sá quidé-ndí cúú-xí nàcuáa cutnùní iní cue ñáyiú sá nchúhú xínú cuèchi-ndí núú Yá Ndiöxí, te ío quide cahnu iní-ndí cuèndá nchaa sá ndóhó-ndí, chi nándi quide ñaha ñáyiú xii-ndí, te ducaⁿ-ni ta quide cahnu iní-ndí cuèi nándi-gá nchaa sá tá yãha-ndí véxi. ⁵ Te duha ta yãha-ndí véxi, núú cánha ñáyiú xii-ndí, núú chíhí ñáhá-yu vecaá, núú cuáá ndeé ñáhá ñáyiú xii-ndí xícuèhé ñáhã-yu, te ío ndòho-ndí quidé-ndí chiúⁿ Yá Ndiöxí, te áma xidí-ndí te áma ñá túú xidí-ndí, te áma ñihí-ndí sá xéxi-ndí te áma ñá túú ñihí-ndí. ⁶ Te quide ndáá-ndí ndécú-ndí, te cùtnuní váha iní-ndí nàcuáa càháⁿ tnúhu Yá Ndiöxí, te quide cahnu iní-ndí cuèi nándi quide ñaha ñáyiú xii-ndí, te cùndahú iní-ndí tnàha ñáyiú-ndí, te quide-ndí nchaa sá váha nàcuáa chindèe ñaha Espíritú Yá Ndiöxí xii-ndí, te ío ndisa iní-ndí cúú ñihí-ndí cue tnàha ñáyiú-ndí. ⁷ Te dànehé-ndí ñáyiú mee-ni tnúhu ndáá, te nchaa chiúⁿ quide-ndí te quide-ndí nàcuáa chindèe ñaha Yá Ndiöxí xii-ndí, te cuèndá sá quidé ndáá-ndí ndécú-ndí ñúu xíãⁿ ñihí ndeé-ndí dáquèe tíhú-ndí nchaa sá cuèhé sá dúhá. ⁸ Te dava ñáyiú quide nínu ñáhá-yu xii-ndí, te davá-yu tnúhu cuèhé tnúhu duha càháⁿ-yu xãháⁿ-yu xii-ndí, te davá-yu xícáháⁿ váha-yu cuèndá-ndí te davá-yu xícáháⁿ cuèhé-yu, te davá-yu càchí-yu sá dándahú-ndí ñáyiú dico ñá ndáá chi càháⁿ ndáá-ndí. ⁹ Te davá-yu càchí-yu sá ñà túú xíní-yu ná ñáyiú cùu-ndí,

te davá-yu càchí-yu sá xíní-yu yoo cùu-ndí, te davá-yu cuíní-yu cahni ñáhá-yu xii-ndí dico vátá cáhni ñaha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiöxí, te cuèi ndòho-ndí dico ñá túú cùu-xi sá cúú-ndí. ¹⁰ Te cuèi ndíhú iní-ndí dico ñá túú dàña ndeé-ndí sá cúú ñihí-ndí, te cùu-ndí cue téé ndàhú dico sànu ichi-ndí vãi ñáyiú ichi Yá Ndiöxí cuèndá ngúndecu váha-yu sá cuèndá-gá, te cuèi ñá túú ñá ndécú ndíhí-ndí dico ñá túú ñá cúmãní xii-ndí.

¹¹ Te nchòhó ñáyiú ndècu ndíhí-í ichi Xítohó Jesucristú ndécú ñúú Còrintú ío cùu iní ñáhá-ndí xii-ndo, te ñi yùhu ñi iní-ndí càháⁿ-ndí nchaa tnúhu càháⁿ-ndí sá cúú-xí-ndó. ¹² Te nchúhú chi ñi yùhu ñi iní-ndí cúú ñihí ñáhá-ndí xii-ndo, dico nchòhó chi ñá túú dùcaⁿ quide-ndo sá cúú-xí-ndí. ¹³ Te yúhú càháⁿ ndàhú-í núú-ndó dàtná quidé ìⁿ téé cùu tátá òré càháⁿ ndíhí-dé cue déhe-dé sá ñi yuhu ñi iní-ndó cùu iní ñáhá-ndó xii-ndí dàtná quidé mèe-ndí cúú ñihí ñáhá-ndí xii-ndó.

Nchoo cùu-o datná ìⁿ vehe Yá Ndiöxí

¹⁴ Te cue ñáyiú ñá túú sàndáá iní tnúhu Xítohó Jesucristú, te vá cúú ìⁿnuu-ndo ndíhí-yu cada-ndo dàtná xíquidé-yu, chi dèⁿ cuu nchaa sá váha te dèⁿ cuu nchaa sá cuèhé sá dúhá, te ñúmí nchícanhii ndíhí níú chi ñá túú ìⁿ-ni cuu-xi. Te ducaⁿ sãtnahá-xi cùu nchaa sá váha ndíhí nchaa sá cuèhé sá dúhá chi ñá túú ìⁿ-ni cuu-xi. ¹⁵ Te diu-ni ducaⁿ ñá túú ìⁿ-ni cuu Xítohó Jesucristú ndíhí sácúíhná, te diu-ni ducaⁿ ñá túú ìⁿ-ni cuu ñáyiú sàndáá iní ñáhá xii Xítohó Jesucristú ndíhí ñáyiú ñá túú sàndáá iní ñáhá xii-gá. ¹⁶ Te diu-ni ducaⁿ sãtnahá tucu-xi cùu vehe Yá Ndiöxí ndíhí nchaa sá càchí ñáyiú cùu ndíóxi ní cadúha cue téé ñuyúú-a, chi vá cúú quíhí ñi ìⁿ xíãⁿ xití vehe-gá. Te nchoo cùu-o datná vehe Yá Ndiöxí Yaá ndécú túu andíu,

chi mee-gă cächí-gá núú tütú-gá núú cächí-xi:

Yúhú vá cúmăní cundecu-í ndihí-yu nděni ní cuu na cùndecú-yu, te diu-ni yúhú cuu-í Ndiöxí-yu, te mée-yu cuú-yu ñáyiu cùu cuendá-í. Duha cächí-gá núú tütú-gá. ¹⁷ Te xíăⁿ núu cächí tucu-gá ingá xichi núú tütú-gá núú cächí-xi:

Chí tá quèe tnuú nchaa ñáyiu ñá túú sàndáá iní ñáhá xii-í, te vá cání iní-ndó càda-ndo ni ìⁿ sá cuèhé sá dúhá, te ducaⁿ te queheⁿ cuendá ñáhà-í xii-ndo,

¹⁸ te yúhú cuu-í Tătá-ndó, te nchòhó cuu-ndo cuè déhe ducuⁿ-í, ndihi cue déhe yoco-í, duha càháⁿ yúhú Yaá ío càhnu cuu. Duha cächí-gá núú tütú-gá.

7

¹ Te sá dúcáⁿ ío váha càháⁿ Yă Ndiöxí sá cúú-xí-ó núu xíăⁿ càháⁿ-í dóho nchòhó ñáyiu ío cùu iní-í sá dùuⁿ duuⁿ daña-o nchaa sá cuèhé sá dúhá, chi nchaa xíăⁿ ñá túú cùu-xi sá váha sá cúú-xí iní-ó ndihi yiqui cuú-ó, te cada-o nàcuáa tàú-xi cunduu nàcuáa cundáá-ó núú Yă Ndiöxí, te cada-o sá néhé-ó sá yíñuhu núú-gă.

Cue ñáyiu ñuú Còrintú quidé vâha-yu

² Te ni yùhu ni iní-ndó chì cúú iní ñáhá xii-ndí, chi nchúhú vá yôo ìⁿ quide úhú iní-ndí, te ni vă yôo ìⁿ dàcuíta nihnu-ndí, te ni vă yôo ìⁿ dândahú-ndí. ³ Te sá dúhá càháⁿ-í te vá cání iní-ndó să ìⁿ cuéchi dàcaa-í díqui-ndó, chi dàtná sa ní cachí-í xii-ndo să yúhú ío cùu iní ñáhà-í xii-ndo, te cuèi vitna ndècu-gá-ó ñùyíú-a àdi cuéi na cùú-ó dico diu-ni ducaⁿ cùu iní ñáhà-í xii-ndo. ⁴ Te yúhú ío váha sàni iní-í cuendá-ndó, te ducaⁿ ío váha càháⁿ-í cuendá-ndó, te ío ndècu ndihi-í tnúhu ndee iní cuendá-ndó, te ío cùdíí iní-í sá cuendá-ndó cuèi nândi ndòho-í ndihi dâva-gá-güedé ndécú-ndí.

⁵ Te nchúhú cútnàhá ní sáháⁿ-ndí distritú Macèdoniá, te ñá túú tnàhí ni ndètátú-ndí cuendá nchaa sá ñí

yáhandi chi ío ní ndoho-ndí cuendá nchaa sá ñí quidé-yu, chi ío ní cuándeé ñáhă-yu xii-ndí, te ío ní sani iní-ndí núu nása-gá yáha-ndí ní cùu. ⁶ Dico Yă Ndiöxí ní taxi-gá tnúhu ndee iní xii-ndí òré ní quexìo té Titú núú ndécú-ndí, te diu-ni Yaá-áⁿ cúú-gă Yaá sãñaha-gă tnúhu ndee iní xii cue ñáyiu ndihú iní-xi. ⁷ Te ducaⁿ ñí taxi Yă Ndiöxí tnúhu ndee iní xii-ndí cuendá sá ñí quexìo té Titú núú ndécú-ndí, te ñá díú-ní să cuendá ní quexìo-dé chi ní níhí tucu-ndí tnúhu ndee iní cuendá ní cani-dé cuendú núú-ndí sá nchòhó ní sãñaha-ndo tnúhu ndee iní xii-dé, te ní cachí tnúhu-dé xii-ndí sá nchòhó ío cuèni-ndó càháⁿ ndihi ñaha-ndo xii-ndí, te ní cachí tnúhu tucu-dé xii-ndí sá nchòhó ío ndihú iní-ndó cuendá nàcuáa cùu ndecu-ndo ni cuu, ndihi cuendá sá ío sàni iní-ndó cuendá-í, te sá dúcáⁿ ndùu cuendú ní cani-dé núú-ndí núu xíăⁿ ío ní cudíí iní-í.

⁸ Te nchòhó ní ndihú iní-ndó cuendá tnúhu càháⁿ-í núú tütú sá ñí dáquíxì-í ndaha-ndo, te òré ní níhí-í tnúhu sá ndihú iní-ndó te tnaa-ni ní ndixi cuéchi iní-í sá dúcáⁿ ñí quide-í te dâtnùní ñá túú-gă ní ndixi cuéchi iní-í.

⁹ Te vitna ní ndihú iní-ndó, te xíăⁿ ní quide-xi ní ndixi cuéchi iní-ndó să ñá túú quide váha-ndo ndècu-ndo ni cuu, te ní cudíí iní-í dico ñá díú cuendá sá ni ndihú iní-ndó ñí cudíí iní-í chi cuendá sá ñí ndixi cuéchi iní-ndó, te ní ndihú iní-ndó nàcuáa ní cuu váha iní Yă Ndiöxí, te xíăⁿ núu ní cuu-xi ìⁿ sá váha sá cúú-xí-ndó cuendá tnúhu ní càháⁿ-í te ñá túú ní cùu-xi ìⁿ sá cuèhé sá cúú-xí-ndó. ¹⁰ Te nchoo núu na ndihú iní-ó nàcuáa cuu váha iní Yă Ndiöxí, te ndixi cuéchi iní-ó te núu ñá túú quide váha-ndo ndècu-o, te sá dúcáⁿ quide-o te nàníhí tãhú-ó, te vá ndihú iní-ó să dúcáⁿ ñí quide-o, te dâva ñáyiu xĩndecu ichi cuèhé ichi duha ndihú iní-yu dico ñá túú ndixi cuéchi iní-yu cuendá nchaa sá ñá túú váha quidé-yu, te sá dúcáⁿ quidé-yu te cuíta nihnú-yu. ¹¹ Te sá dúcáⁿ ñí ndihú iní-ndó nàcuáa ní cuu

váha iní Yă Ndiöxí, te xiăⁿ nũu ndècu ndee-ndo quide-ndo nchaa nacuaáa tàú-xi cunduu, te vitna ni yùhu ni iní-ndó càháⁿ-ndó sã quidé vâha-ndo, te ío cùdèéⁿ-ndó nũu méé-ndó sã ñà túú quide vâha-ndo ndècu-ndo ni cuu, te yùhú-ndó ndècu-ndo cuendá sã ñà túú quide vâha-ndo ni cùu, te ío ní xúhuⁿ iní ñáhá-ndó xii-í, te ní ndúcú ndéé-ndó nĩ quide ndáá-ndó cuendá téé ndècuéchi ndècu ndihí-ndo, te sá dúcáⁿ nĩ quide-ndo te xiăⁿ ní cutnùní sã méé-ndó ñà túú cuéchi-ndo. ¹² Te ní cadúha-í tutú ní dáquixí-í ndaha-ndo, te ní quide-ndo nàcuáa ní cáháⁿ-í, te sá dúcáⁿ nĩ quide-ndo xiăⁿ ní cutnùní iní-ndó sã ío cùu iní ñáhá-ndó xii-í. Te Yă Ndiöxí náhá-gã sá díú cuendá xiăⁿ ní dáquixí-í tutú ndaha-ndo, te ñà díú-ní cuendá sá sání iní-í cuendá téé ndècuéchi ndècu ndihí-ndo, te ni ñà díú-ní cuendá ñáyiu ní dándihú téé ndècuéchi-áⁿ iní-xi ní càdúha-í tutú ní dáquixí-í ndaha-ndo. ¹³ Te cuendá sá quidé vâha-ndo ndècu-ndo xiăⁿ cúu-xí tnũhu ndee iní ndécú ndihí-ndí.

Dico ñà díú-ní xiăⁿ chi tnàhá ío cùdèé iní-ndí cuendá sã ío cùdèé iní té Títú, te ducaⁿ cùdèé iní-dé chi nchòhó ní sãñaha-ndo tnũhu ndee iní xii-dé. ¹⁴ Te yùhú ñà túú cùcahaⁿ núu-í sã nĩ cáháⁿ vâha-í cuendá-ndó nũu tẽ Títú cùtnàhá vátá quíxí-gã-dé núu ndécú-ndó, chi ní cutnùní iní-dé sã ndáá càháⁿ vâha-í nàcuáa quide-ndo datná cúu-xí sã ndáá nchaa tnũhu dàcuaha ñaha-í xii-ndo. ¹⁵ Te vitna ío-gã vâha cùu iní té Títú cuendá-ndó, chi ndàcu iní-dé sã ncháá-ndó ío vâha ní tnũ-ndo nchaa tnũhu ní cáháⁿ-dé núu-ndó, te ndàcu tucu iní-dé sã ní queheⁿ cuendá vâha-ndo-dé, te ní dátũu-ndo nũu-dé sã ío ní quiyùhú iní-ndó sã vã ndácú-ndó càda-ndo nchaa nacuaáa tàú-xi cunduu. ¹⁶ Te ío cùdèé iní-í cuendá-ndó chi cùtnuní ndáá iní-í sã ñà túú ñàña ndéé-ndó quide-ndo nchaa nacuaáa tàú-xi cunduu.

8

Ío vâha cuu iní-ó chindee tnaha-o

¹ Te nchòhó ñáyiu ndècu ndihí-ndí ichi Xítohó Jesucrístú càchí tnũhu-ndí xii-ndo nàcuáa quide ñaha Yă Ndiöxí xii cue ñáyiu xindecu ichi-gã ndécú dístítú Macèdoniá, chi ío chindee ñaha-gã xii-yu cuendá sã quidé vâha-yu ndécú-yu. ² Te cuéi ndòho vihí-yu ndécú-yu dico ío-ni cùdèé iní-yu, te cuendá xiăⁿ nũu ni yùhu ni iní-yu ní sacáⁿ tnáhã-yu díhúⁿ sã cúu-xí tnàha ñáyíu-yu, te ñà túú tnàhí ni xĩnduu díu-yu cuéi ío ndàhú-yu. ³ Te ñà díú-ní nàcuáa ní sani iní-yu ndacú-yu cacáⁿ tnáhã-yu, chi ní quide yica iní-yu ní sacáⁿ tnáhã-gã-yu, te yùhú càchí tnũhu ndáá-í xii-ndo sã nĩ yuhu ni iní-yu ducaⁿ nĩ quidé-yu. ⁴ Te ío ní cáháⁿ ndàhú-yu núu-ndí cuendá sã cuãha-ndí tnũhu sã tnàhá-yu chindèé-yu dava-gã cue ñáyiu cùu cuendá Yă Ndiöxí. ⁵ Te ñà díú-ní nàcuáa ní sani iní-ndí ní quidé-yu, chi ní xidó-gã-yu ní quide vâha-yu, te ducaⁿ chi mèé-yu ní sani iní-yu sã cadã-yu nchaa nàcuáa cuení Yă Ndiöxí, te dàtnùní ducaⁿ te ní cachí-yu sã cúu càdã-yu nchaa nàcuáa na cũñaha-ndí xii-yu. Te ducaⁿ nĩ quidé-yu chi ducaⁿ nĩ cuení méé Yă Ndiöxí cunduu. ⁶ Te sá dúcáⁿ nĩ quide ñáyiu-áⁿ nũu xiăⁿ càháⁿ ndàhú-ndí núu tẽ Títú sã quíxí tucu-dé núu ndécú-ndó cuendá dàxínu cava-dé chiúⁿ sã sã ní ngũíta-dé quidé-dé dátacá-dé díhúⁿ sã sã ní ngũíta-ndo sàcáⁿ tnáhã-ndó, te ducaⁿ quide-ndo chi cùndahú iní-ndó tnàha ñáyiu-ndo. ⁷ Te nchòhó cúu-ndó ñáyiu ío ngòdónúú quide nchaa sã vâha, te ío vâha sàndáá iní-ndó Xítohó Jesucrístú, te ío vâha cùtnuní iní-ndó nàcuáa càháⁿ tnũhu-gã, te ío vâha dàcuaha-ndo ñáyiu tnũhu-gã, te ío ndècu ndee-ndo quide-ndo mee-ni sã vâha, te ducaⁿ ío cùu iní ñáhã-ndó xii-ndí, te sá dúcáⁿ quide-ndo núu xiăⁿ càháⁿ ndàhú-í núu-ndó sã ngòdó núu-gã-ndó càda-ndo sã cúu-xí tnàha ñáyiu-ndo.

⁸ Dico yùhú ñà túú tàuchiúⁿ-í sã dúcáⁿ càda-ndo, chi cuendá-ni sã càchí

tnúhu-í xii-ndo nàcuáa quide dava-gá cue ñáyiú ndècu ichi Xítóhó Jesucristú, chi cue ñáyiú-án ni yùhu ni iní-yu quidé-yu sá vâha sá cúu-xí tnàha ñáyiú-yu, te càchí tnúhu-í xii-ndo nàcuáa quidé-yu cuèndá cutnùni nùu nása cada-ndo nùu ndisa sá cúu iní-ndó cue tnaha ñáyiú-ndo. ⁹ Te nchòhó sa xini-ndó sã Xítóhó Jesucristú ío cùndahú iní ñáhá-gã xii-o, te ío váha ndècu-gá ní cùu te ní quixi-gá ñuyiú-a ní quide váha ñaha-gã xii-o, te ñuyiú-a ñá túú ní xíndecu váha-gá, te ducaⁿ ñi quixi-gá ñuyiú-a cuèi ñá túú ní xíndecu váha-gá cuèndá sá nchóó ngúndecu váha-o nùu ndécú-gã.

¹⁰ Te na càchí tnúhu-í xii-ndo nàcuáa sàni iní-í. Chìuⁿ sá ñi yuhu ni iní-ndó ñi ngüíta-ndo quide-ndo cuiá ñi yáha chi cùu-xi sá vâha sá cúu-xí-ndó nùu na dàxínu cava-ndo, ¹¹ Te dàtná-ni ñi yùhu ni iní-ndó ñi tausaha-ndo chìuⁿ-án te ducaⁿ-ni ñi yuhu ni iní-ndó dàxínu cava-ndo, te cacáⁿ tnáhá-ndó sã ndécú ndìhi-ndo nàcuáa xito mee-ndo ndacu-ndo, ¹² Te núu nchòhó ñi yùhu ni iní-ndó càcáⁿ tnáhá-ndó sã xító mèe-ndo ndacu-ndo ña, te cùu váha iní Yã Ndiõxí, chi mee-gã sa nàha-gá nása ndècu-o te ndùu vétú-ni iní-gá.

¹³ Te sá dúhá ndùu tnúhu càháⁿ-í te vá cání iní-ndó sã yùhú cuini-í sá nchòhó ndoho-ndo cùndecu-ndo te dava-gá-yu ngúndecu váha-yu sá cuèndá-ndó. ¹⁴ Te vitna ndècu ndee iní-ndó nàcuáa ndacu-ndo chindee-ndo cue ñáyiú xini ñuhu, te nduu ña túú ndècu ndee iní-ndó te cue ñáyiú-án chindee ñáhá-yu xii-ndo te núu ndècu ndee iní-yu, te ducaⁿ te ni nchòhó ñá túú ña cumání xii-ndo te ni cuè ñáyiú-án ñá túú ña cumání xií-yu. ¹⁵ Te ducaⁿ te quee ndáá-xi nàcuáa càháⁿ-xi núu tütú Yã Ndiõxí núu càchí-xi: “Cue ñáyiú ío vâi sá ni ñíhí ñá túú ní cùu sobrá xií-yu, te cue ñáyiú sacú ní ñíhí ñá túú ní cùmání xií-yu”, duha càchí-xi núu tütú-gá.

Té Títú ndìhi cue té cùndìhi-dé

¹⁶ Te ndàcáⁿ táhù-í núu Yã Ndiõxí chi mee-gã ní quide sá tè Títú ío

ñùhu iní ñáhá-dě xii-ndo dàtná ñùhú iní ñáhà-í xii-ndo. ¹⁷ Te yùhú ní xáhaⁿ-í xii-dé sá quixí còto ñaha-dé xii-ndo te ní sáha-dé tnúhu, te ñá díu mèe-ni sá dúcáⁿ ñi xáhaⁿ-í xii-dé quixi coto ñaha-dé xii-ndo, chi mee-dé cùdǎⁿ tnàhí iní-dé quixi coto ñaha-dé xii-ndo.

¹⁸ Te tendaha-ndǎⁿ ñiⁿ téé ndècu ndìhi-o ichi Xítóhó Jesucristú quixi-dé ndìhi té Títú, te téé quixi ndìhi té Títú-án cúu-dě ñiⁿ téé ío váha càháⁿ cue ñáyiú xíndecu ichi Xítóhó Jesucristú cuèndá-dé cuèndá sá ío váha quide-dé chìuⁿ Xítóhó Jesucristú càháⁿ-dé tnúhu-gá tnúhu sá càháⁿ nàcuáa naníhí táhù-ó. ¹⁹ Te cue ñáyiú xíndecu ichi Xítóhó Jesucristú ñá díu-ni sã càháⁿ váha-yu cuèndá-dé, chi tnàhá ní cáxi ñáhá-yu xii-dé cuèndá sá cacá cùu ndìhi ñaha-dé xii-ndí chindee ñàha-dé tacá sá cúu-xí ñáyiú ndàhú, te quide-ndí chìuⁿ-a cuèndá ío cuu càhnu Yã Ndiõxí, te cue ñáyiú cutnùni iní-yu sá nchòhó ñi yùhu ni iní-ndó quide-ndo nchaa sá vâha sá cúu-xí cuè tnaha ñáyiú-ndo. ²⁰ Te cuini-ndí sá vã càháⁿ cuèhé ñáyiú cuèndá nàcuáa quide-ndí ndìhi sá ngäutnàha sá cúu-xí cuè tnaha ñáyiú-o, te ío vâi cuu-xi. ²¹ Chi ndècu ndee-ndí quidé-ndǎⁿ nàcuáa càháⁿ váha Xítóhó Jesucristú cuèndá-ndí, te quide tucu-ndí nàcuáa càháⁿ váha ñáyiú sá quidé vâha-ndí.

²² Te tendaha tucu-ndí ingá tucu téé ndècu ndìhi-o ichi Xítóhó Jesucristú quixi-dé ndìhi cue téé úú quixi coto ñaha xii-ndo, te téé quixi ndìhi-güedé-án ñi cuu vâi xito quide-dé nàcuáa cutnùni iní-ndí sá ío ndècu ndee-dé quidé-dě sá vâha, te vitna ío-gá cuini-dé cada-dé sá vâha vitna quixi-dé núu ndécú-ndó, chi cùtnuní ndáá iní-dé sá cúu-ndó cuè ñáyiú quide váha. ²³ Te càchí tnúhu-í xii-ndo sã tè Títú cúu-dě ñiⁿ téé cùndìhi-í quidé-ndǎⁿ chìuⁿ Xítóhó Jesucristú, te tnàhá-dé cúu-dě ñiⁿ téé xínu cuechi núu-ndó càháⁿ-dé tnúhu-gá. Te càchí tnúhu tucu-í

xii-ndo cuendá cue tée úú quixi ndihi-dé, chi cue tée-áⁿ cúu-güedě cue tée tendaha cuè ñáyiú xĩndecu ichi Xítohó Jesucristú quixi coto ñaha xii-ndo. Te cue tée-áⁿ quidé-güedě nàcuáa cachí ñáyiú sá ïo càhnu cuu Xítohó Jesucristú. ²⁴ Te chí cáda sá cúu iní ndisa-ndo-güedě cuendá ducaⁿ na cùtnuní iní nchaa dava-gá ñáyiú xĩndecu ichi Xítohó Jesucristú sá ndàá ndisa ducaⁿ quide-ndo, te ducaⁿ cùtnuní iní-yu sá ndàá ndisa quide vaha-ndo dàtná càháⁿ-ndí cuendá-ndó sá quidé vaha-ndo.

9

Cuendá sá ngăutnaha sá cúu-xí cuè ñáyiú xĩndecu ichi Xítohó Jesucristú

¹ Te cuendá sá ngăutnaha sá cúu-xí cuè ñáyiú ndècu ichi Xítohó Jesucristú ñá túú-gă xíní ñũhu-xi cachí tnũhu-í xii-ndo nũú tütú-a nàcuáa cada-ndo, ² chi sa cùtnuní iní-í sá ïo cuení-ndó chindee-ndó-yu. Te ducaⁿ-ni ïo vaha càháⁿ-í cuendá-ndó nũú ñáyiú xĩndecu ichi Xítohó Jesucristú ndécú distritú Macèdoniá, te xăhaⁿ-ĩ xii-yu sá nchòhó ñáyiú xĩndecu ichi Xítohó Jesucristú ndécú distritú Acáyá sa ní cuu ìⁿ cuíá ducaⁿ cuení-ndó càcáⁿ tnáhá-ndó sá cúu-xí cuè ñáyiú ndàhú ndécú ìchi-gá. Te vại cue ñáyiú distritú Macèdoniá cuení-yu cacáⁿ tnáhă-yu sá cúu-xí cuè ñáyiú ndàhú ndécú ìchi Xítohó Jesucristú cuendá sá ñí ñĩ-yu tnũhu sá nchòhó ïo cuení-ndó dùcaⁿ cada-ndo. ³ Te cuendá sá sání iní-ndó càda-ndo xĩaⁿ tendaha-ĩ cue tée ndècu ndihi-o ichi Xítohó Jesucristú quixi-güedě núú ndécú-ndó cuendá dàtúha ñaha-güedě xii-ndo, cuendá sá vă quée ndèhnde-í núú ñáyiú sá ñí càháⁿ vaha-í cuendá-ndó, te ducaⁿ cùndecu túha ndisa-ndo dàtná sa ñí càháⁿ-í núú-yu. ⁴ Chi na cuáháⁿ ndèé quixi-í ndihi ìⁿ úú cue ñáyiú distritú Macèdoniá núú ndécú-ndó te quini-yu sá ñà túú ndècu túha-ndo, te cucahaⁿ núú-í núú-yu sá ñí càháⁿ vaha-í cuendá-ndó te núú ñă túú ndècu túha-ndo, te tnáhá-ndó cùcahaⁿ núú-ndó. ⁵ Te xĩaⁿ núú ní sani iní-í sá vaha-gá codonũu cue tée

ndècu ndihi-o ichi Xítohó Jesucristú quixi coto ñaha-güedě xii-ndo cuendá chindee ñaha-güedě tacá sá ñí sani iní-ndó càcáⁿ tnáhá-ndó cuendá sá cùndecu túha-xi, te cuu-xi dàtná ìⁿ táhú să ñí quene cuu iní méé-ndó càcáⁿ tnáhá-ndó sá cúu-xí cuè tnaha ñáyiú-ndo. Te ducaⁿ te vă yõo cani iní-xi quesàhá-yu sá nchũhú ní quide yica-ndĩ ducaⁿ ñí sacáⁿ tnáhá-ndó.

⁶ Te nchòhó sa xíní-ndó sá ñáyiú na chĩhi vai tatá te vại ñĩí-yu cùu, te cue ñáyiú na chĩhi sacú tatá te sacú ñĩí-yu cùu. Ducaⁿ sãtnahá-xi cùu ñáyiú sàcáⁿ tnáhá sá cúu-xí tnaha ñáyiú-yu. ⁷ Te ìⁿ ìⁿ-ndo càcáⁿ tnáhá-ndó nàcuáa quene cuu iní méé-ndó, te ïo vaha cuu iní-ndó dùcaⁿ cada-ndo te vă cáda-ndó cuendá-ni sá quidé yica ñaha ñáyiú xii-ndo, chi Yá Ndiõxí cúu vaha iní-gá núú nchàa ñáyiú cùdíí iní sàcáⁿ tnáhá sá cúu-xí cuè tnaha ñáyiú-xi. ⁸ Te Yá Ndiõxí ndacu-gá chindee ñaha-gá xii-ndo nàcuáa cundecu vaha-ndo, chi ñiu-gá cada te ñĩí-ndó nchàa núú sá xíní ñũhu-ndo cundecu ndihi-ndo, te ñă túú tnáhí-gá ná cumání xii-ndo, te mee-gă chindee ñaha-gá xii-ndo ñĩí-ndó ïo vại cundecu ndihi-ndo cuendá ducaⁿ chindee-ndo cue tnaha ñáyiú-ndo. ⁹ Te núú tütú Yá Ndiõxí càchí-xi ìⁿ xichi:

ìⁿ ñáyiú ïo vại sá ñí sãñahá-yu xii ñáyiú ndàhú,

te sá ñí quide ñáyiú-áⁿ ñí cuu-xi sá vaha sá vă yõo cùnaa.

Duha càchí-xi núú tütú-gá. ¹⁰ Te mee Yá Ndiõxí táxí-gă nchaa sá cúu tàtá nchaa nchòhó ñáyiú xitu nándi sá xítú cuendá cuu sá cúu nchìto-ndo, te ñiu-gá cada te ïo vại sá ñĩí-ndó cùndecu ndihi-ndo, te ducaⁿ ïo-gá vại sá vaha cada-ndo sá cúu-xí cuè tnaha ñáyiú-ndo. ¹¹ Te Yá Ndiõxí taxi-gá vại núú sá cùndecu ndihi-ndo cuendá ducaⁿ ñí yuhu ñí iní-ndó vại cuãñaha-ndo sá cúu-xí tnaha ñáyiú-ndo. Te cuendá nchaa sá sàcáⁿ tnáhá-ndó quèheⁿ cuendá-ndí cuu xii tnaha ñáyiú-ndo, te cue ñáyiú-áⁿ ïo ndacáⁿ táhũ-yu núú Yá Ndiõxí

cuendá sá dúcáⁿ sácáⁿ tnáhá-ndó sá cúú-xí-yu. ¹² Te sá dúcáⁿ quide-ndo sacáⁿ tnáhá-ndó sá cúú-xí cue ñáyiú cùu cuendá Yá Ndiöxí, te ñáyiú-áⁿ ñà túú-gã ná cumání xii-yu, te ío ndacáⁿ táhũ-yu núú Yá Ndiöxí sá dúcáⁿ quide-ndo. ¹³ Te ñáyiú-áⁿ cutnùní iní-yu sá nchòhó quidé-ndó sá sàndáá ndisa iní-ndó tnũhu Xítóhó Jesucristú, te cuendá xiáⁿ te ñáyiú-áⁿ chiñùhú-yu Yá Ndiöxí, te cuendá sá dúcáⁿ nì yuhu nì iní-ndó sácáⁿ tnáhá-ndó sá cúú-xí-yu ndihí sá cúú-xí nchàa dava-gá ñáyiú, te cachí-yu sá ïo càhnu cuu Yá Ndiöxí. ¹⁴ Te ñáyiú-áⁿ cãháⁿ ndihí-yu Yá Ndiöxí cuendá-ndó, te ío cuu váha iní ñáhã-yu xii-ndo cuendá sá Yá Ndiöxí chindèe ñaha-gá xii-ndo quide-ndo sá váha sá cúú-xí-yu ndihí dava-gá ñáyiú. ¹⁵ Te ío ndacáⁿ táhú-ó núú Yá Ndiöxí cuendá sá nì taxi-gá sá ïo váha ndècu ndihí-o, te nì ñã cútnùní iní-ó ñãsa cunduu tnũhu cáháⁿ-ó cuendá sá váha ní taxi-gá.

10

Té Pãblú ndécú ndihí-dé tnũhu ndee iní sá cãháⁿ-dé tnũhu Xítóhó Jesucristú

¹ Te Xítóhó Jesucristú ío càhnu iní-gá, te cùndahú iní ñáhã-gã xii-o chindèe ñaha-gá, núu xiáⁿ yúhú té Pãblú ducaⁿ quide-í cãháⁿ ndàhú-í núú-ndó nàcuáa cada-ndo. Te dava-ndo càchí-ndó sá yúhú ío ndàhú iní-í òré ndécú ndihí ñaha-í xii-ndo, te òré ñá túú ndècu ndihí ñaha-í xii-ndo te ío ñã cáã-í. ² Te cãháⁿ ndàhú-í núú-ndó sá cádá-ndó nàcuáa vá cãháⁿ ñã-í núú-ndó òré quixi-í quixi coto ñaha-í xii-ndo. Te cuèní-í sá ndihí tnũhu ñã iní-xi cáháⁿ ndihí-í cue ñáyiú càchí sá ñã-ni cuu-í ndihí cue ñáyiú ñá túú sàndáá iní tnũhu Xítóhó Jesucristú. ³ Te nchúhú cùu-ndí cue téé ñuyúú-a, dico ndùcu ndee-ndí quidé-ndí nàcuáa ndàcu-ndí dáquèe tíhú-ndí nchaa sá cuèhé sá dúhá, dico ñá díú mèe-ndí ducaⁿ ndàcu-ndí quidé-ndí, ⁴ te nì ñã sá ío ñuyúú-a ñá túú chindèe ñaha-xi, chi mee Yá Ndiöxí chindèe ñaha-gá xii-ndí dáquèe tíhú

duuⁿ-ndí nchaa núú sá cuèhé sá dúhá, ⁵ Te xiáⁿ núu ñihí-ndí tnũhu cãháⁿ-ndí sàdí-ndí yuhu cue ñáyiú cãháⁿ tnũhu sá ñà túú cùu váha iní Yá Ndiöxí, ñáyiú xiquide nínu mee-xi càchí sá ñà túú nàndíhi tnũhu-gá. Te quide-ndí sá ñáyiú-áⁿ quèndáá iní-yu tnũhu Xítóhó Jesucristú. ⁶ Te nchúhú sa ndècu túha-ndí sá dáquèetihú-ndí cue ñáyiú ñá túú cuèní cada nàcuáa cuèní Xítóhó Jesucristú, dico díhna-gá xini ñũhu-xi sá nchãá nchòhó ñáyiú cuèní cada nàcuáa cuèní-gá cundáá-ndó.

⁷ Te nchòhó nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuendá-ndí. Chi núu cùtnuní ndáá iní-ndó sá cúú-ndó cuendá Xítóhó Jesucristú, te díu-ni ducaⁿ tàú-ndó càni iní-ndó cuendá-ndí tucu. ⁸ Te Xítóhó Jesucristú ní taxi-gá tnũhu ndee iní ndécú ndihí-ndí sá dánèhé ñáhã-ndí xii-ndo nàcuáa cuíta cuehnu nihnu-ndo ìchi-gá quíhíⁿ, te ñá díú sá dánèhé ñáhã-ndí xii-ndo nàcuáa cuíta nihnu-ndo, te cuèi na chido-gá-í cáháⁿ-í cada nínu-í mèe-í cuendá tnũhu ndee iní ní taxi Xítóhó Jesucristú ndécú ndihí-ndí, dico vá cùcãháⁿ núú-í chi cãháⁿ ndáá-í. ⁹ Te ñá túú cuèní-í sá nchòhó caní iní-ndó sá yúhú dáyuhú ñáhã-í xii-ndo nàcuáa ndùu tnũhu cãháⁿ-í núú tütú-í. ¹⁰ Te dava-ndo càchí-ndó sá ténãá ñáhã-í xii-ndo núú tütú-í, te mee-ni tnũhu càhnu sá ïo cùnuu cuu-xi, te càchí tucu-ndo sá òré ndécú ndihí ñaha-í xii-ndo te ñá túú càa-í sá cúú-í ñã téé cùu váha cùu dico iní-ndó, te càchí tucu-ndo sá ñã túú tnáhã iní-ndó nàcuáa quide-í òré dácuãha ñaha-í xii-ndo. ¹¹ Te nchòhó ñáyiú ducaⁿ cãháⁿ cada cuendá váha-ndo sá dàtnã-ni cãháⁿ-ndí núú tütú-ndí díu-ni ducaⁿ quide-ndí òré ndécú ndihí ñaha-ndí xii-ndo.

¹² Te nchúhú, vá cúú tnàhí cáháⁿ-ndí sá ñã-ni cuu-ndí ndihí cue ñáyiú cãháⁿ váha cuendá mèe-xi, chi ñáyiú-áⁿ sání iní-yu ná cúú sá váha te quidé-yu te xiáⁿ càchí-yu sá ïo váha quidé-yu, te càchí-yu sá quidé váha-gá-yu dàcúxí tnàha ñáyiú-yu, te sá dúcáⁿ cãháⁿ-yu te quidé-yu dàtnã

quidé cuè ñáyiú ñá túú tnàhí cùtnuní iní-xi. ¹³ Te dico nchúhú ñá túú xidó-ndí cáháⁿ váha-ndí cuèndá-ndí, chi càháⁿ váha-ndí cuèndá-ndí dico nàcuáa ndúu chiúⁿ ní taxi Yá Ndiòxí càháⁿ-ndí, chi mee-gã ní cachí-gá ndéé neni sáá-ndí cáháⁿ-ndí tnúhu-gá, te ní sáá-ndí ndéé ñuú-ndó càháⁿ-ndí tnúhu-gá. ¹⁴ Te vitna ndècu ndihí-ndí tnúhu ndee iní sá tnàhá nchòhó cuu cáháⁿ ndihí ñaha-ndí xii-ndo, chi díhna-gá nchúhú ní quixi-ndí ní cáháⁿ-ndí tnúhu Xítohó Jesucristú ñuú-ndó, tnúhu sá càháⁿ nàcuáa naníhí tãhú-ó. ¹⁵ Te nchúhú ñá túú quidé cahnu-ndí mée-ndí cuèndá chiúⁿ quidé dava-gá-güedé que-saha-ndí sá chiúⁿ mée-ndí cúú-xí. Te cuíní-ndí sá nchòhó cuita quindáá-gá iní-ndó Xítohó Jesucristú, te ducaⁿ te níhí-gã-ndí nàcuáa cada-ndí chiúⁿ-gá nchaa dava-gá xichi núú ní cachí-gá cada-ndí chiúⁿ-gá. ¹⁶ Chi cáháⁿ-ndí tnúhu-gá tnúhu sá càháⁿ nàcuáa naníhí tãhú-ó, te yáha-gá-ndí ñuú-ndó quíhíⁿ-ndí nchaa dava-gá xichi cáháⁿ-ndí, te vá cádá cahnu-ndí mée-ndí cuèndá chiúⁿ sá sà ní quidé dava-gá-güedé.

¹⁷ Te cue ñáyiú cuíní cada cahnu mee-xi te vá dúcáⁿ càdá-yu, chi mee Xítohó Jesucristú ná càda cahnú-yu-gá. ¹⁸ Te nchaa ñáyiú na càháⁿ váha Xítohó Jesucristú cuèndá-yu, ñáyiú-áⁿ cúdiú-yu núú-gã, te ñá túú cúdiú-yu núú-gã cuèndá sá càháⁿ váha-yu cuèndá mée-yu.

11

Cuèndá té Pãblú ndihí cuèndá cue téé cãhí sá càháⁿ tnúhu Yá Ndiòxí te ñá ndáá

¹ Te cuíní-í sá nchòhó cada ndee iní-ndó cùndedóho-ndo tnúhu na càháⁿ-í, chi cáháⁿ-í dàtná càháⁿ cue ñáyiú ñá túú cùtnuní iní-xi, te cuèi nása-gá ná cùnduu tnúhu cáháⁿ-í dico chí cádá ndèe iní cùndedóho-ndo. ² Chi yúhú ío ñuhu iní ñahá-í xii-ndo dàtná ñúhú iní ñahá mée Yá Ndiòxí xii-o, te ní cáháⁿ-í tnúhu Xítohó

Jesucristú núú-ndó ñuú xíáⁿ ní tnahá tnúhu-ndo ndihí-gá vitna, te sá dúcáⁿ ní quide-í te cada iní-ndó sá yúhú cúú-í dàtná ñⁿ téé xica ndáhú te nchòhó cúú-ndó dàtná ñⁿ xichí cuéchi, te Xítohó Jesucristú cúú-gã dàtná ñⁿ téé tnándaha ndihí xichí cuéchi-ãⁿ. Te ducaⁿ càda iní-ndó chi na sáa nduu te yúhú na càni cuendá ñahá-í xii-ndo ñuú Xítohó Jesucristú, te cuu-ndo ñáyiú vá cùndècu tnahí-gá cuéchi-xi. ³ Te yúhú-í sá sãcuíhná dandáhú ñahá-xí xii-ndo vá cãní-gã iní-ndó cãchicúⁿ nihnu-ndo ní yuhu ní iní-ndó ìchi Xítohó Jesucristú dàtná nchicúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chi sãcuíhná ní nduu-xi cóo ní dándáhú ñahá-xí xii-xi, chi sãcuíhná-ãⁿ ío váha ní xito-xi nàcuáa ní quide-xi ní dándáhú-xi tá Èvá-áⁿ. ⁴ Te nchòhó, quidé ndèe iní-ndó sãcùndedóho-ndo nchaa tnúhu càháⁿ cue téé càháⁿ ingá núú tnúhu cuèndá Jèsús tnúhu sá ñá túú dãnehé ñahá-ndí xii-ndo, te quidé ndee tucu iní-ndó ndedóho-ndo dãnehé ñahá-güedé xii-ndo cuèndá ingá espíritú, te ñá díú cuèndá Espíritú Yá Ndiòxí sá ní ngúndecu ndihí-ndo dãnehé ñahá-güedé xii-ndo, te quidé ndee tucu iní-ndó ndedóho-ndo dãnehé ñahá-güedé xii-ndo ingá núú tnúhu sá cãhí-güedé càháⁿ nàcuáa naníhí tãhú-ndó, te ñá díú nàcuáa ndúu tnúhu sá ní sãndáá iní-ndó cuèndá naníhí tãhú-ndó càháⁿ-güedé. ⁵ Te cue téé ducaⁿ càháⁿ-áⁿ cãhí-güedé sá Yá Ndiòxí ní tendaha ñaha-gá xii-güedé xicá cùu-güedé càháⁿ-güedé tnúhu-gá te ío cùnuu-güedé, dico ñá ndáá sá càháⁿ-güedé tnúhu-gá. Te yúhú cùtnuní iní-í sá cuè téé-ãⁿ ñá túú cùnuu-güedé dàtná cùnùu yúhú. ⁶ Te cuèi ñá túú càháⁿ-í dàtná càháⁿ cue téé ío váha sáa díquí-xi dico ío váha cùtnuní iní-í cuèndá nchaa sá dácuaha-í, te yúhú sa quide-í nàcuáa cùtnuní iní-ndó sá ío váha cùtnuní iní-í nàcuáa ndúu nchaa tnúhu càháⁿ-í.

⁷ Te cudana te sãni iní-ndó sá yúhú ñá túú ní quidé váha-í sá ní quide-í

mée-í dàtná ìn tée ío ndàhú iní-xi, chi ñá túú ní xicáⁿ-í yáhu-í núú-ndó cuendá sá ñí cáháⁿ-í tnúhu Yá Ndiõxí tnúhu sá cáháⁿ nàcuáa naníhí tãhú-ó núú-ndó. ⁸ Te ní queheⁿ-í díhúⁿ ñí taxi dava-gá cue ñáyíu ndècu ichi Xítóhó Jesucristú, te díhúⁿ-ãⁿ ñí dándóñùhu-í ní saaⁿ-í nchaa sá ñí xini ñùhu-í cùtnàhá ní cáháⁿ-í tnúhu Xítóhó Jesucristú núú-ndó. ⁹ Te cùtnàhá ní xindecu ndíhí ñaha-í xii-ndo te áma ní xóo cumání sá xíní ñùhu-í, te ñá túú ñá ní xicáⁿ-í núú ni ìn-ndo. Chi cue ñáyíu xindecu ichi Xítóhó Jesucristú ndécú dístítú Macèdoniá ní quixí-yu ní taxi-yu sá cúmání xii-í, te ñá túú tnàhí ní dàsatú iní ñáhà-í xii-ndo cãcãⁿ-í núú-ndó ñù ná cúú sã xíní ñùhu-í, te ñíu-ni ducaⁿ càda-í. ¹⁰ Te ñíu-ni duha cáháⁿ váha-í cuendá-í te ni ìn cue ñáyíu dístítú Acãyá vá ñíhí-yu tnúhu cúñàhá-yu xii-í cuendá cadí-yu yuhu-í. Te mee Xítóhó Jesucristú náhá-gã sá ndáa cáháⁿ-í dàtná cáháⁿ ndáa mée-gã. ¹¹ Te cudana te sàni iní-ndó sã sá dúhá cáháⁿ-í te ñá túú cùu iní ñáhà-í xii-ndo, dico ñáhà chi mee Yá Ndiõxí náhá-gã sá yùhú ío cùu iní ñáhà-í xii-ndo.

¹² Te nàcuáa-ni ta quide-í véxi te ñíu-ni ducaⁿ càda-í cuendá sá cuè tée cùni cada nínu mee-xi cãchí sá ìn-ni cuu ndíhí ñaha-güedé xii-í vá ñíhí-güedé tnúhu cáháⁿ-güedé cachí-güedé sá ìn-ni chiuⁿ quide ndíhí ñaha-güedé xii-í. ¹³ Te cue tée-án cãchí-güedé sá Yá Ndiõxí ní tendaha ñaha-gá xii-güedé xicá cùu-güedé cáháⁿ-güedé tnúhu-gá dico ñá ndáa, chi mee-ni dandahú-güedé ñáyíu ndíhí tnúhu cáháⁿ-güedé, te quide-güedé dàtná quidé cuè tée cáháⁿ tnúhu Xítóhó Jesucristú dico ñá ndáa sá cúú-güedé cue tée cáháⁿ tnúhu-gá. ¹⁴ Te vá cúñùhu-o sã dúcãⁿ quide cue tée-án, chi mee sàcúhñá quidé-xí sã cúú-xí dàtná ìn espíritú xínú cuèchi núú ío váha cãa ndecu Yá Ndiõxí dico ñá ndáa sá xínú cuèchi-xi xíãⁿ. ¹⁵ Te xíãⁿ vá cúñùhu-o sã cuè tée xínú cuechi núú-xi quide-güedé sá cúú-güedé cue tée quide váha chi ñá ndáa sá quidé váha-güedé chi dandahú-güedé ñáyíu. Te nàcuáa ndùu nchaa sá

quidé-güedé te ducaⁿ nãcháhu-güedé núú Yá Ndiõxí.

Te Pãblú ío ndòho-dé cuendá sá cúú-dé tée cáháⁿ tnúhu Xítóhó Jesucristú

¹⁶ Te yùhú cáháⁿ tucu-í dóho-ndo sã vá caní iní-ndó sã yùhú cúú-í ìn tée cáháⁿ lúcú cáháⁿ duha, te núu dava-ndo dùcaⁿ sani iní-ndó dico chí cadá ndèe iní cundedóho-ndo tnúhu na cáháⁿ-í cuendá ducaⁿ tnàhá-í cada nínu-í mée-í. ¹⁷ Te vitna na cáháⁿ-í dàtná cáháⁿ ìn tée ñá túú cùtnuní iní-xi, chi tnúhu cáháⁿ-í ñá túú ìn-ni cuu-xi ndíhí tnúhu Xítóhó Jesucristú, chi vitna cáháⁿ-í nàcuáa cada nínu-í mée-í. ¹⁸ Te ío cuéhé ñáyíu quide nínu mee-xi cuendá nchaa sá ío ñuyíu-a te xíãⁿ ñù tnàhá-í cùni-í cada nínu-í mée-í. ¹⁹ Chi cùtnuní sá nchòhó quidé ndèe iní-ndó sàcúndedóho-ndo nchaa tnúhu cáháⁿ cue tée cáháⁿ lúcú cáháⁿ duha, te ducaⁿ quide ndee iní-ndó sàcúndedóho-ndo tnúhu cáháⁿ-güedé chi cãchí-ndó sã ío túha-ndo. ²⁰ Te nchòhó, quide ndee iní-ndó tnè-ndo nchaa tnúhu cáháⁿ cue tée quide yica ñaha xii-ndo sá cúnú cuèchi-ndo núú-güedé, te xicáⁿ-güedé nãndí sá xicáⁿ-güedé núú-ndó, te tàxi tnuní ñáhà-güedé xii-ndo, te quide-güedé sã ío cùnuu-güedé ndécú ndíhí ñaha-güedé xii-ndo, te cãniha-güedé xii-ndo, te cuèi nchaa xíãⁿ quidé ñaha-güedé xii-ndo dico quide ndee-ni iní-ndó. ²¹ Te nchòhó cãchí-ndó sã cúú-ndí cue tée ñá túú ní cùyí cada nãndí sá cadá, te ndáa chi ñá túú ìn-ni cuu-ndí ndíhí cue tée ducaⁿ xiquide.

Dico núu cue tée-án cùyí-güedé quidé ñínu-güedé mée-güedé, te tnàhá-í cùyí-í ducaⁿ càda-í. Te sá dúhá cáháⁿ-í te cáháⁿ-í dàtná ìn tée ñá túú cùtnuní iní-xi. ²² Te núu quide cahnu-güedé mée-güedé cuendá sá cáháⁿ-güedé tnúhu hëbreú, te yùhú tucu ñíu-ni tée cáháⁿ tnúhu hëbreú cúú-í, àdi quide cahnu-güedé mée-güedé cuendá sá cúú-güedé cue tée isràél, te yùhú tucu tnàhá-í cúú-í tée isràél, àdi quide cahnu-güedé mée-güedé cuendá sá cúú-güedé ñaní tnàhá ndíi Àbrahám, te tnàhá yùhú

cùu-í ñani tnáhá ndïi Àbrahám tucu. ²³ Adi quide cahnu-güedé méé-güedé cuendá sá sání iní-güedé sá díú núú Xítohó Jesucristú xínú cuèchi-güedé, dico yúhú ío-gá xínú cuèchi ndisa-í núú-gã. Te sá dúhá quide cahnu-í méè-í te cáháⁿ-í dàtná ìⁿ tée ñá túú cùtnuní iní-xi, te yúhú cùu-í ìⁿ tée ío-gá quidé chiúⁿ-gá dàcúxí cuè tée-án, te vai xito ní cuu caniha ñáyiu xii-í, te vai xito ní cuu chihí ñahá-yu vecaá xii-í, te vai xito ní cuu căcu căcu cahni ñaha ñáyiu xii-í. ²⁴ Te cue ñáyiu israhél ní canihá-yu xii-í úhúⁿ xito, te ndi tnahá ìⁿ ìⁿ xito ní canihá-yu ní dáquëe-yu ócú sáhúⁿ cúmí ñi sátà-í. ²⁵ Te úní xito ní caniha tucu ñáyiu xii-í ndihí carrutí, te ìⁿ xito ní sáha yúú ñáhá-yu xii-í, te ní cuu úní xito quëe naa bàrcú xití ndute òré sácúhuⁿ-í, te ìⁿ xito ío ní ndoho-í ní xíndecu-í ìⁿ nduu ìⁿ níú núú ndute làmár. ²⁶ Te ío titní xichi ní cuu xica cuu-í, te dava xichi ní căcu cuido ñaha ndute ñuhu xii-í, te dava xichi ní căcu duhu ñádúhú nchaá ndachiuⁿ-í, te dava xichi ní căcu cada ñaha cuè ñáyiu cùu ndi mee-í ìⁿ sá cădá ñahá-yu xii-í, te diu-ni ducaⁿ ñi căcu cada ñaha tucu cue ñáyiu ñá túú cùu ndi mee-í ìⁿ sá cădá ñahá-yu xii-í ní cùu, te cuëi xití ñuuú te cuëi xití yucu căcu căcu cada ñaha ñáyiu xii-í ìⁿ sá cădá ñahá-yu, te diu-ni ducaⁿ căcu căcu quiní-í tnúndòho óré ñúhù-í bàrcú cuáháⁿ núú ndute làmár. Te cue ñáyiu cächí sá ndécú ìchi Xítohó Jesucristú te ñá ndàá căcu căcu cada ñahá-yu xii-í ìⁿ sá cădá ñahá-yu. ²⁷ Te ío ndòho-í cuendá chiúⁿ quide-í chi ío xàú-í, te ní cuu vai xito ñá túú xidí-í, te titní xito ní cuu xihí víhì-í docó, te titní xito ní cuu yìchì-í ndute, te titní xito ní cuu ñá túú tnàhí ná xéxì-í cuendá chiúⁿ quide-í, te titní xito ní cuu ndòho-í sá vïxiⁿ, te titní xito ní cuu ñá túú ñihí-í dóó cuihnu-í.

²⁸ Te ñá díú-ní xǎⁿ chi ìⁿ nduu ìⁿ nduu ío sání iní-í cuendá nchaá ñáyiu ndècu ìchi Xítohó Jesucristú xíndecu nchaá xichi. ²⁹ Te ndèda-ni càa ñáyiu ñá túú ñihí ndéé cùndecu

ichi Xítohó Jesucristú, te ío cùndahú iní-í chi sànuu sá tnáhá-í ñá túú ñihí ndéè-í cùndecu-í ìchi-gá sá dúcáⁿ quidé-yu. Te núu ìⁿ ñáyiu quidé-yu sá ìⁿ nchohó ñáyiu ndècu ìchi Xítohó Jesucristú quidé-ndó ìⁿ sá ñá túú tàú-ndó càda-ndo te vá cùú vǎha iní-í chi cudèèⁿ-í. ³⁰ Te núu xini ñuhu-xi sá cădá cahnu-í méè-í, te cuu ducaⁿ càda-í te cáháⁿ-í mee-ni cuendá nchaá sá quidé nàcuáa ñá túú ñihí ndéé yiqui cuñú-í. ³¹ Te Dútú Ndiòxí Yá cùú Tǎtá Xítohó Jesucristú náhá-gã sá yúhú cáháⁿ ndàá-í núú-ndó, te diu-gá tàú-gá cachí-ó sá ío cahnu cuu-gá ni caa ni quíhíⁿ. ³² Te cùtnáhá ní xíndecu-í ñuuú Dàmascú te tée cùu gobiernú tée cùndihí tée yíndaha ñáyiu nàni Aretás ní taxi ndecu-dé cue tée ní xíndedí yuyèhe sá ñúhú dòco ñuuú cuendá òré quee-í te tni ñaha-güedé xii-í ní cùu. ³³ Dico yúhú ní queè-í ìⁿ xití tídihi, te cue ñáyiu cùndihí ñaha xii-í ní queñuhu ñahá-yu ndàa ventaná nchí yiqui naha sá ñúhú dòco ñuuú-áⁿ, te ducaⁿ te ní căcu-í ñá túú ní ndàcu-güedé tni ñaha-güedé xii-í.

12

Té Pǎblú cáháⁿ-dé sá ío vii càa sá ñi dǎnèhé núú ñahá Xítohó Jesucristú xii-dé

¹ Te ñá túú ndéé nándihí-xi sá cáháⁿ vǎha-o cuendá méé-ó, dico vitna xini ñuhu-xi ducaⁿ cada-í chi cáháⁿ-í nàcuáa ní quide ñaha Xítohó Jesucristú xii-í, chi ní quide-gá sá ñi cùtnuní iní-í nàcuáa nduu tnúhu-gá, te vai núú sá ñi dǎnèhé núú ñahá-gã xii-í. ² Te yúhú xini-í ìⁿ tée sàndáa iní ñahá xii Xítohó Jesucristú, te sa ní cuu úxícúmi cuíá sá tée-áⁿ ñi sáa-dé ndéé andiu cùu uní, te ñá túú xini-í te núu ndihí yiqui cùñú-dé ní sáa-dé àdi ñahá, chi ìⁿ dîi díi-ni Yá Ndiòxí náhá-gã te núu nása càa-dé ní sáa-dé. ³ Te yúhú cáháⁿ ndàá-í cuendá tée-áⁿ, dico dàtná ní cachí-í sá ñá túú xini-í te núu ndihí yiqui cùñú-dé ní sáa-dé andiu àdi ñahá, chi mee Yá Ndiòxí náhá-gã te núu nása càa-dé ní sáa-dé. ⁴ Te tée-áⁿ ñi sáa-dé ìⁿ xichi núú ío vǎha càa andiu, te yacáⁿ ní xíndedóho-dé tnúhu

mee-ni sã cúu-xí cuendá méé-dě, te tñúhu-áⁿ vã cúu tñàhí cáháⁿ-dé núú nì ìⁿ ñáyíu. ⁵ Te yúhú quidé nĩnu-í téé-áⁿ, dico mee-í ñá túú càháⁿ váha-í cuendá-í cuendá cada nĩnu-í méé-í, chi càháⁿ-ni mee-ni cuendá nchaa sá quidé nàcuáa ñá túú nihí ndéé yìqui cuñú-í. ⁶ Te núu dicó yúhú cuiní-í te cuu cáháⁿ váha-í cuendá-í cuendá cada nĩnu-í méé-í, te núu ducaⁿ na càháⁿ-í te ñá túú cùu-xi ìⁿ tñúhu neñúú cáháⁿ-í, chi cùu-xi ìⁿ sá càháⁿ ndáá-í te núu na càháⁿ-í. Dico vá dúcáⁿ càda-í chi cuiní-í sá nchòhó cada cuendá-ndó nàcuáa ndùu tñúhu càháⁿ-í ndihí nàcuáa quide-í, te ducaⁿ mèe-ndo cáháⁿ-ndó te núu ná téé cùu-í, te ñá díú sã yúhú cáháⁿ váha-í cuendá méé-í cuendá nchòhó cachí-ndó sã ío cùnùu-í.

⁷ Te sá nĩ dánèhé núú ñáhá Xítóhó Jesucristú xii-í cúu-xí sã xidó ío váha, te cuendá sá vã cadá càhnu-í méé-í nũu xiáⁿ Xítóhó Jesucristú ní quide-gá duha ndòho yìqui cuñú-í vitna. Te sá dúcáⁿ quide ñaha-gá xii-í te xiáⁿ sácúíhná nĩ nihí-xi ichi càhnu dandòho ñaha-xi xii-í. ⁸ Te ní cuu úní xito càháⁿ ndàhú-í núú Xítóhó Jesucristú sá ná cadá-gã nàcuáa vá ndóhó-gã yìqui cuñú-í. ⁹ Dico mee-gã càchí-gá xii-í: “Yúhú ío cùndahú iní ñáhà-í xii-ñ chindee ñaha-í, te ñá túú nã cùmání xii-ñ, te cùtnuní sá ío-gã chindèe-í cue ñáyíu ñá túú nihí ndéé cùndecu”, duha ní cachí-gá xii-í. Te xiáⁿ nũu yúhú ío cùdíí iní-í sá ñá túú nihí ndéé-í ndécù-í, chi díu cuendá xiáⁿ Xítóhó Jesucristú ñá túú dàña nihnu ñaha-gá xii-í chindèe ñaha-gá. ¹⁰ Te xiáⁿ nũu cùdíí iní-í sá dúhá ñá túú nihí ndéé-í ndécù-í, te cùdíí tucu iní-í cuendá nchaa tñúhu cuèhé tñúhu duha càháⁿ ñáyíu cuendá-í, te cùdíí iní-í cuendá nchaa sá ndóhò-í, te cùdíí tucu iní-í cuendá sá quidé ñaha ñáyíu xii-í, te cùdíí tucu iní-í cuendá nchaa dava-gá sá ndóhò-í cuendá Xítóhó Jesucristú. Te òré ñá túú nihí ndéé-í te Xítóhó Jesucristú chindèe ñaha-gá xii-í nihí ndéé-í.

Té Pãblú ío sàni iní-dé cuendá cue ñáyíu xĩndecu ichi Xítóhó Jesucristú ndécú ñúú Còrintú

¹¹ Te cùu-í dàtná ìⁿ téé ñá túú cùtnuní iní-xi sá dúhá càháⁿ váha-í cuendá-í, te ducaⁿ quide-í chi mee-ndo quide-ndo sá dúcáⁿ càháⁿ-í, dico mee-ndo tàú-ndó càháⁿ váha-ndo cuendá-í ní cùu. Te dava cue téé ío quide cahnu-güedé méé-güedé, te càchí-güedé sá Xítóhó Jesucristú ní táuchíúⁿ-gã sá càháⁿ-güedé tñúhu-gá, dico yúhú cùnùu-gá-í dàcúúxí cue téé-áⁿ cuèi ñá túú vèdana ná cùu-í ndécù-í ñuyíú-a. ¹² Te cùtnàhá ní xĩndecu ndihí ñaha-í xii-ndo ío ní quide càhnu iní-í nándi sá nĩ yáha-í ní quide-í chiúⁿ Xítóhó Jesucristú sá cúu-xí-ndó. Te ní chindee ñaha-gá xii-í ní quide-í tĩtní núú sã vã yòo tñàhí ndàcu cada te ní cuñúhu-ndo, te sá dúcáⁿ nĩ chindee ñaha-gá xii-í ní cutnùní iní-ndó sã yúhú cúu ndisa-í ìⁿ téé ní cachí Xítóhó Jesucristú sá càháⁿ-í tñúhu-gá. ¹³ Te yúhú ìⁿ-ni quide ndihí ñaha-í xii-ndo ndihí nchaa dava-gá cue ñáyíu ndècu ichi Xítóhó Jesucristú, te dicó-ni sá yúhú ñá túú ní cuiní-í taxi-ndo sã xíní ñúhu-í dàtná ní quide-í dava-gá-yu. Te núu ñá túú ní quide váha-í sá dúcáⁿ ní quide-í ñá túú ní cuiní-í chindee ñaha-ndo te chí cadá càhnu iní ñáhá xii-í.

¹⁴ Te vitna sa ndècu túha-í sá quíxì-í núú ndécù-ndó, te sá quíxì còto ñaha tucu-í xii-ndo cùu-xi xito cuu úní sá quíxì-í, te cuiní-í sá vã dándihú-ndó iní-ndó ndùcu-ndo sá táxi-ndó cùu xii-í, chi ñá díú xiáⁿ ndéé iní-í chi mee-ndo ndéé iní-í quixi-í. Te duha càháⁿ-í chi nchòhó xini-ndó sã cuè téé cùu tátá sãñaha-güedé sá cúu-xí cuè déhe-güedé te ñá díú cuè déhe-güedé sãñaha-güedé sá cúu-xí mèe-güedé. ¹⁵ Te yúhú ío váha cùu iní-í dandòñuhu-í sá ndécù ndihí-í nàcuáa ndacu-í chindee ñaha-í xii-ndo cùndecu váha-ndo sã cúu-xí Yã Ndiòxí chi ío cùdíí iní-í, te cuèi na cùu-í sá cuendá-ndó, chi ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sànuu sá nchòhó ñá túú cùu iní ñáhá càvihi-ndo xii-í.

¹⁶ Te nàha-ndo sã ñá túú ní dándihú-í iní-ndó nã taxi-ndo cùu xii-í, dico dava-ndo càchí-ndó sã ío váha ní xito-í nàcuáa ní quide-í nàcuáa

ní dándàhú ñàhà-í xii-ndo. ¹⁷ Te chí càháⁿ te núu yúhú ní dándàhú ñàhà-í xii-ndo ndìhi cue téé ní tendaha-í ní quixi coto ñaha xii-ndo. ¹⁸ Te ní cáháⁿ ndàhú-í núú tē Títú ndìhi núú ìngá tucu téé ndècu ndìhi-o ichi Xítóhó Jesucristú ní quixi coto ñaha-güedé xii-ndo. Te nchòhó cùtnùní iní-ndó sã tē Títú ñá túú ní dándàhú ñàhà-dé xii-ndo, te ducaⁿ chí ìⁿ-ni sàni iní-ndí te ìⁿ-ni quide-ndí.

¹⁹ Te cudana te sàni iní-ndó sã sà dúhá cáháⁿ-ndí te tàunihnu-ndí mée-ndí, dico ñá díú dùcaⁿ quee-xi tnúhu cáháⁿ-ndí, chí cáháⁿ-ndí nàcuáa tàú-xi cáháⁿ-ndí chí ndècu ndìhi-ndí Xítóhó Jesucristú, te mee Yã Ndiòxí náhá ndáá-gá nàcuáa ndùu tnúhu cáháⁿ-ndí, te nchaa sá cáháⁿ-ndí cúú-xí cuendá nchòhó cue ñáyiu ío cùu iní-ndí, te cáháⁿ-ndí nàcuáa cundecu váha-ndo ichi Xítóhó Jesucristú. ²⁰ Te ío sàni iní-í cuendá-ndó chí na cuáháⁿ te òré quixi-í quixi coto ñaha-í xii-ndo, te ñá túú quide-ndo nacuáa cuu váha iní-í, te sá dúcáⁿ te yúhú cáháⁿ-í nàcuáa vá cúú vaha iní-ndó, te ducaⁿ ío sàni iní-í cuendá-ndó chí na cuáháⁿ òré quexiò-í te nàá-ndó, àdi ndecu-ndo ichi cuédú iní, àdi cudééⁿ núú tnáhá-ndó, àdi ñá túú cùu ìⁿnuu-ndo ndecu-ndo, àdi cáháⁿ cuèhé-ndó cuendá tnàha ñáyiu-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo. ²¹ Te ío sàni iní-í cuendá-ndó chí na cuáháⁿ òré quixi-í, te Yã Ndiòxí cada-gá te cucahaⁿ núú-í sá cuendá-ndó, te ío ndíhú iní-í cuendá-ndó te núu vátá dáñá-gã-ndó nchaa sá cuèhé sá dúhá nì ngüita-ndo quide-ndo ndéé sanduu, te vài-ndo ní ngüita-ndo dùcaⁿ quide-ndo, chí ndècu-ndo ichi díí iní te náandi-gá nchaa sá cuèhé sá dúhá quide-ndo, te ducaⁿ ío ndíhú iní-í te núu vátá dáñá-gã-ndó nchaa xiáⁿ.

13

Tnúhu ndéé núú nì ndìhi-ná

¹ Te sá quixi-í vitna núú ndécú-ndó cùu-xi xito cuu úní sá quixi còto ñaha-í xii-ndo. Te càhí tnúhu-í xii-ndo sã òré cundáá cuéchi-ndo te canehe núú úú àdi úní ñáyiu cáháⁿ ndáá nàcuáa ndùu cuéchi-ndo. ² Te yúhú sa ní cáháⁿ-í dóho-ndo cùtnàhá ní quixi-í ní quixi coto ñaha-í xii-ndo xito cuu úú, te ñu-ni ducaⁿ cáháⁿ tucu-í dóho-ndo vitna vátá quixi tucu-gá-í quixi coto ñaha-í xii-ndo. Te nchòhó ñáyiu ní cunduu nì ngüita quide nchaa sá cuèhé sá dúhá, tenáá ñàhà-í xii-ndo òré quexiò-í te núu vátá dáñá-gã-ndó nchaa sá cuèhé sá dúhá quide-ndo te tnàhá nchaa dava-gá-ndó tènáá ñàhà-í xii-ndo. ³ Te nchòhó cuini-ndó quini-ndó núu ndáá sá quidè-í núú Xítóhó Jesucristú cáháⁿ-í yuhu-gá, dico dàvá-áⁿ cutnùní ndáá iní-ndó. Te Xítóhó Jesucristú quidè-gã nàcuáa cutnùní iní-ndó sã ío cahnu cuu-gá te ñá túú quide-gá dàtná quidè ìⁿ ñáyiu ñá túú nìhí ndéé cundecu. ⁴ Te Xítóhó Jesucristú ní ndoho-gá dàtná ìⁿ ñáyiu ñá túú nìhí ndéé cundecu, chí ní sahani ñaha-güedé xii-gá núú cùrúxí dico mee Yã Ndiòxí ní quide-gá ní nìhí ndéé Xítóhó Jesucristú ní ndoto-gá ndécú-gã vitna, te tnàhá nchúhú tucu ducaⁿ yaha-ndí ñá túú nìhí ndéé-ndí cundecu-ndí, dico mee Yã Ndiòxí chindèe ñaha-gá xii-ndí nìhí ndéé-ndí ndécú-ndí cuendá sá ndécú ndìhi-ndí Xítóhó Jesucristú, te xiáⁿ núu ndàcu-ndí quidè-ndí nàcuáa tàú-xi cunduu sá cúú-xí-ndó.

⁵ Te chí cáda cuendá váha te núu ndisa sá sàndáá iní-ndó tnúhu Xítóhó Jesucristú, te núu ndáá sá ndécú-ndó ichi-gá te cùtnùní iní-ndó sã ndécú-ndó ndìhi-gá. ⁶ Te cuini-ndí sá nchòhó cutnùní ndáá iní-ndó sã nchúhú ndécú ndìhi ndisa-ndí Xítóhó Jesucristú. ⁷ Te nchúhú cáháⁿ ndìhi-ndí Yã Ndiòxí cuendá-ndó cuendá sá vã cáda-ndó nì ìⁿ sá cuèhé sá dúhá, te vá cání iní-ndó sã sá dúcáⁿ cáháⁿ ndìhi-ndí-gá cuendá-ndó, te cuini-ndí sá nchòhó cutnùní iní-ndó sã nchúhú ío ndècu yíñuhu-ndí núú-gã, te ñàhá chí cáháⁿ ndìhi-ndí-gá

cuendá-ndó chi cuení-ndí sá nchòhó cada váha-ndo cùndecu-ndo cuéi sàni iní-ndó sá nchùhú cúú-ndí cue téé ñá túú ndècu yíñuhu núú-gá.

⁸ Te nchúhú mee-ni càháⁿ váha-ndí cuendá tnúhu ndáá tnúhu Yá Ndiõxí, te ñá túú càháⁿ-ndí ìⁿ tnúhu sá ñà túú tàú-xi cáháⁿ-ndí cuendá tnúhu-áⁿ. ⁹ Te cùdíí iní-ndí sá ñà túú-gá xíní ñùhu-xi cada-ndí nàcuáa níhí ndéé-ndí tenáá ñáhá-ndí xii-ndo cáháⁿ-ndí dóho-ndo, chi nchòhó sa ní níhí ndéé-ndó ndècu-ndo ichi-gá. Te nchúhú càháⁿ ndihí-ndí Yá Ndiõxí cuendá-ndó cuendá sá nchòhó cundáá-ndó cùndecu-ndo ñá túú-gá ná cumání-ndó núú-gá. ¹⁰ Te xiáⁿ nùu duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndihí ñaha-í xii-ndo, cuendá sá òré ná cùndecu ndihí ñaha-í xii-ndo te vá ïo níhí cáháⁿ-í dóho-ndo nàcuáa ndùu tnúhu ndee iní ní taxi Xítohó Jesucristú ndécú ndihí-í, chi ní taxi-gá tnúhu ndee iní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cánúichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáiyu ndècu ndihí-ndí ichi Xítohó Jesucristú ío quíde ndee iní ñáhá-ndí xii-ndo, te ío chí ndúcú nàcuáa cada-ndo cundáá-ndó núú Yá Ndiõxí cuendá sá ñá túú tnáhí-gá ná cumání-ndó núú-gá, te ndee ndèe cada iní-ndó cùndecu-ndo, te chí cúú ìⁿnuu cundecu ndihí tnaha, te ducaⁿ te Yá Ndiõxí cundecu ndihí ñaha-gá xii-ndo chí ío cùu iní ñáhá-gá xii-o, te díu-gá quíde-gá ío váha cùu iní-ó ndècu-o.

¹² Te ndihí tnúhu yíñuhu chí cáda ndèe iní tnáhá. ¹³ Te nchaa ñáiyu cùu cuendá Yá Ndiõxí ndécú ìha quíde ndee iní ñáhá-yu xii-ndo.

¹⁴ Te xicáⁿ táhú-ndí núú Xítohó Jesucristú sá ïo na chindee chítúu ñaha-gá xii-ndo. Te mee Yá Ndiõxí ná cáda-gá nàcuáa cutnùní iní-ndó sá ïo cùu iní ñáhá-gá xii-ndo, te Espíritú-gá cundee cùu cahnu iní-ndó cùndecu-ndo. Te ducaⁿ na cùnduu. Te ío chí cáda ndèe iní-ná vitna.

TUTÚ NÍ CADÚHA TÉ PÄBLÚ QUIHÍⁿ NDAHA ÑÁYIU DISTRÌTÚ GÁLACIÁ

*Té Päblú cádūha-dé tutú quihíⁿ
ndaha nchaa ñáyiú sàndáá iní ñáhá xii
Xítohó Jesucristú ndécú distritú Gàlaciá*

¹ Te yúhú té Päblú ní tendaha ñaha Xítohó Jesucristú, ndihí Dútú Ndiöxí véxi-í cãháⁿ-í tnúhu-gá. Te ðiu Yá Ndiöxí ní dándótó-gã Xítohó Jesucristú Yaá ní xihí ní cùu. Te cãchí tnúhu-í xii-ndo sã ñà díú ñáyiú ñuyúú-a ni tendaha ñaha xii-í véxi-í, te ni Yá Ndiöxí te ni Xítohó Jesucristú ñá túú ní xãhaⁿ-gã xii ñá ñáyiú quixí-yu cachí tnúhu-yu nãcuáa cada-í. ² Te yúhú té Päblú cádūha-í tutú-a ndihí nchaa dava-gã ñáyiú ndècu ichi Yá Ndiöxí ndécú ndihí-í iha cuèndá daquixi-í ndaha nchòhó ñáyiú sàndáá iní ñáhá xii Xítohó Jesucristú ndécú distritú Gàlaciá. ³ Te xicãⁿ táhù-í núú Dútú Ndiöxí, ndihí núú Xítohó Jesucristú sã ïo na chindee chitúu ñaha-gã xii-ndo, te ducaⁿ ndì nduú-gá ná cádá te ïo váha cuu iní-ndó cùndecu-ndo. ⁴ Te Xítohó Jesucristú ní xihí-gá sã cuèndá nchaa cuèchi nchoo cuè ñáyiú ndècu ñuyúú-a. Te ducaⁿ ñi quide-gá, chi cuiní-gá sã vã cùndècu-o ichi cuehé ichi duha. Te ducaⁿ ñi cuu, chi Dútú Ndiöxí ducaⁿ ñi cuiní-gá cunduu. ⁵ Te ïo chí ná ndàcãⁿ táhù-ó núú Yá Ndiöxí cuèndá sã ïo càhnu cuu-gá, te ðiu-ni ducaⁿ càda-o ni caa ni quihíⁿ! Te ducaⁿ na cunduu.

*Mee-ni tnúhu Xítohó Jesucristú
cúú-xí tnúhu sã cãháⁿ nãcuáa naníhí
tãhù-ó*

⁶ Te ïo cùñúhu-í cúú chi ïo ndihí ní dáñá-ndó ichi Yá Ndiöxí. Te Yaá-áⁿ ñi cãháⁿ ñáhã-gã xii-ndo, chi Xítohó Jesucristú ïo ní cundãhú iní ñáhã-gã ní quide váha ñaha-gã xii-ndo, te vitna dàcuaha tucu-ndo ingá tnúhu, te cãchí-ndó sã xãⁿ dàcãcu nihnu

ñaha-xi xii-ndo núú ùhú núú ndãhú. ⁷ Dico ñáhã, chi ñá túú-gã tnúhu sã dácãcu nihnu ñaha xii-o núú ùhú núú ndãhú. Te ðicó-ni sã ïo ñáyiú véxi dàticã nuu ñahã-yu xii-ndo dãnehé ñáhã-yu tnúhu sã dãcuíta nihnu ñaha xii-ndo, chi tnúhu-áⁿ ñà túú cùu-xi tnúhu Xítohó Jesucristú. ⁸ Te yúhú cãháⁿ-í tnúhu Xítohó Jesucristú, dico núú ïo ñáyiú véxi dãnehé ñáhã xii-ndo ingá tnúhu sã ñà túú ní dãnehé ñáhã-í xii-ndo, te nchòhó cachí-ndó sã ñáyiú-áⁿ nachãhu-yu núú Yá Ndiöxí sã dúcãⁿ quidé-yu. Te cuèi yúhú, te núú na dàma-í tnúhu danèhé ñáhã-í xii-ndo, te ðiu-ni ducaⁿ cãháⁿ-ndó sã nãchãhu-í núú-gã te núú ducaⁿ na càda-í. Àdi te núú ñiⁿ espíritú xínú cuèchi núú-gã véxi-xi cãháⁿ-xi ingá tnúhu sã ñà túú ní dãnehé ñáhã-í xii-ndo nãcuáa naníhí tãhù-ndó ñá, te ðiu-ni ducaⁿ cãháⁿ-ndó sã nãchãhu-xi núú Yá Ndiöxí te núú ducaⁿ na càda-xi. ⁹ Te ðiu-ni duha sa ní dãnehé ñáhã-í xii-ndo sã núu véxi ñáyiú dãnehé ñáhã ingá tnúhu sã ñà túú ní dãnehé ñáhã-í xii-ndo nãcuáa naníhí tãhù-ndó ñá, te cachí-ndó sã ñáyiú-áⁿ nachãhu-yu núú Yá Ndiöxí sã dúcãⁿ quidé-yu, duha ní cachí-í xii-ndo.

¹⁰ Te duha ndùu tnúhu cãháⁿ-í chi nchòhó sa xini-ndó sã yúhú cuiní-í sã Yá Ndiöxí cãháⁿ-gã sã quidé vãha-í ndécù-í, te ñá díú sã ñáyiú ñuyúú-a cachí-yu sã quidé vãha-í, àdi sã ïo cùdíí ñiⁿ-yu nchaa nãcuáa quide-í ndécù-í. Te núú na càni iní-í cudùu-í núú ñáyiú ñuyúú-a, te ñá túú cùu-í téé xínu cuechi núú Xítohó Jesucristú te núú ducaⁿ na càda-í.

*Nãcuáa ní cuu ní ngüta té Päblú
cãháⁿ-dé tnúhu Yá Ndiöxí*

¹¹⁻¹² Te nchòhó ñáyiú ndècu ndihí-í ichi Xítohó Jesucristú cãchí tnúhu-í xii-ndo sã tnúhu sã dãnehé ñáhã-í xii-ndo nãcuáa naníhí tãhù-ndó cùu-xi tnúhu sã ñi cachí tnúhu mee Xítohó Jesucristú xii-í, te ñá díú ñiⁿ ñáyiú ñuyúú-a ni càhu iní-yu tnúhu-áⁿ, àdi danèhé ñáhã-yu xii-í, chi mee Xítohó Jesucristú ní dãnehé ñáhã-gã.

¹³ Te nchòhó sa nihí-ndó tnúhu nãcuáa ní xóo cada-í cùtnãhá nchicúⁿ

nihnu-í nchaa nàcuáa dàcuaha ñáyiú cùu ndi mee-í ñáyiú isràèl ní cùu. Te dàvá-áⁿ ïo ní xóo cuu úhú iní-í nchaa ñáyiú ndècu ichi Yá Ndiöxí, te nándi sá ñi xóo cada-í-yu, te ní cuini-í danàa-í-yu ni cùu. ¹⁴ Te yúhú ío-gá ní xóo quene cáva-í ní xóo dacuàha-í nchaa sá dácuaaha ñáyiú cùu ndi mee-í dácúúxí ñáyiú ñⁿ-ni cuià-í ndihí-yu ni cùu, te ío-gá ní xóo cuini-í cada ndáá-í canchicúⁿ nihnu-í nchaa nàcuáa ní dánèhé ñáhá cuè ñani tnáhà-í ní xíndecu ndéé sanaha ni cùu. ¹⁵ Te ndéé cùtnàhá vátá cécú-gã-í Yá Ndiöxí sa nèhe váha ñaha-gã xii-í cuendá sá càháⁿ-í tnúhu-gá, núu xiáⁿ ní cáháⁿ ñáhá-gã xii-í quidè-í chiúⁿ-gá vitna, te sá dúcáⁿ ñi quide-gá te ío váha ní quide ñaha-gã xii-í. ¹⁶ Te òré ní cáháⁿ ñáhá Yá Ndiöxí xii-í te ní cachí tnúhu-gá cuendá Déhe-gá Xítohó Jesucristú. Te ducaⁿ ñi quide Yá Ndiöxí cuendá sá cuini-gá sá cùñaha-í xii ñáyiú ñá túú cùu ñáyiú isràèl cuendá Yaá cúú Déhe-gá. Te cùtnàhá ní cáháⁿ ñáhá Yá Ndiöxí xii-í, te vá yóo ñⁿ dii núu-xi ni ndùcu tnúhu-í nàcuáa cada-í. ¹⁷ Te ni ñà túú ní sáháⁿ-í ñuú Jerusàlén nducu tnúhu-í núu cuè téé díhna nuu ñi tendaha Xítohó Jesucristú càháⁿ tnúhu-gá núu nása cada-í, chi ndihí-ni ní sáháⁿ-í distritú Arabiá ní xíndecu tnaa-í te dàtnùni cuánuhú tucu-í ñuú Dàmascú. ¹⁸ Te núú ùni cuiá sã ñi cáháⁿ ñáhá Yá Ndiöxí xii-í, te ní sáháⁿ tucu-í ñuú Jerusàlén ní cáháⁿ ndihí-í té Pèlú, te ní xíndecu-í ndihí-dé sáhúⁿ nduu. ¹⁹ Te tnàhá té Jàcobó ñani Xítohó Jesucristú ní cáháⁿ ndihí-í. Te ñá túú ní xini-í dava-gá cue téé ní tendaha Xítohó Jesucristú càháⁿ tnúhu-gá. ²⁰ Te Yá Ndiöxí ndéhé ndiⁿ ndehe caxi-gá sá ncháá tnúhu tèe-í núú tùtú-a sá cúú-xi-ndó cùu-xi ñⁿ sá ndáá.

²¹ Te sátá ñi sáháⁿ-í ñuú Jerusàlén, te dàtnùni ní sáháⁿ-í distritú Siriá, ndihí distritú Ciliciá. ²² Te nchaa ñáyiú xíndecu ichi Xítohó Jesucristú ndécú distritú Jùdeá ñá túú xini ñáhã-yu xii-í ní cùu. ²³ Dico ní xóo ñihí-yu tnúhu nchaa nàcuáa ní xóo cada-í, te ní cachí-yu: “Téé cùu úhú iní ñáhá xii nchaa nchoo ñáyiú

ndècu ichi Xítohó Jesucristú càháⁿ-dé tnúhu-gá núú ñáyiú cuendá quíndáá iní ñáhã-yu xii-gá, te diu-dé nándi sá quidé ñàha-dé, te cuini-dé danàa ñaha-dé cuendá sá vã cóo-gã ñáyiú quíndáá iní ñáhá xii-gá ní cùu”, duha ní cachí-yu cuendá-í. ²⁴ Te ní ngúita-yu ní cachí-yu sá ïo càhnu cuu Yá Ndiöxí cuendá sá ñà túú-gã quidè-í dàtná ní xóo cada-í.

2

Té Pãblú ní ñihí tnáhã-dé ndihí dava-gá cue téé càháⁿ tnúhu Yá Ndiöxí

¹ Te ní nútnahá úxícúmi cuiá sã ñi sáháⁿ-í ñuú Jerusàlén ní cáháⁿ ndihí-í té Pèlú, te dàtnùni ndécã-í té Bèé ní sáháⁿ, te tnàhá té Títú ní sáháⁿ ndihí-ndí-dé. ² Te ní sáháⁿ-í chi mee Yá Ndiöxí ní cachí-gá sá quihíⁿ-í. Te yacáⁿ ní tacá mee-ni cuè téé cùnuu. Te ní xáhaⁿ-í xii-güedé nàcuáa ndùu tnúhu dānehé-í ñáyiú ñá túú cùu ñáyiú isràèl cuendá naníhí tahú-yu. Te ducaⁿ ñi quide-í cuendá cuini-í quini-güedé nàcuáa ndùu chiuⁿ quide-í, chi nacuaháⁿ cachí-güedé sá ñà túú nandíhi-xi. ³ Te té Títú téé ndècu ndihí-í chi ñá diú téé isràèl cúú-dé, dico ñá túú ní quide yica-güedé cuáha-güedé señá ñi-dé. ⁴ Te ñáyiú càhí sá ndécú ichi Xítohó Jesucristú te ñá ndáá sá ndécú-yu ichi-gá, ñáyiú-áⁿ ñi chitnahá ñáhã-yu xii-ndí cuendá cuini-yu quini-yu nása quide-ndí ndécú-ndí ichi Xítohó Jesucristú. Te ducaⁿ ñi quidé-yu cuendá sá nchúhú sa ní cácu nihnu-ndí ñá túú-gã quidé-ndí nchaa nàcuáa ní cáháⁿ ndí Moisés. Te cuini-yu sá núcuíta saa tùcu-ndí cada-ndí nchaa nàcuáa ní cáháⁿ ndí nucúndecu-ndí dàtná ní xíndecu-ndí cùtnàhá vátá cácu nihnu-gá-ndí núú tnúhu-áⁿ ni cùu. ⁵ Te nchúhú ñá túú tnàhí ni dàña-ndí méé-ndí dandàhú ñáhã-yu xii-ndí. Te ducaⁿ ñi quide-ndí, chi cuini-ndí sá ñà túú ñágá tnúhu dácánuu ndihí tnúhu sá càháⁿ nàcuáa naníhí tahú-ó ndècu ndihí-ndo.

6 Te ni ñⁿ tnúhu sá vátá quini-gá-í ñá túú ní cächí tnúhu cue té cùnūu núú ñáyiū cada-í. Dico yúhú chi ñá túú ní quide cuendá-í nūu cùnūu-güedé àdi ñá túú cùnūu-güedé, chi núú Yá Ndiöxí ñⁿ-ni cùu-o nchaa-o. 7 Te ní cutnùní iní-güedé sá Yá Ndiöxí ní cachí-gá xii-í sá cäháⁿ-í tnúhu-gá núú ñáyiū ñá túú cùu ñáyiū isràél dätná ní quide-gá té Pèlú ní xáhaⁿ-gä cäháⁿ-dé tnúhu-gá núú ñáyiū isràél. 8 Te ducaⁿ ñⁿ cutnùní iní-güedé, chi diu-ni Yá Ndiöxí Yaá chindèe ñaha xii té Pèlú cäháⁿ-dé tnúhu-gá núú ñáyiū isràél, diu-ni Yaá-áⁿ chindèe ñaha-gá xii-í cäháⁿ-í tnúhu-gá núú ñáyiū ñá túú cùu ñáyiū isràél.

9 Te té Jàcobó, ndihi té Pèlú, ndihi té Juàá, cue téé ío cùnūu-gá ní cutnùní iní-güedé sá Yá Ndiöxí ío chindèe ñaha-gá xii-í quidè-í chiūⁿ-gá. Te ío váha ní cäháⁿ ndihi ñaha-güedé xii-í, ndihi té Bèé, te ní cuu ñⁿnuu-ndí sá nchúhú quíhíⁿ-ndí cäháⁿ-ndí tnúhu Yá Ndiöxí núú nchàa ñáyiū ñá túú cùu ñáyiū isràél, te mee-güedé cäháⁿ-güedé tnúhu-gá núú ñáyiū isràél. 10 Te ñⁿ-ni tnúhu ní cäháⁿ-güedé dóho-ndí te ní cachí-güedé xii-ndí sá chindèe-ndí cue ñáyiū ndàhú, te sa ducaⁿ tnàhí sàni iní-ndí cada-ndí.

Té Păblú cäháⁿ-dé dóho té Pèlú ñuú Antiòquiá

11 Te cùtnàhá ní sáháⁿ té Pèlú ñuú Antiòquiá yàcáⁿ ní cäháⁿ-í dóho-dé, chi quide-dé ñⁿ sá ñà túú tàú-dé cada-dé ní cùu. 12 Te quide váha-dé ní cùu chi xèxi-dé ndihi ñáyiū ñá túú cùu ñáyiū isràél, dico òré ní sáá ñⁿ úú ñáyiū cùndihi té Jàcobó, te òré-áⁿ ñà túú-gä ní cuini-dé caxi-dé ndihi ñáyiū-áⁿ. Te ducaⁿ ñⁿ quide-dé chi ní yúhú-dé cue ñáyiū nchícúⁿ nihnu quide nchaa nacuaá ní cäháⁿ ndí Moisés sá vā cäháⁿ váha-yu cuendá-dé. 13 Te tnàhá dava-gá ñáyiū isràél xindècu ichi Yá Ndiöxí ñá túú quide váha-yu, chi quide-yu dätná quidé tē Pèlú ní cùu, te ndéé tnàhá té Bèé ní ngüita-dé ducaⁿ quide-dé ní cùu. 14 Te òré ní xiní-í sá ñà túú quide-güedé ndihí-yu nàcuáa

cäháⁿ tnúhu Yá Ndiöxí, te núú nchàa ñáyiū ndècu ichi Yá Ndiöxí ní xáhaⁿ-í xii té Pèlú: “Yòhó cúu-n tēe isràél, te ñá túú quide-n nchaa nacuaá quide ñáyiū isràél, chi quide-ni-n dätná quidé nchàa ñáyiū ñá túú cùu ñáyiū isràél. Te núú ducaⁿ quide-n, ¿te ná cuendá dänèhé-n ñáyiū ñá túú cùu ñáyiū isràél sá cädä-yu nchaa nàcuáa quide ñáyiū isràél?”, duha ní xáhaⁿ-í xii té Pèlú.

Ñⁿ-ni nänhí tàhú-ó ndihí ñáyiū isràél nūu na quindáá iní-ó Xitohó Jesucristú ndihí-yu

15 Te yúhú ndihi té Pèlú cúu-ndí ñaní tnàhá ñáyiū isràél, te ñá túú ndècu-ndí ichi cuèhé ichi duha dätná ndécú nchàa ñáyiū ñá túú cùu ñáyiū isràél. 16 Te xiní-ó sá vā cùndècu-gá cuèchi-o nūú Yá Ndiöxí te núu na quindáá iní-ó Xitohó Jesucristú, te ñá díú sá cänchícúⁿ nihnu-o càda-o nchaa nacuaá ní cäháⁿ ndí Moisés. Te tnàhá dava nchúhú ñáyiū isràél sändáá iní-ndí Xitohó Jesucristú, te xíáⁿ cùtnùní iní-ndí sá ñà túú-gä cuèchi-ndí ndécú nūú-gä, dico ñá díú sá ñⁿ cänchícúⁿ nihnu-ndí ní quide-ndí nàcuáa ní cäháⁿ ndí Moisés, chi cuendá sá sändáá iní-ndí Xitohó Jesucristú. Te vá yōo ñⁿ cachí-ó sá ñà túú ndècu cuèchi-xi núú Yá Ndiöxí cuendá sá nchícúⁿ nihnú-yu nchaa nàcuáa ní cäháⁿ ndí Moisés.

17 Te núu cuini-ó sá vā cùndècu cuèchi-o nūú Yá Ndiöxí cuendá sá sändáá iní-ó Xitohó Jesucristú, te xíáⁿ cùtnùní iní-ó sá ñà túú quide váha-o. ¿Te vá cúu tnàhí cani iní-ó sá Xitohó Jesucristú dänèhé ñàhá-gä xii-o sá vā cädä váha-o cùndècu-o! 18 Te yúhú cächí-í sá vā cänchícúⁿ nihnu-gá-ó nchàa nacuaá ní cäháⁿ ndí Moisés, dico núu vitna cächí-í sá xiní ñūhu-xi càda-o nchaa nacuaá ní cäháⁿ ndí ñà, te ñá túú quide váha-í núú Yá Ndiöxí te núu ducaⁿ na càda-í. 19 Te yúhú duuⁿ duuⁿ ní cutnùní iní-í sá vā ndàcù-í cada-í nchaa nàcuáa ní cäháⁿ ndí Moisés nūu xíáⁿ ní dänä-í ñá túú-gä nchícúⁿ nihnu-í nchaa nàcuáa

ní cáháⁿ ndíi cuendá sá cuení-í cundecu-í sá cúú-xí Yá Ndiöxí. ²⁰ Te Xítoho Jesucristú ní xihí-gá cuendá-í, dico dàtná tnúhu sá tnàhá-í ní xihí ndihí-gá, chi ñá cúú-gá cada-í nchaa nàcuáa sàni iní mée-í, chi Xítoho Jesucristú-nă ndécú ndihí ñaha-gá xii-í táxí tnùní ñáhá-gă. Te vitna ndècu-í ñuyíú-a, te ío sándáá iní-í Xítoho Jesucristú Déhe Yá Ndiöxí, te chindee ñaha-gá xii-í. Te ñu-ni Xítoho Jesucristú ío cùu iní ñáhá-gă xii-í nùu ní xihí-gá núú cùrúxí sá cuendá-í. ²¹ Te vitna ñá túú dàquee tíhù-í sá vâha ní quide ñaha Yá Ndiöxí xii-í, chi núu ní ndàcu-o vá cùndècu cuéchi-o nùú Yá Ndiöxí cuendá sá nchícúⁿ nihnu-o quide-o nchaa nàcuáa ní cáháⁿ ndíi Moisés ní cùu ña, te àúⁿ nă cuu ní xihí Xítoho Jesucristú ní cùu te núu ducaⁿ.

3

Vá dáñá ndèé-ó quèndáá iní-ó tnúhu Xítoho Jesucristú

¹ Te nchòhó ñáyiú distritú Gàlaciá, ñáyiú sa xĩndecu ichi Xítoho Jesucristú, ¿ná cuendá ío ñí iní-ndó ñă cuení-ndó tnè-ndo nchaa tnúhu càháⁿ-gá?, ¿te yoo ní dáđáhu ndodo iní ñáhá xii-ndo núu ducaⁿ quide-ndo? Te nàha-ndo sá ío váha ní dánèhé ñáhá-ndí xii-ndo nàcuáa ní cuu ní xihí Xítoho Jesucristú. ² Te vitna cáháⁿ-ndó nùu sá nchícúⁿ nihnu-ndo nchaa nàcuáa ní cáháⁿ ndíi Moisés ní níhí-ndó Espíritú Yá Ndiöxí ndécú ndihí-ndo, àdi sá ní sándáá iní-ndó tnúhu Xítoho Jesucristú sá ní dánèhé ñáhá-ndí xii-ndo ní níhí-ndó Espíritú-gá ndécú ndihí-ndo. ³ Te nchòhó ío ñí ñíquí-ndó chi Espíritú Yá Ndiöxí tá quide váha ñaha-xi xii-ndo cuáháⁿ ní cùu. ¿Te năa vitna mee-nă-ndó cuení-ndó càda-ndo nàcuáa ta quide ñaha Espíritú-gá cuáháⁿ xii-ndo ní cùu-án? ⁴ Te sàni ñí sàni úú iní-í cuendá-ndó sá àúⁿ nă cuu nándí yáha-ndo ndècu-ndo ichi Yá Ndiöxí. ⁵ Te xini-ndó sá Yá Ndiöxí ní taxi-gá Espíritú-gá ní ngúndecu ndihí-ndo, te ní quide-gá sá vâ yôo tnàhí ndàcu cada núú-ndó ní xini-ndó. Te ducaⁿ

ní quide-gá, chi ní sándáá iní-ndó-gă, dico ñá ñíu cuendá nchaa nàcuáa ní cachí ndíi Moisés cada ñáyiú ducaⁿ ní quide-gá.

⁶ Te ndíi Àbrahám ducaⁿ ío ní sándáá iní ndíi Yá Ndiöxí, núu xíáⁿ ní cachí-gá sá ní cudíu ndíi núú-gă sá dúcáⁿ ní quide ndíi. ⁷ Te càchí tnúhu ndáá-í xii-ndo sá ncháá ñáyiú sándáá iní ñáhá xii Yá Ndiöxí dàtná ní sándáá iní ñáhá ndíi Àbrahám xii-gá, ñáyiú-án ñí-ni cùú-yu ndihí ndíi núú-gă. ⁸ Te núú tütú Yá Ndiöxí ní ngódó tnùní tnúhu váha, tnúhu sá ní xáhaⁿ Yá Ndiöxí xii ndíi Àbrahám, te duha ní xáhaⁿ-gă xii ndíi: “Nchaa ñáyiú ñihí ñuyíú cada váha-í-yu sá cuendá-n”, duha ní xáhaⁿ-gă xii ndíi. Te sá dúcáⁿ ní ngódó tnùní núú tütú Yá Ndiöxí ndéé dàvá-án, te xíáⁿ cùtnùní sá sá nduu, te cue ñáyiú ñá túú cùu ñáyiú isràél vá cùndècu-gá cuéchi-yu núú-gă te núu na quèndáá iní ñáhá-yu xii-gá. ⁹ Te xíáⁿ nùu nchaa ñáyiú sándáá iní ñáhá xii Yá Ndiöxí cada váha ñaha-gă xii-yu dàtná ní quide váha-gá ndíi Àbrahám, chi ndíi-án ducaⁿ ní sándáá iní ñáhá ndíi xii-gá.

¹⁰ Te nchaa ñáyiú cuení cada nchaa nàcuáa ní cáháⁿ ndíi Moisés cuendá sá cuení-yu sá vâ cùndècu-gá cuéchi-yu núú Yá Ndiöxí, ñáyiú-án ñá ñíhnu ñaha-gá xii-yu, chi vá ndácú-yu cadá-yu nàcuáa sàni iní-yu, te ducaⁿ càda-gá chi quèe ndáá-xi nàcuáa càháⁿ-xi núú tütú-gá núú càchí-xi sá ncháá ñáyiú ñá túú quide nchaandi túhú nàcuáa ní cáháⁿ ndíi Moisés te ñá ñíhnu ñaha-gá xii-yu. ¹¹ Te núu na càchícúⁿ nihnu-ni-o càda-o nàcuáa ní cáháⁿ ndíi Moisés, te ñá túú vèdana chindee ñaha-xi xii-o nàcuáa vá cùndècu-gá cuéchi-o nùú Yá Ndiöxí. Te ndáá chi núú tütú-gá càchí-xi sá ncháá ñáyiú sándáá iní ñáhá xii-gá, ñáyiú ñá túú-gă cuéchi-xi ndècu ío váha ndécú-yu núú-gă. ¹² Te núu dícó ío ñáyiú quide nchaandi túhú nàcuáa ní cáháⁿ ndíi Moisés ñá, te ñá túú xini ñíhnu-xi quèndáá iní-yu tnúhu Xítoho Jesucristú, chi núú tütú Yá Ndiöxí càchí-xi sá nùu dícó ío ñáyiú

ndacu cada nchaa nàcuáa ní cáháⁿ ndíi Moisés ñá, te cundecu váha-yu núú Yá Ndiöxí.

¹³ Te tnúhu ní chídó tnùní ndíi Moisés càchí-xi sá ìo ndècu cuèchi-o núú Yá Ndiöxí cuendá sá ñá ndácú-ó càda-o nchaa nacuáa ní cáháⁿ ndíi, te cuendá xiáⁿ tá dàña nihnu ñaha-gá xii-o cuáháⁿ. Dico Xítoho Jesucristú ní xido-gá nchaa cuèchi-o cuendá sá vǎ dáña nihnu ñaha-gá Yá Ndiöxí xii-o. Te càchí-xi núú tütú Yá Ndiöxí: “¹³ Tée na càta caa-güedé ¹³ yutnu, te tée-áⁿ cúú-dé tée dàña nihnu ñaha Yá Ndiöxí”, duha càchí-xi núú tütú-gá.

¹⁴ Te ducaⁿ ñi yáha Xítoho Jesucristú, chi cuíní Yá Ndiöxí sá ndùu táhú nchaa ñáyiu ñá túú cùu ñáyiu isràél cundecu váha-yu dàtná ní nduu táhú ndíi Àbrahám ndécú vǎha ndíi. Te ducaⁿ ñi yáha-gá cuendá nchaa nchoo ñáyiu sàndáá iní ñáhá xii-gá ngúndecu ndíi-o Espíritú Yá Ndiöxí sá ñi cachí méé-gǎ taxi-gá.

Nàcuáa ní cachí Yá Ndiöxí cada-gá

¹⁵ Te nchòhó cue ñáyiu ndècu ndíi-í ichi Yá Ndiöxí na càchí tnúhu-í xii-ndo nàcuáa quide cue ñáyiu ñuyíú-a cuendá tecú tnùní-gá-ndó nàcuáa quide Yá Ndiöxí. Chi ñáyiu-áⁿ òré cuíní-yu cadá-yu ¹⁵ sá cadǎ-yu, te díhna-gá ndátnúhu-yu te òré cúú ¹⁵ ñnuú-yu, te sáha fírmá-yu ¹⁵ ñi tutú te tutú-áⁿ vǎ yóo ¹⁵ ñi ndacu cáháⁿ sá vǎ nándíi-gǎ-xi, te ñi vǎ yóo-gá ndacu nágá tnúhu chido tnùní núú-xi.

¹⁶ Te ducaⁿ ñi quide Yá Ndiöxí ndíi ndíi Àbrahám, chi ní xáhaⁿ-gǎ xii ndíi nàcuáa cada-gá, te tnúhu-áⁿ cúú-xi cuendá méé ndíi ndíi cuendá ¹⁶ ñi ñaní tnáhá ndíi cundecu ñuyíú-a ndéé cuèé-gá. Te núú tütú-gá càchí-xi sá tnúhu-áⁿ cúú-xi cuendá ¹⁶ ñi ñaní tnáhá ndíi te ñá díú cuendá nchaá-yu. Te ñaní tnáhá ndíi tée cùu cuendá tnúhu-áⁿ cúú Xítoho Jesucristú. ¹⁷ Te na càchí tnúhu-í xii-ndo sǎ Yá Ndiöxí ní quide ndáá duuⁿ-gá ndíi ndíi Àbrahám nàcuáa cada-gá. Te sa ní cuu cúmí cièndú ócò úxí cuíá sǎ dúcáⁿ ñi xáhaⁿ Yá Ndiöxí xii ndíi Àbrahám, te dàtnùní ní xáhaⁿ-gǎ xii ndíi Moisés chido tnùní ndíi nàcuáa cada ñáyiu,

te nchaa tnúhu ní chídó tnùní ndíi Moisés ñá túú dàquee tǐhú-xi tnúhu sá ñi xáhaⁿ Yá Ndiöxí xii ndíi Àbrahám nàcuáa cada-gá. ¹⁸ Te núu dícó cuendá nchaa tnúhu sá ñi chídó tnùní ndíi Moisés ní náníhí tǎhú-ó ñá, te ñá túú-gǎ xíní ñùhu-xi cada cuendá-ó tnúhu ní xáhaⁿ Yá Ndiöxí xii ndíi Àbrahám cada-gá ní cùu te núu ducaⁿ. Te ndíi-áⁿ ñi naníhí tǎhú ndíi chi ducaⁿ ñi cachí Yá Ndiöxí cada ñaha-gǎ xii ndíi.

¹⁹ Te nchaa tnúhu ní cáháⁿ ndíi Moisés ní ngódó núú-xi nchícúⁿ nihnu ñáyiu cuendá ducaⁿ cùtnuní iní-yu sá ndécú cuèchi-yu, te nchícúⁿ nihnu-ní-yu ndéé ní sáá nduu ñi quexíio Yaá cúú ñaní tnáhá ndíi Àbrahám, chi Yaá-áⁿ ducaⁿ ñi xáhaⁿ Yá Ndiöxí quixi-gá cada váha-gá nchaa ñáyiu. Te nchaa tnúhu ní chídó tnùní ndíi Moisés, chi Yá Ndiöxí ní tendaha-gǎ cue espíritú xínú cuèchi núú-gǎ ní sáháⁿ-xi ní xítnúhu ñaha-xi xii ndíi nàcuáa danèhé ndíi ñáyiu. ²⁰ Te Yá Ndiöxí ñá túú ní cáháⁿ-gá núú méé ñáyiu, chi ndíi Moisés ní cáháⁿ ndíi yuhu-gá núú-yu, dico cùtnáhá ní cáháⁿ ndíi-gá ndíi Àbrahám chi núú méé núú ²⁰ ñi ndíi ndíi-gá ní xáhaⁿ-gǎ xii ndíi nàcuáa cada-gá.

Nàcuáa ndùu nchaa tnúhu ní chídó tnùní ndíi Moisés

²¹ Te nchaa nàcuáa ní chídó tnùní ndíi Moisés, ndíi nchaa nàcuáa ní xáhaⁿ Yá Ndiöxí xii ndíi Àbrahám cada-gá, ñá túú dàquee tǐhú tnáhá-xi. Te núu dícó naníhí tǎhú ñáyiu nchícúⁿ nihnu nchaa nàcuáa ní cáháⁿ ndíi Moisés ñá te cudíú-yu núú-gǎ cuendá-ni sá nchícúⁿ nihnú-yu nchaa nàcuáa ní cáháⁿ ndíi ñi cùu. ²² Te núú tütú Yá Ndiöxí càchí-xi: “Nchaa nchòhó ñáyiu ndècu ñuyíú ndécú cuèchi-ndo”, duha càchí-xi. Te ducaⁿ cáháⁿ-xi cuendá quíndáá iní-ó Xítoho Jesucristú, te naníhí tǎhú-ó chi ducaⁿ ñi cachí Yá Ndiöxí cada-gá.

²³ Te cùtnáhá vǎtá cùndècu ndíi-gǎ-ó tnúhu Xítoho Jesucristú, te nchícúⁿ nihnu-o nchaa nàcuáa ní cáháⁿ ndíi Moisés, te ñi cùtnuní iní-ó sǎ ìo ndècu cuèchi-o ñi cùu. Te

ducaⁿ-ni nchìcúⁿ nihnu-o ndéé ní sáá nduu nǐ quexìo Xítohó Jesucristú ñuyíú-a, te ní sándáá iní-ó-gǎ. ²⁴ Te nchaa tnúhu sá nǐ chídó tnùnì ndí Moisés ní sanu ichi ñaha-xi xii-o nacuaá cada-o cùndecu-o, te ducaⁿ-ni sànu ichi ñaha-xi xii-o ndéé ní sáá nduu ní quexìo Xítohó Jesucristú ñuyíú-a. Te ducaⁿ nǐ cuu cuendá quíndáá iní-ó-gǎ, te vá cùndècu-gá cuèchi-o núú Yǎ Ndiòxí. ²⁵ Te vitna ní ngúndecu ndihì-o tnúhu Xítohó Jesucristú, te ñá túú-gǎ xínì ñuhu-xi canu ichi ñaha nchaa tnúhu ní chídó tnùnì ndí Moisés.

²⁶ Te vitna tnàhá nchaa nchòhó cúú-ndó dèhe Yá Ndiòxí, chi ní sándáá iní-ndó Xítohó Jesucristú. ²⁷ Te nchòhó ní sandute-ndo dàtná càchì-gá, te ndècu-ndo ndihì-gá, te quìde-ndo nchaa nacuaá ní cáháⁿ-gá ndécú-ndó, te ío ndècu yíñuhu-ndo núú Yá Ndiòxí dàtná ndécú yíñuhu mee Xítohó Jesucristú. ²⁸ Te vitna ìⁿ-ni cùu-o nchaa-o ndecu-o ndihì Xítohó Jesucristú cuèi cùu-o ñáyiu israhél àdi ñá túú cùu-o, te cuèi cùu-o ñáyiu ñá túú tnàhí dàñá quee núú chíúⁿ pàtróóⁿ-xi àdi cuu-o ñáyiu dàñá queé núú chíúⁿ pàtróóⁿ-xi, te cuèi téé te cuèi ñadihì ìⁿ-ni cùu-o nchaa-o ndecu-o ndihì Xítohó Jesucristú. ²⁹ Te nchòhó ndécú ndihì-ndo Xítohó Jesucristú, te cùu-ndo datná cue ñani tnàhá ndí Àbrahám, chi ní nduu táhú-ndó cùndecu váha-ndo núú Yá Ndiòxí dàtná ní nduu táhú ndí-áⁿ ndécú váha ndí núú-gǎ, te ducaⁿ chi mee-gǎ ducaⁿ nǐ cachì-gá cunduu.

4

¹ Te nchòhó xínì-ndó sǎ ìⁿ té líhli chi vátá nǎgá cuañaha tǎtá-dé cuu cuendá-dé chi líhli-dé, te ìⁿ-ni cùu-dé ndihì téé xínu cuechi, dico na sáá nduu cuèhnu-dé, te nduu táhú-dé nchaa sá ndécú ndihì tǎtá-dé. ² Te xító-yu té líhli-áⁿ sáhnú-dé ndéé sáá nduu nǐ cachì tǎtá-dé sá cuañaha-dé sá ndúú táhú-dé. ³ Te ducaⁿ sǎtnahá-xi cùu nchoo, chi nchìcúⁿ nihnu-o nchàa nacuaá ní cáháⁿ cue téé ní xíndecu ndéé sanaha ni cùu. ⁴ Te ní sáá nduu nǐ quide Yá Ndiòxí dàtná ní cachì-gá, te ní tendaha-gǎ Déhe-gá

Xítohó Jesucristú ní quixi-gá ñuyíú-a, ní dácácú ñaha ìⁿ ñadihì te ní cuu-gá ñáyiu, te ní quide-gá nchaa nacuaá ní cáháⁿ ndí Moisés. ⁵ Te ducaⁿ nǐ tendaha Yá Ndiòxí Déhe-gá cuendá sá vǎ cǎnchìcúⁿ nihnu-gá-ó nchàa nacuaá ní chídó tnùnì ndí Moisés cuendá ducaⁿ te cuu-o dèhe Yá Ndiòxí.

⁶ Te Yá Ndiòxí ní taxi-gá Espiritú Déhe-gá Xítohó Jesucristú ndécú ndihì-ndo chi cùu-ndo dèhe-gá, te Espiritú-áⁿ chíndèe ñaha-xi xii-ndo te càchì-ndó: “Yòhó Dútú Ndiòxí cúú-n Tǎtá méé-ndí”, duha càchì-ndó. ⁷ Te xiǎⁿ cùtnùnì iní-ndó sǎ cúú-ndó dèhe Yá Ndiòxí vitna, te ñá túú-gǎ cúú-ndó dàtná cue ñáyiu ñá túú tnàhí dàñá quee núú chíúⁿ pàtróóⁿ-xi. Te sá dúcáⁿ cùu-ndo dèhe-gá, te Xítohó Jesucristú taxi-gá nchaa sá vǎha ní cachì Yá Ndiòxí nduu táhú-ndó.

Té Pǎblú ío sàni iní-dé cuendá nchaa ñáyiu ndècu ichi Xítohó Jesucristú

⁸ Te cùtnàhá vátá quíndáá-gá iní-ndó tnúhu Yá Ndiòxí ní xínu cuechi-ndo núú nchàa sá càchì-yu cùu ndiòxí te ñá ndáá sá ndiòxí cúú-xí. ⁹ Te vitna nchòhó cáháⁿ ndihì-ndo Yá Ndiòxí, te mee-gǎ xínì ñáhá-gǎ xii-ndo, te ñá túú ndùu váha-xi nanchòcáva iní-ndó càda tucu-ndo nacuaá ní xóo cada-ndo díhna, chi nchaa xiǎⁿ ñá túú vèdana nàndihì-xi. ¹⁰ Te nchòhó cǎnehe íi-ni-ndo ndùu cachì-ndó íi, te diu-ni ducaⁿ quìde-ndo dava yoó ndihì dava cuíá, te ndi tnàhá nduu sàcòo vico diu-ni ducaⁿ quìde-ndo cǎnehe íi-ndó ndùu-áⁿ. ¹¹ Te ío sàni iní-í cuendá-ndó, chi na cuáháⁿ àúⁿ nǎ cuu ní dánèhé ñàhá-í xii-ndo tnúhu Yá Ndiòxí.

¹² Te cáháⁿ ndàhú-í núú nchòhó ñáyiu ndècu ndihì-í ichi Xítohó Jesucristú sá cádá-ndó dàtná quídè-í ñá túú nchìcúⁿ nihnu-í nchaa tnúhu ní cáháⁿ ndí Moisés, chi yúhú quídè-í vitna dàtná ní quide nchòhó ñá túú ní cǎnchìcúⁿ nihnu-ndo nacuaá ní cáháⁿ ndí. Te cùtnàhá ní xíndecu ndihì ñaha-í xii-ndo nǐ quide váha ñaha-ndo xii-í. ¹³ Te sa ñaha-ndo sá cùtnàhá ní cáháⁿ-í tnúhu Xítohó Jesucristú núú-ndó ndéé díhna ní cuhú-í, núu xiǎⁿ ní xíndecu ndihì ñaha-í xii-ndo nǐ

cáháⁿ-í tnúhu-gá núú-ndó. ¹⁴ Te cuéhé sã ní tnahá-í-áⁿ cúú-xí ñⁿ cuéhé sã vã yõo tnàhí cundee ìní-xi cundecu ndihí ñaha xì-í ní cùu, dico nchòhó chi ío váha ní cáháⁿ ndihí ñaha-ndo xì-í, te ñá túú ní sàni cuehé ní sàni duha iní-ndó cuèndá-í, te ní cáháⁿ ndihí ñaha-ndo xì-í dàtná tnúhu sá yùhú cúú-í ñⁿ espíritú xínú cuèchi núú Yã Ndiõxí àdi datná méé Xítóhó Jesucristú. ¹⁵ ¿Te ná ní tnahá-ndó núu ñá túú-gã sání váha iní-ndó cuèndá-í dàtná ní xóo cada-ndo ndéé díhna ío váha ní xóo caní iní-ndó cuèndá-í? Te na cãchí tnúhu ndáá-í xii-ndo sã ío ní cuu iní ñáhá-ndó xì-í cùtnhá ní xíndecu ndihí ñaha-í xii-ndo, te nãndi sá ndécú ndihí-ndo taxi-ndo xii-í ní cùu, te núu dicó sá cúú te ndéé tìnùu-ndo tava-ndo te taxi-ndo xì-í ní cùu. ¹⁶ ¿Te náa cùu úhú iní ñáhá-ndó xì-í vitna cuèndá sá cáháⁿ-í tnúhu ndáá tnúhu Yã Ndiõxí núú-ndó-ãⁿ?

¹⁷ Te ío ñáyiu ío váha cáháⁿ ndihí ñaha xì-ndo, dico ñáyiu-áⁿ ñúhú cuéhé iní-yu, chi cuíní-yu sá vã cúú-gã cáháⁿ ndihí tnàha-o, chi mee-nã-yu cundecu ndihí-ndo cuíní-yu. ¹⁸ Te váha quíde ñáyiu cáháⁿ ndihí ñaha xì-ndo ndihí tnúhu yíñùhu, te núu cuíní-yu cada-yu ñⁿ sá váha sá cúú-xí-ndó. Te ducaⁿ-ni na cada-yu cuèi òré ñá túú ndècu ndihí ñaha-í xii-ndo. ¹⁹ Te nchòhó ñáyiu ní sanu ichi-í ichi Xítóhó Jesucristú cãchí tnúhu-í xii-ndo sã quidé-xí ìní-í dàtná quidé-xí ìní ñⁿ ñadìhí ñaha sa ní tnahá òré cacu déhe-xi, te ducaⁿ quíde-xi iní-í, chi ío vãi saní iní-í cuèndá-ndó dàtná ní xóo cada-í ndéé díhna, te ducaⁿ-ni cada-í ndéé ná sáá nduu càda-ndo nchaa nacuaá cáháⁿ Xítóhó Jesucristú. ²⁰ ¿Te ío váha cada-xi te núu dicó tnaví sa ndècu ndihí ñaha-í xii-ndo cuèndá cáháⁿ-í núú-ndó nacuaá cada-ndo, te ñá cùtnùní iní-í nása cada-í cuèndá-ndó!

Cuèndá ndíi Àgár ndihí ndíi Sãrá

²¹ Te nchòhó ñáyiu cuíní canchicúⁿ nihnu nchaa tnúhu ní cáháⁿ ndíi Moisés, ¿náa ñá túú tècú tnùní-ndó nacuaá cáháⁿ-xi tnúhu ní chídó tnùní ndíi? ²² Chi cãchí tnúhu ní chídó tnùní ndíi-áⁿ sã ndíi Abrahám ní xíndecu úú déhe ducuⁿ ndíi, te ñⁿ-dé ní cuu

déhe ndíi ndihí ñadìhí méé ndíi ndíi Sãrá, te ìngá-dé ní cuu-dé déhe ndíi ndihí ñⁿ ndíi ní xinu cuechi nũu-yu ní xínani Àgár. ²³ Te sá dúcáⁿ ní cacu déhe ndíi Sãrá, chi mee Yã Ndiõxí ní cundàhú iní ñáhá-gã xii-aⁿ, chi ducaⁿ ní cachí-gã cada-gã. Dico ndíi ní xinu cuechi-ãⁿ chi ducaⁿ tnàhí ní nduu táhú ndíi-áⁿ sã cóo déhe ndíi. ²⁴ Te na cãchí tnúhu-í xii-ndo nã cúú sã nánèhé ndi ndúú cue ndíi dìhí-áⁿ. Te úú xito ní cáháⁿ Yã Ndiõxí nacuaá cada-gã, te ñⁿ ndíi-áⁿ nánèhé ndíi nacuaá ní cáháⁿ Yã Ndiõxí xito díhna nuu, te ìngá tucu ndíi-áⁿ nánèhé ndíi nacuaá ní cáháⁿ tucu-gã xito cùu úú. Te ndíi Àgár-áⁿ nánèhé ndíi nacuaá ní xáhaⁿ Yã Ndiõxí xii ndíi Moisés yucu Sinái cada ñáyiu, te nchaa ñáyiu nchìcúⁿ nihnu nchaa tnúhu-áⁿ cúú-yu dàtná déhe ndíi Àgár téé ní xinu cuechi, chi téé-áⁿ ñá túú tnàhí ní dàñá-dé quee-dé núú chíúⁿ pàtróóⁿ-dè, te ducaⁿ sãtnahá-xi cúú-yu chi nchìcúⁿ nihnú-yu nchaa nacuaá ní xáhaⁿ Yã Ndiõxí xii ndíi Moisés. ²⁵ Te tnúhu Àgár quée-xi: Yucu Sinái, te yucu-áⁿ yíndèhu-xi nacióⁿ Àrabiá. Te ndíi Àgár-áⁿ nánèhé tucu ndíi cue ñáyiu ndècu ñúú Jerusalén, chi ñáyiu-áⁿ ndécú-ní-yu dàtná ní xíndecu ndíi Àgár ndihí déhe ndíi, chi cue ndíi-áⁿ ní cuu cue ndíi ñáyiu ñá túú tnàhí ní dàñá quee núú chíúⁿ pàtróóⁿ-xi, te ducaⁿ sãtnahá-xi cùu ñáyiu-áⁿ chi nchìcúⁿ nihnu-ní-yu nchaa nacuaá ní cáháⁿ ndíi Moisés. ²⁶ Dico nchoo ní nduu táhú-ó cùndecu-o ñúú Jerusalén sáá nũú ndécú Yã Ndiõxí, te vitna chi ñá túú-gã nchìcúⁿ nihnu-o nchaa nacuaá ní cáháⁿ ndíi Moisés. ²⁷ Te duha cáháⁿ-í, chi núú tütú Yã Ndiõxí cãchí-xi:

Yòhó ñaha ní nduu táhú vã cóo dèhe-xi ní cùu, vitna cana saa-n sã cúú ñⁿ ìní-n cuèi vátá quíní-gã-n nása càcu ñⁿ landú.

Te cuèi ní cuu táhú-n sã vã cóo dèhe-n ní cùu dico ío-gã títí déhe-n còo dacúúxí xíchí ní cuu táhú tnàhí sã cóo dèhe-xi.

Duha cãchí-xi núú tütú-gã. ²⁸ Te

nchoo cuè ñáyiú ndècu ichi Xítóhó Jesucristú vitna cùu-o datná ndíi Isàác, chi ndíi-áⁿ nǐ cacu ndíi, chi mee Yá Ndiöxí ní cachí-gá sá cécú ndíi. Te ducaⁿ sätnahá-xi cùu nchoo chi ní nduu-o dèhe-gá vitna chi ducaⁿ nǐ cachí tucu-gá cunduu. ²⁹ Te dèhe ndíi Àgár ní nduu táhú tnàhí ndíi sá cécú ndíi ñuyíú-a, te ndíi-áⁿ nǐ cuu úhú iní ndíi ndíi Isàác, te ndíi Isàác-áⁿ chi Espíritú Yá Ndiöxí ní quide ní cacu ndíi. Te ducaⁿ sätnahá-xi cùu vitna, chi nchaa nchoo ñáyiú ndècu ndíi Espíritú Yá Ndiöxí cúú úhú iní ñáhá ñáyiú xii-o. ³⁰ Te núú tütú Yá Ndiöxí càchí-xi: “Chí nácúicúⁿ xíchí xínú cuèchi ndíi dèhe-xi na nùhú-yu, chi dèhe xíchí xínú cuèchi-áⁿ ñà túú nǎ níhí-dě nduu táhú-dě, chi mee-ni dèhe ñaha ndècu vehe-xi nduu táhú-dě sá cuñaha tātá-dě”, duha càchí-xi núú tütú-gá. ³¹ Te nchoo cuè ñáyiú ndècu ichi Xítóhó Jesucristú ñá túú-gá cúú-ó datná cúú dèhe ndíi ní xinu cuechi-áⁿ, chi ní cuu-o vitna datná cúú ndíi ní nduu táhú nchaa sá nǐ sáñaha tātá-xi-áⁿ. Te ducaⁿ nǐ cuu, chi Yá Ndiöxí ní dácácu ñaha-gá xii-o cuèndá sá vǎ cánchezúⁿ nihnu-gá-ó nchaa nacuaá ní cáháⁿ ndíi Moisés.

5

Cánchezúⁿ nihnu-ni-o ichi Xítóhó Jesucristú

¹ Te Xítóhó Jesucristú ní quide-gá nacuaá vǎ cáni iní-ó sǎ nánhí tǎhú-ó te núú na cánchezúⁿ nihnu-o nacuaá ní cáháⁿ ndíi Moisés, te ñu-ni ducaⁿ cáni iní-ó cundecu-o te vǎ ngõo cáni iní-ó sǎ nánhí tǎhú-ó te núú na cánchezúⁿ nihnu-o càda-o nacuaá ní cáháⁿ ndíi, chi núú ducaⁿ na càda-o te ío dandòho-o mee-o datná ní xóo ndoho-o cǔtnáhá vǎtá cundècu-gá-ó ichi-a.

² Te yúhú té Pǎblú cuiní-í sǎ cùndedóho-ndo ñⁿ tnúhu na càháⁿ-í-a. Te núú nchòhó cuáha-ndo seña ñⁿ-ndo cuèndá sǎ sàndáá iní-ndó nacuaá ní cachí ndíi Moisés cada-ndo, te núú ducaⁿ na càda-ndo ña, te àúⁿ nǎ cuu ndècu-ndo ichi Xítóhó Jesucristú te núú ducaⁿ. ³ Te datná ní cachí-í xii-ndo, te ñu-ni ducaⁿ càháⁿ tucu-í vitna sǎ núú ndéda-ni càa ñⁿ tée na cuáha-dé seña ñⁿ-dé, te xini

ñuhu-xi sǎ dàcuítí tǎu-dé cada-dé nchaa nacuaá ní cáháⁿ ndíi Moisés. ⁴ Te nchaa nchòhó ñáyiú sàni iní sǎ ñà túú-gǎ cuèchi-xi ndècu núú Yá Ndiöxí cuèndá sǎ nchìcúⁿ nihnu-ndo nchaa nacuaá ní cáháⁿ ndíi Moisés, ñà túú-gǎ ndécú-ndó ndíi Xítóhó Jesucristú, te ni Yá Ndiöxí ñà túú-gǎ cùndáhú iní ñáhá-gǎ xii-ndo càda váha ñaha-gǎ. ⁵ Dico nchaa nchoo ñáyiú sàndáá iní ñáhá xii-gǎ cùñu-o núú-gǎ, chi chindee ñaha Espíritú-gǎ xii-o, te ndètu cahnu-ná-ó sǎa nduu cǔñaha núú Yá Ndiöxí xii-o sǎ cùñu-o núú-gǎ. ⁶ Te nchoo cuè ñáyiú ndècu ndíi Xítóhó Jesucristú ñⁿ-ni quide-xi cuèi na cuáha-o seña ñⁿ-o àdi vǎ cuáha-o, chi ñà túú chindee ñaha-xi xii-o nacuaá cundecu váha-o ndíi-gǎ. Te ñⁿ-ni díi-ni sǎ xini ñuhu-xi quèndáá iní-ó Xítóhó Jesucristú, te núú ducaⁿ na càda-o te cuu iní-ó cuè tnaha ñáyiú-o.

⁷ Te nchòhó ío váha quide-ndo ndècu-ndo ichi Yá Ndiöxí ní cùu, te vitna cùñuhu-í sǎ ñà túú-gǎ sàndáá váha iní-ndó tnúhu-gǎ, te ducaⁿ quide-ndo chi ndècu ñáyiú sànu ichi ñaha xii-ndo ingá ichi. ⁸ Te ñà díú Yá Ndiöxí Yaá ní cáháⁿ ñáhá xii-ndo ducaⁿ ni cachí-gǎ cada-ndo sǎ vǎ quèndáá-gǎ iní-ndó tnúhu-gǎ. ⁹ Te nchòhó xini-ndó sǎ núu luha levadùrá ná quíhu yuchi te dāndaa-xi. Ducaⁿ sätnahá-xi cùu ñáyiú dāndahú ñáhá xii-ndo, chi cuiní-yu dàcuíta nihnu ñáhá-yu xii-ndo nchaa-ndo. ¹⁰ Te yúhú cùtnúni ndáá iní-í sǎ Xítóhó Jesucristú chindee ñaha-gǎ xii-ndo cuèndá sǎ ñà túú nǎgǎ tnúhu quèndáá iní-ndó, dico nchaa ñáyiú ducaⁿ dāndahú ñáhá xii-ndo nacháhu-yu núú Yá Ndiöxí nchaa sǎ quidè-yu cuèi náigǎ ñáyiú cùu-yu.

¹¹ Te càchí tnúhu-í xii nchòhó ñáyiú ndècu ndíi-í ichi Yá Ndiöxí sǎ núú dícó dānehé-ni-í ñáyiú sǎ cuáha-yu seña ñⁿ-yu datná ní cachí ndíi Moisés ñà, te vǎ yõo cuu úhú iní ñáhá xii-í ní cùu, te ni vǎ tǔu úhú iní-yu cuèndá sǎ nǐ xihí Xítóhó Jesucristú núú cùrúxí ní cùu. ¹² Te nchaa ñáyiú dàsatú iní ñáhá

xii-ndo sã cuãha-ndo sêñá ñii-ndo, te váha-gá sá ná cáda-yu mée-yu ññ tñúndòho, te ñá díú sã dúcáⁿ cànuichi ñaha-yu xii-ndo cùndecu-ndo.

¹³ Te nchòhó ñáyiú ndècu ndihí-í ichi Xítóhó Jesucristú ñu-gá ní tau-nihnu ñaha-gã xii-ndo cuendá sá vã cáncicúⁿ nihnu-gá-ndó nchàa nacuaá ní cáháⁿ ndíi Moisés, dico vá cáni iní-ndó sã sã dúcáⁿ ñi taunihnu ñaha-gã xii-ndo, te cuu-ni cada-ndo nãndi sá cuèhé sá dúhá vèxi iní-ndó, dico cuu iní tñáhá-ndó ññ ññ-ndo te chindee tñaha-ndo. ¹⁴ Chi ducaⁿ cáháⁿ Yã Ndiöxí sá cúú iní-ó cuè tñaha ñáyiú dàtná cúú iní-ó mée-o. Te núu ducaⁿ na càda-o, te quide-o nchaa nacuaá tàú-xi cada-o dàtná cáháⁿ nchaa tñuhu ní chídó tñùní ndíi Moisés. ¹⁵ Te núu nchòhó cúú ùhú iní tñáhá-ndó ndècu-ndo, te ñá túú quide váha-ndo te núu ducaⁿ quide-ndo, dico yúhú càchí-í sá vã dúcáⁿ-gã cada-ndo cùndecu-ndo cuendá sá vã dácuíta nihnu tñaha-ndo.

Nacuáa sàni iní ñáyiú ndècu ichi cuehé ichi duha ndihí nacuaá sàni iní ñáyiú ndècu ndihí Espiritú Yã Ndiöxí

¹⁶ Te na càchí tñuhu-í xii-ndo sã cáda-ndó nchàa nacuaá cuini mée Espiritú Yã Ndiöxí cada-ndo, te ducaⁿ te vá cáni-gã iní-ndó càda-ndo nãndi nchaa sá cuèhé sá dúhá sàni iní mée-ndó. ¹⁷ Chi nchaa xiãⁿ ñá túú tñáhá tñuhu-xi ndihí Espiritú Yã Ndiöxí. Te ñu-ni ducaⁿ quide Espiritú Yã Ndiöxí, chi ñá túú tñáhá iní-xi nchaa sá cuèhé sá dúhá sàni iní-ndó. Te sã dúcáⁿ ña túú tñáhá tñuhu tñaha-xi xiãⁿ ñá túú ñihí ndéé-ndó càda-ndo ññ sá vãha sàni iní-ndó càda-ndo. ¹⁸ Te núu quide-ndo nchaa nacuaá sànu ichi ñaha Espiritú Yã Ndiöxí, te ñá túú-gã táxi tñùní ñáhá nchàa tñuhu ní chídó tñùní ndíi Moisés xii-ndo.

¹⁹ Te nchaa ñáyiú xini-yu nchaa nacuaá quide ñáyiú quide cuehé quidé duha. Te duha quidé-yu: Cue téè cáháⁿ ndihí-güedé ñáyiú ñihí te ñá díú ñàdihí-güedé cúú-yu, te ñu-ni ducaⁿ xiquire cue ñáyiú ñihí, te nãndi-gã nchaa sá cuèhé sá dúhá cuãháⁿ véxi-yu quidé-yu. ²⁰ Te quide

cahnú-yu nchaa sá càchí-yu cùu ndiöxí te ñá ndàá sá ndiöxí cúú-xí, te quide nduu tñáhá-yu, te cùu ùhú iní tñáhá-yu, te nàá-yu, te cùu cuiñú tñáhá-yu, te ío yáchí cúdeñ-yu, te ndúcú-yu mee-ni sã cúú-xí mée-yu, te ñá túú cùu ññnuú-yu cundecú-yu, te quide ññ tñáhá-yu. ²¹ Te cùu cuedú iní-yu nchaa sá ndécú ndihí dava-gá-yu, te sàhni tñáhá-yu, te ío quihú-yu, te ndí cuu ndi cuú-yu quidé-yu nchaa sá cuèhé sá dúhá, te nãndi-gã nchaa sá cuèhé sá dúhá quidé-yu. Te sa càchí tñuhu-í xii-ndo sã ncháá ñáyiú ducaⁿ xiquire vá ndúú tãhú-yu cundecú-yu núú ndécú Yã Ndiöxí táxi tñùní-gã.

²² Dico Espiritú Yã Ndiöxí chindèe ñaha-xi xii-o cuu iní tñáhá-ó, te cùdí iní-ó ndècu-o, te ío váha cùu iní-ó, te càhnu iní-ó, te váha iní-ó, te cùndahú iní tñáhá-ó, te quide ndáá-ó ndècu-o. ²³ Te ndàhú iní-ó, te quide-o nchaa nacuaá tàú-ó càda-o, te nchaa xiãⁿ chindèe ñaha Espiritú Yã Ndiöxí quidé-ó, te núu ducaⁿ quide-o, te vá yõo ññ-gã cáháⁿ sá ña túú quide váha-o ndècu-o. ²⁴ Te nchoo cuè ñáyiú ndècu ndihí Xítóhó Jesucristú, sa naha-o sá ñi xihí-gã núú cùrúxí sá cuendá-ó, núu xiãⁿ duuⁿ duuⁿ ní dáñá-ó nchàa ichi cuehé ichi duha, te ñá túú-gã táxi tñùní ñáhá ñi ññ sá cuèhé sá dúhá sã ñi xóo cani iní-ó ní cùu. ²⁵ Te vitna ní ngúndecu ndihí-o Espiritú Yã Ndiöxí chindèe ñaha-xi, te xini ñuhu-xi sá cáda-ó nacuaá sànu ichi ñaha Espiritú-gã cada-o.

²⁶ Te vá cáda càhnu-o mee-o, te vá ndúcú-ó plètú, te ni vã cúú cuedú iní-ó sã ndécú ndihí tñaha ñáyiú-o.

6

Chindee tñaha-o ññ ññ-o

¹ Te nchòhó ñáyiú ndècu ndihí-í ichi Xítóhó Jesucristú càchí tñuhu-í xii-ndo sã ñuu ññ ñáyiú ndècu ndihí-ndo ichi-gã ní quidé-yu ññ sá ña túú tàú-yu cada-yu núú-gã, te nchòhó ñáyiú quide váha ndècu ndihí Espiritú Yã Ndiöxí cáháⁿ-ndó dòho cue ñáyiú ducaⁿ xiquire-áⁿ cuendá nucúnu

ichí-yu, te vii vii cáháⁿ ndihí-ndö-yu, te ío coto-ndo mèe-ndo cuendá sá vǎ cáda-ndó ìⁿ sá ñà túú tàú-ndó càda-ndo núú-gǎ. ² Te ío chindee tnàha-ndo, te cuáha tnàha-ndo tnúhu ndee iní cundecu-ndo cuendá nchaa sá yǎha-ndo. Te núu ducaⁿ na càda-ndo, te quide-ndo nchaa nacuaá ní cáháⁿ Xítóhó Jesucristú cada-o.

³ Te núu ío ìⁿ-ndo càchí-ndó sǎ ìo váha quide-ndo ndecu-ndo ichi Yá Ndiöxí te ñá ndáá ñá, te dicó dándàhú-ndó mèe-ndo sá dúcáⁿ quide-ndo. ⁴ Te ndi díⁿ ndi díⁿ càda cuendá-ndó nǔu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudíⁿ iní-ndó sǎ cúú-xí mèe-ndo, te vá cání iní-ndó sǎ quidé váha-gá-ndó dàcúúxí dàva-gá-yu. ⁵ Chi tàú-ó sǎ ndi díⁿ ndi díⁿ càda cuendá-ó nacuaá ndècu-o.

⁶ Te nchaa nchòhó ñáyíu dàcuaha tnúhu Yá Ndiöxí chindee-ndo cuè téè dàcuaha ñaha xii-ndo tnúhu-gǎ cuáñaha-ndo nǎndi sá xíní ñùhu-güedé.

⁷ Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yá Ndiöxí, chi nchòhó xíní-ndó sǎ nǔu na càda váha-o cùndecu-o, te cùu-xi ìⁿ sá váha sá cúú-xí-ó, dico núu vá cáda váha-o ña, te ío ndoho-o te núu ducaⁿ na càda-o. ⁸ Te núu quide-o nchaa sá cuèhé sá dúhá sàni iní-ó, te diu-ni xiǎⁿ dàcuíta nihnu ñaha-xi xii-o, dico núu quide-o nchaa nacuaá sànu ichi ñaha Espíritú Yá Ndiöxí xii-o, te cundecu ndihí-o Yá Ndiöxí ni caa ni quíhíⁿ. ⁹ Te xini ñùhu-xi vá dáña ndeé-ó càda váha-o cùndecu-o, te ducaⁿ te sáá nduu càda váha ñaha Yá Ndiöxí xii-o, te núu vá ná túhú iní-ó càda váha-o cùndecu-o. ¹⁰ Te cada-o sǎ váha sá cúú-xí nchàa tnaha ñáyíu-o vitna ndecu-o ñuyíú-a, te ío-gǎ tàú-ó chindee-o cue ñáyíu ndècu ndihí-o ichi Xítóhó Jesucristú.

Tnúhu ndeé núu ñí ndihí-ná

¹¹ Te cundehe-ndo sǎ ndáa ndáa lètrá téè-í núu tütú-a sá cúú-xí-ndó. ¹² Te nchaa ñáyíu quide yicá sǎ cuáha-ndo sèñá ñiⁿ-ndo dàtná ní cachí ndíi Moisés, ñáyíu-áⁿ cúú-yu

ñáyíu cuení cudíu núu tnàha ñáyíu-xi. Te ducaⁿ quidé-yu cuendá sá vǎ ndóhó-yu cuendá nchaa tnúhu sá dánèhé ñáhá sǎ ñí xihí Xítóhó Jesucristú núu cùrúxí. ¹³ Te ni ñáyíu sa ní ngúndecu ndihí sèñá ñiⁿ-xi ñá túú quidé-yu nchaa nacuaá ní cáháⁿ ndíi Moisés, dico mèe-yu cuení-yu sǎ cuáha-ndo sèñá ñiⁿ-ndo. Te ducaⁿ quidé-yu chi quide cahnú-yu mèe-yu núu nchàa dava-gǎ ñáyíu. ¹⁴ Te yúhú chi ñá túú quide cahnu-í mèe-í cuendá nchaa sǎ quidè-í, chi mee-ni sǎ ìo cùu váha iní-í sǎ Xítóhó Jesucristú ní xihí-gǎ núu cùrúxí cuendá-ó. Te diu cuendá sǎ ñí xihí-gǎ ñá túú-gǎ ndècù-í ichi cuèhé ichi duha, te ni ñà túú-gǎ táxí tnùní ñáhá ni ìⁿ sǎ cuèhé sǎ dúhá xii-í. ¹⁵ Te ñá túú ñá chindèe ñaha-xi xii-o cuéi na cuáha-o sèñá ñiⁿ-o àdi vá cuáha-o, chi ndècu ndihí-o Xítóhó Jesucristú, te ní nduu-o dàtná ìⁿ ñáyíu saa, te xiǎⁿ cúú-xí sǎ ìo-gǎ xíní ñùhu-xi. ¹⁶ Te xicáⁿ táhú-í núu Yá Ndiöxí sǎ ncháá nchòhó ñáyíu quide nchaa nacuaá cáháⁿ-í-a cundecu nahi-ndo, nchòhó ñáyíu cùu cuendá Yá Ndiöxí dàtná ñáyíu isràel chi ñáyíu-áⁿ ñí cachí-gǎ sǎ cúú cuendá-gǎ. Te mee-gǎ ío cundàhú iní ñáhá-gǎ xii-ndo chindee ñaha-gǎ.

¹⁷ Te není vitna cuení-í sǎ vǎ yǒo ìⁿ-gǎ chidácá nihnu ñaha xii-í cuendá chiⁿ quide-í, chi yayacáⁿ sa ní nduu tìlòhó ñiⁿ-í cuendá sǎ ndóhò-í cuendá Xítóhó Jesucristú.

¹⁸ Te nchòhó ñáyíu ndècu ndihí-í ichi Xítóhó Jesucristú xicáⁿ táhú-í núu-gǎ sǎ ìo na chindee ñaha-gǎ xii-ndo nchàa-ndo. Te ducaⁿ na cùnduu. Te ío chí cáda ndèe iní-ñá vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ ÉFESÚ

Té Păblú cádüha-dé tutú quihiⁿ ndaha ñáyiú xñdecu ichi Xítóhó Jesucristú ndécú ñuú Éfesú

¹ Yúhú té Păblú ní tendaha ñaha Yá Ndiöxí cáháⁿ-í tnúhu Xítóhó Jesucristú núú ñáyiú, chi ducaⁿ ñí cachí Yá Ndiöxí cunduu, te vitna càdüha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndiöxí xñdecu ñuú Éfesú, te diu-ni nchòhó cúú-ndó ñáyiú sàndáá iní ñáhá xì Xítóhó Jesucristú.

² Te xicáⁿ táhú-í núú Dütú Ndiöxí Yaá cúú Tátá-ó, ndihi núú Xítóhó Jesucristú sá ná chindee chitúu ñaha-gă xii-ndo, te ducaⁿ ndi nduú-gá ná cádá te ío váha cuu iní-ndó cundecu-ndo.

Espíritú Yá Ndiöxí chindèe ñaha-xi xii-o chi ndècu ndihi-o Xítóhó Jesucristú

³ Te cachí-ó sã ïo càhnu cuu Yá Ndiöxí Yaá cúú Tátá Xítóhó Jesucristú, te ndéé andiú quide Yá Ndiöxí nchaa sá vãha sá cúú-xi-ó cuendá sá ndécú ndihi-o Espíritú-gá, te ducaⁿ quide-gá chi ndècu ndihi-o Xítóhó Jesucristú.

⁴ Te ndéé cútnáhá vátá ngãva-gá ñuyíú ñí cachí Yá Ndiöxí sá nchóó cùu-o ñáyiú cùu cuendá-gá, te ducaⁿ ñí cachí-gá sá cuendá Xítóhó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gă, te ducaⁿ te vá cundècu cuèchi-o. ⁵ Te Yá Ndiöxí ío cùu iní ñáhá-gă xii-o ñuú xiãⁿ ducaⁿ ñí cachí-gá ndéé cútnáhá vátá ngãva-gá ñuyíú sã nchóó ndùu-o déhe-gá. Te sá cuendá nchaa sá cádá Xítóhó Jesucristú sá cúú-xi-ó, xiãⁿ ducaⁿ ñí cachí Yá Ndiöxí, te ducaⁿ ñí cachí-gá chi ducaⁿ tnàhí ní sani iní-gá cunduu. ⁶ Te xiãⁿ ñuú xini ñuhu-xi sá nchóó càchí-ó sã ïo càhnu cuu Yá Ndiöxí, chi ío cundahú iní ñáhá-gă chindèe ñaha-gă xii-o. Te ducaⁿ quide-gá chi ndècu ndihi-o Xítóhó Jesucristú Yaá ío cùu iní-gá.

⁷ Te Yá Ndiöxí ío cùu iní ñáhá-gă xii-o ñuú xiãⁿ Xítóhó Jesucristú ní sati ñíhí-gă te ní xihí-gá cuendá dacăcu nihnu ñaha-gă xii-o ñuú ùhú núú ndàhú, te ducaⁿ càda cahnu iní-gá nchaa yicá cuèchi-o. ⁸ Te Yá Ndiöxí ío cundahú iní ñáhá-gă chindèe ñaha-gă xii-o, nàcuáa ngúndecu ndihi-o nchaa sá xini tnúmi-ó te ducaⁿ te cuu-o ñáyiú tècú tnúni. ⁹ Te Yá Ndiöxí ní dánèhé ñáhá-gă xii-o nchaa sá ndúú yùhu, nchaa sá ñí sani iní-gá cada-gá. Te ducaⁿ ñí quide-gá chi ducaⁿ ñí sani iní-gá cunduu. ¹⁰ Te sá ñí sani iní-gá cada-gá te dacuitíí sã cádá-gă ná sãá nduu, te na sãá nduu-áⁿ te mee-gă cada sá Xítóhó Jesucristú quindaha-gă nchaa sá ío andiú, ndihi nchaa sá ío ñuyíú-a.

¹¹ Te nchoo ñí nduu táhú-ó ñí nduu-o ñáyiú cùu cuendá Yá Ndiöxí chi ndècu ndihi-o Xítóhó Jesucristú. Te ducaⁿ ñí cuu chi ducaⁿ tnàhí ní sani iní Yá Ndiöxí cunduu. Te nchaandi túhú sá quide-gă, quide-gá nàcuáa sãni iní mée-gă cunduu. ¹² Te ducaⁿ ñí cuu cuendá sá nchúhú ñáyiú díhna nuu ñí sãndáá iní tnúhu Xítóhó Jesucristú cáháⁿ-ndí sá ïo càhnu cuu mee Yá Ndiöxí cuendá nchaa sá vãha quide-gá. ¹³ Te nchòhó tucu cútnáhá ní xindedóho-ndo tnúhu ndáá tnúhu sá cáháⁿ nàcuáa naníhí táhú-ó ní cuu ñnuu-ndo ndihi Xítóhó Jesucristú chi ní sãndáá iní-ndó-gă. Te xiãⁿ cútnúni sá nchòhó ní nduu-ndo ñáyiú cùu cuendá Yá Ndiöxí, chi ní ngúndecu ndihi-ndo Espíritú-gá sá ñí cachí-gá taxi-gá. ¹⁴ Te sá ndécú ndihi-o Espíritú Yá Ndiöxí xiãⁿ cútnúni sá ndáá nduu táhú-ó cundecu-o ndihi-gá ná sãá nduu nàcuaca ñaha-gă xii nchaa nchoo ñáyiú cùu cuendá-gá, te sá dúcáⁿ càda-gá ñuú xiãⁿ taú-ó càchí-ó sã ïo càhnu cuu-gá.

Té Păblú xicáⁿ táhú-dé núú Yá Ndiöxí cuendá cue ñáyiú ndècu ichi-gá

¹⁵ Te yúhú nihí-í tnúhu sá nchòhó ío váha sãndáá iní-ndó Xítóhó Jesucristú, te nchaa ñáyiú cùu cuendá Yá Ndiöxí ío cùu iní-ndó-yu. ¹⁶ Te xiãⁿ ñuú ñá túú dàña ndéé-í ndácáⁿ táhú-í

núú-gă cuendá-ndó, te ío xicáⁿ táhù-í
 17 núú Yă Ndiöxí Yaá cúú Tătá Xítóhó
 Jesucristú cuendá-ndó. Te diu-ni Yă
 Ndiöxí cúú-gă Yaá ío cànhu cuu. Te
 xicáⁿ táhù-í núú Yă Ndiöxí sá méé-gă
 ná cádá sã Espiritú-gă chindee
 ñaha-xi xii-ndo cuendá cuu-ndo ñáyiú
 təcú tnùní, te na càda-xi sá cútnùní
 iní-ndó nàcuáa sàni iní Yă Ndiöxí.
 18 Te ducaⁿ xicáⁿ táhù-í núú Yă Ndiöxí
 cuendá-ndó, cuendá sá nchòhó tecú
 tnùní-ndó nàcuáa ndùu tnúhu ndee
 iní ní taxi-gă ní ngúndecu ndihí-ndo
 cùtnàhá ní cáháⁿ ñáhá-gă xii-ndo.
 Te ducaⁿ cùtnuní tucu iní-ndó sã
 ncháá sã ní cachí-gă taxi-gă nduu
 táhú nchoo cuè ñáyiú cùu cuendá-gă
 cúú-xí mèe cuií-ni sá ìo-gă váha. 19 Te
 cùtnuní tucu iní-ndó sã Yă Ndiöxí ío
 cànhu cuu-gă quidé-gă nchaa núú sã
 váha sá cúú-xí nchòo ñáyiú sàndáá iní
 ñáhá xii-gă, chi quide-gă sá vã yõ
 tnàhí ndàcu cada sá cúú-xí-ó dàtná
 ní quide-gă 20 ní dándótó-gă Xítóhó
 Jesucristú cútnàhá ní xihí-gă. Te ní
 taxinucóo-gă Xítóhó Jesucristú xio
 cùha-gă táxi tnùní-gă. 21 Te Xítóhó
 Jesucristú ío-gă cùnùu-gă dàcúúxí
 nchaa núú cuè espíritú, ndihí dàcúúxí
 nchaa cue téé yindaha ñáyiú, ndihí
 dàcúúxí nchaa dáva-gă cue téé cùnùu.
 Te cuèi vitna te cuèi ndéé núú cuàháⁿ
 núú vèxi ducaⁿ-ni ío cunuu-gă taxi
 tnùní-gă. 22 Te mee Yă Ndiöxí ní
 quide-gă sá Xítóhó Jesucristú taxi
 tnùní-gă nchaandi túhú sá ío, te diu-ni
 mee Yă Ndiöxí ní cachí-gă sá ncháá
 ñáyiú cùu cuendá-gă quindaha ñaha
 Xítóhó Jesucristú. 23 Te cada iní-ó sã
 ncháá ñáyiú cùu cuendá Yă Ndiöxí
 cúú-yu yiqui cùñú Xítóhó Jesucristú,
 chi ìⁿ-ni cùú-yu ndihí-gă, te mee-gă
 táxi tnùní-gă nchaandi túhú sá ío.

2

*Yă Ndiöxí ío cùndahú iní ñáhá-gă
 xii-o núu xiãⁿ ní dácăcu nihnu ñaha-gă*

1 Te nchòhó cúú-ndó dàtná ñáyiú
 ní xihí cuendá nchaa sá cuèhé sá
 dúhá quide-ndo ní cuu, dico vitna
 cada iní-ndó sã dàtná ní ndoto-ndo
 chi ní nduu táhú-ndó cùndecu-ndo
 ndihí Yă Ndiöxí ní caa ní quihíⁿ. 2 Te

ducaⁿ ní xíndecu-ndo ìchi cuehé ichi
 duha, chi ní cànchicúⁿ nihnu-ndo
 nchaa sá cuèhé sá dúhá ío ñuyíú-a,
 te ní xóo cada-ndo nchaa nacuáa
 càháⁿ sácuihná, te diu-ni sácuihná-ãⁿ
 táxi tnùní-xi nchaa dáva-gă espíritú
 cùndihí-xi, te diu-ni-xi ndècu ndihí-xi
 nchaa ñáyiú ñá túú cuiní tñi tnúhu
 càháⁿ Yă Ndiöxí, te dàcaháⁿ ñáhá-xí
 xii-yu cuendá cundecu-ni-yu ichi
 cuèhé ichi duha. 3 Te nchaa-o dùcaⁿ ní
 xóo cada-o dàtná quidé cuè ñáyiú-ãⁿ,
 chi ní xóo cada-o nchaa sá cuèhé sá
 dúhá ní xóo caní iní-ó, te nándi-gă
 nchaa sá cuèhé sá dúhá ní xóo cahu
 iní-ó ní xóo cada-o, núu xiãⁿ tàú-ó
 sã dándòho ñaha Yă Ndiöxí xii-o ní
 cùu datná tàú-xi dándòho-gă nchaa
 ñáyiú ducaⁿ ndècu ichi cuehé ichi
 duha-ãⁿ. 4 Te Yă Ndiöxí ío cùu iní
 ñáhá-gă xii-o núu xiãⁿ ní cundàhú
 iní ñáhá-gă xii-o 5 cuèi cùu-o datná
 ñáyiú ní xihí sá cuendá nchaa sá cuèhé
 sá dúhá quide-o ní cuu. Te ducaⁿ
 ní quide-gă ní cundàhú iní ñáhá-gă
 xii-o cuendá cundecu-o ndihí Xítóhó
 Jesucristú vitna, te cuu ìⁿnuu-o
 ndihí-gă. Te sá cuendá-ni sá cùndàhú
 iní ñáhá Yă Ndiöxí xii-o xiãⁿ ní
 quide-gă nàcuáa nchoo nàníhí tàhú-ó.
 6 Te cada iní-ó sã dàtná ní quide Yă
 Ndiöxí cútnàhá ní dándótó-gă Xítóhó
 Jesucristú cútnàhá ní xihí-gă ducaⁿ
 ní quide ñaha-gă xii-o chi ndècu-o
 ndihí-gă vitna. Te Xítóhó Jesucristú
 sa ndècu-gă andiú núú ndécú Yă
 Ndiöxí. Te cada iní-ó sã Yă Ndiöxí
 sa ní quide-gă sá nchòó ní ngúndecu
 túu-o ndihí Xítóhó Jesucristú, chi ío
 váha ndècu-o vitna. 7 Te Yă Ndiöxí
 quidé váha ñaha-gă xii-o vitna cuendá
 sá ná sàá nduu, te diu-ni mee-gă cada
 te cutnùní iní nchaa ñáyiú sá ío cùu
 iní ñáhá-gă xii-o, te ducaⁿ ío chindee
 chitúu ñaha-gă xii-o cuendá sá ndécú
 ndihí-o Xítóhó Jesucristú. 8 Te Yă
 Ndiöxí ío cùndahú iní ñáhá-gă xii-ndo
 núu xiãⁿ ní quide-gă sá nchòhó nàníhí
 tàhú-ndó. Te ducaⁿ ní quide-gă chi
 ní sàndáá iní-ndó-gă. Te ñá díú sã
 cuendá ìⁿ chiuⁿ ní quide-ndo ducaⁿ ní
 nàníhí tàhú-ndó, chi mee Yă Ndiöxí
 ní cuiní-gă sá dícó-ni ducaⁿ nàníhí

tàhú-ndó. ⁹ Te mee Yă Ndiöxí ní cachí-gá sá ñà díú cuendá ìⁿ chiúⁿ quide-o naníhí tàhú-ó, te ducaⁿ ñí cachí-gá cuendá sá vă cádá càhnu-o mee-o. ¹⁰ Te Yă Ndiöxí ní quide ñaha-gă xii-o dàtná ìⁿ ñáyiu saa cuendá sá ñí tnahá tnúhu-o ndìhì Xítohó Jesucristú, te ducaⁿ ñí quide-gá cuendá sá cádá-ó mēe-ni sá văha. Te Yă Ndiöxí ducaⁿ tnahí ní sani iní-gá cunduu sá nchóó cùu-o ñáyiu cada mee-ni sá văha.

Xítohó Jesucristú quidé-gă ío váha cùu iní-ó ndècu-o

¹¹ Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáyiu isràél, te ni ñà túú quide-ndo datná quidé ñáyiu-áⁿ, chí ñáyiu-áⁿ sàha-yu sēñá ñíⁱ-yu, te dàquee tíhũ-yu nchaa ñáyiu ñá túú ndècu seña ñíⁱ-xi. ¹² Te chí dándàcu iní nàcuáa ní xíndecu-ndo, chí dàv-á-áⁿ ñà túú ní xíndecu-ndo ndìhì Xítohó Jesucristú, te ni ñà túú ní xõ cuu tnahá tnúhu-ndo ndìhì ñáyiu isràél, te ni ñà túú ní xíní tnùní-ndó nàcuáa ndùu tnúhu sá ñí cáháⁿ ndáá Yă Ndiöxí nàcuáa cada váha-gá ñáyiu, te ni ñà túú ní cùu-ndo ñáyiu quindaha-gă, te ni ñà túú ní xõ níhí-ndó tnũhu ndee iní sá cùndècu-ndo ndìhì-gá. ¹³ Te cuèi ní cuu-ndo ñáyiu ñá túú tnahá tnúhu ndìhì Yă Ndiöxí ní cùu, dico vitna ní tnahá tnúhu-ndo ndìhì-gá chí cùu ìⁿnuu-ndo ndìhì Xítohó Jesucristú, cuendá sá ñí satí nííⁱ-gă te ní xíhí-gá te xiãⁿ ducaⁿ tnahá tnúhu-ndo ndìhì Yă Ndiöxí vitna. ¹⁴ Te Xítohó Jesucristú ní quide-gá sá nchóó ío váha cuu iní-ó cùndecu-o, te ñiⁿ-ni-gá ní quide cuendá sá vă dáquèe tíhú ñáhá ñáyiu isràél xii ñáyiu ñá túú cùu ñáyiu isràél, te ducaⁿ ìⁿ-ná cuú-yu cundecú-yu. ¹⁵ Te sá ñí xíhí Xítohó Jesucristú, xiãⁿ ñá túú-gă cùnùu nchaa tnúhu sá sánú ichi ñaha xii ñáyiu nàcuáa cadá-yu cundecú-yu ni cùu. Te ducaⁿ ñí xíhí Xítohó Jesucristú cuendá sá cuè ñáyiu isràél ndìhì cue ñáyiu ñá túú cùu ñáyiu isràél ìⁿ-ná cuú-yu cundecú-yu ichi-gá, te ducaⁿ

te vá dáquèe tíhú tnahá-gă-yu, te ío váha cundecu ndìhì tnahá-yu. ¹⁶ Te ducaⁿ ñí quide Xítohó Jesucristú ní xíhí-gá núú cùrúxí cuendá sá cuè ñáyiu cùu ñáyiu isràél ndìhì cue ñáyiu ñá túú cùu ñáyiu isràél vá dáquèe tíhú tnahá-gă-yu. Te ducaⁿ ñí xíhí-gá cuendá ìⁿ-ná cuú-yu tnahá tnúhu-yu ndìhì Yă Ndiöxí nàcuáa cuu váha iní ñáhá-gă xií-yu.

¹⁷ Te cuèi cùu-ndo ñáyiu ñá túú tnahí xíní ndáá cuendá Yă Ndiöxí ní cùu, dico Xítohó Jesucristú ní quixí-gá ñuyíú-a ní cáháⁿ-gá tnúhu váha nàcuáa ío váha cuu iní-ndó cùndecu-ndo ndìhì Yă Ndiöxí. Te ñiⁿ-ni ducaⁿ ñí quide-gá sá cúú-xí nchaa ñáyiu sa xíní cuendá Yă Ndiöxí, ñiⁿ-ni ñáyiu isràél. ¹⁸ Te cuèi cùu-o ñáyiu isràél àdi ñá túú cùu-o dico ñiⁿ-ni mee Xítohó Jesucristú ní quide-gá sá ncháá-ó tnahá tnúhu-o ndìhì Dútú Ndiöxí Yaá cúú Tătá-ó. Te ducaⁿ ñí tnahá tnúhu-o ndìhì Yă Ndiöxí chí ní ngùndecu ndìhì-o Espíritú-gá. ¹⁹ Te nchòhó ñáyiu ñá túú cùu ñáyiu isràél ní cuu-ndo ñáyiu ñá túú tnahá tnúhu ndìhì Yă Ndiöxí ní cùu, dico vitna chí ìⁿ-ná ní cuu-ndo ndìhì nchaa dáva-gá ñáyiu cùu cuendá-gá chí cùu-ndo déhe-gá. ²⁰ Te cada iní-ó sá cuè téé ní táuchíúⁿ Xítohó Jesucristú cáháⁿ tnúhu-gá, ndìhì cue téé ní xóo cáháⁿ tnúhu Yă Ndiöxí ndéé sanaha cùu-güedé dàtná cimientú ìⁿ vehe, te nchòhó cúú-ndó dàtná ndóhó sá sáá vehe-áⁿ, te cada tucu iní-ó sá Xítohó Jesucristú cúú-gă ìⁿ yúú cùnùu cuu cimientú vehe-áⁿ. ²¹ Te ducaⁿ ío váha cùu ìⁿnuu nchaa ndóhó-áⁿ ndìhì yúú cùnùu-áⁿ, te ducaⁿ tucu ío váha ta quèe tnahá nchaa ndóhó-áⁿ cuásaá. Te xiãⁿ cada iní-ó sá cúú-xí vehe Yă Ndiöxí, vehe sá ío ní cuu íí. Te ducaⁿ sãtnahá-xi cùu nchaa ñáyiu ndècu ichi Xítohó Jesucristú chí ní tnahá tnúhu-yu ndìhì-gá, te ìⁿ nduu ìⁿ nduu ta cùu vii cuu váha-gă-yu núú Yă Ndiöxí cuáháⁿ. ²² Te tnahá nchòhó ducaⁿ sãtnahá-xi cùu-ndo chí ní ngùndecu ndìhì-ndo Xítohó Jesucristú, te ducaⁿ ta cùu vii cuu váha tucu-ndo núú Yă Ndiöxí cuáháⁿ, te cùu-ndo datná vehe Yă Ndiöxí chí

ndècu ndihì-ndo Espiritú-gá.

3

*Té Păblú yíhí đǎquí-đě cǎháⁿ-đé
tnúhu Xítóhó Jesucristú núú ñáyiú ñá
túú cùu ñáyiú isràél*

¹ Te yúhú té Păblú yíhí-í vecaá sá cuendá sá cǎháⁿ-í tnúhu Xítóhó Jesucristú núú nchòhó ñáyiú ñá túú cùu ñáyiú isràél, núú xiǎⁿ điu cuendá-gá duha yíhí-í vecaá vitna. ² Te nchòhó sa nàha-ndo sá Yă Ndiöxí ní cundàhú iní ñáhá-gá xii-í, te ní cachí-gá sá yúhú quíhí đíquí-í cǎháⁿ-í tnúhu Xítóhó Jesucristú núú-ndó, te cuendá sá cǎháⁿ-í tnúhu-gá núú-ndó te cuu-xi sá vǎha sá cúu-xí-ndó. ³ Te yúhú sa ní cachí tnúhu-í xii-ndo lùha nacuáa ndùu tnúhu ndùu yuhu ní cuu, sá ñí cachí tnúhu Yă Ndiöxí xii-í. ⁴ Te òré dǎcuaha-ndo tnúhu ndùu yuhu-án ní cùu te quini-ndó sǎ yúhú tècú tnùnì-í nàcuáa ndùu tnúhu-án, te tnúhu-án cǎháⁿ-xi cuendá Xítóhó Jesucristú. ⁵ Te tnúhu-án cúu-xí tnúhu sá vǎ yǒo tnàhí xini ní cùu, dico cue téé ní táuchíúⁿ Xítóhó Jesucristú cǎháⁿ tnúhu-gá, ndihì cue téé cǎháⁿ nàcuáa dǎcahu iní ñáhá Yă Ndiöxí ní níhí-güedě tnúhu ndùu yuhu-án, chi Espiritú Yă Ndiöxí ní xáhaⁿ-xi xii-güedé. ⁶ Te duha cǎháⁿ tnúhu ndùu yuhu-án ní cùu: “Cuěi ñáyiú ñá túú cùu ñáyiú isràél te cuěi ñáyiú cùu ñáyiú isràél dico ñⁿ-ni ndùu táhǔ-yu sá vǎha núú Yă Ndiöxí, te núu na quindáa iní-yu tnúhu sá cǎháⁿ nàcuáa naníhí tǎhǔ-yu, te ñⁿ-nǎ cúu-yu cundecú-yu, te ducaⁿ ñⁿ-ni cada váha ñaha Yă Ndiöxí xii-yu te núu na cùndecu ndihí-yu Xítóhó Jesucristú”, duha ndùu tnúhu ndùu yuhu-án ní cùu.

⁷ Te Yă Ndiöxí ní cundàhú iní ñáhá-gǎ xii-í ní taxi-gá chiuⁿ quide-í cǎháⁿ-í tnúhu-gá, te mee-gǎ quide-gǎ sá yúhú ndacu-í cǎháⁿ-í tnúhu-gá. ⁸ Te nchaa ñáyiú cùu cuendá Yă Ndiöxí cúu-yu ñáyiú ío-gá cùnùu cadá-yu chiuⁿ-gá dǎcúxí yúhú, te cuěi ducaⁿ dico Yă Ndiöxí ní cundàhú iní ñáhá-gǎ xii-í ní taxi-gá chiuⁿ quide-í cǎháⁿ-í

tnúhu-gá núú cuè ñáyiú ñá túú cùu ñáyiú isràél. Te tnúhu-gá-án cǎháⁿ-xi sá sùúni ìo váha cada ñaha Xítóhó Jesucristú xii-o. ⁹ Te ducaⁿ ñí cachí Yă Ndiöxí sá cǎháⁿ-í tnúhu-gá cuendá danèhé-í nchaa ñáyiú. Te sá dánèhé-í-yu-án cúu-xí tnúhu ndùu yuhu sá ñí sani iní-gá ndéé sanaha nàcuáa cada váha-gá cue ñáyiú. Te ndéé dǎvǎ-án ñí quesaha ndùu yuhu tnúhu-án ní cùu. Te điu-ni-gá cúu-gǎ Yáa ní cadúha nchaandi túhú sá ío. ¹⁰ Te ducaⁿ ndùu yuhu tnúhu-án ní cùu cuendá sá ncháá espíritú cùnùu ndecu andiu quini-xi vitna nàcuáa quide nchaa ñáyiú ní tuha ñaha xii Yă Ndiöxí cuendá ducaⁿ cùnuni iní-xi sá ìo váha cùnuni iní-gá nàcuáa cada-gá. ¹¹ Te Yă Ndiöxí ní sani iní-gá ndéé sanaha nàcuáa ní cuini-gá cada Xítóhó Jesucristú, te ní sáa nduu ñí quide Xítóhó Jesucristú nàcuáa ní cuini Yă Ndiöxí cada-gá. ¹² Te vitna cùyi-o cǎháⁿ ndihì-o Yă Ndiöxí cuendá sá ndécú ndihì-o Xítóhó Jesucristú, te sàndáa iní-ó-gǎ. ¹³ Te núu xiǎⁿ cǎháⁿ-í dǒho-ndo sǎ cuěi duha ndòho-í vitna dico vá ná túhú iní-ndó cànchicúⁿ nihnu-ndo ìchi Xítóhó Jesucristú. Te sá dúhá ndòho-í te cùu-xi sá vǎha sá cúu-xí-ndó, chi cuu-ndo ñáyiú cùu cahnu núú Yă Ndiöxí.

*Xítóhó Jesucristú ío cùu iní ñáhá-gǎ
xii-o*

¹⁴ Te sá cuendá nchaa sá ñí sani iní Dútú Ndiöxí quide-gǎ xiǎⁿ yúhú ngüñí xitì-í núu-gǎ cǎháⁿ ndihì-í-gá, te điu-ni-gá cúu Yáa cúu Tǎtá Xítóhó Jesucristú. ¹⁵ Te mee Yă Ndiöxí ní cachí-gá sá ncháá espíritú ndécú àndiu cunduu-xi datná ní cachí mée-gǎ cunduu-xi. Te ní cachí tucu-gá sá nchóo cùu-o ñáyiú, te cunduu-o datná cuini mée-gǎ cunduu-o. ¹⁶ Te xicáⁿ tǎhù-í núú Dútú Ndiöxí sá Espíritú-gá ná cadá nàcuáa cuita níhí ndéé-gǎ-ndó quíhíⁿ cundecu-ndo ìchi-gá, te ducaⁿ xicáⁿ tǎhù-í núu-gǎ cada Espíritú-gá chi ío cahnu cuu-gá. ¹⁷ Te xicáⁿ tǎhú tucu-í núú Yă Ndiöxí sá Xítóhó Jesucristú ná cùndecu ndihì ñaha-ni-gá xii-ndo chi

sandáá iní-ndó-gă, te ducaⁿ te vá dáńá ndéé-ndó ǐo cuu iní tnáhá-ndó, ¹⁸ Te xicáⁿ táhú tùcu-í núú Yă Ndiöxí cuendá-ndó ndìhi cuendá dava-gă ñáyiù cùu cuendá-gă, cuendá sá cùtnùní iní-ndó sǎ sǔúní cùu iní ñáhá Xítóhó Jesucristú xii-o. ¹⁹ Te duha xicáⁿ táhù-í núú Yă Ndiöxí chi cùnì-í sá ncháá-ndó tècú tnùnì-ndó sǎ ǐo cùu iní ñáhá Xítóhó Jesucristú xii-o cuèi vá ndácú càva-o quini-ó nàcuáa cùu iní ñáhá-gă xii-o. Te xicáⁿ táhú tùcu-í núú Yă Ndiöxí sá ǐo na cùndecu ndìhi ñaha-gă xii-ndo, te ducaⁿ càncicúⁿ nihnu-ndo càda-ndo nchaa nacuáa quide mee-gă.

²⁰ Te Yă Ndiöxí ǐo-gă vai sá ndácú-gă táxi-gă dàcúúxí sǎ xicáⁿ-ó nǔú-gă, te cuèi ndéé nchaa sá ñà túú sàni iní-ó nìhí-ó te tàxi-gă, te ducaⁿ chi mee-gă ndécú ndìhi ñaha-gă xii-o, te ndàcu-gă quidé-gă nándi sá vǎha sá cúu-xí-ó. ²¹ Te vitna nchaa nchoo ñáyiù ndècu ichi Xítóhó Jesucristú chí ná càchí-ó sǎ ǐo càhnu cuu Yă Ndiöxí, te ducaⁿ-ni càháⁿ-ó sǎ ǐo càhnu cuu-gă ni caa ni quíhíⁿ chi ndècu ndìhi-o Xítóhó Jesucristú. Te ducaⁿ na cùnduu.

4

Espiritú Yă Ndiöxí quidé-xí cùu ñⁿnuu-o ndecu-o

¹ Te yúhú té Pǎblú yíhí-í vecaá sá cuendá Xítóhó Jesucristú, te càháⁿ ndàhú-í núú-ndó sǎ cáda vǎha-ndo cùndecu-ndo datná tàù-xí cada cue ñáyiù ní càháⁿ Yă Ndiöxí cundecu ndìhi-gă. Te nchòhó tnáhá-ndó cùu-ndo ñáyiù ní càháⁿ ñáhá Yă Ndiöxí cundecu ndìhi-gă. ² Te vá cáda càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó nàcuáa ducaⁿ cùndee iní-ndó nǔu ná cúú sǎ cúmǎní nǔú tnáhá-ndó. ³ Te ǐo nducu ndè-ndo cuu ñⁿnuu-ndo cundecu-ndo, chi Espiritú Yă Ndiöxí chindee ñaha-xi xii-ndo, te ducaⁿ ǐo váha cuu iní-ndó cùndecu-ndo chi cùu ñⁿnuu-ndo. ⁴ Te nchoo ñáyiù ndècu ichi Xítóhó Jesucristú ñⁿ-ni cùu-o, te ducaⁿ ñⁿ-ni Espiritú Yă Ndiöxí ndécú, te ðiu-ni ducaⁿ ñⁿ-ni tnúhu ndee ìní ní ngúndecu ndìhi-o cǔtnáhá ní càháⁿ ñáhá Yă

Ndiöxí xii-o. ⁵ Te ñⁿ-ni Xítóhó Jesucristú ndécú tàxi tnuní ñáhá-gă xii-o, te ñⁿ-ni cùu-o sandáá iní-ó tnǔhu-gă, te ñⁿ-ni nǐ sandute-o. ⁶ Te ñⁿ-ni Dùtú Ndiöxí cúú Yáa cúú Tàtá-ó nchàa-o, te ðiu-gă cùnùu-gă yíndàha ñaha-gă xii-o nchàa-o. Te Yă Ndiöxí dácàháⁿ-gă iní-ó quide-o chiuⁿ-gă, te ducaⁿ ndècu ndìhi ñaha-gă xii-o nchàa-o.

⁷ Te nchoo ndì ðííⁿ ndì ðííⁿ chìndee ñaha Yă Ndiöxí xii-o quide-o nacuáa nduu chiuⁿ ní cachí Xítóhó Jesucristú cada-o. ⁸ Te quèe ndáá-xi nàcuáa càháⁿ-xi núú tùtú Yă Ndiöxí núú càchí-xi:

Xítóhó Jesucristú cuándaa-gă andiu te ǐo cùnùu-gă,

chi nchaa cue espíritú cúú ùhú iní ñáhá xii-gă ñà túú ní ndàcu-xi naá ndìhi ñaha-xi xii-gă,

te mee-gă ní cachí-gă nàcuáa nduu chiuⁿ nduu táhú ñⁿ ñáyiù cadá-yu.

Duha càchí-xi núú tùtú-gă.

⁹ Te sá dúcáⁿ càháⁿ-xi sá cuándaa-gă andiu xǎⁿ cùtnùní iní-ó sǎ nǐ cuuⁿ-gă ñuyíú-a. ¹⁰ Te Xítóhó Jesucristú ní cuuⁿ-gă ñuyíú-a, te ðiu-ni-gă cuándaa-gă andiu cuendá ǐo cunuu-gă taxi tnùnì-gă nchaandi túhú sá ǐo.

¹¹ Te ní dácàhñu-gă cue téé xìnu cuechi núú-gă ñⁿ ñⁿ núú chiuⁿ cada-güedé. Te ní cachí-gă sá dàva-güedé càháⁿ-güedé tnúhu-gă, te dava-güedé ní cachí-gă sá càháⁿ-güedé nàcuáa dàcahu iní ñáhá Yă Ndiöxí xii-güedé. Te dava-güedé ní cachí-gă sá cúú-güedé cue téé datècú tnúhu cue ñáyiù nàcuáa cadá-yu naníhí tàhú-yu. Te dava-güedé ní cachí-gă sá cúú-güedé cue téé quindaha ñaha xii ñáyiù dacuàha ñaha-güedé xií-yu tnúhu-gă.

¹² Te ducaⁿ nǐ cachí-gă cada cue téé-áⁿ cuendá canu ichi-güedé cue ñáyiù cùu cuendá Yă Ndiöxí cuendá ducaⁿ ñáyiù-áⁿ nǐhí-yu nàcuáa cadá-yu chiuⁿ-gă, te ducaⁿ cuíta níhí ndéé-gă-yu cundecú-yu ichi Xítóhó Jesucristú. ¹³ Te ducaⁿ nǐ cachí Xítóhó Jesucristú cunduu ndéé sáá nduu cùu ñⁿnuu-o quíndáá iní-ó tnǔhu-gă,

te ducaⁿ cùu ìⁿnuu-o tecú tnùnì-ó nàcuáa ndùu cuendá-gá chi ðiu-gá cúu-gã Déhe Yá Ndiõxí, te cuu-o ñãyiu ío quíde ndáá dàtná quíde mèe Xítohó Jesucristú. Te ducaⁿ te ñá túú tnàhí-gá ná cùmání-ó nũú Yã Ndiõxí. **14** Te ducaⁿ te vá cúu-gã-ó dàtná cue landú vátá cùtnùnì váha-gá iní-xi, te ni vã cáda-gã-ó dàtná quíde ndùte lamár, chi ndute-áⁿ òré quéné tãchí te cuáhán-xi duha cuáhán-xi dàcán, te ducaⁿ chi vá quíndáá-gá iní-ó tnũhu càháⁿ nchaa ñáyiu dándahú ñáhá xii-o, chi ñáyiu-áⁿ ìo váha xitó-yu nàcuáa dándahú ñáhã-yu xii-o chi càchí-yu sá càháⁿ-yu tnũhu Yá Ndiõxí dico ñá ndáá. **15** Te nchoo ìo cuu iní tnáhá-ó, te vá dándahú tnáhá-ó, chi cáháⁿ-ó mèe-ni sá ndáá. Te xìnì ñuhu-xi sá ìⁿ nduu ìⁿ nduu cuita cada ndáá-gá-ó quíhíⁿ dàtná quíde ndáá méé-gã, te ðiu-ni-gá cúu-gã Yaá cùnùu cuu díhna tàxi tnunì ñáhá-gã xii-o. **16** Te ðiu-ni Xítohó Jesucristú quíde ñàha-gá xii nchaa nchoo ñáyiu ndècu ichi-gá dàtná yiqui cùñú méé-gã, chi ìⁿ yiqui cùñú ío váha ní quée tnàha ìⁿ ìⁿ xichi, te ducaⁿ yìhì túchi yiqui cùñú-ãⁿ yótnì-xi nchaa nacuáa ní quée tnàha. Te ducaⁿ sãtnahá-xi cùu nchoo chi ìⁿ-ni cùu-o ndecu-o ichi Xítohó Jesucristú táxi tnùnì ñáhá-gã xii-o. Te núu nchoo quíde-o nchaa nacuáa tàú-xi cunduu te cùu iní tnáhá-ó, te ducaⁿ ta nihí ndéé-gã-ó cuáhán ndécú-ó ìchi-gá.

Vá cáda-gã-ó dàtná ní xóo cada-o cùtnàhá ní xíndecu-o ìchi cuehé ichi duha

17 Te vitna yúhú càháⁿ-í dóho-ndo quíde-í núú Xítohó Jesucristú sá vã cùndècu-gã-ndó dàtná xíndecu ñáyiu ñá túú sándáá iní ñáhá xii Yá Ndiõxí, chi nchaa ñáyiu-áⁿ ñà túú vèdana nándihì nchaa sá sání iní-yu. **18** Te ni ñà túú vèdana cùtnunì iní-yu nàcuáa ndùu tnũhu ndáá tnũhu Yá Ndiõxí. Te ñáyiu-áⁿ ñà túú ndùu táhũ-yu cundecú-yu nàcuáa cuínì Yá Ndiõxí, chi ñá túú vèdana tècú tnùnì-yu te ducaⁿ chi ío sàá iní-yu. **19** Te ñá túú tnàhí-gá ná sání iní-yu ndécú-yu ichi

cuèhé ichi duha, te ío cùdì^í iní-yu ndécú-yu ichi dì^í iní, te ñá díú-ni xíãⁿ chi nándi-gá nchaa sá cuèhé sá dúhá quíde-yu ndécú-yu. **20** Dico tnũhu Xítohó Jesucristú sá ñi sándáá iní-ndó chi ñá túú dùcaⁿ sanu ichi ñàha-xi xii-ndo cada-ndo. **21** Te nchòhó ní cùtnùnì iní-ndó nàcuáa ndùu cuendá Xítohó Jesucristú, te dàcuaha-ndo tnũhu ndáá ðiu-ni tnũhu-gá nàcuáa ndècu-ndo ichi-gá. **22** Te vitna vá cáni-gã iní-ndó càda-ndo datná ní xóo cada-ndo cùtnàhá ní xíndecu-ndo ìchi cuehé ichi duha, chi núu nchaa-ni sá cuèhé sá dúhá-ãⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuãta nihnu ñàha-xi xii-ndo quíhíⁿ, chi núu nchaa-ni sá cuèhé sá dúhá-ãⁿ ná cùhuⁿ-ni iní-ndó te dàtìcá nuu ñàha-xi xii-ndo. **23** Te nchòhó, xìnì ñuhu-xi sá vã dúcáⁿ-gã canì iní-ndó càda-ndo te tàú-ndó ndùu-ndo datná ìⁿ ñáyiu ní cacu túu saa. **24** Te nduu iní-ndó dàtná cuínì méé Yã Ndiõxí cunduu, chi nduu-xi nàcuáa càa iní méé-gã, te ducaⁿ te cuu-ndo ñáyiu ío váha cada ndáá, te cuu ndisa-ndo ñáyiu ñá túú tnàhí ná cumání cundecu núu-gã.

25 Te cuèndá xíãⁿ nũu càháⁿ-í dóho-ndo sã nchòhó vá dácuañdehnde-gã-ndó dàtná ní xóo cada-ndo, te mee-nã sá ndáá cáháⁿ ndihì tnàha-ndo, chi ìⁿ-ni cùu-o ndecu-o ichi Xítohó Jesucristú.

26 Te núu cùdèéⁿ-ndó te cada cuèndá-ndó sã vã cáda-ndó ìⁿ cuéchi sá dúcáⁿ cùdèéⁿ-ndó, te vá dúcáⁿ-ní cùhuⁿ iní-ndó tnũhu sàtú iní-áⁿ. **27** Te vá dáñá-ndó mèe-ndo dándahú ñáhã sàcuíhã xii-ndo.

28 Te núu dava-ndo cùu-ndo ñaduhú te vá dúcáⁿ-gã cada-ndo, chi nducu-nã-ndó ìⁿ chiuⁿ váha cada-ndo nàcuáa ducaⁿ nihí-ndó sã chíndèe-ndo cue ñáyiu ndàhú ñáyiu ñá túú nã ndécú ndihì.

29 Te vá càháⁿ-gã-ndó ñi ìⁿ tnũhu cuèhé, chi mee-nã tnũhu vii tnũhu váha cáháⁿ-ndó nàcuáa ducaⁿ ngũnu ichi cue ñáyiu ndèdóho ñàha xii-ndo, te núu ducaⁿ na càda-ndo te cuu-xi sá vãha sá cúu-xí ñáyiu ducaⁿ ndèdóho ñàha xii-ndo-áⁿ. **30** Te vá cáda-gã-ndó ñi ìⁿ sá ñà túú tàú-ndó càda-ndo cuendá sá vã dándihú-ndó iní Espiritú

Yă Ndiöxí, chi diu Espíritú-gá ndécú ndihí-ndo, te xíáⁿ cútnùní iní-ndó sã sàá nduu nàcuaca ñaha-gá xii-ndo cùndecu-ndo ndihí-gá ni caa ni quíhíⁿ.

³¹ Te vá dásatú-gá-ndó iní tnàha ñáyiu-ndo, te ni vã cùhúⁿ iní-ndó tnúhu sàtú iní, te ni vã cùdëéⁿ-gã-ndó, te cuèi núú chítú núú tàcá vá càháⁿ cana-ndo cùcuèhé-ndó tnàha ñáyiu-ndo, te ni vã cuátnùhu-ndo tnaha ñáyiu-ndo, te ni vã cání cuèhé cani duha iní-ndó cuendá tnàha ñáyiu-ndo. ³² Te cundàhú iní tnáhá-ndó, te cada tnàha-ndo sã vãha, te cada càhnu iní tnáhá-ndó núu ná cúú sã cúmání núú tnáhá-ndó dàtná ní quide Yă Ndiöxí ní quide càhnu iní-gá nchaa yíca cuèchi-ndo sã cuendá Xítóhó Jesucristú.

5

Nàcuáa tàú-xi cundecu nchaa ñáyiu cùu déhe Yă Ndiöxí

¹ Te nchòhó cúú-ndó ñáyiu ío cùu iní ñáhá Yă Ndiöxí, te diu déhe-gá cúú-ndó núu xíáⁿ xíní ñùhu-xi canchicúⁿ nihnu-ndo càda-ndo datná quidé mèe-gá. ² Te ío cuu iní tnáhá-ndó cùndecu-ndo datná cúú iní ñáhá Xítóhó Jesucristú xii-ndo, chi diu-gá ní cachí-gá sã cùú-gá cuendá nchaa cuèchi-o te ní xíhí-gá, te sã dúcáⁿ ní xíhí-gá te ní cuu-gá dàtná ìⁿ táhú sã cúú-xí Yă Ndiöxí, te ío vãha ní cuu iní Yă Ndiöxí sã dúcáⁿ ní quide-gá.

³ Te sã cuendá sã nchòhó cúú-ndó ñáyiu cùu cuendá Yă Ndiöxí núu xíáⁿ nchaa nchòhó cue téé vá càháⁿ ndihí-ndo ñáyiu dìhí te núu ñá díú ñàdihí-ndó cùú-yu, te ducaⁿ-ni nchàa nchohó cue ñáyiu dìhí tucu vá càháⁿ ndihí-ndo cuè téé te núu ñá díú yì-ndo cuu-güedé, te ni vã cání tnàhí iní-ndó cùndecu-ndo ichi díí iní, te ni vã xíhó-ndó ìⁿ sã ndécú ndihí tnaha ñáyiu-ndo, te ni ìⁿ nchaa xíáⁿ vá cání iní-ndó càda-ndo, te ni vã cãcú nèhe-ndo. ⁴ Te ni vã càháⁿ-ndó ìⁿ tnúhu sã ni vã cúú cùndedóho ñáyiu, te ni vã càháⁿ-ndó ìⁿ tnúhu cùtèxínu, te ni dàva-gá nchaa tnúhu sã ñà túú vèdana nàndíhí vá càháⁿ-ndó,

chi nchaa tnúhu-áⁿ ñà túú tàú-xi càháⁿ-ndó, te xíní ñùhu-xi sã vãha-gá sã ndàcáⁿ táhú-ndó núú Yă Ndiöxí cuendá nchaa sã vãha quide-gá. ⁵ Te nchòhó sa xíní ndáá-ndó sã ncháá cuè téé càháⁿ ndihí ñáyiu dìhí te ñá díú ñàdihí-güedé cùú-yu, ndihí cue ñáyiu dìhí càháⁿ ndihí cue téé te ñá díú yì-yu cùu-güedé, nchaa ñáyiu-áⁿ vã ndúú tãhú-yu cundecú-yu núú ndécú Yă Ndiöxí ndihí Xítóhó Jesucristú táxí tnùní-gá. Te ni cuè ñáyiu xíndecu ichi díí iní, te ni cuè ñáyiu xìho nchaa sã ndécú ndihí tnaha ñáyiu-xi vá ndúú tãhú-yu cundecú-yu ndihí-gá núú ndécú-gã táxí tnùní-gá. Te tnúhu sã càchí-ó xìho-o nchaa sã ndécú ndihí tnaha ñáyiu-o, ìⁿ-ní cùu-xi ndihí tnúhu sã càchí ñáyiu quide cahnú-yu nchaa sã càchí-yu cùu ndiöxí te ñá ndáá sã ndiöxí cúú-xí. ⁶ Te vá quèndáá iní-ndó ìⁿ tnúhu sã ñà túú nàndíhí càháⁿ ñáyiu, chi ñáyiu-áⁿ ío dandòho ñaha Yă Ndiöxí xii-yu cuendá nchaa sã cuèhé sã dúhá quidé-yu chi ñá túú sàndáá iní ñáhã-yu xii-gá. ⁷ Núu xíáⁿ càháⁿ-í dóho-ndo sã vã nihí tnáhá-ndó ndihí cue ñáyiu-áⁿ.

⁸ Te nchòhó ní cuu-ndo dàtná cue ñáyiu ní xíndecu núú néé chi ní xíndecu-ndo ichi cuehé ichi duha, dico vitna ní ngúndecu-ndo ichi Xítóhó Jesucristú, te ñá túú-gã ndécú-ndó núú néé dàtná ní xíndecu-ndo ni cùu. Te vitna cada-ndo nchàa nacuáa tàú-xi cunduu chi ndècu-ndo ichi-gá. ⁹ Te sã cuendá sã ndécú-ndó ichi-gá núu xíáⁿ cúú-ndó ñáyiu vãha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ní sã ndáá. ¹⁰ Te ío vãha cada cuendá-ndó nchàa sã cúú vãha iní Xítóhó Jesucristú, te xíáⁿ cada-ndo. ¹¹ Te vá cãncíⁿ nihnu-ndo tnáhá-ndó càda-ndo datná quidé cuè ñáyiu ndècu ichi cuehé ichi duha, chi nchòhó tàú-ndó càháⁿ-ndó dõho nchaa ñáyiu ducaⁿ ndècu ichi cuehé ichi duha-áⁿ cuendá nchaa sã quidé-yu. ¹² Te cucahaⁿ núú-ndó vã càháⁿ-ndó cuendá ni ìⁿ sã cuèhé sã dúhá quide dayuhu nchaa ñáyiu-áⁿ. ¹³ Dico òré dándixi túu tnúhu Yă Ndiöxí

iní-yu nàcuáa quidé-yu te cùtnuní
iní-yu sá ñá túú quide váha-yu, te
ducaⁿ ndixi cuéchi iní-yu cuèndá
nchaa sá cuèhé sá dúhá quidé-yu.

14 Te núú tütú Yá Ndiöxí cächí-xi:

Nchòhó cúú-ndó dàtná ñáyiú xidí, te
vitna ndiquíú iní-ndó,

te cùu tucu-ndo datná ñáyiú ní xihí, te
vitna ndoto-ndo,

te Xítohó Jesucristú chindee ñàha-gá
xii-ndo nàcuáa vá cùndècu-gá-ndó
ìchi cuehé ichi duha.

Duha càháⁿ-xi núú tütú-gá.

15 Te ío váha cada cuèndá-ndó
nàcuáa cada-ndo cùndècu-ndo, te vá
cáda-ndó dàtná xiquide cue ñáyiú ñá
túú tècú tnùnì, chi cada-ndo dàtná
xiquide ñáyiú ío váha sàá díqui-xi.

16 Te ìⁿ nduu ìⁿ nduu cani iní-ndó
càda-ndo nchaa nacuáa tàú-xi cun-
duu, chi vitna ío cùnuu nchaa sá cuèhé
sá dúhá. 17 Te cuu-ndo ñáyiú tècú
tnùnì cuèndá ducaⁿ cùtnuní iní-ndó
nàcuáa cuìní Yá Ndiöxí cada-ndo, te
vá cáda-ndó dàtná xiquide cue ñáyiú
ñá túú tnàhí cùtnuní iní-xi nàcuáa
cuìní Yá Ndiöxí cada-yu. 18 Te vá
cúú-ndó ñáyiú quihu chi núú ducaⁿ

na càda-ndo te dàcuíta nihnu-ndo
mèe-ndo, te dañà-ndo mèe-ndo sá
Espiritú Yá Ndiöxí ná tàxi tnuní
ñáhá-xi xii-ndo. 19 Te cáháⁿ-ndó
nàcuáa-ni cuáháⁿ ndudú sá ñí xóo
cata nchaa cue ñáyiú ndéé sanaha
ñí xóo chiñuhú-yu Yá Ndiöxí. Te
cáháⁿ-ndó nàcuáa cuáháⁿ ndudú sá
chiñuhu-ndo Yá Ndiöxí, te cata-ndo.
Te cuèi nchaa dava-gá ndudú diu-ni
ducaⁿ cáháⁿ-ndó te cata-ndo. Te
ni yùhu ni iní-ndó càta-ndo nchaa
ndudú-áⁿ chiñuhu-ndo Yá Ndiöxí.

20 Te vá dáñá ndéé-ndó ndàcáⁿ
táhu-ndó núú Tàtá-ó Dütú Ndiöxí
cuèi ndècu váha-ndo àdi ñá túú ndècu
váha-ndo. Te ducaⁿ càda-ndo chi
ndècu ndìhi-ndo Xítohó Jesucristú.

*Tàú-xi sá quèndáá iní tnàhá cue
ñáyiú ndècu ichi Xítohó Jesucristú*

21 Te nchòhó ñáyiú ndècu ichi
Xítohó Jesucristú tàú-xi sá quèndáá
iní tnàhá-ndó, te ducaⁿ càda-ndo chi
nèhe-ndo sá yíñuhu núú Yá Ndiöxí.

22 Te nchaa nchòhó ñáyiú dìhí
ndécú yì-xi, xini ñuhu-xi sá quèndáá
iní-ndó yì-ndo datná sàndáá iní-ndó
Xítohó Jesucristú. 23 Chi yì-ndo tàxi
tnuní ñáhá-güedé xii-ndo dàtná quidé
Xítohó Jesucristú táxi tnùnì ñáhá-gá
xii nchoo cuè ñáyiú ndècu ichi-gá. Te
diu-gá cúú-gá Yaá ní dácäcu nihnu
ñaha xii-o núú ùhú núú ndàhú, te
cùu-o datná yiqui cùñú-gá. 24 Te dàtná
quidé nchòo ñáyiú ndècu ichi Xítohó
Jesucristú sàndáá iní-ó tnè-o nchaa
tnúhu cáháⁿ-gá, ducaⁿ tàú-xi cada
nchaa nchòhó ñáyiú dìhí quèndáá
iní-ndó tnè-ndo nchaa tnúhu cáháⁿ
yì-ndo.

25 Te tnàhá nchaa nchòhó cue
tée tucu tàú-xi sá ío cuu iní-ndó
ñàdihí-ndó dàtná quidé Xítohó Jesu-
cristú cúú iní ñáhá-gá xii nchaa nchoo
ñáyiú ndècu ichi-gá, chi mee-gá ní
xihí-gá sá cuèndá-ó sá cúú iní ñáhá-gá
xii-o. 26 Te ducaⁿ ñí quide-gá cuèndá
sá ncháá ñáyiú vitna ngùndècu ichi-gá
cuu yíñuhú-yu núú Yá Ndiöxí, te
ducaⁿ ndàda ndoo ndada nine-gá
iní-yu sá cuèndá sá quèndáá iní-yu
tnúhu Yá Ndiöxí, te cuanduté-yu.

27 Te ducaⁿ ñí quide-gá cuèndá sá
ncháá ñáyiú na ngùndècu ichi-gá ío
váha cundécú-yu núú-gá, te ducaⁿ vã
cùndècu-gá ni ìⁿ cuéchi-yu núú-gá, te
ni ìⁿ-gá sá ñá túú-gá ná cumánì-yu
núú-gá chi ío cundècu yíñuhú-yu.

28 Te sá dúcáⁿ quide Xítohó Jesucristú
sá cúú-xi cuè ñáyiú ndècu ichi-gá,
xiáⁿ tàú-xi sá nchòhó cue tée xíndècu
ñàdihí-xi cuu iní-ndó ñàdihí-ndó, te
coto-ndó-yu dàtná xító-ndó yiqui
cuñú méé-ndó, te cada iní-ndó sá
ncháá cuè tée ío cùu iní ñàdihí-xi cùu
iní-güedé méé-güedé chi ìⁿ-ná cúú-yu.

29 Te nchoo sà naha-o sá ni ìⁿ ñáyiú ñá
túú dàquee tíhú-yu yiqui cùñú-yu, chi
da uuⁿ-gá chindéé-yu te xító-yu. Te
diu-ni ducaⁿ quide Xítohó Jesucristú
ndìhi nchaa ñáyiú ndècu ichi-gá,
30 chi cùu-o datná yiqui cùñú méé-gá,
te ducaⁿ chi ìⁿ-ni cùu-o ndìhi-gá.
31 Te tnúhu Yá Ndiöxí cächí-xi: “Sá
cuèndá xiáⁿ núu nchaa cue tée na

níhí ñadìhí-xi te dìhí-ná cada-güedé tātá-güedé ndihí náná-güedé, te ñadìhí-ná-güedé cuu cuu ndihí-güedé, te ducaⁿ ñá-ná cuu-güedé ndihí-yu”, duha càchí-xi. ³² Te tnúhu-a cùu-xi ñá tnúhu càhnu vihi, te ducaⁿ sá tnàhá-xi cùu Xítóhó Jesucristú ndihí cue ñáyiu ndècu ichi-gá. ³³ Te càháⁿ-ni tucu-í dóho nchaa nchòhó cue téé xíndecu ñadìhí-xi sá ío cuu iní-ndó ñadìhí-ndó te coto-ndó-yu dàtná xító-ndó mèe-ndo, te ducaⁿ-ni nchàa nchohó ñáyiu dìhí tucu canehe-ndo sá yíñùhu núú yí-ndo.

6

¹ Te nchaa nchòhó cue landú, quindáá iní-ndó tātá-ndó ndihí náná-ndó chi ducaⁿ cuení Yá Ndióxi cunduu, te diu ducaⁿ tnàhí tàú-xi cada-ndo. ² Te Yá Ndióxi ní cachí-gá sá cánèhe-ndo sá yíñùhu núú tātá-ndó ndihí núú náná-ndó. Te tnúhu-áⁿ cúú-xí tnúhu cùnuu ní cáháⁿ-gá cada cue ñáyiu cuendá cada váha ñaha-gá xii-yu. ³ Te ní cachí-gá sá nùu ducaⁿ na càda-ndo te ío váha cundecu-ndo, te ducaⁿ ío naha cùdí-ndo cundecu-ndo ñuyíú-a.

⁴ Te nchaa nchòhó cue téé cùu tātá, vá dásatú-ndó iní cue déhe-ndo chi canu ichi-ndo-güèxi nacuáa tàú-xi cunduu, te dacuàha-ndo-güèxi nchaa tnúhu váha nacuáa cuení Yá Ndióxi cunduu.

⁵ Te nchaa nchòhó cue ñáyiu xínu cuechi, quindáá iní-ndó cuè ñáyiu dii chiúⁿ-xi quide-ndo, te canehe-ndo sá yíñùhu núú-yu, te ío váha cuu iní-ndó càda-ndo chiúⁿ-yu, te ducaⁿ nì yuhu nì iní-ndó càda-ndo. Te cada iní-ndó sá dàtná tnúhu sá chiúⁿ Xítóhó Jesucristú quidé-ndó. ⁶ Te dava ñáyiu xínu cuechi, mee-ni òré ndéhé ñáyiu dii chiúⁿ-xi quidé-yu ío ndùcu ndéé-yu quide chiuⁿ váha-yu cuendá cuení-yu cudíú-yu. Dico nchòhó vá dúcáⁿ càda-ndo, chi cuèi ndècu ñáyiu dii chiúⁿ-xi quide-ndo àdi ñá túú-yu dico cada chiúⁿ váha-ni-ndo, te cada iní-ndó sá dàtná tnúhu sá chiúⁿ Xítóhó Jesucristú quidé-ndó, te

cada-ndo nì yuhu nì iní-ndó nacuáa cuení Yá Ndióxi cunduu. ⁷ Te ío váha cuu iní-ndó càda-ndo chiuⁿ-áⁿ, chi cada iní-ndó sá dàtná tnúhu sá chiúⁿ Xítóhó Jesucristú quidé-ndó te ñá díú chiúⁿ cue ñáyiu ñuyíú-a. ⁸ Te nchòhó sa cùtnuní iní-ndó sá nacuáa ndùu chiuⁿ váha ní quide-ndo ñá ñá-ndo, te ducaⁿ cunduu sá táxi Xítóhó Jesucristú nduu táhú-ndó cuèi cùu-ndo ñáyiu dàñá quée nùú chiúⁿ pàtróⁿ-xi àdi cuu-ndo ñáyiu ñá túú tnàhí dàñá quee núú chiúⁿ pàtróⁿ-xi.

⁹ Te nchaa nchòhó ñáyiu xíndecu ndihí ñáyiu xínu cuechi, tnàhá-ndó tàú-ndó càda váha-ndo sá cúú-xí cuè ñáyiu xínu cuechi núú-ndó, te vá cùndùu nínu iní-ndó nùú-yu, te chí cuàha cuendá sá díú-ní Xítóhó Jesucristú Yaá ndécú àndiu taxi tnuní ñáhá-gá xii-ndo ndihí-yu, te sá cúú-xí mèe-gá chi ñá-ni cùu-ndo núú-gá, te ñá-ni càda ñaha-gá xii-ndo.

Yá Ndióxi chindèe-gá cue ñáyiu ndècu ichi-gá cuendá sá vǎ ndácú sàcùhñá nàá ndihí ñaha-xi xii-yu

¹⁰ Te vitna nchaa nchòhó ñáyiu ndècu ndihí-í ichi Xítóhó Jesucristú càchí tnúhu-í xii-ndo sá ío nducu-ndo nacuáa cada-ndo níhí ndéé-ndó cùu ñánuu-ndo ndihí Xítóhó Jesucristú, chi mee-gá ío càhnu cuu-gá, te chindee ñaha-gá xii-ndo. ¹¹ Te diu-ni nchaa sá nì nduu táhú-ndó nùú Yá Ndióxi diu-ni nchaa xiáⁿ cuhuⁿ iní-ndó, chi xiáⁿ chindee ñaha-xi xii-ndo níhí ndéé-ndó cundecu-ndo cuendá sá vǎ dándàhú ñáhá sàcùhñá xii-ndo. ¹² Chi nchoo ñá díú cuè ñáyiu ñuyíú-a nàá ndihí-o, chi ndihí cue espíritú cùndihí yucu ñávàha, te diu-ni nchaa espíritú-áⁿ cùnuu-xi cuèi núú nínu quide-xi nchaa sá cuèhé sá dúhá, te diu-ni-xi cùnuu-xi ñuyíú-a sànu ichi-xi cue ñáyiu quidé-yu nchaa sá cuèhé sá dúhá. ¹³ Te ío cuhuⁿ iní-ndó nchàa sá nì nduu táhú-ndó nùú Yá Ndióxi cuendá ducaⁿ níhí ndéé-ndó cundecu-ndo, te vá ndácú yùcu ñávàha ná cada ñaha-xi xii-ndo oré cuení-xi coto ndéé ñáhá-xí. Te sáta ná dàquee tíhú-ndó yùcu ñávàha te ñá-ni cunduu-ndo

cùndecu-ndo ichi Yá Ndiöxí. ¹⁴ Te ducaⁿ cùndecu-ni-ndo ichi Yá Ndiöxí cada-ndo dàtná xíquide cue sandàdú, chi cue téé-áⁿ ïo ñíí xíndáa-güedé. Te cáháⁿ-ndó mèe-ni tnúhu ndáá tnúhu Yá Ndiöxí, te cuu-ndo dàtná cue sandàdú cue téé ndàda tii xití-xi òré quíhíⁿ-güedé nàá-güedé. Te ducaⁿ sãtnahá-xi cuu-ndo te núu na càháⁿ-ndó mèe-ni tnúhu ndáá tnúhu Yá Ndiöxí. Te cada ndáá-ndó cùndecu-ndo ichi-gá, te cuu-ndo dàtná cue sandàdú cue téé xíxíhnu sá yídãhu ñaha xii-güedé òré nàá-güedé cuèndá sá vã ñicuèhé-güedé. Te ducaⁿ sãtnahá-xi cuu-ndo te núu na càda ndáá-ndó cùndecu-ndo ichi-gá. ¹⁵ Te cundecu túha-ndo cáháⁿ-ndó tnúhu Xítóhó Jesucristú, tnúhu sá càháⁿ nàcuáa cuu váha iní ñáyiu cundecú-yu, te cuu-ndo dàtná cue sandàdú cue téé ndíhu zapátú-xi quíhíⁿ-güedé nàá-güedé. Te ducaⁿ sãtnahá-xi cuu-ndo te núu na cùndecu túha-ndo cáháⁿ-ndó tnúhu Xítóhó Jesucristú núú ñáyiu. ¹⁶ Te cachí tnúhu tucu-í xii-ndo sã ïo quíndáá iní-ndó Yá Ndiöxí cuèndá sá vã ndácú sàcuíhná nã cada ñaha-xi xii-ndo, te ducaⁿ te cuu-ndo dàtná cue sandàdú cue téé xínehe vítú chínèe-güedé sáquídáhu ñaha-xi xii-güedé cuèndá sá vã cuicúⁿ-güedé sá nchìcúⁿ ñuhú téé ñaha cue téé nàá ndíhi-güedé. Te ducaⁿ sãtnahá-xi cuu-ndo te núu na quíndáá iní-ndó Yá Ndiöxí. ¹⁷ Te ío cuhuⁿ iní-ndó sã ñí naníhí tàhú-ndó, te cuu-ndo dàtná cue sandàdú cue téé ñúhu mbelú cáxíⁿ. Te ducaⁿ sãtnahá-xi cuu-ndo te núu na cùhuⁿ iní-ndó sã ñí naníhí tàhú-ndó. Te ío cuhuⁿ iní-ndó tnúhu Yá Ndiöxí, chi tnúhu-áⁿ ñí taxi Espíritú-gá ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machití cuáháⁿ-güedé nàá-güedé. Te ducaⁿ sãtnahá-xi cuu-ndo te núu na cùhuⁿ iní-ndó tnúhu Yá Ndiöxí. ¹⁸ Te vá dáñá ndéé-ndó cáháⁿ ndíhi-ndo Yá Ndiöxí nàcuáa chindee ñaha Espíritú-gá xii-ndo, te cácáⁿ táhú-ndó núú-gã núu ná cuíní-ndó, te ío cundecu túha-ndo cáháⁿ ndíhi-ndo-gã, te vá nátùhú iní-ndó cácáⁿ táhú-ndó núú-gã cuèndá nchaa dava-gá cue

ñáyiu cùu cuendá-gá. ¹⁹ Te tnàhá cuèndá-í cácáⁿ táhú-ndó núú Yá Ndiöxí cuèndá sá ná chindee ñaha-gá xii-í ñíhí-í tnúhu cáháⁿ-í òré càháⁿ-í tnúhu-gá, te ducaⁿ vã yùhú-í cáháⁿ-í nàcuáa ndùu tnúhu sá càháⁿ nàcuáa naníhí tàhú-ó núú ñáyiu tnúhu sá vátá cùndèdóho-gá-yu. ²⁰ Te Yá Ndiöxí ní cachí-gá sá yùhú cuu-í ñⁿ téé cada-í núú-gã cáháⁿ-í tnúhu-gá núú ñáyiu, te dñu cuèndá tnúhu-áⁿ yíhí-í vecaá vitna. Te ío cácáⁿ táhú-ndó núú Yá Ndiöxí cuèndá-í cuèndá sá yùhú cuyí-í ñí yùhu ñí iní-í cáháⁿ-í tnúhu-gá núú ñáyiu nàcuáa tàù-xi cunduu.

Tnúhu ndéé núú ñí ndíhi-ná

²¹ Te té Tiquicú téé ío cùu iní-í ndécú ndíhi-o ichi Xítóhó Jesucristú cúú-dé ñⁿ téé ío váha quíde ndáá xínú cuèchi-dé núú Xítóhó Jesucristú, téé-áⁿ cachí tnúhu-dé xii-ndo nàcuáa cùu ndecu-í ndíhi nchaa nàcuáa quíde-í cuèndá ducaⁿ cùtnuní iní-ndó. ²² Te cuèndá xiãⁿ núu cuíní-í tendaha-í-dé quixi-dé núú ndécú-ndó cuèndá cachí tnúhu-dé xii-ndo nchaa nàcuáa cùu ndecu-ndí iha, te ducaⁿ tàxi-gá-dé tnúhu ndee iní cundecu ndíhi-ndo.

²³ Te xicáⁿ táhú-í núú Tãtá-ó Dütú Ndiöxí ndíhi núú Xítóhó Jesucristú sá ncháá nchòhó ñáyiu ndècu ndíhi-í ichi-gá sá dñu-gá ná cádá te ío váha cuu iní-ndó cùndecu-ndo, te ducaⁿ ïo cuu iní tnáhá-ndó, te ío quíndáá iní-ndó-gã. ²⁴ Te nchòhó ío cùu iní-ndó Xítóhó Jesucristú, te ñá túú dàña ndéé-ndó cùu iní-ndó-gã. Te mee Yá Ndiöxí ío na chindee chitúu ñaha-gã xii-ndo. Te ducaⁿ na cunduu. Te ío chí cádá ndèe iní-nã vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ FÌLIPÚ

Té Păblú cādūha-dé tutú quihiⁿ ndaha ñáyiu quide ndáá xñdecu ichi Xítóhó Jesucristú ndécú ñuú Fìlipú

¹ Yúhú té Păblú ndihi té Timùteú cùu-ndí cue téé xínu cuechi núú Xítóhó Jesucristú, te tëndaha-ndí tutú-a véxi ndaha nchòhó cue téé yìndaha nchaa ñáyiu ndècu ichi Xítóhó Jesucristú, ndihi cue téé chindee ñaha xii-ndo, ndihi nchaa dava-gá ñáyiu xiquide ndáá ndécú ìchi-gá ñuú Fìlipú. ² Te xicáⁿ táhù-í núú Tătá-ó Dütú Ndiöxí ndihi núú Xítóhó Jesucristú sá ná chindee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

Té Păblú cāháⁿ ndihi-dé Yă Ndiöxí cuendá nchaa ñáyiu ndècu ichi-gá

³ Te ndi tnahá òré ndácú iní ñáhà-í xii-ndo, te ndácáⁿ táhù-í núú Tătá-ó Dütú Ndiöxí sá ndécú-ndó ìchi-gá. ⁴ Te ndi tnahá òré ducaⁿ quide-í te ío cùdí iní-í cāháⁿ ndihi-í-gá cuendá-ndó. ⁵ Chi ndéé cùtnhá ní sándáá iní-ndó-gá ní ngúita-ndo tnahá-ndó quide váha-ndo ndècu-ndo cuendá sá quindáá iní ñáyiu tnúhu Xítóhó Jesucristú. ⁶ Te yúhú sàni ndáá iní-í sá Yă Ndiöxí Yaá ní quesaha chindee ñaha xii-ndo quide váha-ndo ndècu-ndo, te ñu-ndi-gá chindee ñaha-gá xii-ndo càda váha-ndo cùndecu-ndo ndéé ná sáa nduu quixi tucu Xítóhó Jesucristú. ⁷ Te ducaⁿ tnàhí tàú-xi caní iní-í sá cùu-xí-ndó, chí ío cùu iní ñáhà-í xii-ndo. Te tnàhá-ndó ío chindee chitúu ñaha Yă Ndiöxí xii-ndo ndècu-ndo, te ñu-ndi ducaⁿ chindee ñaha-gá xii-ndo tnàhá-ndó cuèi vitna yìhi-í vecaá, te ñu-ndi ducaⁿ chindee ñaha-gá xii-í cuèi òré cuáhàⁿ-í núú cuè ñáyiu ñá túú tnàhá iní tnúhu-gá, chí nìhí-í tnúhu nàdanchocáva-í ñuu ná tnúhu

cāháⁿ-yu cuendá-gá, te nchaa ñáyiu xāháⁿ-í xii-yu sá tnúhu-gá cùu-xí tnúhu ndáá cuiti. ⁸ Te mee Yă Ndiöxí nāhá ndáá-gá sá yùhú ío cùu iní ñáhà-í xii-ndo dàtná cùu iní ñáhà mèe Xítóhó Jesucristú xii-o. ⁹ Te xicáⁿ táhù-í núú Yă Ndiöxí sá díú-gá ná chindee ñaha-gá xii-ndo te uuⁿ-gá cuita cuu iní tnàhá-gá-ndó quíhíⁿ, te ducaⁿ ío váha cuita cutnùní iní-ndó nchaa nacúaa sàni iní-gá cada-ndo, te ducaⁿ ío váha cuita cutnùní tucu iní-ndó nàcuáa cundecu-ndo. ¹⁰ Te ducaⁿ cùtnùní tucu iní-ndó nchaa sá ío-gá váha xini ñuhu-xi cada-ndo, te ducaⁿ te cuu-ndo ñáyiu cada mee-ni sá vāha, te ducaⁿ ñà túú tnàhí ná cùmání-ndó núú Yă Ndiöxí ndéé ná sáa nduu quixi tucu Xítóhó Jesucristú. ¹¹ Te ñu-ndi Xítóhó Jesucristú chindee ñaha-gá xii-ndo càda-ni-ndo nchaa núú sá vāha nàcuáa cuení Yă Ndiöxí. Te sá dúcáⁿ ná càda-ndo te ío cada càhnu-ndo-gá, te nchaa dava-gá ñáyiu cāháⁿ váha-yu cuendá-gá.

Xítóhó Jesucristú ío cùnuu-gá ndécú ndihi-gá té Păblú

¹² Te nchaa nchòhó ñáyiu ndècu ndihi-í ichi Xítóhó Jesucristú na cāchí tnúhu-í xii-ndo sá úúⁿ-gá tá xité nuu tnúhu-gá vitna yìhi-í vecaá. ¹³ Te nchaa cue téé cùu sandadú xñdecu vechiúⁿ núú ndécú téé cùnuu xini-güedé sá sá cuendá sá cāháⁿ-í tnúhu Xítóhó Jesucristú duha yìhi-í vecaá, te ñu-ndi ducaⁿ sá xini nchaa dava-gá ñáyiu sá sá cāháⁿ-í tnúhu-gá duha yìhi-í vecaá. ¹⁴ Te cuendá sá dúhá yìhi-í vecaá xíⁿ ío-gá vai ñáyiu ndècu ichi Yă Ndiöxí ta cùtnùní-gá iní-yu sá cùu-gá ñⁿ Yaá ío quide ndáá, te uuⁿ-gá tá cùyíⁿ-yu cāháⁿ-yu tnúhu-gá, te ñá túú tnàhí-gá yùhú-yu cāháⁿ-yu.

¹⁵ Te na cāchí-í tnúhu ndáá-í xii-ndo sá dáva ñáyiu cāháⁿ-yu tnúhu Xítóhó Jesucristú cuendá-ni sá cùu cuèdú iní ñáhà-yu xii-í sá ío chindee ñaha-gá xii-í cāháⁿ-í tnúhu-gá. Te ducaⁿ quidé-yu chí cuení-yu nàá ndihi ñáhà-yu xii-í, dico dáva-yu chí ío váha sàni iní-yu cāháⁿ-yu tnúhu-gá.

16-17 Te ñáyiú-áⁿ càháⁿ-yu tnúhu-gá chi cùu iní ñáhá-yu xii-í, te sa nàhá-yu sá sã cuendá sá càháⁿ váha-í cuendá tnúhu-gá núú ñáyiú ñá túú tnàhá iní tnúhu-gá, cuendá xiáⁿ yíhì-í vecaá. Te dava-gá-yu càháⁿ-yu tnúhu Xítohó Jesucristú cuendá-ni sá cuiní-yu cuu sá vâha xii mée-yu, te ñá díú sã càháⁿ-yu cuendá sá sání vâha iní-yu. Te ducaⁿ quidé-yu chi cuendá cuiní-yu sá nãndi-gá cada ñaha-güedë xii-í. 18 Dico ío cudíí iní-í sá càháⁿ-yu tnúhu Xítohó Jesucristú cuëi cùu váha iní-yu àdi ñá túú cùu váha iní-yu càháⁿ-yu.

Te ñu-ni ducaⁿ cudíí iní-í núú cuaháⁿ núú véxi. 19 Te cùtnuní iní-í sá sã cuendá nchaa sá quidé ñaha-güedë xii-í, cuendá xiáⁿ cada váha ñaha Yã Ndiöxí xii-í, chi nchòhó ío càháⁿ ndihì-ndo-gã cuendá-í, te Espiritú ní taxi Xítohó Jesucristú ndécú ndihì-o ío chindee ñaha-xi xii-í. 20 Te cuiní-í sá ñá túú tnàhí ná cumáni-í núú Yã Ndiöxí cuendá sá vã cúú càháⁿ núú-í, te cùtnuní iní-í sá díú-gã chindee ñaha-gá xii-í. Te cuiní tucu-í sá ío cuyí-í càháⁿ-í tnúhu-gá vitna dàtná tá quide-í véxi, te ducaⁿ ío cada nínu-í Xítohó Jesucristú cuëi vitna nini ndècu-í ñuyíú-a te cuëi na cùú-í ducaⁿ-ni càda nínu-í-gá. 21 Te nini ndècu-í ñuyíú-a te Xítohó Jesucristú ío cùnnu-gá ndécú ndihì ñaha-gá xii-í, te na sàá nduu cùú-í te ío-gá váha tnàhá-í chi nucúndecu-í ndihì-gá. 22 Te núú na cùndecu-gá-í ñuyíú-a te cada-gá-í chiúⁿ sá cúú-xí Yã Ndiöxí, te ñá cùtnuní iní-í nása cada-í núú sá cùndècu-í àdi sá cùú-í. 23 Te ío vâi sani iní-í te cuiní-í cuú-í chi ío-gá váha cundecu-í núú ndécú Xítohó Jesucristú. 24 Dico sá cúú-xí nchòhó chi ío xini ñuhu-xi cundecu-í. 25 Te cùtnuní ndáá iní-í sá ñⁿ tnúhu ndáá càháⁿ-í, te cùtnuní tucu iní-í sá cùndècu-ni-í cundecu ndihì ñaha-í xii-ndo nchaa-ndo cuendá chindee ñaha-í xii-ndo cuita quindáá-gá iní-ndó Xítohó Jesucristú quíhⁿ, te ducaⁿ ío cudíí iní-ndó cùndecu-ndo. 26 Te ducaⁿ te uuⁿ-gá cachí-ndó sã ío càhnu cuu Xítohó Jesucristú cuendá

sá ñí dácãcu ñaha-gã xii-í ndécú ndihì ñaha-í xii-ndo.

27 Te xini ñuhu-xi cada-ndo nchaa nacuaá càháⁿ tnúhu Xítohó Jesucristú. Te núú ní ndacu-í véxi coto ñaha-í xii-ndo, te dàvá-áⁿ quini ndáá-í sá ndécú-ni-ndó ìchi Xítohó Jesucristú. Dico núú ñá túú ní ndacu-í quixi coto ñaha-í xii-ndo ña, te ñu-ni níhì-í tnúhu sá ndécú-ni-ndó ìchi-gá, te níhì tucu-í tnúhu sá ñⁿ-ní cùu-ndo ndecu-ndo, te níhì tucu-í tnúhu sá ñⁿnuu nducu ndee-ndo caháⁿ-ndó tnúhu Yã Ndiöxí núú ñáyiú, tnúhu sá sàndáá iní-ndó. 28 Te ñá túú yuhú-ndó nchaa sá quidé ñaha ñáyiú cùu úhú iní ñáhá xii-ndo, te sá dúcáⁿ quide-ndo ñá túú yuhú-ndó nchaa sá quidé ñahá-yu xii-ndo, te ndixi túu iní-yu sá nchòhó ndécú-ndó ñⁿ ìchi núú nánihí tàhú-ndó, te ñáyiú-áⁿ cuita nihnú-yu, chi ducaⁿ ñí cachí Yã Ndiöxí cunduu. 29 Te mee Yã Ndiöxí ní taxi-gá tnúhu ndee iní sá quindáá iní-ó Xítohó Jesucristú, te ñá díú-ní sã quindáá iní-ó-gã chi tnàhá ndoho-o cuendá-gá. 30 Te tnàhá nchòhó ndòhó-ndó cuendá-gá vitna, te nchòhó ní xiní núú-ndó nàcuáa ní ndoho-í, te vitna nihí-ndó tnúhu nchaa nàcuáa ndòho tucu-í.

2

Xítohó Jesucristú ñá túú ní quide nínu-gá mée-gã dico Yã Ndiöxí ní quide nínu ñaha xii-gá

1 Te Xítohó Jesucristú dácàhu iní ñáhá-gã xii-ndo nàcuáa cundecu-ndo, te cùu iní ñáhá-gã xii-ndo nàcuáa cuu váha iní-ndó cùndecu-ndo, te ndècu ndihì-ndo Espiritú Yã Ndiöxí, te ío cùndahú iní tnàhá-ndó. 2 Te xiáⁿ núú càháⁿ-í dòho-ndo sã ío cuu ñⁿnuu-ni-ndo cùndecu-ndo nacuaá ío-gá cudíí iní-í, te ñⁿ-ni cùu iní tnàhá-ndó, te ñⁿ-ni càni iní-ndó, te ñⁿ-ni càda-ndo. 3 Te vã cáda nínu-ndo mée-ndo nducu-ndo mee-ni sã cúú-xí mée-ndo, chi cunduu ndàhú iní-ndó, te cani iní-ndó sã tnàha ñáyiú-ndo ío-gá cùnùú-yu dàcúúxí mée-ndo. 4 Te ñí vã cáni iní-ndó nducu-ndo mee-ni sã váha sã cúú-xí mée-ndo, chi

nducu-ndo sã cúu-xí tnàhá cuèndá tnàha ñáyiu-ndo.

⁵ Te ío váha cani iní-ndó nàcuáa cundecu-ndo dàtná quidé mée Xítohó Jesucrístú. ⁶ Te ìⁿ-ni cùu Xítohó Jesucrístú ndihí Yá Ndiöxí. Te cuèi ducaⁿ dico mee Xítohó Jesucrístú ní sani iní-gá sá ñà túú cùyica cundecu-gá taxi tnùní-gá ndihí Yá Ndiöxí. ⁷ Te ní dàñá-gã sá cùnùu-gá andiu te ní quixi-gá ñuyíú-a ní cuu-gá ìⁿ ñáyiu, te ní quide-gá dàtná quidé ìⁿ téé xínu cuechi. ⁸ Te ní cuu-gá ìⁿ téé dàtná ndãa cue téé xíndecu ñuyíú-a, te ní cuu-gá ìⁿ téé ío ndàhú iní-xi chí ñà túú ní quide nínu-gá mée-gã, te ní sándáá iní-gá ní quide-gá nchaa nàcuáa ní xáhaⁿ Yá Ndiöxí xii-gá cùtnàhá ní quixi-gá ñuyíú-a. Te sá dúcáⁿ ñí sándáá iní-gá xíãⁿ ní xíhí-gá núú cùrúxí. ⁹ Te xíãⁿ ío ní quide nínu ñaha Yá Ndiöxí xii Xítohó Jesucrístú cuèndá ío cunuu-gã. Te ní xáhaⁿ Yá Ndiöxí xii Xítohó Jesucrístú sá cúu-gã Xítohó nchaa ñáyiu ndècu ñuyíú-a. ¹⁰ Te ducaⁿ ñí quide Yá Ndiöxí cuèndá nchaa Espíritú ndécú àndiu, ndihí nchaa ñáyiu ndècu ñuyíú-a, ndihí nchaa ñáyiu ní xíhí ngüñí xítí-yu ndihí nchaa espíritú-áⁿ te cachí-yu ndihí-xi sá ío càhnu cuu Xítohó Jesucrístú. ¹¹ Te ncháa-yu cachí-yu sá Xítohó Jesucrístú cúu-gã Yaá táxi tnùní. Te sá dúcáⁿ càdá-yu, te quide cahnú-yu Dútú Ndiöxí.

Ñáyiu ndècu ichi Xítohó Jesucrístú cúu-yu dàtná ìⁿ ñuhú

¹² Te xíãⁿ nùu nchaa nchòhó ñáyiu ío cùu iní-í cuìní-í sá quèndáá iní ñáhá-ndó xii-í dàtná ní quide-ndo cùtnàhá ní xíndecu ndihí ñaha-í xii-ndo, chí dàvá-áⁿ ñà túú tnàhí ní dàña ndeé-ndó ñí sándáá iní ñáhá-ndó xii-í. Te cuìní-í sá úúⁿ-gã quèndáá iní ñáhá-ndó xii-í vitna ñà túú ndècu ndihí ñaha-í xii-ndo. Te ío nducu ndeé-ndo cada-ndo nchaa nàcuáa tàú-xi cunduu ndeé ná sáa nduu ndùu táhú-ndó cùndecu-ndo ndihí Xítohó Jesucrístú, te ío canehe-ndo sã yíñuhu núu-gã. ¹³ Te Yá Ndiöxí ío váha

dàcahu iní ñáhá-gã xii-ndo càda-ndo nchaa nàcuáa cuìní mée-gã, te ñu-ni mee-gã chíndèe ñaha-gã xii-ndo dùcaⁿ quide-ndo.

¹⁴ Te vá cání iní-ndó ñà tnúhu cáháⁿ-ndó cuèndá ñáyiu, te ní ñà túú ñàndi tnúhu cùtnàha-ndo ndihí-yu, ¹⁵ te ducaⁿ te cuu-ndo ñáyiu ñà túú cuèchi-xi núú Yá Ndiöxí. Te nchòhó ñáyiu cùu déhe Yá Ndiöxí, ñà túú tnàhí-gá ná cumání-ndó núu-gã ñini ndècu-ndo tnuú nchaa ñáyiu ndècu ichi cuehé ichi duha ñuyíú-a, ñáyiu cuihna iní-xi. Te cuu-ndo dàtná chódíní sã dáyéhé niú nee, ¹⁶ te ducaⁿ chí dàcuaha-ndo ñáyiu tnúhu Yá Ndiöxí tnúhu sá cáháⁿ nàcuáa naníhí táhú-yu. Te núu ducaⁿ-ni na càda-ndo te òré ná sáa nduu càda ndáá Xítohó Jesucrístú nchaa yíca cuèchi ñáyiu, te dàvá-áⁿ vã cúu càhaⁿ núu-í, chí ñà túú dió ducaⁿ ñí sàhni iní-í cada-í nchaa chiúⁿ ní táhú-gã. ¹⁷ Te nchòhó ío váha quide-ndo ndècu-ndo ichi Yá Ndiöxí chí sándáá iní-ndó-gã, te yúhú cahni ñaha-güedé xii-í cuèndá nchaa sá vãha quide-ó. Te xíãⁿ ío cùdúⁿ iní-í te cùdúⁿ tucu iní-í dàtná cùdúⁿ iní-ndó cuèndá nchaa sá vãha quide-ndo. ¹⁸ Te ñu-ni ducaⁿ ío chí cùdúⁿ iní dàtná cùdúⁿ iní mée-í cuèndá nchaa sá yãha-í ndécú-í.

Té Timùteú ndihí té Epafròditú

¹⁹ Te núu Xítohó Jesucrístú ná càhí-gã te ndíhi-ni tendaha-í té Timùteú quixi-dé quixi coto ñaha-dé xii-ndo nàcuáa cudúⁿ iní-ndó. Te òré ndixi-dé canaha-dé tnúhu ndixi núu nása cùu ndècu-ndo, te tnàhá yúhú ío cudúⁿ iní-í tucu. ²⁰ Te núu ncháá cuè téé ndècu ndihí-í te ìⁿdii-ni té Timùteú-a cùu-dé téé ío váha sàni iní-xi dàtná sání iní-í, chí ñu tnàhí-ni-dé ío sàni iní-dé nùu nása ndècu-ndo. ²¹ Chí dava-gã-güedé mee-ni sã cúu-xí mée-güedé ío sàni iní-güedé, te ñà túú sàni iní-güedé cada-güedé chiúⁿ tahu Xítohó Jesucrístú. ²² Te nchòhó sa xíní-ndó sã té Timùteú-a cùu-dé ìⁿ téé quide váha chí nándi sá tá yãha-dé véxi te quide ndee iní-dé. Te cùu-dé dàtná ìⁿ déhe-í ndécú ndihí ñaha-dé

xii-í xínú cuèchi-ndí núú Xítóhó Jesucristú càháⁿ-ndí tnúhu-gá núú ñàyiú. ²³ Te òré ná cùtnuní nùu nása cada ñaha-güedě xii-í te ndíhi-ni tendaha-í-dé quixi coto ñaha-dě xii-ndo. ²⁴ Te sàni iní-í sá Xítóhó Jesucristú cada-gá te tnàhá mée-í ío ndíhi quixi coto ñaha-í xii-ndo.

²⁵ Te tnàhá sání iní-í sá ío xini ñuhu-xi tendaha-í té Epafròditú té ndècu ndíhi-o ichi Xítóhó Jesucristú ndixi coto ñaha-dě xii-ndo, chi tnàhá-dé quidé-dé chiúⁿ-gá te quide ndee iní-dé tnàhá-dé nándi yáha-dé sá cuendá-gá, te diu mee-ndo nǐ tendaha-ndo-dě véxi-dé cuendá coto ñaha-dě xii-í. ²⁶ Te ducaⁿ cuini-í tendaha-í-dé ndixi-dé chi mee-dě ío sàni iní-dé ndixi càháⁿ ndíhi ñaha-dě xii-ndo, te ío ndíhú iní-dé sá nǐ níhí-ndó tnúhu sá cùhú-dé ní cùu. ²⁷ Te ndáá sá nǐ cuhú-dé chi luha ndiquiⁿ-ná cuú-dé ní cùu, dico Yá Ndiöxí ní cundahú iní ñáhá-gǎ xii-dé ní quide tátna ñaha-gǎ te ní ndúha-dé. Te ñá díú-ní mée-dé ducaⁿ nǐ cundahú iní ñáhá-gǎ xii-dé chi tnàhá yúhú ío ní cundahú iní ñáhá-gǎ xii-í, chi núu nǐ xíhí-dé te ío-gá ndíhú iní-í ní cùu. ²⁸ Te xǎⁿ ío ndíhi cuini-í tendaha-í-dé ndixi-dé cuendá òré nasáá-dé núú-ndó te ío cudíí iní-ndó, te ducaⁿ yúhú ñá túú-gǎ ná caní iní-í. ²⁹ Te òré nasáá-dé te ío cudíí iní-ndó nàqueheⁿ cuendá-ndó-dě, te ducaⁿ ío ndacáⁿ táhú-ndó nùú Xítóhó Jesucristú cuendá-dé. Te ío canehe-ndo sá yíñuhu núú nchàa cue téé quide datná quidé-dě. ³⁰ Chi téé-a sa luha ndiquiⁿ-ná cuú-dé ní cùu sá xínú cuèchi-dé núú Xítóhó Jesucristú, te ní sani iní-dé sá ñà túú nǎ cada-xi cuèi na cùú-dé ní quide-dé nchaa chiúⁿ sá cúmǎní cada-ndo cuendá-í ní cùu.

3

Ñáyiú cundáá núú Yá Ndiöxí

¹ Te vitna nchaa nchòhó ñáyiú ndècu ndíhi-í ichi Xítóhó Jesucristú càháⁿ ndàhú-í núú-ndó sá ío cudíí iní-ndó sá yíndàha ñaha-gá xii-ndo. Te yúhú ñá túú cùu dusaⁿ-í tee

tucu-í nchaa tnúhu sá sà ní dánèhé ñáhá-í xii-ndo, chi cùu-xi tnúhu sá ío chindee ñaha-xi xii-ndo. ² Te ío quíhi iní-ndó vǎ cadá cuendá-ndó nǐ ñⁿ tnúhu càháⁿ cue téé ío cuihna iní-xi ñá túú tnàhí cuini cada sá vǎha, chi cue téé-áⁿ néhé-güedě iní iná chi cǎchí-güedé sá ncháá cue téé xini ñuhu-xi cuáha-güedé seña ñⁿ-güedé cuendá ducaⁿ cùdiu-güedé núú Yá Ndiöxí. ³ Dico nchoo chi cùdiu-o núú Yá Ndiöxí cuèi dava-o sá ní ngúndecu seña ñⁿ-o te dava-o ñáhá, chi Espiritú-gá chíndèe ñaha-xi xii-o quide-o nchaa nacuáa tàú-xi cunduu cuendá cuu cǎhnu-gá. Te ío cudíí iní-ó cǎchí-ó sǎ ío cǎhnu cuu Xítóhó Jesucristú, te ñá túú sàni iní-ó sǎ sǎ cuendá nchaa sá vǎha quide-o cùdiu-o núú Yá Ndiöxí. ⁴ Te núu dìcò cuendá nchaa sá vǎha quide-o cùdiu-o núú Yá Ndiöxí, te yúhú sa ama-gá cùdiu-í núú-gǎ cuendá nchaa sá nǐ quide-í ní cùu te núu dìcò ducaⁿ. Te ío cue téé cǎchí-güedé sá cùdiu-güedé núú Yá Ndiöxí cuendá nchaa sá vǎha quide-güedé. Te yúhú uuⁿ-gá ducaⁿ càháⁿ-í nùu dìcò sá cúú chi yúhú ní xídó-gǎ-í ní quide-í dàcúúxí dàva-gǎ-güedé. ⁵ Te núú ùná-ni nduu sá nǐ cacu-í te ní sáha-güedé seña ñⁿ-í, te yúhú cùú-í téé israél, te mei ñàní tnàhá ndí Benjàmín téé ní xíndecu ndéé sanaha cùu-í. Te càháⁿ-í tnúhu hèbreú tnúhu càháⁿ tǎtà-í ndíhi nǎnà-í, te ní cundíhi-í nchaa cue téé cùu fariséú, te ní cǎnchicúⁿ nihnu-í nchaa nacuáa ní càháⁿ ndí Moisés dàtná xiquide mee-güedé. ⁶ Te yúhú ní sani iní-í sá ñⁿ ichi ndáá ndécù-í ní cùu, te ío ní cuini-í cunu cuechi-í núú Yá Ndiöxí, núu xǎⁿ nándi sá nǐ quide-í nchaa ñáyiú ndècu ichi Xítóhó Jesucristú, te vǎ yòo ñⁿ nǐ xóo cúñaha ñⁿ tnúhu xii-í cǎchí-yu sá ñà túú quide-í nacuáa ní càháⁿ ndí Moisés ní cùu. ⁷ Te nchaa sá sání iní-í sá ío nándíhi nchicúⁿ nihnu-í ní cùu, ní cutnùní iní-í sá ñà túú tnàhí chindee ñaha-xi nacuáa cundáá-í núú Yá Ndiöxí, núu xǎⁿ duuⁿ duuⁿ ní xehndé iní-í sá vǎ chíndèe ñaha-xi cuendá sá nǐ cuini-í cundecu ndíhi-í Xítóhó Jesucristú. ⁸ Te nchaa sá cǎchí

ñáyiú chindee ñaha cundáá-ó nũú Yă Ndiõxí ní cutnùní iní-í sá ñà túú chindee ñaha-xi. Te yúhú ní cutnùní iní-í sá ïo-gá váha tnahá tnúhu-o ndìhi Xítohó Jesucristú. Te nchaa sá sání iní-í chindèe ñaha xii-í ní cùu, ñá túú-gă sândáá iní-í sá chindèe ñaha-xi vitna chi ní cutnùní iní-í sá ñà túú nândìhi-xi. Te ducaⁿ quidè-í ñá túú-gă sândáá iní-í nchaa xiăⁿ sá chindèe ñaha-xi, chi cuiní-í sá úúⁿ-gă cuita tnahá tnúhu-í ndìhi Xítohó Jesucristú quíhíⁿ, ⁹ te cuu ìⁿnuu-í ndìhi-gă, te ducaⁿ-ni cundáá-í núú Yă Ndiõxí dàtná cundáá-í vitna, dico ñá díú cuendá sá nchícúⁿ nihnu-í nàcuáa ní cáháⁿ ndíi Moisés ní cùu, chi cuendá sá sândáá iní-í Xítohó Jesucristú. Te Yă Ndiõxí ní quide-gă cundáá-í núú-gă, te ducaⁿ chi ní sândáá iní-í Xítohó Jesucristú. ¹⁰ Te cuiní-í cutnùní iní-í nchaa nàcuáa sàni iní Xítohó Jesucristú, te cuiní-í sá ïo chindee ñaha-gă, te ñu-ni-gă cúú-gă Yaá ní xíhí te ní ndoto-gă, te ducaⁿ cuiní-í cada-gă cuendá cada-í nchaa nàcuáa cuiní-gă. Te cuiní-í tnahá-í ndoho-í dàtná ní ndoho-gă. Te yúhú cuiní-í sá vă cadà-í ní ìⁿ sá ñà túú tnahá iní Yă Ndiõxí, chi ñu cuendá-áⁿ ní xíhí Xítohó Jesucristú. ¹¹ Te cuiní-í sá Yă Ndiõxí cachí-gă te tnahá-í ndoto na sáa nduu ndòto nchaa ñáyiú sa ní xíhí ní xíndecu ichi-gă.

Cada-o nchaa nàcuáa tãú-xi cunduu cuendá níhí-ó sá ndúú tãhú-ó

¹² Te cumání-gă cada-í nchaa nàcuáa cáháⁿ-í-a, te cumání-gă cada-í nchaa nàcuáa cáháⁿ Yă Ndiõxí cuendá sá ñà túú-gă ná cumání-í núú-gă. Te ïo ndùcu ndee-í nchícúⁿ nihnu-í quidè-í nàcuáa ducaⁿ ñà túú-gă ná cumání-í núú-gă, chi ñu cuendá-áⁿ ní cáháⁿ ñáhá Xítohó Jesucristú xii-í. ¹³ Te nchaa nchòhó ñáyiú ndècu ndìhi-í ichi Xítohó Jesucristú càchí tnúhu-í xii-ndo sá cùnùní ndáá iní-í sá vitná cumání-gă cada-í nchaa nàcuáa ñá túú-gă ná cumání-í núú-gă. Te ní níhí-í ìⁿ sá ïo xini ñuhu-xi cada-í te xiăⁿ quidè-í, te ñá túú-gă quidé cuendá-í nchaa sá ní xóo cada-í, te ïo ndùcu ndee-í quidè-í nchaa nàcuáa

cáháⁿ Yă Ndiõxí. ¹⁴ Te ndùcu ndee vihi-í nchícúⁿ nihnu-í quidè-í nchaa nàcuáa cáháⁿ-gă, te ñu-ni ducaⁿ càda-í ndéé ná sáa nduu sáa-í núú ndécú-gă taxi-gă sá ndúú tãhú-í. Te ducaⁿ tnahá sa ní cáháⁿ ñáhá-gă xii-o cundecu-ndìhi-gă, te ducaⁿ ní cáháⁿ ñáhá-gă xii-o sá cuendá Xítohó Jesucristú chi tnahá tnúhu-o ndìhi-gă.

¹⁵ Te nchaa nchòhó ñáyiú quide váha ndècu ichi Yă Ndiõxí xini ñuhu-xi caní iní-ndó dàtná sání iní-í-a, àdi núú daya-ndo ñà túú sàni iní-ndó dàtná sání iní-í-a, dico mee Yă Ndiõxí dandixi túú-gă iní-ndó te cutnùní iní-ndó nàcuáa cada-ndo. ¹⁶ Te xini ñuhu-ni-xi cada-o nchaa nàcuáa ta quide-o véxi.

¹⁷ Te nchaa nchòhó ñáyiú ndècu ndìhi-í ichi Xítohó Jesucristú cáháⁿ-í dòho-ndo sá cànchícúⁿ nihnu-ndo càda-ndo datná quidè-í. Te cundehe-ndo nàcuáa quide nchaa ñáyiú sa nchícúⁿ nihnu nchaa nàcuáa dānehé ñáhà-í xii-ndo cuendá ducaⁿ càda-ndo tnahá-ndó. ¹⁸ Te sa ní cuu vâi xito cachí tnúhu-í xii-ndo sá ïo ñáyiú ñá túú tnahá cùu váha iní-xi sá ní xíhí Xítohó Jesucristú núú cùrúxí cuendá sá nánihí tãhú-ó. Te ndìhi ndute núú-í dāndācu iní ñáhà-í xii-ndo cuendá-yu. ¹⁹ Te sáa nduu te nchaa ñáyiú ducaⁿ xíquide-áⁿ cuita nihnú-yu, chi mee-ni nchaa sá cuèhé sá dúhá ñuhu iní-yu te ñu-ni nchaa xiăⁿ cùnùu quidé-yu, te cucahaⁿ núú-yu cuendá nchaa sá quidé-yu núú dicó sá cúú, dico ñáhá chi da quide cahnú-yu mée-yu cuendá nchaa xiăⁿ. Te mee-ni nchaa sá ïo ñuyú-a ñuhu iní-yu. ²⁰ Dico nchoo chi andíu ndècu núú cúú ñúú-ó, te ndètu cahnú-o sáa nduu quixi tucu Xítohó Jesucristú nacuaca ñaha-gă xii-o. Te ñu-ni-gă cúú-gă Yaá ní dácācu nihnu ñaha xii-o núú ùhú núú ndàhú. ²¹ Te yiqui cùnù-ó chi vá cúdì-xi cundecu-xi dàtná cáá-xí vitna, dico mee Xítohó Jesucristú nadama-gă yiqui cùnù-ó te ndada-gă dàtná ní nduu yiqui cùnù mée-gă cùnàhá ní ndoto-gă. Te ducaⁿ càda-gă chi ndàcu-gă quidé-gă nchaa sá váha càchí iní-gă, te ducaⁿ tàxi tnuní-gă nchaandí tũhú sá ïo.

4

Ío cudíí ìní-ó sǎ ndécú-ó ìchi Xítóhó Jesucristú

¹ Te nchaa nchòhó ñáyiú ío cùu iní-í ndécú ndìhi-í ìchi Xítóhó Jesucristú ío cuìní-í cáháⁿ ndìhi ñaha-í xii-ndo. Te ío cudíí ìní-í cuèndá nchaa sá vǎha quide-ndo chí ñá túú ní xíta chiuⁿ Yá Ndiöxí ní quide-í sá cúú-xí-ndó, te ñu-ndò nchòhó ñáyiú ío cùu iní-í càháⁿ-í dóho-ndo sǎ cǎnchícúⁿ nihnu-ni-ndo ìchi Xítóhó Jesucristú.

² Te yòhó tá Vòdiá ndìhi yòhó tá Sǐntiqué càháⁿ ndàhú-í núú-ndó sǎ cúú ñⁿnuu-ndo cundecu-ndo ìchi Xítóhó Jesucristú. ³ Te yòhó té cùndìhi-í quide ndáá quidé nchaa chiuⁿ quide-í, càháⁿ ndàhú-í núú-n sǎ chǐndèe tnúhu-n úú ñáyiú ñí-áⁿ cuèndá sá ná cùu ñⁿnuú-yu cundecu-yu, chí cùtnàhá ní xǐndecu ndìhi ñàhá-yu xii-í ío ní chindee ñàhá-yu xii-í, ndìhi té Clémenté, ndìhi nchaa dava-gá-yu ní quide-ndí chiuⁿ Xítóhó Jesucristú, te nchaa ñáyiú-áⁿ sa yòdo tnuní-yu núú tütú Yá Ndiöxí sá ndúú tǎhú-yu cundecu-yu ndìhi-gá ní caa ní quíhíⁿ.

⁴ Te nchaa-ni nduu ío cudíí ìní-ndó sǎ ndécú-ndó ìchi Xítóhó Jesucristú. Te càháⁿ-ni tucu-í dóho-ndo sǎ cudíí ndisa ìní-ndó! ⁵ Te ío váha cuu iní-ndó càháⁿ ndìhi-ndo ñáyiú cuèndá ná cùtnuní iní-yu sá cúú-ndó ñáyiú váha iní-xi, chí sa ta cùyatni nduu quixi tucu Xítóhó Jesucristú.

⁶ Te ñá túú tnàhí ná caní iní-ndó te núu nása cùu ndecu-ndo, chí cáháⁿ ndìhi-ndo Yá Ndiöxí cuèndá sá ná chindee ñaha-gá xii-ndo. Te ío ndacáⁿ tǎhú-ndó núú-gǎ. ⁷ Te núu ducaⁿ na càda-ndo te Yá Ndiöxí cada-gá te ío váha cuu iní-ndó cùndecu-ndo. Te nchoo ñáyiú ñá túú cùtnuní iní-ó nása quide-gá ndéé ducaⁿ ío váha cùu iní-ó, te ducaⁿ ío váha cùu iní-ó chí cùu ñⁿnuu-o ndìhi Xítóhó Jesucristú.

Mee-ni sǎ vǎha cuhuⁿ iní-ó

⁸ Te càháⁿ ndàhú tucu-í núú nchaa nchòhó ñáyiú ndècu ndìhi-í ìchi Xítóhó Jesucristú sá méé-ní sǎ vǎha cuhuⁿ iní-ndó. Te xǐni ñuhu-xi cuhuⁿ

iní-ndó mèe-ni nchaa tnúhu ndáá, ndìhi nchaa tnúhu yǐñùhu, ndìhi nchaa tnúhu sá ío cudíí ìní-ó, ndìhi nchaa tnúhu sá ío vii ío váha cuáháⁿ, ndìhi nchaa tnúhu sá ñà túú ñùhu tnahá tnúhu cuèhé, ndìhi nchaa tnúhu sá cǎchí ñáyiú váha, ndìhi nchaa dava-gá tnúhu sá sání ìní méé-ndó sǎ ío váha te ñu-ndò nchaa xǐáⁿ cuhuⁿ iní-ndó.

⁹ Te cùtnàhá ní xǐndecu ndìhi ñaha-í xii-ndo ní dánèhé ñàhá-í nàcuáa cada-ndo te ní sándáá iní-ndó. Te xǐáⁿ càháⁿ-í dóho-ndo sǎ vǎ dáñá ndéé-ndó càda-ndo, te ñu-ndò ducaⁿ vǎ dáñá ndéé-ndó càda-ndo nchaa nacuáa ní quide-í ní xǐni-ndó. Te núu ducaⁿ na càda-ndo te Yá Ndiöxí Yáa quidé ío váha cùu iní-ó ndècu-o cundecu ndìhi ñaha-gá xii-ndo.

Ñáyiú ñuú Filipú ndécú ìchi Xítóhó Jesucristú sǎñàhá-yu sá ndúú tǎhú tǎ Pǎblú

¹⁰ Te cudíí víhí ìní-í ndacáⁿ tǎhú-í núú Xítóhó Jesucristú sá ní ndacu iní ñàhá-ndó xii-í, dico ñá díú sǎ ñà túú ñùhu iní ñàhá-ndó xii-í chí dǐcó sá ñá ñíhí-ndó nàcuáa cada-ndo chindee ñaha-ndo xii-í ní cùu. ¹¹ Te ñá díú sǎ dúhá càháⁿ-í te caní iní-ndó sǎ cǎchí tnúhu-í xii-ndo sǎ ío ñⁿ sá cùmání xii-í, chí yúhú cùu váha-ni iní-í núu ío xii-í àdi ñá túú ío. ¹² Te xǐní-í cunduu ndàhú-í, te xǐní-í cunduu cuica-í, te xǐní-í caxi-í ndahá xǐtí-í, te xǐní-í cuú-í docó, te xǐní-í nàcuáa quide-xi oré ñá túú vèdana ná ndécú ndìhi-o, te xǐní-í nàcuáa quide-xi oré xidó ndécú ndìhi-o. Te ducaⁿ ní cutúha-í quide-í cuèndá nchaa nàcuáa ta yǎha-í véxi. ¹³ Te nchaa ndacu-í quide-í chí Xítóhó Jesucristú chǐndèe ñaha-gá xii-í. ¹⁴ Te nchòhó ío váha ní quide-ndo ní cundàhú iní ñàhá-ndó xii-í ní chindee ñaha-ndo vitna ndecu ndìhi-í tnúndòho.

¹⁵ Te nchòhó cue ñáyiú ñuú Filipú sa ñaha-ndo nacuáa ní cuu cùtnàhá ní ngúíta-í càháⁿ-í tnúhu Xítóhó Jesucristú distritú Macèdoniá, te cùtnàhá ní ndee-í distritú-áⁿ te ñu-ndò tnàhí-ni nchòhó ní taxi-ndo sǎ ndúú tǎhú-í, te nchaa ñáyiú ndècu ìchi Xítóhó Jesucristú dava-gá xichi ñá túú tnàhí

ni chindee ñahá-yu xii-í. ¹⁶ Te cuëi cùtnàhá ní xíndecu-í ñúú Tesalónica títí xito ní tendaha-ndo sã ndúú tãhù-í sã ñí cutnùní iní mée-ndó ñí xini ñùhu-í. ¹⁷ Te vá cãní iní-ndó sã sã dúhá càháⁿ-í te cuini-í nãndi-gá taxi táhú-ndó, te duha càháⁿ-í chi Yã Ndiöxí ío-gá vãi sã váha cada ñaha-gã xii-ndo sã dúcãⁿ quide-ndo. ¹⁸ Te ní xídó vãi nchaa sã xini ñùhu-í ndécú ndìhi-í vitna, te ducaⁿ ño vãi sã ndécú ndìhi-í ní cuu chi ní tendaha tucu-ndo sã ndúú tãhù-í véxi ndìhi té Epafròditú. Te táhú-a cùu-xi datná ñⁿ táhú sã ñí sãha-ndo mée Yã Ndiöxí, te cùu vii cuu váha iní-gá sã dúcãⁿ ñí quide-ndo. ¹⁹ Te núu ná cúú sã xini ñùhu-ndo, te mee Yã Ndiöxí ío vãi taxi-gá chi ío vãi sã ndécú ndìhi-gá, te ducaⁿ càda-gá chi ndècu ndìhi-o Xítóhó Jesucristú. ²⁰ Te vitna nchaa-o chí ná càchí-ó sã ño càhñu cuu Tátá-ó Dütú Ndiöxí ñí caa ñí quihⁿ. Te ducaⁿ na cùnduu.

Tnúhu ndéé núú ñí ndìhi-ná

²¹ Te cúñaha-ndo sã ño na càda ndee iní nchaa ñáyiu ndècu ichi Xítóhó Jesucristú, ñáyiu cùu cuendá Yã Ndiöxí. Te tnàhá nchaa ñáyiu xíndecu ichi Xítóhó Jesucristú ndécú ndìhi-í quidé ndèe iní ñáhã-yu xii-ndo. ²² Te nchaa ñáyiu cùu cuendá Yã Ndiöxí xínú cuèchi vehe té Cèsár té yíndaha cuéhé nacióⁿ quidé ndèe iní ñáhã-yu xii-ndo, ndìhi nchaa dava-gá ñáyiu cùu cuendá-gá.

²³ Te Xítóhó Jesucristú ío na chindee chitúu ñaha-gã xii-ndo nchaa-ndo. Te ducaⁿ na cùnduu. Te ío chí cáda ndèe iní-nã vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ CÒLOSÁ

Té Păblú cadúha-dé tutú quihiⁿ ndaha ñáyiú xĩndecu ichi Xítóhó Jesucristú ndécú ñuú Còlosá

¹ Yúhú té Păblú ní tendaha ñaha Yá Ndiöxí cãháⁿ-í tnúhu Xítóhó Jesucristú núú ñáyiú chi ducaⁿ cuini méé Yá Ndiöxí cunduu, te cadúha-í tutú-a ndihi té Timùteú ² cuendá daquixi-í ndaha nchòhó ñáyiú ñuú Còlosá, ñáyiú cùu cuendá Yá Ndiöxí, ñáyiú quide ndáá ndécú ichi Xítóhó Jesucristú, te xicáⁿ táhù-í núú Tãtá-ó Dütú Ndiöxí sá ío na chĩndee chitúu ñaha-gã xii-ndo, te ducaⁿ ndi nduú-gá ná cadá te ío váha cuu iní-ndó cundecu-ndo.

Té Păblú cãháⁿ ndihi-dé Yá Ndiöxí cuendá ñáyiú sãndáá iní ñáhá xii Xítóhó Jesucristú

³ Te ducaⁿ-ni cãháⁿ ndihi-ndí Yá Ndiöxí Yáá cúu Tãtá Xítóhó Jesucristú ndacáⁿ táhú-ndí núú-gã cuendá nchaa nacuáa quide-ndo ndecu-ndo, ⁴ chi ñihí-ndí tnúhu sá ío sãndáá iní-ndó Xítóhó Jesucristú, te ducaⁿ ío cùu iní-ndó nchaa ñáyiú cùu cuendá Yá Ndiöxí. ⁵ Te ducaⁿ quide-ndo chi sãndáá iní-ndó sã ndúú táhú-ndó cundecu-ndo núú ndécú Xítóhó Jesucristú, te tnúhu-áⁿ ñí ñihí-ndó cùtnhá ní xĩndedóho-ndo tnúhu ndáá tnúhu Xítóhó Jesucristú. ⁶ Te tnúhu Xítóhó Jesucristú tá xitè nuu-xi ñihí ñuyúu cuáháⁿ. Te vai ñáyiú ta sãndáá iní-yu cuáháⁿ, te ta quidé-yu mee-ni sã váha cuáháⁿ ndécü-yu ichi-gá. Te nchòhó chi ndéé cùtnhá ní tecú dóho-ndo tnúhu-gá ní quesaha-xi ta cùu vai ñáyiú ñuú-ndó tá quide ndáá-yu núú-gã cuáháⁿ. Te dàvá-áⁿ ñí cutnùní ndáá ndisa iní-ndó sã Yá Ndiöxí ío chĩndee chitúu ñaha-gã xii-ndo. ⁷ Te ducaⁿ ñí dánèhé ñáhá tè Èpafrás téé ío cùu iní-ndí, chi tnàhá-dé ío quide ndáá-dé xínú cuèchi-dé núú Xítóhó Jesucristú quidé-dě núú-ndí

dácuàha ñaha-dé xii-ndo tnúhu-gá. ⁸ Te cãchí tnúhu-dé xii-ndí sá ío cùu iní ñáhá-ndó xii-ndí, te ducaⁿ quide-ndo chi Espiritú Yá Ndiöxí chĩndee ñaha-xi xii-ndo.

⁹ Te ndéé cùtnhá ní ñihí-ndí tnúhu nacuáa quide-ndo ndecu-ndo ndéé dàvá-áⁿ ñí ngüita-ndí ñá túú dàña ndee-ndí xicáⁿ táhú-ndí núú Yá Ndiöxí cuendá-ndó sã Espiritú-gá ná tàxi-xi nchaa-gá sá cúmãní quini tnùní-ndó, te ducaⁿ te cutnùní váha-gá iní-ndó nacuáa cuini Yá Ndiöxí cada-ndo. ¹⁰ Te sá dúcáⁿ te ndacu-ndo cada-ndo mee-ni sã váha dàtná cuini Xítóhó Jesucristú cada nchaa ñáyiú ndécü ichi-gá. Te ducaⁿ ío nduu vétú iní-gá te núu na cada-ndo nchaa núú sã váha. Te ducaⁿ ío-gá cuita cutnùní iní-ndó nchaa nacuáa cuini Yá Ndiöxí cada-ndo. ¹¹ Te mee-gã cúu-gã Yáá ío cùnuu, te ñu-gá ío chĩndee ñaha-gá xii-ndo, te cudí iní-ndó cuèi nãndi na càda ñaha ñáyiú xii-ndo sã cuendá-gá, te ducaⁿ ío cunduu cãhnu iní-ndó. ¹² Te ndacáⁿ táhú-ó núú Dütú Ndiöxí chi ní quide túha ñaha-gã xii-o cuendá nduu táhú-ó cundecu-o ndihi nchaa dava-gá ñáyiú yĩndaha-gá xĩndecu núú cándoo canine ñá túú tnàhí-gá ni ñí cuèchi ío. ¹³ Te ñu-gá ní quide ní dáñá-ó nchaa ichi cuehé ichi duha núú táxi tnùní yucu ñávãha, te ní nachihí ñaha-gã xii-o ndàha Déhe-gá Yáá ío cùu iní-gá. ¹⁴ Te Déhe-gá ní xihí-gá cuendá sã nchóó cãcu nihnu-o núú ùhú núú ndàhú, te ní quide cãhnu iní-gá nchaa sã cuèhé sá dúhá ñí quide-o.

Ñáyiú cùu ñí nuu ndihi Yá Ndiöxí cuendá sá ñí xihí Xítóhó Jesucristú

¹⁵ Te Yá Ndiöxí cúu-gã Yáá vá cúu quini-ó dico Xítóhó Jesucristú chi ní quixi túu-gá ñuyú-a, te ní quide-gá nchaa nacuáa sãni iní-gá. Te dàtná-ni sãni iní-gá te ducaⁿ sãni iní Yá Ndiöxí, te Yáá-áⁿ ducaⁿ-ni ndecu-gá ndéé cùtnhá vátá ngãva-gá ñuyúu. ¹⁶ Te Xítóhó Jesucristú ní quide-gá núú Yá Ndiöxí ní cadúha-gá nchaa sá ío andiú ndihi nchaa sá ío ñuyú-a, te ní cadúha-gá nchaa sá cúu quini núú-ó

cùndehe-o, ndihi nchaa sá vǎ quini tnahí-o, ndihi nchaa espíritú cùnù vihi xinu cuechi núú Yǎ Ndiǒxí, ndihi nchaa dava-gá espíritú xínú cuèchi. Te nchaa ní cadúha Xítoho Jesucristú chi ducaⁿ ñi cachí Yǎ Ndiǒxí cunduu. Te ducaⁿ ñi cachí Yǎ Ndiǒxí cunduu cuendá nchaa cuu-xi mee-ni sǎ vǎha sá cúu-xí Xítoho Jesucristú. ¹⁷ Te Xítoho Jesucristú ducaⁿ-ni ndècu-gá ndéé cùtnahá vátá ngǎva-gá ñuyú-a, te ñu núú ndáhá-gǎ cándodo ñuyú-a, ndihi andiu, ndihi nchaandi túhú sá ío. ¹⁸ Te ñu Xítoho Jesucristú cùnù-gá yíndaha ñaha-gá xii nchaa nchoo ñayiu ndècu ichi-gá, te ñu-gá quidé-gǎ ndécú vǎha-o núú-gǎ. Te núú ncháá ñayiu ndoto ñu-gá cúu-gǎ Yaá ío càhnu cuu sa ní ndoto, te sá dúcáⁿ ñi ndoto-gá te xǎⁿ cúu-gǎ Yaá ío tàxi tnuní nchaandi túhú sá ío ñuyú-a ndihi andiu. ¹⁹ Te ducaⁿ ío cùnù-gá táxi tnùn-gá chi ndáá sá ñiⁿ-ni cuu-gá ndihi Yá Ndiǒxí. ²⁰ Te Xítoho Jesucristú ní xíhí-gá núú cùrúxí, chi ducaⁿ ñi cuini Yǎ Ndiǒxí cunduu cuendá sá vǎ yǒo ñiⁿ-gá cuu úhú iní ñáhá xii-gá cuèi ñayiu xíndecu ñuyú-a, te cuèi cue espíritú ndécú àndiu.

²¹ Te nchòhó cùtnahá vátá cùndècu-gá-ndó ichi Xítoho Jesucristú ñá túú tnahí ñi xǒo cáháⁿ ndihi-ndo-gǎ, chi mee-ni ñi xóo cuu úhú iní-ndó-gǎ, te mee-ni ncháa sá cuèhé sá dúhá ñi xóo cunuu ñi xóo cada-ndo ñi cùu, dico Xítoho Jesucristú ní quide-gá ní tnahá tnúhu-ndo ndihi Yá Ndiǒxí vitna. ²² Chi ñu cuendá-áⁿ ñi xíhí Xítoho Jesucristú núú cùrúxí cuendá sá nchóo ndù ndoo nduu nine iní-ó ngùndecu-o núú Yǎ Ndiǒxí, te ducaⁿ te ñá túú tnahí-gá ná cumání-ó núú-gǎ, te vǎ yǒo ñiⁿ-gá cachí sá nchóo ndècu cuèchi-o. ²³ Te núú vǎ dáñá ndéé-ndó quíndáá iní-ndó Xítoho Jesucristú, te cundecu-ni-ndo ichi-gá, te vǎ cání iní-ndó dàña-ndo tnúhu ndee iní ní taxi-gá ndécú ndihi-o. Te nchaa tnúhu-gá-áⁿ tá xité nuu-xi ñihí ñuyú cuáháⁿ, te ñu-ni tnúhu-áⁿ càháⁿ yúhú té Pǎblú dánèhé-í ñayiu.

Té Pǎblú yíhí ñiⁿ-de cáháⁿ-de tnúhu Xítoho Jesucristú núú ñayiu ndècu ichi-gá

²⁴ Te vitna ío cùdí iní-í ndòhò-í cuendá-ndó, chi Xítoho Jesucristú ío ní ndoho-gá cuendá-ó, te tnahá yúhú ndòhò-í cuendá nchaa ñayiu ndècu ichi-gá, dico vitna cùmání-gǎ ndoho-í cuendá-yu. ²⁵ Te Yá Ndiǒxí ní cachí-gá sá yúhú quíhí ñáhá-í xii nchaa nchòhó ñayiu ndècu ichi-gá cuendá danèhé ñáhá vǎha-í xii-ndo tnúhu-gá cuendá cuu-xi sá vǎha sá cúu-xí-ndó. ²⁶ Te nchaa tnúhu sá dánèhé ñáhá-í xii-ndo ñá túú ní tècú dóho nchaa ñayiu ní xíndecu ndéé sanaha, te mee-gǎ ní cuini-gá sá ncháá nchòo ñayiu yíndaha-gá vitna cundecu ndihi-o tnúhu-áⁿ. ²⁷ Te mee-gǎ ní cachí-gá sá dátù-gá nchaa tnúhu sá ío vii ío vǎha cuáháⁿ núú ncháa ñayiu yíndaha-gá. Te tnúhu-áⁿ cúu-xí cuendá tnahá nchaa nchòhó ñayiu ñá túú cùu ñayiu israhél. Te tnúhu-áⁿ dánèhé ñáhá-xí xii-ndo sá Xítoho Jesucristú ndécú ndihi ñaha-gá xii-ndo. Te cuendá xǎⁿ ní ngùndecu ndihi-ndo tnúhu ndee iní cundecu-ndo ndihi-gá ñi caa ñi quíhíⁿ.

²⁸ Te nchúhú mee-ni cuendá Xítoho Jesucristú càháⁿ vǎha-ndí, te dàsahú-ndí ñayiu nàcuáa cadá-yu. Te vǎha vihi danèhé-ndí nchaa ñayiu nàcuáa tecú tnùn-yu tnúhu-gá, te ducaⁿ danèhé-ndí-yu nàcuáa cundáa-yu núú Yǎ Ndiǒxí, te ducaⁿ chi tnahá tnúhu-yu ndihi Xítoho Jesucristú. ²⁹ Te cuendá xǎⁿ ío ndècu ndee-í quidè-í chiúⁿ Xítoho Jesucristú, te mee-gǎ ío chìndee ñaha-gá xii-í núú xǎⁿ ndácù-í quidè-í chiúⁿ-gá.

2

¹ Te cuini-í sá nchòhó cùtnùn iní-ndó sá ío sàni iní-í cuendá-ndó, ndihi cuendá nchaa ñayiu ndècu ñuú Laodiceá, ñayiu xíndecu ichi Xítoho Jesucristú. Te ducaⁿ-ni ío sàni iní-í cuendá nchaa ñayiu vátá quini ñáhá-gǎ xii-í. ² Te cuini-í sá nchòhó ndihi nchaa ñayiu-áⁿ ío nducu

ndèe-ndo canchicúⁿ nihnu-ndo ìchi Xítohó Jesucristú, te ío cuu iní tnáhá-ndó, te ducaⁿ cùu ìⁿnuu-ndo cundecu-ndo. Te cuìní-í sá nchòhó ndìhi dava-gá ñáyiú-áⁿ ío váha sáá sá xìní tnùní-ndó cuèndá tecú tnùní-ndó nchàa nacuáa ndùu cuendá Xítohó Jesucristú chí ío ndùu yuhu ní cuu, dico vitna ní dátüu-gá núú-ó. ³ Te Xítohó Jesucristú néhé vâha-gá nchaa tnúhu sá ío xìní ñuhu-xi tecú tnùní-ó. ⁴ Te duha càháⁿ-í chí cuìní-í sá vâ quindáá iní-ndó ní ìⁿ tnúhu càháⁿ nchaa ñáyiú cuìní dandàhú ñáhá xii-ndo cuéi ío váha càháⁿ-yu. ⁵ Te cuéi ñá túú ndècu ndìhi ñaha-í xii-ndo dico ducaⁿ-ni ío ñuhu iní ñáhà-í, te ío cùdí iní-í chí nihí-í tnúhu sá ío cùu ìⁿnuu-ndo ndecu-ndo, te ñá túú dàña ndeé-ndó sàndáá iní-ndó Xítohó Jesucristú.

⁶ Te dàtná-ni ní sàndáá iní-ndó Xítohó Jesucristú, te ducaⁿ-ni quindáá iní-ndó-gá canchicúⁿ nihnu-ndo ìchi-gá. ⁷ Te ní yùhu ní iní-ndó càncchicúⁿ nihnu-ndo ìchi-gá, te ducaⁿ cuíta cutnuni-gá iní-ndó nchàa nacuáa càháⁿ-gá quíhíⁿ. Te vá dáña ndeé tnàhí-ndo quindáá iní-ndó nchàa tnúhu sá ní dánèhé ñáhá cuè téè càháⁿ tnúhu-gá xii-ndo. Te xìní ñuhu-xi ndacáⁿ táhú vîhi-ndo núú Yá Ndiöxí cuèndá nchaa tnúhu-áⁿ.

Ñáyiú ío váha tnàhá tnúhu ndìhi Xítohó Jesucristú

⁸ Te ío quíhi iní-ndó cùndecu-ndo chí xíca cuu ñáyiú cuìní dandàhú ñáhá xii-ndo, te ñáyiú-áⁿ càháⁿ-yu mee-ni nchàa tnúhu ní cahu iní nchaa cue téè ñuyíú-a, te nchaa tnúhu-áⁿ ñá túú vèdana nàndíhi-xi. Te ducaⁿ quidé-yu chí nchicúⁿ nihnu-ní-yu nchaa nàcuáa ní xóo cada ñáyiú ní xíndecu ndeé sanaha. Te càháⁿ-yu nàcuáa sàni iní yucu ñávâha, te ñá túú càháⁿ-yu nàcuáa cuìní méé Xítohó Jesucristú.

⁹ Te Xítohó Jesucristú cúú-gá ìⁿ ñáyiú dico ìⁿ-ni cùu-gá ndìhi Dútú Ndiöxí. ¹⁰ Te nchòhó chí ñá túú tnàhí-gá ná cúmání-ndó núú-gá chí ndècu ndìhi-ndo Xítohó Jesucristú. Te ío cùnuu-gá te tàxi tnuní-gá nchaa núú

cuè espíritú cúnùu. ¹¹ Te mee-gá ní ndada ndoo ní ndada nine-gá iní-ndó chí ní ngúndecu ndìhi-ndo-gá te ducaⁿ ñà túú-gá ndécú-ndó ìchi cuehé ìchi duha, te cada iní-ndó sá ní ngúndecu ndìhi-ndo ìⁿ seña, chí ní ndada ndoo ní ndada nine-gá iní-ndó, dico ñá díú ìⁿ-ni cuu-xi ndìhi seña sá sâha cue téè isràél ñii-güedé. ¹² Te nchòhó sa ní sandute-ndo te cada iní-ndó sá dàtná tnúhu sá ní xíhí-ndó ndìhi Xítohó Jesucristú, te ní nguindüxi-ndo ndìhi-gá, te ní ndoto-ndo ndìhi-gá, te ducaⁿ càda iní-ndó chí ñá túú-gá ndécú-ndó ìchi cuehé ìchi duha. Te ducaⁿ chí sàndáá iní-ndó nchàa nacuáa quíde Yá Ndiöxí, te díu-gá ní dándótó-gá Xítohó Jesucristú. ¹³ Te nchòhó cùtnàhá ndécú-ndó ìchi cuehé ìchi duha cùu-ndo datná ñáyiú ní xíhí, chí ñá túú tnàhá tnúhu-ndo ndìhi Yá Ndiöxí ní cùu, te ní ñà díú ñáyiú isràél cúú-ndó. Te Yá Ndiöxí ní cachí-gá sá nchóo ío váha tnàhá tnúhu-o ndìhi Xítohó Jesucristú vitna. Te ducaⁿ ní quíde-gá chí sa ní quíde càhnu iní-gá nchaa sá cuèhé sá dúhá ní xóo cada-o. ¹⁴ Te vitna duuⁿ duuⁿ ñà túú-gá cuéchi-o ndècu núú-gá. Te nchoo ñà túú cuìní-ó càda-o nacuáa càháⁿ-gá, te cuèndá xíáⁿ ío ndècuéchi-o, te vâi nacháhu-o núú-gá ní cùu. Te vitna ñá túú-gá ní ìⁿ cuéchi-o ndècu núú-gá, chí díu cuèndá-áⁿ ní xíhí Xítohó Jesucristú núú cùrúxí. ¹⁵ Te sá dúcáⁿ ní xíhí Xítohó Jesucristú núú cùrúxí, te duuⁿ duuⁿ ní dáquée tíhú-gá sàcuíhná ndìhi nchaa espíritú cùndìhi-xi, te ní quendóo canúú-xi, te mee-gá ío cùnuu-gá táxi tnùní-gá.

Nanducu nihnu-o mee-ni sá vâha càhí Xítohó Jesucristú

¹⁶ Te núu dava ñáyiú xícuèhé ñáhâ-yu xii-ndo cuèndá sá ñà túú xèxi-ndo xíhi-ndo datná quíde méé-yu te vá cáda cuèndá-ndó, te ní vâ cáda cuèndá-ndó te núu xícuèhé ñáhâ-yu xii-ndo cuèndá sá ñà túú cànehe íí-ndó víco quíde méé-yu núú cuíá núú cuíá, ndìhi víco quíde-yu ndi tnàhá yóo, ndìhi cuèndá sá ñà túú cànehe íí-ndó ndùu ndetatú-yu.

17 Te nàcuáa quidé-yu ndi tnahá òré quidé-yu nchaa vico-án, ndihi nàcuáa quidé-yu ndi tnahá nchaa nduu cànehe ì-yu-án, te cada iní-ó sà sà quidé-yu-án dánèhé núú ñáhá-xí nàcuáa cada Xítóhó Jesucristú núú cuáháⁿ núú vèxi. 18 Te vá quìndáá iní-ndó nì ìⁿ tnúhu càháⁿ ñáyiú cächí sà cuíta nihnu-ndo cuèndá sà ñá túú tnì-ndo tnúhu càháⁿ-yu, chi cächí-yu sà ío xini ñuhu-xi cada cahnu-o nchaa cue espíritú xínú cuèchi núú Yá Ndiòxí, te ni yùhu ni iní-ó cànehe-o sà yíñùhu núú-xi. Te ñáyiú-án cächí-yu sà ndáá càháⁿ-yu chi dàcoto ñaha saní-yu nàcuáa càháⁿ-yu, te ío quide cahnú-yu mèe-yu cuèndá nchaa sà sání iní mèe-yu quidé-yu, te ñá túú vèdana nàndìhi nchaa sà quidé-yu. 19 Te nchaa ñáyiú ducaⁿ xíquide-án ñá túú tnàhá tnúhu-yu ndihi Xítóhó Jesucristú. Te mee-gã cúú-gã Yaá cúnùu taxi tnuní ñáhá-gã xii nchaa nchoo ñáyiú ndècu ichi-gã, te chindee ñaha-gã xii-o ndècu-o ichi-gã, te mee-gã quidé-gã cúú ìⁿnuu-o ndècu-o, te ta quide-o nchaa nacuáa cuení Yá Ndiòxí cuáháⁿ.

20 Te nchòhó cúú-ndó dàtná ñáyiú ní xihí ndihi Xítóhó Jesucristú cuèndá sà vã cáncñicúⁿ nihnu-gá-ndó nàcuáa càháⁿ ñáyiú ñá túú ndècu ichi-gã. Te núú ducaⁿ ña, ¿te ná cuèndá tnì-ní-ndó tnúhu càháⁿ ñáyiú-án te quide-ni-ndo datná quidé-yu? 21 Chi ñáyiú-án cächí-yu sà ío sà ní vã cúú tèe ndaha-o, te dava ni vã cúú càxi-o, te dava ni vã cúú tnì-o. 22 Te nchaa xiáⁿ, núú néhé chùⁿ-ni-o ndihi nihnu-xi. Te nchaa sà dúcáⁿ càháⁿ-yu-án cúú-xí mèe-ni sà ní cahu iní mèe nchàa ñáyiú ñuyíú-a nàcuáa cadá-yu cundecú-yu. 23 Te nchaa tnúhu càháⁿ-yu-án sánùu sà cúú-xí ìⁿ tnúhu càháⁿ ìⁿ tée ío váha sàá díquí-xi, chi cächí-yu sà cadá cahnu-o Yá Ndiòxí nàcuáa véxi iní mèe-ó, te cunduu ndàhú iní-ó dico ñá túú dènehé ñáhã-yu nàcuáa tàú-xi cunduu. Te cächí tucú-yu sà cadá ùhú-ó mèe-o, chi ducaⁿ cuení Yá Ndiòxí cada-o cächí-yu. Te nchaa xiáⁿ

ñá túú vèdana chindee ñaha-xi xii-o cuendá sà vã táxi tnuní ñáhá nì ìⁿ sà cuèhé sà dúhá sàni iní-ó.

3

1 Te nchòhó cada iní-ndó sà ní xihí-ndó ndihi Xítóhó Jesucristú te ní ndoto-ndo ndihi-gã, núú xiáⁿ tàú-ndó càda-ndo nchaa sà vãha dàtná cuení mèe-gã chi mee-gã núcòo-gã xio cùha Dútú Ndiòxí chi tnàhá-gã ío cùnùu-gã. 2 Te ío cuhuⁿ iní-ndó nchàa sà vãha cächí Xítóhó Jesucristú nduu táhú-ndó cùndecu ndihi-ndo, te vá cùhúⁿ iní-ndó mèe-ni nchaa sà ío ñuyíú-a. 3 Te ducaⁿ càda-ndo chi cùu-ndo datná ñáyiú ní xihí ndihi Xítóhó Jesucristú, chi ñá túú-gã ndécú-ndó ìchi cuehé ichi duha. Te Yá Ndiòxí néhé cuèndá ñáhá-gã xii-ndo chi tnàhá tnúhu-ndo ndihi Xítóhó Jesucristú. 4 Te Xítóhó Jesucristú cúú-gã Yaá ndécú ndihi ñaha xii-o vitna, te sàá nduu quèe túu ndihi ñaha-gã xii-o àndiú, te tnàhá-ó ío cùnùu-o ndihi-gã.

Duuⁿ duuⁿ dañà-o nchàa sà cuèhé sà dúhá ñùhu iní-ó te cada-o mèe-ni sà vãha

5 Te duuⁿ duuⁿ dañà-ndo nchàa sà cuèhé sà dúhá ñùhu iní-ndó. Te nchaa nchòhó cue tée vã càháⁿ ndihi-ndo ñáyiú dìhí te núú ñá díú ñàdihí-ndó cúú-yu, te ducaⁿ-ni nchàa nchòhó cue ñáyiú dìhí tucu vã càháⁿ ndihi-ndo cue tée te núú ñá díú yì-ndo cuu-güedé, te nchaa-ndo vã cáni-gã iní-ndó càda-ndo ni ìⁿ sà cuèhé sà dúhá ndihi tnahá ñáyiú-ndo. Te vá cáni cuèhé cani duha-gã iní-ndó sà cúú-xí-ndó ndihí-yu, te vá cáni-gã iní-ndó nì ìⁿ sà cuèhé sà dúhá, te ni vã xihó-ndó ìⁿ sà ndécú ndihi tnahá ñáyiú-ndo, chi núú ducaⁿ na càda-ndo xiho-ndo sà ndécú ndihí-yu te ìⁿ-ni cùu-ndo ndihi ñáyiú chihnuhu nchaa sà cächí-yu cùu ndiòxí te ñá ndáá sà ndiòxí cúú nchàa xiáⁿ. 6 Te nchaa ñáyiú ducaⁿ xíquide ío dandòho ñaha Yá Ndiòxí xií-yu na sàá nduu tnúndòho tnúhu ndàhú, chi ñá túú sàndáá iní ñáhã-yu xii-gã. 7 Te nchòhó cútnàhá ní xindecu-ndo ìchi cuehé ichi duha, te tnàhá-ndó ní xóo cada-ndo dàtná

quidé nchàa ñáyi-u-án. ⁸ Te vitna duuⁿ duuⁿ dañà-ndo nchàa sá ná càchí tñúhu-í-a: Vá cúdeén-gã-ndó, te ni vã cúndùu líhli-gá iní-ndó, te ni vã cúu ùhú-gá iní-ndó tnàha ñáyi-u-ndo, te ni vã cùcuèhé-gá-ndõ-yu, te ni ñⁿ-gá tñúhu cuèhé vá càháⁿ-ndó. ⁹ Te ni vã dácùandehnde-gá-ndó, chi nchòhó sa ní dáñá-ndó nchàa ichi cuehé ichi duha, te ñá túú-gã sání cuèhé sání dùha iní-ndó nã cada-ndo vitna datná ní xóo cada-ndo. ¹⁰ Te vitna nchòhó ní nduu-ndo ñáyi-u váha, te uuⁿ-gá tá cùtnuní iní-ndó nchàa nacuáa cuíní Yã Ndiõxí cada-ndo, te ducaⁿ ta ndùcu ndee-ndo quide-ndo mee-ni sá váha dàtná quidé mèe-gá. ¹¹ Te vitna ní ngúndecu ndìhi-ndo Xítóhó Jesucristú, te vá cadá cuendá-gá-ndó nùu cùu-ndo ñáyi-u isràel àdi ñá túú cùu-ndo, te ni vã cadá cuendá-ndó nùu cùu-ndo ñáyi-u ní ngúndecu sèñá ñⁿ-xi àdi ñáhá, te ni vã cadá cuendá-ndó nùu cùu-ndo ñáyi-u véxi ñúú xícá, te ni vã cadá cuendá-ndó nùu cùu-ndo ñáyi-u cùu neñúú, te ni vã cadá cuendá-ndó nùu cùu-ndo ñáyi-u ñá túú tnàhí dàñá quee núú chíúⁿ pàtróóⁿ-xi, te ni vã cadá cuendá-ndó nùu cùu-ndo ñáyi-u dàñá queé núú chíúⁿ pàtróóⁿ-xi, chi Xítóhó Jesucristú cùnùu-gá ndécú ndìhi ñaha-gá xii-o nchàa-o.

¹² Te Yã Ndiõxí ní dáquée dⁿ ñaha-gá xii-ndo cuendá cundecu-ndo ndìhi-gá, te vitna cùu-ndo ñáyi-u quide ndáá ndécú ìchi-gá. Te mee-gã ío cùu iní ñáhá-gã xii-ndo nùu xiãⁿ tàú-ndó cùndahú iní tnáhá-ndó, te ío váha cuu iní-ndó chindee tnaha-ndo, te cuu-ndo ñáyi-u ndàhú iní-xi, te ío vii ío váha cuu iní-ndó cùndecu ndìhi tnaha-ndo, te ío càhnu cunduu iní-ndó cuendá nchaa sá quidé ñàha ñáyi-u xii-ndo. ¹³ Te ducaⁿ cànehe-ndo tñúhu càhnu iní núú ndì mèe-ndo nacuáa ndècu-ndo ichi-gá, te cada càhnu tucu iní-ndó nùu ná cúú sã cúmãní nùú tnáhá-ndó. Te dàtná ní quide càhnu iní Xítóhó Jesucristú nchaa sá ñá túú váha ní xóo cada-ndo ducaⁿ càda-ndo cada càhnu iní-ndó nchàa sá cúmãní nùú tnáhá-ndó ndècu-ndo. ¹⁴ Te xini ñuhu vihi-xi sá

íu cuu iní tnáhá-ndó cùndecu-ndo, chi núu ducaⁿ na càda-ndo, te quide-ndo nchaa dava-gá sá càháⁿ-í, te ñá túú tnàhí-gá ná cúmãní-ndó. ¹⁵ Te dañà-ndo sã Yã Ndiõxí ná chindee ñaha-gá nàcuáa ío váha cuu iní-ndó cùndecu-ndo, chi diu cuendá-áⁿ ñí càháⁿ ñáhá Yã Ndiõxí xii-ndo cuendá cuu ñⁿnuu-ndo ndìhi nchaa dava-gá ñáyi-u ndècu ichi-gá, te ducaⁿ-ni ío ndacáⁿ táhú-ndó nùú-gã.

¹⁶ Te ío cuhuⁿ iní-ndó tñúhu Xítóhó Jesucristú, te ío váha cuáha-ndo cuendá nàcuáa càháⁿ tñúhu-gá te ducaⁿ dànehé tnáhá-ndó. Te ío càháⁿ dóho tnàha-ndo nacuáa cada-ndo càncⁿchicúⁿ nihnu-ndo càda-ndo nchaa nacuáa càháⁿ tñúhu-gá, te cata-ndo ndùdú ndèé núú tütú Yã Ndiõxí, ndìhi nchaa dava-gá ndudú sá xini méé-ndó xita-ndo te nchaa xiãⁿ cata-ndo chihnu-ndo Yã Ndiõxí. Te òré xitá-ndó te ni yùhu ni iní-ndó ndacáⁿ táhú-ndó nùú-gã. ¹⁷ Te cuhuⁿ iní-ndó Xítóhó Jesucristú òré sání iní-ndó càda-ndo ñⁿ chiuⁿ àdi ná tñúhu cuíní-ndó càháⁿ-ndó, te diu-ni-gá cuhuⁿ iní-ndó. Te xini ñuhu-xi ndacáⁿ táhú-ndó nùú Yã Ndiõxí, te diu-ni Xítóhó Jesucristú chindee ñaha-gá xii-ndo ndacáⁿ táhú-ndó nùú Tãtá-ó Dütú Ndiõxí.

Nàcuáa tàú ñáyi-u ndècu ichi Xítóhó Jesucristú cadá-yu sá cúu-xi ndì meé-yu

¹⁸ Te nchaa nchòhó ñáyi-u dⁿ ñáyi-u ndècu yⁿ-xi quindáá iní-ndó yⁿ-ndo, chi ducaⁿ tàú-xi cada nchaa ñáyi-u dⁿ ndécú ìchi Xítóhó Jesucristú. ¹⁹ Te nchaa nchòhó cue tée ndècu ñadìhi-xi cuu iní-ndó ñadìhi-ndó, te vá cùcuèhé-ndõ-yu. ²⁰ Te nchaa nchòhó ñáyi-u ndècu tátá-xi ndìhi nãná-xi quindáá iní-ndõ-yu, chi núu ducaⁿ na càda-ndo te ndùu vétú iní Yã Ndiõxí. ²¹ Te nchaa nchòhó ñáyi-u cùu tátá ndìhi nãná vá dásatú-ndó ìní cue déhe-ndo, chi núu ducaⁿ na càda-ndo te ni vã quíxí-gã iní-güexi cada-güexi sá váha. ²² Te nchaa nchòhó ñáyi-u xinu cuechi quindáá iní-ndó nchàa ñáyi-u cùu patróóⁿ-ndó, te ni yùhu ni iní-ndó càda-ndo nchaa chiuⁿ táhú-yu cuèi

òré ndécũ-yu àdi oré ñá túũ-yu, te ñá díú òré-ni ndèhé-yu cada-ndo cuèndá-ni sá cuíní-ndó cùdiu-ndo núũ-yu, chi cada-ndo sá néhé-ndó sá yíñùhu núú Xítóhó Jesucristú. ²³ Te nchaa chiúⁿ sani iní-ndó càda-ndo te cada-ndo ñi yuhu ñi iní-ndó, te sá dúcáⁿ càda-ndo-án te cada-ndo cuèndá sá xínú cuèchi-ndo núú Xítóhó Jesucristú te ñá díú núú ñáyiú ñuyíú-a xínu cuechi-ndo. ²⁴ Te nchòhó sa nàha-ndo sá Xítóhó Jesucristú taxi-gá sá ndúú tǎhú-ndó te núu ducaⁿ na càda-ndo, chi cùu-ndo ñáyiú xínu cuechi núú-gǎ. ²⁵ Te nchaa ñáyiú quide nchaa sá cuèhé sá dúhá nácháhu-yu núú Yǎ Ndiǒxí cuèndá nchaa sá quídě-yu, te mee-gǎ vá cáda cuèndá-gǎ cuéi náí ñáyiú cùu-yu, chi ncháá-yu nacháhu-yu nchaa sá ñà túú váha quidé-yu núú-gǎ.

4

¹ Te nchaa nchòhó ñáyiú cùu pa-tróoⁿ cuu-ndo ñáyiú váha, te cada-ndo ncháa nacuáa tàú-xi cunduu ndihi nchaa ñáyiú xínu cuechi núú-ndó, te cunaha-ndo sá àndiu ndecu Yaá cùú Xítóhó-ndó taxi tnuni ñáhá-gǎ xii-ndo.

² Te nchaa nchòhó ñáyiú ndècu ichi Xítóhó Jesucristú, vá dáñá ndèé-ndó cǎháⁿ ndihi-ndo Yǎ Ndiǒxí, te ío cuhuⁿ iní-ndó-gǎ òré cǎháⁿ ndihi-ndo-gǎ, te òré-án ío ndacáⁿ tǎhú-ndó núú-gǎ.

³ Te cǎcáⁿ tǎhú-ndó tnàhá cuèndá-ndí núú-gǎ cuèndá sá díú-gǎ ná cáda te ndacu-ndí cǎháⁿ-ndí tnúhu-gǎ núú ncháa dava-gǎ ñáyiú, te ducaⁿ cǎháⁿ-ndí tnúhu Xítóhó Jesucristú sá ñá túú ní xíndecu ndihi nchaa ñáyiú ní xíndecu ndéé sanaha, te diu cuèndá tnúhu-án yíhí-í vecaá vitna. ⁴ Te cǎháⁿ ndihi-ndo Yǎ Ndiǒxí cuèndá cǎháⁿ-í nacuáa tàú-xi cunduu te tecú tnùní-yu.

⁵ Te cada-ndo ncháa nacuáa tàú-xi cunduu sá cùu-xí ncháa ñáyiú ñá túú ndècu ichi-gǎ, te ducaⁿ-ni ío nducu ndèe-ndo cada-ndo nchaa nacuáa tàú-xi cunduu. ⁶ Te cada cuèndá-ndó sá ío vii ío váha cunduu tnúhu cǎháⁿ ndihi-ndó-yu, te cǎháⁿ-ndó ìⁿ tnúhu

nacuáa cuu váha iní-yu, te ío váha cundehe-ndo nacuáa cunduu tnúhu cúñaha-ndo xii ìⁿ ìⁿ-yu.

Tnúhu ndéé núú ñi ndihi-ná

⁷ Te té Tiquicú téé ío cùu iní-ó ndècu ndihi-o ichi Xítóhó Jesucristú, téé-án cachí tnúhu-dé nchaa nacuáa cùu ndecu-í. Te tnàhá-dé xínú cuèchi-dé núú Xítóhó Jesucristú te ío váha quide ndáá-dé. ⁸ Te tendaha-í-dé quixi-dé cachí tnúhu-dé nchaa nacuáa cùu ndecu-ndí iha, te taxi-dé tnúhu ndee ìní cundecu ndihi-ndo. ⁹ Te tnàhá tucu té Onésimú téé ío cùu iní-ó ndècu ndihi-o ichi Xítóhó Jesucristú quixi ndihi-dé, te diu-ni téé ñuú-ndó cùu-dé te tnàhá-dé ío váha quide ndáá-dé. Te ndi ndúú-güedé cachí tnúhu-güedé nchaa nacuáa cùu iha.

¹⁰ Te té Arístarcú téé yíhi ndihi-í vecaá quidé ndèe iní ñáhá-dě xii-ndo ndihi té Mǎcú ñaní prímú tǎ Bèé. Te sa nàha-ndo nchaa nacuáa ní cǎháⁿ-í cada-ndo quèheⁿ cuèndá-ndó tǎ Mǎcú, te núu na quixi-dé quixi coto ñaha-dě xii-ndo, te ío váha cuu iní-ndó quèheⁿ cuèndá-ndó-dě. ¹¹ Te tnàhá téé nani Jesús, àdi Bustú chi úú diu-dé, quidé ndèe iní ñáhá-dě xii-ndo. Te cue téé-a cùu-güedé cue téé isràél ní chitnahá ñáhá-güedě xii-í cǎháⁿ-ndí núú ñáyiú nacuáa ndíhu ndaha ñaha Yǎ Ndiǒxí xii-yu, te ni ìⁿ-gǎ ñáyiú isràél ñá túú quide datná quidé-güedě. Te ío váha tàxi-güedé tnúhu ndee ìní xii-í. ¹² Te tnàhá téé ñuú-ndó tǎ Ēpafrás quidé ndèe iní ñáhá-dě xii-ndo, te cùu-dé tnàhá-dé téé xínu cuechi núú Xítóhó Jesucristú. Te ducaⁿ-ni ñi yuhu ñi iní-dé xicáⁿ tǎhú-dě núú Yǎ Ndiǒxí cuèndá-ndó cuèndá sá cǎnchicúⁿ nihnu-ni-ndo ìchi-gǎ, te ducaⁿ te ío váha tecú tnùní-ndó ncháa nacuáa cuíní Yǎ Ndiǒxí cada-ndo, te diu-ni ducaⁿ cǎnchicúⁿ nihnu-ndo càda-ndo. ¹³ Te yúhú cǎchí tnúhu ndáá-í xii-ndo sǎ sũúni sàni iní-dé sá mée-ní sǎ váha cuu xii-ndo cùndecu-ndo ndihi nchaa ñáyiú xíndecu ichi Xítóhó Jesucristú ndécú ñuú Laodiceá, ndihi nchaa ñáyiú xíndecu tucu ichi-gǎ ndécú ñuú Hiérápolís. ¹⁴ Te tnàhá té Lùcá téé xini nchaa núú yǔcú sǎ quidé tǎtna quide

ndee iní ñáhá-dě xii-ndo téé ío cùu iní-ó, te tnàhá tucu té Dëmás quidé ndèe iní ñáhá-dě xii-ndo.

¹⁵ Te cúñaha-ndo na càda ndee iní nchaa ñáyi ndècu ndihí-o ichi Xítóhó Jesucristú ndécú ñuú Laodiceá, ndihí tá Mĩnfás, ndihí nchaa ñáyi ndècu ichi-gá tàcá vehe-xi dàcuahá-yu tnúhu-gá. ¹⁶ Te tutú cádũha-í-a

tendaha-ĩ quixi ndaha-ndo, te òré ná ndíhí dàcuaha-ndo te tendaha-ndo quíhíⁿ ndaha ñáyi xĩndecu ichi-gá ndécú ñuú Laodiceá cuendá dacuàhá-yu tnàhá-yu. Te diu-ni ducaⁿ dàcuaha-ndo tutú tendaha-ĩ quíhíⁿ ndaha ñáyi ñuú Laodiceá òré ná dándixí-yu ndaha-ndo. ¹⁷ Te na cächí tnúhu-í xii-ndo nàcuáa cúñaha-ndo xii té Arquipú, te duha cúñaha-ndo xii-dé: “Yá Ndiõxí ní taxi-gá chiùⁿ quide-n, te ío váha cada cuendá-n càda-n nchaa nacuáa ní cachí-gá”, duha cúñaha-ndo xii-dé.

¹⁸ Te yúhú té Páblú ndihí ndaha mee-ĩ téè-í ñúⁿ tnúhu-a quide ndee iní ñáhà-í xii-ndo, te cunaha-ndo sã yúhú yíhí-í vecaá. Te Yá Ndiõxí ío na chĩndee chitúu ñaha-gã xii-ndo. Te ducaⁿ na cùnduu. Te ío chí cáda ndèe iní-nã vitna.

TUTÚ DÍHNA NUU NĪ CADÚHA TĒ PĀBLŪ QUIHĪⁿ NDAHA ÑÁYIU ÑUÚ TESÀLÓNICÁ

Té Pāblū ndihī cue tēe cūndihī-dé cādūha-güedé tutú quihīⁿ ndaha ñáyiu xīndecu ichi Xítohó Jesucristú ndécú ñuú Tesàlónicá

¹ Yúhú té Pāblū cādūha-í tutú-a ndihī té Silvanú, ndihī té Timùteú cuendá daquixi-í ndaha nchòhó ñáyiu ndècu ndihī-ndí ichi Xítohó Jesucristú ndécú ñuú Tesàlónicá, chi cūu ñuú-ndo ndihī Tátá-ó Dütú Ndiöxí, ndihī Xítohó Jesucristú. Te xicáⁿ táhù-í núú Dütú Ndiöxí, ndihī núú Xítohó Jesucristú sá ïo na chindee chitúu ñaha-gã xii-ndo, te ducaⁿ ndí nduú-gá ná càda te ïo váha cuu iní-ndó cūndecu-ndo.

Ñáyiu ñuú Tesàlónicá ïo váha sàndáá iní-yu Yá Ndiöxí

² Te ndí tnahá òré càháⁿ ndihī-ndí Yá Ndiöxí ndácáⁿ táhù-ndí núú-gã sá ïo quide váha-ndo ndècu-ndo, te ducaⁿ xicáⁿ táhù-ndí núú-gã sá ná còto ñaha-gã xii-ndo. ³ Te ïo ndácáⁿ táhù-ndí núú Tátá-ó Dütú Ndiöxí sá ñí yuhu ñí iní-ndó sàndáá iní-ndó-gã, te xīnu cuechi-ndo núú-gã, te cūu iní tnahá-ndó nàcuáa ndècu-ndo ichi-gá ñuú xīáⁿ ïo xito tnahá-ndo. Te cūtnuní ndáá iní-ndó sã quixí tūcu Xítohó Jesucristú ñuú xīáⁿ ñá túú dàña ndeé-ndó ndètu-ndo-gá. ⁴ Te nchòhó ñáyiu ndècu ndihī-ndí ichi Xítohó Jesucristú sa nàha-ndí sá Yá Ndiöxí ïo cūu iní ñáhá-gã xii-ndo, te ñuú-gá ní càháⁿ ñáhá-gã xii-ndo cuendá cūndecu-ndo ìchi-gá. ⁵ Te cūtnàhá ní dánèhé ñáhá-ndí xii-ndo tñuhu-gã, chi ñá díú sã cúú iní mée-ndí ducaⁿ ñí dānehé ñáhá-ndí xii-ndo, chi mee Espiritú Yá Ndiöxí ní chindee ñàha-xi ní càháⁿ-ndí ñí yuhu ñí iní-ndí tñuhu-gá núú-ndó. Te

nàha-ndo sá cūtnàhá ní xīndecu ndihī ñàha-ndí xii-ndo ñí quide-ndí nàcuáa càháⁿ Yá Ndiöxí cuendá sá cúú-xí sã váha sá cúú-xí-ndó.

⁶ Te nchòhó nchìcúⁿ nihnu-ndo quide-ndo vitna datná quidé-ndí, chi quide váha-ndo datná quidé mèe Xítohó Jesucristú, te díú iní ní tñi-ndo ìchi-gá cuéi ní ndoho ní tnahá-ndó, chi mee Espiritú-gá ní chindee ñàha-xi xii-ndo. ⁷ Te sá dúcáⁿ quide váha-ndo ñuú Yá Ndiöxí, xīáⁿ yīnchìcúⁿ nihnu ñáyiu distritú Macèdoniá, ndihī ñáyiu distritú Acáyá xīquide váha-yu tnahá-yu, ñáyiu xīndecu ichi-gá. ⁸ Te ñuú-ndo ñí sanu ichi-ndo ñáyiu distritú Macèdoniá, ndihī ñáyiu distritú Acáyá, te ñá díú-ní ñáyiu nchaa ñuú-áⁿ chi nchaa ñáyiu dava-gá ñuú ñihí-yu tñuhu sá ïo sàndáá iní-ndó Yá Ndiöxí. Te ñá túú-gã ná tñuhu càháⁿ-ndí cuendá-ndó, chi nchaá-yu sa ñihí-yu tñuhu sá ïo váha quide-ndo ndecu-ndo. ⁹ Te mèe-yu xicáháⁿ váha-yu cuendá-ndó sã ïo váha ní queheⁿ cuendá ñáhá-ndó xii-ndí cūtnàhá ní quixi-ndí díhna nuu. Te ní dáñá-ndó nchàa sã càchí-ndó cūu ndiöxí-ndó chi ñá díú ndiöxí cúú-xí, te ní tñi-ndo ìchi Yá Ndiöxí Yá ndécú tūu andiū chi ñuú-gã cúú-gã Ndiöxí ndisa, te xīnu cuechi-ndo núú-gã vitna, ¹⁰ te ndètu-ndo quixi tūcu Xítohó Jesucristú Déhe Yá Ndiöxí Yá ndécú andiū, chi ñuú-ni-gá ní quixi-gá ñuyú-a ní xihí-gá, te ní ndoto-gá ní dándótó ñàha Yá Ndiöxí xii-gá. Te ñuú-ni Xítohó Jesucristú dácācu nihnu ñaha-gã xii-o ñuú ùhú núú ndàhú, chi sàndáá iní-ó-gã.

2

Nàcuáa ndiū chiuⁿ ní quide té Pāblū ñuú Tesàlónicá

¹ Te nchòhó ñáyiu ndècu ndihī-ndí ichi Xítohó Jesucristú nàha-ndo sá ñá díú àuⁿ nã cuu ñí quixi coto ñaha-ndí xii-ndo, chi ní sàndáá iní-ndó tñuhu Yá Ndiöxí. ² Te nàha-ndo sá cūtnàhá ní xīndecu-ndí ñuú Filipú ïo ní xūhuⁿ

tnúhu cuèhé tnúhu duha núú-ndí, te ní caniha-güedě xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáháⁿ-ndí tnúhu Yá Ndiöxí núú-ndó, chi mee-gã ní chindee ñàha-gá xii-ndí cuèi ío chitu ñáyiu ní cuu úhú iní ñáhá xii-ndí. ³ Te ñá túú ní dándahú ñáhá-ndí xii-ndo chi mee-ni tnúhu ndáá ní cáháⁿ-ndí núú-ndó, te ni ñà túú ni ñáⁿ tnúhu cuèhé ñúhú iní-ndí ní cáháⁿ-ndí tnúhu-gá núú-ndó chi sa ní nduu ndoo ní nduu nine iní-ndí. ⁴ Te mee Yá Ndiöxí ní cachí-gá sá càháⁿ-ndí tnúhu-gá, te càháⁿ-ndí nàcuáa cùu iní mée-gã, chi sa nàha-gá nàcuáa càa iní-ndí, te ñá túú càháⁿ-ndí nàcuáa cùu iní ñáyiu. ⁵ Te nàha-ndo sá ñà díú ñáⁿ tnúhu cudí iní-ndó cùndecu-ndo ichi ñuyúú ní cáháⁿ-ndí núú-ndó cuèndá taxi-ndo díhúⁿ. Te Yá Ndiöxí sa nàha-gá sá càháⁿ ndáá-ndí. ⁶ Te ñá ñáⁿ nduu ni quide-ndí ñáⁿ sá cádá-ndí cuèndá-ni sá cádá càhnu ñaha-ndo xii-ndí, àdi cada cahnu ñaha dava-gá ñáyiu, te cuèi tàú ndisa-ndí sá cádá càhnu ñaha-ndo xii-ndí ní cùu, chi chiúⁿ Xítóhó Jesucristú quidé-ndí, te dícó-ni sá nchùhú ñá túú ní cuení-ndí sá dúcáⁿ càda-ndo. ⁷ Te ío vii ío váha ní cáháⁿ-ndí núú-ndó, dàtná quidé ñáⁿ ñaha cuu náná vii vii càháⁿ ndíhi cue déhe-aⁿ dàcuehnu ñaha-aⁿ xii-güexi. ⁸ Te ducaⁿ ío cùu iní ñáhá-ndí xii-ndo, dico ñá díú-ni sá ñá cáháⁿ-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñàha-xi, te núu dícó ní cùu-xi sá cúú, cuèndá sá ío cùu iní ñáhá-ndí xii-ndo. ⁹ Te nchòhó ñáyiu ndècu ndíhi-ndí ichi Xítóhó Jesucristú nàha-ndo sá ío ní quide chiúⁿ-ndí cuèndá ní níhí-ndí sá ñá xexi-ndí. Te cuèi nduu cuèi níu ní quide chiúⁿ-ndí ní níhí-ndí sá ñá xexi-ndí ní cáháⁿ-ndí tnúhu Yá Ndiöxí núú-ndó cuèndá sá ñà túú ní cuení-ndí chichíuⁿ ñaha-ndí xii-ndo.

¹⁰ Te nchòhó ñáyiu sàndáá iní tnúhu Yá Ndiöxí xini ndáá-ndó sá cúú-ndí cue téé váha te ducaⁿ sá naha Yá

Ndiöxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te ñá-ni ducaⁿ quide-ndí vitna. Te vá yóo ñáⁿ càháⁿ sá ñà túú quide ndáá-ndí ndécú-ndí. ¹¹ Te nàha tucu-ndo sá ñá dácáháⁿ ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidé ñáⁿ tátá ndíhi cue déhe-dé ní quide-ndí. ¹² Te ní cachí-ndí xii-ndo sá cádá ndáá-ndó cùndecu-ndo nacúáa tàú-xi cada nchaa ñáyiu tnàhá tnúhu ndíhi Yá Ndiöxí, chi mee-gã ní cáháⁿ ñáhá-gã xii-o cuèndá nduu táhú-ó cùndecu-o ndíhi-gá núú ío váha càa ndecu-gá táxi tnúú-gá.

¹³ Te xíáⁿ ío ndácáⁿ táhú-ndí núú Yá Ndiöxí sá nchòhó òré ní tedóho-ndo tnúhu-gá ní cáháⁿ-ndí, te ní sàndáá iní-ndó chi ní cutnúú iní-ndó sá díú tnúhu Yá Ndiöxí cúú-xi, te ñá díú tnúhu ñáyiu ñuyúú-a cùu-xi. Te ndáá sá cúú-xi ñáⁿ sá ío váha sá cúú-xi nchòo cue ñáyiu ní sàndáá iní tnúhu-gá. ¹⁴ Te nchòhó ñáyiu ndècu ndíhi-í ichi Xítóhó Jesucristú, ío ní ndoho ní tnàhá-ndó sá ñá quide ñaha ñáyiu ñuú-ndó. Te nchòhó ní ndoho-ndo dàtná ní ndoho nchaa ñáyiu tàcá dácúaha tnúhu Xítóhó Jesucristú ndécú dístítú Jùdeá, chi tnàhá-yu ío ní dándóhó ñaha ñáyiu ñuú-yu. ¹⁵ Te ñá-ni ñáyiu dístítú Jùdeá-áⁿ ñá sahní-yu cue téé ní xóo cáháⁿ tnúhu Yá Ndiöxí ndéé sanaha. Te ñá-ni ñaní tnàhá-yu cùu cue ñáyiu ní sahní ñaha xii Xítóhó Jesucristú, te sá tá xíáⁿ te ní ngúíta-yu ní cuu úhú iní ñáhá-yu xii-ndí, núu xíáⁿ ñá túú tnàhá iní Yá Ndiöxí nchaa sá quidé-yu, te ndéé nchaa dava-gá ñaní tnàhá-yu cùu úhú iní-yu. ¹⁶ Te ío chidácá nihnu ñáhá-yu xii-ndí òré càháⁿ-ndí tnúhu Yá Ndiöxí núú ñáyiu ñá túú cùu ñáyiu isràél, te ducaⁿ quide ñáyiu-áⁿ cuèndá cuení-yu sá vá càháⁿ-ndí tnúhu-gá, sá cádá cuèndá naníhí tàhú ñáyiu ñá túú cùu ñáyiu isràél-áⁿ, te sá dúcáⁿ quidé-yu te ío ta cùu vai-gá cuéchi-yu cuáháⁿ. Te Yá Ndiöxí ío cùdééⁿ-gã núú-yu, te tendaha-gã ñáⁿ tnúndòho quixí sá cúú-xi-yu te ío ndohó-yu.

Té Păblú cuìní-dé quíngoto-dé ñáyiu xñdecu ichi Xítóhó Jesucristú ndécú ñúú Tesalónicá

¹⁷ Te nchòhó ñáyiu ndècu ndìhi-ndí ichi Xítóhó Jesucristú ní quee-ndí núú-ndó, te cuèi ní cuxica-ndí dico ducaⁿ-ni ñùhu iní ñáhá-ndí xii-ndo, te ío ñùhu iní-ndí sá quíxí còto ñaha tucu-ndí xii-ndo. ¹⁸ Te yúhú té Păblú ducaⁿ-ni ñùhu iní-í sá cuèdicó mée-í quixi-í, quixi coto ñaha-í xii-ndo, dico yucu ñávãha chidácá nihnu ñaha-xi xii-í. ¹⁹ Te nchoo ñáyiu ndècu ichi Xítóhó Jesucristú ndètu-ni-gá-ó quèxio-gá candeca ñaha-gã xii-o ndàa andiú cundecu-o ndìhi-gá. Te cùdíí víhí iní-ndí sá cuendá-gá chi ní chindee ñaha-gá ní sanu ichi ñaha-ndí xii-ndo ìchi-gá, te ío vãi ñáyiu cáháⁿ váha-yu cuendá-ndí ná sàá nduu quixi tucu-gá. ²⁰ Te ducaⁿ ío vãi ñáyiu cáháⁿ váha-yu cuendá-ndí cuendá sá ní sanu ichi ñaha-ndí xii-ndo ìchi-gá, te quide váha-ndo. Te xíáⁿ ío cùdíí iní-ndí.

3

¹⁻² Te sa ní cunduu ñá túú-gã cáháⁿ ndìhi tnàha-o, núu xíáⁿ ñá ní cùndee-gá iní-ndí ní tendaha-ndí té Timùteú ní quixi coto ñaha-dě xii-ndo, te nchúhú ní quendóo-ndí ñúú Àtenás, chi tnàhá-dé xínú cuèchi-dé núú Yă Ndiõxí, ndìhi núú Xítóhó Jesucristú cáháⁿ-dé tnúhu-gá núú ñáyiu. Te ní quixi-dé ní taxi-dé tnúhu ndee ìní xii-ndo cuendá sá ío quíndáá-ni iní-ndó Xítóhó Jesucristú, te canchicúⁿ nihnu-ni-ndo nì yuhu ni iní-ndó ìchi-gá. ³ Te vá nátúhú iní-ndó càncchicúⁿ nihnu-ndo ìchi-gá sá dúhá cùu úhú iní ñáhá ñáyiu xii-o, te nchòhó sa nàha-ndo sá dàcuítí sã ndóhó vîhi-o cuendá-gá. ⁴ Te ndée cùtnáhá ndécú ndìhi ñaha-gá-ndí xii-ndo nì cachí tnúhu ndáá-ndí sá ío ndoho-o, te ducaⁿ ndisa quide-xi. ⁵ Te xíáⁿ núu ñá ní cùu váha-gá iní-í chi cuendá ñá túú-gã ní nihí-í tnúhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú

tnúhu-dé núú-ndó núu ndècu-ni-ndo ichi Xítóhó Jesucristú, chi ní sani ñⁿ ní sani úú iní-í sá cùu-xi-ndó, chi ná ndée chidácá nihnu ñaha yùcu ñávãha xii-ndo te cuíta chiúⁿ ní quide-ndí sá cùu-xi-ndó nì cáháⁿ-í.

⁶ Te ñáhá, chi ní ndexio té Timùteú sá nì quixi-dé ñúú-ndó, te nàha-dé tnúhu ní nasáá sá nì yuhu ni iní-ni-ndo sàndáá iní-ndó Yă Ndiõxí, te cùu iní-ndó cuè tnaha ñáyiu-ndo. Te càchí-dé sá ío ñùhu iní ñáhá-ndó xii-ndí, te ío cuìní-ndó cáháⁿ ndìhi ñaha-ndo, te diu-ni ducaⁿ ío cuìní nchúhú cáháⁿ ndìhi ñaha-ndí xii-ndo tùcu. ⁷ Te ío ndòho-ndí chi ío cùu úhú iní ñáhá ñáyiu xii-ndí, dico sá ní nihí-ndí tnúhu sá nchòhó ñáyiu ndècu ndìhi-ndí ichi Xítóhó Jesucristú ñá túú dàña ndée-ndó sàndáá iní-ndó Yă Ndiõxí, te xíáⁿ cùu-xi ñⁿ tnúhu càhnu iní ní nihí-ndí chi ní naníhí ndée-ndí. ⁸ Te ní nduu vétú iní-ndí sá ní nihí-ndí tnúhu ndècu-ni-ndo ichi-gá. ⁹ Te òré cáháⁿ ndìhi-ndí Yă Ndiõxí, te ío ndàcáⁿ táhú-ndí núú-gã cuendá sá ñà túú dàña nihnu-ndo ichi-gá, núu xíáⁿ ío cùdíí ìní-ndí. ¹⁰ Te cuèi nduu cuèi niú xicáⁿ táhú-ndí núú Yă Ndiõxí sá mée-gã ná càda te sáá ñⁿ nduu naníhí tnáhá-ó cuendá danèhé ñáhá váha-gá-ndí tnúhu-gá sá cúmání-gã xii-ndo.

¹¹ Te mee Tătá-ó Dütú Ndiõxí, ndìhi Xítóhó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. ¹² Te mee Xítóhó Jesucristú ná chindee ñaha-gá xii-ndo, te ío-gá cuita cuu iní tnáhá-gã-ndó nàcuáa ndècu-ndo ichi-gá ndìhi nchaa dava-gá ñáyiu dàtná cùu ìní ñáhá-ndí xii-ndo. ¹³ Te xicáⁿ táhú tùcu-ndí núú Tătá-ó Dütú Ndiõxí sá nì yuhu ni iní-ndó càncchicúⁿ nihnu-ni-ndo ìchi-gá, te ducaⁿ te cundáá-ndó núú-gã, te ñá túú-gã ná cúmání-ndó òré ná sàá nduu quixi tucu Xítóhó Jesucristú ndìhi nchaa ñáyiu sa ndècu ndìhi-gá.

4

Nàcuáa cuìní Yă Ndiõxí cada-o

1 Te nchòhó ñáiyu ndècu ndìhi-í ichi Xítóhó Jesucristú càháⁿ ndàhú-í núú-ndó sã cùndèdóho-ndo na càháⁿ-í nàcuáa ndùu tnúhu càháⁿ Xítóhó Jesucristú, chi mee-gã cuìní-gã sã cáda-ndó nàcuáa ní dánèhé ñáhá-ndí xii-ndo cuendá cuu váha iní Yã Ndiõxí núú-ndó, te ducaⁿ-ni càda-ndo ndéé núú cuaháⁿ núú vëxi.

2 Te nchòhó sa nàha-ndo nacuáa ní càháⁿ-ndí núú-ndó, chi ní càháⁿ-ndí nàcuáa ní táuchíúⁿ Xítóhó Jesucristú te ní cachí-gã sã 3 Yã Ndiõxí cuìní-gã sã cáda ndáá-ó cùndecu-o ichi-gã. Te nchoo cuè téé vá càháⁿ ndìhi-o ñáiyu dìhí te núú ñá díú ñàdihí-ó cùú-yu, te ni cuè ñáiyu dìhí vá càháⁿ ndìhi-yu téé núú ñá díú yí-yu cùu-güedé. 4 Te núú xíãⁿ nchaa nchòhó tnàha téé-í ndí dííⁿ cùndecu ñadihí-ndó, te diu-ni ducaⁿ nchòhó cue ñáiyu dìhí tucu ndí dííⁿ cùndecu yí-ndo, te mee-ni tnúhu yíñùhu càháⁿ ndìhi tnàha-ndo. 5 Te vá cání cuèhé caní duha iní-ndó dàtná quidé cuè ñáiyu ñá túú sàndáá iní tnúhu Yã Ndiõxí. 6 Te ni ñíⁿ-ndo vá cání iní-ndó dándahú-ndó tnàha téé-ndo càháⁿ ndìhi-ndo ñàdihí-güedé. Te ducaⁿ-ni nchòhó cue ñáiyu dìhí tucu vá cání iní-ndó dándahú-ndó tnàha dìhí-ndó càháⁿ ndìhi-ndo yí-yu. Chi núú ducaⁿ na càda-ndo, te Yã Ndiõxí ío dandòho ñaha-gã xii-ndo dàtná ní cachí-ndí ndéé díhna. 7 Chi Yã Ndiõxí ní càháⁿ ñáhá-gã xii-o cuendá sã cáda-ó mèe-ni sã vãha, te ñá díú sã cuèhé sã dúhá. 8 Te nchaa ñáiyu na càda sáá iní-xi tnúhu càháⁿ-ndí, te quíde sáá iní-yu núú Yã Ndiõxí, chi ñá díú tnúhu téé ñuyíú-a cùu-xi, chi tnúhu Yã Ndiõxí, Yaá ní taxi Espíritú-gã ndécú ndìhi-o cuu-xi.

9 Te nchòhó ñáiyu ndècu ndìhi-í ichi Xítóhó Jesucristú, ñá túú-gã xíní ñùhu-xi cachí tnúhu-í xii-ndo sã cúú iní tnáhá-ndó, chi Yã Ndiõxí sa ní dánèhé ñáhá-gã xii-ndo nàcuáa cuu iní tnáhá-ndó, ndìhi nàcuáa cuu iní-ndó dàva-gã tnàha ñáiyu-ndo. 10 Te ducaⁿ xíquide-ndo ndìhi nchaa ñáiyu ndècu ndìhi-ndo ichi Xítóhó Jesucristú ndécú dìstrítú Macèdoniá.

Te càháⁿ ndàhú-ndí núú-ndó sã cáda ndáá-gã-ndó, te cuita cuu iní-gã-ndó cuè tnaha ñáiyu-ndo quíhíⁿ. 11 Te cada ndee iní-ndó cùndecu ñucaxi iní-ndó, te cuhuⁿ iní-ndó chiúⁿ mee-ndo, te xíãⁿ cada-ndo dàtná ní dánèhé ñáhá-ndí xii-ndo. 12 Te ducaⁿ te tnàhá nchaa ñáiyu ñá túú sàndáá iní tnúhu Yã Ndiõxí càháⁿ váha-yu cuendá-ndó, te ducaⁿ te ñá túú tnàhí-gã ná cùmání xii-ndo.

Nàcuáa cada-xi òré quixi tucu Xítóhó Jesucristú

13 Te vitna na càchí tnúhu-ndí xii nchòhó ñáiyu ndècu ndìhi-ndí ichi Xítóhó Jesucristú cuendá nchaa ñáiyu sa ní xíhí, ñáiyu ní sàndáá iní tnúhu Yã Ndiõxí cuendá sã vã ndìhú iní-ndó cuendá-yu dàtná xíquide nchaa ñáiyu ñá túú yíhí iní-xi sã quíxí tucu Xítóhó Jesucristú ñuyíú-a. 14 Te nchoo sàndáá iní-ó sã ñí xíhí Xítóhó Jesucristú te ní ndoto-gã ní dándótó ñàha Yã Ndiõxí, te sàndáá tucu iní-ó sã dàtná ní dándótó Yã Ndiõxí Xítóhó Jesucristú, ducaⁿ dándoto-gã nchaa ñáiyu ní xíhí ñáiyu ní sàndáá iní ñáhá xii-gã.

15 Te na càchí tnúhu tucu-ndí ingá tnúhu nàcuáa ní càháⁿ Xítóhó Jesucristú, chi ní cachí-gã sã ná sáá nduu quíxi tucu-gã te nchaa ñáiyu sàndáá iní tnúhu-gã ndécú vívú ñuyíú-a vá códó nùú-yu núú ñáiyu ní xíhí ndaa andíu, chi jùndú candeca ñaha-gã xii-yu ndaa. 16 Chi Xítóhó Jesucristú quee túu-gã andíu, te cana-gã nchaa ñáiyu ní sàndáá iní tnúhu-gã, te òré-ánⁿ Yã Ndiõxí cada-gã te òré-ánⁿ, càháⁿ ñíⁿ cútú te òré-ni-ánⁿ ndoto nchaa ñáiyu ní xíhí, ñáiyu ní sàndáá iní tnúhu-gã. 17 Te dàtnùní nchaa nchoo ñáiyu xíndecu vívú ñuyíú-a naníhí tnáhá-ó ndìhí-yu, te ndanchita-o ndíhu-o xítí vícò naníhí tnáhá-ó ndìhí Xítóhó Jesucristú, te candeca ñaha-gã xii-o ndaa andíu cundecu ndìhi-o-gã ni caa ni quíhíⁿ. 18 Núú xíãⁿ chí cuãha tnàha tnúhu ndee iní, te vá ndìhú iní-ndó chi naníhí tãhú-ndó nùú-gã.

5

¹ Te nchòhó ñáyiú ndècu ndìhi-í ichi Xítóhó Jesucristú ñá túú-gã xíní ñùhu-xi sá cächí tnúhu-í xii-ndo sã quíxí tucu-gá, te ni ñà túú-gã xíní ñùhu-xi sá cächí tnúhu-í xii-ndo ñasa cada-xi òré quixi-gá. ² Chi nchòhó sa ñaha ndáá-ndó sã Xítóhó Jesucristú quixi-gá nduu ñà túú yìhi iní-ó, chi dàtná quidé ñà ñadúhú cada-gá òré quixi-gá, chi nduu ñà túú ñà yíhi iní-ó quixi tucu-gá. ³ Te sáá nduu te cachí nchaa ñáyiú ndècu ichi cuehé ichi duha: “Vitna ío váha cùu iní-ó ndècu-o, te ñá túú-gã ná cúmãní xii-o”, duha quesàhá-yu. Te ñáyiú-án òré ñá túú ñà yíhi iní-yu, te quèxio tnúndòho tnúhu ndàhú sá cúú-xí-yu. Chi cada-xi dàtná quidé-xí ñà ñáyiú dèhí ní tnahá òré cacu déhe-xi, chi na iní-yu ní dàtnúhú ñáhá-xí te vá cãcu-yu núú tnúndòhó-yu, te ducaⁿ sã tñahá-xi yáha nchaa ñáyiú ñá túú ndècu ichi-gá, chi na iní-yu quexio tnúndòho sá cúú-xí-yu te vá cãcu-yu núú tnúndòho-án. ⁴ Te nchòhó ñáyiú ndècu ndìhi-í ichi Xítóhó Jesucristú, ñá túú-gã ndécú-ndó ichi cuehé ichi duha, núú xíã sa yìhi-ná iní-ndó ndùu quixi-gá te vá yáha-ndo dàtná yáha nchaa ñáyiú ñá túú ndècu ichi-gá, chi ñáyiú-án ñà túú ñà yíhi iní-yu sá quíxí-gã. Te na iní-yu quexio-gá dàtná quidé ñadúhú na iní-ó quíhu-güedé vehe-o dùhu-güedé ducaⁿ cada-gá òré quixi-gá. ⁵ Te nchoo ñà túú-gã ndécú-ó ichi cuehé ichi duha, te ichi-án cúú-xí dàtná ñà ichi nee ndècu-o ni cuu, te vitna sa ní ngúndecu-o ichi váha, te ducaⁿ chi Yá Ndiöxí ní dándíxí tũu-gá iní-ó cuendá cutnùní iní-ó ñacuáa ndùu cuendá-gá. ⁶ Te xíní ñuhu-xi dandixi túu-o iní-ó, te cada váha-o cùndecu-o ichi-gá, te vá cádá-ó dàtná quidé nchaa ñáyiú ñá túú sándáá iní ñáhá xii-gá, chi ñáyiú-án ñà túú-gã quidé cuendá-yu te núú quide váha-yu àdi ñá túú quide váha-yu ndécú-yu. ⁷ Te nchaa ñáyiú quide cuehé quidé dùha cuú-yu dàtná ñà ñáyiú xídí àdi xíní, chi ñá túú quide

cuendá-yu ñacuáa cada-yu ñà sá váha dàtná cuíní Yá Ndiöxí. ⁸ Te nchòhó ñáyiú sa ní cutnùní iní-xi ñacuáa ndùu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yá Ndiöxí, te cuu iní-ndó cuè tñaha ñáyiú-ndo te ducaⁿ te vá táxí tnùní ñáhá ni ñà sá cuèhé sá dúhá xii-ndo. Te ío cuhuⁿ iní-ndó sã cùndecu-ndo ndìhi-gá ni caa ni quíhí. ⁹ Chi Yá Ndiöxí ní cachí-gá sá vã quíhí-ó núú úhú núú ndàhú, chi mee-gã nacuaca ñaha-gã xii-o cùndecu-o ndìhi-gá, chi ní sándáá iní-ó Xítóhó Jesucristú. ¹⁰ Te mee Xítóhó Jesucristú ní xíhí-gá sá cuendá nchaa yíca cuèchi-o, te ní ndoto-gá cuendá nduu táhú-ó cùndecu-o ndìhi-gá andíu na sáá nduu cuèi sa ní xíhí-ó, àdi vátá cùú-gá-ó. ¹¹ Núú xíã chí cuáha tñaha tnúhu ndee iní, te chindee tñaha-ndo cundecu-ndo ichi-gá dàtná tá quide-ndo véxi.

Té Pãblú dáquíní sàhú-dé ñáyiú ndècu ichi Xítóhó Jesucristú

¹² Te nchòhó ñáyiú ndècu ndìhi-ndí ichi Xítóhó Jesucristú, cãháⁿ ndàhú-ndí núú-ndó sã cànèhe-ndo sá yíñùhu núú cuè téé cùnùu xinu cuechi núú Yá Ndiöxí, cue téé dānehé ñáhá xii-ndo nacuáa cundecu-ndo ichi-gá. ¹³ Te cãháⁿ váha-ndo ndìhi-güedé, te cuu iní-ndó-güedé, chi ñaha-ndo sá chíúⁿ Yá Ndiöxí quidé-güedé. Te cundecu ndìhi váha tñaha-ndo nchaa-ndo.

¹⁴ Te cãháⁿ ndàhú tucu-ndí núú-ndó sã cãháⁿ-ndó dôho nchaa ñáyiú ñá túú cuíní cada chiuⁿ, te ducaⁿ cuáñaha-ndo tnúhu ndee iní xii nchaa ñáyiú quíyuhu iní-xi canchicúⁿ nihnu ichi-gá, te chindee tucu-ndo nchaa ñáyiú vátá ngũnu ichi váha-gá, te cunduu cãhnu iní-ndó núú-yu nchaa-yu.

¹⁵ Te cada ndee iní-ndó te núú ndècu tñaha ñáyiú-ndo cùu úhú iní ñáhá-yu xii-ndo, te vá tñahá-ni-ndo cùu úhú iní-ndó-yu. Te mee-ni sã váha cada-ndo sã cúú-xí nchaa tñaha ñáyiú-ndo.

¹⁶ Te nchaa nduu ío cudí^í iní-ndó cùndecu-ndo. ¹⁷ Te ñà nduu ñà nduu cãháⁿ ndìhi-ndo Yá Ndiöxí. ¹⁸ Te

ndacáⁿ táhú-ndó nǔú-gǎ te núu nándi cùu sá yǎha-ndo ndècu-ndo, chi ducaⁿ cuìní-gá cada-o, te òu ducaⁿ ndùu tnúhu càháⁿ Xítóhó Jesucristú.

¹⁹ Te vá quèhndé nihnu-ndo chiúⁿ guide Espíritú Yǎ Ndiǒxí iní-ndó.

²⁰ Te vá cáda sàá iní-ndó nǔú cuè téé càháⁿ tnúhu Yǎ Ndiǒxí nàcuáa òacahu iní ñáhá-gǎ xii-güedé.

²¹ Te cada cuèndá váha-ndo nàcuáa càháⁿ-güedé, te tñi-ndo nchàa tnúhu váha càháⁿ-güedé. ²² Te dañá-ndo nchàa ichi cuehé ichi duha.

²³ Te mee Yǎ Ndiǒxí quidé-gǎ ío váha cùu iní-ó ndècu-o ichi-gá. Te xicáⁿ táhú-í nǔú-gǎ sá ná càda íí ñáhá-gǎ xii-ndo, te na còto ñaha-gá xii-ndo ndihi iní-ndó cuèndá sá vá cáda-gǎ-ndó ni ñⁿ sá cuèhé sá dúhá, te òu-ni ducaⁿ na càda-gá sá cúú-xí-ndó ndéé ná sàá nduu quixi tucu Xítóhó Jesucristú ñuyíú-a. ²⁴ Chi Yǎ Ndiǒxí Yáa ní cáháⁿ ñáhá xii-o cada-gá nàcuáa ní cáháⁿ-gá, te chindee ñaha-gá xii-ndo.

Té Pǎblú quidé ndèe iní-dé ñáyiu xǐndecu ichi Xítóhó Jesucristú ndécú ñúú Tesàlónicá

²⁵ Te nchòhó ñáyiu ndècu ndihi-í ichi Xítóhó Jesucristú, cácaⁿ táhú-ndó nǔú Yǎ Ndiǒxí sá ná chindee ñaha-gá xii-ndí.

²⁶ Te cúñaha-ndo xii nchaa ñáyiu ndècu ndihi-o ichi Xítóhó Jesucristú sá ñi yuhu ni iní-ndí quidé ndèe iní ñáhá-ndí xii-ndo ndihí-yu.

²⁷ Te vitna mee Yǎ Ndiǒxí ndéhé-gǎ sá càháⁿ ndàhú-í nǔú-ndó sǎ dácuàha-ndo tutú-a nǔú nchàa ñáyiu ndècu ndihi-o ichi-gá.

²⁸ Te Xítóhó Jesucristú ío na chindee chitúu ñaha-gǎ xii-ndo nǔú cuáháⁿ nǔú vǎxi. Te ducaⁿ na cùnduu. Te ío chí cáda ndèe iní-nǎ vitna.

TUTÚ CÚÚ ÒÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ TESÀLÓNICÁ

Té Päblú ndihi cue té cùndihi-dé cádúha-güedé tutú quíhiⁿ ndaha ñáyiu xñdecu ichi Xítoho Jesucristú ndécú ñúú Tesàlónicá

¹ Yúhú té Päblú cádúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiu ndècu ndihi-ndí ichi Xítoho Jesucristú ndécú ñúú Tesàlónicá, chi tnàhá tnúhu-ndo ndihi Tátá-ó Dütú Ndiöxí, ndihi Xítoho Jesucristú. ² Te xicáⁿ táhú-ndí núú Dütú Ndiöxí, ndihi núú Xítoho Jesucristú sá ná chindee chitúu ñaha-gá xii-ndo, te ducaⁿ ndí nduú-gá ná cadá te ío váha cuu iní-ndó cùndecu-ndo.

Yá Ndiöxí cada ndáá-gá cuéchi nchaa ñáyiu ndècu ichi cuehé ichi duha na sàá nduu quixi tucu Xítoho Jesucristú

³ Te nchòhó ñáyiu ndècu ndihi-ndí ichi Xítoho Jesucristú, cächí tnúhu-í xii-ndo sã cúnaha-ndo sá ñà túú dàña ndee-ndí ndácáⁿ táhú-ndí núú Yá Ndiöxí cuendá-ndó, chi dacuítí dùcaⁿ taú-xi cunduu chi ío-gá tá sàndáá iní-ndó-gá cuáháⁿ, te ducaⁿ ùuⁿ-gá tá cùu iní tnàhá-ndó nàcuáa ndècu-ndo ichi Yá Ndiöxí. ⁴ Núu xíáⁿ nchúhú ío váha cáháⁿ-ndí cuendá-ndó nñú nchaa ñáyiu sàndáá iní tnúhu Yá Ndiöxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gá, te ñá túú dàña ndeé-ndó nchìcúⁿ nihnu-ndo ìchi-gá, te quide cahnu-ni iní-ndó cuèi nándi sá yãha-ndo ndècu-ndo ichi-gá. ⁵ Te sá dúcáⁿ quide váha-ndo ndècu-ndo xíáⁿ cùtnùní nàcuáa cada ñaha Yá Ndiöxí xii-ndo na sàá nduu, chi nduu táhú-ndó cùndecu-ndo núú táxí tnùní-gá, te ducaⁿ càda-gá chi cùu-gá Yaá quidé ndáá cuítí. Te vitna ndòho-ndo

nacuáa ndíhu ndaha-gã dava-gã ñáyiu.

⁶ Te Yá Ndiöxí ío váha ndáá quidé-gã, chi mee-gã nachinaa-gã nchaa sá quidé ñaha ñáyiu cùu úhú iní ñáhá xii-ndo, ⁷ te nchoo ñáyiu ndòho cuendá Xítoho Jesucristú nucúndecu váha-o na sàá nduu nùu túu-gá andíu, te tnàhá cue espíritú xínú cuèchi núú Yá Ndiöxí cuuⁿ ndihi-gá, te cue espíritú-áⁿ quidé-xí nchaa núú chiúⁿ tahu-gá. Te òré nuu túu-gá andíu ndihi cue espíritú-áⁿ, te ío dàtásaⁿ-xi andíu. ⁸ Te dandòho-gã nchaa ñáyiu ñá túú tnàhá tnúhu ndihi Yá Ndiöxí, ñáyiu ñá túú sàndáá iní tnúhu Xítoho Jesucristú tnúhu sá cáháⁿ nàcuáa naníhí tàhú-yu. ⁹ Te nchaa ñáyiu-áⁿ ío dandòho ñaha-gã xii-yu, chi ndohó-yu ni caa ni quíhíⁿ, te vá cùndécú-yu núú ío váha càa ndecu-gá táxí tnùní-gá. ¹⁰ Te ducaⁿ càda ñaha-gã xii-yu na sàá nduu, te dàvá-áⁿ ío cada càhnu ñaha nchaa ñáyiu sàndáá iní ñáhá xii-gá. Te tnàhá nchaa nchòhó ñáyiu ní sàndáá iní tnúhu ní cáháⁿ-ndí ducaⁿ càda-ndo, te nchaa-o ío cuñúhu-o-gã dàvá-áⁿ.

¹¹ Te cuendá xíáⁿ nñú ío xicáⁿ táhú-ndí núú Dütú Ndiöxí sá ná chindee ñaha-gã xii-ndo cùndecu váha-ndo ìchi-gá dàtná cuíní mée-gã cundecu nchaa ñáyiu ní cáháⁿ-gã cundecu ndihi-gá. Te xicáⁿ táhú tùcu-ndí núú-gã sá ío na chindee ñaha-gã xii-ndo càda-ndo nchaa sá vãha sàni iní-ndó, ndihi cuendá chiúⁿ quide-ndo cuendá-gá, te ducaⁿ chi sàndáá iní-ndó-gã. ¹² Te núu ducaⁿ na càda-ndo, te cáháⁿ váha ñáyiu cuendá Xítoho Jesucristú, te tnàhá-ni nchòhó cáháⁿ váha-yu cuendá-ndó, chi mee Yá Ndiöxí ndihi Xítoho Jesucristú cùndáhú iní ñáhá-gã chíndee ñaha-gã xii-ndo.

2

Té quixi dandàhú ñáyiu

¹ Te nchòhó ñáyiu ndècu ndihi-ndí ichi Xítoho Jesucristú cächí tnúhu-ndí xii-ndo nàcuáa cada-xi nduu na quixi tucu-gá, chi quixi-gã nacuaca

ñaha-gã xii-o, núu xiãⁿ càháⁿ-ndí dóho-ndo. ² Te ñá díú sã ííⁿ tnúhu tecú dóho-ndo te ngúíta-ndo càni ííⁿ cani úú iní-ndó, te ni vã yùhú-ndó te núu véxi ííⁿ téé càchí-dé sã càháⁿ-dé tnúhu Yá Ndióxí, te càchí-dé sã sã véxi Xítóhó Jesucrístú, te vã quíndáá iní-ndó tnúhu càháⁿ-dé chi ñá ndáá, àdi véxi ííⁿ téé nèhe ííⁿ tutú núu-ndó te càchí-dé sã yùhú ní tendaha-í véxi, te núu tütú-áⁿ càháⁿ-xi sã sã véxi Xítóhó Jesucrístú, te díu-ni vã quíndáá iní-ndó nàcuáa càháⁿ-xi, te ndèda-ni cà ñáyíu cáháⁿ-yu dàvá-áⁿ sã sã véxi-gá dico vã quíndáá tnàhí iní-ndó. ³ Núu xiãⁿ dátùha ñaha-í xii-ndo cuèndá sã vã dáñá tnàhí-ndo mèe-ndo dandahú ñáhá ñáyíu. Chi cùmání-gã sáá nduu quíxi tucu Xítóhó Jesucrístú, te ngúíta nchaa ñáyíu cuu úhú iní-yu Yá Ndióxí, te dàvá-áⁿ quíní-yu ííⁿ téé xidó quidé nchàa sã cuèhé sã dúhá, te téé-áⁿ quíhíⁿ-dé núu ùhú núu ndàhú ni caa ni quíhíⁿ. ⁴ Te díu-ni téé-áⁿ vã ndèe iní-dé nchaa sã càchí ñáyíu cùu ndiòxí-yu ndíhi nchaa dava-gá sã quidé càhnú-yu, te cachí-dé sã ío cùnuu-dé, te quíhu-dé ndéé xití veñúhu núu ndécú cuè ñáyíu chihnuhu ñaha xii Yá Ndióxí coo-dé, te cúñaha-dé xií-yu sã cúú-dé Yá Ndióxí.

⁵ Te dandacu iní-ndó chi nchaa tnúhu-a sa ní cachí tnúhu-í xii-ndo cùtnàhá ní xíndecu ndíhi ñaha-í. ⁶ Te nchòhó sa cùtnuní iní-ndó ñá cúú sã ngání ñaha xii téé-áⁿ núu ñá túú-dé vitna, dico na sáá nduu tàú-xi quee-dé caca cuu-dé te dàvá-áⁿ quíní ñáhá nchàa ñáyíu. ⁷ Te ío titní núu sã cuèhé sã dúhá quíde yucu ñávãha dicó-ni sã vátá quíní-gá ñáyíu, dico ndècu ííⁿ sã ñá dáñá càda-xi nchaandi túhú nàcuáa càchí iní-xi, dico sáá nduu xòcuíñí sã ñá dáñá-áⁿ te dàvá-áⁿ càda-xi nchaa nàcuáa càchí iní-xi. ⁸ Te sáá nduu quíní-yu téé quíde nchaa sã cuèhé sã dúhá-áⁿ ñuyíú-a. Te òré ná quíxi túu Xítóhó Jesucrístú, te mee-ni sã dátãsaⁿ-xi, ndíhi yóco yuhu-gá cuú téé-áⁿ. ⁹ Te sácuíhná tendaha-xi téé-áⁿ quíxi-dé, te cuñaha-xi tnúhu ndee iní cada-dé nándi sã cádá-dé. Te cada-dé sã ñá túú tnàhí ndacu

ni ííⁿ ñáyíu ñuyíú-a cada-yu, dico mee-ni dandahú ñáhá-dé xií-yu caca cuu-dé. ¹⁰ Te nchaa núu sã cuèhé sã dúhá càda-dé dandahú-dé nchaa ñáyíu sa ñúhu ichi cuáháⁿ núu ùhú núu ndàhú, chi ñá túú ní cuíní-yu quíndáá iní-yu tnúhu ndáá tnúhu Yá Ndióxí cuèndá naníhí tàhú-yu. ¹¹ Te sã dúcáⁿ ñá túú ní cuíní-yu quíndáá iní-yu tnúhu ndáá, núu xiãⁿ dañá Yá Ndióxí dacáháⁿ yucu ñávãha iní-yu quíndáá iní-yu nchaa tnúhu ndehnde ¹² cuèndá cuíta nihnú-yu, te ducaⁿ yãha-yu chi ñá túú sàndáá iní-yu tnúhu ndáá càháⁿ Yá Ndióxí, chi mee-ni nchaa sã cuèhé sã dúhá cùdíí iní-yu quíde-yu, te cuíta nihnú-yu chi ducaⁿ ní cachí Yá Ndióxí cunduu.

Ñáyíu ní cachí Yá Ndióxí naníhí tàhú

¹³ Te nchòhó ñáyíu ndècu ndíhi-ndí ichi Xítóhó Jesucrístú, ñáyíu ío cùu iní-gá càchí tnúhu-ndí xii-ndo sã ñá túú dàña ndee-ndí ndacáⁿ táhú-ndí núu Yá Ndióxí cuèndá-ndó, chi ducaⁿ tàú-xi cunduu, chi Yá Ndióxí ní cachí-gá ndéé cùtnàhá vátá ngãva-gá ñuyíú sã naníhí tàhú-ndó, te díu Espíritú-gá dacáháⁿ-xi iní-ndó ndècu yihnuhu-ndo núu-gã, te sàndáá iní-ndó tnúhu ndáá càháⁿ-gá núu xiãⁿ ní naníhí tàhú-ndó. ¹⁴ Chi cuèndá tnàhí-a ní cáháⁿ ñáhá Yá Ndióxí xii-ndo, te ducaⁿ ní naníhí tàhú-ndó chi ní sàndáá iní-ndó tnúhu Xítóhó Jesucrístú ní cáháⁿ-ndí núu-ndó, te sáá nduu te cundecu-ndo tnàhá-ndó núu ío váha càa ní nduu táhú Xítóhó Jesucrístú ndécú-gã.

¹⁵ Núu xiãⁿ nchòhó ñáyíu ndècu ndíhi-ndí ichi Xítóhó Jesucrístú ío càháⁿ-ndí dóho-ndo sã vã dáñá nihnu-ndo ichi-gá, te ni vã nàcuànaa-ndo nchaa tnúhu ní cáháⁿ-ndí núu-ndó cùtnàhá ní xíndecu ndíhi ñaha-ndí xii-ndo, te díu-ni ducaⁿ càda-ndo nchaa tnúhu tendaha-ndí véxi. ¹⁶⁻¹⁷ Te xicáⁿ táhú-ndí núu-gã sã ná dàcaháⁿ-gá iní-ndó cùndecu-ni-ndo ichi-gá, te ducaⁿ ío na chíndee ñaha-gá xii-ndo cáháⁿ-ndó mèe-ni tnúhu váha, te cada váha-ndo cùndecu-ndo nàcuáa cuu váha iní-gá, chi mee Dütú Ndióxí

ío cùu iní ñáhá-gă xii-o, te diu-gá ní taxi-gá tnúhu ndee iní cundecu ndihí-o ní caa ní quíhíⁿ, te ní cachí tnúhu tucu-gá ingá tnúhu váha sá cùndetu-o Xítóhó Jesucristú.

3

Cáháⁿ ndihí-ndo Yă Ndiöxí cuendá-ndí

¹ Te nchòhó ñáyiú ndècu ndihí-ndí ichi Xítóhó Jesucristú, ndéé núú ndíhí-nă cächí tnúhu-í xii-ndo sã cáháⁿ ndihí-ndo Yă Ndiöxí cuendá-ndí cuendá sá ná chindee ñaha-gá xii-ndí, te ducaⁿ ndíhí-ni cuténuu tnúhu Xítóhó Jesucristú nchaa xichi, te cudí iní-yu tnúhu-gá dàtná quidé nchòhó. ² Te cáháⁿ ndihí tucu-ndo Yă Ndiöxí cuendá sá ná còto ñaha-gá xii-ndí, te ñá túú nă cada ñaha ñáyiú cuihna iní-xi ndècu ichi cuehé ichi duha xii-ndí, chi ñá ncháă-yu sàndáá iní-yu tnúhu-gá. ³ Dico Xítóhó Jesucristú quidé-gă nchaa sá cáháⁿ-gá, te diu-gá cada te nchòhó cundecu-ni-ndo ìchi-gá, te coto ñaha-gá xii-ndo cuendá sá ñá túú nă cada ñaha yùcu ñávâha. ⁴ Te Xítóhó Jesucristú quidé-gă cùtnùní iní-ndí sá nchòhó quidé-ndó nchàa nacuaá ní dánèhé ñáhá-ndí xii-ndo, te diu-ni ducaⁿ càda-ndo cundecu-ndo. ⁵ Te xicáⁿ táhú-ndí núú Yă Ndiöxí sá ná chindee ñaha-gá xii-ndo cùu iní-ndó-gă, te diu-ni-gá ná chindee ñaha-gá xii-ndo cùnduu cahnu iní-ndó, chi Xítóhó Jesucristú ducaⁿ ïo cahnu iní-gá.

Tàú-ó càda chiuⁿ-o

⁶ Te nchòhó ñáyiú ndècu ndihí-í ichi Xítóhó Jesucristú, cáháⁿ-í dóho-ndo sã méé-gă cuení-gá sá vă ñihí tnáhá-gă-ndó ndíhí ndéda-ni càa ñáyiú cächí sá sàndáá iní tnúhu-gá, ñáyiú ñá túú cuení cada chiuⁿ, chi ñáyiú ducaⁿ xiquide ñá túú cuení-yu tní-yu tnúhu sá ní dánèhé ñáhá-ndí xii-ndo. ⁷ Te nchòhó sa xìní-ndó năcuáa cada-ndo cùndecu-ndo can-chicúⁿ nihnu-ndo năcuáa quide-ndí. Te cùtnàhá ní xindecu ndihí ñaha-ndí xii-ndo chi ní ìⁿ nduu ñá túú ní

tùhío-ndí. ⁸ Te ni ñá túú dícó ducaⁿ ni quèheⁿ-ndí sá ndécú ndíhí ñáyiú caxi-ndí àdi canehe-ndí, chi cuèi nduu cuèi niú ío ní quide chiuⁿ-ndí ní níhí-ndí díhúⁿ ní saaⁿ-ndí nchaa sá ní nàndíhí-ndí cuendá sá ñá túú ní cuení-ndí chichiuⁿ ñaha-ndí xii-ndo. ⁹ Te cuèi tàú ndisa-ndí cachí tnúhu-ndí xii-ndo sã chindee ñaha-ndo xii-ndí ní cùu, dico ní quide chiuⁿ-ndí cuendá ní cuení-ndí dánèhé ñáhá-ndí xii-ndo năcuáa cada-ndo cùndecu-ndo. ¹⁰ Te cùtnàhá ní xindecu ndihí ñaha-ndí xii-ndo ní cachí-ndí sá ncháá ñáyiú ñá túú cuení cada chiuⁿ te vă cuăha-ndö-yu sá cáxí-yu.

¹¹ Te vitna ñihí-ndí tnúhu sá ío dava nchòhó ñá túú tnàhí quide chiuⁿ-ndo, chi àúⁿ nă cuu ndí cuu ndí cuu-ni-ndo núú ndécú dàva-gá tnàha ñáyiú-ndo.

¹² Te yúhú cáháⁿ-í dóho nchaa nchòhó ñáyiú ducaⁿ ñá túú cuení cada chiuⁿ sá cadá chiuⁿ-ndo cuendá níhí-ndó nchàa sá cóhó sã cáxí-ndó, te duha cáháⁿ-í dóho-ndo, chi ducaⁿ cuení Xítóhó Jesucristú Yaá táxí tnùní ñáhá xii-o cada-ndo, te òré cada chiuⁿ-ndo te vă ío cada dusaⁿ-ndo.

¹³ Te nchòhó ñáyiú ndècu ndihí-í ichi Xítóhó Jesucristú, vă dáñá ndéé-ndó càda-ndo mee-ni sá vâha.

¹⁴ Te núú ìⁿ ñáyiú ndècu ndihí-ndo ñá túú cuení-yu tní-yu tnúhu cáháⁿ-ndí núú tütú-a, te cundehe-ni-ndo núú ndéda càa-yu, te vă ñihí tnáhá-gă-ndó ndíhí-yu cuendá sá ná cùcahaⁿ núú-yu, ¹⁵ dico vă cúú ùhú iní-ndö-yu, chi cáháⁿ-ndó dóho-yu cada-ndo sã ndécú-ndó ìchi Xítóhó Jesucristú ndihí-yu.

Tnúhu ndéé núú ní ndihí-ná

¹⁶ Te mee Xítóhó Jesucristú ío váha cùu iní-gá ndécú-gă, te xicáⁿ táhú-í núú-gă sá méé-gă ná cadá te ío váha cuu iní-ndó tnàhá-ndó cùndecu-ndo cuèi nása-gá ná cùndecu-ndo. Te mee-gă ná cùndecu ndihí ñaha-gá xii-ndo nchàa-ndo.

¹⁷ Te vitna yúhú té Păblú tèè-í tnúhu-a quide ndee iní ñáhá-í xii-ndo, te diu-ni duha càa nchaa letrá-í nchaa núú tütú cadúha-í. ¹⁸ Te xicáⁿ táhú-í

núú Xìtohó Jesucrìstú sá ïo na chìndee
chitúu ñaha-gă xii-ndo nchàa-ndo. Te
ducaⁿ na cùnduu. Te ío chí cádá ndèe
iní-nă vitna.

TUTÚ DÍHNA NUU NĪ CADÚHA TÉ PĀBLŪ QUIHĪⁿ NDAHA TÉ TIMŪTEÚ

*Té Pāblū cādūha-dé tutú quihĪⁿ
ndaha té Timūteú*

¹ Yúhú té Pāblū ní tendaha ñaha Yá Ndiōxí cāhāⁿ-í tnúhu Xítohó Jesucristú núú ñáyiú chi ducaⁿ ñí cachí Yá Ndiōxí cunduu, te diu-gá cúu-gă Yaá ní dácăcu nihnu ñaha xî-o núú ùhú núú ndáhú. Te tnàhá Xítohó Jesucristú ducaⁿ ñí cachí-gá sá cāhāⁿ-í tnúhu-gá, te diu-gá ní taxi-gá tnúhu ndee ìní xii-o sá cūndecu-o ndihĪ-gá ñí caa ñí quihĪⁿ. ² Te yòhó té Timūteú cúu-n ĩⁿ té ní sanu ichi ndisa-í ichi Xítohó Jesucristú chi ío váha ní sándáá iní-n-gă. Te cādúha-í ĩⁿ tutú daquixi-í ndaha-n. Te xicāⁿ táhù-í núú Tátá-ó Dütú Ndiōxí ndihĪ núú Xítohó Jesucristú sá ío na chindee chitúu ñaha-gă xii-n, te ducaⁿ ndi nduú-gá ná cáda te ío váha cuu iní-n cūndecu-n.

Cuendá nchaa ñáyiú dāndahú tnàha ñáyiú-xi

³ Te nàha-n nacuáa ní cāhāⁿ-í cūtnàhá ní quee-í ñuú Éfesú véxi-í distritú Macèdoniá, chi ní cachí-í sá quéndoo-n ñuú-áⁿ cāhāⁿ-n dōho nchaa ñáyiú dāndahú ñáhá cāchí sá cāhāⁿ tnúhu Yá Ndiōxí te ñá ndáá sá cāhāⁿ-yu tnúhu-gá, te diu-ni ducaⁿ cāhāⁿ-í vitna cada-n cūndecu-n. ⁴ Te cúñaha-n xii-yu sá vā cáda cuendá-yu nchaa cuendú nihĪ-yu nācuáa ní xóo cada ñáyiú ní xindecu ndéé sanaha, te nchaa cuendú-áⁿ dīcō chínàá ñáhá-xí chi ñá túú vėdana nāndihĪ-xi, te ñí ñá túú chindee ñaha-xi cada-o nacuáa cuinĪ Yá Ndiōxí, chi mee-ni sá quindáá iní-ó-gă quidė-xí quide-o nchaa nacuáa cuinĪ-gă.

⁵ Te duha cāhāⁿ-í cúñaha-n xii-yu cuendá sá ná cūu iní-yu tnàha ñáyiú-yu, te xini ñuhu-xi nduu ndoo nduu nine iní-yu, te cunduu váha iní-yu, te quindáá iní-yu Yá Ndiōxí, te

vá caní ĩⁿ cani úú iní-yu, te núu ducaⁿ na cādá-yu te cuu iní ndisá-yu nchaa tnàha ñáyiú-yu. ⁶ Chi dava ñáyiú ñá túú-gă quidė-yu nchaa nācuáa cāhāⁿ-í-a, chi mee-nă nchaa cuendá sá ñá túú vėdana nāndihĪ xicāhāⁿ-yu. ⁷ Te cuinĪ-yu cāhāⁿ-yu nchaa tnúhu ní cāhāⁿ ndī Moisés dico ñá ndácū-yu, chi cuēi ñí yūhu ñí iní-yu cāhāⁿ-yu dico ñá tēcú tnūnĪ-yu nācuáa ní cāhāⁿ ndī, te ñí tnūhu cāhāⁿ mēē-yu ñá cūtnūnĪ iní-yu nācuáa ndūu-xi.

⁸ Te sa nàha-o sá nchāá tnūhu ní cāhāⁿ ndī Moisés váha, te núu na tēcú tnūnĪ-ó nă cuendá ducaⁿ ñí ngūndecu nchaa tnúhu-áⁿ. ⁹ Te cūtnūnĪ iní-ó sá ñá díú sá cúu-xí nchāa ñáyiú quide váha ndėcu ñuyú-a ñí ngūndecu nchaa tnúhu-áⁿ, chi ní ngūndecu-xi sá cúu-xí nchāa ñáyiú ñá túú quide váha, ndihĪ cuendá nchaa ñáyiú ío sáá iní-xi, ndihĪ cuendá nchaa ñáyiú quide cuehé quidė dūha, ndihĪ cuendá nchaa ñáyiú ío ndėcu cuēchi-xi, ndihĪ cuendá nchaa ñáyiú ñá túú nēhe vėdana sá yĪñūhu núú Yá Ndiōxí, ndihĪ cuendá nchaa ñáyiú ñá túú cāhāⁿ váha cuendá ichi Yá Ndiōxí, ndihĪ cuendá nchaa ñáyiú sàhni tátá-xi ndihĪ nāná-xi, ndihĪ cuendá nchaa dava-gă ñáyiú sàhni tnaha, ¹⁰ ndihĪ cuendá nchaa cue té cāhāⁿ ndihĪ ñáyiú dīhĪ te ñá díú ñāndihĪ-güedé cúu-yu, ndihĪ cuendá tucu nchaa ñáyiú dīhĪ cāhāⁿ ndihĪ cue té te ñá díú yĪ-yu cūu-güedé, ndihĪ cuendá nchaa cue té cāhāⁿ ndihĪ tnàha ndi mee té-xi, ndihĪ cuendá nchaa ñáyiú chiváha tnàha ñáyiú-xi cuendá sá cuinĪ-yu níhĪ-yu díhúⁿ, ndihĪ cuendá nchaa ñáyiú ndehnde, ndihĪ cuendá nchaa ñáyiú cācunehe ndéé Yá Ndiōxí cuendá cuinĪ-yu cutnūnĪ iní tnàha ñáyiú-yu sá cāhāⁿ ndáá-yu, te ñá ndáá sá cāhāⁿ ndáá-yu, ndihĪ cuendá nchaa ñáyiú quide nchaa dava-gă sá ñá túú tàuchiūⁿ Yá Ndiōxí cadá-yu. Cuendá nchaa ñáyiú ducaⁿ xiquide ní ngūndecu nchaa tnúhu-áⁿ. ¹¹ Te nchaa tnúhu-áⁿ ĩⁿ-ni cūu-xi ndihĪ nchaa tnúhu sá ñí cachí Yá Ndiōxí cāhāⁿ-í, te tnúhu-áⁿ cúu-xí tnúhu váha vĪhi, chi mee-gă ío váha iní-gă.

Té Păblú ndàcáⁿ táhú-dě núú Yă Ndiöxí sá nǐ cundàhú iní ñáhá-gă xii-dě

12 Te Xítohó Jesucristú ní cutnùní iní-gá sá cádá ndáá-í cada-í nchaa chiúⁿ tahu-gá. Te ndàcáⁿ táhú-í núú-gă sá nǐ taxi-gá chiúⁿ-gá quidè-í, te ío chindee ñaha-gá xii-í. 13 Te ní taxi-gá chiúⁿ-gá quidè-í cuèi ní xóo cáháⁿ cuèhé-í cuèndá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nándi-gá sá nǐ xóo cada-í-yu dico ní cundàhú iní ñáhá Yă Ndiöxí xii-í, chi vátá quindáá-gá iní-í Xítohó Jesucristú cútnàhá ducaⁿ nǐ xóo cada-í, te ni ñă cútnùní iní-í nchaa sá quidè-í ní cùu, te cuèi ducaⁿ nǐ xóo cada-í, 14 dico Yă Ndiöxí ío ní cundàhú iní ñáhá-gă xii-í te chindee ñaha-gá. Te mee Xítohó Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

15 Te nihí-ó tnúhu sá Xítohó Jesucristú ní quixi-gá ñuyíú-a cuèndá sá dácăcu nihnu-gá nchaa ñáyiú ndècu ichi cuehé ichi duha. Te tnúhu-áⁿ cúú-xí ñⁿ tnúhu ndáá, te xini ñuhu-xi quindáá iní nchaa nchoo ñáyiú ndècu ñuyíú-a. Te yúhú cúú-í téé ío-gá ndécú cuèchi-xi núú Yă Ndiöxí ní cùu. 16 Te Yă Ndiöxí ní cundàhú iní ñáhá-gă ní dácăcu nihnu ñaha-gă xii yúhú téé xidó ndécú cuèchi-xi ní cùu, cuèndá cutnùní iní nchaa ñáyiú sá Xítohó Jesucristú ío càhnu iní-gá. Te sá dúcáⁿ nǐ quide ñaha-gă xii-í, te xíáⁿ cutnùní iní-yu sá nǐ na quindáá iní ñáhá-yu xii-gá te cundécú-yu ndihí-gá nǐ caa nǐ quíhíⁿ. 17 Te nchaa-o chí ná càchí-ó sǎ ío càhnu cuu Yă Ndiöxí, te canehe-o sǎ yíñùhu núú-gă nǐ caa nǐ quíhíⁿ, chi mee-gă cúú-gă Yaá táxí tnùní nchaa nduu nchaa quíú. Te cùu-gá ñⁿ Yaá ñá túú xini núú-ó, te ñⁿdìi díi-ni-gă ío ndècu ndihí-gá nchaa sá xini tnùní-gá.

18 Te yòhó té Timùteú téé cùu datná ñⁿ déhe mee-í sa nàha-n nacuáa ní cáháⁿ dava-gá cue téé cáháⁿ tnúhu Yă Ndiöxí cuèndá-n, te ñⁿ-ni ducaⁿ cáháⁿ-ú tucu, te cada-n nchaa nacuáa cáháⁿ tnúhu-áⁿ chí ñⁿ-ni ducaⁿ tnúhu-áⁿ canu ichi ñaha-xi xii-n cada-n nchaa

nacuáa cuèní Yă Ndiöxí. 19 Te ío quindáá iní-n Xítohó Jesucristú, te cada váha-n cundecu-n nacuáa cundecu váha iní-n, chí dava ñáyiú ñá túú-gă ducaⁿ quidè-yu núu xíáⁿ ñá túú-gă sàndáá iní-yu nacuáa cáháⁿ tnúhu-gá. 20 Te ñⁿ-ni ducaⁿ nǐ quide té Himèneú ndihí té Lìjandrú ní dáñá ndèe-güedé ñá túú-gă sàndáá iní-güedé nacuáa cáháⁿ tnúhu Xítohó Jesucristú, te ní xáhaⁿ-í xii-güedé sá ná cundoho-ná-güedé nǐ nása cada ñaha sàculhá xii-güedé, te ducaⁿ nǐ xáhaⁿ-í cuèndá sá vǎ cáháⁿ cuèhé-gá-güedé cuèndá Yă Ndiöxí.

2

Nacuáa cáháⁿ ndihí-o Yă Ndiöxí

1 Te na càchí tnúhu-í xii-n nchaa nacuáa cada-n. Te díhna-gá càchí tnúhu-í sá cáháⁿ ndihí-n Yă Ndiöxí cuèndá nchaa ñáyiú te núu nása cùu xíndécú-yu, te cácáⁿ táhú-n núú-gă cuèndá-yu, te ducaⁿ ío ndacáⁿ táhú-n núú-gă cuèndá nchaa sá vǎha quide ñaha-gá xii-yu. 2 Te ducaⁿ cáháⁿ ndihí-n Yă Ndiöxí cuèndá nchaa cue téé cùnuu ndihí cuèndá nchaa dava-gá cue téé cùchiúⁿ cuèndá cada váha-güedé, te ducaⁿ nchòo ñá túú nǎ cuu cundecu-o, te ñá túú tnàhí ná caní iní-ó cundecu-o, te ío cundecu yíñùhu-o núú Yă Ndiöxí, te cada-o nchaa nacuáa tàú-xi cunduu. 3 Te núu ducaⁿ na càda-o cáháⁿ ndihí-o Yă Ndiöxí cuèndá nchaa ñáyiú te quide váha-o, te ndùu vétú iní Yă Ndiöxí Yaá ní dácăcu nihnu ñaha xii-o núú ùhú núú ndàhú. 4 Te mee-gă cuèní-gá sá ncháá ñáyiú tecú tnùní-yu nchaa tnúhu cáháⁿ-gá, chí cuèní-gá sá nánihí tàhú-yu. 5 Te ñⁿ-ni Dútú Ndiöxí ndécú, te ñⁿ-ni Xítohó Jesucristú, te medli-ni Xítohó Jesucristú quidè-gă tnàhá tnúhu-o ndihí Yă Ndiöxí. 6 Te Xítohó Jesucristú ní dáñá-gă méé-gă ní sahní ñaha-güedé xii-gá cuèndá sá cuèní-gá sá cǎcu nihnu nchaa ñáyiú ndècu ñuyíú núú ùhú núú ndàhú. Te Yă Ndiöxí cuèní-gá sá ncháá ñáyiú ñuyíú ndécú vitna níhí-yu tnúhu nacuáa ní cuu ní xihí Xítohó Jesucristú. 7 Te Yă Ndiöxí ní cachí-gá sá cáháⁿ-í tnúhu-áⁿ

ndëni ní cuu núú xĩndecu ñáyiú ñá túú cùu ñáyiú isràèl, te mee-ni tnũhu ndáá dánèhé-í-yu nàcuáa quindáá iní ñáhã-yu xii-gá, te yúhú càháⁿ ndáá-í sá Yá Ndiõxí ní cachí-gá sá càháⁿ-í tnũhu-gá chi ndècu ndihí-í Xítóhó Jesucrístú, te ñá túú dándahú ñáhà-í xii-n.

⁸ Te yúhú cuiní-í sá ncháá xichi càháⁿ ndihí cue téé Yá Ndiõxí, te na cùnduu ndoo cunduu nine iní-güedé òré ndonehe-güedé ndaha-güedé càháⁿ ndihí ñaha-güedé xii-gá, chi vá cúú cùdééⁿ-güedé cuendá nchaa sá quidé ñaha ñáyiú xii-güedé, te ni vã cání iní-güedé cúcuèhé tnáhã-güedé ndihí-yu. ⁹ Te càchí tnũhu-í xii-n sã ncháá ñáyiú dñí ná cùnduu dío-yu nàcuáa tàú-xi cunduu, te vá cùnduu cuehé cunduu duha dàtná cáá dño nchaa ñáyiú ndècu ichi cuehé ichi duha, te na ndádã-yu díquĩ-yu nàcuáa tàú-xi cunduu, te vá ndádã cuèhé ndada duhá-yu, te vá cání iní-yu cunduu víi-yu ndihí sá ïo ndèyáhu, te ni vã cání iní-yu cuihnú-yu dóó sã ïo ndèyáhu. ¹⁰ Te mee-ni sã vãha cadã-yu, chi ducaⁿ tàú-xi cada nchaa ñáyiú dñí ndécú ichi Yá Ndiõxí. ¹¹ Te òré tàcã-yu núú dácuahá-yu tnũhu Yá Ndiõxí, te cue ñáyiú dñí-áⁿ na nãhi dacuahá-yu tnũhu-gá, te cadã-yu nchaa nàcuáa càháⁿ cue téé dàcuaha ñaha xii-yu tnũhu-gá. ¹² Te yúhú càchí-í sá vá cúú dàcuaha ñáyiú dñí cue téé, te ni vã cúú tàxi tnuní ñáhã-yu xii-güedé chi cunduu tnávíi-ni yuhú-yu cundedóho-yu. ¹³ Te ducaⁿ xini ñuhu-xi cadã-yu, chi Yá Ndiõxí ní cadúha-gá díhna-gá té Àdán te dàtnùní ní cadúha-gá tá Èvá. ¹⁴ Te ñá díú mèe té Àdán ní dándahú ñáhã sàcuíhnã xii-dé, chi tá Èvá ní dándahú-xi, te ñá túú ní quide váha-xi núú Yá Ndiõxí sá dúcãⁿ ñí sándáá iní-xi tnũhu ní càháⁿ sàcuíhnã-ãⁿ. ¹⁵ Dico ñáyiú dñí ní nduu táhũ-yu sá cóo dẽhe-yu, te naníhí tàhũ-yu te núú vá dáñã ndèé-yu canchicúⁿ nihnú-yu ichi Yá Ndiõxí, te cundecu yĩñhũ-yu núú-gã, te cuu iní-yu nchaa tnãha

ñáyiú-yu, te cadã-yu nchaa nàcuáa tàú-xi cunduu cundecú-yu.

3

Nàcuáa tàú cue téé yindaha ñaha xii ñáyiú ndècu ichi Yá Ndiõxí cada-güedé

¹ Te ò ío ñⁿ tnũhu càháⁿ ñáyiú sá nõu ñⁿ téé cuiní quindaha ñaha xii ñáyiú ndècu ichi Yá Ndiõxí, te ñⁿ sá vãha cuiní-dé cada-dé càchí-yu, te ndáá quèé-xí tnũhu càháⁿ-yu. ² Te yúhú càchí-í sá cuè téé ducaⁿ na quindaha ñaha xii ñáyiú te xini ñuhu-xi cuu-güedé cue téé quide ndáá cuendá sá vá càháⁿ ñáyiú cuendã-güedé sã ñã túú quide ndáá-güedé. Te na cùu-güedé cue téé ndèca ñⁿ caa-ni ñadihí, te na cùu-güedé cue téé ñã túú quide cutexínu ndècu, te na cùu-güedé cue téé quide nchaa nacuaáa tàú-xi cunduu, te na cùu-güedé cue téé sãñaha nõu vehe ndetatú nchaa ñáyiú ñuhu ichi, te na cùu-güedé cue téé dãnèhé ñáhã vãha xii ñáyiú tnũhu Yá Ndiõxí. ³ Te vá cúú-güedé cue téé quihu, te ni vã cúú-güedé cue téé ndècu pletú, te ni vã cúú-güedé cue téé dicó-ni ducaⁿ ñihí díhúⁿ, te ni vã cúú-güedé cue téé sãni iní nãã, te ni vã cúú-güedé cue téé ñuhu iní mee-ni díhúⁿ. Chi na cùu-güedé cue téé váha iní-xi te cunduu càhnu iní-güedé. ⁴ Te na cùu-güedé cue téé ío váha sãnu ichi ñadihí-xi ndihí landú-xi, te na cùu-güedé cue téé quide nacuaáa sãndáá iní ñáhã landú-xi cuendã canehe-güexi sã yĩñhũ núú-güedé. ⁵ Chi núú cùu-güedé cue téé ñã ndácú cànuichi ñadihí-xi ndihí landú-xi, te vá ndácú-güedé quindaha-güedé cue ñáyiú ndècu ichi Yá Ndiõxí. ⁶ Te vá cúú-güedé cue téé íchí ñí sãndáá iní-xi tnũhu Yá Ndiõxí, chi na cuáhãⁿ te cada ñinu-güedé mée-güedé te cuíta nihnu-güedé dàtnã ní xíta nihnu sàcuíhnã. ⁷ Te xini ñuhu-xi cuu-güedé cue téé càháⁿ váha ñáyiú cuendã-xi, cuèi ñã díú ñáyiú ndècu ichi Yá Ndiõxí cuendã sã vá cuátnũhu ñaha ñáyiú xii-güedé, chi núú ñáhã te cudana

te sácuihná quesaha-xi tàxi tnuní ñáhá-xí xii-güedé.

Cue téé chindee ñaha xii cue téé yíndaha ñaha xii ñáyiú ndècu ichi Yá Ndiöxí

⁸ Te tnàhá cue téé chindee ñaha xii cue téé yíndaha ñaha xii ñáyiú ndècu ichi Yá Ndiöxí xíní ñùhu-xi cuu-güedé cue téé quide nchaa nacuaa tàù-xi cunduu, te vá cúú-güedé cue téé càchí sá càháⁿ ndáá te ñá ndáá, te ni vâ cúú-güedé cue téé quihu, te ni vâ cúú-güedé cue téé sàni iní-xi dicó-ni ducaⁿ ñíhí dǐhúⁿ. ⁹ Te xìni ñùhu-xi cuu-güedé cue téé ñá túú dàña ndeé sàndáá iní tnúhu Yá Ndiöxí, te na cùu-güedé cue téé ío váha cùu iní-xi cuendá nchaa sá vâha quide-güedé. ¹⁰ Te xìni ñùhu-xi coto ndeé ñáhá xii-güedé te núu cùu-güedé cue téé quide váha, te núu cùu-güedé cue téé quide váha ña te cuu chindee-güedé cue téé yíndaha ñaha xii ñáyiú ndècu ichi Yá Ndiöxí. ¹¹ Te tnàhá tucu nchaa ñáyiú dǐhí ná càdá-yu nchaa nàcuáa tàù-xi cunduu, te vá cùndùu yiti yuhú-yu, te ni vâ cúú-yu ñáyiú quide cutexínu ndècu, te na cùú-yu ñáyiú ío váha quide ndáá. ¹² Te nchaa cue téé chindee ñaha xii cue téé yíndaha ñaha xii ñáyiú ndècu ichi Yá Ndiöxí, xìni ñùhu-xi cuu-güedé cue téé ndècu ñⁿ caa-ni ñadǐhí-xi, te na cùu-güedé cue téé sànu ichi váha ñadǐhí-xi ndǐhi landú-xi. ¹³ Te núu na càda ndáá-güedé chindee-güedé cue téé yíndaha ñaha xii ñáyiú ndècu ichi Yá Ndiöxí, te canehé-yu sá yíñùhu núú-güedé, te ducaⁿ te vá cúú càháⁿ núú-güedé càháⁿ-güedé núú ñáyiú tnúhu Xítohó Jesucristú sá sàndáá iní-güedé.

Ío càhnu cuu tnúhu càháⁿ Yá Ndiöxí

¹⁴ Te cuini-í ndǐhi-ni quixi coto ñaha-í xii-n dico dǐhna-gá cadúha-í tutú-a daquixi-í ndaha-n ¹⁵ chi na cuaháⁿ cuyaa-í. Te xíaⁿ núu cadúha-í tutú-a daquixi-í ndaha-n cuendá cutnùní iní-n ñasa cada-n cùndecu-n ndǐhi nchaa ñáyiú ndècu ichi Yá Ndiöxí. Te ñáyiú-áⁿ cúú-yu dàtná ñⁿ

vehe cùu cuendá Yá Ndiöxí Yaá ndécú nchaa nduu nchaa quiú, chi ndècu ndǐhi ñaha-gá xii-yu, te cùú-yu ñáyiú càháⁿ váha cuendá tnúhu-gá. ¹⁶ Te cùtnuní ndáá iní-ó sǎ ío càhnu cuu tnúhu càháⁿ Xítohó Jesucristú, tnúhu sá càháⁿ nàcuáa ndùu ichi ndecu-o, te duha càháⁿ tnúhu-áⁿ:

Te ní quixi Yá cúú Ndiöxí ñuyíú-a ní cuu-gá ñⁿ ñáyiú,

te Espiritú Yá Ndiöxí ní càháⁿ ndáá-xi sá cúú-gǎ ñⁿ Yaá ío váha quide ndáá,

te cue espíritú xínú cuèchi núú Yá Ndiöxí ní xíní ndáá-xi nchaa nàcuáa ní quide Yaá ní quixi ñuyíú-a.

Te ní xité nuu tnúhu-gá ñíhí ñuyíú-a, te ndèni ní cuu ní ngúita-yu sàndáá iní ñáhǎ-yu xii-gá,

te mee-gǎ cuándaa-gá andiu.

Duha càchí tnúhu-áⁿ.

4

Ñáyiú dàña ñihnu vá quíndáá-gá iní-yu Yá Ndiöxí

¹ Te Espiritú Yá Ndiöxí càháⁿ ndáá-xi sá sáa nduu dàña ñihnu dava ñáyiú ndècu ichi-gá vá quíndáá iní ñáhǎ-gǎ-yu xii-gá, te ducaⁿ chi cue espíritú cùndǐhi yucu ñávǎha dandáhú ñáhǎ-xí xii-yu, te mee-ñá nchaa tnúhu càháⁿ nchaa ñáyiú cùndǐhi nchaa espíritú-áⁿ cuhuⁿ iní-yu. ² Te nchaa ñáyiú ducaⁿ cùndǐhi cue espíritú cùndǐhi yucu ñávǎha-áⁿ cúú-yu ñáyiú ío dandáhú méé-xí chi càchí-yu sá càháⁿ ndáá-yu te ñá ndáá, te ñá túú tnàhí-gá ná quidé-xí ñí-yu cuendá nchaa sá cuèhé sá dúhá quidé-yu. ³ Te ñáyiú-áⁿ quesàhá-yu sá vâ cúú càndeca tnaha ñáyiú, te ni vâ cúú càxí-yu dava núú sǎ xíní-yu caxí-yu, dico Yá Ndiöxí ní cadúha-gá nchaa sá nchító-ó cuendá caxi-o, te cuini-gá sá ncháá nchò ñáyiú sàndáá iní tnúhu-gá ndacáⁿ táhú-ó núú-gǎ òré caxi-o. ⁴ Te nchaa sá ñí cadúha Yá Ndiöxí cúú-xí sá váha te vá dáquée tíhú-ó, te xìni ñùhu-xi ndacáⁿ táhú-ó núú-gǎ cuendá nchaa xíǎⁿ. ⁵ Te Yá Ndiöxí càchí-gá sá méé-gǎ quidé-gǎ

cúu-xí sã vãha sã cúu-xí-ó te núu na ndàcáⁿ táhú-ó núú-gã.

Tée quide ndáá xínú cuèchi núú Xĩtohó Jesucristú

⁶ Te núu na dàcuaha-n ñáyiu ndècu ndihí-o ichi Xĩtohó Jesucristú nchaa nàcuáa càháⁿ-í-a ña, te cuu-n ìⁿ tée quide ndáá xínú cuèchi núú-gã, te nducu ndèe-ni-n dacuaha-n tnúhu Yá Ndiöxí sã sàndáá iní-n, te canchicúⁿ nihnu-ni-n càda-n nchaa nacuáa càháⁿ-gã, te núu ducaⁿ nà cada-n, te níhí ndéé-n cùndecu-n ichi-gã.

⁷ Te vá cáda cuendá-n nchàa cuendú cuèhé cuendú duha càháⁿ ñáyiu, ndihí nchaa dava-gã cuendú sã ñà túú nàndíhí cuendá sã ñà túú nã cumání-n cùndecu-n núú Yá Ndiöxí.

⁸ Te núu ìⁿ chùⁿ cada-o te nàcaá luha yiqui-o te nàndíhí-xi luha, dico ío-gã nàndíhí-xi te núu cada-o sã cùndecu yíñuhu-o núú Yá Ndiöxí. Te núu ducaⁿ na càda-o te cùu-xi ìⁿ sã vãha sã cúu-xí-ó vitna, te ni caa ni quíhíⁿ ducaⁿ cùu-xi ìⁿ sã vãha sã cúu-xí-ó. ⁹ Te xini ñuhu-xi sã ncháá-ndó quindáá iní-ndó nchàa tnúhu càháⁿ-í-a chi cùu-xi tnúhu ndáá. ¹⁰ Te vitna ío nducu ndee-o quide-o chiuⁿ Yá Ndiöxí Yaá ndécú nchàa nduu nchaa quíú te quide ndee iní-ó cuendá nchaa sã quidé ñàha ñáyiu xii-o, chi sàndáá iní-ó sã díú-gã chindèe ñaha-gã xii-o. Te nchaa ñáyiu cùndahú iní ñáhá-gã te chindee ñaha-gã xií-yu, dico ñáyiu sàndáá iní ñáhá xii-gã ío-gã cùnùú-yu chindee ñaha-gã xií-yu, chi dàcácu nihnu ñaha-gã núú ùhú núú ndàhú.

¹¹ Te nchaa tnúhu-áⁿ cũñaha-n xii-yu, te càháⁿ-n dõho-yu sã ná càdá-yu nchaa nàcuáa càháⁿ-xi. ¹² Te ío cada vãha-n cùndecu-n cuendá sã vã yõo daquèe tíhú ñáhá xii-n cuendá sã cúu-n tée cuechi, te ío vãha càda-n nchàa sã tàú-n càda-n cuendá ducaⁿ canchicúⁿ nihnu nchaa ñáyiu ndècu ichi Yá Ndiöxí, te vii vii càháⁿ ndihí-n-yu, te cuu iní-n-yu, te ío quindáá iní-n Yá Ndiöxí, te mee-ni sã vãha cani iní-n, te ducaⁿ càda-n cuendá canchicúⁿ nihnú-yu. ¹³ Te nini cùyaa-í quixi-í, te ío nducu ndèe-n càháⁿ ndodo-n tnúhu Yá Ndiöxí

núu-yu, te dacuàhá-n-yu nàcuáa càháⁿ tnúhu-gã, te càháⁿ-n dõho-yu nàcuáa cuu vii cuu vãha iní-yu cundecú-yu ichi Yá Ndiöxí. ¹⁴ Te vá dáñá ndéé-n càda-n nacuáa ndùu táhú ní taxi Yá Ndiöxí ní ngúndecu ndihí-n cùtnàhá ní sacáⁿ ndodo cue tée yindaha ñaha xii ñáyiu ndècu ichi Yá Ndiöxí ndaha-güedé díquí-n, te ní cachí tnúhu-güedé sã dúcáⁿ ní cuini Yá Ndiöxí cunduu.

¹⁵ Te ni yùhu ni iní-n càda-n nchaa nacuáa càháⁿ-í-a cuendá sã ná quini ñáyiu sã ío-gã vãha ta quide-n cuáháⁿ. ¹⁶ Te ío vãha cundehe-n nchàa nacuáa quide-n, ndihí nchaa nàcuáa dānehé-n-yu, te vá dáñá ndéé-n dùcaⁿ cada-n. Te núu ducaⁿ na càda-n te nduu táhú-n cùndecu vãha-n núú Yá Ndiöxí ni caa ni quíhíⁿ ndihí nchaa ñáyiu na tédóho nchaa tnúhu càháⁿ-n.

5

Nàcuáa tàú-xi cada-o cùndecu-o ndihí ñáyiu sàndáá iní tnúhu Yá Ndiöxí

¹ Te vá ténáá-n nchàa cue tée cùu sacuéhé chi vii vii càháⁿ-n dõho-güedé, te cada iní-n sã dàtná tātá-n cùu-güedé, te diu-ni ducaⁿ vii vii càháⁿ-n dõho nchaa cue tée cuechi, te cada iní-n sã dàtná cue ñani-n cùu-güedé. ² Te diu-ni ducaⁿ vii vii càháⁿ tucu-n dõho nchaa ñáyiu dñí ñáyiu cùu sacuéhé, te cada iní-n sã dàtná nãná-n cùu-yu, te diu-ni ducaⁿ vii vii càháⁿ tucu-n dõho nchaa ñáyiu dñí ñáyiu cuechi, te cada iní-n sã dàtná cue cúha-n cùu-yu, te ío cuu vãha iní-n òré ducaⁿ càháⁿ-n dõho nchaa ñáyiu cuechi-ãⁿ.

³ Te canehe-n sã yíñuhu núú ñáyiu dñí ní quendóo quèé, te chindèe-n-yu núu ndàhú-yu. ⁴ Te núu ìⁿ ñaha quèé ndécú cuè déhe-aⁿ àdi cue déhe ñani-aⁿ, te ío xini ñuhu-xi cada-güexi nchaa nacuáa tàú-xi cunduu núu-aⁿ chi ducaⁿ cuini Yá Ndiöxí cada-güexi. Te núu ducaⁿ na càda-güexi te nānchocáva-güexi quide-güexi sã vãha sã cúu-xí ñáyiu ní dácuéhnú ñaha xii-güexi. Te núu ducaⁿ na càda-güexi te quide vãha-güexi te ío nduu vétú iní Yá Ndiöxí. ⁵ Te

ñáiyu quèé ñáiyu ndàhú ndécú ichi Yá Ndiöxí sàndáá iní-yu sá díú-gã chindèe ñaha-gá xii-yu, te cuèi nduu cuèi niú ñá túú dàña ndeé-yu càháⁿ ndihí ñàhá-yu xii-gá. ⁶ Te nchaa ñáiyu quèé cúdǎ iní quidé nchàa sá cuèhé sá dúhá cùú-yu dàtná ñáiyu ní xihí cuèi ndècu vívǔ-yu. ⁷ Te cúñaha-n xii nchaa ñáiyu sá ná cádá-yu nchaa tnúhu càháⁿ-í-a cuendá sá ñà túú ñà cumání-yu cundecú-yu, te ducaⁿ vǎ yõ cáháⁿ cuèhé cuendá-yu. ⁸ Te ío xini ñuhu-xi chindeé-yu cue tnàha ñáiyú-yu, dico ío-gá xini ñuhu-xi chindeé-yu cue ñáiyu cùu ndi meé-yu ndècu ndihí-yu, te núu vá dúcáⁿ càdá-yu te ñá túú-gã sàndáá iní-yu cadá-yu nàcuáa càháⁿ Yá Ndiöxí. Te sá dúcáⁿ ná càdá-yu te vǎhi-gá quidè-yu dàcúúxí ñáiyu ndècu ichi cuehé ichi duha.

⁹ Te chido tnùní-n mèe-ni ñáiyu quèé ñáiyu sa ndècu únídico cuía-xi àdi vihi-gá cuendá ñáiyu-áⁿ cadá-yu nchaa nàcuáa cuini Yá Ndiöxí núu nchàa ñáiyu ndècu ichi-gá, te ñáiyu-áⁿ xini ñuhu-xi cuú-yu mee-ni ñáiyu ní quide ndáá ní xindecu ndihí yǎ-xi. ¹⁰ Te na cùú-yu ñáiyu quèé quidé vǎha cùú-yu núu nchàa ñáiyu, te na cùú-yu ñáiyu quèé xini canu ichi váha cue landú-xi, te na cùú-yu ñáiyu sǎñaha nùu vehe ndetatú cue ñáiyu ñuhu ichi, te na cùú-yu ñáiyu ndècu túha quide náni chiuⁿ cuendá cue ñáiyu ndècu ichi Yá Ndiöxí, te na cùú-yu ñáiyu chindee nchaa ñáiyu ndècu ndihí tnúndòho tnúhu ndàhú, te na cùú-yu ñáiyu ñá túú dàña ndeé quidé nchàa núu sǎ vǎha.

¹¹ Te vá chídó tnùní-n ñáiyu quèé ñáiyu ñá túú ndècu únídico cuía-xi cada chiuⁿ Yá Ndiöxí, chi núu cuechi-gǎ-yu ña, te vá cúndáá-yu cadá-yu chiuⁿ-gá, chi quesàhá-yu natnándaha tucú-yu. ¹² Te sá cuendá xǎⁿ te nacháhu-yu núu Yá Ndiöxí, chi vá cádá-gǎ-yu nàcuáa ní cuu tnúhu cadá-yu ni cùu. ¹³ Te ngüíta-yu cani iní-yu quíhíⁿ-yu ndi vehe ndi vehe caca nihní-yu, te nchaa ñáiyu ducaⁿ

quide ío cùu cuhndú-yu, te cùyiti yuhú-yu, te ndèni ní cuu cuáháⁿ-yu chinee díquǎ-yu vehe tnàha ñáiyú-yu ndèhé-yu núu nása ndécú-yu, te ñá túú tàú-yu ducaⁿ càdá-yu, te càháⁿ-yu mee-ni tnúhu sá ñà túú nàndíhi. ¹⁴ Núu xǎⁿ cuini-í sá ncháá ñáiyu quèé ñáiyu cuechi na natnándaha tucú-yu cuendá cuú-yu nǎná, te ducaⁿ càdá-yu nchaa sá xini ñuhu-xi cadá-yu vehé-yu, te núu ducaⁿ na càdá-yu, te nchaa ñáiyu cùu úhú iní ñáhá xii-o vá nihí-gá-yu tnúhu cáháⁿ cuèhé-yu cuendá tnúhu Yá Ndiöxí. ¹⁵ Te dava ñáiyu quèé ndécú ichi Yá Ndiöxí ní cùu ní dáñǎ-yu te ní tnǎ-yu tnúhu càháⁿ sácuíhná.

¹⁶ Te núu dava ñáiyu ndècu ichi Yá Ndiöxí ndécú ndihí-yu ña ñaha quèé cùu ndi meé-yu ña, te tàú-yu chindee ñàhá-yu xii-aⁿ cuendá sá vǎ ío chi chiuⁿ-aⁿ nchaa ñáiyu ndècu ichi Yá Ndiöxí, te ducaⁿ te nchaa ñáiyu ndècu ichi-gá-áⁿ nihí ndeé-gǎ-yu chindèe-yu dava-gá ñáiyu quèé ñá túú vèdana ndècu ndihí.

¹⁷ Te nchaa cue téé ío váha quide yǎndaha ñaha xii ñáiyu ndècu ichi Yá Ndiöxí ío xini ñuhu-xi canehe sá yíhí ñuhu núu-güedé, te chindee ñàha xii-güedé. Te uuⁿ-gá tàú ñáiyu ducaⁿ càdá-yu sá cùú-xí nchàa cue téé ni yùhu ni iní càháⁿ tnúhu-gá. ¹⁸ Te núu tütú Yá Ndiöxí càchí-xi: “Vá chíhí-ndó ñunu yuhu ndicutu oré danchihí-dí triú”, duha càchí-xi. Te càchí tucu-xi ingá xichi: “Íⁿ téé quide chiuⁿ dacuítí tàú-xi sá cùhúⁿ yǎhu-dé”, duha càchí-xi núu tütú-gá.

¹⁹ Te núu ío ñáiyu véxi sàcáⁿ cuéchi núu-n cuendá ña téé yǎndaha ñaha xii ñáiyu ndècu ichi Yá Ndiöxí ñá, te cada cuendá-n tnúhu càháⁿ-yu te núu véxi-yu ndihí úú àdi úní ñáiyu càháⁿ ndáá nàcuáa ní cuu, áⁿ núu ñáhá te vá cádá cuendá-n tnúhu càháⁿ-yu. ²⁰ Te núu cue téé yǎndaha ñaha xii ñáiyu-áⁿ ndécú cuéchi-güedé, te cáháⁿ-n dõho-güedé núu nchàa ñáiyu ndècu ichi-gá cuendá sá dává-gǎ-yu vá cùyǎ-yu ducaⁿ càdá-yu. ²¹ Te

Yá Ndiöxí ndihi Xítohó Jesucristú náhá-gã ndihi cue espíritú xínú cuèchi núú-gã sá yùhú càháⁿ-í dóho-n sã cáda-n nchaa nacuaa càháⁿ-í-a, te ìⁿ-ni càháⁿ ndihi-n cuè téé xìní tnáhá ndihi-n, ndihi cue téé ñá túú xìní tnáhá ndihi-n. ²² Te vá ìo cundihí iní-n tàxi ndecu-n ìⁿ téé quindaha ñaha xii ñáyiú, chi díhna-gá cada cuendá-n te núú cùu-dé ìⁿ téé quide ndáá, chi núú cuendá-ni na tàxi ndecu-n-dé te vá cáda ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ío coto-n mèe-n vá cáda-n nì ìⁿ sá cuèhé sá dúhá.

²³ Te ducaⁿ ìo mee-ni cùhú xití-n te vá cóhó-n mèe-ni ndute, chi tnáhá luha vínú ndéhé yoho yàha stilé coho-n cuendá cada tátna-xi.

²⁴ Te dava ñáyiú cùtnuní nchaa sá cuèhé sá dúhá quidé-yu, te cùtnuní tucu sá náchãhu-yu na sàá nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sàá nduu cùndáá cuèchi-yu te dáva-áⁿ cutnùní. ²⁵ Te ducaⁿ sãtnahá-xi cùu nchaa sá váha quide dáva-yu chi cùtnuní, te cuèi ñá túú cùtnuní òré-ni dico dacuitíi sã sàá nduu cùtnuní.

6

¹ Te nchaa ñáyiú ndècu tnuú quidé chiúⁿ ndihi ìⁿ patróóⁿ xìní ñuhu-xi ío canehé-yu sá yíñùhu núú-dé cuendá sá vã càháⁿ cuèhé ñáyiú cuendá Yá Ndiöxí, te ni vã càháⁿ cuèhé-yu cuendá tnúhu-gá. ² Te núú patróóⁿ cue ñáyiú xínu cuechi-áⁿ sãndáá iní-dé Yá Ndiöxí, te ñá díú sã dúcáⁿ sãndáá iní-dé Yá Ndiöxí te vá cánehé-yu sá yíñùhu núú-dé, chi uuⁿ-gá tàú-yu cada váha-yu cunu cuèchí-yu núú-dé, te ducaⁿ na càda-yu chi xínu cuechí-yu núú tãe sãndáá iní ndihí-yu tnúhu Yá Ndiöxí. Te vá dáñá ndéé-n dãnehé-n-yu nchaa nacuaa càháⁿ-í-a, te cùñaha-n xii-yu sá ná càda-yu.

Nduu vétú iní-ó cùndecu-o

³ Te ío cue téé ñá túú tní-güedé nacuaa càháⁿ tnúhu Xítohó Jesucristú, te cue téé-áⁿ càchí-güedé sá càháⁿ ndáá-güedé dico ñá ndáá, chi ñá túú càháⁿ-güedé nacuaa cuáháⁿ tnúhu-gá. Te nchaa tnúhu Xítohó Jesucristú cúu-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. ⁴ Te nchaa cue téé ducaⁿ xiquide quide cahnu-güedé méé-güedé dico ñá túú vèdana xìní-güedé, te cue téé-áⁿ ñá túú ndècu váha iní-güedé chi nándi tnúhu sá ñá túú nãndíhi cuíní-güedé cùtnáha-güedé. Te ngüita-güedé cúu cuèdú iní tnáhá-güedé, te nãá ndihi tnáhá-güedé, te xicuèhé tnáhá-güedé, te ñá túú-gã cúu váha iní núú tnáhá-güedé.

⁵ Te cue téé-áⁿ mee-ni nãá-güedé chi ñá túú sãni váha iní-güedé, te ni ñá túú xìní-güedé nacuaa cuáháⁿ tnúhu ndáá tnúhu Yá Ndiöxí, te càchí-güedé sá ìo váha cundecu-güedé ichi-gá chi sãni iní-güedé sá ìo vãi díhúⁿ nìhí-güedé cundecu ndihi-güedé. Te yúhú càháⁿ-í dóho-n sã vã nìhí tnáhá-n ndihi nchaa cue téé ducaⁿ xiquide. ⁶ Te ndáá sá ichi Yá Ndiöxí cúu-xí ìⁿ ichi sá ìo váha cundecu-o, dico xìní ñuhu-xi nduu vétú iní-ó nacuaa ndècu-o ñuyíú-a.

⁷ Te nchoo cuè ñáyiú chi ñá túú vèdana nèhe-o ní quexìo ñuyíú-a, te ñu-ni ducaⁿ ñá túú vèdana canehé-o quíhíⁿ òré ná cùú-ó. ⁸ Te ío xìní ñuhu-xi nduu vétú iní-ó te núú ndècu-ni sã cùchìto-o ndihi dóó cuihnu-o. ⁹ Te ío ñáyiú ío cuíní-yu cuu cuicá-yu, te ñáyiú-áⁿ dácàhu iní ñáhá yùcu ñávãha xii-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidé-yu, te nchaa sá quidé-yu-áⁿ ñá túú vèdana nãndíhi-xi chi uuⁿ-gá ndádá ndàhú ñáhá-xí xii-yu, te dàcuíta nihnu ñaha-xi. ¹⁰ Chi nchaa ñáyiú ñuhu iní mee-ni díhúⁿ, te xíãⁿ quidé-xí ngüita-yu sãni iní-yu cadá-yu nándi sá cuèhé sá dúhá. Te ío ñáyiú ndècu ichi Yá Ndiöxí te sá tnúhu ducaⁿ ñuhu iní mee-ni díhúⁿ ní dáñá-yu ñá túú-gã sãndáá iní ñáhã-yu xii-gá, te vitna ñá

túú tnàhí-gá ndécú vâha iní-yu.

Cahni iní-ó càda-o nchaa nacuáa càháⁿ Yă Ndiôxí chi sàndáá iní-ó-gă

¹¹ Te yòhó tée quide chiuⁿ Yá Ndiôxí xini ñuhu-xi vá cáda-n dàtná quidé nchaa ñáyiú ní cachí-í sá ñà túú quide ndáá, te vá dáñá ndèé-n càda ndáá-n cùndecu-n, te cada-n nàcuáa nduu vétú iní Yă Ndiôxí, te ío quindáá iní-n-gă, te cuu iní-n nchaa tnaha ñáyiú-n, te cada càhnu iní-n nchaa sá ná yâha-n cùndecu-n ichi-gá, te cunduu ndàhú iní-n. ¹² Te cahni iní-n càda-n nchaa nacuáa cuiní Yă Ndiôxí chi sàndáá iní-n-gă, te ío cuhuⁿ iní-n sá cùndècu-n ndihí Yá Ndiôxí ni caa ni quíhíⁿ, chi ñu cuendá tnàhí-áⁿ nì cáháⁿ ñáhá-gă xii-n, te ní cáháⁿ ndáá-n núú vâ ñáyiú sá ío váha sàndáá iní-n-gă.

¹³ Te Yá Ndiôxí Yaá quidé nchito nchaandi túhú sá ío ñuyíú naha-gá sá càháⁿ-í dóho-n vitna, te ñu-ni ducaⁿ naha tucu Xítohó Jesucristú Yaá ní cáháⁿ tnúhu ndáá núú tē Pilatú ¹⁴ sá quindáá iní-n càda-n nchaa nacuáa càháⁿ Yă Ndiôxí, te nchaa tnúhu càháⁿ-gá cada-n nàcuáa vá dáquè tihú ñáhá ñáyiú xii-n, te ducaⁿ-ni càda-n ndéé ná sàá nduu quixi tucu Xítohó Jesucristú. ¹⁵ Te quixi tucu-gá chi ducaⁿ ñí cachí Yă Ndiôxí cunduu, te mee Yă Ndiôxí ñáhá-gă ná nduu quixi tucu Xítohó Jesucristú. Te Yá Ndiôxí ío váha cùu iní-gá te ñndii díí-ni-gă ío-gá cùnùu-gá dàcúxí cuè tée tàxi tnuní ñⁿ ñⁿ nàcióⁿ ndihí nchaa ñava-gá cue tée cùnùu, chi tàxi tnuní ñáhá-gă xii-güedé, te nchaa ñáyiú ndècu ñuyíú-a tàxi tnuní-gá. ¹⁶ Te ñu-gá cúú-gă Yaá ndécú nchaa nduu nchaa quíú, te ío càhnu cuu-gá chi dàtná dáyhé nchíanchii dàyhé-xi núú ndécú-gă, te vá yôo ñⁿ cùyii dayatni núú ndécú-gă, te ni ñà túú nì ñⁿ ñáyiú xini ñáhá xii-gá te ni vâ ndácũ-yu quiní ñáhá-yu xii-gá. Te ío na cànehe nchaa ñáyiú sá yíñùhu núú-gă ni caa ni quíhíⁿ, te ducaⁿ ío na tàxi tnuní-gá ni caa ni quíhíⁿ. Te ducaⁿ na cùnduu.

¹⁷ Te cáháⁿ-n dôho nchaa ñáyiú cuica ndècu ndihí nchaa sá ío ñuyíú-a cuendá sá vâ cáda càhnu-yu mée-yu, te duuⁿ duuⁿ vá cúndéé iní-yu ni ñⁿ sá ndécú ndihí-yu chi vá cúdí-xi, te cáháⁿ-n dôho-yu sá ná cùndéé iní-yu Yá Ndiôxí chi ñu-gá cúú-gă Yaá ndécú nchaa nduu nchaa quíú, te chitu núú ndáhá tàxi-gá nchaa sá xini ñuhu-o, chi cuiní-gá sá ío cuu váha iní-ó cùndecu-o. ¹⁸ Te cáháⁿ tucu-n dôho-yu sá ná cáda-yu mee-ni sá vâha, te cuendá nchaa sá vâha cadá-yu-áⁿ te cuú-yu ñⁿ ñáyiú cuica sá cúú-xí Yă Ndiôxí, te na cùndecu túha-yu chindéé-yu cue ñáyiú ndàhú cuñhá-yu sá xini ñuhú-yu. ¹⁹ Te núu ducaⁿ na cáda-yu te Yá Ndiôxí cuñhá-gă sá ndúú tãhũ-yu na sàá nduu, te ngùndecu váha-yu ndihí-gá ni caa ni quíhíⁿ.

Tnúhu ndéé núú ñí ndihí-ná

²⁰ Te yòhó té Timùteú càháⁿ-í dóho-n sá ío cada cuendá-n vâ dáma tnúhu ní taxi Yá Ndiôxí danèhé-n ñáyiú, te vá cáda cuendá-n nchaa cuendú cuèhé cuendú duha ío ñuyíú-a chi ñà túú nàndihí-xi, te ni vâ cáda cuendá-n nchaa tnúhu xitnaha ñáyiú càhí sá xicá naha tnúhu cue tée túha chi ñà díú ñⁿ tnúhu ndáá cúú-xí. ²¹ Te ío ñáyiú ñà túú-gă sàndáá iní-yu tnúhu Yá Ndiôxí, chi ní quide cuendá-yu nchaa tnúhu xica naha ñáyiú-áⁿ.

Te Yá Ndiôxí ná chindéé chitúu ñaha-gă xii-n. Te ducaⁿ na cùnduu. Te ío cada ndee iní-nã vitna.

TUTÚ CÚÚ ÒÚ NÍ CADÚHA TÉ PĀBLÚ QUIHÍⁿ NDAHA TÉ TIMÛTEÚ

*Té Pāblú cādūha-dé tutú quíhíⁿ
ndaha té Timùteú*

¹ Yúhú té Pāblú ní tendaha ñaha Yá Ndiõxí cāhāⁿ-í tnúhu Xítóhó Jesucristú núú ñāyiu, chi ducaⁿ nǐ cachí Yā Ndiõxí cunduu. Te cāhāⁿ-í dàtná ní cachí Yā Ndiõxí sá nchāá nchòo ñāyiu ndècu ndìhi Xítóhó Jesucristú naníhí tǎhú-ó. ² Te yúhú té Pāblú cādūha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te ñu-í ní sanu ichi ñaha-í xii-n ìchi Xítóhó Jesucristú, te xicáⁿ tǎhù-í núú Dütú Ndiõxí ndìhi núú Xítóhó Jesucristú sá ño na chindee chitúu ñaha-gǎ xii-n, te cundǎhú iní ñáhá-gǎ, te ducaⁿ ndì nduú-gá ná cǎdá te ío váha cuu iní-n cùndecu-n.

Cāhāⁿ váha-o cuèndá Xítóhó Jesucristú

³ Te cuèi nduu cuèi niú ducaⁿ-ni cāhāⁿ ndìhi-í Yā Ndiõxí cuèndá-n, te ndàcáⁿ tǎhù-í núú-gǎ, te xínu cuechi-í núú-gǎ dàtná ní quide cue ñaní tnáhà-í ní xíndecu ndéé sanduu, te cùtnuní iní-í sá quidé ndáá-í núú-gǎ dàtná ní xóo cada-güedé. ⁴ Te ío sàni iní-í naníhí tnáhà-ó cuèndá ío cudí iní-í, chi ndàcu iní-í sá ño ní ndáhyú-n sǎ ndìhú iní-n cùtnáhá ní quide ndee iní-í tnáhà-ó. ⁵ Te nàha-í sá sàndáá ndisa iní-n Yā Ndiõxí dàtná ní ngúita díhna-gá xítná-n tǎ Lòidá ndìhi nǎnà-n tǎ Eùnicé quidě-yu, te cùtnuní ndáá iní-í sá díú tnáhà-n ño váha sàndáá iní-n-gǎ.

⁶ Te xiǎⁿ dándàcu iní ñáhà-í xii-n cuèndá sá ño-gǎ nducu ndèe-n cada-n chiúⁿ ní nduu tǎhú-n núú Yā Ndiõxí cada-n, chi ní taxi-gǎ tnúhu ndee iní ní ngúndecu ndìhi-n cùtnáhá ní sacáⁿ ndodo-í ndaha-í díquí-n sǎ díú chiúⁿ-gǎ cada-n. ⁷ Te Espíritú sá nǐ taxi Yá Ndiõxí ndécú ndìhi-o

ñá túú cùu-xi ñⁿ Espíritú sá cǎdá nàcuáa yùhú-ó, chi cùu-xi ñⁿ Espíritú sá táxi tnúhu ndee iní cada-o chiúⁿ-gǎ, te ñu-xi quide cuu iní tnáhà-ó ñⁿ ñⁿ-o, te ñu-ni tucu-xi quide cutnuni iní-ó nàcuáa cada-o cùndecu-o. ⁸ Te xiǎⁿ núú vá cùcàhaⁿ núú-n cǎhāⁿ váha-n cuèndá Xítóhó Jesucristú, te ni vá cùcàhaⁿ núú-n sǎ dúhá yìhi-í vecaá sá cuèndá-gǎ, te xini ñuhu-xi sá tnáhà-n ndòho-n sá cuèndá tnúhu-gǎ, te cundee iní-n ndòho-n, chi Yá Ndiõxí chindee ñaha-gǎ xii-n. ⁹ Te Yá Ndiõxí ní dǎcǎcu nihnu ñaha-gǎ xii-o núú ùhú núú ndàhú, te ní cachí-gǎ sá cǎdá-ó nchàa nacuáa cùní méé-gǎ cunduu, te ducaⁿ nǐ quide-gǎ chi ducaⁿ nǐ sani iní méé-gǎ cunduu sá cǎdá váha ñaha-gǎ xii-o, te ñá díú sǎ ño váha quide-o ndecu-o ducaⁿ ni quide-gǎ. Te ndéé cùtnáhá vátá ngáva-gǎ ñuyú nǐ cachí-gǎ sá cǎdá váha ñaha-gǎ xii nchaa nchoo ñāyiu ní ngúndecu ndìhi Xítóhó Jesucristú vitna. ¹⁰ Te vitna cùtnuní iní-ó sǎ ño váha quide ñaha-gǎ xii-o, chi ní quixi Xítóhó Jesucristú ñuyú-a ní dǎcǎcu nihnu ñaha-gǎ xii-o núú ùhú núú ndàhú, te Yaá-áⁿ nǐ quide-gǎ cuèndá sá vá cùú-gǎ-ó cùú dúcáⁿ-ó, chi ní cachí-gǎ sá cùndècu-o ni caa ni quíhíⁿ te núu na quèndáá iní-ó tnúhu-gǎ.

¹¹ Te ní cachí-gǎ sá cāhāⁿ-í tnúhu-gǎ núú ñāyiu ñá túú cùu ñāyiu isràel te dacuàha váha-í-yu tnúhu-gǎ, te cuèi ndèni ní cuu ndécú-yu te quíhíⁿ-í cāhāⁿ-í tnúhu-gǎ núú-yu chi ducaⁿ nǐ cachí-gǎ cunduu. ¹² Te cuèndá xiǎⁿ nándi sá ndóhò-í vitna cuèndá-gǎ, dico ñá túú cùcàhaⁿ núú-í chi cùtnuní váha iní-í nàcuáa sàni iní Xítóhó Jesucristú Yaá sàndáá iní-í, te yúhú ní dǎñà-í méè-í núú ndáhá-gǎ, te cùtnuní ndáá iní-í sá cóto ñaha-gǎ xii-í ndéé ná sǎá nduu nàcuaca ñaha-gǎ.

¹³ Te vá dǎñá ndèe-n càda-n nchaa nacuáa cāhāⁿ tnúhu váha ní dǎnèhé ñáhà-í xii-n, te ío quèndáá iní-n Yā Ndiõxí, te nchaa-o nàcuáa ndècu-o ndìhi Xítóhó Jesucristú ío cuu iní tnáhà-ó ñⁿ ñⁿ-o. ¹⁴ Te cada cuèndá váha-n sǎ vá dǎma tnúhu Yá Ndiõxí

sá nǐ taxi-gá ndécú ndìhi-n, te Espiritú-gá sá nǐ taxi-gá ndécú ndìhi-o chindee ñaha-xi xii-n.

¹⁵ Te yòhó sa xìní-n sǎ nchàa ñáyiu ndècu distritú Àsiá, ñáyiu ní sándáá iní tnúhu Xítohó Jesucristú ní dáñá ñáhá-yu xii-í, te tnàhá té Fígeló ndìhi té Hèrmógenés ní dáñá ñaha-güedé xii-í. ¹⁶ Te xìcáⁿ táhù-í núú Xítohó Jesucristú sá ná chindee-gá cue ñáyiu cùu ndi mee té Onèsíforó, chi ñu-dé ío vǎi xito ní quixi-dé ní quide cuendá ñáhá-dě xii-í, te ní taxi-dé tnúhu ndee iní, te ñá túú ní cùcahaⁿ núú-dě sá yíhì-í vecaá. ¹⁷ Te cùtnàhá ní xíndecu-dé ñúú Rómá ducaⁿ-ni ní xóo nanducu ñaha-dé xii-í ndéé ndéé naníhí ñáhá-dě. ¹⁸ Te xìcáⁿ táhù tucu-í núú Xítohó Jesucristú sá ná cùndahú iní ñáhá-gǎ xii-dé nduu na sáá cundáá cuéchi nchaa ñáyiu. Te yòhó sa xìní ndáá-n sǎ ío ní chindee ñaha-dé xii-o cùtnàhá ní xíndecu-o ñúú Éfesú.

2

Tée quide ndáá xínú cuéchi núú Xítohó Jesucristú

¹ Te yòhó té cùu datná ìⁿ déhe mee-í ío nducu ndèe-n cada-n nacuaá níhí ndéé-gǎ-n cùndecu-n ichi Xítohó Jesucristú chi ñu-gá chindee ñaha-gá xii-n. ² Te nchaa tnúhu sá nǐ dánèhé ñáhá-í xii-n ndìhi nchaa dava-gá ñáyiu, xǎⁿ danèhé-n dàva-gá cue téé quide ndáá cuendá danèhé-güedé dava-gá ñáyiu.

³ Te cahni iní-n ndòho-n cunu cuechi-n núú Xítohó Jesucristú datná cuíní-n ndòho ìⁿ sandadú sàhni iní-dé xínú cuéchi-dé. ⁴ Chi ni ìⁿ sandadú ñá túú nǎgá sání iní-dé cada-dé òré xínú cuéchi-dé cuendá cudíu-dé núú tée tàxi tnuní ñáhá. ⁵ Te ñu-ni ducaⁿ sàtnahá-xi cùu tucu ìⁿ téé dàdiqui, chi núu vá dádiqúi-dé nàcuáa tàú-xi cunduu te vá ñíhí-dé sá ndúú táhù-dě. ⁶ Te núu ìⁿ téé xínú cuechi ío ndùcu ndee-dé quidé chiúⁿ-dé chíhí-dě tatá, te ñu-dé tàú-dé díhna-gá-dé níhí-dě sá cùhúⁿ yǎhu-dé. ⁷ Te cani iní-n nchàa tnúhu càháⁿ-í-a, te Xítohó

Jesucristú chindee ñaha-gá xii-n te tecú tnùní-n nchàa.

⁸ Te ndacu iní-n sǎ Xítohó Jesucristú ní cuu-gá ñani tnáhá ndi Dàvíí, te ní xíhí-gá te ní ndoto-gá, te ñu ducaⁿ ndùu tnúhu dànehé-í ñáyiu. ⁹ Te ío dàndoho ñaha ñáyiu xii-í cuendá sá càháⁿ-í tnúhu-gá, te quide ñáhá-yu xii-í datná quidé-yu ìⁿ téé ní quide ìⁿ cuéchi càhnu, chi ní chihi ñáhá-yu vecaá xii-í, dico tnúhu Yá Ndiòxí chi vá ndácù-yu nganí-yu. ¹⁰ Te xǎⁿ núu cuéi nándi cùu nchaa sá quidé ñáhá-yu xii-í, dico quide cahnu iní-í cuendá sá naníhí táhù tnàhá nchaa dava-gá ñáyiu cuíní Yá Ndiòxí cundecu ndìhi-gá, chi nchaa ñáyiu na tnàhá tnúhu ndìhi Xítohó Jesucristú nduu táhù-yu cundecú-yu ndìhi-gá núú ío váha càa ndecu-gá ni caa ni quíhìⁿ.

¹¹ Te xéhé cúú-xí ìⁿ tnúhu ndáá cuiti:

Nchoo cùu-o datná ñáyiu ní xíhí ndìhi Xítohó Jesucristú chi ñá túú-gǎ ndécú-ó ìchi cuehé ichi duha, te xǎⁿ núu cuéi na sáá nduu cùú-ó ñúyíú-a, dico ñu-ni cundecu-o ndìhi-gá.

¹² Te núu na cùndee iní-ó ndòho-o nándi sá ndóhó-ó sǎ cuendá-gá, te sáá nduu te cunuu-o ndìhi-gá.

Te núu na càháⁿ-ó sǎ ñà túú xìní-ó-gǎ, te ñu-ni ducaⁿ cùñaha-gǎ xii-o sǎ ñà túú xìní ñáhá-gǎ ná sáá nduu càa ndáá-gá cuéchi nchaa ñáyiu.

¹³ Te núu nchoo ñà túú quide ndáá-ó ndècu-o núú-gǎ ñá, dico mee-gǎ chi ío ndáá quidé-gǎ, chi Yá Ndiòxí nchaa sá sání iní-gá quidé-gǎ.

Tée quide nacuaá ndùu vétú iní Yá Ndiòxí

¹⁴ Te dandacu iní-n nchàa ñáyiu ndècu ndìhi-o ichi Xítohó Jesucristú nchaa tnúhu càháⁿ-í-a, te cùñaha-n xii-yu sá Xítohó Jesucristú cuíní-gá sá ñà túú-gǎ nándi tnúhu cùtnàhá-yu, chi nchaa tnúhu càháⁿ-yu-áⁿ dácuíta nihnu-xi ñáyiu ndèdóho ñaha xii-yu,

chi ñá túú vëdana nàndíhi nchaa tnúhu-áⁿ. ¹⁵ Te ío nducu ndèe-n cada ndáá-n cùndecu-n núú Yá Ndiöxí, te cada-n chiúⁿ-gá nàcuáa nduu vétú iní-gá, te cáháⁿ ndáá-n tnúhu-gá, cuendá sá vã cúcàhaⁿ núú-n núú-gã. ¹⁶ Te vã cádá cuendá-n nchàa tnúhu sá ñà túú vëdana nàndíhi càháⁿ ñáyiú cuendá Yá Ndiöxí, chi nchaa ñáyiú càháⁿ tnúhu-áⁿ ndíhi nchaa ñáyiú sàcúndedóho ñaha xí-yu uuⁿ-gá quidé-yu nchaa sá cuèhé sá dúhá. ¹⁷ Te nchaa tnúhu-áⁿ cüténuu-xi dàtná quidé ñⁿ cuèhé sã ñãni ñaha xí ñáyiú xité nuu-xi ñíhi yiqui cùnú-yu. Te tnàhá té Himèneú ndíhi té Filetú càháⁿ-güedé tnúhu-áⁿ quidé-güedé dàtná quidé ñáyiú-áⁿ. ¹⁸ Te cue téé-áⁿ ñà túú-gã càháⁿ ndáá-güedé dàtná càháⁿ tnúhu Yá Ndiöxí, chi càchí-güedé sá ncháá nchòo ñáyiú ndècu ichi Yá Ndiöxí cúú-ó dàtná cue ñáyiú sa ní ndoto, dico na cùú ndisa-o te vã ndótó-gã-ó càchí-güedé. Te dava ñáyiú ní dáñã-yu sá sàndáá iní-yu tnúhu Yá Ndiöxí sá dúcáⁿ càháⁿ-güedé. ¹⁹ Te cuèi ducaⁿ quide davá-yu, dico Yá Ndiöxí ní taxi ndecu-gá cue ñáyiú ni yùhu ni iní ndécú ichi-gá, te cùtnuní sá ndécú ndíhi ñaha-gá xí-yu, chi ñⁿ xichi núú tütú-gá càchí-xi sá mée-gã xíní-gá cue ñáyiú cùu cuendá-gá. Te ñngá tucu xichi núú tütú-gá càchí-xi sá ncháá ñáyiú sàndáá iní ñáhã xí Xítohó Jesucristú xíní ñùhu-xi sá vã cùndècu-gá-yu ichi cuèhé ichi duha.

²⁰ Te ñáyiú cuica chi ndècu ndíhi-yu vehé-yu cóhó sã ñí cuáha mee-ni dñíⁿ cuááⁿ, ndíhi cóhó sã ñí cuáha mee-ni dñíⁿ cuixíⁿ, te nchaa cóhó-ãⁿ cúú-xí dàtná cue ñáyiú ñá túú ñã cùmãní núú Yá Ndiöxí. Te ndècu ndíhi tucú-yu cóhó sã ñí cuáha mee-ni ñùhu, ndíhi cóhó sã ñí cuáha mee-ni yùtnu, te nchaa cóhó-ãⁿ cúú-xí dàtná cue ñáyiú ñá túú quide ndáá núú Yá Ndiöxí. ²¹ Te nchaa ñáyiú ío ndècu yíñuhu núú Yá Ndiöxí cúú-yu ñáyiú ñá túú ñíhi tnáhã ndíhi cue ñáyiú ñá túú quide ndáá núú-gã, te cue ñáyiú ndècu yíñuhu núú-gã-áⁿ ñà túú tnáhí quée cáva-yu quidé-yu nchaa chiúⁿ

tahu-gá.

²² Te ío cada cuendá-n vã cádá-n nàcuáa quide cue téé cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiöxí, te quindáá iní-n-gã, te cuu iní-n nchàa tnaha ñáyiú-n, te cundecu nahi-n, chi ducaⁿ tàú-xi cada-n ndíhi nchaa dava-gá ñáyiú sa ní nduu ndoo ní nduu nine iní-xi ñáyiú càháⁿ ndíhi ñaha xí Yá Ndiöxí. ²³ Te vã cádá cuendá-n ñⁿ tnúhu xítnàha ñáyiú chi ñá túú vëdana nàndíhi-xi, chi núu na càda cuendá-ó te dicó dánáá ñáhã-xí. ²⁴ Chi nchaa cue téé xínu cuechi núú Yá Ndiöxí xíní ñùhu-xi càháⁿ váha-güedé ndíhi nchaa ñáyiú, te danèhé ñáhã váha-güedé tnúhu-gá, te cunduu càhnu iní-güedé te vã nàá-güedé. ²⁵ Te vii vii càháⁿ-güedé dóho nchaa ñáyiú sàá iní-xi, ñáyiú ñá túú tnàhá iní tnúhu ndáá tnúhu Yá Ndiöxí, te ducaⁿ te cudana Yá Ndiöxí cada-gá te ndixi túu iní-yu sá ñà túú quide váha-yu ndécú-yu te quindáá iní-yu tnúhu-gá. ²⁶ Te ducaⁿ te cutnùní iní-yu sá sàcúíhnã cùnùu-xi taxi tnuní ñáhã-xí xí-yu, chi dàcahu iní ñáhã-xí xí-yu quidé-yu nchaa nàcuáa cùu iní-xi ni cùu.

3

Nàcuáa cada ñáyiú òré sa ta cùyatni sáá nduu quixi tucu Xítohó Jesucristú

¹ Te càchí tnúhu-í xíi-n cuendá cunaha-n nàcuáa cada-xi òré sa ta cùyatni sáá nduu quixi tucu Xítohó Jesucristú, chi dàvá-áⁿ ío cada úhú-xi.

² Chi ngüíta ñáyiú cuhuⁿ iní-yu mee-ni sã cúú-xí mée-yu, te cuhuⁿ iní-yu mee-ni dñíⁿ, te ío cada càhnú-yu mée-yu, te cunduu yíchí iní-yu, te cáháⁿ cuèhé-yu cuendá Yá Ndiöxí, te vã quindáá-gá iní-yu ni tãtã-yu ni ñãñã-yu, te ni vã ndacáⁿ táhú núú tnáhã-yu cuendá nchaa sá váha cada tnàhá-yu, te cadá-yu mee-ni sã ñà túú tnàhá iní Yá Ndiöxí. ³ Te vã cúú ñí tnáhã ndí meé-yu, te nàá-yu te vã cuánáá-yu, te tee tnàhá-yu cuèchi neñúú, te vã cuánáá-yu cadá-yu nchaa sá cuèhé sá dúhá sàni iní-yu, te ío cunduu cuihna ñí-yu, te vã

tnàhá iní-yu nchaa sá vǎha. ⁴ Te dayuhu cuǎha cuendá tnáhǎ-yu núu cuè té cùchiuⁿ, te ío cunduu yǎ iní-yu cadá-yu nándi sá ñà túú vǎha, te ío cada nínu-yu meé-yu, te mee-ni nchàa sá cùdí iní-yu cadá-yu, te vá cùdí iní-yu nanducu nihnú-yu Yá Ndiǒxí. ⁵ Te quesàhá-yu sá tnàhá-yu ndécú-yu ichi Yá Ndiǒxí dico vá cadǎ-yu nchaa nàcuáa càháⁿ-gá.

Te yúhú càchí tnúhu-í xii-n sǎ vǎ nihí tnàhá-n ndihí nchaa ñáyiu ducaⁿ quide. ⁶ Te dava ñáyiu-áⁿ quǐhíⁿ-yu dava vehe núu xíndecu ñáyiu, te ngüíta-yu dandàhú-yu ñáyiu dìhí ñá túú xíní dana cuendá Yá Ndiǒxí, te ñáyiu dìhí-áⁿ cúu-yu ñáyiu ndècu vihi cuéchi-xi, chi ío cùdí iní-yu quidé-yu nchaa náni sá cuéhé sá dúhá sàni iní-yu. ⁷ Te cuèi ío dàcuahá-yu, dico ñá túú cùtnuní iní-yu nása cuáháⁿ tnúhu ndáá tnúhu Yá Ndiǒxí. ⁸ Te ñáyiu ducaⁿ dandahú ñáhá xii cue ñáyiu dìhí-áⁿ ñà túú càháⁿ váha-yu cuendá tnúhu Yá Ndiǒxí, chi quidé-yu dàtná ní quide ndíi Jǎnés ndihí ndíi Jǎmbrés chi cue ndíi-áⁿ ñà túú ní cùu váha iní cue ndíi núu ndíi Moisés cuendá tnúhu ní càháⁿ ndíi. Te ñáyiu-áⁿ cúu-yu ñáyiu sàni iní mee nìne-ni nchaa sá cuéhé sá dúhá, te cuèi càchí-yu sá sàndáá iní-yu Yá Ndiǒxí dico ñá ndáá sá sàndáá iní ñáhǎ-yu xii-gá. ⁹ Dico vá ndácú-gǎ-yu dandàhú-yu vǎi ñáyiu, chi nchaa ñáyiu cutnùní iní-yu sǎ ïo nǎ díquǐ-yu, te ñá túú càháⁿ ndáá-yu dàtná ní quide cue téé úú ñá túú ní tnàhá iní tnúhu ní càháⁿ ndíi Moisés.

Té Pǎblú dásàhú-dé té Timùteú

¹⁰ Te yòhó quidé-n nchàa nacuáa ní dánèhé ñáhà-í xii-n, te ní xiní-n nchàa nacuáa quide-í ndécù-í, te cùtnuní iní-n nàcuáa sàni iní-í ndécù-í ñuyíu-a, te xiní-n sǎ ïo sàndáá iní-í Yá Ndiǒxí, te ío càhnu iní-í, te cùu iní-í nchaa ñáyiu, te xiní tucu-n sǎ ïo quide cahnu iní-í cuèi nándi sá yáha-í ndécù-í dico ñá túú dàña ndeé-í ichi-gá. ¹¹ Te ío vǎi sá quidé ñàha ñáyiu xii-í dándòho ñahá-yu sá ndécù-í ichi Xítóhó Jesucristú, te sa nàha tucu-n

dàtná ní quide ñàhá-yu xii-í cùtnàhá ní xíndecu-í ñuú Antiòquiá, ndihí ñuú Ìconiú, ndihí ñuú Lìstrá, chi ío ní dándòhó ñàhá-yu xii-í sá cuendá-gá. Dico Xítóhó Jesucristú ío ní xito ñaha-gǎ xii-í te ní chindee ñàha-gá cuèi nándi cùu sá ñǎ yáha-í. ¹² Te na càchí tnúhu ndáá-í xii-n sǎ ïo vǎi sá ñà túú vǎha cada ñaha ñáyiu xii nchaa ñáyiu cuèni sá ñà túú ñǎ cumání núu Yá Ndiǒxí cuendá sá ndécú ndihí-yu Xítóhó Jesucristú. ¹³ Dico dava ñáyiu càchí-yu sá càháⁿ-yu tnúhu Yá Ndiǒxí te ñá ndáá sá càháⁿ-yu tnúhu-gá, ñáyiu-áⁿ uuⁿ-gá cuita cada-gá-yu nchaa sá cuéhé sá dúhá quǐhíⁿ, te ducaⁿ-ni ïo dandàhú tnáhǎ-yu.

¹⁴ Te yòhó chi ío váha ní sàndáá iní-n tnúhu Yá Ndiǒxí sá dácuaⁿha-n, te vitna càháⁿ-í dóho-n sǎ vǎ dáña ndeé-n quíndáá iní-n tnúhu-áⁿ, te yòhó sa nàha-n ná cúu ñáyiu ní dánèhé ñáhá xii-n tnúhu-gá. ¹⁵ Te yòhó chi ndeé cùtnàhá cúu làndú-n ñǎ ngüíta-n dàcuaha-n tnúhu ndeé núu tütú Yá Ndiǒxí, te diu-ni nchaa tnúhu-gá canu ichi ñaha-xi xii-n te naníhí tàhú-n, chi sàndáá iní-n Xítóhó Jesucristú. ¹⁶ Te nchaa cue téé ní tee tnúhu Yá Ndiǒxí, chi diu-ni mee-gǎ ní dácáhú iní ñáhá-gǎ xii-güedé nàcuáa tee-güedé, te tnúhu-gá ío váha dacuaⁿha-o nchaa dava-gá ñáyiu, te càháⁿ-xi dóho-o sǎ vǎ cùndècu-gá-ó ìchi cuehé ichi duha, te núu ñá túú quide ndáá-ó ndècu-o te nàcanu ichi ñaha-xi, te dānehé ñáhá-xí nàcuáa cada-o cùndáá-ó núu Yá Ndiǒxí. ¹⁷ Te diu-ni tnúhu-gá dátúha ñaha vǎha-xi xii nchoo cuè ñáyiu ndècu ndihí-gá cuendá cada-o nchàa núu sǎ vǎha.

4

¹ Te Xítóhó Jesucristú quixi-gá taxi tnùní-gá ñuyíu-a, te cada ndáá-gá cuéchi nchaa ñáyiu sa ní xíhí, ndihí cuéchi nchaa ñáyiu xíndecu vívú. Te mee-gǎ ndihí Yá Ndiǒxí náhá-gǎ sá ïo càháⁿ-í dóho-n vitna ² sá ïo dacuaⁿha-n ñáyiu tnúhu-gá, te vá dáña ndeé-n dàcuahá-n-yu ndèda-ni càa oré cuèi ñá túú cuèni-yu cundedòho-yu, te nchaa ñáyiu ñá túú cuèni cada ndáá cúñaha

ndää-n nchaa nacuaa quidé-yu. Te cúñaha tucu-n xii-yu sá vǎ dúcáⁿ-gǎ cada-yu, te cáháⁿ-n dôho-yu cuendá cada ndáá-yu cundecú-yu. Te ío cunduu cǎhnu iní-n òré cáháⁿ-n dôho-yu, te ío dacuahá-n-yu tnúhu-gǎ. ³ Chi sáá nduu te vá cǎchí-gǎ-yu cundedôho-yu nchaa tnúhu sá sánú ìchi ñaha cundecu váha-o nǔú Yǎ Ndiöxí, chi mee-nǎ nchaa sá cúdíⁿ iní méé-yu cundedôho-yu, te ndúcú-yu cue téé danèhé ñáhá xii-yu nchaa tnúhu cùu iní-yu-áⁿ. ⁴ Te vá cádá cuendá tnáhí-gǎ-yu tnúhu ndáá tnúhu Yǎ Ndiöxí, chi mee-nǎ tnúhu sá ñà túú nǎndíhi cada cuendá-yu. ⁵ Dico yòhó ío quihi iní-n cundecu-n, te cahni iní-n cuèi nǎndí na ndòho-n, te dacuahá-ni-n ñáyiú tnúhu Yǎ Ndiöxí, ñáyiú vátá quindáá iní ñáhá-gǎ xii-gǎ, te cada-ni-n nchaa chiuⁿ ní táhú-gǎ cada-n.

⁶ Te yúhú sa ñuhu ichi-ná-í quíhíⁿ-í núú ndécú Yǎ Ndiöxí cundecu-í, chi sa ní cuyatni cahni ñaha-güedé xii-í cuendá sá xínú cuèchi-í núú-gǎ. ⁷ Te ní quide-í nchaa chiuⁿ ní táhú Yǎ Ndiöxí cada-í te vitna ní xínu cava nchaa chiuⁿ ní táhú-gǎ-áⁿ ní quide-í, te ñá túú ní dàña ndeé-í ní sándáá iní-í-gǎ, te ducaⁿ-ni sándáá iní-í-gǎ ndéé vitna. ⁸ Te vitna sa ndècu túha-ná sá ndúú tǎhù-í cuendá sá quidé ndáá-í núú Yǎ Ndiöxí, te Xítohó Jesucristú taxi-gǎ táhú-ǎⁿ nduu táhù-í ná sáá nduu, chi cùu-gǎ ìⁿ Yaá quidé ndáá cuíti, te ñá díú-ní yúhú taxi-gǎ táhú-ǎⁿ cuu cuendá-í, chi tnáhá nchaa ñáyiú ndètu cahnu-ná sáá nduu quixi tucu-gǎ ñuyú-a cuañaha-gǎ táhú-ǎⁿ nduu táhù-yu.

Chiuⁿ tahu té Pǎblú cada té Timùteú

⁹ Te cuiní-í sá ío ndíhi quixi-n quixi coto ñaha-n xii-í. ¹⁰ Chi té Dêmás ñá túú-gǎ quidé cuendá ñáhá-dé xii-í, chi mee-nǎ nchaa sá ío ñuyú-a ío cùdíⁿ iní-dé. Te ní dándõo ñaha-dé cuáháⁿ-dé ñuú Tesalónica, te té Crèsceté cuáháⁿ-dé cundecu-dé distritú Gálaciá, te té Títú cuáháⁿ-dé cundecu-dé distritú Dálmaciá. ¹¹ Te ìⁿndi-ná té Lúca ndécú ndíhi ñaha-dé

xii-í, te cúñaha-n xii té Mǎcú quixi-n ndíhi-dé, chi téé-áⁿ ndacu-dé cada-dé ìⁿ chiuⁿ-í. ¹² Te té Tiquicú ní tendaha-í-dé cuáháⁿ-dé ñuú Éfesú. ¹³ Te òré quixi-n te yáha-n vèhe té Cǎrpú cáá ñuú Tròás canehe-n ìⁿ dóó tǎcachi ní dándõo-í vehe-dé quixi, ndíhi nchaa lìbrú-í, te tnáhá nchaa dava-gǎ tutú-í ndécú vèhe-dé canehe-n quixi chi xǎⁿ ío-gǎ xíní ñuhu-í. ¹⁴ Te té Lijandrú téé cùu rerú ío vǎi sá ñà túú vǎha ní cuu quide ñaha-dé xii-í, dico mee Yǎ Ndiöxí náhá-gǎ nása cada ñaha-gǎ xii-dé cuendá sá dúcáⁿ quide-dé. ¹⁵ Te vá nihí tnáhá-n ndíhi-dé chi ío cǎháⁿ cuèhé-dé cuendá nchaa tnúhu cǎháⁿ-ó.

¹⁶ Te cútnáhá ndécá ñaha-güedé xii-í ní sáháⁿ núú cuè téé cùchiuⁿ xito díhna nuu, chi mee òi ní sáháⁿ te ñá túú ní sáháⁿ ni ìⁿ cue téé cùndíhi-í, chi nchaa-güedé ní dándõo ñaha-güedé xii-í, te yúhú xicáⁿ táhù-í núú Yǎ Ndiöxí sá vǎ cádá cuendá-gǎ sá dúcáⁿ ní quide-güedé. ¹⁷ Dico Xítohó Jesucristú ní chindee ñaha-gǎ xii-í, chi ní taxi-gǎ tnúhu ndee iní ní cáháⁿ-í tnúhu-gǎ nǎcuáa tàú-xi cunduu núú cuè téé-áⁿ ndíhi núú nchaa ñáyiú, dico ñá díú ñáyiú isràél cúŷ-yu, te díu-gǎ ní dǎcǎcu nihnu ñaha-gǎ xii-í ñá túú ní sǎhni ñaha-güedé. ¹⁸ Te mee Xítohó Jesucristú coto ñaha-gǎ xii-í te ñá túú nǎ cuu cuèi nǎndí sá ná cádá ñaha ñáyiú xii-í te díu-ni-gǎ coto ñaha-gǎ xii-í ndéé ná sáá nduu sáá-í andíu nǔú ndécú-gǎ táxí tnúní-gǎ. Te nchaa-o chí ná cǎchí-ó sǎ ío cǎhnu cuu-gǎ ni caa ni quíhíⁿ. Te ducaⁿ na cùnduu.

Tnúhu ndéé núú ní ndíhi-ná

¹⁹ Te ío cúñaha-n na càda ndee iní tá Priscá, ndíhi té Àquilú, ndíhi cue ñáyiú cùu ndí mee té Onèsíforó. ²⁰ Te té Èrastú ní quendóo-dé ñuú Còrintú, te té Tròfimú ní dándõo-í-dé ñuú Miletú chi cùhú-dé. ²¹ Te ío cundíhi iní-n quixi-n oré vátá sáá-gǎ yóó quidé vǎxiⁿ-xi. Te ío cada ndee iní-n cǎchí té Eúbulú, ndíhi té Pùdenté, ndíhi té Línú, ndíhi tá Claudiá, ndíhi nchaa dava-gǎ ñáyiú sándáá iní tnúhu Xítohó Jesucristú.

22 Te xìcáⁿ táhù-í núú Xǐtohó Jesu-
crìstú sá ná cùndecu ndìhì ñaha-gá
xii-n ndìhì nchaa dava-gá-yu. Te
ducaⁿ ïo na chìndee chitúu ñaha-gǎ
xii-ndo nchàa-ndo. Te ducaⁿ na
cùnduu. Te ïo chí cádá ndèe iní-nǎ
vítna.

TUTÚ NÍ CADÚHA TÉ PÄBLÚ QUIHIⁿ NDAHA TÉ TITÚ

*Té Păblú cādūha-dé tutú quihíⁿ
ndaha té Titú*

¹ Yúhú té Păblú xínú cuèchi-í núú Yă Ndiöxí, te ðiu-gá ní tendaha ñaha-gá xii-í càháⁿ-í tnúhu Xítóhó Jesucristú núú ñáyiú cuèndá quíndáá iní nchaa ñáyiú ní cachí Yă Ndiöxí naníhí tàhú, ndihí cuèndá sá tècú tnùní váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá. ² Te yúhú dácuàha-í-yu tnúhu-gá cuèndá cundecu ndihí-yu tnúhu ndee iní sá cundècu ndihí-yu Yă Ndiöxí ní caa ní quihíⁿ, chi ndéé cútnàhá vátá ngáva-gá ñuyíú-a ní cachí-gá sá cundècu ndihí ñaha-gá xii-yu, te ñá túú dàndahú ñáhá-gá, chi quide-gá ìⁿ sá càháⁿ-gá. ³ Te ní sáá nduu ní cachí-gá sá nihí-yu tnúhu nàcuáa cuáháⁿ tnúhu-gá, te ðiu-ni tnúhu-áⁿ ní cachí Yă Ndiöxí Yaá dácácu nihnu ñaha xii-o núú ùhú núú ndàhú sá dácuàha-í ñáyiú. ⁴ Te tutú-a cādúha-í cuèndá daquixi-í ndaha yòhó té Titú, téé ní sanu ichi ndisa-í ichi Xítóhó Jesucristú, chi ìⁿ-ni tnúhu sàndáá iní-ó. Te xicáⁿ táhù-í núú Tātá-ó Dütú Ndiöxí sá ìo na chindee chitúu ñaha-gá xii-n, te ðiu-ni-gá ná càda te ìo váha cuu iní-n cundecu-n. Te xicáⁿ táhú tucu-í núú Xítóhó Jesucristú Yaá dácácu nihnu ñaha xii-o núú ùhú núú ndàhú sá ðíú-ní ðucaⁿ na cada ñaha-gá xii-n.

Chiuⁿ quide té Titú distritú Crětá

⁵ Te yúhú ní dándöo ñaha-í xii-n distritú Crětá, chi cuíní-í cada-n nchaa chiuⁿ cumání, te cuíní-í taxi ndecu-n cuè téé quíndaha ñaha xii cue ñáyiú sàndáá iní tnúhu Yă Ndiöxí xíndecu ìⁿ ìⁿ ñuú yíndèhu distritú-áⁿ, te cada-n nàcuáa ní cachí-í cada-n. ⁶ Te cue téé cada chiuⁿ-áⁿ xíní ñuhu-xi cuu-güedé mee-ni cuè téé ìo váha quide ndáá nàcuáa vá yòo cáháⁿ

dóho-güedé, te na cùu-güedé cue téé ndècu ìⁿ dii-ni ñadihí-xi. Te ducaⁿ nchaa landú-güedé ná cùu-güexi landú sàndáá iní ñáhá xii Yă Ndiöxí cuèndá sá vǎ yòo cuatnuñàha xii-güexi quesahá-yu sá ìo sàá iní-güexi te quide-güexi nándi sá ñà túú tàú-güexi cada-güexi. ⁷ Chi xini ñuhu-xi sá ncháá cuè téé quíndaha ñaha xii ñáyiú sàndáá iní tnúhu Yă Ndiöxí ìo cundecu yíñuhu-güedé, chi ducaⁿ tàú-xi cada nchaa cue téé quide chiuⁿ Yă Ndiöxí, te xini ñuhu tucu-xi sá vǎ cúú-güedé cue téé ñíí iní-xi, te ni vǎ cúú-güedé cue téé líhli iní-xi, te ni vǎ cúú-güedé cue téé quihu, te ni vǎ cúú-güedé cue téé plètú, te ni vǎ cúú-güedé cue téé ðicó-ni ducaⁿ ñíhí ðíhúⁿ. ⁸ Te xini ñuhu-xi cuu-güedé cue téé sǎñaha nùu vehe ndetatú cue ñáyiú ñuhu ichi, cue téé quide váha sá cúú-xi tnàha ñáyiú-xi, cue téé ìo váha cùtnuní iní-xi nàcuáa cada cundecu ñuyíú-a, cue téé quide ndáá xíndecu, cue téé quide nchaa nacuáa ndùu vétú iní Yă Ndiöxí, cue téé xito mee-xi ñá túú quide cutexínu. ⁹ Te na cùu-güedé cue téé ìo váha sàndáá iní tnúhu váha tnúhu Yă Ndiöxí sá ní dānehé ñáhá-í xii-ndo cuèndá ducaⁿ te cue téé-áⁿ ndacu-güedé cáháⁿ-güedé dóho ñáyiú cuèndá cādā-yu nchaa nàcuáa càháⁿ Yă Ndiöxí, te níhí-güedé tnúhu cáháⁿ váha-güedé núú nchaa ñáyiú dàquee tíhú tnúhu Yă Ndiöxí, te mee-ni cuè téé ducaⁿ quide váha taxi ndecu-n quíndaha-güedé ñáyiú sàndáá iní tnúhu-gá.

¹⁰ Te na càchí tnúhu-í xii-n sǎ vái ñáyiú sàá iní-xi ìo, te càháⁿ-yu mee-ni tnúhu sá ñà túú nàndíhí, te dàndahú-yu tnàhá ñáyiú-yu, te ñáyiú isràel ìo-gá vǎi-yu ducaⁿ xíquide.

¹¹ Te nchaa ñáyiú ducaⁿ xíquide xini ñuhu-xi nducu-o tnúhu cúñaha-o xii-yu cuèndá cadí-yu yuhú-yu, chi dānehé-yu dava-gá ñáyiú ìⁿ sá ñà túú tàú-yu dacuàhá-yu, te ducaⁿ quide-yu cuèndá-ni sá nihí-yu díhúⁿ, te ìo titní xichi ní cuu dàndahú-yu nchaa ñáyiú xíndecu ìⁿ-ni vèhe.

¹² Te ní cachí ìⁿ téé ìo váha sàá

díquí-xi ndècu mei ñuú distritú Crètá sá ncháá ñáyiú ñuú-dé-án ïo ndèhndé-yu, te ío cuihna ìní-yu, te ío vài xexí-yu, te cùhndú-yu. ¹³ Te ndáá ní cáháⁿ-dé chi ducaⁿ quidé-yu, te xiáⁿ ío cáháⁿ-n dôho-yu cuendá sá ná quíndáá váha ìní-yu tnúhu Yá Ndiöxí. ¹⁴ Te cúñaha-n xí-yu sá vǎ cádá cuendá-yu nchaa tnúhu ndehnde cáháⁿ ñáyiú isràél, te ní vǎ cádá cuendá-yu nchaa tnúhu cáháⁿ ñáyiú ñá túú cuíni quíndáá ìní tnúhu Yá Ndiöxí.

¹⁵ Te nchaa sá ní cadúha Yá Ndiöxí ío ñuyíú-a cùu-xi mee nine-ni sá váha sá cúú-xí ncháa ñáyiú sa ní nduu ndoo ní nduu nine ìní-xi ndècu ichi Yá Ndiöxí. Dico nchaa sá ní cadúha-gá ñá túú cùu-xi sá váha sá cúú-xí ncháa ñáyiú ndècu ichi cuehé ichi duha, chi ñá túú sàndáá ìní-yu tnúhu-gá, chi mee-ni sǎ cuèhé sá dúhá ñúhu ìní-yu, te ñá túú quíde cuendá-yu núu quíde váha-yu àdi ñá túú quíde váha-yu ndècú-yu. ¹⁶ Te càchí-yu sá sàndáá ìní-yu Yá Ndiöxí, dico nchaa sá quíde-yu-áⁿ càchí tnùnì-xi sá ñǎ ndáá. Te Yá Ndiöxí chi duuⁿ duuⁿ ñá túú tnàhá ìní-gá nchaa nàcuáa quidé-yu, chi ío sáá ìní-yu, te ñá túú quíde-yu ní ìⁿ sá váha.

2

Tnúhu váha tnúhu Yá Ndiöxí

¹ Te yòhó òré dánèhé-n ñáyiú, te dánèhé-n-yu mee-ni nàcuáa cáháⁿ tnúhu váha tnúhu Yá Ndiöxí. ² Te nchaa cue téé cùu sacuéhé ná cáda cuendá-güedé vǎ cádá cùtexínu-güedé cundecu-güedé, te na cùndecu yíñuhu-güedé, te na cuǎha váha-güedé cuendá nàcuáa cada-güedé cundecu-güedé, te na quíndáá váha ìní-güedé Yá Ndiöxí, te na cùu ìní-güedé tnàha ñáyiú-güedé, te na cùnduu cahnu ìní-güedé cuèi nándi sá ná yǎha-güedé. ³ Te vitna cáháⁿ tucu-í sá cúú-xí ncháa ñáyiú dìhí ñáyiú cùu sacuéhé sǎ ná cùndecu yíñuhú-yu, te vǎ cúú-yu ñáyiú yiti yùhu-xi, te ní vǎ cúú-yu ñáyiú quihu, te na dànèhé-yu nchaa dava-gá ñáyiú cada váha-yu.

⁴ Te na dásahú-yu nchaa ñáyiú dìhí ñáyiú cuechi cuendá ná cùu ìní-yu yí-yu, ndihí cue landú-yu, ⁵ ndihí cuendá sá ná càni váha ìní-yu nàcuáa cundecu-yu, ndihí cuendá sá vǎ cáni ìní-yu cadá-yu ní ìⁿ sá cuèhé sá dúhá, ndihí cuendá sá ná cáda-yu nchaa chiúⁿ ñuhu vehé-yu, ndihí cuendá sá cádá váha-yu nchaa tnàha ñáyiú-yu, ndihí cuendá sá ná cáda-yu nchaa nàcuáa cáháⁿ yí-yu, te ducaⁿ xini ñuhu-xi cadá-yu cuendá sá vǎ yòo cáháⁿ cuèhé cuendá tnúhu Yá Ndiöxí. Duha cúñaha-n xii cue ñáyiú dìhí ñáyiú cùu sacuéhé cuendá ducaⁿ dásahú-yu nchaa ñáyiú dìhí ñáyiú cuechi.

⁶ Te yòhó cáháⁿ-n dôho nchaa cue téé cuechi cuendá sá ná càni váha ìní-güedé nàcuáa cundecu-güedé, ⁷ te cada-n mèe-ni sá váha cuendá ducaⁿ càncicúⁿ nihnu-güedé cada-güedé, te òré dánèhé-n-güedé te ío váha cuu ìní-n dànèhé-n-güedé, te ndihí tnúhu yíñuhu cáháⁿ ndihí-n-güedé. ⁸ Te cáháⁿ-n mèe-ni tnúhu váha, te ducaⁿ te vǎ yòo ìⁿ cáháⁿ cuèhé cuendá tnúhu cáháⁿ-n, te nchaa ñáyiú cùu úhú ìní ñáhá xii-o cucahaⁿ núu-yu, te vǎ nihí-yu tnúhu cáháⁿ cuèhé-yu cuendá-ó.

⁹ Te ío cáháⁿ-n dôho nchaa cue téé xinu cuechi sá ná quíndáá ìní-güedé cada-güedé nchaa chiúⁿ tahu patrón-güedé nàcuáa cudíu-güedé núu cuè téé-áⁿ, te vǎ cáháⁿ sáá ìní-güedé. ¹⁰ Te vǎ cáni ìní-güedé duhu-güedé, te cada ndáá-güedé cuendá sá ñá túú ná canì ìní ñáhá cuè patrón-güedé, te ducaⁿ te cutnùnì ìní ñáyiú sá tnúhu Yá Ndiöxí ío váha dànèhé ñáhá-xi nàcuáa cada-o cùndecu-o, te diu-gá cúú-gǎ Yá dácǎcu nihnu ñaha xii-o núu úhú núu ndàhú.

¹¹ Te nchoo ní cutnùnì ìní-ó sǎ Yá Ndiöxí ío cùndahú ìní-gá nchaa nchoo ñáyiú ndècu ñuyíú-a, te ní taxi-gá tnúhu ndee ìní sá nánihí tàhú nchaandi túhú ñáyiú te núu na quíndáá ìní ñáhá-yu xii-gá. ¹² Te ní cachí-gá sá dáñá-ó ncháa ichi cuehé ichi duha chi ñá tnàhá ìní-gá cundecu-o ìchi-áⁿ, te vǎ ío cuhuⁿ

iní-ó nchaa sá ío ñuyíú-a, te ní cachí tucu-gá sá ío caní iní-ó nàcuáa cundecu-o vitna ndecu-o ñuyíú-a te cada ndáá-ó cundecu-o cuendá nduu vétú iní-gá. ¹³ Te cundetu-o sáá nduu càhnu vihi, nduu quìxi tucu Xítohó Jesucristú Yaá cúú Ndiòxí-ó, te diu-gá ní dácàcu nihnu ñaha-gã xii-o nùú ùhú nùú ndàhú. Te nduu-ãⁿ ío cudíí iní-ó, ¹⁴ Te mee-gã ní xíhí-gá chi ducaⁿ ní cuiní-gá cunduu, te ducaⁿ ní quide-gá cuendá nchoo vã cùndècu-gá-ó ìchi cuehé ichi duha, te nduu ndoo nduu nine iní-ó, te ducaⁿ te cuu-o cuè ñáyiu quindaha-gã, te ni yùhu ni iní-ó càda-o mee-ni sá vãha.

¹⁵ Te nchaa tnúhu-áⁿ danèhé-n-yu te cúñaha-n xii-yu nàcuáa cadá-yu, te cáháⁿ-n dõho-yu te núu ñá túú quide ndáá-yu. Te cada-n sã cúú-n ìⁿ téé xínu cuechi núú Yá Ndiòxí, te vá dáñá-n mèe-n daquee tíhú ñáhá ñáyiu xii-n.

3

Nchaa sá tàú ñáyiu ndècu ichi Yá Ndiòxí cadá-yu

¹ Te cúñaha-n xii-yu sá ná quèndáá iní-yu cadá-yu nchaa nàcuáa càháⁿ nchaa cue téé cùchiuⁿ, te tàú-yu chindee ñáhá-yu xii-güedé nchaa chiúⁿ váha quide-güedé. ² Te vá càháⁿ cuèhé-yu cuendá ñáyiu, te vá cùndùu pletú-yu, te na cùú-yu ñáyiu ndàhú iní-xi, te na cùndahú iní-yu nchaa tnàha ñáyíú-yu.

³ Te tnàhá-ó ní xóo cada-o dàtná quidé ñáyiu-áⁿ vitna, chi ío ni ñíquí-ó chi ñá tècú tnùní-ó nàcuáa càháⁿ tnúhu Yá Ndiòxí ní cùu, te ío ní xínduu sáá iní-ó nùú-gã, te ní xíndecu-o ìⁿ ichi sá ñà túú tàú-ó cundecu-o ni cuu, te nándi sá cuèhé sá dúhá ío ñuyíú-a ní xóo cudíí iní-ó ní xóo cada-o chi ní xóo taxi tnùní ñáhá-xi xii-o, te ní xóo cada cuèhé ní xóo cada duha-o ni cùu, te ní xíndecu-o ìchi cuedú iní, te cuendá nchaa sá ní xóo cada-o-ãⁿ xíãⁿ ío ní xóo cuu úhú iní ñáhá ñáyiu xii-o, te ducaⁿ-ni nchòo tucu ní xóo cuu úhú iní-ò-yu. ⁴ Te Yá Ndiòxí Yaá ní dácàcu nihnu ñaha xii-o núú ùhú

núú ndàhú ní dándíxí tũu-gá iní-ó nàcuáa cutnùní iní-ó sã ío váha iní-gá, te cùu iní ñáhá-gã xii nchaa nchoo ñáyiu ndècu ñuyíú-a. ⁵ Te Yá Ndiòxí ní dácàcu nihnu ñaha-gã xii-o nùú ùhú núú ndàhú, dico ñá díú cuendá ìⁿ sá vãha quide-o ndecu-o ñuyíú-a ducaⁿ ní quide-gá, chi mee-gã ducaⁿ tnàhí ní cundàhú iní ñáhá-gã xii-o. Te ní nduu ndoo ní nduu nine iní-ó, te ní cuu-o dàtná ìⁿ ñáyiu saa, chi Espíritú Yá Ndiòxí ducaⁿ ní quide ñaha-xi xii-o. ⁶ Te Espíritú-gá ní taxi-gá ni yùhu ni iní-gá ndécú ndìhi-o, te ducaⁿ ní quide-gá chi ní sándáá iní-ó Xítohó Jesucristú Yaá ní dácàcu nihnu ñaha xii-o núú ùhú núú ndàhú. ⁷ Te ío cùndahú iní ñáhá-gã xii-o nùu sa ní quide ndáá-gá cuèchi-o te ní cuu-o ñèhe-gá, núu xíãⁿ vitna ndètu-ná-ó sáá nduu ndùu táhú-ó cundecu-o ndìhi-gá ni caa ni quíhíⁿ.

⁸ Te tnúhu ní cáháⁿ-í-a cùu-xi tnúhu ndáá cuiti, te cuiní-í sá ni yuhu ni iní-n cáháⁿ-n tnúhu-gá núu-yu cuendá sá ncháá ñáyiu sándáá iní ñáhá xii Yá Ndiòxí nducu ndéé-yu cadá-yu mee-ni sã vãha, te tnúhu-áⁿ cúú-xi mèe-ni tnúhu váha, te ío váha sá cúú-xi-yu. ⁹ Te vá cadá cuendá-n nchaa tnúhu sá ñà túú nándíhi xítnàha ñáyiu, te vá cadá cuendá-n ñáyiu nándi càháⁿ cuendá nchaa sá ní xóo cada cue ñáyiu ní xíndecu ndéé sanaha, te vá cadá cuendá-n nchaa tnúhu xítnàha ñáyiu xícuèhé tnàhá cuendá tnúhu ní chídó tnùní ndíi Moisés, chi nchaa tnúhu xítnàhá-yu-áⁿ ñà túú tnàhí nándíhi-xi, te dàcuíta ñaha-xi xii-o.

¹⁰ Te núu ío ñáyiu ní ngüita-yu nándi tnúhu càháⁿ-yu cuendá sá vã cúú ìⁿnuu cue ñáyiu ndècu ichi Yá Ndiòxí ñá, te ñáyiu-áⁿ cáháⁿ sàhú-n dõho-yu ìⁿ úú xito, te núu vá tníⁿ-yu tnúhu càháⁿ-n ñá, te vá nihí tnàhá-gã-n ndìhí-yu. ¹¹ Te ducaⁿ càda-n, chi ñáyiu-áⁿ duuⁿ duuⁿ ñá túú-gã cuiní-yu cadá-yu sá vãha, chi mee-nã sá cuèhé sá dúhá tnàhá iní-yu cadá-yu, te cùtnuní iní mèe-yu sá ñà túú quide

ndáá-yu, te sáá nduu te nacháhu-yu
nchaa sá quídě-yu.

Nàcuáa cada té Titú

¹² Te cuìní-í tendaha-ĩ té Àrtemás
quixi-dé núú ndécú-n àdi té Tìquicú,
te òré ná quèxio ndéda-ni càa ìⁿ cue
tée-a núú ndécú-n, te ío nducu ndèe-n
quíhíⁿ-n ñùú Nicópolis núú quíhíⁿ-í
cundecu-í, chi yàcáⁿ cuìní-í quíhíⁿ-í
cundecu-í yóó quídé v̄xiⁿ-xi. ¹³ Te ío
cuáñaha-n nchàa sá xíní ñùhu té Zènás
tée ío váha xíní nchaa nàcuáa càhàⁿ
lèí, ndihí té Àpolós cuendá sá ñà túú
nã cumání xii-güedé ichi. ¹⁴ Te cuìní-í
sá ncháá ñáyiú ndècu ndihí-o ichi Yá
Ndiöxí cada váha-yu, te cuáñahá-yu
ìⁿ sá xíní ñùhu ñáyiú, te ío váha chiúⁿ
cadá-yu te núu ducaⁿ na càdá-yu.

Tnúhu ndéé núú ñí ndihí-ná

¹⁵ Te vitna ío cada ndee iní-n càchí
nchaa ñáyiú ndècu ndihí-í iha, te
cúñaha-n sã ìo na càda ndee iní nchaa
ñáyiú cùu iní ñáhá xii-o, ñáyiú sãndáá
iní ñáhá xii Yá Ndiöxí. Te Yá Ndiöxí
íó na chìndee chitúu ñaha-gã xii-ndo
nchàa-ndo. Te ducaⁿ na cùnduu. Te ío
chí cádá ndèe iní-nã vitna.

TUTÚ NÍ CADÚHA TÉ PÄBLÚ QUIHIⁿ NDAHA TÉ FILEMÓN

*Té Păblú cādŭha-dé tutú quíhíⁿ
ndaaha té Filemón*

¹ Te yúhú té Păblú té yìhi vecaá sá cuendá Xítohó Jesucristú cādŭha-í ìⁿ tutú ndìhi té Timùteú cuendá daquixi-í ndaha yòhó té Filemón, te ío cùu iní ñáhà-í xii-n chi tnàhá-n quide-n chiuⁿ Yá Ndiòxí. Te tutú-a tëndaha-í quixi ndaha-n ²ndìhi ndaha ñaha nàni Apiá ñaha ndècu ndìhi-o ichi Xítohó Jesucristú, ndìhi ndaha té Àrquipú, chi tnàhá-dé quidé-dě chiuⁿ Yá Ndiòxí, ndìhi ndaha nchaa ñáyiu tàcá vehe-n dàcuahá-yu tnúhu-gá. ³Te xicáⁿ táhù-í núú Tătá-ó Dŭtú Ndiòxí ndìhi núú Xítohó Jesucristú sá ío na chindee chitúu ñaha-gă xii-ndo, te ducaⁿ ndì nduú-gá ná cádá te ío váha cuu iní-ndó cùndecu-ndo.

*Té Filemón ío sàndáá iní-dé Xítohó
Jesucristú te cùu iní-dé tnàha ñáyiu-dé*

⁴ Te ndi tnahá òré cāháⁿ ndìhi-í Yá Ndiòxí cuendá-n ndacáⁿ táhù-í núú-gă. ⁵ Chi ñihí-í tnúhu sá ío sàndáá iní-n Xítohó Jesucristú, te cùu iní-n cuè ñáyiu ndècu ichi-gá. ⁶ Te xicáⁿ táhù-í núú Yá Ndiòxí sá dàtná-ni sàndáá iní-n-gă ducaⁿ-ni dānehé-n ñáyiu cuendá ducaⁿ ngūnu ichi-yu tnàhá-yu, te cutnūnī iní-yu nācuāa ndūu nchaa sá vāha tàxi Xítohó Jesucristú xii-o, te tnàhá-yu nduu táhŭ-yu nchaa sá vāha-áⁿ. ⁷ Te yòhó té Filemón cúu-n tēe ndècu ndìhi-í ichi Xítohó Jesucristú cāchí tnúhu-í xii-n sá ío cùdíí iní-í cuendá sá ío váha quide-n ndecu-n, chi cùu iní-n nchāa ñáyiu ndècu ichi Yá Ndiòxí, te uuⁿ-gá ñihí ndéè-í sá dúcáⁿ quide-n, te ñiu-n ío sáhā-n-yu tnúhu ndee iní ndécú ndìhí-yu.

*Té Păblú chíndèe tnúhu-dé té
Ònésimú*

⁸ Te yúhú té Păblú ní taxi Xítohó Jesucristú tnúhu ndee iní ndécú ndìhi-í

sá táxi tnūnī ñáhà-í xii-n te tahu-í chiuⁿ cada-n, dico vá táxi tnūnī ñáhà-í xii-n, ⁹ chi váha-gá sá cāháⁿ ndāhú-í núú-n sá cādá-n nchāa nacuāa cāháⁿ-í chi ío cùu iní ñáhà-í xii-n. Chi yúhú sa ta yì-í cuáháⁿ, te yìhi-í vecaá cuendá sá cāháⁿ-í tnúhu Xítohó Jesucristú. ¹⁰ Te cāháⁿ ndāhú-í núú-n sá ñā túú ñā canī iní-n cuendá té Ònésimú, chi ní cuu-dé vitna dàtná ìⁿ déhe-í, chi ní sàndáá iní-dé tnúhu Yá Ndiòxí ní xāháⁿ-í xii-dé vitna yìhi-í vecaá.

¹¹ Te nāha-n sá cŭtnāhá ní xīndecu ndìhi-n-dě ñā túú ní quide ndāá-dé, dico vitna ío váha quide-dé ndécú ndìhi-í-dé, te ñiu-ni ducaⁿ cāda-dé òré cundecu ndìhi tucu-n-dě. ¹² Te vitna tendaha-í-dé ndixi-dé cundecu tucu-n ndìhi-dé, te òré queheⁿ cuendá-n-dě, te cada iní-n sá yúhú ní queheⁿ cuendá-n. ¹³ Te vitna yìhi-í vecaá sá cuendá tnúhu Xítohó Jesucristú, te cuiní-í ngani-í-dé cunu cuechi-dé núú-í cuendá cada-dé núú-n ní cùu. ¹⁴ Dico ñā túú ní ngāni-í-dé, chi vātá ndātnūhu ndìhi ñaha-gă-í xii-n nūu nása cachí-n cūnduu. Te ñā cūndēe iní-í cada yica-í cada-n ìⁿ sá vāha sá cúu-xì-í, chi cuiní-í sá méé-n cāni iní-n nūu cuu àdi sá vā cúu. ¹⁵ Te ní cūnduu ñi quee té Ònésimú vehe-n, te cudana te mee Yá Ndiòxí ducaⁿ ñi cachí-gá cūnduu cuendá dācuāha-dé cada váha-dé. Te ndixi tucu-dé cundecu ndìhi ducaⁿ-ñā-n-dě. ¹⁶ Te vá cúu-gă-dé dàtná ìⁿ tēe xīnu cuechi chi ní cuu-dé dàtná ìⁿ ñāni-ó chi ní sàndáá iní-dé Yá Ndiòxí, te yúhú ío cùu iní-í-dé, dico yòhó uuⁿ-gá cuu iní-n-dě, chi cùu-dé ìⁿ tnàha ñáyiu-o, te ndècu-dé ichi Yá Ndiòxí.

¹⁷ Te ìⁿ-ni cùu-o ndecu-o ichi Yá Ndiòxí nūu xiāⁿ cāháⁿ ndāhú-í núú-n sá quéhéⁿ cuendá-n-dě dàtná quéhéⁿ cuendá-n yúhú òré quéxió-í vehe-n. ¹⁸ Te núu ió ìⁿ sá ñi cumání-dě núú-n ñā túú ní quide ndāá-dé cŭtnāhá ní xīndecu-n ndìhi-dé, àdi ió ìⁿ sá tàú-dé te vá ndacáⁿ cuendá-n nūú-dě, chi yúhú ndacáⁿ cuendá-n nūú-í. ¹⁹ Te ndaha mee yúhú té Păblú cādŭha-í tutú-a cāchí tnúhu-í xii-n sá ná chāhu-í nchaa sá ñi quide-dé. Dico dandācu saú iní-n sá yúhú ní sanu

ichi ñaha-ĩ xii-n ìchi Xítóhó Jesucrìstú.

²⁰ Dico yòhó té ndècu ndihí-í ichi Xítóhó Jesucrìstú cada ndee ìní-n càda-n tnúhu ndàhú càháⁿ-í núú-n chi ndècu-o ichi-gá. Te ducaⁿ càda-n nacuáa cuu-xi dàtná ìⁿ tnúhu ndee ìní sá cúú-xì-í, chi ndi ndùú-ó ndècu-o ichi-gá.

²¹ Te cùtnuní ìní-í sá cáda-n nchàa nacuáa càháⁿ-í, te cùtnuní tucu ìní-í sá ìo-gá vài sá vǎha cada-n dàcúúxí tnúhu ndàhú càháⁿ-í núú-n, núu xǎⁿ tëndaha-í tutú-a véxi ndaha-n. ²² Te vitna cuìní-í cada túha-n ìⁿ vehe cundecu-í, chi sàni ìní-í sá quíxí còto ñaha-í xii-ndo, te ndètu-í sáá nduu-ǎⁿ chi nchòhó xicáⁿ táhú-ndó núú Yǎ Ndiǒxí cuèndá-í.

Tnúhu ndéé núú nǎ ndihí-ná

²³ Te ío cada ndee ìní-n càchí té Ěpafrás té yǐhi ndihí-í vecaá sá cuèndá tnúhu Xítóhó Jesucrìstú. ²⁴ Te ío cada ndee ìní tucu-n càchí té Mǎcú, ndihí té Arístarcú, ndihí té Děmás, ndihí té Lùcá, chi tnàhá cue téé-ǎⁿ quède-güedé chiúⁿ Xítóhó Jesucrìstú.

²⁵ Te Xítóhó Jesucrìstú ío na chindee chitúu ñaha-gǎ xii-ndo nchàa-ndo. Te ducaⁿ na cùnduu. Te ío chí cáda ndèe ìní-nǎ vitna.

TUTÚ QUIHIⁿ NDAHA CUE ÑÁYIU HÈBREÚ

Dútú Ndiöxí ní cachí-gá sá Dēhe-gá cada núú-gă

¹ Te ndéé sanaha, Yá Ndiöxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú nchàa ñani tnáhá-ó nǐ xíndecu ndéé dāvá-áⁿ te ñu ducaⁿ nǐ quide-güedé. Te tǐnǐ xito ducaⁿ nǐ xáhaⁿ-gă xii-güedé ní cáháⁿ-güedé tnúhu-gá. Te ndi dííⁿ ndi dííⁿ nǐ xítñuhu ñaha-gă xii-güedé nàcuáa cáháⁿ-güedé tnúhu-gá núú-yu. ² Te sátá nǐ cuu vai nduu ta yáha cuáháⁿ, te ní sáa nduu nǐ cachí Yá Ndiöxí sá Dēhe-gá cada núú-gă cáháⁿ tnúhu-gá núú-ó. Te ñu-ni mee-gă ní táuchíúⁿ nǐ cadúha Dēhe-gá ñuyíú ndihi nchaa sá ío, te ní cachí-gá sá ncháa cùu-xi cuendá Dēhe-gá. ³ Te Dēhe Yá Ndiöxí ío càhnu cuu-gá dàtná càhnu cuu mee-gă, te dàtná-ni sàni iní méé-gă ñu-ni ducaⁿ sàni iní Dēhe-gá chi tnáhá-gá cúú-gă Ndiöxí, te sá cuendá tnúhu cáháⁿ Dēhe-gá xíáⁿ ndécú-ní nchàa sá ío ñuyíú, te ducaⁿ chi ío càhnu cuu Dēhe-gá, te ñu-ni Dēhe-gá ní quide nàcuáa vá cündecu-gá cuèchi-o. Te sátá dúcáⁿ te ní ngóo-gá xio cùha Tátá-gă Dútú Ndiöxí Yáa ío cùnnu ndecu andiú.

Dēhe Dútú Ndiöxí ío-gá cùnnu-gá dàcúúxí cuè espíritú xínú cuèchi núú-gă

⁴ Te Dēhe Yá Ndiöxí ío-gá cùnnu-gá dàcúúxí cuè espíritú xínú cuèchi núú-gă, te ducaⁿ chi ní nduu táhú-gă núú Tátá-gă Dútú Ndiöxí sá ío-gá cùnnu-gă dàcúúxí cuè espíritú-áⁿ. ⁵ Chi Yá Ndiöxí ñá túú ní xáhaⁿ-gă xii ní ñⁿ cue espíritú xínú cuèchi núú-gă dàtná ní xáhaⁿ-gă xii Dēhe-gá, te duha ní xáhaⁿ-gă:
Yòhó cúú-n Dēhe mee-í,
te ducaⁿ-ni cündecu-n núú ndécú-í.
Duha ní xáhaⁿ-gă. Te ní cachí tucu Yá Ndiöxí:

Yúhú cúú-í Tátá Yáa-áⁿ,
te mee-gă cúú-gă Dēhe-í.

Duha ní cachí-gá. ⁶ Te cùtnhá ní tendaha-gă Dēhe-gá Yáa ío cùnnu ní quixi-gá ñuyíú-a, te ní cachí-gá:

Tàú-xi sá ncháa cuè espíritú xínú cuèchi núú-í chiñuhu-xi Dēhe-í.
Duha ní cachí-gá. ⁷ Te Yá Ndiöxí ní cáháⁿ-gá cuendá cue espíritú xínú cuèchi núú-gă, te ní cachí-gá:

Yúhú quidè-í sá ncháa cuè espíritú xínú cuèchi núú-í cúú-xí dàtná táchí,

te ñu-ni cue espíritú-áⁿ quidè-í sá cúú-xí dàtná itá ñuhú.

Duha càchí-gá. ⁸ Dico Dēhe-gá chi ñá túú dùcaⁿ ní xáhaⁿ-gă, chi duha ní xáhaⁿ-gă:

Yòhó tnáhá-n cùu-n Ndiöxí dàtná cúú yúhú Yáa cúú Tátá-n,

te ducaⁿ-ni tàxi tnuní-n nǐ caa ní quíhíⁿ,

te ío váha ndáa quidé-n tàxi tnuní-n.

⁹ Te dàquee tihú-n nchàa sá cuèhé sá dúhá, te cùu iní-n nchàa sá vâha,

núu xíáⁿ yúhú Yáa cúú Tátá-n ní quide-í sá ío-gá vii ío-gá váha cuu iní-n,

dàcúúxí nchàa dava-gá ñáyiú ndecu ndihi-n.

Duha ní xáhaⁿ-gă xii Dēhe-gá. ¹⁰ Te ní xáhaⁿ tucu Yá Ndiöxí xii Dēhe-gá:

Yòhó cúú-n Yáa ío cùnnu, chi ndéé cùtnhá ñá túú vèdana ná ío te ní cadúha-n ñuyíú ndihi andiú.

¹¹ Te andiú ndihi ñuyíú chi naa-xi, dico yòhó chi cundecu-ni-n nǐ caa ní quíhíⁿ.

Te andiú ndihi ñuyíú chi ndihi-xi dàtná ndíhí ñⁿ dóó,

¹² te dàtná cuíní-n quide ñáyiú ndihi ñⁿ dóó òré ndàcáⁿ tnáhnú-yu tàxi ndécú-yu ñⁿ xio, ducaⁿ càda-n ñuyíú ndihi andiú,

te dàtná nádâma dóó ñáyiú ducaⁿ càda tucu-n ñuyíú ndihi andiú.

Te yòhó dàtná-ni càa-n ndecu-n vitna ducaⁿ-ni cündecu-n cundecu-n ní caa ní quíhíⁿ, chi vá yíí tnáhí-n.

Duha ní xáhaⁿ Yă Ndiöxí xii Déhe-gá. ¹³ Te Yă Ndiöxí ñá túú ní xáhaⁿ-gă xii ni ìⁿ cue espíritú xínú cuèchi núú-gă dàtná ní xáhaⁿ-gă xii Déhe-gá, te duha ní xáhaⁿ tùcu-gá:

Ngóo xio cùha-í taxi tnùnì-n, te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.

Duha ní xáhaⁿ-gă xii Déhe-gá. ¹⁴ Te nchaa espíritú xínú cuèchi núú Yă Ndiöxí mee-ni chiuⁿ-gá quidé-xí, chi tëndaha-gá cue espíritú-áⁿ cuáháⁿ-xi nchaa núú ndécú cuè ñáyiú ní nduu táhú cundecu ndihí-gá chindee ñàha-xi xií-yu.

2

Vá dáñá ndèé-ó tnùhu sá càháⁿ nàcuáa naníhí tàhú-ó

¹ Te sá cuèndá sá ìo cùnùu Xítóhó Jesucristú, núú xiáⁿ ío xini ñuhu-xi cada cuèndá-ó nchaa tnùhu càháⁿ-gá sá sá ní xíndedóho-o cuèndá sá vă dáñá nihnu-o. ² Te cue espíritú xínú cuèchi núú Yă Ndiöxí ní cáháⁿ-xi tnùhu-gá ndéé sanaha, te tnùhu ní cáháⁿ cue espíritú-áⁿ cúú-xí sá ndáá cuíti. Te nchaa ñáyiú ñá túú ní cuìní tñi nchaa tnùhu ní cáháⁿ cue espíritú-áⁿ, te ni ñá túú ní cuìní-yu cundedóho-yu, nchaa ñáyiú-áⁿ ñi nacháhu-yu nàcuáa ndùu nchaa cuèchi ní quidé-yu ìⁿ ìⁿ-yu. ³ Te sá dúcáⁿ ñi yáha cue ñáyiú-áⁿ, xiáⁿ cútnùnì ndáá iní-ó sá vă cäcu nihnu-o te núu na dàña nihnu-o tnùhu sá càháⁿ nàcuáa naníhí tàhú-ó, tnùhu sá ìo cùnùu, chi nacháhu-o te núu ducaⁿ na càda-o. Te díhna-gá Xítóhó Jesucristú ní cáháⁿ-gá tnùhu-áⁿ te nchaa ñáyiú ní xíndedóho nchaa nàcuáa ndùu tnùhu-áⁿ ñi cáháⁿ ndáá-yu tnùhu-áⁿ nùú-ó. ⁴ Te tnàhá Yă Ndiöxí cúndihí-gá nchaa ñáyiú-áⁿ quidé-gă nàcuáa cutnùnì iní-ó sá tnùhu-áⁿ cúú-xí tnùhu ndáá, chi quide-gá titní núú sá vă yóo tnàhí ndàcu cada te ío cùnùhu-o. Te Espíritú Yă Ndiöxí quidé-xí nàcuáa nduu táhú-ó ndi díⁿ núú chiuⁿ cada-o nàcuáa cuìní méé-gă. Te sá dúcáⁿ quide Yă Ndiöxí nchaa xiáⁿ, xiáⁿ

cútnùnì iní-ó sá tnàhá-gá càháⁿ-gá sá tnùhu-áⁿ cúú-xí tnùhu ndáá.

Xítóhó Jesucristú ní xínduu yiqui cùnù-gá dàtná cáá yiqui cuñú nchoo cuè ñáyiú ñuyúú-a

⁵ Te Yă Ndiöxí vá táxi ndècu-gá cue espíritú xínú cuèchi núú-gă taxi tnùnì-xi ñuyúú sáá sá vátá quini-gá-ó, te diu cuèndá xiáⁿ càháⁿ-í. ⁶ Te núú tütú Yă Ndiöxí càchí-xi:

Yòhó Dútú Ndiöxí ñá túú nă cúú cuè ñáyiú ñuyúú núu ndacu iní-n-yu, àdi chindee-n-yu.

⁷ Te yòhó ní cachí-n sá nchaa ñáyiú ñuyúú-a vá cùnùú-yu dàtná cùnùu cue espíritú xínú cuèchi núú-n,

dico ní cachí-n sá sáá nduu te ío cùnùú-yu tnàhá-yu, te mee-n càháⁿ-n sá ìo càhnu cuú-yu, te ní cachí tucu-n sá táxi tnùnì-yu nchaa sá ñi cadúha-n.

⁸ Te ducaⁿ nchàandi túhú sá ìo quindàhá-yu.

Duha càchí-xi núú tütú-gá. Te sá dúcáⁿ ñi cachí Yă Ndiöxí sá quindàha ñáyiú ñuyúú nchaa sá ìo, xiáⁿ cútnùnì sá nchàandi túhú sá ìo taxi tnùnì-yu, dico vátá sáá-gá nduu dùcaⁿ quini-ó càda-xi. ⁹ Te nchoo sa nàha-o sá tnáá-ni ñi quide Yă Ndiöxí cuèndá sá vă cùnùu Xítóhó Jesucristú dàtná cùnùu cue espíritú xínú cuèchi núú-gă. Te ducaⁿ ñi quide Yă Ndiöxí chi ní cundàhú iní-gá nchaa ñáyiú ñuyúú-a, chi ní cachí-gá sá Déhe-gá cuú cuèndá nchaa-yu, te Xítóhó Jesucristú ío ní ndoho-gá òré ní xihí-gá, núu xiáⁿ ní nduu táhú-gă cùnùu vihi-gá vitna. Te mee Yă Ndiöxí càchí-gá sá ìo càhnu cuu Déhe-gá.

¹⁰ Te Yă Ndiöxí ní cadúha-gá nchàandi túhú sá ìo nàcuáa ní cachí iní méé-gă, te sá dúcáⁿ ñi quide-gá núu xiáⁿ váha-ni sá ñi cachí-gá sá Xítóhó Jesucristú nandi ndoho-gá te cuú-gá cuèndá ducaⁿ ñá túú tnàhí-gá ná cùmání-gá núú Yă Ndiöxí. Te sá dúcáⁿ ñi cuu núu xiáⁿ ní níhí Yă Ndiöxí nàcuáa cada-gá càndeca-gá nchaa ñáyiú cùu déhe-gá quihíⁿ núú ìo váha càa cundecú-yu ndihí-gá ni

caa ni quíhíⁿ. Te Xítohó Jesucristú cúu-gã Yaá ní quide nàcuáa nduu táhú cue ñáyiú cundecú-yu ndíhi Yá Ndiöxí. ¹¹ Te Xítohó Jesucristú cúu-gã Yaá quidé ndècu yíñuhu ñáyiú núú Yá Ndiöxí ñáyiú sàndáá iní ñáhá xii-gá, te Xítohó Jesucristú ndíhi cue ñáyiú-áⁿ ìⁿ-ni Yáá cúú Tãtã-yu ndíhi-gá, núú xíãⁿ Xítohó Jesucristú Yaá cúú Dêhe Dútú Ndiöxí ñá túú cùcahaⁿ núú-gã càháⁿ-gá sá ñàní-gá ndíhi cúha-gá cúú nchàa ñáyiú-áⁿ. ¹² Te quèe ndáá-xi nàcuáa càháⁿ-xi núú tùtú Yá Ndiöxí núú càchí-xi nàcuáa ní xáhaⁿ Xítohó Jesucristú xii Tãtã-gá Dútú Ndiöxí, te duha ní xáhaⁿ-gã:

Cáháⁿ váha-í cuendá-n núú nchàa cue téé cùu datná ñàní-í ndíhi núú nchàa cue ñáyiú ðíhí cúú dàtná cúha-í,

te cata-í ndudú chiñuhu ñaha-í xii-n núú tàcá-yu.

Duha yòdo tnuní núú tùtú-gá nàcuáa ní xáhaⁿ Dêhe-gá xii-gá. ¹³ Te ingá tucu xichi núú tùtú Yá Ndiöxí càháⁿ-xi nàcuáa ní càháⁿ Xítohó Jesucristú cuendá-gá, te duha ní cachí-gá:

Yúhú nchaa-ni nduu quindáá iní-í Tãtã-í Dútú Ndiöxí.

Duha càchí-xi núú tùtú Yá Ndiöxí nàcuáa ní càháⁿ Xítohó Jesucristú. Te ingá tucu xichi núú tùtú Yá Ndiöxí càháⁿ-xi nàcuáa ní càháⁿ tucu Xítohó Jesucristú, te duha ní cachí-gá:

Iha ndècu ndíhi-í nchaa ñáyiú cùu déhe Tãtã-í Dútú Ndiöxí, te ðiu-ni ñáyiú-áⁿ ñí taxi cuendá Tãtã-í cuu cuendá-í.

Duha càchí-xi núú tùtú-gá nàcuáa ní càháⁿ Xítohó Jesucristú.

¹⁴ Te sá cuendá nchaa ñáyiú cùu déhe Yá Ndiöxí cúú-yu yíqui cùñú, núú xíãⁿ ducaⁿ tnàhá Xítohó Jesucristú ní cuu-gá yíqui cùñú, te ducaⁿ ñí cuu-gá yíqui cùñú cuendá cuú-gá, te sá dúcáⁿ cúu-gá te ndacu-gá daquèe tíhú-gã sácuíhná, te ðiu sácuíhná-ãⁿ quidé-xí xihí ñáyiú. ¹⁵ Te ducaⁿ ñí quide-gá cuendá sá cuè ñáyiú ñuyíú-a vá yùhú-gá-yu sá cúu-yu, chi nchaa-ni nduu yùhú-yu sá cúu-yu.

¹⁶ Te na càchí tnúhu ndáá-í sá Xítohó Jesucristú ní quixi-gá cuendá

chindee-gã cue ñáyiú cùu ñàní tnàhá ndíi Àbrahám, te ñá díú cuendá sá chindèe-gá cue espíritú xínú cuèchi núú Yá Ndiöxí. ¹⁷ Te cuendá xíãⁿ núu dai ní xini ñuhu-xi sá cúu-gã ñáyiú cuendá yãha-gá nándi sá yãha-gá dàtná yãha cue ñáyiú cùu ndí mee-gá cuendá ducaⁿ cùu-gá dútú ío cùnuu te cuu ndáá-gá núú Yá Ndiöxí, te cundàhú iní-gá nchaa ñáyiú te cuú-gá cuendá sá vã cùndècu-gá cuèchi-yu núú Yá Ndiöxí. ¹⁸ Te mei òré ndóhó Xítohó Jesucristú ní xito ndéé ñáhá sácuíhná xii-gá te núu ndisa sá vã cadá-gã ní ìⁿ sá ñà túú tàú-gá cada-gá, te sá dúcáⁿ ñí ndoho-gá xíãⁿ núu ndácú-gã chindèe-gá nchaa ñáyiú ducaⁿ yãha.

3

Xítohó Jesucristú ío-gá cùnuu-gá dàcúúxí ndíi Moisés

¹ Te nchòhó cúu-ndó ñáyiú ndècu ndíhi-í ichi Xítohó Jesucristú ñáyiú cùu cuendá Yá Ndiöxí, te tnàhá-ndó cùu-ndo ñáyiú ní càháⁿ ñáhá-gã cuendá cundecu-ndo ndíhi-gá. Te yúhú càchí tnúhu-í xii-ndo sã ío váha cada cuendá-ndó nàcuáa ndúu cuendá Xítohó Jesucristú, chi ðiu-gá cúu-gã Yaá ní tendaha ñàha Dútú Ndiöxí ní quixi-gá ñuyíú-a, te ðiu-gá cúu-gã Dútú ío cùnuu chi quide-gá núú Yá Ndiöxí. Te ðiu-ni cuendá Xítohó Jesucristú càháⁿ tnúhu sá ní sàndáá iní-ó. ² Te mee Yá Ndiöxí ní sáha chiúⁿ-gá Xítohó Jesucristú, te ío ndáá quidé-gã chiúⁿ-áⁿ sá cúu-xí Yá Ndiöxí, te ðiu-ni ducaⁿ ñí quide ndíi Moisés ní quide ndíi chiúⁿ ní táhú Yá Ndiöxí, te ío ndáá ní quide ndíi chiúⁿ-gá sá cúu-xí nchàa ñáyiú cùu cuendá-gá, te cue ñáyiú-áⁿ cúú-yu dàtná vehe mee-gã. ³ Te ìⁿ téé dàcaa ìⁿ vehe váha ío càhnu-gá cúu-dé dàcúúxí vèhe dacao-dé. Te ducaⁿ sãtnahá-xi cùu Xítohó Jesucristú chi ío-gá càhnu cuu-gá dàcúúxí ndíi Moisés. ⁴ Te nchoo sã naha-o sá ncháá vèhe dacuítí ndècu cue téé ní dácaá, dico sa nàha tucu-o sá Yá Ndiöxí quidé-gã ndécú nchàa sá ío ñuyíú-a. ⁵ Te ndíi

Moisés-áⁿ ïo ndáá ní quide ndíi chiúⁿ ní táhú Yă Ndiöxí ní quide ndíi sá cúu-xí nchàa ñáyiú cùu cuendá-gá. Te sá dúcáⁿ ñí quide ndíi xíáⁿ ní cuu ndíi ñíⁿ téé ní xinu cuechi núú Yă Ndiöxí. Te ní xáhaⁿ ndíi xii nchaa ñáyiú cùu cuendá-gá nàcuáa cáháⁿ-gá ndéé cuéé-gá. ⁶ Dico Xítohó Jesucristú cúu-gă Déhe mee Yă Ndiöxí, te cùu-gá Yaá ío quide ndáá yíndàha-gá nchaa ñáyiú cùu cuendá Yă Ndiöxí. Te tnáhá-ó cùu-o ñáyiú cùu cuendá-gá, te ñiu-ni ducaⁿ cùu cuendá ñáhá-gá xii-o te núu na càncicúⁿ nihnu-ni-o càni ndáá iní-ó cuendá-gá ndéé ná sáá nduu ngündecu-o ndíhi-gá.

Cue ñáyiú cùu cuendá Yă Ndiöxí ío váha cùu iní-yu ndécú-yu ndíhi-gá

⁷ Te núu tütú Yă Ndiöxí yódó tnùnì nàcuáa ní cáháⁿ Espíritú-gá, te duha ní cachí-xi:

Te núu nchòhó ndédóho-ndo nchàa tnúhu càháⁿ Yă Ndiöxí vitna,

⁸ te vá cùndùu sáá iní-ndó dàtná ní xínduu sáá iní ñáyiú ní dáquéé tǐhú tnúhu Yă Ndiöxí, ñáyiú ní xíndecu xítí yucu,

chi ñáyiú-áⁿ ñí xito ndéé-yu Yă Ndiöxí núu nása cada ñaha-gă xii-yu.

Duha ní cachí Espíritú-gá. ⁹ Te càchí tucu Espíritú Yă Ndiöxí nàcuáa ní cáháⁿ méé-gă, te duha ní cachí-gá:

Xítí yucu ní xito ndéé ñáhá cué ñanì tnáhá-ndó ñí xíndecu ndéé sanaha xii-í,

te ducaⁿ ñí quide ñáhá-yu cuéi ní xiní-yu nchaa sá ñí quide-í ndí ùdico cuíá ñí xíndecú-yu xítí yucu-áⁿ.

¹⁰ Te sá dúcáⁿ ñí quidé-yu núu xíáⁿ ní cudéèⁿ-í núú-yu,

núu xíáⁿ ní cáháⁿ-í cuendá-yu, te ní cachí-í:

“Ñáyiú-a quide-ní-yu nchaa sá ñà túú tàú-yu cadá-yu te ni ñà túú cuíní-yu cadá-yu nchaa nàcuáa sàni iní-í,

te ni ñà túú cuíní-yu cadá-yu nàcuáa càháⁿ-í”,

duha ní cáháⁿ-í cuendá-yu.

¹¹ Te xíáⁿ núu ní cudéèⁿ-í núú-yu te ní xáhaⁿ ndáá-í xii-yu sá và ndúú

táhü-yu cundecu váha-yu núú ndécú-í.

Duha ní cachí Yă Ndiöxí càchí Espíritú-gá.

¹² Te nchòhó ñáyiú ndècu ndíhi-í ichi Xítohó Jesucristú, càháⁿ-í dóho-ndo sã ïo cada cuendá-ndó và cáni cuèhé iní-ndó te ngóo-ndo và quíndáá-gá iní-ndó Yă Ndiöxí te ñàña-ndo ichi-gá, te ñiu-gá cúu-gă Yaá ndécú nchàa nduu nchaa quíú.

¹³ Te ñíⁿ nduu ñíⁿ nduu ío chí cuăha tnàha tnúhu ndee iní cundecu-ndo ñini ndecu-ndo ñuyíú-a cuendá sá và xínu iní-ndó càda-ndo nándi sá cuèhé sá dúhá, te ducaⁿ te vá cúu sáá iní-ndó núú Yă Ndiöxí.

¹⁴ Te vá dáñá ndéé-ó càni ndáá iní-ó nàcuáa cada ñaha Yă Ndiöxí xii-o, te dàtná-ni ní sani iní-ó ndéé cútnáhá ní tuha-o ichi Yă Ndiöxí, te ñiu-ni ducaⁿ càni iní-ó ndéé ná sáá nduu và cùndecu-gá-ó ñuyíú-a, te núu ducaⁿ na càda-o te cùu ñíⁿnuu-o ndíhi Xítohó Jesucristú.

¹⁵ Te duha càháⁿ-xi ñíⁿ xichi núú tütú Yă Ndiöxí:

Te núu nchòhó ndédóho-ndo nàcuáa càháⁿ Yă Ndiöxí vitna,

te vá cùndùu sáá iní-ndó dàtná ní xínduu sáá iní cue ñáyiú ní dáquéé tǐhú tnúhu-gá ndéé sanaha.

Duha càchí-xi núú tütú-gá. ¹⁶ Te cue ñáyiú ducaⁿ ñí xínduu sáá iní-xi cùu-yu ñáyiú ní ndeñuhu ndíi

Moisés nacióⁿ Ègiptú, te ñáyiú-áⁿ ñí xíndedóho-yu tnúhu ní cáháⁿ Yă Ndiöxí te ní quide sáá iní-yu ní dáquéé tǐhü-yu tnúhu-gá. ¹⁷ Te ndí ùdico cuíá ñí xúhuⁿ-yu ichi ío ní cùdééⁿ Yă Ndiöxí núú-yu cuendá sá ñí quidé-yu nándi nchaa sá cuèhé sá dúhá, te ñáyiú-áⁿ ñí xíhí-yu xítí yucu.

¹⁸ Te nchaa ñáyiú-áⁿ ñà túú ní cuíní-yu tníⁿ-yu tnúhu ní cáháⁿ Yă Ndiöxí núu xíáⁿ ní cáháⁿ ndáá-gá sá và ndúú táhü-yu cundecú-yu núú ïo váha càa ndecu-gá. ¹⁹ Te xíáⁿ núu nchoo cùtnuní iní-ó sã nchàa ñáyiú-áⁿ ñà túú ní ndùu táhü-yu cundecu váha-yu núú ndécú-gă, chi ñà túú ní sàndáá iní-yu tnúhu ní cáháⁿ-gá.

4

1 Te vitna ndècu ndihi-gá-ó tnũhu Yá Ndiõxí tnũhu sá dánèhé ñáhá xii-o sá cúú cùndecu váha-o núú ndécú-gã, te tàú-xi quiyùhú iní-ó chi na cuáhán te vá ndúú tãhú-ó cùndecu váha-o núú ndécú-gã. 2 Te tnáhá nchoo nĩ ngúndecu ndihi-o tnũhu sá cãháⁿ nãcuáa naníhí tãhú-ó dàtná ní xíndecu ndihi cue ñáyiu ndéé sanaha, dico ñáyiu-án chi ñá túú vèdana ni nãndíhi-xi cuèi ní xíndedóho-yu tnũhu-án chi ñá túú ní sãndáá iní ñáhã-yu xii-gã. 3 Dico nchoo cùu-o ñáyiu ní sãndáá iní tnũhu Yá Ndiõxí, núu xiãⁿ nduu tãhú-ó cùndecu váha-o núú ndécú-gã, te ní quee ndáá-xi nãcuáa cãháⁿ-gã núú tütú-gã núú cãchí-xi:

Yúhú ní cudèèⁿ-í núú-yu, te ní cãháⁿ ndáá-í sá vã ndúú tãhũ-yu cundecu váha-yu núú ndécú-í.

Duha ní cachí-gã. Te cuu nduu tãhũ-yu cundecu váha-yu núú ndécú Yá Ndiõxí ní cùu, chi sa ní xínu cava nchaa chiúⁿ ní quide-gã sá nĩ cadúha-gã ñuyíú. 4 Te núú tütú Yá Ndiõxí cãháⁿ-xi nãcuáa ní quide-gã nduu úsá, te duha cãchí-xi:

Yá Ndiõxí ní quide chiúⁿ-gã íñú nduu ní quide-gã nchaa chiúⁿ-gã te ní ndetátú-gã nduu úsá.

Duha cãchí-xi núú tütú-gã. 5 Te cãchí tucu-xi núú tütú Yá Ndiõxí nãcuáa ní cãháⁿ-gã cuendá cue ñáyiu ndéé sanaha, te duha ní cachí-gã:

Cue ñáyiu-a vá ndúú tãhũ-yu cundecu váha-yu núú ndécú-í ndétátú-í.

Duha ní cachí-gã. 6 Te ñáyiu ní xíndedóho tnũhu sá cãháⁿ nãcuáa naníhí tãhú-ó ndéé sanaha, ñá túú ní nduu tãhũ-yu cundecu váha-yu núú ndécú Yá Ndiõxí ndétátú-gã, te ducaⁿ chi ñá túú ní sãndáá iní ñáhã-yu xii-gã, dico íó-gã ñáyiu nduu tãhú cundecu váha núú ndécú-gã ndétátú-gã. 7 Te ní xica cuéhé nduu sá dúcáⁿ ñá túú ní sãndáá iní ñáhá ñáyiu-án xii-gã, te dàtnùní ní cãháⁿ ndíi Dávíi yuhu-gã nãcuáa cada-gã vitna, te ñiu-ni nãcuáa sa yòdo tnuní ñiu-ni ducaⁿ chido tnuní tucu-í nãcuáa ní cãháⁿ ndíi yuhu-gã, te duha ní cachí-gã:

Te núu nchòhó ndèdóho-ndo tnũhu cãháⁿ-í te vá cadá sãá iní-ndó.

Duha ní cachí-gã. 8 Te ndíi Jòsué ní sanu ichi ndíi ñáyiu núú quíhíⁿ-yu cundecu váha-yu, dico ñá díú cuendá xiãⁿ ní cãháⁿ Yá Ndiõxí, chi cuendá nãcuáa cada-gã vitna ní cãháⁿ-gã. 9 Núu xiãⁿ sãá nduu nduu tãhú nchaa ñáyiu cùu cuendá Yá Ndiõxí ngúndecu váha-yu núú ndécú-gã ndétátú-gã. 10 Te nchaa ñáyiu ducaⁿ na nduu tãhú cundecu váha núú ndécú Yá Ndiõxí ndétátú-gã, te tnáhã-yu ndetátú-yu cuendá nchaa sá vãha ní quidé-yu dàtná ndétátú méé-gã. 11 Te xini ñuhu-xi sá nchóó ío nducu ndèe-o nducu-o nãcuáa cada-o cuendá nduu tãhú-ó ngúndecu váha-o núú ndécú Yá Ndiõxí ndétátú-gã, chi na cuáhán dava-ndo càda-ndo datná ní quide cue ñáyiu ñá túú ní sãndáá iní ñáhã xii-gã, te vá ndúú tãhú-ndó cùndecu váha-ndo núú ndécú-gã te núu ducaⁿ na càda-ndo.

12 Te tnũhu Yá Ndiõxí cúú-xí dàtná ñⁿ sá nchító-ó chi quide-xi nãndí sá quidé-xí, te cùu-xi datná ñⁿ sá dèéⁿ víhí-gã dàcúúxí ñⁿ yuchí sá ndéé úú xio núú-xi. Te ducaⁿ sãtnahá-xi cùu tnũhu-gã chi quée-xi iní-ó, te dàndixi túu-xi nchaandi túhú sá sání iní-ó te núu quide váha-o àdi ñá túú quide váha-o ndècu-o. 13 Te ni ñⁿ sá nĩ cadúha Yá Ndiõxí vá cání iní-ó sã ndácú-xí nguivãha-xi núú-gã, chi nchaandi túhú sá sání iní-ó ndècu túu-xi núú-gã, te ñiu núú Yáá-án na càni cuendá-ó nchaa sá quidé-ó.

Xítóhó Jesucristú cúú-gã Dútú ío cùnnuu

14 Te Xítóhó Jesucristú cúú-gã Dútú ío cùnnuu ndecu ndihi-o, te ñiu-gã cúú-gã Déhe Dútú Ndiõxí, te Yáá-án cuãndaa-gã andíu nĩ nucúndecu-gã núú Yá Ndiõxí, núu xiãⁿ tàú-xi sá cãchícúⁿ nihnu-ni-o quíndáá iní-ó-gã. 15 Te mee Yáá-án ío cùnnuu-gã cúú-gã dútú-ó ndècu ndihi-o, te ío na cùndahú iní ñáhã-gã xii-o cuendá sá ñã nihí ndéé-ó cùndecu-o. Te ducaⁿ càda-gã chi ní yãha-gã dàtná yãha mee-o, chi nchaa sá nĩ yãha-gã-án nĩ cuu-xi sá cadá-gã nãndí nchaa sá

cuèhé sá dúhá ní cùu dico ni ìⁿ ñá túú ní quide-gá. ¹⁶ Núu xiáⁿ tàú-ó sá nchóó nì yuhu ni iní-ó cǎháⁿ ndihi-o Yǎ Ndiǒxí Yaá ío cùndahú iní ñáhá xii-o chindee ñaha-gá, te ducaⁿ càda-o te cundàhú iní ñáhá-gǎ chindee ñaha-gá xii-o nděda-ni cǎa oré xíní ñùhu-o-gǎ.

5

¹ Te nchaa cue dútú cùnùu núu ñáyiú israél ñiú-ni ñáyiú cùu-güedé, te ducaⁿ ñi ngündecu-güedé cuendá cada-güedé chiúⁿ sá cúu-xí Yǎ Ndiǒxí cuendá-yu, chi ñiú cue téé-áⁿ ñi xóo nacani cuendá-güedé núu-gǎ quiti ní xóo cahni-güedé ní xóo nduu táhú-gǎ, te ducaⁿ ñi xóo cada-güedé cuendá sá cáda càhnu iní Yǎ Ndiǒxí cuéchi-yu, te ducaⁿ ñi xóo nacani cuendá tucu-güedé núu-gǎ nchaa dava-gá sá ñi xóo níhí-güedé ní xóo nduu táhú-gǎ. ² Te nchaa cue dútú-ǎⁿ ñi xóo cundee ñi-güedé nchaa sá ñi xóo cada nchaa ñáyiú ñá túú ní quide ndáá ñáyiú ñá túú cùnuni iní-xi, te ducaⁿ ñi xóo cada cue dútú-ǎⁿ chi tnàhá-güedé ñá túú ní xóo níhí ndéé-güedé cundecu-güedé cuendá nchaa sá ñi xóo yáha-güedé. ³ Te sá cuendá sá dúcáⁿ ñá túú ní xóo níhí ndéé-güedé ñuú xiáⁿ dai ní xini ñuhu-xi sá tnàhá-güedé cuáha-güedé Yǎ Ndiǒxí sá ndúú táhú-gǎ cuendá méé-güedé dàtná quidé-güedé cuendá ñáyiú.

⁴ Te ni ìⁿ téé vá ndácú-dě cuu-dé dútú cùnùu cuendá-ni sá cǎchí iní méé-dě te núu ñá díú mèe Yǎ Ndiǒxí ducaⁿ cuini-gá sá cúu-dě dútú cùnùu datná ní quide-gá ndíi Àrón. ⁵ Te cuéi Xítohó Jesucristú chi ñá díú mèe-gá ní quide-gá méé-gǎ ìⁿ dútú cùnùu nacuaá cada nínu-gá méé-gǎ, chi mee Tǎtá-gǎ Dútú Ndiǒxí ducaⁿ ñi cachí-gá sá cúu-gǎ Dútú cùnùu, te ducaⁿ chi Yǎ Ndiǒxí ní xáhaⁿ-gǎ:

Yòhó cúu-n Dèhe-í,
te cuini-í sá dúhá-ni cùndecu-n núu ndécú-í.

Duha ní xáhaⁿ-gǎ xii Xítohó Jesucristú. ⁶ Te núu tütú Yǎ Ndiǒxí yódó tnùni nàcuáa ní xáhaⁿ tucu-gá xii Xítohó Jesucristú, te duha ní xáhaⁿ-gǎ:

Yòhó cúu-n dútú cundecu ni caa ni quíhíⁿ,

te cùu-n datná ní cuu ndíi Melquisèdec. Duha ní xáhaⁿ-gǎ xii Xítohó Jesucristú.

⁷ Te cùtnàhá ní xíndecu Xítohó Jesucristú ñuyíú-a te níhi ní xóo cáháⁿ ndihi-gá Yǎ Ndiǒxí te ní xóo cáháⁿ ndàhú-gá núu-gǎ, te ní xóo ndáhyú-gá òré ducaⁿ ñi xóo cáháⁿ ndihi-gá Yǎ Ndiǒxí, te ducaⁿ ñi quide-gá chi nàha-gá sá Yǎ Ndiǒxí cúu-gǎ Yaá ndacu dàcácu nihnu ñaha xii-gá cuendá sá vǎ cùú dúcáⁿ-gǎ. Te Yǎ Ndiǒxí ní xíndedóho-gá nchaa tnúhu ní cáháⁿ Xítohó Jesucristú cuendá sá ñi quide-gá nchaa nàcuáa ní xáhaⁿ Yǎ Ndiǒxí cada-gá. ⁸ Te sá cuendá nchaa sá ñi ndoho Xítohó Jesucristú xiáⁿ ní cutnùni iní-gá cada-gá nchaa dava-gá sá vǎha nàcuáa cuini méé Yǎ Ndiǒxí cada-gá. Te ducaⁿ ñi cuu cuéi cùu-gá Déhe Yǎ Ndiǒxí. ⁹ Te sá dúcáⁿ ñi quide-gá nchaa nàcuáa cuini méé Yǎ Ndiǒxí, xiáⁿ ñuú vitna cùu-gá Yaá dàcácu nihnu nchaa ñáyiú sàndáá iní ñáhá xii-gá núu ùhú núu ndàhú. ¹⁰ Te mee Yǎ Ndiǒxí ní cachí-gá sá Xítohó Jesucristú cúu-gǎ dútú cùnùu datná ní cunuu ndíi Melquisèdec cùtnàhá ní cuu ndíi dútú ñuyíú-a.

Cuendá ñáyiú cuini dañá nihnu ichi Yǎ Ndiǒxí

¹¹ Te vǎi-gá tnúhu ndècu cáháⁿ-í nàcuáa ndùu cuendá Xítohó Jesucristú, ndihi ndíi Melquisèdec, te dicó-ni sá nchòhó ío cuéé tècú tnùni-ndó, te yúhú ío ùhú níhí-í nàcuáa cáháⁿ-í nàcuáa tecú tnùni-ndó.

¹² Te nchòhó sa ní cuu cuéhé nduu ndècu-ndo ichi Xítohó Jesucristú, te tàú-ndó dǎnehé-ndó cué ñáyiú ndècu ichi-gá tnúhu-gá ñuú dicó sá cúu, dico xini ñuhu-ni-xi sá cùndecu ñáyiú dǎnehé ñáhá tnúhu-gá xii-ndo, tnúhu sá ñi dácuáhá-ndó ndéé díhna sá ñá túú ùhú tecú tnùni-ndó. Te sá dúcáⁿ quide-ndo núu xiáⁿ cúu-ndó dàtná cue landú vitna sàdi camá, landú vátá cúu-gǎ caxi díta. ¹³ Chi nchaa ñáyiú cùu datná landú vitna sàdi, ñáyiú-áⁿ cúu nèñuú-yu ñá túú cùnuni iní-yu nàcuáa càháⁿ tnúhu sá càháⁿ nàcuáa

cada ndáá-yu cundecú-yu. ¹⁴ Te nchaa sá vátá cúú-gă caxi cue landú yíquín xǎn cúú-xí cuendá cue ñáyiú sacuéhé, te xǎn cúú-xí datná tnúhu sá dácuaá ñáyiú sa ní níhí ndéé ndécu ichi-gá, ñáyiú sa ní cutnùní váha iní-xi nándi cùu nchaa sá cuèhé sá dúhá, ndihí nándi cùu nchaa sá vâha.

6

¹ Te xǎn nũ vitna xini ñuhu-xi dacuaá-o dava-gá tnúhu Yá Ndiõxí cuendá ducaⁿ te cuu-o ñáyiú təcú tnùní nchaa tnúhu-gá. Te xini ñuhu-xi sá ncháá tnúhu Xítohó Jesucristú sá ní dácuaá-há-ó ndéé díhna vá dácuaá-gá-ó datná ní dácuaá-há-ó chi sa təcú tnùní-ó. Te ñá túú-gă xini ñuhu-xi dacuaá-o datná ní dácuaá-há-ó ndéé díhna nàcuáa cada-o ndixi cuéchi iní-ó cuendá nchaa sá cuèhé sá dúhá quide-o, sá tá dácuita nihnu ñaha xii-o cuáháⁿ ní cùu. Te ducaⁿ vâ dácuaá-gá tucu-o datná ní dácuaá-há-ó ndéé díhna nàcuáa cada-o quindáá iní-ó Yá Ndiõxí, ² ndihí cuendá nàcuáa ní dácuaá-há-ó nàcuáa cuandute-o, ndihí cuendá nàcuáa cada-o càcáⁿ ndodo-o ndàha-o díquí ñáyiú ní sándáá iní ñáhá xii-gá. Te ducaⁿ ñá túú-gă xini ñuhu tucu-xi dacuaá-o datná ní dácuaá-há-ó ndéé díhna cuendá nàcuáa ndoto cue ñáyiú ní xihí, ndihí cuendá nàcuáa ní dácuaá-há-ó sá Yá Ndiõxí daquihíⁿ-gá ñáyiú núú ùhú núú ndàhú ni caa ni quihíⁿ. ³ Te núu Yá Ndiõxí ná càchí-gá, te cuita dacuaá-gá-ó nchàa dava-gá tnúhu sá cúmăní quihíⁿ.

⁴ Te cue ñáyiú sa təcú tnùní tnúhu Yá Ndiõxí, ñáyiú sa xini nchaa nàcuáa ndùu nchaa sá vâha quide ñaha Yá Ndiõxí xii-o ndihí-yu, ñáyiú sa chindee ñaha Espíritú Yá Ndiõxí, ⁵ ñáyiú sa cutnùní iní-xi sá ïo váha tnúhu Yá Ndiõxí, ñáyiú sa xini nàcuáa ta quide Yá Ndiõxí véxi nchaa sá vâ yõo tnàhí ndàcu cada, ⁶ te núu ñáyiú-áⁿ ná ngũita tucú-yu daquèe tíhú duúⁿ-yu tnúhu Yá Ndiõxí, te vá ndácú-gă-ó nà canu ichi-ó-yu nàcuáa ndixi cuéchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùu-yu datná

cue téé ní sahani ñaha xii Xítohó Jesucristú Déhe Yá Ndiõxí núú cùrúxí. Te sá dúcáⁿ ná càdá-yu te ngóo dava-gá ñáyiú cáháⁿ cuèhé-yu cuendá Xítohó Jesucristú. ⁷ Te nchaa ñáyiú cùu-yu datná ñuhu, chi ñuhu-áⁿ ndi tnahá òré cúúⁿ dăú te xihí-xi ndute, te dava ñuhu váha cùu sá xítú ñáyiú, te sá cúú nũ ñuhu-áⁿ ïo nándihí-xi, te mee Yá Ndiõxí quidé-gă cúú sá vâha núú ñúhú-ăⁿ. ⁸ Dico núu da iñu na ndàa núú ñuhu-áⁿ te ñá túú vèdana nándihí-xi te núu ducaⁿ, te Yá Ndiõxí vá cúú vâha iní-gá cuendá ñuhu-áⁿ sá dúcáⁿ dà iñu ndaa núú-xi, te iñu-áⁿ ndihí-xi cáyú. Te ducaⁿ sâtnahá-xi cùu ñáyiú dàquee tíhú tnúhu Yá Ndiõxí chi ñá túú cùu váha iní-gá núú-yu.

Níhí-ó sá ndétú-ó ndiùu táhú-ó

⁹ Te cuéi duha càháⁿ-í dico nchòhó cue ñáyiú ïo cùu iní-í, chi cutnùní ndáá iní-í sá vâ càdá-ndó datná xiquide dava-gá ñáyiú, te mee-ni sá vâha cuu xii-ndo chi cùu-ndo ñáyiú sa ní naníhí táhú. ¹⁰ Te ducaⁿ chi Yá Ndiõxí cúú-gă Yaá ïo váha quide ndáá, te vá dáná ndòdo iní-gá nchaa sá vâha quide-ndo, te ni vâ dáná ndòdo iní-gá nàcuáa quide-ndo cuu iní-ndó-gă, te sá dúcáⁿ quide-ndo cuu iní-ndó-gă xǎn chindèe-ndo cue ñáyiú ndécu ndihí-ndo ichi Xítohó Jesucristú, te ducaⁿ-ni ta quide-ndo véxi ndéé vitna. ¹¹ Te cuiní-í sá ïⁿ ïⁿ-ndo nducu ndee-ndo cada-ndo nàcuáa cuiní Yá Ndiõxí datná tá quide-ndo véxi, te diu-ni ducaⁿ càda-ndo ndéé ná sáa nduu ndùu táhú-ndó cùndecu-ndo ndihí-gá núú ndécú-gă, te ducaⁿ te níhí-ndó nchàandi túhú sá ndétú-ndó ndùu táhú-ndó cùndecu ndihí-ndo ni caa ni quihíⁿ. ¹² Te yúhú cuiní-í sá nchòhó vá túhí-ndo càda-ndo nchaa nàcuáa cuiní Yá Ndiõxí, te cada-ndo datná quidé ñáyiú sándáá iní tnúhu-gá, ñáyiú càhnu iní-xi. Te sá dúcáⁿ quidé-yu xǎn níhí-yu nchaa sá ní cachí Yá Ndiõxí nduu táhú-yu.

¹³ Te cutnàhá ní xáhaⁿ Yá Ndiõxí xii ndíi Ábrahám nàcuáa cada-gá, te ní cacunehe-gá méé-gă nàcuáa cutnùní iní ndíi sá ndàá cada-gá nàcuáa ní xáhaⁿ-gă xii ndíi, te vá yõo ïⁿ ni

càcunehe-gá cuendá sá quíndáá iní ndíi tnúhu ní cáháⁿ-gá. Te ducaⁿ ñi quide-gá chi ñⁿdíi díi-ni mee-gã ío cùnuu-gá. ¹⁴ Te duha ní xáhaⁿ-gã xii ndíi Àbrahám: “Yòhó té Àbrahám na cächí tnúhu ndáá-í xii-n sã ío chindee ñaha-í xii-n, te cáyá cuéhé víhí ñani tnáhá-n”, duha ní xáhaⁿ-gã xii ndíi. ¹⁵ Te ndíi Àbrahám ío ní quide ndee iní ndíi ní xíndetu ndíi, te ducaⁿ te Yá Ndiöxí ní quide-gá nàcuáa ní xáhaⁿ-gã cada-gá sá cúu-xí ndíi. ¹⁶ Te núu ñⁿ ñáyiu cãháⁿ ñⁿ tnúhu ndáá cuiti te càcu nehé-yu Yá Ndiöxí cuendá quíndáá iní tnaha ñáyíu-yu tnúhu cãháⁿ-yu, te òré ducaⁿ na cãháⁿ-yu te ñá túú-gã sá dácãá ñáyiu cãháⁿ ndíhi-yu cuendú. ¹⁷ Te ducaⁿ ñi quide Yá Ndiöxí ní cáháⁿ ndáá-gá sá cádá-gã nàcuáa ní cachí-gá, te ducaⁿ ñi cáháⁿ-gá cuendá nchaa ñáyiu ní cachí-gá nduu táhú sã cádá-gã nàcuáa cutnùní iní-yu sá quidé-gã ñⁿ sá cãháⁿ-gá, te ni ñà túú nädáma-gá ñⁿ sá cãháⁿ-gá. ¹⁸ Te nchoo ñi natuha-o Yá Ndiöxí cuendá dàcácu nihnu ñaha-gã xii-o núu ùhú núu ndàhú, te ní níhí-ó tnúhu ndee iní ndécú ndíhi-o cuendá sá vã dáña ndéé-ó cùndetu-o sáa nduu ndúu táhú-ó cùndecu-o ndíhi-gá. Te ducaⁿ ñi níhí-ó tnúhu ndee iní chi Yá Ndiöxí ní cáháⁿ ndáá-gá sã cádá-gã nàcuáa ní cachí-gá, te ñá túú dándahú ñáhá-gã, te ni ñà túú nädáma-gá ñⁿ sá ñi cachí-gá cada-gá. ¹⁹ Te tnúhu ndee iní ndécú ndíhi-o xíãⁿ quidé-xí cùtnuní ndáá iní-ó sã ndúú táhú-ó cùndecu-o ndíhi Yá Ndiöxí núu ndécú-gã, te ducaⁿ cùtnuní ndáá ndisa iní-ó sã cuendá Xítohó Jesucristú Yáa ndécú núu Yá Ndiöxí. ²⁰ Te ducaⁿ ñi nucúndecu Xítohó Jesucristú núu Yá Ndiöxí cuendá ducaⁿ cànchicúⁿ nihnu-o càda-o, te ducaⁿ ñi nucúndecu-gá núu Yá Ndiöxí chi cùu-gá dútú cùnùu datná ní cunuu ndíi Melquisèdec ñuyíu-a, te ducaⁿ-ni cùu-gá dútú cùnùu ñi caa ñi quíhíⁿ.

7

Xítohó Jesucristú cúu-gã dútú dàtná ní cuu ndíi Melquisèdec

¹ Te ndíi Melquisèdec ní xíndaha ndíi cue ñáyiu ñuú Sàlém, te ní cuu ndíi dútú ñi xinu cuechi ndíi núu Dútú Ndiöxí Yáa ío cùnuu. Te ndíi Melquisèdec-áⁿ ñi xícaⁿ táhú ndíi núu Yá Ndiöxí cuendá ndíi Àbrahám cùtnáhá ní sáháⁿ ndíi Àbrahám-áⁿ ñi nàá ndíi ndíhi cue dava-gá cue téé yíndaha ñáyiu. Te cue téé-áⁿ ñà túú ní ndàcu-güedé nàá-güedé ndíhi ndíi Àbrahám-áⁿ chi ní xíta-güedé. ² Te nchaa sá ñi níhí ndíi Àbrahám-áⁿ núu ñi nàá ndíi, te ní quide ndíi úxí xichi te ñⁿ xichi núu ùxí-áⁿ ñi sãñaha ndíi xii ndíi Melquisèdec. Te ñuú ndíi Melquisèdec-áⁿ quée-xí: Téé ío váha quide ndáá yíndaha ñaha xii ñáyiu, duha quée-xi. Te ní xóo danàni ñahá-yu xii ndíi Téé yíndaha ñuú Sàlém, duha ní xóo danàni ñahá-yu. Te tnúhu Sàlém-áⁿ quée-xí: Ñuú ndécú nàhi, duha quée-xi tnúhu-áⁿ. Núu xíãⁿ quée tucu-xi nacuáa nàni ndíi Téé yíndaha ñuú ndécú nàhi, duha quée tucu-xi ñuú ndíi. ³ Te ñá túú tnúhu núu yoo cùu tátá ndíi ndíhi nãná ndíi, te ni ñà túú tnúhu núu yoo cùu xíi ndíi ndíhi xítná ndíi, te ni ñà túú tnúhu núu nándi cùu ñáyiu ní cuu ñani tnáhá ndíi ní xíndecu ndéé sanaha-gã, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xíhí ndíi. Te ndíi-áⁿ ducaⁿ-ni ñi cuu ndíi dútú ñi xíndecu ndíi, te ducaⁿ sãtnahá-xi cùu Xítohó Jesucristú déhe Yá Ndiöxí chi cuu-gá dútú ñi caa ñi quíhíⁿ.

⁴ Te vitna chí cuãha váha cuendá sá ndíi Melquisèdec ní cuu ndíi ñⁿ téé ío ní cuu cãhnu ní xíndecu ñuyíu-a, chi ndíi Àbrahám téé ní cuu ñani tnáhá-ó ñi xíndecu ndéé sanaha ñi quide ndíi úxí xichi nchaa sá ñi níhí ndíi núu ñi nàá ndíi. Te ñⁿ xichi núu ùxí-áⁿ ñi sãñaha ndíi xii ndíi Melquisèdec. ⁵ Te ndíi Moisés ní chídó tnùní ndíi nàcuáa cada nchaa dútú, cue téé ní cuu ñani tnáhá ndíi Leví sá cué téé-áⁿ queheⁿ-güedé ñⁿ xichi núu ùxí xichi sá nihí cue ñáyiu israél ñáyiu cùu ñani tnáhá-güedé cuu cuendá-güedé. Te ducaⁿ quide-güedé cuéi ñani

tnáhá-güedě ndihí-yu ní cuu ndii Àbrahám. ⁶ Te cuèi ñá díú ñaní tnáhá ndii Melquisèdec cúu ndii Àbrahám dico ní queheⁿ ndii Melquisèdec-áⁿ ìⁿ xichi núú ùxí xichi nchaa sá ñí níhí ndii Àbrahám. Te ndii Melquisèdec-áⁿ ñí xícáⁿ táhú ndii núú Yá Ndiòxí cuendá ndii Àbrahám. Te ñu-ni ndii Àbrahám-áⁿ ñí xáhaⁿ Yá Ndiòxí xii ndii sá cáda vaha ñaha-gã xii ndii. ⁷ Te sa cùnuni iní-ó sã ñuu ìⁿ téé na càcáⁿ táhú-dé núú Yá Ndiòxí cuendá ìⁿ ñáyiú, te téé-áⁿ cùnùu-gá-dé. ⁸ Te cue dútú ñáyiú isràél quéhéⁿ-güedé ìⁿ xichi núú ùxí xichi nchaa sá ñihí-yu cùu cuendá-güedé, te cue téé-áⁿ cuú-güedé. Te núú tütú Yá Ndiòxí càchí-xi sá ndii Melquisèdec ndécú-ní ndii, te ducaⁿ càháⁿ-xi chi ñá túú tnùhu sá ñí xihí ndii. ⁹⁻¹⁰ Te sá dúcáⁿ ñí sãñaha ndii Àbrahám sá ñí nduu táhú ndii Melquisèdec, te xiãⁿ cada iní-ó sã sã ndecu ndihí ndii Àbrahám cue ñaní tnáhá ndii Lèví cue téé cùu dútú, cue téé queheⁿ ìⁿ xichi núú ùxí xichi nchaa sá ñihí ñáyiú isràél cuèi vátá cécú-gã-güedé. Te cada iní-ó sã tnáhá-güedé ní sáha-güedé ndii Melquisèdec ìⁿ xichi núú ùxí xichi nchaa sá ñí níhí ndii Àbrahám núú ñí nãá ndii. Te ducaⁿ càda iní-ó chi cue téé-áⁿ cuú-güedé ñaní tnáhá ndii Àbrahám cuèi vátá cécú-gã-güedé dàvá-áⁿ.

¹¹ Te sá cuendá cue dútú cue téé cùu ñaní tnáhá ndii Lèví ní ngúndecu ndihí cue ñáyiú isràél tnùhu sá sánú ìchi ñaha xii-yu nàcuáa cadá-yu cundecú-yu. Te ñaní tnáhá ndii Àrón cúu cuè dútú-ãⁿ. Te núú dícó cue dútú-ãⁿ ní ndàcu-güedé cada-güedé nàcuáa cudíu ñáyiú isràél núú Yá Ndiòxí, te ñá túú-gã xini ñuhu-xi ngúndecu ingá dútú dàtná ndii Melquisèdec ní cùu. Te dútú-ãⁿ ñá túú ní cùu-dé dàtná ní cuu cue ñaní tnáhá ndii Àrón. ¹² Te núú cuè dútú cue téé cùu ñaní tnáhá ndii Lèví-áⁿ ñí ngúndecu ingá dútú. Te sá dúcáⁿ ñí ngúndecu ingá dútú xiãⁿ dacuítí ñí xini ñuhu-xi sá dãma nàcuáa nduu tnùhu sá sánú ìchi ñaha xii-yu nàcuáa cadá-yu cundecú-yu. ¹³⁻¹⁴ Te ñu-ni cuendá dútú-ãⁿ sa ñihí-ó

tnùhu, te dútú-ãⁿ cúu Xítóhó Jesucristú, te ñá díú ñaní tnáhá ndii Àrón cúu-gã chi ñaní tnáhá ndii Jùdá cúu-gã. Te nchaa-o tà xini ndáá-ó sã ñaní tnáhá ndii Jùdá cúu-gã, te ndii Moisés ñá túú tnàhí ná ní càchí ndii cuendá cue ñaní tnáhá ndii Jùdá sá cúu-güedé dútú, chi ni ìⁿ-güedé ñá túú ní cùu-güedé dútú ní cùu.

¹⁵ Te vitna cùnuni ndáá iní-ó nàcuáa ní cuu, chi Xítóhó Jesucristú cúu-gã ingá dútú dàtná ní cuu ndii Melquisèdec. ¹⁶ Te ñá díú cuendá tnùhu sá sánú ìchi ñaha xii ñáyiú nàcuáa cadá-yu cundecú-yu ducaⁿ ni cùu-gá dútú, chi ní cuu-gá dútú cuendá sá cúu-gã Yáá cundecu ni caa ni quíhíⁿ chi vá ìⁿ nduu te ndihí nihnu-gá. ¹⁷ Te duha ní xáhaⁿ Yá Ndiòxí xii-gá:

Yòhó cúu-n dútú dàtná ní cuu ndii Melquisèdec,

te cundecu-n nchaa nduu nchaa quíú. Duha ní xáhaⁿ Yá Ndiòxí xii-gá. ¹⁸ Te xiãⁿ ñuu nchaa tnùhu ndéé díhna, tnùhu sá ñí xíndecu ndihí cue dútú ñá túú-gã cùnùu-xi vitna chi ñá túú-gã xini ñuhu-xi te ni ñá túú nã chindèe ñaha-xi. ¹⁹ Te ñu-ni tnùhu-áⁿ cúu-xi tnùhu sá ñí chídó tnùnì ndii Moisés canu ìchi ñaha xii ñáyiú nàcuáa cadá-yu cundecú-yu. Te tnùhu-áⁿ ñá túú vèdana ni quide-xi nàcuáa chindee-xi ñáyiú cudíu-yu núú Yá Ndiòxí. Dico vitna ní ngúndecu ndihí-o tnùhu ndee iní sá ìo-gá váha dàcúxí tnùhu ndéé díhna, chi ndècu ndihí-o Xítóhó Jesucristú Yáá cúu dútú-ó. Te Yáá-áⁿ quidé-gã tnáhá tnùhu-o ndihí Yá Ndiòxí vitna.

²⁰ Te Yá Ndiòxí ní càháⁿ ndáá cuítì-gá sá Xítóhó Jesucristú cuu-gá dútú. ²¹ Dico ñá túú ducaⁿ ní càháⁿ-gã cuendá cue ñaní tnáhá ndii Lèví cue téé ní cuu dútú, cuèi meì òré ní chisaha-güedé ní cuu-güedé dútú. Te cùnàhá ní chisaha Xítóhó Jesucristú cúu-gã dútú, te Yá Ndiòxí ní xáhaⁿ ndáá cuítì-gá xii-gá, te duha ní xáhaⁿ-gã:

Yúhú Dútú Ndiòxí càháⁿ ndáá cuítì-í te vá dãmà-í tnùhu càháⁿ-í:

“Yòhó cúú-n dütú dàtná ndí Melquisèdec,

te cundecu-n nì caa nì quíhíⁿ.”

Duha ní xáhaⁿ Yă Ndiöxí xii Xítóhó Jesucristú. ²² Te Xítóhó Jesucristú quidé-gă nàcuáa cutnùnì ndáá iní-ó sã Yă Ndiöxí cada-gă ingá núú sã vâha sã cúú-xí-ó dàtná ní cachí-gă, te xiãⁿ cúú-xí sã ïo-gă vâha dàcúúxí tnũhu ní cáháⁿ-gă ndéé díhna. ²³ Te ío cuéhé cue ñanì tnáhá ndí Lèví ní cuu-güedé dütú, te ducaⁿ cuendá sã ñà túú ní cùdí-güedé cundecu-güedé chi ní ndihí-güedé ní xíhí. ²⁴ Dico Xítóhó Jesucristú chi vá cùú-gă, chi cundecu-gă nì caa nì quíhíⁿ nõu xiãⁿ ñu-ni-gă cuu-gă dütú, te vá yõõ ñⁿ-gă cuu dütú cada núú-gă. ²⁵ Te núú xiãⁿ Xítóhó Jesucristú dácăcu nihnu ñaha-gă xii nchoo ñăyiu núú ùhú núú ndàhú, nchoo ñăyiu sàndáá iní ñáhá xii-gă, te ñu-ni nchoo cùu-o ñăyiu tnáhá tnũhu ndihí Yă Ndiöxí, te vá ñⁿ ndùu-gă te cuíta nihnu-o. Te ducaⁿ chi Xítóhó Jesucristú ñà túú xòcuñí-gă núú Yă Ndiöxí càháⁿ ndàhú-gă cuendá-ó.

²⁶ Te Xítóhó Jesucristú cúú-gă Yaá cúú dütú cùnùu xini ñũhu-o cundecu ndihí-o, te ñu-ni-gă cúú-gă Yaá chindèe chitúu ñaha xii-o, te cùu-gă Yaá ío quide ndáá núú Yă Ndiöxí, te cùu-gă Yaá cándòo canine chi ñà túú tnàhí cuéchi-gă. Te ñà túú tnàhí quide-gă dàtná quidé nchaa cue ñăyiu ndècu ichi cuéhé ichi duha, te cùu-gă Yaá ní nucúndecu andiu nõu ndécú Yă Ndiöxí te yàcáⁿ táxí tnùnì-gă. ²⁷ Te ñà túú quide-gă dàtná ní quide cue dütú nì cunuú nì xindecu, chi cue dütú-ãⁿ ñⁿ nduu ñⁿ nduu ní xóo cahni-güedé quiti ní xóo nduu táhú Yă Ndiöxí, te díhna-gă cuendá nchaa cuéchi mee-güedé ducaⁿ nì xóo cada-güedé te dàtnùnì ducaⁿ nì xóo cada tucu-güedé cuendá nchaa cuéchi ñăyiu. Dico Xítóhó Jesucristú chi ñⁿ xito-ni ní xíhí-gă sã cúú-xí nchaa ñăyiu chi ducaⁿ nì sani iní-gă, te vá ñⁿ ndùu-gă ducaⁿ càda tucu-gă. ²⁸ Te sã cuendá nchaa tnũhu ní chídó tnùnì ndí Moisés xiãⁿ ní xindecu cue téé ní cuu

dütú cùnùu, te cue téé-ãⁿ nì cuu-güedé cue téé yíca cuéchi-xi. Te sáta dúcáⁿ nì chídó tnùnì ndí Moisés nàcuáa cada ñăyiu, te ní xica cuéhé víhí ndùu te dàtnùnì ní cáháⁿ ndáá cuiti Yă Ndiöxí sã Dèhe-gă cuu-gă dütú cùnùu. Te Yaá cúú Dèhe-gă-ãⁿ nì quide-gă nchaa nàcuáa tàú-xi cunduu, te ñu-ni ducaⁿ càda-gă nì caa nì quíhíⁿ.

8

Xítóhó Jesucristú cúú-gă dütú cùnùu

¹ Te Xítóhó Jesucristú Yaá cúú dütú cùnùu ndecu ndihí-o cuándaa-gă andiu, te ní ngóo-gă xio cùha Dütú Ndiöxí Yaá ío cùnùu, te tnàhá-gă cùnùu-gă. Te ñu-ni cuendá-a cùu-xi sã ïo-gă cùnùu ta cáháⁿ-ndí véxi. ² Te núú ndécú Yă Ndiöxí cúú-xí nõu ñi víhí. Te cada iní-ó sã cúú-xí ñⁿ vehe te xiãⁿ ndécú Xítóhó Jesucristú cúú-gă dütú, te vehe-ãⁿ nì dácáá mée Yă Ndiöxí te ñà díú cuè téé ñuyíú-a. ³ Te sã cuendá nchaa tnũhu ní chídó tnùnì ndí Moisés xiãⁿ ní xindecu cue dütú cùnùu cuendá sã cáhni-güedé quiti nduu táhú Yă Ndiöxí, te nacani cuendá-güedé núú-gă nchaa dava-gă sã nihí-güedé nduu táhú-gă. Te xiãⁿ nõu dai ní xini ñũhu-xi sã tnàhá Xítóhó Jesucristú cuáñaha-gă ñⁿ sã ndúú táhú Yă Ndiöxí, te táhú-ãⁿ cúú-xí mée-gă chi ní xíhí-gă ní cuu-gă dàtná ñⁿ táhú sã cúú-xí Yă Ndiöxí. ⁴ Te núú nì xindecu-ni Xítóhó Jesucristú ñuyíú-a te vá cúú-gă dütú ní cùu, chi sa ndècu cue dütú sãñaha nchaa sã ndúú táhú Yă Ndiöxí dàtná càháⁿ nchaa tnũhu ní chídó tnùnì ndí Moisés. ⁵ Te nchaa sã quidé cuè dütú ñăyiu isràèl nũtnahá-xi luha nchaa sã quidé Xítóhó Jesucristú Yaá cúú dütú cùnùu ndecu andiu. Te quèe ndáá-xi nàcuáa ní xáhaⁿ Yă Ndiöxí xii ndí Moisés cùnàhá tá cùyatni ngúita ndí dacàa ndí vehe-gă, te duha ní xáhaⁿ-gă: “Ío vâha cada cuendá-n nàcuáa dacàa-n vehe-í dàtná cáá sã ní dánèhé ñàhà-í xii-n xiti yucu”, duha ní xáhaⁿ-gă xii ndí. ⁶ Dico vitna chi Xítóhó Jesucristú cúú-gă dütú cùnùu, te ío-gă càhnu nduu chiuⁿ quide-gă dàcúúxí cuè dütú cue ñăyiu isràèl. Te ñu-ni Xítóhó

Jesucrìstú cúu-gă Yaá quidé tnàhá tnúhu-o ndìhi Yá Ndiöxí, te ducaⁿ chi Yá Ndiöxí ío-gá váha ndùu tnúhu ní cáháⁿ-gá xito cùu uú dàcúúxí tnúhu ní cáháⁿ-gá ndéé díhna, te ducaⁿ ío váha ndùu tnúhu ní cáháⁿ-gá xito cùu uú chi ní cachí-gá sá ìngá núú sã ío-gá váha cada ñaha-gă xii-o vîtna.

⁷ Te núu nàcuáa ní cachí Yă Ndiöxí cada ñaha-gă xii-o ndéé díhna ní quide-xi nchaa nacuáa tàú-xi cunduu nàcuáa nduu táhú-ó cùndecu váha-o núú-gă ñá, te ñá túú xini ñuhu-xi cáháⁿ tucu-gá sá cádá-gă ìngá núú sã váha sá cúu-xí-ó vîtna ní cuu. ⁸ Te Yá Ndiöxí ñá túú ní cùu váha iní-gá núú ñáyiú isràél núu xíãⁿ ní cáháⁿ-gá cuèndá-yu, te duha ní cachí-gá:

Yúhú cúu-í Dútú Ndiöxí, te duha ndùu tnúhu na cáháⁿ-í: Sáá nduu te cada-í ìngá núú sã váha sá cúu-xí cuè ñaní tnáhá ñáyiú isràél, ndìhi cue ñaní tnáhá ndi Júdã diu-ni ñáyiú isràél.

⁹ Te tnúhu sá cáháⁿ-í-a ñá túú ñⁿ-ni cuu-xi ndìhi tnúhu sá ñí xáhaⁿ-í xii cue ñáyiú ní cuu ñaní tnáhá-yu ní xíndecu ndéé sanaha càda-í-yu,

te diu-ni dàvá-áⁿ ñí quide yica-í ní ndeñuhu-í-yu nacióⁿ Ègiptú,

te ñá túú ní cuiní-yu tñí-yu tnúhu ní xáhaⁿ-í xii-yu cuèndá ducaⁿ càda váha-í-yu,

te xíãⁿ núu ní dáñá ñihnu-í-yu ñá túú-gă ní quide cuèndá-í-yu.

¹⁰ Te na sãá nduu te duha ndùu tucu ìngá núú sã váha cada-í cue ñáyiú isràél.

Te yúhú cada-í nàcuáa cutnùní váha iní-yu nàcuáa cuiní-í cadá-yu,

te ducaⁿ ñí yuhu ñí iní-yu cadá-yu.

Te yúhú Yă Ndiöxí quindaha-í-yu,

te mèe-yu cuú-yu ñáyiú cùu cuèndá-í.

¹¹ Te dàvá-áⁿ chi ní ñáyiú cùu ndi meé-yu,

te ní cuè dava-gá ñáyiú vá cùtnúhu tnàhá-yu sá nátùha ñahá-yu xii-í,

chi dàvá-áⁿ nchaa ñáyiú cundecu ndìhi ñahá-yu xii-í,

cuèi ñáyiú cùnuu te cuèi ñáyiú ñá túú cùnuu.

¹² Te dàvá-áⁿ cada càhnu iní-í nchaa sá cuèhé sá dúhá quidé-yu,

te vá ñⁿ ndùu-gá ndacu iní-í nchaa sá quidé-yu.

Duha ní cachí Yă Ndiöxí cuèndá ñáyiú isràél. ¹³ Te sá dúcãⁿ ñí cáháⁿ Yă Ndiöxí sá cádá-gă ìngá núú sã váha sá cúu-xí ñáyiú xíãⁿ cùtnùní sá tnúhu sá ñí cáháⁿ-gá díhna ñá túú-gă xini ñuhu-xi. Te cada iní-ó sã tnúhu-áⁿ cúu-xí ñⁿ sá ñí cunaha ndècu te ñá túú-gă nándìhi-xi te cuíta-ná-xi, ducaⁿ sãtnahá-xi cùu tnúhu sá ñí cáháⁿ-gá ndéé díhna.

9

Cuèndá vehe Yá Ndiöxí

¹ Te tnúhu sá ñí cáháⁿ Yă Ndiöxí ndéé díhna cùu-xi cuèndá nàcuáa cada ñáyiú isràél chiñuhu ñahá-yu xii-gá, ndìhi cuèndá vehe-gá caa ñuyíú-a. ² Te ñáyiú isràél ní dácã-yu vehe Yá Ndiöxí, te vehe-áⁿ ñí cuu-xi vehe dóó te ní xúhuⁿ nehu xití-xi. Te cuàrtú díhna ní xínani-xi cuàrtú ní cuu íí, te xíãⁿ ñí xíndecu ñⁿ sá ndéé ditè-xi sá ñí cándodó ñⁿ caa candíl núú ditè-xi, te ní xínutñí ñⁿ mèsá ní xóo códó pãá ní xóo nduu táhú Yă Ndiöxí.

³ Te cuàrtú cúu úú ní xínani-xi cuàrtú ní cuu íí víhí-gă. ⁴ Te xití cuàrtú-áⁿ ñí xínutñí ñⁿ sá ñí cuáha mee-ni díhúⁿ cuáãⁿ te núu xíãⁿ ní xóo cahmi-güedé dúsa sá sàháⁿ tnámí. Te diu-ni xíãⁿ ñí xíndecu tucu ñⁿ càjá ní cuu mee-ni díhúⁿ cuáãⁿ te xití càjá-áⁿ ñí xúhuⁿ ñⁿ lítu ní cuáha mee-ni díhúⁿ cuáãⁿ, te xití lítu-áⁿ ñí xúhuⁿ mànáá sá ñí xóo caxí-yu dàvá-áⁿ. Te diu-ni xití càjá-áⁿ ñí xúhuⁿ tnudì ndíi Àrón sá ñí saa itá-xi, ndìhi yúú sã ñí xíndé tnúhu ní cáháⁿ Yă Ndiöxí nàcuáa cada ñáyiú. Te duha ní xínani càjá-áⁿ: Càjá sá ñíhú tnúhu ní cáháⁿ Yă Ndiöxí sá cúu-xí ñáyiú, duha ní xínani-xi. ⁵ Te núu càjá-áⁿ ñí cándodó úú tnàhá sá ñí cadúha-yu, te xíãⁿ cáá-xí dàtná cáá espíritú xínú cuèchi núú Yă Ndiöxí. Te cuèndá úú xíãⁿ ní cutnùní iní-yu sá ío càhnu cuu Yá Ndiöxí, te sá ñí cadúha-yu-áⁿ ndéé ndíxíⁿ-xi, te

ndíxíⁿ-xi-áⁿ dǎhu-xi xio xio núú quidé càhnu iní Yǎ Ndiǒxí nchaa yíca cuèchi ñáyíu, dico vá cúú-gǎ cáháⁿ-í cuèndá nchaa dava-gǎ xǎⁿ vitna.

6 Te nchaa xǎⁿ ní xíndecu xití vehe Yǎ Ndiǒxí, te cue dútú ní xóo quíhu-güedé ñⁿ nduu ñⁿ nduu xití cuàrtú díhna ní xóo cada-güedé nàcuáa tàú-güedé cada-güedé sá cúú-xí Yǎ Ndiǒxí. 7 Te cuàrtú cúú ùú-áⁿ chi mee-ni dútú cúnùu ní xóo quíhu-dé ñⁿ xito-ni ndi tnahá cuíá. Te ndi tnahá òré ducaⁿ ñí xóo quíhu dútú cúnùu-áⁿ te ní xóo canehé-dé ñíñí ñí xóo quíhu ní xóo nduu táhú Yǎ Ndiǒxí. Te ducaⁿ ñí xóo cada dútú-áⁿ cuèndá sá Yǎ Ndiǒxí cada càhnu iní-gǎ nchaa yíca cuèchi mee-dě, ndihí nchaa yíca cuèchi ñáyíu. 8 Te sá dúcáⁿ mèe-ni dútú cúnùu ní xóo quíhu-dé xití cuàrtú ní cuu íí-gǎ-áⁿ, xǎⁿ Espíritú Yǎ Ndiǒxí quidé-xí cùtnuní iní-ó sǎ ñini ducaⁿ ní xíndecu vehe-áⁿ ñí xóo cada-yu nàcuáa ní xóo cúnaha Yǎ Ndiǒxí cada-yu. Te xǎⁿ cùtnuní sá vátá sáa-gǎ nduu cáháⁿ ndihí-yu Yǎ Ndiǒxí nàcuáa tàú-xi cunduu. 9 Te sá dúcáⁿ ñí xíndecu vehe-áⁿ, ndihí sá dúcáⁿ ñí xóo cada nchaa cue dútú-áⁿ, xǎⁿ cùtnuní iní-ó nàcuáa quide Yǎ Ndiǒxí vitna, chi nchaa quití ní xóo cahni cue dútú-áⁿ ñí xóo nduu táhú Yǎ Ndiǒxí, ndihí nchaa dava-gǎ sá ñí xóo nduu táhú-gǎ ñá túú ní quide-xi nàcuáa nduu ndoo nduu nine iní cue ñáyíu nàcuáa cutnùní iní-yu sá ñà túú-gǎ cuèchi-yu ndècu núú Yǎ Ndiǒxí. 10 Te sá dúcáⁿ ñí xóo cada nchaa dútú-áⁿ ñí níhí tnahá-xí ndihí nchaa tnúhu sá dánèhé ñáhá xii ñáyíu ná cúú sǎ cáxí-yu ndihí ná cúú sǎ cúú còhó-yu ndihí nàcuáa ndàhá-yu. Te tnúhu-áⁿ ñí cuu-xi mee-ni sǎ ñí sanu ichi ñaha xii-yu nàcuáa cundecú-yu ñuyíú-a. Te tnúhu-áⁿ ñí nándíhi-xi ndéé ní sáa nduu ñí nadama Yǎ Ndiǒxí tnúhu-áⁿ cuèndá sá vǎ dúcáⁿ-gǎ cada-yu cundecú-yu.

11 Te Xítohó Jesucristú ní quixi-gǎ ñuyíú-a, te diu-gǎ cúú-gǎ Yaá cúú dútú cúnùu, te xǎⁿ núu quide-gǎ nchaa sá vǎha sá cúú-xí-ó. Te vitna

ní nucúndecu-gǎ núú ño vii ío váha càa, te núú ndécú-gǎ-áⁿ ñà túú cùu-xi ñⁿ vehe sá ñí dácáa cuè téé ñuyíú-a. 12 Te cada iní-ó sǎ Xítohó Jesucristú cuánguihu-gǎ xití cuàrtú núú ñí cuu íí víhí dàtná ní xóo cada dútú cúnùu ní xíndecu ndéé sanaha, chi ní nucúndecu-gǎ núú ndécú Yǎ Ndiǒxí. Dico ñá túú ní quide-gǎ dàtná ní xóo cada dútú cúnùu ní xíndecu ndéé sanaha, chi dútú-áⁿ òré ní xóo quíhu-dé xití cuàrtú ní cuu íí-gǎ-áⁿ, te ní xóo canehé-dé ñíñí chivá ndihí ñíñí chèhlu ní xóo quíhu. Dico Xítohó Jesucristú chi ñíñí méé-gǎ ní sati ní xíhí-gǎ núú cùrúxí, te xǎⁿ duuⁿ duuⁿ cuáháⁿ-gǎ ní nucúndecu-gǎ núú ndécú Yǎ Ndiǒxí. Te sá dúcáⁿ ñí quide-gǎ xǎⁿ ní naníhí táhú-ó. 13 Te nchaa ñáyíu ní xóo cada nàcuáa vá cúú-gǎ-yu ñáyíu ní cuu íí, ñáyíu-áⁿ ñí xóo códó ñáhá cuè dútú ñíñí ndicutu, ndihí ñíñí chivá, ndihí yáa cúnú chèhlu quití sàhni-güedé cuèndá nduu íí tucú-yu. 14 ¡Dico ñíñí Xítohó Jesucristú chi ío-gǎ nándíhi-xi sá cúú-xí nchòo ñáyíu xíndecu vitna! Te cuèndá ñíñí-gǎ-áⁿ, chi Espíritú Yǎ Ndiǒxí sá ndécú nchaa nduu nchaa quíú ñí cuu ñⁿnuu-xi ndihí Xítohó Jesucristú sá cúú cùú-gǎ cuèndá cuu-gǎ dàtná ñⁿ táhú sǎ cúú-xí Yǎ Ndiǒxí cuèi cùu-gǎ Yaá ñá túú tnàhí cuèchi-xi, te ní sati ñíñí-gǎ te ní xíhí-gǎ. Te cuèndá xǎⁿ ní cutnùní iní-ó sǎ Yǎ Ndiǒxí ní quide càhnu iní-gǎ nchaa sá ñà túú vǎha ní quide-o, te ní nduu ndoo ní nduu nine iní-ó. Te ducaⁿ ñí nduu ndoo ní nduu nine iní-ó cuèndá sá ndácú-ó cúnú cuechi-o núú Yǎ Ndiǒxí Yaá ndécú nchaa nduu nchaa quíú.

15 Te Xítohó Jesucristú ní quide ndáa-gǎ núú Yǎ Ndiǒxí cuèndá cue ñáyíu ndècu ñuyíú-a. Te cuèndá xǎⁿ Yǎ Ndiǒxí cada-gǎ ingá núú sǎ vǎha sá cúú-xí-yu dàtná ní cachí-gǎ, te ducaⁿ càda-gǎ sá cuèndá nchaa ñáyíu ní cáháⁿ-gǎ cundecu ndihí-gǎ, chi ñáyíu-áⁿ nduu táhú-yu cundecu ndihí vǎha ñàhá-yu xii-gǎ ñí caa ñí quíhíⁿ chi ducaⁿ ñí cachí-gǎ, te ducaⁿ

chi Xítohó Jesucrístú ní xíhí-gá núú cùrúxí cuèndá sá Yă Ndiöxí cada càhnu iní-gá nchaa yíca cuèchi-yu, nchaa cuèchi sá ní quidé-yu cútnàhá ní cunuu tnúhu sá ní cáháⁿ-gá díhna. ¹⁶ Te nchoo xìní-ó sá nūu ìⁿ tée na càdúha ìⁿ tutú nàcuáa cada ñáyiu dàcáhñu-yu nchaa sá ndécú ndìhi-dé, te tutú-áⁿ xíní ñùhu-xi ndéé ná yăha nduu cùú-dé. ¹⁷ Te ñá túú tàú-xi cada ñáyiu nàcuáa càháⁿ-xi núú tütú-áⁿ nini ndècu tée ní cadúha, dico sátá ná yăha cuú-dé te cadá-yu nàcuáa càháⁿ-xi. ¹⁸ Te cuèi tnúhu ní cáháⁿ Yă Ndiöxí ndéé díhna nàcuáa cada váha-gá ñáyiu, te ñu-ni ndìhi níñí ní cundáá-xi chi ní sahi-güedé quiti te ní sati níñí-güedi. ¹⁹ Te ndí Moisés ní cáháⁿ ndodo ndí núú nchaa ñáyiu nàcuáa ní cachí Yă Ndiöxí cadá-yu, te nàcuáa-ni ndùu tnúhu ní chídó tnùní ndí núú tütú ndí ní cáháⁿ ndí, te ní dácá ndí ndute níñí chēhlu ndìhi níñí chívà līhli, te ní queheⁿ ndí ìⁿ dité yutnu nani hisópó ndìhi luha idi ticuèhé, te ní chindóyo ndí níñí-áⁿ. Te ní sódo ndí núú tütú ndéé tnúhu Yă Ndiöxí sá ní chídó tnùní ndí-áⁿ, te tnàhá cue ñáyiu xīndecu-áⁿ ní chúcú ndí. ²⁰ Te ní xáhaⁿ ndí Moisés xií-yu: “Cuèndá níñí-a ní cundáá sá Yă Ndiöxí cada ñaha-gá xii-ndo sá váha chi ducaⁿ ní cachí-gá cada-gá sá cúú-xí-ndó”, duha ní xáhaⁿ ndí xií-yu. ²¹ Te ñu-ni ducaⁿ ní quide tucu ndí ní chúcú ndí níñí vehe-gá ndìhi nchaa sá nándìhi-güedé òré chíñùhu-güedé Yă Ndiöxí ndécú xítí vehe-gá-áⁿ. ²² Te tnúhu ní chídó tnùní ndí Moisés càchí-xi sá mée-ní níñí chucu-güedé nchaa sá cànehe chùⁿ-güedé òré chíñùhu-güedé Yă Ndiöxí, te sacú-nă te ndìhi ndoo nchaa xíⁿ chucu-güedé níñí ni cùu. Te dacuití ní xini ñuhu-xi sá cáti níñí cuèndá ducaⁿ càda cahnu iní Yă Ndiöxí nchaa yíca cuèchi ñáyiu.

Xítohó Jesucrístú ní xíhí-gá núú cùrúxí cuèndá sá vă cùndècu-gá cuèchi-o núú Yă Ndiöxí

²³ Te sá cuèndá sá ní xíhí Xítohó Jesucrístú núú cùrúxí, xíⁿ ñá túú-gá cuèchi-o ndècu núú Yă Ndiöxí.

Te cuèndá nchaa sá ní xíhí xítí vehe-gá sá ní dácáá ñáyiu isràél xíⁿ cútnùní iní-ó nàcuáa quide-xi núú ndécú-gă. Te dacuití ní xini ñuhu-xi sá cáhni-güedé cue quiti ní cachí Yă Ndiöxí cuèndá nduu íi nchaa sá ní xíhí xítí vehe-gá-áⁿ. Te cuèi ducaⁿ ní sahi-güedé cue quiti-áⁿ dico ñá túú ní quide-xi nacuáa ngúndecu váha-o núú Yă Ndiöxí. Dico Xítohó Jesucrístú ní xíhí-gá, te sá ní xíhí-gá xíⁿ ní quide-gá nàcuáa ngúndecu váha-o núú Yă Ndiöxí. ²⁴ Te Xítohó Jesucrístú cuánda-gá andíu núú ndécú Yă Ndiöxí càháⁿ ndàhú-gá cuèndá-ó, te Xítohó Jesucrístú chi ñá díú ìⁿ vehe ní dácáá cue tée ñuyíú-a cuánguihu-gá. Te vehe Yă Ndiöxí sá ní dácáá cue ñáyiu isràél ñuyíú-a ndéé sanaha, ndìhi nchaa nàcuáa ní xóo cada-güedé xítí vehe-gá-áⁿ xíⁿ cútnùní iní-ó nàcuáa quide-xi núú ndécú-gă. ²⁵ Te dúttú cúnùu núú ñáyiu isràél ní xóo quíhu-dé núú cuíá núú cuíá xítí cuártú ní cuu íi víhí-gă-áⁿ, te ní xóo canehe-dé níñí ní xóo quíhu xítí cuártú-áⁿ dico ñá díú níñí mée-dé. Dico Xítohó Jesucrístú chi ñá túú dùcaⁿ ní quide-gá chi ìⁿ xito-ni ní sati níñí-gă te ní xíhí-gá. ²⁶ Chi núu ní xíhí-gá nuu núu te ndéé cútnàhá ní ngáva ñuyíú ducaⁿ ngüíta-gá cada-gá ní cùu, te vitna ta ndìhi nduu cuáháⁿ ní quixi-gá ñuyíú-a ní xíhí-gá ìⁿ xito-ni cuèndá cuu-gá dàtná ìⁿ táhú sá cúú-xí Yă Ndiöxí, te ducaⁿ ní quide-gá cuèndá sá vă cùndècu-gá cuèchi ñáyiu núú Yă Ndiöxí. ²⁷ Te nchoo cue ñáyiu ñuyíú-a chi ìⁿ xito-ni cuú-ó te dàtnùní ducaⁿ te cada ndáá Yă Ndiöxí cuèchi-o. ²⁸ Te ducaⁿ sátnahá-xi cùu Xítohó Jesucrístú chi ìⁿ xito-ni ní xíhí-gá cuèndá sá vă cùndècu-gá cuèchi ñáyiu núú Yă Ndiöxí, te ducaⁿ ní cuu ní xíhí-gá chi mee-gă ducaⁿ ní cachí-gá cunduu. Te quixi tucu Xítohó Jesucrístú ñuyíú-a dico ñá díú-gă sá cadá-gă cuèndá sá vă cùndècu-gá cuèchi ñáyiu núú Yă Ndiöxí, chi quixi-gá nacuaca-gá nchaa ñáyiu ndètu ñaha xii-gá cuèndá

cundecú-yu ndihi-gá ni caa ni quihíⁿ.

10

¹ Te nchaa tnúhu ní xáhaⁿ ndíi Moisés xii ñáyiú isràél cadá-yu, nchaa tnúhu-áⁿ ñi quide-xi ní cutnùní luha iní-yu nàcuáa cada Yá Ndiöxí cada váha ñaha-gã xii-o vitna. Dico ñá díú mèi nacuaa ní xáhaⁿ ndíi Moisés xii ñáyiú quide Yá Ndiöxí vitna chi dáma quide-gá. Te nchaa tnúhu ní cáháⁿ ndíi Moisés ñá túú ní ndàcu-xi cada-xi nacuaa cundáa nchaa ñáyiú túha ñaha xii Yá Ndiöxí cuèi ní xóo cahni-güedé quiiti ní xóo nduu táhú-gã núú cuíá núú cuíá. ² Te núú dícó sá ñi xóo cahni-güedé quiiti ní xóo nduu táhú Yá Ndiöxí ní quide-xi nacuaa nduu ndoo nduu nine iní cue ñáyiú, te vá cáhni-gã-güedé cue quiiti-áⁿ nduu táhú-gã ní cùu, te ducaⁿ te cutnùní iní-yu sá ñá túú-gã cuéchi-yu ndècu núú Yá Ndiöxí ní cùu. ³ Te sá dúcáⁿ ñi xóo cahni-güedé quiiti ní xóo nduu táhú Yá Ndiöxí núú cuíá núú cuíá, xíáⁿ ní xóo ndacu iní cue ñáyiú nchaa sá cuèhé sá dúhá ñi xóo cadá-yu. ⁴ Te ducaⁿ chi níñi ndicutu-áⁿ ndihi níñi chivá-áⁿ ñá túú ní xóo ndacu-xi cada-xi nàcuáa vá cundècu cuéchi-yu núú Yá Ndiöxí.

⁵ Te xíáⁿ ñúu cútnàhá ní quexìo Xítohó Jesucristú ñuyíú-a ní xáhaⁿ-gã xii Yá Ndiöxí:

Yòhó Tàtá-í, ñá túú ndùu vétú váha iní-n sá sàhni-güedé quiiti ndùu táhú-n,

te ni ñá túú ndùu vétú váha tucu iní-n cuendá nchaa dava-gá sá táxí-güedé ndúú táhú-n,

núu xíáⁿ ní quide túha-n yiqui cuñú-í cuendá yúhú cuú-í te nduu táhú ñáhá-n xii-í.

⁶ Te ni ñá túú ndùu vétú váha iní-n cuendá quiiti sàhmi-güedé ndúú táhú-n te ni ñá túú ndùu vétú váha iní-n cuendá nchaa dava-gá sá táxí-güedé ndúú táhú-n cuendá sá vá cundècu-gá cuéchi ñáyiú núú-n.

⁷ Núu xíáⁿ yúhú ní cachí-í xii yòhó Tàtá-í Dútú Ndiöxí sá yúhú véxi-í ñuyíú-a cada-í nchaa sá

cuiní-n cada-í dàtná yódó tnùní cuendá-í núú tütú-n.

Duha ní xáhaⁿ Xítohó Jesucristú xii Tàtá-gã Dútú Ndiöxí. ⁸ Te Xítohó Jesucristú díhna-gá ní xii-gá Yá Ndiöxí Yaá cúú Tàtá-gã: “Yòhó Tàtá-í ñá túú ndùu vétú váha iní-n cuendá quiiti sàhni-güedé ndúú táhú-n, ndihi cuendá quiiti sàhmi-güedé ndúú táhú tucu-n cuendá sá vá cundècu-gá cuéchi ñáyiú núú-n, ndihi cuendá nchaa dava-gá táhú sá táxí-güedé xii-n ñá túú ndùu vétú váha iní-n cuendá nchaa xíáⁿ”, duha ní xáhaⁿ Xítohó Jesucristú xii Tàtá-gã Dútú Ndiöxí. Te ducaⁿ ñi xáhaⁿ-gã cuèi núú tütú ndíi Moisés yódó tnùní sá dúcáⁿ cada-güedé. ⁹ Te sá dúcáⁿ te ní xáhaⁿ tucu-gá xii Tàtá-gã Dútú Ndiöxí: “Yòhó Tàtá-í Dútú Ndiöxí, mee-í véxi-í ñuyíú-a cuendá cada-í nchaa nàcuáa cuiní-n”, duha ní xáhaⁿ-gã xii Tàtá-gã. Te sá dúcáⁿ ñi cáháⁿ Xítohó Jesucristú xíáⁿ ní cutnùní sá ñá túú-gã xini ñuhu-xi ducaⁿ cada-güedé cahni-güedé nchaa quiiti-áⁿ, te ducaⁿ chi mee Xítohó Jesucristú ní xihí-gá ní cuu-gá dàtná ñi táhú sá cúú-xí Yá Ndiöxí, te ducaⁿ ñi cuu chi ducaⁿ tnàhí ní cachí Yá Ndiöxí cunduu. ¹⁰ Te Xítohó Jesucristú ní quide-gá nàcuáa ní cuiní Yá Ndiöxí cada-gá, chi ní xihí-gá núú cùrúxí chi ducaⁿ ñi cuiní mée-gã cunduu, te ñi xito-ni ní xihí-gá sá cuendá nchaa ñáyiú, te cuendá xíáⁿ ñúu ndècu yiñuhu-o núú-gã vitna.

¹¹ Te cue dútú ñáyiú isràél chi ñi nduu ñi nduu ní xóo cahni-güedé quiiti ní xóo nduu táhú-gã, te ñá túú ní dáma-güedé nàcuáa ní xóo cada-güedé. Te nchaa sá ñi xóo cada-güedé-áⁿ ñá túú ní quide-xi nacuaa vá cundècu-gá cuéchi ñáyiú núú Yá Ndiöxí. ¹² Dico Xítohó Jesucristú ní cachí-gá sá cúú cùú-gá, te ní xihí-gá núú cùrúxí cuendá nchaa yíca cuéchi nchaa nchoo ñáyiú ndècu ñuyíú-a. Te sá dúcáⁿ te dàtnùní ní ngóo-gá xio cùha Dútú Ndiöxí táxí tnùní-gá, te vá ñi ndùu ñi quiú-gã te cuú-gá. ¹³ Te díu-ni xíáⁿ cundecu-gá

cundetú-gá ndéé sáá nduu cànehe nchaa sá cúú ùhú iní ñáhá xì-gá sá yíñùhu núú-gă. 14 Te cuendá sá nǐ xíhí Xítóhó Jesucristú ìñ xito-ni xiǎn ní cuu-gá dàtná ìñ táhú sǎ cúú-xí Yǎ Ndiǒxí, xiǎn ní quide-xi sá ncháá ñǎyiu cùu cuendá-gá ñǎ túú-gă ná cumánǐ-yu núú-gă nǐ caa nǐ quíhí. 15 Te mee Espíritú Yǎ Ndiǒxí càháⁿ ndáá-xi nàcuáa ní cáháⁿ-gá cuendá-ó, te duha ní cáháⁿ-gá:

16 Sáá nduu te cada-í nchaa ñáyiu nàcuáa na càháⁿ-í-a,
te cada-í nàcuáa cutnùnǐ iní-yu tnúhu sá dánèhé-í-yu tnúhu sá cánúichi ñaha xií-yu nàcuáa cadá-yu cundecú-yu,
te cada tucu-í sá tñǐ-yu nchaa tnúhu-áⁿ.

Duha ní cachí-gá. 17 Te ní cachí tucu-gá:

Te vá ìñⁿ ndùu ìñⁿ quíú-gă ndacu iní-í sá quidé sàá iní-yu tnúhu-í,

te ni vǎ ìñⁿ ndùu ìñⁿ quíú-gă te ndacu iní-í nchaa sá cuèhé sá dúhá quidé-yu.

Duha ní cáháⁿ Yǎ Ndiǒxí càchí Espíritú-gá. 18 Te sá dúcáⁿ quide cahnu iní Yǎ Ndiǒxí nchaa cuéchi-o, núu xiǎn ñǎ túú-gă xíní ñùhu-xi cuú quiti nduu táhú-gă cuendá nchaa sá cuèhé sá dúhá quide-o.

Tàú-ó sǎ tnhá tnúhu-o ndìhi Yǎ Ndiǒxí

19 Te cue dútú nǐ xóo cunuu núú ñáyiu israél cue téé-áⁿ nǐ xóo quíhu-güedé xití cuártú ní cuu íí víhí-gă. Dico nchoo cuè ñáyiu ndècu ichi Xítóhó Jesucristú vitna tàú-ó sǎ nǐ yuhu nǐ iní-ó tnhá tnúhu-o ndìhi Yǎ Ndiǒxí. Te cuu tnhá tnúhu-o ndìhi-gá chi Xítóhó Jesucristú ní sati níñí-gă te ní xíhí-gá núú cùrúxí. 20 Te cada iní-ó sǎ dóó sǎ nǐ xíndedí nàcuáa ní xóo quíhu-güedé xití cuártú ní cuu íí víhí-gă-áⁿ nǐ xócuíñí, te ducaⁿ càda iní-ó chi Xítóhó Jesucristú ní xíhí-gá cuendá nchoo níhí-ó nàcuáa cada-o ngùndecu váha-o sǎ cúú-xí-gă. 21 Te ñu-gá cúú-gă Yáá cúú dútú-ó, te

ñu-gá cúú-gă Dútú cùnùu ndecu-gá núú ndécú Yǎ Ndiǒxí. 22 Núu xiǎnⁿ xíní ñùhu-xi sá ìo tnhá tnúhu-o ndìhi Yǎ Ndiǒxí, te vá cání ìñⁿ cani úú iní-ó, te ìo váha quindáá iní-ó-gă chi ñu-gá ní ndada ndoo ní ndada nine-gá iní-ó cuendá nchoo cùnùnǐ iní-ó sǎ ñǎ túú-gă cuéchi-o ndècu núú-gă. Te ní sandute-o cuendá sá dúcáⁿ nǐ nduu ndoo ní nduu nine iní-ó. 23 Te nchoo càháⁿ ndáá-ó sǎ ndécú ndìhi-o tnúhu ndee ìní sá ndúú táhú-ó cùndecu ndìhi-o Yǎ Ndiǒxí, te xíní ñùhu-xi sá vǎ dáñǎ ndéé-ó càncicúⁿ ñihnu-o tñùhu ndee ìní-áⁿ chi Yǎ Ndiǒxí cada-gá nàcuáa ní cachí-gá sá cúú-xí-ó. 24 Te xíní ñùhu-xi cuhuⁿ iní tnhá-ó te chindee tnhá-o nacuaa ducaⁿ cùu iní tnhá-gă-ó, te cada-o mèe-ni sá vǎha. 25 Te nchoo vǎ dáñǎ ndéé-ó nàtacá-ó núú dácuàha-o tnúhu Yǎ Ndiǒxí, te vá cadá-ó dàtná xiquide davá-yu ñǎ túú-gă cuini-yu quixí-yu núú dácuàha-o tnúhu-gá. Chi xíní ñùhu-xi sá cuàha tnhá-o tnúhu ndee ìní canchicúⁿ ñihnu-o ìchi-gá, te uuⁿ-gá ducaⁿ tàú-xi cada-o vitna ta cuyatni nduu quixi tucu Xítóhó Jesucristú ñuyíú-a.

26 Te cue ñáyiu sa ní tecú tñùnǐ nàcuáa càháⁿ tnúhu Yǎ Ndiǒxí te núu na ngüita-yu ñucùuⁿ cadá-yu nándí sá cuèhé sá dúhá, te àúⁿ nǎ cuu ní xíhí Xítóhó Jesucristú cuendá-yu, te ni vǎ yóo ìñⁿ-gá cuú cuendá sá vǎ cùndècu-gá cuéchi-yu núú Yǎ Ndiǒxí. 27 Te núu ducaⁿ na càdá-yu nándí sá cuèhé sá dúhá, te ìo quiyùhú iní-yu nàcuáa cada ñaha Yǎ Ndiǒxí xií-yu. Chi nchaa ñáyiu cùu úhú iní ñáhá xì-gá daquihíⁿ ñáhá-gă xií-yu núú ñùhú núú càyú núú ìo ndohó-yu. 28 Te nchaa ñáyiu ní xóo daqueè tñú tñùhu ní cáháⁿ ndí Moisés, te núu ndècu úú àdi úní ñáyiu càháⁿ ndáá sá dúcáⁿ nǐ dáquée tñù-yu tnúhu ní cáháⁿ ndí, te vá yóo nǐ xóo cundàhú iní ñáhá xì nchaa ñáyiu ducaⁿ nǐ xóo cada chi ní xóo cahni ñaha-güedé. 29 Te núu ducaⁿ nǐ ndoho cue ñáyiu ducaⁿ nǐ dáquée tñú tñùhu ní cáháⁿ ndí Moisés-áⁿ, te uuⁿ-gá ndoho cue ñáyiu dàquee tñú ñáhá xì Xítóhó Jesucristú

Yaá cúú Dēhe Yá Ndiöxí ðiu-ni ñáyiú cächí sá ñà túú nàndíhi níñí-gă. Te níñí-gă-áⁿ ñi sati, te ní xíhí-gá, te ducaⁿ ñi cuu cuendá cada Yá Ndiöxí ingá núú sá vâha sá cúú-xí nchòo ñáyiú ndècu ñuyíú-a dàtná ní cachí-gá cada-gá. Te ðiu-ni cuendá níñí-gă-áⁿ ñi nduu ndoo ní nduu ñine iní cue ñáyiú-áⁿ ní cùu, te ðiu-ni ñáyiú-áⁿ càháⁿ úhú-yu Espíritú Yă Ndiöxí sá chindèe chítúu ñaha xii-o. ³⁰ Te nchoo sá naha-o sá Yá Ndiöxí cächí-gá ñⁿ xichi núú tütú-gá: “Yúhú cada-í te nacháhu ñáyiú nchaa sá quidě-yu, te duha càháⁿ-í chi nachinaa-í cuendá nchaa sá quidě-yu-áⁿ”, duha cächí-gá. Te sa nàha tucu-o nacuáa càháⁿ-xi núú tütú-gá núú cächí-xi: “Yá Ndiöxí cada ndáá-gá cuendá nchaa sá quidé ñáyiú cùu cuendá-gá”, duha cächí-xi núú tütú-gá. ³¹ Te ío ndàhú ndoho cue ñáyiú na dândoho ñaha Yá Ndiöxí, te ðiu-gá cúú-gă Yaá cúnùu nchaa nduu nchaa quiú!

³² Te chí dándàcu iní nàcuáa ní quide-ndo cùtnáhá vitna cuu saa ní tecú tnùní-ndó tnùhu Yá Ndiöxí, chi dává-áⁿ ñi quide càhnu iní-ndó cuèi nándi sá ñi yáha-ndo cuendá-gá. ³³ Te dava-ndo ñi quide úhú ñáhá ñáyiú xii-ndo núú chítú núú tàcá, te nándi tnùhu cuèhé tnùhu duha ní xáhăⁿ-yu xii-ndo. Te dava-ndo ñi cuyi-ni-ndo ñi xindecu ndíhi tnàha-ndo cuèi nándi ní ndoho dava-gá-ndó. ³⁴ Te ní cundàhú iní-ndó cuè ñáyiú yìhi ve-caá, te cuèi ní quendeé ñáyiú sá ndécú ndíhi-ndo dico ñá túú ní ndíhú iní-ndó chi ní cudí-ni iní-ndó. Te ducaⁿ ñi quide-ndo chi sa nàha-ndo sá ndúú tãhú-ndó sá ío-gá váha, te xíáⁿ cundecu ndíhi-ndo ñi caa ñi quihíⁿ. ³⁵ Te xíáⁿ vá dáñá ndèé-ndó quindáá iní-ndó nàcuáa ní cachí Yă Ndiöxí cada ñaha-gă xii-ndo, chi sáá nduu te ío váha cada ñaha-gă xii-ndo. ³⁶ Te nchòhó xíní ñùhu-xi ío cada ndee iní-ndó càda-ndo nchaa nacuáa càháⁿ Yă Ndiöxí, te ducaⁿ te nduu tãhú-ndó sá ñi cachí-gá nduu tãhú-ndó cundecu ndíhi-ndo ñi caa ñi quihíⁿ. ³⁷ Te Yá Ndiöxí cächí-gá núú tütú-gá:

Ta cùyatni vií-nă nduu quixi Yaá quixi ñuyíú-a, te vá cùyàa-gá.

³⁸ Te nchaa ñáyiú cùndáá núu-í ñá túú dàña ndeé-yu sàndáá iní ñáhă-yu xii-í,

te cuendá xíáⁿ cundecu-ní-yu ichi-í, dico núu na dàñá-yu ichi-í te vá cúú vâha iní-í núu-yu.

Duha cächí Yă Ndiöxí núú tütú-gá.

³⁹ Dico nchoo chi ñá túú cùu-o ñáyiú ducaⁿ xíquide dàñá-ó ichi Yá Ndiöxí, chi cùu-o ñáyiú nchicúⁿ ñi hnu-ni sàndáá iní-ó-gă, te sá dúcáⁿ te nduu tãhú-ó cundecu-o ndíhi-gá ñi caa ñi quihíⁿ, te ñá túú cùu-o ñáyiú dàña ñi hnu ichi-gá te xíta ñi hnu-yu.

11

Ñáyiú sàndáá iní ñáhá xii Yá Ndiöxí

¹ Te núu sàndáá ndisa iní-ó Yă Ndiöxí te ducaⁿ cùtnuní ndáá iní-ó sá ñihí-ó sá cuíní-ó núu-gă. Te núu sàndáá iní-ó-gă te ducaⁿ cùtnuní ndáá tucu iní-ó sá càháⁿ ndáá-gá cuendá nchaa sá ñà túú xíní-ó. ² Te ducaⁿ ñi quide ñáyiú ní xindecu ndeé sanaha ío ní sàndáá iní-yu Yá Ndiöxí te xíáⁿ núu ío váha ní cuu iní ñáhá-gă xii-yu.

³ Te núu nchoo sàndáá ndisa iní-ó Yă Ndiöxí te cùtnuní ndáá iní-ó sá sá cuendá tnùhu ní càháⁿ-gá ní cuáha andíu ndíhi ñuyíú-a. Te cùtnuní iní-ó sá ñà díú sá cuendá ñⁿ sá tũu ndèhe-o ío ñuyíú-a ní cuáha andíu ndíhi ñuyíú-a.

⁴ Te ndíi Àbél ío ní sàndáá iní ndíi Yá Ndiöxí núu xíáⁿ ío-gá ní cuu iní-gá sá ñi sáñaha ndíi ní nduu tãhú-gă dàcúúxí sá ñi sáñaha ndíi Càín xii-gá ní nduu tãhú-gă. Te ndíi Àbél-áⁿ ñi cutnùní iní ndíi sá ñi cudíu ndíi núú Yă Ndiöxí cuendá sá ñi queheⁿ cuendá-gá sá ñi sáñaha ndíi ní nduu tãhú-gă. Te cuèi ñá túú-gă ndíi ndècu ñuyíú-a dico yòdo tnuní sá ñi sàndáá iní ndíi Yá Ndiöxí cuendá ducaⁿ càda-o canchicúⁿ ñi hnu-o.

⁵ Te té Ènoc téé ní xindecu ndeé sanaha ñà túú ní xíhí-dé chi ní nacuaca ñaha túu Yá Ndiöxí xii-dé cuendá sá ñi sàndáá iní ñáhá-dé xii-gá. Te vá yòo ñi nànihí ñáhá xii-dé chi mee-gă ní nacuaca ñaha-gă

xii-dé. Te núú tütú Yă Ndiöxí cächí-xi sá cùtnàhá vátá nàcuàca ñaha-gá xii té Ènóc, te ní quide-dé mee-ni nàcuáa ní cuu váha iní ñáhá-gă xii-dé. ⁶ Te nchaa ñáyiu ñá túú sándáá iní ñáhá xii Yă Ndiöxí ñá ndácŭ-yu cadá-yu nàcuáa cudìú-yu núú-gă, chi nchaa ñáyiu cuiní tuha ñaha xii-gá xíní ñùhu-xi sá quindáá iní-yu sá ndécú-gă, te quindáá iní-yu sá nŭu na nànducu nihnu ñahá-yu xii-gá te cuañaha-gă xií-yu sá ndúú tǎhŭ-yu.

⁷ Te Yă Ndiöxí ní dátŭha-gá ndí Nöe nchaa nàcuáa cada-gá. Te ní quide ndí nchaa nàcuáa ní xáhaⁿ Yă Ndiöxí cada ndí, te ní cadúha ndí ìⁿ bàrcú cuendá xití bàrcú-án quèe ndí ndih nchaa ñáyiu vehe ndí cuendá cácu nihnú-yu. Te ducaⁿ ñí quide ndí chi ní sándáá iní ndí Yă Ndiöxí. Te sá dúcáⁿ ñí sándáá iní ndí-án Yă Ndiöxí xiǎⁿ ní cutnùní sá ncháá ñáyiu ío ndècu cuéchi-yu, chi ñá túú ní cǎnchicúⁿ nihnú-yu cadá-yu nàcuáa ní quide ndí. Te sá dúcáⁿ ñí quide ndí ní sándáá iní ndí Yă Ndiöxí xiǎⁿ ío ní cundáá ndí núú-gă.

⁸ Te Yă Ndiöxí ní xáhaⁿ-gă xii ndí Àbrahám sá queé ndí ñúú núú ndécú ndí quíhíⁿ ndí ingá xichi cundecu ndí. Te ní quide ndí nàcuáa ní xáhaⁿ Yă Ndiöxí chi ní quee ndí cuáháⁿ ndí núú cuañaha Yă Ndiöxí cundecu ndí. Te òré ní quee ndí núú ndécú ndí te ñá túú ní cùtnuní iní ndí ndéé cúú nŭú cuáháⁿ ndí cundecu ndí. Te ducaⁿ ñí quide ndí chi ní sándáá iní ndí Yă Ndiöxí. ⁹ Te sá dúcáⁿ ñí sándáá iní ndí Yă Ndiöxí nŭu xiǎⁿ ní xíndecu ndí núú ñí sáñaha-gă cundecu ndí, te cuèi ducaⁿ dico ñá túú ní quide ñúú ndí xiáⁿ. Te ní xóo cundecu ndí vehe cùtexínu vehe dóó. Te ñiu-ni ducaⁿ ñí quide ndí Isàác ndih ndí Jàcób chi tnàhá cue ndí-án ñí cachí Yă Ndiöxí sá ndúú tǎhŭ cue ndí xiáⁿ cundecu cue ndí. ¹⁰ Te ducaⁿ ñí quide ndí Àbrahám chi ní xíndetu ndí ndéé ní sáá nduu ndùu tǎhŭ ndí cundecu ndí núú ndécú Yă Ndiöxí. Te núú ndécú-gă-án cúú-xí ñúú ní cadúha mee-gă, te ñúú-án cudí-xi ni caa ñí quíhíⁿ.

¹¹ Te ndí Sără, sa ní xídó cuíá ndí sá cóo dèhe ndí chi sa ní sahnu vèhi ndí, dico Yă Ndiöxí ní quide-gá te ní xóo ìⁿ dèhe ndí. Te ducaⁿ chi ní sándáá iní ndí Yă Ndiöxí te ní cutnùní ndáá iní ndí sá cadá-gă nàcuáa ní xáhaⁿ-gă xii ndí. ¹² Te cuèi ío ní sahnu ndí Àbrahám ndih ñadìhí ndí, ndí Sără dico dacutíí ñí nduu tǎhŭ-yu ní xóo ìⁿ dèhe-yu. Te xiǎⁿ nŭu ío cuéhé ndíquíⁿ yǎvá ndí Àbrahám ní cáyá dàtná cuéhé chòdíní ndéé andíu, ndih dàtná cuéhé ñuhu cúchí làmár, chi ñí vǎ yŏo ìⁿ ndacu cahu ñaha xii-yu sá cuèhŭ-yu.

¹³ Te cue ndí-án ducaⁿ-ni ñí sándáá iní cue ndí Yă Ndiöxí ndéé ní sáá nduu ñí xíhí cue ndí. Te cue ndí-án ñá túú ní nduu tǎhŭ cue ndí quíní cue ndí nchaa nàcuáa ní cachí Yă Ndiöxí cada-gá, dico ní cutnùní ndáá iní cue ndí-án nàcuáa cada-gá núú cuáháⁿ núú vèxi. Te ío ní cudíⁿ iní cue ndí, te ní cachí cue ndí sá dícó-ni ichi yáha cue ndí ñuyíú-a, chi ñá díú ñuyíú-a cundecu ducaⁿ cuè ndí. ¹⁴ Te sá dúcáⁿ ndùu tnúhu ní cáhⁿ cue ndí-án, xiǎⁿ ní cutnùní sá cuíní cue ndí ingá xichi núú cùndècu cue ndí. ¹⁵ Te ñí ñá díú ñúú núú ñí quee cue ndí ñí cuíní cue ndí núhú cue ndí. Chi núu ducaⁿ ñí sàni iní cue ndí te núhú cue ndí ñí cùu. ¹⁶ Dico ñáhá chi cuíní cue ndí quíhíⁿ cue ndí ìⁿ xichi núú vǎha-gă cáá cùndecu cue ndí. Te núú dúcáⁿ ío-gă váha càa-án cúú-xí ñúú núú ndécú Yă Ndiöxí, te sá dúcáⁿ ñí sàni iní cue ndí xiǎⁿ nŭu ío váha cùu iní Yă Ndiöxí cächí-gă sá ñá túú cùcahaⁿ núú-gă cúú-gă Ndiöxí cue ndí-án, te cùtnuní iní-ó sá ndàá sá dúcáⁿ càháⁿ-gă chi ní quide túha-gă ìⁿ xichi núú cùndècu cue ndí-án.

¹⁷ Te ndí Àbrahám ní xíndecu ìⁿndí-ni dèhe ndí ndih ñadìhí ndí, te cùtnàhá ní xito ndéé ñáhá Yă Ndiöxí xii ndí ní xicáⁿ-gă dèhe ndí, ndí Isàác cuendá nduu tǎhŭ ñáhá-gă xii ndí. Te ní xáhaⁿ ndí sá cúú ndùu tǎhŭ-gă dèhe ndí, te ducaⁿ ñí quide ndí chi ní sándáá iní ñáhá ndí xii-gă. Te sa ndècu túha ndí sá cuañaha ndí dèhe ndí xii-gă cuèi mee Yă Ndiöxí ní xáhaⁿ ndáá-gă xii ndí ¹⁸ sá sǎ cuendá ndí

Isàac te ngúndecu cue ñani tnáhá ndíi. ¹⁹ Te ducaⁿ ñi quide ndíi Àbrahám, chi ní cutnùní ndáá iní ndíi sá Yá Ndiöxí ndácú-gá dándòto-gá cuèi ñáyiú sa ní xíhí. Te sá dúcáⁿ ñi xáhaⁿ ndíi xii Yá Ndiöxí sá cúú ndúu táhú-gá déhe ndíi, te xíáⁿ cada iní-ó sá sà ní xíhí ndíi Isàac te ní ndoto tucu ndíi ní nucúndecu ndíi ndíhi tātá ndíi, ndíi Àbrahám.

²⁰ Te ndíi Isàac ní xícáⁿ táhú ndíi núú Yá Ndiöxí cuendá sá cáda vāha-gá cue déhe ndíi, ndíi Jàcób ndíhi ndíi Esàú núú cuaháⁿ núú vëxi. Te ducaⁿ ñi quide ndíi chi ní sándáá iní ndíi Yá Ndiöxí. ²¹ Te sa ta cùyatni-ná nduu cùú ndíi Jàcób, te ní xícáⁿ táhú ndíi núú Yá Ndiöxí cuendá cue déhe ñani ndíi déhe ndíi Chèé. Te yituu-ná ndíi tatnu ndíi ní chiñuhu ndíi Yá Ndiöxí. Te ducaⁿ ñi quide ndíi chi ní sándáá iní ñáhá ndíi xii-gá. ²² Te cútnàhá sa ta cùyatni vii-nă nduu cùú ndíi Chèé, te ní cachí ndíi sá cuè ñáyiú isràél sáá nduu quèé-yu núú xíndecú-yu-áⁿ. Te ní cáháⁿ tucu ndíi nàcuáa cada-yu yiqui cùñú ndíi na sàá nduu quèé-yu núú ndécú-yu-áⁿ. Te ducaⁿ ñi quide ndíi chi ní sándáá iní ndíi Yá Ndiöxí.

²³ Te cútnàhá ní cacu ndíi Moisés te ní chiváha ñaha ñaná ndíi ndíhi tātá ndíi úní yóó. Te ducaⁿ ñi quide cue ndíi-áⁿ chi ní sándáá iní cue ndíi Yá Ndiöxí. Te ní quide cuendá cue ndíi-áⁿ sá ño váha càa ndíi Moisés déhe cue ndíi, te ñá túú ní yùhú cue ndíi nàcuáa ní cáháⁿ téè cùu Faraón sá cáhni-dé cue landú. ²⁴ Te sātá ñi sahnu ndíi Moisés te duuⁿ duuⁿ ní cachí ndíi sá vā cáháⁿ ñáyiú sá déhe yoco téè cùu Faraón cúú ñaná ndíi. Te ducaⁿ ñi quide ndíi chi ní sándáá iní ndíi Yá Ndiöxí. ²⁵ Te ducaⁿ ñi quide tucu ndíi chi ní tnahá-gá iní ndíi ndoho ndíi ndíhi nchaa ñáyiú cùu cuendá Yá Ndiöxí dàcúxí sá cúdíi iní ndíi cundecu tnaa ndíi ichi cuèhé ichi duha. ²⁶ Chi ní sani iní ndíi sá vāha-gá ndoho ndíi cúcuèhé ñáhá cuè ñáyiú xii ndíi sá cuendá Yaá quixi ñuyú-a dàcúxí sá cùndecu ndíhi ndíi nchaa sá ío Ègiptú. Te ducaⁿ ñi quide ndíi chi ní xúhuⁿ iní ndíi sá Yá Ndiöxí cuañaha-gá sá ndúú táhú ndíi. ²⁷ Te ndíi Moisés ní

quee ndíi nacióⁿ Ègiptú te ñá túú ní quide cuendá ndíi sá ño cùdééⁿ téè cùu Faraón núú ndíi. Te ducaⁿ ñi quide ndíi chi ní sándáá iní ndíi Yá Ndiöxí. Te ní quide càhnu iní ndíi cuendá nchaa sá ñi yáha ndíi, te ní quide iní ndíi sá Yá Ndiöxí ndécú ndíhi ñaha túu-gá xii ndíi cuèi ñá túú ní xini núú ñáhá ndíi xii-gá. Te ducaⁿ ñi sani iní ndíi chi Yá Ndiöxí ndécú ndíhi ñaha-gá xii ndíi.

²⁸ Te ndíi Moisés cúú ndíi téè ní tausaha ñi quide vico pásua ndíhi cue ñáyiú isràél, te dàvá-áⁿ ñi táuchíuⁿ ndíi ní sahní-yu mbéé te níñi quiti-áⁿ ñi dácánúú-yu yuyèhé-yu. Te ducaⁿ ñi quide ndíi chi ní sándáá iní ndíi Yá Ndiöxí. Te ducaⁿ ñi quide tucu ndíi cuendá sá espíritú sá ñi tendaha Yá Ndiöxí cahni-xi mee-ni déhe téè déhe díhna cue ñáyiú Ègiptú, te vá cáhni-xí ñi ñiⁿ déhe cue ñáyiú isràél. ²⁹ Te ndute lámár sá nání Măr Tícuèhé ní quée dava-xi ní natúu ñuhu yìchí ní níhí ñi yáha cue ñáyiú isràél. Te ducaⁿ ñi cuu chi ní sándáá iní-yu Yá Ndiöxí. Te cue téè Ègiptú tnahá-güedé nchícúⁿ-güedé cuaháⁿ dico ñá túú ní ndàcu-güedé yáha-güedé chi ní ndíhi-güedé ní cáhá.

³⁰ Te cue ñáyiú isràél ní dúcúⁿ ndéé-yu úsá nduu ñuú Jericó te ní ngoyo nchaa sá ñúðòco. Te ducaⁿ ñi cuu chi ní sándáá iní-yu Yá Ndiöxí.

³¹ Te ñiⁿ ñaha ní xíndecu ichi díi iní ní xínani-aⁿ Ràháb, ñaha-áⁿ ñá túú ní xíhí-aⁿ dàtná ní xíhí nchaa ñáyiú ío ní cuu sàá iní-xi núú Yá Ndiöxí, chi ní cuu váha iní-aⁿ núú cuè téè ní tendaha cuè ñáyiú isràél ní sángoto dayuhu ñuú-aⁿ. Te ducaⁿ ñi quide-aⁿ chi ní sándáá iní-aⁿ Yá Ndiöxí.

³² Te núu dicó sá cúú te cáháⁿ-í cuendá ndíi Gedéon, ndíhi cuendá ndíi Bàrac, ndíhi cuendá ndíi Sànsón, ndíhi cuendá ndíi Jèfté, ndíhi cuendá ndíi Dávií, ndíhi cuendá ndíi Sàmuel, ndíhi cuendá nchaa cue téè ní xóo cáháⁿ tñuhu Yá Ndiöxí ndéé sanaha, te nchaa cuendá cue téè-áⁿ cáháⁿ-í te núu dicó cùyáchí-í dico ñá túú cùyáchí-í. ³³ Te nchaa cue ndíi-áⁿ ñi sándáá iní cue ndíi Yá Ndiöxí núu xíáⁿ ní xóo ndacu cue ndíi ní

xóo nàá cue ndíi ndihí nchaa ñáyiú dava-gá ñúú. Te nchaa ñáyiú-án ñà túú ní xóo ndacú-yu nàá-yu ndihí cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gã xii cue ndíi. Te cuèi nchaa cue quiti dééⁿ ñà túú ní ndàcu-güedi ná cada ñaha-güedi xii cue ndíi. ³⁴ Te ní xóo ndacu cue ndíi ní xóo ndahvá cue ndíi ñuhú sá vã yõo tnàhí ndàcu ndahvá, te ní cácu cue ndíi vá yõo ni ndàcu cahni ñaha xii cue ndíi. Te cue ndíi-án ñà túú ñihí ndéé cuè ndíi ni cùu, dico ní ñihí ndéé cuè ndíi chi Yá Ndiöxí ní chindee ñaha-gã xii cue ndíi, te nchaa ndíi-ánⁿ ïo ní ñihí ndéé cuè ndíi ní nàá cue ndíi ndihí nchaa ñáyiú ní cuu úhú iní ñáhá xii cue ndíi, te nchaa ñáyiú ducaⁿ ní xóo nàá ndihí cue ndíi-án ñà túú ní xóo ndacú-yu nàá ndihí ñáhá-yu xii cue ndíi chi ní xóo cunú-yu. Te ducaⁿ ní cuu chi ní sándáá iní cue ndíi Yá Ndiöxí. ³⁵ Te dava ñáyiú ñihí ní nduu táhũ-yu ní ndoto cue ñáyiú ní xíndecu ndihí-yu ní nucúndecu ndihí ñaha tùcú-yu.

Te dava ñáyiú ïo ní dándóhó ñaha tnaha ñáyiú-yu te ní xihí-yu, dico ñà túú ní dàñá-yu ichi váha nàcuáa cácu nihnú-yu núú tnaha ñáyiú-yu, te ducaⁿ chi ní cuini-yu sá ndótó-yu ndéé cuèé-gá nàcuáa ngúndecu váha-yu núú ndécú Yá Ndiöxí. ³⁶ Te dava cue ndíi ïo ní ndoho cue ndíi chi ïo ní cudíquí ndéé ñáhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñáhá-yu, te ní chihí ñáhá-yu xii cue ndíi vecaá. ³⁷ Te dava cue ndíi ní sahani ñáhá-yu ndihí yúú. Te dava cue ndíi ní chidava ndáá ñáhá-yu ní xehndé ñáhá-yu ndihí sierrá. Te dava cue ndíi ní xito ndéé ñáhá-yu te núu ndisa sá sándáá iní cue ndíi Yá Ndiöxí, te dava cue ndíi ní sahani ñáhá-yu ndihí machítí. Te mee-ni ñhí mbéé ndihí ñhí chivá, ní xóo cuu dóo cue ndíi. Te mee-ni ñhí cue quiti-ánⁿ ní xóo cuu dóo cue ndíi cuèi ndèni ní cuu ní xóo caca cuu cue ndíi. Te mee-ni cuè téé ndahú ní cuu cue ndíi.

Te ïo ní xóo dandihú-yu iní cue ndíi, te nándi sá ní xóo cada ñáhá-yu xii cue ndíi ní xóo dandòho ñáhá-yu. ³⁸ Te cue ndíi-ánⁿ ïo-gá ní xínduu váha iní cue ndíi dàcúxí nchaa dava-gá ñáyiú. Te nchaa cue ndíi-ánⁿ ní xica cuu cue ndíi cuèi nchaa núú ñà túú vã yõo tnàhí ndècu, te cuèi xiti yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchii yaú ní xóo cundecu cue ndíi. ³⁹ Te ïo ní cudíu cue ndíi núú Yá Ndiöxí cuendá sá ní sándáá iní ñáhá cuè ndíi xii-gá. Te cuèi ducaⁿ ní quide cue ndíi dico ñà túú ní xini cue ndíi nchaa sá ní cachí Yá Ndiöxí cada-gá. ⁴⁰ Te ducaⁿ ní cuu chi ñhí sá ïo-gá váha ní cachí Yá Ndiöxí cada-gá. Te sá dúcáⁿ ïo-gá váha ní cachí-gá cada-gá cúu-xí cuendá nchoo ndihí cuendá cue ndíi-ánⁿ cuendá sá ñà díú mèe-ni cue ndíi-ánⁿ cundáá cue ndíi núú-gã, chi tnàhá nchoo cundáá-ó núú-gã.

12

Ío cuhuⁿ iní-ó Xítohó Jesucrístú

¹ Te cue ñáyiú ní xíndecu ndéé sanaha ní quidé-yu nàcuáa ní cutnùni sá ní sándáá iní-yu Yá Ndiöxí. Te cada iní-ó sã ncháá ñáyiú-ánⁿ xíndéhe ñáhá-yu xii-o vitna. Núu xíáⁿ xini ñuhu-xi sá vã cáda-ó ni ñhí sá cuèhé sá dúhá chi díu nchaa xíáⁿ quidé-xi ñà túú cundáá-ó núú Yá Ndiöxí. Te vá cáda cuendá-ó nchaa sá quidé tneñu iní-ó nàcuáa ndacu-o cáda-o nchaa nacuaa cáháⁿ-gá. Te ïo cáhnu cunduu iní-ó cànchicúⁿ nihnu-o cáda-o nchaa nacuaa ní cachí-gá cada-o cundecu-o ñuyíú-a. ² Te ïo cuhuⁿ iní-ó Xítohó Jesucrístú, chi díu-gá ní quide ní sándáá iní-ó Yá Ndiöxí, te díu-ni ducaⁿ quide-gá cuèi vitna te cuèi ndéé núú cuaháⁿ núú vèxi díu-ni ducaⁿ cáda-gá sá quíndáá iní-ó Yá Ndiöxí. Te Xítohó Jesucrístú ïo ní quide ndee ñihí-gá ní ndoho-gá te ní xihí-gá núú cùrúxí, te ñà túú ní quide cuendá-gá cuèi ñhí sácáⁿ núú cúu-xí sã dúcáⁿ ní ndoho-gá. Te ducaⁿ ní quide-gá chi sa naha-gá sá ná yãha sá dúcáⁿ ndoho-gá te ïo cudíí ñihí-gá. Te vitna núcóo-gá

xio cùha núu núcõo Yá Ndiõxí te tàxi tnuní-gá.

³ Te xini ñuhu-xi sá ïo cada cuendá-ndó nàcuáa ní guide Xítóhó Jesucristú chi Yaá-áⁿ ïo ní guide càhnu iní-gá nchaa sá ñi ndoho-gá ní guide ñaha nchàa ñáyiú ndècu ichi cuehé ichi duha xii-gá. Te ducaⁿ càda cuendá-ndó nàcuáa ní guide-gá cuendá sá vã túu dusaⁿ-ndo, te ni vã nátùhú iní-ndó càda-ndo nchaa nacuáa càháⁿ-gá. ⁴ Te nchòhó dáquèe tìhú-ndó nchàa sá cuehé sá dúhá dico vátá cahní ñaha-gá-yu xii-ndo sã dúcáⁿ quide-ndo. ⁵ Te ndacu iní-ndó nàcuáa càháⁿ Tãtá-ó Dütú Ndiõxí dásahú ñáhá-gã xii nchoo cue ñáyiú cùu déhe-gá. Te duha càchí-gá núu tütú-gá:

Nchòhó cue déhe mee-ï, vá cání iní-ndó sã àuⁿ nã cuu dándoho ñaha-í xii-ndo,

te ni vã nátùhú iní-ndó òré càháⁿ-í dóho-ndo nàcuáa cada-ndo cùndecu-ndo.

⁶ Chi mee-ï dándoho-í nchaa ñáyiú cùu iní-í cuendá sá cùndáa-yu núu-í,

te quide úhú-í-yu, te diu-ní-yu cùu-yu ñáyiú càchí-í cùu dèhe-í.

Duha càchí-gá núu tütú-gá. ⁷ Te ïo cada ndee iní-ndó sã dúcáⁿ dándoho ñaha Yá Ndiõxí xii-ndo, chi quide-gá sá cúu-gã Tãtá-ó. Te ñá túu ñi ñⁿ téé cùu tátá te cachí-ó sã ñà túu sànu ichi-dé cue déhe-dé nàcuáa tàú-xi cunduu. ⁸ Te núu Yá Ndiõxí ñá túu dándoho ñaha-gá xii-ndo dàtná dándoho-gá cue ñáyiú càchí-gá cúu dèhe-gá, te ñá diú dèhe mee-gã cúu-ndó te núu ducaⁿ, chi cùu-ndo datná cue ñáyiú ñá túu cùtnuní yoo cùu tátá-xi. ⁹ Te nchoo sà naha-o sã cùtnàhá ñi cuu landú-ó ñi sanu ichi ñaha tátá-ó nàcuáa tàú-xi cunduu, te ducaⁿ ñi xóo canehe-o sã yíñuhu núu-güedë te diu-ni ducaⁿ nèhe-o sã yíñuhu núu-güedë vitna. Te núu ducaⁿ ñi sándáa iní-ó tátá-ó, te ïo-gá xini ñuhu-xi quíndáa iní-ó Tãtá-ó Dütú Ndiõxí cuendá ducaⁿ ndùu táhú-ó cùndecu-o ndihí-gá ñi caa ñi quíhíⁿ, chi diu-gá cúu-gã Yaá ní chihi iní-ó. ¹⁰ Te cùtnàhá ñi cuu

landú-ó, ñá túu tìtní nduu ñi càniha tátá-ó ñi sanu ichi ñaha-güedë xii-o nàcuáa ní cuu iní mée-güedë. Te Yá Ndiõxí ducaⁿ dándoho ñaha-gá xii-o sànu ichi ñaha-gá cuendá cúu-xí sã vãha sá cúu-xí-ó, te ducaⁿ quide-gá cuendá nchoo càda ndáá-ó dàtná quidé mée-gá. ¹¹ Te òré véxi ñⁿ tnúndòho sá cúu-xí-ó te ñá túu cùdí iní-ó chi dándihú iní ñáhá-xí xii-o. Te nchaa ñáyiú ngúnu ichi sá cuendá nchaa tnúndòho-áⁿ te ngüíta-yu quide ndáá-yu, te ïo váha cùu iní-yu ndècú-yu.

Vá dáquèe tìhú-ó tnùhu Yá Ndiõxí

¹² Te núu xiãⁿ ïo chí ndúcú ndèe-gá canchicúⁿ nihnu-ndo ichi Xítóhó Jesucristú, te vá dico yica cùu iní-ndó cànchicúⁿ nihnu-ndo ichi-gá. ¹³ Te cada váha-ndo cùndecu-ndo ichi-gá cuendá nchaa ñáyiú sàni ñⁿ sani úú iní-xi níhí ndéë-yu cundecú-yu ichi-gá te vá ná túhú iní-yu canchicúⁿ nihnú-yu.

¹⁴ Te nducu-ndo nàcuáa cada-ndo cùndecu váha-ndo ndihí cue tñaha ñáyiú-ndo, te ïo cada váha-ndo cùndecu-ndo nacuáa cundáa-ndó núu Yá Ndiõxí chí núu vá dúcáⁿ càda-ndo te vá ndúú táhú-ndó cùndecu-ndo ndihí-gá. ¹⁵ Te ïo váha cada cuendá-ndó nàcuáa cada-ndo cùndecu-ndo, chí núu ñáhá te vá chindèe ñaha-gá Yá Ndiõxí xii-ndo. Te ïo váha cada cuendá tucu-ndo nàcuáa cundecu-ndo vá cání cuehé iní-ndó cuendá Yá Ndiõxí, chí núu ducaⁿ na càda-ndo te dava-gá ñáyiú ndècu ndihí-ndo ichi-gá tñahá-yu ngüíta-yu ducaⁿ càdá-yu, te vá cùndècu váha-gá-ndó ndihí-yu ichi-gá. ¹⁶ Te cada cuendá tucu-ndo sã vã cùndècu-ndo ichi dí iní, te ni vã dáquèe tìhú-ndó ñi ñⁿ sá cúu cuendá Yá Ndiõxí dàtná ní quide ndii Esàú, chí sá cuãñaha tátá ndii-áⁿ nduu táhú ndii ñi cùu ní dama ndii ñⁿ cóhó comidá. ¹⁷ Te nchòhó sa naha-ndo sã cùtnàhá ñi cuini ndii Esàú cácaⁿ táhú tátá ndii núu Yá Ndiõxí cuendá nchaa sá ndúú táhú ndii ñi cùu, te ñá túu ní xicáⁿ táhú tátá ndii núu Yá Ndiõxí nàcuáa cuini mée ndii ñi cùu. Te ní ndáhyú víhí ndii, te cuei ducaⁿ

nĩ quide ndĩi dico ñá túú ní ndàcu-gá ndĩi nàníhí ndĩi táhú sã nĩ dama ndĩi comidá.

18 Te cue ñáyiú isràél ní sátuhá-yu ìⁿ yucu núú càyú ñuhú, te nchòhó ñá túú ndéé ducaⁿ sàháⁿ tuha-ndo ìⁿ yucu núú càyú ñuhú dàtná ní quide cue ñáyiú-áⁿ. Te cútnàhá ducaⁿ nĩ sátuhá-yu yucu-áⁿ te ní cunee v̄ihí n̄ihí yucu-áⁿ, te ní quene táchí n̄ihí.

19 Te ní tecú dóho-yu ní cáháⁿ ìⁿ cútú, te ní tecú tucu dóho-yu ní cáháⁿ Yá Ndiõxí ní cáháⁿ ndihí ñaha-gã xií-yu. Te nchaa ñáyiú ní tecú dóho-xi ní cáháⁿ-gá te ní cuiní-yu sá v̄ã cãháⁿ-gá.

20 Te ducaⁿ nĩ quidé-yu chi ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ìⁿ quitì nà yáha xitì yucu-a, te cahni-ndo-di ndihí yúú àdi ndihí ìⁿ yutnu puyá”, duha ní cachí-gá. 21 Te sá dúcáⁿ nĩ quide-xi ní xiní-yu xiãⁿ ío ní dáyùhú ñáhá-xí xií-yu. Te tnàhá té Moisés ní yùhú-dé, te ní cachí-dé: “Quidì ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiú-áⁿ nĩ sáháⁿ tuhá-yu yucu-áⁿ, dico cada iní-ndó sã sá ní tuha-ndo yùcu Sión sá ndécú nũú ndécú Yá Ndiõxí, ndihí ñuú-gá ñuú Jerusalén sá cáá àndiu te diu-gá cúú-gã Yaá ndécú nchàa nduu nchaa quíú. Te diu-ni xiãⁿ xĩndecu cuéhé v̄ihí cuè espíritú xinú cuèchi núú-gã 23 chíñùhu ñaha-xi xii-gá. Te nchòhó cúú-ndó cuè ñáyiú cùu cuendá Yá Ndiõxí, te ní tnahá tnúhu-ndo ndihí nchaa dava-gá ñáyiú cùu cuendá-gá, ñáyiú yòdo tnuní núú tütú-gá ndécú àndiu, te diu-ni ñáyiú-áⁿ cuãñaha-gã xií-yu sá ndúú táhú-yu. Te nchòhó ní tuha-ndo Yá Ndiõxí Yaá cada ndáá yicá cuèchi nchaa ñáyiú. Te cada iní-ndó sã nĩ tnahá tnúhu-ndo ndihí cue ñáyiú ní quide ndáá ní xĩndecu ichi Yá Ndiõxí ñuyíú-a. Te ñáyiú-áⁿ ñà túú tnàhí-gá ná cúmãñí-yu vitna ndécú-yu núú-gã. 24 Te ní tnahá tnúhu-ndo ndihí Xítohó Jesucristú Yaá ní quide nàcuáa cada Yá Ndiõxí ìngá núú sã v̄aha sá cúú-xí nchàa

nchoo ñáyiú ndècu ñuyíú-a, chi ní sati níñí-gã te ní xihí-gá núú cùrúxí. Te níñí Xítohó Jesucristú ñá túú ìⁿ-ni cuu-xi ndihí níñí ndĩi Àbél, chi diu cuendá níñí-gã-áⁿ nĩ quide cãhnu iní Yá Ndiõxí nchaa cuèchi-o.

25 Núu xiãⁿ ío cada cuendá-ndó v̄ã dáquèe tihú-ndó tnùhu cãháⁿ Yá Ndiõxí, chi nchaa ñáyiú ní xĩndecu ndéé sanaha dùcaⁿ ní quidé-yu ní dáquèe tihú-yu tnúhu ní cáháⁿ-gá ñuyíú-a sá cúú-xí-yu. Te ñá túú ní cãcu-yu chi ní nacháhu-yu sá dúcáⁿ nĩ quidé-yu. Te uuⁿ-gá tucu nchoo chi v̄ã cãcu-o te núu ducaⁿ na dàquèe tihú-ó tnùhu cãháⁿ Yá Ndiõxí ndéé àndiu sã cúú-xí-ó. 26 Te cútnàhá ní cáháⁿ Yá Ndiõxí ndéé sanaha te ní quidì-xi ñuyíú. Te vitna cãchí-gá: “Yúhú quidì tucu-í ìngá xito ñuyíú, te ñá díú mèe-ni ñuyíú ducaⁿ quidì-í chi tnàhá àndiu quidì-í”, cãchí-gá. 27 Te sá dúcáⁿ cãháⁿ-gá sá ìngá xito tucu ducaⁿ càda-gá xiãⁿ cútnuní sá ncháándì túhú sá tũu ndèhe-o danaa-gá. Te nchaa sã ñà túú ndéé tũu quini-ó ñuyíú-a xiãⁿ v̄ã quidì-xí te ni v̄ã náá-xí. 28 Te núú nĩ cachí Yá Ndiõxí nduu táhú-ó cùndecu-o chi mee-gã táxí tnuní-gá xiãⁿ, te ni v̄ã quidì-xí te ni v̄ã náá-xí. Te xiãⁿ ío xini ñuhu-xi ndacáⁿ táhú-ó nũú-gã, te yĩñùhu yĩñùhu cunu cuechi-o núú-gã nàcuáa cuu v̄aha iní-gá, te ducaⁿ cùhuⁿ iní-ó sã ìo cãhnu cuu-gá. 29 Te Tãtá-ó Dütú Ndiõxí cúú-gã dàtná ìⁿ ñuhú chi danàa-gá nchaa sã ñà túú quide nàcuáa cuu v̄aha iní-gá.

13

Nàcuáa tàú-xi cada-o cuendá cuu v̄aha iní Yá Ndiõxí

1 Te nchaa nchòhó ñáyiú ndècu ichi Xítohó Jesucristú, v̄ã dáñá ndéé-ndó cùu iní tnàhá-ndó nàcuáa ndècu-ndo ichi-gá. 2 Te cunaha-ndo sã nũu ìo ñáyiú ñùhu ichi ní quexìo-yu vehe-ndo te cuãñaha-ndo v̄ehè ndetátú-yu, te cuãñaha-ndo sã cáxi-yu. Chi davá-yu ndéé espíritú xinú cuèchi núú Yá Ndiõxí ní sáháⁿ vehé-yu ní queheⁿ cuendá-yu te ñá túú ní cùtnuní

iní-yu sá díú espíritú xínú cuèchi núú-gă cúú-xí.

³ Te ndacu tucu iní-ndó cuè ñáyiú xixíhi vecaá, te cada iní-ndó sã tnàhá-ndó yìhi-ndo vecaá ndihí-yu. Te ndacu tucu iní-ndó nchàa ñáyiú ío ndòho, te cada iní-ndó sã tnàhá-ndó ndòho-ndo ndihí-yu.

⁴ Te nchaa ñáyiú na cãchí-yu sá ìⁿ sá vãha cùu-xi sá ìⁿ tée ndihí ìⁿ ñadìhí ná nìhí tnàhá-yu candeca tnàhá-yu. Te nchòhó cue tée vá cání ìní-ndó cãháⁿ ndihí-ndo ñadìhí te núú ñá díú ñadìhí-ndó cúú-yu. Te ducaⁿ-ni nchòhó cue ñáyiú dìhí tucu vá cání ìní-ndó cãháⁿ ndihí-ndo tée te núú ñá díú yì-ndo cuu-güedé, chi Yá Ndiöxí dandòho-gá nchaa ñáyiú ndècu ichi díí ìní.

⁵ Te vá cúhúⁿ ìní-ndó mèe-ni díhúⁿ. Te núú nándi cùu nchaa sá ndécú ndihí-ndo te ñiú-ni nchaa xíãⁿ sa nduu vétú iní-ndó, chi Yá Ndiöxí ní cachí-gá: “Ni ìⁿ nduu vá dáñá nìhnu ñaha-í xii-ndo, chi nchaa-ni nduu chindee ñaha-í”, duha ní cachí-gá.

⁶ Te xíãⁿ núu nchoo nì yuhu nì iní-ó cãháⁿ-ó ìⁿ ìⁿ-o, te cachí-ó:

Yá Ndiöxí cúú-gă Yaá chindèe ñaha xii-í,

núu xíãⁿ ñá túú yùhú-í cuèi nándi cãháⁿ ñáyiú cada ñàhá-yu xii-í.

Duha cachí-ó.

⁷ Chí ndácú ìní cue tée ní sanu ichi ñaha xii-ndo ichi Xítóhó Jesucristú cue tée ní cãháⁿ tnúhu Yá Ndiöxí núú-ndó, te ío váha chí nácuãha cuendá nàcuáa ní quide nchaa cue tée-áⁿ ñí xíndecu-güedé ndéé ní sáa nduu ñí xíhí-güedé. Te ío quindáa iní-ndó Yá Ndiöxí dàtná ní xóo cada cue tée-áⁿ.

⁸ Te dàtná-ni ní quide Xítóhó Jesucristú ndéé sanaha ñiú-ni ducaⁿ quide-gá vitna, te ñiú-ni ducaⁿ càda-gá ndéé núú cuaháⁿ núú vèxi. ⁹ Te vá dáñá-ndó mèe-ndo dandahú ñáhá ñáyiú dacaháⁿ ñáhá xii-ndo natuha-ndo ingá ichi, ñáyiú dānehé tnàha ñáyiú-xi nándi sá ñí cutúha-yu, te nchaa xíãⁿ ñá túú ìⁿ-ni caháⁿ-xi ndihí tnúhu sá ndécú ndihí-ndo. Te Yá

Ndiöxí chindèe ñaha-gá xii-o nàcuáa níhí ndéé-ó cùndecu-o ichi-gá, te ducaⁿ te cuu-xi sá vãha sá cúú-xí-ó, te ñá díú cuendá ìⁿ sá xéxí-ó nìhí ndéé-ó ndècu-o ichi-gá. Te dava ñáyiú cãchí-yu sá dává núú comidá cuu caxi-o te dava ñáhá nàcuáa níhí ndéé-ó cùndecu-o ichi-gá, dico ñá ndáá sá sã dúcáⁿ vã cãxí-ó nchàa núú comidá níhí ndéé-ó cùndecu-o ichi-gá.

¹⁰ Chi Xítóhó Jesucristú ní xíhí-gá cuendá-ó núú cùrúxí, te nchaa ñáyiú nchícúⁿ nihnu-ni quide nchaa nàcuáa ní quide nchaa dútú ñí xinu cuechi núú Yá Ndiöxí ndéé sanaha, ñáyiú-áⁿ vã cúú tnàhá tnúhu-yu ndihí Xítóhó Jesucristú Yaá ní xíhí núú cùrúxí sá dúcáⁿ quidè-yu. ¹¹ Chi dútú cùnùu-gá ní xíndecu ndihí cue ñáyiú isràel, tée-áⁿ ñí xóo canehe-dé ñíñí nchaa quiti ní xóo cahni-dé ní xóo quihu ndéé xití cuartú ní cuu íi-gă. Te ducaⁿ ñí xóo cada dútú-áⁿ cuendá cada cãhnu iní Yá Ndiöxí nchaa yíca cuèchi ñáyiú, te cuñú nchaa quiti-áⁿ ñí xóo cahmi-güedé ìⁿ xio yuhu ñùú. ¹² Te ducaⁿ ñí yáha Xítóhó Jesucristú chi ndéé ìⁿ xio yuhu ñùú ní sahani ñaha-güedé xii-gá. Te cuendá ñíñí-gă sá ñí sati núú cùrúxí núú ñí xíhí-gá, ní nduu ndoo ní nduu nine iní cue ñáyiú sàndáa iní ñáhá xii-gá. ¹³ Te vitna chí ná tũha-o Xítóhó Jesucristú te cada ndee ìní-ó ndòho-o datná ní ndoho-gá. ¹⁴ Te ñuyú-a ni ìⁿ xichi ñá túú ndéé cáá ìⁿ ñuú cudíi ñí caa ni quihíⁿ cuendá cundecu-o, dico ducaⁿ-ni ñùhu iní-ó ìⁿ xichi núú ndúú tãhú-ó cùndecu-o ñí caa ni quihíⁿ.

¹⁵ Te núu xíãⁿ xíní ñùhu-xi sá vã dáñá ndéé-ó chĩñuhu-o Dútú Ndiöxí chí Xítóhó Jesucristú ní quide-gá nàcuáa ndacu-o tnàhá tnúhu-o ndihí Yá Ndiöxí, te òré cãháⁿ ndihí-o-gă te nuu núu ndacáⁿ tãhú-ó núú-gă. Te nchaa tnúhu cãháⁿ-ó òré cãháⁿ ndihí-o-gă cúú-xi dàtná ìⁿ tãhú sã cúú-xí-gă. ¹⁶ Te vá dáñá ndéé-ndo càda-ndo mee-ni sá vãha cundecu-ndo, te ducaⁿ chindee tnaha-ndo ìⁿ ìⁿ-ndo ndihí sá ndécú ndihí-ndo. Te núu ducaⁿ na càda-ndo te cani iní-ndó

să cúú-xí dâtná ìⁿ táhú să ìo váha cùu iní Yá Ndiöxí.

17 Te quindáá iní-ndó càda-ndo nchaa nacuáa càháⁿ cue téé yìndaha ñaha xii-ndo nacuáa ndècu-ndo ichi Xítohó Jesucristú, chi diu cue téé-áⁿ quidé cuendá ñáhá-güedë xii-ndo nàcuáa cundecu váha-ndo nũú-gã. Te sáá nduu nàcani tnúhu-güedé núú-gã nũú ní quide váha-güedé àdi ñá túú ní quide váha-güedé ní xíndecu ndihí ñaha-güedë xii-ndo. Te núu ducaⁿ na càda-ndo quindáá iní-ndó-güedë te cudí^í ìní-güedé cundecu ndihí ñaha-güedë xii-ndo, te vá ndihú iní-güedé. Te núu vá dúcáⁿ càda-ndo te vá cúú-xí să váha xii-ndo nchaa să quidé-güedé să cúú-xí-ndó.

18 Te càháⁿ ndàhú-í núú-ndó să cãháⁿ ndihí-ndo Yá Ndiöxí cuendá-ndí. Te nchúhú cútnùní ndáá iní-ndí să ñá túú nã cúmãní-ndí núú Yá Ndiöxí, te ducaⁿ chi ndücu-ndí nàcuáa quide-ndí cundáá-ndí núú-gã. 19 Te càháⁿ ndàhú tucu-í núú-ndó să ìo cãcáⁿ táhú-ndó nũú Yá Ndiöxí cuendá să mée-gã ná cãdá te ìo ndihí quixi coto ñaha tucu-í xii-ndo.

Tnúhu ndéé núú nĩ ndihí-ná

20 Te Yá Ndiöxí Yaá quidé cùu váha iní-ó ndècu-o, Yaá-áⁿ nĩ dándótó-gã Xítohó Jesucristú. Te Xítohó Jesucristú-áⁿ cúú-gã dâtná ìⁿ toli ìo-gá quéné cãva xito mbéé. Te ducaⁿ sãtnahá-xi cùu-gá cuendá să nĩ sati níñí-gã te ní xíhí-gá, te ducaⁿ nĩ cuu cuendá să nĩ quide ndáá-gá ndihí Yá Ndiöxí să cãdá-gã ìngá núú să váha să cúú-xí nchòo cue ñáyiu ndècu ñuyíú-a. Te nàcuáa ní quide ndáá-gá ndihí Yá Ndiöxí te diu-ni ducaⁿ càda-xi núú cuaháⁿ núú vëxi. 21 Te xìcáⁿ táhù-í núú Yá Ndiöxí să mée-gã ná chindee ñaha-gã xii-ndo cuendá cada-ndo mée-ni să váha nàcuáa cuení mée-gã, te mee-gã ná cãdá ñàha-gã xii-o nchaa să váha să sání ìní-gã. Te diu-ni ducaⁿ na tàuchiuⁿ-gã cada Xítohó Jesucristú să cúú-xí-ó, duha xìcáⁿ táhù-í núú-gã. Te vitna nchaa-o chĩ ná càchí-ó să ìo càhnu cuu Xítohó Jesucristú ni caa ni quíhíⁿ. Te ducaⁿ na cùnduu.

22 Te càháⁿ ndàhú-í núú nchòhó ñáyiu ndècu ndihí-í ichi Xítohó Jesucristú să cãdá càhnu iní-ndó nàcuáa ndüu nchaa tnúhu càháⁿ-í dásàhú ñáhà-í xii-ndo, chi ñá túú vãi tnúhu chido tnuní-í núú tütú-a să cúú-xí-ndó.

23 Te càchí tnúhu-í xii-ndo să tẽ Timùteú téé ndècu ndihí-o ichi Xítohó Jesucristú ní cãcu-dé ñá túú-gã yíhí-dë vecaá. Te núu na quèxio ndihí-dé núú ndécù-í te quixi-í ndihí-dé núú ndécú-ndó quixi coto ñaha-ndí.

24 Te cúñaha-ndo să ìo na càda ndee iní nchaa cue téé yìndaha ñaha xii-ndo nacuáa ndècu-ndo ichi Yá Ndiöxí. Te ducaⁿ cúñaha tucu-ndo xii nchaa dava-gã ñáyiu cùu cuendá-gã să ìo na càda ndee iní-yu. Te cue ñáyiu nãcióⁿ Itàliá ñáyiu ndècu ndihí-o ichi-gã càchí-yu să ìo cada ndee ìní-ndó. 25 Te Yá Ndiöxí ìo na chindee chitúu ñaha-gã xii-ndo nchaa-ndo. Te ducaⁿ na cùnduu. Te ìo chí cãdá ndee ìní-nã vitna.

TUTÚ NÍ CADÚHA TÉ SANTIAÚ

*Té Sàntiaú cádũha-dé tutú quíhíⁿ
ndaha ñáyiú isràél nchìté nuu ñihí
ñuyú*

¹ Yúhú té Sàntiaú xínú cuèchi-í núú Yá Ndiòxí ndihí núú Xítóhó Jesucristú, te tèe-í tnúhu-a quide ndee iní ñáhà-í xii nchòhó ñáyiú isràél nchìté nuu ñihí ñuyú-a.

Yá Ndiòxí táxí-gă sá xìní tnùnì-ó

² Te nchòhó ñáyiú ndècu ndihí-í ichi Xítóhó Jesucristú, ío cudíí ìní-ndó cùndecu-ndo cuéi náí cùu sá ùhú véxi cuèndá-ndó, ³ chi ducaⁿ te cutnùnì iní-ndó sá sàndáá ndisa iní-ndó-gă, te cunduu càhnu iní-ndó cuéi náí ná yáha-ndo. ⁴ Te cunduu càhnu-ni iní-ndó te ducaⁿ te cuu-ndo ñáyiú váha, te cundáá-ndó núú Yá Ndiòxí, te ducaⁿ te ñá túú-gă ná cumánì-ndó núú-gă.

⁵ Te núu cùmánì sá xìní tnùnì-ó, te cacáⁿ-ó núú Yá Ndiòxí te mee-gă taxi-gă, chi ío váha iní-gă, te ñá túú cùnini iní-gă núú-ó. ⁶ Te ni yùhu ni iní-ó cãcáⁿ-ó núú-gă, te quindáá ndisa iní-ó sá táxí-gă sá cúmãní quini tnùnì-ó, te vá cánì ñⁿ canì úú iní-ó. Chi nchaa ñáyiú sàni ñⁿ sàni úú iní-xi cùu-yu dàtná ndute làmár cuáhãⁿ-xi duha cuáhãⁿ-xi dàcãⁿ nãã-xi òré quéné tâchí. ⁷ Te nchaa ñáyiú ducaⁿ sàni iní-xi, te vá cánì ìní-yu sá ñihí-yu sá xicãⁿ-yu núú-gă. ⁸ Chi nchaa ñáyiú sàni ñⁿ sàni úú iní-xi ñã cútnùnì iní-yu ndèdacàa sá sánì ìní-yu cadã-yu.

⁹ Te nchaa ñáyiú ndàhú ñáyiú ndècu ichi-gă, xìnì ñuhu-xi ñã túú-gă ná canì iní-yu, mee-nã cudíí ìní-yu, chi Yá Ndiòxí chíndèe ñaha-gă xií-yu. ¹⁰ Te nchaa ñáyiú cuica xìnì ñuhu-xi cundecu váha iní-yu núú Yá Ndiòxí cuéi náí ná yáha-yu. Chi ñáyiú-ãⁿ cúu-yu dàtná itã nchaa cúhú sã ñã túú cudíí naha. ¹¹ Chi òré ní cuu ñihí cahni nchícanhii, te ní dádì-ñi-xi nchaa cúhú cuíí-ãⁿ te ní cóyo-ni nchaa

itã-xi, te ñã túú-gă cáá vìi. Te ducaⁿ sãtnahã-xi cùu ñáyiú cuica chi núú chíúⁿ-ñi-yu xihí-yu.

*Nchaa ñáyiú quide cahnu iní-xi
nchaa sã yãha-yu*

¹² Te váha táhú nchaa ñáyiú quide cahnu-ni iní-xi cuéi nándì sã yãha-yu ndècú-yu ichi Yá Ndiòxí, chi òré ná ndíhí nchaa xíãⁿ yãha-yu, te cuãñaha Yá Ndiòxí ñⁿ corónã váha vìhi cundecu ndihí-yu, te ndáá chi ducaⁿ càháⁿ Yá Ndiòxí sá táxí-gă xii nchaa nchoo ñáyiú ñùhu iní ñáhã xii-gă. ¹³ Te nchaa ñáyiú sàni iní-xi cada nándì sã cuèhé sã dúhá, te vá cánì ìní-yu sã Yá Ndiòxí táuchìuⁿ-gã ducaⁿ cadã-yu, chi Yá Ndiòxí ñã quíú te canì iní-gã cada-gã ñⁿ sã cuèhé sã dúhá, te ni ñã túú tàuchìuⁿ-gã sã dúcãⁿ cadã-yu. ¹⁴ Te cùnì-yu cadã-yu nchaa sã cuèhé sã dúhá chi ducaⁿ véxi iní-yu. ¹⁵ Te nchaa ñáyiú ío ñùhu iní nchaa sã cuèhé sã dúhá te quidè-yu, te núu na cadã-ni-yu te cuíta nihnú-yu.

¹⁶ Te nchòhó ñáyiú ío cùu iní-í ndècú ndihí-í ichi Xítóhó Jesucristú, vá dáñã-ndó mèe-ndo dandahú ñáhã ñáyiú xii-ndo. ¹⁷ Chi nchaa sã vãha véxi-xi núú Yá Ndiòxí Yaá ndècú àndìu, chi ñìu mee-gã ní cadúha-gã andìu ndihí nchaa chódínì, ndihí yóó, ndihí nchícanhii. Te Yá Ndiòxí ñã túú ndì queheⁿ ndì queheⁿ-gã sã cánì ìní-gã, te ni ñã túú cùu-gã dàtnã ñⁿ cuándáhú cuáhãⁿ-xi duha cuáhãⁿ-xi dàcãⁿ, chi ñⁿ-ni sã sánì ìní-gã. ¹⁸ Te Yá Ndiòxí ní cuinì-gã sã cúú-ó dèhe-gã, te ndáá sã cúú-ó dèhe-gã chi sàndáá iní-ó tnùhu-gã. Te nchoo ñáyiú sàndáá iní-xi tnùhu-gã cùnùu-gã-ó chi ní nduu-o dèhe-gã.

Ichi ndáá cuítì

¹⁹ Te nchòhó ñáyiú ío cùu iní-í ndècú ndihí-í ichi Xítóhó Jesucristú, cundedóho-ndo ñⁿ tnùhu na càháⁿ-í-a. Te cùnì-í sã cùndecu túha-ndo cùndedóho-ndo tnùhu Yá Ndiòxí, te canì váha iní-ndó nãcuáã càháⁿ-ndó, te cunduu càhnu iní-ndó te vá cùdèéⁿ-ndó. ²⁰ Chi núu na cùdèéⁿ-ó te ñã túú quide váha-o núú Yá Ndiòxí.

21 Te dañà-ndo nchàa sá cuèhé sá dúhá íó ñuyíú-a. Te quindáá iní-ndó tnúhu Yá Ndiöxí ndécú ndìhi-ndo, te vá cùndùu sáá iní-ndó, te ducaⁿ te naníhí tàhú-ndó.

22 Te quindáá iní-ndó tnúhu-gá te vá cuèndá-ni cundedóho-ndo, chi núu na cundedóho-ndo te vá tníí-ndó ñá, te dicó-ni dándahú-ndó mèe-ndo te vá naníhí tàhú-ndó. 23 Chi nchaa ñáyiú dicó-ni sàcúndedóho tnúhu-gá te ñá túú sàndáá iní-yu, ñáyiú-áⁿ cúú-yu dàtná ìⁿ ñáyiú sàcúndéhé-ní núú-xi núú yùtátá. 24 Chi nini ndèhé-yu ní xiní-yu núú-yu, te ní xócání-yu te ní nacuanaa-ní-yu nàcuáa càa núú-yu. Te ducaⁿ sàtnahá-xi cùu ñáyiú sàcúndedóho tnúhu Yá Ndiöxí, te ñá túú tníí-yu. 25 Te nchaa ñáyiú dàcuaha ndisa tnúhu ní dándóo Yá Ndiöxí ñihnu-ní-yu ichi-gá, chi ñá díú ìⁿ sá vèe cùu-xi. Te ñáyiú-áⁿ ñá túú dicó-ni sàcúndedóho-yu chi quide ndáá-yu núú-gã, te cùdíí iní-yu xíndecú-yu.

26 Te nchaa ñáyiú cächí sá ndécú ìchi ndáá te cùtexínu-ni càháⁿ-yu, te xíáⁿ dicó-ni dándahú-yu mèe-yu sá ndécú-yu ichi ndáá. 27 Te núu ndècu-o ichi ndáá cui^ti ichi Dútú Ndiöxí, te chindee-o nchàa ñáyiú ní ndóo ndàhú, ndìhi ñáyiú quèé ndécú ndìhi tnúndòho tnúhu ndàhú, te vá cádá-o nãndi sá cuèhé sá dúhá íó ñuyíú-a.

2

Ìⁿnuu-ni cùu iní-ó nchàa tnaha ñáyiú-o

1 Te nchòhó ñáyiú ndècu ndìhi-í ichi Xítóhó Jesucristú Yaá cùnùu, ìⁿnuu-ni càháⁿ ndìhi váha-ndo nchàa tnaha ñáyiú-ndo. 2 Te núu núú nátàcá-ndó chiñuhu-ndo Yá Ndiöxí ní sáá ìⁿ téé ío váha càa dóó ñihnú-dè, te ní sáá tucu ìⁿ téé ñihnu dóó ndàhú, 3 te núu téé ñihnu dóó vãha-ni-áⁿ néhé-ndó sã yíñùhu núú-dè, te taxinucóo-ndo-dè ìⁿ núú xilé váha, te téé ndàhú-áⁿ daxòcòo-ndo-dè ìⁿ xio àdi canucóo-ndo-dè núú ñúhú, 4 te núu ducaⁿ na càda-ndo te ñá túú quide váha-ndo. Chi ìⁿ-ni-dé cúú ìní-ndó, te ìⁿ-dé ñá túú cùu iní-ndó.

5 Te nchòhó ñáyiú ío cùu iní-í ndécú ndìhi-í ichi Xítóhó Jesucristú, chí cùndedóho tucu tnúhu na càháⁿ-í-a. Yá Ndiöxí càháⁿ-gá vai ñáyiú ndàhú cuèndá tnahá tnúhu ndìhi ñàhá-yu xii-gá, te ndècu váha-gá-yu dàcúúxí ñáyiú cuica ñáyiú ñá túú sàndáá iní tnúhu-gá, chi ní cachí-gá sá ncháá ñáyiú na cùu iní ñàhá xii-gá nduu táhù-yu cundecú-yu ndìhi-gá ni caa ni quíhíⁿ. 6 Te nchòhó, ñá túú nèhe-ndo sá yíñùhu núú ñáyiú ndàhú, chi núú ñáyiú cuica-ni nèhe-ndo sá yíñùhu. ¿Te náa ñá cútnùní iní-ndó sã ñáyiú cuica dándòho ñaha-gá-yu xii-ndo, te cãndeca ñàhá-yu sàháⁿ núú cuè téé cùchiuⁿ-áⁿ? 7 Te ñiu-ní-yu ío càháⁿ cuèhé-yu cuèndá Xítóhó Jesucristú, te nchòhó sa ní nduu-ndo dèhe-gá.

8 Te ìⁿ ndudú cùnùu-gá ní càháⁿ Yá Ndiöxí ní ngódó tnùní núú tütú-gá cächí-xi sá cúú ìní-ó tnàha ñáyiú-o dàtná cúú ìní-ó mèe-o. Te núu ducaⁿ na càda-o te quide váha-o. 9 Dico núu ñá túú cùu iní ìⁿnuu-o cuè tnaha ñáyiú-o, te cuu cuèchi xii-o chí ñá túú quide-o nacuáa càháⁿ Yá Ndiöxí. 10 Te núu ìⁿ ñáyiú ndaunihnu ìⁿ sá càháⁿ Yá Ndiöxí, te dava-ni quidé-yu ña, te ñáyiú-áⁿ ñá túú quidé-yu nàcuáa càháⁿ ndudú Yá Ndiöxí. 11 Te Yá Ndiöxí ní cachí-gá sá téé ndècu ñadìhi-xi vá càháⁿ ndìhi-dé ìngá ñadìhí. Te ñiu-ni-gá ní cachí-gá sá vã cáhni-ó tnàha ñáyiú-o. Te cuèi ñá túú càháⁿ ndìhi-o ìngá ñadìhí, te núu sàhni-o tnaha ñáyiú-o te ñá túú quide-o nacuáa càháⁿ ndudú Yá Ndiöxí. 12 Te nchoo xini ñuhu-xi càháⁿ-ó tnúhu váha te cada ndáá-ó, chí ñá díú ìⁿ sá vèe cùu-xi sá ñí cachí Yá Ndiöxí cada-o. Te mee-gã ní cachí-gá sá cádá ndáá-gá cuèchi-o na sáá nduu. 13 Te nchaa ñáyiú ñá túú cùndahú iní tnàha ñáyiú-xi, te vá cùndahú iní ñàhá-gã xii-yu na sáá nduu càda ndáá-gá cuèchi-yu. Te nchaa ñáyiú cùndahú iní tnàha ñáyiú-xi te Yá Ndiöxí cùndahú iní ñàhá-gã xii-yu na sáá nduu-ãⁿ.

Quindáá iní-ó Yá Ndiöxí te cada váha-o

14 Te nchòhó ñáyiú ndècu ndìhi-í ichi Xítóhó Jesucristú, te núu càchí-ó sã sàndáá iní-ó Yã Ndiõxí te ñá túú quide-o sá vãha, te ñá túú ndèé nándìhi-xi, chi vá nánihí tàhú-ó te núu ducaⁿ na càda-o. 15 Te núu ndèhe-o ìⁿ tñaha ñáyiú-o ñà túú dõõ-yu àdi ñá túú sã cúnchító-yu, 16 te xãhaⁿ-o: “Núhú-n te nducu-n dõó cuihnu-n te nducu-n sã cáxí-n”, xãhaⁿ-o, te ñá túú ñã sãñaha-o, te sá dúcáⁿ quide-o te ñá túú quide váha-o. 17 Te núu càchí-ó sã sàndáá iní-ó Yã Ndiõxí te ñá túú quide váha-o ndècu-o, te vèdana nándìhi-xi.

18 Te ió ñáyiú càchí-yu sá sàndáá iní-yu Yã Ndiõxí, te ió ñáyiú càchí-yu sá méé-ní sã vãha quidé-yu. Te yúhú càchí-í sá núu ñá túú quide-o sá vãha, te ñá túú sàndáá iní-ó Yã Ndiõxí. Te nchoo quide-o sá vãha núu xíãⁿ cútnùní iní-ó sã sàndáá iní-ó-gã. 19 Te ió ñáyiú càchí sá ìⁿdii-ni Yã Ndiõxí ndécú, te váha-ni càháⁿ-yu. Te tñahá yucu ñãvãha ndìhi nchaa espíritú cúnðìhi-xi xiní-xi sá ndécú ìⁿdii-ni Yã Ndiõxí, te yùhú-xi dico ñá túú tñìⁿ-xi tñúhu-gã. 20 Te ió ñìⁿ ðíquí-ó te núu na càchí-ó sã sàndáá iní-ó Yã Ndiõxí, te vá cádá-ó sã vãha. 21 Te ñaní tñahá-ó ndíi Àbrahám téé ní xíndecu ndéé sanaha ñí ngúndecu váha ndíi núú Yã Ndiõxí, chi ní xito ndéé ñáhá-gã xii ndíi núu ndisa sá cáhni ndíi déhe ndíi té Isàác nduu táhú-gã ní cùu, te ðává-áⁿ ñí cutnùní iní-gá sá ió sàndáá iní ñáhá ndíi xii-gã, núu ñá ní ðãña-gã cahni ndíi déhe ndíi. 22 Te ñaha-o sá ndíi Àbrahám ñá díú-ní sã méé-ní sã ñí sàndáá iní ñáhá ndíi xii-gã, chi ní tñìⁿ ndíi tñúhu-gã. 23 Te ducaⁿ ñí quee ndáá-xi ñàcuáa càháⁿ-xi núú tütú Yã Ndiõxí núú càchí-xi: “Ndíi Àbrahám ní sàndáá iní ndíi ní quide ndíi nchaa ñàcuáa ní xãhaⁿ Yã Ndiõxí, te ní ngúndecu váha ndíi núú-gã, te ní cachí-gá sá cúú ndíi ìⁿ téé ió váha tñahá tñúhu ndìhi-gã”, duha càchí-xi núú tütú-gã.

24 Te xíãⁿ cútnùní iní-ó sã ñà díú mèe-ni sá quindáá iní-ó Yã Ndiõxí, chi núu na càda-o ñàcuáa cuu váha iní-gá te ngúndecu váha-o núú-gã 25 ðàtná ní

quide-gá tá Ràháb ìⁿ ñadìhí ní xíndecu ndéé sanaha, chi xíchí-ãⁿ ñí xíndecu-xi ichi díi iní, dico ní tuha-xi ichi Yã Ndiõxí te ní ngúndecu váha-xi núú-gã, chi ní chindee-xi cuè téé israhél cue téé ní xica chluⁿ-gã, te ní sanu ichi ñaha-xi xii-güedé ìⁿ ichi núú vã nánihí ñáhá cuè téé cùu úhú iní ñáhá xii-güedé. 26 Te nchaa ñáyiú càchí sá sàndáá iní Yã Ndiõxí, te ñá túú quidé-yu ñàcuáa càháⁿ-gã ñáyiú-áⁿ cúú-yu ðàtná ìⁿ ñáyiú ní xíhí. Chi ñá túú-gã ndíxí tñú iní-yu nchaa sá cuèhé sá dúhá quidé-yu. Duha sãtnahá-xi cùu nchaa ñáyiú ñá túú cuìní tñìⁿ tñúhu càháⁿ Yã Ndiõxí.

3

Ñàcuáa quide yaa-o

1 Te nchòhó ñáyiú ndècu ndìhi-í ichi Xítóhó Jesucristú, vá ncháá-ndó càni iní-ndó cùu-ndo mestruⁿ dacuàha-ndo ñáyiú tñúhu Yã Ndiõxí chi íí cáá-xí. Chi na quítnahá nduu ñàcuáha-o cuendá núú-gã, te núu ñá túú ní quide ndáá-ó ñá, te vá cúú vãha iní-gá núú-ó. 2 Te nchaa-o ió cuèhé sã ñà túú vãha quide-o. Te nchaa ñáyiú ñá túú càháⁿ tñúhu cuèhé tñúhu duha cúú-yu ñáyiú ñá túú ñã cúmání chi ió ndáá quidè-yu. Te xiní-yu cotnìⁿ-yu mèe-yu, te quide váha-yu núú Yã Ndiõxí. 3 Te ðàtná cuìní-ndó cùu ìⁿ quítì te núu na chìhi-o frenú yuhu-ðì, te cotnìⁿ-o-ðì te ngúnu ichi-ðì, te ducaⁿ sãtnahá-xi cùu ñáyiú sàcótñìⁿ mee-xi, chi ñá túú càháⁿ-yu tñúhu cuèhé tñúhu duha. 4 Te ðàtná cuìní-ndó cùu barcú cuèi ñàhnu vihi-xi, dico òré quéné ñìhi táchí te tündaha-xi ìⁿ xio, dico téé ðàcaca ndacu-dé dáquìhíⁿ-dé-xi ndìhi ìⁿ yutnu sá ðànàni-güedé tímú ndàa núú càchí iní-dé quíhíⁿ-xi. 5 Te ducaⁿ cùu tucu yaa-o chi ió lñhli-xi dico ió cuèhé tñúhu càháⁿ-ó ndìhi-xi. Te ducaⁿ-ni sãtnahá-xi cùu tucu sá lúhá ñùhú chi sãhmi-xi ìⁿ yucu. 6 Te ðìu-ni ducaⁿ sãtnahá-xi cùu yaa-o chi ió cuèhé tñúhu cuèhé tñúhu duha càháⁿ-ó ndìhi-xi, te ðàcuíta ñìhnu ñaha-xi xii-o. Te ió cuèhé cuèchi

quède-o ndihí-xi cuendá sá ñuyíú-a ñuhu tnahá ñuhú tñi yucu ñávaha daticá nihnu ñaha-xi. ⁷ Te ndacu-o cada masú-ó nchaa núu quiti ío ñuyíú cuéi quiti déeⁿ quiti xica núu ñuhú, te cuéi quiti ndava, te cuéi cóo, te cuéi quiti ñuhu xiti ndute lámár, chi ducaⁿ quide dava cue téa ñuyíú-a. ⁸ Dico yaa-o chi vá yóo ñⁿ ndacu cada masú ñáhá xii-xi nacuaa cáháⁿ-ó mée-ni tñuhu váha ndihí-xi, chi mee-ni tñuhu cuéhé tñuhu duha cunu-gá cáháⁿ-ó ndihí-xi. Te cùu-xi datná ñⁿ venènú chi dátü-xi iní-ó. ⁹ Te diu-ni ndihí yaa-o quide cahnu-o Dútú Ndiöxí Yáa cúu Tátá-ó, te diu-ni ndihí yaa-o cáháⁿ úhú-ó cuè tnahá ñáyiu-o. Te xini ñuhu-xi vá dúcáⁿ cada-o, chi mee-gá ní chihí-gá sá xini tñuni-ó ndihí iní-ó, datná cáa mée-gá ñuhú iní-gá. ¹⁰ Te diu-ni yuhu-o quèe tñuhu váha cáháⁿ-ó, te diu-ni yuhu-o quèe tñuhu cuéhé tñuhu duha. Te nchòhó ñáyiu ndècu ndihí-í ichi Xitohó Jesucristú cunaha-ndo sá ñà túú ndùu váha-xi ducaⁿ cada-o. ¹¹ Te ñà túú xini-ndó sá ñⁿ núu quée nihni ndute, te quèe ndute váha te quèe ndute úa-áⁿ. ¹² Te nchòhó ñáyiu ndècu ndihí-í ichi Xitohó Jesucristú, te ñà túú xini-ndó sá ñⁿ yutnu ngúxí, te cùuⁿ aceitúná, àdi xini-ndó sá ñⁿ yoho yaha stilé te cùuⁿ ngúxí. Te ducaⁿ cuéi ñⁿ núu quée nihni ndute, vá cúu quèe ndute váha te quee ndute úhá. Te ducaⁿ sãtnahá-xi cùu yuhu-o chi vá cúu cáháⁿ-ó tñuhu váha te cáháⁿ-ó tñuhu cuéhé tñuhu duha.

Nchaa sá vaha xini tñuni-ó taxi Yá Ndiöxí

¹³ Te núu ndècu ñáyiu túha tnuú-ndó ñáyiu cùnuni iní-xi, te xini ñuhu-xi mee-ni sá vaha cada-yu, ducaⁿ te cutnuni iní-ó sá túha ndisá-yu, te vá cáda cahnú-yu mée-yu. ¹⁴ Te núu nchoo cuédú iní-ó te cuini-ó cunu-o núu tñaha ñáyiu-o, te vá cachi-ó sá túha-o, chi ñà túú quide ndáá-ó te núu ducaⁿ na cada-o. ¹⁵ Chi ñà díú xíáⁿ ní dànehé ñáhá Yá Ndiöxí, chi ñuyíú iha ní cacu nihnu-xi cuendá sá yucu ñávaha dàcahu iní ñáhá-xi.

¹⁶ Te núu ndécú ñáyiu cuédú iní ñáyiu cuini cunu, te yacáⁿ mee-ni ndáhú nàá xíndecú-yu, te ñà túú quide váha-yu, chi mee-ni nchaa sá cuéhé sá dúhá quide-yu. ¹⁷ Te núu ní taxi Yá Ndiöxí sá xini tñuni-ó, te cada váha-o, te cáháⁿ ndihí váha-o nchaa tñaha ñáyiu-o, te tñi-o tñuhu váha cáháⁿ-yu, te cundáhú iní-ó-güé-yu te chindee-ö-yu, te vá caní ñⁿ caní úu iní-ó, te ío cunduu ndáá iní-ó. ¹⁸ Te núu cuini-ó ñà túú ñà cuu cundecu-o ñuyíú-a, te cada váha-o sá cúu-xi tñaha ñáyiu-o cuendá sá ñà túú ñà cuu cundecu-o ndihí-yu. Te ducaⁿ te nguinchicúⁿ dava-gá tñaha ñáyiu-o cada váha-yu.

4

Vá cúu cundecu-o ichi Yá Ndiöxí te cada-o nãndi sá cuéhé sá dúhá

¹ ¿Te xini-ndó ñà cuendá nàá ñáyiu te xisahní tñahá-yu-áⁿ? Te nàa-yu sá tñuhu cuédú iní, chi diu-ni xíáⁿ ñuhú iní-yu, te ñà túú ndècu váha iní-yu.

² Chi cuini-yu cundecu ndihí-yu ñⁿ sá ñà túú ndècu ndihí-yu, te ñà túú nihí-yu núu xíáⁿ xicuu cuédú iní tñahá-yu, te xicuehé tñahá-yu, te caní tñahá-yu, te xisahní tñahá-yu. Te ñà túú nihí-yu sá cuini-yu chi ñà túú xicáⁿ-yu núu Yá Ndiöxí. ³ Te cuéi xicáⁿ-yu ñⁿ sá cuini-yu núu-gã te ñà túú sãñaha-gã, chi ñà túú xicáⁿ-yu ñⁿ sá cúu xii-yu sá vaha, chi ñⁿ sá ná ndihí-yu núu cáda-yu nchaa sá cuéhé sá dúhá xicáⁿ-yu, núu xíáⁿ ñà nihí-yu.

⁴ Te nchaa ñáyiu ducaⁿ xíquide ío cùu sáa iní-yu núu Yá Ndiöxí. Te naha-ndo sá ncháá ñáyiu cùdí iní-xi cundecu ichi cuéhé ichi duha cùu úhú iní-yu Yá Ndiöxí, chi vá cúu cundecu-o ichi cuéhé ichi duha, te cundecu-o ichi-gá.

⁵ Te ñà túú díu ducaⁿ cáháⁿ-xi núu tütú Yá Ndiöxí núu cachi-xi: “Yá Ndiöxí ní taxi-gá Espiritú-gá ndécú ndihí-o. Te Espiritú-gá-áⁿ cuini-xi sá mée-ní-gã cuhuⁿ iní-ó”, duha cachi-xi núu tütú-gá. ⁶ Te Yá Ndiöxí ío chindee ñaha-gá cuendá cada ndáá-ó núu-gã datná cachi tucu-xi núu tütú-gá núu

càchí-xi: “Yá Ndiöxí ñá túú cùu váha iní-gá núú nchàa ñáyiú quide cahnu mee-xi, dico chindee-gá cue ñáyiú ndàhú iní-xi”, duha càháⁿ-xi núú tùtú-gá. ⁷ Te cada-ndo nàcuáa càháⁿ Yá Ndiöxí. Te vá cáda-ndó nàcuáa cuini yucu ñávàha, ducaⁿ te xóo cóo ndéé ñáhá-xí xii-ndo. ⁸ Te tñi-ndo tñuhu càháⁿ Yá Ndiöxí te cundecu ndihi ñaha-gã xii-ndo. Te nchaa nchòhó ñáyiú ndècu ichi cuehé ichi duha dañà-ndo ìchi-áⁿ te cada váha-ndo. Te nchaa nchòhó ñáyiú sàni iní cunu cuechi núú Yá Ndiöxí te quide-ni-ndo nchaa sá cuèhé sá dúhá, te ñá túú quide váha-ndo núu ducaⁿ, chi xini ñuhu-xi sá càcáⁿ-ndó núú Yá Ndiöxí sá ná ndádá ndòo ndada nine-gá iní-ndó. ⁹ Te ndixi cuéchi iní-ndó nchàa sá quidé-ndó ndèé ndáhyú ndisa-ndo sá ndihú iní-ndó, te ñá díú dà cudí iní-ndó. ¹⁰ Te náhmá-ndó núú Yá Ndiöxí nchaa sá ñi quide-ndo, te ngúndecu váha-ndo núú-gã.

Vá càháⁿ-ó nchàa sá quidé tñaha ñáyiú-o

¹¹ Te nchòhó ñáyiú ndècu ndihi-í ichi Xítohó Jesucristú, vá cuátnuhu tñaha-ndo, chi nchaa ñáyiú sàtnuhu tñaha dicó-ni ndàa nuú-yu ndèhe tñahá-yu, te ñá túú càháⁿ váha-yu cuèndá tñuhu Yá Ndiöxí sá sánú ìchi ñaha xii-yu nàcuáa cundecú-yu, chi dàquee tihú-yu tñuhu-áⁿ. Te núu càchí-ndó sá ñà túú càháⁿ váha tñuhu Yá Ndiöxí, te xiáⁿ queé-xí sá ñà túú sàndáá iní-ndó tñuhu càháⁿ-gá, te cuini-ndó cunu tñuhu-ndo núú tñuhu-gá. ¹² Te mee Yá Ndiöxí ní cachí-gá nàcuáa cada-o, te diu-ni mee-gã càháⁿ-gá te núu ní quide váha-o, àdi ñá túú ní quide váha-o. Te diu-ni mee-gã dàcácu nihnu ñaha-gã xii-o núú ùhú núú ndàhú, te diu-ni-gá daquihíⁿ ñáhá-gã xii-o núú ùhú núú ndàhú-áⁿ te núu vá cáda váha-o. Te nchoo ñà túú ná cúú-ó, te núu mee-ni nchàa sá quidé tñaha ñáyiú-o cundehe-o.

Ñá túú cùnuni iní-ó ñàsa túndaá-ó ìngá nduu

¹³ Te dava nchòhó càchí-ndó sá vítná àdi tneé quihíⁿ-ndó ìⁿ ñuu, te yàcáⁿ cundecu-ndo ìⁿ cuía cada-ndo ìⁿ ndáhú te níhí-ndó dñhúⁿ. ¹⁴ Te ni ñà xini-ndó ná cúú sá yáha-ndo vitna àdi tneé. Te nchoo cùu-o datná ìⁿ vícò núhú, chi vícò-áⁿ tñavíí ndéhé-ó te tna tnaa-gá sa ní ndòñhú-xí. Ducaⁿ sàtnahá-xi cùu nchoo chi ìⁿ úú nduu duha vèxi-o ñuyíú-a te ndoñuhu-o. ¹⁵ Te núu sàndáá iní-ó Yá Ndiöxí te duha càháⁿ-ó: “Te núu Ndiöxí ná càchí-gá sá cundècu tnaa-o ñuyíú-a te cada chiúⁿ-o”, duha cachí-ó. ¹⁶ Dico mee-ndo chi ío ñí iní-ndó cuini-ndó cunu tñuhu-ndo núú Yá Ndiöxí, te ñá túú nduu váha-xi sá dúcáⁿ quide-ndo. ¹⁷ Te núu xini-ó càda-o sá váha te ñá túú quide-o, te cùu-xi ìⁿ cuéchi núú-gã.

5

Tñuhu sá dátuha ñaha xii nchaa ñáyiú cuica ñà túú sàndáá iní tñuhu Yá Ndiöxí

¹ Te nchòhó ñáyiú cuica ñáyiú cuihna iní-xi cundedóho-ndo tñuhu na càháⁿ-í-a. Vitna ngúita-ndo ndihú iní-ndó, te ndáhyú víhí-ndó, chi quixi ìⁿ tñúndòho cuendá-ndó te ndoho víhi-ndo. ² Te nchaa sá ndécú ndihi-ndo ndihi cuita tiu quihíⁿ, te quee tíquidi dóo-ndó, ³ te díhúⁿ-ndó caxi cudi ñuhu. Te xiáⁿ cuita naquiní ndéé-ndó tñúndòho sá ñà túú quide váha-ndo. Te ndihi-ndo ndihi díhúⁿ-ndó sá ñi taxúha-ndo, chi vitna sa ta cùyatni sáá nduu ndihi ñuyíú-a. ⁴ Te nchaa cue téé ní quide chiúⁿ núú chíúⁿ-ndó ñi ndatnúhu-ndo ndihi-güedé nàcuáa cháhu-ndo-güedé ní cùu, te ñá túú ní cháhu-ndo-güedé nàcuáa ní xáhaⁿ-ndo xii-güedé, núu xiáⁿ ío ndècuéchi-ndo. Te Yá Ndiöxí Yaá ndécú àndiu ní tecú dóho-gá nàcuáa càháⁿ-güedé sá ñi dándahú-ndó-güedé. ⁵ Te nchòhó ñáyiú cuica, sá ndécú váha-ni-ndo cundeé iní-ndó, núu quide-ni-ndo nchaa sá vèxi iní-ndó. Te cùu-ndo datná ìⁿ quiti nùcuíhnu mee-ni xèxi-di, te sáá nduu sàhni-güedé-di. Te ducaⁿ sàtnahá-xi cùu nchòhó chi

ndècu váha-ndo vitna, te sáá ìⁿ nduu nàcháhu-ndo ncháa sá quidé-ndó nùú Yă Ndiöxí te núu vá quindáá iní-ndó-gă. ⁶ Te quide úhú iní-ndó sàhni-ndo cue ñáyiú quide ndáá núú Yă Ndiöxí, te ñá túú nă quidě-yu.

Cunduu càhnu iní-ó te cáháⁿ ndìhi-o Yă Ndiöxí

⁷ Te nchòhó ñáyiú ndècu ndìhi-í ichi Xítohó Jesucrístú, cada ndee-ni iní-ndó cùndetu-ndo ndéé ná quixi tucu-gă ñuyú-a, te cada-ndo dàtná quidé ncháa ñáyiú chìhi tatá chi sàcùndetú-yu ndéé cúúⁿ dăú te chihí-yu. Te cùndee-ni iní-yu sàcùndetú-yu ndéé cúúⁿ-gă dăú te cùu itú-yu, te ndùdí iní-yu. ⁸ Te ducaⁿ càda nchohó tucu cada ndee iní-ndó cùndetu-ndo, chi sa ta cùyatni nduu quixi tucu Xítohó Jesucrístú. ⁹ Te duha ndùu tnúhu càháⁿ-í núú nchòhó ñáyiú ndècu ndìhi-í ichi Xítohó Jesucrístú, vá ndàcáⁿ cuéchi núú tnáhá-ndó te núu nása cùu ndecu-ndo, chi ñá cuéhé-gă nduu cùmání te quixi Crístú nacuaca ñaha-gă xii-o cùndecu-o núú Yă Ndiöxí, te mee-gă cada ndáá-gă cuéchi-o. ¹⁰ Te nchòhó ñáyiú ndècu ndìhi-í ichi Xítohó Jesucrístú, ndacu iní-ndó nàcuáa ní quide nchaa cue téé ní xóo cáháⁿ tnúhu Yă Ndiöxí ndéé sanaha sá ío càhnu ní xínduu iní-güedé cuèi nándi ní ndoho-güedé. ¹¹ Te cùtnuní iní-ó sá cúú-ó ñáyiú ío váha táhú-xi te núu na càda cahnu iní-ó ncháa sá ná yáha-o cuèndá Yă Ndiöxí. Te nàha-ndo sá ndii Jöb ducaⁿ ní quide ndii, chi nándi sá ñi yáha ndii te ní quide càhnu iní ndii. Te sátá ñi yáha ní ndoho ndii, te ío cuéhé sá ñi sáñaha Yă Ndiöxí xii ndii. Chi ío váha iní-gă te ío cùndahú iní-gă nchaa ñáyiú ío càhnu iní-xi.

¹² Te nchòhó ñáyiú ndècu ndìhi-í ichi Xítohó Jesucrístú, chí cùndédóho tucu tnúhu na càháⁿ-í-a, chi ío xini ñuhu-xi. Vá cácu nèhe-ndo Yă Ndiöxí òré cuiní-ndó sá cùtnuní iní ñáyiú sá ndàá cada-ndo ìⁿ sá càháⁿ-ndó. Te nì vá cácu nèhe-ndo sá càchí-yu cùu ndiöxí cadúha cue téé ñuyú-a. Te núu ìⁿ sá xicáⁿ tnàha ñáyiú-ndo nùú-ndó

te cúñaha-ni-ndo te núu cuu àdi sá vă cúú. Te vá cácu nèhe-ndo Yă Ndiöxí, ducaⁿ te vá dándòho ñaha-gă xii-ndo.

¹³ Te núu ndòho-ndo te cáháⁿ ndìhi-ndo Yă Ndiöxí, àdi te núu ndècu váha-ndo te cudí iní-ndó te chiñuhu-ndo-gă, ¹⁴ àdi núu cùhú-ndó te cana-ndo cuè téé yindaha ñaha xii-ndo nacuáa ndècu-ndo ichi Yă Ndiöxí cuèndá tee-güedé acití díquí-ndó, te cácáⁿ táhú-güedé núú-gă cuèndá-ndó dàtná ní cachí mée-gă cunduu. ¹⁵ Te núu quindáá ndisa iní-ndó sá ndúha-ndo, te ndúha-ndo chi Yă Ndiöxí cada tátna ñaha-gă xii-ndo, àdi núu ní quide-ndo ìⁿ sá ñà túú tàú-ndó càda-ndo núú-gă te cada càhnu iní-gă cuéchi-ndo. ¹⁶ Te xini ñuhu-xi cùtnúhu tnàha-ndo òré ñá túú cùndáá-ndó nùú Yă Ndiöxí cuèndá chindee tnúhu tnàha-ndo cáháⁿ ndìhi-ndo-gă te xocàni-gă cuéhé-ndó, te cada càhnu iní-gă nchaa sá ñà túú vâha ní quide-ndo te núu cundecu váha iní-ndó. Te nchaa ñáyiú ndècu váha iní-xi núú Yă Ndiöxí na càcáⁿ-yu ìⁿ sá cuiní-yu núú-gă te nihí-yu, chi sáa tnúhu-yu núú-gă. ¹⁷ Te té Èliás, téé ní xíndecu ndéé sanaha ñi cáa-dé dàtná cáa nchòo. Te ní cáháⁿ ndìhi-dé Yă Ndiöxí ñi yùhu ñi iní-dé ní xáhaⁿ-dé xii-gă sá vă dácùⁿ-gă dăú, te ní tñi-gă tnúhu ní cáháⁿ-dé, te ñá ní dácùⁿ-gă dăú ùní cuía dava. ¹⁸ Te dătnuní ducaⁿ te ní cáháⁿ ndìhi tucu té Èliás-áⁿ Yă Ndiöxí sá dácùⁿ-gă dăú te ní cuuⁿ, te ní cuu tucu nchaa sá ñi xitu-güedé.

¹⁹ Te nchòhó ñáyiú ndècu ndìhi-í ichi Xítohó Jesucrístú, te núu dava-ndo sà ndecu-ndo ichi Yă Ndiöxí ní cùu te ní dáñá-ndó, te ndècu tucu dava-ndo nadaxinu iní tnáhá-ndó nùcùndecu tucu-ndo ìchi-gă, ²⁰ te núu ducaⁿ na càda-ndo te dácácu nihnu tnàha-ndo núú ùhú núú ndàhú, te mee Yă Ndiöxí cada càhnu iní ñáhá-gă xii-ndo cuèi ío cuéhé cuéchi ní quide-ndo.

TUTÚ DÍHNA NUU NÍ CADÚHA TÉ PÈLÚ

Té Pèlú cádúha-dé tutú sá cúu-xí cue ñáyiú sàndáá iní ñáhá xii Yá Ndiöxí

¹ Yúhú té Pèlú ní tendaha ñaha Xítohó Jesucristú xicá cùu-í càháⁿ-í tnúhu-gá, te cádúha-í tutú-a sá cúu-xí nchòhó ñáyiú xínchíté nuu ndècu distritú Pòntó, ndihí distritú Gàlaciá, ndihí distritú Capadociá, ndihí distritú Àsiá, ndihí distritú Bitiniá. ² Chi Dútú Ndiöxí ní cachí-gá sá cúu-ndó dèhe-gá ndéé cútñahá vátá ngáva-gá ñuyú, te Espiritú-gá ní quide-xi ndècu yíñuhu-ndo núu-gá vitna. Te ní cachí-gá sá cúu-ndó dèhe-gá cuendá tñi-ndo nchàa tnúhu càháⁿ Xítohó Jesucristú, ndihí cuendá nduu ndoo nduu nine iní-ndó, chi ñi cuendá-áⁿ ní xihí Xítohó Jesucristú. Te xicáⁿ táhù-í núu Yá Ndiöxí sá ño na chindee chitúu ñaha-gá xii-ndo cuèi vitna te cuèi núu cuàháⁿ núu vèxi, te ñi-ni-gá ná cádá te ío váha cuu iní-ndó cùndecu-ndo.

Tnúhu ndee iní sá ndécú ndihí ñáyiú sàndáá iní ñáhá xii Yá Ndiöxí

³ Te vitna chí ná càchí-ó sá ño càhnu cuu Yá Ndiöxí Yaá cúu Tátá Xítohó Jesucristú, chí ñi-gá ío ní cundàhú iní ñáhá-gá xii-o núu xíáⁿ ní quide-gá sá nchóó ní nduu-o dàtná ñiⁿ ñáyiú saa vitna. Te ducaⁿ ní quide ñaha-gá xii-o cuendá sá Xítohó Jesucristú ní xihí-gá te ní ndoto-gá. Te cuendá sá ní nduu-o dàtná ñiⁿ ñáyiú saa, xíáⁿ ní ngúndecu ndihí-o tnúhu ndee iní ⁴ sá cùndècu ndihí-o-gá ní caa ní quihíⁿ, chí ducaⁿ ní cachí-gá cunduu. Te yàcáⁿ vá quini-gá-ó ní ñiⁿ sá cuèhé sá dúhá, te ío cudíⁿ iní-ó cùndecu-o ndihí-gá ní caa ní quihíⁿ. ⁵ Te sá sàndáá iní-ó Yá Ndiöxí, núu xíáⁿ coto ñaha-gá xii-o ndéé ná sáá nduu nàqueheⁿ cuendá ñáhá-gá chí ío càhnu cuu-gá.

⁶ Te xíáⁿ ío cudíⁿ iní-ndó ndècu-ndo, te cuèi nándi ndòho-ndo ndècu-ndo dico sacú-ni nduu ducaⁿ ndòho-ndo. ⁷ Te òré ná cádá càhnu iní-ndó

yáha-ndo nchàa sá ná càda ñaha ñáyiú xii-ndo, te ducaⁿ te cutnùni sàndáá ndisa iní-ndó Yá Ndiöxí, te sá dúcáⁿ sàndáá iní-ndó Yá Ndiöxí ío-gá váha dàcúxí dñhúⁿ cuàáⁿ chí xíáⁿ ñá túu cùdí-xi. Te cuèi ducaⁿ dico xito ndéé náhí-ni-güedé núu ndisa cùu-xi dñhúⁿ cuàáⁿ. Te ducaⁿ sàtnahá-xi cùu nchohó cuendá nchaa sá ndòhó-ndó, te na sáá nduu quixi tucu Xítohó Jesucristú te cúñaha-gá xii-ndo: “Ío váha ní quide-ndo, te vitna ío càhnu cuu-ndo, te tàú-ndó nùcùndecu váha-ndo”, duha cúñaha-gá xii-ndo.

⁸ Te vitna ío cùu iní-ndó Xítohó Jesucristú cuèi vátá quini-gá-ndó-gá, te ducaⁿ ío sàndáá iní-ndó-gá, te ío cudíⁿ iní-ndó te súúni ní ñá cútñúni iní-ndó ñasa cunduu tnúhu càháⁿ-ndó sá dúcáⁿ ío cudíⁿ iní-ndó ⁹ cuendá sá ní naníhí táhú-ndó, chí ní sàndáá iní-ndó-gá.

¹⁰ Te cue téé ní xóo càháⁿ tnúhu Yá Ndiöxí ndéé sanaha ní cachí-güedé nàcuáa cada-gá cundàhú iní ñáhá-gá xii-o vitna. Te cue téé-áⁿ ío váha ní dàcuáhá-güedé nàcuáa cada Yá Ndiöxí dàcácu nihnu ñaha-gá xii-o vitna. ¹¹ Te Espiritú Xítohó Jesucristú ní ngúndecu ndihí cue téé-áⁿ ní xáhaⁿ-xi xii-güedé nàcuáa ndoho-gá, te ní xáhaⁿ tucu-xi xii-güedé sá sáta ná yáha ndoho-gá te ío cunuu-gá ndihí Yá Ndiöxí. Te ío ní sani iní-güedé núu ná nduu sáá ducaⁿ càda-xi, ndihí nchaa nándi-gá cúu sá cádá-xi. ¹² Te Yá Ndiöxí ní xáhaⁿ-gá xii-güedé sá ncháá tnúhu váha càháⁿ-güedé vá cúu-xí cuendá méé-güedé, chí cuendá nchoo cuè ñáyiú ndècu ñuyú-a vitna cùu-xi. Te ñi-ni tnúhu-áⁿ cúu tñuhu càháⁿ nchúhú cue téé càháⁿ tnúhu Yá Ndiöxí núu-ndó. Te Espiritú sá ní taxi Yá Ndiöxí ndécú ndihí-o chindee ñaha-xi xii-ndí càháⁿ-ndí tnúhu-gá. Te cue espíritú xínú cuèchi núu Yá Ndiöxí ío cuini-xi quini ndáá-xi nchaa nàcuáa cuáháⁿ tnúhu-áⁿ.

Yá Ndiöxí càchí-gá sá cádá-ó mèe-ni sá vãha

¹³ Te sá dúcáⁿ ío váha ní quide ñaha Yá Ndiöxí xii-ndo xíáⁿ xini ñuhu-xi ío váha cuáha-ndo cuendá nàcuáa cundecu-ndo te vá cáni iní-ndó

càda-ndo ni ìⁿ sá cuèhé sá dúhá, te ío quíndáá iní-ndó sǎ Yǎ Ndiǒxí cada váha ñaha-gǎ nduu na quíxi tucu Xítóhó Jesucristú. ¹⁴ Te ío tñi-ndo nchàa tnúhu càháⁿ Yǎ Ndiǒxí, te vá cùhúⁿ-gǎ iní-ndó nǎndi sá cuèhé sá dúhá sǎ ní xúhuⁿ iní-ndó cùtnàhá vátá cùndecu-gǎ-ndó ichi-gǎ te ní vǎ cáda-ndó. ¹⁵ Te cada-ndo mèe-ni sá váha cundecu-ndo dàtná quidé mèe Yǎ Ndiǒxí Yaá ní cáháⁿ ñáhá xii-o cundecu-o ndihi-gǎ. ¹⁶ Te càchí-gǎ núú tütú-gǎ: “Cada-ndo mèe-ni sá váha cundecu-ndo, chi ducaⁿ quíde yúhú”, duha càchí-gǎ núú tütú-gǎ.

¹⁷ Te Yǎ Ndiǒxí cada ndáá-gǎ cuéchi nchaa ñáyiú, te vá cáda cuèndá-gǎ cuéi náí ñáyiú cùu-yu, te nchòhó càchí-ndó sǎ díú Tǎtá-ndó cùu-gǎ te ndáá, núú xiǎⁿ xíní ñuhu-xi canehe-ndo sá yíñuhu núú-gǎ ndi nchàa nduu cundecu-ndo ñuyíú-a. ¹⁸ Te diu-gǎ ní dácǎcu nihnu ñaha-gǎ xii-ndo ìⁿ ichi sá ñà túú nàndíhi ní sanu ichi ñaha cué ñaní tnáhá-ndó ní xíndecu ndéé sanaha ní cùu, te nchòhó sa nàha-ndo sá sǎ dúcáⁿ ní quíde ñaha Yǎ Ndiǒxí ní dácǎcu nihnu ñaha-gǎ xii-ndo ichi-áⁿ ñà túú ní chǎhu-gǎ ní ìⁿ díhúⁿ cuàáⁿ, te ní ìⁿ díhúⁿ cuixíⁿ sá ndíhí nihnu ñuyíú-a cuèndá-ndó. ¹⁹ Chi Xítóhó Jesucristú ní quixi-gǎ ní sati níñí-gǎ, te ní xíhí-gǎ núú cùrúxí cuèndá sá nchóo nàníhí tàhú-ó, te cùu-gǎ dàtná ìⁿ mbéé quiti ío váha iní-xi, quiti càndoo canine. ²⁰ Te ducaⁿ ní ndoho Xítóhó Jesucristú, chi ducaⁿ tnáhí ndéé tñuní ndoho-gǎ ndéé cùtnàhá vátá ngǎva-gǎ ñuyíú. Te ducaⁿ ní yáha-gǎ cùtnàhá ní quixi-gǎ òré vitna cùmání sǎá nduu nàa ñuyíú-a cuèndá nchoo cùu-xi sá váha xii-o vitna. ²¹ Te nchòhó sa nihí-ndó tnúhu nàcuáa ní yáha Xítóhó Jesucristú cùtnàhá ní quixi-gǎ ñuyíú-a, núú xiǎⁿ sàndáá iní-ndó Yǎ Ndiǒxí. Te Yǎ Ndiǒxí ní dándótó-gǎ Xítóhó Jesucristú, te sátá ní dándótó ñaha-gǎ te ní cachí-gǎ sá ío càhnu cuu Xítóhó Jesucristú. Te sá dúcáⁿ ní cuu, xiǎⁿ ío sàndáá iní-ndó Yǎ Ndiǒxí, te ní taxi-gǎ tnúhu ndee ìní ndécú

ndihi-ndo sá sàá nduu cùndecu-ndo ndihi-gǎ ní caa ní quíhíⁿ.

²² Te Espíritú Yǎ Ndiǒxí ní quíde-xi te ní sàndáá iní-ndó tnúhu-gǎ, te xiǎⁿ ní nduu ndoo ní nduu nine iní-ndó, te cùu iní tnáhá ndisa-ndo nacúaa ndecu-ndo ichi Yǎ Ndiǒxí, te xíní ñuhu ndisa-xi sá ío ní yúhu ní iní-ndó cùu iní tnáhá-ndó ìⁿ ìⁿ-ndo. ²³ Te nchòhó ní nduu-ndo dàtná ìⁿ ñáyiú saa sá cuèndá tnúhu Yǎ Ndiǒxí, te tnúhu-áⁿ candeca-xi iní-ndó ní caa ní quíhíⁿ, te vá ìⁿ ndùu ndihi nihnu-xi, te ñá díú cuèndá ñáyiú ñuyíú-a ní ndùu-ndo ìⁿ ñáyiú saa chi cuèndá tnúhu-gǎ. ²⁴ Chi núú tütú Yǎ Ndiǒxí càchí-xi:

Nchaa ñáyiú ndècu ñuyíú-a cùu-yu dàtná cùhú, chi cùhú-áⁿ tnaa-ni cùdí-xi te xíhí-xi, ducaⁿ sǎtnahá-xi cùu-yu.

Te nchaa sá ndécú ndíhí-yu cùu-xi datná ìⁿ itá cùhú-áⁿ, chi itá-áⁿ tnaa-ni tucu cùdí-xi te ndàhvá-xi, ducaⁿ sǎtnahá-xi cùu nchaa sá ndécú ndíhí-yu.

²⁵ Dico tnúhu Yǎ Ndiǒxí chi vá náá tnáhí-xi, chi duha-ni ndècu-xi, te diu-ni duha cundecu-xi ní caa ní quíhíⁿ.

Duha càchí-xi núú tütú-gǎ. Te diu tnúhu-áⁿ ní dánèhé ñáhá nchùhú cue téè càháⁿ tnúhu Yǎ Ndiǒxí xii-ndo.

2

¹ Te xiǎⁿ xíní ñuhu-xi dañá-ndo nchaa núú sǎ cuèhé sá dúhá, te dañá-ndo ichi tnúhu ndehnde, te dañá-ndo vǎ dándàhú-gǎ-ndó mèe-ndo sá quíde vǎha-ndo, te dañá-ndo ichi cuédú íní, te dañá-ndo nchàa tnúhu yiti. ² Te cada-ndo cuèndá sá cùu-ndó dàtná cue landú yíquíⁿ vitna sadi camá, chi landú-áⁿ mee-ni sàdi-güexi te sàhnu-güexi. Te cada iní-ndó sǎ dúcáⁿ càda-ndo chi xíní ñuhu-xi sá ío cuhuⁿ iní-ndó dàcuaha-ndo tnúhu Yǎ Ndiǒxí, chi xiǎⁿ cùu-xí mèe-ni tnúhu váha, te ducaⁿ te cuita cuehnu nihnu-ndo ichi-gǎ quíhíⁿ ndéé ná sàá nduu cùndecu-ndo núú ndécú-gǎ. ³ Te ducaⁿ xíní ñuhu-xi cada-ndo, chi nchòhó sa ní cutnùní ndisa iní-ndó sǎ Yǎ Ndiǒxí ío váha iní-gǎ.

Xítohó Jesucristú cúu-gă dâtná ìⁿ yúú

⁴ Te ío nanducu ñihnu-ni-ndo Xítohó Jesucristú Yaá quidé nâcuáa naníhí tâhú-ó. Te ðiu-gá ní cuu-gá dâtná ìⁿ yúú sã ñà túú nândihí sá cúu-xí ñâyíu ñuyíú-a, chi ní dáquéé tîhú ñáhã-yu xii-gá. Dico Yá Ndiöxí ní cachí-gá sá Xítohó Jesucristú cúu-gă dâtná ìⁿ yúú sã ïo-gá váha, chi ío cùnûu-gá. ⁵ Te nchòhó sa ní naníhí tâhú-ndó, te ío-gá chí nándùcu nihnu Yá Ndiöxí cuendá cuu ìⁿnuu-ndo cùndecu-ndo ndihí Espíritú-gá. Te núu ducaⁿ na càda-ndo te cuu-ndo dâtná yúú vâha dàcaa-güedé dava vehe, te cuu tucu-ndo dâtná cue dútú ní xinu cuechi núú Yá Ndiöxí ndéé sanaha, nâcuáa ñá túú nã cumání-ndó núú-gă, chi nchaa cue téé-áⁿ ní xóo cuáha ñaha-güedé sá ní xóo nduu táhú-gă. Te nchòhó vitna tàú-ndó càda-ndo nchaa nâcuáa càháⁿ-gá, te nduu vétú iní-gá. Te ducaⁿ càda-ndo chí ndècu-ndo ndihí Xítohó Jesucristú.

⁶ Te Yá Ndiöxí càchí-gá núú tûtú-gá: Yúhú taxi ndecu-í ìⁿ Yaá ñuú Siôn, te cuu-gá dâtná ìⁿ yúú vâha sá sánútnî-güedé xíquí cimièntú ìⁿ vehe, chi yúhú ní cachí-í sá Yáa-áⁿ ío cunuu-gă.

Te nchaa ñâyíu quindáá iní ñáhã xii-gá vá ìⁿ ndùu ndixi cuèchi iní-yu sá dúcáⁿ sândáá iní ñáhã-yu xii-gá.

Duha càchí-gá núú tûtú-gá. ⁷ Te nchòhó ñâyíu sândáá iní ñáhã xii Xítohó Jesucristú ío cùu iní-ndó-gă, te nchaa ñâyíu ñá túú sândáá iní ñáhã xii-gá quidé-yu dâtná càháⁿ-xi núú tûtú Yá Ndiöxí núú càchí-xi:

Yúú sã ní dáquéé tîhú cue téé dàcaa vehe, xiãⁿ cúu-xí yúú sã ïo-gá nândihí vitna.

Duha càchí-xi núú tûtú-gá. Te yúú-ãⁿ cada iní-ó sã cúu-xí Xítohó Jesucristú, chi ní dáquéé tîhú ñáhã-güedé xii-gá.

⁸ Te càchí tucu-xi ìngá xichi núú tûtú Yá Ndiöxí:

Yúú-ãⁿ nguñenu ñâyíu te nduá-yu.

Duha càchí-xi núú tûtú-gá. Te tnúhu-áⁿ quée-xí sã ïo quide sáá iní

ñâyíu núú-gă, chi ñá túú cuiní-yu tnîi-yu tnúhu càháⁿ-gá, te ducaⁿ tnàhí ndéé tnuní sá ncháá ñâyíu ñá túú cuiní tnîi tnúhu càháⁿ-gá, te ío cùu sáá iní-yu núú-gă.

Ñâyíu ndècu ndihí Yá Ndiöxí

⁹ Te nchoo cùu-o ñâyíu sa ní dáquéé ðîiⁿ ñaha Yá Ndiöxí xii-o cuendá cundecu-o ndihí-gá, te cùu-o dútú xínú cuèchi-o núú-gă, te mee-gă cúu-gă Yaá ío cùnûu, te cùu-o ñâyíu quide ndáá xîndecu ichi-gá te cùu tucu-o ñâyíu yîndaha-gá. Te ducaⁿ ní quide ñaha-gă xii-o cuendá sá cûñaha-o xii nchaa ñâyíu sá ïo càhnu cuu-gá, te ío vâi núú sã vâha quide-gá, te ðiu-gá ní quide ní dáñá-ó nchaa ichi cuehé ichi duha ndècu-o ní cuu, te ní sanu ichi ñaha-gă xii-o ìⁿ ichi váha, te vitna cùtnuní iní-ó sã ïo càhnu cuu-gá.

¹⁰ Te nchoo cùu-o ñâyíu ñá túú ndècu ndihí Yá Ndiöxí ní cùu, dico vitna ní ngúndecu ndihí-o-gă, te dàvá-áⁿ vâtá sâá-gá nduu càda váha ñaha-gă xii-o, dico vitna sa ní sáá nduu quide váha ñaha-gă xii-o, chí ío cùndahú iní ñáhã-gă.

Cada váha-o cùndecu-o cunu cuechi-o núú Yá Ndiöxí

¹¹ Te nchòhó ío cùu iní ñáhã-í xii-ndo, te càchí tnúhu-í xii-ndo sã nchóó cùu-o datná cue ñâyíu ndècu tnaduha ìⁿ ñuú, te ducaⁿ sâtnahá-xi cùu-o chí tnaa-ni ndècu-o ñuyíú-a, te sáá nduu ndùu táhú-ó cùndecu-o núú ndécú Yá Ndiöxí táxi tnùnî-gá, te xiãⁿ càháⁿ ndàhú-í núú-ndó sã vã cáda-ndó ñî ìⁿ sá cuèhé sá dúhá sâni iní-ndó, chí nchaa xiãⁿ ñá túú cùu-xi sã vâha sá cúu-xi-ndó. ¹² Te cada váha-ndo cùndecu-ndo núú nchaa ñâyíu ñá túú ndècu ichi Yá Ndiöxí, te cuéi na càháⁿ ñâyíu sá nchòhó nchìcúⁿ nihnu-ndo ichi cuehé ichi duha, dico quiní-yu nchaa sá vâha quide-ndo, ðico na sâá nduu dândixi túu Yá Ndiöxí iní-yu sã ñà túú quide váha-yu ndécú-yu, te dàvá-áⁿ cachí-yu sá quidé vâha-ndo ndècu-ndo, te cada càhnú-yu Yá Ndiöxí.

¹³ Te Xítohó Jesucristú cuiní-gá sá nchòhó ío quindáá iní-ndó nchaa cue

tée cùchiuⁿ taxi tnuní ñáhá xii-ndo, te ducaⁿ-ni quindáá iní-ndó cuèi mee tée cùnui vihi-gá yíndaha ñaha xii ñáyiu. ¹⁴ Te ducaⁿ-ni quindáá iní-ndó nchàa dava-gá cue tée cùnui, chi Yá Ndiöxí ducaⁿ ñi cachí-gá cunduu sá cuè tée-áⁿ cada ndáá-güedé nchaa cuéchi ñáyiu quide cuehé quidé dùha ndecu, te cáháⁿ váha-güedé cuendá nchaa ñáyiu xiquide váha ndècu. ¹⁵ Te Yá Ndiöxí cuini-gá sá cádá váha-ndo cundecu-ndo cuendá nchaa ñáyiu ío ñi ñíquí-xi cáháⁿ cuèhé cuendá-ndó sá ndécú-ndó ichi Yá Ndiöxí vá ñihí-gá-yu tnúhu cáháⁿ-yu.

¹⁶ Te nchòhó, Yá Ndiöxí ní quide-gá sá cúu-ndó ñáyiu cuu cada nàcuáa véxi iní mee-xí, dico ñá díú sá dúcáⁿ ñi quide ñaha-gá xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sá cúu-ndó ñáyiu xinu cuechi núu Yá Ndiöxí. ¹⁷ Te canehe-ndo sá yíñuhu núu nchàa ñáyiu, ñihí núu tée cùnui vihi yíndaha ñaha xii-yu, te cuu iní tnáhá ndè mee-ndo nacuáa ndècu-ndo ichi Yá Ndiöxí, te ío canehe-ndo sá yíñuhu núu-gá.

Nchaa nàcuáa ndoho-o cundecu-o ichi Xítohó Jesucristú

¹⁸ Te nchaa nchòhó ñáyiu xinu cuechi canehe-ndo sá yíñuhu núu cuè patrón-ndó, te quindáá iní-ndó càda-ndo nchaa chiuⁿ tahu-güedé. Te ñiⁿ-ni càda-ndo núu cuè tée váha iní-xi, ñihí núu cuè tée ío cuihna iní-xi. ¹⁹ Te núu nchòhó ná càda ndee iní-ndó ndòho-ndo nchaa sá ñà túu tàú-ndó ndòho-ndo cuendá sá cuini-ndó cundáá-ndó núu Yá Ndiöxí ñá, te ío nduu vétú iní-gá. ²⁰ Te núu nchòhó ní quide-ndo ñiⁿ cuéchi, te sàhni iní-ndó dandoho ñaha ñáyiu xii-ndo, ¿te ná sá váha cùu xíáⁿ-i? Dico núu nchòhó ná cádá ndèe iní-ndó ndòho-ndo nchaa sá cádá ñaha ñáyiu xii-ndo sá cuendá sá quidé-ndó sá váha ña, te núu ducaⁿ na càda-ndo te cùu-xi ñiⁿ sá váha núu Yá Ndiöxí. ²¹ Te Yá Ndiöxí ní cachí-gá sá cádá ndèe iní-ó ndòho-o nándi ndòho-o sá cuendá sá quidé-ó sá váha, chi ío ní

ndoho Xítohó Jesucristú cuendá-ó, te ducaⁿ tàú-ó cànchicúⁿ nihnu-o càda ndee iní-ó ndòho-o nándi ndòho-o, chi ducaⁿ ñi quide-gá. ²² Te mee-gá ñá túu quide-gá ni ñiⁿ sá cuèhé sá dúhá, te ni ñiⁿ tnúhu ndehnde ñà túu cáháⁿ-gá. ²³ Te òré ní xóo cúcuèhé ñáhá-güedé xii-gá, te ñá túu ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñá túu ní xáhaⁿ-gá xii-güedé sá ío ná cada ñaha-gá, chi núu ndáhá Yá Ndiöxí ní xóo nachihi-gá mee-gá, ñihí nchaa sá sání iní-güedé cada ñaha-güedé xii-gá. Te Yá Ndiöxí cúu-gá Yá ío váha cada ndáá cuéchi nchaa ñáyiu na sáa nduu. ²⁴ Te Xítohó Jesucristú cúu-gá Yá ní xihí núu cùrúxí cuendá nchaa cuéchi nchoo ñáyiu ndècu ñuyíú-a. Te ducaⁿ ñi xihí-gá cuendá nchoo dùuⁿ duuⁿ dañá-o nchaa ichi cuehé ichi duha, te cada ndáá-ó cundecu-o ichi-gá. Te ní dánícuèhé ñáhá-güedé xii-gá, te sá dúcáⁿ ñi ndòho-gá xíáⁿ ní ngúndecu váha nchoo vitna. ²⁵ Te nchoo cùu-o datná cue mbéé cue quiti ní xíta ni cùu, dico vitna ní tuha-o Xítohó Jesucristú, te Yá-áⁿ cúu-gá datná ñiⁿ toli xito ñaha-gá xii-o vitna cuendá sá vā cuíta nihnu-o.

3

Nàcuáa tàú ñáyiu tnándaha cadá-yu cundecú-yu

¹ Te nchaa nchòhó ñáyiu ñihí ní tnandaha ío quindáá iní-ndó yíi-ndo cuendá sá núu ñá túu sàndáá iní-güedé tnúhu Yá Ndiöxí te quindáá iní-güedé cuendá sá ndéhé-güedé quidé ndáá-ndó ndècu-ndo, te ni ñà túu xini ñuhu-xi cáháⁿ-ndó tnúhu-gá núu-güedé. ² Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yíñuhu núu Yá Ndiöxí. ³ Te vá cání iní-ndó mèe-ni cunduu vii-ndo, te ndada-ndo ñíquí-ndó nàcuáa tàú-xi cunduu, te vá cání iní-ndó nándi canehe-ndo, te ni vā cání iní-ndó cuihnu-ndo mee-ni dóo váha sá ío vii ndáa. ⁴ Chi iní-ndó xini ñuhu-xi cunduu vii cunduu váha-xi núu Yá Ndiöxí cuèi vitna te cuèi núu

cuäháⁿ núú vëxi, te cuu-ndo ñáyiú ío cãhnu iní-xi, te núú ducaⁿ na càda-ndo te ío cuu váha iní Yă Ndiöxí. ⁵ Te ducaⁿ ío vii ío váha ní xínduu iní nchaa ñáyiú ðihí ní xíndecu ndéé sanaha, te ñáyiú-áⁿ ío ní sándáá iní-yu Yá Ndiöxí te ní cudíú-yu núú-gă, te ní tñí-yu nchaa tnúhu ní cáháⁿ yí-yu. ⁶ Te ducaⁿ ñí xóo cada ndíi Sără ní xóo quíndáá iní ndíi yí ndíi, ndíi Àbrahám, te ní cánehe ndíi ðihí-áⁿ sã yíñùhu núú yí ndíi. Te núú nchòhó quidé vãha-ndo ndècu-ndo te ñá túú yùhú-ndó nã cada ñaha tnàha ñáyiú-ndo xì-ndo, te núú ducaⁿ quide váha-ndo ndècu-ndo te quide-ndo datná ní quide ndíi Sără.

⁷ Te nchòhó cue téé ndècu ñadihí-xi ío váha cuáha-ndo cuendá nàcuáa cundecu váha-ndo ndihí-yu, te ío vii cáháⁿ ndihí-ndö-yu, chi ñáyiú-áⁿ íi-gă-yu dàcúxí nchòo cue téé, te ducaⁿ càda-ndo chi ndi ndúú-ndó ndúu táhú-ndó cundecu-ndo ndihí Yá Ndiöxí, te núú ducaⁿ na càda-ndo te òré cáháⁿ ndihí-ndo Yă Ndiöxí te tedóho ñaha-gă xii-ndo.

Ñáyiú quide sã vãha ndòhó-yu

⁸ Te càchí tnúhu tucu-í xii-ndo sã ío cuu ñínuu-ndo cundecu-ndo, te cundàhú iní tnáhá-ndó ñí ñí-ndo, te cuu iní tnáhá tùcu-ndo nacuáa ndècu-ndo ichi Yá Ndiöxí, te cuu-ndo ñáyiú ndàhú iní-xi. ⁹ Te núú ñí sã ñà túú vãha quide ñaha ñáyiú xii-ndo, te ñá díú-ní dùcaⁿ nanchocáva-ndo càda-ndó-yu, àdi xícuèhé ñáhã-yu xii-ndo, te vá ná danchocáva-ndo ðiu-ni tnúhu cuèhé, chi cácaⁿ táhú-ndó núú Yă Ndiöxí cuendá sã ná cádá vãha ñaha-gă xii-yu, te ducaⁿ càda-ndo chi Yá Ndiöxí ní cáháⁿ ñáhã-gă xii-ndo cuendá sã cádá vãha ñaha-gă xii-ndo tnáhã-ndó. ¹⁰ Te núú tütú Yă Ndiöxí càchí-xi:

Nchaa ñáyiú cuini cundecu váha ndi nchaa nduu ñini cundecú-yu ñuyíú-a,

xini ñuhu-xi sã vã càháⁿ-yu tnúhu cùtexínu, te ni vã dácuàndehndé-yu

¹¹ Te xini ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni sã vãha,

te ío ndúcú-yu nàcuáa cadá-yu cundecu váha-yu ndihí tnàha ñáyiú-yu te ðiu-ni ducaⁿ cànchicúⁿ nihnú-yu cadá-yu.

¹² Te Yá Ndiöxí xító-gă nchaa ñáyiú quide ndáá núú-gă

te tedóho-gă nchaa tnúhu càháⁿ-yu, dico nchaa ñáyiú ñá túú cuini cada ndáá, ñáyiú-áⁿ ñà túú cùu váha iní-gă núú-yu.

Duha càchí-xi núú tütú-gă.

¹³ Te vá yõo níhí ndéé càda ñaha xii-o ñí sã ñà túú vãha te núú mee-ni sã vãha na càda-o cundecu-o. ¹⁴ Àdi núú ná cúú sã ná cádá ñaha ñáyiú xii-o sã cuendá sã quidé vãha-o ndècu-o ña, te sã dúcáⁿ ná cádá ñahã-yu xii-o cùu-xi ñí sã vãha sã cúú-xi-ó núú Yă Ndiöxí. Te na càchí tnúhu-í xii-ndo sã vã yùhú-ndö-yu, te ni vã cundíyí-ndó cuendá nchaa sã ná càda ñahã-yu xii-ndo. ¹⁵ Te nèhe-ndo sã yíñùhu núú Xítohó Jesucristú. Te ío cundecu túha-ndo dānehé-ndó ñáyiú véxi ndúcu tnúhu núú-ndó nàcuáa ndúu tnúhu ndee iní ní taxi Xítohó Jesucristú ndécú ndihí-ndo, te cuu vii cuu váha iní-ndó cáháⁿ ndihí-ndö-yu, te cáháⁿ-ndó núú-yu mee-ni tnúhu yíñùhu nacuáa cùu váha iní Yă Ndiöxí.

¹⁶ Te ío cada váha-ndo cundecu-ndo cuendá sã vã cundíyí-ndó, te núú ducaⁿ na càda-ndo, te nchaa ñáyiú xícuèhé ñáhã xii-ndo cuendá sã quidé vãha-ndo ndècu-ndo ichi Xítohó Jesucristú quendóo canúú-yu ndihí nchaa tnúhu càháⁿ-yu, chi nchòhó quidé vãha-ndo ndècu-ndo. ¹⁷ Te váha-gă sã ndóhó-ó cuendá sã quidé-ó sã vãha te núú mee Yă Ndiöxí ducaⁿ cuini-gă cunduu, te ñá díú sã ndóhó-ó cuendá sã ñà túú quide-o sã vãha.

¹⁸ Te Xítohó Jesucristú ní xihí-gă sã cuendá nchaa cuéchi nchaa nchoo ñáyiú ndècu ñuyíú-a, te ñí xito-ni ducaⁿ ñí xihí-gă te ducaⁿ te vá cùu tnàhí-gă, te mee-gă cúú-gă Yaá ñá túú tnàhí cuéchi-xi, te ducaⁿ ñí ndoho-gă cuendá nchaa cuéchi ñáyiú ndècu

ñuyíu-a ñáyiu ñá túú cuení cada ndáá núú Yá Ndiöxí, te ducaⁿ ñí cuu cuendá sá núcündecu váha-yu núú Yá Ndiöxí te núu na quíndáá iní ñáhã-yu xii-gá. Te mee-gã ní xihí-gá dico Espiritú-gá chi ní xíndecu-ni-xi, ¹⁹ te Espiritú-gá ní sáháⁿ-xi ní cáháⁿ-xi tnúhu Yá Ndiöxí núú ncháa espíritú ñáyiu ndècu núú ùhú núú ndàhú. ²⁰ Te ñáyiu-áⁿ cúú ñáyiu ní xíndecu ndéé sanaha cùtnàhá ní xíndecu ndíi Nöé, chi ñáyiu-áⁿ ïo ní quide sáá iní-yu núú Yá Ndiöxí. Te Yá Ndiöxí ïo váha iní-gá, chi ní dácácá-gã nduu ñí xíndecuu ndíi Nöé ní cadúha ndíi bàrcú cuendá ndétú-gã ndixi cuéchi iní-yu sá ñà túú quide váha-yu ndècú-yu ni cùu. Te dàvá-áⁿ ñí ndaa ndute ñuyíu te ní cácu úná duha ná tnàhá ñáyiu, chi ní quée-yu xití bàrcú-áⁿ, te ñá túú ní cáhá-yu. ²¹ Te sá dúcáⁿ ñí cácu ñáyiu úná-áⁿ ñà túú ní cáhá-yu ndute ní ndaa ñuyíu dàvá-áⁿ. Te xíãⁿ quée-xí sã cuándute ñáyiu vitna, te naníhí tàhú-yu te núu na quíndáá iní-yu tnúhu ndáá tnúhu Yá Ndiöxí. Te ñá díú sã cuándute-o te nduu ndoo nduu nine yiqui cùñú-ó te naníhí tàhú-ó, chi xìni ñuhu-xi nãhmá-ó núú Yá Ndiöxí ncháa yíca cuéchi-o, te nduu ndoo nduu nine iní-ó, te ducaⁿ te naníhí tàhú-ó, chi Xítohó Jesucristú ní xihí-gá cuendá-ó te ní ndoto-gá. ²² Te Yaá-áⁿ cuãndaa-gá andiu, te ní ngóo-gá xio cùha Yá Ndiöxí, te tàxi tnuní-gá ncháa espíritú cúnúu ndíhi ncháa dava-gá cue espíritú xínú cuéchi.

4

Cada-o nàcuáa cuení méé Yá Ndiöxí

¹ Te Xítohó Jesucristú ní ndoho-gá cùtnàhá ní xíndecu-gá ñuyíu-a, te vitna nchòhó cundecu túha-ndo ndòho-ndo cuendá-gá, chi ncháa ñáyiu ndòho nándi sá ndóhó cuendá-gá dàñá-yu ncháa sá cuèhé sá dúhá. ² Te ducaⁿ ñà túú-gã ndécú-yu ichi cuèhé ichi duha, chi mee-nã nàcuáa càháⁿ Yá Ndiöxí quídè-yu ndècú-yu ñuyíu-a. ³ Te nchòhó sa nàha-ndo sá ïo cuèhé núú sã cuèhé sá dúhá ñí xóo cada-o cùtnàhá vátá

cúndècu-gá-ó ïchi Yá Ndiöxí, chi ní xóo cada-o ncháa sá cuèhé sá dúhá cùdíi ïní ncháa ñáyiu ñá túú sàndáá iní tnúhu-gá, te dàvá-áⁿ ñí xóo cada-o ncháa núú sã cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñáyiu quihu, te ní xóo cundecu-o víco núú ñí xóo cada-o ncháa sá ñà túú váha, te ní xóo níhí tnàhá-ó ndíhi ncháa tnaha quihu-o, te ní xóo chiñuhu-o ncháa sá càchí-yu cùu ndiöxí te ñà ndáá sá ndiöxí cúú ncháa xíãⁿ, te nándi-gá ncháa sá cuèhé sá dúhá ñí xóo cada-o dàvá-áⁿ. ⁴ Te ñáyiu-áⁿ cùñúhu-yu vitna sá ñà túú-gã níhí tnàhá-ó ndíhi-yu cada-o ncháa sá cuèhé sá dúhá quídè-yu, te xíãⁿ càháⁿ cuèhé-yu cuendá-ó vitna. ⁵ Dico sáá nduu te ñáyiu-áⁿ nãhmá-yu ncháa sá quídè-yu núú Xítohó Jesucristú, chi diu-gá sa ndècu túha-gá sá cádá ndáá-gá cuéchi ncháa ñáyiu sa ní xihí, ndíhi cuéchi ncháa ñáyiu xíndecu vívú. ⁶ Te cue ñáyiu sa ní xihí ní xíndedóho tnúhu Xítohó Jesucristú, te cuèi ní xihí-yu dàtná xihí dava-gá ñáyiu, dico espíritú-yu chi ní nduu tàhú-xi ndècu váha-xi dàtná ndécú Yá Ndiöxí.

⁷ Te vitna ta cùyatni danaa Yá Ndiöxí ñuyíu-a núu xíãⁿ ïo váha cuáha-ndo cuendá nàcuáa cundecu-ndo, te cáháⁿ ndíhi-ndo-gã. ⁸ Te xìni ñuhu-xi sá ïo cuu iní tnàhá-ndó ñí ñí-ndo, chi núu ducaⁿ na cùu iní tnàhá-ndó ñí ñí-ndo, te vá cáni-gã iní-ndó càda cuendá-ndó ncháa sá ñà túú váha quide ñaha ñáyiu xii-ndo, ⁹ te nchòhó ñáyiu xíndecu vehe-xi cuáha nùu-ndo vehe xii cue ñáyiu ñuhu ichi na ndetatú-yu, te ïo váha cuu iní-ndó dùcaⁿ càda-ndo. ¹⁰ Te Yá Ndiöxí ní taxi-gá ndí díiⁿ núú tàhú ndécú ndíhi-ndo ñí ñí-ndo, te nàcuáa ndùu tàhú ñí nduu tàhú-ndó ñí ñí-ndo te ducaⁿ chindee tnaha-ndo, te vá dàñá ndéé-ndó càda-ndo ncháa nàcuáa tàuchiuⁿ Yá Ndiöxí càda-ndo, te chindee ñàha-gá xii-ndo. ¹¹ Te dava nchòhó ñáyiu càháⁿ tnúhu Yá Ndiöxí núú ñáyiu, xìni ñuhu-xi cáháⁿ-ndó nàcuáa ndùu tnúhu-gá núu-yu, te dava nchòhó ñáyiu quide ncháa núú chiuⁿ chindee tnaha ñáyiu-xi,

xìni ñuhu-xi cada-ndo sá Yă Ndiöxí chindèe ñaha-gá xii-ndo, te ducaⁿ càda-ndo nchaa núú sá vâha, chi Xítóhó Jesucristú tnàhá-gá chindèe ñaha-gá xii-ndo, te ducaⁿ ïo cuu càhnu Yă Ndiöxí. Te vitna tàú-ó cãháⁿ-ó sá ïo càhnu cuu Xítóhó Jesucristú, chi diu-gá cúnùu-gá nchaa nduu nchaa quíú, te ducaⁿ na cùnduu.

Ndoho tnahá-ó cùndecu-o ichi Xítóhó Jesucristú

¹² Te nchòhó ñáyiú ío cùu iní-í, vá cúññu-ndo sá ïo ndòho-ndo ndecu-ndo ichi Xítóhó Jesucristú, chi sá dúcáⁿ ndòho-ndo-áⁿ cùtnùní ndisa sá sàndáá iní-ndó-gă, te vá cání iní-ndó nă cuendá ducaⁿ ndòho-ndo. ¹³ Chi da cudíí iní-ndó te núu ndòho-ndo datná ní ndoho Xítóhó Jesucristú, te ducaⁿ sùúní cùdíí iní-ndó òré ná quíxi tucu-gá ñuyíú-a te dàvá-áⁿ quíní-ndó sá ïo càhnu cuu-gá. ¹⁴ Te núu xícuèhé ñáhá ñáyiú ndècu ichi cuehé ichi duha xii-ndo cuendá sá ndécú-ndó ichi Xítóhó Jesucristú, te xíãⁿ cúú-xí ñⁿ sá vâha sá cúú-xí-ndó núú-gă, te ducaⁿ chi Espiritú Yă Ndiöxí sá ïo cùnùu ndecu ndíhi ñaha-xi xii-ndo, te nchaa ñáyiú ndècu ichi cuehé ichi duha-ãⁿ cãháⁿ cuèhé-yu cuendá Xítóhó Jesucristú, dico nchòhó cãchí-ndó sá ïo càhnu cuu-gá. ¹⁵⁻¹⁶ Te núu nchòhó dándòho ñaha ñáyiú xii-ndo sá cuendá sá ndécú-ndó ichi Xítóhó Jesucristú ñá, te vá cúú cãháⁿ núú-ndó, chi ndacáⁿ táhú-ndó núú Yă Ndiöxí cuendá sá ndécú-ndó ichi-gá. Te cuèi ndòho-ndo ndecu-ndo, dico ñá túú cùu-ndo ñáyiú sàhni ndíyi te ni ñà túú cùu-ndo ñáyiú dùhu, te ni ñà túú cùu-ndo ñáyiú quide cuehé quidé dùha, te ni ñà túú cùu-ndo ñáyiú chindèe tnúhu tnàha ñáyiú-xi ñⁿ sá ñà túú tàú-ndó càda-ndo.

¹⁷ Te vitna sa quèsaha Yă Ndiöxí cada ndáá-gá nchaa sá quidé nchòhó ñáyiú ndècu ndíhi-gá, te núu ducaⁿ te ndèe-gá cada-gá nchaa ñáyiú ñá túú sàndáá iní ñáhá xii-gá òré ná sàá nduu dùcaⁿ cada ñaha-gá xii-yu. ¹⁸ Te nchòhó xíní-ndó sá ñáyiú quide váha ndècu ichi Xítóhó Jesucristú ndòho tnahá-yu ndécú-yu, dico sáá nduu te

nduu táhú-yu cundecú-yu ndíhi-gá. Te núu ducaⁿ ndòho nchaa ñáyiú quide váha ña, ÿte nása-gá yáha nchaa ñáyiú ndècu ichi cuehé ichi duha na sáá nduu càda ndáá Yă Ndiöxí cuèchi-yu-í? ¹⁹ Te nchaa nchòhó ñáyiú ndòho nacuáa cuíní Yă Ndiöxí xini ñuhu-xi sá vâ dãná ndèe-ndó càda váha-ndo cùndecu-ndo, te ío quindáá iní-ndó sá xító ñaha-gá xii-ndo. Te diu-gá cúú-gă Yaá ní cadúha ñaha xii-o, te quide-gá ñⁿ sá cãháⁿ-gá.

5

Nàcuáa tàú-xi cada ñáyiú ndècu ichi Xítóhó Jesucristú

¹ Te yúhú cãháⁿ-í dóho nchaa nchòhó cue tée yíndaha nchaa dava-gá ñáyiú ndècu ichi Xítóhó Jesucristú, chi tnàhá yúhú yíndaha-í ñáyiú ndècu ichi-gá, te sàndáá iní-í tnúhu-gá, te ní xíní-í nchaa nàcuáa ní ndoho-gá, te sáá nduu te tnàhá-í cunuu-í ndíhi-gá. ² Te ío canehe cuendá-ndó nchaa ñáyiú ndècu ichi Yă Ndiöxí yíndaha-ndo te cada-ndo datná quidé cue toli, chi cue tée-áⁿ ïo váha xito-güedé mbéé-güedé. Te canehe cuendá-ndó-yu sá cúú iní méé-ndó te ñá díú sá ío ñⁿ ñáyiú cada yica ñaha xii-ndo, te ni ñà díú sá cuíní-ndó cùhuⁿ yáhu-ndo, chi ni yùhu ni iní-ndó còto-ndó-yu, chi ducaⁿ cuíní Yă Ndiöxí cunduu. ³ Te vá cadá-ndó sá ïo cùnùu-ndo núú-yu, chi cada-ndo mée-ni sá vâha cuendá ducaⁿ cànchicúⁿ nihnú-yu cadá-yu tnàhá-yu. ⁴ Te òré ná quíxi tucu Xítóhó Jesucristú Yaá néhé cuendá ñáhá xii-o nchaa-o ñuyíú-a, te taxi-gá sá ïo váha nduu táhú-ó, te cunuu-o ndíhi-gá ni caa ni quíhíⁿ.

⁵ Te nchòhó ñáyiú ndècu ichi Xítóhó Jesucristú cãháⁿ-í dóho-ndo sá ïo quindáá iní-ndó cue tée yíndaha ñaha xii-ndo nacuáa ndècu-ndo ichi-gá, te nchaa-ndo tàú-ndó quindáá iní tnàhá-ndó ñⁿ ñⁿ-ndo, chi núú tütú Yă Ndiöxí cãchí-xi ñⁿ xichi:

Nchaa ñáyiú quède cahnu mee-xi ñá túú cùu váha iní Yá Ndiöxí núú-yu,

dico nchaa ñáyiú ndàhú iní-xi te chindee ñaha-gá xií-yu.

Duha càchí-xi núú tütú-gá. ⁶ Te dañ-ndo mée-ndo núú ndáhá Yá Ndiöxí, chi mee-gã ío cùnuu-gá. Te núu ducaⁿ na càda-ndo, te sáá nduu te cada nínu ñaha-gã xii-ndo. ⁷ Te nchaa sá yãha-ndo ndècu-ndo te nachihi-ndo ndàha Yá Ndiöxí, chi mee-gã xító ñaha-gá xii-ndo.

⁸ Te ío váha cuáha-ndo cuèndá cundecu-ndo, te quíhi iní-ndó chi sàcuíhná xícá cùu-xi cuíní-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ìⁿ quítí dééⁿ xícá ndùcu sá cáxí-xí. ⁹ Te ío quíndáá iní-ndó Xítóhó Jesucristú, te vá dáñá-ndó mée-ndo dandahú ñáhá sàcuíhná xii-ndo càda-ndo nacuáa cuíní-xi, chi ñaha-ndo sá ncháá ñáyiú ndècu ichi Xítóhó Jesucristú xíndecu nihíi ñuyíú ndóhó-yu datná ndóhó nchòo ndecu-o ichi-gá. ¹⁰ Dico sacú-ni nduu duha cundoho-o te datnúni ñá túú-gã ná cumání-ó cundecu-o núú Yá Ndiöxí, te dàvá-áⁿ vã cání ìⁿ cani úú iní-ó cundecu-o ichi-gá. Te ío-gá ngúndecu ndihi-o tñuhu ndee iní cada-o ncháa nacuáa càháⁿ-gá, te ducaⁿ càda-o chi mee Yá Ndiöxí ío chindee ñaha-gá xii-o, te diu-ni Yaá-ãⁿ ío cùu iní ñáhá-gã xii-o, chi ní cáháⁿ ñáhá-gã xii-o cundecu-o núú ío váha càa ndecu-gá cundecu-o nì caa ni quíhíⁿ, te ducaⁿ nì quide-gá chi ní sándáá iní-ó Xítóhó Jesucristú.

¹¹ Te ío ndacáⁿ táhú-ó núú Yá Ndiöxí chi ío cahnu cuu-gá, te cùnuu-gá nchaa nduu nchaa quíú. Te ducaⁿ na cùnduu.

Tnúhu ndéé núú nñ ndihi-ná

¹² Te té Silvanú xíní-í sá cúu-dé ìⁿ té quède ndáá ndécú ichi Xítóhó Jesucristú, te diu-dé ní cáháⁿ ndàhú-í núú-dé ní tee-dé ìⁿ úú tñuhu sá nñ xáhaⁿ-í xii-dé núú tütú-a cuèndá daquixi-í ndaha-ndo, te núú tütú-a càchí tñuhu ndáá-í xii-ndo sã Yá Ndiöxí ío cùu iní ñáhá-gã, te chindee ñaha-gá xii-ndo ndècu-ndo, te càchí tñuhu tucu-í xii-ndo sã ío quíndáá

iní-ndó sã ndáá ducaⁿ quède ñaha-gá xii-ndo.

¹³ Te cue ñáyiú ndècu ñuú Babiloniá, ñáyiú ndècu ichi Yá Ndiöxí, diu-ni ñáyiú ní cachí Yá Ndiöxí sá nánihí tàhú datná cúu nchòhó, ío quède ndee iní ñáhá-yu xii-ndo, te tñàhá té Mácú téé cùu datná ìⁿ déhe-í quidé ndee iní ñáhá-dé xii-ndo. ¹⁴ Te ndihi tñuhu yíñuhu cada ndee iní tñáhá-ndó ìⁿ ìⁿ-ndo, te xícáⁿ táhú-í núú Yá Ndiöxí sá ío na cùndecu nahi nchaa nchóhó ñáyiú ndècu ndihi Xítóhó Jesucristú. Te ducaⁿ na cùnduu. Te ío chí cáda ndèe iní-nã vitna.

TUTÚ CÚÚ ÒÚ NÍ CADÚHA TÉ PÈLÚ

Té Pèlú cádúha-dé tutú quíhíⁿ ndaha ñáyiu sàndáá iní tnúhu Yá Ndiöxí

¹ Yúhú té Xímú, àdi Pelú chi úú òú-í, xínú cuèchi núú Xítóhó Jesucristú, chi mee-gă ní tendaha ñàha-gă xii-í xícá cùu-í càháⁿ-í tnúhu-gă. Te cádúha-í tutú-a sá cúú-xí nchàa nchóhó ñáyiu sàndáá iní ñáhá xii-gă dàtná sàndáá iní-ndí-gă, te ducaⁿ chi Tătá-ó Dütú Ndiöxí ní dácàháⁿ-gă iní-ó nǐ sàndáá iní-ó-gă, chi cùu-gă Yaá ío váha quide ndáá ndíhi Xítóhó Jesucristú Yaá dácăcu nihnu ñaha xii-o núú ùhú núú ndàhú. ² Te xicáⁿ táhú-í núú Yá Ndiöxí sá ùuⁿ-gă uuⁿ-gă ná cuita chindee chítúu ñaha-gă xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gă chi ta cùtnuní-gă iní-ndó nàcuáa ndùu cuendá-gă, te ducaⁿ ta cùtnuní tucu iní-ndó nchàa nacuáa ndùu cuendá Xítóhó Jesucristú Yaá cúú Xítóhó-ó.

Nàcuáa quide ñáyiu ndècu ichi Xítóhó Jesucristú

³ Te Yá Ndiöxí ío càhnu cuu-gă chi chindee ñaha-gă xii-o quide ndáá-ó ndècu-o datná cuení méé-gă, te ducaⁿ chi cùtnuní iní-ó nàcuáa sàni iní Xítóhó Jesucristú Yaá ní cáháⁿ ñáhá xii-o. Te òré ní cáháⁿ ñáhá-gă xii-o te ní cutnùní iní-ó sǎ ío càhnu cuu-gă te ío váha quide-gă. ⁴ Te ducaⁿ nǐ cutnùní tucu iní-ó nàcuáa ní cáháⁿ-gă cada ñaha-gă xii-o, te tnúhu ní cáháⁿ-gă-áⁿ ío càhnu cuu-xi te ío váha, te nchoo nǐ sàndáá iní-ó tnúhu-áⁿ nǔu xǎⁿ ñá túú-gă ndécú-ó ichi cuehé ichi duha te ni ñà túú-gă sání iní-ó càda-o nándi sá cuèhé sá dúhá, te ní cuu vii ní cuu váha iní-ó vǐtna. ⁵ Te sá dúcáⁿ quide-gă te xǎⁿ ío nducu ndèe-ndo cada-ndo nchaa nacuáa càháⁿ-í-a, te nchòhó sàndáá iní-ndó-gă dico ñá díú mèe-ni xǎⁿ chi tnàhá xíní ñúhu-xi cada ndáá-ndó cùndecu-ndo. Te núu quide ndáá-ndó ndècu-ndo te xini

ñúhu-xi tecú tnùní-ndó tnúhu-gă. ⁶ Te núu tècú tnùní-ndó te cùu-ndo ñáyiu xíní cotnǐ mee-xi, te núu cùu-ndo ñáyiu sàcòo tnǐ mee-xi te xini ñúhu-xi cunduu cahnu iní-ndó cuèi nándi sá ná yǎha-ndo cùndecu-ndo, te núu càhnu iní-ndó te xini ñúhu-xi cada ndáá-ndó cùndecu-ndo datná cuení méé Yá Ndiöxí cada-ndo. ⁷ Te núu quide ndáá-ndó ndècu-ndo, te xini ñúhu-xi ío cuu iní tnáhá ndí mee-ndo nacuáa ndècu-ndo ichi-gă, te núu cùu iní tnáhá ndí mee-ndo te xini ñúhu-xi cuu iní-ndó nchàa dava-gă tnàha ñáyiu-ndo.

⁸ Te núu sa ducaⁿ quide-ndo ndecu-ndo te uuⁿ-gă cuita ducaⁿ càda-ndo quíhíⁿ núú cuàháⁿ núú vèxi, te núu ducaⁿ quide-ndo te cùu-ndo cue ñáyiu ñá túú dàna iní-xi xǐndecu, te cuita cutnùní-gă iní-ndó nchàa nacuáa sàni iní Xítóhó Jesucristú quíhíⁿ. ⁹ Te nchaa ñáyiu ñá túú cuení ducaⁿ càda cuú-yu ñáyiu ñá túú tnàhí ndíxi túu iní-xi sá Yá Ndiöxí sa ní ndada ndoo ní ndada nine-gă iní-yu cuendá nchaa sá cuèhé sá dúhá nǐ xóo cadá-yu, te ñáyiu-áⁿ cúú-yu dàtná ïⁿ ñáyiu cuáá àdi datná ïⁿ ñáyiu ñá túú cùtnuní váha núú-xi, te ducaⁿ sàtnahá-xi cùu-yu cuendá sá dúcáⁿ quidé-yu. ¹⁰ Te xǎⁿ nǔu yúhú càháⁿ-í dóho nchaa nchòhó ñáyiu ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sǎ Yá Ndiöxí ní cáháⁿ ñáhá-gă xii-ndo, te ducaⁿ nǐ quide-gă chi ducaⁿ nǐ cachí-gă cada-gă. Te vá ïⁿ ndùu cani iní-ndó dàña-ndo ichi-gă, te núu vá dáña ndèe-ndó càda-ndo nchaa nacuáa càháⁿ-í-a. ¹¹ Te núu ducaⁿ na càda-ndo cundecu-ndo, te ío vii ío váha cada Yá Ndiöxí queheⁿ cuendá ñáhá-gă xii-ndo òré ná sàá-ndó nǔú ndécú Xítóhó Jesucristú táxi tnùní-gă nchaa nduu nchaa quíú, te òu-ni Yaá-áⁿ cúú Xítóhó-ó te ní dácăcu nihnu ñaha-gă xii-o núú ùhú núú ndàhú.

¹² Te ducaⁿ-ni quíhí-í dandàcu iní ñáhà-í xii-ndo nchàa tnúhu càháⁿ-í-a cuèi sa xíní-ndó tnúhu-áⁿ, te cuèi

sàndáá váha iní-ndó nchàa tnúhu ndáá dácuaaha-ndo. ¹³ Te yúhú quidé cuèndá-í sá ïo tàú-xi cáháⁿ-í dóho-ndo ñini ndecu-í ñuyúú-a cuèndá sá vǎ nácuaanaa-ndo nacuaa cada-ndo cùndecu-ndo. ¹⁴ Chi Xítohó Jesucristú ní cachí-gá sá ñà túú-gǎ vǎi nduu cundecu-í ñuyúú-a te cuú-í. ¹⁵ Te ío nducu ndèe-í nducu-í nácuaa cada-í cuèndá quendóo ndíhi-ndo nchàa tnúhu cáháⁿ-í-a, te cuèi na yǎha cuú-í dico vá nácuaanaa-ndo cada-ndo nchaa nacuaa cáháⁿ tnúhu sá dánèhè ñáhà-í xii-ndo vitna.

Cue téé ní xiní núú sǎ ïo càhnu cuu Xítohó Jesucristú

¹⁶ Te sa ní dánèhè ñáhà-ndǐ xii-ndo sǎ ïo càhnu cuu Xítohó Jesucristú. Te ní cachí tnúhu tucu-ndí nácuaa cada-gá òré quixi tucu-gá, te tnúhu-áⁿ cúú-xí tnúhu ndáá cuítǐ te ñǎ díú tnúhu sá ñi saní iní cue ñáyiu ñuyúú-a cùu-xi, chi nchúhú ní xiní núú-ndǐ nácuaa ní quide-xi cùtnàhá ní cutnùní iní-ndí sǎ ïo càhnu cuu Xítohó Jesucristú. ¹⁷ Chi dàvǎ-áⁿ ïo váha ní quide Tǎtá-ó Dútú Ndiòxí ní quide càhnu-gá Xítohó Jesucristú, te ñu-ni dàvǎ-áⁿ ñi cáháⁿ Dútú Ndiòxí ndéé andíu ñi xáhaⁿ-gǎ xii Xítohó Jesucristú: “Yòhó cúú-n Dèhe-í téé ío cùu iní-í, te ío cùdíí iní ñáhà-í xii-n”, duha ní xáhaⁿ Yǎ Ndiòxí xii Xítohó Jesucristú. ¹⁸ Te nchúhú ní tecú dóho-ndí ní cáháⁿ Yǎ Ndiòxí ndéé andíu cùtnàhá ducaⁿ ñi xáhaⁿ-gǎ xii Xítohó Jesucristú, chi tnàhá-ndí ndécú-ndǐ ndíhi-gá yucu núú dúcáⁿ ñi quide càhnu ñaha Yǎ Ndiòxí xii-gá.

¹⁹ Te ndècu ndíhi-o nchaa tnúhu ní cáháⁿ cue téé ní xóo cáháⁿ tnúhu Yǎ Ndiòxí ndéé sanaha te nchaa tnúhu-áⁿ cáháⁿ-xi nchaa nácuaa cada-xi vitna, te cùtnuní iní-ó sǎ tnúhu ndáá cúú-xí, te xiní ñuhu-xi cada cuèndá váha-ndo nchàa nacuaa cáháⁿ tnúhu-áⁿ, chi tnúhu-áⁿ cúú-xí dátǎ ñi ñuhú dáyèhé-xi ndéé òré véxi túndaá quéné chòdíni cáhnú dáyèhé-dí. Te ducaⁿ sǎtnahá-xi cùu tnúhu-áⁿ chi quide-xi nacuaa cutnùní iní-ó cuèndá Xítohó Jesucristú. ²⁰ Te xiní ñuhu-xi sǎ ïo-gá cada cuèndá-ndó sǎ ñà túú ñáyiu tecú tnùní ñi ñiⁿ tnúhu sá ñi

chídó tnùní cue téé ní cáháⁿ tnúhu Yǎ Ndiòxí ndéé sanaha, te núu Yǎ Ndiòxí vá cádá-gǎ nácuaa cutnùní iní-yu nácuaa cáháⁿ nchaa tnúhu-áⁿ. ²¹ Te cue téé-áⁿ ïo ní xíndecu yíñùhu-güedé núu Yǎ Ndiòxí, te nchaa tnúhu sá ñi cáháⁿ-güedé-áⁿ ñà túú cùu-xi tnúhu sá ñi cahu iní méé-güedé, chi Espíritú Yǎ Ndiòxí ní dácáhú iní ñáhà-xí xii-güedé nácuaa cunduu tnúhu cáháⁿ-güedé.

2

Cue téé càchí sǎ cáháⁿ tnúhu Yǎ Ndiòxí te ñǎ ndáá

¹ Te ndéé sanduu chi ní xíndecu cue téé ní xóo dandàhú ñáhà xii ñáyiu isràèl càchí sǎ cáháⁿ tnúhu Yǎ Ndiòxí te ñǎ ndáá sǎ cáháⁿ-güedé tnúhu-gá, te ñu-ni ducaⁿ tucu cundecu cue téé dandàhú ñáhà xii-ndo vitna, chi cachí-güedé sǎ cáháⁿ-güedé tnúhu Yǎ Ndiòxí te ñǎ ndáá. Te cue téé-áⁿ ïo yidáhu cáháⁿ-güedé, te nchaa tnúhu cáháⁿ-güedé-áⁿ dacuítǎ nihnu ñaha-xi xii-ndo te núu na tédóho-ndo, chi cue téé-áⁿ vǎ ñunuu-güedé sǎ Xítohó Jesucristú ní xíhí-gá cuèndá-güedé. Te sǎ dúcáⁿ càda-güedé ío-gá ndíhi dacuítǎ nihnu-güedé méé-güedé.

² Te vǎi ñáyiu xínu iní-yu cadá-yu nándí sǎ cuèhé sǎ dúhá cuèndá sǎ dúcáⁿ càda cue téé-áⁿ, te cuèndá xíǎⁿ ngóo ñáyiu cáháⁿ úhú-yu cuèndá ichi Yǎ Ndiòxí. ³ Te mee-ni tnúhu sǎ ñi cahu iní cue ñáyiu ñuyúú-a danèhé ñáhà-güedé xii-ndo, te quesaha-güedé sǎ cúú-xí tnúhu ndáá te ñǎ ndáá cuèndá-ñi sǎ cuǎñaha-ndo díhúⁿ xii-güedé, chi ñu-ni xíǎⁿ tnàhí cuhuⁿ iní-güedé, dico Yǎ Ndiòxí sa ní cunaha ndècu túha-gá cuèndá cada ndáá-gá cuèchi-güedé, te na sǎá nduu te cuítǎ nihnu duuⁿ-güedé, chi Yǎ Ndiòxí vá nácuaanaa-gá ñiⁿ sǎ ñi cachí-gá cada-gá.

⁴ Te Yǎ Ndiòxí ñà túú ní quide cahnu iní-gá sǎ ñi quide cue espíritú ñà túú ní cuíní cada ndáá xínú cuèchi núú-gǎ ní cùu, chi ní dáquihíⁿ ñáhà-gǎ xii-xi ñiⁿ xichi núú ïo ndòho-xi ndecu-xi, te xíǎⁿ cudedí nihnu-xi ndéé sǎá nduu cuítǎ nihnu duuⁿ-ná-xi. ⁵ Te Yǎ Ndiòxí ñà túú ní quide cahnu tucu iní-gá nchaa sǎ ñi quide ñáyiu ñuyúú díhna,

chi dàvá-án nǐ dándáá-gǎ ndute ñuyíú nǐ cáhá nchaa ñáyíu ndècu ichi cuehé ichi duha te ñndì-ni té Nöé ndihí úsá-gá tucu cue ñáyíu cùu ndi mee-dé ní dácăcu nihnu-gá. Te té Nöé-ăⁿ cúú-dě téé ní cáháⁿ dóho-yu năcuăa cada váha-yu cundecú-yu ni cùu te ñá túú ní cuiní-yu. ⁶ Te Yá Ndiöxí ní dăngává-gǎ ñuhú ní dánáá-gǎ ñáyíu ñúú Sodomá ndihí ñáyíu ñúú Gómorrá te mee-nă yáá nǐ nduu ñúú-án. Te sá dúcáⁿ nǐ cuu xiăⁿ cútnùnǐ iní-ó năcuăa cada ñaha Yă Ndiöxí xii nchaa ñáyíu ñá túú quide váha. ⁷ Dico té Löt téé ní quide ndáá ní xindecu ñⁿ ñúú-án dàvá-án chi ní dácăcu nihnu ñaha-gǎ xii-dé. Te nchaa ñáyíu ñúú núú nǐ xindecu-dé-án ío ní xinduu cuihna ñni-yu, te mee-ni ñchi dǐí ñni ní xindecú-yu, te sá dúcáⁿ nǐ xóo cadá-yu xiăⁿ ío ní ndíhú iní té Löt. ⁸ Te ñⁿ nduu ñⁿ nduu ní xóo cada ndàhú-xi iní té Löt-án cuendá nchaa tnúhu cuehé tnúhu duha ní xóo cáháⁿ-yu ní xóo cundedóho-dé, ndihí cuendá nchaa sá cuehé sá dúhá nǐ xóo cadá-yu ní xóo quiní-dé, te mee-dě ní cuu-dé ñⁿ téé ní xinduu vii ní xinduu váha ñni-xi núú Yă Ndiöxí. ⁹ Te sá dúcáⁿ nǐ yáha té Nöé ndihí té Löt, xiăⁿ cútnùnǐ iní-ó sǎ Yă Ndiöxí ío chindee-gá cue ñáyíu quide ndáá ndécú ñchi-gá cuendá sá vǎ cadă-yu năndi sá cuehé sá dúhá cuèi năndi na ndòhó-yu cundecú-yu. Te Yá Ndiöxí cǎchí-gá sá ncháá ñáyíu ndècu ichi cuehé ichi duha sa ndècu túha-yu sá quihíⁿ-yu núú ùhú núú ndàhú nduu nă yáha cundáá cuéchi-yu.

¹⁰ Te uuⁿ-gá cada ñaha Yă Ndiöxí xii nchaa cue téé ndècu ichi dǐí ñni, te dàquee tíhú-güedě nchaa tnúhu sá sánú ñchi ñaha xii-o nacuăa cada-o cundecu-o, te cùu-güedé cue téé ñⁿ ñni iní-xi, te yⁿ ñni-güedé, te ñá túú yùhú-güedé cáháⁿ úhú-güedé cuendá nchaa espíritú cúnú. ¹¹ Te cue espíritú xínú cuèchi núú Yă Ndiöxí ío cúnúu-xi dacúúxí cuè téé-án, dico ñá túú cùyⁿ-xi cáháⁿ-xi dàtná cáháⁿ cue téé-án òré ndàcáⁿ cuéchi-xi núú Yă Ndiöxí cuendá nchaa sá quidé cuè espíritú cündihí yucu ñávaha.

¹² Te nchaa cue téé dandàhú

ñáhá xii-ndo-án cúú-güedě dàtná cue quiti, chi cue quiti-án ñă túú ndècu sá xini tnùnǐ-güedi, chi cue quiti-án nǐ cacu-güedi sá tníí-ó-güedi te cahni-o-güedi. Te ducaⁿ sǎtnahá-xi cùu nchaa cue téé-án, chi cáháⁿ cuèhé-güedé cuendá ndédani cǎa espíritú cuèi ñá túú xini-güedé ná espíritú cúú-xi, te diu-ni mee-güedě dăcuíta nihnu-güedé mée-güedé sá dúcáⁿ quide-güedé, ¹³ te sá nduu te nacháhu-güedé nchaa sá quidé-güedě-án, te cuèi nduu cuèi niú cúdíí ñni-güedé quidé-güedě nchaa núú sǎ cuèhé sá dúhá sàni ñni-güedé. Te òré nàtacá-ndó cada-ndo ñⁿ vico chiñuhu-ndo Yă Ndiöxí te chitnahá ñáhá-güedě xii-ndo, te cada dusaⁿ-güedě sá cúdíí ñni-güedé sá dándàhú ñáhá-güedě xii-ndo, te dícó sácáⁿ-núú cuăha ñaha-güedě xii-ndo dùcaⁿ na cada-güedé.

¹⁴ Te nchaa cue téé-án òré xini-güedé ñⁿ ñáyíu dǐhí te ndíhí-ni sàni ñni-güedé cáháⁿ ndihí ñaha-güedě xii-yu, te ñá túú ndúu vétú ñni-güedé cuendá nchaa sá cuehé sá dúhá quide-güedé chi uuⁿ-gá uuⁿ-gá sánǐ ñni-güedé cada-güedé. Te cuáháⁿ-güedé dándàhú-güedé nchaa ñáyíu ñá túú ñihí ndéé cada ndáá cuendá canchicúⁿ nihnú-yu nchaa tnúhu cáháⁿ-güedé. Te mee-ni nchaa sá ndécú ndihí tnaha ñáyíu-güedé cúú ñni-güedé, te cue téé-án cúú-güedě cue téé duuⁿ duuⁿ sa ní xíta nihnu núú Yă Ndiöxí. ¹⁵ Chi cùu-güedé cue téé vǎ cánǐ-gǎ ñni-xi cada ndáá, te nchícúⁿ nihnu-ná-güedé quidé-güedě năcuăa ní xóo cada ndíi Balaám déhe ndíi Bèór, chi ndíi Balaám-án nǐ xóo tnahá ñni ndíi cada ndíi chiuⁿ cuehé năcuăa ní xóo ñihí ndíi díhúⁿ. ¹⁶ Te Yă Ndiöxí ní quide-gá ní cáháⁿ búrru ndíi ní tenáá ñáhá-dí xii ndíi cuendá sá vǎ cadá ndíi ñⁿ cuéchi sàni ñni ndíi cada ndíi ni cùu. Te sá dúcáⁿ nǐ cuu xiăⁿ ní nguítuu ndíi ñá túú ní quide ndíi ñⁿ sá ñà túú năndíhí sàni ñni ndíi ni cùu.

¹⁷ Te nchaa cue téé ducaⁿ xǐquide cùu-güedé dàtná ñⁿ doco yìchí, te cùu tucu-güedé dàtná ñⁿ vícú sǎ xídó tǎchí

te ñá túú dǎú nchídó-xí, te sa ndècu túha ñⁿ xichi núú ïo nee quíhíⁿ-güedé cundecu-güedé ñi caa ñi quíhíⁿ. 18 Te cue téé-áⁿ càháⁿ-güedé dàtná càháⁿ ñⁿ téé ío cùu cahnu dico ñá túú vèdana nàndihí nchaa tnúhu càháⁿ-güedé, te cue téé-áⁿ dándàhú-güedé nchaa ñáyiu íchí ñí dáñá ìchi cuehé ichi duha, te xǎhaⁿ-güedé xii-yu sá cúú-ní càdá-yu nchaa sá cuèhé sá dúhá quide nchaa ñáyiu ndècu ichi díí ñí, 19 te xǎhaⁿ tucu-güedé sá cúú-ní càdá-yu nání véxi ñí-yu cuèi sá vǎha te cuèi sá cuèhé, dico mee-güedé chi mee-ni sǎ cuèhé sá dúhá cùnuu quide-güedé. Te nchaa ñáyiu ñá ndácú dàña nándi sá cuèhé sá dúhá cùu-yu dàtná ñⁿ ñáyiu xìnu cuechi ñá túú tnàhí dàña quee núú chíúⁿ pàtróoⁿ-xi. Te ducaⁿ sǎtnahá-xi cùu-yu chi ñá ndácú-yu dàña-yu nándi sá cuèhé sá dúhá quide-yu. 20 Te núu ñáyiu sa ní dáñá nchaa ichi cuehé ichi duha cuendá sá ñi cutnùní ñí-yu nàcuáa ndùu tnúhu Xítoho Jesucristú, Yaá ní dácǎcu ñihnu ñaha xii-o núú ùhú núú ndàhú ná nanchocáva ñí-yu cundecu tucu-yu ichi cuèhé ichi duha, te mee-nǎ sá cuèhé sá dúhá tàxi tnuní ñáhá-xí xii-yu, te núu ducaⁿ te vǎa-gǎ tucu cadá-yu dácúxí dàtná ní xóo cadá-yu cútnàhá vátá cútnùní-gǎ ñí-yu nàcuáa ndùu tnúhu-gǎ. 21 Te vǎha-gǎ sá vǎ ngǔnu ichí-yu ichi ndáá ní cùu te ñá díú sǎ sà ní ngúnu ichí-yu te ní dáñá-yu nchaa tnúhu-gǎ sá sà ní ñíhí-yu ndècu ndihí-yu sànu ichi ñaha-xi nacuáa cundecú-yu ñi cùu. 22 Te ñáyiu ducaⁿ xiquide quèe ndáá-xi nàcuáa cuáháⁿ ñⁿ cuèndú sá càchí-xi: “Iná ní nacaxi-dí sá ñí ndusaⁿ-dí, te cùchí quiti íchí ñí xichi ndute càndoo cuáháⁿ-ni tucu-dí cuchi ñihu-dí núú ndèhyú”, duha cuáháⁿ cuèndú-áⁿ.

3

Xítoho Jesucristú quixi tucu-gǎ

1 Te nchaa nchòhó ñáyiu ío cùu ñí-í cùtnuní ñí-í sá ïo vǎha sàni ñí-í ndó, te xéhé cúú-xí tütú cúú ùú cǎdúha-í sá cúú-xí-ndó, te ñⁿ-ni càháⁿ-í dándacu ñí ñáhà-í xii-ndo nchaa tnúhu sá

sà ní xíndedóho-ndo. 2 Chi cuíni-í sá vǎ nàcuáa-ndo nchaa tnúhu ní càháⁿ nchaa cue téé ní xóo càháⁿ tnúhu Yá Ndiòxí ndéé sanaha, te ñí vǎ nàcuáa-ndo nchaa tnúhu ní càháⁿ cue téé ní càháⁿ tnúhu Xítoho Jesucristú Yaá ní dácǎcu ñihnu ñaha xii-o núú ùhú núú ndàhú, chi díu nchaa tnúhu-áⁿ sánú ìchi ñaha-xi xii-o nacuáa cada-o cundecu-o.

3 Te ío-gǎ xíni ñihu-xi cutnuní ñí-ndó nàcuáa cada-xi òré vátá sǎa-gǎ nduu quixi tucu Xítoho Jesucristú ñuyíu-a, te càchí tnúhu-í xii-ndo sǎ cùndècu ñáyiu cuhuⁿ ñí mee-ni nchaa sá cuèhé sá dúhá te mee-ni xǎⁿ cadá-yu, te càháⁿ cuèhé càháⁿ duhá-yu cuendá tnúhu Yá Ndiòxí. 4 Te cachí-yu: “Ñá ndáa sá quixí Xítoho Jesucristú ñuyíu-a, chi núu quixi-gǎ te sá ndéé ama-gǎ sa ní quexio-gǎ ní cùu. Te dàtná-ni quide-xi vitna díu-ni duha ní quesaha-xi quide-xi ndéé cútnàhá ní ngáva ñuyíu, te díu-ni duha quide-xi ndéé cútnàhá ní xíndecu cue ñaní tnàhá-ó ndéé sanaha, te díu-ni duha quide-xi ndéé ní sǎa nduu ní xíhí-güedé, te díu-ni duha quide-xi ndéé vitna”, duha càháⁿ-yu. 5 Te ñucùuⁿ cadá-yu vǎ cadá cuendá-yu sá Yá Ndiòxí ní càháⁿ-gǎ te ní ngúndecu andiu ndihí ñuyíu-a, te díu-gǎ ní quide ní quene ñihu yìchí xití ndute ní ngúndecu-xi ñⁿ xio. 6 Te ñⁿ xito ní dándáa Yá Ndiòxí ndute ñuyíu-a ní dánáa-gǎ nchaa sá ío. 7 Te Yá Ndiòxí ní cachí-gǎ sá cùndècu-ni ñuyíu-a ndihí andiu ndéé ná sǎa nduu càda-gǎ nchaa nàcuáa ní càháⁿ-gǎ sá cúú-xí nchaa ñáyiu ndècu ichi cuehé ichi duha, te dàvá-áⁿ danàa-gǎ nchaa ñáyiu-áⁿ chi cáyú andiu ndihí ñuyíu-a.

8 Te nchaa nchòhó ñáyiu ío cùu ñí-í, ío cuhuⁿ ñí-í ndó tnúhu na càháⁿ-í-a, chi Yá Ndiòxí ñá túú sàni ñí-í-gǎ dàtná sání ñí-í méé-ó, te ñⁿ nduu cùu-xi datná úxí cièndú cuía, te úxí cièndú cuía-áⁿ cúú-xí dàtná ñⁿ nduu sá cúú-xí-gǎ. 9 Te Yá Ndiòxí ñá túú dàna ndodo ñí-í-gǎ vǎ cadá-gǎ ñⁿ sá càháⁿ-gǎ dàtná càchí cue ñáyiu sá dáná ndòdo ñí-í-gǎ cada-gǎ ñⁿ sá càháⁿ-gǎ, chi ñucùuⁿ tnahí dácaca-gǎ nduu cuendá sá ïo

cùndahú iní ñáhá-gă xii-o, te cuíní-gá sá ncháá ñáyiú ndixi túu iní-yu sá ñà túú quide váha-yu ndécú-yu te tuhá-yu ichi-gá, te ducaⁿ quide-gá chi cuíní-gá sá vă cuíta nihnu ni ñⁿ-yu.

10 Te dàtná quidé cuè ñadúhú quíhu-güedé ñⁿ vehe dùhu-güedé òré ñá túú yíhi iní xítóhó vehe-áⁿ, te ducaⁿ càda Xítóhó Jesucristú chi nduu ñà túú yíhi iní ñáyiú ñuyíú-a quixi tucu-gá, te dává-áⁿ cada-xi andiú dàtná quidé-xí òré níhi vîhi caháⁿ ñúhu, te ðiu-ni òré-áⁿ ndoñuhu àndiú, te cáyú nchaa chódíní, te cáyú tucu tnàhá ñuyíú-a ndihi nchaa sá íó.

11 Te vitna nchòhó sa xíní-ndó sá náá ñuyíú-a te xiáⁿ ío xini ñuhu-xi cada váha-ndo cùndecu-ndo, te cada-ndo nàcuáa cuíní méé Yá Ndióxi cunduu. 12 Te ío nducu ndèe-ndo ducaⁿ cada-ndo cuendá ducaⁿ ndíhi-ni sáa nduu càda-gá nchaa nàcuáa càháⁿ-gá, te ducaⁿ nchòhó cundecu túha-ndo sáa nduu-áⁿ. Te ðiu-ni nduu-áⁿ ndoñuhu àndiú chi cáyú-xi, te ðiu-ni ducaⁿ ndòñuhu tucu nchaa chódíní chi ndíhi-ðí cáyú. 13 Te nchoo ndètu-o sáa nduu cùndecu-o ñⁿ ñuyíú sáa, te quiní-ó ñⁿ andiú saa datná ní cachí Yá Ndióxi, te yàcáⁿ chi mee-ná cue ñáyiú quide váha cundecu.

14 Te nchòhó ñáyiú ío cùu iní-í, nini ndètu-ndo sáa nduu dùcaⁿ cada-xi ío nducu ndèe-ndo cada-ndo mee-ni sá văha cundecu-ndo ichi Yá Ndióxi, te cundecu nahi-ndo, te cada-ndo nchàa nacuáa vá cùndècu cuéchi-ndo núú-gá. 15 Te ío cada cuendá-ndó sá dácaca-gá nduu dùcaⁿ cada-gá chi cuíní-gá sá ncháá ñáyiú naníhi tàhú-yu. Te té Páblú téé ío cùu iní-ó ndècu ndíhi-o ichi Xítóhó Jesucristú ðiu-ni nàcuáa càháⁿ-í-a ðiu-ni ducaⁿ ní tee-dé ñⁿ núú tütú ní dáquixí-dé ndaha-ndo, te ní tee-dé nàcuáa ní dácáhú iní ñáhá Yá Ndióxi xii-dé. 16 Te ðiu-ni ducaⁿ càháⁿ-dé nchaa dava-gá núú tütú cádũha-dé, te dava tnúhu càháⁿ-dé ío úhú tecú tnùní-ó, núú xiáⁿ ñáyiú ñà túú cùtnuní váha iní-xi, ñáyiú ío yáchí sàndáá iní-xi ñⁿ tnúhu, ñáyiú-áⁿ tècú tnùní dátñi-yu nchaa tnúhu ní chídó tnùní-dé, ndíhi nchaa

dava-gá tnúhu yòdo tnuní núú tütú Yá Ndióxi, te sá dúcáⁿ quidé-yu te dacuíta nihnú-yu mèé-yu.

17 Te nchòhó ñáyiú ío cùu iní-í, sa cùtnuní iní-ndó nàcuáa quide dava ñáyiú, núú xiáⁿ ío xini ñuhu-xi quíhi iní-ndó cùndecu-ndo cuendá ducaⁿ cùndecu-ni-ndo ichi-gá, te vá dáñá-ndó mèe-ndo dandahú ñáhá nchàa cue téé ndècu ichi cuehé ichi duha, chi cue téé-áⁿ ñà túú sàni váha iní-güedé cuendá tnúhu Yá Ndióxi. Te núu na dàña-ndo mee-ndo dandahú ñáhá-güedé xii-ndo te vá cùndècu váha-gá-ndó ichi-gá dàtná ndécú-ndó vitna. 18 Te nchòhó uuⁿ-gá uuⁿ-gá cuita cutnùní-gá iní-ndó quíhiⁿ nchaa nàcuáa ta chindee ñaha Xítóhó Jesucristú xii-ndo cuáháⁿ. Te ducaⁿ ío-gá cuita cutnùní iní-ndó nchàa nacuáa sàni iní-gá, te ðiu-gá cúú-gá Yaá ní dácăcu nihnu ñaha xii-o núú ùhú núú ndáhú. Te chí ná càchí-ó sá ío càhnu cuu-gá cuéi vitna té cuéi ndéé núú cuáháⁿ núú vëxi. Te ducaⁿ na cùnduu. Te ío chí cádá ndèe iní-ná vitna.

TUTÚ DÍHNA NÍ CADÚHA TÉ JUÁÁ

Tnúhu sá cãháⁿ nãcuáa naníhi tãhú-ó

¹ Te yúhú té Juáá cãchí tnúhu-í xii-ndo cuëndá Cristú Yaá cãháⁿ nãcuáa cundecu ndihí-o Yã Ndiõxí. Te Cristú-áⁿ sa ndècu-gá ndéé cútnáhá ní ngáva ñuyúú. Te yúhú ní xiní núú-í ndihí cue téé ní xica cuu ndihí-í nãcuáa cãa nacuáa ndùu-gá. Te ní xíndedóho-ndí tnúhu ní cãháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúú-gã. ² Te ní quixi túu-gá ñuyúú-a, te ní xiní-ndí-gá, te xíãⁿ cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gã ndihí Tãtá-gã Dútú Ndiõxí ní cùu, te ní quixi-gá ñuyúú-a ní xíndecu-ndí ndihí-gá. Te ní cachí tnúhu-gá xii-ndí sá ndúú tãhú-ó cundecu ndihí-o Yá Ndiõxí ní caa ní quíhíⁿ te núu na quíndáá iní-ó-gã. ³ Te xíãⁿ dátũu-ndí núu-ndó nchãa sá ní xiní-ndí, ndihí nchaa sá ní xíndedóho-ndí cuëndá cuu ñⁿnuu-o nchãa-o datná nchúhú cúú ñⁿnuu-ndí ndihí Tãtá-ó Dútú Ndiõxí, ndihí Déhe-gá Xítoho Jesucristú. ⁴ Te xíãⁿ núu tèe-í nchaa tnúhu-a cuëndá cudí iní-ó nchãa-o.

Yá Ndiõxí cúú-gã dàtná ñⁿ ñuhú

⁵ Te nchaa tnúhu ní dánèhé ñáhá Xítoho Jesucristú xii-ndí, xíãⁿ dánèhé ñáhá-í xii-ndo. Te ní cachí-gá sá Yã Ndiõxí cúú-gã dàtná ñⁿ ñuhú dáyèhé-gá iní-ó, te ducaⁿ sãtnahá-xi cùu-gá chi ío váha quide-gá, te ñá túú quide-gá ní ñⁿ sá cuèhé sá dúhá. ⁶ Te núu cãchí-ó sã ndécú-ó ìchi Yá Ndiõxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núú-gã. ⁷ Te núu na cãda váha-o dàtná quidé mèe-gá, te cuu ñⁿnuu-o nchãa-o. Te ndada ndoo ndada nine-gá iní-ó, chi cada cãhnu iní-gá nchaa sá cuèhé sá dúhá

quide-o, chi diu cuëndá-áⁿ ní xíhí Déhe-gá Xítoho Jesucristú núú cùrúxí.

⁸ Te núu cãchí-ó sã ñá túú quide-o ní ñⁿ sá cuèhé sá dúhá, te dândahú-ó mèe-o, te ñá túú quide ndáá-ó núú Yã Ndiõxí. ⁹ Te núu na nãhmá-ó nchãa yíca cuèchi-o núú-gã, te mee-gã cada cãhnu iní-gá, te ndada ndoo-gá iní-ó, cuëndá cada ndáá-ó cundecu-o ichi-gá, chi mee-gã ío váha quide-gá te ío ndáá quidé-gã, ducaⁿ ní cãháⁿ-gá te ducaⁿ quide-gã. ¹⁰ Te núu na cãchí-ó sã ñá túú quide-o ní ñⁿ sá cuèhé sá dúhá, te quide-o Yá Ndiõxí ñⁿ ñándéhné, dico ñá túú ndèhnde-gá. Te ñá túú ndècu tnúhu-gá iní-ó te núu ducaⁿ na cãda-o.

2

Xítoho Jesucristú cãháⁿ ndàhú-gá cuëndá-ó

¹ Te nchòhó ñáyiu cùu datná déhe-í, chido tnuní-í nchaa tnúhu-a cuëndá sá vã cadá-ndó ní ñⁿ sá cuèhé sá dúhá. Dico núu ñⁿ-ndo quide-ni-ndo nãndí sá cuèhé sá dúhá, te ndècu ñⁿ Yaá cãháⁿ ndàhú cuëndá-ó núú Yã Ndiõxí. Te Yaá-áⁿ cúú-gã Xítoho Jesucristú Yaá quidé ndáá. ² Te ní xíhí-gá sá cuëndá nchaa yíca cuèchi-o cuëndá ngúndecu váha-o núú-gã te núu na quíndáá iní-ó-gã. Te ñá díú-ní sã cuëndá yíca cuèchi nchoo ní xíhí-gá, chi tnàhá cuëndá nchaa yíca cuèchi ñáyiu ní cãa xico ñuyúú.

³ Te núu cada-o nchãa nacuáa cãháⁿ Yã Ndiõxí, te cutnùní iní-ó sã ndécú-ó ìchi-gá. ⁴ Te núu cãchí-ó sã ndécú-ó ìchi-gá te ñá túú quide-o nacuáa cãháⁿ-gá, te dàcuandehnde-o, te ñá túú quide ndáá-ó núú-gã. ⁵ Te núu sãndáá ndisa iní-ó tnúhu-gá, te quide-o nchaa nacuáa cãháⁿ-gá, te ducaⁿ te cùu iní ndisa-o-gã, te cutnùní ndáá iní-ó sã ndécú-ó ìchi-gá. ⁶ Te núu cãchí-ó sã ndécú-ó ìchi Yá Ndiõxí, te xini ñuhú-xi cada ndáá-ó cundecu-o ñuyúú-a dàtná ní quide ndáá Xítoho Jesucristú cútnáhá ní xíndecu-gá ñuyúú-a.

Ndudú sáá

7 Te nchòhó ñáyiú ndècu ndìhi-í ichi Xítóhó Jesucristú, ñá túú chído tnuní-í ñá túú sa sà cúu-xí-ndó, chi diu-ni tnúhu sá ñá ngúndecu ndìhi-ndo ndéé díhna, tnúhu ní xíndedóho-ndo ndéé cútnàhá ní sándáá iní-ndó-gá, xiáⁿ chídó tnùn-í. 8 Te tnúhu-a cùu-xi datná ñá túú sa tée-í dándàcu iní ñáhà-í xii-ndo nàcuáa ní quide Xítóhó Jesucristú cútnàhá ní quixi-gá ñuyíú-a ní quide váha-gá, te tnàhá nchòhó ní tnì-ndo tnúhu-gá te quide váha-ndo tnàhá-ndó. Te vitna ñá túú nduu ñá túú ta cùu vai ñáyiú ta dàña nchaa sá cuèhé sá dúhá cuáháⁿ, chi Xítóhó Jesucristú tá dándixi túu-gá iní-yu cuèndá cutnùn-í iní-yu nàcuáa nduu cuendá Yá Ndiòxí.

9 Te núu càchí-ó sá quidé vâha-o, te cùu úhú iní-ó tnàhá ñáyiú-o, te xiáⁿ ñá túú quide ndáá-ó, chi ndècu-ni-o ichi cuèhé ichi duha sá dúcáⁿ quide-o. 10 Te núu na cùu iní-ó tnàhá ñáyiú-o datná cúu iní ñáhá mèe Yá Ndiòxí xii-o ña, te quide ndáá-ó núú-gá, te vá cánúichi-o tnàhá ñáyiú-o ñá túú ichi cuèhé ichi duha. 11 Te núu cùu úhú iní-ó tnàhá ñáyiú-o, te ñá túú quide váha-o núú Yá Ndiòxí, chi ndècu-ni-o ichi cuèhé ichi duha, te ñá túú cùtnuní iní-ó sá quidé-ó. Chi cùu-o datná ñá túú tée ndècu núú néé chi ñá cútnùn-í núú-dé ndéé ichi quíhíⁿ-dé. Ducaⁿ sátnahá-xi cùu nchoo chi ñá cútnùn-í iní-ó ndéé ichi quíhíⁿ-ó te núu ducaⁿ na càda-o cuu úhú iní-ó tnàhá ñáyiú-o.

12 Te nchòhó ñáyiú cùu datná déhe-í, yúhú chídó tnùn-í tnúhu-a ñá túú tütú càchí tnúhu-í xii-ndo sá ñá quide càhnu iní Yá Ndiòxí nchaa cuèchi-ndo, chi diu cuèndá-áⁿ ní xíhí Xítóhó Jesucristú. 13 Te nchòhó ñáyiú sacuéhé, yúhú tée-í tnúhu-a sá cúu-xí-ndó chi càháⁿ ndìhi-ndo Jèsús, te Yaá-áⁿ sa ndècu-gá ndéé cútnàhá ní ngáva ñuyíú. Te nchòhó ñáyiú nchìcúⁿ-gá tée tucu-í tnúhu-a sá cúu-xí-ndó chi ñá túú sándáá iní-ndó tnúhu càháⁿ yucu ñávâha.

Te nchaa nchòhó ñáyiú cùu datná déhe-í, tée tucu-í tnúhu-a sá cúu-xí-ndó, chi sa càháⁿ ndìhi-ndo Tátá-ó Dütú Ndiòxí. 14 Te nchòhó ñáyiú ní sàhnu, yúhú chídó tnùn-í

tnúhu-a ñá túú tütú chi càháⁿ ndìhi-ndo Jèsús, te Yaá-áⁿ sa ndècu-gá ndéé cútnàhá ní ngáva ñuyíú. Te nchòhó ñáyiú nchìcúⁿ-gá, yúhú chídó tnùn-í tnúhu-a chi ío nihí ndéé-ndó ndècu-ndo, chi tnì-ndo tnúhu càháⁿ Yá Ndiòxí. Te ñá túú sándáá iní-ndó tnúhu càháⁿ yucu ñávâha.

15 Te vá cúhúⁿ iní-ndó ní ñá túú sá cuèhé sá dúhá ío ñuyíú-a, te ní vá cání iní-ndó càda-ndo. Chi núu na cùhuⁿ iní-ó nchaa sá cuèhé sá dúhá ío ñuyíú-a ña, te ñá túú Tátá-ó Dütú Ndiòxí ñúhú iní-ó te núu ducaⁿ na càni iní-ó. 16 Te nchaa ñáyiú ñuyíú-a quidé-yu nchaa sá cuèhé sá dúhá, chi diu nchaa xiáⁿ cúdíⁿ iní-yu cadá-yu. Te nchaa sá cuèhé sá dúhá sàni iní-yu, ndìhi nchaa sá xini-yu quidé-yu. Te xiquide nínu-yu mèe-yu cuèndá nchaa sá ndécú ndìhi-yu. Te nchaa sá ña túú vâha ní cacu nihnu-xi ñuyíú-a. 17 Te nchaa sá ña túú vâha ío ñuyíú-a, ndìhi nchaa sá sání cuèhé sání dùha iní-yu cuita ndìhi nihnu-xi quíhíⁿ. Te nchaa ñáyiú tnì tnúhu càháⁿ Yá Ndiòxí cundecú-yu ndìhi-gá ní caa ní quíhíⁿ.

Tnúhu ndáá tnúhu Yá Ndiòxí ndìhi tnúhu ndehnde

18 Te nchòhó ñáyiú cùu datná déhe-í, sa nihí-ndó tnúhu sá quíxí ñá túú tée cunuu-gá-dé cuu úhú iní-dé Cristú. Te sa xíndecu-gá ñáyiú cùu úhú iní ñáhá xii-gá, núu xiáⁿ cútnùn-í iní-ó sá sà ta cuyatni nduu naa ñuyíú-a. 19 Te ñáyiú-áⁿ ní xíndecu ndìhi ñáhá-yu xii-o, te ní queé-yu cuáháⁿ-yu chi ñá túú ní cùu ñá túú-ndo ndìhi-yu. Chi núu dicó ní cùu ñá túú-ndo ndìhi-yu te cundecu ndìhi ñáhá-yu xii-o ní cùu. Te duha ní cuu cuèndá cutnùn-í ndáá iní-ó nchaa-o sá ña túú cùu ñá túú-ndo ndìhi-yu, chi ñá túú sándáá iní-yu Yá Ndiòxí.

20 Te Xítóhó Jesucristú ní taxi-gá Espiritú Yá Ndiòxí ndécú ndìhi-o, núu xiáⁿ təcú tnùn-í tnúhu-gá. 21 Te cuèndá sá xini-ndó tnúhu ndáá tnúhu Yá Ndiòxí núu xiáⁿ tée-í tnúhu-a, te ñá díú ñá túú sá ñá cútnùn-í iní-ndó cùu-xi. Te sa nàha-ndo sá ní ñá túú tnúhu ndehnde ña túú ñútnahá-xi núú tnúhu Yá

Ndiöxí, chi mee ñine-ni tnúhu ndáá cúú-xí.

²² Te nchaa ñáiyu càchí sá ñà díú Jèsús cúú Crístú Yaá ní tendaha Yá Ndiöxí ní quixi ñuyíú-a dàcuandehndé-yu, te cùu úhú iní-yu Jèsús. Te ñu-ní-yu càchí-yu sá ñà díú Dèhe Yá Ndiöxí cúú Jèsús, te sá dúcáⁿ quidé-yu te cùu úhú iní-yu Yá Ndiöxí ndihí Dèhe-gá Jèsús. ²³ Te nchaa ñáiyu ñá túú sàndáá iní sá Dèhe Yá Ndiöxí cúú Jèsús, ñáiyu-áⁿ ñà túú ndécú-yu ichi Tátá-ó Dütú Ndiöxí. Te nchaa ñáiyu càháⁿ sá Dèhe Yá Ndiöxí cúú Jèsús, ñáiyu-áⁿ ndécú-yu ichi Tátá-ó Dütú Ndiöxí.

²⁴ Te nchaa tnúhu Yá Ndiöxí ní tecú dóho-ndo ndéé díhna, tnúhu-áⁿ cuhuⁿ iní-ndó. Te núu nchaa tnúhu-áⁿ ná cùhuⁿ-ni iní-ndó, te cundecu ndihí-ndo Yá Ndiöxí ndihí Dèhe-gá cuèi vá cùndecu túu-ndo ndihí-gá ñuyíú-a. ²⁵ Te Jèsús ní cachí-gá sá ndúú tǎhú-ó cùndecu ndihí-o-gá ni caa ni quíhíⁿ andíu.

²⁶ Te cuendá nchaa ñáiyu dándahú ñáhá xii-ndo ní chídó tnùn-í tnúhu-a, ²⁷ dico nchòhó chi ndècu ndihí-ndo Espiritú Yá Ndiöxí sá ñí taxi Xítohó Jesucristú. Núu xǎⁿ ñá túú xini ñuhu-ndo ñáiyu danèhé ñáhá xii-ndo, chi mee Espiritú-gá dánèhé ñáhá-xí nchaa sá vǎha. Te nchaa sá dánèhé ñáhá-xí xii-ndo cuu-xi sá ndáá, te ñá díú ñⁿ tnúhu ndehnde. Te vitna chí cǎnchícúⁿ nihnu-ni ichi Yá Ndiöxí dàtná ní sanu ichi ñaha mée Espiritú-gá xii-ndo.

²⁸ Te nchòhó ñáiyu cùu datná déhe-í, chí cǎnchícúⁿ nihnu-ni ichi Xítohó Jesucristú, chi cuendá òré ná quíxi tucu-gá ñuyíú-a te vá yùhú-ndó te ní vá cúú càháⁿ núú-ndó núú-gǎ. ²⁹ Te nchòhó sa ñaha-ndo sá mée-gǎ quidé ndáá-gá, te sa xini-ndó sǎ ncháá ñáiyu quide ndáá cúú-yu déhe Yá Ndiöxí.

3

Ñáiyu cùu déhe Yá Ndiöxí

¹ Te chí cuǎha cuendá sá ño cùu iní ñáhá Tátá-ó Dütú Ndiöxí xii-o cuendá sá cúú-ó déhe-gá, chí ducaⁿ ní cachí-gá, te déhe ndisa-gá cúú-ó. Te

núu xǎⁿ ñáiyu ndècu ichi cuehé ichi duha ñá cúú quini ñáhá-yu xii-o, chí ñá túú xini-yu ñacuáa ndùu cuendá Yá Ndiöxí. ² Te nchòhó ñáiyu ío cùu iní-í, vitna cùu-o déhe Yá Ndiöxí, te vátá cùtnuní váha-gá iní-ó ñasa cunduu-o ndéé núú cuáháⁿ núú vèxi. Dico sa cùtnuní iní-ó sá òré ná quíxi tucu Xítohó Jesucristú te nduu-o dàtná cáá mée-gá, chí quini-ó-gǎ ñacuáa-ni càa ñacuáa-ni ndùu-gá. ³ Te nchaa ñáiyu sa ndètu ñaha xii-gá sa ta ngùndecu túha-yu cuáháⁿ, chí ta ndùu ndoo nduu nine iní-yu cuáháⁿ dàtná cáá ndoo caa nine mee-gá.

⁴ Te nchaa ñáiyu quide nándi sá cuèhé sá dúhá ñá túú quide váha-yu núú Yá Ndiöxí, chí ní cachí-gá sá vǎ dúcáⁿ càda-o. ⁵ Te sa ñaha-ndo sá ní quíxi túu Xítohó Jesucristú ñuyíú-a cuendá cada càhnu iní-gá nchaa sá cuèhé sá dúhá quide-o, chí mee-gǎ ñá túú quide-gá ni ñⁿ sá cuèhé sá dúhá. ⁶ Te nchaa ñáiyu ndècu ichi Yá Ndiöxí ñá túú ñùhú-yu ichi cuèhé ichi duha. Te nchaa ñáiyu ñùhu ichi cuehé ichi duha ñá túú xini-yu ñacuáa ndùu cuendá Xítohó Jesucristú te ní ñá túú xini-yu nása càa-gá. ⁷ Te nchòhó ñáiyu cùu datná déhe-í, vá dáñá-ndó mée-ndo dándahú ñáhá ñáiyu ndècu ichi cuehé ichi duha, chí càchí-yu sá cúú cùndecu-o ichi Yá Ndiöxí te cada-o nándi sá cuèhé sá dúhá dico ñá ndáá. Te nchaa ñáiyu quide váha quide ndáá-yu dàtná quidé mée Jesús. ⁸ Te nchaa ñáiyu ndècu ichi cuehé ichi duha ndècu ndihí-yu yucu ñávǎha, chí ducaⁿ quide mee-xi ndéé cùtnàhá vátá ngǎva-gá ñuyíú. Te xǎⁿ ní quíxi Jèsús Dèhe Yá Ndiöxí ní dáquéé tǎhú-gǎ nchaa sá quidé yùcu ñávǎha.

⁹ Te nchaa ñáiyu ní natuha ichi Yá Ndiöxí ní nduú-yu déhe-gá, te ñá túú-gǎ quidé-yu nándi sá cuèhé sá dúhá chí ní ndada ndoo ní ndada nine-gá iní-yu. Núu xǎⁿ ñá túú-gǎ quidé-yu nándi sá cuèhé sá dúhá, chí ní ngùndecu ndihí ñaha-gǎ xii-yu. ¹⁰ Te cùtnuní iní-ó nándi cùu ñáiyu cùu déhe Yá Ndiöxí, te cùtnuní iní-ó nándi cùu ñáiyu cùu déhe yucu ñávǎha. Te nchaa

ñáyiú ñá túú quide ndáá, te cùu úhú iní-yu tnàha ñáyiú-yu, te ñáyiú-áⁿ ña díú dèhe Yá Ndiöxí cúu-yu.

Cuu iní tnáhá-ó ñⁿ ñⁿ-o

11 Te ndéé òré ní natuha-o ìchi Yá Ndiöxí ní tecú dóho-o sá cúú iní-ó tnàha ñáyiú-o. 12 Te vá cùndùu úhú iní-ó dàtná ní quide ndíi Càin, chi ndíi-áⁿ ñí xíndecu ndíi ndíhi yucu ñávàha núu xíáⁿ ní sahní ndíi ñaní ndíi. Te ducaⁿ ñí quide ndíi chi ní xíndecu ndíi ìchi cuèhé ìchi duha, te ñaní ndíi ní xíndecu-dé ìchi váha.

13 Te nchòhó ñáyiú ndècu ndíhi-í ìchi Xítóhó Jesucristú, vá cada cuendá-ndó sá cúú úhú iní ñáhá nchàa ñáyiú ndècu ìchi cuèhé ìchi duha xii-ndo. 14 Te cunaḥa-ndo na càchí tnúhu-í xii-ndo sá núu na cùu iní-ó tnàha ñáyiú-o, te cùtnuní iní-ó sá sá ní dáñá-ó ìchi sá tá dàcuíta nihnu ñaha xii-o cuáháⁿ ní cùu, te vitna ní tñi-o ìchi váha. Te nchaa ñáyiú ñá túú cùu iní tnàha ñáyiú-xi ñúhu-ní-yu ìchi cuáháⁿ-yu núú úhú núú ndàhú. 15 Te nchaa ñáyiú ñá cúú quíni ndéé tnàha ñáyiú-xi cùu-yu dàtná ñⁿ ñáyiú sahní ndíyi. Te nchòhó sa nàha-ndo sá ñí ñⁿ ñáyiú sahní ndíyi ñá túú ndècu ndíhi-yu tnúhu ndee iní sá nánihí tàhú-yu. 16 Te Xítóhó Jesucristú ní xíhi-gá cuendá nchaa yíca cuèchi-o, núu xíáⁿ cútnuní iní-ó sá ìo cùu iní ñáhá-gá xii-o. Te xíáⁿ cútnuní iní-ó nàcuáa cada-o cùu iní-ó tnàha ñáyiú-o, te cuèi na cùú-ó cuendá sá cúú-xí ñⁿ-yu, cuendá-ná sá ná dàcácu nihnu-ò-yu núú tnúndòho ndecú-yu. 17 Te núu ndècu ndíhi-o sá cóhó sá caxí-ó ndíhi nchaa sá nándíhi-o, te ndècu ñáyiú ndàhú ñá túú vèdana ná ndécú ndíhi, te ñá túú chindee-ó-yu, te ñá túú cùu iní-ó Yá Ndiöxí te núu ducaⁿ na càda-o. 18 Te nchòhó ñáyiú cùu datná déhe-í vá cuendá-ní cúnàha cáháⁿ-ndó sá cúú iní tnáhá-ndó, chi cuu iní tnáhá ndísa-ndo te coto tnàha-ndo.

Vá yùhú-ó núú Yá Ndiöxí

19 Te núu ducaⁿ na càda-o, te cutnùní iní-ó sá ndécú-ó ìchi ndáá ìchi Yá Ndiöxí, te ñá túú-gá ná quíhi

iní-ó núú-gá. 20 Te núu ndíhú iní-ó cuendá ñⁿ sá ñí quide-o, te sa nàha Yá Ndiöxí te núu ní quide váha-o àdi ní quide cuèhé-ó, chi sa nàha ndáá-gá nàcuáa càa iní-ó. 21 Te nchòhó ñáyiú ìo cùu iní-í, na càchí tnúhu-í xii-ndo, te núu ñá túú ñá sání iní-ó te ñá túú ñá quidé-ó, te vá yùhú-ó núú Yá Ndiöxí. 22 Te nchaa sá váha na càcáⁿ-ó núú Yá Ndiöxí, te mee-gá taxi-gá chi tñi-o tnúhu càháⁿ-gá, te quide-o nchaa nàcuáa cùu iní-gá. 23 Te ní cachí Yá Ndiöxí sá quíndáá iní-ó Dèhe-gá Xítóhó Jesucristú, te cuu iní-ó tnàha ñáyiú-o dàtná ní cachí-gá. 24 Te nchaa ñáyiú tñi tnúhu-gá ndécú-yu ìchi-gá, te ndècu ndíhi ñaha-gá xií-yu. Te cùtnuní iní-ó sá ndécú-ó ndíhi-gá chi ní taxi-gá Espiritú-gá ndécú ndíhi-o.

4

Ñáyiú ndècu ndíhi Espiritú Yá Ndiöxí ndíhi ñáyiú cùu úhú iní ñáhá xii Xítóhó Jesucristú

1 Te nchòhó ñáyiú ìo cùu iní-í, vá cùtexínu quíndáá iní-ndó tnúhu càháⁿ nchaa ñáyiú càchí sá ndécú ndíhi Espiritú Yá Ndiöxí. Chi díhna-gá cada cuendá váha-ndo te núu càháⁿ ndáá-yu nàcuáa càháⁿ tnúhu Yá Ndiöxí, chi ìo vài ñáyiú ñuyú-a cachí-yu sá càháⁿ-yu tnúhu-gá dico ñá ndáá. 2 Te duha cutnùní iní-ó nándi cùu ñáyiú ndècu ndíhi Espiritú Yá Ndiöxí. Nchaa ñáyiú càháⁿ ndáá sá Xítóhó Jesucristú ní quixi-gá ñuyú-a te ní cuu-gá ñⁿ yiqui cùñú, ñáyiú-áⁿ cúu-yu ñáyiú cùu cuendá Yá Ndiöxí. 3 Te nchaa ñáyiú ñá túú càháⁿ nàcuáa càa Jesús cútnàhá ní quixi-gá ñuyú-a ñáyiú-áⁿ dándàhú ñáhá-yu, chi ñá túú cùu-yu ñáyiú cùu cuendá Yá Ndiöxí. Te díu-ní-yu cùu úhú iní-yu Jesús. Te nchòhó sa nàha-ndo sá cùndècu ñáyiú cuu úhú iní ñáhá xii-gá, dico yùhú càchí tnúhu-í xii-ndo sá sá ndecú-yu.

4 Te nchòhó ñáyiú cùu datná déhe-í, ndècu ndíhi-ndo Yá Ndiöxí, te ñá dáñá-ndó dándàhú ñáhá nchàa ñáyiú càchí sá càháⁿ tnúhu-gá te ñá ndáá. Te ñá túú sàndáá iní-ndó chi Yá

Ndiöxí Yaa ndécú ndìhi-ndo taxi tñuní víhí-gã dácúúxí yùcu ñávaha ndècu ndìhi nchaa ñáyiu ñùhu ichi cuehé ichi duha. ⁵ Te nchaa ñáyiu dándahú ñáhá sã càháⁿ tñúhu Yá Ndiöxí ndécú-yu ichi cuèhé ichi duha, te mee-ni cuendá nchaa sá íó ñuyíú-a càháⁿ-yu. Te tédóho ñaha nchaa dava-gã ñáyiu ndècu ñu-ni ichi cuehé ichi duha. ⁶ Te nchoo cùu-o ñáyiu cùu cuendá Yá Ndiöxí. Te nchaa ñáyiu xíndecu ichi-gã tñí-yu tñúhu càháⁿ-ó, te nchaa ñáyiu ñá túú ndècu ichi-gã ñá túú tñí-yu tñúhu càháⁿ-ó. Te duha te cùtnuní iní-ó nãndí cùu ñáyiu càháⁿ ndáá, te cùtnuní tucu iní-ó nãndí cùu ñáyiu dándahú ñáhá.

Cuu iní-ó tnàha ñáyiu-o dàtná cúu iní ñáhá mèe Yá Ndiöxí xii-o

⁷ Te nchòhó ñáyiu ío cùu iní-í, xìni ñuhu-xi cuu iní tnáhá-ó dàtná cúu iní ñáhá mèe Yá Ndiöxí xii-o, chi mee-gã táxi-gã sá xìní tñuní-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùu-yu déhe Yá Ndiöxí, te cùtnuní ndáá iní-yu sá ndécú ndìhi ñaha-gã xii-yu. ⁸ Te nchaa ñáyiu ñá túú cùu iní tnàha ñáyiu-xi ñá túú ndècu ndìhi-yu Yá Ndiöxí. Te nchaa ñáyiu ndècu ndìhi Yá Ndiöxí, ñáyiu-áⁿ sãñaha-gã sá xìní tñuní-yu cuendá cuu iní-yu tnàha ñáyiu-yu. ⁹ Te cùtnuní iní-ó sã cúu iní ñáhá Yá Ndiöxí xii-o nchaa-o, chi ní tendaha-gã ñíndí ní Déhe-gã Xítoho Jesucristú ní quixi-gã ñuyíú-a cuendá sá díú-gã cada te naníhí tãhú-ó, te núu na quíndáá iní-ó tñúhu-gã. ¹⁰ Te ío cùu iní ñáhá Yá Ndiöxí xii-o nchaa-o. Te ñá díú sã méé-ó cùu iní-ó-gã, chi díhna-gã méé-gã sa cùu iní ñáhá tnàhí-gã xii-o, núu xíáⁿ ní tendaha-gã Déhe-gã ní quixi-gã ñuyíú-a ní xíhí-gã sá cuendá nchaa yíca cuèchi-o.

¹¹ Te nchòhó ñáyiu ío cùu iní-í, xìni ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gã xii-o. ¹² Te ní ñíⁿ nchoo ñáyiu ndècu ñuyíú-a ñá túú xìní-ó nàcuáa càa Yá Ndiöxí, dico nchoo ñáyiu ní tuha ichi-gã chi cùtnuní iní-ó sã ndécú ndìhi ñaha-gã

xii-o. Núu xíáⁿ cúu iní tnáhá-ó ñíⁿ ñíⁿ-o, te cùtnuní iní-ó sã cúu iní ndisa-o-gã. ¹³ Te cùtnuní iní-ó sã ndécú-ó ìchi-gã, te ndècu ndìhi ñaha-gã xii-o, chi ní taxi-gã Espiritú-gã ndécú ndìhi-o. ¹⁴ Te yúhú ndìhi dava-gã cue téé ní xica cuu ndìhi-gã càháⁿ-ndí sá ñí xíní-ndí Jèsús Déhe Yá Ndiöxí ní quixi-gã ñuyíú-a, chi Tãtá-ó Dütú Ndiöxí ní tendaha ñàha xii-gã ní quixi-gã cuendá dácácu nihnu-gã nchaa nchoo ñáyiu ndècu ñuyíú-a núu ùhú núu ndàhú. ¹⁵ Te nchaa ñáyiu càháⁿ ní yùhu ní iní-xi sá Déhe Yá Ndiöxí cúu Jèsús, ñáyiu-áⁿ ndécú-yu ichi-gã te ndècu ndìhi ñaha-gã xii-yu.

¹⁶ Te sàndáá iní-ó ní yuhu ní iní-ó sã Yá Ndiöxí cúu iní ñáhá-gã xii-o, chi ducaⁿ iní-gã. Te nchaa ñáyiu cùu iní ñáhá xii Yá Ndiöxí ndécú ndìhi ñaha-gã xii-yu. ¹⁷ Te núu ndisa cùu iní-ó Yá Ndiöxí te vá yùhú-ó òré ná sá nduu tàudíⁿ ñaha-gã xii-o tñúu nchaa ñáyiu ndècu ichi cuehé ichi duha, chi quíde ndáá-ó ndècu-o núu-gã ñuyíú-a dàtná ní quíde mee Jèsús. ¹⁸ Chi nchaa ñáyiu cùu iní ñáhá xii Yá Ndiöxí ñá túú-gã yùhú-yu, te núu cùu iní ndisá-yu-gã. Te núu yùhú-yu te xíáⁿ sa ndòhó-yu, chi ñùhú-yu ichi cuáháⁿ-yu núu ùhú núu ndàhú, chi nchaa ñáyiu yùhú ñá túú cùu iní ndisá-yu Yá Ndiöxí.

¹⁹ Te cuu iní-ó Yá Ndiöxí, chi mee-gã ndéé cùtnàhá vátá quíndáá-gã iní-ó tñúhu-gã sa cùu iní ñáhá-gã xii-o. ²⁰ Te nchaa ñáyiu càchí sá cúu iní-yu Yá Ndiöxí, te cùu ùhú iní-yu tnàha ñáyiu-yu, ñáyiu-áⁿ dácuàndehndé-yu. Te núu ñá túú cùu iní-yu tnàha ñáyiu-yu ndècu ñuyíú-a ña, te uuⁿ-gã quídé-yu Yá Ndiöxí Yaa ñá túú xìní núu-yu. ²¹ Te càchí-gã núu tñúhu-gã sá ñáyiu na cùu iní ñáhá xii Yá Ndiöxí, te ducaⁿ-ni cùu iní-yu tnàha ñáyiu-yu.

5

Nchaa ñáyiu ní ndacu ní dáñá ìchi cuehé ichi duha

¹ Te nchaa ñáyiu sàndáá iní sá Jèsús cúu-gã Crístú Yaa ní quixi ñuyíú-a,

ñáyiú-án cúu-yu déhe Yá Ndiöxí. Te cùu iní-yu Tàtá-ó Dütú Ndiöxí, te cùu iní-yu Déhe-gá. ² Te núu cùu iní-ó Yá Ndiöxí te quide-o nacuaa càháⁿ-gá, te cùtnuní iní-ó sá cúu iní tñáhá ndísa-o nacuaa ndècu-o ichi-gá. ³ Te núu cùu iní-ó Yá Ndiöxí te tñi-o tñuhu càháⁿ-gá, chi cùtnuní iní-ó sá ñà díú ìⁿ sá ùhú cúu-xí dàtná càchí ñáyiú. ⁴ Te nchaa nchoo ñáyiú cùu déhe-gá sa ní dáñá-ó ichi cuehé ichi duha, chi ní sándáá iní-ó Jèsús núu xiáⁿ ní ndacu-o ní dáñá-ó ichi-áⁿ. ⁵ Te nchaa ñáyiú sándáá iní sá Déhe Yá Ndiöxí cúu Jèsús ní ndacú-yu ní queé-yu ichi cuehé ichi duha.

Nàcuáa ní càháⁿ Yá Ndiöxí cuèndá Jèsús

⁶ Te Xítoho Jesucristú ní quixi-gá ñuyíú-a, te ní sandute-gá. Te ñà díú-ní xiáⁿ, chi ní xihí-gá sá cuèndá nchaa yíca cuèchi-o. Te Espiritú Yá Ndiöxí càháⁿ-xi mee-ni sá ndáá, chi càháⁿ Espiritú-gá-áⁿ sá Jèsús cúu-gá Crìstú Yaá ní quixi ñuyíú-a. ⁷ Te úní testiú ndécú àndiú, Tàtá-ó Dütú Ndiöxí, ndihi Déhe-gá Xítoho Jesucristú, ndihi Espiritú-gá. Te ìⁿ-ni tñuhu càháⁿ ndi nùní testiú-áⁿ. ⁸ Te ducaⁿ cùu-xi ñuyíú-a tucu, chi càháⁿ Espiritú Yá Ndiöxí sá Jèsús cúu-gá Crìstú. Te ní sandute-gá, te ní xihí-gá sá cuèndá nchaa yíca cuèchi-o. Te xiáⁿ cútnuní ndáá iní-ó sá díú Jèsús cúu-gá Crìstú. ⁹ Te núu tñi-o tñuhu váha càháⁿ ñáyiú, te váha-gá tñi-o tñuhu càháⁿ Yá Ndiöxí, chi càháⁿ ndáá-gá sá Déhe-gá cúu Jèsús. ¹⁰ Te nchaa ñáyiú sándáá iní sá Jèsús cúu-gá Déhe Yá Ndiöxí, ñáyiú-án cútnuní iní-yu sá cúu-xí ìⁿ sá ndáá. Te nchaa ñáyiú ñà túú sándáá iní tñuhu càháⁿ Yá Ndiöxí quide-yu-gá ìⁿ ñándéhdé, dico ñà túú ndèhnde-gá, chi mèé-yu ñà túú sándáá iní-yu sá Déhe-gá cúu Jèsús dàtná càchí mèé-gá. ¹¹ Te Yá Ndiöxí càchí tñuhu ndáá-gá sá cùndècu-o ndihi-gá ni caa ni quíhíⁿ. Te duha càháⁿ-gá chi sándáá iní-ó Déhe-gá. ¹² Te nchaa ñáyiú na quèndáá iní ñáhá xii Déhe-gá cundecú-yu ndihi-gá ni

caa ni quíhíⁿ. Te nchaa ñáyiú ñà túú sándáá iní ñáhá xii Déhe-gá vá cùndècu-yu ndihi-gá.

Sáhú ndèé núu ñi ndihi-ná

¹³ Te cuèndá sá sándáá iní-ndó Déhe Yá Ndiöxí núu xiáⁿ chídó tñuní-í tñuhu-a cuèndá cutnùní iní-ndó sá cùndècu ndihi-o-gá ni caa ni quíhíⁿ.

¹⁴ Te ñà túú tñuhu yùhú càháⁿ ndihi-o Yá Ndiöxí, chi tedóho ñaha-gá xii-o núu ìⁿ-ná sá ná càcáⁿ-ó núu-gá dàtná cuení mèé-gá. ¹⁵ Te cùtnuní iní-ó sá táxi-gá sá xicáⁿ-ó núu-gá, chi ñaha-o sá tedóho ñaha-gá xii-o núu na càcáⁿ-ó nàcuáa cùu iní-gá.

¹⁶ Te núu xini-ó ñáyiú ndècu ichi Yá Ndiöxí te quide-yu sá ñà túú váha núu-gá, te ndèhe-o sá ñà túú ní xita nihnu duúⁿ-yu, te càháⁿ ndihi-o Yá Ndiöxí cuèndá-yu, te dàcácu nihnu ñaha-gá xii-yu te núu na núcunu ichi váha-yu. Chi ió ñáyiú xidó quide nándi sá ñà túú váha te xita nihnu duúⁿ-yu, te vá càháⁿ ndihi-gá-ó Yá Ndiöxí cuèndá-yu. ¹⁷ Te nchaa sá cuehé sá dúhá cùu-xi yíca cuèchi, dico ñà ncháá-xi cùu-xi sá dácuita nihnu ñaha dùuⁿ.

¹⁸ Te ñaha-o sá nchóó ñáyiú cùu déhe Yá Ndiöxí ñà túú-gá sání iní-ó càda-o nándi sá cuehé sá dúhá. Te ducaⁿ chi mee Jèsús déhe Yá Ndiöxí xító ñaha-gá xii-o, núu xiáⁿ ñà ndacú-gá yucu ñáváha dàxínu iní ñáhá-xi xii-o cada-o sá ñà túú váha.

¹⁹ Te nchoo ñaha-o sá ndécú ndihi-o Yá Ndiöxí. Te nchaa ñáyiú ndècu ichi cuehé ichi duha tàxi tñuní ñáhá-ñá yucu ñáváha xii-yu.

²⁰ Te ñaha tucu-o sá ñuyíú-a ní quixi Jèsús Déhe Yá Ndiöxí ní taxi-gá sá xini tñuní-ó cuèndá cutnùní iní-ó sá mèé-gá cúu-gá Ndiöxí-ó. Te ndècu ndihi-o mee-gá ndihi Déhe-gá Jèsús, te ìⁿdi díi-ni mee-gá cúu-gá Yá Ndiöxí, te ndècu dava-gá sá nàcuàca ñaha-gá xii-o cùndècu-o ndihi-gá ni caa ni quíhíⁿ. ²¹ Te nchóó ñáyiú cùu datná déhe-í, vá quèndáá iní-ndó nchaa sá càchí-yu cùu ndiöxí, chi dícó ndaha cue tée ñuyíú-a ní cuáha nchaa xiáⁿ.

Te ducaⁿ na cùnduu. Te ío chí cádá
ndèe iní-nă vitna.

TUTÚ CÚÚ ÒÚ NÍ CADÚHA TÉ JUÁÁ

Tnúhu Yá Ndiöxí ndihi nàcuáa cuu iní tnáhá-ó

¹ Te yúhú té Juáá tée yìndaha ñaha xii ñáyiú sàndáá iní tnúhu Jèsús, tée-í tnúhu-a ñí núú tütú daquixi-í ndaha yòhó ñaha ní cáháⁿ ñáhá Yá Ndiöxí, te nchaa tnúhu-a cùu-xi tnáhá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiöxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhà-ndí xii-ndo.

² Te cùu iní ñáhà-ndí xii-ndo chi ndècu ndihi-ndo tnúhu ndáá tnúhu Yá Ndiöxí, te ducaⁿ-ni cùndecu-o ndihi tnúhu-áⁿ ni caa ni quíhíⁿ. ³ Te xìcáⁿ táhù-í núú Tátá-ó Dütú Ndiöxí, ndihi núú Déhe-gá Xítóhó Jesucristú sá ná chindèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xìcáⁿ táhù-í núú-gá chi ndècu ndihi-o tnúhu ndáá tnúhu Yá Ndiöxí, te cùu iní-ó-gá.

⁴ Te ío cùdíí iní-í, chi ní naníhì-í ñí ùú déhe-n, te quidé-yu nàcuáa sànu ichi ñaha tnúhu ndáá dàtná ní táuchíúⁿ mèe Tátá-ó Dütú Ndiöxí. ⁵ Te vitna yòhó ñaha ní cáháⁿ ñáhá Yá Ndiöxí, cächí tnúhu-í xii-n sá xíní ñùhu-xi cuu iní-ó tnàha ñáyiú-o. Te ñá díú ñí tnúhu saa cùu-xi, chi díu-ni tnúhu sá ñí ngùndecu ndihi-o ndèe cútnàhá ní tuha-o ìchi Yá Ndiöxí. ⁶ Te núu cùu iní-ó Yá Ndiöxí, te cùu iní-ó tnàha ñáyiú-o dàtná ní cachí mèe-gá, te tñi-o nchaa tnúhu càháⁿ-gá. Te ní cachí-gá sá cúú iní-ó-gá, te cuu iní-ó tnàha ñáyiú-o. Te tnúhu-a ní tecú dóho-o ndèe cútnàhá ní tuha-o ìchi-gá.

Cue tée dàndahú tnàha ñáyiú-xi

⁷ Te ío vai ñáyiú dàndahú ñáhá xìca cuú-yu ñuyíú-a, te cächí-yu sá ñá ndáá sá Xítóhó Jesucristú ní cuu-gá ñí ñáyiú ndisa. Te nchaa ñáyiú duha càháⁿ dácuàndehndé-yu, te cùu úhú iní-yu Jèsús. ⁸ Te quíhí iní-ndó sá vǎ dándahú

ñáhá ñáyiú-áⁿ xii-ndo cuèndá sá vǎ cuíta chiúⁿ Yá Ndiöxí ní quide-o. Te òré ná quíxí tùcu Jèsús ñuyíú-a te taxi-gá nchaa sá vǎha cùu iní mèe-gá cundecu ndihi-o.

⁹ Te nchaa ñáyiú dàña tnúhu Xítóhó Jesucristú, te nàtní-yu ñngá ichi, ñáyiú-áⁿ ñà túú ndècu ndihí-yu Yá Ndiöxí. Te nchaa ñáyiú ñá túú dàña tnúhu Xítóhó Jesucristú ndècu ndihí-yu Yá Ndiöxí ndihi Déhe-gá Xítóhó Jesucristú. ¹⁰ Te núu véxi ñáyiú núú ndécú-ndó cächí-yu sá càháⁿ-yu tnúhu Yá Ndiöxí te ñá ndáá, te vá cuǎha-ndo tnúhu danèhé ñáhǎ-yu xii-ndo, te ni vǎ cuǎha-ndǎ-yu tnúhu ndee iní cuèndá chiúⁿ quidé-yu. ¹¹ Chi núu na càháⁿ ndihi váha-ndǎ-yu, te dàtná tnúhu sá chindèe-ndó-yu quidé-yu nchaa sá cuèhé sá dúhá.

Tnúhu ndée núú ñí ndihi-ná

¹² Te ío vai-gá tnúhu cuini-í cachí tnúhu-í xii-ndo, dico vá tée-gǎ-í chi cuini-í quixi-í núú ndécú-ndó ndàtnúhu-o cuèndá cudíí víhí iní-ó nchǎa-o.

¹³ Te nchaa cue déhe cùhú-n, ñáyiú ní cáháⁿ ñáhá Yá Ndiöxí quidé ndèe iní ñáhǎ-yu xii-n.

TUTÚ CÚÚ ÒNÍ NÍ CADÚHA TÉ JUÁÁ

Càháⁿ váha-yu cuèndá té Gǎyú

1 Te yúhú té Juáá té yìndaha ñaha xii ñáyiú sàndáá iní tnúhu Jèsús, chìdo tnuní-í tnúhu-a ñⁿ núú tùtú sá cúú-xí yòhó té Gǎyú téé ío cùu iní-í, chi ndècu ndìhi-n tnúhu ndáá tnúhu Yá Ndiòxí.

2 Te yòhó téé ío cùu iní-í, xìcáⁿ táhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhù-n, chi sa nàha-í sá ndécú vǎha-n núú Yá Ndiòxí. 3 Te ío ní cudí^í iní-í òré ní sáá ñáyiú ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá ñⁿ tnúhu-gá te tnì-n nchaa nacuáa càháⁿ tnúhu-áⁿ. 4 Te ío cùdì^í iní-í ní níhì-í tnúhu sá ncháá-ní ñáyiú ní sanu ichi-í ichi Yá Ndiòxí ndécú-ní-yu ichi-gá, te quìde-ní-yu nchaa nacuáa càháⁿ-gá.

5 Te yòhó téé ío cùu iní-í, ío váha quìde-n núú Yá Ndiòxí, chi chìndee-n nchaa ñáyiú véxi dava-gá ñúú xìcá, ñáyiú sàndáá iní tnúhu Yá Ndiòxí.

6 Te nchaa ñáyiú-áⁿ càháⁿ-yu núú tàcá ñáyiú càháⁿ ndìhi Yá Ndiòxí iha sá ío cùu iní-n nchàa tnaha ñáyiú-n dàtná càháⁿ Yá Ndiòxí. Te yúhú càháⁿ ndàhù-í núú-n sǎ cáda ndèe-ni iní-n chìndee-n nchaa ñáyiú-áⁿ nchaa sá xíní ñùhù-yu ichi. Te núu ducaⁿ na càda-n te quìde-n nacuáa cùu iní Yá Ndiòxí, te xìnu cuechi-n tnahá-n núú-gǎ. 7 Chi nchaa ñáyiú-áⁿ ní tní-yu ichi cuáháⁿ-yu càháⁿ-yu tnúhu Jèsús. Te ñá túú tnì-yu ní ñⁿ sá sǎñaha ñáyiú ñá túú ndècu ichi Yá Ndiòxí. 8 Te núu xǎⁿ nchoo xìni ñuhu-xì chìndee-o nchaa ñáyiú xìnu cuechi núú-gǎ ñáyiú càháⁿ tnúhu-gá, te ducaⁿ te cutnùnì iní-ó sǎ tnàhá-ó xìnu cuechi-o ndìhì-yu núú-gǎ.

Ñá túú quìde váha té Diótrefés

9 Te yúhú ní tendaha-í tutú cuáháⁿ núú tàcá ñáyiú chìñuhù-yu Yá Ndiòxí, dico ñⁿ téé ndècu-áⁿ nání-dé Diótrefés, te ñá sàndáá iní-dé nchaa

tnúhu càháⁿ-í, chi cuìnì-dé cunuu-dé núú-yu. 10 Te òré quixi-í te cada ndáá-ó nchàa tnúhu cuèhé tnúhu duha càháⁿ-dé cuèndá-í. Te ñá díú-ní xǎⁿ quidé-dé, chi nchaa ñáyiú véxi ingá ñúú càháⁿ tnúhu Yá Ndiòxí ñá túú càháⁿ ñáhá-dé vehe-dé, te ní ñá dáñá-dé càháⁿ ndìhi ñaha dàva-gá ñáyiú xii-yu. Te nchaa ñáyiú cuìnì càháⁿ ndìhi ñaha xii-yu, te quèñuhu ñaha duuⁿ-ni-dé ñá dáñá-gǎ-dé níhì tnáhǎ-yu ndìhi nchaa ñáyiú tàcá dácuaⁿha tnúhu Yá Ndiòxí.

11 Te yòhó téé ío cùu iní-í, vá cùndècu-n ichi cuehé ichi duha dàtná quidé nchàa dava-gá ñáyiú, cada-n mèe-ni sá vǎha. Chi nchaa ñáyiú quìde váha ndécú-yu ichi Yá Ndiòxí. Te nchaa ñáyiú quìde nchaa sá cuèhé sá dúhá ñà túú ndécú-yu ichi Yá Ndiòxí.

Nchaa ñáyiú càháⁿ váha-yu cuèndá té Demètriú

12 Te nchaa ñáyiú càháⁿ váha-yu cuèndá té Demètriú, chi quìde ndáá-dé dàtná càháⁿ Yá Ndiòxí. Te tnàhá yúhú càháⁿ-í cuèndá-dé sá ío váha quìde-dé, te nchòhó sa nàha-ndo sá yùhù càháⁿ ndáá-í.

Tnúhu ndéé núú ní ndìhi-ná

13 Te vǎi-gá tnúhu cuìnì-í cachí tnúhu-í xii-n ní cùu, dico ñá ní tèe-gá-í, 14 chi cuìnì-í quixi ndìhi-í, te càháⁿ-ó núú núú-ó.

15 Te ío cada ndee iní, te xìcáⁿ táhù-í núú Yá Ndiòxí sá ná cùndècu váha-n ñà túú nǎ cuu cundecu-n. Te nchaa cue ñáyiú xíní tnàhá ndìhi-o ndecu iha quìde ndee iní ñáhǎ-yu xii-n. Te yòhó cúñaha-n nchàa ñáyiú xíní tnàhá ndìhi-í ndécú xǎⁿ ná càda ndee iní-yu. Te ío cada ndee iní-nǎ vitna.

TUTÚ NÍ CADÚHA TÉ JUDÁS

*Té Jùdás càdũha-dé tutú quíhíⁿ
ndaha ñáyiú ní cachí Yă Ndiõxí nduu
cuendá-gá*

¹ Yúhú té Jùdás ñani té Jàcobó xínú cuèchi-í núú Xítóhó Jesucristú, te càdũha-í tutú-a sá cúú-xí nchòhó ñáyiú ní cachí Yă Ndiõxí Yaá cúú Tátá-ó ndùu cuendá-gá, ñáyiú ío cùu iní-gá. Te dàtná-ni xító ñaha-gá xii-ndo vitna ñu-ni ducaⁿ còto ñaha-gá xii-ndo ndéé ná sáá nduu quíxi tucu Xítóhó Jesucristú ñuyíú-a. ² Te xicáⁿ tãhù-í núú Yă Ndiõxí sá ïo-gá ná chindee chitúu ñaha-gã xii-ndo, te na cùtnuní-gá iní-ndó sã ïo cùu iní ñáhã-gã xii-ndo, te ducaⁿ ïo váha cuu iní-ndó cùndecu-ndo.

*Ñáyiú ñá túú càháⁿ tnúhu ndáá
tnúhu Yă Ndiõxí
(2 Pedro 2:1-17)*

³ Te nchòhó ñáyiú ío cùu iní-í, ducaⁿ-ni ïo sàni iní-í cadũha-í ñú tutú sá cúú-xí-ndó cuendá danèhé ñáhã-í xii-ndo nàcuáa ní cuu ní naníhí tãhù-ó dico ñá túú càdũha-í, dico vitna quide cuendá-í sá xíní ñũhu-gá-xi cáháⁿ-í núú tütú-í sá nchòhó ío cundehe-ndo tnúhu cáháⁿ-ndó ndíhi ñáyiú, te cáháⁿ-ndó nàcuáa ndùu tnúhu sãndáá iní méé-ndó, chi ñu-ni tnúhu-áⁿ ní cáháⁿ Yă Ndiõxí sá cúú-xí nchãa ñáyiú ndècu ichi-gá. Te vitna ñá túú-gã ná tnúhu càháⁿ-gá sá cúú-xí-yu, chi sa ní cáháⁿ duuⁿ-gá. ⁴ Te duha càháⁿ-í núú tütú-a sá cúú-xí-ndó, chi ñihí-í tnúhu sá xicá cùu ñáyiú chìtnahá ñáhã xii-ndo, te ni ñà túú xíní-ndó ñã ñáyiú cùú-yu, te ñáyiú-áⁿ cúú-yu ñáyiú cùu úhú iní ñáhã xii Yă Ndiõxí. Te ñú xichi núú tütú Yă Ndiõxí càchí-xi sá ñáyiú-áⁿ quíhíⁿ-yu núú ùhú núú ndàhú, te ñu-ni ñáyiú-áⁿ càchí-yu sá ïo váha iní Yă Ndiõxí ñũu xicáⁿ cuu-ni cadã-yu nchãa sá cuèhé sá dúhá. Te dàquee tíhũ-yu Yă Ndiõxí Yaá ío cùnuu, ndíhi Xítóhó Jesucristú.

⁵ Te nchòhó sa xíní váha-ndo nàcuáa ní quide Yă Ndiõxí ndéé sanaha dico dândacu iní ñáhã-í xii-ndo, chi dàvá-áⁿ ñi queñuhu-gá ñáyiú isràél nacióⁿ Ègiptú, te dava ñáyiú-áⁿ ñà túú ní sãndáá iní ñáhã-yu xii-gá te ní dánáá ñaha-gá xií-yu. ⁶ Te nchãa espíritú ñá túú ní cuíní cada ndáá cunu cuechi núú Yă Ndiõxí ní quee-xi núú ndécú-xí, te mee-gã ní sadí nihnu ñaha-gã xii-xi ñú xichi núú néé te vá cãcu-xi, chi sáá nduu te nayáha-xi cundecu-xi núú ùhú núú ndàhú ñi caa ñi quíhíⁿ. ⁷ Te dândacu iní ñáhã tucu-í xii-ndo nàcuáa ní yáha ñáyiú ñuú Sòdomá, ndíhi ñáyiú ñuú Gòmorrá, ndíhi nchãa ñáyiú ñuú ní cáa yatni xicáⁿ, chi tnáhã-yu ñá túú ní quide váha-yu dàtná ní quide nchãa cue espíritú-áⁿ. Chi cue téé ní xóo cáháⁿ ndíhi tnàha ndi mee-güedé, te ñu-ni ducaⁿ ñi xóo cada cue ñáyiú ñihí tucu. Te sá dúcãⁿ ñi quidé-yu núú ní dãngóyó Yă Ndiõxí ñuhú ñuú-yu ní dánáá ñaha-gá xií-yu. Te xicáⁿ cùtnuní iní-ó sã nchãa ñáyiú ñá túú cuíní cada váha núú-gã quíhíⁿ-yu núú ùhú núú ndàhú ñi caa ñi quíhíⁿ.

⁸ Te ñu-ni ducaⁿ quide ñáyiú chìtnahá ñáhã xii-ndo cuíní-yu dandàhú ñáhã-yu, chi càchí-yu sá dácòto ñaha saní-yu nàcuáa cadã-yu, núú xicáⁿ nãndi nchãa sá cuèhé sá dúhá quidé-yu sá cúú-xí yiqui cuñú-yu, te dàquee tíhũ-yu nchãa nàcuáa càháⁿ Yă Ndiõxí cada-o, te càháⁿ úhú-yu cuendá nchãa espíritú cùnùu. ⁹ Te mee espíritú cùnùu-gá xínú cuèchi núú Yă Ndiõxí nání Miguél ní nàá-xi ndíhi sácúhñá cuendá yiqui cuñú ndíhi Moisés. Te espíritú-áⁿ ñà túú ní cùyi-xi cáháⁿ úhú-xi sácúhñá-ãⁿ, chi ní xáhaⁿ-ni-xi: “Mee Yă Ndiõxí ñáhã-gã te núú nása cada ñaha-gã xii-n”, duha ní xáhaⁿ-xi. ¹⁰ Te nchãa ñáyiú ducaⁿ dândahú ñáhã xii-ndo-áⁿ càháⁿ cuèhé-yu cuendá nchãa sá vátã cùtnuní-gá iní-yu nása ndùu, te quidé-yu dàtná quidé cuè quiti chi cue quiti-áⁿ quidé-güedé nãni véxi iní-güedé, te ni ñà túú cùtnuní

iní-güedi nchaa sá quidé-güedi. Te ducaⁿ sà tnahá-xi cùú-yu, chi nchaa sá cuèhé sá dúhá vëxi iní-yu quidé-yu, te sá dúcáⁿ quidé-yu xiáⁿ tá xíta nihnú-yu cuáháⁿ.

11 ¡Te ndàhú ní cuú-yu chi ío ndohó-yu!, chi quidé-yu dàtná ní quide ndíi Càin. Te nándi sá quidë-yu cuendá sá cuiní-yu díhúⁿ dàtná ní xóo cada ndíi Bàlaám. Te ío cùu sáá iní-yu núú Yá Ndiöxí dàtná ní xóo cada ndíi Còré, núu xiáⁿ tá xíta nihnú-yu cuáháⁿ. 12 Te dìcò sácáⁿnúú sàha ñáhá-yu xii-ndo òré nátácá-ndó quide-ndo vico chiñuhu-ndo Yá Ndiöxí. Te òré xéxi ndíi ñáhá-yu xii-ndo te mee-ni sá cúú-xí mèe-yu quide cuendá-yu, te ñá túú nèhé-yu sá yíñuhu núú Yá Ndiöxí. Te cùú-yu dàtná ñⁿ vícò sá cuáháⁿ-xi duha cuáháⁿ-xi dàcáⁿ te ñá túú dǎú nchídó-xí, ducaⁿ sà tnahá-xi cùú-yu. Te cùu tucú-yu dàtná ñⁿ yutnu vídí sá ñà túú tnahí cùuⁿ sávídí-xi, te nchaa yutnu ducaⁿ ñà túú cùuⁿ sávídí-xi te tñuhu-güedé ndéé yóho-xi te xihí duuⁿ-xi. Te ducaⁿ sàtnahá-xi cùú-yu, chi ñá túú quide váha-yu. 13 Te cùu tucú-yu dàtná ndute làmár, chi ndute-án òré càndá-xi te quecòo tíñú-xi ñⁿ xio. Te cùu tucú-yu dàtná ñⁿ chódíní cuáháⁿ-di duha cuáháⁿ-di dàcáⁿ. Te ducaⁿ sàtnahá-xi cùú-yu, chi ñá túú cuiní-yu cada váha-yu. Te ñá yiu-án daquihíⁿ ñáhá Yá Ndiöxí xii-yu ñⁿ xichi núú néé núú sà ndecu túha cundecú-yu ni caa ni quíhíⁿ.

14 Te ndíquíⁿ yává ndíi Adán téé cùu usá ní xínani Ènóc ní dácáhú iní ñáhá Yá Ndiöxí xii-dé ní cáháⁿ-dé diu-ni cuendá nchaa ñá yiu-án. Te ní cachí-dé: “Na cachí tñuhu-í xii-ndo sá Yá Ndiöxí quixi-gá ndíi cuèhé víhí espíritú xínú cuèchi núú-gǎ. 15 Te dǎvá-án cada ndáá-gá cuèchi nchaa ñá yiu te daquihíⁿ-gá nchaa ñá yiu ndècu ichi cuehé ichi duha núú ùhú núú ndàhú, te ducaⁿ càda ñaha-gá xii-yu, chi mee-ni sá cuèhé sá dúhá quidé-yu, te càháⁿ úhú ñáhá-yu xii-gá”, duha ní cachí te Ènóc. 16 Te

ñá yiu-án ío yica iní-yu chi ñá túú ndùu vétú iní-yu nàcuáa ndècú-yu ñuyíú-a, te sàtnuhú-yu tñaha ñá yiu-yu te mee-ni sá cuèhé sá dúhá sàni iní-yu quidé-yu, te quide cahnú-yu mèe-yu, te mee-ni càháⁿ váha-yu núú tñaha ñá yiu-yu cuendá cuiní-yu sá cáda váha ñaha ñá yiu-án xii-yu.

Te Jùdás càháⁿ-dé dóho ñá yiu ndècu ichi Yá Ndiöxí

17 Te nchòhó ñá yiu ío cùu iní-í, càháⁿ ndàhú-í núú-ndó sǎ ío cuhuⁿ iní-ndó tñuhu sá sà ní dánèhé ñáhá cuè téé ní tendaha Xítohó Jesucristú càháⁿ tñuhu-gá núú ñá yiu. 18 Te sa nàha-ndo sá ní cachí-güedé sá cùmání-gǎ quixi tucu Xítohó Jesucristú ñuyíú-a, te coo ñá yiu càháⁿ cuèhé càháⁿ duha cuendá tñuhu-gá. Te ñá yiu-án cadá-yu mee-ni sá cuèhé sá dúhá vëxi iní mèe-yu. 19 Te ñá yiu-án cúú-yu ñá yiu càháⁿ nándi tñuhu sá ñà túú nándíi cuendá sá vǎ cúú ñⁿnuu-ndo cundecu-ndo, te mee-ni sá cuèhé sá dúhá ñuhu iní-yu, te ñá túú ndècu ndíi-yu Espíritú Yá Ndiöxí.

20 Te nchòhó ñá yiu ío cùu iní-í, ío dacuàha-ndo tñuhu Yá Ndiöxí sá ní sándáá iní-ndó cuendá ducaⁿ cuíta cuehnu nihnu-ndo ichi-gá quíhíⁿ, te càháⁿ ndíi-ndo Yá Ndiöxí nàcuáa dàcahu iní ñáhá Espíritú-gá xii-ndo. 21 Te ío coto-ndo mèe-ndo cundecu-ndo cuendá cuu váha iní ñáhá Yá Ndiöxí xii-ndo, te cundetú-ndo sáa nduu quixi Xítohó Jesucristú ñuyíú-a nacuaca ñaha-gǎ xii-ndo cundecu-ndo ndíi-gá ni caa ni quíhíⁿ, chi Yá-án ío cundahú iní ñáhá-gǎ xii-o.

22 Te ñá yiu sàni ñⁿ sani úú iní-xi cùñaha-ndo xii-yu nàcuáa cadá-yu cundecú-yu ichi Yá Ndiöxí. 23 Te nchaa ñá yiu ta xíta nihnu ñuhu ichi cuáháⁿ núú ùhú núú ndàhú, ío cundíhí iní-ndó cùñaha-ndo xii-yu tñuhu Yá Ndiöxí cuendá sá ná càcu nihnú-yu, te cundahú iní-ndó-yu, te quíhí iní-ndó vǎ cáda-ndó tñahá-ndó nàcuáa quidé-yu, chi daquèe tíhú-ndó nchaa sá cuèhé sá dúhá quidé-yu-án.

Nàcuáa ndacáⁿ táhú-ó núú Yá Ndiöxí

24 Te Yá Ndiöxí chindee ñaha-gá xii-ndo cuendá sá vǎ cùndècu-ndo ichi cuehé ichi duha, te cunduu ndoo cunduu nine iní-ndó càndeca ñaha-gá xii-ndo quíhíⁿ cundecu-ndo nǔú ïo váha càa ndecu-gá, te ío cudíí iní-ndó. 25 Te Yá Ndiöxí ío ndècu ndihí-gá nchaa sá xini tnùní-gá te diu-gá ní dácăcu nihnu ñaha-gă xii-o nǔú ùhú núú ndàhú, te ducaⁿ nǐ quide ñaha-gă xii-o chi ndècu ndihí-o Xítohó Jesucristú. Te ío ndacáⁿ táhú-ó nǔú Yá Ndiöxí, chi ío càhnu cuu-gá ndécú-gă táxí tnùní-gá, te súúní vǎha iní-gá, te ndàcu-gá quidé-gă nchaa sá vǎha, te ducaⁿ-ni ïo càhnu cuu-gá ndéé cútnàhá vátá ngăva-gá ñuyíú, te ducaⁿ-ni ïo càhnu cuu-gá ndéé vitna, te diu-ni ducaⁿ ïo càhnu cuu-gá ni caa ni quíhíⁿ, duha xini ñuhu-xi ndacáⁿ táhú-ó nǔú-gă. Te ducaⁿ na cùnduu. Te ío chí cádá ndèe iní-nă vitna.

NCHAA SÁ NĪ XINÍ TĒ JUÁÁ NDIĪHĪ NCHAA SÁ NĪ TECÚ DÓHO-DÉ

Xítóhó Jesucrístú xáhaⁿ-gă xii té Juàá nchaa nàcuáa cada-xi ñuyíú

¹ Te Yá Ndiöxí ní xáhaⁿ-gă xii Xítóhó Jesucrístú nchaa sá tá cùyatni víi-nă cada-xi ñuyíú-a cuendá sá cùñaha-gă xii cue téé xínu cuechi núú-gă, te Xítóhó Jesucrístú ní tendaha-gă ñⁿ espíritú xínu cuèchi núú-gă ní quixi-xi ní cachí tnúhu-xi nchaa tnúhu-án xii yúhú té Juàá téé xínu cuechi núú-gă, te nchaa tnúhu-án ndèé núú tütú-a. ² Te yúhú càchí tnúhu ndáá-í xii-ndo nàcuáa ní cáháⁿ Yă Ndiöxí, te cáháⁿ ndáá tucu-í cuendá Xítóhó Jesucrístú, ndiĪhi cuendá nchaa sá nĪ xini-í.

³ Te váha táhú ñáyiu dàcuaha nchaa tnúhu ndèé núú tütú-a, te váha tucu táhú ñáyiu ndédóho, te váha tucu táhú nchaa ñáyiu tnĪ nacuáa càháⁿ-xi, chi sa ta cùyatni víi-nă nduu càda-xi nchaa nacuáa càháⁿ-xi.

Té Juàá cádũha-dé tutú quíhíⁿ ndaha ndi úsá xichi cue ñáyiu ndècu ichi Yá Ndiöxí

⁴ Te yúhú té Juàá cádũha-í tutú daquixi-í ndi úsá xichi núú ndécú nchòhó ñáyiu ndècu ichi Yá Ndiöxí ndécú dīstrítú Àsiá. Te mee-gă ná chindee chitúu ñaha-gă xii-ndo, te ío váha cuu iní-ndó cūndecu-ndo. Te cuēi ndéé sanaha ñu-ni-gă ndécú, te ñu-ni-gă ndécú cuēi vitna, te ducaⁿ-ni cūndecu-gă cuēi ndéé núú cuaháⁿ núú vĕxi, te ñu-ni ducaⁿ ío na chindee chitúu ñaha ndi úsá cue espíritú ndécú núú-gă xii-ndo, te ío váha cuu iní-ndó cūndecu-ndo. ⁵ Te ñu-ni ducaⁿ na càda tucu Xítóhó Jesucrístú, te ñu-ni-gă cúú-gă Yá cáháⁿ ndáá, te ñu-ni-gă ní xihí-gă te díhna-gă ní ndoto, te dàtnùnĪ ndéé cuéé-gă te ndoto cue ñáyiu ní xihí, te ñu-ni-gă táxĪ tnùnĪ-gă nchaa cue téé yindaha ñaha xii ñáyiu ndècu ñuyíú-a. Te ío cūu iní ñáhá-gă xii-o,

te mee-gă ní sati níñĪ-gă te ní xihí-gă núú cūrúxĪ sá cuendá nchaa sá cuéhé sá dúhá quide-o, te ní ndada ndoo ní ndada nine-gă iní-ó, ⁶ te vitna ní quide ñaha-gă xii-o dàtná cue téé yindaha ñáyiu, te ní quide ñaha tūcu-gă xii-o dàtná cue dútú xínu cuèchi-o núú Tătá-gă Dútú Ndiöxí. Te vitna nchaa-o chí ná càchĪ-ó sã ío càhnu cuu Xítóhó Jesucrístú, te ío cūnuu-gă, te ducaⁿ-ni na cūnuu-gă ni caa ni quíhĪⁿ. Te ducaⁿ na cūnduu.

⁷ Te cundehe-ndo àndiū! Chi ichi xitĪ vícú quixi Xítóhó Jesucrístú, te nchaa ñáyiu ndècu ñuyíú-a quini ñáhă-yu xii-gă, te tnàhá nchaa ñáyiu ñⁿ-ni cūu ndiĪhi ñáyiu ní dánĪcuéhé ñáhá xii-gă quini ñáhă-yu, te nchaa ñáyiu xīndecu niĪlĪ ñuyíú, ñáyiu ñá túú cūu váha iní ñáhá xii-gă ndiĪhú inĪ-yu òré quini ñáhă-yu xii-gă, te ndáá sá dúcáⁿ càda-xi.

⁸ Te Yá Ndiöxí càchĪ-gă: “Yúhú ío cūnuu-í chi ñu-í sa ndècu ndéé cūtnàhá ní ngáva ñuyíú, te ñu-ni-í cūndecu ndéé ná sàá nduu nàa-xi ndiĪhi nchaa sá ío, chi yúhú cūndecu-í ni caa ni quíhĪⁿ”, duha càchĪ Yă Ndiöxí Yá ndácú quide nchaandi túhú sá váha. Chi ñu-ni-gă sa ndècu ndéé cūtnàhá ní ngáva ñuyíú, te ñu-ni-gă ndécú-gă vitna, te ducaⁿ-ni cūndecu-gă ni caa ni quíhĪⁿ.

Té Juàá ní xini-dé Xítóhó Jesucrístú Yáá ío cūnuu

⁹ Te yúhú té Juàá téé ndècu ndiĪhi-ndo ichi Xítóhó Jesucrístú, tnàhá-í ndóhò-í cuendá-gă dàtná ndóhò-ndó, te tnàhá-í nduu táhù-í cūndecu ndiĪhi ñaha-í xii-ndo núú ndécú Yă Ndiöxí táxĪ tnùnĪ-gă. Te ío quide cahnu iní-ó cuēi nándĪ yáha-o ndècu-o sá cuendá Xítóhó Jesucrístú. Te yúhú ní ngava-í vecaá ñⁿ ñuú nánĪ Pătmós, te ñuú-án cáá xitĪ ndute lāmár. Te ducaⁿ nĪ cuu cuendá sá cáháⁿ-í tnúhu Yá Ndiöxí, te cáháⁿ váha-í cuendá Xítóhó Jesucrístú. ¹⁰ Te ñⁿ nduu ndumĪngú nduu nàtacá-ó chíñuhu-o Yá Ndiöxí ní quide ñaha Espíritú-gă xii-í nàcuáa càchĪ inĪ-xi, te ní tecú dóho-í níhi ní cáháⁿ ñⁿ sá nĪ

cáháⁿ ndàa sàtá-í te dàtná níhi càháⁿ ìⁿ cútú ducaⁿ níhi ní càháⁿ-xi. ¹¹ Te cächí sá càháⁿ-áⁿ:

—Yúhú sa ndècu-í ndéé cútñàhá ní ngáva ñuyíú, te ñu-í cundecu-í ndéé ná sàá nduu nàa-xi ndihí nchaa sá íó, te chido tnùnì-n ìⁿ núú tütú sá ná dànehé núú ñáhà-í xii-n, te daquìhíⁿ-n tütú-áⁿ ndi ùsá xichi núú xñdecu cue ñáyiu ndècu ichi Yá Ndiöxí xñdecu distritú Àsiá, ndaha ñáyiu ñuú Éfesú, ndaha ñáyiu ñuú Èsmirná, ndaha ñáyiu ñuú Pèrgamú, ndaha ñáyiu ñuú Tiàtirá, ndaha ñáyiu ñuú Sàrdís, ndaha ñáyiu ñuú Filàdelfiá, ndaha ñáyiu ñuú Laodiceá, nchaa ñáyiu ñuú-áⁿ daquìhíⁿ-n tütú-áⁿ ndahá-yu —cächí sá càháⁿ-áⁿ.

¹² Te ní nchócuñhu-í ndéhè-í nñu ná cúú sá càháⁿ-áⁿ, te ní xiní-í xñnutñi ùsá tnàhá sá ñi cuáha mee-ni ñíhúⁿ cuááⁿ sá ndéé dité-xi, te núú dité-xi-áⁿ yíndodo ìⁿ caa candíl. ¹³ Te cuádava tnuú nchaa xíáⁿ ní xiní-í nútñi Yá cáá dàtná cáá nchàa nchoo ñáyiu ndècu ñuyíú-a, te ñihnu-gá ìⁿ dóó cání càa-xi ndéé núú sàhá-gá, te yídúcúⁿnuu ìⁿ sìnchú ní cuáha mee-ni ñíhúⁿ cuááⁿ pèchú-gá. ¹⁴ Te idi díquí-gá cuixíⁿ quiyí dàtná cuixíⁿ idi dava mbéé, àdi yúhá sá quée òré quidé vixiⁿ-xi, te tinùu-gá quidé-xí dàtná quidé-xí òré sàá itá ñuhú. ¹⁵ Te sàhá-gá súúní dàtásaⁿ-xi dàtná dàtásaⁿ sá nání bròncé òré càyú-xi ducaⁿ dàtásaⁿ-xi sàhá-gá, te dónaha tnúhu càháⁿ-gá quidé-xí dàtná quidé-xí dónaha titní víhí yùte. ¹⁶ Te xio ndaha cùha-gá nundàha-gá úsá tnàhá chódíní, te mei yùhu-gá quéné ìⁿ yuchí cáhnú ndéé úú xio núú-xi, te núú-gá quidé-xí dàtná quidé-xí nñu nchìcanchii òré súúní ngòyo cahni.

¹⁷ Te sá dúcáⁿ càa Yáá-áⁿ ñi xiní-í nñu xíáⁿ ní yúhú-í ní nduá-í núú-gá, te ní cuu-í dàtná ìⁿ téé ní xíhí sá dúcáⁿ ío ní yúhú-í, dico mee-gá ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yúhú-n, chì ñu-í yúhú sa ndècu-í ndéé cútñàhá ní ngáva ñuyíú, te ñu-í yúhú cundecu-í ndéé ná sàá

nduu nàa-xi ndihí nchaa sá íó. ¹⁸ Te yúhú cúu-í Yáá ní xíhí te ní ndoto-í, te vitna ndècu vívù-í, te ducaⁿ-ni cundecu-í ñi caa ñi quíhíⁿ. Te yúhú cùnùu-í núú nchàa ñáyiu ní xíhí te ñu-í cùnùu-í núú ndécü-yu. ¹⁹ Te chido tnùnì-n nchàa sá ñi xiní-n-áⁿ ìⁿ núú tütú, ndihí nchaa nàcuáa cùu vitna, ndihí nchaa sá cádá-xí ndéé núú cuáháⁿ núú vèxi-gá. ²⁰ Te na cächí tnúhu-í xii-n nàcuáa quèe-xi ndi usá chódíní ñi xiní-n yòtni-í xio ndaha cùha-í, ndihí nàcuáa quèe-xi ndi usá sá ñi cuáha mee-ni ñíhúⁿ cuááⁿ, sá ndéé dité-xi te yíndodo ìⁿ caa candíl núú dité-xi-áⁿ. Te ndi ùsá chódíní-áⁿ, xíáⁿ cúú-xí sá cútñuní iní-ó sá ndécü ùsá cue téé xinu cuechi núú Yá Ndiöxí, te ndi ùsá cue téé-áⁿ ndécü-güedé ndi ùsá xichi núú ndécü ñáyiu ndècu ichi Yá Ndiöxí. Te cuendá ndi ùsá sá ndéé dité-xi-áⁿ, xíáⁿ cúú-xí sá cútñuní iní-ó sá ndécü ùsá xichi ñáyiu ndècu ichi Yá Ndiöxí —duha cächí Yáá càháⁿ-áⁿ.

2

Tnúhu sá cúú-xí ñáyiu xñdecu ichi Yá Ndiöxí ndécü ñuú Éfesú

¹ Te ní cachí tucu Yáá càháⁿ-áⁿ xii-í sá chídó tnùnì-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xinu cuechi núú Yá Ndiöxí ndécü ñuú Éfesú sá cúú-xí cue ñáyiu xñdecu ichi-gá ndécü ñuú-áⁿ, te duha ní cachí-gá: “Yúhú cúu-í Yáá nundàha úsá chódíní xio ndaha cùha-í, te xica cuu-í núú ndécü ndi usá sá ñi cuáha mee-ni ñíhúⁿ cuááⁿ, sá ndéé dité-xi te yíndodo ìⁿ caa candíl núú dité-xi. ² Te yúhú xiní-í nchaa nàcuáa quide nchohó ñáyiu xñdecu ichi Yá Ndiöxí ndécü ñuú Éfesú, te xiní-í sá ío ndècu ndee-ndo quide chiuⁿ-ndo cuendá-gá, te ío quide cahnu iní-ndó ndècu-ndo quide-ndo chiuⁿ-gá. Te xiní-í sá ñà túú tnàhí tnàhá iní-ndó nàcuáa quide nchaa ñáyiu ndècu ichi cuehé ichi duha. Te xiní tucu-í sá xító ndéé-ndó cue téé cächí sá ñi tendaha-í véxi càháⁿ tnúhu-í te ñà ndàá sá càháⁿ-güedé tnúhu-í, te ducaⁿ te cùtnuní iní-ndó sá ñà ndàá sá càháⁿ-güedé tnúhu-í. ³ Te

xiní tucu-í sá ïo ndòho-ndo quide-ndo chiuⁿ cuendá-í, te ducaⁿ ïo quide cahnu iní-ndó cuèi nándi yáha-ndo, te ñá túú cùu dusaⁿ-ndo quide-ndo chiuⁿ-án. ⁴ Dico ñá túú cùu váha iní-í chi nchòhó ñá túú-gã quidé-ndó datná ní xóo cada-ndo cùtnàhá vitna cùu vii-ni ní sándáá iní ñáhá-ndó xii-í, chi vitna ñá túú-gã cúú iní ñáhá vihi-ndo datná ní xóo cada-ndo dàvá-án. ⁵ Te chí dándacu iní nàcuáa ní xóo cada-ndo cùtnàhá vitna cùu saa ní sándáá iní ñáhá-ndó xii-í, te ndixi cuèchi iní-ndó sá ñá túú-gã quidé váha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéé díhna. Te nchòhó cada iní-ndó sá ndécú ndihí-ndo ìⁿ sá ní cuáha mee-ni díhúⁿ cuáán, sá ndéé dité-xi te yindodo ìⁿ caa candíl núú dité-xi. Te núú vá ndixí cuèchi iní-ndó nàcuáa quide-ndo ndecu-ndo ña, te quixi-í xocàni-í xián, te ducaⁿ sãtnahá-xi cada ñaha-í xii-ndo te núú vá ndixí cuèchi iní-ndó nàcuáa quide-ndo ndecu-ndo, te ducaⁿ te vá yoo-gã nàtacá chiñuhu ñaha xii-í ñúú-ndó. ⁶ Dico quide váha-ndo ìⁿ xichi chi dàquee tihú-ndó nchaa sá quidé cuè ñáiyu cùu nicolaitás, te yúhú tnàhá-í dáquee tihú-í nchaa sá quidé ñáiyu-án. ⁷ Te nchòhó cada cuendá váha-ndo nàcuáa xãhaⁿ-í xii Espíritú Yá Ndiòxí xãhaⁿ-xi xii cue ñáiyu ndècu ichi-gã xíndecu nchaa xichi. Te duha ndùu tnúhu xãhaⁿ-í xii Espíritú-gã xãhaⁿ-xi xii-yu: Cúñaha-n xii nchaa ñáiyu sá núu na càda ndee iní-yu yáha-yu nándi sá ná yáha-yu sá cuendá-í, te yúhú cada-í te nduu táhú-yu cundecu váha-yu núú ndécú Yá Ndiòxí, duha xãhaⁿ-í xii Espíritú-gã cúu-xi ñáiyu”, duha càchí Yaá càháⁿ-án. Te nchaa tnúhu-án ní chídó tnùn-í sá cúu-xi ñáiyu xíndecu ichi Yá Ndiòxí ndécú ñúú Èfesusú.

Tnúhu sá cúu-xi ñáiyu xíndecu ichi Yá Ndiòxí ndécú ñúú Èsmirná

⁸ Te ní cachí tucu Yaá càháⁿ-án xii-í sá chídó tnùn-í nchaa tnúhu sá vítná càháⁿ-gã ìⁿ núú tütú, te tendaha-í quíhíⁿ ndaha téé xínu cuechi núú Yá Ndiòxí ndécú ñúú Èsmirná sá cúu-xi cuè ñáiyu xíndecu ichi-gã ndécú

ñúú-án, te duha càchí-gã: “Yúhú ndécú-í ndéé cùtnàhá ní ngáva ñuyúyú, te ñu-ni-í cundecu-í ndéé ná sáa nduu nàa-xi ndihí nchaa sá ïó, te ñu-ni-í ní xihí te ní ndoto-í ndécú-í vitna. ⁹ Te yúhú xiní-í nchaa nàcuáa quide nchòhó ñáiyu ndècu ichi Yá Ndiòxí ndécú ñúú Èsmirná. Te xiní-í sá ïo ndòho-ndo ndecu-ndo sá cuendá-í, te xiní tucu-í sá ïo ndàhú-ndó dico cùu-ndo ñáiyu xíndecu váha núú Yá Ndiòxí. Te xiní tucu-í sá ïo càháⁿ cuèhé ñáiyu isràél cuendá-ndó, dico ñá túú quidé-yu nàcuáa tàú-yu cada-yu sá cúu-yu ñáiyu isràél, chi cùu-yu ñáiyu xínu cuechi mee-ni núú sàcuíhna. ¹⁰ Dico nchòhó vá yúhú-ndó cuèi nándi cùu nchaa sá ná ndòho-ndo cuendá-í, chi sàcuíhna cada-xi te ngava dàva-ndo vècaá, te ducaⁿ càda-xi chi cuín-í coto ndéé ñáhá-xi xii-ndo núu ndisa sá vá ná tühú iní-ndó sã nchicúⁿ nihnu-ndo ichi Yá Ndiòxí. Te ndòho-ndo ùxí nduu dico vá dáña ndéé-ndó cànchicúⁿ nihnu-ni-ndo ichi-gã cuèi na cùu-ndó sá cuendá-gã, te yúhú cada-í te nduu táhú-ndó cundecu-ndo ndihí-gã ní caa ní quíhíⁿ. ¹¹ Te nchaa nchòhó cada cuendá váha-ndo nàcuáa xãhaⁿ-í xii Espíritú Yá Ndiòxí xãhaⁿ-xi xii cue ñáiyu ndècu ichi-gã xíndecu nchaa xichi, te duha ndùu tnúhu xãhaⁿ-í xii Espíritú-gã xãhaⁿ-xi xii-yu: Cúñaha-n xii nchaa ñáiyu sá núu na cùndee iní-yu yáha-yu nándi sá ná yáha-yu sá cuendá-í te vá cuíta nihnú-yu na sáa nduu cuíta nihnu nchaa dàva-gã ñáiyu, duha xãhaⁿ-í xii Espíritú-gã cúu-xi ñáiyu”, duha ní cachí Yaá càháⁿ-án. Te nchaa tnúhu-án ní chídó tnùn-í sá cúu-xi ñáiyu xíndecu ichi Yá Ndiòxí ndécú ñúú Èsmirná.

Tnúhu sá cúu-xi ñáiyu xíndecu ichi Yá Ndiòxí ndécú ñúú Pèrgamú

¹² Te ní cachí tucu Yaá càháⁿ-án xii-í sá chídó tnùn-í nchaa tnúhu sá vítná càháⁿ-gã ìⁿ núú tütú, te tendaha-í quíhíⁿ ndaha téé xínu cuechi núú Yá Ndiòxí ndécú ñúú Pèrgamú sá cúu-xi cuè ñáiyu xíndecu ichi-gã ndécú ñúú-án, te duha càchí-gã: “Yúhú cúu-í Yaá néhé ìⁿ yuchí cáni te ndéé úu xio

núu-xi. ¹³ Te yúhú xìní-í nchaa nàcuáa quide nchohó cue ñáyiú xĩndecu ichi Yá Ndiöxí ndécú ñùú Përgamú, te xìní tucu-í sá ndécú-ndó núú ïo cùnuu yucu ñávãha, te ñá túú ðãña ndeé-ndó nchícúⁿ nihnu-ndo ìchi-í, te ducaⁿ ïo sàndáá iní ñáhá-ní-ndó xii-í, te ðiu-ni ducaⁿ ñi quide-ndo cũtnáhá ní sahani-güedé té Àntipás núú ndécú-ndó ðiu-ni núú dúcáⁿ ïo cùnuu yucu ñávãha. Te ndíi-áⁿ ñi quide ndáá ndíi ní xĩndecu ndíi ichi-í chi ní cáháⁿ váha ndíi cuendá-í. ¹⁴ Dico ñá túú cùu váha iní-í cuendá ñi úú sá quidé-ndó, chi ndècu ndíhi-ndo ñáyiú nchícúⁿ nihnu-ni nchaa nàcuáa ní cáháⁿ ndíi Bàlaám. Chi ndíi-áⁿ ñá túú ní quide váha ndíi chi ní dácáhú iní ndíi ingá téé ní xínani Bàlác nàcuáa cada-dé canu ichi-dé cue ñáyiú isràél ingá ichi sá ñá túú váha, chi ní xáhaⁿ tẽ Bàlác-áⁿ xii-yu sá cáxi-yu nchaa sá ndúú tãhú nchaa sá ñi cadúha cue téé ñuyíú-a ðanani ñáyiú ndiöxí te ñá ndáá sá ndiöxí cúu-xí, te ní dácáhú iní ñáhá-dẽ xii-yu sá cündécú-yu ichi ðii iní. ¹⁵ Te ndècu ndíhi tucu-ndo ñáyiú nchícúⁿ nihnu sá dácúàha cue ñáyiú cùu nicolaitás. Te nchaa sá dácúàha ñáyiú-áⁿ dáquèe tíhù-í, ¹⁶ te nchòhó chí dándixi cuèchi iní sá ñá túú quide váha-ndo ndècu-ndo, chi núu ñáhá te quixi-í nàá-í ndíhi cue ñáyiú-áⁿ ndíhi yuchí cání sã quéné yùhu-í. ¹⁷ Te nchaa nchòhó cada cuendá váha-ndo nàcuáa xãhaⁿ-í xii Espíritú Yá Ndiöxí xãhaⁿ-xi xii cue ñáyiú ndècu ichi-gá xĩndecu nchaa xichi. Te duha ndùu tnúhu xãhaⁿ-í xii Espíritú-gá xãhaⁿ-xi xii-yu: Cúñaha-n xii nchaa ñáyiú sá núu na càda ndee iní-yu yãha-yu nándi sá ná yãha-yu sá cuendá-í, te yúhú cuãñaha-í sá ndúú yùhu xii-yu caxí-yu ñi sá vátá quini-gá-yu caxí-yu. Te xiiⁿ cúu-xí mànáá sá ñi xóo caxi cue ñáyiú ní xĩndecu ndéé sanaha, te cuãñaha tucu-í ñi caa yúu cuixíⁿ xii-yu, te núu yúú-ãⁿ cundeé ñi ðiu saa. Te ðiu-áⁿ vã yóo tnáhí xìní chi ñi ðii ní ñáyiú na quèheⁿ cuendá ðiu-áⁿ quini-yu, duha xãhaⁿ-í xii Espíritú-gá cúu-xi ñáyiú”, duha càchí Yaá càháⁿ-áⁿ. Te nchaa tnúhu-áⁿ ñi chidó tnùni-í sá cúu-xí

ñáyiú xĩndecu ichi Yá Ndiöxí ndécú ñùú Përgamú.

Tnúhu sá cúu-xí cue ñáyiú xĩndecu ichi Yá Ndiöxí ndécú ñùú Tiàtirá

¹⁸ Te ní cachí tucu Yaá càháⁿ-áⁿ xii-í sá chidó tnùni-í nchaa tnúhu sá vitná càháⁿ-gá ñi núu tütú, te tendaha-í quíhiⁿ ndaha tẽe xĩnu cuechi núu Yá Ndiöxí ndécú ñùú Tiàtirá sá cúu-xí cue ñáyiú xĩndecu ichi-gá ndécú ñùú-áⁿ, te duha càchí-gá: “Yúhú cúu-í Déhe Yá Ndiöxí, te càa tinuu-í ðatná cáá itá ñuhú, te sáhà-í cáá ðatná cáá sã nání bròncé òré ñuhú-xí núu ñuhú càyú-xi. ¹⁹ Te yúhú xìní-í nchaa nàcuáa quide nchohó ñáyiú xĩndecu ichi Yá Ndiöxí ndécú ñùú Tiàtirá. Te xìní tucu-í sá ïo cùu iní-ndó Yá Ndiöxí te sàndáá iní-ndó-gã. Te xìní tucu-í nàcuáa ndùu chiuⁿ quide-ndo sá cúu-xí-gã. Te xìní tucu-í sá ïo quide cahnu iní-ndó cuèi nándi cùu sá yãha-ndo ndècu-ndo. Te xìní tucu-í sá ïo-gá ndúcú ndèe-ndo quide váha-ndo vitna dacúxíⁿ cũtnáhá vitna cùu saa ní sàndáá iní-ndó Yá Ndiöxí. ²⁰ Dico ñá túú cùu váha iní-í cuendá ñi sá quidé-ndó, chi ñá túú tnáhí ná sání iní-ndó ndècu ndíhi-ni-ndo ñáyiú nchícúⁿ nihnu nchaa nàcuáa ðanehé ñáhá ñaha nani Jezabél. Te ñaha-áⁿ càchí-aⁿ sá càháⁿ-aⁿ tnúhu Yá Ndiöxí dico ñá ndáá sá càháⁿ-aⁿ tnúhu-gá, te cuáháⁿ-aⁿ ðandahú-aⁿ nchaa ñáyiú xĩnu cuechi núu-í ndíhi nchaa sá ðanehé ñáhá-áⁿ cuendá cundecú-yu ichi ðii iní, te caxí-yu nchaa sá ndúú tãhú nchaa sá ñi cadúha cue téé ñuyíú-a ðanani ñáyiú ndiöxí te ñá ndáá sá ndiöxí cúu nchaa xiiⁿ. ²¹ Te ní cuu vai nduu ta dacaca-í ndécú-áⁿ cuendá ndixi cuèchi iní-aⁿ sá ñá túú quide váha-aⁿ ndècu-aⁿ, te cuèi ducaⁿ quide-í dico ñá túú cuini-aⁿ ðãña-aⁿ ñi ñi sá cuèhé sá dúhá quide-aⁿ. ²² Te vitna yúhú ïo dandòho-í-aⁿ chi tñi ñaha cuèhé xii-aⁿ, te ðiu-ni ducaⁿ ïo dandòho-í nchaa ñáyiú quide ðatná quidé-áⁿ te núu vá ndíxí cuèchi iní-yu sá ñá túú quide váha-yu ndécú-yu, te ðañá-yu nchaa sá cuèhé sá dúhá quidé-yu. ²³ Te nchaa ñáyiú cündíhi ñaha xii ñaha-áⁿ cahni-í-yu, te ducaⁿ te nchòhó

ndihi dava-gá nchaa ñáyiú xĩndecu ichi Yá Ndiõxí ndécú nchaa xichi cutnuni iní-ndó ndihí-yu sá yúhú cúu-í Yaá xini ndáa nchaa nacuáa sàni iní ñáyiú, ndihi nchaa nacuáa quide-xi iní-yu. Te nchòhó nacuáa ndùu sá quidé-ndó ñí ñí-ndo te ducaⁿ cunduú sá táxi-í nduu táhú-ndó. ²⁴ Te dava nchòhó ñáyiú ndècu ñuú Tiàtirá, ñáyiú ñá túu nchìcúⁿ nihnu nacuáa dànehé ñáhá ñàha nani Jezabél-áⁿ ñà túu xini-ndó ñà cúu sá cachi ñáyiú ndùu yuhu dacahu iní ñáhá yùcu ñávàha. Te nchòhó, ñà túu ñágá cachí tnúhu-í xii-ndo càda-ndo ²⁵ ñí ñí-ná sá ñò nducu ndèe-ndo cada-ndo nchaa nacuáa càháⁿ tnúhu sá ndécú ndihí-ndo, te ducaⁿ-ni càda-ndo ndéé òré quixi tucu-í. ²⁶ Te nchaa nchòhó ñáyiú na càda ndee iní yáha nándi sá ná yáha sá cuendá-í, te núu na càda-ni-ndo nchaa nacuáa cuini-í cada-ndo ndéé nduu vâ cundècu-gá-ndó ñúyíú-a, te yúhú taxi-í tnúhu ndee iní xii-ndo sá táxi tnúni-ndó nchaa ñáyiú ñuyíú ²⁷ dàtná ní quide mee Tàtà-í Dútú Ndiõxí ní taxi-gá tnúhu ndee iní ndécú ndihí-í, te ducaⁿ càda ñàha-í xii-ndo táxi-í tnúhu ndee iní xii-ndo cuendá ñò taxi tnúni-ndó, te cada iní-ndó sá càdá-ndó cuè ñáyiú dàtná quidé-xi ñí quídi òré tàhú-xi cachi duuⁿ-xi, te ducaⁿ chi nchòhó cada-ndo sá ncháá ñáyiú ñà túu quide váha cuíta nihnú-yu. ²⁸ Te cada iní-ndó sá dàtná dáyhé chódini quitì quène oré sa ta tũndaá-ñà cuáháⁿ ducaⁿ càda-xi oré ná sáa nduu ngũta-xi cada váha-xi, te ducaⁿ chi yúhú cada-í nacuáa nduu táhú-ndó cundècu ndihí ñàha-ndo xii-í núu ñò váha càa ndecu-í. ²⁹ Te nchaa nchòhó cada cuendá váha-ndo nacuáa xáhaⁿ-í xii Espiritú Yá Ndiõxí xáhaⁿ-xi xii cue ñáyiú ndècu ichi-gá xĩndecu nchaa xichi”, duha cachi Yaá càháⁿ-áⁿ. Te nchaa tnúhu-áⁿ ñí chídó tnúni-í sá cúu-xi ñáyiú xĩndecu ichi Yá Ndiõxí ndécú ñuú Tiàtirá.

3

Tnúhu sá cúu-xi ñáyiú xĩndecu ichi Yá Ndiõxí ndécú ñuú Sárdís

¹ Te ní cachí tucu Yaá càháⁿ-áⁿ xii-í sá chídó tnúni-í nchaa tnúhu sá vítná

cáháⁿ-gá ñí núu tùtú, te tendaha-í quíhíⁿ ndaha téé xinu cuechi núu Yá Ndiõxí ndécú ñuú Sárdís sá cúu-xi cuè ñáyiú xĩndecu ichi-gá ndécú ñuú-áⁿ te duha cachi-gá: “Yúhú cúu-í Yaá ndécú ndihí ndi usá espíritu cúu cuendá Yá Ndiõxí, te ñí ñí-í cúu-í Yaá ndécú ndihí ndi usá chódini. Te yúhú xini-í nchaa nacuáa quide nchòhó ñáyiú xĩndecu ichi Yá Ndiõxí ndécú ñuú Sárdís, te xini-í sá cúu-ndó dàtná ñáyiú ní xihí cuèi cachi ñáyiú sá ñáhá. ² Te chí cuáha cuendá nacuáa quide-ndo ndecu-ndo vítna, te nducu ndèe-ndo cada-ndo ñí úu-gá nchaa sá váha nchìcúⁿ nihnu-ndo vítna, chí sa ndètu vii-ñà dañà-ndo nchaa-ndi túhú sá váha quide-ndo ní cuu, te quide cuendá-í sá ñà túu quide-ndo nchaa nacuáa cuini Yá Ndiõxí cada-ndo. ³ Te chí dándacu iní nacuáa càháⁿ tnúhu sá ní xĩndedóho-ndo cùtnáhá ní tuha-ndo ichi Yá Ndiõxí, te canchicúⁿ nihnu-ndo càda-ndo nacuáa càháⁿ tnúhu-áⁿ, te ndixi cuèchi iní-ndó sá ñà túu quide váha-ndo ndècu-ndo, te núu vâ nacuáha-ndo cuendá nacuáa quide-ndo ndecu-ndo ñà, te cada-í dàtná quidé ñàdúhú, chí òré ñà túu ñà yihí iní-ndó quèxio-í núu ndécú-ndó. ⁴ Dico ndècu ndihí-ndo ñí úu ñáyiú càndoo caa nine iní-xi, chí ñáyiú-áⁿ ñí nduu táhú-yu cuihnú-yu dóo cuixiⁿ cuendá cundecu ndihí-í-yu, te ducaⁿ chí cùdiú-yu núu-í. ⁵ Te nchaa ñáyiú na càda ndee iní-xi yáha nándi sá ná yáha sá cuendá-í, te ñáyiú-áⁿ nduu táhú-yu cuihnú-yu dóo cuixiⁿ, te vâ náquète-í ñí ñí-yu núu tùtú núu yódó tnúni-í cue ñáyiú ní nduu táhú cundecu ndihí-í ní caa ní quíhíⁿ, te cùñaha-í xii Tàtà-í Dútú Ndiõxí ndihí cue espíritu xinu cuèchi núu-í sá ñáyiú-áⁿ cúu-yu ñáyiú cùu cuendá-í. ⁶ Te nchaa nchòhó cada cuendá váha-ndo nacuáa xáhaⁿ-í xii Espiritú Yá Ndiõxí xáhaⁿ-xi xii cue ñáyiú ndècu ichi-gá xĩndecu nchaa xichi”, duha cachi Yaá càháⁿ-áⁿ. Te nchaa tnúhu-áⁿ ñí chídó tnúni-í sá cúu-xi ñáyiú xĩndecu ichi Yá Ndiõxí ndécú ñuú Sárdís.

Tnúhu sá cúu-xi cuè ñáyiú xĩndecu ichi Yá Ndiõxí ndécú ñuú Filadelfía

7 Te ní cachí tucu Yaá càháⁿ-áⁿ xii-í sá chídó tnùnì-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xínu cuechi núú Yá Ndiöxí ndécú ñúú Filàdelfiá sá cúú-xí cuè ñáyiu xíndecu ichi-gá ndécú ñúú-áⁿ, te duha càchí-gá: “Yúhú cúú-í Yaá ío váha quide ndáá te ñá túú tnàhí cuéchi-í. Te díhna-gá ndíi Dávíí ní taxi tnùnì ndíi ñáyiu, te vítna yúhú táxi tnùnì-í-yu, te yúhú càháⁿ-í te núu ndëndida càa ñáyiu ndíhu ndaha-í te ndëndida càa ñáyiu vá ndíhu ndaha-í. 8 Te yúhú xìnì-í nchaa nàcuáa quide nchóhó ñáyiu xíndecu ichi Yá Ndiöxí ndécú ñúú Filàdelfiá, te yúhú ní quide-í nàcuáa ní níhí-ndó ìⁿ ichi cahnu quide-ndo chiuⁿ-í, te vá yóo ìⁿ cada nàcuáa vá nìhí-gá-ndó nàcuáa cada-ndo chiúⁿ-í. Te cuèi ñá túú ío nìhí ndéé-ndó cùndecu-ndo ichi Yá Ndiöxí dico tñiⁿ-ndo nchaa tnúhu càháⁿ-í, te ni ìⁿ xito ñá túú càháⁿ-ndó sá ñà túú ndècu ndíhí ñaha-ndo xii-í. 9 Te nchaa ñáyiu quide nchaa nàcuáa cuìní yucu ñávàha, ñáyiu-áⁿ cúú-yu ñáyiu isràél, te cuèi cúú-yu ñáyiu isràél dico ñá túú quide-yu nàcuáa tàú-yu cada-yu, te yúhú cada-í sá ncháá ñáyiu-áⁿ canehé-yu sá yíñùhu núu-ndó, te cutnùnì iní-yu sá yúhú ío cùu iní ñáhà-í xii-ndo. 10 Te ío quide ndee-ni iní-ndó nchìcúⁿ nihnu-ndo quide-ndo nchaa nàcuáa ní càháⁿ-í, te xiáⁿ coto ñaha-í xii-ndo ñà túú ñà tnahá-ndó ndúu na quixi nchaa tnúndòho tnúhu ndàhú ñuyíú-a. Te òré quexìo nchaa tnúndòho-áⁿ ñuyíú-a te dāvá-áⁿ cutnùnì nàcuáa ndúu sá quidé ìⁿ ìⁿ ñáyiu. 11 Te ío ndíhí quixi tucu-í. Te vá dáñá ndéé-ndó càda-ndo nchaa sá vǎha nchìcúⁿ nihnu-ndo quide-ndo cuendá sá vǎ cuíta sá ñí cachí Yá Ndiöxí ndúu táhú-ndó. 12 Te nchaa nchòhó ñáyiu na càda ndee iní yáha nándi sá ná yáha sá cuendá-í, te yúhú cada-í sá nchòhó ío cuu càhnu-ndo cundecu-ndo núu ndécú Tǎtà-í Dútú Ndiöxí, te vá ìⁿ ndúu-gá xocuíñí-ndó núu ndécú-gǎ. Te cada iní-ndó sǎ dàtná sá chídó tnùnì-í ñúu Tǎtà-í Dútú Ndiöxí ñiⁿ-ndo chi ducaⁿ-ni cùndecu-ndo ndíhí-gǎ, te

cada tucu iní-ndó sǎ dàtná sá chídó tnùnì-í nàcuáa nàni ñúu-gǎ ñiⁿ-ndo, chi ñúu ñúu-gǎ-áⁿ cundecu-ndo, te ñúu-áⁿ nánì-xí Jèrusalén Sáá, duha nàni ñúu-gǎ. Te ñúu-áⁿ quee-xi andíu núu ndécú Yá Ndiöxí Yaá cúú Tǎtà-í quée-xi ñuyíú. Te cada tucu iní-ndó sǎ dàtná sá chídó tnùnì-í ñúu mee-í ñiⁿ-ndo, te xiáⁿ cúú-xí ìⁿ ñúu saa, te ducaⁿ càda iní-ndó chi cundecu ndíhí ñaha-ndo xii-í. 13 Te nchaa nchòhó cada cuendá váha-ndo nàcuáa xǎhaⁿ-í xii Espíritú Yá Ndiöxí xǎhaⁿ-xi xii cue ñáyiu ndècu ichi-gǎ xíndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ní chídó tnùnì-í sá cúú-xí ñáyiu xíndecu ichi Yá Ndiöxí ndécú ñúu Filàdelfiá.

Tnúhu sá cúú-xí ñáyiu xíndecu ichi Yá Ndiöxí ndécú ñúu Laodiceá

14 Te càchí tucu Yaá càháⁿ-áⁿ xii-í sá chídó tnùnì-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xínu cuechi núú Yá Ndiöxí ndécú ñúu Laodiceá sá cúú-xí cuè ñáyiu xíndecu ichi-gǎ ndécú ñúu-áⁿ, te duha càchí-gá: “Yúhú cúú-í Yaá quidé núu Yá Ndiöxí, te cúu-í Yaá quidé ndáá chi càháⁿ ndáá cuíti-í nàcuáa càháⁿ Yá Ndiöxí. Te yúhú cúú-í Yaá ní quide ní ngúndecu nchaa sá ñí cadúha Yá Ndiöxí. 15 Te yúhú xìnì-í nchaa nàcuáa quide nchóhó ñáyiu xíndecu ichi Yá Ndiöxí ndécú ñúu Laodiceá, te xìnì-í sá ñà túú cuìní-ndó cànchìcúⁿ nihnu-ndo nchaa nàcuáa càháⁿ-í, te ni ñà túú cuìní-ndó dáña duuⁿ-ndo. Te váha-gǎ sá dúuⁿ duuⁿ cada-ndo nchaa nàcuáa càháⁿ-í àdi núu ñáhá te duuⁿ duuⁿ dáña-ndo. 16 Te sá dúcáⁿ quide-ndo ñá túú cuìní-ndó duuⁿ duuⁿ-ni cada-ndo nàcuáa càháⁿ-í, te ni ñà túú cuìní-ndó duuⁿ duuⁿ-ni dáña-ndo te sáá nduu vǎ cùndèe-gǎ iní-í cuendá nchaa sá quidé-ndó-ǎⁿ, te daquèe tíhú ñáhà-í xii-ndo. 17 Te càchí-ndó sǎ cuícá-ndó, te ío váha ta yáha-ndo nchaa nduu cuáháⁿ, te ñá túú tnàhí ná cúmǎní xii-ndo, te ñá túú cùtnunì iní-ndó sǎ cúú-ndó dàtná cue ñáyiu ío ndàhú yáha, te cúu-ndo datná ñáyiu ndàhú, ñáyiu ío cùndahú iní ñáhá tnàha ñáyiu-xi, te cúu-ndo datná cue ñáyiu

cuáá, te cùu tucu-ndo datná cue ñáyiú ndàhú ñá túú tnàhí dóó-xi. ¹⁸ Te na càchí tnúhu-í xii-ndo sã cáda-ndó datná xĩquide cue ñáyiú sàaⁿ ìⁿ sá nĩ cuáha mee-ni dǐhúⁿ cuááⁿ sá ìo váha càa, te ducaⁿ quidé-yu te ío-gá cúú cuicá-yu. Te cada tucu-ndo datná xĩquide cue ñáyiú sàaⁿ dóó cuixíⁿ sácũhnu-yu cuendá sá vã cúú-yu datná ñáyiú ndàhú ñá túú dóó-xi, te cada tucu-ndo datná quidé cue ñáyiú sàaⁿ yúcú quée núú-xi nàcuáa cutnùní váha núú-yu, te duha càháⁿ-í xãhaⁿ-í xii-ndo chi cuiní-í sá nàtuha ñaha-ndo xii-í, te ío váha cundecu-ndo sã cúú-xí Yã Ndiõxí. ¹⁹ Te càháⁿ-í dóho nchaa ñáyiú cùu iní-í òré ñá túú quide ndáá-yu, te dàndoho-í-yu, núu xǎⁿ cuiní-í sá nchòhó ndixi cuéchi iní-ndó sã ñá túú quide váha-ndo ndècu-ndo. ²⁰ Te na càchí tnúhu-í xii-ndo sã yũhú cùú-í datná ìⁿ tée nùtnǎi yuyèhe ndaa quehé te càháⁿ-í ñáyiú yǐhi xití vehe, te núu na càda cuendá-yu sá càháⁿ-í te nacaáⁿ-yu yuyèhe te quíhu-í xití vehe cudìni-í ndihí-yu, te duha càháⁿ-í chi cuiní-í cundecu ndihí ñaha-í xii-ndo. ²¹ Te nchaa nchòhó ñáyiú na càda ndee iní-xi yáha nándi sá ná yãha sá cuendá-í, te yúhú taxi-í xii-ndo ìⁿ xichi núú ndécù-í cundecu-ndo te cunuu-ndo tnàhá-ndó datná cùnùu-í, chi yúhú ducaⁿ nĩ quide ndee iní-í ní yáha-í nándi sá nĩ yáha-í te vitna ní nduu táhù-í ndécù-í núú ndécú Tãtà-í Dútú Ndiõxí cùnùu-í. ²² Te nchaa nchòhó cada cuendá váha-ndo nàcuáa càháⁿ Espiritú Yã Ndiõxí xãhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yáa càháⁿ-áⁿ. Te nchaa tnúhu-áⁿ nĩ chídó tnùnì-í sá cúú-xí ñáyiú xĩndecu ichi Yá Ndiõxí ndécú ñùú Laodiceá.

4

Nàcuáa chĩñuhu ñáyiú Yá Ndiõxí andiu

¹ Te sátá nĩ yáha ducaⁿ nĩ cuu te ní xiní-í nchĩ andiu, te ní cáháⁿ tucu Yáa ní cáháⁿ ndihí ñaha xii-í díhna, te Yáa-áⁿ nĩ cáháⁿ níhi-gá datná càháⁿ níhi ìⁿ cútú, te ní cachi-gá xii-í:

—Taqùene iha te na dànehé ñáhà-í xii-n nchàa nàcuáa cada-xi ndéé núú cuaháⁿ núú vèxi —càchí-gá.

² Te òré-ni-áⁿ nĩ quide ñaha tucu Espiritú Yã Ndiõxí xii-í nàcuáa càchí iní-xi, te ñiu-ni òré-áⁿ nĩ xiní-í nùtnǎi ìⁿ xilé váha andiu te càa datná cáá xilé sácõo nchihí cue ñáyiú ío cùnùu, te núú xilé váha-áⁿ núcõo Yáa táxí tnùnì. ³ Te Yáa-áⁿ cáá-gá datná cáá yũú chàhchí yúú váha sá nání jãspé, te càa tucu-gá datná cáá yũú váha sá nání còrnalíná, te ñùhu doco ñaha ìⁿ cóo yáhnchí xii-gá, te tãsaⁿ-di datná tãsaⁿ ìⁿ yúú váha sá nání èsmeraldá. ⁴ Te ní xiní tucu-í nùtnǎi ócó cúmí xilé váha ní càndéé núú núcõo-gá, te núú xilé-áⁿ xĩnucóo ócó cúmí cue tée cùu sacuéhé te xĩxĩhnu-güedé mee-ni dóó cuixíⁿ, te ìⁿ caa coróná sá nĩ cuáha mee-ni dǐhúⁿ cuááⁿ xĩxúhuⁿ díquí-güedé. ⁵ Te núú núcõo Yáa táxí tnùnì-áⁿ sãá nduté, te càháⁿ ñùhu te xica chihí-xi dóndaha, te càyú úsá ití núú núcõo-gá, te sá úsá ití-áⁿ xǎⁿ cùtnùnì sá ndécú úsá espíritú cúú cuendá-gá. ⁶ Te ndècu ìⁿ sá ndécú ndaa núú-gã te xǎⁿ cáá datná cáá làmár, te datná cáá vídriú cáá ñihí.

Te ní càndéé dǐñi Yáa núcõo-áⁿ xĩnutnǎi cúmí quití te titní víhí tĩnuu-güedi ndéé ndaa sátá-güedi ndihí ndaa núú-güedi. ⁷ Te quití díhna nuu càa-di datná cáá ndìcaha, te quití cùu uú cáá-dí datná cáá ndìcutu, te quití cùu uní néhé-dí núú tée, te quití cùu cúmí cáá-dí datná cáá yàcolo óré cuáháⁿ-di núú tàchí. ⁸ Te ndi cùmí quití-áⁿ ndéé ìñú ndíxíⁿ-güedi ìⁿ ìⁿ-güedi, te ñihí xití ndíxíⁿ-güedi ndihí ndaa sátá ndíxíⁿ-güedi ndéé tĩnùu-güedi, te nduu nùú chíñùhu-güedi Yá Ndiõxí, te xãhaⁿ-güedi xii-gá:

Yòhó Dútú Ndiõxí ducaⁿ-ni ta quide ndáá-n vèxi, te ducaⁿ-ni quide ndáá-n cuéi vitna, te ñiu-ni ducaⁿ càda ndáá-n núú cuaháⁿ núú vèxi,

te cùu-n Yáa quidé nchàa-ndi túhú sá váha,

te diu-ni-n sà ndecu-n ndéé cútnàhá ní cuáha ñuyíú,

te diu-ni-n ndècu-n cuéi vitna, te diu-ni-n cùndecu-n cuéi ndéé núú cuáháⁿ núú vèxi.

Duha xàhaⁿ cuè quiti-áⁿ xii Yaá núcõo núú xilé váha-áⁿ chíñùhu ñaha-güedi.

⁹ Te cue quiti-áⁿ ïo ndàcáⁿ táhú-güedi núú Yàá núcõo núú xilé váha-áⁿ cuèndá nchaa sá quidé-gã. Te Yaá-áⁿ cúú-gã Yaá ndécú nchàa nduu nchaa quíú. Te cue quiti-áⁿ càchí-güedi sá ïo càhnu cuu-gá te nèhe-güedi sá yíñùhu núú-gã. Te ndi tnahá òré ducaⁿ càháⁿ-güedi, ¹⁰ te ndi òcò cúmí cue téé cùu sacuéhé xñucóo-áⁿ ngüíñí xítí-güedé núú Yàá núcõo-áⁿ, chi diu-gá cúú-gã Yaá ndécú nchàa nduu nchaa quíú te chíñùhu ñaha-güedé xii-gá, te tàva-güedé coróná ñúhú dǐquí-güedé te tàxi ndecu-güedé núú-gã, te xàhaⁿ-güedé xii-gá:

¹¹ Yòhó cúú-n Dütú Ndiõxí Yaá cúú cuèndá ñáhá xii-ndí, te ío càhnu cuu-n, te ío váha quide-n, te nèhe-ndí sá yíñùhu núú-n, chi ducaⁿ tàú-xi cada-ndí, chi yòhó cúú-n Yàá ní cadúha nchaandi túhú sá ïó, te ducaⁿ ñí ngúndecu nchaa xǎⁿ chi mee-n dùcaⁿ ní sani iní-n càda-n.

5

Cuèndá Yaá cáá dàtná cáá ìⁿ mbéé quití ní dánícuèhé-güedé ndihí cuèndá ìⁿ tutú

¹ Te ní xini tucu-í sá Yàá núcõo núú xilé váha-áⁿ núndàha-gá ìⁿ tutú ní nacaúnuu xio ndaha cùha-gá, te ndéé lètrá ndàa sáta-xi ndihí ndàa xítí-xi, te úsá tnahá tutú líhli ñùhu seyú ndéé sáta tütú-áⁿ cuèndá sá vǎ dáñá-xí nàcaá. ² Te ní xini-í ìⁿ espíritú xínú cuèchi núú Yǎ Ndiõxí, te ndee vñhi-xi te níhi càháⁿ-xi, te càchí-xi:

—¿Yoo tàú-xi xocàni nchaa tutú líhli ñùhu seyú ndéé sáta tütú-a te nadacáa-xi? —càchí espíritú-áⁿ.

³ Dico ni àndiu, te ni núú ñùyíú-a, te ni ndàa xítí ñuhu ñá túú ìⁿ ñáyíu tàú-xi

nadacáa tutú-áⁿ te cundèhé-yu. ⁴ Te yúhú ní ngüíta-í ndàhyú vñhi-í cuèndá sá ñà túú ní ìⁿ ñáyíu tàú-xi nadacáa tutú-áⁿ cundèhé-yu. ⁵ Te ìⁿ cue téé cùu sacuéhé xñucóo xǎⁿ ñí cachí-güedé xii-í:

—Vá ndàhyú-gá-n, te cada cuèndá-n chi Yaá ío cùnuu cuu ndi mee cue ñáyíu cùu ñani tnahá ndi Jüdá, diu-ni Yaá cúú ñani tnahá ndi Dàvií, Yaá-áⁿ cúú-gã Yaá ní ndacu ní yáha nchaa nándi sá ñí yáha, núu xǎⁿ diu-gá tàú-gá xocàni-gá nchaa tutú líhli ñùhu seyú ndéé sáta tütú-áⁿ te nadacáa-gá —duha càchí téé cùu sacuéhé-áⁿ.

⁶ Te tnuú ndi òcò cúmí cue téé cùu sacuéhé xñucóo-áⁿ, ndihí tnuú ndi cùmí quiti xñutnǎi-áⁿ, ndihí núú núcõo Yaá táxi tñuní-áⁿ ñí xini-í nǔtnǎi ìⁿ Yaá cáá dàtná cáá ìⁿ mbéé quití ní dánícuèhé-güedé te ní xihí-di ní cùu te ní ndoto-di, te ndéé úsá ndiqui-di, te ndéé úsá tinùu-di, te sá úsá tinùu-di-áⁿ cútnuní sá ndécú úsá espíritú cúú cuèndá Yǎ Ndiõxí, ducaⁿ càa Yaá-áⁿ ñí xini-í. Te cue espíritú-áⁿ ñí tendaha-gá xícá cùu-xi ní caa xico ñuyíú.

⁷ Te Yaá cáá dàtná cáá ìⁿ mbéé quití ní dánícuèhé-güedé-áⁿ ñí sáháⁿ-gá núú Yàá núcõo núú xilé váha-áⁿ.

⁸ Te òré ní queheⁿ-gá tutú-áⁿ te ndi cùmí quití xñutnǎi xǎⁿ ñí ngüíñí xítí-güedi núú-gã, te ducaⁿ ñí ngüíñí xítí tucu ndi òcò cúmí cue téé cùu sacuéhé xñucóo-áⁿ, te ndi dǐíⁿ núú-güedé xñehe-güedé yaá sá

nání àrpá, te xñehe tucu-güedé ndi dǐíⁿ núú-güedé ìⁿ caa tǐcùú ní cuáha mee-ni dǐhúⁿ cuááⁿ, te chitu dǐsa sá sáháⁿ tñámí. Te ñúhmá dǐsa sá sáháⁿ tñámí-áⁿ cúú-xi dàtná nchaa tñùhu càháⁿ nchaa ñáyíu ndècu ichi Yǎ Ndiõxí òré càháⁿ ndihí ñáhá-yu xii-gá.

⁹ Te xita-güedé ìⁿ ndudú sáa ndihí cue quití-áⁿ chíñùhu ñaha-güedé xii-gá, te càchí-güedé ndihí cue quití-áⁿ:

Yòhó tàú-n queheⁿ-n tutú-a te xocàni-n nchaa tutú líhli ñùhu seyú ndéé sáta-xi,

chi yòhó ní sati níñí-n te ní xihí-n, te cuèndá xǎⁿ ní nduu cuèndá Yǎ Ndiõxí cue ñáyíu ìⁿ ìⁿ nacióⁿ,

ndihi ñáyiú xĩndecu ìⁿ ìⁿ ñuú,
ndihi ñáyiú càháⁿ ndí dííⁿ ndí
dííⁿ núú tnùhu, ndihi ñáyiú
xĩndecu ìⁿ ìⁿ xichi.

10 Te ní quidé-n-yu dàtná cue téé
yìndaha ñáyiú, te ní quide
tùcú-n-yu dàtná cue dùtú sá
cúú-xí Yá Ndiõxí.

Te sáá nduu te taxi tnùnì-yu ñuyíú-a.
Duha càháⁿ cue téé-áⁿ ndihi cue
quiti-áⁿ chíñùhu-güedé ndihi-güedi
Yaá-áⁿ.

11 Te sáta dúcáⁿ te ní tecú dóho-í
ní cáháⁿ cuéhé víhí espíritú xínú
cuèchi ni candéé núú núcõo Yaá táxí
tnùnì-áⁿ, ndihi núú xĩnutní ndí cùmí
cue quiti-áⁿ, ndihi núú xĩnucóo cue téé
cùu sacuéhé-áⁿ, te ní xiní-í sá sùúní
cuéhé víhí espíritú-áⁿ xĩndecu xiáⁿ,
12 te níhi ní cáháⁿ cue espíritú-áⁿ, te
càchí-xi:

Yòhó Yaá cáá dàtná cáá ìⁿ mbéé quiti
ní dánìcuéhé-güedé te ní xihí ní
cùu te ní ndoto,

te yòhó ío càhnu cuu-n, te ndècu
ndihi-n nchaandi túhú,

te ío ndècu ndihi-n sá xiní tnùnì-n,

te ndàcu-n quide-n nchaa sá cuínì-n,

te nèhe-ndí sá yíñùhu núú-n, te ío váha
quide-n,

te chíñuhu ñaha-ndí xii-n, chi ducaⁿ
tàú-ndí cada-ndí chi ío càhnu
cuu-n.

Duha càchí nchaa cue espíritú-áⁿ
xáhaⁿ-xi xii-gá chíñùhu ñaha-xi.

13 Te ní tecú dóho-í ní cáháⁿ
nchaandi túhú sá ñí cadúha Yá Ndiõxí
ndécú àndiú, ndihi nchaa sá ndécú
ñuyíú, ndihi nchaa sá ndécú xití ñuhu,
ndihi nchaa sá ñuhú xití ndute làmár,
te xicachí-xi:

Yòhó Yaá núcõo núú xilé váha, ndihi
yòhó Yaá cáá dàtná cáá ìⁿ
mbéé quiti ní dánìcuéhé-güedé
táxí tnùnì-ndó, te nèhe-ndí sá
yíñùhu núú-ndó,

te ducaⁿ ío ndàcáⁿ táhú-ndí núú-ndó,
chi ío váha quide-ndo te ío
cùnuu-ndo,

te diu-ni duha cáháⁿ váha-ndí
cuèndá-ndó ñí caa ñí quíhíⁿ.

Duha càchí nchaa sá ñí cadúha Yá
Ndiõxí.

14 Te ndí cùmí cue quiti xĩnutní-áⁿ
càchí-güedi:

—¡Ducaⁿ na cùnduu! —cachí-güedi.

Te ndí òcò cùmí cue téé cùu sacuéhé
xĩndecu-áⁿ ñí ngüíñí xití-güedé
chíñùhu-güedé Yaá ndécú nchaa nduu
nchaa quíú.

6

Cuèndá úsá tutú ìhli ñùhu seyú

1 Te sáta dúcáⁿ te ní xiní-í sá
Yáá cáá dàtná cáá ìⁿ mbéé quiti ní
dánìcuéhé-güedé-áⁿ ñí xócánì-gá ìⁿ
tutú ìhli ñùhu seyú ndéé sáta tütú sá
ñí nadúcúⁿ nuu-áⁿ, te ní tecú dóho-í
ní cáháⁿ ìⁿ quiti cùmí xĩnutní-áⁿ, te
níhi ní cáháⁿ-dì dàtná càháⁿ ñùhu, te
càchí-dì:

—¡Taquìxi cundehe-n! —cachí-dì.

2 Te òré-ni-áⁿ ñí xiní-í ìⁿ cuàyú
cuixíⁿ yódó ñàha ìⁿ sá yódó ñàha xii-dì,
te sá yódó ñàha xii-dì-áⁿ néhé-xí ìⁿ
arcú sá cúú tnùxí-xi, te ní nduu
táhú-xi ìⁿ coròná, te ní ndacu-xi
ní cunu-xi te ducaⁿ-ni ta cunu-xi
cuáháⁿ.

3 Te òré ní xócánì-gá tutú ìhli
cùu uú ñùhú sèyú ndéé sáta tütú
sá ñí nadúcúⁿ nuu-áⁿ, te ní tecú
dóho-í ní cáháⁿ tucu ingá quiti cùu uú
xĩnutní-áⁿ, te càchí-dì:

—¡Taquìxi cundehe-n! —cachí-dì.

4 Te òré-ni-áⁿ ñí xiní tucu-í ìⁿ cuàyú
tícuéhé ní quee-dì cuáháⁿ-dì, te yòdo
ñàha ìⁿ sá yódó ñàha xii-dì, te sá yódó
ñàha xii-dì-áⁿ ñí níhí-xi tnùhu ndee ìní
sá dátìcánuu-xi ñáyiú vá cùndècu ndihi
tnaha váha-gá-yu, te ngüíta ñáyiú
cahni tnàhá-yu, te ní nduu táhú-xi ìⁿ
yuchí cáhnú vîhi.

5 Te òré ní xócánì tucu Yaá-áⁿ ingá
tutú ìhli cùu uní ñùhú sèyú ndéé sáta
tütú sá ñí nadúcúⁿ nuu-áⁿ, te ní tecú
dóho-í ní cáháⁿ quiti cùu uní xĩnutní
xiáⁿ, te càchí-dì:

—¡Taquìxi cundehe-n! —cachí-dì.

Te òré-ni-áⁿ ñí xiní tucu-í ìⁿ cuàyú
tnúú te yòdo ñàha tucu ìⁿ sá yódó ñàha
xii-dì, te sá yódó ñàha-áⁿ núndàha-xi
úú yaxiⁿ libré. 6 Te ní tecú dóho-í ní

cáháⁿ ìⁿ sá nǐ cáháⁿ tnuú cue quiti xĩnutnǐ-áⁿ, te cǎchí-xi:

—Íⁿ cuártú-nǎ triú níhí-ndó sǎ ìⁿ díhúⁿ denàriú, te úní cuártú-nǎ cebàdá níhí-ndó sǎ ìⁿ tùcu díhúⁿ denàriú, dico acítí ndihí ndudí ndéhé yoho yàha stilé chi vá ndíhí ñihnu — duha cǎchí sá cáháⁿ-áⁿ.

⁷ Te òré ní xócání tùcu Yaá-áⁿ tutú lǐhli cùu cumí ñúhú sèyú ndéé sátá tütú sá nǐ nadúcúⁿ nuu-áⁿ, te ní tecú tucu dóho-í ní cáháⁿ tucu íngá quiti cùu cumí xĩnutnǐ-áⁿ, te cǎchí-dí:

—¡Taquixi cundehe-n! —cachí-dí.

⁸ Te òré-ni-áⁿ nǐ xiní tucu-í ìⁿ cuàyu yàhá, te yòdo ñaha tucu ìⁿ sá yódó ñaha xii-dí, te sá yódó ñaha xii-dí-áⁿ nání-xí Sǎ xihí, te xiǎⁿ sáhní-xí ñáyiu, te sátá xiǎⁿ nchícúⁿ sá nèhé núú ndécú ñáyiu ní xihí. Te cúmí xichi cùu ñuyíú, te sá sáhní ñaha xii ñáyiu-áⁿ nǐ níhí-xi tnúhu ndee ìní danàa-xi ñáyiu ìⁿ xichi ñuyíú, te davá-yu cahni ñaha-xi ndihí yuchí, te cada-xi sá cóo tnámá te cuú-yu, te cada tucu-xi sá cóo cuéhé cahni-xi ñáyiu, te diu-ni tucu-xi cada sá ncháá quiti dééⁿ cahni-dí ñáyiu.

⁹ Te òré ní xócání tùcu Yaá-áⁿ tutú lǐhli cùu uhúⁿ ñúhú sèyú ndéé sátá tütú sá nǐ nadúcúⁿ nuu-áⁿ, te òré-áⁿ nǐ xiní-í nútnǐ ìⁿ núú sácódó sǎ ndúú tǎhú Yá Ndióxí, te ndàa caha xiǎⁿ ní xiní-í xĩndecu nchaa àlmá ñáyiu ní sahní-güedé núú ñuyíú sǎ cuendá tnúhu Yá Ndióxí, ndihí sá cuendá sá nǐ cáháⁿ váha-yu cuendá-gá. ¹⁰ Te nchaa àlmá-áⁿ ñihí xǐcáháⁿ-xi, te xǎháⁿ-xi xii Yá Ndióxí:

—Yòhó Dútú Ndióxí cúú-n Yàá ñá túú tnàhí cuéchi-xi, te ñá túú tnàhí queé cáva-n quide-n ìⁿ sá cáháⁿ-n. ¿Te ná ndéé ama dandòho-n ñáyiu ndècu ñuyíú nachinaa-n cuendá sá nǐ quide ñàhá-yu xii-ndí-i? —cǎchí cue àlmá-áⁿ xǎháⁿ-xi xii-gá.

¹¹ Te sátá dúcáⁿ te nchaa cue àlmá ñáyiu-áⁿ nǐ níhí-xi dóo cuixíⁿ ní queé cuíhnu-xi, te ní xitnúhu ñaha xii-xi sá ná ndètatú-xi te cundetú tnaa-xi ndéé ná xĩnu cava cuú ñáyiu nàcuáa ndéé tnuní dàtná ní xihí cue ñáyiu dii àlmá-xi cùu-xi. Te ñáyiu sa ní xihí-áⁿ ìⁿ-ni cùu-yu ndihí ñáyiu vitna

cuú-áⁿ chi mee-ni chiuⁿ Xítóhó Jesucristú quidè-yu, te diu-ni ichi-gá ndécú-yu.

¹² Te òré ní xócání tùcu Yaá-áⁿ tutú lǐhli cùu iñú ñúhú sèyú ndéé sátá tütú sá nǐ nadúcúⁿ nuu-áⁿ, te ní xiní-í súúni ñihí ní quidi-xi ñuyíú, te ní cutnuu ñihí núú nchicanhii dàtná ìⁿ dóo tnuú, te ní cuu tìcuéhé ñíhí ñihí núú yóo. ¹³ Te ní xiní-í ní ngoyo chódíní ñuyíú-a dàtná ngóyó ngúxí yihí òré quéné tǎchí ñihí. ¹⁴ Te ní xiní-í ní nadúcúⁿ nuu andiú dàtná nádúcúⁿ nuu ìⁿ tutú te ní ndóñúhú-xí, te nchaa tĩndúú nǐ xica ndehe-xi núú ndécú-xí, te ducaⁿ nǐ xica ndehe tucu nchaa tĩndúú yìchí ndécú xití ndute làmár. ¹⁵ Te nchaa cue tée yìndaha ñáyiu ní nguivǎha-güedé, ndihí nchaa dava-gá cue tée ío tàxi tnuní, ndihí nchaa ñáyiu cuica, ndihí nchaa cue tée tàxi tnuní sandádú, ndihí cue sandádú cue tée ío váha sáa díquí-xi nàcuáa cada-güedé nàa-güedé, ndihí nchaa ñáyiu ñá túú tnàhí dàhá quee núú chíúⁿ pàtróoⁿ-xi, ndihí nchaa ñáyiu dàhá queé núú chiuⁿ patróoⁿ-xi.

Te dava ñáyiu-áⁿ nǐ nguivǎha-yu xití yaú, te davá-yu ní nguivǎha-yu nchaa tnuú cava. ¹⁶ Te xǎháⁿ-yu nchaa tĩndúú ndihí nchaa cava:

—Chí tácuuⁿ chiváha ñaha-ndo xii-ndí cuendá sá vǎ quini ñáhá Yàá ío tàxi tnuní núcòo núú xilé váha, ndihí cuendá sá vǎ dándòho ñaha Yàá cáa dàtná cáa ìⁿ mbéé quiti ní dánìcuéhé-güedé, chi Yaá-áⁿ ío cùdééⁿ-gǎ núú-ndí —duha cǎchí nchaa ñáyiu-áⁿ xǎháⁿ-yu xii nchaa tĩndúú-áⁿ ndihí nchaa cava-áⁿ.

¹⁷ Te vitna ní sáa nduu ío cùu cahnu nduu tnúndòho tnúhu ndàhú, te vá yóo ìⁿ cundee ìní-xi yáha nchaa tnúndòho-a.

7

Ñáyiu israél ñáyiu nanhí tǎhú

¹ Te sátá xiǎⁿ te ní xiní-í cúmí tnàhá espíritú xínú cuéchi núú Yá Ndióxí xĩnutnǐ-xi ndi cùmí xio ñuyíú, te cue espíritú-áⁿ nǐ ngani-xi tǎchí cuendá sá vǎ cuícó-gǎ-xi ni làmár, te

ni dĩquí yutnu, te ni ìⁿ xichi ñuyíú vǎ cuícó-gǎ-xi. ² Te cue espíritú-áⁿ ndécú ndìhi-xi tnúhu ndee ìní danàa-xi sá ìó làmár ndìhi sá ìó ñuhu yìchí, te ní xini tucu-í ìngá espíritú xínú cuèchi núú Yǎ Ndiǒxí ní quee nchita-xi ndàa nacuaa quène nchícanhii, te nùndaha-xi seyú Yǎ Ndiǒxí Yaá ndécú nchàa nduu nchaa quíú, te níhi ní cáháⁿ-xi xǎhaⁿ-xi xìi ndi cumí cue espíritú-áⁿ:

³ –Vǎ dánàa-ndo sá ìó làmár, te ni vǎ dánàa-ndo yutnu, te ni ìⁿ sá ìó ñuyíú vǎ dánàa-ndo, chi cundetú-ndo ndéé ná tàxi ndecu-ndí ìⁿ sèñá tneé nchaa ñáyiú xìnu cuechi núú Tǎtá-ó Dütú Ndiǒxí –duha càchí espíritú-áⁿ xǎhaⁿ-xi xìi ndi cumí espíritú xǐnutnìi ndi cùmí xichi ñuyíú.

⁴ Te ní tecú dóho-í ní cáháⁿ ìⁿ sá ní cáháⁿ, te ní cachí-xi sá núú ndí ùxúú xichi cue ñáyiú isràél te ní xínu ìⁿ cièndú údico cùmí mǐl-yu ní ngúndecu sèñá tneé-yu. ⁵ Te núú ìⁿ cièndú údico cùmí mǐl ñáyiú-áⁿ, te ní xínu úxúú mǐl cue ñaní tnáhá ndíi Jùdá ní ngúndecu sèñá tneé-yu, te úxúú mǐl cue ñaní tnáhá ndíi Rùbén, te úxúú mǐl cue ñaní tnáhá ndíi Gǎd, ⁶ te úxúú mǐl cue ñaní tnáhá ndíi Àsér, te úxúú mǐl cue ñaní tnáhá ndíi Neftàlì, te úxúú mǐl cue ñaní tnáhá ndíi Manàsés, ⁷ te úxúú mǐl cue ñaní tnáhá ndíi Mìó, te úxúú mǐl cue ñaní tnáhá ndíi Lèví, te úxúú mǐl cue ñaní tnáhá ndíi Isàcár, ⁸ te úxúú mǐl cue ñaní tnáhá ndíi Zabùlón, te úxúú mǐl cue ñaní tnáhá ndíi Chèé, te úxúú mǐl cue ñaní tnáhá ndíi Benjàmín, nchaandi túhú ñáyiú-áⁿ ní ngúndecu sèñá tneé-yu.

Cuéhé víhí ñáyiú ñìhnu dóó cuìxíⁿ

⁹ Te sátá xǎⁿ te ní xini-í cuéhé víhí ñáyiú, ñáyiú ìⁿ ìⁿ nàcióⁿ, ndìhi ñáyiú ìⁿ ìⁿ ñúú, ndìhi ñáyiú càháⁿ ndi dĩⁿ ndi dĩⁿ núú tnùhu, ndìhi ñáyiú ní xíndecu ìⁿ ìⁿ xichi, te nchaa ñáyiú-áⁿ xǐnutnìi-yu ndàa núú Yàá táxi tnùnì núcõo núú xilé váha, ndìhi núú Yàá cáá dàtná cáá ìⁿ mbéé quiti ní dánìcuèhé-güedé, te vá yõ ìⁿ ndàcu cahu ñaha xií-yu chi cuéhé víhí-yu,

te nchaá-yu xǐxíhnu-yu mee-ni dõó cuìxíⁿ, te nùndahá-yu nchaá-yu ìⁿ caa ndàha yutnu ñúú. ¹⁰ Te nchaá-yu níhi xǐcáháⁿ-yu, te càchí-yu:

Yaá táxi tnùnì núcõo núú xilé váha cùu-gá Ndiǒxí-ó,

te diu-gá ndìhi Yaá cáá dàtná cáá ìⁿ mbéé quiti ní dánìcuèhé-güedé ní dácácu ñìhnu ñaha-gǎ xii-o núú ùhú núú ndàhú.

Duha càchí nchaa ñáyiú-áⁿ. ¹¹ Te nchaa espíritú xínú cuèchi núú Yǎ Ndiǒxí ní nadúcúⁿndéé-xi xǐnutnìi-xi ní càndéé núú núcõo Yaá núcõo núú xilé váha, ndìhi núú xínucóo cue téé cùu sacuéhé, ndìhi cue ndi cùmí quiti xǐnutnìi-áⁿ, te nchaa-xi ní ngüñí xítí-xí te ní ngúnu ndeyi-xi núú Yàá núcõo núú xilé váha-áⁿ, te nchaa-xi ní ngüíta-xi chìñuhu ñaha-xi xii-gá, ¹² te càchí-xi:

Na càháⁿ ndáá-ndí núú yòhó Tǎtá-ndí Dütú Ndiǒxí sá ìo càhnu cuu-n, te ndàcu-n quide-n nchaa sá váha cuìní-n, te ìo váha quide-n, te ndècu ndìhi-n nchaa sá xini tnùnì-n,

te chìñuhu ñaha-ndí xii-n, te ducaⁿ ndàcáⁿ táhú-ndí núú-n cuèndá nchaa sá quidé-n, te nèhe-ndí sá yíñùhu núú-n,

te tnúhu càháⁿ-ndí-a cùu-xi tnúhu ndáá, te diu-ni duha càháⁿ-ndí ndéé núú cuàháⁿ núú vèxi.

Duha càchí nchaa cue espíritú-áⁿ xǎhaⁿ-xi xìi Yaá núcõo núú xilé váha-áⁿ.

¹³ Te ìⁿ cue téé cùu sacuéhé xíndecu-áⁿ ní xicáⁿ tnúhú-dé núú-í, te càchí-dé:

–¿Yóndi cùu ñáyiú dàcáⁿ xǐxíhnu dóó cuìxíⁿ-áⁿ, te ndéé véxi-yu núu dàcáⁿ xǐndáá-yu-i? –càchí-dé.

¹⁴ Te yúhú ní xáhaⁿ-í:

–Tǎtá, ñá túú xini-í, dico mee-n xini-n –duha ní xáhaⁿ-í xii-dé.

Te dàtnùnì ní cachí tnúhu-dé xii-í ná cúú ñáyiú-áⁿ, te càchí-dé:

–Nchaa ñáyiú-a cùu-yu ñáyiú ní quee núú ìo víhí tnùhu ndòho tnúhu ndàhú sá vǎ cùndèe ìní-ó te véxi-yu iha, te cùu-yu ñáyiú sa ní nduu ndoo ní nduu nine ìní-xi cuèndá

sá nǐ sati níńí Yàá cáá dàtná cáá ìⁿ mbéé quiti ní dánìcuèhé-güedé, cuendá xǎⁿ vitna ní ndihí-yu ní nduu cuixíⁿ dóó xǐxíhnu-yu. ¹⁵ Te núu xǎⁿ vitna ní nduu táhǔ-yu ndécú-yu núú ndécú Yǎ Ndiǒxí Yáá táxí tñuní núcóo núú xilé váha, te cuèi nduu cuèi niú xínú cuèchí-yu núú-gǎ vitna, te diu-gá xító ñàha-gá xii-yu. ¹⁶ Te vitna ní sáá-yu núú-gǎ cundécú-yu te vá ndóhó-gǎ-yu docó, te ni vǎ quini-gá-yu ndohó-yu yíchí-yu ndute, te ni vǎ quini-gá-yu ndohó-yu cahni nchíanchii, te ñá túú-gǎ ná cahni ndohó-yu. ¹⁷ Te ducaⁿ chi Yáá cáá dàtná cáá ìⁿ mbéé quiti ní dánìcuèhé-güedé ndécú-gǎ núú núnǎi xilé váha núcóo Yá Ndiǒxí Yáá táxí tñuní, Yáá-áⁿ coto ñaha-gǎ xii-yu dàtná quidé ìⁿ toli oré xító-dě mbéé-dě, te candeca ñaha-gǎ xii-yu quíhíⁿ núú tǒo ndute, te ndute-áⁿ cúú-xí ndute candeca ini-yu, te Yá Ndiǒxí cada-gá sá vǎ quini-gá-yu tñuhu ndàhyú —duha ní cachí tñuhu téé cùu sacuéhé-ǎⁿ xii-í.

8

Cuendá tícùú sá nǐ cuáha mee-ni dǐhúⁿ cuááⁿ

¹ Te sátá dúcáⁿ te Yáá cáá dàtná cáá ìⁿ mbéé quiti ní dánìcuèhé-güedé ní xócání-gǎ tutú líhli cùu usá ñuhú sèyú ndèé sátá tütú sá nǐ nadúcúⁿnuu-áⁿ, te òré-áⁿ nǐ cunahi sùuní nàvíí-nǎ ní cuu andiú dàtná cuádava òré. ² Te ní xiní-í úsá tñahá espíritú xínú cuèchi núú Yǎ Ndiǒxí xǐnutnǎi-xi núú núcóo-gá, te ní níhí-xi ìⁿ caa cütú xǐnehe-xi. ³ Te dǎtnuní ní xiní tucu-í ingá espíritú xínú cuèchi núú-gǎ ní quexio-xi nehe-xi ìⁿ tícùú ní cuáha mee-ni dǐhúⁿ cuááⁿ te ñuhu vaj dúsa sá sàháⁿ tñámí, te ní ngúnutnǎi espíritú-áⁿ núú ndécú sá nǐ cuáha mee-ni dǐhúⁿ cuááⁿ núú sácódó sá ndúú táhú Yǎ Ndiǒxí, te xǎⁿ núnǎi-xi ndàa núú-gǎ, te dúsa sá sàháⁿ tñámí-áⁿ cahmi espíritú-áⁿ núú sácódó sá ndúú táhú-gǎ-áⁿ cuendá ñuhmá dúsa-áⁿ cundihí-xi nchaa tñuhu càháⁿ ñáyiú càháⁿ ndihí ñaha

xii-gá, nchaa ñáyiú cùu cuendá-gá. ⁴ Te nùndaha espíritú-áⁿ tícùú ñuhú dúsa sá sàháⁿ tñámí càyú, te quène ñuhmá núnǎi-xi núú Yǎ Ndiǒxí, te ñuhmá-ǎⁿ cundihí-xi nchaa tñuhu càháⁿ ñáyiú càháⁿ ndihí ñaha xii-gá, nchaa ñáyiú cùu cuendá-gá. ⁵ Te ní queheⁿ espíritú-áⁿ tícùú te ní dáchitú-xi ñuhú yódó núú sácódó sá ndúú táhú Yǎ Ndiǒxí, te ní xiténuu-xi ñuyiú, te òré ducaⁿ nǐ quide-xi te ní càháⁿ víhí ñuhu, te ío dusaⁿ nǐ quide-xi ñuyiú, te ní sáá nduté, te níhí víhí ní tñáa.

Ndi ùsá espíritú ní tǐú-xi ìⁿ caa cütú xǐnehe-xi

⁶ Te ndi ùsá cue espíritú xǐnehe ìⁿ caa cütú-ǎⁿ nǐ ngúndecu túha-xi cuendá tǐú-xi.

⁷ Te espíritú díhna nuu nǐ tǐú-xi cütú néhé-xí, te ñuyiú-a ní ngoyo ñiñi dácánuu-xi ndihí ñuhú ndihí níńí, te luha-ná te cuu dava ñuyiú nǐ càyú, te luha-ná te cuu dava tucu nchaa yutnu ío ñuyiú nǐ càyú, te luha-ná te cuu dava tucu nchaa cúhú ío ñuyiú nǐ càyú.

⁸ Te espíritú cúú ùú ní tǐú-xi cütú néhé-xí, te dàtná cáá ìⁿ tǐndúú cáá ìⁿ sá nǐ ngava xití lámár te nchícúⁿ ñuhú, te luha-ná te cuu dava ndute lámár-áⁿ nǐ nduu-xi níńí. ⁹ Te luha-ná te cuu dava nchaa quiti xǐxúhuⁿ xití lámár-áⁿ nǐ xihí-güedi, te luha-ná te cuu dava nchaa bàrcú ní quée naa-xi xití ndute.

¹⁰ Te espíritú cúú ùní ní tǐú-xi cütú néhé-xí, te ní ngava ìⁿ chódíní cáhnú ndèé andiú ñuyiú te nchícúⁿ ñuhú-di, te ñuhú-áⁿ cáá dàtná cáá ñuhú iti. Te luha-ná te cuu dava nchaa yúte ní ngava chódíní-ǎⁿ, te luha-ná te cuu dava tucu nchaa núú quènihni ndute ní ngava-di. ¹¹ Te chódíní-ǎⁿ nání-dí: Yúcú Úá. Te ndute xica nchaa yúte-áⁿ ndihí nchaa ndute quènihni-áⁿ nǐ cuu úá-xi dàtná yúcú úá, te ío cuéhé ñáyiú ní xihí sá dúcáⁿ nǐ cuu úá ndute-áⁿ.

¹² Te espíritú cúú cùmí ní dácàháⁿ-xi cütú néhé-xí, te luha-ná te cuu dava nchíanchii ñá túú ní dáyehé-xi, te ducaⁿ lùha-ná tucu cuu dava yóó ñà

túú ní dàyehé-di, te ducaⁿ lùha-ná te cuu dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchíanchii, te ducaⁿ lùha-ná te cuu dava niú ñà túú ní dàyehé yóó ndihi nchaa chódíní.

13 Te sátá dúcáⁿ te ní xíní-í xícó ìⁿ espíritú xínú cuèchi núú Yá Ndiöxí núú tàchí, te ní tecú dóho-í níhi càháⁿ-xi, te càchí-xi:

—Ío ndàhú ndoho nchaa ñáyíu xíndecu ñuyíú òré ná dàcaháⁿ úní-gá cue espíritú cúmání cútú xínehe-xi, chí sa xíndecu túha-ná-xi sá dácàháⁿ-xi!— duha càchí espíritú-áⁿ.

9

1 Te espíritú cúú ùhúⁿ ní tíú-xi cútú néhé-xí, te òré-áⁿ ñí xíní-í ní quee ìⁿ espíritú andíu te càa-xi datná cáá ìⁿ chódíní, te ní ngava-xi ñuyíú, te ní níhí-xi ìⁿ ndacaá néhé-xí cuendá nacaáⁿ-xi yuyèhe yaú cùnú víhí. 2 Te ní nacaáⁿ-xi yaú-áⁿ te ní ngúíta-xi ní quene ñúhmá datná quéné ñúhmá ìⁿ xítnú cáhnú víhi, te ní quene táchí ñí xítenuu-xi ñúhmá-áⁿ te ní sadí-xi núú nchíanchii, te ní cunee ñuyíú. 3 Te xítí ñúhmá-áⁿ ñí quene tíca làngóstá, te ní xítenuu-di ñuyíú, te dééⁿ-güedi datná dééⁿ nchacua. 4 Te ní ngúndecu ndihi-güedi tnúhu ndee ìní cuendá sá dándòho-güedi mee-ni ñáyíu ñà túú ndèe seña Yá Ndiöxí tneé-xi, te ñà túú ñà cada-di nchaa yutnu ndihi nchaa cùhú. 5 Te ñà túú tnúhu ndee ìní ndécú ndihi-güedi sá cáhní-güedi ñáyíu, chí mee-ni sá dándòho ñaha-güedi xíi-yu úhúⁿ yóó. Te òré ní ngúíta-güedi dándòho ñaha-güedi xíi-yu te tàhú tnúhú núú dáquèe-güedi ìñu-güedi datná quidé-xí núú dáquèe nchacua ìñu-güedi. 6 Te ñáyíu-áⁿ xìcáⁿ táhú-yu sá ndíhi cuú-yu cuendá sá ío ndòhó-yu dàquèe ñaha nchaa quití-áⁿ ìñu-di xíi-yu te ñà cuíní-xi cuú-yu, te ìⁿ nduu ìⁿ nduu sàni ìní-yu cuú-yu te ñà túú cuíní-xi cuú-yu chí ñà túú tnúhu xíhí sá cúú-xí-yu.

7 Te nchaa tíca làngóstá-áⁿ xíndáa-güedi datná ndáa nchaa cuáyú

cue tée cuáháⁿ nàá, te díquí-güedi ññuhu ìⁿ sá cáá datná cáá còroná ní cuáha mee-ni díhúⁿ cuááⁿ, te núú-güedi càa datná cáá núú cuè téé. 8 Te idi díquí-güedi càa datná cáá idi díquí ñáyíu díhí, te núhu-güedi càa datná cáá ññuhu ndícaha. 9 Te yídúcúⁿnuu-güedi ìⁿ sá cáá datná cáá càá, te ndíxíⁿ-güedi quíde-xi datná quidé-xí núú véxi cuéhé víhí càrretá sá táññuhu cuayú cuáháⁿ-güedé ndihi-güedi núú nàá-güedé.

10 Te ndèe ìñu núú lùhmá-güedi datná ndèe ìñu núú lùhmá nchacua, te ìñu núú lùhmá-güedi-áⁿ dáquèe-güedi ñáyíu dándòho ñaha-güedi xíi-yu, te ducaⁿ-ni càda-güedi dándòho ñaha-güedi xíi-yu ndèe xínu úhúⁿ yóó. 11 Te nchaa tíca làngóstá-áⁿ táxí tnùní ñáhá espíritú sá táxí tnùní yaú cùnú víhí, te espíritú-áⁿ nání-xí Àbadón tnúhu hèbreú, te tnúhu grìégú nání-xí Àpolión, te ndi ndùú tnúhu-áⁿ quée-xí: Sá dánàa ñáyíu.

12 Te tnúndòho-a cuu-xi tnúndòho díhna nuu, te vítna cúmání úú-gá.

13 Te espíritú cúú ìñu ní tíú-xi cútú néhé-xí. Te núú Yá Ndiöxí nútñí ìⁿ sá ñí cuáha mee-ni díhúⁿ cuááⁿ núú sácòdó sá ndúú táhú-gá, te ndi cúmí xíquí-xi xíndecu ìⁿ caa ndíquí, te ní tecú dóho-í ní cáháⁿ ìⁿ sá ñí cáháⁿ ññu ndi cúmí ndíquí-áⁿ.

14 Te sá càháⁿ ññu ndíquí-áⁿ xáhaⁿ-xi xíi espíritú cúú ìñu sá ñí tíú cútú-áⁿ:

—Cuáháⁿ nandaxi-n ndi cúmí espíritú ndútú ndècu yúte càhnu nani Eúfratés —càchí sá càháⁿ-áⁿ xáhaⁿ-xi xíi espíritú-áⁿ.

15 Te sátá dúcáⁿ te ní nandaxí ndi cúmí cue espíritú-áⁿ cuendá cahni-xi cuéhé víhí ñáyíu, te sa yatni datná cuádava ñáyíu xíndecu ñuyíú cahni-xi, te ducaⁿ chí sa ndècu túha tnàhí cue espíritú-áⁿ ndétú-xí sàá òré, àdi nduu, àdi yóó, àdi cuía ducaⁿ càda-xi cahni-xi ñáyíu. 16 Te ní xíní-í nchaa cue sandàdú cùndíhi-xi xixódó-güedé cuáyú, te ní níhí-í tnúhu sá xínu úú cièndú millón-güedé.

17 Te duha xíndáa cue cuáyú-áⁿ ndihi cue téé yòdo ñaha-áⁿ ñí xíní-í: Te cue téé-áⁿ yídúcúⁿ nuu ìⁿ sá

yídücüⁿnuu pèchú-güedé, te luha tìcuèhé te luha cuì datná cuì andiù, te luha cuàáⁿ, te nchaa cuàyú-áⁿ cáá díquí-güedi dàtná cáá díquí ndicaha, te yuhu-güedi quene ñuhú ndihi ñúhmá, ndihi àzufré nchìcúⁿ ñuhú. ¹⁸ Te ío cuèhé ñáyiù ñuyíú nǐ xihí chi luha-ná te cudavá-yu ní xihí sá cuendá ñuhú-áⁿ ndihi ñúhmá-áⁿ ndihi àzufré-áⁿ. ¹⁹ Te ndihi núú lùhmá-güedi ndihi yuhu-güedi dàndoho-güedi ñáyiù, te núú lùhmá-güedi nèhe-xi díquí cǒó, te diù-ni dàtná cáá cǒó cáá ñihí lùhmá-güedi.

²⁰ Te nchaa dava-gá ñáyiù ní cácu ñá túú nǐ xihí núú nchàa tnúndòho-áⁿ ñà túú ní cuìni-yu dàñá-yu ichi cuèhé ichi duha ndécú-yu, chi quide cahnu-ní-yu nchaa espíritú cúnndihi yucu ñáváha, ndihi nchaa sá càchí-yu cùu ndióxí ní cadúha cue téé ñuyíú-a, te dava xiáⁿ ní cuáha mee-ni díhúⁿ cuàáⁿ, te dava ní cuáha mee-ni díhúⁿ cuixíⁿ, te dava ní cuáha sá nání brǒncé, te dava ní cuáha mee-ni yúú, te dava ní cuáha mee-ni yùtnu, te nchaa xiáⁿ ñá túú cùnuni núú-xi, te nǐ ñà túú tècú dóho-xi, te nǐ ñà ndácú-xí càca-xi. ²¹ Te nǐ sǎ sáhní tnahá-yu, te nǐ sǎ sáhní ndùu tnahá-yu, te nǐ sǎ ndécú-yu ichi díí iní, te nǐ sǎ dúhú ndàchiuⁿ tnahá-yu ñá túú ní cuìni-yu dàñá-yu.

10

Èⁿ espíritú xínú cuèchi núú Yǎ Ndiǒxí néhé-xí èⁿ librú

¹ Te sátá dúcáⁿ te ní xiní tucu-í èⁿ espíritú cúnúu xinú cuechi núú Yǎ Ndiǒxí ní quee-xi andiù, te yìhi-xi xití vícǒ cuànguee-xi ñuyíú te ndàa díquí-xi ndècu èⁿ cóó yáhnchí, te núú-xi súúní chàhnchí dàtná chàhnchí núú nchìcanchii, te ndi ndùú díhíⁿ-xi càa datná cáá itá ñuhú. ² Te nùndaha-xi èⁿ librú líhli ní nandíca, te sáhá cùha-xi ní sani-xi núú ndute làmár, te sáhá dàtni-xi ní sani-xi núú ñuhu yìchí. ³ Te espíritú-áⁿ ñihi vìhi ní cáháⁿ-xi, te ní quide-xi dàtná quidé èⁿ ndicaha oré cánásàa-di, te òré ducaⁿ ñihi vìhi ní cáháⁿ-xi te úsá xito ní

cáháⁿ ñúhu. ⁴ Te sátá nǐ yáha ní cáháⁿ ñúhu-áⁿ úsá xito, te chido tnùnì-í èⁿ núú tütú nàcuáa ní cáháⁿ-xi ní cùu, te mei òré-áⁿ nǐ tecú dóho-í ní cáháⁿ èⁿ sá nǐ cáháⁿ andiù te càchí-xi:

—Vá chídó tnùnì-n nàcuáa ní cáháⁿ ñúhu-áⁿ, iní mée-ní-n ná cùhuⁿ —duha càchí sá nǐ cáháⁿ-áⁿ.

⁵ Te espíritú sá nútnǐ èⁿ xio sáhá-xi núú ndute làmár-áⁿ ndihi ingá xio sáhá-xi núú ñuhu yìchí-áⁿ nǐ xiní-í ní ndonehe-xi ndaha cùha-xi, ⁶ te càchí-xi:

—Yá Ndiǒxí Yáa ndécú nchàa nduu nchaa quíú Yáa ní cadúha ñuyíú, ndihi andiù, ndihi làmár, ndihi nchaa sá ío, Yáa-áⁿ náhá ndáa-gá sá yùhú càháⁿ ndáa-í, te vá cùyaa vìhi ⁷ te cada-xi nchaa nàcuáa ndùu tnúhu ndùu yuhu ní cáháⁿ-gá, tnúhu ní xáhaⁿ-gǎ xii cue téé ní xinú cuechi núú-gǎ, cue téé ní xóo cáháⁿ tnúhu-gá ndéé sanaha, chi òré ná tìu espíritú cúú úsá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá nǐ xáhaⁿ-gǎ xii nchaa cue téé-áⁿ —duha càchí espíritú-áⁿ.

⁸ Te sátá dúcáⁿ te ní tecú tucu dóho-í ní cáháⁿ tucu sá nǐ cáháⁿ andiù-áⁿ, te càchí-xi xii-í:

—Cuàháⁿ te queheⁿ-n librú líhli sá nǐ nàndíca nùndaha espíritú-áⁿ, espíritú sá nútnǐ èⁿ xio sáhá-xi núú ndute làmár, te èⁿ xio sáhá-xi núú ñuhu yìchí —duha càchí sá nǐ cáháⁿ-áⁿ.

⁹ Te yúhú ní sáháⁿ-í núú ndécú espíritú-áⁿ xìcáⁿ-í librú líhli nèhe-xi-áⁿ, te ní cachí-xi:

—Iha te caxi-n, te cuvídí yuhu-n dàtná cuvídí òré xihí-n ndùdí ñúñú, dico xití-n chi cada úa-xi —càchí-xi.

¹⁰ Te ní queheⁿ-í librú líhli nùndaha espíritú-áⁿ nǐ xexi-í, te yuhu-í ní quide vídí-xi dàtná vídí ndudí ñúñú, dico sátá nǐ ngava-xi xití-í te ní quide úa-xi. ¹¹ Te ní cachí tucu espíritú-áⁿ xii-í:

—Dacuití cǎháⁿ tucu-n nàcuáa càchí Yǎ Ndiǒxí cuendá ñáyiù titní víhí nàción, ndihi cuendá ñáyiù titní víhí ñúú, ndihi cuendá ñáyiù càháⁿ ndí dííⁿ ndí dííⁿ núú tnúhu, ndihi cuendá cue téé yìndaha ñáyiù.

11

Cuendá úú cue tée cãháⁿ nãcuáa cãchí Yã Ndiõxí

¹ Te ní níhì-í ìⁿ tnuyoo nãcuáa chicùhá-í ìⁿ sá chícùhá-í, te ní cãháⁿ ìⁿ sá ní cãháⁿ, te cãchí-xi:

—Ndacuíñí te chicùhá-n vèhe Yã Ndiõxí, te chicùhá tucu-n núú sácódó sã ndúú tãhú-gã, te cahu-n nã daha tnàhá ñáyiú chĩñuhu ñaha xii-gã xĩndecu. ² Dico vá chícùhá-n ndãa quehé vehe-gã, chi xiáⁿ ní nduu cuendá cue ñáyiú ñá túú cùú ñáyiú is-ràél, te ñáyiú-áⁿ nduu nuu-nã-yu núú ní cuu ñuú-gã, te cadá-yu dàtná cãchí iní mée-yu, te údico úú yóó ducaⁿ càdá-yu. ³ Te yúhú tendaha-í úú tnàhá cue tée cãháⁿ yuhu-í nãcuáa cãchí Yã Ndiõxí, te úxúú ciendú únídico nduu ducaⁿ cãháⁿ-güedé yuhu-í cada-güedé núú-í, te cuihnu-güedé dóó tnúú sã sãcuñnu cue ñáyiú ndihú iní-xi — duha cãchí sã cãháⁿ-áⁿ.

⁴ Te ndi ndúú cue tée-áⁿ cúú-güedé dàtná úú yutnu òlívú sã xĩnutnã núú Yã Ndiõxí, ndihì dàtná úú sã ndèé dité-xi, sã yĩndòdo ìⁿ caa candíl núú dité-xi ndècu tucu núú-gã, te ñuú-gã cúú-gã Yaá yĩndàha ñuyíú. ⁵ Te ñáyiú na càni iní-xi ná cada ñaha xii-güedé te yuhu-güedé quene ñuhú cahmi ñaha-xi xii-yu, te ducaⁿ càda-güedé cahni-güedé nchaa ñáyiú na cùú úhú iní ñáhã xii-güedé. ⁶ Te ndi ndúú-güedé ndécú ndihì-güedé tnúhu ndee iní cada-güedé sã vã cúúⁿ dãú, te ducaⁿ càda-güedé ñini cãháⁿ-güedé nãcuáa cãchí Yã Ndiõxí, te ndacu-güedé nadatiú-güedé ndute nduu-xi níñí, te ndacu-güedé dandòho-güedé nchaa ñáyiú titní núú tnúhu ndòho, te ducaⁿ càda-güedé ná daha xito cãchí iní mée-güedé. ⁷ Te nã yãha sã cãháⁿ-güedé nãcuáa ní cachí Yã Ndiõxí, te dàvá-áⁿ quene ìⁿ quiti dééⁿ yàú cùnú víhí sã ìo nèhé cáá, te quiti-áⁿ ngüñta-di nàá-di ndihì ndi ndúú cue tée-áⁿ te cahni ñaha-di xii-güedé. ⁸ Te yiqui cùñú cue tée-áⁿ cautùu-xi ìⁿ tnuú ñuú cãhnú núú ní sahni-güedé Xitohó Jesucristú núú

cùrúxí, te ñuú Yaá-áⁿ cúú Xitohó-ó ndihì-güedé, te cãchí ñáyiú sã ñuú-áⁿ cúú-xi dàtná ñuú Sòdomá ndihì nacióⁿ Ègiptú. ⁹ Te úní nduu dava cautùu yiqui cùñú-güedé xiáⁿ, te ñáyiú nchaa nacióⁿ, ndihì ñáyiú nchaa ñuú, ndihì ñáyiú cãháⁿ ndí ñáyiú ndí ñáyiú núú tnúhu, ndihì ñáyiú xĩndecu nchaa xichi quiní-yu yiqui cùñú-güedé, te vá dáñã-yu nguĩndúxi. ¹⁰ Te nchaa ñáyiú-áⁿ nduu vétú iní-yu sã dúcãⁿ cùú cue tée cãháⁿ nãcuáa cãchí Yã Ndiõxí-áⁿ, te ío cudí iní-yu, te nándi sã cuãha tãhú tnãhã-yu sã cúdí iní-yu sã dúcãⁿ ní xihí-güedé, te ducaⁿ chi ñuú-güedé ní quide ío ní ndohó-yu. ¹¹ Te sãtã ná yãhá úní nduu dava sã dúcãⁿ cùú-güedé te Yã Ndiõxí dandòto ñaha-gã xii-güedé, te ndacóo-güedé, te nchaa ñáyiú na quini sã ndótó-güedé te yùhú víhí-yu. ¹² Te ndi ndúú cue tée-áⁿ tecú dóho-güedé cãháⁿ ìⁿ sã cãháⁿ ndéé andiú, te cùñaha-xi xii-güedé:

—Chí táquene iha —duha cùñaha sã cãháⁿ-áⁿ xii-güedé.

Te cue tée-áⁿ quĩhu-güedé ìⁿ xití vícò caa-güedé andiú, te nchaa ñáyiú cùú úhú iní ñáhã xii-güedé quini ñáhã-yu xii-güedé caa-güedé andiú. ¹³ Te òré-áⁿ ñihì víhì tnãa ñuyíú, te úxí xichi cùú-xi ñuú núú cùndècu-güedé-áⁿ te ìⁿ xichi ñuú-áⁿ naa, te cuú úsã mĩ ñáyiú, te nchaa dava-gã ñáyiú cácu vá cùú yùhú víhí-yu, te cachí-yu sã ìo cãhnu cuu Yã Ndiõxí Yaá ndécú andiú.

¹⁴ Te tnúndòho-a cuu-xi tnúndòho cuu úú yãha, te vitna sa ndètu vii-nã tucu sãá tnúndòho cuu úní.

Espíritú cúú ùsã tíú-xi cútú nèhé-xi

¹⁵ Te espíritú cúú ùsã ní tíú-xi cútú nèhé-xi, te òré-áⁿ ní tecú níhi ní cãháⁿ titní sã ní cãháⁿ andiú, te cãchí-xi:

Nchaa sã cúú cuendá nchaa ñáyiú ñuyíú táxi tnùnì-yu ní cùú ní nduu cuendá Tãtã-ó Dütú Ndiõxí táxi tnùnì-gã,

Te tnàhá Yaá ní tendaha-gã ní sãháⁿ ñuyíú táxi tnùnì-gã nchaa xiãⁿ, te ñuú-gã taxi tnùnì-gã ní caa ní quihíⁿ.

Duha ní cáháⁿ nchaa sá nǐ cáháⁿ-áⁿ.
 16 Te ndi òcò cùmí cue téé sacuéhé
 xñucóo núú xilé váha ní ngüíñí
 xítí-güedě núú Yă Ndiöxí, te ní nuu
 núú-güedě ndàa núú ñúhú te ní
 ngüíta-güedé chíñùhu ñaha-güedé
 xii-gá, 17 te càchí-güedé:

Ío ndàcáⁿ táhú-ndí núú yòhó Dútú
 Ndiöxí,

Yaá ndácú quide nchaandi túhú sá
 váha,

te ñu-ni-n ndècu-n ndéé cútnàhá
 ní ngáva ñuyíú, te ñu-ni-n
 ndècu-n vitna, te ñu-ni-n
 cùndecu-n ndéé núú cuáháⁿ
 núú vèxi,

te ío càhnu cuu-n te ní ngüíta-n ïo-gá
 táxí tnùní-n.

18 Te nchaa ñáyiú xñdecu ñuyíú
 xícudéⁿ-yu núú-n,

te vitna ní sáá nduu dándohó-n-yu chi
 ñá túú cùu váha iní-n nǔú-yu,

te cada ndáá-n cuèchi nchaa ñáyiú sa
 ní xíhí,

te ní sáá tucu nduu cuñaha-n
 sá ndúú táhú nchaa ñáyiú
 ní xinú cuechi nǔú-n nǐ
 cáháⁿ-yu tnúhu-n, ndihí nchaa
 dava-gá ñáyiú cùu cuendá-n,
 chi ñáyiú-áⁿ néhě-yu sá yíñùhu
 núú-n,

te cuèi ñáyiú cùnnu ndihí ñáyiú ñá
 túú cùnnu cuñaha-n sá ndúú
 táhú-yu,

te ní sáá tucu nduu dànaa-n nchaa
 ñáyiú sàhni tnaha ñáyiú-xi.

Duha càchí ndi òcò cùmí cue téé
 sacuéhé-áⁿ xáhaⁿ-güedě xii Yă Ndiöxí.

19 Te ní xiní-í ní nacaáⁿ yuyèhe vehe
 Yă Ndiöxí andiú, te xítí vehe-gá-áⁿ
 nǐ xiní-í ndécú càjá ñúhú sá yódó
 tnùní nàcuáa ní cundáa cada-gá sá
 cúú-xí ñáyiú, te òré-áⁿ nǐ xiní-í ní sáá
 ndúté, te ní cáháⁿ ñúhu te ío dusaⁿ nǐ
 quide-xi, te níhi vìhi ní tnáa, te súúni
 càhnu dáú ñíñí nǐ cuuⁿ.

12

*Cuendá ññadìhí ndihí cuendá ññi quití
 dééⁿ nání dràgón*

1 Te ío vìhi ní quide-xi ññi sá nǐ
 quide-xi andiú, te ní xiní-í ññi ñadìhí te
 dóo níhnú-áⁿ quide-xi datná quidé-xí

nǔú nchíanchii, te ndàa núú sàhá-aⁿ
 quide-xi datná quidé-xí nǔú yóó, te
 ñùhu ññi coroná díquí-aⁿ te ndèé úxúú
 chódíní. 2 Te ñùhu déhe-aⁿ te càna
 saa-aⁿ sá quidé ùhú ñhá-xí xi-aⁿ

chi sa ndètu vií-nǎ cacu déhe-aⁿ.
 3 Te dàtnùní ní quide tucu-xi sá nǐ
 quide-xi andiú, te ní xiní-í ññi quití
 càhnu quití ticuehé, quití dééⁿ nání

dràgón, te ndèé úsá díquí-di ndihí úxí
 ndiqui-di, te ññi caa coroná ñúhú ññi
 caa díquí-di-áⁿ. 4 Te quití-áⁿ luha-ná

te cuu dava nchaa chódíní dǎngòyo-di
 ñuyíú ndihí lúhmá-di, te quití-áⁿ
 nǐ ngúnu tní-di núú ñaha ndètu

vií-nǎ cacu déhe-xi-áⁿ cuendá caxi-di
 déhe-aⁿ òré cacu ní cùu. 5 Te ñaha-áⁿ nǐ
 cacu déhe-aⁿ te téé cùu-dé, te té líhli-áⁿ

ío cunuu-dě taxi tnùní-dé nchaa ñáyiú
 ñuyíú, te mee Yă Ndiöxí ní nacuaca
 ñaha-gǎ xii té líhli-áⁿ cuendá cundecu

ndihí ñaha-dě xii-gá núú ndécú-gǎ
 táxí tnùní-gá. 6 Te ñadìhí-áⁿ nǐ xinú-aⁿ
 cuáhá-aⁿ xítí yucu núú nǐ quide túha

Yă Ndiöxí cundecu-aⁿ cuendá xíaⁿ
 níhí-aⁿ caxi-aⁿ, te ducaⁿ níhí-aⁿ sá
 caxí-áⁿ ùxúú ciendú únídico nduu chi

ducaⁿ nduu cundecu-aⁿ xíaⁿ.

7 Te sátá dúcáⁿ te andiú nǐ xiní-í
 espíritú cùnnu xinú cuechi núú Yă
 Ndiöxí nání Miguél, ndihí nchaa

dava-gá espíritú cundìhí-xi, te nchaa
 espíritú-áⁿ nàa-xi ndihí quití dééⁿ
 nání dràgón ndihí nchaa espíritú

cundìhí-di. 8 Te quití-áⁿ ñá túú
 ní ndàcu-di ndihí nchaa espíritú

cundìhí-di, te ñá túú ní níhí-gǎ-di núú
 cundècu-di andiú ndihí nchaa espíritú

cundìhí-di-áⁿ. 9 Te cue espíritú xínú
 cuèchi núú Yă Ndiöxí-áⁿ nǐ dǎngává-xí

quití dééⁿ nání dràgón-áⁿ ndihí nchaa
 espíritú cundìhí-di ñuyíú, te quití-áⁿ

cúú-dí mèi sácúhna àdi sá càchí-ó cùu
 yucu ñávaha, te ñu xíaⁿ ní dándàhú-xi

ñáyiú níhí ñuyíú, te ñu-ni xíaⁿ ní
 nduu-xi cóo nǐ dándàhú-xi ñáyiú ndéé

sanaha.

10 Te ní tecú dóho-í níhi ní cáháⁿ
 tucu ññi sá ní cáháⁿ andiú, te càchí-xi:

—Vitna te Yă Ndiöxí ní quide-gá ní
 ngúndecu ñáyiú ndihí-gá, te ío càhnu

cuu-gá, te ío tàxi tnuní-gá, te tnàhá Cristú Yaá ní tendaha Yă Ndiöxí ní quixi ñuyíú-a ío tàxi tnuní-gá, te ducaⁿ chi sa ní xócuñí sácuíhná sã sũúni nũnúu sacáⁿ cuéchi núú Tătá-ó Dũtú Ndiöxí cuendá nchaa ñáyíu ndècu ndihí-o ichi-gá, te nduu niú ducaⁿ sàcáⁿ cuéchi-xi núú-gã cuendá-yu ni cùu. ¹¹ Dico ní ndacú-yu ní cunúú-yu núú sácuíhná sã dúcáⁿ sàcáⁿ cuéchi cuendá-yu-áⁿ ní cùu, te ducaⁿ ní cunúú-yu sá cuendá Yaá cáá dàtná cáá ñⁿ mbéé quití ní dánⁿcuèhé-güedé, chi Yaá-áⁿ ñⁿ sati níñí-gã te ní xíhí-gá sá cuendá-yu, te ducaⁿ ñⁿ cunuu tucú-yu sá cuendá sá sàndáá iní ñáhã-yu xii Yaá-áⁿ, te ñá túú ní yùhú-yu cuú-yu sá cuendá-gá. ¹² Te vitna ío chí cudí iní nchaa nchòhó espíritú xínú cuéchi núú Yă Ndiöxí, ndihí nchaa nchòhó ñáyíu ndècu andíu, dico ñndàhú ní cuu nchaa ñáyíu xĩndecu ñihí ñuyíú! Chi sũúni cùdééⁿ sácuíhná ñⁿ ngava-xi te nándi cada ñaha-xi xii-yu, te ducaⁿ chi cùnuni iní-xi sá sácú duha-ná nduu cudí-xi cundecu-xi —duha càchí sá ñⁿ cáháⁿ andíu.

¹³ Te sátá ñⁿ quee quití dééⁿ nání dragón-áⁿ andíu ñⁿ ngava-di ñuyíú quití cùu mei sácuíhná-áⁿ, te quití-áⁿ ñⁿ chinchícúⁿ-di ñadìhí ñaha ní cacu déhe téé-xi-áⁿ. ¹⁴ Te ñadìhí-áⁿ ñⁿ nduu táhú-aⁿ ní quene úú ndíxí-aⁿ, te càa datná cáá ndíxíⁿ ñⁿ yacòlo cahnu vihi cuendá ndava-aⁿ núhú-aⁿ yucu núú ñⁿ cachí Yă Ndiöxí cundecu-aⁿ, te yàcáⁿ cundecu-aⁿ úní cuíá dava cuendá sá vã ñihí ñáhã quití dééⁿ quití nani dragón-áⁿ te xíáⁿ ñihí-aⁿ sá cáxí-áⁿ, te quití-áⁿ cúú tucú-di datná ñⁿ cóo dééⁿ. ¹⁵ Te quití-áⁿ ñⁿ quene cuéhé ndute yuhu-di, te ndute ní quene yuhu-di-áⁿ ñⁿ cuu-xi ñⁿ yúte, te ducaⁿ ñⁿ quide-di cuendá ndute-áⁿ cuido-xi ñadìhí-áⁿ ní cùu. ¹⁶ Te ñuhu yìchí ní chindee-xi ñadìhí-áⁿ, chi ní ndátá te ní quee naa-ni ndute ní quene yuhu quití-áⁿ. ¹⁷ Te sá dúcáⁿ ñⁿ quide-xi xíáⁿ ní cudééⁿ víhí quití-áⁿ núú ñadìhí-áⁿ, te ní xica-di cuáhãⁿ-di núú xĩndecu nchaa dava-gá cue déhe

ñadìhí-áⁿ cuendá nàá ndihí ñaha-di, te ñáyíu-áⁿ cúú-yu ñáyíu tnì nchaa tnúhu càháⁿ Yă Ndiöxí, te nchícúⁿ ñⁿ hnú-yu nchaa tnúhu sá càháⁿ váha cuendá Xítohó Jesucristú.

13

Cuendá úú quití

¹ Te yúhú ní ngúnu tnì-í yuhu làmár, te ní xiní-í ní quene ñⁿ quití te ndéé úsá díquí-di te úxí ndiqui-di, te núú ñⁿ ñⁿ ndiqui-di-áⁿ ndécú ñⁿ caa coroná. Te ñⁿ ñⁿ díquí-di-áⁿ ndéé tnúhu sá càháⁿ úhú-xi cuendá Yă Ndiöxí. ² Te quití-áⁿ cáá-dí dàtná cáá cuíñí, te sáhã-di càa datná cáá sáhã òso, te yuhu-di càa datná cáá yùhu ndicaha. Te quití dééⁿ nání dragón ní sáñaha-di tnúhu ndee iní xii quití-áⁿ cuendá taxi tnùní víhí-dí, te dragón-áⁿ ñⁿ sáñaha-di núú ndécú-dí tàxi tnuní-di xii quití ní quene xití làmár-áⁿ, te ducaⁿ ñⁿ quide-di cuendá sá ñihí ndéé quití-áⁿ cunuu-di. ³ Te ñⁿ díquí quití ní quene xití làmár-áⁿ càhú víhí càa ní nícuèhé, te sa ndètu vií-nã cuú-di sànuu dico ní ndúha-di, te ñihí ñuyíú ñⁿ ñihí ñáyíu tnúhu sá dúcáⁿ ñⁿ cuu, te ío ní cuñúhu-yu te ní tuhá-yu quití-áⁿ. ⁴ Te nchaa ñáyíu-áⁿ ñⁿ cachí-yu sá ío càhnu cuu quití dééⁿ quití nani dragón-áⁿ cuendá sá ñⁿ sáñaha-di tnúhu ndee iní sá táxi tnùní quití ní quene xití làmár-áⁿ, te ní ngũta-yu ní chiñuhú-yu quití ní quene xití làmár-áⁿ, te càchí-yu:

—Vá yõo ñⁿ nũtnahá ñáhã xii quití-a, te ni vã yõo ñⁿ ndacu nàá ndihí ñaha xii-di —cachí-yu.

⁵ Te ní ñihí-di tnúhu ndee iní sá càháⁿ úhú-di Yă Ndiöxí, te cada càhnu-di mee-di, te údico úú yóo ducaⁿ ñⁿ ñihí-di tnúhu ndee iní-áⁿ cunuu-di. ⁶ Te ducaⁿ ñⁿ quide-di ní cáháⁿ úhú-di Yă Ndiöxí ndihí cuendá nchaa sá quidé-gã, te diu-ni ducaⁿ ñⁿ cáháⁿ úhú-di núú ndécú-gã, te ní cáháⁿ úhú tucu-di nchaa ñáyíu ndècu ndihí-gá andíu. ⁷ Te ducaⁿ ñⁿ ñihí-di tnúhu ndee iní sá nàá-di ndihí nchaa ñáyíu cùu cuendá Yă Ndiöxí, te ducaⁿ

nàá ndihí ñaha-di xii-yu ndéé òré vá ndácú-gă-yu nàá ndihí ñàhá-yu xii-di, te tnàhá ní ngúndecu ndihí-di tnúhu ndee ìní sá táxí tnùní-di ñáyíu nchaa nàcióⁿ, ndihí ñáyíu nchaa ñuú, ndihí nchaa ñáyíu càháⁿ ndí dííⁿ ndì dííⁿ nùú tnúhu, ndihí ñáyíu xíndecu nchaa xichi. ⁸ Te cue ñáyíu ñihí ñuyíú ní cachí-yu sá ío càhnu cuu quití-áⁿ, te ñáyíu-áⁿ cúú-yu ñáyíu ñá túú yòdo tnuní núú tütú Yaa cáá dàtná cáá ñⁿ mbéé quití ní dánicuèhé-güedé Yaa ní xihí ní cùu te ní ndoto. Te ndéé cútnàhá ní ngáva ñuyíú sa yòdo tnuní ñáyíu naníhí tàhú, dico ñáyíu càchí sá ío càhnu cuu quití-áⁿ ñà túú yòdo tnuní-yu núú tütú-gá.

⁹ Te nchaa nchòhó ñáyíu xíndedóho chí cündedóho váha nchaa nàcuáa cuáháⁿ tnúhu-áⁿ. ¹⁰ Te nchaa ñáyíu na chìhi tnaha ñáyíu-xi vecaá te sáá nduu te quíhíⁿ-yu tnàhá-yu vecaá, te nchaa ñáyíu sàhni tnaha ñáyíu-xi ndihí yuchí te ñíu-ni ndihí yuchí cuú-yu tnàhá-yu, te xíáⁿ nùu ío xìni ñuhu-xi sá ncháá ñáyíu cùu cuendá Yá Ndiòxí cunduu càhnu iní-yu, te quíndáá iní ñàhá-yu xii-gá.

¹¹ Te ní xiní tucu-í ingá quití ní quene-di núú ñuhu yìchí, te ndéé úú ndiqui-di te càa datná cáá ndìqui canerú, te càháⁿ-di dàtná càháⁿ quití dééⁿ nání dràgón. ¹² Te dàtná ndécú ndihí quití ní quene xití làmár-áⁿ tnúhu ndee ìní sá táxí tnùní-di ducaⁿ ndècu ndihí quití ní quene ñuhu yìchí-áⁿ tnúhu ndee ìní taxi tnùní-di cada-di núú quití ní quene xití làmár-áⁿ, te quití ní quene ñuhu yìchí-áⁿ ñí quide yica-di sá ncháá ñáyíu xíndecu ñihí ñuyíú chiñuhú-yu quití ní quene xití làmár-áⁿ, quití càhú víhí ñí tnahá ní nícuèhé te ní ndúha-di. ¹³ Te quití ní quene xití ñuhu yìchí-áⁿ ñí quide-di titní núú sá vâ yòo tnàhí ndàcu cada, te nchaa ñáyíu ní xiní-yu sá ndéé andíu ñí dányóyó-dí ñuhú ñuyíú. ¹⁴ Te sá dúcáⁿ ñí ngúndecu ndihí-di tnúhu ndee ìní ní quide-di nchaa xíáⁿ ní quide-di núú quití ní quene xití làmár-áⁿ, te sá

dúcáⁿ ñí quide-di te xíáⁿ ní dándàhú-di nchaa ñáyíu xíndecu ñihí ñuyíú, te ní xáhaⁿ-di xii-yu sá ndúcú-yu ñⁿ sá cáduha-yu nàcuáa-ni càa nacuáa-ni ndúu quití ní quene xití làmár-áⁿ, quití càhú víhí ñí tnahá ní nícuèhé díquí-xi-áⁿ ñí quée machití te ñá túú ní xihí-di chí ní xíndecu-ni-di. ¹⁵ Te quití ní quene xití ñuhu yìchí ní ngúndecu ndihí tucu-di tnúhu ndee ìní sá chíhí-dí ìní sá ñí cadúha-yu-áⁿ, sá ñí natavá-yu dàtná cáá quití ní quene xití làmár-áⁿ, te ducaⁿ ñí quide quití-áⁿ cuendá càháⁿ sá ñí cadúha-yu-áⁿ, te xíáⁿ cada-xi cuú nchaa ñáyíu ñá túú ní cuíni chiñuhu ñaha xii-di. ¹⁶ Te quití ní quene xití ñuhu-áⁿ quidé-dí sá ncháá ñáyíu ngúndéé ñⁿ tnuní ndaha cùhá-yu àdi tneé-yu, te ducaⁿ ñí quide-di cuéi ñáyíu cùnūu te cuéi ñáyíu ñá túú cùnūu, te cuéi ñáyíu cuica te cuéi ñáyíu ndàhú, te cuéi ñáyíu ñá túú dàñá quee núú chíúⁿ pàtróóⁿ-xi, te cuéi nchaa ñáyíu dàñá quée nùú chíúⁿ pàtróóⁿ-xi ncháá-yu ducaⁿ ñí ngúndéé tnuní ñí-yu. ¹⁷ Te ní quide-di sá ncháá ñáyíu ñá túú ndéé tnuní ñí-xi vá cúú cuááⁿ-yu sá càchí iní-yu te ní vâ cúú dícó-yu ñⁿ sá cuíni-yu dícó-yu, te tnuní-áⁿ cúú-xí ñíu quití ní quene xití làmár-áⁿ àdi númerú-di. ¹⁸ Te xìni ñuhu-xi sá ncháá ñáyíu ío váha cùtnuní iní-xi ío váha cuáha-yu cuendá nàcuáa quée-xi númerú quití-áⁿ, te númerú-áⁿ cúú-xí ñíu cièndú únídico ñíu, te cùu-xi cuendá ñⁿ ñáyíu ñuyíú.

14

Cuendá ñⁿ cièndú údico cúmí mĩ ñáyíu

¹ Te sátá dúcáⁿ te ní xiní-í Yaa cáá dàtná cáá ñⁿ mbéé quití ní dánicuèhé-güedé nútñí-gá ñⁿ yucu ñuú nání Sión ndécú àndíu, te nutñí-gá ndihí ñⁿ cièndú údico cúmí mĩ ñáyíu, te tneé-yu ndéé ñíu-gá ndihí ñíu tátá-gá Dútú Ndiòxí. ² Te ní tecú dóho-í ní quide-xi andíu dàtná quidé-xi nùú xíca cuèhé víhí ndùte, te quide tucu-xi datná quidé-xi òré níhí vèhi càháⁿ ñúhu, te quide tucu-xi

datná quidé-xí òré cuéhé víhí ñáyiú càní-yu àrpá. ³ Te ní tecú dóho-í xǐxita yuhu sǎ xítá yùhu núú Yàá núcõo núú xilé váha, ndihí núú ndi cùmí cue quití xǐnutnǐ-áⁿ, ndihí núú nchàa cue téé cùu sacuéhé xǐnucóo-áⁿ, te xǐxita-xi ìⁿ ndudú sáá. Te mee-ni cuè ñáyiú ìⁿ ciendú údico cùmí mǐl-áⁿ quèe díquí-yu ndudú-áⁿ, te ñáyiú-áⁿ cúú-yu ñáyiú ní dácäcu nihnu ñaha Yàá cáá dàtná cáá ìⁿ mbéé quití ní dánicuèhé-güedé núú ñáyiú ndècu ichi cuehé ichi duha xǐndecu ñuyúú, te vá yõo ìⁿ-gá quèe díquí-xi ndudú sáá-ǎⁿ chi mee-ni ñáyiú ní cácu nihnu-áⁿ quèe díquí-yu. ⁴ Te ñáyiú ní cácu nihnu-áⁿ cúú-yu ñáyiú ñá túú ní xǐndecu ichi díí ìní, te cùú-yu ñáyiú càndoo canine iní-xi, te ndèni ní cuu cuáháⁿ Yaá cáá dàtná cáá ìⁿ mbéé quití ní nícuèhé-áⁿ, te ducaⁿ-ni ndèndaha ñàhá-yu xii-gá cuáháⁿ, te ñáyiú-áⁿ ní cácu nihnú-yu núú nchàa ñáyiú ñuyúú, ñáyiú ndècu ichi cuehé ichi duha, te ñáyiú ní cácu nihnu-áⁿ cúú-yu ñáyiú díhna nuu ní nduu táhú Yǎ Ndiõxí cuu cuendá-gá ndihí Yaá cáá dàtná cáá ìⁿ mbéé quití ní dánicuèhé-güedé. ⁵ Te cùú-yu ñáyiú ñá túú càháⁿ ni ìⁿ tnúhu ndehnde, te càndoo canine iní-yu ndècú-yu núú núcõo Yǎ Ndiõxí táxi tnùnì-gá.

Cuendá úní cue espíritú xínú cuèchi núú Yǎ Ndiõxí

⁶ Te sátá dúcáⁿ te ní xiní-í ìⁿ espíritú xínú cuèchi núú Yǎ Ndiõxí xícó-xí cuädava andiú, te ndècu ndihí-xi tnúhu sá càháⁿ nàcuáa naníhí tàhú-ó, tnúhu sá ñà túú tnàhí ndihí nihnu te tnúhu-áⁿ danèhé espíritú-aⁿ nchaa ñáyiú ndècu ñuyúú, ñáyiú nchaa nacióⁿ, ndihí ñáyiú nchaa ñuú, ndihí nchaa ñáyiú càháⁿ ndí dííⁿ ndí dííⁿ núú tnúhu, ndihí ñáyiú xǐndecu nchaa xichi. ⁷ Te níhi ní càháⁿ-xi te càchí-xi:

—Nchaa nchòhó ñáyiú ndècu ñuyúú canehe-ndo sǎ yǐñùhu núú Yǎ Ndiõxí, te cachí-ndó sǎ ìo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gǎ chi diu-gá ní cadúha-gá andiú, ndihí ñuhu

yìchí, ndihí làmár, ndihí nchaa ndóhyo —duha càchí espíritú-áⁿ.

⁸ Te nchìcúⁿ tucu ingá espíritú xínú cuèchi núú Yǎ Ndiõxí, te càchí-xi:

—Vitna ní naa ñuú Babiloniá ñuú ìo cùnuu, te ducaⁿ ní naa chi cue ñáyiú ñuú-áⁿ ní quidé-yu ní xíta nihnu nchaa ñáyiú nihí ñuyúú, chi ní sanu ichi ñàhá-yu ichi cuéhé ichi duha —duha càchí espíritú-áⁿ.

⁹ Te nchìcúⁿ tucu ingá espíritú xínú cuèchi núú Yǎ Ndiõxí te níhi càháⁿ-xi, te càchí-xi:

—Nchaa ñáyiú chiñuhu ñaha xii quití ní quene xití làmár, ndihí sá ní natava ñàhá-yu nàcuáa càa-di-áⁿ, ñáyiú ní dáñá mèe-xi ní ngúndeé tnuní ndahá-yu àdi tneé-yu, ¹⁰ ñáyiú-áⁿ sùúnì dándoho ñaha Yǎ Ndiõxí xií-yu chi ìo cùdèéⁿ-gǎ, te ducaⁿ ìo dándoho ñaha-gá xií-yu chi daquihíⁿ ñàhá-gǎ xií-yu núú ñùhú núú ñùhú àzufré càyú-xi, te núú cuè espíritú xínú cuèchi núú-gǎ ducaⁿ dándoho ñaha-gá xií-yu, ndihí núú Yàá cáá dàtná cáá ìⁿ mbéé quití ní dánicuèhé-güedé.

¹¹ Te ní caa ní quíhíⁿ quene ñùhmá núú dúcáⁿ cùndecú-yu ndohó-yu-áⁿ, te cuèi nduu cuèi niú ducaⁿ ndòhó-yu. Te ducaⁿ ndòho nchaa ñáyiú chiñuhu ñaha xii quití ní quene xití làmár, ndihí sá ní natava ñàhá-yu nàcuáa càa-di-áⁿ, te diu-ni ñáyiú-áⁿ cúú-yu ñáyiú ní ngúndeé tnuní ndaha-xi àdi tneé-xi —duha càchí espíritú-áⁿ.

¹² Te xǐǎⁿ xiní ñùhu-xi sá ncháá ñáyiú cùu cuendá Yǎ Ndiõxí cunduu càhnu iní-yu, chi diu-ni-yu cùú-yu ñáyiú tnè nchaa tnúhu càháⁿ-gá, te ní yùhu ní iní-yu sàndáá iní-yu Xítóhó Jesucristú.

¹³ Te sátá dúcáⁿ te ní tecú dóho-í ní càháⁿ ìⁿ sá ní càháⁿ andiú, te càchí-xi:

—Chido tnùnì-n ìⁿ núú tütú nàcuáa na càháⁿ-í-a. “Není vitna ìo váha táhú nchaa ñáyiú sàndáá iní tnúhu Xítóhó Jesucristú te xihí-yu” —duha càchí sá ní càháⁿ-áⁿ.

Te Espíritú Yǎ Ndiõxí ní càháⁿ-xi, te càchí-xi:

—Ndáá, chi ndetatú-yu chi ñá túú-gǎ nágá chiúⁿ ndohó-yu cadá-yu,

te Yá Ndiõxí sa nàha-gá nchaa nàcuáa ndùu chiuⁿ ní quidé-yu —duha càchí Espiritú-gá.

Nchaa sá cúu nùú ñuhú

¹⁴ Te sáta dúcáⁿ te dàtnùní ní xiní-í ñⁿ vícò cuixíⁿ, te nùú vícò-ãⁿ ñⁿ xiní-í núcõ ñⁿ Yaá, te càa-gá dàtná cáá ñⁿ téé ñuyúú, te díquí-gã ñuhú ñⁿ coroná ní cuáha mee-ni díhúⁿ cuááⁿ, te nùndaha-gá ñⁿ yuchí ndíquí te súúní dèéⁿ. ¹⁵ Te ní xiní-í ñⁿ espíritú xínú cuèchi núú Yá Ndiõxí ní quee-xi xití vehe-gá, te níhi ní cáháⁿ-xi xãhaⁿ-xi xìi Yaá núcõ núú vícò-ãⁿ:

—Sa ní cuu nàquehndé-n nchaa sá ñⁿ cuu ñuyúú ndìhi yuchí ndíquí-n, chi sa ní cuu núcõ tnhà-xi —duha càchí espíritú-áⁿ xãhaⁿ-xi xìi Yaá-áⁿ.

¹⁶ Te Yaá núcõ núú vícò-ãⁿ ñⁿ dáyãha ndodo-gá yuchí ndíquí-gã núú ñuyúú ñⁿ nataxi tnhà-gá nchaa sá ñⁿ cuu.

¹⁷ Te ní xiní tucu-í ñⁿ ingá espíritú xínú cuèchi núú Yá Ndiõxí ní quee-xi xití vehe-gá sá cáá àndiu, te nùndaha-xi tnhá-xi ñⁿ yuchí ndíquí dèéⁿ. ¹⁸ Te ní xiní tucu-í ní quee tucu ñⁿ ingá espíritú xínú cuèchi núú Yá Ndiõxí núú nùtnⁿ núú sácódó sã ndúú tãhú-gã, te ndècu ndìhi-xi tnúhu ndee ñⁿ táxí tnùn-í-xi ñuhú, te espíritú-áⁿ níhi ní cáháⁿ-xi xãhaⁿ-xi xìi espíritú néhé yùchí ndíquí dèéⁿ-áⁿ:

—Ngüíta naquehndé-n ndìhi yuchí ndíquí-n ndéhé yoho yàha stilé sá ñⁿ ñuyúú chi sa ní cuu nàtehdé —duha càchí espíritú-áⁿ xãhaⁿ-xi xìi espíritú néhé yùchí ndíquí-ãⁿ.

¹⁹ Te espíritú néhé yùchí ndíquí-ãⁿ ñⁿ dáyãha ndodo-xi yuchí ndíquí-xi nùú ñuyúú ñⁿ nàquehndé-xi nchaa ndéhé yoho yàha stilé, te ní chihi-xi ñⁿ xichi núú ñⁿ chihi-xi cuendá xiáⁿ quihni-xi quee ndudí-xi, te sá dúcáⁿ ñⁿ quide-xi xiáⁿ cútnùní ñⁿ ó sã ñⁿ cùdèéⁿ Yá Ndiõxí núú ñáyiu ñuyúú.

²⁰ Te ndéhé yoho yàha stilé-áⁿ ñⁿ quihni-xi ñⁿ xio yuhu ñúú, te ndudí ndéhé yoho yàha stilé-áⁿ ñⁿ nduu-xi níhi te ní quee-xi núú quíhni ñⁿ hnu espíritú-áⁿ. Te úní cièndú mĩl mètrú ní

xica níhi-ãⁿ, te dàtná ñⁿ mètrú dava ní sáá cuehnu níhi-ãⁿ ñⁿ xica-xi.

15

Úsá tnúndòho

¹ Te ío vìhi ní quide-xi ñⁿ sá ñⁿ quide-xi andiu te ní cuñúhu vìhi-í, te ní xiní-í úsá tnhá espíritú xínú cuèchi núú Yá Ndiõxí, te ñⁿ ñⁿ cue espíritú-áⁿ ndécú ndìhi-xi tnúhu ndee ñⁿ dandòho-xi ñáyiu ñuyúú, te nà yàha nchaa tnúndòho-áⁿ, te vã cùdèéⁿ-gã Yá Ndiõxí núú-yu dandòho ñaha-gá xií-yu.

² Te ní xiní-í ñⁿ làmár te ndute làmár-áⁿ cáá dàtná cáá vìdriú, te dàcánuu-xi ndìhi ñuhú, te yuhu làmár-áⁿ xĩnutnⁿ nchaa ñáyiu ní ndacu ní dáquéé tĩhú ñáhá xìi quiti ní quene xití làmár-áⁿ, te ducaⁿ ñⁿ ndacú-yu ní dáquéé tĩhú-yu sá ñⁿ natava ñáhá-yu nàcuáa càa-di-áⁿ, te ducaⁿ ñⁿ ndacu tucú-yu ní dáquéé tĩhú tucú-yu númerú-di sá cúu dàtná diu-di, te nchaa ñáyiu-áⁿ ñⁿ nduu tãhú-yu núú Yá Ndiõxí àrpá xĩnehé-yu cuendá caní-yu. ³ Te xixitá-yu ndudú sá ñⁿ xita ndíi Moisés ndíi ní xinu cuechi núú Yá Ndiõxí ndéé sanaha, te xita tucú-yu ndudú Yaá cáá dàtná cáá ñⁿ mbéé quiti ní dánícuèhé-güedé, te càchí-yu:

Yòhó Dútú Ndiõxí ío càhnu cuu-n, chi quide-n nchaa sá vã yõ tnhá ndacu cada, te cùu-n Yaá ndácú quide nchaandi tũhú sá vãha, te ío ndáá quidé-n te ío ndáá càháⁿ-n, te yìndaha-n nchaa ñáyiu ñihí ñuyúú.

⁴ Te nchaa ñáyiu nèhé-yu sá yĩñuhu núú-n, te ncháa-yu càchí-yu sá ñⁿ càhnu cuu-n, chi ñⁿ dìi ní yòhó cúu-n Yàá ío vãha quide ndáá, te nchaa ñáyiu ñihí ñuyúú nataká-yu chiñuhu ñáhá-yu xii-n, te ducaⁿ càdá-yu chi ndéhé-yu nchaa sá vãha quide-n. Duha càchí ñáyiu-áⁿ xixitá-yu.

5 Te sáta dúcáⁿ te ní xiní-í ní nacaáⁿ yuyèhe vehe Yá Ndiöxí andiu, te xití vehe-gá-áⁿ ndécú sã ndèé tnúhu-gá. 6 Te xití vehe-gá-áⁿ ní quee úsá tnàhá espíritú xínú cuèchi núú-gã, te ìⁿ ìⁿ-xi ndècu ndihí-xi tnúhu ndee ìní dandòho-xi ñáyíu, te xixíhnu-xi mee-ni dǒó vãha, te súúni vãha càndoo, te chàhnc hí, te yidúcúⁿnuu cìnchú ní cuáha mee-ni dǐhúⁿ cuááⁿ pèchú ndi úsá cue espíritú-áⁿ. 7 Te ìⁿ quití cùmí xĩnutnĩ núú nútñĩ xilé vãha ní sãñaha-di ìⁿ caa sã nàhá tícùú ní cuáha mee-ni dǐhúⁿ cuááⁿ xii ìⁿ ìⁿ espíritú-áⁿ, te xití nchaa tícùú-áⁿ ñúhú ìⁿ sã ñúhú te xíáⁿ cútnùní sã Yá Ndiöxí dandòho-gá ñáyíu ñuyíú, te diu-gá cúú-gã Yáá ndécú nchaa nduu nchaa quíú. 8 Te xití vehe-gá-áⁿ ní chítú ñũhmá, te ducaⁿ ní quide-gá cuendá cutnùní ìní ñáyíu sã ìo càhnu cuu-gá táxí tnùní-gá, te vá yǒo ìⁿ cuu quíhu xití vehe-gá-áⁿ ndèé ndihí ndi úsá tnúndòho cada ndi usá cue espíritú-áⁿ ñuyíú.

16

Tnúndòho cada-xi ñuyíú

1 Te sáta dúcáⁿ te ní tecú dóho-í níhi ní cáháⁿ ìⁿ sã ní cáháⁿ xití vehe Yá Ndiöxí, te xãhaⁿ-xi xii ndi usá cue espíritú-áⁿ:

—Chí cuáháⁿ coyo-ndo sã ñúhú xití nchaa tícùú néhé-ndó-ãⁿ núú ñuyíú, chi sã ñúhú-ãⁿ cúú-xí tnúndòho tendaha Yá Ndiöxí sã cúú-xí nchaa ñáyíu ñuyíú —duha càchí sã càháⁿ-áⁿ.

2 Te espíritú díhna ní sáháⁿ-xi ní coyo-xi sã ñúhú xití tícùú néhé-xí-ãⁿ ñuyíú, te nchaa ñáyíu ñùhu tnuní quití ní quene xití làmár ñáyíu ní chiñuhu sã ní natava ñàhá-yu xii-di, nchaa ñáyíu-áⁿ ní quené-yu ndíhyi tèhyú te súúni dándòho ñaha-xi xií-yu.

3 Te espíritú cúú ùú ní coyo-xi sã ñúhú xití tícùú néhé-xí núú làmár, te ndute làmár-áⁿ ní nduu-xi níñí te càa-xi datná cáá níñí ñáyíu sa ní xíhí, te nchaa quití ñùhu xití làmár-áⁿ ní xíhí-güedi.

4 Te espíritú cúú ùní ní coyo-xi sã ñúhú xití tícùú néhé-xí nchaa yúte ndihí nchaa núú quènihni ndute, te ndute nchaa yúte-áⁿ ndihí nchaa ndute quènihni-áⁿ ní nduu-xi níñí. 5 Te sáta dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndiöxí, espíritú yíndàha ndute, te xãhaⁿ-xi xii Yá Ndiöxí:

—Yòhó Dútú Ndiöxí cúú-n Yáá quidé ndáá cuítí núú duha quide-n tendaha-n tnúndòho-a, te diu-ni-n cúu-n Yáá ndécú ndèé cútnàhá ní ngáva ñuyíú, te diu-ni-n cúu-n Yáá ndécú vitna te ñá túú tnàhí cuèchi-n. 6 Chi cue ñáyíu ñuyíú ní dácácã-yu níñí nchaa ñáyíu ní cáháⁿ tnúhu-n ndihí nchaa dava-gá ñáyíu cùu cuendá-n, te ní sahní-yu nchaa ñáyíu-áⁿ, te vitna ní dátíú-n ndute ní nduu-xi níñí te ducaⁿ-ni càa ndute-áⁿ xíhi-yu, te ducaⁿ tàú-xi ndohó-yu cuendá sã ní sahní-yu cue ñáyíu cùu cuendá-n —duha càchí espíritú-áⁿ xãhaⁿ-xi xii-gá.

7 Te ní tecú tucu dóho-í ní cáháⁿ ìⁿ sã ní cáháⁿ núú nútñĩ núú sácódó sã ndúú tãhú Yá Ndiöxí, te xãhaⁿ-xi xii-gá:

—Ndáá sã yòhó Dútú Ndiöxí Yáá ndácú quide nchaandi túhú sã vãha dándòho-n ñáyíu nàcuáa tàú-xi cundu —duha càchí sã càháⁿ-áⁿ xãhaⁿ-xi xii-gá.

8 Te espíritú cúú cùmí ní coyo-xi sã ñúhú xití tícùú néhé-xí núú nchícanhii cuendá nchícanhii-áⁿ cahmi-xi nchaa ñáyíu ñuyíú. 9 Te ncháá-yu ní ndoho vǐhí-yu ní cáyú-yu, te cuèi ducaⁿ ní ndohó-yu dico ñá túú ní cuíní-yu ndixi cuèchi ìní-yu cuendá nchaa sã ñà túú vãha quidé-yu, te ni ñà túú ní càchí-yu sã ìo càhnu cuu Yá Ndiöxí chi da ní cáháⁿ úhú-yu cuendá-gá, te diu-gá cúú-gã Yáá ducaⁿ ní tendaha tnúndòho-áⁿ sã cúú-xí-yu.

10 Te espíritú cúú ùhúⁿ ní coyo-xi sã ñúhú xití tícùú néhé-xí núú ndécú quití ní quene xití làmár-áⁿ táxí tnùní-di, te nchaa núú táxí tnùní-di ní cuu nee, te nchaa ñáyíu ñuyíú ndèé yáá-ná-yu nàcaxi nihnú-yu sã ndóhó-yu. 11 Dico ni dùcaⁿ ñá túú ní

cuèní-yu dàñá-yu ni ìⁿ sá cuèhé sá dúhá quidé-yu, chi da ní cáháⁿ úhú-yu cuèndá Yá Ndiöxí Yaá ndécú àndiu sá cuèndá sá dándòho ñaha ndíhyi tèhyú ndèé-yu-áⁿ ndíhi nchaa dava-gá sá yáha-yu.

12 Te espíritú cúú ìñú ní coyo-xi sá ñúhú xítí tícúú néhé-xí xítí yúte càhnu nani Eúfratés, te ndute yúte-áⁿ ñí yíchí cuèndá yáha cue téé yíndaha ñáyiu xíndecu ndàa xio nacuaa quène nchíanchii.

13 Te ní xiní-í ní quee ìⁿ espíritú cúndìhi yucu ñávãha yuhu quiti dééⁿ nání drágón, te ní xiní tucu-í ní quee tucu ingá espíritú cúndìhi yucu ñávãha yuhu quiti ní quee xítí làmár, te ní xiní tucu-í ní quee tucu ingá espíritú cúndìhi yucu ñávãha yuhu téé dándahú ñáyiu càchí sá cáháⁿ tnúhu Yá Ndiöxí te ñá ndàá, te ndi núní espíritú-áⁿ xíndáa-xi dàtná cáá làhvã.

14 Te ndi núní espíritú-áⁿ quidé-xí sá vã yõo tnàhí ndàcu cada, te xica datacá-xi nchaa cue téé yíndaha ñaha xii ñáyiu xíndecu ñíhí ñuyíú cuèndá nàa-güedé mei ndùu cachí Yá Ndiöxí coo tnúndòho cahnu vihi-gá, te ñu mee Yá Ndiöxí cúú-gã Yaá ío càhnu cuu. 15 Te Yaá cúú Xítohó-ó ñí cachí-gá: “Cunaha-ndo chi nduu ñà túú yíhi iní-ndó quixi-í núú ndécú-ndó, te cada-í dàtná quidé ñàdúhú. Te váha táhú nchaa nchòhó ñáyiu xíndecu túha, chi cùu-ndo datná cue ñáyiu xíndecu túha xíxíhnu-ni dóo-xi cuèndá sá vã cúcàhaⁿ núú-yu dàtná cúcàhaⁿ núú cuè ñáyiu ñá túú ñíhnu dóo-xi, te duha càháⁿ-í cuèndá sá nchòhó cundecu túha-ndo òré quexìo-í”, duha càchí-gá. 16 Te ndi núní cue espíritú cúndìhi yucu ñávãha-áⁿ ñí dátacá-xi nchaa cue téé yíndaha ñaha xii ñáyiu, te ní taxi ndecu ñaha-xi ìⁿ xichí núú nání Àrmedadón, duha nani xiáⁿ tnúhu hèbreú.

17 Te espíritú cúú ùsá ní coyo-xi sá ñúhú xítí tícúú néhé-xí núú tàchí, te ní tecú dóho-í ñíhi ní cáháⁿ Yaá núcõo núú xilé váha xítí vehe-gá, te càchí-gá:

—Xéhé-nã cúmãní te xínu cava nchaa tnúndòho tnúhu ndàhú —duha càchí-gá.

18 Te sáta dúcáⁿ te ní sáá nduté te ní cáháⁿ ñúhu, te súúni dùsaⁿ ní quide-xi, te ñíhi vihi ní tnáa ñuyíú, te ndéé cútnàhá ní ngúndecu ñáyiu ñuyíú te vátá ìⁿ xító-gá ñíhi tnáa dàtná ní quide-xi. 19 Te ñuú cáhnu ío cùnuu nani Babiloniá ní quée dava-xi ní cuu-xi úní xichí, te nchaa ñuú cáá ñíhí ñuyíú ñí ngoyo nchaa vehe, chi Yá Ndiöxí ní ndacu iní-gá nchaa sá cuèhé sá dúhá quide nchaa ñáyiu ñuú Babiloniá-áⁿ, te ducaⁿ ñí quide ñaha-gã xii-yu chi ío cùdééⁿ-gã núú-yu. 20 Te nchaa tìndúú ñí ndóñúhú-xí cuèi nchaa tìndúú ñuhu yíchí ndécú xítí làmár.

21 Te ní xiní-í ní cuuⁿ ñíñí ñàhnu vihi ní ngaundodo-xi cue ñáyiu ñuyíú, te nchaa ñíñí-áⁿ vëe-xi dàtná údico kílu, te cue ñáyiu ñuyíú ñí cáháⁿ úhú-yu cuèndá Yá Ndiöxí sá dúcáⁿ ñí dácúúⁿ-gã ñíñí ñàhnu vihi-áⁿ, chi ní cuu-xi ìⁿ tnúndòho cahnu vihi sá cúú-xí-yu.

17

Ñadìhí ndécú ichi ñí iní

1 Te núú ùsá espíritú néhé tícúú-áⁿ, te ìⁿ-xi ní quixi-xi núú ndécú-í, te càchí-xi xii-í:

—Néhé ná quíhíⁿ-ó dànehé ñáhà-í xii-n nchàa tnúndòho sá ndóhó ñadìhí ñaha ndècu ichi ñí iní, te ñaha-áⁿ cúnùu-aⁿ nucóo-aⁿ núú ñúhú vihi ndute. 2 Te ñaha-áⁿ ndécú ñí iní-aⁿ ndíhi nchaa cue téé yíndaha ñaha xii ñáyiu xíndecu ñíhí ñuyíú, te nchaa dava-gá ñáyiu ñuyíú ío iní-yu nchícúⁿ ñíhnu-yu quidé-yu nchaa nàcuáa quide ñaha-áⁿ —duha càchí espíritú-áⁿ.

3 Te òré ducaⁿ quide ñaha Espíritú Yá Ndiöxí xii-í nàcuáa càchí iní-xi, te ìⁿ espíritú xínú cuèchi núú-gã ndécá ñaha-xi xii-í cuáháⁿ ìⁿ xítí yucu, te xítí yucu-áⁿ ñí xiní-í ìⁿ ñadìhí yódó-áⁿ ìⁿ quiti ticuehé, te ndéé úsá díqui-di te úxí ndiqui-di, te ñíhí-di ndéé tnuní-di mee-ni tnúhu sá cáháⁿ úhú cuèndá Yá Ndiöxí. 4 Te ñadìhí-áⁿ ñíhnu-áⁿ

dóo muradú ndihi dóo tícuèhé, te mee-ni sã ní cuáha díhúⁿ cuááⁿ, ndihi yúú vãha sã nání përlá, ndihi nchaa dava-gá núú yúú vãha, mee-ni nchaa xíãⁿ ní cuáha sã yíhí lõho-aⁿ, ndihi sã ñúhú dũcúⁿ-aⁿ, ndihi sã ñúhú dũcúⁿ ndáhá-áⁿ, te nũndaha-aⁿ ñⁿ tícuú ní cuáha mee-ni díhúⁿ cuááⁿ te ñúhu mee-ni sã cuèhé sã dúhá, te xíãⁿ cútnúⁿ iní-ó sã cúú-xí ñⁿ ñadihí ñaha ndècu ichi cuehé ichi duha. ⁵ Te tneé-aⁿ ndèé tnuní ñⁿ tnúhu, te cãchí-xi: “Ñuú Babiloniá ñuú ío cùnuu, cada iní-ndó sã cúú-xí mèi ñadihí-a, te ñu ñadihí-a cùu-aⁿ ñaha sanu ichi ñaha xii nchaa ñáyiu ñíhí ñáyiu ndècu ichi díí ìní, te nãndi-gá nchaa sã cuèhé sã dúhá sãnu ichi-aⁿ nchaa ñáyiu cadá-yu”, duha cãháⁿ tnúhu ndèé tnuní tneé ñadihí-áⁿ. Te vá yõo tècú tnúⁿ ná cuendá ducaⁿ cãháⁿ tnúhu-áⁿ. ⁶ Te ní cutnúⁿ iní-í sã díú ñaha-áⁿ ñí dácá-cá-áⁿ ñíhí ñáyiu cùu cuendá Yã Ndiõxí ní sahani ñaha-aⁿ xii-yu, te ñáyiu ní xíhí-áⁿ cúú-yu ñáyiu ní cãháⁿ váha cuendá Xítóhó Jesucristú, te sã dúcáⁿ ñí quide-aⁿ te ní nduu-aⁿ dàtná ñⁿ ñáyiu quihu. Te ío ní cuñúhu-í sã dúcáⁿ ñí cuu ní xiní-í. ⁷ Te sátá dúcáⁿ te espíritú xínú cuèchi núú Yã Ndiõxí-áⁿ cãchí tucu-xi xii-í:

—Vá ndèé dúcáⁿ cuñúhu-n, chi vitna na cãchí tnúhu-í xii-n nãcuáa quèe-xi cuendá quiti ndèé úsá díquí-xi ndihi úxí ndiqui-xi-áⁿ, ndihi nãcuáa quèe-xi cuendá ñadihí ñaha yòdo ñaha xii-di-áⁿ. ⁸ Te quiti ní xiní-n-ãⁿ cúú-dí ñⁿ quiti sa ní xindecu te vitna ñá túú-gã-di ndècu, te sáá nduu te quene-di yaú cùnú víhí sã ño nèhé cáá, te dàtnúⁿ sáá nduu te quíhíⁿ-di núú ùhú núú ndàhú ñí caa ñí quíhíⁿ, te cue ñáyiu xindecu ñuyú cuñúhu víhí-yu quiti-áⁿ chi cùu-di ñⁿ quiti sa ní xindecu ñí cùu te sáá nduu cunde cu tucu-di, te ñáyiu ducaⁿ cuñúhu ñaha xii-di-áⁿ ñà túú yòdo tnuní-yu núú tütú núú yódó tnúⁿ cue ñáyiu naníhí tàhú, chi ndèé cútnàhá vátá ngãva-gá ñuyú ducaⁿ sa yòdo tnuní cue ñáyiu naníhí tàhú.

⁹ Te nchaa ñáyiu tècú tnúⁿ xini ñúhu-xi cani váha iní-yu cuendá tnúhu-a. Te ndi úsá díquí quiti-áⁿ cada iní-ó sã cúú-xí úsá tíndúú núú núcõ ñadihí-áⁿ. ¹⁰ Te ndi úsá díquí quiti-áⁿ cada iní-ó sã cúú-xí úsá tnàhá cue téé yindaha ñaha xii ñáyiu, te úhúⁿ cue téé-áⁿ ñà túú-gã cùnú-güedé vitna, te ñⁿ téé-áⁿ cùnú-dé vitna te ingá-dé vátá sáá-gá nduu cùnú-dé, te na sáá nduu dùcaⁿ cùnú-dé te sacú-ñí nduu cùnú-dé. ¹¹ Te quiti ní xindecu ñí cùu te ñá túú-gã-di ndècu vitna, cùu-di datná téé cùu uná yindaha ñaha xii ñáyiu, te ñⁿ-ñí cùu-di ndihi cue téé úsá yindaha ñáyiu-áⁿ, te quiti-áⁿ sáá nduu cuíta ñíhíⁿ-di núú ùhú núú ndàhú ñí caa ñí quíhíⁿ.

¹² Te ndi úxí ndiqui quiti-áⁿ cada iní-n sã cúú-xí úxí tnàhá cue téé quindaha ñaha xii ñáyiu, dico vátá sáá-gá nduu cùnú-güedé quindaha ñaha-güedé xii-yu. Te cue téé-áⁿ ñíhí-güedé tnúhu ndee ñí taxi tnúⁿ-güedé ndihi quiti-áⁿ, dico tnaa-ñí taxi tnúⁿ-güedé ndihi quiti-áⁿ. ¹³ Te ndi úxí cue téé-áⁿ cuu ñⁿnduu-güedé taxi tnúⁿ-güedé, te chindee-güedé quiti-áⁿ cuendá cuu ñⁿnduu-güedé ndihi-di cuendá taxi tnúⁿ-gã-di. ¹⁴ Te cue téé-áⁿ nãá-güedé ndihi Yaá cáá dàtná cáá ñⁿ mbéé quiti ní dãnícuehé-güedé dico vá ndácú-güedé nãá-güedé ndihi-gã chi cuíta-güedé. Te ñu-gã cúú-gã Yaá ío cùnú taxi tnuní cuèi nchaa téé yindaha ñaha xii ñáyiu, te ducaⁿ-ñí tàxi tnuní-gã cuèi nchaa dava-gã-yu. Te mee Yã Ndiõxí ní cachí-gã nãndi cùu nchaa ñáyiu cunde cu ndihi Yaá cáá dàtná cáá ñⁿ mbéé quiti ní dãnícuehé-güedé-áⁿ, te ñu-ñí ñáyiu-áⁿ cúú-yu ñáyiu ní cãháⁿ-gã te cúú-yu ñáyiu quide ndáá ndécú ñchi-gã —duha cãchí espíritú xínú cuèchi núú-gã.

¹⁵ Te ní cachí tucu espíritú-áⁿ xii-í:

—Ndute ñúhu núú núcõ ñadihí ñaha ndècu ichi díí ìní-áⁿ, ndute-áⁿ cada iní-n sã cúú-xí ñáyiu nchaa nacióⁿ, ndihi ñáyiu nchaa ñuú, ndihi ñáyiu xindecu nchaa xichi, ndihi ñáyiu

cáháⁿ ndí dííⁿ ndí dííⁿ nǔú tñuhu. ¹⁶ Te dàtná ní cachí-í sá ndí ùxí ndiqui quití ní xiní-n-ǎⁿ cúú-xí ùxí tñàhá cue téé quindaha ñàha xii ñáyíu, te cue téé-áⁿ cuu úhú iní-güedé ñadihí ñaha ndècu ichi díí iní-áⁿ, te ni vǎ cádá cuendá ñáhá-gǎ-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé. ¹⁷ Te mee Yǎ Ndiǒxí ducaⁿ dàcaháⁿ-gá iní cue téé-áⁿ cuendá cada-güedé nàcuáa cuíní mée-gǎ, te xíáⁿ nǔu cuu ñⁿnuu-güedé cuendá cúñaha-güedé xii quití-áⁿ cada-dí núú-güedé taxi tñuní-dí, te ducaⁿ-ni càda-dí núú-güedé taxi tñuní-dí ndéé ná sàá nduu càda Yǎ Ndiǒxí nàcuáa ní cachí-gá. ¹⁸ Te ñadihí ñaha ní xiní-n-ǎⁿ càda iní-n sǎ cúú-áⁿ ñùú cáhnú ñùú ío cùnuu, te ñuú-áⁿ ndécú tée ío-gá cùnùu taxi tñuní nchaa cue téé yindaha ñaha xii ñáyíu xindecu ñuyíú —duha ní cachí espíritú xínú cuèchi núú Yǎ Ndiǒxí xii-í.

18

Ní naa ñuú Babiloniá

¹ Te ducaⁿ te dàtnú ní xiní tucu-í ingá espíritú xínú cuèchi núú Yǎ Ndiǒxí, te ndéé andíu nì dátǎsaⁿ-xí te ní dáyéhé-xí ñuyíú, te espíritú-áⁿ ío cùnuu-xí. ² Te níhi ní cáháⁿ-xí, te cǎchí-xí:

—Ní sàá nduu nàa ñuú cáhnú ñùú cùnùu nani Babiloniá, te xíáⁿ-nǎ nat-acá nchaa núú espíritú cündíhi yucu ñávǎha cundecu-xí, te vǎ quée-gǎ-xí xíáⁿ, te díu-ní xíáⁿ nataká nchaa quití ndàva núú tàchí nchaa quití ndehe quide, quití ñá túú tñàhá iní ñáyíu te xíáⁿ-nǎ cundecu-güedi. ³ Te ducaⁿ chi ñáyíu ñuú-áⁿ sánú ìchí-yu nchaa ñáyíu ñihí ñuyíú ichi cuèhé ichi duha, te ducaⁿ-ni xinchícúⁿ ni-hnu nchaa ñáyíu ñuyíú xíquidé-yu, te nchaa cue téé cùnuu yindaha ñaha xii ñáyíu, cue téé-áⁿ cúú ñⁿnuu-güedé ndíhi nchaa ñáyíu ñuú-áⁿ quidé-güedé ndíhi-yu nándi sá cuèhé sá dúhá. Te nchaa ñáyíu dìco nándi sá díco quèheⁿ ñáyíu ñuú-áⁿ ío cùu cuicá-yu, te ducaⁿ quèheⁿ nchaa ñáyíu ñuú Babiloniá-áⁿ

nchaa sá díco ñáyíu-áⁿ cuendá xíáⁿ cǎnehé-yu ndécú-yu ichi cuèhé ichi duha —duha cǎchí espíritú-áⁿ.

⁴ Te sáta dúcáⁿ te ní tecú dóho-í ní cáháⁿ ñⁿ sá ní cáháⁿ andíu, te cǎchí-xí:

—Nchaa nchòhó ñáyíu cùu cuendá-í quee-ndo ñùú Babiloniá cuendá sá vǎ cündècu-ndo tñahá-ndó ìchi cuèhé ichi duha dàtná ndécú ñáyíu ñuú-áⁿ, te ducaⁿ te vǎ quíní-ndó tñundòho tñuhu ndàhú sá quíxí cùu xii ñáyíu-áⁿ.

⁵ Chi ío cuèhé cuèchi-yu ní cuu ndècu núú Yǎ Ndiǒxí, te mee-gǎ náhá-gǎ nàcuáa ndùu nchaa sá quidé-yu.

⁶ Te nchòhó ñáyíu cùu cuendá-í, chí nánchòcáva dandòho-ndo ñáyíu-áⁿ dàtná quidé mèe-yu dandohó-yu cue ñáyíu, te úú xito nanchòcáva-ndo dandohó-ndó-yu, te ducaⁿ càda-ndo cuendá ío-gá ndohó-yu. ⁷ Te ío quide cahnú-yu mèe-yu, te ío cùdí iní-yu quidé-yu nchaa núú sǎ cuèhé sá dúhá,

te sá dúcáⁿ xidó-yu quidé-yu nchaa sá cuèhé sá dúhá nǔu xíáⁿ nchòhó ío dandòho-ndó-yu, te ducaⁿ chi ñáyíu ñuú-áⁿ sání iní-yu, te cǎchí-yu:

“Nchúhú cúú-ndí dàtná ñⁿ ñadihí ñá túú quée, ñaha ío cùnuu yindaha ñaha xii ñáyíu. Te ducaⁿ sǎtnahá-xí cùu-ndí chi nchaa-ni nduu ío váha cùu iní-ndí ndécú-ndí, te ni vǎ sàá ñⁿ nduu te ndíhú iní-ndí”, duha cǎchí ñáyíu ñuú-áⁿ. ⁸ Te sá cuendá nchaa sá quidé-yu-áⁿ nǔu xíáⁿ ñⁿ-ni ndùu sàá tñundòho sá cúú-xí-yu, te ío ndohó-yu chi ñuú-yu coo tnamá, te coo cuèhé cahni ñaha-xí xii-yu, te ío ndíhú iní-yu, te cáyú ñuú-yu, te ducaⁿ ndohó-yu chi Dútú Ndiǒxí ío cùnuu-gá, te díu-gá ducaⁿ dandohó ñaha-gá xii-yu —duha cǎchí sá ní cáháⁿ andíu-áⁿ.

⁹ Te nchaa cue téé cùnuu yindaha ñaha xii ñáyíu ío ndáhyú-güedé sá ndíhú iní-güedé òré ná quíní-güedé quene ñúhmá cáyú ñuú cue ñáyíu Babiloniá, chi díu cue téé-áⁿ cúú-güedé cue téé cùu ñⁿnuu ndíhi-yu quide-güedé nchaa núú sǎ cuèhé sá dúhá ndíhi-yu, te ducaⁿ chi ío tñàhá iní-güedé cundecu-güedé

ndihí-yu ichi díí iní. ¹⁰ Te cue tée-án xica-nă cundecu-güedé cundehe-güedě năcuáa ndoho nchaa ñáyiú ñuú-án sã yùhú-güedé nchaa tnúndòho-án, te cachí-güedé:

—¡Ndàhú nchòhó ñáyiú ñuú cáhnú ñuú cúnù nani Babiloniá! Chi uuⁿⁱ ní sáa nchaa tnúndòho tnúhu ndàhú sá cúu-xí-ndó —duha cachí-güedé.

¹¹ Te nchaa ñáyiú dīco nchaa sá nándihí ñáyiú ñuú Babiloniá tnàhá-yu ío ndáhyú-yu sá ndihú iní-yu chi vá yóo-gá cuaaⁿ nchaa sá dīcō-yu. ¹² Te dīcō-yu nchaa sá ñi cuáha mee-ni dīhúⁿ cuááⁿ, ndihí nchaa sá ñi cuáha mee-ni dīhúⁿ cuixíⁿ, te dīco tucú-yu sá ñi cuáha mee-ni yúú vâha yúú nání pèrlá, ndihí nchaa dava-gá sá ñi cuáha dava-gá yúú vâha, te dīcō-yu tnàhá dóo sèdá, ndihí ingá núú dōó vâha sá nání līnú, ndihí dóo murádú, ndihí dóo tícuèhé te mee-ni dōó vâha cùu-xi, te dīco tucú-yu tnàhá yutnu sá sàháⁿ tnámí, te dīco tucú-yu sá ñi cuáha sá nání mǎrřil, te dīco tucú-yu sá ñi cuáha mee-ni yutnu vâha sá ío ndèyáhu, te dīco tucú-yu sá ñi cuáha mee-ni càá, ndihí sá ñi cuáha mee-ni sá nání brōncé, ndihí sá ñi cuáha mee-ni yúú vâha yúú nání mǎrmól. ¹³ Te dīco tucú-yu canelá, ndihí yúcu sá sàháⁿ tnámí, ndihí dúsa sá sàháⁿ tnámí, ndihí yúcu sá nání mīrrá, te dīco tucú-yu ingá núú dūsa sá sàháⁿ tnámí nání olivánú, te dīco tucú-yu ndudí ndéhe yoho yâha stilé, ndihí acití yutnu nání olívú, ndihí yuchi triú vâha, te dīco tucú-yu nchaa dava-gá núú triú, te dīcō-yu tnàhá mbéé, ndihí cuàyú, ndihí nchaa dava-gá quití tatá, te dīco tucú-yu tnàhá carrètá, te dīco tucú-yu tnàhá ñáyiú xīnu cuechi, ñáyiú ñá túú tnàhí dàñá quee núú chíúⁿ pàtróoⁿ-xi. ¹⁴ Te nchaa ñáyiú dīco-án cūñàhá-yu xii ñáyiú ñuú Babiloniá:

—¡Nchaa sá ío cūdīí iní-ndó cūndecu ndihí-ndo ni cuu vá ndácú-gã-ndó ñihí-ndó vitna, te nchaa sá sání iní-ndó sá ío vâha càa ndecu ndihí-ndo ndihí nchaa dava-gá sá ndécú ndihí-ndo ní ndihí nihnu-xi vitna, te ni ñⁿ nduu-gá vá ñihí-ndó ni ñⁿ xiãⁿ

cundecu ndihí-ndo! —duha cūñaha ñáyiú-án xii-yu.

¹⁵ Te nchaa ñáyiú ní cuu cuica ñi xóo dico nándi nchaa sá ñi xóo dico ñi queheⁿ cue ñáyiú ñuú Babiloniá, nchaa ñáyiú-án xica-nă cundecú-yu cundèhé-yu sá yùhú-yu cuendá nchaa tnúndòho sá yâha cue ñáyiú ñuú-án, te ío ndáhyú-yu sá ndihú iní-yu sá dúcáⁿ ndòho ñáyiú-án. ¹⁶ Te cūñaha tucú-yu:

—¡Ndàhú nchòhó ñáyiú xīndecu ñuú cáhnú ñuú nání Babiloniá! Chi nchòhó cúu-ndó dàtná ñⁿ ñadihí ñaha ñihnu dóó vâha dóó murádú, ndihí dóó tícuèhé, te mee-ni sá ñi cuáha dīhúⁿ cuááⁿ, ndihí mee-ni sá ñi cuáha yúú vâha yúú nání pèrlá, ndihí sá ñi cuáha dava-gá yúú vâha sá ío vii ndâa mee-ni nchâa xiãⁿ ní cuáha sá yihí lôho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndáhá-án. ¹⁷ ¡Te uuⁿⁱ ní ndihí nihnu nchaandi túhú sá ndécú ndihí ñadihí-án, te ducaⁿ sãtnahá-xi cùu nchòhó ní cùu! —duha cūñàhá-yu xii cue ñáyiú ñuú Babiloniá.

Te nchaa cue tée dàcaca barcú ndihí nchaa cue tée tàxi tnuní bàrcú-án, ndihí nchaa ñáyiú ñuhu xití bàrcú-án, ndihí nchaa dava-gá cue tée nándi chiúⁿ quide ndecu lamár, nchaa ñáyiú-án xica cūndecú-yu ¹⁸ te quiní-yu òré quene ñúhmá cáyú ñuú cue ñáyiú Babiloniá, te níhi cáháⁿ-yu, te cachí-yu:

—Ni ñⁿ ñuú ñá túú nūtnahá-xi ñuú Babiloniá —duha cáháⁿ-yu.

¹⁹ Te nchaa ñáyiú-án chidó-yu ñuhu díquǐ-yu, te ngúita-yu ndáhí-yu sá ndihú iní-yu, te níhi cáháⁿ-yu, te cachí tucú-yu:

—¡Ndàhú nchòhó ñáyiú xīndecu ñuú cáhnú ñuú nání Babiloniá! Chi ío cuica-ndo ni cùu, te dīu-ndo ñi quide ní cuu cuica nchâa ñáyiú ndècu ndihí barcú, te vitna uuⁿⁱ ní naa-ndo ndihí ñuú-ndó —duha cachí-yu.

²⁰ Te nchaa nchòhó ñáyiú ndècu andiu ío chí cūdīí iní sá dúcáⁿ dândòho Yá Ndiõxí nchaa ñáyiú ñuú Babiloniá-án, te dīu-ni ducaⁿ chí cūdīí iní nchaa nchòhó cue tée ní cachí

Xítohó Jesucrístú cáháⁿ tnúhu-gá, te ðiu-ni ducaⁿ chí cúdíí ìní nchaa nchòhó cue téé càháⁿ tnúhu Yá Ndiòxí nàcuáa dàcahu ìní ñáhá-gã xii-ndo, te ðiu-ni ducaⁿ chí cúdíí ìní nchaa ðava-gá nchòhó ñáyiu cùu cuendá-gá cuendá sá dúcáⁿ dándoho-gá nchaa ñáyiu ñuú-áⁿ. Te ducaⁿ càda ñaha-gá xii cue ñáyiu-áⁿ cuendá nchaa sá quidé ñáhá-yu xii-ndo.

²¹ Te sátá dúcáⁿ te ní xiní-í ìⁿ espíritú xínú cuèchi núú Yá Ndiòxí, te espíritú-áⁿ ìo ndee-xi te ní queheⁿ-xi ìⁿ yúú cáhnú ðàtná càhnu yódó te ní dáquëe-xi xítí ndute làmár, te càchí-xi:

—Dàtná ní quide-í ní dáquëe-í yúú xítí ndute ducaⁿ càda-xi ñuú cáhnú ñuú Babiloniá, chí ñáyiu ñuú-áⁿ ìo ndíhi naá-yu ndíhi ñuú-yu, te vá ìⁿ ndùu ìⁿ quíú-gã quini ñáhá ñáyiu xií-yu. ²² Te ní ìⁿ-gá ñáyiu càni arpá, te ní ìⁿ-gá ñáyiu tiú vïlu, te ní ìⁿ-gá ñáyiu tiú cútú, te ní ìⁿ-gá yaá vá cóo ñuú-áⁿ, te ní ìⁿ-gá cue ñáyiu xiní cada ìⁿ núú chùuⁿ vá cóo-gã, te ní vã yõo-gá canehe chùuⁿ yúú cúú yódó mulínú. ²³ Te ní ìⁿ-gá ñuhú vá cùndècu ñuú-áⁿ, te ní ìⁿ nduu-gá vá cóo víco tnándaha, te ñáyiu ñuú-áⁿ ñáyiu quide ndáhú cúú-yu ñáyiu ío-gá cuicá-yu dàcúúxí ñáyiu quide ndáhú xĩndecu nihí ñuyúú, dico nchaá-yu naá-yu chí quide nduú-yu te ío dándahú-yu cue ñáyiu ñuyúú sã dúcáⁿ quidé-yu.

²⁴ Te ðiu-ni ñuú-áⁿ ní dácáçã-yu nííí cue téé ní cáháⁿ tnúhu Yá Ndiòxí, te ðiu-ni ducaⁿ ní quidé-yu nchaa ðava-gá cue ñáyiu cùu cuendá-gá, te ðiu-ni-yu quide xisahni tnàha ñáyiu ñuyúú —duha càchí espíritú-áⁿ.

19

¹ Te sátá dúcáⁿ te ní tecú dóho-í níhi ní cáháⁿ cuéhé víhí ñáyiu andíu, te càchí-yu:

Ío càhnu cuu Yá Ndiòxí!, chí ðiu-gá cúú-gã Yaá ní dácáçu nihnu ñaha xii-o núú ùhú núú ndàhú, te ío cùnuu-gá, te mee-ni sã vãha quide-gá,

² te mee-gã ío váha ndáá quidé-gã quidé ndáá-gá cuèchi nchaa ñáyiu,

chí ðiu-gá ní dáquihíⁿ-gá ñadìhí ñaha ndècu ichi díí ìní núú ùhú núú ndàhú,

chí ðiu-aⁿ ní sanu ichi-aⁿ ñáyiu ñuyúú ichi cuéhé ichi duha,

te ducaⁿ ní dáquihíⁿ ñáhá-gã xii-aⁿ núú ùhú núú ndàhú chí nàchinaa-gá sá ní sahani-aⁿ cue ñáyiu ní xinu cuechi núú-gã.

Duha càchí-yu.

³ Te càchí tucú-yu:

—Ío càhnu cuu Yá Ndiòxí!, chí nchaa nduu nchaa quíú ducaⁿ-ni quène ñúhmá núú ñúhú ñaha-áⁿ càyú-aⁿ —duha càchí-yu.

⁴ Te ndí òcò cúmí cue téé cùu sacuéhé xĩndecu-áⁿ ní ngüíñí xítí-güedě núú Yá Ndiòxí núú núcòo-gá táxí tnùnigá, te tnàhá cue quití cúmí xĩnutnì-áⁿ ní ngüíñí xítí-güedè núú-gã, te cue téé-áⁿ càchí-güedè ndíhi cue quití-áⁿ:

—Sá ndáá sá ìo càhnu cuu Yá Ndiòxí —duha càchí-güedè ndíhi cue quití-áⁿ.

⁵ Te sátá dúcáⁿ te ní tecú dóho-í ní cáháⁿ ìⁿ sá ní cáháⁿ mei núú nùtnì xilè váha núcòo Yá Ndiòxí, te càchí sá càháⁿ-áⁿ:

Nchaa nchòhó ñáyiu xinu cuechi núú Yá Ndiòxí, ðiu-ni nchòhó ñáyiu nèhe sá yíñùhu núú-gã,

càháⁿ-ndó sã ìo càhnu cuu-gá cuèi cùnuu-ndo àdi ñá túú cùnuu-ndo.

Duha càchí sá càháⁿ-áⁿ.

Íⁿ vico cùu ðàtná vico tnándaha

⁶ Te sátá dúcáⁿ te ní tecú dóho-í ní cáháⁿ cuéhé víhí ñáyiu andíu, te òré ducaⁿ ní cáháⁿ-yu te ní quide-xi ðàtná quidé-xí núú xicá cuéhé víhí ndùte, te ní quide tucu-xi ðàtná quidé-xí òré càháⁿ níhi víhi ñúhu, te càchí-yu:

Ío càhnu cuu Dútú Ndiòxí Yaá cúú Tátá-ó! Te ío cùnuu-gá táxí tnùnigá, te quide-gá nchaandi túhú sã vãha.

⁷ Te ío chí ná cúdíí ìní-ó, te chí ná càchí-ó sã ìo càhnu cuu Yá Ndiòxí,

chi vitna ní sáá nduu càda Yaá cáá dàtná cáá ìⁿ mbéé quiti ní dánicuèhé-güedé ìⁿ vico, te cùu-xi datná vico tnāndaha.

Te nchaa ñáyiú cùu cuendá-gá sa ní ndihí-yu sa ndècu túha-yu cundecú-yu vico-áⁿ, te cada iní-ó sá ñáyiú-áⁿ cùú-yu dàtná ìⁿ ñadihí xíchí tnāndaha ndihí-gá,

8 te ñáyiú-áⁿ ní nduu táhú-yu cuihnú-yu dóó vāha dóó chàhnchí sá ìo vāha càndoo.

Duha càchí-yu.

Te sá dúcáⁿ ní nduu táhú ñáyiú cùu cuendá Yá Ndiöxí dóó vāha ñihnú-yu, xíáⁿ cùtnuní iní-ó sá cùú-yu ñáyiú quide ndáá núú-gá.

9 Te ìⁿ espíritú xínú cuèchi núú Yá Ndiöxí ní cachí tnúhu-xi xii-í, te càchí-xi:

—Chido tnùní-n ìⁿ núú tütú nàcuáa na càháⁿ-í-a: “Vāha táhú nchaa ñáyiú ní cáháⁿ ñáhá Yá cáá dàtná cáá ìⁿ mbéé quiti ní dánicuèhé-güedé cundecú-yu vico, te vico-áⁿ cùú-xí dàtná vico tnāndaha cada-gá”, te duha chido tnùní-n chi tnúhu-a cùu-xi tnúhu ndáá tnúhu Yá Ndiöxí —duha càchí espíritú-áⁿ.

10 Te ní ngüñí xítì-í núú espíritú-áⁿ cuendá chiñuhu-í-xi ní cùu, te ní cachí-xi:

—Vá dúcáⁿ càda-n, chi tnàhá-í dicó xínú cuèchi-í núú Yá Ndiöxí dàtná quidé-n xínu cuechi-n núú-gá ndihí nchaa dava-gá ñáyiú ndècu ndihí-n ichi-gá, ñáyiú nchícúⁿ nihnu quide ní yuhu ní iní nchaa nàcuáa càháⁿ Xítóhó Jesucrístú, te núu xíáⁿ càchí-í sá vā dúcáⁿ càda-n, chi mee Yá Ndiöxí chiñuhu-n —duha càchí espíritú-áⁿ.

Te nchaa cue téè càháⁿ tnúhu Yá Ndiöxí càháⁿ-güedé nàcuáa ndùu tnúhu càháⁿ Xítóhó Jesucrístú.

Cuendá Yaá yódó ìⁿ cuayú cuixín

11 Te ní xiní-í nchí andiú, te ní xiní-í ní quee ìⁿ Yaá yódó-gá ìⁿ cuayú cuixín. Te Yaá-áⁿ nání-gá Yaá quidé ndáá cuítì, duha nàni-gá. Te quide-gá nchaa sá càháⁿ-gá, te ìo vāha quide ndáá-gá cuèchi nchaa ñáyiú, te nchaa ñáyiú nàá ndihí ñaha xii-gá ìo vāha

xiní-gá nàcuáa cada ñaha-gá xii-yu chi ìo ndáá quidé-gá. 12 Te tinùu-gá dáyehe-xi dàtná dáyehe ñuhú, te titní coróná ñuhú dǐquí-gá, te nèhe-gá ìⁿ sá ndèè diu-gá, te vá yōo ìⁿ cùtnuní iní-xi nása cuáháⁿ tnúhu-áⁿ, chi ìⁿ dii díí-ni mee-gá náhá-gá nàcuáa càháⁿ-xi. 13 Te Yaá-áⁿ níhnú-gá ìⁿ dóó ní cuu mee-ni níñí, te Yaá-áⁿ càchí tnúhu-gá nchaa nàcuáa sàni iní Yá Ndiöxí, núu xíáⁿ nání-gá Tnúhu Yá Ndiöxí. 14 Te sátá-gá nchícúⁿ nchaa espíritú xínú cuèchi núú Yá Ndiöxí, te cue espíritú-áⁿ cùú-xí dàtná sandadú, te xíxíhnu-xi dóó cuixín dóó vāha sá càndoo, te xíxódó-xi cuayú cuixín. 15 Te yuhu Yaá yódónùu-áⁿ quéné ìⁿ yuchí cáhnú, te ndihí yuchí-áⁿ dánicuèhé-gá nchaa ñáyiú xindecu ñuyíú, te ìo dandòho ñaha-gá xii-yu, te dàtná quidé téè quihni ndéhe yoho vāha stilé ducaⁿ sàtnahá-xi cada ñaha-gá xii-yu, chi ìo dandòho ñaha-gá xii-yu cuendá sá ìo cùdéeⁿ-gá. Te mee-gá ìo cùnuu-gá táxi tnùní-gá, te quide-gá nchaandi túhú sá vāha. 16 Te sátá dóó níhnú Yá-áⁿ ndihí núú ticácáⁿ-gá yódó tnùní nàcuáa nàni-gá, te duha càháⁿ-xi: “Tée ìo cùnuu taxi tnuní ñáhá xii nchaa cue téè yindaha ñaha xii ñáyiú ndihí nchaa dava-gá ñáyiú”, duha ndèè tnuní sátá dóó-gá-áⁿ ndihí ticácáⁿ-gá-áⁿ.

17 Te dàtnuní ní xiní-í ìⁿ espíritú xínú cuèchi núú Yá Ndiöxí nútní-xi núú nchícanhii, te níhi ní cáháⁿ-xi, te xāhaⁿ-xi xii nchaa quitì ndava núú tàchí:

—Nchaa nchòhó quitì ndava, chí táquixi chí caxi-ndo nchaa sá ní quide túha Yá Ndiöxí, 18 chí caxi-ndo cùñú nchaa cue téè yindaha ñaha xii ñáyiú, ndihí cuñú nchaa cue téè tàxi tnuní ñáhá xii cue sandadú, ndihí cuñú nchaa cue téè ìo ñí xíndáa, ndihí cuñú nchaa cuayú, ndihí cuñú nchaa cue téè ní xódó ñaha xii-güedi, ndihí cuñú nchaa dava-gá ñáyiú, ñáyiú ñá túú tnàhí ní dàñá quee núú chíúⁿ pàtróoⁿ-xi, ndihí cuñú nchaa ñáyiú ní dàñá ní quee núú chíúⁿ pàtróoⁿ-xi, ndihí cuñú nchaa ñáyiú cùnuu, ndihí

cuñú nchaa ñáyiú ñá túú cùnunu, te nchaa cuñú-án caxi-ndo —càchí espíritú-án xáha-xi xii nchaa quití-án.

19 Te sátá dúcáⁿ te ní xiní tucu-í quití ní quene xití làmár, ndihi nchaa cue téé yíndaha ñaha xii ñáyiú, ndihi nchaa cue téé cùu sandadú-güedé ní naníhí tnáhá-güedé ndihi quití-án cuendá cuu ñⁿnuu-güedé ndihi-di nàá-güedé ndihi Yaá yódó cuàyú-án, ndihi nchaa cue espíritú cúu sandadú ndihi-gá. 20 Te cue espíritú cúu sandadú ndihi Yaá-án ñⁿ tñi-xi quití-án, ndihi téé ío dándahú ñáhá xii ñáyiú càchí sá càháⁿ tnúhu Yá Ndiöxí te ñá ndàá sá càháⁿ-dé tnúhu-gá, te ñⁿni téé-án ñⁿ guide-dé titní núú sá vǎ yǎo tnàhí ndàcu cada núú quití-án. Te sátá dúcáⁿ ñⁿ guide téé-án xíáⁿ ní dándahú-dé ñáyiú ní sándáá iní-yu ní queé-yu tnuní quití-án, te ní chihñuhú-yu sá ñⁿ dándácú ñàhá-yu xii-di, te cue espíritú-án ñⁿ dáquée-xi quití-án núú ñùhú núú ñùhú àzufre càyú-xi, ndihi téé ducaⁿ dándahú ñáhá xii ñáyiú-án, te xíáⁿ cuhuⁿ téé-án ndihi quití-án, te ío ndoho-dé ndihi-di. 21 Te ndihi yuchí cáhnú sǎ quéné yùhu Yaá yódó cuàyú-án ñⁿ sahní-gá nchaa dava-gá cue téé cùndihi quití-án, te nchaa cue quití ndàva ní chítú xití-güedé ní xexi-güedé cuñú nchaa cue téé-án.

20

Úxí cièndú cuíá

1 Te sátá dúcáⁿ te ní xiní-í ñⁿ espíritú xínú cuèchi núú Yá Ndiöxí ní quee-xi andiú, te nùndaha-xi ndacaá nacaáⁿ-xi yèhe ñⁿ yaú cùnú víhí núú cùndècu sácúíhná, te nùndaha tucu-xi ñⁿ cadená cáhnú. 2 Te espíritú-án ñⁿ tñi-xi quití dééⁿ nání drágón, te ñⁿni quití-án cúu-dí mèi yucu ñávàha sá nání sácúíhná, te ñⁿni xíáⁿ ní nduu-xi cóo ndèé sanaha. Te espíritú-án ñⁿ dácútú ñàha-xi xii-di, te ducaⁿ-ni cùndutu-di ndéé xínu úxí cièndú cuíá. 3 Te sátá ñⁿ dácútú ñàha espíritú-án xii-di te ní dáquée ñàha-xi xii-di yaú-án chi ñⁿni yaú-án tàú-di queé-di cundecu-di. Te ní nacadí-xi yuyèhe

yaú-án, te ní tee-xi sèyú yuyèhe-án cuendá sá vǎ quéné-gǎ-di dándahú-di cue ñáyiú ñuyíú, te xíáⁿ cundedí nihnu-di ndéé xínu úxí cièndú cuíá. Te sátá ná yáha úxí cièndú cuíá-án te nandáxi-di te quene-di yaú núú ñùhú-dí-áⁿ caca cuu tnaa-di ñⁿ úú nduu.

4 Te dǎtnùní ní xiní-í xñnutñi titní xilè váha, te xíáⁿ xñnucóo nchaa ñáyiú ní ngúndecu ndihi tnúhu ndee iní cada ndáá cuèchi nchaa ñáyiú, te ní xiní-í xñndecu tnàhá cue ñáyiú ní xehndé-güedé dúcúⁿ-xi cuendá sá ñⁿ cáháⁿ-yu tnúhu Yá Ndiöxí, ndihi cuendá sá ñⁿ cáháⁿ váha-yu cuendá Xítoho Jesucristú. Te ñⁿni ñáyiú-án cúu-yu ñáyiú ñá túú ní chihñuhú-yu quití ní quene xití làmár-án, te ní ñá túú ní chihñuhú-yu sá ñⁿ dándácú ñáyiú ní natava ñàhá-yu xii-di, te ní ñá túú ní dàñá-yu mèe-yu quee-yu tnuní quití-án chi ní tñéé-yu te ní ndàhá-yu ñá túú ní dàñá-yu quee tnuní-di. Te ní xiní-í ní ndoto cue ñáyiú-án cuendá tnàhá-yu cunúú-yu taxi tnùní-yu ndihi Xítoho Jesucristú úxí cièndú cuíá. 5 Te dava ñáyiú ní xíhí ñá túú ní ndòtó-yu, chi ndéé yáha úxí cièndú cuíá te dǎtnùní ndotó-yu. Te ñáyiú ní xiní-í ní ndoto-án cúu-yu ñáyiú ní ndoto díhna nuu. 6 Te ío váha ní tnàhá nchaa ñáyiú ní nduu táhú ñⁿ ndoto díhna nuu!, chi cue ñáyiú-án ío cùdú-yu núú Yá Ndiöxí, te nchaa ñáyiú-án vǎ quihíⁿ-yu núú ùhú núú ndàhú, te ñáyiú-án cúu-yu dútú ndécú-yu núú Yá Ndiöxí ndihi núú Xítoho Jesucristú, te ñáyiú-án cunúú-yu dǎtná cùnùu Xítoho Jesucristú, te cunuu ndihi ñàhá-yu xii-gá úxí cièndú cuíá.

7 Te sátá ná yáha úxí cièndú cuíá-án te sácúíhná quee-xi núú yíndedí nihnu-xi-án, 8 te ngúita tucu-xi dándahú-xi nchaa ñáyiú xñndecu nihú ñuyíú, te cuèi ñáyiú ñuú Gǎg, te cuèi ñáyiú ñuú Mǎgóg ducaⁿ quihíⁿ-xi dándahú ñàhá-xi xii-yu, te datàcá-xi nchaa ñáyiú cuendá nàá-yu, te cuéhe víhí-yu dǎtná cuéhe ñuhu cúchí làmár.

9 Te nchaa ñáyiú-áⁿ tñí-yu ichi quíhíⁿ-yu ìⁿ ichi sá cuàháⁿ núú cáá ìⁿ yodo cahnu vihi, te sáá-yu núú xĩndecu ñáyiú cùu cuendá Yă Ndiõxí, te ñáyiú-áⁿ chidòcò-yu cue ñáyiú cùu cuendá-gá-áⁿ ndihí ñuú-yu, te ñuú-áⁿ ìo cùu iní-gá, dico mee Yă Ndiõxí dangòyo-gá ñuhú cahmi-gá nchaa ñáyiú ducaⁿ chidoco ñaha xii ñáyiú cùu cuendá-gá-áⁿ, te nchaa ñáyiú-áⁿ cuú. 10 Te sácúíhná sá dúcáⁿ dándahú ñáhá xii ñáyiú chidoco ñaha xii ñáyiú cùu cuendá Yă Ndiõxí-áⁿ dàquée ñaha-gă xii-xi núú ñuhú núú ñuhú àzufré càyú-xi, te ñuú-ni xíaⁿ sa ñuhu quiti ní quene xití làmár, ndihí téé ní dándahú ñáyiú ní xáhaⁿ-dě xii-yu sá càháⁿ-dé tñuhu Yă Ndiõxí te ñá ndàá sá càháⁿ-dé tñuhu-gá, te xíaⁿ cuhuⁿ-xi ndoho-xi ni caa ni quíhíⁿ ndihí quiti ní quene xití làmár, ndihí téé càhí sá càháⁿ tñuhu Yă Ndiõxí te ñá ndàá sá càháⁿ-dé tñuhu-gá.

Cùndáá cuéchi ñáyiú

11 Te ní xiní-í nútñí ìⁿ xilé váha xilé cuixíⁿ, te núú xilé-áⁿ núcòo ìⁿ Yáa. Te ndèhe Yáa-áⁿ ni ndóñuhú àndiú ndihí ñuyíú-a, te ducaⁿ ni ndóñuhú-xí chi vá cùndècu-gá-xi. 12 Te sáta dúcáⁿ te ní xiní-í nchaa ñáyiú ní xihí ní cùu, ñáyiú cùnuu ndihí ñáyiú ñá túú cùnuu xínutñí-yu núú Yáa núcòo núú xilé váha-áⁿ, te Yáa-áⁿ cúú-gă Yă Ndiõxí, te òré-áⁿ ni nandicá nchaa tutú núú yódó tñuní nchaa nàcuáa ndùu sá ni quide ìⁿ ìⁿ ñáyiú-áⁿ, te ní nandicá tucu ingá tutú núú yódó tñuní nchaa ñáyiú ní naníhí tãhú, te nchaa ñáyiú ní xihí ní cùu xínutñí-yu núú Yă Ndiõxí cundáá cuéchi-yu, te nchaa nàcuáa ndùu nchaa cuéchi-yu yòdo tñuní núú nchaa tutú-áⁿ ducaⁿ cundáá. 13 Te nchaa ñáyiú ní xihí xití ndute làmár, ndihí nchaa ñáyiú ní xihí núú ñuhu yìhí nchaa ñáyiú-áⁿ cundáá cuéchi-yu nàcuáa ní quidé-yu ìⁿ ìⁿ-yu. 14 Te vitna te vá cùú-gá ñáyiú chi ñá túú-gă tñuhu xihí, te nchaa ñáyiú ñuhu núú ñuhú núú càyú ñáyiú-áⁿ cúú-yu ñáyiú ní xíta nihnu ni caa ni quíhíⁿ.

15 Te ducaⁿ chi nchaa ñáyiú ñá túú yòdo tñuní núú tütú núú yódó tñuní nchaa ñáyiú naníhí tãhú ní dáquée ñaha Yă Ndiõxí xii-yu núú ñuhú núú càyú.

21

Andiú sàa ndihí ñuyíú sáa

1 Te sáta dúcáⁿ te ní xiní-í andiú sàa ndihí ñuyíú sáa, te andiú sà ndécú ñhna ndihí ñuyíú sà ndécú ñhna ní ndóñuhú-xí, te tñahá làmár ní ndóñuhú-xí. 2 Te yúhú té Juáá ní xiní-í ñuú Jerusalén sáa ni quee-xi núú ndécú Yă Ndiõxí, te ñuú-áⁿ cúú-xí ñuú méé-gă, te ío vii càa chi càa datná cáá ìⁿ ñadihí xíchí tñandaha. 3 Te ní tecú dóho-í níhí ní càháⁿ ìⁿ sá ni càháⁿ andiú, te càhí-xi:

—Chí cùndèdóho ìⁿ tñuhu na càháⁿ-í-a: Yă Ndiõxí ndécú ndihí-gá cue ñáyiú vitna, te ducaⁿ-nă cundecu ndihí ñaha-gă xii-yu, te ñuú-yu cùu-yu ñáyiú cùu cuendá-gá, te vá ìⁿ ndùu ìⁿ quíú-gă te dañá ñaha-gă xii-yu. 4 Te mee Yă Ndiõxí cada-gá sá ñá túú tñahí-gá ná caní iní-yu cundecu-yu, te ni vă quíní-gá-yu tñuhu xihí, te ni vă quíní-gá-yu tñuhu ndàhyú, te ni vă quíní-gá-yu tñuhu ndihí iní-xi, te ni vă quíní-gá-yu tñuhu cùhú, chi nchaa sá ni xiní-yu ñuyíú ñhna vá quíní-gá-yu vitna —duha càhí sá ni càháⁿ-áⁿ.

5 Te Yáa núcòo núú xilé váha-áⁿ ni cachí tñuhu-gá xii-í, te càhí-gá:

—Yúhú quídè-í nàcuáa nduu saa nchaa sá cùndècu vitna. Te vitna chido tñuní-n ìⁿ núú tütú nchaa tñuhu sá ni càháⁿ-í-a, chi nchaa tñuhu-a cùu-xi tñuhu ndáá cuítí —duha càhí-gá.

6 Te dătnuní ní cachí tñuhu tucu-gá xii-í:

—Sa ní xínu cava nchaa chiúⁿ ní sani iní-í cada-í, te ñuú-ni yúhú cúú-í Yáa sa ndècu ndéé cùtñahá ní ngáva ñuyíú, te ñuú-ni-í cundecu-í ni caa ni quíhíⁿ. Te nchaa ñáyiú cuíní tuha ñaha xii-í te cada iní-yu sá dătná ndute cùu-xi sá cuãñaha tãhú-í xii-yu candeca-xi iní-yu ni caa ni quíhíⁿ. 7 Te nchaa

ñáyiú na cùndee iní yáha nándi sá ná yáha-yu sá cuendá-í, te ñáyiú-áⁿ nduu táhũ-yu cundecu váha-yu, te yúhú cuu-í Ndiõxí-yu, te ducaⁿ meé-yu cuú-yu déhe-í. ⁸ Te nchaa ñáyiú na yùhú ndoho cuendá-í quíhíⁿ-yu núú ñùhú núú càyú ndihí ñáyiú ñá túú sàndáá iní ñáhá xii-í, ndihí ñáyiú quide nándi nchaa sá cuèhé sá dúhá, ndihí ñáyiú sàhni tnaha, ndihí ñáyiú ndècu ichi díí iní, ndihí ñáyiú quide nduu, ndihí ñáyiú chiñuhu nchaa sá cächí-yu cùu ndiõxí ní cadúha cue téé ñuyíú-a, ndihí ñáyiú dàcuandehnde, nchaa ñáyiú ducaⁿ xĩquide-áⁿ cuíta ni-hnú-yu chi quíhíⁿ-yu núú ñùhú núú ñùhú àzufré càyú-xi —duha ní cáháⁿ Yã Ndiõxí ní cachí tnúhu-gá xii-í.

Ñúú Jerusàlén sáá

⁹ Te núú ùsá espíritú xĩnehe tícùú ñùhú tnúhu ndòho, te ìⁿ-xi ní quixi-xi te cächí-xi:

—Taquixi, te na dànehé ñáhà-í xii-n nchaa ñáyiú cùu cuendá Yaa cáá dàtná cáá ìⁿ mbéé quiti ní dánícuèhé-güedé, ñáyiú-áⁿ cada iní-n sã cùú-yu dàtná ìⁿ xíchí cuéchí vìtna tnándaha, te ducaⁿ càda iní-n sã cùú-yu chi cundecú-yu ndihí-gá —duha ní cachí tnúhu espíritú-áⁿ xii-í.

¹⁰ Te òré quidé ñàha espíritú Yã Ndiõxí xii-í nàcuáa cächí iní-xi, te espíritú néhé tícùú-áⁿ ndécá ñàha-xi xii-í cuásaá ìⁿ tĩndúú dùcúⁿ, te xíaⁿ ní dánèhé núú ñáhá-xí xii-í ñuú Jerusàlén te ñuú-áⁿ ní quee-xi núú ndécú Yã Ndiõxí, te ñuú-áⁿ cúu-xí ñùú méé-gã. ¹¹ Te ñuú-áⁿ ìo càhnu cuu-xi chi ducaⁿ ìo càhnu cuu mee-gá, te dátásaⁿ-xi dàtná dátásaⁿ yúú vãha sá nání jãspé yúú cáá dàtná cáá vìdriú sá túu ingá xio ndàa sátá-xi.

¹² Te ni càndéé yuhu ñuú-áⁿ sũúni dùcúⁿ nchaa sá ñùhú dòco, te nchíí úxúú yuyèhe-xi, te ndi tnahá ìⁿ ìⁿ yuyèhe-áⁿ xĩndecu ìⁿ caa espíritú xínú cuèchi núú Yã Ndiõxí. Te ndi tnahá ìⁿ ìⁿ yuyèhe-áⁿ yódó tnùni dũu ìⁿ caa xichi cue ñáyiú isràél.

¹³ Te úní yuyèhe-xi nchíí ndàa xio nacuáa quène nchíanchii, te úní tucu

yuyèhe-xi nchíí ndàa nacuáa quèe nchíanchii, te úní tucu yuyèhe-xi nchíí ndàa xio cuha nacuáa quène nchíanchii, te úní tucu yuyèhe-xi nchíí ndàa xio datni nacuáa quène tucu nchíanchii. ¹⁴ Te sá ñùhú dòco-áⁿ chí úxúú tnàhá yúú cúu cìmentú-xi, te ndi tnahá ìⁿ ìⁿ yúú-ãⁿ ndèé ìⁿ caa dũu cue téé ní cáháⁿ tnúhu Yaa cáá dàtná cáá ìⁿ mbéé quiti ní dánícuèhé-güedé, te dũu mee-gã ní táuchíúⁿ-gã ní cáháⁿ-güedé tnúhu-gá.

¹⁵ Te espíritú sá càháⁿ ndihí ñàha xii-í-áⁿ néhé-xí ìⁿ sá cání ní cuáha mee-ni díhúⁿ cuáaⁿ, te ndihí xíaⁿ chícùhá-xi ñuú-áⁿ, ndihí sá ñùhú dòco ñuú-áⁿ, ndihí nchaa yuyèhe-xi. ¹⁶ Te ñuú-áⁿ ìⁿ-ni nèhe-xi cuendá quèhéⁿ-xi ndihí cuendá càni-xi, te espíritú-ãⁿ ní chícùhá-xi ndihí sá néhé-xí-ãⁿ ñuú-áⁿ, te nèhe-xi ócó úú cièndú mìl mètrú sá cání te dũu-ni ducaⁿ nèhe-xi cuendá quèhéⁿ-xi, te dũu-ni ducaⁿ nèhe-xi sá dùcúⁿ nchaa vehe càa ñuú-áⁿ. ¹⁷ Te dàtnùni ní chícùhá-xi sá ñùhú dòco ñuú-áⁿ, te xíaⁿ néhé-xí ùnídico cúmí mètrú sá dùcúⁿ, te ní chícùhá-xi dàtná chícùhá cue ñáyiú ñuyíú-a.

¹⁸ Te sá ñùhú dòco-áⁿ ní cuáha mee-ni yúú vãha yúú sá nání jãspé, te ñihí ñuú-áⁿ cúu-xí mèe-ni díhúⁿ cuáaⁿ, te càa datná cáá vìdriú sá ìo vãha càndoo te túu ndàa ingá xio. ¹⁹ Te ndi ùxúú yúú cúu cìmentú sá ñùhú dòco-áⁿ ndèé ndí dííⁿ núú yúú vii càa sátá-xi, te yúú díhna ndèé mee-ni yúú vãha sá nání jãspé sátá-xi, te yúú cúu úú ndèé tucu ingá núú yúú vãha sá nání zàfirú sátá-xi, te yúú cúu úní ndèé tucu ingá núú yúú vãha sá nání àgatá sátá-xi, te yúú cúu cùmí ndèé ingá núú yúú vãha sá nání èsmeraldá sátá-xi. ²⁰ Te yúú cúu ùhúⁿ ndèé tucu ingá núú yúú vãha sá nání ònícé sátá-xi, te yúú cúu ìñú ndèé tucu ingá núú yúú vãha sá nání còrnalíná sátá-xi, te yúú cúu ùsá ndèé tucu ingá núú yúú vãha sá nání crìsòlitú sátá-xi, te yúú cúu ùná ndèé tucu ingá núú yúú vãha sá nání bèrilú sátá-xi, te yúú cúu ìⁿ ndèé tucu ingá núú yúú vãha sá nání tòpacíú sátá-xi, te yúú cúu ùxí ndèé tucu ingá núú yúú vãha

sá nání crìsopásá sátá-xi, te yúú cúú ùxí ìⁿ ndèé tucu ingá núú yúú vǎha sá nání jàcintú sátá-xi, te yúú cúú ùxúú ndèé tucu ingá núú yúú vǎha sá nání àmatístá sátá-xi. ²¹ Te ndi ùxúú yuyèhe sá ñùhú dòco-áⁿ cúú-xi mèe-ni yúú vǎha sá nání pèrlá, te nduu ñi yúú cúú ìⁿ ìⁿ yuyèhe-áⁿ. Te tnuú cáhnú ndècu xití ñuú-áⁿ cúú-xi mèe-ni díhúⁿ cuááⁿ, te cǎa-xi datná cáá vídriú sá tũu ndàa ingá xio.

²² Te ní xiní-í sá ñà túú vèhe núú chíñùhu ñáyiú Dútú Ndiòxí cáá ñuú-áⁿ, chi mee-nǎ Dútú Ndiòxí Yaá quidé nchàa-ndi túhú sá vǎha ndècu ñuú-áⁿ, ndihí Yaá cáá dàtná cáá ìⁿ mbéé quití ní dánìcuèhé-güedé. ²³ Te ñuú-áⁿ ñà túú-gǎ xíní ñùhu-xi nchíanchii dayèhé-xi, te ni yóó ñà túú-gǎ xíní ñùhu-xi, chi mee-nǎ Yǎ Ndiòxí dáyéhé-gǎ ñuú-áⁿ ndihí Yaá cáá dàtná cáá ìⁿ mbéé quití ní dánìcuèhé-güedé. ²⁴ Te cue ñáyiú nchaa ñuú cáá ñùyúú, ñáyiú ní naníhí tàhú xĩndecu ñuú-áⁿ dáyéhé-gǎ núú-yu, te nchaa cue téé yĩndaha ñaha xii-yu nèhe-güedé sá yĩñùhu sá cúú-xi ñuú-áⁿ, te quide cahnu ñaha-güedé xii-gǎ. ²⁵ Te yuyèhe ñuú-áⁿ ñà túú tnàhí nàndedí, te ñuú-áⁿ ñà túú tnàhí cùndiquiⁿ. ²⁶ Te nchaa ñáyiú nèhé-yu sá yĩñùhu sá cúú-xi ñuú-áⁿ te quide cahnú-yu Yǎ Ndiòxí. ²⁷ Te ñuú-áⁿ vǎ cúú cùndecu ni ìⁿ ñáyiú ndècu ichi cuehé ichi duha, te ni ìⁿ ñáyiú ndehnde, te ni ìⁿ ñáyiú quide sá ñà túú cùu vǎha iní Yǎ Ndiòxí vǎ cúú cùndecú-yu ñuú-áⁿ, chi mee-ni ñáyiú naníhí tàhú ñáyiú yòdo tnuní núú tütú Yaá cáá dàtná cáá ìⁿ mbéé quití ní dánìcuèhé-güedé, mee-ni ñáyiú-áⁿ cundecú-yu ñuú-áⁿ.

22

¹ Te sátá dúcáⁿ te ñuú-áⁿ ní espíritú-áⁿ ní dánèhé núú ñáhá-xí xii-í yúte núú ñùhú ndùte candoo canine, te ndute-áⁿ candeca-xi iní ñáyiú ni caa ni quíhíⁿ, te ndute-áⁿ quée-xí mèi núú núcõo Yǎ Ndiòxí ndihí Yaá cáá dàtná cáá ìⁿ mbéé quití ní dánìcuèhé-güedé.

² Te cuádava tnuú cáhnú yǎha xití ñuú-áⁿ cáá yúte-áⁿ, te xio xio yuhu yúte-áⁿ níhnú yùtnu cuuⁿ sávídí-xi, te sávídí nchaa yutnu-áⁿ cúú tucu-xi sá cándèca iní ñáyiú ni caa ni quíhíⁿ, te nchaa yutnu-áⁿ cúúⁿ sávídí-xi úxúú xito ìⁿ cuía chi ndi tnahá yóo cúúⁿ sávídí-xi, te nchaa ndaha-xi cùu-xi tátna sá cúú-xi nchàa ñáyiú. ³ Te vǎ yóo ìⁿ-gǎ cada ìⁿ sá ñà túú cùu vǎha iní Yǎ Ndiòxí ñuú-áⁿ. Chi ñuú-áⁿ núcõo mee Yǎ Ndiòxí ndihí Yaá cáá dàtná cáá ìⁿ mbéé quití ní dánìcuèhé-güedé xitaxi tnuní-gǎ, te nchaa ñáyiú xĩnu cuechi núú-gǎ cada càhnu ñahá-yu xii-gǎ. ⁴ Te nchaa ñáyiú-áⁿ cundehe núú-yu Dútú Ndiòxí, te tneé-yu cundeé ñuú-gǎ. ⁵ Te ñuú-áⁿ vǎ quíní-gǎ-yu niú, te ni vǎ cánèhe chiuⁿ-gǎ-yu ñuhú cutnùní núú-yu, te ni nchíanchii ñà túú-gǎ xíní ñùhu-xi dayehé ñuú-áⁿ chi mee Dútú Ndiòxí dáyéhé-gǎ, te ni caa ni quíhíⁿ cunúú-yu cundecú-yu ñuú-áⁿ.

Sa ta cùyatni nduu quixi tucu Xitohó Jesucrístú

⁶ Te sátá dúcáⁿ te ní cachí tnúhu espíritú xínú cuèchi núú Yǎ Ndiòxí-áⁿ xii-í:

—Nchaandi túhú tnúhu-a cùu-xi mee-ni tnúhu ndáá cuítí. Te Yǎ Ndiòxí Yaá dácàhu iní nchaa cue téé cǎháⁿ tnúhu-gǎ nàcuáa cǎháⁿ-güedé ní tendaha-gǎ ìⁿ espíritú xínú cuèchi núú-gǎ ní quixi-xi ní dánèhé-xi nchaa ñáyiú xĩnu cuechi núú-gǎ nchaa nàcuáa cada-gǎ, te vǎ cùyàa-gǎ ducaⁿ càda-gǎ —duha càchí espíritú-áⁿ.

⁷ Te ní cǎháⁿ Xitohó Jesucrístú, te càchí-gǎ:

—Íó ndihí quixi tucu-í!

’Íte ío vǎha tnahá nchaa ñáyiú tnèi nchaa tnúhu cǎháⁿ Yǎ Ndiòxí yódó tnuní núú tütú-a! —duha càchí-gǎ.

⁸ Te yúhú té Juáá ní tecú dóho-í nchaa nàcuáa ní ngódó tnuní núú tütú-a, te ní xiní núú-í nchaa nàcuáa cada-xi ndéé cuée-gǎ. Te sátá dúcáⁿ ní cuu te ní ngüíñí xití-í núú espíritú sá ní dánèhé núú ñáhá nchàa xii-í cuèndá chíñuhu-í-xi ni cùu. ⁹ Te ní cachí-xi:

—Vá dúcáⁿ càda-n, chi yúhú dìcò xínú cuèchi-í núú Yá Ndiòxí dàtná cúú yòhó ndìhi nchaa dava-gá ñáyiú ndècu ndìhi-n ichi-gá càháⁿ-ndó tnùhu-gá, ndìhi nchaa ñáyiú tnìi nchaa tnùhu ndèé núú tütú-a, te xiãⁿ cächí-í sá vã dúcáⁿ càda-n, chi mee Yá Ndiòxí ducaⁿ chĩñuhu-n-gá —cächí espíritú-án xii-í.

10 Te ní cachí tnùhu tucu-xi xii-í, te cächí-xi:

—Vá chídãhu-n nì ìⁿ tnùhu Yá Ndiòxí ndèé núú tütú-a, chi sa ní cuyatni cada-xi nchaa nàcuáa ndèé tnuní. 11 Te daña sá ncháá ñáyiú ndècu ichi cuehé ichi duha na cùndecu-ní-yu ichi-án, te ducaⁿ-ni dàña-n nchaa ñáyiú quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyiú quide váha te ducaⁿ-ni na càda váha-yu cundecú-yu, te nchaa ñáyiú quide nchaa nacuáa cùu váha iní Yá Ndiòxí te diu-ni ducaⁿ na càdá-yu cundecú-yu —duha cächí espíritú-án.

12 Te ní cachí Xítohó Jesucrìstú:

—Cundedóho-n tnùhu na càháⁿ-í-a. Ío ndìhi quixi tucu-í, te canehe-í nchaa sá ndúú tãhú ñáyiú quixi, te nàcuáa ndùu chiuⁿ ní quidé-yu ìⁿ ìⁿ-yu te ducaⁿ cùnduu sá cuãñaha-í nduu táhũ-yu. 13 Te yúhú cúú-í Yaá sa ndècu ndèé cùtnàhá ní ngáva ñuyíú, te diu-ni-í cundecu-í nì caa nì quíhíⁿ —duha cächí-gá.

14 Te váha táhú nchaa ñáyiú sa ní nduu ndoo ní nduu nine iní-xi, chi ñáyiú-án nì nduu táhũ-yu quíhu-yu xití ñuú-án, te caxí-yu sávidí yutnu nùtní-án te xiãⁿ candeca-xi iní-yu nì caa nì quíhíⁿ. 15 Te ñuú-án vã cúú quíhu nì ìⁿ ñáyiú ndècu ichi cuehé ichi duha, nì cuè ñáyiú quide nduu, te nì cuè ñáyiú ndècu ichi díí iní, te nì cuè ñáyiú sãhni tnaha ñáyiú-xi, te nì cuè ñáyiú chĩñuhu nchaa sá nì cadúha cue téé ñuyíú-a cächí-yu cùu ndiòxí, te nì cuè ñáyiú tnàhá iní dacuàndehnde, te nì ìⁿ ñáyiú ducaⁿ xiquide vá ndúú táhũ-yu quíhu-yu xití ñuú-án.

16 Te ní cáháⁿ tucu Xítohó Jesucrìstú, te cächí-gá:

—Yúhú Xítohó Jesucrìstú ní tendaha-í espíritú xínú cuèchi núú-í cuendá cachí tnùhu-xi xii-n nàcuáa ndùu tnùhu cúñaha-n xii nchaa ñáyiú ndècu ndìhi-n ichi-í dacuàha tnùhu-í ìⁿ ìⁿ ñuú. Te yúhú cúú-í mei ñani tnàhá ndìi Dàvií, te cada iní-n sã cúú-í dàtná ìⁿ chódíní quiti quène datneé —duha cächí-gá.

17 Te nchaa ñáyiú cùu cuendá Xítohó Jesucrìstú Yaá cáá dàtná cáá ìⁿ mbéé quiti ní dánicuèhé-güedé, diu-ni ñáyiú-án cúú-yu ñáyiú cada iní-ó sã cúú-yu ìⁿ ñadìhí xíchí tnãndaha ndìhi ñaha xii-gá, te ñáyiú-án ìⁿ-ni càháⁿ-yu ndìhi Espíritú Yá Ndiòxí, te xãhãⁿ-yu ndìhi Espíritú-gá xii nchaa dava-gá ñáyiú:

—Chí táquixi —cachí-yu xãhãⁿ-yu ndìhi Espíritú Yá Ndiòxí.

Te nchaa ñáyiú ducaⁿ ndèdóho tnùhu-án vitna, te xini ñuhu-xi ducaⁿ cáháⁿ-yu tnàhá-yu cúñàhá-yu xii nchaa dava-gá ñáyiú-án, te nchaa ñáyiú cùni tuha ichi-gá te na quixí-yu, te dìcò ducaⁿ cùu táhũ-yu sá cándeca iní-yu nì caa nì quíhíⁿ.

18 Te nchaa nchòhó ñáyiú ndèdóho nchaa nàcuáa càháⁿ tnùhu Yá Ndiòxí ndèé núú tütú-a càháⁿ-í dóho-ndo. Te núu ìⁿ ñáyiú na còdo-gá tnùhu chido tnùní-yu núú tütú-a, te Yá Ndiòxí ío dandòho ñaha-gá xii-yu chi yáha-yu nchaa tnúndòho yodo tnuní núú tütú-a te núu ducaⁿ na càdá-yu. 19 Te núu ìⁿ ñáyiú na chidáhu dava tnùhu Yá Ndiòxí ndèé núú tütú-a te ñáyiú-án vã ndúú táhũ-yu cundecú-yu ñuú-gá, te nì vã ndúú táhũ-yu sá cándeca iní-yu nì caa nì quíhíⁿ dàtná yódó tnùní núú tütú-a.

20 Te Xítohó Jesucrìstú Yaá càháⁿ sá ncháá tnùhu-a cùu-xi tnùhu ndáá ní cáháⁿ-gá ní tecú dóho-í, te cächí-gá:

—Ndáá sá ío ndìhi quixi tucu-í —duha cächí-gá.

Te yúhú ní xãháⁿ-í xii-gá:

—Ducaⁿ na cùnduu, taquixi yohó Xítohó Jesucrìstú —duha ní xãháⁿ-í xii-gá.

²¹ Te Xítóhó Jesucristú ío na chindee chitúu ñaha-gǎ xii-ndo nchàa-ndo. Te ducan na cùnduu. Te ío chí cádá ndèe iní-nǎ vitna.